

BIBLE

Syin Chin Bible

Chin, Siyin Language

Chin, Siyin - All Bible

Old Testament			
Pianciilna	3	Nahum	1.967
Pusuana	127	Habakkuk	1.972
Thiampite	227	Zephaniah	1.978
Ngamsung Vakna	296	Haggai	1.984
Thuhil Kikna	386	Zechariah	1.988
Joshua	470	Malachi	2.009
Thukhente	529	New Testament	
Ruth	588	Matthew	2.016
Samuel Khatna	596	Teptee bang Lungdamna Thu	2.111
Samuel Niina	676	Luke	2.172
Kumpite Khatna	742	John	2.272
Kumpite Niina	818	Sawltakte	2.347
Khang Tangthu Khatna	892	Romete	2.441
Khang Tangthu Niina	962	1 Corinth te	2.483
Ezra	1.045	2 Corinth te	2.525
Nehemiah	1.067	Galatia te	2.552
Esther	1.101	Ephesus te	2.567
Job	1.119	Philippi te	2.581
Psalms Late	1.191	Colossae te	2.591
Paunakte	1.371	1 Thessalonica te	2.601
Thuhilsya	1.437	2 Thessalonica te	2.610
Solomon ii La	1.457	1 Timothy	2.615
Isaiah	1.469	2 Timothy	2.626
Jeremiah	1.596	Titus	2.634
Kaatap late	1.734	Philemon	2.639
Ezekiel	1.746	Hebrew te	2.642
Daniel	1.868	James	2.672
Hosea	1.905	1 Peter	2.683
Joel	1.926	2 Peter	2.694
Amos	1.931	1 John	2.701
Obadiah	1.948	2 John	2.712
Jonah	1.951	3 John	2.714
Micah	1.956	Jude	2.716
		Thu Pualaakna	2.719



Chin, Siyin - All Bible

Pianciilna

Pianciilna 1

Piansakna Tangthu

- ¹A kipat ciilin Pathian in vaannuai bup bitphua hi.
- ²Leitung in lim le meal nei ngawlin awngthong hi. Khuazing in tuipei sincip bikbek a, Pathian Thaa sia tui tungah diang hi.
- ³Tuaciang Pathian in, “Khuavak om hen” ci in thupia a, khuavak om hi.
- ⁴Pathian in khuavak a mu ciang phasa hi. Tuaciang ama in khuazing pan khuavak khen a,
- ⁵ama in khuavak sia ‘Sun’ ci a, khuazing sia ‘Zan’ ci hi. Nitak bo in zingsang hong theng a, a ni khat ni ahi hi.
- ⁶⁻⁷Pathian in, “Tuite mun nii a kikhen natu in mun kuampi khat om hen” ci in thu a piak ciang om paih hi. Pathian in mun kuampi khat vawt a, a tung tui pan a nuai tui khen hi.
- ⁸Ama in mun kuampi sia “Van” ci hi. Nitak bo in zingsang hong theng a, a ni nii ni ahi hi.
- ⁹Tuaciang Pathian in, “Leitangh kilangh natu in, van nuai a om tui te mun khat ah kingawm hen” ci in thu a piak ciang kingawm paih hi.
- ¹⁰Pathian in leiko sia “Leitangh” ci a, a kikaikhawm tuite sia “Tuipei” ci hi. Pathian in tuate a mu ciang phasa hi.
- ¹¹Tuaciang ama in, “Leitangh in thingkung lopa nam theampo, cii a neite le nga a neite piang hen” ci in thu a piak ciang piang hi.



¹²Leitangh in thingkung lopa nam theampo a piangsakna, Pathian in a mu ciang phasa hi.

¹³Nitak bo in zingsang hong theng a, a ni thum ni ahi hi.

¹⁴Tuaciang Pathian in, “Sun le zan kikhen natu, ni le tha le kumte khen natu le khua hunte teptee natu in van ah khuavakte om hen a,

¹⁵leitung khuavak pia tu in van taang hen” ci in thu a piak ciang taang paih hi.

¹⁶tuaciang Pathian in khuavak a lian zaw nii vawt a, ni in sun teng uk a, tha in zan teng uk hi; ama in aksite zongh vawt hi.

¹⁷Ama in leitung a taangsak tu in van ah khuavakte koi a,

¹⁸khuazing le khuavakte khenin sun le zante uksak hi. Pathian in tuate a mu ciang phasa hi.

¹⁹Nitak bo in zingsang hong theng a, a ni li ni ahi hi.

²⁰Tuaciang Pathian in, “Tui sia nganhing nam tuatuam tam mama te taw kidim hen a, vui sia vacimte taw kidim hen” ci in thupia hi.

²¹Tuaciang Pathian in tuipei nganhing liante, tui sung a nungta nganhing nam theampo le vacim nam theampo piangsak hi. Pathian in tuate pha hi, ci in mu hi.

²²Pathian in a bitphua sate theampo thupha pia a, tui sung nganhingte pungin tuipei sung dim hen a, vacimte zongh tam mama pha taken, ci hi.

²³Nitak bo in zingsang hong theng a, a ni nga ni ahi hi.

²⁴Tua zawkciang Pathian in, “Innsa le ngamsa, a lian le a no, nganhing nam theampo leitangh in piangsak hen ” ci in piangsak a, ama in pha hi ci in mu hi.

²⁶Tuaciang Pathian in, “Eima taw a kibang, eima hong sunin mihing ih vawt tu hi. Amate in, ngasa, vacim le innsa ngamsa, a lian a note tungah vaangletna nei tu hi,” ci hi.



²⁷Tuaciang Pathian in ama taw kibangin mihing bitphua hi. Ama in numei le pasal bitphua a,

²⁸thupha pia in, “Tu le ta tam mama nei tavun a, na suan na paalte leitung ah dimin, amate thuthu in leitung uk taken. Keima in ngasate, vacimte le nganhing theampote tungah ukna za kong pia hi.

²⁹Keima in note neak tu in thaici nam tuatuam le thingnga nam tuatuamte kong pia a,

³⁰ahizong ngamsa theampote le vacim theampote ii an tu in, lopa le thingteete ka pia hi,” a ci ciang tuabangin piang paih hi.

³¹Pathian in a vawtsa theampo a et ciang phasa mama hi. Nitak bo in zingsang hong theng a, a ni luk ni ahi hi.

Pianciilna 2

¹Tuabangin Pathian in vaannuai buppi a bitphuana manthiang hi.

²Pathian in a nasep man siat a, a ni sali ni in a nasep tawlnga hi.

³Pathian in a bitphua nasep zo in, a ni sali ni tawlnga ahikom, tua ni thupha pia in thupisak hi.

⁴vaannuai pianna sia tu a bang teng ahi hi.

Eden Huan

Topa Pathian in vaannuai a vawt lai in,

⁵leitung ah thingkung lopate om ngawl a, a po tu thaici zongh om ngawl hi, banghangziam cile lotho tu khat zongh om ngawl a, ama in ngua zusak ngawl hi.

⁶Ahizong leinuai pan tui pusuakin, lei kawt hi.

⁷Tuaciang Topa Pathian in lei pan leivui la in mihing vawt hi. A naak sungah nuntakna hu mopin mihing nungta suak hi.

⁸Tuaciang Topa Pathian in nisuana sangah Eden huan vawt a, tua munah ama vawtsa mihingpa koi hi.



⁹Ama in ngapha a nga thingkungte le a hoi mama thingkung namcin tua munah posak hi. Huan laizang ah nuntakna thingkung le a pha a sia heak theina thingkung posak hi.

¹⁰Huan sung kawtsak tu in Eden huan panin ngun khat luang a, huan puasang a thet ciang ngun li in kikhen hi.

¹¹A masa bel ngun sia Pishon hi a; Havilah ngam kiimvealin luang hi.

(¹²Tua lai ah kham ciitak om a, paaknamtui le suang manphate zongh om hi.)

¹³A niina ngun sia Gihon hi a; Cush ngam kiimvealin luang hi.

¹⁴A thumna ngun sia Tigris hi a, Assyria ngam nisuana sangah luang hi. A lina ngun sia Euphrates ahi hi.

¹⁵Tuaciang Topa Pathian in Eden huan a tho tu le a keam tu in, mihingpa koi hi.

¹⁶Pathian in ama tungah, “Huan sung thingnga theampo na ne thei tu hi;

¹⁷ahizong a pha le a sia heak theina thingnga na ne buatu hi. Tua thingnga na ne bahet tu a; na ne a ahile na neak ni in na thi tu hi,” ci hi.

¹⁸Tuaciang Topa Pathian in, “Mihingpa ama nguak a om tu pha ngawl hi. Ama taw kilawm a hu tu khat ka vawtsak tu hi,” ci hi.

¹⁹Tuaciang Pathian in lei pan leitangh la in, nganhing theampo le vacim theampo vawt hi. Tua zawkciang mihingpa mu tu in paipui a, ama minphua bangin amate min hi papaih hi.

²⁰Tuaciang mihingpa in vacim theampo le nganhing theampo minphuak siat a, ahizong ama a panpui thei tu a kilawm khat beak om ngawl hi.

²¹Tuaciang Topa Pathian in mihingpa a mut suaksak mama a, a mutthip lanin a telngu khat laaksakin, tua mun sia khak kik hi.

²²Pathian in tua telngu taw numei khat vawt a, mihingpa kungah paipui hi.



²³Tuaciang mihingpa in, “Tu pepeet ciang, keima bang mihing khat ka ngu pan kila ngu le ka sa pan kila sa, hi sungah om hi. Mihingpa sung pan a kila ahikom ‘Numei’ kici tu hi,” ci hi.

²⁴Tua ahiciang pasal in a nu le a pa nusia in a zi taw kingawm tu a, amate pumkhat takkhat suak tu uh hi.

²⁵Mihingpa le a zi a pumnguakin om uh a, ahizong a maizum ngawl uh hi.

Pianciilna 2

¹Tuabangin Pathian in vaannuai buppi a bitphuana manthiang hi.

²Pathian in a nasep man siat a, a ni sali ni in a nasep tawlnga hi.

³Pathian in a bitphua nasep zo in, a ni sali ni tawlnga ahikom, tua ni thupha pia in thupisak hi.

⁴vaannuai pianna sia tu a bang teng ahi hi.

Eden Huan

Topa Pathian in vaannuai a vawt lai in,

⁵leitung ah thingkung lopate om ngawl a, a po tu thaici zongh om ngawl hi, banghangziam cile lotho tu khat zongh om ngawl a, ama in ngua zusak ngawl hi.

⁶Ahizong leinuai pan tui pusuakin, lei kawt hi.

⁷Tuaciang Topa Pathian in lei pan leivui la in mihing vawt hi. A naak sungah nuntakna hu mopin mihing nungta suak hi.

⁸Tuaciang Topa Pathian in nisuana sangah Eden huan vawt a, tua munah ama vawtsa mihingpa koi hi.

⁹Ama in ngapha a nga thingkungte le a hoi mama thingkung namcin tua munah posak hi. Huan laizang ah nuntakna thingkung le a pha a sia heak theina thingkung posak hi.

¹⁰Huan sung kawtsak tu in Eden huan panin ngun khat luang a, huan puasang a thet ciang ngun li in kikhen hi.



- 11**A masa bel ngun sia Pishon hi a; Havilah ngam kiimvealin luang hi.
(**12**Tua lai ah kham ciitak om a, paaknamtui le suang manphate zongh om hi.)
- 13**A niina ngun sia Gihon hi a; Cush ngam kiimvealin luang hi.
- 14**A thumna ngun sia Tigris hi a, Assyria ngam nisuana sangah luang hi. A lina ngun sia Euphrates ahi hi.
- 15**Tuaciang Topa Pathian in Eden huan a tho tu le a keam tu in, mihingpa koi hi.
- 16**Pathian in ama tungah, “Huan sung thingnga theampo na ne thei tu hi;
- 17**ahizong a pha le a sia heak theina thingnga na ne buatu hi. Tua thingnga na ne bahet tu a; na ne a ahile na neak ni in na thi tu hi,” ci hi.
- 18**Tuaciang Topa Pathian in, “Mihingpa ama nguak a om tu pha ngawl hi. Ama taw kilawm a hu tu khat ka vawtsak tu hi,” ci hi.
- 19**Tuaciang Pathian in lei pan leitangh la in, nganhing theampo le vacim theampo vawt hi. Tua zawkciang mihingpa mu tu in paipui a, ama minphua bangin amate min hi papaih hi.
- 20**Tuaciang mihingpa in vacim theampo le nganhing theampo minphuak siat a, ahizong ama a panpui thei tu a kilawm khat beak om ngawl hi.
- 21**Tuaciang Topa Pathian in mihingpa a mut suaksak mama a, a mutthip lanin a telngu khat laaksakin, tua mun sia khak kik hi.
- 22**Pathian in tua telngu taw numei khat vawt a, mihingpa kungah paipui hi.
- 23**Tuaciang mihingpa in, “Tu pepeet ciang, keima bang mihing khat ka ngu pan kila ngu le ka sa pan kila sa, hi sungah om hi. Mihingpa sung pan a kila ahikom ‘Numei’ kici tu hi,” ci hi.
- 24**Tua ahiciang pasal in a nu le a pa nusia in a zi taw kingawm tu a, amate pumkhat takkhat suak tu uh hi.
- 25**Mihingpa le a zi a pumnguakin om uh a, ahizong a maizum ngawl uh hi.

Pianciilna 3



Mihing ii Thunit Ngawlina

¹Tu in ngul sia Topa Pathian vawtsa nganhingte sung pan a thiimthel pil bel ahi hi. Ngul in numei tungah, “Pathian in, huan sung thingkung khat pawpo ii nga ne thei ngawl tu nu hi, hong ci takpi ziam?” ci in dongh hi.

²Numei in, “Huan sung thingnga pawpo ne thei tu khu hi.

³Ahizong huan laizang a om thingnga sia na ne buatu uh hi, zongh na tham buatu uh hi; na ne uhle na thi tu uh hi, Pathian in hong ci hi,” ci in zo hi.

⁴Ngul in, “Tuasia thumaan hi ngawl hi; thi ngawl tu nu hi.

⁵Banghangziam cile na neak uhciang, a pha le a sia he in Pathian taw na kiban tu hunlam ama in he ahikom Pathian in tu a bangin hong ci hi,” ci in zo hi.

⁶Numei in thingkung a hoizia le a nga ii lim tuakziate mu a, mipil sua tu sia uuk huai lawlawm hi, ci in ngaisun hi. Tua ahikom thingnga pawlkhat lo in ne hi. Tuaciang a pasal zongh pawlkhat pia a, ama in zongh ne hi.

⁷A neak zawk pociang amate khua phawkin, a pumnguak ahi hunlam kihe uh hi; tuaciang amate in theitee khiltua in silh uh hi.

⁸A nitak ciang, amate in huan sungah Topa Pathian paina khawsuan za uh a, thingkungte kawmah buu uh hi.

⁹Ahizong TopaPathian in mihingpa sam a, “Koi sungah om ni ziam?” ci hi.

¹⁰Ama in, “Huan sungah na khawsuan nging ka za a; ka pumnguak om ka hikom lau in ka buu hi,” ci hi.

¹¹Pathian in, “Akua in na pumnguak om ni hi, hong ci ziam? ne heak vun kong ci thingnga sia ne nu ziam,” ci in dongh hi.

¹²Mihingpa in, “Kei taw omkhawm tu a, nong piak numei in thingnga hong pia a, ka ne hi,” ci in zo hi.

¹³Topa Pathian in numei tungah, “Banghang hi bang ngamta ni ziam?” ci in dongh hi. Numei in, “Ngul in hong theam a, ka ne hi,” ci in zo hi.

Pathian Thukhenna



¹⁴Tuaciang Topa Pathian in ngul tungah, “Hi thu hangin daan kong pia tu a, nganhing theampo sung pan nangma bek in hi haamsiatna na thuak tu hi: Tu a kipan awmtaalin na vak tu a, na nuntak sung teng leivui na ne tu hi.

¹⁵Numei taw kong kihuatsasak tu a, ama suan le paalte le nangma suan le paalte a tawntungin na kingaal tu uh hi. Ama suan le paal in na lutang hong sucip tu a, nangma in a khawtul na tu tu hi,” ci hi.

¹⁶Tuaciang ama in numei tungah, “Nau na paai ciang na haksatna kong khangsak tu a, nasa in nau na nei tu hi. Ahizong na pasal ma na it veve tu a, ama in nang hong uk tu hi,” ci hi.

¹⁷Tuaciang ama in mihingpa tungah, “Na zi thu ni in, ne heak in kong ci thingnga ne na hikom nang hangin leitangh in haamsiatna thuak hi. Na nuntak sung tawntung ngim takin na na seam tu a, na anneak tu na zong tu hi.

¹⁸Lei sung pan ling le lopa te hong po tu a, dui sung thingkung pan a piangte na ne tu hi.

¹⁹Na pianna leitangh ah na cia kik mateng leitangh tung pan na piang a om thei natu in, haksapi tak le khua-ulsa suakin na na seam tu hi. Lei taw kivawt na hikom lei ma na suak kik tu hi,” ci hi.

²⁰Adam in a zi min sia Eve phuak hi; banghangziam cile ama in mihing theampo ii nu ahi hi.

²¹Topa Pathian in Adam le a zi atu in savunpuan vawtin amate silhsak hi.

Adam le Eve Huansung pan Kihawlkeak

²²Tuaciang Topa Pathian in, “Tu in, mihingpa sia eite khat taw kibangin a pha le a sia he hi. Nuntakna thingnga ne le nungta tawntung tu ahiciang tua thingnga, ama neak tu in ki oai ngawl hi,” ci hi.

²³Tuaciang Topa Pathian in mihingpa sia, ama pianna leitangh tho tu in Eden huan pan hawlkhia hi.



²⁴Pathian in nuntakna thingkung kuama thuthaak thei ngawl natu, a cing tu in, Eden huan ii nisuana sangah Cherubim le a kiimkot ah a tee vazal meikuang namsau khat koi hi.

Pianciilna 4

Cain le Abel

¹Tuaciang Adam in a zi ompui a, a zi naupaai hi. A zi in tapa khat nei a, “Topa huna taw tapa khat ka nei hi,” ci hi. Tua ahikom ama in a min Cain phuak hi.

²Tua zawkciang tapa khat nei kik a, Abel ahi hi. Abel in tuucingpa khat hi a, ahizong Cain sia lothopa khat ahi hi.

³Tawmvei zawkciang Cain in a lo sung pan a piang ante taw Topatungah biakpiakna nei hi.

⁴Tuaciang Abel in a tuute sung pan taciil khat ngo in a sa lim bel taw biakpiakna nei hi. Abel biakpiakna hangin Topa lungdam a,

⁵ahizong Cain biakpiakna nial hi. Cain thin uuk mama a, a maisan hi.

⁶Tuaciang Topa in Cain tungah, “Banghang thin uuk ni ziam? Banghang na mai sansak ni ziam?”

⁷A pha vawt hi lete, na maitai tu a, ahizong a sia na vawt hu in, maw phelna nganno in na innkha kungah bok nginge hi. Ama in nang hong uk nuam a, ahizong nangma in ama na zaw tu ahi hi,” ci hi.

⁸Tuaciang Cain in a suapuipa Abel tungah, “Lozau sungah vak tawng,” ci hi. Amate lozau sung a thet ciang Cain in a suapuipa thatlum hi.

⁹Topa in Cain tungah, “Na suapuipa Abel koisungah om ziam?” ci in dongh hi. Cain in, “He ngawl khi hi. Ka suapuipa a cingpa hi na khi ziam?” ci in zo hi.

¹⁰Tuaciang Topa in, “Banghangin hi bang a cizathuai na seam thong ni ziam? Phu la nuam a, a au aw bangin na suapuipa chisan in leitangh tung pan hong biakpui hi.

¹¹Nang sia haamsiat thuakpa na hi a, leitangh tho thei nawn ngawl tu ni hi. Na thalup lai in na naupa chisan dong tu in a kam a kaa sa bang keakin tua leitangh in na naupa chisan duupkang zo hi.

¹²Lotho lete zong leitangh pan bangma piang ngawl tu a, inn le lo nei ngawlin leitung ah na vakthap tu hi,” ci hi.

¹³Tuaciang Cain in Topa tungah, “Hi daanpiakna sia kei thuak tu in haksa lei hi.

¹⁴Na omna panin a khuala mama na ah nong notkeak hi. Inn le lo nei ngawlin hi leitung ah ka vakthap tu a, hong mu po in kei hong that tu hi,” ci hi.

¹⁵Ahizong Topa in, “Hi ngawl hi. Khat po in nang hong that le a zaa sali in phu kila tu hi,” ci in zo hi. Ama kisik pui po in a thalup ngawl natu in, Cain tungah Topa in tepteena khat koi hi.

¹⁶TuaciangTopa omna panin Cain pai in, Eden ii nisuana sang Nod ngam sungah teang hi.

Cain ii Suan le Paalte

¹⁷Cain in a zi taw tapa khat nei a, a min Enoch phuak hi. Tuaciang Cain in khuapi khat saat a, a min tu in a tapa min tapin Enoch phuak hi.

¹⁸Enoch in tapa khat nei a, a min Irad ci hi, Irad sia Mehujael ii pa hi a, Mehujael in tapa Methushael nei a, ama sia Lamech ii pa ahi hi.

¹⁹Lamech in zi nii nei a, Adah le Zillah ahi hi.

²⁰Adah in Jabal nei a, ama sia puanbuk sungah a teang ngankhoaithe ii pianna taangpupi ahi hi.

²¹A suapuipa sia Jubal hi a, ama sia tengtong le tamngai a kipan a tumthei music thiamte theampote ii pianna taangpupi ahi hi.

²²Zillah in Tubal Cain nei a, ama in thik le taungo panin nazak tuatuamte vawt hi. Tubal Cain ii suapuinu sia Naamah ahi hi.

²³Lamech in a zite tungah, “Adah le Zillah awng, hong ngai tavun; Khangno khat ka thatlum hi, banghangziam cile ama in kei hong vua hi.



²⁴Cain kithalup manin a zaa sali in kithuk kik ahi le, kei hong thatlum a om le a zaa sawmsali le sali in kithuk kik tu hi,” ci hi.

Seth le Enosh

²⁵Adam in a zi taw tapa dang khat nei hi. A zi in, “Cain ii a thalup Abel taang tu in, Pathian in tapa khat hong pia hi,” ci hi. Tua ahikom a min Seth phuak hi.

²⁶Seth in Enosh kici tapa khat nei hi. Tua hun a kipanin mihingte in Topa min thiangtho lo in biakpiakna kipan hi.

Pianciilna 5

Adam Suan le Paalte

(1Khang tangthu 1.1-4)

¹A nuai a teng sia Adam suan le paalte ahi hi. (Pathian in mihing a bitphua lai in, ama taw a kibangin vawt hi.

²Ama in numei le pa bitphua a, thupha pia in, “Mihing” ci hi.)

³Adam kum 130 a phak ciang, ama a sun tapa khat nei a, a min Seth phuak hi.

⁴Tua zawkin, Adam kum 800 nungta lai hi. Ama in ta dang zongh nei a,

⁵kum 930 a phak ciang thi hi.

⁶Seth kum 105 a phak ciang tapa Enosh nei a,

⁷tua zawkin kum 807 nungta lai hi. Ama in ta dang zongh nei a,

⁸kum 912 a phak ciang thi hi.

⁹Enosh kum 90 a phak ciang tapa Kenan nei a,

¹⁰tua zawkin kum 815 nungta lai hi. Ama in ta dang zongh nei a,

¹¹kum 905 a phak ciang thi hi.

¹²Kenan kum 70 a phak ciang, tapa Mahalalel nei a,

¹³tuazawkin kum 840 nungta lai hi. Ama in ta dang zongh nei a,

¹⁴kum 910 a phak ciang thi hi.



- ¹⁵Mahalalel kum 65 a phak ciang, tapa Jared nei a,
¹⁶tua zawkin kum 830 nungta hi. Ama in ta dang zongh nei a,
¹⁷kum 895 a phak ciang thi hi.
- ¹⁸Jared kum 162 a phak ciang, tapa Enoch nei a,
¹⁹tua zawkin kum 800 nungta hi. Ama in ta dang zongh nei a,
²⁰kum 962 a phak ciang thi hi.
- ²¹Enoch kum 65 a phak ciang tapa Methuselah nei hi.
- ²²Tua zawkciang Enoch in Pathian taw kum 300 kithawl a, ta dang zongh nei hi.
- ²³Ama sia kum 365 nungta hi.
- ²⁴Pathian taw a nuntak sung ki thawl khawm a, tuaciang ama bo hi, banghangziam cile Pathian in ama a hingtang in la hi.
- ²⁵Methuselah kum 187 a phak ciang, tapa Lamech nei a,
²⁶tua zawkin kum 782 nungta lai hi. Ama in ta dang zongh nei a,
²⁷kum 969 a phak ciang thi hi.
- ²⁸Lamech kum 182 a phak ciang tapa khat nei a,
²⁹ama in,“Topa ii a haamsiatsa leitangh tung mama panin hi tapa in ih nasep haksatna panin hong suatak tu hi,” ci ahikom a min Noah phuak hi.
- ³⁰Lamech kum 595 nungta lai hi. Ama in ta dang zongh nei a,
³¹kum 777 a phak ciang thi hi.
- ³²Noah kum 500 a phak zawkciang, tapa thum nei a, Shem, Ham le Japheth ahi uh hi.

Pianciilna 6

Mihingte Ngitlona

- ¹Leitung theampo ah mihing khang vaial a, tanute hong nei ciangin,
²Pathian tapate in tua tanute phasa ahikom a dei po tenpui hi.



³Tuaciang Topa in, “Mihingte sia cii le sa taw ahikom a nuntak tawntung tu ka oai bua hi. Tu a kipan kum 120 kanin nungta ngawl tu hi,” ci hi.

⁴Tua hun le tua zawkciang zonghin Pathian tapate le mihing tanute ii suan le paal Nephilim a kici mihing thatang lian namte leitung ah om hi. Hite sia taanglai a ngalhangte le mihing minthangte ahi uh hi.

⁵Leitung ah mihingte ngitlona le khua ngaisut a sia bebek a neina thu Topa in a mu ciang,

⁶Leitung ah mihingte a piansak sia khuangai hi. Ama kisiik kikin,

⁷“Ka piansak mihingte nganhingte le vacimte zongh ka bosak siat tu hi, banghangziam cile amate ka piansak sia ka khuangai hi,” ci hi.

⁸Ahizong Noah tungah Topa lungkim hi.

Noah

⁹⁻¹⁰Hi sia Noah tangthu ahi hi. Ama in tapa thum nei a, Shem, Ham le Japheth te ahi hi. Noah in khialna nei ngawl a, ama hun lai in ama bekma mipha om hi. A nuntak sung Pathian taw kithawl a,

¹¹ahizong a kuama po Pathian muna ah pha ngawl a, koima po ah molngolna kizel hi.

¹²Pathian in leitung en a, a sia in mu hi, banghangziam cile mihing theampo siatna taw kidim in nungta hi.

¹³Pathian in Noah tungah, “Mihing theampo bosak tu in ka khensat zo hi. Leitung sia amate maitatna taw kidim ahikom amate ka mon siat tu hi.

¹⁴Nang atu in thingpha taw teambaw khat vawt in a, a sungah innkhante vawtin, a sung a pua thingnaai taw zut in.

¹⁵Tua teambaw sia pi 450 a sau, pi 75 a zai, le pi 45 a saangin vawt in.

¹⁶Teambaw khuvum vawt in a, a khuvum le a pang kilaklaw letmat 18 vangsak in. Dawl thum in vawt in a, a pangh ah kongkha khat koi in.

¹⁷Nuntakna a nei theampo a mon tu in leitung ah tuipi khatvei ka liimsak tu hi. Leitung a om theampo thi siat tu a,



¹⁸ahizong nang taw kiciamna khat ka vawt tu hi. Teambaw sungah na zi, na tapate le a zite taw pai in.

¹⁹⁻²⁰Amate a nuntak natu in, nganhing namcinte le vacim namcinte sung pan a nu khat le a pa khat veu teambaw sungah paipui in.

²¹Noma le amate atu in an namcinte zongh paipui in.” ci hi.

²²Pathian thupiak bangin Noah in na theampo vawt siat hi.

Pianciilna 7

Tuipi Liim

¹Topa in Noah tungah, “Na innkuan bupin teambaw sungah tum vun; leitung ah a maanin a ngamta nangma bekma kong mu hi.

²Biakna taw kisai a thiangtho nganhingte kop sali tek paipui in a, ahizong a thiangtho ngawl nganhingte ahile kop khat tek paipui in.

³Vacimte zongh nam khat ciang kop sali tek paipui in. Leitung ah vacim le nganhingte a cii a bo ngawl natu in hi bang vawt in.

⁴Tuzo ni sali zawkciang, ni sawmli sung sun le zan ngua kong zusak tu a, ka vawtsa nuntakna nei theampo ka mon siat tu hi,” ci hi.

⁵Noah inTopa thupiak bangin vawt siat hi.

⁶Leitung ah tuipi a liim lai in Noah kum zaluk pha hi.

⁷Tuipi liimna pan a suakta tu in Noah le a zi, a tapate le a zite teambaw sungah tum uh hi.

⁸Nganhingte le vacimte a namkim in kopkhat tek, biakna taw kisai a thiangtho ahizong a thiangtho ngawl ahizong,

⁹Pathian thupiak bangin Noah taw teambaw sungah tum khawm uh hi.

¹⁰Ni sali zawkciang tuipi liim hi.

¹¹Noah kum zaluk a phak zawk, a tha nii na ni sawm le ni sali ni in, leinuai a om tuite puaktham in mun theampo pan tui phul a, van kongkha theampo kihongin,



- ¹²sun sawmli le zan sawmli tawntung leitung ah ngua zu hi.
- ¹³Tua ni in Noah le a zi, a tapate thum Shem, Ham, Japheth le a zite teng taw teambaw sungah tum uh hi.
- ¹⁴Ama taw in nganhing nam theampo, innsate le ngamsate, a lian le a no, le vacim nam theampo tum uh hi.
- ¹⁵Pathian thupiak bangin nganhing nam theampo sung pan a nu khat le a pa khat veu Noah taw teambaw sungah tum uh hi.
- ¹⁶Noah a tum zawkciang Topa in kongkha khak hi.
- ¹⁷Tuipi liim ni sawmli a ngei ciang teambaw a lap thei natu in tui thuk vaial hi.
- ¹⁸Tui thuk vaial a, tui tungah teambaw laam hi.
- ¹⁹Tui thuk mama a, mualsaangbelte zong khum hi.
- ²⁰Mualsaangbel dawn ii tungah pi 25 a phak dong tui khang hi.
- ²¹Leitung ah a om a nungta vacim theampo, nganhing theampo le mihing theampo thi siat hi.
- ²²Leitung ah om husang theampo thi hi.
- ²³Topa in leitung ah a nungta mihing, nganhing le vacimte theampo mongsak siat hi. Noah le ama taw teambaw sungah a om teng bek suakta hi.
- ²⁴Ni za le ni sawmnga sung tuipi kiamsuk tu kipan ngawl hi.

Pianciilna 8

Tuipi Liim A bona

- ¹Pathian in Noah le ama taw teambaw sungah a om nganhingte theampo mangil ngawl hi. Ama in vuivasak a, tuaciang tuipi kiamsuk tu kipan hi.
- ²Leinuai pan hong phul tuite le ngua hong zukna van kongpite kikhak siat hi. Ngua zu nawn ngawl a,
- ³ni 150 sung tuipi dadam in kiamsuk hi.



⁴A tha sali na, ni sawm le ni sali ni in, teambaw sia Ararat mual tungah tawlngha hi.

⁵Tuite kiam susuk a, a tha sawm na, ni khat ni in mualdawnte kilangh hi.

⁶Ni sawmli zawkciang Noah in khelki hong a,

⁷va-ak khat tha hi. Va-ak hong heak kik ngawl a, ahizong leitung ah tui a kan siat mateng leang kawkoai hi.

⁸Tuasia ciang tui kang siat zo ziam ci sia a heak natu in, Noah in vakhu khat tha a,

⁹ahizong tui kang siat ngawllai ahikom vakhu in a tawlnghak natu mun mu ngawl hi. Teambaw ah vakhu hong cia kik a, Noah in manin sungtan pui hi.

¹⁰Ama in a dang ni sali a ngak zawkciang tua vakhu tha kik hi.

¹¹A nitak ciangin ama kungah olive sawlhing khat a muk ah pu in tua vakhu hong heak kik hi. Tuaciang tui kiamsuk zo a hina thu Noah in he hi.

¹²Tuaciang ni sali a ngak zawkciang khatvei ma tua vakhu tha kik a; vakhu hong heak kik nawn ngawl hi.

¹³Noah kum 601 a phak zawk, a tha khatna, ni khat ni in tui kang siat hi. Noah in teambaw sitna hongin khua en a, leikote mu hi.

¹⁴A tha niina, ni kul le ni sali ni ciang leitung ko thiang hi.

¹⁵Pathian in Noah tungah,

¹⁶“Na zi, na tapate le a zite taw teambaw sung pan pusuak vun.

¹⁷Ta nei in leitung theampo ah a kizel natu in, vacim theampo le nganhing theampo nangma pusua pui in,” ci hi.

¹⁸Tua ahiciang Noah sia teambaw sung pan a zi a tapate le a zite taw pusuak uh hi.

¹⁹Nganhing theampo le vacim theampo a nam a nam zui in a hon a hon in teambaw sung pan pusuak uh hi.

Noah in Biakpiakna Vawt



²⁰Noah in biaknatau khat Topa atu vawt a; biakna taw kisai a thiangtho nganhing le vacimte sung pan nam sim pan khat tek la in, biaknatau tungah a thiangtho pumbup meihal biakpiakna in pia hi.

²¹Topa in biakpiakna ngim namtui a zaak ciang lungdamin a thin sungah, “Mihing ngamtatna hangin leitung ka haamsiat ngei nawn buatu hi: a no lai pan a khua ngaisutna a sia a hina thu ka he hi. Tu a ka hi bangin nuntakna nei theampo ka mon ngei nawn buatu hi.

²²Leitung a om laiteng lopoai hun le anlaak hun om tu hi. A tawntung in a vot le a sa, khuakhal le phalbi, sun le zan om tu hi,” ci hi.

Pianciilna 9

Pathian ii Noah taw Thuciamna

¹Pathian in Noah le a tapate thupha pia in, “ Pung vun a tam mama pha in leitung dim vun.

²Ngamsa theampo vacim theampo le ngasa theampo in hong kiita tu hi. Tuате theampo nangma khut nuai ah kikoi hi.

³Tu a kipan hite na ne thei tu uh a, antee hing zong na ne thei tu uh hi. Note an tu in tuate theampo kong pia siat hi.

⁴Ahizong chi a omlai satak na ne buatu uh hi, banghangziam cile nuntakna sia chi sungah om ahiciang neak tu kong kham hi.

⁵Khat pawpo in mihing a that le ama daan kipia tu hi. Mihing a thisak nganhing sia kithatlum tu hi.

⁶Pathian in ama taw kibangin mihing vawt ahikom mihing khat a that pawpo sia ama mipui pa in thatlum tu hi.

⁷Leitung theampo ah na suan le na paalte a kizel thei natu in, ta tam mama nei tu nu hi,” ci hi.

⁸Pathian in Noah le a tapate tungah,

⁹“Tu in noma tung le na suan na paalte tung ahizong,



¹⁰note taw teambaw sung pan a pusuakkhawm nuntakna a nei, vacim theampo le nganhing theampote taw thuciamna kong vawt hi.

¹¹Note tungah ka thuciamna kammalte sia: nuntakna nei a min piang peuma tuipi liimna taw ka mon nawn buatu a, tuipi liimin leitung ka lalsak kik nawn buatu hi, ci in kong kamciam hi.

¹²Nang le nuntakna nei a minpiangte tungah a tawntung a kip tu ka thuciamna lim tu in

¹³meei sungah ka sangun ka koi tu hi. Tua in leitung taw ka thuciamna lim hi tu hi.

¹⁴Van ah meei a kaai ciang le sangun hong kilangh ciang,

¹⁵tuipi liimna in nuntakna nei peuma mon nawn ngawl tu hi ci in, note le nganhing theampo tungah kong kamciamna ka phawk tu hi.

¹⁶Meei sungah sangun a kilangh ciang ka en tu a, tuaciang keima le leitung ah nuntakna nei a minpiangte kilaklaw ah tawntung thuciamna sia ka phawk tu hi.

¹⁷Tua sangun in nuntakna nei a minpiangte tungah kamciam ka piakna lim ahi hi,” ci hi.

Noah le A Tapate

¹⁸Teambaw sung pan a pusuak Noah tapate sia Shem, Ham le Japheth ahi hi. (Ham sia Canaan ii pa ahi hi.)

¹⁹Hi Noah ii tapa thumte sia leitung mihing theampo ii taangpupite ahi uh hi.

²⁰Noah sia lothopa khat hi a, sapit ciing masabelpa ahi hi.

²¹Ama in zu ne in kham a, a puante suutin a puanbuk sungah a pumnguakin lum hi.

²²Canaan ii pa Ham in, a pa a pumnguak a lup a mu ciang, a suapuite nii kungah pai in son hi.

²³Tuaciang Shem le Japheth in puantual khat la in amate ii liangko nungsang ah baang uh hi, a nung leelam in puanbuk sungah tum uh a, a pa sia



puantual taw siin uh hi. A pa uh a pumngwak a om a mu ngawl natu in amate in maingat ngawl uh hi.

²⁴Noah a zu kham theau a, ama tungah a tapa nozaw ii a vawtna teng a heak ciang

²⁵Noah in, “Canaan tungah haamsiatna tung taken! A suapuite ii sila khat hi taken.

²⁶Shem ii Pathian Topa kipok taken! Canaan sia Shem ii sila hi taken!

²⁷Pathian in Japheth pungsak taken! A suan a paalte le Shem ii suante teangkawm taken! Canaan sia Japheth ii sila hi taken,” ci hi.

²⁸Tuipi liim zawkciang Noah kum 350 nungta a,

²⁹kum 950 a phak ciang thi hi.

Pianciilna 10

Noah Tapate ii Suan le Paalte

(1Khang tangthu 1.5-23)

¹Hite sia Noah ii tapa ahi Shem, Ham le Jepheth te ii suan le paalte ahi hi. Tuipi liim zawkciang hite thum in tapate nei uh hi.

²Japheth ii tapate sia Gomer, Magog, Madai, Javan, Tubal, Meshech le Tiraste ahi uh hi. Hite sia amate ii min a pu minamte ii taangpupite ahi hi.

³Gomer ii suan le paalte sia Ashkenaz, Riphath, le Togarmah minamte ahi uh hi.

⁴Javan suan le paalte sia Elishah, Spain, Cyprus le Rhodes minamte ahi uh hi.

⁵Amate sia tuikulh tung le tuipi dung a, a teangte ii pianna taangpupite ahi uh hi. Hite sia Japheth ii suan le paalte hi a, amate kampau tek zanghin ngam tuatuam ah a minam in teang uh hi.

⁶Ham ii tapate sia Cush, Egypt, Libya le Canaan ahi uh hi. Hite sia amate ii min a pu minamte ii taangpupite ahi hi.

⁷Cush ii suan le paalte sia Seba, Havilah, Sabtah, Raamah, le Sabteca minamte ahi uh hi. Raamah ii suan le paalte sia Sheba le Dedan minamte ahi uh hi.



⁸Cush in Nimrod a kici tapa khat nei a, leitung ah a masa bel a minthang ngalzopa ahi hi.

⁹Topa huna taw savai minthang khat hi a, tua ahikom mihingte in “Topa in nang sia Nimrod bangin savai minthang khat hong suaksak taken!” ci uh hi.

¹⁰A masa in ama ukna ngamte sia, Babylon ngam sungah a om Babylon, Erech le Accad ngam thum teng ahi hi.

¹¹Tua ngam panin Assyria ah pai a, Nineveh, Rehoboth Ir, Calah,

¹²le Nineveh le Calah khuapi kilaklaw ah a om, Resen khuapite saat hi.

¹³Egypt suan le paalte sia Lydia, Anam, Lehab, Naphtuh,

¹⁴Pathrus, Casluh le Crete minamte ahi uh hi. Philistinte sia Crete ii suan le paalte ahi hi.

¹⁵Canaan ii tapate sia, tapa lianbel Sidon le Heth ahi uh hi. Hite sia amate ii min a pu minamte ii taangpupite ahi uh hi.

¹⁶Canaan sia Jebus te, Amor te , Girgash te,

¹⁷Hiv te, Arka te, Sin te,

¹⁸Arvad te, Zemar te le Hamath te ii pianna taangpupi zongh ahi hi. Canaan te kithethaang a,

¹⁹amate ngam sia, Sidon panin thangsang Gerar ngam manaw in Gaza dong hi a, niswana sang pan Sodom ngamsang panin Gomorrah, Admah le Lasha khua paam Zeboiim dong ahi hi.

²⁰Hite sia Ham ii suan le paalte hi a, amate kampau tek zanghin ngam tuatuam ah a minam in teang uh hi.

²¹Japheth ii upa Shem sia, Hebrewte ii pianna taangpupi ahi hi.

²²Shem ii tapate sia Elam, Asshur, Arpachshad, Lud le Aramte hi uh a, hite sia amate ii min a pu minamte ii taangpupite ahi uh hi.

²³Aram suan le paalte sia Uz, Hul, Gether le Meshek minamte ahi hi.

²⁴Arpachshad in tapa Shelah nei a, Shelah in tapa Eber nei hi.



²⁵Eber in tapa nii nei a, a khat sia ii min sia Peleg ci hi, banghangziam cile ama hun sungin leitung mihingte kikhentham hi. A khat sia ii min Joktan kici hi.

²⁶Joktan suan le paalte sia Almodad, Sheleph, Hazarmaveth, Jerah,

²⁷Hadoram, Uzal, Diklah,

²⁸Obal, Abimael, Sheba,

²⁹Ophir, Havilah le Jobab minamte ahi hi. A vekpi in Joktan suan le paalte ahi hi.

³⁰Amate teenna ngam sia Mesha pan nisuana sang mualtung ngam Sephar dong ahi hi.

³¹Hite sia Shem ii suan le paalte hi a, amate kampau tek zanghin ngam tuatuam ah a minam in teang uh hi.

³²Hi mihing tuatuam te theampo sia Noah ii suan le paalte hi a, khang simna taw kizui in, minam tuatuamte suak hi. Leitung minam theampo sia tuipi liim zawkciang Noah tapate ii suan le paalte ahi hi.

Pianciilna 11

Babylon Tausaang

¹A masa ciilin leitung mihingte theampo in kam nam khat bek kinei a kammal kibang zangh uh hi.

²Amate nisuana sangah pai kawkoai a, Babylon ngam zaanglei mun khat a thet ciang tua munah khua saat uh hi.

³Amate khat le khat, “Hong pai tavun! uksuang beangin hal tawng” kici uh hi. Amate innsak natu in uksuang le a kimat natu in thingnaai zangh uh hi.

⁴Amate in, “Eite atu in khuapi khat saatin van a dong tu in, tausaang khat ciang tawng. Leitung theampo ah ih kithethaang ngawl natu hi taken,” ci uh hi.

⁵Tuaciang amate ii a vawt khuapi le tausaang a en tu in Topa hong paisuk a,



⁶“En vun, hite sia a vekpi in minam khat hi a, kam namkhat pau hi. A nasep tute a kipatna hi pheang hi. Hai ngawlin a nasep nop teng hong seam tu uh hi!

⁷Tua ahikom eite paisuk in khat le khat a kampau a kitel ngawl natu in a kampau toknoai tawng,” ci hi.

⁸Topa in mihingte leitung mun theampo ah kithethaangsak a, amate in a khuapi saat tawlna hi.

⁹Tua khuapi sia Babylon ci uh hi. Banghangziam cile Topa in tua mun mihingte theampo ii kampau toknoai a, tua mun panin leitung mun theampo ah amate kithethaangsak hi.

Shem ii Suan le Paalte

(1Khang tangthu 1.24-27)

¹⁰Hite sia Shem ii suan le paalte hi. Shem kum 100 a phak, tuipi liim zawk kum 2 ciangin ama in Arpachshad kici tapa khat nei hi.

¹¹Tua zawkciang ama kum 500 nungta lai a, tanu tapa dang zongh nei hi.

¹²Arpachshad kum 35 a phak ciang, ama in Shelah kici tapa khat nei hi.

¹³Shelah a sua zawkciang, ama kum 403 nungta lai a tanu tapa dang zongh nei hi.

¹⁴Shelah kum 30 a phak ciang, ama in Eber kici tapa khat nei hi;

¹⁵tua zawkciang, ama kum 430 nungta lai a, ta dang zongh nei hi.

¹⁶Eber kum 34 a phak ciang, ama in Peleg kici tapa khat nei hi.

¹⁷Tua zawkciang, ama kum 430 nungta lai a, ta dang zongh nei hi.

¹⁸Peleg kum 30 a phak ciang, ama in Reu kici tapa khat nei hi.

¹⁹Tua zawkciang, ama kum 209 nungta lai a, ta dang zongh nei hi.

²⁰Reu kum 32 a phak ciang, ama in Serug kici tapa khat nei hi.

²¹Tua zawkciang, ama kum 207 nungta lai a, ta dang zongh nei hi.

²²Serug kum 30 a phak ciang, ama in Nahor kici tapa khat nei hi.



²³Tua zawkciang, ama kum 200 nungta lai a, ta dang zongh nei hi.

²⁴Nahor kum 29 a phak ciang, ama in Terah kici tapa khat nei hi.

²⁵Tua zawkciang, ama kum 119 nungta lai a, ta dang zongh nei hi.

²⁶Terah kum 70 a phak zawkciang, ama in tapa thum Abram, Nahor le Haran nei hi.

Terah ii Suan le Paalte

²⁷Hite sia Terah suan le paalte hi a, Terah sia Abram, Nahor le Haran te ii pa ahi hi. Haran sia Lot ii pa ahi hi.

²⁸Haran sia a pa Terah a nuntak lai in, a suana Babylon ngam Ur khua ah thi hi.

²⁹Abram in Sarai tenpui a, Nahor in Haran ii tanu Milcah tenpui hi. Haran sia Iscah ii pa zongh ahi hi.

³⁰Sarai in ta nei thei ngawl hi.

³¹Terah in a tapa Abram le Haran ii tapa ama tupa ahi Lot le a tapa Abram ii zi Sarai sam a, Canaan ngam ah pai tu in Babylon ngam Ur khua pan amate taw ding uh hi. Amate Haran dong pai in tua munah teang uh hi.

³²Terah kum 205 a phak ciang Haran khua ah thi hi.

Pianciilna 12

Pathian ii Abram A sapna

¹Pathian in Abram tungah, "Na ngam, na be le phungte le na pa inn nusia in a, kong lak natu ngamah pai in.

²Suan le paal tam mama kong pia tu a, amate minam lian khat suak tu uh hi. Thupha pia in na min kong thangsak tu a, thupha naak na hi tu uh hi.

³Nangma thupha hong piate thupha ka pia tu a, Ahihang nangma hong haamsiatte ka haamsiat tu hi. Nang tungtawnin minam theampo thupha ka pia tu hi," ci hi.

⁴Abram kum sawmsali le kum nga a phak ciang Topa ci bangin Haran khua nusia hi. Lot in zui hi.



⁵Abram in a zi Sarai, a naupa ii tapa Lot, amate neisa theampo le Haran pan a nga sila theampo Canaan ngam zotpui hi. Amate Canaan ngam a thet ciang

⁶Abram sia Shechem khua mun thiangtho Moreh mun lim thingkung a thet dong paisuak hi. (Tua hun in Canaan te tua munah teang lai hi.)

⁷Abram tungah Topakilangh a, “Na suan le na paalte tungah hi ngam ka pia tu hi,” ci hi. Tuaciang Abram in, ama tungah a kilangh Topa atu in biaknatau khat vawt hi.

⁸Tua zawkciang Abram sia thangsang Bethel khua nisuana sang mualtung ngamah kikhiin in nitumna sangah Bethel, nisuana sangah Ai khuate kilaklaw ah ngiaphual saat hi. Tua mun zongh ah ama in biaknatau khat vawtin Topa bia hi.

⁹Tuaciang ama mun khat pan mun khat kikhiin in Canaan ngam thangsang dong theng hi.

Egypt ah Abram

¹⁰Canaan ngam sungah kialpi tung a, tua kialpi nasia ahikom Abram tawmvei sung teang tu in Egypt ah paisuk hi.

¹¹Egypt ngamngi a kan dek ciang a zi Sarai tungah, “Nang sia numei mealpha khat na hi hi.

¹²Egyptte in nang hong mu ciang amate in nang sia keima zi hi hong ci tu uh a, amate in keima hong thatin nang hong nungta sak tu hi.

¹³Hong dongh le a suapuinu khi hi ci lete nang hangin kei ka suakta tu a, phat tak hong vawt tu hi,” ci hi.

¹⁴Egypt ngam a thet ciang Egyptte in a zi meal phasa mama uh hi.

¹⁵Zum uliante pawl khat in a mu ciang a meal phatna kumpipa tungah son a, kumpi inn sungah paipui uh hi.

¹⁶Tua nu hangin kumpipa in Abram phat vawt a, ama tungah tuu, keal, khui, laa, silate le kalaohate a hon a hon in pia hi.



¹⁷Ahizong kumpipa ii, Sarai a laak hu in Topa in kumpipa le a inn sung a, a teang mihing theampo tungah natna ngilote tungsak hi.

¹⁸Tuaciang kumpipa in Abram sam a, “Banghangin hi bang hong vawt thong ni ziam? Ama ka zi hi ci in banghang hong son ngawl ni ziam?”

¹⁹Banghangin ka suapui nu hi ci ni ziam? Ka suapui nu hi na ci hu in ka zi tu in la khi hi. Hi sungah na zi om hi, la in a, pusuak vun!” ci hi.

²⁰Kumpipa in a mite thupia a, amate in Abram sia a zi le a neisa theampo taw a ngam panin hawlkeak uh hi.

Pianciilna 13

Abram le Lot Kikhen

¹Abram sia a zi, a neisa theampo le Lot taw Egypt panin saksang zuanin Canaan thangsang Negev ngamah pai hi.

²Abram sia a hau mama khat hi a, tuute, kealte le khuite a nei bek dom ngawlin kham le ngun zongh nei hi.

³Tua mun nusia in mun khat pan mun khat ah kixhiin in Bethel sang zuan hi. Ama ii ngiaphual a saat ngeina mun le biaknatau khat asak ngeina mun Bethel le Ai kilaklaw ah ama theng hi.

⁴Tua munah ama in Topa bia hi.

⁵Lot zongh in tuute, kealte le khuite a nei bek dom ngawlin innkuanpui le naseamte zongh nei hi.

⁶Tua hi a, ngan tha natu mun kicing ngawl ahikom mun khat ah a tenkhop tek tu suak thei ngawl hi. Banghangziam cile amate in nganno hau mama uh hi.

⁷Abram ii ngancingte le Lot ii ngancingte kilaklaw ah nasia takin kihauna piang hi. (Tua hunin Canaante le Periz te tua ngamah teang lai uh hi.)

⁸Tuaciang Abram in Lot tungah, “Eite sia beta khat ih hikom, na mite le ka mite kihausak ba tawng.



⁹Kikhen zaw heu tawng. Nang ziatsang na zuan le kei veisang ka zuan tu a, nang veisang na zuan le kei ziatsang ka zuan tu hi,” ci hi.

¹⁰Tuaciang Lot khuadak a, Topa ii huan le Egypt ngam taw a kibang Jordan ngunvaal theampo le Zoar sang dong, tui tam mama a omna mun teng mu hi. (Tua hun sia Sodom le Gomorrah khua Topaii a lalsak ma hun ahi hi.)

¹¹Lot in Jordan ngunvaal theampo ama atu in teal a, nisuana sangah kikhiin hi. Tuabangin amate nii kikhen hi.

¹²Abram sia Canaan ngamah teang a, Lot sia ngam kuam sung khuapite sungah teangin, Sodom khua paam ah ngiaphual saat hi.

¹³Sodomte sia mihing ngilote hi a, Topa tungah nasia takin a khialte ahi uh hi.

Abram Hebron ah Kikhiin

¹⁴Lot ii a nusiaw zawkciang Abram tungah Topa in , “Na omna mun panin mun theampo pha tak en in.

¹⁵Na muna ngam theampo nang le na suan le na paalte tungah kong pia tu a, a tawntungin na lua tu hi.

¹⁶Suan le paal leivui za in tam mama kong pia tu a, leitung ah leivui bangin sim zawk ngawl hi tu hi!

¹⁷Tu in, ngam buppi en tu in pai in, banghangziam cile a vekpi nang tungah kong pia siat tu hi,” ci hi.

¹⁸Tua ahikom Abram in a ngiaphual khiinin, Hebron ngam sung Mamre limkung thiangthote paam ah teang a, tua munah Topa atu in biaknatau khat sa hi.

Pianciilna 14

Abram in Lot Suatak

¹Babylon kumpipa Amraphel, Ellasar kumpipa Arioch, Elam kumpipa Chedorlaomer le Goiim kumpipa Tidal, hi kumpi lite in a nuai a kumpi ngate sim uh hi



²Tuate sia Sodom kumpipa Bera, Gomorrah kumpipa Birsha, Admah kumpipa Shinab, Zeboiim kumpipa Shemeber le Bela (Zoar) kumpipa ahi hi.

³Hi kumpi ngate in kipawl na vawtin tu in Tuipi Thi a kici Siddim Kuam ah a ngalkapte ngawmtua uh hi.

⁴Amate kum sawm le kum nii sung Chedorlaomer khutnuai ah om uh a, ahizong kum sawm le kum thum kum ciang amate in ama leedo kik uh hi.

⁵A kum sawm le li kum ciangin Chedorlaomer le ama taw a kipawl kumpite in a ngalkapte taw sim kik a, Ashteroth Karnaim ah Rephaim, Ham ah Zuzim, Kiriathaim zaanglei ah Emim

⁶le Edom mualte tungah Hor te zo in, senneal ngam paam ah a om Elparan ciang dong del uh hi.

⁷Tuaciang amate nungkin kikin Kadesh (Enmishpat) ah pai in, Amalek ngam theampo le Hazazon Tamar ah a teang Amorte zo uh hi.

⁸Tuaciang Sodom, Gomorrah, Admah, Zeboiim le Bela kumpi ngate in, a ngalkap nei teng kaikhawm in,

⁹Elam, Goiim, Babylon le Ellasar kumpi lite Siddim Kuam ah do uh hi.

¹⁰Siddim Kuam sia kattaza khuk taw kidim a, Sodom le Gomorrah kumpite ngal a tai uh ciangin tua khukte sungah taakin, a dang kumpi thum teng mual tungah tai uh hi.

¹¹Kumpi lite in Sodom le Gomorrahte neisa teng le a an teng la in siapui uh hi.

¹²Amate in Sodom ah a teang Abram suapuipa ii tapa Lot zongh manin, a neisa teng taw siapui uh hi.

¹³Ahizong ngalte khut sung pan a suakta khat in Hebrew mi Abram kungah pai in Lot kimatna thu son hi. Abram sia Amor mi Mamre ii neisa limthing thiangthote hui ah teang hi. Mamre le a suapuite Eshcol le Aner in Abram panpui uh hi.



¹⁴Abram in a tupa a kimatna thu a zaak ciang, a ngalkap 318 te a ngiaphual ah kaikhawm in, a ngal kumpi lite Dan ciang dong del uh hi.

¹⁵Tua munah a ngalkapte khen nii sua in, a zan ciang ngal a sim le zo uh hi. A ngalte sia Damascus khuasaksang Hobah ciang dong del uh hi.

¹⁶Ama in a tupa Lot le a neisa theampo, numeite le a mat mihing teng ciapui kik siat hi.

Melchizedek in Abram Thupha Pia

¹⁷Abram in Chedorlaomer kumpipa le kumpi dangte a zawna pan a cia kik ciang, Sodom kumpipa sia ama mu tu in Shaveh Kuam (Kumpipa Kuam) ah pai hi.

¹⁸Tuaciang Salem kumpipa Melchizedek in an le zu Abram atu in keng hi; Melchizedek sia A Saangbel Pathian ii thiampi zongh hi a, Abram tungah thupha hi bangin pia hi.

¹⁹“Vantung le leitung a vawt A SaangBel Pathian in Abram thupha pia taken!

²⁰Na ngalte hong zosak A Saang Bel Pathian sia kipok taken!” ci hi. Tuaciang Abram in a ngalte tung pan a nga na theampo sung pan sawm a khat Melchizedek tungah pia hi.

²¹Sodom kumpipa in Abram tungah, “Na sutol vanh teng keam in a, ahizong ka mihingte teng hong pia kik tan,” ci hi.

²²Abram in, “Vantung le leitung A Vawtpa, A Saangbel PathianTopa tungah zatakna taw ka kiciam hi,

²³ nangma in, ‘Abram ka hausak hi,’ na ci thei ngei ngawl natu in miimkhau a kipan peangdap khau ahizong, na neisa khat zongh ka la bunu hi.

²⁴Ka mite ii zak sa teng le keima taw a kuankhawm ka mite ii tel tu teng ngawlbuang keima atu in bangma ka la bunu hi. Ahizong keima hong panpui Aner, Eshcol le Mamrete in amate tel tu teng la taken” ci in zokik hi.

Pianciilna 15

Abram le Pathian Thuciamna



¹Hi bangteng zawkciang Abram mu kholna sungah Topa thupiakna za a, Topa in, “Abram awng, lau heak in, Keima in lauhuaina panin nang kong hu tu a, thaman thupi mama khat kong pia tu hi,” ci hi.

²Ahizong Abram in, “Vaanglianpipa Topa awng, tu dong ciang ta nei ngawl ka hi ciang na thaman thupi in kei atu in bang phattuumna hong pia tu ziam? Ka innlua tu pa sia Damascus khua mi Eliezer bekma ahi hi.

³Ta hong pia ngawl na hi ciang ka sila khat in ka neisa teng lua tu hi,” ci in zokik hi.

⁴Tuaciang Topa in ama paupui kik a, “Hi sila Eliezar in na neisate lua ngawl tu a, nangma tapa tatak ma in lua tu hi,” ci hi.

⁵Topa in ama doipua sangah pusuapui a, “Van en in a, aksite sim in, hi za a tam suan le paal na nei tu hi,” ci hi.

⁶Abram in Topa muang a, tua hangin Topa lungkim ahikom thutang in saang hi.

⁷Tuaciang Topa in ama tungah, “Hi ngam teng nangma hong pia tu in, Babylon ngam Ur khua pan hong paipui pa in Keima na Topa ka hi hi, ” ci hi.

⁸Ahizong Abram in, “Vaanglianpipa Topa awng, ka lua natu ngam teng bangbangin he thei tu khi ziam?,” ci in dongh hi.

⁹Topa in “Kum thum a pha khuipui khat, kum thum a pha keal khat, kum thum a pha tuatal khat, inn vakhu khat le ngam vakhu khat hong paipui tan,” ci in zokik hi.

¹⁰Abram in hi nganhing teng Pathian kungah paipui a, phel nii veu sua a phel khat le phel khat ngual nii in ki maingatsak hi; ahizong vacimte pheltham ngawl hi.

¹¹Tua sate tungah vaciikte tuaksuk hi, ahizong Abram in bengkeak hi.

¹²Ni tum ciang Abram mutthip a, ama tungah liinna le launa theng hi.

¹³Topa in ama tungah, “Na suan na paalte ngamdang ah peamta suak tu hi. Amate sia tua munah kum zali sung sila suakin kivawtsia tu hi.

¹⁴Ahizong amate sila in a khoai minamte daan ka pia tu a, tua ngam a nusiat uh ciang neisa tam mama taw amate hong cia tu uh hi.

¹⁵Nangma na hile kicing takin huaikut teakkut in na nungta tu a, thin nuam lung nuamin na thi tu a, hong kivui tu hi.

¹⁶Khang li zawkciang na suan na paalte hi ngamah hong cia kik tu hi, banghangziam cile hi sungah Amorte sia hong khansia mama tu a, daan a kipiak mateng hi mun pan ka notkeak buatu hi,” ci hi.

¹⁷Nitum in khua a zin ciang meikhu a suak meibeal le meikuang sia thakhat thu in kilangh a, nganhing sate kilaklaw kantan hi.

¹⁸Tuaciang tua munah Topa in Abram taw thuciamna khat vawt hi. Ama in, “Na suan na paalte tungah Egypt ngamngi pan Euphrates Ngun dong hi ngam theampo piak tu in kong kamciam hi.

¹⁹Tua ngamte sungah Ken ngam, Kenniz ngam, Kadmon ngam,

²⁰Hit ngam, Periz ngam, Rephaim ngam,

²¹Amor ngam, Canaan ngam, Girdash ngam le Jebus ngamte kihel hi,” ci hi.

Pianciilna 16

Hagar le Ishmael

¹Abram zi Sarai in ta khat zongh nei ngawl hi. Ahizong ama in Egyptte Hagar a kici sila numei khat nei a,

²Sarai in Abram tungah, “Topa in keima ta hong neisak ngawl hi. Ka silanu taw banghang lumkhawm ngawl tu ni ziam? Ama in kei atu in ta khat hong neisak thei tha tu hi,” ci hi. Abram sia Sarai ii ci bang lungkim hi.

³Tua ahiciang Sarai in Hagar sia Abram tungah a zino tu in pia hi. (Canaan ngamah Abram kum 10 a ten zawkciang hi thu piang hi,)

⁴Abram in Hagar ompui a, ama naungil om hi. Ama a ngai hunlam ama in a heak ciang, kiphasak in Sarai zawngsak hi.

⁵Tuaciang Sarai in Abram tungah, “Hiza a, Hagar ii hong zawnsakna sia nangma khialna hang hi. Keima in nangma tungah ama kong pia a, ama a



ngai hunlam ama in a heak ciang, kei hong zawngsak hi. Topa in nang le kei kilaklaw ah thu a maanin hong khen taken,” ci hi.

⁶Abram in, “Hi hi, ama sia na salnu hi a, nangma khut nuai ah om hi; na uk bangpo na vawt thei hi,” ci in zokik hi. Tuaciang Sarai in Hagar vawtsia ahikom, Hagar tai hi.

⁷Topa vantung lalang in Shur lampi senneal ngam ciktui khat ah Hagar mu a,

⁸ama in, “Sarai silanu Hagar awng, koisung pan hong pai a, koisung zot sawm ni ziam?” ci hi. Ama in, “Ka tonu kung pan a tai ka hi hi,” ci in zokik hi.

⁹Vantung lalang in, “Na tonu kungah cia kik tan a, ama sila ma in om tan,” ci hi.

¹⁰Tuaciang vantung lalang in, “Suan le paal tam mama kong pia tu a, kuama in sim zo ngawl tu hi.

¹¹Tapa khat na nei tu a, a min Ishmael na phuak tu hi, banghangziam cile thinkiam in na kaana Topa in za zo hi.

¹²Ahizong na tapa sia ngamlaa khat taw kibang tu a, ama in mihingte theampo langpan in, mihingte theampo in zongh, ama langpan tu hi. A bete theampo taw zong teang khawm ngawl tu hi,” ci hi.

¹³Tuaciang Hagar in, “ Pathian mu tatak khi ziam, tua thu son tu in nungta lai khi ziam?,” ci in ama le ama kidongh hi. Tua hi a, ama a paupui Topa sia, “A Mu Pathian khat” ci in min phua hi.

¹⁴Tua ahikom mihingte in Kadesh le Bered kilaklaw a tuikhuk sia, “Kei Hong mu A Nungta khat ii Tuikhuk, ‘Beer Lahai Roi’ ” ci uh hi.

¹⁵Hagar in Abram taw tapa khat nei a, Abram in a min Ishmael, phuak hi.

¹⁶Tua hun in, Abram sia kum sawmliat le kum luk pha hi.

Pianciilna 17

Vun atna sia Thuciamna Lim



- ¹Abram kum sawmkua le kum kua a phak ciang ama tungah Topakilangh a, “Keima in Vaanglianbelpa Pathian ka hi hi. Ka thu hong ni tan a, thumaan in ngamta tawntung in.
- ²Nangma taw thuciamna ka vawt tu a, suan le paal tam tatak kong pia tu hi,” ci hi.
- ³Abram sia a maitang lei taw a kiphak dong kunsuk a, Pathian in,
- ⁴“Nang taw hi thuciamna ka vawt a, nang in minam tam mama te ii taangpupi na hi tu hi ci in kong kamciam hi.
- ⁵Na min , Abram kici nawn ngawl tu a, Abraham kici zaw tu hi; banghangziam cile minam tam mama te ii taangpupi tu in kong siam zo hi.
- ⁶Keima in suan le paal tam mama kong pia tu a, kimkhatte kumpi suak tu hi. Nangma in suan le paal tam mama na nei tu a, amate sia minam tuatuamte suak tu uh hi.
- ⁷“Ka kamciam ka kipsak tu a, nangma le na suan le na paalte tungah, khang khat zawk khang khat, tawntung thuciamna hi tu hi. Keima in na Pathian ka hi tu a, na suan le na paalte Pathian ka hi tu hi.
- ⁸Tu in peamta khat bangin na omna leitangh sia nangma le na suan le na paalte tungah kong pia tu hi. Canaan ngam theampo na suan na paalte in a tawntungin lua tu a, Keima in amate Pathian ka hi tu hi,” ci hi.
- ⁹Pathian in Abraham tungah, “Nangma le maisang a, na suan na paalte in keima taw ih vawt thuciam sia zui tu na thukim uh kul hi.
- ¹⁰Nangma le na suan na paalte in no sung pan a piang pa a minpiang theampo in vun at tu na thukim uh kul hi.
- ¹¹Tu pan kipan note sung pan a sua zawk ni liat a pha pa peuma, vun ki at tu a, na innsung suak salte le ngamdang pan na lei salte zongh kihel tu hi.
- ¹²Note vun ki-at na in, keima le note kilaklaw a kiciamna khat a om sia, lim lak tu hi.



¹³A kuama po vun ki at siat tu hi. Hi sia in note taw ka kiciam na kip tawntung hi ci in a kilangh natu na pumpi tungah tepteena khat hi tu hi.

¹⁴Pasal a minpiang vun a ki at ngawl peuma keima mihing khatin ki ngaisun nawn ngawl tu hi. Banghangziam cile ama in keima taw kiciamna paltan hi,” ci hi.

¹⁵Pathian in Abraham tungah, “Na zi sia Sarai na ci nawn buatu hi, tu pan kipan ama min Sarah hi tu hi.

¹⁶Ama thupha ka pia tu a, ama taw tapa khat kong pia tu hi. Ama thupha ka pia tu a, ama in minamte ii nu hi tu hi. Ama suan le paal sung pan kumpite piang tu hi,” ci hi.

¹⁷Abraham sia a maitang lei a phak dong kunsuk a, ahizong hi bang thu teng a ngaisut ciang a nuiza hi; “Kum zakhat a pha pasal khat in ta khat nei thei laithong tu ziam? Kum sawmkua a pha Sarah in ta khat nei thei laithong tu ziam?” ci hi.

¹⁸Ama in Pathian tungah, “Banghangin, Ishmael sia ka inn lua tu suaksak ngawl tu ni ziam?” ci in dongh hi.

¹⁹Ahizong Pathian in, “Hi ngawl hi, na zi Sarah in nang atu in tapa khat hong nei tu a, a min Isaac na phuak tu hi. Ama tung ahizong a suan le a paalte tung ahizong ka thuciamna sia a tawntungin ka kipsak tu hi. Banghangziam cile a tawntung a kip thuciamna ahi hi.

²⁰Ishmael atu in, nong ngetna ka za zo hi. Tua ahiciang ama thupha ka pia tu a, tu le ta, suan le paal tam mama ka pia tu hi. Ama in kumpi sawm le nii te ii pa hi tu a, a suan le a paalte sia minam lian mama ka suaksak tu hi.

²¹Ahizong mai kum tu bang hun ciangin Sarah sung pan hong suak tu na tapa Isaac taw ka thuciamna ka kipsak tu hi,” ci hi.

²²Abraham tungah a thuson tu teng a man ciang, Pathian in Abraham nusia hi.



²³Tua ni mama in, Abraham in Pathian ci bangin a thu ni a, ama tapa Ishmael ahizong, a innsung suak pasal a minpiang theampo le sum taw a lei sila theampo le a innsung suak sal theampo ii vun atsak hi.

²⁴Abraham vun a ki at lai in kum sawmkua le kum kua pha hi.

²⁵Tua hun in, a tapa Ishmael kum sawm le kum thum pha hi.

²⁶Ni khat sungin, amate pata in

²⁷Abraham ii salte theampo taw vun at khawm uh hi.

Pianciilna 18

Abraham tungah Tapa Khat Kikamciam

¹Topa sia Mamre lim kungah a om Abraham tungah kilangh hi. Abraham sia a puanbuk kongbiang ah, sun nisat bel laitakin to hi.

²Ama khua a etto le a mai ah mihing thum a ding mu hi. Ama in amate a mu po ciang a muak tu in tai a, a maitang lei a phak dong kunsuk in,

³ama in, “Syate awng, nong hesuakna uh in hong kantan ngawlin ka inn ah hong tawlna tavun; keima in note leangna in kong do nuam hi.

⁴Na peang sil natu tui kong toai tu a, hi thingkung nuai ah na tawlna tu uh hi.

⁵An zongh ka na la tu a, tua an in na khualhaw natu tha hong hatsak tu hi. Vaang nong piakna in ka inn hong theng zo na hi uh ciang, zin hong dosak tavun,” ci hi. Amate in, “Lungdam ung, hong saang ung,” ci uh hi.

⁶Abraham a puanbuk sungah tai in Sarah tungah, “ Na anvui a pha belte law thum bang la in anluum in em pai in ” ci hi.

⁷Tuaciang ama in a ngan khoaina ah tai in a ngannote sung pan a limcibel khat tealin, a naseampa tungah neak thei tu in vawt memeang tan, ci in a naseampa sawl hi.

⁸Tuaciang ama in, khuinoai malai, khuinoai, khuisa le an la in amate mai ah lui hi. Ama in tuabangin thingkung nuai ah a zinte leangna do in nesak hi.



⁹Tuaciang leangnate in ama tungah, “Na zi Sarah koisung om ziam?” ci hi. Ama in, “Puanbuk sungah om hi,” ci in zokik hi.

¹⁰Leangnate sung pan khat in, “Tu zo tha kua ciang kong pai kik tu a, na zi Sarah in tapa khat nei tu hi,” ci hi. Sarah in a pasal nungsang puanbuk kong pan ngai hi.

¹¹Abraham le Sarah sia huai mama zo a, Sarah ahile a tha sim numei ngeina zongh kang zo hi.

¹²Tua ahikom Sarah ama nguakin nui a, “Tu in kei sia ka kum tamin huai zo a, numei le pa taw kisai nopsakna nei thei lai thong tu khi ziam? Ka pasal zongh la huai zo si hi, ” ci hi.

¹³Tuaciang Topa in Abraham tungah, “Banghang Sarah nui a, ka kum a ham mama zawkciang ta nei thei takpi lai tu khi ziam? Banghangin ci ziam?”

¹⁴Na khat pawpo Topa atu in a haksa leilam om na ziam ? Kong ci sa bangin tu zo tha kua ciang kong pai kik tu a, Sarah in tapa khat nei tu hi, ” ci hi.

¹⁵Tua thu a zaak ciang Sarah lau ahikom, “Kei ka nui bua hi” ci in nial hi. Ama in, “Hi hi, nui ni hi” ci in zokik hi.

Abraham in Sodom atu Ngetsak

¹⁶Tuaciang leangnate in nusia a Sodom khua a etsuk theina munah pai uh hi. Abraham in amate tha hi.

¹⁷Tuaciang Topa in, “Ka hi tu thu teng Abraham tungah ka im nawn buatu hi.

¹⁸Ama ii suan le paalte minam lian khat le a thahat minam khat suak tu a, ama tungtawn in leitung minam theampo thupha ka pia tu hi.

¹⁹A suan a paalte in ka thu ni a, thumaan thutak a vawt thei natu in thu a piak thei natu in ama ka teal zo hi. Ta bang a vawt uh le ka kamciamsa theampo bangin ama tungah ka tungsak tu hi,” ama le ama kici hi.

²⁰Tuaciang Topa in Abraham tungah, “Sodom le Gomorrah a ki mawsiatna, nasia mama a, a mawna uh lian mama hi.



²¹A kimawsiatna ka zaak teng maan ziam maan ngawl ziam kantel tu in ka paisuk tu hi,” ci hi.

²²Tuaciang Abraham ii leangnate nii sia Sodom sangah pai a, ahizong Topa sia Abraham taw taanglai hi.

²³Abraham in Topa neak a, “Mawnei ngawlte mawnei te taw thatlum khawm takpi tu ni ziam?”

²⁴Sodom khuapi sungah khial nei ngawl mihing sawmnga om le khuapi a vekpi in lalcipsak tu ni ziam? Tua sawmnga te hu tu in tua khuapi khoaikhe ngawl tu ni ziam?

²⁵Mawnei ngawl te mawneite taw thatlum khawm ngei ngawl tu ni hi. Tuabang vawt heak in tuabang vawt thong lete mawnei te bangma in mawnei ngawlte zongh daan thuak tu hi thong hi. Suak thei bo. Leitung buppi thu a khen tu pa in thu a maan in a khen kul tu hi,” ci in dongh hi.

²⁶Topa in, “Sodom khuapi sungah khial nei ngawl mihing sawmnga mu thong leng, amate hangin khuapi ka khoaikhe tu hi,” ci in zokik hi.

²⁷Abraham in, “Topa awng, hi bangin hangsan takin kong ci kik sia hong maisak tan. Kei mihing khat hi lel a, nang tungah thu son natu thu ka nei bua hi.

²⁸Sonteena in, khial nei ngawl mihing sawmnga om zo ngawlin sawmli le nga bek om thong le mihing nga a kispna hangin khuapi na lalcipsak veve tu ziam?” ci kik hi. Topa in mipha sawmli le nga mu thong leng tua khuapi ka lalcipsak buatu hi,” ci in zokik hi.

²⁹Abraham in, “Mipha sawmli bek om thong le eh!” ci kik hi. Topa in mipha sawmli om thong le ka lalcipsak buatu hi,” ci in zokik hi.

³⁰Abraham in, “Topa awng, na thin uuk heak in a, thu khat kong dong lai tu hi. Mipha sawmthum bek om thong le bangbang ahi tu ziam?” ci hi. Topa in, “Sawmthum om thong le ka lalsak buatu hi,” ci hi.



³¹Abraham in, “Topa awng, nang tungah thu kong son ngam lalai na hong maisak tan. Sontena in, kul bek om thong le eh! ” ci hi. Topa in, “Kul a om le ka lalcipsak buatu hi,” ci hi.

³²Abraham in, “Topa awng, thin uuk heak in a, khat vei bek thu hong sonsak lai tan, sawm bek om thong le eh?” ci hi. Topa in, “Sawm a om le ka lalcipsak buatu hi,” ci hi.

³³Abraham taw a thu son tu teng a man zawkciang, Topa paisuak a, Abraham sia inn ah cia hi.

Pianciilna 19

Sodom mite Khialna

¹Vantung lalang niite Sodom ah nitak in a thet laitak khuapi kongpi ah Lot to hi. Lot in, amate a mu pociang thakhat thu dingin amate muak hi. Amate mai ah Lot kunin,

²“Syate awng note leangna hong do tu in kei hi sungah ka om hi. Nong hesuakna in, ka inn ah hong tung tavun. Na peangte silin tu zan hong ngiak tavun a, zingsang ciang tho palin na pai natu uh na pai pheang tu uh hi,” ci hi. Ahizong amate in, “Hi ngawl hi, khuapi tualpi ah tu zan ka ngiak tu uh hi,” ci in zokik hi.

³Lot in amate nasia tak kunh ahikom Lot inn ah ngiak zaw uh hi. Lot in a naseamte sawl a, tol saw ngawl anluum emsak in amate nitak an vak hi.

⁴A leangnate a lup ma in Sodomte a moi a ham hong pai in a inn kiim uum uh hi.

⁵Amate in Lot sam a, “Tu nitak na inn ah hong tung na leangnate koisung ah om ziam? Ko kungah hong pusua tan” ci uh hi. Sodom mite in amate khialpui nuam hi.

⁶Lot pusuak in innkha khak kik hi.

⁷Lot in amate tungah, “Lawmte awng, hi bang ngamtat pha ngawl nong ngamtat ngawl natu uh in hesuak kong ngen hi.



⁸Hi sungah, ngaknu thiangtho ta numei nii ka nei hi. Note kungah amate kong paipui tu a, na uuk bang uh in ompui thei tu nu hi. Ahizong hi mite bangma lawsak heak vun; keima leangnate ahikom ka kepcing kul hi,” ci hi.

⁹Ahihang amate in, “Nang peamta pa, hong pial tan! Ko bang seam tu ci hong sawl sia akua ni ziam? Hong pial tan, tua ahibuale amate ka vawtsiat za sangin a nasia zaw in nang kong vawtsia zaw tu uh hi,” ci uh hi. Amate in Lot a nung sangah sawnin, innkhate sutham tu in pai uh hi.

¹⁰Ahizong inn sung a om a leangnate nii in a khut hong zam uh a, amate omna inn sungah Lot kai in innkha khak uh hi.

¹¹Tuaciang amate in, kong pua sangah a om mi theampo a mit uh tawsak ahikom amate in innkha mu thei nawn ngawl uh hi.

Lot in Sodom Nusia

¹²A leangnate nii in Lot tungah, “Hi khua sungah mealheak dang na nei ziam? Tapate, tanute, maakte na nei le hi mun panin pusua pui in;

¹³banghangziam cile hi khua lalcipsak tu khu hi. Topa in hi mihingte a kimawsakna thu za zo ahikom Sodom khua lalcipsak tu in ko hong puak hi,” ci in son hi.

¹⁴Tuaciang Lot pai in a tanute ii a tenpui tu a mak tute tungah, “Manlang in hi mun pan pai vun; Topa in hi khuapi lalcipsak tu hi,” ci hi. Ahihang a mak tute in ciammui thu son bangin ngaisun uh hi.

¹⁵Zingsang khuavak ciang vantung lalangte in Lot tungah, “Manlang in khuapi a ki lalcipsak ciang na suatak thei natu in, na zi le na ta numeite nii taw tai tavun,” ci hi.

¹⁶Lot sia a thinkaa lai hi. Bangbang hi kale Topa in ama hesuak ahikom leangnate in ama le a zi a tanute nii a khut taw lenin khuapi pua sangah taipui hi.

¹⁷Tuaciang vantung lalang khat in, “Na nuntak natu in tai vun! Nungsang en kik heak vun a, zaangtam zongh ah tawlnga heak vun. Hong kithalup ngawl natu in mual tungah tai tavun,” ci hi.



¹⁸Ahizong Lot in, “Hi ngawl hi, Topa awng, tuabangin hong ngamta sak heak in.

¹⁹Nangma in maipha nong pia zo a, ka nuntakna nong suatak zo hi. Ahizong mualte khuala ahikom lalna siatna in kei hong pha tu a, tua mun ka thet ma ka thi tu hi.

²⁰Ngalkhat ah khuano sia na mu ziam? Tua khua sia nai ngawp hi. Tua khua sia no lel a, tua munah hong taisak lete ka suakta tu hi,” ci in zokik hi.

²¹Ama in, “Na ci bangin ka lungkim hi. Tua khua ka lalcipsak buatu hi.

²²Manlang in tai in! Tua khua na thet mateng bangma ka vawt buatu hi.” ci in zokik hi. Banghangziam cile Lot in tua khua sia khuano ci ahikom, Zoar ci in kiphuak hi.

Sodom le Gomorrah Bona

²³Zoar ah Lot a thet ciang ni suak hi.

²⁴Topa in thakhat thu in Sodom le Gomorrah khuapi tungah kan meikuang zusak a, tuaciang

²⁵Sodom le Gomorrah le zaangtam theampo, tua munah a teang mihingte theampo le leitung ah a po theampo mon siat hi.

²⁶Ahizong Lot ii zi sia nungsang en kik ahikom cikhuam khat suak hi.

²⁷A zing ciang zingtuung in Abraham sia Topa taw a kimu ngeina munah manlang takin pai hi.

²⁸Ama in Sodom le Gomorrah le zaangtam theampo en suk a, meiphual pi khat pan meikhu suak taw a kibang lei pan meikhu suakto mu hi.

²⁹Ahizong Pathian in Lot ii teenna zaangtam ii khuapite a lalcipsak ciang a thin sungah Abraham mangil ngawl ahikom Lot suaktasak hi.

Moabte le Ammonte Pianna

³⁰Lot in Zoar khua ah ten tu lauhuai sa ahikom a tanute nii taw mual tungah kaato in suanghawng khat sungah teang uh hi.



³¹A unu in a nau tungah, “Ih pa la, huai zo a, ta ih nei thei natu in hi leitung ah ih tenpui thei tu pasal khat zongh om ngawl hi.

³²Hong pai tan, ih pa taw lumkhawm in ta ih nei thei natu in ih pa zu khamsak tawng,” ci hi.

³³Tua ni zan in amate in a pa zu pia a, a tanu uzaw taw lumin omkhawm hi. Ahizong a pa in zu kham lei ahikom a omkhop hunlam he ngawl hi.

³⁴A zing ciang a unu in a naunu tungah, “Zeini zan in ih pa taw ka lumkhawm hi; tu zong zu ih khamsak kik tu a, nangma taw na lumkhawm tu hi. Tuabangin ih unau in ih pa taw ta khat veve ih nei tu hi,” ci hi.

³⁵Tua hi a, tua ni zan in, a pa zu khamsakin, a naunu le a pa lumin omkhawm hi. A pa zu kham kik ahikom a tanu taw lumin a omkhop hunlam he ngawl hi.

³⁶Tuabangin Lot ii ta numeite ngeal sia a pa taw nau hong paai uh hi.

³⁷A tanu uzaw in tapa khat hong nei a, Moab ci in minphuak hi. Ama in tu hun a, Moabte ii pianna taangpupi ahi hi.

³⁸A tanu nozaw zongh in tapa khat hong nei a, Benammi ci in min phuak hi. Ama in tu hun a Ammonte pianna taangpupi ahi hi.

Pianciilna 20

Abraham le Abimelech

¹Mamre pan Canaan thangsang ah Abraham paisuk a, Kadesh le Shur kilaklaw ah teang hi. Tua zawk Gerar ah a ten lai in,

²Abraham in a zi Sarah sia ka suapuinu hi, a ci hu in Gerar ngam Kumpipa Abimelech in a zi tu in la hi.

³Zan khat Abimelech ii mang sungah Pathian kilangh a, “Hi numei na laak hu in, na thi tu hi; banghangziam cile ama in pasal neisa ahi hi,” ci hi.

⁴Ahizong Abimelech in Sarah luppui ngawl lai hi. Tuaciang ama in, “Topa awng, ama khialpui ngawl khi hi. Tua ahiciang kei le ka mihingte hong that tu ni ziam?”



- ⁵Abraham in, ka suapuinu hi hong ci a, Sarah zongh in ka upa hi, hong ci hi. Tua ahikom ki thasunna nei ngawlin ngamta ka hi a, ka khial bua hi,” ci hi.
- ⁶Pathian in a mang sungah, “Hi hi, ki thasunna nei ngawlin na ngamtatna thu kong he a, kei tungah nong khial ngawl natu le ama na thuthak ngawl natu in kong keam hi.
- ⁷Tua ahiciang tu in, numeinu sia a pasal tungah pia kik in. A pasal sia kamsang khat hi a, na thi ngawl natu in thu hong ngetsak tu hi. A zi na pia kik bua ahile nangma a kipan na mihingte theampo na thi siat natu thu kong telkholsak hi,” ci hi.
- ⁸A zing ciang zingsang tuungin Abimelech in a naseamte samin, thupiang teng amate tungah son a, amate lau mama uh hi.
- ⁹Tuaciang Abimelech in Abraham samin, “Kote tungah bang teng hong vawt ni ziam? Kei le ka kumpi ngam sungah siatna lianpi khat nong thuaksak natu in nang tungah bang khialna hong vawt khi ziam? Kei tungah nong vawt bangin kuama in hong vawt ngei ngawl hi.
- ¹⁰Banghangin hi bang hong vawt ni ziam?” ci in dongh hi.
- ¹¹Abraham in, “Hi munah Pathian a thasia khat zongh om ngawl tu ahikom ka zi a dei manin kei hong thatlum tha tu hi, ci in ka ngaisun hi.
- ¹²Ama sia ka suapuinu tatak hi; pa khat ii ta ka hi uh a, ka nu uh kibang ngawl ahikom ka tenpui hi.
- ¹³Pathian in ka pa inn pan hong pusuaksak a, ngamdang ka zot uh ciangin Sarah tungah, “Kei tungah na thumaanna nong lak thei natu in, kei sia mi theampo tungah ka suapuipa hi nong ci tu hi, ci in ka sawl hi,” ci in zokik hi.
- ¹⁴Tuaciang Abimelech in Abraham tungah Sarah pia kik a, tuu, khui le silate taw zong pia khawm hi.
- ¹⁵Ama in Abraham tungah, “Hi ngam theampo keima aa hi, na ukna po ah teang in,” ci hi.



¹⁶Ama in Sarah tungah, “Na suapuipa tungah nguntang tulkhat ka pia hi; nang taw a om mi theampo mai ah maw nei ngawl na hina, a kilak natu hi a, khialna bangma vawt ngawl hi, ci in a kuama po in hong he tu hi,” ci hi.

¹⁷⁻¹⁸Abraham ii zi Sarah tungah a kilawm ngawl a vawt hu in, Topain Abimelech inn sung a om numei theampo ta nei thei ngawl tu in vawt hi. Tuaciang Abraham in Abimelech atu thu ngetsakin, Pathian in Abimelech le a zi le a sila numei theampo damsak siat a, tate zongh nei theisak kik hi.

Pianciilna 21

Isaac Suana

¹A kamciam sa bangin Topa in Sarah thupha pia hi.

²Sarah naupaai in Abraham huai zawkciang Abraham taw tapa khat nei hi. Pathian in tapa khat na nei tu hi a ci hunin nei hi.

³Abraham in a tapa min Isaac phuak hi.

⁴Pathian thupiak bangin Isaac ni liat a cin ciang Abraham in a vun atsak hi.

⁵Isaac a sua in Abraham kum zakhat pha hi.

⁶Sarah in, “Pathian in thinnopna le nuina hong pia zo hi. Hi thu a za peuma in hong nuipui tu hi,” ci hi.

⁷Tua zawkciang, “Sarah in nau noai pia tu hi, ci in akua in Abraham tungah son ngei ziam? Ahizong a huai zawkciang ama atu in tapa khat ka nei zo hi,” Sarah in ci hi.

⁸Nauno hong khang a, noai a kitensak ni in Abraham in anneak poai lian khat vawt hi.

Hagar le Ishmael Kihawlkeak

⁹Nikhat ni in, Abraham taw a nei Egyptmi Hagar tapa Ishmael le Sarah tapa Isaac kimai hi.

¹⁰Sarah in a mu ciang Abraham tungah, “Hi sila numei le a tapa hawlkeak in. Ka tapa Isaac ii lua tu mun le ngam le haunate hi silanu ii tapa in tawmbeak zongh nga heak hen,” ci hi.



¹¹Abraham a thinngim mama hi, banghangziam cile Ismael zongh ama ta ma ahi hi.

¹²Ahizong Pathian in Abraham tungah, “Hi tapa le na silanu Hagar huvau in thinngim heak in. Sarah hong ci bang pawpo in seam in; banghangziam cile kong kamciamsa bangin suan le paalte Isaac tungtawn in na nei tu hi.

¹³Na silanu ii tapa tung zongh ah ta tam mama ka pia tu a, amate minam khat suak tu uh hi. Ama zongh nangma tapa ahi hi,” ci hi.

¹⁴A zing ciang zingtuung in, Abraham in Hagar tungah an le savun thawl khat dim tui pia hi. Ama in a tapa, a nu nungzaang ah suan in paisak hi. Hagar pai in Beersheba duisung tengah vak kawkoai hi.

¹⁵A tui ken teng a bo ciang ama in sawlpaang nuai khat ah a tapa nusia a,

¹⁶pi zathum bang a khuala na mun khat ah tosuk hi. Ama le ama, “Ka tapa thi ka en ngam buatu hi,” kici in a to mun panin kap hi.

¹⁷Pathian in patang kaana aw za hi. Pathian vantung lalang in vantung pan Hagar paupui a, “Hagar awng, bang in nang hong thinngimsak ziam? Lau heak in! Pathian in patang kaana awnging za zo hi.

¹⁸Ding in, pai in patang la in a, heeneam in. Ama ii suan le paal sung pan minam lian khat ka suaksak tu hi,” ci hi.

¹⁹Tuaciang Pathian in Hagar mit vaksak a, ama in tuikhuk khat mu hi. Ama pai in savun tuithawl taw tui dim a, pawlkhat patangpa pia hi.

²⁰Patangpa hong khangin Pathian in ompui hi. Ama Paran dui sungah teang a, savai thiam mama khat suak hi.

²¹A nu in Egypt numei khat a zi tu in puisak hi.

Abraham le Abimelech Thukimna

²²Tua hun in Abimelech le a ngalkap hon ukpa Phicol, Abraham kungah pai in, “Na nasepna po ah Pathian in hong ompui hi.

²³Tua ahikom kei le ka suan le ka paalte nong theam ngawl natu in, Pathian mai ah kiciamna khat vawt in. Nang tungah kong thumaan zo hi; tua



ahiciang kei tung le hi na teenna ah nong thumaan natu in kamciam vawt in,” ci hi.

²⁴Abraham in, “Kong kamciam hi,” ci hi.

²⁵Abimelech ii naseamte ii a sutol tuikhuk taw kisai, Abraham in a lungkim ngawl na thu Abimelech tungah son hi.

²⁶Abimelech in, “Akua in hong sut ziam, ka he bua hi. Nangma le na nong son ngei bua a, tu a sia ka zaak ciilna hi,” ci hi.

²⁷Tuaciang Abraham in tuu le khui pawlkhat Abimelech pia in, amate nii in thukimna khat vawt uh hi.

²⁸Abraham in tuuhon sung panin tuuno sali tuamkoi a,

²⁹Abimelech in ama tungah, “Banghang hi bang hi ni ziam?” ci in dongh hi.

³⁰Abraham in, “Hi tuuno salite hong sang tan. Hi bang nong saanna in hi tuikhuk a to sia keima ka hina thu nong pualaak na ahi hi” ci in zokik hi.

³¹Tua hu in tua mun sia, Beersheba kici hi; banghangziam cile amate nii tua munah kiciamna khat vawt uh hi.

³²Beersheba ah hi kiciamna a vawt zawkciang, Abimelech le Phicol, Philistia ah cia kik uh hi.

³³Tuaciang Abraham in Beersheba ah makeang kung khat suan a, Tawntung Pathian, Topa bia hi.

³⁴Philistia ngamah Abraham khua ngei ma teang hi.

Pianciilna 22

Isaac A piak natu in Pathian in Abraham Thupia

¹Tawmvei zawkciang Pathian in Abraham ze et a; “Abraham awng!” ci in sam hi. Abraham in, “Topa awng, hi sungah om ing,” ci in zo hi.

²Pathian in, “Na it, na tapa khatbek na nei Isaac taw Morriah ngamah pai in. Tua mun, kong lak tu mual khat tungah keima nong biak natu in Isaac nong pia tu hi,” ci hi.

³A zing ciang zingsang tuungin Abraham in biakpiak natu in thing tawm tan a, a laa tungah suan in a tapa Isaac le a naseamte nii taw in, Pathian ii sawlna munah pai tu in ding uh hi.

⁴A ni thum ni ciangin Abraham in tua mun ngalmu hi.

⁵Tuaciang ama in a naseamte tungah, “Hi lai ah laa taw na om vun. Kei le ka tapa sia zialai ah Pathian ka bia tu uh a, tua zawkciang kong cia kik tu uh hi,” ci hi.

⁶Abraham in biakpiak natu thing, Isaac tungah suan a, ama in nam khat le meitaw natu meikam keng hi. Amate a pata a paikhop kakawm in

⁷Isaac in, “Pa awng ” ci hi. A pa in, “Bangziam ka ta awng,” ci in zokik hi. Isaac in, “Mei le thing na ken ka mu a, ahizong biakpiak natu tuuno koisungah om ziam?” ci in dongh hi.

⁸Abraham in, ‘Pathian in hong sik tu hi,’ (*Jehovah Jireh*) ci in zokik hi. Tuaciang amate pata pai khakhawm uh hi.

⁹Pathian ii a sonkholna mun a thet ciang, Abraham in biaknatau khat vawt a, a tungah thing koi hi. Ama in a tapa letheen in biaknatau tung thing tungah koi hi.

¹⁰Tuaciang ama in a tapa thatlum tu in a nam dok hi.

¹¹Ahizong Topa vantung lalang in vantung pan, “Abraham awng, Abraham awng!” ci in sam hi. Ama in, “Topa awng, hi sungah om ing,” ci in zokik hi.

¹²Vantung lalang in, “Na tapa liamsua heak in; zongh ama bangma law heak in. Pathian thu na nitna le na zatakna, tu in ka he hi. Banghangziam cile tapa khatbek na nei kei atu in na haza bua hi,” ci hi.

¹³Abraham khuadak kawkoai a, sawlpaang sungah a kii pan a awk tuutal khat mu hi. Ama pai in tua tuutal man a, a tapa taangin meihal biakpiakna khatin zangh hi.



¹⁴Abraham in tua mun sia Topain hong sik hi ‘Jehovah Jireh’ ci in min phuak hi. Tuni dong ciang mihingte in “Topa ii mual ah na theampo Topa in hong sik hi,” ci uh hi.

¹⁵Topa vantung lalang in vantung pan Abraham a nii veina sam a,

¹⁶“Topa cina ah — Keima min taw kiciamna khat ka vawt hi. Thupha tam tatak kong pia tu hi, banghangziam cile hi thu na vawt zo a, na tapa khatbek na nei kei atu in na haza bua hi.

¹⁷Na suan na paalte van ah aksi za le tuipihui senvui za in tam mama ka phasak tu hi, ci in kamciam kong pia hi. Na suan na paalte in a ngalte zo tu uh hi.

¹⁸Nangma suan le paalte tungah thupha ka piak bangin minam theampo in thupha kei tungah hong ngen tu uh hi; banghangziam cile nangma in ka thupiak na nit hang ahi hi,” ci hi.

¹⁹Abraham sia a naseamte kungah cia kikin, Abraham teenna mun ahi, Beersheba ah amate taw ciakhawm tek uh hi.

Nahor ii Suan le Paalte

²⁰Tawmvei zawkciang Abraham in, a suapuipa Nahor in a zi Milcah taw ta liat a neina thu he hi.

²¹Uz sia a ubel hi a, a suapuite sia Buz, Aram ii pa Kamuel,

²²Chesed, Hazo , Pildash, Jidlaph le Bethuel ahi hi.

²³Bethuel sia Rebecca ii pa ahi hi. Milcah in Abraham suapuipa Nahor taw hi tapa liat teng nei hi.

²⁴Nahor zino Reumah in ta, Tebah, Gaham, Tahash le Maacah te nei hi.

Pianciilna 23

Abraham in Sarah Phum natu Thaan khat Lei

¹Sarah sia kum 127 nungta hi.

²Canaan ngam Hebron ah ama thi a, Abraham khuangai hi.

³Ama in tua munah a zi luang nusia in, Hit te kungah pai a,



⁴“Keima in note sungah peamta khat ka hikom ka zi phum natu in, na leitangh uh tawm hong zuak tavun,” ci hi.

⁵Amate in,

⁶Kote Topa awng, hong ngai tan. Nangma in kote sungah lampui lian khat na hikom ka thaane nei uh a phabel sungah na zi phum in. Na zi phum natu thaane ahile kote in lungdam takin kong pia uh hi,” ci in zokik uh hi.

⁷Tuaciang Abraham in amate mai ah kunin, hi bang ci hi

⁸“Hi munah ka zi ka phum tu, na lung uh a kim le nong hesuakna in Zahar tapa Ephron tungah,

⁹Machpelah suanghawng hong zuak natu in hong ngetsak tavun a, tua in ama lo kingh ah om hi. Thaan leitangh ka nei thei natu in, note theampo mai ah, a manh a cing taw kei hong zuak natu in hong ngetsak tavun,” ci hi.

¹⁰Tuabangin, Hitte kikhoptua na khuapi kongbiang ah Ephron zongh om a, mipite zaakin a zokikna pan;

¹¹Topa awng, hong ngai tan; suanghawng omna tua ka lo a vekpi in, nang kong pia tu hi. Hi munah a om, ka mipuite ii mai ah tua ka lo na zi na phum thei natu in, nang tungah kong pia tu hi,” ci hi.

¹²Ahizong, Hitte mai ah Abraham kun a,

¹³mipite zaak tu in Ephron tungah, “Hesuakna taw hong ngai tan, na lociing bup kong lei tu hi. A manh hong saang tan. Tua munah ka zi ka phum tu hi,” ci hi.

¹⁴Ephron in,

¹⁵Topa awng, tua leitangh in nguntang zali bek manh a, nang le kei kilaklaw ah son thamman na ziam? Tua munah na zi phum tan,” ci in zo hi.

¹⁶Mipite zaak a, Ephron ii a sonna bang Abraham lungkim in, sumzuakte ii a zak khaisuang taw kizui in nguntang zali pia hi.



¹⁷Tuabangin, Mamre nisuana sang, Ephron ii neisa Machpelah longam sia Abraham neisa suak hi. A sungah a om, lo, suanghawng le thingkung theampo zongh ama neisa hi siat hi.

¹⁸Tua munah a kikhawm Hitte theampo in Abraham neisa a hina thu heakpui siat uh hi.

¹⁹Tuaciang Abraham in, Canaan ngamsung tua suanghawng ah a zi Sarah phum hi.

²⁰Tua hi a, Hitte neisa ahi tua lo le suanghawng sia mithi phumna than leitangh khat tu in, Abraham neisa suak hi.

Pianciilna 24

Isaac atu Zi

¹Tu in Abraham huai mama a, Topa in a sepna theampo ah thupha pia hi.

²Ama in a neisa theampo a uk, a naseam upabel tungah, “Ka phei kawmah na khut koi in a, kiciam in.

³Hi sung a, Canaan mihingte sung pan ka tapa zi tu na teal ngawl natu in, vantung le leitung Pathian Topa min taw na kiciam tu ka dei hi.

⁴Ka pianna ngamah pai kikin, ka bete sung pan ka tapa Isaac zi tu na pui tu hi,” ci hi.

⁵Ahizong a naseam pa in, “A numei in a inn nusia nuam ngawlin hi ngamah kei hong zui nuam bathong le bangbangh hi tu ziam? Nong paina ngamah na tapa puak kik tu khi ziam?” ci hi.

⁶Abraham in, “Tua lai ah ka tapa na paipui thak ngawl natu, in kidawm in.

⁷Vantung Pathian, Topa in ka pa inn pan le ka bete ngam pan hong paipui a, ama in ka suan ka paalte tungah hi ngam kong pia tu hi, ci in ciliaphuai takin kamciam pia hi. Tua munah ka tapa atu zi khat na nga thei natu in ama in na mai ah a vantung lalangte sawl tu hi.



⁸A numei in hong zui nuam bua ahile hi kamciam panin, nang na suakta hi. Bangbang po ahizong tua munah ka tapa na heak pui ngei buatu hi,” ci in zokik hi.

⁹Tuaciang a naseam pa in, a Topa Abraham pheii kawmah a khut koi in Abraham ci bang seam tu in kiciam hi.

¹⁰Abraham neisa a uk, a naseampa in a Topa kalaohnte sung pan sawm la in, Mesopotamia iisaksang Nahor teenna khua ah pai hi.

¹¹Tua khua a thet ciang khuapi puasang tuikhuk ah a kalaohnte khupdinsak hi. Tua hun in nitak sang hi a, numeite pusuak in a tuitoai hun ahi hi.

¹²Ama thungen a, “Ka Topa Abraham ii Pathian, Topa awng, ka Topa tung ka kiciamnate tuni in hong tangtungsak tan.

¹³Hi sung, ka dinna mun tuikhuk ah khuasung pan ngaknute tuitoai in hong pai tu uh hi.

¹⁴Keima in numeite khat ii tungah, ‘Tui ka neak thei natu in, hesuakna taw na tuibeal niamsuksak in,’ ka ci tu hi. ‘Ne in, na kalaohnte atu zongh tui kana toai tu hi,’ hong ci le tua nu sia, na naseampa Isaac atu in na teal kholsa numei hi tu hi. Hi bangin hong hi takpi le ka Topa tungah na kamciamte na kholetna kong tel tu hi,” ci hi.

¹⁵A thunget a man maa in, a liangko ah tuibeal a pua Rebecca hong theng hi. Tua nusia, Abraham suapuipa Nahor le a zi Milcahte ii tapa Bethuel ii tanu ahi hi.

¹⁶Tua nu sia, ngaknu thiangtho, a mealpha mama khat hi. Ama tuikhuk sungah tuaksuk a, tui dimin kaato kik hi.

¹⁷Naseampa, tua nu taw kimu tu in tai a, “Hesuakna taw na tuibeal sung panin ka neak tu tui hong pia tan,” ci hi.

¹⁸Ama in, “Ne in, Topa awng” ci in, a liangko pan a tuibeal niamsuksak pai a, tuabangin tui nesak hi.



¹⁹Ama, tui a neak zawkciang, Rebecca in, “Na kalaohnte ii a du zaza a neak tu tui zongh kong toai tu hi,” ci hi.

²⁰Ama in, a tuibeal taw tuitoai in ngan tuikuang sungah sung memeang a, kalaohnte tui a kham mateng tuitoai hi.

²¹Tua pa in, Topa in hong tangtungsak tu ahi tam maw, ci in ngaknu nu encik top hi.

²²Ngaknu nu in, tuateng a man zawkciang, tua pa in a manham khamkual khat la in, ngaknu nu naak ah baasak a, khamhak lian nii la in ngaknu nu khutte ah bulsak hi.

²³Ama in, “Na pa akua ziam, hong son tan, na pa inn ah tu zan ka mite le keima ngia natu mun a om tu ziam?” ci hi.

²⁴Ngaknu nu in, “Ka pa sia Nahor le Milcah ii tapa Bethuel ahi hi.

²⁵Na ngannote atu taangphaw le an kicing ka nei uh a, ngia natu mun zongh ka nei uh hi,” ci in zo hi.

²⁶Tuaciang tua pa khupdin in Topa bia hi.

²⁷Ama in, “Ka Topa Abraham ii Pathian, Topa minthang taken. Topa in ka Topa Abraham tungah a kamciamte tangtung sak zo hi. Ka Topa Abraham ii bete kungah Topa in lam hong lak hi,” ci hi.

²⁸Ngaknu nu sia a nu inn ah tai a, thupiang theampo son hi.

²⁹Tu in Rebecca ii suapuipa Laban sia Abraham ii naseampa omna tuikhuk ah pai tu in tai hi.

³⁰Laban in, a suapuinu naakbaa le a khut tungah hakte a mu ciang le, tua pa in ama tungah hi bang teng hong son hi, ci a, a suapuinu thuson teng a zaak ciang tuikhuk kung, a kalaohnte paam ah a ding Abraham naseampa kungah pai hi.

³¹Laban in, “Kei taw ka inn ah cia tawng. Nangma in Topa thupha piakpa khat na hi hi. Banghangin hi lai ah ding ni ziam? Ka inn ah nangma omna tu le na kalaohnte omna tu mun om hi.” ci hi.



³²Tuaciang tua pa inn sungah pai a, Laban in kalaohthe vanh sua in, kalaohthe taangphaw le an pia hi. Tuaciang ama in, Abraham naseampa le a mite peang sil natu tui paipui hi.

³³An a kilui ciang tua pa in, “Kong son tu teng kong son mateng an ka ne buatu hi,” ci hi. Laban in, “Na son nop teng son in, ” ci hi.

³⁴Ama kipan in, “Keima in Abraham naseampa ka hi hi.

³⁵Topa in ka Topa nasia takin thupha pia a, a hau khat suaksak hi. Ama in, tuuhon, kealhon, khuihon, ngun le kham, sila pate le sila numeite, kalaohthe le laate pia hi.

³⁶Ka Topa ii zi Sarah, a huai zawkciang ka Topa taw tapa khat nei a, a tapa tungah ka Topa in a neisa theampo pia hi.

³⁷Ka Topa in, ama thu a ni tu in hong kiciamsak hi. Ama in, ‘Canaan ngam numeite sung pan ka tapa zi tu na teal buatu hi.

³⁸Tua sangin, ka pa ii mipuite le ka bete kungah na pai tu a, ama zi tu na teal tu hi,’ hong ci hi.

³⁹Tuaciang, keima in ka Topa tungah, ‘A numei in kei hong zui nuam bathong le bangbang hi tu ziam?’ ci in ka dongh hi.

⁴⁰Ama in, ‘A thu ka nit tawntung Topa in a vantung lalangte hong paisak tu a nangma hong tangtungsak tu hi. Nangma in ka mipuite le ka pa innkuan sung panin ka tapa zi tu na pui tu hi.

⁴¹Na kiciamna pan na ton natu lampi khatbek om hi, ka bete kungah na pai ciangin amate in nang hong nial le tuasia ciang nang na tong tu hi,’ hong ci hi.

⁴²“Tuni in, tuikhuk kung ka thet ciang, ka thungetna in, ‘Ka Topa Abraham ii Pathian Topa awng, ka sep tu teng hong tangtung sak tan.

⁴³En in, tuikhuk kungah ka om hi. Ngaknu khat tuitoai tu hong pai ciang a tuibeal sung pan tui neak tu hong piak tu in ka ngen tu hi.



⁴⁴Tui hong pia a, ka kalaohnte atu zongh tui hong pia nu sia, ka Topa tapa ii zi tu in na teal sia hisak in, ' ka ci hi.

⁴⁵Thim dide a ka thunget ka man maa in, Rebecca in a liangko tungah tuibeal pua in, tuitoai tu in tuikhuk ah hong tuaksuk hi. Keima in ama tungah, 'Nong hesuakna in ka dawn tu tui hong pia tan,' ka ci hi.

⁴⁶Ama in, manlang takin a liangko pan a tuibeal niamsakin, ' Ne in, na kalaohnte zongh tui ka pia tu hi,' hong ci hi. Tuaciang kei zongh tui ne a, ka kalaohnte zongh ama in tui pia hi.

⁴⁷Keima in ama tungah, "Na pa akua ziam?" ci in ka dongh hi. Ama in , "Ka pa sia Nahor le Milcah ii tapa Bethuel ahi hi,' ci in hong zo hi. Tuaciangin, a naak ah naakbaa ka khai a, a khut tungah hakte ka bulsak hi.

⁴⁸Khupdin in Topa ka bia hi. Ka Topa Abraham Pathian, Topa ka pok hi. Ama in ka Topa bete kungah hong tonpui zo a, hi munah ka Topa ii tapa atu a tanu ka mu zo hi.

⁴⁹Hi bangteng hi a, ka Topa atu in, thupha na ngaisun thei a, pha hi na ci uhle hong son tavun a, hi thei bo na ci uh le zong hong son tavun; tua hile ka nasep tu zia ka khensat tu hi," ci hi.

⁵⁰Tuaciang Laban le Bethuel in , "Hi thu Topa kung pan hong pai hi a, kote khensat tu hi ngawl hi.

⁵¹Hi sungah Rebecca om hi, ciapui tan. Topa ama mama ii cisa bangin na Topa tapa ii zi tu hi taken," ci in zo hi.

⁵²Abraham naseampa in hi thu teng a zaak ciang, kunsuk inTopa bia hi.

⁵³Tuaciang ama in ngun le kham kizepnate le puante la in Rebecca pia hi. A suapuipa le a nu zongh a manpha letsong pia hi.

⁵⁴Tuaciang Abraham ii naseampa le a mite anne tuidawn in, tua munah zan ngiak uh hi. Amate zingsang a thaw uh ciangin ama in,"Ka Topa kungah hong ciasakkik tavun," ci hi.



⁵⁵Ahizong, Rebecca suapuipa le a nu in, “Ngaknu nu taw nipi khat ahibuale ni sawm bang hong omkhawmsaklai tan; tua zawkciang hong zui thei tu hi,” ci uh hi.

⁵⁶Ahizong ama in, “Kote hong taamsak heak vun. Topa in ka khualhawna hong zosak ahikom ka Topa kungah hong ciasakkik tavun,” ci hi.

⁵⁷Amate in, “Ngaknu nu samin ama in bang a ci ziam, ih dongh tu hi,” ci in zo hi.

⁵⁸Tuaciang amate in Rebecca samin, “Hisia pa na zui paih tu ziam?” ci in dongh hi. Ama in, “Ka zui paih tu hi,” ci in zo hi.

⁵⁹Tuaciang amate in Rebecca le a innkuan ii naseam lui numei sia Abraham ii naseampa le a mite taw paisak uh hi.

⁶⁰Tuaciang amate in hi bangin Rebecca thupha pia uh hi, “Kote suapui nu awng, a tul a makte ii nu suak tan! Na suan na paalte in, a ngalte ii khuapite zo taken!” ci uh hi.

⁶¹Tuaciang Rebecca le a numei khangmoite Abraham ii naseampa taw paikhawm tu in, kithoi a, kalaoh tungah to uh hi. Tuaciang amate theampo pai uh hi.

⁶²Isaac sia, “Kei Hong Mu A Nungta Pa ii Tuikhuk” a kici dui sungah pai in Canaan thangsang ah teang hi.

⁶³Nitak sangin a lo sungah lam a seu le kalaoh te hong pai mu hi.

⁶⁴Rebecca in Isaac a mu ciang kalaoh tung pan tuaksuk a,

⁶⁵Abraham ii naseampa tungah, “Lo sungah vak a, ei sang hong zuan pa akua ziam?” ci in dongh hi. Naseampa in, “Ama sia ka Topa hi,” ci in zo hi. Tuaciang ama in, a mai khuna puan la in, a mai seal hi.

⁶⁶Naseampa in Isaac tungah a nasepna theampo son siat hi.

⁶⁷Tuaciang Isaac in a nu tenna ngei tuipuanbuk sungah Rebecca paipui in Rebecca sia Isaac zi suak hi. Isaac in Rebecca it a, a nu Sarah thi huvau in ama a heeneam nu suak hi.



Pianciilna 25

Abraham ii Suan le Paal Dangte

(1Khang tangthu 1.32-33)

- ¹Abraham in Keturah min nei zi dang khat nei hi.
- ²Ama taw ta Zimran, Jokshan, Medan, Midian, Iskbak le Shuah nei hi.
- ³Jokshan sia Sheba le Dedan ii pa ahi hi. Dedan ii suan le paalte sia Asshurim, Letushim le Leummim te ahi hi.
- ⁴Midian tapate sia Ephah, Ephher, Hanoch, Abida le Eldaah ahi uh hi. Hite theampo sia Keturah ii suan le paalte ahi hi.
- ⁵Abraham in a neisa theampo Isaac pia hi.
- ⁶Ahizong ama nuntak sungin zi dangte taw a nei a tapate tungah letsongte pia hi. A tate sia Isaac kung panin a khuala niswana ngamah paisak hi.

Abraham Thina le Kivuina

- ⁷⁻⁸Abraham sia kum 175 a phak ciang thi hi.
- ⁹A ta Isaac le Ismaelte in Mamre niswana sangah a om, Hit te Zohar ii tapa Ephron ii lo sung, Machpelah suanghawng sungah a pa phum uh hi.
- ¹⁰Tua lo sia Hit te tung pan Abraham ii a lei hi a, Abraham le a zi Sarah tua munah kiphum khawm hi.
- ¹¹Abraham thi zawkciang, “Kei Hong Mu A Nungta Pa ii Tuikhuk” nai ah a teang a tapa Isaac sia Pathian in thupha pia hi.

Ishmael ii Suan le Paalte

(1Khang tangthu 1.28-31)

- ¹²Abraham ii zi Sarah ii sila nu ahi, Egypt mi Hagar ii Abraham taw a nei Ishmael in amate ii suana taw kizui in a nuai a bang tapate nei hi.
- ¹³Tate sia Nebaioth, Kedar, Adbeel, Mibsam,
- ¹⁴Mishma, Dumah, Massa,
- ¹⁵Hadad, Tema, Jetur, Naphish le Kedemah ahi hi.
- ¹⁶Amate sia minam sawm le nite ii pianna taangpupite hi a, amate minte sia khua le ngiaphual munte ii min la in a kiphuak ahi hi.



¹⁷Ishmael sia kum 137 a phak ciang thi hi.

¹⁸Ishmael ii suan le paalte sia Egypt ngam niswana sang Assyria ngam paina lampi, Havilah le Shur kilaklaw ah teang uh hi. Abraham suan le paal dangte sung pan amate peu in a tuamin teang uh hi.

Esau le Jacob Suana

¹⁹Hi sia in Abraham ii tapa Isaac ii tangthu ahi hi.

²⁰Isaac sia, Laban suapui nu ahi, Mesopotamia ngam Arameante Bethuel tanu Rebecca taw a kiten in kum sawmli pha hi.

²¹Rebecca in ta nei ngawl ahikom Isaac in Topa tungah thungetsak hi. Topa in ama thungetna zo a, Rebecca naupaai hi.

²²Ama in naupeang nei tu a, a sua ma in a naubu sungah amate khat le khat kilaai ngawp hi. Ama in, “Banghangin kei tungah hi bang thu hong piang thong ziam?” ci hi. Tuaciang ama in Topa kungah pai in thu dongh hi.

²³Topa in ama tungah “A kingal tu minam nii nang sung pan suak tu hi. Khat sia a dang khat sangin hat zaw tu a, a u zaw in a nau zaw na seam tu hi,” ci hi.

²⁴A nau sua hun a cin ciang ama in tapa peang nei hi.

²⁵A suakciil sia a ci san a, a pum tung theampo mul nei hi. Tua ahikom a min Esau kiphuak hi.

²⁶Khat hong suak kik a, Esau khawtul lensa in hong suak ahikom ama min Jacob kiphuak hi. Amate a sua lai in Isaac kum sawmluk pha hi.

Tapa ciil Esau in A Inluaza Zuak

²⁷Tua patangte hong khang a, Esau sia savai uk in, sakap thiam khat suak hi. Ahizong Jacob sia mihing cinghkamh khat hi a inn ah om hi.

²⁸Isaac in Esau samat sa nene ahikom Esau diksa zaw a, ahizong Rebecca in Jacob diksa zaw hi.

²⁹Nikhat Jacob in beme huanin a om laitak Esau a savaina pan theng hi. Ama a ngil kial a,



³⁰Jacob tungah, “Ngilkial in pukhong khi hi, na metui san tawm hong pia tan,” ci hi. (Tua ahikom ama min Edom kici hi.)

³¹Jacob in, “Na innluaza hong pia lete kong pia tu hi,” ci in zo hi.

³²Esau in, “Hi hen, a thi tu hi lel a, ka innluaza bang a mang tu khi ziam?” ci hi.

³³Jacob in, “Na innluaza nong piak natu hong kiciam masa tan,” ci in zo hi. Esau in kiciam in a innluaza Jacob tungah pia hi.

³⁴Tuaciang Jacob in

Pianciilna 26

Gerar ah Isaac Teang

¹Abraham hun lai in kialpi a tun bek dom ngawlin tu in tua ngam sungah kialpi dangkhat tung hi. Philistinete kumpi Abimelech kung Gerar ah Isaac pai hi.

²Isaac tungah Topa kilangh a, “Egypt ah pai heak in a, kong son tu leitangh ah teang in.

³Hi lai ah teang in, nang taw kong omkhawm tu a, thupha kong pia tu hi. Nang le na suan na paalte tungah hi ngam theampo kong pia tu hi. Na pa Abraham tungah ka kamciam ka tangtungsak tu hi.

⁴Na suan na paalte van ah aksi za in, ka tamsak tu a, amate tungah hi ngam theampo ka pia tu hi. Na suan na paalte thupha ka piak bangin leitung minam theampo in kei tungah thupha hong ngen tu uh hi.

⁵Abraham in ka thu ni a, ka thukhamte le ka thupiakte theampo kholet ahikom, nangma thupha kong pia tu hi,” ci hi.

⁶Tua ahiciang Isaac Gerar ah teang hi.

⁷Tua mihingte in a zi taw kisai thu a dok ciang, ama in “Ka suapuinu hi” ci hi. Ama in ka zi ci ngam ngawl hi, banghangziam cile Rebecca sia a mealpha mama a, tua mite in Rebecca a nga nop manin, ama a thalup tu lau hi.



- ⁸Tua lai ah Isaac tawmvei sung a om zawkciang Abimelech kumpipa in a khelki pan khua a etsuk le, Isaac le Rebecca a kino laitak mu hi.
- ⁹Abimelech in Isaac sam a, “Rebecca sia na zi hi! Banghangin ka suapuinu ci ni ziam?” ci hi. Ama in, “Ama ka zi hi ci leng kei hong kithatlum tha tu ci in ka ngaisun hi,” ci in zo hi.
- ¹⁰Abimelech in, “Ko tungah banghang hi bang hong vawt ni ziam? Ka mite khat pawpo in na zi tungah khialin a maw uh le nangma hang ahi hi,” ci hi.
- ¹¹Abimelech in mihingte theampo kidop natu thupia a, “Hi siapa ahizong, a zi ahizong a vawtsia peuma, kithatlum tu hi,” ci hi.
- ¹²Isaac in tua leitangh ah thai tu a, tua kum in a thaici a tu za sang a tam zaw a za zakhat vei a tam zaw an la hi, banghangziam cileTopa in ama thupha pia hi.
- ¹³Ama a hauna khangto vaial a, mihau mama khat suak hi.
- ¹⁴Banghangziam cile ama in tuuhon, khuihon le naseam tam mama nei ahikom Philistinete in ama eang uh hi.
- ¹⁵Abraham nuntak lai a, a pa Abraham ii naseamte ii a tawsa tuikhuk theampo Philistinete in lei huk siat hi.
- ¹⁶Tuaciang Abimelech in Isaac tungah, “Ko sangin hat zaw zo na hi ciang ngamdang ah tai tan” ci hi.
- ¹⁷Tua ahiciang Isaac in tua mun nusia in Gerar kuam ah ngiaphual saatin, tua munah tawmvei sung teang hi.
- ¹⁸Abraham hun lai a, a taw, Abraham thi zawkciang Philistinete ii lei a huh siat tuikhukte ama in khatvei to kik hi. Tuatte a pa ii min a phua sa bangin Isaac in min phuak hi.
- ¹⁹Isaac ii naseamte in tua kuam ah tuikhuk khat to in tui mu hi.
- ²⁰Gerar tuucingte in Isaac tuucingte taw kihau uh a, “Hi tuikhuk koma aa hi,” ci uh hi. Tua ahikom Isaac in tua tuikhuk, “Kihauna” ci in min phuak hi.



²¹Isaac ii naseamte in tuikhuk dangkhat to a, kihauna om kik leleau ahikom ama in, “Ki etsatna” ci in minphuak hi.

²²Tua mun pan kinin tuikhuk dangkhat to hi. Tua tungtaang ah kinialna om ngawl ahikom ama in, “Suatakna” ci in min phuak hi. Ama in, “Tu in hi leitangh ah ka ten thei natu in, Topa in suatakna hong pia zo ahiciang hi munah eite nuamsa in ih khangto tu hi,” ci hi.

²³Isaac in tua mun nusia in, Beersheba zuan hi.

²⁴Tua ni zaninTopa ama tungah kilangh a, “Keima in na pa Abraham ii Pathian ka hi hi. Lau heak in, nang taw kong omkhawm hi. Nang thupha kong pia tu a, suan le paal tam mama kong pia tu hi, banghangziam cile ka naseampa Abraham tungah ka kamciamna hang ahi hi,” ci hi.

²⁵Isaac in biaknatau khat tua munah vawtin Topa bia hi. Tuaciang tua lai ah ngiaphual saatin, a naseamte in tuikhuk dang khat to hi.

Isaac le Abimelech Thukimna

²⁶Gerar panin Abimelech ngaisutna a pia Ahuzzath le a ngalkap hon ukpa Phicol sia Isaac taw kimu tu in pai hi.

²⁷Isaac in amate tungah, “Kei taw kisi tu in banghang hong pai nu ziam? Nong pawl vawt ngawlina manin na ngam pan hong not hi ngawl nu ziam?” ci in dongh hi.

²⁸Amate in, “Nang taw Topa a om hunlam tu in ka he uh a, eite kilaklaw ah thukimna khat vawt tu in ka ngaisun uh hi. Ko deina kamciam in,

²⁹kote in nang kong siatsak ngawl bangma in, nang zongh in kote nong siatsak ngawl natu ahi hi. Na tungah kong thuthiam uh a, thin nuam takin kong paisak uh hi. Topa in nang thupha hong piak sia tu in ka tel uh hi,” ci in zo hi.

³⁰Isaac in amate atu in anneak poai khat vawtsak a amate anne in tui dawn uh hi.

³¹A zing ciang zingtuung in misim in kiciamna vawt a, kipsak uh hi. Isaac in amate mangpha thaakin kilem takin kikhen uh hi.



³²Tua ni in, Isaac ii naseamte hong pai in amate tawsa, tuikhuk thu ama tungah son hi. Amate in, “Tui ka mu zo uh hi,” ci hi.

³³Ama in tuikhuk sia, “Kiciamna” ci in minphuak hi. Tua hu in tu dongin tua khuapi sia Beersheba kici hi.

Esau ii Ngamdang Zite

³⁴Esau kum sawmli a phak ciang, Hit numei nii Beri ii tanu Judith le Elon ii tanu Basemath tenpui hi.

³⁵Amate in Isaac le Rebecca thin ngim pia uh hi.

Pianciilna 27

Isaac in Jacob Thupha pia

¹Tu in Isaac huai zo a, a mittaw in khua mu thei ngawl hi. Ama in a ta uzaw Esau samin, “Ka tapa awng!” ci hi. A tapa in, “Hi sungah om ing” ci in zo hi.

²Isaac in, “Nong mu bangin kei huai zo a, ka thi tu nai zo hi.

³Na thal le thaltangte la in a, duisung vakin kei atu in ngamsa khat hong kap tan.

⁴Ka du bangin anlim tawm huan tan a, hong paipui tan. Ka neak zawkciang, ka thi ma in, a khakbel ka thupha nang kong pia tu hi,” ci hi.

⁵Isaac in Esau a paupui laitakin, Rebecca in ngai nginge hi. Esau savai tu in a kuan ciang,

⁶Rebecca in Jacob tungah, “Na pa ii Esau tungah a son teng ka za hi.

⁷Ngamsa khat hong ciapui tan a, hong huansak tan, Ka neak zawkciang, ka thi ma in Topa mai ah thupha kong pia tu hi,’ ci hi.

⁸Rebecca in a thuson zom a, “Tu in ka tapa awng, hong ngai tan, kong son teng seam in.

⁹Nganhonte sungah pai in, kealno thau nii hong man tan a, na pa du bangin tua an kong huansak tu hi.

¹⁰A neak tu in na pa kungah na paipui tu a, a thi ma in a thupha nang hong pia tu hi,” ci hi.



¹¹Ahizong Jacob in a nu tungah, “Na heak bangma Esau in mul hau a, ahizong kei ka vun neal hi.

¹²Ka pa in hong tham thong le ama ka theamna hong he tu a, hi bangin kei tungah thupha taangin hamsiatna hong theng bungle tu hi,” ci hi.

¹³A nu in, “Ka tapa awng, nang tungah haamsiatna a om le kei tungah hong tung taken, kong ci bangin ngamta in; pai tan a, kealte hong paipui tan,” ci in zo hi.

¹⁴Tuaciang kealte manin, a nu kungah paipui a, a nu in a pa du bangin huansak hi.

¹⁵Tuaciang a nu in inn sungah a kep Esau ii puanphabelte la in, Jacob silhsak hi.

¹⁶A nu in, kealvunte a tapa Jacob baan tung le mul om ngawl na a ngawng teng ah silhsak hi.

¹⁷A nu ii huan anlimte le anluumte a nu in a tapa khut ah aap hi.

¹⁸Tuaciang Jacob in, a pa kungah pai in, “Pa awng” ci hi. A pa in, “Hi sungah om ing, ka tapa awng, akua hi zaw ni ziam?” ci in zo hi.

¹⁹Jacob in, “Keima in na tapa u zaw Esau khi hi; nong sawl bangin vawt zo khi hi. Hesuakna taw hong to tan a, na thupha nong piak thei natu in, sa tawm kong paipuite hong neaksak tan,” ci in zo hi.

²⁰Isaac in, “Ka tapa awng, hi bang manlang takin bangbang nga thei ni ziam?” ci hi. Jacob in, “Topa na Pathian in hong hu a, ka nga pai hi,” ci in zo hi.

²¹Isaac in Jacob tungah, “Kong tham thei tu in hong neak tan. Esau ma hi takpi ni ziam?” ci hi.

²²Jacob in a pa neakin, a pa in tham a, “Na aw lah Jacob aw taw kibang a, ahizong na baan lah Esau baan taw kibang ta a,” ci hi.

²³A pa in Jacob tel zo ngawl hi, banghangziam cile Esau baan bangma in baanmul nei hi. A thuphate ama pia tu ahikom,



²⁴“Esau ma hi takpi ni ziam?” ci in dongh kik hi. Ama in, “Hi takpi khi hi,” ci in zokik hi.

²⁵Isaac in, “Na sa huan tawm hong paipui tan. Ka neak zawkciang ka thupha kong pia tu hi,” ci hi. Jacob in a pa kungah a sa huan paipui in, a dawn tu in zu zongh paipui hi.

²⁶Tuaciang a pa in ama tungah, “Ka tapa awng, hong neak tan a, hong nam tan,” ci hi.

²⁷Ama in, a pa neakin nam hi, a pa in a puan ngim nam a, tuaciang ama thupha pia in, “Ka tapa ngim namtui in Topa ii thupha a piak ngamsung ngim namtui taw kibang hi.

²⁸Pathian in, na tungah vantung daaitui hong pia hen a, na lote lei phasak taken. An le zu kicing takin hong pia taken.

²⁹Minamte in na naseam suakin minam tuatuamte in na mai ah kun taken. Na bete theampo na uk tu a, na nu suan le paalte na mai ah kun taken. Nang hong hamsiatte haamsiatna thuak hen a, nang thupha hong plate thupha nga taken, ” ci hi.

Isaac ii Thupha Esau in Ngen

³⁰Isaac in Jacob thupha a piak zawk Jacob ii a nusiak zawk pociang, a suapuipa Esau a savaina pan theng hi.

³¹Ama zongh in anlim tawm huan a, a pa kungah paipui hi. Ama in, “Pa awng, hesuakna taw hong to tan a, na tapa ii kong paipui sate ne in, na thupha kei hong pia tan,” ci hi.

³²Isaac in, “Akua ni ziam?” ci in dongh hi. Ama in, “Na tapa u zawpa Esau khi hi,” ci in zo hi.

³³Tuaciang Isaac patau ngawp a, a pumpi bup ngawkin liing a, ama in, “Tuabang a hi thong le, ngamsa khat thatin hong paipui sia akua ziam? Nang nong thet mahiat in ka ne hi. Ama tungah a khakbel ka thupha ka pia zo a, a tawntungin ama aa hi zo hi,” ci in zo hi.



³⁴Esau sia hi thu a zaak ciang nging takin kapngawp a, “Pa awng, kei zongh na thupha hong pia tan,” ci hi.

³⁵Isaac in, “Na suapuipa hong pai in kei hong theam hi. Ama in na thupha hong laaksak zo hi,” ci in zo hi.

³⁶Esau in, “Tu a sia kei hong theam a nii veina hi. A min Jacob ahi sia lamdang ngawl hi. Ama in u zaw innluaza hong sut zo a, tu in ka thupha hong sut leleau hi. Kei atu in thupha khat zongh khe nawn ngawl ni ziam?” ci hi.

³⁷Isaac in, “Nangma hong uk tu in ama ka vawt zo a, a bete theampo a naseam tu in ka vawt zo hi. An le zu ama ka pia zo hi. Ka tapa awng, tu in nang atu kong vawtsak thei tu bangma om nawn ngawl hi,” ci in zo hi.

³⁸Esau in a pa tungah ngen veve a, “Pa awng, thupha khatbek nei ni ziam? Kei zongh thupha hong pia tan, Pa awng,” ci in kap hi.

³⁹Tuaciang Isaac in ama tungah “Nang atu in vantung pan daaitui om ngawl a, Nang atu in leipha lote om ngawl hi.

⁴⁰Na namsau suangin na nungta tu a, Ahizong na suapuipa ii sila na hi tu hi Ahihang ama na langpan ciangin ama ukna nuai panin na suakta tu hi,” ci hi.

⁴¹Esau in, Jacob ngaimaw hi, banghangziam cile a pa in, a thupha Jacob tungah pia hi. “Ka pa thina hangin khuangaih tu hun nai zo a, tuaciang Jacob ka that tu hi,” ci in ama in ngaisun hi.

⁴²Ahizong, Esau ii tupna Rebecca in a zaak ciang ama in, Jacob samin “Ngai in, na suapuipa Esau in phu hong la in thalup hong sawm hi.

⁴³Tu in ka tapa awng, kong ci bangin ngamta in. Haran ngamah a teang ka suapuipa Laban kungah thakhat in tai zazok tan.

⁴⁴Na suapuipa thin uukna a thai dong tawmvei sung Laban taw omkhawm tan.



⁴⁵Tua hile ama tungah na vawtnate mangil tu hi. Tuaciang mihing khat pawpo sawlin nang kong sam kik tu hi. Banghangin ka tate nii, ni khat thu in khuai thong tu khi ziam?” ci hi.

Isaac in Laban kungah Jacob Paisak

⁴⁶Rebecca in Isaac tungah, “Esau ii ngamdang zite hangin cimtaak in ka nat law hi. Jacob zongh Hit te numeite khat taw kiteang thong le, thi law liang tu khi hi,” ci hi.

Pianciilna 28

¹Isaac in Jacob samin thupha a piak zawkciang, “Canaan numei peuma tenpui heak in.

²Tua sangin na pupi Bethuel inn Mesopotamia ah pai in, na puno Laban tanute khat tenpui in.

³Vaanglianbelpa Pathian in na mopoai ah thupha hong pia hen a, ta tam mama hong pia in, minam tam mama te ii pa hong suaksak taken!

⁴Pathian in, Abraham thupha a piak bangin nang le na suan na paalte thupha hong pia taken a, Abraham tungah a piak, tu a na teenna leitangh sia nang neisa hisak taken!” ci hi.

⁵Isaac in Laban teenna Mesopotamia ah Jacob paisak a, Laban sia Arameante Bethuel tapa hi a, Jacob le Esau te ii nu Rebecca ii suapuipa ahi hi.

Esau in Zidang Nei

⁶Isaac in Jacob thupha pia in, Mesopotamia ah zi zong tu in a sawlna thu Esau in he hi. Isaac in Jacob thupha a piak ciang Canaan numeite a tenpui ngawl natu in a thupiak zongh Esau in he hi.

⁷Jacob in a nu le a pa thu ni in Mesopotamia ah a paina thu Esau in tel hi.

⁸Tuaciang Esau in a pa Isaac ii Canaan numeite a dei ngawlna thu tel hi.

⁹Tuaciang Esau in Abraham tapa Ishmael kungah pai in a tanu Mahalath, Nebaioth ii suapuinu tenpui hi.

Bethel ah Jacob Mangman



- ¹⁰Jacob in Beersheba nusia in Haran sang zuan hi.
- ¹¹Ni tum ciang mun thiangtho khat thengin, tua munah ama ngiak hi. Suang khat khamin ama lumsuk hi.
- ¹²Ama in mangman a, keallei khat leitung pan vantung dong kidaw to in, vantung lalangte tua keallei ah a tuaksuk a kaato mu hi.
- ¹³Tuaciang ama kungah Topa ding hi. Ama in, “Keima in Abraham le Isaac te Pathian, Topa ka hi hi. Nang le na suan na paalte tungah na lupna leitangh kong pia tu hi.
- ¹⁴Amate leitung ah leivui za in tam tu hi. Amate in mun theampo ah ngamkeak tu uh a, nang le na suan na paalte tungtawn in minam theampote thupha ka pia tu hi.
- ¹⁵Ciamtee tan, na paina po ah nang taw om in, kong dal tu a, hi leitangh ah kong ciapui kik tu hi. Kong kamciam sate ka vawt siat mateng in, nang kong nusia buatu hi,” ci hi.
- ¹⁶Jacob khanglo in, “Topa hi munah om hi! Ama hi munah om hi. Keima in hi thu ka he bua hi,” ci hi.
- ¹⁷Ama lau in, “Hi mun bangza in lauhuai ziam! Hi mun in, Pathian inn hi nanak tu a, hi mun in vantung Pathian kongpi hi nanak tu hi,” ci hi.
- ¹⁸Zingsang tuungin Jacob tho in, a suang lukham la in khansuang in phut hi. Tuaciang ama in khansuang sia olive thau buakin Pathian tungah aap hi.
- ¹⁹Ama in tua mun sia Bethel ci hi. (Ni dangin tua khua sia Luz kici hi.)
- ²⁰Tuaciang Jacob in Pathian tungah kiciamna khat vawt a; “Nangma in kei taw nong om a, ka khualhawna ah hong dalin, an le puan nong pia a,
- ²¹cidam in ka pa inn ah ka cia kik le, nangma in ka Pathian na hi tu hi.
- ²²Hi khansuang ka phuna sia nangma kong biakna mun hi tu hi. Nong piak theampo sung pan sawm a khat, nang kong pia tu hi,” ci hi.

Pianciilna 29

Laban ii Inn ah Jacob Theng



- ¹Jacob in a khualhawna zomin, niswana ngam sang manaw hi.
- ²Thakhat thu in lo sung a om tuikhuk khat kung theng a, tuikhuk paam ah tuuhon hon thum lum hi. Ngannote in hi tuikhuk pan tui ne a, tua tuikhuk sitna suangtum sia lian mama hi.
- ³Tua lai ah tuuhonte hong thet hon ciang tuucingte in tua suang liikin, tuute tui pia hi. Tua zawkciang amate in a omna ngei ah tua suang koi kik hi.
- ⁴Jacob in tuucingte tungah, “Ka lawmte awng, koisung pan nu ziam?” ci in dongh hi. Amate in, “Haran pan hi ung,” ci in zo hi.
- ⁵Ama in, “Nahor ii tapa Laban na he uh ziam?” ci in dongh hi. Amate in, “He khu hi,” ci in zo hi.
- ⁶Ama in, “Ama a cidam ziam?” ci in dongh hi. Amate in, “Ama a cidam hi. En in, a tanu Rachel zongh a tuuhonte taw hi sungah hong pai hi,” ci in zo hi.
- ⁷Jacob in, “Ni sang lai a, ngan hawl hun ngawl lai ahikom, tuute tui pia in tha kik ngawl tu nu ziam?” ci hi.
- ⁸Amate in, “Tuute hi lai ah kim siat a, suangtum a kikhiin mateng ka vawt thei buatu uh hi; tua zawkciang tuuhonte tui ka pia thei pheang tu uh hi,” ci in zo hi.
- ⁹Jacob sia amate taw kipaupui in a om laitak, Rachel a tuuhonte taw hong theng hi.
- ¹⁰Jacob in a pu Laban tuuhon le Rachel a mu ciang tuikhuk ah pai in, suangtum khiinin, tuute tui pia hi.
- ¹¹Tuaciang Jacob in Rachel nam a, lungdamin kap tu kithoi hi.
- ¹²Jacob in Rachel tungah, “Keima in Rebecca ii tapa, na pa ii mealheak ka hi hi,” ci hi. Rachel sia a pa tungah thu ko tu in tai hi.
- ¹³Laban in a tupa Jacob ii thu a zaak ciang ama muak tu in tai a, koai in nam a, inn ah ciapui hi. Jacob in thupiang theampo Laban tungah a son zawkciang,



¹⁴Laban in, “Hi hi, nangma in, keima chi le sa na hi tatak hi,” ci hi. Tua lai ah Jacob tha khat sung om hi.

Rachel le Leah atu in Jacob in Laban Na sepsak

¹⁵Laban in Jacob tungah, “Nangma sia ka mealheak na hi hu in, a thongin ka na naseam buatu hi. Bangza hong pia tu khi ziam?” ci hi.

¹⁶Laban in ta numei nii nei a, a unu min Leah hi in, a naunu min Rachel ahi hi.

¹⁷Leah sia a mit ha ngaibaang a, ahizong Rachel sia a khan pha in a meal hoi hi.

¹⁸Jacob sia Rachel taw kidei ahikom a pu tungah, “Rachel taw nong teangsak tu ahile, kum sali sung na na kong sepsak tu hi,” ci hi.

¹⁹Laban in, “Midang khatpo ka piak sangin nang kong pia nuam zaw hi; kei kungah hong om tan,” ci in zo hi.

²⁰Jacob in Rachel a nga natu in kum sali sung naseam a, Rachel a itna hangin tua hunte ni tawmno taw kibang sa hi.

²¹Tuaciang, Jacob in Laban tungah, “Ih hun cing hi; na tanu taw hong teangsak tan,” ci hi.

²²Tuaciang Laban in mopoai vawtsakin mi theampo sam hi.

²³Ahizong tua ni zanin a pu in Jacob tungah Rachel taingin Leah pia a, Jacob in Leah luppui hi.

(²⁴Laban in ama silanu Zilpah, a tanu Leah tungah a naseam tu in pia hi.)

²⁵A zingsang ciang Leah a hina thu Jacob in he pheang hi. Ama in Laban kungah pai in, “Banghangin hi bang hong vawt thong ni ziam? Rachel hong thalaw hi ngawl khi ziam? Banghangin kei hong theam ni ziam?,” ci hi.

²⁶Laban in, “A u kantan in a nau pasal a nei tu sia hi ngamah ko ngeina hi ngawl hi.

²⁷Nipi khat sung mopoai hun bosak phot in a, a dang kum sali sung ka na nong sepsak tu ahile, Rachel kong pia tu hi,” ci in zo hi.



²⁸Jacob lungkim a, nipi khat sung mopoai hun a bo ciang, Laban in a tanu Rachel, Jacob zi tu in pia hi.

(²⁹Laban in a sila nu Bilhah sia a tanu Rachel tungah a naseam tu in pia hi.)

³⁰Jacob in Rachel zongh luppui a, ama in Leah sang Rachel it zaw hi. Tuaciang ama in, Laban na a dang kum sali sung seam thua hi.

Jacob ii Tate

³¹Rachel sangin Leah a it ngawl zawkna thu Topa in a heak ciang, Leah sia ta nei thei tu in siam a, ahizong Rachel sia ta neisak ngawl hi.

³²Leah ngai in tapa khat nei hi. Leah in, “Ka haksatna Topa in hong mu a, tu in ka pasal in hong it tu hi,” ci a, ama in a tapa min Reuben phuak hi.

³³Ama ngai kik a, tapa dang khat nei hi. Ama in, “Kei hong ki it ngawlna thu Topa in zazo ahikom Topa in hi tapa zongh kei hong pia zo hi,” ci a, ama in a tapa min Simeon phuak hi.

³⁴Khatvei ama ngai kik a, tapa dang khat nei hi. Ama in, “Tu in, ka pasal in kei hong it vaial tu hi, banghangziam cile tapa thum ka neisak zo hi,” ci a, ama in a tapa min Levi phuak hi.

³⁵Tuaciang Leah ngai kik a, tapa dang khat nei hi. Ama in, “Tu hun in Topa ka pok tu hi,” ci a, ama in a tapa min Judah phuak hi. Tuaciang ama ta tawp hi.

Pianciilna 30

¹Rachel in Jacob taw ta khat zongh nei ngawl ahikom ama in a suapuinu Leah eangin Jacob tungah, “Ta hong pia tan tua ahibuale ka thi tu hi,” ci hi.

²Rachel tungah Jacob thin uuk a, “Pathian hi na khi ziam? Ta hong neisak ngawl sia Pathian hi,” ci hi.

³Rachel in hi lai ah, ka silanu Bilhah om hi; ama taw lumkhawm lete kei atu in ta nei thei tu hi. Hi bangin kei zongh ama tungtawn in nu ka suak thei tu hi,” ci hi.

⁴Tuaciang ama in a pasal tungah Bilhah pia in, a pasal in Bilhah ompui hi.



⁵Bilhah ngai in Jacob taw tapa khat nei hi.

⁶Rachel in, “Pathian in thukhen a, maipha hong pia hi. Ama in ka thungetna hong za in tapa khat hong pia hi,” ci a, Rachel in Bilhah tapa min Dan phuak hi.

⁷Bilhah ngai kikin, Jacob taw tapa a niina nei hi.

⁸Rachel in, “Haksa takin ka suapuinu ka do a, ahizong keima in ka zo zo hi,” ci in ama in tua a tapa min Naphtali phuak hi.

⁹Leah in a tatawp hunlam a heak ciang, a sila nu Zilpah sia Jacob tungah a zi tu in pia hi.

¹⁰Tuaciang Zilpah in Jacob taw tapa khat nei hi.

¹¹Leah in, “Ka kampha hi,” ci in ama in a tapa min Gad phuak hi.

¹²Zilpah in Jacob taw tapa dang khat nei hi.

¹³Leah in, “Bangza in ka lungdam ziam! Tu in, numeite in a lungdam nu hong ci tu hi,” ci in ama in tua a tapa min Asher phuak hi.

¹⁴Zungtaang laak hun laitakin Reuben sia lo sungah pai a, tanei theina ai-nga mu a, la in a nu Leah pia hi. Rachel in Leah tungah, “Hesuakna taw na tapa ii tanei theina ai-ngate tawm hong pia tan,” ci hi.

¹⁵Leah in, “Ka pasal nong laaksak pha zo sa ngawl ni ziam? Tu in ka tapa ii tanei theina ai-ngate laaksak nong sawm lai hi,” ci in zo hi. Rachel in, “Na tapa ii tanei theina ai-ngate nong pia le, tu zan Jacob taw lumkhawm thei tu ni hi, ” ci hi.

¹⁶Nitak in lo pan Jacob hong cia ciang, Jacob taw kimu tu in Leah pai a, “Tu zan kei kung hong lum tu ni hi, banghangziam cile ka tapa ii tanei theina ai-nga taw nang kong tham zo hi,” ci hi. Tua ahikom tua ni zan in Jacob le Leah omkhawm hi.

¹⁷Pathian in Leah ii thungetna zo a, ama ngai in Jacob taw tapa a ngana nei hi.



¹⁸Leah in, “Ka silanu ka pasal tungah pia ka hikom Pathian in ka thaman hong pia hi,” ci in ama in a tapa min Issachar phuak hi.

¹⁹Leah ngai kik leleau a, Jacob taw tapa a lukna nei hi.

²⁰Ama in, “Pathian in letsong pha khat hong pia zo hi. Tu in ka pasal in kei hong it tu hi, banghangziam cile ama atu in tapa luk ka neisak zo hi,” ci in ama in a tapa min Zebulun phuak hi.

²¹Tua zawkciang ta numei khat nei a, ama in a min Dinah phuak hi.

²²Tuaciang Pathian in, Rachel phawkin ama thungetna zo a, tanei thei tu in siam hi.

²³Rachel ngai in tapa khat nei hi. Ama in, “Pathian in tapa khat piakna taw ka maizumna teng hong heeneam zo hi.

²⁴Topa in tapa dang hong pia lai taken,” ci in ama in a tapa min Joseph phuak hi.

Jacob ii Laban taw Thu A kinialna

²⁵Joseph a sua zawkciang Jacob in Laban tungah, “Ka inn ah hong cia sak tan.

²⁶Nang tung a kong thalawsa ka zite le ka tate hong pia tan tua hile ka cia tu hi. Pha takpi na na kong sepsak na he hi,” ci hi.

²⁷Laban in ama tungah, “Thu hong son tong: Topa in nang hangin keima thupha hong piakna thu, aisaanna taw ka he hi.

²⁸Na thaman hong son lete kong pia tu hi,” ci hi.

²⁹Jacob in, “Na na kong sepsakna le keima sep sungin na ngannote a pun mama na thu na he hi.

³⁰Kei kong thet ma in nganno tawmbek na nei hi, tu in tam mama in khang hi. Ka va ka ciana po ah Topa in nang thupha hong pia hi. Tu in keima phattuum natu ka ngaisut tu hun hi zo ta hi,” ci in zo hi.



³¹Laban in, “Bang hong pia tu khi ziam?” ci in dongh hi. Jacob in, “Ka thaman tu in bangma dang dei bong. Kong ngetna nong sang zo ahile na ngannote ka keam lai tu hi.

³²Tuni in na ngannote theampo sungah hong paisak tan a, tuu a vom teng, kealno a pawl teng le a pawl ciptep teng hong theisak tan. Tuateng ka thaman tu in ka dei hi.

³³Ka thumaanna le ka thumaan ngawl na mai sangah ol takin nong mu thei tu hi. Ka thamante sit tu in nong pai ciang kealte sung pan a pawl ngawl, a pawl ciptep ngawl, tuute sung pan a vom ngawl tuu khat pawpo ka nei le ka nguk hi, ci in na he tu hi,” ci in zo hi.

³⁴Laban in, “Ka lungkim hi. Nangma ci bangin ih vawt tu hi,” ci in zo hi.

³⁵Ahizong tua ni in Laban in, kealtal a ngial teng le a pawl ciptep teng, kealnu a pawl teng le a pawl ciptep teng, a tungah a kaang a om teng doi hi; tuu vom teng zongh doi hi. Ama in, tuateng a tapate kep tu in aap a,

³⁶Jacob kung pan ni thum paina mun ah hi nganno teng paipui hi. Jacob in a taanglai Laban nganno teng keam hi.

³⁷Jacob in hiangkung, thuangthi kung le pakngiam kungte pan a baak hingte saatin, a haw ngiam a, a ngialin vawtin, a kaangte kimusak hi.

³⁸Ama in tua thingbaakte sia ngannote ii tui neakna kuang sung ngannote mai ah koi hi. Ama in tua thingbaak pawlte banghang hi bang koi ziam cile ngannote tui ne tu in hong pai ciang tua mun ah a nu le a pa omkhawm bul ahikom , a omkhop laitak a mu thei tu a, a koi ahi hi.

³⁹Kealte tua thingbaak pawlte mai ah a omkhop uh ciang amate in a ngial, a pawl le a pawl ciptep note nei uh hi.

⁴⁰Jacob in tuute le kealte khenin tuam koi a, Laban nganno a ngialte le a vomte kimaingatsak hi. Hi bangin ama in a ngannote pungtosakin Laban ngannote taw kihelsak ngawl hi.



⁴¹Nganno cidam a thahatte a omkhop ciang, a note a pawl a nei thei natu in thingbaak pawlte sia tuikuang sungah ngannote sang maingat in Jacob in koi hi.

⁴²Ahizong ama in tua thingbaak pawlte sia nganno thaneamte a nu le a pa omkhopna mai ah koi ngawl hi. Hai ngawlin nganno thaneam teng Laban neisa suak a, nganno thahat teng Jacob neisa suak hi.

⁴³Hi bangin Jacob sia a hau mama suak hi. Ama in ngannote, silate, kalahte le laate tam mama nei hi.

Pianciilna 31

Laban kung pan Jacob Tai

¹Laban tapate in, “Ih pa neisa theampo Jacob in la siat hi. Ih pa neisa tungtawnin ama hau law hi,” a cina thu Jacob in za hi.

²Nidang bang a Laban ii a pawlvawt nawn ngawlina thu zongh Jacob in mu hi.

³Tuaciang, Topa in ama tungah, “Na bete le na pate leitangh ah cia kik in. Nang taw kong omkhawm tu hi,” ci hi.

⁴Tua ahikom Jacob in a tuu cinna dui sungah ama taw kimu tu in, Rachel le Leah kam vaitha hi.

⁵Jacob in a zite tungah, “Na pa in nidang bang a hong pawlvawt nawn ngawlina thu ka he hi; ahizong ka pa ii Pathian in kei hong ompui hi.

⁶Ka tha neiza taw na pa ii na ka sep sia na heak uh hi.

⁷Ama in kei hong theamin ka thaman sawm vei hong khealsak zo hi. Ka tungah siatna hong vawt tu sia Pathian in oai ngawl hi.

⁸Laban in, ‘Keal a pawl im-iam teng na thaman tu hi,’ hong ci ciang nganno theampo a pawl im-iam in piang hi. Ama in, ‘Keal a ngial teng na thaman tu hi,’ hong ci ciang nganno theampo a ngialin piang hi.

⁹Pathian in na pa ngannote laaksak a, kei tungah hong pia hi.



¹⁰“Ngannote a huk hunin, mang khat ka man a kealtal a ngial, a pawl ciptep le a pawl im-iam te kealpuite taw kibawm in ka mu hi.

¹¹Pathian vantung lalang in ka mang sungah hong paupui in, ‘Jacob’ hong ci a, ‘Hi sungah ah om ing,’ ka ci hi.

¹²Tuaciang ama in, kealpuite taw a kibawm kealtalte sia a ngial, a pawl ciptep le a pawl im-iam vive hi. Hi bang a piang tu in, keima vawt hi, banghangziam cile nang tungah Laban ii hong vawtna teng ka mu zo hi.

¹³Keima in Bethel ah nang tung a hong kilangh Pathian ka hi a, tua munah nong phaw tawntung natu suang phutin olive thau buakin, aapna nei in kei tungah kiciamna khat na vawt hi. Tu in kithoai in a, na pianna leitangh ah cia kik in,’ hong ci hi.” ci hi.

¹⁴Rachel le Leah in Jacob tungah, “Ka pa uh kung pan ka lua tu uh bangma om nawn ngawl hi.

¹⁵Ama in ko sia ngamdang mite bangin hong vawt hi. Ama in ko hong zuak a, hong kileina sum teng zongh zangh siat zo hi.

¹⁶Ka pa uh kung pan Pathian ii a laak sa hauna theampo sia ko le ka tate aa ahi hi. Pathian hong sawl pawpo vawt in,” ci in zo uh hi.

¹⁷⁻¹⁸Tuaciang Jacob sia Canaan ngam a pa kungah cia kik tu in kithoai hi. Ama in a tate le a zite kalaohite tungah tosak hi. Ama in Mesopotamia ngam pan a nga na theampo taw a nganno theampo a mai ah hawl hi.

¹⁹Laban sia a tuu mul meet tu in pai a, ama om ngawl lanin Rachel in inn sungah a om a pa neisa milim pathiante nguksak hi.

²⁰Jacob in Laban theam a, a cia natu vai hesak ngawl hi.

²¹Ama in a neisa theampo la in nusia vingveng hi. Ama in Eupharates Ngun kantan in, Gilead ngam mualtung sang manaw hi.

Laban in Jacob Del

²²Jacob taina thu ni thum zawkciang Laban tungah kison hi.



²³Ama in a mite samin a mite taw Gilead ngam mual tungah Jacob a phak dong ni sali sung del uh hi.

²⁴Tua ni zan Laban mang sungah Pathian kilangh in Laban tungah “Bangbang po ahizong Jacob na thawmvau ngawl natu in kidawm in,” ci hi.

²⁵Jacob sia mual tungah ngiaphual saat a, Laban sia a bete taw Gilead ngam mual tungah ngiaphual saat hi.

²⁶Laban in Jacob tungah, “Banghangin hong theam a, ngal sungah ngalmat bangin ka tanute taipui ni ziam?”

²⁷Kei hong theam a, kei hong son ngawlin banghang taiku ni ziam? Hong son hi lete lungdam la sa a, khuang le daak le tengtong tumin hong tha tu hi veang.

²⁸Ka tute le ka tanu te mangpha thaakin, nong namsak beak bua hi. Tua in a mawmawt huai ngamtatna ahi hi!

²⁹Nang kong vawtsiat thei natu thu nei khi hi, ahizong tu zanin na pa ii Pathian in bangbang po ahizong nang kong thawmvau ngawl natu in thu hong pia hi.

³⁰Hi bang na taina in na inn thinbot mama na hina kong he hi, ahizong ka inn sung milim pathiante banghang ngu nu ziam?” ci hi.

³¹Jacob in, “Kei kung pan na tanute nong le kik tu ka lau hi.

³²Ahizong na milim pathiante khat pawpo tungah na mu le ama kithatlum tu hi. Hi lai-ah ih mite sia ih tetti tu hi, zong in a, nangma neisa pawpo la in,” ci in zo hi. Laban ii milim pathiante Rachel in a nguksak hunlam Jacob in he ngawl hi.

³³Laban pai in, Jacob puanbuk sung, Leah puanbuk sung le sal numei niite puanbuk sung teng zong a, ahizong a milim pathiante mu ngawl hi. Tuaciang Rachel puanbuk sungah pai hi.

³⁴Rachel in inn sung milimte ngu in, kalaoh tokhum ip sungah koi in ama in topha hi. Laban in buk sung theampo zong a, ahizong mu ngawl hi.



³⁵Rachel in a pa tungah, “Na mai ah hong ding ngawl ka hikom pa awng, thin uuk heak in, banghangziam cile numei ngeina ka nei laitak ahihang hi,” ci hi. Laban in zong a, ahizong a inn sung milim pathiante mu ngawl hi.

³⁶Tuaciang Jacob a thin uukin, “A bang mawna nei khi ziam?” ci a, thin uuk takin dongh hi. “A bang thukham ka palsat hu in, hiza lawlawm a hong vai thong ni ziam?”

³⁷Tu in ka vanh theampo tok siat zo ni hi, na neisa na inn sung vanh bang mu ni ziam? Mu na nei le hi lai ah na mite le ka mite mu thei tu in hong pusuapui tan a, akua man zaw hi ziam thukhensak tawng.

³⁸Nangma kungah kum kul sung kong om a, kong om sungah na tuu le na kealte a ta tol ngawl hi, tuaciang na nganhonte sung pan tuatal sa ka ne bua hi.

³⁹Ngamsate in na tuute hong matsak ciang, tua supnate keima in ka thuak tawntung hi. Ka khialna hi ngawl hi, ci in na kungah paipui in kong lak ngei bua hi. Sun ahizong zan ahizong a ki-ngute peuma, na liau tu hi, ci in thu nong pia hi.

⁴⁰Tam vei tatak sun nisa le zan khuadap ka thuak a, ka mu thei bua hi.

⁴¹Tuabang in kum kul sung tawntung nang kungah kong om hi. Kum sawm le kum li sung na tanute nii ka nga natu in kong thalaw a, kum luk sung na ngannote kong thalaw hi. Hiza bang seam napi ka thaman sawm vei nong kheal hi.

⁴²Ka pa ii Pathian, Abraham Pathian le Isaac Pathian, kei taw omkhawm bathong le khut hawm nguakin nong hawlkeak zo tu hi. Ahizong Pathian in ka haksatna le ka nasepna te mu zo a, tu zanin nang tungah thukhenna hong pia hi,” ci hi.

Jacob le Laban Thukimna

⁴³Laban in Jacob tungah, “Hi numeite sia ka tanute hi, a tate keima neisa hi, nganhonte keima neisa hi. A tatakin ci leang hi sungah na mu theampo keima



neisa hi. Ahizong ka tanute le a tate tungah bangma ka vawt thei nawn bua hi.

⁴⁴Nang taw thukimna khat a vawt nuam ka hi hi. Ih thukimna teptee natu in suangtumte ciang tawng,” ci in zo hi.

⁴⁵Tuaciang Jacob in suangtum khat la in phaw kik tawntung natu in phut hi.

⁴⁶Jacob in a mite tungah suang ciangto tu in sawl hi. Tuaciang a suang cianna paam ah amate an nekhawm uh hi.

⁴⁷Laban in Jegar Sahadutha ci in min phuak a, Jacob in Galeed ci in min phuak hi.

⁴⁸Laban in Jacob tungah, “Hi suangcian in nang le kei atu in phawk sakna ahi hi,” ci hi. Tua ahiciang tua mun sia Galeed ci in min phuak hi.

⁴⁹Laban zongh in, “Eite khat le khat ii kikhen cianginTopa in hong keam taken,” ci hi. Tua ahikom tua mun zongh Mizpah ci in min phuak hi.

⁵⁰Laban in, “Ka tanute na vawtsia a, zi dang na nei san le kei kong he bua zong Topa in eite hong encik nginge ci in, ciamtee tan.

⁵¹Hi lai ah suang kiciangte sia ih kilaklaw ah phawna suang ahi hi.

⁵²Hi suangcian le phawna suangte ngeal in ih kiciamnate hong phawksak kikte ahi hi. Nangma sim tu in hi suangcian ka kantan ngei buatu a, nangma zongh in keima hong sim tu in hi suangcian le hi phawna suang nong kantan ngei buatu hi.

⁵³Abraham Pathian le Nahor Pathian in eite kilaklaw ah thukhen tu hi,” ci hi. Tuaciang Jacob in a pa Isaac ii biak Pathian min taw hi kamciamna keamcing tu in ciliap huai takin kiciam hi.

⁵⁴Jacob in ngan khat ngo a, mual tungah biakpiakna pia in, an ne tu in a mite sam hi. Amate an a neak zawkciang mual tungah zan khuateak om uh hi.

⁵⁵A zing ciang zingtuung in, Laban in a tute le a tanumeite namhin mangpha thaakin, tuaciang a inn ah cia hi.

Pianciilna 32



Esau taw Kimu tu in Jacob Kinging

- ¹Jacob papai a, lampi ah vantung lalangte in ama muak hi.
- ²Jacob in amate a mu ciang ama in, “Hi sia in Pathian ii ngiaphual hi,” ci hi. Tuaciang tua mun sia Mahanaim ci in min phuak hi.
- ³Jacob in Edom ngam a om a suapuipa Esau kungah kamtaite paisak khol hi.
- ⁴Ama in kamtaite tungah, “Na silapa keima Jacob in, ka Topa Esau tungah thu kong puakna panin, Laban kungah ka om a, tu in kong cia thei pheang hi.
- ⁵Keima in khuite, laate, tuute le kealte le silate ka nei hi. Topa awng nangma maipha ka mu nop manin hi bangin kam kong taisak hi,” na ci tu uh hi, ci in vaitha hi.
- ⁶Kamtaite Jacob kungah hong heak kik ciang amate in, “Na suapuipa Esau kungah ka pai uh a, nangma muak tu in ama hong pai zo hi. Ama in mihing zali nei hi,” ci hi.
- ⁷Jacob lau in, patau hi. Ama in ama taw a omkhawm a mihingte pawl nii in khen a, a tuute, a kealte, a khuite le a kalaohnte zongh pawl nii in khen hi.
- ⁸Ama in, “Esau in pawlkhat nate a that hial zong a dang teng suakta tu hi,” ci in ngaisun hi.
- ⁹Tuaciang Jacob thungen a, “Ka pu Abraham Pathian le ka pa Isaac Pathian awng hong ngai tan! Topa awng, nangma in kei tungah na ngam le na bete kungah cia kik in, tua hile na ma kong vangsak tu hi, nong ci hi.
- ¹⁰Na silapa keima in nong laksa na cikna le na thumaanna taw ka kilawm bua hi. Bangma dang hi ngawl, ciangkhut khat taw Jordan ngun ka kantan a, tuni in hi pawl niite taw in kong cia kik hi.
- ¹¹Ka suapuipa Esau khut sung pan nong hutna tu in thu kong ngen hi. Ama hong pai in kote hong sim tu a, numei patang dongin hong thalup siat tu ka lau hi.



¹²Nangma in, na ma kong vangsak tu a, tuipivaal senvui za in a tam, sim zawk ngawl za dongin suan le paal kong pia tu hi, ci in nong kamciamnate phawk kik in,” ci hi.

¹³⁻¹⁵Tua munah tua ni zan a ngia zawkciang Jacob in a u Esau letsong a piak tu in a ngannote sung pan hi bang teng teal hi. Kealpui 200 le kealtal 20, tuupui 200 le tuutal 20, kalaoh noaisuuk 30 le a note teng, khuipui 40 le khuital 10, laa a nu 20 le a tal 10 te ahi hi.

¹⁶Ama in nganno teng amate nam tek in khen a, a uk tu in a naseamte khat tek koi hi. Ama in amate tungah, “Ka mai ah paikhol tavun a, hon khat le hon khat kilaklaw kihalsak tavun,” ci hi.

¹⁷Ama in a masabel naseampa tungah, “Ka u Esau taw na kisik ciang, ‘Na Topa akua ziam? Koisung pai tu nu ziam? Na mai a ngannote akua neisa ziam?’ ci in hong dok ciang,

¹⁸‘Hite sia na naseampa Jacob neisa hi. Ama in hi teng a Topa Esau letsong pia tu in hong sawl hi. Jacob zongh ka nung ma ah om hi,’ ci in zokik tavun,” ci in thupia hi.

¹⁹Ama in tuabangma in a niina, a thumna le nganno hon a uk dangte theampo tungah, “Esau taw na kimu uh ciang tu a bangin ci tu nu hi.

²⁰‘Hi hi, na naseampa Jacob ka nung uh ma ah om hi’ na ci tu uh hi” ci hi. Jacob in, “Ka letsong piak teng taw a thin ka zo tu a, ama taw ka kimu ciang hong maisak thei tha tu hi,” ci in ngaisun hi.

²¹Ama in a letsong teng mai ah paikholsak a, ama ahile tua ni zan in ngiabuk ah ngiak hi.

Peniel ah Jacob taw Kibuan

²²Tua ni zan Jacob tho in, a zite nii, a zinote nii le a tate sawm le khat taw in, Jabbok Ngun kantan uh hi.

²³Amate teng a paisak zawkciang, a neisa teng zongh kantansak a,

²⁴ahizong ama nguak taang hi. Tuaciang mi khat hong pai in zingsang khuavak dong Jacob buan hi.



²⁵Mipa in a zaw ngawl na thu a mu ciang Jacob khealkawm suksak a, a khealngu kiloai hi.

²⁶Tua pa in, “Khuavak ahiciang hong tha tan,” ci hi. Jacob in, “Thupha nong piak mateng kong tha buatu hi,” ci in zo hi.

²⁷Tua pa in, “Na min akua ziam?” ci in dongh hi. Ama in, “Jacob” ci in zo hi.

²⁸Tua pa in, “Na min Jacob kici nawn ngawl tu hi. Nangma in Pathian le mihingte taw na kibuan a, nangma in zo na hikom, na min Israel kici tu hi,” ci hi.

²⁹Jacob in, “Tua le na min hong son tan,” ci hi. Ahizong ama in, “Banghangin ka min he nuam ni ziam?” ci in zo hi. Tuaciang ama in Jacob thupha pia hi.

³⁰Jacob in, “Maitang kisi in Pathian ka mu zo a, ahizong kei hong kihing khoai lai hi,” ci ahikom ama in tua mun sia Peniel ci in min phuak hi.

³¹Jacob sia Peniel pan a din kik laitakin ni suak hi. Ama a peangbai hi, banghangziam cile ama a khealngu kiloai hi.

³²Tua hi a, tuni dongin Israel ii suan le paalte in khaalkawm sung a, a omsakhaal ne ngawl uh hi, banghangziam cile Jacob khaalkawm thangui a kisuksakna hang ahi hi.

Pianciilna 33

Jacob sia Esau taw Kimu

¹Jacob in, Esau le a mi zali hong pai a mu ciang ama in a tate teng sia Leah, Rachel le a zinote nii kawm ah khenthaang hi.

²Ama in a zinote nii le a tate teng masasak a, tua zawkciang Leah le a tate teng, a khakbel in Rachel le Joseph tonsak hi.

³Jacob sia amate mai ah pai a, a suapuipa kung a thet ciang sali vei lei ah kun hi.

⁴Ahizong Esau sia ama muak tu in hong tai a, ama koaicip in nam hi. Amate kap khawm uh hi.



⁵Esau in a kiim a paam a et ciang numeite le patangte mu a, “Nang taw a om hi mihingte a kuate ziam?” ci in dongh hi. Jacob in, “Hite sia Pathian ii hong hesuakna taw keima hong piak ka tate hi Topa awng,” ci in zo hi.

⁶Tuaciang a zinote le a tate teng pai in kun a;

⁷tuaciang Leah le a tate teng pai in kun a, a khakbel in Joseph le Rachel pai in kun uh hi.

⁸Esau in, “Ka kisik puisa nganhonte bangbang ziam? Bang a ci nopna ziam?” ci in dongh hi. Jacob in, “Tate sia na mai kong etna hi,” ci in zo hi.

⁹Ahizong Esau in, “A kicing nei ing, ka nau awng, na neisa teng nangma keam po tan,” ci hi.

¹⁰Jacob in, “Hi ngawl hi, maipha nong pia le ka letsong hong saang tan. Na maitang kong mu sia, Pathian maitang mu taw kibang a, nangma hi le tu in ka tungah nong dik mama hi.

¹¹Nang atu in kong ken hi letsong hong saang tan, Pathian in kei tungah hong thiam a, ka sap theampo hong pia hi,” ci hi. A saan mateng Jacob in kunh top hi.

¹²Esau in, “Kithoai vun a, pai tek tawng. Na mai ah kei pai tu khi hi,” ci hi.

¹³Jacob in, “Patangte thazawm a, tuute le ngannote le a note atu ka ngaisut a kul sia na he hi. Amate hawlngawp thong leng ni khat sung bek ahizong thi siat tu hi.

¹⁴Hesuakna taw pai khol tan, ngannote le patangte pai zawk babangin Edom ah kong phak dong dadam in kong zui tu uh hi,” ci in zo hi.

¹⁵Esau in, “Tua ahile ka mite pawlkhat nang taw hong nusia sak tan,” ci hi. Ahizong Jacob in, “Pha maw bo, na maipha ka mu tu bek ka kisamh hi,” ci in zo hi.

¹⁶Tua ahiciang Esau sia, Edom ah cia kik tu in tua ni in kipan hi.

¹⁷Ahizong Jacob in Sukkoth ah pai a, tua munah ama atu inn khat le ngannote atu thaampheangte sa hi. Tua ahikom tua mun sia Sukkoth kici hi.

¹⁸Jacob sia Mesopotamia pan hong cia kik ciang Canaan ngam Shechem khuapi cidam takin hong theng a, Sechem khuapi hui ah ngiaphual saat hi.

¹⁹Ama in Shechem ii pa Hamor suan le paalte tung pan tua leitangh nguntang zakhat taw lei hi.

²⁰Ama in tua munah biaknatau khat ciang in, a min El, Israel ii Pathian, ci in phuak hi.

Pianciilna 34

Dinah Buan in Khialpui

¹Ni khat ni in Jacob le Leah te ii tanu Dinah sia Canaan numeite kungah haw tu in pai hi.

²Tua ngam hausapa, Hiv mi Hamor' tapa Shechem in ama a mu ciang manin buan in khialpui hi.

³Ama in Jacob' tanu Dinah sia phasa mama a, it ahikom a nga natu in hanciam hi.

⁴Ama in a pa tungah, “Hi numei ka zi tu in hong doksak tan,” ci hi.

⁵Jacob in a tanu Dinah ii minsiatna thu za ahihang a tapate dui sungah ngan cingin om ahikom amate hong cia mateng bangma vawt ngawl hi.

⁶Shechem ii pa Hamor sia Jacob taw thu son khawm tu in pai a,

⁷Jacob' tapate duisung pan hong cia hun taw kisi hi. Shechem in hi bang teng a ngamtatna thu le Israel mihingte a zawnsak manin Jacob' tanu buanin a khialpui na thu teng a zaak ciang amate lungkim ngawlin a thin uh uk ngawp hi.

⁸Hamor in Jacob tungah, “Ka tapa Shechem in, na tanu it mama ahiciang nong hesuakna in kiteangsak tawng.

⁹Ko mite le no a te kipui, kiten natu in lungkimna khat ih vawt tu hi.

¹⁰Tuaciang ko ngam sungah ko taw nong teang khawm tu uh a, na ten nopna mun po ah teangin na uk bangin sum vawtin, nei le lamh na heang tu uh hi,” ci hi.



- ¹¹Tuaciang Shechem in Dinah ii pa le a suapuite tungah, “Maipha hong pia tavun, tua hile na dei pawpo kong pia tu hi.
- ¹²Bang letsong dei nu ziam? hong son tavun; na suapuinu manh tu na deiza hong ngen tavun; hong kiteangsak tu hi po leute nong nget zaza kong pia tu uh hi,” ci hi.
- ¹³Shechem in, a suapuinu uh Dinah min siasak zo ahikom Jacob ii tapate in Shechem le a pa Hamor theambawl uh hi.
- ¹⁴Amate in Shechem tungah, “Vun at ngawl khat tungah ka suapuinu kong teangsak thei buatu uh a; hong teangsak hi le ung ko atu in min siatna khat hi tu hi.
- ¹⁵Koma bangin pa theampo in vun na at uhle tuasia ciang bekin ka lung uh kim tu hi.
- ¹⁶Tuaciang eite ih kiteang thei tu hi. Note sungah kong teang tu uh a, mi khat ih suak tu hi.
- ¹⁷Ahizong ka thu nong ni bua uh a, vun na at nuam bua uhle, ka suapuinu la in ka ciapui tu uh hi,” ci hi.
- ¹⁸Hamor le a tapa Shechem in hi thu thupha hi, ci in ngaisun a,
- ¹⁹tangvalpa in hai ngawlin a ci bangin a vun at pai hi; banghangziam cile Jacob' tanu a dei hang ahi hi. Shechem sia amate innkuan sung pan mihing thupibel ahi hi.
- ²⁰Hamor le a tapa Shechem in khua mite kikhopna khuapi kongpi ah pai a, a khuapuite tungah thu a sonna panin;
- ²¹“Hi mite sia ih lawmte hi a, ih ngam sungah eima taw teangkawm in a ukna po ah paisak tawng. Ih ngam zongh amate atu taw in kicing lel hi. A tanute ih tenpui tu a, ei a zongh ih pia tu hi.
- ²²Ahihang hi mihingte ei sungah hong ten thei natu le mi khat ih sua thei natu in amate vun a ki at bangin eite pa a minpiang vun ih at kul tu hi.



²³A ngannote le a neisa theampo ei a hi lel ngawl ziam? Tua ahiciang amate eite sungah teangsak tawng,” ci hi.

²⁴Hamor le Shechem ii son thu teng a khuapuite in lungkim pui a, pa theampo vun ki at siat hi.

²⁵Ni thum zawkciang amate vun atna hangin meima vei in a omlai takin Jacob tapa niite Dinah ii suapuipa Simeon le Levite in a namsaute uh la in, heakkhol ngawlin khuapi sungah tumin pa theampo thatlum siat uh hi.

²⁶Hamor le a tapa Shechem zongh thatlum a, Shechem inn pan Dinah la in ciapui uh hi.

²⁷Tuabang a thalup zawkciang Jacob tapa dangte in, a suapuinu a ki minsiatsak huvau in a phula tu in a khua phuul uh hi.

²⁸Amate in a tuuhonte, a khuihonte, a laate, khua sung le lo sung a om na theampo laaksak siat uh hi.

²⁹Amate in a neisa a manpha theampo, numei patang theampo le a inn sung na theampo laaksak siat uh hi.

³⁰Jacob in Simeon le Levi tungah, “Haksatna sungah nong tumpui zo uh hi; tu in hi munah a teang Canaante, Perizte le mi theampo in kei hong ngaimaw tu hi. Kei lah mihing tam nei ka hi bua a, amate kipawl in kei hong sim thong le ih innkuan in hong thatlum siat tu uh hi,” ci hi.

³¹Ahizong amate in, “Ka suapuinu uh sia pumpi kizuak khat bangin a vawt tu sia thuak zo mama ngawl khu hi,” ci in zo uh hi.

Pianciilna 35

Bethel ah Pathian in Jacob Thupha Pia

¹Pathian in Jacob tungah, “Bethel ah pai vingveng tan a, tua munah teang tan. Na suapui Esau kung pan na tai hunlai a, nang tungah hong kilangh Pathian keima atu in biaknatau khat sa in,” ci hi.

²Tuaciang Jacob in a innkuan puite le a ompuite tungah, “Ngamdang milim pathian na nei theampo vawk vun a, noma kithiansua in, puanthiang sil vun.



³Hi mun nusia in Bethel ah ih pai tu hi. Tua munah ngim ka nga ciang hong hu in ka paina theampo ah hong ompui Pathian atu in biaknatau khat ka sa tu hi,” ci hi.

⁴Tuaciang amate in, a ngamdang milim pathian a kepte theampo le a balai bilbaate zongh Jacob tungah pia uh hi. Jacob in Shechem khuahui limthing nuai ah tua vanhte phum hi.

⁵Jacob le a tapate ding tu a kipat ciang a kiim a paam a teang khua mite tungah patauna lian tung ahikom amate in Jacob le a tapate del ngawl uh hi.

⁶Jacob in a mihingte theampo taw Canaan ngam sung, tu in Bethel a kici Luz khua theng uh hi.

⁷Ama in tua munah biaknatau khat sa in a suapuipa kung pan a tai lai in Pathian ama kungah a kilangh na mun ahikom tua mun sia Pathian atu ci in Bethel min phuak hi.

⁸Rebecca a keam nu Deborah thi a, Bethel ii thangsang limthing nuai ah kiphum hi. Tua ahikom, “Kaana Limthing Kung” ci in min kiphuak hi.

⁹Mesopotamia pan Jacob hong cia ciang ama tungah Pathian kilangh kik a, ama thupha pia hi.

¹⁰Pathian in ama tungah, “ Na min Jacob hi, ahizong tu pan kipan Israel hi tu hi,” ci hi. Tua hi a, Pathian in ama min Israel phuak hi.

¹¹Tuaciang Pathian in ama tungah, “Keima in Vaanglianbelpa Pathian ka hi hi. Ta tam mama nei tan. Minamte nang sung pan piang tu a, kumpite pianna taangpupi na hi tu hi.

¹²Abraham le Isaac tungah ka piak leitangh nangma tungah kong pia tu a, nang nung pan na suan na paalte tung zongh ah ka pia tu hi,” ci hi.

¹³Tuaciang Pathian in ama nusia hi.

¹⁴Pathian ii ama a paupuina tua munah Jacob in khansuang khat phut a, tua khansuang sia zu buakna le olive thau buakna taw in aapna vawt hi.

¹⁵Ama in tua mun sia Bethel ci hi.



Rachel Thina

¹⁶Jacob le a innkuanpuite Bethel pan ding uh a, Ephrath khua a thet ma hiatin Rachel a nau nei tu hun tung a, ngim mama hi.

¹⁷Ama hong ngim vaial ciang nausuaksak syamanu in ama tungah, “Rachel awng, lau heak in, tapa dang khat nei ni hi,” ci hi.

¹⁸Ahizong ama thi hi, a thi ma a hui a tat tu ciang a tapa min Benoni ci in phuak hi. Ahizong a pa in Benjamin ci in phuak hi.

¹⁹Rachel a thi ciang Ephrath paina lampi hui, tu in Bethlehem a kici na munah kiphum hi.

²⁰Jacob in tua munah khansuang khat phut a, tua khansuang sia tuni dongin Rachel thaanmual teptee na ahi hi.

²¹Jacob kikhiin kik a, Eder tusaang ngalkhat ah ngiaphual saat hi.

Jacob ii Tapate

(1Khang tangthu 2.1-2)

²²Tua ngamah Jacob a ten laitakin, Reuben in a pa zinote khat ahi Bilhah taw omkhawm hi. Jacob in tua thu za a, thin uuk mama hi. Jacob in tapa sawm le nii nei hi.

²³A zi Leah taw a nei tapate sia Reuben (Jacob ii tapa lianbel) , Simeon, Levi, Judah, Issachar le Zebulun ahi hi.

²⁴Rachel taw a nei a tapate sia Joseph le Benjamin ahi hi.

²⁵Rachel ii silanu Bilhah taw a nei a tapate sia Dan le Naphtali ahi hi.

²⁶Leah ii silanu Zilpah taw a nei tapate sia Gad le Asher ahi hi. Hi teng sia Mesopotamia pan a nei tapate ahi hi.

Isaac ii Thina

²⁷Abraham le Isaac tenna ahi Hebron khua paam Mamre khua a pa Isaac omna ah Jacob pai hi.

²⁸Isaac kum za le sawmliat pha in,

²⁹a huai in thi a, a tate Esau le Jacob in ama vui hi.



Pianciilna 36

Esau ii Suan le Paalte

(1Khang tangthu 1.34-37)

- ¹Hite sia Edom kici, Esau ii suan le paal te ahi hi.
- ²Esau in Canaan numeite tenpui a: tuate sia Hit te Elon ii tanu Adah; Hivte Zibeon ii tapa Anah ii tanu Oholibamah
- ³le Nebaioth ii suapuinu, le Ishmael ii tanu Basemath ahi uh hi.
- ⁴Adah in Esau taw Eliphaz nei a, Basemath in Reuel nei hi.
- ⁵Oholibamah in Jeush, Jalam le Korah nei hi. Hi teng sia Canaan ngamsung pan a nei Esau tapate ahi hi.
- ⁶Esau in a zite, a tapate, a tanute le a inn sung a teang mihingte theampo la in a nganno theampo le Canaan ngam pan a neisa theampo taw a suapuipa Jacob kung pan mundang khat zuan hi.
- ⁷Banghangziam cile Jacob le ama neisa ngannote tamlei a, leitangh kicing ngawl ahikom teangkawm thei nawn ngawl hi.
- ⁸Tua ahikom Edom mual tungah Esau teang hi.
- ⁹Hite sia Edom taangpupi Esau ii suan le paalte ahi hi.
- ¹⁰⁻¹³Esau in a zi Adah taw tapa Eliphaz nei a, Eliphaz in tapa nga nei hi: tuate sia Teman, Omar, Zepho, Gatam le Kenaz ahi hi. Tuaciang a zi dang Timna taw tapa Amalek neithua hi. Esau in a zi Basemath taw Reuel nei a, Reuel in tapa li nei hi. Tuate sia Nahath, Zerah, Shammah le Mizzah te ahi hi.
- ¹⁴Esau in Zibeon ii tapa Anah ii tanu Oholibamah taw tapa thum nei a: tate in, Jeush, Jalam le Korah te ahi hi.
- ¹⁵Esau suante sia hi minamte ahi uh hi. Esau ii ta masabel Eliphaz sia a nuai a minamte ii pianna taangpupi ahi hi. Tua minamte sia Teman, Omar, Zepho, Kenaz,
- ¹⁶Korah, Gatam le Amalek te ahi hi. Hite sia Esau ii zi Adah ii suan le paalte ahi hi.



¹⁷Esau ii tapa Reuel sia a nuai a minamte ii pian na taangpupi ahi hi. Tuate sia Nahath, Zerah, Shammah le Mizzah te ahi hi. Hite sia Esau ii zi Basemath ii suan le paalte ahi hi.

¹⁸Anah ii tanu Esau ii zi Oholibamah taw a hin Esau ii suan le paalte sia a nuai a minamte ahi hi: tuate sia Jeush, Jalam le Korah te ahi hi.

¹⁹Hi minamte theampo sia Esau ii suan le paalte ahi hi.

Seir ii Suan le Paalte

(1Khang tangthu 1.38-42)

²⁰⁻²¹Edom ngam sungah a teang ciilte sia a minam in kikhen hi. Tuate in amate ii pianna taangpupite sia Hor minam khat ahi a nuai a Seir ii suan le paalte tungah kan hi: Tuate in, Lotan, Shobal, Zibeon, Anah, Dishon, Ezer le Dishan te ahi hi.

²²Lotan sia Horite le Heman bete ii pianna taangpupi ahi hi. (Lotan in Timna a kici suapui numei khat nei hi.)

²³Shobal sia Alvan, Manahath, Ebal, Shepho le Onam bete ii pianna taangpupi ahi hi.

²⁴Zibeon in tapa nii nei a, Aiah le Anah ahi hi. (Anah sia dui sungah a pa laate a cin lai in, ciktuisa a mu pa ahi hi.)

²⁵⁻²⁶Anah sia Dishon ii pa ahi hi. Dishon sia Hemdan, Eshban, Ithran le Cheran te ii pianna taangpupi ahi hi. Anah zongh in Oholibamah a kici ta numei khat nei hi.

²⁷Ezer sia Bilhan, Zaavan le Akan bete ii pianna taangpupi ahi hi.

²⁸Dishan sia; Uz le Aran be le phungte pianna taangpupi ahi hi.

²⁹⁻³⁰Edom ngamsung Hor minamte sia: Lotan, Shobal, Zibeon, Anah, Dishon, Ezer le Dishan te ahi hi.

Edom ii Kumpite

(1Khang tangthu 1.43-54)

³¹⁻³⁹Israel ngam sungah kumpi khat zongh a om ma in a nuai a kumpite in a kizom in Edom ngam uk uh hi. Tuate sia Dinhabah khua pan Beor tapa Bela

Bozah khua pan Zerah tapa Jobab Teman ngam pan Husham Avith khua pan Bedad tapa Hadad (Ama in Moab ngamsung ngal kisimna pan Midence zo hi.) Masrekah khua pan Samlah Eupharates ngun tung Rehoboth khua pan Shaul Pau khua pan Achbor Hadad ii tapa Baal Hanan (A zi sia Mehetabel hi a, Matred tanu, Mezahab ii tunu ahi hi.)

⁴⁰⁻⁴³Esau sia a nuai a Edom minam te ii pianna taangpupi ahi hi. Tuata sia, Timna, Alvah, Jetheth, Oholibamah, Elah, Pinon, Kenaz, Teman, Mibzar, Magdiel le Iramte ahi hi. Hi minamte teenna ngam tek sia minam min zui in kilo hi.

Pianciilna 37

Joseph le A Suapuite

¹Jacob sia a pa teenna ngei Canaan ngamah teangsuak hi.

²Hisia sia Jacob innkuan tangthu ahi hi. Joseph sia tangvalno kum sawm le kum sali pha a, a pa zinote ahi Bilhah le Zilpah ii tapate taw tuu le kealte cingkhawm hi. Ama in a suapuite ngamtat siatna teng a pa tungah ko hi.

³Jacob in a tapa dangte sangin Joseph it zaw hi, banghangziam cile a huai zawkciang a nei tapa ahi hi. Ama in puantual baansau khat Joseph atu in khuisak hi.

⁴A pa in Joseph a it zawkna thu a suapuite in a mu uh ciang a suapuipa ngaimaw mama a, pha takin paupui ngawl hi.

⁵Zan khat Joseph in mang khat man a, tua a mang, a suapuite tungah a son ciang a suapuite in ama ngaimaw seseam uh hi.

⁶Ama in, “Ka mangmat sia hong ngai tavun,

⁷Eite lo sungah zungtaang vawngte ih sawm a, keima taangvawng tho in dingtang hi. Keima taangvawng sia noma taangvawngte in kiim uumin kun uh hi,” ci hi.

⁸A suapuite in ama tungah, “Nang kumpi khat suakin kote hong uk tu in kingaisun ni ziam?” ci in dongh uh hi. Ama ii mangmat hu le tua a mang thu a son hu in a suapuite in ngaimaw seseam uh hi.



⁹Tuaciang Joseph in mang man leleau in a ute tungah, “Mang dangkhat ka man a, tua ka mang sungah ni, tha le aksi sawm le khatte in ka mai ah hong kun ka mu hi,” ci in son hi.

¹⁰Ama in a pa tungah zongh a mang son a, a pa in, “Nang mang sia bangbang mang hi thong ziam? Na nu, na suapuite le kei, na mai ah pai in hong kun tu in ngaisun ni ziam?” ci in tei hi.

¹¹Joseph ii suapuite in ama eang uh hi, ahizong a pa in hi thute theampo a thin sungah ngaisun nginge hi.

Egypt ah Joseph Kizuak

¹²Ni khat ni in Joseph ii suapuite a pa tuute cing tu in Shechem ah a pai zawkciang,

¹³Jacob in Joseph tungah, “Na suapuite tuu cinna Shechem ah pai lete kong oai hi,” ci hi. Joseph in, “Kithoai zo ing,” ci in zo hi.

¹⁴A pa in ama tungah, “Va pai tan a, na ute le nganhonte a dam nam? va en tan, tuaciang a dam kim tek ahile hong cia kikin hong son tan,” ci hi. Tua ahikom a pa in Hebron kuam pan pai tu in ama sawl hi. Joseph sia Shechem theng a,

¹⁵mi khat in dui sungah Joseph a va kawkoai a mu ciang, “Bang zong ni ziam?” ci in dongh hi.

¹⁶Ama in “A nganhonte a cing ka suapuite ka zong hi. Amate omna mun nong son thei tu ziam?,” ci in zo hi.

¹⁷Tua pa in, “Amate hi sungah om nawn ngawl hi. Dothan ah ka pai tu uh hi, a ci ka za hi,” ci hi. Tuaciang Joseph in a suapuite nungzui in Dothan ah amate mu hi.

¹⁸Amate in a khuala na ah Joseph mu a, amate kung a thet ma in, amate in Joseph thalup tu in vaihawm uh hi.

¹⁹Amate khat le khat, “Hi sungah mangmanpa hong pai hi.



²⁰Tu in hong pai tavun, ama thatin tuikhuk kang sa khat sungah a luang vawk tawng. Ngamsa khat in ama petlum hi, ih ci thei hi. A mangmatte bang a suak ziam? ih en tu hi,” kici uh hi.

²¹Reuben in hi thu a zaak ciang Joseph a suatak natu hanciam hi. Ama in, “Ama that ba tawng,” ci hi.

²²“Dui sungah a om hi tuikhuk sungah ama khia vun ahizong ama liamsua heak vun,” Hong suakta le a pa kungah ciasak kik nuam ahikom ama in hi bangin ci hi.

²³A suapuite kungah Joseph hong thet to ciang ama silh lai a puantual baansau laaikeaksak uh hi.

²⁴Tuaciang amate in Joseph manin tuikhuk kang sa sungah khia uh hi.

²⁵An a neak laitak Gilead pan Egypt ah a pai Ishmael khualhawte honkhat thakhat thu in mu uh hi. A kalahte sia hel namtui le thingnaai te puasak uh hi.

²⁶Judah in a suapuite tungah, “Ih suapuipa thatin tua thu ih ip hu in bang meetna om thong ziam?”

²⁷Hi Ishmaelte tungah zuak tawng. Tuabang hi leang ama bangma law kul ngawl hi, tua bek dom ngawlin ama sia ih suapuipa hi a, eima chi le sa tatak ahi hi,” ci hi. A suapuite zongh lungkim a,

²⁸Midian sum vawtte pawlkhat hong pai ciang a suapuite in Joseph tuikhuk sung pan kaito kikin Ishmaelte tungah ngun dangka kul taw zuakin, amate in Egypt ah paipui uh hi.

²⁹Reuben hong cia kik a, tuikhuk sungah Joseph a mu ngawl ciang khuangai in a puan balkeak hi.

³⁰A suapuite kungah ama heak kikin, “Tangvalpa om ngawl hi! Bang law tu khi ziam?” ci hi.

³¹Tuaciang amate in keal khat ngo a, tua chi sungah Joseph puantual pap hi.



³²Amate in tua puan la in, a pa tungah, “Hi puan mu ung. Na tapa puan ahi ziam?” ci uh hi.

³³A pa in tua puan tel a, “Hi hi, ka tapa puan hi, ngamsate in thatlum zo hi. Ka tapa Joseph kibalneen zo hi,” ci hi.

³⁴Jacob khuangai in a puan balkeak in, khau-ip puan silh hi. A tapa hangin khua ngeipi kaikut hi.

³⁵A tapate le a tanute theampo in ama heeneam tu in hong pai hi, ahizong kiheneam zo ngawlin, “Mithi khua ah ka tapa atu kaikut sa in ka paisuk tu hi,” ci hi. Tuabangin a tapa Joseph hu in ama kaikut top hi.

³⁶Tua lan in Egypt ngam sungah Midiante in Joseph sia Potiphar tungah zuak uh hi. Potiphar sia Egypt kumpipa ii ulian khat hi a, kumpi inncingte ii ngalkap hon ukpa ahi hi.

Pianciilna 38

Judah le Tamar

¹Tua hun laitak Judah in a suapuite nusia in, Adullam khua mi Hirah a kici pa taw teangkawm hi.

²Tua lai ah Judah in Canaan mi Shua ii tanu ngaknu khat taw kisi hi. Ama in tua nu tenpui a,

³tapa khat nei in a min Er phuak hi.

⁴Tua nu ngai kik a, tapa dangkhat nei in a min Onan phuak hi.

⁵Tapa khat nei kik a, a min Shelah phuak hi. A tapa a sua laitakin Judah sia Achzib ah om hi.

⁶Judah in a tapa upabel Er atu in Tamar kici zi khat puisak hi.

⁷Er ngamtat pha ngawl a, Topa lungkimsak ngawl ahikom Topa in ama thatlum hi.

⁸Tuaciang Judah in Er ii suapuipa Onan tungah, “Pai in, na upa zi meingong nu taw lumkhawm tan. Na suapuipa in suan le paal a nei thei natu in, a pasal suapui na hi bangma nasep tu teng seam siat tan,” ci hi.



⁹Ahizong Onan in a nei tu a tate sia ama aa ahi ngawl natu he ahikom a upa zi taw a omkhop ciang, a suapuipa atu in ta a nei ngawl natu in a bawtui lei ah taaksak hi.

¹⁰A ngamtatnaTopa lungkim ngawlin Topa in ama zongh thatlum hi.

¹¹Tuaciang Judah in a monu Tamar tungah, “Na nungsang na zuan kik tan a, ka tapa Shelah tangval mateng meingong in va om phot tan,” ci hi. Banghangziam cile Shelah zongh a suapuite bangma in a ki thalup tu a lau hangin Judah in hi bangin ci hi. Tua ahiciang Tamar a nungsang zuan hi.

¹²Tua zawk hunkhat ciang Judah ii zi thi hi. Judah a khuangai hun a ven ciang, ama sia Adullam khua mi a lawmpa Hirah taw a tuute mul meetna mun Timnah ah pai uh hi.

¹³Mi khat in Tamar tungah na Topasal a tuute mul meetna mun Timnah ah pai hi, ci in son hi.

¹⁴Tuaciang ama in a meingong puan suutin, mai tuamna puanpaa khat taw a mai tuamin Timnah khua paina lampi tungah a om Enaim khuasung tumna ah to hi. Tu in Judah ii tapa nobel Shelah sia tangval zo ahi hunlam Tamar in he hi. Ahizong ama sia Shelah taw kiteangsak ngawllai hi.

¹⁵Judah in Tamar a mu ciang Tamar sia a maituam ahikom numei pumpi kizuakte khat in ngaisun hi.

¹⁶Lampi hui ama omna ah pai in, “Bangza ngen ni ziam?” ci hi. Tua nu sia a monu ahi hunlam ama in he ngawl hi. Tamar in, “Bang hong pia tu ni ziam?” ci hi.

¹⁷Judah in, “Ka ngannote sung pan kealno khat kong puak tu hi,” ci in zo hi. Tamar in, “Hi hen, tua keal nong puak dong kei tungah kiciamna ahi na khat pawpo nong pia tu ziam?” ci hi.

¹⁸Judah in, “Kiciamna bang hong pia tu khi ziam?” ci in dongh hi. Tamar in, “Na min tupna le a khau, na khutsung a om na ciangkhut,” ci in zo hi. Ama in tuateng Tamar pia hi. Tuaciang amate omkhawm a, Tamar naupaai hi.



¹⁹Tamar inn ah cia in, a kituamna puan suutin, a meingong puan teng silh kik hi.

²⁰Judah in a kiciamna vanh teng tan kik tu in keal khat taw a lawmpa Hirah paisak a, ahizong Hirah in tua nu mu zo ngawl hi.

²¹Ama in Enaim ah mihingte dongh a, “Hi sung lamhui ah a om pumpi kizuak nu sia koi sungah om ziam?” ci hi. Amate in, “Hi sungah pumpi kizuak numei om ngei ngawl hi,” ci in zo uh hi.

²²Ama cia kikin Judah tungah, “Ama ka mu zo bua hi. Tua munah mihingte in hi sungah pumpi kizuak numei om ngei ngawl hi, hong ci hi,” ci hi.

²³Judah in, “Eite hong kinuisan tha tu ahikom vanhte ama in keam taken. A manh piak ka sawm a, ahizong na mu zo bua hi,” ci hi.

²⁴Tha thum bang zawkciang mihing khat in Judah tungah, “Na monu Tamar sia pumpi kizuak khat bang ngamta a, tu in ama naupaai hi,” ci in son hi. Judah in, “Ama paipui vun a, hallum tavun,” ci in thupia hi.

²⁵Ama a ki paipui ciang, ama in a Topasal tungah kam vaitha a, “Hi vanh teng a neipa taw naupaai khi hi. Hi min tupna le a khau le hi ciangkutte—akua neisa ziam?, en in,” ci hi.

²⁶Judah in tua vanhte ciamtee a, “Ama thumaan hi. Ka tapa Shelah taw kiteang tu hi napi kiteangsak ngawl ka hikom keima a khial ka hi hi,” ci hi. Judah in Tamar ompui kik ngei nawn ngawl hi.

²⁷Nausua hun a thet ciang naupeang a nei tu sia ki mu hi.

²⁸Nausuak tu a tut ciang naute khat in a khut kilawtsak hi; nausuaksak syamanu in tua khut zamin khausan khat a khut tung khi a, “Hisia suak masa hi,” ci hi.

²⁹Ahizong a khut a sung sangah a tum kik laitakin a suapuipa hong suak masa hi. Tuaciang syamanu in, “Hi bangin na sua natu lampi nangma in vawttawm ni hi,” ci hi. Tua ahikom ama min Perez kiphuak hi.



³⁰Tua zawkciang a khut tung a khausan taw a suapuipa hong suak a, ama min Zerah kiphuak hi.

Pianciilna 39

Joseph le Potiphar ii Zi

¹Ishmael te in Egypt ah Joseph paipui a, kumpipa ii ulian khat ahi, kumpi inncing ngalkap hon ukpa Potiphar tungah zuak hi.

²Topa in Joseph panpui a, nasep zosak hi. Joseph sia Egypt a Topa inn ah teang a,

³Topa in Joseph panpui ahikom a nasepna theampo ah a cialcinna thu Egypt a Topa in mu hi.

⁴Ama tungah Potiphar lungkim a, ama aituam naseam tu in koi ahikom a innsung a neisa theampo uksak hi.

⁵Tua hun a kipan Joseph hangin Potiphar te innkuan, a innsung le a lo sung a neisa theampote Topa in thupha pia hi.

⁶Potiphar in na theampo Joseph et tu in aap siat a, a anneak tu ngawlbuang thudangte thinbot in nei ngawl hi. Joseph sia a khanhoi in a mealpha a,

⁷tawmvei zawkciang a Topa zi in Joseph lungngul in luppui tu in kunh hi.

⁸Joseph in nial a, “En in, hi munah keima om ka hikom ka Topa in inn sungah bangma thintoi ngawl hi. A neisa theampo ka et tu in hong aap siat hi.

⁹Hi inn sungah ama taw kibangin thu ka nei a, nangma sim ngawl buang kei atu in kham hong nei ngawl hi. Tua ahiciang hi bang ngamtat pha ngawl vawtin ka Pathian tungah khial thei thong tu khi ziam?” ci hi.

¹⁰A Topa zi in Joseph luppui tu in nisim in kunh ahihang Joseph in luppui nuam ngawl hi.

¹¹Ahizong ni khat ni in Joseph sia inn sungah ama na seam tu in a pai ciang inn sungah naseamte kuama om ngawl hi.



¹²A tonu in Joseph puantual pan man a, “Kei taw lumkhawm tawng,” ci hi. Ahizong a tonu khut sungah a puantual nusia in suakta in a pua sangah tai hi.

¹³A tonu in ama khut sungah a puantual nusia in inn pan a tai a mu ciang,

¹⁴ama in a innteang naseamte samin, “Hi sia en vun! Ka pasal ii inn ah hong ciapui, hi Hebrew pa in ei hong zawngsak hi. Ama ka inn khan sungah hong tumin buanin khialpui tu in hong kipan hi, ahizong a nging theiza in ka ciik-au hi.

¹⁵Ama in ka ciik-au a zaak ciang a puantual ka hui ah nusia in doipua ah tai hi,” ci hi.

¹⁶Joseph ii Topa, inn ah hong cia dong ama in Joseph puantual keam hi.

¹⁷Tuaciang a pasal tungah ama in thupiang teng son a: “Hi lai ah nong ciapui Hebrew sila pa in ka inn khan sungah tumin, kei buanin khialpui hong sawm hi.

¹⁸Ahizong ka ciik-au ciang a puantual ka kungah nusia in doipua ah tai hi,” ci hi.

¹⁹Joseph ii Topa a thin uuk a,

²⁰Joseph manin kumpipa ii thongtaakte a koina thonginn ah khum in tua munah Joseph koi hi.

²¹Topa in Joseph panpui a, thupha pia ahikom thong ukpa in Joseph diksa hi.

²²Thong ukpa in Joseph sia thongtaak theampo uk tu in koi a, thong sungah nasep theampo uksak hi.

²³Joseph ii nasepnate thong ukpa ii et kik kul ngawl hi, banghangziam cile Topa in Joseph panpui a, a nasepna theampo zosak hi.

Pianciilna 40

Joseph in Thongtaakte ii Mang Khiaksak

¹Tua zawk hunkhat ciangin Egypt kumpipa ii zu hai piapa le anluum empipa in kumpipa thin uuksak hi.



- ²Hi naseam niite tungah kumpipa thin uuk in,
- ³Joseph kikhumna mun, kumpi inncing ngalkap hon ukpa inn sung thong sungah khum hi.
- ⁴Amate khua ngeipi ma thong sungah om a, ngalkap hon ukpa in Joseph sia amate naseamin zangh hi.
- ⁵Zan khat tua thong sungah zu hai piapa le anluum empipa in mang khat veve man a, a mangte in khiakna tuam tetek nei hi.
- ⁶A zingsang amate kungah Joseph a pai ciang amate thinngim a, a om sia Joseph in mu hi.
- ⁷Joseph in amate tungah “Banghangin tuni in na thin uh ngim tuak mama ziam?” ci in dongh hi.
- ⁸Amate in, “Mang khat veve ka man uh a, tua mangte a khiakna hong son thei tu hi sungah kuama om ngawl hi,” ci in zo hi. Joseph in, “Mang khiak theina hong pia sia Pathian hi, na mang uh hong son tavun,” ci hi.
- ⁹Tuaciang zu hai piapa in, “Ka mang sungah sapit kung khat ka mai ah om a,
- ¹⁰tua tungah sapit baak thum om hi. A teete a men po ciang hong mom a tuaciang sapit ngate min hi.
- ¹¹Kumpipa hai ka toai a, sapit ngate lo in, hai sungah suukin kumpipa ka pia hi,” ci hi.
- ¹²Joseph in, “A khiakna hi bang hi; sapit baak thum sia ni thum hi.
- ¹³Ni thum sungin kumpipa in nang hong suatak tu a, na mawna maisakin na nasep ngei hong pia kik tu hi. Ama zu hai piapa na hi lai a, nasep bangma in ama zu hai na pia tu hi.
- ¹⁴Ahizong na ma a pai ciang kei hong mangil heak in a, hi thong sung pan ka suatak thei natu in kumpipa tungah ka thu teng hesuakna taw hong sonsak tan.
- ¹⁵A tatakin ci leang Hebrew ngam panin hong kingu hi a, hi thonginn sungah hong khum natu in khialna bangma ka nei bua hi” ci hi.



¹⁶Zu hai piapa ii mang a khiakna sia thupha hi ci in anluum empipa in a mu ciang ama in Joseph tungah, “Kei zongh mang khat ka man a, anluum law thum ka lu tungah ka pua hi.

¹⁷A tungbel law sungah kumpipa atu in muh namcin om a, vacimte in tuate ne uh hi,” ci hi.

¹⁸Joseph in, “A khiakna hi bang hi; law thumte sia ni thum ahi hi.

¹⁹Ni thum sungin kumpipa in nang hong suatak tu a, tuaciang na lu hong tan tu hi! Tuaciang ama in na luang thingkung khat ah hong khai tu a, vacimte in na sa ne tu uh hi,” ci in zo hi.

²⁰Ni thum zawkciang kumpipa suani in, ama in a uliante theampo atu in poai khat khaam a, zu hai piapa le anluum empipa, ama in suatak in, uliante mai ah paipui hi.

²¹Ama in zu hai piapa sia a nasep ngei ma seamsakkik a,

²²ahizong anluum empipa sia thatlum hi. Joseph son bang tatak in hi teng theampo piang siat hi.

²³Ahizong zu hai piapa in Joseph phawk vet nawn ngawlin mangil cip hi.

Pianciilna 41

Joseph in Kumpipa ii Mang Khiaksak

¹Tua zawk kum nii zawkciang Egypt kumpipa in mang man a, a mang sungah Nile ngunhui ah ding hi.

²Nile ngun sung panin khuipui a thau, a zol sali pusuak to a, lopa hingte ne uh hi.

³Tua zawkciang a ngawm, a ngu nguak a om khuipui salite pusuak to hi. Amate Nile ngunhui a khuipui dangte kungah dingin,

⁴a ngawm khuipui salite in a thau khuipui salite netum uh hi. Tuaciang kumpipa khanglo hi.

⁵Ama mu kikin mang dang khat man kik hi. A hui bupin a min, kung khat tung pan taanghui sali hui hi.



⁶Tuaciang senneal vui ii a theapsak le a vulsak a dang taanghui sali hong po hi,

⁷a theap taanghui teng in a tak nei taanghui teng valhtum hi. Kumpipa khanglo a, mang a mat sia he hi.

⁸A zingsang ciang ama thinngim ahikom mitbum thiamte le Egypt mipil theampo sam hi. Ama in amate tungah a mang teng son a, ahizong kuama in khiaksak thei ngawl hi.

⁹Tuaciang zu hai pia pa in kumpipa tungah, “Ka khialna tuni in kong pualaak tu hi.

¹⁰Kei le anluum empipa tungah na thin uuk a, kumpi inncing ngalkap hon ukpa inn sung thong sungah nong khum hi.

¹¹Zan khat ka nii in mang khat veve ka man uh a, ka mangte uh in khiakna tuatuam nei hi.

¹²Tua munah kumpi inncing ngalkap hon ukpa ii silapa , Hebrew tangvalno khat kote taw omkhawm hi. Ama tungah ka mangte uh ka son uh ciang a khiakna hong son hi.

¹³Ama son bang tatakin piang a, kei sia ka nasepna ah nong koi kik a, ahizong anluum empipa sia na thatlum hi,” ci hi.

¹⁴Kumpipa in Joseph sam a, thong sung pan thakhat thu in Joseph hong kipaipui hi. Joseph a mul a meetthiang zawkciang le a puante a laih zawkciang kumpipa omna ah pai hi.

¹⁵Kumpipa in ama tungah, “Mang khat ka man a, kuama in a khiakna hong son thei ngawl hi, nang sia mangkhia thei ci in hong kison hi,” ci hi.

¹⁶Joseph in, “Kumpipa awng, kei hi thei hi ngawl hi, ahizong Pathian in mang khiakna maan hong son tu hi,” ci in zo hi.

¹⁷Kumpipa in, “Ka mang sungah Nile ngunhui ah ka ding a,

¹⁸limci in a thau khuipui sali, ngunsung pan hong paito a, lohingte ne hi.



- ¹⁹Tuaciang ngawmin a ngu nguak a om a dang khuipui sali hong paito hi. Egypt ngam sungah tuabang khuipui zawngkhal ka mu ngei bua hi.
- ²⁰Khuipui ngawmte in khuipui thaute valhtum a,
- ²¹ahizong kuama in a valh hunlam he ngawl tu hi, banghangziam cile amate sia ni dang bangma in ngawm veve hi. Tuaciang ka khanglo hi.
- ²²Mang ka man kik a, taangkung khat tung pan a hui bupin a min taanghui salite ka mu hi.
- ²³Tuaciang senneal vui in theapsakin a vulsak taanghui sali hong po a,
- ²⁴tuaciang a theap taanghuite in a taknei taanghuite valhtum hi. Mitbum thiamte tungah ka mang ka son a, ahizong amate khat zongh in ka mang khiakna hong son thei ngawl hi,” ci hi.
- ²⁵Joseph in kumpipa tungah, “Na mangte nii ii a khiakna sia kibang hi; Pathian in a sep tu teng nang tungah hong son hi.
- ²⁶Khuipui thau salite sia kum sali hi a, taanghui a taknei salite zongh kum sali ma hi, A khiakna kibang hi.
- ²⁷A khak sang a hong suak khuipui ngawm sali le senneal vui ii a vulsak taanghui theap salite sia kialpi kum sali ahi hi.
- ²⁸Kong sonsa bangma, Pathian in a sep tu teng nang tungah hong lak hi.
- ²⁹Egypt ngamsung theampo ah kum sali sung an hauna hong tung tu hi.
- ³⁰Tua zawkciang kum sali sung kialpi tungin an hau hun kum teng ki mangil cip tu hi, banghangziam cile kialpi in ngamsung lalcipsak tu hi.
- ³¹Hauna kum teng ki mangilcip tu hi, banghangziam cile hong tung tu kialpi sia cizathuai mama tu hi.
- ³²Nii vei kipee mang na matna sia Pathian in hi thu kipsak zo a, hai ngawlin tungsak tu ci nopna ahi hi.
- ³³Tu in mipil le thu he khat teal in a, ngamsung uk tu in koi in.



³⁴Ulian vaihawmte ngam sungah koi in a, kum sali sung an hau hun sungin lo ante see nga sua see khat khol in.

³⁵Hong tung tu kum phat sung a an theampo kaikhawm in, khuapite sungah kholin cingsak in.

³⁶Hi ante sia Egypt ngam sungah hong tung tu kialpi kum sali sungah ngamsung mihingte kivaak natu a, a kikhoh hi tu hi. Hi bang vawtna taw mihingte pukthi ngawl tu hi,” ci hi.

Egypt Ngam uk in Joseph Kikoi

³⁷Kumpipa le a uliante in hi vaihawmna lungkim a,

³⁸kumpipa in amate tungah, “Joseph sangin a phazaw mi ih mu ngei buatu hi. Joseph sia a sungah Pathian tha om hi,” ci hi.

³⁹Kumpipa in Joseph tungah, “Pathian in nang tungah hite theampo hong lak zo a, nang sang a, a ciim zaw le khua mu zaw kuama dang om ngawl hi.

⁴⁰Ka ngam ukpi tu in nang kong koi tu a, nangma thupiak bangin ka mihingte ngamta tu hi. Nangma thu neina tungsia ah keima bek ka om tu hi.

⁴¹Tu a kipan Egypt ngamsung theampo uk tu in kong koi hi,” ci hi.

⁴²Kumpipa in a min tupna khutzungbu a khutme pan suutin Joseph khutme ah bulsak hi. Ama in puanneal kaang puantual khat silhsakin a ngawng ah khamkhi khat awsak hi.

⁴³Kumpi tona leang kumpi siphu niina tungah Joseph tosakin ama cing ngalkapte in a mai pan, “Lam na awn vun! Lam na awn vun!” ci in au uh hi. Tuabangin Joseph sia Egypt ngamsung theampo ukpi tu in koi hi.

⁴⁴Kumpipa in ama tungah, “Keima in kumpi ka hi hi, nangma thu ngawl in Egypt ngamsung theampo ah kuama in a khut a peang ngangawn laam ngawl tu hi,” ci hi.

⁴⁵⁻⁴⁶Ama in Joseph sia Zaphenath Paneah ci in Egypt min phua hi. Heliopolis khua thiampi khat ahi Potiphera ii tanu Asenath taw teangsak hi. Joseph sia



Egypt kumpipa na a sep kipatin kum sawmthum pha hi. Ama sia kumpi innusia in ngamsung theampo ah pai kawkoai hi.

⁴⁷An hau kum sali sung leitangh pan an tam mama piang a,

⁴⁸tuateng theampo Joseph in kaikhawm in khuapi tengah khol hi. Ama in khuakiim a lote panin a piang ante sia tua khua ah khol hi.

⁴⁹A ankholve sia tuipei senvui za in tam ahikom Joseph in sim nawn ngawl, te nawn ngawl hi.

⁵⁰Kialpi kum hong tun ma in Joseph in Asenath taw tapa nii nei hi.

⁵¹Ama in, “Pathian in ka haksatna theampo le ka pa innkuanpui theampo hong mangilsak hi,” ci hi. Tua ahikom a tapa masa min Manasseh phuak hi.

⁵²Ama in, “Haksat ka thuakna mun ah Pathian in tate hong pia hi,” ci ahikom a tapa niina sia Ephraim phuak hi.

⁵³Nopsak hun kum salite Egypt ngam sungah bo a,

⁵⁴Joseph sonsa bangin kum sali kialpi kipan hi. Ngamdang theampo ah kialpi tung a, ahizong Egypt ngambup ah an om hi.

⁵⁵Egyptte ngilkial tu hong kipat ciang kumpipa tungah an ngen uh hi. Tuaciang kumpipa in amate Joseph kungah pai in, Joseph ci bang a vawt natu in thupia hi.

⁵⁶Kialpi nasia vaial in ngambup ah hong kizel a, tuaciang Joseph in an kholna inn theampo hongin Egyptte tungah antang zuak hi.

⁵⁷Mun theampo ah kialpi nasia mama tung ahikom leitung mun theampo pan mihingte Joseph kungah antaw tu in Egypt ah hong pai uh hi.

Pianciilna 42

Joseph ii Suapuite Antaw tu in Egypt ah Pai

¹Jacob in Egypt ngamah an a omna thu a heak ciang a tapate tungah, “Banghang hi bang om thawthong nu ziam?”



²Egypt ah an a omna thu ka za hi, ih pukthi ngawl natu in pai in an taw tavun,” ci hi.

³Tuaciang Joseph ii suapui seal sawmte Egypt ah an taw tu in pai a,

⁴ahizong Jacob in Joseph suapui laipee Benjamin in amate zuisak ngawl hi, banghangziam cile ama tungah bang khat pawpo a pian thaak tu lau hi.

⁵Canaan ngam sungah kial tung ahikom midangte taw Jacob tapate an taw tu in pai hi.

⁶Egypt ngamukpa Joseph in leitung mihing theampo tungah antang zuak hi. Tuaciang Joseph suapuite hong pai in a maitang uh leipha in Joseph mai ah kun uh hi.

⁷Joseph in a suapuite a mu ciang he hi, ahizong amate a he ngawl bangin om hi. Joseph in a suapuite tungah kamngam taw, “Koi sung pan hong pai nu ziam?” ci in dongh hi. Amate in, “Canaan ngam pan an taw tu in kong pai uh hi,” ci in zo uh hi.

⁸Joseph in a suapuite a heak hang a suapuite in ama he ngawl uh hi.

⁹Joseph in amate taw kisai a mang matnate phawk kikin, “Note sia thukante na hi uh a, ngamsung tha neamna mun teng a dawp tu in hong pai nu hi,” ci hi.

¹⁰Amate in, “Hi ngawl hi, Topa awng, an taw tu in na silate hong pai khu hi.

¹¹Kote unau khat hi ung. Topa awng, thukante hi ngawl a, mi thumaante ka hi uh hi,” ci in zo uh hi.

¹²Joseph in amate tungah, “Hi ngawl hi! Ngamsung thaa neamna mun teng a dawp tu in hong pai nu hi,” ci hi.

¹³Amate in, “Topa awng, kote unau sawm le nii ka pha uh a, Canaan ngammi khat ii tapate ka ahi uh hi. Ka suapui khat thi a, a nobel sia tu in ka pa uh taw om hi,” ci hi.

¹⁴Joseph in , “Kong cisa bangma hi. Note thukante na ahi uh hi.



¹⁵Note hi bangin kong ze et tu hi; kumpipa min taw ka kiciam a, na nau nobel sia hi mun hong thet mateng note cia ngei ngawl tu nu hi.

¹⁶Note sung pan khat pawpo in pui tavun. Na thu uh a thian mateng a dang teng sia thong sungah kong khum tu hi. Tuabang ahibuale kumpipa min lo in ka son hi, note sia thukante hi nanak tu nu hi,” ci in zo hi.

¹⁷Tuabangin Joseph in ni thum sung amate thong sungah koi hi.

¹⁸A ni thum ni in Joseph in amate tungah, “Keima in Pathian kiita mihing khat ka hi a, na nuntak natu in hi bangin ngamta vun,

¹⁹Thumaan mi na hina a kilak natu in note hong kikoina mun thong sungah khat om tu nu hi, a dang teng in ngilkial a om na innkuanpuite na an leisa teng puak tu nu hi.

²⁰Tuaciang na nau nobel uh sia nong paipui tu uh hi. Tuabangin note thumaanna hong kilangh tu a, note kong that buatu hi,” ci hi. Tuasia bangin a unau teng lungkim uh hi.

²¹Amate khat le khat, “Ih suapuipa Joseph tuabang ih vawtsiat ih khial mama hi, haksatna a thuak mu napi in hong hesuak tavun ci hong thum napi ih hesuak bua hi. Tua hu in tu in ngim ih thuak hi,” ci uh hi.

²²Reuben in, “Ih naupa vawtsia heak vun hong ci khi hi. Ahihang ka thu hong ni ngawl nu hi. Tu in ama thina thaman hong theng ahi hi,” ci hi.

²³Tuabang a pau Joseph in telsiat hi. Ahihang amate in Joseph in telsiat ci he ngawl uh hi, banghangziam cile amate in kamphen zanghin Joseph a paupui hang ahi hi.

²⁴Joseph sia mundang ah pai in kap hi. A kaa zawkciang amate kungah heak kikin amate sung pan Simeon kai in amate mu tangin khaukhitsak hi.

Joseph ii Suapuite Canaan ah Cia kik

²⁵Joseph in a suapuite ip sungah antangte a hen natu, a ip sungah amate ii sum tek a koi natu le lampi ah a neak tu an a piak natu in thupia hi. Tuabangin, kivawtsak hi.



- ²⁶Tua unaute in a antang leite a laa tungah suanin ding uh hi.
- ²⁷Tua ni zan a ngiana munah amate khat in a laa an pia tu in a ip a hon le a tungbel ah a sum mu hi.
- ²⁸Ama in a suapuite tungah, “Ka sum hong heak kik hi, ka ip sungah om hi,” ci hi. A thinkiam in lau a, “Pathian in eite tungah bang hong vawt thong ziam?” ci in khat le khat kidongh uh hi.
- ²⁹Canaan ngam a pa Jacob kung a thet ciang amate in thupiung theampo a pa tungah son hi.
- ³⁰“Egypt ngamukpa in kamngam taw in hong paupui a, a ngam thu kanin hong mawsiat hi.
- ³¹‘Kote thukante hi ngawlin mi thumaante ka hi uh hi,’ ci in ka zo uh hi.
- ³²‘Kote unau sawm le nii ka pha uh a, pa khat ii ta ka ahi uh hi. Ka suapui khat thi a, a nobel sia ka pa uh taw Canaan ah omlai hi’ ka ci uh hi.
- ³³Tua pa in, ‘Hi bangin na thumaanna uh kong kan tu hi: note khat hi sungah kei taw om tu nu hi; a dang teng na innkuanpui ngilkialte atu in antang puakin cia tu nu hi.
- ³⁴Na nau nobel sia hong paipui tavun. Tua hile note thukan hi ngawlin thumaan mi na hina uh kong he tu hi, na suapuipa kong pia kik tu hi. Tuaciang hi munah om in, na uk bangin sumlei sumzuak naseam thei tu nu hi,’ hong ci hi,” ci hi.
- ³⁵Tuaciang a ipte a sua uh ciang amate tek in a sumbawm tek uh mu a, a sum a mu uhciang a pata khawngin patau uh hi.
- ³⁶A pa in amate tungah, “Ka tate theampo taw hong kikhensak nuam nu ziam? Joseph bo zo; Simeon bo zo a, tu in Benjamin paipui nuam nu hi. Kei sia a thuakbelpa ka hi hi!” ci hi.
- ³⁷Reuben in a pa tungah, “Benjamin kong ciapui kik bua ahile ka tapate nii thatlum in. Keima in Benjamin hong khoisak tan, kong ciapui kik nanak tu hi,” ci hi.



³⁸Ahizong Jacob in, “Ka tapa in kong zuisak buatu hi; a upa thi a, ama bek taanglai hi. Lampi ah bang khat po tawk tha tu hi. Kei huai zo a, tuabang nong khuangaisaknate in kei hong thatlum tu hi,” ci hi.

Pianciilna 43

Joseph ii Suapuite Egypt ah Benjamin taw Heak kik

¹Canaan ah kialpi nasia seseam a,

²Jacob innkuanpuite in Egypt pan a antang lei teng a neak siat zawk ciang, Jacob in a tapate tungah, “Pai kik tavun a, antawm va taw tavun,” ci hi.

³Judah in a pa tungah, “Na naupa nong paipui bua uh le ka mai nong mu thei buatu uh hi, ci in mipa in ngat takin hong vaitha zo hi.

⁴Ka naupa nong zuisak le kote pai in nang atu an ka taw tu uh hi.

⁵Tuabang na oai buale ka pai buatu uh hi, banghangziam cile tua pa in na naupa nong keng bua uh le ka mai nong mu thei buatu uh hi, hong ci zo hi” ci hi.

⁶Jacob in, “Tua pa tungah suapui dang nei lai khu hi ci in na sonna uh taw banghangin hizata thinngim hong pia thong nu ziam?” ci hi.

⁷Amate in, “Tua pa in eite thu le innkuan thu pha takin hong dongh a, ‘Na pa uh nungta lai ziam? Suapui dang na nei uh ziam?’ hong ci a, ama thu dokte ka zo uh hi. Na naupa hong paipui tavun, ama hong ci tu sia bangbangin he khol thei tu khu ziam?,” ci in zo hi.

⁸Judah in a pa tungah, “Tangvalpa kei taw paisak in, ding kik pai tu khu hi. Tua hile eite ih pukthi buatu hi.

⁹Ka naupa atu in ka nuntakna taw kong kiciam hi. Nang kungah cidam in kong siapui kik bua ahile a tawntungin mawsiatna ka thuak tu hi.

¹⁰Eite vaikai lawlawm thong bualeang tu in nii vei ih thet kik natu hi zo hi,” ci hi.

¹¹A pa in amate tungah, “Tuabang hi tu ahile ngamsung pan a piang a phabel, thingngate tuun in ngamukpa tungah piak tu in keng vun, tuate sia,



thingnaai tawm, khuaitui tawm, hel namtui tawm, pistachio nga le almond ngate ahi hi.

¹²Na ip tungah nong ciapui uh na sumte na ken kik uh kul tu ahiciang na sum uh a zaa nii in keng vun. Sum hong khiak khial zong hi thei tu hi.

¹³Na suapuipa paipui vun a, hong ciapui kik pai tavun.

¹⁴Ama in na suapuipa le Benjamin nang tungah hong piak kik theina tu in Vaanglianbelpa Pathian in tuasia pa, no tungah hesuakna thin neisak taken. Kei, ka tate thi siat tu a thuk tu ka hile thuk ka heu tong,” ci hi.

¹⁵Tuaciang unaute sia letsongte le dangka a zaa nii in kengin, Egypt ngam ah Benjamin taw pai uh hi. Joseph mai ah amate ding uh hi.

¹⁶Joseph in amate taw Benjamin a mu ciang, ama in a inn sung naseampa tungah, “Amate ka inn ah paipui in. Sun ciang amate kei taw an nekhawm tu ahikom ngan khat ngoin, huan in,” ci hi.

¹⁷Ama thupiak bangin naseampa in Joseph inn ah unaute paipui hi.

¹⁸Inn ah amate a kipaipui ciang amate lau a, “A masa lai a sumte ih ip sungah a om hu in hi munah hong kipaipui hi. Amate in thakhat thu hong sim tu a, ih laate hong laaksak zawkciang sila in hong koi tu hi,” ci in ngaisun uh hi.

¹⁹Tuaciang amate Joseph naseampa omna kongkha ah pai in

²⁰“Topa awng hi lai ah antaw tu in khatvei kong pai zo uh hi.

²¹Inn ka cialam ka ngiaphual ah ka ip te ka hon uh ciang ka ipngong tek ah ka sumte ka mu uh hi. Tua sumte kong keng kik uh hi.

²²An lei natu in sum dang zongh kong kengthua uh hi. Ka ip sungah ka sumte uh akua in hong koisakkik ci sia ka he bua uh hi,” ci hi.

²³Naseampa in, “Thin ngim om bo, lau heak vun. Note Pathian, na pa ii Pathian in na ip sungah note atu in sum hong koisak hi tu hi. Na antang manh uh a cingin ka nga hi,” ci hi. Tuaciang ama in amate kungah Simeon paipui hi.



²⁴Naseampa in unaute inn sungah paipui hi. Naseampa in amate peang sil natu in tui pia a, a laate an pia hi.

²⁵Ni sun ciang amate taw Joseph an nekhawm tu ci son ahikom Joseph a piak tu letsong teng kinging khol uh hi.

²⁶Joseph inn hong thet ciang amate in a letsong puakte innsung ama mai ah paipui in ama mai lei ah kunsuk uh hi.

²⁷Ama in amate omzia teng dongh a, “Nong sonsa na pahuai bangbang ahi ziam? Ciidam in a nungta lai ziam?” ci hi.

²⁸Amate in, “A ki niamkhiak na sila pa, ka pa uh a cidam in nungta lai hi,” ci in zo uh hi. Tuaciang amate khupdin in ama mai ah kunsuk uh hi.

²⁹Joseph in a naupa Benjamin a mu ciang, ama in, “Hisia kei tung a nong son uh na nau nobel sia uh ziam? Ka tapa awng, Pathian in nang thupha hong pia taken, ” ci hi.

³⁰Tuaciang Joseph in a naupa a mu ciang a neno leilam ahikom thakhat thu in pusuak hi. Ama a neno leilam ahiciang a khan sungah pai in kap hi.

³¹A mai a phia zawkciang hong pusuak a, ama le ama tha la in an thuukin sawl hi.

³²Joseph sabuai khat ah, a suapuite sabuai dang khat ah an pia hi. Egyptte sia a tuamin nesak hi, banghangziam cile Egyptte in Hebrewte taw an neakkhop sia zano kisa hi.

³³Joseph mai sabuai ah a suapuite a haambel pan a moibel dong a kizom in kitosak hi. Tuabangin amate a kitosak amate in a mu uh ciang lamdangsa in khat le khat ki en uh hi.

³⁴Joseph sabuai tung pan amate an kipia a, Benjamin sia a dangte sangin a zaa nga tamzaw in kipia hi. Tuabangin amate Joseph taw anne tuidawn in nuamsa uh hi.

Pianciilna 44

A Bo Hai



- ¹Joseph in a inn uk naseampa tungah, “Mihingte ip sungah a puak zawk zaza an hensak in a, amate sum tek a ipngong ah koi in.
- ²Ka ngunhai sia a moibelpa ii ipngong a tungbel ah antawk natu sumte taw koikhawm in,” ci in thupia hi. Ama in a kisawl bangin seam hi.
- ³Zingsang tuungin a laate uh taw unaute ciasak uh hi.
- ⁴Khuapi pan tawm a pai zawkciang Joseph in ama inn uk naseampa tungah, “Manlang in tua mite del tan. Amate na phak ciang amate tungah, “Thupha sia banghang a sia taw hong thuk nu ziam?
- ⁵Banghangin ka Topa ngunhai ngu nu ziam? Ka Topa tui neakna hai hi a, aisaan na in a zak hi. Khialna nasia mama khat vawt nu hi,’ na ci tan,” ci hi.
- ⁶Naseampa in amate a phak ciang, hi kammal te son kik hi.
- ⁷Amate in, “Topa awng, hi bang teng na pau bang na ci nopna ziam? Hi bang lawlawm ngamta bua ung ci in ka kiciam uh hi.
- ⁸Na heaksa bangin ka ipngong uh ah ka mu uh sumte Canaan ngam panin nang tungah kong paipui kik uh hi. Tuabang hi a, na Topa ii inn pan ngun ahizong kham ahizong banghangin ngu tu khu ziam?
- ⁹Sya awng, khat pawpo tung pan na mu le tua pa kithat tu a, ko a dang teng na sila kong suak tu uh hi,” ci in zo hi.
- ¹⁰Ama in, “Hi hen; ahizong tua hai a la siabek ka sila suak tu a, no a dang teng na pai thei tu uh hi,” ci hi.
- ¹¹Tuaciang amate in manlang takin a vanhte lei ah khiasuk uh a, amate ip tek hong uh hi.
- ¹²Joseph naseampa in a haambel pan a moibel dong pha takin tok a, tua hai Benjamin ii ip sungah mu hi.
- ¹³Unaute in khuangaina taw a puante balkeak in, laate tungah a vanhte suanin khuapi ah heakkik uh hi.
- ¹⁴Judah le a suapuite Joseph inn a thet uh ciang tua munah Joseph omlai hi. Amate Joseph mai ah kunsuk a,



¹⁵Joseph in, “Bang vawt thong nu ziam? Keima bangin thunei mihing khat in aisaanna zanghin note hong man zo veve tu cisia he ngawl nu ziam?” ci hi.

¹⁶Judah in, “Topa awng, nang tungah bang hong son thei tu khu ziam? Bangbangin hong nial thei tu khu ziam? Bangbangin kiphel thei tu khu ziam? Pathian in ka mawna uh hong kilanghsak hi. Tua hai a kimuna pa bek hi ngawlin kote theampo zongh tu in na sila ka hi uh hi,” ci in zo hi.

¹⁷Joseph in, “Oh, hi ngawl hi! Tuabang ka vawt ngei buatu hi! Hai a kimuna pa bekma ka sila hi tu hi. No a dang teng na pa kungah cidam in cia tavun,” ci hi.

Judah in Benjamin atu Hesuak Ngen

¹⁸Judah in Joseph kungah paito a, “Topa awng nong hesuakna in, na tungah hi hiithiat in thu hong sonsak tan. Kei tungah hong thin uuk heak in. Nang sia kumpipa bang tatak na hi hi.

¹⁹Topa awng, nangma in, ‘Pa ahizong suapui dang ahizong na nei uh ziam?’ ci in nong dongh hi.

²⁰Kote in, ‘A huai pa khat le a huai zawkciang a nei suapuipa khat ka nei uh hi. Ama suapuipa thi a, a nu tate sung pan ama bek nungta lai hi; a pa in ama it mama hi,’ kong ci uh hi.

²¹Topa awng, nangma in ama na mu nop manin hi lai ah hong paipui tavun nong ci a,

²²tangvalpa in a pa nusia thei ngawl tu hi; nusia le a pa thi tu hi ci in kong zo uh hi.

²³Tuaciang nangma in, ‘Na nau moibel uh taw nong pai bua uh ahile ka mai nong mu thei buatu uh hi,’ nong ci hi.

²⁴“Ka pa kungah ka cia kik uh ciang nangma ci bangin ka son uh hi.

²⁵Tuaciang ama in, pai kikin, antawm taw lai tu in hong sawl hi.



²⁶Koma in, ‘Ka nau moibel uh taw ahibuale tua pa maitang hong kimusak ngawl tu ahikom ka pai buatu uh hi, ka nau moibel hong pai le tuasia ciang bek ka pai tu uh hi,’ ci in ka zo uh hi.

²⁷Ka pa uh in ko tungah, ‘Ka zi Rachel in tapa nii bek hong neipui sia na he uh hi.

²⁸A khat sia in keima hong nusiat zo hi. Ama hong nusiat a kipan tu dong mu kik ngawl ka hikom, ngamsate in ama balneen zo hi nanak tu hi.

²⁹Tu in, hi sia kei kungpan paipui in bangii khat po tawk thong le ka huai kawm pan tua khuangaina in kei hong thatlum tu hi,’ hong ci hi.

³⁰⁻³¹Judah in, “Tua hi a, tu in Topa awng, ka nau ngawl taw ka pa kungah cia thong leng ka naupa kei taw cia khawm ngawl hong mu po ciang ka pa thi tu hi. Ka pa nuntakna ka naupa nuntakna taw kipee aw a, ama huai lawlawm zo ahikom ama ka khuangaisakna uh in ama thisak tu hi.

³²Tua bek dom ngawlin ka naupa atu in ka pa tungah ka nuntakna ka khaam hi. Ka naupa ama kungah ka siapui kik bua ahile ka nuntak sung theampo mawsiatna ka thuak tu hi, ci in ka son hi.

³³Tuaciang tu in Topa awng, ama a suapuite taw paisak in a, ka naupa taangin keima na sila in kong om tu hi.

³⁴Ka naupa kei taw hong om buale bangbangin ka pa kungah cia kik thei tu khi ziam? Ka pa ii thuak tu hi tuasiatna bangbangin mu ngam thong tu khi ziam?” ci hi.

Pianciilna 45

A Suapuite tungah Joseph Kipualaak

¹Joseph in a naseamte mai ah a nenona iip zo ngawl ahikom a inn khan sung pan a naseam theampo a pusua natu in thupia hi. Joseph in a suapuite tungah a kipualaak laitak ama taw kuama dang om ngawl hi.

²Joseph nasia tak kap ahikom Egyptte in za a, tua thu kumpi inn sungah thang hi.



³Joseph in a suapuite tungah, “Keima in Joseph ka hi hi. Ka pa nungta lai ziam?” ci hi. Ahizong hi thu a suapuite in a zaak ciang amate lauthawng mama ahikom zo thei ngawl uh hi.

⁴Tuaciang Joseph in amate tungah, “Hesuakna taw hong neak tavun,” ci hi. Amate in neak a, ama in, “Egyptte tungah na zuak uh na suapuipa Joseph ka hi hi.

⁵Hi lai ah nong zuak man un khuangai in kimawsiat heak vun. Mihingte nuntakna ngum tu in note mai ah Pathian in kei hong paisak khol ahi hi.

⁶Tu kum sia ngam sungah kialpi tun kum niina hi pheang a, lotho in anlaak ngawl tu hun kum nga sung omlai hi.

⁷Note le na suan na paalte nuntak thei natu le hi bang a lamdang in note kong suatak thei natu in note mai ah Pathian in kei hong paisak khol hi.

⁸Tua hi a, hi munah kei hong then sia note hi ngawl het a Pathian ahi hi. Pathian in kumpipa nuai ah a za lianbel in hong koi hi. Ama ngam bup thuzeakpa ka hi a, Egypt ngam theampo a ukpa ka hi hi.

⁹“Tu in, ka pa kungah hai ngawlin cia tavun a, na tapa Joseph in hi bang hong ci hi ci in son tavun, ‘Pathian in Egypt ngam theampo a ukpa in hong koi hi, kei kungah hai ngawlin hong pai tan.

¹⁰Kei taw nong kinai thei natu in Goshen ngam ah nangma na tate, na tute, na tuute, na kealte, na khuite le na neisa theampo taw na teang thei tu uh hi.

¹¹Goshen ah nong om le kong khoi thei tu hi. Kialpi hun kum nga bang omlai ahikom na innkuanpuite le na ngannote taw ngilkial in na om tu ka dei bua hi” ci hi.

¹²Joseph in a thuson zom a, “Note theampo le Benjamin zongh in na mit uh taw Joseph tatak ka hi sia nong mu uh hi.

¹³Egypt ngam sungah ka minthan zia le na mu theampote ka pa tungah son tavun. Tuaciang manlang in ama hi munah hong paipui tavun,” ci hi.



- ¹⁴Joseph in a suapuipa Benjamin koai in kap a, Benjamin zongh in koai in kap hi.
- ¹⁵Tuaciang Joseph in a suapui teng khat zawkciang khat kap kawmin koai in nam hi. Tua zawkciang a suapuite taw thuson kipan hi.
- ¹⁶Joseph suapuite hong paina thu kumpi innsung dongah thang a, kumpipa le uliante lungdam hi.
- ¹⁷Kumpipa in Joseph tungah, “A ngante an puasak in, Canaan ngam ah a cia natu in na suapuite sawl in.
- ¹⁸A pa le a innkuanpuite puisak in a, hi lai ah paisak in. Egypt ngam sungah leitangh phabel sia amate ka pia tu a, leitangh pan a piang a phabelte ne tu uh hi.
- ¹⁹A zite, a tate le a pa tona tu in Egypt pan leang a ken natu in son in.
- ²⁰Amate in a nusiak tu vanhte thinbot in ngaisun heak hen. Egypt ngam leitangh phabel sia amate aa hi tu hi,” ci hi.
- ²¹Jacob tapate a kison bangin ngamta hi. Kumpipa sawl bangin Joseph in leangte le lampi a neak tu nguai an pia hi.
- ²²Joseph in amate puan laih natu puansilh khat tek pia a, ahizong Benjamin sia ngun dangka zathum le puan laih natu silh nga pia hi.
- ²³Ama in Egypt ngam pan a piang na phabelte laa sawm ii puak le antang, anluum le lampi a neak tu nguai an laa sawm ii puak a pa thaak hi.
- ²⁴Ama in a suapuite tha a, amate tungah, “Lampi ah kihau heak vun,” ci in vaitha hi.
- ²⁵Amate Egypt ngam pan dingin Canaan ngam a pa Jacob inn theng uh hi.
- ²⁶Amate in a pa tungah, “Joseph nungta lai hi. Ama in Egypt ngam theampo ukpa ahi hi,” ci in son hi. Jacob in lamdang sa in um zo ngawl hi.
- ²⁷Ahizong Joseph ii kam vaithak teng a son ciang le Egypt ngam pan a puak ama pui natu leangte a mu ciang, a pa thinngim takngim na teng veng kik hi.



²⁸A pa in, “Ka tapa Joseph nungta tatak lai thong ziam! Pha zo ei! Ka thi ma in pai in va kimu tong,” ci hi.

Pianciilna 46

Jacob le A Innkuanpuite Egypt ah Pai

¹Jacob in a vanh nei theampo heangin Beersheba ah pai a, tua munah a pa Isaac ii Pathian tungah biakpiakna nei hi.

²Tua ni zanin Jacob ii mukholna sungah Pathian in paupui a, “Jacob, Jacob awng!” ci in sam hi. Jacob in, “Hi hi, hi sungah om ing,” ci in zo hi.

³Ama in, “Keima in Pathian, na pa ii Pathian ka hi hi,” ci hi. “Egypt ah na pai tu sia lau heak in; na suan na paalte tua lai ah minam lian khat in ka siam tu hi.

⁴Nangma taw Egypt ngamah ka pai tu a, na suan na paalte hi leitangh ah kong ciapui kik tu hi. Na thi ciang Joseph sia nangma taw om tu hi,” ci hi.

⁵Beersheba pan Jacob ding hi. A tate in a pa, a tanote le a zite Egypt kumpipa ii a puak leangte tungah tosak hi.

⁶Canaan ngamah a nei ngannote le a vanh nei teng taw kithoai in Egypt ngam zuan hi. Jacob in a suan a paal theampo ahi;

⁷a tapate, a tupate, a tanute le a tunute a vekpi in paipui hi.

⁸Egypt a zuan Jacob ii innkuanpuite hi bang hi a; a tapa lianbel Reuben, le

⁹Reuben ii tapate: Hanoch, Pallu, Hezron le Carmi ahi hi.

¹⁰Simeon le a tapate: Jemuel, Jamin, Ohad, Jachin, Zohar le Canaan numeinu ii tapa Shaul ahi hi.

¹¹Levi le a tapate: Gershon, Kohath le Merari ahi hi.

¹²Judah le a tapate: Shelah, Perez le Zerah ahi hi. (Judah ii tapa dangte Er le Onan hi a, Canaan ah thi uh hi.) Perez ii tapate Hezron le Hamul ahi hi.

¹³Issachar le a tapate: Tola, Puah, Jashub le Shimron ahi hi.

¹⁴Zebulun le a tapate: Sered, Elon le Jahleel ahi hi.



¹⁵Hi tapate sia a tanu Dinah ban ah Jacob in a zi Leah taw Mesopotamia ah a nei tate ahi hi. Leah taw a nei suan le paal a vekpi in sawmthum le thum pha hi.

¹⁶Gad le a tapate: Zephon, Haggi, Shuni, Ezbon, Eri, Arod le Areli ahi hi.

¹⁷Asher le a tapate: Imnah , Ishvah, Ishvi, Beriah le a suapuinu uh Serah ahi hi. Beriah ii tapate Heber le Malchiel ahi hi.

¹⁸Hi mihing sawm le lukte Laban ii a tanu Leah tungah a piak, a sila nu Zilpah taw a nei Jacob ii suan le paalte ahi hi.

¹⁹Jacob in a zi Rachel taw tapa nii nei a: Joseph le Benjamin ahi hi.

²⁰Joseph in Heliopolis khua thiampi Potiphera ii tanu Asenath taw Egypt ah tapa nii nei a, Manasseh le Ephraim ahi hi.

²¹Benjamin ii tapate Bela, Becher, Ashbel, Gera, Naaman, Ehi, Rosh, Muppim, Huppim le Ard ahi hi.

²²Hi sawm le lite Jacob le Rachel suan le paalte ahi hi.

²³Dan le a tapa Hushim.

²⁴Naphtali le a tapate: Jahzeel, Guni, Jezer le Shillem ahi hi.

²⁵Hi salite Laban ii a tanu Rachel tungah a piak a sila nu Bilhah taw a hin Jacob ii suan le paalte ahi hi.

²⁶Egypt ah a pai Jacob ii suan le paalte a vekpi in sawmluk le luk hi a, tua sungah a tapate ii zite kihel ngawl hi.

²⁷Joseph in Egypt ah tapa nii nei a, Jacob innkuanpuite tua mun a thet ciang a vekpi in sawmsali pha uh hi.

Jacob ah A Innkuanpuite Egypt ah

²⁸Goshen ah Joseph in amate a muak natu sawl tu in, Jacob in Judah pai kholsak hi. Amate a thet ciang,

²⁹Joseph a siphuleang tung to in a pa muak tu in Goshen ah pai hi. A kimu ciang Joseph in a pa ngawngkoai in ngei hial ma kap hi.



³⁰Jacob in Joseph tungah, “Tu hile na meal kong mu zo a, na nuntak lai na thu hong he zo ka hikom thi leng zong phamaw ka sa nawn bua hi,” ci hi.

³¹Tuaciang Joseph in a suapuite le a pa innkuanpuite tungah, “Kumpipa kungah ka na pai tu a, Canaan ah a teang ka suapuite le ka pa innkuanpui theampo ka kung hong theng zo hi, ci in ka son tu hi.

³²Note sia tuucingte le ngan khaoite hi a, na tuute na ngante le na neisa theampo nong paipui uh sia ka son tu hi.

³³Kumpipa in note hong samin, bang na seam nu ziam? ci in hong dok ciang,

³⁴ka taangpupite bangma in ka khan tawntungin ngankhoai na seam ung, na ci tu uh hi. Tuabang na ci uh ciang ama in Goshen ngamah hong teangsak tu hi,” ci hi. Egyptte in tuucing nasep sia thupi sim ngawl zawngsak ahikom Joseph in tu a bangin a ci ahi hi.

Pianciilna 47

¹Tuaciang Joseph sia a suapuite nga taw kumpipa kungah pai hi. Ama in kumpipa tungah, “Ka pa le ka suapuite Canaan ngam pan a tuute, a ngannote le a neisa teng taw hong pai zo hi. Tu in amate Goshen ngamah om uh hi,” ci hi.

²Ama in kumpipa mai ah a suapuite paipui hi.

³Kumpipa in, “Bang na seam nu ziam?” ci in amate dongh hi. Amate in, “Ka Topa awng, ka taangpupite bangma in tuucingte hi ung.

⁴Canaan ngamah kialpi tung a, ngantha natu mun om ngawl ahikom hi ngamah a teang tu in kong pai uh hi. Hesuakna taw Goshen ngamah ka ten thei natu uh in thu hong pia tan,” ci in zo uh hi.

⁵Kumpipa in Joseph tungah, “Tu in na pa le na suapuite hong theng zo ahiciang

⁶Egypt leitangh sia amate aa hi. Leitangh phabelna mun ahi, Goshen ah teang taken. Amate sung pan a muanhuai a om le ka ngannote a uk tu in koi in,” ci hi.



⁷Tuaciang Joseph in kumpipa mai ah a pa Jacob paipui hi. Jacob in kumpipa thupha pia a,

⁸kumpipa in ama tungah, “Kum bangza pha ni ziam,” ci in dongh hi.

⁹Jacob in, “Vakthap in ka nuntak kum za le kum sawmthum pha zo hi. Ka taangpupite ii vakthap kum za zongh hi ngawl lai in ka kum tawm napi ka haksa mama hi,” ci in zokik hi.

¹⁰Jacob in kumpipa sia vaithakna thupha pia in nusia hi.

¹¹Tuaciang Joseph in a pa le a suapuite kumpipa thupiak bangin Egypt ngamsung lei phabelna Rameses khuapi hui ah mun pia in teangsak hi.

¹²Joseph in a pa, a suapuite le a pa innkuanpuite theampo a moibel dongin an pia hi.

Kialpi Hun Sung

¹³Kialpi nasia vaial in mun theampo ah an om ngawl a, Egyptte le Canaante ngilkial in a tha zawm uh hi.

¹⁴Joseph in mite ii an leina sum teng kaikhawm in kumpi inn sungah koi hi.

¹⁵Egypt le Canaan ah sum teng a kizaksiat zawkciang Egyptte in Joseph kungah pai in, “An hong pia tan! Hong thisak heak in. Hong vaihawmpui tan! Ka sum uh teng bo siat zo hi,” ci uh hi.

¹⁶Joseph in, “Na sumte a bo siat zo le na ngannote hong paipui tavun, an taw kitheak tu hi,” ci in zo hi.

¹⁷Tuaciang a ngannote Joseph kungah paipui uh a, ama in a siphute , a tuute, a kealte, a khuite le a laate thena in an pia hi. Tua kum in ama in a ngannote theampo thena in an pia hi.

¹⁸A kum kik ciang amate Joseph kungah pai in, “Topa awng, thu piangte na maitang ah ka iim thei bua uh hi; ka sum theampo uh bo siat zo a, nganno theampo nangma aa hi zo hi. Ka pumpi le ka leitangh sim ngawl, kong piak tu bangma om nawn ngawl hi.



¹⁹Hong thisak heak in. Hong vaihawmpui tan! Ka lote uh vaalthong sak heak in. Koma le ka leitangh uh an taw hong lei tan. Kote kumpipa ii sila suakin, ka leitangh uh ama neisa hi tu hi. Ka nuntak natu uh in an hong pia tan a, lote ah ka ciin tu uh thaici hong pia tan,” ci hi.

²⁰Joseph in Egypt leitangh theampo kumpipa atu in lei hi. Kialpi nasia vaial ahikom Egypt mi theampo a leitangh kizuak sak a, tuaciang leitangh theampo kumpipa neisa suak siat hi.

²¹Joseph in Egypt ngam mong khat pan mong khat dong mihingte sila suaksak hi.

²²Ama in thiampite neisa leitangh bekma lei ngawl hi. Kumpipa in amate nuntak khom natu an pia ahikom amate leitanghte zuak kul ngawl hi.

²³Joseph in a mihingte tungah, “Na mu uh bangin, note le na leitangh uh te kumpipa atu in kong lei zo hi. Na lo ah na ciin tu ancii te hi sungah om hi.

²⁴Anlaak hun ciang see nga sua see khat kumpipa na pia tu uh hi. A omlai teng sia, thaici tu le noma le na innkuanpuite ii anneak tu hi tu hi,” ci hi.

²⁵Amate in, “Nangma in kote nuntakna nong hun a; kote tungah nong thuthiam hi, Topa awng, tuaciang kote sia kumpipa ii sila ka hi tu uh hi,” ci in zo hi.

²⁶Tuaciang Egypt leitangh taw kisai, lo ante see nga sua see khat kumpipa neisa ahi natu thu Joseph in thukham khat vawt hi. Tua thukham tu ni dongma in kizangh lai hi. Thiampite leitangh bek kumpipa neisa suak ngawl hi.

Jacob ii A khakbel Hesuak ngetna

²⁷Israel te Egypt ngam Goshen ah teang a, tua munah amate hau in, ta tam mama nei uh hi.

²⁸Jacob kum za le kum sawmli le kum sali a phak dong Egypt ah kum sawm le kum sali sung teang hi.



²⁹A thi tu hun a nai ciang ama in a tapa Joseph samin ama tungah, “Ka phei kawmah na khut koi in, Egypt ah nong phum ngawl natu in kiciamna khat vawt in.

³⁰Ka pate thaan ah kiphum nuam ka hi ciang; Egypt ngamsung pan hong tua tan a, ka pate thaan ah hong phum tan,” ci hi. Joseph in, “Nong ci bangin ka vawt tu hi,” ci in zo hi.

³¹Jacob in, “Ka vawt nanak tu hi ci in hong kiciam tan,” ci hi. Joseph in kiciamna vawt a, tuaciang Jacob a lupna luthung sangah kunsuk in lungdamko hi.

Pianciilna 48

Jacob in Ephraim le Manasseh Thupha Pia

¹Tawmvei zawkciang a pa dam ngawl na thu Joseph tungah kison hi. Tua ahiciang a tapate nii Manasseh le Ephraim taw a pa ve tu in pai uh hi.

²Jacob tungah na tapa Joseph in hong ve tu in hong pai hi, ci in a kison ciang, ama in a tha theampo saanin lupna tungah toto hi.

³Jacob in Joseph tungah, “Canaan ngam Luz khua ah Vaanglianbelpa Pathian in kei tungah hong kilangh a, thupha hong pia hi.

⁴Ama in kei tungah, “Ta tam mama kong pia tu a, na suan na paalte minam tam mama suak tu hi; keima in na suan na paalte tungah a tawntung a nei tu in hi leitangh ka pia tu hi,’ hong ci hi,” ci hi.

⁵Jacob in a pau zomin, “Joseph awng, hi lai Egypt ah kong pai ma in na nei na tapa niite kei ma neisa hi, Reuben le Simeon bangma in Ephraim le Manasseh zongh keima tapa tatak te hi.

⁶Tapa dang na nei lai le amate kei neisa in kingaisun ngawl tu a, ngamh luana taw kisai in Ephraim le Manasseh tungtawn in nga thei tu hi.

⁷Na nu Rachel hangin hi bangin ka vawt hi. Mesopotamia pan ka cia lai in, Canaan ngamsung Ephrath khua taw kikhuala ngawl na ah ka khuangai bel natu in na nu hong thi hi. Ephrath paina lamhui ah ama ka phum hi,” ci hi. (Ephrath sia tu in Bethlehem kici hi.)



- ⁸Jacob in Joseph tapate a mu ciang ama in, “Akua tate ziam?” ci in dongh hi.
- ⁹Joseph in, “Hi lai Egypt pan Pathian hong piak ka tapate ahi hi,” ci in zo hi. Jacob in, “Thupha ka piak thei natu in ka kungah hong paipui tan,” ci hi.
- ¹⁰A kum tam zo ahikom Jacob a mitte mang zo a, pha takin khua mu thei nawn ngawl hi. Joseph in a tate a pa kungah paipui a, a pa in amate koai in nam hi.
- ¹¹Jacob in Joseph tungah, “Nang hong mu kik tu in ka ki lam en ngei bua a, tu in Pathian in na tate ngangawn hong musak hi,” ci hi.
- ¹²Tuaciang Joseph in Jacob kaang pan a tate la in, a pa mai ah a maitang lei a phak dong kunin zatakna pia hi.
- ¹³Joseph in Jacob vei sangah Ephraim, a ziat sangah Manasseh koi hi.
- ¹⁴Ahizong Jacob in a khutte thatheak in, a nau zaw hi kale Ephraim lu tungah a ziatsang khut nga in, a uzaw Manasseh tungah a veisang khut nga hi.
- ¹⁵Tuaciang ama in Joseph thupha pia a; “Ka pu Abraham le ka pa Isaac te ii a na a sepsak Pathian in hi tangvalte thupha pia taken! Tuni dongin keima lam hong pui Pathian in amate thupha pia taken.
- ¹⁶Siatna theampo panin keima hong suatak vantung lalang in amate thupha pia taken! Hi tangvalte tungtawn in keima min le ka pu Abraham min, ka pa Isaac min nungta tawntung taken! Amate in ta tam mama nei in suan le paal tam mama nei taken!” ci hi.
- ¹⁷A pa in a ziatsang khut Ephraim lu tungah a koi, a mu ciang Joseph lung kim ngawl hi. Tua ahikom Joseph in a pa khut, Ephraim lu tung pan la in Manasseh lu tungah koisak hi.
- ¹⁸Joseph in a pa tungah, “Pa awng, hi bang hi ngawl hi. Hi sia ta uzaw hi a, na ziatsang khut a lu tungah koi in,” ci hi.



¹⁹A pa in nial a, “He khi hi, ka ta awng, he khi hi. Manasseh ii suan le paalte zongh minam lian suak veve tu hi. Ahizong a u sangin a naupa lian zaw tu a, ama suan le paalte minam lian suak tu hi,” ci hi.

²⁰Tua hi a, Jacob in tua ni in amate thupha pia in, “Israel te in midangte atu in thupha a nget ciang na minte zangh tu hi. Amate in, ‘Ephraim le Manasseh thupha a nga bangin Pathian in note thupha hong pia taken,’ ci tu uh hi,” ci hi. Hi bangin Jacob in Manasseh mai ah Ephraim koi hi.

²¹Tuaciang Jacob in Joseph tungah, “Nong mu bangin kei thi nai tu khi hi, ahizong Pathian in nang hong panpui tu a, na taangpupite leitangh ah hong ciapui kik tu hi.

²²Amorte tung pan ka namsau le ka thal taw ka laak leipha ngam Shechem sia na suapuite pia ngawlin nangma kong pia hi.

Pianciilna 49

Jacob ii Kammal Khakbelte

¹Jacob in a tapate samin, “Mai sangah note tung a hong piang tu thu kong son tu hi hong kikhawm tavun:

²“Jacob tapate awng hong kikhawm tavun a, hong ngai tavun. Na pa Israel thu son ngai vun.

³“Ka ta masabel Reuben awng, nang in ka thahatna le ka pasal zawkciang ka taciil na hi a, ka tapate sung pan a kiphasak bel le a thahat bel na hi hi.

⁴Nang in tuihual khat taw na kibang a, Ahizong a thupibel na hi buatu hi. Banghangziam cile ka zino na luppui a, na pa lupna na ninsak hi.

⁵“Simeon le Levi unau hi. A ngalhiamte ngoltolna in zangh uh hi.

⁶A thuku sonna ah ka kihel buatu a, A kikhopna ah ka kipawl buatu hi. Banghangziam cile a thin uuk uh ciang mihing that a, kimaina in khuital zapi ngui saattan hi.

⁷A thin uukna tungah haamsiatna om taken, banghangziam cile a thin uukna nasia lei hi. A thin sona tungah haamsiatna om taken, banghangziam cile a



thinso nasia lei hi. Israel ngam sungah amate ka thethaang tu hi. A mipuite sungah amate ka khentham tu hi.

⁸“Judah awng na suapui te in nang hong pok tu hi. Na ngalte a ngawng pan na man hi. Na suapuite in na mai ah hong kun tu hi.

⁹Judah sia tawpi khat taw kibang hi, Sa manin a kuahawng zuanin, Kizia in a lumsuk taw kibang hi. Kuama in ama nawngkaisak ngam ngawl hi.

¹⁰Judah in kumpi ciangkhut len tu a, A suan a paalte uk tawntung tu hi. Minamte in ama tungah phiangshia puak tu a, Thu nitna taw ama mai ah kun tu uh hi.

¹¹Ama in a laano a limcibel sapit kung khat ah khit hi. Ama in a puante chi bangin a san zu sungah sil hi.

¹²Zu a neakna in a mitte san ngengu a, Noai a neakna in a hate paak hi.

¹³“Zebulun sia tuipi hui ah teang tu hi. A tuipi hui sia teambawte tawlngakna khat hi tu hi. A ngam Sidon ciang hi tu hi.

¹⁴“Issachar sia kizia a, a ngit ipte kilaklaw ah a lum, Laa khat sangin phazaw ngawl hi.

¹⁵Ahizong ama in a tawlngakna mun phatzia le a ngam nopzia mu hi. Tua ahiciang a nungzaangah vanh pua tu in ama kunsuk a, Sila khat bangin naseam tu in kisawl hi.

¹⁶“Dan sia a mipuite a ukpa hi tu hi. Amate Israel minam dangte bangma hi tu hi.

¹⁷Dan sia lamhui a om ngul ngu nei khat hi tu a, tua ngul in siphu khawtul pan tu in, A tungto pa a nung sangah lawnin taaksak hi.

¹⁸“Topa awng, nong tat tu ka ngak hi.

¹⁹“Phalakte pawlkhat in Gad sim tu a, ahizong Gad in kilee in amate sul zui kik tu hi.

²⁰“Asher lo pan an tam mama piang tu hi. Kumpi khat ii neak tu in a kilawm an ama in pia tu hi.

- ²¹“Naphtali sia a tai vaving sazukpui, ta ithuai nano a nei khat taw kibang hi.
- ²²“Joseph sia ciktui hui khat ah a om ngamlaa khat taw kibang a, Mualpangh a om ngam laano khat taw kibang hi.
- ²³A ngalte in nasia takin sim a, A thal le a thaltangte taw del hi.
- ²⁴Ahizong Jacob ii Pathian Vaanglianbelpa ii vaangletna le Israel a dal pa, tuucingpa hangin A thal kinging sa in om top a, A khutte a tha kihatsak hi.
- ²⁵Nang hong hu, na pa ii Pathian, Thupha hong pia Vaanglianbelpa Pathian in Vantung pan thupha ngua bangin Leinuai pan tui bangin Khoai le vul tam mama, tu le ta tam mama thuphate taw,
- ²⁶thupha antangte le paakte Taanglai mualte ii thuphate Tawntung mualte panin, nopsakna te, A suapuite sung pan a tuam vilvel in a kiteal Joseph ii lu tungah tung siat taken.
- ²⁷“Benjamin sia zing le nitak sa manin a ne, A hang mama ngiapui khat taw kibang hi,” ci hi.
- ²⁸Hi te sia Israel minam sawm le niite hi a, hi thu sia amate tetek taw a kiphu tu in a pa ii a vaithakna kammalte ahi hi.

Jacob Thi na le Kivuina

- ²⁹Tuaciang Jacob in a tapate tungah, “Tu in ka mipuite thina ah a pai tu ka hi a, ka pate taw in hong phumkhawm tavun. Tua thaankhuk in Hitte Ephron lo sung hi a,
- ³⁰Canaan ngam Mamre ii nisuana sang Machpelah ah om hi. Abraham in hi thaankhuk le lo sia thaam mun tu in Ephron tung pan lei hi.
- ³¹Tua munah amate in Abraham le a zi Sarah, Isaac le a zi Rebecca phum hi. Tua munah Leah ka phum hi.
- ³²Tua lo le thaankhuk sia Hitte tung pan a kilei ahi hi. Tua munah hong phum tavun,” ci in thupia hi.
- ³³Jacob in a tapate a vaithak zawkciang, ama lumsuk kikin thi hi.

Pianciilna 50



- ¹Joseph a pa tungah puksuk a, kapin a pa maitang nam hi.
- ²Tuaciang Joseph in a pa luang a muat ngawl natu vawt tu in thupia hi.
- ³A luang muat ngawl natu nasepna sia ni sawmli sung hai hi. Egyptte sia ama atu in ni sawmsali sung khuangai kaikut in kap uh hi.
- ⁴Khuangai kaikutna hunte a ven ciang, Joseph in kumpipa ii uliante tungah, “Hesuakna in kumpipa tungah hi thu hong sonsak tavun:
- ⁵‘Ka pa a thi mahiat in Canaan ngamsung ama atu in a vawtsa thaankhuk ah ka phum natu in kamciam na hong vawtsak hi. Tua ahiciang hesuakna in ka pa a phum tu in hong paisak tan, tua zawkciang kong cia kik tu hi,’ ci in hong sonsak tavun,” ci hi.
- ⁶Kumpipa in, “Kamciamna na vawt bangin, pai in na pa phum tan,” ci in zo hi.
- ⁷Tua ahiciang Joseph a pa phum tu in pai hi. Kumpipa khut nuai ulian theampo, ama zumsung upate le Egypt ngam lampuite theampo Joseph taw pai uh hi.
- ⁸Ama ii innkuanpui, a suapuipate le a pa ii innkuanpui a om lai teng theampo ama taw pai uh hi. A tanote, a tuute, a kealte le a khuite bek ma Goshen ngamah taang hi.
- ⁹Siphu leang tung ahizong, siphu tung ahizong mihingte to in ama taw pai tek uh a, mihing tam peuma hi.
- ¹⁰Jordan ngun niswana sangah a om Atad ancilna mun a thet ciang, amate ngei hialpo khuangai in nging takin kap uh hi, tuaciang Joseph in ni sali sung khuangai kaa na hun in zangh hi.
- ¹¹Canaan ngam mite in Atad ah tua mihingte khuangai in kap a mu ciang amate in, “Egyptte in a ciliap huai khuangai kaana nasia takin vawt hi ta a,” ci uh hi. Tua ahikom tua mun sia Abel Mizraim kici hi.
- ¹²Tuaciang Jacob thupiak bangin Jacob tapate in seam uh hi;



¹³amate in Canaan ngam ah a pa luang pua in thaam mun tu a Abraham ii Hit mi Ephron tung pan a lei Mamre nisuana sangah a om Machpelah lo sung suangkuul ah phum uh hi.

¹⁴A pa a phum zawkciang Joseph, a suapuite le mithi phumna ah a zui theampo taw Egypt ah cia kik uh hi.

Joseph in A Suapuite Thinnuamsak

¹⁵A pa thi zawkciang Joseph suapuite in, “Joseph in hong ngaimaw lai hen a, ama tungah siatna ih vawt theampo hong thuk kik thong le maw?” ci uh hi.

¹⁶Tua ahikom amate in Joseph tungah, “Ih pa thi ma in, ih pa in

¹⁷nang tungah ‘Na suapuite ii nang tung a hong khialnate hesuakna taw maisak in,’ ci in sawl tu in hong son hi. Na pa ii Pathian ii naseam kote ii vawt khialnate tu in hesuakna taw hong maisak tan,” ci in kam vaitha uh hi. Joseph sia hi thu a zaak ciang kap hi.

¹⁸Tua zawkciang a suapuite hong pai in, ama mai ah kun uh hi. Amate in, “Hi lai na maiah na sila bangin om ung,” ci uh hi.

¹⁹Ahizong Joseph in amate tungah, “Lau heak vun; Pathian dinmun ah kikoi thei ngawl khi hi.

²⁰Note in nong vawtsia uh hi, ahizong tua thupiang hu in tuni a, a nungta mihing tam mama te ii nuntakna a huu tu in, Pathian in a pha lam in hong hei hi.

²¹Bangma lau heak vun. Note le na tate kong khi tu hi,” ci hi. Tuabang in Joseph in a suapuite thinsung lungsung kha tu in kamthiam kamneam zanghin a suapuite thin nuamsak hi.

Joseph Thina

²²Joseph a pa innkuanpuite taw Egypt ah teang khawm a, kum za le kum sawm a phak ciang thi hi.

²³Ama in Ephraim ii tate khang thum dong mu hi. Ama in Manasseh ii tapa Machir ii tate zongh ama innkuanpui in nei hi.



²⁴Ama in a suapuite tungah, “Kei a thi tu ka hi zo hi, ahizong Pathian in note hong keam tu a, hi ngam pan Abraham, Isaac le Jacob te tungah a ciliap huai takin a kamciamna ngamah hong paipui nanak tu hi,” ci hi.

²⁵Tua zawkciang Joseph in a mipuite kiciamna khat vawt tu in sawl hi. Ama in, “Pathian in tua ngam ah hong paipui ciang ka luang noma taw kong paipui tu uh hi ci in hong kamciam tavun,” ci hi.

²⁶Tuabangin Joseph kum za le kum sawm a phak ciang Egypt ngamah thi hi. Amate in Joseph luang a muat thei ngawl natu in vawtin, mithi kuang khat sungah koi hi.



Pusuana

Pusuana 1

Israel te Egypt ah Kivawtsia

- ¹Egypt ah a innkuan puite tek taw a pai, Jacob tapate sia,
- ²Reuben, Simeon, Levi, Judah,
- ³Issachar, Zebulun, Benjamin,
- ⁴Dan, Naphtali, Gad le Asher ahi hi.
- ⁵Jacob sung pan a suak mihing a tu le a tate a vekpi in sawmsali pha hi. A tapa Joseph sia Egypt ah om khol zo hi.
- ⁶Khua hong ngei vaial ciang Joseph le a suapuite le a khanngual a omlaite theampo thi siat hi.
- ⁷Ahizong amate suan le paal Israel te in tu le ta tam mama nei in a honpui suakin, Egypt ngam sungah dimin thahat mama uh hi.
- ⁸Tua zawkciang Joseph ii thu le la a he ngei ngawl kumpi thak khat Egypt ngamah hong khang hi.
- ⁹Ama in a mihingte tungah, “Hi Israel te tam mama in, thahat ahiciang ei atu in lauhuai hi.
- ¹⁰Ngal om luilam thong le, ei hong sim tu in ih ngalte taw kipawl in, ih ngamsung pan pusuak tha tu hi. Amate hong tam vaial ngawl natu in, ih khaam zawk natu lampi zong tawng,” ci hi.
- ¹¹Tua ahikom, Egyptte in a thinkiam huai mama nasep ham seamsakin, a tungah sila ukte koi hi. Kumpipa an khol natu in Israel te in Pithom le Rameses khuapite sa uh hi.
- ¹²Ahizong Egyptte in Israel te a siatvawt vaial ciang, Israel te pung vaial in, ngamsung teng ah kizel hi. Egyptte in Israel te kiita in,
- ¹³nuntak manh om ngawl za dongin zawthawk vawtin, sal ngimnga suaksak uh hi.



¹⁴Amate in innsakna ah naseamsakin, lo sungah lothosakin hesuak vet ngawl uh hi.

¹⁵Tuaciang Egypt kumpipa in, Hebrew numeite nau a suaksak syama niite ahi, Shiphrah le Puah tungah thu sonpui hi.

¹⁶“Hebrew numeite nau na suasak uh ciang, tua nau pa ahile, thatlum vun a, ahizong numei ahile nungtasak vun,” kumpipa in syamate tungah ci hi.

¹⁷Ahizong syamate in Pathian kiita ahikom kumpipa thu ni ngawlin panote nungtasak hi

¹⁸Tuaciang kumpipa in syamate samin thu donghin, “Banghang hi bang ngamta nu ziam? Banghangin panote nungtasak nu ziam?” ci hi.

¹⁹Amate in, “Hebrew numeite Egypt numeite taw kibang ngawlin, ol takin nausuak a, ko thet ma in a nau suak zo uh hi,” ci in zo uh hi.

²⁰⁻²¹Syamate in Pathian kiita ahikom, Pathian amate tungah dikin, amate ta tam mama pia hi. Tuaciang Israel te pung tato in, thahat hi.

²²A khakbel ciang kumpipa in a mihingte theampo thupia in, “Hebrew patang suakthak theampo la vun a, Nile ngun sungah vawk vun, ahizong numei theampo nungtasak vun,” ci hi.

Pusuana 2

Moses ii Suana

¹Tua hunin Levi minamte khat in ama minampui numei khat tenpui in,

²tua nu in tapa khat neipui hi. A tapa mealpha khat ahikom a nu in tha thum sung a tapa phual hi.

³Ahizong a nu in a tapa a phual zawk nawn ngawl ciangin, pompa taw kivawt khum khat la in, tui a tum thei ngawl natu in, thingnaai taw zut hi. A nu in tua sungah nauno sialin, ngunhui lopa thukna ah koi hi.

⁴Nauno ii suapuinu in a khuala thithimna ah dingin, bang a tat ziam ci in en hi.



⁵Kumpipa tanu kibual tu in ngun sungah tuak a, tua laitakin a naseamte ngunhui ah vak uh hi. Thakhat thu in ama in lopa thukna ah a om tua khum mu a, a sal numei khat a la tu in sawl hi.,

⁶Kumpipa tanu in, tua khum hong a, nausen pano khat mu hi. A patang kap a, khuangaihuai sa hi. Ama in, “Hi sia Hebrewte nausen khat hi,” ci hi.

⁷Tuaciang a suapuinu in, “Hi nauno hong opsak tu in, Hebrew numei khat kong sapsak tu ziam?” ci in dongh hi.

⁸Kumpipa tanu in, “Hong sapsak tan,” ci in zo hi. Tuaciang numeino pai in nausen ii nu sam hi.

⁹Kumpipa tanu in tua nausen ii nu tungah, “Hi nausen la in a, kei atu in hong opsak tan, na thaman kong pia tu hi,” ci hi. Tuaciang tua nu in nausen la in, opsak hi.

¹⁰Patang hong khanto ciang, a nu in kumpipa tanu kungah paipui in, kumpipa tanu in ama tapa suaksak hi. Kumpipa tanu in, “Tui sung pan ka laak ahiciang a min Moses ka phuak hi,” ci hi.

Midian ah Moses Tai

¹¹Moses hong let ciang, a mipui Hebrewte kungah haw in, zawthawk thu taw naham a sepsak nate mu hi. Egyptte khat in Moses ii mipui Hebrew khat a thalup ngangawn mu hi.

¹²Moses in a kiim a paam enin, kuama a mu ngawl ciang Egypt pa thatlum in a luang sen sungah phual hi.

¹³A zing ciang ama pai kik a, Hebrewte nii kihau mu hi. Ama in a mawzaw pa tungah, “Banghangin na mipui Hebrewpa saat ni ziam?” ci hi.

¹⁴Tua pa in, “Kote hong uk tu le thukhen tu in, akua in nang hong koi ziam? Egyptpa na thalup bangin kei hong that tu ni ziam?” ci in zo hi. Tuaciang Moses lau in, “Ka ngamtatna teng ngual in hong mu zo hi ta a maw,” ci hi.

¹⁵⁻¹⁶Tua thupiang teng kumpipa in a zaak ciang Moses thalup tu in zong a, ahizong Moses sia Midian ngamah teang tu in tai hi. Ni khat, Moses tuikhuk



paam ah a to laitak, Midian thiampi Jethro tanu salite tuitoai tu in hong pai in, a pa ii tuu le kealte tui pia tu in tuikuang ah tui dim uh hi.

¹⁷Ahizong tuucing pawlkhatte in Jethro tanute notkeak uh hi. Tuaciang Moses in amate suatak in, a ngannote tui piaksak hi.

¹⁸Amate a pa kungah a cia uh ciang, a pa in, “Banghang tuni hong cia pal nu ziam?” ci in dongh hi.

¹⁹Amate in, “Egyptte khat in tuucingte khut sung pan hong suatak in, ko atu in tui zongh hong toaisak in, ih ngannote zongh tui hong piaksak hi,” ci in zo uh hi.

²⁰A pa in a ta numeite tungah, “Tua pa koi sungah om ziam?” ci in dongh hi. “Banghangin tua pa tua lai ah nusia nu ziam? Pai tavun a, eima taw an nekhawm tu in sam tavun,” ci hi.

²¹Moses in tua lai ah teang tu in khensat ahikom, Jethro in a tanu Zipporah taw kiteangsakin

²²Zipporah in tapa khat neipui hi. Moses in, “Hi lai ah ngamdang mi khat suak ka hi ciang, a min Gershom ka phuak tu hi,” ci hi.

²³Kum tam mama zawkciang Egypt kumpipa thi a, ahizong Israel te a saltanna hangin thuumin, tau in, hu ngenin au lai uh hi. A auna awte Pathian kung thengin,

²⁴ama in amate taunate a zaak ciang Abraham, Isaac le Jacob taw a thuciamna phawk hi .

²⁵Ama in Israel te saltanna mu in, amate atu in thinbot hi.

Pusuana 3

Pathian in Moses Sam

¹Moses in Midian thiampi, a sunghpa Jethro ii tuu le kealte cingin a om laitak ni khat ni in a ngannote senneal ngam kantanpui in mual thiangtho Sinai theng hi.



²Tua lai ah Topa vantung lalang in sawlpaang sung pan meikuang khat bangin ama tungah kilangh hi. Moses in sawlpaang kaang in mu a, ahizong sawlpaang sia kaangtum ngawl hi.

³Ama in, “Hi sia paw lamdang ei! Banghang sawlpaang sia kaangtum ngawl ziam? Kei pai in, a nai neakin ka en tu hi,” ci in ngaisun hi.

⁴Moses ii a nai a neak vaial Topa in a mu ciang Topa in sawlpaang sung pan, “Moses! Moses!” ci in sam hi. Ama in, “Hi lai ah om khi hi,” ci in zo hi.

⁵Pathian in, “Hong neak heak in. Na peangdap sut in, banghangziam cile leitangh thiangtho tungah ding ni hi.

⁶Keima in na taangpupite Pathian, Abraham, Isaac le Jacob Pathian ka hi hi,” ci hi. Tuaciang Moses in a mai hum hi, banghangziam cile Pathian en ngam ngawl hi.

⁷Tuaciang Topa in, “Egypt ah ka mihingte bang zata haksatna thuak cisia ka mu zo hi, sila ukte khutsung pan suakta nuam in a auna zongh ka za zo hi. A thuakna theampo ka he siat hi.

⁸Tua ahiciang Egyptte khutsung pan a hun tu le Egypt pan la in lei phana le ngamzaina mun ah a paipui tu in kong tuaksuk zo hi. Tua ngam sia, ngampha le ngamnuam hi a, tu in Canaante, Hitte, Amorte , Perizte, Hivte le Jebuste teang uh hi.

⁹Ka mihingte auna aw ka za takpi zo a, Egyptte ii a zawthawk vawtzia zongh ka mu zo hi.

¹⁰Tu in ka mihingte Egypt pan a pui tu in, kumpipa kungah nangma kong puak tu hi,” ci hi.

¹¹Ahizong Moses in Pathian tungah, “Kei sia bangma ka hi bua hi. Kumpipa kungah pai in Israel te Egypt pan bangbang paipui thei thong tu khi ziam?” ci hi.



¹²Pathian in, “Nang taw kong omkhawm tu a, Egypt pan Israel te na paipui ciang, hi mual tungah nong bia tu hi. Nangma hong paisak ka hina, a kilak natu tuabang hi tu hi,” ci in zo hi.

¹³Ahizong Moses in Pathian tungah, “Israel te kungah pai in, ‘Na taangpupite Pathian in note kungah kei hong paisak hi,’ ka ci ciang, ‘Ama akua ziam’ ci in amate in kei hong dongh le bangbang zokik tu khi ziam?” ci kik hi.

¹⁴Pathian in Moses tungah, “Keima sia Keima ka hi hi. ‘KEIMA a kici khat in note kungah keima hong paisak hi,’ ci in Israel te tungah son tu ni hi,” ci hi.

¹⁵Keima Topa a taangpupite Pathian, Abraham, Isaac le Jacob Pathian in Israel te kungah nang kong paisak, Israel te tungah son in. Hi sia in a tawntung ka min hi; mailam hong piang tu khang theampo in hi bangin keima hong sam tu hi.

¹⁶Pai in a, Israel lampuite kaikhawm in, Keima Topa a taangpupite Pathian, Abraham, Isaac le Jacob Pathian in note mai ah kong kilangh sia amate tungah son in. Amate kungah ka pai zo a, Egyptte ii amate tungah a vawtna teng ka mu hunlam amate son in.

¹⁷Nasia tak vawt siatna a thuakna Egypt pan amate ka pusua pui tu a, Canaante, Hitte, Amorte, Perizte, Hivte le Jebuste teenna ngampha ngam hauna munah amate paipui tu in ka khensat zo hi.

¹⁸“Ka mihingte in nangma thu hong ngai tu uh hi. Tuaciang Israel lampuite taw Egypt kumpipa kungah pai in a, ama tungah, ‘Hebrewte Pathian Topa sia kote tungah ama le ama hong kilak zo hi. Tu in ni thum lampaina senneal ngam sungah Topa kote Pathian tungah sangaw biakpiakna ka piak thei natu uh in, kote hong paisak tan,” ci tu ni hi.

¹⁹Zawhawk thu taw a kisawl bana le Egypt kumpipa in note hong paisak ngawl tu cisia ka he hi.

²⁰Ahizong ka thahatna zanghin, a lauhuai nate tua munah lakin Egyptte daan ka pia tu hi. Tua zawkciang ama in note hong paisak tu hi.



²¹“Ka mihingte a pai ciang khut nguakin a pai ngawl natu in Egyptte in note kong upatsak tu hi.

²²Israel numei theampo in a innpaam Egyptte le a innkuanpui Egypt numeite kungah pai in nik le puan, kham le ngun, suang manphate ngen tu uh hi. Israel te in tua nate a tapate a tanute in silhsakin, Egyptte hauna teng laaksak siat tu uh hi,” ci hi.

Pusuana 4

A lamdang Vaangletna Pathian in Moses Pia

¹Tuaciang Moses in Topa tungah, “Ahizong Israel te in kei hong um ngawlin ka thu son hong ngai bua a, nang tungah Topa hong kilangh ngawl hi, hong ci thong le bangbang in hi tu khi ziam?” ci in zo hi.

²Tuaciang Topa in, “Na khut sungah bang toai ni ziam,” ci in dongh hi. Moses in, “Ciangkhut khat toai khi hi,” ci in zo hi.

³Topa in, “Na ciangkhut lei ah lawn in,” ci hi. Moses in a ciangkhut a lot ciang ngul khat suakin, tua mun pan Moses tai hi.

⁴Tuaciang Topa in Moses tungah, “Kunsuk in a, a mei pan zam in,” ci hi. Tuaciang Moses in kunsuk in zam a, ciangkhut suak kik hi.

⁵Topa in na taangpupite Pathian, Abraham, Isaac le Jacob Pathian nang tungah hong kilangh hi ci sia Israel te ii up thei tu in hi bangin vawt in,” ci hi.

⁶Topa in Moses tungah, “Na khut na puan sungah koi in,” ci kik hi. Moses in koi a, a laak kik ciang a khut meima piangin vuuk bangin a kaang meima in tuam hi.

⁷Tuaciang Topa in, “Na khut na puan sungah koi kik in,” ci hi. Moses in koi kikin, a laak kik ciang a pumpi dangte taw kibang in dam hi.

⁸Topa in, “Amate in a khatna nalamdangte taw hong um thei buale zong a niina sia taw in nang hong um tu uh hi.



⁹Hi nalamdang niite taw hong um zo balai a, na thu hong nial le, Nile ngun pan tui tawm la in lei ah sung in. Tua tui sia chi suak tu hi,” ci hi.

¹⁰Ahizong Moses in, “Hi thei bo, Topa awng kei hong sawl heak in. Thu son ka thiam ngei bua a, nangma nong paupui ciil a kipan tu dong thuson ka thiam tuan bua hi. Kampau ka thiam bua a, hai in ka aw tawn hi,” ci hi.

¹¹Topa in Moses tungah, “Mihingte ii kam le muk akua in pia ziam? Akua in nangong le kampau thei ngawlin vawt ziam? Akua in khua musak a, akua in mittawsak ziam? Tua in Topa Keima ka hi hi.

¹²Tu in, pai tan! Na kampau kong hu tu a, na thuson tu kong hil tu hi,” ci hi.

¹³Ahizong Moses in, “Hi thei bo, Topa awng, midang khat pawpo sawl zaw tan,” ci in zo hi.

¹⁴Tuaciang Moses tungah Topa thin uukin, “Levi minam, na suapuipa Aaron bangbang ziam? Ama sia kampau thiam ci in ka he hi. A tatak in ci leang nang taw kimu tu in, tu in hong pai tu a, nang hong mu tu lawp mama tu hi.

¹⁵Ama taw thu na son khop zawkciang, a son tu teng hil in. Na nii in na thuson kong hu tu a, na vawt tu teng kong hil tu hi.

¹⁶Ama in nang taangin mihingte tungah thuson tu hi. Tuaciang nangma Pathian bang na hi tu a, a son tu teng na hil tu hi.

¹⁷Hi ciangkhut keng in, banghangziam cile tuasia taw nalamdangte na vawt tu hi,” ci hi.

Egypt ah Moses Heak kik

¹⁸Tuaciang Moses a sunghpa Jethro kungah cia in ama tungah, “Egypt ngamah a om ka bete nungta lai ziam ci in a vil tu in Egypt ngamah nong hesuakna in hong ciasak tan,” ci hi. Jethro lungkim in cidam in cia tan ci hi.

¹⁹Midian ah Moses a omlai in Topa in ama tungah, “Egypt ah cia kik tan, banghangziam cile nang hong that nuamte thi siat zo hi,” ci hi.

²⁰Tuaciang Moses in a zi le a tapate samin a laa tungah tosakin Egypt zuan uh hi. Pathian ii keng a, a sawl ciangkhut sia keng hi.



²¹Topa in Moses tungah, “Tu in Egypt ah cia kik tu na hi ciang seamin kong sawl nalamdang theampo kong piak vaangletna taw kumpipa mai ah seam siat tu ni hi. Ahizong kumpipa thin ka sahsak tu a, ama in mihingte paisak ngawl tu hi.

²²Tuaciang nangma in kumpipa tungah, keima Topa in ‘Israel sia ka tapaciil hi.

²³Keima hong bia tu in ka tapaciil paisak tu in, nang kong sawl hi, ahihang nangma in nong nial hi. Tu in, na tapaciil thatlum tu khi hi,’ ci in na son tu hi” ci hi.

²⁴Egypt paina lampi, ngiaphual ah Topa in Moses taw kimu in thalup sawm hi.

²⁵⁻²⁶Tuaciang a zi Zipporah in suanghiam khat la in a tapa ii vunteap attansakin, tua suang taw Moses ii peang thutha hi. Vunteap at ngeina hangin a zi in Moses tungah, “Nang sia kei tungah chisan taw ka pasal hi ni hi!” ci hi. Tua ahikom, Topa in Moses ii nuntakna suatak hi.

²⁷Tua laitakin Topa in Aaron tungah, “Moses taw kimu tu in, senneal ngamah pai in,” ci hi. A sawl bangin mual thiangtho ah pai in Moses taw a kimu ciangin nam hi.

²⁸Tuaciang Moses in Egypt ah a cia tu lai in, Topa kam vaithak theampo le Topa ii sep tu in, a sawl nalamdang thute zongh Aaron tungah son siat hi.

²⁹Tuaciang Moses le Aaron Egypt ah paikhawm in Israel lampuite theampo kaikhawm uh hi.

³⁰Topa ii Moses tungah a thu son teng Aaron in a mite tungah son kik siatin, tuaciang Moses in mihingte mai ah nalamdang theampo lak hi.

³¹Israel te in um uh hi. Israel te kungah Topa haw in amate a ki vawt siatna a thuaknate Topa in a mu siatna thu amate in a zaak uh ciang amate a lu uh kunin Topa bia uh hi.

Pusuana 5

Egypt Kumpipa Mai ah Moses le Aaron



¹Tuaciang Moses le Aaron Egypt kumpipa kungah pai in, “TopaIsrael te Pathian in, ‘Ka mihingte senneal ngamah kei hong upatna poai khat a khaam thei natu in paisak in’ hong ci hi,” ci hi.

²Kumpipa in, “Topa sia akua ziam? Banghang in ama thu ngai in Israel te paisak tu khi ziam? Tua Topa ka he bua hi, Israel te ka paisak buatu hi,” ci hi.

³Moses le Aaron in, “Hebrewte Pathian sia kote tungah hong kilangh zo hi. Topa ka Pathian tungah biakna pia tu in ni thum paina lampi senneal ngamah hong paisak tan. Tuabang ka hi bua uh le ama in natna taw ahibuale ngal taw in kote hong thatlum tu hi,” ci in zo uh hi.

⁴Kumpipa in Moses le Aaron tungah, “Mipite in a nasep a ngaingon thei natu in na vaihawm uh bang na deina uh ziam? Na seam tu in hi salte kuansak kik vun!

⁵Egyptte sangin no tam phazaw zo nu hi. Tu in a nasep tawlna sak nuam nu ziam?” ci hi.

⁶Tua ni in kumpipa in sal a uk Egyptte tung le Israel naseam ukte tungah thupia in;

⁷“Uksuang vawt natu in mihingte tungah taangphaw na piak uh tawlna vun. Amate pai in zongtawmsak vun.

⁸Ahizong uksuang nidang a den za ma, khat zongh kiam ngawlin deangsak vun. Amate in a sep khom tu nasep nei ngawl ahikom a Pathian tungah biakna pia tu in ka paisak natu in hong ngen tan viuveu hi.

⁹Hi mite nasep haksa zaw seamsakin, komlasak vun. Tua hile leilot thusonte ngai man ngawl tu hi,” ci hi.

¹⁰Sal ukte le Israel naseam ukte pai in Israel te tungah, “Kumpipa in taangphaw ka pia nawn buatu hi, hong ci hi.

¹¹Noma pai in a omna munah zongtawm tavun, uksuang na den ngeiza uh ma vawt tavun kumpipa in hong ci hi,” ci uh hi.



¹²Tua ahiciang a mihingte sia Egypt ngamsung theampo ah taangphaw zongin kuan uh hi.

¹³Sal ukte in, taangphaw a kipiak lai a, uksuang a den ngeiza ma nisim uksuang a den natu in sawl ngawp hi.

¹⁴Egypt mi sal ukte in nasepna uk tu in a koi Israel naseam ukte tungah, “Nidang a uksuang na vawt za uh banghang vawt zo ngawl nu ziam?” ci in, tei in saat uh hi.

¹⁵Tuaciang naseam ukte kumpipa kungah pai in, “Kumpipa awng, banghangin kote tungah hi bang hong vawt thong ni ziam?”

¹⁶Taangphaw hong kipia ngawl hi, ahizong uksuang deang tu ma hong kisawl hi! Tu in ko hong kisaat hi, nangma khialna hi,” ci in mawsiat uh hi.

¹⁷Kumpipa in, “Note datham in na na seam nuam bua uh hi, tua hangin Topa tungah biakna pia in pai tu in nong ngen uh hi.

¹⁸Tu in na nasepna zuan kik vun! Taangphaw hong kipia ngawl tu a, ahizong uksuang na den ngeiza ma deang tu nu hi,” ci in zo hi.

¹⁹Nidangin na den ngeiza ma nisim in na deang tu uh hi, ci thu naseam lampuite in a heak ciang haksa sa uh hi.

²⁰Amate hong pusua ciang, amate a ngak Moses le Aaron taw kimu uh hi.

²¹Amate in Moses le Aaron tungah, “Na nasepnate uh Topa in hong mu zo hi, kumpipa le a uliante in kote hong ensansak na hi uh kom, Topa in note daan hong pia tu hi. Kote hong thalup natu in paulap a zong na hi uh hi,” ci uh hi.

Moses in Topa Mawsiat

²²Tuaciang Topa sangah Moses ki heakkik in, “Topa awng, na mihingte banghangin vawtsia ni ziam? Banghang hi sungah kei hong paisak ni ziam?”

²³Nangma taangin thu son tu in kumpipa kung ka pai pan kipan kumpipa in amate siatvawt hi. Tua hi a, nangma in amate hu natu bangma na vawt bua hi!” ci hi.

Pusuana 6



¹Tuaciang Topa in Moses tungah, “Tu in kumpipa tungah ka nasep tu te na mu tu hi. Ka mihingte a paisak natu in ka sawl nanak tu hi. A tatak in ci leang a leitangh pan ka mihingte hawlkeak tu in ka sawl nanak tu hi,” ci hi.

Pathian in Moses Sam

²Pathian in Moses tungah, “Keima in Topa ka hi hi.

³A Vaanglianbel Pathian in Abraham, Isaac le Jacob tungah ka kilangh a, ahizong Topa ci in ka min thiangtho amate ka hesak bua hi.

⁴Ngamdang mite bangin amate teenna Canaan ngam sia amate tung piak tu kamciam in amate taw thuciamna ka vawt zo si hi.

⁵Tu in Egyptte ii salin a mat Israel te tauna ka za zo a, ka thuciamna ka phawk hi.

⁶Tua ahiciang Israel te tungah, ‘Keima in Topa ka hi hi; Egyptte sal panin note kong hun tu a, kong suaktasak tu hi. A thahat ka khut laamin amate tungah a lauhuai daan ka tungsak tu a, note kong hun tu hi.

⁷Note keima mihing kong suaksak tu a, keima in note Pathian ka hi tu hi. Egypt saltanna pan kong suataksak ciang naTopa na Pathian ka hina nong he tu uh hi.

⁸Abraham, Isaac le Jacob tungah piak tu in ka ciansa ngamah kong paipui tu a, tua ngam sia note neisa tu in kong pia tu hi. Keima in Topa ka hi hi,’ ci in, son tan,” ci hi.

⁹Moses in Israel te tungah hi thu teng son a, ahizong amate in awlmawk ngawl uh hi, banghangziam cile a sila nasepna ah ngim lei in a thin tamtham zo uh hi.

¹⁰Tuaciang Topa in Moses tungah,

¹¹“Egypt Kumpipa kungah pai tan a, Israel te na ngamsung pan pusuaksak in, ci tan” ci hi.



¹²Ahizong Moses in, “Israel te ngangawn zongh in ka thuson hong ngai ngawl ci leang bangbang in kumpipa in hong ngai tu ziam? Kampau thiam ngawl mama pa ka hi hi,” ci in zo hi.

¹³Topa in Moses le Aaron tungah, “Egypt ngam pan Israel te pusua pui tu in noma thu kong piak sia Israel te le Egypt kumpipa tungah son tavun,” ci in thupia hi.

Moses le Aaron Innkuan Tepteena

¹⁴Jacob taciil Reuben in tapa li nei in; Hanoch, Pallu, Hezron, le Carmi hi a, amate min bangin a kiphuak be le phungte ii pianna taangpupite ahi uh hi.

¹⁵Simeon in tapa luk nei in; Jemuel, Jamin, Ohad, Jachin, Zohar le Canaan numei khat taw a tapa Shaul hi in, amate min bang a, a kiphuak be le phungte ii pianna taangpupite ahi uh hi.

¹⁶Levi in tapa thum nei a; Gershon, Kohath le Merari hi a, amate min bangin, a kiphuak be le phungte ii pianna taangpupite ahi uh hi. Levi sia kum 137 nungta hi.

¹⁷Gershon in tapa nii nei in: Libni le Shimei ahi uh hi. Amate in suan le paal tam mama nei hi.

¹⁸Kohath in tapa li nei in; Amram, Izhar, Hebron, le Uzziel ahi uh hi. Kohath kum 133 nungta hi.

¹⁹Merari in tapa nii nei in; Mahli le Mushi ahi hi. Hite sia Levi be le phungte le a suan a paalte ahi hi.

²⁰Amram in a pa suapuinu Jochebed tenpui in, Aaron le Moses nei hi. Amram sia kum 137 nungta hi.

²¹Izhar in tapa thum nei in: Korah, Nepheg, le Zichri ahi uh hi.

²²Uzziel zongh in tapa thum nei a; Mishel, Elzaphan, le Sithri ahi hi.

²³Aaron in Amminadab ii tanu, Nahshon ii suapuinu Elisheba tenpui in, Madab, Abihu, Eleazar le Ithamar nei hi.



²⁴Korah in tapa thum nei in; Assir, Elkanah le Abiasaph ahi hi. Amate Korah be le phung hong pianna taangpupite ahi uh hi.

²⁵Aaron ii tapa Eleazar in Putiel ii tanute khat tenpui in, Phinehas nei hi. Hite sia innkuan lutangte hi a, Levi minamte ii pianna be le phungte ahi uh hi.

²⁶Aaron le Moses Topa ii, “Egypt pan Israel minamte pusuapui vun,” ci in a sawl mihingte ahi hi.

²⁷Amate Israel te suatak natu in, Egypt kumpipa tungah thu sonte ahi uh hi.

Moses le Aaron tungah Topa ii Thupiak

²⁸Egypt ngamsung Moses tungah Topa in thu a son lai in,

²⁹ama in, “Keima in Topa ka hi hi. Kong son theampo Egypt kumpipa tungah son in,” ci hi.

³⁰Ahizong Moses in, “Nong heak bangin kampau ka thiam bua hi, banghangin kumpipa in ka thuson hong ngai thong tu ziam?” ci in zo hi.

Pusuana 7

¹Topa in, “Kumpipa mai ah nang, Pathian bangin kong vawt tu a, na suapuipa Aaron in na kamsang bangin ama paupui tu hi.

²Kong thupiak theampo Aaron tungah na son tu a, ama in kumpipa tungah Israel te a ngamsung pan a pusuasak natu in son tu hi.

³Ahizong kumpipa a thin ka khosak tu a, Egypt ah a lauhuaina tam mama vawt kaleng awlmawk ngawlin na thuson hong ngai ngawl tu hi.

⁴Tuaciang Egyptte tungah nasia takin daan ka pia tu a, ka mihing te ii minamte tua ngam pan ka pusuapui tu hi.

⁵Keima in Egyptte tungah ka thahatna ka lak ciang le Israel te a ngam pan ka pusuapui ciang, Egyptte in Topa ka hina hong he tu uh hi,” ci hi.

⁶Topathupiak bangin Moses le Aaron in seam uh hi.

⁷Kumpipa tungah a thuson hunin, Moses kum sawmliat pha in, Aaron kum sawmliat le kum thum pha hi.

Aaron ii Ciangkhut



⁸Topa in Moses le Aaron tungah,

⁹“Kumpipa in, hong ki up thei natu in, nalamdang khat hong lak tavun, hong cile, nangma Moses in Aaron tungah na ciangkhut la in kumpipa mai ah lawn in ci in; tua hile ngul khat suak tu hi,” ci hi.

¹⁰Tuaciang Moses le Aaron kumpipa kungah pai in Topa thupiak bangin seam uh hi. Aaron in kumpipa le a uliante mai ah a ciangkhut lawnin, ngul khat suak hi.

¹¹Tuaciang kumpipa in a mipilte le mitbum thiamte samin mitbum thiamte in Aaron vawt bangma in vawt uh hi.

¹²Amate in a ciangkutte lei ah lawnin ngul suak siat hi. Ahizong Aaron ciangkhut in amate ciangkhut teng valh siat hi.

¹³Bangbang hikale kumpipa thin kho veve a, Topa cisa bangma in kumpipa in Moses le Aaron thu ngai ngawl hi.

Egypt ah Lalna Theng Chisan

¹⁴Tuaciang Topa in Moses tungah, “Kumpipa thin sak mama a, Israel te paisak tu nial hi.

¹⁵Tua hi in, zingsang ciang kumpipa Nile ngun ah a pai ciang pai in kimu tan. Ngul a suak, na ciangkhut kengin ngunvaal pan ngak in.

¹⁶Tuaciang kumpipa tungah, “Topa Hebrewte Pathian in amate ii senneal ngam sungah ama a biak thei natu in, a mihingte na paisak natu a son tu in kei hong sawl hi. Ahizong tu dong ciang a thu na ni bua hi.

¹⁷Tu in kumpipa awng, Topa akua hi cisia a na sepna taw na mu tu uh hi Topa in hong ci hi. En in, hi ciangkhut taw nguntui ka saat tu a, nguntuite chisan suak tu hi.

¹⁸Ngasate thi tu a, nguntuite uih mama in Egyptte in tua tui ne thei ngawl tu uh hi,’ ci in, son tan” ci hi.

¹⁹Topa in Moses tungah, “Aaron tungah na ciangkhut la in a, Egypt ngamsung tui laakna luamte tung, nguntui theampo tung le tuicingte tungah na



ciangkhut laam in. Tuite chisan hong suak tu a, ngamsung tui theampo le thingbeal, suangbeal sungah a om tuite dongin chisan suak tu hi, ci in son in,” ci hi.

²⁰Tuaciang Topa thupiak bangin Moses le Aaron te in seam uh hi. Kumpipa le a uliante mai ah Aaron in a ciangkhut laamin nguntui saat a, tui theampo chisan suak hi.

²¹Ngun sungah a om ngasate thi in, ui mama ahikom Egyptte in tua tui ne thei ngawl uh hi. Egypt ngam theampo chisan taw kidim hi.

²²Tuaciang kumpipa ii mitbum thiamte in a mitbum thiamna uh taw tuabang tatak ma in vawt a, kumpipa sia a thinsak ngei bangma in sak veve hi. Topa cisa bangin kumpipa in Moses le Aaron thu ngai ngawl hi.

²³Hi zata in thupiangte kumpipa in awlmawk vet ngawlin a kumpi inn ah cia kik hi.

²⁴Egyptte theampo in tua nguntui ne thei ngawl ahikom ngundung ah a tui neak tu tuikhuk to uh hi.

²⁵Topa ii Nile nguntui a sa zawk ni sali pha zo hi.

Pusuana 8

Ulolte

¹Tuaciang Topa in Moses tungah, “Kumpipa kungah pai tan a, Topain hi bang ci hi, ‘Ka mihingte paisak hen, tua hile amate in keima hong bia thei tu uh hi.

²Ka thu nong nial le na ngam sungah ulol dimsakin daan kong pia tu hi.

³Nile ngun sungah ulol ka dimsak tu a, ngunsung pan pusuakin na kumpi innsung, na lupna khansung, na mihingte le na uliante innsung, le na uum na beal sung dongah kong thengsak tu hi.

⁴Ulolte in nangma tung, na mihingte tung le na uliante theampo tungah hong kaa tu hi, ‘ci in na son tu hi,” ci hi.



⁵Topa in Moses tungah, “Aaron tungah, ngun tung, tui laakna luam tung, tuicingte tungah a ciangkhut laamto in, ulolte pusuaksakin Egypt ngamsung dimsak in ci in son tan” ci hi.

⁶Tuaciang Aaron in a ciangkhut tui omna theampo tungah laamto a, ulolte pusuak in ngamsung dim hi.

⁷Ahizong mitbum thiamte zongh in mitbum thiamna zanghin ngam sungah ulolte pusuaksak hi.

⁸Kumpipa in Moses le Aaron samin, “Hi ulol teng a bosak natu in, Topa tungah thungen vun, Topa tungah biakna a piak thei natu in, na mihingte ka paisak tu hi,” ci hi.

⁹Moses in kumpipa tungah, “Nang atu in thu kong ngetsak tu ka lungdam hi. Nangma na uliante le na mihingte atu ahizong, hi ulolte Nile ngunsung sim ngawl mundang ah a om nawn ngawl natu thu kong ngetsak tu hun ciangtan in,” ci in zo hi.

¹⁰Kumpipa in, “Zing ciangin thu hong ngetsak tan,” ci in zo hi. Moses in, “Nong sawl bangin ka seam tu a, tuaciang kote PathianTopa taw a kibang Pathian dang a om ngawl sia na he tu hi.

¹¹Ulolte in nangma, na uliante le na mihingte nusia in Nile ngunsung bek ah om tu hi,” ci hi.

¹²Tuaciang Moses le Aaron te kumpipa kung pan pusuak in Topa ii kumpipa kung dongah a puak ulolte a laak kik natu in, Moses in Topa tungah thu ngen hi.

¹³Moses nget bangin Topa in naseam in, innsung huansung le lo sungah a om ulolte thi siat hi.

¹⁴Egyptte in ulol thite a lom a lom in seng a, ngamsung theampo ui hi.

¹⁵Kumpipa in ulol thi te a mu ciang a thinsak kikin Topa ci bangma kumpipa in Moses le Aaron thu ngai ngawl hi.



Thokaangte

¹⁶Topa in Moses tungah, “Aaron tungah, Egypt ngamsung leivui theampo thokaang a sua siat natu in, a ciangkhut taw lei saatin sawl in,” ci hi.

¹⁷Tuaciang Aaron in a ciangkhut taw lei saatin, Egypt ngamsung leivui theampo thokaang suakin mihingte le nganhingte tungah dim hi.

¹⁸Mitbum thiamte in a mitbum thiamna zanghin thokaang vawt tu hanciam a, ahizong vawt thei ngawl uh hi. Thokaang mun theampo ah om in,

¹⁹mitbum thiamte in kumpipa tungah, “Hi sia in, Pathian nasepna ahi hi!” ci uh hi. Ahizong kumpipa thinsakin, Topa ci bangma kumpipa in Moses le Aaron thu ngai ngawl hi.

Thote

²⁰Topa in Moses tungah, “Ngun ah kumpipa a pai ciang kimu tu in zing ciang zingsang tuungin pai in a, Topa in, ‘Amate in kei hong biak thei natu in ka mihingte paisak hen.

²¹Ka thu nong nial le daan kong pia tu a, nangma tung, na uliante tung, le na mihingte tungah tho honpite kong puak tu hi. Egyptte inn te tho taw kidim tu a, leitangh tho honpi taw kituam cip tu hi.

²²Ahizong ka mihingte tenna Goshen ngam ka khe tu a, tua munah tho honpite om ngawl tu hi. Keima Topa in hi ngamah naseam hi ci in nong heak natu in Goshen ngamah tho khat zongh leang ngawl tu hi.

²³Ka mihingte le na mihingte kilaklaw ah ki lamdanna khat ka vawt tu hi. Hi nalamdang sia zing ciang in hong piang tu hi,’ ci in son tan,” ci hi.

²⁴Topa in, kumpipa innsung le a uliante inn sungah tho honpite puak hi. Tho in Egypt ngamsung theampo lalsak hi.

²⁵Tuaciang kumpipa in Moses le Aaron samin, “Pai in hi ngam sungah na Pathian biakpiakna pia vun,” ci hi.

²⁶Moses in, “Tuabang hi thei ngawl tu hi, banghangziam cile Topaka Pathian tungah nganhingte taw biakpiakna Egyptte in diksa ngawl tu uh hi. Egyptte



muna ah biakpiakna vawtin ka nganno thalup te hangin amate thin uuk thong le kote suang taw hong deang lum tu uh hi.

²⁷Ama hong thupiak bangin Topa ka Pathian tungah biakpiakna pia tu in, ni thum paina lampi senneal ngam sungah ka pai uh kul tu hi,” ci hi.

²⁸Kumpipa in, “A khuala na pai buatu uh ahile, senneal ngam sungah Topa na Pathian bia tu in kong paisak tu hi. Kei atu in thu hong ngetsak tavun,” ci hi.

²⁹Moses in, “Ka pusua po ciang, zing ciang tho honpi te in nangma, na uliante le na mihingte kung pan a tai siat natu in Topa tungah thu ka ngen tu hi. Ahizong mihingte in Topa tungah biakpiakna a piak thei natu khakin, hong theam kik nawn ngawl tu ni hi,” ci in zo hi.

³⁰Moses in kumpipa kung pan pusuakin Topa tungah thungen in,

³¹Moses nget bangin Topa in pia hi. Tho honpite kumpipa, a uliante le a mihingte kung panin khat zongh kikhe ngawlin tai siat hi.

³²Ahizong hi hun zongh ah kumpipa thin sah veve in, ama in tua mihingte paisak ngawl leleau hi.

Pusuana 9

Nganhingte Thina

¹Topa in Moses tungah, “Kumpipa kungah pai in, Hebrewte ii Pathian Topa in hi bang ci hi, ‘Kei hong biak thei natu in ka mihingte paisak hen.

²Na paisak nuam bua leleau ahile,

³daan kong pia tu a, siphu, laa, kalaoh, khui, tuu le kealte tungah a lauhuai natna ka thengsak tu hi.

⁴Israel ngannote le Egypt ngannote kilaklaw ah ki lamdanna khat ka vawt tu a, Israel te nganno ngawl teng ka thisak tu hi.

⁵Keima Topa in, hi thu teng zing ciang mama in ka tangtung sak tu hi, ‘va ci tan,” ci hi.

⁶A sonsa bangin a zing ciangin Topa in naseam in, Egyptte nganno theampo thi siat hi. Ahizong, Israel te nganno khat zongh thi ngawl hi.



⁷Kumpipa in bang thupiang ziam ci in dongh a, Israel te nganno khat zongh a thi ngawl na thu teng ama tungah kison hi. Ahizong a thin sah veve a, a mihingte paisak tuan ngawl hi.

Uilut Meima

⁸Tuaciang Topa in Moses le Aaron tungah, “Meikhuk pan khut khat dim vut la vun; kumpipa mai vui sungah Moses in tua vutte lawn tu hi.

⁹Tuate Egypt ngamsung theampo ah leivui bangin kithethaang tu a, a thetna mun po ah a om mite le nganhingte tungah uilut meima piangsak tu hi,” ci hi.

¹⁰Tuaciang amate in vut tawm la in kumpipa mai ah ding uh hi. Moses in tua vutte vui sungah lawnin tua vutte in mihingte le nganhingte tungah uilut meima piangsak hi.

¹¹Mitbum thiamte Moses mai ah pai thei ngawl uh hi, banghangziam cile a dang Egyptte theampo taw kibang in uilut meima vei siat uh hi.

¹²Ahizong Topa in kumpipa thin sahsakin, Topa cisa bangma kumpipa in Moses le Aaron thu ngai nuam ngawl hi.

Ngial

¹³Tuaciang Topa in Moses tungah, “Zing ciang zingtuung in kumpipa taw kimu in, Hebrewte Pathian Topa in, ‘Kei hong biak thei natu in ka mihingte paisak hen.

¹⁴Leitung bup ah keima taw kibang khat beak a om ngawl hunlam na heak natu in tutung in na uliante le na mihingte bek daan pia ngawlin nangma zongh daan kong pia tu hi.

¹⁵Nangma le na mihingte tungah ka khut laamin natna hong thengsak leng note na mong siat tu uh hi.

¹⁶Ahizong Leitung theampo ah ka minthanna a kizel natu in nang tungah ka vaangletna lakin kong nungtasak zo hi.

¹⁷Ahizong nangma na kisathei veve a, ka mihingte na paisak bua hi.



¹⁸Egypt ngam tangthu sungah a kihe ngei ngawl, ngialtang lian mama zing ciang, tu hunin ka kiasak tu hi.

¹⁹Tu in na ngannote le na dang tuatuam a pua sangah na nei theampo buk sungah a koi natu in thupia in. A pua sangah a om mihingte le ngannote tungah ngial kia tu a, amate thi siat tu hi,' ci in va son tan," ci hi.

²⁰Topa thusonte hangin kumpipa ulian kimkhatte lau in a silate le a ngannote buk sungah khum uh hi.

²¹Ahizong pawlkhatte in Topa thupiakte bangma awlmawk ngawlin, a silate le a ngannote doipua sangah koi uh hi.

²²Tuaciang Topa in Moses tungah, "Na khut van ah laamto in tua hile Egypt ngamsung theampo, mihing, nganhing le losung ankung theampo tungah ngial kia tu hi," ci hi.

²³Tuaciang Moses in a ciangkhut van ah laamto in, Topa in vantosak, ngial kiasakin keak kiasak hi. Topa in

²⁴a tee vazal khualeng taw a kithua vui le ngial suangval nasia mama khat kiasak hi. Tua in Egyptte tangthu sungah a heak ngei a nasia bel suangval ahi hi.

²⁵Egypt ngamsung theampo doipua sangah a om mihingte theampo le nganhingte theampo ngial in deangcip hi. Losung ankung theampo puksakin, thingkung theampo talsak siat hi.

²⁶Israel te teenna Goshen ngam bekma ngial kia ngawl hi.

²⁷Kumpipa in Moses le Aaron samin, "Tutung keima maw khi hi;Topa maan a, ka mihingte le keima khial khu hi.

²⁸Topa tungah thungen vun! Hi vanto le ngialkiate kicing zo hi. Note paisak tu in kamciam kong pia a, hi lai ah khuangei na om tu kul nawn ngawl hi," ci hi.



²⁹Moses in kumpipa tungah, “Khuapi pan ka pusua pociang ka khutte laamin Topa tungah thu ka ngen tu hi. Vantote tawlnga in, ngialkia nawn ngawl tu hi. Tuaciang hi leitung sia Topa aa hi ci in na he tu uh hi.

³⁰Ahizong nangma le na uliante in Topa Pathian na kiitak ngawl lai uh sia ka he hi,” ci hi.

³¹Ngial in anthul le mangtaangte lalsak siat hi, banghangziam cile mangtaang a min laitak hi in, anthul sia a mom laitak ahi hi.

³²Ahizong zungtaang a lal om ngawl hi, banghangziam cile tuate min ngawl lai hi.

³³Kumpipa kungpan Moses khuapi pua sangah pai in a khutte laamin Topa tungah thungen hi. Vanto le ngialkia tawlnga in ngua zu nawn ngawl hi.

³⁴Kumpipa sia thupiang teng a mu ciang khial kik leleau hi. Ama le a uliante thin a sah ngei in sah a,

³⁵Topa in Moses tungtawn in a sonkhol bangma in kumpipa in Israel te paisak ngawl hi.

Pusuana 10

Khaumawte

¹Tuaciang Topa in Moses tungah, “Kumpipa kungah pai in, hi bangin amate sungah nalamdang ka vawt natu in ama le a uliante thin ka sahsak hi.

²Na lamdang ka lak ciang, Egypt te a mawmaw bang ka suak sakna thute, na tu na tate tungah na son tu thu ahi hi. Note theampo in Topa ka hina nong he tu uh hi,” ci hi.

³“Tuaciang kumpipa kungah Moses le Aaron pai in, “Topa Hebrewte Pathian in, ‘Kei tungah nong kiniamkhiak tu bangtan vei hong nial lai tu ni ziam? Kei hong biak thei natu in, ka mihingte paisak in.

⁴Nong nial lai le, zing ciangin na ngam sungah khaumaw kong puak tu hi.



⁵Khaumawte tam mama tu a, lei maitang teng siincip tu hi. Ngial ii a lalsak ngawl, thingkung a taanglaite ngangawn amate in netum siat tu hi.

⁶Amate na kumpi innsung, na uliante innsung theampo le na mihingte innsung theampo dim tu hi. Amate na taangpupite mu ngeite sangin sia zaw tu hi, 'ci in' ci hi. Tuaciang Moses kiheak in cia hi.

⁷Kumpipa uliante in kumpipa tungah, "Bangtan vei hi pa in eite ngimna hong pia tu ziam? A Topa a Pathian a biak thei natu in, Israel te pai taken. Egypt ngam lalcip zo ci sia tel ngawl ni ziam?" ci uh hi.

⁸Tuaciang Moses le Aaron kumpipa kungah kipaipui kikin ama in amate tungah, "Note pai in, na Topa Pathian uh bia tavun. Ahizong a kua teng tatak pai tu nu ziam?" ci hi.

⁹Moses in, "Ka patangte uh le ka khanghaamte uh taw pai siat tu khu hi. Kote in ka tapate le ka tanute, ka tuute le ka kealte, le ka khuite keng tu khu hi, banghangziam cile Topa upatna in poai khat vawt tu khu hi," ci in zo hi.

¹⁰Kumpipa in, "Na numeite le na patangte kong pai sak ngei ngawl tu sia Topa min taw ka kiciam hi! Note in kei leedo hong sawm nu hi.

¹¹No ci bang suak thei ngawl tu hi. Na deina uh tuabang ahile pasal teng bek pai in Topa bia tavun," ci hi. Hi bang thu teng zawkciang Moses le Aaron kumpipa kung pan kihawlkeak hi.

¹²Tuaciang Topa in Moses tungah, "Khaumawte hong kipuak natu in, Egypt ngam tungah na khut laamto in. Amate hong pai tu a, thingkung po theampo le ngial ii lalsak mong theampo netum tu hi," ci hi.

¹³Tuaciang Moses in a ciangkhut laamto in, Topa in nisuana sang pan sun le zan tawntung vui vasak hi. Tua vuite in a zingsang ciang khaumawte hong puak hi.

¹⁴Khaumawte a hon a hon in hong theng a, Egypt ngam sung theampo dim hi. Tua in a kimu ngei ngawl le a kimu kik ngei ngawl tu khaumaw hon tambel ahi hi.



¹⁵Amate in lei maitang vom mitmet in siin siat hi. Amate in ngial ii den mong theampo le thingkung tung thingnga theampo ne siat hi. Egypt ngam sung theampo ah thingkung le ankung tungah a hing khat zongh om nawn ngawl hi.

¹⁶Tuaciang kumpipa in manlang takin Moses le Aaron samin, “Topana Pathian le note tungah ka khial zo hi.

¹⁷Tu in, khatvei ka mawna hong maisak tavun a, hi a lauhuai daan piakna kei tung pan a bo thei natu in, Topa na Pathian tungah thu hong ngetsak tavun,” ci hi.

¹⁸Moses in kumpipa nusia in Topa tungah thungen hi.

¹⁹TuaciangTopa in nisuana sang vui sia, a hat mama nitumna sang hui suaksak a, tua vui in khaumawte laamto in Suez Tuidok sungah muutkeak hi. Egypt ngamsung theampo ah khaumaw khat zongh om nawn ngawl hi.

²⁰Ahizong Topa in kumpipa thin sahsakin ama in Israel te paisak ngawl hi.

Khuazing

²¹Tuaciang Topa in Moses tungah, “A saa mama hu in a kiphawk thei liang khuazing taw Egypt ngamsung a kisit siat thei natu in, van ah na khut laamto in,” ci hi.

²²Moses in a khut van ah laamto in, Egypt ngamsung theampo ni thum sung khuazing bikbek hi.

²³Egyptte khat le khat kimu thei ngawl a, tua hun sung kuama pusuak ngawl hi. Ahizong Israel te teenna mun sia khuavak hi.

²⁴Kumpipa in Moses samin, “Note pai in, Topa bia tavun; na numeite le na patangte zongh keng tavun. Ahizong na tuu na keal le na khuite hi lai ah nusia tu nu hi,” ci hi.

²⁵Moses in, “Tuabang ahile Topa ka Pathian uh tungah meihal biakpiak natu le biakpiak natu nganno teng nong sik kul tu hi.



²⁶Hi ngawl hi, ka ngannote paipui tu khu hi, khat zongh kinusia ngawl tu hi. Topa ka Pathian uh biakpiak natu in ngannote ka teal uh kul hi. A mun ka thet mateng un, a bang nganno taw ama biakna pia tu ci sia ka he buatu uh hi,” ci in zo hi.

²⁷Topa in kumpipa thin sahsakin, kumpipa in amate paisak nuam ngawl hi.

²⁸Kumpipa in Moses tungah, “Ka kung pan tai in! Na maitang hong musakkik ngei heak in! Kong mu kik ni in thi tu ni hi!” ci hi.

²⁹Moses in, “Nangma ci bang hi hen. Kei nong mu kik ngei nawn buatu hi,” ci in zo hi.

Pusuana 11

Moses in Taciil Thina Thu Thangsak

¹Tuaciang Topa in Moses tungah, “Kumpipa le a mihingte tungah khat vei bek daan ka pia lai tu hi. Tua zawkciang note hong paisak tu hi. A tatak in ci leang ama in, hi lai pan note theampo hong hawlkeak tu hi.

²Tu in Israel mihingte theampo in a innpaamte tungah kham le ngun suangmanphate a nget natu in son tan,” ci hi.

³Topa in Israel te sia Egyptte in zaktasak hi. Tua dom ngawlin uliante le mihingte theampo in Moses sia mihing thupi mama khatin ngaisun uh hi.

⁴Tuaciang Moses in kumpipa tungah, “Topa in hi bangin ci hi, ‘Zankim laitak Egyptte kungah ka pai tu a,

⁵Egyptte tapaciil theampo, kumpi tokhum a lua tu, kumpipa tapaciil a kipan an ngoaina ah naseam sila numeite ii tapaciil dongin thi tu hi. Nganhing taciil theampo zongh thi tu hi.

⁶Ni dangin a om ngei ngawl le mai sangah a om kik ngei nawn ngawl tu kaana lianpi Egypt ngamsung theampo ah om tu hi.

⁷Ahizong Israel te ahizong, a ngannote ahizong ui ngangawn in nak ngawl tu hi. Tua in Keima Topa ii Egyptte le Israel te kilaklaw ah ki lamdang in ka nasepnate na heak natu uh ahi hi,” ci hi.

⁸Moses ii a thukhupna panin, “Na ulian theampo kei kungah hong pai tu a, ka mai ah kunin ka mihingte theampo ka paipui natu in hong thuum tu hi . Tua zawkciang ka pai tu hi,” ci hi. Tuaciang Moses thin uuk mama in kumpipa nusia hi.

⁹Topa in Moses tungah, “Egypt ngam sungah nalamdang tam mama ka vawt to thei natu in kumpipa in na thu hong ngai ngawl kenkon tu hi,” ci hi.

¹⁰Moses le Aaron in kumpipa mai ah nalamdang hi zata lak zo hi kale, Topa in a thin sahsak ahikom, a ngamsung pan Israel te paisak nuam ngawl hi.

Pusuana 12

Paisan Poai

¹Egypt ngam sungah Topa in Moses le Aaron tungah,

²“Tu tha sia note atu in kum kipat tha hi tu hi.

³Israel mite theampo tungah hi bang kihilna te son tu ni hi: Tu tha ni sawm ni in pa peuma in tuuno khat ahibuale kealno khat a innkuan atu in teal tu hi.

⁴Nganno khat a ne tu in a innkuan a tawmleih le, mihing khat ii neak zawkza taw kizui in mihing phaza en in a innpaamte hawm thei tu hi.

⁵Nganno sia kum khat a pha, a talno hi tu a, a mealhem ngawl tuu ahibuale keal teal tu nu hi.

⁶Tua tha ni sawm le ni li nitak ciang Israel mipite in tua ngante ngo tu uh hi.

⁷Mihingte in a chisan pawlkhat la in, tua sa a kineak natu inn kongkha khuamte nii le vathaang tungah noai tu nu hi.

⁸Tua ni zanin a sa na em tu uh a, tol saw ngawl anluum le a kha metee te taw na ne tu uh hi.

⁹A sate a sial ahizong tuihuan ahizong na ne buatu uh a, a lu, a peangte le a sungkua dong takin a vekpi em in ne tu nu hi.



¹⁰Zingsang dongin neakmong peuma na omsak buatu uh a, neakmong a om le na hal tu uh hi.

¹¹Khualhaw tu in peangdapte thua in, na khut sungah ciangkhut toai kawmin, hi ante manlang takin na ne tu uh hi. Tua in keima Topa tungah upat piakna Paisan Poai ahi hi.

¹²“Tua ni zan Egypt ngamsung tengah ka pai tu a, mihing le nganhing tapaciil teng thatin, Egypt pathian theampo daan ka pia tu hi. Keima in Topa ka hi hi.

¹³Kongkha ah chisan a kinoai teng noma teenna inn teptee natu lim ahi hi. Chisan ka mu ciang note kong paisan tu a, Egyptte daan ka piak ciang note bangma kong law buatu hi.

¹⁴Keima Topa in bang vawt khi ziam ci na phaw natu in hisia biakna poai khat in vawt tu nu hi. Mai lam hunah zongh tua poai vawt suak tu nu hi,” ci hi.

Tol saw ngawl Anluum Poai

¹⁵Topa in, “Ni sali sung tol kisaw anluum peuma na ne buatu uh a, tol kisaw ngawl anluum bek na ne tu uh hi. Ni masa ni in na inn uh pan tol theampo heam tu nu hi, banghangziam cile tua ni sali hunsung khatpo in tol kisaw anluum a ne tha le, keima mihing in kisim nawn ngawl tu hi.

¹⁶Ni masa ni le ni sali ni in biak kikhopna nei tu nu hi. Tua ni nii sung, na na seam buatu uh a, ahizong an huan thei tu nu hi.

¹⁷Hi poai bosak ngawl tu nu hi, banghangziam cile tua ni in note Egypt pan kong pusuapui hi. Mailam hun ah zongh tua ni in poai vawt tawntung tu nu hi.

¹⁸Tha masa bel ni sawm le ni li nitak pan ni kul le ni khat nitak dong tol kisaw anluum ne ngawl tu nu hi.

¹⁹⁻²⁰Ni sali sung tol peuma na inn sungah koi ngawl tu nu hi, banghangziam cile tualmi ahizong, ngamdang mi khat pawpo in tol kisaw anluum a ne le ka mihing in kingaisun nawn ngawl tu hi,” ci hi.

A Masa bel Paisan Poai



²¹Moses in Israel lampui teng samin amate tungah, “Na innkuan tek un Paisan Poai na vawt thei natu uh in, tuuno khat ahibuale kealno khat tealin ngo vun.

²²Hyssop sip khat la vun a, kuang sungah a om nganhing chisan sungah papin, na inn kongkha khuamte nii le vathaang tungah noai vun. Zingsang khuavak mateng khat zongh pusuak ngawl tu nu hi.

²³Egyptte a that tu in Egypt ngam sungahTopa a pai ciang, kongkha khuamte nii le vathaang tungah a kinoai chisan mu tu a, Thina ii Vantung lalang sia na inn sungah hong that tu in tumsak ngawl tu hi.

²⁴Hi zui tu ngeinate nangma le na tate in a tawntung zui tu nu hi.

²⁵Topa ii kamciam hong piakna ngamah na tum uh ciang hi zeksa ngeinate seam tu nu hi.

²⁶Na tate in, ‘Hi, a zeksa ngeina sia, bang a khiakna ziam?’ ci in hong dongh le,

²⁷“Topatungah upatna taw ih piak Paisan Poai biakpiakna ahi hi, banghangziam cile Egypt ah Israel te ii innte hong paisatna hang ahi hi. Ama in Egyptte thatin, ahizong eite hong khoaikhe hi,’ na ci tu uh hi,” ci hi. Israel mite in khupdin in bia uh hi.

²⁸Tuaciang Topa ii Moses le Aaron tungah a thupiak bangin amate pai in seam uh hi.

Taciil Thina

²⁹Zankim laitak Topa in Egypt ngamsung tapaciil theampo, kumpi tokhum lua tu kumpipa tapa pan kipan leinuai khuazing sung thongtaakte ii tapate dongin that siat a, nganno taciil theampo zongh that hi.

³⁰Tua ni zanin kumpipa le a uliante le a dang Egypt mite theampo khanglo siat hi. Tapa thi ngawl inn khatbeak om ngawl ahikom Egypt ngam sungah kaana nasia mama hi.

³¹Tua ni zanin kumpipa in Moses le Aaron samin, “Nangma le na mite pusuak tavun! Ka ngam nusia tavun a, nong nget bangin pai in Topa bia tavun.



³²Na tuu, na keal le na khuite la in pai tavun. Kei atu zongh thupha hong ngetsak tavun,” ci hi.

³³Egyptte in Israel te a ngamsung pan manlang tak a pusua natu in sawlin, na pai bua uh ahile ka thi siat tu uh hi,” ci uh hi.

³⁴Tuaciang Israel te in tol saw ngawl anvuite anluum emna bealpeute sungah heangin, puan taw tuunin a liangko ah pua uh hi.

³⁵Moses ii a ci bangin Israel te in Egyptte tungah kham le ngun kizepna, le puansilhte ngen uh hi.

³⁶Topa in Israel te sia Egyptte in zaktasak ahikom Israel te nget bangin pia uh hi. Tuabangin Egyptte hauna teng Israel te in paipui uh hi.

Israel te in Egypt Nusia

³⁷Israel te a peangin pai a, Rameses pan Sukkoth zuan uh hi. Amate pasal 600,000 pha in, numei le patang kisim ngawl hi.

³⁸Midang tam mama le tuu, keal le khui tam mama te zongh amate taw paikhawm uh hi.

³⁹Amate in Egypt pan a ken tol saw ngawl anluum em uh hi, banghangziam cile thakhat thu in amate Egypt pan ki hawlkeak ahikom a an neak tu ahizong tol saw anluum ahizong kinging man ngawl uh hi.

⁴⁰Israel te Egypt ah kum 430 sung teang hi.

⁴¹Kum 430 a bo ni inTopa mihingte ii minam theampo in Egypt nusia uh hi.

⁴²Tua ni zan sia amate Egypt pan pusua pui tu in Topa et ni zan hi a, tua ni zan sia Israel te ii mailam hun zongh ah a kepcing tu in Topa tungah aap uh hi.

Paisan Poai ah Zui tu Ngeinate

⁴³Topa in Moses le Aaron tungah, “Hite Paisan Poai ah zui tu ngeinate ahi hi: Ngamdangte in Paisan Poai an ne thei ngawl tu a,

⁴⁴ahizong na lei silate in a vunteap na atsak masa ahile ne thei tu uh hi.

⁴⁵A peam pakte le a kicial naseamte in ne thei ngawl tu uh hi.



⁴⁶An theampo a kihuanna inn sungah kine tu a, a pua ah kipusua pui ngawl tu hi. Na ngaw uh nganhingte a ngu khat zongh thiaktan ngawl tu nu hi.

⁴⁷Israel mi a kici theampo in tua poai vawt tu a,

⁴⁸ahizong vunteap at ngawlte in ne ngawl tu uh hi. Note sungah hong teang ngamdang mi khat in Topa upatna Paisan Poai a vawt nuam le amate innkuan sung pan pa peuma vunteap atsak masa tu nu hi. Tua zawkciang ama Israel minam taw kibang tu a, poai sungah kihel thei tu hi.

⁴⁹Hi zui tu ngeinate Israel minamte le note sungah hong teang ngamdang mite taw a kibangin zui tu ahi hi,” ci hi.

⁵⁰Topa ii Moses le Aaron tungah a thupiak bangin Israel te theampo in thu ni in, seam uh hi.

⁵¹Tua ni in, Topa in Israel minam theampo Egypt pan pusuapui hi.

Pusuana 13

Taciil Aapna

¹Topa in Moses tungah,

²“Tapaciil theampo kei tungah hong aap tavun. Banghangziam cile Israel tapaciil theampo le nganno suakciil apa theampo keima aa ahi hi,” ci hi.

Tol saw ngawl Anluum Poai

³Moses in a mihingte tungah, “Egypt ngam sal na tanna mun pan hong pusuapui ni, tu ni phawk tavun. Tu ni sia Topa in ama vaangletna taw hong pusua pui ni ahi hi. Tol saw ngawl anluum ne tu nu hi.

⁴Tha masabel Abib tha, tu ni in note Egypt pan pusuak nu hi.

⁵Topa in na taangpupite tungah Canaante, Hitte, Amorte, Hivte, le Jebuste teenna ngam piak tu in ciliap huai takin hong kamciam hi. Ngampha le ngamnuam ah hong paipui ciang kumsim tha masabel sungin hi poai vawt tu nu hi.

⁶Ni sali sung tol saw ngawl anluum na ne tu uh a, ni sali ni in Topa tungah upatna poai na vawt tu uh hi.



⁷Ni sali sung tol ki saw anluum peuma na ne buatu uh a, tol ahizong tol kisaw anluum peuma na ngam sungah a om buatu hi.

⁸Tua poai na vawt uh ciang na tapate tungah Topa in Egypt pan note hong paipui ahi hu in hi bangin poai kivawt hi, ci in son tu nu hi.

⁹Hi ngeina poai vawtna in na khut ah ahibuale na tal tungah na khat a kikhit bangin, tua in Topa thukham hong phawksak tawntung tu hi. Tua in Topa thukham na sin tu le na sim tawntung natu in hong phawksak tu hi. Banghangziam cile Topa in a vaangletna taw Egypt pan note hong pusuapui hi.

¹⁰Kumsim hi hun a cin simin poai vawt tu nu hi.

Taciil

¹¹“Topa in na taangpupite tungah a kamciamsa Canaan ngamah note hong paipui tu hi. Tua ngam note tungah hong piak ciang,

¹²na tapaciil theampo Topa tungah pia tu nu hi. Na ngannote a pa taciil theampo Topa neisa hi a,

¹³ahizong laa taciil a pa sia tuuno khat taw tan kik tu nu hi. Tua laa na tan kik nuam bua ahile a ngawng thiaktan tu nu hi. Na tapaciil peuma tan kik tu nu hi.

¹⁴Mailam sangah na tapate in hi bang a ih sepnate bang a khiakna ziam? ci in hong dongh le, ‘Topa in a vaangletna zanghin ih saltanna Egypt pan eite hong paipui hang ahi hi.

¹⁵Egypt kumpipa a thinsakin eite hong paisak nop ngawl ciang Topa in Egypt ngamsung tapaciil theampo le nganhing suakciil a pa theampo thatlum siat hi. Tua ahiciang tapaciil le nganhing suakciil a pa theampo Topa tungah kipia a, ahizong ih tapaciil sia kitan kik hi.

¹⁶Hi bang ngeina poai vawtna ah nung thu hong phawksakkik tu in ih khut tungah ahibuale ih tal tungah teptena a kikhit bang hi tu a, tua in Egypt pan Topa in a vaangletna taw hong pusuapuina thu hong phawksak tu hi,’ ci in son tu nu hi,” ci hi.



Meei Khuam le Mei Khuam

¹⁷Egypt kumpipa in Israel te a paisak lai in, lam ban bel hi kale, Philistia tuipei hui ah a paito lampi sia Pathian in totpui ngawl hi. Pathian in, “A ngalsim tute a mu ciang a thin kikheal in, Egypt ah a heak kik tu ka oai bua hi,” ci in ngaisun hi.

¹⁸Tua lampi taangin ama in senneal ngam kantanpui in, San Tuipi sangah kotpui hi. Israel te in ngalhiam a cingin nei uh hi.

¹⁹Joseph in Israel te tungah ciliap huai tak kamciam a vawt bangin, Moses in Joseph ii luang tonpui hi. Joseph in, “Pathian in note hong suatak ciang, hi mun pan ka luang nong pua tu uh hi,” ci hi.

²⁰Sukkoth pan Israel te dingin, senneal ngamngi Etham ah ngiaphual saat uh hi.

²¹Amate sun ahizong, zan ahizong a khualhaw thei natu in sun hunin meeikaai khuam khat in lamlak a, zan hunin khuavak a pia tu in meitaang khuam khat taw amate mai ah Topapai hi.

²²Israel te mai ah sun hunin meeikaai khuam le zan hunin meitaang khuam om tawntung hi.

Pusuana 14

San Tuipi Kantan

¹Tuaciang Topa in Moses tungah,

²“Israel te heak kikin Baal Zephon paam, Migdol le San Tuipi kilaklaw Pi Hahiroth ii mai ah ngiaphual a saatna tu in son in.

³Kumpipa in Israel te ngam sungah lam am in vak kawkoai a, senneal in khakcip in ngaisun tu hi.

⁴Kumpipa thin ka sahsak tu a, nang hong del tu hi. Kumpipa le a ngalkapte ka zo tu a, minthanna ka nga tu hi. Tuaciang Egyptte in Topa ka hina hong he tu uh hi,” ci hi. Israel te a kisawl bangin ngamta uh hi.



⁵Israel te a suatakna thu Egypt kumpipa tungah a kison ciang ama le a uliante a thin kikhealin, “A bang teng seam thong hi ziam? Israel te ih suaktasak zo a, eite sal ih nei nawn bua hi,” ci uh hi.

⁶Kumpipa in ngalleang le a ngalkapte kithoaisak hi.

⁷Ama in a leang phabel zaluk kihel in a leang theampo taw a ngalkapmaang uliante in uksakin kuan uh hi.

⁸Topa in kumpipa thin sahsakin, kumpipa in zawna taw in a pusuak Israel te del hi.

⁹Egypt ngalkapte in a siphuleang theampo taw, ngalleangte le a hawlte in Israel te delin, Pi Hahiroth le Baal Zephon paam San Tuipi hui a ngiaphual saatna ah pha uh hi.

¹⁰Israel te in kumpipa le a ngalkapte hong pai a mu ciang lau mama in, Topa tungah huna ngen in au uh hi.

¹¹Amate in Moses tungah, “Egypt ah thaan om ngawl ziam? Hi lai senneal ngamah a thi tu in hong paipui ni ziam? Egypt pan nong pusuapui na, na nasepte en in!

¹²Egypt ngam pan ih pusua ma in, hi bang teng piang tu ci hong son zo hi ngawl khu ziam? Egyptte sal ahi suak tu in hong nusia lel tan kong ci uh hi. Hi lai senneal ngamah thi sangin tua munah sila hi tu phazaw lai hi,” ci uh hi.

¹³Moses in, “Lau heak vun! Kip takin ding vun a, tu ni in Topahong hutna mu tu nu hi; hi Egyptte na mu kik ngei nawn buatu uh hi.

¹⁴Topa in ngal hong simsak tu a, note na om hiithiat tu bek hi lel hi,” ci in zo hi.

¹⁵Topa in Moses tungah, “Banghangin huna dei in au nu ziam? Israel te maisang a pai natu in sawl in.

¹⁶Na ciangkhut laamin, tuipi tungah vaan in. Tuite hong kikhen tu a, Israel te leiko tung tawn suak thei tu uh hi.

- ¹⁷Egyptte thin ka sahsak tu a, Israel te a del tu uh hi. Kumpipa, a ngalkapte, a leangte le a hawlte ka zawna taw minthanna ka nga tu hi.
- ¹⁸Amate ka zaw ciang Egyptte in Topa ka hina hong he tu uh hi,” ci hi.
- ¹⁹Israel ngalkapte mai ah a om Pathian vantung lalang sia kikhiin in nung sangah pai hi. meeikaai khuam zongh
- ²⁰Egyptte le Israel te kilaklaw dongah kikhiin hi. Meei in Egyptte atu in khuazingsakin, Israel mihingte atu in khuavaksak ahikom zan khuateak in ngalkapte khat le khat kineak thei ngawl uh hi.
- ²¹Moses in tuipei tungah a khut a lap ciang, Topa in nisuana sang pan vui nasia takin vasakin tuipei kinilsak hi. Tua vui sia zan khuateak va in, tuipei leiko suaksak hi. Tuite kikhenin,
- ²²Israel te in leiko tung tawnin tuipei kantan a, a lang le a lang ah tuite pang bangin om hi.
- ²³Egyptte in a siphu theampo, a leangte le a hawlte taw tuipei sung dongin del uh hi.
- ²⁴Topa in khuavak mahiat in meitaang le meeikaai khuam tung pan Egyptte ensuk in, patausak hi.
- ²⁵Topa in a leangmuite awksak ahikom haksa takin kikhiin hi. Egyptte in, “Topa in Israel te sang pangin eite hong sim hi. Hi lai pan tai tawng,” ci uh hi.
- ²⁶Topa in Moses tungah, “Tuipei tungah na khut zaam in tua hile Egyptte le a leangte le a hawlte, tui in khuumcip tu hi,” ci hi.
- ²⁷Tuaciang Moses in tuipei tungah a khut zaam a, khuavak ciang tuite hong heak kikin a ngeina bang ahi hi. Egyptte in a suatak natu hanciam a, ahizong Topa in tuipei sungah amate sawnvawk hi.
- ²⁸Tuite heak kikin tuipei sung dongah Isrealte a del Egypt ngalkap theampo, a leangte le a hawlte khat zongh kikhe ngawlin khuum siat hi.



²⁹Ahizong tuipi kantan in leiko tungah Israel te pai uh a, a lang le a lang ah pang bangin tuite om hi.

³⁰Tua ni in Topa in Egyptte khut sung pan Israel mihingte hunin, tuipi hui ah Egyptte a thi uh Israel te in mu uh hi.

³¹Vaangletna lianpi taw Topa in Egyptte a zawna thu Israel te in a mu uh ciang amate in Topa lamdang sa in Topa le a naseampa Moses um uh hi.

Pusuana 15

Moses ii La

¹Tuaciang Moses le Israel te in hi la Topa tungahsak uh hi: “Ama in a minthang ngal zawna khat nga ahikom, Topa tungah la ka sa tu hi; Ama in siphute le a tung tote tuipi sungah lawn hi.

²Topa in a thahat hong dalpa hi a, Ama in kei hong ngumpa ahi hi. Ama in ka Pathian hi a, ka pok tu hi, Ka pa ii Pathian hi a, ama letnate la in ka sa tu hi.

³Topa sia ngalzopa hi in, A min Topa ahi hi.

⁴“Ama in Egypt ngalkapte le A leangte tui sungah lawn hi; A phabel a ulian teng San Tuipi sungah tuitaasak hi.

⁵Tuipi thuk in, amate khuumin, tuipi taw ah suangtum bangin tumsuk uh hi.

⁶“Topa awng na khut ziatsang, thahat in lamdang a, tua khut in ngalte balneen hi.

⁷A tuanngen na ngualzawna taw na ngalte na lawn thal hi; na thin uukna a kuan ciang taangphaw bangin amate kaangtum hi.

⁸Tuipi tungah na hu na muut ciang, tuite kiciangto in, pang bangin dingto hi; tuipi a thukbelna mun sia tuikhal suak hi.

⁹Ngalpa in, “Amate ka del tu a, ka pha tu hi; a hauna teng ka hawm tu uh a, ka deipo ka la tu uh hi. Ka namsau ka dok tu a, a neisa theampo ka laaksak siat tu uh hi,” ci hi.

¹⁰Ahizong khatvei na hu san taw Topa awng, Egyptte tui kitasak hi; A kiitak huai tui sungah hak khiak bangin amate tumsuk uh hi.



¹¹“Topa awng, pathiante sung pan akua in nang taw kibang ziam? Nang taw a kibang, a thiangtho, a lamdang akua om ziam? Akua in nangma bangin nalamdang vawt thei a, a nasia mama na sepnate seam thei ziam?”

¹²Na ziatsang khut na vaan a, leitangh in ih ngalte valhlum hi.

¹³Na kamciam bangin na zui a, na suatak mihingte lam na pui hi. Na thahatna taw na ngam thiangtho ah amate na paipui hi.

¹⁴Minamte in za zo a, amate lau in liing uh hi. Philistiate lau in patau mama uh hi.

¹⁵Edom lampuite lau mama uh a, Moab ngalhangte liing uh hi. Canaan mihingte a ngalhanna thin teng bo siat hi.

¹⁶Kiitakna le patauna amate tungah theng hi; Topa awng, na thahatna mu uh hi, saltanna pan na suatak na mihingte in a kantan siat mateng amate launa taw ding uh hi.

¹⁷Nangma in amate paipui in na mual tungah na suan hi; Topa awng, tua mual sia na inn tu in, na tealsa mun hi a nangma mama ii nasak Biakinnpi na sa hi.

¹⁸Topa awng, nangma in a tawntung le a tawntungin kumpi na hi tu hi,” ci hi.

Miriam ii La

¹⁹Israel te leiko tawn in tuipi kantan hi. Ahizong Egypt leangte, a siphute le a hawlte tuipi sungah a pai ciang, Topa in tuipi kingawm kiksak in, amate khuumcip hi.

²⁰Aaron suapuinu, kamsang Miriam in a thikdaakkual la in, numei theampo in a nung zui uh a, thikdaakkual tumin laam uh hi.

²¹Miriam in amate lasak hi: “Topa tungah la sa vun banghangziam cile, Ama in a minthang zawna khat zo zo hi. Ama in siphute le a tung tote tuipi sungah lawn zo hi,” ci hi.

Tui Khaa



²²Tuaciang Moses in Israel mihingte San Tuipi pan Shur senneal ngamah paipui hi. Ni thum sung senneal ngam sungah pai in, ahizong tui mu ngawl uh hi.

²³Tuaciang amate Marah kicina munah pai in, ahizong tua mun ah tui kha mama ahikom ne thei ngawl uh hi. Tua ahikom tua mun sia Marah kici hi.

²⁴Mipite in Moses phunsan in, “Bang ne tu khu ziam?” ci in dongh uh hi.

²⁵Moses in thinsung tak taw, Topa tungah thungen in, Topa in thingbaak khat lak a, tua thingbaak tui sungah a khiak ciang tua tui neakthei suak hi. Topa in tua munah a nuntakpui tu thukhamte pia in, ze et si hi.

²⁶Ama in, “Keima thu nong ni uh a, a maan thute seamin , ka thupiakte na zui uh le Egyptte tungah ka tunsak natnate khat zongh kong tungsak buatu hi. Keima in Topa note hong damsakpa (*Jehovah Rapha*) ka hi hi,” ci hi.

²⁷A zing ciang amate in ciktui sawm le nii le palm kung sawmsali a omna mun Elim thengin tua mun tui hui ah ngiaphual saat uh hi.

Pusuana 16

Manna le Vamimte

¹Israel te Elim pan ding kikin, Egypt pan a pusua zawk a tha niina, ni sawm le ni nga ni in Elim le Sinai kilaklaw Sin Senneal ngam theng uh hi.

²Tua senneal ngamah amate theampo in Moses le Aaron phunsan in,

³“Topa in Egypt ah hong that siat le uk zaw ung. Tua lai ah to in sa le an ka du za ka ne uh hi. Ahizong nangma in hi lai senneal ngamah a pukthi tu in hong paipui ni hi,” ci uh hi.

⁴Topa in Moses tungah, “Tu in note theampo atu van pan an kong zusak tu hi. Mihingte nisim pusuak in a khamhop tu khawm tu hi. Tuabangin, kong hilnate a zui le a zui ngawl kong ze et tu hi.

⁵Ni luk ni in ni dang a, na kaikhop ngeiza ii a zaa nii kaikhawm tu nu hi,” ci hi.



⁶Tuaciang Moses le Aaron in Israel te theampo tungah, “Egypt pan hong pusuapuipa sia Topa a hina, tu nitak in he tu nu hi.

⁷Zingsang ciangin Topa ompuina khualeng mu tu nu hi. Ama langpan in na phutsatna thu Topa in za zo hi- hi hi, langpan nu hi, banghangziam cile kote in ama hong sawlna bang bekin hong paipui ka hi uh hi,” ci hi.

⁸Tuaciang Moses in, “Nasia tak na phutsatna uh ama in za zo ahikom, nitak in na neak tu uh sa le, zingsangin na deiza po na neak tu anluum hong pia tu sia Topa ahi hi. Kote nong phutsat uh ciangTopa a phunsan hi nginge nu hi,” ci hi.

⁹Moses in Aaron tungah, “Topa in amate phutsatna za zo ahikom mihonpite hong pai in Topa mai ah a din natu in son tan,” ci hi.

¹⁰Aaron in mipite tungah thu a son ciang amate senneal ngam sang nga in, thakhat thu in meei sung pan Topa khualeng hong taang hi.

¹¹Topa in Moses tungah,

¹²“Israel te hong phutsatna ka za zo hi. Neak tu sa khuazin kuan ciang nga tu uh a, zingsang ciang anluum a deiza a nga natu thu son in. Tuaciang Keima sia Topa, amate Pathian ka hina thu he tu uh hi,” ci hi.

¹³Nitak ciang vamim ngiaphual a dim tu honpui khat hong leangin, zingsang in ngiaphual kiimkot ah daaitui kia hi.

¹⁴Daaitui a kamh ciang senneal tungah paa dildel in a khal pawlkhat om hi. Tua in nipin vuuk-haa taw kibang hi.

¹⁵Israel te in tuasia a mu ciang he ngawl ahikom khat le khat kidongh in “Bangziam?” ci uh hi. Moses in amate tungah, “Hisia in Topa ii note neak tu in hong piak an ahi hi.

¹⁶Topa in noma kikap za tek khawmin innkuan khat sungah mihing khat ciang law nii tek la tu in hong sawl hi,” ci hi.

¹⁷Israel te in Moses sawl bang vawtin, pawlkhat in a tamzaw tawmin, pawlkhat in a tawmzaw tawm uh hi.

¹⁸Amate in a tee uh ciang tam a tawmte dimvaal ngawlin, tawm a tawmte dim la ngawl hi. Amate kisap za tek tawm uh hi.

¹⁹Moses in amate tungah, “Kuama in zing ciang atu koikhol ngawl tu nu hi,” ci hi.

²⁰Ahizong pawlkhat in Moses thu ni ngawlin koikhol uh hi. A zing ciang thanh dimin hiing a, amate tungah Moses thin uuk hi.

²¹Zing simin a kisap za tek tawmin ni hong sat ciang lei ah a omlaite tuitham hi.

²²Ni luk ni in an a zaa nii tamzaw tawmin, mihing khat ciang law li tek tawm uh hi. Israel lampuite theampo hong pai in tua thu Moses tungah son uh hi.

²³Moses in amate tungah , “Topa in zing ciang sia ama tungah a ki aap tawlngakna ni thiango ni khat hi,” ci in thu pia hi. Tuni in na em nop teng le na huan nop teng em in huan tavun. A omlaite zing ciang atu in koi vun, ci hi.

²⁴Moses ii thupiak bangin a omlai teng zing ciang atu in koi in, lal ngawlin thanh zongh om ngawl hi.

²⁵Moses in, “Hite tuni in ne vun, banghangziam cile tuni sia Sabbath ni hi in Topa tungah a ki aap tawlngakna ni khat hi in, ngiaphual pua sangah bangma an mu ngawl tu nu hi.

²⁶Ni luk sung an na tawm tu uh a, ahizong ni sali ni tawlngak ni in bangma om ngawl tu hi,” ci hi.

²⁷Ni sali ni in mihing pawlkhatte in an tawm tu in pusuak a, ahizong bangma mu ngawl uh hi.

²⁸Tuaciang Topa in Moses tungah, “Bang hun dong ka thupiakte note in hong nial lai tu nu ziam?

²⁹Tawlngak ni hong pia pa sia keima Topa ka hina phawk tavun a, tua ahi hu in ni nii sung na khom tu uh an, ni luk ni in kong pia tawntung tu hi. Ni sali ni in a kuama po a inn ah om tu a pusuak ngawl tu hi,” ci hi.



³⁰Tua ahiciang a mihingte in ni sali ni in naseam ngawl uh hi.

³¹Israel mihingte in tua an sia manna ci uh hi. Tua manna sia ancii kaang no khat taw kibangin, khuaitui taw kivawt muhpheang bangin lim hi.

³²Moses in, “Egypt pan eite hong paipui lai in senneal ngamah eite hong piak an ih suan ih paalte in a mu thei natu in manna pawlkhat na keamtuum tu uh hi, ci in Topa in thu hong pia hi,” ci hi.

³³Moses in Aaron tungah, “Beal khat la in a, tua sungah manna law nii dim koi in, ih suan ih paalte atu in Topa omna ah koi tan,” ci hi.

³⁴Topa in Moses tungah a thupiak bangin tua manna beal a kikep cing natu in Aaron in Thukham Thingkuang mai ah koi hi.

³⁵Israel te in a teenna mun Canaan ngam a thet mateng kum sawmli sung manna an ne uh hi.

³⁶(Law khat sia seau khat ii see sawm sua see khat ahi hi.)

Pusuana 17

Suangpi pan Tui

(Ngamsung vakna 20.1-13)

¹Isreal mibup in Sin senneal ngam nusia in Topa thupiak bangin mun khat pan mun khat ah kikhiin uh hi. Rephidim ah ngiaphual saatin, ahizong tua munah neak tu tui om ngawl hi.

²Amate in Moses tungah, “Neak tu tui hong pia tan, ” ci in phuul uh hi. Moses in, “Banghangin hong phuphuul nu ziam? Banghangin Topaze et nu ziam?” ci hi.

³Ahizong a mihingte dangko mama ahikom Moses tungah phuul veve uh hi. Amate in, “Banghang Egypt pan hong paipui ni ziam? Kote ka tate le ka ngannote dangko in hong thisak nuam ni ziam?” ci uh hi.

⁴Moses in nasia takin Topa tungah thungen in, “Hi mihingte bang law tu khi ziam? Suang taw hong deang dektak zo uh hi,” ci hi.

⁵Topa in Moses tungah, “Israel lampuite pawlkhat samin a, mipite mai ah paikhol vun. Nile ngun na saatna ciangkhut keng in.



⁶Na mai Sinai Mual suangpi tungah ka ding tu hi. Suangpi saat in, tua hile mihingte neak tu tui hong pusuak tu hi,” ci hi. Israel lampuite mai ah tuabangin Moses in vawt hi.

⁷Tua mun sia Massah le Meribah ci hi, banghangziam cile Israel te in phuul in Topa ze et a, “Topa eite taw om ziam, om ngawl ziam?” ci in, a dokna mun ahi hi.

Amalekte taw Kido

⁸Amalekte hong pai in Rephidim ah Israel te sim uh hi.

⁹Moses in Joshua tungah, “Zing ciang Amalekte sim tu in mi pawlkhat teal in. Kei sia mual dawnah ka ding tu a, Pathian ii keng a hong sawl ciangkhut ka toai tu hi,” ci hi.

¹⁰Moses thupiak bangin Joshua in Amalekte sim tu in a kuan hunsung in Moses, Aaron le Hur te mual dawnah kaato uh hi.

¹¹Moses ii a khut a lap hunsung theampo Israel te in ngalzo in, ahizong a khut a khiaksuk ciang Amalekte in zo tu in kipan uh hi.

¹²Moses ii khut a toi ciang Aaron le Hur in a tona tu in suangtum khat la in amate nii in a lang le a langah dingin nitum dongin a khutte nii lapsak uh hi.

¹³Hi bangin Joshua in Amalekte zo siat hi.

¹⁴Tuaciang Topa in Moses tungah, “A kiphaw tawntung natu in hi zawnate lai sungah ciamtee in. Amalekte ka motcip natu thu Joshua tungah son in” ci hi.

¹⁵Moses in biaknatau khat sa a, a min phuakin, “Topa sia ka zawna dial hi (*Jehovah Nissi*)” ci hi.

¹⁶Ama in, “Topazawna dial saanglap vun! Topa in Amalekte a tawntungin sim suak tu hi!” ci hi.

Pusuana 18

Moses kungah Jethro Haw



¹Moses ii sunghpa, Midian thiampi Jethro in Moses ii Israel te Egypt ngam pan a pusuapui lai Pathian ii Moses le Israel mihingte atu a sep theampo za hi.

²Tua ahi ciang, Moses kungah ama pai in, nung sangah a nusiati Moses ii zi Zipporah,

³le a tapate nii Gershom le Eliezer tonpui hi. (Moses in, “Ngamdang ah peamta khat suak khi hi,” ci hi. Tua ahiciang a tapa khat ii min Gershom phuak hi.

⁴Ama in, “Egypt kumpipa ii hong thalup natu pan ka pa ii Pathian in hong hu in, hong suaktasak hi,” ci si hi. Tua ahikom a tapa khat sia ii min, Eliezer phuak hi.)

⁵Moses ii ngiaphual saatna mual thiangtho senneal ngamah Jethro taw Moses ii zi le a tapate nii hong pai uh hi.

⁶Ama in amate hong paina thu Moses tungah zasakin,

⁷ama mu tu in Moses pai in a mai ah kunin, nam hi. Khat le khat nat le dam teng a kidok zawkciang Moses ii buk sungah tum uh hi.

⁸Moses in Jethro tungah Topa in Israel te a hut natu in kumpipa le Egypt mihingte tungah a vawt theampo son hi. Lampi ah mihingte in haksatna a thuakna le Topa ii a ngupna teng zongh son hi.

⁹Jethro in hi thu teng a zaak ciang lungdam in,

¹⁰“Kumpipa le Egypt mihingte khut sung pan hong ngum Topa pok vun! Ama mihingte saltanna pan a ngum Topa pok vun!

¹¹Topa sia pathian dangte theampo sangin a let zawkna tu in ka he hi, banghangziam cile Egyptte in Israel te tungah zawnsakna taw na a sep ciang Topa in hi bang vawt hi,” ci hi.

¹²Tuaciang Jethro in meihal biakpiakna le a dang sangaw biakpiaknate Pathian tungah paipui in, Aaron le Israel lampuite theampo ama taw biakpiakna a thiangtho ante nekhawm tu in pai uh hi.



Thukhente Panmun Piakna

(Thuhil kikna 1.9-18)

¹³A zing ciang Moses a mihingte kihaunate lemtua in, zing pan nitak dong komla hi.

¹⁴Moses ii nasep tu theampo Jethro in a mu ciang, “Mihingte atu in bang teng seam thong ni ziam? Banghangin na theampo nangma bek in seamin, hi lai ah mihingte thu hong dongh tu in zing pan nitak dong dingsak ni ziam?” ci in dongh hi.

¹⁵Moses in, “Mihingte in Pathian deina he nuamin, kei kungah hong pai ahikom hi bangin ka sep kul hi.

¹⁶Mihing nii a kihau ciang kei kungah hong pai uh a, a maw le a tang thukhen in Pathian thupiakte le thukhamte ka son hi,” ci in zo hi.

¹⁷Tuaciang Jethro in, “Na nasepzia maan ngawl hi.

¹⁸Nangma le hi mihingte in na tha uh zawm law tu nu hi. Hite nang nguak sep tu in tam lei hi.

¹⁹Tu in thupha pawlkhat kong hil tu a, Pathian in nangma hong ompui tu hi. Pathian mai ah mipite atu in palai na hi tu a, amate kihauna na sonsak tu hi.

²⁰Topa thupiakte na hil tu a, a nuntak tu zia le a nasep tu zia na son tu hi.

²¹Tua zawkciang mipil mi thiam pawlkhat tealin a, mihingte lampui tu in koi in. Tu ate sia a tul, a za, a sawmnga le a sawm, lampui tu te hi tu hi. Amate Pathian a kiita mihing, mihing muanhuai le sumnguk ne ngawlte hi tu hi.

²²Amate in a tawntungin mihingte tungah thukhenna seamsak in. Thu note amate in khensak in a, ahizong thu haksate nangma kungah puaksak in. Tuabang hi lete na vanh ngitte hong dawn tu a, nang atu in ol zaw tu hi.

²³Pathian thupiak bangin, seam lete nangma zongh na thaneam ngawl tu a, mihing theampo zongh a kilem sa in inn ah cia thei tu uh hi,” ci hi.

²⁴Moses in Jethro ii thupha hilnate saangin,

²⁵Israel te sung pan mipil mithiamte teal hi. Ama in tua mipil mithiamte sia a tul, a za, a sawmnga le a sawmte lampui tu in koi hi.



²⁶Amate in mihingte thukhensak tawntung in, thu haksate Moses tungah puakin ahizong thu note amate in khensak hi.

²⁷Tua zawkciang Moses in Jethro mangpha thaakin, Jethro a inn ah cia hi.

Pusuana 19

Sinai Mual ah Israel te

¹⁻²Israel mihingte in Rephidim nusia in, tuaciang Egypt a nusiat zawk a tha thumna, ni masabel ni in, Sinai senneal ngam theng uh hi. Tua lai Sinai Mualpeang ah amate in ngiaphual saatin,

³Pathian taw kimu tu in mual tungah Moses kaato hi. Topa in mualtung pan Moses samin, Jacob suan le paal Israel te tungah hi bang na son tu hi:

⁴“Keima, Topa in Egyptte tungah ka vawtte le muvanlai in a note a tha tungah a puak bangin note hi munah kong puak mu nu hi.

⁵Tu in ka thu hong ni in ka thuciamnate na zui uh le keima aituam mihing hi tu nu hi. Leitung theampo keima neisa hi a, ahizong note sia keima teal tuam mihingte na ahi uh hi.

⁶Keima tung bek ah hong ki aap minam khat na hi tu uh a, thiampite bangin na nong sepsak tu uh hi,” ci hi.

⁷Tuaciang Moses tuaksuk in Israel lampui teng khawmin Topa thupiak theampo sonsiat hi.

⁸Tuaciang mihing theampo in, “Topa hong ci theampo seam tu khu hi,” ci in zo in, Moses in Topa tungah hi thu puak hi.

⁹Topa in Moses tungah, “Nangma taw ih ki paupuate mipite in a zaak natu le tu pan kipan nang hong up natu in meei lom khat taw kong pai tu hi,” ci hi. Mipite zokikna teng Moses in Topa tungah sonin,

¹⁰Topa in ama tungah, “Mihingte kungah pai tan a, biakna pia tu in tuni le zing ciang a kithiansua natu in son in, a puante suu in,

¹¹thai ciang atu ki ngingkhol sa in om taken. Tua ni in Sinai Mual ah kong tuaksuk tu a, tua lai ah mihingte theampo in hong mu tu uh hi.



¹²Mihingte ii a kantan ngawl na tu in mual kiimkot ah tepteena ngamngi khat vawt tavun a, mual tungah kaato ngawlin ngamngi a neak thaak ngawl natu in son tan. Khat po in ngamngi a siik tha le tua pa kithatlum tu hi.

¹³Ama kuama in thutha ngawl tu a, suang taw kideanglum ahibuale thal taw kikaplum tu hi. Mihing ahizong nganhing ahizong ki thatlum tu hi. Ahizong lemle hong kitum ciang mihingte mual tungah kaato tu uh hi,” ci hi.

¹⁴Tua zawkciang mual tung pan Moses tuaksuk in, biakna pia tu in mihingte kithoaisak hi. Amate a puan uh suu in,

¹⁵Moses in amate tungah, “Thai ciang atu kinging khol tavun a, hi hun sungin numei le pa omkhawm heak vun,” ci hi.

¹⁶A ni thum ni zingsang ciang vanto in khualeng a, mual tungah meeilom khat hong kilangh in lemle aw nging mama khat kiza hi. Ngiaphual ah a om mihing theampo liingin lau uh hi.

¹⁷Pathian taw kimu tu in ngiaphual pua sangah Moses in amate paipui a, mualpeang ah amate ding uh hi.

¹⁸Sinai Mual theampo meikhu in siincip hi, banghangziam cile Topa tua mualtung mei sungah hong tuaksuk hi. A khu sia mei phualpi khu bangin kaato in, mihingte theampo lau in liing ngawp uh hi.

¹⁹Lemle aw hong nging vaial hi. Moses in paupui in, Pathian in vanto taw in zokik hi.

²⁰Sinai Mualdawn ah Topa hong tuaksukin, mualdawn ah Moses sam hi. Moses kaato a,

²¹Topa in ama tungah, “Mihingte in keima en tu hong pai ciang tepteena ngamngi hong kan ngawl natu in pai in son tan: hong kan le tam mama thi tu hi.

²²Kei kung hong pai tu thiampite zongh kithiansua masa taken, a kithiansua buale daan ka pia tu hi,” ci hi.



²³Moses in Topa tungah, “Mihingte hong paito thei ngawl tu hi, banghangziam cile nangma in mual sia thiangtho hi ci in ngaisun tu le tua ii kiimkot ah tepteena ngamngi khat vawt tu in thu nong pia hi,” ci hi.

²⁴Topa in, “Tuaksuk tan a, Aaron hong paipui kik tan. Ahizong thiampite le mihingte in kei kungah paito tu in tepteena ngamngi kan ngawl tu hi, ahibuale amate daan ka pia tu hi,” ci in zo hi.

²⁵Tuaciang mihingte kungah Moses tuaksuk in, Topa ci teng amate tungah son hi.

Pusuana 20

Thupiak Sawmte

(Thuhil kikna 5.1-21)

¹Pathian in hi bang kammal teng son hi:

²“Keima in note saltanna Egypt pan hong pusuapui Topa na Pathian ka hi hi.

³“Keima ngawl pathian dang bia heak vun.

⁴Vantung ahizong leitung ahizong, leinuai tuisung ahizong note atu in milim vawt heak vun.

⁵Milim bia heak vun, a mai ah kun heak vun, banghangziam cile keima in Topa, note Pathian ka hi a, kidempui a dei ngawlpa ka hi hi. Kei hong ngaimawte a suan a paalte tungah khang thum khang li dongin daan ka pia tu hi.

⁶Ahizong kei hong it in, ka thupiak a zuite ahile ka itna khang tul tam mama dongin ka lak tu hi.

⁷Keima min a sia vawtna in zangh heak vun, banghangziam cile keima Topa na Pathian in ka min a zangh khialte daan ka pia tu hi.

⁸Sabbath ni tang vun a, thiangthosak vun.

⁹Note in ni luk sung na naseam tu uh a,



¹⁰ahizong ni sali ni sia keima atu in tawlngak ni ahi hi. Tua ni in nangma, na Tate, na salte, na ngannote le na ngam sungah hong teang ngamdang mite khat zongh in na seam ngawl tu uh hi.

¹¹Ni luk sungin Keima Topa in leitung, vantung, tuipte le a sung a om theampo ka vawt a, ahizong ni sali ni in ka tawlinga hi. Tua ahiciang Keima, Topa in Sabbath thupha pia in ka thiangthosak hi.

¹²“Na nu le na pa zakta in, tua hile keima kong piak leitangh ah na khan sau tu hi.

¹³“Mihing that heak in.

¹⁴“Palngul khialna vawt heak in.

¹⁵“Nguta heak in.

¹⁶“A maan ngawlin khat pawpo mawsak heak in.

¹⁷“Midang khat ii inn dungawk heak in: a zi, a salte, a khui, a laa, ahibuale a neisa khat pawpo dungawk heak in,” ci hi.

A Mihingte ii Launa

(Thuhil kikna 5.22-33)

¹⁸Mihingte in, vanto le lemle awngingte za in, khualeng le meikhu mual a mu ciang, lau in liing a, a khualana ah ding uh hi.

¹⁹Amate in Moses tungah, “Nangma in kote nong paupui le kong ngai tu uh hi, ahizong Pathian in kote hong paupui le lau in thi tu khu hi,” ci hi.

²⁰Moses in, “Lau heak vun! Pathian in note na khial ngawl natu hong ze et tu in hong pai bek a, ama thu ni tawntung tu in hong vawt hi,” ci in zo hi.

²¹Ahizong mihingte a khualana ah ding veve in, Pathian omna meei vom kungah Moses bek pai hi.

Biaktau taw kisai Thukhamte

²²Israel te tungah Moses ii son tu in Topa in thupia a: “Keima, Topain vantung pan note kong paupui zia mu zo ni hi.



²³Kei taw nong biak khop tu in note atu in ngun le kham pathiante vawt heak vun.

²⁴Lei taw kivawt biaknatau khat kei atu in vawt vun a, na tuute le na khuite taw meihal biakpiakna le kipawlkhop biakpiaknate tua biaknatau tungah pia vun. Kei nong biak natu in kong koi tuamsak mun teng ah kong pai tu a, thupha kong pia tu hi.

²⁵Kei atu in suang taw biaknatau na vawt uh ahile, a ki-attan suang taw vawt heak vun, banghangziam cile suang tungah sikkhu na zak uh ciang tua suang sia kei atu in zak tham man ngawl sua nu hi.

²⁶Kei atu biaknatau nasak uh ciang a tungah kaato natu in keallei vawt heak vun. Na vawt uh le a tung na kaato uh ciang na sealno uh teng kilawt tu hi.

Pusuana 21

Silate taw Kizopna

(Thuhil kikna 15.12-18)

¹Israel te tungah a nuai a thukhamte pia in:

²Hebrew mi sila in na lei uh le, kum luk sung na na hong sepsak tu hi. Kum sali kumin bangma hong piak kul ngawlin suakta tu hi.

³Na silapa sia na sila a sua lai in zi nei ngawl ahile hong nusiak ciang a zi tonpui ngawl tu a, ahizong zi neisa ahile a zi tonpui thei tu hi.

⁴A Topa in zi neisakin, tanu tapa a nei le a zi le a tano teng a Topa neisa hi tu a, ama nguak pai tu hi.

⁵Ahizong silapa in ka Topa, ka zi, ka tate ka it hi ci in suatak tu a nop ngawl na thu hong pualaak in ahile,

⁶a Topa in biakpiakna munah paipui tu hi. Tua lai kongkha mai ahibuale kongkha khuam mai ah ama dingsak tu a, a bil vuvang sak tu hi. Tuaciang a nuntak tawntung ama sila hi tu hi.

⁷“Mihing khat in a tanu sila tu in a zuak le, pate bangin suakta thei ngawl tu hi.



⁸Tua nu a zi tu in a ngaisun khat ii tungah kizuak in, ahizong tua pa in a dei bua ahile, tua nu sia a pa kungah kizuak kik tu a, a Topa in ngamdangte tungah zuak thei ngawl tu hi, banghangziam cile tua nu phatvawt ngawl ahihang hi.

⁹Mihing khat in a tapa zi tu in sila numei khat a lei le ama tanu bangin ngaisun tu hi.

¹⁰Mihing khat in zi a neithua le a zi masa sia nidang bangma in an, puan le a thu neinate kibang suaksak tu hi.

¹¹Ama in a zi tungah hi thute a cin zo bua ahile liausum bangma la ngawlin a zi suaktasak tu hi.

Ngongtatna taw kisai Thukhamte

¹²Mihing khat vua in a thisak peuma kithatlum tu hi.

¹³Ahizong thalup sawm ngawlpi khutkhial tha ahile note atu kong tealsakna mun ah buu tu a, suakta thei tu hi.

¹⁴Ahizong mihing khat thin uuk in midang khat a thatlum lui le a suakta tu in ka biaknatau ah a tai zongin kithat veve tu hi.

¹⁵A nu ahibuale a pa a vua sia kithatlum tu hi.

¹⁶Mihing khat zuak tu ahizong, sila in khoai tu ahizong a ngu sia kithatlum tu hi.

¹⁷A nu ahibuale a pa a haamsiat sia kithatlum tu hi.

¹⁸Mihing nii kihau in, a khat sia pa in a dang khat pa suangtum taw suu ahibuale a khuttum taw thongin, ahizong a thi buale tua pa daan kipia ngawl tu hi. Tua a thuakpa lupmun tung ngakin a om zong,

¹⁹a dam zawkciang ciangkhut zak kul ahile zong, dam ngawlin a lup hun sung teng a nitha liau tu a, a dam dong ou tu hi.

²⁰Mihing khat in a silapa ahibuale a silanu mol khat taw saatin thakhat thu a thi paih le, a saatpa daan kipia tu hi.



²¹Ahizong a sila sia ni khat ahibuale ni nii a nungta ahile, a Topa daan kipia ngawl tu hi. A neisa a sila a sup sia a kicing daan ahi hi.

²²Mihingte kihau in naupaai numei khat nasakin, a liam ngawl hangin a nau a sia le, a nasakpa in tua numei nu pasal ii a ngetza thukhente in thu khensak tu a, liau tu hi.

²³Tua numei a liam le nuntakna sia nuntakna ma taw daan kipia tu a,

²⁴mittang atu mit, ha atu ha, khut atu khut, peang atu peang,

²⁵meikaang atu meikaang, liamna atu liamna, saatna atu saatna kipia tu hi.

²⁶Mihing khat in a silanu ahibuale a silapa saatin a mit a taw le, a mittang manh taang atu in tua sila suatak tu hi.

²⁷A ha a tongsak le a ha manh taangin tua sila suatakna pia tu hi.

A Tote ii Tavuan

²⁸Khuital khat in mihing khat a silum le tua khuital suang taw kideang lum tu a, a sa kine ngawl tu hi; ahizong a Topa daan kipia ngawl tu hi.

²⁹Ahizong tua khuital in ngual si ngei zo in, a Topa tung kison zo napi khum ngawlin mihing khat a si le tua khuital suang taw kideanglum tu a, a Topa zongh kithatlum tu hi.

³⁰Ahizong that ngawlin ama tung pan kitatna sum a kingen le, a kinget zaza a piak kul tu hi.

³¹Khuital khat in patangno khat ahibuale numeino khat a silum le a tung a sia taw kibang tu hi.

³²Khuital in sila numei khat ahibuale sila pa khat a silum le ngan Topa in sila tote tungah nguntang sawmthum pia tu a, tua khuital suang taw deanglum tu hi.

³³Mihing khat in dum a hon man ahibuale a sit ngawl manin, khuital ahibuale laa dum sungah a taak le,

³⁴tua nganno manh liau tu hi. Ngan neipa tungah a sum pia tu a, tua nganhing luang ama in tang tu hi.



³⁵Mihing khat ii khuitai khat in, a dang khat ii khuitai khat a silum le amate nii in a nungta khuitai sia zuakin, a sum hawm tu a, khuitai thi sia sa zongh hawm tu uh hi.

³⁶Ahizong tua khuitai sia ngual sik tu a zongsang khat hi ci in, kihe in, a neipa in khum ngawl ahile a thi khuitai taangin a nungta khuitai sia pia tu a, ahizong khuitai thi sia ama in tang tu hi.

Pusuana 22

Liausum taw kisai Thukhamte

¹“Mihing khat in khuipui ahibuale tuu khat ngu in, ngo in ahibuale a zuak le ama in khuipui khat taangin khuipui nga, tuu khat taangin tuu li pia tu hi.

²⁻⁴Ama in a nguk hu in liau hamtang tu hi. Ama in bangma a nei buale a nguk sa teng a liau natu in ama salin kizuak tu hi. A nguk nganhing khui, laa, tuu a nungta in ama khut sungah a kimu le ama in a zaa nii in liau tu hi. “Nguta khat in zan laitakin inn phuul in, tua nguta pa a kithat le a that pa sia tualthat in kimawsak ngawl tu hi. Ahizong sun laitak ahile tual that in kimawsak tu hi.

⁵“Mihing khat in a ngannote losung ahibuale sapit huan ah lopa a neaksak laitak a ngante thazau in midang khat ii lo ah ante a neaksak le, ama lo ahibuale a sapit huan pan a ngan anneak teng liau tu hi.

⁶“Mihing khat in ama lo pan meihal in, ngual lo kipeesak in a kikhol an ahizong, ankungte ahizong a kaang le mei a kaangsakpa in a lal teng liau tu hi.

⁷“Mihing khat in midang khat ii sum ahizong, na manpha dangte ahizong kepsak tu in thukim in, ama inn pan kingu in, a ngupa a kimu le a ngupa in a zaa nii in liau tu hi.

⁸Ahizong a ngupa a kimu buale vanh keampa sia biakna mun ah kipaipui tu a tua munah a nguk ngawl na thu kiciam tu hi.



⁹“Mihing nii in khui, laa, tuu, puansilh ahibuale na dang khat pawpo taw kisai kituu in kam kinialna a om ciang amate nii sia biakna mun ah kipaipui tu hi. Pathian ii a mawsak pa in a lang khat pa tungah a zaa nii in liau tu hi.

¹⁰“Mihing khat in ngual laa, khui, tuu nganhing dang khat kepsak a, tetti om ngawlin tua nganno thi, liam ahibuale a ki taipuisak ahile,

¹¹biakna mun ah ngan keampa paipui tu a, ngual ngan a nguksak ngawlina thu kiciam tu hi. A ngu ahibanale tua pa in liau ngawl tu a, a neipa a sumh hi tu hi.

¹²Ahizong a ngu le liau hamtang tu hi.

¹³Ngamsa in manin, a neak mongte a lak thei le ama in ngamsa ii mat sia atu liau kul ngawl hi.

¹⁴“Mihing khat in ngual ngan zawng a, a nei pa om ngawl sungin a liamsak ahibuale a thisak le tua pa in liau tu hi.

¹⁵Ahizong a nei pa om in, tuabang piang ahile liau kul ngawl hi. Manh piak tu in a kizawng ahile a zawn manh teng taw kisi tu hi.

Ngamtatna le Biakna taw kisai Thukhamte

¹⁶“Mihing khat in a kidongh ngawl lai ngaknu thiangtho khat zol in a khialpui le momanh teng pia tu a, tenpui tu hi.

¹⁷Ahizong a numei ii pa in a kiten tu a oai buale tua ngaknu manh za sia a sum in a pa tungah pia veve tu hi.

¹⁸“Aisaan thiam numei peuma kithatlum tu hi.

¹⁹“Nganhing a khialpui pasal peuma kithatlum tu hi.

²⁰“Keima., Topa sim ngawl, pathian dang tungah biakna a pia peuma kithatlum tu hi.

²¹“ Ngamdang mi vawtsia in zothaw heak vun. Egypt ah ngamdang mi na hina uh phawk vun.

²²Meingong ahibuale tanga peuma na vawtsia buatu uh hi.



²³Na vawtsia uh le Keima Topa in amate ih hu hong ngetna aw ka zaak ciang ka zo tu a,

²⁴ka thin uukin ngal sungah kong that tu hi. Na zite uh meingong tu a, na tate uh in pa nei ngawl tu hi.

²⁵“A zawng keima mihingte khat pawpo tungah sum na puk thaak uh le sum puk thaak pa bangin na om buatu uh a, summeet na la buatu uh hi.

²⁶Hong lo kik natu kiciamna in ngual puansilh lai na laaksak le, nitum ma in pia kik tu ni hi.

²⁷Banghangziam cile a khualumna tu in a neisun sia tua puan bek ahi hi. Ama bangbang mu thei tu ziam? Ama in kei tungah hu hong nget ciang ka zo tu hi, banghangziam cile khuangai huai ka sa hi.

²⁸“Pathian na sonsia buatu a, na minam lampuite na haamsiat buatu hi.

²⁹“Na lo ante, na zute le na olive thaute sung pan na piak tu za kei tungah nong pia tu uh hi. “Na tapa ciilte kei nong pia tu uh hi.

³⁰Na khui le na tuu suakciilte nong pia tu uh hi. Ni sali sung a pui taw na omsak tu uh a, ni liat ni in nong pia tu uh hi.

³¹“Note sia keima mihing na hi uh ciang ngamsate ii mat sa nganhing sa peuma ne ngawlin uite pia zaw vun.

Pusuana 23

Thumaanna le Thutanna

¹“A maan ngawl kamdawn kizelsak heak vun a, mikhialpa hu nop manin leilot tetti pang heak vun.

²Mihing a tam zaw te ii siatna a vawt ciang le thumaan thukhenna ah leilot tetti a pan ciang amate zui heak in.

³Mizawngpa thu na khen uh ciang a zawn manin ngum heak vun.

⁴“Na ngalpa ii khui ahibuale a laa a tai na mu uh le ama kungah puak kik vun.



⁵A laa a vanh taw a puk na mu le taisan ngawlin tua laa phokpui vun.

⁶“Mi zawngpa thukhen zum ah a thukhen tu hong pai ciang a maanin khensak vun.

⁷A maan ngawlin ngual mawsiat heak vun a, bangma mawna nei ngawlpa that heak vun, banghangziam cile tuabangin a tatsia peuma daan ka pia tu hi.

⁸Sumnguk ne heak vun, banghangziam cile sumnguk in mihingte mittawsakin, khialna nei ngawlte mailam lalsak hi.

⁹“Ngamdang mi khat vawtsia heak vun, ngamdang mite ii omzia thuakzia he nu hi, banghangziam cile Egypt ah note ngamdang mite na ahi uh hi.

A Kum Sali Kum le A Ni Sali Ni

¹⁰“Kum luk sung na lo ah thai na ciing tu uh a, a piang teng na kaikhawm tu uh hi.

¹¹Ahizong kum sali kum sia tawlngasakin tua lo pan a piangte bangma la heak vun. Lo sung pan a lipo te mizawngte in ne taken a, a taanglai teng ngamsate in ne taken. Na sapit huan le na olive kungte zongh tuabangma in hi tavun.

¹²“Nipi khat sung ni luk naseam in, ahizong ni sali ni in naseam heak vun. Tua hile note na hong sepsak na salte le ngamdang mite le na ngannote zongh tawlnge thei tu uh hi.

¹³“Keima, Topa ii kong son theampo hong ngai tavun. A dang pathiante tungah thungen heak vun a, a min zongh lo heak vun.

Poaipei Lian Thum

(Pusuana 34.18-26; Thuhil kikna 16.1-17)

¹⁴“Keima nong upatna uh in kum khat sung thumvei poaipei khaam vun..

¹⁵Kong thupiakna sa taw kizui in Egypt na nusiat tha ahi, Abib tha sungin Tol saw ngawl Anluum Poaipei khaam vun. Tua poaipei ni sali hun sung tol taw kivawt anluum peuma ne heak vun. Biakpiak natu bangma keng ngawlin kei hong bia tu in hong pai heak vun.



¹⁶“Anlaak tu na kipat uh ciang anlaak Poaipi khaam vun. ‘Na sapit huan le na thingnga huan pan thingngate na kaikhop uh ciang phalbi sungin anlaak Poaipi khaam vun.

¹⁷Topa na Pathian, Keima hong bia tu in kumsim hi poaipi thumte ah no pasal theampo hong pai nanak tu nu hi.

¹⁸“Nganhing taw biakpiakna nong piak uh ciang tol saw anluum keng heak vun. Sangaw biakpiakna nong vawt uh ciang a thaute zingsang dongin koi heak vun.

¹⁹“Kumsim in na lo an a tung masabel sia Topa na Pathian inn sungah hong paipui tavun. “Tuuno sa ahibuale kealno sa a nu noaitui sungah huan heak vun.

Kamciamnate le Kihilnate

²⁰“Na khualhawna ah hong cing tu le ka vawtkholsa munah hong paipui tu in na mai ah vantung lalang khat ka paisak tu hi.

²¹Ama thudon in, a thu ni tavun. Ama langpan heak vun, banghangziam cile keima sawl hi a, a langpante hong dawm ngawl tu hi.

²²Ahizong a thu ni in ka thupiak theampo na seam uhle na ngalte theampo kong simsak tu hi.

²³Na mai ah ka vantung lalang pai in, Amor, Hit, Periz, Canaan, Hiv le Jebuste ngamah hong paipui tu a, tuaciang amate ka mon siat tu hi.

²⁴Amate pathiante mai ah kunin bia heak vun, amate biakziate zui heak vun. A pathiante lalcipsakin a thiangtho suangkhuamte sutham vun.

²⁵Topa na Pathian keima nong bia uhle an le tui taw thupha kong pia tu a, note natna theampo kong laaksak siat tu hi.

²⁶Na leitangh ah numei nautol om ngawlin, a ciing zongh om ngawl tu hi. Keima in note khansauna kong pia tu hi.



²⁷“No hong langpan mihingte in keima hong kiitak natu in ka vawt tu hi. Na sim uh mihingte sungah kitelkhialna ka omsak tu a, note kung pan na ngalte theampo kilee in ka taisak siat tu hi.

²⁸Note mai panin Hivte, Canaante, le Hitte a hawlkeak tu in note mai ah khuaingalte ka sawl tu hi.

²⁹Kum khat sungin amate ka hawlkeak siat buatu hi; hawlkeak siat thong leng tua ngam duipui suak tu a, note atu in ngamsate tam lei tu hi.

³⁰Tua sangin tua ngam la in, na lua thei mateng un, tatawm in ka hawlkeak tu hi.

³¹Na ngamngi uh kong vawtsak tu a, Aqaba Tuidok pan Eupharates Ngun dong le Mediterranean Tuipi pan senneal ngam dong hi tu hi. Tua ngamah a teangte tungah thu neina kong pia tu a, nong thet uh ciang na hawlkeak tu uh hi.

³²Amate taw ahizong a pathiante taw ahizong thukimna peuma vawt heak vun.

³³Tua mihingte na ngam sungah teangsak heak vun, na teangsak uh le amate in kei tungah note hong khialsak tu hi. A pathiante na bia uhle note atu in hong thisak thei thaang hi tu hi,” ci hi.

Pusuana 24

Thuciamna Kikipsak

¹Topa in Moses tungah, “Mual tungah Aaron, Nadab, Abihu le Israel lampui sawmsalite taw ka kungah hong kaato tavun a, a khuala thithimna pan kunin hong bia tavun.

²A dangte hi ngawl, nangma bek in ka kung nong neak tu hi. Mipite kuama, mualtung kaato ngawl tu hi,” ci hi.

³Moses pai in a mipite tungah Topa thupiak teng le zui tu thu teng sonin, mihing theampo in, “Topa cibang ka vawt siat tu uh hi,” ci in zo uh hi.



⁴Topa thupiak theampo Moses in at siat hi. A zing ciang zing tuungin mualpeang ah Moses in biaknatau khat sa in, Israel minam sawm le niite atu in suangtum sawm le nii phut hi.

⁵Tua zawkciang ama in tangvalte sawlin, amate in meihal biakpiakna le kipawlkhop biakpiakna khuite Topa tungah pia uh hi.

⁶Moses in nganhing chisan a lang la in kuang sungah koi in, a lang sia biaknatau ah the hi.

⁷Tuaciang Moses in Topa thupiak teng a ki at, thuciamna laibu la in a mihingte tungah nging takin sim hi. Ama in, “Topa thu ka ni tu uh a, ama thupiak theampo ka vawt siat tu uh hi,” ci uh hi.

⁸Tuaciang Moses in kuangte sung pan chisan la in a mipite the hi. Ama in, “Hi chisan sia ama in hi thute hong piak lai in, Topa in note taw a vawt thuciamna a kipsakna ahi hi,” ci hi.

⁹Moses, Aaron, Nadab, Abihu le Israel lampui sawmsalite mual tungah kaato in,

¹⁰Amate in Israel Pathian mu uh hi. A peangnuai ah a thianthona vancii bang ahi, sapphire suangpheak taw a kibang om hi.

¹¹Pathian in Israel lampuite bangma law ngawlin, amate in Pathian mu in tua zawkciang amate nekhawm dawnkhawm uh hi.

Moses Sinai Mual tungah

¹²Topa in Moses tungah, “Keima kung Mual tungah hong kaato tan a, hi lai ah na om sungin mihingte kihil natu in keima at thukhamte theampo a om suangpheak nii kong pia tu hi,” ci hi.

¹³Moses le ama a hupa Joshua kithoai in, mual thiangtho ah kaato tu in Moses kipan hi.

¹⁴Moses in lampuite tungah, “Kong heak kik uh mateng un, hi lai ngiaphual pan hong ngak tavun. Aaron le Hur note taw hi lai ah om hi; buaina a nei pawpo in amate kungah pai thei nu hi,” ci hi.



¹⁵Sinai Mual ah Moses kaato in, meei in mual tuamcip hi.

¹⁶⁻¹⁷Topaompuna khualeng mual tungah hong taang suk hi. Tua khualeng sia Israel mite atu in mualdawn ah a taang meikuang khat taw kibang hi. Ni luk sung meei in mual tuamcip in, a ni sali ni in meei sung panTopa in Moses sam hi.

¹⁸Mualtung meei sungah Moses kaato hi. Tua munah Moses sun sawmli le zan sawmli om hi.

Pusuana 25

Biakinn atu Sumpi

(Pusuana 35.4-9)

¹Topa in Moses tungah,

²“Kei tungah sumpi hong piak natu in Israel te son in. A pia nuam pawpo ii sumpite saang in.

³Hi sumpite sia kham, ngun, tau,

⁴puankaang neal, puan eng, puan sannum, samul puansan, kealmul taw kivawt puan,

⁵a kisansak tuuvun, savun tatak, acacia thing,

⁶meidet sathau, noi sathau atu hel namtuite le a namtui ngimnamtui,

⁷Thiampi Saang ii ephod tung le awmdal te tungah bul tu suangpaak san le suangmanpha te ahi hi.

⁸Amate sungah ka ten thei natu in, kei atu in mihingte in a thiangtho puanbuk khat vawt taken.

⁹A thiangtho puanbuk le a sung nazak tu te theampo kong lak tu tupna sawmna bangin vawt taken.

Thukham Thingkuang

(Pusuana 37.1-9)

¹⁰Acacia thing taw thingkuang a sau letmat 45, a zai letmat 27, a saang letmat 27 khat vawt in.

¹¹A sung a pua kham ciitak taw tuam in a, a mong kiimkot kham taw zial in.



- ¹²Kham kual li vawt in a, a langah nii veve, a peang lite tungah bul in.
- ¹³A zawn natu in acacia thing sui in a, kham taw tuamin,
- ¹⁴thingkuang pangh veve ah a kibal khamkualte sungah thun in.
- ¹⁵Tua molte khamkualte sungah ki nusia tu a, kila nawn ngawl tu hi.
- ¹⁶Tuaciang nang tungah kong piak tu thupiak teng a ki at suangpheak niite Thingkuang sungah koi in.
- ¹⁷“A sitna kham ciitak taw vawt in, a sau letmat 45, a zai letmat 27 hi tu hi.
- ¹⁸A kiseaktham kham taw cherubim nii ii lim vawt in a,
- ¹⁹a sitna mong veve ah koi in. A sitna taw kipee insakhat a vawt in.
- ²⁰Cherubim niite ii lim sia khat le khat kimaingat in a tungah a tha phal tu a, kuang sitna lia tu hi.
- ²¹Suangpheakte nii Thingkuang sungah koi in a tungah a sitna koi in.
- ²²Tualai ah kong mu tu a, cherubimte ii a thate nii kilaklaw a sin tung panin Israel mihingte atu, ka thukhamte theampo kong pia tu hi.
- Pathian tungah A Kipia Anluum atu Sabuai**
(Pusuana 37.10-16)
- ²³“Acacia thing taw a sau letmat 36, a zai letmat 18, a saang letmat 27 sabuai khat vawt in.
- ²⁴kham ciitak taw tuamin, a kiim teng kham taw zial in.
- ²⁵A kiimkot letmat 3 zaisakin, kham taw tuam in.
- ²⁶Khamkual li vawt in a, a peang omna kingh li ah bul in.
- ²⁷Tua a kualte sabuai zawn natu molte thun natu a vang hi a, sabuai kiil ah bul tu ahi hi.
- ²⁸A molte acacia thing taw vawt in a, kham taw tuam in.
- ²⁹Zu biakpiakna ah a kizangh tu in pakante, haite, haitungte le kuangte vawt in. A vekpi in kham ciitak taw kivawt tu hi.



³⁰Thukham Thingkuang mai ah sabuai sia kikoi tu a, kei tungah hong kipia anluum thiangtho sia tua sabuai tungah om tawntung tu hi.

Meivakna Khuam
(Pusuana 37.17-24)

³¹“Kham ciitak taw meivakna khuam vawt in. A tawdap le a khuamte a kiseaktham kham taw vawt in, paakte taw zeamin, a momte le paakpalhte a khuam tawsakhat siat tu hi.

³²A khuam pan baak luk meang tu a, a lang ah baak thum veve om tu hi.

³³A baak lukte khat simin almond paak bangin a mom le a palh taw a kithua paak nam thum nei tu hi.

³⁴A khuam sia in almond paak bangin a mom le a paakpalh taw a kithua paak pha nam li nei tu hi.

³⁵Kop thum a pha a baakte sim ii nuai ah a mom khat tek om tu hi.

³⁶A momte a baakte le meikhuam sia a kiseaktham kham ciitak taw a kivawtsakhat hi tu hi.

³⁷A mai san a taan thei natu in tua meivak khuam tung pan mei sali vak in.

³⁸Taitee le kuangte kham ciitak taw vawt in.

³⁹Hi meikhuam le a nadang teng vawt natu in kham ciitak pound sawmsali le nga zangh in.

⁴⁰Mual tungah nang tungah kong lak tupna bang tatak in, tua nate pha takin vawt in.

Pusuana 26

Topa ii Omna Puanbuk
(Pusuana 36.8-38)

¹“Ka omna Puanbuk, a thiangtho puanbuk sungsang sia a eng, a sannum, le a san tuumul taw a kitak puankaang neal sawm taw vawt in. Tua puante cherubim limte taw zeam in.

²Tua puante a letna kikim tu a, kaih 14 sau in kaih 2 zai tu hi.



- ³Tua puan ngate khatin khuikhawm in, a dang nga teng zongh tuabangma khuikhawm in.
- ⁴Na pee khop uh puan a tungsang dungsuk teng ah khau eng taw a bilvangte vawt in.
- ⁵A puan masa sia tungah a bilvang sawmnga vawt in a, a niina puan sia tung zongh ah a kibang in a bilvang sawmnga ma vawt in.
- ⁶Tua puante nii, khat a sua thei natu pe natu in kham taw kivawt khamkual sawmnga vawt in.
- ⁷“Puanbuk sitna tu in kealmul taw kivawt puanbek sawm le khat vawt in.
- ⁸A letna kibangsak in, kaih 15 sau in, kaih 2 zaisak in.
- ⁹Tua puan ngate khatin khuikhawm in a, a dang lukte khatin khuikhawm in. A lukna puan sia Puanbuk mai ah thep nii in thep in.
- ¹⁰Na khuikhop puan khat sia mongah bilvang sawmnga vawt in a, a dang khat sia mong zongh ah bilvang sawmnga vawt in.
- ¹¹Puante kipee khop natu in taukual sawmnga vawt in a, a kikhui kopsa puante nii tua taukualte taw pe in.
- ¹²Puanbuk nung sangah tua puante a lang kaai suksak in.
- ¹³Puanbuk a sau lamin na khai uh a teapvaal pi khat le lang veve sia a pang tek ah kaaisuksak in.
- ¹⁴“Puanbuk sitna tu in, a sanin a kinim tuutal vun taw kivawt sitna khat le savun pha taw kivawt sitna dang khat vawt in.
- ¹⁵“Acacia thing taw Puanbuk khuam vawt in.
- ¹⁶Tua khuamte a sau pi 15, a zai letmat 27 hi tu a,
- ¹⁷a kipee thei natu in a mong tek khuak in. A khuam theampo tuabangin vawt siat in.
- ¹⁸Thang sangah khuam kul phutin,



- ¹⁹a nuai ah ngun taw kivawt tawdap sawmli pha in. Na khuaknate ah a len tu in ngun tawdap nii tek koi in.
- ²⁰Puanbuksak sangah khuam kul phutin,
- ²¹khuam khat ciang tawdap nii veu, ngun tawdap sawmli pha in.
- ²²Nitumna sang Puanbuk nung sangah khuam luk,
- ²³le a kinghte atu in khuam nii phut in.
- ²⁴Tua a kingh khuamte a bul pan a dawn dong a kipee siat hi tu hi. A kingh a khuamte nii hi bangin kiphut tu hi.
- ²⁵Tuabangin khuam liat om tu a, khuamsim in tawdap nii veu ngun tawdap sawm le luk om tu hi.
- ²⁶“Acacia thing zawl sawm le nga vawt in, Puanbuk pangh khat ah zawl nga veu,
- ²⁷a lang khat ah nga le, a nung sang nitumna sangah nga vawt in.
- ²⁸A lai zawl, a laizang a kikhen sia Puanbuk langkhat pan langkhat dong, a sau hi tu hi.
- ²⁹Khuamte kham taw tuamin, a zawlte tum natu khamkualte bulin, a zawlte zongh kham taw tuam in.
- ³⁰Mual tungah kong lak ngealna bangin Puanbuk sa in.
- ³¹“A eng, a sannum le a san samul taw a kitak puankaang neal puan khat vawt in. Tuat cherubim te ii liimte taw zeam in.
- ³²Ngun tawdap li tungah a kiphut, vanh khaina a kithua kham taw a kituam acacia thing khuam li tungah tua puan khai in.
- ³³Puanbuk sitna taw a kizom puankhainate pan dalna puan khaisuk in a, tua puan nung sangah suangpheak niite kikoina Thukham Thingkuang koi in. Tua puan in Thiangtho Mun le Thiangthobel Mun kidalna ahi hi.
- ³⁴Thukham Thingkuang siin in.



³⁵Thiangthobel Mun ii pua sang, Puanbuk iisaksang taw ki maingatna ah sabuai koi in a, thangsang taw a ki maingatna ah meivakna koi in.

³⁶“Puanbuk kongkha tu in a eng, a sannum, a san samul taw a kitak a pha mama in, a kizeam puankaang neal puankhai khat vawt in.

³⁷Tua puan khai natu in kham taw a kituam le puankhaina khamkual taw a kibil acacia thing khuam nga phut in. Tua khuamte atu in tau tawdap nga vawt in.

Pusuana 27

Biaktau

(Pusuana 38.1-7)

¹Acacia thing taw biaknatau khat vawt in. Tua in kingh li nei tu a, a sau pi 7 le a lang, a zai pi 7 le a lang le, a saang pi 4 le a lang hi tu hi.

²A dawn kingh li teng doksak in. Tua a dok teng biaknatau taw sakhat suak tu in, tau taw kituam siat tu hi.

³Sathau baang vut koi natu in bealte, kawte, kuangte, thikkaate le meilaakna daalpheakte vawt in. Hi vanhte theampo tau taw kivawt tu ahi hi.

⁴Tau taw ciang vang khat vawt in, a kingh li ah toai natu taukual koi in.

⁵Tua ciang vang sia biaknatau ii a lang dong a bat natu in biaknatau bitha nuai ah koi in.

⁶Acacia thing zawl vawt in, tau taw tuam in.

⁷Biaktau a kizawn ciang a panghte nii ah a om a kualte sungah a zawlte thun in.

⁸Mual tungah kong lak bangin biaknatau sia a sung vang tu in thingpheak taw vawt in.

Topa ii Omna Puanbuk Uumna

(Pusuana 38.9-20)

⁹“Ka omna Puanbuk sia puankaang neal puan taw uum in. Thangsang pangh puan sia kaih 50 sau tu hi.



¹⁰Tua puan sia tau tawdap a nei tau khuam kul tungah na khai tu uh a, tua khuamte tungah ngun taw a kivawt puan khaina le a zawl om tu hi.

¹¹Saksang pangh uumna zongh tuabangma in vawt in. Nitumna sangah kaih 25 a sau puankhaite khuam sawm le a dap sawm taw om tu hi.

¹²Nitumna sangah kaih 25 a sau puankhaite khuam sawm le a dap sawm taw om tu hi.

¹³Nisuana sang, kongbiang omna ah a uumna zongh kaih 25 zai tu hi.

¹⁴⁻¹⁵Kongbiang ii a lang veve ah puankhaite kaih 7 le a lang veu, khuam thum le a tawdap thumte taw om tu hi.

¹⁶A tumna san ah vancii, a sannum, le a san samul taw a kitak a pha mama in a kizeam kaih 10 a sau puankaang neal puankhai khat om tu hi. Tua in tawdap li tungah a kiphut khuam li tungah kikhai tu hi.

¹⁷A kiimkot uumna khuam teng ngunzawl taw kipee a, vanh khainate ngun taw a kivawt hi in a tawdapte tau taw a kivawt hi tu hi.

¹⁸A uumnate kaih 50 a sau, kaih 25 a zai, le kaih 2 le a lang a saang hi tu hi. Puankhaite puankaang neal puanpha taw kivawt tu a, a tawdapte tau taw kivawt tu hi.

¹⁹Puanbuk atu a kizangh vanh theampo le puanbuk atu le a uumna tu in, a kizangh khetphin theampo tau taw kivawt tu hi.

Meivak Kepcingna

(Thiampite 24.1-4)

²⁰“Nitak simin meiinn a kivak thei natu in olive thau phabelte nang kung hong puak natu in Israel mihingte thupia in.

²¹Ka omna Puanbuk sung, Thukham Thingkuang mai, puankhai pua sangah Aaron le a tapate in mei vak tu uh hi. Tua mun keima mai ah nitak pan zingsang dong mei vak tu uh hi. Hi thupiak sia Israel te le a tu a tate in a tawntung a zui tu uh ahi hi.

Pusuana 28

Thiampite Puante



(Pusuana 39.1-7)

- ¹“Na suapuipa Aaron le a tapa Nadab, Abihu, Eleazar le Ithamar te sam in. Keima tungah thiampi na a sep thei natu in Israel mihingte sung pan tuamkoi in.
- ²Na u Aaron sia a vaang nei natu le a etlawm natu in thiampi puan vawtsak in.
- ³Keima atu in a thiangtho thiampi na a sep thei natu in thiamna ka piaksa khutthiamte theampo samin Aaron ii puan khui tu in sawl in.
- ⁴Amate in awmdal khat, ephod khat, puantual khat, pha tak kizeam laktong khat, dial khat le kawngkhau khat a vawt natu in sawl in. Amate in ka thiampi na a sep thei natu in khutthiamte in na suapui pa Aaron le a tapate atu in hi thiampi puante khuisak tu ahi hi.
- ⁵Khutthiamte in vancii, a sannum, a san samul, khamkhau le puankaang neal puanphate zangh tu hi.
- ⁶“Amate in ephod sia vancii, a sannum, le a san samul, khamkhau le puankaang neal puanphate taw vawtin, pha takin zeam tu hi.
- ⁷A kisawm thei natu in, a liangko lang le lang ah sawmna khau nii om tu hi.
- ⁸A dangte taw a vawtzia a kibang a pha tak a kitak kawngkhau sia ephod tawsakhat tu in a tungah pee tu hi.
- ⁹Suangmanpha nii la in, a tungah Jacob tapa sawm le niite min at in,
- ¹⁰amate suana taw kizui in a min lukte suang khat tungah at in, a dang lukte min suang dang khat tungah at in.
- ¹¹Suang manpha a zeamthiamte khat in hi suangte nii tungah Jacob tapa sawm le niite min atsak in a, tua suangte kham taw a mong tuam in.
- ¹²Israel minam sawm le niite taangin ephod liangkhai tungah koi in. Tuabangin Aaron in a minte a liangko tungah pua tu a, tuaciang keima Topa in ka mihingte ka phawk tawntung tu hi.
- ¹³Note in kham awmsuan nii na vawt zawk uh ciangin,



¹⁴kham ciitak taw a kivawt zam nii a, a kipeak khawm khi ngui nii vawt in, tua khite sia kham awmsuan taw na khii khawm tu uh hi.

Awmdal

(Pusuana 39.8-21)

¹⁵“Pathian deina heak thei natu in, a kizangh awmdal khat Thiampi Saangpa atu in vawt in. Tua in ephod taw kibang in a kivawt a kizeam hi tu hi.

¹⁶A tung a pheii a kikim thep nii in kithep tu a, letmat kua sau letmat kua zai hi tu hi.

¹⁷Tua tungah suangmanpha ngual li in na suan tu a, ngual khatna ah ruby, Topaz le garnet suangte hi tu hi.

¹⁸Ngual niina ah emerald, sapphire le diamond suangte;

¹⁹ngual thumna ah turquoise khat, agate khat le amethyst khat;

²⁰le ngual lina ah beryl khat, carnelian khat le jasper khat hi tu hi. Hite kham awmsuan sungah kisuan tu hi.

²¹Israel minamte taangin Jacob tapa khat tek ii min a ki at suang sawm le nii na koi tu hi.

²²Awmdal atu in khauhual taw kibangin a kipeak khawm kham ciitak khi ngui vawt in.

²³Khamkual nii vawt in, awmdal tung sang kinghte veve ah suan in.

²⁴Tua kham khauhual te nii sia, a kual te nii tungah khit in.

²⁵A khauhual ii mong te nii sia awmsuan te nii tungah khit in a, tuaciang ephod ii liangkhai maisang ah thua in.

²⁶Tuaciang khamkual nii vawt in, awmdal a nuai kingh veve ephod mong sung sangah suan in.

²⁷Khamkual nii vawt in, ephod maisang liangkhai nuai ah khitin pha tak a kitak kawngkhau tungah sawm in.

²⁸Kawngkhau tungah pha tak a om thei natu le awmdal a kol ngawl natu in, awmdal khaute ephod khaute tungah khau vancii khat taw sawm khawm in.



²⁹Keima Topa in ka mihingte ka phawk tawntung natu in, Thiangtho Mun ah Aaron a tum ciang Israel minamte min a ki at awmdal silh tu hi.

³⁰Tuabangin ka omna thiangtho mun ah Aaron hong pai ciang a ken thei tu in ama awmdal sungah Urim le Thummim koi in. Israel mihingte atu in ka deina a heak thei natu in tuabang hun ciangin tua awmdal ama in silh tawntung tu hi.

A Dang Thiampi Puante

(Pusuana 39.22-31)

³¹“Ephod tungah silh tu puantual sia vancii samul siuseu taw kivawt tu hi.

³²Lu thun natu a hawng om tu a, tua a hawng kiimkot sia a ek ngawl natu in a kitak sa khui bangin kikhui khawm tu hi.

³³⁻³⁴A nuai kiimkot vancii, a sannum le a san samul te taw a kivawt talee nga te khamdaak taw a ki thatheak in zeam in.

³⁵Aaron in thiampi na a sep ciang tua puantual silh tu hi. Ka omna Mun Thiangtho ah ama hong pai ciang ahibuale a pusua ciang daak nging kiza tu a, ama kithatlum ngawl tu hi.

³⁶“Kham ciitak taw kizepna takma khat vawt in a, a tungah ‘TopaAtu A thiangtho’ ci in at in.

³⁷Tua takma sia lu tuamna mai ah khau dum khat taw khit in.

³⁸A mihingte in biakpiakna a vawt ciang khialna pawlkhat a vawt hial zong, Israel te ii kei tung hong piak biakna theampo ka san natu in Aron in tua takma sia a tal ah suang tu hi.

³⁹“Puankaang neal khaupha taw Aaron laktong le lu tuamna takin, a pha mama a kizeam kawngkhau khat zongh vawt in.

⁴⁰“Aaron tapate ii vaang nei natu le etlawm natu in, laktong, kawngkhau le lukhu vawt in.

⁴¹Hi puante na upa Aaron le a tapate silhsak in. Tuaciang amate in ka thiampi na a sep thei natu in kipsakna le aapna in olive thau taw zut in.



⁴²A ci a sa a kimu ngawl natu in a kawng pan a pheizang ciang a pha ngoaipuante khuisak in.

⁴³Aaron le a tapate in a sealno teng a kimu hu in, thalupna a thuak ngawl natu in ka omna Puanbuk ah hong pai ciang ahibuale Mun Thiangtho ah thiampi naseam tu in biaknatau hong neak ciang tua ngoaipuan teang tawntung tu hi. Tua in Aaron le a suan a paahte atu in a zui tu ngeina kip ahi hi.

Pusuana 29

Aaron le A Tapate Thiampi Kipsak natu Hilna

(Thiampite 8.1-36)

¹“Aaron le a tapate ka thiampi naseam tu in na aap ciang hi bangin na vawt tu hi. A mealhem ngawl khuita moi khat le tuutaal nii keng in.

²Tol saw ngawl zungtaang vui phabel zangh in olive thau taw anluum pawlkhat, olive thau ngawl taw anluum pawlkhat le sathau taw a kizut muhpaa pawlkhat vawt in.

³Tuate khum sungah koi in, khuita le tuutaalte nii na ngaw uh ciang hong pia tavun.

⁴“Aaron le a tapate ka omna Puanbuk kongkha ah hong paipui in, amate a zeksa kibualna neisak in.

⁵Tuaciang Aaron sia thiampi puante ahi laktong, ephod, ephod tung pan a kisilh puantual, awmdal le kawngkhaute silhsak in.

⁶A lu tungah dial khimsakin, tua tungah, ‘Topa Tungah Ki aap hi.’ a kici a thiangtho ki aapna lim takma sia suang in.

⁷Tuaciang noi sathau la in, a lu tungah buakin, noai in.

⁸“A tapate paipui in puante silhsak in.

⁹A kawng ah kawngkhau sawmin a lu tungah lukhu khusak in. Hi bangin Aaron le a tapate thiampi naseam tu in na kipsak tu hi. Amate le a tu a tate in a tawntungin ka thiampi na seam tu uh hi.



- ¹⁰“Ka omna Puanbuk mai ah khuita hong paipui tan a, khuita lu tungah a khut a ngak natu in Aaron le a tapate son in.
- ¹¹Tua lai ka omna thiangtho Puanbuk kongkha ah khuita ngo in.
- ¹²Khuita chi tawm la in, biaknatau kipeena tungah na khutme taw noai in. Tuaciang a omlai teng biaknatau bul ah sung in.
- ¹³Tua zawkciang a sungthau theampo, a thin phabel na mun le a nauta te nii le a tuam a thaute la in, keima biakna in biaknatau tungah hal in.
- ¹⁴Ahizong khuita satak, a vun le a sungkua theampo ngiaphual pua sangah hal in. Tua in thiampite mawna teng maisak natu biakpiakna ahi hi.
- ¹⁵“Tuutal khat hong paipui tan a, Aaron le a tapate in tuutal lu tungah a khut a ngak natu in sawl in.
- ¹⁶Tua tuutal ngo in, a chi la in biaknatau kiimkot ah the in.
- ¹⁷A sa semin, a sungkua le a nung peangte sil in a, a lu le a sa dangte tungah koi in.
- ¹⁸Tuutal sa theampo biaknatau tungah an taw biakpiakna in hal in. Tua ngim namtui biakna in keima hong lungkimsak hi.
- ¹⁹“Ki aapna in a kizangh tuutal dang khat la in a, Aaron le a tapate in tua tuutal lu tungah a khut a ngak natu in sawl in.
- ²⁰Tua tuutal ngo in, a chi tawm la in Aaron le a tapate bil ziatsang dawn, a ziatsang khutpi tung, le a ziatsang peangpi tungah noai in. A omlai chisan teng biaknatau kiimkot ah the in.
- ²¹Biaktaung tungah a om chi tawm le noi sathau tawm la in Aaron le a puante tung, a tapa le a puante tungah the in. Aaron, a tapate le a puante kei tungah hong ki aap tu hi.
- ²²“Tuutal thau, a meici thau, a sungthau, a thin a phabelna mun, a thau, a nautate nii le a tuam thau le a ziatsang pheii tan in.
- ²³Kei tungah nong piak anluum khum sung pan olive thau taw kivawt anluum khat olive thau kihel ngawl anluum khat, le anluum phaang khat tek la in.



24“Hi an theampo Aaron le a tapate khut sungah koi in a, kei tungah a tuam vilvel letsong in aapsak in.

25Tuaciang amate tung pan anluumte la in a, biaknatau tung, meihal biakpiakna tungah an taw keima biakpiakna bangin hal in. Hong lungkimsak biakpiakna ngimnamtui ahi hi.

26“Tuutal awmsa la in, kei tungah a tuam vilvel letsong in nong aap tu hi. Tua tuu awmsa sia nangma atu ahi hi.

27“Thiampi khat a ki kipsak ciang kipsakna in a kizangh tuu awmsa le a pheisate keima tungah a tuam vilvel letsong in nong aap tu a, thiampite atu in kikoi tuam tu hi.

28Hi thu a kikheal ngawl ka thukhenna hi a, ka mihingte in kipawlkhop biakpiakna a nei ciang, nganno awmsa le a phei thiampite neisa hi tu hi. Tua sa sia amate ii keima Topa tungah hong piak letsong ahi hi.

29“Aaron ii thiampi puante ama thi zawkciang a tapate tungah ki aap tu a, amate kipsakna a kinei ciang a silh tu ahi hi.

30Thiampi seam tu in Aaron tapa in ka omna Puanbuk sung Thiangtho Mun ah hong pai ciang ni sali sung tua puante silh tu hi.

31“Aaron le a tapate thiampi seam tu kipsakna in a kizangh tuutal sate la in mun thiangtho ah huan in.

32Ka omna Puanbuk kong ah tua sate le law sungah a taang anluumte nekhawm tu uh hi.

33Amate in thiampi a kikipsak na ah, mawmaisakna taw kisai in a zeksa vawtna ante ne tu uh hi. Tua ante biakpiakna an ahikom thiampite bek in ne tu hi.

34Sa ahizong, anluum ahizong zingsang dongin neakmong a omlai le kihal tu hi; biakpiakna an ahikom kine ngawl tu hi.

35“Aaron le a tapate atu in kipsakna ngeinate kong thupiak bang linlian in ni sali sung vawt in.



³⁶Mawnate a kimaisak natu in, nisim in khuital khat biakpiakna in pia tu ni hi. Tua in biaknatau thiangsak tu hi. Tuaciang a thiantho natu in olive thau noai in.

³⁷Tuabang in ni sali sung nisim in vawt in. Tua hile biaknatau sia thiangtho sitset tu a, biaknatau a tham peuma biaknatau ii thianthona vaang in thiangthosak tu hi.

Nisim Biakpiakna
(Ngamsung vakna 28.1-8)

³⁸Hong pai tu hun theampo ah nisim in biaknatau ah kum khat a pha tuuno nii biakpiakna in pia in.

³⁹Zingsang in khat, nitak in khat biakpiakna in pia in.

⁴⁰A masa tuu sia taw olive thau hai khat taw kihel anvui law khat pia in. Biakpiakna in zu hai khat buak in.

⁴¹A niina tuu sia nitak in biakpiakna in nei in, zingsang a bangma in olive thau le zu biakpiakna in pia in. Hi sia in keima Topabiakpiakna an hi in, keima hong lungkimsak ngim namtui ahi hi.

⁴²A tawntungin hi meihal biakpiakna ka omna Puanbuk kongkha mai ah keima om sungin hong kipia tu hi. Tua munah ka mihingte kong mu tu a, kong paupui tu hi.

⁴³Tualai ah Israel mihingte ka mu tu a, kong ompuina khualeng in tua mun thiangthosak tu hi.

⁴⁴Puanbuk le biaknatau ka thiangthosak tu a, Aaron le a tapate in keima thiampi na a tuamin ka seamsak tu hi.

⁴⁵Israel mihingte sungah ka teang tu a, amate Pathian ka hi tu hi.

⁴⁶Israel mite sungah ka ten thei natu in keima in Egypt pan amate a pusuapui Topa a Pathian ka hina amate in he tu uh hi. Keima in amate Pathian Topa ka hi hi.

Pusuana 30

Paaknamtui Hal natu Biaktau



(Pusuana 37.25-28)

- ¹“Paaknamtui hal natu in biaknatau khat acacia thing taw vawt in.
- ²A sau letmat 18, a zai letmat 18, le a saang letmat 36 hi tu a, a kikim kingh li nei tu hi. A kingh li in a dokte biaknatau tawsakhat hi tu hi.
- ³A sitna tung le a kingh li teng le a dokte kham ciitak taw tuam in a, a mong kiimkot teng kham taw zial in.
- ⁴A zawinna molte thun natu in khamkual nii vawt in, a tungsang pangh a kinghte nii ah bul in.
- ⁵A zawinna molte acacia thing taw vawtin, kham taw tuam in.
- ⁶Thukham Thingkuang mai ah a kikhai puankhaite pua sangah tua biaknatau koi in. Tua mun sia kong mu natu mun ahi hi.
- ⁷Aaron in zingsim in meivakte pua tu hong pai ciang ama in biaknatau tungah paaknamtui hal tu hi.
- ⁸Ama in nitak in mei a vak ciang ta bangma in vawt tu hi. Hi paaknamtui biakpiakna a tawntung pealmaw in a vawt tu ahi hi.
- ⁹Hi biaknatau tungah a kikhaam paaknamtui biakpiakna ahizong, nganhing biakpiakna ahizong, an tang biakpiakna ahizong pia heak vun. Zu biakpiakna zongh buak heak vun.
- ¹⁰Mawna hangin a kipia nganhing chite tua biaknatau lite tung noina taw Aaron in kum khatin khat vei a zeksa biaknatau thiangtho sakna vawt tu hi. Hi biakpiakna sia mailam sangah kumsim in kivawt tu hi. Keima Topatungah hong kipia hi biaknatau sia thiangtho sinsen tu hi,” ci hi.

Topa Omna Puanbuk atu Phiangshia

- ¹¹Topa in Moses tungah,
- ¹²“Israel mihingte a mi phaza na sim ciang, a mi phaza a kisim laitak amate tungah ngimna a thet ngawl natu in mi theampo in a nuntakna tatna manh ka tungah hong pia tu uh hi.



¹³Mihing simna ah a kihel peuma in, biakinn toaikhai taw kizui in a kinget za sum pia tu hi. A kuama po in tua sumte kei tungah biakpiakna in hong pia tu hi.

¹⁴Kum kul pan a tungsia peuma mihing phaza simna ah a kihel theampo in kei tungah tua sum hong pia tu hi.

¹⁵A nuntakna tatna manh sumte hong piak ciang a haute in a tamzaw, a zawngte in a tawmzaw ci bangin pia ngawl tu hi.

¹⁶Israel mihingte tung pan hi sumte khon in a, ka omna Puanbuk sungah nasepna in zangh in. Hi sumte a nuntakna tat manh tu hi a, tuasia taw amate ka cin ka kep tu ka phawk tu hi,” ci hi.

Taukuang

¹⁷Topa in Moses tungah,

¹⁸“Taukuang khat le a ngak natu taukual khat vawt in. Puanbuk le biaknatau kilaklaw ah koi in a, a sungah tui koi in.

¹⁹Aaron le a tapate in tua tui a khut le a peangte silna in zangh tu hi.

²⁰Amate puanbuk sung ahibuale biaknatau ah biakpiakna ante pia tu in a pai ma in kisil po le kithatlum ngawl tu hi.

²¹Amate a thi ngawl natu in a khut le a peangte sil tu uh hi. Hi ngeinate a suan a paalte in a tawntung a zui tu ahi hi,” ci hi.

Noi Sathau

²²Topa in Moses tungah,

²³“A phabel hel namtuite — Myrrh paaknamtui pound 12, ngimnamtui thingzungthum pound 6, ngimnamtui tu pound 6,

²⁴le cassia pound 12 la in. (A vekpi in a ngitna sia biakinn toaikhai taw kizui hi tu hi.) Olive thau gallon khat belap in,

²⁵paaknamtui hel bangin noi sathau thiangtho vawt in.

²⁶Hi sathau taw ka omna Puanbuk, Thukham Thingkuang,



²⁷sabuai le a vanh theampo, meikhuam le a vanh theampo, paaknamtui halna biaknatau,

²⁸meihalna biaknatau le a vanh theampo, le kisilna kuang le a ngaknate zut in.

²⁹Hite theampo hi bangin na aap tu uh a, tua hile thiangtho sinsen tu hi. Tuata a thutha theampo tua thianthona vaang in thiangthosak tu hi.

³⁰Tuaciang Aaron le a tapate sathau noai in a, keima naseam thiampi tu in kipsak in.

³¹Israel mihingte tungah, ‘Hi a thiangtho noi sathau ka nasep na ah a tawntungin kizangh tu hi.

³²Hi sathau nautaangte tungah na buak buatu uh a, hi sathau bang a suak tu in sathau heldan kibang na zangh buatu uh hi. Tuasia in thiangtho a, a thiangtho in zangh in.

³³Hi sathau taw a kibangin a vawtte le thiampi sim ngawl midangte tungah a zangh peuma, keima mihing in kisim nawn ngawl tu hi,’ ci in” ci hi.

Paaknamtui

³⁴Topa in Moses tungah, “A nuai a hel namtuite — stacte, onycha, galbanum le frankincense ciitakte a kikim tek in la in.

³⁵Tua nate a kihel paaknamtui hel bangin, paaknamtui vawtna ah zangh in. A thiantho natu in ci saw in.

³⁶A heap sia suvui in a, ka omna Puanbuk ah paipui in, Thukham Thingkuang mai ah the in. Hi paaknamtui sia a thiangtho sinsen in ngaisun in.

³⁷Tua paaknamtui taw kibangin nangma atu in na vawt buatu a, na zangh buatu hi. Kei tungah hong ki aap a thiangtho vanh khat bangin ngaisun in.

³⁸Tua paaknamtui taw kibangin zak tu paaknamtui a vawt a om le keima mihing in kisim nawn ngawl tu hi,” ci hi.

Pusuana 31

Topa ii Omna Puanbuk atu Khutthiamte (Pusuana 35.30-36.1)



¹Topa in Moses tungah,

²“Judah minam sung pan Hur ii tupa ahi, Uri ii tapa Bezalel ka teal zo a,

³ka vaangletna taw ama ka kidimsak hi. Pilna, thiamna, limsuai namcin hi theina-

⁴kham, ngun, le taute taw nasep thiamnate ka pia zo hi.

⁵Suangmanpha seakna, thing zepna le a dang limsuai nasepziate zongh ka pia zo hi.

⁶Ama taw naseam khawm tu in Dan minam sung pan Ahisamach ii tapa Oholiab zongh ka teal zo hi. Vawt tu in kong thupiak theampo a vawt thei natu in a dang khutthiamte zongh thiamna nasia tak ka pia zo hi.

⁷A vawt tute sia ka omna Puanbuk, Thukham Thingkuang le a sitna, Puanbuk sung vanh theampo,

⁸sabuai le a vanhte, kham ciitak taw kivawt meikhuam le a vanh theampo, paaknamtui hal natu biaknatau,

⁹meihal piak natu biaknatau le a vanh theampo, khutsilna kuang le a ngakna,

¹⁰Aaron le a tapate ii thiampi na a sep ciang a silh tu thiampi puan manphate,

¹¹noi sathau le Mun Thiangtho ah zak tu paaknamtuite ahi hi. Hi teng a vawt ciang, na tungah kong thupiak bang tatakin amate in vawt tu uh hi,” ci hi.

Sabbath, Tawlngakna Ni

¹²Topa in Moses tungah

¹³Israel mihingte tungah a son tu in, “Ka tawlngak ni ahi Sabbath ni tang vun, banghangziam cile tua ni sia Keima le note kilaklaw ah a tawntungin Keima, Topa in note keima ii aituum mihing in kong vawt zo hi ci in a kilangh natu lim khat ahi hi.

¹⁴Tawlngakna ni tang tu nu hi, banghangziam cile tua ni sia thiangtho hi. Khat po in tua ni tang ngawlin na a seam le, kithatlum tu hi.



¹⁵Ni luk sung nasep tu hun na nei uh a, ahizong ni sali ni sia a thupi tawlngak ni, keima atu in ni thiangtho ni ahi hi. Khat po in tua ni in na a seam le, kithatlum tu hi.

¹⁶Israel mihingte in tua ni sia thuciamna lim khatin tang tu ahi hi.

¹⁷Tua thu in keima le Israel mihingte kilaklaw ah a tawntung a kip lim ahi hi, banghangziam cile Keima, Topa in van le lei ni luk sung ka vawt a, ni sali ni in na seam ngawlin ka tawlna hi,” ci in thu pia hi.

¹⁸Sinai Mual tungah Pathian in Moses a paupui zawkciang, Pathian ama tatak ii a thupiakte a atna ahi suangpheak niite Moses tungah pia hi.

Pusuana 32

Kham Khuitano

(Thuhil kikna 9.6-29)

¹Moses mual tungah ngei hial ma om in hong tuaksuk ngawlina thu mihingte in a heak ciang Aaron kungah kikhawmin ama tungah, “Egypt pan lam hong pui Moses bangtat ci kihe ngawl ahikom eite lam hong pui tu in pathian khat vawt tawng,” ci uh hi.

²Aaron in amate tungah, “Na zite, na tapate le na tanute ii a but kham bilbaate suutin hong paipui tavun,” ci hi.

³Tuaciang mihing theampo in a kham bilbaate suutin Aaron kungah paipui uh hi.

⁴Aaron in tua bilbaate la in mei sungah tuisakin, khamte sungin kham khuitano khat vawt hi. Mipite in, “Israel te awng, hi sia in Egypt pan hong pusuapui ih pathian ahi hi!” ci uh hi.

⁵Tuaciang Aaron in kham khuitano mai ah biaknatau khat vawtin, “Zing ciangin Topa upat piakna in poaipi kikhaam tu hi,” ci in thu zasak hi.

⁶A zing ciang zingtuungin amate in nganhing pawlkhat sangaw meihal biakpiak nату le a dang pawlkhat kipawlkhop biakpiakna ah neak tu in hong paipui uh hi. Tua poaipi ah mihingte tokhawm in etlawm ngawl za dongin zu ne in numei le pa omkhawm in nuamsa uh hi.



⁷Topa in Moses tungah, “Manlang in ciasuk tan, banghangziam cile Egypt pan na paipui na mite khialin kei hong nial uh hi.

⁸A zui tu in ka thupiak lampi pan pial zo in, kham khuita vawtin bia uh a, sangaw biakpiakna pia zo uh hi. Amate in hisia sia Egypt pan a pusua pui amate pathian hi ci uh hi.

⁹Hi mihingte thinpuizia ka he hi.

¹⁰Tu in, hong tho heak in. Amate tungah ka thin uuk a, ka mon tu hi. Tuaciang nangma le na suan na paalte minam lian khatin kong vawt tu hi,” ci hi.

¹¹Ahizong Moses in Topa a Pathian tungah hesuak ngenin, “Topaawng, na thahatna le na vaangletna taw Egypt pan na suatak, na mihingte tungah banghangin na thin uuk sak mama thong ni ziam?

¹²A mihingte mual tungah a mot nop manin, a Pathian in Egypt pan pusua pui ahi ve maw? Egypt te in hong ci lel tu hi ngawl ziam? Na thin uukna thaisak in; na ngaisutna kheal in a, na mihingte tungah siatna tungsak heak in.

¹³Na naseamte ahi, Abraham, Isaac le Jacob phawk in. Amate tungah ciliap huai takin na kamciam ahi, na suan na paalte van ah aksi za in tam tu a, na suan na paalte in na khapsa ngam theampo a tawntungin lua tu uh hi, na ci thute phawk kik in,” ci hi.

¹⁴Tuaciang Topa in a ngaisutna khealin, a mihingte tungah a tawn bangin siatna tungsak ngawl hi.

¹⁵Mualtung pan Moses tuaksuk in, a mai lang le lang ah thukham ki at suangpheak niite toai hi.

¹⁶Hi suangpheakte Pathian vawt hi a, a tungah thupiakte ama mama ii khet ahi hi.

¹⁷Mipite auna Joshua in za a, Moses tungah, “Ngiaphual sungah ngal kisimna aw ka za hi,” ci hi.



¹⁸Moses in, “Tua aw sia ngalzawna aw le hi ngawl, ngal lelna aw zongh hi ngawlin, kei zaak sia lasakna aw hi,” ci hi.

¹⁹Moses ngiaphual a nai ciang, khuita milim le mihingte lap mu in a thinso hi. Tua lai mualpeang ah a toai suangpheakte nii lawnsuk in tamthamsak hi.

²⁰Moses in amate vawt khuita la in, tuisak a, ngoaivui in tui taw hel hi. Tuaciang ama in tua tui Israel mihingte in nesak hi.

²¹Ama in Aaron tungah, “Amate in a cizathuai mawna na vawtsak natu in nang tungah bang hong hi ziam?” ci hi.

²²Aaron in, “Kei tungah hong thin uuk heak in, hi mihingte in siatna a vawt nop hamtang sia he ni hi.

²³Amate in kei tungah ‘Egypt pan hong pusuapui hi mipa Moses bangtat ziam; ih he bua hi, tua ahiciang kote hong lampui tu in pathian khat hong vawtsak tan hong ci uh hi.’

²⁴Amate ii a nei na manpha khamte hong paipui natu in ka sawl a, a nei peuma in suutin kei hong pia uh hi. Tua na manphate mei sungah ka vawk a, hi khuitalno milim suak hi,” ci in zo hi.

²⁵Aaron in mihingte enthong lelin, a ngalte mai ah a mawmaw bangin a omsakna thu Moses in mu hi.

²⁶Tuaciang Moses in ngiaphual kongpi ah dingin au a, “Topa sangah a pang peuma hi lai ah hong pai tavun,” ci hi. Tuaciang Levi mite theampo Moses kungah kikhawm uh a,

²⁷Moses in amate tungah, “Israel te Topa Pathian in, na namsau tek taw in, hi ngiaphual kongpi pan a lang khat dong ah pai in, na suapuite, na ngualtamhte le na innpaamte thatlum tu in note theampo hong sawl hi,” ci hi.

²⁸Levite in a thu ni a, tua ni in mihing tulthum bang thatlum uh hi.



²⁹Moses in Levi te tungah, “Topa na nasepna uh sungah thiampi seam tu in na tapate, na suapuite na thalupna uh taw tuni in note kipumpiak zo na hi uh kom, Topa in note thupha hong pia zo hi,” ci hi.

³⁰A zing ciang Moses in mipite tungah, “A cizathuai mawna vawt zo nu hi. Ahizong tu in mualtung Topa kungah ka na paito kik tu a, note mawmaina nga thei tha tu khi hi,” ci hi.

³¹Tuaciang Topakungah Moses pai in, “Hi mihingte in a cizathuai mawna vawt zo hi. Amate in kham taw pathian khat vawt in bia uh hi.

³²Nong hesuakna in a mawna maisak in; ahizong na maisak zo bua ahile, na mihingte min na khumna laibu sungpan ka min hong phiat tan,” ci hi.

³³Topa in, “Ka tungah mawna a neite bek ka laibu sung pan a min ka phiat tu hi.

³⁴Tu in pai in kong sonna munah mihingte paipui in. Ka vantung lalang in lam hong lak tu phawkin a, ahizong a hun a cin ciang hi mihingte a mawna daan ka pia tu hi,” ci in zo hi.

³⁵Tua hi a, Topa in mihingte tungah natna tungsak hi, banghangziam cile amate in kham khuita milim vawt tu in Aaron a sawl hang ahi hi.

Pusuana 33

Topa in Israel te Sinai Muat Nusia in Thu pia

¹Topa in Moses tungah, “Nangma le Egypt pan na tonpui mihingte in hi munusia in, Abraham, Isaac, Jacob le a suan a paalte tungah piak tu in, ka kamciamna munah pai tavun.

²Vantung lalang khat in note lam kong laksak tu a, Canaante, Amorte, Hitte, Perizte, Hivte le Jebuste ka notkeak tu hi.

³Note ngampha le ngamnuam ah pai tu nu hi. Ahizong kei note taw kong pai buatu hi, banghangziam cile mihing thinpuite na hi uh a, lampi ah kong montha tu hi,” ci hi.



⁴Hi thu mihingte in a zaak uhciang amate khuangai in, kham le ngun kizepna te bul nawn ngawl uh hi.

⁵Amate tungah a son natu inTopa in Moses thupia in, “Note sia mihing thinpuite hi nu hi. Note taw tawmveino sung ih kithawl bek zong kong mon tha tu hi. Tu in na kham na ngun kizepnate suut vun, tua hile note tungah ka sep tu thu, ka khensat tu hi,” ci hi.

⁶Tua hi in, Sinai Mual a nusiaw zawkciang, Israel mihingte in kham le ngun kizepnate bul nawn ngawl uh hi.

Topa ii Omna Puanbuk

⁷Israel mihingte ii ngiaphual a saatna mun po ah Moses in a biakpiakna Puanbuk kengin ngiaphual pan a khuala thithim na munah sa hi. Tua in Topa omna Puanbuk kici a, Topa taw thu a kum nuamte in tua munah pai uh hi.

⁸Tualai ah Moses a pai simin, mihingte a Puanbuk kongkha tek ah dingin, Moses a sungtan dong en uh hi.

⁹A sungah Moses a tum zawkciang, meeikhuam tuaksuk in Puanbuk kongkha ah tawnga in, Topa in meei sung pan Moses paupui hi.

¹⁰Mihing te Puanbuk kongkha ah meeikhuam a mu pociang kun uh hi.

¹¹Ngualtam thuson bangin maitang kisi in Topain Moses paupui hi. Tuaciang Moses ngiaphual ah heak kik hi. Ahizong Nun ii tapa ama a dom, tangvalpa Joshua sia Puanbuk sungah om hi.

A Mite Ompui tu in Topa in Kamciam

¹²Moses in Topa tungah, “Tua ngamah hi mihingte lampui tu in nong sawlna thu thumaan ahi hi, ahizong kei taw a paikhawm tu sia nong son balai hi. Nangma in kei, kong telthiang a, dik kong sa hi nong ci zo hi.

¹³Tu in tuabang na hile, na tupnate hong son tan, tua hile nangma na seamin, kong lungkimsak tawntung tu hi. Hi minamte nangma atu in na tealsa a hina thu zongh phawk in,” ci hi.

¹⁴Topa in, “ Nang taw ka paikhawm tu a, zawna kong pia tu hi,” ci hi.



¹⁵Moses in, “Kote taw nong paikhawm bua ahile, hi mun hong nusiasak heak in.

¹⁶Kote nong tonpui bua ahile, keima le na mihingte tungah na lungkimna thu akua in bangbangin hong he thong tu ziam? Kote taw nong omkhopna in leitung midangte sung pan kote hong tumpiansak tu hi,” ci hi.

¹⁷Topa in Moses tungah, “Nong nget sa bangin kong seam tu hi, banghangziam cile nang kong tel sitset a, na tungah ka lungkim hi,” ci hi.

¹⁸Tuaciang Moses in, “Hesuakna taw nong ompuina a tee khuavak hong musak tan,” ci in ngen hi.

¹⁹Topa in, “Nangma mai le note omna ah, ka thupina teng kong lak tu a, a thiangtho ka min kong pualaak tu hi. Keima in Topa ka hi a, mulkimna le hesuakna lak tu a ka teal mihingte tungah ka lak hi.

²⁰Ka maitang kong musak buatu hi, banghangziam cile ka maitang a mu peuma, nungta ngawl tu hi.

²¹Ahizong suang khat tungah na din thei natu in, ka kungah mun khat om hi.

²²Kong ompuina a tee khuavak in nang hong kantan ciang, suanghawng sungah nang kong koi tu a, kong kantan zawk mateng ka khut taw nang kong hum tu hi.

²³Tua zawkciang ka khut ka dok tu a, ka nung teng na mu tu hi, ahizong ka mai na mu buatu hi,” ci in zo hi.

Pusuana 34

A Nii Veina Suangpheap

(Thuhil kikna 10.1-5)

¹Topa in Moses tungah, “A masa taw kibangin suangpheap nii sui in a, na tapsak suangpheap masate tung a, laimal teng tuate nii tungah ka at tu hi.

²Kithoai in a, Sinai Mualdawn ah kei taw kimu tu in zingsang ciang hong paito tan.

³Khat zongh kaato pui heak in a, mual tungah kuama omsak heak in. Tuu ahizong, khui ahizong, mualpeang ah tha heak in,” ci hi.



⁴Tuaciang Moses in suangpheak nii sui in, Topa thupiak bang tatak in a zing ciang zingtuung in Sinai Mual tungah kaato pui hi.

⁵Meei sungah Topa hong tuaksukin, ama taw ding khawmin , Topaci in a min thiangtho pualaak hi.

⁶Topa in Moses mai kantan in tuaciang samin, “Keima in thinbotna le hesuakna taw a kidim TopaPathian khat ka hi hi. Ka thin uuk hakin, itna lian le thumaanna a lakpa ka hi hi.

⁷Ka kamciamte khang tul tam mama te tungah ka tangtungsak a, siatna le mawna ka maisak hi, ahizong a pate a nute mawna hangin tate le tute tungah, khang thum khang li dongin daan ka pia tu hi,” ci in pualaak hi.

⁸Moses in lei ah manlang tak boksuk in bia hi.

⁹Ama in, “Topaawng, kei tungah nong lungkim takpi ahile kote taw hong paikhawm tan. Hi mihingte thinpui hi, ahizong kote siatna le mawna hong maisak tan a, nangma aituam mihing in hong saang tan,” ci hi.

Thuciamna Kithaksua

(Pusuana 23.14-19, Thuhil kikna 7.1-5, 16.1-17)

¹⁰Topa in Moses tungah, “Tu in Israel mihingte taw thuciamna khat ka vawt hi. Hi leitung minamte sungah a kivawt ngei ngawl na thupite amate mai ah ka vawt tu hi. Keima, Topa ii na thupi ka vawt theinate mihing theampo in hong mu tu uh hi, banghangziam cile note atu in nalamdang ka vawt tu hi.

¹¹Tuni in kong piak thukhamte zui vun. Note mai panin Amorte, Canaante, Hitte, Perizte, Hivte le Jebuste ka notkeak tu hi.

¹²Na paina ngamah a teang mihingte taw kipawlkhop thuciamna vawt heak vun, banghangziam cile tua thuciamna in note atu in thi theina thaang suak tu hi.

¹³Tua luangin a biaknataute baltham in, a thiangtho khuamte lalcipsakin Asherah milimte saattan vun.

¹⁴“Pathian dang bia heak vun, banghangziam cile Keima, Topa in pathian dang ka dei bua hi.



¹⁵Tua ngam mihingte taw kipawlkhop thuciamna vawt heak vun, banghangziam cile doai biate ii pathiante tungah biakpiakna a nei ciang, note hong samin, a pathian biakna ante ne tu in hong zol tu hi.

¹⁶Na tapate in ngamdang numeite tenpui tha tu a, amate in na tapate lam khialpui in, doai biate ii pathiante bia khawm tha tu hi.

¹⁷Thik taw kivawt pathiante vawtin bia heak vun.

¹⁸Tol saw ngawl Anluum Poaipi vawt suak vun. Kong thupiak bangin, Abib tha ni sali sung tol saw ngawl anluum ne vun, banghangziam cile tua tha in Egypt pan pusuak nu hi.

¹⁹Mihing ahizong, nganhing ahizong a suakciil a pa theampo keima aa ahi hi.

²⁰Ahizong laa a suakciil pawpo a taangin tuu khat pia in lei tu nu hi. Na lei kik bua uh ahile a ngawng thiaktan vun. Tapaciil peuma lei kik vun. Biakpiakna keng ngawl peuma ka mai ah hong kilaak heak hen.

²¹Ni luk sung noma na seam vun, ahizong lopoai hun le anlaak hun ngangawn in ni sali ni in naseam heak vun.

²²Na mangtaang a tung masate na laak kipat ciang anlaak Poaipi khaamin, phalbi sung thingnga na kaikhop ciang anlaak Poaipi khaam vun.

²³Kum khat in thumvei, Keima Topa Israel Pathian, bia tu in pasal a minpiang nong pai tu uh hi.

²⁴Note mai ah minamte notkeak in, na ngam kong keaksak zawkciang, poaipi thumvei hun sungin kuama in na ngam hong zaw tu hanciam ngawl tu hi.

²⁵Nganhing taw nong biakpiak uhciang tol saw anluum hong pia heak vun. Paisan Poaipi hunsung na ngaw uh nganhing sate a zingsang ciang dong koi heak vun.

²⁶Kumsim in a tungciil lo ante Topa inn sungah hong paipui tavun. Tuuno ahizong kealno ahizong a pui noaitui sungah huan heak vun.

²⁷Topa in Moses tungah, “Hi kammalte at in, banghangziam cile nangma le Israel mite tungah thuciamna ka vawt sia, hi kammalte kibulphu hi,” ci hi.

²⁸Tualai ah Moses an le tui ne ngawlin, sun sawmli le zan sawmli sung Topa taw omkhawm hi. Moses in Thukham Nam Sawmte ahi-thuciamna kammalte suangpheak tungah at hi.

Sinai Mual pan Moses Tuaksuk

²⁹Moses in Thukham Nam Sawmte toai in, Sinai Mual pan hong tuaksuk ciang Topa taw kipaupui ahikom a maitang a taan hunlam he ngawl hi.

³⁰Aaron le mihingte theampo in Moses maitang taang a mu ciang lau in neak ngam ngawl uh hi.

³¹Ahizong Moses in amate samin, Aaron le mipi lampuite theampo ama kungah pai in Moses in paupui hi.

³²Tua zawkciang Israel mihingte theampo ama kungah kikhawm in, Topa ii Sinai Mual ah a piak Thukham theampo Moses in amate tungah pia hi.

³³Moses in thuson a man zawkciang dial taw a maitang seal hi.

³⁴Topa paupui tu in Topa omna Puanbuk sungah Moses a pai simin, a dial hong hi. Hong pusua ciang son tu in, a thupiak theampo Israel mihingte tungah son a,

³⁵amate in a maitang taang sia mu uh hi. Tuaciang Topa taw kipaupui tu in a pai kik dong dial taw a maitang seal hi.

Pusuana 35

Sabbath Ngeinate

¹Moses in Israel huam mihonpite theampo kaikhawm in amate tungah, “Hi thu na zui tu uh Topa thupiak ahi hi.

²Ni luk sung noma na na seam tu uh a, ahizong ni sali ni sia kithiangthosakin, keima naTopa upatna in na tawlngak uh ni hi tu hi. Tua ni in na a seam peuma kithatlum tu hi.

³Sabbath ni in na inn uh ah mei ngangawn thut ngawl tu nu hi,” ci hi.

A Thiangtho Puanbuk atu Piaknate

(Pusuana 25.1-9)

⁴Moses in Israel mihingte theampo tungah, “Hisia sia Topa thupiak ahi hi.



⁵Topa tungah piakna nei vun. A pia nuam peuma in, kham, ngun, tau,
⁶puankaang neal puan, vancii, a sannum le a san samul, kealmul taw a
 kivawt puan,
⁷a san kinim tuatal vun, savunte, acacia thing;
⁸meidet sathau, noi sathau atu hel namtuite le a namtui ngimnamtui,
⁹ephod le Thiampi Sang awmdal ah bul tu suangmanpha le a dang
 suangmanphate keng tu nu hi.

Topa ii Omna Puanbuk atu Vanhte
 (Pusuana 39.32-43)

¹⁰Note sung pan khutthiamna nei theampo hong pai in Topathupiak theampo
 seam hen:
¹¹Puanbuk le a sitna, a uumnate le a vanh khainate, a kalte le a zawlte, a
 khuamte le a tawdapte;
¹²Thukham Thingkuang le a puaknate, a sitna le a dalna puante,
¹³sabuai, a puaknate le a vanh theampo, Pathian a piak anluum;
¹⁴meidet natu meikhuam le a vanhte, meidet sathau,
¹⁵biaknatau ah hal tu paaknamtui le a puakna molte, noi sathau, paaknamtui,
 Puanbuk kongkha puankhai,
¹⁶meihal biak natu biaknatau le a dappha tau, a zawna molte le a vanhte;
 taukuang le a ngakna;
¹⁷a uumna tu puankhai, a khuam le a tawdapte; a uumna kongkha puankhai;
¹⁸Puanbuk khetphin le Puanbuk khaute le a uumna;
¹⁹Thiangtho Mun ah thiampite in na a sep ciang a silh tu a tuanngen le a
 manham puante thiampi Aaron le a tapate atu a thiangtho puante ahi hi.

Mihingte in Amate Biakpiakna Hong Paipui

²⁰Israel mihingte theampo cia siat uh hi.



²¹Topa ii omna Puanbuk a vawt nuam peuma in Topa tungah biakpiakna keng uh hi. Amate in biakna tu in a kismah le thiampi puante vawt natu in a kismah vanhte theampo hong paipui uh hi.

²²Piak nopna thin a nei numei le pasal te in kizepnate, bilbaate, khutzungbute, khite le kham taw kivawt na manpha tuatuamte, paipui in, Topa tungah pia uh hi.

²³Puankaang neal puan, vancii, a sannum, a san samul, kealmul puan, a san a kinim tuuvun, savun ciitak a nei theampo in paipui uh hi.

²⁴Ngun ahizong, tau ahizong a pia theite in Topa atu in pia tekin, nasep natu khat pawpo ah a kizangh thei tu acacia thing a nei theampo in hong paipui tek uh hi.

²⁵Khutthiamna a nei numei theampo in amate vawtsa puankaang neal, khau le samul khau dum, samulkhau sannum le samulkhau sante hong paipui uh hi.

²⁶Amate in kealmul taw khauzam zongh vawt uh hi.

²⁷A lampuite in ephod le awmdal ah a bul tu in suangmanpha le a manpha kizepnate,

²⁸meidet sathau le hel namtuite, noi sathau le a namtui ngimnamtuite hong paipui uh hi.

²⁹Topa in Moses tungah sep tu in a thupiak nasepna ah a kizangh tu in Israel mihingte theampo in amate piak nop bang tekin Topa tungah biakpiakna paipui uh hi.

Topa ii Omna Puanbuk atu Khutthiamte

(Pusuana 31.1-11)

³⁰Moses in Israel te tungah, “Judah minam sung pan Hur ii tupa ahi, Uri ii tapa Bezalel Topa in teal zo hi.

³¹Topa in Bezalel sia ama vaangletna taw kidimsakin, khutthiamna, hitheina, le khutthiam nasep tuatuamte heaktheina,

³²pungsaan tuatuam suai theina le kham, ngun, le tau taw nasep theina,



³³suangmanpha zepthiamna, thing taw nasep thiamna le khutthiamna tuatuamte pia hi.

³⁴Topa in Bezalel le Dan minam sung pan Ahisamach ii tapa Oholiab tungah midangte tungah amate khutthiamna hil tu in pilna pia zo hi.

³⁵Topain amate tungah khutthiam nasep theampo septhiamna, ngeal thiamna, le puankaang neal puantak thiamte, vancii, a sannum, a san samul puantak thiamte le a dang puantak thiamte pia zo hi. Amate in nasep namkim seam thei in, a ngeal thiamte ahi uh hi.

Pusuana 36

¹“Bezalel, Oholiab, le a thiangtho Puanbuksak tu zia Topa ii thiamna le heaktheina a piak khutthiam dang theampo in Topathupiak bang linlianin seam tu uh hi,” ci hi.

Mihingte in Letsong Tam mama hong Paipui

²Moses in Bazalel, Oholiab le Topa ii hitheina a piak khutthiamna a neite le nasep a hu nuamte samin, Moses in amate nasep kipan tu in sawl hi.

³Israel te ii biakpiakna Puanbuksak natu in a paipui na theampo Moses in amate tungah pia siat hi. Tua zawkin Israel mihingte in a neisate zingsim in Moses tungah pia tawntung lai hi.

⁴Tuaciang khutthiamna nei tua nasep seamte in amate nasepna tek pan pai in,

⁵Moses tungah, “Topa in seam tu in hong thupiak nasepna tu in a kisamh za sangin a tamzaw vanh, mihingte in hong paipui uh hi,” ci uh hi.

⁶Tua ahiciang, Moses in ngiaphual tengah thu zacak in, Puanbuk vawt natu in kuama in pia nawn heak vun a ci ciang, mihingte in pia nawn ngawl hi.

⁷Hong paipui sa vanhte, nasep theampo zawna tu in kicing vaal liang hi.

Topa ii Omna Puanbuk Vawt

(Pusuana 26.1-37)



- ⁸Naseamte sung pan khutthiam belte in Topa ii omna Puanbuk vawt uh hi. Amate in tua puanbuk sia vancii, a sannum, le a san samul taw a kitak cherubim limte taw a kizeam puankaang neal puanbek sawm taw vawt uh hi.
- ⁹Tua puante a letna kibangin, kaih 14 sau in, kaih 2 beak hi.
- ¹⁰Amate in puandal nga teng khuikhawmin, a dang nga teng zongh a kibangin khuikhawm uh hi.
- ¹¹Amate in tua puante nii puasang mong tengah puandum taw bilvangte vawt uh hi.
- ¹²Puan khat tungah bilvang sawmnga vawtin, a khat sia tung zongh ah sawmnga ma vawt uh hi.
- ¹³Amate in tua puante nii a pe natu in khamkual sawmnga vawt uh hi.
- ¹⁴Tuaciang amate in Puanbuk sitna tu in kealmul taw kivawt puan sawm le khat vawt uh hi.
- ¹⁵Tua puante kikimsak siatin, kaih 15 sau in, kaih 2 beak hi.
- ¹⁶Amate in tua puan ngate khatin khuikhawmin, a dang luk teng khatin khuikhawm uh hi.
- ¹⁷Amate in tua puante a khakbel sia mongah bilvang sawmnga vawt uh a, a dang khat sia tungah bilvang sawmnga ma vawt uh hi.
- ¹⁸A sitna khat a suak tu in tua puante nii pe natu in amate in taukual sawmnga vawt uh hi.
- ¹⁹Puanbuk sitna tu in amate in a san in a kinim tuumul khat le savun ciitak taw a kivawt a dang khat, sitna nii vawt uh hi.
- ²⁰Amate in Puanbuk khuam tu in acacia thing zangh uh hi.
- ²¹A khuamte pi 15 saangin, letmat 27 beak hi.
- ²²Khat le khat a kipee natu in khuak uh hi. A khuamte tuabangin kivawt siat hi.
- ²³Amate in thang sangah khuam kul phutin



- ²⁴khuam khat le khat a kipee natu in khat ii nuai ah ngun tawdap nii veu, ngun tawdap sawmli koi uh hi.
- ²⁵Puan buksaksang ah khuam kul phut in,
- ²⁶Khuam khat ii nuai ah ngun tawdap nii veu ngun tawdap 40 koi uh hi.
- ²⁷Puanbuk nitumna nungsang atu in khuam luk phutin,
- ²⁸a kinghte ah khuam nii phut uh hi.
- ²⁹A kingh ah a khuamte a bul pan a dawn dongin kikopsak hi. A kingh ah a khuamte nii sia tuabangma a dawn dongin kikopsak hi.
- ³⁰Tuabangin khuam liat om in, khuam khat ciang tawdap nii tek ngun tawdap sawm le luk om hi.
- ³¹Amate in acacia thing zawl sawm le nga, puanbuk pangh khatah zawl nga,
- ³²a lang khat ah zawl nga le a nungsang nitumna sangah zawl nga vawt uh hi.
- ³³A khuamte laizang ah a kikilh laizang zawl sia puanbuk mong khat pan mongkhat dong sau hi.
- ³⁴Amate in khuamte kham taw tuamin, kham taw ma a kituam a zawlte a len tu in khamkualte thua uh hi.
- ³⁵Amate in vancii, a sannum le samul san taw a kitak cherubim lim taw a kizeam puankaang neal puankhai khat vawt uh hi.
- ³⁶Amate in puankhai khat sia khai natu in kham taw a kizut, kham thikkoai taw a kithua acacia thing khuam li vawt uh hi. Tuaciang khuamte a len tu in ngun tawdap li vawt uh hi.
- ³⁷Amate in Puanbuk kongkha tu in vancii puankaang neal puan, a sannum le a san samul taw a kitak, a pha mama in a kizeam puankhai khat vawt uh hi.
- ³⁸Tua puankhai atu amate in thikkoai taw a kithua, a tung le a puan khaina kham taw a kituam khuam nga vawtin, tua khuamte atu in tau tawdap nga vawt uh hi.



Pusuana 37

Thukham Thingkuang Vawt

(Pusuana 25.10-22)

- ¹Bezalel in a sau letmat 45, a zai letmat 27 le a saang letmat 27 Thukham Thingkuang sia acacia thing taw vawt hi.
- ²Ama in kham ciitak taw a sung a pua tuamin, a kiimkot teng kham taw zial hi.
- ³Tua thingkuang puak natu in ama in kham kual li vawtin, a lang ah kual nii veve khuam li tungah bul hi.
- ⁴Ama in a puak natu in acacia thing mol vawt a, kham taw tuamin,
- ⁵kuang pangh ah a kibal a kualte sungah thun hi.
- ⁶Ama in a sitna sia a sau letmat 45, a zai letmat 27 in kham ciitak taw vawt hi.
- ⁷Ama in sek taw a kiseak kham taw cherubin niite lim vawtin,
- ⁸a mongah koi hi. Ama in a sitna tawsakhat suak tu in vawt hi.
- ⁹Cherubin sia thingkuang sitna tungah khat le khat kimai ngatin, amate a tha phalin kuang sitna liap siat hi.

Pathian A kipia Anluum atu Sabuai Vawtna

(Pusuana 25.23-30)

- ¹⁰Ama in a sau letmat 36, a zai letmat 18, le letmat 27 a saang sabuai sia acacia thing taw vawt hi.
- ¹¹Ama in tuasia kham ciitak taw tuamin, a kiimkot teng kham taw zial hi.
- ¹²A kiimkot letmat thum zai in vawt a kham taw zial hi.
- ¹³Ama in tua sabuai zawinna tu in kham kual li vawtin, a peang omna kingh li teng ah bul hi.
- ¹⁴Tua a kualte sabuai zawinna molte thun natu ahikom a pangh veve ah bul hi.
- ¹⁵A zawinna molte acacia thing hi a, kham taw tuam hi.



¹⁶Ama in sabuai tungah neak le zu taw biakpiak natu in pakante, haite, kuang le bealte kham ciitak taw bebek in vawt hi.

Meikhuam Vawt
(Pusuana 25.31-40)

¹⁷Ama in kham ciitak taw meikhuam vawt hi. A bul le a khuam sia a kiseak kham taw vawtin, a kizeam paakte, a mom le a paakte zongh a khuam taw kisakhat siat hi.

¹⁸A pangh pan baak luk meangin, a lang le a lang ah baak thum veve om hi.

¹⁹Baak lukte khat tek in almond paakmom taw kibangin, a kizeam a mom le a paakte a nei paak thum tek nei hi.

²⁰Tua meikhuam in almond paakmom bangin a mom le a paak taw a kizeam paak li nei hi.

²¹A baakbul sim ah kop thum a pha, mom khat tek om hi.

²²Paakmomte, a baakte le meikhuam sia a kiseak kham taw kivawtsakhat ahi hi.

²³Ama in meikhuam atu in meivak sali vawtin, kham ciitak taw taitee le kuangte vawt hi.

²⁴Ama in meikhuam le a vanhte kham ciitak pound sawmsali le nga taw vawt hi.

Paaknamtui Hal natu Biaktau Vawt
(Pusuana 30.1-5)

²⁵Ama in paaknamtui hal natu in acacia thing taw biaknatau khat vawt hi. Tua in a sau letmat 18, a zai letmat 18 le a saang letmat 36 ahi hi. A kingh li teng kipee siatin, sakhat suak hi.

²⁶Ama in a tung, a pangh li teng, le a kipeena teng kham ciitak taw tuamin, a kiimkot teng kham taw zial hi.

²⁷Ama in a zawinna tu in kham kual nii vawtin, a mong lang le a mong lang ah bulin, a zawinna mol thun hi.

²⁸Ama in acacia thing taw molte vawtin, kham taw tuam hi.



Noi Sathau le Paaknamtui Vawt

(Pusuana 30.22-38)

²⁹Ama in paaknamtui vawt bangin a kihel a thiangtho noi sathau le paaknamtui ciitak zongh vawt hi.

Pusuana 38

Meihal Biakpiak natu Biaktau Vawt

(Pusuana 27.1-8)

¹Ama in meihal biakpiak natu in acacia thing taw biaknatau khat vawt hi. Tua in a sau pi 7 le a lang, a zai pi 7 le a lang, a saang pi 4 le a lang ahi hi.

²Biaktau tawsakhat a suak tu in ama in a tung kingh li te zumsak hi. Ama in tua a zumte tau taw tuam hi.

³Biaktau ah vanh zak tu in bealte, thikkeaute, kuangte, thikkualte le vut luana kuangte zongh vawt hi. Hi vanh teng theampo tau taw vawt hi.

⁴Ama in a vang singseng tau letna khat vawtin biaknatau saanna a lang ban tu in biaknatau ii kiil nuai ah koi hi.

⁵Ama in zawn natu kual li vawtin a kinghte li ah koi hi.

⁶Ama in acacia thing taw zawnna molte vawtin, tau taw tuamin,

⁷biaknatau lang le lang ah a om kualte sungah thun hi. Biaktau sia thingpheak taw vawtin a sung hawngsak hi.

Taukuang Vawt

(Pusuana 30.18)

⁸Ama in Topa ii omna Puanbuk kongkha ah naseam numeite neisa limlanghte panin taungo kuang le taungo tawdap vawt hi.

Topa ii Omna Puanbuk Uumna

(Pusuana 27.9-19)

⁹Ama in puankaang neal puan phate taw Topa omna puanbuk uumna vawt hi. Thangsang pangh uumna puankhai sia kaih 50 sau a,

¹⁰tua puankhai sia ngun taw kivawt puankhaina le zawl a kibul tawdap kul tungah a kinga khuam kul tungah kikhai hi.

¹¹Saksang uumna zongh ta bangma ahi hi.



¹²Nitumna sang uumna puankhai sia kaih 25 sau in, ngun taw a kivawt puankhaina le zawl a kibul tawdap sawm tungah a kinga khuam sawm tungah kikhai hi.

¹³Nisuana sang inn mai sang teng uumna sia kaih 25 ma zai hi.

¹⁴⁻¹⁵Kongbiang lang khat veve puankhaite kaih 7 le a lang veu zai a, tawdap thum tungah a kinga khuam thum tungah kikhai hi.

¹⁶Puanbuk uumna puankhai theampo puankaang neal puan phate taw kivawt hi.

¹⁷Khuam tawdapte tau taw kivawtin, vanh khainate, zawlte le khuam tung sitnate ngun taw kivawt hi. A kiimkot uumna khuam theampo ngunzawlte taw kipee siat hi.

¹⁸Kongkha puankhai sia vancii, a sannum le a san samul taw a kitak, pha tatak in a kizeam puankaang neal puanpha taw kivawt hi. Tua puankhai sia a uumna puankhaite bangma in kaih 10 sauin, kaih 2 zai hi.

¹⁹Tua puankhai sia tau tawdap li tungah a ding khuam lite tungah kikhai hi. A tung sitna puankhaina le a zawlte ngun taw kivawt hi.

²⁰Puanbuk letna a kiimkot uumna le khetphin theampo tau taw kivawt hi.

Topa ii Omna Puanbuk sung Zak Vanhte

²¹Thupiak sawm atna suangpheak niite koina ahi, Topa ii omna Puanbuk sungah na zakte a nuai a bang ahi hi. Tua teptena lai vawt tu Moses in sawlin, thiampi Aaron ii tapa Ithamar khut nuai a naseam Levite in vawt hi.

²²Judah minam sung pan Hur ii tupa, Uri ii tapa Bezalel in Topa ii thupiak bangin seam siat hi.

²³Ama a hupa Dan minam sung pan Ahisamach ii tapa Oholiab sia suang tung laikhen thiam, a ngeal thiam, le vancii, a sannum, a san samul puankaang neal puanpha tak thiam khat ahi hi.

²⁴A thiangtho puanbuk atu Topa tungah a kipia kham teng biakinn khaikhin taw a kitee ciang pound 2,195 ngit hi.



²⁵Mihing kisim hun lai in a kipia ngun teng biakinn khaikhin taw a kitee ciang pound 7,550 ngit hi.

²⁶Hite sia mihing kisim lai in misim ii a piak teng kingawm in biakinn khaikhin taw a kitee ahi hi. Kum kul pan a tungsia teng a kisim ciang a vekpi mi 603,550 pha hi.

²⁷Tua ngunte sung pan pound 7,500 teng a thiangtho Puanbuk le puankhai atu tawdap zakhat te vawt natu in kizanghin, tawdap khat ciang pound 75 veu kizangh hi.

²⁸Bezalel in, a taanglai ngun pound 50 taw a zawlte, a khuamte tungah vanh khainate le a tung sitnate vawt hi.

²⁹Topa tungah a kipia tau theampo pound 5,310 ngit hi.

³⁰Ama in tua taute taw Topa omna Puanbuk kongkha tawdapte, tau taw kivawt a vang singseng letna le tau biaknatau, biaknatau atu vanh theampo, vawt hi.

³¹Puanbuk uumna le kongkha uumna tawdapte le Puanbuk le a kiimkot uumna in a kizangh khetphin theampo ama in tau taw vawt hi.

Pusuana 39

Thiampite atu Puante Vawt

(Pusuana 28.1-14)

¹A Thiangtho Mun ah thiampite na a sep ciang a silh tu in vancii, a sannum le samul san taw a tuanngen puansilhte vawt uh hi. Moses tungah a thupiak bangin amate in Aaron atu in thiampi puante vawt uh hi.

²Ephod sia puankaang neal, vancii, a sannum le samulsan le khamkhau taw vawt uh hi.

³Amate in kham daalte, a paa in seakin, a paa in zenin puankaang neal puanphate le vancii, a sannum le samulsante taw tak khawm uh hi.

⁴Amate in liangkhai nii vawtin ephod a kho thei natu in tua liangkhaite puan sunsilh tungah khi hi.



⁵Topa in Moses tungah a thupiak bangin a vawtzia a kibang, pha takin a kitak kawngkhau sia ephod tawsakhat tu in, a tungah khii hi.

⁶Amate in carnelian suangte taatin kham awmsuan tungah suang hi. Jacob tapa sawm le niite min teng suanglai khen thiamte in carnelian suang tungah khensak hi.

⁷Topa in Moses tungah a thupiak bang tatakin Israel minam sawm le niite taang tu in, amate in tua suangte ephod tungah suang uh hi.

Awmdal Vawt
(Pusuana 28.15-30)

⁸Amate in limhoite taw a kizeam awmdal a vawt bangin a kibang puante taw ephod vawt uh hi.

⁹Tua in a kikim kingh li nei in thuap nii a kithepin, letmat 9 sau, letmat 9 zai hi.

¹⁰Amate in tua awmdal tungah suangmanpha ngual li in ngualin, ngual khatna ah ruby, Topaz le garnet;

¹¹ngual niina ah emerald, sapphire le diamond ,

¹²ngual thumna ah turquoise, agate, le amethyst;

¹³le ngual lina ah beryl, carnelian le jasper te ahi hi. Tua suangte kham awmsuan tungah suang uh hi.

¹⁴Israel minam sawm le niite taang tu in, suang sawm le niite tungah Jacob tapa sawm le niite ii min khen uh hi.

¹⁵Awmdal atu in khauhual bangin a kihual kham ciitak khite vawt hi.

¹⁶Amate in kham awmsuan nii le khamkual nii vawtin, khamkual niite awmdal a tung kingh veve ah bel uh hi.

¹⁷Amate in khamkhau niite sia kual niite tungah khitin,

¹⁸awmsuan niite tungah khaumong niite khit hi. Hi bangin ephod liangkhai mai sangah kham awmsuan niite bel uh hi.



¹⁹Amate in khamkual nii vawtin, ephod sung sang mong, awmdal nuaisang mongte nii ah bel uh hi.

²⁰Amate in khamkual nii vawt thua in, ephod liangkhaite nii nuai, a maisang pha tak in a kitak kawngkhau tung san ah bel uh hi.

²¹Topa in Moses tungah a thupiak bang tatak in kawngkhau tungah awmdal kho in a kawm ngawl natu in amate in awmdal kualte ephod kualte tungah vancii khau taw sawm uh hi.

A Dang Thiampi Puan Vawt

(Pusuana 28.31-43)

²²Amate in ephod tungah a kisilh puantual sia vancii samul khau bek taw tak uh hi.

²³Luthun natu in a vang sia a ek ngawl natu in puan kipheak sa taw kikhui thua hi.

²⁴⁻²⁶Topa in Moses tungah a thupiak bang tatakin puantual mong nuai kiim tengah amate in puankaang neal puapha taw kivawt le vancii, a sannum le samul san taw kivawt talee ngate, kham ciitak taw a kivawt daakte taw kithatheak in koi hi.

²⁷Topa ii Moses tungah a thupiak bang tatak in amate in Aaron le a tapate atu in laktong,

²⁸dial, lukhu, puankaang neal ngoaipuan tom le

²⁹puankaang neal, vancii, a sannum le a san samul taw a kivawt a pha mama in a kizeam kawngkhau vawt hi.

³⁰Amate in kham ciitak taw Topa tungah ki aapna lim thiangtho a hi, takma vawtin tua tungah, “Topa atu a kipia,” ci in khen uh hi.

³¹Topa ii Moses tungah a thupiak bang tatak in amate in tua takma sia dial mai sangah vancii khau khat taw khii uh hi.

Nasep Zawna

(Pusuana 35.10-19)



³²Topa omna Puanbuk nasep theampo ki zo siat zo hi. Topa ii Moses tungah a thupiak bang tatak in Israel mite in na theampo seam uh hi.

³³Amate in Moses kungah Puanbuk le a vanh theampo, a vanh khainate, a zawlte, a tuukpite, a khuamte le a tawdapte,

³⁴A sanin a kinim tuuvun taw a kivawt a sitna savun ciitak taw a kivawt a sitna, puankhai,

³⁵suangpheakte kikoina Thukham Thingkuang, a khuamte le a sitna,

³⁶sabuai le a vanhte theampo Pathian a piak anluum,

³⁷Kham ciitak meikhuam, a meite, a vanh theampo le meidet sathau;

³⁸kham biaknatau, noi sathau, paaknamtui, Puanbuk kongkha puankhai,

³⁹a vang singseng tau letna taw kithua biaknatau, a khuamte, a vanh theampo, khutsilna kuang le a tawdap;

⁴⁰a uumna puankhai a khuamte le a tawdapte, kongkha puankhai le a khaute, Puanbuk khetphinte, puanbuk sungah a kizangh tu vanhzak theampo;

⁴¹a Thiangtho Mun ah thiampite silh tu puansilh tuanngente, thiampi Aaron le a tapate atu in a thiangtho puante, hong paipui uh hi.

⁴²Topa ii Moses tungah a thupiak bang tatak in Israel mite in nasep theampo seam siat uh hi.

⁴³Moses in a nasepna teng sit siatin, Topa thupiak bangin a sep siatna thu mu hi. Tuaciang Moses in amate thupha pia hi.

Pusuana 40

Topa ii Omna Puanbuk Sakna le Aapna

¹Topa in Moses tungah,

²“Tha masa, ni masa ni in Topa ii omna Puanbuk sa in

³Thukham Nam Sawmte koina Thukham Thingkuang tua buk sungah koi in, a mai ah puankhai khai in.



- ⁴A sungah sabuai tumpui in a tungah vanhte koi in. Meikhuam zongh la in a, meivakte bul in.
- ⁵Thukham Thingkuang mai ah paaknamtui hal natu in kham biaknatau koi in a, Puanbuk kongkha ah puankhai khai in.
- ⁶Puanbuk mai ah meihal biakpiak natu in biaknatau koi in.
- ⁷Puanbuk le biaknatau kilaklaw ah khut silna kuang koi in a, tui dim in.
- ⁸A kiimkot puan taw uumin a kongkha ah puankhai khai in.
- ⁹“Tuaciang Puanbuk le a vanh theampo a thiangtho sathau noi in a aap in, tua hile thiangtho tu hi.
- ¹⁰Tua zawkciang biaknatau le a vanhte theampo a thiangtho sathau noai in a, aap in, tua hile thiangtho sinsen tu hi.
- ¹¹Ta bangma in khut silna kuang le a ngakna zongh aap in.
- ¹²“Aaron le a tapate puanbuk kongkha ah paipui in a, ngeina om bangin a zeksa kibualna neisak in.
- ¹³Aaron in keima thiampi na a sep thei natu in thiampi puante silhsak in, sathau buakin hi bangin ama aap in.
- ¹⁴A tapate paipui in, laktong silhsak in.
- ¹⁵Tuaciang keima thiampi na a sep thei natu in, a pa sathau na buak bangma, a tate zongh sathau buak in. Hi bang sathau buakna in a tawntung amate thiampi na seam suaksak tu hi,” ci hi.
- ¹⁶Topa thupiak bangin Moses in na theampo seam hi.
- ¹⁷Egypt pan a pusua zawk a kum niina, a tha masa, a ni masa ni in, Topa ii omna Puanbuk kisa hi.
- ¹⁸Moses in a tawdapte pha sukin, a zawlte thua a, puanbuk tungah tuukpite bulin, a khuamte phut hi.
- ¹⁹Ama in Topathupiak bangin puanbuk tungah a sitnate phalin, tua tung pan siin thua hi.



²⁰Tuaciang ama in suangpheak niite la in Thukham Thingkuang sungah koi hi. Ama in a zawna molte a bilvang sungah thun in, Thukham Thingkuang siin hi.

²¹Tuaciang ama in Puanbuk sungah Thukham Thingkuang koi in, puankhai khai hi. Topa thupiak bangin, Moses in Thukham Thingkuang hi bangin seal hi.

²²Ama in Puanbuk sungsaksang, puankhai pua sangah sabuai koi in,

²³Topa thupiak bangin Topa tungah a kipia anluumte, tua sabuai tungah koi hi.

²⁴Ama in Puanbuk sung thangsang kingh, sabuai taw ki maingat in meivak khuam koi hi.

²⁵Topa thupiak bangin tua laiTopa ii omna ah ama in mei vak hi.

²⁶Ama in Puanbuk sung puankhai mai ah kham biaknatau koi in,

²⁷Topa thupiak bangin paaknamtui hal hi.

²⁸Ama in Puanbuk kongkha ah puankhai khai in

²⁹tua mun puankhai mai ah meihal biakpiak natu in biaknatau koi hi. Topa thupiak bangin tua biaknatau tungah ama in antang taw biakpiakna le meihal biakpiaknate taw bia hi.

³⁰Ama in Puanbuk le biaknatau kilaklaw ah ksilna kuang koi in tui dim hi.

³¹Moses, Aaron, le a tapate in tua lai ah a khut le a peangte,

³²Topa thupiak bangin, Puanbuk sung le biaknatau ah a paisim in sil uh hi.

³³Moses in Puanbuk le biaknatau kiimkot teng uumin a uumna kongkha ah puankhai khai hi. Tuabangin ama in nasep theampo zo hi.

Topa ii Omna Puanbuk tungah Meei

(Ngamsung vakna 9.15-23)

³⁴Tuaciang meei in Puanbuk tuam a Topa ii ompuina khualeng in tua puankhai dim hi.

³⁵Hi bang teng ahikom Puanbuk sungah Moses tum thei ngawl hi.



³⁶Puanbuk pan meei a ven ciang bekin Israel te in a ngiaphual mun dang ah khin uh hi.

³⁷Ngiaphual ah meei a kaai laiteng a ngiaphual khin ngawl uh hi.

³⁸Dui sungah a vathap sung tawntungin amate in Topa ii ompuina ahi, Puanbuk tungah sunin meei le zanin meikuang mu thei uh hi.



Thiampite

Thiampite 1

Pumbup Meihal Biakpiaknate

- ¹Topa omna Puanbuk sung pan Topa in Moses sam a,
- ²Israel te ii biakpiakna a nei ciang a zui tu in a nuai a ngeinate pia hi. Mihing khat pawpo in nganhing taw biakpiakna a nei ciang, a khuihon sung pan khat ahizong, a tuuhon ahibuale a kealhonte sung pan khat ahizong, pia tu hi.
- ³A khuihonte sungah khat taw meihal biakpiakna a pia ahile, a mealhem ngawl khuita khat hi tu hi. Topaii a san thei natu in Topa omna Puanbuk kongbiang ah pia tu hi.
- ⁴Ama in khuita lu tungah a khut nga tu a, tuasia sia ama khialnate maisak natu biakpiakna in kisaang tu hi.
- ⁵Tua lai ah ama in tua khuita ngo tu a, Aaron tapa thiampite in khuita chisan sia Topatungah a piak zawkciang Puanbuk kongbiang ah a om biaknatau pangh li ah a chi the tu hi.
- ⁶Tuaciang ama in a vun hoai in a sa sem tu a,
- ⁷thiampite in biaknatau tungah thing sia in mei taw tu hi.
- ⁸Amate in a kisémsa sa teng, a lu le a thau taw mei tungah koi tu hi.
- ⁹Ama in a sungkua le a nungpeangte nii, sil tu a tavuan nei thiampipa in sa teng biaknatau ah hal tu hi. Tua an taw biakpiakna ii a ngim sia Topa in dik a sa hi.
- ¹⁰Mihing khat in a tuu ahibuale a kealte sung pan khat taw biakpiakna a nei le, a mealhem ngawl a tal khat hi tu hi.
- ¹¹Ama in biaknatausak sangah tuasia ngo tu a, biaknatau pangh li ah thiampite in a chi the tu hi.
- ¹²A sa a sem zawkciang thiampipa in a sa teng mei tungah koi tu a, a lu le a thau zongh kihel tu hi.



¹³Ama in a sungkua le a nungpeangte nii sil tu a, thiampipa in Topa tungah biakpiaknate pia in biaknatau tungah hal tu hi. Tua in Topa tungah ngimnamtui biakpiakna ahi hi.

¹⁴Mi khat in vacim khat taw meihal biakpiakna a pia le, ngam vakhu khat ahi buale, inn vakhu khat hi tu hi.

¹⁵Thiampipa in tua biakpiakna sia biaknatau ah paipui tu a, a ngawng meaktan in, biaknatau tungah a lu hal tu hi. Biaktau pangh ah a chite taaksak tu hi.

¹⁶A longtawl le a tawl sungah a om teng la tu a, vut koina, biaknatau ii niswana sangah vawk tu hi.

¹⁷Ama in a thate nii pan len tu a, a thate tatsak ngawlin a pum balkeak tu a, biaknatau tungah hal tu hi. Tua in Topa tungah ngimnamtui biakpiakna ahi hi.

Thiampite 2

Antang Biakpiaknate

¹Mihing khat pawpo in antang taw Topa tungah biakpiakna a nei ciang, antang ngoaivui masa tu hi. Ama in olive thau le paaknamtui buak tu a,

²Aaron nam thiampite kungah paipui tu hi. Thiampipa in anvui khutdim khat, sathau le paaknamtui theampo la in, Topatungah kipia siat zo hi ci in a kiheak thei natu in biaknatau ah hal tu hi. Tua in Topa tungah ngimnamtui biakpiakna ahi hi.

³A taanglai antang teng thiampite neisa hi a, Topa tungah a kipia ante sung pan a lak ahikom, thiangtho mama hi.

⁴A kipia anluum sia, anluum emna sungah em ahile, tol saw ngawl hi tu hi. Olive thau taw a kihel a saa anluum, ahibuale olive thau taw a kizut a paa muh hi tu hi.

⁵A kipia anluum sia beal taw huan ahile, olive thau le anvui a kihel hi tu a, ahizong tol saw ngawl hi tu hi.



- ⁶Biakpiakna in na nei ciang, tuasia balneen in a tungah sathau na buak tu hi.
- ⁷Beal taw a kihuan a kipia anluum ahile, olive thau le anvui taw huan hi tu hi.
- ⁸Hi ante Topa tungah a piak tu in, thiampipa na pia tu a, ama in biaknatau ah paipui tu hi.
- ⁹A vekpi in Topa tungah a kipia a hina thu limlakna in thiampipa in tawm la in biaknatau tungah hal tu hi. Tua in Topa tungah ngimnamtui biakpiakna ahi hi.
- ¹⁰A taanglai biakpiaknate thiampite neisa hi a, Topa tungah a kipia ante sung pan a kila ahikom, thiangtho mama hi.
- ¹¹Topa tungah a kipia antang biakpiaknate tol kisaw ngawl tu a, Topa tungah na piak an sungah khuaitui ahibuale tol na zangh ngei buatu hi.
- ¹²Anpal taw biakpiaknate kumsim in na paipui tu uh a, ahizong biaknatau ah na hal buatu uh hi.
- ¹³Antang taw biakpiakna po ah ci saw vun, banghangziam cile ci sia Pathian le noma kilaklaw ah thuciamna lim ahi hi. (Biakpiakna theampo ah ci saw vun.)
- ¹⁴Anpal taw Topa tungah biakpiakna na nei uh ciang, kan sa antang ahibuale ngoaivui sa an hi tu hi.
- ¹⁵Tua tungah olive thau helin paaknamtui na buak tu uh hi.
- ¹⁶Topa tungah na piak an a hina thu, a kiheak natu limlakna in antawm, sathau le paaknamtui theampo zongh thiampipa in hal tu hi.

Thiampite 3

Kipawlkhop Biakpiaknate

- ¹Mihing khat pawpo in kipawlkhop biakpiakna in a khuite khat a piak ciang a meal hem ngawl a tal ahibuale a nu hi tu hi.



²Ama in tua nganhing lu tungah a khut nga tu a, Topa omna Puanbuk kongkha ah ngo tu hi. Aaron tapa thiampite in biaknatau pangh li ah a chi the tu a,

³a nuai a sa teng Topa tungah an biakpiakna in pia tu hi: a sungthau theampo,

⁴a nautate le a nauta tuam a thau teng le a thinsa phabel teng pia tu hi.

⁵Thiampite in hi teng theampo meihal biakpiakna taw biaknatau tungah hal khawm tu hi. Tua in Topatungah ngimnamtui biakpiakna ahi hi.

⁶Tuu ahibuale keal taw kipawlkhop biakpiakna ah a kizangh le, a nu zongh a pa zongh hi thei a, ahizong a mealhem ngawl hi tu hi.

⁷Mihing khat in tuu taw a bia le,

⁸tuu lu tungah a khut nga tu a, Puanbuk mai ah ngo tu hi. Thiampite in biaknatau pangh li ah a chi the tu a,

⁹a nuai a, sa teng Topa tungah an biakpiakna in pia tu hi. A thau, a cingpingu dongin a kitan a meici thau buppi, a sungkua tuam a thau theampo,

¹⁰a nauta le a nauta tuam a thau teng le a thinsa phabel teng pia tu hi.

¹¹Topa tungah biakpiakna an ahikom tavuan nei thiampipa in biaknatau tungah hal siat tu hi.

¹²Mihing khat in keal a pia le,

¹³a keal lu tungah a khut nga tu a, Puanbuk mai ah ngo tu hi: Thiampite in biaknatau pangh li ah a chi the tu a,

¹⁴a nuai a sa teng Topa tungah an biakpiakna in pia tu hi; a sungthau theampo,

¹⁵a nauta le a nauta tuam a thau teng, a thinsa phabel teng ahi hi.

¹⁶Topa tungah biakpiakna an ahikom, thiampipa in biaknatau tungah hal siat tu hi. A thau teng Topa neisa ahi hi.

¹⁷Israel te in a thau ahizong, a chi ahizong, ne ngawl tu hi. Hi thu in Israel te theampo ii a teenna mun pawpo ah a tawntung a zui tu ngeina khat ahi hi.

Thiampite 4

Vawtthaak Khialnate atu Biakpiaknate

¹Topa in Moses tungah,

²mihing khat in tupkhol ngawlin khial a, Topa thupiate khat pawpo a paltan ciang, a zui tu a nuai a ngeinate Israel te tungah a son natu in thupia hi.

³Thiampi Saangpa khialin mihingte tungah khialna hong then ahile, a khialna hangin ama in a mealhem ngawl khuita no khat Topa tungah biakpiakna in pia tu hi.

⁴Ama in Puanbuk kongkha ah khuita paipui tu a, a lu tungah a khut nga in Topa mai ah ngo tu hi.

⁵Tuaciang Thiampi Saangpa in khuita chi pawlkhat la in, Puanbuk sungah tumpui tu hi.

⁶Ama in a khutme, chi sungah pap tu a, a thiangtho puankhai mai ah sali vei the tu hi.

⁷Tuaciang ama in chi pawlkhat, Puanbuk sung paaknamtui biaknatau kingh, a kipeena teng noai tu hi. A taanglai chi teng Puanbuk kongkha ah a om meihal biakna in a kizangh biaknatau bul ah sung tu hi.

⁸Hi khuita tung pan a thau teng theampo, a sungthate,

⁹a nauta le a nauta tuam a thaute, le a thinsa phabel la tu hi.

¹⁰Thiampipa in tua a thau teng la tu a, kipawlkhop biakpiakna in a kingo nganhingte tung pan a thaute a hal bangin meihal biakpiak natu in a kizangh biaknatau tungah hal tu hi.

¹¹Ahizong ama in a vun, a tak teng, a lu, a peang teng, a ngil le a ngilzangte la tu a,

¹²ngiaphual puasang vut buakna biakna taw kisai a thiangthona munah paipui in tua munah mei taw hal tu hi.



¹³Tupkhol ngawlin Israel huam mite in Topa thupiakte khat paltan in khial a, khialna a vawt le,

¹⁴a khialnate a ki heakpo ciang a huam minam in khuitai khat taw mawmai biakpiakna nei tu hi. Amate inTopa omna Puanbuk ah paipui tu a,

¹⁵huam mihon lampuite in a lu tungah a khutte nga tu uh a, tualai ah ngo tu uh hi.

¹⁶Thiampi Saangpa in khuitai chi tawm Puanbuk sungah paipui tu a tua sungah

¹⁷a khutmete pap in puankhai mai ah sali vei the tu hi.

¹⁸Ama in Puanbuk sung paaknamtui biaknatau kingh, a kipeena tengah chi tawm noai tu a, a taanglai teng Puanbuk kongkha ah a om meihal biakpiakna ah a kizangh biaknatau bul ah sung tu hi.

¹⁹Tuaciang ama in a thau teng la in biaknatau tungah hal tu hi.

²⁰Ama in mawmai biakpiakna in a kizangh khuitai a vawt bangma in hi khuitai zongh a kibangin vawt tu a, mipite ii mawna hu in ama in hi bangin biakpiakna vawt tu a, tuaciang amate mawna kimaisak tu hi.

²¹Tuaciang ama in tua khuitai ngiaphual pua sangah paipui tu a, ama mawmai natu biakpiakna khuitai a hal bangin hal tu hi. Hisia in mipite mawna maisak natu biakpiakna khat ahi hi.

²²Ngam uk khat in tupkhol ngawlin Topa thupiakte paltan in mawna a vawt le,

²³a mawna a heak po ciang, a mealhem ngawl kealtal khat taw biakpiakna nei tu hi.

²⁴Ama in kealtal lu tungah a khut nga tu a, meihal biakna in nganhing a kingawna mun biaknatausak sangah ngo tu hi. Hisia in mawmaisak natu biakpiakna khat ahi hi.

²⁵Thiampipa in a chi sungah a khutme pap tu a, biaknatau kingh a kipeena tengah noai in, a taanglai teng biaknatau bul ah sung tu hi.

²⁶Tuaciang ama in kipawlkhop biakpiakna in a kingo nganhing thaute kihal bangin, biaknatau ah a thau teng hal tu hi. Ngam uk khat ii mawmai natu in hi bangin thiampipa in biakpiakna nei tu a, ngamukpa mawna kimaisak tu hi.

²⁷Tupkhol ngawlin nautaang mi khat in Topa thupiakte paltan in, mawna a vawt le,

²⁸a mawna a heak po ciang a mealhem ngawl kealnu khat taw biakpiakna nei tu hi.

²⁹Ama in keallu tungah a khut nga tu a, meihal biak natu nganhing kingawna mun, biaknatausak sangah ngo tu hi.

³⁰Nganhing chi sungah thiampipa in a khutme pap tu a, biaknatau kingh a kipeena teng noai in, a taanglai teng biaknatau bul ah sung tu hi.

³¹Tuaciang ama in kipawlkhop biakpiak natu in a kingo nganthaute laak bangin a thau teng la tu a, Topa ii diksak ngimnamtui ahi natu in biaknatau tungah hal tu hi. Hi bangin thiampipa in mawneipa mawmai natu in, biakpiakna neisak tu a, a mawna kimaisak tu hi.

³²Mihing khat in mawmai biakpiak natu in tuu khat hong paipui le, a mealhem ngawl a nu khat hi tu hi.

³³Ama in tuu lu tungah a khut nga tu a, meihal biakpiak natu in ngan kingawna mun biaknatausak sangah ngo tu hi.

³⁴Thiampipa in a chi sungah a khutme pap tu a, biaknatau kingh a kipeena teng chi noai in, a taanglai teng biaknatau bul ah sung tu hi.

³⁵Tuaciang ama in kipawlkhop biakpiak natu in a kingo tuu thau laak bangin a thau teng la tu a, Topa tungah a kipia biakpiakna antaw biaknatau tungah halkhawm tu hi. Hi bangin thiampipa in tua pa mawmai natu in biakpiakna nei tu a, tua pa mawna kimaisak tu hi.

Thiampite 5

Mawmai Biakpiakna Vawt tu A kul Thute



¹A nuai a thute ah mawmai biakpiakna kisamh hi. Mihing khat sia thukhen zum ah kisam in ama in a muna bang le a zaakna bang a son bua ahile ama in mawna thuak tu hi.

²Tup khol ngawlin, mihing khat in sathaang thi ci bang, biakna sang panin a nin khat po a thamtha ahile, a thamthaak a heak po ciang ama sia minin le mikhial ahi hi.

³Tup khol ngawlin mihing khat in mihingte sung pan a piang a thiangtho ngawl na khat pawpo a thamtha ahile bangbang po ahizong ama in a thamthaak a heak po ciang mikhial hi tu hi.

⁴Kidawm ngawlin, mihing khat in thu khat po ah a kiciam ahile zong tua thu a heak po ciang ama mikhial ahi hi.

⁵Mihing khat in a khial ciang a khialna pualaak tu a,

⁶mawmai natu in Topa tungah tuu anu khat ahibuale keal anu khat pia tu hi. A mawmai natu in thiampipa in biakpiakna neisak tu hi.

⁷Tua pa in tuu ahibuale keal a pia zo buale, a mawmai natu in inn vakhu nii ahibuale ngam vakhu niite Topa tungah paipui tu a, a khat sia mawmai biakpiakna hi tu a, a dangkhat sia meihal biakpiakna hi tu hi.

⁸Ama in tuate thiampipa kungah paipui tu a, thiampipa in tua vacim taw mawmai biakpiakna nei masa tu hi. Ama in a lu tatsak ngawlin a ngawng meak tu a,

⁹a chi pawlkhat biaknatau pangh the tu hi. A taanglai chi teng biaknatau bul ah sung tu hi. Hisia in mawmai biakpiakna ahi hi.

¹⁰Tuaciang a niina vacim taw ngeina om bangin meihal biakpiakna pia tu hi. Hi bangin thiampipa in tua pa mawmai natu biakpiakna vawtsak tu a, tua pa mawna kimaisak tu hi.

¹¹Tua pa in inn vakhu nii le ngam vakhu nii a pia zo buale a mawmai biakpiak natu in anvui pound nii paipui tu hi. Antang taw biakpiakna hi



ngawl a, mawmai biakpiakna ahikom, ama in olive thau ahibuale paaknamtui, a tungah buak ngawl tu hi.

¹²Ama in thiampipa tungah paipui tu a, Topa tungah biakpiakna hi ci-in, lakna in thiampipa in khutdim khat la tu a, an taw biakpiakna in biaknatau tungah hal tu hi. Tua in mawmaisak biakpiakna ahi hi.

¹³Hi bangin thiampipa in tua pa mawmai natu biakpiakna neisak tu a, tua pa mawna kimaisak tu hi. Antang taw biakpiakna bangin a taanglai anvui teng thiampipa aa ahi hi.

Khialphel Biakpiakna

¹⁴Topa in Moses tungah a nuai a zui tu ngeinate pia hi.

¹⁵Mihing khat in tup khol ngawlin Topa tungah biakna taw kisai a thiangtho nate pia ngawlin a khial le ama in khialphel biakpiakna in a mealhem ngawl tuatal ahibuale kealtal khat Topa tungah pia tu hi. A manh sia upate ii khensat bang hi tu hi.

¹⁶A piak ngawl vanhte ama in lo kik tu a, zakhat ciang 20 taw in piathua tu hi. Ama in thiampipa tungah pia tu a, tua pa mawmai natu in nganhing taw biakpiakna thiampipa in neisak tu a, tua pa mawna kimaisak tu hi.

¹⁷Mihing khat in tup khol ngawlin Topa thupiakte a paltan le, ama a khial hi a, a khialna daan thuak tu hi.

¹⁸A khialphel natu in a mealhem ngawl tuatal khat ahibuale kealtal khat thiampipa tungah paipui tu hi. A man sia ngeina om bangin khensatna bang hi tu hi. Thiampipa in tupkhol ngawlin a khialpa mawmai natu in biakpiakna neisak tu a, tua pa khialna kimaisak tu hi.

¹⁹Hisia sia ama ii Topatungah a khialna hu a, mawmaisak natu biakpiakna ahi hi.

Thiampite 6

¹Topa in Moses tungah a nuai a ngeinate pia hi.



²Mihing khat tungah Israel a mipui khat in sum koi a, a koina pa in pia kik nuam ngawl ahizong, ngual in nguksak ahizong, ngual in theam ahizong,

³a bo vanh khat mu napi mu bong ci in a kiciam ahile, Topa nialin mawnei ahikom biakpiakna a vawt kul hi.

⁴⁻⁵Hi bang khat pawpo taw mihing khat in khialna a vawt ciang thumaan ngawlin a nga vanh pawpo lo kik hamtang tu hi. A khialna a kimu ni in, a nei pa tungah a cingin pia kik tu hi. Zakhat ciang 20 taw belap tu hi.

⁶Ama in Topa tungah ama mawmai biakpiak natu in a mealhem ngawl tuatal ahibuale kealtal khat thiampipa tungah paipui tu hi. A manh sia ngeina ii ciangtan bang hi tu hi.

⁷Tua pa mawmai natu in, thiampipa in biakpiakna piaksak tu a, tua pa khialna kimaisak tu hi.

Pumbup Meihal Biakpiaknate

⁸Topa in

⁹Aaron le a tapate ii meihal biakpiakna a piak ciang a nuai a ngeinate a zui tu in Moses tungah thupia hi. Meihal biakpiakna sia zan khuateak biaknatau tungah kinusia tu a, tuaciang mei sia kuang tansak tawntung tu ahi hi.

¹⁰Tuaciang thiampipa in puankaang neal ngoaipuan tom le puankaang neal puantual silin, biaknatau ah vut teng luakin, biaknatau pangh ah sung tu hi.

¹¹Tuaciang ama in a puan laih tu a, ngiaphual puasang biakna taw kisai a thiangthona munah vutte bua tu hi.

¹²Biakta ah mei kuang topsak tu a, mitsak ngei ngawl tu hi. Zingsim in thiampipa in thing thut thua tu a, meihal biakpiakna vawtin, kipawlkhop biakpiakna sathaute hal tu hi.

¹³Biakta ah mei kuang topsak tu a, mitsak ngei ngawl tu hi.

Antang Biakpiaknate

¹⁴A nuai a te sia antang biakpiakna ah zui tu ngeinate ahi hi. Aaron suan thiampipa in biaknatau mai Topa tungah antang biakpiakna pia tu hi.



¹⁵A vekpi in Topa tungah a kipia a hina thu heaksakna in ama in khutdim khat anvui le sathau, a tungah paaknamtuite buakin, biaknatau ah hal tu hi. Hi biakpiakna sia Topa tungah ngimnamtui biakpiakna ahi hi.

¹⁶⁻¹⁷A taanglai teng thiampite in ne tu hi. Tuате tol kisaw ngawl anluum in ki em tu a, Topa omna Puanbuk huangsung a thiangtho munah kine tu hi. Hite sia an taw biakpiakna le khialna hang a, biakpiaknate bangin thiangtho mama hi.

¹⁸Khang tawntungin Aaron suan pa peuma in Topa tungah biakpiakna ante amate atu ahikom ne thei tu uh hi. Mihing khat pawpo tua biakpiakna an a thutha sia, tua an vaangletna in thiangthosak tu hi.

¹⁹Topa in Moses tungah,

²⁰Aaron suan thiampite kipsak natu taw kisai ngeinate pia hi. Kipsakna a nga ni in Topa tungah anvui pound nii (nisim antang biakna za taw a kikim) zingsangin a lang, nitak in a lang pia tu hi.

²¹Tuате sathau taw helin bealpeu taw kangin, balneen tu a, Topa tungah ngimnamtui antang biakpiakna in pia tu hi.

²²Khang tawntungin Aaron suante peuma Thiampi Saang a sep ciang hi bang biakpiakna vawt tu hi. Tua biakpiakna sia a kihaltum Topatungah biakpiakna hi tu hi.

²³Thiampipa ii a piak antang biakpiaknate tawm zongh ne ngawlin kihal siat tu hi.

Mawmai Biakpiaknate

²⁴Topa in Moses tungah Aaron le a tapate in

²⁵a nuai a ngeinate mawmai biakpiakna a piak ciang a zui tu in thupia hi. Meihal biakpiak natu in sa a kingawna mun, biaknatausak sangah mawmai biakpiak natu in nganhing kingo tu hi. Tua in a thiangtho mama biakpiakna ahi hi.

²⁶Biakpiakna a pia thiampipa in a piak nganhing sate, Topa omna Puanbuk huangsung mun thiangtho na ah ne tu hi.



²⁷Mihing khat pawpo ahibuale na khat pawpo in tua nganhing sa a thutha le tua nganhing sa ii vaangletna in tuasia a thiangtho suaksak tu hi. Tua sachi puan tengah a baang tha le tua puan munthiangtho na ah ksilh tu hi.

²⁸Sa huanna leibeal khat pawpo ki sutham tu a, thikbeal a kizangh le nawt thiang tu a, tui taw silthiang tu hi.

²⁹Thiampi innkuanpui pa pawpo in hi biakpiakna sa ne thei tu hi. Tua biakpiakna sia thiangtho mama hi.

³⁰Ahizong Puanbuk sungah sachi ki paipui in, mawmai natu in a zeksa vawtna ah a kizangh le tua sa kine ngawl tu a, ki haltum tu hi.

Thiampite 7

Khialphel Biakpiaknate

¹A nuai a te sia mawna hang a biakpiakna ngeinate hi a, thiangtho mama hi.

²Meihal biakpiak natu in nganhing kingawna mun, biaknatau sak sangah hi biakpiakna ngan kingo tu a, biaknatau pangh li tengah a chi kithe tu hi.

³A thau theampo la in biaknatau tengah kipia tu a, tuate a meithau, a sungthau,

⁴a nauta le a tuam thau teng, le a thinsa phabel teng hi tu hi.

⁵Topa tengah an taw biakpiakna bangin thiampipa in a thau theampo biaknatau tengah hal tu hi. Tua in mawna hangin biakpiakna ahi hi.

⁶Thiampi innkuanpui pa peuma in tua sa ne thei tu a, ahizong tua sa thiangtho mama ahikom mun thiangthona ah kine tu hi.

⁷Mawphel biakpiakna le khialphel biakpiakna ah a kibangin zak tu ngeina khat om a, tua in biakpiakna ah a kizangh sa theampo biakpiakna a pia thiampipa neisa hi, cina ahi hi.

⁸Meihal biakpiakna in a kipia nganhing vun sia biakna a pia thiampipa neisa ahi hi.

⁹Meibung sungah a ki em ahibuale thikbealpeu le bealdai sungah a kikang antang biakpiakna peuma, Pathian tengah a pia thiampipa neisa hi.



¹⁰Ahizong a kihuan ngawl antang theampo, sathau taw a kihel ahizong a kihel ngawl ahizong, Aaron suan thiampite neisa hi a, a kikim in a hawm tek tu ahi hi.

Kipawlkhop Biakpiaknate

¹¹A nuai a te Topa tungah a kipia kipawlkhop biakpiakna ah zui tu ngeinate ahi hi.

¹²Mihing khat in Pathian tungah lungdamko biakpiakna in hi biakpiakna a vawt le biakpiakna ah a zak tu nganhing taw tol saw ngawl anluum piakhawm tu hi. Tuata anvui le olive thau a kihel a saa anluumte ahizong olive thau taw a kizut anluum paate ahizong ahibuale olive thau taw kihel anluumte ahi hi.

¹³Tua dom ngawlin tol kisaw anluumte zongh pia tu hi.

¹⁴Ama in anluum namkhat tek a tuam vilvel in Topa tungah pia tu a, tuate sia nganhing chi la a, biaknatau tungah a the thiampipa neisa ahi hi.

¹⁵Biakpiakna nganhing sa sia biakpiakna vawt ni in kine tu a, a zingsang ciang dong koi ngawl tu hi.

¹⁶Mihing khat in kamciam tangtut na ahibuale ama thinzawna taw a piak kipawlkhop biakpiakna hong paipui le biakna a piak ni in ne siat ngawl tu a, a taanglai pawpo a zing ciang ne tu hi.

¹⁷A ni thum ni in sa taanglai pawpo kihaltum tu hi.

¹⁸A ni thum ni in a taanglai sa a kine le tua pa biakpiakna Pathian in saang ngawl tu hi. Tua biakpiakna sia ama atu in phattuumna om ngawl tu a, a thiangtho ngawlin kingaisun in, tua sa a ne pawpo ngim thuak tu hi.

¹⁹Tua biakpiakna sa biakna taw kisai a thiang ngawl khat pawpo taw a kithutha le kine ngawl tu a, kihaltum tu hi. Biakna taw kisai mihing a thiang khat pawpo in tua sa ne thei tu hi.

²⁰Ahizong a thiang ngawl khat pawpo in tua sa a ne le Pathian mi in kingaisun nawn ngawl tu hi.



²¹Mihing khat pawpo in mihing ahizong nganhing ahizong biakna taw kisai a thiangtho ngawl khat pawpo a tham zawkciang hi biakpiakna sa a ne le, ama sia Pathian mihing in kingaisun nawn ngawl tu hi.

²²Topa in Israel mite atu in,

²³a nuai a, zui tu ngeina teng Moses tungah pia hi. Khuithau, tuuthau le kealthau kine ngawl tu hi.

²⁴Ama thu in a thi nganhing ahibuale ngamsa ii a mat nganhing thaute kine ngawl tu a, ahizong na dangin kizangh thei tu hi.

²⁵Mihing khat pawpo in Topa tungah an taw biakpiakna bangin a kizangh nganhing thau a ne le, ama sia Pathian mi in kingaisun nawn ngawl tu hi.

²⁶Koisung po ah a om zong Israel te in vacim chi le nganhing chi ne ngawl tu hi.

²⁷Hi thukham a paltan pawpo Pathian ii mihing khat in kingaisun nawn ngawl tu hi.

²⁸Topa in Israel mihingte atu in,

²⁹a nuai a, zui tu ngeina teng Moses tungah pia hi. A kuama po in kipawlkhop biakpiakna a piak ciang tua sungpan pawlkhat Topa tungah a tuam vilvel letsong in puak tu a,

³⁰tua letsong an taw biakpiakna bangin ama khut vateak taw paipui tu hi. Ama in nganhing thau a awmsa taw paipui tu a, Topa tungah a tuam vilvel letsong in pia tu hi.

³¹Thiampipa in a thaute biaknatau ah hal tu a, ahizong a awmsa thiampite in tang tu hi.

³²A pheziatsang sia a tuam vilvel letsong in,

³³chisan le a thau taw kipawlkhop biakna a pia thiampipa tungah pia tu hi.

³⁴A awmsa sia a tuam vilvel letsong hi a, a pheziatsang sia Israel mite tung panTopa ii a laak, thiampite tungah a piak a tuam vilvel letsong ahi hi. Hite Israel mite ii thiampite tungah a tawntung a piak tu ahi hi.



³⁵Hisia in Aaron le a tapate thiampi in a kikipsak ni a, amate tungah a kipia sung pan Topa tungah a kipia an ahi hi.

³⁶Tua ni in hi biakpiakna sung pan pawl khat thiampite tungah piak tu in Israel mihingte tungah Topa in thupia hi. Hi sia in Israel mihingte ii a tawntung a zui tu ngeina khat ahi hi.

³⁷Hite in meihal biakpiakna, antang biakpiakna, mawmai biakpiakna, khialphel biakpiakna, kipsak biakpiakna, le kipawlkhop biakpiakna atu in ngeina ahi hi.

³⁸Hite in senneal ngam Sinai Mual ah, Israel mihingte zui tu biakpiak nate a son ni in Topa ii Moses tungah a thupiakte ahi hi.

Thiampite 8

Aaron le A Tapate Kipsakna

(Pusuana 29.1-37)

¹Topa in Moses tungah,

²“Aaron le a tapate ka omna Puanbuk kongkha ah paipui in, tuaciang thiampi puante, noi sathau, mawmai biakpiak nату in khuital moi sia, tuatal niite le tol saw ngawl anluum khum sia hong paipui tan.

³Tuaciang tua lai ah mi theampo samin,” ci hi.

⁴Topa thupiak bangin Moses in seam a, mihonte hong kikhop uh ciang,

⁵amate tungah Moses in, “Tu in ka sep tute, Topa hong thupiak ahi hi,” ci hi.

⁶Moses in Aaron le a tapate mai sangah paipui a biakna ngeina bangin, kibualsak hi.

⁷Moses in Aaron laktong le puantual silsak a, a kawng ah kawngkhau sawm hi. Ama in ephod silsak a, a pha mama kawngkhau taw a kawng sawmsak hi.

⁸Ama in awmdal thuasakin, a tungah Urim le Thummim koi hi.

⁹Topa thupiak bangin ama in a lu ah dialkhimsak a, a dial mai sangah a thiangtho ki aapna lim, ci in khampheak belh hi.



¹⁰Tuaciang Moses in noi sathau la in Topa omna Puanbuk tung le a sungah a om vanhte theampo noai siat a, hi bangin Topa tungah aap siat hi.

¹¹Topa tungah tua vanhte aap natu in ama in sathau pawl khat la in biaknatau tung a vanhte tung, khut silna kuang tung le a dapte tungah sali vei the hi.

¹²Moses in Aaron lu tungah sathau buakna taw Aaron sia thiampi in kipsak hi.

¹³Tua zawkciang Moses in Topa thupiak bangin Aaron tapate mai sangah paipui a, laktongte silsakin a kawngah kawngkhau sawmsakin a lu ah lukhu khusak hi.

¹⁴Tuaciang Moses in mawmai biakpiak natu in khuitai moi sia paipui a, Aaron le a tapate in khui lu tungah a khutte nga uh hi.

¹⁵Tua biaknatau aap natu in Moses in khuitai sia ngo a, a khut taw a chi tawm la in biaknatau kinghdokte noai hi. Tuaciang a taanglai chite biaknatau bul ah sung hi. Hi bangin ama in biaknatau aapin thiangthosak hi.

¹⁶Moses in a sungthau theampo, a thinsa a phabel teng le a nauta le a tuam a thau teng la in biaknatau tungah hal siat hi.

¹⁷Ama in a taanglai khuitai sa teng, a vun, a tak le a ngilpi a ngilzangte la in Topa thupiak bangin ngiaphual pua sangah hal hi.

¹⁸Tua zawkciang Moses in meihal biakpiak natu in tuatal paipui a, Aaron le a tapate in a lu tungah a khutte nga uh hi.

¹⁹Moses in tua tuu ngo a, biaknatau pangh li tengah a chi the hi.

²⁰⁻²¹Ama in Topathupiak bangin tuusa sem a, a sungkua le a nung peangte tui taw silin, a lu, a thau, le a taanglai tuusa teng biaknatau tungah hal hi. Hi meihal biakpiakna sia an taw biakpiakna hi a, Topa tungah ngimnamtui biakpiakna ahi hi.

²²Tuaciang Moses in thiampite kipsak natu in tuatal a niina sia paipui a, Aaron le a tapate in a lu tungah a khutte nga uh hi.



²³Moses in tuatal ngo a, a chi tawm la in Aaron ziatsang bil tung, a ziatsang khutpi tung le a ziatsang peangpi tungah noai hi.

²⁴Tuaciang ama in Aaron ii tapate mai ah paipui a, tuatal chisan pawlkhat a ziatsang bil tung, a ziatsang khutpi tung le a ziatsang peangpi tungah noai hi. A taanglai chisante Moses in biaknatau pangh li tengah the hi.

²⁵Ama in a thau, a meithau, a sungthau theampo, a thinsa phabel teng, a nauta le a tuam a thau teng le a pheii ziatsang la hi.

²⁶Tuaciang ama in Topa tungah a kipia khum sung pan tol saw ngawl anluum khat, sathau taw kivawt anluum khat, le anluum paa khat, la in a thau tung le ziatsang pheii tungah koi hi.

²⁷Ama in Aaron le a tapate khut tungah hi an teng koi a, amate in Topa tungah a tuam vilvel letsong in pia uh hi.

²⁸Tuaciang Moses in amate tung pan tua an teng la in kipsakna biakpiakna in, meihal biakpiakna tung biaknatau tungah hal hi. Hi sia in an taw biakpiakna hi a, Topa tungah ngimnamtui biakpiakna ahi hi.

²⁹Tuaciang Moses in a awmsa la in Topa tungah a tuam vilvel letsong in pia hi. Tua in kipsakna tuatal sa sung pan Moses ii satel ahi hi. Topa thupiak bangin Moses in seam siat hi.

³⁰Moses in noi sathau tawm le biaknatau tungah a om sachi tawm la in, Aaron le a tapate le a puante tungah the hi. Hi bangin amate le a puante Topa tungah aap hi.

³¹Moses in Aaron le a tapate tungah, “Topa thupiak bangin Topaomna Puanbuk kongkha ah sate paipui in, huanin, khum sungah a om kipsakna biakpiakna anluum taw ne vun.

³²A sa le anluum neakvaalte hal vun.

³³Kipsakna hun a cin mateng ni sali sung Puanbuk kongkha pan puapial ngawl tu nu hi.

³⁴Na mawna uh a mai natu in Topa thupiak bangin tuni in ih vawt hi.

³⁵Topa thupiak bangin seamin, sun taw zan taw ni sali sung Puanbuk kongkha ah om tu nu hi. Na om bua uhle thi tu nu hi. Hi thu in kei tungah Topahong thupiak ahi hi,” ci hi.

³⁶Topa ii Moses tungtawn in a thupiakte Aaron le a tapate in tuabangin vawt siat uh hi.

Thiampite 9

Aaron in Biakpiaknate Pia

¹Thiampi kipsakna teng a man khuavak ni in Moses in Aaron le a tapate le Israel lampuite sam hi.

²Ama in Aaron tungah, “A mealhem ngawl khuital khat le tuutal khat paipui in, Topa tungah biakpiakna in pia in. Mawmai biakpiak natu in khuital le meihal biakpiak natu in tuutal hi tu hi.

³Tuaciang Israel mite tungah mawmai biakpiak natu in kealtal khat, meihal biakpiak natu in a mealhem ngawl kum khat a pha khuino khat le kum khat a pha tuuno khat,

⁴kipawlkhop biakpiak natu in khuital khat le tuutal khat a ken natu in son in. Sathau taw a kihel anvui taw amate in Topa tungah sangaw biakpiakna pia tu uh hi. Amate in hi teng vawt tu uh hi, banghangziam cile tuni in amate tungah Topa kilangh tu hi,” ci hi.

⁵Moses thupiak bangin amate in Puanbuk mai ah na theampo paipui a, Topa a bia tu in mihonte tua munah kikhawm uh hi.

⁶Moses in, “Topa ompuina a tee khuavak note tungah a kilangh thei natu in hite theampo seam tu in Topa in note thu hong pia zo hi,” ci hi.

⁷Tuaciang ama in Aaron tungah, “Biaktauh ah pai in na mawnate le na mite mawnate a mai natu in, mawmai biakpiakna le meihal biakpiakna pia in. Topa thupiak bangin, mite mawnate a mai natu in hi biakpiakna pia in” ci hi.

⁸Aaron biaknatau ah pai in a mawmai natu biakpiakna in khuital moi khat ngo hi.



- ⁹A tapate in sachi puak a, ama in sachi sungah a khutme papin biaknatau kingh a kipeena teng sachi pawlkhat noai in, biaknatau bul ah a taanglai teng sung hi.
- ¹⁰Tuaciang Moses tungah Topa thupiak bangin Aaron in a thau, a nautate le a thin saphabel teng biaknatau tungah hal hi.
- ¹¹Ahizong ama in a satak le a vun sia ngiaphual pua sangah hal hi.
- ¹²Ama meihal biakpiak natu in ama in nganhing ngo hi. A tapate in sachi puakin tua sachite biaknatau pangh li tengah the hi.
- ¹³Amate in a lu le a sa dangte a khut sungah pia a, ama in tua sate biaknatau tungah hal hi.
- ¹⁴Tuaciang ama in a sungkua teng le a nung peangte nii silin a omlai meihal biakpiakna tung biaknatau tungah hal hi.
- ¹⁵Tua zawkciang ama in mipite atu biakpiakna pia hi. Ama in ama mawmai natu biakpiakna a vawt bangin mipite mawmai natu in a kipia keal sia kai in ngo a, biakpiakna in pia hi.
- ¹⁶Ama in meihal biakpiak natu in nganno zongh paipui a, ngeina om bangin biakpiakna in pia hi.
- ¹⁷Ama in antang biakpiakna pia a, anvui khutdim khat la in biaknatau tungah hal hi. (Hi in nisim meihal biakpiakna belapna ahi hi.)
- ¹⁸Ama in mipite atu kipawlkhop biakpiakna in khuita sia le tuatal sia ngo hi. A tapate in sachi puak a, ama in biaknatau pangh li teng ah the hi.
- ¹⁹Aaron in khuithau le tuatal thaute,
- ²⁰nganhingte ii awmsa tungah koi in biaknatau ah paipui siat hi. Ama in biaknatau tungah a thaute halin
- ²¹Moses thupiak bangin a awmsate le a pheii ziatsangte thiampite atu in Topatungah a tuam vilvel letsong in pia hi.
- ²²Aaron in biakpiakna teng a man ciang mipite tungah a khutte laamin thupha pia a, tua zawkciang tuaksuk hi.



²³Topa omna Puanbuk sungah Moses le Aaron tum a, hong pusua ciang amate in mipite thupha pia in, Topa ompuina a tee khuavak sia mipite tungah kilangh hi.

²⁴Thakhat thu in Topa in meikuang puak a, biaknatau tungah a om meihal biakpiakna le a thau teng tua meikuang in haltum hi. Mipite sia tua meikuang a mu uh ciang au in a mai leipha in boksuk uh hi.

Thiampite 10

Nadab le Abihu Mawna

¹Aaron ii tapate Nadab le Abihu in amate mei lakna kuang tek la in a sungah meikam koi a, paaknamtui helin Topa tungah pia hi. Ahizong tua mei thiangtho ngawl hi. Banghangziam cile Topa in tuasia pia tu in amate thu pia ngawl hi.

²Thakhat thu in Topa in mei puak a, Topa omna mai ah tua mei in amate kaanglum hi.

³Tuaciang Moses in Aaron tungah, “Topa in ‘Ka na a seamte theampo in ka thianthona zakta tu hi; ka mihingte tungah ka vaangletna ka kilanghsak tu hi’ a cina thu a deina hi bang ahi hi,” ci hi. Ahizong Aaron bangma pau ngawl hi.

⁴Moses in Aaron pano, Uzziel tapate ahi, Mishael le Elzaphan sam a, amate tungah, “Hi sungah hong pai tavun a, a thiangtho Puanbuk sung pan ngiaphual pua sangah na suapuite luang pusuapui tavun,” ci hi.

⁵Moses thupiak bangin a luangte amate in puan taw tuunin ngiaphual pua sangah pusuapui uh hi.

⁶Tuaciang Moses in Aaron le a tapate Eleazar le Ithamar tungah, “Na khuangaina na lakna in sam pot ngawl ahibuale puan balkeak in om heak vun. Tuabang na om uh le, na thi tu uh a mipite tungahTopa thin uuk tu hi. Ahizong Topa ii mei taw a hallupte hangin Israel na mipuite theampo in a khuangaina lak thei tu uh hi.



⁷Puanbuk kongkha pan pusuak heak vun, na pusuak uh le na thi tu uh hi, banghangziam cile Topa ii noi sathau taw a ki aap sate na hi uh hi,” ci hi. Tuaciang amate in Moses ci bangin seam uh hi.

Thiampite Zui tu Ngeinate

⁸Topa in Aaron tungah,

⁹“Nangma le na tapate zu ahibuale beer na neak zawk uhciang ka omna Puanbuk sungah tum ngawl tu nu hi, na tum uhle thi tu nu hi. Hi thukham na suan na paalte theampo ii zui tu ahi hi.

¹⁰Note in Topa neisa le mipite ii a zak vanhte, biakna taw kisai a thiangtho le a thiangtho ngawl nate khentel tu nu hi.

¹¹Moses tungtawn a kong piak thukham theampo note in Israel mite tungah hil tu nu hi,” ci hi.

¹²Moses in Aaron le a taanglai a tapa niite Eleazar le Ithamar tungah, “Topa tungah a kipia ante sung pan a taanglai antang biakpiaknate la vun a, tol saw ngawl anluum vawtin, biaknatau pangh ah ne vun, banghangziam cile biakpiakna sia thiangtho mama hi.

¹³A thiangtho mun ah ne vun, tua in Topa tungah a kipia biakpiakna ante sung pan nangma le na tapate ii tante ahi hi. Tua in Topa ii kei tungah hong thupiak ahi hi.

¹⁴Ahizong nangma le na innkuanpuite in thiampite atu a Topa tungah a tuam vilvel letsong le a tuam vilvel in a kipia a awmsa le a nung pheisate ne thei tu nu hi. Biakna taw kisai a thiangthona mun pawpo ah tua sate ne thei tu nu hi. Israel mihingte ii kipawlkhop biakpiakna ante sungpan nangma le na tate tan tu in hong kipia biakpiaknate ahi hi,

¹⁵Topa tungah an biakpiakna in a thau a kipiak ciang amate in a pheisate le a awmsa paipui tu uh hi. Topa thupiak bangin hi sanamte nangma le na tate neisa hi tawntung tu hi,” ci hi.



¹⁶Mawna biakpiak natu a kici keal ii thu Moses in a dok ciang tua keal, mei taw kaangtum zo ci sia he hi. Hi thu hangin Eleazar le Ithamar tungah ama thin uuk a, ama in,

¹⁷“Banghangin mawmai biakpiakna sa a thiangtho munah ne ngawl nu ziam? Mihonte mawmai natu in Topa ii note hong piak a thiangtho mama an ahi hi.

¹⁸A chisan sia Puanbuk thiang sungah a kipaipui ngawl hu in, kong thupiak bangin biakpiakna sate tua munah na neak tu uh ahi hi,” ci hi.

¹⁹Aaron in, “Mawmai biakpiakna sa, tuni in ne hi leng Topa in hong saang thei tu ziam? Tuni in Topa tungah mipite in mawmai biakpiakna le meihal biakpiakna pia uh a, ahizong kei tungah hi bang buainate hong tung lalai hi,” ci in zo hi.

²⁰Moses sia hi thu a zaak ciang lungkim hi.

Thiampite 11

Neakthei Nganhingte

(Thuhil kikna 14.3-21)

¹Topa in Moses le Aaron tungah,

²Israel mite atu a nuai a ngeinate pia hi. Leitung nganhing,

³peangcin kaa a, eakkha thai pawpo na ne thei tu uh a,

⁴⁻⁶ahizong kalaohnte,sakihte, ahibuale bilpite na ne buatu uh hi. Hite eakkha a thai hangin a peangcin kaa ngawl ahikom a thiangtho ngawlin kingaisun hi.

⁷Voksa ne heak vun. Vok sia a peangcin kaa hi kale eakkha thai ngawl ahikom a thiangtho ngawlin kingaisun hi.

⁸Tua nganhingte nin ahiciang na ne buatu uh a, a luang zongh na tham buatu uh hi.

⁹Tha le hawlip a nei ngasa peuma ne thei tu nu hi.

¹⁰Ahizong tuisung nganhing, tha le hawlip a nei ngawlte na ne buatu uh hi.

¹¹Hi nganhingte a nin in kingaisun hi. Na ne buatu uh a, a luang zongh na tham buatu uh hi.



¹²Tuisung a om nganhing, tha le hawlip a nei ngawl peuma na ne buatu uh hi.

¹³⁻¹⁹A nuai a vacimte na ne buatu uh hi; muvanlai, simbu, muthi, mupui, mu meikaa, vaciik, va-ak, vacim kalaoh, tui piva, vapi, vakaang, tui ngumpai, vanungak, vasuangui le bak ahi hi.

²⁰Tha nei lungno theampo nin hi.

²¹A leang vakeu lungnote thiangtho hi.

²²Khaumaw, khuangbai ahibuale sim khaumawte na ne thei tu uh hi.

²³Ahizong tha nei a, a bokvak nganhing no dang theampo a nin in kingaisun hi.

²⁴⁻²⁸A kuama po in a nuai a nganhing thite a tham peuma nitak dongin nin tu hi. Tua nganhingte peangcin kaa nei ahihang eakkha a thai ngawl nganhing theampo le, peang li nei nganhing theampo sungpan amate peang bom taw a pai nganhingte ahi hi. Tuata thi luang a pua peuma in a puan silthiang tu a, ahizong nitak dongin nin veve lai tu hi.

²⁹⁻³⁰Savokphualte, ngam zunamte, sanchiimte le, thankhik namte a nin in kingaisun hi.

³¹Hi nganhingte ahibuale a thiluangte a tham pawpo nitak dongin nin tu hi.

³²Hi thiluangte na khat pawpo tungah a taak le, tua vanhte nin tu hi. Thing, puan, savun, ip le nazak khat pawpote huam siat tu hi. Tua vanhte tui sungah dia tu a, ahizong nitak dongin nin tu hi.

³³Tua sathi luangte leibeal khat sungah a taak le, tua sungah a om na theampo a nin suak a, a beal sutham tu nu hi.

³⁴A kine thei an pawpo tungah tuabang beal sung pan tui a kisung le a nin hi tu a, tuabang beal sungah a om a kidawn thei pawpo nin tu hi.

³⁵Thiluangte ii taakna khat pawpo sia nin a, lei taw kivawt meibung ahibuale bealpeu sia kiseak tham tu hi.

³⁶Hi sathi luangte ii a thuthaak pawpo a nin hi tu a, ahizong tuinaak ahibuale tuibeam sia thiang veve hi.

³⁷A kiciing tu thaici tungah sathi luang khat a taak le, tua thaici thiang veve hi.

³⁸Ahizong thaici sia tui sungah kidia in tua tungah sathi luang khat a taak le tua thaici nin hi.

³⁹A kine thei nganhing khat a thi le, tua a luang a tham pawpo nitak dongin nin tu hi.

⁴⁰Tua nganhing sate a ne a om le, a puan silthiang tu a, ahizong nitak dongin nin tu hi. Tua sathi luang a pua pawpo in a puan silthiang tu hi, ahizong ama sia nitak dongin nin tu hi.

⁴¹Lei ah a vak nganhing note,

⁴²a awmtaal ahizong, peang li taw a vak ahizong, peang tam mama a neite ahizong ne ngawl tu nu hi.

⁴³Hi sate ne in noma le noma kininsak heak vun.

⁴⁴Keima in Topana Pathian ka hi a, keima thiangtho ka hikom note zongh na thiangtho tu uh hi.

⁴⁵Na Pathian ka hi thei natu in Egypt pan hong pusuapui Topa ka hi hi. Keima thiangtho ka hikom note na thiangtho tu uh hi.

⁴⁶Tu in hite in, nganhingte, vacimte, tuisung a nungtate theampo le leitung a vakte theampo taw kisai ngeina ahi hi.

⁴⁷Note in biakna taw kisai a thiang le a nin, neak thei le neak thei ngawl nganhingte na khentel thei tu uh kidawm vun.

Thiampite 12

Naunei Zawkciang Numeite Thiansuana

¹Israel mite atu in,



²zui tu a nuai a ngeinate Topa in Moses tungah pia hi. Numei khat in thasim nin a nei hunsung bangma in tapa a nei zawk ni sali sung ama biakna taw kisai in thiangtho ngawl hi.

³Ni liat ni in a tapa vun ki at tu hi.

⁴Tuaciang numei in a chi luanna pan biakna taw kisai in a thiantho mateng ni sawmthum le ni thum sung ngak tu hi. Ama in a thiangtho na khat zongh tham thei ngawl tu a, ahibuale a thiantho sitset mateng ama sia a thiangtho Puanbuk sungah tum ngawl tu hi.

⁵Numei khat in thasim nin a nei hunsung bangma in tanu a nei zawk ni sawm le ni li sung biakna taw kisai in thiangtho ngawl hi. Tuaciang a chi luanna pan biakna taw kisai in a thian natu in ni sawmluk le ni luk ngak lai tu hi.

⁶Tapa ahizong tanu ahizong nei in a thiantho sitset zawkciang, ama in Topa omna Puanbuk kongkha ah a om thiampipa tungah meihal biakpiak natu in kum khat a pha tuuno khat le mawmai biakpiak natu in inn vakhu ahibuale ngam vakhu khat paipui tu hi.

⁷Thiampipa in Topa tungah tua nu a zeksa biakpiakna piaksak tu a, ama thiantho ngawl na teng thiansuana vawtsakin tua nu biakna taw kisai in thiangtho tu hi. Hi thu in naunei numei khat ii a naunei zawkciang a zui tu ahi hi.

⁸Numeinu in tuuno khat a nei zo bua ahile ama in inn vakhu nii ahibuale ngam vakhu nii, meihal biakpiak natu in khat mawmai biakpiak natu in a dang khat paipui tu a, tuaciang thiampipa in tua nu a thiantho ngawl na pan a zeksa thiansua tu a, tua nu biakna taw kisai in thiangtho tu hi.

Thiampite 13

Ciipawl Natna taw Kisai Thukhamte

¹Topa in Moses le Aaron tungah hi thukhamte pia hi.

²Mihing khat pawpo in a vun tungah, a lauhuai phak natna dong a suak thei tu meima khat ahibuale uilut khat ahibuale a sato thei meima khat a nei le, ama Aaron suan thiampite kungah kipaipui tu hi.



³Thiampipa in a meima etsak tu a, a meima sung multe kaingin a meima kiimkot sangin a sa a thuk zaw le tua meima sia a lauhuai phaaknatna hi a, thiampipa in tua pa a nin in thangsak tu hi.

⁴Ahizong tua meima kaingin, a kiimkot zongh thuk zaw ngawl a, a multe zongh a kaang buale thiampipa in tua pa ni sali sung koituam tu hi.

⁵Thiampipa in ni sali ni in en kik tu a, a meimate beak ngawlin, kibang lai in, a ngaisun le a dang ni sali sung ma koituam lai tu hi.

⁶Thiampipa in ni sali ni in en kik tu a, a meima thipin a beak buale meima thawthong hi a, tua pa biakna taw kisai in thiangtho hi ci in thangsak tu hi. Tua pa in a puante silthiang tu a, biakna taw kisai in thiangtho tu hi.

⁷Ahizong thiampipa in en in, thiang hi ci in a thansak zawkciang a meima a beak le thiampipa tungah kilak kik tu hi.

⁸Thiampipa in en kik tu a, a meima a beak le mi nin in thangsak tu hi. Tua in a lauhuai phak natna ahi hi.

⁹Mihing khat pawpo in a lauhuai phak natna a nei le tua pa thiampipa tungah ki paipui tu a,

¹⁰thiampipa in en tu hi. A vun tungah meima khat om in, a multe kaingin, a nai a dim le,

¹¹tua meima sia a dam thei ngawl phak natna ahi hi. Thiampipa in tua pa a nin in thangsak tu a, mi thiangtho ngawl hi zo ahikom koituam kul ngawl hi.

¹²Tua natna beakin a lu pan a peang dong a theng le,

¹³thiampipa in en kik tu hi. A pumpi tung bup a beak zo in a mu le thiampipa in biakna taw kisai in mi thiangtho ci in thangsak tu hi. A vun theampo hong kaang ahile ama sia biakna taw kisai in a thiangtho ahi hi.

¹⁴Ahizong a meima bal a kimu po ciang ama sia a nin ahi hi.

¹⁵Thiampipa in en kik tu a, a meima a balin a mu le mi nin in thangsak tu hi. A bal meima a kici sia phak natna cinopna hi a, tua pa sia mi nin ahi hi.

¹⁶Ahizong meima damin a kaang kik le, thiampipa kungah tua pa pai tu a,



¹⁷thiampipa in en kik tu hi. Tua meima a kaang le, a ma biakna taw kisai in a thiang hi a, thiampipa in mi thiingin thangsak tu hi,

¹⁸Uilut vei khat a dam zawkciang,

¹⁹a ma lui ngoin ahibuale san le ngo kithua in, hong tum le thiampipa tungah kilak tu hi.

²⁰Thiampipa in en tu a, tua a bawk sia, a kiim a vunte sang thuk zaw in a sungah a multe a kaang le, thiampipa in ama sia mi nin in thangsak tu hi. Tuasia in uilut pan a kipan phak natna ahi hi.

²¹Ahizong thiampipa in en in a sung a, a multe kaang ngawlin, a kiim a vunte sangin a thuk zaw tuan bua a, ahizong a pianzia a ngo pianin a mu le thiampipa in ama ni sali sung koituam tu hi.

²²A meima a beak le thiampipa in ama mi nin in thangsak tu a, phak natna vei ahi hi.

²³Ahizong a meima a beak tuan buale uilut mapawn hi lel a, thiampipa in ama biakna taw kisai mi thiingin thangsak tu hi.

²⁴Mihing khat pawpo mei in kaingin, a sa ngoin ahibuale san le ngo a ki thua le,

²⁵thiampipa in en tu hi. A meima sung multe kaingin, a kiim a vunte sangin a thuk zaw le, mei kakna pan a kipan a luahuai phak natna hi a, thiampipa in tua pa mi nin in thangsak tu hi.

²⁶Ahizong a meima sung multe kaang ngawlin, a kiim a vunte sangin thuk zaw tuan ngawlin, ahizong a ngo pian le thiampipa in ama ni sali sung koituam tu hi.

²⁷Ni sali ni in thiampipa in ama en kik tu a, a meima a beak le phak natna ahikom thiampipa in mi nin in thangsak tu hi.

²⁸Ahizong a meima beak ngawlin, ki lamdang tuan ngawl a, a ngo pian bek ahile a lauhuai phak natna hi ngawl hi. Mei kakna mapawn bek ahikom thiampipa in ama biakna taw kisai mi thiingin thangsak tu hi.



- ²⁹Pa ahizong numei ahizong a lu tung ahibuale a kha ah meima a nei ciang,
- ³⁰thiampipa in en tu hi. A kiim a, a vunte sangin thuk zaw in, a sung a multe engin a mal a no le, tua in a lauhuai phak natna hi a, thiampipa in mi nin in thangsak tu hi.
- ³¹Thiampipa in a et ciang a kiim a, a vunte sangin a meima thuk zaw tuan ngawlin, ahizong ama sung a multe mul dang taw a kibang buale, thiampipa in ama ni sali sung koituam tu hi.
- ³²Thiampipa in ni sali ni in a meima en kik tu a, beak zaw ngawlin a sungah mul eng om ngawlin, a kiim a vunte sangin a thuk zaw tuan buale,
- ³³tua pa in a meima kiim a, multe meet tu hi. Thiampipa in ama ni sali sung koituam tu hi.
- ³⁴Ni sali ni in thiampipa in a meima en kik tu a, a meima beak ngawlin a kiim a vunte sang a thuk zaw tuan buale thiampipa in ama biakna taw kisai mi thiingin thangsak tu hi. Tua pa in a puante silh tu a, ama thiangtho tu hi.
- ³⁵Ahizong mi thiing in a thansak zawkciang a meima a beak le,
- ³⁶thiampipa in en kik tu hi. A meima a beak le, a mul engte et kul nawn ngawl a, tua pa mi nin ahi hi.
- ³⁷Ahizong thiampipa in a meimate beak ngawlin, a sung a multe cidam in po a, a meima a damin a ngaisun le thiampipa in ama biakna taw kisai mi thiingin thangsak tu hi.
- ³⁸Pa ahizong numei ahizong a vun tungah a kaang pawl a om le,
- ³⁹thiampipa in en tu hi. Tua munte a kaang philphel ahile, vun tungah mealhem natu bekin a piang hi a, tua pa biakna taw kisai mi thiing ahi hi.
- ⁴⁰⁻⁴¹Mihing khat a nung ahibuale a maisam a pul hangin tua pa mi nin hi ngawl hi.
- ⁴²Ahizong a lu kolhna ah san le ngo a kithua meima a piang le, tua in a lauhuai phak natna ahi hi.
- ⁴³Thiampipa in en tu a, san le ngo kithua meima a om le,



⁴⁴a lu tungah a lauhuai phak natna vei ahikom thiampipa in ama mi nin in thangsak tu hi.

⁴⁵A lauhuai phak natna a veipa in puan ek silh tu a, a samte pot ngawlin, a mai nuaisang teng sealin, “Mi nin ka hi hi, mi nin ka hi hi!” ci in au tu hi.

⁴⁶Phak natna a vei hun sung mi nin hi a, midangte taw a ki khualana ngiaphual pua sangah teang tu hi.

Ciipawl Natna taw kisai Thukhamte

⁴⁷Samul ahibuale puankaang neal puansilh tungah,

⁴⁸puankaang neal puanbek, ahibuale samul puan, ahibuale savun, ahibuale savun taw kivawt khat pawpo tungah a ciipawl natna a om ciang,

⁴⁹a eng ahibuale a sanin a beak le thiampipa tung lak tu hi.

⁵⁰Thiampipa in en tu a, tua puan ni sali sung koituam tu hi.

⁵¹Thiampipa in ni sali ni ciang en kik tu a, tua ciipawl natna a beak le, tua puan a nin ahi hi.

⁵²Thiampipa in hal tu hi, banghangziam cile a beak thei a lauhuai phak natna ahikom mei taw haltum tu ahi hi.

⁵³Ahizong ama in a ettel ciang, ciipawl natna sia puan tungah kizel ngawlin a mu le,

⁵⁴ama in tua puan a silthiang natu le a dang ni sali sung a koituam natu in thupia tu hi.

⁵⁵Tuaciang ama in en tu a, tua ciipawl natna a pianzia a kilaih buale tua ciipawl natna a kizel bua zong nin veve hi. ciipawl natna omna mun a nung ahizong a mai ahizong mei taw hal tu hi.

⁵⁶Ahizong thiampipa in a et ciang ciipawl natna a thip zo ahile, tua puan ahibuale savun sia tua san tak teng eaukeak tu hi.

⁵⁷Tuaciang ciipawl natna kilangh kikin a kizel kik le, a neipa in tua puan haltum tu hi.



⁵⁸Ama in tua puan silthiang in tua munte a bo ahile, ama in tua puan silthiang kik tu a, biakna taw kisai in a thiang hi tu hi.

⁵⁹Hisia in samul ahibuale puankaang neal puan ahibuale samul puan, savun taw kivawt na khat pawpo tungah a baang ciipawl natna taw kisai zui tu thukhamte ahi hi.

Thiampite 14

Phak natna Nei Zawkciang Thiansuana

¹A lauhuai phak natna pan a dam mihing khat a zeksa thiansua natu in,

²Topa in a nuai a zui tu ngeinate Moses tungah pia hi. Miphaakpa dam hi ci in a kithansak tu ni in, ama thiampipa kungah ki paipui tu a,

³thiampipa in ngiaphual pua sangah ama paipui in en tu hi.

⁴A natna a dam le, thiampipa in biakna taw kisai a thiangtho vacim nii sia cedar thing, khausan, hyssop meangte taw a kipaipui khop natu in thupia tu hi.

⁵Tuaciang thiampipa in vacimte khat ciktui thiang a kidim leibeal khat tungah a thalup natu in thupia tu hi.

⁶Ama in vacim dang khat sia la in a kithat vacim ii chi sungah cedar thing, khausan le hyssop taw, papkhawm tu hi.

⁷Ama in phak natna vei a kithiansua tupa ii tungah sali vei a chi the tu a, tua zawkciang ama thiangtho hi ci in thiampipa in thangsak tu hi. A nungta vacim sia dui sungah tha tu hi.

⁸Tua pa in a puan silh tu a, a multe theampo meetin kibual tu a, tua zawkciang ama biakna taw kisai in mi thiang hi tu hi. Ama ngiaphual sung tum thei tu a, buk pua sangah ama ni sali sung teang tu hi.

⁹Ni sali ni in ama in a sam, a khamul, a mitmul le a taanglai a pum tung mul teng theampo meet kik siat tu a, a puante silthiang in kibual tu a, tuaciang ama biakna taw kisai in a thiangtho hi tu hi.



¹⁰A ni liat ni in kumkhat a pha, a mealhem ngawl tuotalno nii le tuu nu khat olive thau taw kihel anvui pound nga le olive thau hai khat, ama in paipui tu hi.

¹¹Thiampipa in tua pa le biakpiakna vanhte Topa omna Puanbuk kongkha ah paipui tu hi.

¹²Tuaciang thiampipa in sathau hai khat taw tuotal note khat mawmai biakpiakna in pia tu hi. Ama in thiampipa atu in tua vanhte a tuam vilvel letsong in pia tu hi.

¹³Ama in mawmai biakpiak natu le meihal biakpiak natu in nganhing kingawna mun, a thiangthona munah tuuno ngo tu hi. Ama in hi bangin vawt tu hi, banghangziam cile mawphel biakpiakna sia mawmai biakpiakna taw kibangin thiampipa neisa hi a, thiangtho mama hi.

¹⁴Thiampipa in tuuno chi tawm la in, biakna taw kisai a kithiansua pa ii a ziatsang bildawn, a ziatsang khutpi dawn le a ziatsang peangpi dawn noi sak tu hi.

¹⁵Thiampipa in olive thau tawm la in a veisang khutpheap sungah sung tu a,

¹⁶a ziatsang khutme khat a sungah papin, Topa omna ah tua sathau sali vei the tu hi.

¹⁷Ama in a khutpheap sung a om sathau tawm le tuuno chi tawm la in biakna taw kisai mi thiang hi, ci in a kithangsakpa ii a ziatsang bildawn, a ziatsang khutpi, a ziatsang peangpi tungah noai tu hi.

¹⁸A khutpheap sungah a taanglai sathaute tua pa lu tungah thisak tu hi. Tuabangin thiampipa in a zeksa thiansuana vawt tu hi.

¹⁹Tuaciang thiampipa in mawmai biakpiakna pia in a zeksa thiansuana vawt tu hi. Tua zawkciang ama in meihal biakpiak natu in ngan ngo tu a,

²⁰antang biakpiakna taw biaknatau tungah pia tu hi. Hi bangin thiampipa in a zeksa thiansuana vawt tu a, tua pa biakna taw kisai in thiangtho tu hi.



²¹Tua pa zawngin bangma a pia zo buale a kithiansua natu bekin, tuatal khat mawphel biakpiak natu, le thiampipa atu in Topa tungah a tuam vilvel letsongin pia tu hi. Ama in antang biakpiak natu in, olive thau taw a kihel anvui pound nii le olive thau hai khat paipui tu hi.

²²Ama in inn vakhu nii ahibuale ngam vakhu nii zongh keng tu a, mawmai biakpiak natu in khat, le meihal biakpiak natu in khat hi tu hi.

²³A kithiansua ni liat ni in, Puanbuk kongkha ah a om thiampipa kungah tuate paipui tu hi.

²⁴Thiampipa in tuu le olive thau keng tu a, thiampipa atu in a tuam vilvel letsongin pia tu hi.

²⁵Ama in tuu ngo tu a, a chisan tawm la in tua pa ii ziatsang bildawn, a ziatsang khutpi tung le ziatsang peangpi tungah noai tu hi.

²⁶Thiampipa in a veisang khutpheak tungah sathau tawm sung tu a,

²⁷a ziatsang khutme taw Topa omna ah tua sathau sali vei the tu hi.

²⁸Ama in chisan a noina mun tengma ahi, a ziatsang bildawn, a ziatsang khutpi tung le a ziatsang peangpi tungah sathau tawm noai tu hi.

²⁹A khutpheak sungah a taanglai sathau teng sia tua pa lu tungah thisak tu a, hi bangin a zeksa thiansuana vawt tu hi.

³⁰Tuaciang ama in inn vakhu khat ahibuale ngam vakhu khat sia,

³¹mawmai biakpiakna in pia tu a, a dang khat sia meihal biakpiakna in antang biakpiakna taw pia tu hi. Hi bangin thiampipa in a zeksa thiansuana vawt tu hi.

³²Hisia in a lauhuai phak natna vei a ahihang ama kithiansua natu in a kismh biakpiakna a pia zo ngawl sia ii zui tu thukham ahi hi.

Innsung Phak natna

³³Topa in Moses le Aaron tungah,



³⁴inn sungah phak natna a om ciang a nuai a zui tu ngeinate pia hi.(Hite sia Israel mite ii lua tu inTopa ii a piak tu Canaan ngamsung a tum zawkciang a zak tu ngeinate ahi hi.)

³⁵Mihing khat pawpo in a inn sungah a lauhuai phak natna a mu le pai in thiampipa tungah son tu hi.

³⁶Thiampipa in a kiitak huai phak natna enthiang tu a pai maa in innsung vanh theampo a pusua natu in thupia tu a, tua ahibuale innsung vanh teng nin hi, ci kul tu hi. Tuaciang ama sia inn ah pai tu a,

³⁷phak natna sittel tu hi. Tuate in a hingpian ahibuale a sanpian hi a, pang a ne le,

³⁸tua inn nisa li sung tawkalh cip in nusia tu hi.

³⁹Ni sali ni ciang ama heak kikin sittel kik tu hi. Tua phak natna a beak le,

⁴⁰tua phak natna a omna suangte la in khuapi puasang a ninna munah a vawk natu in thiampipa in thupia tu hi.

⁴¹Tua zawkciang ama in innsung pang teng kiatsak tu a, a kiatna vuite khuapi pua sang a ninna ah vawksak tu hi.

⁴²Tuaciang tua suangte a kilaakna munah suang dangte koi kik tu a, a zutna thak taw zut kik tu hi.

⁴³Suangte la in pangte kiat a, za a zut kik zawkciang ciipawl natna tua inn sungah hong om kik veve le,

⁴⁴thiampipa in pai in en tu hi. Tua ciipawl natna a kizel ahile tua inn a nin ahi hi.

⁴⁵Tua inn phel tu a, a suangte, a thingte le a zutnate khua puasang a ninna munah vawk tu hi.

⁴⁶Tua inn taw taw a kikalh laitak mihing khat pawpo a tum sia, nitak dong a nin hi tu hi.

⁴⁷Hi inn sungah mihing khat pawpo a lum ahibuale an a ne sia in ama puante silthiang tu hi.



⁴⁸Pangte zazut zawk, thiampipa in a et ciang ciipawl natna a kimu kik nawn buale, ciipawl natna bothiang zo ahikom ama in biakna taw kisai a thiangtho inn ci in thangsak tu hi.

⁴⁹Inn thiansua natu in ama in vacim nii, cedar thing tawm, khausan le hyssop dawnmeangte paipui tu hi.

⁵⁰Tuithiang koina leibeal tungah ama in vacimte khat ngo tu hi.

⁵¹Tuaciang ama in cedar thing, hyssop, khausan le a nungta vacim paipui in, a kithat vacim chi sung le tuithiang sungah pap tu hi. Tuaciang ama in tua inn sali vei the tu hi.

⁵²Hi bangin vacimchi, tuithiang, a nungta vacim, cedar thing, hyssop le khausante taw ama in inn thiansua tu hi.

⁵³Tuaciang ama in a nungta vacim sia khuapi puasang dui sungah tha tu hi. Hi bangin ama in a zeksa inn thiansuana vawt tu a, biakna taw kisai in inn thiangtho hi tu hi.

⁵⁴Hite ciipawl natnate;

⁵⁵⁻⁵⁶meimate, uilutte ahibuale a kilaw thei meimate, le puan ahibuale innsungah ciipawl natnate taw kisai zui tu thukhamte ahi hi.

⁵⁷Hi zui tu thukhamte in na khat sia nin ziam thiang ziam ci in khenthiang hi.

Thiampite 15

Pum tung pan A nin Pusuakte

¹Topa in Moses le Aaron tungah,

²Israel mite atu in a nuai a zui tu ngeinate pia hi. Pasal khat pawpo a zang pan nai a pai le,

³tawlna ngawlin a luang ahizong, a kikhak ahizong tua nai sia nin hi.

⁴A tona ahibuale a lupna nin hi.

⁵Tua pa lupna a tham pawpo,



⁶ahibuale a tona tungah a to pawpo in a puante silthiang in kibual tu a, ahizong ama nitak dongin nin veve hi.

⁷Nai a neipa a tham pawpo in a puante silthiang in kibual tu a, ahizong ama nitak dongin nin veve hi.

⁸Naai a neipa in biakna taw kisai mi thieng khat pawpo a cil a phii le tua pa sia ama puan teng silthiang in, kibual tu a, ahizong ama nitak dongin nin veve hi.

⁹Nai a neipa tona siphukungh ahibuale tokhum sia nin hi.

¹⁰Hi sia pa tona a tham pawpo nitak dongin minin ahi hi. Hi sia pa tona a pua pawpo in ama puante silthiang in, kibual tu a, ahizong ama nitak dongin nin veve hi.

¹¹Nai a neipa in a khutsil masa ngawlin mihing khat po a tham le tua pa ama puan teng silthiang in kibual tu a, ahizong ama nitak dongin nin veve hi.

¹²Hi sia pa ii a tham leibeal pawpo kisutham tu a, hi sia pa ii a tham thing taw kivawt kuang pawpo kisilthiang tu hi.

¹³Naai a neipa a dam zawkciang ni sali sung ngak tu a, tuaciang a puante silthiang in tuithiang luanna ah kibual tu a, tuaciang ama biakna taw kisai in thiangtho tu hi.

¹⁴A ni liat ni in ama in inn vakhu nii ahibuale ngam vakhu nii Topa omna Puanbuk kongkha ah paipui in thiampipa pia tu hi.

¹⁵Thiampipa in mawmai biakpiakna in khat, meihal biakpiakna in a dang khat pia tu hi. Hi bangin tua pa atu a zeksa thiansuana ama in vawt tu hi.

¹⁶Mihing khat sia a bawtui a pusuak le a pum bupin kibual tu a, ahizong ama nitak dongin nin veve hi.

¹⁷Tua bawtui a taakna puan taw ahibuale savun taw kivawt na khat pawpo sia silthiang tu a, ahizong nitak dongin tua na sia nin veve hi.

¹⁸Pa khat le numei khat numei le pa omkhopna a nei zawkciang a nii in kibual tu a, ahizong amate nitak dongin nin veve hi.



¹⁹Numei khat in a thasim ngeina nin a nei ciang ama ni sali sung nin hi. Tua nu a tham pawpo nitak dongin nin hi.

²⁰Tua numei ii a nin nei sung a tona ahibuale a lupna sia nin hi.

²¹⁻²³Ama lupna ahizong a tona ahizong a tham pawpo in ama puante silthiang in kibual tu a, ahizong nitak dongin ama nin veve hi.

²⁴Pa khat in numei khat a nin nei sungin a ompui le tua pa zongh mi nin suakin, ni sali sung nin a, a lupna zongh nin hi.

²⁵Numei khat thasim a nin nei zawkciang ni tam mama sung a chi a luang le, ahibuale numei nin nei ngei hun sangin a chi luan hun a tam zaw le, nin a nei hunsung teng bangma in a chi luan laiteng tua nu sia nin hi.

²⁶A nin nei hun sungin a lupna le a tona pawpo sia nin hi.

²⁷Tuate a tham pawpo nin a, a puante silthiang in kibual tu a, ahizong ama nitak dongin nin veve hi.

²⁸A chi luang a kan zawkciang ama in ni sali ngak tu a, tuaciang ama biakna taw kisai in thiangtho tu hi.

²⁹A ni liat ni in ama in inn vakhu nii ahibuale ngam vakhu nii Topa omna Puanbuk kongkha ah a om thiampipa kungah paipui tu hi.

³⁰Thiampipa in mawmai biakpiakna in khat le meihal biakpiakna in a dang khat pia tu a, hi bangin ama in tua nu a zeksa kithiansuana vawtsak tu hi.

³¹Israel mite thiantho ngawl na taw kisai in, ngiaphual laizang ah a om Topa omna Puanbuk a nitsak thaak ngawl natu Israel mite tungah son tu in Topa in Moses thupia hi. A ninsak ahile amate kithatlum tu hi.

³²Hite sia a thiangtho ngawl ahi, a zang pan nai a pusuak pa khat ahibuale a bawtui a tee pa khat,

³³numei khat thasim a nin nei hun ahibuale, biakna taw kisai in a thiangtho ngawl numei khat taw khialna a vawt pa ii zui tu ngeinate ahi hi.

Thiampite 16

Kilemna Ni



- ¹Topa tungah a thiang ngawl mei taw biakpiakna a piak ciang a kithat Aaron tapate nii thi zawkciang Topa in Moses paupui hi.
- ²Ama in, “Mun Thiangthobel puankhai nungah a hun lian ciang tum tu in, na u Aaron son in, banghangziam cile tua mun sia Thukham Thingkuang sitna tung meei sungah ka kilakna mun ahi hi. Ka thu a ni buale ama kithatlum tu hi.
- ³Ama mawmai biakpiakna in khuitalno khat le meihal biakpiakna in tuatal khat a paipui zawkciang bek in Mun Thiang Bel ah tum thei tu hi,” ci hi.
- ⁴Tuaciang Topa in a nuai a zui tu ngeinate pia hi. Aaron Mun Thiangthobel ah a pai ma in kibual tu a, thiampi puante ahi; puankaang neal puantual silhin, ngoaipuan tom teang tu a, kawngkhau sawm in dial khim tu hi.
- ⁵Israel huam mihonte in mawmai biakpiak natu in kealtal nii le meihal biakpiak natu in tuatal khat Aaron tungah pia tu hi.
- ⁶Aaron in ama mawna le a innkuanpuite mawna a mai natu in khuital khat biakpiakna in pia tu hi.
- ⁷Tuaciang ama in Topa omna Puanbuk kongkha ah keal nii paipui tu hi.
- ⁸Tua lai ah, “Topa atu” ci a , a kiciamtee suang khat le “Azazel atu” ci in a kiciamtee suang dang khat, suang nii zanghin ama in lai meetang sawk tu hi.
- ⁹Topa atu in meetang taw a teal kealtal khat sia Aaron in mawmai biakpiakna in pia tu hi.
- ¹⁰Azazel atu a kiteal keal sia a nungta in Topa tungah pia tu a, Israel mite mawmai natu in duisung Azazel kungah tha tu hi.
- ¹¹Aaron in ama le a innkuanpuite atu mawmai biakpiakna in khuital a piak ciang,
- ¹²ama in biaknatau pan meikam kuang khat dim le paaknamtui phate khutdim nii la tu a, Mun Thiangthobel ah paipui tu hi.



¹³Tua lai Topa omna munah ama in paaknamtui hal tu a, a khu in Thukham Thingkuang siin sia seal tu a, tua hile ama in tuasia mu ngawl tu a, thi ngawl tu hi.

¹⁴Ama in khuital chi tawm la tu a, a khutme taw a sitna mai teng the in, tuaciang Thukham Thingkuang mai teng sali vei the tu hi.

¹⁵Tua zawkciang, ama in mipite mawmai natu in kealtal ngo tu a, a chite Mun Thiangthobel ah paipui in khuital chi a the bangma, a sitna tung le Thukham Thingkuang mai teng the tu hi.

¹⁶Tuabangin Israel mite ii thiantho ngawl na le mawna panin Mun Thiang Bel sia atu a zeksa thianthosakna vawt tu hi. Biakna taw kisai in a thiangtho ngawl ngiaphual laizang ah tua Puanbuk om ahikom Aaron in Puanbuk sia tuabangin thiansua tu hi.

¹⁷Mun Thiangthobel ah a zeksa thiansuana vawt tu in Aaron a tum pan kipan a pusua kik dong, Puanbuk sungah kuama om ngawl tu hi. Ama atu, a innkuanpuite atu, le Israel mihonpi bup atu zeksa ngeina a vawt zawkciang,

¹⁸meihal biakpiakna pia tu le biaknatau thiangthosak tu in biaknatau ah ama pai tu hi. Ama in khuital chi tawm le kealchi tawm la in biaknatau kingh a kipeena teng noai tu hi.

¹⁹Ama in a khutme taw sachi pawlkhat biaknatau tung sali vei the tu hi. Hi bangin ama in tua biaknatau Israel mite mawna pan thiansua tu a, thiangthosak tu hi.

Mipite Mawna A pua Keal

²⁰Aaron in Mun Thiangthobel le Topa omna Puanbuk sung teng le biaknatau atu in zeksa thianthosakna a vawt zawkciang, Azazel atu a kiteal keal nungta lai sia Topa tungah pia tu hi.

²¹Ama in tua keal lu tungah a khutte nii nga tu a, Israel mite siatna, mawna le langpanna teng pualaak in, tuabangin keal lu tungah suan siat tu hi. Tuaciang tua keal sia tuabang a seam tu, a kisawl pa in dui sungah beng tu hi.



²²Tua keal in kuama om ngawl na dui sungah amate mawna theampo pua in paipui tu hi.

²³Tuaciang Puanbuk sungah Aaron tum tu a, Mun Thiangthobel sung a tum maa in a silh thiampi puan teng suutin tua munah nusia tu hi.

²⁴Ama in mun thiangtho ah kibual tu a, ama puante silh tu hi. Tua zawkciang pusuak in ama mawna le mite mawna teng a mai natu in meihal biakpiakna pia tu hi.

²⁵Ama in mawmai biakpiak natu in nganhing thau sia biaknatau tungah hal tu hi.

²⁶Duisung Azazel kungah keal a tha pa in ngiaphual ah hong cia kik ma in a puan silthiang in kibual tu hi.

²⁷Mawmai biakpiak natu in a kizangh khuita le keal ii chi, mawmai natu in Mun Thiangthobel ah a kipaipui sia ngiaphual pua sangah paipui in kihal tu hi. A vun, a sa le a sungkuate theampo ki hal tu hi.

²⁸A hal pa ngiaphual hong heak kik ma in a puante silthiang in kibual tu hi.

Kilemna Ni Tan tu zia

²⁹A nuai a ngeinate a tawntungin zui tu ahi hi. A tha salina, ni sawm ni in Israel te le a ten khoppui ngamdang mite in an tang tu a, na seam ngawl tu hi.

³⁰Tua ni in amate biakna taw kisai in a thiantho natu in amate mawna theampo a thiangsak tu in zeksa ngeina vawt tu hi.

³¹Tua ni sia a thiangtho mama ni hi tu a, tua ni in an tang tu a, na seam ngawl tu hi. Hi ngeinate a tawntungin zui tu ahi hi.

³²A pa za a laih tu in pha tak kipsakna a kivawtsak le a ki aap sa, Thiampi Saang in zeksa thianthosakna vawt tu hi. Ama in thiampi puante silh tu a,

³³Mun Thiangthobel mun Topa ii omna Puanbuk a taanglai teng, biaknatau, thiampite le mihonpite theampo, thiansua tu in zeksa ngeinate vawt tu hi.



³⁴Hi ngeinate a tawntung zui tu ahi hi. Israel mite mawna theampo thiansua natu in hi zeksa ngeina sia kum khat in khat vei kivawt tu hi. Tuabangin Moses in Topa thupiak bangin seam hi.

Thiampite 17

Chisan ii Thianthona

¹Aaron le a tapate,

²le Israel mihingte theampo tungah a nuai a zui tu ngeinate a piak tu in, Topa in Moses tungah thupia hi.

³⁻⁴Israel te khat in khui ahibuale tuu ahibuale keal ahibuale Topa tungah biakpiakna a piak ciang Topa omna Puanbuk kongbiang sim ngawl mundang ah a ngo le, ngeina susia ahi hi. Ama in chisan luangsak zo ahikom Pathian mihing khat in kingaisun ngawl tu hi.

⁵Hi thupiak ii a cinopna in Israel mite ii ngam sungah a ngaw bul ngannote sia tu in Topa kungah paipui tu cinopna ahi hi. Amate in tu in tua ngannote Puanbuk kongkha ah a om thiampipa kungah paipui tu a, kipawlkhop biakpiakna in ngo tu hi.

⁶Thiampipa in Puanbuk kongkha ah a om biaknatau pangh tengah a chite the tu a, a thau siaTopa ii dik asak ngimnamtui biakna in hal tu hi.

⁷Israel mite in Topatungah thumaan ngawlin, duisung keal doaithe biakna in sa ngo nawn ngawl tu hi. Israel mite in hi ngeina a tawntung zui tu hi.

⁸Israel khat ahibuale a ten khoppui ngamdang mite khat pawpo in meihal biakpiakna ahizong a dang biakpiakna ahizong,

⁹Topatungah biakpiakna a piak ciang Puanbuk kongbiang sim ngawl mundang ah a pia le, Pathian mihing khat in kituat nawn ngawl tu hi.

¹⁰Israel te khat pawpo ahibuale a ten khoppui ngamdang mi khat pawpo in a sungah chi omlai sa a ne le, Topa in ama nungngat tu a, ama mi in sim nawn ngawl tu hi.



¹¹A nungta theampo ii nuntakna sia chi sungah om ahikom mihingte mawmai natu in chi theampo biaknatau tungah a kisun natu Topa thupiak ahi hi. Chisan in nuntakna hi a, mawna teng maisak hi.

¹²Tua ahikom, amate ahizong a ten khoppui ngamdang mite khat pawpo ahizong, a sungah chi omlai sa pawpo a neak ngawl natu in Topa in Israel mite tungah son zo hi.

¹³Israel te khat pawpo ahibuale a ten khoppui ngamdang mi khat pawpo in biakna taw kisai a thiangtho nganhing khat ahibuale vacim khat a man le ama in a chi lei ah bua tu a, lei huh tu hi.

¹⁴A nungta theampo ii nuntakna sia chi sungah om ahikom a sungah chi omlai sa pawpo a neak ngawl natu in, Israel mite tungah Topa in son zo a, a ne pawpo ama mihing in kingaisun nawn ngawl tu hi.

¹⁵Israel te ahibuale ngamdangte khat pawpo in ama thu in a thi nganhing khat ahibuale ngamsa ii a mat khat ii sa a ne le, a puante silthiang in kibual tu a, biakna taw kisai a thiantho mateng nitak dong ngak tu hi.

¹⁶Tuabang a vawt buale a mawna ama in thuak tu hi.

Thiampite 18

A Kikhaam Numei le Pa Omkhopna

¹Topa in Moses tungah,

²Israel mihingte tungah a son tu in, “Keima in Topa na Pathian ka hi hi,

³Na om ngeina uh Egypt ngam mite omziate ahizong ahibuale tu in note kong paipuina Canaan ngamsung a teang mihingte ii omziate ahizong zui heak vun.

⁴Ka thukhamte zui in kong thupiakte seam vun. Keima in Topa na Pathian uh ka hi hi.

⁵Kong piak thukhamte zui vun, tua hile na nuntakna na hu tu uh hi, Keima in Topa ka hi hi,” ci hi.



- ⁶Topa in a nuai a zui tu ngeinate pia hi. Na mealheakte khat pawpo taw numei le pa khialna vawt heak vun.
- ⁷Na nu taw numei le pa khialna vawtin na pa maizum pia heak in. Na nu maizumsak heak in.
- ⁸Na pa zino dangte khat pawpo taw numei le pa khialna vawtin na pa maizumsak heak in.
- ⁹Inn khat sungah khangkhawm na hi uh zong, na hi bua uh zong, na suapuinu ahibuale na suapuisseal nu taw numei le pa khialna vawt heak in.
- ¹⁰Na tunu taw numei le pa khialna vawt heak in, na maizum natu hi tu hi.
- ¹¹Na suapuisseal nu taw numei le pa khialna vawt heak in, ama zongh na suapui ma ahi hi.
- ¹²⁻¹³Na pa suapui ahibuale na nu suapui taw numei le pa khialna vawt heak in.
- ¹⁴Na pa suapuipa ii zi khialpui heak in, ama zongh na nu ma ahi hi.
- ¹⁵Na tapa zi khialpui heak in.
- ¹⁶Na suapuipa zi khialpui heak in.
- ¹⁷Na khialpui nu ii tanu ahibuale a tunu khialpui heak in, na mealheakte ma hi a, chi kinai numei le pa khialna ahi hi.
- ¹⁸Na zi nuntak laiteng na zi tu in na nuphal nu la heak in.
- ¹⁹Numei khat nin a nei laitak ompui heak in, banghangziam cile ama biakna taw kisai in thiangtho ngawl hi.
- ²⁰Ngual zi khialpui heak in, na khialpui le hong biakna taw kisai in nin sak tu hi.
- ²¹Molech doai biakna ah zak tu in na tate khat zongh pia heak in, banghangziam cile tua in Topa Pathian mindai sak tu hi.
- ²²Pa le pa khialna vawt heak in, Pathian in ngaimaw hi.



²³Pa ahizong numei ahizong kuama in nganhing taw khial heak hen, tuabang khialna in biakna taw kisai in nang hong ninsak hi.

²⁴Hi ngamtatnate taw a thiang ngawl kisua tawm heak vun. Hi ngam na thet ma a, a teangsa doai biate in hi bangin amate ki ninsak ahikom Topa in bengkeak a, note theng thei na ahi uh hi.

²⁵Amate ngamtatna in leitangh ninsak ahikom Topa in leitangh daan pia in a tung a, a teang mite leitangh in nialsak hi.

²⁶⁻²⁷Amate in hi bang a kiihuainate taw a leitangh ninsak uh a, ahizong note tuabang na hi buatu uh hi. Note theampo, Israel te ahibuale no taw teang khawm ngamdang mite in Topa thukham le thupiakte na zui tu uh a,

²⁸tua hile note mai ah a teang Pathian he ngawlte leitangh ii a nial bangin, note leitangh in hong nial ngawl tu hi.

²⁹Hi bangza a kiihuai nate a seamte sia Pathian mi khat in kingaisun nawn ngawl tu a hina thu na he uh hi.

³⁰Tuaciang Topa in, “Kong thupiakte zui in note mai a hi leitangh ah a teang masate ii ngamtatnate na zui heak vun a, hi bang khat pawpo vawtna taw na kininsak heak vun. Keima in Topa na Pathian uh ka hi hi,” ci hi.

Thiampite 19

Thianthona le Thutang Thukhamte

¹Topa in Moses tungah,

²Israel mipite tungah hi bangin son in, “Thiangtho vun, banghangziam cile Keima Topa na Pathian thiangtho khi hi.

³Kong thupiak bangin note in na nu le na pa zakta vun a, Sabbath tang vun. Keima in Topa na Pathian ka hi hi.

⁴“Kei hong taisan in milim bia heak vun, thik taw pathiante vawtin bia heak vun. Keima in Topa na Pathian ka hi hi.

⁵Kipawlkhop biakpiak natu in nganhing na ngaw uh ciang kong piaksa ngeinate zui vun, tua hile tua biakpiakna kong saang tu hi.



⁶Sa na ngaw uh sia na ngaw ni ahibuale a zing ciang na ne tu uh hi. Ni thum ni in a taanglai sa pawpo kihal tu hi,

⁷banghangziam cile tua sa in biakna taw kisai in nin a, a ne a om le tua biakpiakna kong saang buatu hi.

⁸Ka tungah hong kipiata a neak manin a thiang nate na dang thawthongte bang suaksak ahikom khialnei suak a, keima mihing khat in kingaisun nawn ngawl tu hi.

⁹“Na lo ante na laak uhciang longi hui ah ante la heak vun, na nusiatsa ante a la tu in pai kik heak vun.

¹⁰Na makngil uh sapit bom ahibuale lei ah a taak sapit ngate tawm kik tu in, pai kik heak vun. Tuata mizawngte le ngamdang mite atu in nusia tavun. Keima inTopa na Pathian ka hi hi.

¹¹“Nguta heak vun a, ngual theam in, leilot thu son heak vun.

¹²Na zui ngawl tu po ka min taw kamciam pia heak vun, tua in ka min daisak hi. Keima in Topa na Pathian ka hi hi.

¹³“Noma meet natu in midangte vanh suddol heak vun. Noma cial sa mihing khat ii thamante, zan khat beak zongh kepsak heak vun.

¹⁴Nangongte haamsiat heak vun a, mittawte lutu natu in a mai ah na khat zongh koi heak vun. Kei hong kiita tavun, Keima in Topa na Pathian ka hi hi.

¹⁵“Thumaan le thutang taw thu khen vun; mizawngte ngum tuan heak vun, ahibuale sumhaute kiita tuan heak vun.

¹⁶Leilot thu sonsawn heak vun a, mihing khat ii nuntakna le thina thu a kison ciang na thuson uh in ama atu a phatuam tu ahile, maan tak son vun. Keima in Topa ka hi hi.

¹⁷“Mihing khat pawpo huatsa heak vun, ahizong ama hangin na khial ngawl natu in ama maw nasa uh le pha tak son zaw vun.

¹⁸Kuama tungah phula heak vun a, kuama ngaimaw heak vun. Noma na ki-it uh bangin na innpaamte it vun. Keima in Topa ka hi hi.



¹⁹“Kong thupiakte zui vun. Inn ah khoai ngannote namdang taw ta neisak heak vun. Lo khat sungah thaici nam nii ciing heak vun. Khau nam nii taw a kitak puan silh heak vun.

²⁰“Mi khat in ama silanu midang khat ii zino tu in zuak tu in kiciam napi a man a nga ma in a silanu khialpui le a nii in thalup tu hi ngawl hi. A silanu ma hi veve lai a, suakta ngawllai ahikom daan piak tu bek ahi hi.

²¹Tua pa in ama khialphel biakpiak natu in ka omna Puanbuk kongbiang ah tuatal khat hong paipui tu a,

²²thiampipa in a khialna teng tua tuatal taw zeksa thiansuana vawt tu a, Pathian in ama khialna maisak tu hi.

²³“Canaan ngam sungah tumin thingkung nam khat pawpo na ciin uh ciang a masa kum thum sung tua thingngate biakna sang pan a thiangtho ngawlin ngaisun vun. Tua hun sungteng tua thingnga ne heak vun.

²⁴A kum lina ciang thingnga theampo, Keima na Topatungah lungdamna lakna in nong aap tu uh hi.

²⁵Ahizong a kum ngana ciang tua thingnga ne thei tu nu hi. Tuabang na hi uhle na thingkungte in nga tam zaw nga tu hi. Keima in Topa na Pathian ka hi hi.

²⁶Chisan a omlai sa ne heak vun. aisaanna tuatuamte zangh heak vun.

²⁷Mithite atu khuangai in na pang samte meet heak vun, ahibuale na khamul meet heak vun,

²⁸ahibuale thulkawng sun heak vun, ahibuale na taksa kiliamsua heak vun. Keima in Topa ka hi hi.

²⁹“Na tanute lawkite biakinn ah pumpi kizuakna taw mindaisak heak vun, a min na daisak uhle pathian dangte maingat na hi tu uh a, ngamsung teng numei le pa paktatna taw kidim tu hi.

³⁰Sabbath tang vun a, keima nong biakna mun upat vun. Keima in Topa ka hi hi.



³¹“Mithisate thaa thu a donghte tungah thu dongh heak vun. Na dongh uhle, note biakna taw kisai in mi nin na hi tu uh hi. Keima in Topa na Pathian ka hi hi.

³²“Khanghaamte zatakna lak vun a, upat vun. Keima hong kiita tavun. Keima in Topa ka hi hi.

³³“Note sungah hong teang ngamdang mite vawtsia heak vun.

³⁴Israel na lawmte na vawt uh bangin vawt vun a, noma na ki it uh bangin amate it vun. Khatvei lai in Egypt ngamah ngamdang mi na hina thu phawk vun. Keima in Topa na Pathian ka hi hi.

³⁵“A man ngawl pikhau, toaisuang le khaikhinte zanghin khatpo theam heak vun.

³⁶A man pikhau, toaisuang le khaikhin zangh vun. Keima in Topa na Pathian ka hi a, Egypt pan kong pusua pui hi.

³⁷Ka thukhamte le kong thupiakte theampo zui vun. Keima in Topa ka hi hi,”
ci hi.

Thiampite 20

Thu ni Ngawlte Daan piakna

¹Topa in Moses tungah,

²Israel mihingte tungah hi bang son in, “Note khat pawpo ahibuale note taw a teang khawm ngamdang mi khat pawpo, Molech pathian biakna in a kizangh tu in a tate a pia pawpo sia, mihonpi in suang taw deanglum tu uh hi.

³Mihing khat pawpo a tate khat Molech tungah a pia le, biakna taw kisai Puanbuk ninsak a, ka min thiangtho siasak ahikom, ka nungngat tu a, ka mi khat in ka ngaisun nawn buatu hi.

⁴Ahizong tua pa ngamtatna mihonpite in awlmawk ngawlin a thatlum bua ahile,



⁵tua pa le a innkuanpuite theampo le Molech doai bia in ka tungah hong thumaan ngawl theampo ka nungngat tu hi. Amate ka mihing in ka ngaisun nawn buatu hi.

⁶“Mithi sa thaate thu a dongh mihingte tungah mihing khat pawpo in thu a dongh le ama ka nungngat tu a, ka mihing khatin ka ngaisun nawn buatu hi.

⁷Thiangtho tavun, banghangziam cile keima in Topana Pathian ka hi hi.

⁸Ka thukhamte zui tavun, banghangziam cile Keima in Topa hi a, kong thiangthosak hi,” ci hi.

⁹Topa in a nuai a zui tu ngeinate pia hi. A nu le a pa a haamsiat peuma kithatlum tu hi. Ama mawna hangin thi tu hi.

¹⁰Mihing khat in Israel a mipui khat ii zi a khialpui le, a nii in kithatlum tu hi.

¹¹Mihing khat in a pa zite khat a khialpui le a pa khuangaisak hi a, a nii in kithatlum tu hi. Amate mawna hangin thi tu hi.

¹²Mihing khat in a tapa zi a khialpui le a nii in kithatlum tu hi. Mealheak kung sung numei le pa khialna vawt ahi ciang amate mawna hangin thi tu hi.

¹³Pa khat in a dang pa khat taw khialna a vawt le a kiihuai ngamtatna hi a, a nii in kithatlum tu hi. Amate mawna hangin thi tu hi.

¹⁴Mihing khat in numei khat le tua nu ii nu a tenpui ahile a thum in kihallum tu hi, banghangziam cile amate in a min daihuai ngamtatnate vawt uh hi. Note sungah hi bang ngamtatnate omsak ngawl tu nu hi.

¹⁵Mihing khat in nganhing taw a khial le, a nii in kithatlum tu hi.

¹⁶Numei khat in nganhing khat khialpui nuamin a hanciam le a nii in kithatlum tu hi. Amate a mawna hangin thi tu hi.

¹⁷Mihing khat in a suapuinu ahibuale a suapuisseal nu a tenpui le, amate huam mipite mai ah a maizumhuai le a thasiat huai in kivawt tu a, mihonpi sung pan kihawlkhia tu hi. A suapuinu khialpui ahikom a khialna a thuak kul hi.

¹⁸Mihing khat in numei khat a nin nei laitak a khialpui le a nii in a huam mihonpi sung pan kihawlkhia tu hi, banghangziam cile biakna sang pan a thiang ngawl thu taw kisai ngeinate paltan ahi hi.

¹⁹Mihing khat in a ni taw a khial le, mealheak kung sung mawna hangin a nii in thuak tu uh hi.

²⁰Mi khat in a pa suapuipa zi taw a khial le, a pa suapuipa khuangaisak hi a, a nii in daan thuak tu a, tasel tu hi.

²¹Mihing khat in a suapuipa zi a tenpui le, tasel in amate thi tu hi. Ama in biakna taw kisai a thiang ngawl na seam hi a, a suapuipa khuangaisak ahi hi.

²²Topa in, “Kong paipuina Canaan leitangh ii note hong nial ngawl natu in ka thukham le ka thupiakte theampo zui vun.

²³Hi ngamsung na tum thei natu in hi ngam pan ka nawkeak doai bia mite ii ngeinate zui heak vun. A ngamtat siatnate kiihuai ka sa hi.

²⁴Ahizong hi ngampha le ngamnuam lua tu in, hong ciam zo ka hi ciang kong pia tu hi. Keima in Topa na Pathian ka hi a, minam dangte sung pan kong tuamkoi zo hi.

²⁵Tua hi a, nganhing le vacimte biakna taw kisai in a thiang le a thiang ngawl na khentel tu uh hi. A nin ahi nganhing le vacimte ne heak vun. Nin hi ka ci sa hi a, na ne uhle a nin hong suaksak tu hi.

²⁶Mi thiangtho na hi tu uh a, keima neisa bek na hi tu uh hi, banghangziam cile keima in Topa ka hi a, ka thiangtho hi. Keima neisa bek na hi thei natu in minam dangte sung pan kong tuamkoi hi.

²⁷Pa ahizong nu ahizong mithisate thaa thu a dongh peuma suang taw kideanglum tu hi. Hi bang a ngamta pawpo ama khialna hangin thi tu hi,” ci hi.

Thiampite 21

Thiampite ii Thianthona



1-3 Aaron suan thiampite tungah a son tu in Topa in Moses thupia a, “Akua thiampi ahizong a nu, a pa, a tapa, a tanu, a suapuinu, a suapuipa le inn ah a om pasal nei ngawl a suapuinu thi in, mithi vuina ah a kihelna taw, mi nin suak ngawl tu hi, a dang mithi vuina ah a kihelna taw biakna taw kisai in minin kisua heak hen.

4 Kiteenna hu in a kinai pui a mealheak te a thi ciang mithi sungah a kihel hu in ama le ama kininsak ngawl tu hi.

5 “Akua thiampi ahizong khuangaina lakna in a sam mun khat zongh meet ngawl tu a, ahibuale a khamul zongh tan ngawlin, ahibuale a ci tung kiliamsua ngawl tu hi.

6 Ama thiangtho tu a, ka min siasak ngawl tu hi. Ama in an taw biakpiakna hong pia tu a, ama thiangtho tu hi.

7 Thiampi khat in pumpi kizuak ngei numei khat, ahibuale ngaknu thiangtho ngawl khat, ahibuale pasal taw kikhen numei khat tenpui ngawl tu hi; thiampipa thiangtho hi.

8 Mite in thiampipa a thiangtho in ngaisun tu hi, banghangziam cile an taw biakpiakna kei tungah hong pia hi. Keima in Topa ka hi hi. Keima ka thiangtho a, ka mite ka thiangthosak hi.

9 Thiampipa tanu in a pumpi a zuak le, a pa maizumsak hi a, ama kihallum tu hi.

10 “A lu tung sathau buak sa le thiampi puan silh tu in a ki aap sa Thiampi Saang khat in khuangaina lakna in a sam pot ngawlin om ngawl tu a, a puante zongh balkeak ngawl tu hi.

11-12 Ama kei tungah hong ki aap sa hi a, a nu a pa tatak thi le zong mithi luang koina inn sungah tumna taw biakna taw kisai mi thiangtho ngawl kisuaksak heak hen a, biakna taw kisai a thiangtho ka Puanbuk nusia in mithi koina inn ah a tum hu in ka Puanbuk ninsak heak hen.

13 Ama in ngaknu thiangtho khat tenpui tu a,



¹⁴meingong ahibuale pasal taw kikhen sa numei, ahibuale pumpi kizuak ngei numei tenpui ngawl tu hi. Ama in amate suante sung pan ngaknu thiangtho khat tenpui tu hi.

¹⁵Tuabang ahibuale a thiangtho tu a kilawm a tate biakna taw kisai in a thiang ngawl suak tu hi. Keima in Topa hi a, ama sia Thiampi Saang suak tu in ka koituam zo hi,” ci hi.

¹⁶Topa in Moses tungah,

¹⁷Aaron tungah hi bangin son in, “Na tu na tate sung pan mealhemna khat pawpo a neite in ka tungah an taw biakpiakna hong pia heak hen. Hi thu in a tawntungin zui tu ahi hi.

¹⁸Pumpi kicing ngawl peuma in biakpiakna pia thei ngawl tu hi, tuate in mittaw, peangbai, mealhem ahibuale khut le peang cing ngawl,

¹⁹khut tal le peangbai te;

²⁰cingkuul ahibuale mihing khansamh te; mit natna nei ahibuale vun natna nei; cil kinget te ahi uh hi.

²¹Thiampi Aaron suan le paal pumpi mealhemte in kei tungah an taw biakpiakna pia thei ngawl tu hi.

²²Tuabang mihing khat in ka tungah hong kipia biakpiakna, a thiangtho biakpiakna le a thiangtho mama biakpiakna ante ne thei tu a,

²³ahizong ama pumpi cing ngawl ahikom biakna taw kisai a thiangtho puankhai kung, pai ngawl tu a, ahibuale biaknatau neak ngawl tu hi. Ama in hi a thiangtho nate ninsak ngawl tu hi, banghangziam cile Keima in Topa ka hi a, amate ka thiangthosak hi,” ci hi.

²⁴Hi thu Moses ii Aaron, Aaron ii tapate le Israel mite theampo tungah a son thu ahi hi.

Thiampite 22

Biakpiakna Vanhte ii Thianthona

¹Aaron le a tapate tungah son tu in,



²Topa in Moses tungah thupia a, “Ka min thiangtho na daisak ngawl natu uh in Israel mite ii ka tungah hong piak biakna taw kisai a thiangtho biakpiakna vanhte ciliap vun. Keima in Topa ka hi hi.

³Na suan na paal khat in biakna taw kisai a thian ngawl laitak, Israel mite ii ka tungah hong piak a thiangtho biakna vanhte kungah hong pai ahile biaknatau ah naseam thei ngei nawn ngawl tu hi. Hi in a tawntung a kizangh tu ahi hi. Keima in Topa ka hi hi.

⁴“Aaron suan le paalte sung pan a phaakte, ahibuale meima naai neite in biakna taw kisai a thiantho mateng a thiangtho biakna ante ne ngawl tu hi. Thiampi khat pawpo in mithiluang taw a kithu hu a, a nin na khat pawpo a tham le, ahibuale a bawtui a tee ahile,

⁵ahibuale a thiang ngawl nganhing, ahibuale mihing a tham le ama thiangtho ngawl hi.

⁶Thiampi khat pawpo a nin ahile nitak dongin ninsuak tu a, a kibual mateng a thiang biakna ante ne thei ngawl tu hi.

⁷Nitum zawkciang ama thiangtho a, tuaciang ama an ahi a thiangtho ante ne thei tu hi.

⁸Ama in, ama thu a thi nganhing sa ahibuale ngamsa ii thalup sate ne ngawl tu hi; tua in ama ninsak tu hi. Keima in Topa ka hi hi.

⁹“Thiampi theampo in kong piak ngeinate zui tu hi. A zui bua ahile amate khial tu a thi tu hi, banghangziam cile amate in biakna taw kisai a thiangtho ngeinate a zui ngawl hang ahi hi. Keima in Topa ka hi a, amate ka thiangthosak hi.

¹⁰“Thiampi innkuanpuite bek in a thiangtho biakna an pawpo ne thei tu a, thiampi taw a omkhawm khat ahizong, ahibuale a thacial khat ahizong khat zongh in ne thei ngawl tu hi.

¹¹Ahizong ama ii sum taw a lei silate ahibuale tualsuak silate in thiampi ii a nga ante ne thei tu hi.



¹²Thiampi khat ii tanu in thiampi ahi ngawl khat a tenpui le a thiangtho biakna ante khat pawpo ne thei ngawl tu hi.

¹³Ahizong thiampi khat ii tanu in a pasal thi in meingong, ahibuale a pasal ii khul, ta nei ngawlin a pa inn ah a cia kik le bel tu dang nei ngawl ahikom a pa ii nga ante ne thei tu hi. Thiampi innkuanpuite bek in hi ante ne thei tu hi.

¹⁴“Thiampi innkuanpui ahi ngawl khat in a thiangtho biakna ante a heak ngawlin a ne tha le ama in thiampipa tungah a man a cingin liau kik tu a, zakhat ciang 20 belap tu hi.

¹⁵Thiampipa in tua ante a ne thei tuteng sim ngawl midang khat po a neaksakna taw,

¹⁶a thiangtho biakna ante ninsak ngawl tu hi. A ninsakte a khial hi a, daan thuak tu hi. Keima in Topa ka hi a, biakpiakna ante ka thiangthosak hi,” ci hi.

¹⁷Topa in

¹⁸Aaron le a tapate le Israel mite theampo ii zui tu in a nuai a ngeinate piak tu in tu in Moses thupia hi. Israel mite khat pawpo in ahibuale amate taw a teangkawm ngamdang mi khat pawpo in meihal biakpiakna a piak ciang, kamciam tangtutna ahizong, thin zawna taw a piak ahizong, a mealhem ngawl nganhing zangh tu hi.

¹⁹A kisaang thei tu in, a mealhem ngawl a tal hi tu hi.

²⁰A mealhem nganno khat po na pia le Topa in saang ngawl tu hi.

²¹Mi khat pawpo in kipawlkhop biakpiakna Topa tungah a piak ciang, kamciam tangtutna, ahibuale thinzawna taw biakpiakna a piak ciang, Topa ii san thei tu in a mealhem ngawl nganhing hi tu hi.

²²Topa tungah a mittaw, a peangbai, a mealhem, meima vei, a phak, a khiik nei meima vei nganhing khat pawpo pia heak vun. Hi bang nganhingte biaknatau ah an biakpiakna in pia heak vun.



²³Thin zaw bang biakpiakna ah a khansamh ahibuale a limci lei ngawl nganhingte pia thei tu nu hi, ahizong kamciam tangtut natu in tuate kisaang ngawl hi.

²⁴Topa tungah a ciltang tam sa, a kinget sa, a kisutham sa, a vun kok sa nganhing khat pawpo pia heak vun. Hite sia na ngam sungah kidei ngawl hi.

²⁵Ngamdang mite tung pan a kinga nganhing taw an biakpiakna pia heak vun. Hi bang nganhingte a sitbaang in kingaisun a, kisaang thei ngawl hi.

²⁶⁻²⁷Khui, tuu, kealte a no a sua ciang ni sali sung a pui taw na khen buatu uh hi, ahizong tua zawkciang an biakpiakna in kisaang thei hi.

²⁸Ni khat sungin khuipui le a no, tuupui le a no, kealpuui le a no, biakpiakna in piakhawm heak vun.

²⁹Topa tungah lungdamko biakpiakna na piak uhciang hong san thei tu in ngeinate zui vun.

³⁰Tua ni in a sa ne in, a zingsang dong bangma khe heak vun.

³¹Topa in, “Ka thupiakte zui vun! Keima in Topa ka hi hi.

³²Ka min thiangtho siasak heak vun. Israel mite theampo in ka thianthona he taken. Keima in Topa ka hi a, note kong thiangthosak hi.

³³Na Pathian ka hi natu in Egypt pan note kong pusuapui hi. Keima inTopa ka hi hi,” ci hi.

Thiampite 23

Biakna Poaite

¹Topa in Moses tungah

²Israel mite biakna pia tu hong kikhop ciang, biakna poaite atu in zui tu a nuai a ngeinate pia hi.

³Ni luk sung noma na seam vun, ahizong ni sali ni sia tawlngakna ni, Sabbath ni ahi phawk vun. Tua ni in naseam heak vun, ahizong biakpiakna vawt tu in kikhawm vun. Koisung po na teang uh zong Sabbath sia Topa neisa ahi hi.



⁴A hun a cin simin a nuai a poaite vawt vun.

Paisan Poai le Tol saw ngawl Anluum Poai

(Ngamsung vakna 28.16-25)

⁵Topa upatna in a kivawt Paisan Poai sia tha masabel ni sawm le ni li ni, nitum ciang kipan hi.

⁶Ni sawm le ni nga ni in Tol saw ngawl Anluum Poai kipan a, ni sali sung tol kisaw anluum peuma na ne buatu uh hi.

⁷Poai sung ni masabel ni in biakna pia tu in na kikhawm tu uh a, kuama in noma na seam ngawl tu nu hi.

⁸Ni sali sung Topa tungah biakpiakna an pia vun. A ni sali ni in biakna pia tu in kikhawm kik vun, ahizong kuama in naseam heak vun.

⁹⁻¹⁰Topa hong piakna ngam thengin an na laak uh ciang anpal lom khat thiampipa pia vun.

¹¹Topa hong saan thei tu in thiampipa in Topa tungah a tuam vilvel biakpiakna in pia tu hi. Sabbath khuavak ni in thiampipa in pia tu hi.

¹²Antang biakpiakna na piak ni in meihal biakpiakna in a mealhem ngawl kum khat a pha tuutal khat zongh na pia tu uh hi.

¹³Tua taw an biakpiakna in olive thau taw a kihel anvui pound li na pia tu uh hi. Hi biakpiakna ii ngim in Topalungdamsak hi. Biakpiakna in zu hai khat zongh pia tu nu hi.

¹⁴Pathian tungah hi biakpiakna na piak uh mateng anthak peuma, a sial hikale, a kan hikale, a em hikale, ne heak vun. Hi ngeina sia na suan le na paalte theampo ii a tawntung a zui tu ngeina ahi hi.

Anlaak Poai

(Ngamsung vakna 28.26-31)

¹⁵Topa tungah anpallom na piak ni, Sabbath khuavak ni pan nipi sali cin dong simto vun.

¹⁶Sabbath sali vei a cin zawk ni sawmnga ni in Topa tungah a dang antang biakpiakna thak pia vun.



¹⁷Innkuan simin anluum lum nii tek keng tu a, a tuam vilvel letsong in Topatungah pia tu hi. Anluum khat sia anvui pound li tol kisaw in a ki em hi tu a, anpalte sungpan biakpiakna an in Topa tungah pia tu nu hi.

¹⁸Tua anluum taw mipite in a mealhem ngawl kum khat a pha, tuuno sali khuital khat le keal nii pia tu uh hi. Tuata Topa tungah meihal biakpiakna in antang biakpiakna le zu biakpiakna taw kipiakhawm tu hi. Hi biakpiakna ii ngim in Topa lungdamsak hi.

¹⁹Mawmai biakpiakna in kealtal khat le kipawlkhop biakpiakna in kum khat a pha tuatal nii zongh pia vun.

²⁰Thiampipa in thiampite atu in Topa tungah a tuam vilvel letsong in anluum sia tuunote nii taw pia tu hi. Hi biakpiaknate thiangtho hi.

²¹Tua ni in kuama in noma na seam heak vun, ahizong biakna pia tu in kikhawm vun. Koisungpo ah na teang uh zong na suan na paalte in hi ngeina a tawntungin zui tu uh hi.

²²Na lo ante na laak uh ciang longi dongin la heak vun a, na nusiak sate at kik tu in pai kik heak vun. Tuata sia mizawngte le ngamdang mite atu in nusia vun. Topa sia na Pathian ahi hi.

Kumthak Poai

(Ngamsung vakna 29.1-6)

²³⁻²⁴A tha salina ni masabel ni sia a tuam vilvel tawlngakna ni in tang vun a, lemle hong kitum ciang biakna pia tu in kikhawm vun.

²⁵Topa tungah biakpiakna ante pia vun a, kuama naseam heak vun.

Kilemna Ni

(Ngamsung vakna 29.7-11)

²⁶⁻²⁷Tha salina ni sawm ni sia mihonpite mawmai natu in kumcin biakna zeksa vawt ni tu ahi hi. Tua ni in bangma ne heak vun a, biakna pia tu pai tekin Topa tungah biakpiakna an pia vun.

²⁸Tua ni in naseam heak vun, banghangziam cile tua ni sia mawna maisak natu biakna zeksa vawtna ni ahi hi.



²⁹Tua ni in an khat pawpo a ne sia, Pathian mihing khatin kingaisun nawn ngawl tu hi.

³⁰Tua ni in na seam a om le Topa ama mama in thatlum tu hi.

³¹Koisung po ah a teang zong hi ngeina sia na suan na paalte theampo atu ahi hi.

³²Tua tha ni kua nitak nitum pan kipan ni sawm ni nitum dong sia a tuam vilvel tawlngakna ni in na tang tu uh a, tua hun sungin bangma na ne buatu uh hi.

Buk Poai

(Ngamsung vakna 29.12-40)

³³⁻³⁴Bukpoai sia tha salina, ni sawm le ni nga ni pan kipan ni sali sung hi tu hi.

³⁵Ni masabel ni in biakna piakhawm vun a, kuama in noma na seam heak vun.

³⁶Ni sali sung nisim in biakpiakna ante na pia tu uh hi. A ni liat ni in a bia tu le an taw biakpiakna pia tu in na kikhawm kik tu uh hi. Tua ni sia biakpiakna ni hi a, kuama na seam ngawl tu nu hi.

³⁷(Hi biakna poaite nisim a kisamh bangin biakpiakna vawt khopna le an taw biakpiakna, meihal biakpiakna, antang biakpiakna, sangaw biakpiakna, le zu biakpiaknate taw Topa upatna biakna te ahi hi.

³⁸Hi poaite Sabbath ngeina belapna hi a, hi biakpiaknate Topatungah na piak tawntung letsongte le kamciamna tangtut biaknate le thinzawna taw biaknate belapna ahi hi.)

³⁹Lo an na laak zawk uhciang, tha salina ni sawm le ni nga ni pan kipan ni sali sung poai khaam tu nu hi. Ni masabel ni sia a tuam vilvel tawlngakna ni hi tu hi.

⁴⁰Tua ni in na thingnga phabelte, palm baakte, thingtee boai baakte, pawlkhat la in Topa na Pathian upatna in biakna poai kipan tu nu hi.



⁴¹Tua poai ni sali sung vawt tu nu hi. Hi ngeina sia na suan na paalte ii a tawntung a zui tu ahi hi.

⁴²Israel mite theampo ni sali sung buk sungah om tu a,

⁴³tua hile Topa in Egypt pan hong pusuapui lai in Israel mite buk sungah hong tensakna thu na suan na paalte in hong he tu uh hi. Ama in Topa na Pathian ahi hi.

⁴⁴Hi bangin Topa upatna in biakna poaite a khaam ciang Israel mite zui tu ngeinate Moses in pia hi.

Thiampite 24

Meivakte Kepna

(Pusuana 27.20-21)

¹Topa in Moses tungah,

²Israel mite in Puanbuk sungah a kivak meite a kidet suak thei natu in olive thau phabelte hong paipui natu thu pia tu in sawl hi.

³Topa omna Mun Thiangthobel sungah a om Thukham Thingkuang mai ah a om puankhai pua sangah meite, nitak sim Aaron in de in, zingsang dong kuangtopsak tu hi. Hi ngeina a tawntung zui tu ahi hi.

⁴Kham ciitak taw kivawt meikhuamte tungah meite Aaron in keamcing tu a, Topa omna ah taang top tu hi.

Pathian tungah A kipia Anluum

⁵Anvui pound kul le li la in, anluum sawm le ni vawt in.

⁶Topaomna kham ciitak taw a kituam sabuai tungah luk veu ngual nii in koi hi.

⁷Anluum taangin Topa tungah a kipia an biakpiakna hi ci, lakna in tua a ngualte tungah paaknamtui thiangtho koi in.

⁸Sabbath nisim, a tawntungin tua anluumte Topa omna ah kikoi tu hi. Hisia in a tawntung Israel te sep tu ahi hi.



⁹Hi anluumte Aaron le a tapate neisa hi a, amate in mun thiangna ah ne tu hi, banghangziam cile thiampite atu in Topa tungah a kipia a thiangtho mama ante ahi hi.

A Maan Daan Piakna zia

¹⁰⁻¹¹A pa Egypte a nu Israel te ahi khat sia Israel te ngiaphual ah pai in Israel te khat taw kihau hi. A nu min sia Shelomith hi a, Dan minam sungpan Dibri tanu ahi hi. A kihau sungin tua pa in Pathian haamsiat ahikom, Moses kungah paipui uh hi.

¹²Tua pa kikhumcip a, bangbang hi tu ci sia Topa ii amate a son tu ngakin om uh hi.

¹³Topa in Moses tungah,

¹⁴“Tua pa ngiaphual pua sangah paipui vun. Pathian a haamsiat lai in a za theampo in khial hi ci lakna in tua pa lu tungah a khutte nga tek tu a, tuaciang Israel mite theampo in suang taw deanglum tu uh hi.

¹⁵Tuaciang Pathian a haamsiat peuma hi bangin thuak tu a,

¹⁶kithatlum tu hi, ci in Israel mite tungah na son tu hi. Israel te khat pawpo ahibuale Israel te sungah a teang ngamdang mi khat pawpo Topa a haamsiat sia mihonpi in suang taw deanglum tu hi.

¹⁷“Mihing khat a that peuma kithat tu hi.

¹⁸Ngual nganno a that peuma in liau kik tu hi. Nuntakna sia nuntakna taw lo tu hi.

¹⁹Mihing khat in midang khat a liamsua le, ama vawt babangin kithuk kik tu hi.

²⁰Ama in ngu a talsak le ama ngu kitalsak tu a, mittang khat a khelsak le ama mittang kikhelsak tu hi. Ha tang khat a tongsak le ama hatang khat kithoksak tu hi. Midang khat a liamsua babang in ama tungah kithuk kik tu hi.

²¹Nganno a that sia in liau tu a, ahizong mihing a that sia kithatlum tu hi.



²²Hi thukham Israel te le note sungah hong teang ngamdang mite theampo ii zui tu ahi hi, banghangziam cile Keima in Topa na Pathian ka hi hi,” ci hi.

²³Hi thu Moses in Israel mite tungah a son zawkciang, tua pa ngiaphual pua sangah paipui in suang taw deanglum uh hi. Topa ii Moses tungah a thupiakte hi bangin Israel mite in vawt uh hi.

Thiampite 25

A Kum Salina

(Thuhil kikna 15.1-11)

¹Topa in Sinai Mual tungah Moses paupui a,

²Israel mite tungah a nuai a zui tu ngeinate pia tu in thupia hi. Topa hong piak tu ngamah na tum uhciang a kum sali kumsim in tua lo thaw ngawl na taw Topana upat tu uh hi.

³Kum luk sung lo na tho tu uh a, na sapit nguite uh pua in, lo an na kaikhawm tu uh hi.

⁴Ahizong a kum salina sia na leitangh ii tawlngak kum hi tu a, Topa tungah a ki aap kum hi tu hi. Tua kumin lo an ciing heak vun a, sapit ngui zongh pua heak vun.

⁵Na lo sungah a lipo ante zongh la ngawlin na pua ngawl sapit ngate zongh lo heak vun. Tua kum sia na leitangh ii tawlngak hiithiat kum ahi hi.

⁶Tua kumin lo a kithaw ngawl hang tua lo in note, na silate, na naseamte, no taw a teangkhawm ngamdang mite,

⁷na ngannote le ngamsate zongh hong vak tu hi. Tua lo pan a piang theampo kine thei tu hi.

Jubilee Kum

⁸Kum sali mun sali vei, a kingawm ciang kum sawmli le kumkua dongin kisim hi.

⁹Tua zawk tha salina, ni sawm ni, Kilemna Ni in ngamsung tengah lemle tum tu in mi khat na paisak tu hi.



¹⁰Hi bangin kum sawmngana kum sia Jubilee kum hi tu a, ngam sungah a teang theampote tungah suatakna thu na thangsak tu uh hi. Tua kum in na zuak sa uh vanhte theampo, a neipa tatak kungah, ahibuale a suan a paalte tungah kilee kik tu hi. Sila in a kizuaksa te zongh a innkuanpuite kungah cia kik tu hi.

¹¹Lo na tho buatu uh a, a lipo ante zongh na la buatu uh hi. Na pua ngawl sapit ngate zongh na lo buatu uh hi.

¹²Tua kumbup note atu in biakna taw kisai in thiangtho tu a, na lo pan a piang tawmte bek taw na kivaak tu uh hi.

¹³Hi kum sungin a kizuaksa na theampo a tote kungah kiheak kiksak siat tu hi.

¹⁴Tua hi a, Israel na mipuite tungah na lo na zuak ciang, ahibuale ama tung pan lo na lei ciang kitheam heak vun.

¹⁵A manh sia Jubilee Kum kik dong hi lo pan kum bangza sung an bangza piang tu cisia tuatin kilei tu hi.

¹⁶A kum a tam le a manh tam tu a, ahizong a kum a tawm le a manh tawm tu hi. banghangziam cile a kizuak lo pan a piang ante tungah kibulphu zaw hi.

¹⁷Israel na mipuite theam heak in a, Topa na Pathian zongh zakta sii in.

A Kum Sali Kum ii Haksatna

¹⁸Hi ngam sungah nuam tak na nuntak thei natu in Topathukhamte le thupiakte theampo zui in.

¹⁹Leitangh pan an hong piang tu a, na du theampo nei in, nuam tak na nungta tu uh hi.

²⁰Ahizong mihing khat po in lothaw ngawl kum, anlaak ngawl kum, a kum sali kumin bang ne tu hi ziam, hong ci om tu hi.

²¹Kum nii sung an na khom thei natu uh in Topa in a kum luk kumin leitangh thupha pia tu hi.



²²A kum liat kumin lo na thaw ciang a kum lukna kumin na laak ante na nei lai tu a, tua kumin na thaw ante na laak dong neak tu na nei tu uh hi.

Vanhte Nga kikna

²³Na leitangh sia a tawntung atu in kizuak ngawl tu hi, banghangziam cile nang neisa hi ngawl a, Pathian neisa ahi hi. Nang sia thaw khuan a nga leangna khat taw na kibang hi.

²⁴Leitangh a kizuak ciang a neipa in a tat kik thei natu thu nei hi.

²⁵Israel te khat zawng a, a leitangh zuak tu a kul le a naibel a bete in tan kik tu hi.

²⁶A tan kik tu mealheak a nei bua a, ama hong hau kikin a tan kik zo tu ahile,

²⁷hi thu ah a lei kik thei ni in Jubilee kum dong tuatin a zuakna pa tungah a manh pia in a lo tan tu hi.

²⁸Ahizong a tat kik natu sum a nei buale Jubilee kum kik dong a leipa khut sungah om tu hi. Tua kum ciang a neipa tungah kipia kik tu hi.

²⁹Mihing khat in kulh taw ki uum khuapi sungah a om inn khat a zuak le, a zuak hun pan kum khat sungteng tan kik thei tu hi.

³⁰Ahizong tua kum sungin a tan kik zo buale tan kik thei nawn ngawl tu a, a inn sia a leipa le a suan le a paalte neisa hi suak tu hi. Jubilee kum ciang zongh in pia kik tuan ngawl tu hi.

³¹Ahizong uumna a nei ngawl khua sungah innte sia duisung innte bangin kingaisun tu a, a neipa in tan kik thei tu a, Jubilee kum ciang kipia kik tu hi.

³²Ahizong Levi suante in khuapi sungah a neisate bang hun po in tat kik thei natu thu nei hi.

³³Hi khuapite khat sung pan inn khat sia Levi khat in zuak a, a tan kik buale Jubilee kum ciang kipia kik tu hi, banghangziam cile khuapi sungah Levite innte sia Israel mite sungah a tawntungin amate neisa ahi hi.

³⁴Ahizong Levi khuapite kiimkot ah nganthana lote kizuak ngei ngawl tu hi. Tuatae sia a tawntung amate neisa ahi hi.



Mizawngte tung Sumpukna

³⁵Na nai a, a teang Israel mipui khat zawngin a kivaak zo buale na nai ah hong ten zom thei natu in na naseampa khat bangin sum na puk tu hi.

³⁶Ama tung pan a meet la ngawlin Pathian kiita in na Israel mipuipa na nai ah teangsak in.

³⁷Sum hong pupa tung pan summeet la heak in a, na anzuakte tung pan a meet la heak in.

³⁸Hi thu sia na Topa Pathian uh ii thu piak ahi hi. Ama na Pathian uh a hi natu le Canaan ngam pia tu in Egypt ngam pan hong pusuapuipa ahi hi.

Silate Suatakna

³⁹Na nai a, a teang Israel na mipui khat zawng mama in sila khat bangin ama le ama hong kizuak le sila nasepte na seamsak buatu hi.

⁴⁰Ama in kuli khat bangin na kungah om tu a, Jubilee kum dong na na seam tu hi.

⁴¹Jubilee kum ciang ama le a tate in nangma hong nusia tu a, a innkuanpuite le a taangpupite ngamah cia tu uh hi.

⁴²Israel mihingte sia Topa ii sila hi a, ama in Egypt pan pusuapui hi; amate sila in kizuak ngawl tu hi.

⁴³Na Pathian kiita vun a, amate vawtsia heak vun.

⁴⁴Sila na kisamh le na kiim a om midangte tung pan lei vun.

⁴⁵Note taw teangkawm ngamdang mite ii tate zongh lei thei tu nu hi. Na ngamsung pan piang tuabang patangte noma neisa hi thei a,

⁴⁶amate na tapate ii lua tu in na pia thei tu a, na tapate ii a nuntak laiteng a na sepsak tu hi. Ahizong Israel na mipuite peuma na zothaw buatu uh hi.

⁴⁷Note taw teangkawm ngamdang mite khat hong hau a, na Israel mipui khat zawngin tua pa tung ahibuale a innkuanpuite khat tungah sila in ama le ama a kizuak le,

⁴⁸a kizuak le, a kizuak zawk hang kitan kik thei lai hi. A suapuite khat,



⁴⁹ahibuale a pano, ahibuale a suapuseal, ahibuale a kinaipui a bete khat pawpo in tan kik thei tu hi. Ahibuale ama mama in sum thalaw in a kitan zo le suakta tu hi.

⁵⁰Ama in a leipa taw kikum tu a, a lei hun a kipan a mai Jubilee kum dong a kum simto in, naseampa a kipia nitha za tuatin ama suatak natu a manh tan tu hi.

⁵¹⁻⁵³Kumsim kuli naseam khat bangin ngaisun in, a taanglai kumte tuatin a leina manhte pia kik tu hi. A Topa in zawkthawk vawt ngawl tu hi.

⁵⁴Hi bang khat pawpo taw a ki suaktasak buale ama le a tate mai Jubilee kum ciang kisuaktasak nanak tu hi.

⁵⁵Israel mi khat sia a tawntungin sila hi thei ngawl tu hi, banghangziam cile Israel mite sia Topa sila hi uh hi. Ama in amate Egypt pan pusuapui a, ama sia Topa amate Pathian ahi hi.

Thiampite 26

Thunit hu in Thuphate
(Thuhil kikna 7.12-24; 12.1-14.)

¹Topa in, “Biak tu in milimte ahibuale khansuangte, suangkhuamte, ahibuale a kiseak suangte vawt heak vun. Keima in Topa na Pathian ka hi hi.

²Biakna poaite vawt vun a Keima nong biakna mun upat vun. Keima in Topa ka hi hi.

³Ka thukham bang nungta in ka thupiakte na zui uhle,

⁴Keima in nguatu hunman in kong pia tu a, tua hile leitangh in an piangsak tu a, thingkungte a nga nga tu hi.

⁵Na lo ante tam mama tu a, sapit ngate law hun dongin lo ante na la lai tu a, thaici tuu kik hun dongin sapit nga na lo lai tu uh hi. Na du theampo na nei tu a, na ngam sungah thin muang takin na teang thei tu uh hi.

⁶“Na ngam sungah kilemma kong pia tu a, kuama kiita ngawlin na mu thei tu uh hi. Na ngamsung pan ngamsa ngilote ka hawlkeak tu a, tua munah ngal le sa om ngawl tu hi.



⁷Na ngalte na zo tu uh hi;

⁸note nga in zakhat na zo thei tu uh a, zakhat in tulsawm na zo thei tu uh hi.

⁹Thupha kong pia tu a, ta tam mama kong pia tu hi. Note taw ka vawt thuciam sia ka tangtungsak tu hi.

¹⁰An tam mama na la tu uh a, kum khat na khom tu uh hi, tuaciang kumlui sung an a taanglai teng anthakte koi natu in ansaal pan na vawk siat tu uh hi.

¹¹A thiangtho ka Puanbuk sungah note taw ka teang tu a, note kong nungngat ngei buatu hi.

¹²Note taw kong om tu a, na Pathian hi in, Keima mi na hi tu uh hi.

¹³Keima in Topa na Pathian ka hi a, sila na hi nawn ngawl natu in Egypt pan kong pusuapui hi. Keima in note hong neng suk vaangte ka sutham zo a, vandak sa in hi vaviau in kong kalsuansak zo hi.

Thunit ngawl hu in Daan piakna

(Thuhil kikna 28.15-68)

¹⁴Topa in, “Ka thu piakte na zui bua uhle daan kong pia tu hi.

¹⁵Note taw ka vawt ka thuciam paltan in, ka thukham le ka thupiakte na nial uhle,

¹⁶note daan kong pia tu hi. Na mit hong tawsak tu le na nuntakna hong kiam sak vangeu tu in note tungah haksatna, a dam thei ngawl natnate le cisa natnate kong tungsak tu hi. Lo na thaw hangin an pha ngawl tu hi, banghangziam cile na ngalte in hong zo in na ciin po hong neaksak tu hi.

¹⁷Kong nungngat tu a, ngal na lel tu uh hi. Hong ngaimaw te in hong uk tu hi. Na patau mama tu uh a, hong del om ngawl napi na tatai tu uh hi.

¹⁸“Hi bang teng zawkciang ka thu nong ni bua veve uhle, na thuak daan a zaa sali in ka khangsak tu hi.

¹⁹Na kiphatsakna ka sutham tu a, nguatui kangin na leitanghte ko in thik bangsak tu hi.



²⁰Hanciam in na nasepna theampo a luithong hi tu hi, banghangziam cile na leitangh pan an piang ngawl tu a, na thingkungte nga nga ngawl tu hi.

²¹“Nong nial veve lai a, ka thu na ni balai uhle, na thuak daan a zaa sali in ka khan kik tu hi.

²²Note sungah a kiitak huai ngamsate kong puak tu a, na tate, na ngannote hong thalupsakin, note tawm bek taanglai in na lampite uh kinusia tu hi.

²³“Hi bang teng daan na thuak zawk uhciang ka thu ngai ngawlin nong nial veve lai uhle,

²⁴a masa lai sangin sali vei nasia zaw daan kong pia tu hi.

²⁵Ih thuciamna na palsat manin daan hong pia tu in na tungah ngal kong tungsak tu hi. Na suatak natu in khuapi sung na zuan zonghin a dam thei ngawl natnate kong tungsak tu a, na ngalte khut sungah na ki aap hamtang uh hong kulsak tu hi.

²⁶Na anneak tu kong khepsak tu a, nupi sawm ii neak tu anluum sia anluum emna khat sung emkhop za bek pha tu hi . Amate in hawm tek tu uh a, a neak zawkciang a ngilkial veve lai tu uh hi.

²⁷“Hi bang teng zawkciang ka thu ni ngawlin nong nial veve lai uhle,

²⁸ka thin uukin a masa na daan thuak uh sangin, a sali vei a nasia zawin daan kong pia tu hi.

²⁹Na ngil uh kial leilam in, na tate sa na ne tu uh hi.

³⁰Mual tungah om na biakna munte ka lalcipsak tu a, ngim namtui halna biaknataute baltham in milim pukte tungah na thiluangte ka lawn tu hi. Thasiat huai takin,

³¹na khuapite ka lalcipsak tu a, na biakna munte sutham in, na biakpiaknate kong saang buatu hi.

³²Na leitangh ka lalcipsak tu a, na ngam a lua na ngalte in lamdang sa tu hi.

³³Ngal kong thengsak tu a, ngamdang ah kong thethaang tu hi. Na leitangh dui suak tu a, na khuapite lalcip in kinusia tu hi.



³⁴⁻³⁵Tuaciang tawlngak hun na piak ngei ngawl na leitangh in nuamsa in a a tawlngak kumte hi tu hi. A kinusia ngam hong suak tu a, na ngalte ngamah sal na tan hun sung teng na leitangh tawlnga tu hi.

³⁶Saltangin a om note kong patausak mama tu a, vui ii seam thingtee nging sia in note hong taisak tu hi. Ngal kisimna ah ngalte ii del bangin na tai tu uh a, na kiim ah ngal om ngawl napi na liik tu uh hi.

³⁷Kuama hong del om ngawl napi kipaltha in na liik tu uh a, ngalte khat zongh na sim zo buatu uh hi.

³⁸Na saltanna ah na thi tu uh a, na ngalte leitangh in hong valhlum tu hi.

³⁹Na ngalte leitangh ah a taanglai sun tawmte zongh noma le na taangpupite mawna hangin na mangthang veve tu uh hi.

⁴⁰“Ahizong na suan na paalte ka thu ngai ngawl a, hong langpante in amate le a taangpupite mawnate pualaak tu uh hi.

⁴¹Amate keima in hong nungngatsak a, a ngalte ngamah salin hong puaksakte ahi uh hi. A khakbel in na suan na paalte a khialna hangin ngimna thuak zo in a kiniamkhiak ciang,

⁴²Jacob, Isaac, le Abraham taw ka thuciamna ka phawk kik tu a, ka mite Canaan ngam piak tu in ka kamciam ka thaksua kik tu hi.

⁴³Ahizong hi ngam a tawlngak hiithiat thei natu in ngamsung mite in a masabel in hi ngam a taisat kul hi. Ka thukham le ka thupiakte nial uh ahikom amate daan ka piak kul hi.

⁴⁴Tuabang ahitazong a ngalte ngam sungah a om hun sung zonghin ka nusia bup buatu a, ka mon buatu hi. Tuabangin that siat thong leng amate taw ka thuciamna bo tu a, Keima in Topaamate Pathian ka hi hi.

⁴⁵Keima in Topa amate Pathian ka hi natu in minam theampo tungah ka vaangletna lakin Egypt ngam pan ka mite ka pusuapui ciang a taangpupite taw ka vawt thuciamna ka thaksua tu hi,” ci hi.



⁴⁶Hi thukhamte le thupiakte theampo sia Israel mihingte atu in Sinai Mual tungah Topa ii Moses tungah a piakte ahi hi .

Thiampite 27

Topa tungah Letsongte Piakzia Thukhamte

¹Topa in Moses tungah,

²Israel mite atu a nuai a zui tu ngeinate pia hi. A tuam vilvel kiciamna khat tangtutna in Topa tungah a pia sa mihing khat sia, a nuai a bangin sumpiakna taw tua pa kisuaktasak tu hi.

³⁻⁷Tua sumte Biakinn toaiteena taw kizui in:

— Pasa ham kum kul pan kum sawmluk dong: nguntang 50

— Numei ham : nguntang 30

— Patang kum nga pan kum kul dong: nguntang 20

— Numeino : nguntang 10

— Nausenpa kum nga nuaisia : nguntang 5

— Nausen numei: nguntang 3

— Pasa kum sawmluk tungsia : nguntang 15

— Nupi kum sawmluk tungsia : nguntang 10

⁸Thuciamna a vawtpa sia zawng mama in a thuciam bangin a pia zo buale ama sia thiampipa kungah kipaipui tu a, thiampipa in a piak zawkza tu in khepsak tu hi.

⁹Thuciamna a vawt sia Topa saan thamman nganno piak tu ahileTopa tungah a kipia letsong theampo biakna taw kisai in a thiangtho hi a,

¹⁰thuciamna a vawtpa in nganno dang taw laih ngawl tu hi. Nganno dang taw a laih in ahile ngannote nii sia Topa neisa hi tu hi.

¹¹Ahizong thuciamna in a piak tu nganno sia biakna taw kisai in a thiang ngawl hi a, Topa ii saan thei ngawl piakna ahile, tua pa in tua nganno sia thiampipa kungah paipui tu hi.



- ¹²Thiampipa in nganno phatna le siatna taw kizui in a manh tan tu a, a tan babangin kip tu hi.
- ¹³Tua pa in a lei kik nuam le, a manh za le tua manh tungah zakhat ciang 20 belap in lei tu hi.
- ¹⁴Mi khat in a inn Topa tungah a aap ciang, thiampipa in a phatna le a siatna zui in a manh tan tu a, a tan babang kip tu hi.
- ¹⁵Tua pa in a inn a lei kik nuam le a manh za le tua manh tungah zakhat ciang 20 belap in pia tu hi.
- ¹⁶Mihing khat in a lo khen khat Topa tungah a aap le, a thai ciin za tungtawnin a manh kitan tu a, mangtaang beam khat ciang nguntang sawm in kituat tu hi.
- ¹⁷Jubilee kum zawk po ciang a lo a aap le, a manh a cingin nga tu hi.
- ¹⁸Jubilee kum zawk pek ciang a aap le, thiampipa in Jubilee kum kik dong a omlai kumte taw kizui in a manh za see tu a, a manh khiam tu hi.
- ¹⁹Mi khat in a aap sa lo a lei kik nuam ahile a lo manh za le tua manh tungah zakhat ciang 20 belap thua in pia tu hi.
- ²⁰Topa tung pan lei kik masa ngawlin mi dang khat tungah a zuak le lei kik theina thu sia a sumh hi tu hi.
- ²¹Mai Jubilee kum a cin ciang tua lo a tawntungin Topa neisa suak tu a, tua lo thiampite in tang tu hi.
- ²²Mihing khat in ama leisa lo Topa tungah a pia le,
- ²³thiampipa in mai Jubilee kum dong a kum tuatin a manh see tu a, a see zaza tua pa in tua ni in pia tu hi. Tua sum teng Topa aa ahi hi.
- ²⁴Jubilee kum a cin ciang tua lo a neiphit pa tungah ahibuale a suan a paalte tungah ki aap kik tu hi.
- ²⁵Biakinn toaiteena taw kizui in na manh theampo a manh kiciangtan tu hi.



²⁶Nganhing taciil peuma Topa neisa hi zo a, a kuama po in thin zaw biakpiakna in Topa tungah aap ngawl tu hi. Khuino, tuuno,le kealnote Topa neisa hi a,

²⁷ahizong a thiang ngawl nganhing ii taciil ahile, a ciangtan za manh le tua manh tung zakhat ciang 20 belapin lei kik tu hi. A lei kik bua ahile tua nganhing sia a ciangtan manh za taw midang khat pawpo tungah kizuak thei hi.

²⁸Topa tungah a aap thiang sitsetsa, mihing, nganhing, ahibuale lo ahizong kuama in zuak kik, lei kik thei ngawl tu hi. A tawntunginTopa neisa ahi hi.

²⁹Mihing ngangawn a ki aap thiang sitset sa te tat kik tu hi ngawl hi. Ama sia kithatlum tu hi.

³⁰Na lo pan a piang an le thingngate sawm a khat Topa neisa ahi hi.

³¹Mi khat in tuate a tan kik nuam le, a manh za le a manh tungah zakhat ciang 20 belap in tan tu hi.

³²Na khoai sa ngannote sawm a khat Topa neisa ahi hi. Na nganno na sim ciang a sawmna nganno siaTopa neisa ahi hi.

³³A neipa in a sim ciang a sawmna nganno sia a tha neambel a teal thei natu in vawt kaltang ngawl tu a, a kitealsa khat theak kik thei ngawl tu hi. A theak kik ahile tua nganhingte nii sia Topa neisa hi tu a, ki lei kik thei ngawl tu hi.

³⁴Hite Israel mite atu in Sinai Mual tungah Topa ii Moses tungah a thupiakte ahi hi.



Ngamsung Vakna

Ngamsung Vakna 1

Israel te A masa bel Mihing phaza a kismna

¹Israel mite Egypt pan a pusua zawk a kum niina, a tha niina ni masa bel ni in, Sinai Senneal ngam Pathian omna Puanbuk sungahTopa in Moses paupui hi. Topa in,

²“ Nangma le Aaron in Israel mite a be a phung le a innkuan tek in misimna nei tu nu hi. Pa a minpiang,

³kum kul le a tungsia ngalkap seam thei tu peuma a min tepteena lai la vun.

⁴Hong hu tu in be khat sung pan ukpi khat veu ngen tavun,” ci hi.

⁵⁻¹⁶Hi mihingte sia hi na seam tu in mihonte sung pan a kiteal minam lampuite ahi uh hi.

Minam	Be le phung ukpi
Reuben	Shedeur tapa Elizur
Simeon	Zurishaddai tapa Shelumiel
Judah	Amminadab tapa Nahshon
Issachar	Zuar tapa Nethanel
Zebulun	Helon tapa Eliab
Ephraim	Ammihub tapa Elishama
Manasseh	Pedahzur tapa Gamiliel
Benjamin	Gideoni tapa Abidan
Dan	Ammishaddai tapa Ahiezer
Asher	Ochran tapa Pagiel
Gad	Deuel tapa Eliasaph
Naphtali	Enan tapa Ahira

Hi pasal sawm le niite amate be le phung tek pan ukpi hi a, misimna ah naseam tu in a kitealte ahi hi.

¹⁷Hi pasal sawm le niite ii huna taw Moses le Aaron in,



¹⁸a tha niina, ni masa bel ni in, a huam mihon bup sam a, a be a phung le innkuan taw kizui in mihing theampo tepteena lai vawt hi.

¹⁹Topa thupiak bangin, kum kul le a tungsia pa peuma, kisimin a min kiciamtee hi. Sinai Senneal ngamah Moses in mihingte min tepteena lai la hi.

²⁰⁻⁴⁶Ngalkap na a seam thei tu kum kul pan a tungsia pa peuma a be a phung le innkuan taw kizui in min kikhum a, Jacob tapa lian bel Reuben minam taw kipan hi. A vekpi in a nuai a bang ahi hi.

Minam	Mihing phaza
Reuben	46,500
Simeon	59,300
Gad	45,650
Judah	74,600
Issachar	54,400
Zebulun	57,400
Ephraim	40,500
Manasseh	32,200
Benjamin	35,400
Dan	62,700
Asher	41,500
Naphtali	53,400
A vekpi:	603,550

⁴⁷Levite sia be dangte min kikhumna ah kihel ngawl hi,

⁴⁸banghangziam cile Topa in Moses tungah,

⁴⁹“Ngalkap na a seam thei tu mihingte na sim ciang, Levi minamte kihelsak heak in.

⁵⁰Ahizong Levite ka omna Puanbuk le tua nate theampo a cing tu in koi in. Amate in Puanbuk le vanhte pua tu uh a, pha takin keamin a ngiaphualte tua Puanbuk kiimah sa tu uh hi.



⁵¹Na ngiaphual na khin simin Levite in Puanbuk phel tu a, ngiaphual thak ah sa kik tu uh hi. Mihing khat pawpo Puanbuk paam ah a pai le kithatlum tu hi.

⁵²A taanglai Israel te in amate tek ii, laandial nuai ah a hon a hon in ngiaphual saat tu uh hi.

⁵³Ahizong kuama in hong neak a, Israel mihonte tungah ka thin hong uksak ngawl natu in, Levite in Puanbuk kiim ah ngiaphual saatin cing tu uh hi,” ci hi.

⁵⁴Tuabangin Topa in Moses tungah a thupiakte theampo Israel mite in seam siat uh hi. .

Ngamsung Vakna 2

Ngaphual sungah Minamte Ngiazia

¹Topa in Moses le Aaron tungah a nuai a bangin thupia hi.

²Israel te in ngiaphual a saat uh ciang amate pawlsung tek le a laandial nuai tek ah om tu uh hi. Puanbuk kiimkot ah ngiaphual saat tu uh hi.

³⁻⁹Nisuana sang, Judah ii laandial nuai ah a omte in a lampuite khut nuai ah a nuai a bangin, a hon a honin ngiaphual saat tu uh hi.

Minam	Lampui	Mihing phaza
Judah	Amminadad tapa Nahshon	74,600
Issachar	Zuar tapa Nethanel	54,400
Zebulun	Helon tapa Eliab	57,400
A vekpi:	186,400	

Judah laandial nuai ah a omte pai masa tu uh hi.

¹⁰⁻¹⁶Thangsang Reuben ii laandial nuai ah a omte in a lampuite khut nuai ah a nuai a bangin, a hon a honin ngiaphual saat tu uh hi:

Minam	Lampui	Mihing phaza
Reuben	Shedeur tapa Elizur	46,500
Simeon	Zurishaddai tapa Shelumiel	59,300



Gad	Deuel tapa Eliasaph	45,650
A vekpi:		151,450

Reuben laandial nuai ah a omte a niina in pai tu uh hi.

17Tuaciang a masa pawl niite le a nungsang pawl niite kilaklaw ah Levi mite in Puanbuk pua in pai tu uh hi. A pawl a pawlin amate laandial nuai tek ah ngiaphual saat in a om bangma in a pai ciang zong tuabang ma in pai tu uh hi.

18-24Nitumna sang, Ephraim ii laandial nuai ah a omte in a lampuite khut nuai ah a nuai a bangin, a hon a hon in ngiaphual saat tu uh hi:

Minam	Lampui	Mihing phaza
Ephraim	Ammihub tapa Elishama	40,500
Manasseh	Pedahzur tapa Gamaliel	32,200
Benjamin	Gideoni tapa Abidan	35,400
A vekpi:		108,100

Ephraim laandial nuai ah a omte a thumna in pai tu uh hi.

25-31Saksang Dan ii laandial nuai ah a omte in a lampuite khut nuai ah a nuai a bangin, a hon a honin ngiaphual saat tu uh hi.

Minam	Lampui	Mihing phaza
Dan	Ammishaddai tapa Ahiezer	62,700
Asher	Ochran tapa Pagiell	41,500
Napthali	Enan tapa Ahira	53,400
A vekpi:		157,600

Dan ii laandial nuai ah a omte a khak belin pai tu uh hi.

32A hon a hon zui in, Israel mite kisim a, a vekpi 603,550 pha hi.

33Moses tungah Topa thupiak sa bangma in Levite sia Israel dangte taw kisim khawm ngawl hi.



³⁴Tuabangin Moses tungah Topa thupiak sa bangma in Israel mite in vawt siat uh hi. Amate sia a laandial nuai tekah ngiakin, tuaciang amate a be le phung zui in pai uh hi. .

Ngamsung Vakna 3

Aaron ii Tapate

¹Hite sia, Topa ii Sinai Mual tungah Moses a paupui hun lai a, Aaron le Moses ii innkuanpuite ahi hi.

²Aaron in tapa li nei a: a tapa lian bel Nadab hi a, Abihu, Eleazar le Ithamarte ahi hi.

³Amate thiampi suak tu in sathau kinoai a, kipsakna a ngate ahi hi.

⁴Ahizong, Nadab le Abihu te Sinai Senneal ngamah a thiangtho ngawl meihal biakna Topa tungah a piak ciang, kithatlum hi. Amate in ta nei ngawl ahikom Aaron nuntak hunsung teng Eleazar le Ithamar in thiampi na seam uh hi.

Levite Thiampite Na Sepsak tu in Panmun Kipia

⁵Topa in Moses tungah,

⁶“ Levi minamte paipui in a, thiampi Aaron ii na seamsak in.

⁷Amate in keima omna Puanbuk atu in a kismhte le thiampite atu le mihonpite atu a kismhte seam tu uh hi.

⁸Amate in Puanbuk sungah a om vanhte keam tu uh a, a taanglai Israel te atu in naseam tu uh hi.

⁹Levi mite ii tavuan sia Aaron le a tapate ii na a sepsak tu bek ahi hi.

¹⁰Thiampi na a seam tu in Aaron le a tapate nasep na pia tu a; midang khat pawpo hi na a seam nuam sia kithatlum tu hi,” ci hi.

¹¹Topa in Moses tungah,

¹²⁻¹³“ Tu in Levi mite keima aa hi tu hi. Egyptte ii ta upa bel theampo ka thalup lai in, Israel te innkuan tek pan tapa lian bel le a ngannote sung pan a suakciil theampo keima atu in ka thiangthosak hi. Tu in Israel mite tapaciilte



taangin Levi mite ka la hi. Levi mite Keima aa hi tu hi, Keima in Topa ka hi hi.” ci hi.

Levi mite Misimna

¹⁴Sinai Senneal ngamah Topa in Moses tungah,

¹⁵Levi mite a innkuan le a be le phung taw kizui in, tha khat pan a tungsia pa peuma min tepteena lai la tu in sawl a,

¹⁶Moses in seam hi.

¹⁷⁻²⁰Levi in tapa thum nei a: Gershon, Kohath le Merari ahi hi. Tuata amate min a pua be le phungte ii taangpupite ahi hi. Gershon in tapa nii nei a: Libni le Shimei ahi hi. Kohath in tapa li nei a; Amram, Izhar, Hebron le Uzziel ahi hi. Merari in tapa nii nei a; Mahli le Mushi ahi hi. Amate sia amate min a pua innkuante ii taangpupite ahi uh hi.

²¹Gershon ii be le phung sia Libni innkuante le Shimei innkuante ahi hi.

²²Tha khat pan a tungsia pa peuma kisim in, a vekpi in 7,500 pha hi.

²³Hi be le phungte nitumna sang Puanbuk nung sangah ngiaphual saat tu a,

²⁴Lael tapa Eliasaph in be le phung ii ukpi seam tu hi.

²⁵Amate in Puanbuk, a sungsang sitna, a puasang sitna, a sung tumna kongbiang puan,

²⁶biaknatau le Puanbuk kiim ah a om puankhaite le a sung tumna kongkha puankhaite tavuan la tu hi. Amate in hi nate taw a kipee aw nasep theampo tavuan la tu uh hi.

²⁷Kohath be le phungte sia Amram innkuante, Izhar innkuante, Hebron innkuante le Uzziel innkuante ahi uh hi,

²⁸Tha khat pan a tungsia pa peuma sazian kila a, a vekpi in 8,600 pha hi.

²⁹Hi be le phungte sia Puanbuk thang sangah ngiaphual saat tu uh a,

³⁰Uzziel ii tapa Elizaphan in be le phung ukpi seam tu hi.



³¹Amate in Thukham Thingkuang, Sabuai, meidetna khuam, biaknataute, Mun Thiangtho ah thiampite ii zak vanhte le Thiangthobel Mun sung tumna ah Puankhaite tavuan la tu uh hi. Amate in hi nate taw a kipee aw nasep theampo tavuan la tu uh hi.

³²Levi mite ii ukpi sia thiampi Aaron tapa Eleazar ahi hi. Ama Mun Thiangtho ah naseamte ukpa ahi hi.

³³Merari be le phung te sia Mahli innkuante le Mushi innkuante hi uh hi.

³⁴Kum khat pan a tungsia pa peuma sazian kila a, a vekpi in 6,200 pha hi.

³⁵Hi be le phungte sia Puanbuksak sangah ngiaphual saat tu uh a, Abihail tapa Zuriel in be le phung ii ukpi seam tu hi.

³⁶Amate in Puanbuk sakna thingte, a zawlte, a khuamte, a tawdapte le a kipeepui theampo tavuan la tu uh hi. Ama te in hi nate taw a kipee aw nasep teampo tavuan la tu uh hi.

³⁷Amate in khuamte, tawdapte, khetphinte le a puasang khaute zongh tavuan la tu uh hi.

³⁸Moses le Aaron le Aaron tapate in nisuana sang Puanbuk mai ah ngiaphual saat tu uh hi. Amate in Israel mipite atu in Mun Thiangtho ah sep tu nasep theampo tavuan la tu uh hi. Mihing khat pawpo tua nasep sep a sawm sia kithatlum tu hi.

³⁹Topa thupiak bangin Moses in Levite tha khat pan a tungsia pa peuma sazian la a, a vekpi in 22,000 pha hi.

Levite in Tapaciilte ii Dinmun La

⁴⁰⁻⁴¹Topa in Moses tungah, “Israel te tapa a suakciil theampo keima aa hi. Tua ahiciang tha khat pan a tungsia Israel te tapa a suakciil theampo min tepteena lai vawt in. Ahizong amate tapa suakciil theampo taangin Levite theampo keima aa ka suaksak hi! Keima inTopa ka hi hi! Tua ban ah nganno taciil theampo taangin Levite ngannote keima aa ka suaksak hi.” ci hi.

⁴²Moses in a thu ni a, tapa suakciil tha khat pan a tungsia theampo sazian la in,



⁴³a vekpi kingawm in 22,273 pha hi.

⁴⁴Topa in Moses tungah,

⁴⁵“Tu in Israel te tapa suakciil theampo taangin Levite keima atu in aap in a, Israel te nganno taciil theampo taangin Levite ii ngannote aap in.

⁴⁶Israel te tapa a suakciilte sia Levite sangin 273 in tam zaw ahikom a vaal tapate lei kik tu ni hi.

⁴⁷Biakbuk ah a kizangh ngeina om bangin tapa khat ciang nguntang nga pia in a,

⁴⁸hi sumte Aaron le a tapate tungah pia in ” ci hi.

⁴⁹Moses in a thu ni a,

⁵⁰nguntang 1,365 la in,

⁵¹Aaron le a tapate tungah pia hi. .

Ngamsung Vakna 4

Levi nam Kohath Be le Phungte Nasepte

¹Topa in Moses tungah,

²Levi nam Kohath be le phungte, a bawng le a innkuan in mi simna vawt tu le,

³Topa omna Puanbuk sungah naseam thei tu kum sawmthum le kum sawmnga kilaklaw pa theampo sazian la tu in sawl hi.

⁴A nasep sia a thiangtho bel nate kihel hi.

⁵Topa in a nuai a bangin thuhilna Moses tungah pia hi. Ngiaphual na phel tu uh hun a tun ciang Aaron le a tapate Puanbuk sungah tum tu a, Thukham Thingkuang mai ah a om puankhai la in tuasia taw tua Thingkuang siin tu uh hi.

⁶Amate in tuasia savun pha khat taw siin tu a, a tung bel ah vancii num puan khat taw siinin, tua zawkciang a zawn natu thingte thun tu uh hi.



- ⁷Topa tungah anluum piakna sabuai tungah amate in vancii puan pha tu a tua tungah pakante, ngim namtui bungte, biakpiakna kuangte le zu biakpiakna thawlte koi tu uh hi. Sabuai tungah anluum om tawntung tu hi.
- ⁸Amate in tuate theampo puansan khat taw siin tu a, savun pha khat taw tuate siin thua in, a zawn natu thingte thun tu uh hi.
- ⁹Amate in vancii puan khat la in, meidetna khuam, taitee, a kuangte le olive thau koina bung theampo siin tu uh hi.
- ¹⁰Amate in tua vanhte theampo savun pha khat sungah tuunin zawn natu thing tungah koi tu hi.
- ¹¹Tua zawkciang amate in vancii puan khat taw kham biaknatau siin tu a tua tungah savun pha khat koi in, tuaciang zawn natu thingte thun tu uh hi.
- ¹²Amate in Mun Thiangtho ah a kizangh vanh theampo la tu a puandum khat taw tuunin savun pha khat a tungah koi in tuaciang zawnna tu thingzawl tungah tuate koi tu uh hi.
- ¹³Amate in sathau a baang vutte biaknatau pan luak tu a, a tungah puan sannum khat pha tu hi.
- ¹⁴Amate in biaknatau nasepna ah a kizangh vanh ahi, meihalna kuang, thikkoai, kawkeau le khut silna kuangte theampo tua tungah koi tu uh hi. Tuaciang amate in savun pha khat tua tungah koi tu uh hi, tuaciang a zawnna molte thun tu uh hi.
- ¹⁵Ngiaphual kiphel tu hun a cin ciang a thiangtho vanhzakte le vanhte theampo Aaron le a tapate in a sit zawkciang a pua tu in Kohath be le phungte hong pai tu uh hi. Kohath be le phungte in a thiangtho vanhte thutha ngawl tu a, a thutha le amate thi tu uh hi. Puanbuk a kikhiin pawpo ciang hite sia Kohath be le phungte ii tavuan ahi hi.
- ¹⁶Puanbuk theampo le meidet tu sathau, paaknamtui, antang biakpiakna, noi sathaute le Topa tungah a ki aap sa puanbuk sungah a om theampo thiampi Aaron tapa Eleazar ii tavuan hi tu hi.



¹⁷Topa in Moses le Aaron tungah,

¹⁸“Kohath ii be le phungte sia

¹⁹hi, biakna taw kisai a thiangtho bel vanhte nai ah paina taw kithatlumsak heak in. Thina taw a kipeal natu in Aaron le a tapate a sungah tumin, mihing simin a sep tu te pia in, a ken tu te son tu uh hi.

²⁰Ahizong Kohath be le phungte puanbuk sungah tumin biakna taw kisai a thiangtho vanhte tua tu in a kithoai thiampite a mu le amate thi tu uh hi,” ci hi.

Levi nam Gershon Be le phungte Nasepte

²¹Topa in Moses tungah,

²²Levi nam Gershon be le phungte a innkuan le a bete taw kizui in mihing simna vawt tu le,

²³Topa omna Puanbuk sungah na a seam thei tu kum sawmthum pan kum sawmnga kilaklaw pa peuma sazian la tu in sawl hi.

²⁴Amate in a nuai a vanhte puak tu tavuan nei uh hi:

²⁵Puanbuk, a sung sitna, a pua sitna, a tung sitna a pha savun, a sung tumna puankhai,

²⁶biaknatau le puanbuk kiimkot ah a om puankhaite le khaute, sungtumna puankhaite le tua nate taw a kipee aw vanhte theampo ahi hi. Amate in hi nate atu a kisamh theampo vawt tu uh hi.

²⁷Aaron le a tapate ii Gershon suante tungah puak tu le sep tu tavuan a piak theampo a sep siat natu in Moses le Aaron in pha takin en tu hi.

²⁸Hite sia Puanbuk sungah a sep tu Gershon be le phungte ii tavuan ahi hi; amate in tua nasepte thiampi Aaron tapa Ithamar ii thupiakna bangin seam tu uh hi.

Levi nam Merari Be le Phungte Nasepte

²⁹Topa in Moses tungah Levi nam Merari be le phung teng a innkuan le a be taw kizui in mihing simna nei tu le,

³⁰Topa omna Puanbuk sungah na a seam thei tu kum sawmthum pan kum sawmnga kilaklaw pa peuma sazian la tu in sawl hi.

³¹Amate in puanbuk ii thingpimte, zawlte, khuamte, le tawdapte,

³²tuaciang khuamte, tawdapte, khetphinte le puanbuk leitual kiim a khaute, tuate taw a kizom nate theampo puak tu tavuan nei uh hi. A puak tu vanhte misimin tavuan tekin nei tu hi.

³³Hite sia Puanbuk sungah Merari be le phungte ii tavuan hi a; amate in thiampi Aaron tapa Ithamar thupiakna bangin seam tu uh hi.

Levite Mihing simna

³⁴⁻⁴⁸Topa thupiakna taw kizui in, Moses, Aaron, le lampuite in Levi minam thumte ahi, Kohath, Gershon, le Merari suan teng a innkuan le a be taw kizui in misimna nei hi. Amate in Topa omna Puanbuk sungah na a seam thei tu kum sawmthum le kum sawmnga kilaklaw pa peuma a innkuan le a be taw kizui in sazian la a, a nuai a bang ahi hi.

Be le phung	Mihing phaza
Kohath	2,750
Gershon	2,630
Merari	3,200
A vekpi in:	8,580

⁴⁹Topa in Moses tungah a thupiak bangin mi simin min sazian kila hi; Topa in Moses tungtawn in a thupiak bangin, a nasep tu le a puak tu tavuante mihing sim tungah kipia hi.

Ngamsung Vakna 5

A Thiangtho ngawl Mihingte

¹Topa in Moses tungah,

²“ A lauhuai phak natna veite ahibuale kaangsung meima neite le mithi luang thamna taw a thiangtho ngawl peuma, ngiaphual pan a hawlkeak natu in Israel mite thupia in.



³Amate sungah ka omna hi ngiaphual, amate in a nitsak ngawl natu in biakna taw kisai a thiangtho ngawl hi mihingte peuma hawlkeak in,” ci hi.

⁴Israel te in thu ni in, tua mihingte ngiaphual pan hawlkeak uh hi.

Sep khial manh Liau Khakna

⁵Topa in Moses tungah,

⁶Israel te atu in a nuai a kihilnate pia hi. Mihing khat pawpo in Topa tungah thumaan ngawlin khat pawpo tungah khialna a vawt ciang

⁷a thuak pa tungah a khialna pualaak in, a khial manh a cingin a piak zawkciang zakhat tungah 20 belap in pia thua tu hi.

⁸Ahizong tua pa thi zo a, a liausum piak natu in mealheak nai a nei bua ahile, tua liausum thiampipa atu in Topatungah kipia tu hi. Hi liausum sia, a khialpa thiansua natu a kizangh tuatal belapna ahi hi.

⁹Israel te ii Topa tungah a tuam vilvel in a piak letsongte zongh tua letsong a saang thiampipa neisa ahi hi.

¹⁰Thiampi a seam pawpo in ama tungah a kipia letsongte tang tu hi.

Pasalte ii Muanlaak Zite Thu

¹¹Topa in Moses tungah,

¹²⁻¹⁴Israel te tungah a nuai a kihilna teng pia tu in sawl hi. Tua thu sia pasal a nei numei in a pasal tungah thumaan ngawl a, pasal dang khat taw khialin ama pumpi ninsak a, a pasal in muang la hi, ahizong a khial laitak a kiman hi ngawl a, tetti zongh om ngawlin a zi zongh in im bikbek ahikom a pasal in thiang takin tel ngawl hi. Tua ahibuale hi thu sia a zi in thumaan ngawl na nei ngei ngawl a, a pasal in muang la thawthong zongh hi thei hi.

¹⁵Hi bang thu khat pawpo a piang le, a pasal in a zi sia thiampipa kungah paipui tu hi. A pasal in biakpiak natu in a kisamh mangtaang vui pound nii keng tu a, ahizong olive thau ahibuale ngim namtui khat pawpo a tungah buak ngawl tu hi, banghangziam cile hi biakpiakna sia a muang la pasal in thumaan thutak a heak nop manin a piak biakpiakna ahi hi.



- ¹⁶Thiampipa in tua numei, mai ah paipui in biaknatau mai ah dingsak tu hi.
- ¹⁷Thiampipa in leibeal sungah tui thiangtho tawm sung tu a, Topa omna Puanbuk sung suat tungah a om leivui tawm la in, tua tui a kha a sua natu a sungah tha tu hi.
- ¹⁸Tuaciang thiampipa in numei ii sam phelsak tu a, tua numei khut sungah biakpiakna anvui koi tu hi. Thiampipa in a khut sungah haamsiatna tuikhaa beal toai tu hi.
- ¹⁹Tuaciang thiampipa in tua numei sia, “ Na pasal na palngul bua ahile hi haamsiatna tui taw na kipeal tu hi.
- ²⁰Ahizong na pasal na palngul ahile,
- ²¹Topa in na min, na mite sungah haamsiatna in nei taken. Topa in na numei thil tonsakin, na ngil puak sak taken.
- ²²Hi tui na ngilsung tumin na ngil tumsakin, na numei thil tonsak hen.” ci in kiciamna vawtsak tu hi. Tua numei in, “ Ka thukim hi; Topa in tuabang vawt taken,” ci tu hi.
- ²³Tuaciang thiampipa in hi haamsiatna teng lai taw at tu a, tua tuikhaa beal sungah sil tu hi.
- ²⁴Tua tui sia numeinu ngil sungah a bot mama natna piangsak tu in a neaksak ma in,
- ²⁵thiampipa in numei nu khut sungah a om biakpiakna anvui sia la tu a, Topa tungah aapin, biaknatau tungah koi tu hi.
- ²⁶Tuaciang biakpiakna ah kipia hi cina in thiampipa in anvui khutdim khat la tu a, biaknatau tungah hal tu hi. A khak bel in tua tui numei in nesak tu hi.
- ²⁷Tua numei in a pasal a palngul le tua tui in a bot mama natna piangsak tu a; a ngil tumin, a numei thil ton tu hi. A min sia a mite sungah haamsiatna suak tu hi.
- ²⁸Ahizong tua nu a khial buale bangma tat ngawl tu a, nau nei thei tu hi.



29-30 Hi thu sia pasal khat in muanmawk thu taw ka zi in hong palngul hi, ci in muan laakna a nei ciang zak tu thu meilet ahi hi. Tua numei sia biaknatau mai ah kidingsak tu a, thiampipa in hi zeksa teng seam tu hi.

31 Hi khialna pan a pasal suakta tu a, ahizong tua numei a khial le a khialna thaman thuak tu hi. .

Ngamsung Vakna 6

Nazirite te atu Ngeina

1 Topa in Moses tungah,

2 a nuai a kihilnate Israel mite tungah piak tu in thupia hi. Pa ahizong numei ahizong Nazirite mi suak tu khi hi, ci in kiciamna nei a, Topa tungah a ki aap sia in

3 zu le kham thei ngui theite ten tu hi. Ama in sapit nga taw a kivawt bangma ne ngawl tu a, ahibuale sapit nga sia a hingin ahizong a ko in ahizong ne ngawl tu hi.

4 Ama in Nazirite ahi hun sungin sapit kung pan a nga peuma a mu ahibuale a nga le a haw dong ciangin ne ngawl tu hi.

5 Ama in Nazirite kiciamna nuai ah a om hun sung theampo a sam meet ngawl tu a, a mul meet ngawl tu hi. Ama Topa tungah a kipiak hun a cin dong kiciamna in heencip ahikom a sam le a khamul hoai tu hi.

6-7 Ama sam Pathian tungah ki aapna lim hi a, tua ahi ciang ama le ama a ki nitsak ngawl natu in mithi luang kung, a nu a pa, a suapuite luang ahi hial zong neak ngawl tu hi.

8 Ama in Nazirite ahi hun sung Topa tungah kipumpiak ahi hi.

9 Thakhat thu in a thi pa ii kungah a om hu in Nazirite pa in a ki aap ama sam a ninsak le ama in ni sali sung ngak tu a, tua zawkciang a sam le a khamul meetin, tuabangin ama a thiangtho suak tu hi.

10 Ni liat ni in ama in Topa omna Puanbuk sung tumna thiampipa kungah inn vakhu nii ahi buale ngam vakhu nii paipui tu hi.



¹¹Thiampipa in khat sia mawphel biakpiakna in zangh tu a, a dang khat sia meihal biakpiakna in pia tu hi. Mithi luang tham ahikom ama thiantho natu in thiampipa in tuabangin a zeksa teng vawtsak tu hi. Tua ni ma in, ama in a sam thiangthosak kik tu a,

¹²Nazirite ahi natu in Topa tungah ki aap kik tu hi. A masa hunte kisimsak ngawl tu hi, banghangziam cile a ki aap ama sam sia ninsak hi. Ama in, khialphel biakpiakna in kum khat a pha tuu khat keng tu hi.

¹³Nazirite hina kiciam hun a cin ciang ama in zui tu zeksa ngeina om bangin vawt tu hi. Ama in Puanbuk tumna ah pai in,

¹⁴a mealhem ngawl nganhing thum Topa pia tu hi, meihal biakpiakna in kum khat a pha tuutalno khat, mawphel biakpiakna in kum khat a pha tuula khat, kipawlkhop biakpiakna in tuutal khat hi tu hi.

¹⁵Ama in tol saw ngawl anluum law khat zongh pia tu hi; olive thau taw kihel in a vawt a saa anluumte, olive thau kinoai in a paa in kivawt anluumte a kisamh antang le zu taw biakpiaknate ahi hi.

¹⁶Thiampipa in tua letsong theampo Topa kungah paipui tu a, mawphel biakpiakna le meihal biakpiakna pia tu hi.

¹⁷Ama in kipawlkhop biakpiakna in Topa tungah tuutal le anluum law khat pia tu hi. Ama in antang le zu biakpiakna zongh pia tu hi.

¹⁸Puanbuk tumna ah Nazirite in a sam meet tu a, kipawlkhop biakpiakna kihalna mei sungah a sam hal tu hi.

¹⁹Tuaciang thiampipa in a kihuan tuutal liang la tu a, a saa a kivawt anluum khat le a paa a kivawt anluum law sung a sia taw Nazirite khut sungah piakhawm tu hi.

²⁰Tua zawkciang thiampipa in tuate Topa tungah a tuam vilvel letsong in pia tu hi. Tuate thiampipa atu in a thiangtho letsong hi a, ngeina om bangin thiampipa tan tu in tuutal pheii le a awmsa belapna ahi hi. Tua zawkciang Nazirite in zu ne thei tu hi.



²¹Hite Nazirite mite zui tu ngeina hi a; ahizong Nazirite khat in a kulza sangin a tam zaw piak tu in kiciamna a nei le ama kamciam piak bang linlian in cingsak hamtang tu hi.

Thiampi ii thupha Piakna

²²Topa in Moses tungah,

²³Aaron le a tapate in Israel mihingte thupha a piak ciang a nuai a kammalte a zak natu son tu in thupia hi:

²⁴Topa in note thupha hong pia in, hong keamcing taken;

²⁵Topa in no tungah dikna le cikna hong nei taken;

²⁶Topa in note maipha hong pia in, thinnopna hong pia taken;

²⁷Tuaciang Topa in, “ Amate in Israel mite tungah thupha piakna in ka min a lo le, keima in amate thupha ka pia tu hi,” ci hi. .

Ngamsung Vakna 7

Lampuite ii Piaknate

¹Moses in Topa omna Puanbuksak a man ni in, ama in Puanbuk le a vanhte theampo le biaknatau le a vanhte theampo, sathau noai in Topa tungah aap hi.

²Tuaciang Israel minam sung pan be le phung ukpi ahi lampuite, misimna ukte in,

³Topa tungah a biakpiaknate paipui uh hi; tuate leang luk le khuita sawm le ni hi a, lampui nii atu in leang khat le lampui khat atu in khuita khat ahi hi. Amate in tuate a piak siat zawkciang,

⁴Topa in Moses tungah,

⁵“Puanbuk atu, nasepna ah zak tu in hi letsongte saang in a, amate nasepna taw kizui in Levi mite tungah pia in,” ci hi.

⁶Tuaciang Moses in leangte le khuitalte Levite tungah pia hi.

⁷Ama in leang nii le khuita lite Gershonte tungah pia a,



⁸leang lite le khuita liatte Merarite tungah pia hi. Amate ii nasep theampo Aaron tapa Ithamar ukna nuai ah kiseam tu hi.

⁹Ahizong Moses in Kohathte tungah leangte le khuitalte pia ngawl hi, banghangziam cile amate ii kepcing a thiangtho vanhte a liangko tungah a puak tu a kul hang ahi hi.

¹⁰Biakta aapna vawt natu in lampuite zongh in biakpiakna paipui uh hi. Amate in a letsongte biaknatau ah pia tu in a kingin ciang,

¹¹Topa in Moses tungah,“ Biakta aap natu in, lampuite khat in a letsongte nisim khat veu, nisawm le ni nii hun sung pia tu hi ci in amate son in,” ci hi.

¹²⁻⁸³Amate in piakkhatnate a nuai a bangin pia uh hi:

A ni	Minam	Lampui
Ni 1 ni	Judah	Amminadab ii tapa Nahshon
Ni 2 ni	Issachar	Zuar ii tapa Nethanel
Ni 3 ni	Zebulun	Helon ii tapa Eliab
Ni 4 ni	Reuben	Shedeur ii tapa Elizur
Ni 5 ni	Simeon	Zurishaddai ii tapa Shelumiel
Ni 6 ni	Gad	Deuel ii tapa Eliasaph
Ni 7 ni	Ephraim	Ammihud ii tapa Elishama
Ni 8 ni	Manasseh	Pedahzur ii tapa Gamaliel
Ni 9 ni	Benjamin	Gedeoni ii tapa Abidan
Ni 10 ni	Dan	Ammishaddai ii tapa Ahiezer
Ni 11 ni	Asher	Ochran ii tapa Pagiell
Ni 12 ni	Naphtali	Enan ii tapa Ahira

Lampui khat sim ii a piakte kibang siat hi, antang biakpiakna tu in biakinn ah a kizangh toaiteena taw a kitee, ounce 50 a ngit ngun hai khat le ounce 30 a ngit ngun kuang khat; paaknamtui taw a kidim ounce 4 a ngit kham pakan khat; meihal biakpiakna tu in khuita moi khat, tuatal khat le kum khat a pha tuuno khat, mawphel biakpiakna tu in keal khat le kipawlkhop biakpiakna tu in khuita nii, tuatal nga, keal nga, le kum khat a pha tuuno nga tek ahi hi.



84-88 Lampui sawm le niite ii biaknatau aap natu a, a paipui biakpiaknate a vekpi in a nuai a bang ahi hi. - Ngunhai 12 le ngun kuang 12 a kingawm in pound 60 ngit hi. - Paaknamtui taw kidim kham pakan 12 hi a, a kingawm in 48 ounce ngit hi. - Meihal biakpiak natu in khuita 12, tuuta 12, le kum khat a pha tuuno 12, tua zawkciang tuate taw piakkhop tu antang biakpiaknate, - Mawphel biakpiak natu in keal 12, - Kipawlkhop biakpiak natu in khuita 24, tuuta 60, keal 60, kum khat a pha tuuno 60.

89 Topa taw kipaupui tu in Puanbuk sungah Moses a tum ciang, Thukham Thingkuang sitna tungah a om Cherubim niite kilaklaw pan a paupui Topa aw ama in za hi. .

Ngamsung Vakna 8

Meiinnte Koi

1 Topa in Moses tungah,

2 “ Aaron tungah meinn salite meikhuam tungah a koi ciang maisang a taang tu in koi taken ci in son in.” ci hi.

3 Aaron in a ci bangin a thu ni a, meikhuam maisang maingatin meiinnte koi hi.

4 Topa in Moses tungah a lak sa pianzia bangin tua meikhuam a dawn pan a bul dong a kiseaktham kham taw kivawt hi.

Levite Thianthosakna le Aapna

5 Topa in Moses tungah,

6 “Levite sia Israel mipite taw khien in a, hi bangin thiansua in:

7 thiansuana tui amate tungah the in a, a pum tung multe meet hen a, a puante silh uh hen. Tua hile amate thiangtho tu uh hi.

8 Tuaciang amate in khuita moi khat le antang biakpiak natu a, a kisamh olive thau taw kihel anvuite keng tu uh a, nangma in mawphel biakpiak natu in a dang khuita khat na keng tu hi.



⁹Tuaciang Israel huam mihon bup khawm in a, ka omna Puanbuk mai ah Levite dingsak in.

¹⁰Israel mite in Levite lu tungah a khut uh nga tu a,

¹¹tuaciang Levite in ka na a sep thei natu in Israel te tung pan a tuam vilvel letsong bangin Levi mite Aaron in keima tungah hong aap tu hi.

¹²Levite in khuital niite lu tungah a khut uh nga tu uh a, Levite thiansua na vawt natu in, khui khat mawphel biakpiakna in kipia tu a, a dang khat sia meihal biakpiakna in kipia tu hi.

¹³“ Levite kei tungah a tuam vilvel letsong in hong aap tan a, Aaron le a tapate in amate uksak in.

¹⁴Levite sia keima aa a hi tu in Israel huam mihonte sung pan tuam koi in.

¹⁵Levite thiansua in aapna na vawt zawkciang, amate Puanbuk sungah naseam tu in a kilawmte suak tu hi.

¹⁶Israel te tapa suakciil theampo te ii dinmun ah amate ka khap sa hi a, amate keima bek ii neisa ahi hi.

¹⁷Egypt ah taciil theampo ka thalup lai in, Israel innkuan sim ii tapa lian bel tek le a nganhing taciil theampo keima neisa in ka tuam koi hi.

¹⁸Tu in keima in Levite sia Israel te taciil theampo taangin ka la hi.

¹⁹Puanbuk sungah Israel te atu in naseam tu le Mun Thiangtho ah Israel te in hong neak a, ngimna a thuak thaak ngawl natu in a keam tu in, Israel te sung pan letsong ahi Levite Aaron le a tapate tungah ka pia hi.” ci hi.

²⁰Tuaciang Topa in Moses a thupiak bangin, Moses, Aaron le Israel mihingte theampo in Pathian tungah Levite aap uh hi.

²¹Levite amate le amate kithiansua in, a puante uh silthiang in, tuaciang Aaron in Topa tungah amate a tuam vilvel letsong in aap hi. Aaron in amate atu in kithiansuana ngeina zongh vawtsak hi.



²²Levi mite taw kisai, Topa ii Moses tungah a thupiak theampo mipite in vawt siat hi. Tua hi a, Levi mite Aaron le a tapate khut nuai ah Puanbuk sung naseam tu in a kilawm ka suaksak hi.

²³Topa in Moses tungah,

²⁴“Levite a misim in kum kul le kum nga a phak pan kipan keima omna Puanbuk sungah naseam tu uh a,

²⁵kum sawmnga a cin ciang tawInga tu uh hi.

²⁶Tua zawkciang ama in Puanbuk sungah a lawm Levi mipuite ii nasep hu tu hi, ahizong ama tatak in seam nawn ngawl tu hi. Hi bangin Levite ii nasep tu teng vaihawmsak tu ni hi.” ci hi. .

Ngamsung Vakna 9

Paisan Poai A nii veina

¹Israel mite Egypt a nusiat zawk a kum niina, tha masa bel in Sinai Senneal ngamah Topa in Moses paupui hi.

²⁻³Ama in,“ Israel mite in sep tu le zui tu ngeina om bangin tu tha sawm le li ni, ni tum ciang kipan in Paisan Poai vawt tu uh hi.” ci hi.

⁴Tuabangin, Moses in mihingte tungah Paisan Poai vawt tu son a,

⁵amate in Sinai Senneal ngamah tha masa bel ni sawm le ni li ni nitak in, poai vawt uh hi.Topa in Moses tungah a thupiak bangin mihingte in vawt tu teng vawt siat uh hi.

⁶Ahizong mihing pawlkhatte mithi luang tham a, thiangtho ngawl ahikom tua ni Paisan Poai ah kihel thei ngawl uh hi. Amate in Moses le Aaron kungah pai a,

⁷“Kote in mithi luang thamin, ka thiangtho bua uh hi. Ahizong Israel te ii Topa tungah biakpiakna a nei ciang banghang hong kihelsak ngawl nu ziam? ” ci uh hi.

⁸Moses in,“Topa tung pan sawlna thu ka nga dong ngak zii vun,” ci in zo hi.

⁹Topa in Moses tungah,



¹⁰Israel mite tungah son tu in, “Note khat po na hi uh zong, na tu na tate ahizong mithi luang a tham hu in thiangtho ngawlin om a, ahibuale khual khuala haw ahizong, Paisan Poai a siim nuam veve le,

¹¹tha khat zawkciang, a tha niina ni sawm le ni li ni, nitak in poai vawt thei tu nu hi. Tol saw ngawl anluum le a kha me taw poai vawt vun.

¹²Zingsang dongin anvaal koi heak vun a, a kingo nganhing ngu khat zongh thiaktan heak vun. Zui tu ngeina om bangin Paisan Poai vawt vun.

¹³Ahizong mihing khat po in thiangtho napi a, khual zongh haw ngawl napi Paisan Poai a vawt bua ahile ka mihing khat in kingaisun nawn ngawl tu hi, banghangziam cile a hunin ama in ka tungah biakpiakna hong piak ngawl hang ahi hi. Ama in a khialna hu in thuak tu hi.

¹⁴“Note sungah ngamdang mi khat in Paisan Poai a vawt nuam ahile sep tu le zui tu ngeina om bangin vawt tu hi. Ngamdang mi hi kale ngamsung mi hi kale a kibangin ngeina kibang zakkhop tu ahi hi.” ci in sawl hi.

A Vaangtaang Meei

(Pusuana 40.34-38)

¹⁵⁻¹⁶Topa omna Puanbuk a kisak ni in, meeikaai in, Puanbuk tuamcip hi. Zan in tua meei sia mei bangin taang hi.

¹⁷Puanbuk tung pan meei a kilaak to ciang Israel te in Puanbuk phel a, meei a kaaina munah Puanbuk sa kik uh hi.

¹⁸Topa thupiak bangin mite in ngiaphual phelin, ama thupiak bangin ngiaphual saat uh hi. Puanbuk tungah meei a kaai laiteng tua ngiaphual ma ah amate taam uh hi.

¹⁹Ni tam mama sung Puanbuk tungah meei a kaai ciang amate in Topa thu ni in kikkiin ngawl uh hi.

²⁰Khat vevei ni tawmvei sung bek Puanbuk tungah meei kaai a, bangbang po hi kale Topathupiakna bangin amate taam ahibuale kikkiin uh hi.

²¹Khat vevei nitak pan zingsang dong bek meeikaai a, meei a kikkiin po ciang amate kikkiin uh hi. Meei a kikkiin hun pawpo in amate kikkiin uh hi.



²²Ni nii ahizong, tha khat ahizong, kum khat ahizong, khuangei zaw ahizong, Puanbuk tungah meei a kaai laiteng, amate zongh kikhiin ngawl hi, ahizong meei a kikhiin ciang amate kikhiin uh hi.

²³Topa in Moses tungtawn a, a thupiak bang ni in, amate in ngiaphual saatin ngiaphual phel uh hi. .

Ngamsung Vakna 10

Ngun Lemlete

¹Topa in Moses tungah,

²“Mipite kikhop tu sapna le ngiaphual kikhiin natu zaaksakna a zak tu in sek taw a kiseak peak ngun taw lemle nii vawt in.

³Lemlete nii, awsau in a kitum ciang keima omna Puanbuk tumna, kongbiang nangma kiimkot ah mihonpi kikhawm tu uh hi.

⁴Ahizong lemle khat bek a kitum le be le phung pan lampui teng bek nangma kiimkot ah kikhawm tu uh hi.

⁵Lemlete a aw tawngin a kitum ciang nisuana sangah ngiaphual a saat minamte kikhiin tu uh hi.

⁶Lemlete a aw tawngin nii veina a kitum ciang thangsang a om minamte kikhiin tu uh hi. Ngiaphual phel natu in lemle aw tawng mama in kitum tu a,

⁷ahizong mihonpi kikhop natu ahile aw sau in kitum tu hi.

⁸Aaron tapa thiampite in lemlete tum tu uh hi. “A nuai a ngeina sia a tawntung zui tu ahi hi.

⁹Na ngam sungah ngal hong om ciang, no hong sim na ngalte do tu in ngal lemle na tum tu uh hi. Keima, Topa na Pathian in kong hu tu a, na ngalte khut sung pan kong suatak tu hi.

¹⁰Lungdam hun, na Thadet Poaite le a dang na biakpiakna poaite ah meihal biakpiakna le kipawlkhop biakpiaknate na piak uh ciang lemlete tum tu nu hi. Tuaciang nang kong hu tu hi. Keima in Topa na Pathian ka hi hi.” ci hi.

Israel te a Ngiaphual Khiin.



- 11**A mipite Egypt ngam a nusiawt zawk a kum niina, a ni kul ni in, Topa omna Puanbuk tung pan meei kikhin a,
- 12**Israel te a khualhawna kipan in Sinai Senneal ngam nusia uh hi. Tua meei sia Paran dui sungah tawnga hi.
- 13**Moses tungtawn a, Topa thupiak bangin amate din kipan a,
- 14**a kikhin simin, tua a thupiak bangin ngamta uh hi. Judah minamte lampuina laandial nuai ah a omte Amminadab tapa Nahshon lampuina taw a hon a honin pai masa uh hi.
- 15**Zuar ii tapa Nethanel in Issachar namte uk a,
- 16**Helon ii tapa Eliab in Zebulun namte uk hi.
- 17**Tuaciang Puanbuk phelin Gershon le Merari be le phungte in pua in ding uh hi.
- 18**A zom ah, pawlkhenna laandial nuai ah a om Reuben namte Sheduer ii tapa Elizur lampuina taw a hon a hon in pai uh hi.
- 19**Zurishaddai ii tapa Shelumiel in Simeon namte uk a,
- 20**Deuel ii tapa Elisaph in Gad namte uk hi.
- 21**Tuaciang Levi nam Kohath be le phungte in biakna taw kisai a thiangtho vanhte pua in ding uh hi. Amate Ngiaphual kik tu a thet hunin, Puanbuksaksa in om tu hi.
- 22**A zom ah pawlkhenna laandial nuai ah a om Ephraim namte Ammihud ii tapa Elishama thupiakna taw a hon a hon in pai uh hi.
- 23**Pedahzur ii tapa Gamiliel in Manasseh namte uk a,
- 24**Gideoni ii tapa Abidan in Benjamin namte uk hi.
- 25**A khak bel in pawlkhenna laandial nuai ah a om Dan namte mihonte a vaihuai tu in Ammishaddai ii tapa Ahiezer thupiakna taw a hon a hon in ding uh hi.
- 26**Ochran ii tapa Pagiell in Asher namte uk a,



²⁷Enan ii tapa Ahira in Naphtali namte uk hi.

²⁸Tu a bang teng sia, Israel te ngiaphual a kikkiin simin a hon a honin a paizia ahi hi.

²⁹Moses in Midian mi, Jethro tapa a zi suapui Hobab tungah, “Topaii piak tu a, hong sonna ngamah kote a pai tu ka ahi uh hi. Ama in Israel te a khangto tu in tu in hong kamciam zo a, hong zui tan, tua hile ka khantona te kong hawm tu uh hi.” ci hi.

³⁰Hobab in, “Uk bong, ka pianna ngamah ka heak kik tu hi.” ci in zo hi.

³¹Moses in, “Nong hesuakna taw kote hong nusia heak in. Dui sungah ngiaphual saat thei natu mun he na hiciang kote lam hong lak thei tu ni hi.

³²Ko hong zui le Topa hong piak thupha theampo nang zongh kong hawm tu uh hi.” ci hi.

Mihonte Kikkiin

³³Israel mite in mual thiangtho ahi Sinai nusia in, ni thum sung pai uh hi. Topa Thukham Thingkuang sia ngiaphual mun tu zong tu in amate mai ah paikhol tawntung hi.

³⁴Amate ngiaphual khat pan a kikkiin simin sun hunin Topa meei amate tungah om hi.

³⁵Thukham Thingkuang a din pui hun simin Moses in, “Topa awng, tho in a, na ngalte ki thethaangsak in, nang hong ngaimawte taisak in! ” ci bul hi.

³⁶A tawlngak hun simin ama in, “Topa awng, Israel innkuan tul tam mama te kungah hong heak kik tan,” ci bul hi. .

Ngamsung Vakna 11

Taberah a Kici Mun

¹A mipite in amate haksatnate Topa tungah phun tu kipan uh hi. Tua thu a zaak ciang Topa thin uuk a, amate tungah meikuang khiak hi. Amate sungah tua mei kuang a, ngiaphual mong khat kaangtum hi.



²Mipite in Moses tungah huna ngenin au a, Moses in Topa tungah thungen in tua mei mit hi.

³Tua ahikom tua mun Taberah kici hi, banghangziam cile tua munah, amate sungah Topa mei kuang hi.

Moses in Lampui Sawmsali Teal

⁴Israel te taw khualhaw khawm ngamdang mite om hi. Amate in sa du mama uh a, Israel te ngangawn zongh phun kipan in; “Neak tu sa tawm beak nei thong leang maw!

⁵Egypt ah manh piak ngawlin ngasa theampo ih du bang po ih ne hi. Ih neak tawntung tangmaite, kawl tangmaite, lonamsiate, kaisonsante, kaisonkaangte phawk kik vun.

⁶Ahizong tu in ih tha bo zo hi. Neak tu bangma om ngawl a, nisim nisim in manna bebek hi!” ci uh hi.

⁷(Manna sia thaici no taw kibang a, a meal a kaang le a eng kithua bang ahi hi.

⁸⁻⁹Tua mannate zan lai in ngiaphual tungah daaitui taw taak khawm hi. A zingsang ciang a mihingte pai in tawm a, ngoai in ahibuale sum sungah suvui in tua zawkciang huan in muhpheang in vawt uh hi. A limna olive thau taw a ki em anluum bangin lim hi.)

¹⁰Mipite theampo a ngiaphual kongbiang tek ah a hon a hon in ding a, a phun lialua Moses in za hi. Amate tungah Topa thin uuk ahikom Moses a thin ngim a,

¹¹ama in Topa tungah, “Banghangin hi bang hong siatvawt lawlawm ni ziam? Banghangin kei tungah lungkim ngawl ni ziam? Banghangin hi mihingte theampo kei ii tavuan laak tu in hong pia ni ziam?

¹²Hi mihingte a taangpupite tungah na kamciam sa ngam paina lam tawntung ah nau omh nasep seam tu in amate nausen te bangin ka baan tungah a toai tu in kei hong sawl ni ziam?



¹³Hi mihingte theampo ka piak tu sa a kicing in koi sungpan nga thei tu khi ziam? Amate in sa hong ngenin phiing tawntung hi.

¹⁴Keima in hi mihingte theampo atu tavuan ka la thei bua hi. Kei atu in haksa lei hi!

¹⁵Hi bangin nong vawt tu ahile nong siatvawtnate ka thuk nawn ngawl natu in hesuakna taw kei hong that heu tan,” ci hi.

¹⁶Topa in Moses tungah, “Mipite lampui a, a kiciamtee a zatak huai mihing sawmsali khawm in a, ka omna Puanbuk ah hong paipui tan, tua munah nangma kiim ah ding tu in sawl in.

¹⁷Kong paisuk tu a, tua lai ah kong paupui tu hi. Nang tungah kong piaksa thaa pawl khat la in, amate ka pia tu hi. Tuaciang amate in hi mihingte atu tavuan hong laakpui tu a, nangma bek in tua tavuan na la buatu hi.

¹⁸Tu in, mihingte tungah son in, ‘Zing ciang atu in kithiansua tavun, neak tu sa na nei tu uh hi. Note phiingin sa tawm om thong le maw ci in, Egypt na lungngulna thu uh Topa in za zo hi. Tu in, Topa in sa hong pia tu a, na ne tu uh hi.

¹⁹Note in sa na ne tu uh a ni khat, ni nii, ni nga, ni sawm, ni kul sung bek hi ngawlin,

²⁰Tha khat sung tawntung, kiihuai nasak liang uh dong, na nim uh dongin na ne tu uh hi. Banghang hi bang hi tu ziam na ci uhle note sungah a om Topa na nial uh a, Egypt ngam pan nong pusuasak ngawl tu hi ve, ci in na phunsan uh hi,’ ci in son in” ci hi.

²¹Moses in Topa tungah, “Hi sungah mihing 600,000 ka lampui a, tha khat sung a kham tu sa a kicing ka pia tu, ci ni hi.

²²Khui le tuute amate kham tu in ngo zo thong tu hi ziam? Tuipi sungah ngasa theampo amate atu in kicing zo thong tu ziam?” ci hi.

²³Topa in, “Ka vaangletna kiciangtan ziam? Ka ci bangin a pian le a pian ngawl hai ngawlin na mu tu hi!” ci in zo hi.



²⁴Tuaciang Moses pusuak in Topa ci teng mite tungah son hi. Ama in lampui sawmsalite kaikhawm in Puanbuk kiim ah om sak hi.

²⁵Tuaciang Topa meei sungah tuaksuk in Moses paupui hi. Ama in Moses tungah a piaksa thaa pawlkhat la in, lampui sawmsalite tungah pia hi. Amate sungah tua thaa a tum ciang kamsangte bangin amate au uh a, ahizong khuangei au ngawl uh hi.

²⁶Lampui sawmsalite sung pan niite ahi , Eldad le Medad in Puanbuk ah pai ngawlin ngiaphual ah om uh hi. Tua ngiaphual ah amate tungah thaa pai a, amate zongh kamsangte bangma in au tu kipan uh hi.

²⁷Tangvalno khat sia, Eldad le Medad omdan teng Moses tungah son tu in tai hi.

²⁸Tuaciang a no lai panin Moses a hu tawntung pa Nun tapa Joshua pau a Moses tungah, “Sya awng, amate tawlngasak in,!” ci hi.

²⁹Moses in, “Ka khanto tu hong eang ni ziam? Topa in a mihingte theampo tungah a thaa pia in, kamsangte bangin amate theampo ausak le ka deisak hi,” ci in zo hi.

³⁰Tuaciang Moses le Israel lampui sawmsalite ngiaphual ah cia kik uh hi.

Topa in Vamim Puak

³¹Topa in thakhat thu in tuipi pan vamimte a puak vui vasak hi. Tua vamimte lei pan pi thum saangin leang hi. Vamimte ngiaphual tung le a kiim a paam tai tam mama sungah om uh hi.

³²Tua hi a, mipite in tua ni bup, zankhua teak le a zing ciang sunkhua in vamim man uh a, a tawm bel a man sia zongh in khum sawmnga nuaisia man ngawl hi. Amate in vamimte ngiaphual kiimkot ah pho in ngawmsak uh hi.

³³Vamim sa neak tu tam mama a nei lai hun sung ma in, mipite tungah Topa thin uuk ahikom amate sungah a kilaw thei natna tungsak hi.

³⁴Tua munah sa du in a longsan mi tam mama phum ahikom tua mun sia Kibroth Hattaavah ahibuale “Longsante Thaan” kici hi.



³⁵Mipite tua mun pan Hazeroth ah kikhiin a, tualai ah ngiaphual saat uh hi. .

Ngamsung Vakna 12

Miriam Daan Kipia

¹Moses in Cush numei khat tenpui a, tua hu in Miriam le Aaron in mawsiat hi.

²Amate in, “Topa in Moses tungtawn bekin thuson ziam? Eite tungtawn zong thuson ngawl ziam?” ci uh hi. Amate thusonteTopa in za hi.

³‘Moses sia a kiniamkhiak mihing hi a, leitung ah ama sangin a kiniamkhiak zaw khat zongh om ngawl hi.’

⁴Thakhat thu in Topa in, Moses, Aaron le Miriam paupui a, “Note thum keima omna Puanbuk ah hong pai tavun,” ci hi. Amate pai a,

⁵Topa meeikhuam sungah tuaksuk a, Puanbuk kongbiang ah dingin, “Aaron awng! Miriam awng!” ci-in sam hi. Amate nii mai sangah pai a,

⁶tuaciang Topa in, “Tu in kong thuson tu te ngai vun! Note sungah kamsangte a om ciang, keima le keima amate tungah mu kholna sungah ka kilangh a, mang sungah amate ka paupui hi.

⁷Ka naseampa Moses taw ka kipaupui ciang sia a dang taw kibang ngawl hi. Israel ka mihing thempo ama in ka uksak hi.

⁸Ama taw kimaingat in, kam soaiheam zangh ngawlin thiang takin ka paupui hi, ama in ka piandan ngangawn hong mu hi! Ka naseampa Moses langpang in bangbang pau ngam nu ziam?” ci hi.

⁹Amate tungah Topa thin uuk in; paisan a,

¹⁰Puanbuk pan meei kikhiin in, Miriam vun tungah thakhat thu in a kiitak huai natna theng a, vuuk bangin kaang hi. Miriam hi natna taw a kituamcip na thu Aaron in a mu ciang,

¹¹ama in Moses tungah, “Ka Topa awng, a mawmawt huai ka mawna uh hangin hesuakna taw hi bang ngimna daan hong thuaksak heak in.



¹²A thisa in a suak, a taksa a lang a kine sa bangin Miriam in ngimna thuaksak heak in” ci hi.

¹³Tuaciang Moses in Topa biakpui a, “Pathian awng, Miriam damsak in!” ci hi.

¹⁴Topa in, “Tua numei maitang ah a pa in cil a phi le tua numei in ni sali sung maizum thuk tu hi. Tuaciang ama sia nipi khat sung ngiaphual pua sangah kikoi tu a, tua zawkciang ngiaphual sungah kitumpui kik thei tu hi,” ci in zo hi.

¹⁵Miriam sia ngiaphual pua sangah ni sali sung kikoi a, ama a kitumsak kik mateng mipite kikhiin ngawl hi.

¹⁶Tua zawkciang amate in Hezeroth nusia in, Paran dui sungah ngiaphual saat uh hi. .

Ngamsung Vakna 13

Thukan kute
(Thuhil kikna 1.19-33)

¹Topa in Moses tungah,

²“Minam sawm le niite lampuite sungpan khat tek teal in a, Israel te tungah ka piak tu Canaan ngam vilku tu in paisak in.” ci hi,

³⁻¹⁵A ci bangin Moses in a thu ni a, a nuai a lampuite Paran dui sung panin paisak hi.

Minam	Lampui
Reuben	Zaccur ii tapa Shammua
Simeon	Hori ii tapa Shaphat
Judah	Jephunneh ii tapa Caleb
Issachar	Joseph ii tapa Igal
Ephraim	Nun ii tapa Hoshea
Benjamin	Raphu ii tapa Palti
Zebulun	Sodi ii tapa Gaddiel
Manasseh	Susi ii tapa Gaddi
Dan	Gemalli ii tapa Ammiel



Asher	Michael ii tapa Sethur
Naphtali	Vophsi ii tapa Nahbi
Gad	Machi ii tapa Geuel

¹⁶Hi teng sia thukan ku tu a, Moses ii sawl teng ahi hi. Ama in Nun tapa Hoshea sia Joshua ci in a min laih hi.

¹⁷Moses in amate a paisak ciang, amate tungah, “ Hi sung pansaksang zuanin Canaan ngam thang sangah pai tavun a, tuaciang mualtung ngamah pai tavun.

¹⁸A ngam sia bangbang ngam hi a mihing bang za teang a, bang za thahat ziam cite hong tel tavun.

¹⁹A ngam pha ziam, sia ziam cile mite teangzau ziam maw, a muanhuai a ki uum khuapite sungah teang ziam cite hong kantel tavun.

²⁰A leitangh pha ziam ci le thingkung tamna leitangh ahi ziam hong kantel tavun. Tualai ah a po a nga thingnga pawl khat hong ciapui nanak tavun,” ci in vaitha hi. ‘Tua hun sia sapit min tu kipat laitak ahi hi.’

²¹Tuaciang amatesaksang zuanin thangsang Zin duisung pan, saksang a om Hamath Mualciangh nai Rehob dong ngam vil uh hi.

²²Amate thangsang tengah pai masa a, Anakim a kici mihing thatang liante ii suan le paal ahi, Ahiman, Shashai le Talmai suante teenna Hebron theng uh hi. (Hebron sia Egypt ngam Zoan khua saat ma kum 7 lai in kisaat hi.)

²³Amate Eshcol Kuam theng a, tua munah amate in sapit bom khat a nga sapit baak khat saattan a, ngit mama ahikom mol thaakin mihing nii in zawng uh hi. Amate in talee nga le thei nga pawl khat zongh ciapui uh hi.

²⁴(Tua mun sia Israel te ii sapit nga bom a saat tanna mun ahikom Eshcol Kuam kici hi.)

²⁵Ni sawmli sung ngam a vil zawkciang, thukan kute,



²⁶Moses, Aaron le Israel huam mihonpite omna Paran duisung Kadesh ah heak kik uh hi. Amate ii a mu bang teng son kik uh a, a puak uh thingngate lak uh hi.

²⁷Amate in Moses tungah, “Kote in ngam ka vil uh a, a hauna le a lei phatnate ka mu uh hi. Thingnga tawm zongh tua mun pan kong ciapui uh hi.

²⁸Ahizong tualai ah a teang mite hat mama uh a, a khuapite zongh lianin kul taw pha takin ki uum hi. Tua banah thatang liante ii suan le paalte tua munah ka mu uh hi.

²⁹Thangsang ngamah Amalek te teang a, Hit te, Jebus te, le Amor te mualtung ngamah teangin, Canaan te ahile Mediterranean tuipi hui le Jordan ngundung ah teang uh hi,” ci in son uh hi.

³⁰Caleb in Moses langpan in a phunsan mipite thimsak a, “Tu in eite in simin a ngam la tawng; tua ngam a zo zo tu in ih thahat hi.” ci hi.

³¹Ahizong Caleb taw a paikhawm mihingte in, “Hi thei bo, amate sim tu in ih thahat ngawl hi; eite sangin amate thahat zaw hi.” ci uh hi.

³²Tuaciang amate in, a ngam vilna thute ahi ngawl lamin Israel te sungah son uh hi. Amate in, “Tua leitangh pan tua munah a teang sa mihingte neakkhop tu ngangawn zongh an piang ngawl hi. Ka mu uh mihingte theampo sia saang mama a,

³³Anak suan le paal, mihing thatang liante ngangawn ka mu uh hi. Eite sia khaumaw bang lelin no ih kisa a, amate muna zongh ah tuabang lel ma ih hi tu hi,” ci uh hi. .

Ngamsung Vakna 14

Mipite Phun

¹Mipite khuangai in zan khuateak au in kap uh hi.

²Amate in Moses le Aaron langpan in phunsan uh a, “Egypt ah ahibuale hi lai duisung beak ah thi le ung phazaw hi!



³Banghang in eite tua ngamahTopa in hong paipui ziam? Eite ngal sungah ih thi tu a, ih zite le ih tate kiman tu hi. Egypt ah cia kik leang phazaw ngawl ziam? ” ci uh hi.

⁴Tuaciang amate khat le khat tungah,“Lampui khat tealin Egypt ah cia kik tawng!” kici uh hi.

⁵Tua zawkciang Moses le Aaron sia mihonpite mai lei ah kun uh hi.

⁶Tuaciang Nun tapa Joshua le Jephunneh tapa Caleb, thukan kute sung pan nii in khuangaina taw a puante balkeak in,

⁷mipite tungah,“Ka ngam vilna uh leitangh sia leitangh pha mama ahi hi.

⁸Eite tungah Topa hong lungkim pole ama in tua munah hong paipui tu a, tua ngampha le ngamnuam hong pia tu hi.

⁹Topa langpan heak vun a, tualai a teang mihingte kiita heak vun. Eite in olnu takin amate ih zo tu hi. Eite taw a omkhawm Topa in amate a dal a pathiante zo zo ahikom lau heak vun,” ci hi.

¹⁰Mihonpite buppi in Joshua le Caleb suang taw denlup tu in tawng uh hi. Ahizong Topaompuna a tee khuavak Puanbuk tungah a kilangh sia thakhat thu in mipite in mu uh hi.

Mipite atu Moses Thungen

¹¹Topa in Moses tungah,“Hi mipite in bang tan vei kei hong nial tu ziam? Amate sungah nalamdang tam mama lak zo napi ing, hong muang ngawlin bang tan vei hong nial tu ziam?

¹²Pul natna puakin amate ka mon tu a, ahizong nang sia amate sangin a lian zaw le a thahat zaw minamte ii pa in kong vawt tu hi,” ci hi.

¹³Ahizong Moses in Topa tungah,“Nangma vaangletna taw hi mipite Egypt pan na pusua pui hi. Na mihingte tungah na nasepnate Egyptte in a zaak uh ciang, amate in

¹⁴hi ngam a teang minamte tungah son tu uh hi.Topa, nangma in kote taw nong om a, kote tungah na meei tawInga in, thiang sitset a na kilangh na le



sun in meeikhuam taw, zan in meikhuam taw ka mai uh ah na pai na thute hi mihingte in za siat zo hi.

¹⁵Tu in na mihingte theampo thatlum thong lete na min phatna a za sa minamte in

¹⁶a Pathian in piak tu a, a khapsa ngamah a mihingte then zo ngawl ahikom dui sungah thatlum hi hong ci tu uh hi.

¹⁷Tua ahiciang, tu in Topa awng thu kong ngen hi, na vaangletna hong lak tan a, nong ciamsate tangtungsak in.

¹⁸‘Keima Topa sia thin uuk hak a, itna lian le thumaanna a lak, mawna le langpanna a maisakpa ka hi hi, ahizong pate mawna hangin tate le tute tungah khang thum khang li dongin daan ka pia tu hi.’ nong ci hi.

¹⁹Tuaciang tu in Topa awng, a kikheal ngawl a lian, na itna taw kizui in Egypt ngam pan na pusuapui a kipan tuni ciang dong a khialna na maisak bangin, hi mihingte khialna na maisak natu in thu kong ngen hi,” ci hi.

²⁰Topa in, “Nong nget bangma in a khialna ka maisak tu hi.

²¹Ahizong keima in a nungta takpi Pathian ka hi a ka minthanna in leitung theampo a dim hu in,

²²hi mihingte khat zongh Canaan ngam tum tu in nungta ngawl tu hi cisia kong kamciam hi. Amate in ka ompuina a tee khuavak le Egypt ngam le dui sungah nalamdang ka sepate mu zo napi ka thu ni nuam ngawlin hong nial a, pehial pehial in ka thin uai na hong ze et uh hi.

²³A taangpupite tungah ka khap sa ngamah amate tum ngei ngawl tu hi. Kei hong nial peuma in tua ngamah tum ngei ngawl tu hi.

²⁴Ahizong ka naseampa Caleb ii khuangaisutna sia a tuam hi a, kei tungah thumaan ahikom a ngam vilna leitangh ah ka paipui tu a, tuaciang a suan a paalte in

²⁵Amalek te le Canaan te ii tu a a teenna ngamkuamte lua tu hi. Zing ciang heak kik vun a, Aqaba tuipi sang duiung ah pai vun,” ci in zo hi.



A Phun hu in Topa in Mipite Daan pia

²⁶Topa in Moses le Aaron tungah,

²⁷“Hi mihing ngilote in bang tan vei kei hong phunsan tu ziam? Hong phutsatnate ka zaak tam zo hi!

²⁸Tu in amate tungah, ‘Keima in a nungta takpi Pathian ka hi bangma, nong nget uh bangin kong pia tu hi, ci in ka kiciam hi. Keima Topa pau zo khi hi.

²⁹Na thi tu uh a, hi dui sungah na luangte kithethaang tu hi, Kei nong phutsan uh hu in, note kum kul tungsia peuma, tua ngam tum ngawl tu nu hi.

³⁰Teang tu in kong kamciamsa ngamah Joshua le Caleb sim ngawl note khat zongh na theng buatu uh hi.

³¹Na tate kiman tu hi, na ci uh hi, ahihang thu sim ngawlin na nialna ngamah amate ka paipui tu a, tua ngam sia amate khua suak tu hi.

³²Note sia hi lai dui sungah na thi tu uh hi.

³³Note na thi siat uh dong na thumaan ngawl na uh hangin thuak a, na tate uh dui sung ah kum sawmli sung vakthap tu hi.

³⁴Na ngalvil uh ni phaza, ni khat ciang kum khat, ni sawmli atu kum sawmli sung note in na khialna uh na thuak dipdeap tu uh hi. Kei nong langpan uh ciang bangbang hi thei ziam cisia na he tu uh hi!

³⁵Kikaikhawm in kei hong langpan no mi ngilote tungah a tung a daan piaknate kong tungsak tatak tu hi, ci in ka kiciam hi. Hi lai dui sungah note theampo thi siat tu nu hi. Keima, Topa pau zo khi hi, ‘ci in son in,’ ci hi.

³⁶⁻³⁷Moses ii ngamvil tu a, a sawl mihingte ii thumaan ngawl a son hu in mipite in Topa phunsan uh hi. Tua hu in, Topa in amate tungah natna tungsakin amate thi uh hi.

³⁸thukan ku sawm le niite sung pan Joshua le Caleb bek suakta uh hi.

Ngamlaak tu Hanciam A khat veina

(Thuhil kikna 1.41-46)

³⁹Moses in Topa thusonte Israel te tungah a son ciang, amate nasia takin kap uh hi.



⁴⁰Mualtung ngam la tu in a zing ciang zingtuungin amate pai in, “Tu in Topa hong sonsa ngamah pai tu in ih kinging hi. Mikhial hi hing ci in ih pualaak hi,” ci uh hi.

⁴¹Ahizong Moses in, “Tua ahile banghangin tu in Topa thu ni ngawl nu ziam? Zo ngawl tu nu hi!

⁴²Pai heak vun, note taw Topaomkhawm ngawl a, na ngalte in hong zo tu hi.

⁴³Amalek te le Canaante taw na kisim uh ciang ngal sungah na thi tu uh hi. Topa sia note taw omkhawm ngawl tu hi. Banghangziam cile ama nung zui tu na nial zo uh hi, ” ci hi.

⁴⁴Topa Thukham Thingkuang ahizong, Moses ama mama ahizong ngiaphual nusia ngawl napi amate mualtung ngam dong kaato tu uk veve lai uh hi.

⁴⁵Tuaciang, tualai ah a teang Amalek te le Canaan te in amate simin zo a, Hormah dong zuizen uh hi. .

Ngamsung Vakna 15

Biakpiakna taw kisai Thukhamte

¹Topa in Moses tungah, a khapsa ngam a thet ciang

²Israel mihingte ii zui tu in a nuai a ngeinate pia hi.

³Meihal biakpiakna, kiciamna tangtutna biakpiakna, thin zawna biakpiakna, le a hun zui a na biakna poaite biakpiakna in khuital khat, tuutal khat, tuu khat ahibuale keal khat Topa tungah kipia tu hi, hi an taw biakpiakna ngim namtui sia in Topa lungdamsak hi.

⁴⁻⁵Meihal biakpiakna in tuu ahizong keal ahizong Topa mai ah a pia pawpo in antang biakpiakna in nganno khat ciang olive thau pint 2 taw a kihel anvui pound 2, zu pint 2 taw paipui khawm tu hi.

⁶Tuutal khat a kipiak ciang, olive thau thawl 3 taw a kihel anvui pound 4

⁷zu thawl 3 taw antang biakpiakna in pia khawm tu hi. Hi biakpiakna ngim namtui sia in Topa lungdamsak hi.



- ⁸Meihal biakpiakna ahibuale, kiciamna tangtunna biakpiakna ahibuale kipawlkhop biakpiakna in Topa tungah khuital khat a kipiak ciang
- ⁹antang biakpiakna in olive thau pint 4 taw a kihel anvui pound 6,
- ¹⁰zu pint 4 taw kipia khawm tu hi. Hi bang ngimnamtui biakpiakna sia in Topa lungdamsak hi.
- ¹¹Biakpiakna in khuital, tuotal, tuu le kealte a piak ciang a tung a te taw piakhawm tu hi.
- ¹²Nganhing khat sang a tam zaw a kipiak ciang nganhing a tam za zui in vanh dangte zongh kikhan to tu hi.
- ¹³Israel minam theampo in Topa lungkim natu in ngimnamtui an taw biakpiakna a nei ciang a tung a bangin pia tu hi.
- ¹⁴Ngamdang mi khat note sungah tawmvei sung ahizong a tawntung ahizong a teang pa in Topa ii a ngim dik asak an taw biakpiakna a nei ciang a tung a ngeinate zui tu hi.
- ¹⁵Noma na hi uh zong, note sungah hong teang ngamdang mite ahizong, hi ngeinate a tawntung zui tu nu hi. Note le amate Topa mai ah a kibang na hi uh a;
- ¹⁶thukham le ngeinate a kibangin note le amate zui tu ahi hi.
- ¹⁷Topa ii a piak tu ngamah
- ¹⁸Israel mihingte ii zui tu a nuai a ngeinate Topa in Moses tungah pia hi.
- ¹⁹Tua ngam pan a piang ante a kineak ciang pawl khat Topa atu in a tuam vilvel letsong in kikoi tuam tu hi.
- ²⁰Anthak na laak uhciang anluum na em maksak bel uh sia Topa tungah a tuam vilvel letsong in kipia tu hi. Na ancilna sung pan antang a tuam vilvel letsong in na piak bangin hite kipia tu hi.
- ²¹Na anluum emte sung pan hi a tuam vilvel letsong sia Topa tungah a tawntung atu in kipia tu hi.



²²Topa in Moses tungah a piak zui tu ngeinate, mihing khat pawpo in a zui ngawl thaak ciang ahizong,

²³Topa ii Moses tungtawn a, a thupiak theampo mai sangah Israel huam mihonpi te in a zui ngawl hun ciang ahizong,

²⁴mihonpite ii a awlmawk ngawl manin, kikhial tha ahile amate in meihal biakpiakna Topa atu ngimnamtui, antang biakpiakna le zu biakpiakna taw khuital khat pia tu hi. Amate in mawphel biakpiakna in kealtal khat pia thua tu hi.

²⁵Thiampipa in mipite atu in thiansua natu zeksa teng seam tu a, amate a khialna kimaisak tu hi, banghangziam cile vawt thaak khialna hi a, amate in Topa tungah an taw biakpiakna in mawphel biakpiakna hong paipui hi.

²⁶Israel huam mihonpi bup le amate sungah a teang ngamdang mite a vekpi in a khialna kimaisak tu hi, banghangziam cile tua vawt thaak khialna sungah mihing theampo kihel siat hi.

²⁷Mihing khat in ama aituum in khialna a vawt tha ahile, ama in mawmai biakpiakna in kum khat a pha kealla khat pia tu hi.

²⁸Thiampipa in biaknatau ah tua pa a khialna pan thiansua natu in a zeksa thiansuana teng seam tu a, tuaciang ama khialna kimai sak tu hi.

²⁹Hi ngeina sia Israel mite ahizong, ngam sungah a teang ngamdang mite ahizong, a kuama po in khialna a vawt thaak ciang zui tu ahi hi.

³⁰Ahizong ngamsung mi ahizong, ngamdang mi ahizong khialna a vawt kaltangte sia Topa thusim ngawl hi a, kithatlum tu hi.

³¹Banghangziam cile ama in Topa ci bang nialin a thupiakte a palsat kaltang hang ahi hi. Ama khialna hangin ama in thina thuak hi.

Sabbath A paltan Mi

³²Khat vei, Israel te dui sungah a omlai in mihing khat Sabbath ni in thingtom kimu hi.

³³Ama Moses, Aaron le mihonpi bup mai ah kipaipui hi.



³⁴Ama bangbang vawt tu ci, kihe thiang ngawl ahikom thong sungah kikoi hi.

³⁵Tuaciang Topa in Moses tungah, “Hi sia pa ki thisak tu hi. Ama ngiaphual pua sangah mihonpi bup in suang taw in deanglum tu hi,” ci hi.

³⁶Topa thupiak bangin mihonpite in ama ngiaphual pua sangah pusuapui in suang taw deanglum uh hi.

Puan Mongteap

³⁷Topa in Israel mihingte tungah thuson tu in Moses thu pia hi;

³⁸“Na puante mongah puanteap vawt vun a, puanteap sim ah vancii khauhual khat thua vun. Hite a tawntung atu in na vawt tu uh ahi hi.

³⁹Puanteapte in, nung thu hong phawksakkik tu a, tuate na mu simin, ka thupiakte theampo phawk kikin na zui tu uh hi. Tua hile note deina le uukna zui in, kei nong taisan buatu uh hi.

⁴⁰Puanteapte in kong thupiakte theampo na zui tu hong phawksak tu a, tuaciang note keima mihing vilvel na hi tu uh hi.

⁴¹Keima in Topa na Pathian ka hi hi. Na Pathian hi tu in Egypt ngam pan kong pusua hi. Keima in Topa ka hi hi,” ci hi. .

Ngamsung Vakna 16

Korah, Dathan le Abiram te ii Langpanna

¹⁻²Levi nam Kohath be le phung pan Izhar tapa Korah in Moses ii lampuina langpan hi. Ama sia Reuben nam mihing thumte in pawlpui a, tuate sia Eliab tapate Dathan le Abiram, le Peleth tapa On le mihonpite ii teal a minthang Israel lampui 250 te ahi hi.

³Amate Moses le Aaron mai ah kikhawm uh a, Moses le Aaron tungah, “Pai leet zo nu hi, mihon theampo Topa aa hi a, eite theampo taw Topaomkhawm hi. Hi ka sap Moses awng banghangin Topa ii mihonpite tungah thu kineisak tuan ni ziam?” ci uh hi.

⁴Moses hi thu a zaak ciang lei ah kilumliik in thungen hi.



⁵Tuaciang ama in Korah le a nungzuite tungah, “Zing ciang zingsang in Topa in ama mihing sia ei hong lak tu a; ama in a teal sa a mi sia biaknatau ah ama kungah paisak tu hi.

⁶⁻⁷Zing ciang zingsang in nangma le na nungzuite in meikam daalkuangte kengin tuate tungah meikam le ngim namtui koi in, biaknatau ah paipui vun. TuaciangTopa in eite akua hong teal ziam ci ih en tu hi. A pai leet sia noma Levite na hi uh hi!” ci hi.

⁸Moses in Korah tungah a thuson zomin, “Levi mite awng, ngai vun!

⁹Ama kung na pai thei natu, Topa Puanbuk sungah na nasep thei natu uhle mi honpite atu na a seam tu in Israel Pathian in mi honpite sung pan note hong tuam koina thu sia thuno in ngaisun nu ziam?

¹⁰Ama in nang le Levi mi theampo hong upat zo a, tu in thiampi za zongh dei lalai nu ziam!

¹¹Aaron na phutsat uh ciang a tatak in ci leang noma le na nungzuite in Pathian langpan na ahi uh hi,” ci hi.

¹²Tuaciang Moses in Dathan le Abiram sam a, ahizong amate in, “Hong pai bua vak ung!

¹³Hi lai dui sungah a thi tu in Egypt ngamnuam pan nong pusuapui sia kicing zo lel hi ngawl ziam? Kote tungah to hong seam nuam lai ni ziam?

¹⁴Ngamnuam ah nong paipui ba het a, kote neisa tu in lote le sapit huante zongh nong piak ngawl ban ah tu in theam tu hong hanciam lai ni hi. Hong pai bua vak ung!” ci uh hi.

¹⁵Moses thin uuk in Topa tungah, “Hi mihingte ii hong ken biakpiakna khat zongh saang heak in. Amate khat tungah zongh ka khial ngei bua a, a laate khat zongh ka laaksak ngei bua hi,” ci hi.

¹⁶Moses in Korah tungah, “Zing ciang Topa omna Puanbuk ah nangma le na nungzui 250 te hong pai tu nu hi, Aaron zongh tua munah om tu hi.



¹⁷Na meikam daalkuang tek kengin, a tungah ngim namtui buakin, biaknatauh ah pia tu nu hi ci hi.

¹⁸Tuaciang a meikam daalkuang keng tek a, meikam le ngim namtui a tungah koi in Puanbuk kongbiang ah Moses le Aaron taw ding uh hi.

¹⁹Tuaciang Korah in mihonpi bup kaikhawm a amate Puanbuk kongbiang ah Moses le Aaron maingat in ding uh hi. Thakhat thu in Topa ompuina a tee khuavak sia mihonpi bup tungah kilangh a,

²⁰Topa in Moses le Aaron tungah,

²¹“Hi mihingte kung pan nungkin vun, thakhat thu amate thatlum tu khi hi,” ci hi.

²²Ahizong Moses le Aaron lei ah bok a, “Pathian awng, nuntakna theampo ii naak na hi hi. Mihing khat a khial ciang mihonpi bup tungah thin uuk ni ziam?” ci uh hi.

²³Topa in Moses tungah,

²⁴Mipite sia Korah, Dathan le Abiram te buk pan a kikhiin natu in son in, ” ci hi.

²⁵Tuaciang Moses sia Israel lampuite in zui in, Dathan le Abiram kungah pai hi.

²⁶Moses in mipite tungah, “Hi mi ngilote buk pan tai vun a, a neisa khat zongh tham heak vun. Tuabang na hi bua uhle a khialna hangin amate taw hong kimaimot khawm tu hi,” ci hi.

²⁷Tuaciang Korah, Dathan le Abiram te buk pan amate tai uh hi. Dathan le Abiram pusuak in a buk kongbiang ah a zite le a tate taw dingkhawm uh hi.

²⁸Moses in mipite tungah, “Hi bang teng seam tu in Topa in, kei hong sawl a, keima deina bangin a seam ka hi ngawlna thu na heak natu uh hi.

²⁹Pathian daan thuak ngawlin hi mite thi ngeina in, a thi le Topa hong sawl ka hi buatu hi.



³⁰Ahizong a kiza ngei ngawl na, Topa in seamin lei kihong in a neisa theampo taw amate valhtum a, a hingtangin, mithi khua a zuansuk le, hi mite in Topa nial a hina thu na he tu uh hi,” ci hi.

³¹Hi thuteng a son zawk pociang Dathan le Abiram dinna leitangh kihongin

³²amate le a innkuanpuite, Korah nungzui theampo le a neisate theampo taw valh siat hi.

³³Tuabangin, a neisa theampo taw a hingtangin mithi khua zuansuk uh hi. A tung pan lei in siin a, amate bomang siat hi.

³⁴Amate auna aw a zaak ciang tualai a om Israel mipite tai siat uh hi. Amate in, “Tai vun, ei zongh lei in hong valhlum tha tu hi.” ci in au uh hi.

³⁵Tuaciang Topa in mei puak a, ngim namtui a pia mi 250 te a meileng in haltum hi.

Meikam Daalkuangte

³⁶Tuaciang Topa in Moses tungah,

³⁷“Thiampi Aaron tapa Eleazer tungah meikam daalkuangte thiangtho ahikom mei ii kaklup mithi luangte kung pan meikam tau kuangte heam tu le meikam kuang pan meiholte mundang ah thethaang tu in son in.

³⁸Tuate Topabiaknatau ah a kipiak ciang a thiangtho suak hi. Tua ahiciang a khialna hangin thina a thuakte ii meikam kuangte la in biaknatau sit natu in pakan a paa in seak in. Hi sia sia Israel mipite atu in kidop natu thu hi tu hi,” ci hi.

³⁹Tuaciang thiampi Eleazar in meikam daalkuangte la a, biaknatau sit natu in pakan paa in seak hi.

⁴⁰Hi thu sia Aaron suan le paal sim ngawl kuama in biaknatau ah pai in Topaatu in ngim namtui a hal ngawl natu, Israel te atu in kidopna tu thu hi tu hi. Ngim namtui a hal a om le Korah le a mite bangin kithatlum tu hi. Moses tungtawn in Topa ii Eleazar tung, a thupiak bangin hite theampo kiseam hi.

Aaron in Mipite Suatak



⁴¹A zing ciang mihonpi bup in Moses le Aaron phunsan a, “Topa ii mihing pawlkhat that zo nu hi,” ci hi.

⁴²Moses le Aaron langpan tu in a kikhop zawk, amate Puanbuk sang a ngat ciang, meei in Puanbuk tuam a, Topa ii ompuina a tee khuavak mu uh hi.

⁴³Moses le Aaron pai in Puanbuk mai ah ding uh a,

⁴⁴Topa in Moses tungah,

⁴⁵“Hi mihingte kung pan kiheam vun, amate thakhat thu thatlum siat tu khi hi!” ci hi. Amate nii lei ah boksuk in,

⁴⁶Moses in Aaron tungah, “Na meikam kuang la in, biaknatau pan meikamte a sungah koi in, tua tungah ngim namtui buak in. Tuaciang manlangin mihingte kungah paipui in, amate atu in a zeksa thiansuana vawt in, manlang in! Topa a thin uuk keak zo a, pul natna kipan zo hi,” ci hi.

⁴⁷Aaron in a thu ni a, a meikam kuang la in mihonpite kikhopna laizang ah tai hi. Pul natna hong theng zo ci in a mu ciang, Aaron in meihol tungah ngim namtui buakin mihonte atu in zeksa thiansuana vawt hi.

⁴⁸Tua in pul natna vengsak a, a thi le a hingte kilaklaw ah Aaron ding hi.

⁴⁹Korah ii langpanna ngal sungah a thite a kihel ngawlin tu tung a, pul natna taw a thi 14,700 pha hi.

⁵⁰Pul natna a ven zawkciang Moses omna Puanbuk kongbiang ah Aaron heak kik hi. .

Ngamsung Vakna 17

Aaron ii Ciangkhut

¹Topa in Moses tungah,

²“Israel mihingte tungah minam sim lampuite tung pan ciangkhut khat tek, ciangkhut sawm le nii na tungah hong piak natu in son in, a ciangkhut tungah a min tek at in,

³Levi minamte piak ciangkhut tungah Aaron min at in. Minam lampui khat ciang, ciangkhut khat tek hi tu hi.



⁴Ka omna Puanbuk ah tuate paipui in a, kong kisik puina mun, Thukham Thingkuang mai ah koi in.

⁵Tuaciang ka teal pa ii ciangkhut sia meang tu hi. Hi bangin Israel te ii nangma hong langpan in a phun tawntungna ka thim sak tu hi,” ci hi.

⁶Tuabangin Moses in Israel te tungah son a, minam sim pan ciangkhut khat tek, a lampuite in ama tungah pia a, a vekpi ciangkhut sawm le nii pha in, tuate taw Aaron ciangkhut kikoi khawm hi.

⁷Moses in tua ciangkhut teng Topa ii Thukham Thingkuang mai Puanbuk sungah koi hi.

⁸A zing ciang Puanbuk sungah Moses a tum ciang Levi namte ii a piak Aaron ciangkhut a meang sa in mu hi. Tuasia in mom zo a, palh zo a, almondnga a min nga hi!

⁹Moses in ciangkhut theampo la in Israel te lak hi. Amate in thupiang teng mu a, a lampuite in a ciangkhut tek la kik hi.

¹⁰Topa in Moses tungah, “Thukham Thingkuang mai ah Aaron ciangkhut koi kik in. Hi ciangkhut sia, lampuite a langpan nuam Israel te ii a phunna a tawlna buale amate thi tu a hina thu, kidop nату in kepcing tu ahi hi,” ci hi.

¹¹Topathupiak bangin Moses in vawt hi.

¹²Israel mihingte in Moses tungah, “Ko ka hi uh le manh sa hi zo ung!

¹³Puanbuk nai a neak te ngangawn thi hamtang tu ahile, kote theampo a thithi hi zo ung!” ci uh hi.

Ngamsung Vakna 18

Thiampite le Levite ii Nasepte

¹Topa in Aaron tungah, “Nangma, na tapate le Levite in ka omna Puanbuk sung nasepna taw kisai in khialna khat pawpo hu in na thuak tu uh a, ahizong thiampi nasepna taw kisai in khialna thaman sia, nangma le na tapate bek in thuak tu nu hi.



²Na tapate taw Puanbuk sungah na nasep uhciang, na seppui tu le nasep hong hu tu in Levi minam na bete tumpui in.

³Amate in no atu in hong sepsak tu te le Puanbuk atu in a nasep tu te khuangkhim tu a, ahizong biaknatau ahibuale Mun Thiangtho na ah a om biakna taw kisai vanhte peuma thutha ngawl tu hi. A thutha le amate le nangma hong kithisak khawm tu hi.

⁴Amate sia nangma kungah na seam tu a, Puanbuk sungah sep tu a tavuan theampo seam siat tu hi. Ahizong a seam tu a kilawm ngawlte nang taw seamkhawm ngawl tu hi.

⁵Israel mihingte tungah ka thin uukna a puathap kik ngawl natu in nangma le na tapate bek in biaknatau le Mun Thiangtho nasep teng seam siat tu nu hi.

⁶Israel te sung pan na bete ahi Levite teal a, letsong in hong pia pa sia keima ka hi hi. Amate in Puanbuk sungah na a sep thei natu in kei tungah hong ki aap uh hi.

⁷Ahizong nangma le na tapate bek in biaknatau le Mun Thiangtho bel taw kisai thiampi nasep teng theampo seam tu nu hi. Thiampi nasep hong pia zo ka hikom hi teng nangma sep tu ahi hi. Hi nasepte seam tu a kilawm ngawl khat pawpo hong pai in, vanh thiangthote a neak le ki thisak tu hi,” ci hi.

Thiampite ii nga tu Tel

⁸Topa in Aaron tungah, “Kei tungah a tuam vilvel in hong kipia te theampo sung pan biakpiakna sungah a kihal tum te sim ngawl po nangma kong piak sia ciamtee in. Hite nangma le na tu na tate atu in a tawntung atu kong piak ahi hi.

⁹Biaktau ah a kihal ngawl, a thiangtho bel biakpiaknate panin a nuai a teng nangma aa ahi hi; tuate sia antang biakpiakna, mawphel biakpiakna le khialphel biakpiaknate ahi hi. Kei tungah hong kipia a thiangtho biakpiaknate a vekpi in nangma le na tapate aa ahi hi.

¹⁰Hite mun thiangthona ah pasalte bek in ne taken a, a thiangtho in ngaisun taken.



¹¹“Tua bek dom ngawlin, Israel te ii a tuamin hong piakte zongh noma atu ahi hi. Nangma, na tapate le na tanute atu in a tawntung atu in kong pia hi. Na innsung pan biakna taw kisai a thiangtho pawpo in tuate ne thei tu hi.

¹²“Israel te ii kumsim in keima hong piak a anpal sung pan a pha bel theampo: olive thau, zu le antangte nangma kong pia hi.

¹³A vekpi in nangma aa ahi hi. Na innkuan sung pan biakna taw kisai in a thiangtho pawpo in tuasia ne thei tu hi.

¹⁴“Israel ngam sungah kei tung hong ki aap na peuma, nangma neisa hi.

¹⁵“Israel te ii keima hong piak mihing taciil le nganhing taciil theampo nangma aa ahi hi. Ahizong mihing taciil hi kale, a thiangtho ngawl nganhing taciil hi kale a tat kik ciang a tatna sumte saang tu ni hi.

¹⁶Patangte tha khat a phak ciang, biakinn khaikhin taw kizui in ngun dangka tang nga linlian taw kitan kik tu hi.

¹⁷Ahizong khui, tuu le keal taciil ahi le kitan kik ngawl tu hi; a vekpi in keima aa hi a, biakpiakna in zak tu ahi hi. A chisante biaknatau ah the in, an taw biakpiakna in a thau halin tua ngimnamtui biakpiakna in kei hong lungkimsak tu hi.

¹⁸A tuam vilvel biakpiakna in a kizangh a awmsa le a ziatsang pheii bangma in a sa dangte zongh nangma aa ahi hi.

¹⁹Israel te ii keima hong piaktuam vilvel te theampo a tawntung atu in, nangma, na tapate le na tanute kong pia hi. Hi thu sia nangma le na suan na paalte taw ka vawt a kisia thei ngawl thuciamna ahi hi,” ci hi.

²⁰Topa in Aaron tungah, “Nangma in a kilua thei na khat pawpo saang ngawl tu ni hi. Israel leitangh khen khat zongh nang hong kipia ngawl tu hi. Keima, Topa sia nangma ii na kisp buppi ka hi hi.” ci hi.

Levite ii Nga tu Tel

²¹Topa in, “Israel mihingte ii kei tungah hong piak sawm a khat sumpi theampo Levite ka pia zo hi. Hisia sia keima omna Puanbuk a kepcing hu in a nasep thaman ahi hi.



²²Israel dangte in Puanbuk neak nawn ngawl tu uh a, tuabangin a neak a om le thina daan thuak tu uh hi.

²³Tu pan kipan Levite bek in Puanbuk keamcing tu a, tavuan theampo la siat tu hi. Hi thu na suan na paalte tung zongh ah a kizangh tu ngeina kip ahi hi. Levite in Israel ngam sungah a kip a kho neisa bangma nei ngawl tu hi.

²⁴Banghangziam cile Israel te ii kei tungah a tuam vilvel a hong piak sawm a khat sumpi sia amate neisa tu in ka pia zo hi. Tua hu in Israel ngam sungah a kip a kho in amate in neisa bangma nei ngawl tu hi, ci in amate ka son hi,” ci hi.

Levite ii sumpi sawm a khat

²⁵Topa in

²⁶Levite tungah thu son tu in Moses thupia hi; “Topa in note neisa tu in hong piak sawm a khat sumpi sia Israel te tung pan na san uhciang, sawm a khat a tuam vilvel letsong in Topa tungah pia tu nu hi.

²⁷Hi a tuam vilvel piakna sia lothote ii anthak le zu thak taw biakpiakna taw kibangin kingaisun tu hi.

²⁸Hi bangin Israel te tung pan na nga uh sawm a khat sumpite theampo sung pan a tuam vilvel piakna Topa tungah pia tu nu hi. Hi bang a tuam vilvelTopa atu piakna sia thiampi Aaron tungah pia tu nu hi.

²⁹Na nga uh sung pan a pha bel sia pia vun.

³⁰A pha bel sia na piak zawk uhciang a omlai teng, lothote ii biakpiakna a nei zawkciang a omlai teng a kepcing bangin keam tu nu hi.

³¹Puanbuk sungah na nasep thaman uh ahikom, noma le na innkuan puite in a taanglai teng na ukna mun pawpo ah ne thei tu nu hi.

³²Topa tungah a pha bel na piak zawk uh nungsang kithasunna om ngawlin, ne tu nu hi. Ahizong Israel te ii a piak letsong a thiangtho a pha bel sia Topa tungah a kipiak ma in ne in, ninsak heak vun; na ninsak uhle hong kithatlum tu hi, ” ci hi. .



Ngamsung Vakna 19

Khuipui San ii Vaamte

¹Topa in

²a nuai a ngeinate Israel te pia tu in Moses le Aaron thupia hi. A mealhem ngawl le na a kiseamsak ngei ngawl lai khuipui san khat kengin,

³thiampi Eleazar tungah pia hen. Tua khui ngiaphual pua sangah kipusua pui in, thiampi Eleazar omna ah kingo tu hi.

⁴Tuaciang Eleazar in tua chisan pawlkhat la in, Puanbuk sang a khutme taw sali vei the tu hi.

⁵Tua nganhing buppi a vun a kipan, a sa, a chi le a sungkuate thiampipa omna ah kihal tu hi.

⁶Tuaciang thiampipa in cedar thing tawm, hyssop dawn le puansan la in tua mei sungah vawk tu hi.

⁷Tua zawkciang ama in a puante silthiang a kibual in, tua zawkciang ngiaphual ah tum tu a; ahizong nitak dong a nin hi tu hi.

⁸Khui a halpa zongh a puante silthiang in kibual tu a, ahizong ama zongh nitak dong nin tu hi.

⁹Tuaciang biakna taw kisai a thiangtho mihing khat in khuipui halna vaam teng luak tu a, ngiaphual puasang biakna taw kisai a thiangthona munah koi tu hi. Tua munah Israel huam mihonpite tui taw a kithiansua hun ciang a zak tu in tua vaamte kikeamcing tu hi. Hi ngeina sia mawna thiantho natu in, a kivawt ahi hi.

¹⁰Tua vaamte a luak pa in a puante silthiang tu a, ahizong ama nitak dong a nin hi tu hi. Hi ngeina sia Israel te le amate sung a teang ngamdang mite ii a tawntungin zui tu ngeina ahi hi.

Mithi luang taw A kiphak ciang

¹¹Mithi luang a tham pawpo, ni sali sung biakna taw kisai in thiangtho ngawl hi.



¹²Ama in ni thum ni le ni sali ni in tui taw kithiansua tu a, tuaciang ama thiangtho tu hi. Ahizong ni thum ni le ni sali ni in, a kithiansua bua ahile ama thiangtho ngawl tu hi.

¹³Mithi luang tham a, ama le ama a kithiangthosak ngawl sia a nin ahi hi. Banghangziam cile kithiansuana tui ama tungah kibuak ngawl hi. Ama in Topa Puanbuk ninsak ahikom Topa ii mihing khat in kingaisun nawn ngawl tu hi.

¹⁴Mihing khat buk sungah a thi le, a thi laitak buk sung a om pa ahizong, buk sung a tum pa ahizong, ni sali sung a nin ahi hi.

¹⁵Sitna nei ngawl buk sungah a om bungte le bealte zongh a nin suak hi.

¹⁶Doipua sangah mihing khat a kithatlum ahibuale thi ngei in a thi khat sia mihing khat pawpo in a tham le, ahibuale mihing khat pawpo in mithi ngu ahibuale mithi than a tham le, ama ni sali sung biakna taw kisai in thiangtho ngawl hi.

¹⁷Hi bang mihingte thiantho natu in, mawphel natu in a kihal khuipui san ii vaamte tawm la in, beal sungah koi in, tuithiang taw kihel tu hi.

¹⁸A masa in biakna taw kisai a thiangtho mihing khat in, hyssop dawn khat la tu a, tua hyssop dawn tui sungah papin, Puanbuk le a sung a om na theampo le tua mun a om mite the tu hi. A niina in, biakna taw kisai a thiangtho mihing khat in, mithi ngu, mithi luang le than a tham pawpo tua tui the tu hi.

¹⁹Biakna taw kisai a thiangtho mihing khat in ni thum ni le ni sali ni in mihing nin pa sia tua tui the tu hi. Ni sali ni in mithiang pa in mi nin pa thiansua tu hi. Mihing nin pa a puan a silthiang zawkciang le ama le ama tui a kibuak zawkciang, ni tum ciangin biakna taw kisai a thiangtho suak hi.

²⁰Mihing khat pawpo biakna taw kisai thiangtho ngawlin, ama le ama a kithiansua buale ama nin veve hi, banghangziam cile kithiansuana tui ama kibuak ngawl lai hi. Ama in Topa ii Puanbuk ninsak ahikom Pathian ii mihing khat in ki ngaisun nawn ngawl tu hi.

²¹Hi zui tu thute a tawntung na zui tu ahi hi. Ki thiansuana tui a the pa in a puante silthiang tu hi. Tua tui a tham peuma nitak dongin biakna taw kisai in thiangtho ngawl hi.

²²A nin mi khat ii a tham na khat pawpo sia nin a, tua na a tham peuma nitak dongin nin hi. .

Ngamsung Vakna 20

Kadesh ah Thupiangte

(Pusuana 17.1-7)

¹Tha masa bel sungin Israel huam mihonpi bup Zin duisung theng a, Kadesh ah ngiaphual saat uh hi. Tua munah Miriam thi in kiphum hi.

²Tua ngiaphual ah tui om ngawl ahikom Moses le Aaron kiim ah mite kikhawm in,

³“Topa Puanbuk mai ah Israel ka mipuite taw thi khawm le ung phazaw tu hi.

⁴Banghang in hi dui sungah hong paipui nu ziam? Hi lai ah ka ngannote taw thi khawm tu hi lel khu ziam?

⁵Banghang in bangma a po zo ngawl, ngam pha ngawl na ah pai tu in, Egypt pan hong pusuapui nu ziam? Hi lai ah taang, thei, sapit, talee ngate om ngawl hi. Tui neak tu ngangawn zongh om ngawl hi!” ci in mawsiat uh hi.

⁶Mipite kung pan Moses le Aaron pai in, Puanbuk kongbiang mai ah ding uh hi. Amate lei ah bokin, Topaompui na a tee khuavak amate tungah kilangh hi.

⁷Topa in Moses tungah,

⁸“Thukham Thingkuang mai ah a om ciangkhut la in a, nangma le Aaron in mihonpi bup kikhawmsak vun. Tualai amate theampo mai ah, a om suangpi sia paupui in, tua hile tua sung pan tui pusuak tu hi. Hi bangin mipite le a ngannote neak tu in suangpi pan tui na pusuaksak tu hi,” ci hi.

⁹Topa thupiak bangin Moses pai in, tua ciangkhut la hi.



¹⁰Moses le Aaron in suangpi mai ah mihonpi bup kikhawmsak a, Moses in, “Ngai vun, ngual langpante awng! Note atu in hi suangpi pan tui hong suaksak tu khu ziam?” ci hi.

¹¹Tuaciang Moses in a ciangkhut laamin suangpi nii vei saat a, tui hong luang vahe in, mite le ngannote theampo in dawn uh hi.

¹²Ahizong Topa in Moses le Aaron tei zazan hi. Ama in, “A thiangtho ka vaang Israel mihingte mai ah saan ngam natu dong upna nei ngawl na hi uh komin amate ka khap sa ngamah note in amate na thetpui buatu uh hi,” ci hi.

¹³Israel mite in Topa langpan in a phutsatna mun le Topa in ama thianthona a lakna mun ahi, Meribak ah hi thu teng piang hi.

Edom Kumpipa in Israel te Paisak ngawl

¹⁴Moses in Kadesh pan Edom kumpipa tungah kamtaite paisak hi. Amate in, “Na mealheak uh ahi Israel minamte in hi bangin thu kong zasak uh hi. Haksatna ka thuakte uh le,

¹⁵ka taangpupite uh Egypt ah pai in kum tam mama sung teangin Egyptte in ka taangpupite le kote hong vawtsia a,

¹⁶Topa hu ngenin ka kikona na he uh hi. Ama in kote ngetna aw za a, vantung lalang khat sawlin ama in Egypt pan hong pusua pui hi. Tu in, na ngamngi Kadesh khua ah ka om uh hi.

¹⁷Nong hesuakna in na ngam hong kantansak tan. Kote le ka ngannote in lampial ngawlin, na losung le na sapit huan sungah pai ngawlin, na tuikhuk tuite kong neaksak buatu uh hi. Na ngamsung ka kantan mateng un, lamzinpi tung bek ka tawn tu uh hi,” ci uh hi.

¹⁸Ahizong Edomte in, “Ka ngam kong kantansak buatu uh hi! Nong kantan uhle pai in kong sim tu uh hi,” ci in zo uh hi.

¹⁹Israel mihingte in, “Lamzinpi tung bek ka tawn tu uh a, kote le ka ngannote in na tuite kong neaksak uhle a manh kong pia tu uh hi. A paitan nuam ka hi bek uh hi,” ci uh hi.



²⁰Edomte in, “Oai ngawl khu hi!” ci in zokik a, amate Israel te sim tu in a thahat ngalkapte taw kuan uh hi.

²¹Edomte in Israel te ii a ngam a kantan tu oai ngawl ahikom Israel te heak kikin lamdang tawn uh hi.

Aaron Thina

²²Israel huam mihonpите in Kadesh nusia a, Edom ngamngi Hor Mual theng uh hi.

²³Tualai ah Topa in Moses le Aaron tungah,

²⁴“Israel te piak tu in ka ciam sa ngamah Aaron theng ngawl tu hi. Banghangziam cile no nii in Meribah ah kong thupiakte hong langpan na hi uhciang Aaron thi tu hi.

²⁵Hor Mual ah, Aaron Le A tapa Eleazar

²⁶paipui in a, tua lai ah Aaron ii a thiampi puante sutin Eleazar silhsak in. Aaron sia tualai ah thi tu hi,” ci hi.

²⁷Topathupiakte Moses in seam hi. Mihonpите muna ah amate Hor Mual ah paito uh a,

²⁸Moses in Aaron ii thiampi puante sutin Eleazar silhsak hi. Tua Mualdawn ah Aaron thi a, Moses le Eleazar ciasuk kik hi.

²⁹Mihonpi bup in Aaron thina thu za a, amate theampo ni sawmthum sung khuangai in om uh hi. .

Ngamsung Vakna 21

Canaante A zawna

¹Canaan ngam thang sangah a om Canaan minam Arad ngam kumpipa in Israel te Atharim lam tawnin hong pai ci a zaak ciang simin pawlkhat man hi.

²Tuaciang Israel te in Topa tungah kiciamna khat vawt a: “Hi mihingte nong zosak le amate le a khuapite nangma tungah kong aap tu a, tuate ka lalcipsak tu hi,” ci uh hi.



³AmateTopa in za a, Canaante zosak hi. Tuaciang Israel te in Canaante that siatin, a khuapite zongh lalcip sak siat a, tua mun Hormah ci uh hi.

Taungo taw Kivawt Ngul

⁴Israel te Hor Mual nusia in Edom ngam kiimveal in Aqaba Tuipi sangah pai uh hi. Ahizong lampi ah amate thinkiam in,

⁵Pathian le Moses langpan in sonsia uh hi. Amate in, “An le tui om ngawlna hi mun senneal ngam sungah a thi tu in banghang Egypt ngam pan hong pusuapui ni ziam? Hi bang anlim ngawlte ka ne zo nawn bua uh hi!” ci in phunsan uh hi.

⁶Tuaciang Topa in mihingte sungah ngul ngu neite tha a, Israel te tam mama tu in thi hi.

⁷Mihingte Moses kungah pai in, “Topa le nang langpan in kong sonsiat uh khial khu hi. Tu in hi ngulte hong laak siat natu in Topa tungah thu hong ngetsak tan,” ci uh hi. Tuaciang mihingte atu in Moses in thu ngen hi.

⁸Tuaciang Topa in Moses tungah, taungo ngul khat vawt in a, ngul tuk thuak mihing khat pawpo in tuasia a et ciang damna a nga thei natu in, khuam tungah khai in ci hi.

⁹Tuaciang Moses in taungo ngul khat vawtin khuam tungah khai hi. Ngul tuk thuak khat pawpo in tua taungo ngul a et ciang damna nga hi.

Hor Mual pan Moab Kuam ah

¹⁰Israel te kikhiin in Oboth ah ngiaphual saat uh hi.

¹¹Tua mun a nusiat zawkciang, Moab ngam nisuana sang duisung a lal sa Abiram ah ngiaphual saat uh hi.

¹²Tua zawkciang Zered Kuam ah ngiaphual saat uh hi.

¹³Tua mun pan kikhiin kik leleau a, Amor ngam dong a zai Arnon Ngunsaksang dui sungah ngiaphual saat uh hi. (Arnon sia Moab le Amor mite ngamngi ahi hi.)



¹⁴Tua ahi hu in Topa ii Ngal simna Laibu in, “Suphah ngamsung Waheb khua, le ngamkuamte; Arnon Ngun,

¹⁵Ar khua dong a ban suk ngamkuam panghte le Moab ngamngi dong in,” ci in son hi.

¹⁶Tua mun pan Tuikhuk kicina mun ah amate pai in, tua lai ahTopa in Moses tungah, “Mihingte kikhawmsak in, amate tui pia tu khi hi,” ci hi.

¹⁷Tua laitakin Israel mihingte in, hi la sa uh hi. “Tuikhuk te awng, na tui phul vun; Lasakna taw kong muak tu uh hi-

¹⁸Kumpi tate ii kumpi ciangkhut taw a taw Ngam lampuite ii a ciangkhut taw a taw Tuikhuk awng,” ci uh hi. Amate duisung panin Mattanah ah kikhiin uh a,

¹⁹tua mun pan Nahaliel zuanin, Nahaliel pan Bamoth ah,

²⁰Bamoth panin senneal ngam a kimu theina Pisgah Mualdawn nuai Moab ngamkuam theng uh hi.

Sihon Kumpi le Og Kumpi A zawna

(Thuhil kikna 2.26 - 3.11)

²¹Tuaciang Israel mihingte in Amor kumpi Sihon tungah kamtaite paisak a;

²²“Na ngam hong kantansak tavun. Kote le ngannote in lampial in na lo sung le na sapit huan sungah pai ngawl tu khu hi. Na tuikhukte pan tui ka ne buatu uh hi. Na ngam ka kantan mateng un, lamzinpi tung bek ka tawn tu uh hi,” cisak hi.

²³Ahizong Sihon in Israel mite ii a ngam a kantan tu oai ngawl hi. Ama in a ngalkapte khawm a, Jahaz duisung ah pai in Israel te sim uh hi.

²⁴Ahizong ngal kidona ah Israel te in a ngalte tam mama that a, Arnon ngun pan Jabboksaksang dong laaksak hi, banghangziam cile tua mun sia Ammon ngam hi a, Ammonte in a ngamngi nasia takin hung uh hi.

²⁵Tuaciang Israel mihingte in Amor khuapi theampo la siat a, Heshbon le a kiim a om kuate zongh la in tua khua sungah teang uh hi.



²⁶Heshbon sia Amorte kumpi Sihon teenna khuapi hi a, Sihon sia Moab kumpi masa a do pa le Arnon Ngun dong ngam theampo a laaksak pa ahi hi.

²⁷Tua hu in la phuakte in, “Kumpi Sihon ii teenna Heshon khuapi ah hong pai tavun! Tua khuapi a kisa kik le a kipua kik mu nuam khu hi.

²⁸Khat vei lai, Heshon khuapi panin Sihon ngalkapte meikuang bangin pai a: Moabte khuapi Ar lalcipsakin Arnon thunghsang mualte valhtum hi.

²⁹Moabte awng, no atu bang za ta lauhuai ziam! Chemosh a bia note lal siat nu hi! Na pathian in a mite ngaltai suaksak a, Numeite Amor kumpipa sal suak uh hi.

³⁰Ahizong tu in a suan a paalte Heshbon pan Dibon lam tawntung Nashim pan Medaba khua paam Nophah dong kimon hi,” ci in phua uh hi.

³¹Tuabangin Israel mihingte Amorte ngam sungah teang a,

³²Moses in Jazer khuapi sim natu lampi pha bel zong tu in, mihingte paisak hi. Israel te in tua khuapi le a kiim ah khuapite la in tua mun ah a teang Amorte hawlkeak uh hi.

³³Tua zawkciang Israel te Bashan lam tawnin heakkik a, Bashan Kumpi Og in amate sim tu in a ngalkapte taw Edrei khua ah kuan uh hi.

³⁴Topa in Moses tungah, “Ama kiita heak in. Hi kumpipa a mihing theampo le a ngam a lei kong zosak tu hi. Heshbon khua a uk Amor Kumpi Sihon tungah na vawt bangin Bashan Kumpi Og tungah vawt in,” ci hi.

³⁵Tuabangin Israel te in Kumpi Og, a tapate le a mihingte theampo khat zongh khoaikhe ngawlin thatlum siat a, tua zawk ciang amate in a ngam lua uh hi. .

Ngamsung Vakna 22

Moab Kumpipa in Balaam Sam

¹Israel te ding kikin, Jericho ngalkhat Jordan ngun nisuana sang Moab zaangtam ah ngiaphual saat uh hi.



²Israel te in Amorte tungah a vawtna teng le Israel te bang za om ci sia Zippor tapa Balak, Moab kumpipa in a zaak ciang,

³ama le a mihingte theampo lau mama uh hi.

⁴Moab te in Midian lampuite tungah, “Khuita in lopa a neak bangin hi mihon in, ih kiim ih paam teng hai ngawlin lalcipsak siat tu hi,” ci uh hi. Tuaciang Balak Kumpipa in,

⁵Amaw ngam Euphrates Ngun hui Pethor khua ah a teang Beor tapa Balaam sam tu in kamtaite paisak hi. Amate in Balak ii kam vaithak hi thu teng Balaam tungah puak uh a, “Kong heaksak nop thu panin, Egypt pan minam bup khat hong pai a, ih ngamsung theampo ah ki thethaang in, hong tuancil tu hi zo hi.

⁶Amate eite sangin tam zaw ahikom nong hesuakna in hong pai tan a, hong haamsiatsak tan. Tuaciang kote in amate zo in, ngamsung pan ka hawlkhia thei tha tu uh hi. Nangma ii thupha piak mihingte in thupha nga a, na haamsiatte in haamsiat thuak hi, ci in ka he hi,” ci uh hi.

⁷Tua hi a, Moab upate le Midian upate in a haamsiatsak natu thaman kengin Balaam kungah pai uh a, Balak vaithak bang teng son uh hi.

⁸Balaam in amate tungah, “Tu zan hi lai ah taam vun a, Topahong son teng, zing ciang kong son tu hi,” ci hi. Tua ahikom Moab upate Balaam kungah taam uh hi.

⁹Balaam kungah Pathian pai in, “Nang kungah hong ngiakte akuate ziam?” ci in dongh hi.

¹⁰Balaam in, “Moab Kumpi Balak sawltakte hi a,

¹¹Egypt pan minam khat hong pai in, ngam sungah ki thethaang siat zo ci in hong son tu in hong paisakte hi. Ama in amate simin a hawlkhiat thei natu in haamsiatsak le hong oai hi,” ci in zo hi.

¹²Pathian in Balaam tungah, “Hi mihingte zui heak in a, Israel mihingte haamsiat heak in, banghangziam cile amate in ka thupha piakte ahi uh hi,” ci hi.

¹³A zingsang ciang Balaam sia Balak ii kamtaite kungah pai in, “Cia kik tavun; Topa in note kong zui tu oai ngawl hi,” ci hi.

¹⁴Tua ahiciang amate Balak kungah cia kik a, Balaam ii zui nop ngawl na thu teng son uh hi.

¹⁵Tuaciang Balak in a masa lai sang a, a tam zaw le a zatak huai zaw uliante paisak hi.

¹⁶Amate Balaam kungah pai in, “Nong hesuakna in ka kungah nong pai tu bangma in khaksak heak in!

¹⁷Thaman tam mama kong pia tu a, nong son babang ka vawt tu hi. Nong hesuakna in hong pai tan a, hi mihingte hong haamsiatsak tan,” ci in Balak ii kam vaithak teng son uh hi.

¹⁸Ahizong Balaam in, “Balak in a kumpi innsung a om ngun le kham theampo hong pia zong, Topa ka Pathian ii thupiak a no bel zongh ka nial thei bua hi.

¹⁹Ahizong nong hesuakna in ngualdangte bangma, tu zan taam vun, tua hile Topa in thu dang son tu hong nei ziam hong nei bua ziam ka he tu hi,” ci in zo hi.

²⁰Tua ni zanin Balaam kungah Pathian pai a, “Nangma sam tu in hi mite hong pai ahile, kithoai in zui tan, ahizong kong son teng bek vawt in,” ci hi.

²¹Tua hi a, a zingsang ciang Balaam in a laa tung to in Moab upate zui hi.

Balaam le Ama Laa

²²Balaam in zui ahikom Pathian thin uuk hi. Balaam sia a naseam niite in zui a, a laa tung to in a pai laitak a lampi khak tu in Topavantung lalang khat a mai ah ding hi.



²³Tua laa in namsau khat a toai vantung lalang tua munah ding a mu ciang lampi pan pialin duisung zuan hi. Balaam in a laa saatin lampi ah hawl kik hi.

²⁴Tuaciang lamciakna sapit huan nii kilaklaw, a lang le a lang suangpang omna munah vantung lalang sia ding hi.

²⁵A laa in vantung lalang a mu ciang leangin suangpang phul a, Balaam ii peang suangpang ah neng hi. Balaam in a laa saat kik hi.

²⁶Khat vei ma vantung lalang a mai ah pai leleau a, kipial natu a om ngawl lampi ciakna mun khat ah ding hi.

²⁷Tutung ciang, laa sia vantung lalang a mu ciang boksuk hi. Balaam a thin uukin, a ciang taw a laa saat tu kipan hi.

²⁸Tuaciang Topa in laa sia kampau theina vaang pia a, laa in Balaam tungah, “Nang tungah bang khialna nei khi ziam? Banghangin thum vei hong saat ni ziam?” ci hi.

²⁹Balaam in, “Banghangziam cile kei nong mawmawt vawt hang hi! Namsau nei leng hong thatlum tu khi hi,” ci in zo hi.

³⁰Laa in, “Na khan tawntung, nong tona laa sia ma hi ngawl kana khi ziam? Nidangin hi bang hong vawt ngei khi ziam?” ci in zo hi. Balaam in, “Nong vawt ngei bua hi,” ci in zo hi.

³¹Tuaciang, Topa in Balaam tua munah namsau taw a ding vantung lalang sia musak hi. Balaam lei ah boksuk hi.

³²Vantung lalang in, “Banghang hi bang na laa thum vei saat ni ziam? Hi lampi a zui tu hi ngawl na hikom, na maikhak tu in kong pai zo hi.

³³Ahizong na laa in kei hong mu a, thum vei hong pial hi. Tuabang hong pial buale nangma hong thatin, na laa a suaktasak tu ka hi hi,” ci hi.

³⁴Balaam in, “Khial zo khi hi. Kei hong pangin ka mai ah na din hunlam ka he bua hi. Ahizong tu in ka paisuak tu khial nong sa ahile ka heak kik tu hi,” ci in zo hi.

³⁵Ahizong vantung lalang in , “Hi mihingte taw paikhawm in a, ahizong son a kong sawl teng bek son in,” ci hi. Tuabangin Balaam in amate zui hi.

Balak in Balaam Muak

³⁶Balak in Balaam a pai hunlam a zaak ciang Moab ngamngi Arnon Ngun tung a om Ar khuapi ah muak hi.

³⁷Balak in Balaam tungah, “Kong samsak maksak lai in banghangin hong pai ngawl ni ziam? A kicing thaman pia zo ngawl tu in hong um ni ziam?” ci hi.

³⁸Balaam in, “Hong theng zo hi ngawl khi ziam? Ahizong tu in a bang vaang nei khi ziam? Pathian ii son a hong sawl teng bekma son thei khi hi,” ci in zo hi.

³⁹Tuaciang Balaam sia Balak taw Huzoth khua ah pai in,

⁴⁰tua lai ah Balak in khui le tuu ngo in, a sa pawlkhat Balaam le a tonpui upate pia hi.

Balaam ii A khat vei Kamsaanna

⁴¹A zingsang ciang Balak in Balaam sia Bamoth Baal Mual ah paipui to hi. Tua mun panin Balaam in Israel mihingte khen khat mu thei hi.

Ngamsung Vakna 23

¹Balaam in Balak tungah, “Hi lai ah biaknatau sali kei atu in hong vawtsak tan a, khuital sali le tuutal sali hong paipui tan,” ci hi.

²A ci bangin Balak in seam a, Balak le Balaam in biaknatau sim ah khuital khat le tuutal khat veu pia uh hi.

³Tuaciang Balaam in Balak tungah, “Topa in kei hong mu nuam ziam hong mu nuam ngawl ziam, pai in ka na et laan in, nang na meihal biakpiakna hui ah na ding zii in. Ama ii kei tungah hong pualaakna bangin kong son kik tu hi,” ci hi. Tuaciang Balaam sia mualdawn ah ama nguak kaato a,

⁴Pathian in paupui hi. Balaam in Topa tungah, “Biaktau sali ka vawt a tuate tungah khuital khat le tuutal khat veu biakpiakna in ka pia zo hi,” ci hi.



⁵Topa in Balaam tungah, Balak kungah kong vaithak teng son tu in heak kik in, ci in sawl hi.

⁶Tuaciang Balaam heak kik a, Balak a meihal biakpiakna hui ah Moab upate theampo taw ding khawm lai mu hi.

⁷Balaam in hi kamsaannate pualaak a: “Moab kumpi Balak in Syria ngam niswana mualtung pan kei hong paipui hi. Moab kumpi Balak in, ‘Hong pai tan a, kei taangin Israel mite haamsiat in’ hong ci hi,

⁸Pathian ii haamsiat ngawl sia bangbang haamsiat thong tu a, Topa lalsak ngawl sia bangbang lalsak tu khi ziam?

⁹Suangpi saang tung pan amate ka mu thei a, Mualtung pan amate ka en thei hi. Amate bek minam khat in nungta a, Minamdangte sangin thupha a nga zawkna thu amate in he uh hi.

¹⁰Israel suan le paalte leivui za in tam a- a phak za sim tu tamlei lawlawm hi. Pathian mihingte khat bangin ka hunte hong bosak tan a, Mihing thumaante bangin thinnuam in hong thisak tan,” ci hi.

¹¹Tuaciang Balak in Balaam tungah, “Kei tungah bang hong vawt ni ziam? Hi lai ah ka ngalte haamsiat tu in kong paipui a, ahizong amate thupha na pia pumsai hi,” ci hi.

¹²Balaam in, “Topa ii son tu a hong sawl teng bek ka son thei hi,” ci in zo hi.

Balaam ii A nii vei Kamsaanna

¹³Tuaciang Balak in Balaam tungah, “Israel te pawlkhat na mu thei bek natu mundang khat ah hong zui tan. Tua mun pan amate hong haamsiatsak tan,” ci hi.

¹⁴Balak in Balaam sia Zophim lo sung Pisgah Mualdawn ah paipui hi. Tua munah ama in biaknatau sali vawtin tua tungah khuital khat le tuotal khat veu biakpiakna in pia hi.

¹⁵Balaam in Balak tungah, “Na meihal biakpiakna hui hi sungah na ding in a, tua munah Pathian taw ka na kimu tu hi,” ci hi.



- ¹⁶Topa sia Balaam taw kimu a, a son tu teng a son zawkciang Balak tungah son tu in ciasakkik hi.
- ¹⁷Tuaciang ama heak kik a, Balak meihal biakpiakna hui ah Moab upate taw dingkhawm lai mu hi. Topa in bang hong ci ziam? ci in Balak in dongh hi.
- ¹⁸Balaam in hi kamsaanna pualaak in: “Zippor ii tapa Balak awng hong pai tan, Kong son tu thute hong ngai tan.
- ¹⁹Pathian sia a leilot thei mihingte taw kibang ngawl a, Ama sia a thin a kheal papai mihing hi ngawl hi. A kamciamna babang seam a, A pau bangin tangtung hi.
- ²⁰Thupha pia tu in hong kisawl a, Pathian in thupha a piak ciang ka khealsak kik thei bua hi.
- ²¹Israel te mai sangah kaamsiatna le ngimna a thuak tu ka mu kholsak bua hi. Topa a Pathian in amate ompui a; Pathian sia a kumpi in pualaak uh hi.
- ²²Pathian in Egypt pan amate pusuapui a, Ama in ngam khuita hang bangin amate panpui hi.
- ²³Israel mihingte langpan natu a kizangh thei bumh ahizong, ai ahizong om ngawl hi. Tu in mihingte in Israel te thu son a, ‘En vun Pathian nasepna paw!’ ci tu uh hi.
- ²⁴Israel minamte sia a thahat tawpi khat taw kibang a: A sa mat sate balneen in a neak siat mateng, A sa mat sate chisan a neak siat mateng in, tawlna ngawl hi,” ci hi.
- ²⁵Tuaciang Balak in Balaam tungah, “Israel mihingte haamsiat tu nong nial a, tua ahile thupha beak pia heak ka lam in!” ci hi.
- ²⁶Balaam in, “Topa hong sawl bang bekin seam tu khi hi, ci in hong son zo hi ngawl khi ziam?,” ci in zo hi.

Balaam ii A thumvei Kamsaanna



²⁷Balak in, “Hong pai tan, mundang khat ah kong paipui tu hi. Tua mun pan kei atu in, amate na haamsiat tu Pathian in hong oai zongh hi thei tha tu hi,” ci hi.

²⁸Tuaciang Balak in senneal ngam a ki ensuk theina Peor Mualdawn ah Balaam paipui hi.

²⁹Balaam in Balak tungah, “Hi lai ah biaknatau sali kei atu in sa in a, khuital sali le tuatal sali kei atu hong paipui tan,” ci hi.

³⁰Ama ci bangin Balak in seam a, khuital khat le tuatal khat veu biaknatau tungah biakpiakna in pia hi.

Ngamsung Vakna 24

¹Israel mite thupha pia tu in Topa ii ama Balaam a deina thu tu in Balaam in he ahikom, ni dang a vawt ngei bangin aisaan tu in pai nawn ngawl hi. Ama senneal ngamsang nga in,

²Israel mihingte a minam a minam in ngiaphual saat mu hi. Pathian thaa in ama uk in,

³ama in hi kamsaanna pualaak a: “Beor tapa Balaam thupuak, Thiang takin a mu theipa ii kammalte,

⁴Pathian son bang a za theipa Vaanglian belpa Pathian tung pan mu kholna khat Mit hak kiukiau in ka mu hi.

⁵Israel Puanbukte etlawm a,

⁶A ngual sau in a kiciing palm kung, ahibuale ngunhui ah huante taw kibang a, Topa ii a ciin aloe kungte ahibuale tui hui a po cedar kungte taw kibang hi.

⁷Amate in nguatui cing takin nga tu uh a, nguatui zen lote ah a thaicite ciing tu hi. A kumpipa sia Agag kumpipa sangin lian zaw tu a, Ama ukna ngam zai in lian tu hi.

⁸Pathian in amate Egypt ngam pan pusua pui a; Ama in ngam khuital hang bangin amate panpui hi. Amate in a ngalte lopvalh a, A ngute ngoaicip in a thaltangte thiaktan hi.



⁹Israel sia a thahat tawpi khat taw kibang a; A mut laitakin kuama in phong ngam ngawl hi. Israel thupha a pia pawpo thupha kipia tu a, Israel a haamsiat pawpo kihaamsiat tu hi,” ci hi.

¹⁰Balak thin uukin a khut tumin Balaam tungah, “Ka ngalte haamsiat tu in kong sam a, ahizong tu in amate thumvei tak thupha na pia bungle hi.

¹¹Tu in, inn ah cia in! Thaman piak tu in kong kamciam a, ahizong na thaman nga tu sia Topa in hong khak hi,” ci hi.

¹²Balaam in, “ Ka kungah palai nong paisakte tungah ka sonsa bangin,

¹³na kumpi inn sungah a om ngun le kham theampo nong pia zong, Topa thupiakte nialin keima thu taw bangma ka seam buatu hi. Topa in son a hong sawl teng bek ka son tu hi,” ci in zo hi.

Balaam ii A khak bel Kamsaannate

¹⁴Balaam in Balak tungah, “Tu in ka mihingte kungah ka cia kik tu a, ahizong ka cia ma in, mailam sangah Israel mihingte in na mihingte tungah a vawt tu teng na kidop natu in kong son khol tu hi.” ci hi.

¹⁵Tuaciang ama in hi kamsaanna pualaak a: “Beor tapa Balaam thusonte; Thiang takin a mu thei pa ii kammalte;

¹⁶Pathian son bang a za thei pa le A Sang belna pan hong pai thu heakna a nga pa Vaanglian belpa Pathian tung pan mu kholna khat mit hak kiukiau in ka mu hi.

¹⁷Maisang hun tu ka en a, Israel minamte ka mu hi. Tua minamte sungah, Aksi bangin a taang kumpi khat piang tu hi. Thazau aksi bangin Israel minam sung pan ama piang tu hi. Ama in Moab lampuite saat tu a, Seth mite theampo sucip tu hi.

¹⁸Ama in Edom ngamah a ngalte zo tu a, A ngalte ngam ama neisa sua tu a, Israel sia a ngualzo hi tawntung tu hi.

¹⁹Israel minamte in a peangnuai ah amate tuancil tu a, A suaktate a khak bel dongin that tu hi,” ci hi.



²⁰Tuaciang Balaam ii mukholna sungah Amalek te mu a, hi bangin kamsaanna pualaak hi: “Amalek sia minam theampo sung pan a thahat bel hi a, ahizong a khak bel ciang a tawntung maaimang tu hi,” ci hi.

²¹Ama mu kholna sungah Balaam in Kente mu a, hi kamsaanna pualaak hi: “Na teenna mun muanhuai a, Suangliang saang tung a om vacimbu bang in bit hi,

²²Assyria in note salin hong mat ciang, No Kente hong kithatlum tu hi,” ci hi.

²³Balaam in hi bang kamsaanna pualaak hi: “Sak sangah a kikhawm mihingte akuate ziam?

²⁴Cyprus pan ngalsim tute teambaw taw hong pai tu a: Amate in Assyria le Eber zo tu hi. Ahizong amate zongh a tawntungin lalcip tu uh hi,” ci hi.

²⁵Tuaciang Balaam kithoai in a inn ah cia a, Balak sia a pai natu ah paisuak hi. .

Ngamsung Vakna 25

Peor ah Israel Mihingte

¹Israel te Acacia Kuam ah ngiaphual a saat lai in, pate in tua munah a teang Moab numeite khialpui a kipan uh hi.

²Tua numeite in Moab pathian a kibiakna mun sangaw biakpiakna poai ah amate sam uh hi. Israel te in an ne in,

³Peor ii Baal pathian bia uh hi. Tua ahikom amate tungah Topa thin uuk a,

⁴Moses tungah, “Israel lampui theampo sam in a, ka thu nong nitna in suntang in amate thatlum siat in. Tua hile mihingte tungah ka thin uuk nawn ngawl tu hi,” ci hi.

⁵Moses in upate tungah, “Note khat sim in na minam sung pan Peor ii Baal pathian a bia peuma thatlum tu nu hi,” ci hi.

⁶Moses le Israel huam mihonpите khuangai in Topa omna Puanbuk kongbiang ah kapin a om laitak, Moses le mihonpi bup mu tangin Israel te khat in Midian numei khat Topa omna Puanbuk sungah tumpui hi.



⁷Tua thu Eleazar tapa, thiampi Aaron tupa, Phinehas in a mu ciang dingin mipite sung pan pusuak hi. Ama in tei khat la a,

⁸tua pa le tua nu ii nung zui in Puanbuk sungah a nii in khawlet hi. Hi bangin Israel te sungah a tung tuasiatna sia kithaisak a,

⁹ahizong mihing tulkul le tulli tua tuasiatna in thisak zo hi.

¹⁰Topa in Moses tungah,

¹¹“Phinehas nasepna hangin Israel mihingte tungah ka thin a uk nawn bua hi. Ama in keima sim ngawl Pathian dang biak tu peuma a dei ngawlpa hi a tua thu hangin thin uuk hi ka leng amate ka mon bua hi.

¹²Tua ahiciang a tawntung a kip tu thuciamna khat Phinehas taw ka vawt tu sia Phinehas tungah son in,

¹³Kei hong langpan pathiante saang ngawl a, Israel te ii mawmai sakna zongh piangsak ahikom ama le a suan a paalte a tawntung in thiampi kiseamsak hi,” ci hi.

¹⁴Israel te Midian numei taw thalup a thuak khawmpa ii min sia Zimri hi a, Simeon nam sung pan be lutang Salu tapa ahi hi.

¹⁵A numei min sia, Cozbi ahi hi. A pa sia Zur hi a, Midian minam sung pan be le phung khat ii ukpi ahi hi.

¹⁶Topa in Moses tungah,

¹⁷“Midiante sim in a, mon in,

¹⁸banghangziam cile Peor ah note hong theamin na pha ngawl a sep uh hang le Poer ah tuasiatna a tun lai in a kithatlum Cozbi hang ahi hi,” ci in thu pia hi. .

Ngamsung Vakna 26

A Nii vei Misimna

¹Tuasiatna a ven ciang Topa in Moses le Aaron tapa Eleazar tungah,



²“Israel huam mihonpi bup kumkul le a tungsia ngalkap a seam thei tu pasal theampo innkuan zui in misimna vawt in,” ci hi.

³⁻⁴Moses le Eleazar in a thu ni a, kumkul pan a tungsia pa theampo kaikhawm hi. Amate Jericho paam Jordan Ngunngal Moab zaangtam ah kikhawm uh hi. Hite sia Egypt pan a pusuak Israel mite ahi hi.

⁵Reuben nam pan: (Reuben sia Jacob tapa lian bel hi.) Hanoch, Pallu,

⁶Hezron le Carmi be le phungte ahi uh hi.

⁷Hite sungah pasal 43,730 om hi.

⁸Pallu suan le paalte sia Eliab,

⁹le a tapa Nemeul, Dathan le Abiram te ahi hi, (Dathan le Abiram sia mipite teal ahi hi, Amate in Moses le Aaron thu nialin Topa a langpan ciang Korah nungzuite taw kipawl hi.

¹⁰Lei kihongin amate valhlum a, amate Korah le a nungzui pasal 250 mei ii kaklup sungah kihel hi. Amate mihingte atu kidopna suak hi.

¹¹Ahizong Korah tapate kithatlum ngawl hi.)

¹²Simeon nam pan, Nemeul, Jamin, Jachin,

¹³Zerah le Shaul be le phungte ahi hi.

¹⁴Hi be le phungte sungah pasal 22,200 om hi.

¹⁵Gad minam pan : Zephon, Haggi, Shuni,

¹⁶Ozni, Eri,

¹⁷Arod le Areli be le phungte ahi hi.

¹⁸Hi be le phungte sungah pasal 40,500 om hi.

¹⁹⁻²¹Judah nam pan: Shelah, Perez, Zerah, Hezron le Hamul be le phungte ahi hi. (Judah ii tapa nii ahi Er le Onante sia, Canaan ngam ah thi hi.)

²²Hi be le phungte sungah pasal 76,500 om hi.

²³Issachar nam pan: Tola, Puah,



- ²⁴Jashub le Shimron be le phungte ahi hi.
- ²⁵Hi be le phungte sungah pasal 64,300 om hi.
- ²⁶Zebulun nam pan: Sered, Elon, le Jahleel be le phungte ahi hi.
- ²⁷Hi be le phungte sungah pasal 60,500 om hi.
- ²⁸Joseph nam pan: tapa nii; Manasseh le Ephraimte ahi hi.
- ²⁹Manasseh nam pan Manasseh tapa Machir sia Gilead ii pa hi a, a nuai a be le phung teng sia Gilead ii suan le paalte ahi hi.
- ³⁰Iezer, Helek,
- ³¹Asriel, Shechem,
- ³²Shemida, le Hepher be le phungte ahi hi.
- ³³Hepher tapa Zelophehad in tapa nei ngawl a, tanu bek nei hi. A tanute min sia, Mahlah, Noah, Hoglah, Milcah le Tirzahte ahi hi.
- ³⁴Hi be le phungte sungah pasal 52,700 om hi.
- ³⁵Ephraim nam pan: Shuthelah, Becher, le Tahan be le phungte ahi hi.
- ³⁶Eran be le phungte sia, Shuthelah ii suan le paalte ahi hi.
- ³⁷Hi be le phungte sungah pasal 32,500 om hi. Hi be le phungte sia Joseph ii suan le paalte ahi hi.
- ³⁸Benjamin nam pan: Bela, Ashbel, Ahiram,
- ³⁹Shephupham le Hupham be le phungte ahi hi.
- ⁴⁰Ard le Naaman be le phungte sia Bela ii suan le paalte ahi hi.
- ⁴¹Hi be le phungte sungah pasal 45,600 om hi.
- ⁴²Dan nam pan: Hushim be le phung hi a,
- ⁴³Pasal 64,400 om hi.
- ⁴⁴Asher nam pan: Imnah, Ishvi, le Beriah be le phungte ahi hi.
- ⁴⁵Heber le Malchiel be le phungte sia Beriah ii suan le paalte ahi hi.



- ⁴⁶Asher in ta numei khat nei a, a min Serah ahi hi.
- ⁴⁷Hi be le phungte sungah pasal 53,400 om hi.
- ⁴⁸Naphtali nam pan: Jahzeel, Guni,
- ⁴⁹Jezer, le Shillem be le phungte ahi hi.
- ⁵⁰Hi be le phungte sungah pasal 45,400 om hi.
- ⁵¹Israel pasal a vekpi in 601,730 pha hi.
- ⁵²Topa in Moses tungah,
- ⁵³“ A mi phaza taw kizui in, hi minamte ngam hawmsak in.
- ⁵⁴⁻⁵⁶Lai meetang sawkin ngam hawmsak in a, minam tamte ngamliaan pia in, minam tawmte ngamno pia in,” ci hi.
- ⁵⁷Levi nam sungah Gershon, Kohath le Merari be le phungte kihel hi.
- ⁵⁸A suan le paalte sungah Libni, Hebron, Mahli, Mushi, le Korah bawngte kihel hi. Kohath sia Amram ii pa hi a,
- ⁵⁹Amram in Egypt pan a piang Levi ii tanu Jochebed tenpui hi. Ama in Amram taw tapa nii nei a, Aaron le Moses le tanu khat Miriam ahi hi.
- ⁶⁰Aaron in tapa li nei a, Nadab, Abihu, Eleazar le Ithamar ahi hi.
- ⁶¹Nadab le Abihute sia Topa tungah a thiangtho ngawl meihal biakpiakna a piak ciang a thi uh hi.
- ⁶²Levi mite tha khat pan a tungsia pasal 23,000 pha hi. Amate Israel ngam sungah neisa leitangh bangma kipia ngawl ahikom Israel midangte taw kihel ngawlin a tuamin kiciamtee hi.
- ⁶³Hi be le phungte theampo Moses le Eleazarte in Jericho paam, Jordan Ngunggal Moab zaanglei ah Israel mite misimna a vawt lai a kiciamtee ahi hi.
- ⁶⁴Moses le Aaron ii Sinai Senneal ngamah mite tepteena lai a vawt maksak lai in a kihelte khat zongh nungta nawn ngawl hi.
- ⁶⁵Topa in amate a vekpi in dui sungah thi siat tu hi, a ci bangin Jephunneh tapa Caleb le Nun tapa Joshua sim ngawl thi siat hi.



Ngamsung Vakna 27

Zelophehad ii Tanute

¹Joseph tapa Manasseh, Manasseh tapa Machir, Machir tapa Gilead, Gilead tapa Hephher, Hephher tapa Zelophehad ii tanute sia Mahlah, Noah, Hoglah, Milcah le Tirzahte ahi hi.

²Tua tanute pai in Moses, thiampi Eleazar, lampuite le mihonpite mai, Topa omna Puanbuk kongbiang ah ding a,

³“Ka pa uh in tapa khat zongh nei ngawlin dui sungah hong thi san hi. Ama sia Topa a langpan Korah ii nungzuite sungah kihel ngawl hi. Ama mawna hangin ama thi hi.

⁴Tapa a nei ngawl man lelin ka pa uh ii min banghangin Israel minam sung pan bo tu ziam? Ka pa uh ii mealheakte taw in ko zongh tel hong pia tavun, ” ci hi.

⁵Moses in amate thu Topa tungah ko a,

⁶tuaciang Topa in ama tungah,

⁷“Zelophehad tanute ii hong ngetna maan hi; a pa mealheakte taw in tel piakhawm in. A pa tel amate in tang taken.

⁸Pasal khat tapa nei ngawlin a thi ciang a tanu in a neisa lua tu hi, ci in Israel mihingte tungah son in.

⁹Tua pa in tanu a nei bua ahile ama ii suapui pate in lua tu hi.

¹⁰Ama in suapui pasal a nei buale, a pa ii suapui pate in lua tu hi.

¹¹Ama in suapui pasal ahibuale papi, pano a nei buale a bete sung pan a kinai pui bel khat in lua tu a, ama neisa suak tu hi. Hi thu sia Keima Topa ii kong thupiak hi a, Israel mihingte zui tu ngeina ahi hi, ” ci hi.

Moses lai tu in Joshua Kiteal

(Thuhil kikna 31.1-8)

¹²Topa in Moses tungah, “Abiram Mual ah kaato in a, Israel te ka piak tu ngam sia ngal-et in,

¹³tua ngam na mu zawkciang na u Aaron thi bangin na thi tu hi,



¹⁴banghangziam cile Zin dui sungah kong thupiakte na unau in nong langpan uh hang hi. Meribah ah Israel huam mihonpite in keima hong langpan lai in, a thiangtho ka vaangletna amate mai ah nong saang bua uh hi,” ci hi. (Meribah sia Zin duisung Kadesh a om ciktui naak ahi hi.)

¹⁵Moses in,

¹⁶“Nuntakna theampo ii naak ahi Topa Pathian awng,

¹⁷na mihonpite tuucing nei ngawl tuuhon bang ahi ngawl natu in, lampui thei tu le ngal a sim ciang thu a pia thei tu mihing khat nong tealsak natu in, hesuak kong ngen hi,” ci in thungen hi.

¹⁸Topa in Moses tungah, “Kicinna a nei Nun tapa Joshua sam in, a lu tungah na khut nga in.

¹⁹Thiampi Eleazar le mihonpi bup mai ah ama dingsak in a, amate theampo ii mai ah nangma hong laih tu a hina thu thangsak in.

²⁰Israel huam mipibup in a thu a nit thei natu in, na thu neina pawlkhat ama pia in.

²¹Joshua in thiampi Eleazar bulphu tu a, Eleazar in keima deina a heak natu in Urim le Thummim zangh tu hi. Tuabangin Joshua le Israel mihonpite thu theampo ah Eleazar in lampui tu hi,” ci hi.

²²Topa thupiakna bangin Moses in seam hi. Ama in Thiampi Eleazar le mihonpite bup mai ah Joshua dingsak hi.

²³Topa thupiak bangin Moses in Joshua lu tungah a khut nga in, ama laih tu a hina thu thangsak hi. .

Ngamsung Vakna 28

A hun zui a Biakpiaknate

(Pusuana 29.38-46)

¹Topa in Moses tungah,

²Israel te in a kisee hunin ama a lungdamsak, a kisamh an biakpiakna Pathian tungah a piak natu a son tu in thupia hi.



³Hite sia Topa tungah a kipia tu an biakpiaknate ahi hi: nisim meihal biakpiak natu in, a mealhem ngawl kum khat a pha tuutalno nii hi tu hi.

⁴Tuuno khat zingsang in kipia tu a, a dang tuuno sia nitak in kipia tu hi.

⁵Tua tuunote antang biakpiakna in a pha bel olive thau pint 2 taw a kihel anvui pound 2 taw kipia khawm tu hi.

⁶Sinai Mual tungah a masa bel an biakpiakna na piak uh bangin, nisim in a kipiak, a kihaltum biakpiakna hi a, tua in Topa a lungdamsak ngimnam ahi hi.

⁷A masa tuuno taw zu biakpiakna na piak uh bangin biaknatauh ah zu pint 2 buah vun.

⁸Zu taw zingsang biakpiakna na piak khop uh bangin, nitak in a niina tuuno sia pia vun. Tua zongh Topa tungah ngimnamtui an taw biakpiakna ahi hi.

Sabbath Ni Biakpiakna

⁹Sabbath ni in a mealhem ngawl, kum khat a pha tuutal no nii, antang biakpiakna in olive thau taw a kihel anvui pound 4 le zu biakpiakna pia vun.

¹⁰Hi meihal biakpiakna sia nisim in zu taw biakpiakna belapna in Sabbath simin piak tu ahi hi.

Thasim Ni masa bel Ni Biakpiakna

¹¹Thasim ni masa bel ni in, Topa tungah meihal biakpiakna a nuai a bangin pia vun. Khuitalno nii, tuutal khat, kum khat a pha tuuno sali, a vekpi in a mealhem ngawl hi tu hi.

¹²Antang biakpiakna in olive thau taw a kihel anvui pia vun. Khuital khat ciang anvui pound 6, tuutal khat ciang anvui pound 4 le,

¹³tuuno khat ciang anvui pound 2 pia vun. Hi meihal biakpiaknate Topa tungah an biakpiakna hi a, Topa a lungdamsak ngimnamtui ahi hi.



¹⁴A kilawm zu biakpiakna sia khuital khat ciang zu pint 4, tuutal khat ciang zu pint 3 le tuuno khat ciang zu pint 2 ahi hi. Hisia sia kum khat tawntung thasim, ni masa bel ni in meihal biakpiakna ah zui tu ngeina ahi hi.

¹⁵Tuaciang nisim meihal biakpiakna le zu taw biakpiakna belapna in, mawphel biakpiakna in kealtal khat pia vun.

Tol kisaw ngawl Anluum Poai ah Biakpiaknate

(Thiampi 23.5-14)

¹⁶Topa upatna in a kizangh Paisan Poai tha masa bel, ni sawm le ni li ni in, kivawt tu hi.

¹⁷Ni sawm le ni nga ni in, biakna poai kipan in, ni sali sung kivawt tu hi. Tua hunsung teng tol kisaw ngawl anluum bek kine tu hi.

¹⁸Poaipi ni masa bel ni in, biakpiakna vawt tu in na kikhawm tu uh a, na na seam buatu uh hi.

¹⁹Topa tungah an taw biakpiakna in meihal biakpiakna pia vun: khuitalno nii, tuutal khat le kum khat a pha tuutal sali, a vekpi in a mealhem ngawl hi tu hi.

²⁰Olive thau taw a kihel anvui a kilawm antang biakpiakna in pia vun: Khuital khat ciang anvui pound 6, tuutal khat ciang anvui pound 4 le

²¹tuutalno khat ciang anvui pound 2 pia tu nu hi.

²²Mawphel biakpiakna in keal khat zongh pia vun a, hi bangin mipite atu in a zeksa thiansuana vawt vun.

²³Hite sia zing simin meihal biakpiakna belapna in pia thua vun.

²⁴Tuabangin ni sali sung a namtui an taw biakna Topa tungah pia vun. Hi biakpiakna sia nisim meihal biakpiakna le zu taw biakpiakna belapna in pia thua vun.

²⁵Ni sali ni in, biakpiakna vawt tu in kikhawm vun a, na seam heak vun.

Anlaak Poai ah Biakpiaknate

(Thiampi 23.15-22)



²⁶Anlaak Poai ni masa bel ni in Topa tungah anpal biakpiakna na piak uhciang biak kikhopna nei in, bangma vawt ngawl tu nu hi.

²⁷Topa a lungdamsak ngimnamtui biakpiakna in meihal biakpiakna pia vun. Khuita moi nii, tuuta khat le kum khat a pha tuuta no sali hi tu a, a vekpi in a mealhem ngawl hi tu hi.

²⁸Olive thau le anvui a kihel antang biakpiakna pia vun. Khuita khat ciang anvui pound 6, tuuta khat ciang anvui pound 4,

²⁹le tuuta no khat ciang anvui pound 2 pia vun.

³⁰Mawphel biakpiakna in kealta khat zongh pia vun a, hi bangin mipite atu in a zeksa thiansuana vawt vun.

³¹Nisim meihal biakpiakna le antang biakpiakna belapna in hite le zu biakpiakna pia vun.

Ngamsung Vakna 29

Kumthak Poai ah Biakpiaknate

(Thiampi 23.23-25)

¹Tha salina ni masa bel ni in, biak kikhopna na nei tu uh a, na na seam buatu uh hi. Tua ni in lemle kitum tu hi.

²Topa a lungdamsak ngimnam ahi meihal biakpiakna khat Topa pia vun: khuita moi khat, tuuta khat, kum khat a pha tuuta no sali hi tu a, a vekpi in mealhem ngawl hi tu hi.

³Olive thau le anvui a kihel ngeina antang biakpiakna pia vun: khuita khat ciang anvui pound 6, tuuta khat ciang pound 4,

⁴le tuuno khat ciang pound 2 pia vun.

⁵Mawphel biakpiakna in kealta khat zongh pia vun a, hi bangin mipite atu zeksa thiansuana vawt vun.

⁶Hi bang biakpiaknate thasim ni masa bel ni in ngeina meihal biakpiakna le antang biakpiakna, nisim meihal biakpiakna le antang biakpiakna le zu biakpiaknate belap na in pia vun. Hi bang an taw biakpiaknate Topa a lungdamsak ngimnam biakpiakna ahi hi.



Kilemna Ni a Biakpiaknate

(Thiampi 23.26-32)

⁷Tha salina ni sawm ni in, biak kikhopna nei vun. An ne heak vun a, naseam heak vun.

⁸Topa a lungdamsak ngimnamtui ahi meihal biakpiakna khat Topa tungah pia vun: khuitalno khat, tuutal khat, le kum khat a pha tuutalno sali hi tu a, a vekpi in mealhem ngawl hi tu hi.

⁹Olive thau le anvui kihel ngeina biakpiakna pia vun; khuital khat ciang anvui pound 6, tuutal khat ciang anvui pound 4,

¹⁰le tuutalno khat ciang anvui pound 2 pia vun.

¹¹Mipite atu a zeksa thiansuana in a kipia keal, le nisim meihal biakpiakna, antang biakpiakna le zu biakpiakna belapna in mawmai biakpiakna in kealtal khat zongh pia thua vun.

Buk Poai ah Biakpiaknate

(Thiampi 23.33-44)

¹²Tha salina ni sawm le ni nga ni in, biak kikhopna nei vun. Topaupatna in tua poaipi ni sali sung khaamin, naseam heak vun.

¹³Ni masa ni in Topa a lungdamsak ngimnam ahi an biakpiakna Topatungah pia vun. Khuital no sawm le thum, tuutal nii le kum khat a pha tuutal no sawm le li hi tu a, a vekpi in mealhem ngawl hi tu hi.

¹⁴Olive thau le anvui a kihel ngeina antang biakpiakna pia vun. Khuital khat ciang anvui pound 6, tuutal khat ciang pound 4,

¹⁵le tuutalno khat ciang pound 2, a kisamh za zu biakpiakna taw pia vun.

¹⁶Mawphel biakpiakna in kealtal khat zongh pia vun. Hi bang biakpiaknate nisim meihal biakpiakna, antang biakpiakna le zu biakpiakna belapna in piathua vun.

¹⁷A ni nii ni in, a vekpi mealhem ngawl khuital no sawm le nii, tuutal nii le kum khat a pha tuutal no sawm le li pia vun.



18-19 Ni masa ni atu a, a kismah biakpiakna dang theampo taw pia khawm vun.

20 A ni thum ni in, a vekpi mealhem ngawl khuita sawm le khat, tuutaal nii, le kumkhat a pha tuutaalno sawm le li pia vun.

21-22 Ni masa ni atu a kismah a dang biakpiaknate theampo taw pia khawm vun.

23 Ni li ni in, a vekpi mealhem ngawl khuita no sawm, tuutaal nii, le kum khat a pha tuutaalno sawm le li pia vun.

24-25 Ni masa ni atu, a kismah a dang biakpiaknate theampo taw pia khawm vun.

26 Ni nga ni in a vekpi mealhem ngawl khuita no kua, tuutaal nii, kum khat a pha tuutaalno sawm le li pia vun.

27-28 Ni masa ni atu a kismah a dang biakpiakna theampo taw pia khawm vun.

29 Ni luk ni in, a vekpi mealhem ngawl khuita no liat, tuutaal nii, le kumkhat a pha tuutaalno sawm le li pia vun.

30-31 Ni masa ni atu in a kismah a dang biakpiakna theampo taw pia khawm vun.

32 Ni sali ni in, a vekpi a mealhem ngawl khuita sali, tuutaal nii, le kumkhat a pha tuutaalno sawm le li pia vun.

33-34 Ni masa ni atu a kismah a dang biakpiakna theampo taw pia khawm vun.

35 Ni liat ni in, biak kikhopna nei vun a, na seam heak vun.

36 Topaa lungdamsak ngimnamtui ahi an biakpiakna in Topa tungah meihal biakpiakna pia vun: Khuita no khat, tuutaal khat, le kum khat a pha tuutaalno sali hi tu a, a vekpi mealhem ngawl hi tu hi.

37-38 A ni masa ni atu a kismah a dang biakpiakna theampo taw pia khawm vun.



³⁹Hite sia a hun zui a Topa tungah na vawt tu meihal biakpiakna, antang biakpiakna, zu biakpiakna le kipawlkhop biakpiaknate taw kisai zui tu ngeinate ahi hi. Hite sia na kiciamna tangtutsakna a na piak ahibuale thinzawna taw biakpiakna in na piak biakpiaknate belapna ahi hi.

⁴⁰Tuabangin Moses in ama tungah Topa thupiak theampo Israel mipite tungah son hi.

Ngamsung Vakna 30

Kiciamna ah Zui tu Ngeinate

¹Moses in Israel minam lampuite tungah a nuai a zui tu ngeinate pia hi.

²Pasal khat in Topa tungah na khat piak tu in kiciamna a vawt ciang ahizong, ahibuale na khat pawpo ten tu in kiciamna a vawt ciang ama in tua kiciamnate palsat ngawl tu a, a ci bangin tangtungsak hamtang tu hi.

³A pa inn ah a omlai ngaknu khat in Topa tungah na khat piak tu in kiciamna khat a vawt ciang ahibuale bang ziam khat ten tu in kamciam a piak ciang,

⁴ama in tua kamciamte a pa in a zaak ciang a nial banale, tua a kiciamna ahibuale a kamciamte tangtungsak hamtang tu hi.

⁵Ahizong a kamciamte a pa in a zaak ciang, a khaam le ama in tua a kamciamte tangtunsak kul nawn ngawl hi. A kamciam bang a sep tu a pa in oai ngawl ahikom Topa in maisak tu hi.

⁶Pasal nei ngawl lai ngaknu khat in thin takpi taw ahizong, ahibuale telmeal nei ngawlin, na khat pawpo ten tu in, kiciamna a vawt zawkciang pasal nei in, ahile

⁷tua thute a pasal in a zaak ciang a khaam buale, a kiciamna ahibuale a kamciamte theampo ama in tangtungsak nanak tu hi.

⁸Ahizong a pasal in tua kamciamna a zaak ciang a tangtun tu a khaam le ama in tua kiciamnate tangtutsak kul ngawl hi. Topa in ama maisak tu hi.



⁹Meingong khat ahibuale a pasal ii khul numei khat in kiciamna a vawt theampo le na khat pawpo sep ngawl tu in kamciamna a vawt theampo tangtungsak tu hi.

¹⁰Pasal a nei numei khat in kiciamna khat vawt a, ahibuale na khat sep ngawl tu in kamciam a vawt le,

¹¹a pasal in tua thu a zaak ciang a khaam banale ama kiciamna ahibuale a kamciamte theampo tangtungsak nanak tu hi.

¹²Ahizong a pasal in tua thute a zaak ciang, a tangtungsak tu a khaam ahile ama in a kiciamnate tangtungsak kul ngawl hi. A pasal in ama kiciamnate a tangtun tu khaam ahikomTopa in ama maisak tu hi.

¹³A pasal in a zi kiciamnate ahibuale a kamciamte khosak tu ahizong, phiatsak tu ahizong thu nei hi.

¹⁴Ahizong a pasal in a zi kiciamnate a zaak ni in a lungkim ngawl na bangma a son buale a kiciamna bangin a zi in vawt tu hi. A zaak ni in khaam ngawl ahikom a lungkimpui suak hi.

¹⁵Ahizong a zi ii kamciamnate a zaak zawk pek ciang a phiatsak kik pheang le, a zi ii mawna thaman teng a pasal in thuak tu hi.

¹⁶Hi zui tu thute pasal nei numei ahizong, pasal nei ngawl lai, a pa inn ah a omlai ngaknu ahizong, kiciamna a vawt ciang a zui tu in,Topa ii Moses tungah a piak ngeinate ahi hi.

Ngamsung Vakna 31

Midiante taw A Thiangtho Ngal kisimna.

¹Topa in Moses tungah,

²“Israel mihingte tungah a vawtna hangin Midiante daan pia in. Tuasia na vawt zawkciang thi tu ni hi ” ci hi.

³Tuaciang Moses in mipite tungah, “Topa tungah a vawtnate hangin Midiante sim thei tu le daan pia thei tu in ngal sim tu in kithoi vun.

⁴Israel minam sim pan ngalkap tulkhat tek ngalsim tu in kuansak vun,” ci hi.



⁵Tuaciang Israel minam khat pan ngalkap tulkhat tek kiteal a, a vekpi in tulsawm le tulnii ngalsim tu in, kithoai hi.

⁶Moses in thiampi Eleazar tapa, biakna taw kisai a thiangtho nate le thu heak sakna kona lemle a keam pa Phinehas in uksakin ngalkapte kuansak hi.

⁷Topa in Moses tungah a thupiak bangin amate in Mudiante simin, pa theampo that siat hi.

⁸Tua sungah Midian kumpi ngate ahi: Evi, Rekem, Zur, Hur, le Reba kihel hi. Amate in Beor tapa Balaam zongh thatlum hi.

⁹Israel mihingte in Midian numeite le patangte manin, a khuite le a ngannote, a nei a lamh theampo la in,

¹⁰a ngiaphual le a khuapi theampo halsak uh hi.

¹¹Amate ii a laaksak vanh theampo, a ngalmat theampo le a nganno theampo,

¹²Jericho pan Jordan ngunngal khat Moab zaangtam ah ngiaphual a saat Moses, Eleazar le Israel huam mihonpi bup omna ah paipui uh hi.

Ngalkapte Heak kik

¹³Moses, Eleazar le mihonpi lampuite theampo in ngalkapte muak tu in ngiaphual pan pai uh hi.

¹⁴Moses sia ngalsimna pan hong heak kik ngalkap bute ahi, tulkhat a ukte le zakhat a ukte tungah thin uuk hi.

¹⁵Moses in amate tungah,“ Banghang numei theampo khoaikhe nu ziam?

¹⁶Balaam thu ni in Peor ah Israel mipite Topa mai ah mawnei a suaksak sia, hi numeite ahi hunlam phawk vun. Ta sia inTopa mihingte tungah natsiat a then sia ahi hi.

¹⁷Tua ahiciang, tu in tangvalno teng le pa taw a khial ngei sa numei teng thatlum vun a,

¹⁸ahizong pa taw a khial ngawl lai ngaknu teng le numei teng noma a tu in khoaikhe vun.



¹⁹Tu in mihing a that peuma le mithiluang a tham peuma, ni sali sung ngiaphual pua sangah om tu nu hi. A ni thum ni le ni sali ni in noma le na mat uh numeite kithiansua vun.

²⁰Note in puan ahizong, savun, kealmul le thing taw kivawt nate theampo thiansua tu nu hi,” ci hi.

²¹Thiampi Eleazar in ngalsimna pan hong heak kik ngalkapte tungah, “Hite sia Topa ii Moses tungah a piak zui tu ngeinate ahi hi.

²²⁻²³Mei ii a kak thei ngawl, kham, ngun, tau, thik, daan le hakte mei taw halin kithiansua tu hi. Nadangte ahile thiansuana tui taw in kithiansua tu hi.

²⁴Ni sali ni in na puante silthiang vun a, tuaciang note thiangtho in, ngiaphual sungah hong kitumsak tu hi,” ci hi.

Vanh laakte Hawmna

²⁵Topa in Moses tungah,

²⁶“Nangma le Eleazar in mipi lampuite taw ngal sungah ngalmatte le ngannote a kipan a kiman theampo sim khawm tu nu hi.

²⁷Tua nate a kikim in, khen nii sua vun a, khen khat sia ngalkapte atu le khen khat sia a taanglai mihonpate atu hi tu hi.

²⁸Ngalkapte ii a nga tu sung pan ngalmat za-nga ciang khat veuTopa atu phiangshia in la vun. Khui, laa, tuu le kealte zongh tuabangma in la vun.

²⁹Topa atu a tuam vilvel piak tu nate thiampi Eleazar tungah pia vun.

³⁰A taanglai mihingte ii a nga tu nate sung pan ngalmatte sawmnga ciang khat la in a, khui, laa, tuu le keal zongh tuabangin la vun. Tuate Topa Puanbuk a cing Levi mite pia vun, ” ci hi.

³¹Topa thupiak bangin Moses le Eleazar in seam uh hi.

³²⁻³⁵A nuai a teng sia ngalkapte ii mat vanhthe sung pan amate atu in a khen tuam zawkciang a taanglai vanhthe ahi hi. Tuu le keal 675,000, khui 72,000, laa 61,000, ngaknu thiangtho 32,000 ahi hi.



36-40 Hite sungpan a lang ngalkapte ii a nga sia; tuu le keal 337,500 hi a Topa tungah phiangshia in a kipia 675 ahi hi. Ngalkapte atu in khui 36,000 hi a, tua sung pan Topa tungah phiangshia in a kipia 72 ahi hi. Ngalkapte atu in laa 30,500 hi a, tua sung pan Topa tungah phiangshia in a kipia 61 ahi hi. Ngalkapte atu in ngaknu thiangtho 16,000 hi a, tua sung pan Topa tungah phiangshia a piak 32 ahi hi.

41 Tuaciang Topa thupiakna bangin Topa a kipia a tuam vilvel phiangshia sia Moses in Eleazar tungah pia hi.

42-46 Mihonpite ii tel sia ngalkapte a taw kibang a: tuu le keal 337,500, khui 36,000, laa 30,500 le ngaknu thiangtho 16,000 ahi hi.

47 Hi tel sung pan Topa thupiakna bangin ngalmatte le ngannote sawmnga ah khat Moses in la a, Topa Puanbuk a cing Levi mite tungah pia hi.

48 Tuaciang ngalkapte a uk bute sia Moses kungah pai in,

49 thupuak a, “Topa awng, kote khutnuai a om ngalkapte ka sim siat uh a khat zongh kisamh ngawl hi.

50 Tua hi a, kote tek ii ka laak sa uh kham taw kivawt vanhte, khutbulte, hakte, khutzungbute, bilbaate le khite kong paipui uh hi. Kote nuntakna hong kep bit natu in hi vanhteTopa tungah kote nuntakna kitatna in ka pia uh hi.”
ci uh hi.

51 Moses le Eleazar in kham taw kivawt tua vanhte theampo saang uh hi.

52 Ngalkap bute ii a piak teng a kingawm ciang pound zali vaal ngit hi.

53 Ngalkapbu ahi ngawlte in a laak vanhte sia, amate atu in keam uh hi.

54 Topa in Israel mite a kepcing natu in, Moses le Eleazar in kham sia tuabangin Puanbuk sungah paipui in koi uh hi.

Ngamsung Vakna 32

Jordan Nisuana sang a om Minamte

(Thuhil kikna 3.12-22)

1 Reuben le Gad minamte in nganno tam mama nei uh hi. A ngannote atu in Jazer le Gilead ngamte ngampha ci in a mu ciang,



- ²Moses, Eleazar le Israel lampui dangte kungah amate pai in,
- ³⁻⁴“Topa hesuakna taw Israel te ii ka lua uh hi ngam Ataroth khua, Dibon khua, Jazer khua, Nimrah khua, Heshbon khua, Elealeh khua, Sibmah khua, Nebo khua, le Beon khuate nganno khoai natu in pha a, tua hu in ko in nganno tam mama ka nei uh hi.
- ⁵Nong hesuakna in hi ngam kote hong pia tavun a, Jordan ngun ngalkhat ah teang tu in Jordan Ngun hong kantansak heak vun,” ci uh hi.
- ⁶Moses in, “Israel na mipuite ngalsim in a kuan laitak note hi lai ah om nuam nu ziam?
- ⁷Topa in amate a piakna ngam sungah a tum natu in Israel mite Jordan ngun a kantan tu sia, bang zata thinkiamsak ngam zen nu ziam?
- ⁸Tua na sep uh bangin Kadesh Barnea pan ngamvil tu ka paisak lai in na pate uh in seam uh hi.
- ⁹Amate Eshkol kuam dongah pai in ngam en uh a, ahizong a heak kik ciang Topa piaksa ngamah Israel te a tum ngawl natu a thin kiamsak uh hi.
- ¹⁰Tua ni in Topa thin uukin kamciamna vawt a:
- ¹¹‘ Kei tungah hong thumaan ngawl ahikom, Egypt ngam pan a pusuk mite sung pan kumkul pan a tungsia pa a minpiang Abraham, Isaac le Jacob tungah ka khapsa Canaan ngam kuama theng ngawl tu hi, ci in kamciamna ka vawt hi ’ ci hi.
- ¹²Topa tungah thumaanna a nei Keniz mi, Jephunneh tapa Caleb le Nun tapa Joshua sim ngawl, a dang teng kihel siat hi.
- ¹³Mihingte tungah Topa thin uuk a, ama a khuangaisak tua hun lai khang mite theampo a thi siat dong, dui sungah kum sawmli sung vakthapsak hi.
- ¹⁴Tu in, mawnei khangthak note in na pate dinmun la in, Israel tungah thuak zawk ngawl tuTopa thin uukna thengsak kik tu in kipan nu hi.



¹⁵Tu in no Reuben le Gad mite in Topa nungzui tu na nial uh le ama in hi mipi theampo khatvei dui sungah nusia kik tu a, amate a lalsak sia noma na hi tu uh hi,” ci in zo hi.

¹⁶Amate Moses kungah pai in, “A masa in, hi lai ka tuute atu in suang taw huang hong uumsak tan a, ko hong bealte atu in a ki uum khuapi hong sasak tan.

¹⁷Tuaciang Israel ka mipuite uh taw ngalsim in ka kuan tu uh a, a lua tu ngamte ka laak siat uh mateng in, ka ngalte ka sim tu uh hi. Tua hun sungin ko hong bealte in a ki uum khuapite sungah teang thei tu uh a, hi ngamah a teang mite in nawnkaisak ngawl tu uh hi.

¹⁸Israel te theampo in a lua tu ngam teng a laak siat mateng in, kong cia buatu uh hi.

¹⁹Kote in hi lai Jordan nisuana sangah tel nga zo ka hi uhkom Jordan lang khat amate sungah tel dang ka la nawn buatu uh hi,” ci uh hi.

²⁰Moses in, “ Na thuson uh te a takpi ahile hi lai Topa mai ah ngalsim tu in kithoi vun.

²¹Na ngalkapte theampo in Jordan ngun kantan in, Topa thupiakna nuai ah, Topa in ngalte a zaw mateng,

²²le ngam sungah a neisate a laak siat mateng amate in ih ngalte sim tu uh hi. Topa tung le Israel na suapuite tungah na tavuan teng na zaw siat zawk uh ciang na cia thei tu uh hi. Tuaciang Topa in hi Jordan nisuana ngam sia note atu in kipsak tu hi.

²³Ahizong, na kamciamte na len bua uhle, Topa langpan in mawnei na hi tu uh sia kong hesak hi. Hi thu taw kisai mawna vawt heak vun; na mawna daan thuak tu nu hi.

²⁴Tuabangin khuapi le na tuute atu in uumna huang vawt vun, ahihang na kamciam sa uh sia vawt vun!” ci in zo hi.



²⁵Gad le Reuben mite in, “Topa awng, nong thupiakna bangin ka seam tu uh hi.

²⁶Ka zite, ka tate, ka khui le ka tuute hi lai Gilead khuapite ah ka nusia tu uh hi.

²⁷Ahizong kote theampo Topathupiakna nuai ah ngalsim tu in ka kinging uh hi. Nangma ci bangin kote Jordan kantan in ngal ka sim tu uh hi.” ci uh hi.

²⁸Tuaciang Moses in Eleazar, Joshua le Israel lampui dangte tungah thupia a:

²⁹“Gad le Reuben mite in Jordan kantan in Topa thupiakna taw ngalsim tu in kinging a, amate huna taw note in ngam na la zo uh ahile, Gilead ngam sia amate atu in pia vun.

³⁰Ahizong amate in Jordan kan ngawlin, ngal hong simpui bua ahile, noma bangin Canaan ngamah amate in amate tel nga tu uh hi,” ci hi.

³¹Gad le Reuben mite in, “Topa awng, Topa thupiak bangin ka seam tu uh hi.

³²Kote in hi lai Jordan niswana mun ka nga thei natu uh in ama hong lampuina taw Canaan ngam kantan in ngal ka sim tu uh hi,” ci in zo uh hi.

³³Tua ahiciang, Moses in Amor Kumpi Sihon, le Bashan Kumpi Og ngam theampo le a kiim a paam a khua le ngamte Gad le Reuben minamte tung le Manasseh minam a langte tungah pia hi.

³⁴Gad minamte in a ki uumcip khuapite ahi Dibon, Ataroth, Aroer,

³⁵Ataroth Shopan, Jazer, Jogbehah,

³⁶Beth Nimrah le Beth Haran khuapite luphung taw uum kik uh hi.

³⁷Reuben minamte in Heshbon, Elealeh, Kiriathaim,

³⁸Nebo, Beal Meon (Hi min sia kilaih zo), le Sibmah khuate sa kik uh hi. Amate in amatesaksa khuapite minthak phuak uh hi.

³⁹Manasseh tapa Machir be le phungte in Gilead ngam simin a laak zawkciang tua ngamah a teang Amorte hawlkeak uh hi.



⁴⁰Tua ahiciang Moses in Gilead ngam sia Machir be le phungte pia a, tualai ah amate teang uh hi.

⁴¹Manasseh minam Jair in khuano pawlkhat simin la a, “Jair khuanote” ci in a min phuak hi.

⁴²Nobah in Keneth khua le a kiim a khuanote simin la a, ama min tapin Nobah ci in min phuak kik hi.

Ngamsung Vakna 33

Egypt pan Moab Ngam dong Khualhawna

¹Moses le Aron lampuina taw Israel te Egypt ngam pan a minam a minam in a pusua zawk uhciang a ngiaphual saatna mun minte a nuai a bang ahi hi.

²Topa thupiakna bangin, Moses in ngiaphual a saat simin a ngiaphual mun minte ciamtee hi.

³Paisan Poai masa bel a zing ciang, tua kum tha masa bel ni sawm le ni nga ni in Israel mite in Egypt ngam nusua uh hi. Topa kepna taw amate Rameses khuapi pan kipan uh hi.

⁴Topa ii a thalup a tapa lian belte phumin a buai mama Egypt mite mu tangin Israel mite pai uh hi. Hi bangin Topa in Egypt pathiante sangin vaanglian zaw a hina lak hi.

⁵Israel mihingte Rameses nusua in Sukkoth ah ngiaphual saat uh hi.

⁶Tuaciang senneal ngamngi Etham ah ngiaphual saat kik uh hi.

⁷Tua mun pan amate, Baal Zephon nisua, Pi Hahiroth ah heak kikin Migdol paam ah ngiaphual saat uh hi.

⁸Amate Pi Hahiroth nusua in, San Tuipi kantan in Shur senneal ngam theng uh hi. Ni thum sung a pai zawk uhciang Marah ah ngiaphual saat uh hi.

⁹Tua mun pan Elim ah pai in ngiaphual saat uh hi. Banghangziam cile tualai ah ciktui sawm le nii le palm kung sawmsali om hi.

¹⁰Amate Elim nusua in, San Tuipi paam ah ngiaphual saat uh hi.



¹¹A ngiaphual kik sia Sin senneal ngamah saat uh hi.

¹²Tuaciang Dophkah ah ngiaphual saatin,

¹³tua zawkciang Alush ah saat uh hi.

¹⁴A ngiaphual kik sia Rephidim hi a, tualai ah amate atu in neak tu tui om ngawl hi.

¹⁵⁻³⁷Amate in Rephidim pan Hor Mual dong a nuai a mun tengah ngiaphual saat uh hi. Tuate in: Sinai Senneal ngam, Kibroth Hattaavah ahibuale (Longsante Thaan), Hazeroth, Rithmah, Rimmon Perez, Libnah, Rissah, Kehelathah, Shepher Mual, Haradah, Makheloth, Tahath, Terah, Mithkah, Hashmonah, Moseroth, Bene Jaakan, Hor Haggidgad, Jotbathah, Abronah, Eziongeber, Zin duisung (Kadesh), le Edom ngamngi Hor Mualte ahi hi.

³⁸⁻³⁹Topa thupiak bangin thiampi Aaron sia Hor Mual ah kaato hi. Israel te Egypt pan a pusua zawk kum sawm lina, tha ngana, ni masa bel ni, a kum za le kul le thum a phak ciang tua munah ama thi hi.

⁴⁰Canaan thangsang Arad ngam kumpipa in Israel te a paina thu za hi.

⁴¹⁻⁴⁹Hor Mual pan Moab zaangtam dong a nuai mun tengah Israel te in ngiaphual saat uh hi: Tuate in Zalmonah, Punon, Oboth, Moab ngam Abarim, Dibon Gad, Almon Diblathaim, Nibo Mual hui Abarim Mual le Beth Jeshimoth le Acacia Kuam kilaklaw, Jericho pan Jordan Ngun ngalkhat Moab zaangtam te ahi hi.

Jordan Ngun Kan ma in Hilna

⁵⁰Jericho pan Jordan ngunngal khat Moab zaangtam ah Topa in Moses tungah,

⁵¹Israel atu in a nuai a hilnate pia hi. “Jordan ngun kanin Canaan ngam na tum uhciang,

⁵²ngam sungah a teangte theampo notkeak tu nu hi. Amate ii suang le leistung sumpiang taw a vawt milim theampo le a milim biakna mun theampo lalcipsak vun.



⁵³A ngam lua in, tua munah teang vun, banghangziam cile tua mun note kong pia hi.

⁵⁴Minam le be le phung tuatuam sungah lai meetang sawkin ngam hawm vun. Be le phung liante ngamlia in, be le phung note ngamno pia vun.

⁵⁵Ahizong ngam sungah a teangte na notkeak bua uh ahile a taanglaite in note mit sungah ninneng bang le na pangh hong sun lingte bangin hong nawngkaisak tu a, amate in note hong langpan tu uh hi.

⁵⁶Amate na notkeak bua uh ahile, amate mot tu ka sawm bangin note kong mon tu hi.” ci hi.

Ngamsung Vakna 34

Ngam ii Ngamngite

¹Topa in Moses tungah,

²Israel mihingte atu in a nuai a hilnate pia hi: “Keima kong piak Canaan ngamsung na tum uhciang na ngamngi uh te a nuai a bang hi tu hi.

³Thangsang ngamngi sia Zin duisung pan kipan tu a, Edom ngamngi zui in pai tu hi. Nisuana sang ngamngi sia Tuipi Thi thangsang pan kipan tu hi.

⁴Tuaciang Akrabbim Mualciangh sang thang sangah kotin Zin duisung kantan in Kadesh Barnea thangsang dong kipee hi. Tuaciangsaksang nitumna sang Hazar Addar ah paito in, Azmon dong hi tu hi.

⁵Tua mun pan Egypt ngamngi kuam sangah kot tu a, Mediterranean ah tawp tu hi.

⁶“Nitumna sang ngamngi sia Mediteranean Tuipi hi tu hi.

⁷“Saksang ngamngi sia Mediteranean pan Hor Mual dong tang takin pai tu a,

⁸tua mun pan Hamath MualCiangh dong hi tu hi. Tuaciang Zedad le

⁹Ziphron dong paisuak in Hazar Enan ah tawp tu hi.

¹⁰“Nisuana sang ngamngi sia Hazar Enan pan Shepham dong tang takin pai tu hi.



¹¹Tuaciang Ain ii nisuana sangah a om Har bel thang sangah pai tu a, Galilee Tuili vaalbo nisuana sang mual tungah pai in,

¹²tuaciang Jordan ngun zui in thangsang Tuipi Thi dong pai tu hi. Hite na ngam kingh li ii ngamngi hi tu hi,” ci hi.

¹³Tuaciang Moses in Israel te tungah, “Hi ngam sia Topa in minam kua le langte tungah a piak ngam hi a, lai meetang sawkin na nga tu uh ngam ahi hi.

¹⁴Reuben le Gad minamte le nisuana sang Manasseh minam a langte in,

¹⁵Jordan ngun ngalkhat nisuana sang Jericho ngalkhat ah amate innkuan taw kizui in ngam nga siat zo uh hi, ” ci hi.

Ngam Hawmna ah Tavuan nei Lampuite

¹⁶Topa in Moses tungah,

¹⁷“Thiampi Eleazar le Nun tapa Joshua in mipite atu in ngam hawmsak tu hi.

¹⁸Ngam hawmna ah amate hu tu in, minam khat pan lampui khat veu teal in,” ci hi.

¹⁹⁻²⁸Hite sia Topaii teal mihingte hi:

Minam	Lampui
Judah	Jephunneh ii tapa Caleb
Simeon	Ammihud ii tapa Shelumiel
Benjamin	Chislon ii tapa Elidad
Dan	Jogli ii tapa Bukki
Manasseh	Ephod ii tapa Hanniel
Ephraim	Shiphthan ii tapa Kemuel
Zebulun	Parnach ii tapa Elizaphan
Issacher	Azzan ii tapa Paltiel
Asher	Shelomi ii tapa Abihud
Naphtali	Ammihud ii tapa Padahel



²⁹Hi mihingte Canaan ngamah Israel mihingte atu ngam hawm tu in Topa sawlte ahi hi.

Ngamsung Vakna 35

Levite tungah A kipia Khuapite

¹Jericho khua pan Jordan ngun ngalkhat Moab zaangtam ah Topain Moses tungah,

²“Israel te tungah amate ii a lua a neisate sung pan Levite ten natu in khuapi pawlkhat le khuapi kiimkot ah ngan tha natu munte a piak nanak tu in son in.

³Hi khuapite Levite in lua tu a, tua munah amate teang tu uh hi. Ngan thana mun sia a khui le a nganno dangte theampo atu hi tu hi.

⁴Ngan thana sia khua luphung pan a kiimkot ah pi tul le za-nga veu hi tu hi.

⁵Ngan tha natu sia khua pan a kiimkot teng, kingh khat pi tulthum veu hi tu a, a laizang ah khuapi om tu hi.

⁶Levite tungah bukna khuapi luk na pia tu uh a, mi khat pawpo in mihing khat a that tha le a buk natu hi tu hi. Tua be lapna in a dang khuapi sawmli le nii a ngan thana taw amate pia thua vun.

⁷A vekpi in sawmli le liat pha tu hi.

⁸A minam khat sim ii sungah Levite ii khuapi phaza tu a ngam letna taw kizui in kikhensat tu hi,” ci hi.

Buhna Khuapite

(Thuhil kikna 19.1-13; Joshua 20.1-9)

⁹Topa in Moses tungah,

¹⁰Israel mihingte tungah a son tu in thupia a: “Jordan Ngun kanin Canaan ngamsung na tum uhciang,

¹¹ngaisut khol ngawlin mi khat pawpo a that thate ii buk natu khuapi teal tu nu hi.



¹²Tua munah ama buu tu a, mithi pa mealheak phu la nuamte khut sung pan suakta tu hi. Mihing that hi ci in a kimawsak pa sia mipi mai ah thu a kikhensat mateng kithat ngawl tu hi.

¹³Khuapi luk

¹⁴Jordan nisuana sangah thum le Canaan ngam sungah thum teal vun.

¹⁵Ngaisut khol ngawlin mi khat a that tha pawpo in tua khuapi khat pawpo zuan thei tu hi. Hi khuapi lukte sia Israel mite le ngamdang mite tawmvei sung ahizong a tawntung ahizong a teangte atu in bukna hi tu hi.

¹⁶⁻¹⁸“Ahihang mihing khat in thik, suang ahibuale moltawng zanghin mihing khat po a that le, ama sia mihing that ahikom kithatlum tu hi.

¹⁹Thalup a thuak pa ii a kinaipui bel sia in mi that pa a thalup tu tavuan nei hi. Tua pa a mu po ciang ama in that tu hi.

²⁰“Mihing khat in midang khat ngaimaw in sawnvawk ahibuale bang khat po taw deangin,

²¹ahibuale a khuttum taw thongin a thi le ama sia mihing that ahikom, kithatlum tu hi. Thalup a thuakpa ii a kinaipui bel sia in mihing that pa a thalup tu tavuan nei hi. Tua pa a mu po ciang ama in that tu hi.

²²“Ahizong mihing khat in midang khat ngaimaw ngawl napi sawnvawk a, ahibuale bang khat po taw deang tha in thi hi,

²³ahibuale liamsua nuam ngawl napi, a ngal zongh hi ngawl napi khua en ngawlin a suang den khat taw midang khat kha in thi hi.

²⁴Tuabang thute taw kisai in mihonpite in, a thi sia ii be pa, phu la nuam pa panpui ngawlin mihing a that tha pa panpui in thukhen tu hi.

²⁵Mipite in mihing thatin a kimawsiat pa, mithi pa bete kung pan suaktak in a bukna khuapi ah heak kiksak tu a, suatak tu hi. Tua hun a Thiampi Saangpa ii thi dong tua lai ah ama teang tu hi.

²⁶Mawnei mihing that pa sia a bukna khuapi pan pusuak in,



²⁷mithi pa bete in mu in, a thatlum le hi thu in phula hi a, mi that hi ngawl hi.

²⁸Mawnei mihing that pa sia a bukna khuapi ah Thiampi Saangpa thi dong teang tu a, ahizong a thi zawkciang cia thei tu hi.

²⁹Hi ngeinate na teenna mun po ah nangma le na suan na paalte ii zui tu ahi hi.

³⁰“Mihing that a, a kimawsiat pa sia a mu tetti nii, ahibuale tetti a tam zaw a om ciang bekin mimaw hi ci in ki thatlum thei bek tu hi. Tetti khat bek sia mi that hi, ci in mawsiat natu in kicing ngawl hi.

³¹Mihing that pa sia kithatlum tu hi. Ama mawna pan a suatak natu in sum taw kitan thei ngawl tu hi.

³²Buhna khuapi ah a buu sa khat sia Thiampi Saang thi ma in, a inn ah cia tu in kitansak heak vun.

³³Na kitansak uh ahile, na teenna ngam ninsak na ahi uh hi. Mihing thalupna in ngam ninsak a, mihing khat kithalupna mun thiansak natu in mihing that pa a kithalup tu ngawl buang thudang om ngawl hi.

³⁴Na teenna ngam ninsak heak vun, banghangziam cile Keima inTopa ka hi a, Israel mihingte sungah ka teang hi,” ci hi.

Ngamsung Vakna 36

Pasal nei Numeite ii Ngamh Luana

¹Joseph ii tapa Manasseh ii tupa Machir ii tapa Gilead be le phung sung innkuan lutangte, Moses le lampui dangte kungah pai hi.

²Amate in, “Topa in nang tungah hi ngam Israel mihingte tungah lai meetang sawkin hawmsak tu in thu hong pia hi. Ama in nang tungah ka suapuipa uh Zelophehad ii luana teng a tanute tungah piak natu in thu hong pia sii hi.

³Ahizong a tanute in minam dang taw a kiteang le, a neisate tua minam dangte neisa suak tu a, ko ii ka nga uh ngam theampo kikhiam tu ahi sia phawk vun.

⁴Kipiak kik kumin, innmun longam a kizuaksa theampo a nei ciilte tungah a kipiak kik ciang, Zelophehad tanute ii ngam sia a tawntungin a pasalte neisa hi paisuak tu ahikom, ko minamte sumh mama tu khu hi,” ci uh hi.

⁵Tua ahiciang Moses in, Israel mihingte tungah Topa ii Thupiak a nuai a bangin thupia hi. Moses in, “Manasseh minamte ii thuson te maan hi.

⁶Tua ahiciang Topa in Zelophehad tanute in a dei po tenpui thei tu hi, ahizong amate minam sung pan bek hi tu hi, ci hi.

⁷Israel mi peuma ii neisate amate minam sungah kip tu hi.

⁸Israel minam sungah ngamhlua numei peuma in tua minam sung pan pasal khat tenpui tu hi. Tuabang hile Israel mikim in a taangpupite neisa teng lua tu a,

⁹a neisate minam khat pan minam dang tung theng ngawl tu hi. A neisate a minam tek in neisuak tu uh hi.” ci hi.

¹⁰⁻¹¹Tuabangin Zelophehad tanu Mahlah, Tirzah, Hoglah, Milcah le Noahte in Moses tungah Topa thupiak bangin a suapui sealte tenpui uh hi.

¹²Amate in Joseph tapa Manasseh minamte ii be le phungte taw kiteang uh a, a neisate a pa minamte sungah kip hi.

¹³Hite sia Jordan Ngun ngalkhat Moab zaangtam Jericho khua panTopa ii Moses tungtawn in a piak Israel mite ii zui tu ngeinate ahi hi.



Thuhil kikna

Thuhil kikna 1

Thupatna

¹Hi laibu sung a thute sia Israel mihingte Jordan ngun nisuana sang dui sungah a om laitak Moses ii amate a paupuina kammalte ahi hi. Amate Suph khua paam Jordan Kuam a lang khat ah Paran, a lang khat ah Tophel, Laban, Hezeroth le Dizahab khuate kilaklaw ah om hi.

²(Sinai Mual pan Kadesh Barnea sia Edom ngam mualdung zui leang ni sawm le ni khat kipai hi.)

³Egypt pan a pusua zawk a kum sawmli kum a tha sawm le khatna ni masa bel ni in Topa ii amate tungah son a, a sawl theampo Moses in mihingte tungah son hi.

⁴Hi thu sia Heshbon khua a uk, Amor Kumpi Sihon, Ashtaroth le Edrei khua a uk Bashan Kumpi Og, Topa in a zaw zawkciang a son ahi hi.

⁵Jordan ngun nisuana Moab ngam sungah a om sungin Moses in Pathian thukhamte le a thuhilnate hilthiang tu in kipan hi.

⁶Moses in, “Sinai Mual ah ih om lai, Topa ih Pathian in eite tungah, ‘Hi mual ah khua ngei ma om zo nu hi.

⁷Ngiabuk phelin kikhin vun. Amor mualtung ngam le a kiimkot ngamte theampo - Jordan Kuam, mualtung ngam le leiniamna ngam, thangsang ngam le Mediterranean tuipei hui dongin pai tavun. Canaan ngam le Lebanon Mualte langkhat Euphrates Ngun lian dong pai tavun.

⁸Hi ngam theampo Keima Topa in na taangpupite Abraham, Isaac le Jacob te tung le a suan le a paalte tungah piak tu in ka kamciam ahi hi. Pai in lua tavun’ hong ci hi,” ci hi.

Moses in Thukhente Koi

(Pusuana 18.13-27)



⁹Moses in mipite tungah, “Sinai Mual ah ih omlai in note kong son zo a, ‘Note lam kong pui tu tavuan sia kei atu in haksa lei hi. Kei nguak in ka seam zo buatu hi.

¹⁰Topa na Pathian in note van ah aksi za in hong tamsak hi.

¹¹Na taangpupite Pathian Topa in hong kamciam bangin note a tulkhat vei in hong khangsak hen a, hong nuamsasak taken!

¹²Ahizong kei nguak in no kilem ngawlinate lemtua tu in tavuan lian sia bangbang pua zo thong tu khi ziam?

¹³Minam sim pan a pil, thu he, thu phawk sate teal vun a, note hong uk tu in amate ka koi tu hi,’ kong ci hi.

¹⁴Hi sia sep tu in a pha khat hi, ci in na lung uh kim hi.

¹⁵Tuaciang na minam sim pan na tealsa a pil le thu phawksa lampuite in kong uksak hi. Pawlkhat in mihing tulkhat, pawlkhat in zakhat, pawlkhat in sawmnga, pawlkhat in sawm uk tu in tavuan ka pia hi. Na minam theampo sungah lampui dadang zongh ka koi hi.

¹⁶“Tualai in amate tungah, ‘Na mihingte sung pan kilem ngawlina thu hong paite pha tak ngaisak vun a, na mihingte ahizong, note sungah a teang minam dangte thu ahizong pha takin khen vun.

¹⁷Thu na khen uh ciang nguptuam nei heak vun; akua akua ahizong a kibangin khen vun. Kuama kiita heak vun, banghangziam cile na thu khen sia Pathian kung pan hong pai hi. Thu khat pawpo note atu in a haksa lei le, hong paipui tavun a, keima ka khen tu hi,’ ka ci hi.

¹⁸Tua hun lai ma in, na nasep tu theampo kong hil siat zo hi.

Kadesh Barnea kan Thukankuute Kipaisak

(Ngamsung vakna 13.1-33)

¹⁹“Eite in Topa ih Pathian hong thupiak bangin ih seam hi. Sinai Mual nusia in a zai, a lauhuai senneal ngam kantan in Amor ngam mualtung ngam sungah ih pai hi. Kadesh Barnea ih thet ciang,



20-21 'Ih taangpupite ii Pathian, Topa ih Pathian ii eite hong piak Amor ngam mual tu in theng zo nu hi. En vun, zia lai hi. Ama thupiak bangin pai in lua vun. Hai heak vun a lau heak vun,' ci in kong son hi.

22 "Ahizong note ka kungah hong pai in, 'Ih mai ah thukan kute paisak masa tawng, tua hile amate in ih zui tu lampi pha bel le khuapite omzia hong son thei tu hi,' nong ci uh hi.

23 "Tua thu phasa ka hikom minam sim pan khat tek mihing sawm le nii ka teal hi.

24 Amate Eshcol Kuam dong mualtung ngamah paito in ngam vil uh hi.

25 Amate in tua lai ah a mu thingnga pawlkhat hong ciapui kik a Topa ih Pathian hong piak ngam sia leipha mama hi, hong ci uh hi.

26 "Ahizong Topa na Pathian thu piak langpan in tua ngam sungah na tum bua uh hi.

27 Note phun lialua in; 'Topa in eite hong ensan hi. Amorte ii hong thalup thei tu in ama in Amorte khut sungah aap tu in Egypt pan hong paipui hi.

28 Banghang tua munah pai tu hi ziam? Lauhuai hi. Thu kan a ih paisakte in tua munah a teang mihingte ei sangin hat zaw, saang zaw a, van banin a ki uum khuapite sungah teang hi, ci in hong son hi. Amate in tua lai ah mi thatang liante mu hi,' na ci uh hi.

29 "Ahizong, 'Tua mihingte kiita heak vun.

30 Topa na Pathian in hong lampui tu a, Egypt le senneal ngamah a vawt na mu uh bangin, note atu in ngal hong simsak tu hi.

31 A pa in a tapa a toai bangin, hi ciang dong lam tawntungah bit takin hong paipuina thu na mu uh hi,' ci in kong son hi.

32 Ahizong hi bangza in kong ci hang note in

33 na mai ah pai in ngiaphual tu mun hong zonsak a, na pai natu lam hil tu in zanin meikhuam taw, sunin meeikhuam taw pai tawntung kale Topa na muang balai uh hi.



Topa in Israel Daan pia
(Ngamsung vakna 14.20-45)

- 34“Topa sia na phunna uh a zaak ciang thin uukin, kiciam in,
- 35‘Hi khang hun a, a ngilo note khat zongh, na taangpupite tung piak tu a ka kamciam lei phana ngam na theng buatu uh hi.
- 36Jephunneh ii tapa Caleb bek theng tu hi. Ama in kei tungah hong thumaan a, ama le a suan a paalte ama vil sa ngam ka pia tu hi,’ ci hi.
- 37Note hanginTopa kei tung zongh ah hong thin uuk a ama in ‘Moses awng, nang ngangawn Canaan theng ngawl tu ni hi. Tua ngam sia amate ka pia tu a, amate in tua ngam lua tu hi.
- 38Ahihang na khutdom pa Nun ii tapa Joshua a thin kho natu hanthawn in. Ama in Canaan ngam a lua tu in Israel te lampui tu hi,’ ci hi.
- 39“Tuaciang Topa in eite theampo tungah, ‘Moi lei lai ahiciang a pha le a sia a he ngawllai na tate uh- ngalte in man tu na ci na patangte uh, tua ngam ah tum tu hi. Amate tungah tua ngam ka pia tu a, amate in lua tu hi.
- 40Ahizong note heak kikin San Tuipi sang manaw in senneal ngam ah pai vun,’ hong ci hi.
- 41“Note in, ‘Moses awng, kote Topa tungah maw zo khu hi. Ahizong tu in Topa ih Pathian hong thupiak bangin sim tu khu hi,’ nong ci uh hi. Tuaciang mualtung ngam ngalsim tu sia ol tu in ngaisun a, note misim in ngalsim tu in na kithoai uh hi.
- 42“Ahizong Topa in kei tungah ‘Ngal simsak heak in, banghangziam cile amate ka ompui buatu a, a ngalte in zo tu hi,’ hong ci hi.
- 43Topahong son bang kong son hi, ahizong nong thusim bua uh hi. Topa thunialin kiphatsakna taw mualtung ngam na kuan uh hi.
- 44Tuaciang mual tungah a teang Amorte in khuaihon bangin note hong del hi. Amate in note Hormah dong hong del a, Edom ngam mual ah hong zo hi.
- 45Tuaciang Topa tungah kapin huna na ngen uh a, ahizong ama in hong ngai ngawlin, hong awlmawk ngawl hi.



Senneal Ngamah Kum tampi

⁴⁶“Hi bangin Kadesh ah ngei hialma ih om zawk,

Thuhil kikna 2

¹a khak bel ciang, Topa thupiak bangin heak kikin San Tuipi sang tawnin senneal ngamah ih pai a, Edom ngam mual tungah ngei hialma ih vakthap hi.

²“Tuaciang Topa in kei tungah

³hi mual kiim ah khua ngei ma vak zo nu hi, sak sangah paito vun, hong ci hi.

⁴Ama in a nuai a hilnate note tungah son tu in keima hong sawl a, ‘Na suapui ma ahi Esau ii suan le paalte ngam Edom mualtung ngam kantan in na pai tu uh hi. Amate in no hong kiita tu uh a,

⁵ahizong amate sim tu in kipan heak vun, banghangziam cile a ngam tawm zongh kong pia buatu hi. Edom ngam sia Esau ii suan le paalte ka piak sa ahi hi.

⁶Amate tung pan an le tui lei tu nu hi,’ hong ci hi.

⁷“Topa na Pathian in na sepna theampo ah thupha hong pia a hina thu phawk tavun. Hi zata a zai senneal ngamah na vakthap sung uh theampo ama in hong keam hi. Ama in kum sawmli sung tawntung note hong ompui a, na kikap theampo hong pia hi.

⁸“Tuaciang Elath le Eziongebar khua lampite tawnin ih pai a, Tuipi Thi thengin tua mun pan nisuanasaksang Moab ngamsang ih zuan hi.

⁹Topa in kei tungah, ‘Lot ii suan le paalte ahi Moab mite ngim pia heak vun a, sim tu in kipan heak vun. Amate tungah Ar khuapi ka pia zo a, a ngam tawm zongh note kong pia buatu hi,’ hong ci hi,” ci hi.

(¹⁰Ar khuapi ah Emim a kici mihing thatang lian nam khat teang ngei hi. Emimte sia Anakimte bangin a tun saang a, a dang mihing thatang lian nam khat ahi hi.

¹¹Anakimte bangma in Emimte sia Rephaim zongh kici a, ahizong Moabte in amate Emim ci uh hi.



¹²Edom ngam sungah Horte teang ngei a, Israel te in Topa ii a piakna ngamah a teangte nungsang ciang a nawkeak bangin Horte Esau suan le paalte in notkeak in a minamte lalcipsak a tua munah amate teang uh hi.)

¹³“Tuaciang Topa ii eite hong sawl bangin Zered Ngun ih kantan hi.

¹⁴Kadesh Barnea ih nusiak le Zered Ngun ih kantan kilaklaw hun sia kum sawmthum le kum liat khuangei hi. Topa in thi siat tu hi a ci bangma in tua khang hun sungah ngalsim thei pasal theampo thi siat hi.

¹⁵Amate a thalup siat mateng Topa in amate langpan top hi.

¹⁶“Amate a thi siat zawkciang,

¹⁷Topa in eite tungah,

¹⁸“Tuni in Ar lampi tawnin Moab ngam kantan vun.

¹⁹Tua zawkciang note in Lot ii suan le paalte ahi Ammon te ii ngam nai na theng tu uh hi. Amate nawngkaisak heak vun a sim tu zong kipan heak vun, banghangziam cile amate ka piaksa ngam tawm zongh note kong pia bunu hi’ hong ci hi,” ci hi.

(²⁰Tua ngamah Rephaimte teang ngei ahikom Rephaim zongh kici hi. Ammonte in Zamzummim ci uh hi.

²¹Amate sia Anakimte bangin a tun saang hi. Amate tam mama a, a thahat nam ahi hi. AhizongTopa in amate thatlum siat a, tua hu in Ammonte in a ngam la in teang uh hi.

²²Tuabang ma in Edom ngam mualtung a teang Esau suan le paal ahi Edomte tungah Topa in vawt hi. Ama in Horte thatlum a Edomte in a ngam la in tualai ah tuni dongin amate teang lai uh hi.

²³Crete tuikulh pan a mihingte Mediterranean tuipi hui dungah teang uh hi. Amate in a teang ciil Avvim te thatlum in Gaza khuapi thangsang dongin a ngam theampo laaksak hi.)



²⁴“Moab ngam ih kantan zawkciang Topa in eite tungah, ‘Tu pan kipan Arnon Ngun kantan vun. Amor mi Heshbon Kumpi Sihon sia a ngam theampo taw na khut sungah kong pia hi. Ama simin, a ngam lua tu kipan vun.

²⁵Tuni a kipan mun theampo a teang mihingte in note kong kiita sak tu hi. Na min uh a kilaw ciang mihing theampo lau in liing tu uh hi,’ hong ci hi.

Israel in Kumpi Sihon Zo

(Ngamsung vakna 21.21-30)

²⁶“Tuaciang Kedemoth senneal ngam pan Heshbon Kumpi Sihon tungah a nuai a kilemna thu puakin palaite ka paisak hi.

²⁷‘Na ngamsung hong kantansak tan. Ka paina uh lampi pan lampial ngawlin paisuak tu khu hi.

²⁸Ka neak tu uh an le tuite a manh kong pia tu uh hi. Topa kote Pathian ii hong piak natu ngamah theng tu in Jordan Ngun ka kantan mateng,

²⁹na ngamsung hong kantan nuam ka hi bek uh hi. Edom ah a teang Esau suan le paalte le Ar ah a teang Moab te in a ngam uh hong kantan sak hi,’ ka ci hi

³⁰“Ahizong Kumpi Sihon in a ngam kantan tu oai ngawl hi. Ama ih zaw thei natu le tu laitak ih omna a ngam, ih laak thei natu in Topana Pathian in ama a thin sahsakin ngal thin neisak hi.

³¹“Tuaciang Topa in kei tungah, ‘En in, Kumpi Sihon le a ngam sia na mai ah ka cimawsak zo hi, a ngam la in lua in’ hong ci hi.

³²Sihon sia a mihing teng theampo taw Jahaz khuahui ah eite sim tu in hong pai hi.

³³Ahizong Topa ih Pathian in ama sia eite khut sungah hong koi a, a tapate le a ngalkap theampo ih that siat hi.

³⁴Tua hunin khua theampo la in ih lalcipsak a, pasal, numei, patang ih thatlum siat hi. Khat zongh ih khoaikhe bua hi.

³⁵A nganno teng le a vanh teng ih la hi.



³⁶Topa ih Pathian in Arnon Kuam mongah a om Aroer khuapi pan kipan khuapi theampo le tua kuam laizang ah a om Gilead khuapi dong hong zosak hi. A khua uumna luphungte ei atu in son thamman ngawl hi.

³⁷Topa ih Pathian ii pai ngawl a hong sawlna Ammon ngam nai teng, Jabbok Ngunhui teng, mualtung khuapite le mun dangte ah ih pai bua hi.

Thuhil kikna 3

Israel in Og Kumpipa Zo

(Ngamsung vakna 21.31-35)

¹Tua zawkciangsaksang Bashan ngamsang ih manaw a, Edrei khua hui ah eite hong sim tu in Og Kumpipa a ngalkapte theampo taw hong pai hi.

²Ahizong Topa in kei tungah, ‘Ama kiita heak in. Ama, a ngalkapte le a ngam theampo nang kong pia tu hi. Heshbon khua a uk Amor Kumpipa Sihon tungah na vawt bangin, ama tungah vawt in,’ hong ci hi.

³“Tuabangin Topa in Kumpipa Og le a ngalkapte eite khut sungah hong pia a, eite in amate ih thatlum siat hi.

⁴Tua hunin eite in a khuapi theampo ih la siat a, ih laak ngawl khat zongh om ngawl hi. Khuapi sawmluk eite in ih la a, Bashan Kumpipa Og ukna, Argod ngam theampo ahi hi.

⁵Hi khuapite theampo luphung saang, kongpi saangte taw ki uum a, kongpi kalhnate taw kithua hi. Luphung nei ngawl khuano tam mama zongh om hi.

⁶Khuapi theampo eite in ih susia siat a, Heshbon khua Kumpi Sihon ii khuapite ih vawt bangin pasal, nupi le patang theampo ih that siat hi.

⁷A ngannote eite in ih laaksak a, khuapite ih susia hi.

⁸“Tua hunin Jordan Ngun ii nisuana sang ngam Arnon Ngun pan Hermon Mual dong, Amor kumpi niite khut tung pan eite in ih la hi.

⁹(Sidonte in Hermon Mual sia Sirion ci uh a, Amorte in Senir ci uh hi.)

¹⁰Bashan Kumpi Og ii ngam theampo eite in ih la a, tuate sia Mual zaangtam tungah khuapite, Gilead le Bashan ngamte Salecah le Edrei khuapi nisuana sang dong ahi hi,” ci hi.



(¹¹Kumpi Og sia Rephaim kumpi khakbel ahi hi. Ama thaankuang suang taw kivawt sia a ngeina bang a kitee ciang, pi luk zai in pi sawm le pi li dedek sau hi. Tua thaankuang sia Ammon khuapi Rabbah ah kimu thei lai hi.)

Jordan Nisuana sangah A teang Minamte

(Ngamsung vakna 32.1-42)

¹²“Tua ngam eite in ih laak zawkciang Arnon Ngun hui ah a om Aroer khuapisaksang ngam le Gilead mualtung ngam khenkhat a khuapite taw Reuben le Gad minamte tungah ka pia hi.

¹³A taanglai Gilead ngam le Bashan ngam buppi, Og ukna ngam buppi, Argob ngam theampo Manasseh minam a langte tungah ka pia hi.”

(Bashan ngam buppi sia Rephaim leitangh kici hi.

¹⁴Bashan ngam, Argob ngam buppi sia Manasseh ii tapa Jair in Geshur le Mascah ngamngi dong la hi. Tua khuanote sia ama min tapsakin minphuak a Jair khuanote kici lai hi.)

¹⁵“Manasseh minam Machir be le phungte tungah Gilead ngam ka pia hi.

¹⁶Gilead ngam pan Arnon Ngun dong sia Reuben le Gad minamte tungah ka pia hi. Ngunpi laizang sia amate ii thangsang ngamngi hi a, Ammon mite ngamngi ahi Jabbok Ngun siasaksang ngamngi ahi hi.

¹⁷Nitumna sangah a ngam sia Jordan Ngun dong hi a, saksang sia Galilee Tuili pan thangsang Tuipi Thi dong, nisuana sang pan Pisgah Mualpeang dong ahi hi.

¹⁸“Tua hunlai ma in amate tungah a nuai a thuhilnate ka pia hi: “Topa ih Pathian in Jordan Ngun nisuana ngam sia na lua tu uh in no hong pia zo hi. Tu in na ngalkapte uh kithoaisak vun a, a dang Israel minamte ii a ngam laak a hu tu in Israel minamte ih mai ah Jordan kan in paisak vun.

¹⁹Na zite, na tate le na ngannote (nganno tam mama na nei uh kong he hi) bek kong piakna khuate ah taang tu hi.

²⁰Topa ii amate a piak Jordan Ngun nitumna sang ngam teng a laak mateng le hi lai ah note atu hong vawtsak bangma in Topa in amate tua munah thin



nuam takin a tensak mateng in na lawm Israel mipuite hu vun. Tua zawkciang kong piakna ngam hi munah nong cia kik tu uh hi,' ka ci hi.

²¹“Tuaciang keima in Joshua ka hil a, ‘Topa na Pathian in Kumpi niite ahi, Sihon le Og tungah a vawtna theampo na mu siat zo hi, tuaciang simin na laak tu mite tung zongh ah ama in tuabang ma in vawt tu hi.

²²Amate kiita heak in, banghangziam cile Topa na Pathian in hong simsak tu hi,' ka ci hi.

Moses sia Canaan ah Kitumsak Ngawl

²³“Tua hunlai ma in thintak taw thu ka ngen a,

²⁴VaanglianpipaTopa awng, na lian le nalamdang na vawt tu te ii kipatna bek hong laak ni hi ci in ka he hi. Nangma sep bangin nalamdang a seam thei, vantung ah ahizong leitung ah ahizong pathian om ngawl hi.

²⁵Topaawng, Jordan Ngun hong kantansak tan a, a ngalkhat ngam phana le mualtung ngamhoi le Lebanon Mualte hong musak tan', ka ci hi.

²⁶“Ahizong note hangin Topa in kei tungah hong thin uuk a, ka thungetna hong ngai ngawl hi. Ama in kei tungah, ‘Pha zo hi! hi thu son kik nawn heak in!

²⁷Pisgah Mualdawn ah pai in asaksang, thangsang, nisuana sang le nitumna sang en in. Jordan Ngun kantan ngeingawl tu na hi ciang na mu teng pha tak en in.

²⁸Joshua pha tak thuhil in. Ama tha pia in a thin khosak in, banghangziam cile na mu na ngam teng a lua tu in ama in mipite lampui tu hi,' hong ci zaw hi.

²⁹“Tuabangin eite Bethpeor khua ngalkhat kuam sungah ih taam hi,” ci hi.

Thuhil kikna 4

Moses in Israel Thunit tu Hanthawn



¹Tuaciang Moses in mipite tungah, “Kong hil thukham theampo zui vun, tua hile na nungta tu uh a, Topa na taangpupite ii Pathian ii note hong piak ngam na lua tu uh hi.

²Ka thupiakte bangma belap heak vun a bangma khiam heak vun. Keima kong sonsa, Topa na Pathian uh ii thu piakte zui vun.

³Peor Mual ah Topa nasepte noma mama in na mu uh hi. Ama in tua lai ah Baal a bia theampo mon a,

⁴ahizong Topa na Pathian tungah a thumaan note tuni dongin nungta lai nu hi.

⁵“Topa ka Pathian hong sawl bangin thukham theampo note kong hil zo hi. Na sim tu uh le na lua tu uh ngamah hi thute zui vun.

⁶Thumaan takin zui vun, tua hile hisia in minam dangte tungah, na ciimna uh lak tu hi. Hi thukhamte theampo a zaak uh ciang, amate in, ‘Hi minam lian sia bang za in ciim a thu he zen ziam?’ ci tu uh hi.

⁷“Bang zata minam lian hi kale Topa ih Pathian ii ih kitaangsap sim hong nai bangin minam dangte in a kikap simin nai in a hu tu pathian khat nei tuan ngawl hi. Ama in hong hu tu in ih ko simin hong zo hi.

⁸Bangzata minam lian hi kale tuni in kong hil thukhamte bangin a maan thukham kuama in nei ngawl tu hi.

⁹Kidawm tavun! Na mit taw na mute na nuntak lai teng mangil peuma heak vun.

¹⁰Mipite a kungah hong khawm tavun. ‘Leitung ah a nuntak laiteng in amate in kei thu hong nit thei natu le hong kiitak natu le, a tate tung zongh ah tuabang ma in a hilsawn thei natu in, amate ka son tu te za le ka oai hi.’

¹¹“Meikhu vom bangin meisate le van ah meikuang paito te taw a kituam tua mualpeang ah pai in, na dindan uh te, na tate tungah son tavun.

¹²Tua meisung pan Topa in hong paupui a, a paute za a, ahizong ama lim le meal na mu ngawl na thu zongh son tavun.



¹³Ama in note taw thuciamna a vawt sia na zui hamtang natu in hong son hi. Tua in Suangpheak nii tungah a at Thukham Sawmte ahi hi.

¹⁴Sim in, na lua natu ngamah na zui tu uh thukham theampo a hil tu in Topa in kei hong sawl hi.

Milim Biakna Langpan natu

¹⁵“Sinai Mual meikuang sung pan Topa ii noma hong paupui lai in, a lim a meal na mu bua uh hi. Tua ahiciang noma phattuum natu in,

¹⁶⁻¹⁸pasal ahibuale numei meal ahizong nganhing le vacimte meal bang ahizong, awmtaal nganhingte le ngasate bang ahizong milim vawt in, khial tha peuma heak vun.

¹⁹Note in van ah na mu uh ni, tha, aksi te na biak thaak ngawl natu uh in kidawm tavun. Tuata siaTopa na Pathian in midangte theampo tungah a biak tu in pia hi.

²⁰Tuni na dinmun ahi, ama mihing na sua thei natu uh in thik a tuisak tua a lingh mama meikuang bang ahi Egypt panin, note hong pusuapui hi.

²¹Note hangin Topa na Pathian sia kei tungah hong thin uuk a, note hong piak ngampha ah tum tu in Jordan ngun kantan ngawl tu ni hi hong ci vacin hi.

²²Jordan Ngun kantan ngei ngawlin hi munah ka thi tu hi, ahizong note in na kantan dek tak zo uh a, tua ngampha na lua dek tak uh hi.

²³Topa na Pathian in note taw thuciam a vawt sia na makngil peuma heak vun. Milim peuma, no mama in milim peuma, vawt ngawl tu in hong thupiak sia zui tavun,

²⁴banghangziam cile Topa na Pathian sia hong kaangtum thei meikuang taw kibang a, a dang Pathian biak tu dei ngawl hi.

²⁵“Tua ngamah kum tam mama om in, tu le ta na nei uhciang zong noma atu in bangbang milim ahizong vawtin khial peuma heak vun. Hisia in Topa muna ah a sia hi a, ama thin uuksak tu hi.



²⁶Ka thu nong zui bua uh ahile hi ngam pan na mangthang pai natu uh in note lang khat ah tetti pang tu in tuni in van le lei ka sam hi. Na lua natu Jordan ngalkhat ah khua ngei na nungta buatu uh a, note hong kithatlum siat tu hi.

²⁷Minam dangte sungah Topa in note hong thethaang tu a, mihing tawm bek na suakta tu uh hi.

²⁸Note in tua lai ah mihingte khut taw a kivawt pathian, thing le suang taw a kivawt pathian, khuamu thei ngawl, khuaza thei ngawl, an ne thei ngawl, a nam za thei ngawl, pathiante na na seam tu uh hi.

²⁹Tua lai ah Topa na Pathian na zong tu uh a, na thinsung theampo taw na zong uh le na mu tu uh hi.

³⁰Hi thute hong tungin haksatna na thuak uhciang a khakbel in Topa kungah na heak kik tu uh a, a thu na ni tu uh hi.

³¹Ama in hong hesuak thei Pathian ahi hi. Note hong nusia ngawl tu a, hong thatlum ngawl tu a, na taangpupite uh taw a vawt thuciamna mangil ngawl tu hi.

³²“A bo sa hunte, na sua maa hun le leitung ah Pathian ii mite a piansakna thute kan kik vun. Leitung bup kan vun. Hi bang na lian dang piang ngei na ziam? Hi bang thute akua in za ngei ziam?”

³³Meikuang sung pan pathian kammal a zaak zawkciang no bangin, a nungta mihing om ngei ziam?

³⁴Topa na Pathian in Egypt ah note tung hong vawt bangin Pathian khat pawpo in minam dangte khutsung pan la in ama mi sua ngam na ziam? Ama in note mitmu in a hatna le a vaangletna hong kilanghsak a, natna le ngal thengsakin, nalamdang le a lamdangte vawt a, a lauhuai nate pianghsak hi.

³⁵Ama bek Pathian om a, a dang a om ngawl na thu hi nate taw Topa in hong lak ahi hi.



³⁶Ama in thu hong hil thei natu in vantung pan a aw hong zasakin; hi leitung ah ama ii a thiangtho meikuang hong musak a, tua mun pan hong paupui hi.

³⁷Na taangpupite a it manin note hong teal a, a vaangletna taw Egypt ngam pan hong pusuapui hi.

³⁸Tu dongin noma neisa ahi hi ngam sungah hong paipui natu le tua ngam noma hong piak natu in na mainawt kakawm in ama in note sang a lianzaw le a thahat zawte notkeak hi.

³⁹Tua ahiciang vantung leitung ah Topa sia Pathian a hina thu tuni in phawk vun a, mangil heak vun. Pathian dang om ngawl hi.

⁴⁰Tuni in kong piak ama thukhamte theampo zui tavun, tua hile nangma le na suan na paalte theampo na nuamsa tu uh hi. Topa na Pathian ii a tawntung na lua tu in hong piakna ngamah na teang top tu uh hi,” ci hi.

Jordan Nisuana sangah Buhna Khuapite.

⁴¹Tuaciang Moses in Jordan Ngun nisuana sangah khuapi thum koi a,

⁴²tua munte sia mihing khat in a ngal a hi ngawl khat a thatlum tha le a suatak thei natu khuapite ahi hi. Hi khuapite khat sungah a buu man ahile ama kithat ngawl tu hi.

⁴³Reuben minamte atu in senneal ngam mual zaangtam tungah a om Bezer khuapi hi a, Gad minamte atu in Gilead ngam sungah a om Ramoth hi a; tuaciang Manasseh minamte atu in Bashan ngamah a om Golan khuapite ahi hi.

Pathian Thukhamte Kipatna.

⁴⁴Moses in Pathian thukham le kihilnate Israel mihingte tungah pia hi.

⁴⁵⁻⁴⁶Hite sia Egypt pan a pusua zawk Bethpeor khua ngalkhat Jordan Ngun nisuana sang kuam ah a omlai in pia hi. Tua mun sia Heshbon khua a uk Amor Kumpi Sihon ngam sungah om hi. Egypt pan a pusua zawkciang Moses le Israel mihingte in Kumpi Sihon zo uh hi.

⁴⁷Amate in ama ngam le Jordan ngam nisuana ah a teang Amor kumpi dangkhat ahi Bashan Kumpipa Og ngam teng laaksak hi.



⁴⁸Tua ngam sia Arnon Ngun hui ah a om Aroer khuapi pansaksang Sirion Mual (Hermon Mual) dong kipee hi.

⁴⁹Tua sungah Jordan Ngun nisuana sang theampo, thangsang pan Tuipi Thi dong, le nisuana sang pan Pisgah Mualpeang dong kihel hi.

Thuhil kikna 5

Thukham Sawm

(Pusuana 20.1-17)

¹Moses in Israel mihingte theampo samin amate tungah, “Israel mite awng, tuni in kong piak thukham theampo ngai vun. Sin vun a, pha tak zui vun.

²Topa ih Pathian in Sinai Mual tungah thuciamna khat vawt a,

³ih pate bek taw hi ngawlin, tuni in a nungta eite taw zong a vawt ahi hi.

⁴Tua lai mual tungah meikuang sung pan maitang kisi in Topa in note hong paupui hi.

⁵Tua meikuang kiita in mual tungah kaato ngam ngawl na hi uhkom Topa thusonte, note tungah hong son tu in tua hunin note le Topa kilaklaw ah ka ding hi. “Topa in,

⁶‘Keima in Topa na Pathian, na saltanna Egypt pan hong suatakpa ka hi hi.

⁷“ ‘Keima ngawl pathian dang bia heak vun.

⁸“ ‘Vantung ahizong, leitung ahizong, leinuai, tuisung ahizong note atu in milim vawt heak vun.

⁹Milim mai ah kunin bia heak vun. banghangziam cile Keima in Topa na Pathian ka hi a, kidempui tu ka dei peuma bua hi. Kei hong ngaimawte le a suan a paalte tungah khang thum khang li dongin daan ka pia hi.

¹⁰Ahizong kei hong it a, ka thukhamte a zuite tungah ka itna khang tul tam mama dongin ka lak hi.

¹¹“ ‘A sia vawt natu in ka min, zangh heak vun. banghangziam cile Keima Topa na Pathian in ka min a zangh khial pawpo daan ka pia tu hi.



12“ ‘Keima Topa na Pathian in kong thupiak bangin Sabbath tang vun a, thiangthosak vun.

13Ni luk sung noma na naseam tu uh a,

14ahizong ni sali ni sia kei atu in a kithiangsak le tawlngak ni ahi hi. Tua ni in nangma, na tate, na silate, na ngannote na ngam sung hong teang ngamdangte ahizong kuama in naseam ngawl tu hi. Nangma tawlngak bangin na silate zongh tawlna tu hi.

15Egypt ah na saltanna thu le keima Topa na Pathian in ka vaangletna le ka thahatna taw kong suatakna thu ciamtee vun. Tua ahikom Sabbath tang tu in thu kong pia hi.

16“ ‘Keima Topa na Pathian ii kong thupiak bangin na nu le na pa zakta vun. Tua hile na maa vang tu a, kong piakna ngamah kum tam mama na nungta tu uh hi.

17“ ‘Mihing that heak vun.

18“ ‘Palngul mawna vawt heak vun.

19“ ‘Nguta heak vun.

20“ ‘A maan ngawlin ngual mawsiat heak vun.

21“ ‘Midang khat ii zi dungawk heak vun, a inn, a lo, a silate, a khui, a laa, ahibuale a neisa khat pawpo dungawk heak vun.

22“Hite sia mual tungah na kikhop lai un Topa ii note theampo tungah hong thupiak thukhamte ahi hi. Meikuang sung pan le meeisaa te sung panin a vaanglian aw taw hong paupui a, ama in thukhamte hong pia in thudang hong son ngawl hi. Tuaciang ama in hi thukhamte suangpheak nii tungah at in, kei tungah hong pia hi.

Mihingte Lau
(Pusuana 20.18-21)

23“Mualtung teng meikuang a khuazing sung pan aw na zaak uhciang, na lampuite le be lutangte kei kungah hong pai in,



²⁴Meikuang sung pan hong paupuina aw ih zaak ciang Topa ih Pathian in ama letna le a minthanna hong lak hi! Pathian in mihing paupui a, a paupuina a heak zawk uhciang zong, amate nungta lai veve hi ci sia tuni bekin ka he uh hi.

²⁵Ahizong banghangin thi tu lau in om tu khu ziam? A lauhuai meikuang in hong kaanglum tu hi. Topa ih Pathian hong paupuina aw ih za kik le ih thi takpi tu hi.

²⁶A nungta Pathian ii meikuang sung pan a paupuina a zaak zawkciang a nungta mihing om ngei na ziam?

²⁷Moses awng, heak kikin Topa ih Pathian thusonte theampo ngai in. Tuaciang hong heak kikin nang tungah hong thusonte hong son tan. Kote in ngai in kong ni tu uh hi,' hong ci hi.

²⁸“Hi thute Topa in a zaak ciang ama in kei tungah, ‘Hi mihingte pauna ka za a, amate maan hi.

²⁹Amate le a suan a paalte, a maa a pai thei tawntung natu in, keima hong zakta in ka thupiak theampo hong zui thei thong le maw.

³⁰A buk ah a heak kik natu in, pai in son tan.

³¹Ahizong Moses awng, nang ka kungah om in, ka thukham theampo le zui tu ngeina theampo kong pia tu hi. Ka piak tu ngam sungah hi thute a zui thei natu in mihingte hil in,' hong ci hi.

³²“Israel mihingte awng, Topa na Pathian ii hong thupiak theampo, pha tak zui vun. Hi zui tu ngeinate zui siat vun.

³³Na lua natu ngam sungah na ten suak thei natu le na nopsak tawntung thei natu in hi zui tu ngeinate theampo zui vun.

Thuhil kikna 6

A Thupi Thupiakna

¹“Hi thukham theampo note hil tu in Topa na Pathian in keima thu hong pia hi. Na lua natu ngamsung na tum uhciang hi thupiakte zui vun.

²Tualai ah khuangeipi na ten thei natu uh in nangma le na suan na paalte in na nuntak sung theampo Topa na Pathian zakta in, kong piak zui tu ngeinate theampo zui vun.

³Israel mihingte awng, hi thute ngai in zui vun! Tua hile na maa uh vang tu a, ih taangpupiteTopa Pathian ii hong kamciamsa bangin minam lian na suak tu uh a, tua ngamnuam le lei phana munah na teang tu uh hi.

⁴“Israel awng hi thu ciamtee vun! Topa - Topa bek — eite Pathian ahi hi.

⁵Topa na Pathian sia na thin theampo, na nuntakna theampo, le na thahatna theampo taw it vun.

⁶Tuni a kong piak hi thupiakte mangil ngei heak vun.

⁷Tua thupiakte na tate hil vun. Inn ah ahizong, lampi ah ahizong, na tawlngak ciang le na nasep ciang ahizong hil kik tawntung vun.

⁸Hong phawksak kik tu in na baan ah khi in, na talki ah bel vun.

⁹Na kongbiang tung le na baang tungah at vun.

Thu nit Ngawl hu a Hilkholna

¹⁰“Topa na Pathian in na taangpupite ahi Abraham, Isaac le Jacobte tungah a kamciam bangin ama in note saat ngawl, a lian le a nuamsa khuapite a om ngam khat note hong pia tu hi.

¹¹Tua munah innte sia note khol ngawl naphate taw kidim tu a, note taw ngawl tuikhukte om in, note ciin ngawl sapit huan le olive huante om tu hi. Topa in hi ngamah hong paipui ciang le na neak nop theampo na nei uh ciang,

¹²sila in na omna Egypt pan hong suatak Topa mangil mama heak vun.

¹³Topa na Pathian kiita in ama bek bia tavun a, ama min taw bekin kamciamnate vawt tavun.

¹⁴A dang pathiante le na kiim na paam ah a teang mite ii milim pathiante khat pawpo bia heak vun.

¹⁵Milim pathian na bia uh le na tungah Pathian thin uukna meikuang bangin hong tung tu a, hong mon tu hi, banghangziam cile note taw a omkhawm Topa na Pathian in kidempui dang dei peuma ngawl hi.

¹⁶“Massah ah na ze et uh bangin Topa na Pathian ze et heak vun.

¹⁷Ama ii hong piak zui tu thukham theampo pha takin zui vun.

¹⁸Topa ii maan hi, pha hi, a ci teng seam vun, tua hile na maa uh vang tu hi. Na taangpupite tungah Topa ii a kamciam ahi, ngam phana mun na lua thei tu uh a,

¹⁹ama kamciam bangin na ngalte na notkeak tu uh hi.

²⁰“Mailam sangah na tate in, ‘Banghangin Topa ih Pathian in hi thukhamte theampo zui tu in hong sawl ziam?’ ci in hong dongh tu hi.

²¹Tuasia ciang amate tungah, ‘Eite sia Egypt kumpipa sila ih hi a, Topa in ama vaangletna taw hong suatak hi.

²²Egyptte le a kumpipa le a uliante theampo tungah nalamdang a vawtnate le a lauhuai a vawtnate ih mittang taw ih mu hi.

²³Ama in ih taangpupite tungah a kamciam bangin hi munah hong paipui tu le hi ngam lua tu in Egypt pan hong suatak hi.

²⁴Tuaciang Topa ih Pathian in thukham theampo zui tu le ama kiitak tu in thu hong pia hi. Tuabangin ih vawt le ama in ih minam hong cing tu a, hong nuamsasak tu hi.

²⁵Pathian ii hong thu piak theampo thumaan takin ih ni le ama eite tungah lungdam tu hi,’ ci in son vun.

Thuhil kikna 7

Topa Mama ii Mihingte

(Pusuana 34.11-16)

¹“Topa na Pathian in na lua natu ngamah hong paipui tu a, ama in tua ngam pan minam tam mama te notkeak tu hi. Na mainawt kakawm in ama in note sang a lianzaw le a thahat zaw minam salite ahi: Hitte, Girgashte, Amorte, Canaante, Perizte, Hivte le Jebuste notkeak tu hi.



²Topa na Pathian in hi tenpuisak heak vun.

⁴Na tenpuisak uhle amate in na tate uh pathian dang bia tu in, Topa kung pan lam pialpui tu uh hi. Tuabang hile Topa thin uukin thakhat thu noma hong thatlum tu hi.

⁵Hi minamte tungah hi bangin vawt zaw vun, a biaknataute baltham in, a biakna suangkhuamte saattham in, a doai numei Asherah lim ektham in, a milimte haltum vun.

⁶Hi bang vawt vun, banghangziam cile note Topa na Pathian neisa hi nu hi. Leitung mi theampo sung pan ama aituam minam tu in note hong teal hi.

⁷“Midangte sang na tam zawk uh manin Topa in hong it a, hong teal hi ngawl hi. Leitung ah minam ciitawm belte na hi uh hi.

⁸Ahizong Topa in note hong it a, na taangpupite tungah a kamciamte tangtungsak nuam hi. Tua ahikom ama in note a thahatna taw hong hun a, Egypt kumpipa sila panin hong suatak hi.

⁹Topa na Pathian sia Pathian khat bek a hina le a thumaanna phawk vun. Ama in a thuciam keamcing tu a, ama a itte le a thupiak a zui mihingte khang tulkhat dongin a itna kip lak tu hi.

¹⁰Ahizong ama a ngaimaw mite daan a piak tu haisaang ngawl tu hi.

¹¹Tu in, hong kihilna sate ni tavun a, tuni a kong piak thukham theampo ni vun.

Thunitna ii Thuphate

(Thuhil kikna 28.1-14)

¹²“Hi thupiakte ngai in, thumaan takin na zui uhle, na taangpupite tungah a kamciam bangin Topa na Pathian in noma taw a thuciamna tangtungsak tu a, a itna kip hong lak tu hi.

¹³Ama in hong it in thupha hong pia tu a, khangto in ta tam mama na nei tu uh hi. Ama in na lote thupha pia tu a, lo ante, zute le olive thaute na nei tu uh hi. Ama in khui le tuu tam mama piakna taw thupha hong pia tu hi. Noma



tungah piak tu in na taangpupite tungah a kamciamsa ngamah hi thupha theampo note tungah hong pia tu hi.

¹⁴Note bangin thupha kicing a saang hi leitung ah kuama om ngawl tu hi. Note na hi uh zong, na ngannote ahizong a ciing om ngawl tu hi.

¹⁵Topa in natna theampo pan hong dal tu a, Egypt ah na thuak uh a lauhuai natnate khat zongh no tungah hong tungsak ngawl tu a, ahizong na ngalte theampo tungah tuate tungsak tu hi.

¹⁶Topa na Pathian ii na khut sungah hong piak minam theampo thatlum in, hesuak heak vun. A pathiante bia heak vun. Na bia uh le thi thei tu nu hi.

¹⁷“Amate ei sang tam zaw a, bangbangin notkeak zo thong tu hi ziam ci in zongh ngaisun heak vun.

¹⁸Amate kiita heak vun. Topa na Pathian in Egypt kumpipa le a mite tungah a vawt thute phawk vun.

¹⁹Na mittang taw na mu a lauhuai pul natnate, nalamdangte, a lamdangte le Topa na Pathian ii hong suataksakna, a vaangletna le a thahatna phawk vun. Egyptte a thalup bangma in ama in tu a na kiitak uh hi mihingte theampo thatlum tu hi.

²⁰Ama in amate patauna tungsak tu a, suakta in a buu mihingte zongh thatlum siat tu hi.

²¹Tua ahiciang hi mihingte kiita heak vun. Topa na Pathian sia note taw omkhawm hi, ama sia a lian le ih kiitak tu Pathian ahi hi.

²²Note na manaw kakawm in ama in hi minamte dadam dadam in notkeak tu hi. Note in thakhat thu in amate theampo na mon thei buatu uh hi, banghangziam cile tuabang na hi uhle ngamsate hong tam tu a, note atu in lauhuai tu hi.

²³Topa in na ngalte na khut sungah hong pia tu a, amate a kithalup siat mateng in ama in amate patausak tu hi.



²⁴Ama in a kumpite na khut sungah hong pia tu hi. Na thatlum tu a, amate ki mangil tu hi. Kuama in note hong khaktan zo ngawl tu a, a vekpi na thatlum siat tu uh hi.

²⁵A milimte hal vun. Tua milim tungah a om kham le ngunte dei heak vun a, noma atu in la heak vun. Na la uhle note atu in thaang hi tu hi, banghangziam cile, milim biaknate Topa in ngaimaw hi.

²⁶Hi milimte khat zongh na inn ah ciapui heak vun, na ciapui uhle amate tungah haamsiatna sia note tungah tung tu hi. Hi milimte zawngsak in na ngaimaw tu uh hi. banghangziam cile tuate sia Topa ii haamsiatte ahi hi.

Thuhil kikna 8

Lua tu Ngampha

¹“Note nungta in tam mama na phak thei natu uh le na taangpupite tungah piak tu a, Topa kamciamna ngam na lua thei natu uh in tuni in kong piak zui tu thukhamte theampo thumaan takin zui vun.

²Kum sawmli sung Topa na Pathian in senneal ngam hong kantan pui a, hi khual khuala hong hawsakin, hong thupiakte zui nuam ziam, zui nuam ngawl ziam ci in, na thinsung na ngaisutnate he nuamin note tungah haksatna hong tunsaknate phawk vun.

³Ama in note hong ngilkialsak a, tua zawkciang nangma le taangpupite neak ngeingawl manna na neak tu in hong pia hi. Mihingte in an bek taw nungta hi ngawl a, Topa kammalte taw nungta ih hina thu hong hesak nuamin ama in hi bang vawt hi.

⁴Hi kum sawmli sungah na puante sia ngawl a, na peangte tum ngawl hi.

⁵Pa in tate a hil banginTopa na Pathian in hong hilin daan hong piaknate phawk vun.

⁶Tua ahiciang Topa hong thupiak bangin vawt vun; a thukhamte bangin nungta vun a, ama kiita vun.

⁷Topa na Pathian in ngunte le ciktuite omna mun le mualtung le kuam sungah a luang leinuai luituite omna;



⁸zungtaang, mangtaang, sapit, thei, talee, olive le khuaituite a pianna ngam phana ah hong paipui hi.

⁹Tua lai ah na ngilkial ngei ngawl tu a, kisapna na nei ngei buatu uh hi. A suangte sungah thik om a, mualte panin tausan piang hi.

¹⁰Na du theampo na nei tu uh a, ngampha hong piakna hangin Pathian tungah lungdam na ko tu uh hi.

Topa Makngil ngawl natu Hilna

¹¹“Topa na Pathian na mangil peuma heak vun. Tuni in kong piak zui tu a thukham khat zongh khe ngawlin zui vun.

¹²Na du theampo nei in na ten natu uh innpha nasak uhciang,

¹³le na khui, na tuu, na ngun na kham le a dang na neisa theampo a khanto ciang ,

¹⁴kiphasak heak vun a, note na saltanna, Egypt pan hong suatakTopa na Pathian mangil heak vun.

¹⁵Ama in note a ngu nei ngulte le aikamte omna a zai le a lauhuai senneal ngam hong kantan pui hi. Tui om ngawl na, leikona ngam sungah note atu in suangpi sung pan tui luangsak hi.

¹⁶Senneal ngam sungah na taangpupite ii a neak ngeingawl manna sia na neak tu in hong pia hi. Ama in mai sangah thupha hong piak thei natu in haksatna taw hong ze et hi.

¹⁷Tua hi a, noma vaangletna le na thahatna uh taw hau khu hi, ci in ngaisun ngei heak vun.

¹⁸Na hau natu in vaangletna hong pia pa sia Topa na Pathian a hina thu phawk vun. Ama in hi bangin note hong hausak sia na taangpupite taw a vawt thuciam tungah tuni dongin a thumaan laina hang ahi hi.

¹⁹Topa na Pathian mangil heak vun, ahibuale pathian dangte bia in a na seam heak vun. Tuabang na hi uhle note hong kithatlum nanak tu a hina thu tuni in kong hil hi.



²⁰Topa thu na ni bua uhle maisang na manaw uhciang Topa in na mai uh ah minamte a thalup bangin note zongh hong kithatlum tu hi.

Thuhil kikna 9

Mihingte ii Thunit Ngawlina

¹“Israel mihingte awng, ngai vun! Tuni in Jordan Ngun na kantan tu uh a, note sangin a lian zaw le a thahat zaw minamte ii teenna ngam na lua tu uh hi. Amate khuapite lian a, a luphungte van ban hi.

²Tua mihingte a tun saangin thahat a, a thatang lianin kuama ii zaw zawk ngawlina thu, na zaak sa uh ahi hi.

³Ahizong Topa na Pathian sia note mai ah meikuang bangin a pai na mittang uh taw na mu tu uh hi. Note na mainawt zawkna za uh taw kizui in ama in amate zo tu a hong kamciam bangin, na ngalte na notkeak tu uh a, manlang takin na mon tu uh hi.

⁴“Topa na Pathian in note atu in amate a nawkeak zawkciang, note kilawm manin hi ngam lua tu in hong paipui hi ci heak vun. Note kilawm man hi ngawl a, hi mite a siat hu in note atu in Topa in notkeak tu ahi hi.

⁵Na phatna le na thumaanna hangin Topa in amate ngam hong pia hi ngawl hi. Hi mite a siatna hang le na taangpupite Abraham, Isaac le Jacob tungah a kamciam a tangtutsak nop manin Topa in amate notkeak tu hi.

⁶Note kilawm manin Topain hi ngampha hong pia ahi ngawlina thu telthiang vun. Note kilawm man hi ngawl hi. Note sia mihing thinpuite na hi uh hi.

⁷“Senneal ngamah Topa na Pathian na thin uuksaknate mangil ngei heak vun. Egypt na nusiati ni a kipan, hi lai na thet uh dong ama na langpan uh hi.

⁸Sinai Mual ah zongh Topa a thin na uksak uh a, hong thalup siat tu za dongin thin uuk hi.

⁹Topa in note taw thuciam a vawt sia a ki atna suangpheakte la tu in mual tungah ka kaato hi. Tua lai ah sun sawmli le zan sawmli ka om a, an le tui ka ne bua hi.



¹⁰Tuaciang Topa in ama khut taw a at suangpheak niite hong pia a, tuate in mual tungah na kikhop uh ni in meikuang sung pan hong son thute ahi hi.

¹¹Hi hi, sun sawmli le zan sawmli zawkciang thuciam a atna suangpheak niite Topa in keima hong pia hi.

¹²“Tuaciang Topa in kei tungah, ‘Mualtung pan thakhat in tuaksuk in, banghangziam cile Egypt pan na paipui na mihingte lal in, a sia ngamta uh hi. Zui tu in ka thupiakte pan amate lampial zo uh a, amate atu in milim khat vawt zo uh hi,’ hong ci hi.

¹³“Topa in kei tungah, ‘Hi mihingte thin puizia ka he hi.

¹⁴Hong tho heak in. Kuama ii a phawk nawn ngawl natu in amate mot ka sawm hi. Tua zawkciang amate sangin, a lian zaw le a thahat zaw minam khat ii pa kong suaksak tu hi,’ hong ci lai hi.

¹⁵“Tuaciang thuciam ki atna suangpheakte nii toai in mualtung pan ka tuaksuk hi. Mualtung panin meikuang hong pai hi.

¹⁶Topa na Pathian ii hong thupiakte na zui ngawl na uh le leistung sumpiangte taw khuita milim vawtin Topa tungah na khialna uh kong mu hi.

¹⁷Tua hi a, note mai ah tua suangpheakte nii lei denna ka nei a, ka tamthamsak hi.

¹⁸Tuaciang ni sawmli le zan sawmli sung, an ne ngawl tuidawn ngawlin Topa mai ah khatvei ma lei ah ka bok kik leleau hi. Tuabang ka hina sia Topa tungah na maw uh hang le ama na thin uuksak uh hang ahi hi.

¹⁹Note mot tu za dongin ama thin uuk ahikom Topa thin uuk mama na ka kiita hi. Ahizong khatvei maTopa in ka thu hong ngai kik hi.

²⁰Topa sia Aaron tung zongh ah thalup tu za dongin thin uuk ahikom Aaron atu zonghin thu ka ngetsak hi.

²¹Note ii na vawt uh khuita milim la in meisung denna ka nei hi. Tuaciang tua milim sia semneen in ka ngoaivui a, a vuite mualtung pan a luang suk lui sungah ka vawk hi.

²²“Topa na Pathian sia Taberah, Massah, le Kibroth Hattaavah ah na omlai uh zonghin a thin na uksak uh hi.

²³Ama hong piak tu ngam, vil tu le a lua tu in Kadesh Barnea pan hong paisak lai in, ama na langpan uh a, a thu um ngawlin na zui bua uh hi.

²⁴Kong heak pan kipan note in Topa na langpan uh hi.

²⁵“Tuabangin note hong mot nop sia he ka hikom, Topa mai ah sun sawmli le zan sawmli sung lei ah ka bok hi.

²⁶Tuaciang keima in, ‘Vaanglianpipa Topa awng, na thahatna le na vaangletna taw Egypt pan pusua in, na suatak sa mihingte mon heak in.

²⁷Na naseam Abraham, Isaac le Jacobte phawk in a, hi mihingte ii thin puina, a siatna le a mawnate awlmawk heak in.

²⁸Tuabang na hi buale amate tungah na kamciam bangin na mihingte, Canaan ngamah thetpui zo ngawl hi, Egyptte in hong ci tu hi. Na ngaimawk manin na mite thatlum tu in senneal ngamah paipui hi, hong ci tu hi.

²⁹Bangbang po ahizong, hi mihingte sia nangma atu na teal sa te hi a, na vaangletna le na thahatna taw Egypt pan na pusuapui mihingte ahi hi,’ ci in thu ka ngen hi.

Thuhil kikna 10

Moses in Thukhamte La kik

(Pusuana 34.1-10)

¹“Tuaciang Topa in kei tungah, ‘A masa a te bangma in suangpheak nii vawt in a, a koi natu thingkuang khat vawt in. Mual tungah hong kaato tan a,

²na tapsak suangpheakte tungah ka at tengma tua suangpheakte tungah ka at kik tu a, tuaciang tuate thingkuang sungah na koi tu hi,’ hong ci hi.

³“Tuaciang acacia thing taw thingkuang khat ka vawt a, a masa lai a sia taw a kibang suangpheak nii sui in mual tungah ka paipuito hi.

⁴Tuaciang Topa in tua suangpheakte tungah a masa a at kammal, mualtung na kikhop uh ni meikuang sung pan note tungah hong son thu, thukham sawmte at hi. Tuaciang Topa in suangpheakte hong pia a,



⁵mualtung pan ka tuaksuk hi. Tuaciang Topa thupiak bangin ka vawtsa thingkuang sungah tua suangpheakte ka koi a, tua hun pan kipan tualai ah om hi,” ci hi.

(⁶Israel te in Jaakan mihingte tuikhuk pan pai in Moserah zuan uh hi. Tua munah Aaron thi in kivui a, a tapa Eleazar in a thiampi za laih hi.

⁷Tua mun pan amate Gudgodah ah pai uh a, tua mun pan tui tam omna mun Jotbathah theng uh hi.

⁸Mual tungah Topa in Thukham Thingkuang a cing tu le thiampi na a seam tu, le ama min taw thupha a pia tu in Levi namte nasep pia hi. Hi nasepte tu dongin amate nasep hi lai hi.

⁹Tua ahikom Levi minamte in a dang minamte nga bangin lo ngam nga ngawl hi. Amate ii nga sia Topa na Pathian ii kamciam bangin Topa ii thiampi za ngana hamphatna ahi hi.)

¹⁰“A masa lai bangma in mual tungah sun sawmli le zan sawmli ka om hi. Topa in khatvei ka thu hong ngai lai a, note hong mot ngawl tu lungkim hi.

¹¹Tuaciang ama in na taangpupite tungah piak tu in a kamciamsa leitangh na lua thei natu in note lampui tu kei hong sawl hi.

Pathian ii A ngette

¹²“Tu in Israel mihingte awng, Topa na Pathian ii note tungah hong nget thute pha tak ngai vun. Topa zakta vun a, hong thupiakte zui vun. Na thin theampo uh taw ama it in, a na seam tavun a,

¹³a thukham theampo zui vun. Note phattuam natu in tuni in tuate kong pia hi.

¹⁴A saangbel vantungte ngangawn Topa neisa hi a, leitung le a tung a om na theampote zongh ama neisa ahi hi.

¹⁵Ahizong Topain na taangpupite a itna lian mama ahikom midangte taangin note hong teal a, note sia ama tealtuamte na hi lai uh hi.



¹⁶Tua ahiciang tu pan kipan Topa thu ni tavun a, na thin puisak nawn heak vun.

¹⁷Topa na Pathian sia pathiante theampo tung le a vaanglian theampo tungah thu nei hi. Ama lian in thahat a, kiitak tu ahi hi. Ama in ngup tuam nei ngawl a, sumnguk saang ngawl hi.

¹⁸Ama in tangate le meingongte phat vawtin, eite sungah a teang ngamdang mite it in, an le puansilhte pia hi.

¹⁹Tua hi a, ngamdang mite it vun, banghangziam cile note zongh Egypt ngamah ngamdang mi ma na hi ngei nu hi.

²⁰Topa na Pathian zakta in ama bek bia vun. Ama tungah thumaan in ama min taw bekin na kamciamna uh te vawt vun.

²¹Ama na Pathian uh hi a, pok vun. Noma atu a vawt a lian le a lamdang nate na mit mama uh taw mu nu hi.

²²Na taangpupite Egypt ngamah a pai lai in mihing sawmsali bek pha hi. Ahizong tu inTopa na Pathian in note van ah aksi za in tam mama hong phasak zo hi.

Thuhil kikna 11

Topa ii Letna

¹“Topa na Pathian uh it in, a thukham theampo zui tawntung vun.

²A bangbang Pathian a hina thu na heaksa uh ahikom tuni in phawk vun. Tuabangin a hete sia, na tate uh hi ngawlin, noma na hi uh hi. Topa letna, a vaangletna, a thahatna,

³le nalamdang a vawtte mu nu hi. Ama ii Egypt kumpipa tung le a ngamsung theampo ah a nasepna sa te mu nu hi.

⁴Egypt ngalkapte ii hong del lai in Topa in Egypt ngalkapte, a siphute le a leangte taw San Tuipi sungah tuitaasakin a bosak siatna thu mu nu hi.

⁵Hi mun na thet uh ma in senneal ngam sungah Topa in note atu hong sepsaknate na he uh hi.



⁶Reuben minam Eliab ii tapa Dathan le Abiram tungah Topa nasepnate phawk kik vun. Mihing theampo ii mu in leitangh kihong a amate, a innkuan puite, a puanbuk le a silate theampo le a nganno theampo valhtum hi.

⁷Hi hi, Topa ii nasep lian theampo a mute noma nu hi.

Kamciam sa Ngam ii Thuphate

⁸“Tuni in kong piak thukham theampo zui vun. Tua hile na tum nopna ngam sia ngun kantan in lua thei tu nu hi.

⁹Tuaciang Topa in na taangpupite tung le a suan a paalte tungah piak tu in a ciam ngampha le ngam nuam ah khansau in na nungta tu uh hi.

¹⁰Na lua natu uh ngam sia nidang in na teenna uh Egypt ngam bang hi ngawl hi. Tua lai ah thaici na tu uh ciang lo sungah tui piak natu hawklum to in haksa takin na na seam uh hi;

¹¹ahizong na tum natu ngam sia mual le luam omna ngam hi a, nguatui taw tui nga na ngam ahi hi.

¹²Topa na Pathian in hi ngam keamcing a, kum tawntungin cing hi.

¹³“Tua hi a, tuni in kong thupiakte zui vun; Topa na Pathian sia na thin theampo taw it in, a na seam vun.

¹⁴Tuabang na hi uhle, Topain na ngam sungah a kikap ciangin tukngua, khalngua hong zusak tu a, note atu in antang, zu le olive thaute,

¹⁵le na ngannote atu in lopa om tu hi. Na du an pawpo na nei tu uh hi.

¹⁶Milim pathian dangte bia tu le a na seam tu in Topa kung pan lampial heak vun.

¹⁷Lam na pial uhle no tungah Topa thin uuk tu hi. Ama in nguatui kangsak tu a, leiko in an piang ngawl tu hi. Tuaciang Topa in note hong piak ngam pha napi tua munah na thi pal tu uh hi.

¹⁸“Kong thupiakte na thin le na lung sungah ciamtee vun. Na baan ah sawm tavun a, hong phawksak tu in na tal ah bel vun.



¹⁹Na tate tungah hil vun. Inn ah na om ciang ahizong na va ciang ahizong, na tawlngak ciang le na nasep ciang ahizong na tate sonpui vun.

²⁰Na innkha tung le na kongbiang tungah at vun.

²¹Tua hile Topa na Pathian in na taangpupite tungah piak tu in a ciansa ngam sungah noma le, na tate kum tam mama na nungta tu uh hi. Lei le van a om lai teng tua ngamah na teang tu uh hi.

²²“Kong thupiak theampo thumaan takin zui vun; Topa na Pathian it vun a, a thupiak theampo seamin, ama tungah thumaan vun.

²³Tuaciang na mai uh ah hi minamte theampo ama in notkeak tu a, note sangin a lianzaw le a hatzaw mite ii leitangh na lua tu uh hi.

²⁴Na siina leitangh theampo note neisa hi tu hi. Na ngam uh sia thangsang senneal ngam pansaksang Lebanon mual dong, niswana sang pan Eupharates ngun dong, nitumna sang pan Mediterranean tuipi dong hi tu hi.

²⁵Tua ngam sung na paina po ah Topa ii hong kamciam bangin Topa na Pathian in, mihingte in note hong kiitasak tu uh a, kuama in note hong langpan zo buatu uh hi.

²⁶“Tuni in note na teal tu in thupha khat le haamsiatna khat kong pia hi.

²⁷Tuni in kong piak Topa na Pathian thupiakte na zui uh le thupha khat hi a,

²⁸ahizong Topa na Pathian thupiakte zui ngawlin na biak ngeingawl milim pathian dangte na bia uh le haamsiatna khat ahi hi.

²⁹Na lua natu ngamah Topa in hong paipui ciang, Gerizim Mual pan a thupha na thangsak tu uh a, Ebal Mual pan haamsiatna na thangsak tu uh hi.

³⁰(Hi mualte nii sia Jordan zaangtam ah a teang Canaan mite ngamsung Jordan ngun ii nitumna sangah om hi. Tua mualte sia nitumna sangah om a, Gilgal khua pan Moreh biakna taw kisai thingkung thiangthote taw kikhuala ngawl hi.)

³¹Topa na Pathian ii hong piakna ngam lua tu in Jordan ngun na kantan tu uh hi. Tua ngam lua in na ten uhciang,



³²tuni in kong piak thukhamte theampo pha takin zui vun.

Thuhil kikna 12

Biak natu Mun khat

¹“Na pu na pate Pathian Topa ii note tungah hong piak ngamah na ten hunsung teng na zui tu uh sia hi thukhamte ahi hi. Tuате ngai vun!

²Na lua natu ngamsung mihingte ii biakna mualsaang tungah ahizong, mualnote tung le thingkung hing nuai ah ahizong, amate ii milim pathiante omna munte theampo lalcipsak vun.

³A biaknataute baltham vun a, a biakna suangkhuam thiangthote sutham vun. Hi munte ah tuate a kibiak nawn ngawl natu in Asherah doai numei limte mei taw halin, a milimte semneen vun.

⁴“Hi mihingte ii a pathiante a biak bangin Topa na Pathian bia heak vun.

⁵Topa in no minambup ii ngamsung pan mun khat teal tu a, tua mun ama omna mai ah a mihingte pai in ama bia tu uh hi.

⁶Tua lai ah na biakpiakna theampo, meihal biakpiakna le a dang biakpiaknate, sawm a khat le na sumpite, Topa tungah na kamciam letsongte, thin zawna taw piaknate, le na khui le na tuute sung pan taciilte pia vun.

⁷Tua munah note thupha hong pia Topa na Pathian mai ah nangma le na innkuanpuite in an ne in na sepsa thuphate tungtawn in na lungdam tu uh hi.

⁸“Tua hun a thet ciang na sep ngei uh bangin na seam nawn buatu uh hi, tu ciang dong noma uuk bang pawpo in na bia uh hi,

⁹banghangziam cile Topa na Pathian ii hong piakna ngam, nuam takin na ten thei natu uh mun na theng balai uh hi.

¹⁰Jordan ngun na kan uhciang Topa in tua ngam hong luasak tu a, tualai ah hong teangsak tu hi. Ama in na ngalte theampo khut sung pan hong keamcing tu a, ngalmuang in na teang tu uh hi.

¹¹Topa in ama biak natu in mun khat teal tu a, kong thupiak bangin tua munah ama tungah na theampo na puak tu uh hi: tuate in meihal biakpiakna



le a dang biakpiaknate, na sawm a khat le na sumpite le Topa tungah na kamciam a tuam vilvel letsongte ahi hi.

¹²Tua mun Topa mai ah na Tate, na naseamte le na khua sungah a teang Levite taw lungdam khawm tavun. Levite in lo ngam a nei ngawl natu thu phawk tavun.

¹³Na uukna po ah biakna na pia buatu uh hi.

¹⁴Topa in no minamte ngam sungah mun khat teal tu a, tua munah na pia tu uh hi. Tua mun bekah meihal biakpiakna na pia tu uh a, ka thupiak bangin a dangte theampo na vawt siat tu uh hi.

¹⁵“Ahizong na teenna mun po ah na ngannote ngoin, na ne thei tu uh hi. Topa hong piak zaza na ne thei tu uh hi. Na vekpi in biakna taw kisai a thiangte zongh, a thiang ngawlte zongh in; sazuksa lesakhisa na neak uh bangin ne tavun.

¹⁶Ahizong a chi na ne buatu uh a, lei ah tui sun bangin na sung tu uh hi.

¹⁷Na teenna munte ahTopa tung na piak uh na te na ne buatu uh hi; tuate in sawm a khat in na piak antang, zu, olive thau ahizong, na khui le na tuu taciilte ahizong, Topa tungah na kamciam letsongte, thin zawna taw na piakte, le a dang biakpiaknate ahi hi.

¹⁸Nang le na Tate in, na naseamte le na khua sungah a teang Levite taw hi biakpiaknate Topana Pathian ii tealsa biakpiakna mun Topa na Pathian omna mun bek ah ne khawm tu nu hi. Na nasepna theampo ii tungah tua munah na lungdam tu uh hi.

¹⁹Na ngam sungah na ten uh laiteng Levite ngaingon heak vun.

²⁰“ Ama kamciamsa bangin, Topa na Pathian in na ngam hong keaksak ciang, na du hun pawpo ciang sa na ne tu uh hi.

²¹Tua biakna mun sia a khuala lei ahile, kong cisa bangin Topa hong piak sa khui le tuute khat pawpo na uuk hun pociang ngo in na inn uh ah a sa na ne thei tu uh hi.



²²Sazuksa lesakhisa a neak uh bangin biakna taw kisai mithiang khat in ahizong, mithiang ngawl khat in ahizong tua sa ne thei tu uh hi.

²³A sungah chi omlai sate ne heak vun; banghangziam cile chi sungah nuntakna om a, nuntakna sia sa taw ne khawm heak vun.

²⁴Chi ne heak vun, tui bangin lei ah sung vun.

²⁵Hi thupiak na zui uh le Topa lungdam tu a, nangma le na suan na paalte theampo na maa uh vang tu hi.

²⁶Na biakpiaknate le Topatungah na kamciam letsongte biakpiakna munah paipui vun.

²⁷Topabiaknatau tungah a kihaltum tu biakpiaknate tua munah pia vun. Sangaw biakna ah na neak uh sate zongh biaknatau tungah pia vun a, a chite biaknatau tungah sung vun.

²⁸No tungah kong thupiak theampo thumaan takin zui vun, tua hile nangma le na suan na paalte a tawntungin na maa uh vang tu hi, banghangziam cile noma in a maan le Topa na Pathian a lungdamsak nate a seam tu na hi uh hi.

Milim Biak ngawl natu Hilkholna

²⁹“Ngal na sim uhciang Topa na Pathian in hi minamte mon tu a, a ngam lua in na teang tu uh hi.

³⁰Topa in tua minamte a mot zawkciang a doai biaknate na zui ngawl natu uh in kidawm vun, banghangziam cile tua in hong thatlum tu hi. Amate biak bangin na biak thei natu in a milim pathian bangbangin bia cisia kan sese heak vun.

³¹Amate ii a milim pathiante a biak bangin Topa na Pathian bia heak vun, banghangziam cile a milim pathiante a biak uhciang Topaii ngaimawk, a kiihuai nate vawt uh hi. Amate in a tate ngangawn pia in a biaknataute tungah mei taw hallum uh hi.

³²“Kong thupiak theampo zui siat vun; khat zongh belap heak vun a khat zongh khiam heak vun.



Thuhil kikna 13

- ¹“Note sung pan kamsang khat ahibuale mang khia thei khat in,
- ²nidang in na biak ngeingawl uh milim pathiante bia tu le a na seam tu in, hong zol in lim lamdang le nalamdangte hong lak tu hi. Ama hong lak lim lamdang le nalamdangte a maan hial zong,
- ³ama awlmawk heak vun. Topa sia na thin theampo taw na it takpi ziam ci in hong heak nop man, Topa na Pathian in tua pa zangh zongh hi thei hi.
- ⁴Topa zui in zakta vun. A thupiakte ngai in zui vun. Ama bia in ama tungah thumaan vun.
- ⁵Ahizong na saltanna Egypt pan hong suatak Topa langpan tu in hong sawl mang khia theite ahibuale kamsang peuma thatlum vun. Tua pa sia misia hi a nuntak natu aTopa ii hong thupiak lampi pan hong pialpui nuam hi. Hi misia pa taw na kipeal natu in ama thatlum vun.
- ⁶“Na suapui, na tapa, na tanu, na it na zi, na lawm phabelte ngangawn in noma le na taangpupite ii na biak ngeingawl uh milim pathian dangte bia tu in hong hanthawn ku tha tu hi.
- ⁷Amate khat pawpo in na nai a teang minamte ii milim pathiante ahibuale a khualana ah a teang minamte ii milim pathiante bia tu in hong hanthawn tha tu hi.
- ⁸Ahizong ama in zolsak heak vun a, a thu ngangawn ngai heak vun. Khuangaihuai sa in hesuak heak vun a, panpui heak vun.
- ⁹Ama that vun! Suang taw a deang masa bel hi vun a, tua zawkciang midangte theampo zongh in deang taken.
- ¹⁰Ama suang taw deanglum vun! Na saltanna Egypt pan hong suatakTopa na Pathian kung pan lam hong pialpui nuam hi.
- ¹¹Tua hile Israel mihingte theampo in thupiiang teng za tu uh a, lau tu uh hi. Nidang ciang kuama in hi bang a sia ngamta kik nawn ngawl tu uh hi.
- ¹²“Topa na Pathian hong piak khuapite sungah na ten uhciang,



¹³a masa na biak ngeingawl uh milim pathian bia tu in na mipuite sung pan mihing ngina ngawl pawlkhat in amate khuasung mihingte a lampui khialna thu na za tha tu uh hi.

¹⁴Tuabang kamleang na za uhle a maan le a maan ngawl kantel vun a, thumaan ahile,

¹⁵tua khua mihingte theampo le a ngannote theampo zongh thatlum siat vun. Tua khua lalcipsak vun.

¹⁶Tua munah a teang mihingte ii neisa theampo khawmtua in khua laizang ah seng vun. Topa na Pathian tungah biakpiakna in tua khua le a vanh teng hal siat vun. Tuabangin a khua susia in ki nusia tu a, kisa kik ngei nawn ngawl tu hi.

¹⁷A kisusia nate sung pan note atu in na khat zongh la heak vun. Tua hile Topa thin uukna thai in hong hesuak tu hi. Tuni in kong piak ama thupiakte theampo zui in, hong sawl bang na seam uh le,

¹⁸na taangpupite tungah a kamciamsa bangin note hong hesuak tu a, note mihing tam mama pha tu in hong pungsak tu hi.

Thuhil kikna 14

A Kikhaam Khuangaizia

¹“Note sia Topa na Pathian ii mihingte na hi uh hi. Tua hi a, mithi na kaa uhciang midangte ii vawt bangin, na pumpi noma le noma ki at heak vun a, na mai samte meet heak vun.

²Topa na Pathian neisa te na hi uh a, leitung ah a teang mihingte theampo sung pan ama mihing tu in hong tealsa na hi uh hi.

A thiang le A nin Nganhingte

(Thiampite 11.1-47)

³“Topa in nin a ci peuma ne heak vun.

⁴Hi nganhingte ne thei tu nu hi: tuate sia khui, tuu, keal,

⁵sazuk, ngamtuu, ngamkeal le sanang,

⁶a peangcin kaa in eakkha thaite ahi hi.



⁷Ahizong a peangcin kaa ngawl le eakkha thai ngawl nganhingte na ne buatu uh hi. kalaoh, bilpi lesakih te ne heak vun. Tuate sia eakkha thai ahihang a peangcin kaa ngawl ahikom a nin in kingaisun tu hi.

⁸Voksa ne heak vun. Amate peangcin kaa hi kale eakkha thai ngawl ahikom a nin in kingaisun hi. Hi nganhingte khat zongh ne heak vun a, a thisa ngangawn tham heak vun.

⁹“Ngasate sung pan a lip le a tha neite na ne thei tu uh a,

¹⁰ahizong tui sungah a nungta lip le tha a nei ngawl peuma ne heak vun. Tuate sia a nin in kingaisun tu hi.

¹¹“A thiang vacimte ne thei tu nu hi.

¹²⁻¹⁸Ahizong a nuai a vacimte ne ngawl tu nu hi. Tuate sia muvanlai, simbu, muthi, mupui, mumeikaa, musan, va-ak, vacim kalaoh, tuiva, vapi, vakaang, tuingumpai, ngun va, vasuangui le bak ahi hi.

¹⁹“Tha a nei lungno theampo nin hi, ne heak vun.

²⁰Lungno thiangtho pawpo ne thei tu nu hi.

²¹“Ama thu a, a thi nganhing sa ne heak vun. Note sungah a teang ngamdang mihingte in nesak vun, ahibuale ngamdang mihingte tungah zuak vun. Ahizong note sia Topa na Pathian neisa na hi uh a, ama mihingte na hi uh hi. “Tuuno sa ahibuale kealno sa sia a pui noaitui sungah huan heak vun.

Sawm a khat taw kisai Thukham

²²“Kumsim in na lo pan a piang theampo sung pan sawm a khat a tuam in koi vun.

²³Tuaciang Topa na Pathian ii ama biak natu in a tealna munah paipui vun. Tua mun ama mai ah sawm a khatin na piak uh antang, zu le olive thau le tuu le keal taciilte ne vun. Topa na Pathian a tawntung na zaktak thei natu in tuabangin hi vun.

²⁴Topathupha hangin a piang sawm a khat te puak natu in biakna mun sia na inn pan a khuala lei ahile, hi bangin vawt vun.



²⁵Tua ante zuakin, a sumte biakna munah paipui vun.

²⁶Na du pawpo, khuisa, tuusa, zu, beer lei in tua mun Topa na Pathian mai ah nangma le na innkuanpuite in lungdam takin ne in dawn vun.

²⁷“Na khua sungah a teang Levite in neisa bangma nei ngawl ahikom, ngaingon thong heak vun.

²⁸Kum thum cin simin na piak uh sawm a khat ante hong paipui in na khuasung uh ah khol vun.

²⁹Hi ante neisa bangma a nei ngawl Levite atu le, na khua sungah a teang ngamdang mihingte, tangate, le meingongte atu ahi hi. Amate hong pai in a kikap bangin la tu hi. Tuabangin vawt vun, tua hile na TopaPathian in na nasepna po ah thupha hong pia tu hi.

Thuhil kikna 15

A kum Salina

(Thiampite 25.1-7)

¹“Kum sali a cin simin note tungah sum hong ba theampo maisak tu nu hi.

²Hi bangin vawt tu ahi hi. Israel a mipui khat pawpo tungah sum a puk sia in a sumpuk teng maisak tu hi. Leiba siik nawn ngawl tu hi, banghangziam cile Topa in tua leiba kimaisak zo hi, ci in thangsak zo hi.

³Ngamdang mihingte ii hong bat te na siik thei tu uh a, ahizong na mipuite ii hong batte siik ngawl tu nu hi.

⁴“Topa na Pathian ii hong piakna ngamah ama in thupha hong pia tu hi. Tuni in kong thupiakte theampo pha takin zui in, ama thu na ni uhle,

⁵na mihingte sung pan khat zongh zawngkhal ngawl tu hi.

⁶Hong kamciamsa bangin Topa in nang thupha hong pia tu hi. Minam dang tam mama te tungah sum puk na thaak tu uh a, ahizong kuama tung pan sum puk na laak uh a kul buatu hi. Minam tam mama na uk tu uh a, ahizong kuama ii khut nuai ah na om buatu uh hi.



⁷“Topa na Pathian ii hong piakna ngamsung khua khat pawpo ah kispna a nei Israel na mipui khat po a om le, duhop heak vun a, hu ngawlin om heak vun.

⁸A taangsap za ngo takin puk vun.

⁹Leiba maisak kum a nai hang sumpuk nuam ngawlin om heak vun. Tuabang khua ngaisutna siate na thinsung uh ah tumsak heak vun. Na puk nuam bua uhle amate in note hong langpan in Topa tungah au tu a, tuaciang no hong kikhialsak tu hi.

¹⁰Ngo tak le oaina tak taw pia vun, tua hile nasepna theampo ah Topa in thupha hong pia tu hi.

¹¹Israel te sungah a zawng le a cimaw pawlkhat om tawntung tu a, tuate tungah na thuthiam natu uh in thu kong pia hi.

Silate tung Vawtzia

(Pusuana 21.1-11)

¹²Na mipui Israel te, pa ahibuale numei khat sia sila in na tungah ama le ama hong kizuak le, kum luk sung na hong sepsak zawkciang na suatak tu hi. A kum sali ciang ama na suaktasak tu hi.

¹³Na inn pan na suataksak ciang khut hawm nguakin pusuaksak heak in.

¹⁴Topa ii thupha hong piakte sung pan tuute, antangte, le zute thuthiam takin ama tungah pia in.

¹⁵Noma zongh Egypt ngamah sal na tanna uh le Topa na Pathian ii hong suataksakna thu phawk vun. Tua ahikom hi bangin thu kong pia hi.

¹⁶“Ahizong na silapa in hong nusia nuam ngawlin, nangma le na innkuanpuite it in hong om suak nuam tha tu hi.

¹⁷Hong om suak nuam le, na innkha ah paipui in a, tua munah a bil vusak in. A nuntak sung tawntung na sila hi tan tu hi. Na sila numeite zongh tuabangma in vawt vun.

¹⁸Na sila khat na suataksak ciang na thin nasak heak in, a tatak in ci leang a kicial naseam khat ii thaman lang taw ama in kum luk sung na hong sepsak



zo hi. Hi bangin vawt in, tua hile, Topa na Pathian in na nasepna theampo ah thupha hong pia tu hi.

Khui le Tuu Tacilte

¹⁹“Topa na Pathian atu in na khui le na tuu sung pan a tal a suakciilte theampo tuam koi vun. Hi khuite khat zongh naseam in zangh heak vun a, tuute khat zongh a mul meet heak vun.

²⁰Kumsim in Topa mai ama biakna munah nangma le na innkuanpuite in tuate ne tu nu hi.

²¹Ahizong tua ngannote siatna khat pawpo nei in a peangbai, a mittaw, mealhemna a nasia khat pawpo a nei le tuateTopa na Pathian tungah biakpiakna in zangh ngawl tu nu hi.

²²Tuabang ngannote na inn ah na ne tu uh hi. Note theampo biakna taw kisai in na thiangtho uh zong na nin uh zongin sazuksa le sanangsa na neak uh bangin tuate na ne tu uh hi.

²³Ahizong a chi ne heak vun a, tui sun bangin lei ah sung zaw vun.

Thuhil kikna 16

Paisan Poai (Pusuana 12.1-20)

¹“Topa na Pathian upatna in Abib tha sungah Paisan Poai vawt vun, banghangziam cile tua tha sung zan khatin ama in Egypt pan note hong suatak hi.

²Biakna munah pai vun a, tua munah Topa na Pathian upat natu in Paisan poai an tu in na tuu ahibuale na keal khat ngo vun.

³Hi an na neak uhciang tol kisaw anluum ne heak vun. Egypt pan hi bingbungin, na pusua uh lai na neak uh bangin ni sali sung tol saw ngawl anluum na ne tu uh hi. Thuakna mun ahi Igypt ngam pan na pusua ni uh sia na nuntak tawntung sung teng na phawk thei natu in anluum ne vun — Tuasia in thuakna anluum kici tu hi. Tua hi le haksatna mun Egypt pan na pusua ni uh sia na khan tawntung phawk tu nu hi.



⁴Na ngam sungah kuama in a inn ah ni sali sung tol koi ngawl tu hi. Ni masa bel ni, nitak a na ngaw uh nganno sia ii sa tua ni zanin kine tu hi.

⁵⁻⁶“Paisan Poai sangaw ngannote sia Topa na Pathian ii hong piak tu ngamsung mun khat po ah ngo ngawlin, biakna mun khat bek ah ngo vun. Egypt pan na pusua hun, nitum hunin ngo vun.

⁷A sa huanin biakna munah ne vun a, a zingsang ciang na inn tek ah cia vun.

⁸Niluk sung tol saw ngawl anluum na ne tu uh a, tuaciang ni sali ni in Topa na Pathian bia tu in kikhawm vun a, tua ni in naseam heak vun.

Anlaak Poai

(Pusuana 34.22; Thiampite 23.15-21)

⁹“Anlaak na kipat ni a kipan nipi sali sim vun a,

¹⁰Topa na Pathian upat natu in ama hong piak thupha taw kizui in thin zawna bang piakna paipui in anlaak poai vawt vun.

¹¹Topa mai ah na tate, na naseamte le Levite, ngamdang mihingte, tangate le note taw a teang khawm meingongte taw lungdam khawm vun. Biakna mun khatah lungdam takin biakna vawt vun.

¹²Egypt ah na saltannate uh mangil heak vun a, hi thupiakte pha takin zui vun.

Buk Poai

(Thiampite 23.33-43)

¹³“Antang na cil siat zawkciang le sapit na ngoai siat zawkciang ni sali sung Buk Poai khaam vun.

¹⁴Na khua sungah a teang na tate, na naseamte, Levite, ngamdang mihingte, tangate le meingongte taw lungdam in poai vawt khawm vun.

¹⁵Biakna mun khatah ni sali sung hi poai vawtin, Topa na Pathian upat vun. Topa in na lo an le na nasepna ah thupha hong piak hu in lungdam vun.

¹⁶“Na minam sung pan pa theampo in kum khat sung thumvei biakna mun ah Topa bia tu in pai tu hi, tuate sia Paisan Poai, Anlaak Poai, le Buk Poai te ahi hi.



¹⁷Topa na Pathian ii hong piak thupha taw kizui in, amate kitun zaza in misim in letsong khat tek keng tu hi.

A maan in Thukhenna

¹⁸“Topa na Pathian ii hong piak khua sim ah thukhente le ulian dangte khuasim in koi vun. Hi mihingte in ngup tuam nei ngawlin mipite thukhen tu hi.

¹⁹Amate in a thukhenna ah thumaan ngawl ahibuale ngup tuam nei ngawl tu hi. Amate in sumnguk la ngawl tu hi. banghangziam cile sumnguk in mipil le thumaante ii mit ngangawn tawsak thei a, a maan ngawlin thu khensat thei hi.

²⁰Topana Pathian ii hong piak tu ngam na lua thei natu le tua lai ah na ten tawntung thei natu in, thutang thumaan tawntung vun.

²¹“Topa na Pathian atu in biaknatau na vawt ciang, a kungah thing taw a kivawt Asherah doai numei lim khat pawpo koi heak vun.

²²Tuaciang milim biak natu in suangkhuam khat pawpo na phut heak vun; Topa in tuate ngaimaw hi.

Thuhil kikna 17

¹“Topa na Pathian sia mealhemna khat pawpo a nei khui ahibuale tuu taw bia heak vun, banghangziam cile Topa in tuabangte ngaimaw hi.

²“Sonteena in na khua sungah pa ahizong numei ahizong,

³Topalangpan in, a thupiakte palsat in, doaithe bia in a na sepna taw ni, tha, aksite bia a, Topa thupiak langpan hi,

⁴ci in thu na za uh le, pha takin kantel vun. Hi bang thusiate Israel te sungah a piang takpi ahile,

⁵tua pa khuapua sangah paipui in suang taw deanglum vun.

⁶Bangbang po ahizong tetti nii ahibuale a tamzaw in ama khial hi ci in tetti a pang le tua pa kithatlum tu a, tetti khat bek a om le ama kithatlum ngawl tu hi.



⁷Tettite in ama suang taw deang masa tu a, tuaciang a taanglai mihingte in deang tu hi. Hi siatnate hi bangin bosak tu nu hi.

⁸“Khuasung thukhente atu in khensat haksa ahi, neisa kituuna, pumpi kiliam suana, mihing kithalupna thute hong om tu hi. Hi bang thute a om ciang Topa na Pathian ii tealsa biakna mun khat ah pai in,

⁹tua thu sia Levi mi thiampite le tua laitak thukhen tu in a kikoi thukhente mai ah puak vun a, amate in khensatsak vun.

¹⁰Amate in khensat tu a, amate hong son bang linlian in seam tu nu hi.

¹¹A thu khensatnate saang vun a, a son bangin zui vun.

¹²Tavuan nei thukhenpa ahibuale thiampipa thu a ni ngawl ngam pawpo sia kithatlum tu hi, tuabangin Israel te sung pan hi bang thusiate bo sak tu nu hi.

¹³Tuaciang hi thu a za theampo lau tu uh a, kuama in tuabangin ngamta ngam nawn ngawl tu uh hi.

Kumpi khat ii Zui tu Thute

¹⁴“Topa na Pathian ii hong piak tu ngam lua in, na ten zawk uhciang na kiim na paam a om minamte theampo bangma in kumpi nei tu na khensat tu uh hi.

¹⁵Kumpi tu in na tealpa sia Topa ii a tealsa mi hi hamtang tu hi. Ama sia na mipui khat hi tu a; ngamdang mihing khat, na kumpi in koi heak vun.

¹⁶Kumpipa in ama ngalkapte atu in siphu tam mama nei ngawl tu a, siphu lei tu in Egypt ah mite sawl ngawl tu hi, banghangziam cile Topa in a mihingte Egypt ah heak kik ngei nawn ngawl tu hi, ci hi.

¹⁷Kumpipa in zi tam nei ngawl tu hi, banghangziam cile zi tam a nei le tuate in ama Topa kung pan lampialsak tu hi; tuaciang ama in kham le ngun taw hau nuam heak hen.

¹⁸Kumpi a sua ciang ama in Levi mi thiampite ii pha takin at in a kep Pathian thukhamte le kihilnate a ki at laibu ciil khat nei tu hi.



¹⁹Tua laibu sungah thupiak theampote thumaan takin a zui natu leTopa zatakna zia a heak thei natu in, ama in tua laibu a kungah koi in a khan tawntung sim tu hi.

²⁰Tuabang a vawt ahile ka Israel mipuite sangin phazaw khi hi ci in ngaisun ngawlin Topa thupiakna pan lampial ngawl tu hi. Tuaciang ama le a suan a paalte in Israel ngam, khang tam mama uk tu uh hi.

Thuhil kikna 18

Thiampite ii Tel

¹“Israel ngam sungah thiampi nam ahi Levite in leitangh tel khat zongh nga ngawl tu hi. Tuasia taangin amate in Topa tungah a kipia sumpite le a dang biakpiaknate taw nungta tu uh hi.

²Minam dangte bangin amate in leitangh nei ngawl tu hi. Topa kamciam sa bangin amate tel sia Topa ii thiampi nasep ahi hi.

³“Khui ahibuale tuu taw biakpiakna a kivawt simin thiampite tungah a liang, a kha le a ngilpi kipia tu hi.

⁴Thiampite in a masa bel a kila antang, zu, olive thau le tuumulte nga tu hi.

⁵Topa in na minam theampo sung pan Levi minamte sia ama thiampi a seam tawntung tu in teal hi.

⁶“Levite a pai nuam pawpo Israel ngam khuapi khat pawpo pan biakna mun khat ah pai tu a,

⁷tualai ah na a seam Levi dangte bangma in, Topa a Pathian ii thiampi na seam tu hi.

⁸Ama in thiampi dangte ii nga za an nga tu a, tuaciang a innkuanpuite ii a thaak pawpo keam thei tu hi.

Doai biate ii Biaknate Kidopna

⁹“Topa na Pathian ii hong piak tu ngamsung na thet uhciang, tualai ah a teang minamte ii a kiihuai ngamtatnate zui heak vun.



¹⁰Biaktaung tung mei sungah na tate biakpiakna in pia heak vun. Na mite in aisaan, dei ai, bum

¹¹le phuisam zanghsak heak vun a, mithisa ii thaate thu donghsak heak vun.

¹²Hi bangin a kiihuai na a zanghteTopa na Pathian in huatsa a, tua hu in mailam na manaw uh ciang tua ngam sung pan tuabang minamte ama in hawlkeak hi.

¹³Topatungah thumaan tatak vun,” ci hi.

Kamsang khat Paisak natu Kamciam

¹⁴Tuaciang Moses in, “Na lua natu ngamah mite in aisaan thiamte le dei ai toaite thu ngai in a nungzui uh a, ahizong Topa na Pathian in tuabangte na vawt tu uh oai ngawl hi.

¹⁵Tuate taangin ama in kei taw kibang kamsang khat na mite sung pan no hong puak tu a, ama thu na ni tu uh hi.

¹⁶“Sinai Mual ah note na kikhop ni in, Topa paupuina aw na zaak kik ngawl natu ahibuale ama ompuina meikuang na mu nawn ngawl natu in ngen nu hi. banghangziam cile na thi tu uh na lau uh hang ahi hi.

¹⁷Tuaciang Topa in kei tungah, ‘Amate ngetna maan hi.

¹⁸Amate sung pan nang taw a kibang kamsang khat amate ka puak tu hi; a son tu thute ka son tu a, ka thupiak theampo mipite tungah ama in son tu hi.

¹⁹Ama in ka min taw thuson tu a, ama thu a nial peuma daan ka pia tu hi.

²⁰Ahizong kamsang khat pawpo in ka sawl ngawl thu khat ka min taw in a son ngam le, ama thi tu a pathian dang min suangin a son kamsang khat pawpo zongh thi tu hi,’ hong ci hi.

²¹“Kamsang pa ii thuson sia Topa tung pan hong pai ahile ahi ngawl na lungman hun uh om tu hi.

²²Kamsang khat in Topa min taw thuson a, tua thu hong tangtung bua ahile tua kammal Topakammal hi ngawl hi. Tua kamsang pa sia ama uk thu in thuson hi a, ama kiitak tu hi ngawl hi.

Thuhil kikna 19

Buhna Khuapite

(Ngamsung vakna 35.9-28; Joshua 20.1-9)

¹“Topa na Pathian ii hong piak tu ngam sungah a teang mihingteTopa na Pathian in a mot siat zawk, a khuapite le a innte la in, tua munah na ten zawk uhciang,

²⁻³tua ngam sia khen thum a khenin, a khen sim in ol takin a kihaw thei khuapi khat tek nei tu hi. Tuasia hun ciang mihing khat in khat po a thalup ciang, a buh natu in tua khuapite khat pawpo zuan thei tu hi.

⁴Mihing khat in a ngal ahi ngawl khat a thatlum tha ahile, tua khuapite khat pawpo zuanin suakta tu hi.

⁵Sonteena in, mihing nii dui sungah thingtom tu in kuan a, khat pa in thing a sik laitak a heitang zukin a lawmpa kha tha in a thi le ama sia tua khuapi thumte khat sungah tai in suakta tu hi.

⁶Buhna khuapi khat bek om thong hile mihing pawlkhatte atu in khuala mama tu a, a mealheak phu la nuamte in khutkhial tha pa manin a thin uuk kawmin maw nei ngawl mihing khat thatlum tu hi. Tua hi a, ama in a ngal pa ahi ngawl mihing khat thatlum tha ahi hi.

⁷Tua ahikom bukna khuapi thum koi tu in thu kong pia hi.

⁸“Topa na Pathian uh in na taangpupite tung a sonsa bangin na ngam uh keak vaial in, ama kamciamsa ngam theampo no hong piak ciang,

⁹note in khuapi thum na teal thua tu uh hi. (Tuni in kong thupiak theampo vawt vun. Topa na Pathian uh it in, hong hil bangin na nungta uh le ama in hi ngam note hong pia tu hi.)

¹⁰Kong ci bangin seam leute, Topa ii hong piak tu ngam sungah a maw ngawlte in thina thuak ngawl tu a, mawsiatna thuak ngawl tu hi.

¹¹“Ahizong sonteena in, mihing khat in a ngal pa thatlum lui in tua zawkciang buu tu in khuapi thumte khat zuan hi.



¹²Tuabang thu ciangin tua khua lampuite in tua pa man tu a, tua pa a kithalup thei natu in, a thi pa mealheakte tungah a phulam tu in aap tu hi.

¹³Ama hesuak heak vun. Israelte sung pan mihing that pa bosak vun, tua hile na maa uh vang tu hi.

Taanglai Lo ngite

¹⁴Topa na Pathian ii hong piak tu ngam sungah na innpaamte taw neisa khenna ahi nidang lai pekin a kiphut sa huan ngi, lo ngite khin heak vun.

Tetti taw Kisai

¹⁵“Thu a nei khat mawsak natu in tetti khat bek taw suak thei ngawl a, a tawmbel in tetti nii kisamh hi.

¹⁶Mihing khat in midang khat a siatsak nopna hangin thumaan ngawl taw a mawsak le,

¹⁷a nii in biakna munah pai tu a, tavuan nei thiampite le thukhente in a thu khensak tu hi.

¹⁸Thukhente in tua thu pha tak kantel tu a, thumaan ngawl taw mawsak hi ci in telthiang ahile,

¹⁹a kimawsiat pa ii daan a thuak tu za ama in thuak tu hi. Tuabangin thumaan ngawl kimawsiatna bosak tu nu hi.

²⁰Tuaciang akuama po in tua thupiang za tu a, lau in, kuama in tuabang a sia vawt kik nawn ngawl tu hi.

²¹Hi bang thute ah hesuak heak vun a, daan piakna tu taw kisai in nuntakna khat luangin nuntakna khat, mittang khat luangin mittang khat, hatang khat luangin hatang khat, khut khat luangin khut khat, peang khat luangin peang khat hi tu hi.

Thuhil kikna 20

Ngal taw Kisai

¹Na ngalte uh sim tu in na kuan uhciang, a ngal leangte, a siphute le a ngalkapte note sang a tam zaw in na mu uhciang amate kiita heak vun. Egypt pan hong suatak Topa na Pathian sia note taw hong omkhawm tu hi.



- ²Ngal sim tu na kipat uh ma in, thiampi khat mai sangah hong pai in, ngalkapte tungah,
- ³'Israel mihingte awng ngai vun! Tuni in ngal na sim tu uh hi. Na ngalte kiita heak vun a, lau in liing heak vun.
- ⁴Topa na Pathian in note hong tonpui tu a, zawna hong pia tu hi,' ci tu hi.
- ⁵"Tuaciang ngalkap bute in ngalkapte tungah, ' Hi sungah inn thak asak zawk bek hi a, aapna a vawt ngawllai khat pawpo a om ziam? A om le a inn ah cia kik taken. Cia kik ngawlin ngal sungah ama a kithat le a inn mihing dang khat pawpo in aapna vawt tu hi.
- ⁶Hi sungah sapit huan thak a vawt zawk bek hi a, ahizong sapit nga a lo ngawllai khat pawpo a om ziam? A om le a inn ah cia kik taken. Cia kik ngawlin ngal sungah ama a kithat le mihing dang khat pawpo in tua sapit huan taw nuamsa tu hi.
- ⁷Hi sungah zi nei tu in mo dongh sa khat pawpo a om ziam? A om le a inn ah cia kik taken. Cia kik ngawlin ngal sungah ama a kithatlum le midang khat pawpo in a dok sa numei sia tenpui tu hi,' ci tu hi.
- ⁸"Tuaciang ngalkap bute in ngalkapte tungah, 'Hi sungah patau in a lauthauh khat pawpo a om ziam? A om le, a inn ah cia kik taken. A cia kik buale ama in a lawmte thin lalsak tu hi,' ci lai tu hi.
- ⁹Ngalkap bute in ngalkapte tungah a thuson a man zawkciang ngalkapte atu in lampuite kiteal tu hi.
- ¹⁰"Khua khat sim tu in a pai uhciang a masa phit belin tua khua mihingte hong tum thei natu in vaihawm vun.
- ¹¹Amate in kongpi hong honin hong ki aap ahile, a vekpi in na sal suak tu a, na na hong sepsak tu hi.
- ¹²Ahizong tua khua mite hong ki aap nuam ngawlin kido tu a teal zaw le tua khua na ngalkapte taw uumci vun.



¹³Topana Pathian in tua khuapi zawna hong piak ciang pa a a minpiang thatlum siat vun.

¹⁴Ahizong note atu in numeite, patangte, ngannote, le khuasung a om na theampo la thei tu nu hi. Na ngalte neisa theampo zangh thei tu nu hi. Topa in note tungah hong pia zo hi.

¹⁵Note ten natu khua pan a khualana khuapite tu a bangin vawt tu nu hi.

¹⁶“Ahizong Topa na Pathian ii hong piak ngam sungah a om khuapite na laak uh ciang, khuasung mihing theampo thatlum siat vun.

¹⁷Topa ii hong thupiakna bangin Hitte, Amorte, Canaante, Perizte, Hivte le Jebuste theampo mon vun.

¹⁸A milim pathian a biak ciang a kiihuai nate a sep pui tu in hong hil a, Topa tungah hong khialsak ngawl natu in amate thatlum siat vun.

¹⁹“Khuapi khat na laak nop uh ciang hun tam mama sung na kiim uum ta uh zong a thingnga kungte phuktan heak vun. Thingnga ne vun a, a kungte mon heak vun, a kungte sia na ngalte uh hi ngawl hi.

²⁰Thingkung dangte na phuk thei tu uh a, khuapi a kilaak mateng in kulh uumna in zangh thei tu nu hi.

Thuhil kikna 21

A Kihe ngawl Kitha nate taw Kisai

¹“Sonteena in, Topa na Pathian ii hong piak natu ngam duisung khat ah mihing khat kithatlum a, a that sia he ngawl nu hi.

²Na lampuite le thukhente pai in mithi luang a kimu na mun le a kiim a om khuate tek taw a kikhualatna tee tu hi.

³Tuaciang mithi luang a kimu na pan a naibel khua lampuite in na a kiseamsak ngei ngawl lai khuila khat teal tu hi.

⁴Amate in tua khui sia a kang ngeingawl luihui mun khat le a kitho ngeingawl, an a kiciing ngeingawl na mun ah paipui tu a tua mun ah a ngawng thiaktan tu uh hi.



⁵Levi suan thiampite zongh tua munah pai tu hi, banghangziam cile kihauna thu taw kisai theampo amate in thukhen tu uh hi. Topa na Pathian in ama naseam tu le ama min taw thupha pia tu in amate teal zo hi.

⁶Tuaciang mithi luang a kimu na taw a kinaibel khua lampuite theampo in khuila tungah a khut sil tu uh a,

⁷tuaciang, 'Hisia pa ka that bua uh a, a that sia ka he bua uh hi.

⁸Topa awng, Egypt pan na suatak Israel na mihingte maisak in. Mawnei ngawl mihing khat a kithalupna hangin mawna hong thuak sak heak in a, hong maisak tan,' ci tu uh hi.

⁹Tua hi a, Topa sawl bangin vawt na hi uhkom mithi pa taw kisai in mawna na thuak buatu uh hi.

Ngalmat Numeite taw Kisai

¹⁰“Topa na Pathian in ngal zawna hong pia in ngal na mat uhciang,

¹¹amate sungah dik nasak le na tenpui nop numei mealpha khat mu tu ni hi.

¹²Tua nu na inn ah siapui in a, ama in na inn ah a sam meetin a khutcinte tan tu a,

¹³a puante laih tu hi. Tua nu na inn ah om tu a, a nu le a pa ngai in tha khat sung hee in a kaikut zawkciang tenpui tu ni hi.

¹⁴Hun khat ciang tua nu na dei nawn bua ahile ama suaktasak tu ni hi. Zawthawk thu taw ama ompui zo na hi ciang sal bangin na vawt thei buatu a, na zuak thei buatu hi.

Tapaciil ii Innuana taw Kisai

¹⁵“Sontena in pa khat in zi nii nei a, a zite in tapa veve neipui hi, ahizong a tapa masa sia dik asak zawk a zi taw a ta hi ngawl hi.

¹⁶Tua pa in a tate tungah a neisate hawmsak tu a khensat ciang hamphat tuam nei heak hen. A tapaciil ii nga tu tel sia tapaciil a hi ngawl ama diksak zawk a zi taw a nei tapa tungah pia heak hen.



¹⁷Ama ii diksak zawk a zi ii tapa hi ngawl ahihang a tapaciil tungah ama in ama neisa sung pan tel a see nii in pia tu hi. banghangziam cile a tapaciil ahi hu in tapaciil ii tel sia ama aa ahi hi.

Thuni ngawl Tapa khat taw Kisai

¹⁸“Sontena in mihing khat in a thinpui ngual langpang vilvel a daan a piak hang a nu a pa thu a ni ngawl tapa khat nei hi.

¹⁹A nu le a pa in a tapa sia a teenna khua lampuite mai ah thusit thuaksak tu in paipui tu hi.

²⁰A nu le a pa in lampuite tungah, ‘Ka ta uh sia thinpui in hong langpan a, ka thu uh hong ni ngawl hi. Ama in dangka pakvawt in zu ne hi,’ ci in son tu hi.

²¹Tuaciang khuasung mihingte in tua pa suang taw deanglum tu a, tuabangin hi bang siatnate bosak tu hi. Israel ngam sungah mihingte theampo in tua thupiang za in lau tu uh hi.

Thukham Tatuamte

²²Ama mawna hangin mihing khat kithat in a luang sia khuam tungah kikhai le,

²³tua a luang sia zankhua in khai heak vun. Tua a luang sia tua ni in kiphum tu hi, banghangziam cile khuam tungah a kikhai mithi luang in tua leitangh tungah Pathian haamsiatna tungsak hi. Topa na Pathian ii hong piak leitangh na nitsak ngawl natu in a luang phum vun.

Thuhil kikna 22

¹“Israel na mipui khat ii khui ahibuale tuu, suakta in a tai na mu le enthong heak in a, a nei pa kungah paipui kik in.

²Ahizong a neipa a teenna khuala a, ahibuale a neipa na he bua ahile na inn ah siapui in. A neipa in a zon ciang pia in.

³A laa, a puan ahibuale Israel na mipuite ii bosua na khat pawpo na mu uh le tuabangma in vawt vun.



4“Israel na mipui khat ii laa ahibuale a khui a puk le enthong heak in a, phongto kik in.

5“Numeite in pate puan silh ngawl tu a, pate in numeite puan silh ngawl tu hi. Topa na Pathian in tuabang a silhte ngaimaw hi.

6“Thingkung tung ahibuale lei ah vacim bu khat a pui in a tuite op in, ahibuale a note uapin a om na mu le a pui la heak in.

7Vacim note la in a pui tha tu ni hi, tua hile na khansau in, na nuntak nuam tu hi.

8“Innthak nasak uhciang na innkhum kiimkot ah taangban zawl thung hamtang vun. Tua hile mihing khat taakin a thi hial zong mawsiat thuak ngawl tu nu hi.

9“Lo khat sungah sapit le thaici dang khat po ciingkhawm heak vun. Na ciingkhawm uh ahile sapit ahizong, andang ahizong ne ngawl tu nu hi.

10“Khuita khat le laa khat lotho khawmsak heak vun.

11“Samul le puankaang neal a kitak khawm puansilh heak vun.

12“Na puan kingh li ah puanteap khui vun.

Numei le pa Omkhopna taw kisai Thukhamte

13“Sonteena in mihing khat in numei khat tenpui a, hun khat ciang dei nawn ngawl hi.

14Tua hi a, a maw natu zongin a kiten lai in ngaknu thiangtho hi ngawl hi, ci in mawsiat hi.

15“Hi bang thu a piang le tua nu ii nu le pa in ngaknu thiangtho a hina a heaksak natu in, a kiten ni zan a, a delpha chi baang puan sia paipui in thukhen zum ah khuasung upate tungah lak tu hi.

16Tua numei ii pa in amate tungah, ‘Ka tanu sia hisia pa taw ka teangsak a, ahizong tu in hisia pa in dei nawn ngawl hi.



¹⁷Ama in ka tanu ii mawna tu zong a, a kiten lai in ngaknu thiangtho hi ngawl hi, ci hi. Ahizong ka tanu sia ngaknu thiangtho a hina lakna hi sungah om hi. A kiten lai a delpha chibaang puan sia en vun!’ ci tu hi.

¹⁸Tuaciang khuasung upate in a pasal samin saat tu hi.

¹⁹Upate in nguntang zakhat zongh liausak tu a, tua sumte numei ii pa tungah pia tu hi, banghangziam cile tua pa in Israel numei khat mindaisak ahi hi. Tua bek dom ngawlin tua nu sia ama zi ma hi suak tu a, ama nuntak laiteng khul thei ngawl tu hi.

²⁰Ahizong a mawsakna thu maanin, ngaknu thiangtho a hina thu a lak thei buale,

²¹upate in a pa inn kongbiang ah ama paipui tu a, tua khua pasalte in tua nu suang taw deanglum tu hi. A pasal nei ma in a pa inn ah a omlai in numei le pa khialna vawtna taw a mipuite sungah a maizumhuai na seam zo hi. Hi bangin hi bang siatnate bosak tu nu hi.

²²“Mihing khat sia midang khat ii zi taw a khial laitak a kiman le, amate ngeal kithatlum tu hi. Hi bangin siatnate bosak tu nu hi.

²³“Sonteena in khua sungah mihing khat sia a kidongh sa numei khat a khialpui laitak kiman hi.

²⁴Amate ngeal khuapua sangah paipui in deanglum tu nu hi. Tua nu sia khua sungah a om midangte zaak thei tu in hu ngenin au thei tu hi napi a au ngawl hu in thi tu hi. Tua pa sia a kidongh sa numei taw a khial hu in a thi kul hi. Hi bangin, hi siatnate bosak tu nu hi.

²⁵“Sonteena in, mihing khat in a kidongh sa numei khat dui sungah buan hi, tuabang ciang tua pa bek kithatlum tu a,

²⁶tua numei sia bangma kilaw ngawl tu hi, banghangziam cile thi thei natu mawna vawt ngawl hi. Hi thu sia mihing khat in midang khat simin a thatlum thu taw kibang hi.



²⁷Tua pa in a kidongh sa numei khat dui sungah buanin, tua nu in ngalko in au napi a hun tu kuama om ngawl hi.

²⁸“Sontena in mihing khat in a kidongh ngawllai numei khat buanin a khialpui laitakin kiman hi.

²⁹Tua pa in tua numei ii pa tungah mo manh in nguntang sawmnga pia tu a, tua nu sia ama zi suak tu hi, banghangziam cile tua pa in zawthawk thu taw a khialpui hang ahi hi. Tua pa in ama nuntak sungteng tua nu khul thei ngei ngawl tu hi.

³⁰“Kuama in a pa ii zite khat pawpo taw khialin a pa maizum sak heak hen.

Thuhil kikna 23

Topa ii Mihing pan A Kipuavawkte

¹“Cil kingetsate ahibuale zang kitansate peuma Topa ii mihingte sungah kihel ngawl tu hi.

²“Lamlakta ahibuale tuabang mihingte ii a suan a paal khat pawpo a khang sawmna dong keak ahizong kuama peuma Topa ii mihingte sungah kihel ngawl tu hi.

³“Ammonte ahibuale Moabte ahibuale amate ii suan le paalte khat pawpo a khang sawmna dong keak ahizong Topa ii mihingte sungah kihel ngawl tu hi.

⁴Amate in Egypt pan nong pusua uh lai in lampi ah an le tui hong pia nuam ngawl a, note hong haamsiat tu in Mesopotamia ngam Pethor khuapi pan Beor tapa Balaam cial uh hi.

⁵Ahizong Topa na Pathian in Balaam thu ngai ngawlin, note hong it hu in a haamsiatna sia thupha suaksak hi.

⁶Minam khat na hi uh laiteng, hi minamte hu tu ahibuale a khanto thei natu peuma seam ngei heak vun.

⁷“Edomte zawngsak heak vun, na bete uh hi. Tuaciang Egyptte zawngsak heak vun, amate ngamah teang ngei nu hi.

⁸A khang thumna pan kipan a suan a paalte Topa ii mihingte sungah kihel thei tu uh hi.

Ngalkap Ngiaphual Thianthosakna

⁹“Ngalsim hun sung ngiaphual ah na om uh ciang, biakna taw kisai a thiangtho ngawl hong suaksak tu peuma pial vun.

¹⁰Pasal khat zan a mut lanin a bawtui tee in mi nin a suak le, ama ngiaphual pua sangah pusuakin tua lai ah om tu hi.

¹¹A zing ciang nitak sangin ama kibual tu a, nitum ciang ngiaphual sungah tum thei tu hi.

¹²“Ngiaphual pua sangah awnghawna mun khat na nei vun a, na awnghaw nop uhciang tua munah pai vun.

¹³Thingbaak khat kengin leito vun a, na awnghaw zawkciang lei huh kik vun.

¹⁴Na ngiaphual uh biakna taw kisai in thiangthosak vun, banghangziam cile hong keam tu le na ngalte hong zosak tu in Topa na Pathian sia na ngiaphual sungah note taw omkhawm hi. Topa ii hong nungngat natu in a kilawm ngawl na khat zongh vawt heak vun.

Thukham Tatuamte

¹⁵“Sila khat in a Topa kung pan tai in nang hong beal le a Topa kungah puak kik heak in.

¹⁶Ama ukna khua khat pawpo ah teangsak in a, vawtsia heak in.

¹⁷“Israel te pa ahizong numei ahizong biakinn pumpi zuak khat suak thei ngawl tu hi.

¹⁸Tua bek dom ngawlin tuabang a thalaw sum sia kiciamna tangtutna in Topa na Pathian biakinn ah ki paipui thei ngawl tu hi. Topa in biakinn pumpi kizuate ngaimaw hi.

¹⁹“Dangka ahibuale an, ahibuale na khat pawpo Israel na mipuite tungah na pukthaak uhciang a meet la heak vun.



²⁰Ngamdang mite tungah na pukthaak uhciang a meet la vun a, ahizong Israel na mipuite tungah na pukthaak uhciang a meet la heak vun. Hi ngeina zui vun, tua hile na lua natu ngamsung na nasepna theampo uh ahTopa na Pathian in thupha hong pia tu hi.

²¹“Topa na Pathian tungah kiciamna na vawt uh ciang na kamciam uh bangin tangtungsak vun. Topa in na kam ciamna len tu a, na tangtungsak bua uh le khialna ahi hi.

²²Topa tungah kamciam vawt ngawl sia khialna hi ngawl hi.

²³Ahizong thin zawna taw kamciamna na vawt le tangtung sak nanak vun.

²⁴“Midang khat ii sapit huan sungah lampi na tot ciang, sapit nga na du zaza na ne thei tu a, ahizong bung sungah heangin bangma ciapui ngawl tu nu hi.

²⁵Midang khat ii lo sungah lampi na tot ciang na khut taw anhuite sik in ne thei tu nu hi, ahizong phiau taw anhuite khat zongh attan heak vun.

Thuhil kikna 24

Kikhulna le Kiten kikna

¹“Sonteena in pa khat in numei khat tenpui a, hun khat ciang dei nawn ngawl hi, banghangziam cile tua numei tungah ama in dik asak ngawl thu pawlkhat mu hi. Tuaciang ama in kikhulna lai at in, tua nu tungah pia in a inn pan ciasak hi.

²Tuaciang sontheena in tua nu in pasal dang khat tenpui kik hi.

³Tua pa in zongh dei ngawlin kikhulna lai at in tua nu tungah pia in, a inn pan ciasak hi. Ahibuale, sontheena in a pasal niina thi hi.

⁴Bang thu po ahizong a pasal masa in tua nu tenpui kik ngawl tu hi, ama atu in tua nu sia mi nin ahi hi. Ama in a tenpui kik ahile Topa mai ah kiihuai hi. Topa na Pathian ii hong piak natu ngamah hi bang a cizathuai khialnate vawt ngawl tu nu hi.

Thukham Tatuamte



⁵“Zi nei tuung khat sia ngalkap kitumsak ngawl tu a, ahibuale taangpi nasep khat pawpo zongh kiseamsak ngawl tu hi. A inn ah om in, a zi a lungdamsak thei natu in ama sia kum khat sung na kiseamsak ngawl tu hi.

⁶“Mihing khat tungah na khat pawpo na zot ciang, khapna in, a zak laizang, an ngoaina suangte na laaksak buatu hi. Tua in amate innkuan ii nuntakna ahi hi.

⁷“Israel a mipui khat ngu a, sal in a khoai pawpo ahibuale sal in a zuak pawpo kithatlum tu hi. Tuabangin hi siatnate na bosak tu uh hi.

⁸“A lauhuai mama vun natna na vei uhciang, Levi thiampite ii hong son bang linlian in vawt vun. Amate tungah ka thupiakte zui vun.

⁹Egypt pan nong pai lai un, Topa na Pathian ii Miriam tungah a vawtnate phawk vun.

¹⁰“Ngual tungah na khat na zot ciang khapna in hong piak tu puante a inn sungah tumin la heak vun.

¹¹A puasang pan ngak vun a, ama in piasak vun.

¹²Ama sia mizawng khat ahile, tua vanhte zan taamsak ngawlin,

¹³a mut thei natu in nitak simin ama pia kik vun. Tua hile ama lungkim tu a, Topa na Pathian sia na tungah lungdam tu hi.

¹⁴“Israel na mipuite khat ahizong ahibuale na khuapite khat sungah a teang ngamdangte khat ahizong, a zawng le a cimaw na cial uh naseamte, theam heak vun.

¹⁵Nisim in a nitha nitum ma in pia vun. Ama in sum kisamh a, nga nanak tu in kimuangmaw nginge hi. Na pia bua uh ahile ama in Topa tungah hong khia tu a, noma khialna vawt na hil tu uh hi.

¹⁶“A tate mawna hangin a nu le a pa kithatlum ngawl tu a, a nu le a pa mawna hangin a tate ki thatlum ngawl tu hi. Mihing khat sia ama khialna hang bekin kithatlum tu hi.



¹⁷“Ngamdang mite le tangate ii a nga tu telte khaktan heak vun a, meingong nu ii puan sia leibat khapna in la heak vun.

¹⁸Egypt ngamah sal na hina uhle Topa na Pathian ii hong suatakna thu phawk vun. Tua hu in hi thu kong pia hi.

¹⁹“Lo ante la in na laak makngil uh a om ciang pai in tawm kik heak vun. Topa na Pathian in na nasepna po ah, thupha hong piak natu in, tuate ngamdang mihingte, tangate, le meingongte atu in kinusia tu hi.

²⁰Olive kungte khatvei na law zawk uh ciang a taanglaite pai in lo kik heak vun. Tuate ngamdang mihingte, tangate, le meingongte atu ahi hi.

²¹Na sapit ngate khatvei na law zawk uh ciang, sapit huan ah pai kik heak vun. Tua sapit a taanglaite ngamdang mihingte, tangate, le meingongte atu ahi hi.

²²Egypt ngamah sila na hina uh mangil heak vun. Tua hu in hi thu kong pia hi.

Thuhil kikna 25

¹“Sonteena in Israel te nii kihau in zum kithen a, thu a kisit ciang khat sia maw ngawlin a dang khat sia maw hi.

²A maw zaw pa sia ngoaidaan kipia tu in thu a kikhen le, thukhen pa in tua pa lei ah boksakin kisaatsak tu hi. Bang tanvei saat tu cisia ama khialna bang hi tu hi.

³Ama sia sawmli vei dong kisaat thei tu a, ahizong tua sang a tamzaw ngawl tu hi. Tua sang a tamzaw na saat uhle mipite mai ah maizum a pia suak tu nu hi.

⁴“Khuital khat an na cilsak laitakin a muk tuamsak heak vun.

A Thi Suapuipa tungah Sep tu

⁵“Unau nii mun khat ah teangkhawm a, khat sia tapa nei ngawlin a thi le, a zi sia innkuan dangah pasal nei thei ngawl tu a, mithi pa ii suapuipa in ama a tenpui tu sia a tavuan ahi hi.



⁶Mithi pa ii be le ngui Israel minam sungah a bo ngawl natu in amate ii nei a tapaciil sia mithipa ii tapa in kingaisun tu hi.

⁷Ahizong mithi pa ii suapuipa in ama a tenpui nuam bua ahile tua nu sia khuasung upate mai ah pai tu a, ‘Ka pasal suapuipa in a tavuan seam ngawl hi. Ama in Israel mihingte sungah a suapuipa atu in suan le paal pia nuam ngawl hi,’ ci in son tu hi.

⁸Tuaciang khuasung upate in tua pa samin thu sonpui tu hi. Tua pa in a tenpui nuam balai ahile,

⁹a suapuipa zi in khuasung uliante mai ama kungah pai in tua pa ii peangdap lang khat sutin, a maitang cilphii in, ‘A suapuipa atu in suan le paal a pia nuamngawlte tungah hi bangin kivawt hi,’ ci tu hi.

¹⁰Israel sungah tua pa innkuan sia, ‘A peangdap a kisuusak pa ii innkuan,’ kici tu hi.

Thukham Dangte

¹¹“Pasal nii kihau in a khat sia pa ii zi in a pasal hunin, a khat sia pa ii cil le zang a sumcipsak ahile,

¹²tua nu hesuak ngawlin a khut tansak vun.

¹³⁻¹⁴Toaisuangte le piciangte na zaak uhciang theam heak vun.

¹⁵Topa na Pathian ii hong piak natu ngamah na khan a sau thei natu in toaisuangte le piciangte thumaan thutak taw zangh vun.

¹⁶Topa in ngualtheamte ngaimaw hi.

Amalekte Thalup tu in Thupiakna

¹⁷“Egypt ngam pan nong pusua lai un, Amalekte ii hong vawtnate phawk vun.

¹⁸Amate in Pathian kiita ngawl uh ahiciang toi in na tha uh a bo ciang na nungsang uh pan hong simin, nung sangah a baa theampo hong thatlum siat hi.



¹⁹Tua hi a, Topa na Pathian in ngam hong pia in, na kiim ah a teang na ngalte kung pan suatakna hong piak ciang Amalekte theampo thatlum siat vun. Tua hile kuama in amate phawk nawn ngawl tu hi. Mangil heak vun!

Thuhil kikna 26

Anpal taw Biakpiakna

¹Topa na Pathian hong piak ngam lua in na ten zawkciang,

²note khat simin na laak maksak uh na lo anpalte sung pan nam khat tek bawm khat sungah koi in, biakna munah paipui tu nu hi.

³Tua hun laitak a tavuan nei thiampipa kungah pai in, ama tungah, ‘Ka taangpupite tungah piak tu in a kamciamsa ngamah ka tum zo hi, ci in heaksakna in Topa ka Pathian tungah hite kong pia hi,’ ci vun.

⁴“Thiampipa in nangma tung pan tua bawm hong saang tu a, Topana Pathian biaknatau mai ah koi tu hi.

⁵Tuaciang Topa mai ah hi kammalte; ‘Ka taangpupi sia a vak kawkoai inn nei ngawl Aram mi hi a, a innkuanpuite Egypt ngamah teang tu in a paipui pa hi. Amate tualai ah a pai lai in mihing tawmbek hi a, ahizong amate tam pha in a thahat minam suak hi.

⁶Egyptte in kote hong vawtsia in zawthawk thu taw sal nasep hong seam sak uh hi.

⁷Tuaciang ka taangpupite Pathian, Topa tungah huna ngenin ka au uh hi. Ama in hong za a, kote thuakna ka haksatna le ka buaina uh te hong mu hi.

⁸Ama in a vaangletna le a thahatna taw Egypt ngam pan hong suatak hi. Ama in a lamdang le nalamdangte vawtin a kiitak huai nate piangsak hi.

⁹Ama in hi munah hong paipui a, khuinoai le khuaitui a luanna hi ngampha le ngamnuam hong pia hi.

¹⁰Tua ahiciang tu in ama hong piaksa anpalte Topa kungah kong paipui hi,’ na ci tu hi. “Tuaciang Topa mai ah na bawm nga suk in a, tua lai ah Topa bia in.



¹¹Topa na Pathian in nang le na innkuanpuite hong piak na phate hangin lungdam vun. Levite le note sungah hong teang ngamdang mihingte taw lungdam khawm vun.

¹²“Kum thum simin na lo ante sawm a khat sumpite sia Levite, ngamdang mihingte, tangate le meingongte tungah pia vun. Tua hile mipite in amate neak tu a kisap za tek nei tu uh hi. Tuabang na vawt zawk uh ciang,

¹³Topa tungah, ‘A thiangtho sawm a khat sumpite ka inn ah bangma om nawn ngawl hi. Nong thupiak bangin Levite, ngamdang mihingte, tangate le meingongte tungah ka pia zo hi. Sawm a khat sumpi tungtaang ah na thupiakte khat zongh ka nial bua a ka mangil bua hi.

¹⁴Hee in kaikut a ka om ciang zong, sumpi peuma ka ne bua hi, mi thiang ngawl ka hi hun sung zong, tua sumpite ka inn pan ka pusua bua hi. Mithi an siana in tua sumpite ka zangh bua hi. Topa awng na thu hong ni khi hi. Sawm a khat sumpi taw kisai nong thupiak theampo ka vawt siat zo hi.

¹⁵Vantung na omna thiangtho mun pan hong ensuk tan a, Israel na mihingte thupha hong pia tan; ka taangpupite tungah na kamciam bangin nong piaksa ngamnuam le ngampha zongh thupha hong piak sak tan,’ ci vun.

Topa ii Mihingte

¹⁶“Tuni in Topa na Pathian in ama ii thukham theampo zui tu in no tungah thu hong pia hi. Tua ahiciang tuate na thin na lung theampo uh taw thumaan takin zui vun.

¹⁷Tuni in Topa sia note Pathian a hina na saang zo uh hi, a thu ni tu, ama ngeinate theampo zui tu le a thupiak theampo seam tu in kamciam na pia zo uh hi.

¹⁸Ama hong kamciam bangin tuni in Topa in note sia ama mihing in hong saang zo a, ama thukham theampo zui tu in thu hong pia hi.

¹⁹Ama in ama ii piansak minam dang theampo sangin a lianzaw in note hong vawt tu a, note in ama min pokin na upat tu uh hi. Ama kamciam bangin note ama mihing na hi tu uh hi,” ci hi.



Thuhil kikna 27

Suang tungah a Ki at Pathian ii Thukhamte

¹Tuaciang Moses le Israel lampuite in mipite tungah, “Tuni a kong piak kihilna theampo zui vun.

²Jordan Ngun kantan in Topa na Pathian ii hong piakna ngamsung na tum uh ni in, suangtum lian pawlkhat phut in, zakaang taw zut vun a,

³tuat tungah hi thukhamte le hilnate theampo at vun. Na taangpupite Pathian, Topaii hong kamciamna ahi ngamnuam le ngampha sungah na tum uh ciang,

⁴le Jordan Ngun langkhat na thet uh ciang tuni in kong hil bangin Ebal Mual tungah hi suangtumte phut vun a, zakaang taw zut vun.

⁵Tua munah thik taw a kitan ngawl suangtum taw kivawt biaknatau khat ciang vun,

⁶banghangziam cile Topa na Pathian atu in na cian biaknatau peuma a ki attan ngawl suangte taw kivawt tu hi. Tua lai ah meihal biakpiaknate na pia tu uh a,

⁷sangaw biakpiakna pia in kipawlkhop biakpiaknate ne in Topa na Pathian mai ah lungdam vun.

⁸Zakaang taw a kizut suangte tungah Pathian ii thukham kammal theampo kician takin at vun,” ci uh hi.

⁹Tuaciang Moses in Levi thiampite taw Israel mihingte theampo tungah, “Israel mihingte awng thim dide in om in pha tak hong ngai tavun. Tuni in Topa na Pathian ii mi na suak zo uh hi.

¹⁰Tua ahiciang tuni in kong piak ama thukham theampo zui in keamcing tavun,” ci uh hi.

Thu ni ngawlte Haamsiatna

¹¹Tuaciang Moses in Israel mihingte tungah,



¹²“Jordan ngun na kan zawk uh mipite tungah thupha a kipiak ciang a nuai a minamte sia Gerizim Mual tungah ding tu uh hi. Tuате sia Simeon, Levi, Judah, Issachar, Joseph le Benjamin minamte hi.

¹³Mipite a kihaamsiat ciang a nuai a minamte Ebal Mual tungah ding tu uh hi. Tuате sia, Reuben, Gad, Asher, Zebulun, Dan le Naphtali minamte ahi uh hi.

¹⁴Levite in hi kammalte nging takin pau tu hi.

¹⁵“ ‘Suang, thing, le leisung sumpiangte taw milim vawt a, a bia ku pawpo tungah Pathian haamsiatna tung taken; Topa in milim biakna ngaimaw hi.’ “Tuaciang mipi theampo in ‘Amen!’ ci in zo tu uh hi.

¹⁶“ ‘A pa le a nu a zakta ngawl pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

¹⁷“ ‘A innpaamte ngisuang a khiin pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

¹⁸“ ‘Mittaw khat a lamlak khial pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

¹⁹“ ‘Ngamdang mihingte, tangate le meingongte ii hamphatna a khaktan pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

²⁰“ ‘A pa zite khat pawpo khialpuina taw a pa min a daisak pawpo tungah Pathian haamsiatna tung taken.’ “Tuaciang mipi theampo in ‘Amen!’ ci in zo tu uh hi.

²¹“ ‘Nganhing taw numei le pa khialna a vawt pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

²²“ ‘A suapui nu ahibuale a suapui sealnu taw numei le pa khialna a vawt pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.



23“ ‘A sungh nu taw numei le pa khialna a vawt pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

24“ ‘Mihing a that ku pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

25“ ‘Mawnei ngawl mihing khat thatlum tu in sumnguk a saang pawpo tungah Pathian haamsiatna tung taken.’ “Tuaciang mi theampo in, ‘Amen!’ ci in zo tu uh hi.

26“ ‘Pathian thukham theampo le hong hilna theampote a zui ngawl pawpo tungah Pathian haamsiatna tung taken.’ “Tuaciang mipi theampo in, ‘Amen!’ ci in zo tu uh hi.

Thuhil kikna 28

Thu nitna hangin Thuphate
(Thiampite 26.3-13; Thuhil kikna 7.12-24)

1“Tuni a kong piak Topa na Pathian uh ii hong thupiak theampo thumaan takin zui vun, a thu na ni uh le ama in leitung minam dangte sangin a lian zaw in note hong siam tu hi.

2Topa na Pathian thu ni vun, tua hile hi thupha theampo saang tu nu hi.

3“Topa in na khua uhle na ngam uh thupha hong pia tu hi.

4“Topa in ta tam mama, an tam mama, le khui le tuu tam mama taw note thupha hong pia tu hi.

5“Topa in na antang uh le tua sung pan na vawt uh ante thupha hong pia tu hi.

6“Topa in na sep na vawt uh theampo thupha hong pia tu hi.

7“Na ngalte uh in note hong sim ciang Topa in na ngalte uh zo tu hi. Amate in mun khat pan hong sim tu a, ahizong mun theampo ah taikeak tu uh hi.

8“Topa na Pathian in na nasepna uh thupha hong pia tu a, na ansaalte uh antang taw hong dim tu hi. Ama ii hong piak na ngamsung uh ah thupha hong pia tu hi.

⁹Topa na Pathian thuni in ama thupiak theampo na seam uhle, ama kamciamsa bangin ama mihing hong suaksak tu hi.

¹⁰Tuaciang leitung mihingte theampo in note Topa ii a teal ama mihingte na hi uh hunlam hong mu tu uh a, hong kiita tu uh hi.

¹¹“Topa in no tungah hong piak tu ci in na taangpupite tungah a kamciamsa ngam sungah ta tam mama, nganno tam mama, le an tam mama hong pia tu hi.

¹²Ama in vantung vanh kholna inn pan a hun zui in nguatui hong zusak tu a, na na sepna theampo uh thupha hong pia tu hi. Tua hile note in minam tam mama te tungah sum na pukthaak tu uh a, ahizong kuama tung pan sum puk na laak tu a kul buatu hi.

¹³Topana Pathian in minamte sungah lampui hong suaksak tu a, ngual nungzui na hi buatu uh hi. Tuni in kong piak ama thupiak theampo thumaan takin na zui uh le note na nuamsa tawntung tu uh a, na kiamsuk ngei buatu uh hi.

¹⁴Bangbang po ahizong hi thupiakte na nial ngei buatu uh a, a dang milim pathiante bia in a na na seam ngei buatu uh hi.

Thu ni ngawlte Thuak tute

(Thiampite 26.14-46)

¹⁵“Ahizong tuni in kong piak Topa na Pathian ii hong thupiak theampo le thukham theampo thumaan takin zui ngawlin ama thu na ni bua uh le, hi siatna theampo note tungah hong tung tu hi.

¹⁶“Topa in na khuate le na ngam uhte haamsiat tu hi.

¹⁷Topa in na antang uhte le tua sung pan na vawt uh ante haamsiat tu hi.

¹⁸“Topa in ta tawmbek a nei tu, an a zawng tu, le khui le tuu tawmbek a nei tu in note hong haamsiat tu hi.

¹⁹“Topa in na sep na vawt pawpo uh haamsiat tu hi.



²⁰“A sia vawtin Topa na nial uh le, manlang takin na mon uh dong ama in note tungah siatna, kitel khialna, le na sepna pawpo uh ah buainate tungsak tu hi.

²¹Ama in na lua tu uh ngam sungah khat zongh na tan nawn ngawl uh dongin natna khat zawkciang khat hong tungsak tu hi.

²²Topa in a kilaw thei natnate, ciitum le ciisa natnate no tungah hong tungsak tu hi; ama in na lo ante lalsak tu a nguatui kangsakin, vuisa vasak tu hi. Hi bang tuasiatnate na thi dong thuk tu nu hi.

²³Nguazu ngawl tu a, na leitanghte thik bangin sah tu hi.

²⁴Na thi siat uh dong Topa in nguatui taangin leivui vuipi le senneal vuipite zusak tu hi.

²⁵“Topa in na ngalte uh in hong zosak tu hi. Note in munkhat pan na sim tu uh a, ahizong mun theampo ah na tai tu uh hi. Note tungah thupiangte a mu uh ciang leitung mihingte theampo lau mama tu hi.

²⁶Na thi uh ciang vacimte le ngamsate hong pai in hong ne tu uh a, tuate a beng tu kuama om ngawl tu hi.

²⁷Topa in Egyptte tungah a tunsak bangma in ama in note uilut hong veisak tu hi. Ama in na pumpi tungah matum taw lalsak tu hi. Cithak natna vei in thah na sa tu uh a, ahizong dam thei ngawl tu hi.

²⁸Topa in na thin uh hong amhsak tu a, na mit uh taw in hong buaisak tu hi.

²⁹Mittaw bangin sun lai in na zawt tu uh a, na lampi na mu thei buatu uh hi. Na sepna po uh ah na maa uh vang ngawl tu hi. Note hong kinengcip in hong kisuttol tawntung tu a, note hong hu tu kuama om ngawl tu hi.

³⁰Zi tu in ngaknu khat na dongh tu uh a, ahizong midang khat in tenpui tu hi. Inn na sa tu uh a, ahizong a sungah na teang ngei buatu uh hi. Sapit na ciing tu uh a, ahizong a nga na ne ngei buatu uh hi.



³¹Na khuite na mutang in kingo tu a, ahizong a sa bangma na ne buatu uh hi. Na laate na mutang uh in kikai tu a, hong kipia kik nawn ngawl tu hi. Na tuute uh sia na ngalte tungah kipia tu a, hong hu tu kuama om ngawl tu hi.

³²“Na tapate le na tanute noma mutang in ngamdang mihingte tungah salin kipia tu hi. Na tate uh hong cia kik tu en in nisim in na mit zungte na liangin na et uh hang a luithawthong hi tu hi.

³³Haksa takin na ciin uh lo ante ngamdang mihingte in hong sut tu a, bangma nga ngawlin nencipna le zawthawkna bek na thuak tawntung tu uh hi.

³⁴Na thuaknate uh in na thin uh hong amhsak tu hi.

³⁵Topa in na peangte uh a dam thei ngawl, a bot mama meimate taw dimsak tu hi; na lu uh pan na peang uh dong uilut dimsak tu hi.

³⁶Topa in nangma le na kumpipa sia nangma le na taangpupite uh ii a ten ngeingawl na ngamdang ah hong paipui tu uh hi; tua lai ah thing le suang taw a kivawt milim pathiante na na seam tu uh hi.

³⁷Topa ii hong thethaang natu ngam tuatuam ah note tungah thupiangte hangin mihingte in lamdang sa tu uh hi. Amate in note hong nunau in hong ciammui vawt tu uh hi.

³⁸“Thaicii tam mama na ciing tu uh hi, ahizong tawmbek na la tu uh hi, banghangziam cile na lo ante uh sia khaumawte in ne tu hi.

³⁹Sapit kung ciingin na pua tu uh a, ahizong na sapit nga na lo buatu uh a, sapittui na ne buatu tu uh hi, banghangziam cile lungte in sapit nguite ne tu uh hi.

⁴⁰Na ngamsung theampo ah olive kungte na ciing tu uh hi, ahizong tua olive thau peuma na nei buatu uh hi, banghangziam cile a ngate a pul siat hang ahi hi.

⁴¹Tapate le tanute na nei tu uh hi, ahizong in no aa hi ngawl tu hi, banghangziam cile amate in ngal mat thuak tu uh hi.

⁴²Na thingkungte le na ankungte uh theampo lung in netum tu hi.



⁴³“Na ngam sungah a teang ngamdang mihingte in vaang nei vaial tu a, note na hi uhle dadamin na vaang uh kiamsuk tu hi.

⁴⁴Amate in no tungah hong pukthaak tu sum nei tu a, ahihang note in na pukthaak tu sum bangma na nei buatu uh hi. A khakbel ciang amate in note hong uk tu hi.

⁴⁵“Topa na Pathian thu na nit ngawl hang uhle hong piak thukham theampo na zui ngawl hang un, hi tuasiatnate no tung hong tung tu a, note na thi siat uh dong tuasiatnate in hong ompui tu hi.

⁴⁶Hi thute nangma le na suan na paalte tungah a tawntungin Pathian ii thukhenna tetti hi tu hi.

⁴⁷Topa in a nanam in thupha hong pia hi, ahizong lungdam, thinnuam in ama na na seam bua uh hi.

⁴⁸Tua ahikom, Topa ii note kungah hong paisak tu ngalte ii na na seam tu uh hi. Na theampo kisamh in, ngilkial dangtaak le pum nguak in na om tu uh hi. Na thi siat uh dong Topa in zawthawk thu taw hong nengniam tu hi.

⁴⁹Topa in note langpan tu in a kampau na heak ngawl uh minam khat leimong panin hong puak tu hi. Muvanlai bangin amate in note hong man tu hi.

⁵⁰Amate ngoltat tu a, khangmoi, khanghaam a kuama po tungah thuthiamna lak ngawl tu hi.

⁵¹Amate in na ngannote le na lo ante hong neaksak tu a, ngilkial in na thi tu uh hi. Amate in note atu in antang, zu, olive thau, khui ahibuale tuu hong nusiat ngawl tu a, na mongcip tu uh hi.

⁵²Amate in Topa na Pathian ii note hong piak na ngamsung khua theampo sim tu a, na muan na suan ahi luphung saangte cimhtham tu hi.

⁵³“Na ngalte in na khuapite uh hong uumci ciang anneak tu nei ngawlin na cimaw tu uh a, Topa na Pathian ii hong piak na tate ngangawn na ne tu uh hi.

54-55 Nampi suan mihing pha mama te ngangawn zongh ngalte ii hong uumci laitak cimaw mama tu a, neak tu dang om ngawl ahikom a tate pawlkhat ne tu uh hi. Amate in a tate sa sia a suapuipa, a it a zi, a taanglai a tate khat zongh hawm ngawl tu hi.

56-57 A hau lei hu in a peang a a vak ngei ngawl nampi suan numei pha mama te ngangawn zongh in tuabang ma in ngamta tu hi. Ngalte in a khuapi a uumci ciang anneak tu cimaw mama ahikom, a suak tung a nausen le a suaksa a nausente zongh ama in ne ku tu hi. Ama in a it a pasal le a tanote khat zongh hawm ngawl tu hi.

58 “Hi laibu sungah a ki at Pathian ii hong hilnate theampo thumaan takin ni ngawlin, a lauhuai le a lamdang ahi Topa na Pathian ii min na zakta bua uh ahile,

59 ama in na suan na paalte tungah a dam thei ngawl natnate le a kikhaam thei ngeingawl a lauhuai a kilaw thei natnate tungsak tu hi.

60 Egypt ah na thuaksa uh a lauhuai natnate theampo ama in no tungah khatvei hong tungsak kik tu a, na dam kik ngei buatu uh hi.

61 Hi Pathian thukhamte le kihilnate tepteena laibu sungah a kiciamtee ngawl natna nam theampo le a kilaw thei natnate zongh ama in tungsak tu a, note na thi tu uh hi.

62 Van ah aksi za in na tam uh zong, Topa na Pathian thu na nit ngawl uh hu in, tawmcik bek nungta tu nu hi.

63 Note hong laamsaang pa le note tam mama hong phaksakna thu ah Topa a lungkim bangma in, note hong thalup siat natu le lalna hong piak natu thu zongh ah ama lungdam veve tu hi. Na lua tu uh ngam pan note hong kilongkeak tu hi.

64 “Topa in note sia leimong khat pan mong khat dong, minam theampote sungah hong thethaang tu a, tualai ah noma le na taangpupite ii a biak ngeingawl milim pathiante, thing le suang taw a kivawt milim pathiante na na seam tu uh hi.



⁶⁵Mun khat zongh ah thinnopna na mu buatu uh a, noma ngam ci tu in munkhat zongh na nei buatu uh hi. Topa in no sia thinngimna, lam et nei ngawlna, le thinkiamna taw hong khuplup tu hi.

⁶⁶Na nuntakna uh lauhuai tawntung tu hi. Sun le zan in na patau tawntung tu uh a, thi tu lau tawntungin na nungta tu uh hi.

⁶⁷Na khat pawpo na mu uh ciang na thin uh lau tu hi. Zing simin nitak na thangai tu uh a, nitak simin zingsang na thangai tu uh hi.

⁶⁸Tua munah na pai kik ngei nawn buatu uh hi, ama in hong ci kale zong Topa in teambaw taw Egypt ah hong puak kik tu hi. Tua munah na ngalte tungah sal in noma le noma na kizuak tu uh a, ahizong kuama in note hong lei nuam buatu hi,” ci hi.

Thuhil kikna 29

Moab Ngamah Israel taw Topa ii Thuciamna

¹Hi thute Moab ngamah Israel mihingte taw thuciamna vawt tu in, Topa in Moses tungah a sawl thute ahi hi. Hi thuciamna theampo sia Topa ii amate taw Sinai Mual ah a vawt thuciamna belapna ahi hi.

²Moses in Israel mihingte theampo samhsiat in amate tungah, “Topa ii Egypt kumpipa tung, a uliante tung le a ngamsung theampo ah a vawt thute noma ma in mu nu hi.

³A lauhuai natnate, nalamdangte, le Topa ii a vawt a lamdang thulianta mu nu hi.

⁴Ahizong na thuaksa thute tuni dong mama in ama in no hong telsak ngawllai hi.

⁵Kum sawmli tawntung Topa in senneal ngam sungah hong paipui a, ahizong na puante uh le na peangdapte uh lal ngei ngawl hi.

⁶Neak tu in anluum, dawn tu in zu le beer nei ngawl nu hi. ahizong ama sia na Pathian a hina thu hong hil nopna in na kikap bangin Topa in hong pia hi.



⁷Tuaciang hi mun ih thet ciang Heshbon Kumpi Sihon le Bashan Kumpi Og te in ei sim tu in hong pai hi. Ahizong eite in amate ih zo a,

^{8a} ngam la in, Reuben le Gad minamte le Manasseh minam a langte ka kihawmsak hi.

⁹Na sep na vawtna po ah na cialcin thei natu in hi thuciamte theampo thumaan takin zui vun.

¹⁰“Tuni in note theampo, na lampuite le na upate, na pasalte,

¹¹na numeite, na patangte le note atu in thing hong tomsak, tui hong toaisak a, note sungah a teang ngamdang mihingte taw Topa na Pathian mai ah na ding siat uh hi.

¹²⁻¹³Note le na taangpupite ahi, Abraham, Isaac, le Jacob tungah a kamciamsa bangin note sia Topain ama mihing hong sua sak tu le ama note Topa a sua thei natu in tuni in Topa na Pathian ii thuciamna sungah tum vun a, sep tu te saang vun.

¹⁴Hi thuciamna le sep tu te note tung bek ah Topa in a vawt hi ngawl hi.

¹⁵Tuni in ama mai ah a ding eite theampo le a suak ngawllai ih suan ih paalte tungah zongh ama in hi thuciamnate vawt ahi hi.

¹⁶“Note in Egypt ah nuntakzia le minam dangte ngam sungah khualhawzia na phawk uh hi.

¹⁷Thing, suang, ngun le kham taw a kivawt a kiihuai a milimte na mu uh hi.

¹⁸Tuni in hi lai ah a ding, pa, numei, innkuan le minamte, kuama in Topa na Pathian nungngat in minam dangte milim pathiante bia peuma heak vun. Na bia uh le a khaa thingkung le ngu a nei kungte a pianna thingzung taw kibang tu nu hi.

¹⁹Tuni in hi lai ah a ciliaphuai ngetnate za napi in a thinpui man po in keima uuk bang pai leng ka maa vang tu zam a ci om tha peuma heak vun. A ci a om tha le, tua in note theampo a pha zong, a sia zongh a kibangin hong thatlum siat tu hi.



²⁰Topa in tuabang mihingte a mawna maisak ngawl tu hi. Tua luangin Topa thin uukna tua pa tungah mei bangin kuang tu a, Topa in ama a thalup mateng in hi laibu sungah a kiciamtee tuasiatnate theampo ama tungah tung tu hi.

²¹Topa in Israel minam theampo mai ah ama sia sonte ngatna khatin nei tu a, Topa ii kihilna laibu sungah a ki at ahi, thuciamna ah a kiciamtee haamsiatna theampo taw kizui in tuasiatnate ama tungah tungsak tu hi.

²²“Mailam khang tam mama te sungah na suan na paalte le ngam khuala pan ngamdang mihingte in na ngam sungah Topa ii hong puak tuasiatnate le na thuaknate mu tu uh hi.

²³Na ngam sia kol siat tu a, kaan le ci taw kidim tu hi. Bangma kiciing thei ngawl tu a, lopa ngangawn po ngawl tu hi. Na ngam uh sia, a thin uuk lai in Topa ii a lalcipsak Sodom le Gomorrah, Admah le Zeboiim khuapite taw kibang tu hi.

²⁴Tuaciang leitung buppi in, ‘Banghang Topa in amate ngam hi bang vawt ziam, bang thu hangin Topa a thin uuk ziam?’ ci in dongh tu uh hi.

²⁵Tuaciang, ‘A taangpupite Pathian in Egypt ngam pan a pusuapui lai in amate taw a vawt thuciamte Topa mihingte in a palsat hang ahi hi.

²⁶Topa ii a biak ngawl tu in a khaam milim pathiante, ni dang a biak ngei ngawl milim pathiante amate in bia uh hi.

²⁷Tua ahikom Topa in a mihingte tungah thin uuk in, hi laibu sungah a ki at tuasiatnate theampo amate ngam sungah tungsak hi.

²⁸Topa thin uuk mama a, a thin uuk lei hangin amate a ngamsung pan longhkeak in ngamdang denna in nei a, tuni dongin tua munah teang uh hi,’ ci in kizo tu uh hi.

²⁹“Topa ih Pathian in ama kep tuam thuku pawlkhat om hi; ahizong ama in a thukham hong pualaak zo a, tuaciang eite le ih suan ih paalte in tua thukham a tawntungin a zui tu ih hi hi.



Thuhil kikna 30

Pua kikna le Thupha nga thei natu Thute

- ¹“Tu in thupha le haamsiatna na teal tu uh in kong pia zo hi. Hi thu theampo note tungah hong tun ciang le Topa na Pathian ii hong thethaang na mun minamte sungah na ten uh ciang, teal tu in kong piak thute na phawk kik tu uh hi.
- ²Note le na suan na paalte in Topakungah cia kikin, tuni a kong piak ama thupiakte na thin theampo uh taw na zui uh le,
- ³Topa na Pathian uh in note hong hesuak tu hi. Ama in note hong thethaang na ngamte pan hong kaikhawm kik tu a, hong nuamsa sak kik tu hi.
- ⁴A khuala bel leimong dong keak ah na kithethaang uh zongin Topa na Pathian in note hong kaikhawm kikin hong siapui kik tu a,
- ⁵khatvei lai na taangpupite ii teenna leitangh na lua kik tu uh hi. Tuaciang ama in na taangpupite sangin a nuamsa zaw le tam a phazaw in hong vawt tu hi.
- ⁶Na thin theampo uh taw ama na it natu uh le tua ngamah na ten suak thei natu uh in Topa na Pathian in note le na suan na paalte tungah thu nit nopna thin hong pia tu hi.
- ⁷Ama in no hong ngaimawte le hong nengniam na ngalte tungah haamsiatna theampo tungsak tu a,
- ⁸tuni in kong piak ama thupiakte theampo na keamcing tu uh a, ama thu na ni kik tu uh hi.
- ⁹Na nasepna theampo ah Topa in hong nuamsasak tu a, na taangpupite bangma in ta tam mama le nganno tam mama nei in, na lote pan an tam mama piang tu hi.
- ¹⁰Ahizong hi laibu sungah a ki at ama thuhilnate ahi, a thukham theampo zui in a thu na nit uh kul tu hi. Note in na thinsung theampo uh taw ama na zot uh kul tu hi.



¹¹“Tuni in kong piak thupiak sia haksa lei ngawl a, zui laak tu zongh hi ngawl hi.

¹²Tua in vantung ah a om hi ngawl hi. ‘Eite zaak thei tu le zui thei tu in akua kaato in hong puaksuk tu ziam?’ ci in dok kul ngawl hi.

¹³Tuipi ngalkhat ah a om thu zongh hi ngawl hi. ‘Eite zaak thei tu le ih zui thei tu in akua in tuipi kantan in ei kungah hong paipui tu ziam’ ci in dok kul ngawl hi.

¹⁴Tuabang hi ngawl hi, hi lai ah note taw hong omkhawm hi. Note in na he uh a, zongh, na son thei uh hi. Tua ahiciang zui vun.

¹⁵“Tuni in na teal tu uh in a pha le a sia, nuntakna le thina kong pia hi.

¹⁶Tuni in kong piak Topa na Pathian ii thupiakte zui in ama it in, a thu ni in a thukham theampo na zui uh le, note na nuamsa tu uh a, minam lian khat na suak tu uh hi. Note ii na lua natu ngamahTopa na Pathian in thupha hong pia tu hi.

¹⁷Ahizong a thu ngai ngawlin ama nialin, pathian dangte bia tu in lam na pial uh le,

¹⁸tu in hi lai ah thieng takin kong son hi, note na mong siat tu uh hi. Na lua tu uh ngam Jordan ngun ngalkhat ah khuangei nungta ngawl tu nu hi.

¹⁹Tu in na teal tu uh nuntakna le thina, Pathian ii thupha le Pathian ii haamsiatna kong pia a, na teal uh sia hong heakpui tu in van le lei ka sam hi. Nuntakna teal vun.

²⁰Topa na Pathian it vun, a thu ni vun, ama tungah thumaan vun, tua hile na taangpupite ahi Abraham, Isaac, le Jacob tungah piak tu a, a kamciamna ngam sungah noma le na suan na paalte khansau in na nungta tu uh hi,” ci hi.

Thuhil kikna 31

Joshua in Moses ii Za laih

¹Moses in Israel mihingte tungah a thuson zom lai a,



²“Tu in kum za le kum kul ka pha a, note hong lampui zo nawn ngawl tu khi hi. Tua bek dom ngawlin Topa in Jordan ngun kan ngawl tu ni hi, hong ci hi.

³Amate ngam na lua thei natu uh in Topa na Pathian ama mama na mai uh ah pai tu a, tua ngamah a teang minamte mon tu hi. Tuaciang Topa hong ci bangin Joshua sia note lampui hi tu hi.

⁴Topa in Amor kumpite Sihon le Og zo in, a ngam a lalcipsak bangma in hi mihingte mon tu hi.

⁵Topa in amate hong zosak tu a, kong sonsa bang linlian in amate na vawt tu uh hi.

⁶Na thin khosak vun a, kimuang vun. Amate kiita heak vun. Na Pathian, Topa ama mama in note hong ompui tu hi. Ama in note hong cimawsak ngawl tu a, hong taisan ngawl tu hi,” ci hi.

⁷Tuaciang Moses in Joshua sam a, Israel mihingte theampo ii mai Joshua tungah, “Na thin khosak in a, kimuang in.; a taangpupite tungah Topa kamciam na sa ngam lua tu in hi mihingte lampui tu sia nangma ni hi.

⁸Topa ama mama in nang lam hong pui in, hong ompui tu hi. Ama in nang hong cimawsak ngawl tu a, hong taisan ngawl tu hi. Tua ahiciang thinkiam heak in a, lau heak in,” ci hi.

Thukham sia Kum Sali simin Kisim tu

⁹Tuaciang Moses in Pathian thukham at in, Topa thukham thingkuang a cing Levi mi thiampite le Israel lampuite tungah pia hi.

¹⁰Moses in amate thupia a, “Kum sali a cin sim, leiba maisak kum hong thet ciang Buk Poai ah hi Thukham sia a ngingin sim vun.

¹¹Biakna munah Israel mihingte Topa na Pathian bia tu in hong pai uh ciang hi thukhamte amate tungah sim vun.

¹²A kuama po ii a zaak tu le Topa na Pathian zatakna a sin thei natu le ama thu hong hilte thumaan takin a zui thei natu in pa, numei, patang le na khuapi sungah a teang ngamdang mihingte a vekpi in khawm vun.



¹³Topana Pathian ii thukham a za ngeingawl na suan na paalte in hi bangin za tu uh hi. Tuaciang Jordan ngun ngalkhat na lua natu ngam sungah a ten laiteng ama thu a nit thei natu in amate in sin tu uh hi,” ci hi.

Moses tungah Topa ii Hilna A khakbel

¹⁴Tuaciang Topa in Moses tungah, “Khua ngei nungta nawn ngawl tu ni hi. Keima in Joshua thu ka hil thei natu in ama samin Puanbuk sungah paipui in,” ci hi. Moses le Joshua Puanbuk sungah tum a,

¹⁵tua munah amate tungah meeikhuam khat taw Topa hong kilangh a, meeikhuam sia Puanbuk kongbiang ah ding hi.

¹⁶Topa in Moses tungah, “Thi pal tu ni hi, na thi zawkciang mihingte kei tungah hong thumaan ngawl tu a, amate taw ka vawt thuciamna sia palsat tu uh hi. Amate in kei hong taisan tu uh a, a tum natu ngam doai biate ii pathiante bia tu uh hi.

¹⁷Tuabang teng a pian ciang amate tungah ka thin uuk tu a, amate taisan in, amate kimon tu hi. A lauhuai natna tuatuamte amate tungah theng tu a, keima a Pathian amate taw omkhawm nawn ngawl ka hikom hi thu teng piang hi cisia amate in tel tu uh hi.

¹⁸Tuasia ciang amate ka hu buatu hi, banghangziam cile amate a sia in ngamta uh a, milim pathian dangte bia uh hi.

¹⁹“Tu in hi la at in. Amate sangah ka pang bua hi ci tepteena in hi la Israel mihingte hil in.

²⁰A taangpupite tungah ka kamciamsa bangin hi ngampha le ngamnuam ah amate ka paipui tu hi. Tualai ah amate in a du pawpo an nei tu uh a, nuamsa mama in teang tu uh hi. Ahizong amate in hong nungngat in milim pathian dangte bia tu uh hi. Amate in kei hong nialin ka thuciamte a palsat uh ciang,

²¹a lauhuai natna tuatuamte amate tungah tung tu hi. Ahizong hi la kisa lai tu a, tua la in amate ka langpanna thu tepteena hi tu hi. Tu laitak amate piak tu in ka khapsa ngamah ka tumpui ma ngangawn in amate ngaisutna ka he hi,” ci hi.



²²Tua ni in Moses in tua la at in, Israel mihingte hil hi.

²³Tuaciang Topa in Nun tapa Joshua paupui in Joshua tungah, “Kimuang in a, na thin khosak in. Ka khap sa ngam sungah Israel mihingte lam na pui tu a, nangma taw kong omkhawm tu hi,” ci hi.

²⁴Moses in laibu khat sungah Pathian thukhamte at a, khat zongh a kheet thaak ngawl natu in kidawm hi.

²⁵A man zawkciang ama in, Topa Thukham Thingkuang keamte ahi, Levi mi thiampite tungah,

²⁶“Hi Pathian ii Thukham laibu sia la vun a, a mihingte lang khat ah tetti in tua munah a omtop thei natu in Topa na Pathian ii Thukham Thingkuang hui ah koi vun.

²⁷Amate bang zata thinpui in bangbang hong langpan cisia ka he hi. Ka nuntak sungin amate in Topa sia hi zata langpan ahile ka thi zawkciang langpan seseam tu uh hi.

²⁸Hi thute amate tungah ka son thei natu in na minam lampuite le uliante a vekpi in ka mai ah khawmtua vun. Amate lang ah tetti tu in van le lei ka sam tu hi.

²⁹Ka thi zawkciang mihingte ngilo tu a, amate ka hil sa thute a nial tu uh sia ka he hi. Topa ii a khamte amate in palsat in Topa thin a uksak uh hu in mai sangah amate in tuasiatna thuak tu uh hi,” ci hi.

Moses ii La

³⁰Tuaciang Moses in a nuai a late theampo sa a, Israel mite theampo in thimdide in ngai uh hi.

Thuhil kikna 32

¹“Van le lei awng, ka kammalte za vun a, ka thusonte hong ngai cinten tavun.

²Kong hilnate nguamal bangin taak tu a, leitung ah daaitui bang hi tu hi. Ka kammalte sia thingkungnote tungah nguaphiin bangin zu tu a, lopa moite tungah dam takin zu vahil tu hi.



³Topa min ka pok tu a, a mite in ama letna son tu uh hi.

⁴“Topa in note hong dal a hatbelpa hi a, Na a sepna theampo ah kicing in maan hi; Na Pathian thumaan in thutak a, Ama in a maan le a pha seam hi.

⁵Ahizong note sia thumaan ngawlin ama mi tu in na kilawm bua uh a, mawna taw a kidim le a leilot thei minam na hi uh hi.

⁶Mamaw in khuangaisut nei ngawl mite awng, hi bangin Topa vawt tu nu ziam? Ama hong bitphua pa na pa uh hi a, minam khatin hong vawt pa ahi hi.

⁷“A bo sa hunte, nidang lai hunte, ngaisun tavun; Thupiangte hong son tu in na pate dongh tavun, a bo sa thute son tu in khanghaamte dongh tavun.

⁸A Saangbel Pa in minamte a ngam tu pia a; mite ten natu mun hawmsak hi. Ama in minam simin vantung lalang khat tek pia a,

⁹ahizong Jacob suan le paalte ama atu in teal hi.

¹⁰“Ama in, a ngamkhing vuipi vakna senneal ngam sungah a vathap uh mu hi. Ama in ama le ama a kikep bangin amate keamin cing hi.

¹¹Muvanlai in a note len tu sinpui a, manin a thate tungah bit tak a koi bangin, Topa in Israel te a taak natu pan keamcing hi.

¹²Topa bek in ama mite lampui a, ngamdang milim pathian huna kihel ngawl hi.

¹³“Topa in amate mun saang munte uksak a, amate in lo pan a piangte ne uh hi. Amate in suangpi kawmah khuaitui mu uh a, suanghol sungah a olive kungte limci hi.

¹⁴A khuipuite le a kealpuite in noai tam tak ma pia a, amate in tuu, keal le khui phabel, anvui phabel le zu limbelte nei uh hi.

¹⁵“Topa ii mite hau uh a, ahizong langpan tu uk uh hi; amate an khamin thau uh hi. Amate in a Bitphuapa Pathian taisan uh a, a vaanglian ngumpa nial uh hi.



¹⁶A milim biakna hangin Topa in thum a, na pha ngawl a sepna in Topa thin uuksak hi.

¹⁷Amate in pathian tatak a hi ngawl milim pathiante, a taangpupite ii a heak ngawl milim pathian thakte Israel te ii a thu a nit ngeingawl milim pathiante tungah biakpiakna vawt uh hi.

¹⁸Amate in a vaanglian ngumpa, amate nuntakna a pia pa, a Pathian mangil uh hi.

¹⁹“Hi thu Topa in a mu ciang a thin uuk a, a tapate le a tanute ningkhiin hi.

²⁰‘Amate ka hu nawn buatu hi,’ ama in ci hi; tuaciang a thinpuite le a thumaan ngawl mite tungah bang piang ziam ka en tu hi.

²¹Amate in a milimte taw ka thin hong uksak a, Pathian tatak a hi ngawlte taw ka thum natu hong vawt uh hi. Tua ahikom a son thamman ngawl minam khat taw amate thin ka uksak tu a; a mawmaw minam khatin amate ka thumsak tu hi.

²²Ka thin uukna sia mei bangin kuang a, leitung a om na theampo kaang siat tu hi. Leinuai dong thengsuk tu a, mualpeangte zongh kaangtum siat tu hi.

²³“Keima in amate tungah a bo thei ngawl tuasiatna ka tungsak tu a, ka thaltang theampo taw amate ka kap tu hi.

²⁴Amate ngilkial le cisa natna, a lauhuai natnate taw thi tu uh hi. Ngamsa ngilote in amate ka simsak tu a, ngul ngu neite in ka tusak tu hi.

²⁵Ngal kisimna in amate lamlai ah thisak tu uh a, patauna in amate inn sungah thisak tu uh hi. Patangte le numei note thi tu uh a, nausente le khanghaamte zongh kisuaktasak ngawl tu hi.

²⁶Keima in amate ka thatlum siat tu a, tua hile kuama in amate ciamtee nawn ngawl tu hi.

²⁷Ahizong amate in ka mite a zawna thu a ngalte kiphatsak hun ka pia buatu hi, tuasia hun in Keima in amate ka hualcip hi,’ ci hi.



28“Israel mite khua ngaisutna nei ngawl minam khat hi a; ciimna bangma nei ngawl hi.

29Amate in a ngal lelma thu mu thei ngawl a, thupiangte tel thei ngawl uh hi.

30Banghangin mikhat in tulkhat zo a, mi nii bek in tulsawm zo thei ziam? Topa a Pathian in amate nusia zo hi; a vaanglian amate Pathian in amate nungngat zo hi.

31A ngalte in amate ii biak milim pathiante thaneam a, a thahat Israel Pathian taw a kiban ngawlma thu he uh hi.

32A ngalte Sodom le Gomorrah bangin a khan uh sia a, a kha le ngu a nei sapitnga a nga, sapit kung taw kibangin,

33A zute ngulte ii ngu bang ahi hi.

34“Topa in a ngalte nasepna teng ciamtee a, daan a piak hun tu ngak nginge hi.

35Topa in amate phu la in daan pia tu a, a kiamsuk tu hun hong theng tu a, a lal tu ni nai hi.

36A thahatna teng a bo a mu ciang Topa in a mite suatak tu hi. Ama in a naseamte a panpui tu a om ngawl hunlam a mu ciang, a naseamte hesuak tu hi.

37Tuaciang Topa in a mite tungah, ‘Na suan na muan uh a thahat milim pathiante koisung ah om ziam?’ ci in dongh tu hi.

38Noma in na sangaw biakna thau taw amate na vak uh a, a neak tu in zu na pia uh hi. Tu in amate hong pai in husak vun. Noma hong suatak tu in hong del taken.

39“ ‘Keima, keima khat bek Pathian ka hi a, a dangte sia pathian tatak hi ngawl hi. Thatlum in, ka nungtasak kik a, liamsakin ka damsak kik hi, ka nasepte kuama in hong langpan thei ngawl tu hi.

40Keima in a nungta Pathian tatak ka hi a, ka khut laamin ka kiciam a,



⁴¹ a tee vazal ka namsau ka taat tu a, thumaan in thu ka khen tu hi. Ka ngalte tungah phu ka la tu a, keima hong ngaimawte daan ka pia tu hi.

⁴² Ka thaltangte amate chi sungah kidia tu a, ka namsau in kei hong langpante theampo that tu hi. Kei hong langpante kuama ka khoaikhe buatu a, a liamte le thongtaakte ngangawn thi tu uh hi,' ci tu hi.

⁴³ “Minamte awng Topa mite pok vun. Topa in ama mite a thatte theampo daan pia hi. Ama in a ngalte phu la a, a mite mawnate mai sak hi,” ci hi.

⁴⁴ Moses le Nun tapa Joshua in Israel mite zaak thei tu in, hi la sa uh hi.

A khakbel Moses ii Kam vaithak

⁴⁵ Moses in mite tungah Pathian ii thuhilnate a son zawkciang,

⁴⁶ ama in, “Tuni in kong piak thupiakte theampo na zui natu uh in hanciam vun. Pathian ii hilnate theampo thumaan takin a zui thei natu in na tate tungah son kikik vun.

⁴⁷ Hi thuhilnate kammal hawm thong hi ngawl a, na nuntakna tatak uh ahi hi. Tuate zui vun tua hile na lua tu uh Jordan ngalkhat ngamah khansau in na nungta tu uh hi,” ci hi.

⁴⁸ Tua ni ma in Topa in Moses tungah,

⁴⁹ “Jericho khuapi ii ngalkhat Moabte ngam Abarim Mual ah pai in a, Nebo Mual tungah kaato in, Israel mihingte tungah ka piak tu Canaan leitangh en in.

⁵⁰ Na suapuipa Aaron ii Hor Mual tungah a thi bangin tua mual tungah na thi tu hi,

⁵¹ banghangziam cile note ngeal in Israel mihingte mai, keima tungah nong thumaan bua uh hi. Zin senneal ngamsung Kadesh khua paam tui omna Meribah ah na om uh lai in, mihonte mai ah ka thu nong ni bua uh hi.

⁵² Canaan ngam sia na ngal et tu a, ahizong Israel mite ka piak tu tua ngamah na tum buatu hi,” ci hi.

Thuhil kikna 33



Moses in Israel Minamte Thupha pia

¹Hite sia Pathian mihing pa Moses ii a thi ma a Israel mihingte tungah a piak thuphate ahi hi.

²Sinai Mual pan Topa hong pai a; Edom ngam tungah ni bangin suak in, Paran Mual pan a mite tungah taang hi. Vantung lalang tulsawm te ama taw omkhawm a, a ziatsang khut ah meikuang khat toai hi.

³Topa in a mite it a, ama mite sungsia hi. Tua hi a, eite a peang ah kunin hong thupiakte ih zui hi.

⁴Moses ii hong piak thukham ih zui a, ta sia in ih minam ii neisa manphabel ahi hi.

⁵A minamte le a lampuite a kikaikhop ciang, Topa sia Israel a mite kumpi suak hi.

⁶Moses in Reuben minam tungah hi bangin thupha pia hi. “A minamte a tawm hangin Reuben minamte mong heak hen,” ci hi.

⁷Moses in Judah minamte tungah hi bangin thupha pia hi. “Topa awng, amate ii hu hong ngetna aw ngai in, A dang minamte taw ngawmkhawm kik in. Topa awng, amate atu ngalsimsak in. Tuaciang a ngalte ii a sim ciang panpui in,” ci hi.

⁸Moses in Levi minamte tungah hi bangin thupha pia hi. “Topa awng, Nangma in Urim le Thummim taw na deina pualaak in A thumaan na naseamte Levite tungtawn in; Massah ah amate na ze et a Meribah tui ah a thu maanna na lak hi.

⁹Amate in nangma tungah a nute a pate, a suapui pate le a tate tung sangin thumaan zaw hi. Amate in na thupiakte ni in, na thuciam tungah thumaan uh hi.

¹⁰Amate in na thukham a nit thei natu in na mite hil tu hi; Na biaknatau tungah biakpiaknate pia tu uh hi.

¹¹Topa awng, a minamte a thahat natu in hu in a; A nasepna ah lungkim in. A ngalte theampo hualcip in; amate tho kiksak nawn heak in,” ci hi.



¹²Moses in Benjamin minamte tungah hi bangin thupha pia hi. “Hite Topa ii it le a kepcing minam ahi hi. Ama in sunkhua teakin amate cing a, tuaciang amate sungah Topa teang hi,” ci hi.

¹³Moses in Joseph minamte tungah hi bangin thupha pia hi. “Topa in a ngam sia vantung nguatui le leinuai tuitaw thupha pia taken.

¹⁴A ngam in thupha nga hen a ni taw a min thingnga le A hun simin a nga thingnga phabelte taw kidim taken.

¹⁵A taanghtawng mualte deiteal thingngate taw kidim taken.

¹⁶A ngam sia napha theampo taw kidim hen a, Sawlpaang kuang sung pan a pau Topa phatna in thupha pia taken. Hi thuphate Joseph minamte tungah tung taken, banghangziam cile ama sia a suapuite sungah lampui ahi hi.

¹⁷Joseph in khuita khat ii thahatna nei a, A kiite ngam khuita kiite taw kibang hi. A kiite Manasseh mi a tul a tul le Ephraim mi tulsawmte taw kibang hi. Tua a kiite taw minamte si a, leimong dongah nawt hi,” ci hi.

¹⁸Moses in Zebulun le Assachar minamte tungah hi bangin thupha pia hi. “Zelubun sia tuipi tung a sum vawtna ah cialcing taken a, Issachar ii hauna sia inn sungah khang taken.

¹⁹Amate in amate mual tungah ngamdang mite sam a, tua lai ah a maan sangaw biakpiaknate pia hi. Amate in amate hauna sia tuipi pan le tuipi hui sen pan nga uh hi,” ci hi.

²⁰Moses in Gad minamte tungah hi bangin thupha pia hi. “Amate ngam a zaisak pa Pathian pok vun. Gad in tawpi khat bangin a lu a baan balkeak tu in pang hi.

²¹Amate in amate atu in ngam phabelna mun la uh a; Lampui khat ii tel amate kipia hi. Israel lampuite a kikhop uh ciang, amate in Topa ii thupiakte le thukhamte zui uh hi,” ci hi.

²²Moses in Dan minamte tungah hi bangin thupha pia hi. “Dan sia tawpi moi khat ahi hi. Ama in Bashan panin leang hi,” ci hi.

²³Moses in Naphtali minamte tungah hi bangin thupha pia hi. “Naphtali sia Topa ii maipha in nasia takin thupha pia hi, A ngam Galilee tuili pan thangsang dong thengsuk hi,” ci hi.

²⁴Moses in Asher minamte tungah hi bangin thupha pia hi. “Asher sia minamdangte sangin thupha kipia zaw hi. Ama a suapuite ii itbel hi tu a, a ngam olive kungte taw kidim tu hi.

²⁵A khuapite thik kongpite taw kidal tu a, Thinmuang in nungta tawntung tu hi,” ci hi.

²⁶Israel mite awng, noma hong hu tu in meei tungah a to a letna taw vantung ah a om Noma Pathian taw a kibang pathian dang om ngawl hi.

²⁷Pathian in note hong dal tawntung zo a, A tawntung a om ama khutte in no hong panpui hi. Ama in na mai nawt kakawm uh in na ngalte uh notkeak in, Amate mon tu in note hong sawl hi.

²⁸Tuabangin Jacob suan le paalte vantung pan a taak daaitui ii a kawtsakna mun, an le zu taw a kidimna ngamah ngalmuang thinnuam in teang uh hi.

²⁹Israel awng, bangza in lungdam nu ziam! Topa ii a suatak note taw kibang minam khat zongh om ngawl hi. Topa ama mama na lum le na namsau hi a, note hong dal tu le zawna hong pia tu ahi hi. Na ngalte in hesuak nengin hong pai tu a, ahizong amate na tuancil tu uh hi.

Thuhil kikna 34

Moses ii Thina

¹Moses sia Moab zaangtam pan Nebo Mual, Jericho niswana sang Pisgah Mualdawn ah kaato a, tua munah Topa in ngam theampo lak hi: Gilead ngamsaksang pan Dan khua dong;

²Naphtali ngam theampo, Ephraim le Manasseh ngam theampo, Judah ngam theampo, nitumna sang pan Mediterranean tuipei dong;

³Judah ngam thangsang, le Zoar zaangtam panin palm khuapi Jericho dong lak hi.



⁴Tuaciang Topa in Moses tungah, “ Hi ngam sia a suan a paalte tungah piak tu in Abraham, Isaac, le Jacob tungah ka kamciam ahi hi. Nang kong musak a, ahizong tua munah kong paisak buatu hi,” ci hi.

⁵Tuaciang Topa ii naseampa Moses sia, Topa ii a cisa bangin tua mun Moab ngam sungah thi hi.

⁶Topa in Moses sia Bethpeor khua ngalkhat, Moab kual sungah phum a, ahizong tuni dongin ama a kiphumna mun tatak kuama in he ngawl hi.

⁷Moses sia kum za le kum kul a phak ciang thi a, a tha zongh hat lai in a mit khua muna zongh pha lai hi.

⁸Israel mihingte Moab zaangtam ah ama atu in ni sawmthum sung khuangai in kaikut uh hi.

⁹Nun tapa Joshua sia ciimna taw kidim hi, banghangziam cile Moses in ama a zalaih tu in teal zo hi. Israel mihingte in Joshua thu ni uh a, Topa ii Moses tungtawn in amate a piak thupiakte zui uh hi.

¹⁰Maitang kisi in Topa taw a kipaupui Moses bang Israel mihingte sungah kamsang khat zongh om ngeingawl hi.

¹¹Topa in Moses sawlin Egypt kumpipa, a uliante tung le a ngamsung tengah nalamdang le thu lamdang a vawt bangin a vawt ngei kamsang dang om ngeingawl hi.

¹²Israel theampo ii mit mu in Moses ii na lianpi le a lauhuai nate a vawt thei bangin a vawt thei kamsang dang om ngawl hi.



Joshua

Joshua 1

Canaan ngam Zothal tu in Pathian in Joshua Thupia

¹Topa ii naseam Moses thi zawkciang, Moses a hu Nun ii tapa Joshua ii tungah Topa in paupui hi.

²Ama in hi bangin ci hi, “Ka naseam pa Moses thi zo hi. Tu in kithoai in, nang le Israel mite theampo awng, amate tungah ka piak sa ngam lua tu in Jordan ngun kantan vun.

³Moses tungah ka ci sa bangma in nang le ka mite theampo sia na sii na leitangh a buppi in kong pia zo hi.

⁴Na ngamngi tu uh sia thangsang senneal ngam panin Lebanon Mualpите dong kithung to tu hi; nisuana sang Ngunpi lian Euphrates pan, Hitte ngam kantan, nitumna sang Mediterranean Tuipi dong hi tu hi.

⁵Joshua awng, na nuntak lai teng nang sia kuama in hong zo zo ngawl tu hi. Moses ka ompui bangma in nang kong ompui tu hi. Nang taw a tawntungin kong omkhawm tu hi; nang kong nusia buatu hi.

⁶Thin takkha in a kimuang in, banghangziam cile a taangpupite tungah ka kamciam sa leitangh te a lua uh ciang hi mihingte ii lampui pa na hi tu hi.

⁷Thin takkha in a kimuang in, tuaciang ka naseampa Moses ii hong piak thukham a buppi in na ni vun. Tuate khat zongh na ngaingon heak vun, tua hi le na paina theampo ah zawna na nga tu hi.

⁸Na biakpiakna sung theampo ah Thukham Laibu sia sim vateei tu nu hi. Sun taw zan taw tua laibu sung a thute kantel in a ki at theampo na ni hamtang vun. Tuasia ciang na khangto tu a, zawna na nga tu hi.

⁹Thin takkhana le kimuanna nei tu in kong thupiak sia ciamtee in. Lau heak in a, thinkiam heak in, banghangziam cile Kei, Topa na Pathian sia na paina theampo ah nang taw hong omkhawm khi hi.”

Joshua in A mite Thupia

¹⁰Tua zawkciang Joshua sia lampuite ii ngiaphual sungah



¹¹pai kawkoai in mihingte tungah hi bangin thupia in sawl hi. “Nguai an pawlkhat taw kinging vun, banghangziam cile tu zo ni thum sung, Topa na Pathian ii hong piak leitanghte lua tu in Jordan Ngun kantan in na pai tu uh hi.”

¹²Reuben le Gad ii suan le Manasseh ii suan khen langte tungah Joshua in,

¹³“Topa ii naseam pa Moses in Topa na Pathian in Jordan ngun ii niswana leitangh sia na inn na lo tu in hong pia tu hi a ci teng ciamtee vun.

¹⁴Na zite na tate uh le na ngannote uh sia hi lai munah taang zii tu a, ahihang na ngalkapte uh ngalsim tu in a kinging sa te sia Israel mipuite mai ah amate hu tu in ngun kantan in pai tu hi.

¹⁵Topa na Pathian ii amate a piak sa Jordan ii nitumna sang ngam teng a lua uh mateng tuabangin ngamta tu nu hi. Ama in Israel minam a vekpi in ngam muanna a piak zawkciang Topa naseam pa Moses ii no hong piak Jordan ii niswana ngamah a teang tu in nong cia kik tu uh hi.”

¹⁶Amate in, “Nong sawl theampo ka vawt tu a, nong puakna mun theampo ah ka pai tu hi.

¹⁷Moses ii thu ka nit uh bangma na thu hong ni tu khu hi. Moses a ompui bang keak ma in Pathian sia nang taw hong omkhawm po taken!

¹⁸Na thu neina hong thusim ngawlte le na thupiakna hong ni ngawlte ki thatlum tu hi. Takkha in kimuang po in,” ci in zokik uh hi.

Joshua 2

Joshua in Jericho khua sungah Thukante Paisak

¹Tua zawkciang Joshua in thukante nii sia Acacia ngiaphual panin paisak aa, Canaan ngam vil tu le Jericho khua mama a encik tu in sawl hi. Amate ngeal in khuapi sung hong thet uh ciangin pumpi kizuak numei Rahab ii inn ah zan hong taam uh hi.

²Jericho khua kumpipa in Israel mi pawlkhat ngal vil tu in hong pai hi ci in za hi,



³tua ahikom ama in Rahab tungah thu puak a: “Na inn ah hong tung mihingte in ih ngam bup hong enkuu tu in hong pai hi! Hong pusua tan!” ci hi.

⁴⁻⁶“Mihing pawl khat ahile ka inn ah hong pai peu hi, ahihang amate sia koi sung pan hong pai ziam ci in ka he bua hi. Khuapi kongpi a kikka hun nitum maa in amate ding khia kik zo hi. Amate zot natu kan se ngawl ka hi hang amate nung pan del memeing le uh te pha thei lai tu nu hi,” ci hi. (Tu in Rahab in hi thukan te nii sia a innkhum tungah khaukaang kung pawlkhat a koi te ii nuai ah a seal hi.)

⁷Kumpipa mihingte in khuapi nusia a, tua zawkciang kongpi sia kikhak hi. Lampi ii Jordan ngun a kaanna mun dong amate in Israel thu kan te a zong uh hi.

⁸Thukan te zan a lup maa in Rahab sia inn tungah kaa to a,

⁹hi bangin ci hi; “Topa in hi ngam sia no hong pia zo hi ci in ka he hi. Ngamsung mihingte khat sim in no hong kiita vadil hi.

¹⁰Na mai uh ah Topa in Egypt ngam na nusiak uh ciangin San Tuipi sia kangsak ci in ka za uh hi. Jordan niswana sang Amor te ii kumpite nii Sihon le Og na thalup uh zongh ka za uh hi.

¹¹Ka zaak uh po ciang ka lau uh hi. No hu in ka thin letna uh teng ka bosua uh hi. Topa na Pathian uh sia vantung le leitung ii Pathian ahi hi.

¹²No tungah kong dik bangin ka innkuanpui te kungah dikna taw nong ngamtat natu in tua Pathian min taw hong kiciam tavun, tuaciang in kong muan thei natu in lim khat pawpo hong pia tavun.

¹³Ka pa le ka nu, ka suapui pate ka suapui numei te le a innkuanpui tetek hong huutsak natu kamciam hong pia tavun. Ko hong kithatlumsak heak vun!”

¹⁴Pasal te in ama ii tungah, “Ka pau uh bangin ka ngamta bua uh le Pathian in ka nuntakna uh hong la taken. Ka ngamtatna uh teng kuama munah na son bua uh le Topa in hi leitangh hong piak ciangin pha takin kong en tu uh hi ci in kamciam kong pia uh hi,” ci uh hi.



¹⁵Rahab sia khuapi luphung pang sungah inn vawtin teang ahi bangma ama in pasal te nii khuazeen taw kongvang no panin khiasuk hi.

¹⁶“Mual tung ngam sang zuan tavun, tua ahi ba na po le kumpipa mihingte in hong mu tu hi. Tua munah amate ii hong heak kik dong ni thum sung buu tavun. Tuasia zawkciang na lampi uh ah na tawn thei kik tu uh hi.”

¹⁷Pasalte in ama munah ci hi, “Kamciam nong vawtsak uh teng sia kholet tu khu hi. Hi bangin na ngamtat kul tu hi.

¹⁸Na ngam uh kong sim uh ciang khauhual san hi sia nong khiak sukna kongvang no panin khii in kaai suksak in. Na pa na nu le na suapuite na pa innkuanpuite theampo na inn sungah khawm siat tu ni hi.

¹⁹Khat po doipua ah a pusuak in ahile ama ii thina sia ama mawna hi tu a, ko taw kisai ngawl tu hi; ahihang na inn sungah om khat pawpo sia bang khat po a kitawksak ahile ko khialna hi tu hi.

²⁰Tua ahihang ko ii ngamtatna sia khat po tungah na son a, ahile kamciam pia a nong sawl sia len ngawl tu khu hi.”

²¹Numei in tua thu lungkim in amate a pai khiasak hi. Amate pai zawkciang numei nu in khauhual san khat a kongvang no panin a kaai suk tu in khit hi.

²²Thukante mual kawm ah pai in buu uh hi. Kumpi pa mihingte in amate sia ni thum tangciing mun theampo ah zong uh hi, ahihang a mu bua uh a, tua ahikom amate Jericho khua ah a heak kik uh hi.

²³Tua zawkciang thukante nii sia mual tung pan hong tuaksuk uh a, ngun kantan in Joshua kungah a heak kik uh hi. Ama ii tungah amate in thupiang theampo a son uh hi,

²⁴tuasia zawkciang, “Topain ngam buppi sia ei hong pia zo hi ci in um khu hi. Tua munah a om mipi theampo sia ei hong kiita vadil hi,” ci uh hi.

Joshua 3

Israel Mite in Jordan Ngun kantan



¹A khuavak ni ciang Joshua le Israel te zingtuungin tho uh a, Acacia ah ngiaphual nusia in Jordan ah pai uh a, a kantan tu ngakin tua munah ngiaphual saat uh hi.

²Ni thum zawkciangin lampuite ngiaphual sung tengah pai in,

³mipite tungah, “Topa na Pathian ii thukham thingkuang sia thiampite in pua in a pai uh na mu uh ciang, ngiaphual nusia in zui vun.

⁴No hi sungah a om ngei kuama om ngawl nu hi, tua ahiciang amate in na pai natu lampi hong lak tu hi. Ahihang thukham thingkuang nai neak heak vun a, tai lang bang a kisamh in om vun,” ci hi.

⁵Joshua in mihingte tungah ci hi, “Noma le noma kithiansua vun, banghangziam cile Topa in no ii sungah nalamdang hong vawt tu hi.”

⁶Tua zawkciang Joshua in thiampite thu pia a, thukham thingkuang pua in mipite mai ah pia in sawl hi. A ci bangin amate ngamta uh hi.

⁷Topa in Joshua munah ci hi, “Tu ni a ka sep tu sia in nang sia mihing thupi khat hi a, Moses ka ompui bangin nang zongh kong om pui hunlam Israel te in hong tel tu a, hong upat vawt tu uh hi.

⁸Thiampite munah son in a, thukham thingkuang pua in pai tu a, ngun hui a thet uh ciang, tui sung tan suk tu a, tuivaal taw a kinai na ah ding tu hi.”

⁹Tuaciang Joshua in mipite munah, “Hong pai tavun a, Topa na Pathian ii hong pauna ngai vun.

¹⁰⁻¹¹Mainawt in na pai uh ciang ama in Canaan te, Hit te, Hiv te, Perizz te, Girgash te, Amor te le Jebus te sia a maan takin notkeak tu hi. Topa ii thukham thingkuang in no mai ah Jordan kantan in a kipaipui leitung theampo ii a nungta Pathian sia no ii kawm ah hong om hi ci in na tel tu uh hi.

¹²Tu in, no Israel minam sawm le nii te sung pan mihing khat tek teal vun.



¹³Leitung theampo ii Topa ii thukham thingkuang a pua thiampi te in a peang uh tui sung hong sii tak ciang, Jordan ngun sia a luan hong tawp tu hi, tuaciang hong luangsuk lai tuite sia mun khat ah hong kisengneng tu hi.”

¹⁴⁻¹⁵Tua hun sia anlaak hun hi a, nguntui pawm hi. Jordan ngun kan tu in mipite ngiaphual a nusiak uh ciang, thiampite sia thukham thingkuang pua in masa uh hi. Thiampite in ngun sungah a peang uh a sii suk uh po ciang

¹⁶tui luan tawp a, Zarethan khua pi hui Adam a kici na mun tuilu sangah a tui hong kisengneng hi. Tuipi Thi sungah a luangsuk tui sia kikhaktan ik-ek a mipite in Jericho khua hui panin kantan thei uh hi.

¹⁷Mipite in leiko tung tawn tan in a pai uh laitakin, Topa ii thukham thingkuang a pua thiampite sia Jordan ngun laizang lei kona ah mipite ii kantan siat mateng in ding uh hi.

Joshua 4

Khansuangte Kiphut

¹Ngam mi bup in Jordan a kantan zawk uh ciang Topa in Joshua ii mun ah ci hi,

²“Mihing sawm le nii teal in, nam khat pan mihing khat veu,

³tuaciang Jordan ngun sung thiampite ii dinna san tatak keak panin suangtum khat tek lasak in. Amate in hi suangtumte pua in zan ciang ngiaphual na saat natu mun ah koi suk tu in sawl in.”

⁴Tuaciang Joshua in mihing sawm le nii a teal teng samin,

⁵hi bangin ci hi, “Topa na Pathian ii thukham thingkuang ii mai Jordan ngun sungah na tuaksuk tavun a, Israel minam, khat sim a tu suangtum khat tek na liang uh ah hong pua tavun.

⁶Topa in bang seam ci in hi suangtumte in mipite a phawksak tu hi. Mai sangah na tate in hi suangte ii khiakna bang ziam ci in hong dok ciangin



⁷Topaii thukham thingkuang in ngun a kantan ciangin Jordan ngun sia a luan tawp hi, ci in na son tu uh hi. Hi lai mun ah bang thu piang ci in hi suangte in Israel mite phawksak tu uh hi.”

⁸A kiteal pasalte in Joshua ii thupiak bangin ngamta uh hi. Topa in Joshua thu a piak bangma amate in suangtum sawm le nii Jordan ngun sung pan la in, Israel minam khat atu suangtum khat veu pua in a ngiaphual saat na mun ah koi uh hi.

⁹Thukham thingkuang a pua thiampite ii dinna san ah zongh Joshua in suangtum sawm le nii ciang hi. (Tua suangtumte tu hun dongin tua mun ah om lai hi.)

¹⁰Topa ii Joshua tungah a thupiak theampo sep tu vawt tu teng a kizaw dong thiampite Jordan ngun lai ah ding uh hi. Hi sia in Moses ii thu piak ahi hi. Mipite sia ngun kantan in pai memeang uh hi.

¹¹Amate ngun langkhat a thet siat zawk uh ciang Topa thukham thingkuang a pua thiampite sia mipite mai ah pai uh hi.

¹²Reuben le Gad ii suan minamte le Manasseh ii suan khen lang sung pan ngal sim tu a kinging te Moses ii sawl bangin mipite mai ah ngun kan masa uh hi.

¹³Topa ii mai ah ngal sim tu a kinging sa mihing tul sawmli bang sia ngun kantan in Jericho hui zaangtam theng uh hi.

¹⁴Topa ii tua ni a sep a vawt teng in Joshua sia Israel te ngaisutna ah mihing thupi khat hi ci uh hi. Amate ii Moses a upat vawt uh bangma, ama zongh a khan tawntungin upat vawt uh hi.

¹⁵Tua zawkciang Topa in Joshua munah,

¹⁶Thukham Thingkuang a pua thiampite Jordan ngun sung pan hong kaato natu thu pia in sawl hi.

¹⁷Joshua in tuabangma in vawt hi.



¹⁸Tuaciang thiampite in ngun vaal langkhat a thet uh ciang, ngun tui luangsuk tu in kipan kik a, ngun vaal dong tui liim hi.

¹⁹Mipite in a tha khatna ni sawm ni in Jordan kantan uh a, Jericho ii niswana a om Gilgal ah ngiaphual saat uh hi.

²⁰Tua mun ah Jordan ngun sung pan a laak uh sungtum sawm le nii teng sia Joshua in ciang hi.

²¹Ama in Israel te mun ah ci hi, “Mai sangah na tate in hi suangtumte sia bang a ci nopna ziam ci in hong dok ciang

²²Jordan ngun sia leiko suakin na kantan hun a thute na son tu uh hi.

²³Topana Pathian in ei atu San Tuipi a kan cipsak bangma in Jordan ngun zongh ih kantan siat dong leiko a suasakna thu na son tu uh hi.

²⁴Hi sia hu in leitung a om theampo in Topa ii vaangletna sia bangza in lian ci in he tu a, tuaciang no in zongh Topa na Pathian sia a tawntungin na upat tu uh hi.”

Joshua 5

¹Jordan nitumna sangah a om Amor kumpite theampo le Mediterranean Tuipi hui susuk ah a om Canaan kumpite theampo in, Israel te ii kantan thei tu in Topa in Jordan ngun kang cipsak hi ci in za uh hi. Amate sia lau uh a, Israel te hu in a thin letna theampo bosua uh hi.

Gilgal ah Vunteap atna

²Tuaciang Topa in Joshua ii munah, “Thau suang pawl khat khawmtua a, naam a vawt in Israel te vunteap atsak in,” ci hi.

³Joshua in Topa sawl bangin ngamta hi, tuaciang ama in Vunteap atna Mual a kici na munah Israel te vunteap a atsak hi.

⁴⁻⁶Israel te in Egypt a nusiat lai in pa a minpiang theampo vunteap at sa ahi uh hi. Ahihang kum sawmli sung senneal ngam a kantan hun sung teng a piang pano te kuama vunteap at a om bua hi. Egypt ngam a nusiat lai in ngal sim thei tu kumcing sa te theampo sia tua hun bo sang ciangTopa ii thu a nit



nop ngawl hu in thi siat zo hi. A taangpupite tungah tua ngam hau, lei phana ngam sia piak tu in kamciam pia ahihang amate in tua ngam mu ngawl tu hi ci in a ciansiat bangma in thi siat uh hi.

⁷Hite ii tapate sia vunteap ki at om ngawl hi; Joshua ii vunteap a atsak te hi khangthak te ahi hi.

⁸Vunteap a at zawkciang minam bup sia a ki atna maa dam dong ngiaphual ah taam uh hi.

⁹Topa in Joshua mun ah, “Tu ni in Egypt ngam ah na sal tan uh hu a na min daina uh teng kong laak keaksak hi,” ci hi. Tua hu in tua mun sia Gilgal kici hi, tu dong ma kici lai hi.

¹⁰Jericho hui zaangtam Gilgal ah Israel te ngiaphual a saat uh lai, tua tha a ni sawm le ni li ni in Paisan Poai khaam uh hi.

¹¹A khuavak ni sia Canaan ngamah a kiciing ante a neak phit hi a; antang em le anluum tol saw ngawl te ne uh hi.

¹²Manna an hong kia te zongh tawm ahikom Israel te in a ne nawn bua uh hi. Tua hun pan kipan Canaan ngam ah a kiciing ante ne uh hi.

Joshua le Namsau Toai pasal khat

¹³Joshua sia Jericho nai ah a om lai in pasal khat namsau toai in ama ii mai ah a ding mu hi. Joshua sia ama ii kungah paito a, “Nang sia ko ii ngalkap ni ziam maw ka ngalte ni ziam?” ci in dongh hi.

¹⁴“Khat zongh hi bong, kei sia Topa ii ngalkap uk pa khi hi,” ci hi. Joshua in ama bia tu in lei ah bok a, “Topa awng, kei na naseam pa khi hi, bang hong sawl nuam ni ziam?” ci hi.

¹⁵Tuaciang Topa ii ngalkap uk pa in, “Na peangdap suut in, a thiangtho mun tungah ding ni hi,” ci hi. Joshua in a sawl bangin ni hi.

Joshua 6

Jericho Khua Bona



- ¹Israel te tum thei ngawl natu in Jericho khua kongpi kikhak hi. Kuama sungtang thei ngawl pusuak thei ngawl hi.
- ²Topa in Joshua ii tungah ci hi, “Jericho khua sia a kumpipa le a ngalhang theampo taw kopin na khut sungah hong koi zo khi hi.
- ³Nang le na ngalkapte khuapi kiimkot ah ni khat in khat vei veu ni luk sung pai tu nu hi.
- ⁴Thiampi sali sia lemle khat tek toai in thukham thingkuang mai ah pai tu hi. A ni sali ni ciangin nang le na ngalkapte sia khuapi kiimkot sali vei pai tu nu hi, tuasia laitak thiampite in lemle hong tum tu uh hi.
- ⁵Tuaciang, amate in lemle aw a sau in khat vei hong muut tu hi. Tua aw na zaak po ciang pasal te a vekpi in a nging tak au tu uh a, tuasia ciang khuapi uumna luphung hong cimhtham tu hi. Ngalkap hon bup sia a tangtan in khuapi sungah tum tu uh hi.”
- ⁶Joshua in thiampite sam a, amate ii tungah, “Thukham thingkuang la vun a, tua ii mai ah lemle khat tek a toai thiampi sali pai vun,” ci hi.
- ⁷Tua zawkciang a mipite ii tungah khuapi kiimkot ah a pai natu thu a pia hi, a madawk ngalkap pawlte Topa ii thukham thingkuang mai ah paisak hi.
- ⁸⁻⁹Tua ahikom, Joshua ii thupiak sa bangma in ngalkap madawk pawlte sia thukham thingkuang a pua thiampite ii mai ah pai uh a, tua thiampite in lemle tum uh hi. Hite ii nung panin thukham thingkuang a pua thiampite hong pai uh a, tuate ii nung pan a nungdal ngalkapte in zui uh hi. Hi hunsung bup sia lemle aw nging hi.
- ¹⁰Ahihang Joshua in a mite sia a au ngawl natu in thoh hi, kammal khat zongh a pau ngawl natu in thupia hi.
- ¹¹Tua ahikom ama in hi mipawlte sia thukham thingkuang pua in khuapi khat vei a kiimkot natu thupia hi. Tua zawkciang amate ngiaphual ah hong cia kik uh a, tua munah zan ngiak uh hi.



12-13 Joshua sia zing tuungin tho a, thiampite le ngalkapte sia a nii veina khuapi kiimkot ah a ni masa ni a pai uh bang tatakin pai uh hi. A masa in ngalkap madawk pawl, a zom in thiampi sali te lemle sali tumin tua zom ah thukham thingkuang a pua thiampite, a khak bel in nungdal ngalkapte pai uh hi. Hi hun sung teng lemle sia ngin tan hi.

14 Hi a ni nii ni in amate in khuapi kiimkot khat vei pai uh a, ngiaphual zuan kik uh hi. Ni luk sung hi bang veu in vawt uh hi.

15 A ni sali ni amate khuavak po ciang tho uh a khuapi kiimkot ah sali vei a pai ngei uh bangin hong pai kik uh hi— hi sia sia khuapi kiimkot a pai uh ni khat bek ahi hi.

16 Khuapi sali vei kiimkot a, thiampite in lemle muut tu in a kipat laitak, Joshua in a mite a au keak natu thupia hi. Hi bangin ci hi, “Topa in khuapi sia no hong pia zo hi!

17 Khuapi le a sunga om theampo sia Topa tunga piakkhiatna bangin kisia cip tu hi. Numei pumpi kizuak Rahab le a innkuanpuite bek kisuatak tu hi, ama in ih ngal vil thudawpte hong sealsak hi.

18 Ahizong a kisia tu nate khat zongh la thei ngawl tu nu hi, tuabang na ngamta uh le ngimna le lalna Israel te sungah tungsak tu nu hi.

19 Ngun, kham, taungo le thik taw a kivawt vanh theampo sia Topa atu a thiangtho in kikoi hi. Tuabangte sia Topasum kholna ah kikoi tu hi.”

20 Tua ahikom thiampite in lemle muut a, mipite in tua a zaak ciang nging takin au uh a, tuaciang luphung pangte a cimtham hi. Tuaciang ngalkap hon bup in mual tungah hong kaato uh a, tang takin hong pai uh a, khuapi la uh hi.

21 A namsau uh taw khuapi sung om theampo thatlum uh hi, numei, pasal, khanghaam, khangmoi. Amate in khui, tuu le laa te zongh thatlum siat uh hi.

22 Joshua in pasal thukan in a paisak te nii sam a, “Pumpi zuak numei nu inn sungah tum tavun a kamciam na piak sa uh bangma, ama le a innkuanpuite hong pusua tavun,” ci hi.



²³Tua ahi ciang amate in Rahab sia a pa, a nu, a suapui pate, a suapui numeite le a innkuanpuite taw hong pusua uh hi. Amate in tua innkuante le a salte dongin hong la uh a Israel te ngiaphual nai ngam muanna khat ah koi uh hi.

²⁴Tua zawkciang amate in khuapi sia a tumtham diipdeap dongin a sung a om theampo taw cip in hal uh a, kham, ngun, taungo le thik taw a kivawt vanhte hal ngawl hi, tuate ahile amate in la in Topa sum kholna ah koi uh hi.

²⁵Joshua in pumpi zuak Rahab le a mealheakte sia suatak pia hi, banghangziam cile tua numei nu in Jericho khua huvau thukan tu a, a paisak pasal nii te seal hi. (Ama ii suan le paalte sia Israel ngam ah tu ni dongin om lai hi.)

²⁶Tua hun laitak in Joshua in a ciliap huai kidop natu thu pia hi. “Mihing khat pawpo Jericho sa kik tu in a hanciam sia Pathian in haamsiat tu hi. A kuama po khuapi phungkawng a ciang sia in a tapa upa bel sia taan tu hi. A kuama po khuapi kongpi a sa kik sia in a tapa no bel sia taan tu hi.”

²⁷Tuabangin Topa sia Joshua taw omkhawm a, tuaciang ama ii minthanna sia ngambup ah kizel hi.

Joshua 7

Achan ii Khialna

¹A kisia tu na khat pawpo Jericho pan a laak ngawl natu Topa ii thupiak sia kini ngawl hi. Achan a kici pasal khat in tua thupiak sia ni ngawl hi, tua ahikom Topa sia Israel te tungah a thin so hi. (Achan sia Carmi ii tapa, Zabdi ii tupa Zerah ii suan, Judah be le phung sungah a kihel khat ahi hi.)

²Joshua in mihing pawlkhat Jericho pan Ai khua ah paisak hi, tua khuapi sia Bethel ii nisuana sangah om a, Bethaven taw kinai hi, tua mun ah ngam vil tu in sawl hi. Amate in a sawl teng a sep zawk uh ciang

³Joshua tungah a muna uh bang thu puak kik hi: “Ai khua sim natu in mihing theampo kuan kul ngawl hi. Pasal tulnii pan tulthum khawng kuansak lel in.



A sim tu in ngalkap hon bup puak heak in; a khua sia khuapi lian hi ngawl hi,” ci uh hi.

⁴Tua ahikom Israel te mihing tulthum in sim uh a, ahizong amate ngal lel in hong nungkin kik kul hi.

⁵Ai mite in amate sia khuapi kongpi panin suangkhuik pawlkhat omna dong uum uh a, mihing sawmthum le luk khawng mual tung pan del suk kawmin that uh hi. Tuasia ciang Israel te sia a thin letna bo a, lau uh hi.

⁶Joshua le Israel lampuite sia heena taw a puansilh lai uh hong baltham uh a, Topa ii Thukham Thingkuang ii mai ah lei hong liik uh a, a khuangaina lakna in a lu tungah leivui kithe in, tua munah nitak dong lum uh hi.

⁷Tuaciang Joshua in ci hi, “Topa Pathian awng! Banghang peuma in Jordan ngun hong kantansak ni ziam? Amor mite khut sungah hong aap tu in maw? Hong lalcipsak tu in maw? Banghang in Jordan ngun lang khat ah om po ngawl ka na khu ziam?”

⁸Tu in Israel te sia ngal mai panin nungkin thong ci leang bang son nawn tu khi ziam? Topa awng.

⁹Canaan mite le ngam sung a mihing om theampo in hi thu za nanak tu hi. Amate in hong kiim uum tu a, khat simin hong that siat tu hi. Tuasia ciangin na min na kihuk natu in a bang vawt thei nawn tu ni ziam?”

¹⁰Topa in Joshua mun ah ci hi, “Thoto in banghangin hi bangin lei ah lum nu ziam?”

¹¹Israel in mawna vawt zo hi! Amate in kei taw thukimna a vawt uh sia len ngawlin paltan zo hi. Lalcipsak tu in a ki nilkhia na pawlkhatte amate in la zo hi. Amate in ngu a, tuate huvau leilot thu sonin amate ii vanh taw keamkhawm hi.

¹²Hi sia hu in Israel in a ngalte nalh zo ngawl hi. Tuate ii mai pan amate a nungkin sia banghangziam cile amate mama sia tu in a lalcip tu in nilkhiat thuak zo hi! Laak ngawl tu in hong kisawl vanh te na suksiat cip uh ma teng kei no taw hong om khawm nawn ngawl tu khi hi.



¹³Tho in! ka mai ah hong pai tu in mihingte thiansua in. Zing ciang kinging khol sa in a om natu son in, banghangziam cile Kei, Topa, Israel ii Pathian in hi teng son tu ka nei hi. ‘Israel awng note kawm ah suksiat tu a thu kong piak na pawlkhat keam nu hi. Hi nate na suksiat uh mateng na ngalte uh na zo buatu uh hi.’

¹⁴Tua ahikom zingsang ciangin amate sia nam khat zawkciang nam khat, mai ah hong kipaipui tu uh hi. A nam ka tealte sia phung khat zawkciang phung khat mai ah hong pai tu uh hi. A phung ka tealte sia innkuan khat zawkciang khat mai ah hong pai tu uh hi. Innkuan ka tealte sia pasal khat zawkciang khat mai ah hong pai tu uh hi.

¹⁵Pasal tuabang a kiteal sia a kinilkhin vanhte taw kiman a, ahile tua pa sia kihal lum tu hi, a innkuanpuite le a neisa theampo taw kihal tu hi, banghangziam cile ama in a kiitak huai mama maizumna Israel tungah tungsak a ka thuciam paltan hi.

¹⁶A khuavak ni zingtuungin Joshua in Israel te nam khat zawkciang nam khat mai ah a paisak ciang Judah namte kiteal hi.

¹⁷Ama in Judah namte, mai ah paisak a, phung khat zawkciang phung khat a paisak ciang Zerah be le phungte kitealkhia hi. Tua zawkciang ama in Zerah beta sung innkuan khat zawkciang innkuan khat, mai ah a paisak le Zabdi ii innkuante kitealkhia hi.

¹⁸Tua zawkciang ama in Zabdi ii innkuante khat zawkciang khat mai ah paisak a, Zabdi ii tupa, Zerah ii tapa Achan sia tealkhia hi.

¹⁹Joshua in ama ii mun ah, “Ka tapa awng Israel te Pathian Topa mai hi sungah thumaan son in a pualaak in. Tu in hong son tan a, bang teng tak vawt ni ziam. Kei kung panin seal tu hanciam heak in,” ci hi.

²⁰Achan in zokik a, “Topa Israel te Pathian tungah maw peu khi hi, tuaciang ka ngam tatna sia hi bang teng hi.

²¹Vanh ih mat te sungah Babylon te puantungsilh hoi mama khat ka mu hi, ngun toai khat tu khawng khamtawn toai lang khawng ka mu hi. Tuате dei



leilam ka hi man ka la hi. Ka tuipuan buk sungah kiphum in na mu tu a ngun teng sia a taw nung bel ah om tu hi.”

²²Tua ahikom Joshua in pasal pawlkhat sawl a, amate tai in tuipuan buk sung a zon le a kinilkhin vanhte kiphum in om takpi a, a ngunte a taw nung bel ah om hi.

²³Amate in tua vanhte lakhia in Joshua ii kung le Israel mipite mai ah Pathian ii mu tu in lui uh hi.

²⁴Joshua le Israel mipite in Achan pummat uh a, a ngun, a puantual puasilh, a khamtawn te, Achan ii tapate le tanute, a khui, a laa, a tuu le a tuipuanbuk le a neisa theampo matsak uh hi, tuaciang amate in tuate a vekpi in Ngimna Luamkuam ah paipui uh hi.

²⁵Joshua in, “Banghangin taza ta ngimna te ko tungah hong tungsak ni ziam?Topa in tu in nang ngim hong pia tu hi!” ci hi. Mipi theampo in Achan sia suangtum taw deanglum hi; amate in a innkuanpuite le a neisa theampo zongh deangin haltum uh hi.

²⁶Amate in ama ii luang tungah suangtum khawl lianpui khat seng uh hi, tuate sia tu ni dongin om lai hi. Tua hu in tua mun sia Ngimna Luamkuam kici lai hi. Tuasia ciang Topa a thin so nawn ngawl hi.

Joshua 8

Ai Khua a Kilaakna le a Kilalcipsakna

¹Topa in Joshua ii munah ci hi, “Ngalkapte a vekpi in keng in a, Ai khua ah va pai to tavun. Lau heak vun a thinkiam heak vun. Ai khua kumpipa tungah zawna nang kong pia tu hi; a mite, a khuapi le a leitangh te nang aa hi tu hi.

²Jericho khua le a kumpipa tungah na vawt uh bangin Ai khua le a kumpipa tungah na vawt tu uh hi; ahihang tu sia hun ciang vanhte le ngannote noma neisa tu in na la thei tu uh hi. A muanmawk ngawl het tu in khuapi sia a nungsang pan sim tu in kithoi vun.”



³Tua ahikom Joshua sia a ngalkap theampo taw Ai khua ah kuan tu in kinging hi. Ama in a ngalkapte sung pan a phabel tul sawmthum teal a, zanin pai khiasak a,

⁴thupiakna hi teng pia hi, “Khuapi ii lang khat ah na buu vun a, ahizong a khuala leilam ngawl na teal vun; a sim tu in na kinging vun.

⁵Ka mite le keima in khuapi sang kong zuan tu uh hi. Ai khua mihingte in ko ii lang panin hong pai uh ciang a masa in ih ngamtat bangin ko kong kiheak tu uh a, kong tai tu uh hi.

⁶Khuapi panin a paikhiat dong ko hong del tu in kong vawt tu uh hi. A masa lai bangma in amate kung pan a taikeak bangin hong ngaisun tu hi.

⁷Tuasia ciang no sia na bukna uh panin nong pai tu uh a, khuapi nong la tu uh hi. Topa na Pathian in tua khuapi sia no hong pia tu hi.

⁸Khuapi na laak zawk uh ciang, Topa ii hong thupiak bangin na haltham tu uh hi. Hi teng sia zui tu thu piakna hi.”

⁹Tua ahikom Joshua in amate paikhiasak a, Ai le Bethel kilaklaw, Ai ii nitumna sang a bukna tu mun zuanin tua sung pan ngak uh hi. Joshua sia ngiaphual ah zan ngiak hi.

¹⁰Zingsang khuavak tuungin Joshua in ngalkapte khawmtua hi. Tuaciang ama le Israel lampuite in amate Ai khua sang zotpui hi.

¹¹Ama taw a kithua ngalkapte in khuapi tumna kongpi sangah pai uh a, saksang Ai le amate kilaklaw luamkuam khat omna ah ngiaphual saat uh hi.

¹²Ama in mihing tulnga bang la in khuapi ii nitumna sang Ai le Bethel kilaklaw ah a buu tu in koi hi.

¹³Ngalkap te sia a kido hun tak ciang ngiaphualpi a om teng khuapi iisak sangah, a dang a om lai teng nitumna sangah diang tu in hawm hi. Joshua ahile luamkuam sungah zan ngiak hi.

¹⁴Ai kumpipa in Joshua ii mite a mu ciang manlang takin hong diang hi. Ama le a mite in Jordan Ngun kuam sungah a masa a lai bangma in Israel te do tu



in hong pai uh hi, amate sia a nungsang panin kisim tu ci zongh a he meal bua uh hi.

¹⁵Joshua le a mite sia nungkin bangin hong kiheang a, mun awngna sangah hong taimang uh hi.

¹⁶Khuapi sunga om pasal theampo sia ngalte del tu in kism a, tuabangin amate in Joshua a del uh ciang, amate sia khuapi pan a khuala vaialna hong theng uh hi.

¹⁷Pasal minpiang in Israel te del ahikom khuapi kihong keak a, kuama a hung tu om ngawl hi.

¹⁸Tuasia ciang Topa in Joshua ii mun ah, “Na teipalh sia Ai khua kawksak in; na tungah tua khua hong pia khi hi,” ci hi. Joshua in ama a kisawl bangin ngamta hi,

¹⁹ama in a khut a lapto po ciang, a buu ngalkapte ding to uh a, khuapi sangah tai in tua khuapi la uh hi. A zawk po ciang khuapi hal uh hi.

²⁰Ai mite in a nung a lee et kik uh ciang, meikhu van ah a kaato mu uh hi.

²¹Amate atu in suatak natu lampi om ngawl hi, banghangziam cile Israel te a kolhna ngam sangah a tai te sia tu in hong kingeilee kik uh a, Ai mite thatlum tu in hong kipan uh hi.

²²Israel te khuapi sunga omte sia tu in a lawmte hu tu in hong paisuk uh hi. Tua ahikom Ai mite in amate le amate ngalte in kiim uum zo ci in phawk uh a, a vekpi in kithatlum hi. Kuama suakta ngawl a,

²³Ai kumpipa sim ngawl kuama nungta in a suakta om ngawl hi. Ai kumpipa ahile kiman a Joshua ii kungah kipuak hi.

²⁴Israel te in ngamkolna sung dongin amate a del ngalkapte thatlum siat uh hi. Tuaciang amate Ai ah heak kikin tua munah a om theampo thatlum siat uh hi.

²⁵⁻²⁶Joshua in a teipalh zum sia Ai khua kawksak a, tua munah a om mihing theampo a kithalup mateng in a tei a khia bua hi. Tua ni in Ai khua



mite a vekpi in kithatlum siat hi, numei pasal a kingawm tul sawm le tulnii pha uh hi.

²⁷Topa ii Joshua a sawl bangin Israel te in vanhte le ngannote amate neisa tu in keam uh hi.

²⁸Joshua in Ai sia haltum a, a zancip in nusia hi. Tu hunin zongh tuabangma in om lai hi.

²⁹Ama in Ai kumpipa sia thingkung khat tung panin awksak a, a nitak dong a luang tuabangin nusia hi. Nitum ciangin Joshua in a luang a laak natu thupia a, khuapi tumna khuapi kongpi ah vawksuk uh hi. Amate in a luang sia suangtum hon khat taw del in, tu ni dongin tua suangte omlai hi.

Ebal Mualvum ah Thukham Simna vawt

³⁰Tuaciang Joshua in Ebal Mualvum ah Topa Israel te Pathian atu biaknatau khat ciang hi.

³¹Topa ii naseam pa Moses ii Israel te tungah hilna a piak, Moses ii Thukham sungah, “Thikhiam taw a kitan ngawl suangtum biaknatau” ama in vawt hi. Tua ii tungah amate in Topa atu meihal biakpiakna le kipawlkhop biakpiakna pia uh hi.

³²Tua munah Israel mit mu tangin Joshua in Moses ii Thukham a at sia taw a kibang linlian khat suang tungah at hi.

³³Israel mite in a lampuite, a maangte, a thukhente le amate kawm a om ngamdang mite teng taw Thukham Thingkuang ii a lang le a lang ah kingual in, Levi thiampite tua thingkuang a puate maingat uh hi. A mite sung pan a lang in Gerizim Mualvum nungngat uh a, a lang in Ebal Mualvum nungngat in ding uh hi. Amate in thupha saang tu in hong pai uh ciangin tu a bangin ngamta tu hi ci in Topa ii naseam pa Moses ii thukham om hi.

³⁴Joshua in Thukham laibu sungah a ki at, a sungah a om thuphate le haamsiatna te kihel in Thukham buppi a ngingin sim hi.



³⁵Moses ii thupiakte theampo, numei zongh patang zongh, ngamdang mi amate sung a teangte dong, a kikhawm buppi tungah Joshua in khat ii simin sim hi.

Joshua 9

Gibeon Mite in Joshua Theam

¹Israel te ngalzawna thu Jordan nitumna sang mualtung kumpi theampote in he hi, mualpeangte le Mediterranean Tuipi vaal zaangtamsaksang Lebanon dong; hite sia Hit kumpipa, Amor kumpipa, Canaan kumpipa, Periz kumpipa, Hiv le Jebus kumpipate ii uk sung ngamte ahi uh hi.

²Amate hong kingawmtua in a tha neina uh ngawmtua in Joshua le Israel te sim tu in hong pai uh hi.

³Ahihang Hiv minam Gibeon mite in Jericho le Ai khuate Joshua in bang law ci sia za uh hi,

⁴tuaciang amate in Joshua theam sawm uh hi. Amate pai in nguai an pawlkhat sia ip sia sa sung le, savun tuithawl a kiphaw bikbek sungah heang uh hi.

⁵Amate in puansia ngapkaai silh in phaw zazan sa peangdapte bul uh hi. Anluum a ko sa le a ap sa pawlkhat keng uh hi.

⁶Tuaciang amate in Gilgal ngiaphual ah pai in Joshua le Israel mite mun ah hi bangin ci uh hi. “Ngam khuala na pan hong pai khu hi. Ko taw kilemna kamciam nong vawt tu uh dei khu hi.”

⁷Ahihang Israel te in, “ A banghang peuma no taw kilemna kamciam vawt tu khu ziam? A nai no na ah teangte po na hi tha na uh zongh kihe ngawl hi,” ci uh hi.

⁸Amate in Joshua ii mun ah, “Ko sia nangma ii nong sawltak tu in hong ki aap khu hi,” ci hi. Joshua in amate mun ah, “No akuate nu ziam? Koisung pan hong pai nu ziam?” ci in dongh hi.



⁹Tuasia ciang amate in hi thu son uh hi. “Topa awng, ko sia ngam khuala mama na khat pan hong pai khu hi, banghangziam cile Topana Pathian uh ii thu ka za uh hi. Egypt ngam a, a sep a vawt theampo ka za uh hi,

¹⁰Jordan ngam niswana a teang Amor kumpipate nii, Hesbon a teang Kumpi Sihon le Ashtaroth a teang Bashan te Kumpipa Og tunga a vawtna teng zongh ka za uh hi.

¹¹Ka lampuite uh le ka ngam sunga teang mite theampo in nguai an keng in no taw kimu tu in khualhaw in hong sawl hi. Noma ii sawltak tu in ki aap in hong kisawl a, kilemna kamciam vawtin hong sawl hi.

¹²Ka anluum uh te en vun. Tuata pua in inn pan ka pusua uh lai in lum lai zaw sap hi. Ahihang tu in en vun! Tu in kocip a ap zo liang hi.

¹³Hi savun thawlte ka dip uh lai in thak sitset lai hi, ahihang tu in en leute! Tu in ekkeak zo hi. Ka puansilh uh le ka peangdap uh te zongh khua khuala hawna hu in paat vadil zo hi!” ci hi.

¹⁴Israel te in an pawl khat amate ii tung pan saang hi, ahihang tuata taw kisai in Topa a dongh bua uh hi.

¹⁵Joshua in tua Gibeon mite taw kilawmtakna kamciam vawt a, amate nungtasak hi. Israel mipawlte ii lampuite in tua thuciam sia a kholet natu kamciam pia uh hi.

¹⁶Thuciam a vawt zawk ni thum ni ciangin Israel te in hi mite sia a nainona ah minamte hi ci in phawk uh hi.

¹⁷Tua ahikom Israel te dingkhia uh a ni thum a pai zawkciang hi mite ii teenna khuapi ahi Gibeon, Chephirah, Beeroth, le Kiriath Jearim ah theng uh hi.

¹⁸Ahihang tua khua mite Israel te in a that thei bua uh hi, banghangziam cile Israel te lampuite in Israel te Pathian Topa min taw ciliap huai takin kamciam na vawt zo uh hi. Mihingte theampo in lampuite ii tungah hi thu huvau in lungkim ngawlina a pua tek uh hi,

¹⁹Ahiahang amate in zokik a, “Israel te Pathian Topa ii min taw amate tungah kamciam ciliap huai takin ih pia zo hi. Tu in amate bangma kilaw thei nawn ngawl hi.

²⁰Ih kamciam vawt hu in amate sia ih nuntaksak kul tu hi; tuabangin ih hi buale Pathian in ei sia daan hong pia tu hi.

²¹Tua ahi ciang nungta taken, ahizong ei atu thing hong tomsak in tui hong toaisak taken,” ci in lampuite in a ngaisutna pia uh hi.

²²Joshua in Gibeon mite ama mai ah hong kipaipui tu in thu pia hi, tuaciang amate hi bangin dongh hi, “Hi sung teng ma a teang napi banghangin a khuala mama na ah ka teang uh ci in hong theam nu ziam?

²³Hi bangin na ngamtat uh hu in Pathian in no sia hong nilkhiin zo hi. Na mite uh sia sal hi tawntung tu a, ka Pathian ii biakna munah thingtom in tui toai tu nu hi,” ci hi.

²⁴Amate in zokik a, “Hi bangin ka ngamtat uh sia banghangziam ci le Topa na Pathian uh in a naseam pa Moses tungah thupia a, ngamkuam buppi no hong piak a, a sung a teang mite sia na mainawt uh kawmin thatlum siat tu ci thu sia maan mama hi ci in tel khu hi, Topa awng, tua hu in hi bangin ngamta khu hi, ko sia nasia takin lau khu hi, ka nuntakna a tu mama in patau khu hi.

²⁵Tu in ko sia nangma ii thu neina nuai ah om khu hi. Tang nasak bel bangin ko tungah hong seam tan,” ci uh hi.

²⁶Tua ahikom Joshua in hi bangin vawt hi: ama in amate sia hung a, Israel te ii thalup tu a oai bua hi.

²⁷Ahiahang tua hunin amate sia sal suak hi, Topa ii biaknatau atu le Israel mite atu thingtomsakin tuitoaisak hi. Tu ni dongin Topa ii tealna biakpiakna mun pawpo ah tua nasepte seam tan lai uh hi.

Joshua 10

Amorte Kizo

¹Jerusalem kumpipa Adonizedek in Joshua ii Ai khua la in, zanciimsak a, a kumpipa a thalup le Jericho khua le a kumpipa a vawtna teng za hi. Gibeon



mite zongh in Israel mite taw kilemna vawt a, amate taw teangkawm hi ci in za hi.

²Jerusalem mite sia nasia takin patau uh hi, banghangziam ci le Gibeon sia kumpi a nei khuapi khat pawpo cia ma pha hi. Ai sangin zongh lian zaw, a mite zongh ngal vawt thiam vive hi.

³Tua ahikom Adonizedek in Hebron Kumpipa Hoham, Jarmuth Kumpipa Piram, Lachish Kumpipa Japhia, Eglon Kumpipa Debir tu teng tungah thu puak hi.

⁴“Hong pai tavun a Gibeon hong sim pui tavun, banghangziam cile amate in Joshua le Israel te taw kilemna vawt hi,” ci hi.

⁵Hi Amor kumpi nga, Jerusalem, Hebron, Jarmuth, Lachish le Eglon te Kumpipa te in a ngalkap uh ngawmtua in, Gibeon khua a kiim uum zawkciang sim uh hi.

⁶Gibeon mite in Gilgal ngiaphual ah Joshua kungah kamtai paisak hi. “Topa awng, hong nusia heak vun! A manlang in hong pai tavun a hong hu tavun! Hong hun tavun! Mualtung a teang Amor kumpite theampo in a ngalkap uh ngawmtua in ko hong sim uh hi,” cisak hi.

⁷Tua ahikom Joshua le a ngalkap hon bup, ngal lamsang a nasia bel te a kihel, Gilgal panin dingkhia uh hi.

⁸Topa in Joshua munah, “Amate kiita heak in. Amate zawna keima in nang hong pia zo khi hi. Amate khat zongh in nang hong nalh zo ngawl tu hi,” ci hi.

⁹Zan khua teakin Joshua le a ngalkap hon sia Gilgal pan Gibeon khua sang zuanin kuan uh a, Amor te heak khol ngawlin sim uh hi.

¹⁰Topa in Amor te sia Israel ngalkapte a mu po ciang patau keaksak hi. Israel te amate Gibeon ah thatlum uh a, a taite Beth Horon mualciangh dong delsuakin thang sangah Azekah le Makkeda dong delsuak hi.



¹¹Amorte mualciangh zu in Israel te mai ah a taisuk uh ciang, Topa in ngialtang puite Azekah dong kiasuksak hi. Israel te ii thalup sangin ngialtang ii denlup tam zaw hi.

¹²Amorte tungah Israel te ii zawna Topa ii piak ni in, Joshua in Topa paupui hi. “Ni awng, Gibeon tung san ah ding top in, Tha awng, Aijalon Kuam tungah tawlna in,” ci hi.

¹³Ni zongh ding top a, tha zongh Israel te ii a ngalte a zaw sitset dong a pai bua hi. Hi sia sia *Jashar laibu* sungah ki at hi. Ni sia van zanglai ah ding top a, ni buppi a tum suk bua hi.

¹⁴Tua masia hi kale a zawkciang hi kale Topa ii mihing thu a nit hun om ngei ngawl hi. Topa sia Israel te sang pangin ngal sim hi.

¹⁵Hi sia zawkciang Joshua le a ngalkap honpite Gilgal ngiaphual zuan kik uh hi.

Joshua in Amor Kumpi Nga teng Man

¹⁶Amor kumpite nga teng sia suakta in Makkeda leihawng sungah buu uh hi.

¹⁷Pawlkhath in amate mu a, amate ii bukna mun Joshua hil uh hi.

¹⁸Ama in, “Lei kua hawng ii mai ah suangtum lianpui pawl khat lumliik vun. A cing tu pawlkhath koi vun,

¹⁹ahihang noma tatak tua munah om heak vun; ngalte zuizen vun a, a nungsang pan sim vun; a khuapite ah thengsak kik heak vun. Topa na Pathian in amate ii tungah zawna no hong pia zo hi.

²⁰Joshua le Israel mite in amate sia thatlum vapeak hi, ahihang pawlkhathte sia a khuapi luphung pang sung sang theng zo a, kithatlum ngawl hi.

²¹Joshua ii mite a vekpi in bangma tat ngawlin Makkedah ah ama ii kungah hong cia kik uh hi. Ngam sunga om mite kuama in Israel te sia ngen zongh ngensia ngam ngawl hi.

²²Tua zawkciang Joshua in, “Leihawng sung tumna teng hong keak vun a, tua kumpi nga teng ka kungah hong paipui tavun,” ci hi.



²³Tua ahikom leihawng sia hong keakin, Jerusalem, Hebron, Jarmuth, Lachish le Eglon kumpipate nga teng pusua in,

²⁴Joshua ii kungah paipui uh hi. Joshua in Israel te bup sam a, ngalkap mang ama taw a kuankhawm te munah, tua kumpite ii ngawng a peang uh taw siikin sawl hi. Tuabangin ngamta uh hi.

²⁵Tuaciang Joshua in a ngalkap maangte munah, “Kiita heak vun a, thinkiam heak vun. Takkha vun a kimuang vun, banghangziam cile hi sia in na ngalte theampo ii tung a Topa ii sep tu zia ahi hi,” ci hi.

²⁶Tua zawkciang Joshua in kumpi nga teng thatlum in thingkung nga tungah a luangte nitak dong khai uh hi.

²⁷Ni tum ciangin Joshua in thupia a, amate bukna leihawng sungah a luangte lawnsak hi. Suangtum puite lianghawng kua mai ah koi uh a, tu dong ma in om lai hi.

Joshua in Amor ngamkhen La thua

²⁸Tua ni in Makkedah khua sia Joshua in sim in, zo hi. A kumpipa zongh man hi. A kumpipa le a khua mi theampo khat zongh khe ngawlin that siat hi. Jericho kumpipa a vawt bangma in Makkedah kumpipa zongh vawt hi.

²⁹Tua zawkciang Joshua in a ngalkapte taw Makkedah panin Libnah ah pai in sim hi.

³⁰Topa in Israel te tungah khuapi le a kumpipa zawna pia leleau hi. Amate in kuama khoaikhe ngawlin a sunga om theampo thatlum siat uh hi. A kumpipa tungah Jericho kumpipa tungah a vawt bangin amate in vawt uh hi.

³¹Tua zawkciang Joshua le a ngalkapte Libnah panin Lachish ah mainawt uh a, kiim uum in sim uh hi.

³²A kido ni nii ni ciang Topain Israel te tungah Lachish khua zawna pia hi. Libnah ah a vawt uh bangma in kuama khoaikhe ngawlin khuapi sunga om theampo thatlum uh hi.

³³Gezer te Kumpipa Horam in Lachish hu tu hong pai ahihang amate sia Joshua in zothal a, a ngalkapte kuama nungta ngawl hi.



³⁴A kizom in Joshua le a ngalkapte sia Lachish panin Eglon ah hong kuan uh a, kiim uum in sim uh hi.

³⁵Tua ni ma in a khuapi la uh a, tua sungah a om theampo thatlum uh hi, Lachish ah a vawt bang keak ma in tu sungah vawt uh hi.

³⁶Hisia zawkciang Joshua le a ngalkapte Eglon panin Hebron mual tungah kaato in sim uh a,

³⁷tuaciang a khua la uh hi. A kumpipa pan kipan khuapi sunga om theampo le kiim le paam khuapino sunga om theampo thatlum uh hi. Joshua in tua khuapi sia a zancip tu in thupia a Eglon a lai bangma in vawt hi. Kuama a nungta in, a kikhe bua hi.

³⁸Tua zawkciang Joshua le a ngalkapte hong heak kik uh a, Debir khua hong sim uh hi.

³⁹Ama in tua khuapi le kiim le paam khuapinote la hi. Tua mun a om theampo thatlum siat uh hi. Hebron khua le Lachish khuapite tung le a kumpite veve tungah a vawt bangin Joshua in Debir khua ah vawt hi.

⁴⁰Ngam kuam bup Joshua in zothal hi. Mual tung ngam kumpite zo a, niswana sang mualpangh le nitumna sang mualpeangte, mun kona thangsang ngamte zo siat hi. Kuama khoaikheet nei ngawlin thatlum siat hi. Hi sia sia Topa Israel te ii Pathian thupiak ahi hi.

⁴¹Joshua ii ngalsim sia thangsang Kadesh Barnea pan tuipi hui Gaza, Goshen ngamkhente a kihel,saksang pan Gibeon dong ahi hi.

⁴²Joshua in kumpite le a ngam a lei te sim khat sungah zo siat hi, banghangziam cile Topa Israel te ii Pathian sia Israel te sang panin ngal sim hi.

⁴³Hisia zawkciang, Joshua le a ngalkapte Gilgal ngiaphual ah cia kik uh hi.

Joshua 11

Joshua in Jabin le Ama ii Pawlpuite Zo



- ¹Hazor Kumpipa Jabin in Israel te ii ngalzawna thuthang a zaak ciang, ama in Madon Kumpipa Jobab, Shimron Kumpipa le Achshaph Kumpipa,
- ²saksang ngam mualtung ngam a teang kumpite, Galilee Tuili thangsang, Jordan kuam, mualpeangte le tuipi hui Dor nai a kumpite mun ah thu zasak hi.
- ³Jordan ngun lang le lang a teang Canaante tung le Amorte, Hit te, Periz te, mual tunga teang Jebus te, Mizpah ngam Hermon Mualvum a teang Hiv te munah thu zasak hi.
- ⁴Amate in a ngalkap nei theampo uh taw tuipi hui a, sen mal za in mihing a tam ngalkap honte taw hong kuan uh hi. Amate in ngal siphu leang le siphu zongh tam ma nei hi.
- ⁵Hi kumpite in a ngal thahatna uh teng ngawmtua in, Israel te sim tu in hong kuan uh a, Merom Lui ah ngiaphual saat uh hi.
- ⁶Topa in Joshua ii munah, “Amate kiita heak in. Zing ciang hi hunin Isrealte atu, amate thatlum siat tu khi hi. Noma in a siphute na liam na baaisak tu uh a, a ngalleangte na haltham tu uh hi,” ci hi.
- ⁷Tua ahikom Joshua le a mite in a ngalte uh Merom Lui ah a muanmawk ngawl lai takin sim uh hi.
- ⁸Topa in Israel te zawna pia hi; Israel te in ngalte sia Misrephoth Maim le Sidon dong nisuana sang pan Mizpah kuam dong simin del uh hi. A ngalte khat zongh a om nawn ngawl dong kido tan uh hi.
- ⁹Joshua in Topa ii thupiak bangin a siphu uh te liamsakin, a ngalleang uhte halthapsak hi.
- ¹⁰Tua zawkciang Joshua heak kik a Hazor khua la in, a kumpipa thatlum hi. (Tua hun lai in Hazor sia kumpi nei ngam teng pan a hatbel ahi hi).
- ¹¹Tua munah a om theampo thisak uh hi; kuama a nungta in kikhe ngawl a, a khuapi kihaltum hi.



¹²Joshua in hi khuapite le a kumpipate manin, Topa naseam Moses ii thupiakna bangin, misim in thisak uh hi.

¹³Ahihang Israel te in Joshua ii halthap Hazor simngawl mualbawkwungah a kisa khuate khat zongh hal ngawl hi.

¹⁴Israel mite in hi khuapite sung pan vanh manphate le ngannote amate atu in la uh hi. Ahihang mihing simin thatlum uh a, khat zongh a nungta in a kikhe om ngawl hi.

¹⁵Topa in a naseampa Moses tungah thupia in, Moses in Joshua tungah tua thupiaknate son sawn a, Joshua in ni hi. Topa ii Moses thu a piak theampo ama in vawt hi.

Ngam le Lei Joshua ii Laakte

¹⁶Joshua in leitangh theampo la hi, mualtung ngamte, mualpanghte, saksang le thangsang Goshen le a thangsang ngamko teng le Jordan ngun kuam teng la hi.

¹⁷⁻¹⁸A ngam sia Halak Mualvum panin thangsang Edom hui dong kithungsuk a, saksang khakbel pan Baalgad dong, Lebanon luamkuam pan Hermon Mual thangsang dong ahi hi. Joshua sia hi ngam a kumpite taw khua ngeipi ma kisim ahihang ama in tuate zo siatin thatlum siat hi.

¹⁹Israel te taw kilemna a vawt khuapi khat bek sia Gibeon hi a, tua munah Hiv te teang hi. A dang khuapite theampo sia kidona sungah kizo siat hi.

²⁰Topa in amate sia Israel te a do natu a thin uh takkhasak mama a, a lalcip siat natu le hesuakna saang ngawlin a kithalup natu ahi hi. Hi sia in Topa ii Moses tungah a piak sa thu ahi hi.

²¹Hisia hun sungin Joshua pai in Israel le Judah ngam mualtung khua ahi, Hebron, Debir le Anab le a dang khuate ah thatang lian mama Anakim a cite lalthamsak hi. Joshua in amate le a khuapi te a lalcip dipdeap dong susia hi.

²²Anakim te khat zongh Israel ngam sungah om nawn ngawl hi; ahihang tawm khawng ahile Gaza, Gath le Ashdod ah taanglai hi.



²³Topa ii Moses a thu piak sa bangma in Joshua in ngamkuam bup la hi. Joshua in tua ngam sia Israel mite neisa tu in pia a, amate in minam khat sim atu a khen in hawm hi. Tuabangin a mite sia ngal simna panin tawlna uh hi.

Joshua 12

Moses ii A zaw Kumpite

¹Israel te in ngal hong zo ngawp uh a, leitanghte hong lua hi, Jordan ii niswana Arnon Kuam pan Jordan Kuamsaksang Hermon Mual dong ahi hi. Amate in kumpipate nii zo a,

²khat sia Amorte kumpipa Sihon hi a Heshbon ah maang hi. Ama ii kumpi ngam sia Gilead ii a ngam lang kihel hi: Tuaciang Aroer pan (Arnon kuam ii kiil a om) a kuam laizang a om khuapi, Amon ngamngi Jabbok Ngunpi dong ahi hi;

³tua ii huam sia Jordan Kuam Galilee tuili ii thang Beth Jeshimoth (Tuipi Thi ii niswana sang) le Pisgah Mualvum ii mualpeang dong ahi hi.

⁴Amate in Rephaim nam pan a khak bel ahi Bashan kumpipa Og zongh zo uh hi, ama sia Ashtaroth le Edrei ah maang hi.

⁵Ama ii kumpi ngam in Hermon Mualvum, Salecah le Bashan ngam bup Geshur le Maacah ngamngi dong le Gilead ngam lang khen Heshbon kumpipa Sihon ngam dong ahi hi.

⁶Hi kumpi niite sia Moses le Israel te in zo hi. Topa naseampa Moses in Reuben minam, Gad minam te le Manasseh minam a langte tungah amate ngam tu in pia hi.

Joshua ii A zaw Kumpite

⁷Joshua le Israel mite in Jordan ii nitumna ngam a kumpipate theampo zo siat hi, Lebanon kuam sunga Baalgad pang thangsang Edom hui Halak Mualvum dong ahi hi. Joshua in hi leitanghte a minamte atu in hawmtham in a tawntungin a neisa tu in pia hi.



⁸Hi ngamkhen ii huam teng sia mualtung ngam, nitumna sang mualpeang, niswana susuk le thangsang a ngamkona mun teng ahi hi. Hi ngam sia Hit te, Amor te, Canaan te, Perizz te, Hiv te, Jebus te ii teenna hi ngei hi.

⁹Israel mite in hi kumpite ii khuapi teng zo sia uh hi: Ai (Bethel khua hui),

¹⁰Jerusalem, Hebron,

¹¹Jarmuth, Lachish,

¹²Eglon, Gezer,

¹³Debir, Geder,

¹⁴Hormah, Arad,

¹⁵Libnah, Adullam,

¹⁶Makkedah, Bethel,

¹⁷Tappuah, Hopher,

¹⁸Aphek, Lasharon,

¹⁹Madon, Hazor,

²⁰Shimron Meron, Achshaph,

²¹Taanach, Megiddo,

²²Kedesh, Jokneam (Carmel ngam sungah)

²³Dor (Tuipi hui ah), Goiim (Galilee ngam sungah)

²⁴le Tirzah ahi uh hi. A vekpi kingawm kumpi sawmthum le khat ahi hi.

Joshua 13

A Kila lai tu Ngamte

¹Joshua tu in huai mama zo hi. Topa in ama munah ci hi, “Nang sia huai mama zo ni hi, ahihang ngam le lei tam mama laak tu om lai hi:

²Philistia le Geshur te ngam theampo,

³thang sangah Avvim te ngam bup zongh ahi hi. (Shihor lui pan Egypt te ngamngi dong,saksang pan Ekron te ngamngi dong leitangh teng sia Canaan



te neisa ci in kingaisun hi: Philistine kumpite sia Gaza, Ashdod, Ashkelon, Gath, le Ekron ah teang hi.)

⁴Canaan te ngam theampo le Mearah (Sidon te neisa hi) om lai a, Amor te ngamngi a om Aphek dong;

⁵Gebal te ii leitangh, niswana a Lebanon bup, Hermon Mualvum ii thangsang Baalgad pan, Hamaath Mualciangh dong ahi hi.

⁶Hi ngam sia Lebanon Mual le Misrephoth Maim kilaklaw a teang Sidon te ngam zongh kihel hi. Israel mite a mainaw uh ciang hi mite theampo ka notkhia tu hi. Kong sawl sa bangma in ngam le lei te sia Israel mite sungah na hawm tu uh hi.

⁷Tua ahi ciang tu in, Israel minam kua le Manasseh ii suan a lang teng ii tan tu in hawm tham in.”

Jordan Niswana sang Ngamte Hawmthapna

⁸Reuben le Gad minam te le Manasseh ii suan a lang teng in Topa ii naseam pa Moses ii piak bangin Jordan Ngun ii niswana sang ngam teng saang zo uh hi.

⁹Amate ii ngam Areer (Arnon Kuam ii kiil) le tua kuam ii zanglai a om khuapi, le mualtung zaangtam Medeba pan Dibon dong kithung hi.

¹⁰Ammon te ngamngi dong hi a, Heshbon pan a uk Amor te kumpipa Sihon ii khuapi theampo zongh kihel siat hi.

¹¹Gilead le Geshur le Maacah ngamte le Hermon Mualvum bup, Bashan bup Selecah dong kihel hi.

¹²Ashtaroth le Edrei panin a uk Rephaim kumpi nam a khakbel ahi Og ii kumpi ngam zongh kihel hi. Moses in hi mite sia zo in notkeak hi.

¹³Ahihang Israel te in Geshur te le Maacah te not ngawl uh a, Israel ngamah teang lai uh hi.



¹⁴Moses in Levi namte leitangh a pia bua hi. Topa ii Moses ii tungah a son sa bangma in Topa Israel Pathian biakpiakna tau tungah meihal biakpiaknate sung pan tel khat sia amate in tang tu hi.

Reuben Suante atu A kipia Ngam

¹⁵Moses in ngam khen khat sia Reuben ii suan innkuante ii tan tu in pia hi.

¹⁶Amate ii ngam sia Aroer (Arnon Kuam kiil a om) le tua kuam sung a om khuapi te hi a Madeba mualtung zaangtam zongh kihel hi.

¹⁷Tua ii huam sia Heshbon le mualtung zaangtam khuapi te: Dibon, Bamoth Baal, Beth Baalmeon,

¹⁸Zahaz, Kedemoth, Mephaath,

¹⁹Kiriathaim, Sibmah, Zereth Shahar kuam sung mual tung,

²⁰Bethpeor, Pisgah Mualvum pangh suk le Beth Jeshimothte ahi uh hi.

²¹Heshbon pan a uk Amorte kumpipa Sihon ii kumpi ngam theampo le mualtung zaangtamte zongh kihel hi. Moses in ama zo a, Midian ukpите ahi Evi, Rekem, Zur, Hur le Reba te zongh zo hi. Amate theampo in Kumpi Sihon taangin ngam uk uh hi.

²²Israel te ii thalupte sungah Beor ii tapa Balaam aisaan thei pa zongh kihel hi.

²³Jordan Ngun sia Reuben suante ii nitumna sang ngamngi ahi hi. Hi khuapite le khuapi note sia Reuben innkuan tuatuate ii tan tu in kipia hi.

Gad Suante atu A kipia Ngam

²⁴Moses in zongh ngam khen pawlkhat sia Gad namte le innkuante ii tan tu in a piak sa hi.

²⁵Amate ii ngam sia, Jazer le Gileadte khuapi theampo a kihel, Ammon te ii ngam a lang Aroer, Rabbah ii nisuana sang dong ahi hi;

²⁶amate ii ngam sia Heshbon panin Ramah Mizpeh le Betonim dong, Mahanaim pan Lodebar ngamngi dongin kithung hi.



²⁷Jordan ngun kuam sungah Beth Haram, Bethnimrah, Sukkoth, le Zaphon le Heshbon pan a maang Sihon Kumpipa kumpi ngam a om lai theampo ahi hi. Amate ii nitumna sang ngamngi sia Jordan Ngun hi a, saksang ah Galilee Tuili dong hi to hi.

²⁸Reuben ii nam le innkuante ii tan tu a kipia sia hi khuapite le khuapinote ahi hi.

Nisuana Manasseh te ii Ngam tu A kipia Ngam

²⁹Moses in Manasseh ii suan a lang te le innkuante tan tu in ngamkhen khat a piak sa hi.

³⁰Amate ii ngam sia Mahanaim dong kithung a, Bashan huam hi — Bashan kumpipa Og ii kumpi ngam bup le Bashan sunga Jair khuano sawmluk te a kihel ahi hi.

³¹Bashan te kumpipa Og ii kumpi ngam khuapi thupibel Astaroth le Edrei le Gilead ngam langkhen zongh tua ii sungah kihel hi. Hite theampo sia Manasseh ii tapa Machir ii suan le innkuan lang te atu a kipia sa ahi hi.

³²Jericho le Jordan ii nisuana sang a ngamte sia Moses in Moab zaangtam panin a khenthap sa ahi hi.

³³Ahihang Moses in Levi namte leitangh a pia bua hi. Topa ii Moses ii tungah a son sa bangma in Topa Israel Pathian biakpiakna tau tungah piakkhiat biakpiaknate sung pan tel khat sia amate in tang tu hi..

Joshua 14

Jordan Nitumna sang Ngam Hawmna

¹Canaan ngam Jordan ngun ii nitumna sang leitanghte Israel mite sungah a kihawmna thu a nuai a bangin kizom hi. Thiampi Eleazar, Nun ii tapa Joshua le Israel innkuante ii lampuite in ngam mi bup sungah hawm uh hi.

²Topa ii Moses tungah a thupiak bangma in minam kua le nam khat ii langte ngam tu sia laimee sawkin khensat uh hi.

³⁻⁴Moses in Jordan ii nisuana sang ngamte sia minam nii le nam khat ii langte atu see siat sa hi. (Joseph ii suante sia Mansseh le Ephraim ci in phung nii



in kikhen hi.) Ahihang Moses in Levi te sia leitangh tel a pia bua hi. Tua ii luangin a ten natu khuapite pia in, a khui le a tuu honte atu ngantat natu lo pia hi.

⁵Israel mite in Topa ii thupiak bangin leitanghte khen uh hi.

Hebron sia Caleb atu Kipia

⁶Ni khat ni in Judah ii suan mihing pawl khat sia Gilgal ah Joshua ii kungah hong pai hi. Amate sung pan khat Jephunneh tapa, Kenniz minam, Caleb in, “Kadesh Barnea ah Topa in nang le kei huvau Pathian mihing ahi Moses tungah a pau teng na heak hi.

⁷Topa ii naseam pa Moses ii hong paisak lai in kei sia kum sawmli ka pha zo hi. Ahi bang tatak teng thu ka puak kik hi.

⁸Kei taw a paikhawm pasal dangte in ahile ih minamte lauthawn hi. Ahihang keima in Topa ka Pathian sia thumaan takin a thu ka mang hi.

⁹Tuabang ka ngamtat hu in, Moses in kamciam hong piakna pan, ka vana sa uh leitanghte kei le ka tate neisa tu in hong kipia tu ci hi.

¹⁰Ahihang tu in en in! Topa in Moses tunga a pau sia tu in kum sawmli le kum nga pha zo hi. Tuasia Israel te ii senneal ngam kantan in a pai hun hi a, tuaciang Topa in hong kamciam bangma hong nungta tansak lai hi. Hong en tan! Kum sawmliat le kum nga pha khi hi.

¹¹Moses ii hong sawl lai bangma in hat ngawp lai khi hi, ngal sim tu ahizong bang dang khat po seam tu ahizong naap lai khi hi.

¹²Ngalvil pasalte taw kikop in thu ka puak uh lai a Topa ii hong kamciam sa mualtung ngam teng tu in hong pia tan. Tua lai in kong thupuakna uh pan Anakim a kici thatang lian mama minamte sia luphung taw a ki uum khuapite sungah teang hi ci in kong son hi. Topa sia kei taw hong omkhawm po le Topa ama ii ci bangin amate ka hawlkhia tu hi,” ka ci hi.

¹³Joshua in Jephunneh ii tapa Caleb sia thupha pia in Hebron khuapi sia ama neisa tu in pia hi.



¹⁴Hebron khuapi sia Keniz mi Jephunneh ii tapa Caleb ii suante ii neisa in om lai hi, banghangziam cile ama in Topa Israel te ii Pathian sia thumaan takin a thu ni hi.

¹⁵Hi hun maa sia in Hebron sia Arba khuapi kici hi (Arba sia Anakimte sung pan a lianbel ahi hi). Ngam sungah tu in kilemna om hi.

Joshua 15

Judah Minamte A kipia Ngam

¹Judah nam innkuante in a nuai a, a kison bangin ngam le lei nga hi. Zin duisung thangsang bel dawn Edom te ngamngi dong leitangh sia kithung suk hi.

²Hi thangsang ngamngi sia Tuipi Thi ii a thangsang mongah paisuk a,

³Akrabbin Mualciangh ciang Zin ah sun hi. Kadesh Barnea ii thang sangah pai suk a, Hezron kantan in Addar dong, Karka sangah kot a,

⁴Azmon sangah pai tan, Egypt ngamngi a luang lui sia zui a, Mediterranean Tuipi ah a ngamngi tawp hi. Tuasia Judah thangsang ngamngi hi.

⁵Nisuana sang ngamngi sia Tuipi Thi hi a, Jordan ngun ii tumsukna dong tuipi hui to teng ahi hi. Asaksang ngamngi sia tua mun panin kipan a,

⁶Beth Hoglah ah kithungto a, saksang Jordan Kuam etsukna mualzaang ah pai hi. Tua mun pan Bohan ii Suangphu dong (Bohan sia Reuben ii tapa hi) paito hi.

⁷Ngimna Kuam pan paito Debir ah, tuaciang tua mun pan Gilgal sangah kot a, tuasia in ngam kuam ii thangsang a om Adummim Mualciangh sia maingat hi. Tuasung panin pai a Enshemesh ciktuite ah, tua mun pan Enrogel ah paisukin,

⁸Hinnom Kuam Judah Jebuz te ii khuapi Jerusalem omna mual ii thang sangah sun hi. Tua sung panin ngamngi sia Raphaim Kuam iisaksang tawpna ah a om, Hinnom Kuam ii nitumna sang mualtung tawnin paisuak hi.



⁹Tua mun panin Nephtoah Ciktui te kaanin Ephron Mualvum a khuapite ah pai hi. Tua mun panin Baalah (ahibuale Kiriath Jearim) ah heak a,

¹⁰tua mun pan Balaah ii nitumna sangah kot a, Edom mualtung ngam ah, sak sangah Jearim Mualvum (ahibuale Chesalon zongh kici) ah, tua mun pan paisuk Beth Shemesh ah, tua sung pan Timnah kantan hi.

¹¹Ngamngi sia Ekronsaksang mual ah, Shikkeron ah heak, Balaah Mualvum kantan, tua mun pan Jamnia. Mediterranean Tuipi ah tawp hi,

¹²tua in a nitumna sang ngamngi ahi hi. Hi ngamngi ii huam sung sangah Judah ii suan innkuan tatuante teang hi.

Caleb in Hebron le Debir Zothal

(Thukhente 1.11-15)

¹³Topa in Joshua thu a piak bangma in Judah nam Jephunneh ii tapa Caleb, Judah ngamkhen khat kipia hi. Ama in Anak ii pa Arba ii khuapi Hebron nga hi.

¹⁴Caleb in Anak ii suan le paal te khuapi panin hawlkhia hi — tuate sia Shesai, Ahiman le Talmai be le phungte hi.

¹⁵Tua mun panin ama in Debir a teang mihingte sim hi. (Hi khuapi sia Kiriath Sepher kici ngei hi).

¹⁶Caleb in, “Kiriath Sepher a la zo po ka tanu a zi tu in ka pia tu hi, ci hi.

¹⁷Caleb ii suapuipa Kanaz ii tapa Othniel in tua khuapi la zo ahikom Caleb in a tanu Achsah a zi tu in pia hi.

¹⁸Mo kiten ni in Othniel in monu tungah a pa ii munah leitangh khat ngenin sawl hi. Ama in a laa tung tona pan tuaksuk in, tuaciang Celeb in bang dei ni ziam ci in dongh hi.

¹⁹Ama in zokik a, “Tuicingna mun pawlkhat dei khi hi, leitangh nong piakte sia munko hi thong hi,” ci hi. Tua ahikom Caleb in ciktui omna a thunghsang le a thangsang teng pia hi.

Judahte ii Khuapite

²⁰Judah nam innkuan tuatuamte ii tan leitangh sia hiteng ahi hi.



- ²¹Khuapi lian amate neisa a thang khakbel Edom ngamngi taw a kinai sia Kabzeel, Eder, Jagur,
- ²²Kinah, Dimonah, Adadah,
- ²³Kedesh, Hazor, Ithnan,
- ²⁴Ziph, Telem, Bealoth,
- ²⁵Hazor Hadattah, Keriath Hezron (ahibuale Hazor),
- ²⁶Amam, Shema, Moladah,
- ²⁷Hazar Gaddah, Heshmon, Bethpelet,
- ²⁸Hazar Shual, Beersheba, Biziothiah,
- ²⁹Baallah, Iim, Ezem,
- ³⁰Eltolad, Chesil, Hormah,
- ³¹Ziklag, Madmannah, Sansannah,
- ³²Lebaoth, Shilhim, Ain le Rimmon te ahi hi. A kiim a paam ah khuanote taw a vekpi in khua kul le khua kua pha hi.
- ³³Mualpeang ah a om khuapite sia, Eshtaol, Zorah, Ashnah,
- ³⁴Zanoah, Engannim, Tappuah, Enam,
- ³⁵Jarmuth, Adullam, Socoh, Azekah,
- ³⁶Shaaraim, Adithaim, Gederah le Gederothaim kuate ahi hi. A kiim a paam ah kuate taw khua sawm le khua li pha hi.
- ³⁷Tua sung zongh ah, Zenan, Hadashah, Migdalgad,
- ³⁸Dilean, Mizpah, Joktheel,
- ³⁹Lachish, Bozkath, Eglon,
- ⁴⁰Cabbon, Lahmam, Chitlish,
- ⁴¹Gederoth, Bethdagon, Naamah le Makkedahte hi a, a kiim a paam khuapinote taw a vekpi khua sawm le khua luk pha hi.
- ⁴²Tua sungah a om a dang pan Libnah, Ether, Ashan,



- ⁴³Iphtah, Ashnah, Nezib,
- ⁴⁴Keilah, Achzib le Mareshahte hi a, a kiim a paam khuapinote taw khua kua pha hi.
- ⁴⁵Tua sungah Ekron le a khuapinote le a khuanote zongh om hi,
- ⁴⁶tuaciang Ashdod hui le Ekron pan a Mediterranean Tuipi dong a, a om khuapi liante le khuapinote ahi hi.
- ⁴⁷Ashdod le Gaza khuapite zongh om a, amate ii khuapinote le khuanote taw Egypt ngamngi lui sia dongin le Mediterranean Tuipi dong kithung suk hi.
- ⁴⁸Mualtung ngamte ah Shamir, Jattir, Socoh,
- ⁴⁹Dannah, Kiriath Sepher (ahibuale Debir)
- ⁵⁰Anab, Eshtemoa, Anim,
- ⁵¹Goshen, Holon le Giloh hi a, a kiim a paam khuapinote taw khuapi sawm le khat pha hi.
- ⁵²Tua sungah Arab, Dumah, Eshan,
- ⁵³Janim, Beth Tappuah, Aphekah,
- ⁵⁴Humtah, Hebron le Zior khuapi kua le a kiim a paam khuapinote om hi.
- ⁵⁵Tua sungah Maon, Carmel, Ziph, Juttah,
- ⁵⁶Jezreel, Jokdeam, Zanoah,
- ⁵⁷Kain, Gibeah le Timnah khuapi sawm le a kiim a paam khuapinote om hi.
- ⁵⁸Tua ah Halhul, Bethzur, Gedor,
- ⁵⁹Maarath, Bethanoth le Eltekon: khuapi luk te le a kiim a paam khuapinote om hi.
- ⁶⁰Kiriath Baal (ahibuale Kiriath Jearim) le Rabbah: khuapi nii le a kiim a paam khuapinote zongh om hi.
- ⁶¹Senneal ngam sungah Beth Arabah, Middin, Secacah,



⁶²Nibshan, Ci Khuapi le Engedi, khuapi luk le a kiim a paam khuapinote om hi.

⁶³Ahihang Judah minamte in Jerusalem a teang Jebus te not keak zo ngawl hi. Tua Jebus mite in Judah minamte taw teangkhawm lai uh hi.

Joshua 16

Ephraim Minamte le Nitumna sang Manassehte atu A kipia Ngam

¹Joseph ii suan le paalte atu leitangh a kipia te ii ngamngi sia Jericho hui Jordan Ngun panin kipan a, Jericho khua niswana sang ciktui omna pan senneal ngam sungah a ngi pai hi. Jericho pan Bethel dong mualtung ngamah kaato hi.

²Bethel pan a ngamngi sia Luz ah pai a, Ataroth Addar, Archit te teenna kantan hi.

³Tua mun panin nitumna Japhlet te ii ngamkhen ah pai a, Beth Horon nuainung mun dong paisuak hi. Tua mun panin Gezer ah tuaciang Mediterranean Tuipi ah tawp hi.

⁴Joseph ii suan Ephraim nam le nitumna Manasseh namte in hi leitangh te amate ii neisa tu in saang uh hi.

Ephraim

⁵Ephraim innkuante ii ngam sia hisia ahi hi: a ngamngi ii paizia sia, Ataroth Addar pan niswana sangah Beth Horon Tungnung,

⁶tua mun panin Mediterranean Tuipi dong ahi hi. Michmethath siasaksang om hi. Tua ii niswana sangah ngamngi Taanath Shiloh sangah kithiak a, tuaciang Janoah ii niswana sangah paitan hi.

⁷Tua mun panin paisuk a Janoah pan Ataroth le Naarah ah, Jericho pha in Jordan Ngun ah tawp hi.

⁸Ngamngi sia Tappuah ii nitumna sang Kanah lui ah pai in Mediterranean Tuipi ah tawp hi. Hi leitangh sia Ephraim namte innkuante atu a tan tu in kipia hi.



⁹Manasseh ii ngamngi sungsuam a khuapino le khuano pawl khat taw kopin Ephraim te kipia khawm hi.

¹⁰Ahihang amate in Canaan mi Gezer a teangte sia notkhia ngawl uh a, tua ahikom Canaan mite sia Ephraim mite taw tu ni dong teang khawm uh hi, ahihang amate salte nasep kiseamsak hi.

Joshua 17

Nitumna sang Manasseh

¹Jordan ngun ii nitumna sang leitangh khen khat sia Joseph ii ta upa Manasseh ii innkuan te ii tan tu in kipia hi. Gilead ii pa Machir sia Manasseh ii ta upa bel hi a, ngalhang minthang khat zongh ahi hi, tua ahikom Jordan Ngun ii niswana sang Gilead le Bashan sia ama kipia hi.

²Jordan ngun ii nitumna sang leitanghte sia Manasseh ii suan innkuan dang teng atu kipia hi; Abiezer, Helek, Asriel, Shechem, Hepher le Shemida. Hite sia Joseph ii tapa Manasseh ii tapa te hi a, a innkuan tek ii pa bel tek ahi hi.

³Zelophehad sia Hepher ii tapa hi a, tua sia Gilead ii tapa, ama sia Machir ii tapa, tua pa sia Manasseh ii tapa hi, ahizong ama in tapa nei ngawlin tanu bebek nei hi. Tua numeite min sia Mahlah, Noah, Hoglah, Milcah, le Tirzah ahi hi.

⁴Amate in thiampi Eleazar le Nun ii tapa Joshua le lampuite kungah pai in, “Topa in Moses thu pia a, ko le ka suapui pate ii ka tan tu uh leitangh khen khat hong kipiak natu sawl hi,” ci hi. Tua ahikom, Topa ii sawl bangma in, amate sia a suapuite taw a kibangin leitangh kipia hi.

⁵Tua hu in Manasseh in Jordan Ngun ii niswana sangah Gilead le Bashan belapna in leitangh tel sawm saang hi,

⁶ama ii suan le paal numeite le pate tel a kipiak khop hang ahi hi. Gilead ngam leitanghte sia Manasseh ii suan dangte kipia hi.

⁷Manasseh ii ngam sia Shechem ii niswana a Asher pan Michmethath dong kithung hi. A ngamngi sia Entappuah mite sungsuam tu in thangsang zuan suk hi.



⁸Tappuah ii kiim a leitanghte sia Manasseh aa hi, ahizong Tappuah khuapino ngamngi tung a om sia Ephraim suante neisa ahi hi.

⁹Ngamngi sia tua mun pan Kanah lui dong paisuk hi. A ngam sia Manasseh ii ngam ahi saap hang lui ii thangsang a khuapite sia Ephraim te aa ahi hi. Manasseh ii ngamngi sia lui iisaksang ah pai to a, Mediterranean Tuipi ah tawp hi.

¹⁰Ephraim sia thang sangah om a, Manasseh siasaksang khak a, Mediterranean Tuipi sia amate ii nitumna sang ngamngi hi.

¹¹Issachar le Asher te ii ngam huam sungsang ah Manasseh in Beth Shan le Ibleam, a kiim a paam khuapino te; le Dor (tuipi hui a om sia), Endor, Taanach, Meggido le a kiim a khuapinote hi teng nei hi.

¹²Manasseh minamte in tua munah a teang minamte not zo ngawl ahikom Canaan mite sia tua sungah teang suak uh hi.

¹³Israel te hong hat zawk hun hong thet dong ngangawn in Canaan mite notkeak ngawl uh hi, ahizong amate ii naseam tu in zawthawk thu taw sawl uh hi.

Ephraim le Nitumna sang Manasseh te in Ngam Ngenthua.

¹⁴Joseph ii suan le paalte in Joshua ii mun ah, "Banghangin ko neisa tu leitangh khen khat bek hong pia ni ziam? Topa in thupha hong pia a, ko mihing tam mama pha khu hi," ci uh hi.

¹⁵Joshua in zokik a, "No mihing tam mama a Ephraim mualtung ngam sia no atu no lei ahile Periz te le Rephaim te ngam a thingtang teng tu tham in tang tavun," ci hi.

¹⁶Amate in zokik a, "Mualtung ngam sia ko atu lian ngawlin kicing zo ngawl hi, ahihang zaanglei a teang Beth Shan le a kiim khuapinote le, Jazreel Kuam sungah teangte Canaante in thik ngalleang nei tek uh hi."

¹⁷Joshua in Ephraim namte le nitumna Manasseh tungah ci hi, "No sia tam mama takpi nu hi, ciangin hat zongh hat mama nu hi. Tel khat sangin a tam zaw nga tu nu hi.



¹⁸Mualtung ngam sia no neisa hi tu hi. Duithuk hi kale na vaat tham tu uh a mong khat pan mong lang khat dong na neisa tu in la tu nu hi. Canaan mite ahile ngalleang te nei in a hat minamte hi kale hawlkhia tu nu hi.”

Joshua 18

Leitangh A taanglai teng Hawmna

¹Ngam a zaw zawk uhciangin Israel huammi theampo in Shiloh ah hong kikhawm uh a, Topa ii omna Buk hong vawt uh hi.

²Amate ii tel saan tu a saang ngawl lai minam sali om lai hi.

³Tua ahikom Joshua in Isaelte mun ah ci hi, “Topa na Pathian ii na taangpupite tungah hong piak sa leitanghte na laak siat uh maa in bang tan vei ngak tu nu ziam?

⁴Minam khat panin mihing thum veu hong pia tavun. Ngam bup sungah ka vaksak kawkoai tu a, na neisa tu a na dei uh leitanghte ii lim ka suaisak tu hi. Tua zawkciang amate kei kungah hong heak kik tu hi.

⁵A ngam sia khen sali kisua tu hi; Judah sia ama ii ngam, thang sangah om tu a, Joseph sia ama ii ngam,sak sangah om tu hi.

⁶Hi ngam khen sali te ii thu hong at tavun a, ka kungah hong paipui tavun. Tuasia ciang Topa ih Pathian sia no atu in kong dongh tu a, laimee ka dok tu hi.

⁷Levi te ahile no a dangte bangin leitangh tel a saang buatu hi, banghangziam cile amate ii tel sia Topa ii thiampi sepsakna ahi hi. Tuaciang Gad, Reuben le Nisuana Manasseh minamte ahile Topa ii naseam pa Moses in Jordan Ngun ii niswana sang ngamte a piak sa hi zo hi.”

⁸Pasal a kiteal te sia ngamlim suai tu in paikhia a, Joshua in hi bangin thupia hi: “Ngam bup ii sungah va pai tavun a, ngamlim na suai zawk uh ciang ka kungah hong cia kik tavun. Tuaciang hi mun Shiloh ah Topa kong dongh tu a, no atu in laimee ka dok tu hi.”



⁹Tua ahikom pasalte sia ngam sung buppi ah vakin khen sali in a khenna lai taw at in, khuapino omte ii min lai sungah ngual uh hi. Tua zawkciang amate sia Shiloh ngiaphual ah Joshua kungah heak kik uh hi.

¹⁰Joshua in amate atu laimee dokin Topa doksak hi, a taanglai Israel minamte leitangh khen khat tek pia hi.

Benjamin A kipia Ngam

¹¹Benjamin nam sungah innkuan tuatnamte neisa ngamte sia a masa phitbel a kipia ahi hi. Amate ii leitangh sia Judah le Joseph namte ii kilaklaw ah om hi.

¹²Sak sangah amate ii ngamngi sia Jordan Ngun panin kipan a Jerichosak munkhamna ah paito a, mualtung ngam nitumna sang Bethaven senneal ngam dong ahi hi.

¹³Ngamngi sia tua mun pan thangsang munkhamna ah paisuk a, Luz (Bethel zongh kici) pangh dong, tua zawkciang, Beth Horon Nuainung ii thangsang mual tungah a om Ataroth Addar dong paisuk hi.

¹⁴Ngamngi sia tua mun pan mundang khat ah kot a, hi mual ii nitumna pangh panin thang sangah kotsuk a, Judah te ii neisa Kiriath Baal (ahibuale Kiriath Jearim) dong ahi hi. Hi sia nitumna sang ngamngi hi.

¹⁵Thangsang ngamngi sia Kiriath jearim kiil panin kipan a Nephtoah ciktui ah sun hi.

¹⁶Tua mun pan paisuk a, Rephaim Kuam iisaksang mong Hinnom Kuam etsuk theina mualpeang ah pai hi. Tua mun pan Hinnom Kuam kantan in paisuk a, Jebus mualzum ii thangsang Enrogel sang zuan hi.

¹⁷Tua mun paninsak sangah kiheak in Enshemesh sangah tuaciang Adumim Mualciangh ii lang khat Geliloth ah pai hi. Ngamngi sia Bohan Suangphu (Bohan sia Reuben ii tapa khat hi) ah paisuk hi,

¹⁸tuaciang Jordan Kuam a kimu suk thei mualzum sia kantan hi. Tua mun pan kuam sungah paisuk in,



¹⁹Beth Hoglah mualzum kantan in pai a, Tuipi Thi sung Jordan Ngun ii tumna ah tawp hi. Hisia sia a thangsang ngamngi hi.

²⁰Jordan Ngun sia niswana ngamngi hi. Hiteng sia Benjamin suan innkuante ii tan tu a saan ngam ahi hi.

²¹Benjamin minamte ii a nga khuapite sia Jericho, Beth Hoglah, Emek Keziz,

²²Beth Arabah, Zemaraim, Bethel,

²³Avvim, Parah, Ophrah,

²⁴Chepharammoni, Ophni, le Geba hi a, khuapi sawm le nii le a kiim a paam a khuanote zongh ahi hi.

²⁵A dang khuapite sia Gibeon, Ramah, Beeroth,

²⁶Mizpah, Chephirah, Mozah,

²⁷Rekem, Irpeel, Taralah,

²⁸Zela, Haeleph, Jebus (ahibuale Jerusalem) Gibeah le Kiriath Jearim hi a, khuapi sawm le li le a kiim a paamah a om khuanote ahi hi. Hi ngam sia Benjamin minam innkuante ii lua ngam ahi hi.

Joshua 19

Simeon atu A kipia Ngam

¹A nii veina ngam a kipia te sia Simeon le a suan innkuan tuatuam te atu hi. A ngam sia Judah minamte atu a kipia leitanghte dongin kithung suk hi.

²A huam khuapite; Beersheba, Sheba, Moladah,

³Hazar Shual, Balah, Ezem,

⁴Eltolad, Bethul, Hormah,

⁵Ziklag, Beth Marcaboth, Hazar Susah,

⁶Beth Lebaoth le Sharuhem kihel a, a kiim a paam khuapinote taw khuapi sawm le thum ahi hi.

⁷A dang khuapite sia, Ain, Rimmon, Ether le Ashante hi in, khuapi li le a kiim a paam ah khuanote ahi hi.



⁸Hi khuapi kiim ah a om khuanote theampo kihel a thang sangah Baalath Beer (ahibuale Ramah) dong ahi hi. Hi ngam sia Simeon nam innkuante ii nga ngam ahi hi.

⁹Judah namte ii nga ngam sia amate atu in zai lei ahikom a ngam khenkhat Simeon namte kipia hi.

Zebulun atu Ngam Ki at

¹⁰A thumna sia Zebulun namte ii innkuan tuatuamte atu a ki at te hi. Amate ii saan leitangh sia Sarid dong pha hi.

¹¹Tua mun panin ngamngi sia nitumna sangah kiheak a Mareal ah, Dabbesheth le Jokneam ii niswana lui sia thutha hi.

¹²Sarid ii lang khat panin niswana Chisloth Tabor te ii ngamngi ah, tua mun pan Daberath le Japhia dong pai hi.

¹³Tua mun pan niswana sangah paisuak a, Gath Hepher le Ethkazin ah, ciang Neah sangah kiheak in, Rimmon paina sang zuan hi.

¹⁴Saksang ngamngi sia Hannathon sangah kotin, Iphtahel Kuam ah tawp hi.

¹⁵A ngam ii huam teng sia Kattath, Nahalal, Shimron, Idalah le Bethlehem te hi a, a kiim a paam khuanote taw kopin khuapi sawm le nii ahi hi.

¹⁶Hi khuapite le a khuapinote sia Zebulun nam innkuante ii a neisa tu in a saan leitanghte ahi hi.

Issachar atu A kipia Ngam

¹⁷A lina ah ngam khenna sia Issachar namte ii innkuante atu kivawt hi.

¹⁸Amate ii ngam huam sia, Jezreel, Chesulloth, Shunem,

¹⁹Hapharaim, Shion, Anaharath,

²⁰Rabbith, Kishion, Ebez,

²¹Remeth, Engannim, Enhaddah le Bethpazzez te ahi hi.

²²Ngamngi in Tabor, Shahazumah le Beth Shemesh thutha a, Jordan ah tawp hi. A kiim a om khuapinote taw khuapi sawm le luk kihel hi.



²³Hi khuapi te le khuapino ngam sunga omte sia Issachar ii namte sunga innkuante atu a neisa tu in a kipia ahi hi.

Asher atu Ngam A kikhente

²⁴Ngamkhen a kipia a ngana sia Asher namte sung innkuante atu ahi hi.

²⁵Tua ii a huam ngam sia Helkath, Hali, Beten, Achshaph,

²⁶Allam Melech, Amad le Mishal ahi hi. Nitumna sangah a ngamngi in Carmel le Shihor Libnath baan hi.

²⁷Nisuana sang a zot ciang, ngamngi sia Bethdagon ah pai in, Zebulun le Iphtahel Kuam Bethemek le Neielsaksang paito na thutha hi. Tua sia kizom to a, Cabul,

²⁸Ebron, Rehob, Hammon le Kanah, Sidon dong paisuak hi.

²⁹Ngamngi sia Ramah ah hong kot kik a, khua kulhpi taw a ki uum Tyre dong theng hi; tua mun pan Hosah ah kot a, Mediterranean Tuipi ah tawp hi. Ama ii huam sia Mahalab, Achzib,

³⁰Ummah, Aphek le Rehob: khuapi kulh le niite le a kiim a paam khuapinote taw ahi hi.

³¹Hi khuapite le khuapinote sia Asher namte ii innkuante neisa tu in a saan uh leitanghte ahi hi.

Naphtali Minamte atu A kipia Ngamte

³²Ngam hawm a lukna sia Naphtali namte ii innkuante atu a kipiante hi.

³³A ngamngi sia Heleph ah pai a Zaananim limthing kung Adaminekeb paina, ciang Jamnia Lakkum dong Jordan ngun ah tawp hi.

³⁴Tua mun pan ngamngi sia nitumna sangah kiheak a Aznoth Tabor ah, tua mun pan Hukkok ah, thang sangah Zebulun ngamngi thutha hi. Asher sia nitumna sang le Jordan nisuana ah om hi.

³⁵Kulhpi taw ki uum khuapite sia Ziddim, Zer, Hammath, Rakkath, Chinnereth,

³⁶Adamah, Ramah, Hazor,



³⁷Kedesh, Edrei, Enhazor,

³⁸Yiron, Migdalel, Horem, Bethanath le Beth Shemeshte ahi hi. A kiim a paam ah khuanote taw kopin khuapi sawm le kua ahi hi.

³⁹Hi khuapite le a khuapinote sia Naphtali namte ii sung a innkuante ii neisa tu in a kipia leitanghte ahi hi.

Dan atu A kipia Ngam

⁴⁰Piakkhiatna a sali veina sia Dan namte sung a innkuante atu hi.

⁴¹A ngam ii huam sia Zorah, Eshtaol, Irshemesh,

⁴²Shaalbim, Aijalon, Ithlah,

⁴³Elon, Timnah, Ekron,

⁴⁴Eltekeh, Gibbethon, Baalath,

⁴⁵Jehud, Beneberak, Gathrimmon,

⁴⁶Mejarkon le Rakkon le Joppa kiim a ngamte zongh ahi hi.

⁴⁷Dan mihingte in a ngam uh a taan uh ciang, amate Laish ah pai in sim uh hi. Amate in a khua la in, a mite that uh a, tuaciang amate neisa suaksak uh hi. Amate sia tua munah teang uh a, a khuapi min sia Laish pan a taangpupi min Dan phua uh hi.

⁴⁸Hi khuapite le a kiim a paam a khuapinote sia Dan nam innkuan te ii neisa tu in a kipia ngam le lei te ahi hi.

A khakbel A kipia Leitanghte

⁴⁹Israel te in leitangh a hawm tu uh teng a man uh ciang Nun ii tapa Joshua ii neisa tu in ngamkhen pawlkhat pia uh hi.

⁵⁰Topa ii thupiak bangin, ama ii nget khuapi sia pia uh a, Timnath Serah hi a, Ephraim ngamsung mualtung ngam ahi hi. Ama in khuapi sa in tua munah teang hi.

⁵¹Thiampi Eleazar, Nun ii tapa Joshua le Israel innkuan tuatuamte ii lampuite in hi leitanghte sia a hawm uh ciang, Topa ii omna Buk kongbiang ah, Topa a



dokna in laimee dok uh hi. Hi bangin amate in amate ngam a hawmna man uh hi.

Joshua 20

Buhna Khuapite

- ¹Tuaciang Topa in Joshua ii munah,
- ²“Moses ii hong son sawn tu ka sawl bukna khuapi liante teal vun.
- ³Mihing khat in ngual dang khat a thatlum tha a ahile phulam tu in a zong pa khut pan a suatak natu in tua munah pai thei hi.
- ⁴Ama in hi khuapi te khat pawpo ah tai in hi khuapi te ii thukhenna kongpite ah lampuite tungah thupiang babang son thei tu hi. Amate in khuapi sungah tumsakin, a ten natu mun khat a piak zawkciang tua munah om thei tu hi.
- ⁵Phulam nuam pa in tua mun dongah a zuizen le khuapi mipite in ama ii khut sungah a tai pa sia aap ngawl tu hi. Amate in ama hung tu hi, banghangziam cile ama in thin uukna hang hi ngawlin a thalup thaak ahi man hi.
- ⁶Taangpi thukhenna a nga dong le tua laitak Thiampi Saang a seam sia ii thi dong tua munah om thei tu hi. Tua zawkciang in a taiku pa sia ama ii khua ah a cia nuam le cia kik thei tu hi.
- ⁷Tua ahikom, Jordan Ngun ii nitumna sang Galilee ngamah Kadesh sia tuam koi uh a, mualtung ngam Naphtali ngam sung hi; Ephraim ii mualtung ngam ah Sechem; Judah ii mualtung ngamah Hebron;
- ⁸Jordan ii niswana sangah senneal ngam mualdawn tam Reuben ii ngam sung Bezer; Gad ii ngamsung Gilead ah Ramoth; Manasseh ngam Bashan sungah Golan teal uh hi.
- ⁹Hi teng sia bukna khuapi tu in Israel te theampo le ngamdang mi amate sungah a teangte atu a kiteal teng ahi hi. Khat po in midang khat a thatlum le phulam tu a, ama a zong sia ii mun pan dalna nga tu hi; taangpi ii thukhenna a thuak phot buale ama sia thi daan kipia thei ngawl hi.



Joshua 21

Levite ii Khuapite

- ¹Levi nam sunga innkuan papite sia thiampi Eleazar kung, Nun ii tapa Joshua le Israel nam tuatum te ii lampuite tungah pai uh hi.
- ²Canaan ngam Shiloh ah hi bang ci uh hi. “Topa in Moses tungtawn in a thupiakna pan ko sia khuapite hong kipia tu a, ka ngan tat natu tua khuate ii kiim le paam ah lozau hong kipia tu ci hi.”
- ³Tua ahikom Topa ii thupiakna taw kizui in Israel te in Levi te sia amate ngam sungah khuapi pawlkhat le ngamtat natu leitanghte pia uh hi.
- ⁴Levi suan sung pan Kohath be le phungte sia a masa bel in khuapite kipia hi. Thiampi Aaron ii suan le paalte sia Judah ngam, Simeon ngam, le Benjamin ngam sung panin khuapi sawm le thumte kipia hi.
- ⁵Kohath beta te sung a om lai teng sia Ephraim, Dan le Nitumna Manasseh teng ii ngam sung pan khuapi sawm kipia hi.
- ⁶Gershon ii be le phungte sia Issachar, Asher, Naphtali, Niswana Manasseh teng ii ngam sung pan khuapi sawm le thum pia hi.
- ⁷Merari ii phung sung pan innkuan tuatumte sia, Reuben, Gad, le Zebulun teng ii ngam sung pan khuapi sawm le nii kipia hi.
- ⁸Topa ii Moses tunga thu a piak bangin Levite atu khuapite le ngan tha natu lozau Israel te in mee dok in pia uh hi.
- ⁹⁻¹⁰Levi nam, Aaron ii suan, Kohath ii be le phungte atu Judah ngam le Simeon ngam a kipan a kipia khuapite ii min teng hi teng hi. Amate a kipiakna sia a masa bel ahi hi.
- ¹¹Amate sia Arba khuapi kipia a, (Arba sia Anak ii pa hi), tu in Hebron kici hi, Judah mualtung ngam, ngan tha na leitangh taw kop hi.
- ¹²Ahihang khuapi ii lozau le a paam a khuapinote sia Jephunneh ii tapa Caleb a kipia sa hi.



- ¹³Hebron (bukna khuapite sung pan khat) sia taw kikop in a nuai a khuapi teng sia thiampi Aaron ii suante kipia hi: Libnah,
- ¹⁴Jattir, Eshtemoa,
- ¹⁵Holon, Debir,
- ¹⁶Ain, Juttah le Beth Shemesh a ngan tatna leitanghte taw; Judah le Simeon ii ngam pan khuapi kua,
- ¹⁷Tuaciang Benjamin ii ngam panin amate sia khuapi li: Gibeon, Geba,
- ¹⁸Anathoth le Almon ngan tha na tu taw,
- ¹⁹A vekpi in khuapi sawm le thum, a ngan tat natu leitanghte taw Aaron ii suan thiampi te kipia hi.
- ²⁰Levi ii suan Kohath ii phung sung innkuan a dangte atu Ephraim te ii ngam sung pan khuapi pawlkhat kipia hi.
- ²¹Khuapi li hi a; Shechem le a ngan tha na mualtung ngam Ephraim te ngam (bukna khuapi khat hi), Gezer,
- ²²Kibzaim le Beth Horon le a ngan tha na leitanghte,
- ²³Dan ii ngam sung pan amate sia khuapi li kipia a: Eltekeh, Gibbethon,
- ²⁴Aijalon le Gathrimmon le a ngan tha na leitanghte ahi hi.
- ²⁵Nitumna Manasseh te ngam pan amate sia khuapi nii kipia a: Taanach le Gathrimmon, ngan tha na leitanghte taw kipia khawm hi.
- ²⁶Hi Kohath ii be le phungte in a kingawmin khuapi sawm le a ngan tha nate saang uh hi.
- ²⁷Levi nam pawl khat Gershon ii be le phungte in Niswana Manasseh pan khuapi nii: Bashan ah Golan (bukna khuapi khat) le Beeshterah, a ngan thana leitanghte taw nga khawm uh hi.
- ²⁸Issachar ngam panin amate in khuapi li saang hi: Kishion, Daberath,
- ²⁹Jarmuth le Engannim, a ngan thana leitanghte taw kopin nga khawm uh hi.
- ³⁰Asher te ngam panin amate in khuapi li saang hi: Mishal, Abdon,



- ³¹Helkath le Rehob, a ngan tha na leitanghte taw nga khawm uh hi.
- ³²Naphtali ngam pan amate in khuapi thum saang hi: Galilee ah Kedesh, a ngan tha na leitanghte taw (bukna khuapi khat), Hammoth Dor, le Kartan, a ngan thana leitangh taw nga khawm uh hi.
- ³³Gershon ii be le phung tuatuam te in a vekpi a kingawm khuapi sawm le thum le a ngan thana leitangh teng taw nga khawm uh hi.
- ³⁴Levi te ii suan taanglai Merari beta te in Zebulun ngam panin khuapi li saang hi: Joknem, Kartah,
- ³⁵Dimnah le Nahalal le a ngan tha na leitangh taw nga khawm uh hi.
- ³⁶Reuben ngam panin amate in khuapi li saang hi: Bezer, Jahaz,
- ³⁷Kedemoth le Mephaath le a ngan tha na leitangh taw nga khawm uh hi.
- ³⁸Gad namte tung pan amate in khuapi li saang hi: Gilead a Ramoth, a ngan tha na leitangh uh taw (bukna khuapi khat) Manahaim,
- ³⁹Heshbon le Jager a ngan tha na leitangh taw kopin nga khawm uh hi.
- ⁴⁰Tua ahikom Merari be le phung te a kipia khuapi sia sawm le nii ahi hi.
- ⁴¹⁻⁴²Israel te ii neisa ngamte panin a kingawm khuapi sawmli le liat le a ngan tha na leitangh teng sia Levi te kipia hi.

Israel in Ngam a Neisa tu in La

- ⁴³Tua hi a, Topa in Israel sia a taangpupite tungah ciliap huai tak kamciam a piak bangin ngam le lei pia hi. Amate in a lua zawk uh ciang, tua munah teang uh hi.
- ⁴⁴Topa in a taangpupite tungah kamciam a piak sa bangma in, ngam sung bup ah ngal kilemna pia hi. A ngalte theampo sung pan khat zongh in amate a nalh zo bua uh hi, banghangziam cile Topa in a ngalte theampo zaw zawkna Israel te a pia hi.
- ⁴⁵Topa in Israel mite tungah kamciam a piak theampo kholet hi.

Joshua 22

Joshua in Nisuana sang Minamte Ciasak



¹Tua zawkciang Joshua in Reuben, Gad, le niswana Manasseh nam teng sam khawm hi.

²Amate tungah, Topa ii naseam pa Moses ii hong thupiak theampo vawt siat zo nu hi, tuaciang keima ii kong thupiak theampo hong ni zo nu hi.

³Hi hun bup sungah na Israel pui te khat vei zongh na taisan ngei bua uh hi. Na Topa Pathian ii thupiakna awlmaw in na ni uh hi.

⁴Tu in ama ii hong kamciam bangma in, Topa na Pathian in na Israel mipui te ngal kilemna hong pia hi. Tua ahikom Topa ii naseampa Moses ii hong piak Jordan ngun ii niswana sangah noma atu na tealna uh na inn uh ah cia kik tavun.

⁵Moses ii hong piak thukham na nit natu khua ngaisun hamtang tavun; Topa na Pathian it vun, ama ii deina bang ngamta vun, a thukhamte ni vun. Ama ii tungah thumaan vun, tuaciang ama atu na ngaisutna uh le na lungtang theampo uh taw sepsak vun.

⁶⁻⁸Joshua in ama ii thupha le hi kammalte taw amate ciasak hi: “No sia a hau mama in nganno, ngun, kham, taungo, thik, silh le ten tam mama taw cia kik nu hi. Na ngalte ii tung pan na laak uh vanhete sia na be na phung pui te uh hawm tavun,” ci hi. Tua zawkciang amate inn sang zuan tu in cia uh hi. Moses in Manasseh nam a khen langte sia Jordan ii niswana sangah ngam pia hi, ahihang a langte sia Joshua in, be dang phung dangte taw Jordan ngun ii nitumna sangah ngam pia hi.

⁹Tua hi a, Reuben, Gad, le Niswana Manasseh nam teng sia inn ah cia kik uh hi. Amate in Israel dangte sia Canaan ngam Shiloh ah nusia uh hi, tuaciang amate in Topa ii Moses tungah a thupiakna tungtawn in a laak uh Gilead ngam le lei zuan tu in kipan uh hi.

Jordan hui ah Biaktau

¹⁰Reuben, Gad, le Niswana Manasseh te nitumna sang ma ahi lai Geliloth a thet uh ciang, tua sung ngun hui ah a lian a mu nophuai biaknatau khat sa uh hi.



- ¹¹Israel minam a dang teng munah, “Ngai vun, Reuben, Gad, le Nisuana Manasseh namte in Geliloth, Jordan ii ei sangah sa uh hi!”
- ¹²Israel minamte in hi thu a zaak uh ciang, a mipawl bup sia, nisuana sang minamte sim tu in Shiloh ah a kuan uh hi.
- ¹³Tua zawkciang Israel mite in thiampi Eleazar ii tapa Phinehas sia Reuben, Gad, le Nisuana Manasseh te kung Gilead ah paisak uh hi.
- ¹⁴Lampui pasal sawm sia Phinehas taw pai khawm uh hi, nitumna sang a minamte khat ciang khat veu le be le phung sunga innkuan papi khat tek ahi hi.
- ¹⁵Amate in Gilead ngamah Reuben, Gad, le Nisuana Manasseh namte kungah a pai uh hi, Topa ii huam mihon bup taangin amate tungah hong pau hi.
- ¹⁶“Banghangin Israel te ii Pathian tungah hi bang ngamtatna siatna vawt nu ziam? Noma atu hi bang biaknatau nasak uh ciang Topa a langpan na hi uh hi. No in ama ii nung zui nawn ngawl nu hi!
- ¹⁷Peor ah ih mawna te phawk kik vun, Topa in ama mite sia tua munah pul natna taw daan hong pia hi kana ngawl ziam? Tua hu in eite in tu dong ma in ih thuak lai hi. Tua mawna sia pha zo sa ngawl lai nu ziam?
- ¹⁸Tu in ama ii nung na zui tu uh nial lai nu ziam? Tu ni in Topa na langpan uh le ama in zing ciang, Israel mihing khat sim tungah hong thin uuk tu hi.
- ¹⁹Tu in, na ngam na lei uh sia biakpiak natu in citaak sa ngawl na hi uh le ama ii tui puan buk omna Topa ii leitangh tungah hong pai tavun. Ko sungah leitangh pawl khat sia ko aa hi hong ci tavun. Bang po ahizong Topa langpan heak vun a, tua ahibuale zong Topa ih Pathian ii biaknatau sia belapna in biaknatau dang khat nasakna uh hu in ko theampo zongh tual ngal hong suaksak heak vun.
- ²⁰Zerah ii tapa Achan phawk vun, ama in a kinilkhin nate taw kisai thupiakna sia ni nuam ngawl hi; Israel huam mihon bup sia tua huvau in daan hong kipia hi. Achan mawna hu in a thi sia ama bek hi ngawl hi.”



²¹Nitumna sang minamte ii innkuan papi te mun ah Reuben, Gad, le Nisuana Manasseh te in:

²²“A Thahatpipa sia Pathian hi! Ama siaTopa hi! A Thahatpipa sia Pathian hi! Ama sia Topa hi! Ama in hi sia banghangin vawt khu ziam ci in hong he hi, ciang no zongh in he leute kong oai hi. Topa ka upna uh ka keamcing bua uh a, ka langpan uh le hong nungtasak heak vun!

²³Topa ii thu ni ngawlin koma aituam atu hi biaknatau sia sa in, meihal biakpiakna ahibuale antang biakpiakna, kipawlkhop biakpiakna tu in sa ka hi uh le Topaama mama in daan hong pia taken.

²⁴Hi ngawl hi! Biaktau kasak uh sia banghangziam cile mai sangah na suan na paalte uh in ko suan ko paalte ii tungah, ‘Israel Pathian Topa taw no bang kisai nu ziam?’

²⁵Ama in Jordan ngun sia no Reuben le Gad te taw ih kilaklaw a ngamngi a hong khen sa hi. No le Topa sia na kisaina uh om ngawl hi,’ hong ci thaak tu ka lau uh hi. Tuaciang na suan na paalte in ko suan ko paalte sia Topa biakpiak tu dongin tawpsak tu hi.

²⁶Tua ahikom biaknatau khat sa khu hi, meihal biakpiak natu ahizong piakkhiat natu ahizongin ka zak tu uh ci ngawl khu hi,

²⁷tua hi ngawl zaw in, no le ko kilaklaw a lim tu le ei zawkciang a khang kikikte ii heak tu, Topa sia ama ii a thiangtho tuipuan buk mai ah, ko in piakkhiatna le meihal biakpiakna le kipawlkhop biakpiakna te vawt tatak khu hi cina lim ahi tu hi. Hi sia in no ii suan le paalte ii ko aa te tungah Topa sia no taw bang kisai ziam hong ci ngawl natu hi.

²⁸Ko ii ngaisutna pan hi bang thu hong piang zezen le, ‘En vun! ka taangpupite in Topa ii biaknatau taw a kibang biaknatau khat vawt hi. Tua biaknatau sia meihal biakna ahibuale sangaw biakpiakna vawt natu kici ngawl hi, ka mite uh le na mite kilaklaw ah lim tu in kivawt hi.’

²⁹Topa langpan ngawl het tu khu hi. Tua ahibuale ama nungzui tu tawpin meihal biakpiakna ahizong piakkhiatna ahizong, sangaw biakpiakna ahizong



vawt natu in biaknatau a vawt hi ngawl khu hi. Ama ii hong ompuina buk sia ii mai a Topa Pathian biaknatau sia ngawl a dang vawt ngawl tu khu hi,” ci uh hi.

³⁰Reuben, Gad, le Nisuana Manasseh mite ii pau na teng sia thiampi Phinehas le ama taw a pai khawm huam mihonte ii lampuite sawm le nitumna sang a teang minamte ii innkuan papi te in za uh a, a lung uh kim hi.

³¹Eleazar thiampi ii tapa Phinehas in amate tungah, “Tu in ka heak uh thu pan Topa sia ei taw hong omkhawm hi, tua ahikom noma in Israel mite Topa ii daan hong piak natu panin hong suatak nu hi,” ci hi.

³²Tua zawkciang Phinehas le lampuite in Reuben, le Gad te Gilead ngam ah nusia uh a, Canaan ngam ah cia kikin Israel mipuite tungah thu a puak uh hi.

³³Israel te sia lungkim uh a Pathian pok uh hi. Reuben, le Gad te teenna ngamte lalcipsak tu thu sonin a nei nawn bua uh hi.

³⁴Reuben le Gad mite in, “Topa sia Pathian hi ci in hi biaknatau in eite theampo tungah tetti hi ci uh hi. Tua ahikom amate in a min sia “Tetti” a phuak uh hi.

Joshua 23

Joshua ii Kikhenna Kam vaithak

¹Hun tam mama zawkciang Topa in Israel te sia a kiim a paam ngalte panin ngam muanna pia hi. Tua hun in Joshua sia huai mama zo hi,

²tua ahikom ama in Israel te theampo sam a, upate, lampuite, thukhente, mihing te tung pan a ukte, hi bangin ci hi. “Tu in kei sia huai mama zo khi hi.

³No ii hu in hi minamte tungah Topa na Pathian ii a sep a vawt teng na mu zo uh hi. Topa na Pathian sia no atu in ngal sim hi.

⁴Ngam minam a taanglai te ii leitanghte noma ngamte atu kong khensak zo a, nisuana Jordan ngun pan a nitumna Mediterranean Tuipi dong ka zaw sitset sate ii ngam zongh kong khensak zo hi.



⁵Topa na Pathian in no kung pan amate nungkinsak tu hi, tuaciang na mainaw uh ciang amate sia ama in hawlkeak tu hi. Topa na Pathian ii hong kamciam sa bangin amate ii ngam sia na tang tu uh hi.

⁶Tua ahikom Moses ii Thukham laibu sung a ki at te bangin na theampo na nit natu na belcing tavun. Tua ii sungah thute khat zongh na ngaingon heak vun,

⁷tuasia ciang no sungah a kihel hi mite taw na kipawl buatu uh a, amate ii pathiante sia thuson in na nei buatu uh hi, tua ahibuale zong amate ii min la in kamciam na vawt buatu uh hi, tua ahibuale tua pathiante bia in na kun suk buatu uh hi.

⁸Tua taangin tu dong ciang na thumaan sa uh bangma Topatungah thumaan tu nu hi.

⁹Topa in a thahat minam liante sia na mainaw uh ciang hong betkeaksak zo a, kuama no hong nalh zo om ngei ngawl hi.

¹⁰No sung pan pasal khat po in pasal tulkhat taikeaksak zo tu nu hi, banghangziam cile Topa na Pathian sia, hong kamciam sa bangma in, no atu ngal hong simsak hi.

¹¹Tua ahikom, Topa na Pathian na it tu uh kingaisun vun.

¹²Na thumaan bua uh a, no sungah a kikhe lai ngamte taw kipawlkhawm in na kiteang uh ahile,

¹³Topa na Pathian in hi mite sia na mainaw uh ciang hong nawkeaksak ngawl tu hi. Amate sia no atu in thaang bang ahizong vuum bang ahizongin hong lau huai zaw tu a, thibin pan kivel bangin naa na sa tu a, mittang sung ling do bang hong hi tu hi. Topana Pathian ii hong piak sa hi leitangh hoi tungah note khat zongh na om nawn ngawl uh dong hi bang thu sia hong kikhomsuan tu hi.

¹⁴“Tu in ka thi tu hun theng zo hi. Topa na Pathian in na pha theampo hong kamciam sa bangin hong pia zo ci sia na thinmuu na lungmuu uh taw a

kuama po in na he uh hi. Kamciam khat simin ama in keamcing a, khat zongh vaal thongsak ngawl hi.

¹⁵No tung a kamciam hong piakte a cingin a kepcing bangma in, hong tawnnate zongh tungsak tu hi.

¹⁶Topa na Pathian ii thuciamte keam a hong sawl bangin na keamcing bua uh a, pathian dangte atu sepsakin na bia uh le ama in a thin uukna hu in note daan hong pia tu a, ama ii hong piak sa hi ngam hoi ngam phana ah khat zongh hai ngawlin na om nawn buatu uh hi.

Joshua 24

Shechem ah Joshua in Mipite tungah Thuson

¹Joshua in Israel minam theampo Shechem ah khawmtua hi. Ama in upate, lampuite, thukhente, Israel te ukna za a nei te sam a, Pathian ii omna mai ah hong pai tek uh hi.

²Joshua in mipite theampo tungah, “Topa na Pathian ii pau nop sia hi teng hi: ‘Khua ngei pi hun lai in na taangpupite uh sia Euphrates Ngun ii langkhat ah teang a, pathian dang bia uh hi. Tua taangpupite sung pan khat sia Terah hi a, Abraham le Nahor ii pa ahi hi.

³Tuaciang na taangpupi uh Abraham ka la a, Euphrates ngun lang pan Canaan ngam buppi kantan in ka paipui hi. Suan le paal tam mama ka pia hi. Ama Isaac ka pia a,

⁴tuaciang Isaac tungah Jacob le Esau ka pia hi. Esau tungah a neisa tu in Edom ngam mualtung ngam ka pia a, ahihang na taangpupi uh Jacob ahile Egypt ah paisuk hi.

⁵A zawkciang Moses le Aaron ka paisak a, Egypt tungah ngimna lianpi ka pia hi. Ahihang no sia kong pusua hi.

⁶Egypt panin na taangpupite uh ka pusua a, tuaciang Egypt te in ngalleang le siphu ngalkapte taw del uh hi. Ahihang na taangpupite uh San Tuipi a thet uh ciang,



⁷amate in hu ngen in kei tungah hong au uh hi, tuasia ciang amate le Egypt te kilaklaw ah khua ka zingsak hi. Egypt te tungah tuipi ka kihualsak a, amate tuitaa siat hi. Egypt tunga ka vawt ka sep teng na he uh hi. “ ‘Senneal ngam sungah khua ngei ma na om uh hi.

⁸Tuaciang Jordan ngun ii niswana sang a om Amor te ngam ah kong paipui hi. Amate in no hong do ahihang amate na zaw tu in no tungah zawna kong pia hi. Amate ii leitangh na laaksak uh a, mainawt in na pai uh ciang amate ka lalthamsak hi.

⁹Tua zawkciang Moab te ii kumpi pa, Zippor ii tapa Balak in no hong do hi. Ama in Beor ii tapa Balaam samin no hong haamsiat tu in sawl hi.

¹⁰Ahihang Balaam ii ngetna ka ngai nuam bua hi, tua ahikom ama in no thupha hong pia hi, tuabangin Balak khut sung pan kong hunkhia hi.

¹¹Jordan ngun na kantan uh a, Jericho khua na theng uh hi. Jericho mite in Amor te, Periz te, Canaan te, Hit te, Girgas te, Hiv te le Jebus te ii hong do bangma in hong do hi. Ahihang amate tung theampo ah zawna kong pia hi.

¹²Na mainawt uh ciang Amor kumpipa te nii ka nawkeak natu in amate launa nasia takin ka pia hi. Na namsau uh te le na thal uh te hang hi ngawl hi.

¹³Na thaw ngei ngawl uh leitangh kong pia a, nasak ngei ngawl uh khuapite kong pia hi. Tu in tua munah na suan ngei ngawl uh sapit nga te ne in, na ciin ngei ngawl uh olive thau te na ne uh hi.’ ”

¹⁴“Tua ahi ciang, tu in, Topa upat vun a, thintak le thumaanna taw sepsak vun,” Joshua in a thu son zom a, “Mesopotamia le Egypt a na taangpupite ii biak pathiante vawk vun, Topa atu bek seam vun.

¹⁵Ama ii na na sepsak nuam bua uh le, tu ni in teal vun, akua atu seam nuam nu ziam? ih taangpupite ii Mesopotamia ah a biak pathiante ii na ziam maw, tu lai tak na teenna uh ngam Amorte pathiante ii na ziam? Ka innkuan puite le kei ka hi uh le Topa atu ka sepsak tu uh hi.”

¹⁶Mipi te in zokik a, “Topa nusia in pathian dang atu sepsak ngei ngawl tu khu hi.



¹⁷Topa ih Pathian in ih pute le ei sia Egypt ngam sal tanna pan hong pusua a, lamdang lakna a vawtte ih mu hi. Ih paina theampo ah ih kantan sa minamte kawm panin hong suatak hi.

¹⁸Hi ngam sungah mainawt in ih pai ciang Amor te tua munah a teangte sia Topa in hong nawkeaksak hi. Tua ahikom ko zongh Topana, sepsak tu khu hi; ama sia ih Pathian hi,” ci uh hi.

¹⁹Joshua in mipite tungah ci hi, “Ahihang Topa na, sepsak zo ngawl tha tu nu hi. Ama sia a thiangtho Pathian hi a, ama in na mawna uh hong maisak ngawl tu hi. Ama in ama a dem kuama dual zo ngawl hi.

²⁰Tuaciang pathian dang atu sepsak tu in ama na nusia uh le ama sia note hong langpan tu a, daan hong pia tu hi. Ni dangin no tungah hong dik hi kale ama in note hong lalthamsak tu hi.”

²¹Mipite in Joshua ii munah, “Hi bo! Topa atu sepsak tu khu hi,” ci uh hi.

²²Joshua in amate munah, “Topa na seam tu a, na tealna uh huvau a no mama tetti hi tu nu hi,” a ci ciang, “Hi hi, koma tetti pang khu hi,” a ci uh hi.

²³“Tua ahile ngamdangte pathian na kep uh te vawk vun, tuaciang na thumaanna uh sia Topa Israel te Pathian tungah nga vun,” ci hi.

²⁴Mipite in Joshua ii munah, “Topa ih Pathian atu sepsak tu khu hi. A thu piakte ni tu khu hi,” ci uh hi.

²⁵Tua ahikom Joshua in tua ni in thuciamna khat vawt a, Shechem ah thukham ngeina zui tute pia hi.

²⁶Joshua in hi thupiakna te Pathian ii Thukham laibu sungah at hi. Tua zawkciang ama in suangtum pui khat la in, Topa ii biakna mun limthingkung nuai khat ah phut hi.

²⁷Mipite theampo tungah, “Hi suang sia ih tetti hi tu hi. Topa ii ei tunga hong pau theampo zongh ama in za siat hi. Tua ahikom ama in note ii lang pan tetti hi tu a, tua in Topa na langpan ngawl natu hi tu hi.



²⁸Tua zawkciang Joshua in mipite ciasak a, misim in ama ii neisa ngam le lei ah heak kik uh hi.

Joshua le Eleazar Thi

²⁹Tuasia zawkciang Nun ii tapa Topa naseam pa Joshua sia a pian kum za le kum sawm a phak ciang thi hi.

³⁰Ama sia ama ii neisa leitangh Timnath Serah, Ephraim mualtung ngam, Gaash Mualvum iisak sangah kiphum hi.

³¹Joshua nuntak lai teng Israel mite in Topa naseam uh hi. Tuaciang ama ii thi zawkciang zong, Topa ii Israel te atu a sep a vawt a minpiang, a mu lampuite a nuntak lai teng Topa na a sepna zom suak uh hi.

³²Israel mite ii Egypt pan a paipui uh Joseph ii luang sia Shechem ii pa Hamor ii tung pan nguntang zakhat taw Jacob ii a lei leitangh no khat ahi Shechem ah kiphum hi. Hi leitangh sia Joseph ii suante in lua hi.

³³Aaron ii tapa Eleazar thi a, Ephraim ngam mual tungah a om, a tapa Phinehas tungah kipia khuapino Gibeah ah kiphum hi.



Thukhente

Thukhente 1

Judah le Simeon Minamte in Adonibezek Pummat

¹Joshua ii thi zawkciang Israel te in Topa dongh a, “Akua namte in Canaan te pai in, sim masa tu khu ziam?” ci uh hi.

²Topa in zokik a, “Judah namte pai masa tu hi. Amate tungah ngam uk thu neina pia khi hi.”

³Judah mite in Simeon mite tungah, “Ei hong kipia ngam sungah ko taw hong pai tavun, Canaante ih sim khawm tu hi. Tua zawkciang no hong kipia ngamte sia ko zongh kong sim pui tu uh hi,” ci hi. Tua ahikom Simeon namte le

⁴Judah namte sia ngalsim tu in kuan khawm hi. Topa in amate sia Canaan mite le Periz mite tungah zawna pia a, amate in Bezek ah ngalte tulsawm zo uh hi.

⁵Amate in tua munah Adonibezek mu uh a ama sim uh hi.

⁶Ama tai hi, ahihang amate in del a, pummat hi, amate in a khutpите le a peangpите tansak uh hi.

⁷Adonibezek in, “Kumpi sawmsali, a khutpите le a peangpите a kitante in ka sabuai nuai ah antaakte tawm uh hi. Amate tung a ka vawt teng Pathian in kei tungah hong thuk hi,” ci hi. Jerusalem ah ama kipaipui a, tua munah thi hi.

Judah namte in Jerusalem le Hebron La

⁸Judah nam sunga mite in Jerusalem simin la uh hi. A mihingte that uh a, a khuapi haltham hi.

⁹Hisia zawkciang amate in mualtung ngam a teang Canaan mite le mualpeang a teangte, thangsang ngam kona a omte sim uh hi.

¹⁰Amate in, Kiriath Arba a kici ngei Hebron khuapi kiim a teang Canaan mite kuan in sim uh hi. Tua munah amate in Sheshai, Ahiman le Talmai be le phungte zo uh hi.



Othniel in Debir Khuapi Zothal

(Joshua 15.13-19)

¹¹Tua mun panin Judah mite tua hun lai in Kiriath Sepher kinaa Debir khuapi sim tu in kuan uh hi.

¹²Amate sung pan khat ahi Caleb in, Kiriath Sepher a la zo sia ka tanu Achsah a tenpui tu in pia tu khi hi,” ci hi.

¹³Caleb ii naupa Kenaz ii tapa Othniel in khuapi la zo hi, tua ahikom Caleb in a tanu Achsah sia a tenpui tu in pia hi.

¹⁴Mo kiten ni in Othniel in ama ii munah, na pa ii tung pan lo khat ngen in sawl hi. Ama in a laa tung pan hong tuaksuk a, tuasia ciang Caleb in bang dei ni ziam ci in dongh hi.

¹⁵“Tuicing pawl khat dei khi hi, leitangh nong piak sia mun kona hi thong hi,” ci hi. Tua ahikom Caleb in cik tungnung le cik nuainung pia hi.

Judah namte le Benjamin namte ii Zawmate

¹⁶Moses ii sungh pa ii suan Ken mite in Judah mite taw kopin Jericho, palm thing namte pona, mualkolna ngam Judah ii thangsang zuan uh hi. Amalek te taw tua munah teang khawm uh hi.

¹⁷Judah nam mite le Simeon mite kuan khawm in Zephath khuapi a teang Canaan mite zo uh hi. Amate in khuapi tomlaw a, susia in, Hormah ci in min phua uh hi.

¹⁸⁻¹⁹Topa in Judah mite hu a, amate in a neisa tu in mualtung ngam la uh hi. Ahihang amate in Gaza, Ashkelon, ahibuale Ekron le a kiim a ngamte a la bua uh hi. Hi mite tuipi hui a, a teangte in thik ngalleang nei ahikom Judah mite in a nawtkeak zo bua uh hi.

²⁰Moses ii thupiak bangin, Hebron sia Caleb kipia a, ama in khuapi sung pan Anak ii suan minam thumte notkeak hi.

²¹Ahihang Benjamin mite in Jerusalem khua a teang Jebuste notkeak ngawl ahikom Jebus mite sia Benjamin mite taw tua hun a kipan teang khawm hi.

Ephraim namte le Manasseh namte in Bethel Suan



22-23 Tua hun lai in Ephraim namte le Manasseh namte pai in, Luz a kici Bethel khua sim uh hi. Topa in amate hu hi. Amate khuapi sungah thukan kute paisak uh a,

24 pasal khat khua pan paikhia tu kithoai a mu uh hi. “Khuapi sung tumna hong hil le te bangma hong law ngawl tu khu hi,” ci uh hi.

25 Tua ahikom ama in lak a, tuasia ciang Ephraim le Manasseh namte in tua pasal pa le a innkuanpui teng simngawl mon siat uh hi.

26 Ama in tua zawkciang Hit te ngamah pai in, khuapi khat tua munah sa hi, Luz ci in a min phuak a, tu dong ma tua min taw kinaa lai hi.

Israel te ii Nawkeak ngawl Mite

27 Manasseh minamte in a nuai a khuapi teng, Beth Shan, Taanach, Dor, Ibleam, Megiddo, le a nai a khuapinote sung pan mihingte a notkhia bua uh hi; Canaan mite tua munah teang suak uh hi.

28 Israel mite a thahat vaial ciang amate atu na sepsak tu in sawl uh a, ahihang amate sia a bengkeak siat bua uh hi.

29 Ephraim namte in Gezer khuapi panin Canaan mite notkeak ngawl ahikom Canaan mite sia amate taw teangkhawm suak uh hi.

30 Zebulun namte in Kitron khuapi le Nahalal khuapi sung panin Canaan mite a notkhe bua uh hi, tua ahikom Canaan mite sia amate taw teangkhawm top a, amate ii na sepsak tu in sawl uh hi.

31 Asher namte in Canaan mite sia a nuai a khuapite Acco, Sidon, Ahlab, Achzib, Helbah, Aphek, le Rehob panin a notkeak bua uh hi:

32 Asher namte in Canaan tualsuak mite sia notkhe ngawl ahikom amate taw teangkhawm hi.

33 Naphtali namte in Beth Shemesh te le Bethanath a teangte a notkeak bua uh hi. Naphtali namte in Canaan tualsuakte taw teangkhawm uh hi, ahizong amate ii na sepsak tu in sawl uh hi.



³⁴Amor mite in Dan namte sia mualtung ngam ah nolh to uh a zaanglei ah hong tuaksuk tu khaam uh hi.

³⁵Amor mite in Aijalon, Shaalbim, le Heres Mualvum ah teangtan a, Ephraim le Manasseh te in amate uk in, zawthawk thu taw sawltak in zangh hi.

³⁶Sela iisak sangah Edom te ii ngamngi sia Akrabbim Mualciangh kantan in pai hi.

Thukhente 2

Bochim ah Topa ii Vantung lalang

¹Topa ii vantung lalang sia Gilgal pan Bochim ah pai a, Israel te munah ci hi, “Egypt ngam panin no kong lakhia a, na taangpupite tungah ka kamciam sa leitangh tungah kong then hi. ‘Nang taw ka thu kiciamna ka peal ngei buatu hi, ka ci hi

²Hi ngam a teang te taw kiciamna vawt thei ngawl tu nu hi. Amate ii biaknataute na laitham tu uh hi, ka ci hi. Ahihang kong sawl bangin na ngamta bua uh hi. A lee lalam in na ngamta uh hi!

³Tua ahikom tu in kong cina pan, na mainaw uh ciang hi mite sia hong betkeaksak nawn ngawl tu khi hi. Amate sia na ngalte uh hong hi tu a, tuaciangin amate ii pathian biakpiakna in no thaang hong sia tu hi.”

⁴Vantung lalang in hi teng a ci zawkciang, Israel mite theampo kap tu in hong kithoi hi,

⁵tua hu in tua mun sia Bochim kici hi. Tua munah amate in Topa tungah sangaw biakpiakna pia uh hi.

Joshua ii Thina

⁶Ngam le lei amate ii tel tu tek tang tu in Joshua in Israel te paikhiasak hi.

⁷Joshua ii nuntak lai tengin Israel mite in Topa na sepsak uh hi, tuaciang a thi zawkciang, Topa ii Israel te atu na lianpi a vawt teng a mu lampuite ii nuntak lai teng seam tan uh hi.



⁸Topa ii naseam pa Nun ii tapa Joshua sia kum za le kum sawm a phak ciang thi hi.

⁹Ama sia ama ii leitangh ahi Timnah Serah a kicina, Ephraim mualtung ngam Gaash Mualvum iisak sangah kiphum hi.

¹⁰Tua khang mite theampo thi siat zo a, tuaciang a khang kikte in Topa leTopa ii Israel te atu a sep a vawtte mangil uh hi.

Israel te in Topa A biak kik uh Tawp

¹¹Tua zawkciang Israel mite in Topa tungah mawna vawt uh hi, Baal pathiante bia tu in hong kipan uh hi.

¹²A taangpupite ii Pathian, Egypt ngam panin amate a la khia Pathian Topa a biak tu tawpin amate ii kiim le paam a mihingte ii pathian pathian dangte bia tu in hong kipan uh hi.

¹³Topa a biak tu tawpin Baal le Ashtartes te bia uh hi.

¹⁴Tua ahikom Topa sia Israel tungah nasia takin thin uuk a, ngalnguk in simsaksak a, suamsak hi. Kiim le paam a ngalte in amate zosak a, amate le amate kihung zo nawn ngawl uh hi.

¹⁵Ngal kido tu in a kuan uh simin, a ci sa bangma, Topa sia amate ii lang ah pang hi. Amate sia thinkiam mama uh hi.

¹⁶Tuasia ciang Topa in ngalnguk seamte ii khut pan a hung tu lampuite pia hi.

¹⁷Ahihang Israel te in a lampui uh te sia awlmawk vawt ngawl uh a, Israel sia Topa tungah thumaan ngawlin pathian dangte bia uh hi. Amate ii pate in Topa ii thupiakte ni hi, ahihang hi khangthakte in thu ni nawn ngawl uh hi.

¹⁸Israel te ii tungah Topain lampui khat a piak simin, tua lampui pa ii nuntak lai teng Topa in Israel te sia ngalte khut sung pan hung hi. Nenniamna le thuakna taw a tau uh ciangin Topa in hesuak hi.



¹⁹Ahihang lampui sia a thi ciangin a ngamtat lui uh kan kik uh a, a khang masa te sangin a ngamtatna sia zaw hi. Amate in pathian dang bia in a na sepsak uh a, amate ii khansiatna te a thasua nuam peuma bua uh hi.

²⁰Tuasia ciang Topa sia Israel tungah thin uuk mama a, “Hi minamte in a taangpupite tunga ka thuciamte keamcing a ka sawlte paltan hi. Amate in kei thu hong ni ngawl ahikom,

²¹Joshua ii thi hun dong a ngam sungah a om lai minamte betkeaksak nawn ngawl tu khi hi.

²²A taangpupite uh ii vawt bangma in hi Israel mite in ka thu hong zui ziam hong zui bua ziam ka heak natu in amate zangh tu khi hi.

²³Tua ahikom Topa in hi minamte sia a ngam sungah teangsak lai a, Joshua in a zosak bua hi. Joshua ii thi zawk po ciang zong amate a notkeak bua hi.

Thukhente 3

Ngam sungah A taanglai Minamte

¹Tua ahikom, Topa in Canaan ngal kisim na sungah a kihel ngawl Israel te a ze et natu in minam pawlkhatte a taangsak lai hi.

²Hi bangin ahi sia Israel te khang simin ngal huvau a hil natu, a tuanin kidona sungah a kihel ngei ngawlte a hil natu ahi hi.

³A ngam sung a taanglai teng sia Philistine te khuapi nga, Canaante, Sidonte, Lebanon Mualpi tung Baal Hermon Mualvum pan Hamath Mualciangh dong a teang Hiv te ahi hi.

⁴Moses ii tungtawn in Israel mite ii taangpupite tungah Topa ii thukham a piakte a ni ziam a ni bua ziam ci in Israel te a ze et natu in amate a kikhoaikhe ahi hi.

⁵Tuabangin Israel mite sia Canaan te, Hit te, Amorte, Periz te, Hiv te le Jebus te kawmah teang uh hi.

⁶Tua mite taw amate kiteang uh a, amate ii pathiante zongh a bia uh hi.

Othniel



⁷Israel mite in Topa a Pathian mangil ta uh hi; Ama tungah amate maw a, Baal le Asherah ii milimte bia uh hi.

⁸Tua ahikom Topa sia Israel tungah thin uuk a, Mesopotamia te ii Kumpipa Cushan Rishathaim in zosakin, kum liat sung uk hi.

⁹Tuaciang Israel te inTopa tungah ko uh a, Ama in amate a suatak tu mihing khat paisak hi. Tuasia in Caleb ii naupa, Kenaz ii tapa, Othniel ahi hi.

¹⁰Topa ii thaa sia ama ii tungah hong theng a, ama in Israel te ii lampui hong suak hi. Othniel in ngal sim a Topa in ama sia Mesopotamia Kumpipa zosak hi.

¹¹Ngam sungah kilemna kum sawmli hong om a, tua zawkciang Othniel hong thi hi.

Ehud

¹²Israel te sia Topa tungah mawna vawt leleau hi. Hisia hu in Topain Moab te kumpipa Kumpipa Eglon sia Israel te sangin hatsak zaw hi.

¹³Eglon in Ammon te le Amalekte ngawmtua hi; amate in Israel te zo in, palm thing khuapi Jericho khuapi hong suan hi.

¹⁴Israel te sia kum sawm le kum liat sung Eglon khut nuai ah om uh hi.

¹⁵Tuasia ciang Israel te in Topa tungah ko uh a, amate suatak tu in mihing khat paisak hi. Hisia in Ehud hi a, a veilawng pasal khat hi, ama in Benjamin ii suan Gera ii tapa hi. Israel mite in Ehud sia Moabte ii Kumpipa Eglon kungah letsong pia tu in paisak hi.

¹⁶Ehud in a lang nii hiam pi khat le pi lang bang a sau namsau khat vawt hi. ama in a ziatsang pangh a puan nuai ah tua namsau sawm hi.

¹⁷Tua zawkciang ama in Eglon kungah a letsong paipui hi, Eglon sia a thau mama pasal khat hi.

¹⁸Ehud in letsongte a piak zawkciang, tua letsong a pua mite inn ah cia kikin sawl hi.



¹⁹Ahihang Ehud ama ahile Gilgal hui asuanggelte pan heak a, Eglon kungah pai kikin, “Kumpipa awng, nang atu thuku khat nei khi hi,” ci hi. Tua ahikom kumpipa in a naseamte mun ah, “Ko nguak hong omsak tavun,” ci hi. Tuasia ciang amate theampo pusuak hi.

²⁰Tua zawkciang , kumpipa sia innkhum tung a vot ama ii khaan sungah a to laitak Ehud in ma ii kungah pai in, “Pathian ii kung pan nang atu thupuak khat kong nei hi,” ci hi. Kumpipa hong ding hi.

²¹Ehud in a khut veisang taw a ziatsang pangh pan namsau hong la a, kumpipa ii ngil hol hi.

²²Namsau bup sia a kuung taw cipin tum hi, tuaciang a thau in a namsau tuam hi. Ehud in kumpipa ii ngil panin a dok bua hi. A peangte ngeal kilaklaw a ngoai sangah a suaklet hi.

²³Tua zawkciang Ehud pusuak in, a nungah kongkhate khasan in taw kilh in,

²⁴tuabangin nusia hi. Naseamte hong pai uh ciang kongkhate taw kikilh mu uh hi, ahihang amate in kumpipa sia a sungah om nginge a, awng po haw hi tu in um uh hi.

²⁵Amate in ngak tu tuak tan vei a ngak zawk uh ciang kumpipa in kongkhate hong peang ngawl ahikom amate in tawtang la in hong uh hi. Tua munah a Topa uh sia a thi sa in suat tungah a om hi.

²⁶A naseamte ii ngangaa laanin Ehud sia tai man hi. Suuanggelte omna kantan in pai a, Seirah ah suakta hi.

²⁷Ephraimte ii mualtung ngam hong thet ciangin Israel mite ngalsim tu in samna lemle hong tum hi, tuaciang ama in amate sia mualtung panin lam a pui suk hi.

²⁸Ama in, “Hong zui tavun! Moab na ngalte ii tungah Topa in zawna hong pia zo hi,” ci hi. Tua ahikom amate in Ehud zuisuk a, Moabte ii Jordan ngun a kan natu mun sia la uh hi. Mihing khat zongh kantansak ngawl uh hi.



²⁹Tua ni in amate in Moabte ii ngalkap pha bel tulsawm bang that uh hi; khat zongh a suakta om ngawl hi.

³⁰Tua ni in Israel te in Moabte zothal a, ngam sungah kum sawmliat ngal kilemna om hi.

Shamgar

³¹Lampui a zom sia Shamgar hi a, Anath ii tapa hi. Ama zongh in khuital hawlina ciangzum taw Philistine te zaluk that in Israel te hung hi.

Thukhente 4

Deborah le Barak

¹Ehud ii thi zawkciang Israel te Topa tungah mawna vawt leleau uh hi.

²Tua ahikom Topa in amate sia Hazor khua a teang Canaante kumpipa Jabin in zosak hi. A ngalkap honpi ukpipa sia Gentile te ii Harosheth a kici khua ah a teang Sisera ahi hi.

³Jabin in thik ngalleang zakua nei a, ama in Israel te sia tatsiatna le molngolna taw kum kul uk hi. Tuasia ciang Israel mite in Topa tungah hu ngen in au uh hi.

⁴Tu in, Lappidth ii zi Deborah sia kamsang khat hi a, tua hun lai takin ama in Israel te ii thukhen seam hi.

⁵Ama in Ephraim mualtung ngam Ramah le Bethel kilaklaw palm thingkung khat ii nuai ah to bul a, tuaciang Israel mite in ama ii khensatnate thangai in pai bul uh hi.

⁶Ni khat ni ciang ama in Naphtali ngam a om Kadesh khuapi ah a teang Abinoam ii tapa Barak samsakin ama tungah son hi, “Topa, Israel ii Pathian in nang sia hi thu hong pia hi, ‘Naphtali le Zebulun namte panin pasal tulsawm la in a, Tabor Mualvum saangah zot pui in.

⁷Keima in Jabin ii ngalkap hon ukpipa Siserah sia Kishon Ngun ah nang taw kido tu in kong paipui tu hi. Ama in a ngalleang le a ngalkapte nei hi ma kale ama ii tungah zawna nang kong pia tu hi.’ ”



⁸Tuasia ciang Barak in zokik a, “Nangma nong paipui le kei zongh ka pai tu a, nang nong paipui buale kei zongh ka pai buatu hi,” ci hi.

⁹Ama in zokik a, “Pha hi, nang hong paipui tu khi hi, ahihang nang in zawna tungah bangma min na nga buatu hi, banghangziam cileTopa in Siserak sia numei khat ii khut sungah hong aap tu hi.” Tuabangin Deborah in Barak taw Kadesh ah kuan tu in pai hi.

¹⁰Barak in Zebulun le Naphtali namte sung panin pasal tulsawm samin ama zuisak hi. Deborah sia ama taw paikhawm hi.

¹¹Tua hun laitakin Ken mi ahi Heber in Kedoh khua hui Zananim limthing nuai ah tuipuan buk sa hi. Moses ii sunghno ahi Hobab ii suan le paalte Kente ii kung pan paikhia hi.

¹²Barak sia Tabor Mualvum ah pai zo hi ci in a zaak ciang Sisera in a ngalleang

¹³zakua teng a mite Gentile te ii Haroseth a kicina mun pan Kishon Ngun ah paisak hi.

¹⁴Tuasia ciang Deborah in Barak munah, “Pai vun! Topa in hong lampui hi! tu ni in ama in Sisera tungah zawna hong pia zo hi. “Tua ahikom Barak in ama ii mi tulsawm teng taw Tabor Mualvum panin tuaksuk uh hi.

¹⁵Barak in a ngalkapte taw a sim tak ciang Topa in Sisera ii ngalleangte le a ngalkapte sia a nokkhak bialbual tu in vawt hi. Sisera sia a ngalleang tung panin hong tuaksuk a, a peangin tai hi.

¹⁶Barak in ngalleang le ngalkapte del a, Gentile te ii Haroseth a kicina mun dong, tuaciang Sisera ii ngalkap hon bup thatlum hi. Mihing khat zongh a kikhe bua hi.

¹⁷Ken mi Heber ii zi Jael ii tuipuan buk dong Sisera a tai hi, banghangziam cile Hazor kumpipa Jabin sia Heber ii baangkua taw kilem hi.



¹⁸Jael pusuak in Sisera muak hi, “Hong pai tan, Topa, ka tuipuan buk sungah hong tum tan. Lau heak in!” ci hi. Tuabangin ama tum hi, tuaciang innteaknu in puankhakna lia ah seal hi.

¹⁹Ama in numei munah, “Nong hesuakna tuidam dawn tu hong pia tan; ka dangko hi,” ci hi. Ama in noai koina savun ip khat hongin a dawn tu in pia hi, tuaciang seal kik hi.

²⁰Tua zawkciang ama mun ah ci hi, “Tuipuan buk ii kongah ding in, khat po hong pai in hi sungah a om om ziam ci in hong dongh le om bo ci in.”

²¹Sisera sia toi mama ahikom mutthip paih hi. Tuasia ciang Jael in sek khat le tuipuan buk panet khat la in, dam takin ama kungah pai hi, tuaciang a thaideap pan panet leisung dong khenin thatlum hi.

²²Barak in Sisera zongh in hong pai ciangin Jael in ama muak a, “Hong pai tan, na zon sia pa hong lak tu khi hi,” Tuabangin ama taw a sungtan uh le Sisera sia lei ah a thi sa in om a, tuipuan buk panet khat a lutang paillet in a na kikhen hi.

²³Tua ni in, Pathian in Israel te in Canaan kumpipa Jabin zosak hi.

²⁴Canaan kumpipa a suksiat diipdeap dong amate in a nasia vaial, a nasia vaial in phul a, sim uh hi

Thukhente 5

Deborah le Barak ii La

¹Tua ni in Deborah le Abinoam ii tapa Barak in la hisia sa uh hi.

²Topa pok vun! Israel te sia a thin khensat zo uh hi, mihingte sia lungdam takin hong kipia uh hi.

³Ngai vun, no kumpipate awng! Ngam ukte awng, hong nadon tavun! La ka sa tu a, tum thei te ka tum tu hi Israel te ii Pathian tungah, Topa tungah.

⁴Topa awng, Seir mualpите na nusiат ciang, Edom ngam panin nong pusua ciang, lei liingin van pan nguatui hong kia suk hi. Hi hi, meei sung panin tui hong bua hi.



- ⁵Sinai ii Topa mai ah mualpite liing hi, Topa mai ah, Israel Pathian mai ah.
- ⁶Anath ii tapa Shamgar ii hun sung, Jael ii khansung, kalaoh hon vanh puate ngam kaanin pai nawn ngawl hi, tuaciang khualhaw te in zinnote a tawn uh hi.
- ⁷Israel te ii khuapi note kinusia hi, Deborah awng, nang nong pai mateng amate sia a hawmpi in ding hi, Israel atu in nu bangin nong pai hi.
- ⁸Tuaciang ngam sungah ngal hong om hi Israel te in pathian thak hong teal uh ciang. Israel ngam sungah pasal tul sawmli, tuate sungah lum le tei toai akua om ziam?
- ⁹Ka thin sia Israel ngalkap ukpите taw omkhawm hi, lungdam takin a kipia te taw om hi. Topa pok vun!
- ¹⁰Laa kaang tungah a to note awng, kungh tungah a tote awng, na pai natu mun theampo ah peang taw a paite awng, hi thu son tek vun.
- ¹¹Ngai vun! Tuikhuk kiim ah a ngamlumte in Topa ii ngal zawna kikum uh hi. Israel mite ii ngal zawna. Tuaciang Topa ii mite in a khuapi uh pan, hong kuan suk hi.
- ¹²Lampui in, Deborah awng, lampui in! Lampui in! La khat sa in! Lampui in! Mainawt in! Abinoam ii tapa Barak awng, na ngalmatte paipui in!
- ¹³Tuaciang a thumaan te kungah hong pai a, Topa ii mite ama ii kungah ngal sim tu in ki nging sa in hong pai uh hi.
- ¹⁴Amate in Ephraim panin a kuam sungah, Benjamin namte le a mite ii nungsang pan ngalkap ukte Machir pan hong pai suk hi, min nei za neite Zebulun pan hong kuan suk hi.
- ¹⁵Issachar ii lampuite Deborah taw hong pai uh hi; hi hi, Issachar hong pai a, Barak zongh hong pai hi, tuaciang amate in kuam sungah ama a zui uh hi. Ahihang Reuben minamte kikhen tham uh hi; amate in hong pai tu a khensat thei bua uh hi.



¹⁶Banghangin amate nung sangah tuute taw taang khawm ziam? Tuucingte ii tuuhonte a sam ngai tu in maw? Hi hi, Reuben minamte kikhen uh hi; amate in hong pai tu a khensat thei bua uh hi.

¹⁷Gad namte Jordan ii nisuana sangah om hi, Tuaciang Dan namte sia teambaw kungah om uh hi. Asher namte tuipi vaalbo ah teang uh hi; amate tuipi vaalbo ah om suak uh hi.

¹⁸Ahihang Zebulun le Naphtali namte in, ngalphual ah a nuntakna uh aita uh hi.

¹⁹Megiddo lui hui Taanach khua ah, kumpite hong pai uh a kido hi; Canaan kumpite in ngalsim uh a; ahihang amate in ngun bangma ciapui ngawl hi.

²⁰Aksite in, vantung pan ngaldo uh hi; van zanglai kaanin a pai uh ciang, amate in Sisera sim hi.

²¹Kishon ah namthuam in amate taaikeak a — Kishon Ngun pawm sia in. Mai ka nawt tu, ka nawt tu, thahatna taw.

²²Siphute hong kinuntaw uh a, a peangcin uh taw lei tuan uh hi.

²³“Meroz tomlaw in” Topa ii vantung lalang in ci hi, “Tomlaw vun, tua munah a teangte tomlaw vun. Amate in Topa hu tu in hong pai bua uh hi, ngalkap bang ngal sim tu in Topa hong pai ngawl hi.”

²⁴Numei a kaam pha bel sia Jael hi, Ken mi Heber ii zi tuipuan buk sung a teang teng po pan, a kaam pha bel hi.

²⁵Sisera in tui ngen a, ahihang ama in khuinoai pia hi; ama in kuang hoi khat taw noaidiat puak hi.

²⁶Ama in a khut lang taw puanbuk khetphin toai in, a lang khat taw naseamte sekpui toai hi; Ama in Sisera lutang khenin a lu ngu zaan hi; ama in a lutang vutlet hi.

²⁷A khupte top suk in, puksuk a, a peang kungah tung ngawlin lum hi. Ama ii peang a khupte tungah top sukin puk hi; lei ah pukin thi hi.



²⁸Sisera ii nu in khelki pan khua en a, puankhak ii nung panin salh hi. “Banghangin a ngalleang hong cia kik tu haisaang ziam?” ci in ama in dongh hi. Banghangin a siphute vai hai thong ziam?”

²⁹A lalang numei ciimbel te in zokik a, ama le ama zongh kison kikik hi,

³⁰“Amate in a mat tu le a hawm tu nate zong hi, ngalkap sim atu ngaknu khat ahibuale nii, Sisera atu puan manham kumpinu ngawng atu paak bang kikhui puan, zong hi tu hi.

³¹Topa awng, na ngalte theampo tuabang veu in thi taken, ahihang na lawmte sia nisuak bangin taang taken! Tuaciang ngam sungah kum sawmli ngallemna om hi.

Thukhente 6

Gideon

¹Khat vei ma Israel te in Topa tungah mawna vawt hi, tua ahikom Midian mite in amate kum sali uk hi.

²Midiante sia Israel te sangin hat zaw ahikom Israel te lianghawng khawng mualtung a ngammuanna ah buu uh hi.

³Israel te in thaici a tu uh ciang, Midiante sia Amalekte le senneal ngam minamte taw pai in sim uh hi.

⁴Amate in ngam sungah ngiaphual saat uh a, Gaza ngam thangsang tawng dong ankungte hong susia hi. Amate in khuite, tuute, laate hong la uh a, Isrealte nuntak natu bangma kheet ngawl uh hi.

⁵amate in a puanbuk uh le a ngannote taw hong pai uh ciang khaumaw za in tam uh hi. Amate le a kalaoh te sim zawk pang ngawl hi. Amate hong pai a,

⁶ngam sung sia hong susia ngawp ahikom amate ii lang pan Israel te cimaw uh hi.

⁷Tuasia ciang Israel mite in Midiante langpan zawk natu in Topatungah au uh a,



⁸Tuaciang ama in kamsang khat paisak a, Topa Israel te Pathian ii thupuakte kengsak hi: “Egypt ngam na saltanna uh panin kong lakhia hi.

⁹Egyptte le hi ngam sunga hong sim na ngalte kung pan kong hung hi. Na mainawt uh ciang amate sia ka notkeak hi, tuaciang amate ii ngam no kong pia hi.

¹⁰Keima in Topa na Pathian khi hi, tuaciang a leitangh uh tunga tu laitak na teenna uh Amorte ii pathiante na bia buatu uh hi, kong ci hi. Ahihang kei nong nadon bua uh hi.”

¹¹Tuaciang Topa ii vantung lalang Ophrah khua ah hong pai a, Abiezer phungte sung a pasal khat ahi Joash ii neisa limthingkung nuai ah hong to hi. A tapa Gideon sia Midiante ii mu ngawl natu in sapittui meakna munah zungtaang tawm hong cil ku hi.

¹²Topa ii vantung lalang sia tua mun ama ii mai ah hong kilaak a, hi bangin ci hi, “Topa sia nang taw omkhawm hi, ngal hangsan thahat pa awng.”

¹³Gideon in ama ii munah ci hi, "Kong dongh thei tu ahile, Topa,Topa in hong ompui ahile hite theampo banghangin piang ziam? Ka pate uh ii hong son Topa sep nalamdang te— amate Egypt ngam pan a pusua na khawngte theampo bang sua ni ziam? Topa in hong nusia zo a, Midiante ii hong hesuak tu po in hong taisan zo hi.”

¹⁴Tuaciang Topa in thu pia a, “Na thahatna theampo taw kuan in a, Israel te Midiante khut sung pan suatak in. Keima tatak ma in nang hong sawl khi hi.”

¹⁵Gideon in zokik a, “Banghangin Israel hun khia thei tu khi ziam? Ka be ka phung sia Manasseh nam sung pan a zawngkhal bel hi a, keima zongh ka baangkua sung pan a thupi ngawl bel ka hi hi.”

¹⁶Topa in zo a, “Vawt thei tu ni hi, banghangziam cile keima in hong hu tu khi hi. Midiante sia mihing khat vawt tu bangin ol takin na nuaitham tu hi.”

¹⁷Gideon in, “Kei dik nong sa in ahile nang sia Topa na hina hong lak tan.



¹⁸Nong hesuakna in an taw biakpiakna kong paipui dong hong nusia heak in,” ci hi. Ama in, “Nong pai kik dong om tu khi hi,” ci hi.

¹⁹Tua ahikom Gideon inn sungah tumin, kealmoi khat la a, mangtaang vui toai 6 le lang khawng la in, tol saw ngawlin anluum vawt hi. Ama in a sa sia bawm sungah koi in, a satui sia beal sungah a koi zawkciang Topa vantung lalang kung limthing nuai ah tua ante ama pia hi.

²⁰Vantung lalang in, “A sa le anluum sia suangpi tungah koi in a, a tung pan satui buak suk in,” ci hi. Gideon in tuabangin vawt hi.

²¹Tuasia ciang Topa vantung lalang in a ciangkang toai sia ii dawn taw thutha hi. Suangpi sung panin meikuang hong pusuak a, sa le anluum sia kaangtum hi. Tua zawkciang vantung lalang bo hi.

²²Tuasia ciang Gideon in Topa ii vantung lalang mu ahi hunlam phawk in, launa lianpi taw, “Vaanglianpipa Topa, na vantung lalang maitang kisii in mu thong khi hi,” ci hi.

²³Ahihang Topa in, ama munah, “Thinnuamsak in! Lau heak in! Thi ngawl tu ni hi,” ci hi.

²⁴Gideon in tua munah biaknatau khat sa in, ‘Topa sia thinnopna hi,’ (*Jehovah Shalom*)” ci hi. (Tuasia tu dong ma in Ophrah ah ding lai a, Abiezer ii be le phungte neisa ahi hi.)

²⁵Tua ni zanin Topa in Gideon munah, “Na pa ii khuital le khuital dang khat la in a, na pa ii Baal atu a vawt biaknatau sia baltham in, tuaciang Asherah pathiannu ii lim a kung a om sia zongh phukvawk in.

²⁶Topa na Pathian atu in pha tak a kisa biaknatau khat hi, leibawk tungah sa in. Tuaciang khuital a niina sia la in, a bup in hal in, piakkhiatna in zangh in, a thingkang tu in Asherah lim na phukvawk sia zangh in,” ci hi.

²⁷Tua ahikom Gideon in a naseamte sawm la in Topa ii sawl teng vawt hi. Ama in a innkuanpuite le khua mite kiita lei ahikom sunin seam ngam ngawlin zanin seam hi.

²⁸Khuapino sunga om mite zing tuungin hong thaw uh ciang, Baal ii biaknatau le Asherah ii limte kiphuk a mu uh hi, tuaciang khuita a niina sia biaknatau kisa sia tungah piakkhiatna in kihaltum mu uh hi.

²⁹Amate le amate kidongh a, “Akua in hi sia vawt ziam?” Amate in a kat uh ciangin Joash ii tapa Gideon in vawt hi ci in he uh hi.

³⁰Tuasia ciang amate in Joash ii mun ah, “Na tapa hi sungah ka thalup tu uh in hong paisak tan! Ama in Baal ii biaknatau sia baltham a, Asherah ii thingngel a kung a om sia phuktan hi,” ci uh hi.

³¹Ahihang Joash in ama a nalhte theampo tungah, “Baal panpui tek a kinei nu ziam? Ama hung nu ziam? Ama a hung khat pawpo sia zing khuavak maa in thalup thuak tu hi. Baal sia pathian ahile ama le ama kihung taken. A kibaltham biaknatau sia ama aa hi,” ci hi.

³²Tua hun pan kipan sia Gideon sia Jerubbabbe kinaa hi, banghangziam cile Joash in, “Baal in ama le ama kihung taken; biaknatau a kibaltham sia ama aa hi,” a ci hu hi.

³³Tuaciang Midian mite theampo, Amalekte, le senneal ngam sung teang minamte hong kikhawmtua in, Jordan Ngun a kaan zawk uh ciang, Jezreel Kuam ah ngiaphual saat uh hi.

³⁴Topa ii thaa in Gideon uk a, tuaciang ama in Abiezer be le phungte sung pan pasalte ama zui tu samna lemle tum hi.

³⁵Ama in kamtaite sawlin Manasseh ngamte ngeal bup ah ama zui tu in samsak hi. Ama in kamtaite sia Asher, Zebulun, le Naphtali ah paisak a, amate zongh ama taw kipawl tu in hong pai uh hi.

³⁶Tuasia ciang Gideon in Pathian munah, “Israel te hunkhia tu in kei nong zak tu khensat zo khi hi,” ci ni hi.

³⁷“Pha hi, tuumul pawlkhat ka zungtaang cilna ah koi tu khi hi. Zingsang ciangin daaitui sia tuumul tung bek ah om in, leitangh tungah a om buale, Israel te hunkhia tu in hong zangh takpi tu na hina ka tel tu hi.



³⁸Tuabang tatak ma in hong piang hi. Zing khuavak tuungin Gideon hong thaw ciang, ama in tuumul hong meak a, kuang khat dim daaitui om hi.

³⁹Tuaciang Gideon in Topa munah, “Na thin uuksak heak in, khat vei lian bekma pau lai tong. Tuumul taw khatvei hong sinsak lai tan. Tusia ciang tuumul kosak in a, a leitangh kawtsak in.”

⁴⁰Tua zan in Pathian in tuabang tatakin vawt hi. A zingsang ciang tuumul sia ko a, leitangh sia daaitui taw kawt hi.

Thukhente 7

Gideon In Mudiante Zo

¹Ni khat ni in Gideon le a pawlte tho pal in Harod Cik paam ah ngiaphual saat uh hi. Mudiante ii ngiaphual sia Moreh Mual iisaksang kuam sung ahi hi.

²Topa in Gideon munah ci hi, “Mudiante ii tungah zawna kong piak natu na mihing nei teng sia kei atu tam lei hi. Amate in amate ii zaw khawng sa in kei hong upat ngawl tu uh hi.

³Mihingte tungah thu thangsak in a, ‘A lau khat pawpo sia inn ah cia kik thei tu hi,’ tuaciang ko sia Gilead Mual ah ka na om tu uh hi,” ci in son hi. Tua ahikom tulkul le telnii cia kik a, ahihang tulsawm taanglai hi.

⁴Tuaciang Topa in Gideon munah ci hi, “Na mihingte tam lei lai hi, tui ah paipui in a, tua munah nang atu kong khensak tu hi. Mihing khat sia nang taw pai tu hi ka ci le pai tu a, pai ngawl tu hi ka ci le pai ngawl tu hi.”

⁵Gideon in tui omna ah paipui suk a, tuaciang Topain ama mun ah ‘Ui bangin a leei uh taw tui a liak khat sim, khupdin a tui a ne sukthe panin khen tu ni hi,” ci hi.

⁶A khutpheap uh taw tui suak a a leei uh taw a liakte sia zathum pha hi; a dang teng in khupdin sukin tui a dawn uh hi.

⁷Topa in Gideon ii munah, “Mudiante khut sung pan nang kong hunkhia tu a, a leei uh taw tui a liak mihing zathum teng taw zawna kong pia tu hi. A dangte theampo cia tu in sawl in.



⁸Tua ahikom Israel te nguai an le lemle a keng mihing zathum simngawl teng Gideon in inn ah ciasak hi.

⁹Tua ni zan in Topa in Gideon thupia a, “Tho in a ngiaphual sim in, tua ii tungah zawna nang hong pia khi hi.

¹⁰Ahihang na sim tu na lau a, ahile na naseam pa Purah taw ngiaphual ah paisuk tavun.

¹¹Amate ii paute na za tu a, tuasia ciang sim natu na thin hong lian tu hi.”
Tua ahikom Gideon le a naseam pa Purah sia ngalte ngiaphual kiil dong hong pai uh hi.

¹²Midiante, Amalekte le senneal ngamsung a minamte sia kuam sungah khaumaw hon bangin kizel uh hi,tuaciang a kalaoh te zong tuipei vaal a sente za in tam hi.

¹³Mihing khat in a lawmpa tungah a mang a son teng Gideon hong thet ciangin za hi. Ama in hi bangin a ci laitak hi, “Ka mang in zungtaang taw a kivawt anluum khat ih ngiaphual ah hong liik suk a, puanbuk khat kha hi. Puanbuk sia cimh in lei ah kipheangpha hi.

¹⁴A lawmpa in zo a, Israel te Joash ii tapa Gideon ii namsau hi! Khiakna dang mama nei thei buan te! Midiante le a ngalkap bup sia ama tungah Pathian in hong pia zo hi!” ci hi.

¹⁵Gideon in mihing pa ii mang le a khiakna a son teng a zaak ciang khupdin in Pathian bia hi. Tua zawkciang ama Israel te ngiaphual ah heak kikin, “Tho vun! Midian ngalkap honpi tungah no sia Topa in zawna hong pia zo hi,” ci hi.

¹⁶Ama in mihing zathum teng sia pawl thum in khen a, lemle khat le thambeal khat meisip taw kikop khat tek pia hi.

¹⁷Amate tungah ci hi, “Ngalte ngiaphual hui ka thet ciang, hong en nginge tavun a, keima ii hi bang hi vun.



¹⁸Ka pawlte le keima in lemle kong tum uh ciang, no zongh ngiaphual kiimkot panin lemle nong tum uh a, ‘Topa atu le Gideon atu’ ci in nong au tu uh hi.”

¹⁹Zankim mahiat, ngalvilte kilaih zawk hiat ciangin Gideon le a mi zakhat teng sia ngiaphual hui hong theng hi. Amate in lemle tumin, a ken uh thambealte hong sutham uh a,

²⁰tuaciang pawl dang nii te zongh in tuabangma in hong ngamta uh hi. Amate in meisipte a veisang khut taw len in, a ziat sangah lemle toai in, “Topa atu le Gideon atu namsau khat!” ci in a au uh hi.

²¹Misim in ngiaphual kiim ah ama din natu san, ngiaphual kiim ah hong ding tek uh a, ngalte ii ngalkapte sia au in a taithaap uh hi.

²²Gideon ii mihingte in lemle hong tum sungin, Topa in ngalte sia amate le amate namsau taw kisimsak uh hi. Amate sia Zarethan sang Beth Shittah dong, Tabbath hui Abel Meholah khua dong tai uh hi.

²³Tua zawkciang, Naphtali, Asher le Manasseh ngamte ngeal pan mite kisam khia in Midiante del uh hi.

²⁴Gideon in Ephraim mualtung ngam a omte theampo tungah kamtai paisak a, “Midiante sim tu in hong pai suk tavun. Midiante ii kantan thei ngawl tu in Jordan Ngun le luite Bethbarah dong cing vun.” Ephraim mite kisam in, tuaciang amate in Jordan Ngun le luite Bethbarah dong topha uh hi.

²⁵Amate in Midiante ukpите nii, Oreb le Zeeb pummat uh a, Oreb sia Oreb Suangpi ah thatin, Zeeb sia Zeeb ii Sapitzu suukna mun ah that uh hi. Amate in Midiante del tan a, Oreb le Zeeb ii lutangte sia Jordan nisuana a om Gideon ii kungah hong paipui uh hi.

Thukhente 8

Midiante ii A khakbel A Ielna

¹Ephraim mite in Gideon munah, “Midiante na sim tu lai in banghang hong sam ngawl ni ziam? Banghangin ko hi bangin hong vawt nu ziam?” ci in nasia takin haam uh hi.



²Ahizong ama in, “Kei ii tawm ka sep teng sia no ii septe taw teengat taak ngawl hi. No Ephraimte ii tawm na sep uh teng sia ko minam bup ii sep sang zong manh nei zaw hi.

³A dang son ta bualeang, Pathian ii thahatna taw Midiante ukpite Oreb le Zeeb that nu hi. Tua taw a kiteengat thei tu kei sep bang om thong na ziam?” Hi bangin a ci zawkciang amate sia taza pi in thin uuk nawn ngawl hi.

⁴Hisia hun ciang Gideon le a mihing zathum teng in Jordan Ngun ah hong pai in kantan uh hi. Amate sia toi mama hi, ahihang Midiante ma del tan lai hi.

⁵Amate in Sukkoth ah hong thet uh ciangin a khua mite munah, “Nong hesuakna in ka mihingte anluum hong piaksak tavun. Amate sia toi mama zo a, tuaciang Midian kumpipate ahi Zebah le Zalmunna te del suak lai khu hi,” ci hi.

⁶Ahihang Sukkoth lampuite in, “Banghang peuma na ngalkapte an hong piaksak tu khu ziam? Zebah le Zalmunna zongh na mat pepeu ngawl lai uh po,” ci uh hi.

⁷Tua ahikom Gideon in, “Pha hi! Topa in Zebah le Zalmunna ka khut sungah hong aap ciangin, senneal ngam pan a ling le ngeaukal te taw hong saat tu khu hi!” ci hi.

⁸Gideon pai suak a Penuel ah, tua mihingte mun ah an a nget le, Sukkoth te ii ci bangma in Penuelte zongh in a na ci uh hi.

⁹Ciidam ludam in suatakna taw hong heak kik tu khu hi, tuasia ciang na tausaang uh kong laithapsak tu hi,” ci hi.

¹⁰Zebah le Zalmunna sia a ngalkap hon taw Karkor ah om hi. Senneal ngam minamte ii ngalkapte sung pan 15,000 taang khawng bek taanglai hi. Ngalkap 120,000 kithatlum hi.

¹¹Gideon in senneal ngam hui Nobah le Jogbehah ii nisuana sang lampi zui in, ngalkap honte heak khol ngawlin sim hi.



¹²Midian kumpite nii Zebah le Zalmunna te taikeak ahihang ama in del in pummat hi, a ngalkap honpите patau keaksak hi.

¹³Gideon sia ngalphual panin hong heak kik ciang Heres Mualciangh tawn a,

¹⁴ama in Sukkoth pan a khangmoi tangval khat manin thu dongh hi. Tangval pa in Gideon atu in Sukkoth khua lampui sawmsali le sali teng ii min atsak hi.

¹⁵Tua zawkciang Gideon sia Sukkoth khua mite kungah hong pai a, “Nong hu nop ngawl uh sia na ciamtee lai uh ziam? Zebah le Zalmunna ka mat zawk ngawl lai uh hu in, a toi mama ka ngalkapte an kong piaksak buatu uh ci nu hi. Pha hi, hi sungah amate om hi!” ci hi.

¹⁶Ama in tuasia zawkciang senneal ngam pan ling le ngeaukal la in tuate taw Sukkoth khua lampuite vel in daan pia hi.

¹⁷Ama in Penuel khua a tausaang sia pheltham in tua khuapi mite thatlum hi.

¹⁸Zebah le Zalmunna mun ah Gideon in, “Tabor a na thalup uh te bangbang ziam?” ci in dongh hi. Amate in zokik a, “Amate nangma taw kibang hi — khat sim in kumpipa tapate taw kibang hi.”

¹⁹Gideon in, “Ama sia ka suapuite hi, ka nu ii tapate hi. Amate that ngawl hi thong leute no zong hong thatlum ngawl tu in ka kiciam hi,” ci hi.

²⁰Tuaciang a tapa lian bel Jether munah, “That in” ci in sawl hi. Ahihang patang sia in a namsau a dok bua hi. Ama sia patangno ma hi lai ahikom a khensat thei zok bua hi.

²¹Tuaciang Zebah le Zalmunna in Gideon ii munah, “Hong pai tan a, nangma hong that tan. Pasal nasep a seam tu sia pasal ma kul hi,” ci uh hi. Tua ahikom Gideon in thatlum a, a kalaoh ngawng ah kizepnate laaksak hi.

²²Tuasia zawkciang Israel mite in Gideon ii munah, “Ko hong uk pa hong hi tan, nang le na suan na paalte. Midiante khut sung pan hong hun khia zo ni hi,” ci uh hi.



²³Gideon in zo a, “Kei ka hi zong ka tapa ahizong no ii uk pa hong suak ngawl tu khu hi.”

²⁴Ahizong ama in a kampau zomto a, “No tung pan na khat hong ngensak tavun. Misim in na bilbaa laak uh te kei hong pia tavun. (Midiate in senneal ngam midangte bangma in bilbaa a baa uh hi.)

²⁵A mite in zokik a, “Lungdam takin tuate hong pia tu khu hi.” Amate in puan khat pha in, misim in bilbaa a laak tek koi uh hi.

²⁶Gideon ii saan bilbaate a kingawmin pound sawmli pha a, tuate ii sungah kizepna dang, khi le Midian kumpipa ii silh puan sannum le, kalaoh ngawng aw te kihel ngawl lai hi.

²⁷Gideon in kham milim khat vawtin Ophrah a inn ah koi hi. Israel buppi in Pathian nusia in tua munah milim bia tu in pai uh hi. Tuasia sia Gideon le a baangkua atu in thaangpui khat hong suak hi.

²⁸Tuabangin Midian sia Israel in zo a, amate sia ngual a lauthawn zo tu ahi nawn bua uh hi. Gideon ii thi dong ngam sungah kum sawmli ngal kilemna om hi.

Gideon ii Thina

²⁹Gideon sia ama ii inn ah heak kik a tua munah teang hi.

³⁰Ama in tapa sawmsali nei hi, banghangziam cile ama in zi tam ma nei hi.

³¹Ama in Shechem ah zino khat nei a, tua taw a tapa sia a min Abimelech phuak hi.

³²Gideon sia a huai a teakin hong thi a, Abiezer be le phungte ii khuapino Ophrah ah, a pa ii thaah ah kiphum hi.

³³Gideon ii thi zawkciang Israel mite sia Pathian tungah thumaan ngawl leleau a, Baal te bia uh hi. Kiciamna-ii-Baal sia amate pathian in hong nei hi,

³⁴tuaciang amate in Topa a Pathian uh a kiim a paam a ngalte khut sung pan a suatak sia ii na a sepsak nawn bua hi.



³⁵Amate in Israel atu taza in a diang Gideon le a baangkua tungah lungdamna zongh a nei bua uh hi.

Thukhente 9

Abimelech

¹Gideon ii tapa Abimelech sia a nu ii nungsang te teenna Shechem khua ah pai a, tua munah Shechem mite thu dongh in sawl hi.

²“Koi sia na uuk zaw uh ziam? Gideon ii tapa sawmsali te ii hong uk tu uuk zaw nu ziam, tua ahibuale khat bek ii hong uk tu uuk zaw nu ziam? Na teptee tu uh sia Abimelech sia noma ii chi le sa hi.”

³A nu ii nungsangte in Shechem a mite hi thu huvau dongh uh a, tuaciang Shechem a mite in Abimelech nungzui tu khensat zaw uh hi, banghangziam cile ama sia ama ii mealheak ahi hi.

⁴Amate in Abimelech sia Kiciamna-ii-Baal ii biakinn panin nguntang sawmsali pia uh hi, tuaciang tua sum taw ama in mi ngina ngawl hon khat ama taw kikop tu in cial hi.

⁵Ama in a pa ii inn Orprah ah pai in, tua mun suangpheak khat ii tungah Gideon ii tapate, a suapuite, sawmsali teng thatlum hi. Ahihang Gideon ii tapa no bel Jotham sia buu ahikom a that bua hi.

⁶Tua zawkciang Shechem le Bethmillo a pasal theampo hong kikhawm uh a, Shechem a biakna taw kisai a thiangtho oak thingkung sia ah pai in, Abimelech sia kumpi suaksak hi.

⁷Jotham in hi thu a zaak ciang Gerizim Mualvum tungah pai in, amate oksan hi. “Pathian ii no hong ngai nop natu in, Shechem mihingte awng, ka aw hong ngai tavun.

⁸Khat vei lai in thingkung theampo kikhawm uh a, amate kumpi tu teal sawm uh hi. Amate in olive kung tungah, ‘Ka kumpipa hong hi tan,’ ci uh hi.

⁹Olive kung in zo a, ‘No kong uk thei natu in pathiante le mihingte upat a pia sathau piansak ka tawp kul tu hi,’ ci hi.



¹⁰Tuasia ciang thingkungte in theikung ii munah, ‘Hong pai tan a, kote kumpi hong suak tan’ ci uh hi.

¹¹Ahihang theikung in, ‘No kong uk natu in ka nga thumte nga nawn ngawlin ka tawp kul tu hi,’ ci hi.

¹²Tua ahiciang thingkungte in sapitngui tungah, ‘Nang hong pai tan a ko ii kumpi hong suak tan,’ ci uh hi.

¹³Ahihang sapitngui in, ‘No kong uk natu in pathiante le mihingte a lungdamsak zu ka piansak teng ka tawp kul tu hi,’ ci hi.

¹⁴Tua ahikom thingkungte theampo in lingkung tungah pai a, ‘Ka kumpi tu in hong pai tan,’ ci uh hi.

¹⁵Lingkung in zo a, ‘Na kumpi tu in nong dei takpi uh le hong pai tavun a, ka lim ah hong beal tavun. Tuabangin na hi bua uh le ka baakte panin meikuang hong pusuak tu a, Lebanon a cedar thingkung te dongin kaangtum tu hi,’ ci hi.

¹⁶Jotham in “Tua ahile Abimelech Kumpipa na suasak uh ciang na thin uh thiangtho a, na thin takpi uh ma ahi na ziam? Ama ii sepkhiat sa te taw kilawm in Gideon sia zatakna taw na phawk uh ziam, a innkuanpuite tungah pha takin na seam na uh ziam?

¹⁷Ka pa ii no atu ngal hong dosak sia phawk vun. Midade khut sung pan na nuntakna uh hong hutkhiat natu in ama in a luang ai kitaa hi.

¹⁸Ahihang tuni in ka pa ii innkuante sia na langpan uh hi. Ama ii tapate sawmsali sia suang tungah ni khat thu in na thatlum uh hi, tuaciang a innteang nu taw a tapa Abimelech sia na be uh ahikom lel takin Shechem Kumpipa in na koi uh hi.

¹⁹Tua ahiciang tu in, Gideon le a innkuanpuite tunga na vawt uh teng sia thin thiangtho le thin takpi taw ahile Abimelech taw lungdam khawm vun a, Abimelech zongh no taw lungdam khawm taken.



²⁰Ahihang tuabang ahi bua ahile, Abimelech tung pan meikuang hong lengkeak taken a Shechem le Bethmillo mite hong haltum taken. Shechem le Bethmillo te tung pan meikuang hong lengkeak taken a, Abimelech haltum taken.”

²¹Jotham in a suapuipa Abimelech kiita ahikom Beer ah teang tu in tai hi.

²²Abimelech in Israel kum thum sung uk hi.

²³Tuaciang Pathian in Abimelech sia Shechem mite taw a kilem ngawl natu in vawt a, amate in ama ii lang panin tualngal tho hi.

²⁴Hi bangin a pian sia Abimelech le Shechem mite Gideon tate thatlum tu in a hanthawn amate ii mawna hu in, a thuak natu a piang thu ahi hi.

²⁵Shechem mite in mualdawn ah Abimelech a pang tu in pasal pawl khat koi a, tuate in amate kantanin a pai peuma suam uh hi. Abimelech tungah hi thu kison hi.

²⁶Tua zawkciang Ebed ii tapa Gaal sia a suapuite taw Shechem ah hong pai hi, tuaciang Shechem mite in ama muang uh hi.

²⁷Amate a sapit huan uh sungah pai in sapit nga lo in sapittui a vawt zawk uh ciang poai khaam uh hi. Amate ii pathian biakinn sungah tumin tua munah amate in ne in dawn in om a, Abimelech simmawkna kam pau uh hi.

²⁸Tuaciang Gaal in ci hi, “Ei Shechem mite sia bangbang mi hi thong hi ziam? Banghangin Abimelech atu sepsak hi ziam? Ama akua hi na ziam? Gideon ii tapa maw! Tuaciang Zebul in ama thupiak mang hi, ahi bel hang ei in ama ii na banghangin sepsak tu hi ziam? Na be le phung uh hong piangsak na taangpupi uh Hamor tungah thumaan vun!

²⁹Hi mite ii lampui hi leng uuk meak ing. Tua hile Abimelech ka sot tu hi. Ama mun ah na ngalkap te belap thua in kisim tu in hong kuan tan, ka ci tu hi,”

³⁰Khuapi uk pa Zebul in Gaal ii pau a zaak ciang a thin uuk hi.



31Ama in Arumah a om Abimelech kungah kamtai te paisak a, hi bangin cisak hi, “Ebed ii tapa Gaal le a suapuite Shechem ah hong pai a, amate in nang sia khuapi sungah hong tumsak ngawl tu hi, ci hi.

32Tua ahikom tu in nang le na mihingte sia zanin pai in lo sungah na buu tu uh hi.

33Zingsang ciang ni hong sua ciang tho in, khuapi sia heak khol ngawl thu in na sim tu uh hi. Tuaciang Gaal le a mite nang sim tu in hong pai uh ciang, na tha neiza uh taw na do tu uh hi.”

34Tua ahikom Abimelech le a mihingte theampo sia pawl li in kikhen uh a, zanin hong pai uh a, Shechem khuapua ah buu uh hi.

35Abimelech le amate in Gaal hong pusuak a, khuapi kongpi ah hong ding a mu uh ciang, a bukna uh pan hong ding uh hi.

36Gaal in amate mu a, Zebul mun ah, “En in! Mualdawn panin mihing hong paisuk hi!” ci hi. “Tuata mihing hi bo, mualtung a lim hi lel hi” Zebul in ci hi.

37Gaal in ci kik a, “En in! Mualbawk panin mihing pawlkhat hong pai hi, tuaciang pawlkhat sia aisaan theite ii oak thingkung sia pan lampi tawnin hong pai hi!”

38Tuasiasiang Zebul in ama tungah, “Tu in na awpui teng koi sungah koi ni ziam? Hi Abimelech sia banghangin a na sepsak hi ziam ci in a dongh sia nangma hi ka na ngawl ni ziam? Hi mite sia simmawkna taw na ci ngawpte hi. Tu in pai in a, va sim tan!” ci hi.

39Gaal in Shechem mite lampui Abimelech sim hi.

40Gaal tai a, Abimelech in del hi. Khuapi kongpi dong ngangawn ah mi tam ma liam hi.

41Abimelech sia Arumah ah teang a, tuaciang Zebul in Gaal le a suapuite sia Shechem pan hawlkeak a, tua munah a ten thei nawn ngawl natu in vawt uh hi.

⁴²A khuavak ni ciangin Abimelech in Shechem mite sia lo sungah paikhiat sawm hi,

⁴³tua ahikom ama in a mite samin pawl thum in khen a, lo sungah phualin ngaksak hi. Ama in mihingte khuapi sung pan hong pusua uh a mu ciang amate that tu in a bukna pan hong pusuak hi.

⁴⁴Abimelech le a pawlte in khuapi kongpi cing tu in manlang in hong pai ciang, a pawl dangte nii in mihingte lo sungah thatlum siat uh hi.

⁴⁵Ngal kidona sia sun khuateak ma ahi hi. Abimelech in khuapi sia suan a, a teangte thatlum in, a khuapi laitham in, a leitangh ci buakin siin hi.

⁴⁶Shechem khua a lampuite theampo in khuapi kulh sung panin hi thu a zaak uh ciang, amate in Kiciamna-ii-Baal ii biakinn ngal nanna mun ah suatak nga tu in hong tu uh hi.

⁴⁷Tua munah amate kikhawm hi ci in Abimelech tungah kiko hi,

⁴⁸tua ahikom ama in Zalmon Mualvum ah a mite taw paito hi. Tua munah ama in hei khat la in, thing khat ii baak siiktan a, a liang ah pu hi. Ama in a mite mun ah manlang takin ama hi bangin hi vun ci in sawl hi.

⁴⁹Tua ahikom misim in thingbaak khat tek siik tan in, Abimelech zui uh a, kulhpi pangh ah a thingte sia uh hi. Amate in mihing a sunga om kulhpi sia hal uh hi, a mihingte theampo thi siat uh hi, pasal le numei a kingawm tulkhat bang pha uh hi.

⁵⁰Tua zawkciang Abimelech in Thebez khua zuanin, a khuapi a kiim uum zawkciang, la hi.

⁵¹Tua munah tausaang muanhuai khat om a, khua sung a om pasal, numei le lampuite theampo kihel in, tua mun tu uh hi. Amate in a sungsang pan kikalh uh a, tua zawkciang innkhum tungah kaato uh hi.

⁵²Abimelech in tausaang sim tu in hong pai a, tausaang ii kongkha hal tu in hong pai hi.

⁵³Ahihang tua munah numei khat in an ngoaina suang khat ama lu tungah lawnsuk a, a lu ngu aam hi.

⁵⁴Tuaciangin ama ii ngal vanh a pua tangval khat sia samin, “Na namsau dokin a hong hol tan. Numei khat ii thalup a hong kison tu sia ka dei bua hi,” ci hi. Tua ahikom tangval pa in namsau taw hollet a, thi hi.

⁵⁵Abimelech a thi a mu uh ciang Israel te inn ah cia siat uh hi.

⁵⁶Hi bangin Pathian in Abimelech ii a suapuite sawmsali a thalupna taw a pa tungah a mawna kithuk kik ahi hi.

⁵⁷Pathian in Shechem te zongh a ngitlo na uh hu in thuaksak hi, Gideon ii tapa Jotham in amate a tomlaw lai, tuabangin piang tu hi a ci bang keak ma piang hi.

Thukhente 10

Tola

¹Abimelech ii thi zawkciang Dodo ii tupa Puah ii tapa Tola sia Israel te suatak pia tu in hong pai hi. Ama sia Issachar nam hi a, Ephraim mualtung ngam Shamir ah teang hi.

²Ama sia Israel te ii lampui kum kul le kum thum sung seam hi. Tua zawkciang ama thi a Shamir khua ah kiphum hi.

Jair

³Tua zawkciang Gilead panin Jair hong pai hi. Ama in Israel sia kum kul le kum nii lampui hi.

⁴Ama in tapa sawmthum nei a tuate in laa sawmthum tungah to uh hi. Amate in Gilead ngam ah khuapi sawmthum nei uh hi, tuate sia Jair khuanote kici lai hi.

⁵Jair thi in Kamon khua ah kiphum hi.

Jephthah

⁶Khatvei ma Israel te in Topa tungah hong maw uh a, Baalte, Astarte te, Syria, Sidon, Moab, Ammon le Philistia te ii pathiante bia uh hi. Amate in Topa nusia uh a, ama a biak tawp uh hi.



- ⁷Tua ahikom Topa sia Israel te tungah thin uuk a, Philistine te le Ammon te in amate zosak hi.
- ⁸Kum sawm le kum liat sung amate in Gilead ngam Jordan niswana Amor ngam a teang Israel te sia nengniam in vawtsia uh hi.
- ⁹Judah, Benjamin, le Ephraim te sim tu in Ammon te in Jordan ngun ngangawn hong kantan uh hi. Israel sia ngim nga mama hi.
- ¹⁰Tua zawkciang Israel te in Topa tungah hong au uh a, “Nang tungah hong maw zo khu hi, nang ka Pathian uh kong nusia a, Baalte ka bia uh hi,” ci uh hi.
- ¹¹Topa in hi zokikna pia hi: “Egyptte, Amorte, Ammonte, Philistinete,
- ¹²Sidonte, Amalekte le Maonte in hun bo sa sungah hong nengniam a, tuaciang in kei ko in nong au uh hi. Tuate khut sung pan hong hunkhia ngawl ka na khi ziam?
- ¹³Ahihang nong nusia veve uh a, pathian dangte na bia uh hi, tua ahikom hong hunkhia kik ngawl tu khi hi.
- ¹⁴Pai tavun a, na teal uh pathiante munah ko tavun. Amate in ngim na nga uh ciang hong hun khia taken.”
- ¹⁵Ahihang Israel mite in Topa tungah, “Ko maw zo khu hi. Na uuk po hong vawt tan. Ahizong, nong hesuakna in, tu ni in hong hun tan,” ci uh hi.
- ¹⁶Tua ahikom amate in ngamdang pathiante vawkin, Topa bia uh hi; tuasia ciang ama sia Israel te ii ngim ngana tungtaang ah a thin nuam ngawl hi.
- ¹⁷Tua zawkciang Ammon ngalkap honte in Israel te sim tu in Gilead ah ngiaphual saat hi. Israel mite zongh hong kikaitua uh a, Gilead ngam sung Mizpah ah ngiaphual saat uh hi.
- ¹⁸Tua munah mipite le Israel lampuite in amate le amate kidongh uh a, “Ammonte taw kidona sungah akua in hong lampui tu ziam? Akua po ahizong hong lampui tu sia Gilead ah a om mihing sim ii lampui hi tu hi,” ci uh hi.



Thukhente 11

¹Gilead pan ngalhang ngalkap Jephthah sia, pumpi kizuak numei khat ii tapa ahi hi. A pa Gilead in,

²a zi taw tapa dang nei hi, tuaciang amate hong khan uh ciang Jephthah sia inn panin hawlkhia uh hi. Amate in ama ii mun ah, “Ka pa ii neisa na khat zongh nang lua thei ngawl tu ni hi, nang sia nu dang khat ii ta ni hi,” ci uh hi.

³Jephthah zongh a suapuite kung pan tai in Tob ngam ah teang hi. Tua munah mihing mannung ngawl pawlkhat ama in zol a, tuate taw kithawl uh hi.

⁴Ammonte ii Israel te sim tu in a kuan sia tua zawk hun tawmvei zawkciang ahi hi.

⁵Hi thu hong pian ciangin Gilead a lampuite in Jephthah sia Tob ngam panin hong cia pui kik hi.

⁶Amate in, “Ammonte ka sim thei natu hong pai tan a hong lampui tan,” ci uh hi.

⁷Ahihang Jephthah in zo a, “Nong etsat lawlawm hu in ka pa inn sung pan hong hawlkhia nu hi. Tu in ngim, na nga uh ciang banghangin kei kungah hong pai nu ziam?”

⁸Amate in Jephthah ii mun ah, “Nang kungah tu in kong pai uh sia banghangziam cile, Ammonte sim tu in ko taw nong kuan khawm tu a, Gilead mite lam nong pui tu dei khu hi” ci uh hi.

⁹Jephthah in amate zokik a, “Ammonte sim tu in nong ciapui uh sia Topa in zawna hong pia in ahile no hong ukpa ka hi tu hi,” ci hi.

¹⁰Amate in zo a, “Lungskim khu hi. Topa sia ka tetti uh hi,” ci hi.

¹¹Tua ahikom Jephthah sia Gileadte lampuite taw tonkhawm a, tuaciang a mite in ama sia lampui le ukpa in koi uh hi. Jephthah in Mizpah ah Topa ii mai ah a dei bang teng son hi.



¹²Tuaciang Jephthah in Ammon kumpipa kungah kamtaite paisak a, “Ko nong kihau puina sia bang thu ziam? Banghangin ka ngam uh hong sim ni ziam?” ci hi.

¹³Ammon kumpi pa in, “Egypt panin Israel te hong pusua lai in, amate in ka ngam sia Arnon Ngun pan Jabbok Ngun le Jordan Ngun dong hong laaksak hi. Tu in kam tam kul ngawlin nong piak kik uh kul tu hi,” ci hi.

¹⁴Jephthah in Ammon kumpipa kungah kamtaite paisak kik a,

¹⁵hi kammal teng taw zokik hi: “Israel te in Moab ahibuale Ammonte leitangh laaksak ci thu sia maan ngawl hi.

¹⁶Ahi tatak sia hi bang hi: Israel te in Egypt a nusiak uh ciang, senneal ngam kantan in pai a, Aqaba Tuidok ah, tua mun pan Kadesh hong theng uh hi.

¹⁷Tuasia ciang Edom kumpipa tungah kamtaite paisak a, a ngam kantan thei natu ngen hi. Ahihang Edom kumpipa in amate a oai bua hi. Amate in Moab kumpipa tungah zongh ngen uh hi, ahihang amate in a ngam kantan tu a oai bua uh hi. Tua ahikom Israel te sia Kadesh ah taam uh hi.

¹⁸Tuaciang amate in senneal ngam kantan in pai uh a, Edom le Moab ngamte kiimkot in, Moab ii niswana sang Arnon Ngun langkhat a thet dong pai uh hi. Amate in tua munah ngiaphual saat uh a, ahihang Arnon sia a kantan bua hi.

¹⁹Tuasia ciang Israel te in Heshbon a Amor kumpipa Sihon tungah kamtaite paisak a, ama ii ngam kantan in amate ngam ah a pai natu ngen uh hi.

²⁰Ahihang Sihon in Israel te tuabangin a ngamtasak bua hi. Ama in a ngalkap hon buppi khawmtua in Jahaz ah ngiaphual saat hi, tuaciang Israel sim hi.

²¹Ahihang Topa, Israel te Pathian in Sihon ngalkap honte tungah zawna Israel te pia hi. Tua ahikom Israel te in Amorte ii ngam theampo la uh hi.

²²Amate in Amorte ii ngam theampo thangsang Arnon pan, sak sangah Jabbok dong tuaciang niswana sang senneal ngam pan nitumna Jordan dong topha uh hi.



²³Tua hi a, a mi Israel te atu Amorte a bengkeak sia Topa Israel te Pathian ahi hi.

²⁴La kik tu in na hanciam tu ziam? Na pathian Chemosh ii hong piak teng keam thei ni hi. Ahihang ko ka hi uh le Topa ka Pathian ii hong piak sa teng sia tang tu khu hi.

²⁵Zippor ii tapa Moab kumpipa Balak sangin nangma phazaw kisa ni ziam? ama in Israel sia thato ngei ngawl hi, ahi bua le? ama in ko hong sim tu in hong kuan ngei na ziam?

²⁶Kum zathum tawntung Israel te in Heshbon le Aroer le a kiim a paam khuapi note, le Arnon Ngun vaal a khuapite uk uh hi. Hi hunte theampo sungah banghangin la kik ngawl ni ziam?

²⁷Hi ngawl hi, no tungah bangma tat khial hong nei ngawl khi hi. Ko tungah ngal nong phot uh sia noma khial zaw nu hi. Topa sia thu hong khensat tu pa hi. Ama in tuni in Israel te le Ammonte kilaklaw ah hong khensat tu hi.”

²⁸Ahihang Jephthah ii kam puak huvau Ammon kumpipa in awlmawk ngawl hi.

²⁹Tuasia ciang Topa ii thaa sia Jephthah ii tungah hong theng hi. Ama in Gilead le Manasseh kantan in pai a, Gilead ngam Mizpah ah hong heak kikin, Ammon ah pai hi.

³⁰Jephthah in Topa tungah kamciam pia a, “Ammon tungah zawna nong pia a, ahile

³¹zawna taw ka cia ciang, ka inn panin kei hong muak tu in hong pusuak phit sia meihal biakpiakna in kong pia tu hi. Tua sia sangaw biakpiakna in nang kong pia tu hi,” ci hi.

³²Tuabangin Jephthah in Ammonte sim tu in ngun kantan in pai a,Topa in zawna pia hi.



³³Ama in amate sia Aroer pan Minnith kiim ngamte, a kingawmin khuapi kul le Abel Keramim dong vaat pheang hi. Tua ki thalupna nasia mama a, Ammonte sia Israel te in zo hi.

Jephthah ii Tanu

³⁴Jephthah sia Mizpah ah hong heak kik ciangin ama muak tu in a tanu laam kawmin, thikdaakkual tum kawm a laamin hong pai hi. Ama sia Jephthah ii khat bek a hin ta ahi hi.

³⁵Ama in a tanu a mu ciang heena taw a puansilh baltham a, hi bangin ci hi: “Aw, ka tanu; nang in ka thin hong tamthamsak ni hi! Kei hong thinnasak tu sia banghang nang keak hi luilam ni ziam? Topa tungah ciliap huai takin kamciam ka piak sa hi a, tua kamciam laih kik thei nawn ngawl khi hi!”

³⁶A tanu in, “Topa tungah kamciam pia zo na hi le Ammon na ngalte tungah Topa in phulamna hong pia zo ahiciang kei tungah vawt tu na kamciam bangin vawt in.”

³⁷Ahihang ama in a pa mun ah, “Hi na khat kei atu hong hisak lai tan. Keima nguakin tha nii hong omsak tan, tua hi le ka lawmte taw mualtungah ka vak kawkoai tu a, ngaknu thiangtho in ka thi tu sia khuangai in ka om tu hi,” ci hi.

³⁸Ama in a tanu sia tha nii sung, a pai natu in sawl hi. Ama le a ngualtamhte sia mualtungah kaato uh a, khuangai uh hi, banghangziam cile ama sia pasal nei ngawl le ta nei ngawlin thi tu ahi hang hi.

³⁹Tha nii zawkciang ama a pa kungah hong cia kik hi. A pa in Topa tungah a kamciam bangin vawt a, ama sia ngaknu thiangtho in thi hi. Hi sia in Israel ngam ah ngeina khat hong pianna hi a,

⁴⁰kumsim in Israel numeite sia ni li sung Gilead a Jephthah ii tanu atu a khuangaina lakna in inn panin paikhia uh hi.

Thukhente 12

Jephthah le Ephraimte



¹Ephraim mite sia ngal kido natu kinging hi; amate in Jordan Ngun kantan tu a, Zaphon sangah zuanin, Jephthah mun ah, “Ammonte sim tu ngamngi kantan in pai napi, banghangin ko hong paa ngawl ni ziam? Na lu tung a inn hal tu khu hi!” ci hi.

²Ahihang Jephthah in amate munah ci hi, “Ka mihingte le Ammonte sia nasia takin kihauna nei khu hi. Hong sam peu hi ve ung, kei hong hung ngawl nu hi.

³Hong hung ngawl tu ci in kong mu ciang ka nuntakna aita in amate sangah ngamngi kanin ka kuan uh hi, tuaciang Topa in amate tungah zawna hong pia hi. Tua ahikom tu in ko hong sim tu in banghangin hong pai nu ziam?”

⁴Tuaciang Jephthah in Gilead mite theampo khawmtua in, Ephraim mite simin zo uh hi. (Ephraimte in, ‘Ephraim le Manasseh a om no Gileadte sia Ephraimte hong taisan te hi lel nu hi’ ci uh hi.)

⁵Ephraimte a suatak ngawl natu in, Gileadte in Jordan Ngun a kantan natu mun la uh hi. Ephraim mite khat po in suakta nuamin a hanciam le, Gileadte in, “Nang Ephraimte na hi ziam?” ci in a dok ciang “Hi bong” a ci le,

⁶tua le “Shibboleth” ci in, a cisak uh hi. Ahihang “Sibboleth” ci hi, banghangziam ci le ama in tua kammal sia a maan in a lo thei bua hi. Tuasia amate in manin tua sung Jordan kantanna mun khat po ah thatlum uh hi. Tua hun sungin Ephraim mite tul sawmli le tulnii that uh hi.

⁷Jephthah in Israel te kumluk sung lampui hi. Tua zawkciang ama thi a, ama ii khua Gilead ngam sungah phum uh hi.

Ibzan, Elon le Abdon

⁸Jephthah zawkciang Bethlehem pan Ibzan in Israel te lampui hi.

⁹Ama in tapa sawmthum le tanu sawmthum nei hi. Ama in a tanute sia a phung sung ahi ngawl phung dangte taw teangsak hi, a tapate atu zongh phung dang panin mo sawmthum la hi. Ibzan in Israel te kum sali lampui hi,

¹⁰tua zawkciang ama thi a Bethlehem ah kiphum hi.

¹¹Ibzan zawkciang Zebulun pan Elon in Israel te kum sawm sung lampui hi.



- ¹²Tua zawkciang ama thi a, Zebulun ngam Ajjalon ah kiphum hi.
- ¹³Elon zawkciang, Hill ii tapa Pirathon pan a Abdon in Israel te lampui hi.
- ¹⁴Ama in tapa sawmli le tupa sawmthum nei a, tuate in laa sawmsali tungah to uh hi. Abdon in kum liat sung Israel te lampui hi.
- ¹⁵tuaciang ama thi in Amalekte ngam, Ephraim mualtung ngam, Pirathon khua ah kiphum hi.

Thukhente 13

Samson ii Suana

- ¹Israel te in Topa tungah maw kik a, tuaciang Topa in amate sia Philistinete in kum sawmli sung uksak hi.
- ²Tua hun laitakin Zorah khua ah Manoah a kici pasal khat om hi. Ama sia Dan namte sung pan ahi hi. A zi in ta nei thei ngawl hi.
- ³Topa vantung lalang khat ama ii tungah kilangh a, “Nang sia ta nei thei ngawl ni hi, ahihang hai ngawlin na ngai tu a, tapa khat na nei tu hi.
- ⁴Zu le beer le a kikhaam ante khat pawpo na neak ngawl het natu kidawm in;
- ⁵na tapa a pian zawkciang, a sam meetsak peuma ngawl tu ni hi, banghangziam cile a pian ni pan kipan ama sia Pathian ii naseam a kituamkoi nazirite khat in ki aap tu hi. Ama in Philistine te khut sung pan Israel te suataksak natu nasep kipan tu hi,” ci hi.
- ⁶Tua zawkciang numeinu a pasal kungah pai in son hi, “Pathian ii mihing khat hong pai a, ama sia Pathian ii vantung lalang bangin kiitak huai mama hi. Koisung pan hong pai ziam ci in ka dongh bua a, ama zongh in a min hong son bua hi.
- ⁷Ahizong ama in kei sia nau paai in tapa khat nei tu hong ci hi. Ama in zu le beer te le a kikhaam ante a neak ngawl natu thu hong pia hi, banghangziam cile patang sia a nuntak lai teng Pathian tungah nazirite khat bangin ki aap tu hi,” hong ci hi.



⁸Tuaciang Manoah in Topa tungah thungen hi, “Topa awng nong hesuakna in, nong paisak Pathian mihingpa hong paisak kik tan a, pano sia a pian zawkciang bang law tu khu ziam ci hong sonsak tan,” ci hi.

⁹Pathian in Manoah ii nget bangin vawt a, vantung lalang sia numeinu lo sungah a to laitakin pai kiksak hi. A pasal Manoah sia ama taw a omkhawm bua hi,

¹⁰Tua ahikom ama thakhat in tai a, ama mun ah, “En in! Khat vei ni a, hong pai mihingpa kei kungah hong kilangh kik hi,” ci hi.

¹¹Manoah dingin a zi nung zui hi. A mihingpa kungah pai in, “Ka zi kungah thuson sia nangma na hi ziam?” ci in dongh hi. “Hi khi hi” ci in zo hi.

¹²Tuaciang Manoah in, “Na paunate hong tangtun tak ciang patang sia in bang teng a vawt kul tu ziam? Bangbang nuntak zia taw nungta tu ziam?” ci in dongh hi.

¹³Vantung lalang in zokik a, “Na zi in ka son sa theampo a vawt hamtang kul tu hi.

¹⁴Ama in sapitngui pan a kinga nate khat zongh ne ngawl tu hi; zu le beer te dawn ngawl tu, a kikhaam ante ne ngawl tu hi. Ama tungah ka son sa theampo cing takin a sep kul tu hi,” ci hi.

¹⁵⁻¹⁶Manoah in tua mihing sia Pathian ii vantung lalang ahi hunlam he ngawl ahikom, ama mun ah, “Hesuakna taw na pai heak lai in. Nangma atu kealmoi khat huan phot tawng,” ci hi. Ahihang vantung lalang in, “Ka om zii ngawl zonghin, na an hong ne ngawl tu khi hi. Ahizong na vawt veve tu ahile Topa atu piakkhiatna in hal in,” ci hi.

¹⁷Manoah in zokik a, “Na min hong son tan, tua hile na pauna teng a tun tak ciang, zatakna kong pia thei tu uh hi,” ci hi.

¹⁸Vantung lalang in zo a, “Banghangin ka min he nuam ni ziam? Ka min sia a lamdang min ahi hi,” ci hi.



¹⁹Tua ahikom Manoah in kealmoi khat la in, antang pawlkhat taw kopin nalamdang a seam Topa biak suangtau tungah Topa atu in pia hi.

²⁰⁻²¹Biaktau tung panin meikuangte a kuantu ciang, Manoah le a zi in Topa ii vantung lalang sia meikuang sung panin vantung ah kaato a mu hi. Manoah in tua mi sia Topa ii vantung lalang hi ci in phawkin, a zi taw amate nii sia lei ah a bok lamin kisp suk uh hi. Amate in tua vantung lalang sia a mu kik nawn bua uh hi.

²²Manoah in a zi munah, “Ei sia ih thi kul tu hi, banghangziam cile ei in Pathian ih mu zo hi,” ci hi.

²³Ahihang a zi in zokik a, “Topa in ei hong thatlum nuam hi thong le ih piakkhiatna hong saang ngawl tu hi; ama in hite theampo hong lak ngawl tu a, hi bang thute hi hun sungah hong son ngawl tu hi,” ci hi.

²⁴Numei in tapa khat hong hing a, a min sia Samson phuak hi. Patang hong khang a, Topa in thupha pia hi.

²⁵Dan ii ngiaphual ahi Zorah le Eshtaol kilaklaw ah a om lai in, Topa ii vaangletna in ama thahatsak tu in kipan hi.

Thukhente 14

Samson le Timnah pan Ngaknu khat

¹Ni khat ni in Samson sia Timnah khua a pai le tua munah Philistine ngaknu khat mu hi.

²Ama a inn ah cia kikin a pa le a nu tungah, “Timnah khua ah ka thin hong la Philistine ngaknu khat om hi. Ka tenpui tu in hong laaksak tavun,” ci hi.

³Ahihang a pa le a nu in dongh a, “Zi khat nga natu in tua doai bia Philistine te kungah pai kul na ziam? Eima minam sung, eima phung sungah ngaknu khat mu zo ngawl ni ziam?” Ahihang Samson in a pa munah, “Kei atu nong laaksak tu ka dei sia ama hi. Dei khi hi,” ci hi.

⁴Samson ii hi bang a hina sia Pathian ii lamlakna ahi hunlam a pa le a nu in he ngawl hi, banghangziam cile Topa in Philistinete a sim natu hun pha khat a zonna ahi hi. Hi hun sia Philistinete ii Israel te a uk hun sung ahi hi.



⁵Tua ahikom Samson in a pa le a nu taw Timnah ah pai suk uh hi. Amate sapit lo sung kantan in a pai laitak tawpi moi khat a hawk za hi.

⁶Thakhat thu in Topa ii vaangletna in Samson hatsak a, tuaciang a khut nguak taw tawpi sia kealmoi no khat bangin baltham hi. Ahihang a pa le a nu a hil bua hi.

⁷Tuaciang ama in ngaknu ii kungah pai in paupui a, diksa hi.

⁸Ni tawmvei zawkciang Samson heak kikin tenpui hi. A cia lamin, lampi pan pialin tawpi a thalup sia en tu in a pai le tua tawpi luanghawm sungah khuai hon khat le khuaitui mu in lamdang sa hi.

⁹Ama in khuaitui sia a khut taw la in a lampai kawmin ne hi. Tuaciang a pa le a nu kungah pai in pawl khat pia hi. Amate in ne ahihang Samson in tua khuaitui sia tawpi thi sa sia ii pum sung pan a laak hunlam Samson in a son bua hi.

¹⁰A pa sia ngaknu nu ii inn ah pai a, Samson in anneak poai khat tua munah vawt hi. Tuasia in tangvalte vawtzia ngeina khat ahi hi.

¹¹Philistinete in ama a mu uh ciangin ama taw a teang khawm tu tangval sawmthum puak uh hi.

¹²⁻¹³Samson in amate munah, “Thukhel kidokna khat hong dong tong. Mopoi ni sali a bo maa in, a khiakna na son thei uh le khat sim in, puanza hoi khat tek le puansilh laihna a cing khat tek hong pia tong ci in kong khaam ngam hi,” a ci ciang, “Na thukhel dokna sia hong son ka sin in, za tek tawng,” ci uh hi.

¹⁴Ama in, “A ne sia ii sung pan neak tu khat hong piang, A hat sia ii sung pan a thum khat hong piang,” ci hi. Ni thum zawkciang zong amate in khel dokna ii khiakna a tel zo bua uh hi.

¹⁵A ni li ni ciangin amate in Samson ii zi munah, “Na pasal ii a khiakna hong son natu theam in. Tuabang na hi buale na pa inn mei taw ka hal tu uh a, nangma taw cipin kong hal tu uh hi. No nii in ko teng nong suam nopna in ko teng hong sam na hi bua uh ziam?” ci hi.



¹⁶Tua ahikom Samson ii zi zongh thitui taw a kungah pai in, “Kei hong it ngawl ni hi! Hong ensan ni hi. Ka ngualtamhte thukhel khat dongh a ciang, kei munah a khiakna hong son ngawl ni hi!” ci hi. Ama in, “En in! Ka pa le ka nu zongh son ngawl khi hi. Banghangin nang hong son tu khi ziam?” ci hi.

¹⁷Mopoi ni sali tawntung ama kap hi. Ahihang a ni sali ni ciang ama in thukhel ii khiakna son hi, banghangziam cile a numei sia in ama buaisak tawntung hi. Tuasia ciang numei in Philistine te tungah son hi.

¹⁸Tua hi a, a ni sali ni in Samson lupna a zot maa in, khuapi sung mite in ama munah, “Khuaitui sangin a thum zaw bang om a, Tawpi sang a hatzaw bang om ziam?” ci in zona pia uh hi. Samson in zokik a, “Ka khuipui taw lo tho khawm ngawl hi leute a khiakna tu in na he buatu uh hi.” ci hi.

¹⁹Thakhat thu in Topa ii vaangletna in Samson hatsak a, tuaciang ama Ashkelon ah paisuk hi; tua munah pasal sawmthum thatlum in, a puansilh uh suusak a, thukhel dokna a zo thei teng tua puan hoite pia hi. Tuasia zawkciang thupiang teng hu in a thin so ahikom, ama inn ah cia kik a,

²⁰tuaciang a zi sia a mopoi lai ama a dinpui tetti pa kipia hi.

Thukhente 15

¹Tua zawk tawm vei ciang Samson in, zungtaang laak hun laitakin, kealmoi khat kai in a zi kungah haw hi. A sunghpa munah, “Ka zi ii khaan sungah pai nuam khi hi,” ci hi. Ahihang ama in a tum tu a oai bua hi.

²Samson munah, “Ensan takpi hi vak teh ci in kong um a, tua ahikom na ngualtamh pa hong piaksak khi hi. Ahihang a nau nu sia ama sangin a meal phazaw hi. A taangin ama la thei ni hi,” ci hi.

³Samson in, “Tu a sia hun ciang sia Philistine mite tungah ka ngamatatna po kei mawna hi nawn ngawl tu hi!” ci hi.

⁴Tua ahikom ama pai in, ngia zathum man hi. Nii veu nii veu in a meite uh sawm khawm a, a sawmna khaubawk pan meisip sawm khawm hi.



⁵Tuasia zawkciang meisipte halin Philistine te ii zungtaang lo sungah tha hi. Hi bangin ama in zungtaang a kila sa te bek hi ngawlin, laak ngawl laite le olive ciinna huante zongh haltham hi.

⁶Philistinete in akua in hi bangin ngamta ziam ci in a kat uhciang Samson ii vawt ahi hunlam tel uh hi, banghang tuabangin vawt ziam cile Timnah khua ah a sungpha in Samson ii zi sia Samson ii ngualtamhte khat piaksak hi. Tua ahikom Philistine te pai in Samson ii zi a hallup uh zawkciang a pa inn zongh haltumsak uh hi.

⁷Samson in amate munah, “Tua ahile no hi bangin ngamta nu hi! Hite kong thuk kik mateng tawp ngawl tu in kiciam khi hi!” ci hi.

⁸Ama in amate sia sim ngawp a, amate tam ma thatlum hi. Tuaciang ama pai in Etam lianghawng sungah teang hi.

Samson in Philistine te Zo

⁹Philistine te hong pai uh a Judah ah ngiaphual saatin, Lehi khuapi sim uh hi.

¹⁰Tuaciang, Judah mihingte in amate dongh a, “Banghangin ko hong sim nu ziam?” ci hi. Amate in zokik a, “Samson man tu le ama ii ko hong vawt bangin ama tungah vawt tu in hong pai khu hi,” ci uh hi.

¹¹Tua ahikom Judah te mihing tulthum sia Etam lianghawng ah pai uh a, Samson munah, “Philistine te sia ei hong ukte ahi hunlam he ngawl ni ziam? Ko bang hong law thong nu ziam?” ci uh hi. Ama in zo a, “Kei tungah hong vawt bangin amate tungah vawt khi hi,” ci hi.

¹²Amate in, “Hi sungah kong paina uh sia nangma letheen tu le amate tungah nangma aap tu in hong pai khu hi,” ci uh hi. Samson in, “Noma tatak ma ii nong thalup ngawl natu kamciam hong pia tavun,” ci in ngen hi.

¹³Amate in, “Pha hi, hong letheen bek tu a, amate tungah hong aap tu khu hi. Ko nang hong that ngawl tu khu hi,” ci uh hi. Tuabangin amate in khauzeen thak nii taw heen cip in lianghawng pan cia pui uh hi.



¹⁴Lehi hong thet ciang, Philistine te ama oksan in hong del uh hi. Thakhat thu in Topa in ama hatsak hi, tuaciang ama in a khut le a baan a heenna khauzeen sia khauzam kaangdeau sa bang phet in saantat hi.

¹⁵Tuaciang ama in a thituung laa khat ii khangu mu hi. Ama in kunsuk in tawm a, tua taw pasal tulkhat thatlum hi.

¹⁶Tua ahikom Samson in la sa hi, “Laa khangu taw mihing tulkhat that ing nge, Laa khangu taw a luang uh kangthing bang sia ing.”

¹⁷Tuasia zawkciang, a laa khangu vawk hi. Hi thu a pianna mun sia Ramath Lehi kici hi.

¹⁸Samson sia a dangko mama a, Topa tungah hi bangin ko hi, “Zawna lianpi hong pia zo ni hi. tu in dangko in thi tu khi ziam, hi doai bia Philistine te in hong man tu ziam?” ci hi.

¹⁹Tuasia ciang Pathian in tua mun Lehi ah leidum khat honsak a, tua sung pan tui hong pusuak hi. Samson in tua tui dawn a, ama a om nuamtuum zaw hiat hi. Tua ahikom tua ciktui sia Hakkore kici a, Lehi ah om nginge lai hi.

²⁰Philistinete ii uk hun sung ma ah Samson in Israel te kum kul sung lampui hi.

Thukhente 16

Gaza ah Samson

¹Nikhat Samson sia Philistinete khuapi Gaza ah pai in, tua munah pumpi kizuak numei khat mu a, tua nu taw lumkhawm hi.

²Gaza mite in Samson sia tua munah om ci in he a, tua ahikom amate in tua mun kiim uum in zan khuateak in tua sung khuapi kongpi ah ngakin om uh hi. Zan khuateak in amate thim khipkhep in om uh a, “Khua hong vak dongin ngak tu a, tuasia ciang ih thatlum tu hi,” ci in khua ngaisun uh hi.

³Ahihang Samson sia lupna tungah zankim dong bek om hi. Tua zawkciang ama tho in khuapi kongpi sia hong zam a, phaikeak hi, khuam, suakhak, taw ci khawng theampo phai keak hi. Ama in tuate a liang ah pua in, mualtung Hebron a kimu suk theina mun dong pu to hi.



Samson le Delilah

⁴Hisia zawkciang Samson in Sorek Kuam sungah a teang Delilah kici numei khat taw ki it hi.

⁵Philistine kumpi ngate ama kungah pai in, hi bangin ci uh hi. “Ama sia banghangin tuza in hat a, bangbang hi leang ama kizo thei tu a, letheen in a cimaw in koi thei tu khu ziam ci in ka heak thei natu uh in, Samson theam vawt in. Ko khat sim in nguntang tul le zakhat tek hong pia tu khu hi,” ci uh hi.

⁶Tua ahikom Delilah in Samson ii mun ah, “Nong hesuakna in hong son tan, nang sia bang in hong hatsak ziam? khat po in nang hong letheen nuam ii hong cimawsak nuam le bangbang in hong hi tu ziam, hong son tan,” ci hi.

⁷Samson in, “Thalkhau thak a ko ngawl lai sali taw hong ki letheen le ngualdang bangma in ka tha zawm tu hi,” ci hi.

⁸Tua ahikom Philistine kumpite in Delilah kungah thalkhau thak a ko ngawl lai zam sali hong paipui uh a, ama in Samson khii cip hi.

⁹Ama in pasal pawlkhat in doituam sungah ngaksak a, tuate zaak tu in, “Samson! Philistinete hong pai hi,” ci in au hi. Ahihang ama in khauzamte mei taw a kithutha ciang a tat bangin a thalkhaute hong saantat hi. Tuabangin amate in Samson ii thahat theina thuku sia he zo ngawl lai hi.

¹⁰Delilah in Samson munah, “En in, nang kei sia a mawmaw bangin hong vawt ni hi, thumaan hong son ngawl ni hi. Nong hesuakna in hong son tan, bangbang hi le khat po in nang hong letheen thei tu ziam?” ci hi.

¹¹Ama in, “Amate in a kizangh ngei ngawl lai khauzeen thak taw hong sawm le ngualdang khat pawpo bangin ka tha zawm tu hi,” ci hi.

¹²Tua ahikom Delilah in khauzeen thak te la in a heen zawkciang, “Samson! Philistine te hong pai hi,” ci in au hi. Khaan khat sungah pasal pawlkhat in ngak nginge hi. Ahihang Samson in a khut a kisawmna khauzeente khauzam bang phetin saantat hi.



¹³Delilah in Samson munah, “Kei sia a mawmaw khat vawtin hong vawt lai ni hi, thumaan hong son ngawl ni hi. Khat po in nang bangbangin hong letheen thei tu ziam, hong son tan,” ci hi. Ama in zo a, “Ka samlom sali teng hong pheaksakin, thawn khat taw a ngatin hong khen le ngualdang khat bangin ka tha zawm tu hi,” ci hi.

¹⁴Delilah in ama a mut natu in oai a, a samlom sali teng pheaksak hi. Ama in a sam a kan natu thawn taw a khet zawkciang “Samson! Philistine hong pai,” ci in au hi. Ahihang ama hong khanglo a, a kipheak sam sia hong nuk keak hi.

¹⁵Tua ahi ciang Delilah in ama tungah, “Nong it tak ngawl po bangbangin kong it ci thei ni ziam? Thum vei vaset a mawmaw bangin hong vawt zo ni hi, bang in tuza in hong hatsak ci in hong son ngawl lai ni hi,” ci hi.

¹⁶Ama in nisim, nisim in dongh hi. Ama in numei nu ii a nawm tawtung sia cimtaak pi in cimtaak a,

¹⁷a khak bel ciang a maan son hi. “Ka sam sia hong kimeetsak ngei ngawl hi, kei sia ka pian pan kipan Pathian tungah nazirite khat in hong ki aap hi. Ka sa hong kimeetsak hi le, ka thahatna ka taan tu a, ngualdangte bangma in ka tha zawm tu hi.”

¹⁸Delilah in Samson ii thu son teng sia a maan hi ci in a phaw ciangin, Philistine kumpipa te tungah kamtai paisak a, “Khat vei ma hong pai kik tavun. Ama in thumaan hong son zo hi,” ci hi. Tuasia ciang amate hong pai a, a sum uh teng hong keng uh hi.

¹⁹Delilah in Samson sia a kaang ah a lu ngasakin a mut natu in oai a, tuasia zawkciang pasal khat samin, a sam lom sali teng meetsak hi. Tua zawkciang ama in Samson sia vawt zazan hi, banghangziam cile a hat na teng taan zo hi.

²⁰Tua zawkciang ama in, “Samson! Philistine te hong pai hi!” ci in au hi. Ama khanglo a, “Ka kisuut tu a, a ngei bangma in ka suakta tu hi,” ci in ngaisun hi. Topa in ama sia nusia zo ahi hunlam a he bua hi.



²¹Philistine te in man a, a mittangte khelkeaksak uh hi. Amate in ama sia Gaza ah paipui in, taungo khau taw khii in, thonginn sungah an ngoaina ah naseam tu in koi uh hi.

²²Ahihang a sam sia hong khang kik tu in kithoai hi.

Samson Thina

²³Philistine kumpite kikhawmin, amate ii biak pathian Dagon tungah piakkhiatna lianpi khat taw lungdam poai khaam tu in kipan uh hi. Amate in la sa uh a, “Ih pathian in ih ngal pa Samson tungah zawna hong pia hi!” ci uh hi.

²⁴⁻²⁵Amate in nuamsa mama in om uh a, “Samson sam tavun a, ei mu nop tu in ngamtasak tawng!” Amate in Samson thong sung pan hong pusua a, amate lungkim tu in a ngamtatsak zawkciang khuampite nii kilaklaw ah dingsak uh hi. A mihonte in ama a mu uh ciang, amate ii pathian tungah pokna la sa uh hi: “Ih pathian in ih ngal pa, ih ngam lalcipsak a mihing tam mama hong that pa tungah zawna hong pia hi.”

²⁶Samson in a khut pan len in a paipui tangval pa munah, “Inn a dingsak khuampite hong thamsak tan, tuate neal nuam khi hi,” ci hi.

²⁷A inn sia numei le pasal a dimteak in om hi. Philistine kumpi nga te zongh tua munah om a, tuaciang innkhum tungah numei le pasal kingawm mihing tulthum khawng zongh Samson ii poai lak en in om uh hi.

²⁸Tuasia ciang Samson in thu ngen a, “Vaanglianpipa Topa awng, kei hong phawk tan; nong hesuakna in Pathian awng, ka mittang te ngeal hong khelsak Philistinete tungah hi khat vei ka hatna taw ka thuk kik zawk natu in ka thahatna hong pia kik tan,” ci hi.

²⁹Tua ahikom Samson in innpi a dingsak a zanglai a po suut khuampite nii zam hi. A khut lang le lang suut khuamte nii tungah nga a suut khuamte sawn hi,

³⁰tuaciang au a, “Philistinete taw thi khawm tong,” ci in a au zawk ciang, a tha nei theampo taw a sawn le a inn hong cimh a, kumpi nga teng le a om



theampo del hi. Samson in a nuntak lai a thalup sangin a thi ciangin a tamzaw thatlum hi.

³¹A suapuite le a innkuanpui dangte hong paisuk a, a luang hong phaam hi. Amate in ciapui a, Zorah le Eshtaol kilaklaw a pa ii thaam buk sungah phum uh hi. Ama sia Israel te ii lampui kum kul seam hi.

Thukhente 17

Micah ii Milimte

¹Khatvei lai in, Ephraim mualtung ngam a teang Micah a kici pasal khat om hi.

²Ama in a nu munah, “Nguntang tul le zakhat nang tung pan khat ii hong nguksak lai in, nguta pa na tomlaw hi. Na tomlaw hong za khi hi. En in! A dangka keima in nei khi hi. A la sia keima khi hi,” ci hi. A nu in, “Topa in nang thupha hong pia taken, Ka tapa awng!” ci hi.

³Ama in a sum sia a nu pia kik a, a nu in, “Haamsiatna nang tung hong tuk ngawl natu in, keima mama in tua ngunte sia Topa tungah ciliap huai takin aap khi hi. Ngun taw a kituam thingngel milim khat vawtna in kizangh tu hi. Tua ahikom tu in tua ngun teng nang hong pia kik tu khi hi.”

⁴Tua zawkciang ama in a nu pia kik hi. A nu in nguntang zanii la in thikseak te khat pia hi, tua pa in milim khat vawt a, thing khat sui in, ngun taw tuam hi. Tua milim sia Micah ii inn ah koi hi.

⁵Hi pa Micah in ama ii biakpiakna mun a tuam in nei hi. Ama in milim pawlkhat le ephod khat vawt a, tuaciang ama in a tapate khat sia thiampi in koi hi.

⁶Tua hun lai in Israel ah kumpi a om bua hi, misim in amate uuk bang tekin ngamta uh hi.

⁷Tua hun laitak ma in Judah ngam Bethlehem khua ah a teang Levite mihing khangmoi khat om hi.

⁸Ama in Bethlehem nusia in a ten natu mun khat zong hi. Ama in khual a haw laitakin, Ephraim mualtung ngam Micah inn ah hong theng hi.



⁹Micah in, “Koisung pan hong pai ni ziam?” ci in dongh hi. Ama in zokik a, “Kei sia Judah ngam Bethlehem khua pan Levite khat ka hi a, ten natu mun zongin hi sungah kong pai hi,” ci hi.

¹⁰Micah in, “Keima kungah hong teang tan. Ka thu dok pa hong hi tan a, thiampi hong sepsak tan, kum khat in nguntang sawm taw na puansilh le na anneak tu kong pia tu hi,” ci hi.

¹¹Levi khangno pa in Micah taw ten tu lungkim in, a tapa bangin hong om hi.

¹²Micah in ama sia a thiampi tu in koi in, a inn ah teang hi.

¹³Micah in, “Tu in Levi mi khat thiampi tu in nei ka hi ciang Topa in na theampo a dikin hong piangsak tu hi ci in ka he hi,” ci hi.

Thukhente 18

Micah le Dan Minam

¹Tua hun lai in Israel ngamah kumpi om ngawl hi. Tua hun laitak ma in Dan minamte in amate ii lua tu ngam zong uh hi, banghangziam cile Israel suante sung panin amate in a tan tu ngam saan mun nei ngawl lai hi.

²Tua ahikom Dan mite in kicinna a nei pasal nga sia amate ii phung sung panin teal a, Zorah le Eshtaol pan paikhiasak a, ngam sung vil kawkoai tu le thu kankuu tu in sawl uh hi. Amate Ephraim mualtung ngam hong thet uh ciang Micah ii inn ah tung uh hi.

³Amate tua munah a taam sung Levite khangmoi pa khat ii pau za uh hi, tua ahikom tua pa kungah amate pai in, “Hi sungah bang hi ni ziam? Akua in nang hi sungah hong paipui ziam?” ci in dongh uh hi.

⁴Ama in zo a, “Keima in Micah taw vaihawmna khat ka nei uh a, ama ii thiampi tu in sum taw thap tu in hong cial hi.”

⁵Ama in ama munah, “Nong hesuakna in Pathian dongh in, ko ka khualhawna vai uh a dik tu ziam?” ci hi.

⁶Thiampi pa in zokik a, “Na thin toi tu uh bangma om bo. Topa in no sia na khualhawna uh ah hong keam hi,” ci hi.

⁷Tua ahikom pasal nga teng sia Laish ah pai hi. Amate in tua mite sia Sidon mite bangma in ngammuang takin om a mu uh hi. Amate sia kilem a uuk, dai khipkhep a om mite ahi hi, kuama taw bangma kituu ngei ngawlin, a ki taangsap uh theampo nei uh hi. Amate sia Sidon mite kung pan a khuala mama na ah teang uh a, midang taw bangma kipee aw na a nei bua uh hi.

⁸Pasal nga teng Zorah le Eshtaol ah hong cia kik ciang, a ngam mipuite in a vana uh ah bang mu ziam ci in dongh uh hi.

⁹Amate in, “Hong pai tavun, Laishte sim tawng. A ngam ka mu zo uh a, ngam pha mama khat hi. Hi sungah bangma vawt ngawlin om thawthong heak vun, hong manlang tavun! Pai in tua khuapi la vun!

¹⁰Tua mun na thet uh ciang a mite sia bangma a sia muanmawk nei ngawlin a om na mu tu uh hi. Ama ngam lian khat hi; mihing khat ii dei thei theampo ama in nei a, Pathian in no ii tungah tua ngam hong pia zo hi,” ci uh hi.

¹¹Tua ahikom Dan nam sung pan pasal zaluk sia Zorah le Eshtaol ah pai in ngal kido tu in kinging uh hi.

¹²Amate kuantu a Judah ngam sung Kiriath Jearim ah ngiaphual saat uh hi. Tua hu in a mun sia Dan Ngiaphual kici top lai hi.

¹³Amate tua mun pan paisuak in Micah ii inn Ephraim mualtung ngam theng uh hi.

¹⁴Tuaciang Laish khua kiim ngam vil tu in a pai pasal nga teng in a kitholpuite mun ah, “Hi sung innte khat ii sungah thing taw a kivawt biak milim ngun taw a kituam khat om ci in na he uh ziam? Biak milim dang le ephod khat zongh om hi. Tuate bang law leang na ci uh ziam?” ci hi.

¹⁵Tua ahikom amate Micah ii inn sungah khangmoi Levi pa ii omna ah tum uh hi, tuaciang Levi pa mun ah bang na cici ziam ci in dongh uh hi.

¹⁶Tua laanin Dan minam sung pan ngalkap zaluk ngalsim tu a kinging teng sia kongpi ah ding uh hi.



¹⁷Ngam vil ku nga teng sia thiampi pa kongpi ah ngalkap zaluk te taw a om laanin inn sungah tangtan in hong tum uh a, ngun taw a kituam thing taw a kivawt biak milim, milim dangte le ephod te hong la uh hi.

¹⁸Tua pasalte Micah inn sungah tumin biakna vanhte a laak uh ciang thiampipa in dongh a, “Bang ka vawt uh ci nu ziam?” ci hi.

¹⁹Amate in, “Kam tam heak in. Kam khat zongh pau heak in. Ko taw hong pai in ko ii thiampipa le thudok pa hong hi tan. Pasal khat ii innkuan atu thiampi na sep sangin Israel minam bup atu seam nuam zaw ngawl ni ziam?” ci uh hi.

²⁰Hi kammalte in thiampi pa sia lungkimsak mama ahikom ama in biakna vanhte la in amate taw ton hi.

²¹Amate kiheakin, a tate, a ngannote le a neisa teng taw dingkhia uh hi.

²²Amate in a inn pan, a khuala thimna a thet zawk uh ciang, Micah in a innpaamte ngal sim tu in sam hi. Amate in zongh Dan minam te pha uh hi,

²³tuaciang oksan uh hi. Dan nam sung pan pasalte in nungsang nga kikin Micah dongh hi. “Bang thu om ziam? Banghang hi bang lialua hi ziam?” ci uh hi.

²⁴Micah in zokik a, “Bang thu om ziam? na ci, bang na ci nopna ziam? Noma in ka thiampi pa hong laaksak a, pathian ka vawtte zongh la in, paikhia hi ngawl nu ziam? Kei atu bang om nawn thong ziam?” ci hi.

²⁵Dan nam pasalte in, “Hi mite thin uuksakin, nangma hong sim tu na uuk lui bana le pau ngawlin om lete phazaw hi. Tua ahibuale nang le na innkuan bupin thi tu nu hi,” ci hi.

²⁶Tuasia zawkciang amate paisuak uh hi. Micah in amate sia ama atu thahat lei ci in mu ahikom ama heak kikin inn ah cia hi.

²⁷⁻²⁸Dan minam pasalte in thiampipa le Micah ii vawt vanhte a laak zawk uh ciang, Bethrehob taw kuam khat sung a om, ngal a kin ngawl, daai dide in a omte khua Laish sim uh hi. Amate in tua munah a teangte thatlum in a khua haltham uh hi. Amate a hun tu kuama a om bua hi, banghangziam cile amate



sia Sidon pan kikhuala sii, midang kuama taw kizopna nei ngawl sii hi. Dan mite in a khua saat kikin tua munah teang uh hi.

²⁹Amate in a khua min zongh Laish pan Jacob ii tapa a taangpupi uh Dan min lawna in Dan saa uh hi.

³⁰Dan mite in milimte sia biak tu in koi uh a, tuaciang Jonathan, Gershom ii tapa, Moses ii tupa in Dan minam bup atu in thiampi hong seam a, tuaciang ama ii suan le paalte zongh in sal in a kiciapui hun dong a mite atu thiampi seam uh hi.

³¹Shiloh ah Pathian biakpiakna Puanbuk a om lai theampo in Micah ii biak milimte tua munah taang top hi. Reviced on - 21 August 2002

Thukhente 19

Levi pa le A Zino

¹Tua hun lai Israel te ii kumpi a nei maa in, Ephraim mualtung ngam ah Levite khat teang hi. Ama in Judah ngam Bethlehem khua panin ngaknu khat la in a zino tu in koi hi.

²Ahihang a numei nu sia ama ii tungah thin uuk ahikom a pa inn Bethlehem khua ah cia kikin, tha li taam hi.

³Tuasia ciang pasal pa in ama taw heak kik tu in kun tu in del hi. Ama in a naseam pa le laa nii keng hi. Numei in Levi pa inn sungah tumpui a, a pa in a mu ciang zin pha takin do hi.

⁴A pa in a taam natu a ngenget ciang ni thum taam hi. Nupate in a an uh ne in, tua munah zan zangh uh hi.

⁵A ni li ni zing ciang, zingtuung in tho a, dingkhia tu in kithoai uh hi. Ahihang numei ii pa in, “Bang khat po ne phot vun. Noma atu phazaw tu hi. A zawkciang na dingkhia thei tu uh hi,” ci hi.

⁶Tua ahikom pasalte nii zong hong to uh a, an ne tuidawn khawmin om uh hi. Tua zawkciang numei ii pa in, “Nong hesuakna in zan hi sungah zangh vun a, nuam takin om vun,” ci hi.



⁷Levi mi pa sia dingin pai tu a kithoai le numei ii pa in taam lai a sawl ahikom zan khat tua munah taam thua hi.

⁸A ni nga ni zingtuung in dingkhia tu a kithoai le numei ii pa in, “Nong hesuakna in bang khat po ne vun. Nisaang dong ngak vun,” ci hi. Tua ahikom pasalte nii in an ne khawm uh hi.

⁹Pasal pa a zino le a naseam pa khat vei ma dingkhia tu in hong kipat ciangin, numei ii pa in, “En vun! tu sia nitak hi dektak zo hi; zan taam lai tavun. Hai ngawlin khua hong zing tu hi; hi sungah taamin nuam takin om vun. Zingsang ciangin na khualhaw natu uh hu in na tho pal tu uh a, na cia tu uh hi,” ci hi.

¹⁰⁻¹¹Ahihang pasal pa in tua munah zan khat zangh thua nuam ngawl ahikom ama le a zino, a naseampa le tona kungh kithua sa a laate nii taw hong dingkhia hi. Jebus (Jerusalem mindang khat) hong thet uh sia in ni niam zo a, tua ahikom naseampa in a Topa munah, “Banghangin hi Jebus khuapi ah tawlinga in zan taam maw tu hi ziam?” ci hi.

¹²⁻¹³Ahihang a Topa in, “Israel mite teenna ahi ngawl khuapi ah ei ih tawlinga buatu hi. Ih kantan tu a, tawm a khuala zawna Gibeah ahibuale Ramah ah zan ih taam tu hi,” ci hi.

¹⁴Tua ahikom amate in Jebus khua kal in paisuak uh hi. Benjamin namte ii ngam sung Gibeah khua hong thet sia in ni tum hi.

¹⁵Ama in lampi pan pialkhia in tua munah zan zangh tu in hong kipan uh hi. Amate in khuapi sungah hong tum uh a, khuatual ah hong to uh a, ahihang kuama in amate zan in a inn ah ngiak tu in a paa a om bua hi.

¹⁶Amate tua munah a om laitakin, pasal huai khat lo ah a nasepna pan nitum ciang hong cia hi. Ama sia a kipatciil in Ephraim mualtung ngam pan ahi hi, ahihang tu in Gibeah ah teang hi. (Tua munah khuapi dangte ahi uhle Benjamin suante hi).

¹⁷Pasal huai pa in khuatualpi a khualhaw pa mu a, “Koi sung pan hong pai a, koisung zuan tu nu ziam?” ci in dongh hi.

¹⁸Levi mi pa in zokik a, “Judah ngam Bethlehem khua ah haw khu hi, tu in ka inn uh Ephraim mualtung ngam thukna ah cia tu khu hi. Kuama in zan ngiak tu in hong cia pui ngawl hi,

¹⁹ka laate atu sa an le taangphaw zongh nei a, anluum le zu zongh ka zino le kei le ka naseampa atu taw nei bilbel hi ve ung. A kismh tu te theampo ma nei khu hi.

²⁰Pasal huai pa in, “Ka inn ah hong saang khi hi! Pha takin kong en tu hi, khua tualpi ah ngia kul bo,” ci hi.

²¹Tuabangin ama in amate a inn ah ciapui a, a laate vaaksak hi. A zinte in a peang uh sil in, an ne uh hi.

²²Amate a nuam in a om laitak thakhat thu in khua sung pan numei le pa vai in a lee-tat pawlkhat in kiim uum a, kongkha nawm ngawp uh hi. Amate in pasal pa munah, “Nang taw a cia khawm pa sia hong pusua tan, numei ompui bangin ompui nuam khu hi,” ci uh hi.

²³Ahiahng pasal huai pa in doipua ah pusua a, amate tungah, “Lawmte awng, tuabang hi heak vun! Nong hesuakna in! Tuabang tatsiat kiihuai ngamtatna te vawt heak vun! Hi sia pa sia keima ii zin hi.

²⁴En vun! Hi sungah ama ii zino le ka tanu om hi, ka tanu sia ngaknu thiangtho hi. Kong pusua tu a, na vawt nop uh po in vawt vun. Ahizong hisia pa tungah tuabang a lipkhap huai siatna te vawt heak vun!”

²⁵Ahiahng tua mihingte in ama thu a ni nuam bua uh hi. Tua ahikom Levi pa in a zino la in doipua amate kungah koi hi. Amate in ama sia zan khuateak in buanin zingsang dong vawtsia zazan uh hi.

²⁶Khuavak ciangin numei nu sia a pasal ii omna, pasal huai pa ii inn kongkha ah hong pai in puk hi. Ni hong sua dong ama sia tua munah om hi.

²⁷A pasal sia zingsang ciang hong tho a, kongkha hongin khualhaw tu in a pusua le, a zino sia innpua ah a liik sa in om a, a khutte sia kongkha zamh tu bangin om a mu hi.



²⁸Ama in, “Tho in, Pai tawng,” ci hi. Ahihang bangma a zokik nawn bua hi. Tua ahikom ama in a zino ii luang sia laa tungah a pheii lamin suan a, inn ah cia tu in kipan hi.

²⁹Inn a thet ciang inn sungah tumin naam khat la hi. Ama in a zino luang la in, see sawm le see nii sua hi, tuaciang see khat tek Israel minam sawm le nii sim in thaak hi.

³⁰A mu theampo in, “Hi bang thu peuma za ngei bua hing! Israel te ii Egypt a nusiawt zawk peuma in hi bang mama piang ngei ngawl hi! Bang khat pawpo vawt kul tu hi! Bang vawt tu hi ziam?” ci tek uh hi.

Thukhente 20

Israel Ngalsim tu Kithoi

¹Israel mite theamposak sangah Dan pan thang sangah Beersheba dong, niswana sang pan Gilead ngamte dongin ngal ki kona sia zo uh hi. Amate in Topa ii mai Mizpah ah pumkhat bangin hong kikhawm uh hi.

²Israel lampui theampo zongh hi Pathian ii mite kikhopna ah om uh a, peang ngalkap sia 400,000 pha uh hi.

³Tua laitak ma in Benjamin minamte in a dang Israel te a vekpi in Mizpah ah kingawmtua hi ci in za uh hi. Israel te in, “Hi mawna ngamtatna sia koi bang teng in piang ci sia hong son tavun,” ci in dongh uh hi.

⁴A zino a kisuamlum Levi pa in zo a, “Ka zino le kei sia Benjamin te ngam Gibeah ah zantaam tu in ka pai uh hi.

⁵Gibeah mite in kei hong sim tu in zanin hong kiim uum hi. Amate in kei hong thatlum nuam hi, ahihang kei taangin ka zino sia buanin ama thi hi.

⁶Ama ii luang la in, ka sem zawkciang Israel minam khat sim see khat tek ka thaak hi. Hi mite in ei sungah ngitlona le paktat nasep hong seam hi.

⁷Hi sungah a om theampo sia Israel mite vive nu hi. Hi thu huvau ah bangbangin ngamta tu hi ziam?” ci uh hi.



⁸Mihing theampo hong ding khawm tek uh a, “Ei a kuama po puanbuk sungah teang kale, inn sungah tang kale, ih inn ah cia ngawl tu hi hing.

⁹Ih sep tu sia hi sia hi: laimee ih sawk tu a, Gibeah a sim tu pasalte ih teal tu hi.

¹⁰Israel mi sung pan sawm a khat in ngalkap hon atu an ih sik tu a, a dang teng in hi paktat ngitlona Israel ah hong sep hu in Gibeah daan ih pia tu hi.

¹¹Tua ahikom Israel mite theampo Gibeah khua sim tu vai khat taw hong kikhawm hi.

¹²Israel namte in Benjamin namte ii ngam sung tangciing kamtai paisak uh a, “Hi mawna na vawt uh sia bang hi thong ziam?”

¹³Gibeah ah a lee-tat te hong aap tavun, tua hile amate ka thatlum tu uh a, hi khansiatna sia Israel panin ka sot tu uh hi.” Ahihang Benjamin mite in Israel dangte a awlmawk bua uh hi.

¹⁴Benjamin ngam sung khuapite theampo panin Israel mi namdang teng do tu in Gibeah ah kuan uh hi.

¹⁵⁻¹⁶Amate in tua ni in a khuapite uh pan ngalkap tulkul le tulluk sam uh hi. Hite tungsia ah Gibeah mite in a kiteal tuam a veilawng zasali khawmtua uh hi. Amate khat sim in puansia taw suang viikin a lot uh ciang samzam zong a khial ngei bua uh hi.

¹⁷Benjamin namte a kisim ngawl Israel nam dangte ngalkap thiam sa 400,000 khawmtua uh hi.

Benjaminte taw Ngalsimna

¹⁸Israel mite Bethel biakpiakna ah pai uh a, amate in Pathian dongh uh hi, “Akua namte in Bejaminte sim masa tu ziam?” ci uh hi. Topa in zo a, “Judah namte” ci hi.

¹⁹Tua ahikom Israel te a zing kik ciang hong kipan uh a, Gibeah khua hui ah ngiaphual saat uh hi.



²⁰Amate in Benjamin ngalkap honte sim tu in hong pai uh a, tuaciang a ngalkapte uh sia khuapi maingat in koi uh hi.

²¹Benjamin ngalkap honte khuapi sung pan hong pusuak uh a, ni a tum maa in Israel ngalkapte tulkul le tulnii thatlum uh hi.

²²⁻²³Tuaciangin Israel biakpiakna munah hong pai uh a, nitak dong Topa ii mai ah tau uh hi. Amate in ama dongh uh a, “Ka suapui uh ahi Benjamin te taw kido kik tu in ka kuan kik tu uh ziam?” ci uh hi. Topa in zo a, “Kuan vun!” ci hi. Tua ahikom Israel ngalkap honte sia thinletna nga a, a zeini in ahi bangma a ngalkapte sia a dinmun ngei ah koi kik uh hi.

²⁴Benjamin ngalkap honte ii lang panin amate in a nii veina hong kuan uh hi.

²⁵Tuaciang Benjamin te zongh a nii veina Gibeah pan hong pusuak uh hi, hisia hun ciang Israel ngalkap thiam sa tulsawm le tulliat thatlum uh hi.

²⁶Tuaciang Israel mite theampo Bethel ah pai in tau uh hi. Amate in Topa ii omna tua munah hong to uh a, nitak mateng an a nei bua uh hi. Amate in kipawlkhop biakpiakna le sangaw biakpiakna te a bupin hal uh hi — tua theampo Topa ii mai ah vawt uh hi.

²⁷⁻²⁸Pathian ii Thukham Thingkuang sia tua hun lai in Bethel ah kikoi hi, tuaciang Eleazer ii tapa, Aaron ii tupa Phinehas sia tua Thukham Thingkuang huvau tavuan nei hi. Mihingte in Topa tungah, “Ka suapui Benjamin te ka sim kik tu uh ziam maw, ka tawp heu tu uh ziam?” ci in dongh uh hi. Topa in, “Sim vun, zing ciangin amate tungah no sia zawna hong pia tu khi hi,” ci hi.

²⁹Tua hikom Israel te in ngalkap pawlkhat Gibeah kiimah buusak hi.

³⁰Tuaciang ni kizom ni thum ni in amate in Benjamin ngalkapte sangah kuan a, tuaciang ni dang bangma in ngalkapte sia Gibeah maingat in dinmun lasak hi.

³¹Benjamin te a do tu in hong pusuak uh a, khuapi panin amate sia kizol khia uh hi. A masa bangma amate in Bethel paina lampi le Gibeah paina lampi a kolhna mun tengah Israel mi pawlkhat thalup tu hong kipan uh hi. Amate in Israel te sawmthum khawng hong that uh hi.

³²Benjaminte in, “Tu masia ih zaw bangin tu zong zokik hing,” ci uh hi. Ahihang Israel te in kinungkinsak a, amate khuapi pan lampi ah zol tu in ngealna vawt uh hi.

³³Tua ahikom Israel te ii ngalkap hon a tam zawte hong nungkin a, Baaltamar ah hong kingawmtua kik ciangin, Gibeah khua a uumci ngalkap te sia amate ii bukna khuapi hui suangtumpui tamna mun panin hong del uh hi.

³⁴A kiteal tuam Israel ngalkap tulsawm te in Gibeah a sim uh a, tuaciang a kisimna sia haksa hi. Benjaminte in amate sia kisu cimit tu ci in a he bua uh hi.

³⁵Topa in Benjaminte tungah zawna Israel te pia hi. Israel te in a ngalte 25,100 tua ni in thatlum uh a,

³⁶tuaciang Benjaminte in amate in lel ahi hunlam phawk uh hi.

Israel te ii Zaw zia

Israel ngalkap hon sung pan a ngalsim pi tu ngalkap honte Benjaminte kung pan a nungkin sia banghangziam cile amate in Gibeah kiim a ngalkap pawlkhat a buhsakte suang hi.

³⁷Hi mihingte in Gibeah sangah tai in amate khuapi sungah kiphal in tua sungah a om theampo thatlum uh hi.

³⁸Israel ngalkap honpite le a buu tu a kisawlte in lim taw kilak natu khat vaihawm uh hi. Amate in meikhu sia meeikaai bangin khuapi pan a zaam to a mu uh ciang,

³⁹ngalphual a om Israel te sia kiheak tu in kiciam hi. Tu hunin Benjamin te in Israel sawmthum te thatlum zo hi. Amate le amate hi bang kici uh hi, “Hi hi, tu masia ih zaw bangma tu zong ih zo zo hi,” ci uh hi.

⁴⁰Tuasia ciang lim sia hong kilangh hi, meeikaai bangin meikhu khua sung pan hong zaamto hi. Benjaminte in nungsang a et uh ciang a khuathing bup mei in kaang a mu uh a, lamdang sa uh hi.

⁴¹Tuasia ciang Israel te hong leeheak kik a, Benjamin te sia peakkeak uh hi, banghangziam cile amate sia kisuu cimit tu ci in phawk uh hi.



⁴²Amate Israel te mai pan nungkin a, mun kolhna ngam sangah tai uh hi, ahihang suakta thei ngawl uh hi. Amate sia Israel ngalkap honpite le khuapi sung pan hong pusuakte kilaklaw ah om a, amate sia kiskusia cip hi.

⁴³Israel te in ngalte sia thaang sung a awk bangin vawt hi, tuaciang tawlna ngawlin Gibeah ii nisuana sang mun khat dong del uh a, a del kawmin that uh hi.

⁴⁴Benjamin ngalkap sung pan a pha bel tulsawm le tulliat that uh hi.

⁴⁵A dangte sia Rimmon Suangpi a ki cina mun kolhna ngam ah tai uh hi. Lam dungah tulnga kithat hi. Israel in Gidom dong del tan in tulnii that uh hi.

⁴⁶A kingawmin Benjaminte tulkul le tulnga tua ni in kithat hi, ngalhang ngalkap vive hi.

⁴⁷Ahizong, mihing zaluk te in Rimmon Suangpi a kicina mun kolhna ngam ah suakta uh a, tuaciang tua munah amate tha li taam uh hi.

⁴⁸Israel te heak kikin Benjaminte a taanglai sun teng pasal, numei, patang le ngannote a kibangin thatlum siat uh hi. Tua ngam sungsuam khuapino theampo zongh haltham siat uh hi.

Thukhente 21

Benjamin namte atu Zite

¹Israel te in Mizpah ah hong kikhoptua uh laitakin Topa tungah ciliap huai takin kamciam vawt uh hi: “Ko sungah kuama in Benjaminte ii zi tu in ka tanute pia ngawl tu khu hi,” ci hi.

²Tua ahikom Israel mite Bethel ah hong pai uh a, Topa ii mai ah nitak dong to uh hi. Nging tak le thinbot takin amate mau tek uh hi.

³“Israel ii Topa Pathian awng, banghangin hi bangin thupiang ziam? Banghangin Benjamin namte sia Israel te sung pan bo mang tu in kithoi ziam?” ci hi.

⁴A khuavak ni zing tuungin mite in tua munah biaknatau khat sa uh hi. Kipawlkhop biakpiakna le sangaw biakpiakna te a bup in hal uh hi.



⁵Amate in Topa ii mai Mizpah ah Israel te kikhopta lai in hong kihel ngawl pawl a om ziam? (Amate in Mizpah ah a pai ngawl peuma thatlum tu hi, ci in tomlawna ciliap huai takin vawt hi.)

⁶Israel mite in a suapui uh Benjaminte atu khuangai hi, tuaciang amate in hi bangin ci uh hi, “Tu ni in Israel in amate sung pan minam khat taan uh hi.

⁷Benjamin a taang laite zi tu bang law tu hi ziam? Topa tungah ciliap huai takin kamciam ih vawtna pan, ih tanute khat zongh amate zi tu in ih pia buatu hi,” ih ci hi.

⁸Mizpah ah kikhopna sungah Israel namte sung pan hong kikhawm ngawl a pawlin akua te om ziam ci in a kat uh ciang, Gilead ngam Jabesh panin kuama hong kikhawm ngawl uh hi;

⁹min kikhawna ngalkap hon sungah a kivawt lai in Jabesh panin kuama in zo ngawl hi.

¹⁰Tua ahikom a kikhawmte in mihing tulsawm le tulnii a hang bel te thupia a, “Pai vun a misim in, numei patang dong thatlum tavun.

¹¹Pa a minpiang theampo thatlum vun a, numei pan ngaknu thiangtho ngawl peuma that vun,” ci hi.

¹²Jabesh mite sungah ngaknu thiangtho zali mu uh a, tuate sia Canaan ngam sungah a om Shiloh ngiaphual ah paipui uh hi.

¹³Tuasia ciang a kikhawm theampo ii taangin Rimmon Suangpi a om Benjamin te munah ngal bona thu zacak hi.

¹⁴Benjamin te hong cia kik uh a Israel a dangte in Jabesh pan ngaknu a thalup ngawlte pia uh hi. Ahihang amate atu in a kicing zo bua hi.

¹⁵Benjamin te atu in Israel mite khuangai hi, banghangziam cile,Topa in Israel te kilomtangh na sia sutham hi.

¹⁶Tua ahikom a kikhawmte ii lampuite in ci uh hi, “Benjamin namte atu numei om nawn ngawl hi. Amate a taanglai te atu a zi tu piak natu bang law tu hi ziam?



¹⁷Israel te in nam sawm le nam nii sung pan nam khat a bo cimit tu sia suak thei ngawl hi,

¹⁸ahihang amate in ih tanute a tenpui tu ki oai ngawl hi, banghangziam cile eima in Benjamin zi tu a tanu a plate haamsiatna thuak hen ih ci zo hi.”

¹⁹Tua zawkciang amate in, “Kumsim na Topa poaipi sia Shiloh ah hong tung dektak zo hi,” ci in ngaisun uh hi. (Shiloh sia Bethel iisaksang, Lebonah ii thangsang Bethel le Shechem kilaklaw a lampi sia ii niswana sangah om hi.).

²⁰Amate in Benjaminte munah, “Pai vun a, sapit lote sungah buu vun,

²¹tuaciang encik vun, Shiloh ngaknute poai sungah hong pusua uh ciangin sapit lote sung pan hong pusuak tavun. Noma misim in ngaknu khat tek zawthawk thu taw la vun a, Benjamin ngam ah cia pui vun.

²²Amate ii pate suapuute in no kungah hong pai in lungkim ngawl na hong pau le, ‘Hong keamsak po tavun, amate sia ka zi tu a ngal kidona pan ka laak uh hi ngawl hi. Tuaciang no zongh nong piak uh hi ngawl ahiciang, na kamciam uh a paltan suak ngawl tu nu hi,’ ci tavun,” ci in sawl uh hi.

²³Benjamin te in tuabangma in vawt uh hi; Shiloh ah a laam ngaknute sung pan amate atu tek tealin siapui uh a, khua saat kikin tua munah teang uh hi.

²⁴Tuasiasia hun laitakin Israel dangte zongh tua mun nusia in, misim in ama ii namte kung, a innkuanpuite kung le a neisa omna ah cia uh hi.

²⁵Tua hun laitakin Israel ah kumpi a om bua hi. Misim in ama uuk bangin ngamta uh hi.



Ruth

Ruth 1

Elimelech le A Innkuanpuite Moab ngam Theng

¹⁻²Khua ngeipi lai, Israel te in kumpi a nei uh maa in, a ngam sungah kialpi hong tung hi. Tua ahikom pasal khat Ephrath be te sung pan, Judah ngam Bethlehem khua a teang Elimelech ci khat om hi, ama in a zi Naomi le a tapate nii, Mahlon le Chilion taw moab ngamah tawmvei sung teang tu in pai hi. Tua munah a ten lai in,

³Elimelech hong thi hi, tuaciang Naomi sia Moab ngaknute ahi Orpah le Ruth

⁴a tenpui a tapate nii taw, taang hi. Kum sawm bang zawkciang

⁵Mahlon le Chilion zongh hong thi uh hi, tuaciang Naomi sia pasal ngawl ta ngawl taw hong taang hi.

Naomi le Ruth Bethlehem khua ah hong Heak kik

⁶Tua zawk tawmvei ciangin, Topa in ama ii mite sia thupha pia a, an tam mama la hi ci in Naomi in za hi; tua ahikom a mote nii taw a teenna uh nusia tu hong kinging hi.

⁷Judah ngam ah cia tu in amate kipan khawm tek ahihang lampi tungah

⁸ama in amate mun ah, “Cia kik tavun a, na nute uh taw om tavun. Kei tung le a thi sa te tungah nong thuthiam uh bangma in Topa in no tungah hong thuthiam taken.

⁹Tuaciang Topa in no ngeal sia pasal nei kikin inn khat veve nei kik tu in hong siam taken,” ci hi. Tua ahikom vaithakna in Naomi in a mote nii sia namh hi, ahihang amate kap tu hong kipan a,

¹⁰“Heak kik ngawl tu khu hi! Na minam pui te kung zuan tu in pai tu khu hi,” ci uh hi.

¹¹“Ka tanute awng, na heak kik uh kul tu hi,” ci in Naomi in zokik hi. “Kei taw banghangin paikhawm nuam nu ziam? Na pasal tu uh tapate vei hing kik thei lai tu hong um nu ziam?”



¹²Cia kik tavun, kei sia pasal nei kik tu in huai lei zo khi hi. Lam et om lai hi ci in tu nitak mama in pasal nei in tapate nei ma leng,

¹³a khan ngak zo thong tu nu ziam? Hi bang a na ngamtat uh ciang ngualdang na tenpui tu uh hong khak bana tu ziam? Hi ngawl hi, ka tanute awng, tuabang sia suak thei ngawl hi ci in na he uh hi. Topa in kei hong langpan hi, tuaciang no atu in khuangai mama khi hi,” ci hi.

¹⁴Amate kap tu in hong kipan leleau hi. Tua zawkciang Orpah in a to nupi vaithakna in namh a, cia hi. Ahihang Ruth in a thasua nuam bua hi.

¹⁵Tua ahikom Naomi in ama tungah, “Ruth awng, na nuphal nu sia a mite le a pathian kungah zuanin cia zo hi. Ama taw cia khawm tan,” ci hi.

¹⁶Ahihang Ruth in zo a, “Nang hong nusia tu in hong sawl heak in. Hong pai khawmsak po tan. Na paina theampo ah ka pai tu a na teenna po ah ka teang tu hi. Na mite sia keima mite hi tu a, na Pathian sia ka Pathian hi tu hi.

¹⁷Na thina po ah ka thi tu a, tuaciang tua mun sia ka kiphum natu hi tu hi. Thina khat sim ngawlin kei sia nang taw ka kikhen le Topa in ngimna lian bel kei tungah hong tungsak taken,” ci hi.

¹⁸Naomi in Ruth sia ama taw pai khawm tu in a thin nasia tak khensat zo ci in a mu ciang a pau nawn bua hi.

¹⁹Bethlehem a thet dong amate pai uh hi. Amate tua mun a thet uh ciang khuathing bup liinglawng in, numei te in, “Hi sia Naomi hi takpi ziam?” ci in au uh hi.

²⁰“Naomi hong ci heak vun, Mara hong ci tavun, banghangziam cile Vaanglian Pathian in ka nuntakna sia khasak hi.

²¹Hi sung ka nusiati lai in na tam mama ka nei hi, ahihang Topa in bangma ngawl taw hong ciasak kik hi. Topa Vaanglianpipa in hong pua nil zo a, ngimna hong puak zo ahi ciang banghangin Naomi hong cici lai nu ziam?

²²Moab mi a monu Ruth taw Naomi ii hong ciana sia tu a bang ahi hi. Bethlehem hong thet hun lai in mangtaang at hun a kipat laitak ahi hi.



Ruth 2

Boaz Lo sungah Ruth Naseam

¹Elimelech ii baangkua sung mealheak hi a, a hau le a thunei mama khat ahi Boaz a kici khat sia Naomi ii mealheak khat na hi hi.

²Ni khat ni in, Ruth in Naomi mun ah lo sungah hong piasak tan a, naseamte ii a kheet ansangh te va khon ka tong. Ama taw na hong seam khawmsak tu mihing khat po mu nanak tu khi hi,” ci hi. Naomi in, “Pai tan, ka tanu awng” ci hi.

³Tua ahikom Ruth pai a, naseamte ii nung panin zui a, an a kheet te la hi. Ama ii sepna lo sia Boaz ii lo a na hi luilam hi.

⁴Tua zawk tawm vei ciang Bethlehem panin Boaz hong pai a, naseamte paupui a, “Topa in thupha hong pia taken,” ci hi. Amate zongh in, “Topa in thupha hong pia taken,” ci uh hi.

⁵Boaz in, naseamte a uk pa mun ah “Zia sunga numei khangmoi sia akua ziam?” ci in dongh hi.

⁶Tuasia pa in, “Ama sia ngamdang mi Moab pan a Naomi ii hong siapui sia hi.

⁷Ama in kei mun ah, naseamte ii nung pan zui in a kikhe ante a laak natu in hong ngen hi. Ama in zingsang tuung panin seam a, tu mahiat ma in thinglim ah tawlna hi,” ci in zo hi.

⁸Boaz in Ruth mun ah, “Ngaisutna pha khat hong pia tu khi hi. Hi lo sung sim ngawl mundang ah an la heak in. Hi sung a numei te taw naseam khawm in,

⁹amate koi sungah at ci in en in, amate taw kithua in. Ka mite mun ah nang hong vawtsiat ngawl natu thupia zo khi hi. Na dang a ko simin amate ii dip sa thambeal te sung pan tui dawn in,” ci hi.

¹⁰Ruth in a maitang leipha dong kunsuk a Boaz tungah, “Nang a banghang kei atu hong thin nuammaw ni ziam? Banghang in ngamdang mi khat tungah hong cingh ni ziam?” ci hi.



¹¹Boaz in zokik a, “Na pasal thi pan kipan na tonupi tungah na sep na vawt theampo hong za siat khi hi. Na pa na nu le na ngam nusia in hong pai a, na heak ngei ngawl mite kawm ah nong ten ka he hi.

¹²na sep sa na vawt sa theampo hu in Topa in thaman hong pia taken. Ama ii hong pau hong dal tu in Israel te Pathian na tu hu in Topa in thaman a cingin hong pia taken!” ci hi.

¹³Ruth in, “Topa awng, nang kei tungah hong dik mama ni hi; Na naseamte khat taw zong kikim zo ngawl kei po kamthiam taw nong paupui ciang ka om nuam mama pai hi,” ci in zo hi.

¹⁴Anneak hun ciang Boaz in Ruth mun ah ci hi, “Hong pai tan a, anluum bek khat la in metui sungah pap in.” Tua ahikom ama naseamte taw hong tokhawm a, tuaciang Boaz in an ki em khat pia hi. Ama in a kham dong a neak zawkciang a neak vaal pawl khat nei lai hi.

¹⁵⁻¹⁶An la tu in a pai laanin Boaz in naseamte thu pia hi, “Taangvawngte kikoina phual dong an lasak vun a, anlaak a tawp ngawl natu in bangma ci heak vun. Tua bek tham ngawlin taangvawngte pan pawlkhat dok vun a ama ii top tu in vawt vun.”

¹⁷Tua hi a Ruth in an lala a, lo sungah nitak dong tuaciang a cil ciangin pound kul le pound nga dektak pha hi.

¹⁸Ama in a anlaakte khua sungah cia pui in a tonupi mun ah lak hi. A anneak vaal a kep teng zongh a tonupi pia hi.

¹⁹Naomi in ma mun ah, “Hiteng theampo koi sung pan kaikhawm ni ziam? Akua lo sungah naseam ni ziam? Nang hong kin pa tungah Topa in thupha pia taken,” ci hi. Tua ahikom Ruth in Naomi mun ah ama sia Boaz a kici pasal khat ii lo sungah na a sep son hi.

²⁰“Topa in Boaz thupha pia taken!” ci in Naomi hong paukhia hi. “Topa in a kamciam sia a nungta lai te le a thi sa te tung dong ah kholet hi.” A kampau zom lai a, “Tua pasal sia eima ii mealheak kuung khat hi a, ei hong kep tu tavuan a nei khat ahi hi,” ci hi.



²¹Tuasia ciang Ruth in, “A pha bel thu sia bang ziam cile ama in an laak man dong a lo sungah naseamte taw an ka top tu in hong sawl hi,” ci hi.

²²Naomi in Ruth mun ah, “Hi ma hi, ka tanu awng, Boaz ii lo sungah a naseam numeite taw nasep khop tu ma phabel tu hi.”

²³Tua hi a, Ruth in mangtaang le zungtaangte a laak man dong amate taw seamkhawm in ansangh te tawm hi. Tuaciang ama in a tonupi taw teang khawm tan hi.

Ruth 3

Ruth in Pasal Mu

¹Tawmvei zawkciang Naomi in Ruth munah, “Noma aituam inn khat na nei thei natu in pasal khat kong zonsak kul tu hi.

²A naseam numeite taw na sep khoppui Boaz sia ih mealheak ahi hunlam ciamtee in. Tu in ngai in. Nitak ciang ama sia mangtaang na cil tu hi.

³Tua ahikom kibualin, paaknamtui tawm kinoai in, na puan neisun a phabel teng silh in. Tua zawkciang a taang cilna ah pai tan a, ahizong a neak a dawn zawk mateng tua munah na om sia ama in hesak heak in.

⁴Ama koi sungah lum ziam ci ciamtee in, tuaciang a mut zawkciang a puan hawk in a, a peang ah lum in. Ama in na vawt tu teng hong son tu hi.”

⁵Ruth in, “Na ci theampo ka vawt tu hi,” ci hi.

⁶Tua ahikom Ruth sia ancilna mun ah pai in, a tonupi ii sawl bangin ngamta hi.

⁷Boaz in an a neak zawkciang le a dawn zawkciang ama sia a thin nuam hi. Ama in taangvawng lomte omna ah pai in mu tu in a lum hi. Ruth in pai ku vaden a, a puan hawkin ama ii peang ah lum hi.

⁸Zan ciangin Boaz thakhatin hong khanglo a, hong kilumheak a, numei khat a peangah a lum mu in lamdang sa hi.



⁹“Akua ni ziam?” ci in dongh hi. “Ruth khi hi, Topa awng. Nang sia mealheak kuung khat hi na hi ciang kei nong et tu tavuan nei ni hi. Nong hesuakna in hong tenpui tan ci hi.”

¹⁰“Topa in thupha hong pia taken. Na tonupi tungah na sep sa te sangin, tu in ih baangkua tungah thumaanna nasia zaw in nei ni hi. Hau ahizong, zawng ahizong tangval khat po na zon thei natu hi ih ve, ahizong tuabangin zong ngawl ni hi.

¹¹Tu in, na thin ngim heak in, Ruth awng. Nong nget theampo vawt tu khi hi; khua sunga om a kuama theampo in nang sia numei pha khat hi ci in hong he hi.

¹²Kei sia na mealheak kuung khat hi a, nang tungah tavuan hong nei peu khi hi, tuasia in a maan thu hi, ahihang kei sangin nang taw a kinai zaw mealheak khat om lai hi.

¹³Hi sungah zankhua in om in a, zingsang ciangin tua pa nang tavuan hong la tu ziam, hong la ngawl tu ziam ih en tu hi, tavuan hong la a, ahi le pha hi, hong la bua ahile a nungta Pathian tungah kamciamna vawt hi tong, keima in tavuan hong la tu khi hi. Tu in zingsang ciang dong lum suk in,” ci hi.

¹⁴Tua ahikom ama in Boaz ii peang kungah a lum hi, ahizong ama a mu thei khuavak mahiat in tho hi, banghangziam cile Boaz in ama tua munah a om sia kuama in a hesak nuam bua hi.

¹⁵Boaz in ama munah, “Na puantual silh suut in a, hi sungah pha in” a ci ciang ama in tuabangin pha a, Boaz in mangtaang pound sawmnga dektak sun in, a liangah a puak tu in suan hi. Tua zawkciang khuapi sungah a vanh taw ama heak kik hi.

¹⁶Inn a thet ciang a tonupi in, “Bangbangh nong hi ziam ka tanu awng,” ci hi. Ruth in Boaz ii ama tungtaang a, a sep a vawt theampo son hi.

¹⁷A belap lai na pan, “Nang kungah khut nguakin kong cia ngawl natu in hi mangtaang teng zongh hong pia hi,” ci hi.



¹⁸Naomi in ama mun ah, “Tu in na thin sausak in Ruth awng, hi thu sia koi bang ciang hong theng tu ziam ngak in. Boaz sia tuni in hi thu a thian mateng om thong ngawl tu hi,” ci hi.

Ruth 4

Boaz in Ruth Tenpui

¹Boaz sia khuapi kongpi kikhopna mun ah pai in tua sungah to hi. Tua zawkciang Elimelech ii mealheak naihuai bel Boaz ii son sia hong pai a, Boaz in ama sam hi. “Hi sungah hong pai tan ka ngualtamh pa awng, hong to tan,” ci hi. Tuasia ciang ama pai in, to hi.

²Tua zawkciang Boaz in khuapi sungah a lampuite sawm samin tua munah to in sawl hi.

³Amate a to zawkciang mealheak pa munah, “Tu in Naomi sia Moab panin hong cia kik ahikom, ih be pa Elimelech ii lo sia ama in zuak nuam hi,

⁴tuaciang hi thu sia na heak uh kul ka sa hi. Tu in na lei nuam le hi pasal hi sungah a to te mai ah lei in. Ahihang na lei nuam buale lei nuam bong ci in, banghangziam cile lei thei natu thu nei masa sia nang hi a, tua zawkciang kei hi pheang khi hi,” ci hi. Tua pa in, “Lei tu khi hi,” ci hi.

⁵Boaz in, “Pha mama hi, ahizong Naomi kung panin lo na lei a, ahi le Moab meingong nu Ruth zongh a lei suak tu ni hi, tuasia ciang bekin a lo sia mithi pa ii baangkua sungah om tu hi,” ci hi.

⁶Tua pasal pa in, “Tuabang ahile lo lei theina ka thu neina sia thasua ka heu tong, banghangziam cile ka tate in tua lo lua thei ngawl tu uh hi. Nangma lei in, kei lei ba tong,” ci hi.

⁷Tua hun lai in, sum kizuak kilei na ahizong, vanh kithe na ahizong, a zuak sia in a peangdap suutin a lei pa pia hi. Israel te in hi bangin thu kip thu kho suaksak hi.

⁸Tua ahikom pasal pa in Boaz mun ah, “Nangma lei in,” a ci ciang, a peangdap suutin Boaz pia hi.



⁹Tuasia ciang Boaz in lampuite le tua sung a om midangte mun ah, “No sia tu ni in Elimelech le a tapa te Chilion le Mahlon ii neisa theampo Naomi tung pan ka lei sia tetti nu hi.

¹⁰Tua bek dom ngawlin Mahlon ii a nusiat a zi meingong nu Ruth, Moab mi sia ka zi hong suak hi. Hi sia in mithi te ii neisa te sia a baangkua sungah a kip in om tu a, a khang uh zongh amate mealheak sung le a khua sungah bo ngawlin kip tu hi. No teng sia hi thu huvau in tetti na hi uh hi,” ci hi.

¹¹Lampui te le a dangte in, “Hi hi, tetti khu hi. Topa in na zi sia Jacob atu ta tam mama a piangsak Rachel le Leah bang hong hisak taken. Ephrath be le ngui sungah hau in Bethlehem khua sungah na min thang taken.

¹²Topa in hi numei khangmoi tung pan hong piak tu tate sia Judah le Tamar ii tapa Perez baangkua bang hong hisak taken,” ci hi.

Boaz le A suan A paalte

¹³Tua ahikom Boaz in Ruth sia a zi tu in ciapui hi. Topa in Ruth sia thupha pia a, nau hong paai a, tapa khat hong hing hi.

¹⁴Numei te in, “Topa pok vun! Ama in nang hong en kik tu tapa khat hong pia hi. Hi patang sia Israel ah minthang taken!

¹⁵Na monu in hong it hi, tuaciang ama in tapa sali sang zongin nang atu tam hong seam zaw hi. Tuaciang tu in ama in tupa khat hong pia a, tua pa in nang atu nuntakna thak le na huai ciang ngam muanna hong pia tu hi,” Naomi tungah ci uh hi.

¹⁶Naomi in nau sia la in toai bikbek a, pha takin omh hi.

¹⁷Innpaam numei te in pano ii min sia Obed phuak uh hi. Amate in ngual mun theampo ah, “Naomi in tapa khat nei hi,” ci uh hi. Obeb sia Jesse ii pa hi a, Jesse sia David ii pa hi.

¹⁸⁻²²Hite sia Perez pan David dong khang simna ahi hi. Perez, Hezron, Ram, Amminadab, Nahshon, Salmon, Boaz, Obed, Jesse, David ahi hi.



Samuel Khatna

Samuel Khatna 1

Shiloh ah Elkanah le A Innkuante

¹Ephraim mualtung ngam Ramah khua ah Ephraim nam ahi Elkanah a kici pasal khat om hi. Ama sia Jeroham ii ta, Elihu ii tupa, Tohu baangkua, Zuph be le phung sung pan ahi hi.

²Elkanah in zi nii nei a, Hannah le Peninnah ahi hi. Peninnah in ta nei ahihang Hannah in nei ngawl hi.

³Kum simin Elkanah in Topa Vaanglianbelpa bia tu le sangaw biakpiakna vawt tu in Ramah pan Shiloh ah pai hi, tua munah Hophni le Phinehas, Eli ii tapa nii te sia thiampi seam uh hi.

⁴Elkanah in sangaw biakpiakna a vawt simin, ama in tel khat sia Peninah pia a, tel khat tek sia a tate pia hi.

⁵Tuaciang ama in Hannah sia it mama hi napi ama sia tel khat bek pia hi, banghangziam cile Topa in ta nei ngawlin koi hi.

⁶A kidem pui Peninah in ama sia nunau zazan in, a maizum thethei tu in vawt hi, banghangziam cile Topa in Hannah sia ta selsak hi.

⁷Kum khat zawk kum khat hi bangin papai a, Topa ii inn ah a pai uh simin Peninah in Hannah sia a thin lalsak mama ahikom Hannah sia kap ngawp a, an zongh a ne nuam bua hi.

⁸A pasal Elkanah in ama dongh a, “Hannah awng, banghangin kap ni ziam? Banghangin an ne nuam ngawl ni ziam? Banghangin hee tawtung ni ziam? Tapa sawm sangin kei sia nang atu manpha zaw hong sa ngawl ni ziam?” ci hi.

Hannah le Eli

⁹⁻¹⁰Ni khat, amate Shiloh, Topa inn sungah an a neak zawk uh ciang, Hannah hong dingto hi. Ama sia a thin na sa mama a, kap ngawpin Topa tunga thu ngen hi. Tua sung teng in Eli thiampipa sia ama ii omna mun kongkha hui ah to nginge hi.



¹¹Hannah in ciliap huai takin kamciam vawt hi: “Topa Vaanglianbelpa awng, na naseamnu hong en tan! Ka ngimna hong mu tan a, hong phawk tan! Hong mangil heak in! Tapa khat nong pia le, ama ii nuntak buppi nang atu in kong aap tu a, ama in a sam meet ngei ngawl tu hi,” ci hi.

¹²Hannah in Topa tungah hun saupi sung thu ngen a, tuaciang Eli in ama muk teng en hi.

¹³Ama sia a thimthamin thu ngen hi; a muk sia tutung ahihang a aw suak ngawl hi. Tua ahikom Eli in ama sia zu kham hi tu in um hi,

¹⁴tuaciang ama munah, “Na zu kham ngamtatna na pualaak teng tawp in! Zu ne nawn heak in a, hi kinken in om in!” ci hi.

¹⁵“Hi bo, kei zu kham hi bong, Topa, zu ne sa in om ngawl khi hi, a cimaw khi hi, thu ngengen in ka ngimna teng Topa tungah sung khi hi.

¹⁶Mihing mannung ngawl hong sa heak in. Ngim nga mama ka hikom hi bangin thu ngengen khi hi,” ci in zokik hi.

¹⁷“Thin nuam in pai tan, Israel te ii Pathian in na ngette hong pia taken,” Eli in ci hi.

¹⁸“Kei a tawntungin hesuakna taw hong phawk tan,” ama in ci hi. Tuasia zawkciang an tawm ne in paikhia a, a khuangai nawn bua hi.

Samuel ii Pianna le a Ki aapna

¹⁹A khuavak ni zingsang ciang Elkanah le a innkuanpuite hong tho pal uh a, Topa a biak zawk uh ciang Ramah a inn ah hong cia kik uh hi. Elkanah in a zi Hannah ompui a, Topa in ama ii thungetna zo hi.

²⁰Tuabangin ama sia nau ngil om a, tapa khat hong hing hi. Ama in a min sia Samuel ci in phuak a, “Ama atu in Topa tung pan ka nget hi” cina ahi hi.

²¹Elkanah le a innkuanpuite Shiloh ah pai in Topa tungah kum sim sangaw biakpiakna le a kamciam sa a tuam sangaw biakpiakna pia tu in hong pai tu hun hong cing hi.



²²Ahihang tusia hunin Hannah hong pai bua hi. Ama in a pasal munah, “Nau in noai a ten po ciang a nuntak sung buppi teang tu in Topa inn ah ka paipui tu hi,” ci hi.

²³Elkanah in zokik a, “Pha hi, phabel nasak bangin vawt in; noai na tensak dong inn ah om in. Tuaciang Topa in na kamciam hong tangtungsak hen,” ci hi. Tua ahikom Hannah sia inn ah om a, a nau keam hi.

²⁴Ama in noai a tensak zawkciang Shiloh ah paipui a, kum thum a pha khuital khat, anvui kuang khat le savun ip sungah zu a dim keng hi. Ama in Samuel sia moi mama ahihang Topa inn Shiloh ah paipui hi.

²⁵Amate in khuital a ngaw zawkciang nausen sia Eli kungah paipui uh hi.

²⁶Hannah in ama ii munah, “Hong ngai pak tan Topa! Kei nong ciamtee lai ziam? Kei sia hi munah dingin Topa tungah thu a ngengen numei sia khi hi.

²⁷Hi patang sia ama munah ka ngen a, ama in ka nget bangin hong pia hi.

²⁸Tua ahikom Topa tungah ama aap khi hi. A nuntak lai theampo ama sia Topa ii neisa suak tu hi,” ci hi. Tua zawkciang amate in tua munah Topa bia uh hi.

Samuel Khatna 2

Hannah ii Thungetna

¹Hannah in hi bangin thungen hi: “Topa in ka lungtang sia thinnopna taw hong dimh hi; Ama ii sep le vawt te hu in bangza in ka lungdam ziam! Ka ngalte ka nuisan taa hi, Pathian in hong hu ahikom bangza in thin nuam khi ziam?

²“Topa bangin a thiangtho kuama om ngawl hi; Ama bang kuama om ngawl hi, Ih Pathian bangin hong dal kuama om ngawl hi.

³Na kisuantaakna uh teng kheal vun; Na kiphatsak kammalte thimsak vun. Banghangziam cile Topa sia a he Pathian hi a, mihingte sep le vawt te tungah thu khi hi.

⁴Ngalkap thahat pa ii thal sia taltan a, ahihang a zawngkhalte thahat tato hi.



⁵Khatvei lai in a cing takin a kivaakte, an thalaw in ngual cial sa in om hi, ahihang a ngilkialte sia kial nawn ngawl hi. Tasel zi in ta sali hong nei taa hi, ahihang ta tam mama te ii nu in ama taw kuama a taang nawn bua hi.

⁶Topa in thatlum a, tuaciang nungtasak kik hi; ama in mihingte sia mithi khua ah puak hi, tuaciangin hong heakpui kik hi.

⁷Ama in mihing pawlkhat a zawngin vawt a, pawl khat sia hausak hi. pawlkhat sia ama in niamkhiak suk a, pawlkhat liansak hi.

⁸Ama in leivui panin mizawngte laamto a, a kitasamte a lungmanna panin phongto hi. Amate sia kumpipa tapate taw kithawlsakin, ki upat vawtna munah koi hi. Simlei ii phungkawng sia Topa aa hi; tuate ii tungah ama in leitung sa hi.

⁹“A thumaan ama ii mihingte sia ama in dal hi, ahihang a ngilo te sia khuazing sungah bo mang hi; mihing khat in ama ii tha ngum hatna taw mualsuak zo ngawl hi.

¹⁰Topa ii ngalte sia kisia cip tu hi; Ama in amate langpanna vantung panin vanto bangin hong nging tu hi. Topa in leitung buppi tungah thu hong khen tu hi; ama in a kumpipa tungah thahatna pia tu hi, ama ii teal kumpipa sia zawna pia tu hi.

¹¹Tua zawkciang Elkanah sia a khua Ramah ah cia kik hi, ahihang Samuel patangno sia Shiloh ah taang a, thiampi Eli khut nuai ahTopa ii na a seam hi.

Eli ii Tapate

¹²Eli ii tapate sia mihing seksol vive hi. Amate in Topa le mihingte tung pan thiampite ii nget thei thu ngeina te a awlmaw bua uh hi,

¹³tua ahibuale zong mihingte tung pan thiampite ii nget thei thu ngeina te a kin bua uh hi. Tua taangin mihing khat in sangaw biakpiakna hong paipui ciangin thiampi pa ii naseamte in thikkaa zum thum pha khat taw hong pai uh hi. A sa a kihuahuan laitakin



¹⁴ama in beal sungah a thikzum kaa taw sun in, thikzumkaa ii a laak po sia thiampi ii neisa ahi hi. Shiloh ah sangaw biakpiakna pia tu in hong pai Israel mite theampo sia hi bangin kivawt hi.

¹⁵Tua banah ngan thau kikhok in a kihal maa in, thiampipa ii naseampa hong pai in piakkhiatna a pia pa ii munah “Sa pawlkhat thiampipa em tu hong pia tan; ama in sa huan sa nang tung pan hong saang ngawl tu hi, sasial bek dei hi,” ci hi.

¹⁶Mihing pa in, “A maan bangin ngamta tawng, a thau hal phot tawng, tua zawkciang na dei uh po la vun,” a cile, “Hi bo, tu ma in hong pia tan. Nong pia bua ahile zawthawk thu taw la tu khi hi!” thiampipa ii naseam pa in ci hi.

¹⁷Eli ii tapate mawna hi sia sia Topa muna ah nasia tatak in thupi hi, banghangziam cile amate in Topa tunga piakkhiatnate sia tuabangin simmawk vawt uh hi.

Shiloh ah Samuel

¹⁸Tua hunin patang Samuel biakna taw kisai a kithiansua puanneal apron khat silhin Topa na seam hi.

¹⁹Kum simin, a nu in a pasal ii kumsim sangaw piakkhiatna a vawt ciangin ama taw kithua in pai a, puantual khat veu ama atu in vawtsak a, puak hi.

²⁰Tua zawkciang Eli in Elkanah le a zi thupha pia a, Elkanah munah, “Topa in ama atu na piak, na tapa uh sia taangin ta dangte zongh hong pia taken,” ci hi. Tua zawkciang amate inn ah cia kik uh hi.

²¹Topa in Hannah sia thupha pia takpi a, tapa thum le tanu nii nei hi. Patang Samuel sia Topa nasepna sungah khangto hi.

Eli le A tapate

²²Tu in Eli sia huai mama zo hi. Ama in a tate ii Israel mite tungah a ngamtatna uh te zaza a, Topa ii ompuina Puanbuk kongbiang a naseam numeite ngangawn luppui uh hi, ci in za hi.

²³Tua ahikom amate ii munah, “Banghangin hi nate vawt nu ziam? Mihing theampo in ngamtat siatna na vawt uh te hong son hi.



²⁴Kheal vun, ka tate awng! Hisia sia a lipkhap huai mama Pathian Topa ii mite ii son ahi hi.

²⁵Mihing khat in midang khat tungah a maw le Pathian in sungsia thei lai hi, ahihang Topa tungah a mawte sia akua in sungsia tu ziam?” ci hi. Ahihang amate in a pa thu ngai ngawl uh hi, banghangziam cileTopa in amate thalup tu in khensat zo hi.

²⁶Patang Samuel sia hong khangto a, Topa le mihingte mai ah maipha nga hi.

Eli ii Innkuan tungah Sonkholna

²⁷Topa kung pan kam hong kipuak khat son tu in kamsang khat Eli kungah hong pai hi: “Egypt kumpipa ii salin a om lai in, na taangpupi Aaron le innkuanpuite tungah keima ka kilaak hi.

²⁸Israel minam theampo ii sung pan biaknatau ah a seam tu, ngim namtui hal tu, thiampi ephod silh in kei thu hong dongh tu in ama ii innkuan ka teal hi. Tuaciangin biaknatau tungah a kihal sangaw biakpiakna te tel khat a tan thei natu thu ka pia hi.

²⁹Tua hi kasap ka mite tung pan, ka nget piakkhiatnate le sangaw biakpiaknate banghang duhopna taw en ni ziam? Eli awng, ka mihingte ii kei tungah hong piak sangaw biakpiakna te ii a khen pha bel teng taw na tate amate le amate a kithausak uh dong kivaaksak a, banghangin nang in kei sangin na tate upat vawt zaw ni ziam?

³⁰A bo sa hun sungah Keima, Israel te ii Topa Pathian in na innkuan le na bete in keima ii thiampi seam tawntung tu hi, ci in kamciam ka pia hi. Ahihang tu ahile kong cina pan, tuasia dei nawn ngawl khi hi. Tua sangin hong upat vawt te ka upat vawt tu a, hong simmaw te ka ngaimawk vawt tu hi.

³¹Ngai in, na baangkua sung le na be sungah tangval khangmoi teng ka that siat tu a, kuama kumhaam in a nungta a om nawn ngawl tu hun hong thetheng zo hi.



³²Nang in ngim na nga tu a, Israel midangte thupha ka piakte na eang tu hi, ahihang nang baangkua sungah kuama a khanhaam dong a nungta buatu hi.

³³Hi kale na suan na paalte khat sia ka nungtasak tu a, keima ii thiampi hong seam tu hi. Ahihang ama sia a mittaw tu a, lam etna mama a nei buatu hi, tuaciang na suan na paal theampo sia thi-ngamh in thi tu hi.

³⁴Na tapate nii Hophni le Phinehas te ni khat thu in hong thi khop ciang kong son teng tung siat tu hi ci in na he tu hi.

³⁵Vawt le ka oai theampo vawt a, kei tungah hong thumaan tu thiampi dang khat ka teal tu hi. Ama sia suan le paal ka pia tu a, tuate in ka teal kumpipa ii omna ah seam tu hi.

³⁶Na suan na paal sung pan a luhai lai te in tua thiampite kungah pai in sum le anneak tu ngen tu a, tuaciang a neak tu a nga natu in thiampite nasep a hu thei natu in ngen tu hi,” ci hi.

Samuel Khatna 3

Topa Samuel tungah Kilaak

¹Tua hun lai, patang Samuel in Eli ii lamlakna bang a Topa atu a sep lai in, Topa tung pan thu hong pai sia tam ngawl hi, tuaciang mang muna zongh tawm mama hi.

²Zan khat, a mit a taw cip dektak Eli sia ama ii khaan sungah mu hi;

³Samuel sia Thukham Thingkuang omna a thiangtho biakpiakna munah lum hi. Khua vak maa, meinn a kuan laitakin,

⁴Topa in Samuel sam hi. “Awi, Topa!” ci in

⁵Eli kungah tai a, “Kei nong sap sia, hi sung ma om khi hi,” ci hi. Ahihang Eli in zo a, “Kei nang hong sam bong, lum kik tan.” Tua ahikom Samuel sia a lupna zuan kik hi.

⁶⁻⁷Topa in Samuel sam kik hi. Patangpa in Topa ahi hunlam a he bua hi, banghangziam cile tua masia in Topa in ama a paupui ngei bua hi. Tua



ahikom ama tho in Eli kungah pai a, “Nong sap sia hi sung ma om khi hi,” ci hi. Ahihang Eli in, “Ka tapa awng, hong sam ngawl khi hi, lum kik tan,” ci hi.

⁸Topa in Samuel sia a thum veina sam hi; ama tho in, Eli kungah pai in, “Nong sap sia, hi sung ma om khi hi,” ci hi. Tuasia ciang Eli in patang a sam sia Topa ahi hunlam phawk hi.

⁹tua ahikom ama munah, “Lupna zuan kik tan; tuaciang ama in hong sam kik le hi bangin ci in, ‘Topa awng pau in, na naseampa in hong ngai khi hi,’ ci tan,” ci hi. Tua ahikom Samuel sia lupna zuan kik hi.

¹⁰Topa hong pai a tua munah dingin, a masa bangma in sam kik a, “Samuel! Samuel!” ci hi. Samuel in zo a, “Pau in, na naseampa in hong ngai khi hi,” ci hi.

¹¹Topa in ama munah, “Ni khat ni ciang Israel mite tungah a lau huai mama na khat ka vawt tu a, a za peuma in ingh tu hi.

¹²Tua ni in Eli innkuante tungah ka tawna theampo a kipat pan a tawp dong ka tungsak tu hi.

¹³Ama munah zongh son zo khi hi, ama baangkua sia tawntung daan pia tu khi hi, banghangziam cile a tapate kei hong langpan in kamsia pau uh hi. Eli in hite sia he nginge ahihang tho ngawl hi.

¹⁴Tua ahikom Eli ii baangkua tungah sangaw biakpiakna ahizong, piakkhiatna ahizong bangma in, hi a lipkhap huai mama mawna taw a kizom a piang tu te seamkhia zo ngawl tu hi ci in ciliap huai takin ka taangko hi.

¹⁵Samuel sia zing khuavak mateng lupna tungah om hi; tua zawkciang tho in, Topa ii inn kongkha hong hi. A mangmuna huvau Eli tungah a son tu lau hi.

¹⁶Eli in, “Samuel, ka tapa awng,” ci in sam hi. “Awi, Topa” ci in Samuel in zo hi.



¹⁷“Topa in bang hong son ziam?” ci in Eli in dongh hi. “Kei kung pan bangma seal heak in. Hong son theampo nong son buale Pathian in nasia takin daan hong pai tu hi,” ci hi.

¹⁸Tua ahikom Samuel in ama tungah na theampo son in, bangma kheet a nei bua hi. Eli in, “Ama sia Topa hi; pha asak bel bangin ama in vawt tu hi,” ci hi.

¹⁹Samuel hong khan ciang Topa sia ama taw omkhawm a, Samuel ii son teng a vekpi in tangtungsak hi.

²⁰Tua ahikom Israel ah mihingte theampo, a ngam ii mong lang pan monglang a omte in, Samuel sia Topa ii kamsang takpi hi ci in he uh hi.

²¹Topa in ama le ama sia Shiloh ah a kizom in hong kilaak tan a, tua munah ama sia Samuel tungah hong kilaak in, ama ii tungah pau hi. Tuaciang Samuel ii a pau ciang, Israel theampo in ngai uh hi.

Samuel Khatna 4

Thukham Thingkuang A kimatsakna

¹Tua hun laitakin Philistinete in Israel te sim tu in kikaikhawm uh a, tua ahikom Israel te in amate do tu in kuankhia uh hi. Israel te in a ngiaphual uh sia Ebenezer ah saat uh a, Philistinete in Aphek ah saat uh hi.

²Philistinete in simin, a nasia mama in a kido zawk uh ciang amate in Israel te zo a, ngalphual ah mihing tulli bang that uh hi.

³A thimong teng in ngiaphual hong thet kik uh ciangin a Israel lampuite in, “Banghangin Topa in Philistinete tuni in ei hong zosak ziam?Topa ei taw tonkhawmin ih ngalte khut pan hong hut natu in Shiloh ah pai in Topa Thukham Thingkuang va la tawng,” ci uh hi.

⁴Tua ahikom amate in kamtaite Shiloh ah paisak hi, tuaciang tha nei cherubim te ii tungah Vaanglianbelpa Topa kumpi bangin to in a omna Thukham Thingkuang sia lasak hi. Tuaciang Eli ii tapate nii Hophni le Phinehas te Thukham Thingkuang taw hong ton uh hi.



⁵Thukham Thingkuang hong thet ciangin Israel te nasia takin lungdamna taw in hong au uh a, leitangh liing liang hi.

⁶Philistinete in a au uh za uh a, “Hebrewte ngiaphual ah a auna ngai vun. A khiakna bang ziam?” ci uh hi. Topa ii Thukham Thingkuang sia Hebrewte ngiaphual ah hong theng ci in a heak uh ciang,

⁷amate lau uh a, “Pathian khat amate ngiaphual ah hong theng hi! Eite manhsa hi hing! Tu maa sia in hi bang peuma piang ngei ngawl hi!

⁸Hi a thahat pathiante tung pan ei akua in hong hunkhia tu ziam? Tua pathiante sia senneal ngam sungah Egyptte a monte ahi hi!

⁹Hang vun, Philistinete awng! Pasal bangin do vun, tua ahi bana pole amate ei ii sila ahi bangma, amate ii sila ih suak tu hi. Tua ahikom pasal bangin do vun!” kici uh hi.

¹⁰Philistinete in nasia takin do in, Israel te zo uh a, amate sia a inn uh ah tai uh hi. Nasia takin kithalupna om a, Israel ngalkapte tul sawmthum thi uh hi.

¹¹Pathian Thukham Thingkuang sia kimatsak a, Eli ii tate Hophni le Phinehas te ngeal thi khawm hi.

Eli ii Thina

¹²Benjamin minamte pasal khat ngalphual panin Shiloh ah hong tai a, tua ni ma in hong ni tut hi. A khuangaina lianpi a lak natu in a puansilhte hong eaukeak a, a lu tungah leivui a koi hi. .

¹³Thukham Thingkuang atu a thin ngim mama Eli sia lampi hui a tokhum tungah to in mun khat salh nginge hi. Pasal pa in khuathing bup ah thu thangsak a, a kuama theampo in lau in au uh hi.

¹⁴Eli in ngamlumna aw za in, dongh hi. “Hi ngamlumna aw sia bang thu ziam?” ci hi. Pasalpa in Eli kungah a thuson tu in pai vasat hi.

¹⁵(Eli sia tu in kum sawmkua le kum liat pha in a mittaw cip dek tak zo hi.)

¹⁶Passal pa in, “Ngal kisimna pan ka suakta a, hi munah tuni in kong tai hi,” ci hi. Eli in ama dongh a, “Bang thu piang ziam, ka tapa awng?” ci hi.



¹⁷Kamtai pa in, “Israel sia Philistinete mai pan taikeak hi; ei atu a nasia mama lelma hi. Tua banah na tapate nii Hophni le Phinehas sia kithatlum hi, tuaciang Pathian ii Thukham Thingkuang sia kiman hi,” ci hi.

¹⁸Pasal pa ii Thukham Thingkuang thu a son ciang, kongpi hui a tona ah Eli sia thalpu hi. Ama sia huai lei mama sii, thau mama sii ahikom a taaksukna in a ngawng tal in thi hi. Ama sia Israel ah kum sawmli lampui seam hi.

Phinehas ii Zi Meingongnu Thina

¹⁹Eli ii mo nu, Phinehas ii zi sia naungil om in nausua tu hun theng dektak hi. Pathian ii Thukham Thingkuang kiman a, a Topasal le a pasal thina thu a zaak zawkciang thakhat thu in a nau tun in ta nei hi.

²⁰Ama sia thi tu in kithoai ahikom numei ama a hu sia in, “Na thin liansak in! Tapa khat nei ni hi!” ci hi. Ahihang ama in nangaih ngawlin, a zo bua hi.

²¹Ama in a tapa min sia Ichabod sa hi, a khiakna sia, “Pathian ii vaangletna in Israel te nusia zo,” cina hi, Thukham Thingkuang kimatna le a Topasal le a pasal thina teng kilhtua in a phua ahi hi.

²²Ama in, “Pathian ii Vaangletna in Israel te nusia zo hi, banghangziam cile Pathian ii Thukham Thingkuang sia hong kimatsak hi,” ci hi.

Samuel Khatna 5

Philistinete sungah Thukham Thingkuang

¹Philistinete in Thukham Thingkuang a matsak zawkciang, Ebenezer panin amate khuapi Ashdod ah pua uh a,

²amate ii pathian Dagon ii biakinn sungah tumpui in, a milim hui ah koi uh hi.

³A zing ciang zingtuungin Ashdod mite in milim sia Thukham Thingkuang mai ah lutu in a liik mu uh hi. Tua ahikom amate in phongto in a omna ngei ah koi kik uh hi.

⁴A zing kik ciang zingtuungin amate in a milim sia Thukham Thingkuang mai ah a liikin mu kik uh hi. Tusia ciang a lu le a khutte nii taltan in kongkha hui ah liik a; a pumpi bekma kinusia hi.



⁵(Tua hu in tuni dong ma Dagon ii thiampite le Ashdod a biakpiakna a vawt a mite theampo in tua mun sia pai ngei po in pai ngawlin kan valian uh hi.).

⁶Topa in Ashdod a mihingte sia nasia takin daan pia a, lausak ngawp hi. Amate le kiim le paam a mite sia Topa in ngim pia a, meima pui veu veisak hi.

⁷Amate in tua thupiangte a mu uh ciang, “Israel te ii Pathian in ei le ih pathian Dagon daan hong pia hi. Thukham Thingkuang ei kungah ki omsak thei nawn ngawl tu hi,” ci uh hi.

⁸Tua ahikom amate in Philistine kumpi nga teng samin, “Israel te ii Pathian Thukham Thingkuang sia bang law tu hi ziam?” ci in dongh uh hi. Amate in, “Gath ah paipui tavun,” ci in zo uh hi; tua ahikom amate in Philistinete ii khuapi dang khat ahi Gath ah paipui uh hi.

⁹Ahihang tua sung a thet ciang Topa in tua khuapi sia daan ma pia a, patauna nasia takin om hi. Khuapi sungah mihing theampo, a huai a moi kibangin meima pui veisak hi.

¹⁰Tua ahikom amate in Thukham Thingkuang sia Ekron a kici Philistinete khuapi dang khat ah puak uh hi; ahihang tua sung a thet ciang, mihingte hong au uh hi, “Israel te Pathian ii Thukham Thingkuang sia ei theampo hong thatlum tu in hi sungah hong puak hi,” ci uh hi.

¹¹Tua ahikom Philistine kumpite theampo samin, “Israel te ii Thukham Thingkuang sia, ei le ih innkuanpuite hong thalup ngawl natu in, ama ii omna ngei ah puak kik tavun,” ci uh hi. Pathian in nasia takin daan pia ahikom khuapi sung bup ah patauna om hi.

¹²A thi ngawlte zongh meimapui vei ahikom mihingte in amate ii pathiante munah hu ngen uh hi.

Samuel Khatna 6

Thukham Thingkuang A heak kikna

¹Philistia ngam ah Thukham Thingkuang tha sali a om zawkciang,



²mihingte in thiampite le mitbum he te sam uh a, “Topa ii Thukham Thingkuang sia bang law tu hi ziam? Ama ii omna ngei ah puak kik tu ih hile, bang taw puak tu hi ziam?” ci in dongh uh hi.

³Amate in, “Israel te Pathian ii Thukham Thingkuang na heak kiksak tu uh le na mawna uh te hu in letsong khat taw na kikopsak uh kul tu hi. Thukham Thingkuang sia letsong khat ngawl taw heak kik thei ngawl tu hi. Tuabangin note na dam tu uh a, banghangin ama in no daan hong pia tawntung ziam ci in na he tu uh hi,” ci uh hi.

⁴“Bang letsong pia tu hi ziam?” ci in mite in dongh uh hi. Amate in zokik a, “Kham taw kivawt meimapui lim nga le Philistine kumpi khat sim atu kham sanchiim nga hi tu hi. Ngimna lianpi sia a kibangin no tung le kumpi nga teng tungah hong tung hi.

⁵Meima pui le sanchiim, na ngam buppi ah ngim hong plate ii lim te vawt in, Israel te Pathian sia upat vawt tu nu hi. Tua hile ama in noma, na pathian te uh le na leitangh daan hong piakna tawp tha tu hi.

⁶Egypt kumpipa le a mite bangin banghangin na thin uh sahsak tu nu ziam? Israel mite ii Egypt a nusiak dong Pathian in Egyptte a mawmaw bangin a vawt sia ciamtee vun.

⁷Tua ahikom leang thak khat vawt vun a, kanhak a kibal ngei ngawl khuipui nii la in, leang ah thua vun, a khuinote sia khuibuk sungah beng kik vun.

⁸Topa ii Thukham Thingkuang sia la in, leang tungah suan vun, tuaciang na mawna uh hu in letsong na piak tu uh, kham limnote sia thingkuang dang khat sungah a kungah koi vun. A pai natu lampi ah ama le ama a pai natu a leang sia kipansak vun.

⁹Tua zawkciang en vun, Beth Shemesh sang a zuan le Israel Pathian in, hi a kiitak huai tuasiatna hong puak hi ci in ih he tu hi. Tuabang ahibuale, ngimnate sia ama ii hong puak hi ngawl a, a hun taw kizui in a piang hi, ci in ih he tu hi,” ci uh hi.



¹⁰Amate in a kisawl bangin ngamta uh hi: amate in khuipui nii la in leang ah thua uh a, khuinote sia khuibuk sungah khumcip uh hi.

¹¹Amate in Thukham Thingkuang sia leang tungah, meimapui le sanchiim limte kikoina thingkuang taw a koi khawm uh hi.

¹²Khuipuite in Beth Shemesh sang zuan tu in dingkhia a, tangtan in pai a, lam a pial bua hi. Amate sia a pai kawmin haam uh hi. Philistine kumpipa nga teng in Beth Shemesh ngamngi dong zui uh hi.

¹³Beth Shemesh khua mite, kuam sungah zungtaang at in a om laitak thakhat thu in a etto uh le Thukham Thingkuang mu uh hi. Amate in a mu ciangin lungdam leilam uh hi.

¹⁴Beth Shemesh khua ah a teang Joshua a kici pasal khat ii lo sungah a leang hong pai a, suangpi khat ii hui ah tawlnga hi. Mihingte in leang sia sem tham in, khuipuite ngo a, Topa tungah meihal biakpiakna in nei uh hi.

¹⁵Levite in Topa ii Thukham Thingkuang le kham limnote a kikoi thingkuang sia laamto in, suangpi lian sia ii tungah koi uh hi. Tua zawkciang Beth Shemesh khua mite in meihal biakpiakna le a dang sangaw biakpiakna te Topa tungah vawt uh hi.

¹⁶Philistine kumpi nga teng in hisia en uh a, tua zawkciang tua ni ma in Ekron ah cia kik uh hi.

¹⁷Philistine mite in a khuapi ngate Ashdod, Gaza, Ashkelon, Gath, le Ekronte atu in khua khat ah khat tek a kham meima pui nga sia Topa tungah mawmai natu in pia uh hi.

¹⁸Philistine kumpi ngate ii uk ahi a ki uum khuapite hi kale, a ki uum ngawl khua note hi kale khuapi sim atu in kham sanchiim khat tek zongh pia sii hi. Topa ii Thukham Thingkuang koina Beth Shemesh khua mi Joshua ii lo sungah a om suangtumpui sia tua lai ah a piang thu te heak natu in tuni dongin omlai hi.



¹⁹Thukham Thingkuang sung a et hu in Beth Shemesh khua miteTopa in mihing sawmsali thatlum hi. Tuaciang Topa in tuabangin nasia tak thalupna a thuaksak hu in a mite tau uh hi.

Kiriath Jearim ah Thukham Thingkuang

²⁰Tua ahikom Beth Shemesh mite in, “Hi a thiangtho Pathian, Topamai ah akua peuma dingtang zo tu hi ziam? Ei taw a kikhuala thei natu in ama koi sungah puak tu hi ziam?” ci uh hi.

²¹Amate in kamtaite paisak a, Kiriath Jearimte munah, “Philistine te in TopaThukham Thingkuang hong heaksak kik zo hi. Hong paisuk tavun a la vun,” ci uh hi.

Samuel Khatna 7

¹Tua ahikom Kiriath Jearim mite in Topa Thukham Thingkuang sia la in, mualtung a teang Abinadab a kici pasal khat ii inn ah tun uh hi. Amate in a tapa Eleazar sia a keam tu in thiansua uh hi.

Samuel in Israel Uk

²Topa ii Thukham Thingkuang sia Kiriath Jearim ah khuangeipi om a, kum kul taang om hi. Hisia hun sung tawntung Israel te theampo in Topa ii tungah hu ngen in au uh hi.

³Samuel in Israel mite munah, “Na lungtang theampo uh taw Topasangah na kihei kik tu uh ahile, ngamdang pathiante le Astarte doainu ii limte na vawk siat uh kul tu hi. Topa tungah noma le noma kipum aapna uh a vekpi in nei vun a, ama bek bia vun, tuaciang ama in Philistinete ii khut sung pan hong hunkhia tu hi,” ci hi.

⁴Tua ahikom Israel mite in Baal le Astarte ii milim theampo vawkin Topabek bia uh hi.

⁵Tua zawkciang Samuel in Israel te theampo Mizpah ah kisitua tu in sam a, hi bangin ci hi, “Tua munah no atu in Topa tungah thu ka ngen tu hi.”

⁶Tua ahikom amate theampo Mizpah ah kikhawm uh hi. Amate in tui tawm toai in, Topa tungah piakkhiatna in tua tui sung uh a, nikhat bup an tang uh



hi. Amate in, “Topa tungah maw zo khu hi,” ci uh hi. (Khat le khat kinop mawknate Samuel ii thu a khensakna mun sia Mizpah ahi hi.)

⁷Israete Mizpah ah kikhawm hi ci in Philistinete in a zaak zawk uh ciang a kumpipa nga teng in a mite taw amate sim tu in kuan uh hi. Israel te in tua thu za in lau uh a,

⁸tuaciang Samuel munah, “Philistinete kung pan hong hutkhiat natu Topa ih Pathian tungah thu ngen tan in,” ci uh hi.

⁹Samuel in tuuno khat la in, Topa tungah meihal biakpiakna in zangh hi. Tua zawkciang ama in Topa ii Israel te a hu natu ngen a, tuaciang Topa in a thungetna zo hi.

¹⁰Samuel in sangaw biakpiakna a vawt laitakin, Philistinete in sim tu in mai hong nawt uh hi; ahizong tuasia hun laitakin Topa in vantung panin amate ii tungah vanto keaksak hi. Amate sia a lung uh mang cip a, patau in tai uh hi.

¹¹Israel te in Mizpah panin kuankhia uh a Bethcar dong, Philistinete zuizen in lampi ah thathat uh hi.

¹²Tua zawkciang Samuel in suangtum khat la in Mizpah le Shen kilaklaw ah phut a, “Topa in lam tawntung hong hu hi” ci in a min sia “Hu na Suangpi” (*Ebenezer*) saa hi.

¹³Tua hi a Philistinete in lel in, Samuel ii nuntak lai teng Israel ngam a sim tu Topa in khaam hi.

¹⁴Philistinete ii a laak khuapite Ekron pan Gath dong sia Israel te tungah kipia kik a, Israel te in a ngam a vekpi in nga kik hi. Tuaciang Israel te le Canaan mite kilaklaw zongh ah ngal kilemna om hi.

¹⁵Samuel in a nuntak lai teng Israel te uk hi.

¹⁶Kum simin ama in Bethel, Gilgal, le Mizpah ah paikot in hi munte ah kilem mawkna te thu khensak hi.

¹⁷Tua zawkciang ama in Ramah ah cia kik in, tua munah thukhen maang seam hi. Ramah ah ama in Topa atu biaknatau khat saa hi.



Samuel Khatna 8

Mihingte in Kumpipa khat Ngen

¹Samuel hong huai ciangin, ama in a tapate Israel te ii thukhen in koi hi.

²A u zaw sia Joel kici a, a nau zaw sia Abijah kici hi; amate sia Beersheba ah thukhen seam hi.

³Ahihang amate in a pa ii lamlakna bangin a seam bua uh hi; amate in sum vawt tu bek kin uh ahikom, sumnguk saangin thu tang takin a khen bua uh hi.

⁴Tuasia ciang Israel lampuite hong kikhawmtua uh a, Ramah a om Samuel kungah pai in,

⁵hi bang ci hi, “En in, nang sia haam vaial zo a, tuaciang na tate sia nang ii lamlak bang hong zui ngawl hi. Tua ahikom, ko hong uk tu kumpipa khat, ngamdang te ii nei bangin, za hong piaksak tan.”

⁶Samuel sia amate ii kumpipa khat a ngetna huvau a lungkim ngawl hi; tua ahikom ama in Topa tungah thungen hi,

⁷tuaciang Topa in ci hi, “Mihingte ii nang tungah hong son theampo ngai in. Hong nial uh sia nang hi ngawl ni hi; Keima sia a kumpipa ka hina pan hong nial hi.

⁸Egypt panin amate ka pusua pui pan kipan, amate in kei kung panin kiheak in pathian dangte bia uh hi; kei tungah hong vawt tawntung teng tu in nang tungah hong vawt hi.

⁹Tua ahikom, amate ii thu ngai in a, ahizong amate ii kumpipate in amate bangbangin vawtsia tu ziam ci in a kidop khol thei tu khoh takin son in.”

¹⁰Kumpipa khat a ngen mihingte tungah Samuel in Topa ii ama tungah a son teng son siat hi.

¹¹“Hisia in na kumpipate ii no hong vawt tu dan ahi hi. Ama in na tapate uh sia ngalkap suaksak tu a, pawlkhat sia a ngalleang te uksak tu hi, pawlkhat sia siphu ngalkap suaksak tu a, tuaciang pawlkhat sia ngalleangte ii mai ah taisak tu hi.



¹²Ama in pawlkhat te sia mihing tulkhat ukin koi tu a, pawlkhat sia mihing sawmnga uk in koi tu hi. Na tapate in ama ii lo a thawsak kul tu a, a an laaksakin, a ngalhiamte le ngalleang sungah a kizangh vanhte vawtsak tu hi.

¹³Na tanute uh sia ama ii sathau namtui vawtin zangh tu a, a anhuan, a muh em seamsak tu hi.

¹⁴Ama in na lo uh a phabel te la in, na sapit huan uh le na olive kungte la in, ama ii uliante pia tu hi.

¹⁵Na lo an uh sawm a khat le na sapit uh sawm a khat sia ama ii a kumpi innsung za neite le ulian dangte hawmsak tu hi.

¹⁶Ama in na naseamte le na khui pha bel te le laate ama ii na seam tu in la tu hi.

¹⁷Na tuu honte sung pan sawm a khat ama in la tu hi. Tuaciang noma mama zongh ama ii silate na suak tu uh hi.

¹⁸Tua hun hong thet ciang, noma ii teal sa na kumpipa tungtaang ah nasia takin na phun na mau tu uh hi. Ahihang Topa in na phun na mauna uhte hong ngai ngawl tu hi,” ci in Samuel in son thiang hi.

¹⁹Mipite in Samuel sia a nadon bua uh a, “Hi bo!

²⁰ngamdangte taw ka kiban natu in ko zongh kumpipa khat dei khu hi, ko hong uk tu le ka ngal uh hong simsak hong lampui tu dei khu hi,” ci uh hi.

²¹Samuel in amate ii son theampo ngai in, tua zawkciang pai a, Topatungah thu puak hi.

²²Topa in zo a, “Amate ii dei bangin vawt in a, kumpipa khat amate pia tan.” Tua zawkciang Samuel in Israel mite theampo a inn uh ah cia kikin sawl hi.

Samuel Khatna 9

Saul sia Samuel taw Kimu

¹Benjamin ii suan Kish a kici mihau, thu nei khat om hi; ama sia Abiel ta, Zeror ii tu, Becorath ii baangkua sung pan hi a, Aphiah ii phung khen khat sung mi ahi hi.



²Ama in Saul a kici tapa, mealpha khang tungto khat nei hi. Saul sia Israel bup sungah ngual sangin pi khat bang saang zaw a, a meal zongh phazaw hi.

³Kish ii laate pawlkhat vakthap a, tua ahikom ama in Saul munah, “Naseamte khat kengin, ih laa va zong tan,” ci hi.

⁴Amate in Ephraim mualtung ngam teng le Shalishah ngam khawk khat teng zong uh a, a mu bua uh hi; tua ahikom amate in Shalishah ngam khawk kantan in pai a, zong ahihang a laa om ngawl hi; tua zawkciang Benjamin ngam zongh kantan ahihang a mu peang bua uh hi.

⁵Zuph ngamkhen sung a thet uh ciangin, Saul in a naseampa munah, “Cia tawng, tua ahibuale ka pa sia laate huvau thintoi nawn ngawlin eima atu thin ngim tu hi,” ci hi.

⁶A naseampa in, “Na om zii in! Hi khuapi sungah mi thiangtho khat om a, ngual in nasia takin thasia hi, banghangziam cile ama ii son theampo sia tangtung hi. Ama kungah pai tawng, ama in laate koisungah kimu tu ci in hong son thei tha tu hi,” ci in zo hi.

⁷“Ama ii kungah pai leang ama bang pia natu hi ziam?” Saul in ci hi. “Ih vanh sungah ih an la taang nawn ngawl, ama ih piak tu bangma ih nei bua hi, hi ngawl ziam?” ci hi.

⁸A naseam pa in zo a, “Ngun tanghno khat nei khi hi, tuasia ama pia thei khi hi, tua hile koi sungah mu tu hi ziam ci in hong son tu hi,” ci hi.

⁹⁻¹¹Saul in zo a, “Na ngaisutna pha hi! Pai tawng.” ci hi. Tua ahikom amate khuapi sungah, mi thiangtho pa teenna ah pai uh hi. Amate mualtungah a kaa tato laitakin, tuitoai tu ngaknu pawlkhat taw kisi uh hi. Ngaknute dongh a, “A mukhol theipa khua sungah a om ziam?” ci uh hi.

(Tua hun lai in kamsangte sia a mukhol thei pa kici a, khat po in Pathian munah thu a dok nop ciang, “A mukhol thei pa kungah pai tawng,” ci uh hi.)

¹²⁻¹³Ngaknute in, “Om hi, ama sia noma maihiat ah pai hi. Manlang leute pha lai tu nu hi. Khuasung na tum uh po ciang ama mu tu nu hi. Ama sia khua sungah tuni in hong theng hi, banghangziam cile mihingte in mualtung



biaknatau ah sangaw biakpiakna nei nuam hi. Tua munah a kisam mite in ama thet mateng an ne ngawl tu hi, banghangziam cile ama in piakkhiatna te thupha a piak phot kul hi. Tu laitakin pai leute mual tungah an ne tu in a kaato maa in kimu thei tu nu hi,” ci uh hi.

¹⁴Tua ahikom Saul le a naseam pa sia khuapi sangah pai a, a sung a tum uh ciang biakpiakna munah hong papai Samuel mu uh hi.

¹⁵Tu in Topa in a zeini in Samuel tungah,

¹⁶“Zing ciang hi sia hun in Benjamin namte khat na kungah hong puak tu khi hi, ka mi Israel te uk tu in sathau na noai in, tuaciang ama in amate sia Philistinete khutsung pan hunkhia tu hi. Ka mite ii thuakna ka mu zo a, hu ngenin hong auna zongh ka za zo hi,” ci hi.

¹⁷Samuel in Saul a mu ciang, Topa in ama munah, “Hisia pa sia kong son sa sia hi. Ama in ka mite uk tu hi,” ci hi.

¹⁸Tuasia ciang Saul sia kongkha hui ah a om Samuel ii kungah pai in, “A mu khol thei pa koi sungah teang ziam, hong son tan,” ci in dongh hi.

¹⁹Samuel in, “Keima a mu khol theipa khi hi. Biakpiakna munah kei mai ah pai vun. No nii sia tuni in kei taw an ne khawm tu nu hi. Zing ciang zingsang in nong dok uh theampo kong son tu a, tua zawkciang na pai natu po ah kong paisak tu hi.

²⁰Tu nung ni thum lai in a bo laate ahile thinngim heak in; amate kimu zo hi. Ahizong, Israel mite ii a dei a lungngul mama sia akua ziam? Nangma ni hi, nang le na pa ii innkuante ahi hi,” ci hi.

²¹Saul in zo a, “Kei sia, Israel ngam sungah nam no bel Benjamin suan ka hi hi, tuaciang ka baangkua sia ka nam uh sung pan a thupi ngawl bel ahi hi. Tua ahi ciang a banghangin tuabangin thu hong son ni ziam?” ci hi.

²²Tua zawkciang Samuel in Saul le a naseampa sia inn khaan lian khat sungah tumpui a, leangna sawmthum khawng ii tona sabuai lu ah tosak hi.



²³Samuel in an huan pa munah, sabak a tuamin koi in, ci a kong piak sia hong la tan,” ci hi.

²⁴Tua ahikom anhuanpa in a pheisa a kiteal bak khat hong la a, Saul ii mai ah hong lui hi. Samuel in, “En in! Hi sungah sabak nang atu a kikoi tuam sia om hi. Ne in. Mihing ka samte taw tu hunin na neak tu in kong khealsiasak hi,” ci hi. Tuabangin tua ni in, Saul in Samuel taw an ne khawm hi.

²⁵Biakpiakna mun panin khuapi sungah a tuaksuk zawk uh ciang, amate in innkhum tungah Saul atu lupna vawtsak uh a,

²⁶tuaciang ama tua munah lum hi.

Samuel in Saul Ngam Ukpa Sathau noai

Khuavak ciang Samuel in innkhum tungah Saul sam to in, “Tho in, na pai natu po ah hong paisak tu khi hi,” ci hi. Saul tho in Samuel taw lampi liante ah paikhawm hi.

²⁷Khuapi mong a thet uh ciang, Samuel in Saul munah, “Naseampa ei mai ah a pai natu sawl in,” ci hi. Naseampa in amate nusia a, Samuel in, “Tawmvei no sung hi sungah na om zii in, Pathian ii kampauna kong son tu hi,” ci hi.

Samuel Khatna 10

¹Tua zawkciang Samuel in olive thau thawl khat la a, Saul ii lung tungah buakin ama a nap zawkciang, “Topa in a mi Israel te uk tu in nang sathau hong noai hi. Ama ii mite nangma in uk in, a ngalte theampo kung panin na hung tu hi. Tuaciang Topa ii nang hong teal takpina sia hi bangin hong kilak tu hi:

²Tuni kei nong nusiati ciang Benjamin ngam Zelzah ah Rachel ii thaah ah mihing nii taw na kisi tu hi. Amate in laa na bosua uh te kimu kik zo a, na pa sia tuate atu thin ngim nawn ngawlin nangma atu thin ngim a, hi bangin dok sasaan hi, “Ka tapa bang law tu khi ziam?” hong ci tu hi.

³Tabor ah biakna thingkung sia na thet dong na papai tu a, tua munah mihing thum, Bethel ah sangaw biakpiakna pia tu in a paite taw na kisi tu hi.



Tuate khat in kealngual thum hong kai tu a, khat in anluum luum thum hong pua tu a, khat in savun thawl dimin zu hong pua tu hi.

⁴Amate in nang hong paupui tu a, anluum luum nii hong pia tu hi; tuate na saang tu hi.

⁵Tuaciang, Philistinete ii ngiaphual saatna khat a om, Gibeah ah Pathian ii Mual ah na pai tu hi. Khuapi sung tumna ah kamsang pawlkhat mualtung biaknatau pan tengtong, khuang, tamngai le liamlo te tumin hong tuaksuk te taw na kisi tu uh hi. Amate laam in a au tu uh hi.

⁶Thakhat thu in Topa ii thaa in nang hong uk tu a, amate ii biakna lap le auna te na pawm tu a, mihing tuampui khat na suak tu hi.

⁷Hite hong pian ciangin Pathian ii vawt tu a hong lampui pawpo vawt in.

⁸Keima mai Gilgal ah na pai tu a, tua munah kei taw ih kimu tu hi, tuaciang meihal biakpiakna le kipawlkhop biakpiakna ih pia tu hi. Keima hong pai a, na sep na vawt tu hong son tu in kong thet dong ni sali ngak tu nu hi,” ci hi.

⁹Samuel nusia tu in Saul a kiheak ciang, Pathian in Saul sia pianzia thak khat pia hi. Tuaciang Samuel ii son theampo tua ni in tangtung hi.

¹⁰Saul le a naseampa Gibeah hong thet uh ciang, kamsang pawlkhat in ama taw kisi hi. Thakhat thu in Pathian thaa in ama uk a, tuaciang ama in tuate ii lawp ngawpin a lapna le a auna pawm hi.

¹¹Nidang in ama a he ngeite in hi bangin a mu uh ciang amate khat le khat kidongh a, “Kish ii tapa bang tawk ziam? Saul in kamsang khat suak zo ziam?” ci uh hi.

¹²Tua munah a teang pasal khat in, “Hi kamsang dangte zongh — amate ii pate akua bangte hi ci in na he uh ziam?” Hi sia “Saul ngangawn kamsang khat suak zo ziam?” ci paunak ii kipatna ahi hi.

¹³Saul in lawp ngawpin a lap le a au teng a man zawkciang mualtung tau ah paito hi.



¹⁴Saul ii pano in ama le a naseam pa mu in, “Koi sung theng nu ziam?” ci in dongh hi. “Laa zong khu hi,” ci in Saul in zo hi. “Ka mu ngawl uh ciang Samuel taw kimu tu in pai khu hi,” ci uh hi.

¹⁵“Tuaciang ama in bang hong ci ziam?” Saul pano in dongh hi.

¹⁶“Ama in ngannote sia kimu zo hi ci in hong son hi,” ci in zo hi— ahihang ama ii kumpipa huvau Samuel ii pauna teng a pano tungah a son bua hi.

Saul Kumpipa hi ci in Kithangsak

¹⁷Samuel in Mizpah ah biak kikhop khat sam a,

¹⁸tuaciang amate tungah, “Topa Israel te ii Pathian in, ‘Egypt ngam panin kong pusua pui a, Egyptte le midang no hong nengniamte kung panin kong hunkhia hi.

¹⁹Keima sia na Pathian ka hi a, na ngim nga theampo le na haksatna theampo panin hong suatak pa ka hi hi, ahihang tuni in nong nial uh a, kumpipa khat piak tu in nong ngen uh hi. Pha keak hi, tua le, Topa mai ah a nam le a be a phung zui in hong kikhawm tavun,’ ” ci in son hi.

²⁰Tuaciang Samuel in nam simin mai ah paisak a, Topa in Benjamin nam teal hi.

²¹Tuaciang Samuel in Benjamin namte sung pan a innkuan tek mai ah a paisak ciang Matri ii baangkuate kiteal hi. Matri ii baangkua pan pasalte a mai ah hong pai a, tuaciang Kish ii tapa Saul sia kiteal hi. Amate in ama zong uh a, a mu zawk ngawl ciang,

²²amate in Topa dongh uh hi. “A dang khat ma a om lai ziam?” ci uh hi. Topa in zo a, “Saul sia zia sungah om hi, vanh honte nungah buu hi,” ci hi.

²³Tua ahikom amate tai in Saul sia mite kungah hong paipui uh hi, tuaciang ama sia midang khat pawpo sangin pi khat saangzaw hi ci in mu uh hi.

²⁴Samuel in mipite munah, “Hi munah Topa ii teal sia om hi. Ei sungah ama bang kuama om ngawl hi,” ci hi. Mipite au siat uh a, “Kumpipa a khan sau taken,” ci uh hi.



²⁵Samuel in kumpipa khat ii thu neina te le a tavuante mipite tungah son thiingin, laibu sungah a at zawkciang a thiangtho doituamna ah koi hi. Tua zawkciang ama in a kuama theampo inn tek ah ciasak hi.

²⁶Saul zongh Gibeah a inn ah cia hi. Pathian ii a lungtang a thuthaak pasal thahat pawlkhat in ama tonpui hi.

²⁷Ahihang mihing mannung ngawl pawlkhat in, “Banghangin hi sia pa in ei noptuam natu hong vawt thei tu ziam?” ci uh hi. Saul sia simmaw in letsong bangma a puak bua uh hi.

Samuel Khatna 11

Saul in Ammonte Zothal

¹Tha khat bang zawkciang Ammon Kumpipa Nahash in Gilead ngamkhen sung, Jabesh sangah a ngalkapte kuanpui in tua khuapi uumci hi. Jabesh mite in Nahash munah, “Ko taw kiciamna hong vawt tan a, tuaciang ka ukpa tu in kong saang tu uh hi,” ci uh hi.

²Nahash ii zokikna pan, “Thu khat na lungkim uh le no taw kiciamna khat vawt ma tawng: Israel mibup tung ah maizumna a pian natu in khat sim ii mittang ziatsang hong khelsak tu khi hi,” ci hi.

³Jabesh lampuite in, “Israel ngambup ah kamtai ka paisak natu uh in ni sali hun hong pia tan. Kuama in hong hu tuak buale kong tum tu uh hi,” ci uh hi.

⁴Kamtaite Saul ii tenna Gibeah hong theng uh a, a thu a kison ciang mihingte sia thinkiamin hong kap uh hi.

⁵Saul sia a khuitalte taw lo panin hong cia zawk hiat bek hi a, “Bangtat nu ziam? Banghang mihingte theampo kap ziam?” ci in dongh hi. Amate in ma ii munah Jabesh pan a, kamtaite ii thupuak teng son uh hi.

⁶Saul in hi thu a zaak ciang, Pathian ii thaa in ama uk a, a thin sosakkeak hi.

⁷Ama in khuital nii la in, a bak in a at zawkciang, Israel ngam bup ah kamtai te sabak kengin paisak a, kidop natu thu puaksak hi: “Ngal kisimna sungah Saul le Samuel ii nung a zui ngawl peuma a khuital tek uh tuabangma in



kivawtsak tu hi,” ci hi. Israel mite in Topa in bang po hong law tha bana him ci in lau uh a, khat zongh kikhe ngawlin hong paikhawm tek uh hi.

⁸Saul in amate Bezak ah khawmtua hi; Israel pan 300,000 le Judah pan 30,000 pha uh hi.

⁹Amate in Jabesh panin kamtai te munah, “Na mipuite munah son vun, zing ciang sun maa in amate kisuatak tu hi.” Jabesh a mite in a thupuak uh a saan uh ciangin amate sia lungdam leilam uh a,

¹⁰tuaciang Nahash munah, “Zing ciangin hong tum tu khu hi, nong law nop po hong law tan,” ci uh hi.

¹¹A khuavak ni zingtuung in Saul in a mite sia pawl thum in khen a, Ammonte ngiaphual ah tum ngawpin Ammonte thatlum uh hi. Ni sun hun in amate thatlum uh hi. A suakta sun te amate nguak tekin tai thaap uh hi.

¹²Tuasia ciang Israel mite in Samuel munah, “Saul sia ih kumpi seamsak ngawl tu hi a ci te koi sungah om siat ziam? Ko tungah hong aap tavun, thatlum siat tu khu hi!” ci hi.

¹³Ahihang Saul in, “Tuni in kuama kithisak ngawl tu hi, banghangziam cile tuni in Topa in Israel suatak hi,” ci hi.

¹⁴Tuaciang Samuel in amate munah, “Ih vekpi in Gilgal ah pai in, Saul sia ih kumpipa hi ci in khat vei taangko tawng,” ci hi.

¹⁵Tua ahikom amate a vekpi in Gilgal ah pai uh a, tua sung mun thiangthona ah Saul sia kumpipa hi ci in thangsak uh hi. Amate in kipawlkhop biakpiakna pia uh a, tuaciang Saul le Israek mite theampo in tua thu hangin poai khaam uh hi.

Samuel Khatna 12

Samuel ii Kikhen Thu Vaithakna

¹Tuaciang Samuel in Israel mite munah, “Nong nget uh theampo hong vawtsak zo khi hi. Kumpipa khat no hong uk tu in hong pia zo khi hi,



²tu in no lam hong pui tu ama nei zo nu hi. Kei ka hi le huai in ka puak kaang zo hi, tuaciang ka tate sia no taw omkhawm nu hi. Ka khangno lai pan kipan tu dong na lampui uh hong seam zo khi hi.

³Hi sungah om khi hi. Ka sep ka vawt khat po ahi ngawl a om leTopa le kumpipa a teal pa mai ah maw hong suan tavun. Mihing khat po ii khui ahizong, laa ahizong kong laak thongsak ngei ziam? Akua khat po hong theam ngei ziam? Ahibuale kong nengniam ngei ziam? Khat po tung pan sumnguk kong saang ngei ziam? Hi bangin ka ngamta ngei le ka laak babang hong piak kik tu khi hi,” ci hi.

⁴Mipite in zo a, “Hong theamin hong nengniam ngei ngawl ni hi. Kuama tung pan bangma hong la ngei ngawl ni hi,” ci uh hi.

⁵Samuel ii a zokikna pan, “Kei a sit baang ngawl het in nong mu uh sia Topa le ama ii teal sa kumpipa in tetti hong pang taken,” ci hi. “Hi ma hen, Topa sia ka tetti uh hi,” amate in ci uh hi.

⁶Samuel in zom suak a, “Topa sia Moses le Aaron teal khia a, Egypt pan na taangpupite uh hong pusuapui sia hi.

⁷Tu in na omna tek ah ding vun, Topa mai ah maw kong sot natu in na phaw kik tu uh thu kong son masa tu hi, Topa ii na taangpupite uh a hutkhiat natu nasep lianpi hong sepna thu no kong phawksak tu a, Topa mai ah note maw kong suan tu hi.

⁸Jacob le a innkuanpuite Egypt ah a pai uh ciang Egyptte in na nengniam uh a, na taangpupite uh in Topamunah hu ngenin au uh hi, tuaciang ama in Moses le Aaron paisak a, amate in Egypt ngam panin amate pusua in, hi ngamah teangsak hi.

⁹Ahihang a mite in Topa a Pathian uh mangil a, tuasia ciang ama in Philistine te le Moab kumpipa le Hazor khuapi a teang ngalkap hon ukpi pa Sisera te in na taangpupite uh simsak in, zosak hi.

¹⁰Tua zawkciang amate in Topa tungah au in hu ngen uh a, hi bangin ci uh hi, ‘Ko sia maw zo khu hi, banghangziam cile nang kung panin kiheak khu



hi, Topa, tuaciang Baal le Astarte te ii milim ka bia uh hi. Ka ngalte uh kung pan hong suatak tan, tuasia ciang nangma kong bia tu uh hi!’

¹¹Tuaciang, Topa in Gideon paisak, a zawkciang Barak, tua zawkciang Jephthah, a khak bel in kei hong sawl hi. Ko khat ii sim in na ngalte khut sung pan no kong suatak uh hi, tuaciangin ngam muang takin na teang uh hi.

¹²Ahihang Ammonte kumpipa Nahash in no hong sim tu in a kithoai laitakin, Topa sia na Kumpipa ahina pan na nilkhia uh hi, tuaciang kei munah, “Ko hong uk tu kumpipa khat dei khu hi,” nong ci uh hi.

¹³“Tu in hi sungah na teal sa na kumpipa om hi; na nget uh sia ama hi a, tuaciang Topa in ama sia no hong pia hi.

¹⁴Topa na Pathian atu sepsak in, a thu ngai in, a thupiak na ni uh a, no le na kumpipa in ama nung na zui uh le na theampo a dik a pha in hong piang tu hi.

¹⁵Ahihang Topa ii pau na ngai bua uh a, a thupiakte na ni bua uh le ama sia no le na kumpipa hong langpan tu hi.

¹⁶Tua ahikom na dinmun uh kholet vun, tua hile Topa ii sep tu na lianpite na mu tu uh hi.

¹⁷Tu hun sia khuakhal laitak hi kana ngawl ziam? Ahihang thu kong ngen tu a, Topa in vanto le ngua hong puak tu hi. Hi bangin hong pian ciang kumpipa khat na nget thong uh sia Topa tungah nasia takin maw nu hi ci in na kiphawk tu uh hi,” ci hi.

¹⁸Tua ahikom Samuel in thu ngen a, tua ni ma in Topa in vanto le ngua paisak hi. Tuaciang mipi theampo in Topa le Samuel kiita uh hi,

¹⁹tuaciang Samuel tungah, “Nong hesuakna in, ka thi ngawl natuTopa na Pathian munah thu hong ngetsak tan. Tu in mawna dangte tungsia ah kumpipa khat ka nget uh maw ka hi uh hunlam ka phawk uh hi,” ci uh hi.



²⁰Samuel in, “Lau heak vun, siatna khaatna taza in vawt na hi uh hangin, Topa kung panin kiheak heak vun, ahihang na lungtang theampo uh taw ama na sepsak vun.

²¹A maan ngawl pathian te zuan heak vun; amate in hong hu thei ngawlin, hong hunkhia thei ngawl hi, banghangziam cile amate sia a tak hi ngawl hi.

²²Topa in ciliap huai takin kamciamna vawt zo a, ama in no hong nusia ngawl tu hi, banghangziam cile ama in no sia ama ii mite in hong hisak tu a khensat zo hi.

²³Kei ka hile note atu thungetsak nawn ngawl mawna ka vawt tu sia Topa in khaam hi. Tua hi ngawl zaw in, no atu a pha le a maan thute kong hil tu hi.

²⁴Topa thu ni vun a, thumaan takin na lungtang theampo uh taw ama na sepsak vun. Na lianpi no atu hong sepsak te ciamtee vun.

²⁵Ahihang mawna na vavawt lai uh le no le na kumpipa uh sia hong kisia tu hi.

Samuel Khatna 13

Philistinete taw Ngalkisimna

¹Taang laibu sungah a khan no 1. om ngawl hi

²Saul in pasal tulthum teal a, ama in tulnii sia Michmash ah ama taw a om tu le Bethel mualtung ngam atu in koi a, tulkhat sia a tapa Jonathan taw Benjaminte ngam khen Gibeah ah puak hi. Tua ngawl teng Saul in a inn tek ah ciasak hi.

³Jonathan in Philistinete ngalkap ukpa Geba ah that hi, tuaciang Philistine theampo in tua thu za uh hi. Tua zawkciang Saul in kamtai paisak a, ngambup sungah Hebrew mi a om theampo ngal sim tu samna in lemle tumsak kawkoai hi.

⁴Saul in Philistinete ngalkap ukpa that a, Israel mite theampo sia thu kizasak a, tuaciang Philistinete in amate ensan hi, ci in Israel theampo tungah thu kison hi. Tua ahikom mite in Gilgal ah Saul pawm tu in a kismh bangin pai uh hi.



⁵Philistinete in Israel te sim tu in kikhawmtua uh hi; amate in ngalleang tul sawmthum nei uh a, siphu ngalkap tulluk, lei ngalkap sia tuipi hui a sen za in tam hi. Amate in Bethaven ii nisuana sang Michmash ah kuanin, tua sungah ngiaphual saat uh hi.

⁶Tua zawkciang amate in Israel te nasia takin sim a, Israel te a cimaw dinmunah koi hi. Israel mi pawlkhatte sia suanghawng, leihawng le suangpi kawm, leidum le tuikhuk sungah buu uh a;

⁷a dangte Jordan ngun kan in, Gad le Gilead te ngamkhen zuan uh hi. Saul sia Gilgal ma ah omlai in, ama taw a om mite lau in liing uh hi.

⁸Ama in ni sali sung Samuel ii sawl bangin Samuel ngak hi. Ahihang Samuel Gilgal ah hong pai peang bua hi. Mipite in Saul taisan tu hong kipan uh hi,

⁹tua ahikom ama in amate munah, “Meihal biakpiakna le kipawlkhop biakpiakna ka kungah hong paipui tavun,” ci hi. Ama in meihal biakpiakna khat vawt a,

¹⁰a man lian laitakin Samuel hong theng hi. Saul in pai in muak a,

¹¹ahizong Samuel in, “Bang ka vawt ci ni ziam?” ci in dongh hi. Saul in zo a, “Mihingte in hong taisan a, kong pai tu na ci bangin nang hong pai ngawl ni hi; tua ban ah Philistine te sia Michmash ah kikhawmtua hi.

¹²Tua ahikom, ‘Philistinete in hi sung Gilgal ah kei hong sim tu in om a, tuaciangin kei in Topa ii maipha ka nga natu sep ka nei bua hi. Tua ahikom sangaw biakpiakna khat ka piak kul vak,’ ci in ka na ngaisun hi,” ci hi.

¹³“Tuasia mawmawt nasep hi,” ci in Samuel in zo hi. “Nang in naTopa Pathian ii thupiak bangin ngamta ngawl ni hi. A thu ni hi thong lete nang le na suan na paalte in Israel a tawntungin hong uksak tu hi.

¹⁴Ahizong na ukna sia kizom suak ngawl tu hi. Nangma in a thu ni ngawl na hikom ama in ama ii dei bang mihing zong tu a, a mihingte uk tu in vawt tu hi,” ci hi.



¹⁵Samuel in Gilgal nusia a, ama ii pai natu ah pai hi. A dang mihingte in Saul sia a ngalkap uap tu in a pai ciang zui uh hi. Amate in Gilgal pan Benjamin te ngamkhen sung Gibeah ah pai uh hi. Saul in a ngalkap zaluk khawng sia vil hi.

¹⁶Saul, a tapa Jonathan le a mihingte sia Benjamin te ngamkhen Geba ah ngiaphual saat uh hi; Philistinete ngiaphual sia Michmash ah om hi.

¹⁷Philistinete in pawl thum kisua in a ngiaphual uh pan veu ngalnguk seam uh hi: pawlkhen khat in Shual te ngamkhen Ophrah ah pai uh a,

¹⁸a dang pawlkhat in Beth Horon zuanin, tuaciang a dang khatte in Zeboim Kuam le duisung a kimuna ngamngi ah pai uh hi.

¹⁹Israel te sungah thikseak kuama a om bua hi, banghangziam cile Hebrew te ii namsau le tei a nei ngawl natu in Philistinete in nasia takin khak uh hi.

²⁰(Israel te in a hei, a tu, a phiau uh a hiamsak nop ciangin Philistinete kung veu ah pai uh hi.

²¹A seak manh sia hei le ngan hawl na ciang dawn ah a kisan thik ahile ngundangkaa tang khat, lo thawna le tumanh ahile nguntang tang nii piasak uh hi.)

²²Tua ahikom ngal kido ni in Saul le a tapa Jonathan simngawl ngalkap dangte in namsau le tei a nei bua uh hi.

²³Philistinete in ngalkap pawlkhat Michmash mualciangh cing tu in paisak hi.

Samuel Khatna 14

Jonathan ii Ngalhan Nasepna

¹Nikhat ni in Jonathan in ngalvanh a pua pa munah, “Philistinete ngiaphual kantan in pai tawng,” ci hi. Ahihang Jonathan in a pa Saul munah a son bua hi,

²ama sia Gebeah pan a khuala ngawl Migron khua, talee kung nuai khat ah ngiaphual saat hi; ama in mihing zaluk bang ama taw kithua in nei hi.



³(Ephod a silh thiampi sia Ichabod ii suapuipa Ahitub ii tapa Ahijah hi a, tua pa sia Phinehas ii tapa, Eli ii tupa, Shiloh ah Topa ii thiampi ahi hi. Jonathan ii pai hunlam sia a mite in he ngawl hi.

⁴Philistinete ngiaphual a thet thei natu in a kantan tu a kul Michmash mualciangh ah suangpi dawn hiam nii a lang le a lang ah om a: tua suangpите khat sia Bozez kici a, a dang khat sia Seneh kici hi.

⁵Khat zaw sia Michmash maingat a, mualciangh iisak sangah om in, a khat sia Gebeah sang nga a, a thang sangah om hi.

⁶Jonathan in a tangvalpa munah, “Pathian he ngawl Philistine te ii ngiaphual kantan in pai tawng. Topa in hong hu tha tu hi; hong hu a ahile bangza in ih tawmbel hang, zawna hong piak natu sia bangma in khak ngawl tu hi,” ci hi.

⁷Tangvalpa in, “Na vawt nop babang hi hen, kei sia nangma taw pang khi hi,” ci hi.

⁸Jonathan in, “Pha hi. Ei ih paitan tu a Philistinete in ih musak tu hi.

⁹Ama te in ei kungah hong pai tu ngakin hong sawl le ih omna mun san ah ih om nginge tu hi.

¹⁰Ahihang amate kungah pai in hong sawl ahile ih pai tu hi, banghangziam ci le tuasia in Topa ii ngal zaw natu lim hong piak hi tu hi,” ci hi.

¹¹Tuabangin amate sia Philistinete in musak uh a, tuate in, “En vun! Hebrew mite pawlkhat leihawng sung a bukna pan hong pusuk hi!” ci hi. Tua zawkciang amate in Jonathan le tangvalpa oksan in, “Hi sungah hong paito tavun! Kong son nop bang ziam maw khat om hi,” ci uh hi.

¹²Tuaciang amate in Jonathan le tangvalpa tungah, “Hi sungah hong pai tavun, thu hong son nuam khu hi!” ci in sam uh hi. Jonathan in tangvalpa munah, “Hong zui tan. Topa in amate tungah Israel te zawna hong pia hi,” ci hi.

¹³Jonathan in mualciangh tungah a khut le a khup taw peang li nei in kaato a, tangvalpa in zui hi. Jonathan in Philistine simin, tangvalpa in zongh that hi.

¹⁴Kithalupna mun masa phitbel tua sung lo acre lang bang a zai na munah mihing kul bang thatlum uh hi.

¹⁵Ngam sungah a om Philistine theampo lau ngawp uh hi; ngal nguk sim tu te le ngalkap, ngiaphual a om ngalkap theampo lau in liing uh hi; lei liing liangin patauna lianpi om hi.

Philistine ii Lelna

¹⁶Benjamin ngamkhen sung Gibeah a om, Saul ii mite in Philistine ii patau keakin a tai mu uh hi.

¹⁷Tua ahikom Saul in a mite munah, “Ih ngalkapte sim sin vun, a om ngawl kua teng om ziam?” ci hi. Amate in tuabangin ahi uh ciang Jonathan le a ngal vanh pua khangmoipa a om ngawl hunlam he uh hi.

¹⁸“Ephod sia hi sungah hong paipui tavun,” Saul in Ahijah thiampi sia ii munah ci hi. (Tua ni in Ahijah in tua vanh sia Israel te mai ah pua hi.)

¹⁹Saul in Ahijah taw a papau laitakin, Philistine ngiaphual ah hong buai vaial a, tua ahikom Saul in, “Topa thu dok tu a hun om nawn ngawl hi!” ci hi.

²⁰Tuaciangin ama le a mite sia amate le amate tel meal om ngawlin a kido Philistine ngiaphual sangah ngalsim tu in hong kuan uh hi.

²¹Hebrew mi pawlkhat Philistine sang pang phot a, amate ngiaphual ah a pai sa te heak kikin, Saul le Jonathan sangah hong pang kik uh hi.

²²A dang, Ephraim mual tungah a om te in Philistine tai keak hi ci in za uh a, tua ahikom amate zongh hong kipawlin Philistine sim a,

²³Bethaven kalh dongin do uh hi. Topain tua ni in Israel hunkhia hi.

Ngal kisim Zawkciang Thupiangte

²⁴Israel te sia tua ni in ngilkial in zawm uh hi, banghangziam cile Saul in ciliap huai kiciamna taw thu pia hi: “Ka ngalte tungah phu laakna ka nei



mateng an a ne sia haamsiatna thuak taken,” ci hi. Tua ahikom ni buppi an a ne kuama om ngawl hi.

²⁵Thingtang omna mun khat hong theng uh a, mun theampo ah khuaitui om hi.

²⁶Ahihang kuama in tua zongh a ne bua hi, banghangziam cile amate in Saul ii haamsiatna sia kiita uh hi.

²⁷Ahihang Jonathan in a pa ii kiciamna za ngawl ahikom ciangkang khat taw khuaiphaang sungah sun in tawm ne hi. Thakhat thu in ama hong hat zaw hiat paih hi.

²⁸Ahihang a mite khat in, “Ko sia ngilkial in pukhong khu hi, ahihang na pa in haamsiatna taw hong tawng hi, “Tuni in an a ne peuma tungah haamsiatna tung taken ci hi, ’ ” ci in son hi.

²⁹Jonathan in, “Ka pa in ih mite tungah bang zata in, a kiitak huai mama in ngamta thong ziam? En vun, khuaitui tawm ka neak hu in bangza in ka om nuam tuam paih ziam!

³⁰Ih ngalkapte in ngalte a zaw uh ciang a laak uh ante ne le bangza in pha tuam seseam tu ziam? Philistinete bangza a tam zaw that zo seseam tu ziam?” ci hi.

³¹Tua ni in Israel te in Philistinete zo a, Michmash pan Aijalon dong sim uh hi. Hi sia hunin Israel te sia ngilkial in zawm mama uh hi,

³²tua ahikom amate in ngalte khut sung pan a matte la tu in del uh a, tuu le kealte la in tua munah ngo paih uh a, a chi thai ngawlin a sa ne uh hi.

³³Saul munah hi thu kikhia a, “En in, ih mite in sa le a chi ne khawmin Topa tungah mawna vawt hi,” ci uh hi. Saul au in, “No sia pawl zuakte nu hi! Suangtumpui khat hi munah hong lumliik tavun,” ci hi.

³⁴Tuaciang ama in a dang thupiakna khat pia a, “Mihingte sungah pai tavun a, khui le tuute hi sungah hong paipui siat taken. Amate in tua ngante hi munah ngo in hi sung ma ah ne tu hi; amate in sa le chi neak khop



mawna Topa tungah vawt thei ngawl tu hi,” ci hi. Tua ahikom tua ni zanin amate in a nganno uh te hong paipui a tua munah ngo uh hi.

³⁵Saul in Topa atu biaknatau khat sa a, a masa bel a vawt biaknatau ahi hi.

³⁶Saul in a mite munah, “Zan a paisuk in, Philistinete sim tawng, khuavak dong a neisa te phuulin, thatlum siat tawng,” ci hi. “Pha nasak bel bang po vawt in,” amate in ci uh hi. Ahizong thiampipa in, “Pathian dongh phot tawng,” ci hi.

³⁷Tua ahikom Saul in Topa dongh a, “Philistinete ka sim tu ziam? Zawna nong pia tu ziam?” ci hi. Ahihang Pathian in tua ni in zo ngawl hi.

³⁸Tua zawkciang Saul in mihingte a lampuite munah, “Hong pai tavun a, akua in tu ni in mawna vawt hi ziam, kan vun.

³⁹Israel sungah zawna hong pai a nungta Topa min taw kamciam vawt khi hi, ka tapa Jonathan keak ahizong, a maw sia kithatlum tu hi,” ci hi. Ahihang kuama in bangma son ngawl hi.

⁴⁰Tuaciang Saul in amate tungah, “Na vekpi in zia lai ah va ding tavun, Jonathan le kei hi sungah kong ding tu uh hi,” ci hi. Amate in, “Pha bel tu na ngaisut pawpo vawt in,” ci in zo uh hi.

⁴¹Saul in Topa Israel te Pathian munah, “Topa, banghangin tuni kei hong zo ngawl ni ziam? Topa Israel Pathian awng, biakna taw kisai a thiangtho suangte tungtawn in hong zo tan. Mawna sia Jonathan ahibuale kei mawna ahile, Urim panin hong zo tan; ahizong a mihing Israel te ii mawna hang ahile Thummim pan hong zo tan,” ci hi. A zona sia Jonathan le Saul ii tungah cia a, mipite thiangsak hi.

⁴²Tuaciang Saul in, “Ka tapa Jonathan le kei akua hi zaw khu ziam hong khensat tan,” ci hi. Tuaciang Jonathan hong kikawk hi.

⁴³Tuaciang Saul in Jonathan munah, “Bang vawt ni ziam?” ci in dongh hi. Jonathan in, “Khuaitui tawm ne khi hi. Hi lai ah om khi hi— a thi tu in kinging khi hi,” ci in zo hi.



⁴⁴Saul in Jonathan tungah, “Nang tuni in hong kithisak bua le, keima Pathian in hong vaatlum taken,” ci hi.

⁴⁵Ahihang mipite in Saul munah, “Israel atu ngal zawna lianpi hong neisak Jonathan sia thatlum tu hi ziam? Hi thei bo! A nungtaTopa min taw kiciam khu hi, a samzam khat zongh a lu tung pan taan thei ngawl tu hi. Tuni in a sep a vawt theampo, Pathian ii hu na taw vawt hi,” ci uh hi. Tuabangin mipite in Jonathan sia thi natu pan hunkhia uh hi.

⁴⁶Tua zawkciang Saul in, Philistinete a del tawp in, amate ngamkhen ah cia kik uh hi.

Saul ii Ngam ukna le a Baangkua

⁴⁷Saul sia Israel te kumpipa a sua zawkciang, mun theampo ah a ngalte sim hi; Moab mite, Ammonte le Edomte kumpipa Zobah le Philistinete kumpipate do hi. Ngal a simna po ama in zo tawntung hi.

⁴⁸Ama in hangsan takin ngalsim a Amalekte ngangawn zo hi. Ama in Israel te, a sim theampo panin hunkhia hi.

⁴⁹Saul ii tapate sia, Jonathan, Ishvi le Malchishua ahi hi. Ama ii tanu uzaw sia ii min Merab hi a, a nau zaw sia Michal hi.

⁵⁰A zi sia Ahimaaz ii tanu Ahinoam hi a; a ngalkap ukpipa sia a pano Ner ii tapa, a suapui seal Abner ahi hi.

⁵¹Saul ii pa Kish le Abner ii pa Ner sia Abiel ii tate ahi uh hi.

⁵²A nuntak sung tawntung Saul in Philistinete hangsan takin sim tawntung hi. Tua ahikom a thahat le a hang pasal khat a mu na le a ngalkap sungah tumsak hi.

Samuel Khatna 15

Amalekte Taw Kisimna

¹Samuel in Saul munah, “A mihingte Israel te ii kumpipa tu in sathau noai a Topa ii hong sawl sia keima khi hi. Tu in TopaVaanglianpipa ii son teng ngai in.



²Ama in Amalekte sia daan pia nuam hi, banghangziam cile amate ii taangpupite in Israel mite ii Egypt ngam pan a pusua lai in na nalh uh hi.

³Kuan tan a, Amalekte a neisa theampo uh taw a vekpi in susia cip in. Na khat zongh khoaikhe heak in: pasal, numei, patang le nausen; a khui, a tuu, a kalaoh le a laate thatlum siat in,” ci hi.

⁴Saul in a ngalkapte Telem ah khawmtua in vil hi. Israel panin ngalkap 200,000 le Judah pan 10,000 pha uh hi.

⁵Tuaciang ama le a ngalkapte Amalekte khuapi ah kuanin ngun luanna munko khat pan ngakin pang uh hi.

⁶Ama in a taangpupite in Egypt pan a pusua uh lai in Israel te tungah a dik Kente tungah a kidop natu kam thaak hi. Tuata munah, “Pai vun a Amalekte nusia vun, amate taw cipin kong thalup ngawl natu in tai vun,” ci hi. Tua ahikom Kente in khua a nusia uh hi.

⁷Saul in Amalekte, Havilah pan Egypt nisuana Shur dongin zo a;

⁸ama in Amalek Kumpipa Agag a hingtang in man a, tuaciang a mite theampo thatlum hi.

⁹Ahihang Saul le a mite in Agag ii nuntakna sia khoaikhe a, tuaciang a tuu le a khui a phabel teng, khuino le tuuno a pha bel teng le na a pha theampo khe in, a manh nei ngawl le a mannung ngawl teng bek susia uh hi.

Saul sia Kumpipa ahina pan Kinial

¹⁰Topa in Samuel tungah,

¹¹“Saul kumpipa in ka koi sia kisiik khi hi; ama in kei sang panin kiheak a, tuaciang ka thupiakna hong ni ngawl hi,” ci hi. Samuel thin uuk a, zan khua in Topa tungah pakaai hi.

¹²A khuavak ni zing tuungin Saul zong tu in ama pai hi. Saul sia Carmel khua ah pai in tua munah ama atu in khansung khat phut a, tua zawkciang Gilgal ah paisuak hi ci in za hi.



¹³Samuel in Saul kung dong pai in, Saul in muak a paupui hi, “Topa in thupha hong pia taken, Samuel awng! Topa ii thupiak ni khi hi,” ci hi.

¹⁴Samuel in, “Tua ahile khui ham le tuu ham te banghangin za khi ziam?” ci in dongh hi.

¹⁵Saul in zo a, “Ka mite in Amalekte tung pan la hi. Tuu le khui a phabel teng la in Topa na Pathian tungah sangaw biakpiakna in nei sawm uh hi, a dang teng sia maaimot siat hi,” ci hi.

¹⁶Samuel in, “Tawp in, tu zanin Topa ii kei hong son teng hong sonsawn tu khi hi,” ci in thupia hi. Saul in, “Hong son tan?” ci hi.

¹⁷Samuel in zokik a, “Nangma le nangma sia thupi na kisak ngawl hang, nang sia Israel te ii lampui pa ni hi. Topa in Israel Kumpipa tu in sathau hong noi sa ni hi,

¹⁸tuaciang ama in nang sia tua a ngilo Amalekte moncip tu in hong paisak hi. Amate na thalup siat dong sim tu ni hi ci in thu hong pia hi.

¹⁹Tua ahile banghangin a thu ni ngawl ni ziam? Banghangin a neisa uh te phuul tu in kinaw liang in Topa ii diksak ngawl tu in ngamta ni ziam?” ci hi.

²⁰Saul in zokik a, “Topa thu ni khi hi. Hong sawl bangin ka kuankhia a, Kumpipa Agag ka siapui hi, Amalek dangte theampo ka thatlum hi.

²¹Ahihang ka mihingte in tuu le khui a matte sung pan a phabel teng a thatlum bua uh hi; tuabang ahi luangin Topa tungah sangaw biakpiakna tu in, hi sung Gilgal ah hong paipui uh hi,’ ci hi.

²²Samuel in, “Thu nitna, piakkhiatna le sangaw biakpiakna Topa in koi sia dei zaw ziam? Ama ii tungah a phabel tuute sangaw biakpiakna le piakkhiatna sangin thu nitna phazaw hi.

²³Ama langpan in tualngal a thawna sia bum le aitoaina bangma in sia a, kiphatsakna sia milim biakna za in mawna hi. Nangma in Topa ii thupiakna nial na hi man, ama in nang sia kumpi na hina pan hong nial zo hi,” ci hi.



²⁴“Hi hi, maw zo khi hi,” ci in Saul in zokik hi. “Topa ii thu piakna le nangma ii nong hilna te ni ngawl zo khi hi. Ka mite ka kiitak manin amate ii dei bangin ngamta khi hi.

²⁵Ahihang tu in ka mawna hong maisak tan a, Topa biakna ka nei thei natu in Gilgal ah kei taw pai khawm kik tawng,” ci hi.

²⁶“Nang taw heak kik ngawl tu khi hi. Nang in Topa ii thupiaknate nial na hi man, ama in nang sia Israel te ii kumpipa na hina pan hong nial zo hi,” ci in Samuel in zo hi.

²⁷Tua zawkciang Samuel sia ama nusia tu in hong kiheak a, ahihang Saul in a puan puasilh pan a let le a puan ki-eau hi.

²⁸Samuel in ama ii munah, “Topa in Israel kumpi ngam sia nang khut sung pan eau keak zo hi, tuaciang nang sangin a phazaw mihing khat tungah pia zo hi.

²⁹Israel ii kumpi Pathian sia leilot ngei ngawl a, a thin kheal ngei ngawl hi. Ama sia mihing hi ngawl hi — a thin kheal ngawl hi,” ci hi.

³⁰Saul in, “Keima maw zo khi hi, ahihang ka mite ii lampuite le Israel theampo ii mai ah zatakna beak hong lak tan. Keima taw hong heak kik tan a, Topa na Pathian ka biakpiak thei natu hong hi tan,” ci hi.

³¹Tua ahikom Samuel in Saul taw Gilgal ah heak kik khawm a, tuaciang Saul in Topa biakpiakna nei hi.

³²“Kumpipa Agag kei kungah hong paipui tavun,” ci in Samuel in thu pia hi. Agag sia ama ii kungah liing vadil in hong pai a, “Thi tu sia bangza in na ziam?”. ci in ngaisun hi.

³³Samuel in, “Na namsau in numei tam mama ta selsak ahi bangma, tu in nangma ii nu zongh ta sel tu hi,” ci hi. Tuabangin Samuel in Agag sia Gilgal biaknatau mai ah neensem hi.

³⁴Tua zawkciang Samuel sia Ramah ah pai a, Saul Kumpipa sia Gibeah a inn ah cia hi.



³⁵Samuel ii nuntak sungah ama in kumpipa a mu kik ngei nawn bua hi; ahihang ama khuangai hi. Topa in Saul, Israel te ii Kumpipa in a koi hu in hee hi.

Samuel Khatna 16

David Kumpi tu in Sathau Kinoai

¹Topa in Samuel munah, “Saul atu in bang tan vei khuangai tu ni ziam? Israel kumpipa ahina pan keima in nial zo khi hi. Ahihang tu in olive thau tawm la in a, Bethlehem khua ah Jesse a kici pasal khat sia kungah pai tan, banghangziam cile ama ii tapate khat kumpi tu in teal zo khi hi,” ci hi.

²“Banghang tuabangin ngamta thei tu khi ziam, Saul in tua thu za le keima hong that tu hi,” ci in Samuel in dongh hi. Topa in zo a, “Khuino khat la in a tua munah Topa tungah sangaw biakpiakna ka vawt tu ci in.

³Sangaw biakpiakna ah Jesse sam in a, na vawt tu kong hil tu hi. Keima ii kong son tu pa sia sathau noai tu ni hi,” ci hi.

⁴Samuel in Topa sawl teng vawt tu in Bethlehem ah pai hi, tua munah khuapi lampuite in ama muak tu in liing liang in hong pai uh a, “A mukhol thei pa awng, nong hawna sia kilem thu ahi buang naam?” ci uh hi.

⁵Ama in, “Hi hi, Topa tungah sangaw biakpiakna khat vawt tu in kong pai hi. Kithiansua vun a, hong pai tavun,” ci hi. Ama in Jesse le a tapate amate le amate kithiansua tu in sawl a, sangaw biakpiakna munah a pai natu in sam hi.

⁶Amate hong thet ciang, Samuel in Jesse ii tapa Eliab mu a, “Hi sia pa, hi sung Topa mai a ding sia ama ii teal sia hi vangiat tu hi,” ci in ngaisun hi.

⁷Ahihang Topa in ama munah, “A saanna le a mealphatnate awlmawk heak in. Ama sia nial zo khi hi, banghangziam cile, mihingte ii khen bangin thu ka khen bua hi. Mihingte in a pua sangah a kimu teng bek en uh hi, ahihang kei ka hile a thin sung ka en hi,” ci hi.

⁸Tuasia ciang Jesse in a tapa Abinadad samin Samuel kungah paipui hi. Ahihang Samuel in, “Hi bo, Topa in ama zongh teal ngawl hi,” ci hi.

⁹Jesse in tua zawkciang Shammah a paipui hi. “Hi bo,Topa in ama zongh teal bo,” Samuel in ci hi.

¹⁰Hi bangin Jesse in a tapa sali te Samuel kungah paipui hi. Samuel in ama tungah, “Hi bo,Topa in hite khat zongh teal ngawl hi,” ci hi.

¹¹Tuaciang Samuel in ama tungah, “Tapa dang na nei lai ziam?” ci in dongh hi. Jesse in, “A no bel sia omlai hi, ahihang ama sia tuute en tu in pusuak hi,” ci hi. Samuel in, “Hi sungah hong pai natu sawl in,” ci hi. “Sangaw biakpiakna sia ama hong thet ma teng kivawt ngawl tu hi,” ci hi.

¹²Tua ahikom Jesse in samsak hi. Ama sia a meal pha, a cidam, a mit tee wakil khat ahi hi. Topa in Samuel tungah, “Hi sia hi, sathau noai in!” ci hi.

¹³Samuel in olive thau la in a suapuite mai ah David sathau noai hi. Thakhat thu in Topa ii thaa in David uk a, tua ni pan kipan ama taw omkhawm top hi. Tua zawkciang Samuel sia Ramah ah heak kik hi.

Saul ii Zumtual ah David Om

¹⁴Topa ii thaa in Saul nusia in, tuaciang Topa ii paisak thaa ngilo khat in ama vawtsia hi.

¹⁵A naseamte in ama munah, “Topa ii hong paisak thaa ngilo khat in nang hong vawtsia ci in he khu hi.

¹⁶Tua ahikom thu hong pia tan, Topa awng, tengtong tum a thiam khat ka na zong tu uh hi. Tua hile thaa ngilo sia nang tungah hong pai ciang, a mihing pa in tengtong hong tum tu a, nangma na pha kik tu hi,” ci uh hi.

¹⁷Saul in amate thupia a, “Tum a thiam khat zong tavun a, keima kungah hong paipui tavun,” ci hi.

¹⁸Ama a cingte khat in, “Bethlehem khua mi Jesse in tum thei lamsang a thiam tapa khat hi. Ama sia hangin, a mealpha khat hi a, ngalkap pha, thu son zongh a thiam khat hi. Topa sia ama taw omkhawm hi,” ci uh hi.

¹⁹Tua ahikom Saul in kamtaite Jesse kungah paisak a, hi bangin cisak hi, “Na tapa David tuu cing thei sia hong puak tan.”



²⁰Jesse in David sia Saul kungah paisak a, kealngual khat, anluum a pua laa khat le savun ip dim zu paipuisak hi.

²¹David in Saul ii naseam in tum hi. Saul in ama sia dik sa mama a, a ngal vanhte pua tu in teal hi.

²²Tua zawkciang Saul in Jesse kam thaak hi: “David dik sa khi hi. Keima ii nasep seamin hi munah hong omsak tan,” ci hi.

²³Tua hun pan kipan Pathian ii puak thaa ngilo sia Saul tungah a thet simin David in tengtong la in tum hi. Thaa ngilo in nusia a, Saul sia a om nuamtuam in, a ngei bang hong hi kik hi.

Samuel Khatna 17

Goliath in Israel te Thato

¹Judah ngam khuapi khat ahi Socoh ah Philistinete ngalsim tu in hong kikhawmtua uh a; Socoh le Azekah kilaklaw Ephes Dammim a kicina mun khat ah, ngiaphual saat uh hi.

²Saul le Israel te sia Elah Kuam sungah kikhawmtua a, Philistinete in do tu in kinging uh hi.

³Philistinete mual khat tungah kingual in, Israel te sia a ngal khat mual tungah kingual uh a, a kilaklaw ah kuam khat om hi.

⁴Gath khua pan Goliath a kici pasal khat pa in Philistinete ngiaphual panin hong pusuak in Israel te thato hi. Ama sia pi kua vaal saangin,

⁵pound 125 a ngit thikpuan le taungo lukhu zangh hi.

⁶A peangte zongh taungo kidalna taw tuam a, a liangah taungo tei khat kua hi.

⁷A teipalh sia thiamtakte ciam cia pha a, pound sawm le pound nga bang ngit hi. Ama ii mai ah lum a puaksak ngalkap khat pai hi.

⁸Goliath ding in, Israel te oksan a, “Tua munah bang hi nu ziam, Ngalsim tu in kingual nu ziam? Saul ii silate awng, kei sia Philistinete khat khi hi! Na mihingte khat kei taw kisi tu in hong teal tavun.



⁹Ama in kei hong zo in hong thatlum le, ko sia na sila uh suak tu khu hi; ahihang keima in ama ka zo le no sia ko ii sila suak tu nu hi.

¹⁰Hi sung mun le hi hun laitakin Israel ngalkapte hong thato khi hi. Kei taw a kido tu khat hong kidok ngam ka sin vun,” ci hi.

¹¹Saul le a mite in hi thu a zaak uh ciang lau ngawp uh hi.

Saul ii Ngiaphual ah David Theng

¹²David sia Jesse ii tapa hi a, Judah ngam Bethlehem khua Ephrath te ahi hi. Jesse in tapa liat nei a, Saul ii kumpipa a sep lai hunin ama sia huai mama zo hi.

¹³A tapa lian bel thum te in Saul taw ngalsim tu in kuankhia zo uh hi. A u bel sia Eliab hi a, a zom sia Abinadab, a thumna sia Shammah ahi hi.

¹⁴David sia a no bel hi a, a u bel thum teng Saul taw mun khat ah a om laitak,

¹⁵David sia Bethlehem khua ah hun khat pan hun khat a pa ii tuute en tu in cia vazek hi.

¹⁶Goliath in Israel te zing sim nitak sim, ni sawmli sung sitset thato hi.

¹⁷Ni khat ni ciangin Jesse in David ii munah ci hi, “Hi an em min kuang lang le anluum sawm teng la in na ute omna ngiaphual ah manlang in va pai tan.

¹⁸Tuaciang hi noaikhal sawm teng sia amate a uk ngalkap mang te va puak tan. Na ute sia bangbangin om ziam hong kan tan a, amate taw cidam in na kimuna nong lak natu in bang ziam khat hong siapui tan.

¹⁹Kumpipa Saul, na ute le Israel dangte sia Elah Kuam ah Philistinete do in om hi.”

²⁰A khuavak ni zing tuungin David tho a, tuute encik tu mi dang khat tavuan pia in nguai an teng la a, Jesse ii sawl bangin pai hi. Israel te ngal mai ah kingualin ngalsim tu in hanla a sam laitakin David theng hi.

²¹Philistinete le Israel te sia kido natu mun la in, ki maitua in om uh hi.



²²David in a nguai an teng nguai an a uk ngalkapmaang khat ii khut sungah aap a, ngalphual ah tai in a ute kungah bang hi nu ziam ci in dongh hi.

²³Ama a ute taw a kipaupui laitakin, Goliath sia mai ah hong pai in, nidang a hi ngei bangma in Israel te thato hi. Tuaciang David in ama aw za hi.

²⁴Israel te in Goliath a mu uh ciang lau in taikeak uh hi.

²⁵“Ama en vun! A thatona ngai vun! Kumpipa Saul in ama a that zo sia tel lian mama piak tu in kamciam hi; kumpipa in a tanu a tenpui tu in pia sii tu a, tua pa ii a pa baangkua in phiangshia piasak ngawl tu ci hi,” ci in amate khat le khat kison uh hi.

²⁶David in ama ii kung nai a omte munah, “Hi sia pa that in, Israel mite maizumna pan suatak a pia sia in bang nga tu ziam? A peuma in hi Pathian he ngawl Philistine pa sia akua ka hi ci nial a, a nungta Pathian ii mihingte nalh ngam nial ziam?” ci in dongh hi.

²⁷Amate in Goliath a that pa ii nga tu teng son uh hi.

²⁸David ii a u lianbel Eliab in David ii mite taw a kipaupui na teng za hi. Ama in David tungah thin uuk in, “Nang hi sungah bang hong zong ni ziam? Duisung na tuute akua in keam ziam? Kin ngawl tu teng kin, nang po! Ngal kido mu nuam a hong pai hi lel ni zam!” ci hi.

²⁹“Tu in bang vawt na khi ziam? Thu khat beak zongh dongh thei ngawl tu khi ziam?” David in ci hi.

³⁰Ama in midang khat sang nga in tua teng ma dongh hi, a dok sim in tuabang vive ma in kizo hi.

³¹Pawlkhat in David ii pau teng za a, Saul tungah son uh hi, tuaciang Saul in ama samsak hi.

³²David in Saul munah, “Kumpipa awng, hi Philistine pa sia kuama ii kiitak kul ngawl hi! Keima pai in do tu khi hi,” ci hi.

³³Saul in, “Hi bo, bangbangin do thawthong thei tu ni ziam? Nang sia patangno hi lel a, ama sia a khan tawntung ngalkap a seam sa hi,” ci hi.

³⁴David in, “Kumpipa awng, kei sia ka pa ii tuute a keamcing pa khi hi. Tawpi ahizong vompui in ahizong ka tuuno te hong tuasak ciang,

³⁵del in ka sim a, tuuno ka hung hi. Tuasia ciang tawpi ahibuale vompui in kei sang hong kiheak ciang, a longtawl pan zamh a, a thi dong ka tek lum hi.

³⁶Tawpите le vompuite ka that a, tuabangma in Pathian he ngawl Philistine pa a nungta Pathian ii ngalkap hon a nalh pa sia vawt tu khi hi.

³⁷Topa in tawpi le vompuite panin hong suatak sa khi hi; ama in hi Philistine pa khut sung pan zong hong suatak tu hi,” ci hi. Saul in, “Pha hi, pai tan a, Topa sia nang taw hong omkhawm taken,” ci hi.

³⁸Ama in ama ii thikpuante a silh tu in David pia a, David lu tungah tau lukhu khusakin, thik puan zongh silhsak hi.

³⁹David in Saul ii namsau sia a thikpuante ii tung panin kua in lampai tu a kisin le a pai thei bua hi. Banghangziam cile ama in tuate silh ngei ngawl hi. Saul munah, “Hi vanhte theampo taw kei ngalsim thei ngawl tu khi hi. Ngeina in nei ngei ngawl khi hi,” ci in sut siat hi.

⁴⁰Ama in a tuu cinna ciangkhut la in, lui sung pan suangtang naal nga a thung sungah koi hi. A saili taw kinging sa in Goliath taw kisi tu in kuan hi.

David in Goliath Zo

⁴¹Philistine pa sia David sangah kalsuan tu in hong kipan a, a lum toai pa sia a mai ah pai hi. A nai vaial in ama hong pai a,

⁴²David pha takin a et zawkciang ama sia simmawkna taw a thin sung hong kidim hi, banghangziam cile David sia a dik a mealpha pano khat a na hi lel hi.

⁴³Ama in David munah, “Na ciangkang toai sia bang tu ziam? Kei sia ui po hong sa ni ziam?” a ci zawkciang, ama ii pathian min taw David haamsiat hi.

⁴⁴Ama in David thato a, “Hong kuan tan, na pumpi sia vacimte le ngamsate neak tu in pia tu khi hi,” ci hi.



⁴⁵David in zo a, “Nang sia kei sim tu in, teipalh, tei zum le namsau taw hong kuan ni hi, ahihang kei ka hile na nalh tawntung TopaVaanglianbelpa, Israel ngalkap honte Pathian ii min taw hong kuan khi hi,” ci hi.

⁴⁶Tuni mama in Topa in nang sia keima ii khut sungah hong pia tu hi; kong zo tu a, tuaciang na lu ka tan tu hi. Tuaciang Philistine ngalkapte ii pumpite sia vacimte le ngamsate ii neak tu in ka pia tu hi. Tuasia tak ciang leitung buppi in Israel in Pathian khat nei hi ci tu uh a,

⁴⁷tuaciang hi sungah a om misim in a heak tu uh in, a mite a hutkhiat natu in Topa in namsau le teite kisamh ngawl hi ci in mu tu uh hi. Ama sia ngalphual ah a zo pa hi a, ama in no sia ko ii thahatna nuai ah hong koi tu hi.

⁴⁸Goliath in David sangah kalsuan tu in hong kipan leleau hi, tuaciang David sia Philistinete ngalphual kingualna sangah manlang in ama sim tu in hong tai hi.

⁴⁹Ama in a thung sung hong sawk a, a saili ah thua tu suangtang la in, Goliath sangah vik hi. Goliath ii talki panin kha a, a lu ngu tamh in Goliath sia a bok lamin lei ah puksuk hi.

⁵⁰Tua hi a, namsau ngawl taw, saili le suangtang khat taw David in Goliath zo in, thatlum hi!

⁵¹Ama in delin, a tungah a din zawkciang Goliath ii namsau a paai sung pan dokin, a lutang saattan in that hi. Philistine te in amate ii ngalhang pa thi a mu ciangin taimang uh hi.

⁵²Israel mite le Judah mite in au in amate ii nung pan del a, Gath le Ekron kongpite dong zuizen uh hi. Shaaraim paina lampi Gath le Ekron dong lam dungah Philistinete liamin puk uh hi.

⁵³Israel te in Philistine a zuizenna pan hong cia kik ciang a ngiaphual uh phuul uh hi.

⁵⁴David in Goliath ii lutang tawm in Jerusalem ah paipui hi, ahihang Goliath ii ngalhiamte sia ama ii puanbuk sungah keam hi.

David sia Saul kungah kipaipui

⁵⁵David sia Goliath taw kido tu in a pai Saul in a mu ciang, a ngalkap ukpipa Abner munah, “Abner awng, akua tapa ziam?” dongh hi. Abner in, “Akua tapa ziam ci in ngaisun zo ngawl khi hi, Kumpipa awng,” ci in zo hi.

⁵⁶Saul in, “Tua ahile va kan tan,” ci in thupia hi.

⁵⁷Tuabangin Goliath a thalup zawkciang ngalphual ah David hong heak kik a, Abner in Saul ii kungah paipui hi. David in Goliath ii lutang pua nginge lai hi.

⁵⁸Saul in, “Tangvalpa awng, akua tapa ni ziam?” ci in dongh hi. David in, “Keima sia Bethlehem khuami na naseam pa Jesse ii tapa khi hi,” ci in zo hi.

Samuel Khatna 18

¹Saul le David a kipaupuina uh man hi. Tuasia zawkciang Saul ii tapa Jonathan sia David tungah a thin nasia takin hong tu a, ama le ama a ki it za in David it hi.

²Saul in David sia tua ni pan kipan keam a, a inn ah a cia kiksak nawn bua hi.

³Jonathan in David sia it a, thin bot mama ahikom tawntung kingualtamhna kiciamna vawt hi.

⁴Ama in a puantual silh lai sia suutin David pia hi, tua taw kikop in a thik puan, tuaciang a namsau, a thal le a kawngkhaute zongh pia hi.

⁵David sia Saul ii nasep lian seam tu in a sawlna theampo ah zawna nga a, tua ahikom Saul in ama sia ngalkap mang khat in koi hi. Hisia in Saul ii ngalkapte le a maangte uh lungkimsak hi.

Saul in David Eang

⁶David in Goliath a thalup zawkciang le ngalkapte inn ah hong cia kik uh ciangin Israel ngamsung khuapite theampo pan numeite in Saul muak tu in hong pai uh hi. Amate laamin lungdam huai late sa a, thikdaakkual le liamlo tum uh hi.



⁷A poai vawtna sungah numeite in la sa uh a, “Saul in a tul in that a, ahihang David in a tulsawm in that hi,” ci uh hi.

⁸Saul in hi sia dik sa ngawl a, a thin uuk mama hi. Ama in, “David atu in amate in a tulsawm in thatsak a, kei ciang a tul in hong thatsak bek hi. Amate in ama Kumpipa kik suaksak tu hi!” ci hi.

⁹Tua hi a, tua ni pan kipan sia ama in David eang a, muang khial vilvel hi.

¹⁰A khuavak ni ciang Pathian kung pan hong kipuak thaa ngilo khat in Saul hong uk a, a inn sungah Saul sia a thin amh te bangin kitom ngawp hi. Nisim in a tum ngei bangin David sia tengtong tum a, tuaciang Saul sia tei khat toai hi.

¹¹“Pang taw cipin ama khaw let tong,” ci in Saul in ama le ama kici a, ama in a tei taw nii vei khaw hi, ahihang David in a sim ma in pial thei hi.

¹²Saul in David sia kiita hi, banghangziam cile Topa sia David taw omkhawm a, ama nusia hi.

¹³Tua ahikom Saul in ama sia kuankhiasak a, ngalkap tulkhath uk tu in koi hi. David in a mite sia ngalphual sungah lampui a,

¹⁴tuaciang a sepna theampo ah zawna nga hi, banghangziam ci le Topa in ama panpui hi.

¹⁵David ii zawnate Saul in ciamtee a, kiita seseam hi.

¹⁶Ahihang Israel le Judah ngam a mihingte theampo in David it uh hi, banghangziam cile zawna a nei lampui pha khat ahi hi.

David in Saul ii Tanu Tenpui

¹⁷Saul in David munah, “Hi sungah ka tanu u zaw Merab om hi. Hanna le thumaanna taw keima ii na, nong sepsak a, Topa ii ngal na dosak le ama sia na zi tu in hong pia tu khi hi,” ci hi. (Saul ii ngaisutna bulpi sia ama ii David a thalup lawlawm sangin Philistinete in thatlum le a ci nopna hi.)

¹⁸David in zo a, “Kei po akua hi na khi ziam? tuabangin kumpipa ii maakpa ka sua natu ka baangkua bang hi thong na ziam?” ci hi.



¹⁹Ahihang David atu Merab a kithaak tu hun hong thet peetma ciang Meholah pan Adriel a kici pasal khat kipia zaw hi.

²⁰Saul ii tanu Michal in David it a, hi thu Saul in a zaak ciang ama lungkim hi.

²¹Ama le ama hi bangin kici hi, “Michal sia David ka pia tu a; ama thaang ka sia natu ka tanu zangh tu khi hi, tuasia ciang Philistine in ama thatlum tu hi,” ci hi. Tua ahikom Saul in David munah a nii veina in, “Nang sia ka maakpa hi tu ni hi,” ci hi.

²²Ama in ngalkapmaangte munah son kusak a, hi bangin cisak uh hi. “Kumpipa sia nang tungah lungkim mama a, tuaciang a ulian dangte zongh in nang dik hong sa mama hi; tu laitak sia a tanu na tenpui tu hun pha hi,” ci uh hi.

²³Tua ahikom amate in David munah tu a teng son uh a, tuaciang ama in, “Bangma a sim thamman ngawl mizawng kei bang atu kumpipa ii maakpa sua tu sia ki upat vawtna lian mama hi,” ci in zo hi.

²⁴Uliante in Saul ii munah David ii pau teng a son uh ciang,

²⁵Saul in amate munah, “Kumpipa ii nang tung panin hong nget tu mo manh sia, a ngalte tung phulam natu in, a thi sa Philistine vunteap zakhat bek hi,” cisak hi. (Hi sia Philistine in David a thalup thei natu Saul ii ngealna ahi hi.)

²⁶Saul ii uliante in Saul ii pauna teng David tungah son a, David sia kumpipa ii maakpa hi tu sia a lungdam hi. Kiten natu ni a kisee maa in,

²⁷David le a mite pai in Philistine zanii thatlum uh hi. Ama in kumpipa mai ah a vunteap te paipui in a maakpa a sua natu a mai pan sim hi. Tua ahikom Saul in a tanu Michal sia David taw kiteang tu in a piak kul hi.

²⁸Saul in thiang takin a telna pan, Topa sia David taw omkhawm a, zongh a tanu Michal in David it ci in phawk hi.

²⁹Tua ahikom ama in David kiita sesem a, a nuntak lai teng ngal in nei hi.



³⁰Philistine ngalkap honte hong pai bul a, hong sim bul hi, ahihang kidona theampo ah David sia Saul ii ngalkap mang dangte sangin zawna nei zaw hi. Ta sia taw kizui in David sia hong minthang mama hi.

Samuel Khatna 19

Saul in David Vawtsia

¹Saul in a tapa Jonathan le a uliante theampo tungah David thatlum tu in a ngealna son hi. Ahihang Jonathan in David it mama ahikom,

²ama munah, “Ka pa in nang hong thalup natu hanciam hi. Zingsang ciangin kidawm in; kuama heak ngawl na mun khat ah buu in a, tua munah om top in.

³Na bukna lo sungah ka pa kungah kong ding tu a, nangma ii thu kong sonsak tu hi. Ka phaw thu a thak a om le kong zasak tu hi,” ci hi.

⁴Jonathan in David pokna Saul tungah son hi. “Topa awng, na naseam pa David ii tungah ngamtat sia taa tha heak in. Ama in nang tungah a pha ngawl ngamta ngei ngawl hi; tuabang hi kana teng ci bua hing, a sep a vawt theampo nangma atu hu na lianpi hi siat hi.

⁵Goliath a thalup lai zongh in, ama ii nuntakna a luang khaam a, tuaciang Topa in Israel te atu zawna lianpi nga hi. Tua na mu ciangin nangma zongh na lungdam hi. Tua ahile banghangin, mawna nei ngawl khat tungah tatsiatna vawt nuamin, bangma thu om ngawlin David thatlum nuam ni ziam?” ci hi.

⁶Jonathan ii pauna teng in Saul ii thin hong suu a, David that ngawl tu ci in Topa ii min taw kiciamna vawt hi.

⁷Tua ahikom Jonathan in David sam a, a thu theampo son hi; tuaciang ama Saul kungah paipui in a sep ngei bangin David in kumpipa na seam hi.

⁸Philistine te taw ngal hong piang kik hi. David in amate sim a, nasia takin zo ahikom, amate taikeak uh hi.



⁹Ni khat ni in Topa kung pan thaa ngilo khat in Saul hong uk hi. Ama sia a inn sungah tei khat toai in to a, tuaciang David sia tengtong tumin tua munah om hi.

¹⁰Saul in David sia pang taw cipin a tei taw khaw hi, ahihang David in pial in a tei sia pang tungah po hi. David tua mun pan tai in suakta hi.

¹¹Tau ni zan ma in Saul in pasal pawlkhat David inn encik tu in sawl a, zingsang ciang ama thalup tu in thupia hi. David ii zi Michal in a kidop natu in son khol a, “Zan ciangin na tai buale zingsang ciang thi tu ni hi,” ci hi.

¹²A zi in khelki panin khiasuk a, ama tai in suakta hi.

¹³Tua zawkciang Michal in a innkuan ii biak milim sia la in, lupna tungah a sial zawkciang, kealmul taw a kivawt lukham khamsak in sitna khat taw siin hi.

¹⁴Saul ii mihingte in David that tu in hong pai uh ciang, Michal in David sia a cina hi ci hi.

¹⁵Ahihang Saul in paisak kik a, amate mama ii David a etcian natu thupia hi. “A lupna taw hong paipui tavun, keima in ama that tu khi hi,” ci in thupia hi.

¹⁶Amate inn sungah pai kik a, lupna tungah innkuan ii biak milim sia kealmul lukham khamin om mu uh hi.

¹⁷Saul in Michal munah, “Banghang hi bangin kei hong theamin, ka ngalpa suaktasak ni ziam,” ci in dongh hi. Ama in, “A suatak natu hu ba leng, kei kong that tu hong ci hi,” ci in zo hi.

¹⁸David suakta in Ramah ngam, Samuel kungah pai in ama tungah Saul ii ama a vawtna te a vekpi in son hi. Tua zawkciang ama le Samuel sia Naioth ah pai in tua munah taam uh hi.

¹⁹David sia Ramah ngam Naioth ah om hi ci in Saul tungah kison hi,

²⁰tua ahikom ama man tu in mihing pawlkhat paisak hi. Amate in Samuel ii lampuina taw kamsang pawl khat laamin au in a om mu uh hi. Tuasia ciang Pathian ii thaa in amate uk a, amate zongh laam tu au tu in hong kipan uh hi.



²¹Saul in hi thu a zaak ciang kamtai pawlkhat pai thuasak a, amate zongh laam tu au tu in hong kipan uh hi. Ama in kamtai a thum vei na paisak a, amate zongh tuabangma in ngamta uh hi.

²²Tuaciang ama mama Ramah ah pai tu in kipan hi. Secu ah tuikhuk lian khat ii hui hong thet ciangin Samuel le David koi sungah om ziam, ci in dongh a, amate Naiioth ah om hi ci in kison hi.

²³Ama tuak sangah a pai ciang Pathian ii thaa in ama zongh uk a, Naiioth dong lam tawntungin laamin au hi.

²⁴Ama in Samuel kungah a puan suutin laam in au a, a pumngwak in tua ni le tua zan lum hi. (Hisia panin, “Saul ngangawn kamsang suak zo ziam?” ci paunak hong pianna ahi hi.)

Samuel Khatna 20

Jonathan in David Hu

¹Tua zawkciang Ramah ngam Naiioth panin David tai a, Jonathan kung zuan hi. Ama in, “Kei a bang vawt na khi ziam? Mawna bang vawt khi ziam? Na pa tungah bang tat khialna nei a, banghangin kei hong that nuam liang ziam?” ci hi.

²Jonathan in, “Pathian in na thi tu sia oai ngawl tu hi! Thupi kale thupi ta buale, ka pa in a sep a vawt theampo kei kung pan hong seal ngei ngawl tu hi. Tuabangma hi ngawl ziam?” ci in zo hi.

³Ahizong David in, “Kei bangza in hong it na hi sia na pa in tel mama hi, tuaciang na pa in a ngealna sia nang hong heaksak ngawl natu khensat zo hi, banghangziam ci le nasia takin na thin hong suu tu hi. A nungta Topa taw kiciam in kong son nop pan, kei sia ka thi natu kal khat bek in samh hi,” ci in zo hi.

⁴Jonathan in, “Nangma uk babangin seam tu khi hi,” ci hi.

⁵David in, “Zing ciang sia Tha Thak Poai ni hi. Tuaciang kei sia kumpipa taw an ne khawm tu in hong kituat hi. Ahizong nangma in pha maw na sa bana le lo sungah pai in thai nitak dong buu tu khi hi.



⁶Na pa in sabuai ah ka to ngawl hunlam hong phawk le Bethlehem khua ah ka innkuan bup in kumcin sangaw biakpiakna vawt tu in nangma tungah inn ah manlang takin ka cia natu hong ngen khi hi ci in na son in.

⁷Ama in, 'Pha hi,' a ci le kei sia suakta tu khi hi; ahihang ama sia hong thin uuk le kei hong susia tu in khensat ahi sia na he tu hi.

⁸Nong hesuakna in ka tungah thuthiamna khat hong vawt tan a, biakna taw kisai a thiangtho kiciamna kei tungah nong vawt sia na kho let in. Ahizong keima mama maw nei ka hile nangma in hong thatlum tan. Ki thalup tu po banghangin na pa kungah kipaipui kul na ziam?" ci in zo hi.

⁹Jonathan in, "Tuabangte ngaisut zongin nei vet heak in. Ka pa in nang hong susia nuam ci in a kho in he leng nang tungah hong son ngawl tu khi ziam?" ci in zo hi.

¹⁰Tuaciang David in, "Tua ahile na pa in thin uuk awsua taw hong zo le hong zo ngawl sia a kua in kei tungah hong zasak, na tu ziam?" ci in dongh hi.

¹¹Jonathan in, "Lo sungah pai ka tawng," ci in zo hi. Tuabangin amate pai uh a,

¹²Jonathan in David munah ci hi, "Israel te ii TopaPathian sia ih tetti hi hen! Zing ciang, hi hun le a zing kik ciangin ka pa kong dongh tu hi. Ama ii nang hong ngaisut zia sia a pha le kong zasak tu hi.

¹³Ama in nang, suksiat hong sawm a, tua thu kong son bua ii, na suatak natu kong hesak bua le Topa in kei hong vellum taken. Topa sia ka pa taw a omkhop bangin nang taw zong hong omkhawm taken!

¹⁴A nungta in ka om ahile biakna taw kisai a thiangtho na kamciam te keam in a, kei tungah hong thumaan tan; ahihang ka thi le,

¹⁵tua thumaanna te ka innkuanpuite tungah a tawntungin na kholet in. Tuaciangin Topa in na ngalte a vekpi in a maaimot zawkciang,

¹⁶ei ii ih kiciamna khat le khat tungah ih kivawt sia tatsat ngei heak hen. Tuabangin a tat le Pathian in nang daan hong pia tu hi."



- ¹⁷Khat vei ma Jonathan in ama a it natu David tungah kamciam ngen hi, banghangziam cile Jonathan in David sia ama le ama a ki it za in it hi.
- ¹⁸Tuaciang Jonathan in, “Zing ciang sia Tha Thak Poai ahi ciang an neakna ah om buale te na om ngawl hunlam hong kician tu hi.
- ¹⁹Thai ciangin na om ngawl hunlam nasia seseam in kician tu hi; tua ahikom tunung a na bukna suangtumpui te ii nungah na buu in.
- ²⁰Tua suangtum sia phutuun bangin thaltang tang thum taw kong kap tu hi.
- ²¹Tuaciang ka naseampa munah tua thaltangte zongin ka sawl tu hi. Tuaciang ama munah, ‘En in, thaltangte nangma ii hi sangah om hi, la in,’ ka ci le nangma suakta a, hong pusuak thei tu ni hi. A nungta Topa taw ka kician hi, na lau tu bangma om ngawl tu hi.
- ²²Ahihang ama munah, ‘Thaltangte nangma ii langkhat ah om hi,’ ka ci le na tai in, banghangziam ci le Topa in nang hong paikhiasak ahi tu hi.
- ²³Eima khat le khat kamciam ih vawtte taw kisai in, Topain ih kepcing tawtung tu in hong hu tu hi,” ci hi.
- ²⁴Tua ahikom David sia lo sungah buu hi. Tha Thak Poai ah Saul Kumpipa anneakna ah hong pai a,
- ²⁵tuaciang ama ii a to ngeina mun pang hui ah to hi. Abner sia ama kungah to a, Jonathan sia amate taw kimaingat in to hi. David ii tona sia awng thong hi,
- ²⁶ahihang tua ni in Saul in bangma son ngawl hi, banghangziam cile, “Bang khat po tat hi tha tu hi, tuaciang a zeksa ngeina taw kisai in thiang ngawl po hi thei tu hi,” ci in ama in ngaisun hi.
- ²⁷A khuavak ni, Tha Thak Poai zawkciang, David ii tona sia awngthong lai a, tuaciang Saul in Jonathan dongh hi. “Banghangin David in zei ni zongh, tuni zongh an ne tu in hong pai ngawl ziam?”
- ²⁸Jonathan in, “Bethlehem khua ah a pai natu in kei munah hong ngen hi.



²⁹Ama in, ‘Hong ciasak tan, banghangziam cile ka innkuan in sangaw biakpiakna poai khuapi sungah vawt tu khu hi, tuaciang ka suapuite in tua munah om tu in thu hong pia hi. Tua ahikom ka ngualtamh na hi le hong paisak tan a, ka mealheakte taw hong kimusak tan,’ hong ci a, tua hu in ama sia sabuai ah om thei ngawl hi,” ci hi.

³⁰Saul sia Jonathan tungah a thin so a, “Nang lamlak ta awng! Tu in David sangah pang na hi sia hong tel khi hi, tuabangin nangma le na nu mindaisak ni hi!

³¹David ii nuntak lai teng nang sia bangma hun kumpipa suak ngei ngawl tu na hi sia na he ziam? Tu in pai tan a, hi sungah ama hong paipui tan — ama a thi kul tu hi!” ci hi.

³²Jonathan in, “Banghang thi liang tu ziam? Ama in bang sep khial nei ziam?” ci in zokik hi.

³³Tuasia ciang, Saul in Jonathan sia tei taw that tu in khaw hi, tuaciang Jonathan in David that nuam takpi ahi hunlam tel hi.

³⁴Jonathan sia sabuai panin thin so in hong dingto a, tua ni bup bangma ne ngawl hi — Tha Thak Poai a ni nii ni ahi hi. David huvau in ama sia nasia takin a thin nuam ngawl hi, banghangziam cile Saul in ama sia nunau hi.

³⁵A zing kik ciangin a kiciam sa uh bangma Jonathan in David taw kisi tu in lo sungah pai hi. Ama in patang no khat pai pui a,

³⁶tuaciang ama munah, “Thaltang ka kaa tu sia delin tai in,” ci hi. Patang no sia hong tai a, Jonathan in a thaltang sia patang ii mai ah a theng tu in kap hi.

³⁷Patang pa in a thaltang tuhna a thet ciang oksan a, “Thaltang sia a khuala zawna ah tu hi!

³⁸Tua munah ding top heak in! Manlang in!” ci hi. Patang no sia thaltang tawmin a Topa kungah heak kik hi,

³⁹a Topa pau sia a khiakna a tel bua hi; Jonathan le David bek in he uh hi.



⁴⁰Jonathan in patangno sia a ngalhiam pia a, khuapi sungah ciapui in sawl hi.

⁴¹Patangno sia ii nusiawt zawkciang, David sia suangtum hon sung panin hong dingto a, hong khupdin in a maitang le lei kisi in thum vei hong kun hi. Jonathan le ama sia khat le khat kinamh in kap khawm uh hi; David ii khuangai na sia Jonathan aa sangin nasia zaw lai hi.

⁴²Tuasia ciang Jonathan in David ii munah, “Pathian nang taw hong om taken. Topa in nang le kei, nang ii suan le paalte le kei aa te sia khat le khat tungah biakna taw kisai a thiangtho kamciam ih vawt sa te hong keamcingsak thei taken,” ci hi. Tua zawkciang David in nusia a, Jonathan sia khuapi ah cia kik hi.

Samuel Khatna 21

Saul kung pan David Tai

¹Nob khua ah a om thiampi Ahimelech kungah David pai hi. Ahimelech a liing sa in ama muak tu in pai a, “Nangma nguakin hi sungah banghang hong pai ni ziam?” ci in dongh hi.

²“Kumpipa vai taw kei hi sungah kong pai hi,” ci in David in zo hi. “Ama in sep tu hong piak te kuama ka heaksak ngawl tu in hong sawl hi. Ka mite ahile mun khat ah kisiktua tu in thu ka pia hi.

³Tua ahile, tu in nguai an bang teng nei ni ziam? Anluum nga ahibuale zong a dang na nei khat po hong pia tan!” ci hi.

⁴Thiampipa in, “Anluum thawthong nei ngawl khi hi, a kithiansua sa anluum bek nei khi hi; na mite in tu nai sungin numei taw a omkhawm bana uh le tuate la thei ni hi,” ci hi.

⁵David in, “Om khawm ngawl het hi, ka mite sia sawlna thawthong te a sep bek zongh a zeksa ngeina taw kisai in thiang hi, tua ahile a thupi sawlna ah ka pai uh ciang thiang seseam ngawl tu khu ziam?,” ci in zo hi.

⁶Tua ahikom thiampipa in David sia a thiangtho anluumte pia hi, banghangziam cile anluum a nei sunte sia Pathian a kipia sa hi a, sabuai thiang panin anluum thak taw a kilaih sa te ahi hi.



⁷(Saul ii tuucing ukpa Doeg, Edom pan a sia, tua ni in tua munah biakna vai a khuangkimsak tu in na om hi.)

⁸David in Ahimelech munah, “Tei ahizong namsau ahizong kei nong piak tu na nei ziam? Kumpipa in manlang tatak in ka pai natu thu hong pia ahikom ka namsau ahizong ngalhiam dang ahizong laak tu hun ka nei nawn bua hi,” ci hi.

⁹Ahimelech in zokik a, “Elah Kuam sungah Philistinete Goliath na thalup sia ii namsau bek nei khi hi; ephod sia ii nungah puan taw kituun in om hi. Na dei le la in — hi sungah a om ngalhiam sia tuasia bekma hi,” ci hi. David in, “Hong pia tan, tuasia sangin a phazaw namsau dang koima ah om ngawl hi,” ci hi..

¹⁰Tuabangin David in Saul kung pan tai in, tua mun zongh nusia in, Gath ah kumpipa Achish kung zuan hi.

¹¹Kumpipa ii uliante in, “Hisia David hi kana ngawl ziam? Ama ii ngam sungah kumpipa hi ngawl ziam? Numeite a lap kawm in la asak uh, ‘Saul in a tul in that a, David in a tulsawm in that hi’ a ci sia hi ngawl ziam?” ci uh hi.

¹²Amate ii kammalte in David thin sung nasia takin hong suu hi, tuaciang ama in Kumpipa Achish sia kiita mama hi.

¹³Tua ahikom amate kiim le paam ah a om uh ciang David sia a thin ki amhsakin, amate in ama a letcip nop uh ciang, mihing mawmaw te bangin kithoi a, khuapi kongpi tung piik zazan in, a khamul tung khawng ah a cil kaaisak dimdum hi.

¹⁴Tua ahikom Achish in uliante munah, “En vun! Mihing pa sia mawmaw hi ngawl ziam? Banghang kei kungah hong paipui nu ziam?”

¹⁵Mihing mawmaw a kicingin nei zo hong sa ngawl nu ziam? Ka baangkua sungah a mawmawt huai ngamtatna te taw hong nawnkaisak tu in banghang midang khat hong paipui nu ziam?” ci hi.

Samuel Khatna 22

Thiampite Kithalupna



¹David sia Gath khuapi panin hong tai in Adullam khua mawk lianghawng khat hong zuan hi. A suapuite le a innkuanpuite in tua thu a zaak ciang ama pawm uh hi.

²Mihing a ki nengniamte, leiba neite le lungkim ngawl na nei pawpo in ama kungah pai uh a, a vekpi a kingawm in zali bang pha in, ama sia amate lampui suak hi.

³David in tua mun panin Mizpah, Moab ngam Mizpah ah pai a, Moab kumpipa munah, “Nong hesuakna in, Pathian in kei atu bang hong vawtsak tu ci ka heak dong, ka pa le ka nu sia nang kungah na omsak in,” ci hi.

⁴Tua hikom David in a pa le a nu sia Moab kumpipa taw nusia a, David ii lianghawng sung a ten lai theampo amate zongh tua munah om uh hi.

⁵Tuaciang kamsang Gad sia David kungah hong pai a, “Hi sungah om heak in, Judah ngam ah tu mama in pai in,” ci hi. Tua ahikom David in tua mun nusia in Hereth ngam duisung zuan hi.

⁶Ni khat ni in Saul sia Gibeah ah om a, mualtung khat makeang kung nuai ah tei toai in, a uliante ama ii kiim ah dingin om hi. David le a mite sia kimu zo hi ci in ama tungah thu kiko a,

⁷tuaciang ama in a uliante munah, “Benjamin mite awng, ngai vun! David in no sia sapit huan khawng hong pia in, ama ngalkap hon sungah ulian, zalian hong pia tu in muangmaw nu ziam?

⁸Tuasia hu in kei sia hong sawm na hi uh ziam? Ka tapa in David taw a kipawl hunlam no sung pan khat zongh in kei tungah hong son ngawl nu hi. Kuama in kei hong thin nuam maw ngawlin, tua ahibuale zong ka mihingte sung pan khat ahi David in, tu hun tatak ma in kei hong thalup natu hun pha zong tawntung ahi hunlam le ka tapa in ama hanthawn ahi hunlam hong son ngawl nu hi,” ci hi.

⁹Doeg sia Saul ii uliante taw tua munah ding a, ama in, “Nob khua ah Ahitub ii tapa Ahimelech thiampipa kungah David a pai mu khi hi.



¹⁰David in bang teng vawt kul tu ziam ci in Ahimelech in Topadongh a, tua zawkciang David sia an tawm pia in, Philistine Goliath ii namsau sia pia hi,” ci in son hi.

¹¹Kumpipa Saul in thiampi Ahimelech le Nob ah thiampite ahi a bete samsak a,

¹²Saul in Ahimelech munah, “Ahimelech awng, hong ngai tan,” ci hi. Ama in, “Na naseampa khi hi, Topa,” ci in zo hi.

¹³Saul in, “Nang le David in banghangin kei hong sawm nu ziam? Banghangin ama an tawm le namsau namsau pia in, Pathian munah ama atu thu doksak ni ziam? Tu in ama in kei hong langpan a, kei hong thalup natu hun pha a nga tu ngakin om hi!” ci in dongh hi.

¹⁴Ahimelech in, “David sia na uliante sung pan nang tungah a thumaan bel pa hi. Ama sia na maakpa, nangma hong cingte ii ngalkap mang pa hi a, tuaciang kumpipa inn sungah a om theampo in ama zakta uh hi.

¹⁵Hi hi, ama atu Pathian tungah thu dongh peu khi hi, ahizong hi sia a masa phit bel hi ngawl hi. Nang hong thasawm na taw kisai in, kumpipa in kei ka innkuan sungah a dang khat pawpo ahizong maw hong suan thei ngawl tu ni hi. Hi thu ah kei bangma he ngawl khi hi,” ci in zo hi.

¹⁶Kumpipa in, “Ahimelech awng, nang le na bete theampo na thi uh kul tu hi,” ci hi.

¹⁷Tua zawkciang ama a cing a kungah a dingte munah, “Topa ii thiampite that vun! Amate in David taw kikum ku uh a, ama a taimang zongh he napi hong son ngawl hi,” ci hi. Ahihang amate in Topa ii thiampite ii tungah a khut uh a tu nuam bua hi.

¹⁸Tua ahikom Saul in Doeg munah, “Nangma that in!” ci a, Doeg in thatlum siat hi. Tua ni in ephod a silh thei tu thu nei sa thiampi sawmliat le nga that hi.



¹⁹Saul in thiampite khuapi Nob sungah a teangte theampo thalup natu thu pia a: pasal, numei, patang le nausen, khuite, laate le tuute — tuate theampo that uh hi.

²⁰Abiathar a kici Ahimelech ii tapa khat suakta a, ama in David zuanin pawm hi.

²¹Ama in Saul in Topa ii thiampi theampo a thalup son hi.

²²David in ama tungah, “Tua ni in Doeg tua munah ka mu ciang, ama in Saul tungah son vangiat tu hi ci in ka heak ma hi peu hi. Tua ahikom, na bete theampo ii thina sia keima hang ahi hi.

²³Keima kungah hong om tan a, lau heak in. Saul in nang le kei sia hong thatlum nuam hi, ahihang nang sia kei taw suakta tu ni hi,” ci hi.

Samuel Khatna 23

David in Keilah Khua Suatak

¹Philistinete in Keilah khua sim a, a anthak laak uh te nguksak hi, ci in David in za hi.

²Tua ahikom ama in Topa dongh a, “Philistinete sim tu in ka kuan tu ziam?” ci hi. “Hi hi, sim in a, Keilah suatak in,” ci in Topa in zo hi.

³Ahihang David ii mihingte in ama munah, “Hi lai Judah sung zongh ah kiitak tu a khom om hi; Keilah ah pai in Philistinete sim leang pha ngawl seseam tu hi,” ci uh hi.

⁴Tua ahikom David in Topadongh kik a, tuaciang Topa in, “Pai in a, Keilah sim tan, banghangziam cile Philistinete ii tungah zawna kong pia tu hi,” ci hi.

⁵Tua ahikom David le a mite Keilah khua ah kuanin, Philistinete sim uh hi; amate in tam ma that uh a, a ngannote laaksak uh hi. Tuabangin David in tua khuapi suatak hi.

⁶Ahimelech ii tapa Abiathar suakta in Keilah khua ah David a pop ciang ephod keng hi.



⁷David sia Keilah zuan hi ci in Saul tungah a kison ciang, “Pathian in David sia keima khut sungah hong pia zo hi. David in ama le ama sia luphung taw ki uum, kongpite taw ngal nanna te ii sung sangah thaang kisia hi,” ci hi.

⁸Tua ahikom Saul in a ngalkapte samin, Keilah ah David le a mite uumci sawm hi.

⁹Saul in amate sim tu in ngeal hi ci in David in a zaak ciang, thiampi Abiathar munah, “Ephod sia hi munah hong paipui tavun,” ci hi.

¹⁰Tua zawkciang David in, “Topa Israel te ii Pathian awng, kei na naseam pa ii hu in, Saul sia Keilah ah hong pai in suksiat sawm hi ci in za khi hi.

¹¹Keilah khua mite in Saul khut sungah keima hong aap tu ziam? Ka zaak bang in Saul hong pai takpi tu ziam? Topa Israel te ii Pathian awng, hong zo tan, kong ngen hi,” ci hi. Topa in zo a, “Saul hong pai tu hi,” ci hi.

¹²“Tuaciang Keilah khua mite in kei le ka mite Saul khut sungah hong aap tu ziam?” ci in David in dongh kik hi. “Hong aap tu hi,” ci in Topa in zo hi.

¹³Tua ahikom David le a mite zaluk khawng in Keilah thakhat thu in nusia a, paisuak uh hi. Saul in David suakta hi ci in a zaak ciang a ngealna kheal hi.

David Mualtung Ngamah Om

¹⁴Ziph ngam duisung mualtung ngamah David sia buu in om hi. Saul in zong tawntung a, ahihang Pathian in David sia ama ii khut sungah a aap bua hi.

¹⁵David in Saul sia ama thatlum nuamin kuankhia ci in mu hi. David sia Ziph khua paam duisung Horesh ah om hi.

¹⁶Jonathan ama ii kungah pai in Pathian ii sungsiatna ama ii tungah om tu hi ci in hanthotna pia a,

¹⁷ama munah, “Lau heak in, ka pa Saul in nang bangma hong law zo ngawl tu hi. Ama in nang sia Israel te ii kumpipa tu hi a, nang zom a kei sia a zalian kik bel ih hi tu sia ama in tel mama hi,” ci hi.

¹⁸Amate nii in kilawmtakna biakna taw kisai a thiangtho kamciam vawt ku a, David sia Horesh ah taamin, Jonathan inn ah cia hi.



¹⁹Ziph panin mihing pawlkhat Gibeah ah Saul ii kungah hong pai uh a, “David sia Judah duisung ii thangsang koma ii Horesh ngamkhen, Hachilah Mualvum ah buu hi.

²⁰Kumpipa awng, ama bangza in man nuam na hi sia hong he khu hi; tua ahikom koma ii ngamkhen sungah hong pai tan, na mat thei natu koma in vawt hamtang tu khu hi,” ci uh hi.

²¹Saul in zo a, “Kei tungah nong dik uh hu in, Topa in thupha hong pia taken!

²²Pai tavun a, khat vei ma a kipealkhial ngawl natu in hong seam tavun; ama koisung tatak ah om ziam hong kan tavun a, akua taw veu kimu ziam a maanin hong tel tavun. Ama sia kukal mama hi ci in za khi hi.

²³A bukna mun tatak hong zong tavun a, kei kungah tangtan in thu hong puak nanaksak tavun. Tuasia ciang noma taw kong pai khawm tu a, ama ngamkhen sungah a om lai le Judah ngam buppi zon a kul zong ka vai tu hi,” ci hi.

²⁴Tua ahikom amate in pai a, Saul ii mai Ziph ah heak kik uh hi. David le a mite sia Judah ngam thangsang duisung a ngamkhing kuam, Maon dui sungah om uh hi.

²⁵Saul le a mihingte in David zong tu in hong pai khia uh a, ahizong ama in a thu za in, Maon ngamsung mual tungah taam hi. Saul in hi thu a zaak ciang David zuizen hi.

²⁶Saul le a mite sia mualpangh lang ah om uh a, a lang pangh a om David le a mite taw mual in da hi. Saul ii mite in amate man tu in neakin, man dektak uh a, amate sia Saul ii kung panin manlang takin paikhia uh hi.

²⁷Tua laitak lianin kamtai khat hong pai a, Saul munah, “Philistinete in ih ngam hong sim hi, thakhat thu in hong heak kik tan,” kici uh hi.

²⁸Tua ahikom Saul in David a zuizet sia tawp in, Philistinete do tu in kuan hi. Tua hu in tua mun sia Kidoina Mual kici hi.

²⁹David in tua mun nusia a pai in Engedi ngamkhen sungah buu in om hi.



Samuel Khatna 24

David in Saul ii Nuntakna Khoaikhe

¹Philistinete a simna pan Saul hong cia kik ciang, Saul munah David sia Engedi dui sungah om hi ci in kison hi.

²Saul in Israel ngamsung ngalkap pha bel tulthum la in David le a mite zong tu in Ngam Keal Suangpi a kicina ii nisuana sangah hong pai uh hi.

³Ama in tuukhawk taw a kinai lampi hui lianghawng khat ah awnghaw tu in hong tum hi. Tua lianghawng sia David le a mihingte ii a tawngah a bukna lianghawng a na hi luilam hi.

⁴Amate in ama munah, “Hisia nangma ii hunpha hi! Topa in na ngalte nangma ii khut sungah kong koi tu hi hong ci hi, ama tungah na law nop po law thei tu ni hi,” ci uh hi. David bokvak in pai a, Saul ii heak ngawl lan in a puantual mong bek khat attansak hi.

⁵Ahihang tuasia hun lai takin David ii thin hong nuam ngawl a,

⁶ama in a mite tungah, “Topa in ama ii kumpipa tu in a teal ka Topa tungah siatna ka vawt ngawl natu hong keamcing taken! Ama sia tawm zongh ka suksiat thaak ngawl tu kul hi, banghangziam cile ama sia Topa ii teal sa kumpipa ahi hi!” ci hi.

⁷Tua ahikom David in a mite tungah Saul a sim ngawl natu thin zo takin son hi. Saul dingto a, lianghawng nusia in ama pai natu ah pai tu in kipan hi.

⁸Tua zawkciang David pusuakin a nung panin zui a, “Kumpipa awng!” ci in ama biakpui hi, Saul hong kiheak a, tuaciang David lei ah bok suk in zatak a piak zawkciang,

⁹ama in, “Banghangin nang vawtsiat tu hanciam hi ci a, thu hong son mihingte ngai ni ziam?”

¹⁰Nangma tatak ma ii na mu tu a, tu ma hiat tatak in Topa in nang sia keima ii kong vawt nop po a kong vawt thei tu in hong pia hi. Ka mite pawl khat in thatlum in hong sawl hi, ahihang khuangai huai kong sa a, tawm zongh



bangma law ngawl tu khi hi ka ci hi, banghangziam cile nang sia Topa ii kumpipa tu in hong tealkhia sa na hi hi.

¹¹Ka pa awng, na puatual mong bek ka khut sungah ka toai sia en in! Hong thatlum thei tu khi hi, tuabang hi ngawlin hi sia at keak zaw khi hi. Hisia in nang lang khat pan ngal kong thaw nop ngawl na le nang bangma kong law nop ngawl na nasia takin hong lak tu hi. Nang tungah bangma hong khial ngawl ka hihang that nuam in hong vaizui ni hi.

¹²Topa in ei nii akua maw hi ziam thu hong khen taken! Kei ii tungah nong ngamtatna te hu in Topa in nang daan hong pia taken, banghangziam cile nang sia bangma hong law ngawl tu khi hi.

¹³Paunak khat, ‘Siatna sia misiata bek in vawt hi’ a ci sia he ni hi. Tua ahikom nang sia bangma hong law ngawl tu khi hi.

¹⁴Israel kumpipa ii a thatlum nop sia en vun! A del thapai sia bang ziam en vun! Ui thi sa khat, uili no khat hi lel hi!

¹⁵Ei ngeal akua maw hi ziam? Topa in thu hong khen tu hi. Hi thu Topa in hong en cian taken, kei hong hung taken, nang khut sung pan suatak hong pia taken,” ci hi.

¹⁶David ii pau tu teng a pau zawkciang, Saul in, “Nangma tatak ma ni ziam, ka ta David awng?” ci hi. Tuaciang ama kap tu in hong kipan hi.

¹⁷Tua zawkciang David munah, “Nangma maan a kei khial khi hi. kei ii nang tungah khialna ta za kong nei kawm panin, nang sia kei tungah hong dik mama ni hi,

¹⁸Tu ni in nang sia kei tungah bangza in hong dik ni ziam ci in hong lak zo ni hi, banghangziam cile Topa in na khut sungah kei hong aap hi kale nong thatlum bua hi.

¹⁹Mihing khat in a ngalpa man zo kasap a thasua kik hun bangtan vei om ngei ziam? Tu ni in kei tungah nong vawt teng hu in Topa in nang thupha hong pia taken!



²⁰Tu in ka up tatak thu sia bang ziam cile nang sia Israel te kumpipa suak tu a, na ukna na kumpi ngam sia nangma ii ukna nuai ah kizom suak tu hi.

²¹Ahihang ka min le ka baangkua ii min a kimangil bit ngawl natu in, ka suan ka paalte nong khoaikheetsak natu Topa min taw kamciam hong pia tan,” ci hi.

²²David in tuabang ka hi tu hi ci in kamciam pia hi. Tuaciang Saul a inn ah cia kikin, David le a mite sia a bukna mun zuan kik uh hi.

Samuel Khatna 25

Samuel ii Thina

¹Samuel thi a, Israel mibup hong pai in, ama hu in khuangai tek uh hi. Tua zawkciang ama teenna Ramah ah phum uh hi.

David le Abigail

Tua zawkciang Paran dui sungah David pai hi.

²⁻³Tua munah Caleb ii suan Nabal a ci pasal khat om a, ama sia Maon khuapi pan hi. Carmel khuapi ii hui ah leitangh nei hi. Ama sia a hau mama pa khat hi a, tuu tulthum le keal tulkhat nei hi. A zi Abigail sia a meal hoi a ciim hi, ahihang a pasal sia ama tu bek a ngaisun a thin tom khat hi. Carmel khua ah Nabal in a tuute mulmeet in om a,

⁴tuaciang dui sungah a om David in ama thu za hi,

⁵tua ahikom ama in tangval sawm paisak a, Carmel ah Nabal zongsak in, nuksetna kam thaak hi.

⁶Ama in Nabal tungah amate pau natu teng hil hi, “David in nuksetna kam hong thaak hi, ngualtamh pa awng, nangma atu le na innkuan bup atu le na neisa theampo atu in, a pha bel deisakna hong zasak hi.

⁷Ama in nang sia tuumul meetin om ci hong za a, na tuucingte zongh ko taw omkhawmin, bangma kong suksiatsak ngawl uh sia na heak tu ka dei hi. Carmel ah a om sung tawntung amate ii neisa na khat zongh kinguksak ngei ngawl hi.



⁸Amate dongh le te ahi bangin hong son tu hi. Poai ni khat a hong pai luilam khu hi, tua ahiciang pha takin zin hong do tan. Nong piak thei po ko na naseamte le na it na lawmpa David hong pia tan,” cisak hi.

⁹David ii mihingte in hi kammalte sia David ii min taw Nabal tungah puak uh hi. Tua zawkciang amate in tua munah ngak uh a,

¹⁰tuaciang Nabal in a khak bel ciang zo in, “David ziam? Akua David ziam? Za zongh za ngei bong! Ih ngam sung sia sila tai khawng taw tu laitak kidim hi!

¹¹Ka an le ka tui la in, ka tuumul meette atu ngan ka ngawte taw a koisung pan hong pai ziam ci ka heak ngawl mite pia ngawl het tu khi hi,” ci hi.

¹²David ii mihingte in heak kikin Nabal ii pau teng David tungah son kik uh hi.

¹³David in, “Na namsau uh kua vun,” ci in thupia a, amate in tuabangma in vawt uh hi. David zongh ama namsau kua in tuaciang a mihingte zali tu khawng taw paikhia a, phual ah vanhte cing tu in zanii nusia hi.

¹⁴Nabal ii naseamte khat Nabal ii zi Abigail munah, “Na za zo ziam? David in kamtai paisak a, ih Topa munah, nuksetna kam puaksak kasap ih Topa in lang zazan hi.

¹⁵Tuabang hi na ve, amate ei tungah hong dik mama uh hi; ko hong nawngkaisak ngei ngawl hi, tuaciang lo sungah amate taw ka om sung tawntung, ka neisa uh bangma hong kinguksak ngei ngawl hi.

¹⁶Tuu honte cingin ka om uh laitakin ama in sun taw zan taw ko hong hung hi.

¹⁷Hi thu sia pha tak ngaisun in a, bang vawt tu ci in khensat in. Hi sia in ih Topa le a innkuanpuite atu lalna piangsak tu hi. Ama sia mawmaw thinpui khat hi a, kuama ii ngaisutna piak saang thei ngawl hi,” ci hi.



¹⁸Abigail in manlang takin anluum zanii, savun tuithawl nii dim zu, tuu pum em nga, antang kan kuang nii, sapitko bom zakhat, theiko muh luum zanii khawmtua in laa tungah suan hi.

¹⁹Tua zawkciang a naseamte munah, “No, mai ah pai vun, kei, nung pan kong zui tu hi,” ci hi. Ahihang a pasal munah bangma son ngawl hi.

²⁰Muallim vei khat ah a laa tung to in a pai le thakhat in David le a mihingte hong paito taw kikealsik uh hi.

²¹David in, “Banghangin hi sia pa ii neisa te dui sungah hun sasak ka na khi ziam? Ama ii neisa khat zongh kinguksak ngei ngawl hi, tu in hisia sia ka huna sa teng hong thuk kikna hi!

²²Zingsang khuavak maa in tua pasalte khat zongh kikhe ngawlin ka that siat buale Pathian in keima hong vaatlum taken,” ci in khua ngaisun hi,

²³Abigail in David a mu ciang manlang takin a laa tung pan tuakin,

²⁴David ii peang kung lei ah kisp sukun, ama tungah hi bangin ci hi, “Nong hesuakna in hong ngai tan! Keima a maw pu hi tong;

²⁵bangma kimanna a nei ngawl Nabal sia awlmaw vet heak in! Ama sia a min ii khiakna ‘Mamaw’ sia ma hi linlian hi. Na naseamte hong thet lai in tua munah keima om ngawl luilam khi hi, Topa awng.

²⁶Phu lam in na ngalte na thalup ngawl natu hong keamcing siaTopa hi. Tuaciang tu in a nungta Topa taw ka kiciamna pan, na ngalte le nang hong susia nuamte theampo sia Nabal bangin daan thuak tu hi.

²⁷Nong hesuakna, Topa awng, hi letsongte hong saang tan, nangma atu kong paipui hi, na mite pia in.

²⁸Ka khialna a om le nong hesuakna in hong maisak tan. Topa in nang le na suan na paalte zongh kumpipa tu in hong vawt tu hi, banghangziam cile ama ii ngal nangma in na simsak hi; tuaciang na nuntak sung tawntung tatkhaakna na vawt ngei buatu hi.



²⁹Tuaciang mihing khat po in nang hong sim in that tu in hong hanciam le Topa na Pathian in sumngum manphate a kicin bangin nang hong keamcing tu hi. Na ngalte ahile, mihing khat ii suangtang saili taw a kaa bangin kilawnthal tu hi.

³⁰Tuaciangin Topa in nang atu thupha hong kamciamte theampo hong tungsak a, Israel te ii kumpipa in hong vawt ciangin,

³¹a thu om ngawl bulin ngual na thalupna le nangma thu a, phu na lamna te hu in kisii na le thin nop ngawl na nei buatu hi. Tuaciang Topa in thupha hong piak ciangin, Topa, kei hong mangil heak in,” ci hi.

³²David in ama Munah, “Tuni a kei taw kisi tu a hong puak Israel te Pathian Topa pok tawng!

³³Na khua ngaisut thiamna le tuni tual thalupna ka vawt tu le keima thu a phu ka lam natu pan nong kep natu in, na sep na vawt teng hu in Pathian kong pok hi.

³⁴Topa in nang kong suksiat thaak ngawl natu in kei hong keam hi. Ahihang a nungta Israel te Pathian taw kiciam in kong sonna pan, a manlang in hong pai in hong kisik pui ba le te zingsang khuavak sia in, Nabal ii mihingte theampo thi siat tu hi,” ci hi.

³⁵Tua zawkciang David in ama kungah hong puak letsongte ama tung pan saang a, “Va cia kik tan a, thinngim heak in. Na dei bangin vawt tu khi hi,” ci hi.

³⁶Abigail in Nabal kungah cia kik a, ama sia kumpipa atu a kilawm liang poai khat khaam hi. Zu khamin maimua nuamin om a, tua ahikom a zingsang ciang mateng ama ii munah bangma son ngawl hi.

³⁷A zukham hong thai ciang ama in thu theampo son hi. Thakhat in ama sia thanguikon natna hong nga a, a tung thei nawn bua hi.

³⁸Ni sawm khawng zawkciang Topa in Nabal sia vaatin thi hi.



³⁹Nabal ii thina David in a zaak ciang, “Topa pok vun! Nabal tungah ama in kei hong nunau hu in phu hong lamsak a, kei a naseam pa ii ka khial ngawl natu hong keamcing hi. Topa in Nabal sia a khansiat hu in daan tat hi,” ci hi. Tua zawkciang David in kiten natu mo dokna Abigail tungah thaak hi.

⁴⁰A naseamte Carmel ah pai in, “David in a zi tu, nang hong pui tu in ko hong sawl hi,” ci uh hi.

⁴¹Abigail lei ah kun sukin, hi bangin ci hi, “Keima a naseam nu hi a, a naseamte ii peang a silsak tu naseam ka hi hi.”

⁴²Ama manlang tak tho in a laa tungah to hi. A lalang numei nga teng taw David ii naseamte taw ton in, a zi suak hi.

⁴³David in Jezreel mi Ahinoam tenpui zo a, tu in Abigail zongh a zi hong suak hi.

⁴⁴Tua laanin Saul in David ii zi ahi a tanu Michal sia Gallim khua Laish ii tapa Palti a piaksak hi.

Samuel Khatna 26

David in Saul ii Nuntakna Khoaikhe kik

¹Ziph panin pasal pawlkhat Gibeah, Saul kungah hong pai in Saul munah David sia Hachilah Mualvum Judah duisung ii mongah buu hi ci in son uh hi.

²Thakhat thu in Saul in Israel ngam sung a ngalkap phabel tulthum tonpui in Ziph dui sungah David zong tu in pai a,

³tuaciang Hachilah Mualvum paina lampi hui ah ngiaphual saat uh hi. David sia dui sungah om lai a, tuaciang Saul in ama zong tu in hong pai ci in a zaak ciang,

⁴ngalvilte a paisak le, Saul sia tua munah na om takpi hi.

⁵Ama thakhat in pai a, Saul le Ner ii tapa Abner, Saul ii ngalkap hon ukpipa koisung lum ziam ci in vil hi. Saul sia ngiaphual sung sangah lum a, a mite sia ama ii kiim ah ngiaphual saat uh hi.



⁶Tuaciang David in, Hit mi Ahimelech le Joab ii suapuipa Abishai (A nu uh sia Zeruah hi), te munah, “No nii sung pan akua zaw in Saul ii ngiaphual ah kei taw hong pai tu nu ziam?” a ci ciang, Abishai in, “Keima in hong zui tong,” ci hi.

⁷Tua zanin, David le Abishai te Saul ii ngiaphual sung sangah tum in, Saul sia ngiaphual zanglai san ah muu in a om mu a, a tei a lu ngakna hui ah phut hi. Abner le ngalkapte a kiim ah muu uh hi.

⁸Abishai in David ii munah, “Pathian in na ngalpa na khut sungah tu zanin hong pia hi. Tu in ama ii tei taw ma in ama kong sun tu a, lei ah ih kilh cip tu hi — khat vei sut taw kiman tu hi, nii vei ka sut kul ngawl tu hi!” ci hi.

⁹Ahihang David in, “Ama susia ngawl tu ni hi! Topa in ama ii teal sa kumpipa a susia sia daan pia tu hi,” ci hi.

¹⁰David in a pau zomto lai in, “ thi ngei a thi tu ahizong ngalphual ah thi tu ahizong, Topa ii hun ciang, Topa ama mama in Saul sia thatlum tu ci in he khi hi.

¹¹Topa ama ii kumpipa in a koi sa sia ka suksiat tu Topa in khaam hi. A tei le a tuithawl la in, paikhia tawng,” ci hi.

¹²Tuabangin David in Saul ii tei le a tuithawl Saul ii lu sialna mawk pan la in ama Abishai in nusia uh hi. Kuama a mu om ngawl, bang thu piang ci in a he zongh om ngawlin, zongh a khanglo beak bua uh hi, amate mut thip dipdeap uh hi, banghangziam cile Topa in mutciik takin muusak hi.

¹³David in kuam ii langkhat kantan in mualdawn, a khuala khopna mun khat panin au a,

¹⁴Saul ii ngalkapte le Abner oksan hi. “Abner awng! Nong za thei ziam?” ci hi. “Kumpipa phawng tu in a au sia akua ziam?” ci in Abner in dongh hi.

¹⁵David in zo a, “Abner, nang sia Israel ngamah a lianbel hi ka na ngawl ni ziam? Banghangin na Topa kumpipa hung zo ngawl ni ziam? Tu ma hiat in na Topa thatlum tu in akua ziam maw khat na ngiaphual sungah hong tum hi.



¹⁶Na tavuan lel ni hi, Abner awng! A nungta Topa ii min taw kiciamin ka cina pan, no theampo a thi tu kilawm nu hi, banghangziam cile Topa ii kumpipa in a koi na Topa uh hung ngawl nu hi. En in! Kumpipa ii tei koi sungah om ziam? A lutang hui a tuithawl sia koi sung om ziam?” ci hi.

¹⁷Saul in David ii aw tel a, “David ka tapa awng, nangma ni ziam?” ci in dongh hi. “Hi khi hi, Kumpipa awng,” ci in David in zo hi.

¹⁸Belap a, “Topa awng, kei na naseam pa banghangin hong delkot lai ni ziam? Bang seam khial thong na khi ziam? Bang mawna vawt khi ziam?”

¹⁹Kumpipa awng, kong son tu sia na ngai in. Kei nong langpan natu hong vawt sia Topa ahile ama ii tunga piakkhiatna khat vawt leang ama in a thin kheal thei tu hi; tua ahi bua a mihingte ii vawt ahileTopa ii haamsiatna amate tungah tung taken. Banghangziam cileTopa ii ngam le lei panin ngamdang te pathian bek ka biak thei natu munah kei hong kihawlkhia hi.

²⁰Topa ii kung pan a kikhuala ngamdang leitangh tungah thalup hong thuaksak heak in. Banghangin Israel te ii kumpipa in uili bang lel kei po that tu in hong pai ziam? Ngam sungah vacimte vai bang liangin banghang hong vai ziam?” ci hi.

²¹Saul in zo a, “Keima khial zo khi hi. Hong heak kik tan, David ka tapa awng. Bangma hong law nawn ngawl tu khi hi, banghangziam cile tu zanin ka nuntakna hong khoaikheetsak ni hi. Kei sia mawmaw khi hi. A lipkhap huai mama nasep seam thong khi hi,” ci hi.

²²David in, “Kumpipa awng, hi sungah na tei om hi. Na mihingte khat hong pai in hong lasak tan.

²³Topa in a thumaante le a thutang te noptuam pia hi. Tu ni in ama in nang, keima ii khut sungah hong pia hi, ahihang Topa ii kumpipa in hong koi sa nang sia kong susia bua hi.

²⁴Na nuntakna tuni in kong khoaikheetsak bangma in, Topain kei, ngim ngana theampo pan hong hunkhia taken,” ci hi.



²⁵Saul in David munah, “Pathian in thupha hong pia taken, ka tapa awng. Na vawt pawpo zawna nga tu ni hi,” ci hi. Tuabangin David ama ii pai natu ah pai a, Saul sia a inn ah cia kik hi.

Samuel Khatna 27

Philistinete sungah David

¹David in ama le ama hi bangin kici hi, “Ni khat pawpo ciang Saul in kei hong thatlum tu hi. A pha bel ka sep tu sia Philistia ah tai in ka suatak tu ahi hi. Tua hi le Saul in kei Israel ngam sung a hong zon sia kheal tu a, kei ka suakta tu hi.”

²Tua ahikom David le a mite zaluk sia thakhat in Gath kumpipa Maoch ii tapa Achish kung zuan uh hi.

³David le a mite sia a innkuanpuite taw Gath ah peam uh hi. David in zite nii nei a, Jezreel pan Ahinoam le Nabal ii zi meingongnu Carmel pan Abigail ahi uh hi.

⁴Saul in David sia Gath ah tai hi ci in a zaak ciang ama a zon tawntung kheal hi.

⁵David in Achish munah, “Nang ka lawm na hile ka ten natu khuapino khat hong pia tan. Ngam ii khuapi sungah nang le kei ih tenkhop tu sia a kulna om ngawl hi,” ci hi.

⁶Tuaciang Achish in khuapino Ziklag sia pia a, tua hu in Ziklag sia Judahte neisa hi tan hi.

⁷David in Philistia ah tha sawm le tha luk teang hi.

⁸Tua hun sung tengin David le a mite in Geshur, Girzi, le Amalek ngamkhen ah khua ngeipi a teang sa te sim uh hi. Ama in amate ii ngam sia Shur dong tuaciang Egypt ngam dong, ngalnguk in simsuk hi,

⁹a pasalte le a nupite that in, a tuu, a khui, a laa le a kalaoh te le puan ngangawn laaksak uh hi. Tua zawkciang Achish kung veu ah cia kik hi,



¹⁰tua pa in, “Tutung koi sungah ngalnguk sim ni ziam?” ci in dongh bul a, tuaciang David in, Judah thangsang ngam, ahibuale Jerahmeel be le phungte ngam, ahibuale zong Kente ii teenna ngamte ka sim hi ci hi.

¹¹David in, ama le a mite ii ngamtatna kuama ii Gath ah cia in a son thei ngawl natu in, pasal le numei theampo thatlum siat hi. Hi sia in Philistia ah a ten sung tawntung David ii a ngamtatna ahi hi.

¹²Ahihang Achish in David muang a, ama le ama hi bang kici hi, “Ama sia a mipui Israel te in ensan mama ahi ciang a nuntak tawntung keima na hong sepsak tu hi,” ci hi.

Samuel Khatna 28

¹Tua zawk tawmvei ciangin Philistinete in Israel sim tu in a ngalkapte uh khawmtua hi, tuaciang Achish in David munah, “Nang le na mihingte in kei sang pan ngal sim tu ci sia na heak sa hi,” ci hi.

²“Hi mama hi,” David in ci hi. “Kei na naseampa khi hi, tuaciang bang ciang vawt thei khi ziam ci sia nangma mama in na mu tu hi,” ci hi. Achish in, “Pha hi! A tawntungin keima hong cing pa kong suaksak tu hi,” ci hi.

Saul in Thaa sam thei khat Thu dongh

³Tu in Samuel thi zo a, tuaciang Israel theampo ama hangin khuangai uh a, tuaciang ama ii khua Ramah ah phum uh hi. Saul in aisaan thei te le thaa sam thei te theampo Israel panin not keak zo hi.

⁴Philistine ngalkapte hong kikhawmtua a, Shunem khua hui ah ngiaphual saat uh hi; Saul in Israel te khawmtua in Gilboa Mualvum ah ngiaphual saat hi.

⁵Saul in Philistine ngalkapte a mu ciang ama lau mama hi,

⁶tua ahikom ama in Topa munah bang law tu khi ziam ci in dongh hi. Ahihang Topa in mang sung pan ahizong, Urim le Thummim tung pan ahizong, kamsangte tung pan ahizong, a zo mama bua hi.



⁷Tuasia ciang Saul in a uliante munah, “Thaa sam thei nupi khat va zong tavun, keima pai in thu dongh tu khi hi,” ci hi. Amate in, “Endor ah khat om hi,” ci in zo uh hi.

⁸Tua ahikom Saul ama le ama kimealseal a, puandang silh in, khuazin zawkciang a mite nii taw nupi nu taw kisi tu in pai hi. “Bang thu piang thei tu ziam ci in kei tungah nong son thei natu in thaa dongh in. A min kong law pasal khat ii thaa sam in,” ci hi.

⁹Numei nu in zo a, “Kumpipa Saul ii ngamtatna teng na heak siat sa hi a, Israel ngam sung panin aisaan thei te le thaa sam thei te theampo hawlkeak hi. Tua ahile, banghangin kei thaang hong sia in hong kithatlumsak nuam ni ziam?” ci hi.

¹⁰Tuaciang Saul in kiciamna vawt a, “A nungta Topa taw kamciam hong pia khi hi, hi nasep na sep hu in daan hong kipia ngawl tu hi,” ci hi.

¹¹“Akua thaa hong samsak tu khi ziam?” numei nu in ci hi. Ama in, “Samuel” ci in zo hi.

¹²Tua numei nu in Samuel a mu ciang ciik au in Saul munah, “Banghang hong theam ni ziam? Nang Saul Kumpipa ni hi! ” ci hi.

¹³“Lau heak in, bang na mu ziam?” kumpipa in ci hi. Numei nu in, “Thaa khat lei panin hong tho to ka mu hi,” ci in zo hi.

¹⁴Ama in, “Tuasia bang taw kibang ziam?” ci in dongh hi. “Pasal huai khat hong pai to a, ama in puatual tungsilh silh hi,” ci in numei nu in zo hi. Tuaciang Saul in Samuel hi ci in tel a, ama zatakna in lei ah bok hi.

¹⁵Samuel in Saul munah, “Banghangin hong nawngkaisak ni ziam? Banghangin hong heak kiksak ni ziam?” ci hi. Saul in zo a, “Keima in ngimna lianpi sungah om khi hi! Philistinete sia kei ngalin hong ding hi, tuaciang Pathian in kei hong nusia hi. Ama in kamsangte tungtawn ahizong, mang tungtawn ahizong hong zo ngawl hi. Tua ahikom bang vawt tu khi ziam ci in nong son natu nang hong sam khi hi,” ci hi.



- ¹⁶Samuel in, “Topa in nang hong nusia a, na ngal a sua zawk nungsang, banghangin kei hong sam ni ziam?”
- ¹⁷Topa in kei tungah hong son sa bangma in ama in nang tungah hong seam zo hi: ama in na kumpi ngam sia na khut sung pan la keakin David hong piaksak zo hi.
- ¹⁸Nangma in Topa thu ni ngawlin, Amalekte le a neisa uh te a vaikhua in susia cip ngawl ni hi. Tua hu in Topa in hi sia nang tungah hong vawt hi.
- ¹⁹Topa in nang le Israel sia Philistinete khut sungah hong aap tu hi. Zing ciangin nang le na tapate in kei nong pawm tu uh a, Topa in Israel ngalkap honte Philistinete aap tu hi,” ci hi.
- ²⁰Thakhat thu in Saul puk suk a, Samuel ii pau teng hu in lau leilam in lei ah kithung hi. Ama sia a tha zawm hi, banghangziam cile nibup le zan tawntung bangma neak nei ngawl hi.
- ²¹Numeinu in ama kungah hong pai in ama lau ngawpin om a mu ciang, “Topa awng, nong hesuakna in ka luang aita in, nong sawl teng hong vawtsak khi hi.
- ²²Tu in kei ii kong nget bangin hong ngamta tan. Nang atu an tawm hong vawt tu khi hi. Na khualhaw thei khom natu thahatna na nga natu an na neak kul tu hi,” ci hi.
- ²³Saul in bangma ne ngawl tu khi hi ci in nial hi. Ahihang a uliante zongh in ama an ne tu in sawl uh hi. A khakbel ciang ama in kilelsakin lei pan hong tho to a, lupna tungah to hi.
- ²⁴Numeinu in a thau tu in a vaak top khuino sia ngo hi. Tuaciang ama in anvui pawl khat hong la a, tol saw ngawl anluum in hong em hi.
- ²⁵Ama in a ante Saul le a uliante mai ah lui a, amate in ne uh hi. Amate tua ni zan in dingkhia uh hi.

Samuel Khatna 29

Philistinete in David Nial



¹Philistinete in a ngalkapte theampo Aphek ah hong paipui uh a, tua laitakin Israel te sia Jezreel Kuam sung cik ah ngiaphual saat uh hi.

²Philistine kumpipa ngate amate ngalkap tek a za pawl, a tul pawl taw kuan uh hi; David le a mite a nungsang pan kumpipa Achish taw kuan uh hi.

³Philistine ngalkap maangte in amate mu uh a, “Hi Hebrewte hi sungah bang hong hi ziam?” ci uh hi. Achish in, “Hi sia David hi, Israel te Kumpipa Saul ii ulian khat hi. Tu in ama sia kei taw khua ngeipi ka omkhawm zo uh hi. Ama kei kung hong zot pan kipan a sep a vawt ka mawsak natu bangma mu ngawl khi hi,” ci in zo hi.

⁴Ahihang Philistine ngalkap maangte in Achish tungah thin uuk uh a, ama ii munah, “Na mihing pa na piak sa khuapino ah heaksak kik in. Ngal kidona phual ah ei taw hong omkhawmsak heak in; ama ei hong leedo kik na meal kihe ngawl hi. A Topa ii maipha a nga kik natu ih mihingte ii thina sangin a phazaw dang bang om ziam?”

⁵A khakbel in, ama sia David hi a, numeite in laamin la sa a, ‘Saul in a tul a tul in that a, David in a tulsawm, a tulsawm in that hi,’ a ci pa, hi ngawl ziam?” ci uh hi.

⁶Achish in David samin, ama munah, “Israel te ii a nungta Pathian taw kiciam hi tong, nang sia kei tungah hong thumaan ni hi; hi kodona sungah kei taw kikop in ngal hong sim pui lete uuk khi hi. Kei kung nong zot hun pan kipan nang tungah mawna kong sot tu bangma om ngawl hi. Ahihang kumpi dangte in nang hong saang thei ngawl hi.

⁷Tua ahikom inn ah thin nuam takin cia kik tan a, amate ii diksak ngawl tu bangma vawt heak in,” ci hi.

⁸David in zo a, “Bang ka sep khial om ziam, Topa awng. Na ci bangin nang kung kong zot a kipan na na ka sepna sungah sep khial vawt khial nei ngawl ka hile, nang taw kithua in pai in, nang ka Topa le ka kumpipa atu na ngalte hong dosak ngawl tu khi ziam?” a ci ciang,



⁹Achish in, “Na ci teng thukim khi hi, nang sia Pathian vantung mi khat bangin thumaan takin hong panpui ci in kong ngaisun hi. Ahihang kumpipa dangte in nang sia ko taw kuan khawm thei ngawl tu hong ci hi.

¹⁰Tua ahikom David awng, Saul nusia a, kei kungah hong pai note theampo sia zing thopal in khua hong vak po ciang nong nusiak uh kul tu hi,” ci hi.

¹¹Tuabangin David le a mite, a khuavak ni zing tuungin Philistia ah heak kikin, Philistinete sia Jezreel ah pai uh hi.

Samuel Khatna 30

Amalekte taw Kidona

¹Ni nii zawkciang David le a mite Ziklag theng kik uh hi. Amalekte in Judah ngam thang sangah ngalnguk taw sim a, Ziklag sim uh hi. Amate in a khuapi haltham a,

²numei teng manin, kuama that ngawl ahihang a nusiak uh ciang a kuama theampo paipui uh hi.

³David le a mite hong thet uh ciang, a khuapi kihal tham sa in na om a, a zite, a tapate, a tanute kiciapui siat sa in mu uh hi.

⁴David le a mite kakap in, a tha uh a bo sitset dong tawp ngawl uh hi.

⁵David ii zite ahi Ahinoam le Abigail ngangawn ciapuisak uh hi.

⁶David sia tu in a thin ngim mama hi, banghangziam cile a mite a vekpi in a zite a tate a taan hu in a thin uh na na mama hi, tuaciangin amate in David suangtum taw den lup tu in tawng hi; ahihang Topa Pathian in ama thinletna pia hi.

⁷David in Ahimelech ii tapa thiampi Abiathar munah, “Ephod sia hong la tavun,” ci a, Abiathar in paipui hi.

⁸David in Topa tungah, “Tua ngalnguk seamte ka del tu ziam? Del leng ka pha tu ziam?” ci in dongh hi. Ama in zo a, “Del in; amate pha tu ni hi, amate zongh suatak tu ni hi,” ci hi.



- ⁹Tua ahikom David le mihing zaluk teng kipan in, Besor Lui a thet uh ciangin amate pawlkhat tua munah taam hi.
- ¹⁰David in mihing zali taw paisuk a; a dang zanii teng lui kan tu in toi lei ahikom nungah taam uh hi.
- ¹¹David taw a kithua mite in Egyptte patangno khat ngam sungah mu uh a, David kungah paipui uh hi. Amate in an le tui pawlkhat pia uh a,
- ¹²thei nga ngawm pawl khat le sapit bom nii pia uh hi. An a neak zawkciang a tha hong hat kik hi; ama in an ahizong tui ahizong a neak ngawl zawk ni thum hi zo hi.
- ¹³David in, “Na Topa akua hi a, koisung pan hong pai ni ziam?” ci in dongh hi. Ama in, “Kei Egyptte ka hi a, Amalekte khat ii sila ka hi hi. Ka Topa in tunung ni thum lai in ka cina ahikom hong nusia hi.
- ¹⁴Chereth te ngamkhen Judah ngam thangsang le Caleb ii suante ngamkhen tengah ngalnguk ka sim uh a, Ziklag ka hal tum uh hi,” ci in zo hi.
- ¹⁵David in, “Tua ngalnguk seamte kungah nong paipui tu ziam?” ci in dongh hi. Ama in, “Nong thalup ngawl natu le ka Topa kungah nong aap kik ngawl natu Pathian taw kamciam hong pia po leute, hong paipui tu khi hi,” ci hi.
- ¹⁶Tuaciang ama in David sia amate sangah paipui hi. Amate sia Philistia le Judah ngam pan a phul uh vanh le mihing tam mama te hu in poai khaam uh a, an ne, zu dawn in, mun theampo ah kithethaang uh hi.
- ¹⁷A khuavak ni zing tuungin David in sim a, nitak dong kido uh hi. Kalaoh tungah to in a tai khangno zali sim ngawl kuama a suakta om ngawl hi.
- ¹⁸David in Amalek te ii laak sa na theampo le ama zite nii dongin hunkhia a;
- ¹⁹bangma a sumsi om ngawl hi. David in a mite ii tapate, tanute le Amalekte ii laak theampo nga kik hi.
- ²⁰Ama in tuu hon le khui honte zongh nga kik a; a mite in amate mai ah hawl uh hi, tuaciang, “Hite sia David ii neisa hi,” ci uh hi.



²¹Tua zawkciang David in Besor Lui ah tha zawmcip in a taam zanii te kungah heak kik hi. Amate in David le a mihingte nasia takin vaidawn tu in hong pai a, tuaciang David zongh in pai a nasia takin amate nukset hi.

²²Ahihang mihing mannung ngawl thutuath sel pawlkhat in, “Amate ei taw hong kuan khawm ngawl ahiciang, ih vanh ngate hawm ngawl tu hi, amate in a zite le a tate la in cia thei tu hi,” ci uh hi.

²³Ahihang David in, “Ka suapuite awng, Topa ii hong piak vanh te tungtaang ah tuabangin ngamta thei ngawl tu nu hi. Ama in suatakna taw hong keam a, ngalnguk seamte tungah zawna hong pia hi.

²⁴No ii ci bang sia kuama in hong thukim pui ngawl hi! Ih vekpi in a om babang hawm tu hi; phualcing a omte zongh, ngalphual ah a kuante nga za ma nga tu hi,” ci in zo hi.

²⁵David in hi sia thuthun in nei a, Israel ngam ah tua hun pan kipan kizangh tan hi.

²⁶David in Ziklag ah hong heak kik ciangin, ama in ngalte vanh a laakte pawlkhat sia a lawmte ahi Judahte lampuite munah hi kammal teng taw thaak hi. “Hi sungah Topa ii ngalte vanh ka laak uh te letsong in hong thaak khu hi.”

²⁷Ama in tua letsongte sia Bethel a mite tungah, Judah thangsang ngam a om Ramah mite tungah, khuapino Jattir,

²⁸Aroer, Siphmoth, Eshtemoa,

²⁹le Racal; Jarahmeel be le phungte tung, Ken mite tung,

³⁰khuapino Hormah, Borashan le Athach,

³¹le Hebron khuapite ah a teang mite tungah thaak hi. Ama in ama le a mite vakotna mun theampo ah thaak siat hi.

Samuel Khatna 31

Saul le A tapate ii Thina

(1Khang tangthu 10.1-12)



- ¹Gilboa Mualvum ah Philistine te langpan in ngal kidona ah do uh hi. Israel te tam mama tua munah thi in, a taang laiteng Kumpipa Saul le a tapate taw tai uh hi.
- ²Ahihang Philistine te in a taina ah pha in Saul ii tapate thum, Jonathan, Abinadad le Malchishua te that uh hi.
- ³Saul ii kiim ah ngal kidona sia nasia mama a, Saul ama zongh ngalte thaltangte in kha a, nasia liam mama hi.
- ⁴Ama ii ngal vanh a pua tangvalpa munah, “Pathian he ngawl Philistine ii kisuangtaak a hong thalup thei ngawl natu in, na namsau dokin hong that tan,” ci hi. Ahihang tangvalpa in tuabang a ngamtat tu lau lei hi. Tua ahikom Saul in a namsau la in a tungah ama le ama kihen hi.
- ⁵Tangvalpa in Saul a et ciang thi zo ci in mu a, ama zongh namsau tung ma ah kihen in Saul taw thi khawm hi.
- ⁶Tuabangin Saul taw, a tapate thum le tangvalpa thi uh hi; Saul ii mihingte theampo tua ni in thi siat uh hi.
- ⁷Jereel kuam ii langkhat Jordan Ngun ii niswana sang a om Israel te in Israel ngalkap honte taithaap zo a, Saul le a tapate thum thi zo ci a zaak uh ciang amate zongh a khua uh nusia in tai uh hi. Philistine hong pai in tua khua lua uh hi.
- ⁸Ngal kido khuavak ni in Philistine mithiluang te phuul tu in hong pai uh ciang Saul le a tapate thum sia Gilboa Mualvum ah a luang uh lumin mu uh hi.
- ⁹Amate in Saul ii lutang tan in, a thik puan teng suutin, tuate a pua kamtaite Philistia ngam sung amate ii biak milimte le a mite tungah lungdamna thuthang taangko tu in paisak hi.
- ¹⁰Tuaciang amate in Saul ii ngalvanhte a pathian nu Astarte ii biakinn sungah koi in, a luang sia Beth Shan khuapi luphung tungah kilh uh hi.



¹¹Gilead ngam Jabesh khua mihingte in Saul ii tungah Philistinete ii ngamtatna a zaak uh ciang,

¹²pasal hang bel teng dingkhia in Beth Shan ah zankhua teak mainawtin pai uh hi. Amate in Saul le a tapate ii luang luphung tung pan la suk uh a, Jabesh ah ciapui in tua munah hal uh hi.

¹³Tuaciang a ngu uh sia khuapi sung, makeang nuai ah phum in ni sali sung an tang uh hi.



Samuel Niina

Samuel Niina 1

David in Saul ii Thina thu za

¹Saul ii thi zawkciang, David sia Amalekte a zawna pan hong cia a, Ziklag ah ni nii taam hi.

²A khuavak ni ciangin khangno khat Saul ii ngiaphual panin hong theng hi. A khuangai a lak natu in ama in a puante eaukeak in a lu tungah leivui kipoai hi. Ama in David ii kungah pai in, zatak piakna in lei ah bok hi.

³David in, “Koisung pan hong pai ni ziam?” ci in dongh hi. Ama in, “Israel te ngiaphual pan hong suakta khi hi,” ci in zo hi.

⁴“Bang thu teng piang ziam hong son tan,” David in ci hi. “Ih ngalkap honte ngalaphual panin taikeak hi, tuaciang ih mite tam ma kithatlum hi. Saul le a tapa Jonathan zongh kithat hi,” ci hi.

⁵“Bangbangin Saul le Jonathan thi hi ci in he ni ziam?” ci in David in dongh hi.

⁶Ama in, “Kei sia Gilboa Mualvum tungah ka om luilam a, tuaciang Saul sia a tei neal in om hi, tuaciang ngalleang le siphu ngalkapte in ama neak vaial zo uh hi.

⁷Tuasia ciang ama hong kiheak a, kei hong mu in hong sam a, ka zo hi.

⁸Ama in kei sia kua ka hi hong dongh a, Amalek mi ka hi hi, ci in ka son hi.

⁹Tuasia ciang ama in, ‘Hong pai tan a, hong that tan, kei sia nasia takin liam zo a, a thi tu hi zo khi hi,’ hong ci hi.

¹⁰Tua ahikom ama kung ka zuan a, ka that hi, banghangziam cile puksuk po le ama sia a thi tu hi veve hi ci in ka he hi. Tua zawkciang, ama lu tung pan a kumpi lukhu le a baan tung pan a hak ka la a, tuate nang hong puak khi hi, Topa awng,” ci hi.

¹¹David khuangai in a puan eaukeak a, a mite zongh in tuabangma in ngamta uh hi.



¹²Amate in khuangai in mau in, Saul le Jonathan le Israel te Topa ii mite ngalphual ah tam ma kithat ahikom, nitak dong an tang uh hi.

¹³A thu hong puak khangno pa sia, “Nang koisung pan ni ziam?” ci in David in dongh hi. Ama in “Kei Amalekte ka hi a, ahizong nangma ngam sungah ka teang hi,” ci in zo hi.

¹⁴David in dongh thua a, “Banghangin Topa ii teal sa kumpipa that ngam ni ziam?” ci hi.

¹⁵Tuaciang, David in a mite khat samin, “Hi sia pa that in!” ci in sawl hi. Tua pa in Amalek pa vaatin thatlum hi.

¹⁶David in Amalek pa tungah, “Hi thina sia nangma le nangma kisuan ni hi. Topa ii kumpipa in a teal sa khat ka thatlum na ci hu in nangma le nangma nilkhiat thuak ni hi,” ci hi.

David in Saul le Jonathan Kaatap

¹⁷David in Saul le a tapa Jonathan hi bangin kaatap a,

¹⁸tuasia Judah mite tungah hil sawn tu in thu pia hi. (*Jashar Laibu* sungah kikhum hi.)

¹⁹“Israel mual tungah ih lampuite thi zo! Ih ngalkap sung pan a hang bel teng kia zo!

²⁰Gath ah taangko heak vun, ahibuale Ashkelon lampi liante ah taangko heak vun. Philistia numeite lungdamsak ba tawng; doai biate ii tanute lungdamsak ba tawng!

²¹“Gilboa mualte tungah nguatui le daaitui kia heak vun; a lote ko ngawtaak tawntung taken! Tua munah a hangsan te ii lum sia mindaina taw liik a; Saul ii lum sia sathau taw kiteesak nawn ngawl hi.

²²Jonathan ii thal sia thi theina hi a, Saul ii namsau in hesuakna sel hi, a thahat te vaat vawk a, ngalte thatlum hi.



²³“Saul le Jonathan, taza in lamdang in it huai, a nunna ah nungta khawm, a thina ah thi khawm; muvanlaite sangin zuan ngang zaw, tawpi te sangin hat zaw.

²⁴“Israel a numeite awng, Saul kaatap vun! ama in puan san hoi hong silhsak a, suang manphate le kham taw hong zeam hi.

²⁵“Ngalkap hangte puk zo a, amate ngalphual ah kithatlum uh hi. Jonathan sia mual tungah thi in lum hi.

²⁶“Nang atu in khuangai khi hi, ka suapui Jonathan awng; bangza in kei atu in it huai ni ziam! Nang nong itna kei atu, bangza in lamdang ziam, Numeite ii itna ngangawn in dem zo ngawl hi.

²⁷“Ngalkap hangte liik siat zo a, a ngalhiam uh te manna sel in kinusia hi.”

Samuel Niina 2

David Judah Kumpipa in Kikoi

¹Hisia zawkciang David in Topa dongh a, “Judahte ii khuapinote khat a uk tu in la in ka pai tu ziam?” ci hi. “Pai in,” ci in Topa in zo hi. “Koisung a sia ziam?” ci in, David in dongh hi. Topa in, “Hebron” ci hi.

²Tua ahikom David in Hebron ah a zite nii ahi Jezreel pan a zi Ahinoam le Carmel pan Nabal ii meingongnu Abigail te kengin pai hi.

³Ama in a mihingte le tuate ii innkuanpuite zongh paipui in, Hebron kiim a khuapinote ah teang uh hi.

⁴Tua zawkciang Judah a mite hong pai in David sia Judahte ii kumpipa tu in sathau noai uh hi. Gilead ngam Jabesh mite in Saul phum hi ci in David in a zaak ciangin,

⁵ama in mihing pawlkhat paisak a, kam puaksak hi. “Na kumpipa tungah thumaanna na lak uh a, na phum uh hu in Topa in thupha hong pia taken.

⁶Tu in Topa sia no tungah hong dikin hong thumaan taken. Na nasepna te uh hu in kei zongh no pha takin hong vawt tu khi hi.



⁷Hat vun a, hang vun! Saul, na kumpipa uh sia thi zo a, Judah mite in kei sia a kumpipa tu in sathau hong noai zo hi,” ci hi.

Ishbosheth sia Israel Kumpipa in Kikoi

⁸Saul ii ngalkap hon ukpipa Ner ii tapa Abner sia, Saul ii tapa Ishbosheth taw Jordan Ngun kantan in Mahanaim ah tai uh hi.

⁹Tua sungah Abner in Ishbosheth sia Gilead, Asher, Jezreel, Ephraim, Benjamin ngamkhen hi teng ii kumpipa in koi a, a tatak in Israel ngam buppi uk ahi hi.

¹⁰Israel te ii kumpipa tu in a kikoi hun in, ama sia kum sawmli pha a, tuaciang ama in kum nii sung uk hi. Ahihang Judah minamte in David tungah thumaan uh a,

¹¹tuaciang ama in Hebron panin Judahte kum sali le kum lang sung uk hi.

Israel te le Judahte Kilaklaw Ngal om

¹²Abner le Ishbosheth ii uliante Mahanaim pan Gibeon khuapi ah pai uh hi.

¹³Zeruiah ii tapa Joab le David ii ulian dangte in amate taw ningh khat ii kungah kisii uh hi, amate in tua munah pawlkhatte ningh ii lang khat ah to in, pawlkhat te ningh ii a ngal langkhat ah to hi.

¹⁴Abner in Joab munah, “Eima sang tek panin khangnote pawlkhat veve sawlin kido kidemsak tawng,” ci hi. Joab in, “Hi ma hen,” ci hi.

¹⁵Tua ahikom Ishbosheth le Benjamin namte taangin mihing sawm le niite, le David mihing sawm le niite kido uh hi.

¹⁶Misim in a ngal tek sia a lu uh pan kizamh in, namsau taw kihol a, mihing kul le li sia pukin thi siat uh hi. Tua ahikom Gibeon ah tua mun sia, “Namsau Lo” kici hi.

¹⁷Tua zawkciang kidona nasia mama khat hong nei uh a, David ii mite in Abner le Israel te zothal uh hi.

¹⁸Zeruiah ii tapate thum tua sungah kihel hi: Joab, Abishai, le Asahel ahi uh hi. Asahel sia a kii mama sazuk bangin a tai ngang a,



¹⁹Abner a tangtan in del hi.

²⁰Abner in nung lee et kik a, “Hong del sia nangma Asahel ni ziam?” ci hi. Ama in “Hi khi hi,” ci in zo hi.

²¹Abner in, “Kei hong del heak in. Ngalkapte that in a, a nei po laaksak in,” ci hi. Ahihang Asahel in ama del tan lai hi.

²²Khat vei ma Abner in, “Hong del heak in. Banghang nang hong thatlumsak hamtang tu ni ziam? Tuabang hi leng bangbangin na suapui pa Joab maitang en ngam tu khi ziam?” ci hi.

²³Ahihang Asahel in a tawlnga nuam bua hi; tua ahikom Abner in a tei taw a nungsang a khaw le Asahel ii ngil panin kha a, a nungah paillet hi. Asahel pukin thi hi, tuaciang tuak a lupna mun ah hong pai peuma in tawlnga in en uh hi.

²⁴Ahihang Joab le Abishai in Abner ii nung hong zuizen uh a, ni tum ciangin Giah ngam ii nisuana sang, Gibeon dui paina lampi tung Ammah mual hong theng hi.

²⁵Benjamin mite in Abner ii kiim ah hong kikhawmtua uh a, mual khat ii tungah ngal nanna mun la uh hi.

²⁶Aner in Joab oksan a, “Tawp hun nei ngawlin kido tan tu hi ziam? A khakbel ciang thin lalna sim ngawl bangma dang taang nawn ngawl tu ci in mu thei ngawl nu ziam? Ko sia na ngam mipuite khu hi. Na mite munah ko hong del a tawp natu thu na piak tu bangtan vei hai tu ziam?” ci hi.

²⁷Joab in zo a, “Pau ngawl hi thong lete ka mite in zingsang khuavak dong hong del tu hi, ci in a nungta Pathian taw kiciam ngam khi hi,” ci hi.

²⁸Tua zawkciang Joab in, Israel te a del teng a tawp natu in lemle tum hi, tuabangin kidona tawp uh hi.

²⁹Abner le a mihingte sia Jordan Kuam dungah zankhua in pai uh hi; amate Jordan Ngun hong kantan uh a, a zingsang kik dong pai suakin, Mahanaim hong theng kik uh hi.



³⁰Joab in ngal del a tawp zawkciang a mite a khoptua le Asahel kihel ngawl a kingawmin mihing sawm le kua kisamh hi.

³¹David ii mihingte in Benjamin nam Abner ii mihingte 360 that uh hi.

³²Joab le a mite in Asahel luang la in, Bethlehem khua a innkuan ii thaah ah phum uh hi. Tuaciang zankhua in pai a, zing khuavak bek in Hebron hong theng kik uh hi.

Samuel Niina 3

¹Saul ii baangkua sang a pangte le David ii baangkua sang a pangte ii kidona khua hong ngei hi. David sia hat vaial a, a ngalte thazawm vaial hi.

David ii Tapate

²Hebron ah a suak hi David ii tapa luk teng sia a pian kum zui in: Amnon, a nu sia Jezreel panin Ahinoam hi;

³Chileab, a nu sia Carmel panin Nabal ii meingong nu Abigail hi; Absalom, a nu sia Geshur a Kumpipa Talmai ii tanu Maacah hi;

⁴Adonijah, a nu sia Haggith; Shephatiah, a nu sia Abital;

⁵Ithream, a nu sia Eglah hi. Hi tapate theampo sia Hebron ah piang siat uh hi.

Abner in David Pawm

⁶David ii ngalkapte le Saul ii baangkua tungah a thumaante a kido tato uh ciang Saul ii nungzuite sung pan Abner sia hong thahat vaial hi.

⁷Ni khat ni in Saul ii tapa Ishbosheth in Abner sia Saul ii zino Aiah ii tanu Rizpah taw lumkhawm hi ci in mawsuan hi.

⁸Hisia in Abner ii thin sosak hi. “Saul leeheak tu in hong um ni ziam? Judahte atu na a seseam hong sa takpi ni ziam?” ci in au ngawp hi. “A kipat ciil pan kipan na pa Saul tungah, a suapuite tungah, a ngualtamhte tungah thumaan khi hi. David ii hong zaw natu pan zong hong hun khi hi; ahizong tuni in numei khat huvau in ka maw natu hong zong ni hi!

⁹⁻¹⁰Topa in David munah kamciam pia a, ama in kumpi ukna sia Saul le a suan a paalte tung pan la in, David sia Israel le Judah ii kumpipa suaksak tu



hi, a ngam mong langkhat pan a mong langkhat dong uk tu hi. Tu in hi thu sia a tangtun natu in ka seam buale Pathian in hong saatlum taken!” ci hi.

¹¹Ishbosheth in Abner kiita leilam ahikom kam khat zongh pau ngam ngawl hi.

¹²Abner in hi hun a Hebron ah a om David kungah kamtai paisak a, “Akua in hi ngam hi lei uk tu ziam? Keima taw thukimna khat hong vawt tan, tuaciang Israel bup nangma sangah na nga natu kong hu tu hi,” cisak hi.

¹³David in, “Pha hi! thukimna nang taw hong vawt tu khi hi, ahihang thu khat na khuangkimsak ciang bek hi tu hi, kei taw kimu tu nong pai ciang Saul ii tanu Michal hong keng tu ni hi,” ci hi.

¹⁴David in Ishbosheth tung zongh ah kam thaak a, “Ka zi Michal hong pia kik tan, ama ka tenpui natu in Philistinete ii vunteap zakhat taw ka lei sa hi,” ci hi.

¹⁵Tua ahikom Ishbosheth in Michal sia Laish ii tapa, a pasal Paltiel kung panin la kik hi.

¹⁶Paltiel in kap kawmin Bahurim khua dong zui hi. Ahihang Abner in, “Inn ah cia tan,” ci a, ama cia hi.

¹⁷Abner sia Israel te lampuite munah pai in hi bang ci hi, “Khua ngeipi ma David sia na kumpipa tu in na dei uh khua ngei zo hi.

¹⁸Tu in hi sia no atu hun pha hi. Topa in hi bang a ci sia ciamtee vun, ‘Ka naseam pa David ka zangh tu a, ama in Israel te sia Philistinete le a ngaldangte theampo kung panin hunkhia tu khi hi,’ ” ci Israel te ii thukimna teng David munah son hi.

²⁰Abner in Hebron, David kungah mihing kul taw hong pai ciangin David in amate atu poai vawtsak hi.

²¹Abner in David munah, “Tu in ka na pai tu a, Israel buppi nang sangah pang tu in ka vawt tu hi, Kumpipa awng. Amate in nang sia kumpipa in hong saang tu hi, tuaciangin nangma in na dei teng na nga siat tu a, ngam buppi



na uk tu hi” ci hi. David in Abner sia kuama ii bangma a law ngawl natu kiciamna kho pia in paisak hi.

Abner Kithatlum

²²A zawkciang, Joab le David ii ulian dangte ngalnguk vawtna pan hong cia uh a, a suutol uh vanh tam mama hong ciapui hi. Abner sia tua mun Hebron ah David taw a om nawn bua hi, banghangziam cile David in ama sia suatakna kiciamna kho taw tha hi.

²³Joab le a mite hong thet uh ciangin Abner sia David ii kungah a paina thu le suatakna kiciamna kho taw a kipaisak thu ama tungah kison hi.

²⁴Tua ahikom Joab sia kumpipa kungah pai in ama mun ah, “Bang vawt thong ni ziam? Abner nang kungah hong pai ci leang, banghangin tuabangin paikhiasak ni ziam?”

²⁵Ama hi sungah hong pai sia nang hong theam tu, na sep na vawt theampo le na paina theampo hong kan tu in hong pai hi. Tuasia he buang hi ngawl ni ziam?” ci hi.

²⁶David a nusiat zawkciang Joab in Abner sam kik tu in, kamtai paisak a, tuaciang amate in Sirah tuikhuk panin ama hong ciapui kik hi; ahihang David in bangma heak pui ngawl hi.

²⁷Hebron ah Abner hong thet ciangin, Joab in kongpi ah a tuam in paipui a, ama nguak taw thu son tu bangin thoai in, tua munah a ngil pan naam taw tuum hi. Tuabangin Abner sia kisuamlum hi, banghangziam cile ama in Joab ii suapui Asahel thalupsak hi.

²⁸David in tua thu a zaak ciang, “Topa in kei le ka uk sung mite Abner kisuam lupna tungtaang ah bekcik zongh maw ngawl hi ci in hong he hi.

²⁹Tua hu in daan piakna Joab le a baangkua in thuk taken! Khangsim in a baangkua sungah numei le pa omkhopna pan a piang natna a vei khat veu om taken a, a phaak khat, ahibuale numei nasep teng a seam thei bek khat veu om taken, tua ahibuale zong ngal sungah thi in ahibuale an neak tu nei ngawl veu om vaciat taken!” ci hi.



³⁰Tuabangin Joab le a suapuipa Abishai in amate ii suapuipa Asahel Gibeon kidona a thi sia ii phu lam uh hi.

Abner Kiphum

³¹Tuaciang David in, Joab le a mite a puan uh eaukeak a, khau-ip puan silhin, Abner hangin a tau tu in thu pia hi. Tuaciang thi vuina ah Kumpipa David ama mama mithi kuang nung pan zui in pai hi.

³²Abner sia Hebron ah kiphum in, kumpipa sia a ngingin a thaan ah kap a, tuabangin midangte theampo zongh kap uh hi.

³³David in hi kaala Abner sak hi: “Banghangin Abner sia a mawmaw pa bangin thi ziam?”

³⁴A khut te zongh kiletheen ngawl hi, a peangte zongh kisawm ngawl hi; Ama sia kumpi thukham paltante bangin kithat hi!” Tuaciang mipite in ama kaa kik uh hi.

³⁵Nitangtum in mipite hanciam in David in bang khat po nesak nuam ahihang ama in ciliap huai kamciam vawt hi, “Ni tum maa in neak khat po ka nei le Pathian in hong vaatlum taken!” ci hi.

³⁶Amate in hi thu sia ciamtee in a lung uh kim mama uh hi. A tatakin, David ii vawt theampo in mipite lungdamsak hi.

³⁷David ii a mite le Israel mihingte in Abner kisuamlupna vai ah kumpipa sia kihel ngawl hi, ci in he uh hi.

³⁸Kumpipa in a uliante munah, “Tuni in Israel ngam sungah lampui lian khat thi hi ci in phawk ngawl nu ziam?”

³⁹Pathian in kei sia kumpipa tu in hong teal sa ka hi saap hang, tuni sia ka tha zawm mama hi. Hi Zeruah ii tapate sia kei atu in ngoltol lei hi. Thukham paltante sia a kilawm bangin Topa in daan pia taken,” ci hi.

Samuel Niina 4

Ishbosheth Kisuamlum



- ¹Abner sia Hebron ah kisuamlum hi ci in Saul ii tapa Ishbosheth in a zaak ciang ama lau mama in, Israel a mite theampo zongh patau uh hi.
- ²Ishbosheth in ulian nii nei a, amate sia ngal lampuite veu ahi hi, amate Benjamin nam, Beeroth khua pan Rimmon ii tapate hi a, Baanah le Rechab ahi uh hi. (Beeroth sia Benjamin ngamin kiciamtee hi.)
- ³A teang ciil te sia Gittaim ah tai in, tua munah teang uh hi.)
- ⁴Saul ii suan le paal dang khat sia Jonathan ii tapa Mephibosheth hi a, ama kum nga a phak laitakin Saul le Jonathan ngal sungah kithat hi. Jezreel khua panin amate ii thina a kizaak ciang, a nau omh nu in, Mephibosheth sia tawmin tai hi; ahihang ama manlang nuam mama ahikom a nau taksua tha a, a peangzaw khat suak hi.
- ⁵Rechab le Baanahte Ishbosheth kungah pai tu in hong pai uh a, ama sun a tawlngak laitakin hong theng uh hi.
- ⁶Numei kongkha cing sia zungtaang kheapin a omna ah lusu in muu hi, tua ahikom Rechab le Baanah te tum ku uh hi.
- ⁷Inn sung hong thet uh ciang Ishbosheth ii lupna khaan sungah tum a, tua munah ama mutthip a, tuaciang amate in that uh hi. Tua zawkciang a lu tansak a, paipui in, Jordan Kuam zui in zankhua in pai uh hi.
- ⁸Amate in a lutang sia Hebron ah David pia a, “Na ngal pa nang hong that tu a hanciam Saul ii tapa Ishbosheth ii lutang hi sungah om hi. Tuni in Topa in Kumpipa nang sia Saul le a suan a paal te tungah phu laak tu hong oai hi,” ci uh hi.
- ⁹David in amate zokik a, “Launa theampo pan hong hun a nungtaTopa taw ka kiciam hi!
- ¹⁰Saul ii thina sia lungdam huai thuthang a saa Ziklag a thu hong puak sia zongh manin thatsak khi hi. Ama ii hong puak lungdam huai thu hu a, tel ka piak sia tuabang hi!



¹¹Maw nei ngawl ama ii inn sungah a muu mihing khat a thatlum mi ngilote atu in bangza in sia zaw lai tu ziam! Ama na suamlup uh hu in a phu lam tu khi hi, tuaciang no sia lei maitang panin hong zutmaai tu khi hi!” ci hi.

¹²David in thu pia a, a ngalkapte in Rechab le Baanah te thatlum in, a khutte a peangte a tansak zawk uh ciang, Hebron ningh hui ah khai uh hi. Amate in Ishbosheth ii lutang la in Hebron ah Abner ii thaankuul ah phum uh hi.

Samuel Niina 5

David sia Israel te le Judahte ii Kumpipa Suak

(1Khang tangthu 11.1-9; 14.1-7)

¹Tua zawkciang Israel namte theampo Hebron David ii kungah hong pai uh a, ama munah hi bangin ci uh hi, “Ko sia nangma ii ci le sa puite khu hi.

²A bo sa hun sung Saul sia ih kumpipa ahi lai ngangawn in, ama in Israel te ngal kidona sungah na lampui a, tuaciang Topa in na mite na lampui natu le a ukpa na sua natu kamciam hong pia hi.”

³Tuabangin Israel te lampui theampo Hebron ah Kumpipa David ii kungah hong pai uh hi. Ama in amate taw kipanpui natu a thiangtho biakna taw kisai kiciamna vawt a, amate in ama sathau noai in, ama Israel te ii Kumpipa suak hi.

⁴David sia kumpipa a sua hunin kum sawmthum pha a, kum sawmli sung uk hi.

⁵ama in Hebron panin Judahte kum sali le lang sung uk a, Jerusalem panin Israel le Judahte theampo kum sawmthum le kum thum sung uk hi.

⁶Kumpipa David le a mite ii Jerusalem sim tu in a kuan tu hun hong theng hi. Tua munah a teang Jebus te in tua khua sia David in zo ngei tu in um ngawl ahikom hi bangin ci uh hi. “Hi lai khua ah nang hong tum thei ngawl tu ni hi; mittawte le a koncipte ngangawn in hong nolh keak tu hi.”

⁷(Ahihang David in Zionte ii kulhpi suanthal in tua hun pan kipan “David Khuapi” kici hi.)



⁸Tua ni in David in, a mite tungah, “Jebus mite kei ii ngaimawk za in a ngaimaw na om uh ziam? Thalup nop dongin a ensan na om uh ziam? Tua ahile tui laakna lei tawlet sia zui in pai tavun a, tua munah a mittawte le a koncip te sim tavun,” ci hi. (Tua hu in, “Mittawte le a koncipte sia Topa inn sungah tum thei ngawl tu ci thu hong piang hi.”)

⁹Kulhpi a suan zawkciang a sungah David hong teang a, “David ii khuapi” a kici hi Khuapi sia tua kulhpi ii kiimkot ah ama in hong sa a, nisuana mualpangh ah lei a dimin a kivuhna pan hong pan hi.

¹⁰Ama sia hong thahat vaial tawntung hi, banghangziam cile TopaPathian Vaanglianbelpa ama taw omkhawm hi.

¹¹Tyre khua a om Kumpipa Hiram in David ii kungah sum zuak sum lei tu vaihawm tu taangmi paisak hi; ama in tua kumpipa atu in kumpi teenna innsak natu cedar thingluangte, inn sa thiamte, suang ciang thiamte paisak hi.

¹²Tuabangin David in phawk hi, Topa in ama sia Israel te ii kumpipa tu in kipsak a, ama ii mite ii hu in ama ii kumpi ngam khangtosak hi.

¹³Hebron pan Jerusalem ah a kikhiin zawk uh ciang David in zino le zipi lathua in tapa tanute tam zaw lai nei hi.

¹⁴Jerusalem ah a tate hi bang teng hi: Shammua, Shobab, Nathan, Solomon,

¹⁵Ibhar, Elishua, Nepheg, Japhia,

¹⁶Elishama, Eliada, le Eliphelet te ahi uh hi.

Philistinete tung Zawna

(1Khang tangthu 14.8-17)

¹⁷Philistinete munah David sia Israel te ii kumpipa in kisuaksak zo hi ci in kison ahikom amate ii ngalkap honpite, ama man tu in hong kuan uh hi. Hi thu David in a zaak ciangin ama ngal nanna kulh khat sungah tuaksuk hi.

¹⁸Philistinete Rephaim Kuam sung hong theng a tua mun lua uh hi.

¹⁹David in Topa dongh a, “Philistinete ka sim tu ziam? Zawna kei nong pia tu ziam?” ci hi. Topa in, “Hi hi, sim tan! Zawna kong pia tu hi,” ci in zo hi.



²⁰Tua ahikom David sia Baal Perazim ah kuan a Philistine zo hi. Ama in, “Topa in ka ngalte khuanawl bangin nawk keak hi,” ci hi. Tua ahikom tua mun sia Baal Perazim kici hi.

²¹Philistine a taikeak uh ciang a biak uh milimte nusia uh a, David le a mite in tuate pua uh hi.

²²Tua zawkciang Philistine in Rephaim Kuam ah heak kikin tua mun lua kik uh hi.

²³Khat vei ma David in Topa thu dongh a, ama ii a zokikna pan, “Hi sung panin sim heak in, amate ii lang ah kot pai in, balsam thingkung omna sang panin sim vun ci hi.

²⁴Ngalkap honte kalsuan nging thing dawn ah na zaak uh ciang na sim tu uh hi, banghangziam cile Philistine ngalkap honte a zo tu in keima no mai ah kuan tu khi hi,” ci hi.

²⁵David in Topa ii thupiak bangin seam a, tuaciang ama in Philistine Geba pan kipan Gezer dong not keak hi.

Samuel Niina 6

Thukham Thingkuang sia Jerusalem ah Kipaipui

(1Khang tangthu 13.1-14; 15.25-16.6; 43)

¹Khatvei ma David in Israel mi ngalkap pha bel teng hong khawmtua a, a vekpi in tul sawmthum pha uh hi,

²tuaciang ama in amate Judah ngam Baalah ah paipui a, a kumpi tokhum sia cherubim te ii tungah a om, Vaanglianpipa Topa ii min a pu, Pathian ii Thukham Thingkuang sia tua mun panin laak tu ahi hi.

³Amate in mualtung Abinadab inn pan la in, leangthak khat ii tungah suan uh hi. Aminadab ii tapate Uzzah le Ahio in khuileang lampui in,

⁴leang mai ah Ahio pai hi.

⁵David le Israel buppi sia a tha nei za uh tawTopa upat piakna in la sa in laam uh hi. Tengtong, liamlo, khuang, nguasemh le daalkopsai te tum uh hi.



⁶amate Nacon ii ancilna mun hong thet uh ciangin a khuitalte hong lutu in Uzzah in Thukham Thingkuang hong zamh hi.

⁷Thakhat inTopa Pathian, Uzzah tungah thin uuk a, ama thatlum hi, banghangziam cile a thasia vawt ngawl hang ahi hi. Uzzah sia Thukham Thingkuang hui ah thi hi,

⁸tuaciang tua hun pan kipan tua mun sia Perez Uzzah kici hi. David sia a thin hong so hi, banghangziam cile Topa in Uzzah sia thin uukna taw daan a piak hang ahi hi.

⁹Tua zawkciang David in Topa kiita a, “Bangbangin Thukham Thingkuang sia tu in kei taw tonkhawm ngam nawn tu khi ziam?” ci hi.

¹⁰Tua ahikom ama in Jerusalem khua ah ciapui ngam ngawlin; tuasia taangin Gath khua mi Obed Edom inn ah lampial in tun hi.

¹¹Thukham Thingkuang sia tua munah tha thum kitaamsak a, tuaciang Topa in Obed Edom le a baangkua thupha pia hi.

¹²Kumpipa David in Thukham Thingkuang hu in Obed Edom le a baangkua sia Topa in a neisa dang theampo taw cipin thupha pia hi ci in za a, tua ahikom ama in Thukham Thingkuang sia Obed ii inn panin la in, poaipi khaamna lianpi taw Jerusalem ah ciapui hi.

¹³Thukham Thingkuang a pua mihingte kal luk hong suan zawkciang David in amate tawlngasak a, khuital khat le khuino thau khat sangaw biakpiakna in pia hi.

¹⁴David sia a kawngah dial khat teang bekin, Topa a upat piakna in a tha neiza taw laam hi.

¹⁵Tuabangin ama le Israel mite theampo in Thukham Thingkuang Jerusalem ah lungdamna in au na le lemle aw te taw paipui uh hi.

¹⁶Thingkuang khuapi sung hong kithet pui ciangin Saul ii tanu Michal in khelki panin khua a et le David kumpipa sia laamin, tawn in, biakpiak lapna taw laam a mu ciangin hoi maw sa hi.



¹⁷Amate in Thingkuang sia David ii ama atu asak puanbuk sungah koi uh hi. Tua zawkciang ama in Topa tungah sangaw biakpiakna le kipawlkhop biakpiakna pia hi.

¹⁸Sangaw biakpiakna a man zawkciang David in Vaanglianbelpa Topa min taw mipite thupha pia in,

¹⁹amate an hawmsak hi. Ama in Israel pasal le numei khat simin anluum khat tek, sa em bak khat tek le sapitko tawm tek pia hi. Tua zawkciang a kuama po inn ah cia uh hi.

²⁰Tua zawkciang David in a innkuanpuite taw kinukset tu in hong cia ciang, Michal sia ama muak tu in hong pusuak hi. “Tuni in Israel te ii kumpipa in ama atu min let mama natu khat vawt hi! Ama ii uliante ii naseam numeite mu na ah a mawmaw bangin kipholaak hi!” ci hi.

²¹David in zo a, “Na pa le ama baangkua taangin Israel te ii lampui tu kei hong tealkhia ka Topa ka upat piakna in laam peu khi hi,

²²tuaciang tu a sang zongin a nasia zaw lai in keima le keima kisimmawk vawt zaw lai tu khi hi. Nang na hile kei, bangma in hong heang ngawl tha tu ni hi, ahihang tua numeite in kei, hong thupi sim mama tu hi,” ci hi.

²³Saul ii tanu Michal sia ta nei ngei ngawl hi.

Samuel Niina 7

Nathan ii David A puak Thu

(1Khang tangthu 17.1-15)

¹Kumpipa David sia ama ii kumpi inn sungah om a, tuaciang Topain ama sia a ngalte theampo kung panin suatak in keam hi.

²Tua zawkciang kumpipa in kamsang pa Nathan munah, “Kei hi sungah cedar thing taw a kisa inn sungah teang khi hi, ahihang Pathian ii Thukham Thingkuang sia puanbuk sungah kikoi hi!” ci hi.

³Nathan in, “Na thin sung a om babangin vawt in, banghangziam cile Topa sia nang taw omkhawm hi,” ci in zo hi.

⁴Ahihang tua ni zanin Topa in Nathan munah,



⁵“Pai tan a, ka naseam pa David munah hi bangin ci tan, ‘Kei ten natu biakinnpi a sa tu sia nang hi ngawl ni hi.

⁶Egypt ngam panin ka mihingte ka suataksak hun pan kipan tu hun dong biakinnpi sungah teang ngei ngawl khi hi; khualhaw in vakkot ka hi hang puanbuk sungah teang khi hi.

⁷Israel ka mite taw ka khualhawna theampo sungah a lampuite khat ii tung zongh ah banghangin cedar taw a kisa biakinn hong saksak ngawl nu ziam? ci ngei ngawl khi hi.’

⁸“Tua ahikom ka naseampa David munah son in a, Kei, TopaVaanglianbelpa in ama munah, ‘Lo sungah tuu cingin na omna panin nang kong la khia a, Israel ka mite uk tu in kong vawt hi.

⁹Na pai na po ah nang taw kong omkhawm a, tuaciang na mainawt ciang na ngalte theampo kong zawsak siat hi. Leitung ah lampui lianbel te bangin kong minthangsak tu hi.

¹⁰⁻¹¹Ka mi Israel te ten natu mun khat ka teal zo a, tua munah amate kinengniam nawn ngawlin nungta tu uh hi. Ngam hisia sungah amate hong tum pan kipan amate mihing ngoltolte in sim tawntung a, ahihang hi bang thute piang kik nawn ngawl tu hi. Na ngalte kung pan kong suatak natu le suan le paal na nei natu kamciam kong pia zo hi.

¹²Nang thi in na taangpupite taw na kiphum khop zawkciang zong na tapate sung pan khat kumpipa ka suaksak tu a, a kumpi ngam ka thahatsak tu hi.

¹³Ama sia biakinnpi kei atu in a sa tu pa hi tu a, a kumpi ngam ka kikhomsuansak tu hi.

¹⁴Keima in ama ii pa ka hi tu a, ama ka tapa hi tu hi. Sep khial vawt khial a nei ciangin pa ii tapa a teh bangin ka teh tu hi.

¹⁵Ahihang nangma kumpipa na sua thei natu in Saul ka dawkhia bangin tua na tapa sia ka khuangkhosakna ka dokkhia kik buatu hi.



¹⁶Nangma in suan le paal na nei tawntung tu a, na kumpi ngam sia a kikhomsuan in ka vawt tu hi. Na khangngui sia a mong ngei buatu hi.’ ”

¹⁷Pathian ii a pualaak teng a vekpi in Nathan in David munah son hi.

David ii Lungdamkona Thungetna

(1Khang tangthu 17.16-27)

¹⁸Tua zawkciang David sia Topa ii ompuina Puanbuk sung zuanin to a thungen hi: “Vaanglianpipa Topa awng, kei tung ahizong ka innkuanpuite tung ahizong nong septe ka kiphu ka kilawmna om ngawl hi.

¹⁹Hi napi tu in a nasia zaw lai in hong seam ni hi, Vaanglianpipa Topa awng; maisang hong pai lai tu kumte ah ka suan ka paalte atu dongin kamciam nong pia hi. Tuaciang hi sia mihingte atu thuthun ahi hi, Vaanglianpipa awng!

²⁰Nang tungah bang kong ci lalai thei tu ziam? Kei na naseam pa hong he ni hi.

²¹Hi bang nong vawtte nangma ii deina le tupna hi; nangma in hi na lianpите kei nong hil natu in na vawt ahi hi.

²²Bangza in lian ni ziam, Vaanglianpipa Topa awng, nang taw a kibang khat zongh om ngawl hi; nang bekma Pathian na hi sia kong he tawntung uh hi.

²³Nangma mihing a suak tu in na hutkhiat Israel bang peuma leitung ah minam om ngawl hi. Amate atu in na vawt a lian le a lamdang nate in na minthanna leitung ah kizelsak hi. Egypt ngam pan nangma neisa tu in na suatak na mite a mainawt ciangin ngamdang mite le a pathian uh te na hawlkeak hi,.

²⁴Nangma in Israel te a tawntung na neisa tu in na vawt a, Topa awng, tuaciang nangma sia amate ii Pathian na suak hi.

²⁵“Tuaciang tu in, Topa Pathian awng, kei le ka suan ka paalte atu hun tuatuam sungah kamciam na vawtte a tawntung atu in hong tangtungsak tan, ka seam tu na ci te hong seam tan.



²⁶Na minthanna sia lian tu a, tuaciang mite a tawntung in, ‘Topa Vaanglianbelpa sia Israel te ii Pathian hi,’ ci tu uh hi. Tuaciang nangma in ka khangngui sia hun buppi ah nong keam tu hi.

²⁷Topa Vaanglianpipa, Israel ii Pathian awng! Hi thungetna nang tungah hang takin kong ngen hi, banghangziam cile, nangma in kei na naseam pa ii tungah hite nong lak zo a, tuaciang ka suan ka paalte sia kumpipa te na suasak tu nong son zo hi.

²⁸“Tuaciang tu in, Vaanglianpipa Topa, nangma in Pathian na hi hi; na kamciam na len tawntung a, hi a lamdang mama kamciamte kei tungah nong vawt zo hi.

²⁹Nangma ii piak hamphat nate taw a nopsak tawntung thei natu in, ka suan ka paalte thupha nong piaksak natu kong ngen hi. Nang, Vaanglianpipa Topa, in hi kamciam nong vawt zo a, na thupha sia ka suan ka paalte tungah a tawntungin kip tu hi.

Samuel Niina 8

David ii Ngalzawnate (1Khang tangthu 18.1-17)

¹Hun tawmvei zawkciang Kumpipa David in Philistinete sim kik a, amate zo in, amate ii ngam tungah Philistinete ii ukna a nei teng bosak hi.

²Tua zawkciang Moabte zo hi. A ngal matte lei ah lumsakin thum sung pan nii veu thatlum hi. Tua ahikom Moabte sia ama ii khutnuai mi hong suak uh a, ama tungah shia pia uh hi.

³Tuaciang, Syria ngam ii ngamno khen Zobah a uk kumpipa Rehob ii tapa Hadadezer sia Euphrates ngun naak sangah ngamukna la kik tu in a pai na lampi ah ama in zo hi.

⁴David in siphu ngalkap tul le zasali le, lei ngalkap tulkul matsak hi. Ama in ngalleang zakhat atu a kicing khom siphu la a, tua vaal teng a peangbai in koi siat hi.



⁵Damascus a om Syria te in Kumpipa Hadadezer hu tu in ngalkap hon khat a paisak le David in tuate simin tulkul le tulnii that hi.

⁶Tua zawkciang ama in amate ngam sungah ngal ngiaphualte saatin amate sia ama ii khut nuai mite hong suak uh a, shia pia uh hi. Topain mun theampo ah David sia zawna pia hi.

⁷Hadadezer ii a uliante ii a toai, kham lumte David in la a, Jerusalem ah cia pui hi.

⁸Ama in Hadadezer ii uk khuapite ahi Betah le Berothai pan taungo zonghtam ma la hi.

⁹David in Kumpipa Hadadezer ii ngalkap honpite zothal hi ci in Hamath ah Kumpipa Toi in za hi.

¹⁰Tua ahikom ama in a tapa Joram sia David tungah Hadadezer a zaw hu in lungdampuina ko tu in muaksak hi, tua Hadadezer le Toi sia tam vei ma kido ngei uh hi. Joram in David a piak tu kham, ngun le taungo taw a kivawt letsongte puak hi.

¹¹Kumpipa David in tuate sia a zaw sa ngamte pan a laak ngun le kham te taw kopin biakpiakna ah a zak tu in koi tuam hi — tua a zaw sa ngamte sia

¹²Edom, Moab, Ammon, Philistia, le Amalek te hi — Hadadezerte kung pan a phuul vanh pawlkhatte taw zong kikopsak hi.

¹³Ci Kuam sungah Edom mite tulsawm le tulliat a thalupna pan a cia kikciang David minthang vaial hi.

¹⁴Ama in Edom ngam sung theampo ah ngalkap phual saat a, tuaciang tua mun ah mihingte ama ii khut nuai mi suak uh hi. Topa in David mun theampo ah zawna pia hi.

¹⁵David in Israel buppi tungah ukna nei a, a mite thumaan tak le thutang takin a ki uk natu in vawt hi.

¹⁶A nu Zeruah ahi Joab sia ngalkap hon bup ukpipa ahi hi; Ahilud ii tapa Jehoshaphat sia thu tepteena huvau teng tavuan pia hi;



¹⁷Ahitub ii tapa Zadok le Abiathar ii tapa Ahimelech te sia thiampi ahi uh hi; Seraiah sia kumpipa inn sung thuzeakpi ahi hi;

¹⁸Jehoiada ii tapa Benaiah sia David a cingte ukpi hi a, David ii tapate sia thiampite ahi uh hi.

Samuel Niina 9

David le Mephibosheth

¹Nikhat ni in David in, “Saul ii baangkua sung pan a nungta lai om ziam? Tuabang a om le Jonathan hu in dikna lak nuam khi hi,” ci hi.

²Saul ii baangkua sungah inntiang a seam Ziba a kici khat om a, ama sia David kungah pai in kisawl hi. “Nang Ziba ni ziam?” ci in kumpipa in dongh hi. “Na na seam tu khi hi, Topa,” ci in ama in zo hi.

³“Pathian tungah kiciamna ka vawt bangma, Saul ii baangkua tungah thumaanna le dikna ka lak natu in Saul ii baangkua sungah khat po a kikhe a om ziam?” ci in dongh hi. Ziba in, “Jonathan ii tapa khat omlai hi; Ama a peangzaw hi,” ci in zo hi.

⁴Kumpipa in, “Koi sungah ama om ziam?” ci in dongh hi. Ziba in “Lodebar khua, Ammiel ii tapa Machir inn ah om hi,” ci in zo hi.

⁵Tua ahikom David in ama samsak hi.

⁶Saul ii tupa, Jonathan ii tapa, Mephibosheth a thet ciang David mai ah zatak pia in kun hi. David in, “Mephibosheth awng, ” ci in sam a, ama in “Na na seam tu khi hi, Topa,” ci in zo hi.

⁷David in, “Lau heak in. Na pa Jonathan hu in nang tungah hong thudik tu khi hi. Na pu Saul ii leitangh theampo nang kong pia kik tu a, tuaciang nang sia a tawntungin ka sabuai ah an na ne tu hi,” ci hi.

⁸Mephibosheth kun kik a, “Kei sia ui thi sa khat sangin mannung ngawl zaw khi hi, Topa awng. Banghangin kei tungah ta za in hong dik tu ni ziam?” ci hi.

⁹Tua zawkciang kumpipa in Saul ii naseam pa Ziba sam a, “Na Topa Saul ii tupa Mephibosheth tungah Saul le a baangkua ii neisa theampo pia khi hi.



¹⁰Nang, na tapate le na naseamte in leitangh te na tho tu uh a, Saul na Topa ii innkuanpuite anlaak ciang amate neak tu an na puak tu uh hi. Ahihang Mephibosheth ama ahile keima sabuai ah leangna hi tawntung tu hi,” ci hi. (Ziba in tapa sawm le nga le naseam kul nei hi.)

¹¹Ziba in, “Kumpipa ii nong sawl babang ka vawt tu hi,” ci in zo hi. Tuabangin Mephibosheth in kumpipa ii tapate khat bangin kumpipa sabuai ah an ne hi.

¹²Mephibosheth in tapano Mica a kici khat nei hi. Ziba ii innkuanpuite theampo Mephibosheth ii naseamte suak siat uh hi.

¹³Tua ahikom, a peangte ngeal a zawcip Mephibosheth sia Jerusalem khua ah teang a, a an theampo kumpipa sabuai ah ne hi.

Samuel Niina 10

David in Ammonte le Syria te Zo

(1Khang tangthu 19.1-19)

¹Tua zawk tawm vei ciangin Ammonte ii Kumpipa Nahash thi a, a tapa Hanun sia kumpipa suak hi.

²Kumpipa David in Hanun tungah, “A pa Nahash ii kei tungah hong vawt bangin thumaan lawmtakna ka lak kul tu hi,” ci hi. Tua hi a, David in a khuangai puina a lakna in kamtaite paisak hi. Amate Ammon a thet uh ciang,

³Ammon lampuite in a kumpipa tungah, “Na pa upat piakna taw David in hi mite khuangai thu lakna in hong paisak hi tu in um ni ziam? Hi peuma ngawl hi. Ama in amate hi sungah hong puakna sia ih khuapi hong suanthal thei natu ngalvil thu dawpin hong paisak hi!” ci uh hi.

⁴Hanun in David ii kamtaite mansak a, a khamul langkhen meetkolsakin, a puansilh uh a kawng ciangin attansak a, tha kik uh hi.

⁵Amate sia inn lam a zot tu a mai uh zum mama hi. David in bang thu piang ci a zaak ciang amate tungah kam thaak a, na khamul uh a po kik mateng hong heak kik heak vun a, Jericho khua ah na taam vun ci in zasak hi.



⁶Amate in David sia a ngal uh suaksak ci in a phaw ciang Bethrehob le Zobah pan Syria ngalkapte tulkul, Tob pan tulsawm le tulnii, tuaciang kumpipa Maacah le a mite tulkhat teng ngal cial uh hi.

⁷David in hi thu za a tuaciang, Joab le a ngalkap hon bup amate do tu in kuansak hi.

⁸Ammonte in amate khuapi Rabbah tumna ah mun la uh a, tua laan in a dangte Syria te le Tob le Maacah pan a te in leimai na ah mun la uh hi.

⁹Ngalte in mai pan le nung panin hong sim tu hi ci in Joab in mu ahikom Israel ngalkap pha bel teng tealin Syria te maingat in mun lasak hi.

¹⁰Ngalkap a om lai teng sia a suapui pa Abishai khut nuai ah koi a, ama in tuate sia Ammonte maingat in koi hi.

¹¹Joab in ama munah, “Syria te in kei hong zo tuak bangin na mu le hong pai tan a hong hu tan, tuaciang Ammonte in nang hong zo tuak bang ahile keima hong pai in kong hu tu hi.

¹²Hat in a, na thinliansak in. Ih Pathian khuapite le ih mite atu in nasia takin do tawng. TuaciangTopa ii deina babangin piang taken,” ci hi.

¹³Joab le a mite a sim tu in hong mainawt uh a, tuaciang Syria te tai keak uh hi.

¹⁴Ammonte in Syria te tai a mu uh ciang amate zongh Abishai mai panin tai a, a khuapi sung tu uh hi. Tuasia ciang Joab sia Ammonte a simna pan hong heak kikin Jerusalem khua zuan hi.

¹⁵Syria te in amate sia Israel te in zo hi ci in phawk ahikom a ngalkap theampo khawmtua uh hi.

¹⁶Kumpipa Hadadezer in Euphrates Ngun ii niswana sangah a om Syria te sam a, tuaciang amate Zobah Kumpipa Hadadezer ii ngalkap hon ukpa Shobach uk a, Helam khua ah hong pai uh hi.



¹⁷David in tua thu zaak ciang Israel ngalkap theampo khawmtua a, Jordan Ngun kantan in Helam ah kuan uh hi, tua munah Syria te in amate maingat in mun la uh hi. Kidona hong kipan a,

¹⁸tuaciang Israel te in Syria ngalkapte notkeak kik uh hi. David le a mihingte in Syria ngalleang uk mihing zasali that uh a, siphu ngalkap tul sawmli thatin, ngalte ngalkap ukpipa Shobach zongh liam a, ngalphual ma ah thi hi.

¹⁹Hadadezer ii khutnuai ah a om kumpite in amate sia Israel te lel ci in a kiphaw uh ciangin ngal kilemna vawt uh a, amate ii khutnuai ah tum uh hi. Tuaciangin Syria te in Ammonte hu ngam nawn ngawl uh hi.

Samuel Niina 11

David le Bathsheba

¹Kumpipate in ngalsim veu in a kuan hun tuk kik ciangin David in Joab le a ngalkap uliante le ngalkap honte kuansak hi; amate in Ammonte zo in, a khuapi Rabbah uumci uh hi. Ahihang David ama sia Jerusalem ah om hi.

²Nikhat sun ni niam zawkciang David sia a mutna pan hong tho a, kumpi teenna inn a khum tungah kaato hi. Ama tuabangin inntung tamna ah a vavaa ciang numei khat a inn sungah kibual in a om mu hi. Ama a meal pha mama hi.

³Tua ahikom ama in kamtaite paisak a, tua nu sia akua ziam ci in a katsak ciang, Hit mi Eliam ii tapa Uriah ii zi Bathsheba hi ci in he hi.

⁴David in ama sam tu in kamtaite paisak hi; amate in ama kungah numei nu ciapui uh a, ama in luppui hi. (Ama sia thasim in a zeksa kithiansua hun a manh zawk hiat bek ahi hi.) Tua zawkciang ama cia kik hi.

⁵A zawkciang ama ngai ahi hunlam kiphawk a, David munah son tu in kamtai paisak hi.

⁶Tuasia ciang David in Joab tungah kam thaak a, “Hit mi Uriah hong puak tan,” cisak hi. Tua ahikom Joab in Uriah sia David kungah paisak hi.

⁷Uriah hong thet ciang David in Joab le a ngalkapte bangbang hi ziam, ngal kidona bangbang hi ziam ci in dongh hi.



⁸Tuaciang, ama in Uriah munah, “Cia tan a tawm vei tawlngak hun la tan,” ci hi. Uriah in nusia a, tuaciang David in a inn ah letsong puaksak hi.

⁹Ahihang Uriah cia ngawl a; kumpi teenna inn kongpi ah kumpipa a cingte taw lum hi.

¹⁰Uriah inn ah cia ngawl hi ci in David in a zaak ciang ama dongh a: “Hun saupi inn taw kikhen hi ngawl ni ziam, banghangin cia ngawl ni ziam?” ci hi.

¹¹Uriah in zo a, “Israel te le Judahte sia ngal kidona ah om a, tuaciang Thukham Thingkuang zongh amate taw om hi; hong ukpa Joab le a uliante zongh munmaaina ah ngiaphual saat hi. Bangbangin kei inn ah cia a, ne in dawn in ka zi taw koi bang lum thei thong tu khi ziam? Tuabang peuma in ngamta ngei ngawl tu khi hi ci in biakna kisai a thiangtho nate theampo taw kiciam khi hi,” ci hi.

¹²Tua ahikom David in, “Tua ahile tuni bup hi sungah taam lai in tawlnga lai in, zing ciangin kong paisak kik tu hi,” ci hi. Tua ahikom Uriah sia tua ni le a zing ciang dong Jerusalem ah taam hi.

¹³David in nitak an ne tu in Uriah sam a, zu khamsak hi. Ahihang tua ni zan zongh Uriah a inn ah cia peang ngawl hi; kumpi teenna inncingte khaan sungah ama puanvan tungah mu veve hi.

¹⁴A zing kik ciang David in Joab lai thaak a, Uriah in a lai puaksak hi.

¹⁵Ama in a lai sungah: “Uriah sia ngal kisim a nasia belna, ngal mai ah koi in, tuaciang thakhat in nungkin vun, ama sia kithat taken,” ci in at hi.

¹⁶Tua ahikom Joab in khuapi a uumci laitakin ngalte thahat na munah Uriah puak hi.

¹⁷Ngalte ngalkapte khuapi panin hong pusuak uh a, Joab ii ngalkapte hong sim uh hi; David ii uliante pawlkhat thi a, Uriah zongh thi hi.

¹⁸Tua zawkciang Joab in David munah ngal kidona thu zaaksakna thaak hi,

¹⁹tuaciang ama in kamtai te hi bangin a pau natu hil a, “Kumpipa tungah ngal kidona thu na son siat zawk uh ciang,



²⁰ama thin uukin, hi bangin hong dongh thei tu hi. ‘Banghangin amate sim tu in khuapi taw a kinai lei na dong pai nu ziam? Khuapi luphungte tung panin thaltangte hong kap tu ci in he ngawl nu ziam?’

²¹Gideon ii tapa Abimelech ii kithalupna ciamtee nawn ngawl nu ziam? A mun sia Thebez hi a, numei khat in anngoai na suang khat luphung tung pan a khiaksuk sia in ama khalum hi. Tua ahile banghangin luphung neak lei in pai nu ziam?’ Kumpipa in tu a bangin hong dongh le ama munah, ‘Na ngalkap mang Uriah zongh kithat hi,’ ci vun,” ci hi.

²²Tua ahikom kamtai pa, David kungah hong pai in Joab ii son tu a thupiak bangin son hi.

²³Ama in, “Ih ngalte sia ei sangin hat zaw a, khuapi sung pan hong pusuk in munmaaina ah ei hong sim tu in hong pai hi, ahihang amate sia khuapi kongpi dong ka nawt kik uh hi.

²⁴Tuaciang amate in luphung tung pan thaltang taw hong kap in, na ngalkap uliante pawlkhat hong thalupsak a, Uriah zongh thi hi,” ci hi.

²⁵Kamtaite munah David in, “Joab na hanthawn vun a, ngal kidona sung sia a kua teng thi tu ci in kuama in kison thei ngawl ahi nung sang na thinkiam heak hen. Khuapi sia nasia seseam in na sim hen a, na suan hen,” cisak hi.

²⁶Bathsheba in a pasal kithat ci in a zaak ciang ama atu in khuangai in tau hi.

²⁷Khuangai tu hun teng a man ciangin David in ama sia kumpi teenna inn ah pai tu in sam hi; ama ii zi hong suak a, tapa khat hing hi. Ahihang Topa sia David ii ngamtatna huvau ah a lungkim ngawl hi.

Samuel Niina 12

Nathan ii Thupuak le David ii Kisiikikna

¹Topa in kamsang pa Nathan David ii kungah sawl hi. Ama kungah Nathan pai in, “Pasal nii khuapi khat ii sungah teang khawm hi; khat sia hau a, a khat zaw sia zawnng hi.

²A hau sia pa in khui le tuu tam mama nei hi,



³tuaciang a zawng sia pa in a lei sa tuuno khat bek nei hi. Ama in tuasia pha takin vaak a, a inn ah a tate taw khang khawm hi. Ama ii neak lai an pawlkhat taw vaakin, ama ii hai panin dawnsak a, tuaciang a kaang sungah toai hi. Tuuno sia ama atu in tanu khat taw kibang hi.

⁴Ni khat ni in leangna khat a hau pa inn ah hong theng hi. Mi haupa in leangna pa atu an a huan tu in ama ii ngannote khat a ngaw tu oai ngawl a, ama in mizawngpa tuuno la in a zinpa an neak tu in vawt hi,” ci in son hi.

⁵David sia mihau pa tungah a thin uuk mama a, “A nungta Topataw kiciam hi tong, hi bangin a ngamta pa a thi tu kilawm hi.

⁶Hi bangin a tatsiat hu in a laak za tungah a zaa li in a lo kik kul tu hi,” ci hi.

⁷“Nangma tuasia pa ni hi,” Nathan in David munah ci hi. “Tuaciang hi sia Israel ii Pathian Topa ii ci hi: ‘Saul ii khut sung pan kong suatak a, Israel kumpipa in kong koi hi.

⁸Ama ii kumpi ngam le a zite nang kong pia hi; Israel le Judahte ii kumpipa in kong koi hi. Hi sia kicing sa ngawl lai na hi le a see nii in a tamzaw zongh hong pia lai tu khi hi.

⁹Tua ahile banghangin kong thupiak ni ngawl ni ziam? Banghangin hi tatsiatna ngamtat in nei ni ziam? Nang in Uriah sia ngal sungah na thisak hi: Ammonte in na thatlumsak hi, tua zawkciang a zi na la hi!

¹⁰Tu in na khang sim in na suan na paalte pawlkhat sia thi ngamh in thi tu hi, banghangziam cile nang in ka thu nong ni bua a, tuaciang Uriah ii zi na tang hi.

¹¹Nangma ii baangkua sung pan ma in pawlkhat in nangma tungah ngimna hong tut tu in ka kiciam hi. Na zi sia nangma kung pan la a ka piak ciangin hi thu na mu tu hi. Ama in sun tangin amate luppui tu hi.

¹²A thimtham in mawna vawt ni hi, ahihang Israel theampo ii mu tu in sun tangin ka piangsak tu hi,” ci hi.



¹³David in, “Topa tungah maw zo khi hi,” ci hi. Nathan in, “Topa in hong maisak hi; thi ngawl tu ni hi.

¹⁴Ahihang hi bangin na ngamtatna panin Topa simmawkna lak na hikom na ta sia thi tu hi,” ci in zokik hi.

¹⁵Tua zawkciang Nathan inn ah cia hi.

David ii Tapa Thi

Uriah zi taw David ii a hin nausen sia Topa in a cina mamasak hi.

¹⁶David in patang sia ii dam natu Pathian tungah thu ngen hi. Ama in bangma ne nuam ngawl a, zan simin ama ii khaan sungah pai in suat tungah lum hi.

¹⁷A kumpi inn sungah uliante in hong thaw natu hanciam hi kale tho nuam ngawl a, amate taw bangma ne khawm nuam ngawl hi.

¹⁸Nipi khat zawkciang a patang hong thi a, tuaciang David ii uliante in tua thu ama a son tu sia lau uh hi. Amate in, “Patang a nuntak lai zongin ih paupui ciang David in hong zo nuam ngawl hi. Patang sia thi zo hi ci in bangbangin son thei tu hi ziam? Ama le ama bang khat po kilaw tha tu hi,” ci uh hi.

¹⁹David in amate kihau a mu ciang patangno thi zo hi ta a, ci in phawk hi. Tua ahikom ama in amate munah, “Patang thi zo ziam?” ci in dongh hi. “Hi hi, thi zo hi,” ci in amate in zo uh hi.

²⁰David in suat tung pan hong thoto a, kibualin, a sam hong pot a, a puan hong laih hi. Tua zawkciang ama Topa ii inn sungah hong pai in biakpiakna vawt hi. Kumpi inn ah a heak kik ciangin an ngen a, a kilui po ciangin ne paih hi.

²¹Ama ii inn sung uliante in, ama munah, “Hi thu sia tel zo ngawl khu hi. Patangno a nuntak lai in ama na kaa a, an na ne bua hi; ahihang a thi po ciang thoto in an na ne hi!” ci uh hi.

²²“Hi hi, A nuntak lai in kapin an tang peu khi hi. Topa in kei hong hesuak tha tu a patang sia thisak ngawl tu hi ci in ka ngaisun hi.



²³Ahihang tu in a thi zawkciang banghangin an tatang nawn tu khi ziam? Patang nungtasak kik thei tu khi ziam? Ni khat ni ciang ama omna ah kei pai tu khi hi, ahihang ama kei kungah hong pai kik ngei ngawl tu hi,” ci hi.

Solomon hong Piang

²⁴Tua zawkciang David in a zi Bathsheba heeneam hi. Ama in luppui in, tapa khat hong nei kik a, David in Solomon ci in a min phuak hi. Topa in patangno sia it hi,

²⁵tuaciang Topa in kamsangpa Nathan sawl a, patangno min Jedidiah phuaksak hi, banghangziam cile Topa in ama it hi.

David in Rabbah Khuapi La

(1Khang tangthu 20.1-3)

²⁶Tua laan in Joab in Ammonte ii khuapi Rabbah a simna hong zomto suak a, suan tu in kipan hi.

²⁷Ama in kamtaite paisak a, David tungah, Rabbah sim zo khi hi, tuaciang a tuinaak zongh suan zo khi hi.

²⁸Tu in na ngalkap om lai teng hong khawmtua tan a, a khuapi sim in, nangma tatak ma in la in, Tua khuapi la hi ci in min nga nuam ngawl khi hi,” ci in kosak hi.

²⁹Tua ahikom David in a ngalkapte khawmtua a, Rabbah ah kuanin sim hi.

³⁰Ammonte ii biak milim pathian Molech lu tung pan David in pound sawmsali le pound nga bang a ngit kham kumpi lukhu le suangmanpha a kisuan sia la hi. David in la in ama lu ah khu hi. Ama in khuapi sung pan a phuul uh vanh tam mama la a,

³¹a mihingte thing at naam, thik tumanh, thik hei te taw naseamsakin, uksuang seaksak hi. Ammonte ii khuapino dangte sung a om mite zongh tuabangma in zangh hi. Tuaciang ama le a mite Jerusalem ah cia kik uh hi.

Samuel Niina 13

Amnon le Tamar

¹David ii tapa Absalom in a mealpha pasal nei ngawl lai suapuinu Tamar a kici khat nei hi. Amnon a kici David ii tapa dang khat in ama dei hi.



²Ama in tua nu dei mama ahikom nat law liang hi, banghangziam cile a tenpui tu piang thei tu in um ngawl hi; ngaknu thiangtho a hina taw kizui in ama sia pate taw kimu ngawlin kikoi hi.

³Ahihang ama in a pilvang mama, David ii suapuipa Shammah ii tapa Jonadab kici khat ngualtamh in nei hi.

⁴Jonadab in Amnon munah, “Nang sia kumpipa ii tapa hi napi, ni khat zawk ciang ni khat hee maipuak taw om ni hi. Bang tat ni ziam?” ci hi. Ama in, “Ka suapui seal Absalom ii suapuinu Tamar dei khi hi,” ci in zo hi.

⁵Jonadab in, “Na cii kinasak in lupna zuan in. Na pa in nang ve tu in hong pai ciang, ama mun ah hi bangin ci in, ‘Nong hesuakna in ka suapui nu Tamar in hong pai in an hong piasak tan. Hi sungah ka mu tangin an hong huansak hen a, ama mama in an hong piasak tan,’ ” ci hi.

⁶Tua ahikom Amnon sia kizawmsakin lupmun zuan hi. Kumpipa David in ama ve tu in pai a, tuaciang Amnon in, “Nong hesuakna in Tamar hi sungah hong paisak tan a, ama ka mu thei natu munah anluum nip pawl khat hong vawtsak taken, tuaciang ama mama in hong pia taken,” ci hi.

⁷Tua ahikom Kumpipa David in kumpi teenna inn sungah Tamar kam thaak a, “Amnon ii inn ah pai tan a, an tawm vawtsak tan,” ci hi.

⁸Ama pai in lupna tungah a lup mu hi. Anvui thauh sa pawl khat la in, ama ii mu theina munah anluum nip pawlkhat vawt hi. Tua zawkciang anluum nip te em in,

⁹ama ii neak tu in beal sung pan sua hi, ahihang ama in ne nuam ngawl hi. Ama in, “A om theampo pusuaksak in,” ci a, tuasia ciang amate in nusia uh hi.

¹⁰Tua zawkciang, “Anluum nipte hi sungah hong paipui tan a nangma hong baak tan,” ci hi.

¹¹Ama in anluumte a piak ciangin, Amnon in zamh a, “Hong pai tan, lumkhawm tawng!” ci hi.

¹²“Tuabang zano huai nasepte hong seamsak heak in! Lamdangsak huai mama hi.



¹³Bangbangin mihing kawm ah khuadak ngam nawn tu khi ziam? Tuaciang, nang zongh Israel ngam ah minsia cip tu ni hi. Nong hesuakna in kumpipa tungah ngen in, ama in kei nang atu hong pia tu hi ci in um khi hi,” ci hi.

¹⁴Ahihang ama in numei ii pau a ngai nuam bua hi; tuaciang ama sia hatzaw ahikom buancip in khialpui hi.

¹⁵Tua zawkciang Amnon in numei nu tungah nasia takin ngaimawkna thin taw kidim hi; a masa in a it mama lai sangin tu in a ngaimawk leleau ciang nasia zaw hi. Ama in, “Tai in,” ci hi.

¹⁶Ama in zo a, “Tu bang a nong betkeak sia, na vawt sa khialna saang zongin a nasia zaw khialna hi!” ci hi. Ahihang Amnon in ama ii pau a ngai nuam bua hi;

¹⁷ama in ama ii aituam naseamte samin, “Hi numei ka muna ah omsak heak vun! Doipua ah lawn vun a, kongkha kilhnelh vun,” ci in sawl hi.

¹⁸Naseamte in ama doipua ah koi in kongkha kilh san uh hi. Tamar sia tua hun lai in kumpipa tanu pasal nei ngawl lai te kizepna ahi puantual baan sau silh hi.

¹⁹Ama in a lu tungah vut kipoai a, a puantual eaukeak in, a khut sungah a maiphum in kap kawmin pai hi.

²⁰A suapuipa Absalom in ama a mu ciang, “Amnon in hong vawtsia ahi bua ziam? Suapui nu awng, taza in na thin lalsak heak in. Ama na suapui seal hi, tua ahikom kuama mun ah son heak in!” ci hi. Tua ahikom Tamar sia Absalom ii inn ah ama nguakin hee in lungzuang in om hi.

²¹Kumpipa David in bang thu piang ci in a zaak ciang ama a thin so hi.

²²Tuaciang Absalom in Amnon ii a suapuinu a buansak hu in huatsa mama a, pau zongh paupui nuam ngawl hi.

Absalom ii Phu laakna

²³Kum nii zawkciang Ephraim khuapino hui, Baal Hazor ah Absalom in a tuumul meetsak a, ama in kumpipa tapate theampo tua munah pai tu in sam hi.



²⁴Ama in Kumpipa David kungah pai in, “Kumpipa awng, ka tuute mul meetsak khi hi. Nang le na uliante hong pai in tua poai ah hong kihel tu hi ngawl ni ziam?” ci hi.

²⁵“Hong kihel thei ngawl tu khi hi, ka tapa awng, ka vekpi in hong pai thong le ung, nang atu ngim huai lei tu hi,” kumpipa in ci hi. Absalom in ngen kenkon ahihang kumpipa uuk ngawl a, Absalom paikhia in sawl hi.

²⁶Ahihang Absalom in, “Tua ahile pha hi, ka suapuipa Amnon beak nong paisak buatu ziam?” ci hi. “Banghangin ama hong pai kul tu ziam?” ci in kumpipa in dongh hi.

²⁷Ahihang Absalom in ngengen ahikom a khakbel ciang David in Amnon le a tapa dangte Absalom taw ton tu in sawl hi. Absalom in kumpipa atu dong a kiphu an neak poapi khat vawt hi,

²⁸tuaciang a naseamte thupia a: “Amnon in zu tam hong neak lei zawkciang le thu kong piak ciangin ama that vun. Lau heak vun. Keima in tavuan la khi hi. Hang vun a, ki haisaangsak heak vun,” ci hi.

²⁹Tuabangin naseamte in Absalom thupiak bangin Amnon that uh hi. David ii tapa dangte a laa uh tungah to in taikeak uh hi.

³⁰Amate innlam hong zazot lai in, David munah thu kiko a, “Absalom in a tapate theampo thatlum siat hi, khat zongh kikhe ngawl hi!” kici hi.

³¹Kumpipa hong ding a, a puansilh lai sia heena taw eaukeak in, tuaciang ama lei liik hi.

³²Ahihang David ii suapui pa Shammah ii tapa Jonadab in, “Kumpipa awng, na tapa theampo kithat siat ngawl hi. Amnon bek thi hi. Amnon in Absalom suapuinu Tamar a buan pan kipan hi bangin a ngamtat tu sia a thin sung a khensat sa hi, ci in Absalom na et ciang kimu thei hi.

³³Tua ahikom na tapate theampo thi hi ci thuthang sia um heak in; Amnon bekma kithat hi,” ci hi.



³⁴Tua laanin Absalom tai zo hi. Tua hun laitak lianin ngalvil ngalkap pa in Horonaim mualtung lampi pan hong paisuk mihonpi khat mu hi. Ama in kumpipa kungah pai in ama ii mu teng ko hi.

³⁵Jonadab in David ii munah, “Tuatae sia keima ii kong son sa bangin na tapate hong cia hi,” ci hi.

³⁶Hi teng a son man po ciang, David ii tapate hong tum a: amate kap tu in hong kipan a, David le a uliante zongh nasia takin kap uh hi.

³⁷⁻³⁸Absalom sia tai in, Ammihud ii tapa Talmai, Geshur kumpipa zuan a, tuaciang tua munah kum thum sung om hi. David in a tapa Amnon atu khua ngei pi ma tau hi;

³⁹ahihang Amnon ii thina hu a khuangaina a theau zawkciang a tapa Absalom khuangaina taw hong kidim leleau hi.

Samuel Niina 14

Absalom hong Cia kik natu Joab in Ngealsak

¹Kumpipa David in Absalom ngai mama hi ci in Joab in he hi,

²tua ahikom ama in numei pil khat Tekoa ah a teang sia sam hi. Ama hong thet ciang Joab in ama munah, “Ki khuangaisakin, na khuangaih puante silh in, na sam pot heak in. Khua ngei mama khuangai in a om sa bangin kithoai in.

³Tuaciang kumpipa kungah pai tan a, ci a kong sawl teng va ci tan,” ci hi. Tua zawkciang Joab in a pau natu teng hil hi.

⁴Numei nu kumpipa kungah pai in, zatak piakna in lei ah bok hi, tuaciang hi bangin ci hi, “Hong hu tan, Kumpipa awng.”

⁵“Bang dei ni ziam?” ci in ama in dongh hi. Tua nu in, “Kei sia a zawng meingong nu khi hi, Topa awng. Ka pasal hile thi zo hi.

⁶Topa awng, tapa nii ka nei a, ni khat ni ciang lo sungah kuama a khen tu a om ngawl na ah kihau uh a, khat in a dang khat sia thatlum hi.



⁷Tuaciang tu in, Topa, ka be te theampo in hong langpan a, a suapuipa a thalup hu in ama zongh thalup tu in ka tapa amate khut sungah aap in hong sawl hi. Hi bangin amate hong ngamta ahile kei sia tapa nei nawn ngawl tu khi hi. Amate in ka lam etna a khakbel sia hong suk siatsak tu a, ka pasal min a lua tu zongh kuama om nawn ngawl tu hi,” ci hi.

⁸Kumpipa in, “Inn ah cia kik tan, keima in hi thu kong thintoisak tu hi,” ci in zokik hi.

⁹“Kumpipa awng, bangpo na vawt zong, hi thu tungtaang ah kei le ka baangkua in mawsiat thuak taw ung; nang le kumpi innkuan sia maw thei ngawl tu nu hi,” ci hi.

¹⁰Kumpipa in zo a, “Khat po in hong tawng le keima kungah hong paipui tan, tua hile ngim hong pia nawn ngawl tu hi,” ci hi.

¹¹Ama in, “Kumpipa awng, Topa na Pathian tungah thu hong ngetsak tan, ka be te ka tapa ii phulam natu tavuan nei te in ka tapa a om lai sia a thalupna uh taw mawna nasia zaw lai a vawt ngawl natu hong ngetsak tan,” ci hi. “A nungta Topa taw kiciam khi hi, na tapa sia tawmno zongh bangma tat ngawl tu hi,” David in ci hi.

¹²“Nong hesuakna in kumpipa awng, kammal khat hong pausak lai tan,” numei in ci hi. Ama in, “Son in,” ci in zo hi.

¹³Numei in ama munah, “Banghangin Pathian mite tungah tuabang ahi ngawl ngamta ni ziam? Nangma zongh na tapa sia lei dangah a peamna pan cia kiksak ngawl ni hi, tua ahikom tu mahiat a na pau teng in nangma kipuanilsak ni hi.

¹⁴Ei ih vekpi in thi tu hi hing; ei sia lei ah a bua tui taw kibang hi, tuate kikhawmtua kik thei ngawl hi. Pathian ngangawn zongh in a thi sa te nungtasak kik ngawl hi, ahihang kumpipa in mihing khat peamta in a om sia cia kiksak thei ni hi.



¹⁵Tu in, kumpipa awng, nang kungah hong pai a hi bangin thu kong sonna sia, mihingte in kei hong tawng hi, tua ahikom nang kungah hong pai leng kong nget po hong vawtsak tu ci in keima le keima lam etna nei ka kisa hi.

¹⁶Pathian ii a mite a piak leitangh tung pan kei le ka tapa sia hong sot tu in thalup hong sawmte kung panin nong hutkhiat natu kong son teng hong ngai tu in ka um hi.

¹⁷Keima le keima tungah ka kici na pan, Topa na kamciam in keima hong suaktasak tu hi, banghangziam cile kumpipa sia Pathian ii vantung mite bangin a pha le a sia khentel thei hi. Topa na Pathian nang taw omkhawm taken,” ci hi.

¹⁸Kumpipa in zo a, “Thu khat hong dongh tu khi hi, tuaciang ahi babangin hong son tu ni hi,” ci hi. Tua nu in, “Nong dok nop po hong dongh tan, Kumpipa awng,” ci hi.

¹⁹“Tu a bang teng nong sep sia Joab ii hong sawl ahi ziam?” ama in ci hi. Numei in “A thiangtho nate theampo taw kiciam khi hi, nong thudok sia, Kumpipa awng, ka pial thei natu mama a lam om ngawl hi. Na ulianpa Joab in tu a bangin seamin pau in ci in hong sawl takpi hi.

²⁰Ahihang hi vai buppi thiangsak nuam a, tua hu in a vawt hi. Kumpipa sia Pathian ii vantung lalangte bangin ciim a thupiang theampo he ni hi,” ci hi.

²¹A zawkciang kumpipa in Joab ii munah, “Na dei bangin sep tu ka khensat zo hi. Pai tan a khangno Absalom sia hi sungah hong siapui tan,” ci hi.

²²Joab in David ii mai ah zatakna taw ki leisee sukin, “Pathian in thupha hong pia taken, Kumpipa awng! Tu in kei tungah hong lungkim na hi hunlam sia kong nget teng nong piak ciangin ka hee hi,” ci hi.

²³Tua zawkciang ama thoto in Geshur ah pai in Absalom Jerusalem ah siapui hi.

²⁴Ahihang kumpipa in Absalom sia kumpi teenna inn sungah a ten ngawl natu in thu pia hi, “Ama mu nuam ngawl khi hi,” ci hi. Tua ahikom Absalom sia ama inn ah teangin kumpipa mai ah hong kilaak ngei ngawl hi.



Absalom le David Kilem kik

²⁵Israel ngambup sungah mealphatna lam sang Absalom bangin a minthang kuama om ngawl hi; a lu pan a peang dong sit baanna nei ngawl hi.

²⁶A sam saa mama a, a sau lei, a ngit lei ciang kumsim khat vei veu tan hi. A sam ngitna sia kumpite ii khaiteena taw tee ciang, pound nga bang pha hi,

²⁷Absalom in tapa thum le Tamar kici tanu khat nei a, a mealpha mama numei khat ahi hi.

²⁸Absalom sia kumpipa taw kimu ngawlin kum nii sung Jerusalem ah teang hi.

²⁹Tua zawkciang ama in Joab samsak a, ama atu kumpipa taw a kimu natu sawl hi; ahihang Joab pai nuam ngawl hi. Khatvei ma Absalom in Joab samsak kik ahihang Joab pai nuam peang ngawl hi.

³⁰Tua ahikom Absalom in a naseamte munah, “En vun, Joab ii lo sia keima taw kingizawng hi, tuaciang a sungah mangtaang kiciing hi. Pai tavun a va hal tavun,” ci hi. Tua ahiciang amate pai in lo sia hal uh hi.

³¹Absalom inn ah Joab pai in, “Banghangin na naseamte in ka lo hong halsak ziam?” ci in dongh hi.

³²Absalom in, “Banghangziam cile kong sam sasak hang nang hong pai ngawl ni hi. Kumpipa kungah pai in, kei taangin thu hong doksak lete oai khi hi: ‘Banghangin Geshur nusia in hi sungah hong pai peuma khi ziam? Tua munah om po leng phazaw tu hi kana ve.’ Absalom in zom to a, “Kumpipa taw ka kimu natu hong vawtsak tan, tuaciang kei maw ka hi le hong thatlum taken,” ci hi.

³³Tua ahikom Joab sia Kumpipa David kungah pai in, Absalom ii son teng son hi. Kumpipa in Absalom samsak a, ama in kumpipa mai lei ah hong kun suk hi. Kumpipa in namh in muak hi.

Samuel Niina 15

Absalom in Tualngal tho tu Ngeal



- ¹Hisia zawkciang Absalom in ama atu ngalleang khat le siphu pawl khat heang a, ama a cing mihing sawmnga zongh koi hi.
- ²Ama in zing tuungin tho a, khuapi kongpi hui lampi ah ding hi. Mihing khat po ngual taw thu kinei om in, kumpipa khensak tu in hong pai a om ciang, Absalom in samin koisung pan hong pai ni ziam ci in dongh bul hi. Tuaciang ama sia bang minam ahi Absalom tungah a son zawkciang,
- ³Absalom in hi bang veu ci hi, “En in, thukham in nang hong panpui hi, ahihang nang thu hong ngai tu kumpipa ii taangmi kuama om ngawl hi.”
- ⁴Tuaciang hi bang veu belap hi, “Keima thukhenmang hi leng uuk meak ing! Tua hile ngual taw thu kinei, ahibuale neisa nga nuam khat pawpo kei kungah hong pai tu a, thu a tangin khensak tu khi hi,” ci hi.
- ⁵Mihing khat po in Absalom mai ah kun tu in hong neak ciangin Absalom in ama zamh in koai a, namh hi.
- ⁶Kumpipa tung pan thutang khenna thangai a hong pai peuma Israel mi simin Absalom in hi bang veu in vawt ahikom amate ii panpuina nga hi.
- ⁷Kum li zawkciang Absalom in David munah, “Hebron ah hong paisak tan, Topa tungah sep tu kamciam teng seam nuam khi hi, Topa awng,
- ⁸Syria ngam Geshur ah ka om lai in, Topa tungah kamciam ka piakna pan, ama in kei, Jerusalem ah hong cia kiksak le ama Hebron ah pai in bia tu khi hi, ka ci hi,” ci hi.
- ⁹“Thin nuam takin pai tan,” kumpipa in ci hi. Tua ahikom Absalom sia Hebron ah pai hi.
- ¹⁰Ahihang Israel namte theampo tungah kamtai paisak in, “Lemle aw na zaak uh ciang, ‘Hebron ah Absalom sia kumpi suak zo hi,’ ci in au vun cisak hi.
- ¹¹Absalom ii samna taw Jerusalem ah ama taw a paikhawm mihing zanii pha hi; amate in tualngal sawmna bangma he ngawlin, ngaisutna pha taw pai uh hi.



¹²Tuaciang ama in sangaw biakpiakna a vawt laitakin, Kumpipa David atu ngaisut pha a pia Gilo khua mi Ahithophel samsak hi. Kumpipa langpan tu sawmna sia hong thahat vaial a, Absalom ii nungzuite zongh mihing hong khang vaial hi.

Jerusalem pan David Tai

¹³Kamtai khat in David munah, “Israel te in Absalom tungah thumaan tu kamciam pepia hi,” ci hi.

¹⁴Tua ahikom David in a uliante Jerusalem ah a om theampo munah, “Absalom khut panin ih suakta nuam le ih tai kul tu hi! Manlang vun! Tua ahibuale ama hai ngawlin hi mun hong theng tu a, hong zo in khuapi sungah a om theampo hong that tu hi,” ci hi.

¹⁵Amate in zokik a, “Hi hi, Kumpipa awng, na ci babangin ngamta tu in kinging khu hi,” ci uh hi.

¹⁶Tua ahikom kumpipa ding khia a, a uliante le a zino sawm kumpi inn en tu a nusiak teng ngawl, a innkuanpui dang teng taw pia uh hi.

¹⁷Kumpipa le a mihingte theampo hong dinkhiat ciangin khuapi inn mong khakbel sia ah hong tawlna uh hi.

¹⁸A uliante theampo zongh ama kungah hong ding uh a, ama a cing ngalkapte ama ii mai pan paisuak uh hi. Gath pan hong zui ngalkap zaluk te zongh hong pai suak uh hi,

¹⁹tuaciang kumpipa in amate lampuipa Ittai munah, “Banghangin ko taw hong pai khawm nu ziam? Heak kik vun a, kumpi thak sia taw om tavun. No sia ngamdang mi nu hi, na ngam uh panin ngaltai te nu hi.

²⁰No hi sungah tawmvei sung bekma hong teangte hi a, tua ahiciang banghangin kei taw hong vakthap kawkoaisak tu khi ziam? Koi sung zuan tu khi ziam ci in keima zongh in heak ngawl khi hi. Heak kik tavun a, na ngam mipuite zong heak pui tan. Topa no tungah hong dik taken a hong thumaan taken,” ci hi.



²¹Ahihang Ittai in zo a, “Kumpipa awng, Topa min taw kiciam khi hi, thi keak a kul zong na paina po ah pai tu khi hi,” ci hi.

²²“Pha hi,” David in ci hi. “Pai tawng,” ci hi. Tua ahikom Ittai in a mite le a beal te theampo taw pai uh hi.

²³David hong dinkhiat tak ciang ngam mite nasia takin hong kap uh hi. Kumpipa in Kidron lui hong kantan a, a mite in zui in amate dui sung manaw in paikhawm hon uh hi.

²⁴Thiampi Zadok zongh tua munah kihel a, tuaciang ama kungah Thukham Thingkuang a pua Levi mite zongh om uh hi. Amate in Thukham Thingkuang lei ah nga suk uh a, mipite ii khuapi a nusiak dong kisuan kik ngawl uh hi. Thiampi Abiathar zongh tua munah om hi.

²⁵Tuasia ciang kumpipa in Zadok munah, “Thukham Thingkuang khuapi sungah heak pui kik tan. Topa in kei dik hong sa ahile ni khat ni ciang a mu tu in kei hong heak kiksak tu a, a omna mun zongh hong musak kik tu hi.

²⁶Ahihang Topa in kei dik hong sa bua ahile, tuasia ciang ama ii hong law nop po hong law taken,” ci hi.

²⁷Tuaciang ama in Zadok munah a ci lai na pan, “En in. Na tapa Ahimaaz le Abiathar ii tapa Jonathan tonpuiin khuapi sungah thinnuam takin na cia kik tavun.

²⁸Tua laanin nang tung pan thuthak ka zaak dong ngun kanna ah kong ngak tu hi,” ci hi.

²⁹Tua ahikom Zadok le Abiathar in Thukham Thingkuang sia Jerusalem paipui kikin tua munah om uh hi.

³⁰David in Olive Mualvum ah a kap sa in kaato a; khuangaina lim in peangdap thua ngawlin a lu siin hi. Ama a zuite theampo in zongh a lu uh puan taw siinin kap uh hi.

³¹Ahithophel in Absalom taw tualngal vai ah kipawl hi ci in David in a zaak ciangin thu ngen hi. “Topa awng, Ahithophel ii ngaisut piaknate lui thawthong suaksak in,” ci hi.

³²Biakpiakna mun khat a omna mual tungah David hong thet ciangin, Arch mi ahi a muanbel a ngualtamh Hushai taw kimu a, ama sia a puan ki eaukeak in a lu tungah leivui kibuak hi.

³³David in, ama munah “Kei taw nong tonkhop hang kei nong hu theina bangma om ngawl hi,

³⁴ahihang khuapi ah heak kik lete tuaciang Absalom mun ah na pa atu na ka sep bangma, nangma atu zongh thumaan takin sepsak tu khi hi, va ci lete kei hong hu thei zaw tu ni hi. Tuaciang Ahithophel ii ngaisut piakna peuma na langpan thei za in vawt in.

³⁵Thiampi Zadok le Abiathar te zongh tua munah om hi; kumpi inn sungah na zaak theampo amate son in.

³⁶Amate ii a tapate Ahimaaz le Jonathan amate kungah om hi, tuaciang thu na zaak theampo amate in kei hong puak tu in nong paisak thei tu hi,” ci hi.

³⁷Tua ahikom Hushai, David ngualtamh pa sia Absalom hong thet bek laitakin khuapi sungah heak kik hi.

Samuel Niina 16

David le Ziba

¹David in mualdawn a kan zawkciang thakhat thu in Mephibosheth ii naseampa Ziba taw kisi hi, ama in laa nii hong keng a, a laate in anluum luum zanii, sapitko bom zakhat, thingnga hing bom zakhat le savun ip khat dim zu hong pua hi.

²Kumpipa David in, “Tuante theampo bang tu ci ni ziam?” ci in dongh hi. Ziba in zo a, “Laate sia kumpipa ii innkuanpuite to natu hi a, anluum le thingngate sia a mihingte ii neak tu, tuaciang zu sia dui sungah amate a toi ciang a dawn tu hi,” ci hi.



³“Na Topa Saul ii tupa Mephibosheth koisung a om ziam?” kumpi pa in dongh hi. “Ama Jerusalem ah om hi, banghangziam cile ama ii up tatakna pan a pu Saul ii neisa theampo Israel te in ama tungah pia tu hi,” ci in Ziba in zo hi.

⁴“Mephibosheth ii neisa theampo nangma tang tu ni hi,” kumpipa in Ziba munah ci hi. “Kei na naseam pa khi hi. Kumpipa nang hong lungkimsak tawntung hong suaksak taken,” Ziba in ci hi.

David le Shimei

⁵Kumpipa David Bahurim hong thet ciangin Saul ii bete Gera ii tapa Shimei sia ama taw kisi tu in hong pai in ama haamsiat hi.

⁶David ii uliante le a cingte in ama uumci napi Shimei in suang taw deang tu in hong kipan hi.

⁷Shimei in haamsiat a, “Tai in! Tai in! Tual that pa! Mimaw pa!

⁸Nang in Saul ii kumpi ngam na suan a, tu in Topa in Saul ii innkuanpuite na suamlup hu in daan hong pia hi. Topa in na kumpi ngam sia na tapa Absalom hong piaksak hi, tu in lalcip zo ni hi, nang tualthat pa!” ci hi.

⁹A nu Zeruah ahi Abishai in, “Kumpipa awng, banghangin ui hi sia in nang haamsiatsak ni ziam? Ama ii kungah hong paisak tan a, a lu hong tansak tan,” ci hi.

¹⁰“Hisia no taw bangma kisai bo,” kumpipa in Abishai le a suapuipa Joab munah ci hi. “Topa in kei haamsiat in sawl ahile a kua in khaam thei tu ziam?” ci hi.

¹¹Tuaciang David in Abishai le a uliante theampo munah, “Keima tapa in kei hong thatlum nuam a kipan ahile hi Benjamin pa ii ngamtatna banghangin lamdang sa nu ziam? Topa in ama ii kei hong haamsiat tu in sawl hi tu hi, tua ahiciang koi po vun a, haamsiatsak vun.

¹²Topa in ka cimawkna hong hesuak tha tu a, ama ii hong haamsiatna kei atu thupha hong suaksak nuam ahi na meal zongh kihe ngawl hi,” ci hi.



¹³Tua ahikom David le amate a lampai hong zom suak hi. Mualpangh a tona ah Shimei in pha valep a; a pai kakawm in ama in haamsiat a, suang le lei taw deang hi.

¹⁴Kumpipa le a mite Jordan Ngun hong thet sia in, amate a tha uh zawm mama zo ahikom tua munah tawlnga uh hi.

Absalom Jerusalem Khua sungah

¹⁵Absalom le ama taw kikop Israel te theampo Jerusalem khua ah tum a, Ahithophel zongh amate sungah kihel hi.

¹⁶David ii muan ngualtamhpa Hushai in Absalom taw a kisik ciang, “Kumpipa a khansau taken! Kumpipa a khansau taken!” ci in au hi.

¹⁷Absalom in, “Na lawmpa David tungah na thumaanna teng bang suak ziam? Banghangin ama taw ton ngawl ni ziam?” ci in dongh hi.

¹⁸Hushai in zo a, “Banghangin ton thei tu khi ziam? Topa ii tealpa, mipite ii teal pa, le Israel mibup ii teal pa sangah pang khi hi. Kei nang taw om tu khi hi.

¹⁹A khakbel in ci leang, ka Topa ii tapa atu ka seam buale akua dang atu seam tu khi ziam? Na pa atu ka sepsak bangma in tu in nang atu hong sepsak tu khi hi,” ci hi.

²⁰Tua zawkciang Absalom in Ahithophel sang nga in, “Tu in hi sungah ei teng om ci leang bangbangin ngamta tu ci in ngaisutna hong pia tu ni ziam?” ci in dongh hi.

²¹Ahithophel in zo a, “Pai tan a, na pa ii zinote kumpi teenna inn encik tu in a nusiatte luppui tan. Tua hile Israel a om theampote in na pa in nang ngalin hong nei hi, ci in he tu hi, tuaciang na nungzuite nasia takin kihansua tu hi,” ci hi.

²²Tua ahikom amate in kumpi inn tungah puanbuk khat Absalom atu khaksakin, Absalom tua sungah tumin a pa ii zinote luppui hi.

²³Tua hunin Ahithophel ii ngaisut piak pawpo sia Pathian ii kammal za in kisaang a; David le Absalom in zui khawm uh hi.



Samuel Niina 17

Hushai in Absalom Lampui khial

¹Tua zawk a ngei ngawlin, Ahithophel in Absalom ii munah, “Pasal tulsawm le tulnii hong tealsak tan a, tu nitak in David ka na del tu hi.

²Ama a toi laitak le a thinkiam laitakin ka na sim tu hi. Ama sia hong lau tu a, a mite theampo zongh taikeak tu hi. Keima in kumpipa bekma ka that tu a,

³tuaciang a mite mo khat a pasal kung a zot kik bangin nangma kungah kong paipui tu hi. Na thalup nop sia mihing khat bekma hi; a dang teng lau om ngawl hi.

⁴Hi ngaisutna sia Absalom le Israel lampuite atu ngaisutna pha hi tuak sa uh hi.

⁵Absalom in “Tu in Hushai sam vun, ama in hi thu tungtaang ah bang ci nop a nei ziam ngai sin tawng,” ci hi.

⁶Hushai hong thet ciang, Absalom in ama mun ah, “Hi sia Ahithophel ii ngaisut hong piak teng hi; tuasia ih ni tu ziam? Ih ni buatu ahile ih ngamtat natu nangma hong son tan,” ci hi.

⁷Hushai in, “Ahithophel ii ngaisutna hong piak tutung sia pha ngawl hi.

⁸Na pa David le a mite sia ngalsim a taktai mama te hi a, vompui a no khuaite a kiitak huai za in kiitak huai hi. Na pa sia ngalvai heak sa tam mama a nei khat hi a, zanin a mite taw mun khat ah om ngei ngawl tu hi.

⁹Tu laitak lian bang ama sia lianghawng sung khat ziam a dang mun khat ziam ah om tu hi. David ii na mite a sim po ciang a kuama theampo tua thu za siatin, na mite ngal lel hi ci in au tu uh hi.

¹⁰Tawpi bangin launa a nei ngawl a hangsan belte ngawngawn lau tu hi, banghangziam cile Israel ngam a om a kuama po in na pa sia ngalkap lian khat hi a, a mite zongh ngalsim a hatte vive hi ci in he uh hi.

¹¹Kei ngaisut kong piak nopna pan tuipi hui a senneal za in a tam Israel te, ngam mong khat pan mong khat dong khawmtua in a, tuaciangin ngalphual ah nangma mama in lampui in kuan in.



¹²David a omna po ah ih mu tu a, tuaciang ama ii bang piang ziam ci in a phaw maa in ih sim tu hi. Ama ahizong a mite ahizong a suakta om ngawl tu hi.

¹³Ama in khuapi sung tu in a nungkin le zong, ih mite in khauzeen la in, a khuapi mama a nuai sang kuam sungah ih kaisuk tu hi. Tua mual tungah suangtum khat dongin kikhe ngawl tu hi,” ci hi.

¹⁴Absalom le Israel te theampo in, “Hushai ii ngaisut piakna sia Ahithophel aa sangin phazaw hi,” ci uh hi. Absalom ii lelma hong tun natu in Ahithophel ii ngaisut pha sia a kinit ngawl natu in Topa in khensat zo hi.

David Thu Kipuak a Suakta

¹⁵Tua zawkciang Hushai in thiampite Zadok le Abiathar te munah, Absalom tungah ama in bang ngaisutna teng pia a, Ahithophel in bang ngaisutna teng pia ziam ci in son hi.

¹⁶Hushai in belap a, “Tu in manlang vun! David kam thaak vun, ngun kantanna dui sungah zanin om heak hen, Jordan ngun thakhat in kanin hile ama le a mite kiman in kihat ngawl tu hi,” cisak hi.

¹⁷Abiathar ii tapa Jonathan le Zadok ii tapa Ahimaazte in Jerusalem khua hui Enrogel cik panin ngak uh hi, banghangziam cile amate in khuapi sung a tum uh a kimusak ngam bua uh hi. Naseam numei khat in hun maanmaan in bang thu veu om ziam ci in amate tungah son a, amate in Kumpipa David kungah pai in tua thute son uh hi.

¹⁸Ahihang nikhat ni ciangin patang khat in amate mu hi, tuaciang ama in Absalom munah son hi; tua ahikom amate in manlang takin tai a Bahurim a kici pasal khat ii inn ah buu uh hi. Ama in a inn hui ah tuikhuk khat nei a, tua ii sungah tuaksuk hi.

¹⁹Pasal pa ii zi in sitna khat taw siinin, antang pawl khat a tungah poai a, kuama in bangma a lamdang a mu bua uh hi.

²⁰Absalom ii uliante hong pai a, tuaciang numeinu munah, “Ahimaaz le Jonathan koi sungah om ziam?” ci in dongh hi. “Amate ngun kanin pai zo



hi,” numeinu in ci hi. Pasalte in tuate ngeal zong ahihang mu zo ngawl a, Jerusalem ah heak kik uh hi.

²¹Amate ii pai zawkciang Ahimaaz le Jonathan te tuikhuk sung pan pusuak uh a, pai in David tungah thu ko hi. Ahithophel in amate lang khat panin bangteng ngeal ziam ci in amate in David son hi, “Manlang vun a, ngun kantan vun,” ci uh hi.

²²David le a mite in Jordan ngun kan tu in hong kipan uh a, tuaciang khuavak hun sia in amate theampo ngal a kaa siat zo uh hi.

²³Ahithophel in ama ii ngaisut piaknate kizui ngawl hi ci in a mu ciangin, ama in a laa sia a kungth thua in ama ii khuapi ah cia kik hi. Ama ii vai tuatuamte ahi tu bangin a vawt siat zawkciang ama le ama awklum hi. Ama sia a innkuan ii thaah ah kiphum hi.

²⁴Absalom le Israel te ii Jordan ngun a kantan hunin, David sia Mahanaim khuapino theng zo hi.

²⁵(Absalom in Joab taangin Ishmael mi Jether ii tapa Amasa sia ngalkap honbup ukpipa in koi hi. Tua pa ii nu sia Abigail hi a, Joab ii nu Zaruiah ii suapuinu le Nahash ii tanu ahi hi.)

²⁶Absalom le a mite in Gilead ngamah ngiaphual saat uh hi.

²⁷David sia Mahanaim hong thet ciang Ammon ngam Rabbah khuapi panin Nahash ii tapa Shobi, Lodebar pan Ammiel ii tapa Machir le Gilead ngam Rogelim pan Barzillai te in muak uh hi.

²⁸⁻²⁹Amate in meekuang, tungbealte, zanpuan le an zongh David le a mite atu in hong puak hi; zungtaang, mangtaang, anvui, antang kan, benaang, be, khuaitui, thawbat tangh, noaidiat le tu pawlkhat hong puak uh hi. Amate in David le a mite sia dui sungah ngilkial dangtaak in, toi in om tu ci in he uh hi.

Samuel Niina 18

Absalom Ngallel in Kithat



- ¹David in a mite theampo khawmtua in, tulkhat pawl, zakhat pawl ci in khen a, a uk tu uliante koi hi.
- ²Tuaciang ama in tuate pawl thum in kuankhiasak a, Joab taw a suapuipa Abishai le Ittaite sia ngalkap pawl khat tek uksak hi. Tuaciang kumpipa in, “Keima zongh no taw kuankhawm tu khi hi,” ci hi.
- ³“Ko taw hong kuankhawm ngawl tu ni hi. Ih ngalkapte a lang a tai zong, ahibuale a lang khawng a kithat zong ih ngalte atu bangma kilamdan om ngawl tu hi; ahihang nang na hi le ko tulsawm taw na manh neina kikim hi. Hi lai khuapi sungah om ii huna hong thaak vakek lete phazaw tu hi,” ci uh hi.
- ⁴“Pha nasak bel uh bangin ngamta tu khi hi,” kumpipa in ci hi. Tuasia zawkciang a ngalkapte tulkhat pawl, zakhat pawl, a pawl a pawl in hong kuankhiat ciangin, David sia khuapi kongpi hui ah hong ding hi.
- ⁵Ama in Joab, Abshai le Ittaite munah thupia a, “Keima ii hu in, khangnopa Absalom bangma na law heak vun,” ci hi. Ngalkap mite theampo in zongh David ii hi thu uliante a piak sia za kim uh hi.
- ⁶David ii ngalkap honpite sia ngamsung tangciing in hong kuan uh a, Ephraim dui sungah Israel te sim uh hi.
- ⁷Israel te sia David ii mite in zo uh a, nasia lel mama uh a, tua ni in tulkul thi uh hi.
- ⁸Ngam sung bup ah kidona hong kilaw a, dui sungah a thi sia ngalphual ah a thi sangin tam zaw hi.
- ⁹Thakhat thu in Absalom in David ii mite taw kisi uh hi. Absalom sia laa tungah to a, a laa sia oak thingkung lian nuai khat ah a pai laitak, Absalom ii lutang thingbaak kawm ah awk hi.
- ¹⁰David ii mite khat in mu a, Joab ii tungah ko hi. “Topa awng, Absalom sia oak thingkung tung pan kaai in ka mu hi,” ci hi.



¹¹Joab in, “Mu na hi le banghangin a mun ah thatlum ngawl ni ziam? Keima mama in ngun dangka sawm le kawngkhau khat hong pia zawsap tu khi hi,” ci hi.

¹²Ahihang ngalkappa in, “Ngun dangka tulkhath keak nong pia hial zong kumpi pa tapa ii tungah ka khutme no khat zongh laamto ngawl tu khi hi. Kumpipa in nang le Abishai le Ittai tungah thu hong piak sia za tek khu hi. Kumpipa in nang le Abishai le Ittai tungah, ‘Keima ii hu in khangno pa Absalom sia bangma na law heak vun’ ci in thu hong piak sia za tek khu hi.

¹³Ahihang kumpipa thupiak mang ngawlin Absalom that hi leng, kumpipa in za nanak tu hi, ama in zaak ngawl nei ngawl hi — tuaciang nangma zongh in kei hong hung ngawl het tu ni hi,” ci hi.

¹⁴“Nang taw hun luithawthong in bosak nawn ba tong,” ci hi. Joab in tei thum la in a nungta lai in, oak thing tung pan a kikhai Absalom ii awm hol hi.

¹⁵Tuaciang Joab ii mite sawm in hong neak uh a, Absalom hong thatlum uh hi.

¹⁶Ngal kido tawngak natu in Joab in lemle tum natu thu pia a, a ngalkapte Israel te a delna uh pan hong heak kik uh hi.

¹⁷Amate in Absalom ii luang la in duisung dum thuk khat sungah a lotsuk zawk uh ciang suangtum honpui khat taw siin uh hi. Israel te theampo taimang in a inn tek zuan uh hi.

¹⁸Absalom in a nuntak lai in Kumpipa Kuam a kicina munah ama atu in, a min kilaw natu tapa nei ngawl ahikom, khansuang khat ciang hi. Tua ahikom ama min ma phuakin, tu ni dong ciang Absalom ii Khan kici lai hi.

Absalom ii Thina David munah Kison

¹⁹Tuasia ciang Zadok ii tapa Ahimaaz in Joab ii munah, “Topa in a ngalte khut sung pan ama hunkhia hi ci in thuthang pha kumpipa tungah son tu in hong taisak tan,” ci hi.



²⁰“Hi bo, tu ni in thupha bangma puak ngawl tu ni hi, nidang khat pawpo ciang na uuk le hi thei hi, ahihang tuni in puak ngawl tu ni hi, banghangziam ci le kumpipa ii tapa thi hi,” Joab in ci hi.

²¹Tua zawkciang Ethiopia te a sila pa ii tungah, “Pai in, na mu teng kumpipa tungah son tan,” ci hi. Sila pa zongh kunin, tua zawkciang tai paih hi.

²²Ahimaaz in, “Bang thu po piang kale awlmaw bong; kei zongh thuthang hong puaksak po tan,” ci veve hi. Joab in, “Ka tapa awng, bang tu ci kenkon ni ziam? Letsong zongh nga beak ngawl tu ni hi,” ci hi.

²³“Bang po a piang zong pai tu khi hi,” Ahimaaz in ci hi. Tua zawkciang Joab in, “Tua ahile pai tan,” ci hi. Ahimaaz zongh lamdungah hong taisuk a, Jordan Kuam kantan in, silapa tawmvei zawkciang hong suangkhiat hi;

²⁴David sia khuapi kongpi puanung le sungnung kilaklaw ah to hi. Ngal vilpa sia khuapi uumna luphung tungah kaato a, kongpi ii innkhum tungah ding hi; ama in khua a et le pasal khat ama nguakin hong tai mu hi.

²⁵Ama in ensuk a kumpipa munah son hi, tuaciang kumpipa in, “Ama nguak ahile thuthang pha hong puak hi tu hi,” ci hi. A tai pa sia hong nai vaial hi.

²⁶Tuaciang ngalvil pa in pasal dang khat ma ama nguakin hong tai mu leleau a, kongkhapi cing pa oksan hi. “En in! Zia sungah pasal dang khat ma hong tai hi,” ci hi. Kumpipa in, “Hisia zongh in thupha hong puak hi” ci hi.

²⁷Ngalvil pa in, “A masa in hong tai sia Ahimaaz ii tai bangin tai hi,” ci hi. “Ama sia mihing pha khat hi,” kumpipa in ci a, “Tuaciang ama zongh in thupha hong puak hi,” kumpipa in ci hi.

²⁸Ahimaaz in kumpipa nuksetna kam taw au in ama ii mai lei ah kisp suk hi, tuaciang, “Topa na Pathian pok tawng, ama in na lang pan a tual ngal hong tho tute ii tungah zawna hong pia zo hi, Kumpipa awng!” ci hi.

²⁹“Khangmoi Absalom suakta ziam?” ci in kumpipa in dongh hi. Ahimaaz in zokik a, “Topa awng, a ulian pa Joab in kei hong sam ciang a buai lialua khat ka mu a, bangziam ci in ka son thei bua hi,” ci hi.



³⁰“Tua munah ding in,” kumpipa in ci a, tuaciang ama tua munah ding hi.

³¹Tuaciang Ethiopia silapa hong theng a, kumpipa munah, “Kumpipa atu thupha khat hong puak khi hi, Kumpipa awng! Tuni inTopa in nang hong langpan tualngal te theampo tengah zawna hong pia zo hi,” ci hi.

³²“Absalom khangnopa suak ta ziam?” ci in kumpipa in dongh hi. Sila pa in zo a, “Ama ii thuak teng sia na ngalte theampo in zongh thuak hen a, tuaciang nang langpan tualngal hong tho theampo in zongh thuak le ka oai hi,” ci hi.

³³Kumpipa sia khuangai cip hi. Kongpi tung khaan sungah kaato in kap hi. A pai kawmin hi bangin au hi. “Aw, ka tapa! Ka tapa Absalom! Absalom ka ta! Nang thi luangin kei thi zaw leng maw! Ka tapa! Absalom ka tapa!” ci hi.

Samuel Niina 19

Joab in David Teih

¹Kumpipa David sia Absalom hu in kakap in mamau hi ci in Joab tengah kison hi.

²Tuabangin ngal zawna lungdamna sia David ii a ngalkapte atu David ii a tapa atu a mamau hu in heena hong suak hi.

³Ngalphual panin a tai a maizum ngalkapte bangin, amate sia khuapi sungah thim takin hong tum uh hi.

⁴Kumpipa in a maitang siinin nging takin kap hi, “Aw ka tapa! Ka tapa Absalom! Absalom ka tapa!” ci in kap hi.

⁵Joab in kumpipa ii inn ah pai in ama ii munah, “Tuni in nang le na tapate na tanute, na zite le na zinote nuntakna hong huu na mihingte maimawlsak ni hi.

⁶Nang hong langpan teng na it a, nang hong panpui teng na ensan hi. Na uliante le na mite sia bangma in heang ngawl na hi sia kitel thiangsak ni hi. Absalom nungta zaw hen a, ko teng theampo thi zaw le ung na lungdam zaw phial tu in hong mu khi hi.

⁷Tu in pai tan a, na mite lungmuangsak kik tan. Topa min lo in ka kiciamna pan, tuabangin nong ngamta buale zingsang ciangin amate sung pan khat zongh kikhe ngawlin nang taw omkhawm nawn ngawl tu hi. Tuasia in na khan tawtung sungah tuasiatna nasia bel na thuk hi tu hi,” ci hi.

⁸Tuasia ciang kumpipa dingto a, pai in khuapi kongpi nai ah to hi. A mite in ama sia tua munah om ci in a zaak uh ciangin ama ii kiim ah hong kikhawm uh hi.

David Jerusalem zuan kik

Tua sungin Israel te theampo tai in amate inn tek zuan uh hi.

⁹Ngam buppi sungah amate le amate kihau tu hong kipan uh hi. “Kumpipa David in ih ngalte mun panin hong suatak hi,” khat le khat kici uh hi. “Ama in Philistinete kung panin hong hunkhia a, ahihang ama tu in Absalom kung pan tai in ngam hong nusia hi.

¹⁰Absalom sia ih kumpipa tu in sathau ih noai hi, ahihang ama ngalphual ah kithat hi. Tua ahile banghangin khat po in Kumpipa David hong ciapui kik ngawl ziam?” ci uh hi.

¹¹Israel te ii pauna teng David kungah kison hi. Tua ahikom thiampi Zadok le Abiathar te Judah lampuite dongh tu in samsak hi. “Kumpipa a kumpi teenna inn sungah a cia kik natu a hu te sung pan banghangin note a khakbel hi nu ziam?

¹²No sia ka bete nu hi, ka chi le ka sa nu hi; banghangin ka cia kik natu hong hu khakbel te hi nu ziam? ci in dongh hi.

¹³David in Amasa tungah hi bangin cisak sii hi, “Nang ka be pa ni hi. Tu pan kipan sia Joab ii sep ka ngalkap honpite ukpipa in hong koi khi hi. Tuabangin kong koi buale Pathian in hong vaatlum taken!” ci hi.

¹⁴David ii kammalte in Judah mite theampo ii panpuina a cingin hong piangsak a, amate in ama le a uliante hong heak kik natu kam thaak hi.

¹⁵Hong cia kik lamin kumpipa sia Judah mite in Jordan Ngun ah muak uh a, amate kumpipa ngun a kan dong a cing tu in Gilgal ah hong pai ahi uh hi.



¹⁶Tua hun sung ma in, Bahurim pan Gera ii tapa, Benjaminte Shimei zongh Kumpipa David taw kisi tu in manlang in hong pai hi.

¹⁷Ama in Benjamin namte tulkhat keng hi. Tuaciang Ziba, Saul ii innkuante naseampa a tapa sawm le nga le a naseam kul taw hong pai uh a, kumpipa ii thet maa in Jordan hong theng hi.

¹⁸Kumpipa le a pawlte ngun a kan laitak a cing tu in amate ngun hong kan uh hi, tuaciang kumpipa ii dei babangin a seam tu in kinging uh hi.

Shimei tungah David in Cikna pia

Kumpipa in ngun kantan tu in a kithoai laitak Shimei hong pai in kumpipa ii mai ah hong kilei see suk a,

¹⁹“Kumpipa awng, Jerusalem na nusiati ni in nang tungah kong ngamtat khialna teng hong maisak tan. Kei tungah thinngil laingil hong nei heak in a, zongh mangil in.

²⁰Keima mawna vawt zo ka hi hunlam keima le keima in he khi hi, Topa awng, tuaciang tua hu ma insaksang minamte sung panin a masa phitbel in kumpipa taw kisi tu in hong pai khi hi,” ci hi.

²¹Zeruah ii tapa Abishai hong pau a, “Shimei sia thalup tu hi, banghangziam cile Topa ii kumpipa tu in a teal pa haamsiat hi,” ci hi.

²²Ahizong David in Abishai le a suapuipa Joab ii munah, “No ngaisutna akua in hong ngen ziam? Ngimna hong pia nuamin kipan nu ziam? Tu in kei Israel ii kumpipa hi zo khi hi, tuaciang tu ni in Israel te kuama ki thisak ngawl tu hi,” ci hi.

²³Tuaciang Shimei munah, “Nang sia hong ki thisak ngawl tu hi ci in kamciam hong pia khi hi,” ci hi.

Mephibosheth tungah David in Cikna Lak

²⁴Tua zawkciang Saul ii tupa Mephibosheth sia David taw kisi tu in hong pai hi. Kumpipa zawna taw Jerusalem ah hong cia kik mateng ama in a peang le sil ngawl, a khamul le meet ngawl, a puan le sawp ngawlin omcip hi.



²⁵Kumpipa taw kimu tu in Jerusalem pan Mephibosheth hong thet ciangin, kumpipa in ama munah, “Mephibosheth awng nang kei taw hong pai khawm ngawl ni hi. Banghangziam?” ci in dongh hi.

²⁶Ama in zo a, “Na heak sa bangma, Kumpipa awng, kei sia koncip khi hi. Ka naseam pa munah ka laa a kung h hong thuasak tan, kumpipa taw tonkhawm nuam khi hi, ka ci hang ama in hong leeheak hi.

²⁷Ama in kei huvau leilot thu Kumpipa tungah hong son hi, ahihang nang sia Pathian ii vantung lalang taw na kibang hi, tua ahikom maan nasak bel bangin ngamta in.

²⁸Ka pa ii innkuanpuite theampo kumpipa ii na thisak sia ahi tu ma hi, ahihang Kumpipa in kei na sabuai ah an neak thei natu thu hong pia ni hi. Kumpipa tung pan hamphatna dang kong nget thathua lai natu bangma thu om ngawl hi,” ci hi.

²⁹Kumpipa in, “Bangma son thua kul nawn bo. Nang le Ziba in Saul ii ngamh teng na hawm natu khensat zo khi hi,” ci in zo hi.

³⁰“Ziba in tang siat taken, Kumpipa cidam in inn nong cia kik sia kei atu pha zo hi,” Mephibosheth in ci hi.

David in Barzillai tungah Cikna Lak

³¹Gilead pan Barzillai zong kumpipa ii Jordan a kan ciang a cing tu in Rogelim pan hong paisuk hi.

³²Barzillai sia kum sawmliat a pha pasal huai mama khat ahi hi. Ama hau mama a, kumpipa Mahanaim ah a taam sung ama in an veu pia hi.

³³Kumpipa in ama tungah, “Kei taw Jerusalem ah ih pai khawm tu a, keima in nang kong en tu hi,” ci hi.

³⁴Ahihang Barzillai in, “Kei sia ngei nungta nawn ngawl tu khi hi, banghangin kumpipa taw Jerusalem ah pai tu khi ziam?”

³⁵Kei kum sawmliat pha zo a, bangma in nopsak hong pia nawn ngawl hi. Ka neak ka dawnte ii limna le he nawn ngawl, la sa te ii aw le za thei nawn ngawl khi hi. Kumpipa atu vanh ngitpui khat suak thong tu khi hi.



³⁶Tuabang tel manpha a saang tu in kiphu nawn ngawl khi hi. Tua ahikom Jordan ngal tawm khawng dong hong pai lai bek tu khi hi.

³⁷Tuaciang hong ciasak tan a, ka nute ka pate ii thaam hui ka inn ah thi ka tong. Hi munah ka tapa Chimham om hi, ama in nangma na hong sepsak tu hi; ama nangma paipui in, Kumpipa awng, ama atu pha nasak bel bangin ama tungah vawt tan,” ci hi.

³⁸Kumpipa in zo a, “Ama paipui tu khi hi, tuaciang vawt a nong sawl babangin ama tungah ka na vawt tu hi. Tuaciang nong nget pawpo nang atu in hong vawtsak tu khi hi,” ci hi.

³⁹Tua zawkciang David le a mite in Jordan ngun kan uh hi. Ama in Barzillai namh a, thupha pia in, tuaciang Barzillai inn ah cia kik hi.

Judah le Israel in Kumpipa vai Kam kinial

⁴⁰Judah mi theampo le Israel mi a lang ii cinna nuai ah kumpipa in ngun a kan zawkciang, ama Gilgal ah pai in Chimham sia ama taw paikhawm hi.

⁴¹Tuaciang Israel te a om theampo in kumpipa kungah pai in, ama munah, “Kumpipa awng, ka suapui uh ahi Judah mite in, nang hong la in, na innkuanpuite le na mite taw Jordan na kan uh dong hong cin natu bang thu nei kisa ziam?” ci in dongh uh hi.

⁴²Judah mite in “Tuabang ka ngamtat uh banghangziam cile kumpipa sia koma mi khat hi. Tua ahikom banghangin hi sia hu in thin uuk thei nu ziam? Ama in ka an neak tu uh lah hong leisak bo, a dang zongh bangma piak hong nei ngawl hi,” ci in zo uh hi.

⁴³Israel te in zo uh a, “Ama sia noma mi hi kale David tungtaang ah no sangin ko in see sawm bang a tam zaw in thu nei khu hi. Banghangin hong no mu nu ziam? Kumpipa ciapui kik natu kam a nging phitsak sia koma khu hi, mangil heak vun,” ci uh hi. Ahihang Judah mite sia Israel mite sangin kam ham zawkna taw a dei uh hong ngen uh hi.

Samuel Niina 20

Sheba ii Tualngal Thawna



- ¹Gilgal ah Benjamin mi Bikri ii tapa Sheba a kici mihing mannung ngawl khat om hi. Ama in lemle tumin au a, “David taak hen! Ei ama zui ngawl tu hi hing. Israel pasalte awng inn ah cia tawng,” ci hi.
- ²Tua ahikom Israel te in David nusia in Sheba zui uh a, ahihang Judah mite sia David tungah hong thumaan top in, Jordan pan Jerusalem ah David zui uh hi.
- ³Jerusalem khua a kumpi inn ah David hong thet ciangin kumpi inn keam tu in a nusiat zino sawm teng la in, a cingte ii khut nuai ah koi hi. Amate ii sapna babangin sik hi, ahihang amate taw numei le pa omkhopna vawt ngawl hi. A nuntak tawntung khumcip in meingong bangin koi hi.
- ⁴Kumpipa in Amasa munah, “Judah mite khawmtua in, thai ciang amate taw hi munah hong theng kik tan,” ci hi.
- ⁵Amasa in khawmtua tu in pai hi, ahihang kumpipa hun ciam lapin a theng kik bua hi.
- ⁶Tua ahikom kumpipa in Abishai munah, “Absalom sangin Sheba in ngim hong pia zaw tu hi. Ka mite la in, ama del in, tua ahibuale kulh taw a kiim uum khuapino khat po hong lua tu a, ei kung pan suakta tu hi,” ci hi.
- ⁷Tua ahikom Joab ii mihingte kumpi cingte le ngalkap dangte in Abishai taw Jerusalem nusia in Sheba del uh hi.
- ⁸Suangpi khat omna Gebeon ah a thet uh ciang Amasa taw kisi uh hi. Joab sia ngalsim tu in kinging a, a paai sungah a om namsau sia a kawng ah khii hi. Ama mai sangah hong pai ciangin a namsau hong taak hi.
- ⁹Joab in Amasa munah, “Bang hi ni ziam, ka ngualtamh pa awng,” ci in, ama namh tu in a khut ziatsang taw a khamul zapsak hi.
- ¹⁰Amasa sia Joab ii a khut lang khat ah a toai namsau sia atu kidal ngawl ahikom Joab in a ngil panin nam taw sun a, a ngilzang teng lei ah hong keekeak hi. Ama thakhat in thi paih a Joab ii a vuak kik kul ngawl hi. Tuaciang Joab le a suapui pa Abishai in Sheba del uh hi.



¹¹Joab ii mihingte khat Amasa ii luang hui ah ding a, “Joab le David ii mi ahi theampo in Joab zui vun,” ci in au hi.

¹²Amasa ii luang chi taw a kidim sia lampi laizang ah liik hi. Joab ii mihing pa in, mihing theampo in tawlnga in en a mu ciang, ama in a luang sia lampi pan kai in lo sungah lawnin, puanvan taw siin hi.

¹³A luang lampi pan a kilaakkhiat zawkciang mihing simin Joab zui in Sheba del uh hi.

¹⁴Israel te theampo ii ngamkhennote theampo kantan in pai a, Abel Beth Macaah khuapi ah theng hi, tuaciang Bikri ii be le phungte hong kikhawm a, ama khuapi sungah zui uh hi.

¹⁵Joab ii mihingte in Sheba tua munah om hi ci in za uh ahikom amate pai in khuapi uumci uh hi. Luphung puanung sia ii pangh panin leivum ciangto a, a luphung nuai pan luphung a cip thei natu lei to hi.

¹⁶Tua khuapi sungah nupi ciim khat om a, tua nu in luphung panin au hi. “Na ngai vun! Na ngai vun! Joab hi sungah hong pai natu son vun; ama taw thu son nuam khi hi,” ci hi.

¹⁷Joab pai a, tuaciang numei in, “Nang Joab na hi ziam?” ci in dongh hi. Ama in, “Hi hi keima khi hi,” ci in zo hi. Tua nu in “Hong ngai tan, Topa awng,” ci hi. Ama in, “Hong ngai khi hi,” ci in zo hi.

¹⁸Numei in, “Nidang tawng lai in, ‘Abel khuapi ah pai tavun a, zokikna tua mun pan la tavun kici a, tuabangma in ki ngamta hi.

¹⁹Ka khuapi uh sia kilemna a ombel khuapi hi a, Israel ngam ah a thumaan bel zongh hi. Banghangin Pathian ii neisa sia zanciimsak nuam ni ziam?” ci in dongh hi.

²⁰Joab in zo a, “Na khuapi sia bangma hunin zanciimsak ahibuale susia nuam ngawl khi hi.

²¹Tuabang sia ko ii ngealna hi ngawl hi. Ephraim mualtung ngam pan Bikri ii tapa Sheba a ci sia Kumpipa David langpan in tualngal tho hi. Hi mihing pa



hong aap lete, na khuapi uh pan nungkin tu khu hi,” ci hi.. “A lutang luphung tungsia no kungah kong lawn tu hi,” ama in ci hi.

²²Tua zawkciang ama in khuapi sung a mite kungah ama ii ngealna taw pai in, Sheba ii lutang tan in, luphung kaanin Joab ii kungah lawn uh hi. Ama in a mite khuapi pan a nungkin natu lemle tum a, amate inn ah cia kik uh hi. Tuaciang Joab Jerusalem kumpipa kungah heak kik hi.

David ii Uliante

²³Joab sia Israel ngalkap hon ukpipa hi; Jehoiada ii tapa Benaiah sia David a cingte a ukpa hi a;

²⁴Adoniram sia zawthawk thu taw a kisawl naseam te uk a, Ahilud ii tapa Jehoshaphat sia tepteena lai teng sai hi;

²⁵Sheva sia kumpi zum thuzeakpa ahi hi; Zadok le Abiathar te sia thiampi te ahi uh hi,

²⁶Jair khuapino pan Ira zongh David ii thiampi khat ahi hi.

Samuel Niina 21

Saul ii Suan le Paalte Kithatlum

¹David ii maan sungin kum thum sitset kialpi tung hi. Tua ahikom David in Topa munah hi thu dongh a, tuaciang Topa in, “Saul le a baangkua in tualtha mawna vawt hi; ama in Gibeon mite thatlum hi.”

²(Gibeon mite sia Israel mi hi ngawl a, amate Amor mi pawl khat hi, Israel te in hut tu dal tu in kamciam a piak sa hi napi, Israel mite le Judah mite atu a lawp manin Saul in tuate suk cimit tu in hanciam hi.)

³Tua ahikom David in Gibeon mite sam a, “No atu bang hong vawtsak thei tu khi ziam?” Topa ii a mite thupha hong piak natu in no tungah tatkhialna hong kivawt te hong lul kik nuam khi hi,” ci hi.

⁴Amate in, “Saul le a baangkua taw ka kihauna uh sia ngun le kham taw thu kisaatsat thei ngawl bek dom ngawlin Israel mite khat zongh thatlum nuam ngawl khu hi,” ci uh hi. “Tua ahile no atu bang hong vawtsak thei tu in nong um uh ziam?” ci in David in dongh hi.



⁵Amate in, “Saul in ko sia hong maaimot nuam a, Israel ngamsung koima ah khat zongh a nungta in ka om ngawl natu in vawt hi.

⁶Tua ahikom Saul ii suan le paal pasal sali hong aap tavun, Topa ii kumpipa tu a teal Saul ii khuapi Gibeoh ah amate Topa mai ah ka awksak tu uh hi ci in zo uh hi. “Hong aap tu khi hi,” kumpipa in ci hi.

⁷Ahihang Jonathan taw a thiangtho kiciamna a vawt hu in, Saul ii tupa, Jonathan ii tapa, Mephibosheth sia David in khoaikhe hi.

⁸Ahihang ama in Aiah ii tanu Rizpah ii Saul taw a hin tapate nii Armoni le Mephibosheth la hi; ama in Saul ii tanu Merah le Meholah pan Barzillai ii tapa Adriel taw a hin tapa nga teng zongh la hi.

⁹David in amate Gibeon te tungah aap a, tuate in Topa mai mual tungah awklumsak uh hi — tuaciang a sali bup in thi khawm uh hi. Tua hun sia tuk bo kuan hi a, mangtaang at kipat sawngin tuabangin kithat uh hi.

¹⁰Tuaciangin Saul ii zino Aiah tanu Rizpah in mithiluangte ii kisialna suangpi tungah khau-ip buk vawtin anlaak kipat pan kipan tangngam ngua zuk dong ama tua munah om hi. Sun in ama in mithiluangte pan vacimte hung a, zanin ngamsa te panin dal hi.

¹¹David in Rizpah ii ngamtatna a zaak ciangin,

¹²ama pai in Saul le a tapa Jonathan ii ngu, Gilead ngam Jabesh panin la hi. (Amate in Beth Shan taang tualpi panin, Gilboa mualvum tung a Saul a kithalup zawkciang Philistine te ii a luang a khaina panin ngu uh hi.)

¹³David in Saul le Jonathan ii ngu le a ki awklumsak pasal sali teng ii ngu khawmtua hi.

¹⁴Tua zawkciang amate in Saul le Jonathan ii ngute Benjamin ngamkhen sung, Zela khua Saul ii pa Kish ii thaun sungah phumin kumpipa sawl babangin ngamta uh hi. Tuasia zawkciang Pathian in amate ii ngam atu a thungetna uh zo hi.

Philistine Thatanglian mamate taw Ngal kisimna

(1Khang tangthu 20.4-8)



¹⁵Philistinete le Israel te kilaklaw ah ngal kisimna khat om kik a, David le a mite kuankhia in Philistine te do uh hi. Kido hun sung khat ah David sia hong toi ta hi.

¹⁶Thatang lian mama Ishbibenob a kici khat, taungo taw a kivawt pound sali le lang a pha tei khat toai in, namsau thak khat kua a, David that thei tu in ki um hi.

¹⁷Ahihang Zeruiah ii tapa Abishai in David hu a, thatang lianpa sim in thatlum hi. Tua zawkciang David ii mite in David peuma amate taw ngalsim khawm tu in a kuan nawn ngawl natu kamciam vawtsak hi. “Nang sia Israel te ii lam etna ni hi, nang hong taan nuam ngawl khu hi,” ci uh hi.

¹⁸Hisia zawkciang Gob ah Philistinete taw kidona khat hong om kik a, Hushah pan Sibbecai in Saph a kici thatang lian mama khat thatlum hi.

¹⁹Gob maa ah Philistine te taw kidona khat om a, Bethlehem pan Jair ii tapa Elhanan in Gath mi Goliath that hi, ama ii tei bul sia thiamtakte ii pumlawng cia saa hi.

²⁰Tuaciang Gath ah ngal kidona dang khat om a, tua munah thatang lian mama ngal sim uuk mama khat om hi. Ama in a khutte ah khutme luk veve le a peangte ah peangme luk veve nei hi.

²¹Ama in Israel te nalh hi, tuaciang David ii suapuipa Shammah ii tapa Jonathan in ama thatlum hi.

²²Hi mihing li teng sia thatang lian Gath ii suante vive hi a, David le a mite in thatlum uh hi.

Samuel Niina 22

David ii Ngalzawna La

(Psalm 18)

¹Topa in David sia Saul le a ngal dangte kung panin a hutkhiat ciangin David in Topa tungah hi lasak hi.

²Topa in kei hong dal pa hi; ama sia ka kulh thakho ahi hi.



³Ka Pathian sia ka kidalna ahi hi, tuaciangin ama hangin kei ka suakta hi. Ama in lum bangin kei hong sung hi; ama in kei hong hung a, a suakta in kei hong keam hi. Ama in ka hunpa hi; Ama in molngolte kung panin kei hong dalin hong hung hi.

⁴Topa ka biakpui a, ama in ka ngalte kung panin hong suatak hi. Topa pok vun!

⁵Thina tuihual ka kiim theampo ah om a, lalna tuihual in kei hong khuum hi.

⁶Thina ii lau huaina ka kiim ah hong om a, tuaciang thaankuul in kei thaang hong sia hi.

⁷Ngim ka nga ciangin Topa ka biakpui a; ka Pathian munah hu ka ngen hi. A biakinn sung pan ka aw hong za a; hu ka ngetna aw ama in hong ngai hi.

⁸Tuaciang leitung sia liingin ngawk a; van ii phungkawngte kivei in liing hi, banghangziam cile Pathian a thin uuk hi!

⁹A naak hawng panin meikhu hong pusuak a, a kam sung pan a kaangtumsak thei meikuang le meikam piang hi.

¹⁰Ama in vantung eaukeakin hong pai suk a, a peang nuai ah meeikaai vom om hi.

¹¹Ama in vantung cherub to in manlang takin leang a; vuipi ii thakhui te tung pan khualhaw hi.

¹²Ama le ama khuazing taw kituam a; tui taw kidim meeikaai saate in ama kiim uum hi;

¹³ama mai pan khualeng in meikam te kuangsak hi.

¹⁴Tuaciang Topa in vantung pan vanto bangin hong nging a, Vaanglianbelpa Pathian ii aw kiza hi.

¹⁵Ama in a thaltangte kap a, a ngalte kithethaang hi; khualeng kuang taw amate taisak hi.

¹⁶Topa in a ngalte a tei ciang le a thin uukin hong hawksan ciangin, Tuipi ii tawdap suat kihong a, leitung ii phung kawng zongh kilawt hi



- ¹⁷Topa in tungsang panin hong ban suk a, kei hong len hi; ama in tuithukna panin kei hong dokkhia hi.
- ¹⁸A thahat ka ngalte kung pan hong hunkhia a tuaciang kei hong ensan theampo te kung pan zongin — kei atu in amate hat lei uh hi.
- ¹⁹Ngim ka nga laitak, amate in kei hong sim a, ahizong Topa in kei hong dal hi.
- ²⁰Ama in launa pan hong hu a; dik hong sak hu in ama in kei hong hunkhia hi.
- ²¹A maanin ngamta ka hikom Topa in kei, tel hong pia hi; paubaang ngawl ka hikom ama in thupha hong pia hi.
- ²²Topa thukhamte ka ni a; ka Pathian kung pan ka paikhia bua hi.
- ²³Ama ii thukham theampo ka tang a; a thupiakte ni ngawlin ka om bua hi.
- ²⁴Ama in mawna taw kitong ka hi hong he a, ahi ngawl ngamtatnate pan kikep hong he hi.
- ²⁵A maanin ngamta ka hikom ama in tel hong pia hi, banghangziam cile maw nei ngawl ka hi hong he hi.
- ²⁶Topa awng, nang tungah hong thumaante tungah na thumaan a, a cialcing te tungah phatna taw na kicing hi.
- ²⁷Nangma in a thiangtho te tungah na thiangtho a, ahizong a ngilote na ngal vawt hi.
- ²⁸A kiniamkhiakte na ngum a, ahizong a kiphasakte na khiasuk hi.
- ²⁹Nangma, Topa, ka khuavak na hi hi; ka khuazing na nilkhia hi.
- ³⁰Ka ngalte ka sim natu in thatang nong pia a, amate ii kinanna zawk natu in vaangletna nong pia hi.
- ³¹Hi Pathian — bangza in ama ii nasepte cialcing a, ama ii kammalte suan taak ziam! Ama ii hong dalna a zong theampo atu in ama in lum khat taw kibang hi.



- ³²Topa bekma Pathian hi a; Pathian bekma ih kidalna ahi hi.
- ³³Hi Pathian sia a kip ka bukna hi; Ama in ka lampi ngammuangsak hi.
- ³⁴Ama in ka peangte sazuk bangin liim takin suansak a; mual tungah ngammuang in hong koi hi.
- ³⁵Ama in ngal kisim hong sinsak a, tuasia ciang thalkawng a kho bel zongh ka zangh thei hi.
- ³⁶Aw, Topa nangma in nong dal a, nong hun hi; nong hu na in keima hong thupisak hi.
- ³⁷Kimat natu panin nong keam a, bangma hunin ka puk ngei bua hi.
- ³⁸Ka ngalte ka del a ka zo hi; amate ka lalcipsak mateng ka tawp bua hi.
- ³⁹Amate ka vaat suk a, a thoto thei nawn bua uh hi; amate ka mai ah ngallel in puk uh hi.
- ⁴⁰Ngal do natu in thahatna nong pia a; ka ngalte tungah zawna nong pia hi.
- ⁴¹Ka ngalte ka kung panin na taisak a; kei hong ensan te ka lalcipsak hi.
- ⁴²Amate in hu na zong ka le kuama in hu ngawl hi; amate in Topa biakpui hi kale ama in zo ngawl hi.
- ⁴³Amate ka ngoaicip a leivui bang suak uh hi; lampi ah a om buan bangin amate ka siikcil hi.
- ⁴⁴Tualngal kin ka mite kung pan nong hunkhia a minamte tungah ka ukna nong kipsak hi; ka heak ngei ngawl mihingte, tu in ka khutnuai mi suak uh hi.
- ⁴⁵Ngamdang mite ka mai ah hong kun a; amate in ka kammal a zaak ciang hong ni hi.
- ⁴⁶Amate a thin letna uh taanin, a kulhte sung pan liing vadil in hong pai uh hi.
- ⁴⁷Topa nungta hi, Ka kidalna pa pok vun! Kei hong hunkhia a thahat Pathian ii letna taangko vun.



⁴⁸Ama in ka ngalte tungah zawna kei hong pia hi, minamte ka khutnuai ah ama in huthe ngam ngawlin koi a;

⁴⁹ka ngalte kung pan kei hong dal hi. Aw Topa, ka ngalte tungah zawna kei nong pia a, molngolte mun panin nong dal hi.

⁵⁰Tua ahi ciang minamte sungah nang kong pok a, na tungah pokna late kong sak hi.

⁵¹Pathian in a kumpipa tungah zawna lian pia hi; ama in a teal sa sia ii tungah itna kip lak a, David le a suan a paalte tungah a tawntungin lak hi.

Samuel Niina 23

David ii Kammal Khakbelte

¹Jesse ii tapa, David sia Pathian ii mi thupi tu in a vawt, Jacob ii Pathian in kumpipa tu in a teal hi a, Israel mite atu in la hoi a phuakpa ahi hi. Hi teng sia David ii a khakbel a pau kammalte ahi hi.

²Topa ii thaa in kei tungtawnin hong pau hi; ama ii thu hong puak sia ka muk tungah om hi.

³Israel te ii Pathian in pau zo hi; Israel te a dal pa in kei tungah hong ci hi: “Thutang khenna taw a uk kumpipa, Pathian ii thu ni in a uk pa sia,

⁴meeikaai om ngawl zing khuavak lai ah nitaang taw kibang hi, ngua theau zawkciang lopate a teesak wakil ni taw kibang hi.

⁵Ka suan ka paalte Pathian ii thupha a piak tu zia sia tuabang ahi hi, banghangziam cile ama in tawntung kiciamna taw kei hong kiciam pui hi, a kipaltan ngawl tu thukimna, a kikheal ngei ngawl tu kamciam piakna ahi hi. Kei dei sia tuateng lian ahi hi, tua in ka zawna hi tu hi, Pathian in tangtungsak naksaal tu hi.

⁶Ahihang Pathian selte, a kivawk lingte taw kibang hi; Tuateng sia kuama in khut nguak taw tham thei ngawl hi.

⁷Thik vanhzak ahibuale tei khat na zak kul a, tuasia ciang amate kaangtum tu hi.



David ii Ngalkap Minthangte

(1Khang tangthu 11.10-41)

⁸David ii a minthang ngalkapte sia hite ahi hi: a masa phitbel sia Tachemon pan Josheb Basshebeth hi a, ama sia “Thum teng” ii lampui pa ahi hi; ama in tei taw ngalte zaliat kisimna khat sungah thatlum siat hi.

⁹A minthang thum sung pan a niina sia Ahoh minam Dodo ii tapa Eleazor hi. Nikhat ni in ama le David in ngaldo tu a kikhawmtua Philistinete thato uh hi. Israel te nungkin a,

¹⁰ahihang ding topin a namsau tha thei nawn ngawl dongin sim ahikom a khutte kemkee liang hi. Topa in tua ni in zawna lianpi nga hi. Ngal a kizaw zawkciang Israel te Eleazar kungah hong heak kikin a thite ii thikpuante suut uh hi.

¹¹A minthang thum sungah a thumna sia Harar pan Agee ii tapa Shammah hi. Philistinete be lo khat omna Lehi ah hong kikhawmtua uh hi. Israel te Philistinete mai panin tai keak uh a,

¹²ahizong Shammah ahile lo sungah a dinmun nusia ngawlin hung hi; tuaciang Philistinete that hi. Topa in tua ni in zawna nasia mama nga hi.

¹³Anlaak Poai hong kipat hun nai ciang, “sawmthumte” sung pan thum sia David ii omna Adullam leihawng sungah pai uh a, tua laitakin Philistinete sia Rephaim Kuam ah ngiaphual saat uh hi.

¹⁴Tua hun laitak in David sia ngal nanna tu in a ki uum mualno tung khat ah om a, Philistinete in Bethlehem khua lua uh hi.

¹⁵David in inn sang ngai in, “Bethlehem kongpi hui tuikhuk panin ka dawn tu tui, khat in hong paipui le paw uk na peu ingh!” ci hi.

¹⁶Ngalkap minthang thumte in Philistinete phual nawkkeak in pai uh a, tuikhuk pan tui tawm a laak zawkciang David kungah paipui uh hi. Ahihang David in a dawn nuam bua hi; tuabang ahi luang in Topa tungah piakkhiatna in lei ah sung a,



¹⁷tuaciang, “Topa awng, Hi tui ka ne ngei buatu hi! A nuntakna a khaam mite ii chi a ne taw ka kibang tu hi,” ci hi. Tua ahikom ama in tui a neak tu nial hi. Ngalkap minthang thumte ii ngalhan nasep tuabang ahi hi.

¹⁸Joab ii suapuipa Abishai (a nu sia Zeruah hi) sia “A minthang Sawmthumte” ii lampui ahi hi. Ama in tei taw a ngalte zathum do a, that siat hi, tuabangin ama sawmthumte sungah minthang hi.

¹⁹Ama sia “Sawmthumte” sungah a minthangbel hi a, amate ii lampui hong suak hi, ahihang “Thumte” za in minthang ngawl hi.

²⁰Kabzeel pan Jehoiada ii tapa Benaiah sia ngalkap minthang dang khat hi; ama in ngalhan nasep tam ma nei a, tua sung pan Moab ngalhang te nii a thalup kihel hi. Vuuk taak ni khat ama in dumkhuk sungah tuaksuk in tawpi khat thatlum hi.

²¹Ama in a thatang lian mama Egyptte tei toai khat that hi. Benaiah in molpum taw Egypt pa sim a, Egypt pa ii tei sut in tua taw that hi.

²²“Sawmthumte” sungah khat ahi Benaiah ii ngalhan nasep te tuabang ahi hi..

²³Ama sia “Sawmthum” sung panin a minthang a, ahihang “Thumte” za in minthang zo ngawl hi. David in ama a cingte ukpipa in koi hi.

²⁴⁻³⁹“Sawm Thumte” sungah a kihel dang teng sia: Joab ii suapui Asahel, Bethlehem pan Dodo ii tapa Elhanan, Harod pan Shammah le Elika Pelet pan Helez Tekoa pan Ikkesh ii tapa Ira Anathoth pan Abiezer Hushah pan Mebunnai Ahoh pan Zalmon Netophah pan Maharai Natophah pan Baanah ii tapa Heleb Benjamin ngam Gibeah pan Ribai ii tapa Ittai Pirathon pan Benaiah Gaash ngamnai kuam sung pan Hiddai Arabah pan Abialbon Bahurim pan Azmaveth Shaalbon pan Eliahba Jashen ii tapate Jonathan Harar pan Shammah Harar pan Sharar ii tapa Ahiam Maacah pan Ahasbai ii tapa Eliphelet Gilo pan Ahithophel ii tapa Eliam Carmel pan Hezro Arab pan Paarai Zobah pan Nathan ii tapa Igal Gad pan Bani Ammon pan Zelek



Beeroth pan Nahavai Joab ii ngalhiam puapa Jattir pan Ira le Gareb Hit pan Uriah, ahi uh hi. A vekpi in ngalkap minthang sawmthum le sali pha hi.

Samuel Niina 24

David in Mimal simna Vawt

(1Khang tangthu 21.1-27)

¹Topa sia Israel te ii tungah khatvei ma thin uuk kik a, amate tungah David in ngim piasak hi. Topa in ama mun ah, “Pai tan a, Israel te le Judahte mimal phaza sim tan,” ci hi.

²Tua ahikom David in ngalkap honte ukpipa Joab mun ah thu pia hi: “Na uliante taw Israel te minam theampo sung ngam ii mong lang khat pan lang khat dong pai tan a, mimalte sim tavun. Bangza tak pha ziam he nuam khi hi,” ci hi.

³Ahihang Joab in kumpipa zokik a, “Kumpipa awng, Topa na Pathian in Israel mite tu a sangin a zaa zakhat a tamzaw in hong piangsak taken a, tuaciang tuabang a pian dong nangma in hong musak lai taken. Ahihang, kumpipa awng banghang hisia vawt nuam ni ziam?” ci hi.

⁴Ahihang kumpipa in Joab le a uliante in a thu nisak a; amate in kumpipa nusia in Israel mite mi phaza sim tu in pai uh hi.

⁵Amate in Jordan ngun kantan in, Gad ngamkuam ii zanglai a Aroer khuapi ii thang sangah ngiaphual saat uh hi. Tua mun panin amate insaksang Jazer ah,

⁶tua mun pan Hit te ngamkhen sung Gilead le Kadesh ah pai uh hi. Tua zawkciang amate in Dan ah pai in, Dan pan nitumna sangah Sidon zuan uh hi.

⁷Tua mun pan amate kulh taw a ki uum Tyre khuapi, Hiv le Canaante khuapi theampo, a khakbel in Beersheba, Judahte ngamkhen thang sangah pai uh hi.

⁸Tuabangin a ngamsung buppi ah a khualhaw zawk uh, tha kua le ni kul zawkciang amate Jerusalem ah hong heak kik uh hi.

⁹Amate in, kumpipa tungah, Israel ngamah ngalhiam toai thei pasal a vekpi 800,000 om in, Judah ngamah 500,000 om hi, ci in son uh hi.



¹⁰Ahihang David in mimal simna sazian a laaksak zawkciang a thin hong nuam ngawl a, Topa munah hi bangin ci hi. “Hi nasep ka sep sia maw mama khi hi. Nong hesuakna in hong maisak tan, mawmawt nasep seam hi thong khi hi,” ci hi.

¹¹⁻¹²Topa in David ii kamsang Gad munah, “David son tan, ama ii teal tu thu nam thum pia khi hi. Ama ii teal po vawt tu khi hi,” cisak hi. A khuavak ni zing David ii thaw zawkciang,

¹³Gad ama ii kungah pai in, Topa ii a sawl teng son hi, tuaciang dongh hi. “Koisia teal tu ni ziam? Na ngam sungah kum thum kialpi tung zaw tu maw, na ngalte mai pan tha thum sung tai zaw tu ni ziam, tua ahibuale ni thum sung na ngam sungah pulpi tungsak nuam zaw ni ziam? Tu in ngaisun tan, Topa munah ka puak kik tu na zona hong zasak tan,” ci hi.

¹⁴David in zokik a, “A lung man huai mama dinmun ah om khi hi! Hi kale mihingte ii daan hong piak tu uuk ngawl khi hi. Topa mama sia kei daan hong pia tu pa hi hen, banghangziam cile ama sia hesuakna taw kidim hi,” ci hi.

¹⁵Tua ahikom tua ni zing pan kipan ama ii teal hun a ci dong Topa in Israel tungah pul natna tungsak hi. Ngam mong khat pan mong khat dong Israel mi tul sawmsali thi uh hi.

¹⁶Topa ii vantung lalang in Jerusalem lalthamsak tu in a kipat ciangin Topa in mihingte daan a piak huvau a thin kheal kikin, amate a that vantung lalang munah, “Tawp in! Pha zo!” ci hi. Vantung lalang sia Jebus mi Araunah ii ancilna munah hong theng hi.

¹⁷David in a mite a that vantung lalang mu a, Topa munah, “A maw sia keima khi hi, a pha ngawl a ngamta sia keima khi hi. Hi a khuangai huai mihingte in bang vawt thong na ziam? Kei le ka innkuante daan nong piak tu hi zaw khu hi,” ci hi.

¹⁸Tua ni ma in Gad sia David kungah hong pai a, “Araunah ii ancilna munah pai tan a, tua munah biaknatau khat Topa atu sa tan,” ci hi.



¹⁹David in Topa ii thupiak ni in Gad ii sawl bangin pai hi.

²⁰Araunah in a etsuk le kumpipa le a uliante ama kungah hong pai a mu hi. Ama in David ii mai lei ah kisepsuk in,

²¹dongh hi, “Kumpipa awng, banghangin hi sungah hong om ni ziam?” ci hi. David, “Na ancilna mun lei tu le, pul natna a thai natu Topa atu biaknatau khat sa tu in hong pai khi hi,” ci in zo hi.

²²“La in, kumpipa awng, tuaciang Topa tungah na uuk babangin pia in. Hi munah biaknatau tungah na hal tu khuita te om hi, tuaciang hi munah ah khuite ii kanhak le ancilna thingpheakte om hi, mei thu tu in zangh in,” Araunah in ci hi.

²³Araunah in kumpipa tungah a vekpi in pia siat hi tuaciang ama munah, “Topa na Pathian in na piakkhiatna hong saang taken,” ci hi.

²⁴Ahihang kumpipa in zo a, “Hi ngawl hi. Tuatae ii manh hong pia tu khi hi. Ka Topa tungah keima ii bangma a manh ka piak ngawl nate sangaw biakpiakna in nei ngawl tu khi hi,” ci hi. Ama in khuitalte le ancilna thingpheakte manh tu nguntang sawmnga pia hi.

²⁵Tua zawkciang ama in Topa tungah biaknatau sa in, meihal biakpiakna le kipawlkhop biakpiakna pia hi. Topa in a thungetna saang a, Israel ngam ah pul natna kamh hi.



Kumpite Khatna

Kumpite Khatna 1

Kumpipa David A huai a teak hun

¹Kumpipa David sia tu in pasal huai mama khat hong hi a, a naseamte in puanvan taw sisiin hi kale a khua mama a lum thei nawn bua hi.

²Tua ahikom a uliante in, ama munah, “Kumpipa awng, nang hong ou tu ngaknu khangmoi khat hong zonsak taw ung. Ama in nang taw a nai in hong luppui tu a, na khualum tu hi,” ci uh hi.

³Israel ngam bup ah ngaknu mealpha khat kizong a, Shunem ah Abishag a kici khat mu uh a, tuaciang ama sia kumpipa kungah ki paipui hi.

⁴Ama sia a meal pha mama a, kumpipa zongh ou hi, ahihang ama in nupa vai a zak pui nawn bua hi.

Adonijah in Kumpi tokhum Lua nuam

⁵⁻⁶Tu in Absalom a thi tak ciang David ii Haggith taw a tapa Adonijah sia David tate a nungta lai te sung pan a upa bel ahi hi. Ama sia a meal hoi mama mihing khat ahi hi. David zongh in ama sia bangma hunin tei ngei ngawl a, tuaciang ama sia kumpipa suak nuam mama hi. Ama le ama sia ngalleang, siphu te le ama a cing ngalkap sawmnga heang hi.

⁷Ama in Zeruah ii tapa Joab taw thu son a, thiampi Abiathar taw zong thu kikum uh hi, tuaciang amate in ama sia hu tu a lungkim uh hi.

⁸Ahihang thiampi Zadok, Jehoiada ii tapa Benaiah, kamsangpa Nathan Shimei, Rei le David a cing ngalkapte sia Adonijah sangah a om bua uh hi.

⁹Ni khat ni in Adonijah in Enrogel cik hui Ngul Suangpi a kicina munah tuu, khuital, khui no thaute sangaw biakpiakna in a pia hi. Ama in kumpipa David ii tapa dangte le Judah pan kumpipa uliante tua biakpiakna sungah sam hi,

¹⁰ahihang ama in a suapui seal Solomon ahizong Nathan kamsangpa ahizong, Benaiah kumpipa a cing pa sam ngawl hi.

Solomon Kumpipa in Kikoi



¹¹Tua zawkciang Nathan in Solomon ii nu Bethsheba kungah pa in dongh hi, “Haggith ii tapa Adonijah in ama le ama sia kumpipa in kikoi ahi hunlam he ngawl ni ziam? Tuaciang Kumpipa David zongh in hi thu bangma he ngawl ahi hunlam na he ziam?”

¹²Nangma le na tapa Solomon ii nuntakna na hu nuam le,

¹³ngaisutna hong pia khi hi, thakhatin Kumpipa David kungah pai in a, “Kumpipa awng, ciliap huai takin kei tungah kamciam nong vawtna ah ka tapa Solomon in na kumpi za hong laih tu ci ka na ngawl ni ziam? Tua ahile Adonijah sia bangbangin kumpipa suak thei ziam?” ci in dongh tan.

¹⁴Tuaciang Nathan in belap a, “Tua zawkciang Kumpipa David taw na papau laitakin kei kong tum tu a, a thuson teng maan hi kong ci tu hi,” ci hi.

¹⁵Tua ahikom Bethsheba in kumpipa lupna khaan sungah kimu tu in pai hi. Ama sia huai mama zo a, Shunem panin Abishag in ou hi.

¹⁶Bethsheba kumpipa mai ah a niamin hong kun a, kumpipa in, “Bang uuk ni ziam?” ci in dongh hi.

¹⁷Ama in, “Kumpipa awng, Topa na Pathian ii min taw kei tungah ciliap huai takin kamciam nong piakna ah, nang zawkciang kumpi a suak tu sia ka tapa Solomon hi, ci ka na ngawl ni ziam?”

¹⁸Ahihang Adonijah sia kumpipa suak zo a, tuaciang hi thu huvau nang bangma he ngawl ni hi.

¹⁹Ama in khuital tam ma, tuute, khuino thaute sangaw biakpiakna in pia a, ama in na tapate sam a, Abiathar thiampipa, Joab na ngalkap hon ukpipa samin poaipi khaam hi, ahihang ama in na tapa Solomon sam ngawl hi.

²⁰Kumpipa awng, Israel mite theampo in akua in na kumpi za hong lai tu ci in na son tu hong ngak tek hi.

²¹Tuabang na hi buale na thi pawpo ciang ka tapa Solomon le kei sia thumaan ngawlte a vawt bangin hong kivawt tu hi.”

²²Ama a papau laitak in, Nathan sia kumpipa inn sungah hong tum hi.



²³Nathan tua munah om ci in kumpipa tungah kison a, kamsangpa, Nathan sia sungtangin kumpipa mai ah kun hi.

²⁴Tua zawkciang ama in, “Kumpipa awng, Adonijah in nang hong laih kumpipa suak tu hi ci in taangko zo ni ziam?”

²⁵Tu ni mama in ama in pai in, khuital tam ma le tuu le khuino thaute sangaw biakpiakna in pia hi, ama in na tapate theampo sam a, Joab na ngalkap hon ukpipa zongh sam hi, tuaciang Abiathar thiampi zongh sam a, amate poai khaam in, ‘Kumpipa Adonijah a khan sau taken,’ ci in au uh hi.

²⁶Ahihang ama in kei hong sam ngawl hi, Topa awng, Zadok thiampipa ahizong, Benaiah ahizong, Solomon ahizong hong sam ngawl hi.

²⁷Kumpipa in hite sia na thukim ma ziam, nang hong laih tu sia akua hi tu ziam ci in na uliante zongh nong son ngawl ma ahi ziam?” ci hi.

²⁸Kumpipa David in, “Bathsheba hong tumsak kik tavun,” a ci ciang ama hong pai a, ama ii mai ah ding hi.

²⁹Tuaciang ama ii munah, “Ka ngim nga na theampo pan hong hunkhia a, a nungtaTopa min taw nang tungah kamciam hong pia khi hi,

³⁰tu ni in TopaIsrael Pathian min taw kamciam kong piak kholet tu khi hi, na tapa Solomon in keima kumpi za hong laih tu hi,” ci hi.

³¹Bathsheba kunsuk in, “Ka Topa kumpipa nungta tawntung taken!” ci hi.

³²Tua zawkciang kumpipa David in Zadok, Nathan le Benaiah samsak hi. Amate hong sungtan ciangin,

³³amate tungah, “Ka zum uliante keng vun; ka tapa Solomon in ka laa tung to taken a, Gihon Cik ah tha suk tavun,

³⁴tua munah Zadok le Nathan in Israel te ii kumpipa tu in sathau noai taken. Tua zawkciang lemle tum tu a, ‘Solomon kumpipa a khan sau taken,’ ci in au vun.



³⁵Ka kumpi tokhum tungah to tu in hi munah hong heak kik ciangin, a nung zui vun. Ama in ka kumpi za hong laih tu hi banghangziam cile ama sia Israel le Judah uk tu in ka teal sa ahi hi,” ci hi.

³⁶“Na dei bangin ka seam tu hi,” Benaiah in ci in zo a, “tuacianginTopa in zongh hong kipsak taken.

³⁷Topa sia nang kumpipa taw hong omkhop bangin na tapa Solomon taw zong hong omkhawm taken, tuaciang ama ii maanna sia nang sangin zongh mainawt zaw lai taken,” ci hi.

³⁸Tua ahikom Zadok, Nathan, Benaiah le kumpipa a cingte in Solomon sia Kumpipa David ii laa tungah suan in, Gihon Cik ah tha uh hi.

³⁹Zadok in Topa ii hong ompuina puanbuk sung pan olive thau la in, Solomon noai hi. Amate in lemle tumin, mipite theampo au in, “Kumpipa Solomon a khan sau taken,” ci uh hi.

⁴⁰Tuaciang amate theampo in ama nungzui in cia a, lungdam in au a, tamngai tumin, lei liing khom za tu in a aw uh nging hi.

⁴¹Adonijah le a leangnate poaipi khaam a man kuan ciang, amate in awnging za uh hi. Tuaciang Joab in lemle aw a zaak ciang ama in, “Khuapi sungah awnging sia bang khiakna nei ziam?” ci hi.

⁴²A pau a man maa in thiampi Abiathar ii tapa Jonathan hong theng hi. Adonijah in, “Hong tum tan, nang sia pasal pha khat na hi hi, thuthang pha khat hong puak hi lete kilawm hi,” ci hi.

⁴³“Thuthang pha hong puak ngawl khi hi,” Jonathan in ci hi. “Kumpipa David in Solomon sia kumpipa suaksak hi.”

⁴⁴Ama in Zadok, Nathan, Benaiah le kumpipa cingte in thasak hi. Amate in kumpipa laa tungah Solomon tosak uh hi,

⁴⁵tuaciang Zadok le Nathan in Gihon Cik hui ah sathau noai in kumpi suaksak hi. Tua zawkciang amate khuapi sungah tumin lungdam in au uh a, mipite sia tu in ngamlum lialua uh hi. Tuasia na zaak uh awnging sia ahi hi.



⁴⁶Solomon sia tu in kumpipa ahi hi.

⁴⁷Tuateng bek dom ngawlin kumpipa ii uliante in pai in Kumpipa David zatakna pia uh a, hi bangin ci uh hi. ‘Na Pathian in Solomon sia nang sang zongh in minthangsak zaw lai taken, tuaciang Solomon ii maanna sia nang aa sangin khangto zaw lai taken,’ ci uh hi. Tua zawkciang Kumpipa David in a lupna tungah kun in biakpiakna vawtin

⁴⁸thungen hi, ‘Ka suan ka paalte khat kei hong laihsak a tuasia hun a mu tu in hong nungtasak Israel te ii Pathian Topa pok tek tawng,’ ” ci hi.

⁴⁹Tuasia ciang Adonijah ii leangnate lau uh a, amate theampo dingin amate san tek ah paikhia uh hi.

⁵⁰Adonijah in Solomon kiita mama ahikom Topa ii ompuina puanbuk sungah biaknatau ii kingh khat lenin om hi.

⁵¹Adonijah in ama kiita ahikom biaknatau kingh lenin om hi ci in Solomon tungah kiko hi, tuaciang ama in, “A masa phitbel in Kumpi Solomon in kei hong thalup ngawl natu kamciam hong pia le dei khi hi,” ci hi.

⁵²Solomon in zokik a, “Ama kei tungah hong thumaan po le a samzam khat zongh kithutha ngawl tu hi, ahihang hong thumaan bua ahile thi tu hi,” ci hi.

⁵³Kumpipa Solomon in Adonijah biaknatau panin samkhiasak hi. Adonijah Kumpipa ii mai ah kun suk a, tuaciang kumpipa in, ama munah, “Na cia nuam le cia thei ni hi,” ci hi.

Kumpite Khatna 2

David ii Solomon tungah A khakbel A hilna

¹David thi tu hun a thet ciang ama in Solomon sam a, a khakbel kam hilna vawt hi:

²“Ka thi tu hun hong theng zo hi. Kimuang in takkha in,

³tuaciang Topa na Pathian ii vawt a hong sawl teng vawt in. A thukhamte le a thupiakna te a vekpi in, Moses ii thukham sungah a ki at theampo, vawt in, tua hi le na paina po ah na sep pawpo tungah na mainawt tu hi.



⁴Ama ii thu na ni le, Topa in kamciam kei tungah hong pia a, ka suan ka paalte in thumaan tak le thintak lungtak taw ama ii thupiakna a ni uh le, ama in tua kamciam ka kholet tu hi ci hi.

⁵“A dang thu khat om lai hi. Joab in kei tungah hong ngamtatna te na ciamtee tu hi, ama in Israel te ngalkaphon ukpipa, Ner ii tapa Abner le Jether ii tapa Amasa te nii hong thalupsak hi. Ngal sungah thina hangin ngal kilem sungah phulam in tualthat ahi sia na phawk tu hi. Ama in mihing maw nei ngawlte that ahikom tu in ama ii ngamtatna tungah keima in tavuan nei khi hi, tuasia bangma tua taw kizui in thuak khi hi.

⁶Na vawt tu bang ziam ci in he ni hi; ama, thi ngei bang thawthongin thisak ngawl tu ni hi.

⁷“Ahihang Gilead pan Barzillai tapate tungah hesuakna nei tan a, a pha takin ou tan, banghangziam cile na suapui Absalom kung pan ka tai lai in amate in kei tungah hong dik hi.

⁸“Benjamin ngam Bahurim khuapino panin Gera ii tapa Shimei a ci khat zongh om hi. Mahanaim zuanin ka pai lai in nasia takin hong haamsiat hi, ahihang Jordan ngun ah ka kisik ciangin ama ka thalup ngawl natu ciliap huai takin Topa ii min taw kamciam ka pia hi.

⁹Ahihang ama daan piak ngawlin tha thong ngawl tu ni hi. Bang vawt tu ci in nangma he ni hi, ama a kithalup natu na vaihawm kul tu hi,” ci hi.

David ii Thina

¹⁰David thi a David khuapi ah kiphum hi.

¹¹Ama kum sawmli sung Israel te ii kumpipa seam hi. Hebron panin kum sali sung maang a, Jerusalem ah kum sawmthum le kum thum sung maang hi.

¹²Solomon in a pa David ii za lua a, ama ii kumpi vaangletna kho takin kip hi.

Adonijah ii Thina



¹³Tua zawkciang Haggith tapa Adonijah in Solomon ii nu Bethsheba kungah haw hi. “Kilem vai in hong vak na hi ziam?” ci in ama in dongh hi. Adonijah in, “Hi hi,” ci in zo hi,

¹⁴tuaciang belap a, “Kong nget nop khat om hi,” ci hi. Ama in, “Bang ziam?” ci in dongh hi.

¹⁵Ama in zo a, “Na heak sa bangin kei sia kumpi ka sua natu hi, Israel ngamah mihing sim in tuabangin muangmaw hi. Ahihang a tuam dang khat in hong piang a, ka suapuipa sia kumpipa suak hi, banghangziam cile tuasia Topa ii deina hi.

¹⁶Tu in nget nop khat hong nei khi hi; Nong hesuakna in hong nial heak in,” ci hi. Bathsheba in, “A bang ziam?” ci in dongh hi.

¹⁷Ama in zo a, “Nong hesuakna in Kumpipa Solomon tungah Shunem panin numei Abishag sia ka zi tu in hong piak natu hong ngetsak tan — nang sia ama in hong nial ngawl tu ci in he khi hi,” ci hi.

¹⁸Ama in, “Pha mama hi nang atu Kumpipa tungah kong sonsak tu hi,” ci in zo hi.

¹⁹Tua ahikom Bethsheba kumpipa kungah Adonijah ii taangin pau tu in pai hi. Kumpipa sia a nu muak tu in dingto a, tuaciang kun hi. Tuasia zawkciang ama kumpi tokhum tungah to a, a nu atu a dang khat paipui in a sawl zawkciang a ziat sangah tosak hi.

²⁰Ama in, “Hamphatna no khat hong ngen nuam khi hi, hong nial heak in,” ci hi; “Bang ziam nu awng?” ci in dongh hi. “Hong nial bong,” ci hi.

²¹Ama in zo a, “Na suapuipa Adonijah ii zi tu in Abishag pia in,” ci hi.

²²Kumpipa in, “Banghangin Adonijah atu in Abishag hong ngen ni ziam?” ci in dongh hi. “Kumpi tokhum zongh ngetsak vet ve le, Adonijah sia ka u hi a, thiampi Abiathar le Joab zongh ama sangah pang hi! ” ci hi.

²³Tua zawkciang Solomon in Topa min taw kiciamna vawt hi. “Adonijah in hisia hong nget hu in ama nuntakna taw a lul bua ngangaw le Pathian in kei hong vua lum taken!



²⁴Topa in ka pa David ii kumpi tokhum tungah kip takin kei hong koi zo hi; ama in a kamciam kholet in kumpi ngam sia ka suan ka paalte dongin hong pia zo hi. Adonijah sia tu ni mama in thi tu hi ci in a nungta Topataw kiciam khi hi,” ci hi.

²⁵Tua ahikom Solomon in Benaiah thu pia a tua pa in pusuak in Adonijah that hi.

Abiathar Kihawlkhiatna le Joab ii Thina

²⁶Tua zawkciang Kumpipa Solomon in Abiathar thiampipa tungah, “Na teenna ngam Anathoth ah cia tan. A thi tu kilawm ni hi, ahizong tu laitakin hong thisak ngawl tu khi hi, ka pa David a om lai in Thukham Thingkuang a keam pa na hi a, ama ii ngim ngana theampo a siim pa zongh na hi hu, ahi hi,” ci hi.

²⁷Tua zawkciang Solomon in thiampi Abiathar sia Topa ii thiampi a sepna pan tawpsak hi, tuabangin Topa ii Shiloh ah thiampi Eli le a suan a paalte huvau a pauna tangtungsak hi.

²⁸Joab in thupiayang teng za hi. (Ama in Absalom panpui ngawl ahihang Adonijah panpui hi.) Tua hikom ama tai in Topa ii ompuina puanbuk sungah biaknatau ii kinghte lenin om hi.

²⁹Kumpipa Solomon in Joab sia puanbuk tu in tai a, biaknatau hui ah om hi ci in a zaak ciang, Kumpipa Solomon in kamtai khat sawlin Joab munah banghangin biaknatau tu in tai ni ziam ci in donghsak hi, Joab in zokik a, ama Topa tu in ka tai sia Solomon ka kiitak hang hi cisak hi. Tua ahikom Kumpipa Solomon in Joab that tu in Benaiah sawl hi.

³⁰Ama Topa ii ompuina Puanbuk ah pai in Joab munah, “Kumpipa in hong pusuak taken, ci hi,” ci hi. Joab in, “Hong pusuak ngawl tu khi hi. Hi munah thi zaw tu khi hi,” ci in zo hi. Benaiah heak kikin Kumpipa munah Joab ii pauna teng son hi.

³¹“Joab ii ci bangin vawt in,” Solomon in ci hi. “That in a, phum in. Tuasia ciangin kei ka hi zong, David ii suan le paal dangte ahizong Joab ii maw nei ngawl a thalupte huvau ah tavuan ka nei nawn buatu hi.



³²Ka pa David ii heak ngawl laanin, tual thana a vawt hu in Topa in Joab sia daan pia tu hi. Joab in ama sangin mi phazaw maw nei ngawl mihing nii thatlum hi: Abner sia Israel te ngalkap hon ukpipa hi a, Amasa sia Judahte ngalkap hon ukpipa ahi hi.

³³Amate tual a tha hu in daan piakna sia Joab le a suan a paalte tungah a tawntungin thuk tu hi. Ahihang Topa in David le a suan a paal kumpipa tokhum tungah a to peuma zawna pia tawntung tu hi.”

³⁴Tua ahikom Benaiah in Topa ii ompuina Puanbuk ah pai in Joab that hi, tuaciang ama sia ama ii inn ngam tanzauna ah kiphum hi.

³⁵Kumpipa in Benaiah sia Joab taangin ngalkap hon ukpipa suaksak a, thiampipa Zadok in Abiathar za laihsak hi.

Shimei ii Thina

³⁶Tua zawkciang kumpipa in Shimei samsak a, “Hi sung Jerusalem ah nangma atu in inn khat sa in, a sungah teang in a, khuapi nusia ngei heak in.

³⁷Inn nusia in Kidron lui na kantan le thi tatak tu ni hi — tuaciang nangma mawna hi tu hi,” ci hi.

³⁸“Pha mama hi, Kumpipa awng, na ci babangin ngamta tu khi hi,” ci in Shimei in zokik hi. Tuabangin ama Jerusalem ah ngei ma teang hi.

³⁹Kum thum zawkciang, Shimei ii silate nii tai in, Macaah ii tapa Achish, Gath kumpipa tu in tai uh hi. Shimei in amate sia Gath ah om hi ci in a zaak ciangin,

⁴⁰a laa kungthua in Gath ah Achish Kumpipa kungah tua silate zong tu in pai hi. Amate mu in inn ah hong cia pui kik hi.

⁴¹Solomon in Shimei ii ngamtatna teng a zaak ciangin,

⁴²ama samsak a, “Jerusalem na nusiak ngawl natu in Topamin taw kamciamna kong vawtsak hi. Tuaciang na kidop natu kong thupiakna na na nusia le thi tatak tu ni hi ci in thu kong pia hi. Tua thu thukim in ka thu nong nit natu lungkim hi ngawl ni ziam?”



⁴³Tua ahile banghangin na kamciam paltan in kong thupiakna hong mang ngawl ni ziam?

⁴⁴Ka pa David tungah na tatkhialnate theampo he nginge ni hi. Topa in tuate hu in daan hong pia tu hi.

⁴⁵Ahihang ama in kei sia thupha hong pia tu a, David ii kumpi ngam sia ngammuangsak tawntung tu hi,” ci hi.

⁴⁶Tua zawkciang kumpipa in Benaiah thu pia a, ama pusuak in Shimei that hi. Tu in Solomon in ukna a cingin nga hi.

Kumpite Khatna 3

Solomon in Ciim natu Thungen

(2Khang tangthu 1.3-12)

¹Solomon in Egypt te taw ngal vai a kipawl natu Egypt Kumpipa tanu tenpui hi. Ama in tua a zi sia ama ii inn tu, Biakinnpi le Jerusalem khua uumna luphungtesak man dong David khuapi ah a teang tu in ciapui hi.

²Topa atu in biakinnpi kisa ngawl lai hi, tua ahikom mipite in sangaw biakpiakna mun tuatuam ah vawt uh hi.

³Solomon in Topa it a, a pa David ii hil bangin ngamta hi, ahihang ama in ngannote ngo in biaknatau tuatuamte ah biakpiakna in nei hi.

⁴Khat vei, ama Gibeon ah pai in tua munah sangaw biakpiakna vawt hi, banghangziam cile tua mun ah biaknatau minthang bel sia om hi. Ama in hun bo sa sungah tua munah meihal biakpiaknate a za a za in pia hi.

⁵Tua ni zan in Topa sia a mang sungah hong kilaak a, ama thu dongh hi. “Bang kong piak tu na uuk bel ziam?” ci hi.

⁶Solomon in zokik a, “Nang in ka pa David, na naseam pa sia itna lianpi na lak a, tuaciang ama pha in, thumaan in, nang taw kizopna sungah thutang in seam hi. Tuaciangin nangma in a kizom paisuakin itna kho na lakna in tapa khat na pia a, ama ii taangin tu ni in ngam a uk hi.

⁷Aw Topa Pathian, keima sia ka khan moi mama in ki uk zia he ngawl ka hi hang, nangma in kei ka pa za nong laihsak zo hi.



⁸Hi sungah na teal sa nangma mite a kisim zo ngawlte sungah om khi hi.

⁹Tua ahikom na mihingte thutang taw ka uk thei natu le a pha le a sia ka khentel thei natu in ciimna hong pia tan. Tua ahibuale bangbangin hi na mihon tam mama te uk thei tu khi ziam?” ci hi

¹⁰Solomon ii hisia a nget sia Topa lungkim hi,

¹¹tua ahikom ama munah, “Nangma atu in khan sauna ahizong, hauna ahizong, ahibuale na ngalte thi natu ahizong, hong ngen ngawlin thutang takin uk thei natu ciimna hong ngen zaw na hikom,

¹²nong nget bangin ka vawt tu hi. Ciimna le heakna sia tu masia le tu zawkciang zong kuama ii nei ngei ngawl a kicingin hong pia tu khi hi.

¹³Nong nget ngawlte zong hong pia sii tu khi hi: na nuntak tawntung hauna le minphatna te sia kumpipa dang khat pawpo sangin tam zaw kong pia tu hi.

¹⁴Tuaciang na pa David ii vawt bangin kei thu nong ni a ka thukham le ka thupiakte na keamcing le khan sauna hong pia tu khi hi,” ci hi.

¹⁵Solomon hong khanglo a, Pathian in a mang sungah ama paupui hi ci in phawk hi. Tua zawkciang ama Jerusalem ah pai in Thukham Thingkuang mai ah meihal biakpiakna le kipawlkhop biakpiaknaTopa tungah vawt hi. Tua zawkciangin a uliante theampo atu an neak poai khat vawt hi.

Solomon in Thuhaksa khat khen

¹⁶Nikhat ni in pumpi zuak numei nii Kumpipa Solomon mai ah amate thu in ding uh hi.

¹⁷Khat sia in, “Kumpipa awng, hi numei le kei inn khat sungah teang khawm khu hi, tuaciang keima in ama om sung ma in ka inn ah nausen no khat ka hing hi.

¹⁸Ka nau a sua zawk ni nii ciang ama zongh in nau pano khat hing hi. Koma nii bekma tua inn sungah teang a, kuama dang om ngawl hi.

¹⁹Tuaciang zan khat ciangin ama in a nau tungah hong kilumliik tha in, a nau dellum hi.



²⁰Ama in zan in tho a, ka mut laanin ka tapa sia ka pangh panin la a, ama lupna ah paipui hi; tua zawkciang ama in nausen thi sa sia kei lupna ah hong koi hi.

²¹A khuavak ni zingsang ka khanlaw ciangin ka nau noai pia tu ka hi le a thi sa ahi hunlam ka mu hi. Nausen pha takin ka etcian ciang kei ii ta hi ngawl hi ci in ka mu hi,” ci hi.

²²Ahihang numei dang khat sia in, “Hi ngawl hi! Nau thi sa sia nang aa hi a, a nungta sia kei aa hi,” ci hi. Numei a pau masa sia in, “Hi ngawl hi! Nau a thi sia nang aa hi a, a nungta sia keima aa hi,” ci kik hi. Tuabangin Kumpipa mai ah kinial uh hi.

²³Tua zawkciang Kumpipa Solomon in, “Na nii uh ma in, nau a nungta sia kei aa hi ci in a thi sa sia ama aa hi ci nu hi,” ci hi.

²⁴Ama in namsau khat lasakin, hong paipui zawkciang,

²⁵ama in, “Nau a nungta sia phalbat vun a, numeite a lang veve hawmsak vun,” ci hi.

²⁶A nu tatak sia a tapa a itna taw kidim ahikom kumpipa munah, “Kumpipa awng, nau sia that heak in. Ama pia in!” ci hi. Ahihang numei dang khat sia in, “Ko khat zongh hong pia heak in; khen nii sua in,” ci hi.

²⁷Tua zawkciang Solomon in, “Nau sia that heak in! Numei a pau masa sia pia vun, ama sia a nu tatak hi,” ci hi.

²⁸Israel mipite in Solomon ii thu khenna a zaak uh ciang ama zatakna nasia nei uh hi, banghangziam cile Pathian in ama sia thu kituu te tang takin khen thei natu Pathian in ciimna pia hi, ci in he uh hi.

Kumpite Khatna 4

Solomon ii Uliante

¹Solomon sia Israel ngam bup ii kumpipa hi a,

²tuaciang hite sia a uliante ahi uh hi. Thiampi: Zadok ii tapa Azariah



- ³Zum thuzeakpite: Shisha tapate Elihoreph le Ahijah Thu ciamtee pipa: Ahilud tapa Jehoshaphat
- ⁴Ngalkap mang: Jehoiada tapa Benaiah Thiampi: Zadok le Abiathar
- ⁵Ngam khen khat ukpi pa: Nathan tapa Azariah Kumpite ngaisutna a pia pa: Nathan tapa thiampi Zabud
- ⁶Kumpi innsung naseamte lampuipa: Ahishar Thaman piak ngawl kulite a ukpa: Abda ii tapa Adoniram sia,
- ⁷Solomon in Israel ngam sungah ngamkhen uk maangpi sawm le nii koi hi. Amate in a uk sung ngam tek panin kumpipa le a baangkua ii kumkhat bup a neak tu sia mihing khat sim in tha sim a baanin kilaih in piasak hi.
- ⁸Tua upa sawm le niite le amate ii ukna ngamkhente sia hi bang hi: Benhur: Ephraim mualtung ngam teng
- ⁹Bendeker: Makaz, Shaalbim, Beth Shemesh, Elon le Beth Hanan khuapite
- ¹⁰Benhesed: Arubboth le Socoh khuapite le Hephher ngam theampo
- ¹¹Solomon tanu Taphath ii pasal Benabinadab: Dor ngam theampo
- ¹²Ahilud tapa Baana: Taanach le Megiddo khuapite le Jezreel khua thangsang, Beth Shean le Zarethan khuahui ah a om ngam theampo, Abel Meholah le Jokmeam khua dong
- ¹³Bengeber: Gilead ngam Ramoth khua le Manasseh ii suan le paal khat ahi Jair be le phungte ii neisa Gilead ah khuanote le Bashan pan Argob ngam, a vekpi in khuapi lian sawmluk, luphung taw a ki uum, le kongpi taungo taw kikalh te a
- ¹⁴Iddo tapa Ahinadab: Mahanaim ngam
- ¹⁵Solomon ii tanu dang khat Basemath a tenpui pa Ahimaaz Naphtali ngam
- ¹⁶Hushai tapa Baana: Asher ngam le Bealoth khua
- ¹⁷Puruah tapa Jehoshaphat: Issachar ngam
- ¹⁸Ela tapa Shimei: Benjamin ngam



¹⁹Uri tapa Geber: Amor kumpipa Sihon le Bashan kumpi Og ii a ukna ngam Gilead ngam Hi ngam uk sawm le niite ii tungsia ah ngambup uk menzi khat zongh om hi.

Solomon ii maan sung Khantona

²⁰Judah le Israel ngam sung a mite sia tuipi vaal a sentang za in tam hi; amate in ne a, dawn in, lungdam uh hi.

²¹Solomon ii kumpi ngam sia Euphrates Ngun ii huam, Philistia le Egypt te ngamngi dong ahi hi. Amate in shia pia uh a, ama ii nuntak sung tawntung a khut nuai ah om uh hi.

²²Solomon ii nisim a tulmawk ante sia, zungtaang vui neal kuang 150, anvui ham kuang 300,

²³sazuk, saza, sanang le ak te a kisim ngawl, inn ah a kivaak khui 10, lo sung kitha khui 20, tuu 100 te ahi uh hi.

²⁴Solomon in Euphrates Ngun ii nitumna sang ngam theampo, Tipshah khua Euphrates ngun hui ah, tuaciang nitumna sang Gaza dong uk hi. Tuaciang Ephrates ii nitumna sang kumpipate theampo sia ama ii khutnuai ahi hi, tuaciang ngamngi kizawng a omte theampo taw kilem uh hi.

²⁵Ama ii nuntak lai tengin Judah le Israel te sia ngam muang in om uh a, innkuan simin a sapit huante le a thei kungte taw nuamsa uh hi.

²⁶Solomon in ngalsimna siphuleang atu siphu khawk tul sawmli nei a, siphu ngalkap tulsawm le tulinii nei hi.

²⁷Ngam uk maangpi sawm le niite in Solomon le ama ii kumpi inn sungah an ne theampo atu tha sim kum khat ai atu a baan in kilaih in an pia uh hi; amate in a kismah theampo a tawntungin puak uh hi.

²⁸Maangpi khat ii simin, a kismah babang taangpi le taangphawte, ngalsimna siphute le naseam siphute an tu sik uh hi.

²⁹Pathian in Solomon sia a tuampian ciimna le mukhol theina, a kitee thei ngawl heak theina te pia hi.



³⁰Solomon sia Nisuana sang a micimte ahibuale Egypt mi ciimte sangin ciim zaw hi.

³¹Ama sia mihing a minpiang a ciimbel ahi hi: Ezrah mi Ethan sangin ciim zaw a, Haman, Calcol le Darda, Mahol ii tate sangin ciimzaw hi, ama ii minthanna sia kiim le paam ngamte dongin kizel hi.

³²Ama in paunak tulthum phuak a, la zongh ngui tul vaal phuak hi.

³³Ama in thingkung le lopate thu sonin nei a, Lebanon a cedar te le pang tung a po hyssop te thu; tuaciang ama in ngamsate, vacimte, awmtaal nganhingte le ngasate thu son hi.

³⁴Leitung bup a kumpite in a ciimna uh za a, tua ciimnate a ngai tu in thataak paisak tek uh hi.

Kumpite Khatna 5

Biakinpi Sa tu in Solomon Kithoi

(2Khang tangthu 2.1-18)

¹Tyre te ii Kumpipa Hiram sia David ii ngualtamh khat hi tawntung a, tuaciang Solomon in a pa David ii za laih hi ci in a zaak ciang tongciinte ama kungah paisak hi.

²Solomon in Hiram tungah hi kamte thaak kik hi:

³“Na heak bangma ka pa David in a kiim a paam a ngalte taw kisim tawntung ahi hu in Topa in a ngalte theampo tungah zawna a piak mateng ama in Topa a Pathian a biak natu Biakinn a sa thei bua hi.

⁴Ahihang tu in Topa ka Pathian in ka ngamngi dung theampo ah kilemna hong pia a, ngal nei nawn ngawl khi hi, tuaciang hong kisim tu zongh lau om ngawl hi.

⁵Topa in ka pa David munah, ‘Nang zawkciang kumpi ka suasak tu na tapa in kei atu Biakinpi hong saksak tu hi,’ ci in kamciam pia hi. Tuaciang tu in Topa ka Pathian a kibiak natu biakinnpisak tu ka khensat zo hi.

⁶Tua ahikom Lebanon ah cedar kungte phuk tu in na mite na paisak in. Keima ii mite zongh amate taw diangkawm tu a, tuaciang nangma ii khensat



babang thaman pia tu khi hi. Na heak bangma, ka mihingte sia thingphu dan na mite thiam bangin thiam ngawl hi,” ci hi.

⁷Solomon ii kam thaakte a saan ciang Hiram sia lungkim mama a, hi bangin ci hi. “Ngamliau tuasia uk tu David a laih tu tapa ciim khat a piak hu in Topa tu ni in pok vun!” ci hi.

⁸Tua zawkciang Hiram in Solomon munah hi teng kam thaak hi. “Na kam hong thaak nga khi hi, tuaciang nong nget bangin seam tu kithoai zo khi hi. cedar thing le taakthing teng hong sik tu khi hi.

⁹Ka mihingte in thingluangte Lebanon panin tuipei dong hong paipui tu a, tuate sawm khawm in phong in ka vawtsak zawkciang nangma tealna tuipei vaal mun khat ah hong taisuksak tu khi hi. Tua munah ka mite in phel in, tuaciang na mite in tavuan la tu hi. Nangma sang pan sia ka mite nguai an nong piaksak tu ka dei hi.”

¹⁰Tua ahikom Hiram in Solomon sia cedar luang le taak luang a dei za sik hi,

¹¹tuaciang, Solomon in Hiram sia kumsim in zungtaang kuang 100,000 le olive thau thieng gallon 110,000 sik hi.

¹²Topa in a kamciam lenin Solomon sia ciimna pia hi. Hiram le Solomon kilaklaw ah kilemna om hi, tuaciang amate ngeal sia khat le khat ki hu natu thukimna lai vawt hi.

¹³Kumpipa Solomon in Israel ngam bup panin thaman piak ngawl kuli 30,000 khon hi,

¹⁴tuaciang Adoniram sia tuate uk tu in koi hi. Ama in tua mite pawl khat ciang mihing 10,000 veu a om pawl thum in khen a, Lebanon ah thakhat veu diangin, a ngam uh ah tha nii veu diangsak hi..

¹⁵Solomon in mual tung suangkhu ah a diang tu mihing 80,000 nei hi, tua suangte a pua tu mihing 70,000 hi a,

¹⁶ama in tuate ii nasep a vil tu in mihing 3300 koi hi.



¹⁷Solomon ii thupiakna taw Biakinnpi phungkawng atu suangtum lian a hoi tosak hi.

¹⁸Solomon le Hiram ii naseamte in Byblos khuapi pan suangtum le thingte Biakinnpi atu in pua pha hi.

Kumpite Khatna 6

Solomon in Biakinnpi Sa

¹Israel te ii Egypt a nusiawt zawk kum zali le kum sawmliawt zawkciawng, Solomon ii maan zawk kum lina, a tha niina Ziv tha sungah Solomon in Biakinnpi sa tu in kipan hi.

²A sungsang a sauna pi 90 pha a, pi 30 zai hi, tuaciawng a saanna pi 45 ahi hi.

³A tumna khaan sia pi 15 thuk in, a zaina pi 30 hi a, biakinnpi zaina cia ma pha hi.

⁴Biakinnpi ii pangte sia a hawng veu om a, a pua sang toi zaw in a sung sang zaizaw hi.

⁵Biakinnpi ii pangh sang le a nung sangah inn pepna inndawl thum khat biakinn nealin sa a, dawl khat simin pi 7 le lang veu saang hi.

⁶A dawl nuainung bel a khaante sia pi 7 le lang veu zai a, a laizawng dawl sia pi 9 zai in, tuaciawng a tungnungbel dawl sia pi 10 le lang pha hi. Sualthal te sia pang sungah phum kul ngawl a, pang tungah ngak thei natu in biakinn pang sia dawl khat zawkciawng dawl khat paa vaial hi.

⁷Biakinnpi asak tatak ciawng sek, hei, le thik hiamte ii ngin a kizaak ngawl tu in, Biakinnpisak natu suangtumte sia suangkhuuk sungah zep sa in kikoi hi.

⁸Biakinnpi pepna inn ii a dawl nuai nungbel sia biak innpi ii thawng sangah om a, tua mun panin a dawl niina le a thumna pai natu keallei kithung hi.

⁹Tuabawngin Solomon in Biakinnpi asak man hi. Ama in innciawngdap sia cedar thingpheakte le innsunte vawt hi.



¹⁰Dawl thum a pha inn pepna sia pi 7 le lang saang a, khaan simin Biakinnpi ii pang pua nung sia bealh in kisa a, a innpi taw cedar thingpimte taw kipee hi.

¹¹Topa in Solomon munah,

¹²“Ka thukhamte le ka thupiakna te na ni le na pa David tungah sep tu a ka kamciam teng hong seam tu khi hi.

¹³Tu a nasak hi Biakinnpi sung Israel ka mihingte sungah teang tu in kong om tu a, tuaciangin amate ka nusia ngei buatu hi,” ci hi.

¹⁴Tuabangin Solomon in Biakinnpi asak man hi.

Biakinnpi Sungsang Zepna

(2Khang tangthu 3.8-14)

¹⁵Inn sung sang pangte sia suat pan kipan innciingdap te dong cedar thing pheakte taw kituam a, tuaciang a suatte sia taakthing kizangh hi.

¹⁶A sung sang inn khaan khat, “A thiangtho bel Mun” a kici sia Biakinnpi ii nung sangah kisa hi. Ama sia pi 30 sau a, cedar thingpheakte taw kidoi a, suat panin innciingdap dong kikhaktan hi.

¹⁷A Thiangthobel Mun sia ii mai a innkhan sia pi 60 sau hi.

¹⁸Cedar thingpheak sia uum nga le paak limte khetkuak taw kizeam hi; a inn sungsangbup sia cedar thingpheak taw kituam a, tua hu in pangin a kiciang suangte kimu thei ngawl hi.

¹⁹Biakinnpi nung sangah innsungnung khaan khat kivawt a, tua mun sia Topa ii Thukham Thingkuang a kikoi natu ahi hi.

²⁰Hi inn sungsang khaan sia pi 30 sau a, pi 30 zai in, pi 30 saang a, a buppi in kham ciitak taw kituam hi. Biaktaua sia cedar thing taw kituam hi.

²¹Biakinnpi ii sungsang sia kham taw kituam a, a doi sungnung sia a tumna khaamtan in kham kualpee khau kithung hi.

²²Biakinnpi ii sungsang buppi kham taw kituam a, A Thiangthobel Mun aa biaknataua sia zongh kham taw kituam hi.



- ²³Cherubim nii sia olive thing taw kivawt a, A Thiangthobel Mun ah kikoi a, amate ngeal pi 15 veve saang hi.
- ²⁴⁻²⁶Amate ngeal a letna le a lim a meal kibang hi. Khat ii sim in tha nii tek nei hi. Tuaciang a thate khat ciang pi 7 le lang sau hi, tua ahikom a tha dawn khat le khat kilaklaw pi 15 pha hi.
- ²⁷Amate ngeal sia A Thiangthobel Mun ah a ki cial in kikoi a, a tha kiphalte dawn veve kipha in, a khaan zanglai santak ah kipha in, tuaciang a tha dangte nii in pang pha uh hi.
- ²⁸Cherubimte a nii in kham taw kituam hi.
- ²⁹A innsungpi pangte le a sungnung khaante ii pangte sia a khetkuak cherubim te ii limte, palm thingkung limte le paak limte taw kizeam hi.
- ³⁰A suatte a kilawm tiuteu in kham taw kidap hi.
- ³¹Olive thing taw a kivawt suakhak a kipee nii te sia A Thiangthobel Mun tumna ah kikoi hi; a kongvang ii laisaan a tung sia a lang le a lang pan suang a awn in kiciang a, a dawn zum hi.
- ³²Kongkhate sia cherubim te, palm thingkung limte le paak limte taw kizeam in, kham taw kituam hi.
- ³³Khaanpi sung tumna kongkha sia siik li nei in olive thing taw kivawt hi.
- ³⁴Suakhak a kithep thei nii sia taakthing taw kivawt a,
- ³⁵cherubim te, palm thingte lim le paak limte taw kizeam hi, tuate sia a saanna kikim in kham taw kituam hi.
- ³⁶Leitual sung nung sia Biakinnpi ii mai ah kivawt a, pang taw ki uum in, suang ngual thum simin cedar thingpim ngual khat veu kiciang hi.
- ³⁷Biakinnpi ii phungkawng sia Ziv a kici tha niina, Solomon ii maan zawk a kum lina ah kiciang hi.
- ³⁸Bul tha a kici a tha liatna, Solomon ii maan zawk a kum sawm le kum khat ciangin, a kingeal bangin kiman thiangtho hi. A kisak natu Solomon atu kum sali hai hi.



Kumpite Khatna 7

Solomon ii Kumpi Inn

¹Solomon in a ten natu Kumpi inn sa sii hi, a man natu in kum sawm le kum thum hai hi.

²⁻³Lebanon Thingtang Khaan sia pi 150 sau a, pi 75 zai in, pi 45 saang hi. Cedar khuam sawm le nga veu ngual thum om hi, tuate tungah zawlliang kithung hi. Innciingdap sia cedar hi a, vanh senna khaante tung liap hi, tuate zongh khuam in nang hi.

⁴A pangte ngeal ah khelki ngual thum om hi.

⁵Tua a kongkha te le a khelkite sia kingh li nei veu hi a, tuaciang pang tunga khelki ngual thum teng sia ngual khat le ngual khat kimaingat hi.

⁶Khuampi te ii Khaan a kici sia pi 75 sau a, pi 45 zai hi. A tung panin kisiin a, khuam in nang hi.

⁷Kumpi tokhum khaan sia thukhenna khaan zongh kici a, Solomon in thu a khenna mun ahi hi, tua zongh suat panin tuukpite dong cedar thingpheakte taw kituam hi.

⁸Solomon ii teenna inn sia Thukhenna Khaan ii inn nung sangah inn dangtesak bangma in kisa hi. A zi Egypt Kumpipa ii tanu atu zongh tua taw kibangin innsaksak hi.

⁹Hi innte theampo, a leitual pi kihel in, phungkawng pan kipan bitha dong suang taw kivawt hi. A suangte sia a suangkhuuk ah a pha tu a kidei cia kivawt a, a sung le a pua panghte sia thingatnaam taw kingiamh hi.

¹⁰A phungkawng tu sia suangtum liante suangkhuuk ah kivawt a, pawlkhat sia pi sawm le pi nii hi a, pawl khat sia pi sawm le pi nga sau hi.

¹¹Tuate ii tungah a pha cia tu a kidei za ki at sa suang pawl khat le cedar thingpim te taw kisa hi.

¹²Kumpi inn leitual, Biakinnpi leitual sungnung Biakinnpi tumna khaan sia ii pangte sia suang ngual thum simin cedar thingpim ngual khat veu kicial in kisa hi.



Huram ii Nasep

¹³Solomon in, taungo taw nasep a thiam Tyre khua ah a teang, khutthiamna a nei Huram a kici pasal khat sam hi.

¹⁴A nungta nawn ngawl a pa sia Tyre pan hi a, ama zongh taungo taw nasep a thiam khat ahi hi; a nu sia Naphtali pan ahi hi. Huram sia a ciim, khutthiam nasep a seam ngei sa ahi hi. Ama in taungo taw na seam tu in Solomon Kumpipa ii samna saang hi.

Taungo Khuam Ngual Niite

(2Khang tangthu 3.15-17)

¹⁵Huram in taungo khuam nii sung hi, khat simin pi 27 sau a, a kiimkot sia pi 18 khawng pha hi, tuate sia biakinnpi inn tumna mun ah koi hi.

¹⁶Ama in khuampite ii tung khu nату in taungo pi 7 le lang a sau zongh vawt sii hi..

¹⁷Khuamte ii a dawn sia thikkhau kipheakte ii lim le

¹⁸taungo taw a kivawt talee nga ngual nii zongh sung hi.

¹⁹A tung a sitna sia unok kung bangin kivawt a, pi 6 sau a,

²⁰tuate sia a pumin a kivawt a sitna thikkhau hual ii tungsia ah kikoi hi. Talee nga pum zanii ii lim sia ngual nii in a sitna kiim ah kivawt hi.

²¹Huram in hi taungo khuamte nii sia Biakinn tumna mai ah koi hi; thangsang a sia Jachin ci a,saksang a sia Boaz kici hi. Unok bangin a kivawt taungo sitna te sia khuamte ii dawn ah koi hi.

²²Unok paak taw kibang taungo khuamlu zepnate sia tua khuam tungah kinga hi. Tuabangin taungo khuamte tungah nasepna kiman hi.

Taungo Tuikuang

(2Khang tangthu 4.2-5)

²³Huram in tuikholna sia a beam in vawt hi, pi 7 le lang thuk a, a kuang mai sia pi 15 ahi hi, a kiimkot sia pi 45 ahi hi.

²⁴Tuikholna ii a ngong kiil kiim ah tau uum nga lim ngual nii in a tui kholna taw cipin taungo taw kisung hi.



²⁵Tuikholna sia pua sang a ngaa khuita lim sawm le nii te ii nungzaang ah tosak hi, thum sim in mun khat sang tek ngaa hi.

²⁶Tuikholna ii saanna sia letmat 3 saa hi. A ngong sia hai ii ngong taw kibang a, a pua sangah paal in, unok paak bangin vawt hi. Tuikholna in gallon 10,000 bang taa hi.

Taungo leangte

²⁷Huram in taungo taw leang sawm vawt hi; khat simin pi 6 sau in, pi 6 zai a, pi 4 le a lang saang hi.

²⁸Tuate sia taungo pheak kingh li nei taw kivawt a, a kiim pan a mung taw ki uum in,

²⁹tawpi lim, khuita lim le cherubim lim taw tua taupheakte kizeam hi; a uumna mungte a tungnung sia le a nuai nung sia ah tawpi le khuita lim om a, a kimeak limte kivawt hi.

³⁰Leang khat ii sim in tau mui li veu kithua in, tau zawl tungah kibul hi. A leang ii kingh li simin kuangpui nanna tau taw a kivawt khuamno om a, tuate sia a kimeak limte taw kizeam hi.

³¹Kuangpui ngak natu a tungah a beam valh pui khat om hi. Ama in leang tungah letmat 18 dok to a, leang sungah letmat 7 tum suk hi. Ama ii kiim ah thing ngelh kivawt hi.

³²A leangmuite sia letmat 25 saang hi, amate sia taungo pheakte ii nuai sia ah om a, a leang zawl te a leang inn taw sa khat in kivawt hi.

³³Leangmuite sia ngalleang te ii mui taw kibang hi; a mui zawl, a mui kiil le a muipei letna khuamno te le a mui zawl tumna bu sia taungo vive ahi hi.

³⁴Leang khat ii sim ii a kingh a nuai ah nanna te zongh leang taw sa khat ma ahi hi.

³⁵Letmat 9 a beak taungo kual khat leang tungah om hi; tua ii nanna le taungo daalpheakte sia leang taw sa khat ahi hi.



³⁶A nanna le taungo daalpheapkte sia cherubim, tawpите le palm thingkung te ii lim taw kizeamin, lim a kimeakte taw a awngna theampo ah kizeam hi.

³⁷Tua hi a hi bangin leangte kivawt hi; amate khat le khat kibang hi, a phak cia le a pianzia kibang kim hi.

³⁸Huram in leang khat atu khat veu kuangpui sawm vawt hi. Kuangpuite khat sim ii a kuangmai pi 6 veu zai hi, tuaciang kuang simin gallon 200 taa hi.

³⁹Ama in leang nga sia Biakinnpi ii thang sangah koi a, a om lai nga teng siasak sangah koi hi; tuikholna sia nisuana thang sang kingh ah koi hi.

Biakinnpi Zepna Vanhte ii Tepteena lai

(2Khang tangthu 4.11; 5.1)

⁴⁰⁻⁴⁵Huram in beal, leiluana kawpheapkte, kuangte zongh vawt hi. Ama in Solomon Kumpipa atu in Topa ii Biakinnpi atu a nasep man hi. Hi sia ama ii vawt teng ahi hi; Khuam niite Khuamdawn ah kuangno taw a kibang khuam lu sitna nii, Khumte ii lu ah a kipheap thikkhau lim Khuam lu zepna kiimkot ah 100 veu ngual nii in a kisuai, talee nga lim 400 Leang sawmte, Kuangpui sawmte Tuikholna Tuikholna a pua khuita sawm le nii te ii lim Bealte, kawpiate le kuangte Biakinn vanh zak tu Huram in Solomon Kumpipa atu a vawtte sia a kinawt taungo taw kivawt hi.

⁴⁶Kumpipa in tuate theampo sia Jordan Kuam Sukkoth le Zarethan kilaklaw ah thikseakna munah vawtsak hi.

⁴⁷Solomon in hi taungo vanh te khai a tee bua hi, banghangziam ci le amate sia tam lei ahikom a ngitna kituat ngei ngawl hi.

⁴⁸Solomon in Biakinnpi atu kham vanhte vawtsak hi: biaknatau, Pathian piak tu anluum sabuai,

⁴⁹A Thiangthobel Mun ii mai a meivak khuam sawmte, nga siasak sangah, nga sia thang sangah; paakte, meiinnte le taidepte;

⁵⁰haite, meinn mii na, kuangte, meikam kenna beal; A Thiangthobel Mun le Biakinnpi kongkhate ii pattaate. Hi nate theampo sia kham taw kivawt hi.



⁵¹Kumpipa Solomon in Biakinpi tungtaang ah nasep tu teng a man ciangin a pa David ii Topa tungah a aap sa teng sia, ngun kham le a dang nate sia vanh senna khaan sungah koi hi.

Kumpite Khatna 8

Thukham Thingkuang sia Biakinn ah Kipaipui

(2Khang tangthu 5.2- 6.2)

¹Tua zawkciang Kumpipa Solomon in Israel ngam sung nam le, be le phungte ii lampuite sia David ii khuapi Zion panin Jerusalem Biakinpi ah Thukham Thingkuang sia tua tu in ama kungah sam hi.

²Amate in Ethanim tha, tha sali tha Buk Poai hunin hong kikhawmtua uh hi.

³A lampuite theampo hong kikaikhop zawkciang, thiampite in Thukham Thingkuang hong laamto uh a,

⁴tuaciang Biakinpi ah hong pua uh hi. Levi te le thiampite in Topa ii ompuina Puanbuk le tua taw kisai vanhte zongh Biakinpi ah paipui uh hi.

⁵Kumpipa Solomon le Israel mite theampo Thukham Thingkuang ii mai ah hong kikhawmtua uh a, khui le tuu tam mama sangaw biakpiakna in ngo uh hi — tam lei ahikom kisim zo ngawl hi.

⁶Tua zawkciang thiampite in Thukham Thingkuang sia Biakinpi sungah hong tum pui uh a, cherubim te ii nuai A Thiangthobel Mun ah koi uh hi.

⁷A tha uh a kizaakte in thingkuang le a puakna molte siin uh hi.

⁸A Thiangthobel Mun ii mai san tak ah a dingte bek in tua molte ii mongte mu thei a, tua ngawl po in koima pan kimu thei ngawl hi. (Molpumte sia tu ni in tua munah om lai hi.)

⁹Thukham Thingkuang sungah, Egypt ngam panin Israel mihingte hong pusua lai in Sinai mual tungah Topa in amate taw kiciamna a vawt lai in suangpheak nii Moses ii koite ngawl, na dang bangma om ngawl hi.

¹⁰Thiampite Biakinpi hong nusiata tu ciang thakhat thu in tua Biakinpi sia meeikaai taw kidim in,



¹¹Topa ii ompuina hu in khuataang ziazua taw hong kidim a, amate in a tavuante uh seam tu in pai kik thei nawn ngawl hi.

¹²Tua zawkciang Solomon in thungen hi: “Nang, Topa in van ah ni na koi hi, hi napi meeikaai sung le khuazing sungah om tu na teal hi.

¹³Tu in a tuanngen biakinn khat kong saksak zo hi, a tawntungin na ten natu mun ahi hi.”

Solomon ii Mihonpi tungah A Pauna

(2Khang tangthu 6.3-11)

¹⁴Mipite tua munah a din uh ciangin Kumpipa Solomon in amate maingat tu in kihei a, tuaciang ama in mipite atu in Pathian ii thupha ngetsak hi.

¹⁵Ama in, “Israel te ii Topa Pathian pok vun! Ama in ka pa David tungah a kamciam kholet a,

¹⁶‘Egypt ngam panin ka mite ka paipui hun pan kipan, Israel ngam bup sungah kei hong kibiak natu biakinnpisak natu khuapi dang ka teal bua hi. Ahihang, ka mihingte uk tu in David nang kong teal hi,’ ” ci hi.

¹⁷Tuaciang Solomon in a kampau zom a, “Ka pa David in Israel te iiTopa Pathian a biak natu biakinnpi khatsak tu ngeal hi,

¹⁸ahihangTopa in ama munah, ‘Kei atu biakinnpi nasak nop sia maan ni hi,

¹⁹ahihang nang in na sa ngei buatu hi. Na tapa, nangma ii tapa in ka biakinn hong saksak tu hi,’

²⁰“Tu in Topa in a kamciam kholet hi. Israel kumpi tu in ka pa za ka laih hi, tuaciang Israel te ii Topa Pathian atu in Biakinnpi kasaksak hi.

²¹Egypt ngam panin ih taangpupite a pusua pui lai inTopa in ih pute taw kiciamna thukham suangpheak nii a om Thukham Thingkuang sia koi natu mun zongh ka vawtsak hi,” ci hi.

Solomon ii Thungetna

(2Khang tangthu 6.12-42)

²²Tuaciang mipite ii omna biaknatau mai ah Solomon dingin, a khut laamin,



²³thu ngen hi, “Israel ii Topa Pathian awng, tungsang vantung ah ahizong, nuaisang lei tungah ahizong nang taw a kibang kuama om ngawl hi! Na mite taw na kiciamna na kholet a, tuaciang amate in thin theampo taw na thu hong nit ciangin na itna amate tungah na lak hi.

²⁴Ka pa David tungah na kamciamte zongh na kholet hi; tu ni in na kammalte theampo tangtung zo hi.

²⁵Tuaciang tu in Israel ii Topa Pathian awng, ka pa tungah kamciam na vawt dang khat sia, ama ii na thu hong nit bangin amate in kidopna taw hong ni po le, na suan na paalte sung pan khat in Israel te ii kumpi in maang tawntung tu hi, na ci sia zongh nong tangtunsak natu thu kong ngen hi.

²⁶Tua ahikom tu in Israel ii Pathian awng, na naseam pa ka pa David tungah kamciam na piakte theampo zongh tangtungsak in.

²⁷“Ahihang, Aw Pathian awng, nang leitung ah teang thei takpi tu ni ziam? Vantung theampo zongh nang hong huam tu in lian tham ngawl hi, tua ahikom hi Biakinmpi keisak sia lian khom thong tu ziam?

²⁸Topa ka Pathian awng, kei sia na naseam pa khi hi. Ka thungetna hong za tan a, tu ni a kong ngetnate hong pia tan.

²⁹Hi Biakinmpi sia nang hong kibiak natu in na teal sa hi mun sia a sun a zan in na cing in. Hi Biakinmpi sang nga in thu kong nget ciangin hong za tan.

³⁰Kei ii thungetna le na mite ii thungetna te hi mun maingat in hong nget ciang hong za tan. Vantung na inn sung panin hong za tan a, hong maisak tan.

³¹“Mihing khat sia midang khat tungah khial hi ci in a kimawsiat ciangin, a khial ngawl na a kilangh natu in kiciamna nei tu in hi sung Biakinmpi biaknatau ah a kipaipui ciang,

³²Aw Topa, vantung panin na ngai in a, na naseamte tungah thu hong khen tan. A maw sia tungah a kiphu bangin thukhenna na vawt in a, daan na pia in, a maw ngawlte na tha in.



³³“Na mihing Israel te sia nangma tungah hong khial hu in a ngalte in zo a, tuaciang amate in nang sang hong heak in, kiniamkhiakin maw maisakna hong ngen le,

³⁴vantung panin na ngai in. Na mite ii khialnate maisak in a, tuaciang a taangpupite tungah na piak sa leitangh ah na ciapui kik in.

³⁵Na mite in a khial uh hu in nguatuite na khaam le, tuaciang amate kisiik in hi Biakinnpi sung nga in kiniamkhiakin thu hong ngen le,

³⁶vantung panin na ngai in. Kumpipate le Israel mite ii mawna na maisak in a, a maan a ngamtat natu amate na hil in. Tuaciang Aw Topa, na mite ii a tawntung a neisa tu in na piak hi na leitangh tungah nguatui na puak suk in.

³⁷“Ngam sungah kialpi tungin, ahibuale pulpi tungin, ahibuale ankungte vuisa in hallum in, ahibuale khaumaw hon in a lalsak ciang, tua ahibuale na mite a ngalte in a sim ciangin, tua ahibualaile amate sungah natna satna a om ciang,

³⁸amate ii thungetna na ngai in. Israel na mite khat pawpo in thin tak taw heena lakin, hi Biakinnpi sangah a khut uh zan in thu hong ngen le,

³⁹ama te ii thungetna na za in. Vantung na inn sung panin amate na ngai in a, na maisak in, na hu in. Nangma bekma in mihingte ii thinsung khuangaisutna te he ni hi. Misim in ama taw a kiphu bangin a tungah na seam in,

⁴⁰tuasia ciangin a taangpupite tungah na piak sa leitangh tungah amate in teangin na thu hong ni tu hi.

⁴¹⁻⁴²“A khuala a om ngam dang mi khat in na minthanna za in, na mite atu na lianpi na sepna za in, hi Biakinn ah hong pai in thu hong ngen ahile,

⁴³a thungetna na ngai in. Vantung na teenna pan na za in a, vawtsak tu in hong nget teng na vawtsak in, tua hile leitung mite theampo te in Israel na mite ii hong heak bangin hong he tu uh a, na thu hong ni tu uh hi. Tuasia ciang amate in hi Biakinnpi nang atu kasak sia nang biak natu hi ta a, ci in he tu uh hi.



⁴⁴“A ngalte uh taw kido tu in kuankhia in na sawl ciang na mite in nang tungah thu hong ngen a, koi sung po ah a om zong na teal sa hi khuapi le hi Biakinnpi nang atu kasak sia sang hong nga in nang tungah thu hong ngen a ahile,

⁴⁵amate ii thungetna na ngai in vantung panin na za in a, zawna na pia in.

⁴⁶“Na mite in khialna vawtin hong langpan ciang — khialna nei ngawl khat zongh om ngawl ahi ciang — na thin uukin, a ngalte in zosak in ngamdang ah thongtaak tu in a paipui ciang bangza po in tua ngam sia a khuala ta zong,

⁴⁷na mite ii thungetna ngai in. Tua ngam pan amate kisik kikin na tungah a phat ngawl na le a mawna pualaak in thu hong ngen le, amate thungetna na ngai in, Aw kaTopa awng.

⁴⁸Tua ngam ah amate in thin tak le a maan takin kisiik in, ka taangpupite tungah na piak sa ahi, hi leitangh, na teal sa hi khuapi hi Biakinnpi nang atu kasak sia maingat in thu hong ngen le,

⁴⁹tuasia ciang amate ii thungetna na ngai in. Vantung na inn sung panin amate thungetna na ngai in a, tuaciang amate tungah hesuakna na nei in.

⁵⁰Amate ii mawna le tualngal a hong dinnate na maisak in a, tuaciang a ngalte in amate sia hesuakna na neisak in.

⁵¹Amate sia na mihingte hi a, meiphual lingh mama taw a kibang Egypt ngam pan na pusuaksak sa te hi.

⁵²“Vaanglianpipa Topa, na mihing Israel te le a kumpite tungah maipha na pia tawntung in, tuaciang amate ii thungetna na za in a, amate in hu ngen in hong sap ciangin a thungetna uh na za in.

⁵³Ka taangpupite uh Egypt pan na laakkhiat lai in Moses tungah na son sa bangma in mihing namte sung pan amate sia nangma mi tu in na teal sa ahi hi,” ci hi.

A khak bel Thungetna

⁵⁴Thungetna teng Topa tungah a vawt zawkciang khut laamin khupdin a, a om na biaknatau panin Solomon hong dingto hi.



⁵⁵Ama in tua munah a kikhawm mite theampo tungah Pathian ii thupha a piak natu awnging tak taw ngen hi. Ama in,

⁵⁶“Topa pok vun ama in a mite munah ngal kilemna kong pia tu hi ci in a ci bangin ngal kilemna hong pia hi. A naseam pa Moses tungtawn in kamciam ngo takin a piakte kho takin len hi.

⁵⁷Topa ih Pathian sia ih taangpupite taw a omkhop bangin ei taw zong hong omkhawm taken; hong nusia ngei heak hen a, hong taisan heak hen;

⁵⁸ama dei bangin ih nungtak thei natu le ih taangpupite tungah a piak thukham le thupiakna te ih kepcing thei natu in, ama in ei ama ii thu a ni tu in hong vawt taken.

⁵⁹Topa ih Pathian in ama tungah ngetna le thuumna ka vawtte a tawntungin hong teptesak taken. Israel mite le a kumpipate tungah nisimin a kitaangsap uh bangin ama in hong hesuak tawntung taken.

⁶⁰Tuaciang leitung minamte theampo in Topa ama bek Pathian hi ci in he tu a — a dang Pathian om ngawl hi ci in he tu uh hi.

⁶¹No, ama ii mite in Topa ih Pathian tungah thumaan tawntung vun a, a thukham le a thupiakte tu ni a na nit uh bangin ni tawntung tavun.”

Biakinn Aapna
(2Khang tangthu 7.4-10)

⁶²Tua zawkciang Kumpipa Solomon le mipite in Topa tungah sangaw biakpiakna vawt uh hi.

⁶³Ama in khui 22,000 le tuu 120,000 sia kipawlkhop biakpiakna in pia hi. Tuabangin kumpipa le a mite in Biakinnpi aapna vawt uh hi.

⁶⁴Tua ni ma in ama in Biakinnpi mai leitual zanglai sia, thiansuana vawt hi, tua munah ama in sangaw biakpiakna haltumna te vawtin, antang biakpiakna le nganno thau te taw kipawlkhop biakpiakna vawt hi. Ama in hi bangin a vawt sia banghangziam cile taungo biaknatau sia hi za ta biakpiakna atu in no leih hi.



⁶⁵Tua mun Biakinnpi ah Solomon le mipite theampo in Buk Poai sia ni sali sung khaam uh hi. Tua munah Hamath Mualciangh tek pan le thangsang Egypt ngamngi pan hong pai a tam mama mihonpi khat kikhawmtua uh hi.

⁶⁶A ni liat ni ciang Solomon in mipite ciasak hi. Amate in ama pokin a lung uh dam hi, banghangziam cile Topa in a naseam pa David le a mi Israel te thuphate a piak hu ahi hi.

Kumpite Khatna 9

Pathian sia Solomon tungah Kilaak kik

(2Khang tangthu 7.11-22)

¹Solomon Kumpipa in Biakinnpi le kumpi inn le a dang asak nop teng asak zawkciang,

²Gibeon ah a kilaak bangin Topa sia ama ii tungah kilaak kik hi.

³Topa in ama munah, “Na thungetna hong za khi hi. A tawntungin kei hong kibiak natu nasak, hi Biakinnpi thiansua khi hi. Ka encik tu a ka keamcing tawntung tu hi.

⁴Thumaanna le phinciingna taw keima na, na pa David ii sep bangin seamin, tuaciang ka thukham na ni a, kong thupiak theampo na vawt le,

⁵na pa David tungah kamciam ka piak, Israel sia ama ii suan le paalte in uk tawntung tu hi, ka ci sia ka kholet hi.

⁶Ahihang nangma na hi zong, na suan na paalte ahizong in kei nong zui uh na kheal uh a, ka thukhamte le ka thupiaknate ni ngawlin pathian dangte na bia uh le,

⁷tuasia ciang ka mihing Israel te sia ka piak sa ngam panin ka heam tu hi. Kei hong kibiak natu in ka thiansua hi Biakinnpi zongh ka nusia tu hi. Mun theampo pan mihingte in Israel sia nunau tu a, simmaw tu hi.

⁸Hi Biakinnpi sia zanciim in kisengneng tu a, a kuama po kantan in a paite liinglawng tu uh a lamdang sa tu uh hi. ‘Banghangin Topa in hi ngam le hi Biakinnpi tungah hi bangin ngamta ziam?’ ci in kidongh tu uh hi.



⁹Mihingte in zokik tu a, ‘Banghangziam cile Egypt ngam panin a taangpupite a pusua Pathian sia nusia uh hi. Pathian dangte tungah kinga a, bia uh ahikom Topain hi tuasiatna amate tungah tungsak hi,’ ” ci tu hi.

Hiram taw Solomon ii Thukimna

(2Khang tangthu 8.1-2)

¹⁰Biakinnpi le ama teenna kumpi inn te asak natu kum kul sung hai hi.

¹¹Tyre a Hiram in hi na sepna atu a kisamh cedar thing ahizong, taakthing ahizong, kham ahizong, sik siat hi. Innsak a kiman zawkciang Solomon in Hiram sia Galilee ngamkhen sungah khuapino kul pia hi.

¹²Hiram in pai in a vil ciangin tua khuapinote dei ngawl hi.

¹³Tua ahikom ama in Solomon munah, “Tua ahile, suapui awng, kei nong piak khuapino teng hi teng ahi ziam!” ci hi. Hi sia hu in tua sung ngam sia Cabul kici hi.

¹⁴Hiram in Solomon kham toai tul le ton nga dektak pia hi.

Solomon ii Zawthuana Thudangte

(2Khang tangthu 8.3-18)

¹⁵Kumpipa Solomon in Biakinnpisak natu, kumpi innsak natu le khuapi ii niswana sang leite vuh tu, khuapi luphung ciang tu in, thaman piak ngawl kulite zangh hi. Amate in khuapite ahi Hazor, Megiddo, le Gezer tesak natu tuate ma zangh hi.

¹⁶(Egypt kumpipa in Gezer sim in suan a, a teang khua mite thatin, khuapi sia haltum hi. Tua zawkciang tua khuapi sia a tanu le Solomon hong kiten uh ciang mo thaakna letsong in pia hi.

¹⁷Tuaciang Solomon in sa kik hi.) Thaman piak ngawl a kulite ma zangh in Solomon in Beth Horon Nuainung sa kik hi.

¹⁸Baalath, Judah dui sungah a om Tamar,

¹⁹a anneak a vanh zakte kholna khuapite, a siphute le a ngalleangte kholna khuapite, Jerusalem ah asak nop babang inn dangte le Lebanon le a uk sung mun dangte ah tua kulite zangh hi.



²⁰⁻²¹Thaman piak ngawl kuli seam tu in Solomon in Israel mite ii ngam a suan lai in a thalup mong Canaan mite ii suan le paalte zangh uh hi. Hite sungah Amorte, Hitte, Perizzite, Hivte le Jebuste kihel uh a, tuate ii suan le paalte sia tu ni dong sila ahi uh hi.

²²Solomon in Israel te sila in a khoai bua hi; amate in a ngalkap, ngalkap ulian, ngalkap uk le ngalleang ukte, le siphu ngalkap seamsak uh hi.

²³Solomon ii a tuatuam innsakna ngealna sungah ulian 550 in thaman piak ngawl kulite uk uh hi.

²⁴Solomon in a zi Egypt kumpipa tanu, ama atu asaksak kumpi inn ah David khuapi pan a khiin zawkciang, khuapi ii niswana sang lei teng vuhsak hi.

²⁵Kum khat sung thumvei veu Solomon in meihal biakpiakna le kipawlkhop biakpiakna Topa atu kivawt biaknatau tungah pia hi. Ama in Topa tungah ngim namtui halna zongh pia hi. Tuabangin Biakinnpisak kiman hi.

²⁶Aqaba Tuidok vaal ah a om Elath taw kinai, Edom leitangh tungah a om Eziongeber ah Solomon in teambaw hon khat vawt hi.

²⁷Kumpipa Hiram in ama ii teambaw naseam a thiam sa pawlkhat Solomon mihingte taw seamkhawm tu in puak hi.

²⁸Amate in Ophir ngam ah teambaw taw pai in kham ton sawm le ton luk bang Solomon kungah cia pui hi.

Kumpite Khatna 10

Sheba Kumpinu ii Hawna

(2Khang tangthu 9.1-12)

¹Sheba kumpinu in Solomon ii minthanna za a, tuaciang ama in thudokna haksa pawlkhat taw ze et tu in Jerusalem ah haw hi.

²Ama in a cingte honpui khat keng a, hel namtuite, suangmanpha le kham tam ma a pua kalaoh te hong paipui hi. Ama le Solomon a kisik ciangin a ngaisut thei za taw thu doknate dongh hi.

³Solomon in zo siat hi; ama a tu zo mawk tu bangma om ngawl hi.

⁴Sheba kumpinu in Solomon ii ciimziate za a, kumpi inn asakte mu hi.



⁵Kumpinu in kumpipa sabuai ah a kilui ante mu a, a uliante ii teenna innte, kumpi innsung naseamte ii nasep hawm zia le a puansilh uh te, poaipi khaam ciang naseamte ii ama an le tui a piak dan te pan kipan sangaw biakpiakna Biakinnpi sungah a kivawtte mu hi. Ama in hu sang la liangin lamdang sa hi.

⁶Ama in Kumpipa Solomon munah, “Ka ngam panin na ciimna huvau le nang thu kong zaakte maan siat hi!

⁷Ahihang hong pai a keima tatak ma in ka mu mateng ka um thei bua hi. Ahihang a lang zongh za ngawl lai hi nginge khi hi; na ciimna le na hauna te kei tungah hong kiko za sangin nasia zaw lai hi.

⁸Na zite bangza in hampha uh ziam! Na ciimna kammalte hong zaak tawntung thei natu na kung a om, na naseamte zongh kaampha mama hi!

⁹Topa na Pathian pok tawng! Ama in nang Israel kumpipa in hong vawt ciang nang tungah ama bangza in lungkim ziam ci in hong lak hi. Ama in Israel hong itna a tawntung atu ahi hu in, ama in nang sia thukham le thutang khenna na kipsak thei natu in, amate kumpi tu in hong koi hi,” ci hi.

¹⁰Ama in Solomon kumpipa sia letsong hong paipui teng pia hi, kham ton nga dektak, hel namtuite le suangmanpha tam mama pia hi. Tua hel namtuite sia vanh a saan ngei theampo sung pan a nasia bel ahi hi.

¹¹(Hiram ii teambaw Ophir panin kham hong siapui te in juniper thing le suangmanpha zongh hong siapui hi.

¹²Solomon in tua thingte sia Biakinnpi le kumpi inn te ah dal in vawt a, tuaciang tum thei lamsang tengtong le liamlo vawtna in nei hi. Tuате sia Israel ngam sungah a ki siapui juniper thingte hi a, a phabel hi; hibangte bangma hunin kimu kik ngei nawn ngawl hi.)

¹³Kumpipa Solomon in Kumpinu Sheba sia kipiak ngei letsongte vaalin a nget theampo pia hi. Tua zawkciang ama le a lalangte sia Sheba ngam ah cia uh hi.

Solomon Kumpipa ii Hauna
(2Khang tangthu 9.13-29)



¹⁴Kum simin Solomon Kumpipa in kham ton kul le ton nga vaal nga hi,

¹⁵tua tungsia ah sumvawtte ii shia piakte, sumzuak sumleina tung pan a meet, le Arab kumpi tuatuamte ii piak shia, Israel ngamkhen ukpipate ii piak shia te saang hi.

¹⁶Solomon in lum a lian zanii vawtsak a, kham pound sawm le pound nga taw zeamsak hi.

¹⁷Ama in lum a no zaw zathum zongh vawtsak a, kham pound li dektak taw veu zeamsak hi. Ama in hi lumte sia Lebanon Thingtang Khaan ah koi hi.

¹⁸Ama in kumpipa tokhum lian khat zongh vawtsak hi. Tua tokhum khen khat sia saiha taw tuam a, a taanglai mun dang teng kham phabel taw tuam hi.

¹⁹⁻²⁰Kumpipa tokhum in a tona thet to natu keallei dawl luk nei hi, keallei dawl khat ii mongsim in tawpi lim khat veu kivawt a, tawpi lim sawm le nii om hi. Kumpi tokhum ii nung sangah khuital lu ii lim om a, a khutngakna sia hui ah tawpi lim khat veve kivawt hi. Kumpi ngam koima ah hi bang kumpi tokhum om ngei ngawl hi.

²¹Solomon ii dawnna haite kham taw kivawt hi, tuaciang Lebanon Thingtang Khaanpi sung a, ankuang ankeau theampo sia kham tatak taw kivawt hi. Solomon hun lai in ngun sia na manpha in kingaisun ngawl ahikom ngun peuma kihel ngawl hi.

²²Ama in tuipei sung pai teambaw hon khat nei a, Hiram ii teambaw te taw kithawlsak hi. Kum thum simin tua teambawte hong heak kik uh a, kham, ngun, saiha, zawng le mei nei ngawl zawng puite hong ciapui hi.

²³Solomon Kumpipa sia kumpi dang khat pawpo sangin hau zawin ciim zaw hi, tuaciang

²⁴leitung bup in Pathian ii ama a piak ciimna kammalte ngai tu in hong pai nuam uh hi.



²⁵Hong pai peuma in ama letsong veu pia uh a, ngun taw a kivawt na, kham, puantualte, ngalhiam, hel namtuite, siphu, laate ahi hi. Kum khat zawk kum khat tuabangin kipia hi.

²⁶Solomon in ngalleang tul le zali, ngalsim siphu tulsawm le tulnii nei hi. Tuate pawlkhat Jerusalem ah koi a, a dang teng khuapi dang ah koi kawkoai hi.

²⁷Ama ii uk hun sung ngun sia Jerusalem khua sungah suang za in tam a, cedar sia sycamore thing thawthong za in Judah mualpeang ah tam hi.

²⁸Kumpipa ii taang mite in Musri le Cilicia pan siphute ngamdang a puak tute tungah thu nei uh hi,

²⁹tuaciang ngalleangte sia Egypt pan ngamdang a puak tu zongh sai uh hi. Amate in Hit mite ii kumpipate le Syria kumpipate, siphu le ngalleangte sik uh hi, ngalleang khat nguntang 600 taw zuak uh a, siphu khat nguntang 150 taw zuak uh hi.

Kumpite Khatna 11

Solomon in Pathian Nungngat

¹Solomon in ngamdang numeite tam ma dei hi. Egypt kumpipa ii tanu ngawl zongh a dang a tenpuite sia Hit, Moab, Ammon, Edom le Sidon pan numeite ahi hi.

²Topa in Israel te sia hi mite taw a kiten ngawl natu thupia hi, banghangziam cile tuabang a tenpui uh ciang Israel mite in Topa tungah thumaanna pia ngawlin pathian dang tungah panpuina a piak tu hang ahi hi.

³Solomon in kumpipate tanute zasali tenpui a, zino zathum nei hi. Amate in Solomon sia Pathian kung panin kihei khiasak hi,

⁴tuaciang a khanhaam hun hong thet ciangin amate in ama sia ngamdangte pathiante biasak hi. Ama in Topa a Pathian tungah thumaan ngawl a, a pa David ii thumaan bangza in maan ngawl hi.

⁵Ama in Sidonte ii pathian nu Astarte bia hi, tuaciang Ammonte ii a thasiat huai Molech bia hi.



⁶A pa David bang hi ngawlin ama in Topa tungah khialin a tungah thumaan ngawl hi.

⁷Jerusalem niswana sang mual tungah Chemosh biak natu mun khat vawt hi, tuasia Moabte ii a thasiat huai pathian ahi hi, tuaciang Ammon te ii a thasiat huai pathian Molech biakna tu mun vawt hi.

⁸A ngamdang zite ii biakpiak natu mun, ngim namtui a hal natu le sangaw biakpiakna amate pathian tek tungah a nei thei natu in biakna munte vawtsak hi.

⁹⁻¹⁰Topa Israel te ii Pathian in nii vei to Solomon tungah kilaak in, ngamdangte pathian a biak ngawl natu thu pia hi kale Solomon in Topa thu ni ngawlin kihei khia hi. Tua ahikom Topa sia Solomon tungah thin uuk a,

¹¹ama tungah, “Nang in kei taw na kiciamna palsat kaltang a, ka thupiak hong ni ngawl na hikom na kumpi ngam sia kong laaksak tu a, na khut nuai uliante khat kong piaksak tu hi, ci in kiciamna kong pia hi.

¹²Ahikang na pa David ii hu in hi sia na nuntak sungin ka vawt buatu a, na tapa ii uk hun sungin piang tu hi.

¹³Tuaciang kumpi ngambup ka la buatu hi; tua taangin ama sia ka naseam pa David hu in minam khat ka nusiak tu a, tuaciang Jerusalem khuapi sia keima atu ka teal sa ahikom tua khuapi hu in tuabang ka vawt tu hi,” ci hi.

Solomon ii Ngalte

¹⁴Tua ahikom Topa in Edom kumpi baangkua pan Hadad sia Solomon langpansak hi.

¹⁵⁻¹⁶Hi hun ma pek in, David in Edom a zaw lai in, a ngalkap hon ukpipa Joab tua munah a thite ii luang phum tu in pai hi. Ama le a mite Edom ah tha luk taam uh hi, tuaciang tua hun sungin Edom mite pa a minpiang thatlum siat hi.

¹⁷Hadad le a pa ii naseam Edom mi pawl khat Egypt ngam ah suakta tu in a tai hi. (Tua hun lai in Hadad sia patangno khat hi pheang hi.)



¹⁸Amate in Midian nusia in Paran ah pai uh hi, tua munah mi pawlkhat in amate pawm hi. Tua zawkciang amate Egypt ngam ah pai uh a, kumpipa in Hadad sia leitangh pawlkhat le inn khat pia hi, tuaciang an zongh sik hi.

¹⁹Hadad in kumpipa ii ngualtamh vawtna nga a, kumpipa in a nuphal nu, Kumpinu Tahpenes ii suapuinu sia Hadad ii zi tu in pia hi.

²⁰Ama in Hadad taw tapa khat hing a, a min Genubath hi in, ama sia kumpinu in kumpi inn sungah khangsak a, kumpipa tapate taw teang khawmsak hi.

²¹David ii thina le ngalkap hon ukpi Joab ii thina thu Egypt ah Hadad in a zaak ciang Hadad in Kumpipa munah, “Ka ngam ah hong cia kiksak tan,” ci in ngen hi.

²²Kumpi pa in, “Banghang in maw? Kong piak tu khat po kong piak ngawl om ziam? Tua hu in cia kik nuam ni ziam?” ci hi. “Hong ciasak lel ka po in,” ci in Hadad kumpipa zokik hi. Tuaciang a ngam ah ama cia kik hi. Edom te ii kumpipa khat a hina taw ama sia Israel te atu a ngilo a khan sia ngal khat ahi hi.

²³Pathian in Eliada ii tapa Rezon zongh Solomon a langpan tu in vawt hi. Rezon sia a Topa Zobah Kumpipa Hadadezer kung pan tai a,

²⁴tuaciang ama sia kuama thukham khut nuai ah a om ngawl pawlkhat ii lampui seam hi. (Hisia David ii Hadadezer a zawthal zawk, a kipawl pui Syria te a thalup siat zawkciang ahi hi.) Rezon le a mite Damascus ah pai in tua munah teang uh hi, tua munah a mite in ama sia Syria Kumpipa suaksak uh hi.

²⁵Ama sia Solomon ii nuntak sung Israel te ii ngal ahi hi.

Jeroboam tungah Pathian ii Kamciam

²⁶Solomon Kumpipa a langpan mihing khat sia Jeroboam hi a, Ephraim ngam Zeredah pan Nabat ii tapa hi. A nu sia meingong khat hi a Zeruah hi.

²⁷Hisia tualngal thawna tangthu hi. Solomon sia Jerusalem ii niswana sangah lei dimh in, khuapi luphungte pua hi.



²⁸Jeroboam sia a kiveakseak khangno khat hi ci in Solomon in a mu ciang Manasseh le Ephraim ngamkhen sung a thaman piak ngawl kulite uk tu in koi hi.

²⁹Ni khat ni in Jeroboam sia Jerusalem pan khualhaw in a pai laitak kamsang pa Ahijah in Shiloh pan hong pai a, ngam taanzauna khat lampi tungah ama nguak taw kisi uh hi.

³⁰Ahijah in a puantual thak khat a silh sia suutin, khen sawm le khen nii sua in leamtham hi,

³¹tuaciang, Jeroboam munah, “Puanbek sawm la in, banghangziam cile Topa, Israel te ii Pathian in nang tungah hi bang hong ci hi, “Keima in Solomon khut sung pan kumpi ngam la tu khi hi, tuaciang nang sia minam sawm hong pia tu khi hi.

³²Ka naseam pa David ii hu le Israel ngambup sung pan ka khuapi tu ka teal sa Jerusalem hu in, Solomon in nam khat bek keam lai tu hi.

³³Hi bangin seam tu khi hi, banghangziam cile Solomon in kei hong nial in ngamdang te pathiante: Astarte, Sidonte pathian nu, Chemosh, Moab te ii pathian, Molech, Ammonte ii pathiante bia hi. Solomon in ka thu hong ni ngawl hi, ama in mawna vawt hi, a pa David ii a nit bangin ka thukhamte le ka thupiakte ni ngawl hi.

³⁴Ahihang Solomon tung pan kumpi ngam bup la ngawl tu khi hi, a nuntak lai teng thu neina ka pia tu hi. Ka teal sa le ka thukham le ka thupiakte hong ni ka naseam pa David ii hu in hi bangin vawt tu khi hi.

³⁵Solomon ii tapa tung pan kumpi ngam sia lakhia in minam sawmte nang hong pia tu khi hi,

³⁶ahihang Solomon ii tapa in ngam khat ka keamsak tu hi, banghangziam cile ka naseam pa David ii suan le paalte khat in kei hong kibiakpiakna mun le ka teal sa khuapi Jerusalem panin a uk tawntung natu deina hi.

³⁷Jeroboam awng, nang sia Israel kumpipa in hong vawt tu khi hi, tuaciang ngam na dei zaza tungah na uk tu hi.

³⁸ka thu a cing takin nong ni a, ka thukham bangin na nungta a, tuaciang ka thupiak David ii hong nit bangin nong ni ahile nang taw kong omkhawm tawntung tu hi. Israel te kumpipa in kong vawt tu a tuaciang na suan le na paalte in nang zawkciang, David tungah ka vawt bangma, ukna nei tawntung tu hi.

³⁹Solomon ii mawna hu in David ii suan le paalte daan ka pia tu hi, ahihang a tawntung hi ngawl tu hi,” ci hi.

⁴⁰Tua ahikom Solomon in Jeroboam thalup tu in hanciam ahihang Egypt ah kumpipa Shishak tu in tua munah Solomon ii thi dong om hi.

Solomon ii Thina
(2Khang tangthu 9.29-31)

⁴¹Na dang theampo Solomon ii sep le vawt te, a nuntak sung a sepna, a ciimnate theampo Solomon ii Tangthu sungah kikhum siat hi.

⁴²Ama in Jerusalem pan Israel bup tungah kum sawmli kumpipa seam hi.

⁴³Ama thi a, David ii khuapi sungah kiphum hi, tuaciang a tapa Rehoboam in ama ii kumpi za laih hi.

Kumpite Khatna 12

Saksang Minamte Tualngal tho
(2Khang tangthu 10.1-19)

¹Rehoboam sia Hechem ah pai a, tua munah Israelsaksang minamte in ama kumpi suaksak tu in kikhawm uh hi.

²Nebat ii tapa Jehoboam, Solomon Kumpipa khut sung pan suata tu in Egypt ngam ah a tai sia in hi thu a zaak ciang Egypt ngam panin ama cia kik hi.

³Saksang minamte in ama sam uh a, tua zawkciang amate theampo Rehoboam kungah pai in ama tungah,

⁴“Na pa Solomon in ko sia thuak hak takin hong uk a, vanhngit pi hong suan hi. Hi vanh ngitte nong zangsak a, nuntakna a ol zaw hiat tu in nong vawt le ko sia a thumaan na uk sung mite hi tu khu hi,” ci uh hi.



⁵“Ni thum zawkciang hong pai tavun, zona hong pia tu khi hi,” ci in ama in zo hi. Tua ahikom amate in nusia hi.

⁶Kumpipa Rehoboam in a pa Solomon tung a ngaisut pia uhaamte dongh hi. “Hi mite tungah bangbangin zo tu khi ziam?” ci in dongh hi.

⁷Amate in zo a, “Hi mite atu a pha in nasepsak nuam le amate ii hong ngetnate tungtaang ah hamphat pia in, tua hile amate in thumaan takin nang na hong sepsak tu hi,” ci hi.

⁸Ahihang ama in uhaamte ii ngaisut piakna sia melsia a, ama taw a khangkhawm ama ii ngaisut a pia tu in a koi khangmoite kungah pai hi.

⁹“Bangbangin ngamta leng ci in ngaisutna hong pia tu nu ziam? A vanhngit uh zangsak zaw tu in hong ngen mite tungah bangbangin ci tu khi ziam?” ci in a ma in dongh hi.

¹⁰Amate in zokik a, “Amate tungah hi bangin ci in: ‘Ka khutme no bel sia ka pa kawng sangin lian zaw hi!’

¹¹Amate tungah ci tan, ‘Ka pa in no vanhngit hong suan hi; keima in tua vanhngitte sangin a ngit zaw lai tu in ka vawt tu hi. Ama in khauhual kibul ciang taw hong saat hi; kei ka hi le siphu saatna taw hong vel tu khi hi,” ci in sawl hi.

¹²Ni thum zawkciang Jereboam le mipite theampo Kumpipa Rehoboam kungah ama ii sawl bangin hong heak kik uh hi.

¹³Kumpipa in uhaamte ii ngaisutna piakte melsia in mihingte tungah,

¹⁴khangmoite ii ngaisut piak bangin aw ham taw pau hi. Ama in, “Ka pa in vanhngit hong suan hi; tuate sangin a ngit zaw lai in ka vawt tu hi. Ama in khauhual kibul ciang taw hong saat hi; kei ka hile siphu velna taw kong vel tu hi,” ci hi.

¹⁵Shiloh panin kamsang Ahijah ii Nebat tapa Jeroboam tungah a son sa Topa ii deina a tangtun natu tuabangin pau ahi hi. Hisia hu in kumpipa in mipite bangma thudon ngawl hi.



¹⁶Mipite in kumpipa ii amate a thudon ngawl a mu ciangin amate au uh hi. “David le a innkuan te taak hen! Ei atu amate in bang hong vawtsak na ziam? Israel mite awng, cia tawng! Rehoboam in ama le ama kikeam taken!” ci uh hi. Tua ahikom Israel mite tualngal tho a,

¹⁷Rehoboam sia Judah ngam khen sungah a teangte kumpipa tu in nusia uh hi.

¹⁸Tua zawkciang Kumpipa Rehoboam in thaman piak ngawl kulite a uk Adoniram samin Israel te kungah paisak hi, ahihang amate in ama suang taw deanglum uh hi. Tuasia ciang Rehoboam sia a ngalleang tungah manlang takin kaato a, Jerusalem khua ah suakta hi.

¹⁹Tua hun pan kipan Israelsaksang kumpi ngamte sia David ii kinguizui kumpite tungah tualngal in om tan uh hi.

²⁰Israel a mipite in Jeroboam Egypt pan hong cia kik zo ci in a zaak uh ciang, amate in mipite kikhopna khat ah sam uh a, Israel te kumpipa in koi uh hi. Judah namte bek David ii suan le paalte tungah thumaan uh hi.

Shemaiah ii Kamsaanna

(2Khang tangthu 11.1-4)

²¹Rehoboam Jerusalem khua a thet ciangin ama in Judah nam le Benjamin namte sung pan ngalkap phabel 180,000 sam hi. Ama in ngalsim in kuan a,saksang Israel te tungah a ukna thuan kik sawm hi.

²²Ahihang Pathian in kamsang pa Shemaiah tungah,

²³Rehoboam le Judah minamte le Benjamin namte hi thu puakin sawl hi.

²⁴“Na suapui tiilteal ahi Israel mite sim heak vun. Na vekpi inn ah cia kik vun. Thu piang sa sia keima ii deina hi,” cisak hi. Amate in Topa ii thupiakna mangin inn ah cia kik uh hi.

Jeroboam Pathian kung pan kiheikhia

²⁵Israel te kumpipa Jeroboam in Ephraim mualtung ngam ah Shechem sia kulh taw uumin tua munah tawmvei teang hi. Tua zawkciang ama in tua mun nusia in Penuel ah kulhte vawt hi.



²⁶⁻²⁷Ama le ama hi bangin kici hi, “Tu a thu omzia bang hile, Jerusalem khua ah Topa atu sangaw biakpiakna tua mun Biakinnpi sungah vawt thong le, amate in a panpuina uh sia Judahte Kumpipa Rehoboam tungah khiin a; kei hong that tu hi.”

²⁸Khua a ngai susut zawkciang ama in kham khuita1 nii vawtin mite tungah, “Biakpiakna vawt tu Jerusalem ah na pai zawk uh ngei zo hi. Israel mite awng, hi sungah Egypt pan a hong pusua na pathiante uh om hi!” ci hi.

²⁹Ama in a kham khuitalte khat Bethel ah koi a, khat sia Dan ah koi hi.

³⁰Tuabangin mipite in biakpiakna pia tu in Bethel le Dan ah a pai hu in mawna vawt uh hi.

³¹Jeroboam in mualdawn ah biakpiakna munte vawtin, Levi minam ahi ngawlte innkuante sung panin thiampite zongh teal hi.

Bethel ah Biakpiakna Kipuavawk

³²Judah ngam a poaipite bangin Jeroboam in poaipi khat tha liat tha ni sawm le ni nga ni in phuan hi. Bethel biaknata1 tungah ama in a kham khuita1 a vawtte ah a seam tu in thiampite koi hi.

³³Tuaciang tha liatna ni sawm le ni nga ni, ama ii see siat ni in, ama Bethel ah pai in sangaw biakpiaknate tau tungah, Israel te atu ama ii vawt tawm poai khaamsak hi.

Kumpite Khatna 13

¹Topa ii sawlna taw Judah panin kamsang khat Bethel ah hong pai a, sangaw biakpiakna pia tu in Jeroboam biaknata1 mai ah hong din laitak hong theng hi.

²Topa ii sawlna zui in kamsangpa in biaknata1 sia haamsan hi: “Aw biaknata1, biaknata1 awng, hisia Topa ii pauna hi: David ii baangkua sungah Josiah a kici nausen khat hong piang tu hi. Ama in doai biate ii biaknata1 tungah sangaw biakpiakna a vawt thiampite nang tungah that tu a, mihing ngute nang tungah hal tu hi,” ci hi.



³Tuaciang kamsang pa in a ci lai na pan, “Hi biaknatau sia cimhtham tu a, a tungah vutte kithe zau tu hi. Tuasia ciang nang in kei sia Pathian in kei tungtawn a hong pau hi ci in na he tu hi,” ci hi.

⁴Kumpipa Jeroboam in hi thu a zaakciang ama kawkin thupia hi: “Pasal zia sia man vun!” Thakhat thu in kumpipa ii baan sia hong zaw a, dok kik thei nawn ngawl hi.

⁵Biaktau sia cimhtham a, Topa ii min taw kamsang pa ii sonkhol bangma in a tunga vutte hong kithezau hi.

⁶Kumpipa Jeroboam in kamsangpa munah, “Ka khut hong damsak natu in Topa na Pathian tungah nong hesuak na in thu hong ngetsak tan!” ci hi. Kamsang pa in Topa tungah thu a nget le kumpipa ii baan sia dam hi.

⁷Tuasia ciang kumpipa in, kamsangpa munah, “Kei taw cia khawm tawng, bang khat po ne tawng. Na sep sa te hu in thaman hong pia tu khi hi,” ci hi.

⁸Kamsangpa in, “Na hauna a lang keak nong pia hial tu ahizong nang taw ton in pai khawm ngawl tu khi hi, ahibuale zong nang taw bangma ne ngawl dawn ngawl tu khi hi,” ci hi.

⁹“Topa in bangma ne ngawl dawn ngawl tu in thu hong pia a, kong paina lampi tawnin cia kik ngawl tu in hong sawl hi,” ci hi.

¹⁰Tua ahikom ama in a paina lampi pan cia kik ngawlin lampi dang khat tawn hi.

Bethel pan Kamsang Huaipa

¹¹Tua hun laitakin Bethel ah kamsang pasal huai khat om hi. A tapate hong cia a Judah pan a kamsang khat ii ngamtatna teng le kumpipa Jeroboam tungah a pauna teng a pa munah son hi.

¹²“A paikhiat ciangin koisung tawn ziam?” ci in kamsang huaipa in dongh hi. Amate in lampi lak a,

¹³tuaciang ama in a laa kungh thuasak hi. Amate in a sawl bang a vawt zawk uh ciang ama laa tungah to in pai a,



¹⁴Judah panin kamsang pa ii nung pan a zui le oak thingkung nuai khat ah to hi. “Nang Judah pan a kamsangpa sia na hi ziam?” ci in dongh hi. “Hi khi hi,” ci in pasalpa in zo hi.

¹⁵Ama in, “Inn ah cia tawng, kei taw an nekhawm tawng,” ci hi.

¹⁶Ahihang Judah panin kamsangpa in zokik a, “Nang taw cia khawmin nang zindona kei saang thei ngawl tu khi hi,

¹⁷banghangziam cile Topa in bangma ka neak ka dawn ngawl natu thu hong pia a, ka paina lam tawn in cia kik ngawl natu thu hong pia hi,” ci hi.

¹⁸Tuasia ciang Bethel pan kamsang huai pa in ama munah, “Kei zongh nangma bangma kamsang khat khi hi, tuaciang Topa ii sawlna taw vantung lalang khat in nang sia inn ah ciapui in zindo in hong sawl hi,” ci hi. Ahihang kamsang huai pa sia leilot thu son ahi hi.

¹⁹Tua ahikom Judah pan kamsangpa sia kamsang huaipa taw ciakhawm in ama taw an ne khawm hi.

²⁰Sabuai ah an ne in a to laitak Topa ii kammal sia kamsang huai pa tungah hong pai hi,

²¹tuaciang ama in Judah panin kamsang pa tungah au hi, “Topa in ama ii thu ni ngawl ni hi, a thupiakte seam ngawl ni hi hong ci hi.

²²Tua taangin na heak kik a, an ne ngawl a hong sawlna munah tumin an na ne hi. Hi sia hangin nang sia thalup na thuak tu a, na luang sia na innkuan than ah kivui ngawl tu hi.”

²³Anneak zawkciang kamsang huai pa in Judah pan kamsang pa atu a laa kungh thua in,

²⁴ama in laa tungah to in paikhia hi. Lampi tungah tawpi khat taw kisi a, ama tawpi in thatlum hi. A luang sia lampi tungah lum a, a laa le tawpite sia a luang hui ah ding uh hi.



²⁵Mihing pawlkhat in tua mun hong kantan a, lampi tungah a luang mu uh hi, tawpi sia a kungah dingin a na om hi. Amate sia Bethel ah paisuak uh a, amate ii mu teng tua munah son hi.

²⁶Kamsang huai pa in a zaak ciang, ama in, “Tuasia Topa ii thupiakna a ni ngawl kamsang pa hi! Tua ahikom Topa in ama a lai tu le a that tu in tawpi paisak hi, Topa ama ii ka vawt tu a ci bangma in kivawt hi,” ci hi.

²⁷Tuasia zawkciang a tapate munah, “Ka laa kungah hong thuasak tavun,” ci hi. Amate in tuabangin seam uh a,

²⁸tuaciang ama laa tungah to in a pai le kamsang pa ii luang lampi ah lum in mu hi, laa le tawpi zongh a kungah dingkhawm nginge lai hi. Tawpi in mithi luang le ne ngawl a, laa zongh bangma law ngawl hi.

²⁹Ama ii hu in a khuangai tu le a phum tu in kamsang huai pa in a luang hong phaam a Bethel ah siapui hi.

³⁰Ama in ama ii innkuan thaah ah phum a, tuaciang ama le a tapate in, “Aw ka suapui, ka suapui awng!” ci in ama hu in tau uh hi.

³¹A phum zawk uh ciang, kamsangpa in a tapate munah, “Ka thi ciangin hi thaah sungah ama ii luanghui ah hong phum tavun.

³²Topa ii thupiakna taw Bethel ah biaknatau le Samaria khuapinote sungah a biakpiakna munte langpan in a pau teng sia tung takpi tu hi,” ci hi.

Jeroboam ii Lalna piangsak Mawna

³³Israel te Kumpipa Jeroboam in ama ii khansiatnate kheal tuan ngawl a, ama iisak biaknataute ah thiampi seam tu sia baangkua thawthongte pan mi teal lai hi. A uuk theampo thiampi in ama in koi hi.

³⁴Hi mawna in siatcipna le ama ii kinguizui kumpi ukna a bo cimitna suak hi.

Kumpite Khatna 14

Jeroboam ii Tapa Thina

¹Tua hun laitakin Kumpipa Jeroboam ii tapa Abijah a cina hi.



²Jeroboam in a zi munah, “Nangma le nangma, kuama ii hong tel ngawl natu in kimealseal in, kei sia Israel te ii kumpipa suak tu ni hi, hong ci Shiloh a kamsangpa Ahijah kungah va pai tan.

³Anluum luum sawm le anluum thum pawlkhat le khuaitui thawl khat va keng tan. Ih tapa bang suak tu ziam ama ii munah dongh tan, ama in hong son tu hi,” ci hi.

⁴Tua ahikom ama Shiloh ah Ahijah ii inn ah pai hi. Khanhaamna in Ahijah sia a mittawsak hi.

⁵A tapa cina sia huvau dongh tu in Jeroboam ii zi sia nang kungah hong pai tu hi ci in Topa in son zo hi. Tuaciang Topa in Ahijah ii pau natu teng hil zo hi. Jeroboam ii zi hong thet ciangin, ama sia ngualdang khat bangin kivawt hi.

⁶Ahihang ama baangkua sung sangah hong tum Ahijah in a zaakciang, “Hong tum tan, Jeroboam ii zi na hi sia hong he khi hi. Midang khat bangin banghangin kithoai ni ziam? Nang atu thupha ngawl kong son tu nei khi hi.

⁷Pai in a Jeroboam munah Israel te ii Pathian Topa in ama tungah hi bangin ci hi: ‘Ka mite sung pan nang kong teal a, ka mi Israel te uk tu in kong koi hi.

⁸David ii suan le paalte khut sung panin kumpi ngam ka lakhia a, nang kong pia hi. Ahihang nang sia ka naseam pa David bang na hi bua hi, ama sia kei tungah a khawng a kheakin hong thumaan a, ka thupiakte ni in, ka thukim teng bek seam hi.

⁹Nang in na mai a ngam uk te sangin mawna lianzaw na vawt hi. Nang in kei nong nial a, tuaciang ka thin uuk natu in biak milimte vawtin thik biak milimte na biak tu in na vawt hi.

¹⁰Hi sia hu in na kumpi khang zui in tuasiatna kong tungsak tu a, tuaciang na suan na paal sung panin pa a minpiang a moi a haam a kibangin ka thatlum siat tu hi. Na baangkua kong heam tu a, eak bangin kiphiat keak tu hi.

¹¹Khuapi sungah a thi na innkuanpuite sia ui in ne tu a, ngam taanzauna a thite sia vaciik in ne tu hi. Keima, Topa in pau zo khi hi,’ ” ci in son tan.



¹²Tuaciang Ahijah in Jeroboam ii zi tungah a ci lai na pan, “Tu in inn ah cia tan. Khuapi sung na tum po ciangin na tapa thi tu hi.

¹³Israel bup in ama atu khuangaina lakin phum tu hi. Jeroboam baangkua sungah ama bek ma pha takin kivui tu hi, banghangziam cile ama bekma Israel te ii Pathian Topa ii diksak om hi.

¹⁴Topa in Israel tungah kumpi khat koi tu a, ama in Jeroboam ii khang zui kumpi za sia bosak tu hi.

¹⁵Topa in Israel daan pia tu hi, tuaciang ama sia lui sung a pumpate bangin ngawk tu hi. A taangpupite tungah a piak sa hi leitangh phate tung panin ama in Israel sia zunglok tu a, Euphrates Ngun kal in thethaang tu hi, banghangziam cile amate in Asherah pathian numei sia ii lim a vawt hu in ama a thin uuksak hi.

¹⁶Topa in Israel taisan tu hi banghangziam cile Jeroboam in mawna vawt a, Israel mite mawna sungah lampui hi.”

¹⁷Jeroboam ii zi sia Tirzah ah cia kik hi. A inn sung a tum bek lian ciangin a tapa thi hi.

¹⁸Israel mipite ama atu khuangai in phum uh a, a naseam pa kamsangpa Ahijah tungah Topa ii sonkhol bangma ahi hi.

Jeroboam ii Thina

¹⁹Jeroboam ii sep le vawt theampo, a ngal dona ahizong a uk zia ahizong Israel Kumpipate ii Tangthu bu sungah kikhum hi.

²⁰Jeroboam in kum kul le kum nii sung kumpipa in maang hi. Ama thi in kiphum a, a tapa Nadab in a kumpi za laih hi.

Judah ii Kumpi Rehoboam

(2Khang tangthu 11.5-12.15)

²¹Solomon ii tapa Rehoboam sia Judahte kumpipa a sua lai in, ama ii kum sia kum sawmli le kum khat pha hi, tuaciangin ama in, Israel ngam bup sungah ama a kibiak natu Topa ii teal sa khuapi Jerusalem ah kum sawm le kum sali zawkciang kumpi in om hi. Rehoboam ii nu sia Ammon panin Naamah ahi hi.



²²Judah ngam ah mite in Topa tungah mawna vawt a, a taangpupite theampo ii vawt sangin a tamzaw in ama thin uuk natu vawt uh hi.

²³Amate in pathian theamte biak natu in biakna munte vawtin, suangkhuamte phutin, mualtung le thinglimte ah Asherah biak natu limte vawt uh hi.

²⁴A sia bel sia tua doai biakna munte ah numeite le pasalte sia pumpi zuakin om uh hi. Israel mite ii ngam sungah mainawt in a pai uh lai in Topa ii a nawk keak mite ii a maizum huai ngamtatnate Judah mite in ngamtatna in nei uh hi.

²⁵Rehoboam ii maan zawk a kum ngana ciangin Egypt Kumpipa Shishak in Jerusalem khuapi sim hi.

²⁶Ama in biakinnpi sung le kumpi innsung a sumngumte la siat hi, tuate sungah Solomon ii vawt sa kham lumte zongh kihel hi.

²⁷Tuate taangin Kumpipa Rehoboam in taungo taw a kivawt lumte vawt a, kumpi inn kongkha cing ulian pa tungah tuate kepcing tu in aap hi.

²⁸Kumpipa Biakinnpi ah a pai simin a cingte in tua lumte paipui in, tuaciang a cingte omna khaan ah siapui kik uh hi.

²⁹Kumpipa Rehoboam ii sep le vawt dangte theampo sia *Judah Kumpite* Tangthu bu sungah kikhum hi.

³⁰Hi hunte theampo sungah Rehoboam le Jeroboam sia a kipee tan in khat le khat kido uh hi.

³¹Rehoboam thi a, David khuapi ah kiphum in, a tapa Abijah sia ama laih kumpipa suak hi.

Kumpite Khatna 15

Judah Kumpipa Abijah (2Khang tangthu 13.1-14.1)

¹Israel te Kumpipa Jeroboam ii maan zawk a kum sawm le liatna ciangin Abijah sia Judahte kumpipa suak a,



²tuaciang, ama in Jerusalem panin kum thum sung uk hi. Ama ii nu sia Absalom ii tanu Maacah ahi hi.

³Ama in a pa mawnate ma maw suk in, a pu selawn David bangin Topa tungah thumaan bup ngawl hi.

⁴Ahihang David ii hu in Topa in Abijah sia ama zawkciang Jerusalem pan a uk tu le Jerusalem ngammuang in a koi tu tapa khat pia hi.

⁵Topa in hi bangin a vawt sia banghangziam cile David in ama ii diksakte bek seam a, a thukhamte Hit mi Uriah taw a vai khat sim ngawl, nit ngawl nei ngawl hi.

⁶Abijah ii maan sung theampo Rehoboam le Jeroboam ii kidona sia kizom paisuak lai hi..

⁷Tuaciangin Abijah ii sep le vawt theampo sia Judah *Kumpipate Tangthu* sungah kikhum siat hi.

⁸Abijah sia thi in David ii khuapi sungah kiphum hi, tuaciang a tapa Asa in ama kumpi za laih hi.

Judah Kumpipa Asa
(2Khangtangthu 15.16-16.6)

⁹Israel te ii Kumpipa Jeroboam ii maan zawk a kum kul na ciangin Asa sia Judahte Kumpipa suak hi,

¹⁰tuaciangin ama in Jerusalem ah kum sawmli le kum khat sung maang hi. Ama ii pi sia Absalom ii tanu Maacah ahi hi.

¹¹A taangpupi David ii ngamtat bangin Asa in Topa ii diksak tu in ngamta hi.

¹²Ngam sung panin numei le pasal pumpi zuak doai biate biakna munah a om theampo hawlkeak hi, tuaciang ama ii mai a kumpipate ii vawt milim theampo sot hi.

¹³Ama in a pi Maacah sia kumpipa ii nu ahina panin heamkhia hi, banghangziam cile ama in a kiihuai ta tam nei natu a siam Asherah pathian numei ii milim khat vawt hi. Asa in tua milim sia phukin Kidron luamkuam ah haltham hi.



¹⁴Asa in doai biate ii biakpiakna mun theampo susia ngawl ahihang Topa tungah a nuntak tawntung thumaan hi.

¹⁵Biakinn sungah a pa ii Pathian atu a piak sa nate le kham le ngun nate ama ii piakte koi hi.

¹⁶Judahte ii kumpipa Asa le Israel te ii Kumpipa Baasha sia amate vaang a nei lai teng in kido tawntung hi.

¹⁷Baasha in Judah sim a, Judah ngam pan a pusuak a sungtang a om thei ngawl natu in Ramah sia kulh taw uum hi.

¹⁸Tua ahikom Kumpipa Asa in Biakinnpi sung a kham le ngunte le kumpi inn sung pan a dangte a om lai sun teng la in a uliante in puasak in, Damascus ah, Tubrimmon ii tapa, Hezion tupa, Syria Kumpipa Benhadad, — hi kam teng thaak hi:

¹⁹“Ih pate sia ngal a kipawl ahi bangma ei zongh kipawl khawm tawng. Hi ngun le khamte sia nangma atu letsong kong piak hi. Tu in, ka ngamkhen sung pan ngalkapte a laak kik thei natu in, Israel te kumpipa Baasha taw na kipawl na sia na pheltan in,” ci hi.

²⁰Benhadad kumpipa in Asa ii nget teng thukim a, a ngalkap ukpите kuansak in Israel khuapite sim uh hi. Amate in hi khuapi teng suan uh hi, Ijon, Dan, Abel Beth Maacah khuapi teng, Galilee Tuili hui ngam teng, Napthali ngamkhen bup. amate in suan uh hi.

²¹Kumpipa Baasha in thupiang teng a zaak ciang Ramah khua ah a kulhpi vawt teng tawpin Tirzah zuan hi.

²²Tua zawkciang Kumpipa Asa in Judah ngambup ah thupiakna paisak in, a kuama theampo khat zongh kikhe ngawlin, Ramah panin suang le thing aa te Baasha ii kulh vawtna a zakte pua siat tu hi, ci hi. Hi vanhte taw Asa in Mizpah le Benjamin ngamah Geba khuapite sia ngal nan natu in vawt hi.

²³Asa ii a sep a vawt dang theampo, a haanna, khuapinote a khuangkhosak nate dongin *Judahte Kumpipate* ii Tangthu sungah kikhum hi. Ahihang a khanhaam ciangin ama sia peang natna taw zawcip hi.



²⁴Asa thi a, ama sia David ii Khuapi sung kumpi than ah kiphum hi, tuaciang a tapa Jehoshaphat in a kumpi za laih hi.

Israel Kumpipa Nadab

²⁵Judah Kumpipa Asa ii maan zawk a kum niina hun sungah Kumpipa Jeroboam ii tapa Nadad sia Israel te kumpipa hong suak a kum nii sung maang hi.

²⁶Ama ii mai ah a pa bangin ama in Topatungah mawin, Israel te mawna vawtna ah lampui hi.

²⁷Issachar nam Ahijah ii tapa Baasha in Nadad thasawm in, Nadad le a ngalkap honte in Philistia ngam ah Gibbethon khuapi a uumci laitakin Nadad thatlum hi.

²⁸Hi thu, Kumpipa Asa in Judah ah a maan zawk a kum thumna ciang piang hi. Tua bangin, Baasha in Nadad sia Israel kumpipa ahina laih hi.

²⁹Thakhat thu in ama in Jeroboam ii innkuanpuite that siat hi, Shiloh pan kamsang pa Ahijah ii Topa kammal a son bang tatakin tung hi, Jeroboam ii innkuanpuite kithat siat a, khat zongh a nungta om ngawl hi.

³⁰Hi bang a pian sia banghangziam cile Jeroboam in Israel te ii Pathian Topa sia ama ii mawna hang le Israel mite a maw tu in a vawt hu in Topa thin uuksak a tua hang ahi hi.

³¹Nadad ii a sep a vawt dang theampo sia Israel *Kumpite* ii Tangthu sungah kikhum hi.

³²Judah ii Kumpipa Asa le Israel ii Kumpipa Baasha te ngeal sia a vaang nei uh sung teng khat le khat kido tan uh hi.

Israel Kumpipa Baasha

³³Judah ah Kumpipa Asa ii maan zawk a kum thumna ah Ahijah ii tapa Baasha sia Israel te kumpipa suak a, ama in Tirza panin kum kul le kum li sung uk hi.

³⁴Ama ii mai ah Kumpipa Jeroboam bangma in ama in Topa tungah maw a, Israel te mawna sungah lampui hi.



Kumpite Khatna 16

¹Hanani ii tapa kamsang pa Jehu tungah Baasha atu kam hi tengTopa in pau hi:

²“Nang sia bangma ahi ngawl khat hi napi ka mi Israel te ii lampui tu in hong koi khi hi. Tuaciang tu in nang zongh Jeroboam bangma in mawna na vawt a, ka mite mawna vawt natu sungah na lampui hi. Amate ii mawnate in kei hong thin uuksak hi,

³tua ahikom Jeroboam tungah ka vawt bangma in nang le na innkuante sia kong heam tu hi.

⁴Na innkuanpuite sung pan khuapi sungah a thite sia ui in a sa uh ne tu a, ngam taanzauna sungah a thite vaciik in ne tu hi,” ci hi.

⁵Baasha ii a sep a vawtte theampo a dangte sia *Israel Kumpipate Tangthu* sungah kikhum hi.

⁶Baasha thi a Tirzah ah kiphum hi, tuaciang a tapa Elah in a kumpi za laih hi.

⁷Baasha le a innkuanpuite langpanna tua Topa kammalte sia kamsangpa Jehu in pia hi, banghangziam cile Baasha in Topa tungah mawna vawt hi. Ama in Topa ii thin uukna piangsak hi, banghangziam cile ama in tatkhaakna bek, Jeroboam bangin vawt ngawlin, Jeroboam ii innkuanpuite theampo zongh ama in that siat hi.

Israel Kumpipa Elah

⁸Judah ah Asa ii maan zawk a kum kul le lukna in, Baasha ii tapa Elah sia Israel te ii kumpipa suakin Tirzah pan kum nii sung uk hi.

⁹A uliante khat, kumpipa ii ngalleangte a lang a uk pa Zimri in ama suam sawm hi. Ni khat ni in Tirzah ah Elah sia kumpi inn a ukpi pa Arza ii inn ah zu kham hi.

¹⁰Zimri in inn sungah tumin, Elah suamlum hi, tuaciang ama in kumpi za laih hi. Hi sia a pian hun sia Judah ngam ah Asa in Kumpipa in a maan a kum kul le sali kum ahi hi.



¹¹Zimri kumpipa a sua po ciangin Baasha ii innkuanpuite theampo thatlum siat hi. Pasal a minpiang be hi kale lawm hi kale thatlumsak siat hi.

¹²Tuabangin kamsangpa Jehu tungtawnin Topa ii Baasha huvau a son bangin Zimri in Baasha ii innkuanpui theampo thatlum siat hi.

¹³Amate ii milim a biak hu le Israel mite mawna sung a thet pui hu in Baasha le a tapa Elah in Israel te ii Pathian Topa a thin uuksak hi.

¹⁴Elah ii sep le vawt a dangte theampo sia *Israel Kumpipate Tangthu* sungah kikhum siat hi.

Israel Kumpipa Zimri

¹⁵Judahte ii Kumpipa Asa ii a kum kul le sali na ciang Zimri in Tirzah pan Israel te sia ni sali sung uk hi Israel ngalkapte sia Philistia ah Gibbethon khuapi uumci uh hi.

¹⁶tuaciang amate in, Zimri in a kumpipa uh suamlum hi ci in a zaak uh ciang, tua hun tua munah amate ngalkap ukpipa Omri sia Israel te Kumpipa in taangko uh hi.

¹⁷Omri le a ngalkapte in Gibbethon nusia in Tirzah uumci uh hi.

¹⁸Zimri in khuapi sia ngalte khut sung theng zo ci in a zaak ciang kumpi inn ii a sungnung doi kulh taw a ki uumna mei taw hal hi, tuaciang ama zongh meikuang sungah thi hi.

¹⁹Hi bangin a pian sia banghangziam cile ama in Topa tungah maw hi. Ama ii mai ah a maang Jeroboam bangma in ama ii mawna hu le Israel mite mawna ah a lampui hu in, Topa diksak ngawlina thuak hi.

²⁰Zimri ii a sep a vawt na dangte theampo le suamlup natu a sawmna te sia *Israel te Kumpipate Tangthu bu* sungah kikhum siat hi.

Israel Kumpipa Omri

²¹Israel mite sia kikhen hi; pawlkhat te in Ginath ii tapa Tibni sia kumpipa in koi nuam a, a dangte in Omri dei uh hi.



²²A khakbel ciang Omri deite in zo uh a; Tibri thi a Omri sia kumpipa suak hi.

²³Tuabangin Judah kumpipa in Asa a maan zawk a kum sawmthum le kum khat kumin Omri sia Israel te kumpipa suak hi, tuaciang ama in kum sawm le kum nii sung uk hi. A masa kum luk teng sia ama in Tirzah pan uk hi,

²⁴tuaciang ama in Samaria ngam mualno khat sia Shemer a kici pasal khat ii tung pan nguntang tul zaluk taw lei hi. Omri in tua mual sia kulh taw ngal nanna vawt in tua munah khuapi khat sa hi, tuaciang a min sia mual nei lui pa min la in Samaria phuak hi.

²⁵Omri in ama mai a te sangin Topa tungah nasia maw zaw hi.

²⁶Ama ii mai ah Jeroboam bangma in ama ii mawna te hu le a mite mawna te milim biakna sungah a thet pui hu in Israel te ii PathianTopa ii thin uukna piangsak hi.

²⁷Omri ii a sep a vawt dangte le ama ii zawmate sia *Israel Kumpipate Tuanthu* sungah kikhum hi.

²⁸Omri thi a, Samaria ah kiphum in, a tapa Ahab in a kumpi za laih hi.

Israel Kumpipa Ahab

²⁹Judah ah Kumpipa Asa ii maan zawk a kum sawmthum le liat kumin Omri ii tapa Ahab sia Israel te ii kumpipa suak hi, tuaciang ama in Samaria panin kum kul le kum nii sung uk hi.

³⁰Ama in ama ii mai a kumpi dangte sangin Topa tungah maw zaw hi.

³¹Ama atu in Kumpipa Jeroboam ii khial bang bekte taw kicing sa ngawl hi; ama in tua kaanin ngamta in, Jezebel a kici Sidon Kumpipa Ethbaal ii tanu sia pai in tenpui a, tuaciang ama in Baal pathian bia hi.

³²Ama in Samaria ah Baal atu biakinnsaksakin, biaknatau khat vawtin biakinn sungah koi hi.

³³Ama in pathian nu Asherah milim khat vawt hi. Israel te ii Pathian Topa ii thin uuk natu in, ama ii masia a, Israel kumpipa te theampo sangin ama in nasia takin vawt zaw hi.

³⁴Ama ii maan sungin Bethel panin Hiel in Jericho sa kik hi. Nun ii tapa Joshua ii tungah Topa ii son khol bangma in Hiel in a tapa lianbel Abiram sia Jericho khua ii phungkawng a vawt laitakin thi sua a, tuaciang a tapa a nobel Segub sia khuapi kongpi a vawt ciang thisua hi.

Kumpite Khatna 17

Elijah le Nguatui Hanh hun

¹Gilead ngam Tishbe panin kamsangpa khat ahi Elijah om a, ama in Ahab Kumpipa munah, “A na ka sepsak Israel te ii a nungta Pathian Topa ii min taw nang tungah kong sonna pan, keima ii ci kik mateng daaitui ahizong, nguatui ahizong kum nii, kum thum sung sia hang tu hi,” ci hi.

²Tua zawkciang Topa in Elijah ii munah,

³“Hi mun nusia in a, niswana sangah Cherith luam hui ah buu tan.

⁴Luam in na zak tu tui hong sik tu a, tuaciang ngam va-akte in nang tua munah an hong puak tu in thu pia zo khi hi,” ci hi.

⁵Elijah in Topa ii thupiakna mangin, Cherith luam ah pai in tua munah taam hi.

⁶Ama in Luam tui dawnin, ngam va-akte in zing sim nitak sim in anluum le sa puak hi.

⁷Tawm vei zawkciang nguatui kisap hu in luam sia kang hi.

Zarephath a Meingong nu le Elijah

⁸Tua zawkciang Topa in Elijah munah,

⁹“Tu in Sidon hui ah a om khuapino Zarephath ah pai tan a, tua munah om tan. Tua munah meingong nupi khat nang hong vaak tu in thu pia zo khi hi.”



¹⁰Tua ahikom Elijah Zarephath ah pai a, khuapi kongpi a thet ciang, ama in meingongnu khat thingtom in om mu hi. “Tui dawn khat hong puak tan,” ama ii tungah ci hi.

¹¹Tui la tu in a pai ciang, “Nong hesuakna in anluum zongh hong paipui tan,” ci in oksan thua hi.

¹²Ama in zo a, “A nungta Topa na Pathian taw anluum nei vet ngawl khi hi ci in ka kiciam hi. Ka nei buppi sia kuang sungah anvui tawm le thawl sungah olive thau tawmno khat bek nei khi hi. Hi sungah kong pai sia thing tawm tomin ciapui a, ka nei sun teng ka tapa le kei atu in vawt tu khi hi. Tuasia ka an neak khakbel hi tu a, tua zawkciang pukthi tu khu hi,” ci hi.

¹³“Thintoi heak in,” Elijah in ama tungah ci hi. “Pai tan a, na an va vawt tan. Ahihang a masa phit in na nei sung pan kei atu lumno khat hong vawt tan a, kei hong puak tan, tua zawkciang nang le na tapa atu a om lai teng sung pan vawt in.

¹⁴Banghangziam cile hi sia sia Topa Israel te ii Pathian pauna hi: ‘Kuang sungah anvui taw kipeal ngei ngawl tu a, thawl sungah sathau sia, kei, Topa ii nguatui hong puak mateng kang ngei ngawl tu hi,’ ” ci hi.

¹⁵Meingong nu in Elijah ii sawl bangin pai in ngamta a, tuaciang amate in ni tam mama sung an a khom tu nei uh hi.

¹⁶Topa ii Elijah tungah kamciam a piak bangin, kuang sungah anvuite thot ngei ngawlin, thawl sungah sathau a kang bua hi.

¹⁷Tua zawk tawmvei ciangin meingong nu ii tapa sia a cii na a; zawm vaial in a khakbel ciang thi hi.

¹⁸Ama in Elijah ii munah, “Pathian ii mihing pa awng, banghangin hi bangin hong vawt ni ziam? Hi sungah nong pai sia ka mawna teng Pathian in phawksak in, ka tapa ii thi natu in vawt ni ziam?” ci hi.

¹⁹“Patang sia keima hong pia tan,” Elijah in ci hi. Ama in patang sia a khut sung pan la hi, ama ii omna inntung khaan ah toai to in, lupna tungah sial hi.



²⁰Tua zawkciang nging takin thu ngen hi. “Aw,Topa ka Pathian awng, banghangin hi bang meingong nu tungah a lipkhap huai mama in ngamta ni ziam? Ama in kei sia hong hesuak a hong vaak kasap tu in a tapa thalupsak ni hi,” ci hi.

²¹Tua zawkciang Elijah in patang ii tungah thum vei kizalh in bok a, thu ngen hi. “Aw,Topa ka Pathian awng, hi patang tungah nuntakna pia kik in!” ci hi.

²²Topa in Elijah ii thungetna zo a; patang sia hu hong sang kik tu in kithoai a, hong nungta kik hi.

²³Elijah in patangpa sia inn nuai dawl a nu kungah paipui suk kikin a nu munah, “En in, na tapa nungta hi,” ci hi.

²⁴Ama in zo a, “Tu ahile nang sia Pathian ii mihing khat hi a, tuaciang Topa sia nang tungtawn in hong pau hi, ci in hong he khi hi,” ci hi.

Kumpite Khatna 18

Elijah le Baal ii Kamsangte

¹Nguatui a hanh zawk a kum thumna zawk hiat ciangin Topa in Elijah munah, “Pai tan a, Kumpipa Ahab mai ah kilak tan, tuaciang ngua kong zusak tu hi,” ci hi.

²Tua ahikom Elijah dingkhia hi. Samaria a kialpi sia a haksa bel hun laitak ahi hi,

³tua ahikom Ahab in Obadiah, kumpi inn a uk pa samin (Obadiah sia Topa a bia thu um khat hi a,

⁴Jezebel in Topa ii kamsangte a thalup lai in, Obadiah in tua kamsangte zakhat la in, lianghawng sungah pawlkhat ciang sawmnga veu khen in pawl nii seal hi, tuaciang an le tui sik hi.)

⁵Ahab in Obadiah munah, “Ih siphute le laate a nungta in ih kep thei natu in, a kicing lopa te ih mu ziam maw, ngam sung tuinaak theampo le luam theampo ah pai in zong ka tawng. Ih ngannote khat zongh ih thalup kul ngawl tha tu hi,” ci hi.



⁶A ngamkhen koi sia sungah amate akua pai in zong tu ziam ci in thukimna vawt a, tuaciang amate ii pai natu san tek ah paikhia uh hi.

⁷Obadiah in a paina lam tungah thakhat thu in Elijah taw kisi hi. Ama in tel a, ama ii mai ah a niamin kumsuk a, “Nangma tatak ma ni ziam? Topa awng,” ci in dongh hi.

⁸“Hi khi hi, keima Elijah khi hi” ci in zo hi. “Pai tan a, na Topa kumpipa munah hi sungah ka om hunlam son tan,” ci hi.

⁹Obadiah in zokik a, “Kumpipa Ahab ii hong thalup tu lau huaina sung nong thetsak liang tu in bang khialna nei khi ziam?”

¹⁰A nungtaTopa na Pathian taw kiciam in hong son hi tong, ngamsung theampo ah kumpipa in nang hong zongsak hi. Ngam khat ii ukpa khat in nang sia ama ii ngam sungah om ngawl hi ci in thu a ko le Ahab in tua ngam ah nang hong kimu zawk ngawl na thu tua ngamukpa kiciamsak hi.

¹¹Tuaciang tu in nang hi sungah na om sia son tu in ama kungah pai le hong oai ni ziam?

¹²Ka pai po ciang Pathian ii thaa in nang sia heak ngei ngawl na mundang khat pawpo ah hong tua luilam le bang law tu khi ziam? Tuasia ciang Ahab munah nang hi sungah om hi ka ci ciang ama in hong mu zo buale kei sia hong thatlum tu hi. Ka no ciang a thu um a, Topa a bia pa ka hi hunlam sia ciamtee in.

¹³Jezebel in Topa ii kamsangte a thalup lai in, amate lianghawng sungah sawmnga veu in khenin, zakhat ka seal a, an le tui taw ka vaak thu za ngei ngawl ni ziam?

¹⁴Tua ahikom bangbangin nang hi sungah na omna thu kumpipa kungah son tu in hong sawl thei ni ziam! Ama in kei hong that tu hi ngawl ziam?” ci hi.

¹⁵Elijah in zo a, “A na ka sepsak Vaanglianbelpa Topa min taw kiciam khi hi, kumpipa mai ah tu ni in kilak tu khi hi,” ci hi.



¹⁶Tua ahikom Obadiah in Kumpi Ahab kungah pai in a son ciang, Ahab sia Elijah taw kimu tu in dingkhia hi.

¹⁷Ahab in a mu ciangin ama munah, “Israel ngam sungah ngimna a nasia bel a piangsak pa hi sungah om ni ziam!” ci hi.

¹⁸“Kei ngimna piangsak ngawl khi hi,” ci in Elijah in zo hi. “Nangma ni hi, nangma le na pa nu hi. Nangma in Topa ii thupiak ni ngawlin Baal milimte bia tawntung ni hi.

¹⁹Tu in Israel mite theampo kei taw Carmel mual ah kisi tu in thupia in. Baal ii kamsang 450 te hong paipui tavun, tuaciang pathiannu Asherah ii kamsang 400, Kumpinu Jezebel ii vaak teng zongh hong pai taken,” ci hi.

²⁰Tua ahikom Ahab in Israel mite theampo le Baal ii kamsangte sia Carmel Mualvum ah sam hi.

²¹Elijah in mite kungah paito in, “Na thin uh na khensat natu in bang tan vei hai lai tu nu ziam? Topa sia Pathian ahile ama bia vun; ahihang Baal sia Pathian ahile bia vun!” ci hi. Ahihang mite in kam khat zongh pau ngawl uh hi.

²²Tuasia ciang Elijah in, “Topa ii kamsang sia kei bekma taanglai khi hi, ahihang Baal ii kamsangte sia 450 om hi.

²³Khuitai nii hong paipui tavun; Baal ii kamsangte in khat lasak vun a, amate in ngo in, semneen in thingkang tungah koisak vun — ahihang meitaw heak vun. Keima in khuitai dang khat sia tuabangma in ka vawt tu hi.

²⁴Tua zawkciang Baal kamsangte in amate pathian munah thu ngen hen, tuaciang kei sia Topa tungah thu ka ngen tu a, tuaciang meikuang taw thunget hong zo sia Pathian hi,” ci hi. Mipite lungkim in au uh hi.

²⁵Tuaciang Elijah in Baal ii kamsangte munah, “No tam mama na hi uh ciang, noma khuitai khat la in biakpiakna tu vawt masa vun. Na pathian uh tungah thu ngen vun, ahizong thingkang tungah meitaw heak vun,” ci hi.



²⁶Amate kungah a kipaipui khuita sia amate in la a, a vawt tu bang a vawt zawk uh ciang sun dong Baal tungah thu ngen uh hi. Amate in au a, “Hong zo tan, Baal awng!” ci in amate ii a cian biaknatau sia ii kiimkot ah laam uh hi. Ahihang zona hong pai bua hi.

²⁷Sun hun ciang Elijah in amate nunau in ciammui tu hong kipan hi: “A nging zaw in thungen vevun, ama sia pathian hi ngawl ziam! Ama mangngai in om ziam, awnghaw ziam, tua ahibuale ama khualhaw ziam khat hi thei tu hi. Tua ahibuale zong ama mu khawng hi thei tu hi, na phok uh kul tu hi!” ci hi.

²⁸Tua ahikom kamsangte in nging zaw lai in thu hong ngen uh a, tuaciang amate ii zeksa ngeina om bangin naamte, naamzumte taw amate le amate chisan a luan dongin ki at uh hi.

²⁹Sun ni kaai dong amate sia au lialua in om uh hi; ahihang zona hong pai ngawl a, aw khat zongh kiza ngawl hi.

³⁰Elijah in mihingte munah, “Keima kung a nai zaw in hong neak tavun,” a ci ciang amate in ama ii kiimkot ah hong kikhawm uh hi. Topa ii biaknatau a kibaltham sia hong pua hi.

³¹Israel ci in Topa ii min a piak pa Jacob ii tate nam sawm le nam nii sim atu in suangtum sawm le nii la hi.

³²Hi suangte taw ama in Topa biakpiak natu biaknatau sa kik hi. Ama in tua kiimkot ah tui gallon li bang a ta thei tu dum to hi.

³³Tua zawkciang ama in thingkangte biaknatau tungah koi in, khuita sia semneen a, thingkangte tungah koi hi. Ama in, “Phealpuite li dim tui hong dim tavun a biakpiakna tung le thing tungah hong sung tavun,” ci hi.

³⁴Amate in tuabangma in vawt a, ama in, “Hi kik vun,” a ci ciang — amate in sung kik hi. “Khat vei ma hi lai vun,” ci hi — tuaciang amate in tuabangma vawt uh hi.

³⁵Tui sia biaknatau kiim ah hong luang a, dum sung hong dim hi.



³⁶Nikaai sang biakpiakna hun hong thet ciangin Elijah in biaknatau neak in, thu ngen hi. “Aw Topa, Abraham, Isaac le Jacob ii Pathian awng, tu in nang sia Israel te ii Pathian hi a, tuaciang kei sia na naseampa ka hi na taw nong sawl bangin hi bang teng ngamta khi hi.

³⁷Hong zo tan Topa, hong zo tan, tua hi le hi mite in nang sia TopaPathian hi a, tuaciang amate sia nang kungah heak kiksak tu ni hi,” ci hi.

³⁸Topa in meikuang hong puaksuk a, sangaw biakpiakna, thingkang, suangtumte haltham in, lei zongh kaang keaksak a, dum sungah tuite kosak hi.

³⁹Mipite in hi sia a mu uh ciang amate le amate sia lei ah hong kisp suk a, hi bangin au uh hi, “Topa sia Pathian hi; Topa bekma Pathian hi!” ci uh hi

⁴⁰Elijah in thupia a, “Baal ii kamsangte man vun, khat zongh suaktasak heak vun!” ci hi. Mipite in amate man siat a, tuaciang Elijah in Kishon Lui ah lampui sukin tua munah that uh hi.

Nguatui Kanna Veng

⁴¹Tua zawkciang Elijah in Kumpipa Ahab kungah, “Tu in pai tan a, an va ne tan. Nguatui hawk liang a hong pai tu za khi hi,” ci hi.

⁴²Ahab an a neak laitakin Elijah sia Carmel Mualvum ah kaato a, lei ah kunsukin, a khupte nii kilaklaw ah a lu phum hi.

⁴³A naseam pa munah, “Pai tan a, tuipei sung en tan,” ci hi. A naseam pa pai in hong heak kik a, “Bangma mu bong,” ci hi. Sali vei vaset Elijah in a naseam pa pai in en in sawl hi.

⁴⁴A sali veina ciangin ama hong heak kik a, “Meeikaaino khat khuttum saang lianzaw ngawl khat tuipei panin hong paito ka mu hi,” ci hi. Elijah in a naseampa thupia a, “Kumpipa Ahab kungah pai tan a, a ngalleang sungah kaato in, ngua ii ama a khaktan maa in, inn ah cia taken, va ci tan,” ci hi.

⁴⁵Tawmvei no hun sungin van sia meeivom taw dim in, vui va tu in kipan a, ngua nasia takin zuk tu kipan hi,. Ahab zongh ngalleang tungah kaa in, Jezreel ah cia kik tu in dingkhia hi.



⁴⁶Topa ii thahatna Elijah tungah hong pai a, ama in a kawng san ah a puante ngat takin sawmin, Jezreel dong Ahab ii mai ah tai hi.

Kumpite Khatna 19

Sinai Mualvum ah Elijah

¹Kumpipa Ahab in a zi Jezebel munah Elijah ii ngamtatna theampo son a, Baal ii kamsang theampo a thalup na thu dong son siat hi.

²Kumpi nu in Elijah kam khat thaak hi: “Kamsangte tungah na vawt bang keak in zing ciang tu hunin nang tungah kong vawt ba le pathiante in kei hong vaatlum taken,” ci hi.

³Elijah lau a, a nuntakna kihukna tu in tai in, a naseampa kengin Judah ngam Beersheba zuan hi. A naseam pa tua munah nusia in,

⁴Elijah sia nitangtum dui sungah a peangin pai hi. Ama in thingkung khat ii lim nuai ah tawlna in to a, tuaciang thi thei le uuk hi. “Nasia lei hi, Topa awng,” ci in thu ngen hi. “Ka nuntakna hong laaksak tan; thi leng phazaw hi,” ci hi.

⁵Ama in thingkung nuai ah lumin mutthip hi. Thakhat thu in vantung lalang khat in tham a, hi bangin ci hi. “Khanglo in ne in,” ci hi.

⁶A kiimkot a et ciang anluum khat le tuidam thawl khat mu hi. Ama in ne in dawn a, tua zawkciang lum suk kik hi.

⁷Topa ii vantung lalang sia a nii veina hong pai a, “Tho in an ne in, tua ahibuale na khualhaw natu sia nang atu haksa lei tu hi,” ci hi.

⁸Elijah tho in, a neak a dawn zawkciang ni sawmli mual thiango Sinai dong a pai natu thangui thatang tua an tung pan nga hi.

⁹Tua munah zan ngiak tu in lianghawng khat ii sungah tum hi. Thakhat thu in Topa in, “Elijah, hi sungah bang vawt ni ziam?” ci hi.

¹⁰Ama in zo a, “Topa Pathian Vaanglianbelpa awng, na na — nang bekma ii na hong sepsak tawntung khi hi. Ahihang Israel mite in nang taw kiciamna



paltan uh a, na biaknataute baltham in, na kamsangte thatlum siat hi. Kei bekma taanglai khi hi — tuaciang amate in kei hong thasawm hi!”

¹¹“Pusuak in a, mualdawn ka mai ah hong ding tan,” Topa in ama tungah ci hi. Tua zawkciang Topa in kantan in hong pai a, vui pi suangval khat hong paisak hi, tua vui in mualno kikhenthamsak a, suangtumpuite tam zaansak hi — ahihang Topa sia vui sungah om ngawl hi. Vui vak hong thim a, tua zawkciang zin hong liing hi — ahihang Topa sia zinliing sungah om ngawl hi.

¹²Zinliin zawkciang meikuang khat hong om a, — ahihang Topa sia meikuang sungah om ngawl hi. Meikuang zawkciangin a kihau vathial awneal khat om hi.

¹³Elijah tua a zaakciang a maitang a puantual taw siinin pusuak in lianghawng kuamai ah ding hi. Aw khat in, “Elijah, hi sungah bang hi ni ziam?” ama tungah ci hi.

¹⁴Ama in zo a, “Topa Pathian Vaanglianbelpa, na na nangma na hong sepsak tawntung khi hi. Ahihang Israel mite in na thuciamna paltan in, na biaknataute baltham a, na kamsangte thatlum siat hi, Keima bekma taanglai khi hi — tuaciang amate in kei hong thasawm hi.” ci hi.

¹⁵Topa in ama munah, “Damascus hui dui sungah heak kik tan a, khuapi sungah tumin, Hazael sia Syria te ii kumpipa tu in sathau noai tan,

¹⁶Nimshi ii tapa Jehu sia Israel te ii Kumpipa tu in sathau noai tan. tuaciang Abel Meholah pan a, Shaphat ii tapa Elisha sia nang hong laih tu kamsang tu in sathau noai tan.

¹⁷Hazael ii thalup natu pan a suakta a om le Jehu in thatlum tu a, Jehu ii thalup tu pan a suakta a om le Elisha in thatlum tu hi.

¹⁸Ahihang Israel ngamah a nungta in mihing tulsali khe lai tu khi hi — kei tungah hong thumaan theampo le Baal mai ah kun ngawlin milim a namh ngawlte ahi uh hi,” ci hi.

Elisha ii a Kisap khatna



¹⁹Elijah in tua mun nusia in a pai le Elisha sia khui kap taw lotho in mu hi; ama mai ah kap sawm le kap khat om a ama sia a khakbel kap sia taw lotho hi.

²⁰Tuasia ciang Elisha in a khuikap nusia in Elijah del a, tuaciang, “Ka pa le ka nu vaithakna in va nam phot tong, tua zawkciang nangma taw tonkhawm tu khi hi,” ci hi. Elijah in zo a, “Pha hi, cia kik tan. Hong khaam ngawl khi hi,” ci hi.

²¹Elisha sia ama ii khuikapte kungah pai in ngo hi, tuaciang a sa huanin, a khui hakkolte sia mei thuna thingin zangh hi. Ama in a sa sia mihingte hawmsak a, amate in ne uh hi. Tua zawkciang ama in Elijah ii hu pa tu in a nungzui hi.

Kumpite Khatna 20

Syria te taw Kidona

¹Syria te Kumpipa Benhadad in ngam uk sawmthum le nii te ii siphu le ngalleangte taw kuantu in Samaria khuapi uumci in, sim hi.

²Ama in khuapi sungah kam thaak in Israel te ii Kumpipa Ahab munah, “Kumpipa Benhadad in hi bang teng hong ngen hi,

³ama tungah na ngun, na kham, na numeite le na tate a hatbel teng taw lut in,” ci hi.

⁴“Benhadad ka Topa mun ah son tavun a, hong ngetna teng sia lungkim khi hi; ama in kei le ka neisa theampo tang thei hi,” ci in Ahab in zo hi.

⁵A zawkciang kamtai te hong heak kik uh a, Benhadad kung pan ngetna dang khat hong paipui thua hi. “Na ngun, na kham, na numeite le na tate nong aap natu kam hong thaak khi hi.

⁶Tu in, ka uliante kong paisak tu a, na kumpi inn le na uliante ii innte tok in, manpha asak theampo la tu hi. Amate zing ciang tu hun khawngin tua mun hong theng tu hi,” ci hi.

⁷Kumpipa Ahab in ngamsung a lampui theampo samin hi bang ci hi. “Na mu uh hi a, hi sia pa in ei sia hong lalcipsak nuam hi. Ama in kam hong thaak a,



ka zite ka tate le ka ngun ka khamte hong ngen hi, tuaciang ka na lungkim hi,” ci hi.

⁸Lampuite le mipite in zo a, “Ama awlmaw heak in. Ama ii tungah lut heak in!” ci uh hi.

⁹Tua ahikom Ahab in Benhadad ii kamtaite munah zokik a, “Hong nget masak teng thukim khi hi, ahihang hong nget kik teng sia thukim thei ngawl khi hi, ka Topa Benhadad munah va ci tavun,” ci hi. Kamtaite cia a tawmvei zawkciang hong heak kikin Benhadad kung pan kam thaak khat ma hong keng hi;

¹⁰“Nang ii khuapi hi sia a sutham zo tu mihing a khom kong keng tu a, tuaciang suangbek te sia amate khut tek taw puakhia tu hi. Tuabangin ka ngamta buale pathiante in hong vaatlum taken!” ci hi.

¹¹Kumpipa Ahab in zo a, “Kumpipa Benhadad munah son tavun a, ngalkap citak khat in ngal kido zawkciang kisuangtaak pheang a, kido maa in kisuang ngawl hi,” ci hi.

¹²Benhadad in Ahab ii kam thaakte sia ama le a kipawl pui ngam uk dangte taw puanbuk sung zu a neak laitakin nga hi. Ama in a mite sia khuapi sim tu in sawl a, tua ahikom amate sia dinmun la tu in hong kuan uh hi.

¹³Tua laanin kamsang khat Kumpipa Ahab kungah hong pai a, “Topa in ci hi, ‘Tua ngalkap hon lian sia kiita heak in! Amate tungah tu ni in zawna nang kong pia tu hi, tuasia ciang kei Topa ka hi hunlam nong he tu hi,’ ” ci in son hi.

¹⁴Ahab in, “Akua in kidona lampui tu ziam?” ci in dongh hi. Kamsangpa in zokik a, “Topa in ngamkhen ukpите ii nuai a seam khangmoi ngalkapte in lampui tu hi,” ci hi. “A ngalkap mipite a kua in uk tu ziam?” ci in Ahab in dongh hi. “Nangma,” ci in kamsangpa in zo hi.

¹⁵Tua ahikom kumpipa in ngamkhen a ukte ii nuai a ngalkap khangmoi te sam a, amate sia 232 pha hi. Tua zawkciang ama in Israel ngalkapte khawmtua in tulsali pha uh hi.



¹⁶Kisimna sia sunkim ciang hong kipan a Benhadad le a pawlpui sawmthum le nii te puanbuk sungah zu khamin a om laitak ahi hi.

¹⁷Ngalkap khangmoite sia madawk in hong mainawt uh hi. Benhadad ii ngalvilte in Samaria pan ngalkap pawlkhat hong pai hi ci in ama tungah ko uh hi.

¹⁸Ama in thupia a, “Hong sim tu in hong kuan ahizong, a vekpi in pummat vun,” ci hi.

¹⁹Ngalkap khangmoite in kisimna hong lampui uh a, Israel ngalkap honte in zui uh hi,

²⁰tuaciang misim in amate ii kido pui tek that uh hi. Syria te hong taitaap uh a, amate sia Israel te in del uh hi, ahihang Benhadad sia siphu tung panin hong suakta hi, ama sia siphu ngalkap pawlkhat in tonpui hi.

²¹Kumpipa Ahab sia ngalphual ah hong diang a, ngalte siphu, ngalleang te manin, Syria te in nasia takin lelna thuk hi.

²²Tua zawkciang kamsangpa Kumpipa Ahab kungah hong pai kik a, “Cia kik in a, na ngalkapte puapha in, tuaciang kidopna taw ngealna vawt in, banghangziam cile Syria te in mai tuk ciang hong sim kik tu hi,” ci hi.

Syria te in Nii vei A simna

²³Kumpipa Benhadad ii uliante in, “Israel te ii pathiante sia mualpите pathiante hi a, tua hu in Israel te in hong zo hi. Ahizong, zaangtam ah sim leang ahile zo tu hi hing ci uh hi.

²⁴Tu in ngam uk sawmthum le nii te ngalkap uksak heak in a, ngalzia he ngalkapmaangte in uksak in.

²⁵Tuaciang nang hong taisan sa ngalkapte za ma in a tam ngalkap hon sam in, siphu le siphu ngalleangte zongh a ngei za ma sam in. Israel te zaangtam ah ih sim tu a, tu sia ciangin amate ih zo tu hi,” ci hi Kumpipa Benhadad in amate ii ngaisut piakna sia thukim a, tuabangin ngamta hi.

²⁶Tuk hun hong thet kik ciangin ama in ngalkapte sam kik in, Aphek khua ah Israel te sim tu in pai uh hi.



²⁷Israel te sia a kism sa hi a, ngalvanh a cing taw; amate in khen nii in kikhen a mainawt a, Syria te taw kimaingat in ngiaphual saat uh hi. Israel ngalkapte sia Syria te ngam sung theampo ah a kizel te taw ettee ciang kealhon nii bang ahi hi.

²⁸Kamsang khat Kumpipa Ahab kungah hong pai a, “Topa in hi bangin ci hi: ‘Syria te in kei sia mualnote pathian hi a, zaangtam te ii pathian hi bo hong ci hu in, hi ngalkap hon lian mama tungah zawna kong pia tu a, tuasia ciang nang le na mihingte in kei sia Topa ka hi hunlam nong he tu uh hi,’ ” ci in son hi.

²⁹Ni sali sung Syria te le Israel te sia kimaitua in a ngiaphual tek ah om uh hi. A ni sali ni ciang amate kido tu hong kipan a, tuaciang Israel te in Syria te tul zakhat that uh hi.

³⁰A suakta lai teng sia Apek khuapi sungah tai uh hi, tua sung khuapi luphung cimh in tulkul le tulsali thi lalai hi. Benhadad zongh suakta a, khuapi sung tu in, inn khat ii nung khaan khat sungah om hi.

³¹Ama ii uliante ama kungah pai in, “Israel te kumpipate sia ngual hesuak thei hi ci in za khu hi, Ka kawng uh ah khau-ip puan teangin ka ngawng uh ah khauhual taw kivial in, Israel kumpipa kungah ka pai natu hong oai tan, tua hi le ama in na nuntakna hong khoaikhe tha tu hi,” ci uh hi.

³²Tua ahikom amate in a kawngah khau-ip puan teang uh a, a ngawng ah khauhual kivial in Ahab kumpipa munah, “Na naseampa Benhadad in a nuntakna na suataksak natu hong mangkaa hi,” ci uh hi. Ahab in, “Ama nungta lai ziam? Pha hi, ama sia ka suapui khat bangin ngaisun khi hi,” ci hi.

³³Benhadad ii uliante in limpha khat encik in a om laitak Ahab in ka suapuipa ci kammal a zaak uh po ciang, amate in thakhat in zomto in, “Na ci bangma in Benhadad sia na suapui pa hi,” ci uh hi. “Keima kungah hong paipui tavun,” ci in Ahab in thupia hi. Benhadad hong thet ciang Ahab in ngalleang sungah a to natu in sawl hi.



³⁴Benhadad in ama munah, “Ka pa ii na pa tung pan khuapino a laak teng hong pia kik tu khi hi, tuaciang Damascus khua ah nangma atu sumzuak sum leina phual khat na koi nuam le ka pa ii Samaria ah a koi bangin koi thei tu ni hi,” ci hi. Ahab in, “Hi thukimna tungtawn in nang hong suatak tu khi hi,” ci hi. Ama in kiciamna khat vawtin, Benhadad paisak hi.

Kamsang khat in Ahab Puanil

³⁵Topa ii sawlna bangin kamsang pawlkhat sung pan khat in a kamsang dang khat munah, hong vua tan ci hi. Ahihang ama in nial hi.

³⁶Tua ahikom ama in tua pa tungah, “Topa ii thupiakna nial na hikom kei nong nusiak po ciang tawpi khat in nang hong thatlum tu hi,” ci hi. Tuaciangin a nusiak po ciang tawpi khat hong pai a, ama that hi.

³⁷Tua zawkciang tua kamsangpa ma in a dang khat ii munah, “Hong vua tan,” ci hi. Hi sia pa in vua hi, ama in nasia takin thong ahikom na sa hi.

³⁸Kamsangpa in a maitang sia puansia taw hong tuam a, kimealseal in, lampi hui ah ding a, Israel kumpipa hong kantan tu ngakin om hi.

³⁹Kumpipa hong kantan tu ciang kamsang pa in biakpui a, “Kumpipa awng, kidona sungah kihel hi veang, ngalkap khat in ngalte a mat khat kei kungah hong paipui a, hi bang hong ci hi. ‘Hi sia pa cing in; a suakta napo le na nuntakna taw lul tu ni hi, tua ahibuale zong nguntang tulthum liau tu ni hi,’hong ci hi.

⁴⁰Ahihang vai dang taw komla ka hikom a pasal suakta hi” ci hi. Kumpipa in zo a, “Nangma in nangma thi natu thu son ni hi, daan na thuak kul tu hi,’ ci hi,

⁴¹Kamsangpa in a maitang panin puansia sia hong leamkeak a, thakhat thu in kumpipa in kamsang khat ahi hunlam hong tel paih hi.

⁴²Kamsangpa in kumpipa munah, “Hi sia Topa ii kammal hi: ‘Thalup tu in kong thupiak pa suaktasak na hikom nangma in na nuntakna taw lul tu ni hi, tuaciang ama ii ngalkap honte na suataksak hu in nangma ngalkap honte lalcip tu hi,’ ” ci hi.



⁴³Kumpipa sia Samaria a inn ah cia kikin thinngim in a thin kiam hi.

Kumpite Khatna 21

Naboth ii Sapit huan

¹Jezreel khua Kumpipa Ahab ii kumpi inn hui ah Naboth a kici pasal khat ii sapit huan om hi.

²Ni khat ni in Ahab in Naboth munah, “Na sapit huan kei hong tangsak tan; ka kumpi inn taw kinai a, antee lamsang ciin natu leitangh dei khi hi. Sapit huan a phazaw khat hong pia tu khi hi, ahibuale na deizaw le a manh kilawm khat hong pia tu khi hi,” ci hi.

³“Hi sapit huan sia ka taangpupite tung pan ka luasuk hi a, Topa in nang kong tansak tu hong khaam hi,” Naboth in ci hi.

⁴Ahab inn ah cia in, Naboth ii kampau teng hu in thin uukin thin lal in om hi. A lupna tungah lumin, pang sang nga in, an ne nuam ngawl hi.

⁵A zi Jezebel ama kungah pai in, “Banghangin taza in na thin lal ziam? Banghang an ne ngawl tu ni ziam?” ci in dongh hi.

⁶Ama in zo a, “Naboth ii kei tungah hong ci teng hang hi. A sapit huan lei tu in ka paupui a, a uuk le zong huan dang khat piak tu in ka ci hi, ahihang ama in tua huan kei neisa suak thei ngawl tu hong ci hi!” ci in zo hi.

⁷“Pha hi! Nang sia kumpipa ni ziam maw hi ngawl ni ziam?” Jezebel in dongh hi. “Na lupna pan tho in, na maitaisakin an ne in. Naboth ii sapit huan keima hong ngasak tu khi hi,” ci hi.

⁸Tua zawkciang ama in laithak pawl khat at in, Ahab ii min at in, tazeik tum in, Jezreel khua a uliante le lampuite thaak hi.

⁹A laithak sungah: “An tan ni khat taangko vun, mihingte sam vun, tuaciang Naboth sia a ki upat leangna in vawt vun.

¹⁰Mihing thuzel nii in ama ii maitang panin Pathian le kumpipa a haamsiatna mawsuansak vun. Tua zawkciang khuapi puasias ah paipui in suangtum taw deanglum vun,” ci hi.



- ¹¹Jezreel khua uliante le khua mi lampuite in Jezebel ii thupiak bangin ngamta uh hi.
- ¹²Amate in antan ni khat taangko uh a, mihingte samin, Naboth sia a ki upat leangna in vawt uh hi.
- ¹³Mi thuzel te nii in ama sia mipi mai ah mawsuan a, Pathian le kumpipa haamsiat hi ci hi, tua ahikom ama sia khuapi puasias ah kipaipui in suangtum taw kideanglum hi.
- ¹⁴Jezebel tungah kam kithaak a, “Naboth kithatlum zo hi,” ci hi.
- ¹⁵Jezebel in kam kithaak sia a nga po ciang, Ahab munah, “Naboth sia thi zo hi. Tu in a sapit huan nang hong zuak nop ngawl sia la in tang in,” ci hi.
- ¹⁶Thakhat in Ahab pai in sapit huan sia a neisa tu in la hi.
- ¹⁷Tuaciang Topa in Tishbe panin kamsangpa Elijah munah,
- ¹⁸“Samaria ah Kumpipa Ahab kungah pai tan. Ama sia Naboth ii sapit huan sungah tua huan la in tang tu kithoai na mu tu hi.
- ¹⁹Ama munah son in, kei Topa in ama munah ci khi hi: ‘Pasalpa na suamlup zawkciang a neisa la tu in kithoai lalai ni ziam?’ Ama ii tungah hi teng son in, ‘Naboth ii chisan uite ii a lia na mun lian ah nangma chisan zongh uite in liak tu hi!’ ci in son tan,” ci hi.
- ²⁰Ahab in Elijah a mu ciang, “Ka ngal pa awng, kei hong pha ngangaw ni ziam?” ci hi. “Hi hi, hong pha khi hi,” Elijah in ci in zo hi. “Topa ii muna ah khialna ahi teng na vawt natu in nangma le nangma kipumpiak bup ni hi.
- ²¹Tua ahikom Topa in nang tungah hi bangin hong ci hi. ‘Lalna nang tungah kong piangsak tu hi. Nangma le na innkuan sungah pa a minpiang a haam a moi theampo kong heam siat tu hi.
- ²²Na innkuanpuite sia Nabat ii tapa Kumpipa Jeroboam innkuanpuite bang hi tu a, Ahijah ii tapa Kumpipa Baasha ii innkuanpuite bang hi tu hi, banghangziam cile nangma in ka thin uuk natu in nong sau a, Israel te mawna sungah lam na pui hi,’



²³Jezebel taw kisai in, Topain a luang khuapi sungah ui in ne tu hi, ci hi.

²⁴Na mealheakte khuapi sungah a thite ui in ne tu a, ngamtaanzauna munah a thite vaciik in ne tu hi,” ci hi,

²⁵(Ahab bangza in Topa ii muna ah khialna vawt natu a kipumpiak bup kuama dang om ngawl hi, tua theampo a zi Jezebel ii hansua na pan piang ahi hi.

²⁶Ama in a maizumhuai bel ngamtatna mawna a vawt sia Israel mite a mai nawt lai in ngam sung pan Topa ii nawkeak Amor te ii vawt bangin milim bia hi.)

²⁷Elijah ii a pau tu teng a man ciang Ahab in a puansilh lai te hong baltham in, suutin, khau-ip puan silh hi. Ama in an ne ngawlin khau-ippuan te taw lum a, mainuu in thin lalin vavak hi.

²⁸Topa in kamsangpa Elijah munah,

²⁹“Ahab in kei mai ah kiniamkhiak in a om sia na mu ziam? Hi bangin ngamta ahi ciang ama khan sungah tuasiatna piangsak ngawl tu khi hi: a tapa ii khan sungah Ahab ii innkuan sungah tuasiatna piangsak tu khi hi.”

Kumpite Khatna 22

Kamsangpa Micaiah in Ahab Kidopna tu son

(2Khang tangthu 18.2-27)

¹Israel te le Syria te kilaklaw hong pai pheang tu kum nii sung ngal kilemna om hi,

²ahihang a kum thumna ciang Judahte ii Kumpipa Jehoshaphat in Israel te Kumpipa Ahab taw kisi tu in hong pai hi.

³Ahab in a uliante munah, “Banghangin Syria te tung pan Gilead ngam a Ramoth laak kik tu bangma kipan ngawl ni ziam? Eima neisa hi ngawl ziam?” ci hi.

⁴Tuaciang Ahab in Jehoshaphat dongh a, “Kei taw paikhawm in Ramoth na sim tu ziam?” “Nang na kinging zo le kei zongh kinging sa in om khi hi,”



Jehoshaphat in ci in zo hi, “Ka ngalkapte le ka siphu ngalkapte zongh tuabangma hi,” ci hi.

⁵“Ahizong Topa dongh phot tawng,” ci hi.

⁶Tua ahikom Ahab in kamsangte zali bang samin, thu dongh hi: “Ramoth sim tu khi ziam? maw sim ngawl tu khi ziam?” “Sim in,” amate in ci uh hi, “Topa in zawna hong pia tu hi,”

⁷Ahihang Jehoshaphat in, “Topa ih dok tu kamsang dang om nawn ngawl ziam?” ci in dongh hi,

⁸Ahab in zo a, “Khat om lai hi, Imlah ii tapa Micaiah hi. Ahihang ama ensan khi hi, banghangziam cile ama in kei atu peuma a pha thusuak nei ngei ngawl hi, a pha ngawl khat veu hi hamtang hi.” ci hi. “Tuabangin ci heak in,” Jehoshaphat in ci hi.

⁹Ahab in zum naseam uliante khat sam a, “Manlang in Macaiah kungah hong paipui tan,” ci hi.

¹⁰Kumpipate nii sia amate ii kumpi puantualte silh in, Samaria kongpite ii puasang ancilna ah kumpi tokhum tungah to uh a, kamsang theampo in amate mai ah thusuakte son uh hi.

¹¹Amate sung pan khat, Chenaanah ii tapa Zedekiah in, thik kiite vawt in, Ahab munah, “Hisia Topa ii pauna hi, ‘Hite taw Syria te na sim tu a, na zo tu hi,’ ” ci hi.

¹²Kamsang dangte in zongh tuabang vive ma in ci uh hi. “Ramoth sim tu in kuan in, zo tu ni hi,” ci uh hi. “Topa in zawna hong pia tu hi.”

¹³Tua laanin Micaiah sam tu in a pai ulian pa in, “Kamsang dangte theampo in kumpipa zawna tu bebek son zo hi, nang zongh tuabangma son lete pha tu hi,” ci hi.

¹⁴Ahihang Micaiah in, “A nungta Topa min lo in kamciam ka piakna pan ama ii son hong sawl teng son tu khi hi,” ci in zo hi.

¹⁵Ama Kumpipa Ahab mai ah hong kipaipui ciang, kumpipa in, “Micaiah awng, Kumpipa Jehoshaphat le kei Ramoth ah kuanin ka sim tu uh ziam? tua ahibuale sim ngawl tu khu ziam?” “Sim vun!” Macaiah in ci hi. “Na zo tu uh hi, Topa in zawna hong pia tu hi,” ci hi.

¹⁶Ahihang Ahab in zokik a, “Topa min taw kei tungah nong pau ciangin a tatak teng bek son tu ni hi. Bang tan vei tuabangin hong ci tu khi ziam?” ci in zo hi.

¹⁷Micaiah in, “Israel ngalkapte sia mualtung tengah tuu cing pa om ngawl a tuute kithezau bangin ka mu hi. Tuaciang Topa in, ‘Hi mite lampui nei ngawl hi, inn ah dai takin cia hen,’ ” ci hi.

¹⁸Ahab in Jehoshaphat munah, “Ama in kei huvau peuma a pha khat zongh pau ngei ngawl hi, hong ci ka na ngawl khi ziam? A sia khat peuma hi tawntung hi,” ci hi.

¹⁹Micaiah in zomto a, “Tu in Topa pauna teng ngai vun! Topa sia vantung a kumpi tokhum tungah to in, ama ii vantung lalangte a kiim ah ding uh hi.

²⁰Topa in dongh a, ‘Ramoth ah Ahab a kithalup natu in akua in theam tu nu ziam? Vantung lalang pawlkhat in son khat nei a, a dangte in thu dang ma son uh hi,

²¹thaa khat mai ah hong kalsuan a, Topa kung zuanin, “Keima in theam tu khi hi,” ci hi.

²²“Bangbang in maw?” Topa in dongh hi. Thaa in zo a, “Keima pai in Ahab ii kamsangte theampo leilotthu ka sonsak tu uh hi! ” ci hi. Topain, ‘Pai tan, va theam tan, Zawna nga tu ni hi,’ ” ci hi.

²³Tuaciang Micaiah in thu khup a, “A piang thu in hi sia hi. Topain na kamsang hite nang tungah leilot thu hong sonsak hi. Ahihang ama mama in nang tuasiatna nga tu in a thutan sa hi,” ci hi.

²⁴Tuaciangin kamsangpa Zedekiah in Micaiah kungah paito in, a maitang beang hi, tuaciang dongh hi. “Bang hun pan kipan Topathaa in kei hong nusia a, nang tungah hong pau ziam?” ci hi.



²⁵Micaiah in zo a, “Inn nungsang khaan sung khat ah a buu tu in na pai ciangin mu tu ni hi,” ci hi.

²⁶Tua zawkciang Kumpipa Ahab in a uliante khat munah, “Micaiah man in a, Amon ah paipui in, khuapi ukpa le Kumpipa Joash tungah aap vun.

²⁷Thong sungah koi hen a, bangma tat ngawlin kong heak kik dong anluum le tui bek taw na vaak hen, ci in son in,” ci hi.

²⁸“Bangma tat ngawlin nong heak kik le maw? Topa sia kei tungah hong pau ngawl hi tu hi,” ci in Micaiah in au ngaw hi. Tuaciang belap a, “A kuama po in hong ngai tavun, ka son sa teng!” ci hi.

Ahab ii Thina

(2Khang tangthu 18.28-34)

²⁹Tua zawkciang Israel te ii Kumpipa Ahab le Judahte ii Kumpipa Jehoshaphat te in Gilead ah Ramoth khua sim tu in pai uh hi.

³⁰Ahab in Jehoshaphat munah, “Ngal phual ah ih thet ciangin kei sia kong kimealseal tu a, nang hile kumpipa puan teng ma nong silh tu hi,” ci hi. Tuabangin Israel te kumpipa kidona phual ah kimealseal in pai hi.

³¹Syria kumpipa in a ngalleang uk sawmthum le nii te munah, Israel te ii kumpipa sim ngawl a dang kuama sim ngawl tu ni hi ci hi.

³²Tua ahikom amate in Kumpipa Jehoshaphat a mu uh ciangin ama sia Israel te ii kumpipa sa uh hi, tuaciang amate kiheak in ama sim hi. Ahihang ama hong au keak ciangin

³³ama sia Israel te ii kumpipa ahi ngawl hunlam phawk uh hi, tuaciang amate in sim nawn ngawl uh hi.

³⁴A luilamna in Syria ngalkapte khat ii thaltang a kaa khat in Kumpipa Ahab ii thikpuan kipeena panin kha hi, “Kei liam khi hi, ngal phual panin kiheam in,” ci in ngalleang hawlpa thupia hi.

³⁵Kido saan lai tengin Kumpipa Ahab sia ngalleang tungah kingingin om a, Syria te maingat hi. A liamna maa pan chi luang sia ngalleang tawdap ah hong cing a, a nitak ciangin ama thi hi.



³⁶Ni tum kuan ciangin Israel ngalkapte a lian a no tungah thupiakna hong pai a, “Mi sim in na ngam le khuapi tek uh ah cia vun,” kici hi.

³⁷Tuabangin Kumpipa Ahab thi hi. A luang Samaria ah kiciapui a, kiphum hi.

³⁸Topa ii piang tu hi a ci bangma in, ama ii ngalleang sia Samaria tuili no ah kisil a, a chi sia ui in liak a, a silna tui sia pumpi kizuak numeite kisilna tui ahi hi.

³⁹Kumpi Ahab ii a sep a vawt dangte theampo, a kumpi inn saiha taw a zepna le a khuapite asakna te theampo sia *Israel Kumpipate Tangthu* bu sungah kikhum hi.

⁴⁰Ama ii thi ciangin a tapa Ahazia in a kumpi za laih hi.

Judah Kumpipa Jehoshaphat

(2Khang tangthu 20.31 - 21.1)

⁴¹Israel Kumpipa Ahab ii a maan zawk a kum lina ciang, Asa ii tapa Jehoshaphat sia Judah te kumpi suak hi,

⁴²ama pian kum sia kum sawmthum le kum nga pha a, Jerusalem panin kum kul le kum nga sung uk hi. A nu sia Azubah hi a, Shihi ii tanu ahi hi.

⁴³Ama ii mai ah a pa Asa bangma in ama in Topa ii muna ah a maanin ngamta hi; ahihang doai biakna munte sia kisia ngawl a, mipite in tua munah sangaw biakpiakna te le ngim namtui halna te zangh uh hi.

⁴⁴Jehoshaphat in Israel Kumpipa taw kilemna vawt hi.

⁴⁵Jehoshaphat ii a sep a vawt na dangte theampo, a hanna, a ngal donate *Judah Kumpipate* ii Tangthu bu sungah kikhum hi.

⁴⁶Ama in doai biate ii biaknatau ah a pa Asa ii hun panin a taanglai numei ahizong, pasal ahizong pumpizuakte sot siat hi.

⁴⁷Edom ngam in kumpipa nei ngawl a, Judah panin ngam uk tu a khutdawn khat koi hi.

⁴⁸Kumpipa Jehoshaphat in Ophir ngam pan kham puak natu tuipi sung a pai teambawte vawt hi, ahihang tua teambawte Eziongeber ah lal a, tuipi sungah khual haw ngei ngawl hi.



⁴⁹Tua zawkciang Israel te Kumpipa Ahaziah in ama ii mite le Jehoshaphat ii mite tuipi sungah khualhaw khawm tu in pia hi, ahihang Jehoshaphat in saang ngawl hi.

⁵⁰Jehoshaphat thi a, David Khuapi ah kumpite thaana ah kiphum hi, tuaciang a tapa Jehoram in a kumpi za laih hi.

Israel Kumpi Ahaziah

⁵¹Judah ah Kumpipa Jehoshaphat maan zawk kum sawm le kum sali kumin Ahab ii tapa Ahaziah sia Israel te kumpipa suak hi, tuaciang ama in Samaria panin kum nii sung uk hi.

⁵²Ama in Topatungah maw hi, a pa Ahab ii ngamtatna tatkhaakna bang le, a nu Jezebel le Kumpipa Jeroboam bangma in ama in Topa tungah maw a Israel te mawna sungah lampui hi.

⁵³Ama in ama ii mai a a pa bangma in Baal bia in, a na sepsak hi, ama in Israel te ii PathianTopa a thin uuksak hi.



Kumpite Niina

Kumpite Niina 1

Elijah le Kumpipa Ahaziah

¹Israel te ii Kumpipa Ahab thi zawkciang Moab ngamte in Israel te langpan in tualngal tho uh hi.

²Israel te ii Kumpipa Ahaziah sia ama ii Samaria ah a kumpi inn thaam tung panin taak a, nasia takin liam hi. Tua ahikom ama in Philistine te khuapi Ekron ah kamtai paisak a, ama ii a dam kik tu le a dam nawn ngawl tu Philistine te pathian Baalzebub donghsak hi.

³Ahihang Topa ii vantung lalang khat Tishbe pan kamsang Elijah sawl a, Kumpipa Ahaziah ii kamtaite taw kisi tu in pai a, thu dongh tu in sawl hi. “Banghangin Ekronte pathian Baalzebub thu dongh tu nu ziam?”

⁴Israel ngamah pathian om ngawl hi ci in ngaisun nu ziam?” Topa in ci hi, ‘Na liamna pan dam kik ngawl tu ni hi; thi tu ni hi,’ ” ci hi. Elijah in Topa thupiak bangin ngamta a,

⁵tuaciang kamtaite kumpipa kungah heak kik uh hi. “Banghangin hong heak kik nu ziam?” ci in ama in dongh hi.

⁶Amate in zo a, “Pasal khat taw ka kisi uh a, ama in heak kik in Topa ii nang tungah, ‘Banghangin Ekronte pathian Baalzebub kungah kamtaite paisak ni ziam? Israel ngam ah pathian om ngawl hi tu na up hu ahi ziam? Na liamna pan dam kik ngawl tu ni hi, thi tu ni hi.’ ” hong cina teng sonin hong sawl hi.

⁷Kumpipa in, “Pasal pa sia bangbang pian ahi ziam?” ci in dongh hi.

⁸Ama in nganhing phaw taw a kivawt puantual khat silh a, tuaciang savun kawngkhau taw kisawm hi,” ci in amate in zokik hi. “Ama Elijah hi,” kumpi pa in ci hi.

⁹Tua zawkciang ama in ulian khat le pasal sawmnga sia Elijah sam tu in paisak hi. A ulian pa in ama sia mualno tung khat ah to in mu a, ama ii munah, “Pathian ii mihingpa awng, kumpipa in nong paisuk natu thu hong pia hi,” ci hi.



¹⁰“Kei Pathian ii mihing ka hi le van panin meikuang paisuk taken a, nang le na mihingte hong thatlum taken,” ci hi. Thakhat thu in meikuang hong paisuk a, ulian pa le a mite thatlum siat hi.

¹¹Kumpipa in ulian dang khat le pasal sawmnga sawl kik a, amate paito in, Elijah ii munah, “Pathian ii mihingpa awng, kumpipa in thakhat in nong paisuk natu thu hong pia hi,” ci hi.

¹²“Kei, Pathian ii mihing ka hile, vantung panin meikuang hong paisuk taken a, nang le na mihingte hong thatlum taken,” ci in Elijah in zo hi. Thakhat thu in Pathian ii meikuang hong paisuk a ulian pa le a mite thatlum hi.

¹³Khatvei ma kumpipa in ulian khat le mihing sawmnga sawl hi. Ulian sia in mualno tungah kaato in, Elijah maiah khupdin in mangkaa hi. “Pathian mihingpa awng, kei le ka mite hong hesuak tan. Ka nuntakna uh hong khoaikhe tan!

¹⁴Ulian dangte nii le a mite sia vantung pan meikuang in thatlum siat hi; ahihang kei tungah hong hesuak tan!” ci hi.

¹⁵Topa ii vantung lalang in Elijah munah, “Ama taw paisuk tan a, lau heak in,” ci hi. Tua ahikom Elijah sia ulianpa taw kumpipa ii kungah pai in,

¹⁶hi bangin ci hi, “Topa in hi bangin ci hi, ‘Israel ngam ah pathian om ngawl bang keak in — Ekronte pathian kungah kamtai pai sakin Baalzebub tu in paisak na hikom — dam kik ngawl tu ni hi; thi tu ni hi,’ ” ci in son hi.

¹⁷Topa ii Elijah tungtawn a, a son bangin Ahaziah thi hi. Ahaziah in tapa nei ngawl hi, tua ahikom a suapuipa Joram in, a kumpiza laih a, tua lai tak sia Judahte kumpipa Jehoshaphat ii tapa Jehoram ii a maan zawk a kum nii na ahi hi.

¹⁸Kumpipa Ahaziah ii sep le vawt a dangte theampo sia *Israel te Kumpite Tangthu* sungah kikhum hi.

Kumpite Niina 2

Elijah Vantung ah Kila to



¹Elijah sia suumpei taw Topa ii vantung ah a laakto tu hun hong theng hi. Elijah le Elisha sia Gilgal panin hong dingkhia a,

²tuaciang, lampi tungah Elijah in Elisha tungah, “Tu in hi sungah na om in;Topa in Bethel ah pai in hong sawl hi,” ci hi. Ahihang Elisha in zo a, “A nungta Topa tung le nang tungah ka thumaanna taw kamciam khi hi, hong nusia ngawl tu khi hi,” ci hi. Tua ahikom amate Bethel ah pai uh hi.

³Tua munah a teang kamsang pawlkhat te in Elisha kungah pai in, “Na Topa sia tu ni in nang kung pan Topa in la tu ahi hunlam na he ziam?” ci in dongh uh hi. “Hi hi, he khi hi. Ahihang tua thu son ba tawng,” ci hi.

⁴Tua zawkciang Elijah in Elisha munah, “Tu in hi sungah na om in;Topa in Jericho khua ah pai in hong sawl hi,” ci hi. Ahihang Elisha in zo a, “A nungta Topa tung le nang tungah ka thumaanna taw kamciam khi hi, nang hong nusia ngawl tu khi hi,” ci hi. Tua ahikom amate Jericho ah pai uh hi.

⁵Kamsang pawl khat tua munah a teang te in Elisha kungah pai in, ama dongh uh hi. “Topa in na Topa nang kung pan tu ni in la tu ahi na he ziam?” “Hi hi, he khi hi. Ahihang tua thu son ba tawng,” Elisha in ci hi.

⁶Tuasia zawkciang Elijah in Elisha munah, “Tu in hi sungah na om in. Topa in kei Jordan Ngun ah pai tu in hong sawl hi,” ci hi. Ahihang Elisha in, “A nungta Topa tung le nang tungah ka thumaanna taw kamciam khi hi, nang hong nusia ngawl tu khi hi,” ci hi. Tua ahikom amate paisuak a,

⁷kamsangte sung pan sawmnga in amate Jordan dong zui uh hi. Elijah le Elisha te sia ngun ah hong tawlna uh a, a kamsang sawmnga teng sia tawm a kikhuala na ah ding uh hi.

⁸Tuaciang Elijah in a puantual suutin, a zial zawkciang tui saatna in nei hi; tui hong kikhen a, tuaciang ama le Elisha in a lang khat ah leiko tung tawnin hong kantan uh hi.

⁹Tua munah, Elijah in Elisha munah, “Kei hong kilaak maa in nang atu bang kong vawtsak tu uuk ni ziam hong son tan,” ci hi. “Nang kong zop thei natu in na vaangletna tel ka saan tu za (*a see nii*) hong ngasak tan,” ci hi.



¹⁰“Tuasia piak tu a haksa mama ngetna hi,” Elijah in ci hi. “Ahihang nang kung panin kei hong kilaak nong mu a, ahile tua ngetna sia na nga tu hi; nong mu buale na nga buatu hi,” ci hi.

¹¹Amate lam a pai kawmin thu son uh hi; tuaciang thakhat thu in meikuang siphute ii kai meikuang ngalleang khat amate nii kilaklaw ah hong pai a, Elijah sia vantung ah suumpei in kaato pui hi.

¹²Elisha in mu a, Elijah oksan hi, “Ka pa, ka pa! Israel a dal a thahat pa! Nang pai zo hi teh!” ci hi. Tuaciang ama in Elijah mu kik nawn ngawl hi. Khuangai in Elisha in a puan tual khen nii in baltham hi.

¹³Tuaciang ama ii kungah a taaksuk Elijah ii puantual sia tawm in Jordan ngun vaal ah pai in ding hi.

¹⁴Ama in nguntui sia Elijah ii puantual taw vaat a, “Elijah ii Pathian Topa a koi sungah om ziam?” ci hi. Tuaciang ama in tui sia a vaat kik le, a tui kikhen a, tuaciang ngun langkhat ah pai hi.

¹⁵Jericho pan kamsang sawmnga teng in ama mu a, “Elijah ii vaangletna Elisha tungah om hi!” ci uh hi. Amate pai in ama taw kisi uh a, ama ii mai ah kun uh hi,

¹⁶tuaciang, “Hi sungah a thahat tingtengh sawmnga om khu hi. Na Topa zongh tu in hong paisak tan. Topa ii thaa in ama sia mualtung khat po ziam, luamkawm sung khatpo ziam ah koi hi tha tu hi,” ci uh hi. “Hi bo. Pai ngawl het tu nu hi,” ci in Elisha in zo hi.

¹⁷Ahihang amate a thukim dadong a nget uh ciang paisak hi. Sawmnga teng in mun saang mun niamna ah Elijah sia ni thum sung zong ahihang mu ngawl uh hi.

¹⁸Tuaciang amate Elisha kungah hong heak kik uh a, ama in Jericho ah amate ngakin na om a, “Pai heak vun hong ci hi ngawl khi ziam?” ci hi.

Elisha ii Lamdang Laknate



¹⁹Jericho panin pasal pawl khat Elisha kungah pai a, “Na heak bangma, Topa awng, hisia in khuapi pha khat hi, ahihang a tui pha ngawl a, nau tolsak thei hi,” ci uh hi.

²⁰“Kuang thak khat sungah ci tawm hong paipui tavun,” ci in thu pia hi. Amate in ama kungah paipui uh hi,

²¹tuaciang ama in cik ah pai in, tui sungah a ci lawn a, hi bangin ci hi. “Hisia Topa ii kammal hi, “Tui hisia a thiangtho a, ka vawt hi, ama in thina ahizong, nautolna ahizong piangsak nawn ngawl tu hi,’ ” ci hi.

²²Tuaciang tua tui Elisha ii son bangma in tua hun pan kipan thiangtho hi.

²³Elisha in Jericho nusia in Bethel ah a pai le, patang pawlkhat khuapi no khat panin hong pusuak uh a, ama ciammuina in nei uh hi. “Hi sung pan tai in, lukok pa awng,” ci in oksan uh hi.

²⁴Elijah hong kingeilee a, amate salh in, Topa min taw haamsiat hi. Tua zawkciang vom a nu nii thingtang sung pan hong pai in, patangte sung pan sawmli le nii laitham uh hi.

²⁵Elisha Carmel Mualvum ah kaato a, tua zawkciang Samaria ah heak kik hi.

Kumpite Niina 3

Israel te le Moabte Ngal kidona

¹Judah ah Kumpipa Jehoshaphat a maan zawk a kum sawmliat laitakin, Ahab ii tapa Joram sia Israel te kumpipa suak a, tuaciang ama in Samaria panin kum sawm le kum nii sung maang hi.

²Ama sia Topa tungah mawna vawt a, ahizong a pa le a nu Jezebel za in sia ngawl hi; ama in a pa ii vawt Baal biak natu milim sia baltham hi.

³Ahizong, ama mai ah a maang Nabat ii tapa, Kumpipa Jeroboam bangma in Israel mawna sungah lampui a, kheal nuam ngawl hi.

⁴Moab te Kumpipa Mesha in tuu khoai a, kumsim in ama in Israel kumpipa tungah tuunu 100,000 le tuumul 100,000 ii mul teng shia in pia hi.



⁵Ahihang Ahab a thi ciang Kumpipa Mesha in Israel te langpan in tualngal tho hi.

⁶Thakhat thu in Kumpipa Joram in Samaria nusia in a ngalkapte khawmtua hi.

⁷Ama in Judah ah Kumpipa Jehoshaphat tungah kam thaak a: “Moab kumpipa in kei langpan in ngal hong tho hi; ama sim tu in kei nong pawm tu ziam?” ci in dongh hi. “Hong pawm tu khi hi,” Kumpipa Jehoshaphat in zo hi. “Keima le a mite le ka siphute, na dei babangin zeak in.

⁸Ama ih sim natu koisung lampi tawn tu hi ziam?” ci hi. “Edom duisung kantan in a pai lamsau sia ih tawn tu hi,” ci in Joram in zo hi.

⁹Tua ahikom Kumpipa Joram, Judah le Edom te kumpipate dingkhia uh hi. Ni sali a pai zawk uh ciang a tui neak tu uh bo a, mihing atu ahizong, vanh pua ngannote atu ahizong bangma om nawn ngawl hi.

¹⁰“Man sa hi hing!” Kumpipa Jehoshaphat in ci hi. “Topa in ei teng thum sia Moab kumpipa ii a uukpo hong vawt tu in hong koi hi!” ci hi.

¹¹Kumpipa Jehoshaphat in, “Ama tungtawn in Topa ih dok thei tu hi sungah kamsang khat om ngawl ziam?” ci hi. Kumpipa Joram ii ngalkapte sung ulian khat in zo a, “Shaphat ii tapa Elisha hi sungah om hi. Ama sia Elijah ii khut dawn pa ahi hi,” ci hi.

¹²“Ama sia kamsang maan khat hi,” Kumpipa Jehoshaphat in ci hi. Tua ahikom kumpipate thum sia Elisha kungah pai uh hi.

¹³“Banghangin nang hong hu tu khi ziam?” Elisha in Israel kumpipa munah ci hi. “Na pa le na nu ii dok kamsangte dongh tu in pai tan,” ci hi. “Hi ngawl hi,” ci in Joram in zo hi. “Topa in kumpipa thum teng sia Moab kumpipa ii a uuk po hong law tu in hong koi hi,” ci hi.

¹⁴Elisha in zo a, “A na ka sepsak a nungta Topa taw kiciam khi hi, na kipawl puipa Judah kumpipa Jehoshaphat ka zatak hang hi buale nang taw bangma kipee aw nuam ngawl khi hi.



¹⁵Tu in tumthei thiam khat hong sam tavun,” ci hi. Tumthei thiampa in tengtong hong tum tak ciang Topa ii thahatna Elisha tungah hong pai a,

¹⁶tuaciang, ama in, “Hi sia Topa pauna hi: ‘Luamko dungah dum to vun.

¹⁷Vui ahizong ngua ahizong na mu mun uh a om ngawl hang, hi luam sia tui taw hong kidim tu a, tuaciang noma, na khuite uh le na vanh pua ngannote ii dawn tu kicing piikpeak in na nei tu uh hi,’ ” ci hi.

¹⁸Tuaciang Elisha in zomto a, “Hisia in Topa atu a ol mama nasep hi a; Moabte tung zongh ah zawna hong pia tu hi.

¹⁹Noma in amate ii a hoi mama khuapi, kulh taw a kidal te na zo tu uh hi; amate ii thingnga kungte na phuktham tu uh a, a tuinaakte khaktan in, leipha a lote sia suangtum taw siinin na lalcipsak tu uh hi,” ci hi.

²⁰A khuavak ni zing ciangin zingsang sangaw biakpiakna vawt hun laitakin, Edom sang pan tui hong luang a, leitangh te khuumin cing hi.

²¹Kumpi thum te in amate sim tu in hong pai hi ci in Moabte in a zaak uh ciang pa a minpiang ngalhiam toai thei theampo a moibel pan a haambel dong kisam uh a, ngamngi ah amate dinmun lasak uh hi.

²²A zing ciang hong thaw tak ciang, tui tungah ni hong taang a, tui sia chi bang a san in kimu hi.

²³“Chisan hi,” ci in amate in au uh hi. “Ih ngalte thum in amate le amate kido in kithat hi tu hi. A ngiaphual pai in phuul tawng,” ci uh hi.

²⁴Ahihang amate ngiaphual hong thet uh ciang, Israel te in amate do in, amate not kik uh hi. Israel te in del tan a, Moabte that in,

²⁵a khuapite lalthamsak uh hi. Leipha lo khat po a kantan uh ciangin Israel misim in tua lo sungah suang lawn uh a, a lote suangtum taw a kisit dongin lawn uh hi; amate in ciktui naakte zongh hucip uh a, tuaciang thingnga kungte phuk uh hi. A khakbel ciangin a kumpi tona khuapi Kir Heres bek hong taanglai a, tuaciang suangtum lawnte in uumci in sim uh hi.

²⁶Moab kumpipa in ama ngallelna a phaw tak ciang ama in namsau saat thiam mihing zasali tealin a ngalte kawm panin Syria kumpipa kungah suakta tu in hanciam a, ahihang tangtun ngawl hi.

²⁷Tua ahikom ama in ama za laih tu a tapa upabel sia la in, khuapi luphung tungah Moab pathian tungah sangaw biakpiakna in pia hi. Israel te sia lau ngawp uh a, tua ahikom amate khuapi pan nungkin in amate ngamah cia kik uh hi.

Kumpite Niina 4

Elisha in Meingong Zawng khat Hu

¹Kamsang pawl khat sung a kihel khat ii meingong nu sia Elisha kungah pai in, “Topa awng, ka pasal sia thi zo hi! Na heak bangma in ama sia Pathian kiita mihing khat hi, ahihang tu in ama ii lei a batna pasal khat hong pai a, ka pasal ii leiba taangin ka tate nii sia sila tu in la tu hong kithoi hi,” ci in son hi.

²“Nang atu bang hong lawsak tu khi ziam?” ci in ama in dongh hi. “Inn ah bang nei ni ziam, hong son tan,” ci hi. Ama in, “Olive thau thawl khat simngawl bangma dang nei mama ngawl khi hi,” ci hi.

³Elisha in, “Na innpaamte kungah pai tan a, thambeal a tam thei zaza na zawng tan,” ci in sawl hi.

⁴“Tua zawkciang nangma le na tapate inn sungah pai in, kongkha khak vun a, thambealte ii sungah sathau bugh tu in kipan tavun. Khat a dim simin a hui ah heam vun,” ci hi.

⁵Tua ahikom nupi nu in a tapate taw inn sungah tumin, baangkua a kha zawkciang olive thau a om thawlno sia panin a tapate ii hong ciapui thambealte sungah sathau sung suk hi.

⁶Amate in thambealte a dip siat zawk uh ciang nupi nu in a dang a om lai ziam ci in dongh hi. “Tuasia a khakbel hi,” a tapate khat in ci hi. Tuasia ciang olive thau a luan hong tawp hi.



⁷Ama in kamsangpa Elisha kungah pai kikin, tua pa in ama munah, “Olive thaute zuak tavun a, na leiba theampo lo tavun, tuaciang a sum a khom hong vaal tu a, nang le na tapate in tua taw na nungta tu uh hi,” ci hi.

Elisha le Shunem pan Nupi Hau Khat

⁸Nikhat ni in Elisha sia Shunem khua ah haw hi, tua munah nupi hau khat om hi. Ama in kamsang pa sia an ne tu in sam a, tua panin kipan Shunem ah a pai simin nupi ii inn ah an ne hi.

⁹Ama in a pasal munah, “Hi sungah hong pai tawntung pasal sia mi thiangtho khat hi vangiat tu hi ci in ka he hi.

¹⁰Innkhum tungah khaanno khat vawt tawng, lupna khat, sabuai khat, tokhum khat le meiinn khat tua khaan sungah ih koi tu hi, tuaciang ama hong haw simin tua munah om thei tu hi,” ci hi.

¹¹Ni khat ni ciang Elisha sia Shunem ah hong heak kik a, toitang tu in a khaan ah kaato hi.

¹²Ama in a naseampa Gehazi munah, nupinu samin sawl hi. Ama hong pai ciang,

¹³ama in Gehazi munah, “Ei ii ih kitaangsap teng hong sik natu hong ngim law hu in ama atu bang vawtsak tu khi ziam dongh in. Kumpipa tungah ahizong ngalkap ukpipa tungah ahizong kammal khat po sonsak thei tu khi ziam?” ci hi. “Hi sungah ka mite kawmah ka kisap theampo nei khi zam,” ci hi.

¹⁴Elisha in Gehazi munah, “Tua ahile ama atu bang vawtsak thei tu khi ziam?” ci dongh hi. Ama in zo a, “Ama in tapa nei ngawl a, a pasal le huai zo meak hi,” ci hi.

¹⁵“Ama hi sungah hong pai natu son in,” Elisha in thupia hi. Ama hong pai a, baangkua ah hong ding hi,

¹⁶tuaciang Elisha in ama munah, “Mai ciang hi hun hong thet ciangin tapa khat na khut sungah toai tu ni hi,” ci hi. Ama in “Aw! nong hesuakna in leilot thu hong son heak in. Nang sia Pathian mihing ni hi,” ci hi.



¹⁷Ahihang Elisha ii ci bangin mai kum tua hun khawng tu ciangin ama in tapa khat hing hi.

¹⁸Tuazawk kum tawmvei ciang anlaak hun laitakin, patangno sia zing khat a pa taw a pua ah hong pai hi, a pa sia lo sungah an late taw ding hi.

¹⁹Thakhat in patangno sia hong au a, “Ka lutang na hi! Ka lutang na hi!” ci hi. A pa in, “Patangno sia a nu kungah na puak tan,” ci in naseamte khat sawl hi.

²⁰Naseam pa in patangno sia a nu kungah puak kik a, a nu in ni sun dong a kaang sungah toai a, tua hun ciang a ta thi hi.

²¹Ama in patangno sia Elisha ii khaan ah kaato pui in lupna tungah sialin nusia a, a nung pan kongkha khak hi.

²²Tuaciang ama in a pasal samin, ama munah, “Naseamte khat hi sungah laa taw hong paisak tan. Kamsang pa Elisha kungah ka pai kul tu hi. A manlang thei belin hong heak kik tu khi hi,” ci hi.

²³“Banghang tu ni na pai kul tu ziam? Tu ni sia Sabbath le hi ngawl Thathak Poai ni le hi ngawl hi,” a pasal in ci hi. Ama in, “Pha maw bo,” ci in zo hi.

²⁴Tuaciang ama in laa a kungh thuasakin, naseam pa thupia hi. “Laa sia a manlang thei za in paisak in, keima kong sawl ngawl po haisak heak in,” ci hi.

²⁵Tuabangin ama ding khia in Elisha ii omna Carmel Mualvum ah pai hi. Ama ii hong pai sia Elisha in a khuala thithim na pan mu a, a naseampa Gehazi munah, “En in, zia sungah Shunem pan nupinu hong pai hi!

²⁶Manlang in pai tan a, ama ahizong a pasal ahizong a tapa ahizong na theampo a kimang thei ziam, dawp tan,” ci hi. Nupinu in Gehazi munah na theampo pha hi ci hi,

²⁷ahihang Elisha kung a thet ciang a mai ah kun sukin a peangte pom hi. Gehazi in ama sawn tu in kithoai ahihang Elisha in, “Koi po in. Ama nasia



takin a thin kiam ahi hunlam mu ngawl ni ziam? Tuaciang Topa in a bang thu ci in kei hong son ngawl het hi,” ci hi.

²⁸Numei nu in ama tungah, “Topa awng, tapa khat nang tungah hong ngen kana khi ziam? Lametna saangpi ka nei thaak tu in hong hi heak in hong ci hi ka na ngawl khi ziam?” ci hi.

²⁹Elisha sia Gehazi sangah kiheakin, ama munah, “Manlang in! Ka ciangkhut la in pai tan. Lampi ah na kisik pui pawpo paupui tu in tawlnga heak in, tuaciang khat po in hong paupui le zong ama na zokik natu hun bosak heak in. A inn ah tangtan in pai tan a, patangno sia tungah ka ciangkhut na nga tan,” ci hi.

³⁰Numei nu in Elisha munah, “A nungta Topa tung le nang tungah ka thumaanna taw hong kiciam khi hi, nang hong nusia ngawl tu khi hi!” ci hi. Tua ahikom amate in hong heak kik khawm uh hi.

³¹Gehazi sia Elisha ii mai ah paikhol in, a ciangkhut sia patangno ii tungah nga in om ahihang bangma a nging le om ngawl, nuntakna lim a kimu le a om bua hi. Tua ahikom ama Elisha kungah hong heak kik a, tuaciang hi bangin ci hi. “Patangno sia khanglo ngawl hi.”

³²Elisha hong thet ciangin, ama innkhan sungah hong tum a, patangno a lupna tungah a thi sa in om mu hi.

³³Ama in kongkha khak in Topa tungah thu ngen hi.

³⁴Tua zawkciang ama in patangno tungah boksuk a, a kam le a kam, a mit le a mit, a khut le a khut a kisi tu in bok suk hi. Tuabangin patangno ii tungah kizan in a bawsuk ciang patangno ii cii lum tu in hong kipan hi.

³⁵Elisha hong tho a, khaan sung tengah hong vak in, tua zawkciang pai kik a, patangno ii tungah khatvei ma hong kizan kik hi. Patangno sia sali vei hetchia lo a, tua zawkciang a mit hak hi.

³⁶Elisha in Gehazi sam a, patangno sia ii nu samin sawl hi. Ama hong sungtan ciang ama ii munah, “Hi sungah, na tapa!” ci hi.



³⁷Ama Elisha ii peangah kisp suk a, a mai lei phasak hi; tua zawkciang ama in a tapa la in paisan hi.

Na Lamdang Lakna A dang Niite

³⁸Khatvei ngam buppi sungah kialpi a tun khat lai in Elisha sia Gilgal ah heak kik hi. Ama in kamsangte pawlkhat a hil laitakin, a naseampa sawlin bealpuie khat mei tungah suangin satui huanin sawl hi.

³⁹A naseamte khat lo sungah pai in lopa pawl khat la in pai hi. Ama in uum ngui khat mu a, uum nga a puak zawk za lo in ciapui hi. Ama in tuate ciapui in bang ziam ci in he ngawl bul a zen zawkciang satui sungah tha hi.

⁴⁰A mihingte atu satui sia bungah in nesak tu in ahi ciang, amate in tep a, Elisha munah satui sia “Ngu kisaw hi!” ci uh a, tuabangin a ne bua uh hi.

⁴¹Elisha in anvui pawlkhat ngenin beal sungah tha hi, tuaciangin ama in, “Amate neak tu satui pawlkhat buh thua lai vun,” ci hi. Tua zawkciang satui sia bangma siat huai nawn ngawl hi.

⁴²Hun dang khat ma ah, Baal Shalishah panin pasal khat hong pai a, tua kum an kila masa bel mangtaang taw a kivawt anluum luum kul le vaimim ngap kibal thak pawlkhat hong paipui hi. Elisha in a naseam pa munah tua kamsangte, tuate taw vaakin sawl a,

⁴³ahihang naseampa in zokik in, “Mihing zakhat atu hi teng kikhom tu in um ni ziam?” ci hi. Elisha in zo a, “An neak tu in amate pia in, banghangziam cile ama in ne tu a, a neak vaal zongh om tu hi, Topa in ci hi,” ci in zo hi.

⁴⁴Tua ahikom a naseam pa in an lui a, tuaciang Topa ii ci bangma in, amate theampo in ne a, a vaal zongh pawlkhat om hi.

Kumpite Niina 5

Naaman Kidamsak

¹Syria te ngalkap hon ukpipa Naaman sia Syria kumpipa in nasia takin zakta in upat vawt hi, banghangziam cile Naaman tungtawn in Topa in Syria ngalkapte sia zawna pia hi. Ama sia ngalkap thupi khat hi, ahihang ama in a kiitak huai mama vun natna khat thuak hi.



²Amate ii ngalnguk sim hun khat ah Syria ngalkapte in Israel taw kido na sungah Israel numeino khat ciapui uh a, tua nu sia Naaman zi ii naseamnu suak hi.

³Ni khat ni in ama in a tonu tungah, “Samaria a teang kamsangpa kungah ka Topa pai le ka oai hi! Ama in a natna teng damsak tu hi,” ci hi.

⁴Naaman in hi thu a zaak ciang ama kumpipa kungah pai in, numeino ii pauna teng son hi.

⁵Kumpipa in, “Israel kumpipa kungah pai tan a, hi ka laithak ama atu sia na keng tan,” ci hi. Tua ahikom Naaman dingkhia in, nguntang tul sawmthum, khamtang tulluk, puansilh laih natu puanhoi sawm keng hi.

⁶Ama ii ken laithak sungah hi bang teng ki at hi: “Hi laithak in ka ulianpa Naaman kong heaksakna hi. A natna pan na damsak natu ka dei hi.”

⁷Israel kumpipa in tua laithak a sim ciangin, thin nop ngawlina taw a puansilh teng laitham hi. “Banghangin Syria kumpipa in mihing hisia pa kei in damsak thei tu in hong um ziam? Nuntakna le thina tungah vaang nei Pathian vei hong sa ziam? Ama in kei taw kihau nuam in hanciam ahi hunlam sia kician hi,” ci hi.

⁸Kamsangpa Elisha in bang thu piang ci in a zaak ciangin ama in kumpipa tungah kam thaak hi: “Banghang in na thin ngim ziam? A mihing pa keima kungah hong puak tan, Israel ngam sungah kamsang khat om nginge hi ci in lak tu khi hi,” ci hi.

⁹Tua ahikom Naaman in a siphu le a ngalleang taw pai in Elisha ii kongbiang ah ding hi.

¹⁰Elisha in a naseam khat sawl a, pai in a Jordan Ngun sungah sali vei kisil taken, tua hile a natna theampo pan dam tu hi cisak hi.

¹¹Ahihang Naaman in thin so takin tua mun nusia a, “Kei ngaisutna pan ama in a no bel in hong pusuak in, aTopa Pathian munah thu hong ngetsak tu a, ka natna mun san te tungah a khut hong vaan tu a, hong damsak tu in ka um hi!



¹²Tua ban ah Damasacus ah Abana ngun, Pharpar ngun te Israel ngam sungah ngun te saangin phazaw ngawl ka na ziam? Tu ate ii sungah kibual in ka dam lel buatu ziam?” ci hi.

¹³A naseamte ama kungah pai in, “Topa awng, kamsangpa in a haksa vawt tu in hong sawl le zong vawt tu hi ngawl ni ziam? Tu in ama ci bangin bang hangin ngun sungah kibual in dam tu uk ngawl ni ziam?” ci hi.

¹⁴Tua ahikom Naaman sia Jordan ngun ah paisuk in, Elisha ii thupiak bangin ngun sungah ama le ama sali vei tui ki pap a, tuaciang ama dam thiang sitset hi. Ama ii sa sia hong sah in hong dam hi, nausente cii le sa bang ahi hi.

¹⁵Ama sia a mihingte theampo taw Elisha kungah hong heak kik a, “Tu in Israel te ii Pathian ngawl pathian dang om ngawl hi ci in ka he hi, Topa awng, nong hesuakna in, kei tung pan letsong khat hong saang tan,” ci hi.

¹⁶Elisha in zo a, “A nungta Topa ii a na ka sepsak sia taw kiciam khi hi, letsong bangma saang ngawl tu khi hi,” ci hi. Naaman in a saan natu in kunh kenkon top ahihang ama in saang nuam ngawl hi.

¹⁷Tua ahikom Naaman in, “Ka letsong te hong saang ngawl tu na hile laa nii ii puak khop leitangh hong ciapuisak tan, banghangziam cile tu pan kipan Topa tung sim ngawl pathian dangte tungah sangaw biakpiakna pia nawn ngawl tu khi hi.

¹⁸Tuabangin hi leng, Rimmon biak innpi ah Syria te pathian biakpiakna vawt tu in Syria kumpipa ka zui ciang Topa kei hong maisak tu hi ci in ka um hi. Topa in hong maisak tatak tu hi,” ci hi.

¹⁹Elisha in, “Thin nuamin pai tan,” ci a, tuaciang Naaman dingkhia hi. Ama in lam khuala a thet maa in,

²⁰Elisha naseampa Gehazi in, ama le ama tungah hi bangin kici hi, “Ka Topa in Naaman sia bangma piasak ngawlin pai thongsak hi. Tua Syrian pa ii piak teng sia a saan tatak tu ahi hi. A nungta Topa taw kiciam ing ama ii nung pan del in, na khat pawpo ama ii tung pan nga tong,” ci hi.



²¹Tua ahikom ama in Naaman nung panin del hi. Naaman in ama ii nung pan mihing khat in del ci in a mu ciangin a leang tung pan tuakin, ama taw kisi a, “A phamaw po om ziam?” ci in dongh hi.

²²“Om ngawl hi,” Gehazi in zo hi. “Ahihang ka Topa in nangma tungah sonin hong sawlna pan, tu ma hiat in Ephraim mualtung ngam panin kamsangte pawl sung pan nii hong theng a, amate nguntang tulthum le puan laih natu kop nii pia le hong oai hi,” ci hi.

²³Naaman in, “Nong hesuakna taw nguntang tulluk la in,” ci in zo hi. Ama in lasak hamtang a, nguntangte ip nii sungah sawm in, puansilh laihna kop nii pia a, a naseamte nii aap in, Gehazi mai ah tua vanhte pua in paisak hi.

²⁴Amate in Elisha ii teenna mualtung a thet ciang Gehazi in ipte nii saangin inn sungah sungtan hi. Tua zawkciang ama in Naaman ii naseamte ciasak hi.

²⁵Ama in inn sungah tum kik a, tuaciang Elisha in ama munah, “Koisung pai ni ziam?” ci in dongh hi. “Topa awng, koima pai bong,” ci in ama in zo hi.

²⁶Ahihang Elisha in, “A mihingpa in nang taw kisi tu in leang tung pan hong tuak lai in, kei zongh ka thaa taw hong om ngawl ka na khi ziam? Hi sia sum ahizong, puan le olive huante ahizong, sapit huante ahizong, tuu le khuite ahizong, letsong saan tu hun hi ngawl hi.

²⁷Tu in Naaman ii natna teng nang tungah hong theng tu a, nang le na suan na paal theampo in tua natna a tawntungin vei tu uh hi,” ci hi. Gehazi a paikhiat ciang ama in phaak natna nga in a vun sia vuuk bangin kaang hi.

Kumpite Niina 6

Heitang Nga kikna

¹Ni khat ni in, Elisha ii a uk kamsang pawlkhat te in Elisha tungah amate lungkim ngawlna zasak uh hi, “Ka teenna uh mun no lei hi, tua ahikom Jordan ngun ah pai in, thing pawlkhat phukin,

²ten natu inn kasak tu uh hong oai tan,” ci uh hi. Elisha in, “Pha hi,” ci in zo hi.



³Amate sung pan khat in amate taw paikhawm tu in Elisha paa a, ama lungkim in paikhawm uh hi.

⁴Jordan a thet uh ciangin amate sia naseam tu in hong kipan uh hi.

⁵Amate sung pan khat in thing khat a phuu ciangin thakhat thu in a heitang hong zukin tui sungah taak hi. Ama in Elisha ii munah, “Bang law tu khi ziam? Topa awng. Hei sia a kikawm hi!” ci hi.

⁶Elisha in, “Koi sung santak ah taak ziam?” ci in dongh hi. A taakna san a lak ciang Elisha in ciangkang khat saattan in, tui tungah a lot le a heitang tui tungah hong kilaam to hi.

⁷“La in,” ci in a sawl ciang mihing pa in kun sukin heitang tawm hi.

Syria Ngalkap honpite Kizo

⁸Syria kumpipa sia Israel te taw kido hi. Ama in uliante taw kikum in, ngiaphual saat natu mun khat teal hi.

⁹Ahihang Elisha in Israel kumpipa tungah tua mun nai ah a pai ngawl natu, kidop natu kam thaak hi, banghangziam cile Syria te in tua mun panin pang hi.

¹⁰Tua ahikom Israel kumpipa in tua mun nai ah a om mihingte munah kidop natu thu puak hi, tuaciang amate sia ngal nang tu in kithoai sa in om uh hi. Hi bangin tam vei ma hong piang hi.

¹¹Syria kumpipa sia hisia huvau in nasia takin a thin lal hi; ama in a uliante samin amate dongh hi, “No sung pan akua bel sia Israel kumpipa sangah pang nu ziam?” ci hi.

¹²Khat in zo a, “Kuama a pang om ngawl hi, Kumpipa awng. Kamsangpa Elisha in Israel kumpipa tungah na innkhan sungah thuku na son theampo zong son siat hi,” ci hi.

¹³Kumpipa in, “Ama koi sungah om ziam? Zong vun! Ama man tu khi hi,” ci hi. Ama ii munah, Elisha sia Dathan ah om hi ci in a kison ciangin ama in,



¹⁴tua munah ngalkap le ngalleang tam ma puak hi. Amate sia a khuapi no ah zan in theng a, uumci uh hi.

¹⁵A khuavak ni zing tuungin Elisha ii naseampa hong tho a, inn pua ah pusuakin khua a et ciang, khua ii kiimkot ah ngalkapte, ngalleangte le siphute mu hi. Ama in inn sungah tum kikin, Elisha ii munah, “A lal hi zo hing, Topa awng, bang ih law thong tu ziam?” ci hi.

¹⁶“Lau heak in!” ci in Elisha in zokik a, “Amate sangah a pangte sangin ei sangah hong pangte tam zaw hi,” ci hi.

¹⁷Tua zawkciang ama thu ngen a, “Aw, Topa, ama mittangte khua a mu thei natu honsak in,” ci hi. Topa in Elisha ii thungetna zo a, tuaciang Elisha ii naseampa in a et to le Elisha ii kiimkot ah mualte ii pangh sia siphu le meikuang ngalleangte taw kidim in mu hi.

¹⁸Syria te in a sim uh ciang Elisha in thungen a, “Aw Topa, hi mite a mit uh tawcipsak in!” ci hi. Topa in a thungetna zo a, a ngalte a mittaw cipsak hi.

¹⁹Tuaciang Elisha in amate kungah pai in, “No sia lam khial nu hi, khuapino na zon uh sia hi sung hi ngawl hi. Mihing na zon uh sia kungah keima hong paipui tu khi hi,” ci hi. Tuaciang ama in amate sia Samaria zotpui hi.

²⁰Amate khuapi sung a tum po ciang Elisha in thu ngen a, “A mittang uh honsak in, Topa awng, amate khua mu theisak in,” ci hi. Topa in a thungetna zo a, amate khua muna a ngei bang hisak kik a, tuaciang khua a et uh ciang amate sia Samaria sungsuam ah om ahi hunlam kimu uh hi.

²¹Israel kumpipa in Syria te a mu ciang Elisha dongh hi. “Ka thatlum tu ziam, Topa ka thatlum tu ziam?” ci hi.

²²“Thatlum heak in,” kidona phual ah na mat sa ngalkapte zong thisak ngawl tu ni hi. Amate neak tu dawn tu khat po pia in a, amate kumpipa kungah cia kiksak in,” ci hi.

²³Tua ahikom Israel kumpipa in amate atu aneak poai lian khat vawtsak a, amate ii a neak a dawn zawkciang Syria kumpipa kungah ciasak hi. Tua hun pan kipan Syria te in Israel ngam ngalnguk a sim tawntung teng kheal uh hi.

Samaria Uumci na

²⁴Tua zawk tawm vei ciang Syria te kumpipa Benhadad in ama ii ngalkap hon bupte lampui in Samaria uumci hi.

²⁵Tuabang a ki uumci hu in khuapi sungah anneak tu sia hong haksa mama a, laa khat ii lutang sia nguntang sawmliat manh a, inn vakhu eak pound lang ciang nguntang nga manh hi.

²⁶Israel kumpipa sia khuapi luphungte ii tungah vak sia numei khat au in, “Hong hu tan, Kumpipa awng!” ci hi.

²⁷Ama in zo a, “Topa in nang hong hu buale kei in nang bang hong pia zo thong tu khi ziam? Zungtaang le zu te nei na khi ziam?”

²⁸Na haksatna bang tatak ziam?” ci hi. Ama in zo a, “Ning zeini in hi lai a numei sia in ngaisutna hong pia a, kei nauno sia tua ni in ne tu, a zing ciang ama ii nau sia ne tu ci in ka thukim uh hi.

²⁹Tua ahikom ka nauno sia ka huan uh a ka ne uh hi. A khuavak ni ciang ama nau sia ne tu ka ci le ama in phual hi,’ ci hi.

³⁰Kumpipa in hi thu a zaak ciang a khuangaih suakin a puansilh lai baltham hi, tuaciang a puansilhthe ii sungah khau-ip puan a silh sia ama kung nai ah a pai mihingte in mu hi.

³¹Ama au in, “Ni tum maa in Elisha ii lu a kitan buale Pathian in hong vaat lum taken!” ci hi.

³²Tuaciang ama in Elisha man tu in kamtai paisak hi. Tua laitakin Elisha sia inn ah ama ii kungah a haw upa pawl khat taw om uh hi. Kumpipa ii kamtaite hong thet maa in, Elisha in upate munah, “Tual that pa in kei that tu in khat hong paisak hi! Tu in ama hi sung hong thet ciang kongkha khak vun a, tumsak heak vun. Kumpipa ama mama zongh a nung hiat pan hong pai tu hi,” ci hi.

³³Hi teng a pau zongh maan tak ngawl lai in kumpipa hong pai a, “Hi ngimna ei tungah hong puak sia Topa hi. Ama ii na khat pawpo a vawt tu ngakin banghangin om top tu khi ziam?” ci hi.



Kumpite Niina 7

¹Elisha in zo a, “Topa ii pauna ngai in! Zing ciang tu hunin Samaria ngam sungah a phabel zungtaang pound sawm ciang ahibuale mangtaang pound kul ciang nguntang khat taw lei thei tu nu hi,” ci hi.

²Kumpipa a cing tuam pa in, “Tuabang piang thei ngawl tu hi —Topa in thakhat thu in antang hong puak hial zong piang thei ngawl tu hi,” ci hi. Elisha in, “Tuabang a pian sia mu tu ni hi, ahihang nang in tuate na ne buatu hi,” ci in zo hi.

Syria Ngalkapte Dingkhia

³A phaak pasal li sia Samaria kongpi pua sangah om uh hi, tuaciang amate khat le khat hi bangin kipaupui uh hi, “Banghangin hi sungah ih thi dong ngak tu hi ziam?

⁴Khuapi sungah tum tu le lui thawthong hi, banghangziam cile, tua munah ih pukthi tu hi; ahihang hi sungah om leang zong ih thi veve tu hi. Tua ahikom Syria te ii ngiaphual sungah tum ka tawng; a sia bel amate ii hong vawt thei sia hong thatlum tu hi, ahizong ih nuntakna hong kikhoaikhe tha tu hi,” ci uh hi.

⁵Tua ahikom khuangial tu a kithoi ciang, amate in Syria te ii ngiaphual ah pai uh hi, ahihang tua mun a thet uh ciangin, tua munah kuama a na om bua hi.

⁶Topa in Syria te ii zaakna ah ngalkap hon lianpi le siphu te le ngalleangte ngin zacak a, tuaciang Israel kumpipa in Hit te le Egyptte ngal cialin, amate simsak hi ci in Syria te in ngaisun uh hi.

⁷Tua ahikom tua nitak in Syria te in amate nuntakna kihuk natu in taikeak uh a, a puanbukte, siphute, le laate nusia uh in a ngiaphual sia a om babangin nusia uh hi.

⁸Pasal phaak li teng in ngiaphual kiil a thet uh ciang, puanbuk khat ii sungah tum uh a, tua munah a mu po ne in dawn uh hi, ngun, kham le puansilh a mu po zongh zamh uh hi, tuaciang amate pusuak in phual uh hi; tua zawkciang



amate hong heak kik a, puanbuk dang khat ah tum in a ngamtat ngei uh bangin taa uh hi.

⁹Ahihang amate khat le khat hi bangin kici uh hi, “Hi bangin ih ngamtat tu hi ngawl hi! Eima in thuthang pha nei a ciang, eima bek ii ih kep tu hi ngawl hi. Tua thu son tu zingsang dong ih ngak le daan hong kipia nanak tu hi. Thakhat in pai in, kumpipa ii uliante munah ko tawng,” ci uh hi.

¹⁰Tua ahikom amate sia Syria te ii ngiaphual nusia in Samaria ah a heak kik zawkciang, kongpi cingte munah oksan uh a, “Ko teng Syria te ii ngiaphual ah ka pai uh le kuama mu ka nei bua uh a, a pau a haam zongh za ngawl khu hi; a siphute le a laate zongh a khau uh kisuut ngawl hi; tuaciang puanbukte zongh Syria te ii nusiati bang linlian in om hi,” ci uh hi.

¹¹Kongpi cingte in tua thu taangko uh a, kumpi inn sung dongin hong kiko uh hi.

¹²Zan lai ma hi napi kumpipa hong tho a, a uliante munah hi bangin ci hi. “Syria te ii ngealna bang ziam ci in hong son tu khi hi! Amate in hi sungah kialpi a tun sia he hi, tua ahikom amate in ngiaphual nusia in ngam sungah a buh tu in pai hi. Amate in ei sia khuapi nusia in pai tu a, an zong tu in hong um hi, tuasia ciang amate in ei sia hong hing mat tu a, khuapi hong suan tu hi,” ci hi.

¹³Ama uliante khat in, “Khuapi sung a mihingte sia bangbang po ahizong a thi sa te taw kibang in a lal hi zo hi hing. Tua ahikom a thi mong siphu nga teng taw pasal pawl khat paisakin, bang thu om ziam kansak tawng,” ci hi.

¹⁴Amate in pasal pawl khat teal in, kumpipa in ngalleang nii taw paisak a, Syria ngalkapte bang tat ziam ci in dawp tu in thupia hi.

¹⁵Pasalte Jordan ngun dong pai uh a, tuaciang lampi dungah puan le vanh Syria ngalkapte ii a tai kawmin a nusiatte mu uh hi. Tua zawkciang amate hong heak kik uh a, kumpipa tungah thu ko uh hi.

¹⁶Samaria mite Syria te ngiaphual phuul tu in hong kiphul ngawpin del uh hi. Tuaciangin Topa ii ci sa bangma in a pha bel zungtaangte pound sawm ciang tua ahibuale mangtaang pound kul ciangin nguntang khat taw kizuak hi.

¹⁷Israel kumpipa in ama a cing tuam ulian pa sia khuapi kong cing tu in koi hi. Tua ulian pa sia mipite in siiklum hi, kumpipa in ama taw kimu in a pai laitak Elisha ii son khol bangin thi hi.

¹⁸Elisha in kumpipa munah a zing ciang tua hunin a phabel zungtaangte pound sawm ahibuale mangtaang pound kul sia nguntang khat taw kizuak tu hi' a ci lai in,

¹⁹tua ulian pa in zo a, “Tuabang piang thei ngawl tu hi — Topa in thakhat thu in antang hong puak hial zong piang thei ngawl tu hi,” ci hi. Tuaciang Elisha in zo a, “A pian mu tu ni hi, ahihang nang in na ne buatu hi,” na ci hi.

²⁰Tuasia bang tatak in ama ii tungah piang a — ama thi in, khuapi kongpi ah mihonpite in ama siikcil hi.

Kumpite Niina 8

Shunem pan Nupi nu Heak kik

¹Tu in Elisha in Shunem ah a teang nupinu, a tapa a thi sa a thaw kiksak sia munah, Topa in kum sali sung a ngei tu kialpi khat a ngam sungah tungsak tu ahikom, ama sia leidang khat ah, a innkuanpuite taw a ten natu in son hi.

²Ama in a sawlna mangin a innkuanpuite taw Philistia ah kum sali sung teang hi.

³Kum sali bo zawkciang ama hong heak kik a, kumpipa ii munah a inn le a leitangh te ama tungah a kipiak kik natu ngen hi.

⁴Ama in kumpipa sia Elisha ii naseampa Gehazi taw kipaupui in om mu hi; kumpipa in Elisha ii a lamdang nasepte he nuam hi.

⁵Gehazi in Elisha ii mihing khat a thawsak kikna thu a sason lai tak tua nu in kumpipa tungah ngetna nei hi. Gehazi in, “Kumpipa awng, hi sungah ih son nupi sia le Elisha ii a thaw kiksak a tapa om hi,” ci in son hi.



⁶Kumpipa ii dokna te a zona in Gehazi ii son teng sia maan hi ci in nupi nu in son hi, tuasia ciang kumpipa in a uliante khat samin, ama ii neisa teng theampo a piak kik natu le kum sali a om ngawl sung theampo a, a lo sung pan a piang ante theampo ii manh a piak kik tu in thu pia hi.

Elisha le Syria te Kumpipa Benhadad

⁷Syria te ii Kumpipa Benhadad ii cinat hun khat laitakin Elisha sia Damascus khua ah pai hi. Elisha tua munah om ci in kumpipa tungah a kison ciang,

⁸ama in a uliante khat Hazael munah, “Kamsangpa letsong khat na puak tan a, kei ka cidam kik tu ziam, dam nawn ngawl tu khi ziam Topa hong doksak taken,” ci hi.

⁹Tua ahikom Hazael ii kalaoh sawmli ii puak khop Damascus pan a piang vanh phabel teng taw Elisha ii kungah pai hi. Hazael in ama taw a kimu ciang ama in, “Na naseampa Kumpipa Benhadad in nang kungah pai in hong sawl a, ama ii natna sia dam kik tu ziam dam nawn ngawl tu ziam ci in hong donghsak hi,” ci hi.

¹⁰Elisha in zo a, “Topa in ama thi tu hi ci in hong lak hi; ahihang ama ii kungah pai tan a, ama dam kik tu hi na ci tan,” ci hi.

¹¹Tuasia zawkciang Elisha in a lau huai mama mai puak taw Hazael ii mai nopmawk dong a maitang salh hi. Thakhat thu in Elisha a thitui luang hi.

¹²Hazael in, “Banghangin kap ni ziam, Topa awng,” ci in dongh hi. “Israel mite tungah a lipkhap huai mama na ngamtat tu teng hu hi,” ci in zokik hi. Nangma in a kulhpate na haltum tu a, a khangmoite a phabel teng na thatlum tu a, patangnote na vaatlum tu hi, naungil omte ii ngil na khuakeak tu hi,” Elisha in ci hi.

¹³“Banghangin taza ta in vaanglian thei tu khi ziam kei sia bangma ka hi bua hi,” Hazael in ci hi. “Topa in hong son zo hi, nang sia Syria te ii kumpipa na suak tu hi,” ci in Elisha in zo hi.

¹⁴Hazael sia Benhadad kungah heak kikin, ama in, “Elisha in bang hong ci ziam?” ci in dongh hi. “Ama in nang sia dam kik tatak tu ni hi, hong ci hi,” Hazael in ci hi.



¹⁵Ahihang a khuavak ni ciang Hazael in puanvan khat tui sungah pap a, tuasia taw kumpipa ii nuntakna sumit hi. Tuaciang Hazael in Syria Kumpipa Benhadad ii za laih hi.

Judah Kumpipa Jehoram

(2Khang tangthu 21.1-20)

¹⁶Israel te ii Kumpipa Ahab ii tapa Joram ii maan zawk a kum ngana ciang Judahte Kumpipa Jehoshaphat ii tapa Jehoram sia kumpipa hong suak a,

¹⁷ama ii kum, kum sawmthum le nii pha a, tuaciang ama in Jerusalem panin kum liat sung uk hi.

¹⁸A zi sia Ahab ii tanu hi a, tuaciang Ahab ii innkuante bangma in ama in Israel kumpipa ii khansiat teng maa zui hi. Ama in Topa tungah maw hi,

¹⁹ahihang Topa in Judah sia a susia nuam bua hi, banghangziam cile ama in a naseam pa David munah kiciamna pia zo a, a suan a paalte in a kizom suakin uk tu hi ci hi.

²⁰Jehoram ii maan sungin Edomte in Judahte langpan in tualngal tho uh a, amate le amate a ki uk kumpi ngam hong suak hi.

²¹Tua ahikom Jehoram in ama ii ngalleang theampo taw Zair ah kuan a, tua munah Edom ngalkap honte in amate uumci uh hi. Zan lai in ama le a ngalleang ukte in a kikiim uumna phultham thei in, suakta uh a, a ngalkapte sia amate inn tek ah kithethaang uh hi.

²²Edom sia tua hun pan kipan Judahte khutnuai pan amate le amate a ki uk suak hi. Hi hun sung ma in Libna khuapi in tual ngal tho hi.

²³Jehoram ii a sep a vawt dangte theampo *Judah Kumpite ii Tangthu* sungah kiciamte hi.

²⁴Jehoram thi a, David khuapi sung kumpite than ah kiphum in, a tapa Ahaziah in a kumpi za lua hi.

Judah Kumpipa Ahaziah

(2Khang tangthu 22.1-6)

²⁵Israel te ii Kumpipa Ahab ii tapa Joram a maan zawk kum sawm le kum nii na ciang Jehoram ii tapa Ahaziah sia Judahte ii Kumpipa suak hi,



²⁶ama ii pian kum sia kum kul le kum nii hi a, ama in Jerusalem panin kum khat sung uk hi. A nu sia Athalia hi a, Kumpipa Ahab ii tanu, Israel Kumpipa Omri ii tunu hi.

²⁷Ahaziah sia a zi hangin Ahab ii mealheak khat a sua bangin, Ahab ii innkuanpuite bangma in ama in Topa tungah maw hi.

²⁸Kumpipa Ahaziah in Israel te Kumpipa Joram taw kipawl khawm in Syria te ii Kumpipa Hazael do uh hi. Ngalkap honte sia Gilead ngam Ramoth ah hong kisii uh a, Joram sia ngalphual ah liam hi.

²⁹Ama in Jezreel Khuapi ah a liamna pan a dam kik tu ngakin heak kik hi, tuaciang Ahaziah in tua munah pai in ve hi.

Kumpite Niina 9

Israel Kumpi tu in Jehu Sathau Kinoai

¹Tua laanin kamsangpa Elisha in kamsang khangmoi zaw te khat munah, “Kithoi in a, Gilead ah a om Ramoth ah na pai tan. Hi olive thau thawl sia keng tan a,

²tuaciang tua mun na thet ciang Jehoshaphat ii tapa, Namshi ii tupa Jehu na zong tan. A lawmte kung pan samkhia in innkhan khat sungah paipui a,

³hi olive thau sia a lu tungah buakin, hi bangin ci tan, “Topa in nang sia Israel te ii kumpipa tu in taangko hi.’ Tua zawkciang tua mun sia a manlang thei zaza in nusia in,” ci hi.

⁴Tua ahikom kamsang khangmoi pa Ramoth ah pai in,

⁵tua munah ngalkap maangte thu kikum mu hi. Ama in, “Topa nang atu kam thaak khat hong keng khi hi,” ci hi. Jehu in , “Ko teng sungah akua hong paupui ni ziam?” ci in dongh hi. “Topa awng, nangma ni hi,” ci in ama in zokik hi.

⁶Tua zawkciang amate nii sia inn doituam sungah tum a, tuaciang kamsang khangmoipa in Jehu ii lu tungah olive thau buakin ama munah, “Topa Israel te ii Pathian in taangko hi: ‘Keima in nang sia Israel te ii kumpipa tu in sathau hong noai khi hi.



⁷Nangma in na Topa, kumpipa, Ahab ii tapa sia, Jezebel ii ka kamsangte le a dang ka naseamte a thalup hu in daan ka piak natu in thatlum tu ni hi.

⁸Ahab ii innkuanpuite le a suan a paalte a thi siat kul tu hi; a moi a haam a kibangin a baangkua sungah pa a minpiang heamkhia tu khi hi.

⁹Ama ii baangkua tungah Israel te ii Kumpipa Jeroboam tung ahizong, Israel te kumpipa Baasha ii tungah ahizong, ka vawt bangin vawt tu khi hi.

¹⁰Jezebel sia kiphum ngawl tu hi; a luang sia Jezreel ngamkhen sungah ui in ne tu hi, ’ ” ci hi. Hi teng a ci zawk ciang kamsang moi pa pusuakin tai hi.

¹¹Jehu sia a ngalkap maang puite kungah pai kik a, amate in, “Na theampo a pha naam? Tua a mawmawt tuak pa sia in nang tung pan bang dei ziam?” ci uh hi. Jehu in, “Ama ii dei sia he nu hi,” ci in zo hi.

¹²Amate in, “Ko he ngawl khu hi, hong son tan,” ci in zo uh hi. Ama in keima munah hong sonna pan, Topa in hi bangin taangko hi: “Nangma sia Israel te ii kumpipa tu in sathau hong noai khi hi,” ci hi.

¹³Thakhat thu in Jehu ii ngalkap maang puite in a puantual uh suutin keallei tungah Jehu ii dinpha tu in pha uh a, lemle tumin, “Jehu sia Kumpipa hi!” ci in au uh hi.

Israel Kumpipa Joram Kithatlum

¹⁴⁻¹⁵Tua zawkciang Jehu in Kumpipa Joram suamlup tu sawm hi, ama sia Syria Kumpipa Hazael taw Ramoth ah a kidona a liamna pan a dam kik natu in Jezreel ah om hi. Tua ahikom Jehu in ama ii ngalkap maang puite munah kei sangah nong pang uh ahile Ramoth pan kuama pai ku in Jezreel ah mipite kidop natu sonsak peuma heak vun,” ci hi.

¹⁶Tua zawkciang ama a ngalleang tungah hong kaa in Jezreel zuan tu in dingkhia hi. Joram sia dam kik ngawl lai hi, Judahte kumpipa Ahaziah zongh ama ve in haw sia om lai hi.

¹⁷Jezreel tusaang tung pan ngalvil tavuan a nei sia in, Jehu le a mite hong neak mu hi. “Mihing pawlkhat siphu tung to in hong pai ka mu hi,” ci in au



hi. Joram in, “Tual ziam maw ngal ziam siphu ngalkap khat pai in kansak vun,” ci in zo hi.

¹⁸Kamtai pa in Jehu kungah hong pai in, ama munah, “Kumpipa in nang sia lawm khat bangin nong pai ziam ci in he nuam hi,” ci hi. Jehu in, “Tuasia nang taw bangma kisai bo, ka nung panin hong zui tan,” ci in zo hi. Tausaang tung a ngalvil pa in, kamtai pa sia hong paite taw kisii napi hong heak kik ngawl hi ci in thu ko hi.

¹⁹Kamtai dang khat ma paisak uh a, ama in Jehu sia a mai a pa ii dok teng ma dongh hi. Tuaciang Jehu in “Tuasia nang taw bangma kisai bo, ka nung uh pan hong zui tan,” ci leleau hi.

²⁰Khatvei ma khuapi cing pa in, kamtaipa le hong papai te kimu napi ama hong heak kik nawn ngawl hi, ci hi. Ama ii belapna ah, “Hong pai pawlte ii lampui pa in a ngalleang sia mihing thin amh bang phet in nasia takin hawl hi, Jehu taw kibang hi,” ci hi.

²¹“Ka ngalleang kithoai sa in omsak vun,” kumpipa Joram in thupia hi. Tuabang ma in kiseam hi, tuaciang ama le kumpipa Ahaziah amate ngalleang tek tungah Jehu taw kisi tu in hong pai uh hi. Amate in Naboth ii lo sungah kisi uh hi.

²²“Lem thu taw hong pai nu ziam?” ci in Joram in dongh hi. Jehu in, “Bangbangin lem thu om thei tu ziam, Na nu Jezebel ii pat sa bum le ai toaite ahizong, milim biakna ahizong, ih nei lai teng lem thu om thei ngawl tu hi,” ci hi.

²³“Ahaziah awng, hisia kilee heakna hi,” ci in Joram au a, a ngalleang heak in, tai hi.

²⁴Jehu in a thal eal in a tha nei za taw a kap le Joram ii cingzaang pan kha in a lungtang sunlet a, Joram sia ama ngalleang sungah pukin thi hi,

²⁵tuaciang, Jehu in ama a hu pa Bidkar munah, “A luang la in a, Naboth ii lo sungah vawk in. Na ciamtee lai ziam, nang le kei kumpipa Ahab ii nung pan siphu tung to in ih pai lai in, Topa in Ahab huvau hi bangin pau hi.



²⁶“Zeini in Naboth le a tate a kisuamlupna ka mu hi. Tuaciang kamciam kong piakna pan, lo hi sia sung mama ah nang daan hong pia tu khi hi.’ Tua ahikom Joram ii luang la in, Topa ii kamciam sia a tangtun natu in, Naboth ii lo sungah vawk in,” Jehu in ci hi.

Judah Kumpipa Ahaziah Kithat

²⁷Kumpipa Ahaziah in bang teng piang ci in mu a, a ngalleang taw Beth Haggan khua tu in tai hi, Jehu in del hi. “Ama zongh that vun,” ci in Jehu in a mite sawl hi, tuaciangin ama a ngalleang Ibleam khua hui Gur sangah hawlto a, liam hi. Ahihang Meggido khuapi a thet dong a leang hawl thei a, tua mun a thet ciang thi hi.

²⁸Ama ii uliante in a luang la in, David Khuapi sung kumpi than ah phum hi.

²⁹Israel te Kumpipa Ahab ii tapa Joram a maan zawk a kum sawm le khat kum in Ahaziah sia Judahte kumpipa suak hi.

Kumpinu Jezebel Kithat

³⁰Jehu Jezreel ah theng hi. Jezebel in bang thu teng piang ci in za zo a, a ma in mitkhu vom za kinoai in, a sam pot in, kumpi inn tung khelki panin ensuk hi.

³¹Jehu sia khuapi kongpi sungah hong tum ciangin ama in oksan a, “Nang Zimri! Nang tual that pa! Hi sungah bang hong zong ni ziam?” ci hi.

³²Jehu in ento a, “Akua teng kei sangah hong pang nu ziam?” ci hi. Kumpi inn sung uliante nii khawng thum khawng in khelki pan en suk hi,

³³tuaciang Jehu in, “Ama hong vawk suk tavun,” ci hi. Amate in a vawksuk uhle a chi pangte tungah kithe a, siphute tung zongh ah kithe hi. Jehu in a siphu le a leang ama ii luang tungah hawl a,

³⁴kumpi inn sungah tum hi, tuaciangin an ne hi. Tua zawkciang bekma in hi bang ci hi. “Tua a kipuanil numei sia la vun a phum vun; a tatak in ci leang ama zongh kumpipa tanu khat hi,” ci hi.

³⁵Ahihang ama phum tu a pai te in a lungu le a khut ngu, a peang ngu tawm sim ngawl bangma mu nawn ngawl uh hi.



³⁶Hi thu amate in Jehu munah a ko uh ciangin Jehu in, “Hi sia Topa ii naseam pa Elisha tungah a son sa bangin a piang hi: ‘Jezreel ii ngamkhen sungah uite in Jezebel luang ne tu hi.

³⁷Ama ii pumpi sia eak bangin kithethaang tu hi, tuasia ciang kuama in ama pumpi ahi hunlam son thei ngawl tu hi,’ ci hi,” ci in son hi.

Kumpite Niina 10

Ahab ii Suan le paalte Kithat

¹Samaria khuapi ah Ahab ii suan le paalte mihing sawmsali om uh hi. Jehu in lai at a, khuapi ukte, khuapi sungah lampuite le Ahab ii suan le paalte a keamte munah thaak hi. A laithak sungah:

²“No sia kumpipa ii suan le paalte a keam te nu hi, tuaciang na uuk po na zak tu uh ngalleang te, siphute, ngalhiamte le kulh taw a ki uum khuapite nei nu hi. Tua ahikom hi laithak na nga uh po ciang

³kumpipa ii suan le paal sung pan a kilawmbel khat kumpipa in koi vun a, tuaciang ama hung tu in ngal do vun,” ci in at hi.

⁴Samaria ukpите sia lau mama uh hi. “Bangbang in Jehu nalh zo tu hi ziam? Kumpipa Joram le Kumpipa Ahaziah ii zaw ngawl sia ei in bangbangin nalh zo tu hi ziam?” ci uh hi.

⁵Tua ahikom kumpi inn ah tavuan nei te, khuapi tungah tavuan neite, ngam mite lampuite le kumpipa baangkua a keamte in hi kamthaak sia Jehu tungah puak hi; “Ko sia na naseamte khu hi, nangma ii ci po a seam tu in kinging khu hi. Ahihang kuama kumpipa in koi ngawl tu khu hi; phabel nasak bangin hong seam tan,” ci uh hi.

⁶Jehu in laithak dang khat puak hi: “Kei sangah nong pang uh ahile, tuaciang ka thupiak babang zui tu na hi uh le zing ciang tu hunin Kumpipa Ahab ii suan le paal teng ii lutang hong puak tavun,” ci hi. Kumpipa Ahab ii suan le paal sawmsali teng sia Samaria ngam mi lampuite ii kep le ou ahi hi.



⁷Jehu laithak a kinga ciangin, Samaria lampuite in Ahab ii suan le paal sawmsali teng thatlum in a lutang uh bawm sungah heangin Jehu omna Jezreel ah puak uh hi.

⁸Ahab ii suan le paalte ii lutang teng hong kipaipui zawkciang ama in tua lutangte khuapi kongpi hui ah khawl nii in sengin a zingsang kik dong tu munah nusiat tu in thu pia hi.

⁹A zingsang ciangin ama khuapi kongpi ah pai in, tua sungah a om mite munah, “Kumpipa Joram suam natu a sawm sia keima khi hi; no sia tua tungtaang ah bangma tavuan nei ngawl nu hi. Ahihang hite sia akua in thatlum ziam?”

¹⁰Hi sia in bang thu lak ziam cile Ahab ii suan le paalte huvauTopa ii kamsaang Elijah ii tungtawn in a pau teng tangtung hi,” ci hi.

¹¹Tua zawkciang Jehu in Ahab ii be le phung dangte le Jezreel a om theampo le a uliante, a ngualtamhte, a thiampite, khat zongh a nungta in kikoi ngawl hi..

Kumpipa Ahaziah ii Mealheakte Kithat

¹²Jehu in Samaria ah khua pai tu in Jezreel khua nusia hi. Lampi tung mun khat, “Tuucingte Ngiaphual” a kicina munah,

¹³Judah Kumpipa Ahaziah ii mealheakte pawlkhat taw kisi in amate tungah, “Akuate nu ziam?” ci in dongh hi. Amate in, “Ahaziah ii mealheakte khu hi! Kumpinu Jezebel tate le kumpi mealheak a taanglaite zatakna pia tu in Jezreel ah pai tu khu hi,” ci in zo uh hi.

¹⁴Jehu in, “Hing mat siat vun!” ci in a ngalkapte thupia hi. A ngalkapte in amate manin Jehu in a hui ah om dum khat sungah that siat hi. A vekpi in mihing sawmli le nii pha a, khat zongh suakta ngawl hi.

A taanglai Ahab Mealheakte theampo Kithat

¹⁵Jehu dingkhia kik a, lampi ah Rechab ii tapa Jonadab taw kisi uh hi. Jehu in paupui a, “Nang le kei ih khua ngaisutna kibang hi, Kei nong panpui tu ziam?” ci in dongh hi. Jonadab in, “Hong panpui tu khi hi,” ci in zo hi. “Na



khut hong thaak tan,” Jehu in ci hi. Amate kilen uh hi, tuaciang Jehu in ama sia ngalleang tungah a kaato zawk natu hu in,

¹⁶“Keima taw paikhawm tawng, Topa tungah bangza in kipia khi ziam nangma ma in hong mu tan,” ci in son kawm hi. Tuaciang amate Samaria ah leang taw paikhawm uh hi.

¹⁷Tua mun a thet ciang Jehu in Ahab ii meal heak theampo khat zongh khoaikhe ngawlin thatlum siat hi. Hi sia in Topa ii Elijah munah piang tu hi ci in a son sa teng ahi hi.

Baal A biate Kithatlum

¹⁸Jehu in Samaria ngam mite kaikhawm in hi bang ci hi, “Kumpipa Ahab in Baal pathian sia tawm bia hi, ahihang keima in tua sangin a nasia zaw in ka bia tu hi.

¹⁹Baal ii kamsang te hong kaikhawm tavun a, ama a biate theampo le a thiampite a vekpi hong sam tavun. Kuama kam zong thei ngawl tu hi; Baal tungah sangaw biakpiakna nasia takin vawt tu khi hi, tuaciang hi sungah hong kihel ngawl peuma ki thisak tu hi,” ci hi. (Hi sia in Jehu ii a theamna hi a, Baal a biate theampo a thalup nopna hi.)

²⁰Tua zawkciang Jehu in thu pia a, “Baal zatak piak natu ni khat biakna ni in thangsak vun,” ci hi. Thu thansakna kivawt a,

²¹tuaciang Jehu in Israel ngam bup ah kam zasak hi. Baal a bia theampo hong pai uh hi, hong pai ngawl khat zongh om ngawl hi. Amate theampo Baal biakinnpi sungah tum uh a, biakinn mong lang pan mong lang dong dim uh hi.

²²Tuaciang Jehu in puantual thiangtho a keam thiampipa munah puantualte pusua in biakpiakna a vawtte pia in sawl hi.

²³Tua zawkciang Jehu ama mama zongh biakinnpi sungah, Rechab ii tapa Jonadad taw tum a, tuaciang tua sungah om mihingte mun ah, “Baal biate bek tua sungah om tu a, tuaciang Topa a biate kuama a kihel ngawl natu in a pha takin en vun,” ci in sawl hi.



²⁴Tua zawkciang ama le Jonadab in pai in sangaw biakpiakna, meihal biakpiakna Baal tungah pia hi. Ama in pasal sawmliat biakinn pua sangah koi a, hi bangin thu piakna nei hi. “Hi mihingte a vekpi in thatlum siat tu nu hi, khat po in amate a suaktasak a om le ama ii nuntakna taw lul tu hi!” ci hi.

²⁵Jehu in biakpiakna a vawt zawkciang a cingte munah, “Tum vun a, a vekpi in thatlum siat vun; khat zongh suaktasak heak vun,” ci hi. Amate namsau daw sa in tum a, a vekpi in thatlum siat in, amate luang sia doipua ah kaikeak uh hi. Tua zawkciang amate a sungnung biakna munah tumin,

²⁶a thiangtho khuam sia pusua uh a, haltum uh hi.

²⁷Tuabangin amate in a thiangtho khuam sia susia in biakinn zongh susia uh a, a biakinnpi sia eakbuk suaksak uh hi, tu ni dong ma in tuabangin kizangh lai hi.

²⁸Tuabangin Jehu in Israel ngamah Baal biakna thiansua hi.

²⁹Ahihang ama in Kumpipa Jeroboam ii ngamtatna teng zui in Jeroboam ii khuita lim khat Bethel le Dan ah koi in a mite a biaksak bangma in Israel te mawna sungah lampui hi. .

³⁰Topa in Jehu tungah, “Ahab le a suan a paalte tungah vawt a kong sawl theampo vawt zo ni hi. Tua ahikom na suante khang li dong Israel te kumpipa in koi tu khi hi ci in kamciam hong pia khi hi,” ci hi.

³¹Ahihang Jehu in a thin theampo taw Topa Israel te ii Pathian ii thukhamte ni ngawl a, tua taangin Jeroboam bangin Israel mawna sungah lampui hi.

Jehu ii Thina

³²Tua hun laitakin Topa in Israel ngam ii a zaina khiam tu in hong kipan hi. Syria Kumpipa Hazael in Israel te ii ngam theampo zo hi,

³³Jordan ii niswana Aroer khuapi thangsang Arnon Ngun hui dong zo hi — hisia ii huam sia Gilead le Bashan ngamkhen te hi a, Gad, Reben le Niswana Manasseh te ii teenna teng ahi hi.

³⁴Jehu ii a sep a vawt dangte theampo ama ii hanna nasepte dong *Israel Kumpipate Tangthu* sungah kikhum hi.



³⁵Ama thi a Samaria ah kiphum hi, tuaciang ama ii tapa Jehoahaz in a kumpi za laih hi.

³⁶Jehu in Israel kumpipa khat ahina taw Samaria panin kum kul le kum liat sung uk hi.

Kumpite Niina 11

Judahte ii Kumpinu Athaliah

(2Khang tangthu 22.10-23.15)

¹Kumpipa Ahaziah ii nu Athaliah in a tapa ii kisumlupna a zaak po ciang kumpipa innkuan pui theampo thalup natu thu pia hi.

²Ahaziah ii tapa Joash bekma suakta hi. Ama sia a dangte taw kithatlum dektak a, ahihang a ni Jehosheba in suatak hi, tua nu sia Kumpi Jehoram ii tanu hi a, Ahaziah ii suapui seal ahi hi. Ama in Joash sia a keam nu taw la in biakinnpi sung doituam sungah koi hi. Athaliah ii mu natu pan seal a, tuabangin ama kithat ngawl hi.

³Kum luk sung Jehosheba in patangno sia biakinn sungah Athaliah ii Kumpinu a sep sung theampo phual hi.

⁴Ahihang a kum sali na ciangin thiampi Jehoiada in kumpipa a cingte le kumpi inn a cingte ii uliante Biakinn ah samin, ama ii ngealna bang a ngamtat nop natu kiciamna taw thukimna vawt hi. Ama in Kumpipa Ahaziah ii tapa Joash amate lak hi,

⁵tuaciang hi thupiakna teng pia hi: “Sabbath ni in tavuan la tu in nong pai uh ciang, no sung pan see thum sua see khat in kumpi inn cing tu nu hi;

⁶a dang see thum sua see khat sia Sur Kongpi cingin om tu nu hi, tuaciang a om lai see thum sua see khatte inn kongpi ah kong cingte nung pan cing sawn tu nu hi.

⁷Sabbath ni a tavuan nei ngawl a om pawl nii te sia kumpipa cing tu in Biakinnpi ah a cingin om tu nu hi.



⁸Kumpipa Joash sia noma in namsau daw sa in cing tu a, ama ii paina theampo ah ama ompui tu nu hi. No ii nai ah hong pai khat po a om le thatlum tu nu hi,” ci hi.

⁹Uliante in Jehoiada ii hil bangin ni a, ngalkapte ama kungah paipui hi — Sabbath ni a tavuan nei ngawlte le tavuan neite paipui uh hi.

¹⁰Ama in uliante sia David ii neisa, Biakinnpi sungah a kikoi tei le lum te, kumpipa cin natu in pia a,

¹¹tuaciang ama in kumpipa cing tu in ngalkapte sia a namsau daw sa in Biakinn mai kiimkot ah koi hi.

¹²Tua zawkciang Jehoiada in Joash pusua pui in, kumpi lukhu a lu tungah koi a, kumpite ii zak tu thukham laibu bu khat Joash pia hi. Tua zawkciang Joash sia sathau noai in kumpipa hi ci in taangko uh hi. Mipite in a khut uh beang uh a, “Kumpipa a khan sau taken!” ci uh hi.

¹³Kumpinu Athaliah in a cing ngalkapte le mipite ii awsa za in, Biakinnpi ah manlang in pai hi. Tua munah mihingte kikhawm uh hi.

¹⁴Taangh ngeina om bangin kumpipa thak sia Biakinnpi tumna khuampi kingualte mai ah dingin kumpinu in mu hi. Ama sia uliante le lemle tumte le mipite in kiim uum uh a, a vekpi in lungdam takin au in, lemle tum uh hi. Athaliah in a puansilh baltham in, “Hong leeheak hi! Hong leeheak hi!” ci in au hi.

¹⁵Jehoiada in Athaliah sia Biakinnpi huang sungah a kithalup tu oai ngawl ahikom ama in ngalkap maangte munah: “A ngual a ngualin a cingte kilaklaw panin ama la in paipui vun, ama suatak a sawm pawpo that vun,” ci in thupia hi.

¹⁶Amate in Athaliah manin, kumpi inn ah paipui uh a, tua mun Siphu Kongpi ah ama thatlum uh hi.

Jehoiada ii Ngampua kikna

(2Khang tangthu 23.16-21)



¹⁷Thiampi Jehoiada in Kumpipa Joash le mipite, Topa ii mihingte a sua natu in Topa taw thuciamna vawtsak hi; ama in kumpipa le mipite kilaklaw ah zongh thuciamna vawtsak hi.

¹⁸Tua zawkciang mipite in Baal ii biakinn ah pai uh a, biakinn baltham uh hi; amate in biaknataute le milimte saat tham uh a, tuaciang Baal ii thiampi Mattan sia biaknatau ii mai ah thatlum hi. Jehoiada in Biakinn ah a cingte koi in,

¹⁹tua zawkciang ama sia ngalkap maangte, kumpipa a cing ngalkapte, le kumpi inn a cingte taw kumpipa sia Biakinnpi pan kumpi inn ah paipui uh a, mihonpite in zui uh hi. Joash in A Cingte Kongpi panin tumin, kumpi tokhum tungah ama ii mun hong la hi.

²⁰Mipi theampo sia lungdam uh a, kumpi inn sungah Athaliah zongh kithat zo ahikom khuapi sung sia ngam daai in om uh hi.

²¹Joash sia kum sali a phak laitakin Judahte kumpipa suak hi.

Kumpite Niina 12

Judah Kumpipa Joash

(2Khang tangthu 24.1-16)

¹Israel ah Jehu Kumpipa a maan zawk a kum salina ciang Joash sia Judahte ii kumpipa suakin, ama in Jerusalem panin kum sawmli sung uk hi. A nu sia Beersheba khua panin Zibiah ahi hi.

²A khan tawntung ama in Topa ii diksak tu bebek in ngamta hi, banghangziam cile Jehoiada thiampipa in ama hil hi.

³Ahitazong doai biakna munte kisia ngawl a, tuaciang mihingte in sangaw biakpiakna le ngim namtui halna te tua munah vawt tan lai uh hi.

⁴Joash in thiampite sam a, Biakinnpi sungah sangaw biakpiakna tungtaang sum a kipiaste ahizong, hun maan a sangaw biakpiakna tung pan sumte ahizong amate tungah a thin zawna taw piakte ahizong, tua sumte a top natu in thu pia hi.



- ⁵Thiampi sim in ama ii sepsak mite tung pan a nga uh sumte sia tavuan a laak natu le a kismah bangin Biakinnpi pua natu a kizak natu in thu pia hi.
- ⁶Ahihang Joash ii maan zawk a kum kul le kum thum dong sia thiampite in Biakinnpi puana khat zongh nei ngawl uh hi.
- ⁷Tua ahikom ama in Jehoiada le a dang thiampite samin dongh hi, “Banghangin Biakinnpi pua ngawl nu ziam? Tu pan kipan sum na saan uh te noma keam nawn ngawlin Biakinnpi pua natu in hong aap tu nu hi,” ci hi.
- ⁸Thiampite lungkim uh a, Biakinnpi amate ii pua a kul ngawl tu zongh thukim uh hi.
- ⁹Tua zawkciang Jehoiada in thingkuang khat la in, a sitna tungah a hawng khat vut hi, tuaciang a thingkuang sia biaknatau ii kung, Biakinnpi sung in tumna ziat sangah koi hi. Tumna munah tavuan a nei thiampi sia in biakpiakna a plate ii sum theampo thingkuang sungah koi hi.
- ¹⁰Thingkuang sungah sum tam a om ciang kumpipa ii thuzeakpa le Thiampi saang pa hong pai in, ngun teng a tui thapsak zawkciang khai tee uh hi.
- ¹¹A pha za tatak a kiteptee zawkciang Biakinnpi sung naseamte ii a ukpa tungah a ngunte aap in, tua pa in lettamate, inn sate,
- ¹²uksuang ciangte, suang at te pia in, thing at le suangte inn pua natu in a kismah thing at le suangte theampo lei a, a dang zak tu theampo pia uh hi.
- ¹³Ahizong a sumte sung panin ngun hai vawt natu kuangte, lemle te, tua ahibuale meiinn taw kisai vanhzakte, tua ahibuale ngun le kham taw a kivawt vanh te leina in kizangh ngawl hi.
- ¹⁴Tua sumte sia naseamte thaman le biakinn puana sung a kizangh vanh te leina bekin kizangh hi.
- ¹⁵Tua nasep taw kisai in a ukte sia thumaan takpi ahikom tua sumte tungtaang ah sazian koi kul ngawl hi.
- ¹⁶Khialphel biakpiakna sum le mawna atu piak sumte sia thingkuang sungah kikoi ngawl hi; tuate sia thiampite neisa ahi hi.



¹⁷Tua hunin, Syria te ii Kumpipa Hazael in Gath khuapi sim in zo hi; tua zawkciang ama in Jerusalem sim tu sawm hi.

¹⁸Judahte Kumpipa Joash in ama ii mai ah a maang Jehoshaphat, Jehoram, le Ahaziah te ii Topa tungah a aap sa uh piakkhiatnate sia ama ii piakkhiatna taw ngawmin, Biakinnpi sung le kumpi inn sungah kham theampo taw kop in Kumpipa Hazael letsongin a piak ciang, tua kumpipa in a ngalkapte Jerusalem panin leidang zot pui hi.

¹⁹Kumpipa Joash ii a sep a vawt a dang theampo sia *Judah Kumpite Tangthu* sungah kikhum hi.

²⁰⁻²¹Kumpipa Joash ii uliante in ama thalup sawm uh a, tuate sung pan nii, Shimeath ii tapa Jozacar le Shomer ii tapa Jehozabad in Jerusalem niswana sangah lei kihuhna mun Silia pai sukna lampi tungah a kisa inn sia sungah thatlum uh hi. Joash sia David ii Khuapi sung kumpi than ah kiphum a, a tapa Amaziah in a kumpipa za laih hi.

Kumpite Niina 13

Israel Kumpipa Jehoahaz

¹Judahte ii Kumpipa Ahaziah ii tapa Joash ii maan zawk a kum kul le kum thum kumin, Jehu ii tapa Jehoahaz sia Israel te ii kumpipa hong suak a, ama in Samaria panin kum sawm le kum sali uk hi.

²Ama mai ah kumpipa a seam Jeroboam bangma in ama in Topatungah maw a, Israel mite mawna sungah thetpui hi; ama in a khansiat nate kheal ngawl hi.

³Tua ahikom Topa sia Israel tungah thin uuk hi, tuaciang ama in Syria te kumpipa Hazael le a tapa Bedad in Israel sia hun khat zawk hun khat zosak hi.

⁴Tua zawkciang Jehoahaz in Topa tungah thungen a, tuaciang Topa in Syria te ii kumpipa in Israel mite nasia takin nengniam a mu ciang a thungetna ngai hi.



⁵Topa in Israel te lampui khat puak a, ama in amate sia Syria te khut sung pan suatak hi, tuaciang nidang bangma in, Israel sia ngammuang in om uh hi.

⁶Ahihang amate in Kumpipa Jeroboam ii Israel mite mawna sungah a lampuina te nusia ngawl uh a, tua mawnate ma vawt suak lai uh hi, tuaciang pathian nu Asherah ii lim sia Samaria ah taanglai hi.

⁷Jehoahaz in siphu ngalkap sawmnga, ngalleang sawm le ngalkap tulsawm sim ngawl ngalkap nei ngawl hi, banghangziam cile Syria kumpipa in a dang teng susia in leivui totcil bangin tuancil hi.

⁸Jehoahaz ii a sep a vawt le a hanna dang teng sia *Israel Kumpite Tangthu* sungah kikhum hi.

⁹Ama thi a, Samaria ah kiphum hi, tuaciang a tapa Jehoash in a kumpi za lua hi.

Israel Kumpipa Jehoash

¹⁰Judahte ii Kumpipa Joash ii maan zawk a kum sawmthum le sali kumin Jehoahaz ii tapa Jehoash sia Israel te ii kumpipa suak hi, tuaciang ama in Samaria pan kum sawm le kum luk sung uk hi.

¹¹Ama in zongh Israel te mawna sungah a lampui, Kumpipa Jeroboam ii siatna teng zui in Topa tungah maw hi.

¹²Ama ii sep le vawt dangte, Judahte kumpipa Amaziah ii langpan in, a donate theampo a kihel in *Israel Kumpipate ii Tangthu* sungah kikhum hi.

¹³Jehoash thi a Samaria kumpi than ah kiphum a, a tapa Jeroboam II in a kumpi za laih hi.

Elisha Thina

¹⁴Kamsangpa Elisha sia thi thei natna taw hong na a, ama thi tu in a lupna ah Israel te Kumpipa Jehoash in ve hi. “Ka pa awng, ka pa awng!” ci in au in kap hi. “Nang sia Israel a hung a thahat pa ni hi!” ci hi.

¹⁵Elisha in, Jehoash tungah, “Thal khat le thaltang pawl khat hong la tan,” ci in thupia hi. Jehoash in tuate la a,



¹⁶Elisha in tua thal kap tu in kinging in sawl hi. Kumpipa in a sawl bangin mang a, Elisha in a khut sia kumpipa khut tungah koi hi.

¹⁷Tua zawkciang kamsangpa ii sawl bangin Syria ngam sang a nga khelki sia kumpipa in hong hi. “Thaltang kap in!” ci in Elisha in thupia hi. Kumpipa ii thaltang a kaa zawk po ciang kamsangpa in hong pau a, “Nang siaTopa ii thaltang ni hi, tua taw ama in Syria te zo tu hi. Nangma in amate Aphek ah na do tu a, amate na zo tu hi,” ci hi.

¹⁸Tua zawkciang Elisha in kumpipa munah thaltang dang teng zongh la in lei saatna nei in ci in sawl hi. Kumpipa in lei thum vei saat a, tua zawkciang tawp hi.

¹⁹Hi sia in Elisha thin uuksak a, ama in kumpipa munah, “Nga vei luk vei bang na saat tu ahi hi, tua hile Syria te na zo suak tu hi, tu in amate thumvei bekma na zo tu hi,” ci hi.

²⁰Elisha thi in ama kiphum hi. Kumsim in Moab te in a hon veu in Israel ngam sim uh hi.

²¹Khatvei mithi vui laitakin tua ngalte hon khat kingal mu a, mithi puate in a thiluang sia Elisha ii thaang sungah lawnsuk uh hi, tuaciang amate taikeak uh hi. Tuaciang mithi luang in Elisha ii ngu taw a kiphak po ciang mithi sia nungta kik a, ding to hi.

Israel te le Syria te Kilaklaw ah Ngal

²²Syria Kumpipa Hazael in Jehoahaz ii maan sung theampo Israel nengniam ngawp a,

²³ahizong Topa sia amate tungah thuthiam in hesuak hi. Amate a kimaimot mang tu oai ngawlin, hu zaw hi, banghangziam cile Abraham, Isaac le Jacobte tungah thuciamna a vawt hang ahi hi. Ama in a minamte sia mangil ngei ngawl hi.

²⁴Syria Kumpipa Hazael a thi ciang a tapa Benhadad kumpi suak hi.



²⁵Tua zawkciang Israel Kumpipa Jehoash in Benhadad sia thumvei zo zo a, tuaciang a pa Jehoahaz ii khan lai a Benhadad ii suan sa khuapite ama in la kik hi.

Kumpite Niina 14

Judah Kumpi Amaziah

(2Khang tangthu 25.1-24)

¹Israel te Kumpipa Jehoahaz ii tapa Jehoash ii maan zawk a kum nii na ciang, Joash ii tapa Amaziah sia Judahte kumpipa suak a,

²ama ii pian kum sia kum kul le kum nga hi in, ama in Jerusalem panin kum kul le kum kua sung uk hi. A nu sia Jerusalem pan a Jehoaddin hi.

³Ama in Topa ii diksak bangin ngamta a, ahihang ama sia a taangpupi David bang hi ngawlin, tua taangin a pa Joash ii ngamtat bangin taa hi.

⁴Ama in doai biakna munte baltham ngawl a, tuaciang mihingte in sangaw biakpiakna le ngim namtui halna te tua munah zom to suak uh hi.

⁵Amaziah in thahatna a kip in a nei po ciang, a pa kumpipa a that uliante thatsak hi.

⁶Ahihang ama in tuate ii tate thatlum ngawl a, Moses Thukham sungah Topa ii thupiak ahi: “A tate ii khialnate hu in nute pate kithisak ngawl tu a, pate nute ii khialna hu in tate kithisak ngawl tu hi; mihing khat sia ama ii khialna hang bekin kithisak tu hi,” a ci te zui hi.

⁷Amaziah in Edom ngalkapte tulsawm sia Ci Kuam kuam sungah that hi; ama in Sela khuapi sia kidona sungah suan a, Joktheel ci in a min phuak a, tu dong ma tua min pua lai hi.

⁸Tuaciang Amaziah in Israel te Kumpipa Jehoash tungah kamtaite paisakin kido natu thato hi.

⁹Ahihang Kumpipa Jehoash in hi bang zokikna thaak kik hi: “Khatvei lai in lingkung khat Lebanon Mual tungah a om sia in cedar kung khat ii munah: ‘Na tanu sia ka tapa ii zi tu hong pia tan,’ ci hi. Ngamsa khat hong pai in lingkung sia tuancil hi.



¹⁰Tu in Amaziah awng, nang in Edomte na zaw hu in kisathei ni hi. Na minthang na sa teng taw lungkim in a, inn ah om po in. Nang le na mite ii lalna hong pia tu banghangin ngimna piangsak nuam ni ziam?” ci hi.

¹¹Ahihang Amaziah in ngai nuam ngawl hi, tua ahikom Kumpipa Jehoash in a mite taw hong kuanin Judah ngam Beth Shemesh ah kido uh hi.

¹²Amaziah ii ngalkap honte in lel a, a ngalkap te theampo amate inn tek ah cia uh hi.

¹³Jehoash in Amaziah sia manin thongtaaksak hi, Jerusalem ah paisuak in kaih zanii a sau khuapi ii luphung sia Ephraim Kongpi pan A Kingh Kongpi dong baltham hi.

¹⁴Ama in ngun le kham a mu theampo, biakinn vanh theampo le kumpi inn sungah sumngum te la in Samaria ah siapui hi. Ama in mihing pawlkhat zongh a kitan tu in siapui hi.

¹⁵Jehoash ii a sep a vawt dangte theampo, kumpipa Amaziah taw a kidona sungah a hanna te huamin, Israel te ii Kumpipate Tangthu sungah kikhum hi.

¹⁶Jehoash thi a, ama sia Samaria kumpi thaah ah kiphum hi, tuaciang a tapa Jeroboam II in ama ii kumpi za laih hi.

Judah Kumpipa Amaziah Thina

(2Khang tangthu 25.25-28)

¹⁷Israel Kumpipa Jehoash ii thi zawk kum sawm le kum nga dong Judahte kumpipa Amaziah nungta hi.

¹⁸Amaziah ii a sep a vawt dangte theampo sia Judah te Kumpipate ii Tangthu sungah kikhum hi.

¹⁹Amaziah suamlup natu in Jerusalem ah sawmna khat om hi, tua ahikom ama sia Laschish ah tai hi, ahihang a ngalte in tua munah zuizen in thatlum uh hi.

²⁰A luang sia siphu khat tungah suan in Jerusalem ah siapui uh hi, David khuapi ah kumpi thaah ah ama kiphum hi.



²¹Mihingte in a tapa kum sawm le kum luk pha Uzziah sia kumpi lukhu khusakin kumpi suaksak hi.

²²A pa thi zawkciang Uzziah in Elath khua suan kikin sa kik hi.

Israel Kumpipa Jeroboam II

²³Judahte ii Kumpipa Joash ii tapa Amaziah maan zawk a kum sawm le kum nga kum in Jehoash Kumpipa ii tapa Jeroboam sia Israel te ii kumpipa suak hi, tuaciang ama in Samaria pan kum sawmli le kum khat sung uk hi.

²⁴Ama in, Israel sia mawna sungah a lampui Nabat ii tapa Kumpipa Jeroboam ii ngamtatna teng zui in Topa tungah maw hi.

²⁵Ama in Israel te ii ngamkhen, saksang pan Hammath Mualciangh, thangsang pan Tuipi Thi dong zokik hi. Hisia in Topa, Israel te ii Pathian in Jonah Gath Hepher pan a kamsangpa Amittai ii tapa tungah kamciam a piak sa sia ahi hi.

²⁶Topa in Israel te ii thuakna a cizathuai mama sia mu hi; tuaciang amate a hu tu kuama om ngawl hi.

²⁷Ahihang Israel te a tawntungin a bo cimit tu sia Topa ii tupna hi ngawl hi. Tua ahikom ama in amate sia Kumpipa Jeroboam II tungtawnin suatak hi.

²⁸Jeroboam II ii a sep a vawt dangte theampo, ngal sung a hanna le Damascus le Hamathte sia Israel te atu a laak kikna theampo sia Israel Kumpipate Tangthu sungah kikhum hi.

²⁹Jeroboam thi a, kumpi thaah ah kiphum in, tuaciang a tapa Zechariah in a kumpi za lua hi.

Kumpite Niina 15

Judah Kumpipa Uzziah

(2Khang tangthu 26.1-23)

¹Israel Kumpipa Jeroboam II kumpi a sep zawk a kum kul le kum sali kumin Amaziah tapa Uzziah sia Judahte kumpipa suak a,

²ama kum sia kum sawm le kum luk pha in, Jerusalem pan kum sawmnga le kum nii sung uk hi. A nu sia Jerusalem pan a Jecoliah ahi hi.

³A pa ii ngamtatna zui in ama in Topa ii diksak bangin ngamta hi.



⁴Ahihang doai biate ii biakpiakna munte kisia ngawl a, mihingte in sangaw biakpiakna le ngim namtui halnate tua munah vawt suak lai uh hi.

⁵Topa in Uzziah sia a kiitak huai vun natna taw vaat a, a thi dong tua natna vei hi. Ama in ama ii aituam inn khat ah teang a, tavuan theampo kidawn in, a tapa Jotham in ngam uk hi.

⁶Uzziah ii a sep a vawt dangte theampo sia *Judah Kumpipate Tangthu* sungah kikhum hi.

⁷Uzziah thi a, David khuapi sung kumpi thaah ah kivui a, a tapa Jotham in a kumpi za laih hi.

Israel Kumpipa Zechariah

⁸Judah Kumpipa Uzziah ii maan zawk a kum sawmthum le liat kumin Israel te ii Kumpipa Jeroboam II ii tapa Zechariah sia Israel te ii Kumpipa suak a, tuaciang ama in Samaria pan tha luk sung uk hi.

⁹Ama in, ama mai ah a seam masa te bangma in Topa tungah maw hi. Ama in Nabat ii tapa Kumpipa Jeroboam khansiat zui in, Israel te mawna sungah lampui hi.

¹⁰Jabesh ii tapa Shallum in Kumpipa Zechariah suam tu sawm a, Ibleam ah thatlum hi, tuaciang a kumpi za ama in lua hi.

¹¹Zechariah ii sep le vawt a dangte theampo sia *Israel Kumpipate Tangthu* sungah kikhum hi.

¹²Tua ahikom Topa ii Kumpipa Jehu tungah kamciam a piak, “Na suan na paalte khang li dong Israel kumpipate suak tu hi,” a ci sia tangtung hi.

Israel Kumpipa Shallum

¹³Judah Kumpipa Uzziah a maan zawk a kum sawmthum le kum kua kumin, Jabesh ii tapa Shallum sia Israel te ii kumpipa suak hi, tuaciang ama in Samaria pan tha khat sung uk hi.

¹⁴Gadi ii tapa Menahem in Tirzah pan Samaria ah pai a, Shallum suamlum in a kumpi za lua hi.



¹⁵Shallum ii a sep a vawt dangte theampo, a ngual suamna thute a kihel in *Israel Kumpipate ii Tangthu* sungah kikhum hi.

¹⁶Manahem in Tirzah panin a pai ciangin Tappuah khuapi ah a teangte le a kiim a paam ngamkhen zongh ama tungah ki aap ngawl ahikom susia cip hi. Nau ngai numeite ngilpi ngangawn khuakeak hi.

Israel Kumpipa Menahem

¹⁷Judah Kumpipa Uzziah ii maan zawk a kum sawmthum le kum kua kum in Gadi ii tapa Menahem sia Israel te ii Kumpipa suak hi, tuaciang ama in Samaria pan kum sawm sung uk hi.

¹⁸Ama in, a thi dong Israel te mawna sungah a lampui Nabat ii tapa Kumpipa Jeroboam tatsiatna teng zui in, Topa tungah maw hi.

¹⁹Assyria te ii Kumpipa Tiglath Pileser in Israel sim a, tuaciang Menahem in, ngam sungah ama ii vaangletna a kip natu tua kumpipa ii panpui natu in ngun ton sawmthum le ton liat pia hi.

²⁰Menahem in tua dangka te sia Israel ngam ah mihaute theampo tung pan nguntang sawmnga tek zawthawk thu taw khonin a nga ahi hi. Tua ahikom Tiglath Pileser sia ama ngam ah cia kik hi.

²¹Menahem ii a sep a vawt dangte theampo sia *Israel Kumpite ii Tangthu* sungah kikhum hi.

²²Ama thi in kiphum a, a tapa Pekahiah in ama kumpi za laih hi.

Israel Kumpipa Pekahiah

²³Judah Kumpipa Uzziah ii maan zawk a kum sawmnga kum kumin Menahem ii tapa Pekahiah sia Israel te ii kumpipa suak hi, tuaciang ama in Samaria panin kum nii sung uk hi.

²⁴Ama in, Israel sia mawna sungah a lampui Nabat ii tapa Kumpipa Jeroboam ii ngitlo ngamtat teng zui in, Topa tungah maw hi.

²⁵Remaliah ii tapa Pekah a kici ama ii ngalkapmaang khat in Gilead pan mihing sawmnga taw ama sawmin, Samaria kumpi inn sung a nung kulh sungah Pekahiah sia suamlum a, ama in a kumpi za lua hi.



²⁶Pekahiah ii a sep a vawt dangte theampo *Israel Kumpipate ii Tangthu* sungah kikhum hi.

Israel Kumpipa Pekah

²⁷Judah Kumpipa Uzziah ii a maan zawk a kum sawmnga le kum nii kumin Remaliah ii tapa Pekah sia Israel te kumpipa suak a, ama in Samaria ah kum kul sung maang hi.

²⁸Ama in Israel te mawna sungah a lampui Nabat ii tapa Kumpipa Jeroboam ii khansiat ngamtatna teng zui in, Topa tungah maw hi.

²⁹Pekah ii kumpipa ahi hun laitakin Assyriate ii Kumpipa Tiglath Pileser in, Ijon, Abel Beth Maccah, Janoah, Kedesh le Hazor khuapi teng le le Gilead ii ngamkhen, Galilee le Napthali teng suan hi, tuaciang a mihingte sia Assyria ah thongtaak tu in siapui hi.

³⁰Judah Kumpipa Uzziah ii tapa Jotham ii maan zawk a kum kul lai in Elah ii tapa Hoshea in Kumpipa Pekah sia ngawl sawmin suamlum a, a kumpi za sia ama in lua hi. Israel te Kumpipate

³¹Pekah ii a sep a vawt dangte theampo sia *Israel Kumpite ii Tangthu* sungah kikhum hi.

Judah Kumpipa Jotham

(2Khang tangthu 27.1-9)

³²Remaliah ii tapa Pekah ii Israel kumpi in a maan zawk a kum nii kumin Uzziah ii tapa Jotham sia Judahte kumpipa suak hi,

³³ama ii kum sia kum kul le kum nga pha a, Jerusalem panin kum sawm le kum luk sung uk hi. A nu sia Zadok ii tanu Jerusha hi.

³⁴A pa Uzziah ii ngamtatna zui in Jotham in Topa ii diksak te ngamtatna in nei hi.

³⁵Ahihang doai biate ii biakna munte ki susia ngawl hi, tuaciang mihingte in sangaw biakpiakna le ngim namtui halna te tua munah vawt suak lai uh hi. Biakinnpi ii Saksang Kongpi a sa sia Jotham ahi hi.



³⁶Jotham ii sep le vawt a dangte theampo sia *Judah Kumpipate* ii *Tangthu* sungah kikhum siat hi.

³⁷Ama kumpipa ahi laitakin Topa in Syria te kumpipa Rezin le Israel te kumpipa Pekah te Judah sim tu in puak hi.

³⁸Jotham thi a David ii Khuapi sung kumpi thaah ah kiphumin a tapa Ahaz in a kumpi za laih hi.

Kumpite Niina 16

Judah Kumpipa Ahaz

(2Khang tangthu 28.1-27)

¹Remaliah ii tapa Israel te ii Kumpipa Pekah ii maan zawk a kum sawm le kum sali kum in Jotham ii tapa Ahaz sia Judahte kumpipa suak hi,

²ama pian kum, kum kul pha in, Jerusalem panin kum sawm le kum luk sung uk hi. Ama in a taangpupi David ii ngamtatna phate zui ngawl a; tua taangin Topa Pathian ii diksak ngawlte vawt hi,

³tuaciang ama in Israel kumpipate ii ngamtatna te veu zui hi. Ama in, Israel mite hong mainawt uh lai in, Topa ii a ngam sung pan a naw keakte ii a thasiat huai ngamtatnate zui a, a tapa ngangawn milim biakna meihal biakpiakna in nei hi.

⁴doai biate ii biakna mun, mualte ii tung, le thinglim nuai sim ah, Ahaz in sangaw biakpiakna le ngim namtui halna piakhia hi.

⁵Syria te kumpipa Rezin le Israel kumpipa Pekah in Jerusalem sim a, uumci ahihang Ahaz sia zo zo ngawl uh hi.

⁶(Tua hun khat sung ma ah Edomte kumpipa in Elath khuapi hong nga kik a, Judah mi tua munah a teangte notkeak hi. Edom te Elath a teang a, teang top lai hi.)

⁷Ahaz in Assyriate ii ngam uk lianpa Tiglath Pileser munah kamtai mihingte paisak a: “Keima in a thumaan na naseam pa khi hi. Hong pai tan a, Syria le Israel kumpipate khut sung pan hong hun khia tan, amate in kei hong sim hi.” cisak hi.



⁸Ahaz in ngun le khamte Biakinn pan le kumpi inn sung sum kholna pan la in, ngam uk lianpa tungah letsong in thaak hi.

⁹Ahaz ii mangkaa na a zona in Tiglath Pileser in a ngalkap hon taw Damascus ah kuan in, tua khuapi suan a, Kumpipa Rezin thatlum in a mite sia thongtaak tu in ciapui hi.

¹⁰Kumpipa Ahaz in Damascus ah Ngam uk lianpa Tiglath Pileser taw kimu tu in a pai ciang, biaknatau tua munah a om sia mu hi, ama in tua biaknatau ii lim sia kheet nei ngawlin a kicing tatak in suai a, Uriah thiampipa thaak hi.

¹¹Tua ahikom Uriah in biaknatau tuasia taw a kibang linlian khat vawtsak a, Ahaz hong heak kik maa in man hi.

¹²Damascus pan hong cia kik ciang Ahaz in biaknatau sia a kiman sa in mu hi,

¹³tua ahikom ama in nganhingte taw sangaw biakpiakna le antang biakpiakna tua biaknatau tungah vawt a, tuaciang zu le nganhing chi te kipawlkhop biakpiakna in bugh suk hi.

¹⁴Taungo taw kivawt biaknatau Topa tungah a ki aap sa sia biaknatau thak le Biakinnpi kilaklaw ah koi uh a, tua ahikom Ahaz in biaknatau thak sia iisaksang ah khiin hi.

¹⁵Tua zawkciang ama in Uriah munah, “Hi keima aa ahi biaknatau thak sia zingsang meihal biakpiakna le nitak antang biakpiakna, kumpipa le a mipite meihal biakpiakna le antang biakpiak natu le mipite ii zu biakpiak natu in zangh in. Nganhing sangaw biakpiakna a kizangh theampo ii chi sia a tungah sung in. Ahihang taungo biaknatau sia keima ii aisaan natu in na koi in,” ci in thupia hi.

¹⁶Uriah in kumpipa thupiak bangin seam hi.

¹⁷Ahaz in Biakinnpi sungah a kizangh taungo leang sia la khia a, tua tungah a om kuangpui te heam hi, ama in taungo khuital sawm le nii te nungzaang pan tuikuangte zongh la in suangtum doppha tungah koi hi.



¹⁸Assyriate ngam uk lianpa a lungkimsak natu in Biakinnpi sung pan kumpi tokhum koina teitan sia heamkhia in, kumpipa ii Biakinnpi sung aituum tumna baangkua zongh khak bil hi.

¹⁹Ahaz Kumpipa ii a sep a vawt dangte thempo sia *Judah Kumpipate Tangthu* sungah kikhum siat hi.

²⁰Ahaz thi a, David Khuapi sung kumpi thaah ah kiphum in, a tapa Hezekiah in a kumpi za laih hi.

Kumpite Niina 17

Israel Kumpipa Hoshea

¹Judah ah Kumpipa Ahaz a maan zawk a kum sawm le kum nii kumin Elah ii tapa Hoshea sia Israel te kumpipa suak a, ama in Samaria pan kum kua sung uk hi.

²Ama in Topa tungah maw a, ahizong ama mai ah a seam Israel kumpipa dangte za in maw ngawl hi.

³Assyria Ngam uk lianpa Shalmaneser in ama tungah ngal phuang hi; Hoshea in Shalmaneser tungah tum in, kum simin shia pia hi.

⁴Ahihang Hoshea in kum khat ciang, Egypt kumpipa So tungah hu ngetna kamtai paisak hi, tuaciang Assyriate tungah shia a piak sia tawp hi. Shalmaneser in hi thu a zaak ciang Hoshea manin thong sungah khum hi.

Samaria khua Bona

⁵Tua zawkciang Shalmaneser in Israel sim in Samaria uumci hi. A uumci zawk a kum thum kum

⁶sia Hoshea ii maan zawk a kum kua na hi a, tua kumin Assyriate ii Ngam uk lianpa in Samaria suan hi, Israel te pawl khat thongtaak tu in ciapui a, pawlkhat sia Halah khuapi ah Gozan ngamkhen no Habor Ngun hui ah teangsak hi, tuaciang pawlkhat sia Mediate khuapite ah teangsak hi.

⁷Samaria ii bona sia banghangziam cile Egypt ngam panin amate a pusua pui, Egypt kumpipa khut sung pan a hunkhia Topa a Pathian tungah a maw hu ahi hi. Ama te in pathian dangte bia uh a,



⁸a mite ii a mainawt ciang Topa ii a nawkeak mite ii taangh ngeina te zui pui in, Israel kumpipate ii phottawm ngeinate zui uh hi.

⁹Israel te inTopa a Pathian ii thukimpui ngawl nate seam uh hi. Amate in doai biate ii biakna munte khua nobel pan khuapi lianbel dongah vawt uh hi.

¹⁰Mualtung theampo le thinglim nuai sim ah, Asherah pathian nu ii milim le suangkhuamte phut uh hi,

¹¹tuaciang amate in ngim namtuite doai biate tau tungah hal uh hi, Topa ii a ngam pan a betkeak mihingte ii ngamtatna zui uh hi. Amate in Topa thin uuk natu in amate ii khansiat ngamtatna te taw piangsak a,

¹²milim biak ngawl natu Topa ii thupiakte ni ngawl uh hi.

¹³Topa in a kamtai te le a kamsangte paisakin Israel le Judahte a kidop natu in sawl hi: “Na ngamtat siatna uh te nusia vun a, na taangpupite uh ka piak Thukhamte sungah a om, ka naseam ka kamsangte tungtawnin no tungah kong piak kong sawlna te ni vun,” ci hi.

¹⁴Ahihang amate sia Topa a Pathian uh muang ngawlin a pute uh bangma in thinpui uh hi.

¹⁵Ama ii hilnate nit tu nial hi, a taangpupite taw thuciamna a vawtte zongh keam ngawl uh a, kidop natu a piakte zongh ngaingon uh hi. Amate in a mannung ngawl milimte bia uh a, amate mama zongh mannung ngawl uh hi, amate in a kiim a paam ah mite ii taangh ngeinate Topa in zui heak vun ci in a thupiakna sia ni ngawl uh hi.

¹⁶Topa a Pathian ii thukham theampo amate in paltan uh a, amate in thik taw a kivawt khuita nii ii lim a biak tu in vawt uh hi; amate in Asherah pathiannu ii milim zongh vawt a, aksite bia in, Baal pathian atu sepsak uh hi.

¹⁷Amate in a tapa a tanute doai biate ii pathiante tungah meihal biakpiakna in pia uh hi; amate in thaa taw kipaupui theite le mailam thu son thei te thu dongh uh hi, tuaciang amate in Topa ii muna ah a maan ngawlte vawt tu in kipum aap uh a, Topa thin uukna piangsak hi.



¹⁸Topa sia Israel tungah thin uuk ahikom ama ii mai pan bengkeak a, Judah kumpi ngam bek khe lai hi.

¹⁹Ahihang Judah mite in zongh Topa a Pathian ii thukhamte ni ngawl uh a, Israel te ii taangh ngeina a zak uh te zui uh hi.

²⁰Topa in Israel te nial in, daan pia a, a ngilo ngalte khut sungah aap in, ama ii muna pan bengkeak hi.

²¹Topa in Israel le Judah a khen zawkciang Israel te in Nabat ii tapa Jeroboam sia kumpi suaksak uh hi. Jeroboam in Topa taisan in a kiitak huai mama mawna sungah lampui hi.

²²Amate in Jeroboam zui in ama ii mawna a vawt theampo vawt paisuak uh a,

²³a naseam kamsangte tungah Topa ii a kidop natu a sonkhol bangin ama ii mai pan betkeakna a thuak uh dong amate in mawna vawt uh hi. Tua ahikomin Israel mite sia Assyria ah sal in kicia pui a, tu ni dong tu munah teang lai uh hi.

Assyriate Israel Ngam sungah Teang

²⁴Assyriate ii Ngam uk lianpa in khuapite ahi Babylon, Cuth, Ivvah, Hamath le Sepharvaimte pan mihingte paipui in, saltang Israel te ii teenna munah Samariate khuapite ah teangsak hi. Amate in hi khuapite taangin tua munah teang uh hi.

²⁵Amate tua munah a ten phit sawngin Topa bia ngawl uh ahikom Topa in tawpi te puakin, amate pawlkhat thatlumsak hi.

²⁶Assyriate ii Ngam uk lianpa munah a kison thu pan, Samaria khuapite ah mihing a tensakte in tua ngam ii pathian le a thukhamte he ngawl ahikom pathian in tawpi puakin thatsak hi, ci in kison hi.

²⁷Tua ahikom Ngam uk lianpa in in: “Thiampi ii ciapui thongtaak te sung pan khat puak kik vun a; ama tua munah teangin, a ngam ii pathian zia mihingte a hil natu in vawt vun,” ci in thupia hi.



- ²⁸Tua ahikom Samaria pan a kihawlkhia Israel thiampi khat sia mihingte in Topa bangbangin bia tu ci a hil tu in paisak uh a, ama Bethel ah teang hi.
- ²⁹Ahihang Samaria ah a teang mite in amate ii milim tek vawt lai uh a, Israel te ii vawt sa biakpiakna munah koi uh hi. A kibang ngawl pawl tuatuum sim in amate ii teenna khuapite ah a milimte vawt uh hi;
- ³⁰Babylon mite in Succoth Benoth pathian ii milimte vawt a; Cuth mite in Nergal milimte; Hamath mite in Ashima milimte;
- ³¹Ivvah mite in Nibhaz le Tartak milimte; tuaciang Sepharvaim mite in a pathian uh Adrammelech le Anammelech tungah meihal biakpiakna in a tate pia uh hi.
- ³²Hi mihingte in Topa zongh bia uh hi, tuaciang amate sung pan mihing tuatuumte tealin doai biate ii biakna munte le sangaw biakpiakna munte ah thiampi seamsak uh hi.
- ³³Tuabangin amate in Topa bia uh a, ahihang amate hong paina a ngamte ii taangh ngeina taw amate pathiante zongh bia uh hi.
- ³⁴Amate in a taangh ngeina luite tu ni dongin zangh lai uh hi. Amate in Topa bia ngawl a, Israel ci in min a piak Jacob ii suan le paalte tung a piak thukham le thupiaknate zongh ni ngawl uh hi.
- ³⁵Topa in amate taw thuciamna vawt in, thupia a, “A dang pathiante bia ngawl tu nu hi; tuate mai ah kun ngawl tu nu hi tuaciang sepsak ngawl tu nu hi, tua ahibuale zong sangaw biakpiakna vawt ngawl tu nu hi.
- ³⁶No in keima thu nong ni tu uh hi, keima, Topa note Egypt ngam pan vaangletna le thahatna taw hong pusua pa; note kei mai ah nong kun tu uh hi, tuaciang sangaw biakpiakna zongh nong pia tu uh hi.
- ³⁷Note a tawntungin thukhamte le thupiakte no atu ka at te na ni tu hi. A dang pathiante bia ngawl tu nu hi,
- ³⁸tuaciang thuciam no taw ka vawtte mangil ngawl tu nu hi.



³⁹Keima Topa, na Pathian ii thu nong ni tu uh a, tuasia ciang, na ngalte kung pan kong suatak tu hi.” ci hi,

⁴⁰Ahihang tua mihingte in ngai nuam ngawl a, amate ii taangh ngeinate ma zui veve uh hi.

⁴¹Tua hi a, tua mite in Topa bia uh hi, ahihang amate in a milimte zongh bia uh hi; tu ni dong ma in a suan a paalte in tuabangin ngamta lai uh hi.

Kumpite Niina 18

Judah Kumpipa Hezekiah

(2Khang tangthu 29.1-2;31.1)

¹Israel ah Elah ii tapa Hoshea ii maan zawk a kum thumna ah Ahaz ii tapa Hezekiah sia

²ama ii pian kum, kum kul le kum nga a phak laitakin Judahte ii Kumpipa suak a, Jerusalem panin kum sawmli le kum kua sung uk hi. A nu sia Zechariah tanu Abijah hi.

³A taangpupi David ii ngamtatna zui in ama in Topa ii diksak tu in ngamta hi.

⁴ama in doai biate ii biakpiakna munte sutham hi, suangkhuamte sutan in, tuaciang Asherah ii limte zongh saattan siat hi. Moses ii vawt taungo ngul, Nehushtan a kici sia zongh sutham hi. Tua hun dong sia Israel mite in tua taungul upat vawtna in ngim namtui hal uh hi.

⁵Hezekiah in Topa Israel te ii Pathian muang hi; Judah in ama bang ama ii mai hi kale ama ii zawkciang hi kale kumpipa nei ngei ngawl uh hi.

⁶Ama in Topa tungah thumaan in, bangma hunin a thu a ni ngawl ngei bua hi, Topa ii Moses tungah a piak thupiakna te phinciing takin keamcing hi.

⁷Tua ahikom Topa sia ama taw omkhawm a, tuaciangin ama sia a sep a vawt theampo ah zawna nga hi. Ama in Assyriate ii ngam uk lianpa langpan in tualngal tho in ama khut nuai ah tum nuam ngawl hi.



⁸Ama in Philistine te zo in, amate ii teenna khuano bel te pan kipan khuapi lianbel te dong kuanin sim bul hi, tuate sungah Gaza le a kiim a paam ngamte kihel hi.

⁹Hezekiah ii a maan zawk a kum li na ciang — tuasia Israel te tungah Kumpipa Hoshea ii maan zawk a kum salina hi a — Assyriate ii Ngam uk lianpa Shalmaneser in Israel simin Samaria uumci hi.

¹⁰A uumci zawk a kum thumna ciangin Samaria bo a; hi sia Hezekiah ii maan zawk a kum lukna hi in, tuaciang Hoshea ii maan zawk a kum kua na ahi hi.

¹¹Assyria te ii ngam uk lianpa in Israel te thongtaak tu in paipui a, pawlkhat sia Halah khuapi sungah, pawlkhat Gozan ngamkhen sung Habor Ngun hui ah, pawlkhat sia Mediate khuapite ah teangsak hi.

¹²Samaria sia bo hi, banghangziam cile Israel in Topa a Pathian uh ii thu ni ngawl hi, tua ban ah amate taw thuciam a vawt te zongh paltan uh a, Moses Topa naseam pa ii thukham a piakte theampo zongh ni ngawl uh hi. Amate in za nuam ngawl a, ni nuam ngawl hi.

Assyriate in Jerusalem Tawng
(2Khang tangthu 32.1-19; Isaiah 36.1-22)

¹³Kumpipa Hezekiah ii a maan zawk a kum sawm le kum li ciangin, Assyriate ii ngam uk lianpa Sennacherib in Judahte ii kulh taw a ki uum khuapite sim in zo hi.

¹⁴Hezekiah in Lachish a om Sennacherib tungah kam thaak hi, “Keima khial khi hi; nong hesuakna in nong simnate tawp in, nong nget pawpo hong pia tu khi hi,.” ci hi. Ngam uk lianpa ii zokikna sia, Hezekiah in ngun toai ton sawm le kham ton khat puak tu hi.

¹⁵Hezekiah in Biakinnpi sung le kumpi inn sumkholna ngun teng thaak hi,

¹⁶ama in Biakinnpi kongbiang khuamte tung pan khamte khokin, tuaciang ama mama ii kongbiang khuamte a tuamna khamte la in Sennacherib thaak siat hi.



¹⁷Assyria ngam uk lianpa in ngalkap hon lian khat Jerusalem ah Hezekiah sim tu in paisak hi; tua ngalkap honpi sia ama ii uliante a za lianbel thum teng in uksak hi. Amate Jerusalem hong thet uh ciangin, amate in puan vawt naseamte ii omna lampi hong lua uh hi, tua lampi sia tuili tungnung sia pan tui hong luanna hawklum sia ii hui ah om hi.

¹⁸Tuaciang amate in Hezekiah samsak uh hi, tuaciang ama ii uliante thum in amate taw kisi tu in pai uh hi: Kumpi inn a keam pa Hilkiyah ii tapa Eliakim, zum lai atpa Shebna; le thu tepteena teng a keam Asaph ii tapa Joah ahi uh hi.

¹⁹Assyria te ii uliante khat in, Kumpipa Hezekiah sia a bang teng in hi zata in ngammuangsak thei ziam ci sia ngam uk lianpa in he nuam hi, ci in son hi.

²⁰Ama in, “Ngalkap lam sang a thiamna le a hatna te sia kam le muk lel taw kizo thei hi ci in um nu ziam? Assyria te lang pan tualngal nong thaw uh a kua in hong hu tu in um nu ziam?”

²¹Egyptte in no hong hu tu in um nu hi, ahihang tua ngaisutna sia bang taw kibang ziam cile pompa kung ciangkhit in zak taw kibang hi — hong tal tu a na khut uh hong sun tu hi. Egypt kumpipa sia ama a suang pawpo atu tuasia taw kibang hi,” ci hi.

²²Assyria ulianpa in ci lai a, “Tua ahibuale zong noma in na TopaPathian uh suang a kinei nu ziam? Topa ii biakpiakna munte biaknataute a sutham sia Hezekiah hi, ama in Judah mite tungah Jerusalem biaknatau bekma ah biakpiakna vawt thei tu nu hi, ci in thu pia hi.

²³Ngam uk lianpa min taw thukimna khat kivawt tu hi. Siphu tulnii hong pia tu khi hi, a to tu mihing ta za ma mu lei tu nu ziam?”

²⁴No sia Assyriate sung pan a za nobel sia taw zong kitee ngat thei ngawl lai nu hi, hi napi Egypt te in ngalleang le siphu ngalkapte puak tu in na muangmaw uh hi!

²⁵Topa ii hong huna kihel ngawlin na ngam uh sim tu in hong um nu ziam? Topa ama mama in simin susia in ci in hong sawl hi,” ci hi.



²⁶Tuasia ciang Eliakim, Shebna le Joah in ulian pa munah, “Aramaic kam in hong pau tan, Topa awng, tua kam tel khu hi. Hebrew kam in hong pau heak vun, luphung tungah a to mite theampo in hong ngai hi,” ci hi.

²⁷Ama in zo a, “Ngam uk lianpa ii hite theampo son in hong sawl sia no le na kumpipa zaak tu bek sa nu ziam? Hi dek ngawl hi. Mihingte luphung tungah a to te, noma bang keakin, na eak uh ne, na zun uh dawn tu, luphung tungah a to te ii zaak tu in ka pau ahi hi,” ci hi.

²⁸Tua zawkciang ulian pa hong dingto in Hebrew kam in hong au hi, “Assyria Ngam uk lianpa ii hong son teng ngai vun!

²⁹Ama in Hezekiah ii hong theam ngawl natu kidopna hong pia hi. Hezekiah in no hong hun zo ngawl tu hi.

³⁰Tuaciang Topa suan natu ama in zolsak heak vun. Topa in no hong hun tu in um heak vun.

³¹Hezekiah ii thu son ngai heak vun. Assyria te Ngam uk lianpa in thu hong pia hi, khuapi panin hong pusuak tavun a hong tum tavun. Noma sapit nguite panin sapitte hong kinesak tu a, na thingkung uh te panin thei ngate hong kinesak tu hi, tuaciang na tuikhuk uh pan tui hong kidawnsak tu hi —

³²ngam uk lianpa in note ten natu hong piak hun dong hi tu a, tua mun sia noma ngam taw ma kibang tu hi, sapittui na neak natu uh sapit huan om a, anluum vawt natu antang om tu hi: tua ngam sia olive kung le olive thau, le khuaitui omna ngam hi. Ama ii hong thupiak bangin na ngamta uh le na thi buatu uh a, na nungta tu uh hi. Topa in note hong suatak tu hi ci in Hezekiah in theamsak heak vun.

³³Ngamdangte ii pathiante in zongh a ngam uh sia Assyria Ngam uk lianpa ii khut sung pan hunkhia ngei na ziam?

³⁴Amate tu in koi sungah om ziam? Hamath le Arpad ii pathiante, koi sungah om ziam? Sepharvaim, Hena, le Ivvah te ii pathiante koi sungah om ziam? Samaria akua in hunkhia ngei ziam?



³⁵Ko ii ngam uk lianpa khut sung pan hi pathiante khat pawpo in hi ngamte hunkhia ka na ziam? Tua ahile Topa in Jerusalem hunkhia thei tu hi ci in bang in hong ngaisunsak ziam?” ci hi.

³⁶Mihingte sia kumpipa Hezekiah ii sawl bangma in dai khipkhep in om uh a, amate in kam khat zongh pau ngawl uh hi.

³⁷Tuaciangin Eliakim Shebna le Joah te in heena taw a puansilh lai uh baltham uh a, tuaciangin Assyria ulian pa ii pauna teng kumpipa munah son uh hi.

Kumpite Niina 19

Kumpipa in Isaiah Thu dongh

(Isaiah 37.1-7)

¹Kumpipa Hezekiah in amate ii thu kona a zaak po ciang a puansilh lai eaukeak in, khau-ip puan a silh zawkciang Biakinnpi sungah tum hi.

²Ama in kumpi inn a keam pa Eliakim, zum lai at pipa Shebna le thiampi lian pa sia Amoz ii tapa Isaiah kamsangpa kungah puak hi. Amate theampo zongh khau-ip puan silh uh hi.

³Amate ii Isaiah tungah kammal thaak tu a piak sia hi teng hi. “Tu ni sia haksatna ih thuak ni hi; ei sia hong kidaantat a, hong kimai mawlsak hi. Ei sia numei khat nau suak tu tha mama nei ngawlin a suak zo ngawl taw ih kibang hi.

⁴Assyria ngam uk lianpa in ama ii ulianbel pa a nungta Pathian leal tu in hong paisak hi. Na TopaPathian in hi lan zazan nate za hen a, tuabang a paute daan pia hen. Tua ahikom Pathian tungah ih mihingte a luhai lai teng atu thu ngen in,” ci uh hi.

⁵Isaiah in Kumpipa Hezekiah ii kamthaak teng a nga ciang,

⁶ama in hi zokikna teng thaak kik hi. “Topa in Assyriate ii Topa in hong hun thei bo a ci khawng te in lauthawnsak heak vun.

⁷Topa in ngam uk lianpa sia kamleang khat zasak tu a, a ngam ah ciasak kik tu hi,Topa in ama tua munah kithat lumsak tu hi,.” ci hi.



Assyriate in Tawna Dang khat thaak

(Isaiah 37.8-20)

- ⁸Assyria ulian pa in ngam uk lianpa sia Lachish khua nusia in a nai na Libna khuapi ah ngaldo hi ci in za hi; tua ahikom ama in ama taw kamkum tu in pai hi.
- ⁹Assyriate in thu za a, Egyptte ngalkap honte Ethiopia kumpipa Tirhakah in lampui in amate sim tu hi ci in za uh hi. Ngam uk lianpa in hi thu a zaak ciang ama in Judah te kumpipa Hezekiah lai khat thaak hi.
- ¹⁰“Na muanna Pathian in nang sia kei khut sungah taak ngawl tu ni hi hong ci hi, ahihang tua in nang theamsak heak in.
- ¹¹Assyria ngam uk lianpa khat in ama ii siatsak nop ngam khat pawpo sia bang law ziam na zaak sa hi. Nang suakta thei tu ki um ni ziam?
- ¹²Ka taangpupite in khuapite ahi Gozan, Haran le Rezepth te susia a, Telasar a teang Bethedan mite zongh mon hi, amate ii pathiante in hun thei ngawl hi.
- ¹³Hamath, Arpad, Sepharvaim, Hena le Ivvah khuapi te ii a kumpipate koi sungah om ziam?” ci hi.
- ¹⁴Hezekiah in a laithak la in sim hi. Tua zawkciang ama Biakinnpi sungah tumin Topa ii ompuina ah laithak sia koi hi,
- ¹⁵tuaciang thu ngen hi. “Cherubim te ii tungsia na tokhum tungah a to, Topa Israel te ii Pathian awng, nang bekma Pathian na hi hi, leitung kumpi ngam theampo a uk pa na hi hi, nangma in lei le van na bitphua hi.
- ¹⁶Tu inTopa awng, ko tungah thu hong piangte en in. Nang a nungta Pathian hong selnona Sennacherib ii pau teng ngai in.
- ¹⁷Ka vekpi in he khu hi, Topa Assyria te ngam uk lianpa in ngam tam mama susia a, a leitangh te ngamkhing in omsak hi,
- ¹⁸tuaciang a pathian uh te haltham hi, tua pathiante sia pathian hi ngawl hetin, thingngel suangngel mihing khut taw ma in a kivawt ahi hi.



¹⁹Tu in, Topa, ka Pathian awng, Assyriate kung panin hong hun tan, tuasia ciang leitung ngamte theampo in nang, Topa bek Pathian na hi hunlam hong he tu hi.”

Kumpipa tungah Isaiah ii Kamthaak

(Isaiah 37.21-38)

²⁰Tua zawkciang Isaiah in Kumpipa Hezekiah kam thaak a kumpipa ii thungetna Pathian ii zokikna

²¹Topa ii ci teng, “Sennacherib awng Jerusalem khuapi in nang hong nuisan hi, hong nunau hi.

²²Nang in akua lang a, akua selno ni ziam? Nang in kei, Israel te ii a thiangtho Pathian sia nong zatak vawt bua hi.

²³Na kamtai te na paisak a, kei tungah kisuangtaak in, na ngalleangte taw Lebanon mualsaang bel te na zo hi. Nang in cedar saangbelte le cypress thing phabelte ka phuktan a, taam sung a thuk belna mun ka theng hi ci in na kisuangtaak hi.

²⁴Ngamdang ah tuikhuk to in tui ka dawn hi na ci a, na ngalkapte in Nile Ngun tuan ko hi ci in na kisuangtaak hi.

²⁵“Hite sia khua ngeipi lai in ka ngeal sa ahi hunlam za ngei ngawl ni ziam? Tuciangin tua ka ngealna te taksua suak hi. Khuapi lian kulh taw a ki uumte suangtum hon suaksak tu in thahatna kong pia hi.

²⁶Tua mun ah a teang mihingte sia thahatna nei ngawl hi; amate sia lau in khing uh hi. Amate sia lo sungah lopate ahibuale innkhuam tunga nisuana pan vuisa ii seam keak lopa te bang hi lel hi.

²⁷“Ahihang nang huvau na theampo hong he khi hi, bang vawt a koi sungah pai, ci in kong he hi. Kei langpan in na kitom ngawp kong he hi.

²⁸Tua na kitomna te hong kikona ka nga a, na kiphatsakna hong kikona te zongh ka nga hi, tu in na naak sungah thikkoai kong thaak tu a, na kam sungah kamkhau kong bul tu a, na paina lampi sia ma tawnin kong leekai kik tu hi,” ci hi.



²⁹Tua zawkciang Isaiah in Kumpipa Hezekiah munah, “Hong piang tu thu ii lim sia hi sia hi. Tu kum le mai kum ciangin ngamh antangte bek na ne tu uh hi, ahizong a kum kik ciang na ciin sa uh ante na at tu a, na suan sa uh sapit ngate na ne tu hi.

³⁰Judah a luhai in a omlai teng sia thingno bangin khang tu a, lei ah zung thuk tha in, a ngate nga tu hi.

³¹Jerusalem ah mite om tu a, Zion Mual ah zong a luhai in om tu hi, banghangziam cile Topa in hisia a pian natu sia kho ngaisut hi.

³²Assyria ngam uk lianpa huvau Topa ii ci sia hi sia hi: Ama in hi khuapi sungah tum ngawl tu a, thaltang khat zongh hi khuapi ngatin kap ngawl tu hi. Lum toai ngalkap khat zongh hi khuapi hong neak ngawl tu a, tuaciang uumci natu a kiim ah leivum khat zongh kivawt ngawl tu hi.

³³Ama hong paina lampi ma tawnin heak kik tu hi, hi khuapi sungah tum ngawlin heak kik tu a, Keima, Topa in pau zo khi hi.

³⁴Keima min taw upatna le ka naseampa David tungah ka kamciam sa bangin hi khuapi sia dal in hung tu khi hi.

³⁵Tua ni zanin Topa vantung lalang khat pai in Assyria te 185,000 thatlum hi. A zingsang khuavak ciang amate a thi sa in liik hi!

³⁶Tua zawkciang Assyria te ngam uk lianpa Sennacherib nungkin in Nineveh khua ah heak kik hi.

³⁷Ni khat ni in ama biakinn sungah a pathian Nisroch bia in a om laitak a tapate nii, Adrammelech le Sharezer te in a namsau uh taw thatlum hi, tuaciang amate Ararat ngam ah suakta uh hi. A tapate a dang khat Esarhaddon in ngam uk lianpa za lua hi.

Kumpite Niina 20

Hezekiah Kumpipa ii Natna le Dam kikna

(Isaiah 38.1-8; 21-22; 2Khang tangthu 32.24-26)

¹Hi hun sung khawngin Kumpipa Hezekiah sia a cina in hong thi dektak hi. Amoz ii tapa, Kamsangpa Isaiah in ama taw kimu tu in pai a, ama munah,



“Topa in, na theampo ahi tu bangin koi in, banghangziam cile dam kik ngawl tu ni hi. A thi tu kinging in,” ci hi.

²Hezekiah in a maitang pang sang nga in thungen hi:

³“Topa awng na phawk in, nang tungah thumaanna taw seam a nong oai theampo seam khi hi,” ci hi. Ama in nasia takin kap tu in hong kipan hi.

⁴Isaiah in kumpipa paisan a, ahihang kumpi inn leitual a kantan laitakin Topa in ama munah,

⁵Topa in ama munah a minamte a ukpa Hezekiah kungah pai kik in sawl a, “Kei, Topa, na taangpupi David ii Pathian in na thungetna kong za a, na thitui luan ka mu hi. Hong damsak tu khi hi, tuaciang tu zo ni thum ciangin Biakinnpi sungah pai tu ni hi.

⁶Kum sawm le kum nga hong nungtasak lai tu khi hi. Assyria te ii ngam uk lianpa khut sung pan nang le hi khuapi Jerusalem sia hong hun tu khi hi. Keima ka ki upat natu le ka naseampa David tungah ka kamciam vawt hu in hung tu khi hi,” ci in sonsak hi.

⁷Tua zawkciang Isaiah in kumpipa a ou te munah thei nga panin a kivawt noi thei khat a uilut noai leute dam tu hi, ci in sawl hi.

⁸Kumpipa Hezekiah in, “Topa in hong damsak tu a, ni thum ciangin Biakinnpi ah ka pai thei tu sia bang lim taw tel tu khi ziam?” ci in dongh hi.

⁹Isaiah in zo a, “Topa in a kamciam tangtungsak tu hi ci in hong lakna in lim khat hong pia tu hi. Tu in keallei tungah niliap ii lim sia kal sawm a mai sangah paisak nuam zaw ni ziam, a nung sangah kal sawm nungkinsak nuam zaw ni ziam?” ci in dongh hi.

¹⁰Hezekiah in, “Nilim liap mai ah kal sawm pai tu sia thu ol hi. Kal sawm nungkinsak in,” ci in zo hi.

¹¹Isaiah in Topa tungah thungen a, Kumpipa Ahaz ii vawt keallei tungah Topa in nilim sia kal sawm nungkinsak kik hi.

Babylon pan Kamtaite

(Isaiah 39.1-8)



¹²Tua hun khawng ma in Babylonia kumpi ahi Baladan ii tapa Merodach Baladan in Hezekiah kumpipa sia a cina hi ci in za a, tua ahikom ama in lai thaak khat le letsong khat thaak hi.

¹³Hezekiah in tua kamtai te pha takin saang a, tuaciang a hauna teng amate lak hi — ama ii ngun le khamte, tuaciang hel namtuite ahizong paaknamtuite le a ngal vanh teng lak hi. Ama ii vanh kholna sung ahizong ama ii kumpi ngam sungah ahizong amate a lak ngawl vanh khat beak zongh a om bua hi.

¹⁴Tuaciang kamsangpa Isaiiah sia Hezekiah Kumpipa kungah pai in, “Mihing hite koisung pan hong pai a, amate in nang tungah bang hong ci ziam?” ci in dongh hi. Hezekiah in zo a, “Amate a khuala ngam Babylon panin hong pai hi,” ci hi.

¹⁵“Kumpi inn sungah amate in bang teng mu ziam?” ci in dongh hi. “Amate in na theampo mu siat hi. Vanh senna inndoi sungah ka lak ngawl bangma om ngawl hi,” ci hi.

¹⁶Isaiiah in kumpipa tungah, “Topa Vaanglianbelpa in ci hi,

¹⁷na kumpi inn sungah vanh om theampo, na taangpupite ii tu ni dong a khol sa theampo Babylon ah ki ciapui tu hun khat hong theng tu hi. Bangma kikhe ngawl tu hi.

¹⁸Nangma ii suan le paal tatak te pawlkhat kiciapui tu a, a cil uh kinget in Babylon kumpipa inn sungah naseam in kikoi tu hi,” ci in son hi.

¹⁹Kumpipa Hezekiah in hi teng sia ngal kilemna le ngam muanna ama ii nuntak sungah om tu hi ci in saang a, hi bangin zo hi, “Topatung pan nong thu piak teng sia thupha hi,” ci hi.

Hezekiah ii Maanna Bo

(2Khang tangthu 32.32-33)

²⁰Hezekiah Kumpipa ii a sep a vawt dang teng, a ngal hanna, tuikholna khat a vawtna le khuapi tui neak tu leihawng a tawlet nate theampo sia Judah Kumpipate Tangthu sungah kikhum siat hi.

²¹Hezekiah thi a, a tapa Manasseh in a kumpi za laih hi.

Kumpite Niina 21



Judah Kumpipa Manasseh

(2Khang tangthu 33.1-20)

- ¹Manasseh sia Judahte ii kumpipa a sua hunin ama ii pian kum, kum sawm le kum nii pha hi, tuaciang ama in Jerusalem panin kum sawmnga le kum nga sung uk hi. A nu sia Hephzibah hi.
- ²Topa ii minamte mai hong nawt ciang a betkeaksak minamte ii a thasiat huai ngamtatna te zui in Manasseh in Topa tungah maw hi.
- ³A pa Hezekiah ii a suksiatcip sa doai biate ii biakpiakna munte ama in sa kik hi; Israel te ii Kumpipa Ahab ii vawt bang keak ma in ama in Baal biak natu biaknataute sa in, Asherah pathiannu ii milim vawt hi.
- ⁴Ama in doai biate ii biaknatau te sia Topa ii ama a kibiakpiak natu mun hi a ci Biakinmpi sungah sa hi.
- ⁵Biakinmpi ii leitual te nii sungah aksite biakpiak natu biaknatau te vawt hi.
- ⁶A tapa sia meihal biakpiakna in pia hi. Ama in aisaan theite, mitbum thiamte, mailam thuson theite le thaa thudongh theite, thu veu dongh hi. Ama in Topatungah nasia takin maw a, a thin uukna piangsak hi.
- ⁷Ama in pathiannu Asherah ii lim sia Biakinmpi sungah koi hi, tua mun siaTopa in David le a tapa Solomon munah: “Hi mun Jerusalem ah hi Biakinmpi sia kei hong kibiak natu in minam sawm le niite ii ngam sung bup pan ka teal ahi hi.
- ⁸Tuaciang Israel mite in ka thupiakna te theampo ni in, ka thukham buppi Moses tungtawn in ka piakte keamcing in ahile amate ii taangpupite tungah ka piak leitangh panin a kinawkeak tu ka oai buatu hi,” a ci na mun ahi hi.
- ⁹Ahihang Judah mite in Topa thu ni ngawl a, Manasseh in Topa ii a mite hong mainawt hun lai a, a betkeak mite sangin mawna nasia zaw a vawt natu in lampui hi.
- ¹⁰A naseam kamsangte tungtawn in Topa in,



¹¹“Kumpipa Manasseh in hi a thasiat huai mama nate Canaan mite sangin a nasia zaw lai in vawt hi; tuaciang ama ii milimte taw Judah mite mawna sungah lampui hi.

¹²Tua ahikom kei, Topa, Israel te Pathian in Jerusalem le Judah tungah tuasiatna ka piangsak tu a, a za po in khing liang tu hi.

¹³Samaria daan ka piak bang le Israel Kumpipa Ahab le a suan a paalte ka vawt bangin Jerusalem daan ka pia tu hi. Jerusalem sia a mite bo dongin ka nawt thiing tu a, pakan nawt thiingin a khup lam a kikoi bangin ka thiangsak tu hi.

¹⁴A mite sung pan a nungta lai te ka nusia tu a, tuaciang amate sia a ngalte khut sungah ka aap tu hi, tuate in amate zo tu a, a leitangh phuul tu hi.

¹⁵Hi bangin ka vawt tu sia banghangziam cile ka mite in kei tungah hong khial a Egypt ngam pan a taangpupite ii a pusua pan kipan tu ni dong ma ka thin uuksak tawntung hi,” ci hi.

¹⁶Manasseh in mawna nei ngawl mihing tam mama thatlum a, Jerusalem lampite chisan luang hi; hi teng tung sia ah ama in a mite milim biakna ah lampui a, Topa tungah mawsak hi.

¹⁷Manasseh ii sep le vawt a dangte theampo mawna a vawtte theampo kihel in, *Judah Kumpipate Tangthu* sungah kikhum hi.

¹⁸Manasseh thi a, kumpi inn huangsung Uzza huan ah kiphum hi, tuaciang tapa Amon in a kumpi za laih hi.

Judah Kumpipa Amon

(2Khang tangthu 33;21-25)

¹⁹Amon sia Judahte kumpipa a sua hunin kum kul le kum nii pha a, Jerusalem panin kum nii sung uk hi. A nu sia Meshullemeth hi a, Jotbah khua pan Haruz ii tanu ahi hi.

²⁰A pa Manasseh bangma in ama in Topa tungah maw hi;

²¹ama in a pa ii ngamtatna teng zui in a pa ii biak milimte bia hi.

²²Ama in a taangpupite Pathian Topa sia nial a, Topa ii thupiak ni ngawl hi.



²³Amon ii uliante in ama suam sawm uh a, kumpi in sungah ama thatlum uh hi.

²⁴Judah mite in Amon that teng thatlum uh a, tuaciang a tapa Josiah kumpi in koi uh hi.

²⁵Amon ii a sep a vawt dangte theampo *Judah Kumpipate Tangthusungah* kikhum hi.

²⁶Amon sia Uzza huansung than ah kiphum a, a tapa Josiah in a kumpi za laih hi.

Kumpite Niina 22

Judah Kumpipa Josiah

(2Khang tangthu 34.1-2)

¹Josiah sia kumpipa a sua hunin kum liat pha hi, tuaciang ama in Jerusalem pan kum sawmthum le kum khat sung uk hi. A nu sia Bozkath khua pan Adaiiah ii tanu Jedidah hi.

²Josiah in Topa ii diksak te vawt hi; ama in a taangpupi David ii lam lak bangin ngamta a, Pathian ii thukhamte belcing takin zui hi.

Thukham Laibu Kimu

(2Khang tangthu 34.8-28)

³Kumpipa Josiah in a maan zawk kum sawm le kum liat laitakin, Meshullam ii tupa, Azaliah ii tapa zum thu zeakpipa Shaphan sia Biakinnpi ah samsak a,

⁴“Pai tan a, thiampi Hilkiah munah, Biakinnpi tumna a tavuan nei thiampite ii mite tung pan a khon sumte bangza tak pha ziam sazian hong lak taken.

⁵A sum sia Biakinnpi pua te ii ukte tungah pia taken. Amate in,

⁶lettamate, innsate, uksuang ciangte thaman pia taken a, thing le suang biakinn pua natu a kul teng leina in nei taken.

⁷Nasepnate a ukte sia thumaan mama ahikom a sum zakna uh sazian vawt a sawl kul ngawl hi,” ci hi.



⁸Shaphan in kumpipa ii thupiakna teng Hilkih tungah a tut zawkciang Hilkih in, Biakinnpi sungah Thukham Laibu kimu hi ci in son hi. Hilkih in laibu a piak le Shaphan in sim hi.

⁹Tua zawkciang ama kumpipa kungah pai kikin thu ko hi: “Na naseamte in Biakinnpi sunga sum teng la in, innpuate a ukte tungah aap siat zo khu hi,” ci uh hi.

¹⁰Tua zawkciang ama in, “Hi sungah Hilkih ii hong piak laibu khat nei khi hi,” ci hi. Tuaciang ama in kumpipa zaak tu in a nging in sim hi.

¹¹Kumpipa in laibu a kisim sia thu a zaak ciang, thin nop ngawl na taw a puansilh lai eau keak a,

¹²tuaciang Hilkih thiampipa tung, Shaphan tapa Ahikam tung, Micaiah tapa Achbor tung, zum thuzeakpipa Shaphan tung le kumpipa langpan pa Asaiah te tungah:

¹³“Pai tavun a, hi laibu huvau Topa tungah kei taang le Judah mite taangin dongh tavun. Topa sia ei tungah hong thin uuk hi, banghangziam cile ih taangpupite in hi laibu ii ci bangin ngamta ngawl hi,” ci in thupia hi.

¹⁴Jerusalem khen thak khat sungah a teang Huldah a kici numei kamsang khat munah thu dongh tu in, Hilkih, Ahikam, Achbor, Shaphan le Asaiah te pai uh hi. (A pasal Shallum, Tikvah ii tapa, Harhas ii tupa, hi a, ama in Biakinnpi sungah a zak puantualte a keam pa ahi hi.) Amate in thupiang teng ama munah son uh hi,

¹⁵tuaciang ama in amate sia kumpipa kungah cia kikin sawl hi, tua kawmin

¹⁶Topa ii thupiak hi teng kumpipa puakin sawl hi: “Keima in Jerusalem le a sunga teang mihingte theampo kumpipa ii sim laibu sungah a ki at bangin daan ka pia tu hi.

¹⁷Amate in kei hong nial a, tuaciang pathian dangte tungah sangaw biakpiakna pia uh hi, tua ahikom amate ii sep le vawt tung panin ka thin uukna hong piangsak hi. Ka thin uukna sia Jerusalem tungah tu hi, tuaciang tua ka thin uukna sia veng ngawl tu hi.



¹⁸Kumpipa ama ahile, hi sia in kei, TopaIsrael ii Pathian in ci khi hi: Nangma in laibu sung a ki at teng ngai ni hi,

¹⁹tuaciang Jerusalem a mite daan ka piak tu te na zaak ciang kiniamkhiakna le kisiina taw ka mai ah na puansilh eaukeak in, kap ni hi. Mit mu bek zongin a lau huai mama ka suaksak tu a, mihingte in haamsiatna kammal in a zangh liang tu hi. Ahihang na thungetna hong za zo khi hi,

²⁰tuaciang Jerusalem khua daan ka piak tu sia na thi maa in tungsak ngawl tu khi hi, thinnuam in kong thisak tu hi,” ci hi. A sawltak pasalte in hi thu teng kumpipa Josiah tungah puak kik uh hi.

Kumpite Niina 23

Josiah in Doai biate Biakna Vawk

(2Khang tangthu 34.3-7, 29-33)

¹Kumpipa Josiah in Judah ngam le Jerusalem khua ii lampuite khawmtua hi,

²tuaciang amate Biakinn ah pai uh a, thiampite le kamsangte in ton pui in, midangte a hau a zawng kibang in pai uh hi. Amate ii mai ah kumpipa in Biakinnpi sungah a kimu thak thuciamna laibu a buppi in sim hi.

³Ama in kumpi khuamngual honte ii kungah dingin ama ii thu ni tu, a thupiakte le a thukham te sia thin theampo ngaisutna theampo taw keamcing in thuciamna taw a kithua laibu sungah ngetna theampo seam tu vawt tu in Topatungah thuciamna khat vawt uh hi. Tuaciang mihingte theampo in thuciamna keamcing tu in Topa taw kiciam uh hi.

⁴Tua zawkciang Josiah in Thiampi Saang Hilkih, a khut dawn thiampite, Biakinnpi tumna cingin a om tavuan neite munah, Biakinnpi sungah Baal biakna, pathiannu Asherah biakna le aksite biakna vanh theampo pusua siat tu in thu pia hi. Kumpipa in hi vanhte sia khuapi puasang Kidron luamkuam hui ah haltum in, a vaam teng sia Bethel ah paipui hi.

⁵Ama in sangaw biakpiakna le doai biate ii biakna taute tungah, Judah ngam le Jerusalem ah — Judah kumpi masa te ii kipsak thiampite, Baal tung a sangaw biakpiakna a pia thiampi theampo, ni, tha, aksi le solh te biakna sung a seam theampo heamkhia hi.



⁶Ama in Biakinnpi sung pan Asherah pathiannu ii lim sia la keakin khuapi pua sang Kidron luamkuam ah a haltum zawkciang a vaamte leivui sungah sucip in mipi kiphumna munah poai hi.

⁷Ama in Biakinnpi a teenna inn, pumpi zuak te omna te sutham hi. (Numeite in tua munah puantualte Asherah biakpiak natu a kizanghte tak uh hi.)

⁸Ama in Judah khuapite a om thiampite Jerusalem ah paipui hi, tuaciang ngambup sungah sangaw biakpiakna vawtna biaknataute theampo phiat hi. Khuapi kongpi sung tum ciang vei sangah khuapi ukpipa Joshua ii vawt kealdoai tungah a ki aap, biaknatau sia baltham hi.

⁹Tua thiampite sia Biakinnpi sungah a sep tu ki oai ngawl hi, ahihang amate ii thiampite a kipia tol saw ngawl anluumte nesak uh hi.

¹⁰Kumpipa Josiah in Topheth a kici doaibiakna mun Hinnom Kuam a om sia, kuama in a tapa, a tanute Molech pathian tungah meihal biakpiakna in a nei thei ngawl natu in lalthamsak hi.

¹¹Ama in Judah kumpite ii ni biakpiakna in a zak siphute heam a, hi biakpiakna sung a kizangh leangte haltum hi. (Hite sia biakinn leitual ii kongkha hui ah Nathan Melech thiampi saang pa ii teenna inn hui ah kikoi hi.)

¹²Kumpipa Ahaz ii teenna kumpi innkhum tungah Judah kumpipate iisak biaknatau le kumpipa Manasseh ii Biakinn leitual te nii sungah biaknatau sia vaattham in; biaknataute saatneen in a bek a bek in Kidron Kuam ah vawk hi.

¹³Josiah in Kumpipa Solomon iisak Jerusalem ii nisuana sang Olive Mualvum thang sangah a thasiat huai milimte le biaknataute lalsak hi — tua milimte sia Sidon te pathiannu Astarte, Moabte ii pathian Chemosh, Ammonte pathiante Molech te ahi uh hi.

¹⁴Kumpipa Josiah in suangkhuamte balneen in, Asherah pathiannu ii milim zongh laitham in, tuaciang tuate ii dinna munte sia mithi ngu taw siin hi.

¹⁵Josiah in Israel te mawna sungah a lampui Nabat ii tapa Kumpipa Jeroboam iisak Bethel a biakpiakna mun sia zongh laitham hi. Josiah in

biaknatau sutham a, a suangte a bekin sutham in leivui suak tu in sucip hi; ama in Asherah ii lim zongh haltum hi.

¹⁶Tua zawkciang Josiah in a kiimkot a et le mualtungah thaan pawlkhat mu hi; ama in mithi ngute la in biaknatau tungah halsak hi. Kumpipa Jeroboam sia biaknatau hui ah dingin a om lai in kamsang khat in hi bang teng piang tu hi ci in nidang pek lai in a sonkhol sa bangin ama in biaknataute ninsak hi. Kumpipa Josiah in a kiimkot a et le tua a sonkhol kamsangpa ii thaam mu hi.

¹⁷Ama in “Zia sia akua thaam ziam?” ci in dongh hi. Bethel mite in, “Tuasia Judah panin hong pai kamsang khat ii thaam hi a, biaknatau tungah na vawt tu teng a son khol sia hi,” ci uh hi.

¹⁸Josiah in, “A om bangin omsak vun,” ci in thupia hi. “Ama ii ngute sia kiheam khia ngawl tu hi,” ci hi. Tua ahikom a ngute sia kikhiin ngawl a, Samaria pan hong pai kamsangte ii ngu zongh kiheamkhia ngawl hi.

¹⁹Israel khuapite sim in, Kumpipa Josiah in Israel te kumpite ii vawt doai biate ii biakna munte sutham siat hi, tua kumpite in Topathin uukna piangsak uh hi. Tua biaknataute sia Bethel a te a vawt bangin vawt hi.

²⁰Ama in doai biate thiampi theampo sia amate ii sepna biaknatau tungah thatlum a, tuaciang ama in biaknatau sim tungah mithi ngu hal hi. Tua zawkciang ama Jerusalem ah heak kik hi.

Josiah in Paisan Poai Vawt

(2Khang tangthu 35.1-19)

²¹Kumpipa Josiah in a mipite munah thuciam laibu sungah a ki at bangin Topa upatna Paisan Poai vawtin sawl hi.

²²Hi sia bang Paisan Poai sia Israel kumpipate Judah kumpipate in Thukhen maangte ii ngam a uk zawk peuma in kuama in vawt ngei ngawl hi.

²³Tu in a khak bel ciang Josiah ii maan zawk a kum sawm le liat hun ciang Jerusalem khua sungah Paisan Poai kivawt hi.

Josiah ii A dang Kikhealna A vawtte

²⁴Thiampi Saang Hilkiyah ii Biakinnpi sung pan a mu Thukham laibu sungah a ki at te bang ngamtat thei natu in Kumpipa Josiah in Jerusalem pan le Judah



ngam lei dang panin, thaa taw kipaupui thei te theampo, mailam thuson khol theite, baangkua pathian note, milimte, a dang doai bia theampo ii biakpiakna in a zak nate a vekpi in heam siat hi.

²⁵Ama ii Topa atu thin theampo ngaisutna theampo le thatang theampo taw seam a, Moses ii thukham a nit bang in ama mai ah kuama kumpi khat zongh om ngei ngawl hi; ama zawkciang zong tuabang kumpi khat zongh om ngawl hi.

²⁶Ahihang Topa ii a nasia mama a thin uukna sia Kumpipa Manaseh ii ngamtatna hangin Judah te tungah hong tung a, tu dong ma in thai ngawl hi.

²⁷Topa in, “Israel tungah ka vawt sa bangma Judah tungah vawt tu khi hi: ka muna pan Judah mite sia hawlkhia tu khi hi, tuaciang ka teal Jerusalem khuapi le keima hong kibiakpiakna mun tu hi ka ci Biakinnpi sia dong, ka nilkhia tu hi,” ci hi.

Josiah ii Maan A tawpna

(2Khang tangthu 35.20-36.1)

²⁸Kumpipa Josiah ii a sep a vawt dangte theampo sia *Judahte Kumpipate Tangthu* sungah kikhum hi.

²⁹Josiah sia kumpi ahi laitak ma in, Egypt kumpipa Neco in Assyriate kumpipa hu tu in ngalkap hon taw Euphrates Ngun dong hong kuantu hi. Kumpipa Josiah in Egypt ngalkap hon te khak tu in hanciam a, ama Megiddo ngalphual ah kithat hi.

³⁰Ama ii uliante in ama luang sia leang tungah suan in Jerusalem ah ciapui uh a, kumpi thaah ah ama kiphum hi. Judah mite in Josiah ii tapa Joahaz tealin kumpi suaksak hi.

Judah Kumpipa Joahaz

(2Khang tangthu 36.2-4)

³¹Joahaz sia kumpi a sua hunin kum kul le kum thum pha hi, tuaciang ama in Jerusalem pan tha thum sung uk hi. A nu sia Hamutal hi a, Libnah pan Jeremiah ii tanu ahi hi.

³²A taangpupite ii zia zui in ama in Topa tungah maw hi.



³³Ama ii maan hun sia Egypt te Kumpipa Neco in Hamath ngam Riblah ah thong taakin a koi ciang, bo a, Judah in ngun pound 7,500 le kham pound 75 shia in piyasak hi.

³⁴Kumpipa Neco in Joahaz ii tapa Eliakim sia Joahaz laih tu kumpipa in koi a, a min zongh khealsakin, Jehoiakim ci hi. Joahaz sia Kumpipa Neco in Egypt ah ciapui a, tua sungah thi hi.

Judah Kumpipa Jehoiakim

(2Khang tangthu 36.5-8)

³⁵Kumpipa Jehoiakim in a mite tung pan amate hauna taw kizui in shia khon a, Egypt Kumpipa ii nget za a cingin a piak zawk natu in tuabangin vawt hi.

³⁶Jehoiakim sia Judah kumpipa a sua hunin ama kum sia kul le nga pha hi, tuaciang ama in Jerusalem panin kum sawm le kum khat sung uk hi. A nu sia Zebidah hi a, Rumah khuapino panin Pedaiah ii tanu hi.

³⁷A taangpupite ii zia bangin ama in Topa tungah maw hi.

Kumpite Niina 24

¹Jehoiakim sia kumpipa ahi laitakin Babylon Kumpipa Nebuchadnezzar in Judah sim hi, tuaciang kum thum sung Jehoiakim sia ama ii khut nuai ah hong lut kul hi; tua zawkciang tualngal hong tho hi.

²Topa in Babylon te, Syria te, Moabte, Ammonte tungah ngalnguk sim tu in Judah ah paisak a, Jehoiakim langpanin Judah lalsak tu in kipan uh hi, Topa in a naseam a kamsangte tungtawn in ka vawt tu hi a ci bangin vawt hi.

³HisiaTopa ii thupiakna taw a piang hi a, Kumpipa Manasseh ii mawnate hu in Judah mite muna pan a betkeak natu in thu piang ahi hi,

⁴tuaciang, a tuan in maw nei ngawlte a thalup hu ahi hi. Topa in Manasseh ii tuabang a mawna te maisak zo ngawl hi.

⁵Jehoiakim ii sep le vawt theampo sia *Judah Kumpipate Tangthusungah* kikhum hi.

⁶Jehoiakim thi a, a tapa Jehoiachin in a kumpi za laih hi.



⁷Egypt kumpipa le a ngalkap honte in Egypt pua sia ah kuan kik nawn ngawl uh hi, banghangziam cile Babylonia te in tu in Egyptte ii ngamkhen theampo, Euphrates Ngun pan Egyptsaksang ngamngi dong uk hi.

Judah Kumpipa Jehoiachin

(2Khang tangthu 36: 9-10)

⁸Judah te ii kumpipa a sua hunin Jehoiachin sia ama pian kum, kum sawm le kum liat pha hi, tuaciang ma in Jerusalem panin tha thum sung uk hi. A nu sia Nehusta hi a, Jerusalem khua pan Elnathan ii tanu hi.

⁹A pa ii ngamtat teng zui in Jehoiachin in Topatungah maw hi.

¹⁰Ama ii maan hun sungah Babylonia ngalkap honte sia Nebuchadnezzar uliante in uk a, Jerusalem sim tu in kuan a, uumci uh hi.

¹¹Ama ii tuabang a uumci lai in Nebuchadnezzar ama mama Jerusalem ah hong pai hi,

¹²tuaciang Kumpipa Jehoiachin sia a nu, a tapate, a uliante, le kumpi inn uliante taw Babylonia te tungah tum uh hi. Nebuchadnezzar ii maan a kum liatna hunin ama in Jehoiachin sia thong taak tu in paipui a,

¹³Biakinnpi sung le kumpi inn sungah sum le paai theampo pua siat hi. Topa ii sonkhol bangma in Nebuchadnezzar in Biakinnpi sungah zak tu Solomon kumpipa ii vawt kham ankuang ankeaute pua siat hi.

¹⁴Nebuchadnezzar in Jerusalem mite, kumpipa tate le lampuite theampo thongtaak tu in siapui hi, a vekpi kingawm tulsawm pha hi. Ama in khutthiamna nei theampo, thikseakte dong siapui hi, Judah ah mizawng bel teng bek nusia hi.

¹⁵Nebuchadnezzar in Jehoiachin sia thongtaak tu in siapui hi, Jehoiachin ii nu, a zite, a uliante le Judah a lampuite theampo taw kopin siapui hi.

¹⁶Nebuchadnezzar in mihing thupi theampo Babylon ah puak hi, a vekpi in tulsali pha uh hi, tuaciang thiamneal naseam thei tulkhat, thikseakte kihel, ngalkap seam thei tu pumpi cing vive ahi uh hi.



¹⁷Nebuchadnezzar in Jehoiachin ii pano, Mattaniah sia Judahte kumpipa tu in koi a, a min zongh Zedekiah ci in kheal hi.

Judah Kumpipa Zedekiah

(2Khang tangthu 36.11-12; Jeremiah 52: 1-3a)

¹⁸Judahte ii kumpipa a sua hunin Zedekiah sia a pian kum, kum kul le kum khat ahi hi, tuaciang ama in Jerusalem panin kum sawm le kum khat sung uk hi. A nu sia Hamutal hi a, Libna khua mi Jeremiah ii tanu ahi hi.

¹⁹Kumpipa Zedekiah in Topa tungah Kumpipa Jehoiakim maw bang tatakin maw hi.

²⁰Topa sia Jerusalem le Judah te tungah thin uuk mama ahikom ama muna pan beng keak hi.

Kumpite Niina 25

Jerusalem khuapi Bona

(2Khang tangthu 36.13-21; Jeremiah 52.3b-11)

¹Zedekiah in Babylon Kumpipa Nebuchadnezzar ii khut nuai pan tualngal tho a, tua ahikom Nebuchadnezzar in a ngalkap hon theampo taw Jerusalem sia Zedekiah ii maan a kum kua, a tha sawm, ni sawm ni in, sim hi. Amate in khuapi pua sangah uumci na pang ciangin,

²Zedekiah ii a ngam uk, kum sawm le kum khat a cin dong uumci hi.

³Tua kum a tha lina, a ni sawm ni in, kialpi sia nasia mama ahikom

⁴mihingte in khuapi luphung sulet hi. Babylonte in khuapi kiim uum ahihang ngalkapte sia zanin suakta uh hi. Amate in kumpi huan pan, luphungte nii kipeena kongpi tungtawn in, Jordan Kuam sangah tai uh hi.

⁵Ahihang Babylon ngalkap honte in Zedekiah Kumpipa zuizen a, Jericho khuahui zaangtam ah manin, ama sia a ngalkapte theampo in taisan hi.

⁶Zedekiah sia Kumpipa Nebuchadnezzar kungah kipaipui a, ama sia Riblah ah om in, tua mun panin Zedekiah tungah thu tan hi.

⁷Zedekiah ii mu tangin a tapate kithatlum a; tua zawkciang Nebuchadnezzar in Zedekiah ii mittangte khelkeaksakin, thikkol bul in Babylon ah siapui hi.



Biakinnpi Lalthapna

(Jeremiah 52.12-33)

⁸Babylon Kumpipa Nebuchadnezzar ii maan a kum sawm le kum kua, a tha nga na, a ni sali ni in, Kumpipa ngaisutna a pia le a ngalkap honte ukpipa Nebuzaradan sia a ngalkapte taw Jerusalem ah tum hi.

⁹Ama in Biakinnpi sia haltum a, kumpi inn le Jerusalem ah mihing thupi theampo ii innte haltham hi,

¹⁰tuaciang ama ii ngalkapte in khuapi luphung pheltham hi.

¹¹Tua zawkciang Nebuzaradan in khuapi sung a om lai sun teng, thiamneal naseamte le Babylonte sangah pang tu in a taite Babylon ah siapui hi.

¹²Ahihang ama in mi zawngbel teng, neisa bangma a nei ngawl teng sia Judah ah nusia in amate sia sapit huan sung le lo sungah na seamsak hi.

¹³Babylonte in Biakinnpi sungah taungo khuamte, leangte le taungo tuikuang le taungo vanhte theampo Babylon ah siapui hi.

¹⁴Amate in kawpheap te, biaknatau thiansakna vut kholna, meiinnte puana vanhte, sangaw biakpiakna sangaw ciang sachi donna kuangte, ngim namtui halna kuangte le a dang taungo taw a kivawt biakpiakna a zakte la hi.

¹⁵Amate in kham le ngun taw a kivawt peuma, meikam toai na kuang dongin la uh hi.

¹⁶Kumpipa Solomon ii vawt taungo vanh, Biakinnpi atu — khuamngual niite, leangte, tuikuangpui — hite sia ngit lei ahikom khia kitee ngawl hi.

¹⁷Khuampi ngual nii a kiphutte sia pi 27 veu saang hi, a tung sitna sia taungo ma ahi hi, pi li pi lang saa hi. Tua khuamlu kiimkot simin taungo taw a kivawt talee nga taw kizeam hi.

Judah Mite Babylon ah Kipaipui

(Jeremiah 52.24-27)

¹⁸Tuate tungsia ah, ngalkap maangpipa Nebuzaradan in Thiampi Saang Seraiah le thiampi lianbel ii zom Zephaniah le a dang Biakinnpi a seam ulian thum teng siapui hi.



¹⁹Khuapi sung panin ngalkap uk ulianpa le kumpipa ii aituam thudokte nga, khuapi sung a om lai teng, ngalkap ukpa ii khut dawn pa, ngalkap vai theampo tepteena keampa zongh ahi sia le a dang mihing thupi sawmluk ciapui hi.

²⁰Nebuzaradan in amate Babylon kumpipa kungah paipui hi, ama sia Riblah khuapi ah om a,

²¹Hamath ngamkhen sung ahi hi. Tua munah kumpipa in velsak a, thatlumsak hi. Tua ahikom Judah mite sia amate ngam panin salin kiciapui hi.

Judah Ngam uk Gedaliah

(Jeremiah 40.7-9; 41.1-3)

²²Babylonia te ii Kumpipa Nebuchadnezzar in Shaphan ii tupa, Ahikam ii tapa Gedaliah sia Judah ngam uk menzi in koi hi, tuaciang ama sia Babylonia ah a kiciapui ngawlte uk tu in koi hi.

²³Babylonia te khut sungah a tum ngawl ngalkap maangte le ngalkapte in hi thu a zaak ciang Mizpah ah ama taw kipawl na vawt uh hi. Hi ngalkap maangte sia, Nethania ii tapa Ishmael, Kareah ii tapa Johanan, Netophah khuapino pan Tanhumeth ii tapa Seraiah le Maacah pan Jezaniah te ahi uh hi.

²⁴Gedaliah in amate tungah, “Babylonia uliante kiitak om ngawl hi ci in kam hong pia khi hi. Hi ngam sungah teang vun a, Babylonia kumpipa a tu sepsak vun, tua hile na theampo a dikin hong piang tu hi,” ci hi.

²⁵Ahihang tua kum sunga tha salina ciang, Elishama ii tupa, Nethaniah ii tapa Ishmael, kumpi innkuante sung pan khat zongh ahi sia Mizpah ah mihing sawm taw pai a, Gedaliah simin thatlum uh hi. Ama in Israel mite le Babylonia te ama taw tua munah a om teng zongh that hi.

²⁶Tua zawkciang Israel te a hau a zawng, a kibangin ngalkap uliante taw tua mun nusia in Egypt ah tai uh hi, banghangziam cile amate in Babylonia te kiita uh hi.

Jehoiachin sia Thongsung pan Kipusua

(Jeremiah 52.31-34)



²⁷Evilmerodach sia Babylon te kumpipa a sua kumin, ama in Judahte ii Judah te ii Kumpipa Jehoiachin tungah hesuakna a lakna in thong panin ama pusuaksak hi. Hi bangin thu hong pian sia Jehoiachin ii luangtaak zawk a kum kul le sali, tha sawm le tha nii, a ni kul le ni sali ni hi.

²⁸Evilmerodach in ama sia hesuakna pia a, ama taw Babylonia a sal a hi khawm kumpipa dangte sangin phat vawt zaw a, dinmun le upatna a lian zaw pia hi.

²⁹Tua ahikom Jehoiachin sia a thongpuante a laih tu ki oai a, a nuntakna a taanglai sung teng kumpipa sabuai ah an kinesak hi.,

³⁰Ama ii a nuntak sung teng ni simin a zak tu sum zongh a hun zui in kipia hi.



Khang Tangthu Khatna

Khang Tangthu Khatna 1

Adam pan Abraham dong

(Pianciilna 5.1-32; 10.1-32; 11.10-26)

- ¹Adam ii tapa Seth, Seth ii tapa Enosh, Enosh ii tapa Kenan,
- ²Kenan ii tapa Mahalalel, Mahalalel ii tapa Jared,
- ³Jared ii tapa Enoch, Enoch ii tapa Methuselah, Mathuselah ii tapa Lamech,
- ⁴Lamech ii tapa Noah ahi uh hi. Noah in tapa thum nei a Shem, Ham le Japheth te ahi uh hi.
- ⁵Japheth ii tapate sia Gomer, Magog, Madai, Javan, Tubal, Meshech le Tiras hi a — amate ii min a tap a suan a paalte ii taangpupite ahi uh hi.
- ⁶Gomer ii suan le paalte sia Ashkenaz, Riphath le Togarmah mite ahi uh hi.
- ⁷Javan ii suan le paalte sia Elishah, Spain, Cyprus le Rhodes mite ahi uh hi.
- ⁸Ham ii tapate sia Cush, Egypt, Libya le Canaante hi a — amate ii min a tap a suan a paalte ii taangpupite ahi uh hi.
- ⁹Cush ii suan le paalte sia Seba, Havilah, Sabtah, Raamah le Sabteca mite ahi uh hi. Raamah ii suan le paalte sia Sheba le Dedan mite ahi uh hi.
- (¹⁰Cush in Nimrod a kici tapa khat nei in, Nimrod sia leitung ah a minthang ngual tungtuang masa bel ahi hi.)
- ¹¹Egypt ii suan le paalte sia Lydia, Anam, Lehab, Naphtuh,
- ¹²Pathrus, Casluh le Crete mite ahi uh hi, (hite sia Philistine mite ii pianna taangpupite ahi uh hi).
- ¹³Canaan ii tapa lianbel Sidon le Heth te sia amate ii min a tap minamte ii taangpupite ahi uh hi.
- ¹⁴Canaan sia Jebus, Amor, Girgash,
- ¹⁵Hiv te, Ark te, Sin te,
- ¹⁶Arvad, Zemar le Hamath te zongh ii taangpupi ahi hi.



¹⁷Shem ii tapate sia Elam, Asshur, Arpachshad, Lud, Aram, Uz, Hul, Gether le Meshekte hi uh a — amate ii min a tap a suan a paalte ii taangpupite ahi uh hi.

¹⁸Arpachshad sia Shelah ii pa hi a, Shelah sia Eber ii pa ahi hi.

¹⁹Eber in tapa nii nei in, khat pa ii min sia Peleg hi a, a khiakna sia ama khan in leitung mihingte kikhen tham siat hi cina hi a, a tapa dang khat ii min sia Joktan hi.

²⁰Joktan ii suan le paalte sia Almodad, Sheleph, Hazarmaveth, Jerah,

²¹Hadoram, Uzal, Diklah,

²²Ebal, Abimael, Sheba,

²³Ophir, Havilah le Jobab mite ahi uh hi.

²⁴Shem khang pan Abram khang ciang a suan le a paalte sia Shem, Arpachshad, Shelah,

²⁵Eber, Pelag, Reu,

²⁶Serug, Nahor, Terah le

²⁷Abram (Abraham zongh kici) te ahi uh hi.

Ishmael ii Suan le Paalte

(Pianciilna 25.12-16)

²⁸Abraham in tapa nii nei in, Isaac le Ishmael ahi uh hi.

²⁹Ishmael ii tapate sia minam sawm le niite ii lutang suakin, Nebaioth (Ishmael ii ta lianbel panin), Kedar, Adbeel, Mibsam,

³⁰Mishma, Dumah, Massa, Hadad, Tema,

³¹Jetur, Naphish le Kedemahte ahi uh hi.

³²Abraham in a zino Keturah taw in tapa luk nei a: Zimran, Jokshan, Medan, Midian, Ishbak le Shuah ahi uh hi. Jokshan in tapa nii nei a: Sheba le Dedan ahi uh hi.



³³Midian in tapa nga nei in: Ephah, Epher, Hanoch, Abida le Eldaah ahi uh hi.

Esau ii Suan le Paalte

(Genesis 36.1-19)

³⁴Abraham ii tapa Isaac in tapa nii nei a, Esau le Jacob ahi uh hi.

³⁵Esau ii tapate sia Eliphaz, Reuel, Jeush, Jalam le Korah hi uh hi.

³⁶Eliphaz in a nuai a minamte ii taangpupi hong suak a, tuate sia Teman, Omar, Zephi, Gatam, Kenaz, Timna le Amalek ahi uh hi.

³⁷Reuel sia Nahath, Zerah, Shammah le Mizzah minamte ii taangpupi suak hi.

Edom ngamah A teang ciilte

(Pianciilna 36.20-30)

³⁸⁻⁴²Edom ah a teang ciilte sia a nuai a Seir ii tapate ii suan le paalte ahi uh hi. Lotan sia Hori le Homam be le phungte ii pianna taangpupi hi. (Lotan in suapui numei Timna nei hi) Shobal sia Alvan, Manahath, Ebal, Shephi le Onam be le phungte ii pianna taangpupi hi. Zibeon in tapa nii nei a, Aiah le Anah ahi uh hi. Anah sia Dishon ii pa hi a, Dishon sia Hamran, Eshban, Ithran le Cheran be le phungte ii pianna taangpupi hi. Ezer sia Bilhan, Zaavan le Jaakan bete ii pianna taangpupi hi. Dishan sia Uz le Aran be le phungte ii pianna taangpupi hi.

Edom Kumpite

(Pianciilna 36.31-43)

⁴³⁻⁵⁰Israel ngamah kumpi a om ma in a nuai a kumpite khat zawk ciang khat in Edom ngam uk hi. Dinhabah pan Beor ii tapa Bela, Bozrah pan Zerah ii tapa Jobab, Teman ngam pan Husham, Avith pan Bedad ii tapa Hadad. (Hadad in Moab ngam sungah Mudiante zo hi.) Masrekah pan Samlah, Rehoboth-ngun-tung pan Shaul, Achbor ii tapa Baal Hanan le Pau pan Hadad in uk uh hi. (Hadad ii zi Mahetabel sia Matred ii tanu, Mezahab ii tunu hi.)

⁵¹Edom mite sia a nuai a minam bangin kikhen uh a: Timna, Alvah, Jetheth,

⁵²Oholibamah, Elah, Pinon,

⁵³Kenaz, Teman, Mibzar,

⁵⁴Magdiel le Iram te ahi uh hi.



Khang Tangthu Khatna 2

Judah ii Suan le Paalte

- ¹Jacob in tapa sawm le nii nei hi: Reuben, Simeon, Levi, Judah, Issachar, Zebulun,
- ²Dan, Joseph, Benjamin, Naphtali, Gad le Asher te ahi uh hi.
- ³Judah in tapa nga nei hi. Canaan numei a zi Bathshua taw tapa thum nei hi: Er, Onan le Shelah te ahi uh hi. A tapa lianbel Er sia ngilo lei ahikom Topa in that hi.
- ⁴A monu Tamar taw Judah in tapa nii nei thua a, Perez le Zerah ahi uh hi.
- ⁵Perez in tapa nii nei a Hezron le Hamul ahi uh hi.
- ⁶A suapui pa Zerah in tapa nga nei hi: Zimri, Ethan, Heman, Calcol le Darda ahi uh hi.
- ⁷Zerah ii suan le paalte khat ahi Carmi ii tapa Achan in Topaatu a kici suksiat tu vanhte ama aituam tu in a nguk manin Israel mite tuasiatna thuaksak hi.
- ⁸Ethan in tapa khat nei a, Azariah ahi hi.

David Kumpipa ii Innkuan Khangsimna

- ⁹Hezron in tapa thum nei hi: Jerahmeel, Ram le Caleb ahi uh hi.
- ¹⁰Ram khang panin Jesse khang dong, a suan le a paalte sia a nuai a bang ahi hi; Ram, Amminadab, Nahshon (Judah minam sung pan a minthang mama khat)
- ¹¹Salmon, Boaz,
- ¹²Obed le Jesse te ahi uh hi.
- ¹³Jesse in tapa sali nei hi. A lianbel pan a nobel ah: Eliab, Abinadab, Shammah,
- ¹⁴Nethanel, Raddai,
- ¹⁵Ozem le David te ahi uh hi.



¹⁶Ama in tanu nii zongh nei in, Zeruah le Abigail te ahi uh hi. Jesse ii tanu Zeruah in tapa thum nei hi: Abishai, Joab le Asahel te ahi uh hi.

¹⁷A tanu dang Abigail in Ishmael ii suan le paal khat ahi Jether tenpui a, amate in Amasa kici tapa khat nei hi.

Hezron ii Suan le Paalte

¹⁸Hezron ii tapa Caleb in Azubah tenpui a, Jerioth kici tanu khat nei hi. Azubah in tapa thum nei hi: Jeshar, Shobab le Ardon te ahi uh hi.

¹⁹Azubah a thi zawkciang Caleb in Ephrath tenpui a, Hur kici tapa khat nei hi.

²⁰Hur ii tapa sia Uri hi in, a tupa sia Bezalel ahi hi.

²¹Heron in kum sawmluk a phak ciang Machir ii tanu, Gilead ii suapuinu tenpui hi. Amate in Segub kici tapa khat nei a,

²²Segub in Jair kici tapa khat nei hi. Jair in Gilead ngamah khuapi kul le thum uk hi.

²³Ahihang Geshur le Aram kumpi ngamte in tua munah khua sawmluk la a, tua sungah Jair le Kenath khuanote le a kiim a khuapite kihel hi. Tua munah a teang mite theampo sia Gilead ii pa Machir ii suan le paalte ahi uh hi.

²⁴Hezron thi zawkciang a tapa Caleb in a pa zi meingong Ephrath tenpui hi. Amate in Ashhur kici tapa khat nei a, Ashhur sia Tekoa khua saatpa ahi hi.

Jerahmeel ii Suan le Paalte

²⁵Hezron ii tapa lian bel Jerahmeel in tapa nga nei hi: a lian bel pan Ram, Bunah, Oren, Ozem, le Ahijah te ahi uh hi.

²⁶⁻²⁷Ram in tapa thum nei hi: Maaz, Jamin le Eker te ahi uh hi. Jerahmeel in Atarah kici zi dang khat nei a, amate in Onam kici tapa khat nei hi.

²⁸Onam in tapa nii nei a, Shammai le Jada te ahi uh hi. Shammai zongh in tapa nii nei a, Nadab le Abishur te ahi uh hi.

²⁹Abishur in Abihail tenpui in, tapa nii Ahban le Molid nei uh hi.



³⁰Abishur ii suapuipa Nadab in tapa nii Seled le Appaim nei a, ahihang Seled sia tapa nei man ngawlin thi hi.

³¹Appaim sia Ishi ii pa hi a, Ishi sia Sheshan ii pa hi in, Sheshan sia Ahlai ii pa ahi hi.

³²Shammai ii suapuipa Jada in tapa nii Jether le Jonathan nei hi, ahihang Jether sia tapa nei ngawlin thi hi.

³³Jonathan in tapa nii Peleth le Zaza nei hi. Hite theampo sia Jerahmeel ii suan le paalte ahi uh hi.

³⁴Sheshan in tapa nei ngawlin, tanu bek nei hi. Ama in Egypt mi Jarha kici naseam khat nei a,

³⁵tuasia pa le a tanute khat teangsak hi. Amate in Attai kici tapa khat nei hi.

³⁶Attai khang pan Elishama khang dong sia a nuai a bang ahi hi: Attai, Nathan, Zabad,

³⁷Ephlal, Obed,

³⁸Jehu, Azariah,

³⁹Helez, Eleasah,

⁴⁰Sismai, Shallum,

⁴¹Jekamiah le Elishama te ahi uh hi.

Caleb ii Suan le Paal A dangte

⁴²Jerahmeel ii suapuipa Caleb ii tapa lianbel sia Mesha kici hi. Mesha ii tapa sia Ziph, Ziph ii tapa sia Mareshah, Mareshah ii tapa sia Hebron ahi uh hi.

⁴³Hebron in tapa li nei hi: Korah, Tappuah, Rekem le Shema te ahi uh hi.

⁴⁴Shema sia Raham ii pa hi a: Jorkeam ii pu ahi hi. Shema ii suapuipa Rekem sia Shammai ii pa hi.

⁴⁵Shammai sia Maon ii pa hi a, Moan sia Bethzur ii pa hi.



⁴⁶Caleb in Ephah kici zino khat nei a, tua nu taw tapa thum nei thua hi: Haran, Moza le Gazez te ahi uh hi. Haran zongh in Gazez kici tapa khat nei hi.

⁴⁷(Jahdai a kici pa in tapa luk nei hi: Regem, Jotham, Geshan, Pelet, Ephah le Shaaph te ahi uh hi.)

⁴⁸Caleb in zino dang Maacah nei in tua nu taw tapa nii nei a, Sheber le Tirhanah te ahi uh hi.

⁴⁹Tua zawkciang tua nu in tapa nii nei thua a: Madmannah khua saat pa Shaaph le Machbenah le Gibeah khua saat pa Shevah ahi uh hi. Caleb in Achsah kici tanu khat nei thua hi.

⁵⁰A nuai a teng zongh Caleb ii suan le paalte ahi uh hi. Caleb ii zi sia Ephrath hi in, a ta masa bel sia Hur hi. Hur ii tapa Shobal sia Kiriath Jearim khua saat pa hi,

⁵¹a tapa niina Salma in Bethlehem khua saatin, a tapa thumna Hereph in Bethgader khua saat hi.

⁵²Kiriath Jearim khuapi a saat Shobal sia Haroeh mite, Menuhoth ah a teangte a lang, le

⁵³Kiriath Jearim ah a teang a nuai a be le phung: Ithrit Puthit, Shumathit le Mishrait te ii pianna taangpupi hi. (Zorah le Eshtaol khua mite sia hi be le phungte ii mite hi.)

⁵⁴Bethlehem khuasaat pa Salma sia Netophath, Atroth Beth Joab le Zor mite ii pianna taangpupi hi in, Manahath ah a teang be le phung nam nii sung pan nam khat hi.

⁵⁵(A nuai a lai at thiamte le laiku thiam be le phung te ii teenna khuapi Jabez ah Tirath, Shimeath le Sucath te teang uh hi. Amate sia Rechab mite taw zi le pasal in a kiman Ken mite ahi uh hi.)

Khang Tangthu Khatna 3

David Kumpipa ii Tate



¹⁻³Hebron ah David a ten lai in a nei tapate a kum zui in a nuai a bang ahi hi: Amnon, a nu sia Jezreel pan Ahinoam, Daniel, a nu sia Carmel pan Abigail, Absalom, a nu sia Geshur pan Talmai Kumpipa ii tanu Maacah, Adonijah, a nu sia Haggith, Shephatiah, a nu sia Abital, Ithream, a nu sia Eglah te hi.

⁴A luk in David Kumpipa ii Hebron ah kum sali le lang ngam a uk sungin a nei tapate ahi uh hi. Ama in Jerusalem ah kum sawmthum le kum thum sung kumpi seamin,

⁵tua munah tapa tam mama nei hi. Ammiel ii tanu, a zi Bethsheba taw tapa li toai hi; Shimea, Shobab, Nathan le Solomon te ahi uh hi.

⁶Ama in tapa dang kua nei hi: Ibhar, Elishua, Elpelet,

⁷Nogah, Nepheg, Japhia,

⁸Elishama, Eliada le Eliphelet te ahi uh hi.

⁹Hi teng zawkciang David in a zinote taw tapa dang zongh nei thua hi. Ama in Tamar kici tanu khat zongh nei hi.

Solomon Kumpipa ii Suan Le Paalte

¹⁰Solomon Kumpipa ii suan le paalte, pa pan kipan tapa dong, hi bang hi: Solomon, Rehoboam, Abijah, Asa, Jehoshaphat,

¹¹Jehoram, Ahaziah, Joash,

¹²Amaziah, Uzziah, Jotham,

¹³Ahaz, Hezekiah, Manasseh,

¹⁴Amon le Josiah ahi uh hi.

¹⁵Josiah in tapa li nei hi: Johanan, Jehoiakim, Zedekiah, le Joahaz te ahi uh hi.

¹⁶Jehoiakim in tapa nii nei hi: Jehoiachin le Zedekiah te ahi uh hi.

Jehoiachin Kumpipa ii Suan Le Paalte

¹⁷Hite sia Babylonte ii thong ah a khum, Jehoiachin Kumpipa ii suan le paalte ahi uh hi. Jehoiachin in tapa sali nei hi: Shealtiel,



¹⁸Malchiram, Pedaiah, Shenazzar, Jekamiah, Hoshama le Nedabiah te ahi uh hi.

¹⁹Pedaiah in tapa nii nei in, Zerubbabel le Shimei te ahi uh hi. Zerubbabel in tapa nii nei a, Meshullam le Hananiah te ahi uh hi. Tanu khat zongh nei a, Shelomith hi.

²⁰Ama in a dang tapa nga zongh nei hi: Hashubah, Ohel, Berechiah, Hasadiah le Jushab Hessed te ahi uh hi.

²¹Hananiah in tapa nii nei in, Pelatiah le Jeshaiiah te ahi uh hi. Jeshaiiah ii tapa sia Rephaiah, Rephaiah ii tapa sia Arnan, Arnan tapa sia Obadiah, Obadiah ii tapa sia Shecaniah te ahi uh hi.

²²Shecaniah in tapa khat Shemaiah le tupa nga nei hi: Hattush, Igal, Bariah, Neariah le Shephat te ahi hi.

²³Neariah in tapa thum nei hi: Elioenai, Hizkiah le Azrikam te ahi uh hi.

²⁴Elioenai in tapa sali nei hi: Hodaviah, Eliashib, Pelaiah, Akkub, Johanan, Delaiah le Anani te ahi uh hi.

Khang Tangthu Khatna 4

Judah ii Suan le Paalte

¹Hite sia Judah suan le paalte pawl khat ahi hi: Perez, Hezron, Carmi, Hur le Shobal te ahi uh hi.

²Shobal ii ta Reaiah, Reaiah ii ta Jahath, Jahath ii ta Ahumai le Lahad hi a, amate sia Zorah ah a teang mite ii pianna taangpupite ahi uh hi.

³⁻⁴Hur sia Caleb ii a zi Ephrath taw a taciil hi a, ama suan le paalte sia Bethlehem khuapi saatciilte ahi uh hi. Hur in tapa thum nei hi: Etam, Penuel le Ezer te ahi uh hi. Etam in tapa thum nei hi: Jezreel, Ishma, Idbash le Hazzelelponi kici tanu khat nei hi. Penuel sia Gedor khuapi saatciilpa hi a, Ezer sia Hushah khuapi saatciilpa ahi hi.

⁵Tekoa khua saatciilpa Ashhur in zi nii nei a, Helah le Naarah te ahi uh hi.



⁶Ama in Naarah taw tapa li nei hi: Ahuzzam, Hephher, Temeni le Haahashtari te ahi uh hi.

⁷Ashhur le Helah in tapa thum nei hi: Zereth, Izhar le Ethnam te ahi uh hi.

⁸Koz sia Anub le Zobebah ii pa hi a, Harum tapa Aharhel ii suan le paal be le phungte ii pianna taangpupi hi.

⁹Jabez kici pasal khat om a, amate mealheak sung panin a zatak bel uh ahi hi. A sua lai, a nu in na sa lei ahikom Jabez ci in min phuak hi.

¹⁰Ahihang Jabez in Israel Pathian tungah thungen in, “Pathian awng, thupha hong buak tan a, ngam zaipui hong pia tan. Hong ompui tan a kei hong nasak tu siatna khat pawpo pan hong keam tan,” ci hi. A thunget bangin Pathian in pia hi.

A mealheak Dangte

¹¹Shuhah ii suapuipa Caleb in tapa Mehira nei hi. Mehira ii tapa sia Eshton hi a,

¹²Eshton in tapa thum nei hi: Bethrapha, Paseah le Tehinnah te ahi uh hi. Tehinnah sia Nahash khuapi saatciilpa hi. Amate ii suan le paalte sia Recah ah teang uh hi.

¹³Kenaz in tapa nii nei a, Othniel le Seraiah te ahi uh hi. Othniel zongh in tapa nii nei a, Hathath le Meonothai te ahi uh hi.

¹⁴Meonothai sia Ophrah ii pa hi. Seraiah sia Joab ii pa hi a, khutthiam mite bebek ii teenna Khut thiamte Kuam saatciilpa hi.

¹⁵Jephunneh ii tapa Caleb in tapa thum nei hi: Iru, Elah le Naam te ahi uh hi. Elah sia Kenaz ii pa hi.

¹⁶Jehallelel in tapa li nei hi: Ziph, Ziphah, Tiria, le Asarel te ahi uh hi.

¹⁷⁻¹⁸Ezrah in tapa li nei hi; Jether, Mered, Ephraim, le Jalon te ahi uh hi. Mered in Egypt kumpipa ii tanu Bithiah tenpui a, amate in Miriam kici tanu khat le tapa nii Shammai le Ishbah nei uh hi. Ishbah in Eshtemoa khuapi saat hi. Mered in zongh Judah minam numei khat tenpui in tapa thum nei hi: Gedor



khua saatciilpa Jered, Soco khua saatciilpa Heber, le Zanoah khua saatciilpa Jekuthiel te ahi uh hi.

¹⁹Hodiah in Naham ii suapuinu tenpui hi. A suan a paalte sia Keilah khuapino ah a teang Garm be le phung te le Eshtemoa khuapino ah a teang Maacath be le phungte ii pianna ahi hi.

²⁰Shimon in tapa li nei hi: Amnon, Rinnah, Benhanan, le Tilon te ahi uh hi. Ishi in tapa nii nei hi: Zoheth le Benzoheth te ahi uh hi.

Shelah ii Suan le Paalte

²¹Shelah sia Judah ii tapate khat ahi hi. A suan le a paalte sia Lecah khua saatciilpa Er; Mareshah khua saatciilpa Laadah; Beth Ashbea khua ah puanneal kaang thiamtak namte;

²²Jokim le Cozeba khua ah a teang Joash le Saraph in Moab numeite tenpui in, Bethlehem khua ah teang uh hi. (Hite sia tang ngeina lui mamate hi.)

²³Amate kumpipa atu in bealseakte hi a, Netaim le Gederah khuate ah teang uh hi.

Simeon ii Suan le Paalte

²⁴Simeon in tapa nga nei hi: Nemuel, Jamin, Jarib, Zerah, le Shaul te ahi uh hi.

²⁵Shaul ii tapa Shallum, a tupa Mibsam hi a, a tu selawn sia Mishma ahi hi.

²⁶Tuaciang Mishma ii suan le paalte sia Hammuel, Zaccur, le Shimei te hi susuk uh hi.

²⁷Shimei in tapa sawm le luk le tanu luk nei a, ahihang a mealheakte in tu le ta tawmbek nei in Simeon minamte sia Judah minamte za in pung ngawl uh hi.

²⁸David Kumpipa khan dong Simeon suan le paalte sia a nuai a khuapite ahi: Beersheba, Moladah, Hazarshual,

²⁹Bilhah, Ezem, Tolad,

³⁰Bethuel, Hormah, Ziklag,



³¹Beth Marcaboth, Hazarsusim, Bethbiri, le Shaaraim ah teang uh hi.

³²Amate a dang mun nga zongh ah: Etam, Ain, Rimmon, Tochen, Ashan, le

³³nitumna thangsang Baalath khua dong, a kiim a paam khuanote ah teang uh hi. Hite sia amate bete ii a teenna mun le ngamte ii thu le la tepteena ahi hi.

³⁴⁻³⁸Be le phung lutangte sia a nuai a bang ahi hi: Meshobab, Jamlech, Amaziah ii tapa Joshah, Joel,

(Asiel ii tapa Seraiah, Seraiah ii tapa Joshibiah, Joshibiah ii tapa) Jehu, Elioenai, Jaakobah Jeshohaiah, Asaiah, Adiel, Jesimiel, Benaiah, Ziza sia (Shiphi ii tapa, Shiphi sia Allon ii tapa hi a, Jedaiah, Shimri, le Shemaiah ii suan le paal khat ahi hi.) Amate innkuan pung vaial ahikom,

³⁹nitumna sang Gerar thet mahiat dongin kizel hi, a tuute sia khuapi omna ii niswana sang kuamah tha uh hi.

⁴⁰Amate in a ngannote atu in ngam pha le lei phana lohing omna, ngamthim dide patauna om ngawlina mun tam mama mu uh hi. Tua ngam ah a teang masate sia Ham mite ahi uh hi.

⁴¹Judah Kumpipa Hezekiah hun lai in a tungah a ki at mite in Gerar ah pai in tua munah a teangte ii buk le thaampheangte sathapsak siat uh hi. A tuute atu in lohing ngam pha omna mun ahikom amate in a teang sa te notkeak in tua munah teang uh hi.

⁴²Simeon minam sung pan mihing zanga niswana sang Edom ngam zuan uh hi. Amate Ishi ii tapate ahi: Pelatiah, Neariah, Rephaiah, le Uzziel te in lampui uh hi.

⁴³Tua munah amate in a nungta lai Amalek mite that a, amate in tua munah teang suak uh hi.

Khang Tangthu Khatna 5

Reuben ii Suan le Paalte



¹Hite sia Jacob ii tapa lianbel Reuben ii suan le paalte ahi uh hi. (Reuben in a pa zinote khat khialpui ahikom ta ubel hina innlua za tan in; ta ubel za sia Joseph kipia hi.

²Bangbang po ahizong Judah minamte sia a hat bel hi a, a minam bup uk tu zong amate minam sung pan hi tawntung uh hi.)

³Jacob ii tapa lianbel Reuben in tapa li nei hi: Hanoch, Pallu, Hezron, le Carmi te ahi uh hi.

⁴⁻⁶Hite sia khang khat zawkciang khang khat Joel ii suan le paalte ahi hi: Shemaiah, Gog, Shimei, Micah, Reaiah, Baal, le Beerah te ahi uh hi. Assyria ngam uk lianpa Tiglath Pileser in minam lampuipa Beerah manin a ngam pan mun dangah puak hi.

⁷Reuben minam sungah a nuai a, be le phung lampuite innkuan khang laibu sungah kiciamtee hi: Jeiel, Zechariah, le

⁸Bela hi a, Bela sia Azaz ii tapa hi a, Shema ii tupa Joel ii be le phungte ahi hi. Hi be le phungte sia Aroer khua le asaksang Nebo le Baal Moen ngamkhente ah teang uh hi.

⁹Amate in Gilead ngamah nganno tam ma nei ahikom Eupharates ngundung suk niswana sang senneal ngam dongin teang uh hi.

¹⁰Saul Kumpipa khan sung Reuben minamte in Hagri mite simin a thalup zawkciang Gilead ii niswana sang amate ngam teng lua uh hi.

Gad Suan le Paalte

¹¹Gad minamte sia Reuben minamte ii teennasaksang Bashan ngam Salecah ii niswana sang dongin teang uh hi.

¹²Joel sia amate be le phung sung pan be lutang ahi hi. Shapham sia be lutang dom ahi hi. Janai le Shaphat te sia Bashan ngamah a teang be le phung dangte ii be lutangte ahi uh hi.

¹³Gad minam sung pan be le phung dang salite a nuai a bang ahi hi: Michael, Meshullam, Sheba, Jorai, Jacan, Zia, le Eber te ahi uh hi.



¹⁴Amate Huri ii tapa Abihail ii suan le paalte hi in, a pianna a taangpupite a nuai a bang ahi hi: Abihail, Huri, Jaroah, Gilead, Michael, Jeshishai, Jahdo, le Buz te ahi uh hi.

¹⁵Hi be le phungte ii lampuipa sia Abdiel ii tapa, Guni ii tupa ahi hi.

¹⁶Amate Bashan le Gilead ngamkhen, ngamsung khuapite le Sharon ngam ngan thana munte theampo ah teang uh hi.

¹⁷(Hi thu tepteenate sia Judah Kumpipa Jotham le Israel Kumpipa Jeroboam khan lai in a kikaikhawm thute veu hi.)

Nisuana sang Minamte ii Ngalkapte

¹⁸Reuben, Gad le nisuana sang Manasseh minamte sungah lum, namsau, le thal kapthiam ngalkap 44,760 om hi.

¹⁹Amate in Jetur, Naphish le Nodab nam ahi Hagri minamte do uh hi.

²⁰Amate in Pathian muangin thungen ahikom Pathian in hu a, Hagri le a pawlte tungah zawna pia hi.

²¹Amate in ngalte ii kalaoh 50,000, tuu 250,000, le laa 2000 matsakin ngalte 100,000 man uh hi.

²²Tua ngal sia Pathian deina ahikom amate in ngalte tam mama that uh hi. Amate sia saltang tu in a kipaipui dong tua ngamah teang uh hi.

Nisuana sang Manasseh Mite

²³Nisuana sang a Manasseh mite sia Bashan ngam Baal Hermon, Senir, le Hermon Mualsaksang dongin teang a, pung mama uh hi.

²⁴Amate ii be le phung lampuite sia: Epher, Ishi, Eliel, Azriel, Jeremiah, Hodaviah le Jahdiel te ahi uh hi. Amate theampo sia ngalkap min dok tuamte le be le phung lampui minhangte ahi uh hi.

Nisuana sang Minamte Kihawlkeak

²⁵Ahihang hi mite in a taangpupite ii Pathian tungah thumaan ngawlin a ngam pan Pathian ii a nawkeak mite ii pathiante bia tu in Pathian taisan uh hi.



²⁶Tua ahikom Pathian in Assyria Ngam uk lianpa Pul in (Tiglath Pileser zong kici) a ngam simsak hi. Pul Kumpipa in Reuben, Gad, le niswana sang Manasseh minamte notkeak in Halah, Habor, le Hara, ngam le Gozan ngunhui ah teang suaksak hi.

Khang Tangthu Khatna 6

Thiampi Saangte ii Innkuan Khangsimna

- ¹Levi in tapa thum nei hi: Gershon, Kohath, le Merari te ahi uh hi.
- ²Kohath in tapa li nei hi: Amram, Izhar, Hebron, le Uzziel te ahi uh hi.
- ³Amram in tapa nii, Aaron le Moses, le tanu khat Miriam nei hi. Aaron in tapa li nei hi: Nadab, Abihu, Eleazer, le Ithamar te ahi hi.
- ⁴Eleazer ii suan le paalte khang khat zawkciang khang khat a nuai a bang ahi hi: Phinehas, Abishua,
- ⁵Bukki, Uzzi,
- ⁶Zerahiah, Meraioth,
- ⁷Amariah, Ahitub,
- ⁸Zadok, Ahimaaz,
- ⁹Azariah, Johanan,
- ¹⁰Azariah (Jerusalem ah Solomon Kumpipa iisak Biakinn sungah naseampa)
- ¹¹Amariah, Ahitub,
- ¹²Zadok, Shallum,
- ¹³Hilkiah, Azariah,
- ¹⁴Seraiah, Jehozadak, te ahi uh hi.
- ¹⁵Nebuchadnezzar Kumpipa in Jehozadak sia Topa ii saltang tu in a nawkeak Judah midangte le Jerusalem mite taw notkeak khawm hi.

Levi Suan le Paal Dangte

- ¹⁶Levi in tapa thum nei hi: Gershon, Kohath, le Merari te ahi uh hi.
- ¹⁷Amate zongh in tapa nei tek uh hi. Gershon sia Libni le Shimei ii pa ahi hi.



- ¹⁸Kohath sia Amram, Izhar, Hebron, le Uzziel ii pa hi a:
- ¹⁹Merari sia Mahli le Mushii ii pa ahi hi.
- ²⁰Hite sia Gershon ii khang khat pan khang khat a suan a paalte ahi hi: Libni, Jahath, Zimmah,
- ²¹Joah, Iddo, Zerah, Jeatherai te ahi uh hi.
- ²²Hite sia Kohath ii khang khat pan khang khat a suan a paalte ahi hi: Amminadab, Korah, Assir,
- ²³Elkanah, Ebiasaph, Assir,
- ²⁴Tahath, Uriel, Uziah, Shaul te ahi uh hi.
- ²⁵Elkanah in tapa nii nei a, Amasai le Ahimoth ahi uh hi.
- ²⁶Hite sia Ahimoth ii khang khat pan khang khat a suan a paalte ahi hi: Elkanah, Zophai, Nahath,
- ²⁷Eliab, Jeroham, Elkanah te ahi uh hi.
- ²⁸Samuel in tapa nii nei hi: a upa sia Joel hi in a naupa sia Abijah ahi hi.
- ²⁹Hite sia Merari ii khang khat pan khang khat a suan a paalte ahi hi: Mahli, Libni, Shimei, Uzzah,
- ³⁰Shimea, Haggiah, Asaiah te ahi uh hi.

Biakinn Tumthei thiamte

- ³¹Hi mite sia Jerusalem ah Thukham Thingkuang a kikhiin zawkciang Jerusalem biakpiakna munah a huhun in a kilaih tavuan nei tu in Divid Kumpipa ii a koi tumthei thiam lampui te ahi uh hi.
- ³²Solomon Kumpipa ii Biakinn asak ma in Topa omna puanbuk sungah amate in a huhun in kilaih a, tavuan la uh hi.
- ³³Amate ii suan le paalte sia a nuai a bang ahi hi. Kohath suan sung panin Heman sia choir khatna lampui hi a Joel ii tapa hi. Heman ii innkuan khangsimna sia a nuai a bangin Jacob dong kilee simto a: Heman, Joel, Samuel,



³⁴Elkanah, Jeroham, Eliel, Toah,

³⁵Zuph, Elkanah, Mahath, Amasai,

³⁶Elkanah, Joel, Azariah, Zephaniah,

³⁷Tahath, Assir, Ebiasaph, Korah

³⁸Izhar, Kohath, Levi, Jacob te ahi uh hi.

³⁹Asaph sia choir niina lampui pa ahi hi. Asaph ii innkuan khangsimna sia a nuai a bangin Levi dong kilee simto hi: Asaph, Berechiah, Shimea,

⁴⁰Michael, Baaseiah, Malchijah,

⁴¹Ethni, Zerah, Adaiah,

⁴²Ethan, Zimmah, Shimei,

⁴³Jahath, Gershon, Levi te ahi uh hi.

⁴⁴Merari be le phung sung pan Ethan in choir thumna lampui pa ahi hi. Ama innkuan khangsimna sia a nuai a bangin Levi dong kilee simto hi: Ethan, Kishi, Abdi, Malluch,

⁴⁵Hashabiah, Amaziah, Hilkiah,

⁴⁶Amzi, Bani, Shemer,

⁴⁷Mahli, Mushi, Merari, Levi te ahi uh hi.

⁴⁸Amate ii a mipui Levi mite sia Pathian biakna munah nasep dangte theampo a kiseamsakte ahi uh hi.

Aaron ii Suan le paalte

⁴⁹Aaron le a suan le a paalte in ngimnamtui biakpiaknate pia in biaknatau tungah a kihal biakpiaknate pia uh hi. Mun Thiangthobel ah Pathian biakna taw kisai nasepnate le Pathian in Israel te mawna a mai sak natu in biakpiaknate amate nasep hi. Hi nasepte sia Pathian ii naseam pa Moses ii thupiak bangin seam uh hi.

⁵⁰Aaron ii suan le paalte sia: Eleazer, Phinehas, Abishua,

⁵¹Bukki, Uzzi, Zerahiah,



⁵²Meraioth, Amariah, Ahitub,

⁵³Zadok, Ahimaaz te ahi uh hi.

Levite Tenna Mun

⁵⁴Hi ngam sia Kohath ii be le phung, Aaron ii suan le paalte tungah a kipia ngam hi. Amate in Levite tungah a kipia masa bel mun nga uh hi.

⁵⁵Judah ngamsung Hebron le a kiim a paam a, ngan thana munte hi sungah kihel hi.

⁵⁶Ahitazong khuapi kiim ah lote le khuanote sia Jephunneh ii tapa Caleb pia uh hi.

⁵⁷⁻⁵⁹A nuai a kuate Aaron suan le paalte tungah kipia hi: bukna khuapi Hebron, Jattir, Libnah, Eshtemoa, Hilan, Debir, Ashan, le Beth Shemesh kuate hi a, a kiim a paam ah nganthanate zongh kihel hi.

⁶⁰Benjamin ngam sungah amate sia a nuai a khuapite le a kiim a paam ah ngan thana munte kipia a: Geba, Alemeth, le Anathoth te ahi uh hi. Amate mealheak theampo ten natu in a vekpi in khua sawm le khua thum kipia hi.

⁶¹Manasseh nitumna ngam sungah a om khua sawmte sia Kohath ii be le phung a taanglaite tungah a innkuan a innkuan in lai meetang sawkin kipia hi.

⁶²Gershon be le phungte tungah a innkuan a innkuan zui in Issachar ngam, Asher ngam, Naphtali ngam le Bashan ngamsung nisuana sang Manasseh ngam sungah a om khuapi sawm le thumte kipia hi.

⁶³Tuabangma in Merari be le phungte tungah a innkuan a innkuan zui in Reuben ngam, Gad ngam, le Zebulun ngam sungah a om khuapi sawm le niite kipia hi.

⁶⁴Hi bangin Israel mite in Levi mite tungah a ten natu in khuapite le khuapite kiim ah a om ngan tha natu munte pia khawm uh hi.

⁶⁵(A tungah a kison Judah, Simeon le Benjamin ngam sungah a om khuapite zongh lai meetang sawkin kihawmsak hi.)



⁶⁶Kohath be le phung innkuan pawlkhatte tungah Ephraim ngamkhen ah a om khuapite le a kiim a paam a, ngan thana munte kipia hi.

⁶⁷Tua khuapite sia Ephraim mualtung ngam a om bukna khuapi ahi Shechem, Gezer,

⁶⁸Jokmeam, Beth Horon,

⁶⁹Aijalon, le Gath Rimmon te ahi uh hi.

⁷⁰Nitumna sang Manasseh ngamkhen sungah amate sia Aner le Bileam khuapite le a kiim a, ngan thana munte kipia hi.

⁷¹Gershon be le phung innkuante tungah a nuai a, khuapite le a kiim a, ngan thana munte kipia hi. Nisuana sang Manasseh ngamkhen sung Bashan ah Golan khua le Ashtaroth khua om hi.

⁷²Issachar ngamkhen ah Kedesh, Daberath,

⁷³Ramoth le Anem khua om hi.

⁷⁴Asher ngamkhen ah: Mashal, Abdon,

⁷⁵Hukok, le Rehob khua om hi.

⁷⁶Naphtali ngamkhen sungah: Galilee ah Kedesh, Hammon, le Kiriathaim khua om hi.

⁷⁷A dang a taanglai Merari be le phungte tungah a nuai a, khuapite le a kiimkot a, ngan thana munte kipia hi. Zebulun ngamkhen sung pan Rimono le Tabor khua om hi.

⁷⁸Reuben ngamkhen sung pan, Jericho ngal Jordan Ngun nisuana sang: Jahzah mualtam tungah a om Bezer,

⁷⁹Kedemoth, le Mephaath om hi.

⁸⁰Gad ngamkhen sung pan: Gilead ah Ramoth, Mahanaim,

⁸¹Heshbon le Jazor khuate ahi hi.

Khang Tangthu Khatna 7

Issachar ii Suan le paalte



¹Issachar in tapa li nei hi: Tola, Puah, Jashub, le Shimron te ahi uh hi.

²Tola in tapa luk nei hi: Uzzi, Rephaiah, Jeriel, Jahmai, Ibsam, le Shemuel te ahi uh hi. Amate Tola be le phung innkuan lutang te vive hi in ngalkap minthangte ahi uh hi. Amate suan le paal sia David Kumpipa hun lai in 22,600 pha hi.

³Uzzi in tapa khat nei a, Izrahiah hi. Izrahiah le a tapa lite ahi, Michael, Obadiah, Joel, le Isshiah te a vekpi in innkuan lutangte ahi uh hi.

⁴Amate in zi tam mama le ta tam mama nei a, a suan a paalte ngalkap seam thei 36,000 pha hi.

⁵Issachar minam innkuante theampo sia kumpi laibu sungah ngalkap seam thei 87,000 om hi ci in kiciamtee hi.

Benjamin le Dan ii Suan le paalte

⁶Benjamin in tapa thum nei hi: Bela, Becher, le Jediael te ahi uh hi.

⁷Bela in tapa nga nei hi: Ezbon, Uzzi, Uzziel, Jerimoth le Iri te ahi uh hi. Amate be le phung innkuan lutangte le ngalkap minthangte vive ahi uh hi. A suan a paal ngalkap seam thei 22,034 om hi.

⁸Becher in tapa kua nei hi: Zemirah, Joash, Eliezer, Eleoenai, Omri, Jeremoth, Abijah, Anathoth le Alemeth te ahi uh hi.

⁹Kumpi laibu sungah a suan a paalte a innkuan zui in a phaza a kisim ciang ngalkap seam thei 20,200 om hi.

¹⁰Jadaiel in tapa khat Bilhan nei a, Bilhan in tapa sali nei hi. Tuata sia Jeush, Benjamin, Ehud, Chenaanah, Zethan, Tarshish, le Ahishahar te ahi uh hi.

¹¹Amate theampo sia be le phung innkuan lutang le ngalkap minthangte ahi uh hi. Amate ii suan le paal sungah ngalkap seam thei 17,200 om hi.

¹²Shupim le Hupim zongh hi minamte ahi hi. Dan in tapa khat Hushim nei hi.

Naphtali Suan le paalte



¹³Naphthali in tapa li nei hi: Jahziel, Guni, Jezer, le Shallum te ahi uh hi. (Amate sia Bilhah ii suan le paalte ahi uh hi.)

Manasseh ii Suan le paalte

¹⁴Manasseh in a zino Aramean taw tapa nii nei in, Asriel le Machir te ahi uh hi. Michir sia Gilead ii pa hi.

¹⁵Machir in Huppim le Shuppim zi khat tek neisak hi. Ama suapui nu ii min Maacah hi. Machir ii tapa niina sia Zelophehad hi a, ama in tanu bek nei hi.

¹⁶Machir ii zi Maacah in tapa nii nei a, Peresh le Sheresh ci in min phuak hi. Peresh in tapa nii nei a, Ulam le Rakem te ahi uh hi.

¹⁷Ulam in Bedan kici tapa khat nei hi. Hite theampo sia Gilead suan le paalte hi a, Gilead sia Machir ii tapa, le Manasseh ii tupa ah hi.

¹⁸Gilead suapuinu Hammolecheth in tapa thum nei a, Ishod, Abiezer, le Mahlah te ahi uh hi.

¹⁹(Shemida in tapa li nei a: Ahian, Shechem, Likhi, le Aniam te ahi uh hi.)

Ephraim ii Suan le paalte

²⁰Hite sia Ephraim ii a khang a khangin a suan le a paalte hi: Shuthelah, Bered, Tahath, Eleadah, Tahath,

²¹Zabad, Shuthelah te ahi uh hi. Ephraim in Shuthelah ngawl tapa dang nii nei a: Ezer le Elead te ahi hi, amate Gath khua sungah a teang mite ii khui ngu tu in a kipat laitakin a kithatlumte hi.

²²Amate ii pa Ephraim sia khua ngei ma khuangai in kap a, a suapui pasalte in heeneam hi.

²³Tuaciang ama in a zi luppui kik a, a zi ngai in tapa khat nei hi. A innkuan sungah khuangaina theng ahikom a tapa min Beriah phuak hi.

²⁴Ephraim in Sheerah kici tanu khat nei hi. Sheerah in Beth Horon Tungnung le Nuainung khuapite le Uzen Sheerah khua saat hi.

²⁵Ephraim zongh in Rephah kici tapa khat nei in, a suan a paalte a nuai a bang hi: Resheph, Telah, Tahan,



²⁶Ladan, Ammihud, Elishama,

²⁷Nun, Joshua te ahi uh hi.

²⁸Amate ii a lua le a teenna khuate sia Bethel le a kiim ah khuate, nisuana sang panin Naaran dong, nitumna sang panin Gezer le a kiim a khuate dong ahi hi. Shechem le Ayyah khuapite le a kiim a, khuapite zongh kihel hi.

²⁹Manasseh suan le paalte in Beth Shean, Taanach, Megiddo le Dor, le a kiim a, khuapite uk hi. Hite theampo Jacob ii tapa Joseph ii suan le paalte teenna munte hi.

Asher ii Suan le Paalte

³⁰Hite sia Asher ii suan le paalte hi. Asher in tapa li nei hi: Imnah, Ishvah, Ishvi le Beriah ahi uh hi. Tanu khat nei a, Serah hi.

³¹Beriah in tapa nii nei in, Heber le Malchiel te ahi uh hi. (Malchiel sia Birzaith khuapi saat pa hi.)

³²Heber in tapa thum nei hi: Japhlet, Shomer, le Hotham te hi. Tanu khat nei a, a min Shua hi.

³³Japhlet zongh in tapa thum nei hi: Pasach, Bimhal, le Ashvath te hi.

³⁴A suapuipa Shomer in tapa thum nei hi, Rohgah, Jehubbah, le Aram te ahi hi.

³⁵A suapuipa Hotham in tapa li nei a, Zophah, Imna, Shelesh, le Amal te hi.

³⁶Zophah suan le paalte sia Suah, Harnepher, Shual, Beri, Imrah,

³⁷Bezer, Hod, Shamma, Shilshah, Ithran, Beera te ahi uh hi.

³⁸Jether ii suan le paalte sia Jephunneh, Pispah, Ara, le

³⁹Ulla ii suan le paalte sia Arah, Hanniel, Rizia te ahi uh hi.

⁴⁰Hite theampo sia Asher ii suan le paalte ahi uh hi. Amate sia innkuan lutangte veu hi in, ngalkap minthang le lampui minthang veu ahi uh hi. Asher ii suan le paalte sungah ngalkap seam thei pasal 26,000 om hi.

Khang Tangthu Khatna 8



Benjamin ii Suan le Paalte

¹Benjamin in tapa nga nei hi. A kumhaam zui in Bela, Ashbel, Aharah,

²Nohah le Rapha te ahi uh hi.

³Bela ii suan le paalte sia Addar, Gera, Abihud,

⁴Abishua, Naaman, Ahoah,

⁵Gera, Shephuphan, Hiram te ahi uh hi.

⁶⁻⁷Ehud ii suan le paalte sia Naaman, Ahijah, Gera te ahi uh hi. Amate sia Geba khua a teang innkuante ii lutangte hi uh a, ahitazong amate kinot in, Manahath ah teang tu in pai uh hi. Uzza le Ahihud ii pa Gera in amate lampui hi.

⁸⁻⁹Shaharaim in a zite nii Hushim le Baala khul hi. Tua zawk, Moab ngamah a ten ciang ama in Hodesh tenpui in tapa sali nei hi: Jobab, Zibia, Mesha, Malcam,

¹⁰Jeuz, Sachia, le Mirmah te ahi uh hi. A tapate theampo sia baangkua lampuite veu suak uh hi.

¹¹Ama in Hushim taw zong tapa nii nei hi; Abitub le Elpaal te ahi uh hi.

¹²Elpaal in tapa thum nei hi: Eber, Misham, le Shemed te ahi uh hi. Shemed sia Ono le Lod khuapite le a kiim ah khuate a saat pa hi.

Gath le Aijalon ah Benjaminte

¹³Beriah le Shema sia Aijalon ah a teang amate be tek ii lampui veve hi a, Gath khuapi ah a teang mite notkeak hi.

¹⁴Beriah ii suan le paalte sungah Ahio, Shashak, Jeremoth,

¹⁵Zebadiah, Arad, Eder,

¹⁶Michael, Ishpah, le Joha te kihel uh hi.

Jerusalem ah Benjaminte

¹⁷Elpaal ii suan le paalte sungah Zebadiah, Meshullam, Hizki, Heber,

¹⁸Ishmerai, Izliah le Jobab te kihel uh hi.



¹⁹Shimei ii suan le paalte sungah Jakim, Zichri, Zabdi,

²⁰Elienai, Zillethai, Eliel,

²¹Adaiah, Beraiah le Shimrath te kihel uh hi.

²²Shashak ii suan le paalte sungah Ishpan, Eber, Eliel,

²³Abdon, Zichri, Hanan,

²⁴Hananiah, Elam, Anthothijah,

²⁵Iphdeiah le Penuel te kihel uh hi.

²⁶Jeroham ii suan le paalte sungah Shamsherai, Shehariah, Athaliah,

²⁷Jareshiah, Elijah le Zichri te kihel uh hi.

²⁸Hite sia a pu a pa khan pan kipan Jerusalem ah a teangte ii suan le paalte dongin a lampuite veu ahi hi.

Gibeon le Jerusalem ah Benjaminte

²⁹Jeiel in Gibeon khuapi saatin tua khua ah teang hi. A zi sia Maacah hi in,

³⁰a tapa lian bel sia Abdon hi. A tapa dangte sia Zur, Kish, Baal, Ner, Nadab,

³¹Gedor, Ahio, Zecher,

³²le Mikloth te ahi uh hi. A suan a paalte sia Jerusalem khua, a mealheakte kungah teang uh hi.

Saul Kumpipa ii Innkuanpuite

³³Ner sia Kish ii pa hi a, Kish sia Saul Kumpipa ii pa hi. Saul in tapa li nei a: Jonathan, Malchishua, Abinadab le Eshbaal te ahi uh hi.

³⁴Jonathan sia Meribbaal ii pa hi a, Meribbaal sia Micah ii pa hi.

³⁵Micah in tapa li nei hi: Pithon, Melech, Tarea le Ahaz te ahi uh hi.

³⁶Ahaz sia Jehoaddah ii pa hi a, ama in tapa thum nei in, Alemeth, Azmaveth, le Zimri te ahi uh hi. Zimri sia Moza ii pa hi a,

³⁷Moza sia Binea ii pa hi in, Binea sia Raphah ii pa hi. Raphah sia Eleasah ii pa hi a, Eleasah sia Azel ii pa hi.



³⁸Azel in tapa luk nei hi: Azrikam, Bocheru, Ishmael, Sheariah, Obadiah, le Hanan te ahi uh hi.

³⁹Azel ii suapuipa Eshek in tapa thum nei hi: Ulam, Jeush, le Eliphelet te ahi uh hi.

⁴⁰Ulam ii tapate sia ngalkap minthang mama le thalkap thiamte veu ahi uh hi. Ama in tapa le tupa a vekpi in za le sawmnga nei hi. A tungah min omte theampo sia Benjamin minamte ahi uh hi.

Khang Tangthu Khatna 9

Saltanna pan A heak kik Mihingte

¹Israel mite theampo a innkuan zui in kiciamtee a, tuate Israel Kumpite laibu sungah kikhum hi. Judah mite amate mawna hangin daan piakna in Babylon ah saltang tu in kipuak hi.

²Khuapi sung amate neisa kungah a heak kik masa belte sia Israel nautang te, thiampite, Levite le Biakinn naseamte ahi uh hi.

³Jerusalem ah teang tu in Judah, Benjamin, Ephraim le Manasseh minamte sung panin pai uh hi.

⁴⁻⁶Jerusalem ah Judah minamte innkuan 690 teang hi. Judah ii tapa Perez ii suan le paalte ii lampuipa sia Uthai hi a, Uthai sia Ammihud ii tapa, le Omri ii tupa hi. A taangpupi dangte sia Imri le Banite hi. Judah ii tapa Shelah ii suan le paalte lampuipa sia Asaiah hi a, amate innkuan ii lutang hi. Judah ii tapa Zerah ii suan le paalte lampuipa sia Jeuel hi.

⁷⁻⁸Benjamin, minamte sung panin a nuai a te Jerusalem ah teang hi, tuate in: Meshullam ii tapa Sallu, Sallu sia Hodaviah ii tapa hi a, Hodaviah sia Hassenuah ii tapa hi. Jehoram ii tapa Ibneiah; Uzzi ii tapa, Michri ii tupa Elah; Shephatiah ii tapa Meshullam; Shepatiah sia Reuel ii tapa hi in, Reuel sia Ibnijah ii tapa hi.

⁹Hi minam sung pan innkuan 956 te Jerusalem ah teang uh hi. A tungah min a ki atte theampo sia baangkua lutangte hi.

Jerusalem ah A teang Thiampite



10-12A nuai a thiampite Jerusalem ah teang hi: Tuate sia Jedaiah, Jehoiarib, le Jachin, Hilkiyah ii tapa Azariah (Biakinn lampui lianbelpa) a taangpupite sia Meshullam, Zadok, Meraioth le Ahitub te ahi uh hi. Jeroham ii tapa Adaiyah, a taangpupite sia Pashhur le Malchijah hi in, Adiel ii tapa Maasai; a taangpupite sia Jahzerah, Meshullam, Meshillemith le Immer te ahi uh hi.

13Innkuan te ii innkuan lutang ahi thiampite a vekpi in 1,760 pha uh hi. Amate Biakinn taw kisai nasep theampo a thiam mamate ahi uh hi.

Jerusalem ah A teang Levite

14-16A nuai a min ki atte Jerusalem ah a teang Levite ahi hi: Tuate Hasshub ii tapa Shemaiah; a taangpupite sia Azirikam le Hashabiah hi in, Merari, Bakbakkar, Heresh, le Galal be le phung pan hi. Mica ii tapa Mattaniah; a taangpupite sia Zichri le Asaph te ahi uh hi. Shemaiah ii tapa Obadiah; a taangpupite sia Galal le Jeduthun te ahi uh hi. Asa ii tapa, Elkanah ii tupa Berechiah hi in, Netophah mite ii ngam sungah a teang pa hi.

Jerusalem ah A teang Biakinn Cingte

17A nuai a Biakinn cingte Jerusalem ah teang uh hi: Tuate sia Shallum, Akkub, Talmon, le Ahiman te hi uh a, Shallum sia amate lampuipa hi.

18Tua hun dongin amate ii be le phungte Kumpipa Kongpi tumna niswana sangah kiteangsak hi. Amate in nidang in Levite ngiaphual kongpите cing uh hi.

19Kore ii tapa, Ebiasaph ii tupa Shallum sia Korah ii suapui tuatuate taw Topa ompuina Puanbuk tumna kongcingpa hi a, a taangpupite ii Topa ompuina Puanbuk a cin bangma in cing uh hi.

20Eleazar ii tapa Phinehas in amate khatvei lai in uk hi — Topa in ama taw om taken!

21Meshelemiah ii tapa Zechariah zongh Topa omna Puanbuk tumna kongcingpa hi.



²²A vekpi in mihing 212 puanbuk tumna le kongpi cing tu in kiteal hi. Amate sia amate teenna khuanote zui in kiciamtee hi. David Kumpipa le kamsang Samuel in a taangpupite hi bang nasep thupite seamsak hi.

²³Amate le a suan a paalte in Biakinn kongpите cing tawntung uh hi.

²⁴Saksang, thangsang, nisuana le nitumna sangah kongpi khat tek om in, a cing a uk zongh khat tek om hi.

²⁵Kongcingte sia khuano a teang amate mealheak tek in hu in, ni sali ciang khat vei kilaih hi.

²⁶Kongcing lampuite li sia Levite hi a, tavuan nei belte ahi uh hi. Amate in Biakinn sung khaante le a sungah a om vanhte kep tu zongh tavuan nei uh hi.

²⁷Amate in Biakinn cin tu le zingsim kongpите hon tu tavuan nei ahikom Biakinn nai ah teang uh hi.

Levi Dangte

²⁸Levi dangte in biakna a, a kizangh uum le bealte kep tu tavuan nei uh hi. Amate in tua vanhte a kizak simin a zak zawkciang sim dildelh hi.

²⁹A dangte in biakna taw kisai a thiangtho vanh le, anvui, zu, olive thau, ngimnamtui le hel namtuite cing hi.

³⁰Ahihang hel namtuite hel tu sia thiampite tavuan hi.

³¹Korah ii be le phung pan Shallum ii tapa lian bel Mattitiah kici Levipa ii nasep sia biakna in a kizangh anluum em hi.

³²Kohath be le phung pan pawlkhat in Sabbath nisim Biakinn a zak tu anluum thiangtho vawt tu tavuan nei uh hi.

³³Levi innkuan pawlkhat in Biakinn ah tumtheite tum tu tavuan nei hi. Hi innkuante ii lampuite Biakinn huangsung innte sungah teang uh a, amate a sun a zanin nasep a nei uh hu in nasep dang bangma kipia ngawl hi.

³⁴A tung a, a kison pasal te sia amate pu le pa khang taw kizui in Levite ii baangkua lutangte veu ahi uh hi. Amate Jerusalem ah a teang lampuite hi.

Saul Kumpipa ii taangpupite le Suan le Paalte
(1Khang tangthu 8.29-38)



- ³⁵Jeiel in Gibeon khua saatin tua munah teang hi. A zi sia Maacah hi.
- ³⁶A tapa lianbel Abdon hi in, a tapa dangte Zur, Kish, Baal, Ner, Nadab,
- ³⁷Gedor, Ahio, Zechariah, le Mikloth te ahi uh hi.
- ³⁸Mikloth sia Shimeah ii pa hi. A suan a paalte amate bawng ahi a mealheakte nai Jerusalem ah teang uh hi.
- ³⁹Ner sia Kish ii pa hi a, Kish sia Saul ii pa hi. Saul in tapa li nei hi: Jonathan, Malchishua, Abinadab le Eshbaal te ahi uh hi.
- ⁴⁰Jonathan sia Meribbaal ii pa hi a, Meribbal sia Micah ii pa hi.
- ⁴¹Micah in tapa li nei hi: Pithon, Melech, Tarea, le Ahaz te ahi uh hi.
- ⁴²Ahaz sia Jarah ii pa hi a, Jarah in tapa thum nei hi: Alemeth, Azmaveth, le Zimrite ahi uh hi. Zimri sia Moza ii pa hi in
- ⁴³Moza sia Binea ii pa hi a; Binea sia Rephaiah ii pa ahi hi. Rephaiah sia Eleasah ii pa hi in, Eleasah sia Azel ii pa hi.
- ⁴⁴Azel in tapa luk nei hi: Azrikam, Bocheru, Ishmael, Sheariah, Obadiah, le Hanan te ahi uh hi.

Khang Tangthu Khatna 10

Saul Kumpipa Thina (1Samuel 31.1-13)

- ¹Philistine mite in Israel te Gilboa Mual tungah sim uh hi. Israel te tam mama tua munah kihatlum in a taanglai sunte Saul Kumpipa le a tapate taw tai uh hi.
- ²Ahihang Philistine te in amate manin Saul ii tapate thum Jonathan, Abinadab le Malchisua te thatlum uh hi.
- ³Saul ii omna kiim ah nasia tak kido in, Saul sia ngalte thaltang khat in kha a, nasia takin liam hi.
- ⁴Ama in ama ngalhiam a pua tangvalpa tungah, “Pathian he ngawl Philistinete ii oai lui bang keak ka sua ngawl natu in na namsau dok in hong that ka heu in,” ci hi. Ahihang tua tangvalpa lau mama in bangma law ngam



ngawl hi. Tua ahikom Saul in ama namsau la in a tungah ama le ama kidenna in kinei hi.

⁵Tangvalpa in Saul ii thi a mu ciang ama zongh a namsau tungah kidenna in kinei in thi hi.

⁶Tuabangin Saul le a tapate thum sia mun khat ah thi khatin thi khawm siatin, a suan a paalte kuama in ngam uk ngei nawn ngawl hi.

⁷Jereel zaangtam ah a teang Israel mite in a ngalkapte a taimang siat le Saul le a tapate a thi siat a zaak uh ciangin a khuate uh nusia in taimang uh hi. Tuasia ciang Philistinete pai in a khuate suan uh hi.

⁸Ngal kisim khuavak ni in a thite ii vanh la tu a, a pai Philistinete in Saul le a tapate ii luang Gilboa Mual tungah mu uh hi.

⁹Amate in Saul ngawng tan in a ngal vanhte la in, Philistia ngam bup ah a mite le a milimte tungah hi lungdamna thu ko tu in kamtaite paisak uh hi.

¹⁰Amate in Saul ii ngalhiamte a biakinnte khat ii sungah koi in a lutang sia Dagon pathian biakinn sungah khai uh hi.

¹¹Philistinete ii Saul tungah a vawt thu sia Gilead ngam Jebesh mite in a zaak uh ciangin,

¹²ngalhang belte pai in Saul le a tapate ii luangte la in Jabesh khua ah ciapui uh hi. Amate in limthing khat ii nuai ah a luangte phumin ni sali sung an tang uh hi.

¹³Saul thi hi, banghangziam cile Topa tungah a thumaan ngawl hang hi. Ama in Topa thupiakte ni ngawl hi; Topa thu dongh in Topadeina zui tu sangin

¹⁴mithite ii thaa samin thu dongh zaw hi. Tua ahikom Topa in ama thatin ngamukna za Jesse ii tapa David tungah pia hi.

Khang Tangthu Khatna 11

David sia Israel le Judah ii Kumpi suak

(2Samuel 5.1-10)

¹Israel mite theampo David omna Hebron ah pai in ama tungah “Ko sia na chi le na sa hi khu hi.



²Tu masia Saul ii kote kumpi a sep lai ngangawn zonghin Israel mite nangma in ngalsimna ah na lampui a, a mite lampui tu le uk tu in Topa na Pathian in nang tungah kamciam hong pia zo hi,” ci uh hi.

³Tua ahikom, David Kumpipa omna Hebron ah Israel lampuite theampo pai uh hi. David Kumpipa in amate taw Topa mai ah kiciamna khat vawtin Samuel tungtawn aTopa ii kamciam sa om bangin David sathau noai in Israel kumpi suaksak uh hi.

⁴David Kumpipa le Israel mite theampo pai in Jerusalem khuapi sim uh hi. Tua lai in Jerusalem khuapi sia Jebus kici a tua munah a teang masa Jebus te ma teang lai uh hi.

⁵Jebus mite in David tungah, khuapi sungah tum zo ngei ngawl tu ni hi ci uh hi, ahihang David in Zion kulhte nawktham in a khua la in tua khuapi, “David ii Khuapi” kici hi.

⁶David in, “Jebus mi khat a thatlum masa belpa ngalkapmaang suak tu hi!” ci hi. Zeruah ii tapa Joab in ngalsimna ah lampui a, ama ngalkapmaang lian bel suak hi.

⁷Kul sungah David pai in teang ahikom tua kul sia, “David ii Khuapi” kici hi.

⁸David in tua mual ii nisuana sang lei kidimna mun pan kipan in khuapi saat a Joab in khuapi sung a om lai teng pua kik hi.

⁹Vaanglianbelpa Topain ompui ahikom David a thahat vaial hi.

David ii Ngalkap Minthangte

(2Samuel 23.8-39)

¹⁰Hite in David ii ngalkap minthangte ahi uh hi. Amate in Israel mi a om lai teng taw kipawl khawmin, Topa kamciamna om sa bangin, David kumpi a sua natu in hu uh a, a ukna ngam thahatsak uh hi.

¹¹A masa belpa sia Hachmon be le phung pan Jashobeam hi in, “Mihing Thumte” ii lampuipa ahi hi. Ama in a tei taw a ngalte zathum simin, sim khatin that siat hi.



¹²“Mihing Thumte” sung pan a minthang a niina pa Ahoh be le phung pan Dodo ii tapa Eleazar hi.

¹³Pas Dammim ngal kisimna ah ama in David sangah pangin Philistinete sim hi. Isarealte taikeak tu a kipat laitakin ama mangtaang lo sungah om a,

¹⁴tuabangin Eleazar le a ngalkapte sia lo lai ah panmun la in Philistinete do uh hi. Topa in ama ngalzawna lianpi pia hi.

¹⁵Ni khat ni ciangin Philistine ngalkapte Rephram Kuam ah ngiaphual saatin a om laitak Israel ngalkapte lampui sawmthum sung pan thum sia Adullam suanghawng ah a om David kungah pai uh hi.

¹⁶Tua laitakin David sia kul taw ki uum mualtung khatah om in Bethlehem khua sia Philistinete pawlkhat in to pha uh hi.

¹⁷David in inn sang ngai in, “Bethlehem kongpi hui tuikhuk panin ka dawn tu tui, khat in hong paipui le paw uk na peu ingh!” ci hi.

¹⁸Ngalkap minthang thumte pai in Philistine ngalkapte omna nawktan in tua tuikhuk pan tuitoai in David puak uh hi. Ahizong tua tui David in dawn ngawlin; Topa biakpiakna in zangh zaw a,

¹⁹“Hi tui ka ne ngei buatu hi! A nuntakna a khaam mite ii chi a ne taw ka kibang tu hi,” ci hi. Tuabangin ama in tui neak tu nial hi. Hite sia a minthang ngalkap thumte ii ngalhan nasepte veu hi.

²⁰Joab ii suapuipa Abishai sia, “A minthang sawmthumte” lampuipa hi. Ama in a teipi taw mihing zathum thatin, “Sawmthumte sungah” a minthang suak hi.

²¹Ama, “Sawmthumte” sungah minthang bel ahikom amate lampui suak a, ahizong, “Mihing Thumte” za in minthang ngawl hi.

²²Kabzeel pan Jehoiada ii tapa Benaiah sia ngalkap minthang khat hi a, ama in ngalhan nasep tam mama seamin Moabte ngalhang nii zongh that hi. Ama in khatvei vuuk taak ni khat in leidum sungah tuaksuk in tawpi khat that hi.



²³Ama in mihing thatang lian pi sali le pi lang a saang tei lian mama khat a toai Egyptpa zongh that hi. Tua pa sia Benaiah in moltum taw delin a khut sung pan a tei a suutol zawkciang, tua tei taw ama that hi.

²⁴Tuate sia Benaiah ii ngalhan nasepte hi a, ama “Sawmthum” sungah khat ahi hi.

²⁵Ama sia “Sawmthum” sungah a min dok tuam khat hi a, ahizong “Mihing Thumte” za in minthang ngawl hi. David in ama sia ama a cingte a uk tu in koi hi.

²⁶⁻⁴⁷Hite sia ngalkap min dok tuam dangte ahi uh hi. Joab ii suapuipa Asahel Bethlehem pan Dodo ii tapa Elhanan Harod pan Shammoth Pelet pan Helez Tekoa pan Ikkesh ii tapa Ira Anathoth pan Abiezer Hushah pan Sibbecai Ahoh pan Ilai Netophah pan Maharai Netophah pan Baanah ii tapa Heled Benjamin ngam Gibeah pan Ribai ii tapa Ithai Pirathon pan Benaiah Gaash kuamte paam pan Hurai Arbah pan Abiel Bahurum pan Azmaveth Shaalbon pan Eliahba Gizon pan Hashem Harar pan Shagee ii tapa Jonathan Harar pan Sachar ii tapa Ahiam Ur ii tapa Eliphai Mecherah pan Hephher Pelon pan Ahijah Carmel pan Hezro Ezbai ii tapa Naarai Nathan suapuipa Joel Hagri ii tapa Mibhar Ammon pan Zelek Beeroth pan Joab ii ngalhiam puapa Naharai Jattir pan Ira le Gareb Hit mi Uriah Ahlai ii tapa Zabad Shiza ii tapa Adina (ama sia Reuben minam pan a minthang hi in, ngalkap sawmthum nei hi.) Maacah ii tapa Hanan Mithan pan Joshaphat Ashterah pan Uzzia Aroer pan Hotham ii tapate Shamma le Jeiel Tiz pan Shimri ii tapate Jediael le Joha Mahavah pan Eliel Elnaam ii tapate Jeribai le Joshaviah Moab pan Ithmah Zobah pan Eliel, Obed le Jaasiel te ahi uh hi.

Khang Tangthu Khatna 12

Benjamin Minam sung pan David ii Nungzui Masate

¹Saul Kumpipa khut sung pan suakta tu in David tai in, Ziklag ah a ten sungin, ama sia ngalsim thiamte, a muan huai ngalkapte,

²Saul ii minampui ahi Benjamin minamte in pawm uh hi. Amate in a ziatsang taw ahizong, a veisang taw ahizong thal le saili kap thei uh hi.



3-7 Amate sia Gibeah pan Shemaah ii tapate ahi Ahiezer le Joash te ii ukna nuai ah, a omte ahi uh hi. Hite sia a ngalkapte ahi uh hi: Azmaveth ii tapate Jeziel le Pelet Anathoth pan Beracah le Jehu Ngalkap minthang khat le, “Sawmthum” sungah lampui khat ahi Gibeon pan Ishmaiah Gederah pan Jeremiah, Jahaziel, Johannan le Jozabad Hariph pan Eluzai, Jerimoth, Bealiah, Shemariah, le Shephatiah Korah be le phung pan Elkanah, Isshiah, Azarel, Joezer, le Jashobeam Gedor pan Jeroham ii tapate Joelah le Zebadiah te ahi uh hi.

Gad Minam sung pan David ii Nungzuite

8 Hite sia David ii senneal ngam kulh ah a omlai takin ama ngalkapte a pawm Gad minam sung panin a minthang le ngalkap thiamte ii minte ahi uh hi. Amate lum le tei zak thiamin, tawpi bangin kiitak huai a, mualtung sazuk bangin tai ngang hi.

9-13 Amate a za lianbel pan a za nobel dong a nuai a bang ahi hi: Ezer, Obadiah, Eliab, Mishmannah, Jeremiah, Attai, Eliel, Johanan, Elzabad, Jeremiah, le Machbannai te ahi uh hi.

14 Hi Gad minamte sung pan pawlkhat ngalkap tulkhat uk ngalkapmaang liante hi a, a dangte sia ngalkap zakhat uk ngalkapmaang note ahi uh hi.

15 Kum khat lai tha masa bel tha in Jordan nguntui pawmin ngunhui vaalbo ah tui a let hunin amate in ngun kantan in ngun ii niswana sang le nitumna sang kuam ah a teang mite thethaang uh hi.

Benjamin le Judah pan Nungzuite

16 Khatvei lai in Benjamin le Judah minamte sung pan pasal pawlkhat David omna kulh ah pai uh hi.

17 David in amate muakin, “Keima hu tu in lawmpha in hong pai na hi uh le pha hi. Ih kipawl tu hi! Ahihang ka ngalte kungah hong zuak tu in hong pai na hi uh le keima in bangma hong law ngawl tu ka hi ta zongin, ih taangpupite ii Pathian in he tu a, note daan hong pia tu hi,” ci hi.

18 “Sawmthum” te ii khat vei ciangin lampui a suakpa amate sung pan khat ahi Amasai tungah Pathian thaa thengin ama in: “Jesse ii tapa David awng,



nangma mi ka hi uh hi! Nang le nangma hong hute tungah zawna om taken! Pathian sia nang sangah om hi,” ci in aukeak hi. David in amate saangin, a ngalkapmaangte in koi hi.

Manasseh Minam pan Nungzuite

¹⁹David le Philistine mite Saul Kumpipa do tu in a pai lai in Manasseh minamte sung pan ngalkap pawlkhat David ii sangah pang uh hi. A tatakin David in Philistinete hu ngawl hi, banghangziam cile Philistine kumpite in a to masa ahi ngei Saul tungah amate a zuak tu a lau hu in David Ziklag ah heak kiksak hi.

²⁰Hite sia Ziklag ah David a heak kik lai in David sang a pawm Manasseh minam sung pan ngalkapte: Adnah, Jozabad, Jediael, Michael, Jozabad, Elihu, le Zillethai te ahi uh hi. Manasseh minam sungah amate theampo sia ngalkap tulkhath ukte veu ahi uh hi.

²¹Ngalkap mindokte veu ahi uh komin David ii ngalkap uliante veu suak uh hi. A khak sang ciangin amate sia Israel ngalkapte ii a uliante veu ahi uh hi.

²²Nisim phialin David ngalkapte kibelap ahikom hai ngawlin ama ngalkap hong tam mama hi.

David ii Ngalkapte

²³⁻³⁷Topa kamciam sa bangin Hebron ah David a omlai in, Saul taangin ama kumpi suaksak tu in ngalsim thiam ngalkap tam mama in ama ngalkap pawm uh hi. Tua mite a nuai a bang ahi hi: Judah: ngalvanh cing a kinguan lum le tei a toai pasal 6,800; Simeon: ngalkap thiam sa pasal 7,100; Levi: pasal 4,600; Aaron ii suan le paal Jehoiada ii nungzuite pasal 3,700; ngalkapthiam khangno khat ahi Zadok ii mealheakte lampui pasal 22; Benjamin (Saul ii mipui): pasal 3,000 (Benjaminte a tam zaw sia Saul sangah pang top lai uh hi.) Ephraim: amate be le phung sungah a minthang pasal 20,800; Nitumna sang Manasseh: David kumpi suaksak tu in, a kiteal pasal 18,000; Issachar: amate khutnuai ngalkap tek taw a kingawm 200, (Hi lampuite in Israel te in bang vawt tu ci le a vawt tu hun a phabel hun a he te veu ahi uh hi); Zebulun: ngalsim tu a kinging, ngalhiam ngalnaam a zangh thei a thumaan le



a muan huai pasal 50,000; Naphtali: lampuite 1,000, lum le tei a toai pasal 37,000; Dan: ngalsim thiam sa 28,600; Asher: ngalsim tu a ki thoaisa 40,000; Jordan ngun ii nisuana sangah a om minamte — Reuben, Gad le nisuana sang Manasseh minamte: ngalhiam a nanam a zangh thei sa pasal 120,000 te ahi uh hi.

³⁸Ngal do tawm tu in a kinging hi ngalkapte theampo, Israel ngam theampo a uk tu in David kumpi suaksak tu in sawmna khat taw Hebron ah pai uh hi. A taanglai Israel mi theampo in a kibang ngaisutna nei uh hi.

³⁹Ngamsung a mite ii a vaihawmsak sa an le tuite David taw ni thum sung ne khawm dawn khawmin om uh hi.

⁴⁰Saksang tawngah a teang Issachar, Zebulun, le Naphtali minamte dongin laa, kalaoh, siphu le khuite taw neakthei — anvui, thei, sapit ko ngawm, zu le olive thaute paipui tek uh hi. Amate in ngaw tu le neak tu in khui le tuu zongh paipui uh hi. Hi bangin a ken tek uh sia a ngambup ii lungdamna lakna ahi hi.

Khang Tangthu Khatna 13

Thukham Thingkuang Kiriath Jearim pan Kikhiin

(2Samuel 6.1-11)

¹David Kumpipa sia ngalkap tulkhat ukte le zakhat uk ngalkapmaangte theampo taw thu kikum uh hi.

²Tuaciang Israel mite theampo tungah ama in, “Note na lung uh kim in, Topa ih Pathian ii deina a om le ih ngamsung mite, thiampite le Levite kungah kamtaite ih paisak tu a, eima kungah hong kikhawm tek tu in ih vaitha tu hi.

³Tuaciang pai in, Saul ii kumpi a sep lai in a ki awlmawk ngawl Pathian Thukham Thingkuang sia ih la tu hi,” ci in zasak hi.

⁴Mipite sia tua ngaisutna thukim in lungdam mama uh hi.



⁵Tua hi a, David in Israel ngamsung theampo thangsang Egypt ngamngi pansaksang Hamath Mualciangh dong ah a teangte Kiriath Jearim pan Jerusalem khuapi ah Thukham Thingkuang paipui tu in kaikhawm uh hi.

⁶David le Israel mite sia Judah ngam Kiriath Jearim kici Baalah khuapi ah Cherubim tung minthanna taw a toTopa min a pua Thukham Thingkuang la tu in pai uh hi.

⁷Amate in Abinadab inn pan Thukham Thingkuang la in khuileang thak khat tungah suan uh hi. Uzzah le Ahio in khuileang lampui in,

⁸David le Israel mite theampo Pathian minthang pokin a tha neiza taw laam uh hi. Amate la sa in, tengtong, kuang, daalkopsai le lemlete tum uh hi.

⁹Chidon kici ancilna mun a thet uh ciang khuitalte liik a Uzzah in Thukham Thingkuang zam in dom hi.

¹⁰Thakhat thu in Uzzah tungah Topa thin uuk in Thukham Thingkuang a tham hu in thatlum pai hi. Ama tua mun Pathian mai ah thi a,

¹¹tuasia hu in, tua mun sia tua hun pan kipan Perez Uzzah kici hi. Uzzah tungah Topa thin uuk in daan a piak hu in David thin uuk mama hi.

¹²Tuaciang David in Pathian kiita in, “Hi Thukham Thingkuang tu in koi bangin paipui thei tu khi ziam?” ci hi.

¹³Tua ahikom David in Thukham Thingkuang sia Jerusalem ah ciapui ngawl hi. Gath khua mi Obed Edom kici pa inn ah nusia hi.

¹⁴Tua munah Thukham Thingkuang tha thum sung om a, Topa in Obed Edom innkuanpuite le a neisa theampo thupha pia hi.

Khang Tangthu Khatna 14

David ii Jerusalem ah A Nasepte

(2Samuel 5.11-16)

¹Tyre Kumpipa Hiram in David kungah sumlei sumzuak palai paisakin kumpi innsak natu in Cedar thingluangte, suangciangte le lettamate puak hi.

²Tuasia ciang Topa in Israel kumpi hong suaksak zo a, ama mite atu in ka ngamukna hong khangtosak hi, ci in David in phawk hi.



³Jerusalem ah David in zi tam ma nei in, tanu tapa tam ma toai hi.

⁴Jerusalem pan a nei tapate, a nuai a bang ahi hi: Shammua, Shobab, Nathan, Solomon,

⁵Ibhar, Elishua, Elpelet,

⁶Nogah, Nepheg, Japhia,

⁷Elishama, Beeliada, le Eliphelet te ahi uh hi.

Philistinete A zawna

(2Samuel 5.17-25)

⁸Tu in David sia Israel ngambup kumpi kisuaksak zo ci in Philistinete in a zaak uh ciang ama man tu in a ngalkapte pai uh hi. Tua hu in David in amate do tu in kuan hi.

⁹Philistinete Rephaim Kuam thengin a vanhte suddol tu in kipan uh hi.

¹⁰David in Pathian tungah, “Philistinete ka sim tu ziam? Ngal zawna nong pia tu ziam?” ci in dongh hi. Topa in, “Hi hi! Sim in zawna kong pia tu hi!” ci in zo hi.

¹¹Tuaciang David in Philistinete Baal Perazim ah simin zo hi. Ama in, “Tuipawm bangin ngalte a phul let tu in Pathian in keima hong zangh hi,” ci hi. Tua hu in tua mun sia Baal Perazim kici hi.

¹²Philistinete a taikcak ciang a milimte nusia a, David in tua milimte hal tu in thupia hi.

¹³Hai ngawlin Philistinete kuam sungah heak kikin a mihingte neisa vanhte suddol tu in kipan leleau uh hi.

¹⁴Khatvei ma David in Pathian dongh kik a, ama in, “Hi sang pan sim heak in a, kiimveal in, na kingin zawkciang balsam thingkung nai pan sim tu in kithoi in.

¹⁵Thingkung dawn pan kalsuan nging na zaak ciang sim in, banghangziam cile Philistine ngalkapte na zaw natu in na mai ah ka pai tu hi,” ci in zo hi.

¹⁶David in Pathian sawl bangin seam ahikom Philistine ngalkapte Gibeon pan Gezer dongin ama in notkeak hi.



¹⁷David ii minthanna mun theampo ah kizel a, Topa in minam theampo in ama kiitasak hi.

Khang Tangthu Khatna 15

Thukham Thingkuang Khiin tu Kithoai

¹David in ama aituam zak tu in David khuapi sungah innte sa hi. Ama in Pathian Thukham Thingkuang atu in mun khat vawtin puanbuk khat zonghsaksak hi.

²Tuaciang David in, “Thukham Thingkuang sia Levi te bek in pua thei tu hi, banghangziam cile amate sia Pathian in Thukham Thingkuang pua tu le a tawntung ama na a seam tu in a teal sa te ahi uh hi,” ci hi.

³Asak Puanbuk sia sungah Thukham Thingkuang paipui tu in Israel mite theampo David in Jerusalem ah sam hi.

⁴Tua zawkciang ama in Levite le Aaron suan le paalte sam hi.

⁵Levite Kohath be le phung sung pan, ama ii be le phung mihing 120 a uk tu in Uriel hong pai hi.

⁶Merari be le phung sung pan, ama ii mihing 220 a uk tu in Asaiah pai hi;

⁷Gershon be le phung sung pan, ama ii mihing 130 a uk tu in Joel pai hi;

⁸Elizaphan be le phung sung pan, ama ii mihing 200 a uk tu in Shemaiah pai hi;

⁹Hebron be le phung sung pan, ama ii mihing 80 a uk Eliel pai hi;

¹⁰Uzziel be le phung sung pan, ama ii mihing 112 a uk tu in Amminadab pai hi.

¹¹David in thiampi Zadok le Abiathar le Levi mi luk ahi Uriel, Asaiah, Joel, Shemaiah, Eliel le Amminadab te sam hi.

¹²Ama in Levite tungah, “Note sia Levi be le phung lampuite na hi uh hi. Kasak sa inn sungah Topa Israel Pathian ii Thukham Thingkuang na paipui thei natu uh in noma le noma kithian sua in, na Levi mipuite uh thiansua vun.



¹³A masa lai in tua Thukham Thingkuang pua tu in nong kihel bua uh a, ama ih biak tu bangin ih biak ngawl hu in, Topaih Pathian in eite daan hong pia hi,” ci hi.

¹⁴Tuaciang Israel te Topa Pathian ii Thukham Thingkuang khiin tu in thiampite le Levite amate le amate kithiansua uh hi.

¹⁵Moses tungtawn in Topa thupiak bangin Levite in Thukham Thingkuang sia a liangko tungah molte taw pua in zawng uh hi.

¹⁶A mipuite lasa tu, tengtong tum tu, daalkopsai tum tu see tu in David in Levite lampuite tungah thupia hi.

¹⁷⁻²¹La sate ii be le phungte sung pan amate in taungo daalkopsai tum tu in a nuai a mite teal hi: Joel ii tapa Heman, a bepa Berechiah ii tapa Asaph, le Merari be le phung pan Kushaiah ii tapa Ethan te ahi uh hi. Amate a hu tu in amate in a nuai a, Levite tengtong awsaangte tum tu in teal hi: Zechariah, Jaaziel, Shemiramoth, Jehiel, Unni, Eliab, Maaseiah, le Benaiah te ahi uh hi. Tengtong awniamte tum tu in amate in a nuai a Levite teal hi: Mattithiah, Eliphelehu, Mikneiah, Azaziah, le Biakinn cingte Obed Edom, le Jeiel te ahi uh hi.

²²Tumthei a thiam hu in Chenaniah sia Levi tumthei thiamte uk tu in kiteal hi.

²³⁻²⁴Berechiah le Elkabah sia Obed Edom le Jehiah taw Thukham Thingkuang cing tu in kiteal hi. Thukham Thingkuang mai ah lemle tum tu in thiampi Shebaniah, Joshaphat, Nethanel, Amasai, Zechariah, Benaiah le Eliezer te kiteal hi.

Jerusalem ah Thukham Thingkuang Kikhiin

(2Samuel 6.12-22)

²⁵Tuaciang David Kumpipa, Israel lampuite le ngalkapmaangte Thukham Thingkuang la tu in Obed Edom inn ah pai in nasia takin poai khaam uh hi.

²⁶Amate in Thukham Thingkuang a pua Levite Pathian huna a nga nanak natu in khuital sali le tuu salite biakpiakna in pia uh hi.



²⁷David le tumthei tumte, a la lampui Chenaniah le Thukham Thingkuang a pua Levite in puanneal kaang pha bel taw a kivawt puantualte veu silh uh hi. David zongh ephod khat silh hi.

²⁸Tuabangin Israel te theampo in Thukham Thingkuang sia lungdamna taw au kawm in lemle, sialkii, daalkopsai le tengtongte tum kawmin Jerusalem khua ah paipui uh hi.

²⁹Thukham Thingkuang sia khuapi sungah a tumpui uh ciang Saul ii tanu Michal in khelki pan en in, David kumpipa lungdamna taw laamin a lelen a mu ciang a thin sungah hoi maw sa hi.

Khang Tangthu Khatna 16

¹Amate in Thukham Thingkuang sia David ii tua Thukham Thingkuang koi natu in asak sa puanbuk sungah koi uh hi. Tuaciang amate in Pathian tungah sangaw biakpiakna le kipawlkhop biakpiakna pia uh hi.

²David in sangaw biakpiaknate a man zawkciang Topa min taw mipite thupha pia in,

³an zongh a vekpi in hawmsak hi. Ama in Israel mite theampo pasal ahizong numei ahizong mihing khat muh phaang khat tek, sakan bak khat tek le sapit ngawm tawm tek pia hi.

⁴David in Levi mite pawlkhat Thukham Thingkuang mai ah lasakna le ama pokna taw Topa Israel Pathian biakna ah lampui tu in koi hi.

⁵Asaph sia lampui in koi a, a hupa tu in Zechariah koi hi. Jeiel, Shemiramoth, Jehiel, Mattithiah, Eliab, Benaiah, Obed Edom le Jeielte sia tengtong tum tu te ahi uh hi. Asaph sia daalkopsai tum tu pa hi.

⁶Thiampi nii ahi Benaiah le Jahaziel sia Thukham Thingkuang mai ah a huhun in lemle a tum tu te ahi hi.

⁷Tua hunin David in Asaph le Levi a mipuite Topa tungah pokna la sa tu in nasep pia masa hi.

Pokna La

(Psalms 105.1-15; 96.1-13; 106.1, 47-48)



- ⁸Topa tungah lungdamko vun, ama letna thangsak vun; a nasepte minamte tungah son vun.
- ⁹Topa tungah pokna la sa vun; a lamdang a nasep sate son vun.
- ¹⁰Ama aa ih hi sia lungdam vun; ama a biate theampo lungdam taken!
- ¹¹Topa tungah huna ngen tu in pai vun; tatsat ngawlin ama bia vun.
- ¹²⁻¹³Pathian ii naseam pa Jacob ii suan le paal note, Pathian teal Israel ii suan le paalte awng, a lamdang Pathian ii nasepte le a thukhennate phawk vun.
- ¹⁴Topa sia ih Pathian hi; a thupiakte sia leitung bup atu hi.
- ¹⁵Pathian ii a tawntung atu a vawt thuciam
- ¹⁶Abraham taw a vawt thuciam, Isaac tungah a kamciam mangil ngei heak vun.
- ¹⁷Topa in Jacob taw thuciamna khat vawt a, a tawntung a kip tu ahi hi.
- ¹⁸Ama in, “Canaan ngam nang kong pia tu a, nangma aituam atu hi,” ci hi.
- ¹⁹Pathian ii mite tawm a, Canaan ngamah khual mi suak uh hi.
- ²⁰Amate ngam khat pan ngam khat, kumpi ukna ngam khat pan ngam khat ah pai kawkoai uh hi.
- ²¹Ahizong Pathian in amate kuama in nengniamsak ngawl hi, Amate cing tu keam tu in Pathian in kumpite thupia hi:
- ²²“Ka teal sa ka naseamte bangma law heak vun; ka kamsangte thutha heak vun,” ci hi.
- ²³Leitung bup awng, Topa tungah la sa vun! ama ii eite hong ngupna thuphate nisim in thangsak vun.
- ²⁴Minamte tungah a minthanna thangsak vun, mihing theampo tungah a vaanglian a nasepnate thangsak vun.
- ²⁵Topa sia lian a, nasia tak pok tu ahi hi; ama sia pathiante theampo sangin pok zawk tu ahi hi.



²⁶Ngamdang theampote ii pathiante milim bek hi a; ahihang Topa in vantungte bitphua hi.

²⁷Minthanna le tuanngen na in ama kiim uumin, a Biakinn minthanna le nopsakna taw kidim hi.

²⁸Leitung mihing theampo awng Topa pok vun; a vaangletna le a minthanna pok vun.

²⁹Topa ii minthanna pok vun; biakpiaknate kengin a Biakinn ah pai vun. A Thiangtho Pa a kilangh ciangin a mai ah kun vun;

³⁰leitung theampo awng a mai ah liingin om vun! Leitung sia a dinmun kho in, kikhiin thei ngawl hi.

³¹Van le lei awng lungdam vun! Topa sia kumpipa hi ci in minamte tungah son vun.

³²Tuipi le a sungah a om nganhingte theampo awng, au vun; lo le lo sungah a om theampo awng, lungdam vun!

³³Leitung uk tu in Topa hong pai ciang, duisung a om thingkungte lungdam in au tu hi.

³⁴Topa tungah lungdam vun, banghangziam cile ama pha hi; ama itna sia mong nei ngawl hi.

³⁵Ama tungah, “Kote hong ngumpa Pathian awng, kote hong ngum tan; kote mun khat ah hong khawmtua tan; minamte khutsung pan hong suaktasak tan, tua hile ka lung uh dam tu a, na min thiangtho kong pok tu uh hi,” ci vun.

³⁶Israel Pathian Topa pok vun! Tu le a tawntungin ama pok vun. Tuaciang mi theampo in, “Amen” ci in Topa pok uh hi.

Jerusalem le Gibeon ah Biakpiakna

³⁷David Kumpipa in Asaph le Levi a mipuite Thukham Thingkuang a kikoina mun ah a kivawt biakpiakna ah a uk tawntung tu in koi hi. Amate in nisim in amate nasep tek tua munah seam tu uh hi.



³⁸Amate sia Jeduthun ii tapa Obed Edom le ama be le phung pasal sawmluk le liatte in hu tu hi. Hosah le Obed Edom te sia kongcing a ukte ahi uh hi.

³⁹Thiampi Zadok le a thiampi puite bangbang po ahizong Gibeon ah a om biakpiakna munah Topa biakpiakna a ukte ahi uh hi.

⁴⁰Topain Israel tungah a piak thukham sungah a ki at bangin thiampite in zing sim, nitak sim meihal biakpiakna biaknatau tungah pia tu uh hi.

⁴¹Amate sia a mong nei ngawl Topa hong itna pokna la Topa tungah sa tu in a kiteal tuam vilvel ahi Heman le Jeduthun, le a dangte taw tua munah om khawm uh hi.

⁴²Pokna la asak uh ciang a tum uh lemle, daalkopsaite le tumthei vanhte zongh Heman le Jeduthun in cing uh hi. Jeduthun ii be le phungte sia kongcing a ukte ahi uh hi.

⁴³Tua zawkciang a kuama po a inn uh ah cia tek uh a, David zongh a innkuanpuite taw hun khat sung omkhawm tu in a inn ah cia hi.

Khang Tangthu Khatna 17

David tungah Nathan ii Thuson

(2Samuel 7: 1-17)

¹Tu in David Kumpipa a kumpi inn ah teang hi. Nikhat ni in David in kamsangpa Nathan samin ama tungah, “Kei hi sungah cedar thing taw a kisa inn sungah teang khi hi, ahihang Pathian ii Thukham Thingkuang sia puanbuk sungah kikoi hi!” ci hi.

²Nathan in, “Na thin sung a om babangin vawt in, banghangziam cile Pathian sia nang taw omkhawm hi,” ci in zo hi.

³Ahizong tua ni zanin Pathian in Nathan tungah,

⁴“Ka naseampa David kungah pai tan a, ‘Ka ten natu biakinn khat sa tu sia nangma na hi bua hi.

⁵Israel mite Egypt ngam pan ka suatak ni pan kipan tu dong biakinn sungah ka teang ngei bua hi; puanbuk sungah teang tawntung in, mun khat pan mun khat ah ka kikhiin hi.



⁶Israel mite taw ka khualhawna theampo ah lampui in ka tealte khat pawpo ii tungah banghingin cedar thing taw ka biakinn sa ngawl nu ziam ka ci ngei bua hi,' ci hi,

⁷“Tua ahi ciangin ka naseampa David tungah keima Vaanglianbelpa Topa in hi bangin hong ci hi ci in son tan, ‘Lo sung na tuu cinna panin kong la a, Israel ka mihingte ukpa kong suaksak hi.

⁸Na paina theampo ah kong ompui a, na mai ah na ngal theampo kong zawsak hi. Leitung ah lampui lianbelte bangin na min kong thangsak tu hi.

⁹⁻¹⁰Israel ka mite atu in mun khat ka tealsak a, tua munah ka teang sak zo hi, amate tua munah teangin kuama in nengniam nawn ngawl tu hi. Hi ngam a thet ni pan kipan amate a ngoltol mite in sim bul uh hi, ahizong tuabang piang kik nawn ngawl tu hi. Na ngalte theampo na suatak natu uh le suan le paal na nei natu uh in kamciam kong pia hi.

¹¹Na thi ciang le na taangpupite taw hong kiphum khop ciangin na tapate sung pan khat, kumpi ka suaksak tu a, a ukna ngam a thahat ngam khat ka suaksak tu hi.

¹²Ama sia keima atu in biakinn a sa pa hi tu a, a ngamukna ka kizom suaksak tu hi.

¹³Keima in a pa ka hi tu a, ama sia ka ta hi tu hi. Nangma kumpi na sua thei natu in Saul ka hepkeak bangin ama ka khuangkhosaknate ka dok kik buatu hi.

¹⁴Ka mite le ka kumpi ngam a uk tawntung tu in ama ka koi tu hi. Ama kumpi khangngui sia a bo ngei buatu hi,' va ci tan,” ci in sawl hi.

¹⁵Pathian ii ama tung a, a pualaak thu theampo Nathan in David tungah son hi.

David ii Lungdamko Thungetna
(2Samuel 7.18-29)



¹⁶Tuaciang David Kumpipa sia Topa ompuina puanbuk sungah pai a, tosuk in thungen hi, “Topa ka Pathian awng, kei tung ahizong ka innkuanpuite tung ahizong nong septe ka kiphu ka kilawmna om ngawl hi.

¹⁷Hi napi tu in a nasia zaw lai in hong seam ni hi, mai sangah ka suan ka paalte atu dong kamciamna na vawt zo hi, Topaka Pathian awng, nangma in kei mihing thupi khat bangin nong thupi vawt zo hi.

¹⁸Bangdang hong ci thei lai tu khi ziam! Na naseampa kei nong he mama a, nong upat lalai hi.

¹⁹Hi thu sia kei atu in na deina le na tupna hi a, mai sangah ka let natu nong lakna hi.

²⁰Topa awng nang taw a kibang kuama om ngawlin; nangma bek Pathian na hi hunlam kong he tawntung zo uh hi.

²¹Na minam suak tu in saltanna pan na suataksak Israel mite taw a kibang leitung ah minam dang om ngawl hi. Amate tungah a lamdang le a thupi na nasepte hangin leitung bup ah na minthang hi. Egypt panin na mite suatak in, amate mai ah minam dangte na notkeak hi.

²²Israel mite a tawntungin nangma mi tu in na vawt zo a, nangma Topa in amate Pathian na suak zo hi.

²³“Tuaciang tu in, Topa Pathian awng, kei le ka suan ka paalte atu hun tuatuam sungah kamciam na vawtte a tawntung atu in hong tangtungsak tan, ka seam tu na ci te hong seam tan.

²⁴Na minthanna sia lian tu a, tuaciang mite a tawntung in, ‘Topa Vaanglianbelpa sia Israel te ii Pathian hi,’ ci tu uh hi. Tuaciang nangma in ka khangngui sia hun buppi ah nong keam tu hi.

²⁵Hi thungetna nang tungah hang takin kong ngen hi, banghangziam cile, nangma in kei na naseam pa ii tungah hite nong lak zo a, tuaciang ka suan ka paalte sia kumpipa te na suasak tu nong son zo hi.



²⁶Topa awng nang Pathian na hi a, hi a lamdang kamciamna ka tungah nong vawt zo hi.

²⁷Na maipha a nga tawntung tu in ka suan le ka paalte thupha nong piaksak natu in hesuak kong ngen hi. Topa awng, nangma in amate thupha na pia zo a, na piak thupha sia amate tungah a tawntungin kip tu hi,” ci hi.

Khang Tangthu Khatna 18

David ii Ngal zawmate

(2Samuel 8.1-18)

¹Tawmvei zawkciang David Kumpipa in Philistinete sim kikin zo hi. Ama in amate ii a uk Gath khuapi le a kiim ah khuanote la hi.

²Moabte zongh simin zo a, a khut nuai suak ahikom David tungah shia pia uh hi.

³Tua zawkciang Syria ngamsung Zobah ngam uk Hadadezer Kumpipa in Eupharates ngunnaak sangah a om ngamkhen sia laak tu hanciam ahikom David in Hamath ngam nai ah sim hi.

⁴David in ngal leang tulkhat, siphu ngalkap tulsali le lei ngalkap tulkul man hi. Ama in leang kai tu siphu zakhat bek khe in a dangte theampo a zapi ngui saattan siat hi.

⁵Damascus ah a om Syria te in Hadadezer Kumpipa hu tu in a ngalkapte a paisak ciang, David in simin, tulkul le tulnii thatlum hi.

⁶Tuaciang David in Syria ngamkhen sungah a ngalkap ngiaphualte koi a, ama khutnuai suaksakin phiangshia piasak hi. Topa in David sia mun theampo ah zawna pia hi.

⁷Hadadezer ii ngalkapmaangte ii a zak kham ngal dalna lumte David in matsakin Jerusalem ah ciapui hi.

⁸Ama in Hadadezer ii ukna Tibhath le Kun khuapite panin taungo tam mama zongh la hi. (Solomon in nungsang ciang tuate taw Biakinn sungah vanhzak uum le beal, khuam le tuikuangte vawt hi.



⁹David in Hadadezer ii ngalkapte a buppi zo siat ci thu Hamath Kumpipa Toi in za hi.

¹⁰Tua hu in David Kumpipa muak tu le Toi ii tamvei mama a sim bul Hadadezer a zawna lungdamko tu in Toi in a tapa Joram paisak hi. Joram in kham, ngun, le taungo taw a kivawt letsongte David puak hi.

¹¹Tua vanhte David Kumpipa in a zawna ngam Edom, Moab, Amon, Philistia le Amalek pan a lak ngun le khamte taw Topa biakna ah zak tu in pia khawm hi.

¹²A nu Zeruah ii tapa Abishai in Ci Kuam ah Edomte zo in tulsawm le tulliat that hi.

¹³Ama in Edom ngamsung theampo ah ngalkap ngiaphualte koi in tua mun ah a teang mite David Kumpipa khutnuai suak hi. Topa in David sia mun theampo ah ngal zawna pia hi.

¹⁴David in Israel ngambup ukin, a mite a tawntungin a kilawm bang le thumaan thutang taw in uk hi.

¹⁵Abishai ii suapui pa Joab ngalkapmaang lianbel hi a, Ahilud ii tapa Jehoshaphat sia thu theampo tepteena ukpa ahi hi.

¹⁶Ahitub ii tapa Zadok le Abiathar ii tapa Ahimalech te in thiampi seamin, Seraiah sia zum thuzeakpi seam hi.

¹⁷Jehoiada ii tapa Benaiah sia David Kumpipa cingte ukpa hi a, David Kumpipa tapate in kumpipa ii na a sepna uh ah panmun lian len tek uh hi.

Khang Tangthu Khatna 19

David in Ammonte le Syria te Zo

(2Samuel 10.1-19)

¹Hun tawmvei zawkciang Ammon Kumpipa Nahash thi in, a tapa Hanun in kumpi seam hi.

²David Kumpipa in, “A pa Nahash in thumaan lawmtakna ka tungah hong nei bangin Hanun tungah ka thuk kik tu hi,” ci hi. Tuabangin David in a



khuangai heeneam tu in kamtaite paisak hi. Amate Ammon ngam thengin Hanun Kumpipa kungah a pai uh ciang

³Ammon lampuite in kumpipa tungah, “Na khuangai hong heeneam tu in, David in hi kamtaite hong paisak sia na pa a zatak hang hi tu in na um ziam? Hi ngawl het hi! Ama in hong zaw nop hangin ih ngamsung en kawkoai tu in ngalvilte hong paisak hi,” ci uh hi.

⁴David ii kamtaite Hanun in manin, a khamul meetsakin a puante a kawng nuai ciangin a tansak zawkciang tha kik hi.

⁵Inn a zot tu amate maizum mama uh hi. Tua thu David in a zaak ciang, a khamul uh a sau dong cia ngawlin amate Jericho ah om tu in kam vaitha hi.

⁶Amate in David sia a ngal a suasak hunlam Hanun Kumpipa le Ammonte in a tel uh ciang amate in Mesopotamia tungnung le Syria ngam Maacah le Zobah panin ngalleang le ngalleang ukte cial natu in ngun dangka ton sawmli dedek pia uh hi.

⁷A cial ngalleang tul sawmthum le tulnii te le Maacah Kumpipa ngalkapte hong pai in Medeba khua hui ah ngiaphual saat uh hi. Ammon mite zongh a khuapi tek pan hong pai tekin ngalsim tu in kinging uh hi.

⁸Tua thu David in a zaakciang Joab le a ngalkapte theampo ngalsim tu in paisak hi.

⁹Ammon mite hong kuanin amate khuapi ahi Rabbah khua suazoai ah panmun la uh hi. Amate hu tu in hong pai kumpite in ngamkolna ah panmun la uh hi.

¹⁰Joab in a ngalte in maisang le nungsang panin hong sim nuam hi ci a heak ciang Israel ngalkap sung pan a pha bel teng tealin Syria ngalkapte maingat in panmun lasak hi.

¹¹Ama in a ngalkap dangte a suapuipa Abishai lampuisakin Abishai in Ammonte maingat in panmun lasak hi.



¹²Joab in ama tungah, “Syria ngalkapte in kei hong zaw nong mu le hong pai in hong hu tan a, Ammonte in nang hong zo le pai in kong hu tu hi.

¹³Thahat in a, hang in! Ih mipuite atu le ih Pathian ii khuapite atu in nasia takin ngal ih do tu hi. Topa deina bang hi taken,” ci hi.

¹⁴Joab le a ngalkapte in sim tu in a manaw uh ciang Syria ngalkapte taimang uh hi.

¹⁵Ammon ngalkapte in Syria ngalkapte a taimang a mu uh ciang amate zongh Abishai mai pan tai in khuapi sungah nungkin uh hi. Tuaciang Joab Jerusalem ah cia kik hi.

¹⁶Israel te in hong zo zo cisia Syria te in a heak uh ciang Eupharates ngun niswana sang Syria ngam panin ngalkapte paipui in, Zobah ngam uk Hadadezer Kumpipa ii ngalkapmaang Shobach in lampuisak hi.

¹⁷Tua thu David in a zaak ciang Israel ngalkapte khawmtua a, Jordan ngun kanin Syria ngalkapte maingat in panmun la uh hi. A kisim uh ciangin,

¹⁸Israel te in Syria te not kik uh hi. David le a ngalkapte in Syria ngalleang hawlte tulsali le lei ngalkap tul sawmli that uh hi. Amate in Syria ngalkapmaang Shobach zongh that uh hi.

¹⁹Hadadezer Kumpipa ii uk a khutnuai a, a seam kumpite in Israel ngalkapte in amate zo zo hi, ci in a heak uh ciang ama te in David taw kilemna vawt uh a, David khutnuai mi suak uh hi.

²⁰Syria te in, Ammon mite hu kik nuam ngei nawn ngawl uh hi.

Khang Tangthu Khatna 20

David in Rabbah La

(2Samuel 12.26-31)

¹Kumpite ii ngalsim hun veu ahi khuakhal hun a thet kik ciang Joab in a ngalkapte lampui in Ammon ngam sim uh hi, ahizong David Kumpipa sia Jerusalem ah om hi. Amate in Rabbah khuapi uumci in sim a, lalcipsak hi.

²Ammonte biak milim Molech in pound sawmsali le pound nga a ngit kham kumpi lukhu khat nei hi. Tua sungah suang manpha khat om a, tuasia David

in la in a kumpi lukhu tungah suan hi. Ama in khuapi sung pan vanh kisutte honpui khat zongh ciapui hi.

³Ama in khuapi sung mite paipui in thingatnam, thik tumanh, le heite zanghin na seamsak hi. Ammon ngam khuapi dangte theampo zongh ah tuabangma in seamsak hi. Tuaciang ama le a ngalkapte Jerusalem ah cia kik uh hi.

Philistine Thatang liante taw Kisimna

(2Samuel 21.15-22)

⁴Tua zawkciang Philistinete taw Gezer ah ngal kido na hong om leleau hi. Tua tungin Hushah pan Sibbecai in mihing thatang lian Sippai a kici pa thatin, Philistinete zo hi.

⁵Khatvei Philistinete taw ngal kisim leleau in, Jair ii tapa Elhanan in Gath khua mi Goliath suapuipa Lahmi that hi. Lahmi ii a tei ii kuung sia thiamtakte ii pumlawng cia lian hi.

⁶Gath ah khatvei ma kisim kikin, tua khua sungah a khut lang khat ah khutme luk veve, a peang langkhat ah peangme luk veve a nei thatang lian khat om hi. Ama sia nidang lai in mihing thatang liante ii suan le paal khat hi.

⁷Tua pa in Israel te thato ahikom David ii suapuipa Shammah ii tapa Jonathan in thatlum hi.

⁸David le a ngalkapte ii a thalup hi mihing thumte sia Gath khua ah a om thatang liante ii suan le paalte ahi uh hi.

Khang Tangthu Khatna 21

David in Mihing Phaza simna Vawt

(2Samuel 24.1-25)

¹Satan in Israel mite tungah ngimna thengsak nuam ahikom ama in David sia mihing phaza sim tu in khensatsak hi.

²David in Joab le a ngalkapmaang dangte tungah, “Israel ngam mong khat pan mong khat dong pai in mihing sim vun. Mihing bangza pha ziam he nuam khi hi,” ci hi.



³Joab in, “Topa in Israel mite tu sangin a see zakhat in pungsak zaw taken! Kumpipa awng, amate theampo nangma naseamte hi. Banghangin na minam theampo maw pu tu in misim na vawt nuam ni ziam?,” ci in zo hi.

⁴Ahihang kumpipa in Joab sia a thu nisak a, tua ahikom Joab sia Israel ngamsung theampo ah pai in tua zawkciang Jerusalem ah heak kik hi.

⁵Ama in David Kumpipa tungah ngalkap seam thei Israel mi 1,100,000 le Judahte 470,000 om hi ci in son hi.

⁶Joab in David Kumpipa ii thupiak lungkim ngawl ahikom Levi le Benjamin minamte mihing phaza sim ngawl hi.

⁷Hi bang, a kivawt Pathian lungkim ngawl ahikom Israel te daan pia hi.

⁸David in Pathian tungah, “Hi bangin ka vawt hu in khialna lian mama khat ka vawt zo hi! Nong hesuakna in hong maisak tan. A mawmawt huai na ka seam zo hi,” ci hi.

⁹Tuaciang Topa in David ii kamsangpa Gad tungah,

¹⁰“Pai tan a, a teal tu in thu nam thum ka piak sia David tungah son tan. A teal bang pawpo vawt tu khi hi,” ci hi.

¹¹Gad sia David kungah pai in Topa ii son a, a sawl teng son a, “Koi sia na teal tu ziam?”

¹²Kum thum sung kial tung tu maw? Ahibuale tha thum sung na ngalte ii ngalkapte mai ah tai tu maw? Ahibuale ni thum sung Topa in a namsau taw nang hong sim tu le a vantung lalangte zanghin Israel ngamsung theampo ah a kilaw thei natna le thina hong tungsak tu maw? Topa tungah na zokikna koi sia son tu khi ziam?” ci in dongh hi.

¹³David in Gad tungah, “Ka ci ka law he ngawl khi hi. Ahihang mihingte ii daan hong piak tu ka nuam bua hi. Kei daan hong pia tu sia Topa ama mama hi taken, banghangziam cile ama ngual hesuak thei pa ahi hi,” ci in zo hi.

¹⁴Tua ahikom Topa in Israel mite tungah a kilaw thei natna tungsakin amate sung pan tul sawmsali thi hi.



¹⁵Topa in Jerusalem susia tu in vantung lalang khat paisak a, ahihang Topa sia a thin kikheal kikin vantung lalang tungah, “Tawlnge in! Pha zo hi!” ci hi. Tuabangin vantung lalang sia Jebus mi Araunah ii ancilna hui ah ding hi.

¹⁶Jerusalem susia tu in a kithoai namsau a toai vantung lalang sia van zanglai a ding David in mu hi. Tuaciang David le Israel lampuite — khau-ip puan silh siatin — a mai leipha dongin kun uh hi.

¹⁷David in, “Pathian awng a khial sia keima ka hi hi. Mihing phaza sim tu thu a pia sia keima ka hi hi. Hi mihingte in bang khialna vawt na ziam?Topa ka Pathian awng, keima le ka innkuanpuite daan hong pia tan a, na mite suaktasak in,” ci in thungen hi.

¹⁸Topa vantung lalang in Gad tungah, Topa atu in Jebus mi Araunah ii ancilna munah, David pai in biaknatau khat asak natu son tu in sawl hi.

¹⁹Gad ii son bangma Topa thupiak ni in David pai hi.

²⁰Ancilna munah Araunah le a tapa lite sia zungtaang cil in a om laitak vantung lalang a mu ciang a tapate tai in buu uh hi.

²¹Araunah in David Kumpipa ama sang zuanin hong pai a mu ciang a ancilna mun nusia in a mai lei a phak dongin David mai ah kun hi.

²²David in ama tungah, “Na ancilna mun hong zuak tan, Topa atu biaknatau khat ka sa nuam hi. Tua ahibuale a ki law thei pulnatna thai ngawl tu hi. A manh sia nong nget za po a cing hong pia tu khi hi,” ci hi.

²³Araunah in, “Kumpipa awng la in, na dei bangpo in zangh in. Biaktau tungah biakpiakna in hal tu, hi sungah khuitalte om hi; thingthu tu in ancilna ah a kidaw suatte om a, biakpiakna tu in zungtaangte om hi. A vekpi in kong pia hi,” ci hi.

²⁴Ahizong kumpipa in, “Hi ngawl hi, Topa biakpiak natu in nangma neisa khat pawpo zangh ngawl tu khi hi, a manh ka piak ngawl khat pawpo hi ngawl tu hi,” ci in zo hi.



- ²⁵Tuaciang ama in Araunah ancilna mun atu in kham dangka zaluk pia hi.
- ²⁶Ama in tua munah Topa atu in biaknatau khat sa in meihal biakpiakna le kipawlkhop biakpiakna pia hi. Topa in a thungetna saang ahikom biaknatau tungah biakpiaknate a kaangsak tu in vantung pan meikuang khiaksuk hi.
- ²⁷Topa in a vantung lalang tungah a namsau sot kikin sawl ahikom vantung lalang in a thu ni hi.
- ²⁸Tua thu David in a mu ciang Topa in ka thungetna hong saang hi ci in tel ahikom ama in Araunah ii ancilna mun biaknatau tungah biakpiakna pia hi.
- ²⁹Moses ii ngam sungah asak Topa ompuina Puanbuk le biakpiaknate a halna biaknataute tua hun lai in Pathian a biakna mun Gibeon ah tu hun zong om lai hi;
- ³⁰ahihang David sia Topa bia tu in tua munah pai thei ngawl hi, banghangziam cile Topa vantung lalang ii namsau a kiita hi.

Khang Tangthu Khatna 22

¹Tuaciang David in, “Hi mun sia Topa Pathian ii Biakinn om natu mun ahi hi. Hi sia in Israel mite ii meihal biakpiakna a piak natu biaknatau hi,” ci hi.

Biakinn Sak tu Kingin kholna

- ²David Kumpipa in Israel ngam sungah a teang ngamdang mite theampo a kikhoptua natu thupia in na seamsak hi. Amate pawlkhat in Biakinnsak natu in suang kingh neite vawtkhol uh hi.
- ³Thikpim le kongkha letnate vawt natu in ama in thik tam mama pia a, taungo tam mama pia ahikom kuama in toaitee zo ngawl hi.
- ⁴Ama in Tyre le Sidon mite sia ama atu in Cedar thingluang tam mama puasak hi.
- ⁵David in, “Ka tapa Solomon ii asak tu Biakinn sia nasia mama tu a, leitung ah a minthang hi tu hi. Ahihang Solomon sia moi lei lai a, bangma thiamna thei ngawl lai ahikom keima in a kismah theampo ka kingin khol kul tu hi,”



ci in ngaisun hi. Tua ahikom David in a thi ma in vanh tam mama taw kinging khol zo hi.

⁶David in a tapa Solomon samin Topa Israel Pathian Biakinn sa tu in thu pia hi.

⁷David in ama tungah, “Ka tapa awng, Topa ka Pathian upat natu in biakinn khat ka sa nuam hi.

⁸Ahihang Topa in, ngal tam mama simin mihing tam mama na that hi, hong ci hi. Tuabang in chi ka luansakte theampo hu in ama atu in biakinn hong sasak ngawl hi.

⁹Ahitazong ama in kamciam khat hong vawtsak hi. Ama in, ‘Tapa khat na nei tu a tua na tapa in kilemna taw ngam uk tu hi; banghangziam cile ama sia a ngalte taw ngal kilemna ka pia tu hi. Ama min sia Solomon hi tu hi; banghangziam cile ama ngam uk hun sung tengin Israel ngam sungah ngammuanna le ngalmuanna ka pia tu hi.

¹⁰Ama in keima atu in biakinn khat sa tu hi. Ama sia ka tapa hi tu a keima sia a pa ka hi tu hi. Ama kumpi khang kingui zui in Israel ngam uk tawntung tu hi,’ ” ci hi.

¹¹David in a kampau zomin, “Tu in ka tapa awng, Topa na Pathian sia nang taw omkhawm taken, ama atu in biakinn khat nasak zawk natu in ama in a kamciam tangtungsak taken.

¹²Israel ngam sia ama thukham bangin na uk theina tu in Topa na Pathian in mu tel theina le ciimna hong pia taken.

¹³Topa ii Israel te atu in Moses tungah a piak thukhamte theampo na zui le zawna nga tu ni hi. Citak in kimuang in a, bangma in patausak heak in.

¹⁴Biakinn taw kisai in ka hanciamna taw Biakinnsakna ah zak tu in kham ton tullu dedek le ngun ton tul sawmli dedek ka khol zo hi. Tua bek dom ngawlin tau le thik a kisim zo ngawl za dongin om hi. Kei zongh in thing le suangte khol zo khi hi, ahizong nangma in belap in.



¹⁵Naseam tam mama nei ni hi. Suangkhuuk ah naseamte, suangciangte, lettama te, khut thiamna tuatum a nei,

¹⁶kham, ngun, tau le thik nasep a thiam tam mama om hi. Tu in nasep kipan in a, Topa in hong ompui taken,” ci hi.

¹⁷David in Solomon hu tu in Israel lampui theampo thu pia hi.

¹⁸Ama in, “Topa na Pathian sia nang taw omkhawm zo a, na kiim na paam theampo ah kilemna hong pia zo hi. Ama in keima sia ih ngamah a teang minam theampo hong zosak siat zo a, tu in amate sia na khutnuai le Topa khutnuai ah om uh hi.

¹⁹Tu in na thinsung theampo le na thaa theampo taw Topa na Pathian na seam in. TopaThukham Thingkuang le ama biakna ah a kizangh vanh thiangtho dangte theampo a sungah na koi thei natu in tua Biakinnsak kipan in,” ci hi.

Khang Tangthu Khatna 23

¹David a huai mama ciang ama in a tapa Solomon sia Israel kumpi suaksak hi.

Levite Nasepna

²David Kumpipa in Israel lampuite theampo le thiampite le Levite theampo kaikhawm hi.

³Ama in Levi mi pasal kum sawmthum le a tungsia theampo mihing phaza simna vawt a, a vekpi in tul sawmthum le tulliat pha hi.

⁴Kumpipa in tulkul le tullu sia Biakinn naseam lampui tu in koi a, tulluk sia thu tepteena laibu keam tu le thukhen tu in koi hi,

⁵tulli te in kongkha cingsak a, a dang tullu te in kumpipa ii Topa pok tu le in a piak tumtheite zanghin Topa pok tu uh hi.

⁶David in Levite sia amate be le phung zui in khen thum in khen a; tuate sia Gershon, Kohath, le Merarite hi.

⁷Gershon in tapa nii nei a; Ladan le Shemeite hi.



- ⁸Ladan in tapa thum nei a; Jahiel, Zetham, le Joelte hi.
- ⁹Amate sia Ladan ii be le phung lampuite hi. (Shemei in tapa thum nei a; Shelomoth, Haziell, le Harante hi.)
- ¹⁰⁻¹¹Shimeil in tapa li nei a; a kum zui in Jahath, Zina, Jeush, le Beriahte hi. Jeush le Beriah in suan le paal tam nei ngawl ahikom amate sia be le phung khat in kisim hi.
- ¹²Kohath in tapa li nei a; Amram, Izhar, Hebron, le Uzzielte hi.
- ¹³A tapa lianbel Amram sia Aaron le Moses ii pa hi. (Aaron le ama suan le paalte sia biakna taw kisai vanh thiangthote a keam tawntung tu, Topa biak ciang paaknamtui hal tu, ama naseam tu le ama min taw mite thupha pia tu in kikoi tuam hi.
- ¹⁴Ahizong Pathian mihing Moses ii tapate sia Levite sungah kihel hi.)
- ¹⁵Moses in tapa nii nei a, Gershom le Eliezerte hi.
- ¹⁶Gershon ii tapate sung pan a lampuipa sia Shebuel hi.
- ¹⁷Eliezer in tapa Rehabiah khat bek nei a, ahizong Rehabiah in suan le paal tam mama nei hi.
- ¹⁸Kohath ii tapa a niina, Izhar in tapa khat Shelomith nei a, be le phung lutang hi.
- ¹⁹Kohath ii tapa thumna, Hebron in tapa li nei a: Jeriah, Amariah, Jahaziel, le Jekameamte hi.
- ²⁰Kohath ii tapa lina, Uzziel in tapa nii nei a, Micah le Isshiahte ahi hi.
- ²¹Merari in tapa nii nei a, Mahli le Mushite hi. Mahli zongh in tapa nii nei a, Eleazar le Kish te hi,
- ²²ahizong Eleazar sia tanu bek nei a, tapa nei ngawlin thi hi. A tanute in a suapui sealte ahi Kish ii tapate tenpui hi.
- ²³Merari ii tapa niina, Mushi in tapa thum nei a; Mahli, Eder, le Jeremoth te hi.



²⁴Hite sia Levi suan le paalte a be le phung le a innkuan in misim a min taw a kiciamtee te hi. Ama suan le paalte kum kul le a tungsia khat tek in Topa Biakinn sungah nasep khat tek nei hi.

²⁵David in, “Israel te ii Topa Pathian in a mite tungah kilemna pia zo hi. Ama mama sia a tawntungin Jerusalem ah teang tu hi.

²⁶Tua ahikom Topa ompuina puanbuk le biakna ah a kizangh vanhte theampo Levi mite in puak kul nawn ngawl hi,” ci hi.

²⁷David ii a khakbel a thupiakna doppha in amate theampo sia kum kul a cin ciang naseam tu in a min kiciamtee hi.

²⁸Amate a nuai a bangin tavuan kisee hi: Aaron ii suan le paal thiampite Biakinn ah Pathian a biak uhciang hu tu, huangsung teng le innkhante keamcing tu, le Biakna taw kisai vanh thiangthote vanh thiangthote ninsak ngawl tu;

²⁹Pathian tungah a kipia anluum, biakpiakna in a kizangh zungtaang vuite, tol kisaw ngawl muhpheangte, a ki em biakpiak nate, olive thau a kihel zungtaang vuite, biakinn ah a kipia vanhte toaikhai tu le teesak tu;

³⁰zingsim nitak simin Topa pok tu le a min thansak tu;

³¹tua zawkciang Topa tungah biakpiaknate Sabbath ni, Thadet Poai le poai dangte ah a kihal simin Topa pok tu le ama min thansak tu ahi hi. Hun khat simin Levite bangza in naseam tu cisia zui tu ngeina kivawt hi. A tawntungin Topa biak tu tavuan sia Levite sep tu in kisee siat hi.

³²Amate sia Topa ompuina Puanbuk le Biakinn cin tu leTopa Biakinn nasepna ah a seam, a mealheakte ahi Aaron suan le paal thiampite hu tu in nasep kipia hi.

Khang Tangthu Khatna 24

Thiampite A kisee siat Nasep

¹Aaron suan le paalte sia hi bangin a pawlin kikhen hi. Aaron in tapa li nei a; Nadab, Abihu, Eleazar, le Ithamar te hi.



²Nadab le Abihu sia a pa thi maa in thi a, suan le paal nei man ngawl ahikom a suapui Eleazar le Ithamar bek thiampi suak hi.

³David Kumpipa in Aaron suan le paalte sia amate nasep taw kizui in a pawlin khi hi. Hi nasep khenna ah ama sia Eleazar ii suan le paal Zadok le Ithamar ii suan le paal Ahimelech in hu hi.

⁴Eleazar ii suan le paalte sia khi sawm le khi luk in kikhin a, Ithamar ii suan le paalte sia khi liat in kikhin hi; hi bangin a khi sia Eleazar ii suan le paalte sung baangkua sim pan pasal tamzaw ahihang hi.

⁵Eleazar le Ithamar ii suan le paalte sungah Biakinn lampui le thaa lamsang lampui om ahikom nasep hawmna sia lai meetang sawk in hawm hi.

⁶Eleazar le Ithamar suan le paalte in khat zawkciang khat lai meetang sawk hi. Tuabangin lai meetang a sawk uh sia Levi mi thuzeakpa Nethanel tapa Shemaiah in laibu sungah ciamtee hi. Kumpipa, a khutnuai uliante, thiampi Zadok, Abiathar tapa Abimelech, thiampi innkuan sim pan ulian bel tek le Levi mi baangkua lampuite sia tetti te vive ahi uh hi.

⁷⁻¹⁸Hi thu sia innkuan kul le li te nasep kipiakna thu ahi hi. 1.Jehoiarib; 2.Jedaiah; 3.Harim; 4.Seorim; 5.Malchijah; 6.Mijamin; 7.Hakkoz; 8.Abijah; 9.Jeshua; 10.Shecaniah; 11.Eliashib; 12.Jakim; 13.Huppah; 14.Jeshebeab; 15.Bilgah; 16.Immer; 17.Hezir; 18.Happizzez; 19. Pethahiah; 20.Jehezkel; 21.Jachin; 22.Gamul; 23.Delaiah; 24.Maaziah te ahi uh hi.

¹⁹Hi mite sia Israel te Topa Pathian ii thupiak bangin a taangpupi Aaron ii ngeina a omsak bangin Biakinn ah naseam tu in a kisee te ahi uh hi.

Levite

²⁰Hite sia Levi suan le paalte ii innkuan lutang dangte hi uh hi: Shebuel tungtawn in Amram ii suan le paal Jehdeiah;

²¹Rehabiah ii suan le paal Isshiah

²²Shelomith tungtawn in Izhar ii suan le paal Jahath;

²³Hebron tapate sung pan a kum haam zui in Jeriah, Amariah, Jehaziel, le Jekameam;



²⁴Micah tungtawn in Uzziel ii suan le paal Shamir;

²⁵Micah suapuipa Isshiah tungtawn in Uzziel suan le paal Zechariah;

²⁶Merari suan le paalte ahi Mahli, Mushi, le Jaaziah te hi uh hi.

²⁷Jaaziah in tapa thum nei a; Shoham, Zaccur le Ibri te ahi uh hi.

²⁸⁻²⁹Mahli in tapa nii Eleazer le Kish nei hi. Eleazer in tapa nei ngawl a; ahihang Kish in tapa khat Jerahmeel nei hi.

³⁰Mushi in tapa thum nei a; Mahli, Eder, le Jeremoth te ahi uh hi. Hite sia Levite ii innkuante hi.

³¹A mealheakte, Aaron suan le paal thiampite ii a vawt bangma in naseam tu a teal ciang innkuan pa bel le a nau pate khat in lai meetang sawk hi. David Kumpipa, Zadok, Ahimelech, le thiampi innkuante le Levite ii pabelte sia a tetti te ahi uh hi.

Khang Tangthu Khatna 25

Biakinn ah Tumthei Thiamte

¹David Kumpipa le Levi lampuite in a nuai a Levi be le phungte sia biakpiakna lampui tu in teal uh a: Asaph, Heman, le Jeduthunte ahi uh hi. Amate sia tengtong le daalkopsai tumna taw thua in Pathian thu taangko tute ahi uh hi. Hite sia amate pawlte ii biakpiakzia te taw lampui tu in a kiteal mihingte tepteena ahi hi:

²Asaph tapa lite: Zaccur, Joseph, Nethaniah, le Asharelah te ahi uh hi. Amate ii lampui sia Asaph hi a, ama sia kumpipa ii thupiak simin Pathian thu a taangko pa hi.

³Jeduthun ii tapa lukte: Gedaliah, Zeri, Jeshaiyah, Shimei, Hashabiah, le Mattithiah te ahi uh hi. A pa lampuina taw amate in tengtong te tum kawmin Pathian thu taangko in pokna le Topatungah lungdamna la sa uh hi.

⁴Heman tapa sawm le lite sia: Bukkiah, Mattaniah, Uzziel, Shebuel; Jerimoth, Hananiah, Hanani, Eliathah, Giddalti, Romanti Ezer, Joshbekashah, Mallothi, Hothir, le Mahazioth te ahi uh hi.



⁵Pathian in kumpipa ii kamsangpa Heman tungah a kamciam sa om bangin Heman vaang a piakna in tapa sawm le li, le tanu thum zongh pia hi.

⁶Biakinn biak kikhopna ah a pa lampui in a tapate theampo in tengtong le daalkopsai te tum uh hi. Asaph, Jeduthun, le Heman te sia kumpipa sawl bangin ngamta uh hi.

⁷Hi pasal kul le lite sia a vekpi in a thiamte ahi uh hi; a nasep pui Levite sia lasak thiam le tumthei thiamte veu hi. A vekpi in pasal 288 pha hi.

⁸Nasep a kisee ciang khangmoi ahizong, khanghaam ahizong, a thiam sate ahizong, a sin tuungte ahizong a vekpi in lai meetang sawk tek hi.

⁹⁻³¹Tua pasal 288 te sia a innkuan zui in mihing sawm le nii tek a pha khen kul le khen li in kikhen a, khen khat ciang lampui khat tek nei hi. A nuai a bangin a pawl a pawlin naseam uh hi. 1) Asaph ii innkuanpui Joseph; 2.Gedaliah; 3.Zaccur; 4.Zeri; 5.Nethaniah; 6.Bukkiah; 7.Asharelah; 8.Jeshaiah; 9.Mattaniah; 10.Shimei; 11.Uzziel; 12.Hashabiah; 13.Shebuel; 14.Mattithiah; 15.Jerimoth; 16.Hananiah; 17.Joshbekashah; 18.Hanani; 19.Mallothi; 20.Eliathah; 21.Hothir; 22.Giddalti 23.Mahazioth; 24.Romanti Ezer te ahi uh hi.

Khang Tangthu Khatna 26

Biakinn Cingte

¹Hite sia Biakinn cing Levite ii nasep hawmna ahi hi. Korah be le phung panin Asaph innkuan ahi Korah tapa Meshelemiah hi.

²Ama in tapa sali nei a, a kum haam zui in: Zechariah, Jediael, Zebadiah, Jathniel,

³Elam, Jehohanan, le Eliehoenai te ahi uh hi.

⁴Tapa liat piakna taw Pathian ii thupha a piak Obed Edom zongh om hi. Tua a tapate sia a kum haam zui in: Shemaiah, Jehozabad, Joah, Sachar, Nethanel,

⁵Ammiel, Issachar, le Peullethai te ahi uh hi.



⁶⁻⁷Obed Edom ii tapa lianbel Shemaiah in tapa luk nei a: Othni, Rephael, Obed, Elzabad, Elihu, le Semachiah te ahi uh hi. Amate sia a thiamna lian a nei uh hu in a be le phung sungah mihing thupite ahi uh hi; a nobelte nii sia thiam tuam seseam hi.

⁸Hi nasepna ah a seam tu in Obed Edom innkuanpuite in thiamna saang nei mihing a vekpi in sawmluk le nii pia hi.

⁹Meshelemiah ii innkuanpuite in thiamna nei mihing sawm le liat pia hi.

¹⁰Merari be le phung panin tapa li nei Hosah om a: Shimri (taciil hi ngawl ahitazong a pa in lampuipi pia hi),

¹¹Hilkiah, Tebaliah, le Zechariah te ahi uh hi. Hosah innkuan sung pan Biakinn cingte sia a vekpi in sawm le thum pha hi.

¹²Levi dangte bangma in Biakinn cingte sia innkuan zui in a pawlin kikhen a, Biakinn nasep kihawmsak hi.

¹³Kongpi koi sia akua in cing tu cisia a innkuan a tam le a tawm ci tuan ngawlin innkuan simin lai meetang sawk hi.

¹⁴Shelemiah in nisuana sang kongcing nga in, a tapa Zechariah, ngual tungah ngaisutna pha a pia tawntung theipa insaksang kongcing nga hi.

¹⁵Obed Edom sia thangsang kongcing kipia a, a tapate sia vanh koina khaante kicingsak hi.

¹⁶Shupim le Hosah sia nitumna kongpi le lam tungnung ah a omsaksang Shallecheth kongpите kicingsak hi. Kong cin tavuan sia a hun a hun in kilaih hi.

¹⁷Nisuana sang kongpi sia nisim in mihing luk in cing a, nitumna sang a sia li in cing in, thangsang a sia li in cing hi. Vanh kholna khaan niite sia nisim mihing li in cing a, khaan khat ciang mihing nii veu in cing hi.

¹⁸Nitumna sang a om vanh koina inn lampi cing mihing li om a, inncing sia mihing nii om hi.

¹⁹Hite sia Korah le Merari be le phungte ii biakinn cing nasepte ahi hi.



A dang Biakinn Nasepte

²⁰A dang a Levi mipuite sia Biakinn sum kholna le Pathian tungah a kipia vanhte koina khaan cingte ahi uh hi.

²¹Gershon tapate khat ahi Ladan sia innkuan tam mama te ii pianna taangpupi hi a, a tapa Jehiel innkuan puite zongh kihel hi.

²²Ladan tapa dangte nii ahi Zetham le Joel sia Biakinn sum kholna le vanh koina innkhan cingte hi.

²³Amram, Izhar, Hebron, le Uzziel ii suan le paalte tung zongh ah nasep kipia hi.

²⁴Moses tapa Gershom be le phung pan Shebuel sia Biakinn sum kholna a cingte lampui lianbelpa hi.

²⁵Eliezer sia Gershom ii suapui ahikom Shebuel sia Shelomith ii mealheak ahi hi. Eliezer sia Rehabiah ii pa, Rehabiah sia Jeshiah ii pa, Jeshiah sia Joram ii pa, Joram sia Zichri ii pa, Zichri sia Shelomith ii pa hi.

²⁶Shelomith le a innkuanpuite sia Pathian tungah David Kumpipa, baangkua pabelte, be le phungte ii lampuite le ngalkapmaangte ii a aap letsongte theampo cingte ahi uh hi.

²⁷Amate in ngalsimna pan a laak vanhte pawlkhat la in Biakinn ah zak tu in aap uh hi.

²⁸Shelomith le a innkuanpuite sia Biakinn sung zak tu in a ki aap vanhte theampo a cingte hi uh a, kamsang Samuel, Saul Kumpipa, Ner tapa Abner, le Zeruah tapa Joab ii a piak letsongte zongh kihel hi.

A dang Levite ii Nasepte

²⁹Izhar ih suan le paalte sung pan Chenaniah le a tate sia zum nasep kipia a; thu tepteena laibute kepcingna le Israel mite thu kinialna te ah thukhensakna ahi hi.

³⁰Hebron ii suan le paalte sung pan Hashahbiah le a bete a minthang mama tul le zasali te sia Jordan ngun pan nitumna sang Israel ngamah biakna thu



theampo le mihonpite ii nuntak luheakna ki ukna vaihawm nasep a seamte ahi uh hi.

³¹Jeriah sia Hebron suan le paalte lampuipa hi. David ii kumpi a sep zawk a kum sawmli kum in Hebron ii suan le paal innkuante thu a kikat ciang hi innkuan sung pan ngalkap min dok tuam pawlkhat Gilead ngamkhen Jazer khua ah a ten sia kihe hi.

³²David Kumpipa in Jeriah mealheakte sung pan be lutang a min dok bel mihing tulnii le zasali teal a Reuben ngamkhen, Gad ngam le nisuana sang Manasseh ngamkhen sung Jordan ngun nisuana sang Israel ngam ah biakna sang thu le mihonpite nuntak luheak ki ukna nasepte theampo uksak hi.

Khang Tangthu Khatna 27

Ngalkapte le Mihonpite Kipawl Nasepna

¹Hisia in, kumpi ngam atu nasepna a uk Israel baangkua lutangte le be le phung lampuite, le ngam sung a, vaihawm uliante tepteena hi. Kumkhat sungah thasim in pawl tuatuam kilaih in nasep nei a, pawlkhat ah mihing tulkul le tulli tek in tha khat sung lampuite ii khutnuai ah seam uh hi.

²⁻¹⁵A nuai a te sia thasim atu ngalkap lampuite veu ahi uh hi. Tha khatna ah: Zabdiel ii tapa Jashobeam. (Ama sia Judah minam, Perez be le phung sung pan hi.) Tha niina ah: Ahohi ii suan le paal sung pan Dodai. (Ama a hu pa sia Mikloth hi.) Tha thumna ah: Thiampi Jehoiada ii tapa Benaiah hi a, ama sia “Sawmthumte” ii lampuipa hi. (A tapa Amizzabad in ama za laih hi.) Tha lina ah: Joab ii suapuipa Asahel. (A tapa Zebadiah in ama za laih hi.) Tha ngana ah: Izhar ii suan le paal sung pan Shamhuth. Tha lukna ah: Tekoa pan Ikkesh ii tapa Ira. Tha salina ah: Pelon pan Ephraim mi Helez. Tha liatna ah: Hushah pan Sibbecai. (Ama sia Judah minam Zerah be le phungte hi.) Tha kuana ah: Benjamin minamte ii ukna ngamkhen Anathoth pan Abiezer. Tha sawmna ah: Netophah pan Maharai. (Ama sia Zerah be le phungte hi.) Tha sawm le tha khatna ah: Ephraim minam ii ukna ngamkhen Pirathon pan Benaiah. Tha sawm le tha niina ah: Netophah pan Heldai. (Ama sia Othniel ii suan le paal hi.)



Israel Minamte Ki ukzia

16-22 A nuai a te sia Israel minamte a ukte ahi hi.

Minam	A ukpa
Reuben	Zichri ii tapa Eliezer
Simeon	Maacah ii tapa Shephatiah
Levi	Kemuel ii tapa Hashabiah
Aaron	Zadok
Judah	Kumpi David suapui ahi Elihu
Issachar	Michael ii tapa Omri
Zebulun	Obadiah ii tapa Ishmaiah
Naphtali	Azriel ii tapa Jeremoth
Ephraim	Azaziah ii tapa Hoshea
Nitumna	Manasseh Pedaiah ii tapa Joel
Nisuana	Manasseh Zechariah ii tapa Iddo
Benjamin	Abner ii tapa Jaasiel
Dan	Jeroham ii tapa Azarel

23 Topa ii Israel mite sia van ah aksi za in ka pungsak tu hi ci in kamciam bangin David Kumpipa in Israel mi kum kul nuaisia te sia mihing simna vawt ngawl hi.

24 Zeruah ii tapa Joab in mihing simna vawt kipan ahihang man zo ngawl hi. Hi mihing simna a vawt hangin Pathian in Israel te daan pia ahikom mihing pha za tatak sia David Kumpipa ii thu tepteena laibu sungah kiciamtee ngei ngawl hi.

Kumpi Neisa A ukte

25-31 A nuai a te sia kumpi neisa a ukte hi a: Kumpi neisa vanh koina innkhan: Adiel ii tapa Azmaveth Ngamsung vanh koina innkhante: Uziah ii tapa Jonathan Lo nasepte: Chelub ii tapa Ezri Sapithuan nasepte: Ramah pan Shimei Zu koinate: Shepham pan Zabdi Olive le sycamore kungte (Nitumna sang mualpeang ah): Gerder pan Baal Hanan Olive thau kholna: Joash Sharon zaangtam ah khuite: Sharon pan Shitrai Kuamte sungah khuite: Adlai ii tapa



Shaphat Kalaoh te: Ishmael mi Obil Laate: Meronoth pan Jehdeiah Tuu le kealte: Hagrit mi Jaziz

David tungah Ngaisutna A plate

³²David Kumpipa ii pano Jonathan sia pilna saang nei khat hi a, ngaisutna pha a pia pa ahi hi. Jonathan le Hachmoni ii tapa Jehiel sia kumpipa tapate pilna sinna ah a ukte ahi uh hi.

³³Ahithophel sia kumpipa tungah ngaisutna a piapa hi a, Arch mi Hushai sia kumpipa ii lawmpha le thudokpa hi.

³⁴Ahithophel thi zawkciang Abiathar le Benaiah ii tapa Jehoiada in kumpipa tungah ngaisutna pia uh hi. Joab sia kumpi ngalkap ukpa hi.

Khang Tangthu Khatna 28

Biakinn atu David ii Hilna

¹David Kumpipa in Israel ngamsung ulian theampo Jerusalem ah a kikhop natu in thupia hi. Tua ahikom minam sim ii uliante, Israel ngamsung nasep ukte, be le phung lampuite, kumpipa le a tapate ii neisa vanhte le ngannote a cing a keamte — kumpi inn ah uliante, ngalkapmaangte le mihing thupi theampo — Jerusalem ah kikhawm uh hi.

²David Kumpipa sia amate mai ah dingin, amate tungah, “Ka ngam mite awng hong ngai tavun. Thukham Thingkuang a tawntung koi natu le Topa ih Pathian om natu in inn khat sa nuam khi hi. Pathian zatakna in biakinn khat sa tu ka kinging zo hi,

³ahizong keima in ngalkap khat hi a, chisan tam mama ka luansak hu in Topa in tua biakinn kasak tu hong khaam hi.

⁴Topa Israel te Pathian in Israel ngam uk tawntung tu in keima le ka suan ka paalte hong teal hi. Ama in a lampui tu in Judah minamte teal a, Judah minam sung pan ka pa innkuan puite teal hi. Ka pa innkuan puite theampo sung pan Israel ngam theampo a uk tu in Topa in keima kumpi in ama diksak bangin hong teal hi.



⁵Ama in tapa tam mama hong pia a tuate theampo sung pan Topa ii ngam Israel uk tu in Solomon teal hi.

⁶“Topa in ka tungah, ‘Ka Biakinn a sa tu pa sia na tapa Solomon ahi hi. Ama sia ka ta tu in ka teal zo a, keima sia a pa ka hi tu hi.

⁷Ka thukham le ka thupiakte theampo tu a, a zui bangin kidopna taw a zui zom le a ngamukna sia a tawntungin ka khomsuan sak tu hi,’ hong ci hi.

⁸“Tua ahikom tu in ka mite awng, hi ngampha sia na lua tawntung thei natu le na suan le na paalte in khang khat zawk khang khat a lua suak thei natu in, Topa ih Pathian ii thupiakte pha takin na zui natu in Topa mai le Topa ii mihing Israel mite theampo kikhopna ah thu kong pia hi,” ci hi.

⁹Tua zawkciang David in Solomon tungah, “Ka tapa awng, na pa ii Pathian sia he in a, na thinsung theampo le uuk tatakna taw ama na seam in. Ama in ih thinsung tawng le ih ngaisutna theampo he siat hi. Ama kung na zuan le ama in nang hong saang tu a; na taisan le a tawntungin nang hong nungngat tu hi.

¹⁰Topa in ama Biakinn thiangtho sa tu in nang hong teal zo hi ci sia tel in. Tua nasep sia tu in kipan in a, citakna taw seam in,” ci hi.

¹¹David in Solomon tungah Biakinn ngealna lim, vanh koina khaan ngealna lim, innkhan tuatuamte ngealna lim le mawmaisakna khaan a kici Mun Thiangthobel khaan ii ngealna limte pia hi.

¹²Ama in a thin sungah a ngiimna sate theampo ahi leitual le a kiimkot ah om innkhante, Biakinn vanh le Topa tungah a kipia letsongte koina innkhante ii ngealna limte zongh pia hi.

¹³Tua bek dom ngawlin David in thiampite le Levite nasep hawmnate le Biakinn ah a nasep tute le Biakinn vanh uum le bealte theampo cingte ii nasep tute theampo atu ngealna lim zongh pia hi.

¹⁴Ama in um le bealte vawt natu in ngun le kham bang za zangh tu,

¹⁵meidet natu khat le mei detna khuam khat atu,



¹⁶ngun sabuaite le Pathian atu in a kipia anluumte koina kham sabuai khat ciang ngun le kham bangza zak kul tu cisia thu pia hi.

¹⁷Tua bek dom ngawlin ama in thikkeaute, kuang le thawl ngong neite atu kham ciitak bangza kizangh tu, pakan vawt natu in ngun le kham bangza kizangh tu,

¹⁸ngimnamtui halna biaknatau le Topa Thukham Thingkuang tungah a thate phal in a om Cherubimte a ngakna leangte vawt natu in kham ciitak bangza kizangh tu cisia thu pia hi.

¹⁹David Kumpipa in, “Hite theampo siaTopa ama mama in ka tungah vawt tu a hong sawl bangma in a ki at sa ngiimna sungah om hi,” ci hi.

²⁰David Kumpipa in a tapa Solomon tungah, “Kimuang in a thin takkha in. Nasep kipan in a, bangma in khaktansak heak in. Ka biakTopa Pathian sia nang taw hong om tu hi. Ama in nang hong nusia ngawl tu a, ama Biakinn ah nasepte na man dong nang taw om tu hi.

²¹Thiampite le Levi mite sia Biakinn sungah a nasep tute kihawm sak zo hi. Khut thiamna tuatuam nei naseamte sia nangma hu tu in thalawp a, mite theampo le a lampuite sia nangma sawl babang seam tu in a kinging sa in om uh hi,” ci hi.

Khang Tangthu Khatna 29

Biakinn Sak natu A kipia Letsongte

¹David Kumpipa in a kikhawmte theampo tungah, “Ka tapa Solomon sia Pathian teal sa hi, ahihang ama sia khangmoi lai a, a heakna tawm lai hi. A nasep tusia mihing omna kumpi inn hi ngawl a, Topa Pathian om natu Biakinn sa tu ahikom nasia mama hi.

²Ka hi zawkza in Biakinnsak natu vanhte — kham, ngun, tau, thik, thing, suangmanpha le suangkaang, a hoisakna suangnam tuatuam le marble te ka khol siat zo hi.

³Hi ka khol sa vanhte bek dom ngawlin Pathian Biakinn atu ka deisak manin keima aituam kham le ngun tam mama zongh ka pia hi.



- ⁴Biakinn pangte zep natu in kham phabel ton 115 le ngun ciitak ton 265 le
- ⁵khut thiamte ii vawt tu nate theampo atu ka pia zo hi. Tu in akua in Topa tungah deisakna taw pia lai tu nu ziam?” ci hi.
- ⁶Tuaciang be le phung lutangte, minam uliante, ngalkap lampuite le kumpi neisa vanh cingte a ukte in,
- ⁷Biakinnsak natu in a nuai ah vanhte kham ton 190, ngun ton 380, tau ton 675, le thik ton 3,750 pia uh hi.
- ⁸Suangmanpha neite in Biakinn sum kholna Gershon be le phung Levi minam Jehiel ii a uk Biakinn vanh kholna ah pia tek uh hi.
- ⁹Mihonpite in lawpna taw tazata a tam vanh Topa tungah lungkim takin a piak thei sia lungdam uh hi. David Kumpipa zongh a lungdam peuma hi.

David in Pathian Pok

- ¹⁰David Kumpipa in mihon mai ah Topa pok hi. Ama in, “Ka taangpupi Jacob ii Topa Pathian awng, a tawntung a tawntungin nang kipok taken!
- ¹¹Nang sia a vaanglian, a minthang, a patak huai le a tuanngen na hi hi. Leitung vantung ah a om theampo nangma aa hi a, nangma sia Leitung vantung a ukpa na hi hi.
- ¹²Hauna le maanna theampo nangma kung pan hong pai hi a; na vaangletna le na thahatna taw na theampo na uk a; vaangletna le thahatna sia a kuama po tungah na pia thei hi.
- ¹³Tu in ka Pathian awng ka lungdamnate kong ko uh a na minthang kong pok uh hi.
- ¹⁴“Ahitazong kei le ka mite in a tatakin bangma kong pia thei bua uh hi; banghangziam cile na theampo nangma ii nong piak hi a, nangma tengma kong pia kik bek uh hi.
- ¹⁵Topa awng, nong heak hi a, ka taangpupite uh bangma in nuntakna lampi ah saltangte le khualmite bangin a vakthapte ka hi uh hi. Ka nuntakna uh sia Leitung ah nilim bang hi a, thina pan ka suakta thei bua uh hi.



¹⁶Topa kote Pathian awng, na min thiangtho pok natu Biakinn khatsak natu in hi vanhte theampo ka khol siat zo uh hi; ahihang tuate theampo sia nangma kung pan hong paite veu hi a, a vekpi in nangma aa ahi hi.

¹⁷Khat tek ii thin sung na ze et a, thumaan thutang a neite tungah nang na lungdam hi ci sia ka he hi. Thumaan thutak le thinsung takpi taw hi vanhte theampo kong pia zo hi, tuaciang hi munah hong kikhawm na mite in nang kungah biakpiakna hong paipui sia bangza in lungdam ziam ci sia ka mu zo hi.

¹⁸Ka taangpupite uh ahi Abraham, Isaac, le Jacob ii Topa Pathian awng, tuabang thinsung sia nangma mite thin sungah khosak in a nangma atu in a muanhuaite ahi thei natu in keamcing tawntung in.

¹⁹Na thupiakte a vekpi in a zui zawk natu le asak tu a, hi bangin ka kingin khol biakinn sia asak natu in ka tapa Solomon thin le lung sungah uuk takpina hong piaksak tan,” ci hi.

²⁰Tuaciang David in mihonpite tungah: “Topa na Pathian pok vun!” ci in thupia hi. Mihonpite in Topa a taangpupite Pathian pok uh a, amate a lu uh kun in Topa zatakna pia uh a kumpipa zongh upatna pia uh hi.

²¹A zing ciang amate in biakpiakna in a ngannote ngo in Topatungah aap a, tua zawkciang, a neak tu in mihingte tungah pia uh hi. Tua dom ngawlin amate in khuital tulkhat, tuutal tulkhat le, tuuno tulkhat te sia biaknatau tungah meihal biakpiakna in pia uh hi. Amate in zu biakpiakna in paipui uh hi.

²²Tua ni in amate sia Topamai ah anne tuidawn in lungdam ngualnuam in om uh hi. Amate in Solomon sia kumpi in a nii veina thangsak uh hi. Topamin taw amate in Solomon sia amate a uk tu in sathau noai a, Zadok sia thiampi seamsak uh hi.

²³Tuabangin Topa ii a kipsak kumpi tokhum tungah a pa David taangin Solomon to hi. Ama in a cialcing kumpipa khat hi a, Israel mite theampo in a thu ni uh hi.



²⁴Uliante theampo le ngalkapte le David ii tapa dangte theampo ngangawn in Solomon Kumpipa tungah kong thumaan tu uh ci in kamciam pia uh hi.

²⁵Solomon sia a ngam buppi in kiita a, Israel a uk kumpi theampo sung pan Topa in a min thangbel kumpi suaksak hi.

David ii Ngam ukna A tom

²⁶Jesse tapa David in Israel ngam buppi sia,

²⁷kum sawmli sung uk hi. Ama in Hebron khua pan kum sali sung uk a, Jerusalem khua pan kum sawmthum le kum thum sung uk hi.

²⁸Ama sia sumhau le ngual ii zatak mama hi a, a khan haam mama zawkciang thi a, a tapa Solomon in a kumpiza lua hi.

²⁹David Kumpipa ii tangthu sia a kipat pan a tawpna dong in kamsang thumte ahi, Samuel, Nathan, le Gad ii tangthu khumnate sungah kikhum hi.

³⁰A ngam ukzia, vaang a neizia, ama tungah a piang thu le la theampo le Israel le a kiim a paam ngamte tungah a piang thute theampo sia tua tepteena laibu sungah cing takin ki at hi.



Khang Tangthu Niina

Khang Tangthu Niina 1

Solomon Kumpipa in Ciimna Ngen

(1Kumpite 3.1-15)

¹David Kumpipa ii tapa Solomon in Israel kumpi ngam a kho takin uk a, Topa a Pathian in thupha pia in a vaang liansak mama hi.

²Solomon Kumpipa in a ngalkap tulkhat a uk le zakhat a uk ngalkapmaangte theampo, kumpi naseam ulian theampo, baangkua lutang te theampo le a taanglai mihonpите tungah,

³Gibeon khua biakna munah ama taw a pai khop natu thupia hi. Amate tua munah a pai uh hi, banghangziam cile tua mun sia Topa ii naseampa Moses ii dui sungah a vawt Topa ompuina puanbuk a kikoina mun hi.

⁴(Thukham Thingkuang sia ahile David Kumpipa ii Kiriath Jearim pan a laak lai in, Jerusalem khua ah asak Puanbuk sungah kikoi hi.)

⁵Hur ii tupa, Uri ii tapa Bezalel ii tau taw a vawt biaknatau sia zongh Gibeon khua Topa ompuina Puanbuk mai ah om hi. Tua munah Solomon Kumpipa le mipite theampo in Topa bia uh hi.

⁶Puanbuk mai tau taw kivawt biaknatau tungah Solomon in Topa bia a; nganno tulkhat ngosakin biaknatau tungah haltum hi.

⁷Tua zan in Solomon tungah Pathian kilangh a, “Bang hong pia leng na uuk ziam?” ci in dongh hi.

⁸Solomon in, “Ka pa David tungah itna lian mama na lak a, tuaciang tu in kei sia a kumpi za nong luasak zo hi.

⁹Topa Pathian awng, ka pa tungah na kamciamte hong tangtungsak tan. A kisim zo ngawl za dongin a tam mihingte tungah kumpi nong seamsak hi,

¹⁰tua ahikom amate ka uk thei natu in ka kisap ciimna le heak theina hong pia tan. Tua hi bathong le, hi za a tam na mihonte koibang uk zo thong tu khi ziam?” ci in zo hi.



¹¹Topa in Solomon tungah, “Thumaan na teal zo hi. Hauna, sum le paai, minthanna, na ngalte thi natu, nangma khansau natu, hong ngen ngawlin, ka mite uk tu in kumpi in kong teal zo a, tua ka ka mite na uk thei natu in ciimna le heak theina nong ngen zaw hi.

¹²Keima in ciimna le heak theina nang kong pia tu hi. Tua bek dom ngawlin kumpi khat pawpo zongh ii a nei ngawl ahibuale a nei ngei nawn ngawl tu hauna, sum le paai le minthanna a tamzaw kong pia tu hi,” ci in zo hi.

Solomon Kumpipa ii Vaangletna le Hauna

(1Kumpite 10.26-29)

¹³Tuaciang Solomon in Topa ompuina puanbuk omna ahi Gibeon khua biakpiakna mun nusia in Jerusalem ah cia kik hi. Tua mun panin ama in Israel ngam uk hi.

¹⁴Ama in ngalsim natu in ngalleang tul le zali, siphu ngalkap tulsawm le tulnii khawmtua hi. Tuata pawl khat sia Jerusalem ah koi in, pawlkhat sia khuapi dang tuatuamte ah koi hi.

¹⁵Ama uk sungin Jerusalem ah suang za in ngun le kham tam a, Judah ngam mualpeang ah a om theikung thawthong za in cedar thingkung tam hi.

¹⁶Kumpipa atu vanh leite in Musri le Cilicia pan siphu hong kizuakte vai kizeaksak a,

¹⁷Egypt pan ngalleang a kilei te zeak uh hi. Amate in Hit te le Syria kumpite tungah siphu le ngalleang zuak uh a, ngalleang khat ciang nguntang dangka 600 le siphu khat ciang nguntang dangka 150 taw veu in zuak uh hi.

Khang Tangthu Niina 2

Biakinn Sak tu Kinginna

(1Kumpite 5.1-18)

¹Solomon kumpipa in Topa biak natu biakinn khat le ama ten natu kumpi inn khatsak tu in khensat hi.

²Ama in vanhte pua tu in mihing 70,000 le mualtung ngamah suang attan tu in mihing 80,000 see hi. Nasepna a uk tu in a dang mihing 3,600 see hi.



³Solomon in Tyre kumpipa Hiram tungah a vaithakna panin; “Ka kumpi innsak natu in ka pa David Kumpipa tungah cedar thingluangte na zuak bangma in kei zongh hong zuak tan.

⁴Topa ka Pathian ka upat natu in biakinn khat ka sa hi. Tua mun sia mun thiangtho hi tu a, keima le ka mite in zingsim nitak sim, Sabbath ni, Thadet poaite le a dang ni thiangtho nite ah Topa ih Pathian upatna in meihal biakpiakna mun hi tu a, tatsat ngawlin ama tungah anluum thiangtho piakna mun le hel namtuite pan a kinga ngimnamtui tuatuate halna mun hi tu hi. Hi bang biakpiakna a tawntung vawt tu in Topa in Israel tungah thu pia zo hi.

⁵Ih Pathian sia pathian dangte sangin lianzaw ahikomin a lian mama biakinn khatsak tu ka sawm hi.

⁶Ahizong a zai mama vantung sung ngangawn in ama tasak zo ngawl ahikom kuama in Pathian om natu biakinn sa zo tatak ngawl hi. Tuasia ci leang Pathian tungah ngimnamtui hal natu mun ci sim ngawl keima in bangbangin Biakinn khat sa thei tu khi ziam?

⁷Tu in khetlet lim ngelh thiamna nei a, kham, ngun, taungo le thik vawt thiamin vancii meal, a sannum le a san puante a khui thiam pasal khat hong puak tan. Ama in Judah le Jerusalem ah ka pa David ii teal sa khut thiamna nei te taw seam khawm tu hi.

⁸Na mite thing nasep a thiamzia ka he hi, tua ahikom Lebanon panin cedar thing, cypress thing le juniper thingluangte hong puak tan. Na mihingte a hu tu in ka mihingte hong puak tu in kinging zo khi hi,

⁹amate in thing tam mama kinging khol tu uh hi, banghangziam cilesak tu a ka tup biakinn sia lian tu a, hoi mama tu hi.

¹⁰Na thing atte neak tu in zungtaang seau 100,000, mangtaang seau 100,000, zu gallon 110,000, le olive thau gallon 110,000 kong puak tu hi,” ci hi

¹¹Hiram Kumpipa in Solomon tungah lai thuk kik hi. A lai sungah, “Topa in a mite a it hu in nangma sia amate kumpi hong suaksak zo hi.



¹²Lei le van a bitphua Israel te Topa Pathian sia pok vun. Tu inTopa atu biakinn khat le ama a tu kumpi inn khat sak a sawm heaktheina le thiamna taw a kidim tapa ciim khat David Kumpipa tungah ama in pia zo hi.

¹³Huram kici a ciim mama le khutthiam mama khat kong puak hi.

¹⁴A nu sia Dan minam hi a, a pa sia Tyre khua mi ahi hi. Ama in kham, ngun, tau, thik, suang le thingte bang piangsak tu ci theampo he siat hi. Ama in vancii, a sannum, a san le puankaang neal taw zong nasep zia thiam hi. A ma in khetlet zepna nam tuatuam vawt thei a, ama tungah a kipia ngealkhol lim bangin seam thei hi. Na khutthiamte le na pa David Kumpipa naseamte taw seamkhawmsak in.

¹⁵Tua hi a, kong puak tu ci in nong kamciam sa zungtaang, mangtaang, zu le olive thaute tu in hong puak tan.

¹⁶Lebanon mual tungah na kisap za cedar thing ih phuk tu a, khittua in phong vawt a, Joppa ciang tuipi tungah kong taaisak tu uh hi. Tua mun pan nangma in Jerusalem ah na nawn thei tu hi,” ci in at hi.

Biakinn Sak Kipan
(1Kumpite 6.1-38)

¹⁷A pa David ii mihing simna a vawt bangin Solomon Kumpipa in Israel ngam sungah a teang ngamdang mite theampo mihing simna vawt hi. Ngamdang mi a vekpi 153,600 teang hi.

¹⁸Ama in tuate sung pan 70,000 sia vanh nawn tu, 80,000 sia mual tungah suang at tu le 3,600 te sia naseamte uk tu in see siat hi.

Khang Tangthu Niina 3

¹Solomon ii pa David Kumpipa in Biakinn mun tu khat kinging khol zo hi. Tua mun sia Jerusalem khua sung Moriah mualbawk tung Jebus minam Araunah ii ancilna mun hi. Solomon Kumpipa ii innsak tu a kipat sia

²ama ii kumpi a sep zawk a kum li kum tha nii tha sung ahi hi.

³Solomon Kumpipa iisak Biakinn sia pi 90 sau a pi 30 zai hi.



⁴Biakinn tumna mailim sia Biakinn zaina taw kikim a, pi 30 zai in pi 180 saang hi. A khaan sungsang sia kham ciitak taw kizut hi.

⁵A khaanpi sia cedar thing taw kidal a, kham ciitak taw tuamin palm thingkung le kual kipee limte kisuai hi.

⁶Kumpipa in Biakinn sia a pha mama suangmanpha le Parvaim ngam pan a kilei kham taw zeam hi.

⁷Ama in Biakinn pangte, zawlsaute, tumna lampi le kongkhate sia kham taw tuam hi. A pang tungah limngel te in cherubim limte ngelh hi.

⁸A sungsang khaan, Mun Thiangthobel a kicina sia pi 30 sau in, pi 30 zai a, biakinn zaina za ma hi. Mun Thiangthobel pangte tuamna in kham ton 25 kizangh hi;

⁹kham thikpim vawtna in kham ounce kul kizangh a, inntung khaan pangte zongh kham taw kituam hi.

¹⁰Kumpipa in a naseamte Cherubim lim niite thik taw vawtsak a, kham taw tuamsak a, Thiangthobel Mun ah koisak hi.

¹¹⁻¹³Tua mun ah Cherubim lim niite sia kongkha sang nga in a kitangin kikoi hi. Tuate in tha nii veve nei a, a thate khat sia pi 7 le a lang veu sau a, a thate kiphah a, a khaan laizang ah kisitua in a tha lang khat veve sia pang taw ki thutha hi, tuabangin a khaan zaina pi 30 sia a tha in pha siat hi.

¹⁴A Thiangthobel Mun atu in puankaang neal le a dang taw puankhai khat kivawt a, vancii, a sannum le a san taw kinim in, a tung sia cherubim lim taw kizeam hi.

Tau Khuam Nii

(1Kumpite 7.15-22)

¹⁵Kumpipa in pi 52 veu a saang khuam nii vawtsak a, Biakinn mai ah phut hi. Khuam khat in pi 7 le lang a saang lubaw khat veu nei hi.

¹⁶Khuamte ii dawn sia thik kipheak le tau taw kivawt talee nga lim zakhat taw kizeam hi.



¹⁷Tua khuamte nii sia Biakinn tumna mun ah kiphut hi. Thangsang khuam sia Jachin kici a, saksang khuam sia Boaz kici hi.

Khang Tangthu Niina 4

Biakinn atu Vanh zakte

(1Kumpite 7.23-51)

¹Solomon Kumpipa in pi 30 a sau, pi 30 a zai, pi 15 a saang biaknatau khat tau taw vawtsak hi.

²Ama in pi 7 le lang a thuk, a kuangmai pi 15 a sau, a kiimkot pi 45 a pha, a beam tau tuikuang khat zongh vawt hi.

³Tuikuang puasang kiimkot a tung le a nuai ngual nii in khen a, zeam hi. A zepnate sia khuita lim hi a, tuikuang taw sa khat in a kisung ahi hi.

⁴Tua tuikuang sia a puasang a nga, tau taw a kivawt khuita sawm le nii te tungah kinga a, tua khuita in thum veu thum veu in nisuana, nitumna, saksang, thangsang nga uh hi.

⁵Tuikuang sia letmat thum saa hi. A ngong sia haingong taw kibang a, paakpalh taw kibangin a puasang ah deal hi. Tuikuang sungah tui gallon 15,000 ta hi.

⁶Amate in kuangno sawm zongh vawtin nga sia Biakinn thangsang ah koi in, Biakinnsak sangah a dang nga teng koi hi. Kuangno sungah tuite sia meihal biakpiakna in a kipia sabakte silna in zangh uh hi. Kuangpui sungah tui sia thiampite in kisilna in zangh uh hi.

⁷⁻⁸Amate in a vawt ngei bangin kham meidetna khuam sawm le sabuai sawm vawtin Biakinn ii a lai khan sungah koi a, khat sangah meidetna khuam nga le sabuai nga, a dang khat sangah meidetna khuam nga le sabuai nga koi uh hi. Kham kuangno zakhat zongh vawt uh hi.

⁹Amate in thiampite atu in a sungsang leitua vawt a, a puasang leitua khat zongh vawt hi. A sung le a pua kilaklaw ah kongkhate sia tau taw tuam uh hi.

¹⁰Tuikuangpi sia Biakinn ii nisuana thangsang kingh ah kikoi hi.



11-16Huram in bealte, kawpiate le ankuangte zongh vawt hi. Ama in Biakinn atu vawt tu a, Solomon Kumpipa tungah a kamciam sa vanh theampo vawt siat a: Khuam niite Khuamdawn ah kuangno taw a kibang khuam lu sitna nii, Khuam lubawk sim ii tungah a kipheak thikkualte pawl, Khuam lubawk kiimkot ngual nii a, a kingual tau taw kivawt talee nga zali te, Khuileang sawm, Kuangno sawm, Tuikuangpi Tuikuang ngakna in khuita sawm le nii, Bealte, kawpiate le thikkeaukaate ahi hi. Khut thiamna nei pipa Huram in hi vanhte theampo sia Solomon Kumpipa thupiak bangin Topa Biakinn sungah zak tu in a kinawt sitset tau taw in vawt hi.

17Kumpipa in hi vanhte theampo sia Jordan kuam, Sukkoth le Zeredah kilaklaw tau seakna mun ah vawtsak hi.

18A vawtsa vanhte tam mama ahikom tau a kizangh theampo kuama in toai tee zo ngawl hi.

19Solomon kumpipa in Biakinn sung zak tu vanhte sia a cingin kham taw vawt hi: Biakinn ngealkhol sa lim bangin biaknatau, Topaatu anluum koina sabuaite,

20meidetna khuamte le Mun Thiangthobel mai ah det tu kham ciitak taw a kivawt meiinnte;

21Biakinn zepna paakte, meiinnte, taitee te,

22meiinn taitee te, pakante, ngimnamtui halna pakante le meikam koina pakante ahi hi. A vekpi in kham ciitak taw vawt hi. Biakinn puasang kongkhate le Mun Thiangthobel tumna kongkhate sia kham taw veu kituam hi.

Khang Tangthu Niina 5

1Solomon Kumpipa in Biakinn sak nasep a man siat zawkciangin a pa David ii Pathian tungah a piak vanhte ahi — ngun, kham le a dang vanhte theampo Biakinn vanh koina innkhante sungah koi hi.

Thukham Thingkuang sia Biakinn ah Kipua

(1Kumpite 8.1-9)



²Tuaciang Solomon Kumpipa in Israel te a minam le, be le phung lampuite theampo sia David Khuapi Zion panin Topa Thukham Thingkuang la tu le Biakinn ah paipui tu in Jerusalem ah khawmtua hi.

³Amate a vekpi in Buk Poai vawt hunin kikhawm uh hi.

⁴A lampui theampo a cin zawk ciangin Levi mite in Thukham Thingkuang zawngin,

⁵Biakinn ah paipui uh hi. Thiampite le Levi mite zongh in Topa ompuina puanbuk le a sung vanh theampo sia Biakinn ah tua siat uh hi.

⁶Solomon Kumpipa le Israel mite sia Thukham Thingkuang mai ah kikhawm in a kisim zo ngawl za dongin a tam tuu le khui taw biakpiakna nei uh hi.

⁷Tuaciang Thiampite in Topa Thukham Thingkuang sia zawngin Biakinn sungah a tumpui zawkciang Mun Thiangthobelna Cherubim thate ii nuai ah koi uh hi.

⁸Cherubim tha a kiphalte ni in Thukham Thingkuang le a zawna molte liap hi.

⁹A zawna molte ii mongte sia Mun Thiangthobel mai santak ah a ding khat pawpo in mu thei a, ahihang mundang pan kimu thei ngawl hi. (Tua molte tuni dongin om lai hi.)

¹⁰Thukham Thingkuang sungah, Israel mite Egypt ngam pan hong cia in Topa taw kiciamna a vawt lai a, Moses ii Sinai mual ah Thukham Thingkuang sungah a koi suangpheakte nii sim ngawl bangma dang om ngawl hi.

Topa Minthanna

¹¹⁻¹⁴Thiampite a om theampo sia akua pawl akua pawl ci om tuan ngawlin amate le amate kithiansua tek uh hi. Tua zawkciang Levi mi tumthei thiamte theampo — Asaph, Heman le Jeduthun le amate ii be le phungte in — puankaang neal silh uh hi. Levi mite sia biaknatau ii nisuana sangah daalkopsai le tengtongte taw ding uh a, amate taw thiampite 120 sia lemle tumin om uh hi. La sate in a aw kihualin, lemle daalkopsai le a dang



tumtheite taw la sa in Topa pok uh a: “Topa pok vun, banghangziam cile ama pha hi. Hong itna sia kip tawntung hi,” ci uh hi. Thiampite ii Biakinn a nusiati po ciang Biakinn sung sia Topaompuna a taang ziazua meei taw thakhat in kidim a, amate in biakpiakna zom thei nawn ngawl hi.

Khang Tangthu Niina 6

Mipite tungah Solomon Thusonna

(1Kumpite 8.12-21)

- ¹Tuaciang Solomon Kumpipa thungen a, “Topa awng meei sung le khuazing sungah ten tu na teal hi.
- ²A tawntung na ten natu mun ahi a tuanngen Biakinn khat, tu in kong saksak zo hi,” ci hi.
- ³Tua mun ah Israel mipite theampo ding uh hi. Kumpipa in amate sang maingatin amate atu Pathian thupha ngetsak hi.
- ⁴Ama in, “Topa Israel te Pathian Topa pok vun! Ama in ka pa David tungah a kamciam tangtungsak hi, ka pa tungah,
- ⁵Egypt pan Israel ka mite ka pusua pui hun pan kipan tuni dong Israel ngam sungah keima hong kibiak natu mun Biakinn khatsak natu in khuapi khat zongh ka teal bua a, Israel ka mite lampui tu in khat zongh ka teal bua hi.
- ⁶Ahihang tu in keima nong biak natu in Jerusalem ka teal zo a, ka mite uk tu in nangma David kong teal zo hi.’ ci hi,” ci in Solomon in son hi.
- ⁷Solomon in a kampau zom kik a, “Ka pa David in Israel PathianTopa biak natu in biakinn khatsak tu in ngeal hi,
- ⁸ahihang Topa in ka pa David tungah , ‘Kei atu biakinn khat nasak nop sia maan hi,
- ⁹ahizong nangma in tua biakinn na sa ngei buatu hi. Ka biakinn sa tu sia na tapa, nangma tapa tatak hi zaw tu hi,’ ci hi.
- ¹⁰“Tu in Topa in a kamciam tangtungsak zo hi: keima in ka pa ii Israel kumpi za ka laih zo a, Israel te Pathian Topa biak natu in biakinn khat ka sa zo hi.



¹¹Topa in Israel mite taw a vawt thuciamna tepteena suangpheakte koina Thukham Thingkuang sia Biakinn sungah ka koi zo hi,” ci hi.

Solomon ii Thungetna

(1Kumpite 8.22-53)

¹²Tua zawkciang mihonte mai biaknatau mai ah Solomon pai in ding a, a khutte laamin thungen hi.

(¹³Solomon in teitan khat tau taw vawtin leitual laizang ah koi hi. Tua teitan sia pi liat sau in, pi liat zai a, pi nga saang hi. Ama in hi teitan tungah kaato in misim ii mu theina mun ah khupdin in a khutte van ah laamto hi.)

¹⁴Solomon thungen in, “Israel ii Topa Pathian awng, tungsang vantung ah ahizong, nuaisang lei tungah ahizong nang taw a kibang kuama om ngawl hi! Na mite taw na kiciamna na kholet a, tuaciang amate in thin theampo taw na thu hong nit ciangin na itna amate tungah na lak hi.

¹⁵Ka pa David tungah na kamciamte zongh na kholet hi; tu ni in kammalte theampo tangtung zo hi.

¹⁶Tuaciang tu in Israel ii Topa Pathian awng, ka pa tungah kamciam na vawt dang khat sia, ama ii na thu hong nit bangin amate in kidopna taw hong ni po le, na suan na paalte sung pan khat in Israel te ii kumpi in maang tawtung tu hi, na ci sia zongh nong tangtutsak natu thu kong ngen hi.

¹⁷Tua ahikom tu in Israel ii Pathian awng, na naseam pa ka pa David tungah kamciam na piakte theampo zongh tangtungsak in.

¹⁸“Ahihang, Aw Pathian awng, nang leitung ah teang thei takpi tu ni ziam? Vantung theampo zongh nang hong huam tu in lian tham ngawl hi, tua ahikom hi Biakinnpi keisak sia lian khom thong tu ziam?

¹⁹Topa ka Pathian awng, kei sia na naseam pa khi hi. Ka thungetna hong za tan a, tu ni a kong ngetnate hong pia tan.

²⁰Hi Biakinnpi sia nang hong kibiak natu in na teal sa hi mun sia a sun a zan in na cing in. Hi Biakinnpi sang nga in thu kong nget ciangin hong za tan.



²¹Kei ii thungetna le na mite ii thungetna te hi mun maingat in hong nget ciang hong za tan. Vantung na inn sung panin hong za tan a, hong maisak tan.

²²“Mihing khat sia midang khat tungah khial hi ci in a kimawsiat ciangin, a khial ngawl na a kilangh natu in kiciamna nei tu in hi sung Biakinnpi biaknatah ah a kipaipui ciang,

²³Aw Topa, vantung panin na ngai in a, na naseamte tungah thu hong khen tan. A maw sia tungah a kiphu bangin thukhenna na vawt in a, daan na pia in, a maw ngawlte na tha in.

²⁴“Na mihing Israel te sia nangma tungah hong khial hu in a ngalte in zo a, tuaciang amate in nang sang hong heak in, kiniamkhiakin maw maisakna hong ngen le,

²⁵vantung panin na ngai in. Na mite ii khialnate maisak in a, tuaciang a taangpupite tungah na piak sa leitangh ah na ciapui kik in.

²⁶Na mite in a khial uh hu in nguatuite na khaam le, tuaciang amate kisiik in hi Biakinnpi sung nga in kiniamkhiakin thu hong ngen le,

²⁷vantung panin na ngai in. Kumpipate le Israel mite ii mawna na maisak in a, a maan a ngamtat natu amate na hil in. Tuaciang Aw Topa, na mite ii a tawntung a neisa tu in na piak hi na leitangh tungah nguatu na puak suk in.

²⁸“Ngam sungah kialpi tungin, ahibuale pulpi tungin, ahibuale ankungte vuisa in hallum in, ahibuale khaumaw hon in a lalsak ciang, tua ahibuale na mite a ngalte in a sim ciangin, tua ahibualaile amate sungah natna satna a om ciang,

²⁹amate ii thungetna na ngai in. Israel na mite khat pawpo in thin tak taw heena lakin, hi Biakinnpi sangah a khut uh zan in thu hong ngen le,

³⁰ama te ii thungetna na za in. Vantung na inn sung panin amate na ngai in a, na maisak in, na hu in. Nangma bekma in mihingte ii thinsung khuangaisutna te he ni hi. Misim in ama taw a kiphu bangin a tungah na seam in,



³¹tuasia ciangin a taangpupite tungah na piak sa leitangh tungah amate in teangin na thu hong ni tu hi.

³²“A khuala a om ngam dang mi khat in na minthanna za in, na mite atu na lianpi na sepna za in, hi Biakinn ah hong pai in thu hong ngen ahile,

³³a thungetna na ngai in. Vantung na teenna pan na za in a, vawtsak tu in hong nget teng na vawtsak in, tua hile leitung mite theampo te in Israel na mite ii hong heak bangin hong he tu uh a, na thu hong ni tu uh hi. Tuasia ciang amate in hi Biakinnpi nang atu kasak sia nang biak natu hi ta a, ci in he tu uh hi.

³⁴“A ngalte uh taw kido tu in kuankhia in na sawl ciang na mite in nang tungah thu hong ngen a, koi sung po ah a om zong na teal sa hi khuapi le hi Biakinnpi nang atu kasak sia sang hong nga in nang tungah thu hong ngen a ahile,

³⁵amate ii thungetna na ngai in vantung panin na za in a, zawna na pia in.

³⁶“Na mite in khialna vawtin hong langpan ciang — khialna nei ngawl khat zongh om ngawl ahi ciang — na thin uukin, a ngalte in zosak in ngamdang ah thongtaak tu in a paipui ciang bangza po in tua ngam sia a khuala ta zong,

³⁷na mite ii thungetna ngai in. Tua ngam pan amate kisik kikin na tungah a phat ngawl na le a mawna pualaak in thu hong ngen le, amate thungetna na ngai in, Aw kaTopa awng.

³⁸Tua ngam ah amate in thin tak le a maan takin kisiik in, ka taangpupite tungah na piak sa ahi, hi leitangh, na teal sa hi khuapi hi Biakinnpi nang atu kasak sia maingat in thu hong ngen le,

³⁹tuasia ciang amate ii thungetna na ngai in. Vantung na inn sung panin amate thungetna na ngai in a, tuaciang amate tungah hesuakna na nei in a, na mite ii a khialna te theampo na maisak in.

⁴⁰“Ka Pathian awng, tu in hong en tan a, hi mun pan kong thungetnate hong ngai tan.



⁴¹Topa Pathian awng, tu in tho in a, na vaangletna a kilakna Thukham Thingkuang taw Biakinn sungah tumin hi munah a tawntung in om in. Na thiampite a nasepna theampo ah thupha pia in a, amate tungah na phatna hangin na mite theampo lungdam taken.

⁴²Topa Pathian awng, na teal sa kumpi nial heak in. Na naseampa David na itna phawk tawntung in,” ci in thu ngen hi.

Khang Tangthu Niina 7

Biakinn Aapna

(1Kumpite 8.62-66)

¹Solomon Kumpipa in a thunget a man ciangin vantung pan meikuang hong taaksuk a, biakpiaknate kaangtum in, Topa ompuina a taang ziazua sia Biakinn sung dim hi.

²Biakinn sia Topa a taang ziazua taw kidim ahikom thiampite a sungah tum thei ngawl hi.

³Israel mite in van panin meikuang taaksuk le Biakinn sia khua vaangtaang taw kidim a mu uh ciang a dinna leitual ah a lu kunin Pathian bia in a phatna le a tawntung, a itna pok uh hi.

⁴Tua zawkciang Solomon le mite theampo in Topa tungah biakpiakna pia uh hi.

⁵Ama in kipawlkhop biakpiakna in khui 22,000 le tuu 120,000 pia hi. Tuabangin Solomon le mipite in Biakinn sia Pathian tungah aap uh hi.

⁶Thiampite sia amate atu a kisee mun tek ah dingin amate sang nga in Levite dingin David Kumpipa ii piak tumthei tuatuamte taw, “Ama hong itna in kip tawntung hi,” ci in la sa a David sawlna om bangin Topa pok uh hi. Thiampite ii lemle a tum sung teng mipi theampo ding uh hi.

⁷Solomon in Biakinn mai leitual laizang a thiansua zawkciang tua munah pumhal biakpiakna, antang taw biakpiakna le kipawlkhop biakpiakna panin ngan thaute taw biakpiaknate pia hi. Hi bang a vawtna sia ama ii vawt tau biaknatau sia hi biakpiaknate theampo atu in nolei ahihang hi.



⁸Solomon le Israel mite theampo in ni sali sung Buk Poai khaam uh hi. Tua poai ah mi tam mama hong pai a, tua mite siasaksang Hamath Mualciangh panin thangsang Egypt ngamngi dong a teang mite ahi uh hi.

⁹Amate in ni sali sung biaknatau aapna vawtin tua zawkciang a dang ni sali sung poai vawt uh hi. A ni khakbel ni in, amate in poai zawna vawt uh hi.

¹⁰A zing ciang tha sali tha ni kul le ni thum ni in Solomon in mipite a inn ah ciasak hi. Topa ii Israel mite tung David tung le Solomon tungah thupha theampo a piak manin mipite lungdam uh hi.

Solomon tungah Pathian Kilangh Kik

(1Kumpite 9.1-9)

¹¹Solomon Kumpipa in Biakinn le kumpi inn asak sia a tup a sawm bangin pha takin a manthiang sitset zawkciang,

¹²Topa sia Solomon tungah zanin kilangh hi. Topa in Solomon tungah, “Na thungetna ka za a, hi Biakinn sia ka tungah sangaw biakpiaknate nong nei natu munin ka saang hi.

¹³Nguatui ka khaam ciang ahizong, lo ante ne khawng tu in khaumawte ka paisak ciang ahizong, ka mite tungah a kilaw thei natnate ka tunsak ciang ahizong,

¹⁴amate in ka tungah thungenin kisiik kikin a sia ngamtatnate nungngatin ahile vantung pan a thungetnate ka za tu a, a mawnate maisak in amate ngam sia ngamnuam ka suaksak kik tu hi.

¹⁵Hi Biakinn ka keamcing tu a, hi mun panin a thungetnate theampo za tu in ka kinging tu hi,

¹⁶banghangziam cile hi Biakinn sia ka teal sa hi a, a tawntungin keima hong kibiak natu munin ka thiansua sa ahi hi. Ka keamcing tu a, a tawntungin ka hung tu hi.

¹⁷Na pa David ii sep bangin ka thukhamte zui in na tungah kong sawlte theampo seamin thumaan takin ka na na seam le,



¹⁸na suan na paalte in Israel ngam uk tawntung tu hi ci a, na pa David tungah ka son ama tungah ka kamciam sia ka tangtung sak tu hi.

¹⁹Ahihang nangma le na mite in nangma tungah kong piak thukham le thupiakte zui ngawlin milim pathian dangte na bia uh a ahile,

²⁰kong piak sa ngam panin kong heam tu hi. Keima hong kibiak natu mun tu in ka thiansua sa, hi Biakinn ka nusia tu hi; Israel sia mihing theampo ii zawngsak in ngaimaw tu uh hi.

²¹“ Tu in tua Biakinn sia nasia takin ki upat a, ahihang tua Biakinn a kantan pawpo in lamdang sa in, ‘Banghang in Topa in hi ngam le hi Biakinn sia hi bangza a vawt ziam?’ ci in dongh tu uh hi.

²²Amate in ‘A taangpupite Egypt ngam pan a pusua pui Topa amate Pathian sia a nusiathang ahi hi. Amate in milim pathian dangte pomin bia uh hi. Tua ahikom Topa in hi tuasiatna sia amate tungah tungsak hi,’ ci in zo tu uh hi,” ci hi.

Khang Tangthu Niina 8

Solomon ii Nasep Tangtutnate

(1Kumpite 9.10-28)

¹Solomon in Biakinn le a kumpi inn sia kum kul sung sa hi.

²Ama in Hiram Kumpipa ii a piak khuapite zongh pua kik a tua khuapite sungah Israel mite puakin teangsak hi.

³Ama in Hamath le Zobah ngamkhen te la in,

⁴senneal ngam a om Palmyra khuapi sia kulh taw uum hi. Ankholna in a kizangh Hamath ngam ah khuapite theampo pua kik hi.

⁵Solomon in a nuai a khuapite zongh pua kik hi. Tuatae sia: Beth Horon Tungnung le Beth Horon Nuainung, (hi khuapite sia ngaldal na kulh taw uum a, a kongpite a kikalh thei ngal dalna kulh taw uum hi.)

⁶Baalath khuapi ankholna khuapi theampo le a siphute le a ngalleangte koina khuapite ahi hi. Ama in Jerusalem khua, Lebanon le a ukna ngamkhen sung theampo ahsak tu in a tup a sawm theampo tangtun siat hi.



⁷⁻⁸Israel te ii Canaan ngam a laak lai in that ngawl a, a kheet Canaan mite ii suan le paalte sia, Solomon in zawthawk thu taw naseamsak hi. Tuabangin naseam a, a zakte sia Hit mi, Amor mi, Periz mi, Hiv mi le Jebus mite hi a, a suan a paalte sia tuni dongin sila seam lai uh hi.

⁹Israel mite sia zawthawk thu taw na kiseamsak ngawl a, ahihang ngalkap, ulian, ngalleang uk le siphu ngalkap nasep kiseamsak hi.

¹⁰Innsakna tuatuamte ah zawkthawk thu taw naseamte uk tu in ulian 250 om hi.

¹¹Solomon in a zi, Egypt kumpipa tanu sia David Khuapi panin a zi atu asak inn ah khiin hi. Ama in, “Ama sia Israel Kumpipa David kumpi inn ah a teang tu hi ngawl hi, banghangziam cile Thukham Thingkuang omna pawpo sia thiangtho hi,” ci hi.

¹²Solomon in Biakinn mai ah asak biaknatau tungah Topa atu in sangaw biakpiaknate pia hi.

¹³Ama in Moses thukham sungah ngeina om bangin ni thiangtho nisim atu in meihal biakpiakna pia hi: tua ni thiangthote sia Sabbath nite, Thadet Poaite le kumsim a kivawt poai thumte ahi — Tol kisaw ngawl Anluum Poai, Anthak Poai le Buk Poaite ahi hi.

¹⁴A pa David ii zui tu a vawt ngeina om bangin thiampite le lasakna taw thiampite a hu tu Levi mite ii nisim a nasep tu sia ama in vaihawmsak siat hi. Pathian ii mi David ii thupiak bangin Biakinn cingte in amate nasepna kongpi tek ah nisim a nasep tu vaihawmsak siat hi.

¹⁵David ii thiampite le Levi mite tungah vanh koina innte le thudang taw kisai in a thupiakte cing takin kivawt siat hi.

¹⁶Hi hun in Solomon ii ngiim nasep theampo cialcing hi. TopaBiakinn phungkawng a kiphu pan kipanin a zaw thiang dong nasep theampo ah a kisuangsamh khat zongh om ngawl hi.

¹⁷Tua zawkciang Solomon sia Edom ngam, Aqaba Tuidok hui ah a om khuapi nii Eziongeber le Elath ah pai hi.

¹⁸Hiram Kumpipa in ama ii khutnuai uliante ii a uk le teambaw hawlthiamte ii a hawl teambawte Solomon puak hi. Amate in Solomon ii a khutnuai uliante taw Ophir ngamah paikhawmin Solomon tungah kham ton sawm le ton luk bang puak kik uh hi.

Khang Tangthu Niina 9

Sheba Kumpinu Haw

(1Kumpite 10.1-13)

¹Sheba kumpinu in Solomon minthanna a zaak ciang thu haksa dokna taw ama ze et tu in Jerusalem ah haw hi. Ama in a cingte honpui khat le hel namtuite, suangmanphate le kham tam mama a pua kalaoh te keng hi. Solomon taw a kimu uh ciang Sheba kumpinu in a thin sungah a ngaisut thei theampo dongh hi.

²Solomon in zo thei siat a; ama atu in thu haksa khat zongh om ngawl hi.

³Sheba kumpinu in Solomon ii ciimna he a, asak sa kumpi inn zongh mu hi.

⁴Ama in kumpi sabuai tungah a kilui ante, a khutnuai uliante ii teenna innte, kumpi innsung a naseamte a ki ukzia le a puansilhate, poai ni in ama a cing a naseamte ii puansilhate le Biakinn ah a piak biakpiaknate mu hi. Tuatetheampo a mu ciang ama in lamdang sa in ingh liang hi.

⁵Ama in Solomon Kumpipa tungah, “Ka ngam panin na ciimna le na thu ka zaakte maan hi!.

⁶Keima mama hong pai in ka mu matengin ngual ii hong sonte ka um bua hi. Ka zaak thute sia na ciimna ii a lang zongh hi zo ngawl hi. Ngual ii hong sonna sangin na ciimzaw lai hi.

⁷Nangma taw a omkhawm tawntung mite, na ciimna kammal a za tawntungte le na naseamte sia bang zata in hampaha thong ziam!

⁸Topa na Pathian pok tawng! Ama in nang Israel kumpipa in hong vawt ciang nang tungah ama bangza in lungkim ziam ci in hong lak hi. Ama in ama mi ahi Israel te a tawntungin a itna le a kep nopna hu in, nang sia thukham le thukhaikim khenna kipsak thei tu in, amate kumpi tu hong koi zo hi,” ci hi.



⁹Sheba kumpinu in Solomon Kumpipa tungah ama ken letsongte: kham ton nga dedek le hel namtuite le suangmanpha tam mama pia hi. Sheba ngam kumpinu ii Solomon Kumpipa tungah a piak hel namtuite sangin a phazaw, om ngei ngawl hi.

¹⁰(Ophir pan kham hong paipui Hiram Kumpipa le Solomon Kumpipa ii mihingte in juniper thing le suangmanphate zongh paipui uh hi.

¹¹Solomon in tua thingte sia Biakinn le ama kumpi inn keallei vawtna, tumthei thiamte ii tengtong le liamlote vawtna in zangh hi. Tua hun maa in Judah ngam sungah tuabang te kimu ngei ngawl hi.)

¹²Solomon Kumpipa in Sheba kumpinu ii a nget theampo pia hi. Hite sia Sheba kumpinu ii ama tungah letsong a piakte a thukna in a piak letsongte belapna in a piak vanhte hi. Tuaciang ama le a cingte Sheba ah heak kik uh hi.

Solomon Kumpipa ii Hauna

(1Kumpite 10.14-25)

¹³Solomon Kumpipa in kumsim in kham ton kul le ton nga vaal nga a,

¹⁴sumvawtte le sumbukte ii phiangshia a piakte vaalin a nga ahi hi. Arabia ngam kumpite le Israel ngamkhen ukte zongh in ngun le kham puak uh hi.

¹⁵Solomon in ngaldalna lumlian zanii vawtin lum khat ciangin a kiseak sa kham pound sawm le pound nga taw tuam hi,

¹⁶tuaciang ngaldalna lum a no zaw zathum vawt a, khat ciangin a kiseak sa kham pound liat taw tuam hi. Ama in tuate a vekpi in Lebanon Thingtang Khaan sungah koi hi.

¹⁷Kumpipa in kumpi tokhum lian mama khat zongh vawt hi. Tua tokhum a lang sia saiha taw kituam a, a dang teng sia kham ciitak taw kituam hi.

¹⁸Tua tokhum tungah a kaa natu in keallei dawl luk pha khat om a, a mai ah kham taw a kituam peang ngakna khat om hi. To khum ziatsang le vei sangah khut ngakna om a, a hui ah tawpi lim khat veve ding hi.



¹⁹Keallei dawl lukte ii mong le mongah tawpi lim 12 ding hi. Hi bang kumpi tokhum sia kumpi ngam dang mun khat zongh ah om ngei ngawl hi.

²⁰Solomon Kumpipa ii zak haite theampo sia kham taw kivawt siat a, Lebanon Thingtang Khaan sungah a kikoi vanhzak uum le bealte theampo sia kham ciitak veu hi. Solomon khan lai in ngun sia a manh nei in kingaisun ngawl hi.

²¹Solomon in Hiram Kumpipa ii teambawte taw a paikhawm tuipi teambaw hon khat nei hi. Kum thum simin ama teambawte hong cia kik in, kham, ngun, saiha, mei nei ngawl zawngpui le zawngte hong pua uh hi.

²²Solomon Kumpipa sia leitung kumpi theampo te sangin ciimzaw a hauzaw hi.

²³Pathian ii a piak a ciimna thu he nuamin kumpi theampo in ama thu dongh hi.

²⁴Amate khat simin Solomon sia letsong — kham, ngun, puantualte, ngalvanhte, hel namtuite, siphute le laate letsong in puak hi. Kum khat zawk kum khat tuabangin kizom suak hi.

²⁵Solomon Kumpipa in a ngalleang le a siphute koi natu in siphu khawk tulli nei a, siphu ngalkap tulsawm le tulnii zongh nei hi. A siphu pawlkhat sia Jerusalem ah koi in pawlkhat sia khuapi dangte ah koi hi.

²⁶Ama sia Euphrates Ngun panin Philistia le Egypt ngamkhen ii ngi dong kumpi theampo a uk a lianbelpa ahi hi.

²⁷Solomon khan lai in Jerusalem ah ngun sia suang za in tam a cedar thingkung sia Judah mualpeang ah a om sycamore thingkung za in tam hi.

²⁸Solomon in a siphute sia Musri le ngamdang tuatuamte panin lei hi.

Solomon ii Ngam ukna A tom in

(1Kumpite 11.41-43)

²⁹Solomon kumpipa ii tangthu dangte sia a kipat pan a tawpna dong Kamsang Nathan Tangthu sung, Shiloh khua mi Ahijah ii thu Son kholna sung le



Kamsang Iddo ii Mu Kholna laibu sungah kiciamtee a, tua laibu sungah Israel kumpipa Jeroboam ii ngamukna thu zongh kiciamtee hi.

³⁰Solomon in Israel ngambuppi sia Jerusalem khua panin kum sawmli sunguk hi.

³¹Solomon thi a, David khuapi sungah kiphum in a tapa Rehoboam in a kumpi za laih hi.

Khang Tangthu Niina 10

Saksang Minamte Ngaltho

(1Kumpite 12.1-20)

¹Rehoboam sia ama kumpi suaksak tu in Saksang Israel mite theampo ii kikhopna Shechem ah pai hi.

²Solomon Kumpipa kiita in Egypt ngam ah atai Nebat ii tapa Jeroboam in tua thu a zaak ciang inn ah cia kik hi.

³Saksang minamte in ama sam a, a vekpi in Rehoboam kungah pai in ama tungah,

⁴“Na pa in kote tungah vanhngit hong suan hi. Ka vanhngit te nong zangsak a, nuntakna nong nuamsak zaw le nangma na ka seam tu uh hi.” ci uh hi.

⁵Rehoboam in, “Hi thu ka ngaisut natu in ni thum hun hong pia tavun. Tua zawkciang hong pai kik tavun,” ci in zo hi. Tuaciang amate cia hi.

⁶Kumpipa Rehoboam in a pa Solomon tung a ngaisut pia uhaamte dongh hi. “Hi mite tungah bangbangin zo tu khi ziam?” ci in dongh hi.

⁷Amate in zo a, “Hi mite tungah dik lete a, amate lungkim natu in thu hong dokte pha takin na zo le, amate in thumaan takin na na hong sepsak tu hi,” ci hi.

⁸Ahihang ama in uhaamte ii ngaisut piakna sia melsia a, ama taw a khangkhawm ama ii ngaisut a pia tu in a koi khangmoite kungah pai hi.

⁹“Bangbangin ngamta leng ci in ngaisutna hong pia tu nu ziam? A vanhngit uh zangsak zaw tu in hong ngen mite tungah bangbangin ci tu khi ziam?” ci in a ma in dongh hi.



¹⁰Amate in zokik a, “Amate tungah hi bangin ci in: ‘Ka khutme no bel sia ka pa kawng sangin lian zaw hi!’

¹¹Amate tungah ci tan, ‘Ka pa in no vanhngit hong suan hi; keima in tua vanhngitte sangin a ngit zaw lai tu in ka vawt tu hi. Ama in khauhual kibil ciang taw hong saat hi; kei ka hi le siphu saatna taw hong vel tu khi hi,” ci in sawl hi.

¹²Ni thum zawkciang Jereboam le mipite theampo Kumpipa Rehoboam kungah ama ii sawl bangin hong heak kik uh hi.

¹³Kumpipa in uhaamte ii ngaisutna piakte melsia in mihingte tungah,

¹⁴khangmoite ii ngaisut piak bangin aw ham taw pau hi. Ama in, “Ka pa in vanhngit hong suan hi; tuate sangin a ngit zaw lai in ka vawt tu hi. Ama in khauhual kibil ciang taw hong saat hi; kei ka hile siphu velna taw kong vel tu hi,” ci hi.

¹⁵Shiloh panin kamsang Ahijah ii Nebat tapa Jeroboam tungah a son sa Topa ii deina a tangtun natu tuabangin pau ahi hi. Hisia hu in kumpipa in mipite bangma thudon ngawl hi.

¹⁶Mipite in kumpipa ii amate a thudon ngawl a mu ciangin amate au uh hi. “David le a innkuan te taak hen! Ei atu amate in bang hong vawtsak na ziam? Israel mite awng, cia tawng! Rehoboam in ama le ama kikeam taken!” ci uh hi. Tua ahikom Israel mite tualngal tho a,

¹⁷Rehoboam sia Judah ngam khen sungah a teangte kumpipa tu in nusia uh hi.

¹⁸Tua zawkciang Kumpipa Rehoboam in thaman piak ngawl kulite a uk Adoniram samin Israel te kungah paisak hi, ahihang amate in ama suang taw deanglum uh hi. Tuasia ciang Rehoboam sia a ngalleang tungah manlang takin kaato a, Jerusalem khua ah suakta hi.

¹⁹Tua hun pan kipan Israelsaksang kumpi ngamte sia David ii kinguizui kumpite tungah tualngal in om tan uh hi.



Khang Tangthu Niina 11

Shemaiah ii Kamsaanna

(1Kumpite 12.21-24)

¹Rehoboam Kumpipa Jerusalem a thet ciang, ama in Judah le Benjamin minamte sung pan ngalkap thiambel 180,000 khawm hi. Ama insak sangah a teang Israel minamte simin uk kik sawm hi.

²Ahizong kamsang Shemaiah tungah Pathian in,

³Kumpipa Rehoboam le Judah le Benjamin minamte theampo tungah hi thu puak tu in sawl hi:

⁴“Na Israel mipuite sim heak vun. Na vekpi na inn tek ah cia kik vun. Hi bangin thupiang sia keima deina ahi hi,” ci hi. Amate in Topa thupiak ni in Jeroboam sim tu in pai nawn ngawl uh hi.

Rehoboam in Khuapite Kulh taw Uum

⁵Rehoboam sia Jerusalem khuapi ngakin Judah le Benjamin ngam sungah a om, a nuai a khuapite kulh taw uum hi, tua khuapite sia:

⁶Bethlehem, Etam, Tekoa,

⁷Bethzur, Soco, Adullam,

⁸Gath, Mareshah, Ziph,

⁹Adoraim, Lachish, Azekah,

¹⁰Zorah, Aijalon le Hebron te ahi hi.

¹¹Ama in hi khuapite sia nasia takin kulh taw uum a, khua sim ah a uk khat tek koi in, tua zawkciang ama in khua sim ah an, olive thau le zu,

¹²lum le teite zongh koi hi. Hi bangin ama in Judah le Benjamin ama ukna nuai ah koi hi.

Thiampite le Levite Judah ah hong Pai

¹³Israel ngam theampo panin thiampite le Levite sia thangsang Judah ngamah pai uh hi.



¹⁴Israel Kumpipa Jeroboam le a tapate in Levi mite sia Topa ii thiampi nasep a sepsak nop ngawl hu in Levite in nganthana le a lote nusia in Judah ngam le Jerusalem ah tai uh hi.

¹⁵Jeroboam in doai biate ii biakna mun ah doate le khuitalno lim in a vawt milimte biakpiakna ah naseam tu in ama aituam thiampite koi hi.

¹⁶Israel minam tuatuam sung panin Topa, Israel ii Pathian a bia nuam takpi te in Levi mite taw a taangpupite ii Topa Pathian tungah sangaw biakpiakna a piak thei natu in Jerusalem ah pai uh hi.

¹⁷Hi thu in Judah ngam thahatsak vaial a, kumthum sung Solomon tapa Rehoboam sia tha pia a, pha takin David Kumpipa le Solomon Kumpipa khutnuai ah a nuntak bangma in Rehoboam khut nuai ah nungta in panpui uh hi.

Rehoboam ii Innkuan

¹⁸Rehoboam in Mahalath tenpui a, Mahalath ii pa sia David ii tapa Jerimoth hi a, a nu sia Jesse ii tunu, Elian ii tanu Abihail hi.

¹⁹Amate in tapa thum nei a, Jeush, Shemariah le Zaham te hi.

²⁰Tua zawkciang ama in Absalom ii tanu Maacah tenpui a, amate in tapa li nei in: Abijah, Attai, Ziza le Shelomith te ahi hi.

²¹Rehoboam in a vekpi zi sawm le liat le zino sawmluk nei a, tapa kul le liat le tanu sawmluk nei hi. A zite le a zinote theampo sung pan ama in Maacah it bel a,

²²ama in a tapa dangte theampo sung pan Maacah taw a nei a tapa Abijah it tuamin, ama kumpi za laih tu in teal hi.

²³Rehoboam in a tapate nasep pha tak hawmsak a, Judah le Benjamin ngamsung theampo a, a om kulh taw a ki uum khuapite ah koi hi. Ama in amate atu haza ngawlin a dei bang pia a, zi tam mama zongh puisak hi.

Khang Tangthu Niina 12

Egyptte Tumin Judah A simna

(1Kumpite 14.25-28)



- ¹Rehoboam sia a kumpi thu neina a kip a kho a sua zawk po ciang ama le a mite theampo in Topa thukham paltan uh hi.
- ²Rehoboam in a ngam a uk zawk a kum nga kumin Topa tungah a thumaan ngawl hu in amate daan kipia hi. Egypt Kumpipa Shishak in Jerusalem sia,
- ³ngalleang tul le zanii, siphu ngalkap tul sawmluk le Libyante, Sukkite te le Ethiopia ngalkapte kihel ngalkap a kisim zo ngawl taw sim hi.
- ⁴Ama in kulh taw a ki uum Judah khuapite la in Jerusalem khua dong mainawt hi.
- ⁵Shishak pial tu in Jerusalem ah a kikhawm Rehoboam Kumpipa le Judah lampuite kungah kamsang Shemaiah pai in, “Topa ii no hong puak thu sia hi bang hi, ‘Keima nong nusiath uh hangin kei zongh in Shishak khut sungah kong nusia hi,’ ci hi,” ci in son hi.
- ⁶Kumpipa le Judah lampuite in maw khu hi ci a, amate in “Topa ii vawt sia a maan hi,” ci uh hi.
- ⁷Topa in hi thu a mu ciang kamsang Shemaiah kungah a son kikna pan, “Maw khu hi ci in kihe ahiciang amate ka susia buatu hi. Ahihang Shishak in a sim ciang amate suakta valiai bekma hi tu uh hi. Jerusalem in ka thin uukna a cingin thuak ngawl tu hi,
- ⁸ahizong Shishak in amate zo tu a, amate in keima na a sep le leitung ngamukte ii na a sep a kilamdanna he tu uh hi.” ci hi.
- ⁹Jerusalem ah Shishak Kumpipa pai in Biakinn pan le kumpipa inn panin sum le paaite la siat hi, ama in na theampo a laak sungah Solomon Kumpipa ii a vawt kham kidalna lumte zongh kihel hi.
- ¹⁰Tua khamlumte laih natu in Rehoboam in tau lumte vawtin kumpi inn kongkhate a cing ngalkap uliante tungah aap hi.
- ¹¹Kumpipa Biakinn ah a pai simin a cingte in lumte keng uh a, tua zawkciang kongkha cingte omna khaan ah koi kik uh hi.



¹²Ama in Topa tungah kiniamkhiak ahikom Topa thin uukna in ama susia siat ngawl a, Judah ngamah thu luanzia hong nuam kik hi.

Rehoboam ii Ngam ukna A tom

¹³Rehoboam in Judah ngam sia Jerusalem pan uk a, a kumpi ukna vang kho vaial hi. Ama kumpi a sua laitakin kum sawmli le kum khat pha a, Israel ngamkhen bup pan Topa in ama biak natu a teal Jerusalem khuapi pan ama in kum sawm le kum sali sung uk hi. Rehoboam ii nu sia Ammon mi Naamah hi.

¹⁴Ama in thusia vawt hi, banghangziam cile ama in Topa deina zong ngawl hi.

¹⁵Rehoboam ii nasepnate a kipat pan a tawpna dong le a innkuan puite ii thu sia *Kamsang Shemaiah Tangthu le Kamsang Iddo Tangthu* sungah ki at hi. Rehoboam le Jeroboam sia khat le khat kido tan uh hi.

¹⁶Rehoboam thi in David khuapi sung kumpi thaah ah kiphum a, a tapa Abijah in a kumpi za laih hi.

Khang Tangthu Niina 13

Abijah ii Jeroboam taw A kisimna

(1Kumpite 15.1-8)

¹Israel Kumpipa Jeroboam ii a ngam uk a kum sawm le kum liat kum in Abijah sia Judah kumpi suak a,

²ama in Jerusalem khua pan kum thum sung ngam uk hi. A nu sia Gibeah khuapi pan Uriel ii tanu Micaiah hi. Abijah le Jeroboam kilaklaw ah ngal piang hi.

³Abijah in ngalkap 400,000 khawmin sim a, Jeroboam in ngalkap 800,000 taw nalh in do hi.

⁴Ephraim mual tungah a ngalkapte kisi uh hi. Zemaraim Mual ah Abijah Kumpipa kaato in, Jeroboam le Israel mite oksan a: “Hong ngai tavun,” ci hi.



⁵“Topa” Israel ii Pathian in David taw a lal thei ngawl thuciamna khat vawt a, David le a suan a paalte sia Israel tungah kumpi seam tawntung tu in thuciamna a vawt sia he ngawl nu ziam?

⁶Nebat ii tapa Jeroboam in a kumpipa Solomon langpan hi.

⁷Tua zawkciang bangma kiman na nei ngawl mihing ngilo te samin, Solomon ii tapa Rehoboam tungah a vawt nop ngawl nate dongin zawthawk thu taw in vawtsak hi. Rehoboam sia khangmoi lei in a heakna kicing ngawl lai ahikom amate nalh thei ngawl hi.

⁸Tu inTopa in David suan le paalte tungah a piak a thuneina te langpan tu in na vaihawm uh hi. Ngalkap tam mama na nei uh a, na pathian tu in Jeroboam ii hong vawtsak kham khui milimte na keam uh hi.

⁹Aaron ii suan le paal Topa ii thiampite le Levite na not uh hi. Amate taangin mi namdang tuatuamte ii vawt bangin thiampite na koi uh hi. Khuital khat ahibuale tuu sali a pia thei pawpo sia pathian hi na ci uh te ii thiampite suak tu in amate le amate na ki aapsak uh hi.

¹⁰“Ahihang kote in Topa ka Pathian nungngat ngawlin ama na ka seam lai uh hi. Aaron suan le paal thiampite in thiampi na seamin Levite in amate hu uh hi.

¹¹Zingsim nitaksim in amate in Topatungah ngimnamtui biakpiakna le nganno taw pumhal biakpiaknate nei uh hi. Amate in zeksa ngeina bangin a thiangtho sabuai tungah anluum biakpiakna pia a, tuaciang amate in nitak simin kham meivak khuam tungah meivakte vaak uh hi. Kote in Topa hong sawl bang ka seam uh hi, ahihang note in ama na nusia uh hi.

¹²Pathian tatak ma sia kote lampui hi a, tuaciang ama ii thiampite sia hi sungah lemle taw om a, noma hong sim tu in lemle tumna taw hong sam tu in kinging uh hi. Israel mite awng, na taangpupite ii PathianTopa do heak vun! Zo zo ngawl tu nu hi,” ci in au hi.

¹³Tua laitakin Jeroboam in a ngalkapte pawlkhat sia Judahte nungsang pan pangin a sim tu in paisak a, a dang teng sia a mai pan a sim tu in paisak hi.



- ¹⁴Judah ngalkapte in a kiim a paam en kawkoai in, amate a ki uumci sia mu uh hi. Amate in Topa tungah hu ngenin au a, thiampite in lemle tum hi.
- ¹⁵Judahte au vazak in Abijah lampuina taw ngalsim uh a, Pathian in Jeroboam le Israel ngalkapte zo hi.
- ¹⁶Judahte kung pan Israel tai a, Pathian in Judah mite in Israel mite zosak hi.
- ¹⁷Abijah le a ngalkapte in Israel ngalkapte zothal a, Israel ngalkap sung pan a phabel tul za-nga that uh hi.
- ¹⁸Tuabangin Judah mite in Israel tungah zawna nga hi, banghangziam cile amate in a taangpupite ii Pathian Topa a suan a muan uh hang ahi hi.
- ¹⁹Abijah in Jeroboam ii ngalkapte del a, a khuapite pawlkhat sut hi, tuate sia: Bethel, Jeshanah le Ephron le hi khuapite nai ah khuanote ahi uh hi.
- ²⁰Abijah ii kumpi a sep sungin Jeroboam sia thahat kik zo nawn ngawl hi. A khakbel ciang Topa in ama saat vawkin thi hi.
- ²¹Abijah ahile a tha hat vaial hi. Ama in zi sawm le li nei a, tapa kul le nii le tanumei sawm le luk ii pa ahi hi.
- ²²Abijah ii tangthu dangte, a sonte le a nasepnate Kamsang Iddo Tangthu sungah ki at hi.

Khang Tangthu Niina 14

Asa Kumpipa in Ethiopiate Zo

- ¹Abijah Kumpipa thi a, David khuapi sung kumpi thaan ah kiphum hi. A tapa Asa in a kumpi za laih a, Asa khut sungah Judah ngam sia kum sawm sung kilemna om in nuamsa uh hi.
- ²Asa sia thumaan le a pha in naseam ahikom Topa a Pathian lungdamsak hi.
- ³Ama in ngamdang mite ii biaknataute le a doai biate ii biakna munte vawk siat a, biakna khansuangte saattham in a pathian nu Asherah ii lim zongh phuktan hi.
- ⁴Ama in a taangpupite ii Pathian Topa deina bang vawt tu le a thuhil nate le a thukhamte zui tu in Judah mite sawl hi.



⁵Judah ngamsung khuapi theampo ah om doai biate ii biakna munte le ngimnamtui halna biaknataute theampo ama in a sukthap hu in a ukna ngam sungah kilemna om hi.

⁶Tua hunin ama in Judah ngam khuapite atu ngaldalna kulhte vawt a, Topa in kilemna pia ahikom kum tam mama sung ngal om ngawl hi.

⁷Ama in Judah mite tungah, “Ih khuapite kiimkot ah ngaldalna kulh ih phut tu a, luphung taw ih uum tu a, khua etna tusaangte vawtin a kikhak thei le a kikalh thei kongpite ih vawt tu hi. Topa ih Pathian deina bang ih vawt hu in ih ngam sia pha takin ih uk thei hi. Ama in mun theampo ah hong pao hong dal hi,” ci in son hi. Tuabangin amate in vawt a, a mai uh vang hi.

⁸Asa Kumpipa in Judah ngalkap lum le tei toai 300,000 nei a, Benjamin ngalkap lum le thal toai 280,000 nei hi. A vekpi in ngalkap thiam le ngalhangte veu hi uh hi.

⁹Ethiopiate Zerah a kici pa in ngalkap tul za sawm le ngalleang zathum taw Judah ngam sim a, Mareshah khua dong theng uh hi.

¹⁰Asa in Zerah sim tu in pai a, Mareshah khuahui Zephathah kuam ii a lang le lang ah panmun la khawm uh hi.

¹¹Asa in Topa a Pathian tungah thungen a, “Topa awng, ngalkap hon thahat khat na hu bangin ngalkap hon thazawng khat ol takin na hu thei hi. Topa kote Pathian awng tu in hong hu tan, banghangziam cile nangma bek kong muang kong suang uh a nangma min suangin hi za in a tam ngalte sim tu in ka kipan uh hi. Topa awng nang sia kote Pathian na hi hi; nangma zo tu in kuama in a thin sungah muangmaw ngam ngawl tu hi,” ci hi.

¹²Asa le Judah ngalkap honte in Ethiopia ngalkap honte a sim ciang Topa in Ethiopia ngalkap honte zawsak hi. Amate tai in,

¹³Asa le a ngalkapte in Gerar dong del uh hi. Ethiopiate tam mama kithat ahikom a ngalkap honte ngalsim tu in kikaikhawm zo nawn ngawl hi. Topa le a ngalkap honte in amate zo ngawp ahikom a vanh tam mama laaksak uh hi.



¹⁴Tua munah om mite in Topa a kiitak lei hu in Judah ngalkap honte in Gerar kiim a om khuapite siasak cip thei uh hi. Tua khuapite theampo ngalkapte in simin a vanh tam mama laaksak uh hi.

¹⁵Amate in tuucingte pawlkhat ii ngiaphualte zongh simin tuu le kalaoh tam mama laaksak uh hi. Tua zawkciang amate Jerusalem ah heak kik uh hi.

Khang Tangthu Niina 15

Asa ii Puaphat Kiknate

¹Pathian ii thaa sia Oded ii tapa Azariah tung thengin,

²tuaciang, ama sia Asa Kumpipa taw kimu tu in pai hi. Ama in, “Asa Kumpipa le Judah mite le Benjamin mite awng, hong ngai tavun! Topa na bel uh laiteng ama in hong ompui tu hi. Ama na zong uh le ama in hong musak tu a, ahizong na nungngat uh le ama in hong taisan tu hi.

³Israel sia khua ngei hialma a maan Pathian nei ngawl, thuhil tu thiampi nei ngawl le thukham nei ngawlin nungta uh hi.

⁴Ahizong haksatna a thuak ciang amate in Topa Israel ii Pathian zuan uh hi. Amate in Topa zongin mu uh hi.

⁵Tua hun lai in mihingte na seamin a vasuk a vatona ah thinmuanna om ngawl hi, banghangziam cile ngam theampo ah haksatna le buaina om hi.

⁶Pathian in haksatna le khuangaina amate tungah tungsak ahikom ngam khat le ngam khat, khua khat le khua khat kinengcip in khua khat le khua khat kivawtsia uh hi.

⁷Ahizong note tha hat vun a thinkiam heak vun. Na nasepna thaman hong kipia tu hi,” ci in ausan hi.

⁸Asa in Oded ii tapa kamsang Azariah ii kamsaannate a zaak ciang tha nga hi. Ama in Judah le Benjamin ngam sungah a om milimte theampo le Ephraim mualtung ngam pan a laak khuapite sungah a om milimte theampo vawk siat hi. Ama in Biakinn leitual ah a omTopa ii biaknatau zongh pua kik hi.

⁹Ephraim, Manasseh le Simeon ngamte panin mi tam mama Asa sangah pai in a kumpi ngam sungah teang uh hi, banghangziam cileTopa sia ama taw a omkhop hunlam amate in he uh hi. Asa in amate theampo le Judah le Benjamin mite sam hi.

¹⁰Amate sia Asa ii kumpi a sep zawk kum sawm le kum nga kum, a tha thum tha in Jerusalem ah kikhawm uh hi.

¹¹Tua ni in a ngalte vanh a laaksakte sung pan amate in: khui zasali le tuu tulsali Topa tungah biakpiakna in pia uh hi.

¹²A taangpupite ii Pathian Topa sia a thinsung theampo uh le a thaa theampo uh taw biak tu in amate lungkimin thuciamna khat vawt uh hi.

¹³A haam ahizong, a moi ahizong, numei ahizong, pasal ahizong ama a bia ngawl pawpo sia kithatlum tu ahi hi.

¹⁴Tua thuciamna sia ka zui tu uh hi ci in Topa min taw a ngingin kiciam uh a, tua zawkciang amate au in lemle tum uh hi.

¹⁵A thin sung theampo uh taw hi thuciamna vawt zo ahikom Judah mite theampo lungdam uh hi. Topa a biakna ah amate lungkim uh a, tuaciang amate sia Topa in saangin, mun theampo ah kilemna pia hi.

¹⁶Asa Kumpipa in a pi Maacah sia lei phasak Asherah pathian nu milim a vawt hu in kumpipa ii nu a hina pan heam hi. Asa in tua milim sia phuktanin semneen a, Kidron Kuam ah a bek teng haltum hi.

¹⁷Asa in Israel ngam sung doai biate ii biakna mun theampo susia siat ngawl ahitazong ama in a nuntak sung teng Topa tungah thumaan hi.

¹⁸Ama in Pathian tungah a pa Abijah ii a piak vanhte theampo le ama mama ii piak ngun le kham taw a kivawt vanhte sia Biakinn sungah koi siat hi.

¹⁹Ama ii Judah ngam a uk kum sawmthum le kum nga ciang dong a ngam sungah ngal kisimna om ngawl hi.

Khang Tangthu Niina 16

Israel taw Buainate
(1Kumpite 15.17-22)



¹Asa Kumpipa ii Judah ngam a uk kum sawmthum le kum luk kumin Israel Kumpipa Baasha in Judah ngam simin, Judah ngamsung pan a pusuk a sungtang a khaam nop manin Ramah khuapi sia kulh taw uum hi.

²Tuaciang Asa in Biakinn le kumpi inn sumkholnate pan kham le ngunte la in Damascus ah Syria Kumpipa Benhadad tungah thaak a, a kam vaithakna panin,

³“Ih pate a kipawl bangma in ei zongh kipawl tawng. Hi kham le ngunte sia letsong in kong puak hi. Tu in Israel Kumpipa Baasha taw na kipawl na sia tatsak vun, tua hile ka ngam sungah a koi ngalkapte sia Baasha in sam kik siat tu hi,” ci hi.

⁴Asa ii kam vaithak sia Benhadad Kumpipa lungkimin, a ngalkapmaangte le a ngalkapte Israel khuapite sim tu in paisak hi. Amate in Ijon, Dan, Abel, Beth Maacah le an kholna mun Naphtali khuapite theampo la hi.

⁵Baasha Kumpipa in tua thu a zaak ciang Ramah khua kulh taw a uum sia tawlna in a nasep nusia hi.

⁶Tuaciang Asa Kumpipa in Judah ngamsung theampo pan mihing khawmtua in Baasha ii Ramah khua uumna in a zak suang le thingte puasakin Geba le Mizpah khuapi kulhte uumna in zangh hi.

Kamsangpa Hanani

⁷Tua hunin kamsang Hanani sia Judah Kumpipa Asa kungah pai in, “ Topa na Pathian muang ngawlin Syria kumpipa na muan zawk hu in Israel kumpipa ii ngalkapte sia nangma khutsung pan suakta siat zo hi.

⁸Ethiopiate le Libyan te in ngalleang tam mama le siphu ngalkap tam mama taw ngalkap tam mama nei hi ngawl ka na ziam? Ahitazong Topa muangin suang na hikom Topa in amate hong zosak hi.

⁹Topa in ama tungah thumaanna a neite tungah thahatna pia tu in leitung buppi encik hi. Na mawmawt ngamtatna hu in tu pan kipan ngal nei tawntung tu ni hi,” ci hi.



¹⁰Hi thu hangin kamsangpa tungah Asa thin uuk mama ahikom ama in kamsangpa thikkol bul hi. Hi hunsung teng mama in Asa in a ngamsung mite pawlkhat vawtsia tu kipan hi.

Asa ii Ngam ukna A khakbel

(1Kumpite 15.23-24)

¹¹Asa ii Judah ngam a uk sungin a piang thute theampo a kipat pan a tawpna dong *Judah le Israel kumpipate Tangthu* sungah kiciamtee hi.

¹²Asa ii Judah kumpi a sep a kum sawmthum le kum kua kumin a peang ah meima ngilo khat vei in a peang bai hi; ahihang tuasia hun ngangawn in ama in Topa tungah hu ngen ngawlin zato maangte tungah hu ngen zaw hi.

¹³Tua zawk a kum nii ciang ama thi a,

¹⁴David ii khuapi sungah a om ama atu in ama khuak sa suangkhuik sungah ama kiphum hi. Amate in a luang phumna ah hel namtuite le paaknamtui thau te zanghin ama thi khuangaina in a lian mama meimang khat amate in sep uh hi.

Khang Tangthu Niina 17

Jehoshaphat Kumpi Suak

¹Jehoshaphat in a pa Asa ii kumpi za laih in Israel te sim tu in ama ii dinmun hatsak hi.

²Ama in a ngalkapte sia kulh taw a ki uum Judah khuapite sung Judah ngamsung le a pa ii a laak Ephraim ngamsung khuapite ah koi hi.

³Jehoshaphat in a pa ii no lai a ngamtat bangin ngamta a, Baal bia ngawl ahikom Topa in ama thupha pia hi.

⁴Ama in a pa ii Pathian na seamin Pathian thupiakte zui a, Israel kumpite ngamtat bangin ngamta ngawl hi.

⁵Topa in Jehoshaphat sia Judah ngam kho takin uksak a, a ngam mite theampo in ama letsong a puak tek hu in ama hau in nasia takin ki upat hi.

⁶Ama in Topa nasep sia angtang in Judah ngam sungah doai biate ii biakna munte theampo le Asherah doai numei limte zongh sutham siat hi.



⁷Judah kumpi a sep zawk a kum thum kumin ama in a nuai a, a khut nuai uliante sia Judah ngam khuapite ah thuhil tu in paisak hi: tuate sia Benhail, Obadiah, Zechariah, Nethanel le Micaiah te ahi uh hi.

⁸Amate sia Levite kua le thiampi nii in zui hi. Levite sia Shemaiah, Nethaniah, Zebadiah, Asahel, Shemiramoth, Jehonathan, Adonijah, Tobijah le Tobadonijah hi a; thiampite nii sia Elishama le Jehoram te ahi uh hi.

⁹Amate in Topa ii thukham laibu kengin Judah khuapite theampo ah pai in mihonpite hil kawkoai hi.

Jehoshaphat ii Letna

¹⁰Topa in Judah ngam kiim le paam a kumpite in Jehoshaphat Kumpipa langpan tu le sim tu sia kiitasak hi.

¹¹Philistinete pawlkhat in Jehoshaphat sia kham tam mama le letsong dangte zongh puak uh a, Arabte pawlkhat in tuu 7,700 le keal 7,700 puak uh hi.

¹²Tuabangin Jehoshaphat sia a vaanglian vaial hi. Judah ngamsung theampo ah ama in khua uumna kulhte le khuapite sa a,

¹³nguai an a vuum a saal kholna in nei hi. Ama in Jerusalem khua sungah a min doktuam ngalkapmaangte,

¹⁴be le phung zui in mun pia hi. Adnah sia Judah be le phung sung pan ngalkap lampuipi hi a, a khutnuai ah ngalkap 300,000 nei hi.

¹⁵Ngalkap lampuipi niina sia Jehohanan hi a, ngalkap 280,000 nei in,

¹⁶ngalkap lampuipi thumna sia Zichri tapa Amasiah hi a, ngalkap 200,000 nei hi. (Amasiah sia Topa naseam tu in ama le ama kipia hi.)

¹⁷Benjamin be le phungte sung panin ngalkap lampuipa sia ngalkap a min doktuam Eliada hi a, lum le thal a toai ngalkap 200,000 uk hi.

¹⁸Ama zom a, lampui niina pa sia Jehozabad hi a, ngalhiam toai cingteng ngalkap 180,000 uk hi.



¹⁹Hi mihingte in Jerusalem ah kumpipa ii naseamte hi a, tuaciang Judah ngam sungah kulh taw a ki uum khuapi dangte sung zongh ah, ngalkapte koi thua lai hi.

Khang Tangthu Niina 18

Kamsang Micaiah in Ahab Kidop natu Thupia

(1Kumpite 22.1-28)

¹Judah Kumpipa Jehoshaphat hau in a minthan ciang ama in a innkuan sung pan khat le Israel Kumpipa Ahab ii innkuan sung pan khat a kiten natu in vaihawm hi.

²Kum tawmvei zawkciang Jehoshaphat sia Ahab kung haw tu in Samaria ah pai hi. Jehoshaphat le a kithol puite upatna in Ahab in paoipi khaam natu in khui le tuu tam mama ngo hi. Ahab in Gilead ngamah Ramoth khua sim tu in Jehoshaphat paa hi.

³Ahab in Jehoshaphat tungah, “Ramoth khua sim tu in nong zui tu ziam?” ci in dongh hi. Jehoshaphat in, “Na man ciang hong son tan, ka ngalkapte taw kinging khu hi, hong pawm tu khu hi,” ci in zo hi.

⁴“Ahihang Topadongh phot tawng,” ci in a kampau belap hi.

⁵Tua ahikom Ahab in kamsangte zali bang samin, thu dongh hi: “Ramoth sim tu khi ziam? maw sim ngawl tu khi ziam?” “Sim in,” amate in ci uh hi, “Topa in zawna hong pia tu hi,”

⁶Ahihang Jehoshaphat in, “Topa ih dok tu kamsang dang om nawn ngawl ziam?” ci in dongh hi,

⁷Ahab in zo a, “Khat om lai hi, Imlah ii tapa Micaiah hi. Ahihang ama ensan khi hi, banghangziam cile ama in kei atu peuma a pha thusuak nei ngei ngawl hi, a pha ngawl khat veu hi hamtang hi.” ci hi. “Tuabangin ci heak in,” Jehoshaphat in ci hi.

⁸Ahab in zum naseam uliante khat sam a, “Manlang in Macaiah kungah hong paipui tan,” ci hi.



⁹Kumpipate nii sia amate ii kumpi puantualte silh in, Samaria kongpite ii puasang ancilna ah kumpi tokhum tungah to uh a, kamsang theampo in amate mai ah thusuakte son uh hi.

¹⁰Amate sung pan khat, Chenaanah ii tapa Zedekiah in, thik kiite vawt in, Ahab munah, “Hisia Topa ii pauna hi, ‘Hite taw Syria te na sim tu a, na zo tu hi,’ ” ci hi.

¹¹Kamsang dangte in zongh tuabang vive ma in ci uh hi. “Ramoht sim tu in kuan in, zo tu ni hi,” ci uh hi. “Topa in zawna hong pia tu hi.”

¹²Tua laanin Micaiah sam tu in a pai ulian pa in, “Kamsang dangte theampo in kumpipa zawna tu bebek son zo hi, nang zongh tuabangma son lete pha tu hi,” ci hi.

¹³Ahihang Micaiah in, “A nungta Topa min lo in kamciam ka piakna pan ama ii son in hong sawl teng son tu khi hi,” ci in zo hi.

¹⁴Ama Kumpipa Ahab mai ah hong kipaipui ciang, kumpipa in, “Micaiah awng, Kumpipa Jehoshaphat le kei Ramoht ah kuanin ka sim tu uh ziam? tua ahibuale sim ngawl tu khu ziam?” “Sim vun!” Macaiah in ci hi. “Na zo tu uh hi, Topa in zawna hong pia tu hi,” ci hi.

¹⁵Ahihang Ahab in zokik a, “Topa min taw kei tungah nong pau ciangin a tatak teng bek son tu ni hi. Bang tan vei tuabangin hong ci tu khi ziam?” ci in zo hi.

¹⁶Micaiah in, “Israel ngalkapte sia mualtung tengah tuu cing pa om ngawl a tuute kithezau bangin ka mu hi. Tuaciang Topa in, ‘Hi mite lampui nei ngawl hi, inn ah dai takin cia hen,’ ” ci hi.

¹⁷Ahab in Jehoshaphat munah, “Ama in kei huvau peuma a pha khat zongh pau ngei ngawl hi, hong ci ka na ngawl khi ziam? A sia khat peuma hi tawntung hi,” ci hi.

¹⁸Micaiah in zomto a, “Tu in Topa pauna teng ngai vun! Topa sia vantung a kumpi tokhum tungah to in, ama ii vantung lalangte a kiim ah ding uh hi.



¹⁹Topa in dongh a, ‘Ramoth ah Ahab a kithalup natu in akua in theam tu nu ziam? Vantung lalang pawlkhat in son khat nei a, a dangte in thu dang ma son uh hi,

²⁰thaa khat mai ah hong kalsuan a, Topa kung zuanin, ‘Keima in theam tu khi hi,’ ci hi. ‘Bangbang in maw?’ Topa in dongh hi.

²¹Thaa in zo a, ‘Keima pai in Ahab ii kamsangte theampo leilot thu ka sonsak tu uh hi!’ ci hi. Topa in, ‘Pai tan, va theam tan, Zawna nga tu ni hi,’ ” ci hi.

²²Tuaciang Micaiah in thu khup a, “A piang thu in hi sia hi. Topain na kamsang hite nang tungah leilot thu hong sonsak hi. Ahihang ama mama in nang tuasiatna nga tu in a thutan sa hi,” ci hi.

²³Tuaciangin kamsangpa Zedekiah in Micaiah kungah paito in, a maitang beang hi, tuaciang dongh hi. “Bang hun pan kipan Topathaa in kei hong nusia a, nang tungah hong pau ziam?” ci hi.

²⁴Micaiah in zo a, “Inn nungsang khaan sung khat ah a buu tu in na pai ciangin mu tu ni hi,” ci hi.

²⁵Tua zawkciang Kumpipa Ahab in a uliante khat munah, “Micaiah man in a, Amon ah paipui in, khuapi ukpa le Kumpipa Joash tungah aap vun.

²⁶Thong sungah koi hen a, bangma tat ngawlin kong heak kik dong anluum le tui bek taw na vaak hen, ci in son in,” ci hi.

²⁷“Bangma tat ngawlin nong heak kik le maw? Topa sia kei tungah hong pau ngawl hi tu hi,” ci in Micaiah in au ngaw hi. Tuaciang belap a, “A kuama po in hong ngai tavun, ka son sa teng!” ci hi.

Ahab ii Thina (1Kumpite 22.29-35)

²⁸Tua zawkciang Israel te ii Kumpipa Ahab le Judahte ii Kumpipa Jehoshaphat te in Gilead ah Ramoth khua sim tu in pai uh hi.

²⁹Ahab in Jehoshaphat munah, “Ngal phual ah ih thet ciangin kei sia kong kimealseal tu a, nang hile kumpipa puan teng ma nong silh tu hi,” ci hi. Tuabangin Israel te kumpipa kidona phual ah kimealseal in pai hi.



³⁰Syria kumpipa in a ngalleang ukte munah, Israel te ii kumpipa sim ngawl a dang kuama sim ngawl tu ni hi ci hi.

³¹Tua ahikom amate in Kumpipa Jehoshaphat a mu uh ciangin ama sia Israel te ii kumpipa sa uh hi, tuaciang amate kiheak in ama sim hi. Ahihang ama hong au keak ciangin

³²ama sia Israel te ii kumpipa ahi ngawl hunlam phawk uh hi, tuaciang amate in sim nawn ngawl uh hi.

³³A luilamna in Syria ngalkapte khat ii thaltang a kaa khat in Kumpipa Ahab ii thikpuan kipeena panin kha hi, “Kei liam khi hi, ngalphual panin kiheam in,” ci in ngalleang hawlpa thupia hi.

³⁴A ngal kisimna a nasia vaial laitak ma in Ahab Kumpipa sia Syria sang nga in ama ngalleang sungah kikhuangkho in to hi. Nitum laitakin ama thi hi.

Khang Tangthu Niina 19

Kamsang khat in Jehoshaphat Teih

¹Judah Kumpipa Jehoshaphat cidam in Jerusalem a kumpi inn ah cia kik hi.

²Hanani ii tapa kamsang Jehu sia Kumpipa Jehoshaphat taw kisi tu in pai a, kumpipa tungah, “Mihing ngilote hu tu le Topa a huatsa mite panpui tu sia pha sa ni ziam? Hi bangin na ngamtatna inTopa thin uukna na tungah thengsak ni hi.

³Ahitazong na phatna zongh om veve hi. Nangma in mite ii a biak Asherah doainu milimte na vawk siat a, Topa deina zui tu na hanciam hi,” ci hi.

Jehoshaphat ii A Pua kiknate

⁴Jehoshaphat Kumpipa sia Jerusalem khuapi ah teang hi napi a taangpupite ii Pathian Topa kungah a mite sam kik tu in thangsang Beersheba paninsaksang Ephraim mualtung dong a mite sungah khualhaw tawntung hi.

⁵Ama in Judah ngamsung kulh taw a ki uum khuapi theampo ah thukhente koi in,



⁶amate tungah, “Thu na khen uh ciang kidawm vun; thu na khen uh ciang mihing thuneina taw khen tu na hi bua uh a; Topa deina bang khen tu na hi uh hi; tuaciang thu na khen uh ciang Topa sia noma taw hong om hi.

⁷Topakiita vun a, kidawmin ngamta vun, banghangziam cile Topa ih Pathian in thumaan ngawl na, mi doidanna le sumnguk neaknate dei ngawl hi,” ci in thuhil hi.

⁸Jerusalem khua sungah Jehoshaphat in Levi mi, thiampite le khuasung uliante pawlkhat sia Topa thukhamte a paltan ciang le khua mite thu a nei uh ciang thukhen tu in koi hi.

⁹Ama in amate tungah, “Topa thasiana le ciitak nate taw na nasepna theampo uh a muanhuai in seam tavun.

¹⁰Khuapite khat pawpo pan na mipuite in mihing thalupna thu ah ahizong, Topa thukham le thupiakte paltanna thu ah ahizong note kungah hong paipui uh ciang Topatungah a khial ngawl natu in amate thu a sit laitakin bangbang ngamta tu ci sia pha takin hil tavun. Tuabang na seam bua uh le noma le na mipuite in Topa thin uukna na thuak tu uh hi. Ahitazong pha tak na na seam uh le maw pu ngawl tu nu hi.

¹¹Biakna taw kisai thu theampo ah Thiampi Lianbel Amariah sia thu nei bel hi tu a, Judah ngamkhen ukpa Ishmael ii tapa Zebadiah sia khua mite taw kisai thu theampo ah thu nei bel hi tu hi. Levite in zum pan a thukhennate kiseam suak ziam ci a et tu nasep nei hi. Hangsan vun; hi kong sawl bangin seam vun; Topa in thumaan mite taw omkhawm taken,” ci hi.

Khang Tangthu Niina 20

Edomte A simna

¹Tawmvei zawkciang Moab le Ammon ngalkapte in amate taw a kipawl Meun te taw Judah ngam sim uh hi.

²Kamtai pawlkhat hong pai in Jehoshaphat Kumpipa tungah: “Edom ngam pan ngalkap tam mama hong pai in Tuipi Thi ngalkhat panin sim hong sawm



hi. Amate in Hazazon Tamar khua la zo hi,” ci in son uh hi. (Hazazon Tamar sia Engedi zongh kinaa hi.)

³Jehoshaphat sia patau in Topa ii lamlak natu in Topa tungah thungen hi. Tua zawkciang ama in a ngamsung theampo ah an tanna khat nei natu a zaaksak natu in thupia in sawl hi.

⁴Judah ngam khuapi sim pan Topa lamlak natu ngenin Jerusalem ah mite manlangin hong pai uh a,

⁵amate le Jerusalem khua mite sia Biakinn leitual thak ah kikhawm uh hi. Jehoshaphat Kumpipa pai in amate mai ah dingin,

⁶a ngingin thungen a, “Topa ka taangpupite ii Pathian awng, na omna vantung panin leitung minam theampo na uk siat hi. Nangma sia a vaanglian a thahat na hi a, kuama in hong nalh zo ngawl hi.

⁷Nangma sia kote Pathian na hi hi. Israel na mite hi ngam hong thet ciang, hi mun ah a omsa mite na nawtkeak a, na lawm ahi Abraham suan le paalte tungah hi ngam a tawntung a lua tu in na pia hi.

⁸Amate hi ngam sungah teangin nangma hong upatna in hi biakinn sa uh a,

⁹amate daan na piakna in, tuasiatna tuatuam— ngal kidona — a kilaw thei natna ngilote le kialpi — amate tungah na tunsak ciang amate hong pai in nangma hong biakna hi Biakinnpi mai ah pai in kiding thei ci sia he uh hi. Amate in a haksatna uh na tungah thu hong ngen thei a, tuaciang nangma in za in na suatak hi.

¹⁰“Tu in Ammon mi, Moab mi le Edom mite in ko hong sim uh hi. Ka taangpupite Egypt ngam pan a pusua lai in hi ngam a tum tu oai ngawl na hi kom, ka taangpupite in hi ngamte kiimvealin susia ngawl uh hi.

¹¹Ko tungah hong lo kikna sia hi bang hi — nong piak sa ngam pan hong notkeak tu in hong pai uh hi.

¹²Nangma sia kote Pathian na hi hi! Amate daan pia in. Banghangziam cile kote hong sim a, hiza a tam ngalkapte mai ah ka ci ka law ka he bua uh hi.



Bang vawt tu ci sia ka he bua uh hi. Nangma hong hu tu bek ka lam en uh hi,” ci uh hi.

¹³Judah mite theampo a zite a tate taw tua mun Biakinn ah ding uh hi.

¹⁴Topa thaa sia mihonpi sungah a om Levite khat ii tung hong theng hi. Tua Levi mipa sia Zechariah ii tapa Jahaziel ahi hi; ama sia Asaph be le phungte hi a, Mattaniah, Jeiel le Benaiah te ii sungsuak ahi hi.

¹⁵Jahazial in, “Kumpipa le Judah mihonpite theampo le Jerusalem mihonpite theampo awng, na ngalte a tam hangin thinkiam in lau heak vun, Topa in ci hi. Ngal kisimna sia Pathian taw kisai hi, no taw kisai ngawl hi.

¹⁶Zing ciang amate Ziz mualciangh ah pai ciang sim vun. Jeruel hui zaangtam tawpna, dui kipatna ah na kisi tu uh hi.

¹⁷Note ii ngalsim tu kul ngawl tu hi. Panmun la vun a, a kinging sa in om vun; Topa ii zawna hong piak na mu tu uh hi. Judah mite le Jerusalem mite awng, haisaang heak vun a lau heak vun. Ngalsim tu in kuan vun, Topa in note hong ompui tu hi,” ci hi.

¹⁸Tua zawkciang Jehoshaphat Kumpipa sia a mai leipha dongin kun a, mipite zongh kunin Topa bia uh hi.

¹⁹Levite ahi Kohath le Korah ii be le phungte sia dingto in a aw nei za taw Israel PathianTopa pok uh hi.

²⁰A zing ciang zingtuungin mihonte Tekoa hui duisung zuan uh hi. A din tu ciang Jehoshaphat in amate tungah, “Judah mite le Jerusalem mite awng! Topa na Pathian muang vun, tua hile kip takin na ding thei tu uh hi. Ama kamsangte ii sonte um vun, tua hile na maa uh vang tu hi,” ci in vaitha hi.

²¹Mipite thu a kikuppui zawkciang kumpipa in tumthei thiam pawlkhat poai vawt ciang a silh bul puantualte silhsak a, ngalkapte mai ah paisakin: “ Topa pok vun! Ama hong itna kip tawntung hi!” ci in la sasak hi.



- ²²Tuabang in la sa tu a kipat po uh ciang Topa in a ngalte tungah thin patauna tungsak hi.
- ²³Ammon te le Moab te in Edom ngalkapte simin a suksiat cip zawkciang amate le amate nasia takin kisim uh hi.
- ²⁴Judah ngalkapte in senneal ngamsung tusaang khat a thet uh ciang a ngalte sang enin a ngalte thi peakpukin a om mu uh hi. Khat zongh suakta ngawl hi.
- ²⁵Jehoshaphat le a ngalkapte sia a ngalte vanh la tu in pai a, khui, neak le dawn, puansilh tawmte le vanh manpha tam mama mu uh hi. Amate in ni thum sung vanhte khawmtua napi tamlei ahikom a vekpi in la siat zo ngawl uh hi.
- ²⁶A ni li ni in amate sia Beracah Kuam ah kikhawm a, ama ii vawt sa theam po hangin Topa pok uh hi. Tua ahikom tua kuam sia “Beracah” kici hi.
- ²⁷Topa in a ngalte zawsak ahikom Jehoshaphat in lampui a, a ngalkapte Jerusalem ah zawna le lungdamna taw cia kik uh hi.
- ²⁸Amate Jerusalem a thet ciang tengtong le lemlete tumin Biakinn zuan uh hi.
- ²⁹Topa in Israel te ii ngalte zawsak hi ci thu a za, ngam theampo lau uh hi.
- ³⁰Pathian in a kiim a paam pan dal ahikom Jehoshaphat in nuam takin ngam uk hi.

Jehoshaphat ii Ngam ukna A khakbel

(1Kumpite 22.41-50)

- ³¹Jehoshaphat sia kum sawmthum le kum nga a phakin Judah ngam kumpi suak a, Jerusalem panin kum kul le kum nga sung uk hi. A nu sia Shilhi ii tanu Azubah ahi hi.
- ³²A pa Asa bangma in Topamai ah a pha vawt a;
- ³³ahitazong doai biate ii biakna munte susia ngawl hi. Mipite in a taangpupite ii Pathian bia tu in thintak lungtak taw kiheak ngawl lai uh hi.



³⁴Jehoshaphat ii nasep tuatuamte theampo a kipatna pan a tawpna dong *Israel Kumpipate ii Tangthu* sungah a kihel *Hanani ii tapa Jehu ii Tangthu* sungah kiciamtee hi.

³⁵Khatvei lai in Judah Kumpipa Jehoshaphat in na pha ngawl tam mama a vawt, Israel Kumpipa Ahaziah taw kipawlna khat vawt hi.

³⁶Amate in Eziongeber teambaw tawlngakna mun ah tuipi teambawte vawt uh hi.

³⁷Ahihang Mareshah khua mi Dodavahu ii tapa Eliezer in Jehoshaphat tungah, “Ahaziah taw kipawlna na vawt hu in na vawtsa nate Topa in susia tu hi,” ci in a kidop natu son hi. A son bangma in a vawt sa teambawte lal cip a, tui tungah kizangh thei ngawl hi.

Khang Tangthu Niina 21

¹Jehoshaphat thi a, David Khuapi sung kumpi than ah kiphumin a tapa Jehoram in a kumpi za laih hi.

Judah Kumpipa Jehoram

(2Kumpite 8.17-24)

²Judah Kumpipa Jehoshaphat ii tapa Jehoram in suapui pasal luk nei a: Azariah, Jehiel, Zechariah, Azariahu, Michael le Shephatiah ahi hi.

³A pa in amate tungah kham, ngun le vanh manpha tam ma pia a, Judah ngamsung kulh taw a ki uum khuapite khat tek uksak hi. Ahitazong Jehoram sia a lianbel ahikom Jehoshaphat in ama za laihsak hi.

⁴Jehoram ii a kumpi ngamukna a kip ciang, ama in a suapui pasalte teng le Israel uliante pawl khat zongh that hi.

⁵Jehoram sia kum sawmthum le kum nii a phak kumin kumpi suak a, Jerusalem khua pan kum liat sung uk hi.

⁶Ahab ii tanute khat a tenpui hu in ama in a pha ngawl a ngamta Ahab Kumpipa le Israel kumpi dangte ii ngamtatna zui hi. Tuabang in ama in Topa tung ah khialna vawt hi,



⁷Ahitazong Topa in David taw thuciamna khat vawt a, David ii suan le paalte in ngam uk tawntung tu hi ci in kamciam ahikom Topa in David ii khang kizui ngamukna sia susia nuam ngawl hi.

⁸Jehoram ii Judah ngam a uk lai in Edom mite in Judah mite leedo in Edom ngam sia a suakta ngam khat suak hi.

⁹Tuasia hu in Jehoram le a ngalkapmaangte sia ngalleang taw kuanin Edom ngam tumin sim uh hi. Tua mun ah Edomte in amate uumci a, ahihang zanin amate pusuak ku in suakta uh hi.

¹⁰Tua hun pan kipan Edom mite sia Judah kumpite khut sung pan suatakna nga suak uh hi. Jehoram in a taangpupite ii Pathian Topa a nungngat hu in hi hun sung mama in Libnah khuapite zongh in leedo uh hi.

¹¹Ama in Judah ngam mualsaangte tungah doai biate ii biakna mun ngangawn vawtin, tuabangin Judahte le Jerusalem mite Topa ii lang ah, maw nei suaksak hi.

¹²Kamsangpa Elijah in Jehoram laithak a, a lai sungah: “Na pa Jehoshaphat Kumpipa le na taangpupi Asa Kumpite ii ngamtat bangin na ngamtat ngawl hu in na taangpupi David ii Pathian Topain nang hong puavawk hi.

¹³Israel kumpite khuani zuizaw in Ahab le ama ii za a laih te ii Israel te lam a pialpui bangma Judahte le Jerusalem mite Pathian tungah thumaan ngawl tu in lam na pialpui hi. Nangma sangin a phazaw na suapui pasalte ngangawn na thatlum hi.

¹⁴Tua ahikom Topa in na mite, na tate le, na zite nasia takin daan pia tu a, na nei na lamhte susia tu hi.

¹⁵Nangma mama in ngilsung natna khat na nga tu a, tua natna ni khat sangin ni khat nasia zaw vaial tu hi,” ci in at hi.

¹⁶Philistinete le Arabte pawlkhat sia Ethiopiate teenna tuipidung nai ah teang uh hi. Tua mite sia Jehoram a sim tu in Topa in piangsak hi.



¹⁷Amate in Judah ngam simin kumpipa inn phuul a, a tapa nobel Ahaziah simngawl kumpipa ii a zite theampo le a tapate theampo thongtaak tu in paipui hi.

¹⁸Hite theampo a pian zawkciang Topa in kumpipa sia a bot mama ngilsung natna khat veisak hi.

¹⁹A natna nasia vaial in kum nii zawkciang na sa vadel in, thuak zo ngawlin thi hi. A ngam mite in ama mai ah kumpi a seam a taangpupite a vawt bangin ama thi khuangai lakna in meimang sep ngawl uh hi.

²⁰Jehoram sia kum sawmthum le kum nii a phak ciang kumpi suak a, Jerusalem khua pan kum liat sung uk hi. A thi ciang kuama khuangai ngawl hi. Amate in Jehoram sia David khuapi sungah phum ahihang kumpi than ah phum ngawl uh hi.

Khang Tangthu Niina 22

Judah Kumpipa Ahaziah

(2Kumpite 8.25-29; 9.21-28)

¹Arabte pawlkhat in Jerusalem simin Jehoram Kumpipa ii tapate a nobel Ahaziah simngawl thatlum siat hi. Tua ahikom tu in Jerusalem khua mite in Ahaziah sia a pa ii kumpiza luasak hi.

²⁻³Ahaziah kum kul le kum nii a phakin kumpi suak a, ama in Jerusalem khua pan kum khat sung uk hi. A nu sia Israel kumpipa Omri ii tunu, Ahab kumpipa ii tanu Athaliah hi a, a nu ii thusia a mop bangin Ahaziah in Ahab kumpipa ii baangkua ngamtatna zui in a pha ngawl ngamta hi.

⁴A pa thi zawkciang Ahab Kumpipa innkuanpuite sia Ahaziah Kumpipa ngaisutna plate hi a, ngaisutna pha a piak ngawl hu in Topatungah khialin ama puksak hi.

⁵Amate thu ni in Ahaziah in Israel Kumpipa Joram pawmin Syria Kumpipa Hazael sim hi. Gilead ngam Ramoth ah ngalkap honte kisim a, ngal simna ah Joram liam hi.



⁶A liamma bawl tu in Joram sia Jezreel khua ah cia kik a, tua munah Ahaziah in ve hi.

⁷Joram a ve sia Ahaziah atu in Pathian in Ahaziah ii puk natu a, a zak ahi hi. Ahaziah tua munah a taam sungin Ahab ii ukna ngam siasak tu in Topa ii a teal sa Nimshi ii tapa Jehu in Ahaziah le Joram thato hi.

⁸Pathian ii Ahaziah ukna ngam sungah a thukhen te a taksua tu sia Jehu ahikom Ahaziah khualhawna ah a zui Judah lampuite pawlkhat le Ahaziah tute taw kital sik uh hi. Jehu in amate that siat hi.

⁹Ahaziah zong a, Samaria khua a bukna ah mu hi. Amate in Ahaziah sia Jehu kungah paipui in that hi. Ahihang Topa atu a sep thei za a seam a pu Jehoshaphat Kumpipa a zatakna uh taw amate in Ahaziah ii luang sia pha takin phum hi. Ahaziah ii innkuan sung panin ngam uk thei tu khat zongh taang ngawl hi.

Judah Kumpinu Athaliah

(2Kumpite 11.1-3)

¹⁰Ahaziah Kumpipa ii a nu Athaliah in a tapa a thalupsak a heak po ciang Judah ngam sungah kumpi nam theampo kithalup siat natu in thu pia hi.

¹¹Ahaziah in thiampi Jehoiada taw a kiteang Jehosheba a kici suapui seal khat nei hi. Jehosheba in Ahaziah ii tapate khat a hi Joash a kici pa sia suatak ku in, a kithat tu a suapui dangte kung panin taipui ku a, sealin naucing khat taw Biakinn sung lupna khaan khat sungah phual hi. Tuabang a, a seal hu in Jehosheba in Joash sia Athaliah khut sung, thi natu panin suatak hi.

¹²Athaliah ii kumpinu a sep kum luk sung theampo Joash sia tua munah buu top hi.

Khang Tangthu Niina 23

Athaliah langpan in Ngal thawna

(2Kumpite 11.4-16)

¹Kum luk a ngak zawkciang thiampi Jehoiada in bang khat po sep tu hun zo hi ci in khensat hi. Ama in ngalkapmaang ngate ahi: Jeroham ii tapa Azariah,

Jahohanan ii tapa Ishmael, Obed ii tapa Azariah, Adaiiah ii tapa Maaseiah le Zichri ii tapa Elishaphat te taw thukimna khat vawt uh hi.

²Amate in Judah ngamsung khuapi theampo ah khualhaw in Levite le amate be le phung lampuite a vekpi in Jerusalem ah paipui uh hi.

³Amate a vekpi in Biakinn sungah kikhawmin kumpipa ii tapa Joash taw thuciamna khat vawt uh hi. Jehoiada in amate tungah, “Hong thi san, ih kumpipa ii tapa sia hi lai ah om hi. David ii suan le paalte kumpi seam tawntung tu hi ci a, Topa ii kamciam sa thu om bangin ama sia tu in kumpi suak tu hi.

⁴Hi bangin ih vawt tu hi. Thiampite le Levite, Sabbath ni in naseam tu in hong pai uh ciangin khen thum sua khen khat in Biakinn kongkhate cing tu a,

⁵a dang khen thum sua khen khat in kumpi inn cingin, a dang a taanglai teng in Kongpi Bulpi ah mun la tu uh hi. Mihonpite theampo Biakinn leitual ah kikhawm tu uh hi.

⁶Nasep a kisee thiampite le Levite sim ngawl kuama Biakinn sungah tum ngawl tu hi. Thiampite le Levite sia kithiangthosak ahikomin tum thei tu hi, ahihang a dangte siaTopa thupiak bang ni in a pua sangah om tu uh hi.

⁷Levite in a namsaute dawk sa in kumpipa cing tu uh a, a paina theampo ah zuikot tu uh hi. Biakinn sung tum a sawm pawpo sia kithatlum tu hi,” ci hi.

⁸Levite le Judah mipite in Jehoiada thupiak ni in a sawl bangin seam uh hi. Sabbath ni in nasep a nei nawn ngawlte zongh a inn tek zuansak ngawl ahikom nasep lampuite in, naseam tu hong paite ahizong, a seam sa a cia tute ahizong naseam tu te a kipee tanin nei tawntung hi.

⁹Jehoiada thiampipa in Biakinn sungah a kep David Kumpipa ii neisa lum le teite uliante pia hi.

¹⁰Ama in kumpipa cing tu in pasalte namsau dok sa in Biakinn mai kiimkot ah koi hi.

¹¹Tuaciang Jehoiada in Joash pusuapui in kumpi lukhu khusakin kumpipa zui tu kumpi thukham laibu khat aap hi. Tuabangin ama sia kumpi kisuaksak hi. Thiampi Jehoiada le a tapate in Joash sia sathau noai a, a om theampo in, “Kumpipa a khansau taken,” ci in au hon uh hi.

¹²Mihonpite ii kumpipa a pokna aw Athaliah in a zaak ciang mihonpite kikhopna Biakinn ah manlang takin pai hi.

¹³Tua munah ama in kumpi thak pa sia kumpipa atu in a kituam koi Biakinn tumna Khuam kungah ngalkapmaangte le lemle tumte in uumci in a din mu hi. A om theampo lungdamin, au in lemle tum a, Biakinn tumthei tumte in tumtheite taw tua poai lampui uh hi. Athaliah sia khuangai a, a puante baltham in “Hong leeheak hi! Hong leeheak hi!” ci in au hi.

¹⁴Jehoiada in Athaliah sia Biakinn sungah a kithalup tu dei ngawl ahikom a ngalkapmaangte pawlkhat sam a, “A ngual a ngualin a cingte kilaklaw panin ama la in paipui vun, ama suatak a sawm pawpo that vun,” ci in thupia hi.

¹⁵A sawl bangin amate in Athaliah manin kumpi inn ah paipui in Siphu Kongpi a cina mun ah thatlum uh hi.

Jehoiada ii Puaphat kiknate

(2Kumpite 11.17-20)

¹⁶Thiampi Jehoiada in David Kumpipa, a mipite taw kingawm inTopa ii mihingte a sua thei natu thuciamna khat vawtsak hi.

¹⁷Tuaciang amate a vekpi in Baal biakinn ah pai in susia siat hi. Amate in tua munah om biaknataute le milimte saattham siatin biaknatau mai ah Baal thiampi Mattan that uh hi.

¹⁸Jehoiada in thiampite le Levite sia Topa biakinn ah naseam tu in koi hi. Amate nasep sia David Kumpipa ii nasep hawmna sa om bangin a sep tu le Moses Thukham om bangin Topa tungah a kipia sangaw biakpiaknate hal tu ahi hi. Amate in tumthei thiamte le poai vawtna te zongh a ukte ahi hi.

¹⁹Jehoiada in Biakinn sungah mithiang ngawlte kuama a tum ngawl natu a cing tu in Biakinn kongcingte koi hi.



²⁰Ngalkap uliante, khuapi lampuite, ulian dangte le mipite theampo a kingual sa in Jehoiada nungzui a, kumpipa sia Biakinn pan kumpi inn ah paipui uh hi. Amate kongpi lianbel panin tumin tuaciang kumpipa sia kumpi tokhum tungah to hi.

²¹Tu in Athaliah kithatlum zo ahikom khuapi thimdide in mihing theampo lungdam uh hi.

Khang Tangthu Niina 24

Judah Kumpipa Joash

(2Kumpite 12.1-16)

¹Joash sia kum sali a phak kumin Judah kumpi suak a, Jerusalem pan kum sawmli sung uk hi. A nu sia Beersheba khuami Zibiah ahi hi.

²Ama in thiampi Jehoiada nuntak sungtengin Topa lungdamsak hi.

³Joash Kumpipa atu in Jehoiada in zi nii tealsak a, a zite taw tanu tapa toai hi.

⁴Tawmvei kumpi a sep zawkciang Joash in Biakinn pua tu in khensat hi.

⁵Ama in thiampite le Levite Judah ngamsung khuapi theampo ah paisak in kumsim Biakinn pua natu, a kism sum khon tu in sawl hi. Ama in manlang tatak, a vawt tu in sawl ahihang Levite sia haisaang uh a,

⁶tua ahikom ama in amate lampui Jehoiada samin, “Topa ompuina Puanbuk atu in mipite in panpuina pia taken, ci a Topa naseampa Moses ii sawl bangin, banghang Levite in Judah mite le Jerusalem mite tung pan shia khonsak ngawl ni ziam?” ci in dongh hi.

⁷(Nupi pha ngawl Athaliah ii nungzuite in Biakinn usia in Biakinn vanh thiangtho tam mamate Baal biakna in zangh uh hi.)

⁸Kumpipa in Levite tungah sum khiakte khol natu thingkuang khat vawtin Biakinn kongmai ah a koi natu in thupia hi.

⁹Amate in Pathian naseampa Moses ii a masabel in dui sungah a khon shia sia kuama po in Topa tungah a piak natu in Jerusalem le Judah ngamsung theampo ah zasak kawkoai uh hi.



¹⁰Hi thu in mipite le a lampuite lungdamsak ahikom, amate in a shia sumte hong paipui tekin thingkuang dim hi.

¹¹Nisim in tavuan nei kumpipa khutnuai ulian khat tungah tua thingkuang sia Levite in puak uh hi. Thingkuang a dim simin kumpipa ii thuzeakpipa le Thiampi Saangpa ii taangmipa in a sumte la in a thingkuang sia a omna ngei ah koi kik uh hi. Tuabangin amate in sum tam ma khon uh hi.

¹²Kumpipa le Jehoiada in tua sumte sia Biakinn pua naseam lampuite tungah pia uh hi, amate in Biakinn pua tu in tua sumte taw suang ciangte, lettamate le thik naseamte cial uh hi.

¹³Naseamte theampo in nasep hanciam tekin Biakinn sia asakciil bang linlian in a kho mama in pua kik uh hi.

¹⁴A pua nate a man zawkciang kham le ngun a taanglaite sia kumpipa le Jehoiada kungah pia a, amate in Biakinn atu a kismah kuangnote le nazak dangte vawtna in zangh uh hi.

Jehoiada ii Paizia Kilumlet

Jehoiada nuntak sung tengin Biakinn ah sangaw biakpiakna kipia tawntung hi.

¹⁵Jehoiada sia a huai kaikut in kum za le kum sawmthum a cin zawkciang thi hi.

¹⁶Israel mipi atu, Pathian atu le Biakinn atu a nasepnate hangin ama sia David khuapi, kumpi thaah ah phum uh hi.

¹⁷Ahihang Jehoiada thi zawkciang Judah lampuite in Joash Kumpipa sia amate thu ni tu in zol uh hi.

¹⁸Tua ahikom, mipite a taangpupite ii Pathian Topa Biakinn sungah biakpiakna vawt nawn ngawlin milimte le Asherah pathiannu limte biak tu kipan uh hi. Hi bangin mawna a vawtte hu in Judah le Jerusalem tungah Topa thin uuksak hi.

¹⁹Topa in ama a zot kik natu sawl tu in amate kungah kamsangte puak hi kale amate in ni nuam ngawl uh hi.



²⁰Tuaciang Pathian thaa in thiampi Jehoiada ii tapa Zechariah uk hi. Ama sia mipite mu theina ah dingin amate tungah, “Topa Pathian in, banghangin a thupiakte zui ngawlin noma le noma tungah siatna tungsak nu ziam! ci in thu dongh hi. Note in ama nusia nu hi, tua hu in ama in note hong nusia hi!” ci in au hi.

²¹Joash Kumpipa in Zechariah a tha sawmna sia pawmin, kumpipa ii thu piakna taw mipite in Biakinn tual ah Zechariah suang taw deanglum uh hi.

²²Joash Kumpipa in Zechariah ii pa Jehoiada ii ama tungah a thumaan nasepnate mangil in, Zechariah that hi. Zechariah in a thi dektak ciang, “Na vawt uh sia Topa in mu in note daan hong pia taken!” ci in au hi.

Joash ii Ngam ukna A bona

²³Tua kum khuakhal hun ciang Syria ngalkapte in Judah ngam le Jerusalem khua simin a lampui theampo thatin vanh tam mama sutin Damacus ah siapui hi.

²⁴Syria ngalkapte tawm ahitazong, Judah mite in a taangpupite ii Pathian Topa a taisat hu in Topa in a tam mama zaw Judah ngalkapte zosak hi. Hi bangin Joash kumpipa sia daan thuaksak hi.

²⁵Ama sia ngal kisimna ah nasia takin liam a, tuaciang a ngalte ii a nungkin zawkciang a khutnuai ulian niite in thasawmin thiampi Jahoiada ii tapa a thalup hu in a phulamin a lupna tungah thatlum hi. Ama sia kumpi thaah ah kiphum ngawlin David Khuapi sungah kiphum hi.

²⁶(Joash a suamte sia Ammon numei Shimeath ii tapa Zabad le Moab numei Shimrith ii tapa Jehozabad ahi hi.)

²⁷Kumpipate ii Tangthu Laibu Thiangsonna sungah Joash ii tapate ii tangthu, ama atu in kamsangte kamsaanna le Biakinn a pua kikna a ki tepteena sungah kihel hi. A tapa Amaziah in a kumpiza laih hi.

Khang Tangthu Niina 25

Judah Kumpipa Amaziah (2Kumpite 14.2-6)



¹Amaziah sia kum kul le kum nga a phakin kumpi suak a, Jerusalem pan kum kul le kum kua sung uk hi. A nu sia Jerusalem khua mi Jehoaddin ahi hi.

²Ama in Pathian lungdamsak ahitazong a thin sung theampo pia ngawl hi.

³Ama in a ngamsung kho takin a uk thei po ciang, a pa a that a khutnuai uliante that hi.

⁴Ahihang ama in Moses Thukham sung a, Topa thupiak bang zui in a khutnuai ulian te ii tate that ngawl hi. Moses Thukham sungah: “A tate ii khialna hangin a nu le a pa kithat ngawl tu a, ta bangma in a nu le a pa khialna hangin a tate kithat ngawl tu hi; mihing khat sia ama mama ii vawt khialna hang bekin kithisak tu hi,” ci in om hi.

Edom Ngam A simna

(2Kumpite 14.7)

⁵Amaziah Kumpipa in Judah le Benjamin minamte sung pan pasal theampo ngalkap a tum tu in khawmtua a; a be a phung zui in khen a, tulkhath uk le zakhat uk tu in ngalkap uliante koi hi. Kum kul le a tungsia theampo kihel a, a vekpi in 300,000 pha hi. Amate sia ngalsim tu in a tealtuam, ngalsim thei paih tu lum le tei toai thiam sa te vive ahi uh hi.

⁶Tua bek dom ngawlin ama in ngun ton li bang thaman pia in, Israel ngam panin ngalkap 100,000 cial hi.

⁷Ahihang kamsang khat kumpipa kungah pai a, kumpipa tungah “Hi Israel ngalkapte nang atu in la heak in. Hisaksang Kumpi ngam pan mihingte Topa in ompui ngawl hi.

⁸Amate kihel le ngal kisimna ah nang hong thahatsak zaw tu hi, ci in um tha tu ni hi, ahihang zawna le lelvaang a nei sia Pathian hi a, ama in na ngalte hong zosak tu hi,” ci hi.

⁹Amaziah Kumpipa in kamsangpa tungah, “Tuabang hi thong le ka piak sa ngunte theampo koibang hi tu khi ziam? ” ci in dongh hi. Kamsangpa in, “Tuasia sangin a tamzaw Topa in nang hong pia kik thei hi,” ci in zo hi.



¹⁰Tuabangin Amaziah in a cial ngalkapte a ngam ah ciasak kik hi. Tua hu in Israel ngalkapte sia Judah mite tungah thin uuk mama in a ngam ah cia uh hi.

¹¹Amaziah in ama le ama kihansua in Ci Kuam ah a ngalkapte paipui hi. Tua munah amate in Edom ngalkapte simin tulsawm thatin a dang tulsawm man uh hi.

¹²Tuaciang amate in a mat uhte sia Sela khuapi liang tungdawn ah paipui in, tua mun pan sawnsukin, a nuai suang tungah thi siatsak hi.

¹³Tua hun laitakin Amaziah ii ama taw ngalsim khawm tu in a oai ngawl Israel ngalkapte in Samaria le Beth Horon kilaklaw ah a om Judah khuapite sim a, pasal tulthum thatin, vanh tam mama laaksak uh hi.

¹⁴Amaziah sia Edom ngalkapte zo in a cia kik ciang, ama in Edomte ii biak milimte siapui in, a pathian in vawt a, bia in, tuate mai ah ngimnamtui hal uh hi.

¹⁵Tuabangin a ngamtat hu in Amaziah tungahTopa thin uuk a, kamsang khat paisak hi. Kamsangpa in, “Nang khut sung pan ngangawn in a mihingte a hu zo ngawl ngamdang pathiante banghangin bia ni ziam?” ci in Amaziah kumpipa dongh hi.

¹⁶Tuasia ciang Amaziah in, “Bang hunin kumpipa ngaisutna pia tu in hong koi khu ziam?. Pau nawn heak in, na pau lai le hong that tu khi hi!” ci hi. Kamsangpa sia pau nawn ngawl ahihang, a pau tawp ma in, “Hi bangin na sep hu le ka thu na nit ngawl na hangin nangma susia tu inTopa in khensat zo hi, ci sia tu in ka he hi,” ci hi.

Israel te A simna

(2Kumpite 14.8-20)

¹⁷Judah Kumpipa Amaziah le ama thu dokte in Israel ngam sim tu in sawm uh hi. Tua hu in ama in Jehoahaz ii tapa, Jehu ii tupa Israel Kumpipa Jehoash tungah thu puakin sim tu in thato hi.

¹⁸Jehoash in Amaziah tungah a zokikna panin: “Khatvei lai in Lebanon Mual tungah lingkung khat in cedar thingkung tungah kam vaitha a: ‘Ka tapa zi tu



in na tanu hong pia tan,' ci hi. Nganhing ngilo khat pai in tua lingkung sia siikcil hi

¹⁹Tu in Amaziah awng Edomte na zaw hu in na kiphasak hi; ahihang na inn ah om lete kong oai zaw hi. Banghangin nangma le na minamte ngim nga natu bek in vaihawm vealvul ni ziam?" ci hi.

²⁰Ahihang Amaziah in tua thu nadon ngawl hi. Hi bang a Amaziah ii a ngallel tu sia Pathian deina ahi hi. Banghangziam cile ama in Edom mite ii milim a biak hang ahi hi.

²¹Tuabangin Israel Kumpipa Jehoash in Judah Kumpipa Amaziah sim tu in kuan hi. Amate Judah ngam Beth Shemesh ah kisim a,

²²Judah ngalkapte ngallel in, a inn tek ah tai siat uh hi.

²³Jehoash in Amaziah manin Jerusalem ah paipui hi. Tua munah ama in Jerusalem khua uumna luphung sia Ephraim kongpi panin Khuakingh Kongpi ciang kaih zanii a sau sia sutham uh hi.

²⁴Ama in Biakinn sung pan a suu ngun le kham te theampo, Obed Edom ii suan le paalte ii a cin Biakinn vanhte le kumpi inn ah sum le paai theampo Samaria ah ciapui siat hi. A ngalmatte zongh ciapui siat hi.

²⁵Judah Kumpipa Amaziah sia Israel Kumpipa Jehoash sangin kum sawm le kum nga a khan sau zaw hi.

²⁶Amaziah ii ngamukna a kipat pan kipan a tawpna dong a vawt dangte theampo *Judah le Israel Kumpipate Tangthu* sungah a cingin kiciamtee hi.

²⁷Amaziah in Topaa langpan hun pan kipan Jerusalem khua ah Amaziah sia kitha sawm tawntung hi. A khakbel ciang ama sia Lachish khuapi ah tai hi, ahihang a ngalte in zui in tua munah that hi.

²⁸A luang sia siphu tungah pua in Jerusalem David khuapi sung, kumpite thaah ah kiphum hi.

Khang Tangthu Niina 26

Judah Kumpipa Uzziah
(2Kumpite 14.21-22; 15.1-7)



¹Judah mite theampo in kum sawm le kum luk a pha Amaziah ii tapa Uzziah sia a pa' kumpiza laih tu in teal uh hi.

²(A pa Amaziah ii thi zawkciang Uzziah in Elath khua la kikin pua kik hi.)

³Uzziah sia kum sawm le kum luk a phakin kumpi suak a, ama in Jerusalem khua pan kum sawmnga le kum nii sung uk hi. A nu sia Jerusalem khua mi Jecoliah ahi hi.

⁴A pa ngamtat zui in a pha in ngamta a, Topa lungdamsak hi.

⁵Biakna sangah a thudok Zechariah ii nuntak sung teng Uzziah in thumaan takin Topa ii na seam ahikom Pathian in ama thupha pia hi.

⁶Uzziah in Philistine ngam pai in sim hi. Ama in Gath, Jamnia le Ashdod khuapi uumna luphungte sutham in Ashdod nai le Philistine ngam mun dangte ah kulh taw a ki uum khuapite saat hi.

⁷Pathian in Uzziah sia Philistinete Gurbaal ah a teang Arab te le Meun te zosak hi.

⁸Ammonte in Uzziah tungah phiangshia pia in, ama sia a vaanglian mama ahikom a minthanna sia Egypt ngam dong ngangawn ah kizel hi.

⁹Uzziah in Khuakingh Kongpi, Kuam Kongpi le luphung kiheakna kinghte ah ngal vilna tusaangte sa in Jerusalem uumna kulh sia khosak vaial hi.

¹⁰Ama in ngam kolhna zongh ah kulh taw a ki uum tusaangte sa in, nganno tam mama nei ahikom nitumna sang mualpeang le zaangtamte ah tuikhuk tam ma to hi. Lothaw nasep dik sa ahikom, ama in mualtung ngamte le lei phana theampo ah sapit huan vawt tu in a ngam mite hanthawn hi.

¹¹Ama in ngalsim thei paih tu ngalkap tam mama nei hi. Tuata tepteena sia kumpipa khutnuai ah naseam khat ahi Hananiah in lampui a, kumpipa thuzeakpi nii te Jeiel le Maaseiah in len uh hi.

¹²Tua ngalkap honte sia ngalkapmaang 2,600 in uk hi.

¹³Amate ii khutnuai ah kumpipa ii ngalte a zo zo tatak tu in a sim thei ngalkap thiam 307,500 om hi.

¹⁴Uzziah in a ngalkapte sia lum, tei, thik lukhu, thik laktong, thal le thaltangte, saili suangtang dongin pia hi.

¹⁵Jerusalem khua ngal vilna tusaang le khuapi luphung kinghte pan thal le saili toaite ii zak tu in ngalhiam vawt thiamte in ngalhiam tuatuamte vawt uh hi. Pathian ii ompui hu in Uzziah sia thahat mama a, mun theampo ah minthang hi.

A Kiphatsak hu in Uzziah Daan kipia

¹⁶Ahihang Uzziah Kumpipa a tha a hat ciang kisathei vaial a, a kisaktheina in ama puksak hi. Ama in Topa a Pathian a thusim ngawl hu in ngimnamtui halna biaknatau tungah ngimnamtui hal tu in Biakinn sungah pai hi.

¹⁷Thiampi Azariah le, a hat mama le a hang mama thiampi sawmliatte in

¹⁸kumpipa nalh tu in a nungzui uh hi. Amate in, “Uzziah awng! Topa tungah ngimnamtui hal tu sia nang nasep hi ngawl hi. Aaron ii suan le paalte ahi thiampite bek sia hi na seam tu in ki tuam koi hi. Hi mun thiangtho nusia in. Topa Pathian tungah khial zo na hikom ama thupha na saang nawn bua hi,” ci uh hi.

¹⁹Uzziah sia Biakinn sung ngimnamtui halna biaknatau kungah ngimnamtui halna pakan toai in ding hi. Ama sia thiampite tungah thin uuk ahikom thakhat thu in a talki tungah phaak natna theng hi.

²⁰Azariah le thiampi dangte in kumpipa talki tungah phaak natna a nga sia salh in lau a, Biakinn sung pan hawlkeak uh hi. Ama sia Topain daan pia zo ahikom Biakinn sung pan manlang takin pusuak hi.

²¹Uzziah Kumpipa sia tua hun pan a nuntak sung teng theampo phak natna a nga hu in mihing nin suak hi. Biakinn sungah tum thei nawn ngawlin ama inn bek ah om a, a nasep theampo pan kitongsakin, a tapa Jotham in ngam uk hi.

²²Uzziah Kumpipa ii kumpi a sep sung, a nasep dang tuatuamte theampo sia Amos tapa, kamsang Isaiah in laibu sungah ciamtee siat hi.



²³Uzziah sia thi a, kumpi thaan leitangh tungah kiphum hi, ahihang a natna hu in ama sia kumpite thaankuul ah kiphum ngawl hi. A tapa Jotham in a kumpiza laih hi.

Khang Tangthu Niina 27

Judah Kumpipa Jotham

(2Kumpite 15.32-38)

¹Jotham sia kum kul le kum nga a phakin kumpi suak a, ama in Jerusalem pan kum sawm le kum luk sung uk hi. A nu sia Zadok ii tanu Jerushah ahi hi.

²Ama in a pa ngamtat zui in a pha ngamta a, Topa a lungdam sak nate seam a, a pa bangin Biakinn sungah ngimnamtui halin mawna zongh vawt ngawl hi, a mipite ahile mawna vawt veve uh hi.

³Biakinn Saksang Kongpi a sa sia le Jerusalem khuasung Ophel a kicina munah khuapi uumna luphung nasia mama a, a sa pa sia Jotham ahi hi.

⁴Ama in Judah ngam mualtung ngamte ah khua tam ma saatin dui sungah kulh le tusaangte sa hi.

⁵Ama in Ammon kumpipa le a ngalkapte simin zo hi. Tuaciang ama in ama tungah Ammon mite ii a nuai a, phiangshia te kum simin kum thum sung a piak natu in sawl hi, tuate sia: ngun ton li, zungtaang seau tul sawmnga le mangtaang khum tul sawmnga ahi hi.

⁶Topa a Pathian ii thu, maan takin a zui hu in Jotham sia kumpi thahat mama suak hi.

⁷Jotham ii kumpi a sep sung teng a nasep dadangte a ngal simnate le a paiziate sia *Israel le Judah Kumpipate Tangthu* sungah a cingin kiciamtee hi.

⁸Jotham sia kum kul le kum nga a phak kumin kumpi suak a, ama in Jerusalem pan kum sawm le kum luk sung uk hi.

⁹Ama thi a, David Khuapi sungah kiphum hi. A tapa Ahaz in a kumpiza laih hi.

Khang Tangthu Niina 28

Judah Kumpipa Ahaz



(2Kumpite 16.1-4)

¹Ahaz sia kum kul a phakin kumpi suak a, ama in Jerusalem pan kum sawm le kum luk sung uk hi. Ama in a taangpupi David Kumpipa ii ngamtatna zui ngawl a, Topa a lungdamsak tute vawt ngawlin,

²Israel kumpite ii ngamtatna zui zaw hi. Ama in thik taw Baal milimte vawtin,

³Hinnom Kuam ah ngimnamtui halin, Israel mite Canaan ngam a tum lai a, Topa ii a ngam sung pan a nawkeak mite ii a zak a kiihuai nasepte zui in a tapate ngangawn meihal biakpiakna in milim tungah pia hi.

⁴Mualtung le thinglim nuai theampo doai biate ii biakna munte ah Ahaz in biakpiakna nei in ngimnamtui hal hi.

Syria le Israel te taw Ngal kisimna

(2Kumpite 16.5)

⁵⁻⁶Ahaz Kumpipa mawna hangin Topa a Pathian in Syria kumpipa in ama zosak a, Judah mi tam mama manin Damascus ah thong taak tu in paipui hi. Topa in Israel Kumpipa, Remaliah ii tapa Pekah zongh in Ahaz zosak a, ni khat thu in Judah ngalkap ngalhangbel 120,000 thatsak hi. Judah mite in a taangpupite ii Pathian Topa a nusiak hu in hi bangin Topa in thuaksak hi.

⁷Israel ngalkap Zichri a kici pa in Ahaz Kumpipa ii tapa Maaseiah, kumpi inn uk Azrikam le kumpipa zom a thu nei Elkanah that hi.

⁸Judah mite sia amate mipui hi napi Israel ngalkapte in numei le patang 200,000 thongtaak tu in man a, a suu tol vanh tam mama te taw Samaria ah ciapui uh hi.

Kamsangpa Oded

⁹Oded kici Topa kamsang pa khat sia Samaria khuapi ah teang hi. Ama in ngalsimna pan Judah mi thongtaakte taw hong cia kik Israel ngalkap honte sia khuapi sung a tum dektak ciang muak a, amate tungah, “Na taangpupite Pathian Topa sia Judahte tungah a thin uuk hu in amate hong zosak hi, ahihang na thin uh uuk a, ngongtat in amate tam lei na thalup uh sia ama in za zo hi.



¹⁰Tu in Jerusalem le Judah ngam panin numei pasalte sila in zak na sawm uh hi. Topa na Pathian tungah khialna na vawt uh sia kihe ngawl nu ziam?.

¹¹Hong ngai tavun! Hi na ngalmatte sia na suapui numei le na suapui pasalte veu ahi hi. Tha kik siat vun, tua ahibuale Topa a thin uuk in note daan hong pia tu hi,” ci hi.

¹²Saksang kumpi ngam pan a minthang mihing li ahi Jehohanan ii tapa Azariah, Meshillemoth ii tapa Berechiah, Shallum ii tapa Jehizkiah le Hadlai ii tapa Amasa te zongh in ngalkapte ngamatna langpan uh hi.

¹³Amate in, “Na ngalmatte hi munah hong paipui heak vun! Topa tungah ih khial zo a, eima daan hong piak khom natu in a thin ih uuksak zo hi. Tu in ih khialna a tam vaial natu in hi bangin sep na sawm uh hi,” ci uh hi.

¹⁴Tuasia ciang ngalkap honte in a thongtaakte le a suutol vanhte sia mipite le a lampuite tungah aap in,

¹⁵a suutol nik le puante a thongtaakte tungah hawm tu in tua mihing li te sawl uh hi. Amate in a silh tu in nik le puan le peangdapte pia a, tui le ante pia in a meimate olive thau noisak hi. Lampai zo ngawlte laa tungah tosak in a ngalmat mite theampo, Judah ngam Palm khua a kici Jericho khua dong puak uh hi. Tua zawkciang Israel mite Samaria ah cia uh hi.

Ahaz in Assyria ii Huna Ngen

(2Kumpite 16.7-9)

¹⁶⁻¹⁷Edomte in Judah ngam sim kik a, thongtaak tu in tam mama man hi, tua ahikom Ahaz Kumpipa in Assyria Kumpipa Tiglath Pileser tungah huna a puak tu in ngen hi.

¹⁸Tua laitak ma in Philistine mite in nitumna sang mualpeang le Judah thangsang a om khuapite sim hi. Amate in Beth Shemesh, Aijalon le Gederoth khuate a laak zawkciang Soco, Timnah le Gimzo khuapite le a kiim ah khua note la in, tua munah teang suak uh hi.

¹⁹Judah Kumpipa Ahaz in a mipite ii a nga tuakte pheltan a, amate tungah thumaan ngawl taw naseam a, Topa nial ahikomin Judah ngam ah Topa in haksatna tungsak hi.



²⁰Assyria kumpipa in Ahaz kumpipa hu zaw ngawlin langpan in thin ngimna pia zaw hi.

²¹Tuasia ciangin Ahaz in Biakinn, kumpi inn le Judah mi lampuite ii inn panin kham la in Assyria ngam uk lianpa tungah pia hi. Ahitazong Assyria ngam uk lianpa in hu nuam tuan ngawl hi.

Ahaz ii Khialnate

²²Ahaz sia a thin ngimbel hun hong thet ciang Topa tungah nidang sangin khialna vawt zaw lai hi.

²³Ama in ama a zo Syria mite ii pathiante tungah sangaw biakpiakna pia hi. Ama in, “Syria pathiante in Syria kumpite a hu bangma in, amate sangaw biakpiakna nei leng kei zongh hong hu tu hi,” ci hi. Tuasia hu in ama le a ngam mite tungah tuasiatna tung hi.

²⁴Tua bek dom ngawlin ama in, Biakinn sung vanhzak theampo la in sutham siat hi. Ama in Topa Biakinn sia khakbil in Jerusalem khua sungah biaknatau sa kawkoai hi.

²⁵Judah ngam khuapite le khua lian theampo ah ama in ngamdang te pathiante tungah ngimnamtui hal natu in doai biate ii biakna mun vawt kawkoai hi. Tuabang a vawt hu in ama in a taangpupite Pathian Topa thin uukna ama tungah thengsak hi.

²⁶Kumpi a sep sungin a dang a vawtte theampo sia a kipat pan kipan a tawp dongin *Judahte le Israel kumpipate Tangthu* sungah kiciamtee hi.

²⁷Kumpipa Ahaz thi a, kumpite thaan ah kiphum ngawlin Jerusalem khua sungah kiphum hi. A tapa Hezekiah in a kumpiza laih hi.

Khang Tangthu Niina 29

Judah Kumpipa Hezekiah

(2Kumpite 18.1-3)

¹Hezekiah sia kum kul le kum nga a phak kumin kumpi suak a, ama in Jerusalem khua pan kum kul le kum kua sung uk hi. A nu sia Zechariah ii tanu Abijah ahi hi.



²A taangpupi David kumpipa ngamtat zui a, ama in Topa a lungdamsak tu nate seam hi.

Biakinn Thiansuana

³Hezekiah ii kumpi a sua kum a tha khat tha in ama in Biakinn kongpите hong kik in pua kik hi.

⁴Ama in Biakinn nisuana sang leitual ah thiampite le Levite pawl khat khawmtua in,

⁵thu son hi, ama in “Levi te awng noma le noma kithiansua vun a, na taangpupite Pathian Topa Biakinn thiangthosak vun. Biakinn a ninsak vanhte theampo Biakinn pan vawk siat vun.

⁶Ih taangpupite sia Topa ih Pathian tungah thumaan ngawlin Topa diksak ngawlte vawt uh hi. Amate in Topa nusia in ama teenna mun nungngat uh hi.

⁷Amate in Biakinn kongkhate khakbil in meivakte mit siat uh a, Israel Pathian ii Biakinn sungah ngimnamtuite hal nawn ngawlin; meihai biakpiaknate vawt nawn ngawl uh hi.

⁸Tua hu in Topa sia Judah le Jerusalem tungah thin uuk mama a, ama ii a vawt thute hangin a kuama po ingh in lau uh hi. Tua thu na he tek uh hi.

⁹Ih pate sia ngal sungah thi uh a, ih zite le ih tate sia thongtaak tu in kipaipui uh hi.

¹⁰“Hi bang teng ahikom Topa Israel Pathian sia ei tungah a thin a uuk nawn ngawl natu in ama taw thuciamna khat vawt tu in ka khensat zo hi.

¹¹Ka tate awng, hun bothongsak heak vun. Note sia ama tungah ngimnamtui hal tu le ama bia tu in mipite lampui tu a, Topa ii hong teal sate na hi uh hi,” ci hi.

¹²⁻¹⁴A nuai a Levite sia tua munah om hi: Kohath be le phung pan Amasai ii tapa Mahath le Azariah ii tapa Joel Merari be le phung pan Abdi ii tapa Kish le Jehallelel ii tapa Azariah Gershon be le phung pan Zimnah ii tapa Joah le Joah ii tapa Eden Elizaphan be le phung pan Shimri le Jeuel Asaph be le



phung pan Zechariah le Mattaniah Neman be le phung pan Jehuel le Shimei Jeduthun be le phung pan Shemaiah le Uzziel

¹⁵Hi mite in Levi mipuite khawmtua in amate le amate zeksa ngeina bang kithiansua uh hi. Tua zawkciang kumpipa thupiak bangin Biakinn sia Topa ii thukham om bangin thiansua tu in kipan uh hi.

¹⁶Thiampite sia Biakinn thiansua tu in Biakinn sungah tumin zeksa ngeina bangin a thiangtho ngawl vanh theampo Biakinn leitual ah pusua uh hi. Tua mun panin Levi te in tua vanhte khuapi pua sang Kidron Kuam ah nawn uh hi.

¹⁷A nasep uh sia ni masabel tha masabel ni in kipan a, ni liat ni in zo siat hi, biakinn sung tumna khaan zongh kihel hi. Tuaciang amate in a dang ni liat sungma seam a, ni sawm le ni luk ni dong biakpiakna vawt thei natu in Biakinn pua uh hi.

Biakinn Ki aap kik

¹⁸Levite in Hezekiah Kumpipa tungah thu a zaaksakna pan, “Biakinn buppi meihal biakpiak natu in biaknatau anluum thiangtho koina sabuai le vanhzak te theampo zeksa ngeina om bangin ka thiansua siat zo uh hi.

¹⁹Ahaz Kumpipa ii Topa thu a nit ngawl hun sungin a laak vanhte theampo zongh kong paipui kik zo uh a, Pathian tungah ka aap kik zo uh hi. Tuat theampo Topa ii biaknatau mai ah om hi,” ci uh hi.

²⁰Hezekiah Kumpipa in haisaang ngawlin khuasung lampuite kaikhawm in, Biakinn ah pai tek uh hi.

²¹Kumpipa baangkua le Judah mipite maw phel natu le Topa Biakinn thiansak natu, sangaw biakpiak natu in amate in khuita salu, tuuta salu, tuuno salu le keal salu keng uh hi. Kumpipa in tua ngannote biaknatau tungah sangaw biakpiakna in zangh tu in Aaron suan le paal thiampite sawl hi.

²²Thiampite in a masabel in khuitalte ngo a, tuaciang tuuta te, tuunote ngo in khat sim ii chi sia biaknatau tungah the uh hi.



²³A khakbelin amate in kealte paipui a, kumpipa le biakna a pia dangte in kealte tungah a khut nga uh hi.

²⁴Tuaciang thiampite in kealte ngo in, kumpipa in Israel mite theampo atu in meihal biakpiakna le mawmai biakpiakna vawt tu, a thupiak bangin tua chisan sia mipite mawmai natu in biaknatau tungah bua uh hi.

²⁵Topa in David Kumpipa atu in kamsang a seam kamsang Gad le kamsang Nathan tungtawnin David tungah a piak ngeinate Hezekiah Kumpipa in zui in; Levite Biakinn sungah, tengtong le daalkopsai te,

²⁶David Kumpipa ii a zak tumtheite taw panmun lasak hi. Thiampite zongh lemle taw tua lai ah ding hi.

²⁷Meihal biakpiakna pia tu in Hezekiah in thupia a; biakpiakna a kipat ciang mipite in Topa pokna la sa in tumthei thiam te in lemle le tumthei dang theampo tum tu in kipan uh hi.

²⁸Tua munah a om mi theampo in Pathian bia tu kingawm in la sate le tumthei thiamte in biakpiaknate a kihal siat dong la sa in tumtheite tum suak uh hi.

²⁹Tuaciang Hezekiah Kumpipa le mipite theampo khupdin in Pathian bia uh hi.

³⁰Hezekiah Kumpipa le Judah ngam lampuite in David le kamsang Asaph ii a phua pokna late Topa tungahsak tu in Levi mite sawl uh hi. A sawl bangma in a kuama po in lungdam na lianpi taw khupdin in la sa a, Pathian bia uh hi.

³¹Hezekiah in mipite tungah, “Tu in note zeksa ngeina bangin thiangtho zo na hi uh ciang Topa tungah lungdam biakpiaknate hong paipui tavun,” ci hi. A sawl bangin amate zongh in vawt a, pawlkhate in meihal biak natu in amate thu in ngannote paipui uh hi.

³²Amate in Topa tungah meihal biakpiak natu in khuita 70, tuu 100 le tuuno 200 hong paipui uh hi,

³³amate in mipite neak tu in khuita 600 le tuu 3,000 zongh paipui uh hi.



³⁴Nganno hi za a ngo tu in thiampite kicing zo ngawl ahikom Levite in nasep a man dong hu uh hi. Tua hun pan kipan thiampite a tam zaw zeksa ngeina bangin kithiansua zo uh hi. (Kithiansuana thu ah thiampite sangin Levite thumaan zaw uh hi.)

³⁵Pum hal biakpiakna ah a piak bek hi ngawlin mipite neak tu nganno thaute meihal tu le meihal biakpiakna taw a kizom zu buak tu zongh thiampite ii nasep ahi hi. Tuabangin Biakinn ah Pathian biakna kipan kik hi.

³⁶Pathian huna taw tua nasepnate manlang takin man ahikom Hezekiah Kumpipa le mipite lungdam mama hi.

Khang Tangthu Niina 30

Paisan Poai vawt tu Kinginna

¹⁻³Zeksa ngeina om bangin a kithiansua sa thiampi a kicing om ngawl lai a, mipite zongh a kicing in Jerusalem khua theng kim ngawl lai ahikom mipite ii Paisan Poai sia tha khat tha sung vawt ngei hunin vawt thei ngawl uh hi. Tua ahikom Hezekiah Kumpipa, a khutnuai uliante le Jerusalem mite in tha ni tha sung Paisan Poai vawt tu in lungkim a, kumpipa in Israel le Judah mite theampo tua thu zasak siat hi. Israel Pathian Topa minthan natu in Jerusalem Biakinn ah Paisan Poai hong sim natu in Hezekiah Kumpipa in Ephraim le Manasseh minamte tungah kin vawtin sapna lai thaak hi.

⁴Kumpipa le a mite sia amate tupna dik sa uh hi,

⁵tu ahikom, amate insaksang a om Dan pan thangsang Beersheba dong, Israel mite theampo kum dang sangin, a tam zaw Jerusalem ah pai tekin thukham om bangin Paisan Poai vawt tu in sam uh hi.

⁶Kumpipa le a khutnuai uliante ii thu piakna om bangin Judah ngam le Israel ngam sungah kamtaite paisak kawkoai in sapna lai hi bangin at hi. “Israel mite awng, Assyriate ii ih ngam hong zawna pan na suakta uh hi. Tu in Abraham Pathian, Isaac Pathian, Jacob Pathian Topazuan kik tavun, tua hile ama zongh no kung hong zuan kik tu hi.



⁷Amate Pathian Topa tungah a thumaan ngawl, na taangpupite le Israel na mipuite bangin om heak vun. Na heak sa bangma in, Topain nasia takin daan thuaksak hi.

⁸Amate bangin thinpui ngawlin Topa thu ni vun. Topa note Pathian in a tawntungin a thianthosak sa Jerusalem Biakinn ah hong pai in ama bia vun, tua hile no tungah ama in hong thin uuk nawn ngawl tu hi.

⁹Topa na zuan kik uh le na suapuite paipui a, thong ah a koite in amate khuangai huai sa in inn ah hong ciasak kik tu hi. Topa note Pathian sia a dik, a cingh le ngual hesuak thei pa hi a, ama kungah na heak kik uh le ama in note hong saang tu hi,” ci hi.

¹⁰Kamtaite sia Ephramte le Manasseh minamte ngamkhen sung khuapi sim, saksang khakbel Zebulun minamte teenna dong theng ahihang mite in amate nuisan in selno uh hi.

¹¹Tua kawm pan Asher, Manasseh le Zebulun minamte sung pan Jerusalem khua ah a pai nuam pawlkhat om uh hi.

¹²Judah mite sungah Pathian in naseam a, kumpipa le a khutnuai uliante thupiak bangin Topa deina zui tu in mihonpite in a kibang ngaisutna thin neisak hi.

Paisan Paoi Kivawt

¹³Tha nii tha in Tol Kisaw Ngawl Anluum Poai vawt tu in mihon hon pui khat Jerusalem ah kikhawm uh hi.

¹⁴Amate in Jerusalem khua sungah sangaw biakpiakna le ngimnamtui halna in a kizangh biaknataute theampo la in Kidron Kuamah vawk uh hi.

¹⁵Tuaciang tua tha ni sawm le ni li ni in amate in Paisan Poai atu tuute ngo uh hi. A zeksa thiansuana a vawt ngawl lai thiampite le Levite sia a maizum lei hu in Topa mai ah amate le amate ki aap a; tua ahiciang tu in amate in biakinn sungah meihal biakpiakna pia thei hi.



¹⁶Pathian ii mihing Moses ii Thukham sungah a thupiak bangin amate in Biakinn sungah omna la uh hi. Levite in biakpiakna ah a kizangh nganno chisante thiampite tungah pia in thiampite in biaknatau tungah the uh hi.

¹⁷Mipite tam mama sia zeksa thianthona nei ngawl ahikom amate in Pathian Paisan Poai tuute ngo thei ngawl uh a, tua ahikom amate taangin Levite in ngo in Topa tungah tuuno te aap uh hi.

¹⁸Tua bek dom ngawlin Ephraim, Manasseh, Issachar le Zebulun minamte sung panin hong pai mihing tam mama te in zeksa kithiansuana vawt ngawl ahikom amate in Paisan Poai sia ngeina ngawl bang in vawt uh hi. Hezekiah Kumpipa in amate atu in hi bangin thungetsak hi:

¹⁹“Ka taangpupite ii Pathian Topa awng, amate sia a zeksa kithiansuana nei ngawl ahitazong thinsung takpi taw nang hong bia ahikom na thin phatna taw amate maisak in,” ci hi.

²⁰Topa in Hezekiah ii thungetna sia saangin; tua mite mawna maisak a, ngim ngasak ngawl hi.

²¹Jerusalem khua ah a kikhawm mite theampo in Tol Kisaw Ngawl Anluum Poai sia lungdamna lianpi taw ni sali sung vawt a; ni khat zawkciang ni khat thiampite le Levite in Topa sia a tha neiza taw pok uh hi.

²²Topa biakna ah lampui a thiam Levite sia Hezekiah in pok hi.

Paisan Niina

A taangpupite ii Pathian Topa pokna in ni sali sung sangaw biakpiakna a nei zawkciang, khensat uh hi,

²³amate theampo in a dang ni sali sung poai vawt tu in khensat hi. Tuabangin amate in lungdamna taw poai vawt uh hi.

²⁴Hezekiah Kumpipa in tua poai ah mipite neak tu in khuita 1,000 le tuu 7,000 pia in a khutnuai uliante in a dang khuita 1,000 le tuu 10,000 pia uh hi. Thiampi tam mama in zeksa kithiansuana vawt uh hi.



²⁵Tua ahikom Judah mi, thiampite, Levite,saksang ngam pan hong pai mihonte le Israel le Judah ngam sungah a teang suak ngamdang mite — a kuama po lungdam uh hi.

²⁶Jerusalem khua sia lungdamna taw kidim hi, banghangziam cile tuabang lungdamna sia David ii tapa Solomon Kumpipa khan zawk pan kipan om ngei ngawl hi.

²⁷Thiampite le Levite in mipite atu in Topa tungah thupha ngetsak hi. Vantung a inn panin amate thungetna Pathian in za a, saang hi.

Khang Tangthu Niina 31

Hezekiah in Biakna Ngeinate Pua kik

¹Poi a man zawkciang Israel mite theampo Judah ngam khuapite ah pai in, khansuangte sutham in Asherah pathiannu ii limte phuktan in biaknatau le doai biate ii biakna mun theampo sutham siat hi. Amate in tuabangma in a taanglai Judah ngam theampo Ephraim, Benjamin le Manasseh ngamkhen te ah a vawt zawkciang a inn zuan siat uh hi.

²Hezekiah Kumpipa in thiampite le Levite ii nasep hawmna puapha kik a, tuabangin amate in nasep nei tek uh hi. Amate nasep sia meihal biakpiakna, kipawlkhop biakpiakna le Biakinn sung biakpiakna ah kihelna le Biakinn sung khaan sim ah Pathian min pokna le Pathian tungah lungdamkonate ahi hi.

³Zing le nitak in meihal biakpiak natu le Sabbath ni le Thathak Poaite atu ahizong,Topa thukham om bangin vawt a kul Poi dangte atu ahizong Hezekiah Kumpipa in a khuihon le a tuu honte sung pan nganno te pia hi.

⁴Tua bek dom ngawlin Topa Pathian thukham om bangin thiampite le Levite in a hun nei zaza a piak thei natu in Jerusalem khua ah a om mihonpite in piak tu a kul biakpiaknate a piak tek natu in kumpipa in Jerusalem khua mite thupia hi.



⁵Tuabangin thu a piak zawk pociang Israel mite in a letsong phabel ahi antang, zu, olive thau, khuaitui le a dang lo ante le a neisa theampo sung pan sawm a khat zongh paipui hi.

⁶Judah ngamsung khuapite ah a teang mite theampo in a khui le a tuute sawm a khat puak uh a, amate PathianTopa tungah a aap sa letsong tam mama zongh puak si uh hi.

⁷Tha thum tha pan kipan letsong piak kipan a, tha li sung a kipee paisuakin pia uh hi.

⁸Hezekiah Kumpipa le a khutnuai uliante in tuabangza a tam letsong a kipiak a mu uh ciang, amate in Topa le Israel a mite pok hi.

⁹Tuabang letsong a piakna thu kumpipa in thiampite le Levite tungah a son ciang,

¹⁰Zadok ii suan le paal khat ahi Thiampi Saang Azariah in kumpipa tungah, “Mihonpite in a letsongte Biakinn ah hong paipui pan kipan, neak le dawn tu kicingin tam mama vaal lai hi. Tu bangza a tam ih nei na sia Topa in a mite thupha hong piak hang ahi hi,” ci hi.

¹¹Kumpipa ii thupiak bangin amate in Biakinn sungah vanh kholna khaante vawtin,

¹²tua khaante sungah letsong le sawm a khatte theampo koi in keamcing uh hi. Amate in tua vanhte sia Levite Conaniah in uksak a, a suapuipa Shimei in husak hi.

¹³Amate khutnuai ah na seam tu in Levite sawm kisee a, tuate sia: Jehiel, Azaziah, Nahath, Asahel, Jerimoth, Jozabad, Eliel, Ismachiah, Mahath le Benaiah te ahi uh hi. Hite theampo sia Hezekiah Kumpipa le Thiampi Saang Azariah thu taw a kikoite veu ahi hi.

¹⁴Biakinn Nisuana sang Kongpi cingpipa Levite Imnah ii tapa Kore sia Topatungah a kipia letsongte saan natu le amate tungah hawmna te ah a ukpa ahi hi.



¹⁵Thiampite teenna khuapi dangte ah tua nasep sia Levi dangte in ama sia thumaan takin hu hi, tuate sia: Eden, Miniamin, Jeshua, Shemaiah, Amariah le Shecaniah ahi uh hi,

¹⁶be le phung zui in hawm ngawl hi. Amate ii Biakinn ah nisim nasep nei pasal kum sawmthum le a tungsia theampo sia amate nasep zui in hawmsak uh hi.

¹⁷Thiampite a be le a phung zui in nasep kipia a, Levite pasal kum kul le a tungsiate a pawl a pawl in nasep kipia hi.

¹⁸Amate ii biakna taw kisai a thiangtho nasep thupite bang hun po in sep tu kingin tu kul ahikom amate theampo a zi a tate le a be dangte taw a min uh kiciamtee siat hi.

¹⁹Thiampi baangkuate sungah a om pasalte atu ahizong, Levite be le phung min ki teptee na sungah a om theampote atu ahizong, an hawmsak tu in, Aaron suan le paalte atu a kisee khuapite sungah a teang thiampite sung pan, tua ahibuale hi khuapite ii neisa ngan tha na munte sung panin tavuan nei pasalte a om hi.

²⁰Judah ngamsung theampo ah, Hezekiah Kumpipa in thumaan leTopa a Pathian ii diksak teng seam hi.

²¹Biakinn a tu a sep theampo ahizong, thukham zuina thu ah ahizong ama in a thinsung takpi taw Pathian tungah a thumaan hu le a kipiak hu in a maa vang hi.

Khang Tangthu Niina 32

Assyriate in Jerusalem Thawmvau.

(2Kumpite 18.13-37; 19.14-19, 35-37; Isa 36.1-22; 37.8-38)

¹Hezekiah Kumpipa in thumaan takin Topa na seam a, hi bang thupiang teng zawkciang Assyria ngam uk lianpa Sennacherib in Judah ngam sim hi. Ama in kulh taw a ki uum khuapite uumci in a ngalkap honte tungah khua uumna luphungte a lampi tu in suklet tu in thupia hi.

²Sennacherib in Jerusalem khuapi zongh sim a sawm hunlam Hezekiah in a heak ciang,

³⁻⁴Assyria ngalkapte Jerusalem khua hong thet ciang a tui neak tu nei heak hen ci a deina in Hezekiah Kumpipa le a khutnuai uliante in khuapi pua sangah a om tuinaakte khakcip tu in khensat uh hi. Uliante lampui in khua mite tam mama kuan tek a, tuinaak theampo khakcip in tuiluang nawn ngawl hi.

⁵Kumpipa in ngal pannate a kho vaial in vawt a, khuapi uumna luphungte puapha in, a tungah ngal vilna tusaangte sa in khuapi uumna pua sangah luphung ciang hi. Tua bek dom ngawlin, ama in Jerusalem khua khen lui niswana sangah a om ngal panna asakte zongh puapha hi. Ama in lum le tei tam mama zongh vawt hi.

⁶Ama in Jerusalem khuapi sung pasal om theampo ngalkapmaangte khutnuai ah koi in khuapi kongpi leitual ah khawm hi. Ama in amate tungah,

⁷“Citak in thin muang vun, Assyria ngam uk lianpa le a ngalkapte kiita heak vun. Ama sangah thahatna sangin ei sangah thahatna nasia zaw hi.

⁸Ama in mihing thahatna nei a, ahihang ei ih hile hong hu tu le ih ngalte hong simsak tu in Topa ih Pathian ih nei hi,” ci hi. Kumpipa ii kammalte in amate thin liansak hi.

⁹Tawmvei zawkciang Sennacherib le a ngalkap honte Lachish ah a om laitakin, Sennacherib in Jerusalem khua ah a om Hezekiah Kumpipa le ama taw omkhawm Judah mite tungah kam a vaithakna panin,

¹⁰“Keima Assyria Ngam uk lianpa Sennacherib in a ki uumci Jerusalem khua sungah na om ngam lai natu uh in bang in thinmuanna hong pia ziam? ci in kong dongh hi.

¹¹Ko khutsung panin Topa na Pathian in hong hun tu hi ci in Hezekiah in note hong son hi, ahihang Hezekiah in note hong theam a, an ngawl tui ngawlin hong thisak tu uh hi.



¹²Topa Pathian biakna munte le biaknatau a sutham siat sia ama Hezekiah hi a, Judah le Jerusalem mite tungah biaknatau khat bek ah Pathian bia in ngimnamtui hal tu in a sawl sia zongh ama ma ahi hi.

¹³Ngamdang mite tungah ka taangpupite le keima in bang vawt ci sia he ngawl nu ziam? Ngamdang khat pawpo ii pathiante in a mite Assyria ngam uk lianpa khutsung theng ngawl tu in hun zo ka na ziam?

¹⁴Bang hunin ka suksiat minamdangte ii pathiante in a ngam sia ko khutsung pan hun ngei na ziam? Tua ahile na pathian in nang hong hun tu hi ci in, bang in hong ngaisunsak ziam?

¹⁵Tu in Hezekiah in tuabangin theamsak heak vun a, lamkhial puisak heak vun . Ama um heak vun! Minam khat pawpo ii pathian in a mite sia Assyria ngam uk lianpa khut sung pan hun zo ngei ngawl hi. Tua ahiciang note pathian in note hong hun takpi zo ngawl tu hi!” ci hi.

¹⁶Assyria uliante in Topa Pathian le Topa naseampa Hezekiah sia, a sia zaw kanin son uh hi.

¹⁷Assyria ngam uk lianpa in Israel te Pathian Topa a zawnsakna in hi bangin lai thaak hi, “Minam dangte pathiante in keima khutsung panin a mite hun zo ngawl hi, Hezekiah pathian zongh in ka khut sung pan a mite hun zo ngawl tu hi,” ci hi.

¹⁸Jerusalem khuapi a ol zaw in a laak thei natu in luphung tungah a om Jerusalem mite a lau natu le a thinkiam natu in Hebrew kam taw, a uliante a aw nei za in au hi.

¹⁹Mihing khut taw a kivawt tawm minamdangte ii pathiante bang lelel in amate in Jerusalemte Pathian son uh hi.

²⁰Tuasia ciang Hezekiah Kumpipa le Amoz ii tapa kamsang Isaiah in Pathian tungah thungen a, huna ngenin au uh hi.

²¹Topa in vantung lalang khat paisakin tua vantung lalang in Assyria ngalkap honte le a ngalkapmaangte that hi. Tua ahikom a ngam uk lianpa sia maimawlin Assyria ngam ah heak kik hi. Ni khat ni in ama ii pathian biakinn

sungah ama a om laitakin a tapate pawlkhat in a namsau uh taw ama thatlum hi.

²² Tuabangin Topa in Hezekiah Kumpipa le Jerusalem khua mite sia Assyria ngam uk lianpa Sennacherib le a ngal dangte khutsung pan suatak hi. Topa in a mihingte sia, kiim le paam ngam theampo taw kilemin teangsak hi.

²³ Mihing tam mama sia Topa tungah biakpiakna vanhte le Hezekiah tungah a piak tu letsongte kengin Jerusalem ah hong paipui uh a, tuabangin tua hun pan kipan minam theampo in Hezekiah sia thasia mama uh hi.

Hezekiah ii Cii natna le A Kiphatsakna

(2Kumpite 20.1-3, 12-19; Is 38.1-3; 39.1-8)

²⁴ Tua hunin Kumpipa Hezekiah sia thi dek takin na hi. Ama in Topa tungah thungen a, Topa in a dam natu lim lak hi.

²⁵ Ahihang Hezekiah sia kiphasak lei in Topa ii ama atu a vawtsak nate hangin lungdamko nuam ngawl hi; tua ahikom Judahte le Jerusalem mite in ngim thuak uh hi.

²⁶ A khakbel ciang Hezekiah le Jerusalem mite a thin kiniamkhiak kik ahikom Topa in amate sia Hezekiah ii thi dong daan pia ngawl hi.

Hezekiah ii Vaangletna le Hauna

²⁷ Hezekiah Kumpipa hau mama a, kuama po in upat hi. Ama in ngun, kham, suangmanpha, hel namtuite, lum le vanh manpha dangte koi natu in innte sa hi.

²⁸ Tuabek dom ngawlin a lo ante, zu le olive thau koina tu innte sa a; khui koi natu in khuibuk le tuute koi natu tuu bukte sa hi.

²⁹ Tua bek dom ngawlin Pathian in tuu le khui tam mama pia in nei le lamh tam mama pia ahikom ama in khuapi tam ma saat hi.

³⁰ Gihon ciktui luanna khaktan in leinuai ah Jerusalem khuapi luphung sungsang mun khat dongin tui luannate a vawt sia zongh Hezekiah Kumpipa ahi hi. A vawt theampo Hezekiah in tangtun a,



³¹A ngam sungah a lamdang a piang thute kan tu in Babylon kumpipa in a tongciinte a paisak laitak ngangawnin a khua ngaisutna a heak nop hu in Pathian in Hezekiah sia a uuk bangpo in omsak hi.

Hezekiah ii Ngam ukna Bona

(2Kumpite 20.20-21)

³²Hezekiah Kumpipa ii a nasep tuatuamte le Topa tungah a kipiaknate theampo sia Amoz tapa Kamsang Isaiiah ii mulkholna laibu sung le Judah le Israel kumpipate ii Tangthu sungah kiciamtee hi.

³³Hezekiah thi a, kumpite thaan tungnung ah kiphum hi. A thi ciang, Judahte le Jerusalem khua mite theampo in zatakna pia uh hi A tapa Manasseh in a kumpiza laih hi.

Khang Tangthu Niina 33

Judah Kumpipa Manasseh

(2Kumpite 21.1-9)

¹Manasseh sia kum sawm le kum nii a phak ciangin Judah kumpi suak a, ama in Jerusalem pan kum sawmnga le kum nga sung uk hi.

²Israel mite Canaan ngam a tum lai in tua munah a om sa Topa ii a nawkeak minamte ii a kiihuai ngamtatna te zui in Manasseh in Topatungah khial hi.

³Manasseh in a pa Hezakiah ii a suksiat sa doai biate ii biakna munte sa kik hi. Ama in Baal biakna tu in biaknataute sa in, Asherah pathiannu limte vawtin aksite bia hi.

⁴Ama a tawntungin a kibiakna tu mun Topa ii a cina mun Biakinn sungah ama in doai biate ii biakna biaknataute vawt hi.

⁵Biakinn leitual mun nii te ah aksite biakna tu in ama in biaknataute vawt hi.

⁶Ama in a tapate sia Hinnom Kuam ah meihal biakpiakna in pia hi. Ama in maisang thupiang tu a son theite, mitbum, aisaanna le mithite ii thaa thu dokna te zangh hi. Ama in Topa tungah khial mama in a thin uuksak hi.

⁷Ama in Topa Biakinn sungah milim khat koi a, tua mun sia Pathian ii David le a tapa Solomon tungah, “Hi Jerusalem khua sung, hi Biakinn sung sia



keima hong kibiak natu mun in, Israel minam sawm le niite ii ngamkhen sung theampo panin ka tealna mun ahi hi.

⁸Israel mite in ka thukham theampo zui in ka naseam pa Moses ii amate tungah a piak thukham theampo a cingin a zui uh le a taangpupite tungah ka piak ngam panin a kinawkeak tu ka oai buatu hi,” ci in son hi.

⁹Topa mihing Israel mite Canaan ngamsung a tum lai in, tua munah a teang Topa ii a nawkeak minamte ii khialna sang zong a khai zaw lai in khialna sungah Judah mite sia Manasseh in tumpui hi.

Manasseh Kisiik kik

¹⁰Topa in Manasseh le a mite a kidop natu in son hi napi amate in ni nuam ngawl uh hi.

¹¹Tua ahikom Topa in Assyria ngalkapmaangte in Judah ngam tumin simsak hi. Amate in Manasseh manin thikkawn taw sun a, kol bulin Babylon ah paipui uh hi.

¹²Hi bangin a thuakna hu in, ama a thin neam kikin Topa a Pathian kung zuanin Topatungah huna ngen hi.

¹³Manasseh ii thungetna sia Pathian in saang a, Jerusalem ah heak kiksakin a ngam uksak kik hi. Tuabangin Manasseh in Topa sia Pathian a hina thu tel tatak hi.

¹⁴Tua zawkciang Manasseh in David khuapi nisuana sangah a om luphung puasang sia Gihon Cik kum paninsaksang Ngasa Kongpi a kicina le Ophel a kici khuapi ciang saangsak vaial hi. Judah ngam sungah kulh taw a ki uum khuapi sim ah ngalkap hon khat le a uk ngalkapmaang khat zongh koi hi.

¹⁵Ama in Biakinn sung panin ngamdang pathiante le tua munah ama ii a koi milimte le, Biakinn omna mualtung le Jerusalem khuasung mun dadang ah a om doai biate ii biakna biaknataute khiin hi: ama in hite theampo Jerusalem khuapua sangah paipui in vawk siat hi.



¹⁶Ama in Topa a kibiakna biaknatau zongh pua kikin tua tungah kipawlkhop biakpiakna le lungdamko biakpiaknate pia hi. Ama in Israel te Pathian Topa bia tu in Judah mite theampo thupia hi.

¹⁷Mipite in mun tuatuam biakpiaknate munah biakpiaknate pia tawntung ahitazong amate inTopa tung bekma ah pia uh hi.

Manasseh ii Ngam ukna Bona

(2Kumpite 21.17-18)

¹⁸Manasseh ii a nasep dang tuatuamte, a Pathian tungah a thungetnate le Topa Israel ii Pathian min taw kamsangte ii ama tungah a thusonnate theampo *Israel kumpipate Tangthu* sungah kiciamtee hi.

¹⁹Manasseh kumpipa ii thungetna le Pathian ii a zokikna, a ki siik kik ma a, a vawt — a sia a vawtte, doai biate ii biakna mun, pathiannu Asherah lim a vawtte le a biak milimte theampo sia *Kamsangte Tangthu* sungah kiciamtee hi.

²⁰Manasseh thi a, kumpi inn ah kiphum a, a tapa Amon in a kumpiza laih hi.

Judah Kumpipa Amon

(2Kumpite 21.19-26)

²¹Amon sia Judah kumpi a sua lai in kum kul le kum nii pha a, ama in Jerusalem panin kum nii sung uk hi.

²²A pa Manasseh bangma in ama in Topa tungah khialin a pa ii a biak milimte bia hi.

²³Ahihang a pa taw kibang ngawl a, ama in kiniamkhiak ngawlinTopa kung zuan ngawl hi; ama sia a pa sang zong a khai zaw lai in khial hi.

²⁴Amon sia a khutnuai uliante in suam a, kumpi inn sungah thatlum hi.

²⁵Amon a suamte sia Judah mite in that a, a tapa Josiah sia kumpi suaksak uh hi.

Khang Tangthu Niina 34

Judah Kumpipa Josiah

(2Kumpite 22.1-2)

¹Josiah sia kum liat a phakin Judah kumpi suak a, ama in Jerusalem panin kum sawmthum le kum khat sung uk hi.



²Ama inTopa a lungdamsak nate vawt a; a taangh taangpupi David ngamtat zui in Pathian ii thukham theampo pha takin zui hi.

Josiah in Doai biate ii Biakna Do

³Josiah a khangmoi nolai, kumpi a sua zawk kum liat a phak kumin ama in a taangpupi David ii Pathian biak tu kipan hi. Kum li zawkciang ama in doai biate ii biakna munte, Asherah pathiannu ii limte le a dang milimte theampo susia tu in kipan hi.

⁴Ama thupiak bangin a mite in Baal biakna biaknataute sutham in a kungah ngimnamtui halna biaknataute pheltham hi. Amate in Asherah nu limte le a dang milimte theampo a vui a sua dong ngoaivui in, a vuite sia amate a bia mite thaang tungah the uh hi.

⁵Ama in doai biate ii thiampite ii ngute amate ii biakna mun biaknataute tungah hal hi. Tuabangin Josiah in Judah le Jerusalem zeksa ngeina om bangin thiansua kik hi.

⁶Manasseh ngam, Ephraim ngam le Simeon ngamsung mun theampo le khuapi theampo ah,saksang Naphtali dongin ama in tuabangma in vawt siat hi.

⁷Saksang ngamkhen theampo ah ama in biaknataute le Asherah limte sutham in milimte suvui in ngimnamtui halna biaknataute theampo saat tham hi. Tua zawkciang ama Jerusalem ah heak kik hi.

Thukham Laibu Kimu

(2Kumpite 22.3-20)

⁸Josiah Kumpipa in Judah ngam a uk zawk kum sawm le kum liat kumin, a ngamsung le Topa biakinn sungah doai biate ii biakna bosakna taw a thiansua zawkciang Josiah Kumpipa in Topa Pathian biakinn pua tu in pasal thum paisak a, tuate sia: Azaliah tapa Shaphan, Jerusalem ukpa Maaseiah le ulian seam khat ahi Joahaz ii tapa Joah ahi uh hi.

⁹Levi Biakinn cingte ii Biakinn sung pan a khon sumte sia Thiampi Saang Hilkiyah tungah ki aap hi. (Tua sumte sia Ephraim mi, Manasseh mi, Saksang



Kumpiangam mite, Judah mi, Benjamin mi, Jerusalem mite tung pan a kikhonte ahi hi.)

¹⁰Tua sumte sia Biakinn pua tu lampui mihing thumte tungah kipia in amate in,

¹¹Judah kumpite ii a muat tu in a koi innte pua natu a kisamh suang le thingte lei natu in lettamate le innsate tungah pia uh hi.

¹²Tua naseamte sia mihing thumaan mama te veu ahi uh hi. Amate nasep sia Levite li in lampui uh a, tuate sia Merari be le phung pan Zahath le Obadiah, Kohath be le phung pan in Zechariah le Meshullam hi uh hi. (Levite sia a vekpi tumthei thiam veu hi siat hi.)

¹³A dang Levite in vanh nawnte uk a, nasep dang tuatuam a seamte lampui in, a dangte in thu tepteena te keamin, a dangte in vanh cing uh hi.

¹⁴Vanh kholna khaan sung pan sum a laak laitakin Hilkiyah in Moses tungah Pathian ii a piak Thukham, Topa ii Thukham Laibu mu hi.

¹⁵Hilkiyah in Shaphan munah, “Hi Biakinn sungah Thukham Laibu mu khi hi,” ci in son hi. Hilkiyah in tua laibu sia Shaphan pia in,

¹⁶Shaphan in kumpipa kungah paipui hi. Ama in, “Nong sawl theampo ka seam siat zo uh hi.

¹⁷Biakinn sungah a kikoi sumte ka la zo uh a, naseamte le lampuite tungah ka pia zo uh hi,” ci in son hi.

¹⁸Tuaciang ama in a kampau pee kikin, “Hi sungah Hilkiyah ii hong piak laibu khat om hi,” ci hi. Tua zawkciang ama in kumpipa tungah nging vazak in sim hi.

¹⁹Kumpipa in laibu a kisim sia thu a zaak ciang, thin nop ngawlina taw a puansilh lai eau keak a,

²⁰tuaciang Hilkiyah thiampipa tung, Shaphan tapa Ahikam tung, Micaiah tapa Achbor tung, zum thuzeakpipa Shaphan tung le kumpipa langpan pa Asaiah te tungah:



²¹“Pai tavun a, hi laibu huvau Topa tungah kei taang le Judah mite taangin dongh tavun. Topa sia ei tungah hong thin uuk hi, banghangziam cile ih taangpupite in hi laibu ii ci bangin ngamta ngawl hi,” ci in thupia hi.

²²Kumpipa thupiak bangin Jerusalem khen thak khat sungah a teang Huldah a kici numei kamsang khat munah thu dongh tu in, Hilkiyah, Ahikam, Achbor, Shaphan le Asaiah te pai uh hi. (A pasal Shallum, Tikvah ii tapa, Harhas ii tupa, hi a, ama in Biakinpi sungah a zak puantualte a keam pa ahi hi.) Amate in thupiang teng ama munah son uh hi,

²³tuaciang ama in amate sia kumpipa kungah cia kikin sawl hi, tua kawmin

²⁴Topa ii thupiak hi teng kumpipa puakin sawl hi: “Keima in Jerusalem le a sunga teang mihingte theampo kumpipa ii sim laibu sungah a ki at tomlawna te taw daan ka pia tu hi.

²⁵Amate in kei hong nial a, tuaciang pathian dangte tungah sangaw biakpiakna pia uh hi, tua ahikom amate ii sep le vawt tung panin ka thin uukna hong piangsak hi. Ka thin uukna sia Jerusalem tungah tu hi, tuaciang tua ka thin uukna sia veng ngawl tu hi.

²⁶Kumpipa ama ahile, hi bangin kei, Topa Israel ii Pathian in ci khi hi: Nangma in laibu sung a ki at teng ngai ni hi,

²⁷tuaciang Jerusalem a mite daan ka piak tu te na zaak ciang kiniamkhiakna le kisiina taw ka mai ah na puansilh eaukeak in, kap ni hi. Mit mu bek zongin a lau huai mama ka suaksak tu a, mihingte in haamsiatna kammal in a zangh liang tu hi. Ahihang na thungetna hong za zo khi hi,

²⁸tuaciang Jerusalem khua daan ka piak tu sia na thi maa in tungsak ngawl tu khi hi, thinnuam in kong thisak tu hi,” ci hi. A sawltak pasalte in hi thu teng kumpipa Josiah tungah puak kik uh hi.

Josiah in Topa Thuzui natu Thuciamna Vawt

(2Kumpite 23.1-20)

²⁹Kumpipa Josiah in Judah ngam le Jerusalem khua ii lampuite khawmtua hi,

³⁰tuaciang amate Biakinn ah pai uh a, thiampite le kamsangte in ton pui in, midangte a hau a zawng kibang in pai uh hi. Amate ii mai ah kumpipa in Biakinpi sungah a kimu thak thuciamna laibu a buppi in sim hi.



³¹Ama in kumpi khuam kungah dingin ama ii thu ni tu, a thupiakte le a thukham te sia thin theampo ngaisutna theampo taw keamcing in thuciamna taw a kithua laibu sungah ngetna theampo seam tu vawt tu in Topa tungah thuciamna khat vawt uh hi.

³²Tua thuciamna zui tu in ama in Benjamin mite le Jerusalem a om mihing theampo kiciamsak hi. Tuabangin Jerusalem mite in taangpupite taw a Topa bia tawntung uh hi.

Khang Tangthu Niina 35

Josiah in Paisan Poai Vawt

(2Kumpite 23.21-13)

¹Josiah Kumpipa in Topa upatna in Paisan Poai Jerusalem khua ah vawt hi; tha masa bel, ni sawm le ni li ni in tua poai atu in amate in ngannote ngo uh hi.

²Ama in thiampite tungah Biakinn ah a nasep tu seesakin amate nasep tek pha tak a sep natu in hanthawn hi.

³Ama in Topa tungah a ki aap Israel te ii thuhil sya Levite tungah kam vaitha a, amate tungah, “David tapa Solomon Kumpipa ii asak Biakinn sungah tua Thukham Thingkuang thiangtho sia koi vun. Hi thingkuang sia mun khat pan mun khat ah khiin kawkoai nawn heak vun a, Topa na Pathian le Israel a mite ii na seam vun.

⁴David Kumpipa le a tapa Solomon ii nasep hong hawmsak bangin Biakinn ah noma be le phung tek ii na nasep tek seam vun a,

⁵Israel mi sungah baangkua khat pawpo hu a kul ciang, hu thei tu in om vun.

⁶Noma in Paisan Poai atu in tuuno le kealte ngo vun. Tu in Topa ii Moses tungah a piak zui tu ngeina om bangin Israel na mipuite ii a zui natu noma le noma a zeksa bangin kithiansua vun a, sangaw biakpiakna pia tu in kinging vun,” ci hi.

⁷Josiah Kumpipa in Paisan Poai hun sung mipite zak tu in ama ngannote sung pan tuu, tuunote le kealnote a vekpi 30,000 le khuita 3,000 pia hi.



⁸A khutnuai uliante zongh in mihonpite, thiampite le Levite zak tu in pia tek hi. Biakinn cing uliante ahi — Thiampi Saang Hilkiah, Zechariah le Jeiel — in tua poai hun sungah sangaw biakpiakna in zak tu in thiampite tungah tuuno le kealno 2,600 le khuita 300 pia uh hi.

⁹Levite ii lampuite ahi — Conaniah, Shemiah le a suapuite Nethanel, Hashabiah, Jeiel le Jozabad — in tuuno le kealno 5,000 le khuita 500 sia Levite ii sangaw biakpiakna in a piak tu in pia uh hi.

¹⁰Paisan Poai atu in na theampo a kingin siat zawkciang kumpipa ii thupiak bangin thiampite le Levite in amate nasepna mun tek ah om uh hi.

¹¹Tuu le keal a kingaw zawkciang Levite in a vun hoai in a chi thiampite in biaknatau tungah the uh hi.

¹²Tua zawkciang Moses ii thukham sungah ngeina om bangin a zak thei tu in meihal biakpiakna ah a kizangh nganno sate sia amate in a innkuan zui in mipite hawmsak hi.

¹³Ngeina om bangin Paisan Poai sa sia Levite in mei tungah em in a thiangtho biakpiakna sate sia beal, bealpeu lian mama le bealpeute sungah huanin mipite tungah manlang takin hawmsak hi.

¹⁴Hi bangin a vawt zawkciang Levite in amate atu le Aaron suan le paal thiampite atu in sa hawm uh hi, banghangziam cile meihal biakpiakna le biakpiakna ah a piak nganthaute halin thiampite zan dongin komla uh hi.

¹⁵Asaph be le phung Levi nam a nuai a tumthei thiamte sia David Kumpipa ii thupiakna bangin a nasepna a kiseena munte ah om uh hi, tuate sia: Asaph, Heman le kumpipa ii kamsang Jeduthun ahi uh hi. Biakinn kongpi cingte in a cinna mun uh nusiak kul ngawl hi; banghangziam cile amate atu in Levi dangte in Paisan Poai kinginsak uh hi.

¹⁶Tua ahikom Josiah Kumpipa thupiak bangin Paisan Poai vawtna le biaknatau tungah meihal biakpiaknate le tua ni a, Topa biakpiakna theampo kivawt siat hi.



¹⁷Tua munah a om Israel mite a vekpi in Paisan Poai le tol kisaw ngawl Anluum Poai ni sali sung vawt uh hi.

¹⁸Kamsangpa Samuel hun bo pan kipan Paisan Poai hi bangin kivawt ngei ngawl hi. Kumpi masate in hi bang Paisan Poai sia Josiah Kumpipa, thiampite, Levite le Judah, Israel le Jerusalem mihingte in,

¹⁹Josiah ii kumpi a sep zawk kum sawm le kum liat kum a, a vawt bangin kuama in vawt ngei ngawl hi.

Josiah ii Ngam uk Bona

(2Kumpite 23.28-30)

²⁰Josiah Kumpipa in Biakinn atu in hite theampo a vawt zawkciang Egypt Kumpipa Neco in Euphrates Ngunhui ah a om Carchemish ah ngalsim tu in a ngalkap honte paipui hi. Josiah in ama tawlngak sak tu in hanciam a,

²¹ahizong Neco in Josiah tungah a vaithakna pan, “Judah Kumpipa awng, ka ngalsim tu sia nang taw kisai ngawl hi. Nang hong sim tu in hong pai ka hi bua a, ka ngalte sim tu in hong kuan ka hi hi. Pathian in a manlangin sim tu in hong sawl hi. Pathian sia keima sangah pang ahikom kei hong nang heak in, tua ahibuale ama in nang hong sucip tu hi,” ci hi.

²²Ahihang Josiah in ni ngawlin sim sawm veve hi. Ama in Pathian ii Neco Kumpipa tungtawnin a thusonte ni ngawlin kimealseal in Megiddo Zaangtam ah ngalsim tu in kuan hi.

²³A ngal kisim sungin Egyptte ii thaltangte in Josiah Kumpipa kha hi. Ama in a naseamte tungah, “Hong taipui tavun; nasia liam khi hi!” ci in thupia hi.

²⁴Amate in a tona ngalleang tung panin toai in tua munah ama ii nei a niina ngalleang tungah koi in Jerusalem ah paipui uh hi. Tua munah ama thi in kumpite than ah kiphum hi. Judahte le Jerusalem mite theampo ama thi hu in khuangai tek uh hi.

²⁵Kamsangpa Jeremiah in Josiah Kumpipa atu in kaatapla khat phuak hi. Kumpipa atu khuangai in a kaa uh ciang la sate in numeite ahizong pasalte ahizong tua kaatapla taw a kaa uh sia Israel te ngeina suak hi. Tua kaatap late sia kaatap late khoptuana laibu sungah kikhum hi.



²⁶Josiah ii a sep theampo — Topa tungah a kipiakna, thukham a zuina,

²⁷le ama tangthu a kipatna pan a tawpna dong — *Israel le Judah Kumpipate Tangthu* sungah kiciamtee siat hi.

Khang Tangthu Niina 36

Judah Kumpipa Joahaz

(2Kumpite 23.30-35)

¹Judah mite in Josiah ii tapa Joahaz tealin Jerusalem khua ah sathau noai in kumpi suaksak uh hi.

²Joahaz sia Judah kumpi a sua lai in kum kul le kum thum pha a, ama in Jerusalem khua pan tha thum sung uk hi.

³Egypt Kumpipa Neco in ama manin thong sungah khum a, Judah mite in Neco tungah ngun pound 7,500 le kham pound 75 phiangshia in piasak hi.

⁴Neco in Joahaz ii suapuipa Eliakim Judah kumpi suaksak a, a min Jehoiakim ci in laihsak hi. Joahaz sia Neco in Egypt ngamah paipui hi.

Judah Kumpipa Jehoiakim

(2Kumpite 23.36-24.7)

⁵Jehoiakim sia Judah kumpi a sua lai in kum kul le kum nga pha a, ama in kum sawm le kum khat sung uk hi. Ama in Topa a Pathian tungah khial hi.

⁶Babylon Kumpipa Nebuchadnezzar in Judah ngam tumin sim a, Jehoiakim manin thikkol bulin Babylon ah paipui hi.

⁷Nebuchadnezzar in Biakinn vanh manpha pawlkhat pua in Babylon khua a kumpipa inn ah koi hi.

⁸Jehoiakim ii a vawt theampo, a kiihuai a vawt nate le a sia a vawtte dongin Israel le Judah kumpipate Tangthu sungah kiciamtee hi. A tapa Jehoiachin in a kumpiza laih hi.

Judah Kumpipa Jehoiachin

(2Kumpite 24.8-17)

⁹Jehoiachin sia Judah kumpi a sua lai in kum sawm le kum liat pha a, ama in Jerusalem pan tha thum le ni sawm sung uk hi. Ama zonghTopa tungah khial hi.



¹⁰Khua hong khal ciang Nebuchadnezzar Kumpipa in Jehoiachin sia manin thongtaak tu in Babylon ah paipui hi. Biakinn vanh manphate zongh pua siat hi. Tuaciang Nebuchadnezzar in Jehoiachin ii pano Zedekiah sia Judah le Jerusalem kumpi suaksak hi.

Judah Kumpipa Zedekiah
(2Kumpite 24.18-20; Jer 52.1-3a)

¹¹Zedekiah sia Judah kumpi a sua lai in kum kul le kum khat pha a, ama in Jerusalem khua pan kum sawm le kum khat sung uk hi.

¹²Ama sia Topa tungah khialin Topa kammal a son kamsangpa Jeremiah ii thusonte kiniamkhiakna taw ngai ngawl hi.

Jerusalem Khua Bona
(2Kumpite 25.1-21; Jeremiah 52.3b-11)

¹³Nebuchadnezzar Kumpipa in ama khut nuai ah thumaan in om tu in Pathian min taw a kiciamsak Zedekiah in Nebuchadnezzar Kumpipa leedo hi. Zedekiah thinpui in kisiik nuam ngawlin Israel Pathian Topa kung zuan kik nuam ngawl hi.

¹⁴Tua bek dom ngawlin Judah lampuite, thiampite le mipite in a kiim a paam ah a om minamte ii khialnate zui in milim bia uh hi. Tuabangin amate in Topa ama mama ii a thiansak Biakinn sia ninsak uh hi.

¹⁵A taangpupite Pathian Topa in a mite le a Biakinn a huuk nop manin a mite kidop natu thu pia tu in kamsangte tatsat ngawlin paisak hi.

¹⁶Ahizong amate in Pathian ii kamtaite sia nunau in, a kammalte awlmawk ngawlin, kamsangte nuisan uh hi. A khakbel ciang a mite tungah Topa thin uukna nasia lawlawm ahikomin Topa thin uukna pan suatak natu lampi om ngawl hi.

¹⁷Tua ahiciang Topa in Babylon kumpipa sia amate sim tu in paipui hi. Judah khangnote sia Biakinn sung ngangawn ah kumpipa in thatlum hi. Kumpipa in kuama a moi a haam, numei pasal, a cina a cidam ci tuan ngawlin kuama hesuak ngawl hi. Pathian in amate theampo ama tungah aap siat hi.



¹⁸Babylon kumpipa in Biakinn, biakinn sumkholna le kumpipa le a khutnuai uliante neisa vanh manpha theampo suddol in Babylon ah pua siat hi.

¹⁹Ama in Jerusalem khuapi le Topa Biakinn, kumpi inn theampo le a sung a neisa theampo taw haltham siatin khuapi uumna luphungte sutham hi.

²⁰Ama in a nungta lai theampo Babylon ah ciapui a, tua munah amate in Persiate uk hun a thet dong Babylon kumpipa le a suan a paalte ii sila suak uh hi.

²¹Tuabangin kamsang Jeremiah tungtawn a, Topa ii a son khol: “A kitang ngawl Sabbath tawngak nuam a kicin natu in a ngam sia kum sawmsali sung ngamkhing tu hi,” a ci thu sia tangtung hi.

Cyrus in Judahte Cia kiksak

(Ezra 1.1-4)

²²Persia Kumpipa Cyrus in ngam uk lianpa a sep a kum khat kumin Topa in kamsang Jeremiah tungtawn a, a thusonte tangtungsak hi. Topa in a nuai a, a thupiaknate thangsak tu in Cyrus hanthawn in a ukna ngam theampo ah, sim tu in lai taw at in thaak hi:

²³“Hisia in Persia Ngam uk lianpa Cyrus ii thupiak ahi hi. Vantung Pathian Topa in leitung buppi uk tu in keima hong vawt zo a, Judah ngam Jerusalem khua ah ama atu biakinn khat sa tu in tavuan hong pia zo hi. Tu in, no Pathian mite theampo awng, tua mun zuan tavun a, Topa na Pathian sia note taw omkhawm taken,” ci hi.



Ezra

Ezra 1

Cyrus in Jewte Cia kiksak

¹Persia mi Cyrus in ngam uk lian a sep, a kum khat kumin kamsang Jeremiah tungtawn in, Topa ii son thute Topa in tangtungsak hi. Topa in ama ukna ngamsung theampo ah a nging takin sim tu in a nuai a, a thupiakte at in puak tu in Cyrus sawl hi.

²“Hi thu sia Persia ngam uk lian Cyrus ii thupiak ahi hi. Topa Vantung Pathian in kei sia leitung bup uk tu in hong koi zo a, Judah ngam Jerusalem khuapi ah ama atu biakinn khat sa tu in tavuan hong pia zo hi.

³Ama mihing ahi note theampo taw Pathian omkhawm taken. Note Jerusalem ah cia tavun a, Jerusalem khuapi ah a kibia Pathian, Israel te Pathian, Topa ii Biakinn sa kik tavun.

⁴Saltang a mihingte sung pan a cia kik natu in hu tu a kul a om le, a innpaamte in amate hi bangin hu tu hi. Amate in ngun le kham, nguai an le vanh pua nganhingte, Jerusalem khuapi sung Pathian Biakinn sungah piak tu biakpiaknate taw zong amate tungah pia khawm tu hi,” ci hi.

⁵Tuaciang Judah le Benjamin minam sung pan be lutangte, thiampite le Levite, le Pathian ii a thin a phawnsak theampo te in Jerusalem khua ah, Topa ii biakinn sa kik tu in kithoai uh hi.

⁶A innpaamte theampo in na tam mama pia in amate hu uh hi: tuate in ngun uum le beal, kham, nguai an, vanh pua nganhingte, na manpha dangte le Biakinn atu in a piak nate ahi hi.

⁷Cyrus ngam uk lianpa in Nebuchadnezzar Kumpipa ii Jerusalem Biakinn sung pan a laak, a pathiante, biakinn sungah a koi kuang le haite amate pia kik hi.

⁸Ama in tua vanhte Judah ngamukpa Sheshbazzar atu in tepteena lai a vawt kumpi sumkeampi pa Mithredath tungah aap hi.

⁹⁻¹⁰A piak vanhte a nuai a bang ahi hi.



biakpiakna khamkuang	30
biakpiakna ngunkuang	1000
kuang tuatuam	29
khamkuang note	30
ngunkuang note	410
uum le beal dang tuatuamte	1000

¹¹Kham le ngun taw kivawt kuang le vanh dang tuatuamte a vekpi in 5,400 pha a, Babylon a saltanna pan Jerusalem ah a dang saltangte taw a cia uh ciang Sheshbazzar in ciapui hi.

Ezra 2

A Cia kik Saltangte Tepteena lai

(Nehemiah 7.4-73)

¹Saltang tam mama Babylon ngam nusia in Jerusalem le Judah ngam a khua tek ah cia kik uh hi. Nebuchadnezzar Kumpipa in amate thongtaak tu in, a mat a kipan a innkuakuan in Babylonia ngamah salin teang uh hi.

²A lampuite sia Zerubbabel, Joshua, Nehemiah, Seraiah, Reelaiah, Mordecai, Bilshan, Mispar, Bigvai, Rehum le Baanah te ahi uh hi. Hite sal pan a cia kik Israel be le phung pan mite tepteena lai ahi hi.

³⁻²⁰Parosh - 2,172 Shephatiah - 372 Arah - 775 Pahath Moab(Joshua le Joab suan le paalte) - 2,812 Elam - 1,254 Zattu - 945 Zaccai - 760 Bani - 642 Bebai - 623 Azgad - 1,222 Adonikam - 666 Bigvai - 2,056 Adin - 454 Ater(Hezekiah zong kici hi) - 98 Bezai - 323 Jorah - 112 Hashum - 223 Gibbar - 95

²¹⁻³⁵A taangpupite a nuai khuate ah a teang te ii mite zongh cia kik uh hi. Bethlehem - 123 Netophah - 56 Anathoth - 128 Azmaveth - 42 Kiriath Jearim, Chephirah le Beeroth - 743 Ramah le Geba - 621 Michmash - 122 Bethel le Ai - 223 Nebo - 52 Magbish - 156 A dang Elam - 1,254 Harim - 320 Lod, Hadid le Ono - 725 Jericho - 345 Senaah - 3,630

³⁶⁻³⁹Hite sia saltang a cia kik thiampi be le phungte tepteena ahi hi: Jedaiah(Jeshua ii suan le paalte - 973 Immer - 1,052 Pashhur - 1,247 Harim - 1,017



40-42 Saltangin a cia kik Levi be le phungte: Jeshua le Kadmiel (Hodaviah suan le paalte) - 74 Biakinn la sate (Asaph suan le paalte) - 128 Biakinn cingte (Shallum, Ater, Talmon, Akkub, Hatita le Shobai ii suan le paalte) - 139

43-54 Saltang a cia kik Biakinn naseamte ii be le phung te: Ziha, Hasupha, Tabbaoth, Keros, Siaha, Padon, Lebanah, Hagabah, Akkub, Hagab, Shamlai, Hanan, Giddel, Gahar, Reaiah, Rezin, Nekoda, Gazzam, Uzza, Paseah, Besai, Asnah, Meunim, Nephisim Bakbuk, Hakupha, Harhur Bazluth, Mehida, Harsha, Barkos, Sisera, Temah, Neziah le Hatipha te ahi uh hi.

55-57 Saltang a cia kik Solomon ii naseamte ii be le phungte in: Sotai, Hassophereth, Peruda, Jaalah, Darkon, Giddel, Shephatiah, Hattil, Pochereth Hazzebaim le Ami te ahi uh hi.

58 Saltang a cia kik Biakinn naseamte le Solomon ii naseamte ii suan le paalte a vekpi in 392 pha uh hi.

59-60 Tel Melah, Tel Harsha, Cherub, Addan le Immer khuapite pan a cia kikte sia Delaiah, Tobiah le Nekoda te ii be le phungte hi a, 652 pha uh hi; ahizong amate in Israel suan le paalte ahi uh hunlam lak thei ngawl uh hi.

61-62 A nuai a thiampi be le phungte in a taangpupite pianna teptena lak thei ngawl uh hi. Tuat in: Habaiah, Hakkoz, le Barzillai ahi uh hi. (Thiampi be le phung Barzillai pianna pu in Gilead ngam Barzillai be le phung numei khat tenpui a, a sunghpa ii be le phung min la hi). A pianna taangpupite lak thei ngawl ahikom amate sia thiampi in kisaang ngawl hi.

63 Jew ngamukpa in amate tungah Urim le Thummim a zangh thei thiampi khat a om mateng in Pathian tungah a kipia biakpiakna ante ne thei ngawl tu nu hi ci hi.

64-67 Saltanna pan a cia kik theampo 42,360 pha uh hi. Amate ii naseam pa le numei - 7,337 La sa pa le numei - 200 Siphu - 736 Laa - 245 Kalaoh - 435 Laano - 6720 pha uh hi.



⁶⁸Jerusalem khuasung Topa ii Biakinn ah saltangte a thet uh ciang, be le phung, lampui pawlkhatte in Biakinn munlui ma ah Biakinn a kisak kik natu in thin zawna taw a piak, piakna te pia uh hi.

⁶⁹Amate in Biakinnsak natu in a piak thei za tek pia uh a, a vekpi kingawm kham pound 1030, ngun pound 5740, le thiampite atu in puantual silh 100 pia hi.

⁷⁰Thiampite, Levite, le mihing pawlkhatte Jerusalem khuasung ahibuale khuapaam ah teang uh hi. La sate, Biakinn cingte le Biakinn naseamte sia a naina khuapite ah teang uh hi; tuaciang a taanglai Israel te sia a taangpupite teenna khuapite ah teang uh hi.

Ezra 3

Pathian Biakna Kipan kik

¹A tha sali tha in Israel mihingte a khua tek ah teang siat hi. Tuaciang amate a vekpi in Jerusalem ah kikhawm uh a,

²Jehozadak ii tapa Joshua, a thiampi puite le Shealtiel ii tapa Zerubbabel le a bete teng in Pathian ii mihing Moses ii Thukham sungah a ki at hilmate bangin meihal biakpiakna a tungah a piak thei natu in Israel ii Pathian ii biaknatau sa kik uh hi.

³Saltanna pan a cia kikte in tua ngamah a teang mihingte kiita uh ahitazong, amate in biaknatau sia a om ngeina mun ma ah sa kik uh hi. Tuaciang amate in zing sim le nitak sim biakpiaknate tua tungah hal tu in khat vei ma kipan kik uh hi.

⁴Amate in zui tu ngeina om bangin Buk Poai khaam uh hi. Ni khat atu a kisamh babang nisimin amate in biakpiakna pia uh hi.

⁵Tua banah amate in a piak tawntung meihal tum biakpiakna, Tha Thak Poai ah biakpiakna le Topa a kibiakna ah kikhopna dang theampo te le Topa tungah amate thin zawna taw biakpiakna theampo te zongh pia uh hi.



⁶Mihingte in Biakinnsak kik tu kipan ngawllai hi kale, amate in tha salina ni khat ni in Topa tungah meihal biakpiakna kipan uh hi.

Biakinn Sak kik tu Kipan

⁷Mihingte in suangciangte le lettamate piak tu in sum pia uh a, Lebanon pan Cedar thingte the natu in Tyre le Sidon khuapite ah puak tu in amate in an, tui le olive thaute pia uh hi. Tuate tuipi lam tawnin Joppa ah kipuak tu ahi hi. Hite theampo Persia ngam uk lianpa Cyrus ii thukimna taw in kivawt hi.

⁸Tuaciang Jerusalem Biakinn munah amate a cia kik kum, tha nii tha in nasep kipan uh hi. Zerubbabel, Joshua le a taanglai ngamsung a mipuite, thiampite le Levi mite, a tatakin saltanna pan Jerusalem ah a cia kikte theampo in tua Biakinnsak pui uh hi. Kum kul le a tungsia Levite theampo Biakinnsak kikna ah nasep ki uksak hi.

⁹Levi suan Jeshua le a tapate le a bete, le Kadmiel le a tapate (Hodaviah ii be le phungte) in Biakinnsak kikna uk khawm uh hi. (Amate sia Levi minam Henadad be le phungte in hu uh hi.)

¹⁰Innsate in Biakinn phungkawng a kipat ciang Thiampite in a puantual silh in a khut ah lemle toai in dinmun la uh a, Asaph be le phung Levite in daalkopsai taw tua munah ding uh hi. Amate in David Kumpipa hun pan a kihilnate bangin Topa pok uh hi.

¹¹Amate in Topa pokna la sa in, asak kikikte sia: “Topa pha hi, Israel a itna kip tawntung hi,” ci uh hi. A kuama po in a aw neiza tek taw au in Topa pok uh hi, banghangziam cile Biakinn phungkawng kipan zo hi.

¹²Khanghaam thiampite, Levite le be lutang tam mama in a masa Biakinn sia mu zo a, hi Biakinn phungkawng a kipha a mu uh ciang amate au in kap uh hi. Ahizong tua munah a om a dangte sia lungdam in au uh hi.

¹³Amate nasia takin ngamlum lialua in au ahikom a khuala mama na panin kiza a, kuama in kaa na aw ahile lungdamna aw ahi khen thei ngawl uh hi.

Ezra 4

Biakinn Sak kikna Kilangpan



¹Judah le Benjamin mihingte ii ngalte in, Israel ii Pathian, TopaBiakinn sia sal a cia kikte iisak kikna thu za uh hi.

²Tuaciang amate in Zerubbabel le be lutangte taw kimu uh a, “Ko zongh Biakinnsakna ah hong kihelsak tavun. Note ii biak Pathian sia kote zongh in bia khu hi. Assyria ngam uk lianpa Esarhadon in hi munah teang tu in hong paisak pan kipan ama tungah biakpiakna ka pia uh hi,” ci uh hi.

³Zerubbabel, Joshua le be lutangte in amate tungah, “Topa kote Pathian ii Biakinn sa tu in note ii nong hu tu uh ka kisamh bua uh hi. Persia ngam uk lianpa Cyrus ii hong thupiakna bangin koma le koma in ka sa tu uh hi,” ci in son uh hi.

⁴Tuaciang tua ngam sungah a teang mihingte in biakinnsak ngawl natu in Judahte thinkiamsakin lauthawn uh hi.

⁵Biakinnsakna a langpanpui natu in amate in Persia kumpi uliante tungah sumnguk pia uh hi. Amate in ngam uk lianpa Cyrus hun sung theampo le Darius ngam uk lianpa hun dongin langpan tawntung uh hi.

Jerusalem Sak kikna Kilangpan

⁶Xerxes ngam uk lianpa uk hun a kipat ciang Judah le Jerusalem ah a teangte ii ngalte in amate a langpanna lai pia uh hi.

⁷Persia ngam uk lianpa Artaxerxes hun ciangin Bishlam, Mithredath, Tabeel le a lawmte in ngam uk lianpa tungah laithak at kik uh hi. Tua laithak sia Aramaic kampau taw in ki at a, a kisim ciang kam pheem tu kul hi.

⁸Ngam uk Rehum, ngamsung thuzeakpi Shimshaite zongh in Jerusalem khua thu taw kisai ngam uk lianpa Artaxerxes tungah a nuai a bangin laithak at uh hi:

⁹“Ngam uk Rehum le ngamsung thuzeakpi Shimshai, a lawmte, thukhente le ulian dang theampote Elam ngam sungah a om Erech, Babylon le Susa khuate ah a teang,



¹⁰a lian le a thahat Ashurbanipal ii amate inn pan a taisak le Samaria khuapi sung le Euphrates nitumna sangah a tensak mihingte theampo taw at khawm in kong thaak uh lai hi.”

¹¹A laithak sia a nuai a bang ahi hi. “Euphrates nitumna sangah a teang a naseamte in ngam uk lianpa Artaxerxes tungah lai kong thaak uh hi.

¹²“Ngam uk lianpa awng, na ngamsung mun tuatuam panin Jewte hi lai ah hong pai in, Jerusalem khua ah teangin khuapi ngilo le kumpi langpan thei tua khuapi a saat kikna thu he le te kong oai uh hi. Amate in luphung cian tu kipan zo a, hai ngawlin zo tu hi.

¹³Ngam uk lianpa awng, hi khuapi kisa kikin a luphungte a ki manthiang le mihingte in phiangshia piak tawlna tu uh a, na kumpi sum tum kiam tu hi.

¹⁴Ngam uk lianpa awng, tu in kote nangma ukna nuai mihingte ka hi uh a, hi bang thute mu nuam ngawl ka hi uh ciang,

¹⁵na taangpupite ii nusiathu tepteena laibu sungah na kat kik tu uh ngaisutna kong pia uh hi. Tuabangin kan kik le te hi khuapi sia kumpi langpan tawntung khuapi a hina le taanghlai hun a kipan kumpite le ngam ukte buaina a piak tawntungna thu na mu tu uh hi. Hi mihingte sia uk hak tawntung hi. Tua hangin a khua kilalcipsak hi.

¹⁶Hi khua kisaat kikin a luphungte kizo thiang thong le ngam uk lianpa nangma in Euphrates nitumna ngam teng uk zo nawn ngawl tu ci thu kote in telthiang khu hi,” ci uh hi.

¹⁷Ngam uk lianpa in hi bangin lai thuk hi: “Ngam uk Rehum, ngamsung thuzeakpi Shimshai le Samaria le Euphrates nitumna sangah a teang lawmte awng kong paupui hi.

¹⁸“Nong thaak uh lai sia kam kipheen in hong kisim hi.

¹⁹Nong son uh bangin thu kan tu in ka sawl a, thu a kat ciang nidang lai hun a kipan Jerusalem sia kumpi a langpanna thu le leedona taw kidimna mun le a nawnkai vawtte omna a hina thu kimu takpi hi.



²⁰A thahat kumpite in Jerusalem le Euphrates nitumna sang theampo uk in shia le phiangshia khon uh hi.

²¹Tua ahikom thu kong piak kik mateng khuapisak kik nasepna a tawlngak natu in thu pia tu nu hi.

²²Ka tupna te a kisutsiat ngawl natu in thakhat thu in hi thu seam vun,” ci hi.

²³Ngam uk lianpa Artaxerxes tung pan hi laithak Rehum, Shimshai le a lawmte tungah a kisim po ciang amate Jerusalem ah manlang takin pai in Jewte ii khuapi asak kik sia zawthawk thu taw tawlngasak uh hi.

Biakinn Sak Kipan kik

²⁴Biakinnsak kik sia kitawlngasak a, Persia ngam uk lianpa Darius ii ngam uk a kum nii kum dong bangma seam ngawlin omcip hi.

Ezra 5

¹Tualai hunin kamsang niite ahi Haggai le Iddo ii tapa Zechariah in Judah le Jerusalem ah a teang Jewte tungah Israel ii Pathian min taw thu son kipan uh hi.

²Shealtiel ii tapa Zerubbabel le Jehozadak ii tapa Joshuate in a thusonte a zaak uh ciang amate in Jerusalem khua Biakinnsak kik kipan a, kamsangte nii in hu uh hi.

³Thakhat thu in Euphrates nitumna sang ngamukpa Tattenai, Shethar-Bozenai le a seppui uliante Jerusalem ah pai in, “Hi Biakinnsak tu le a sungah vanhte zeam tu in akua in thu hong pia ziam?” ci in dongh uh hi.

⁴Amate in hi Biakinnsakna ah a hute ii min zongh dongh uh hi.

⁵Ahizong Pathian in Jew lampuite sungsia nginge a, Persia uliante in ngam uk lianpa Darius tungah laithak in a laithak a thuk kik mateng bangma law ngawl tu in khensat uh hi.

⁶Amate in hi bangin ngam uk lianpa tungah thu zacak uh hi.

⁷“Darius ngam uk lianpa awng, na ukna ngam sungah kilemna om taken.



⁸“Ngam uk lianpa awng, kote in Judah ngam sungah pai in a lian Pathian ii Biakinn sia suangtum lian mamate taw kisa in, a pang zongh thinglian mamate taw a uum ka mu uh a, tua thu he lete kong oai uh hi. A nasep sia belcing sep mama a, ngai vahuut uh hi.

⁹Tuaciang akua ii thupiakna taw hi Biakinn sa kik a, a sung vanhte zeam thei nu ziam, ci in hong son natu in a lampuite ka dongh uh hi.

¹⁰Hi nasep lampuite akua bang teng ziam? ci in kong son thei natu in amate min zongh ka dongh uh hi.

¹¹“Amate in, ‘Kote vantung le leitung Pathian ii naseamte ka hi uh a, a vaanglian Israel kumpipa khat ii kum tam mama lai in, asak phit le a zep Biakinn sia ka sa kik uh hi.

¹²Ahizong ka taangpupite in vantung Pathian thin uuksak a, Chaldean kumpi te sungah kumpi khat ahi, Babylonia Kumpipa Nabuchadnezzar in amate na zosak hi. Biakinn sia kisiacipsakin mihingte Babylonia ah sal in kipai pui hi.

¹³Tuaciang Cyrus Ngam uk lianpa in Babylonia ngam uk a sep zawk a kum khat kumin ama in Biakinn a kisa kik natu thupia hi.

¹⁴Nebuchadnezzar ii Jerusalem Biakinn pan a laak Babylon biakinn ah a koi kham le ngun, Biakinn uum le bealte Cyrus ngam uk lianpa in Judah ngam uk tu in a koi Sheshbazzar a kici pa tungah pia hi.

¹⁵Ngam uk lianpa in tua vanhte la in Jerusalem Biakinn ah ciapui kik tu in le ni dang asakna ngei mun ma ah Biakinn asak natu in Sheshbazzar sawl hi.

¹⁶Tua ahiciang Sheshbazzar hong pai in Biakinn phungkawng phut hi. Tua hun pan kipan tu dong Biakinn kisa a, ahizong kiman ngawl lai hi,’ hong ci uh hi.

¹⁷“Tu in ngam uk lianpa awng, na lung a kim le Babylon kumpi thu tepteena laibu sungah Cyrus ngam uk lianpa in hi Jerusalem Biakinn sak kik natu in thu a piakna le a piak ngawl na thu zongin, kote tungah hi thu taw kisai nangma deina bang hong zasak tan,” ci uh hi.



Ezra 6

Cyrus ngam uk lianpa ii Thupiakna Kimu kik

¹Tuaciang Darius ngam uk lianpa in Babylon khua ah a kikeam kumpite thu tepteena laibu sungah tua thute zong tu in thupia hi.

²Ahizong Media ngamsung Ecbatana khua sungah a nuai a bang thu tepteena a om laizial khat kimu hi:

³“Ngam uk a sua zawk a kum khat kumin Cyrus ngam uk lianpa in sangaw biakpiakna le meihal biakpiakna mun tu in, Jerusalem khua ah Biakinn a kisak kik natu thupia hi. Biakinn sia pi sawmkua saangin pi sawmkua zai tu hi.

⁴A pangte suangtum dawl thum simin thing dawl khat taw kisa tu hi. A sum bo theampo kumpi sum sung pan kipia tu hi.

⁵Nebuchadnezzar Kumpipa ii Jerusalem Biakinn pan Babylon ah a paipui kham le ngun, uum le bealte zongh Jerusalem Biakinn sung a omna ngei tek ah kikoi kik tu hi,” ci in a ki tepteena mu uh hi.

Darius kumpipa in Nasep A zop natu Thupia

⁶Tuaciang Darius ngam uk lianpa in a nuai a bangin zokik hi. “Euphrates nitumna ngamukpa Tattenai, Shethar Bozenai le Euphrates nitumna ngam a om uliante awng, “Biakinn pan kiheam vun a,

⁷Biakinnsakna nawngkaisak heak vun. Judah ngamukpa le Jew lampuite in Pathian Biakinn sia a om ngeina munah sa kik taken.

⁸Biakinnsak kikna hu tavun. Hi nasep a kisuangsamh ngawl natu in, Euphrates nitumna sang pan kumpite atu in a kinga phiangshiate sung pan amate ii bona theampote manlang takin kipia tu hi.

⁹Jerusalem ah a om thiampite ii nisim in kisamh hi hong ci pawpo peal ngawlin pia tu nu hi: tuate vantung Pathian tungah meihal biakpiak natu in khuitalno, tuu ahibuale tuunote ahibuale zungtaang, ci, zu le olive thau ahi hi.



¹⁰Vantung Pathian ii a saan thei tu sangaw biakpiakna a piak thei natu le keima le ka tapate atu in thupha hong ngetsak thei natu in hi sia sep tu ahi hi.

¹¹Tua banah hi kong thupiak a zui ngawl a om le a inn tuukpi khat kidawkeaksak tu a, a mong khat kizumin tua zawkciang ama pumpi kisunlet tu hi. A inn sia ninthuk kisua tu hi.

¹²Ama a kibiak natu mun Jerusalem khua a teal Pathian in hi thupiak a nialte le tua Biakinn a lalsak nuam kumpi ahizong, minam ahizong lalcipsak taken. Keima Darius in hi thu kong pia hi. Ka thupiak sia zui siat tu ahi hi,” ci hi.

Biakinn Ki aap

¹³Tuaciang ngam uk Tattenai, Shethar Bonezai le a naseppui uliante in kumpipa thupiak bang linlian in vawt siat uh hi.

¹⁴Jew lampuite in kamsang Haggai le Zechariahte ii hanthotna taw a Biakinnsak uh a maa tun tato uh hi. Amate in Biakinn sia Israel Pathian le Persia ngam uk liante ahi Cyrus, Darius le Artaxerxes te ii thupiak bangin zo thiangu uh hi.

¹⁵Amate in Darius ii ngam uk lian a sep zawk a kum luk kum Adar tha, ni thum ni in Biakinn zo uh hi.

¹⁶Tuaciang Israel mihing theampo— thiampite, Levite le saltanna pan a cia kik midang theampote in lungdam takin Biakinn aap uh hi.

¹⁷Biakinn aapna in amate in khuita 100, tuu 200, le tuuno 400 te sangaw biakpiakna in pia a, Israel minam sim atu in mawmai biakpiakna in keal khat tek keal 12 pia uh hi.

¹⁸Amate in Moses laibu sungah kihilna a om bangin Jerusalem Biakinn sungah naseam tu in thiampite le Levite zongh a pawl a pawlin khen uh hi.

Paisan Poai

¹⁹Saltanna pan hong cia kik mihingte in a kum kik tha masa, ni sawm le ni li ni in Paisan Poai khaam uh hi.



²⁰Thiampite le Levite theampo in amate le amate ki thiansua in a zeksa ngeina om bangin thiangtho uh hi. Levite in hong cia kik mihingte theampo atu le thiampite le amate atu in Paisan Poai biakpiakna in nganhing ngo uh hi.

²¹Biakpiakna sate saltanna pan hong cia kik Israel te theampo le tua ngamah a teang doai biate ii biakna nusia sa theampote le Israel ii Topa Pathian bia tu in hong paite in ne uh hi.

²²Ni sali sung lungdam takin Tol saw ngawl Anluum Poai khaam uh hi. Topa in Assyria kumpipa sia Jewte tungah kilem nopna thin neisak a, Israel Pathian ii Biakinnsak kik nasepna ah hu ahikom amate lungdam mama uh hi.

Ezra 7

Jerusalem ah Ezra Theng

¹Artaxerxes sia Persia ngam ukin a khan kum tam mama zawkciang Ezra a kici mihing khat hong om hi. Ama in a taangpupite Thiampi Saang Aaron dong kan a, Ezra sia Seriah ii tapa, Seriah sia Azariah ii tapa, Azariah sia Hilkihah ii tapa,

²Hilkihah sia Shallum ii tapa, Shallum sia Zadok ii tapa, Zadok sia Ahitub ii tapa,

³Ahitub sia Amariah ii tapa, Amariah sia Azariah ii tapa, Azariah sia Meraiioth ii tapa,

⁴Meraiioth sia Zerahiah ii tapa, Zerahiah sia Uzzi ii tapa, Uzzi sia Bukki ii tapa,

⁵Bukki sia Abishua ii tapa, Abishua sia Phinehas ii tapa, Phinehas sia Eleazar ii tapa, Eleazar sia Aaron ii tapa ahi hi.

⁶⁻⁷Ezra sia lai heakna kicing a nei khat hi a, Topa Israel Pathian ii Moses tungah a piak Thukham sia he sitset hi. Banghangziam cileTopa a Pathian in Ezra thupha pia a, Ezra ii a nget theampo ngam uk lianpa in pia hi. Artaxerxes ii uk hun a kum sali kumin Ezra sia thiampite, Levite, Biakinn la



sate, Biakinn cingte le naseamte a kihel Israel mihon khat taw Babylonia ngam pan Jerusalem zuan uh hi.

8-9 Amate in tha masa bel tha, a ni khat ni in Babylonia ngam nusia uh a, Pathian ii panpuina taw in tha nga tha, ni khat ni in Jerusalem theng uh hi.

10 Ezra in a nuntakna sia Topa Thukham sinna, a sin sate zuina, le Israel mihingte tungah thukham le ngeina theampo hilna in zangh hi.

Artaxerxes Ngam uk lianpa ii Ezra tungah A lai piak

11 Artaxerxes Ngam uk lianpa in a nuai a laite Topa ii Israel tungah a piak thukham le thupiakte a he sitset, thiampi le lai heakna kicing, Ezra tungah pia hi.

12 “Ngam uk lianpa Artaxerxes tung pan Vantung Pathian ii Thukham a he thiampi Ezra tungah:

13 “Ka ukna ngamsung theampo ah a om Israel mihingte theampo, thiampite le Levite Jerusalem ah a cia nuam peuma nangma taw a cia natu in thu ka pia hi.

14 Keima le ka thu kumpui salite in nangma nasep in a kikoi, na Pathian Thukham sia Judah le Jerusalem ah bangza ciang dongin kizui ci thu kan tu in kong sawl uh hi.

15 Israel Pathian, Jerusalem Biakinn a nei pa tungah keima le ka thu kumpui te ii ka piak nop uh kham le ngun biakpiaknate nangma in keng tu ni hi.

16 Israel mihingte le a thiampite ii Jerusalem ah a om a Pathian Biakinn atu in a piakte le noma ii Babylon ngamsung pan na kaikhop uh ngun le kham theampo zongh nangma in paipui tu ni hi.

17 “Hi dangkate khuital, tuutal, tuuno, antang le zu leina in pha takpi na zangh tu a, tua vanhte sia Jerusalem Biakinn biaknatau ah na pia tu hi.

18 A taanglai ngun le khamte na Pathian ii deina taw kizui in nangma le na ngamsung mite in na uk bang po in zangh thei tu nu hi.



¹⁹Biakinn sung nasepna ah zak tu in nangma tungah hong kipia uum le beal theampo Jerusalem khua Pathian tungah pia tu ni hi.

²⁰Tuaciang Biakinn atu in na kisap dangte sia kumpi sum sung panin nga thei tu ni hi.

²¹“Keima in thiampi le vantung Pathian ii Thukham a thiam, Ezra ii hong nget theampo thakhat thu piak tu in Euphrates Nitumna Ngam sungah a om kumpi sumkeam uliante theampo thu ka pia hi.

²²Piak tu a ki ciangtan za sia, ngun pound 7,500 zungtaang seau 500 zu gallon 550, olive thau gallon 550, le ci al a kisamh za za hi tu hi.

²³Vantung Pathian in a Biakinn atu in hong nget zaza hanciam in pia tu nu hi; tuasia in keima tung le kei zawkciang ngamukte tungah ama thin uuk ngawl natu ahi hi.

²⁴Nangma in thiampite, Levite, la sate, inncingte, naseamte, le Biakinn taw kisai mihing khat pawpo tung pan shia na khon thei buatu hi.

²⁵“Nangma Ezra in na Pathian ii hong piak sa ciimnate zanghin, na Pathian Thukham bangin a nungta Euphrates Nitumna ah a teang mihing theampo uk tu in ngamukte le Thukhente na koi tu hi. A he ngawl laite theampo tungah tua Thukham na hil tu hi.

²⁶Mihing khat pawpo in na Pathian Thukhamte, ahibuale ngamsung thukhamte a zui bua ahile ama sia thalupna taw ahizong, hawlkeakna taw ahizong, a na theampo laaksakna taw ahizong, thongtaaksakna taw ahizong, thakhat thu in daan kipia tu hi,” ci hi.

Ezra in Pathian Pok

²⁷Ezra in, “Ih taangpupite ii Pathian, Topa pok vun! Ama in ngam uk lianpa sia Jerusalem ah a om Topa ii Biakinn hi bangin upat nopna thin neisak hi.

²⁸Pathian ii thuthiamna taw kumpipa, a thu kumpuite le a thahat ulian theampote ii maipha ka nga zo hi; Topaka Pathian in hanna hong pia zo a, keima taw cia khawm tu in Israel be lutang tam mama ka zol thei hi,” ci hi.

Ezra 8



Saltanna pan A Cia kik Mihingte

¹Hite sia Artaxerxes ii ngam uk lian a sep sungin Babylonia saltanna pan Jerusalem ah Ezra taw a cia kik be lutangte ii tepteena lai ahi hi:

²⁻¹⁴Phinehas be le phung pan Gershom, Ithamar be le phung pan Daniel David be le phung pan Shecaniah ii tapa Hattush, Parosh be le phung pan Zechariah le a bete pasal 150 (a pianna innkuan tepteena tepteena lai om hi) Pahath Moab be le phung pan Zerariah ii tapa Eliehoenai taw pasal 200 Zattu be le phung pan Jahaziel ii tapa Shecaniah taw pasal 300 Adin be le phung pan Jonathan ii tapa Ebed taw pasal 50 Elam be le phung pan Athaliah ii tapa Jeshaiiah, taw pasal 70 Shephatiah be le phung pan Michael ii tapa Zebadiah, taw pasal 80 Joab be le phung pan Jehiel ii tapa Obadiah taw pasal 218 Bani be le phung pan Josiphiah ii tapa Shelomith taw pasal 160 Bebai be le phung pan Bebai ii tapa Zechariah taw pasal 28 Azgad be le phung pan Hakkatan ii tapa Johanan taw pasal 110 Adonikam be le phung pan Eliphelet, Jeuel le Shemaiah, taw pasal 60 (A khak sang a ciate hi.) Bigvai be le phung pan Uthai le Zaccur, taw pasal 70 ahi uh hi.

Biakinn naseam tu in Ezra in Levite Zong

¹⁵Ahava khua ah a luang tui laakna luamhui ah mihon theampo ka kaikhawm a, tua munah ngiaphual saatin ni thum sung ka taam uh hi. Tua mihon sungah thiampite ka mu a, ahizong Levite ka mu bua hi.

¹⁶Tuaciang lampui kuate ahi, Eliezer, Ariel, Shemaiah, Elnathan, Jarib, Elnathan, Nathan, Zechariah le Meshullam, le laihiil sya niite ahi Joiarib le Elnathante ka sam hi.

¹⁷Casiphia khua mihonte ii lutang ahi Iddo kungah, ama le a lawmte, Biakinn naseamte, Biakinn sungah Pathian naseam tu mihing hong puak natu ngen tu in amate ka paisak hi.

¹⁸Pathian ii thuthiamna taw amate in Mahli be le phung sung pan Levite a pilvang Sherebiah hong puak a, a tapate le a suapuipa te sawm le liat taw hong pai uh hi.



¹⁹Amate in Merari be le phung sung pan Hashabiah le Jeshaihte zong a mealheakte kul taw hong puak hi.

²⁰Tua dom ngawlin Levite a hu tu in Biakinn naseam 220 om a, tuate ii taangpupite sia David kumpipa le a khutnuai uliante ii nasep a piak mihingte ahi uh hi.

Ezra in Mihingte Antanpui in Thungetpui

²¹Ahava tui laakna luam huiah ka vekpi uh in ih Pathian maiah antangin kiniamkhiak tu le ih khualhawna ah hong lampui a, koma le ka tate le ka neisa theampo hong kep natu ama tungah ngen tu in ka sawl hi.

²²Ka khualhawna ah ngalte khut sung pan hong keam tu in kumpipa tungah ngalkapte nget tu sia ka maizum tu ahi hi, banghangziam cile ka Pathian in ama a muang pawpo thupha pia a, ahizong ama a nungngat pawpo tungah lungkim ngawlin daan a piakna thu ama tungah ka son zo hi.

²³Tua ahikom kote in Pathian hong dal natu antangin thu ka ngen uh a, ka thungetnate ama in hong zo hi.

Biakinn atu Letsongte

²⁴Lampui thiampite sung panin Sherebiah, Hashabiah le a dang sawm ka teal uh hi.

²⁵Tuaciang kumpipa, ama tungah ngaisutna a plate le, a kumpi uliante le Israel mihingte ii Biakinn sungah zak tu in a piak ngun le kham le uum le bealte toai ka tee a, tua zawkciang thiampite tungah ka pia hi.

²⁶⁻²⁷Hi teng sia amate ka piakte hi: Ngun - ton 25 Ngun uum le beal 100 - pound 150 Kham - pound 7500 Khamkuang 20 - ounce 270 A citak taubeal 2, khambealte taw a manh kibang hi.

²⁸Keima in amate tungah, “Note sia na taangpupite ii Pathian, Topatungah biakna taw kisai mithiangthote na hi uh a, tuabangma in ama tungah thin zawna taw na piak uh ngun le kham uum le bealte zongh thiangtho hi.



²⁹Biakinn na thet uh mateng tua vanhte pha takin keamcing tavun. Tualai thiampite khan ah tua vanhte toaitee in Jerusalem ah a om lampui thiampite le Levite le Israel te lampuite tungah pia vun,” ka ci hi.

³⁰Tuaciang thiampite le Levite in ngun le kham, uum le bealte Jerusalem Biakinn ah paipui tu in tavuan la uh hi.

Jerusalem ah Cia kik

³¹Tha khat tha, ni sawm le ni nii ni in Jerusalem khua zuan tu in Ahava Tuilaakna luam ka nusia uh hi. Lampi ah ih Pathian in hong ompui a, ngalte hong simna le hong panna panin hong dal hi.

³²Jerusalem khua ka thet uh ciang, ni thum sung ka tawlnga uh hi.

³³Tuaciang ni li ni in Biakinn ah ka pai uh a ngun, kham le uum le bealte toaitee in Uriah ii tapa thiampi Meremoth tungah ka pia uh hi. Ama taw in Phinehas ii tapa Eleazar le Levite nii ahi, Jeshua ii tapa Jozabad le Binnui ii tapa Noadiahte om uh hi.

³⁴Vanh a vekpi kisimin toai kitee a, tepteena cing takin kivawt paih hi.

³⁵Saltanna pan hong cia kikte theampo in Israel Pathian tungah sangaw biakpiakna a hal tu in biakpiakna hong paipui uh hi. Amate in Israel mite theampo atu in khuita 12, tuuta 96, le tuuno 77 pia uh a, mawna pan amate le amate a kithiansua natu in kealta 12 zongh pia uh hi. Hi nganhingte theampo meihal biakpiakna in Topatungah pia uh hi.

³⁶Amate in ngam uk lianpa ii a laithak sia zongh kengin Euphrates nitumna ngamukte le kumpi naseam uliante tungah pia uh hi. Tua uliante sia tua hun lai in mipite le Biakinn sung biakpiak natu in huna a plate ahi uh hi.

Ezra 9

Jew ahi ngawlte taw Kiteenna Ezra in He

¹Hi teng a ksep zawkciang Israel lampuite pawl khat hong pai in, mipite, thiampite le Levite sia a innpaamte ahi Ammon, Moab le Egyptte ahizong, Canaante, Hitte, Perizte, Jebuste le Amorte sung pan a tua min a om ngawlina



thu ka tungah hong son uh hi. Amate in hi mihingte ii a vawt a kiihuai nate vawt uh hi.

²Jew pasalte in ngamdang numeite tenpui ahikom Pathian ii mi thiangthote mi nin suak uh hi. A khial belte sia a lampuite le kumpi naseam uliante ahi uh hi.

³Hi thu ka zaak ciang thinkiam in ka puan ka eaukeak a, ka sam le ka khamul botkeak in khuangai in ka to suk cip hi.

⁴Khuangai in tualai ah nitak biakpiak hun dong ka to a, mihing pawlkhatte ka kungah hong kikhawm uh hi. Tuatate sia saltanna pan a cia kikte ii khialna thu Israel Pathian ii a son hu in a lau te ahi uh hi.

⁵Nitak biakpiak hun a thet ciang khuangai in ka omna mun pan thoto in ka puan ek niknek teng ma silh lai in, khupdin in Topa ka Pathian tungah ka khutte laamin thu ka ngen hi.

⁶Keima in, “Pathian awng, na mai ah vandak in ka om tu ka maizum lawlawm hi. Ka khialna uh sia ka lu sang, a saang zawin kiciang a, vantungte a ban za tu dongin saang hi.

⁷Ka taangpupite hun pan kipan tu hun dongin koma, na mihingte nasia takin ka khial zo uh hi. Kote khialna hangin koma, ka kumpite uh le ka thiampite uh sia ngamdang kumpite khutnuai theng uh a, hong kithatlum in, hong kisuum a, thongtaak tu in hong kipaipui hi. Tuni ciang dongin minsiatna ka thuak dikdek uh hi.

⁸Tu in hun tomno sungin, kote Pathian Topa awng, nong hesuak a, mi pawlkhat sia sila pan nong suatak a, hi mun thiangtho ah thin muang takin nong teangsak hi. Saltanna pan nong suaktasak a, nuntakna thak nong pia hi.

⁹Kote sal ka hi uh hang saltangin nong nusia bua hi. Persia ngam uk liante ii maipha nong musak a, hi lai Judah le Jerusalem ah thinmuanna ka nei thei natu uh le a lal sa na Biakinn sa kik tu in nong nungtasak hi.



¹⁰“Ahizong tu in Pathian awng, hi bang a sua zawkciang bang ci thei nawn thong tu khu ziam? Kamsang na naseamte tungtawn a nong piak ahi, na thupiakte ka zui bua leleau uh hi.

¹¹Amate in, ka lua tu uh ngam sia thiangtho ngawl hi, banghangziam cile tua ngam a, a teang mite in tua ngam mong khat pan mong khat a kiihuai ngamtatnate taw ninsak uh hi, ci in hong son uh hi.

¹²Amate hong cina pan, tua ngam sungah nuamsa in na suan na paalte in a tawntung na luasak nuam uh ahile tua lai mihingte taw na kiteang ngei buatu uh a, a khanto natu le a matut natu in hu ngei ngawl tu nu hi, hong ci hi.

¹³Ka mawna uh le ka khialna uh hangin hiza daan ka thuak uh hangin nangma kote Pathian in kote thuak tu a kilawm za sangin a tawm zaw nong thuaksak a, ka nuntakna uh nong hoaisak lai sia ka he uh hi.

¹⁴Hi bang teng zawkciang nong thupiakte thu sim ngawl kikin hi mihing ngilote taw kiteang kik thei tu khu ziam? Tuabang ka ngamta uh le na thin uuk mama in khat zongh hong hing khoai ngawlin nong thatlum siat tu hi.

¹⁵Israel ii TopaPathian awng, nang thutang ni hi, ahihang kote nong nungtasak hi. Ka khialnate uh na tungah kong pualaak uh hi; na mai ah kong pai natu thu a om bua hi,” ka ci hi.

Ezra 10

Kiten Khopna Bosak natu Tupna

¹Ezra sia Biakinn maiah kapin hi khialnate pualaakin kunin a thunget laitak a kiim ah Israel te— pa, numei, patang kikhawm in, nasia takin kap uh hi.

²Tuaciang Elam be le phung sung pan Jehiel ii tapa Shecaniah in Ezra tungah, “Ngamdang numei tenpuina hangin Pathian tungah ka khial uh hi, ahizong Israel atu in lam et om lai veve hi.

³Tu in hi numeite le a tate ih hawlkeak natu in ih Pathian tungah a ciliap huai kamciamna khat ih vawt hamtang tu hi. Kote in nangma le Pathian ii thupiak a zakta dangte ii vawt tu hong sawl bangin ka vawt tu uh hi. Pathian Thukham ii sawl bangin ka vawt tu uh hi.



- ⁴Tuasia in sep tu na tavuan ahi hi. Kote na nungah om khu hi, tua hi a pai in, seam in,” ci hi.
- ⁵Tuaciang Ezra in Shecaniah ii a ci bang a seam siat tu in thiampi lampuite, Levi lampuite le a taanglai mihon lampuite kiciamsak hi.
- ⁶Tuaciang ama sia Biakinn mai pan pai in Eliashib ii tapa Jehohanan omna ah tumin zan taam hi. Tua munah saltangte thumaan ngawl nate hangin khuangai in om a, bangma peuma ne ngawl dawn ngawl hi.
- ⁷Saltanna pan a cia kik theampo Jerusalem khua ah a kikhop natu thu Jerusalem le Judah ngam mun theampo ah thu kizasak hi.
- ⁸Tua thu mihonpi lampuite ii thupiak bangin a kizasak ahi hi. Ni thum sungin a pai ngawl a om le, a neisa theampo kimat sak tu a, huam minam sungah pawlmi suak thei nawn ngawl tu hi.
- ⁹Tua ni thum sung, a tha kua na ni kul ni in Judah le Benjamin ngam sungah a teang pasal theampote, Jerusalem khua ah hong pai in Biakinn leitual ah kikhawm uh hi. Tua hun sung ngua tam mama zu ahikom khua hun phat ngawl hang le kikhopna a thupi hangin mi theampo ling vadil uh hi.
- ¹⁰Thiampi Ezra dingto in amate tungah, “Note in na thumaan ngawl na uh hang le ngamdang zi na nei man un, Israel tungah khialna na tung sak uh hi.
- ¹¹Tu in na taangpupite Pathian, Topatungah na khialnate pualaak vun a, ama lungdamsak vun. Ih ngam sungah a teang ngamdang mihingte taw tuam om in, na ngamdang zite taw kikhen vun,” ci hi.
- ¹²Mi honpate au in, “Nong sawl bangin ka vawt tu uh hi,” ci in zo uh hi.
- ¹³Ahizong amate in, “Mihon le tam lawlawm a, ngua zongh tam mama sii hi. Hi bangin doi pua sangah kote ding zo nawn ngawl tu khu hi. Hi mawna sungah eite tam mama kihel ih hikom, ni khat ni nii sungin hi nasep zaw zawk tu hi ngawl hi.
- ¹⁴Ih lampui uliante Jerusalem ah taamin hi thu seam taken. Tuaciang ngamdang zi nei pawpo in a kiciam hunin a khua tek pan a lampuite le



thukhente taw hong pai taken. Hi thu taw kisai in Pathian ii thin uukna sia hi bangin thai thei pheang tu hi,” ci thua uh hi.

¹⁵Hi thu sia Asahel ii tapa Jonathan le Tikvah ii tapa Jahzeiahte sim ngawlin nial ngawl hi, amate sia Melshullam le Levi mi Shabbethaite in panpui uh hi.

¹⁶Saltanna pan a cia kikte in hi tupna thukim ahikom thiampi Ezra in be lutang sung pan lampui tu tek tealsak a, a min khum siat hi. Amate in tha sawmna, ni khat ni in a thu kat kipan uh a,

¹⁷tua zawk tha thum sungin amate in ngamdang zi neite taw kisai thu theampo kan siat uh hi.

Ngamdang Zi nei Pasalte

¹⁸Hi sia in ngamdang zinei pasalte tepteena lai ahi hi. A be le phung zui in thiampite: Jehozadak ii tapate ahi Joshua le a suapuite ii be le phung pan Maaseiah, Eliezer, Jarib le Gedaliahte ahi uh hi.

¹⁹Amate in a zite khul tu in kamciam pia a, a mawna uh hangin tuatal khat taw sangaw biakpiakna nei uh hi.

²⁰Immer be le phung pan: Hanani le Zebadiahte ahi uh hi.

²¹Harim be le phung pan: Maaseiah, Elijah, Shemaiah, Jehiel le Uzziachte ahi uh hi.

²²Pashhur be le phung pan: Elioenai, Maaseiah, Ishmael, Nethanel, Jozabad le Elasahte ahi uh hi.

²³Levi sung pan : Jozabad, Shimei, Kelaiah, (Kelita zongh kici), Pethahiah, Judah le Eliezerte ahi uh hi.

²⁴La sate sung pan: Eliashib ahi hi. Biakinn cingte sung pan: Shallum, Telem le Uri te ahi uh hi.

²⁵A dang sung pan: Parosh be le phung pan: Ramiah, Izziah, Malchijah, Mijamin, Eleazar, Malchijah le Benaiah te ahi uh hi.

²⁶Elam be le phung pan: Mattaniah, Zechariah, Jehiel, Abdi, Jeremoth le Elijah te ahi uh hi.



²⁷Zattu be le phung pan: Elioenai, Eliashib, Mattaniah, Jeremoth, Zabad, le Aziza te ahi uh hi.

²⁸Bebai be le phung pan: Jehohanan, Hananiah, Zabbai le Athlai te ahi uh hi.

²⁹Bani be le phung pan: Meshullam, Malluch, Adaiah, Jashub, Sheal le Jeremoth te ahi uh hi.

³⁰Pahath Moab be le phung pan: Adna, Chelal, Benaiah, Maaseiah, Mattaniah, Bezalel, Binnui le Manasseh te ahi uh hi.

³¹⁻³²Harim be le phung pan Eliezer, Isshijah, Malchijah, Shemaiah, Shimeon, Benjamin, Malluch le Shemariah te ahi uh hi.

³³Hashum be le phung pan: Mattenai, Mattattah Zabad, Eliphelet, Jeremai, Manasseh le Shimei te ahi uh hi.

³⁴⁻³⁷Bani be le phung pan: Maadai, Amram, Uel, Benaiah, Bedeiah, Cheluhi, Vaniah, Meremoth, Eliashib, Mattaniah, Mattenai le Jaasu te ahi uh hi.

³⁸⁻⁴²Binnui be le phung pan: Shimei, Shelemiah, Nathan, Adaiah, Machnadebai, Shashai, Sharai, Azarel, Shelemiah, Shemariah, Shallum, Amariah le Joseph te ahi uh hi.

⁴³Nebo be le phung pan: Jeiel, Mattithiah, Zabad, Zebina, Jaddai, Joel le Benaiah te ahi uh hi.

⁴⁴Hite theampo ngamdang zineite ahi uh hi. Amate in a zite khulin a zite le a Tate khulin ciasak siat uh hi.



Nehemiah

Nehemiah 1

¹Hi sia in Hacaliah ii tapa Nehemiah ii nasep zaw sa teng tepteena ahi hi.

Nehemiah ii Jerusalem A thinbotna

Kumpi Artaxerxes ii Persia kumpi a sep a kum kul kum, Kislev tha in keima Nehemiah sia Susa khuapi ah ka om hi.

²Ka suapui khat ahi, Hanani sia midang pawlkhat taw Judah pan hong theng a, amate tungah Jerusalem khua thu le Babylon ngam saltanna pan a cia kik Jew ih mipuite thu ka dongh hi.

³Amate in, saltanna pan a suaktate a khua a tui a thet uhciang haksatna lianpi a thuaknate le a kiim a paam a teang ngamdangte ii a nomuna thu teng ka tungah hong son uh hi. Amate in, Jerusalem luphungte cimhtham lai a, kongpите zongh kaangtum in a kivawt kik ngawllaina thute zongh hong son uh hi.

⁴Hi thu teng ka zaak ciang to suk in ka kap hi. Ni tam mama sung ka mau a an ka ne bua hi. Pathian tungah thu ka ngen a,

⁵“Vantung Pathian, Topa awng! Nang na lian a, nangma kiita in ka om uh hi. Hong itte le na thupiak a zuite tungah na thuciamna thumaan takin na kipsak hi.

⁶Topa awng, hong en tan a, Israel mite ahi na naseamte atu a sun a zanin, ka thungetna hong ngai tan. Ko Israel mihingte ka khial zo uh a, ka khialnate hong pualaak khi hi. Ka taangpupite le keima ka khial zo uh hi.

⁷Ngilo in nang tungah kong khial zo uh a, nong thupiakte ka zui bua uh hi. Na naseampa Moses tungtawn a nong piak thukhamte ka zui bua uh hi.

⁸Moses tungah: ‘Israel mihingte ka tungah nong thumaan bua uh ahile mi namdangte sungah kong thethaang tu hi.



⁹Ahizong ka kungah hong heak kikin ka thupiakte na zui uh le, leimong dongin na kithethaang ta uh zongin keima biak natu in ka tealna sa mun ah kong paipui kik tu hi,' na ci thute tu in phawk kik tan.

¹⁰“Topa awng, hite in nangma mi na naseamte ahi uh hi. Na vaangletna le na thahatna taw amate na suatak hi.

¹¹Ka thungetna le nangma hong upat nuam na naseam dangte theampo ii thungetnate tu in hong ngai tan. Tuni in zawna hong pia tan a, ngam uk lianpa in hong hesuaksak tan,” ka ci hi. Tua hun lai in keima in ngam uk lianpa ii tungah zu pia pa ka hi hi.

Nehemiah 2

Jerusalem ah Nehemiah Pai

¹Tha li zawk ni khat ni in Ngam uk lianpa Artaxerxes an a neak laitakin zu ka pia hi. Ama in nidang in ka khuangaihna hong mu ngei ngawl ahikom,

²ama in, “Banghangin hee tuak mama ni ziam? Na cina ngawl hi; tua hi ciang na thin nuam ngawl hi tu hi,” ci in hong dongh hi. Ka thin patau in,

³ka zokik a, “Kumpipa awng, na khan sau taken! Ka taangpupite a kiphumna khuapi laltham a, a kongpite kaangtum siatin a om laitak bangbangin khuangai ngawlin om thei tu khi ziam?,” ka ci hi.

⁴Ngam uk lianpa in, “Na dei sia bang ziam?” ci in hong dongh hi. Vantung Pathian tungah thu ka ngen a,

⁵tuaciang ngam uk lianpa tungah, “Kumpipa awng na thukim a, kong ngetna nong pia nuam ahile ka taangpupite kiphumna khuapi Judah ngamah hong paisak tan, tua hile tua khuapi ka pua kik thei tu hi,” ka ci hi.

⁶Ngam uk lianpa sia kumpi nu taw tokhawm in ka nget sia hong saang hi. Ama in bangtan vei ngei tu a, bang hun ciang hong heak kik tu ni ziam? ci in hong dongh a ka zokik hi.

⁷Tuaciang, na thukim le Judah ngam dong ka pai thei natu in Euphrates Nitumna sang ngamukte tungah laithak hong atsak tan, ci in ka ngen hi.



⁸Kumpi ngamsung thingkung lopate a keam pa Asaph tungah Biakinn cinna kulh kongpite, khuapi luphungte, le ka ten natu ka innthing tute hong piak natu in lai hong thaaksak natu zongh ka ngen hi. Pathian in kei hong ompui ahikom ka nget theampo ngam uk lianpa in hong pia hi.

⁹Ngam uk lianpa in keima taw paikhawm tu in ngalkapmaang pawlkhat le siphu ngalkap pawlkhat sawl a, Euphrates nitumna sangah khual ka haw uh hi. Tua lai ah ngam uk lianpa ii laithakte ngamkhen ukte tungah ka pia hi.

¹⁰Ahizong Beth Horon khua pan Sanballat le Ammon pan kumpi naseam Tobiah in Israel mihingte phattuam natu in na a seam tu mihing khat hong pai ci thu a zaak uh ciang amate a thin uuk peuma uh hi.

¹¹Jerusalem khua ka theng a, ni thum sung

¹²Jerusalem atu in ka nasep tu Pathian ii ka thin sung a hong suasak thute kuama tungah ka son bua hi. Tuaciang zankim laitak in tho in ka pusuak a, ka lawmte pawlkhat taw ka pai uh hi. Keima tona laa sim ngawl nganhing dang ka keng bua uh hi.

¹³Zan lai ma in khuapi nusia a nitumna sang Kuam Kongpi tawnin thangsang Ngulpui ii Tuinaak pan Nin Kongpi ah ka pai hi. Ka pai kawmin khuapi luphung cimhthamte le mei ii a kak kongpite ka en kawkoai hi.

¹⁴Tuaciang khuapi niswana sang pansaksang Tuinaak Kongpi le Kumpipa Tuili ah ka pai hi. Ka tona laa in thingtawng suangtawngte kawm ah lampi mu zo ngawl ahikom,

¹⁵Kidron Kuam ah ka tuaksuk a, laa tung to kawmin luphung ka en hi. Tuaciang ka paina lampi tawnin ka cia kik a, Kuam Kongpi kantan in khuapi sungah ka tum kik hi.

¹⁶Tualsung kumpi naseamte khat zongh in ka paina mun le ka nasepte he ngawl hi. Judah ka mipuite ahi, thiampite, lampuite, kumpi naseamte, le nasepna ah hong kihel tu mihing khat tung zongh ah tu dong bangma ka son balai hi.



¹⁷Ahizong tu in amate tungah, “Jerusalem lalcip in a kongpite kilal sak siat ahikom hiza ta thinngimna sungah ih om na mu uh hi! Khuapi luphungte ciang kikin ih minsiatna teng bosak tawng,” ka ci hi.

¹⁸Tuaciang amate tungah Pathian ii kei hong ompuina le hong panpuina, le ngam uk lianpa ii kei tungah hong son thu teng ka son hi. Amate in, “Nasep kipan tawng,” hong ci uh hi! Tuaciang amate nasep kipan tu in kithoai uh hi.

¹⁹Sanballat, Tobiah le Arab mi Geshem in sep tu ka ngealna te uh a zaak uh ciang amate in hong nuisan a, “Bang teng sep sawm nu ziam? ngam uk lianpa langpan tu nu ziam?” hong ci uh hi.

²⁰Keima in, “Vantung Pathian in kote zawna hong pia tu hi. Kote ama naseam ka hi uh a, nasep ka kipan tu uh hi. Ahizong note in Jerusalem ah neisa te taw kisai in thu na nei bua uh a, tuaciang a taang ngeina sungah note kihelna na nei bua uh hi,” ci in ka zo hi.

Nehemiah 3

Jerusalem ii Luphung Ciang kik

¹Khuapi luphung sia hi bangin kiciang kik hi. Thiampi Saang Eliashib le a thiampipuite in Tuu Kongpi vawt kik a, aapin kongpite a omna tek ah koi uh hi. Amate in luphung sia Zakhat Tausaang le Hananel Tausaang dongin aap uh hi.

²Jericho khua mite in luphung maa mong khen sia ciangto uh hi. Imri ii tapa Zaccur in luphung maa mong khen sia ciang hi.

³Hassenaah ii be le phungte in Ngasa Kongpi vawt uh hi. Amate in a zawlte thungin kongpite bulh uh a, kongpi kalh natu in a kalhnate le a zawlte thua uh hi.

⁴Uriah ii tapa Hakkoz ii tupa Meremoth in luphung maa mong khen sia ciang hi. Berechaih ii tapa ahi Meshazabel ii tupa Meshullam in luphung maa mong khen sia ciang hi. Baana ii tapa Zadok in luphung maa mong khen sia ciang hi.



⁵Tekoa mite in luphung maa mong khen sia zom uh a, ahizong khuasung lampuite in naseam lampuite ii amate sep tu a, a sawl nasepte nial uh hi.

⁶Paseah ii tapa Joaida le Besodeiah ii tapa Meshullamte in Jeshanah Kongpi vawt kik uh hi. Amate in a zawlte thungin kongpите bulh uh a, kongpi kalh natu in a kalh nate le a zawlte thua uh hi.

⁷Gibeon pan Melatiah, Meronoth pan Jadon le Gibeon le Mizpah mite in Euphrates Nitumna sang ngamukpa inn dong luphung maa mong khen sia zomto hi.

⁸Khamseakpa Harhaiah tapa Uzziel in luphung maa mong khen sia zomto hi. Paaknamtui vawt pa Hanamiah in Luphung Zai ciang dong luphung maa mong khen sia zomto hi.

⁹Jerusalem ngam khenlang a ukpa Hur ii tapa Rephaiah in luphung maa mong khen sia zomto hi.

¹⁰Harumaph ii tapa Jedaiah in ama inn kungah luphung maa mong khen sia zomto hi. Hashabneiah ii tapa Hattush in luphung maa mong khen sia zomto hi.

¹¹Harim ii tapa Malchijah le Pahath Moab ii tapa Hasshub in luphung maa mong khen sia zomto in meikhuk Tausaang sa uh hi.

¹²Jerusalem ngam khenlang a ukpa Hallohesh ii tapa Shallum in luphung maa mong khen sia ciang hi. (A tanute in nasep hu uh hi.)

¹³Hanun le Zanoah khuapi sung a, a teangte in Kuam Kongpi vawt kik uh hi. Amate in kongpите a omna tu mun ah koi in, kongpите kalh natu in a kalhnate le a zawlte bulhin luphung sia pi tul le pi za-nga sung Nin Kongpi dong pua uh hi.

¹⁴Beth Haccherem ngamukpa Rechab ii tapa Machijah in Nin Kongpi vawt kik hi. Ama in kongpите a omna tu mun ah koi a, kongpi kalh natu in a kalhnate le a zawlte bulh hi.



¹⁵Mizpah Ngam ukpa Colhozeh ii tapa Shallum in Tuinaak Kongpi vawt kik hi. Ama in kongpi lam siinin kongpite a omna tu mun ah koi in, a kalhna le a zawlte bulh hi. Ama in kumpi huan ii zom ah a om Shelah Tuili luphung sia David ii khuapi pan tuaksukna keallei ciang dong ciang hi.

¹⁶Bethzur Ngam khenlang a ukpa Azbuk ii tapa Nehemiah in luphung sia David ii thaan, tuili, le ngalkap innte dongin zom hi.

Luphung a, naseam Levite

¹⁷A nuai a, Levite in luphung a zom khen pawlkhatte ciang kik uh hi: Bani ii tapa Rehum in a zom khen sia ciang hi; Hashabiah, Keilah Ngam khenlang ukpa in a ngambup taangin a zom khen sia ciang hi;

¹⁸Henadad ii tapa Bavvai, Keilah Ngam a taanglai khenlang ukpa in a zom khen sia ciang hi;

¹⁹Jeshua ii tapa Ezer, Mizpah ngamukpa in ngalhiamte koina mai luphung a koaina mun dong a zom khen sia ciang hi;

²⁰Zabbai ii tapa Baruch in Thiampi Saang Eliashib inn kongbiang dong luphung maa mong khen sia zom hi;

²¹Uriah ii tapa ahi Hakkoz ii tupa Meremoth in Eliashib inn mong dong maa mong zom hi.

Luphung a, Naseam Thiampite

²²A nuai a, thiampite in luphung maa mong khen pawlkhatte ciang kik uh hi: Jerusalem khua paam a teang thiampite in maa mong khen cian zomto uh hi;

²³Benjamin le Hasshub in amate inn mai ah luphung maa mong khente zom uh hi. Maaseiah ii tapa ahi Ananiah ii tupa Azariah in a innmai ah luphung maa mong khen sia zom hi;

²⁴Henadad ii tapa Binnui in Azariah inn pan luphung kingh dong luphung maa mong khen sia zom hi;

²⁵⁻²⁶Uzai ii tapa Palal in luphung kingh pan kipan a, inncingte omna paam kumpi inn tung tusaang luphung teng zom hi; Parosh ii tapa Pedaiah in niswana sang Tui Kongpi paam teng le Biakinn cingte tusaang luphungte



zom hi. (Hi mun sia Ophel kici khuapi taw a kinaina mun hi a, Biakinn naseamte teenna ahi hi.)

Naseam Dangte

²⁷Tekoa khua mite in Biakinn cinna tusaang lian ii ngalkhat mun khat pan Ophel nai luphung dong a nii veina maa mong khen sia zom uh hi.

²⁸Thiampi pawlkhat in Siphu Kongpi pansaksang amate innmai tek ah seamin luphung maa mong khen sia zom uh hi.

²⁹Immer ii tapa Zadok in ama inn mai ah luphung maa mong khen sia zom hi. Shecaniah ii tapa Shemaiah, Nisuana Kongpi cingpa in luphung maa mong khen sia zom hi.

³⁰Shelemiah ii tapa Hananiah le Zalaph ii tapa lukna Hanun in a nii veina luphung maa mong khen sia zom uh hi. Berechiah ii tapa Meshullam in a inn mai ah luphung maa mong khen sia zom hi.

³¹Khamseakpa Malchijah insaksang nisuana sang luphung kingh, a khan tungnung bel ii paam, Miphkad Kongpi pan Biakinn dong ahi, Biakinn naseamte le sumzuakte omna inn dong luphung maa mong khen sia zom hi.

³²Khamseakte le sumzuakte in a kingh a om khaan pan Tuu Kongpi dong a khak bel luphung maa mong khen teng zom uh hi.

Nehemiah 4

Nehemiah in A nasepna A langpante Zo

¹Koma Jewte in luphung cian ka kipat kikna thu Sanballat in a zaak ciang a thin ukin, selno tu hong kipan hi.

²A lawmte le Samaria ngalkapte mai ah ama in, “Hi mi ngina ngawl Jewte in bang teng vawt kisa ziam? Khuapi pua kik nuam hi tu ziam? Sangaw biakpiaknate piakna taw ni khat sungin nasep zo thei tu in kingaisun hi tu ziam? Thingtawng suangtawng kaangmong teng taw innsak natu suang vawt thei sawm hi tu ziam?” ci hi.

³A kung a ding Tobiah in, “Hite in bang luphung zongh ciang thei lei tu ziam? Ngia ngangawn zongh in phulvawk zo lel tu hi!” ci in belap hi.



⁴Keima in thu ka ngen a, “Pathian awng, hong selnonate za in! Hong selnonate amate lu tungah tu taken. A neisa theampo kisut siat taken a, ngamdang ah saltang tu in kipaipui taken.

⁵A siatnate maisak heak in a, a khialnate mangil heak in, banghangziam cile amate in ko innsate hong zawngsak uh hi,” ka ci hi.

⁶Tuabangin kote in luphung ka ciang tato uh a, mihingte naseam thanuam mama ahikom, hai ngawlin a saanna ii a lang kizo to pai hi.

⁷Jerusalem luphung cian kik a kingaih mama na thu le luphung hawngte a kihuhna thute Sanballat, Tobiah le Arabia mite, Ammon mite le Ashdod mite in a zaak uh ciang a thin uk mama uh hi.

⁸Tua hi a, amate kipawlin Jerusalem simin buaina vawt tu sawm uh hi,

⁹ahizong ih Pathian tungah thu ka ngen uh a, sun le zanin ngalvil tu mihing ka koi uh hi.

¹⁰Tuaciang Judah mihingte in a nei la khat sa uh a: “Eite nasep ngimin ih tha kiam a, Nin vawk tu tam mama hi. Tuni in bangbang luphung ciang thei tu hi ziam?” ci uh hi.

¹¹Ih ngalte in, eite ii ih mu ma le eite ii ih heak ma in eite kung hong thengin hong thatlum tu a, tuabangin ih nasep uh tawlnga tu hi, ci in ngaisun uh hi.

¹²Ahitazong ih ngalte sungah a teang Jewte in ih ngalte ii hong vawt nopna thute pehial pehial in hong ko uh hi.

¹³Tua ahikom ka mihingte tungah namsau, tei le thalte ka pia a, a kiman ngawl lai luphung nung sangah a be le a phung zui in ka pangsak hi.

¹⁴Mihingte ii launa ka mu ciang amate tung, a lampuite tung le uliante tungah, “Ih ngalte kiita heak vun. Topa letna le a kiitak huai nate phawk tavun a, na ngam mipuite atu, na tate atu, na zite atu le na innkuanpuite atu in ngalsim tavun,” ka ci hi.



¹⁵Ih ngalte ii hong sim nopna thute ih heak sia a zaak uh ciang, Pathian in a sawmnate suktansak zo hi, ci in tel uh hi. Tuaciang luphung cianna ah ka vekpi uh in ka kuan kik uh hi.

¹⁶Tua hun a kipan in ka mihingte a lang in naseam a, a lang in ngal simna puante silhin, tei, lum le thalte toai in ngalvil uh hi. Tuaciang luphung a ciang mihingte ih lampuite in nasia takin panpui uh hi.

¹⁷Vanh a nawnte ngangawn in a khut lang khat taw naseam in a lang khat ah ngalhiamte toai uh hi.

¹⁸Naseamte peuma in a kawngah namsau kua uh hi. Lemle tum tu pa ahile keima taw omkhawm hi.

¹⁹Keima in mipite le a uliante le lampuite tungah, “Ih nasepna zai a, kikhuala in luphung tungah khat le khat ih ki thethaang hi.

²⁰Lemle aw na za uh le ka kungah hong kikhawm tavun. Ih Pathian in ngal hong simsak tu hi,” ci in ka son hi.

²¹Tua hi a, nisim in zing khuavak pan zan aksi a sua dong kote a lang in luphung ka cian uh laitak a lang in tei toai in ngal ka vil uh hi.

²²Tua hun sungin naseam lampuite le nasep a hute theampo zanin khuapi a cing tu le sunin na a seam tu in Jerusalem ah zantaam tu in ka sawl hi.

²³Keima, ka lawmte, ka naseamte le keima hong cingte in zan ngangawn in ka puante uh ka suut bua uh hi. Ka khut sung tek uh ah ka ngalhiamte ka toai uh hi.

Nehemiah 5

Mizawngte a Kinencipna

¹Tawmvei zawkciang nupi le pasal tam mama in Judah a mipuite tungah lungkim ngawl pualaak tu in kipan uh hi.

²Pawlkhate in, “Innkuan lian ka hi uh a, nuntak natu antang ka kisamh uh hi,” ci uh hi.



³A dangte in, “Pukthi ngawl natu in, antang kicing nga natu ka lote, ka sapit huante le ka innte ka pong uh hi,” ci uh hi.

⁴A taanglai dangte in, “Ka lote le ka sapit huante atu in phiangshia piak tu in sum ka puk uh kul hi.

⁵Eite ih Judah mipuite taw minam khat ih hi hi. Ih tate amate tate taw kibangin pha hi ngawl ziam? Ahizong ih tate sal ih suasak kul hi. Ih tanute pawlkhat sal in kizuak zo hi. Bangma ih law thei nawn bua hi, banghangziam cile ih lote le ih sapit huante hong kilaaksak zo hi,” ci uh hi.

⁶A phunnate ka zaak ciang ka thin uk a,

⁷khensatna khat ka nei hi. Mipi lampuite le a uliante ka tei a, amate tungah, “Na suapuite nengcip nu hi,” ka ci hi. Tua buaina taw kisai in mihonpite ka sam a,

⁸amate tungah, “Ngamdangte tungah amate le amate a kizuak ih Judah mipuite ih hi thei za in ih tan kik hi. Tu in Judah a mipuite ahi note tungah amate le amate hong kizuak natu in na suapuite na sawl hamtang uh hi!” ka ci hi. A lampuite thim dide in om a, bangma son tu he ngawl uh hi.

⁹Tuaciang keima in, “Note na ngamtatna uh khial zo nu hi! Pathian zakta in a maan bang na sep tu uh ahi hi. Tua hile ih ngalte ahi Gentilete in ei hong zawnsak natu thu om ngawl tu hi.

¹⁰Mihingte in keima tung pan sum le antang ka pusak hi. Tuabangma in ka lawmte le ka naseamte in sum le antang keima tung pan ka pusak hi. Tu in leibate ih not nawn buatu hi.

¹¹Dangka le antang, zu le olive thau, hong ba theampo maisak siat tavun. A lote, a sapit huante, a olive kungte le a innte tu tatak ma in amate pia kik vun!” ka ci hi.

¹²Lampuite in, “Na ci bangin ka vawt tu uh hi. A neisate ka pia kik tu uh a, leiba zongh ka siik nawn buatu uh hi,” hong ci hi. Thiampite ka sam a, lampuite ii tu mama a, a vawt kamciam sia a zui natu in, thiampite mai ah lampuite ka kiciamsak hi.



¹³Tuaciang ka kawng ah ka vial dial sia suutin ka thing hi. “Na kamciam bang a zui ngawl peuma Pathian in hi bangin hong thing tu a, Pathian in na innte le na neisa theampo la in, bangma hong nusiak ngawl tu hi,” ka ci hi. Tua lai ah a omte theampo in, “Amen!” ci in Topa pok uh hi. Tuaciang lampuite in a kamciam zui uh hi.

Nehemiah ii A duhop Ngawlna

¹⁴Artaxerxes ii kumpi a sep kum kulna pan kipan kum sawmthum le kum nii dong, kum sawm le kum nii sung theampo Judah ngam uk ka sep sungin ngam uk khat ka hina taw keima hong kipia an sia keima le ka mealheakte in ka ne bua uh hi.

¹⁵Ka mai ah ngam uk a seam peuma mipite ii vanhngit hi a, nisim in a an tu le a zu tu in nguntang sawmli veu ngen uh hi. A naseamte ngangawn in mipite nengcip hi. Ahizong keima in Pathian zakta ka hikom tuabangin ka ngamta bua hi.

¹⁶Ka tha ka ngal teng luphung cian kikna ah ka zangh a, keima atu in vanh bangma ka la bua hi . Keima atu na a seam pawpo luphung cianna ah kihel uh hi.

¹⁷Kiim le paam ngam pan ka kungah hong pai mihing theampo dom ngawlin, ka an neakna sabuai ah Judahte le a lampuite za le sawmnga an ka vaak tawntung hi .

¹⁸Ni simin a neak tu khuital khat, tuu limci bel luk, le ak tam mama ka pia a, ni sawm simin zu a thak in ka pia hi. Ahitazong mihonpite ii a haksatna he ka hikom, ngamukpa ii a nga tu hamphatnate ka la bua hi.

¹⁹Pathian awng, nang tungah thu kong ngen hi, hi mipite atu in ka septe theampo, keima phat natu in hong teptesak tan.

Nehemiah 6

Nehemiah A thasawmna



¹Kongpitem ah kongkha bulh ngawl lai ih hi hang, luphung cian ih zawna thu le a vang khat zongh a om nawn ngawl na thu Sanballat, Tobiah, Geshem le a dang ih ngalte in za uh hi.

²Tuaciang Sanballat le Geshem in Ono Zaangtam khuanote khat ah amate taw kimu natu ngaisutna pia in kam hong vaitha hi. Hi thu sia bang khat po hong law nop manin kei hong theamna ahi hi.

³Amate kungah kamtaite ka sawl a, “Nasep thupi nei ka hikom tua lai ah paisuk thei ngawl khi hi. Nasep tawlngasak in, note taw kimu tu in kong pai buatu hi,” ka cisak hi.

⁴Amate in tuabangin li vei kam hong vaitha a, keima zongh in tuabangma in li vei ka zokik hi.

⁵Tuaciang a nga veina ah Sanballat in tazeik tup ngawl laithak khat a naseamte khat in hong piasak hi.

⁶Tua lai sungah: “Geshem in hong son a, nangma le Jew mihingte in ngaltho nuamin, luphungte ciang kik nu hi, ci in kiim le paam mihingte in son kheukho hi, tuaciang nangma le nangma kumpi kisuaksak nuam ni hi ama in hong ci sii hi,

⁷tuaciang Judah kumpi sia nangma na hina thu, kamsang pawlkhat in Jerusalem khua sungah a son natu in ngealna nei hi, zongh Geshem in ci hi. Kumpipa in hi thu za nanak tu ahikom keima taw kimu in thu kum khawm leang ka uuk hi,” ci in ki at hi.

⁸Ama tungah lai ka thuk kik a, “Na son thute khat zongh maan ngawl hi. Nangma phua tawm vive hi siat hi,” ka ci hi.

⁹Nasep tawlngak thei natu in amate in ko hong lauthawn ahi hi. Thu ka ngen a, “Ahizong tu in, Pathian awng, hong thahatsak tan!” ka ci hi.

¹⁰Hi hun sungin a inn a nusia thei ngawl Dalaiyah ii tapa, Mehettabel ii tupa Shemaiah kungah haw tu in ka pai hi. Ama in kei tungah, “Nangma le keima, Biakinn sung Mun Thiangtho ah pai in ih buu khawm tu a, kongkhate ih kalh



tu hi, banghangziam cile nangma that tu in amate hong pai tu hi. Tu in nangma that tu in zan khat pawpo amate hong pai tu uh hi,” hong ci hi.

¹¹Keima in, “Kei sia tai in, a buu te nam ka hi bua hi. Biakinn sung bukna taw ka nuntakna huuk sawm tu in hong ngaisun ni ziam? Tuabangin ka buu buatu hi,” ci in ka zokik hi.

¹²Ka ngaisut kik ciang Pathian in Shemaiah tungah tuabang kidop natu thu son hi ngawl a, Tobiah le Sanballat in tuabang teng kei tungah son tu in Shemiah sumnguk pia a hina thu ka phawk hi.

¹³Ka min hong siatsak natu le maizum ka nga natu in mawna ka vawt thei natu dongin hong lauthawn tu in amate in Shemaian cial hi.

¹⁴Thu ka ngen a, “Pathian awng, Tobiah le Sanballat ii nasepnate phawkin, amate daan pia in. Kei hong lauthawn numei nu Nodiah le a dang kamsangte theampo phawk in,” ka ci hi.

Nasep Mazialna

¹⁵Ni sawmnga le ni nii a kisep zawkciang Elul tha ni kul le ni nga ni in lumphung cian kizo thiang hi.

¹⁶Ih kiim ngam a om ih ngalte in hi thu a zaak uh ciang a mai zum a, Pathian ii panpuina taw nasep a kizawna thu a kuama po in he uh hi.

¹⁷Hi hun sung theampo Judah lampuite Tobiah taw lai kithaak tawntung uh hi.

¹⁸Tobiah sia Arah ii tapa Shecaniah ii maakpa ahikom Judah ngamsung mi tam mama ama sangah pang uh hi. Tua bek dom ngawlin a tapa Jehohanan in Berechiah ii tapa Meshullam ii tanu tenpui hi.

¹⁹Mihingte in ka mai ah Tobiah ii nasep phate theampo son uh a, ka thuson theampo ama tungah son siat uh hi. Tuaciang ama in lauthawna lai kei hong thaak tawntung hi.

Nehemiah 7



¹Tu in luphung cian kiman zo a, kongpите kибul siatin Biakinn cingte, biakna taw kisai a thiangtho la sa pawlte, le a dang Levite a nasep tek kihawmsak zo hi.

²Jerusalem khuapi a uk tu in mihing nii ka koi a, ka suapuipa Hanani le kulhpi a uk ngalkap hon ukpa Hananiah ahi hi. Hananiah sia a muanhuai le Pathian a kiita khat hi a, kuama taw kibang ngawl hi.

³Amate tungah, Jerusalem kongpите zingsang nisua zawk ma teng a kihon ngawl natu le nitum ciang kongcingte a cia ma in a kikha natu in ka sawl hi. Amate tungah Jerusalem khua sungah a teang mi pawlkhatte sung pan khuapi cing tu pawlkhat le a kismh na po ah ngalvil tu pawlkhat le amate innhuang tek a cing tu pawlkhat a koi natu zongh ka vaitha hi.

Saltanna pan A cia kikte Min Tepteena
(Ezra 2.1-70)

⁴Jerusalem sia khuapi lian khat hi napi a sungah mihing tam teang ngawl a, inn zongh tam kisa ngawl lai hi.

⁵Mihingte, a lampuite le a uliante kaikhawm tu le, a innkuan sung mihing tepteena lai sitthiang tu in Pathian in ka thin sungah hong sawl hi. Saltanna pan hong cia masa belte a ki tepteena laite ka mu a, a nuai a bang ahi hi.

⁶Saltang tam mamate in Babylon ngam nusia in amate khua tek ahi, Jerusalem le Judah ah cia kik uh hi. Amate innkuanpuite in Nebuchadnezzar Kumpipa ii amate thongtaak tu a, a paipui pan kipan Babylon ah saltangin teang uh hi.

⁷A lampuite sia Zerubbabel, Joshua, Nehemiah, Azariah, Raamiah, Nahamani, Mordecai, Bilshan, Mispereth, Bigvai, Nehum le Baanah ahi uh hi.

⁸⁻²⁵Saltanna pan a cia kik Israel be le phungte sung pan mihing phaza tek sia hi bang ahi hi. Parosh - 2,172 Shephatiah - 372 Arah - 652 Pahath Moab(Jeshua le Joab suan le paalte) - 2,818 Elam - 1,254 Zattu - 845 Zaccai - 760 Binnui - 648 Bebai - 628 Azgad - 2,322 Adonikam - 667 Bigvai - 2,067 Adin - 655 Ater(Hezekiah zongh kici) - 98 Hashum - 328 Bezai - 324 Hariph - 112 Gibeon - 95



26-38 A taangpupite teenna khua taw kizui in a cia kik mite a nuai a bang ahi hi. Bethlehem le Netophah pan - 188 Anathoth pan - 128 Beth Azmaveth pan - 42 Kiriath Jearim, Chephirah le Beeroth pan - 743 Ramah le Geba pan - 621 Michmash pan - 122 Bethel le Ai pan - 123 A dang Nebo pan - 52 A dang Elam pan - 1,254 Harim pan - 320 Jericho pan - 345 Lod, Hadid le Ono pan - 721 Senaah pan - 3,930

39-42 Saltanna pan a cia kik thiampi be le phungte tepteena lai hi bang ahi hi. Jedaiah pan (Jeshua suan le paalte) - 973 Immer pan - 1,052 Pashhur pan - 1,247 Harim pan - 1,017

43-45 Saltanna pan a cia kik Levi be le phungte panin: Jeshua le Kadmiel (Hodaviah ii suan le paalte) - 74 Biakinn lasate (Asaph ii suan le paalte) - 148 Biakinn cingte (Shallum, Ater, Talmon, Akkub, Hatita le Shobai ii suan le paalte) - 138 ahi uh hi.

46-56 Saltanna pan a cia kik Biakinn naseamte ii be le phungte panin: Ziha, Hasupha, Tabbaoth, Keros, Sia, Padon, Lebana, Hagaba, Shalmal, Hanan, Giddel, Gahar, Reaiah, Rezin, Nekoda, Gazzam, Uzza, Paseah, Besai, Meunim, Nephushesim, Bakbuk, Hakupha, Harhur, Bazlith, Mehida, Harsha, Barkos, Sisera, Temah, Neziah le Hatipha ahi uh hi.

57-59 saltanna pan a cia kik Solomon ii naseamte ii be le phungte panin: Sotai, Sophereth, Perida, Jaalah, Darkon, Giddel, Shephatiah, Hattil, Pochereth Hazzebaim le Amon te ahi uh hi.

60 Saltanna pan a cia kik Biakinn naseamte ii suan le paalte le Solomon ii naseamte ii suan le paalte a vekpi in 392 pha uh hi.

61-62 Hi lai ah 642 te sia Delaiah, Tobiah le Nekoda suante hi a, Tel Melah, Tel Harsha, Cherub, Addon le Immer khua pan a cia kikte hi nabi Israel suan le paal a hina lak thei ngawl uh hi.

63-64 A taangpupite ii khangthu tepteena lai a lak tu a mu zo ngawl thiampi be le phungte sia a nuai a te ahi hi. Hobaiah, Hakkoz le Barzillai te ahi uh hi. (Barzillai thiampi be le phung a pu in Gilead mi Barzillai be le phung numei



khat tenpui a, a sunghpa min la ahikom Barzillai be le phung kici hi.) A taangpupite a kuate ziam ci in lak thei ngawl ahikom amate thiampi in kisaang ngawl hi.

⁶⁵Judah ngamukpa in Urim le Thummim a zangh thei thiampi khat a om mateng in Pathian tungah a kipia an, ne thei ngawl tu nu hi, ci in amate son hi.

⁶⁶⁻⁶⁹saltanna pan a ciate a vekpi in - 42,360 A naseamte pa le numei - 7,337 Lasate pa le numei - 245 Siphu - 736 Laa - 245 kalaoh - 435 Laano - 6,720 pha uh hi.

⁷⁰⁻⁷²Mihing tam mama in Biakinnsak kik natu in na manphate pia uh hi. Ngam ukpa in kham ounce - 270 biakpiakna uum le beal - 50 thiampipuan - 530 Be lutangte in kham pound - 337 ngun pound - 3215 A taanglai mipite in kham pound - 337 ngun pound - 2923 thiampi puan- 67 te ahi hi.

⁷³Thiampite, Levite, Biakinn cingte, tum thei tumte, mi nautang tam mamate, Biakinn naseamte - Israel mihingte theampo — sia Judah ngamsung khuapi note le khuapi liante ah teang uh hi.

Nehemiah 8

Ezra in Mihingte tungah Thukham Sim

¹Tha sali tha in Israel mihingte theampo a khua tek ah teang thei hi. Tua tha ni khat ni in amate theampo Jerusalem khua Tui Kongpi sungsang leitual ah kikhawm uh hi. Amate in Topa ii Moses tungtawn a, Israel a piak Thukham laibu sia la tu in thiampipa le Thukham thiampa Ezra sawl uh hi.

²Tuaciang Ezra in pasal, numei le thutel thei sa patangte kikhopna mun mipite kungah tua laibu paipui hi.

³Tua lai kongpi hui leitual ah ama in Thukham laibu sia zing khuavak pan nisun dong amate sim a, amate in pha takpi in ngai uh hi.

⁴Ezra sia thuson natu in thing taw a kivawt dawtuam tungah ding hi. Ama ziat sangah Mattithiah, Shema, Anaiah, Uriah, Hilkiah le Maaseiah ding uh a,



ama vei sangah Pedaiah, Mishael, Malchijah, Hashum, Hashbaddanah, Zechariah le Meshullam ding uh hi.

⁵Mipite ii a tung dawtuam saangna ah Ezra ding a, amate in Ezra salh nginge uh hi. Ezra in laibu a hon po ciang amate ding siat uh hi.

⁶Ezra in, “A lian Pathian, Topa pok vun!” ci hi. Mihing theampo in a khutte laamto siat uh a, “Amen! Amen!” ci in zo uh hi. Mipite khupdin in a maitang lei a phak dong kunin bia uh hi.

⁷Tuaciang amate tho in a omna tek ah ding uh a, Levite ahi a nuai a Jeshua, Bani, Sherebiah, Jamin, Akkub, Shabbethai, Hodiah, Maaseiah, Kelita, Azariah, Jozabad, Hanan le Pelaiah te in amate tungah thukham son thiange uh hi.

⁸Mipite ii a tel thei natu in amate in Pathian ii Thukham sia kam taw pheem in son thiange uh hi.

⁹Mipite in Thukham ii deinate a zaak uh ciang a thin suu in kap tu in kipan uh hi. Tuaciang ngamukpa ahi Nehemiah, thiampi le Thukham thiam Ezra le mipite tungah Thukham a son thiange Levite in mihing theampo tungah, “Tuni sia na Topa Pathian atu in thiange tho ahikom, khuangai in a kap tu na hi bua uh hi.

¹⁰Tu in cia tavun a, anlim tuilim ne tavun. Na an le na zute, a kicing a nei ngawlte hawm tavun. Tuni sia ih Topa atu in thiange tho ahikom khuangai heak vun. Topa ii note hong piak thinnopna in note hong thahatsak tu hi,” ci in son hi.

¹¹Levite in mipite dai khipkhepsakin tuabang ni thiange tho ni in a khuangai ngawl natu in son kawkoai uh hi.

¹²Tuaciang mipite a inn uh ah cia in an ne in thinnuam takin zu ne uh a, a nei pawpo ngualdangte hawm uh hi. Banghangziam cile amate tungah a kisim thukhamte a telthiang uh hang ahi hi.

Buk Poai



¹³A zing ciang in be lutangte sia thiampite le Levite taw Thukham hilnate sin tu in Ezra kungah pai uh hi.

¹⁴Topa ii Moses tungtawn in a piak Thukham in Buk Poai hunsung teng Israel mihingte thaampheang buk sungah a om zii natu a sawlna thu amate in mu uh hi.

¹⁵Tua ahikom amate in Jerusalem le a dang khuapi, khua note ah zui tu in a nuai a bangin thupia uh hi. “Thukham sungah zui tu in a ki at bangin mual tungah pai vun a, buksak natu in taakthing baakte, olive baakte, myrtle baakte, palm baakte le a dang thingbaakte la vun,” ci uh hi.

¹⁶Tuaciang mipite in thingbaakte la in amate innkhum tam tung, a leitual, Biakinn huangsung le, Tui Kongpi le Ephraim Kongpi hui ah a om taangpi leitual ah bukte sa uh hi.

¹⁷Saltanna pan a cia kik mihingte theampo in buk sa in tuate sungah teang uh hi. Hisia in Nun ii tapa Joshua hun zawkciang, a kivawt ciil hi a, a kuama po lawpin lungdam uh hi.

¹⁸Poai hunsung ni masa ciil pan kipan nitawp ni dong ni simin amate in Pathian ii Thukham sim uh hi. Amate in ni sali sung poaikhaam uh a, Thukham sungah a om bangin ni liat ni in paoi khupna vawt uh hi.

Nehemiah 9

Mihingte in A khialna uh Pualaak

¹⁻²Tua tha ni kul le ni li ni in, a khialna uh hangin khuangaihna lakna in antang tu in Israel mihingte kikhawmtua uh hi. Amate sia ngamdang mihingte theampo taw kikhen zo uh hi. Amate khau-ip puan silhin khuangaina lim in a lutung uh ah leivui buak uh hi. Amate dingin amate le a taangpupite khialnate pualaak tu in kipan uh hi.

³Nai thum sung Topa a Pathian ii Thukham amate tungah kisim a, tua zawk nai thum sung amate in a khialnate pualaak in, Topa a Pathian bia uh hi.



⁴Levite atu in tusaang khat om a, tua ii tungah Jeshua, Bani, Kadmiel, Shebaniah, Bunni, Sherebiah, Bani le Chenanite ding uh hi. Amate in Topa a Pathian tungah a ngingin thungen uh hi.

⁵A nuai a Levite Jeshua, Kadmiel, Bani, Hashaneiah, Sherebiah, Hodiah, Shebaniah le Pethahiah te in biak sapna sam uh hi. Amate in: “Ding vun a, Topa na Pathian uh pok vun; a tawntung a tawntungin ama pok vun! mihingte ii pokna sia a kicing zo bua zong, ama minthanna misim in pok taken,” ci uh hi.

Maw Pualaak Thungetna

⁶Tuaciang Israel mihingte in hi bangin thungen uh hi. “Topa awng nangma bek Topa na hi a, Vantungte le van a aksite na vawt hi. Lei le tuipi le a sung a, na theampo na piangsak a; nuntakna na pia siat hi. Vantung ah a om theampote in kunin nang hong bia uh hi.

⁷Topa Pathian awng, nangma in Abram teal in, Babylon ngam Ur khua pan paipui in, a min Abraham in na laih hi.

⁸Na tungah hong thumaanna na mu a, ama taw in thuciamna khat na vawt hi. Canaante ngam, Hit mite le Amorte ngam, Perizte, Jebuste, Girgashte ngam sia a suan a paalte teenna ngam tu in ama tungah piak tu in kamciam na pia hi. Nangma thumaan na hikom na kamciamte na tangtungsak hi.

⁹“Egypt ah ka taangpupite uh ii thuakna na mu a, San Tuipi ah hu hong ngetnate na za hi.

¹⁰Kumpipa, a uliante le a ngam mite langpan in nalamdangte na vawt hi, banghangziam cile amate in na mite a zawnsakna na he hi. Tuni dongin na nei minthanna sia tua hunlai pan na nga ahi hi.

¹¹Na mite atu in tuipi sungah lampi khat na vawt a, leiko tungah amate na paipui hi. Tuipi kihual sungah suangtum khat a tumsuk bangin, amate a delte tuithuk sungah tuitaa uh hi.

¹²Sun in amate meei taw lam na pui a, zanin mei taw a lampite na taangsak hi.



¹³Vantung panin Sinai Mual tungah na tuaksuk a, na mite paupui in thukham phate le hilna maante na pia hi.

¹⁴Na Sabbath ni a thianthosak natu in amate na hil a, na naseampa Moses tungtawn in na thukhamte na pia hi.

¹⁵“Amate a ngil kial ciang vantung pan anluum na pia a, a dangko ciang suang sung pan tui na pia hi. Amate tungah piak tu in na kamciam sa leitanghte uk tu in amate na sawl hi.

¹⁶Ahizong ka taangpupite uh kiphasak in thinpui a, na thupiakte zui tu nial uh hi.

¹⁷Na thu ni nuam ngawlin, na nasep sate theampo amate in mangil siat uh hi, na lak sa nalamdangte mangil uh hi. Saltanna Egypt ah a heakpui kik tu in, kiphatsakna taw amate in lampui khat teal uh hi. Ahizong nangma in mawna a maisak Pathian na hi a, hesuakna le itna nei in na thin uai hi. Na thuthiamna lian a, amate na nusia bua hi.

¹⁸Amate in a kiseak khui milim khat vawtin Egypt pan a paipui pathian hi ci uh hi! Topa awng amate in bangza ta nang hong zawngsak ziam!

¹⁹Ahizong senneal sungah amate na nusia bua hi, banghangziam cile na thuthiamna lian hi. Sun le zanin amate lampi a lak meei le meite na laaksak bua hi.

²⁰Na phatna taw a sep tu te na son a; manna taw vaakin a neak tu tui na pia hi.

²¹Senneal sungah kum sawmli tawntung a kikap theampo na sik a; a puante sia ngei ngawlin a peangte na in tum ngawl hi.

²²“Minamte le kumpi ngamte, amate taw a ki ngamngi leitanghte na zosak hi. Amate in Sihon ukna Heshbon ngam le Og ii kumpi a sepna Bashan ngamte zo uh hi.

²³Van ah aksi za in amate ta tam mama na pia a, a taangpupite tungah piak tu in na kamciam sa ngamte na zosak a, tua ngamah na teangsak hi.



²⁴Amate in Canaan ngam zo in; tua lai a teang mite nangma in na zo hi. Canaan kumpite le a mite, a uk bang po a vawt tu in na mite tungah vaangletna na pia hi.

²⁵Na mite in a ki uum khuapite, ngamphate, hauna taw a kidim innte, a kito sa tuikhukte, olive kungte, thingnga kungte, le sapit huante la uh hi. Amate in a du pawpo ne in thau uh a, na piak na phate theampo diksa uh hi.

²⁶“Ahizong na mite in nang hong langpan in, na thu hong nial a; na Thukhamte nungngat uh hi. Nangma kung hong heak kik natu le a kidop thei natu in thu a pia kamsangte amate in that uh hi. Amate in hun khat zawk hun khat nang hong zawngsak uh a,

²⁷tua ahikom a ngalte in, na zosak a na uksak hi. A haksat ciang na hu tu dei in nang hong sam uh a, vantung pan na zo hi. Na thuthiamna lian taw lampuite na puak a, amate in a ngalte khutsung pan suatak uh hi.

²⁸Thinnopna a nga kik ciang amate khial kikin, a ngalte in amate na zosak kik hi. Ahizong amate kisiik kikin, hut tu hong nget ciang vantung pan na za a, hun khat zawk hun khat na thuthiamna lian taw amate na hun hi.

²⁹Na hilnate a nit natu in thu na pia a, ahizong na Thukhamte zuina sia nuntakna lampi hi napi amate kphasak in, na Thukhamte nial uh hi. Amate a thin sahin a thinpui uh a, na thu nial uh hi.

³⁰Kum khat zawk kum khat thinsau takin kidop natu amate na hil hi. Thu son tu in na kamsangte a thin sungah thu na hil a, ahizong na mite in nadon ngawl ahikom, mi namdangte in amate na zosak hi.

³¹Ahizong na thuthiamna lian ahikom amate na nusia bua a, na thatlum bua hi. Nang sia hesuakna le thuthiamna taw a kidim Pathian na hi hi!

³²“Kote Pathian awng, bangzata lian ni ziam! Bangzata kiitak huai a, bangzata vaangletna nei ni ziam! Na thuciamte thumaan takin na tangtungsak hi. Assyria kumpite ii kote hong nencip hun pan kipan tu dong ciang bangzata haksatna thuak khu ziam! Ka Kumpite uh, ka lampuite uh, ka



thiampite uh le ka kamsangte uh, ka taangpupite uh le ka mite theampo uh in haksatna thuak uh hi. Bangzata haksatna thuak khu ziam hong phawk tan!

³³Kote daan nong piak sia nong piak tu ma hi a; kote khial kale ung zongh nang na thumaan hi.

³⁴Ka taangpupite uh, ka kumpite, lampuite le ka thiampite uh in na Thukham zui ngawl uh hi. Amate in na thupiakte le na hilnate ngai ngawl uh hi.

³⁵Amate na piak ngamzai le ngampha ah a ten lai uh in, na thuphate taw kumpite in na mite uk a; ahizong amate in khialna nungngat ngawlin, na na seam ngawl uh hi.

³⁶Tu in nong piakna ngamah sal ka tang uh a, hi ngampha in kote an hong vaak hi.

³⁷Ngamsung pan a piang peuma kumpite tungah kipia a, kote mawnei ka hi uhkom, amate in nong uksak hi. Amate in a uuk bangpo in kote le ka ngannote hong vawt uh a, kote ka khuangai mama uh hi!” ci uh hi.

Mihingte in Thukimna Vawt

³⁸Hi thupiangte theampo hangin ko Israel mihingte in ciliap huai takin thukimna lai khat ka vawt uh a, tuaciang ka lampuite uh, ka Levite uh, le kote thiampite uh in tua lai tungah a tazeik uh tum hi.

Nehemiah 10

¹A min a thu masa bel sia Hacaliah ii tapa ngam uk Nehemiah hi a, tua zawkciang Zedekiah in a min thu hi. A nuai a te zongh in a min thu uh hi.

²⁻⁸*Thiampite:* Seraiah, Azariah, Jeremiah, Pashhur, Amariah, Malchijah, Hattush, Shebaniah, Malluch, Harim, Meremoth, Obadiah, Daniel, Ginnethon, Baruch, Meshullam, Abijah, Mijamin, Maaziah, Bilgai le Shemaiah ahi uh hi.

⁹⁻¹³*Levite:* Azaniah ii tapa Jeshua, Henadad be le phung Binnui, Kadmiel, Shebaniah, Hodiah, Kelita, Pelaiah, Hanan, Mica, Rehob, Hashabiah, Zaccur, Sherebiah, Shebaniah, Hodiah, Bani, le Beninu ahi uh hi.



14-27 *Mipi lampuite*: Parosh, Pahath Moab, Elam, Zattu, Bani, Bunni, Azgad, Bebai, Adonijah, Bigvai, Adin, Ater, Hezekiah, Azzur, Hodiah, Hashum, Bezai, Hariph, Anathoth, Nebai Magpiash, Meshullam, Hezir, Meshezabel, Zadok, Jaddua, Pelatiah, Hanan, Anaiah, Hoshea, Hananiah, Hasshub, Hallohesh, Pilha, Shobek, Rehum, Hashabnah, Maaseiah, Ahiah, Hanan, Anan, Malluch, Harim, le Baanah ahi uh hi.

Thukimna

28 Ko, Israel mite, thiampite, Levite, Biakinn cingte, Biakinn la sate, Biakinn naseamte le midangte theampo in Pathian Thukhamte zuina in ih ngam sungah a teang ngamdang mite kung pan ka tuam om zawk uh ciang ka zite uh le, khua he sa ka patangte,

29 hong lampuite uh taw mun khat ah kingawmin, hi thukham ka zui bua uh ahile, haamsiatna thuk tu in, Pathian ii Moses tungtawn a, a piak Pathian ii Thukham bang ka nungta tu uh a, Topa ii thupiak theampo zui tu le, a thukham le a ngeina theampo zui tu in hi kiciamna ka vawt uh hi.

30 Ih ngam sungah hong teang ngamdang mihingte taw ka kiteang buatu uh hi.

31 Ngamdang mihingte in Sabbath ni ahibuale a thiangtho ni khat pawpo ah antang le na khat pawpo hong zuak ahile ka lei buatu uh hi. Kum sali a cin simin ka lo uh ka tho buatu uh a, leiba theampo ka maisak tu uh hi.

32 Kum simin Biakinn nasep natu in nguntang ounce khat ii khen liat sua khen khat ka pia tu uh hi.

33 Kote in Biakinn biakpiak natu in biakna taw kisai a thiangtho anluum, nisim biakpiakna antang, ni simin biakpiakna ah a kihal tu nganhingte, Sabbath ni atu in a thiangtho sumpite, Tha Thak Poaite le a dang poaite, a dang biakna taw kisai a thiangtho sumpite, Israel te maw phel natu sumpite, le Biakinn atu a kismh na theampo ka pia tu uh hi.



³⁴Kote, mipite, thiampite, le Levite in zui tu thukham sungah a om bangin Topa ih Pathian tungah meihal biakpiakna ih piak ciang akua bete in thing si tu ziam ci heak natu in kum simin lai meetang ka sawk tu uh hi.

³⁵Kote in kum simin a tungciil anpal le thingnga minciilte, Biakinn ah ka pia tu uh hi.

³⁶Thukham sung a om bangin Biakinn sung thiampite kungah ka tapa suakciil tek ka paipui tu uh a, Pathian tungah ka aap tu uh hi. Kote in ka khuino a suakciilte, ka tuu le keal taciilte zongh ka aap tu uh hi.

³⁷Kote in Biakinn sung thiampite tungah kum simin a tungciil antang taw a kivawt anvui lom sa le zu, olive thau, le a dang ka nei uh thingnga tuatuamte ka paipui tu uh hi. Ko lotho khuate ah sawm a khat sumpi a khon Levite tungah ka ngam uh sung pan a piang sawm a khat ka pia tu uh hi.

³⁸Aaron suan le paal thiampite sia sawm a khat sumpi a kikhon ciang Levite sungah kihel tu uh a, tuaciang Levite kaikhop sa sumpi sung pan sawm a khat sia Biakinn sung zak tu in Biakinn ankhon ah amate in koi tu hi.

³⁹Israel mihingte le Levite in a kipia an, zu le olive thaute Biakinn uum le bealte koina khaan le thiampite nasepna, Biakinn cingte le Biakinn la sa pawlte omna khaan ah koi tu uh hi. Eite in ih Pathian inn ih ngaingon buatu hi.

Nehemiah 11

Jerusalem ah A teang Mihingte

¹Jerusalem ah lampuite teang uh a, a taanglai mipite sung pan innkuan sawm ciang innkuan khat sia, Jerusalem khuapi thiangtho sungah teang tu in lai meetang sawkin teal a, a dangte sia khuapi lian le khuapi note ah teang uh hi.

²Jerusalem ah ka teang tu a ci ngam pawpo mipite in pok uh hi.

³A dang khuapi note le khuapi liante sungah Israel te, thiampite, Levite, Biakinn naseamte le Solomon ii naseamte ii suan le paalte sia amate khua tek



amate leitangh tung tek ah teang uh hi. Judah ngam Jerusalem khua sungah a teang lampuite min tepteena lai a nuai a bang ahi hi.

⁴*Judah Minam sung pan:* Uzziah ii tapa le Zechariah ii tupa Athaiah. A taangpupi dangte sia Amariah, Shephatiah le Mahalalel hi a, Judah ii tapa Perez ii suan le paalte ahi hi.

⁵Baruch ii tapa le Colhozeh ii tupa Maaseiah. A taangpupi dangte sia Hazaiah, Azaiah, Joiarib le Zechariah hi a, Judah ii tapa Shelah ii suan le paalte ahi hi.

⁶Perez ii suan le paal sung pan pasal minthang 468 te, Jerusalem ah teang uh hi.

⁷*Benjamin minam sung pan:* Meshullam ii tapa le Joed ii tupa Sallu. A taangpupi dangte sia Pedaiah, Kolaiah, Maaseiah, Ithiel le Jeshaiyah ahi uh hi.

⁸Gabbai le Sallai te sia Sallu ii mealheak naite ahi hi. Jerusalem ah a teang Benjamin ii suante a vekpi 928 pha uh hi.

⁹Zichri ii tapa Joel sia amate ii lampui hi a, Hassenuah ii tapa Judah sia Jerusalem khuapi sungah ulian a niina ahi hi.

¹⁰*Thiampite:* Joiarib ii tapa Jedaiah le Jachin te ahi uh hi.

¹¹Hilkiah ii tapa le Meshullam ii tupa Seraiah. A taangpupite sia Zadok, Meraioth le Thiampi Saang Ahitub ahi uh hi.

¹²Hi be sung pan Biakinn sungah naseam a vekpi 822 pha uh hi. Jeroham ii tapa le Pelaliah ii tupa sia Azaiah ahi hi. A taangpupite sia Amzi, Zechariah, Pashhur le Malchijah ahi uh hi.

¹³Hi be sungpan innkuan lutang a vekpi 242 pha hi. Azarel ii tapa le Ahzai ii tupa Amashsai. A taangpupite sia Meshillemoth le Immer ahi uh hi.

¹⁴Hi be sung pan ngalkap minthang 128 om hi. Amate be sung pan a lampui sia Zabdiel ahi hi.

¹⁵*Levite sung pan:* Hasshub ii tapa le Azrikam ii tupa Shemaiah. A taangpupite sia Hashabiah le Bunni ahi uh hi.



¹⁶Shabbethai le Jozabad sia Biakinn pua sangah naseam lampui minthang Levite ahi uh hi.

¹⁷Asaph suan le paal ahi Mica ii tapa le Zabdi ii tupa Mattaniah. Ama in lungdamko thungetna ah Biakinn la sate lampui hi. Mattaniah a hu pa sia Bakbukiah ahi hi. Shammua ii tapa le Galal ii tupa sia Abda hi a, Jeduthun suan le paal ahi hi.

¹⁸Jerusalem khuapi thiangtho sungah a teang Levi minam a vekpi in 284 pha hi.

¹⁹*Biakinn cingte:* Akkub, Talmon le a bete a vekpi in 172 pha hi.

²⁰A taanglai Israel mihingte le a taanglai thiampite le Levite sia Judah ngamsung amate neisa ahi, khuapi le khuano dangte ah teang uh hi.

²¹Ophel a kicina mun Jerusalem khua sungah Biakinn naseamte teang uh a, Ziha le Gishpa khutnuai ah naseam uh hi.

²²Uzzi sia Jerusalem khua sungah a teang Levite a ukpa hi a, Bani ii tapa le Hashabiah ii tupa ahi hi. A taangpupite sia Mattaniah le Mica hi uh a, ama sia Asaph be le phungte ahi hi. Hi be le phungte Biakinn biakpiakna ah tumthei tuatuam tumte ahi uh hi.

²³Be le phung tuatuamte in ni simin Biakinn biakpiak lasakna ah bangbangh in lampui tek tu ci kumpi thupiakna om hi.

²⁴Judah minam, Zerah be le phung Meshezabel ii tapa Pethahiah sia Persia kumpizum ah Israel te ii taangmi ahi hi.

Khuanote le Khuapi dangte ah A teang Mihingte

²⁵Mihing tam mama sia a lo thawna paam kuate ah teang uh hi. Judah minamte sia Kiriath Arba, Dibon le Jekabzeel le khuapite ii paam khuanote ah teang uh hi.

²⁶Amate sia Jeshua, Moladah khuapite, Bethpelet,

²⁷le Hazarshual, Beersheba khuapi le a kiim a om khuanote zongh ah teang uh hi.



²⁸Amate sia Ziklag khuapi, Meconah le a khuanote ah,

²⁹Enrimmon, Zorah, Jarmuth,

³⁰Zanoah, Adullam khuasang le a kiim a paam khaunote ah teang uh hi. Amate sia Lachish le a naina lote ah, le Azekah khua le a khuanote ah teang uh hi. Judah mite teenna ngam sia Beersheba thangsang pan Hinnom Kualsaksang dong kici thei hi.

³¹Benjamin minamte sia Gebasaksang pan, Michmash, Ai, Bethel le a kiim a khuate,

³²Anathoth, Nob, Ananiah,

³³Hazor, Ramah, Gittaim,

³⁴Hadid, Zeboim, Neballat,

³⁵Lod le Ono le Khutthiamte Kual sung dong ah teang uh hi.

³⁶Judah ngamsung a teang Levi mi pawlkhate sia Benjamin minamte taw mun khat ah kiteang khawmsak hi.

Nehemiah 12

Thiampite le Levite Tepteena Lai

¹Shealtiel ii tapa Zerubbabel le Thiampi Saang Joshua taw saltanna pan a cia kik, thiampite le Levite tepteena lai sia a nuai a bang ahi hi.

²⁻⁷*Thiampite:* Seraiah, Jeremiah, Ezra, Amariah, Malluch, Hattush, Shecaniah, Rehum, Meremoth, Iddo, Ginnethoi, Abijah, Mijamin, Maadiah, Bilgah, Shemaiah, Joiarib, Jedaiah, Sallu, Amok, Hilkiyah le Jedaiah ahi uh hi. Hite sia Joshua hunlai in a thiampipuite theampo sungah lampuite ahi hi.

⁸*Levite:* A nuai a te sia lungdamko lasakna ah la sa lampuite ahi uh hi: tuate sia Jeshua, Binnui, Kadmiel, Sherebiah, Judah le Mattaniah ahi uh hi.

⁹A kizo choir sate a nuai a bang ahi hi: Bakbukiah, Unno le a Levi puite ahi uh hi.

Thiampi Saang Joshua ii Suan le paalte



¹⁰Joshua sia Joiakim ii pa hi a, Joiakim sia Eliashib ii pa ahi hi. Eliashib sia Joiada ii pa ahi hi.

¹¹Joiada sia Jonathan ii pa hi a, Jonathan sia Jaddua ii pa ahi hi.

Thiampi Be le phungte ii Lutangte

¹²⁻²¹Joiakim sia Thiampi Saang a sep lai in thiampi suante ii be lutangte sia a nuai a thiampite ahi hi.

Thiampi	Be le phung
Meraiah	Seraiah
Hananiah	Jeremiah
Meshullam	Ezra
Jehohanan	Amariah
Jonathan	Malluchi
Joseph	Shebaniah
Adna	Harim
Helkai	Meraioth
Zechariah	Iddo
Meshullam	Ginnethon
Zichri	Abijah
...s	Miniamin
Piltai	Moadiah
Shammua	Bilgah
Jehonathan	Shemaiah
Mattenai	Joiarib
Uzzi	Jedaiah
Kallai	Sallai
Eber	Amok
Hashabiah	Hilkiah
Nethanel	Jedaiah

Thiampi le Levi Innkuante Tepteena



²²Thiampi Saang Eliashib, Joiada, Jonathan le Jaddua te nuntak hun sungin Levi innkuan lampuite le thiampi innkuan lampuite tepteena khat kikoi hi. Hi tepteena sia Darius ii Persia ngam uk lianpa a sep lai in kizo siat hi.

²³Levi innkuan lutangte tepteena lai sia Eliashib ii tupa Jonathan hun dong bek ma kumpi tepteena lai sungah kiciamtee hi.

Biakinn sung Nasep Hawmna

²⁴Hashabiah, Sherebiah, Jeshua, Binnui le Kadmiel te lampuina taw Levite sia pawl tam mama in kikhensak hi. Pathian ii mihing David Kumpipa ii thupiakna taw kizui in, pawl nii pawl nii in a kizo a Pathian pokin, lungdamko uh hi.

²⁵Biakinn kongpi ah vanh kholna a cingte a uk a nuai a Biakinn cingte sia, Mattaniah, Bakbukiah, Obadiah, Meshullam, Talmon le Akkubte ahi uh hi.

²⁶Hi mite sia Joshua ii tapa le Jehozadak ii tupa Joiakim, le ngam uk Nehemiah le Thukham a thiampa, thiampi Ezra hun lai in a omte ahi uh hi.

Nehemiah in Khuapi Luphung Aap

²⁷Jerusalem khuapi luphung a ki aap ciang, daakbute le tengtongte tumin lungdamkona la sa in a kihel thei natu Levite sia a teenna tek pan kikaikhawm hi.

²⁸Levi innkuan la sate sia Jerusalem khuakiim a teenna tek pan le Netophah khuakiim pan,

²⁹le Bethgilgal, Geba le Azmaveth panin kikhawmtua kik uh hi.

³⁰Thiampite le Levite in amate atu, mipite, kongpite le khuapi luphungte thianthosakna a zeksa ngeinate seam uh hi.

³¹Luphung dawn ah Judah lampuite ka khawmtua a, Pathian tungah lungdamko in, khuapi a kiimkot tu in pawl niite ka uksak hi. A masa pawlte luphung tung ziatsang Nin Kongpi manaw in pai uh hi.

³²La sate nungah Hoshaiah pai a, Judah lampuite a lang in zui uh hi.



33-35A nung pan thiampi Azariah, Ezra, Meshullam, Judah, Benjamin, Shemaiah le Jeremiah te in lemle tumin zui uh hi. Tua zawkciang Jonathan ii tapa le Shemaiah ii tupa, Zechariah in zui hi. (A taangpupite sia Mattaniah, Micaiah le Zaccur te zongh hi a, Asaph be le phungte ahi uh hi.)

36Zechariah sia a be le phung sung pan Shemaiah, Azarel, Milalai, Gilalai, Maai, Nethanel, Judah le Hanani te in zui uh a, a vekpi in Pathian ii mihing David Kumpipa ii a tum thei vanh namte keng uh hi. Hite pawl a pai ciang laithiampa Ezra in lampui hi.

37Tuinaak Kongpi pan David Khuapi ah kaato uh a, David kumpi inn kantan in khuapi nisuana sang Tui Kongpi luphung theng kik uh hi.

38Lungdam a ko pawldang khat sia luphung dawn veisang tawnin pai a, keima le mipite a lang in ka zui uh hi. Ovens Tausaang kantan in Luphung Zai ah ka pai uh a,

39tua mun panin Ephraim Kongpi, Jeshanah Kongpi, Ngasa Kongpi, Hananel Tausaang le Zakhat Tausaang te kantan in Tuu Kongpi ah ka pai uh hi. Biakinn kongpi hui ah ka tawp uh hi.

40Tuaciang Pathian a pok pawl niite Biakinn huangsung theng uh hi. Keima taw a omkhawm lampuite zawkciang

41ka pawl sungah lemle tum thiampite ahi, Eliakim, Maaseiah, Miniamin, Micaiah, Elioenai, Zechariah le Hananiah te kihel uh a,

42amate sia Maaseiah, Shemaiah, Eleazar, Uzzi, Jehohanan, Malchijah, Elam le Ezer te in zui uh hi. Jezrahiah ih lampui la sate in a aw neiza uh taw la sa uh hi.

43Tua ni in sangaw biakpiakna tam mama kipia a, mihingte lungdamna taw kidim uh hi, banghangziam cile Pathian in amate lungdamsak mama hi. Numeite le patangte tua poai ah kihel uh a, lungdamna awngingte tai tam mama na pan kiza thei hi.

Biakinn ah Biak natu A piakte



⁴⁴Tua hunlai in sawm a khat sumpite, anpalte le kum simin a minciil thingnga Biakinn atu a kipiante kholna innkhante, a cing tu in mihing kikoi hi. Hi a cingte in vanh kholna inn a cin zawkciang Thukham sungah a om bangin thiampite le Levite atu in a kipiante khuakiim khuapaam lote pan kaikhop tu tavuan nei uh hi. Judah mihing theampo thiampite le Levite tungah lungdam uh hi,

⁴⁵banghangziam cile amate in Pathian thupiakna bangin kithiansua na poaite le a zeksa tuatuamte pha takin vawt uh hi. David Kumpipa le a tapa Solomon ii zui tu ngeina a piakte bangin Biakinn la sate le Biakinn cingte zongin pha takin a nasep tute seam uh hi.

⁴⁶Nidang lai, David Kumpipa le lathiam Asaph hun pan kipan la sate in Pathian pokna la le lungdamkona late lampui uh hi.

⁴⁷Zerubbabel le Nehemiah hun ciang zonghin Biakinn la sate le Biakinn cingte kivaak natu in Israel mihing theampo in nisim in letsong pia uh hi. Mipite in Levite tungah a thiangtho biakpiaknate pia a, Levite in a kisamh za thiampite tungah pia uh hi.

Nehemiah 13

Ngamdang Mihingte taw Kikhenna

¹Mipite tungah nging takin Moses ii Thukhamte a kisim ciang Ammonte le Moabte Pathian ii mihingte sungah a kihel thei ngawl natu thu laingual mu uh hi.

²Banghangziam cile Israel mihingte Egypt pan a pusua lai in, lampi ah Ammonte le Moabte in an le tui a piak nop ngawl hang ahi hi. Amate in Israel te haamsiat tu in Balaam sum pia uh a, ahizong ih Pathian in tua haamsiatna sia thupha suaksak zaw pumsai hi.

³Israel mihingte in hi thukham a kisim a zaak ciang amate sung pan ngamdang mihingte nawtkeak uh hi.

Nehemiah ii Puaphatnate



⁴Biakinn vanh kholna innkhan a uk thiampi Eliashib sia Tobiah taw khuangei hialma kilem in om hi.

⁵Eliashib in Tobiah sia antang le ngim namtui biakpiaknate, Biakinn sungah a kizangh vanhte, thiampite atu a kipia biakpiak nate le Levite, biakinn la sate le biakinn cingte tungah a kipia antang, zu le olive thau sawm a khatte bek khol natu a, a kingaisun, innkhan lian sia zanghsak hi.

⁶Hi bang teng hunlai in Jerusalem ah ka om bua hi, banghangziam cile Artaxerxes in Babylon kumpi a sep zawk kum sawmthum le a kum niina hi a, ama tungah thu zasak tu in ka pai laitak ahi hi. Tawmvei zawkciang ama thukimna taw Jerusalem ah ka cia kik hi.

⁷Tualai ah Eliashib in Biakinn khaan khat Tobiah zak tu in a piaknate ka mu ciang ka patau hi.

⁸Ka thin uuk a, Tobiah vanh theampo ka lotkeaksak hi.

⁹Tua khaante a zeksa ngeina bang a kithianthosak natu le Biakinn vanhte, biakpiakna ante le ngim namtuite a kikoi kik natu in thu ka pia hi.

¹⁰Mihingte in a khamkhop tu an pia zo ngawl ahikom Biakinn la sate le a dang Levite in Jerusalem nusia in a lo tek ah a ciana thu zongh ka za hi.

¹¹Biakinn keam upate ii Biakinn a awlmawk ngawlina thute hangin, upate ka tei zazan hi. Tuaciang Levite le la sate Biakinn ah ka kaikhawm kik a, a nasep ka seamsak kik hi.

¹²Tuaciang Israel mihingte theampo in Biakinn vanh kholna ah amate sawm a khat sumpite ahi, antang , zu le olive thaute puak tu kipan kik uh hi.

¹³Vanh kholna innkhante uk tu in, thiampi Shelemiah, thukham a thiam Zadok le Levi mi Pedaiah ka koi hi. Mattaniah ii tupa ahi, Zaccur ii tapa Hanan sia amate hu tu in ka koi hi. Hi mite sia, a naseppuite tungah thumaanna taw an hawm tu in ka muan mite ahi hi.

¹⁴Ka Pathian awng, na Biakinn atu le nang kong biak natu in ka nasepnate theampo hong phawsak tan.



¹⁵Tua hunlai Judah ngamah a teang mihingte in Sabbath ni in sapittui a suuk uh ka mu hi. Midangte in an, zu, sapit ngate, thei ngate le, a dang vanhte a laate tungah suanin Jerusalem ah a paipui ka mu a, Sabbath ni in bangma a zuak ngawl natu in a kidop natu thu ka pia hi.

¹⁶Tyre khua mi Jerusalem ah teang a, tuate in Sabbath ni in ka mite tungah a zuak tu in ngasa le vanh tuatuamte khuapi sungah hong paipui uh hi.

¹⁷Judah lampuite ka tei a amate tungah, “Na pha ngawl nasepte en vun! Sabbath ni ninsak nu hi.

¹⁸Hi bang linlian in na taangpupite uh ngamta ahikom Pathian in daan pia a, hi khuapi lalcipsak hi. Tua bek dom ngawlin Sabbath ni nitsakna taw Israel te tungah Pathian thin uksak seseam nu hi,” ka ci hi.

¹⁹Tua ahikom Sabbath a kipat sim nitak po ciang khuapi kongpite a kikha natu le Sabbath hun a bo mateng a kihon ngawl natu in thu ka pia hi. Sabbath ni in khuapi sungah bangma a kitumpui ngawl natu in ka mihingte pawlkhat in kongpite ka cingsak hi.

²⁰Khat vei nii vei khawng vanh tuatuam zuak sumzuakte khuapi luphung pua sangah nipi zawk ni nga ni zanin ngiak uh hi.

²¹Tua mihingte tungah, “Zingsang ciang dong ngak heak vun. Hi bang na om kik uh le, aana kong zak kul tu hi,” ci in a kidop natu in thu ka pia hi. Tua hun a kipan Sabbath ni in amate hong pai kik ngawl uh hi.

²²Levite amate le amate kithiansua natu le Sabbath a thianthosak natu uh in, kongpite pha tak a cin natu thu ka pia hi. Pathian awng, hi thu zongh ah hong phawk tan a, na itna lian ahikom kei hong pengsak tan.

²³Tua hun lai in Judah pasal tam mama in Ashdod, Ammon le Moab numeite a tenpuina thu zongh ka mu hi.

²⁴A tate pawlkhat sia Ashdod kam ahibuale kamdang pau uh a, amate in ii kam pau thei ngawl uh hi.



²⁵Tua pasalte tei in ka haamsiat ngawp a, saatin, a sam ka nuk zazan hi. Tuaciang amate le a tate sia ngamdang mite taw a ten kik nawn ngawl natu in Pathian ii min taw ka kiciamsak hi.

²⁶Amate tungah, “Solomon Kumpipa a khialsak sia ngamdang numeite ahi hi. Ama minam dang kumpite sangin lian zaw hi. Pathian in ama it in, Israel mihingte theampo ii kumpi tu in siam napi, hi khialna sungah taak veve hi.

²⁷Hi bang na ngamtatnate zui in ngamdang numeite tenpuina taw ih Pathian thu nial tu hi ziam?” ka ci hi.

²⁸Joiada sia Thiampi Saang Eliashib ii tapa hi a, ahizong Joiada ii tapate khat in Beth Horon khua pan Sanballat ii tanu tenpui ahikom Jerusalem pan Joiada ka taisak hi.

²⁹Pathian awng, hi mihingte in thiampi nasep le thiampite le Levite taw na vawt thuciamna te a nitsakna thu phawk tan.

³⁰Ngamdang mite taw a kipee awna theampo pan mipite ka thiansua a, amate nasep tu tek a heak natu in thiampite le Levite zui tu ngeinate ka vawtsak hi.

³¹Hun ciamte a cin ciang meihal biakpiakna ah a kizangh tu thingte le mipite ii a anpalte le thingnga minciilte biakpiakna ah a paipui natu in ka vaihawmsak hi. Pathian awng, hite theampo phawk in a, tuaciang keima phattuum natu hong hisak tan.



Esther

Esther 1

Vashti Kumpinu in Xerxes Kumpipa Thu nial

¹⁻²Persia ngam khuapi Susa khua kumpi tokhum tung panin Xerxes Kumpipa in, India pan Ethiopia dong ngam 127 uk hi.

³Kumpi a sep a kum thum kumin a khutnuai uliante theampo le ngam uk upate atu in aneak poai khat khaam hi. Tua lai ah, Persia le Media ngalkapte, ngamsung ukpite, le ngamke uk kumpi namte kihel hi.

⁴A kumpi ngam hauna le ama thupiziate tha luk sung tawntung lak hi.

⁵Tua zawkciang kumpipa in Susa khuapi sungah a om pasal theampo a hau, a zawng atu in a kibangin aneak poai khat khaam hi. Tua poai nipi khat sung bup kumpi huang sungah kivawt hi.

⁶Tua huang sia patpuanza vancii le a kaangte taw kizeam a, tua puante a cii pha puangkaang neal sannum khau taw marble suangkaang khuamte tungah ngunkualte taw kikhii hi. Huangsung sia suangkaang, suangsan, suangngo le suangengte kipha a, tuate tungah kham le ngun taw kivawt tokhumte kikoi hi.

⁷Zute khat le khat a kibang ngawl khamhai taw kihawm a, kumpipa in kumpi zute hawmsak vazia hi.

⁸Zu neak tu za ciangtan om ngawl a, a kuama po in a du za a neak natu in kumpipa in kumpi inn sung naseamte tungah thupia hi.

⁹Tua poai hun sungin Vashti Kumpinu in kumpi inn sungah numeite atu in aneak poai khat vawtsak hi.

¹⁰A poaikhaam ni sali ni in kumpipa zu ne in lungdam ahikom ama aituum naseam cilnge sa sali Mehuman, Biztha, Harbona, Bigtha, Abagtha, Zethar le Carkas te sam hi.

¹¹Kumpipa in amate tungah Vashti Kumpinu a kumpi lukhu khu in ama kungah a paipui natu in thupia hi. Kumpinu sia numei mealpha khat hi a,



kumpipa in a kumpi uliante le a leangnate theampo tungah kumpinu meal hoina lak nuam hi.

¹²Ahizong a naseamte in kumpipa ii sawlna Vashti Kumpinu tungah a son uh ciang kumpinu in nialin pai nuam ngawl hi. Tua hu in kumpipa thin uk hi.

¹³Tu in kumpi thukham le zui tu ngeina huvau thu khat pawpo a pian ciang kumpipa in ngaisutna a plate tungah ngaisutna a dok tu sia kumpi ngeina ahi hi. Tua ahiciang ama in bang vawt tu ci a he, ngaisutna a plate sam hi.

¹⁴Ama ii ngaisutna a dok tawntung belte sia Carshena, Shethar, Admatha, Tarshish, Meres, Marsena le Memucan te ahi uh hi. Hite sia Persia le Media ngam ulian sali te hi a, kumpi ngam sungah ulian belte ahi uh hi.

¹⁵Ama in hi uliante tungah, “Keima Xerxes Kumpipa in ka naseamte sawlin Vashti Kumpinu ka samsak a, ahizong ama in ka thu ni ngawlin hong nial hi! Ama tungah bang vawt tu ci sia thukham in bang ci ziam,” ci hi.

¹⁶Tuaciang Memucan in kumpipa le a uliante tungah, “Vashti Kumpinu in kumpipa bek hi ngawlin, a uliante a tatak in ci leang ngamsung pasal theampo hong zawngsak hi!

¹⁷Kumpinu ngamtatna a zaak pawpo ciang, ngamsung numei theampo in a pasalte uh nomu paih tu uh hi. Amate in, ‘Xerxes Kumpipa in Vashti Kumpinu thupia napi, nialin ama kungah pai nuam ngawl hi,’ ci tu uh hi.

¹⁸Persia le Media ngamsung uliante ii zite in kumpinu ngamtatna teng a zaak uh ciang amate in nitum ma in tua thu a pasalte tungah son tu uh hi. Mun theampo ah zite in a pasalte zakta nawn ngawl tu a, a pasalte sia a zite tungah thin uk tu uh hi.

¹⁹Kumpipa na thukim le, Vashti sia kumpipa mai ah a kilak kik ngei nawn ngawl natu in kumpi thu zaaksakna khat vawt in. A kilaih kik thei nawn ngawl tu in tua kumpi thu zaaksakna sia Persia le Mediate thukham sungah atsak in. Tuaciang ama kumpinu dinmun ah numei phazaw khat koi in.



²⁰Na thu zaaksakna sia a lian mama na ngamsung theampo ah a kiheak ciang numei theampo in hau kale zawng kale a pasalte tek pha takin zakta tu uh hi,” ci hi.

²¹Kumpipa le a uliante in hi ngaisutna pha sa a, Memucan ii ngaisutna a piak bangin kumpipa ngamta hi.

²²Pasal theampo amate baangkua tek ukpa hi tu a, a pau babang in zui tek tu hi ci in, kumpi ukna ngamsung tek ah ama in a kampau tek le a lai tek taw thu zaaksakna khat puak hi.

Esther 2

Esther Kumpinu Suak

¹Tua zawk kumpipa ii thin ukna a thai zawkciang ngangawnin ama in Vashti ngamtatna le a tungah a thupiakte ngaisun nginge hi.

²Tuaciang kumpipa taw a om a thudok pawlkhatte in, “Banghangin ngaknu thiangtho mealpha pawlkhat zongsak ngawl ni ziam?”

³Na ukna ngamke theampo ah na khutnuai uliante koi in a, tuate in numei mealpha teng hi lai Susa khuapi, numeite teenna ah puaksak in. Na numeite a uk cilnge Hegai ii kep tu in aap in, amate tua lai ah a mealphat natu in kipuasak in.

⁴Tuaciang pha nasak bel numei sia la in, Vashti taangin kumpinu suaksak in” ci in ngaisutna pia uh hi. Kumpipa in hi ngaisutna a piak uh sia phasa in zui hi.

⁵Tua lai Susa khuapi ah Jewte Jair tapa Mordecai kici khat teang hi. Ama sia Benjamin minam hi a, Kish le Shemei ii suan le paal khat ahi hi.

⁶Babylon Kumpipa Nebuchadnezzar in Judah Kumpipa Jehoiachin le a ngalmat honkhat Jerusalem pan Babylon ah saltang tu in a paipui lai in Mordecai kihel hi.

⁷Ama in suapuisseal khat nei a, Hebrew min in Hadassah kici Esther hi a, a mealpha in a khanhoi hi. A nute a pate a thi ciang Esther sia Mordecai in keam a, ama tanu tatak bangin khoi hi.



⁸Kumpipa in thu zaaksakna thak a vawt ciang Susa ah ngaknu tam mama hong kipaipui a, Esther kihel hi. Ama zongh numeite teenna a uk Hegai khutnuai kumpi inn sungah kikoi hi.

⁹Hegai in Esther diksa in maipha pia hi. Ama in Esther mealphat natu in metsak a, a kisamh ante pia hi. Ama in numeite teenna ah omna pha bel pia a, kumpi innsung pan a tuam vilvel a kiteal numei salite in khoisak hi.

¹⁰Tu in Mordecai ii thupiak bangin Esther in Jewte a hina thu iimcip hi.

¹¹Ni simin Mordecai sia Esther tungah bang thuteng piang a, bang thuteng piang lai tu ci a heak nop hangin kumpi huangsung numeite teenna inntual mai ah kilee nithi hi.

¹²Numeite mealphat natu a kipua hun kum khat sung hi a, myrrh sathau namtui taw tha luk sung le balsam sathau taw tha luk sung kimet hi. Tua zawkciang numeite khat zawkciang khat kumpi Xerxes kungah kipaipui hi.

¹³Numeite teenna pan kumpi inn sungah ama a pai ciang puan a silh nop po silh thei hi.

¹⁴Tua lai ah ama nitak in pai a, a zingsang ciang numeite teenna mundang ah kipaipui kikin kumpipa ii zinote a uk cil kinget pa Shaashgaz tungah ki aap hi. Kumpipa in diksa a, a min taw a sam kik buale ama sia kumpipa kung pai kik ngawl tu hi.

¹⁵Kumpipa kungah Esther a pai tu hun hong theng hi. Esther sia Abihail tanu hi a, ama tanu bangin a keam Mordecai ii suapuisseal ahi hi. Esther sia a mu pawpo in hoi sa hi. Ama pai hun a thet ciang numeite teenna a uk cil kingetpa Hegai ii a sawl bang linlian in puansilh hi.

¹⁶Tuaciang Xerxes ii kumpi a sep a kum sali kum, a tha sawmna, Tebeth tha in Esther sia kumpi inn sung Kumpi Xerxes kungah kipaipui hi.

¹⁷Kumpipa in ngaknu dangte sangin Esther hoi sa zaw a, a dangte sangin maipha pia zaw in, it zaw hi. Ama in Esther lu tungah kumpi lukhu khusak a, Vashti taangin kumpinu suaksak hi.

¹⁸Tuaciang kumpipa in Esther upatna in anneak poai lian khat vawt a, a uliante le a vaihawm upa theampo sam siat hi. Ama in a ukna ngamke sung tengah zum ni khat khaksak a, kumpipa min taw a kiphu, a kilawm bangin letsongte hawm hi.

Mordecai in Kumpipa ii Nuntakna Hu

¹⁹Tua hun sungin kumpipa in Mordecai sia vaihawm upa dinmun khat pia hi.

²⁰Esther in Jewte a hina kuama in hesak ngawl lai hi. Mordecai in kuama tung a son ngawl natu in khaam a, a nolai a khoi hunlai in a thu a nit bangma in tu zong a thu ni hi.

²¹Mordecai in kumpi inn sungah upa a sep hun sungin, kumpipa innkhan kongkha cing cil kinget niite ahi, Bigthana le Teresh in Xerxes Kumpipa ngaimaw in, thalup sawm ku uh hi.

²²Mordecai in tua thu a heak ciang Esther Kumpinu tungah son a, Esther in Mordecai ii muna bang kumpipa tungah son hi.

²³Hi thute a kat ciang thumaan a hina mu ahikom tuate ngeal sia ngui ki awklumsak hi. Hi thupiang theampo kumpi ngam thu tepteena laibu sungah a kiteptee natu in kumpipa in thupia hi.

Esther 3

Haman in Jewte Thalup Sawm

¹Tawmvei zawkciang Xerxes Kumpipa in Haman a kici khat sia a ulian theampo sung pan a lian bel pia hi. Haman sia Agag suan le paal, Hammedatha tapa ahi hi.

²Kumpipa in a khutnuai ulian theampo tungah Haman sia khupdin in kun a, zatakna a piak tu in thupia hi. Amate in tuabangin upat pia napi Mordecai in pia nuam ngawlin, a thu nial hi.

³Kumpi naseam dangte in kumpipa thupiakna sia banghangin zui nuam ngawl ni ziam, ci in dongh uh hi.

⁴Amate in ni khat zawk ni khat a zui natu sasawl napi Mordecai in a thu ngai nuam tuan ngawl hi. Ama in, “Keima in Jew mi hi a, Haman mai ah ka kun



thei bua hi,” ci in thiang son hi. Tuaciang amate in Haman tungah hi thu son a, Mordecai ii ngamtatnate a thuak zo thong ka tawm maw ci in ngaisun uh hi.

⁵Mordecai ii khupdin in a kun ngawl na thu Haman in a heak ciang a thin uk mama hi.

⁶Mordecai sia Jew mi a hina thu ama in a heak ciang Mordecai khat bek daan piak ngawl tu in, ama in khensat hi. Ama in Persia ngambup ah a teang Jew mi theampo motsiat sawm hi.

⁷Xerxes Kumpipa ii kumpi a sep a kum sawm le kum nii kum, tha masa, Nisan tha in, a tupna bang a vawt natu in bang ni bang tha pha bel ziam he nuam ahikom “purim” a kici lai mee vawt tu in Haman in thupia hi. Adar tha, tha sawm le tha niina, ni sawm le ni thum ni tu in khensat hi.

⁸Tuaciang Haman in kumpipa tungah, “Na ukna ngamsung theampo ah a kithethaang le ngamke theampo ah a kimu minam khat om hi. Amate ngeina sia midangte a taw kibang ngawl hi. Tua bek dom ngawlin na ukna ngamsung zui tu ngeinate zui nuam ngawl uh ahikom hi bang ih koithong tusia nang atu in pha ngawl hi.

⁹Kumpipa awng, na thukim ahile, hi mihingte a kithalup siat natu in thupia in. Tuabang thu na pia le na ukna ngam sungah zak tu in na kumpi dangka inn sungah dangka nguntang ton 375 kong piak tu in keima in kong kamciam hi,” ci in son hi.

¹⁰Tua thute kumpi thu a sua thei natu laitupna in a kizangh kumpipa khutzungbu sia kumpipa in suut a, Jewte ii ngal Agag suan le paal, Hammedatha tapa Haman tungah pia hi.

¹¹Kumpipa in Haman tungah, “A mihingte le a dangkate nangma aa hi; na uk bang po vawt in,” ci in son hi.

¹²Tuaciang tha masa bel ni sawm le ni thum ni in, Haman in kumpipa ii thuvaante sam a, tua thu minam kampau tuatuamte le minam lai taw at tu in khaw hi. Tua thute hausate, ngamukte le kumpi naseamte theampo tungah



puak tu ahi hi. Tua thu Xerxes Kumpi min taw a kihawm hi a, a khutzungbu taw tepteena kituum hi.

¹³Laitaite in tua thu ngamsung a om ngamke theampo ah puak uh hi. Tua thu sungah Adar tha, ni sawm le ni thum ni, ni khat sungin Jew mi theampo ahi, a moi le a haam, numei le patang a kimot siat natu thu om hi. Amate kihesuak ngawlin kimon siat tu a, a neisa teng kilaksak tu hi.

¹⁴Tua ni hong thet ciang a kuama po a kingin thei natu in tua thute ngamke theampo ah ki zasak tu hi.

¹⁵Kumpipa ii thupiakna taw Susa khuapi ah tua thu kizasak a laitaite in tua thu ngamkete ah puak uh hi. Susa khuapi sungah a teang mihingte a buai mama laitakin kumpipa le Haman tokhawm in zu ne uh hi.

Esther 4

Mordecai in Esther ii Huna Ngen

¹Mordecai in hi thupiang teng a heak ciang a thinna sa in a puan balkeak hi. Tuaciang khau-ip puan silhin a lu tungah vut buak a, nasia tak kapin tau in,

²khuapi sungah Kumpi kongbiang a thet dong pai hi. A sungah ama tum ngawl hi, banghangziam cile khau-ip puan silhte a sungah kuama kitumsak ngawl hi.

³Kumpipa ii thupiakna a kiheaksakna ngam theampo ah Jewte sungah mauna nasia tak om hi. Amate an tangin, kapin tau uh a, a tam zaw khau-ip puan silhin vut sungah lum uh hi.

⁴Esther ii naseam numeite le cil kingette in Mordecai ii ngamtatna teng Esther tungah a son uh ciang nasia takin Esther thin ngim hi. Ama in Mordecai ii a khau-ip puan laih natu in puan pawlkhat pia sak hi, ahizong Mordecai in saang nuam ngawl hi.

⁵Tuaciang Esther in kumpipa ii ama na a seam tu in a koi cil kingetpa khat ahi Hathach samin, Mordecai kungah paisak a, banghang hi bang thu teng piang ci thu kan tu in sawl hi.



⁶Hathach sia Mordecai ii omna ahi kumpi innsung tumna khuapi leitual ah pai hi.

⁷Mordecai in thupiang theampo son siat a, Jewte theampo kimon siat ahile, kumpi sum koina inn sungah Haman in dangka a piakza tu ciang dong kamciam a piakna dongin son siat hi.

⁸Jewte a thalup siat natu thu Susa khuapi pan a laihawm dal khat ama in Hathach tungah pia hi. Mordecai in Esther tungah tua lai piasak a, thupiang teng a son siat natu le Esther pai in ama mipuite atu kumpipa tungah hesuak a ngetsak natu in sawl hi.

⁹Mordecai vaithak bangin Hathach in seam siat hi.

¹⁰Tuaciang Esther in Hathach sia Mordecai tungah hi thu puaksak kik a,

¹¹“Mihing khat pawpo, pa ahizong numei ahizong sapna nga ngawlin kumpipa mu tu in inndoi sungnung ah a tum le tua pa thi tu hi. Tua in thukham hi; kumpipa tungah ngaisutna a pia mihingte a kipan ngamsung mihing theampo a kuama po ii heak ahi hi. Hi thukham panin suatak thei natu lampi khat bek om hi: kumpipa in mihing khat tungah a kham ciangkhut laamin ahile, tua ii nuntakna kikhoaikhe tu hi. Keima zongh kumpipa ii hong sap ngawl zawk tha khat pha zo hi,” ci in son tu in sawl hi.

¹²Esther ii kam vaithak teng Mordecai in a zaak ciang,

¹³ama in hi bangin a kidop natu thupia hi. “Kumpi inn sungah na om hu in Jew midangte sangin ngalmuang zaw tu in kingaisun heak in.

¹⁴Hi bang hun sungah na thim om le, vantung pan Jewte atu huna hong pai tu a, Jewte suakta in, ahizong nangma na thi tu a, na pa ii innkuanpuite mong siat tu hi. Kumpinu hong kisuasak zongh hi bang hun atu in a suak na hina meal zongh akua in he ziam!” ci hi.

¹⁵Esther in Mordecai tungah kam zasak kik a:

¹⁶Pai in a, Susa khuapi sungah a om Jew mi theampo khawmin, antang in kei atu in thu hong ngetsak tavun. Sun thum le zan thum sung an ahizong tui



ahizong bangma ne heak vun. Ka naseam numeite le keima zongh in tuabang ma in ka na vawt tu uh hi. Tua zawkciang, thukham taw a kileebul tazong kumpipa kungah ka pai tu hi. Tuabang ka pai hu in ka thi le zong a thi ka hi tu hi” ci hi.

¹⁷Tuaciang Mordecai in tua mun nusia in, Esther ii vawt tu a sawl theampo vawt hi.

Esther 5

Esther in Kumpipa le Haman Anneak Poai ah Sam

¹A antan ni thum ni ciang Esther in a kumpinu puantual silh a, kumpi inn leitual sung sangah pai in, kumpi tokhum omna innkhan sang maingat in ding hi. Kumpipa sia innsung sangah kongbiang maingat in kumpi tokhum tungah to hi.

²Kumpipa in Esther Kumpinu doipua sangah ding a mu ciang diksa in ama sangah a kham ciangkhut laam hi. Tuaciang Esther hong pai in, ciangkhut dawn len hi.

³Kumpipa in, “Esther Kumpinu awng, bang ziam? Bang dei ni ziam, hong son tan, ka ukna ngam a lang dong ahizong kong pia tu hi,” ci in dongh hi.

⁴Esther in, “Kumpipa awng na thukim le, noma atu in ka huan anneak poai ah nangma le Haman tu nitak hong pai leute ka uk hi,” ci in zo hi.

⁵Tuaciang Esther ii a leangna tu uh in kumpipa in Haman manlang tak a pai natu in sawl hi. Tuaciang kumpipa le Haman sia Esther ii anneak poai ah pai uh hi.

⁶Zu a neak kawmin kumpipa in Esther tungah, “Na dei po hong son tan, kong pia tu hi. Ka ngam phellang keak ahizong nong ngen le kong pia tu hi,” ci in dongh hi.

⁷Esther in zokik a,

⁸“Kumpipa awng, na thukim a kong nget sia nong hesuak zo tu ahile, zing nitak ciangin ka huan anneak poai dang khat ah nangma le Haman ka leangna tu in kong dei hi. Tua hun ciang ka dei sia kong son tu hi,” ci hi.



Hamán in Mordecai Thalup Sawm

⁹Hamán nitak an a neakna pan lungdam thinnuam in cia hi. Ahizong ama in kumpi kongbiang ah Mordecai mu a, ama kung a kaan ciang Mordecai in zatakna pia ngawlin, din zongh din beak ngawl ahikom Hamán sia ama tungah thin uk mama hi.

¹⁰Ahizong ama in thuak kenkon in a inn ah cia hi. Tuaciang a inn ah a lawmte sam a, a zi Zeresh zongh kihelsak hi.

¹¹Ama in a hauna teng, a tapa nei teng, kumpipa in a za a khatna thu, le kumpi naseam dangte sangin a thupi zawkna thu teng amate tungah kisuangtaak hi.

¹²Hamán in zomto a, “Hi teng bek hi ngawl lai hi. Esther Kumpinu in kuama dang anvaak ngei ngawl a, ahizong kumpipa le keima an hong vaak a, zing ciang zong hong sam kik hi.

¹³Ahizong kumpi kongbiang ah a to Jew mi Mordecai ka mu lai teng hi thute theampo kei atu in a luithawthong suak lel hi,” ci hi.

¹⁴Tuaciang a zi le a lawmte theampo in, “Banghangin mihing khailup natu in pi sawmsali le pi nga a saang khuam khat vawt ngawl ni ziam? Zingsang ciang tua khuam tungah Mordecai awlup natu in kumpipa tungah na ngen tu a, tua zawkciang lungdam takin nitak an neakna poai ah na pai tu hi,” ci in ngaisutna pia uh hi. Hamán in hi ngaisutna phasa ahikom mihing awlupsak natu in khuam phut hi.

Esther 6

Kumpipa in Mordecai Upat

¹Tua ni zan ma in kumpipa mu thei ngawl ahikom a kumpi ngamsung thu tepteena laibute lasakin ama tungah simsak hi.

²Tua sungah kumpipa innkhante a cing cil kinget mihing niite ahi Bighthana le Teresh in kumpipa a thalup nopna, Mordecai ii pualaakna thu kihel hi.



³Kumpipa in, “Hi thu hangin Mordecai tungah upatna le minphatna tel bangbang kipia ziam?” ci in dongh hi. A naseamte in, “Bangma ki pia ngawl hi,” ci in zokik uh hi.

⁴Kumpipa in, “Kumpi inn sungah ka uliante akua om ziam?” ci in dongh hi. Tua laitak Haman in Mordecai awlup natu khuam sia man zo a, Mordecai awlupsak thei natu kumpipa tungah ngen tu in kumpi leitual ah tum lian hi.

⁵Tuaciang a naseamte in, “Hi lai ah Haman om a, nangma taw kimu tu in hong ngak hi,” ci in zo uh hi. Kumpipa in, “Hong tum taken,” ci hi.

⁶Tuaciang Haman tum a, kumpipa in ama tungah, “Ka upat nop mama mi khat om hi. Tua pa atu bang vawt tu khi ziam?” ci hi. Haman in, “Tu in kumpipa in hi za lawlawm a, a upat nop sia akua ahi thong ka tawm maw? Keima ngawl, kuama dang hi buan te!” ci in ngaisun hi.

⁷⁻⁸Tuaciang ama in kumpipa tungah, “Tua pa atu nangma ma ii na silh kumpi puantual pia in. Kumpi kizepna teng na siphu in silhsak in.

⁹Tuaciang na khutnuaite sung pan ulianbel khat in tua pa hi puantualte silhsak in a, siphu tungah tosakin khuapi leitual kantan in paipui sak in. Tua ulian belpa in amate a pai kawmin, ‘Kumpipa in a upat nop sia bangbangzia in minphatna tel pia ci sia, en vun!’ ci in au taken” ci in zo hi.

¹⁰Tuaciang kumpipa in Haman tungah, “Manlang pai in a, ka puantual le ka siphu la in upat natu teng Jew mi Mordecai tungah vawt tan. Tu a ngaisutna nong piak bangin ama tungah vawt siat tan. Ama Kumpi kongbiang ah a to na mu tu hi,” ci hi.

¹¹Tuaciang Haman in puantualte le siphu la in, puantualte Mordecai in silhsak hi. Mordecai siphu tungah to in khuapi leitual kantan a, Haman in a paipui kawmin mipite tungah: “Kumpipa in a upat nop sia bangbangzia in minphatna tel pia ci sia en vun!” ci in taangko hi.

¹²Tuaciang Mordecai kumpi kongbiang ah heak kik a, Haman sia maimawl in a mai seal sa in a inn ah manlang tak cia hi.



¹³Ama in a zi le a lawmte theampo tungah ama tungah thupiang teng theampo son siat hi. Tuaciang a zi le a lawm mipilte in ama tungah, “Nang sia Mordecai in zothaw tu in hong kipan hi. Ama sia Jew mi hi a, zo thei ngei ngawl tu ni hi. Ama in nang hong zo hamtang tu hi,” ci uh hi.

Haman Kithatlum

¹⁴Amate hi thu teng a son laitak Esther kumpinu ii aneak poai ah Haman paipui tu in kumpi inn pan cil kinget naseamte manlang tak theng uh hi.

Esther 7

¹Tua ahiciang kumpipa le Haman sia Esther taw an nekhawm tu in,

²a nii veina pai uh hi. Zu a neak kawmin kumpipa in Esther tungah thu dongh kik a, “Tu in Esther Kumpinu awng, bang dei ni ziam? Hong son tan, kong pia tu hi. Ka ngam phellang ahizong kong pia tu hi,” ci hi.

³Esther Kumpinu in, “Kumpipa awng, kiniamkhiakna taw kong ngetna hong pia zo tu na hile, keima le ka mite hong nungtasak tan.

⁴Ka mite le keima thalup tu in hong kizuak zo hi. Saltang tu in hong kizuak hi zaw thong le, phamaw ka sa bua a, pau ngawlin ka om lel tu a, kong nawngkaisak buatu hi, ahizong kote hong kithatlum siat tu a, hong mon siat tu uh hi!” ci in zo hi.

⁵Tuaciang Xerxes Kumpipa in Esther Kumpinu tungah, “Hi bangte akua in seam ngam ziam? Tua pa koi sungah om ziam?” ci in dongh hi.

⁶Esther in, “Kote ii ngal le kote hong vawtsia pa sia, hi mihing ngilopa Haman ahi hi!” ci in zo hi. Haman sia kumpipa le kumpinu mai ah lau citak in lau hi.

⁷Kumpipa a thin uuk sa in dingto a, khansung pan pusuak in doi puasang kumpi huan sungah pai hi. Kumpipa in hi thu hangin daan hong pia tu hi, ci in Haman in mu thei ahikom a tona ma ah to in Esther Kumpinu tungah a nuntakna a suatak natu in hesuak ngen hi.

⁸Haman in hesuak ngen tu in Esther tona ah a to suk laitakin huansung pan innkhan sungah kumpipa hong sungtang kik hi. Hi bang a mu ciang kumpipa



au in, “Hi siapa in ka kumpi innsung hi lai keima mai tatak ah kumpinu buanin khialpui nuam hi ngawl ziam?” ci hi. Kumpipa ii a kampau a man ma in cil kinget a naseamte in Haman ii lutang puan taw khu uh hi.

⁹Tuaciang Harbonah a kici a kinget naseamte khat in, “Kumpipa ii nuntakna a hu Mordecai a awlupsak natu ci in, Haman in a inn ah mihing awlupsak natu khuam phut zo hi, tua khuam pi sawmsali le pi nga saang hi,” ci hi. Kumpipa in, “Tua tungah Haman awklumsak tavun,” ci in thupia hi.

¹⁰Tuabangin Mordecai a awlupsak natu a phu khuam tungah Haman ki awklumsak hi. Tua zawkciang kumpipa thin ukna thai hi.

Esther 8

Leedo Kik tu in Jewte Kisawl

¹Tua ni in Xerxes Kumpipa in Esther Kumpinu tungah Jewte ii a ngalpa Haman neisa theampo pia hi. Esther in Mordecai taw beta khat a hina thu kumpipa tungah son a, tua hun a kipan Mordecai sia kumpipa omna ah kitumsak thei hi.

²Kumpipa in a min tupna a om a khutzungbu suutin, (Haman tung pan a laak kik sia ahi hi.) Mordecai tungah pia hi. Esther in Haman neisa teng a keam tu in Mordecai koi hi.

³Tuaciang Esther in kumpipa paupui kik a, a peang ah kisp suk in kap hi. Ama in kumpipa tungah Agag suan le paal Haman ii Jewte langpan in a thasawm nopna thu a tawlngaksak natu in ngen hi.

⁴Kumpipa in a kham ciangkhit Esther sangah laam ahikom Esther dingto in,

⁵“Kumpipa awng, na thukim le kei nong khualna in hi thu thumaan hi na ci le, Agag suan le paal Hammedatha ii tapa Haman ii na ngamsung tengah Jewte theampo thalup siat natu in a thupiak sia a daw kik natu in thu hong piaksak tan.

⁶Ka mipuite tungah hi siatna thengin, ka bete kimon siat thong le, bangbangin thuak zo thong tu khi ziam?” ci hi.



⁷Tuaciang Xerxes Kumpipa in Esther Kumpinu le Jew mi Mordecai tungah, “En vun, keima in Jewte a thasawm hu in Haman ka awklumsak zo a, a neisa teng Esther tungah ka pia zo hi.

⁸Ahizong kumpipa mintupna taw a kitum thu thansakna sia kidawk kik thei ngawl tu hi. Ahizong Jewte tungah na dei bang po in ka min taw lai at tavun a, tua lai tungah kumpipa min tupna tum vun,” ci hi.

⁹Sivan tha, a tha thumna, ni kul le ni thum ni in hi thu piang hi. Mordecai in kumpipa ii thuvaante samin India pan Ethiopia dong ngamkhen 127 a uk Jewte, ngam ukpите, ngamukte le kumpi naseamte tungah a laithak tu teng khaw hi. Tua laithakte sia ngam tuatuam ah a zaak kampau tek le a lai tek taw ki at a, Jewte tungah Jew kam le a lai taw in ki at hi.

¹⁰Mordecai in tua laithakte sia Xerxes Kumpipa min taw atsak a, ama in tua laite kumpi min tupna taw tum hi. Tua laite kumpi siphu buk pan siphu tai manlangte tungah a tote in hawmsak hi.

¹¹Tua laithak sungah kumpipa in khua tuatuam ah a om Jewte kipawl in amate le amate a kihuk natu in thiang son hi. Ngamke khat pawpo pan minam khat pawpo in ngalhiamte taw Jewte, a patangte, a numeite ahizong a sim le Jew te in a simte do kikin khat zongh khaoikhe ngawlin thatlum siat thei tu a, a neisa teng laaksak siat thei tu hi.

¹²Hi thutanna sia Persia ngamsung theampo ah Jewte a kithalup tu ni, tha sawm le tha niina, Adar tha ni sawm le ni thum ni in, tangtunsak natu ahi hi.

¹³Hi thu sia thukham bangin kithangsak tu a, ngam tuatuam ah mihingte theampo ii heak tu in kizasak tu a, tua hi le tua ni a thet ciang Jewte in a ngalte tungah phulam tu in kinging khol thei tu hi.

¹⁴Kumpipa thupiak bangin kumpi siphu tungto laitaite a manlang thei tawpin tai uh hi. Tua decree thupiakna sia Susa khuapi sung zongh ah kithangsak hi.

¹⁵Mordecai sia vancii le a kaang kumpi puantual, a cii pha puankaang neal puan sannumte silh in, a etlawm mama kham lukhu khu in kumpi innsung



pan pusuak hi. Tuaciang Susa khuapi lampi dungah a om mi theampo lungdam nuamsa in au uh hi.

¹⁶Jewte atu in thinnopna le suaktakna, lungdamna le ngalzawna hun ahi hi.

¹⁷Kumpipa ii thu zaaksakna lai a kisimna theampo, khuapi sim le ngamke sim ah Jewte in lungdam poai khaam kawkoai uh hi. A tatak in ci leang tu in midangte in Jewte kiita uh ahikom, midang tam mama Jew mi suak uh hi.

Esther 9

Jewte in A Ngalte Thatlum

¹Adar tha ni sawm le ni thum ni theng a, tua ni sia kumpipa ii thu thansakna, a kithansak tu ni, Jewte ii a ngalte in ngalzo tu in a kilamet ni ahi hi. Ahizong Jewte in amate zo pumsai uh hi.

²Ngamsung khuapi sim Jewte omna hawng tuatuamte ah Jewte a sim khat po a om tha le a leedo kik tu in amate kipawl uh hi. Koima po ah a om mihingte in Jewte kiita uh a, khat zongh in nalh zo ngawl uh hi.

³A tatak in ci leang ngamsung kumpi naseam theampo- ngam ukpите, ngamukte le kumpi palaite- in Jewte panpui zaw uh hi, banghangziam cile amate theampo in Mordecai kiita uh hi.

⁴Mordecai sia kumpi inn sungah thu nei khat hi a, a vaangletna a khan seseam bangma in ngamsung theampo ah a minthanna kizel hi.

⁵Tua ahikom Jewte in a ngalte a uuk bangpo in vawt thei uh hi. Amate in a ngalte namsau taw simin thatlum uh hi.

⁶Susa khuapi sung mama ah Jewte in pasal za-nga thatlum uh hi.

⁷⁻¹⁰Tuate sungah Jewte ii a ngalpa Hammedatha ii tapa Haman ii tapa sawmte, Parshandatha, Dalphon, Aspatha, Poratha, Adalia, Aridatha, Parmashta, Arisai, Aridai le Vaizatha te kihel uh hi. Ahizong a neisa kilaaksak ngawl hi.

¹¹Tua ni ma in Susa khuapi sungah mihing a kihat za kumpipa tungah thu kizasak hi.



¹²Tuaciang kumpipa in Esther Kumpinu tungah, “Susa khuapi sung bebek ah Jewte in pasal za-nga thatlum zo a, tuate sungah Haman tapa sawmte kihel hi. Ngam sungah bangzata kithat tu ziam! Tu in bang dei ni ziam? Na nga tu hi. Bang dang dei lai ni ziam hong son tan, na nga tu hi,” ci hi.

¹³Esther in, “Kumpipa awng, na thukim le Jewte tu ni Susa khuapi sungah a kingamtatsak bangma in zing ciangin ngamta kik taken. Tuaciang Haman tapa sawmte ii luanghawmte sia ngui awkna khuam tungah khaisak in,” ci in zo hi.

¹⁴Kumpipa in Esther Kumpinu ci bangin sep tu thupia a, Susa khuapi sungah thangsak hi. Haman tapa sawmte luanghawm sia mipite mu tu in kikhai hi.

¹⁵Adar tha, ni sawm le ni li ni in Susa khuapi sungah a om Jewte kikhawm kikin, khuapi sungah a dang pasal zathum that thua uh hi. Ahizong a neisa laaksak ngawl uh hi.

¹⁶Ngamke tuatuam sungah a om Jewte zongh kipawl in amate le amate kihuh uh hi. Amate in amate a ngaimaw, a ngalte tulsawm sa li le tulnga a thalup na taw amate le amate kihuh uh hi. Ahizong a neisa laaksak ngawl uh hi.

¹⁷Tua ni sia Adar tha, ni sawm le ni thum ni ahi hi. A zing ciang, ni sawm le ni li ni in, kithalupna om nawn ngawl a, lungdam takin poai khaam uh hi.

¹⁸Ahizong Susa khua sungah a om Jewte in sawm le thum ni le sawm le li ni in a ngalte thatin, tuaciang sawm le nga ni in tawlnga ahikom sawm le nga ni sia lungdam poai vawt ni in zangh uh hi.

¹⁹Hi thu hangin khuano sungah a teang Jewte in Adar tha, ni sawm le li ni sia lungdam poai vawt ni, anneak poai vawt ni le khat le khat letsong kipiakna ni in zangh uh hi.

Purim Poai

²⁰Mordecai in hi thute lai sungah khumin, Persia ngamsung theampo a nai le a khuala a om, Jewte tungah laithak kawkoai a,

²¹Kumsim in Adar tha, sawm le li ni le sawm le nga ni sia zum khak ni in a zak natu in thupia hi.



²²Tua nite sia Jewte ii a ngalte a bona ni hi a, tua tha sia heena le thin kiamna hun pan thinnopna le lungdamna hunin a kilaih tha ahi hi. Hi ni niite ngualnopna le anneak poai in zangh tu a, khat le khat ahizong, a zawngte tungah an letsong kipiakna ni in a zak natu in amate thu kipia hi.

²³Tuabangin Mordecai ii a zaaksak thute Jewte in zui uh a, tua poai sia kumsim in a kivawt ngeina poai suak hi.

²⁴Agag suan le paal Jewte ii a ngal pa Hammedatha ii tapa Haman in Jewte thalup mot siat natu ni ciangtan tu in, “Purim” a kici lai meetang sawkin aisaan hi; Haman in Jewte mot siat tu sawm hi.

²⁵Ahizong Esther sia kumpipa kungah pai a, kumpipa in lai at in thupia a, Jewte thalup tu a sawm Haman in thuak zaw hi. Ama le a tapate sia ngui awkna khuam tungah ki awklumsak hi.

²⁶Hi thute hangin zumkha nite sia Purim kici a, (lai mee) ci nopna ahi hi. Mordecai ii laithakna hang le amate tungah thupiangte hangin,

²⁷Jewte in amate mama atu, a suan a paalte atu, Jew mi a suak tu khat pawpo atu in hi ni niite kum simin Mordecai thupiak bangin tan tu, zui tu ngeina in vawt uh hi.

²⁸Jewte innkuan simin, khang khat zawk khang khat, ngamsim le khuasim ah hi Purim nite phawkin, a vawt tawntung tu in kikipsak hi.

²⁹Tuaciang Abihail tanu, Esther Kumpinu zongh in Mordecai taw, laithak at uh a, Mordecai ii a at Purim thu teng zawkciang thu neina taw a laithak at hi.

³⁰Tua Esther laithak sia Jewte theampo tung le Persia ngamsung ngam 127 ah kithaak hi. Tua sungah Jewte ii kilem natu le ngalmuan natu deisaknate kihel a,

³¹antanna le khuangai hun atu in ngeina a nei bangin, Purim poai niite sia a suan le paalte le amate in a hun maan a, a zak thei natu in lamlaknate zongh kihel hi. Hi thu sia Mordecai le Esther kumpinu ii thupiak ahi hi.



³²Purim poai taw kisai zui tu ngeinate a kipsak Esther ii thupiak sia laizial khat sungah ki at hi.

Esther 10

Xerxes le Mordecai ii Thupina

¹Xerxes Kumpipa in a ukna ngamsung tuipihui ah a teangte le a ngam sung sangah a teangte sia zawthawk thu taw in na seamsak hi.

²Ama thupina le a lamdang a nasepnate theampo, Mordecai dinmun saang a piakna thute sia Persia le Media kumpite ii thu teptena sungah kikhum siat hi.

³Jew mi Mordecai sia Xerxes kumpi mama ii a zom ulian bel ahi hi. Ama sia Jew a mipuite in upat a, diksa mama uh hi. Ama in a mipuite phat natu le a suan le a paalte theampo ii ngalmuan natu in naseam hi.



Job

Job 1

Satan in Job Ze-et

¹Uz ngamah a teang Job kici mi khat om hi. Ama in Pathian bia a, Pathian tungah thumaan hi. Ama mihing pha khat hi a, siatna minpiang vawt ngawl tu in kidawm hi.

²Ama in tapa sali le tanu thum nei a,

³tuaciang tuu tulsali, kalaoh tulthum, khui tulkhat le laa za-nga nei hi. Ama in naseam tam mama zongh nei in, Nisuana ngam sungah a hau bel ahi hi.

⁴Job ii tapate in a ban a banin poaikhaam a, tua poai ah a suapui dangte theampo pai uh hi. Amate in a suapui numeite thum zongh a kihel tu in sam tawntung uh hi.

⁵Poaikhaam khuavak nisim in Job sia zingtuung in tho a, a tapate a thiansua natu in a tapate khat sim atu sangaw biakpiakna vawt hi. Ama in hi bangin a vawt tawntung sia a tapate khat po in tupkholna om ngawlin Pathian zawngsak in khialna khat po a nei tha a om le ci in, a ngaisut hang ahi hi.

⁶Topa mai ah vantung mite a kilangh tu ni a tun ciang tuate sungah Satan kihel hi.

⁷Topa in Satan tungah, “Bang teng vawt ni ziam?” ci in dongh hi. Satan in, “Mun khat pan mun khat ah pai in simleitung kiimkot in ka vak kawkoai hi,” ci in zo hi.

⁸Topa in, “Ka naseampa Job na phawk tha ziam? Leitung bup ah ama bangin a thumaan le a pha kuama om ngawl hi. Ama in kei hong bia a, a sia a vawt ngawl natu kidawm hi,” ci hi.

⁹Satan in, “Hong biakna tungtaang pan phattuumna nga ngawl hile Job in nang hong bia thong tu ziam?”

¹⁰Ama le a innkuan le a neisa theampo nangma in na huuksak tawntung hi. A sep theampo thupha na pia a, ngambup dim dongin ngannote na pia hi.



¹¹Ahihang tu in a neisa theampo nangma in laaksak ci tawng na maitang pan hong haamsiat tu hi!” ci in zo hi.

¹²Topa in Satan tungah, “Pha hi, a neisa theampo tungah thu nei ni hi, ahihang Job ii pumpi susia thei ngawl tu ni hi,” ci hi. Tuasia ciang Satan in nusia hi.

Job ii Tate le A hauna Ki lalcipsak

¹³Ni khat ni Job ii tate a upabel pa ii inn ah poai a khaam laitakin,

¹⁴Job kungah kamtai khat hong tai hi. Ama in, “Kote lo sungah khuikap taw naseam in om a, laate lohui ngan thana ah taa uh hi.

¹⁵Thakhat thu in Sabeante in hong sim a, nganno teng ngu siat hi. Amate in keima simngawl na naseamte a vekpi in thatlum uh hi. Nang tungah thu hong ko tu in keima bekma ka suakta hi,” ci hi.

¹⁶A thu ko zongh man ngawl lai in naseam dang khat hong theng a, ama in, “Keak kia in na tuute le a cingte deanglum siat hi. Nang tungah thu hong ko tu in keima bekma ka suakta hi,” ci hi.

¹⁷A thu son man ngawl lai in naseam dang khat hong theng a, ama in, “Chaldean ngal nguk seamte pawl thum in hong sim a, na kalaoh theampo ciapui in na naseamte keima sim ngawl thatlum siat hi. Nang tungah thu ko tu in kei bekma suakta khi hi,” ci hi.

¹⁸A thu son zongh man tak ngawl lai in naseam dang khat hong theng a, ama in, “Na tate na tapa ulianbel sia ii inn ah poai khaam in a om laitak,

¹⁹senneal ngam sang pan vuiپی suangval hong va hi. Tua vuiپی suangval in a inn seamkeak a, amate theampo thisak siat hi. Na tungah thu ko tu in keima bekma suakta khi hi,” ci hi.

²⁰Tuasia ciang Job dingto a, khuangai in a puansilh teng baltham hi. A sam meet a, lei ah bokcip hi.

²¹Ama in, “Ka pian lai in ka pumnguak in ka suak a, ka pumnguak in ka thi tu hi. Topa in hong pia a, tu in Topa in la kik hi. Ama min kipok taken!” ci hi.



²²Ama tungah hi bangin thu piang napi Job in Pathian mawsiat ngawl a Pathian tungah khial ngawl hi.

Job 2

Satan in Job Ze-et Kik

¹Topa mai ah vantung lalangte a kilangh kik tu ni a tun ciang tuate sungah Satan om hi.

²Topa in Satan tungah, “Koi sung teng pai ni ziam?” ci in dongh hi. Satan in, “Mun khat pan mun khat ah pai in simleitung ah, ka vak kawkoai hi,” ci in zo hi.

³Topa in, “Ka naseampa Job na phawk tha ziam? Leitung bup ah ama bangin a thumaan le mipha kuama om ngawl hi. Ama in kei hong bia a, a sia vawt tu kidawm hi. Bangma thu om ngawl bulin ama na suksiat natu in kei nong kun a, ahihang Job sia a ngei bangma in thumaan lai hi,” ci hi.

⁴Satan in, “Mihing khat pawpo in a nuntak natu in a nei theampo pia tu hi.

⁵Ahihang tu in sonteena in nangma in a pumpi nasak lete ama in na maitang panin hong haamsiat tu hi!” ci in zo hi.

⁶Tuaciang Topa in Satan tungah, “Pha hi, ama na khut sungah om hi, ahihang ama thatlum ngawl tu ni hi,” ci hi.

⁷Tuasia ciang Topa kung pan Satan pusuak in, ama in, Job ii pumpi tung theampo ah meima puite piangsak hi.

⁸Job sia nin kholna munah to in a meimate a kkuat natu in tungbeal tamhbek khat la hi.

⁹A zi in, ama tungah, “Tu dong ma thumaan tawntung lai ni ziam? Banghangin Pathian haamsiat in thi heu ngawl ni ziam?” ci hi.

¹⁰Job in, “Lui thawthong ni hi! Pathian in napha khat po hong puak ciang lawp takin ih saang hi. Ngimna hong puak ciang banghangin phun thei tu hi ziam?” ci in zo hi. Hite theampo a thuak hun sung ngangawn in, Job in Pathian tungah langpanna kam bangma pau ngawl hi.



Job ii Lawmte hong Pai

¹¹Job ii lawmte thum sia Teman khua panin Eliphaz, Shuah ngam panin Bildad, le Naamah ngam panin Zopharte ahi uh hi. Job ii thuaknate theampo a zaak uh ciang amate in Job kungah pai in heeneam tu in khensat uh hi.

¹²Amate in a khuala pan Job mu a, ahihang tel ngawl uh hi. A tel tak uh ciang amate kapin cik au tu in kipan uh a, khuangai in a puansilhte baltham in leivui lawnto in a lu tungah the uh hi.

¹³Tua zawkciang amate ama taw sun sali le zan sali lei ah to uh a, kam khat zongh pau ngawl uh hi, banghangziam cile ama in bang zata in thuak ci sia amate in mu uh hi.

Job 3

Job ii Pathian A phutsatna

¹A khak bel ciang Job pau in, ama pian ni haamsiat hi.

Job in hi bang ci hi.

²⁻³Pathian awng, ka sua ni haamsiat in; ka nu sungah naungil ka om phit ni zan tomlaw in!

⁴Tua ni sia khuazing suaksak in, Pathian awng. Bangma hunin tua ni phawk kik nawn heak in; tua ni in khuavak taang kiksak nawn heak in.

⁵Tua ni sia a thim le a zingcip ni hisak in; meeikaai taw tuamcip in a, ni phiat mang in.

⁶Tua zan sia kum simnapan phiat keak in a, bangma hunin kisim kiksak nawn heak in.

⁷tua zan sia a ngamkhing zan, thinnopna om ngawl zan hisak in.

⁸Leviathan nganhing pui a uk thei bum le ai toaite in, tua ni sia haamsiatsak in!

⁹Nikonghong taangsak heak in; Tua zan sia khua hong vak tu ci in lamletna omsak heak in.



- ¹⁰Ngimna le heena sungah kei hong thuaksak hangin, kei hong piansak hangin tua zan haamsiat in.
- ¹¹Ka nu sulh sungah thi ka na leng tua ahi buale ka sua po ciang thi ka na leng uuk ing.
- ¹²Banghang in ka nu in a khup tungah hong toai ziam? Banghang in a noaitui taw hong vaak ziam?
- ¹³Tualai in thi hi leng, tu in tawlnga hithet tu hi veang,
- ¹⁴taanghlai a kumpi teenna inn a sa kik kumpite le ngamukte bangin mu hithet tu hi veang.
- ¹⁵Kham le ngun taw a inn uh a dim kumpi tate bangin mu hithet zo tu a,
- ¹⁶ahibuale a thisa in a suak nausente bangin mu hithet zo tu khi hi.
- ¹⁷Thaankuul sungah mi ngilote in a khan siatna uh kheal a, tuaciang a toi naseamte in a khak bel ciang tawlnga tu uh hi.
- ¹⁸Thongtaakte ngangawn thin nuamin om hun nga a, oksatna le thu piakna kamhamte taw kipeal hi.
- ¹⁹Tua munah a minthangte le kuama heak ngawl mi theampo om a, salte a khak bel in suakta hi.
- ²⁰Banghangin mihingte ngimna sungah nungtasak ni ziam? A khuangaite atu in banghangin khuavak pia ni ziam?
- ²¹Amate in thi tu ngak hi kale tua thina theng ngei ngawl hi; amate in sumngum khat po sangin thaankuul lungngul zaw uh hi.
- ²²Thi in a kiphum mateng amate lungdam ngawl hi.
- ²³Pathian in amate mailam seal hi, tuaciang a kiimkot panin uumci hi.
- ²⁴Anneak tuidawn tu luangin ka kap a, tauna pan ka tawlnga thei bua hi.
- ²⁵Ka kiitak theampo le ka launa teng tung takpi hi.
- ²⁶Keima in thinnopna nei ngawl, tawlngakna nei ngawlin ka ngimnate bo ngei nawn ngawl hi.



Job 4

A Khat vei Kipaupuina

(4.1-14.22)

Eliphaz in hi bang ci hi.

¹⁻²Job awng, kei pau leng na thin a uuk tu ziam? Huthe ngawlin om thei nawn ngawl khi hi.

³Mihing tam mamate na hil zo a, tha zawngkhalte tha na pia zo hi.

⁴Khat po lutu in, toi in, tha zawmin a om ciang, na kammal in a dintang thei natu hanthawn hi.

⁵Tu in na ngimnga tu hun hong tung a, na thuak zawk ngawl tu dongin na thinno hi.

⁶Nangma in Pathian na bia a, na nuntakzia sitbaang ngawl hi; tua ahikom kimuanna le lamletna nei tu na hi hi.

⁷Tu in khua ngaisun kik in. Thutang mi khat in lalcipna thuak ngei ziam, son in.

⁸Mihingte in khan siatna lo bangin tho a, ngitlona ancii tu bangin a tu ka mu hi; tu in tuabangte in siatna le ngitlona sia anlaak bangin la uh hi.

⁹Vuipi suangval ii suksiat bangin Pathian thin uukna in amate susia hi.

¹⁰Mi ngilote sia tawpите bangin hawkin ngalh hi, ahihang Pathian in amate thimsak a, a ha uh suktansak hi.

¹¹Mat tu neak tu a nei ngawl tawpите bangin, amate thi a, a tate theampo kithethaang hi.

¹²Khatvei lai in thu khat thimtham in hong theng a, thimtham leilam ahikom za zongh ka za zo bua hi.

¹³Zan mangsia bangin tua in ka mut hong phawng hi.

¹⁴Liingin ka ngawk hi; ka pumpi bup lau in, kithing hi.

¹⁵Vuiva vahiau khat in ka maitang hong seam a, lau in ka khuasik mul suak hi.



¹⁶Tua munah a ding khat ka mu hi; sal ka leng zong a bang tatak ziam ci in ka son thei bua hi. Tuasia ciang a thim dide sung pan aw khat ka za hi:

¹⁷“Pathian ii muna ah khat beak thutang om thei tu ziam, tua ahibuale ama a bitphua pa mai ah khat beak a thiangtho om thei tu ziam?”

¹⁸Pathian in a vantung naseamte muang ngawl hi; ama in a vantung lalangte ii khialna ngangawn mu hi.

¹⁹Tungman taw kivawt mihing, leivui sung pan a piang mihing pingpaleap bangin ol takin a ki siikcip thei mihingte sia Pathian in muang tu in na um ziam?

²⁰Mihing khat sia zingsang in nungta tha tu a, ahihang nitak hun ma in kuama heak ngawlin thi thei lel hi.

²¹Ama ii neisa theampo kilaksak a; ciimna selin thi hi,” ci hi.

Job 5

¹Job awng, au keak in. Hong zo a om ziam en in. Na tuu tu vantung lalang khat po a om ziam?

²Thukim ngawl na taw na thi dong na thin ngim tu sia mawmawt huai hi, khiakna sel ngamtatna hi.

³Ngammuang a kisa, mihing mawmawte ka mu ngei hi, ahihang amate innkuan thakhat thu in ka tomlaw hi.

⁴A tapate in bangma hunin ngam muanna mu zo ngawl a, kuama in amate hung tu in zum sungah dinpui ngawl hi.

⁵A ngilkial mite in mi mawmawte ii lo an neaksak tu hi- ling kawm a po lo ante ngawngawn ne tu uh hi- tuaciang a dangko mite in a hauna eang tu uh hi.

⁶Siatna sia lei sung pan poto ngawl a, ngimna zongh lei panin po ngawl hi.

⁷Hi ngawl hi! Mihing in ama le ama ngimna kipuak a, mei eakte mei sung pan a peakto bang ngengeei ahi hi.



- ⁸Nang hi leng Pathian kung tu in, ama tungah ka thu ka sung tu hi.
- ⁹Ama ii nasep lian a septe ih tel zo bua a, nalamdang a laknate bo ngei ngawl hi.
- ¹⁰Ama in leitung ah ngua zusak a lote tui buak hi.
- ¹¹Hi hi, a kiniamkhiakte a laamto le, amate theampo thinnopna a pia sia Pathian ahi hi.
- ¹²⁻¹³Ama in mihing kukalte ii tupna le sawmnate lumleesak a, miciimte ii tupna sawmnate thaangsia hi. tuabangin amate ii sepna pawpo a tangtung ngawl tu in vawt hi;
- ¹⁴Sun lai ngangawnin khuazing sungah a zawt uh hi.
- ¹⁵Ahihang Pathian in mizawngte thina pan hun hi; Ama in a cimawte zawthawkna pan hun hi.
- ¹⁶Ama in mizawngte lamletna pia a, mi ngilote pausak ngawl hi.
- ¹⁷Pathian ii a hil sia mi hampaha ahi hi! Pathian in hong tei le thin uuk heak in.
- ¹⁸Pathian in ama liamsakte ii a meimate tuamsak hi; a khut taw nang hong liamsak a, a khut taw nang hong damsak hi.
- ¹⁹Hun khat zawkciang hun khat lal theina pan ama in nang hong hun tu hi;
- ²⁰Kialpi a tun ciang ama in nang hong nungtasak tu a, tuaciang ngal sungah thina pan nang hong dal tu hi.
- ²¹Pathian in nang sia sonsiatna pan hong suatak tu a, lalna a tun ciang nang hong sungsia tu hi.
- ²²Nangma in maitatnate le ngilkialnate na nuisan tu a, tuaciang ngamsate na kiita buatu hi.
- ²³Na lo thawna munah suang om ngawl tu hi; ngamsate in nang hong sim ngei ngawl tu hi.



²⁴Tuaciang na puanbuk sungah thin nuamin, na teang tu hi; na tuute na et ciang bit takin om na mu tu hi.

²⁵Ngan thana munah lopate ii tee za in ta tam mama na nei tu hi.

²⁶Anlaak hun dong a min in a om mangtaang huite bangin a huai a teakin na nungta tu hi.

²⁷Job awng, hi thute sia khua ngeipi sinin ka heak uh thu ahi hi. Thumaan thutak hi, tua ahikom tu in saang thiam in.

Job 6

Job in hi bang ci hi .

¹⁻²Ka ngimna le ka khuangai nate khai kitee le

³tuipi hui a sente sangin ngit zaw tu hi, tua ahikom ka mot paute in note lamdang hong sasak heak hen.

⁴Vaanglianbelpa Pathian in thaltangte taw hong kap a, tuaciang a ngute in ka pumpi zen hi. Pathian in a kiitak huai nate ka mai ah ngual hi.

⁵Laa in lopa a neak ciang lungkim a, khuipui in lopa ko a neak ciang thim dide hi.

⁶Ahizong a kua in limna nei ngawl ci al ngawl an ne thei ziam? Aktui dida sungah bang limna om na ziam?

⁷Tuabang ante lim ka sa bua a, ka neak pawpo in hong sungnimsak hi.

⁸Banghangin Pathian in ka nget sia hong pia nuam ngawl hi tu ziam? Banghangin ka thunget hong zo ngawl hi tu ziam?

⁹Ama in kei hong that zaw heu le maw!

¹⁰Tuabang hong that nuam tu ci in he leng ka natna bang za in a lian tazong, lungdamin ka kilawn tu hi, Pathian thiangtho hi, ci in he khi hi; ama ii hong sawl po bangma hun nalh ngei ngawl khi hi.



- 11**Ka luhai lai natu in bang thangui thatang nei thong na khi ziam? Muanmawk lam et ka nei ngawl nungsang bang tu in nung tataa lai tu khi ziam?
- 12**Kei sia suang taw kivawt khi ziam? Ka pumpi sia taungo taw kivawt ziam?
- 13**Keima le keima ka kihuk natu in thangui nei nawn ngawl khi hi; hong hu tu, tu thei tu mun nei ngawl khi hi.
- 14**Pathian nusia ka hizong, nusia ngawl ka hizong, hi bang ngimna sungah a thumaan lawm le ngual kisamh khi hi,
- 15**Ahihang no ka lawmte awng, ngua zuk ngawl ciang a, luitui kangte bangin hong theam nu hi.
- 16**Luite sia vuuk le tuikhalte in khakcip a,
- 17**ahizong khua a saat ciang amate bo vangeu in, luamte a taw dongin kangcip hi.
- 18**Kalaoh hon taw khualhawte in tui a zonna in ngam amh a; amate senneal ngam sungah vakin thi uh hi.
- 19**Vanh pua kalaoh hon Sheba pan le Tema pan a te in tui zong uh hi,
- 20**ahihang luiko huite ah a lametna uh bo hi.
- 21**Note sia kei atu in tua luikote taw kibang nu hi, ka tuasiatna teng na mu uh ciang lau in nungkin nu hi.
- 22**Letsong hong pia tavun ci in hong ngen khi ziam? Tua ahibuale kei taangin khat po sumnguk pia tu in kong sawl ziam?
- 23**Tua ahibuale ngal pawl khat pawpo ahibuale ngual zothaw thei khat pawpo pan hong hun tavun kong ci ziam?
- 24**Pha hi, hong hil tavun, ka sep khialte hong pholaak tavun. Pau ngawlin ka om tu a, kong ngai tu hi.
- 25**Thumaan kammalte sia up thamman hi, ahihang no na hi uh le nawnsan thu son nu hi.



²⁶Kei sia vui bek ka kam pan pusua hong sa nu hi; tua ahile ka thin lalna kammalte banghangin hong zo nu ziam?

²⁷Tangate salin zuak natu in nuangtangte ngawngawn na lawn uh a, tuaciang na lawm pha belte uh duupin hau tu zong sawm tu nu hi!

²⁸Ka maitang hong en tavun. Leilot ngawl tu khi hi.

²⁹A liap a vaal in ngamta zo nu hi. Na thumaan ngawl na uh kheal vun. Hong puanil heak vun. Kei sia thumaan khi hi.

³⁰Ahihang lei lawlot hong sa nu hi- a maan le a maan ngawl khentel thei ngawl hong sa nu hi.

Job 7

¹Mihing nuntakna sia zawhawk thu taw a kiseamsak ngalkap nuntakna bang, nasep ham a seam naseam sia ii nuntakna bang le

²sila naseam khat ii nilim a lungngul bang, naseampa khat sia a thasum ngak bang ahi hi.

³Tha khat zawkciang tha khat, ka nuntak pui tu bangma ka nei bua hi; zan khat zawkciang zan khat in khuangai lungzuan bek hong pia hi.

⁴A mu tu in ka lupsuk ciang naite cing hak a, zan khuateak kilumlet in khuavak tu kal ka ngakla hi.

⁵Ka pumpi sia thanh taw kidim hi. Meima khiik in tuamcip hi. Ka meima pan meima nai luang hi.

⁶Ka hunte sia muanmawk lam et om ngawlin babo a, thiamtakte ii khauphei kithalee sia sangin manlang zaw hi

⁷Pathian awng, hong phawk tan, ka nuntakna sia husan khat hi bek hi; ka lungdamna bo zo hi.

⁸Tu laitak hong mu ni hi, ahizong hong mu kik nawn ngawl tu ni hi. Nong zon hang om nawn ngawl tu khi hi.



9-10 Meeikaai khat a bo vadi bangin, mihing khat sia thi in heak kik nawn ngawl hi; ama a hete theampo in ama mangil uh hi.

11 Hi ngawl hi! Thim om ngawl tu khi hi! Ka thin uuk a, khuangai lei khi hi. Ka pau kul hi.

12 Banghangin kei hong cing nu ziam? Tuipi nganhing pui khat hong sa nu ziam?

13 Lumsuk in tawlngak tu ka hanciam hi; ka natna pan noptuam ka zong hi.

14 Ahihang nangma ma in mang taw nong lausak a, mukholna le mangsiate nong puak hi;

15 hi bangin ngim nga in ka nuntak sangin ka tawl hong kisaan lum le ka uuk zaw hi.

16 Ka thinkiam hi; nuntakna cimtaak khi hi. Kei nguak hong nusia tavun; ka nuntakna in khiakna nei ngawl hi.

17 Banghangin mihing thupi sa ni ziam? Ama ii sep le vawtte bang thinnop mawkpui ni ziam?

18 Zingsim in ama na vil a, tuaciang manet sim in ama na ze et hi.

19 Ka ciltee ka valh sung teng beak leidang en ngawl tu ni ziam?

20 Thongcing pa awng, ka khialna in nang hong nasak ziam? Banghang phutuunna in, hong zangh ni ziam? Nang atu in vanh ngitpi hi thong khi ziam?

21 Ka khialna hong maisak thei ngeingawl tu ni ziam? Ka sep khialte hong hesuak thei ngawl tu ni ziam? Hai ngawlin ka thaankuul sungah ka om tu hi, tuaciang kei nong zon ciang ka om nawn buatu hi.

Job 8

Bildad in hi bang ci hi.

1-2 Na hawpai thuson teng na man zo ziam?



- ³Pathian in thutang lumlet ngei ngawl hi; ama in a maan ngawl vawt ngeingawl hi.
- ⁴Pathian tungah na tate khial hi vangiat tu hi, tua ahikom amate taw a kilawm bangin ama in daan pia hi.
- ⁵Ahihang tu-in kiheak in a, Vaanglianbelpa Pathian tungah hesuak ngen tan;
- ⁶Tuabang thumaan in, na thiangtho le, Pathian in hong zuan tu a, nang hong hu tu hi, tuaciang na baangkua sia na thaman tu in puapha tu hi.
- ⁷Hauna na taansa theampo sia Pathian hong piak tute taw en khawm leang son thamman ngawl tu hi.
- ⁸Taanglaite ii ciimna en zok in; ih taangpupite ii thumaan thu a sinte ngaisun in.
- ⁹Ih khan tom a, bangma ih heak om ngawl hi; leitung sia lim bangin ih kantan hi.
- ¹⁰Ahihang taangpupi micimte in hilsak in; amate ii son teng ngai in:
- ¹¹“Pumpa sia tui om ngawl na ah po thei ngawl hi, nawng omna puasias ah amate kimu ngeingawl hi.
- ¹²Nolei lai a zak tu in a saat thamman maa in tui a kang le amate sia a vul phit tute ahi hi.
- ¹³Pathian he ngawlte sia hi pumpate bang ahi hi; khatvei Pathian a makngil ciang a lametna uh bo hi.
- ¹⁴Amate in, miimkhau khawng, pangpaan khawng muang uh hi,
- ¹⁵amate in pangpaan khat neal le tuasia in amate do tu ziam? amate in miimkhau khat zamh le tuasia in amate khuangkho zo tu ziam?
- ¹⁶Mi ngilote sia nitaang sungah lopate beaklei in a po bang, Huansung bup a, a kizel keak lopate taw kibang in, piang kheukho hi.
- ¹⁷A zungte in suangte vial a, tuaciang suangtum om theampo len tinten hi.



¹⁸Ahihang amate bot vun- kuama in amate tua mun ah om ngei ahi hunlam phawk tha ngawl tu hi.

¹⁹Hi hi, mingilote ii lungdamna sia tuabang ahi hi; midangte hongpai-in amate omna suan uh hi.

²⁰Ahihang Pathian in a thumaante taisan ngeingawl tu a, mingilote huna pia ngei ngawl tu hi.

²¹Ama in nang hong nuisakin hong ausak kik tu a,

²²ahizong ama in nang hong ensante tungah minsiatna tungsak tu hi, tuaciang mingilote baangkua sia bo tu hi.

Job 9

Job in hi bang ci hi.

¹⁻²Hi hi, tuate theampo sia ka zaak ngei sa vive hi. Ahizong, bangbangin mihing khat in Pathian taw thu a neina sungah thu zo thei tu ziam?

³Bangbangin mihing khat pawpo in Pathian nial thei tu ziam? Ama in, kuama ii zo thei ngei ngawl thu nam tul bang dongh thei hi.

⁴Pathian sia ciim peuma a, vaanglian mama ahikom kuama in ama langpan thei ngawl hi.

⁵Kidop natu thu pia khol ngawlin mualpite ama in khin a, tuaciang a thin uukin tuate lalcipsak hi.

⁶Pathian in zinliingsak a leitangh ngawksak hi, simlei kingakna khuamte ama in lok hi.

⁷Ama in ni a sua ngawl natu in bilhcip thei a, tuaciang aksite zanin a tan ngawl natu vawt thei hi.

⁸Pathian ii vantungte a phal lai in tua ahibuale tuipei nganhing pui sia ii thibin a totcip lai in kuama in hu ngawl hi.

⁹Pathian in Zingsol, Siluk, Unau zawlzawng te le thangsang aksite van ah khai hi.



- ¹⁰Na lianpi ama ii septe ih tel zo bua hi, tuaciang ama ii lamdang lak nasepnate bo ngei ngawl hi.
- ¹¹Pathian in hong kantan hi, ahizong ama ka mu thei bua hi.
- ¹²Ama in a dei po la a, kuama in tho thei ngawl hi; kuama in, “Nang bang ka vawt ci ni ziam?” ci in dongh ngam ngawl hi.
- ¹³Pathian ii thin uukna sia thai ngei ngawl hi. Tuipi nganhing pui Rahab, ama a langpan, tha a pia a ngalte ama in ngoaicip hi.
- ¹⁴Tua ahikom Pathian ka zokik natu kammal koi bangin mu tu khi ziam?
- ¹⁵Maw nei ngawl ka hihang ka vawt thei a lian bel sia ka thukhen pa Pathian munah hesuakna nget tu bekma ahi hi.
- ¹⁶Tuasia ciang ngawngawn in, pau thei natu hong pia hial zong ama in hong ngai tu in ka um thei bua hi.
- ¹⁷Ama in a hang thu om ngawl bulin kei hong vevel tu le hong liamsak tu in suangvalte vasak hi.
- ¹⁸Ama in ka hu zongh hong diiksak man bua hi, ka nuntakna sia thasiatna taw hong dimh hi.
- ¹⁹Thazaw ka suang tu ziam? Pathian tungah thazaw ka suang thei ziam? Thukhen zum ah ama thu vawt ngam tu khi ziam? Akua in ama paisak thei tu ziam?
- ²⁰Maw baang ngawlin thumaan ka hi hang ka awsua sia a mawte bang ka hi hi, tuaciang ka pau thempo in kei hong puanil taw kibang hi.
- ²¹⁻²²Maw baang ngawl khi hi, ahizong tua zongh awlmaw zo nawn bong. Nuntak sia cimtaak zo khi hi, bangma thupi kasak om nawn ngawl hi; maw ka leang maw ba ka leang Pathian in eite hong moncip tu hi.
- ²³A maw ngawl khat thakhat thu in a thi ciang Pathian nui hi.
- ²⁴Pathian in leitung sia mi ngilote pia hi. Ama in thukhenmangte thempo mittawsak siat hi. Tuabang sia Pathian ii vawt ahibuale akua vawt ziam?



²⁵Ka nite pai vahan a, khat zongh a pha om ngawl hi.

²⁶Ka nuntakna sia ngunkuang manlang bel bangin bo lam manaw a, muvanlai ii bilpi man tu a, a suktun bangin manlang hi.

²⁷⁻²⁸Zumnui maitai in ka natnate makngil sawm kaleng ka thuakna theampo in hong zuan kik a hong vil kik hi. Pathian in kei sia a maw ma in hong tuat hi, ci in ka he hi.

²⁹Maw hong kiputsak zawk nungsang bang zongh awlmawk tu khi ziam?

³⁰Ka mawnate hong silthiang zo tu satpia om ngawl hi.

³¹Pathian in a kiihuai dum sungah kei hong lawn suk a, ka puansilhte ngangawn in kei hong maizum pui hi.

³²Pathian sia mihing hile a kam zokik thei khi hi; ka kihauna uh thukhen tu in zum ah pai thei tu khu hi.

³³Ahihang ko kilaklaw ah kuama palai hong seam tu om ngawl hi. Pathian le kei thu hong khen tu kuama om ngawl hi.

³⁴Pathian awng, kei daan nong piak tawlnga in! Na kiitak huai ziate bosak in!

³⁵Kei lau vet ngawl khi hi, papau lel tu khi hi, banghangziam cile ka thinsung keima ma in ka he hi.

Job 10

¹Nuntak cimtaak khi hi, ka phun ka mauna hong ngai tan.

²Hong puavawk heak in Pathian awng, Kei nong mawsakna a bang hi thong ziam? Hong son tan!

³Tua zata a na ngitlo tu sia kilawm thong tu ziam? Nangma vawtsate zawnsak vawt tu ni ziam? Tuaciang mi ngilo khansiate tupna sawmna tungtaang ah maipha pia tu ni ziam?

⁴Kote mu bangin nate na mu ziam?

⁵Na khan sia ko a bangin tom ziam?



⁶Tua ahile banghang ka khialna theampo hong sul zui in, ka sep khial theampo banghang hong vaizui ni ziam?

⁷Maw ngawl ka hi sia na he a, kuama in nang khut sung pan kei hong hun thei ngawl cisia na he hi.

⁸Na khutte in kei hong piangsak a hong zeam hi, tuaciang tu in tua khutte ma in kei hong lalsak hi.

⁹Tungman panin nong vawt sia phawk kik in a, leivui suak kik tu in hong ngoaivui tu ni ziam?

¹⁰Nangma in kei pian natu in ka pa thahatna na pia a, ka nu sulh sungah nong khangsak hi.

¹¹Ka pumpi sia ngu le tha ngui taw na vawt hi, tuaciang tua ngute sia sangol le vun taw na tuam hi.

¹²Nuntakna le a ki khomsuan itna nong pia a, tuaciang nong kepna in kei hong nungtasak hi.

¹³Ahihang tua hunte sung theampo ah nong vawtsiat natu a thimtham in, sawmna na nei sia tu in ka he hi.

¹⁴Ka khialna hong maisak nuam ngawlin bang hun ciang khial tu ziam ci in nong encik hi.

¹⁵Ka khial pawpo ciang nang tung pan haksatna ka thuak a, ahihang a maanin ka ngamtat ciang patakna ka nga bua hi. A cimaw a maizum in ka om hi.

¹⁶Zawna khat po nei lei leng zong, tawpi khat ii hong vai bangin nong vai hi. Hong liamsua tu in lamdang laknate ngangawn na vawt hi.

¹⁷Kei langpanin hong ding tu tetti na nei tawntung hi; Kei tungah na thin uuknate sia khang vaial khang vaial hi; kei nong sim natu ngealna thak na nei tawntung hi.

¹⁸Pathian awng, banghang hong piangsak peuma ni ziam? Kuama ii hong mu ma in ka thi tu hi ka na ve.

¹⁹Sulh sung pan thaankhuk ah paitan hi leng a om ngei ngawl bangin pha tu kana hi ve.

²⁰Ka khan bo dektak zo hi ngawl ziam? Kei le kei hong omsak kapo in! Ka hun nei laisun teng a nuamin hong zangsak tan.

²¹Hai ngawlin ka pai tu a, kong heak kik nawn buatu hi— ka zot natu ngam sia khuazing in zingcip a,

²²khuazing na, lim taw kiliana le lungman buaina ngam hi a, khuavak ngangawn khuazing a hina ngam ahi hi.

Job 11

Zophar in hi bang ci hi.

¹⁻²Kuama in hi nawnsan thute theampo zokik ngawl tu ziam? Kamtam pauna in mihing khat thutang suaksak ziam?

³Job awng, nang hong zokik thei ngawl tu in hong um ni ziam? Nong selnona kammalte in kote pau thei ngawlin hong koi tu ziam?

⁴Na pau teng sia maan hi ci ni hi; Pathian muna ah ka thiangtho ci ni hi.

⁵Pathian in nang hong zo le uuk na peu ing!

⁶Ama in, ciimna nam tam mama a omna thu nang hong son tu hi; mihingte heak zawk ngawl thuthuk tam mama a omna thu nang hong son tu hi. Pathian in na kilawmna za sangin a tawm zaw daan hong pia hi.

⁷Pathian ii thahatna le letna a kiciangtanna le a kidalna na mu thei ziam?

⁸Vantung sangin Pathian saang zaw a, ahizong tua vantung ngangawn na ban zo bua hi. Pathian in mithi khua he a, nang in bangma na he bua hi.

⁹Pathian ii letna sia simlei bup sangin lianzaw a, tuipi sangin zai zaw hi.

¹⁰Pathian in nangma hong manin, thusit tu in hong puak le akua in ama tho tu ziam?

¹¹Pathian in akua teng mannung ngawl ci sia he hi; Ama in amate ngitlo ngamtatna theampo mu hi.



- ¹²Ngamsung laa note a zual sa in a pian ciang mi ngoaite ciim tu kipan tu hi.
- ¹³Job awng, na thinsung puapha in, Pathian tu in.
- ¹⁴Na baangkua sung pan siatna le tatkhialna sot in.
- ¹⁵Tua zawkciang bekin leitung vaite dinmun kho le hangsanna taw maingat in.
- ¹⁶Tuasia ciang, na ngimna theampo mangthai vadi tu a, a bo sa le a kiciamtee nawn ngawl namthuam bang hi tu hi.
- ¹⁷Na nuntakna sia sunkim laitak nitaang sangin taang zaw tu a, tuaciang na nuntakna a zing bel zong zing khuavak bangin taang tu hi.
- ¹⁸Ngam muanna le lamletna kidim taw na nungta tu hi; Pathian in nang hong dal tu a, tawlngakna hong pia tu hi.
- ¹⁹Na ngalte na kiita buatu hi; mihing tam mama in huna hong ngen tu hi.
- ²⁰Ahihang mihing ngilote in thinkiam in, a kiim a paam en tu a, tuaciang suatak natu lam om ngawl cisia mu tu hi. Amate lamletna khat sia thina hong pai tu ci thu bek ahi hi.

Job 12

Job in hi bang ci hi.

- ¹⁻²Hi hi, na kampau sia mihonpite ngaisutna ahi hi. Na thi uh ciang na ciimna uh sia note taw thi khawm tu hi.
- ³Ahihang, kei zongh note ngaisut thei bang tuaciang ngaisun thei khi hi. Note sangin kei nangh zaw ngawl khi hi; na son theampo uh sia a kuama po ii heak thu ahi hi.
- ⁴Tu in ka ngualtamhte ngangawn in kei hong nuisan hi, kei sia thutang in sit baang ngawl ka hi hang hong nuisan veve uh hi; ahihang hun khat lai in Pathian in ka thungetna hong zo ngei hi.
- ⁵Note in ngimna thuk ngawl nu hi, ahihang ciammuina in hong nei nu hi; mihing a puk dek khat vel nu hi.



- ⁶Ahihang ngutate le Pathian selte in amate pathian sia amate ii tha le ngal bekma hi napi thin nuamin nungta uh hi.
- ⁷Vacimte le nganhingte zongh in note hong hil thei tu thu tam mama nei hi,
- ⁸leitung le tuipei nganhingte tung pan a ciimna ngen in.
- ⁹Amate theampo in, Topa khut ii vawt sa ahi uh hunlam he uh hi.
- ¹⁰A nganhingte ii nuntak natu thu a vaan sia Pathian hi; mihing sim ii nuntakna sia ama ii khut sungah om hi.
- ¹¹Ahihang note ii leei in anlimte tep le diksa ahi bangma note bil in thu zaak tu diksa hi.
- ¹²⁻¹³Pasal huaite in ciimna nei hi, ahihang Pathian in ciimna le vaangletna nei hi. Pasal huaite in mukhol theina nei hi, Pathian in mukhol theina le vaangletna nei hi.
- ¹⁴Pathian in a balthap ciang a kua in sa to kik thei ziam? Tuaciang Pathian ii thong a khiak mi sia akua in suatak thei ziam?
- ¹⁵Pathian in nguatui a letcip ciang nguatui hang a, tuite a tha ciang namthuam hi.
- ¹⁶Pathian sia hat a, a tawntungin ngal zo hi, ngual a theamte le theam a thuakte ama khut sungah om hi.
- ¹⁷Ama in ngamukte ii ciimna laaksak a, ngam lampuite sia a mawmawte bangin ngamtasak hi.
- ¹⁸Ama in kumpite za taaksak a, thong sungah khum hi;
- ¹⁹Ama in thiampite le vaang nei mite kiniamkhiaksak hi.
- ²⁰Ama in a kimuang mite thimthusak a, tuaciang uhaamte ii ciimna laaksak hi.
- ²¹Ama in vaangletna a neite min siasak a, ngamukte ii thahatna bosak hi.
- ²²Ama in khuazing sungah a om thukute kilanghsakin khuavak thengsak hi.



²³Ama in minamte hatsakin liansak hi, tua zawkciang amate zo in lalthamsak hi.

²⁴Ama in a lampuite mawmawsak a, lungmang le ngammang in vakvaisak hi;

²⁵amate khuazing sungah zawtin vak uh a zukhamte bangin hoi uh hi.

Job 13

¹⁻²Na son theampo uh ka zaak ngei sa vive hi siat hi. Tuat ka tel siat a, na heak za uh ma in ka he hi. Kei sia note sangin nangh zaw ngawl khi hi.

³Ahizong ka kinialpui sia note hi ngawlin Pathian ahi hi; ka vai sia ama taw kinial nuam khi hi.

⁴Na heak ngawl uh thu sia leilot thu taw seal nu hi; no sia kuama a damsak thei ngawl syavuante taw kibang nu hi.

⁵Pau tengtong ngawlin om zaw vun, tua hile khatpo in a ciim hong sa tu hi!

⁶Ka vai kong pualaak ciang ngai vun.

⁷Banghangin leilot thu son nu ziam? Na leilotna uh teng in Pathian phatuamsak tu in ngaisun nu ziam?

⁸Ama sungsia tu kipan nu ziam? Ama ii vaite zum ah ngatang sep nuam nu ziam?

⁹Pathian in note hong encian le phatna khat beak a mu tu ziam? Ngual na theam uh bangin Pathian theam thei tu ki um nu ziam?

¹⁰Na thu lang khenna uh te a kiseal hang ama in note hong tei tu hi.

¹¹Tuaciang ama ii thahatna in note hong lausak tu hi.

¹²Na paunakte uh sia vut taw kibangin mannung ngawl hi; na ngatang seena uh te tungman bangin thazawm hi.

¹³Thim khipkhep vun a, thuson tu hun khat kei hong pia tavun, a sua nop po suak hi taken.

¹⁴Keima in ka nuntakna pia tu in ka kinging hi.

¹⁵Ka lamletna theampo bosua zo ci leang Pathian in hong that hial zong bang phamaw ziam? Ama tungah ka vai teng ka pualaak tu hi.



¹⁶Ka hangsanna zongh in hong hun nuam le hong hun thei hi, banghangziam cile mi ngilote kuama in Pathian nalh ngam ngawl uh hi.

¹⁷Tu in ka son telna kammalte ngai vun.

¹⁸Ka thu sung tu in kinging zo khi hi, banghangziam cile thutang ka hi hunlam kihe khi hi.

¹⁹Pathian awng, kei mawna suan tu in hong pai ni ziam? Tuabang hong pai na hile thimthu tu le a thi tu in kinging khi hi.

²⁰Thu nam nii hong ngensak tan; thukim po lete nang kung pan buu ngawl tu khi hi;

²¹Kei ngim nong piak tawlnga in a, launa taw kei hong sucip heak in.

²²Pathian awng, pau masa in, hong zo tu khi hi. Tua ahibuale kei hong pausak tan a, hong zo tan.

²³Ka khialnate bang teng ziam? Khialna bang vawt khi ziam? Bang thu taw kei hong kimaw sak ziam?

²⁴Banghangin kei hong pial ni ziam? Banghang in hong ngal vawt ni ziam?

²⁵Kei hong lausak tu in hanciam ni ziam? Kei sia thingtee khat hi lel khi hi, taangphaw ko sa khat a dado hi thong ni hi.

²⁶Kei tungah nasia takin mawna nong zong hi, ka khanmoi lai a ka sep ka vawtte ngangawn phawlo kik ni hi.

²⁷Ka peangte thikkhaute taw nong khi a, ka kalsuan sim nong encik a, ka khawnite ngangawn na en cian hi.

²⁸Tua hu in thing muatsa bangin ka topcip a, nget ii neaksa puan puasilh bangin ka zancip hi.

Job 14

¹Eite theampo sia a zawngkhal a thaneam in ih piang hi. Mi theampo in khantom nuntak haksa ih thuak hi.

²Ih khangto a, paakte bangin manlang takin ih vul hi; limte bangin ih bo hi.

³Pathian awng, en beak nong en tu ziam? tua ahibuale thusit tu le thutanna thuak tu in nong koi tu ziam?

⁴Mihing bang a, a ninte sung pan a thiangtho na piang thei ngeingawl hi.

- ⁵Ama ii khan kum tu le a tha pha tu za, a masia in kikhensat zo hi. Nangma in tuate na ciangtan zo a, kuama ii lai kik thei ahi bua hi.
- ⁶Mundang en in a, ama nguak nusia in; Ama in a thuak zo ahile, nuntakna haksa ama in zomsak in.
- ⁷Thingkung a kiphuk sa sia atu in lamletna khat om hi, ama nungta kikin meang kik thei hi.
- ⁸A zungte haamin, a bulte lei sungah thi kale
- ⁹tui nga le meang kikin thingkung note bangin hing kik tu hi.
- ¹⁰Ahihang mihing khat thi a, tua in ama ii tawpna ahi hi; ama thi hi, tua zawkciang ama koi sungah om ziam?
- ¹¹Nguntui a luan tawp a, tuili a kangte bangin,
- ¹²mihingte thi a, a tho kik tu hi nawn ngawl hi. Vanpi a kip laiteng amate khanglo nawn ngawl tu hi; amate a mutcipna pan tungn nawn ngawl tu hi.
- ¹³Mithite ngamah kei hong seal heu lete paw uuk nang; na thin uukna a thai dong hong seal ka ven, tuaciang kei nong phaw kik tu hun hun khat ciangtan in.
- ¹⁴Mihing khat a thi le ama nungta kik thei ziam? Ahihang hi haksatna hunte a bo dong hun phazawte ngak tu khi hi.
- ¹⁵Tuasia ciang nong sam tu a, kong zo tu hi. Tuaciang nong bitphua sa kei tungah na lungdam tu hi.
- ¹⁶Tuaciang ka kalsuan simin nong encik tu a, ahizong ka khialnate nong sulzui buatu hi.
- ¹⁷Nangma in tuate na maisak siat tu a, a maan ngawl na ka vawt theampo na bosak siat tu hi.
- ¹⁸Mualte a cip tu hun le a kip suangliangte a kikhin tu hun hong theng tu hi.
- ¹⁹Tui in suangpite seu tu a, tuaciang nguapi in leinealte tai tu hi, tuabang keakin mihingte ii a nuntak natu a lamletna na lalthamsak hi.
- ²⁰Mihing khat na zawthawk vawt a ama a tawntung na bosak hi. A thi ciang a meal kilaih hi.



²¹A tapate in minphatna nga kale zong ama in he ngei ngawl hi, amate a min a siat ciang zong kuama in ama ko ngawl hi.

²²Ama in a pumpi natna teng bek le a thinsung khuangaina teng bek phawk hi.

Job 15

A nii vei Kipaupuina (15.1-21.34)

Eliphaz in hi bang ci hi.

¹⁻²Job awng! na kammalte khiakna sel, khiakna nei ngawl kammal vive hi!

³Miciim kuama in nang pau bangin pau ngawl hi tua ahibuale ama le ama ta bang khiakna nei ngawl kammalte taw a kivuumsit om ngawl hi.

⁴Nangma thu bekin ngamta lete kuama in Pathian kiita ngawl tu a, Pathian tungah kuama in thungen ngawl tu hi.

⁵Na ngitlo khansiatna sia na pauna tung pan kitel hi; ciim kammalte taw nangma le nangma kiseal sawm ni hi.

⁶Nang kong puanil tu a kulna om bo; na pau kammal simin nangma hong puanil hi.

⁷Nang sia mihing a piang phitbelpa kisa ni ziam? Pathian in mualpite a vawt lai in om ni ziam?

⁸Pathian vaihawmnate za ku ni ziam? Mihing ciimna sia nang bek aituam sa ni ziam?

⁹Nang ii heak thu khat pawpo ko ii heak ngawl om ngawl hi.

¹⁰Ka ciimna uh sia na pa pian ma a piang puakkaang sa pasalte mun pan ka sin uh ahi hi.

¹¹Pathian in nang nopsak hong pia hi, banghangin nolh lalai ni ziam? Ama taangin kam-uai kamneam taw pau khu hi.

¹²Ahihang nang na hile, patau in thin uukna taw ko nong sal hi.

¹³Pathian tungah na thin uuk a, ama na son sia hi.



- ¹⁴Mihing khat pawpo sia thiangtho takpi thei tu ziam? Mihing khat pawpo sia Pathian muna ah mipha hi thei tu ziam?
- ¹⁵Pathian in a vantung lalangte ngangawn muang ngawl hi; banghangziam cile amate zongh ama muna ah thiangtho ngawl hi.
- ¹⁶Tuaciang, mihingte in siatna sia tuidawn bangin dawn hi; hi hi, mihing sia sia huai in mannung ngawl hi.
- ¹⁷Job awng, ka heak sia tu in ngai in.
- ¹⁸Miciimte in a taangpupite tung pan a sin uh thumaan te kei hong hil hi, tuaciang amate in thuku seal ngawl hi.
- ¹⁹A ngam sungah ngamdang mi kuama om ngawl hi; amate Pathian kung pan lam a pialpui tu kuama om ngawl hi.
- ²⁰Ngualdang a zothaw mihing khansia khat sia, a khan tawntungin haksatna thuk tu hi.
- ²¹Launa awte a nakheng sungah ciik au tu hi, tuaciang ngammuang a kisak laitak phalakte in ama suam tu hi.
- ²²Ama in khuazing sung pan suatak natu in lamletna nei ngawl hi, banghangziam cile namsau khat in ama that tu in mun khat pan pang hi,
- ²³tuaciang vaciikte in a luang ne tu in ngak hi. Ama in a mailam zing hi, ci in he hi;
- ²⁴a thahat kumpipa khat bangin lalna in ama sim tu in ngak hi.
- ²⁵Tuasia in Pathian khuttum a lak, Vaanglianbelpa a nalh mihing khat ii thuk tu ahi hi.
- ²⁶⁻²⁷Tuasia pa sia kiphasak a leedo kin hi; ama in thinpui takin a lum laamto a, Pathian sim tu in del hi.
- ²⁸Tuasia in khuapi a suan le a neite ii a nusiat sa innte a sut mihing pa hi a, ahihang ngal in tua khuapi le innte lalthamsak tu hi.



²⁹Ama sia khua ngei hau ngawl tu hi; a neisa bangma kikhomsuan ngawl tu hi. Ama ii lim ngangawn bo tu a,

³⁰tuaciang ama in khuazing sung pan suakta ngawl tu hi. Ama sia, a baakte a kihal, a paakte vui ii seamkeak thingkung khat bang hi tu hi.

³¹Ama in siatna suang tu muang tu a, a mawmaw lawlawm le siatna ma minphatna telin saang tu hi.

³²A hun a cin ma in ama vulcip tu hi, thingbaak khat bangin vulin hing kik ngei nawn ngawl tu hi.

³³Ama sia, sapit nga ungte a pul sapit ngui bang hi tu hi; ama sia a paak pul sa olive kung bang hi tu hi.

³⁴Pathian selte atu in, suan le paal om ngawl tu a, sumnguk taw a kisa innte kaangmei in lalthamsak tu hi.

³⁵Hi mite sia ngual ngim natu ngaisun in, siatna a vawtte hi a, amate thin sung ngual theam nopna taw kidim tawntung hi.

Job 16

Job in hi bang ci hi.

¹⁻²Kammal tuabangte tu masia in ka za ngei zo hi; heenep nong piak uh sia vawtsiatna hi bek hi.

³Pau tan viuveu tu nu ziam? kam tungnung tu tu bekma lungngul nu ziam?

⁴Kei dinmun ah no om leute a, no dinmun ah kei ding leng, no pau theampo kei zong pau thei tu khi hi. Ka lu thingin thupha nano kong son thei tu hi.

⁵Ngaisut piakna taw no kong thahatsak tu a, heeneam tu in no kong pau pupui tu hi.

⁶Ka sonte in bangma hong hu ngawl a, thimthu in om leng zong ka natna thai tuan ngawl hi.

⁷Pathian awng, hong paatsak niknek zo ni hi, ka innkuan in hong kithalup tu na oai zo hi.



- ⁸Nangma in nong pummat zo a, ka ngalin nong pang zo hi. Ka ngu le ka vun bek taanglai a, tuasia zongh ka mawna hang hi ci in mite in hong ngaisun hi.
- ⁹Pathian in thin uukna taw ka khut ka peang hong laitham a, etsatna taw ama in kei hong ngau hi.
- ¹⁰Mihingte in kei hong nunau uh a, hong uumci in ka maitang hong beang hi.
- ¹¹Pathian in kei mi ngilote khut sungah hong aap zo hi.
- ¹²Thinnuam in ka om a, ahihang Pathian in ka longtawl pan hong zam a, hong vel in hong sucip hi. Pathian in phutuunna in hong nei a,
- ¹³tuaciang ka kiimkot pan thaltang taw hong kap a, hong kha in hong liamsua hi, tua zawkciang ngangawn in ama in hong hesuak beak bua hi.
- ¹⁴Ama in kei hong liamsua kikik hi. Thin uukna taw a mawmaw ngalkap khat bangin ama in kei hong sim hi.
- ¹⁵Khuangai in khau-ip puan ka silh a, hi sung leivui sungah ngallel in ka tocip hi.
- ¹⁶Ka kakaana in ka maisan in, ka mit tumin ka mitkhu bol hi,
- ¹⁷ahihang ngongtat mawna khat zongh ka vawt bua hi, tuaciang Pathian tungah thin tak taw thu ka ngen hi.
- ¹⁸Simlei awng, kei tung a hong kivawt khialnate seal heak in! Thutang khen natu ka sapna aw thimsak heak in!
- ¹⁹Kei taangin a ding tu le kei sangah a pang tu vantung ah khat om hi.
- ²⁰Ka lawmte in hong zawnsak vawt a; Pathian tungah kapin ka thitui luang hi.
- ²¹Mihing khat in a lawmpa atu a mangkaasak bangin kei atu in Pathian tungah hong mangkaasak tu khat ka kisamh hi.
- ²²Tu in ka kumte babo a, heak kikna a om ngawl lampi ka tawn hi.

Job 17



- ¹Ka nuntakna a bo tu nai zo a, ka hu zongh ka sang lalaa hi; thaankuul simngawl kei atu bangma om nawn ngawl hi.
- ²Mihing sim ii hong nunau zazan nate ka en hi.
- ³Pathian awng, kei thumaan khi hi. Ka kammal hong saang tan. Ka pauna hong panpui tu kuama om ngawl hi.
- ⁴Amate a khua ngaisut thiam ngawl natu in a thinsung na humcipsak hi, tu in amate in kei hong zosak heak in.
- ⁵Paunak lui sungah mihing khat in sum huvau in a lawmte leeheak hi, tua hu in a tate in thuak hi.
- ⁶Tu in mite in hi paunak sia kei tungah hong zangh hi. Amate hong pai in ka maitang cil hong phii hi.
- ⁷Ka heena in ka mit hong tawsak phial hi; ka khut le ka peangte sia lim bang kianguang ahi hi.
- ⁸Thumaan a a kineite in hong mu uh ciang ciza in kei sia amate theampo in Pathian sel ci in hong ningkhiin uh hi.
- ⁹A zatak huai a kineite in amate ngaisutna tang kisa vaial uh hi.
- ¹⁰Ahihang amate a vekpi hong pai in ka mai ah hong ding tek le, amate sungah khat beak zongh a ciim ka mu watu hi.
- ¹¹Ka hunte babo a, ka tupnate tangtung thei ngawlin, ka lamletna bo hi.
- ¹²Ahihang ka lawmte in zan sia sun hi ci a, khuavak hong nai hi ci hi, ahihang khuazing sungah omlai ka hi hunlam ka he hi.
- ¹³Ka lamletna mithite omna ngam bek hi a, tua mun khuazing sungah mu tu in ka lumsuk tu hi.
- ¹⁴Thaankuul sia ka pa ka na tu a, ka sa hong ne thanh te sia ka nu le ka suapui numeite ka ci tu hi.
- ¹⁵Kei atu lamletna khat pawpo koi sungah om ziam? akua in tua lamletna mu ziam?



¹⁶Mithite ngam ka zotsuk ciang kei taw lamletna tonkhawm ngawl tu hi.

Job 18

Bildad in hi bang ci hi.

¹⁻²Job awng, nang bang mite thimthu in om thei ngei ngawl ziam? Hong ngai tu in na pau tawlinga lete hong paupui thei tu khu hi.

³Ko sia khui khawng bangin mawmaw ci in akua in nang hong ngaisunsak ziam?

⁴Na thin uukna taw nangma le nangma kinasak bek ni hi. Nang thin uuk hang po leitung kitaisan tu ziam? Nang hong lungkimsak tu in Pathian in mualpite khin tu ziam?

⁵Mi ngilote ii khuavak taang kimitsak lai tu hi; a meikuang kuang kik ngei nawn ngawl tu hi.

⁶A tuiptuan buk sungah a meiinn sia kimit tu hi.

⁷A kalsuante kho hi, ahizong tu in ama lutu hi, ama le ama ngaisut a kipiakna taw ama puk hi.

⁸Ngen sungah ama vak a, a peangte awk hi;

⁹thaangsia na khat sungah a khawtul awk a, ama lencip hi.

¹⁰Lei ah thaangkhou khat kiseal a, a lampi ah thaang khat kisia hi.

¹¹A kiimkot panin launa in ngak hi; tua in kal simin ama zuizen hi.

¹²Ama hau ngei hi, ahihang tu in ngilkial in vak hi; lalna in a kung panin ngak hi.

¹³A kiitak huai natna khat a pumpi bup ah kizel a, a khut le a peangte muatsak hi.

¹⁴Ama ngammuang takin a teenna tuiptuan buk panin kikaikeak a, Thina Kumpipa taw maitang kisi tu in kipaipui hi.

¹⁵Tu ahile, a kilaw thei natnate thiansak natu in kaan a kithe zawkciang, a kuama po a tuiptuan buk sungah teang thei hi!



¹⁶Ama ii a baakte le a zungte sia vulin ko hi.

¹⁷A minthanna sia inn le ngam ah bo vangeu a; kuama in ama phawk nawn ngawl hi.

¹⁸Ama a nungtate ngam pan kihawlkeak tu a, khuavakna pan khuazingna ah kihawlkeak tu hi.

¹⁹Ama in suan le paal nei ngawlin, nguizom tu kuama om ngawl hi.

²⁰Nisuana pan nitumna dong ama ii thuakna a za peuma lau in liing hi.

²¹Tuasia sia mi ngilote ii thuakna hi a, Pathian a awlmaw ngawlte ii thuakna ahi hi.

Job 19

Job in hi bang ci hi.

¹⁻²Banghangin kammal taw kei hong vawtsia tawntung nu ziam?

³Kei nong lang tawntung uh a, nong lannate hu in na mai uh beak zongh zum ngawl hi.

⁴Sep khial keak nei hial ka leng, tua in no bang hong nasak ziam?

⁵No hile kei sangin pha kisa zaw nu hi, tuaciang ka thuaknate, ka maw hu a thuak hi ci in ngaisun nu hi.

⁶Hite Pathian ih sep ahi hunlam mu thei ngawl nu ziam? Ama in kei hong mat natu in thaang hong sia hi.

⁷Ama ngoltol nate lungkim ngawlin, nial ka leng kuama in hong ngai ngawl hi; thutang ka deina in ka au sia kuama in za ngawl hi.

⁸Pathian in lampi khak zo a, ka paisuak thei bua hi; ama in ka pai natu lampi khuazing cipsak hi.

⁹Ama in ka hauna theampo la siat zo a, ka minthanna siasak zo hi.

¹⁰Ama in ka pumpi tung theampo hong saat ngawp a, ka lamletna te hong zungloksakin, a vul tu le a thi tu in kei hong nusia hi.



¹¹Pathian thin uukin kei langpan in kitom hi; ama ii ngal ciipha bel bangin kei hong vawt hi.

¹²Kei hong sim tu in a ngalkap honte ama in paisak hi; amate in kulhte to in ka tuipuan buk uumci uh hi.

¹³Ka suapuiate ii hong nusiak hong taisat natu in Pathian in sawl hi; Kei hong hete atu in khual mi ka hi hi.

¹⁴Ka bete le ka ngualtamhte bo siat zo hi.

¹⁵Ka inn a zin hong tung ngeite zongh in kei hong mangil zo hi; ka naseam numeite in khual mi khat le ngamdang mi khat bangin kei hong vawt hi.

¹⁶Naseam khat ka sap ciang ama in hong zo ngawl hi, hong hu tu in ka nget vangeau ciang zong ama in hong nangon thaak hi.

¹⁷Ka zi in ka husan namh zo ngawl a, ka suapuiate zongh in hong neak nuam ngawl uh hi.

¹⁸Patangte in hong mu uh ciang hong zawngsak in hong nuisan uh hi.

¹⁹Ka ngualtamh pha belte zongh in hong et uh ciang hong nomu uh hi; ka it belte ka langah pang uh hi.

²⁰Ka ngute tungah ka vunte kaai vadul hi; a nungta valiai bekma in ka suakta hi.

²¹Note ka ngualtamhte nu hi! Hesuak mulkimna hong nei tavun. Pathian ii khut in kei hong vaatvawk zo hi.

²²Pathian ii vawt bangin, banghangin note in kei hong vawtsia tu nu ziam? Nong vawtsiatna uh tu za pha heu zo ngawl ziam?

²³Ka kammalte khat in ciamtee in, laibu khat sungah tawm le paw oai napeu ing!

²⁴Tua ahibuale sikkhu khat taw suang tungah ka kammalte a tawntung a kip tu in khen le oai napeu ing.



²⁵Ahizong a khakbel ciang hong pai in, kei hong hung tu khat vantung ah om cisia ka he hi.

²⁶Natna in ka vunte a neaktum zawk ngangawn in hi ka pumpi mama taw Pathian ka mu tu hi.

²⁷Ama ka mittang mama taw ka mu tu hi, tuaciang ama sia khual mi khat hi ngawl tu hi. Ka thin letna bo hi, banghangziam cile

²⁸noma in, “Bangbangin ama vawt zazan thei tu hi ziam?” na ci uh hi. Kei sim tu in paulap zong nu hi.

²⁹Ahihang tu in mawna tungah Pathian ii thin uukna a thengsak namsau sia kiita vun, tua hile thukhen khat om hi ci sia na he tu uh hi.

Job 20

Zophar in hi bang ci hi.

¹⁻²Job awng, ka ngaisutna hong lumlet ni hi, tu in kong zo tu kal ngakla khi hi.

³Na paunate zawnsakna kammal vive hi, ahizong kong zo natu he khi hi.

⁴Taanghlai pek panin, mihingte leitung ah a kikoi ciil pan kipan

⁵mi ngilote khua ngei lungdam ngawl ci sia he mama ni hi.

⁶Ama khangto in van ban kale a lutang in meeikaai te banto hi kale

⁷ama sia leivui bangin kiseamkeak tu hi. Ama a he ngeite in, ama koisung theng ziam ci a lung uh mang tu hi.

⁸Ama sia mang bangin zan mangmu bangin mangthang tu a, kimu kik ngei nawn ngawl tu hi.

⁹A ten ngeina pan ama bo tu hi:

¹⁰tuaciang mizawngte tung pan a nguk vanhte a tapate in pia kik tu hi.

¹¹A pumpi moi in hat ngei hi kale leivui suak pal tu hi.

¹²⁻¹³Siatna sia ama in lim sa a a limna a phaw top natu in a kam sungah pawl khat muam hi.



- 14A an neakte a ngilpi uum sungah a kha suak a, ngu bangin kha tu hi.
- 15Mi ngilo pa in nguk taw a nga haunate a kam pan lua kik siat hi; Pathian in a ngilpi uum sung pan ngangawn in tuate la kik hi.
- 16Mi ngilo pa ii a valh an sia nguza bang hi; tua in ngulngu hangte ii tuh bangin ama thatlum hi.
- 17Ama in olive thau nguntui bang a luangte, tua ahibuale lui bang a luang noai le khuaituite mu tu in nungta ngawl tu hi.
- 18Ama in a sepsa thaman theampo nusia tu a, a haunate a nuamin a neak hun tu nga ngawl tu hi,
- 19banghangziam cile ama in mizawngte zothaw in ngaingon a, tuaciang ngualdang khat iisak sa innte suddol hi.
- 20A duhopna bangma hun lungkim ci om ngei ngawl hi.
- 21An a neak ciang bangma kheet nei ngawl hi, ahihang tu in a hauna bo hi.
- 22A nuntakna a nuam bel lai takin hamsatna le khuangaina thuak tu hi.
- 23A du za po ne taken! Pathian in thin so, thin uukin ama daan pia tu hi.
- 24Thik namsau pan suatak tu a hanciam ciang taungo thaltang in ama kap vawk tu hi.
- 25Thaltang khat in a pum sung paillet a, a tee wakil a thaltang dawn pan a chisan mal taak hi, tuaciang launa in a lungtang suumcip hi.
- 26A khol sa na theampo kilalthamsak a, mihing khut taw a kihal ngawl meikuang in ama le a innkuan bup kaangtum hi.
- 27Vantung in hi pa ii mawna pualaak a, leitung in ama langpanna tetti pang hi.
- 28Ama ii hauna theampo Pathian ii thin uukna khuanawl sungah kilalthamsak tu hi.
- 29Hi thu sia mi ngilote thuak tu hi a, tua in amate tungah Pathian ii piak thuakna ahi hi.



Job 21

Job in hi bang ci hi.

- ¹⁻²Ka son teng hong ngai tavun; Heenepna kong nget sia tuateng lian ma hi bek hi.
- ³Pau tu hun hong pia tavun a, tuaciang ka man ciang nong nunau nuam uh le hong nunau tavun.
- ⁴Ka kihaupui sia a thi thei mihingte hi ngawl hi; ka thinsau zawk ngawl na sia a thupi a hang khat om hi.
- ⁵Kei hong en tavun. Ingh liangin nong sal uh sia kicing heu hi ngawl ziam?
- ⁶Ka tungah hong piang thute ka ngaisut ciang amh in liingin ka ngawk hi.
- ⁷Banghangin Pathian in mi ngilote a huai dong nungta in nuamsasak ziam?
- ⁸Amate in tate le tute nei in tuate khan en tu in amate nungta hi.
- ⁹Pathian in a baangkua uh ah siatna tungsak ngawl hi, amate in launa sungah teang ngei ngawl hi.
- ¹⁰Hi hi, a ngannote theampo pungin ngimna om ngawlin no nei uh hi.
- ¹¹A tate uh tuunote bangin tai in kimai uh a,
- ¹²tengtong le liamlote aw taw laam uh hi.
- ¹³Amate in a nuntakna uh thinnopna taw zanghin, tuaciang ngimna thuak ngawlin nuam takin thi uh hi.
- ¹⁴Mi ngilote in, Pathian tungah hong taisan tan ci uh hi; amate in a nuntakna tu Pathian deina tel nuam ngawl uh hi.
- ¹⁵Amate in Pathian atu sepsak kul sa ngawl hi, a tungah thunget zongh phattuamna om sa ngawl hi.
- ¹⁶Amate in amate ii tha le ngal taw zawna nga in kingaisun hi, ahihang amate khua ngaisutzia ka saang thei bua hi.
- ¹⁷Mi ngilopa ii meivak sia kimitsak ngei ziam? Amate khat pawpo in siatna thuak ngei ziam? Pathian in thin uukin a ngilote daan pia ngei ziam?



- 18**tuaciang suangval ii seam taangphaw bangin amate seamkeak ngei ziam? tua ahibuale vuipi suangval ii leivui a let bangin seamkeak ngei ziam?
- 19**Pate khialna hu in tate tungah Pathian in ngim pia hi ci nu hi. Hi ngawl hi! A khialte amate mama Pathian in daan pia hen; Amate khial hu in Pathian in tuabang vawt hi ci in Pathian in lak hen.
- 20**Mi khialte in amate khialna hu in daan thuak taken; Amate in Vaanglianbel pa Pathian thin uukna thuak taken.
- 21**Mihing khat in a thi zawk ciang a tate ii a lungdam le dam ngawl awlmawk ziam?
- 22**A saangna mun a omte ngangawn tungah thu a khen Pathian sia mihing khat in thuhil thei ziam?
- 23-24**Mihing pawlkhat sia a thi dong cidam in nungta a, a pumpi uh zongh anpha tuipha taw kivaak in, lungdam, thinnuam in thi uh hi.
- 25**A dangte in lungdamna nei vet ngawl hi, amate in thinsia in nungta a, thinsia in thi uh hi.
- 26**Ahihang a vekpi, a kibangin thi a, a kibangin kiphum hi; amate sia thanh taw kituamcip hi.
- 27**Thin kukal na nei uh hong he khi hi.
- 28**“Siatna a vawt mi lianpa ii inn sia tu in koisung hi ka na ziam?” ci in na dongh uh hi.
- 29**Khualhaw mite taw thu kumkhawm ngawl nu ziam? Amate ii hong ko kik thute he ngawl nu ziam?
- 30**Pathian thin uuk a daan a piak ni in mi ngilopa sia kikhoaikhe tawntung hi.
- 31**Mi ngilopa a mawsiat tu kuama om ngawl hi. Ahibuale ama vawtsate theampo a thuk kik tu kuama om ngawl hi.
- 32**Thaanmual ah a om pha takin a kicing a thaankuul ah ama a kipaipui ciang,



³³Mihing tul tam mama in thaan kuanpui a, a luang tungah lei dam takin vuh hi.

³⁴Tuaciang no na hi uh le! thu mannung ngawl teng po taw kei heenep nong sawm uh hi! Nong zokikna theampo leilot thu ahi hi!

Job 22

A Thumvei Kipaupuina

(22.1-27.23)

Eliphaz in hi bang ci hi.

¹⁻²Mihing khat po, a ciimbel ngangawn Pathian ii zak thei tawntung om ziam?

³A maan na sep na vawtte in Pathian phatuamsak ziam? tua ahibuale na phatna in Pathian hu peuma ziam?

⁴Nangma in Pathian na zatak hangin ama in nang hong hilin hong ze et hi ngawl hi.

⁵Hi ngawl hi, banghangziam cile na khial lei lam hang le, ngitlo khansiatna, na vawtte theampo hang ahi hi.

⁶Na suapui khat ii hong bat sum na losak natu in a puante na laaksak a, puansilh tu selin na koi hi.

⁷A toite tui na pia bua a, tuaciang a ngilkialte an na pia bua hi.

⁸Leitangh theampo na hom natu in na vaangletna le na min na za na zangh hi.

⁹Meingongte na hu nop ngawl bek dom ngawlin tangate zongh na suam a na vawtsia hi.

¹⁰Tua ahikom tu in na kiim theampo ah dumkhuk om a, tuaciang thakhat thu in launa taw na kidim hi.

¹¹Khua hong zing mama ahikom khua na mu thei bua a, tuaciang namthuam in nang hong khuum hi.



- ¹²Pathian sia a saangbel vantungte ah teangin, tuaciang a saang aksite ngangawn zongh ensuk hi ngawl ziam?
- ¹³Tuaciang, “Pathian in bang he ziam? Ama meeikaai in seal hi- bangbangin ama in ei tungah thu hong khen thei tu ziam?” ci in na dongh lalai hi.
- ¹⁴Van khuvum tungah Pathian a pai ciang meeikaai saate in sealin hong mu buan te, ci in na ngaisun hi.
- ¹⁵Mi ngilote tot tawntung na lampi ma tawn tong ci in na khensat ziam?
- ¹⁶Amate ii a hun a cin ma ngangawnin amate namthuam in taaikhe hi.
- ¹⁷Hi mite sia Pathian a nial le Pathian in amate bangma law zo buan te, ci in a um mite ahi uh hi.
- ¹⁸Ahiteehang amate a khangtosak sia Pathian hi a mi ngilote ii khua ngaisutzia ka tel thei bua hi.
- ¹⁹Mi ngilote daan a kipiak a mu uh ciang mipbate lungdam in paubanna nei ngawl mite nui uh hi.
- ²⁰Mi ngilote neisa theampo kiskusiat a, tuaciang a taanglai sun kaangmei in kaangtum hi.
- ²¹Job awng, tu in Pathian taw kilemna vawt in a, ngalte khat bang a ama na vawt sia tawlnga in, tuabang hi lete ama in nangma thupha hong pia tu hi.
- ²²Ama ii hong thuhilnate saang in a, a kammalte na thin sungah ciamtee in.
- ²³Hi hi, Pathian kungah kiniamkhiak in, na heak kik tu a, tuaciang na baangkua sungah ngitlo ngamtatna theampo na bosak tu hi.
- ²⁴Na khamte vawk siat in; na kham pha belte luamko sungah sung in.
- ²⁵Vaanglianbelpa Pathian sia na kham hi hen a, ama nang atu a saangin a kiciang ngun hisak in.
- ²⁶Tuasia ciang Pathian na muang tawntung tu a, ama, na lungdamna ii naak ahi hunlam na mu tu hi.



²⁷Thu na nget ciang ama in hong zo tu a; tuaciang na kamciamte na tangtungsak tu hi.

²⁸Na sep na vawt theampo na tangtun tu a, na maa hong vang tu hi.

²⁹Pathian in a kiphasakte khia suk a, a kiniamkhiakte hun hi.

³⁰A maanin ngamta in, paubanna na nei buale ama in nang hong suatak tu hi.

Job 23

Job in hi bang ci hi.

¹⁻²Pathian el in ka lungkim ngawl na ka pualaak veve hi; tau ngawlin ka om thei bua hi.

³Koi sungah ama mu thei tu khi ziam ci sia ka he nuam a, tuaciang ama omna munah koi bangin pai tu ci ka tel nuam hi.

⁴A mai ah ka vai teng ka son tu a keima sang pan ka nial nopna teng ka lui tu hi.

⁵Ama ii a son tu sia ka he nuam hi, tuaciang bangbangin kei hong zokik tu ci ka he nuam hi.

⁶Pathian in a thahatna theampo taw kei hong langpan buang tu ziam? hong langpan buan te, ama in ka thusonte hong ngai tu hi.

⁷Keima in thutak son khi hi; Pathian taw kam kikum thei tu khi hi, ama in kei sia paubanna nei ngawl hi ci in a tawntung atu in khatvei sonkeak tu hi.

⁸Ni suana sangah Pathian ka zong a, ahihang tua munah ama om ngawl hi; Ni tumna sang ka zon hang ama ka mu bua hi.

⁹Pathian siasaksang le thang sangah na seam hi; ahihang ama ka mu balai hi,

¹⁰Tua hi napi Pathian in ka kalsuanna theampo he hi. Ama in kei hong sit hen a hile a thiangtho in kei hong mu tu hi.

¹¹Ama teal lampi thumaan takin ka zui a, lam ka pial ngei bua hi.

¹²Pathian ii thupiakte ka seam tawntung hi; ama ii deina ka zui a, keima uuk bangin ka ngamta bua hi.



¹³Ama kikheal ngei ngawl hi. Kuama in ama nalh zo ngawl hi, tua ahibuale a vawt nopte kuama in khaam zo ngawl hi.

¹⁴Kei atu a ngealsa sia ama in tangtungsak tu hi; tua ngealna sia ama ngealna tam mama sung pan khat ahi hi.

¹⁵Ama mai ah kiitakna taw ka liing vadil hi.

¹⁶⁻¹⁷Vaanglianbelpa Pathian in ka hanna teng bosak hi, khuazing in ka mit hong tawsak ahitazong hong kiitasak sia khuazing hi ngawl a Pathian ama ahi hi.

Job 24

¹Banghangin Pathian in thukhen natu hun khat ciangtan ngawl ziam, ama atu a seamte atu in thutang khen natu ni khat koi ngawl ziam?

²Mihingte in leitangh tam zaw a nga natu in, lo ngi khin hi; amate in tuute ngu in amate tuute taw koi khawm uh hi.

³Amate in tangate neisa laanote la in, a leiba a lo dong meingong nu ii khuital keam hi.

⁴Amate in mizawngte ii a nga tute khaktan in; tuaciang a cimawte zawthawkna taw taisakin buusak uh hi.

⁵Tua ahikom mizawngte sia, ngam laate bangin, senneal ngamko sungah an zong uh hi; koima po ah a tate an tu mu zo ngawl uh hi.

⁶Amate in amate neisa uh a hi ngawl lote ah an la uh hi, tuaciang mi ngilote ii sapit huan sungah sapit ngate lo uh hi.

⁷Zanin khuasik nan natu bangma silh ngawlin lum uh hi.

⁸Mualtung a nguazute in amate kawtcipsak ahikom amate suangpите bealhin ton uh hi.

⁹Mi ngilote in pasel patang note sal tu in la a, mizawngte ii tate leiba taangin la uh hi.



¹⁰Mizawngte ahile amate kiseal natu puan nei ngawl pumngwak in pusuak tu a, mangtaang a at uh lai ngangawn in a ngilkial tu uh hi.

¹¹Amate in olive nga sathau tu in meak a, sapit nga zu tu in suuk hi kale, amate a dangko uh hi.

¹²Khuapite sungah a liamte le a thi dekte a au uh hang Pathian in amate thunget nate awlmawk ngawl hi.

¹³Khuavak a nial mite om hi; Amate in tuasia tel ngawlin a lampuina zui ngawl hi.

¹⁴Khuavak ciang tualthatpa tho in mizawngte thatlum tu in kuan hi, Zanin ama in ngual na nguksak hi.

¹⁵Palngul mawna a vawt sia in khuangial tu ngak hi, Ama in kuama ii mu thei ngawl tu in a maitang seal hi.

¹⁶Zanin ngutate in innte phuul a, ahihang sunin amate buu in khuavak pial uh hi.

¹⁷Amate in sun khuataang kiita a, ahihang amate in khuazing kiita ngawl hi.

Zophar in hi bang ci hi.

¹⁸Mi ngilopa khuanawl suakin taaikak a, tuaciang a neisa leitangh Pathian in haamsiat hi; ama a sapit huan sungah naseam tu in kuan nawn ngawl hi.

¹⁹Khua ko le khuasa sungah vuuk a tuithap vadi bangin mimaw khat sia a nungtate ii ngam panin bo vangeu hi.

²⁰A nu ngangawn in ama phawk nawn ngawl hi; ama thanh in ne a, thing puk khat bangin ki muatthamsak hi.

²¹Tuabangin a pian sia meingongte a vawtsiat hang le tasel nupite tungah cikna a nei ngawl hang ahi hi.

²²Pathian in ama ii thahatna taw a thahatpa susia a, Pathian hong dian tak ciang mi ngilo pa thi hi.

²³Pathian in ama thin muangin nungtasak phot hi kale Pathian in ama encik tawntung hi.



²⁴Tawmvei sung teng mi ngilo pa nuamsa hi. Ahihang ama lopa khat bangin vul a, ankung kisaattante bang ahi hi.

²⁵Tu a ka ci bang hi bo ci in a nial thei tu om nu ziam? Ka kammalte maan bo ci in, a lak thei na om uh ziam?

Job 25

Bildad in hi bang ci hi.

¹⁻²Pathian sia vaanglian hi; mi theampo in ama kiita taken; ama in a vantung ngam sia kilemna taw uk hi.

³Ama na a seam vantung lalang a phaza a sim zo akua om ziam? Pathian ii khuavak, a taang ngawl na mun om ziam?

⁴Pathian muna ah thutang le a thiangtho akua om tu ziam?

⁵Ama muna ah tha ngangawn taang sitset ngawl a, aksite zongh thiang ngawl hi.

⁶Tua ahile tangteal, lungno ahi lel mihing sia bangbang hi tu ziam? Pathian mit muna ah mihing sia manh nei tham ziam?

Job 26

Job in hi bang ci hi.

¹⁻²A zawngkhal mi a thazawm kei atu in bangza in huna lian hi nu ziam!

³Tuabang ngaisutna pha nong pia uh a, kei bang mi mawmaw khat po na pilna nong hawm uh hi!

⁴Na kammal theampo uh akua in za tu in na um uh ziam? Hi bang pau tu in akua in no hong sawl ziam?

Bildad in hi bang ci hi.

⁵A thisate ii thaate sia leinuai tui sungah liing hi.

⁶Mithi khua sia Pathian mai ah kilangh siat hi. Ama ii mu thei ngawl natu in a khak bangma om ngawl hi.



⁷Pathian insaksang van sia phal a, tuaciang leitung sia mun awngpi sungah khai hi.

⁸meeikaaite tui taw a dimh sia Pathian hi, tuaciang ama in tuate a ngitna taw a puathap ngawl natu in keam hi.

⁹Ama in thalik sia meeikaai khat nungah seal hi.

¹⁰Ama in khuazing sung pan khuavak sia tuipi mai a, a beampui khat a kisuai sia taw khen hi.

¹¹Van a pua khuamte ama in a thawmvau ciang amate lau in liing uh hi.

¹²Tuipi a zothal sia ama ii thahatna hi, ama ii thiamna taw ama in nganhingpui Rahab thatlum hi.

¹³Van a thiangsak sia ama ii husan hi a, a suakta nganhing pui a that sia ama ii khut ahi hi.

¹⁴Ahihang hite ama thahatna a hiauhiau hi bek a, ngual ii son vasip ih zaak hi bek hi. Pathian bangza tatak in lian cisia akua in he thei ziam?

Job 27

Job in hi bang ci hi.

¹⁻²Thumaan hong pia nuam ngawl le ka nuntakna a khacipsak, a nungta Vaanglianbelpa Pathian taw ka kiciam hi.

³Pathian in hu sanna hong piak laiteng in

⁴ka muk in a sia khat zongh pau ngei ngawl tu a, ka leei in leilot thu khat zongh son ngei ngawl tu hi.

⁵Note thumaan nu hi ci ngei ngawl tu khi hi; ka pauban ngawl na sia ka thi dongin pualaak kikik tu khi hi.

⁶Thutang khi hi ka ci sia bangma hunin thasua ngawl tu khi hi; hi thu ah ka thinsung thiangtho hi.

⁷Kei hong langpan in kei hong ngal vawtte a vekpi in misiate bang, mimawte bangin daan kipia taken.



⁸Pathian selte atu in a nuntakna uh Pathian ii a nget hunin bang muanmawkna om ziam?

⁹Ngimna hong tun ciang Pathian in amate auna za tu ziam?

¹⁰Pathian ii piak thinnopna sia amate ii a dei tu hi a, ama tungah tatsat ngawlin thu a nget tu ahi hi.

¹¹Pathian ii vaangletna bangza ta in lian ci sia no hong hilsak tavun a, tuaciang Vaanglianbelpa Pathian in bang tum ziam ci sia hong sonthiangsak tavun.

¹²Ahitazong noma mama in mu tek zo nu hi; tua ahile banghangin tuabang nawnsan thu son nu ziam?

Zophar in hi bang ci hi.

¹³Vaanglianbelpa Pathian ii mi ngilote, a mottat te daan a piakzia hi bang ahi hi.

¹⁴Amate in tapa tam mama nei tha tu hi, ahihang ngal sungah a vekpi kithat tu a, amate ii tanote in neak tu a kicing nei ngei ngawl hi.

¹⁵A nungta sunte zongh natna taw thi tu a, tuaciang a meingongte ngangawn in a thite kaa ngawl tu uh hi.

¹⁶Mi ngilote in sim zawk ngawl nguntang nei tu a, khat po ii kisap za sangin a tamzaw puansilhthe nei tu hi;

¹⁷ahihang mipha pawlkhat in tua puante silh tu a, tuaciang mi thumaan pawlkhat in tua ngunte tang tu uh hi.

¹⁸Mi ngilopa in mom ii thun pangpaan bangin innte sa a, tua ahibuale lote a cing sila khat ii buk asak bangin sa hi.

¹⁹Hun khak bel khat sung sia amate hau in lum tu a, ahihang a khanlaw ciang a hauna theampo a bo mu tu hi.

²⁰Thakhat thu in khawnawl suak bangin launa in nawk tu a; zanin vuipi in, amate seamkeak tu hi;

²¹ni suana sang vuipi in amate a inn uh panin lenkeak tu hi;



²²amate suakta tu in a hanciam laitakin tua vuipei in amate hesuak ngawl hetin nuaimang tu hi.

²³Amate a tai uh ciang, vuipei thuum himhum in nawk ngawp a, lalsak theina thahatna taw amate lausak hi.

Job 28

Ciimna Pokna

¹Ngunte a kitawna munah khukte om a, khamte a kithiansakna munte om hi.

²Mihingte in thik sia lei pan to uh a, tuaciang suang panin tausau tuisak hi.

³Mihingte in khuazing thuk bel sung zong uh hi. Amate in leitaw thuk bel dong zongin Khuazing thuk tawng sung pan suang to uh hi.

⁴Mihingte teenna pan a khualana mun, tua ahibuale kuama ii siik ngei ngawl na munah mihingte in suangkuk to uh hi. Tua mun dum sungah amate in khau luai in lungzuangin naseam uh hi.

⁵Thaw ante leitangh pan piang hi; Ahihang tua leitangh nuai ah Na theampo kilaikeak in kisutham hi.

⁶Leisung suangte ii sungah suangmanpha vomte om a, a leivui sungah kham om hi.

⁷Suangkuk paina lampi muthi in mu ngei ngawl a, a tungah vaciik leang ngei ngawl hi.

⁸Tawpi ahibuale a kiitak huai nganhang dangte in tua a ngamkhang lampite tawn ngei ngawl hi.

⁹Mihingte in suang sah belte to a, mualte ii peang dong totham hi.

¹⁰Suang sungah a hawng a taw let uh ciang amate in suangmanphate mu uh hi.

¹¹Amate in ngun tuinaakte dong to uh a, a kiphualnate a pua ah suakeak uh hi.

¹²Ahihang ciimna koisung ah kimu thei ziam? Telthiam theina koisung ah ih sin thei ziam?

¹³Ciimna sia mite sungah om ngawl hi. Kuama in a manphatna tatak he ngawl hi.



- ¹⁴Tuipi liante le tuipi note ii thukna in tua munah ciimna om ngawl hi ci uh hi.
- ¹⁵Ciimna sia ngun le kham taw kilei thei ngawl hi.
- ¹⁶Ciimna ii manphatna sia kham pha bel le suangmanpha pha belte ii manphatna taw kibang thei ngawl hi.
- ¹⁷Ciimna sia kham sangin manpha zaw a, kham paakbungte le palaang pha belte sangin manpha zaw hi.
- ¹⁸Ciimna ii manh sia tuikepte, suangkaangte le suangmanpha sante ii manh sangin tam zaw hi.
- ¹⁹Topaz suangmanpha pha belte le kham ciitak belte ii manh sia ciimna ii manh taw kisonte thei ngawl hi.
- ²⁰Tua ahile, ciimna ii naak sia koisung ziam? Koisung ah teltheina kisin thei ziam?
- ²¹A nungta nganhing in tua ciimna mu thei ngawl hi. A leang vacim khat zongh in mu thei ngawl hi.
- ²²Thina le lalthapna ngangawn zongh in, ngual ii kamdawn bek ka zaak uh hi ci uh hi.
- ²³Pathian bek in tua lampi he hi. Ama in ciimna a kimuna mun he hi.
- ²⁴Banghangziam cile ama in leimongte dong mu a, van ii nuai ah a om na theampo mu hi.
- ²⁵Pathian in vuipte thahatna a piak ciang, tuipi ii phak cia tu a ngeal ciang;
- ²⁶Pathian in ngua zuk natu mun a khensat ciang, vanto khualengte lampi tu a khensat ciang;
- ²⁷Tuasia ciangin ama in ciimna mu a, a man a phat le a phat ngawl sit hi. Ama in a thukimna kipsak hi.
- ²⁸Pathian in mite mun ah, “Na ciim natu uh in, Topa thasia tu nu hi. Na heak thei natu uh in siatna pial tu nu hi,” ci hi.

Job 29

Job ii Ama Thu A khak bel A sonna



¹Job pau tu in kipan kik hi.

Job in hi bang ci hi.

²Pathian ii kei hong kepcing hun lai bangkeak in ka nuntakna khat vei kipan kik thei le oai meak ing.

³Tua lai in Pathian kei taw omkhawm tawntung a, khuazing kantan in ka va ciang khuavak hong pia hi.

⁴Tua hun lai sia ka nopsak hunlai hi a, Pathian ii hong pawlpuina in ka baangkua cing hi.

⁵Tua lai in Vaanglianbelpa Pathian kei taw omkhawm a, kei sia ka tate theampo in hong kiim uum vaniau hi.

⁶Ka khuipuute le ka kealpuite in noai tam mama hong pia a, ka olive kungte leisia bel suang sungah po hi.

⁷Khuapi upate kikhop simin amate sungah ka to ciang,

⁸khangmoite in kei hong mu po uh ciang hong pial a, tuaciang khanghaamte in zatak piakna in hong din uh hi.

⁹Mipite ii lampuute zongh a pau uh tawlnga uh hi;

¹⁰a thupi bel mite zongh pau ngawlin om uh hi.

¹¹Kei hong mu theampo le kei hong za mite theampo in ka sep ka vawt sate hangin hong pok uh hi.

¹²Mizawngte a au uh ciang ka hu hi. Zot natu mun a nei ngawl tangate ka hu hi.

¹³Cimawkna nasia bel a thuk mite in kei hong pok uh hi, tuaciang meingongte ngam muangin a om thei natu lampi ka zonsak hi.

¹⁴Thutang le khualna taw ka ngamta tawntung hi.

¹⁵Mittawte atu in mittangte ka hi a, peangbaite atu in peangte ka hi hi.

¹⁶Mizawngte atu in pa dinmun ah ka ding a, khual mi ngimngate sangah ka pang hi.



¹⁷Mihing cizat nei ngawlte ii thahatna ka susia a, a vawtsiat mite ka suatak hi.

¹⁸Khansau a nuntak tu le nuam takin inn ah thi tu ka ngaisun tawntung hi.

¹⁹Kei sia a zung, tui a kham tawntung le a baakte daaitui taw a kawt thingkung khat bang ka hi hi.

²⁰Mi theampo in kei hong pok tawntung a, ka thahatna kiam ngei ngawl hi.

²¹Ngaisutna ka piak ciang mihingte pau ngawlin om a, ka pauna pha takin hong ngai hi;

²²Ka man zawk ciang zong bangma belap natu amate in nei ngawl uh hi. Ka kammalte a sungah nguamalte bangin tum hi;

²³tuk lai a lothote in khuapi ngua tui a saan thiam bangin a kuama po in ka kammalte saang thiam uh hi.

²⁴A thin uh a kiam ciang amate ka maitai a, ka maituina in amate thahatsak hi.

²⁵Amate lampui in a vai tu ka hawmsak hi. Kumpipa khat ii a ngalkapte lam a pui bangin amate lam ka pui a, a thin ngim uh ciangin amate ka heeneam hi.

Job 30

¹Ahihang kei sangin a khan moi zaw pasalte in tu in kei ciammuina po in hong nei uh hi! A pate mannung ngei ngawl ahikom ka uite ii tuu cin zongh ka husak nuam bua hi.

²Amate sia tha tual sa hon khat hi a, kei atu na hong sepsak tu in thazawm lei hi.

³Amate zawngin ngilkial tek mama ahikom thingzung ko po zanin duisung ngamkhingna munah khim uh hi.

⁴Amate in senneal ngamah thingno pote botin ne uh hi, limna a nei ngawl munphia kungte ii zung ngangawn ne uh hi!



- ⁵Nguta khawngte oksat bang phetin a kuama po in amate oksan in notkeak uh hi.
- ⁶Amate in liang maitang ah a taw vang lianghawng sungah teang uh hi.
- ⁷Amate ngamsate bangin ngam sungah au in, sawl nuai ah a hon in om uh hi.
- ⁸Amate a mannung ngawl, a son thamman ngawl, min meméal nei ngawlte ahi uh hi! Amate sia ngamsung pan kinot keak hi.
- ⁹Tu in amate hong pai in kei hong nuisan ka zen hi; Kei sia amate atu in ciammuina bek ka suak hi.
- ¹⁰Amate in kei kiihuai hong sa uh hi. Amate in amate sia kei atu thupi leih kisa uh a, hong pai in ka maitang ngangawn cil hong phii uh hi.
- ¹¹Pathian in a thazawm le a cimaw in kei hong vawt ahikom amate in a thin so theiza in kei hong ngalvawt uh hi.
- ¹²Hi mihonte in talphul in kei hong do a, kei hong taisak hi; amate in a khak bel hong sim natu kithoai uh hi.
- ¹³Amate in ka suatak natu khaktan in, hong lalcipsak tu in hanciam uh hi; tuaciang amate a tho tu kuama om ngawl hi.
- ¹⁴Ka bukna leihawng ah hong tuaksuk uh a, kei hong sucip suk uh hi.
- ¹⁵Launa in kei hong zo hi; ka zatak huaina vaang vui bangin bo hi; ka haunate meeikaai bangin bo hi.
- ¹⁶Tu in thi dektak khi hi; ka thuakna sia nuamtuam zaw hiat ci om ngawl hi.
- ¹⁷Zanin ka ngu ka taang theampo bot hi; kei hong khim natna sia tawp hun nei ngawl hi.
- ¹⁸Pathian in ka laktong ngawng pan hong zam a, ka puante meakcip hi.
- ¹⁹Pathian in kei buannoai sungah hong lawn suk a, nin bulom taw ka kibang hi.
- ²⁰Pathian awng, hong biakpui khi hi, ahihang nong zo ngei bua hi, thu kong nget ciang nong nadon bua hi.



- ²¹Kei tungah nong ngilo mama a, na tha neiza taw nong vawtsia hi.
- ²²Vuipi in nong seamkeaksak hi. Suangval sungah nong lawlok hi.
- ²³Mihing theampo atu in a kisp kholsa thina sungah nong zotpui hunlam ka he hi.
- ²⁴Hesuak nget sim ngawl a dang bangma a vawt thei ngawl a lal sa pasal khat sia, banghangin sim nu ziam?
- ²⁵Mihing ngim ngate taw kap khawm ngawl ka na khi ziam? Tuaciang a cimaw a kisamhte atu khuangai ngawl ka na khi ziam?
- ²⁶Lungdamna le khuavak ka lam en a ahizong ngimna le khuazing hong theng zaw hi.
- ²⁷Thin ngimna le natna in kei hong bal ngawp a nisim in ngimna ka thuak hi.
- ²⁸Thinngim lungkham in ka om a mihon sungah dingin huna ka ngen hi.
- ²⁹Ka aw sia ngam ui le kalaoh vacimte auna aw bang hi a, heehuai in lungzuan huai hi;
- ³⁰Ka vunte vom in dul a, sukin ka pumbup in ka ci sa ngawp hi.
- ³¹Khatvei lai in thinnop huai la awte ka zaakna munah tu in mauna le kaana aw bek ka za hi.

Job 31

- ¹Khialpui nopna thin taw numei khat po ka et ngei ngawl natu in a ciliap huai kamciam khat ka vawt zo hi.
- ²Vaanglianbelpa Pathian in ei tungah bang hong vawt ziam? Ama in mihingte nasepna bangbangin thuk kik ziam?
- ³Ama in, a maan ngawl a seamte tungah tuasiatna le lalthapna tungsak hi.
- ⁴Pathian in ka vawt theampo he a, ka kalsuanna theampo mu hi.
- ⁵Ngitlo ngamtatna nei ngei ngawlin, ngual theam tu hanciam ngei ngawl khi hi ci in ka kiciam hi.



⁶Pathian in a maan khaikhin tungah ka ngitna hong tee taken, tua hile ama in ka pauban ngawlna mu tu hi.

⁷Lamtang panin ka pial a, tua ahi buale zongh siatna in ka zolsak a, ka khutte mawna taw nin a baang le

⁸ka lo ante kilalthamsak taken a, tua ahibuale, ka ciin sa ante ngualdang in ne taken.

⁹Ka innpaam pa ii zi ka dei a, a kongbiang pua sangah buu in ka ngak le

¹⁰tuaciang ka zi in pasal dang khat ii an huansak taken a, pasal dang khat ii lupna ah lum taken.

¹¹Tuabang ngamtatsia a vawtte kithatlum tu hi.

¹²Tuabang ngamtatna sia ka nei theampo a kuangtumsak, a lalcipsak thei hell meili pui bang khat hi tu hi.

¹³Ka naseamte khat in ka tungah a lungkim ngawlna hong pualaak ciang, pha takin ka ngai a, ama tungah a pha ka vawt hi.

¹⁴Tuabang a pha ka vawt bua ahile bangbangin Pathian maitang si ngam tu khi ziam? Kei tungah thukhen tu in Pathian hong pai ciang a bang son thei thong tu khi ziam?

¹⁵Kei hong bitphua Pathian ma in ka naseamte zongh bitphua hi.

¹⁶Mizawngte hu tu ka nial ngei bua hi; meingongte thinkiam in ka omsak ngei bua hi,

¹⁷tua ahibuale neak tu ka nei laiteng tangate a ngil ka kialsak bua hi.

¹⁸Ka khan tawntungin amate pha takin ka en hi.

¹⁹Zawng leilam in puansilh lei zo ngawl a kitasamh khat ka mu ciang,

²⁰keima ii tuu hon sung pan a piang samulte taw a kivawt puansilhthe ka pia hi. Tuasia ciang ama in a thinsung theampo taw kei hong pok hi.

²¹Thukhen zum ah ka zo tu ci in he in tanga khat ka theam a, ahile

²²ka baante taltan taken; ka liangko panin kileamkeak taken.



- ²³Pathian ii daan piak tu kiita ka hikom tuabangin ka ngamta ngei buatu hi.
- ²⁴Hauna ka muang ngei bua a,
- ²⁵tua ahibuale ka neisa tungah ka kiphasak ngei bua hi.
- ²⁶A taang mama ni ahizong, a pha mama tha ahizong ka bia ngei bua hi.
- ²⁷Amate thasiana in ka khut ka napna taw tuate upat pia tu in lam hong kipialsak ngei ngawl hi.
- ²⁸Tuabang khialnate sia thidaan piak tuak hi; tuabang ngamtatna in Vaanglianbelpa Pathian nial ahi hi.
- ²⁹Ka ngalte ii a thuak ciang ka lungdam ngei ngawl hi, tua ahibuale lalna a thuak ciang dik ka sa ngei bua hi.
- ³⁰Amate thi natu thungetna taw khialna ka vawt ngei bua hi.
- ³¹Kei atu na hong sepsak mite theampo in, khual mite pha tak zin ka do tawntung, he hi.
- ³²Khualhaw mite ka inn sungah ka sam a, lampi liante ah ka lumsak ngei bua hi.
- ³³Midangte in a khialnate uh seal tu hanciam a, kei ka hile ka khialnate ka phualseal ngei bua hi.
- ³⁴Mihingte ii ci tu sia ka kiita ngei bua hi, amate hong ci zazan tu lauinn sungah ka omcip ngei bua a, pau ngawl khipkhep in ka om ngei bua hi.
- ³⁵Ka pau teng kuama in ngai ngawl tu ziam? Ka kammal theampo maan hi ci in ka kiciam hi. Vaanglianbelpa Pathian in kei hong zo taken. Hong langpante ii hong mawsaknate ka mu tu in ki at le
- ³⁶Ka liangko tungah kiphasak liuliau in ka pua tu a, kumpi lukhu khat bangin ka lu tungah ka khu tu hi.
- ³⁷Pathian tungah ka sep sa theampo ka son tu a, ama mai ah kiphasak liuliau in ka om tu hi.
- ³⁸Ka thaw leitangh sia ngu in, a nei tatakte tung pan ka sut ahile,



³⁹tua munah a kiciing ante ne in, ahizong tua ante a ciing lothote ka pukthisak a, ahile-

⁴⁰tua lo ah zungtaang le mangtaangte a po luangin lopa le lingkungte po taken. Job ii thu sonte a bona hi.

Job 32

Elihu ii Pauna te

(32.1-37.24)

¹Job sia ama ii pauban ngawl na teng kitelsak ahikom pasal thum teng in zokikik tu hanciam nawn ngawl hi.

²Ahihang a kung a om Elihu a kici pasal khat in a thin uukna vei zo nawn ngawl hi, banghangziam cile Job in ama le ama kitangsakin, Pathian mawsiat hi. (Elihu sia Buz ii suan le paal ahi Barakel ii tapa hi a, Ram ii be le phung ahi hi.)

³Ama sia Job ii ngualtamh thumte tungah a thin uuk si hi. Amate in Job ii kam zo thei ngawl ahikom, Pathian sia a maw bang suaksak hi.

⁴Elihu sia tua lai ah a moi bel ahikom ama in a lawmte thuson a man tu ngakin om hi.

⁵Job lawmte thum in Job ii kam zo thei ngawl a mu ciang Elihu thin uukin,

⁶thuson tu in kipan hi.

Elihu in hi bang ci hi.

Kei sia ka khan moi lai a, no na hi uhle khanghaam zo nu hi, tua ahikom ka ngaisutna kong son tu ka lauthawng hi.

⁷Noma zongh na pau tu uh ma hi a, no uhaam zawte in na ciimna uh nong hop tu uh ma hi ci in keima le keima ka kici hi.

⁸Ahihang mihingte kungah pai in amate ciimna a pia sia Vaanglianbelpa Pathian ii thaa ahi hi.

⁹Khanghaamna in mihingte ciimsak hi ngawl a thumaan zongh he tuansak ahi bua hi.



- ¹⁰Tua ahikom tu in nong nangaih tu uh ka dei hi; ka ngaisutna teng no tungah hong sonsak tavun.
- ¹¹Na thu son uh lai in thinsau takin kong ngai a, tuaciang ciimna kammalte na zon uh laitakin kong ngak nginge hi.
- ¹²Pha takin kong ngai a, na cimawkna uh ka he hi. Job ii paunate na nial thei bua uh hi.
- ¹³Bangbangin ciimna ka mu zo uh ci thei nu ziam? Pathian in Job a zo kul tu hi, banghangziam cile noma in Job na lel uh hang ahi hi.
- ¹⁴Job sia kei hong paupui hi ngawl a, noma hong paupui hi. ahihang no ii zo bangin ka zo ngei buatu hi.
- ¹⁵Job awng, amate in a pau tu he nawn ngawl hi, na pauna hong zo thei ngawl hi.
- ¹⁶Amate pau ngawl a om laitak ngak kenkon tu khi ziam? Amate tua munah dingin a pau tu he nawn ngawl hi.
- ¹⁷Hi ngawl hi, tu in keima in kong zo tu a, ka ngaisutna kong son tu hi.
- ¹⁸Pau ngawlin ka om thei nawn bua hi. Ka pau tute ka iip thei nawn bua hi.
- ¹⁹Pau tu hun ka nga buale, zu a thak taw a kidim savun thawl bangin puaktham tu khi hi.
- ²⁰Thuak zo nawn ngawl khi hi, ka pau ma kul hi.
- ²¹Hi kam kinialna sungah pan tuam mun nei ngawl tu khi hi; kuama zongh sialpok ngawl tu khi hi.
- ²²Sialpokdan thiam ngawl khi hi, ngual ka sialpok le Pathian in manlang takin kei daan hong pia tu hi.

Job 33

- ¹Job awng, tu in ka son tu theampo pha takin hong ngai tan.
- ²Ka thin sungah a om teng son tu in kinging khi hi.



- ³Ka kammalte theampo sia ka thintak ka lungtak hi a, thumaan thutak ka son hi.
- ⁴Pathian ii thaa in kei hong vawt a, nuntakna hong pia hi.
- ⁵Nong zo thei le hong zo tan. Nong nial natu kinging khol in.
- ⁶Nang le kei sia Pathian ii muna ah ih kibang a, ih nii in tungman pan hong kivawt hi.
- ⁷Tua ahikom kei nong kiitak natu bangma thu om ngawl hi; Nang hong zothaw ngawl tu khi hi.
- ⁸Tu in hi sia na pau vangiat ka zaak sia ahi hi.
- ⁹“Kei maw ngawl khi hi; a maan ngawl vawt ngawl khi hi. Kei sia paubanna nei ngawlin khialna pan suakta khi hi.
- ¹⁰Ahihang Pathian in kei hong sim nop hu in thu zong a, kei sia ngalte khat bangin hong vawt hi.
- ¹¹Ama in ka peang thikkhau taw hong khit a, ka tuhna theampo hong encik hi,” ci ni hi.
- ¹²Job awng, ahihang thiang takin kong son hi. Nangma khial ni hi. Pathian sia mihing khat pawpo sangin lian zaw hi.
- ¹³Banghangin Pathian in mihing khat ii lungkim ngawlna zo ngei ngawl hi ci in mawsiat ni ziam?
- ¹⁴Pathian in thuson kikik, son kikik ahihang ama ii thusonte kuama in nangaih ngawl hi.
- ¹⁵Zan mihingte mut lanin Pathian in mang le mu kholna taw paupui hi.
- ¹⁶Pathian in ama paunate mihingte in ngaisak hi, tuaciang kidop khol natu a, a thu sonte in amate lausak hi.
- ¹⁷Pathian in amate tungah khialna a vawt nawn ngawl natu le a kiphatsak nawn ngawl natu in son hi.
- ¹⁸Pathian in amate lalcipsak ngawl tu hi; ama in amate thina panin ngum hi.



¹⁹Pathian in mihing khat sia natna thuaksakna le a pumpi natna taw kidimsakna taw in pua hi.

²⁰Ciina sia in a ankam limna taanin, an lim bel zongh sungnim huai sa hi.

²¹A ci a sa theampo kiamin a ngu nguak bek om hi.

²²Ama sia mithite ngam zuan tu in ki papan ahi hi.

²³Mihingte a nasep a phawksak kik Pathian ii vantung lalang tul tam mama sung pan khat ama hu tu in hong pai tha tu hi.

²⁴Hesuakna taw vantung lalang in, “Ama suatak in! Ama sia a thite ngamah a pai tu hi ngawl hi. Ama suataksak natu in hi lai ah kitatna om hi,” ci tu hi.

²⁵A pumpi sia moi sua kikin a thahat kik tu hi; thu a nget ciang Pathian in zo tu hi.

²⁶Ama in Pathian sia thinnopna taw bia tu hi. Pathian in ama atu in na theampo a maan in lemh kik tu hi.

²⁷Ama in mipite tungah, “Ka khial zo hi. A maan ka seam bua hi, ahihang Pathian in ka nuntakna hong khoaikhe hi.

²⁸Mithite ngam ah ka pai ngawl natu in ama in hong keamcing ahikom ka nungta lai hi” ci tu hi.

²⁹Pathian in hite theampo seam kikik, seam kikik hi,

³⁰Ama in mihing khat ii a nuntakna hun a, tuaciang nuntak lungdamna pia hi;

³¹Tu in Job awng, ka son tu sia hong ngai tan; thim khipkhep in a, kei hong pausak tan.

³²Ahihang son nop khat po na nei le kong ngai tu hi. Lungdam takin maan ni hi kong ci tu hi.

³³Ahihang tuabang ahibuale, thim in a hong ngai tan, na ciim natu in thu kong hil tu hi.

Job 34



- ¹⁻²No mipil le miciimte awng, tu in ka son sia hong ngai tavun.
- ³An na tep uhciang a lim le a lim ngawl he nu hi, ahizong ciim kammalte na zaak uh hang he ngawl nu hi.
- ⁴Hi thu sia eima ii khensat tu ahi hi.
- ⁵Job in paubanna nei bong, Pathian in thutang hong danh hi ci hi.
- ⁶Job in, “Banghangin leilot in maw khi hi ci thei tu khi ziam? Thi thei natu dongin liam khi hi, ahihang mawna nei ngawl khi hi,” ci in dongh hi.
- ⁷Job bang mi khat pawpo na mu ngei uh ziam? ama in Pathian zatakna lak ngei ngawl hi.
- ⁸Ama in mi ngilote taw kithawl le mi khialte taw vakot sia nuamsa hi.
- ⁹Ama in Pathian ii deina zui tu hanciam sia bangma phattuamna om ngei bo ci hi.
- ¹⁰No a telthiam mite awng, hong ngai tavun! Vaanglianbelpa Pathian in a maan ngawl naseam tu ziam?
- ¹¹Ama in mite a sep bangin min phatna tel pia a, a thuk tu kilawm bangin amate daan pia hi.
- ¹²Vaanglianbelpa Pathian in siatna vawt ngawl hi, ama in kuama tungah thumaan ngawlin seam ngei ngawl hi.
- ¹³Pathian in ama ii vaangletna ngualdang khat tung pan nga sawn ziam? Leitung uk tu in ama sia khat po in koi ziam?
- ¹⁴Pathian in nuntakna husan la kik le,
- ¹⁵a nungta theampo thi tu a leivui suak kik tu hi.
- ¹⁶Na ciim uh le tu in kei hong ngai tavun.
- ¹⁷Thutang Pathian sia nilkhiin nu ziam? Ama in thutang ngaimaw hi ci in ngaisun nu ziam?
- ¹⁸Pathian in kumpite le ngamukte sia amate ngitnat ngawl ciang le a khansiat ciangin nilkhiin hi.



¹⁹Ama in ngamukte sangah pang ngawl hi, mizawngte puavawk in a haute maipha pia tuan ngawl hi, banghangziam cile mi theampo ama bitphua sa vive ahi hi.

²⁰Mihing khat sia zanin thakhat thu in thi thei hi. Pathian in mihingte vaatvawkin amate thi hi, a thahatte zongh ol takin ama in thatlum hi.

²¹Ama in mihingte kalsuanna theampo encik hi.

²²Mikhial khat Pathian muna pan a seal zo tu khuazing om ngawl hi.

²³Pathian in mihingte ama ii thukhenna a zot tu hun ciangtan kul sa ngawl hi.

²⁴Ama in ngam lampuite sot in ngualdang taw a laih natu in, thu katna vawt phot kul sa ngawl hi.

²⁵Banghangziam cile ama in amate sep sia he hi, ama in zanin amate lawnthal a sucip hi.

²⁶Ama in mi khialte sia mi theampo ii mu theina munah daan pia hi,

²⁷banghangziam cile amate in ama nung zui nawn ngawlin a thu piakte theampo a thusim ngawl uh hang ahi hi.

²⁸Amate in mizawngte zawthawk thu taw Pathian ko in ausak hi, tuaciang ama in mizawngte ii hu ngenin a auna za hi.

²⁹Pathian in bangma tungh nuam ngawlin om hial le zong kuama in ama mawsiat thei ngawl hi. Pathian in a mai a seal le mite cimaw tu hi.

³⁰Pathian he ngawl mi ngoltolte ii amate a uk ngawl natu ngam mite ii vawt thei bangma om ngawl hi.

³¹Job awng, na khialnate Pathian tungah na pualaak zo ziam, na khial kik ngawl natu in na kiciam zo ziam?

³²Na khialna hong lak tu in Pathian tungah na ngen zo ziam? siatna vawt kheal tu in na thukim zo ziam?



³³Pathian ii nasepna na nial nungsang na dei bang hong vawtsak tu muangmaw thei lai ni ziam? Hi thu sia nang khensat tu hi a, kei khensat tu hi ngawl hi, tu in na ngaisutna ko hong son tan.

³⁴Mihing khua ngaisun thei khat pawpo in thukim tatak tu hi; tuaciang ka pauna hong za mi ciim khat pawpo in

³⁵Job sia tel ngawl vai taw papau a, a pauna po khiakna nei sinsen zongh om ngawl hi, ci tu hi.

³⁶Job ii pauna theampo ngaisun vun, ama sia mi ngilo khat bangin pau hi ci sia na mu tu uh hi.

³⁷A khialna bek hi ngawlin ama in Pathian langpan hi; eite theampo ii mai ah ama in Pathian selno hi.

Job 35

¹⁻²Job awng, Pathian ii muna ah ka paubaang bua hi na cisia nang atu in kilawm ngawl hi,

³tua ahibuale Pathian tungah, “Ka mawna in nang bang hong tatsak ziam? Ka maw ngawl ciang bang phattuamna nei khi ziam?” ci a na dok tu kilawm ngawl hi.

⁴Nangma le na lawmte zongh ii pauna kong zo tu hi.

⁵Van ento in! meeikaaite bangza in saang ziam!

⁶Na khial le tua in Pathian bangma tatsak ngawl hi, a maan ngawl tam na vawtna in ama bang a tatsak tu ziam?

⁷Thutang a na nuntak hu in Pathian na hu ziam? Pathian in nang tung pan kitaangsap nei ngawl hi.

⁸Na khial hu in a thuak sia na lawmpa hi a, phatna na vawt sia ii a hu sia ama ma ahi hi.

⁹Mihingte a kivawtsiat ciang, amate tau uh a, khat po ii hut tu in amate au uh hi.

¹⁰Amate in amate ii haksat bel hun sungin lamletna a pia a bitphuapa Pathian tu ngawl uh hi.



¹¹Amate in eite a ciim a hong vawt, nganhing ahibuale vacim khat pawpo sangin a ciim zaw a hong vawt Pathian kung zuan ngawl uh hi.

¹²Amate in hu ngenin au uh hi, ahihang Pathian in zo ngawl hi, banghangziam cile amate kiphask in khansia hi.

¹³Amate ii aukeakna zongh a lui thawthong hi; Vaanglianbelpa Pathian in amate mu ngawlin za ngawl hi.

¹⁴Job awng, Pathian mu thei bong ci ni hi; ahihang thinsau takin ngak in, na vai sia ama mai ah om nginge hi.

¹⁵Pathian in daan pia ngawl, khialna zongh awlmawk ngawl hi, ci in ngaisun ni hi.

¹⁶Na papau hang phattuumna om ngawl hi; nangma pau teng mama a tel ngawl na hi sia a thiingin kimu hi.

Job 36

¹⁻²Na thin sausak in a, Pathian taingin ka paunate tawmvei hong ngai lai tan.

³Ka heakna sia zai hi; kei hong bitphuapa Pathian sia thutang hi ci in lak tu in ka heak teng ka zangh tu hi.

⁴Nang tungah kong paute a maan ngawl om ngawl hi, na mai ah miciim takpi khat na mu hi.

⁵Pathian sia bangza in hat ziam? Ama in kuama zawngsak ngawl hi. Ama ii heak ngawl bangma om ngawl hi.

⁶Ama in mikhialte nungtasak ngawl a, mizawngte ii thu sia a maan in khensak tawntung hi.

⁷Ama in thutangte sungsia hi, kumpite bangin amate in uksak a, a tawntungin minphatna ngasak hi.

⁸Ahihang mihingte sia a sep a vawt hu in thikkhau taw kiheen in a thuak le,

⁹Pathian in a kiphatsakna le a khialna uh te amate lak ahi hi.

¹⁰Siatna pan a heak kik natu, kidop natu in a thu piakte amate in ngaisak hi.

¹¹Amate in Pathian thu ni in ama atu na a seam uh le a nuntak sungin thin nuam le a nuamsa in nungta tu uh hi.



- ¹²Tuabang ahibuale, amate sia tel ngawl na sungah thi tu a, tuaciang lui kantan in mithite ngam zuan tu uh hi.
- ¹³Pathian selte sia thin uuk tan hi, ngim a kipiak ciang zongin, hu natu in thungen ngawl uh hi.
- ¹⁴Amate kxanthi uh hi, a nuntakna uh maizumna taw bo hi.
- ¹⁵Ahihang Pathian in mihingte a thuakna tungtawn in hil a, hamsatna sia a khua mu natu in zangh hi.
- ¹⁶Pathian in nang ngimna sung pan hong la a, tuaciang ngam muanna hong pia in na sabuai tungah anlim nano hong lui hi.
- ¹⁷Ahihang tu in nang na kilawm bangin daan hong kipia hi.
- ¹⁸Sumnguk neakna ii hong theam ngawl natu ahibuale hauna ii lam hong pialsak ngawl natu in kidawm in.
- ¹⁹Hu ngen a auna in bangma phattumna nang hong pia ngawl tu hi; na thatang theampo in tu in nang hong hu thei ngawl hi.
- ²⁰Minamte lalcip natu hun, zan hong thet tu ngakla heak in.
- ²¹Siatna sangah na kihei thaak ngawl natu in kidawm in; tuate na pial natu in hamsatna hong kipuak hi.
- ²²Pathian ii vaangletna sia bangza in lian ci sia ciamtee in. Pathian sia sya theampo sung pan a lianbel ahi hi.
- ²³Kuama in Pathian bang seam tu ci in sawl thei ngawl hi, ahibuale siatna vawt hi ci in kuama in mawsiat thei ngawl hi.
- ²⁴A nasepte tungtaang ah ama sia kipok tawntung hi; nang zongh ama na pok kul tu hi.
- ²⁵A kuama po in ama ii sepsate mu uh hi; ahihang eite in ih ngal et thei bek hi.
- ²⁶Ama ii letna a cingin ih he thei bua hi; ahibuale ama khan kumte ih sim thei bua hi.
- ²⁷Lei pan in tui la in nguamalte a suaksak sia Pathian hi.
- ²⁸Ama in meeikaaite panin minam theampo atu ngua zusak hi.



²⁹Meeikaaite koi bangin kikhin a, ahibuale Pathian teenna vantung lenglet in bangbangin vanto ziam ci sia kuama in he ngawl hi.

³⁰Ama in vantung theampo lenglet in khualengsak a, ahihang tuipei thukna taw sia zing veve hi.

³¹Hisia sia ama in mihingte a vaak zia le an tam mama a nguan zia ahi hi.

³²Ama in khualeng keakkiate a khut taw man a tuaciang a kap nop sia a kha tu in sawl hi.

³³Vanto in vuipi nguapi hong pai tu taangko a ngannote in hong pai hi ci in he uh hi.

Job 37

¹Suangval le nguatui in nasia takin ka thin patausak hi.

²Note theampo awng, Pathian ii aw, a kam sung pan hong pai vanto awnging ngai vun.

³Ama in khualeng sia vanpi kantan in leimong khat pan mong khat dongah paisak hi.

⁴Tua zawkciang a vaanglian vanto awnging ahi ama awnging kiza a, tua hun sungteng khualeng tee vazal hi.

⁵Pathian ii thu piakna taw nalamdangte, ih tel zawk ngawl a tumdang nate piang hi.

⁶Ama in vuuk lei ah kiasak a, nguatui tam mama zusak hi.

⁷Ama in mihingte nasep tawlngasak a, ama ii vawt theite amate lak hi.

⁸Ngamsate in amate kua tek zuan uh hi.

⁹Suangval vui sia thangsang pan hong vato a, hong vut vaval khuasik siasaksang pan hong vasuk hi.

¹⁰Pathian ii husan in tuite khalsak a, vuukkhal tangh suaksak hi,

¹¹Khualeng sia meeikaai sung pan taang vazai hi,



¹²Pathian ii thu taw amate tunguh hi. Simleitung mun theampo ah amate in Pathian ii thupiak theampo seam uh hi.

¹³Pathian in lei kawtsak tu in nguatui zusak hi; mihingte daan pia tu ahibuale a maipha lak tu in ama in ngua zusak thei hi.

¹⁴Job awng, tawmvei tawlinga in ngai in; Pathian ii a lamdang a nasepte ngaisun in.

¹⁵Pathian in thu pia in meei sung pan khualeng a piansak zia na he ziam?

¹⁶Koi bangin meeite van ah kikhaang in om cisia na he ziam? Pathian ii a lamdang a thiamnate na he ziam?

¹⁷He ngawl ni hi. Thangsang vui va in ngamsung a sat ciang sa saa in thuak bek ni hi.

¹⁸Pathian in van zalh in tua van sia thik bang, a sah in a vawt lai, nang hu thei bang om ziam?

¹⁹Pathian tungah ka pau tu uh te hong hil tan; ka thinsung uh ah bangma om ngawl hi. Son tu bangma nei ngawl khu hi.

²⁰Pathian taw ki paupui tu ngen ngawl tu khi hi; banghangin kei hong lalthapsak natu hun pha ama pia tu khi ziam?

²¹Tu in van a khuataang sia tee vanai hi; et tu in taang leih lawlawm hi, tuaciang van sia vuipei in muut thiang zo hi.

²²Kham bangin a taang khatsak sangah kimu hi, tuaciang Pathian vaangletna in ka thin uh hong lausak hi.

²³Pathian ii vaangletna lian leih ahikom ama ih neak thei bua hi; ama mihingte taw a kizopna ah thutang in, thumaan hi.

²⁴Tuaciang mihing theampo in ama nasia takin a kiitak uh sia lamdang ngawl hi, tuaciang a kiciimsakte a awlmawk ngawl zongh lamdang ngawl hi.

Job 38

Topa ii Job Azokikna



¹Tuaciang vuipei suangval sung pan Topa in Job paupui hi.

Topa in hi bang ci hi.

²Na heak ngawl na le khiakna nei ngawl na kammalte taw kei ciimna nong dok sia nang akua ni ziam?

³Pasal khat bangin tu in dingto in a kong thudokte hong zo tan.

⁴Simlei ka vawt lai in nang na om ziam? Taza in na he le tua thu kei hong son tan.

⁵Leitung bangcia pha tu cisia akua in khensat ziam? Akua in a tungah pikhau kai in tee ziam? Hite theampo na he ziam?

⁶Leitung a nang khuamte bang tungah kinga ziam? Simlei ii phungkawng akua in khia ziam?

⁷Tua ni zingtuung in aksite la sa khawmin, vantung lalangte lungdam in au uh hi.

⁸Lei sung pan tuipi a puathap lai in tua tuipi khaktan tu in akua in kongpite khak ziam?

⁹meeikaai taw tuipi a tuam le khuazing taw a tuun pa sia keima ka hi hi.

¹⁰Tuipi atu in ngamngi khat ka vawt a, a kikalh kongpite nungah ka koi hi.

¹¹Keima in tuipi tungah, “Hi ciang bek pai in, a kan in pai heak in! Hi munah a thahat na tuihualte tawlna tu hi” ka ci hi.

¹²Job awng, na khan sung theampo ah ni khat beak khua a vak tu in thu na pia ngei ziam?

¹³Leitangh pum mat tu le mi ngilote a bukna pan thinkhe tu in khuavak tungah thu na pia ziam?

¹⁴Puan kithep bang le tungman tungah min khet a kilangh bangin nitaang in mual le luamte kilanghsak hi.

¹⁵Sun khuavak sia mi ngilote atu taang leih a, amate mottat natu te khak hi.



- 16Tuipi sung a thukna ciktuite ah na pai ngei ziam? Tuipi liante tawdap lei ah na vak ziam?
- 17Khuazing cip mithite ngam a cing kongpite hong lak om ngei ziam?
- 18Simlei bangza in lian cisia ngaisutna khat pawpo na nei ziam? Ngaisutna na nei le hong son tan.
- 19Khuavak koi sung pan hong pai a, khuazing ii naak bang cisia na he ziam?
- 20Amate tungah bangtan khuala pai tu cisia na lak thei ziam? ahibuale amate na heak kiksak thei tu ziam?
- 21Hi thei tu in kong um hi, banghangziam cile nang na khan haam mama zo a, leitung a kivawt lai in om zo na hi hang ahi hi!
- 22Vuuk le ngialte ka kholna innkhan ah na haw ngei ziam?
- 23Tuante sia ngimnga hun atu le ngal kido hun ciang atu in ka koicing ahi hi.
- 24Ni a suana mun ah, ahibuale niswana vui hong vakna munah na pai ngei ziam?
- 25Nguatui hong luansuk natu akua in luam to a, vanto atu in lampi akua in sial ziam?
- 26Kuama ten ngawlina munah akua in nguazusak ziam?
- 27Lopa a meento natu in leiko le lei dangkote akua in tuibuak ziam?
- 28Nguatui ahibuale daaitui in pa nei ziam?
- 29Tuikhal le vuuk ii nu akua ziam?
- 30Tui suang a suaksak le tuipi maitang a khalsak sia akua ziam?
- 31Zingsol aksite na sawm khawm thei ziam? ahibuale Siluk aksite a sawm khawm khaute na suut thei tu ziam?
- 32Aksite amate hun tekin lam na pui thei ziam? Tuaciang a lian le a no unau zawlzawng aksite tungah lam na lak thei ziam?
- 33Van a uk thukhamte na he ziam? Tuaciang tua thukhamte in leitung na uksak thei tu ziam?



³⁴Meeikaaite tungah au in thupia in, amate in nguatui taw nang na tuamsak thei tu ziam?

³⁵Khualeng a taang vazeak tu in thu na pia a ahile ama nang kungah hong pai in, “Nong sawl babang” hong ci tu ziam?

³⁶Nile ngun bang hun ciang pawm tu hi ci sia vakaangte akua in hil ziam? Ahibuale aklui munah ngua zu tu hi ci in akua in son ziam?

³⁷Meeite sim tu le

³⁸leivuite sahsakin, a tanghsak ngua zusak tu in meeite a kibunghsak tu akua in ciimna kicing nei ziam?

³⁹Tawpите le a note leihawng sungah buu in, ahibuale akua sungah sa pangin ngakin a om laitak tawpите neak tu an zonsak in,

⁴⁰tuaciang a ngilkial tawpi note a lung na kimsak ziam?

⁴¹Va-akte ngilkial in a len kawkoai ciang a note an du in ka kungah hong au ciang an a pia sia akua ziam?

Job 39

¹Sathakte bang hun suak cisia na he ziam? Sazukte a no sua na en ngei ziam?

²Amate in a no bangtan vei paai ci sia na he ziam? Amate sua hun tu na he ziam?

³A no suak tu in lei ah a baw suk tu hun le a note leitung ah a paipui tu hun na he ziam?

⁴A note dui sungah khangin a thahat uh hi; amate pusuak in heak kik nawn ngawl uh hi.

⁵Ngam laanote akua in suatakna pia ziam? Akua in thazau in, vaksak ziam?

⁶Senneal ngam sia amate inn tu in ka pia a amate ci al zaangtam ah ka teangsak hi.

⁷Amate awsa lialua khuapi sungah om nuam ngawl hi. Amate kuama in zualin naseamsak thei ngawl hi.



- ⁸Mualpite amate kivaak natu a tatna mun hi a, tua munah a neak tu in lohing pawpo zong uh hi.
- ⁹Ngam khuital khat in nang na hong sepsak tu ziam? Na nganbuk sungah ama zan ngiak nuam tu ziam?
- ¹⁰Tuate khat khau khitin lo na thosak thei tu ziam? Ahibuale na lo sungah lo thawna ha na kaisak thei tu ziam?
- ¹¹Ama ii thahatna na suang thei tu ziam? Tuaciang na nasep lian sia seam tu in na muangmaw ngam tu ziam?
- ¹²Na taangvawngte hong ciapui tu le na antang cilna phual panin antangte hong khoptuasak tu in na muangmaw ziam?
- ¹³Vacim kalaoh pui khat ii thaphil bangza in manlang ziam! Ahihang Vacim kalaoh sia vakaang khat bangin leang thei ngawl hi.
- ¹⁴Vacim kalaoh puite in a tuite leitangh sate ii a lumsak tu in lei ah nusia hi.
- ¹⁵Ama in a tuite peang khat po in siiktham tu ahibuale ngamsa khat po in tamsak tu cisia he ngawl hi.
- ¹⁶Ama in a tuite ama tui hi ngawl bang phetin ngamta a, tuaciang ama ii hanciamnate a lui thawthong suak tu hi cisia zongh thinbot ngawl hi.
- ¹⁷Ama mawmawsakin, ciimna a pia ngawl sia keima ka hi hi.
- ¹⁸Ahihang ama a tai zutak ciang siphu khat pawpo le a tung Topa nuisan thei hi.
- ¹⁹Job awng, siphute thahatsak a, a ngawng multe a kaaisak niingniang sia nangma na hi ziam?
- ²⁰Khaumaw bangin amate na kipeaksak ziam? tuaciang amate ii naak thin taw mihingte a lausak tu in amate na sawl ziam?
- ²¹Amate in ngamkuam sungah lawp takin leikhuat hi. Amate in a tha nei za taw ngal kisimna phual del uh hi.



²²Amate in launa cisia he ngawl uh hi, tuaciang amate namsau in heak kiksak thei ngawl hi.

²³A tung a tote ii ngalvanh kente, nging lialua in nisa sungah tee vazia hi.

²⁴Siphute lawpna taw a ci uh liingin mai ah tai uh hi. Lemle kitum ciangin amate ding thong thei ngawl hi.

²⁵Lemle kitum simin amate a naak uh thing hi, ngal kisimna mun nai a thet ma in amate in ngalngim za thei uh hi; tuaciang amate in ngalkapmaangte thupia in a au za uh hi.

²⁶Muthi khat in thangsang zuan tu in a tha a phal ciang, bangbang leang tu cisia nang tung pan sin ziam?

²⁷Muvanlai khat in mualsaangte dawn ah a bu a vawt tu ciang nang thupiak tu hong ngak ziam?

²⁸Ama in a saang bel suangpите tungah a bu vawt a, tuaciang mualvum hiamte sia a kulh in zangh hi.

²⁹Tua mun panin ama in a nai le a khuala ah bang khat po matlup tu le neak tu in en hi.

³⁰Sathi kiimkot ah muvanlaite kikhawm a muvanlai note in sachi dawn uh hi.

Job 40

¹⁻²Job awng, nang in Vaanglianbelpa Pathian thato ni hi. Tu in tawlna tu ni ziam ahibuale zo lalai tu ni ziam?

Job in hi bang ci hi.

³⁻⁴Topa awng, a mawmawt huai tatak in pau khi hi. Bang hong zo thei tu khi ziam? Bangma dang ka son nawn buatu hi.

⁵Ka pau tu za sangin tam zaw pau zo khi hi.

⁶Tuasia ciang suangval sung panin Topa in Job khatvei paupui kik hi.

Topa in hi bang ci hi.

⁷Tu in pasal khat bangin ding in a, kong dok thute hong zo tan.



- ⁸Kei thutang ngawl hi hong ci nuam ni ziam? Kei a maw hong pusak a nangma kitangsak nuam ni ziam?
- ⁹Nang keima bangin hat ni ziam? Na aw keima aw bangin vanto bangin na ngingsak thei ziam?
- ¹⁰Tuabang ahile na minphatna le na kisuantaak na taw dingin; nangma le nangma vaangletna le tuanngenna puan kisilhsak in.
- ¹¹A kiphasakte en in; na thin uukna lak in a, amate kiniamkhiaksak in.
- ¹²Hi hi, amate en in a, niamkhiak in; mi ngilote a dinna munah sucip in.
- ¹³A vekpi in lei sungah phumin; a thisate ngamah heencip in.
- ¹⁴Tua hile nang hong pok masa phit tu sia keima ka hi tu a, tuaciang nangma ma in zawna nga ni hi, ka ci tu hi.
- ¹⁵Behemoth nganhing pui sia en in; ama ka bitphua a, nangma kong bitphua hi. Ama in khuipui khat bangin lopa ne hi.
- ¹⁶Ahizong a pumpi sungah bang thahatna om a, tuaciang a sangol sungah bang vaangletna om ziam!
- ¹⁷A mei cedar thingkung bangin ding mam a, a peang thangolte hat hi.
- ¹⁸A ngute taungo bangin kho a, a peangte thikpum bangin tak hi.
- ¹⁹Ka bitphua nganhing theampo sung pan a lamdang bel nganhing ahi hi! A bitphua pa bek in ama zothal thei hi.
- ²⁰Ama kivaak natu lopa, ngamsate kimaina mualbawkte tungah po hi.
- ²¹Lingkungte nuaiah ama lum in, nawng sung pumpate kawm ah buu hi.
- ²²Ama sia luhui a po lingkungte le pakngiamte in amate lim bealsak hi.
- ²³Ama in nguntui luang vahawnte kiita ngawl hi. Ama Jordan nguntui in a maitang a the ciang om hiithiat lel hi.
- ²⁴Akua in a mittawsakin man thei tu ziam? Ahibuale ama sia akua in naakphe khau phe in man thei tu ziam?

Job 41



- ¹Leviathan awlepui sia ngasa tangthaakna taw na man thei tu ziam? ahibuale khau taw a leei na khii thei tu ziam?
- ²Leviathan awlepui sia naakphe khau na thun thei tu ziam? ahibuale a khangu paillet in thikkoai bul thei tu ni ziam?
- ³Ama in hong tha tan ci in hong ngen tu ziam? Hesuakna nang tungah hong ngen tu ziam?
- ⁴Ama in nangma taw thukimna vawtin a tawntungin na na kong sepsak tu ci in hong kamciam tu ziam?
- ⁵Na naseam numeite lungdamsak tu in inn ah na khoai vacim khat bangin ama na khi tu ziam?
- ⁶Ngasa paaite in ama manh nee tu ziam? Sum zuakte in zuak tu in a sa sem tu ziam?
- ⁷Ngasa holna teite taw a vun tung dimin na hol thei tu ziam? ahibuale ngasa kapna thaltang pui taw a lu na kaplet thei tu ziam?
- ⁸Khatvei ama tham lete bangma hun na tham kik nuam nawn buatu hi, na kingal vawtna uh te na mangil ngei buatu hi.
- ⁹Leviathan awlepui a mu pawpo lauvin lei ah liik hi.
- ¹⁰Ama a ki thin uuksak ciang kiitak huai mama hi. A mai ah kuama ding ngam ngawl tu hi.
- ¹¹Ama a simte bangma a tat ngawl akua om tu ziam? Leitung bup ah kuama om ngawl tu hi.
- ¹²Leviathan awlepui ii peangte thu le ama ii letna le hatna thu na tungah hong sonsak tan.
- ¹³A puan puasilh sia kuama in leamkeak thei ngawl hi, ahibuale a kidalna ngalpuan kuama in sunlet thei ngawl hi.
- ¹⁴A kiitak huai hate a po siusiau ama kha akua in kamkaasak thei tu ziam?



- ¹⁵A cingzaang suk a, a hawlipte kithuap cinten a, suang bangin sah in, kimatcip bikbek hi.
- ¹⁶Tua a lipte khat le khat kithuapcip bikbek ahikom, ngaat takin kipee a, a kilaklaw ah vui zongh thawl zo ngawl hi.
- ¹⁷Amate theampo kho takin kimatcip ahikom bangma in phel thei ngawl hi.
- ¹⁸Ama hetchia a law ciang khualeng vazal a, a mittangte ni suaktuung bangin tee hi.
- ¹⁹A kam sung pan meikuang pusuak a, mei eak leang vazai hi.
- ²⁰Beal nuai pan lopa kaangte khu bangin a naak sung pan meikhu pusuak hi.
- ²¹A husan in meikuangsak a, a kam sung pan meikuang pusuak hi.
- ²²A ngawng thahat mama ahikom ama taw a kisi peuma lau vadil hi.
- ²³A vun tung a nip mun om ngawl hi. A vun sah mama a, a kiseak zo ngawl thik taw kibang hi.
- ²⁴Suang bangin a sah lungtang in kiitak nei ngawl hi. A lungtang sia a sah le a tam thei ngawl an ngoaina suang khat bang ahi hi.
- ²⁵Ama a din ciang a hat belte zongh lau uh a, kiita in cimaw uh hi.
- ²⁶Ama a liamsua thei namsau om ngawl hi. Ama a sunlet thei, tei le thaltang om ngawl hi.
- ²⁷Ama atu in thik sia taangphaw ko bang hi a, taungo sia thingmuat bangin nip hi.
- ²⁸Ama a taisak thei thaltang om ngawl hi; ama a kidenna suangtumte taangphaw beknote taw kibang hi.
- ²⁹Ama atu in khetbuk sia taangphaw bekno khat hi a, tuaciang mihingte in tei a khaw uhciang ama nui hi.
- ³⁰A ngilvun sia leibeal tam bek hiamte bang ahi hi, tuate in taangcilna leang khat bangin leibuan laitham hi.



³¹Ama in tuipei sia tuiso bangin phuanin sosak a, tuaciang sathau beal khat bangin phuansak hi.

³²Ama in a nung sangah a taang lampi khat nusia a, tuaciang tuipei tui phuansakin kaangsak hi.

³³Leitung ah ama taw a kitee ngat thei tu bangma om ngawl hi, ama kiitak a nei ngawl nganhing khat ahi hi.

³⁴Nganhing kphasak belte ngangawn ama in nomu hi. Ama sia ngamsa theampo ii kumpipa ahi hi.

Job 42

¹Tuaciang Job in Topa kam zo hi.

Job in hi bang ci hi.

²Topa awng, vaangletna theampo na neina, na vawt nop theampo na vawt theina thu ka he hi.

³Bangma tel ngawl pi in na ciimna kong dok ngamna thu nong dongh hi. Keima in ka tel zawk ngawl thute, kei heak tu in lamdang in a nasia leih te son in ka nei hi.

⁴Na pau laitakin thu ngai tu le nong doknate zo tu in nong sawl hi.

⁵Hun bo sa sungah ngual ii hong son teng bekma ka he hi, ahihang tu ahile ka mittangte taw mama in nang kong mu zo hi.

⁶Tua ahikom ka pau sa theampote hangin ka maizum a, leivui sung le vut sungah kisiik in ka om hi.

Thukhup na

⁷Job tungah a pau tu teng a pau zawkciang Topa in Eliphaz tungah, “Nang tung le na lawmte nii tungah ka thin uuk hi, banghangziam cile, kei huvau thumaan sia ka naseampa Job son bangin na son bua uh hi.

⁸Tu in khuital sali le tuatal sali Job kungah paipui vun a, noma atu in sangaw biakpiakna in tuate pia vun. Job in no atu thu hong ngetsak tu hi, tuaciang



ama ii thungetna ka zo tu a, na kiphut uh bangin minsiatna kong pia buatu hi. Ama ii son bangin kei huvau thumaan na son bua uh hi,” ci hi.

⁹Eliphaz, Bildad le Zopharte in Topa ii amate sep tu in a sawl bangin seam uh a, tuaciang Topa in Job ii thungetna zo hi.

¹⁰Tuaciang Job ii a lawmte thum atu thu a ngetsak zawkciang Topain Job sia nuamsasak kik a, nidang a nei ngeiza, a zaa nii in pia hi.

¹¹Job ii a suapui pate, a suapui numeite le, a ngualtamh luite theampo ama inn ah hawin ama taw poai vawt uh hi. Amate in Topaii ama tung a tunsak ngimnate theampo hu in khuangai pui in heeneam uh hi. Ama sia mikim in sum pawlkhat le kham khutzungbu khat tek pia uh hi

¹²Topa in Job ii nuntakna a khaksang sia a masa sangin thupha tam zaw lai pia hi. Job in tuu tulsawm le tulli, kalaoh tulluk, khui tulnii, le laa tulkhat nei hi.

¹³Ama sia tapa salite le tanu thumte ii pa ahi hi.

¹⁴Ama in a tanu upa bel sia Jemimah, a niina sia Keziah, tuaciang a no bel sia Karen Hapuch sa hi.

¹⁵Leitung bup ah Job ii tanute bangin a mealpha numei dang om ngawl hi. A pa in a suapui pate a piak bangma in a tanute ngamh khensak hi.

¹⁶Job sia hisia zawkciang a tu le a tu selawnte mu tu in kum za le kum sawmli khansau in nungta hi.

¹⁷Tuaciang ama kum haam tatak in thi hi.



Psalm Late

Psalm Late 1

LAIBU A KHATNA

(Psalm Late 1-41)

Lungdamna Tatak

¹Mihing lungdam ih ci te in mihing ngilote ii ngaisut piakna a nialte, mawneite zia a zui ngawlte, Pathian ii zak ngawlte taw a kizom ngawlte ahi hi.

²Amate in Topa Thukham zuina sungah lungnopna mu zaw uh a, tua thute sun taw zan taw ngaisusun uh hi.

³Amate in luhui ah a po thingkungte bang hi a, a nga hunin nga a, a teete a vul bua hi. A sep a vawt theampo a zo uh hi.

⁴Ahizong mihing ngilote in tuabang hi vet ngawl a, vui ii letkeak taangphaw taw kibang uh hi.

⁵Mawneite Pathian in puavawk tu a, Pathian ii mite sung pan a tuam in koi tu hi.

⁶Thutangte Topa in lam lakin dal a, ahizong a ngilote sia amate lalcip natu mun ah a pai uh hi.

Psalm Late 2

Pathian Teal Kumpipa

¹Banghangin minamte in leedo sawm thong ziam? Banghangin mihingte in a manh nei ngawl thasawmnate vawt ziam?

²A kumpite in leedo zo a, a ukpите taw Topa le a teal kumpipa thasawm in langpan khawm uh hi.

³Amate in “Hong ukna pan ei le ei kisuatak tawng i, hong letna vawk keak tawng” ci uh hi.

⁴Vantung ah om ama tokhum tung pan Topa nuiza a, amate ii a ngina ngawl ngealnate nunau lel hi.



⁵Tuaciang ama in thin uukna taw amate kidop natu thupia a, a thin sona hangin amate patausak uh hi.

⁶Ama in “Ka mual thiangtho Zion ah ka kumpipa ka koi zo hi,” ci hi.

⁷Kumpipa in “Topa thu khensatna son tu khi hi,” ci hi. Ama in kei tungah hi bangin hong ci hi, “Nang sia ka tapa na hi hi, tuni in na pa ka suak zo hi.”

⁸Hong ngen tan, minamte theampo kong pia tu a, leitung bup nangma aa hi tu hi.

⁹Nangma in amate thikmol taw na veltham tu a, leibeal tam bek bangin amate na sutham tu hi.

¹⁰Tu in no kumpi te awng, hi kidop natu thu hong ngai tavun. No leitung ukte awng, hi thu tel tavun.

¹¹Kiitakna le liinna taw Topa na seam vun a,

¹²ama mai ah kun vun; tua ahibuale ama thin uuk ek paih tu a, thakhat thu in na thi tu uh hi. Ama a bealte in a lungdamte ahi uh hi.

Psalm Late 3

Hu nget natu Zing Thungetna

¹Ngal tam ka nei lawlawm hi, Topa awng, kei hong langpan tam lawlawm hi.

²“Pathian in ama hu ngawl tu hi.” amate in kei hong ci uh hi.

³Ahihang, Topa awng, nang sia a tawntung in launa pan hong dal ka lum na hi hi. Nangma in zawna nong pia a, thinletna taw nong dimh kik hi.

⁴Hu ngenin Topa ka biakpui a ama in a mual thiangtho panin hong zo hi.

⁵Lum in ka mu a, zan khua teakin Topa in hong dal hi.

⁶Ka kiimkot pan hong uumci ka ngal tul tampite ka kiita bua hi.

⁷Hong pai tan, Topa awng hong hun tan, ka Pathian awng, nangma in ka ngalte theampo daan na pia a, kei hong natsak natu vaang na selsak hi.

⁸Ngal zawna sia Topa kung pan hong pai hi— Ama in a mihingte thupha pia taken.



Psalm Late 4

Hu natu Nitak Thungetna

¹Thu kong nget ciang hong zo tan, Pathian, kei hong hungpa awng! Ngimna sungah ka om ciangin nong hu hi. Hong dik tan a, tu in ka thungetna hong za tan.

²No mihingte in bang tan vei kei hong zawnsak vawt tu nu ziam? Luithawthong khat sia bangtan vei dei in thumaan ahi ngawl khat bang tan vei del tu nu ziam?

³Topa in a thutangte ama atu in teal tuamin ka biapui ciang hong zaak hunlam phawk tavun.

⁴Kiitakna taw liingin mawna vawt nawn heak vun; na lupnate tungah thim dide in na lup uh ciang, hi thu a thukin ngaisun vun.

⁵A maan sangaw biakpiaknate Topa tung ah pia vun, na muanna uh ama tungah koi vun.

⁶Mihing tam mamate in “Topa awng, thupha tam zaw hong pia tan a, kote maipha hong pia tan” ci in thungen uh hi.

⁷Amate ii an le sapittui a neisa theampo tungtawn a, a lungdam na sangin lungdamna a lianzaw ka thin sungah nong pia zo hi.

⁸Ka lupsuk ciangin thinnuam in ka mu hi, Aw Topa awng, nangma bek in bit takin nong keamcing hi.

Psalm Late 5

Hong Dal natu Thungetna

¹Ka kammalte hong ngai tan a ka huisaknate hong za tan, Topaawng

²Hu ngenin ka auna aw hong ngai tan, ka Pathian le ka kumpipa awng! Topa awng, na tungah thu kong ngen hi,

³zingsangin ka aw nong za hi; ni sua ciang kong ngetnate na mai ah kong lui a, nong zo tu kong ngak hi.



⁴Banghangziam cile nang sia tatsiatna a dei Pathian na hi bua hi; nang omna munah ngitlonate na oai bua hi.

⁵A kiphasakte sia na mai ah a ding thei buatu hi; mihing seksol theampo na ensan hi.

⁶Nangma in leilot thusonte na lalsak a, molngolte le ngual theamte na thusim bua hi.

⁷Ahihang kei sia nong itna lian ahikom na inn sungah kong tum thei hi, na Biakinnpi thiangtho sang nga in nangma thasiana taw kong bia tu hi.

⁸Topa awng, ngal ka hau lawlawm hi! na deina bang a vawt tu in lam hong pui tan; ka zui tu in na lampi tamkimsak in.

⁹Ka ngalte ii kampaute kimuang thei ngei ngawl hi, amate in lalsak tu bek uuk hi. Amate kampau te sia kisial pokna hi a, zaak nop huai hi, ahihang, thina hong then thei kitheamna taw kidim hi.

¹⁰Pathian awng, amate puavawk in daan pia in: amate ii hong thasawmnate taw amate puk taken; a khialna tam mamate le nang hong leedo hu in na kung pan amate notkeak in.

¹¹Ahihang nangma hong bealte theampo lungdam taken. Amate in lungdamna taw la sa thei tawntung taken. Nang hong itte na dal in, nang hu in amate lungdam takpi hi.

¹²Nang thu hong ni te thupha na pia hi, Topa awng; nangma itna in amate lum bangin sung hi.

Psalm Late 6

Ngimna Hun sung Hu natu Thungetna

¹Topa awng, thin uuk in hong tei heak in a; thin uuk in daan hong pia heak in!

²Ka tha zawm vangeu zo hi, Aw Topa; hong hesuak tan! tha hatna hong pia tan, zawmcip zo khi hi,



³ka pumpi bup ngim lawlawm hi. Topa awng, nong hu tu bangtan vei haisaang lai tu ziam?

⁴Hong pai tan a, hong hun tan Topa; nong hesuakna taw thina pan hong suatak tan.

⁵Mithi khua ah nang hong kiphawk ngawl hi; tua munah nang kuama in hong pok thei ngawl hi.

⁶Khuangaina taw ka zawmcip hi; zan simin ka kakaana in, ka lupna kawtcip hi; Ka lukham sia thitui in tuamh hi.

⁷Khua ka mu thei tak bua hi; ka ngalte vawtna in ka kakaana ka mit bol hi.

⁸No a ngilo te kei kung pan kiheam vun! Ka Topa in ka kaa hong za hi;

⁹hu ngenin ka kaana ama in hong ngai a, ka thungetna hong zo tu hi.

¹⁰Ka ngalte in ngallel maizumna he tu hi; thakhat thu hi biaibuai in amate kinot tu hi.

Psalm Late 7

Thukhaikim atu Thungetna

¹Topa ka Pathian awng, ka kidal natu in nang kong tuu hi, kei hong zuizente panin hong suatak tan a, hong hun tan;

²tua ahibuale hong hun thei tu a om ngawlina munah tawpi bangin kei hong kai tu a, tua munah amate in kei hong baltham tu hi.

³⁻⁴Topa ka Pathian awng, khat pawpo tungah khial in ka lawm khat theamin ka zuak zong tua ahibuale a thu om ngawlin ka ngal pa tungah ka molngol le —

⁵tuasia ciang, ka ngalte in hong del taken a hong man taken, hong saatvawk taken a, hong that taken, tuaciang ka luanghawm sia lei ah hong nusia taken.

⁶Topa awng, na thin uukna taw hong tho to tan! ka ngalte thinsona a nalh tu in nangma hong ding tan; nangma le nangma hong kithaw tan a, hong hu tan! Nong nget sia thukhaikimna ahi hi,



⁷mihingte theampo na kiimkot ah khawmtua in a, amate ii tungsia panin hong uk tan.

⁸Nangma in minam theampo ii thukhenpa na hi hi. Topa awng, keima sang pangin thu hong khen tan, kei ka maw ngawl hunlam nong he hi.

⁹Nangma in a thutang Pathian na hi a, kote ngaisutna le ka deinate thu nong khen hi. A ngilote ii seksolnate tawpsakin, mipate thaman pia in.

¹⁰Pathian in kei hong dal pa ahi hi, ama in a thu a ni te hun hi.

¹¹Pathian sia thutang thukhenpa ahi hi, tuaciang a tawntungin a seksolte a nil hi.

¹²A kisiik nuam ngawl a om le Pathian in a namsau a tat hiam tu hi; ama in a thal keaksa in kinging zo hi;

¹³a kiitak huai a ngalhiamte la zo hi, a meikuang thaltangte taw tuung zo hi.

¹⁴Mihing seksolte in bangbangin ngitlo tu ngaisun ziam ci sia he in; ngimna vawt nuam a, leilot thu zangh hi.

¹⁵Amate in ngual thaangsia a, tua thaang sungah amate awk uh hi.

¹⁶A ngamtat phat ngawl na teng sia amate tungah tu kik a, amate ii ngoltolna in amate nasak hi.

¹⁷Topa sia ama thutang ahi hu in lungdam ka ko hi; A Saangbel Pa sia pokna la ka sak tu hi.

Psalm Late 8

Pathian Minthanna le Mihing Thupina

¹Topa kote ii Topa awng, na letna sia leitung theampo ah kimu hi! Hong kipokna vantungte dong theng to hi;

²patangte le nausente in tua la sa uh hi. Na ngalte ii bangma hong law thei ngawl natu in, a kip a kho in na om hi. Nang hong langpan peuma na khaam hi.

³Na vawt sa vantung le a omna mun tek ah na koi, tha le aksite ka et ciang —



⁴mihingte sia bang hi a, phawk liang ni ziam; mihing thitheite lelpo bangbangin thinbot ni ziam?

⁵Nangma bek sangin a niam zaw hiat in na vawt a, minthanna le patoaina na pia hi.

⁶Na vawt sa na theampo uk tu in na sep hi; bitphua sa theampote ii tungah na koi hi:

⁷tuute, khuite, ngamsate;

⁸vacimte le ngasate, tuipi nganhing namcinte zongh na uksak hi.

⁹Topa kote Topa awng, leitung theampo ah na letna kimu hi!

Psalm Late 9

A Thukhaikimkhenna hangin Pathian tung Lungdamkona

¹Topa awng, ka thin theampo taw nang kong pok tu hi; a lamdang na nasepnate ka son tu hi.

²Nangma hangin lungdamna taw la ka sa tu uh hi. Vanglianbel Pathian awng, na min pokna la ka sa tu hi.

³Nang nong kilaak ciangin ka ngalte nungkin kik a amate lutu in thi uh hi.

⁴Nangma thumaan thutang taw thu na khen a, kei sangah nong pang hi.

⁵Pathian he ngawlte na puavawk zo a, mihing seksolte na lalthamsak zo hi; amate kiphawk kik nawn ngawl tu hi.

⁶Ngalte sia a tawntungin bosiat zo hi, a khuapite na lalthamsak zo a, amate kimangil cip zo hi.

⁷Ahihang Topa sia a tawntungin kumpi hi a, ama in a thukhenna kumpi tokhum phut zo hi.

⁸Ama in thutang taw leitung uk a; ama in minamte thukhaikim taw thukhen hi.

⁹Zawthawk a thuakte atu in Topa sia bukna kip ahi hi, ngimna hun sungah ngammuanna mun ahi hi.



¹⁰Topa awng, nang hong hete in nang hong muang tu hi; nang hong zuante na nusia bua hi.

¹¹Zion pan a uk Topa tungah pokna la sa vun! Ama nasepnate minam theampo tungah son vun!

¹²Pathian in a ngimngate phawk a, a kaana aw a mangil bua hi; tuaciang amate tungah a khialte daan pia hi.

¹³Kei hong hesuak tan, Topa awng! ka ngalte tung pan ka thuaknate hong en tan! thina pan hong suatak tan Topa awng,

¹⁴tua hi le Jerusalem mihingte mai ah ding thei a, nangma kong pokna thute theampo ka son thei tu hi. Nangma in kei nong hut manin ka lungdam tu hi.

¹⁵Pathian he ngawlte in amate ii taw sa dum sungah taaksuk uh hi, a thaangsiana sungah amate awk zo hi.

¹⁶Topa in thutang khennate taw ama le ama hong kilaak hi, mihing seksolte sia amate ii a sep a vawtte taw ma in awk hi.

¹⁷Pathian a nial theampo le a seksol theampo ii lam tawpna sia thina hi.

¹⁸A cimawte kimangil tawntung ngawl tu hi, a zawngte lametna zongh a tawntungin kisucip ngawl tu hi.

¹⁹Topa awng, hong pai tan, mihingte nial tu in na om heak in; Pathian he ngawlte na mai ah samin, amate tungah thu khi in.

²⁰Topa awng, amate lausak in; a thi thei te ahi lel hunlam kitelsak in.

Psalm Late 10

Thumaan natu Thungetna

¹Banghangin a khuala ah om ni ziam, Topa awng? Ngimna ka nga uh hun sungah banghangin buu ni ziam?

²Mi seksolte in kiphasak a, mizawngte vawtsia hi, amate ii thaangsia sungah amate ma awksak in.



- ³A seksol pa in ama ii a sia deinate kiphatsak pui hi, a duhop pa in Topa haamsiat in nial hi.
- ⁴Mihing seksol pa in Topa awlmaw ngawl a, a kiphatsak lung in, Pathian thupi sim ngawl hi.
- ⁵Mi seksol pa in na theampo sungah zawna nga hi, Pathian thukhennate tel thei ngawl a, a ngalte nunau hi.
- ⁶Amate in, “Kei lelh ngei bua vak ing; ngim nga ngei bua vak ing” ama le ama kici hi.
- ⁷A kam uh sia haamsiatna, theamna le ngual tawna taw kidim a; amate in ngaimawkna le ngitlona kammalte pau memeang hi.
- ⁸Khuanote sungah amate mama buu in, maw nei ngawl mite that tu in pang hi. Akua cimaw ziam ci in kan ku uh a;
- ⁹tawpите bangma in ama in a bukna pan mizawngte pang hi. A thaang sungah amate manin kaikeak hi.
- ¹⁰Mat a thuk a cimawte kisucip hi; ngoltol thahatna in amate zo zo hi.
- ¹¹Mi seksolte in amate le amate, “Pathian in phamaw sa ngawl hi! Ama a mit si a, hong mu ngei ngawl tu hi,” ci hi.
- ¹²Topa awng, mihing seksolte daan pia in! ngim a thuakte phawk in!
- ¹³Banghangin mihing seksol pa in Pathian sia thusim ngawlin a thin sungah “Daan hong pia buan te” ci thei ziam?
- ¹⁴Ahihang nang in a ngimna le a thuaknate na mu a, a hu tu in na kinging tawntung hi. A cimawte in nang tungah hong ki aap a, a kitaangsamh te na hu tawntung hi.
- ¹⁵Mihing seksolte le ngilote ii hi theina nuaitan in; khialna a vawt kik nawn ngawl dong daan na pia in.
- ¹⁶Topa in a tawntung pan a tawntung kumpipa ahi hi; pathian dang a biate sia ama ii leitangh tung panin mong tu hi.



¹⁷Topa awng, mihing kinengniamte ii thungetna na ngai tu hi; amate thinletna na pia tu hi.

¹⁸Zawthawk thuakte le tangate kaana na za tu hi; a thi thei mihingte ii liinna launa a piansak nawn ngawl natu in amate sang pangin thu na khen tu hi.

Psalm Late 11

Topa sungah Kimuanna

¹Topa sia ngammuanna nga natu in ka muang hi. Hi bang na ci uh sia bangza in mawmawt huai ziam? “Vacim bangin mualte ah leang ta in,

²banghangziam cile, mi seksolte in thal keak a, amate in thaltangte taw mihing phate a buliana panin kap tu in tuung zo hi.

³Na theampo a cipthap zawkciang mihing phate vawt thei tu bangma a om nawn bua hi.”

⁴Topa in ama biakinn thiangtho sungah om hi; Topa ii kumpi tokhum in vantung ah om hi. Mun theampo a om mihingte encik a, amate bang vawvawt ci sia he hi.

⁵Topa in a mip hate le a seksolte a kibangin encian khawm hi, tuaciangin a maitatte a thinsung theampo taw ensan hi.

⁶Ama in a seksolte tungah suangmeihol kaamte le kan kuangte buaksuk hi; ama in amate a sa mama vuite taw daan pia hi.

⁷Topa in thutang a, na pha sepna dei hi; tuabang a, a seamte sia ama omna munah teang tu uh hi.

Psalm Late 12

Hu natu Thungetna

¹Topa awng, ko hong hu tan. Mipha khat zongh kikhe nawn ngawl hi; mihing thumaante kimu zo nawn ngawl hi.

²Amate in khat le khat kitheam hi. Amate in khat le khat kisial pokna taw kitheam uh hi.



³Topa awng, sialpok thei te ii leei na thimsak in! Hi bang a, kihisakna taw a paute ii kam na huksak in.

⁴“Ka kammal uh taw ka dei uh po nga khu hi. Ka uuk bang po in ka pau lel tu uh a, kuama in hong khaam thei ngawl tu hi.”

⁵“Ahihang tu in hong pai tu khi hi,” Topa in ci hi, “Banghangziam cile a cimawte kizothaw a, vawtsiatna a thuakte in na asakna taw tau uh hi. Amate ii dei ngammuanna ka pia tu hi.”

⁶Topa kamciamte in muanhuai hi; tuate in pummei sungah sali vei a kithiangsak ngun tatakte taw kibang hi.

⁷⁻⁸Mi seksolte mun theampo ah om a, tuaciangin a kuama theampo in ngitlona sia pok uh hi. Topa awng, ko hong keam tawntung tan a, tuabang mihingte ii kung panin hong keam tan.

Psalm Late 13

Hu natu Thungetna

¹Topa awng, bang tan vei hong mangil lai tu ni ziam? A tawntung ziam? Kei kung pan bang tan vei na kiseal lai tu ziam?

²Ngimnate bang tan vei thuak lai tu khi ziam? Sun taw zan taw bang tan vei thin heena taw kidim lai tu khi ziam? Ka ngalte in bang tan vei kei tungah hong zo lai tu ziam?

³Topa ka Pathian awng, kei hong en tan a, hong zo tan. Ka thatang hong dimh kik tan a, hong thisak heak in.

⁴Ka ngalte in “Ama ka zo zo uh hi” cisak heak in; kei puna hu in amate na kisatheisak heak in.

⁵A kip nong itna hong suang khi hi; ka lungdam tu hi, banghangziam cile nangma in nong suatak tu hi.

⁶Topa awng, nang, la kong sak tu hi, banghangziam cile nang in kei tungah nong pha hi.

Psalm Late 14



Mihingte Seksol Khansiatna

(Psalm Late 53)

¹Mihing mawmawte in, “Pathian om bo!” ci uh hi. Amate theampo siatna khaatna taw kidim siat a, a cizathuai nate seam zo uh hi; a maan a seam kuama a om bua hi.

²Mihing khat po a ciim a om ziam, ama a bia khat po a om ziam ci in, Topa in vantung panin mihingte ensuk hi.

³Ahihang amate lampial siat zo uh hi; amate a kibang in sia siat hi. A maan a ngamta khat zongh om ngawl, khat beak zongh om ngawl hi.

⁴“Ama te in he ngawl ziam?” Topa in dongh hi. “Hi a tatsiate in heakna nei ngawl ziam? Amate in ka mite neisa sutolna taw nungta a, kei tungah zongh thu hong ngen ngeingawl hi.”

⁵Ahihang tuasia ciangin amate laungawp tu uh hi, banghangziam cile Pathian in ama thu a nite taw om khawm hi.

⁶Ngitlo tatsiatna a vawtte in mihing kiniamkhiak pa ii ngealnate nawngkaisak hi, ahihang Topa sia ama kidalna ahi hi.

⁶Zion panin Israel te ii zawna hong pai natu in bangza in thungen khi ziam. Topa in Israel te a khantosak kik hun ciang bangza in amate lungdam tu ziam!

Psalm Late 15

Pathian Deikal Thute

¹Topa awng, na biakinnpi sungah akua bangte tum thei tu ziam? Akua bangte in na mual thiangtho Zion tungah biakpiakna vawt thei tu ziam?

²Na theampo sungah Pathian thu ni a, a tawntungin a maan nasep seam in, a kammalte maanin taknei tu a,

³tuaciang ama in ngualdangte ngensia ngawl tu hi. Ama in a lawmte tungah tat khialna nei ngawl tu a, a innpaamte huvau kamleang kizelsak ngawl tu hi.



⁴Pathian ii nilte sia amate zongh in thusim ngawl tu hi, ahihang Topa thu a nite sia amate in patoai tu hi. Bangza po supna keak a om tu ahi hial zong, amate in a kamciam bangin vawt tawntung hi.

⁵Amate in a meet ngawl taw sum pukthaak hi, tuaciang a maw ngawlte langpanna tetti tu in sumnguk ne ngawl hi. A kuama po hi bang a, a ngamta sia in ngam muanna nei tawntung tu hi.

Psalm Late 16

Kimuanna taw Thungetna

¹Pathian awng, hong sungsia tan; bittak ka om thei natu nang kong muang hi.

²Topa tungah “Nangma in ka Topa na hi hi; na pha ka nei theampo nangma kung panin hong pai hi,” ka ci hi.

³Topa ii a thumaan mihingte sia bangza in pha ziam! Amate taw kithol sia ka nopsak bel ahi hi.

⁴Pathian dang a del mihingte in amate tungah ngimna tam mama tungsak hi. Amate ii sangaw biakpiakna sungah ka kihel buatu a, amate ii pathiante ka bia buatu hi.

⁵Topa awng, Nangma in ka nei a min piang a buppi na hi a, tuaciang ka kisap theampo nong pia hi; maisang ka nuntak natu na khut sungah om hi.

⁶Tel a nong piakte kei atu bangza in lamdang ziam; tuate in bangza in pha ziam!

⁷Topa ka pok hi, banghangziam cile ama in hong lampui hi, tuaciangin zan ciang ka thinsung phawtheina in hong hil khol hi.

⁸Topa hong ompuina a tawntungin ka phawk hi; ama in kei taw kinai in hong om hi, bangma in hong liinglawngsak zo ngawl tu hi.

⁹Tua ahikom kei sia lungdamko nopna le lungdamna taw ka kidim hi, tuaciangin ngammuanna a cing takin nei ka kisa hi,

¹⁰thina vaangletna panin hong sungsia na hikom thumaan takin nang atu kong seam hi, tua hi a mithi khua ah nong nusia buatu hi.



¹¹Nangma in nuntakna sung hong then lampi nong lak tu hi; nangma nong ompuina in lungnopna taw hong kidimsak a, nopsakna a tawntungin hong puak hi.

Psalm Late 17

A maw ngawlpá Thungetna

¹Hong ngai tan, Topa awng, thukhaikim khen natu a kong ngetna hong za tan! Hu ngen a kong auna hong ngai tan! Thin tak taw thu kong ngetna hong ngai tan.

²Nangma in kei sang pangin thu nong khen tu hi, banghangziam cile nangma in a maan sia na he hi.

³Ka thinsung hong he ni hi. Zan in kei kungah nong pai hi; nong veal ngiingeei zo a, ka sungah ngitlo nopna nong mu bua hi.

⁴Ngualdangte bangin kamsia ka pau bua hi; na thupiakna kong ni a ngoltolna lampi ka tawn bua hi.

⁵Nangma lampi ka zui tawntung a ka pial tha ngei bua hi.

⁶Nangma tungah thu kong ngen hi, Pathian awng, banghangziam cile nangma in kong ngetna nong zo hi; tua ahikom kei sang hong nga tan a ka kammalte hong ngai tan.

⁷A lamdang na itna hong pualaak tan a, hong hun tan; nang kungah ka om ciang ngal le sa panin ka ngammuang hi.

⁸Na mittang mama na kep bangin kei hong keam tan a,

⁹a seksolte ii hong dona panin na tha limnuai ah hong seal tan. Thi theina ngalte in kei hong kiim uum a,

¹⁰amate in mulkimna nei ngawlin kiphatsak kam pau uh hi.

¹¹Tu in koisang po ka nga zong amate ka kiimkot ah om siat a, hong kuaivawk tu in hong pang hi.

¹²Amate in tawpите bang hi a, hong balneen nuamin hong ngak hi.



¹³Topa awng, hong pai tan! Ka ngalte langpan in a, zothal in! Mihing seksolte kung panin na namsau taw hong hun tan;

¹⁴hi leitung nuntakna sungah a dei uh po a neite khutsung panin hong hun tan. Amate atu na khealsia ngimnate taw amate daan pia in; tua daante sia a tate atu zongin kicing lai taken a, a tate ii tate dong pawlkhat khomsuan lai taken.

¹⁵Ahihang kei in nang kong mu tu hi, banghangziam cile ngamtat khialna ka nei bua hi; tuaciang ka khanlaw ciang nong ompuina in lungnopna taw hong kidimsak tu hi.

Psalm Late 18

David Ngalzawna Hanla

(2Samuel 22.1-51)

¹Topa awng, bangza in nang hong it khi ziam! Nangma in kei hong hungpa na hi hi.

²Topa in kei hong dal pa hi a, ama sia a kip a kho ka kulhpi hi. Ka Pathian in ka kidalna hi, ama taw ka kikop ciang kei ka ngammuang hi. Ama in lum bangin kei hong sung hi, ama in kei hong sungsia a, hong keamcing hi.

³Topa ka biakpui a, ama in ka ngalte khutsung panin hong hun hi. Topa pok tawng!

⁴A lauhuai thina in kei hong uumci a, lalna tuihual in kei hong nawk hi.

⁵A lauhuai thina in kei hong uumci a, thaankuul in a thaang taw kei hong sia hi.

⁶Ngimna kawmkaal pan Topa ka biakpui hi; hong hu tu in Pathian ka biakpui hi. A biakinn sungah ka aw hong za hi; hu ngenin ka auna ama in hong ngai hi.

⁷Tuasia ciang leitung sia liingin ngawk hi; mualte ii tawdapte kilokin phe vadil hi, banghangziam cile Pathian thin uuk hi.

⁸A naak hawng sung panin meikhute hong buak hi, a kamsung panin a kaangtumsak thei meikamte le meikuangte hong pusuak hi.



- ⁹Ama in van sia eautham in meeikaaivom siisan in hong tuaksuk hi.
- ¹⁰Ama in Cherub khat tungah to in manlang takin leang hi; ama in vui ii thate tungah khualhaw hi.
- ¹¹Ama le ama khuazing taw kituam a, tui taw a kidim meeikaai saapuie in kiim uum hi.
- ¹²Ngialtangte le meileng vazalte ama mai khualeng panin hong pai a meeizingte phullet hi.
- ¹³Tuaciang Topa in van panin vanto bangin hong pau a, Saangbel Pa aw kiza hi.
- ¹⁴Ama in a thaltangte hong kap a, a ngalte kithethaangsak hi; khualeng tee vazialte taw amate taisak hi.
- ¹⁵Topa awng, na ngalte na teih ciang le thin uukin amate na oksat ciang, tuipei taw le lei tawdapte kilawt hi.
- ¹⁶Topa in ka tung panin hong bansuk a kei hong len hi; ama in tuihukte panin hong kai to hi.
- ¹⁷A thahat ka ngalte le kei hong ensante kung panin hong suatak hi — amate in kei atu in hat lei hi.
- ¹⁸Ka ngimnga laitakin amate in kei hong sim hi, ahihang Topa in hong dal hi.
- ¹⁹Ama in launa sung panin hong hu hi, banghangziam cile ama in kei sia dik hong sa a, hong hun hi.
- ²⁰Topa in kei thaman hong pia hi banghangziam cile a maante sep le vawtin ka nei hi; ama in keima thupha hong pia hi, banghangziam cile kei mawna ka nei bua hi.
- ²¹Topa thukham ka zui zo a, ka Pathian kung panin ka pial bua hi.
- ²²Ama thukhamte theampote ka tang zo a, ama thupiakte ka nit ngawl a om bua hi.
- ²³Ama in ka sitbaan ngawlna, khial ngawl tu in ka kikepna hong he hi.



- ²⁴Tua ahikom ama in telte hong pia hi, banghangziam cile a maan na seamin ka maw ngawl hunlam hong he hi.
- ²⁵Topa awng, hong thumaante tungah na thumaan hi; a cialcingte ii tungah a kicingin na dik hi.
- ²⁶A thiangthote tungah na thiangtho hi; ahihang a seksolte na ngal vawt hi.
- ²⁷A kiniamkhiak te na hun hi, ahihang a kiphasakte na niamsak hi.
- ²⁸Topa awng, kei khuavak nong pia hi; ka khuazing na bosak hi.
- ²⁹Ka ngalte ka sim natu in thahatna nong pia hi, tuaciang amate ii kinannate ka zaw natu tha nong pia hi.
- ³⁰Hi Pathian ii nasepnate bangza in cialcing ziam! Ama kammalte bangza in suan thamman ziam! Ama ii huuk tu a zongte theampo atu in Ama in lum taw kibang hi.
- ³¹Topa bekma Pathian ahi hi; Pathian bekma ei kinanna ahi hi.
- ³²Ama in kei hong thahatsak Pathian hi a, ka lampi bitsak hi.
- ³³Ama in sazuk bangin ka peang hong khosak a, mual tungah hong keamcing hi.
- ³⁴Thal kho bel sia ka zak thei na tu in ama in ngal kido zia hong sinsak hi.
- ³⁵Topa awng, nangma in nong dal a nong hun hi; nangma ii nong khoina in hong liansak a, na vaangletna in hong keamcing hi.
- ³⁶Kipummat natu panin nong keam a ngalte khutsung ka theng ngei bua hi.
- ³⁷Ka ngalte ka del a, amate ka man hi; amate ka lalsak mateng in ka tawlnga bua hi.
- ³⁸Amate ka vaatvawk a tho kik thei bua uh hi; ka mai ah ngallel in amate liik uh hi.
- ³⁹Nangma in kidona sung a zak tu thahatna nong pia a ka ngalte nong zosak hi.



⁴⁰Ka ngalte ka kung panin a tai natu in na vawt hi; kei hong ensante ka lalsak hi.

⁴¹Amate in hu ngenin au ahihang kuama in amate hun ngawl hi. Amate in Topa biakpui hi, ahihang Ama in a zo bua hi.

⁴²Amate leivui bang ahi dongin ka sucip a, vui ii let leivuite bang ahi uh hi. Lampite tungah buan omte bangin amate ka tuancil hi.

⁴³Ngal phuang mihingte kung panin nong hun a tua ngamte uk tu in nong siam hi; ka heak ngei ngawl mite, tu in ka khutnuai mi suak uh hi.

⁴⁴Ngamdang mite in ka mai ah kun hi; ka thu hong zaak ciangin ka thu ni uh hi.

⁴⁵Amate in thinkiamin a kulhte uh sung pan a liing sa in hong pai uh hi.

⁴⁶Topa nungta hi! Kei hong hungpa pok vun! Kei hong hun Pathian letna thangsak vun.

⁴⁷Ama in ka ngalte hong zosak hi; ngam tuatuamte

⁴⁸ka khut nuai ah biiksak vakheau in kei sia ka ngalte khutsung panin hong hun hi. Topa awng, ka ngalte nong zosak hi; tuaciang a ngoltol mihingte khutsung panin nong dal hi.

⁴⁹Tua ahikomin ngam tuatuamte kawm ah nang kong pok hi; nang tungah pokna la kong sak hi.

⁵⁰Pathian in zawna lian mamate a kumpipa tungah pia hi; ama in itna kip sia ama teal sa David le ama suan le paalte tungah a tawntungin lak hi.

Psalm Late 19

Bitphuana ah Pathian Minthanna

¹Van in Pathian minthanna thiang takin kilangsak hi! Ama nasepna huvau in a kician mama in lak hi!

²Nisim in tua thu ki sason a, zansim in kison kikik hi.



³Thusonna ahibuale kammalte kizangh ngawl a, awnging zongh kiza ngawl hi;

⁴ahitazong amate ii thupuak sia leitung bup ah kizel a leimong dongin kiza hi. Pathian in ni atu in van ah inn khat vawtsak hi;

⁵a lungdam zinei pa bangin zingsang in hong pusuak hi, tai kidem tu a lawp kimai thiamte bang ahi hi.

⁶Van mong khat pan hong kipan a, van laizang kantanin a langkhat dongah pai hi. Ama satna pan bangma in lia thei ngawl hi.

Topa Thukham

⁷Topa thukham sia cialcing a; thahatna thak a pia hi. Topa thupiaknate sia muan thamman a, a kitaangsamhte atu in ciimna pia hi.

⁸Topa ii thukhamte maan hi, tuaciang tua thukham a ni te lungdam hi. Topa thupiakte tang a, thinsung heakna pia hi.

⁹Topa thasiana sia pha a, a tawntungin kizom paisuak tu hi. Topa thukhennate sia tang a, tuate sia a tawntungin khaikim hi.

¹⁰Tuate sia kham pha belte sangin dei huai zaw a, khuaitui thiangeb bel sangin thum zaw lai hi.

¹¹Tuate in keima, na naseampa heakna hong pia a; tuate ka nit hu in tel ka saang hi.

¹²Kuama in ama khialnate a mu thei bua hi; Topa awng, a kiseal khialnate panin hong hung tan!

¹³Vawtluih mawnate panin hong keamcing si tan a; tuate in kei hong uksak heak in. Tua hile ka cialcing tu a, mawna ii siatna khaatna pan ka suakta tu hi.

¹⁴Ka bukna le hong tanpa ka Topa awng, ka ngaisutnate le ka kampaunate nong saan thei hi taken!

Psalm Late 20

Zawna atu Thungetna



¹Ngimna na nga ciangin Topa in na biapuina hong zo taken; Jacob Pathian in nang hong dal taken!

²Ama in a Biakinnpi panin nang kungah huna hong puak taken, tuaciangin Zion Mual panin panpuina hong pia taken!

³Na piakkhiatnate theampo ama in hong saang taken a, na sangaw biakpiaknate theampo ama lungkim taken.

⁴Na dei sia ama in hong pia taken a na tupna theampo ah zawna hong ngasak taken.

⁵Tuasia ciang nang ii zawna tungtaang ah lungdamna taw kong au tu uh hi, Ih Pathian pokna taw na zawna poai ka khaam tu uh hi. Topa in na nget theampo hong tungsak taken.

⁶Topa in ama tealsa kumpipa sia zawna pia hi ci, tu in ka he hi; ama in a thiangtho vantung panin ama ii ngetnate zo hi, tuaciang ama vaangletna taw zawna lianpi te pia hi.

⁷Pawlkhat in amate ii ngalsimna siphuleangte muang uh hi, a dangte in a siphute muang uh hi, ahihang eite in Topa ih Pathian ii vaangletna ih muang hi.

⁸Tuabang mihingte sia lutu in liik tu uh hi, ahihang eite tho in kip takin ih ding tu hi.

⁹Topa awng, kumpipa tungah zawna na pia in a, kong biapui uh ciangin hong zo tan.

Psalm Late 21

Zawna hangin Pokna

¹Topa awng, kumpipa lungdam hi, banghangziam cile ama thahatna na pia hi; ama ngalzo pa na suasak manin lungdam hi.

²Ama lungdei sia na pia zo a, hong ngetna bangin na zokik zo hi.

³Ama kungah thupha lianpite taw nong pai a a lu tungah kham kumpi lukhu na khusak hi.



⁴Ama in nuntakna hong ngen a, tuasia ma na pia hi, khansau le a kikhomsuan nuntakna na pia hi.

⁵Nangma huna hangin ama minthanna lian a, ama sia minthanna le uk theina vaang na pia hi.

⁶Na thuphate ama tungah a tawntungin om a, na ompuina hu in ama sia lungnopna taw kidim hi.

⁷Kumpipa in Vaanglianbelpa Topa muang a, Topa ii a kip itna hu in ama sia a ngam muang tawntung tu hi.

⁸Kumpipa in a ngalte pummat siat tu a, ama a ensan theampo man tu hi.

⁹Ama hong kilaak tak ciang amate sia meileng pui ii a kak bangin susia tu hi. Topa in a thin uukna taw amate valh tu a, meikuang in amate kaangtum tu hi.

¹⁰Kumpipa in thatlum siat tu a, a suan a paal kuama a taang buatu hi.

¹¹Amate in ama tha sawm uh a, ahihang a tangtung buatu hi.

¹²Ama in a thaltangte taw amate kap tu a, nung sangah leetaisak tu hi.

¹³Topa awng, Na thahatna lianpi hu in kong pok uh hi! Na vaangletna pokin, la kong sak tu uh hi.

Psalm Late 22

Hee vangui a Auna le Pokna La

¹Ka Pathian, ka Pathian awng, banghangin kei hong nusia ni ziam? Hu ngenin hong cimawk au khi hi, ahihang huna hong pai tuan ngawl lai hi.

²Ka Pathian awng, sunin kong biakpui hi, ahihang nong zo bua hi; zanin kong biakpui hi, ahihang ka ommuang tuan bua hi.

³Ahihang nang sia Israel te ii a pok, a Thiangtho Pa in na maang hi.

⁴Ka taangpupite in nang hong muang hi; amate in nang hong muang a, nang in amate na hun hi.



- ⁵Amate in nang hong ko a, launa panin suakta uh hi; amate in nang hong muang a, thinkiamna a thuak bua uh hi.
- ⁶Ahihang kei sia mihing zongh hi nawn ngawl khi hi; lungno khat ka hi lel a mihing theampo in hong thusim ngawlin hong nunau hi;
- ⁷Hong mu theampo in hong selno hi; a leei uh hong daw a, a lu uh hong pei san hi.
- ⁸“Nangma in Topa na suang hi. Banghangin nang hong hun ngawl ziam? Topa in hong it ahi le banghangin nang hong hu ngawl ziam?” amate in hong ci san hi.
- ⁹Bit tak a hong piangsak sia nangma na hi a, tuaciang nausen ka hi lai in nong keamcing hi.
- ¹⁰Ka pian ni panin nang kong suang a, nang sia ka Pathian na hi tawntung hi.
- ¹¹Ngimna hong nai a, hong hu tu kuama om ngawl ahiciang, kei kung pan kiheam heak in.
- ¹²Khuitalte bangin ka ngalte in hong kiim uum a; ka kiimkot ah om uh hi, amate sia a kiitak huai Bashan ngam khuitalte bang ahi uh hi.
- ¹³Amate in tawpite bangin hong kamkat a, hawkin kei hong laai hi.
- ¹⁴Ka tha tual zo a, leisung a tui buak bangin bo vangeu hi. ka ngu kipeenate zongh kipealkhial siat zo a, ka lungtang sia khuainun tuitham bang hi.
- ¹⁵Ka longtawl sia leivui bangin ko a, ka leei sia ka vadang ah kibelto hi. Leivui sungah a thi tu in nong nusia zo hi.
- ¹⁶Mihing ngilo honkhat sia ka kiim ah hong om a, uihonte bangin kei hong neak hi; amate in ka khut le ka peang pan hong laai hi.
- ¹⁷Ka ngu ka taangte sia lawt siat a, ka ngalte in hong en a hong sal uh hi.
- ¹⁸Amate in ka puante a hawm natu in aisaan hi.
- ¹⁹Topa awng, kei kung panin kiheam heakin a, kei hong suatak tu in a manlangin hong pai tan.



- ²⁰Namsau panin hong hun tan a, hi uite panin ka nuntakna hong hun tan.
- ²¹Hi tawpите panin hong suatak tan; hi ngam khuitalte mai ah cimaw in ka om hi.
- ²²Ka mipuite tungah nangma ii nong sepsaksate ka son tu a, amate kikhopna sungah nang kong pok tu hi.
- ²³“Topa naseamte awng, ama pok vun! Jacob suante awng, ama zatakna pia vun! no Israel mite awng, ama bia vun!
- ²⁴Ama in a zawngte ngaingon in ahibuale amate thuaknate awlmawk ngawlin a om bua hi; amate a nungngat bua a, hu ngenin a biapui uh ciang ama in zo hi.
- ²⁵Mihonpите kikhopna sungah nangma ii nong sepsaksate ka pok tu hi; nang hong biate ii omna munah ka kamciam sa sangaw biakpiakna ka pia tu hi.
- ²⁶Mizawngte in a du zaza ne tu uh a, Topa kung a zuan peuma in ama a pok tu uh hi. Amate in a tawntungin nuamsa taken!
- ²⁷Ngam theampo in Topa a phawk tu uh hi. Leitung mun tuatuamte panin ama a zuan tu a minam theampo in ama a bia tu uh hi.
- ²⁸Topa sia kumpipa hi a, ama in ngam theampo uk hi.
- ²⁹Mihing kiphasak theampo in ama mai ah kun tu a, a thi thei theampo in ama mai ah kun tu hi.
- ³⁰Maisang khangsawnte in ama atu seam tu uh hi; amate in hong khang pheang tute tungah Topa thu son tu uh hi.
- ³¹A piang pheang tu mite tungah “Topa in a mite hun hi” ci in kison tu hi.

Psalm Late 23

Topa Tuu bangin Eite Hongcingpa

- ¹Topa in tuu bangin kei hong cing pa (*Jehovah Ra-ah*) ahi hi; bangma ka kitaangsam bua hi.



²Ama in lo hingna sungah hong lumsak a, tuithiang cingna munah hong paipui hi.

³Ama in thahatna thak hong pia hi. Ama hong kamciam sa bangin lampi maan tawn tu in lam hong pui hi.

⁴Thina luamkuam khuazing thuk belna sung keak kantanin ka tawn zongin ka lau buatu hi, banghangziam cile, Topa awng, nangma in kei taw nong om khawm a, na tuucinna molpum le na ciangkhut in kei hong dal hi.

⁵Ka ngalte mu tangin an neakna poai nong vawtsak hi. Leangna pipa bangin nong muak a, ka lu sathau nong thiisak hi; ka hai a dim letin nong buk hi.

⁶Ka khan tawntungin na phatna le na itna in kei hong ompui tu a, na inn sungah a tawntungin ka teang tu hi.

Psalm Late 24

A lian Kumpipa

¹Simleitung le a sung a om theampo sia Topa neisa ahi hi; leitung le a tung a teang theampo sia ama aa ahi hi.

²Ama in tuipei taw ah, inn tawdap pha a, leinuai tuithukpite tungah sa hi.

³Topa mual tungah akua in pai theina thu nei ziam? Ama ii a thiangtho Biakinnpi sungah akua tum thei tu ziam?

⁴Ngaisutna le ngamatatna a thiangthote, milim a bia ngawlte tua ahibuale a maan ngawl kamciam a vawt ngawlte pai thei tu hi.

⁵Tuabangte sia Topa in thupha pia in hun tu hi; Pathian in amate sia maw ngawl hi ci tu hi.

⁶Pathian kungah hong pai, Jacob ii Pathian kung a zuan tu te sia tuabang mite ahi hi.

⁷Kongpите hongkeak vun a, taangh kongkhate hong tavun, minthang kumpipa hong tum tu hi.

⁸A lian kumpipa sia akua ziam? Ama sia Topa hi a, a thahat le a thakho, ngal a zo Topa hi.



⁹Kongpitem hongkeak vun a, taangh kongkhate hong tavun, minthang kumpipa hong tum tu hi.

¹⁰A lian kumpipa sia akua ziam? Zawna mualsua Topa — ama a lian kumpipa ahi hi.

Psalm Late 25

Lamlakna le Ngal kidal natu Thungetna

¹Topa awng, nang tungah, thu kong ngen hi;

²ka Pathian awng, nang sungah muanna kong nei hi. Lel a maizumna panin hong hun tan a, ka ngalte kei tungah hong kisatheisak heak in;

³Nang hong muangte kuama in ngual lel ngawl tu hi, ahihang nang hong leedo papaihte nguallel tu hi.

⁴Topa awng, na zia na tong hong hil tan a, hong tel sak tan.

⁵Na thumaanna taw kizui in ka nuntak thei natu hong hil tan, banghangziam cile nangma in kei hong hunpa ka Pathian na hi hi. Nang kong muang tawntung hi.

⁶Topa awng, taanglai panin nong lak, na cikna le na itna kip sia na phawk tan.

⁷Topa awng, ka khangno lai a ka mawnate le ka khialnate hong maisak tan a, Na itna kip sung le na phatna sungah hong phawk tan.

⁸Topa sia pha a thutang ahikom mawneite tungah a tot tu uh lampi hil hi.

⁹Ama in a kiniamkhiakte lam maan lakin ama deina hil hi.

¹⁰A thuciam le a thupiak a nite theampo itna le thumaanna taw lampui hi.

¹¹Topa awng, na kamciam kipsak in a, ka mawnate hong maisak tan, banghangziam ci le ka mawna tam mama hi.

¹²Topa a thasiate in a tot tu uh lampi sia ama tung panin a he tu uh hi.

¹³Amate in nuamsa tawntung tu a, a tate in ngam le lei a lua tu uh hi.

¹⁴Topa in ama thu a nite ii lawm hi a, amate tungah a thuciam kipsak hi.



¹⁵Huna nga tu in a tawntungin Topa ka ento a, ama in launa pan hong suatak hi.

¹⁶Topa awng, kei hong maingat tan a, kei hong hesuak tan, banghangziam cile keima in lungzuang in ka tha a zawm hi.

¹⁷Ka thin ngimnate pan hong suut tan a, ka ngimnganate pan hong hun tan.

¹⁸Ka ngimna le ka thuaknate hong heakpui tan a, ka mawnate theampo hong maisak tan.

¹⁹Ka ngalte bangza in tam a, bangza in hong ngaimaw ci sia hong musak tan.

²⁰Kei hong dalin, hong hun tan a, hong lel sak heak in. Ngammuan natu in nang kong zuan hi.

²¹Ka phatna le ka thumaanna in kei hong keam taken, banghangziam cile kei in nang kong muang hi.

²²Pathian awng, na minam Israel mite a ngim ngana theampo panin na hun in.

Psalm Late 26

Mihing pha Khat ii Thungetna

¹Topa awng, maw ngawl hi hong ci tan, banghangziam cile a maan in ka seam a, nang muan citak in hong muang khi hi.

²Topa awng, hong veal tan a, hong sittel tan, ka deinate le ka khua ngaisutnate thu hong khen tan.

³Nong itna kip in kei lam hong lak a, na thumaanna in a tawntungin lam hong pui hi.

⁴A mannung ngawlte taw ka kithawl bua a, a kihi theamsakte bangma in ka sim bua hi.

⁵Mihing ngilo ii hong pawl pui ka ngaimaw a, a seksolte ka pial hi.

⁶Topa awng, maw baang ngawl ka hi hunlam ka khut silin kong lak a, na biaknatau kim ah pai in kong bia hi.



⁷Lungdamkona la kong sak a, a lamdang na nasepna theampo ka son hi.

⁸Topa awng, na minthanna mun, na teenna inn ka it hi.

⁹Mawneite taw hong susia khawm heak in a, ngual suamlumte thuak tute panin hong tongsak in,

¹⁰ngitlona a vawt tawntungte le sumnguk a ne nuam tawntungte ii thuak tute hong thuaksak heak in.

¹¹Kei ka hi le a maanin ka seam hi. Kei hong hesuak tan a, hong hun tan.

¹²Launa theampo panin ka ngammuang a, ama mihingte ii kikhopna sungah Topa ka pok hi.

Psalm Late 27

Pokna Thungetna

¹Topa in ka khuavak le kei hong ngumpa hi a, kuama ka kiita buatu hi. Topa in launa theampo panin hong sungsia a, ka lau ngei buatu hi.

²Mihing ngilote in that tu in hong sim ciangin, amate lutu in puk uh hi.

³Ngalkap hon buppi in hong kiim uum hial zong ka lau buatu hi; ka ngalte in hong sim ka le zong Pathian ka muang veve tu hi.

⁴Topa tungah na khat ka ngen a, ka dei khat bek a om hi; ka khan tawntung Topa inn sungah teang a, ama phatna lamdang et tu le lam hong laknate nget tu ahi hi.

⁵Ngimna hun sungah ama in hong lia tu a, ama Biakinnpi sungah hong keamcing tu hi, tuaciang suangpi saang tungah ngammuang in hong koi tu hi.

⁶Tua ahikom ka kiim a ka ngalte tungah zawna mualsua na ka nei tu hi. Lungdamna taw au in a Biakinnpi sungah sangaw biakpiakna ka pia tu hi; la sa in Topa ka pok tu hi.

⁷Topa awng kong biapui ciang hong za tan! Hong hesuak tan a hong zo tan.

⁸“Hong pai tan a hong bia tan” nong ci ciang, “Hong pai tu khi hi, Topa awng ” ci in Topa in kei hong keamcing tu hi.



⁹Kei kung pan nangma le nangma hong kiseal heak in. Kei tungah hong thin uuk heak in a, na naseampa hong nungngat heak in. Nangma in kei hong hupa na hi ngei zo hi; hong paisan heak in a, hong nusia heak in, Pathian, kei hong ngumpa awng.

¹⁰Ka pa le ka nu in hong nusia thei tha tu hi, ahihang TOPA in kei hong khoi tu hi.

¹¹Topa awng, nong sepsak nop thute, hong hil tan,

¹¹Topa awng, nong sepsak nop thute, hong hil tan, Ngal tam mama ka nei hu in, a ngammuanhuai lampi ah lam hong pui tan.

¹²Leilot thu le tawna taw hong ngalvawt ka ngalte khut sungah hong nusia heak in.

¹³Hi nuntakna hun sung mama ah Topa phatna mu lai tu ci in ka kihe hi.

¹⁴Topa muang in, upna nei in, thinkiam heak in. Topa muang in!

Psalm Late 28

Hu natu Thungetna

¹Topa kei hong hungpa awng, nang kong biakpui hi. Ka auna hong za tan! Nong zo bua ahile, kei sia mithi khua a zuan suk te sungah ka kihel tu hi.

²Nang tungah hu ngenin kong au ciang le na Biakinnpi thiangtho sungah ka khut kong lap ciangin hong za tan.

³Mihing seksolte taw hong puavawk heak in, ngitlo nasep a seamte, a kam teng taw lawm bang a kithoai ahihang a thinsung uh ah etsatna a neite taw hong puavawk khawm heak in.

⁴Amate sep le vawt a ngitlo ngamtatnate hu in daan na pia in. Amate sepna theampo taw a kilawm in daan na pia in.

⁵Amate in Topa ii sep le vawt sate a awlmawk bua uh hi; tua ahikom amate sia ama in daan pia tu a a tawntungin a susia tu hi.

⁶Topa pokna pia vun; ama in hu ngen a, ka auna hong za zo hi.



⁷Topa in hong dal a hong hung hi; ama ka muang hi. Ama in huna hong pia a hong lungdamsak hi. Lungdamna la sa in ama ka pok hi.

⁸Topa in ama mite sungsia hi; ama in a teal sa a kumpipa hungin hun hi.

⁹Topa awng, na mite hun in a, nangma neisate thupha pia in. Amate ii tuucingpa hi in a, amate khoi tawntung in.

Psalm Late 29

Vuipi Suangval sungah Topa Awnging

¹No vantung mite awng; Topa pok vun, Ama minthanna le vaangletna pok vun.

²A minthang Topa min pok vun a, Thiangtho Pa hong kilangh ciangin a mai ah kunsuk vun.

³Topa awnging tuipte tungah kiza hi; a minthang Pathian in vanto bangin nging a, ama awnging tuipi lian tungah hawl hi.

⁴Topa awnging sia a thahatna le uk theina vaang theampo taw kidim hi.

⁵Topa awnging in cedar kungte taltansak hi, Lebanon mual tungah cedar kungte ngangawn thiaktan hi.

⁶Ama in Lebanon mualte sia khuino bangin leang va eetsak a, Hermon mual sia khuitai moi bangin kilawnsak hi.

⁷Topa awnging in khualeng taangkeaksak hi.

⁸Ama awnging in senneal ngam liingsak a, Kadesh senneal ngam sia thing zazan hi.

⁹Topa aw in limthing kungte ngawksak a, a teete a kung tung pan thong siat hi, tua laitakin, a Biakinnpi sung a om theampo in “Pathian minthang hen” ci in au uh hi.

¹⁰Topa in kumpi a hina taw tui thukpite a tawntungin uk hi.

¹¹Topa in a mite sia thahatna pia in kilemna thupha zongh pia hi.

Psalm Late 30



Lungdamko Thungetna

- ¹Topa awng, Nangma in kei hong hun zo na hikom, Nang kong pok hi, tuaciang kei tungah ka ngalte in nong enthawsak bua hi.
- ²Topa ka Pathian awng, huna ngenin kong au ciang kei nong damsak a, thaankuul panin nong keam hi.
- ³Leinuai a thuk zaw na zuanin ka pai laitakin nuntakna a thak nong pia kik hi.
- ⁴A thumaan ama mihingte theampo awng! Topa tungah pok na la sa vun! A Thiangtho Pa in bang teng seam zo ziam ci in phawk vun a, ama tungah lungdamko vun!
- ⁵A thin uukna in tawmvei sung teng bek hi a, a phatna in khan tawntung ahi hi. Zanin thitui zongh taak tha tu ahitazong zing sang ciangin lungdamna hong pai hi.
- ⁶Ngammuang ka kisa a, keima le keima “Hong kinuaisia ngei ngawl tu hi” ka kici hi.
- ⁷Topa awng, nang in kei tungah nong dik hi; mualtung ngal nanna kulphi bangin kei nong dal hi. Ahihang ka mai panin nong kiseal a, tuaciang ka lau hi.
- ⁸Topa awng, nang kong biakpui a, nong hu natu in kong thum hi.
- ⁹“Ka thina tungtaang ah bang leaplaw tu ni ziam? Thaankuul sung ka zotsuk ciang bang meetna om ziam? Mithite in nang hong pok thei tu ziam? A lalmaw na phatna amate in thangsak thei tu ziam?”
- ¹⁰Topa awng, hong ngai tan a, hong hesuak tan! Topa awng, hong hu tan!
- ¹¹Ka khuangaina sia lungnop lapna taw nong laihsak zo hi; ka khuangaina nong laaksak zo a lungnopna taw nong uap zo hi.
- ¹²Tua ahikom ka thim om buatu a, nang pokna la kong sak tu hi. Topa awng, nangma in ka Pathian na hi a, a tawntungin lungdam kong ko tu hi.

Psalm Late 31



Pathian Muanna huvau Thungetna

¹Topa awng, nong sungsiat tu in nang hong tu ka hikom lelna hong thuaksak ngei heak in. Nangma in a thutang Pathian na hikom; hong hun tan, thu kong ngen hi!

²Hong za tan a, tu mama in hong hun tan! Ka bukna hong hi tan a hong dal tan; ka kihukna hong hi tan a hong hun tan.

³Nangma in ka bukna le ka kihukna na hi a, nong ciam sa bangma in lam hong lakin lam hong pui tan.

⁴Kei hong kisiana thaang panin hong keamcing tan a; launa panin hong khoi hong pao tan.

⁵Nong kepna sungah keima le keima kong ki aap hi. Topa awng, nong hun tu hi. Nang sia a thumaan Pathian na hi hi.

⁶A maan ngawl pathiante, a biate na ensan hi, ahizong kei ka hile nangma kong muang hi.

⁷Ka lungdam in ka lawp tu hi, banghangziam cile nong itna in kip hi. Ka thuakna nong musak a, ka ngim ngana nong heaksak hi.

⁸Ka ngalte in kei nong pummatsak bua a, ka pai nopna po ka pai thei natu in suatakna nong pia hi.

⁹Topa awng, kei hong hesuak tan, banghangziam cile ngimna ka thuak a, ka kakaana in ka mit taak in, ka tha zawcip hi.

¹⁰Khuangaina in ka tha hong tatsak a, kaana in ka khan hong tomsak hi. Ka ngimna theampo hu in ka thazawm a, ka ngute ngangawn ngawngot hi.

¹¹Ka ngalte theampo le a tuanin ka innpaamte in hong zawngsak hi; kei hong hete in hong kiita a, lam lai ah hong mu uh ciangin tai uh hi.

¹²A kuama po in kei sia a thi sa bangin hong mangil siat zo a, a kivawk sa na khat bang ka hi hi.

¹³Ngat tam mamate ii a kihuu ka za a, liinna launa sia ka kiimkot ah om hi. Amate in kei hong langpan in ngealna nei uh a, kei hong thasawm uh hi.



¹⁴Ahihang kei ii lung muanna in nangma na hi hi, Topa awng, nangma in ka Pathian na hi hi.

¹⁵Kei sia nangma khoina sungah ka om tawntung hi; ka ngalte kung pan le hong vawtsiate kung panin hong hun tan.

¹⁶Na naseam pa sia cikna taw hong en tan a, na itna kip taw hong hun tan.

¹⁷Topa awng, nang kong biakpui hi; maizum hong thuaksak heak in, mihing seksolte maizum thuak taken; amate ahile mithi khua thim takin zuansuk taken.

¹⁸A leilot theite, a kiphasakte, a kisathei le thutangte zawnsakna kam a paute na thimsakin.

¹⁹Nang hong upatte atu in a lamdang mama nate na khealsia hi! A kuama po in nangma bangza pha ci sia hong he tek hi, nang hong muangte sia ngammuang takin na sungsiana hong he uh hi.

²⁰Amate sia mihingte thasawmna pan le ngalte lealna panin nangma omna ngam muanna ah na seal hi.

²¹Topa pok vun! Kei hong ki uumci a, hong kisim lai in, kei tungah itna hong lak sia bangza in lamdang ziam!

²²Ama omna panin kei hong hawlkeak zo vei bua na ziam ci in ka lau hi. Ahihang huna ngenin ka biapui ciangin ka auna hong za hi.

²³A thumaan ama mihing theampote awng Topa it vun. Topa in a thumaante hung hi, ahihang a kiphasakte ahile amate taw kiphu in daan pia hi.

²⁴Topa sungah lametna a neite theampo awng, na tha uh khosak vun a, na thin uh hangsak vun.

Psalm Late 32

Mawna Pualaakna le Maisakna

¹A mawna uh kimaisak a, a khialna uh a kipengsakte in mihing lungdamte ahi uh hi.



²Topa ii ngamta khial hi ci a, maw a sot ngawlte le, theamna cite theampo taw a kipealte in mihing lungdamte ahi hi.

³Ka mawnate ka pualaak ngawl ciangin, sun khuateak in ka kakaana taw ka zawm ngiingeei hi.

⁴Topa awng, sun taw zan taw daan nong pia hi, khal nisa ii tuikhu a kosak bangin ka thazawm dikdek hi.

⁵Tuasia ciangin nang tungah ka mawnate kong pualaak a, ka tatkhialnate ka seal bua hi. Tuate nang tungah pualaak tu in ka khensat hi, tuaciang nangma in ka mawnate theampo nong maisak hi.

⁶Tua ahikom a thumaan na mihingte in a taangsap hun sung nang tungah thu hong nget tu ahi hi; ngimna in namthuam lianpi bangin hong pai in hong nawkngawp ciang, amate a baan buatu hi.

⁷Nangma in ka bukna mun na hi a, ngim ngana panin nong hun tu hi. Nging takin, na ngupna thu, la in ka sa hi, banghangziam cile nangma in kei nong sungsia hi.

⁸Topa in, “Na pai natu lampi kong hil tu hi; keima in kong lak tu a, ngaisutna kong pia tu hi.

⁹A ki uk thei natu in kamkhau bul a kul siphu ahibuale laa bangin na mawmaw heak vun” ci hi.

¹⁰Mihing seksolte in a thuak uh kul hi, ahihang Topa a muangte sia ama itna kip in dal hi.

¹¹No thutangte awng, lungdam in lawp vun, Topa sep sate hu in lungdam vun. Ama thu a nite awng, lungdam in au keak vun!

Psalm Late 33

Pokna La

¹No a thutangte awng, Topa ii a sep sate hu in lungdamin au vun; ama thu a nite awng, ama pok vun.



- ²Topa tungah lungdamkona in tengtongte tumin, khau kithua tumtheite tumin ama tungah la sa vun.
- ³Ama tungah lathak sa vun, thiamna taw tengtongte tum vun a, lungdam in au vun.
- ⁴Topa kammalte in maan hi, tuaciangin ama nasepnate theampo sia suan thamman hi.
- ⁵Topa in a thutang le a a maan dei a, ama ii itna kip leitung ah dim hi.
- ⁶Topa in a thupiakna taw vantungte bitphua hi, ni, tha le aksite a kammal taw piangsak hi.
- ⁷Ama in tuipi theampo mun khatah khawmtua a, tuipi thukte khakin a bitna sungah khol hi.
- ⁸Leitung theampo awng, Topa bia vun! Leitung mihingte theampo awng, ama vaang pia vun!
- ⁹Ama a pau ciangin leitung kibitphua a, ama thupiakna taw na theampo piang hi.
- ¹⁰Topa in minam tuatuamte ii tupnate nawngkaisak a, amate ngealnate a vawtsuak zawk ngawl natu in khak hi.
- ¹¹Ahihang ama ngealnate in a tawntungin kip a, ama tupnate in a tawntungin kikhomsuan hi.
- ¹²Topa sia a Pathian in a nei minam in a lungdamte hi a, Ama mi tu in a teal sate in mihing lungdamte ahi uh hi.
- ¹³Topa in vantung panin ensuk a mihing nam bup mu hi.
- ¹⁴Ama ukna mun panin leitung ah a teangte theampo ensuk hi.
- ¹⁵Amate khua ngaisut theina theampo sia ama piak hi a, amate sep le vawt theampo he hi.
- ¹⁶Kumpipa khat in ama ngalkap hon thahat hu in ngal zo hi ngawl a, ngalkap khat in ama thahatna hu in zawna mualsua hi ngawl hi.



¹⁷Ngal simna siphute sia ngalzaw natu in mannung ngawl a, amate ii a lian thahatna in hun thei ngawl hi.

¹⁸Topa in ama thu a nite le ama ii itna kip a muangte encing hi.

¹⁹Ama in thina panin amate hun a, kialpi tun hun sungin nungtasak hi.

²⁰Eite in ih lametna sia Topa sungah ih nga a, ama sia eite kidalna le hong hu pa ahi hi.

²¹Eite in ama hangin ih lungdam a, ama min thiangtho ih muang hi.

²²Topa awng, Nang sungah lametna kong nei uh bangma in nong itna kip sia ko taw hong omkhawm tawntung taken.

Psalm Late 34

Pathian ii a Phatna Pokna

¹Topa tungah lungdam ka ko tawntung tu a, ama pokna ka tawlnga ngei buatu hi.

²Ama sepnate hangin ama ka pok tu a, a kizothaw theampo in ngai in lungdam taken.

³keima taw kopin Topa letna thangsak in, ama min pok khawm tek tawng.

⁴Topa tungah thu ka ngen a, ama in hong zo hi; ama in ka launa theampo panin hong suaktasak hi.

⁵A kizothaw theampo in ama mitsuan uh a, lungdam uh hi; amate in a thinkiam ngei ngawl tu hi.

⁶A cimawte in ama biakpui a, tuaciang ama in zo hi; amate ngimna theampo panin ama in hun hi.

⁷Topa a zaktate sia a vantung lalang in cing a, launa sung panin suatak hi.

⁸Topa sia bangza in pha ziam ci sia noma le noma in zong tavun. Ama sungah ngammuanna a ngate in mihing lungdamte ahi uh hi.

⁹Ama mihing theampo awng, Topa patoai vun; ama thu a ni te in a kitaangsap theampo nga uh hi.



¹⁰Tawpите ngangawn an neak tu samh in ngilkial thei a, ahihang Topa thu a nite in na pha bangma a kisamh bua uh hi.

¹¹A khangmoi ka lawmte awng, hong pai tavun a, hong ngai tavun, Pathian patoai tu zia kong hil tu hi.

¹²A nuamin na nungta nuam uh ziam? Khansauna le lungdamna na dei uh ziam?

¹³Tua ahile kam ngilo pauna le leilot thusonnate pan kikeam vun.

¹⁴Ngitlote nungngatin a pha vawt vun; na thin theampo uh taw kilemna a om natu in hanciam vun.

¹⁵Topa in thutangte encing a, amate aunate ngai hi;

¹⁶ahihang siatna a vawtte sia ama in langpan a, tua in amate a thi uh ciangin a kimakngil pal natu ahi hi.

¹⁷Thutangte in Topa biakpui uh a, ama in ngai hi; amate ngimna theampo panin suatak hi.

¹⁸Topa in a thinkiam mihingte taw a kinai in om a, lametna a nei nawn ngawlte hun hi.

¹⁹Miphate in ngimna tam mama thuak a, ahihang Topa in tuate theampo panin ama hun hi;

²⁰Topa in ama pha takin keam a, a ngute khat zongh tal ngawl hi.

²¹Ngitlona in mihing seksolpa that tu a, thutangte a ensante in daan thuak tu hi.

²²Topa in ama mite hun tu a, ama a bealte kikhoaikhe tu hi.

Psalm Late 35

Hu natu Thungetna

¹Topa awng, kei hong langpante na langpan in; kei hong dote na do in.

²Na lum le na thikpuante zam in kei hong suatak tu in hong pai tan.



- ³Kei hong delte sangah na tei le na hei hong vik tan a, kei nong hut natu kamciam hong pia tan.
- ⁴Kei hong tha sawmte in lelina le maizumna thuak taken a, kei hong thasawmte nungkin in lungmang taken!
- ⁵Topa vantung lalang in a del ciang amate sia vui ii taangphaw a letkeak bang hi taken.
- ⁶Topa vantung lalang in a vaat vawk laitakin amate lampi sia khuazing in leinaal taken.
- ⁷Bangma a hang om ngawl bulin amate in keima thaang hong sia hi, tuaciangin kei hong mat natu in vuum thuk khat to uh hi.
- ⁸Ahihang amate ii tel ma in, siatna thuak tu a, amate ii thaang sungah awkin lalna sungah taaksuk tu hi.
- ⁹Tuasia ciangin keima in Topa hangin ka lungdam tu hi; banghangziam cile ama in hong hun hi.
- ¹⁰Topa tungah “Nang bang ahi kuama om ngawl hi; a hatte khutsung pan a thazawmte na sungsia a, a zawngte sia a zothawte khut sung pan na hung hi” ka thin theampo taw ka ci tu hi.
- ¹¹Mi ngilote in kei langah tetti in hong ding uh a, ka heak ngawl khialna liante hong suan hi.
- ¹²Amate in a pha ka vawtte, a sia taw hong thuk a, thin kiamin ka topsuk hi.
- ¹³Ahihang amate a cinat uh ciangin khau-ip puan silhin ka heena taw an ka tang a,
- ¹⁴suapui laipee ahibuale ngualtamh khat atu thu ka ngetsak tu bangma in kun in thu ka ngen hi. A nu atu in a tau mihing khat bangin, tau in a kun sa in ka vavak hi.
- ¹⁵Ahihang ngim ka nga ciang amate lungdam siat a, hong selno tu in hong kikhawm uh hi; khual mite in hong vel a hong sasaat hi.
- ¹⁶Peangzawte nunau tu bangin amate in kei sia etsatna taw hong salh uh hi.



¹⁷Topa awng, bang tan vei, hong en thong lalai tu ni ziam? Amate ii hong simnate pan hong suatak tan a, hi tawpите panin ka nuntakna hong hun tan.

¹⁸Tuasia ciang na mipawlte kikhopna munah lungdam kong ko tu a, amate theampo mai ah nang kong pok tu hi.

¹⁹Tua a leilot thei ka ngalte sia kei ii lelna hangin hong enthawsak heak in. Bangma a hang om ngawl bul a kei hong ensante in kei ii khuangaina hangin lungdamna taw nuisansak heak in.

²⁰Amate in ngualtamh bangin zongh kipaupui ngawl hi; kilemna a dei mihingte taw kisai in, leilot thu a tuatuamte phuak tawm zawsap hi.

²¹“Nang bang seam cisia hong mu khu hi” ci in amate au in maw hong suan uh hi.

²²Ahihang, Topa awng, nangma in hite sia na mu sa ahi hi. Tua ahikom om thim heak in, Topa; a khuala na ah hong kiheam heak in!

²³Topa awng, nangma le nangma hong kithawn tan a, hong panpui tan; ka Pathian awng, hong tho tan a, ka thu hong sonsak tan.

²⁴Topa awng, nang sia thutang na hikom maw ngawl hi ci in hong pualaaksak tan; ka ngalte in kei tungah hong enthawsak heak in.

²⁵Amate le amate tungah, “Ama taw kipeal thei hing! Ih oai bang keak hi!” cisak heak in!

²⁶Kei thukna tungtaang ah a hong oiaamte lel kha ma in na lelsak in a, lungmang biaibuai taken; kei sangin pha a kisa zawte maizumna le min siatna in tuam taken.

²⁷Maw ngawl hi ci in kei tungah thukhensat natu a mu nuamte in “Topa bangza in lian ziam! Ama in a naseam pa ii zawna tungah lungkim hi.” ci in lungdamna taw au kikik taken.

²⁸Tuasia ciang na thutang ka thangsak tu a, nitangtum in kong pok tu hi.

Psalm Late 36

Mihing Seksolzia



¹Mihing seksol pa thinsung tawngah, mawna in thu son hi; Pathian nialin ama thasiana a nei bua hi.

²Ama le ama nasia mama kisa ahikom Pathian in a mawna musak ngawl tu a puavawkna thuaksak ngawl tu hi ci in um hi.

³Ama kampauna in seksolna le leilotnate taw kidim a, ama in ciimna le phatna taw seam nawn ngawl hi.

⁴Lupna tungah a lup laitak zong ngitlo vai veu ngealin nei hi; a sep pawpo a pha om ngawl a, a sia khat beak zongh nial ngei ngawl hi.

Pathian ii Phatna

⁵Topa awng, na itna kip in vantungte ban a, na thumaanna in vante ah kizelto hi.

⁶Na thutang sia mualpite bangin saang a, na thukhaikim khenna in tuiipi bangin thuk hi. Mihingte le nganhingte in nangma khoina sungah om hi.

⁷Pathian awng, na itna kip sia, bangza in manpha ziam! Na thakhui lim nuai ah kote in kidalna ka nga uh hi.

⁸Tam mama nong piak ante ne in nuam ka sa uh a, na phatna sia nguntui bangin nong dawnsak thei hi.

⁹Nang sia nuntakna theampo ii naak na hi a, nangma khuavak hu in khuavak ka mu uh hi.

¹⁰Nang hong hete sia it suak in a, a thutangte tungah a pha in hong seam suak tan.

¹¹Mihing kiphasakte in hong ngalvawtsak thei heak in a, mihing seksolte in hong notsak heak in.

¹²Mi ngilote liikna san en vun. Tua munah amate pukin thoto zo ngawl hi.

Psalm Late 37

Mihing Seksolte le Miphate Thet natu

¹Mihing seksolte hangin thinngim heak vun; khialna a vawtte eang heak vun.

²Amate in lopa ko bangin bo pal tu hi; thingno vulte bangin thi tu hi.



³Topa muangin ngamtat pha ngamta vun; tua leitangh tungah teangin ngammuang tavun.

⁴Na lungdamna uh sia Topa sungah zong vun, tuasia ciang ama in na lunggulna bang hong pia tu hi.

⁵Nangma le nangma Topa tungah ki aap in; ama muang in, ama in nang hong hu tu hi;

⁶ama in na thutang sia sun ni bangin hong taangsak tu hi.

⁷Thinsau in Topa sep tu ngak in; a nuamsate le a sia ngealna neite ii maa tutnate hangin thinngim heak vun.

⁸Thin ngimna le thin uukna na saang heak vun, tuate in ngimna sung hong then bek hi.

⁹Topa a muangte in ngam le lei a lua tu hi; ahihang a seksolte kinot keak tu hi.

¹⁰Hai ngawlin a seksolte hong bo tu hi; na zazon hangin na mu nawn buatu hi.

¹¹A kiniamkhiakte in ngam le lei lua tu a, nopsakna le thinnopna nga tu uh hi.

¹²Mihing seksolte in mihing phate thasawmin etsatna taw salh uh hi.

¹³Ahihang Topa in mihing seksolte nuisan lel hi, banghangziam cile amate hai ngawlin kilalcipsak tu hi ci in he hi.

¹⁴A zawngte le a cimawte thatlum nuam a, a maan na a seamte ngolum nuam in, mihing seksolte in a namsau dokin a thal uh keak uh hi;

¹⁵ahihang amate le amate a namsau uh taw ma kithatlum tu uh a, tuaciang a thal uh te laltham tu hi.

¹⁶Mihing pha khat ii tawmno khat a nei teng sia mihing seksol theampo ii hauna sangin manh neizaw hi,



- ¹⁷banghangziam cile Topa in a seksolte ii thahatna laaksak tu a, ahihang mihing phate sungsia tu hi.
- ¹⁸Topa in ama thu a nite khoi a, a ngam le a lei sia a tawntungin amate atu hi tu hi.
- ¹⁹Hunsia hong tun ciangin, amate in thuak ngawl tu uh hi; kialpi tun hunin a khom tu uh an nei tu hi.
- ²⁰Ahihang mihing seksolte thi tu uh hi; Topa ngalte sia ngamsung paakte bangin mangthang tu hi; amate meikhu bangin a bo tu uh hi.
- ²¹Mihing seksolte in leitoai in, lo kik ngei ngawl a, ahihang mihing phate in ngo takin pia hi.
- ²²Topa ii thupha a piakte in ngam le lei lua tu uh a, ama haamsiatna a thuakte ahile, kinotkeak tu hi.
- ²³Topa in mihing khat sia a pai natu lak a, ama a lungkimsakte hung hi.
- ²⁴Amate sia a puk zongin a topcip buatu uh hi, banghangziam cile Topa in phongto kik tu hi.
- ²⁵Tu in ka huai zo a, hunsau ma ka nungta zo hi. Ahihang mihing phakhat Topa in nusia ahibuale a tate khutdaw an ngenin vak ci thu ka mu ngei balai hi.
- ²⁶Amate in midangte tungah ol takin pia in, pukthaak tawntung a, tuaciang a tate sia a thupha saanna khat ahi hi.
- ²⁷Ngitlona panin kiheak vun a, a pha vawt vun, tuasia ciang na suan na paalte in tua leitangh tungah teang tawntung tu hi;
- ²⁸banghangziam cile Topa in a maan dei a, a thumaan a mihingte a nusia bua hi. Amate a tawntungin sungsia a, ahihang a seksolte ii suan le paalte sia kinotkeak tu hi.
- ²⁹Thutangte in ngam le lei lua in a sungah teang tawntung tu hi.
- ³⁰Miphate ii kammalte sia ciimkam hi a, thutang hi tawntung hi.



³¹Amate' Pathian ii thukham sia a thin sungah keam a, tua thukham panin a pial ngei bua hi.

³²Mihing pha khat sia mihing seksol khat in encik a thalup tu in hanciam hi;

³³Ahihang Topa in a ngalpa khutsa sungah a nusia buatu a, ahibuale thu a kisit ciangin mawputsakna a thuak buatu hi.

³⁴Topa tungah lametna nei vun a, a thupiakte ni vun; ngam le lei hong piakna taw ama in note hong patoai tu hi, tuaciang mihing seksolte a naw keak na mu tu hi.

³⁵Khatvei lai in mihing seksol ahi ngual a zo thaw ngawp thei khat ka he ngei hi; ama in Lebanon mualtung a cedar thingkung khat bangin ngual tungtuangin om hi;

³⁶ahihang ka pai kik ciang a na om nawn bua hi; ama ka zon hang ka mu zo bua hi.

³⁷Mihing pha pa ciamtee vun a, thutang pa entel vun; kilemna a nei pa in suan le paal zongh nei in,

³⁸ahihang mimawte sia kilal cimit sak siat a, a suan a paalte sia kimon siat hi.

³⁹Topa in mihing thutangte hun a, ngimna hun sungah amate sungsia hi.

⁴⁰Ama in amate hu a suatak hi; ama in mihing ngilote khut sung panin hun hi, banghangziam cile amate a sungsia tu in ama tuuh uh hi.

Psalm Late 38

Ngim Thuakpa khat ii Thungetna

¹Topa awng, na thin uukna taw daan hong pia heak in!

²Na thaltangte taw nong kaaliam zo a, nong vaatvawk zo hi.

³Na thin uuk hu in nasia takin a na ka thuak hi; ka mawnate hu in ka pumpi bup natna ka vei hi.

⁴Ka mawnate ii namthuam sungah tui ka ta zo hi; tuate kei puak tu in ngit lei hi.



- ⁵Ka mawmawt hu in ka meimate uih in muat hi.
- ⁶Keima bawng cip in, hong kisupeak zo a, sun khuateak in ka tau hi.
- ⁷Ka ci sa mama a suk in, ka thi dektak hi.
- ⁸Keima sia zawm dikdek in nasia tak hong kisupeak zo hi. Ka thinngim a, na sa in ka tau hi.
- ⁹Topa awng, nangma in ka thangai teng na he a, ka tauna theampo nong za hi.
- ¹⁰Ka lung peal ngam vasauh in ka tha bo vangeu a, ka mit zongh ciim vaset meal ngawl hi.
- ¹¹Ka meimate hangin ka lawmte le ka innpaamte in hong neak ngawl tu hi; ka innkuanpuite ngangawn zongh ka kung pan kiheam uh hi.
- ¹²Kei hong thatlum nuamte in thaang hong sia a; hong liamsua nuamte in susia tu in hong tawng hi; amate in kei hong thasawmna a tawp ngei bua uh hi.
- ¹³Kei sia nangong khat bangin khua ka za thei bua a, a ngoai khat bangin ka pau thei bua hi.
- ¹⁴Khua zaak thei ngawl man po ngual paupuina a zo ngawl khat taw ka kibang hi.
- ¹⁵Ahihang Topa awng, nang kong muang hi; Topa ka Pathian awng, nangma in kei nong zo kik tu hi.
- ¹⁶Ka ngalte sia kei ngim ngana tungah kisathei heak hen a, ka kiamsukna huvau in amate kisuangtaaksak heak in!
- ¹⁷Keima in a puk dektak ka hi zo a, tatsat ngawlin a na a bot ka thuak hi.
- ¹⁸Ka mawnate kong pualaak hi; tuate in ka thin hong ngimsak hi.
- ¹⁹Ka ngalte sia cidam in thahat hi; bangma thu om ngawl bulin hong ensan tam mama hi.



²⁰A pha khat a sia taw a thukte in in kei hong langpan hi; banghangziam cile a pha sep tu ka hanciam hang ahi hi.

²¹Topa awng, kei hong nusia heakin, ka Pathian awng, a khuala na ah om heak in!

²²Topa kei hong hunpa awng, tu tatak ma in hong hu tan!

Psalm Late 39

Ngimna Thuak khat ii Mawna Pualaakna

¹“Ka sep po kidawm in seam tong tuaciang ka leei zongh in mawna vawtsak ba tong; mihing ngilote hong nai laitakin bangma pau bua tong” ka ci hi.

²Ka thim a, kam khat zongh ka huthe bua hi, a phate ngangawn zongh ka son bua hi! Ahihang ka thuakna sia khang vaial bekin,

³ka thin ngim cip hi. Ka ngaisut a tam vaial ciang, ka thin ngim vaial a; hi bangin ngen ngawlin ka om thei bua hi:

⁴“Topa awng, bang tan vei nungta tu khi ziam? Bang hun ciang thi tu khi ziam? Ka nuntakna sia bang hun ciang bo paih tu ziam hong son tan.”

⁵Ka khan bangza in hong tomsak zo ni ziam! Nang muna ah kei khan khat sia bangma ngawl bang ahi hi. A tatak in a nungta mihing khat sia vui muut khat za hi bek a,

⁶lim khat bang hi lel hi. Ama sep le vawtte bangma in a kimang bua hi; ama in nei le lamh khawmtua ahitazong akua in lua tu ziam ci in a he bua hi.

⁷Tua ahile Topa awng, bang lamen thei tu khi ziam? Ka lametna in nangma sung ahi hi.

⁸Ka mawna theampo panin hong hun tan a, mihing mawmawte in hong nuisansak heak in.

⁹Thim takin ka om tu a, kam khat zongh ka huthe buatu hi, banghangziam cile hi bang a, hong thuaksak sia nangma na hi hi.

¹⁰Daan hong pia nawn heak in! Nong vuakna taw ka thi dek zo hi.



¹¹Ko mawnate sia teina taw daan nong pia hi, tuaciang ama itte sia nget ii neak bangin na lalsak hi! A takpi ma in mihing khat sia husan khat za kan ahi bua hi!

¹²Topa awng, kong thungetna hong za tan a, ka auna hong ngai tan; ka kaa ciangin kei hong hu tu in hong pai tan. Ka taangpupite theampo bangma in keima in tawmvei no sung atu bekin na leangna ka hi hi.

¹³Ka thi ma thinnopna tawm ka nga thei natu in keima nguak hong omsak tan.

Psalm Late 40

Pokna La khat

¹Topa huna nga tu in thinsau takin ka ngak hi; ama in hong ngai a ka auna hong za hi.

²Ama in a lauhuai dum sung le, sennawng sung panin hong kaito hi. Ama in suangpi tungah lau om ngawlin hong suanto a ngam muanna hong pia hi.

³Ama in Pathian pokna la thak sak tu khat hong hil a, ih Pathian pokna la khat ahi hi. Hi thu teng a mu mi tam mamate in kidop theina nga tu a, Topa tungah muanna nei tu uh hi.

⁴Milim sang zuan ngawlin ahibuale pathian maan ngawl a biate taw kop ngawlin, Topa a muangte in mihing lungdamte ahi uh hi.

⁵Topa kote Pathian awng, ko atu na tam mama nong sepsak zo hi; nang taw a kibang khat zongh om ngawl hi! Ko atu in a lamdang ngealnate tam mama nong vawtsak zo hi. Tuate sia tam lei ahikom a vekpi in ka son zo ngei buatu hi!

⁶Sangaw biakpiakna le piakkhiatnate na dei bua hi; biaknatau tungah nganhing pumhal tu nong ngen bua hi, tua ahibuale zong mawnate laak keak natu in sangaw biaknate nong ngen bua hi. Tuate taangin nang kong zaak thei natu in bil nong pia hi,

⁷tuaciangin, keima in "Hiak om khi hi; na thukham laibu sungah keima tu na thupiate om nginge hi.



⁸Na deina sep tu sia bangza in uuk khi ziam, ka Pathian awng! Nong hilmate ka thin sungah ka keam hi.” ci in ka zo hi.

⁹Topa awng, na mite theampo ii kikhopna sungah, kote nong ngupkhiat lungdamna thupha ka son hi. Tawp hun nei ngawlin ka son tu sia nong he hi.

¹⁰Ngupna thute sia keima aituum atu in bilh thong ngawl khi hi; na thumaanna le nong huna sia ka son tawntung zo hi. Na mite theampo kikhopna sungah na thumaanna le na itna kipte son ngawlin ka om bua hi.

¹¹Topa awng, kei nong hesuakna sia tawp ngei ngawl tu ci in kong he hi. Nong itna le na thumaanna in kei hong keamcing tawntung tu hi.

Hu natu Thungetna

(Psalm 70)

¹²Sim zawk zongh ahi ngawl ngimna tam mama in kei hong kiim uum hi. Khua mu thei ngawl za dongin, ka mawnate in, kei hong khunelh zo hi; amate ka samzam phaza sangin tam zaw a, ka thin kiamcip hi.

¹³Topa awng, kei hong hun tan! Tu ma in hong hu tan!

¹⁴Kei thalup tu hong sawmte lelna le buaina thuak siat taken. Kei ngimna hu a, a lungdamte sia nungkinin maizum thuak taken.

¹⁵Kei hong selnote amate ii lelna hu in a thin lal taken.

¹⁶Nang kung hong zuan theampo lungdam in thin nuam taken. Nong ngupkhiatna tungtaang ah a lungdam theite theampo in, “Topa bangza lian ziam” ci tawntung taken.

¹⁷Topa awng, kei sia thazawm in ka zawnghal a, ahihang nong mangil bua hi. Nang sia ka hunpa le ka Pathian na hikom, hong hu memeang tan!

Psalm Late 41

Cinat ciang Thungetna

¹Mizawngte a thin nuammawte sia mihing lungdamte ahi uh hi; amate ngim a nga uh ciangin Topa in hu tu hi.

²Topa in sungsia in a nuntakna uh kepsak tu hi; amate a ngam a lei sungah a lungdamsak tu hi; a ngalte khutsa sungah a nusiak buatu hi.



- ³A ci uh a nat ciang Topa in hu tu a, cidamna pia kik tu hi.
- ⁴“Topa awng, nang tungah kong maw zo hi; hong hesuak tan a hong damsak tan” kong ci hi.
- ⁵Ka ngalte in kei huvau kam ngilo pau uh hi. Amate in kei sia thi leng a hong ki mangil le oai uh hi.
- ⁶Kei hong ve tu a hong pai te zongh thin takpi hi ngawl hi; kei huvau thusiate khawmtua a, tua zawkciang pai in mun theampo ah son uh hi.
- ⁷Hong ensan theampo in kei hong ngenin khat le khat kihau uh a, kei taw kisai a sia bel teng ngaisut in nei uh hi.
- ⁸Amate in “Ama sia thi tu a na hi zo hi; a lupmun tung ngak top tu hi” ci uh hi.
- ⁹Ka lawm phabel, ka muan bel, ka ankuang uumpui sia ngangawn in kei hong langpan hi.
- ¹⁰Topa awng, hong hesuak tan a, cidamna hong pia kik tan, tuasia ciang ka ngalte ka thuk kik tu hi.
- ¹¹Amate in kei hong zo ngawl tu a, tuaciang nong lungkimpui hunlam ka he tu hi.
- ¹²Nangma in kei nong hu tu hi, banghangziam cile a maan sia ka seam hi; na omna mun ah kei nong keam tawntung tu hi.
- ¹³Israel Pathian Topa pok vun! Tu le a tawntungin pok vun! Amen! Amen!

Psalm Late 42

LAIBU A NIINA

(Psalm Late 42-72)

Ngamdang ah Saltang khat ii Thungetna

- ¹Pathian awng, sazuk in luitui vot wakil a thangai bangin, nang kong thangai hi.
- ²Nang a nungta Pathian sia tui du bangin kong thangai hi; bang hun ciang nang omna munah hong pai in hong bia thei tu khi ziam?



³“Na Pathian koi sungah om na ziam?” ci in ka ngalte ii hong dok hunsung bup, sun taw zan taw kapin ka thitui bek an in ka nei hi.

⁴A bo sa hun sungah lasakna le au na taw Pathian a pok a lungdam mihing hon khat keima in lampui in Pathian inn ah ka paina uh ka ngaisut ciangin ka thin tamtham hi.

⁵Banghangin taza in khuangai khi ziam? Banghangin taza in ngim nga khi ziam? Pathian sungah ka lametna ka koi tu a, ka hunpa le ka Pathian khat vei ma ka pok kik tu hi.

⁶⁻⁷Hi sung ka saltanna ah ka thin tamtham ahikom, ka ngaisutna te nang sang kong heak a, khuangai na tui hual te ka thaa sungah ama in hong puak hi; lungmanna te in namthuam bangin hong hawk a, Hermon mual le Mizar mual tung pan Jordan ngun dong tuiteau nging bang ahi hi.

⁸Ka nuntakna ahi Pathian tungah zanin la khat ka sak thei natu le thungetna khat ka nei thei natu in Topa in sunlai in a itna kip hong lak taken.

⁹Kei hong hungpa Pathian tungah, “Banghangin hong mangil zo ni ziam? Ka ngalte tatsiatna banghang thuak tan lai tu khi ziam?” ka ci hi.

¹⁰“Na Pathian sia koisungah om ziam?” ci in amate ii hong dadok ciangin amate ii hong lealnate in kei hong supeak hi.

¹¹Banghangin taza in khuangai khi ziam? Banghangin taza in ngim nga khi ziam? Ka lametna Pathian tungah ka koi tu a, ka hunpa le ka Pathian khatvei ka pok kik tu hi.

Psalm Late 43

Ngamdang ah Saltang khat ii Thungetna

(Psalm Late 42 taw a kizom)

¹Pathian awng, ka maw ngawlna thangsak in a, Pathian zia he ngawlte taw thu ka kineina uh pan hong hung tan. a leilot, a ngilo mihingte kung pan hong hunkhia tan.

²Nang sia kei hong dalpa na hi hi; banghangin hong nusia ni ziam? Ka ngalte ii tatsiatna banghang thuak tan lai tu khi ziam?



³Na khuavak le na thumaan thutak hong puak tan; tuate in na mual thiangtho Zion ah hong lampui taken a, na teenna na Biakinnpi ah hong then kik taken.

⁴Tuasia ciang na biaknatau ah kong pai tu hi, Pathian awng; nangma in ka lungdamna ii a naak na hi hi. Ka tengtong ka tum tu a, pokna la kong sak tu hi, Pathian, ka Pathian awng.

⁵Banghangin taza in khuangai khi ziam? Banghangin taza in ngim nga khi ziam? Ka lametna sia Pathian sungah ka koi tu a, ka hunpa ka Pathian khatvei ma ka pok kik tu hi.

Psalm Late 44

Kidal natu Thungetna

¹Pathian awng, ngei tawng lai in na sep na vawtte ka taangpupite in hong son zo a, ka bil uh taw ka za zo uh hi:

²Nangma mama in Pathian he ngawlte bangbang na notkeak a, amate leitangh tungah na mite na koina thu; bangbang minam dangte daan pia in na mite na khantosakna thu ka za uh hi.

³Na mite in tua leitangh sia amate namsau taw zothal hi ngawl hi; amate vaangletna taw a zo hi ngawl hi; nangma vaangletna le thahatna taw ahizong, nangma ompuina a telna taw ahizong a zo hi a, tua in amate na itna na lakna ahi hi.

⁴Nangma in ka kumpipa le ka Pathian na hi hi; na mite tungah zawna na pia a,

⁵tuaciangin nangma vaangletna taw ngalte ka zo uh hi.

⁶Kei hong hun tu in ka thal ahibuale ka namsau ka muang bua hi;

⁷ahihang nangma in ka ngalte panin nong hun zo a, hong ensante na zo zo hi.

⁸Nang kong pok tawntung tu a, a tawntungin lungdam kong ko tu uh hi.

⁹Ahahang tu laitakin nong nial a lelna nong thuaksak hi; ka ngalkap honte nong tonpui nawn bua hi.

¹⁰Koma ngalte kung panin nong taisak a, ko neisate amate atu in la uh hi.



- ¹¹Tuute bangin nong kingolumsak hi; ngamdang ah nong thethaang hi.
- ¹²Bangma manh a nei lei ngawlte bang phetin na mite takpi manh tawmno taw nong zuak zo hi.
- ¹³Ka innpaamte in ko tung a nong ngamatatna teng hong mu a, amate in ko hong selno in hong nuisan uh hi.
- ¹⁴Minam tuatuamte sungah ko sia ngual zawnsak tu in nong koi hi; amate in a lu uh hong thin in hong nunau uh hi.
- ¹⁵Kei sia a tawntungin minsiat ka thuk hi; maizumna in hong khunel hi,
- ¹⁶ka ngalte le hong ensante ii hong nunauna le hong lealna ka zaak ciangin ka mai zumna in hong khulum hi.
- ¹⁷Nang hong mangil ngawl ahibuale ko taw na vawt thuciamna paltan ngawl hi napi, hi bangte ko tungah hong piang siat zo hi.
- ¹⁸Nang tungah thumaan ngawlin ka om ngei bua uh hi; nong thupiakte kong nial bua uh hi.
- ¹⁹Tua hi napi ngamsate kawm ah a cimaw in nong nusia hi; a thuk bel khuazing sungah nong nusia hi.
- ²⁰Ka Pathian kong biakna tawlinga hi le ung a, ngamdangte pathian tungah thungen hi le ung,
- ²¹hong mu tatak zo tu ni hi, banghangziam cile ka ngaisut kute dongin nong he siat hi.
- ²²Ahihang nang hu in kote thalupna ka thuk tawntung uh a, ngawlup tu tuute bangin hong kivawt hi.
- ²³Topa awng, hong khanglo tan! Banghangin mu ni ziam? Nangma le nangma hong thoto tan! A tawntungin ko hong nial heak in!
- ²⁴Banghangin ko kung panin buu ni ziam? Ka thuakna uh le ka ngimnate uh hong makngilsak heak in!
- ²⁵Lei ah pukin ka topcip zo uh hi; leivui sungah lelma taw ka liik zo uh hi.



²⁶Ko hong hu tu in hong pai tan! Nong itna kip hangin hong hun tan!

Psalm Late 45

Kumpi Mo Kiteenna La

¹Kumpipa atu hi la ka phua laitakin ka khua ngaisutna in kammal hoi nano taw kidim hi. Lai at thiampa laikung bangin ka leei sia lamal phuak tu in kinging hi.

²Nangma in pasal a minpiang a meal phabel na hi hi; kampau thiam in a paupa na hi hi. Pathian in nangma thupha hong pia tawntung hi.

³Vaang nei Kumpipa awng; na namsau hong kua tan nangma in minthang in uk zawkna vaang nei ni hi.

⁴Thumaan le thukhaikim khenna a huu tu in zawna sungah na uk theina vaang taw hong pai tan. Na thahatna in zawna lianpite hong ngasak tu hi.

⁵Na thaltangte hiam a, na ngalte lungtangte vutlet hi; minam tuatuamte in na peang ah puksuk hi.

⁶Pathian hong piak kumpi ngam in a tawntung pan a tawntung dong kikhomsuan tu hi. Na mite thukhaikim taw na uk hi;

⁷a maan na dei a, a siate na ensan hi. Tua hu in nangma ii Pathian in nang hong teal zo a, kumpi dang khat po sangin na tungah lungdamna a tamzaw hong buak zo hi.

⁸Myrrh le aloe a namtuite thau, na puan tungah nam hi; saiha taw a kizeam kumpi inn sungah music thiamte in nang hong lungdamsak hi.

⁹Na suumsung sang a om numeite sia kumpite tanute veu hi a, tuaciang na kumpi tokhum ziat sangah kumpinu dingin, ama in kham phabel taw a kivawt kizepnate taw kizeam hi.

¹⁰Kumpipa zi tu monu awng, kong thuson sia ngai in, na mihingte le na bete mangil in.

¹¹Na meal phatna hangin kumpipa in hong dei tu hi; ama in na Topa ahikom ama thu na ni tu hi.



¹²Tyre mihingte in nang atu letsong hong paipui tu hi; sumhaute in maipha na piak tu hong hanciam tu hi.

¹³Kumpipa tanu kumpi inn sungah om hi— ama bangza in a mealpha ziam! A puantual sia khamkhau taw kitak hi.

¹⁴Mealci tuatuam a nei puantual pawl silh in kumpipa kungah ama kipaipui a, ama a zui moliata zongh kumpipa kungah kipaipui hi.

¹⁵Lungdamna le lungnopna taw amate hong pai a kumpipa inn sungah hong tum uh hi.

¹⁶Nang ka kumpipa in, na taangpupite kumpiza a laih tu tapa tam mama na nei tu hi. Tuaciang amate sia leitung bup a ukte na suaksak tu hi.

¹⁷Ka laphua in na minthanna sia a tawntungin nungtasak tu a, mihing theampo in hong pai lai tu hun theampote sungah nang hong pok tu hi.

Psalm Late 46

Pathian Ei taw Omkhawm

¹Pathian in ih belna le ih thahatna hi a, ngimna hun sungah hong hun tu in a kinging sa in om tawntung hi.

²Tua ahikom leitung keak a ngawk ngawp a mualte tuipi thuk sungah a kisep hial zong;

³tuipite hawkin kilok a, mualte liing ngawp le zong ih lau buatu hi.

⁴A thiangtho a Saangbel Pa inn, Pathian khuapi a lungdamsak ngun khat a om hi.

⁵Pathian in tua khuapi sungah om a, tua khuapi a lal ngei buatu hi; zing khuavak tuungin a hu tu in ama hong pai tu hi.

⁶Minamte lau uh a, kumpi ngam liinglawng hi. Pathian awngingin, leitung tuitham hi.

⁷Topa Vaanglianbelpa in ei taw omkhawm hi; Jacob Pathian sia ih bukna ahi hi.



⁸Pathian ii sep sa le vawt sate en tu in hong pai tavun; leitung ah a vawt na lamdangte en in.

⁹Ama in leitung theampo ah ngal kidonate thimsak hi; ama in thalkawngte thiaktan a, teite susia in, lumte haltham hi.

¹⁰“Kisim kidona tawp vun a, Pathian ka hina hong tel tavun, minamte ii sungah a lianbel le leitung ii tungsia ah a lianbel ka hi hi” ci hi.

¹¹Vaanglianbelpa Topa in ei taw hong omkhawm hi. Jacob Pathian sia ih bukna ahi hi.

Psalm Late 47

A Lianbel Ukpa

¹Lungdamin na khut uh beang vun, mihing theampo awng! A nging lasaknate taw Pathian pok vun!

²Topa a Saangbel Pa sia kiitak tu ahi hi; Ama in leitung theampo a uk kumpilian pa ahi hi.

³Ama in mihingte tungah zawna ei hong pia hi; minamte hong uksak hi.

⁴Hong it ama mihingte ii kiphatsakpui tu neisa ahi ih teenna leitangh sia ama in hong tealsak hi.

⁵Pathian in ama kumpi tokhum zuan to hi. Topa pai to laitak lungdamna taw auna le lemle awte nging hi.

⁶Pathian tungah pokna la sa vun; ih kumpipa tungah pokna la sa vun!

⁷Pathian in leitung theampo ii kumpipa ahi hi; lasaknate taw ama pok vun.

⁸Pathian in a thiangtho ama kumpi tokhum tungah to hi; ama in minamte uk hi.

⁹Minam tuatuam a ukte in Abraham Pathian ii mite taw hong kikhawm uh hi. Ngalkap hon theampo sangin ama thahat zaw hi; a lianbel in ama maang hi.

Psalm Late 48

Pathian Khuapi Zion



- ¹Topa in lian a ih Pathian khuapi sung le a mual thiangtho tungah nasia takin pok tu ahi hi.
- ²Zion, Pathian mual sia, saangin hoi hi; kumpi lianpa khuapi in leitung theampo lungdamna hong puak hi.
- ³Pathian in a khuapi kulhte sungah ngam muanna om hi ci in lak hi.
- ⁴Kumpite kikhawmtua in Zion Mual sim tu in hong kuan hi.
- ⁵Ahihang tuasia a mu uh ciangin lamdang sa hi; amate lau in taikeak uh hi.
- ⁶Tua munah amate sia launa le thin ngimna taw nausuak tu a tun numei khat bang hi a,
- ⁷lauhuai vuipi suangval sungah a kilok teambawte taw kibang hi.
- ⁸Pathian vawt sa le sep sate ih zaak sa hi a, tu in Vaanglianbel Topa ih Pathian khuapi sungah tuate ih mu zo hi; ama in tua khuapi sia a tawntungin keamcing tu hi.
- ⁹Pathian awng, na Biakinnpi sungah, nong itna kip ka ngaisun uh hi.
- ¹⁰Mun theampo ah nang hong kipok a, leitung theampo ah na minthanna kizel hi. Thukhaikim khenna taw nangma in na uk hi;
- ¹¹Zion mihingte lungdam taken! Nangma in a maan thukhennate na pia hi; Judah khuapite sungah lungnopna om taken!
- ¹²Pathian mite awng, Zion kiimkot ah pai vun a, ngalvilna tusaangte a phak za sim vun;
- ¹³ khang kikte tungah na son thei natu in luphungte le kulhpite ciamtee in, veal vun a, hi bang ci vun:
- ¹⁴“Hi Pathian in a tawntung pan a tawntung dong atu eite Pathian ahi hi; hong pai lai tu hunte theampo sungah ama in eite lam hong pui tu hi.”

Psalm Late 49

Haunate tungah Muanna sia Mawmawtna

- ¹A kuama po in hi thu za vun! Mun theampo a om mihingte awng,



- ²A lian, a no, a hau, a zawng a kibangin ngai khawm tek vun.
- ³Ka ngaisutte kitel thiang tu hi; ciimna kammalte ka pau tu hi.
- ⁴Paunakte kong zangh tu a tengtong ka tum ciang a khiakna kong sontel tu hi.
- ⁵Ka ngalte in hong kiim uum a, launa hun sungah ka om ciang ka lau bua hi.
- ⁶A hauna uh muangin a neisate uh a kiphatsakpui mihing ngilote in hong kiim uum hangin ka kiita buatu hi.
- ⁷Mihing khat in ama le ama kitan thei ngei ngawl hi; a nuntakna ii manh Pathian tungah banghang lo zo ngei ngawl ziam cile,
- ⁸mihing khat nuntakna ii manh sia tam lei hi.
- ⁹Thaankuul a thet ngawl natu le tawntung nuntak natu in ama piak thei tute a kicing ngei buatu hi.
- ¹⁰Mihing mawmawte le a nanghte bangma in mihing a ciimte ngangawn zongh thi hi ci in a kuama theampo ii muthei ahi hi. Amate theampo in a hauna uh sia a suan a paalte nusiat hi.
- ¹¹Amate thaankuulte sia a tawntungin a inn uh ahi hi; amate in leitanghte nei ngeai ahihang tua munah a tawntung teang uh hi.
- ¹²Mihing khat ii letna in thina panin ama hun thei ngei ngawl hi; ama sia nganhingte bangin thi lai tu hi.
- ¹³A hauna uh taw a lungkimte pianzia le amate le amate a kimuangte bang tawk ziam ci sia en vun—
- ¹⁴amate sia tuute bangin a thi tu in kisee a, Thina sia amate tuucing pa a hi tu hi. Amate pumpi sia manlang takin muatin amate ii inn taw a kikhuala mithi khua ah a om uh ciang thutangte in amate tungah zawna mualsua tu hi.
- ¹⁵Ahihang Pathian in kei hong suatak tu hi; thina vaangletna panin kei hong hun tu hi.



¹⁶Mihing khat a hau ciang le ama haunate a khan seseam ciang zongin na thin nuammaw heak vun;

¹⁷ama in a thi ciangin keng thei tuan ngawl hi; a hauna sia ama in thaan ah tonpui thei ngawl hi.

¹⁸Mihing khat in hi nuntakna sungah lungkim in ama zawnate hu in kipok kale,

¹⁹ama in thi in a tawntung khua zingna mun a taangpupite kung zuan tu hi.

²⁰Mihing khat ii letna in thina panin ama hun zo ngei ngawl hi; ama sia nganhingte bangin thi lai tu hi.

Psalm Late 50

Biakpiakna Tatak

¹Vaanglianbel Pathian ahi Topa hong pau hi; ama in leitungbup niswana le nitumna kilaklaw ah a om theampo khawm hi.

²A hoina taw a kicing Zion khuapi panin Pathian vaang hong taang hi.

³Eite Pathian hong pai laitak hi a, ahihang a thimtham in hong pai bua hi; ama mai ah a lengkeak meikuang om a, vuiپی suangval in a kiim uum hi.

⁴Ama in a mite tungah thu a khen ciangin a tetti tu in van le lei sam hi.

⁵Ama in, “Sangaw biakpiakna nei in, kei taw thuciamna a vawt, a thumaan ka mihingte kei kungah hong khawmtua tavun” ci hi.

⁶Vantungte in Pathian sia thutang a, ama in thukhen pa ma hi ci in thangsak hi.

⁷“Ka mihingte awng, na ngai vun, hong son tu khi hi; Israel te awng, note langpanna tetti pang tu khi hi. Kei sia Pathian ka hi a, note Pathian ka hi hi.

⁸Na sangaw biakpiaknate hu le nong piak tawntung uh meihal biakpiaknate hu in kong mawsak bua hi.

⁹Na lo sung pan na khuitalte ahizong, na nganhon sung pan kealte ahizong ka kitaangsamh bua hi;



¹⁰duisung nganhing theampo le mual tul tam mamate tungah nganhonte sia keima aa ahi hi.

¹¹Ngamsung vacimte theampo le nuntakna a nei theampo zongh keima neisa ahi hi.

¹²“Ka ngil a kial le nang tungah an kong ngen buatu hi, banghangziam cile leitung le a sungah om na theampo sia keima neisa ahi hi.

¹³Khuitalte ii sa ne in, ahibuale kealte ii chi dawn na khi ziam?

¹⁴Pathian tungah lungdamkona sia nangma sangaw biakpiakna hi zaw taken, Vaanglianbelpa tung piak tu a, na kamciam bang pia siat in.

¹⁵Ngimna hong pai ciangin keima hong ko tavun; Noma kong hun tu a kei nong pok tu uh hi.”

¹⁶Ahihang Pathian in mi seksolte munah, “Banghangin ka thupiakte lotnga nu ziam? Banghangin ka thuciam sia thu sonin nei tu nu ziam?

¹⁷No kong puaphat tu nong oai bua uh a, ka thupiakte na nial uh hi.

¹⁸Nguta na mu theampo ii lawm na hi uh a palngul mawneite taw na kipawl uh hi.

¹⁹Ngitlona thuson tu in a tawntungin a kinging sa in na om uh hi; Leilot thute na son thada ngei bua uh hi.

²⁰Na suapuute uh maw siat tu in na kinging uh a, a khialna tu na zong uh hi.

²¹Hite theampo na sep uh hangin zongh, bangma kong ci ngawl hu in, kei sia noma taw a kibangin nong tuat uh hi. Ahihang tu in kong mawsak a, a thu kong telthiangsak hi.

²²“No, kei hong ngaingonte awng, hi thu ngai vun, tua ahibuale kong susia tu hi, tuaciang no hong hun tu kuama a om buatu hi.

²³Lungdamkona sia kei vaang hong pia sangaw biakpiakna hi a, kei thu hong nite theampo ka hun takpi tu hi” ci hi.

Psalm Late 51



Mawmaisak Thungetna

- ¹Pathian awng, nong itna kip hu in kei hong hesuak tan, A lian na hesuakna hu in ka mawnate hong melsak tan!
- ²Ka ngitlona theampo hong silsak tan a, ka mawna panin hong thiangthosak tan!
- ³Ka tatkhialnate ka he a, ka mawnate ka phawk tawntung hi.
- ⁴Nangma mama tung bek ah hong maw zo khi hi, a sia na sakte ka ngamta zo hi. Tua ahiciangin, na thu sonna ah thu nong khenna sia maan hi; kei nong mawsak sia khial ngawl ni hi.
- ⁵Ka pian ni pan ma in a sia ka hi hi; ka nu ngil sungah ka omlai pan ma in mimaw ka hi zo hi.
- ⁶Thintakna le thumaanna sia na dei thu ahi hi; ka khua ngaisutna sia na ciimna taw hong dim tan.
- ⁷Ka mawna hong laakkeaksak tan, tua hile ka thiangtho tu hi, hong sil tan, tua hile vuuk sang ka ngo zaw tu hi.
- ⁸Thin nopna le lungdamna awte hong zasak tan; na delpeak, na sukthap sa ka hi tazong khatvei ma ka lungdam kik tu hi.
- ⁹Ka mawnate hong etsak heak in a, ka siatnate theampo hong melmaisak tan.
- ¹⁰Pathian awng, ka sungah thin thiangtho hong bitphua tan a, a thak le a thumaan thaa hong nguan tan.
- ¹¹Na omna mun panin hong beng heak in; ka tung panin na thaa thiangtho lakeak heak in.
- ¹²Na ngupna tungtawn a hong pai lungnopna sia hong pia kik tan a, na thu a ni nuam tu in hong siam tan.
- ¹³Tuasia ciangin mimawte sia nangma thupiakte ka hil tu a, amate in nang hong zuan kik tu uh hi.
- ¹⁴Pathian awng, ka nuntakna hong khoaikhe tan a, hong hun tan, tuaciang thutang na hina lungdam takin ka thangsak tu hi.



¹⁵Topa awng, ka pau thei natu in hong hu tan, tuaciang nangma kong pok tu hi.

¹⁶Sangaw biakpiaknate na dei bua hi, tua hi buale tuate kong pia zo tu hi; meihal biakpiaknate taw na lung a kim zo bua hi.

¹⁷Pathian dei sangaw biakpiakna sia a kiniamkhiak thinsung ahi hi; Pathian awng, a kiniamkhiak le a kisiik kik thinsung na nial bua hi.

¹⁸Pathian awng, Zion tungah thuthiam in na hu in; Jerusalem luphungte na ciangto kik in.

¹⁹Tuasia ciang a kilawm sangaw biakpiaknate le koma ii meihal biakpiaknate dik na sa tu hi; tuaciang na biaknatau tungah khuitalte biakpiakna in kinei tu hi.

Psalm Late 52

Pathian Thukhenna le Thuthiamna

¹Milian pa awng na ngitlona hu in banghangin kisuangtaak ni ziam? Pathian thumaanna sia a tawntungin kip hi.

²Ngualdangte lal natu in na ngeal uh hi; na leei sia mulnam hiam khat taw kibang a, leilot thu na phuaktawm tawntung uh hi.

³Siatna sia phatna sangin na lamnai zaw uh a, thumaan sangin a maan ngawl thu na deizaw uh hi.

⁴Nang a leilot thei sia awng, na kammalte taw mite thin natsak tu thanuam ni hi.

⁵Tua ahikom Pathian in nang sia hong lalcipsak top tu hi; ama in nang hong man tu a, na inn panin hong tua tu hi; a nungtate omna leitung panin nang hong khiin tu hi.

⁶A thutangte in hi sia mu tu a, amate lauthawng tu uh hi; tuaciang amate in nang hong nuisan tu a,



⁷“En vun, ngammuan natu Pathian a suang ngawl, hi sungah mihing khat om a, ama in a nei a lamh tampite suang a, seksol ngamtatna taw ngammuanna zon a sawm zaw hi,” hong ci tu uh hi.

⁸Ahihang kei ka hile Pathian inn sung ah a po olive thingkung bang ka hi hi; ama ii a hong itna kip sia a tawntung a tawntungin ka muang hi.

⁹Pathian awng, na sep sa nate hu in lungdam kong ko tawntung tu hi; na mite omna munah nang sia pha na hi hunlam ka thangsak tu hi.

Psalm Late 53

Mihingte Seksol Khansiatna

(Psalm Late 14)

¹Mihing mawmawte in, “Pathian om bo!” ci uh hi. Amate theampo siatna khaatna taw kidim siat a, a cizathuai nate seam zo uh hi; a maan a seam kuama a om bua hi.

²Mihing khat po a ciim a om ziam, ama a bia khat po a om ziam ci in, Topa in vantung panin mihingte ensuk hi.

³Ahihang amate lampial siat zo uh hi; amate a kibang in sia siat hi. A maan a ngamta khat zongh om ngawl, khat beak zongh om ngawl hi.

⁴“Ama te in he ngawl ziam?” Topa in dongh hi. “Hi a tatsiate in heakna nei ngawl ziam? Amate in ka mite neisa sutolna taw nungta a, kei tungah zongh thu hong ngen ngeingawl hi.”

⁵Ahihang amate in nidangin a thuak ngei ngawl launa nasia thuak tu uh hi, banghangziam cile Pathian in a mite ii ngalte ii ngute sia thethaang tu hi. Pathian in amate nial zo ahikom, Israel in amate zothal siat tu hi.

⁶Zion panin Israel te ii zawna hong pai natu in bangza in thungen khi ziam. Topa in Israel te a khantosak kik hun ciang bangza in amate lungdam tu ziam!

Psalm Late 54

Ngaldal natu Thungetna



¹Pathian awng, na vaangletna taw hong hun tan; na thahatna taw hong suatak tan!

²Pathian awng, kong thungetna hong za tan; ka kammalte hong ngai tan!

³Mihing kiphasakte in kei hong sim tu in hong kuan hi; Pathian a awlmawk ngawl mihing ngilote in kei thalup tu in hanciam hi.

⁴Ahihang Pathian in kei hong hupa hi. Topa in kei hong hungpa ahi hi.

⁵Pathian in amate ngitlona sia ka ngalte daan piakna in nei taken. Ama in amate sucip tu hi, banghangziam cile ama thumaan hi.

⁶Topa awng, lungdam takin sangaw biakpiakna khat kong pia tu hi; lungdam kong ko tu hi banghangziam cile nangma na pha hi.

⁷Ka ngimnate theampo sung pan nong suatak zo a, ka ngalte a kizaw sia ka mu zo hi.

Psalm Late 55

A Lawmpa ii Leeheak thuak khat Thungetna

¹Pathian awng, ka thungetna hong za tan; kong thuumna panin hong nungngat heak in!

²Hong ngai tan a hong zo tan; ka thin ngimna taw zawmcip zo khi hi.

³Ka ngalte hong tawna hu in ka lau a, mihing seksolte hong zawthawkna hangin ka topcip zo hi. Amate in ka tungah ngimna hong puak hi; amate kei tungah hong thin uukin hong ensan hi.

⁴Ka lau mama a, thi tu launa in hong nengcip hi.

⁵Liinna le launa in kei hong leencip hi; thalauna in kei hong zo hi.

⁶Vakhu bangin tha nei leng ka uuk hi. Leangin tawngakna ka mu tu hi.

⁷A khualana ah ka leang tu a, dui sungah ka teang tu hi.

⁸A thin uuk vuipei suangvalte panin bukna khat manlang takin ka mu tu hi.

⁹Topa awng, ka ngalte kampau uh hi bialbualsak in. Khuapi sungah, ngoltolna le buainate ka mu hi.



- ¹⁰Sun taw zan taw tua khuapi kiim uum uh a, tua khuapi sia khut khialna le ngimna taw kidimsak uh hi.
- ¹¹Mun theampo ah lalna om hi; lampite sia zawthawkna le kitheamna taw kidim hi.
- ¹²Kei hong nunau sia ngal ahile thuak zo tu khi hi; kei hong langpan khat ii hong kisuantaakna ahile ama kung panin ka kiseal thei tu hi.
- ¹³Ahihang tuasia in ka kitholpui, ka pawl, ka lawm cii pha ahi nangma hi thong ni hi.
- ¹⁴Khat le khat sia thu ih kumkhawm a, Biakinnpi sungah ih bia khawm hi.
- ¹⁵Ka ngalte sia amate hun a cin ma in thi taken; mithi khua ah amate a hingtang in zuansuk taken! Siatna sia a innsung le a thinsung uh ah om hi.
- ¹⁶Ahihang hong hu tu in Topa Pathian ka sam a, tuaciang ama in kei hong hun tu hi.
- ¹⁷Zingsang, sun le zan in ka thuumnate le ka taunate ama kungah paito a, tua ahikom ama in ka aw hong za tu hi.
- ¹⁸Ngal taza ta ka simnate pan ama in kei bit takin hong siapui kik tu hi.
- ¹⁹Tawntung hun pan a, hong uk Pathian in kei hong za tu a, amate a zo tu hi; banghangziam cile amate kikheal nuam ngawlin, ama a kiita bua uh hi.
- ²⁰Tu ma sia a, ka kitholpui pa in a lawmte sim hi; a kamciamte a peal hi.
- ²¹A kammal ahile noaidiat sangin neal zaw ahihang, a thin sungah etsatna om hi; a kammalte sia sathau bangin neal a, ahihang tuate in namsau hiamte bangin bantan hi.
- ²²Na ngimna uh te Topa nusiata vun, tua hile ama in hong hung tu hi; ama in mihing thumaante bangma hun in lelina thuaksak ngei ngawl hi.
- ²³Ahihang, Pathian awng, mihing thatte le a leilotte nangma in amate khanlang a cin ma in a thaankuulte ah na paipui tu hi. Kei ka hile nang kong muang tu hi.



Psalm Late 56

Pathian Muanna Thungetna

¹Pathian awng, Kei hong hesuak tan, banghangziam cile kei hong kisim hi; ka ngalte in a tawntungin kei hong siatvawt hi.

²Kei hong langpante in nitangtum in kei hong sim hi. Kei hong simte tam mama hi.

³Vaanglianbelpa Topa awng ka lau ciang, ka muanna nang sungah kong nga hi.

⁴Pathian ka muang a, ka lau bua hi; ama hong kamciam hu in ama ka pok hi. Mihing lelel khat in kei bang hong law thei tu ziam?

⁵Ka ngalte in nitangtum in ngim hong pia hi; kei hong liamsua natu in amate in ngeal tawntung hi!

⁶Amate in a buliana munte ah kikhawm in, hong thatlum thei tu in ki um uh a, ka ngamtatna theampo hong encik hi.

⁷Pathian awng, amate ngitlona hu in amate daan pia in; na thin uukna taw tua mite zothal in.

⁸Bangza in ngim nga ka hi sia nong he hi; nangma in ka thituite nong tepteesak zo hi. Na laibu sungah tuate kiciamtee hi ka na ngawl ziam?

⁹Nang kong sam ni in ka ngalte kiheak kiksak tu hi. Hi thu ka he hi: Pathian sia keima sangah hong pang hi.

¹⁰Ama in a kamciamte ka pok Topa ahi hi.

¹¹Ama ka muang a, ka lau buatu hi. Mihing lelel khat in kei bang hong law thei tu ziam?

¹²Pathian awng, kong kamciam sa sia kong pia tu hi; lungdamko piakkhiatna kong pia tu hi,

¹³banghangziam cile nangma in thina panin nong suatak a, lelna panin nong keam hi. Tua ahikom Pathian omna, a nungtate tung a taang khuavak sungah ka vak hi.



Psalm Late 57

Hu Natu Thungetna

¹Kei hong hesuak tan, Pathian awng, kei hong hesuak tan, banghangziam cile ngammuanna nga natu in nang kong tu hi. A nasia mama vuipei suangvalte thim dong na thakhui lim nuai ah kidalna ka nga hi.

²Saangbel Pathian, ka kispna theampo hong pia Pathian ka biakpui hi.

³Ama in vantung panin hong zo tu a hong hun tu hi; kei hong zothawte ama in zothal tu hi. Pathian in a itna kip le a thumaanna kei hong lak tu hi.

⁴Ngalte in kei hong kiim uum a, amate sia mihing sa a du tawpите bang ahi uh hi. Amate ii hatangte sia tei bang thaltang bang ahi uh hi; amate ii leeite sia a hiam namsau bang ahi uh hi.

⁵Van ah na letna lak in Pathian awng, leitung theampo ah na minthanna lak in.

⁶Ka ngalte in kei hong mat natu in ngen khat phal hi; thin patauna taw ka kidim hi. Amate in ka lampi ah vuum khat to uh a, ahihang amate ma tua sungah taaksuk uh hi.

⁷Pathian awng, muanna kicing ka nei hi; la ka sa tu a, nang kong pok tu hi!

⁸Ka thaa awng, khanglo in! Ka tengtong le ka liamlo awng, hong khanglo tavun. Tung sunni ka phong tu hi.

⁹Topa awng, minam tuatuamte sungah, lungdam kong ko tu hi. mihingte sungah nang kong pok tu hi.

¹⁰Na itna kip in vantungte ban hi; na thumaanna in van dong pha hi.

¹¹Na letna van ah lak in, Pathian awng, na minthanna leitung theampo ah lak in.

Psalm Late 58

Mihing Seksolte Daan Piak tu Thungetna

¹No ngamukte in a maan khensatna na pia ngei uh ziam? Mihing theampo tungah thutang in thu na khen uh ziam?



²Khen ngawl nu hi! a sia na vawt thei tu uh teng bekma ngaisun uh a, tuaciang ngam le lei ah ngoltol khialna liante vawt nu hi.

³Mihing ngilote in a khan tawntung ngamtatna maan ngawl taw nungta uh hi; a pian ni pan kipan leilot thuson uh hi.

⁴Amate sia ngulte bangin ngu taw kidim hi; amate in ngulsok nangong bangin a bil uh hu hi,

⁵tuante in ngul zol thiamte aw le za ngawl, mitbum thiamte phuisamna le za ngawl uh hi.

⁶Pathian awng, hi a kiitak huai tawpите ii hate thiaktan in.

⁷Leisung tui tum bangin amate mang vadi taken; lam lai lopate bangin kisiikcil taken.

⁸Amate sia buan ii khulup toktolte bang hi taken; khuavak a mu ngei ngawl a thi sa a suak nausen khat bang hi taken.

⁹Amate in zongh tel man ngawlin lopa bangin kivaattan hi; a lauhuai thin uukna taw Pathian in amate a nuntak lai ma in muutkeak tu hi.

¹⁰Mawneite daan a kipiak a mu uh ciang thutangte lungdam tu hi; amate in a seksolte chisan sung tan tu uh hi.

¹¹Mihingte in “Thutangte sia noptuam kipia takpi hi; Leitung ah thu a khen Pathian khat om takpi hi,” a ci tu uh hi.

Psalm Late 59

Hong Kepcing natu Thungetna

¹Ka Pathian awng, ka ngalte khut sung panin hong hun tan; kei hong simte kung panin hong dal tan!

²Tua mihing ngilote kung panin hong hun tan; tua mihing thatte kung pan hong suatak tan!

³En in! Amate in kei that tu in hong pang hi; mihing tatkhat ka langah hong kikhawmtua uh hi. Amate ii tuabang a, manlang tak a kei hong sim natu mun a zot uh sia, mawna khat po hang ahibuale ka tatkhialna khat po hang ,



⁴tua ahibuale keima ii kicin laakna khat po hang zongh hi ngawl hi, Topa awng.

⁵Tho in, Topa Vaanglianbelpa Pathian awng, kei hong hu tu in hong kuan tan; Israel Pathian awng, nangma ma in en in! Khanglo in, Pathian he ngawlte daan pia in; a ngilo ngual leeheak theite tungah hesuakna lak heak in!

⁶Amate in nitak sangin hong heak kik a, ui bangin ngual ngalh a, khuapi sungah vak kakoai uh hi.

⁷Amate ii hong lealnate le hong tawnnate ngai in. Amate ii kam sungah om a leei sia namsau taw kibang ahitazong, kuama in amate pau za ngawl tu in um uh hi.

⁸Ahihang Topa awng, nangma in amate na nuisan a, Pathian he ngawl theampo na selno hi.

⁹Na thahatna kong muang hi; nang sia ka bukna na hi hi, Pathian awng.

¹⁰Ka Pathian in kei hong it a, kei kungah hong pai tu hi; ama in ka ngalte ii ngallelna kei hong musak tu hi.

¹¹Amate thatlum heak in, Pathian awng, tua bang hi thong le te ka mite in mangil tha thei tu hi. Topa, kote hong dal pa awng, Na thahatna taw amate thethaang in a, zo cip in.

¹²Mawna sia amate muk ah om hi; amate kammal theampo mawna vive ahi hi; a kiphatsakna sungah amate awkval taken! Amate in longsia le leilot thu zangh ahikom,

¹³na thin uukna taw amate susia in; susia cimit in. Tuasia ciang a kuama po in Pathian in Israel te a uk hunlam he tu a, a ukna sia leitungbup ah kithung ahi hunlam tel tu hi.

¹⁴Ka ngalte in nitak sangin hong heak kik a, ui bangin ngual ngalh a, khuapi sungah vak kakoai uh a,

¹⁵an zongin a vak uite taw kibang a, an a kicing in mu buale phiing uh hi.



¹⁶Ahihang na thahatna thu la in ka sa tu hi; na itna kip sia zingsim in a ngingin, la in ka sa tu hi. Nang sia ka bukna na hi zo a, ngimna sungah ka belna na hi hi.

¹⁷Kei hong hungpa awng, nangma kong pok tu hi. Ka bukna sia Pathian hi a, kei hong it Pathian ahi hi.

Psalm Late 60

Suatak natu Thungetna

¹Nangma in kote nong nial zo a, Pathian awng, nong zothal zo hi. Ko tungah na thin uuk zo hi — ahihang tu in kote hong maingat kik tan.

²Leitanghte nangma in na liingsak a na kekthamsak hi; tu in a keknate kimatsak kik in banghangziam cile cimthamh tu in kithoai hi.

³Na mite nasia takin nong thuaksak hi; zukham bang keakin ka hoi vacit uh hi.

⁴Nang hong thasiate tungah kidop natu thu na pia zo a, tua taw amate in lalna tu pan suakta thei tu uh hi.

⁵Na thahatna taw kote hong hun tan; na it, na mite a suatak natu in kong thungetna uh hong zo tan.

⁶Ama ii a thiangtho mun panin Pathian in, “Zawna mualsuana taw Shechem ka khentham tu a, Sukkoth Ngamkuam sia ka mite ka hawmsak tu hi.

⁷Gilead sia keima aa hi a, Manasseh zongh keima aa ahi hi. Ephraim sia ka thik lukhu hi a, Judah sia ka kumpi ciangkhut hi.

⁸Ahihang Moab sia kisilna kuangin ka zangh tu a, keima neisa ahi hunlam a kitel natu in ka peangdap taw Edom ka deang tu hi. Philistine te in kei tungah zawna mualsua in au tu ki um ziam?” ci hi.

⁹Pathian awng, luphung taw a ki uum khuapi sungah akua in kei hong paipui tu ziam? Edom ah akua in kei lam hong pui tu ziam?

¹⁰Kote hong nial takpi zo ni ziam? Ka ngalkap honte taw hong mainawt pui ngawl tu ni ziam?



¹¹Ngal hong dopui tan; mihingte hong huna sia mannung ngawl hi.

¹²Pathian ei sangah hong pang pole ih zo tu hi; ama in ih ngalte zo tu hi.

Psalm Late 61

Kidal natu Thungetna

¹Pathian awng, ka auna hong za tan; ka thungetna hong ngai tan.

²Thin kiamin inn taw a kikhuala na pan nang kong biakpui hi! A muanhuai bukna ah hong zotpui tan,

³banghangziam cile nangma in ka kidalna na hi hi, ngalte ka nan natu a kho ngalnanna na hi hi.

⁴Ka khan tawntung na mun thiangtho sungah hong teangsak tan; na thakhui nuai ah ngammuanna hong ngasak tan.

⁵Pathian awng, kong kamciamate nong za zo a, nang vaang hong plate ii neisate kei nong pia zo hi.

⁶Kumpipa ii nuntakna kum tampi belapsak in; a nuntakna sausak in.

⁷Pathian awng, nangma ompuina sungah ama in ngam uk tawntung taken; na itna kip le na thumaanna taw ama sungsia in.

⁸Tua ahiciang kong kamciamate nang tungah nisim in kong piak laitak pokna la kong sak tawntung tu hi.

Psalm Late 62

Pathian Sungsiatna sung Kimuanna

¹Kei hong hun tu in Pathian thinsau takin ka ngak hi; Ama bekma ka suang hi.

²Ama bekma in kei hong sungsia a, hong hun hi; ama sia kei hong hungpa hi a, hong kizo thal ngei buatu hi.

³Dal a puk sa sia sangin a kho ngawl zaw mihing khat sia note theampo in bangtan vei sisim lai tu nu ziam?



⁴Ama vaangpiakna dinmun panin a khiasuk nuam bek hi thong nu hi; note in leilot thusonna sungah nuam na sa uh hi. Thupha piakna kammalte na zak uh hang, na thinsung uh ah ama na haamsiat uh hi.

⁵Keima in Pathian bek ka suang hi; ama sungah ka lametna ka koi hi.

⁶Ama bekma in kei hong sungsia a, hong hun hi; ama sia kei hong hungpa hi a, hong kizo thal ngei buatu hi.

⁷Kei hong kingupna le hong ki upatna sia Pathian tung pan bek hi; ama in a thahat kei hong sungsia pa ahi hi; ama in ka belna ahi hi.

⁸Hun theampo sungah Pathian muang vun, ka mite awng. Na ngimna theampo ama ko vun, banghangziam cile ama sia ih bukna hi.

⁹Mihingte sia, husan khat bang bek hi siat hi; a lian a no a kibangin manh nei ngawl hi. Khaikhin tungah koi leang bangma ngit ngawl hi; tuate sia husan khat sangin zaangzaw lai hi.

¹⁰Ngoltolna sungah thin muang heak vun; sutolna taw meetna bangma nga tu in ki um heak vun; na haunate a khang ta zongin tuate suang heak vun.

¹¹Pathian in vaangletna sia ama aa hi a, ama itna sia kip hi ci in a son tamvei ma ka za hi.

¹²Topa awng, nangma tatak ma in mihing simin a sep babangin thaman na pia hi.

Psalm Late 63

Pathian Thangaina

¹Pathian awng, nangma in ka Pathian na hi a, nangma kong thangai hi. Ka nuntakna buppi in nang hong dei hi; tui om ngawl, munko, lei tulsate in tui a du bangin ka thaa in nang hong du hi.

²Mun thiangtho sungah nang hong musak tan; nang sia bangza in minthang a thahat cisia hong musak tan.

³Nong itna kip sia nuntakna sangin phazaw hi, tua ahikom nang kong pok tu hi.



⁴Ka nuntak lai teng lungdam kong ko tu hi; ka khutte laamto in thu kong ngen tu hi.

⁵Ka thaa in kibuailamna an ne in lungkim tu a, pokna lungdamna late nang kong sak tu hi.

⁶Lupna tungah ka lup ciangin nang kong phawk a, zan khuateak in nang kong ngaisun hi;

⁷banghangziam cile nangma in a tawntungin kei hong hu pa na hi hi. Na thakhui lim nuai ah lungdam in la ka sa hi.

⁸Nangma kong luai a, na khut in kei hong keamcing hi.

⁹Kei hong thatlum nuamte mithi khua zuansuk tu uh hi.

¹⁰Ngal kisimna sungah amate kithatlum tu a, ngiapuite in a luangte ne tu uh hi.

¹¹Pathian in ama zawna pia ahikom, kumpipa a lungdam tu hi. Pathian min taw kamciam a plate in ama pok tu a, ahihang leilot theite kam kihuksak tu hi.

Psalm Late 64

Kidal natu Thungetna

¹Ngim nga khi hi, Pathian awng, ka thungetna hong ngai tan! Ka ngalte kiita khi hi, ka nuntakna hong hun tan!

²Mihing seksolte le mi ngilo honte ii hong thasawmna panin hong dal tan.

³Amate in a leei uh namsau bangin taat hiam uh a, tuaciang kamsia pau tu in thaltang kap tu bangin eal uh hi.

⁴Amate in zummawk leilot thute manlang takin kizelsak hi; amate in mihing phate lauthauh vai taw sonsia in lalsak uh hi.

⁵Amate in khat le khat sia ngual thasawm tu in kihanthawn uh hi; a thaangsia na mun tu kikum in, “Kuama in amate mu thei buan te” ci uh hi.



⁶Amate in a sia tupnate ngeal kholin, “A cingtaak khialna lian ngeal zo hing” ci uh hi. Mihingte thinsung le lungsung sia tel hak thu hi.

⁷Ahihang Pathian in a thaltangte taw amate kap a, thakhat thu in liam uh hi.

⁸Ama in tua kammalte hu in amate susia tu hi; amate a mu theampo in a lu peisan tu uh hi.

⁹Amate theampo lau tu uh hi; Amate in Pathian sep sa nate ngaisun tu uh a, tuaciang ama sepnate sawson tu uh hi.

¹⁰Thutang mihing theampo in Topa sepnate hangin lungdam tu uh hi. Amate in ama sungah ngammuang tu uh hi; mipha theampo in ama pok tu uh hi.

Psalm Late 65

Pokna le Lungdamkona

¹Pathian awng, Zion khua sungah nang kong pok tu uh le nang tungah ka kamciamna uh ka kholet tu uh sia a maan ahi hi,

²banghangziam cile nangma in thungetnate na zo hi. Mun theampo panin mihingte in

³amate mawnate hangin nang hong zuan tu uh hi. Koma khialnate in hong zo hi, ahihang nangma in tuate na maisak hi.

⁴Na mun thiangtho sungah teang tu in na paipui, na teal sate mi nuamsate ahi uh hi. Na inn sungah na phate, na Biakinnpi thiangtho ii thuphate hangin ka lung uh kim tu hi.

⁵Zawna nong piakna taw kote ngetna nong zo a, ko nong ngup natu in nalamdangte na vawt hi. Leitung bup mihingte le a khuala tuipe ngal khat ah a omte in nang hong muang hi.

⁶Na vaangletna lian lakin, nangma in mualte na thahatna taw a om natu munah na koi hi.

⁷Nangma in tuipe hawknate le tui kihual ngingte na thimsak hi; nangma in mihingte ii ngamlumna na thimsak hi.



⁸Leitung bup in na lian nasep sate lamdang sa in om uh hi. Na nasepate in lungdam aunate leimong khat pan leimong khat dong thengsak hi.

⁹Leitangh na thinbotna na lakna in nguatu na puak a; leipha leihoi in na vawt hi. Luamte tui taw na dimsak hi; leitung ah an na piangsak hi. Na sepzia in hi bang ahi hi:

¹⁰a kitho sa lote tungah nguatu a kicing piikpeak in na zusak a, lei na zensak hi; nangma in leitanghte sia nguatu taw na nipsak a, thingno ankungte na khangsak hi.

¹¹Na phatna in bangza in an hauna piangsak ziam! Na paina theampo ah na a kicing takin om hi.

¹²Nganthana munte sia nganhon taw kidim hi; muallimveite sia lungnopna taw kidim hi; ngamkuamte sia zungtaang taw kidim hi. Na a minpiang lungnopna taw au in la sa uh hi.

Psalm Late 66

Pokna le Lungdamkona La

¹Mihing theampo awng, lungdam auna taw Pathian pok vun!

²Ama minthanna la in sa vun a, a minthang pokna ama pia vun!

³Pathian mun ah, “Na sep na vawtte bangza in lamdang ziam! Na vaangletna in lian lawlawm a, na ngalte in kiitakna taw na mai ah kun uh hi.

⁴Leitung mihing theampo in nangma hong bia uh hi; amate in pokna la hong sak uh a, amate in na min pokna la nang hongsak uh hi” ci vun.

⁵Hong pai tavun a Pathian sepna sate, mihingte atu a lamdang a septe hong en tavun.

⁶Ama in tuipe sia leiko suaksak hi; ih taangpupite in a peang uh taw ngun kantan hi. Tua munah eite in ama sepna hu in ih lawp hi.

⁷Ama in a thahatna taw a tawntungin uk a, minam tuatuamte mitsuan hi. Ama langpan in kuama in tualngal tho heak hen.

⁸Minam theampo awng, ih Pathian pok vun; na pokna uh kiza tachen.



- ⁹Ama in eite a nungta in hong keam a, ih liik tu a oai bua hi.
- ¹⁰Pathian awng, kote hong sit zo ni hi; ngun sia meisa taw a kithiansak bangin kote nong sittel zo hi.
- ¹¹Thaang sungah nong taaksak a, ka nungzaang uh ah vanhngit nong suan hi.
- ¹²Ka ngalte in nong tuancilsak hi; meikuang le namthuam kantan in ka pai uh hi, ahihang tu in nangma in a ngammuanna mun nong then hi.
- ¹³Na inn ah meihal biakpiakna kong paipui tu hi; kong kamciam sia kong pia tu hi.
- ¹⁴Ngim ka nga hun lai a kong pia tu ka ci teng kong pia tu hi.
- ¹⁵Biaknatau tungah hal tu in tuute ka pia tu hi; khuitalte le kealte sangaw biakpiakna in ka nei tu a, a meikhu in van ah kaato tu hi.
- ¹⁶Pathian a patoai theampote awng, hong pai tavun a ngai vun, tuasia ciang kei atu ama sep theampo kong son tu hi.
- ¹⁷Hu ngenin ama ka biakpui hi; late taw ama ka pok hi.
- ¹⁸Ka mawnate awlmawk ngawl hi leng Topa in kei hong nangai ngawl tu hi.
- ¹⁹Ahihang Pathian in kei hong za takpi zo hi; ka thungetna hong ngai zo hi.
- ²⁰Pathian ka pok hi, banghangziam cile ama in ka thungetna hong nial ngawl a, hong itna kip sia kei kung panin keam kik ngawl hi.

Psalm Late 67

Lungdamkona La

- ¹Pathian awng, kote hong hesuak tan a, thupha hong pia tan; cikna taw kote hong en tan,
- ²tua hile leitung bup in na deina he thei tu hi; minam tuatuamte in na ngupna he thei tu hi.
- ³Pathian awng, mihingte in nang hong pok taken; mihing theampo in nang hong pok taken!



⁴Minam tuatuamte lungdam in lungnopna taw la sa hen, banghangziam cile thukhaikim in mihingte tungah thu na khen hi; tuaciang leitung minam theampo lam na lak hi.

⁵Pathian awng, mihingte in nang hong pok taken; mihing theampo in nang hong pok taken!

⁶Leitangh in lo ante piangsak zo hi; Pathian, eite Pathian in thupha hong pia zo hi.

⁷Pathian in eite thupha hong pia zo hi; mun theampo ah om mihingte in ama upat thei taken.

Psalm Late 68

Zawna Minam La

¹Pathian hong dingto a, a ngalte kithethaangsak hi. Ama a ensante in lelna taw taikcak uh hi.

²Meikhu a ki seamkeak bangin amate hawlkeak hi; khuainunte meikuang mai ah a tuithap bangin, mihing seksolte Pathian mai ah a mangthang uh hi.

³Ahihang thutangte in ama omna ah lungdam in a lawp hi; amate lungdam in, lungpilna taw au uh hi.

⁴Pathian tungah la sa vun, ama min pokna la sa vun; meeit tung a to pa atu in lampi sial khol vun. Ama min sia Topa hi a, ama omna munah lungdam vun!

⁵Ama Biakinnpi thiangtho sungah a teang Pathian in tangate khoi a meingongte sungsia hi.

⁶Ama in lawm le pawl nei ngawlin, a ngamkhingte teen natu inn khat pia a, thongtaakte lungdam suatakna sungah lampui hi; ahihang a leedote ngam tawngtolna munah teang tu uh hi.

⁷Pathian awng, na mihingte lam na pui hun, senneal ngam kantan in mai na nawk pui ciangin,

⁸Sinai Pathian ahi Israel te Pathian hong paina hangin, lei kiliing a, van in nguatui buaksuk hi.



- ⁹Nangma in ngua na zusak piikpeak a, a tul sa na leitangh na puapha kik hi;
- ¹⁰na mite in tua munah a inn sa uh hi; na phatna taw mizawngte kisap teng na sik hi.
- ¹¹Topa in thupia a, numeite tam mama in tua thu son uh hi:
- ¹²“Kumpipate le a ngalkap honte taikpeak hi!” ci uh hi. Inn ngak nupite in ngalte neisa a kiman teng hawm uh hi:
- ¹³a thakhui kham cipha taw a tee wakil, ngun taw a kituam vakhu limte zongh kihel hi.
- (Banghangin ngal kido ni in note pawlkhat tuu khawk sungah om nu ziam?)
- ¹⁴Vaanglianbelpa Pathian in kumpipate Zalmon Mual tungah a thethaang ciang tua munah ama in vuuk taaksak hi.
- ¹⁵Bashan mual sia mualvum tam mama a nei mual khat hi a, bangza in a nasia mual ahi ziam!
- ¹⁶Banghangin a nasia na mualvum saangte panin Pathian ii a ten natu a teal mualtung sia zawsakna taw en ni ziam? Topa sia tua munah a tawntungin teang tu hi!
- ¹⁷A thahat siphuleang tul tampite taw Topa in Sinai panin a thiango mun hong zuan hi.
- ¹⁸Ama in a saangna munte ah kaato a, a ngalmat sa tam mama tonpui hi; ama in a leedo mite tung panin letsong saang hi. Tua munah Topa Pathian teang tu hi.
- ¹⁹Ni khat zawkciang ni khat ih vanhngit hong puaksak Topa pok vun; ama in eite hong hun Pathian ahi hi.
- ²⁰Eite Pathian in hong hun Pathian ahi hi; ama in Topa, eite Topa hi a, thina panin eite hong suatak hi.
- ²¹Amate ii mawna sungah a kheal maw, ama ngalte lutang sia Pathian in sutham takpi tu hi.



²²Topa in, “Na ngalte Bashan panin kong paipui kik tu hi; tuipi thukna panin amate ka lato kik tu hi,

²³tua hile amate chisan sung na tan thei tu uh a, na uite in a du zaza liak thei tu uh hi,” ci hi.

²⁴Pathian awng, zawna mualsuana taw ka kumpipa, ka Pathian a biakinn thiango sung a zotna sia a kuama po in mu tek hi.

²⁵La sate masa a, music thiamte nungkhak in, a lai ah numeite in thikdaalkualte tumin pai uh hi.

²⁶“A mite kikhopna sungah Pathian pok vun; No Jacob suan theampo awng, Topa pok tek vun!” ci uh hi.

²⁷A masa phitin unau sungah a nobel ahi Benjamin suante hong pai a, a zom in Judah suan lampuite le amate pawlte, a nung panin Zebulun le Nephtali suante ii lampuite in zui uh hi.

²⁸⁻²⁹Pathian awng, kumpipate ii nang letsong hong piakna Jerusalem na Biakinnpi pan, ko taangin na zak, na vaangletna hong lak tan.

³⁰Pumpa sungah a om ngamsa bang ahi, Egypt te tei in; khuinote taw a om khawm khuita hon bang ahi, minamte theampo na mai ah kunin a ngun nei uh te nang hong piak mateng in, tei in. Ngala kin mihingte thethaang in.

³¹Egypt ngam panin tongciin uliante hong pai tu hi; Ethiopia mite in Pathian tungah a khutte laamto in thungen tu uh hi.

³²Leitung kumpi ngamte awng, Pathian tungah la sa vun, Topa pokna la sa vun.

³³Taanglai a, a om van, tua van ah a to pa pok vun. Ama ii a vaanglian awpui ngai vun.

³⁴Pathian vaangletna thangsak vun; A uk theina vaang sia Israel te tungah om a, ama thahatna sia van ah om hi.

³⁵Israel te ii Pathian a thiangtho mun pan hong pai ciangin bangza in kiitak huai ziam! Ama in thahatna le vaangletna a mite tungah pia hi. Pathian pok vun!

Psalm Late 69

Hu nget Biapuina

¹Hong hun tan, Pathian awng! Tui in ka ngawng ciang hong khum hi;

²Buanthuk sungah ka tum suk a, lei ngum mun om ngawl hi; tui thukna sung ka theng a, tuihualte hangin tui ka ta dektak hi.

³Hu ngenin ka biapupuina taw ka tha bo a, ka longtawl taak heanghuung hi. Nong hu tu kong zawzonna ka mit taak zo hi.

⁴Bangma thu om ngawl a, kei hong ensante sia ka lu a samzamte sangin tamzaw hi. Ka ngalte in kei langpanna leilot thu son hi; amate hat a, kei hong thatlum nuam hi. Ka nguk ngawl bul nate amate in hong pia kiksak hi.

⁵Pathian awng, ka mawnate nang kung panin kiseal ngawl hi; bangza ta mawmaw ka hi sia nong he hi.

⁶Nangma hong muangte maizum a pia hong hisak heak in, Vaanglianpipa TopaVaanglianbelpa awng! Nangma hong biate tungah a mindaisak hong hisak heak in, Israel te Pathian awng.

⁷Kei hong kilealna sia nangma hang hi a, maizumna taw ka kikhucip hi.

⁸Kei sia ka suapuite atu in khualmi bang ka hi a, ka innkuanpuite atu in ngamdang mi bang ka hi hi.

⁹Na Biakinpi atu ka thangaina in ka sungah mei bangin kuang liang hi. nang hong kilealna kammalte kei tung hong tu hi.

¹⁰An tanna taw keima le keima kiniamkhiak in ka om ciang, mihingte in hong phunsan hi;

¹¹heena lak puante silh in ka om ciangin amate in hong nuisan hi.

¹²Amate in lampite ah kei thu son a, zukhamte in kei huvau la phuak uh hi.



¹³Ahihang, Topa awng, kei ka hile nang tungah thu kong ngen tu hi; na teal hun ciangin kong ngetna hong zo tan, Pathian awng. Nong itna lianpi hu in hong zo tan, banghangziam cile kong hun tu ci na kamciam sia na kipsak hi.

¹⁴Buannawng sungah ka tumsuk natu panin hong hun tan; ka ngalte kung panin hong keamcing tan, tuithuk sung panin hong hun tan.

¹⁵Tuiliim namthuam in hong khumsak heak in; tui thukna ah hong tasak heak in a, thaankuul sungah hong taaksuksak heak in.

¹⁶Topa awng, nong itna kip ii phatna sungah, kong ngetna hong zo tan; nong ciliapna lian taw kei sang hong nga tan!

¹⁷Na naseam pa kung pan nangma le nangma kiseal heak in; kei sia ngimna lianpi thuk khi hi — tu mama in hong zo tan!

¹⁸Kei kungah hong pai tan a, hong hun tan; ka ngalte khutsung panin hong suatak tan.

¹⁹Kei hong kilealna, hong min daisaknate le, hong ngen ngasaknate na he hi; ka ngalte theampo na mu hi.

²⁰Hong kilealna in ka thin hong tamsak a, thinkiam in ka om hi. Hesuakna ka lamet hang koima ah a om bua hi; heenepna muangmaw ka hihang ka mu zo bua hi.

²¹Ka ngilkial ciangin amate in ngu hong pia hi; ka dangko ciangin amate in zuhau hong pia hi.

²²Amate ii poai khaamnate in amate lalna hi taken; amate ii a thiangtho kibuilamna sia amate kiamsuk natu hi taken.

²³Amate a mit tawsakin! Amate a tawntungin a cingngu zawsak in!

²⁴Na thin uukna amate tungah tungsak in; na thangsiatna in amate tung tu taken.

²⁵Amate ngiaphualte kinusia taken; amate buk sungah kuama kihingkhoai heak taken.



²⁶Nangma ii daan na piak sate amate in siatvawt hi; nangma ii na liamsakte ii thuaknate amate in thuson in nei uh hi.

²⁷Amate mawna theampo tepteena khat nei in; nang ii ngupna sungah amate kihelsak heak in.

²⁸Nuntakna laibu sung pan amate min sia kimmel taken; nangma mite tepteena lai sungah amate kihel heak hen.

²⁹Ahihang kei sia na sa in thinkiam in ka om hi; Pathian awng, hong laamto tan a, hong hun tan!

³⁰La khat taw Pathian ka pok tu hi; ama letna sia ama tungah lungdamkona taw ka thangsak tu hi.

³¹Hisia in khuite taw ama biakpiakna sangin khuitaI kxanthin sa khat taw sangaw biakpiakna a piak sangin Topa lungdamsak zaw tu hi.

³²A kizothawte in hi sia a mu uh ciangin a lungdam tu uh hi; Pathian a biate kihansua tu hi.

³³Topa in a ki taangsamhte ngetna ngai a, thongtaak a mihingte a mangil bua hi.

³⁴Vantung le leitung awng, tuipi le a sung a om a nungta theampo awng, Pathian pok vun.

³⁵Ama in Jerusalem hun tu a, Judah khuapite sa kik tu hi. Ama mite tua munah teang tu a, tua leitangh lua tu uh hi;

³⁶a naseamte ii suan le paalte in tua ngamh lua tu a, ama a itte tua munah teang tu uh hi.

Psalm Late 70

Hu natu Thungetna

(Psalms 40.13-17)

¹Pathian awng, hong hun tan! Topa awng, tu ma in kei hong hu tan!

²Kei hong thasawmte in lelina le thinbuaina thuak taken. Kei ngim nganate hu in, a lungdamte in nungkin kik taken a, maimawl taken.



³Kei hong selnote in a lelna hu in thinkiam taken.

⁴Nang hong tu theampo lungdam in thin nuam taken. Nangma ngupna hu a, lungdam a ko thei theampo in, “Pathian bangza in lian ziam!” ci tawntung taken.

⁵Ka tha zawmin zawngkhal khi hi; ka kungah manlangin hong pai tan, Pathian awng. Nangma in kei hong ngumpa le ka Topa na hi a — kei hong hu memeang tan!

Psalm Late 71

Pasal Huai khat ii Thungetna

¹Topa awng, kidalna nga natu in nang kong zuan zo hi; lelna hong thuaksak ngei heak in!

²Nangma in thutang na hikom hong hu tan a, hong suatak tan. Kong ngetna hong ngai tan a, hong hun tan!

³Kei atu in a muanhuai belna mun le kei hong dal tu a kho kulhpi hong hi tan; nangma in ka bukna le ka kihukna na hi hi.

⁴Ka Pathian awng, mihing tatsiate kung pan le, mihing ngilote le a khansiate thahatna panin kei hong suatak tan.

⁵Vaanglianpipa Topa awng, ka lametna sia nang sungah kong koi hi; ka khanmoi lai panin nangma kong muang hi.

⁶Ka khan tawntung nangma kong suang zo hi; ka pian ni pan kipan nangma in nong hung nong dal tawntung zo hi. A tawntungin nang kong pok tu hi.

⁷Ka nuntak zia sia mihing tam ma ii ettee ahi hi, banghangziam cile nangma in a thahat hong hungpa na hi hi.

⁸Nitangtum in nang kong pok a, na minthanna ka thangsak hi.

⁹Tu in ka khanhaam ciangin kei hong nial heak in a; ka thatual ciangin kei hong nusia heak in.

¹⁰Ka ngalte in kei hong thatlum nuam a; amate in kikumin kei hong thahsawm uh hi.



- ¹¹Amate in, “Pathian in ama nusia zo hi; a nung pan zui in ama man tawng; ama a hun tu kuama om ngawl hi,” ci uh hi.
- ¹²Pathian awng, taza a khuala na ah om heak in ka Pathian awng; kei hong hu tu in hong manlang tan!
- ¹³Kei hong simte in lelna le lalcipna thuak taken. Kei hong liamsua nuamte in maizumna le minsiatna thuak taken.
- ¹⁴Ka lametna nang sungah kong koi tawntung tu a; nang sia kong pok thathua lai tu hi.
- ¹⁵Na phatnate ka son tu a; tua thu sia kei ii tel zawk zongh hi ngawl hinave, nitangtum in, na ngupna thu ka son tu hi.
- ¹⁶Na vaangletna ka pok tu hi, Vaanglianpipa Topa awng; nangma bek ii nei, na phatnate ka thangsak tu hi.
- ¹⁷Ka khanmoi lai pan ma kipan nangma in nong hil zo a, tu dong ma in a lamdang na septe ka son lai hi.
- ¹⁸Tu in ka huai zo a ka puak zongh kaang zo hi. Kei hong nusia heak in, Pathian awng! hong pai pheang tu khang kikte tungah na vaangletna le na thahatna ka thansak laitakin keima taw hong omkhawm tan.
- ¹⁹Pathian awng, thutang na hina in van ban hi. Nangma in na liante na seam zo a; nang taw a kibang kuama om ngawl hi.
- ²⁰Ngimna le thuaknate kei tungah nong tungsak zo hi, ahihang nangma in ka tha ka ngal nong dim kik tu a; thaankuul panin nong keam tu hi.
- ²¹Nong liansak seseam tu a; nong heeneam kik tu hi.
- ²²Tengtong tumna taw nang kong pok tatak tu hi. Na thu maanna kong pok tu hi, ka Pathian awng. Israel te ii a Thiangtho Pa awng, ka tengtong tumin pokna la kong sak tu hi.
- ²³Tumtheite nang tungah kong tum ciangin lungdamna taw ka au tu hi; ka nuntakna theampo taw la ka sa tu hi banghangziam cile nangma in nong hun zo hi.



²⁴Nitangtum in thutang na hina ka son tu hi, banghangziam cile kei hong vawtsia nuamte kizo thal zo a, ki maizumsak zo hi.

Psalm Late 72

Kumpipa atu Thungetna

¹Nangma ii thutang taw thu a khen natu in kumpipa thuhil in, Pathian awng! nangma ii a kikkaikim thukhenna sia ama hawm in,

²tua hile ama in na mite thutang taw uk tu a, a kizothawte thumaanna taw uk tu hi.

³Ngam le lei in khantona nga taken a, thutanna he taken.

⁴Kumpipa in mizawngte tungah thutang in thukhen taken a; a cimawte hu taken a, Amate a zothawte zothal taken.

⁵Ni a taan laiteng, na mite in nang hong bia taken a, hong pai tu khang tawntung sungah tha in khuavak a piak laiteng nang hong bia taken.

⁶Kumpipa sia lo sungah ngua zu bang, leitangh tungah nguatu buak bang hi taken.

⁷Ama khan sungah thutanna khangto taken a, khantona sia tha in khuavak a piak lai theampo in om taken.

⁸Ama ukna kumpi ngam sia tuipi khat pan tuipi khat dong kithung tu a, Euphrates ngun pan leimong dong hi tu hi.

⁹Senneal ngam mite in ama mai ah a kun tu uh hi; a ngalte lei ah a bok tu uh hi.

¹⁰Spain le tuikulhte kumpipate in ama letsong pia tu uh hi; Arabia le Ethiopia kumpipate in ama tel pia tu uh hi.

¹¹Kumpipa a kici theampo in ama mai ah kun tu uh a; minam theampo in ama atu sepsak tu uh hi.

¹²Ama a ko mizawngte theampo le a cimaw a kingaingonte theampo sia ama in suaktasak hi.



¹³Ama in mizawngte le a thazawmte mulkim a, a kitaangsamh te ii nuntakna a hun hi.

¹⁴Ama in amate sia ki zawthawkna le ngoltolna panin suatak hi; amate nuntak sia ama atu in manh nei hi.

¹⁵Kumpipa a khansau taken! Ama sia Arabia pan khamte kipia taken; ama atu in thungetna a tawntung kivawt taken; Pathian thupha ama tungah om tawntung taken!

¹⁶Ngam sungah antang tam mama om taken; mualte sia lo ante in sin taken, tua lo ante sia Lebanon ah ankungte bangin tak nei in nga thiam taken. Ngampa sung lopate taw kidim bang keakin khuapite sia mite taw kidim taken.

¹⁷Kumpipa min kimangil ngei heak hen a; ni a taan laiteng ama minthang taken. Kumpipa tungah ama in thupha a piak bangin minam tuatuamte in Pathian tungah thupha ngen taken.

¹⁸Israel te Pathian, Topa pok vun! Ama bekma in hi nalamdangte seam hi.

¹⁹Ama min tuanngen sia a tawntungin pok vun! Ama minthanna in leitung bup ah dim taken. Amen! Amen!

²⁰Hisia in Jesse ii tapa David ii thungetna a tawpna ahi hi.

Psalm Late 73

LAIBU A THUMNA

(Psalm Late 73—89)

Pathian ii A maan Thutanna

¹Pathian in thinsung thiangtho a nei Israel te atu in pha tatak hi.

²Ahihang ka thinmuanna ka thasua dedek a; ka upna bo dektak hi,

³banghangziam cile keima in mihing seksolte atu in na theampo a dik veu in a pian ka mu ciangin a ki phasakte ka eang hi.

⁴Amate in natna thuak ngawl a; thahat in a cidam uh hi.

⁵Midangte bangin amate in thuak ngawl uh a; ngualdangte ngim nga bangin amate in ngim nga ngawl hi.



- ⁶Tua ahikom amate in ki phatsakna sia khi bangin aw a, ngoltolna sia puantual bangin sil uh hi;
- ⁷amate thinsung in ngitlona pusua in, a thinsung sia a seksol tupnate taw komla uh hi.
- ⁸Amate in midangte nuisan zazan in kamsia veu pau uh a; kiphasak in ngualdangte zawthawk sawm uh hi.
- ⁹Amate in vantung ah om Pathian sonsia in leitung ah mihingte sia kiletsakna taw thupia uh hi,
- ¹⁰tuabangin Pathian mihingte ngangawn in amate sangah kiheak in tuaciang amate son theampo a um papaih uh hi.
- ¹¹Amate in: “Pathian in he buante; A saangbel Pa in phawk buante” ci uh hi.
- ¹²Mihing seksolte in tuabang ahi uh hi. Amate in tam mama nei a, nga thathua lai uh hi.
- ¹³Tua ahile a thiangtho in kikeam a, mawna ka vawt ngawl sia a luithawthong ahi tu ziam?
- ¹⁴Pathian awng, nangma in nitangtum in nong thuaksak a; zingsim in daan nong pia hi.
- ¹⁵Tuabangin kampau ka hi le, na mite khat ii ngamtat tu bangin a kilawm in ngamta ngawl ka hi tu hi.
- ¹⁶Hi thu haksa sia ngaisun tu in ka hanciam a,
- ¹⁷ahihang na Biakinn sung ka tum mateng in, kei atu haksa lei hi. Tua zawkciang mihing seksolte tungah bang piang tu ci in ka tel hi.
- ¹⁸Nangma in amate sia a naalna munah na koi tu a, siatcipna sungah na liiksak tu hi.
- ¹⁹Amate thakhat thu in kisia in, a kiitak huai sungah bocip uh hi.
- ²⁰Amate sia zingsang a, a bo vangeu zanmang bang ahi hi; nangma nong thaw tak ciang, Topa awng, amate mang vadi hi.



²¹Ka ngaisutna a siat ciang le ka thin a nat ciang,

²²kei sia nganhingte bangin ka mawmaw hi; nang kong tel bua hi.

²³Ahihang nang kungah a nai in kong om tawntung a, nangma in ka khut panin nong len hi.

²⁴Nong hilnate taw lam nong lak a, a tawpna ah nangma in upat minphatna taw nong saang tu hi.

²⁵Vantung ah nang sim ngawl bang dang ka nei ziam? Nang kong nei zawk nungsang leitung ah bang dang ka dei lai tu ziam?

²⁶Ka khua ngaisutna le ka pumpi thazawm tu hi. Ahihang Pathian sia ka thahatna hi; ama bekma a tawntungin ka kisap ahi hi.

²⁷Nang hong taisante lalcip nanak tu a; nang tungah hong thumaan ngawlte na susia tu hi.

²⁸Ahihang kei ka hile, Pathian nai ah ka om tu, Topa Pathian ka bel tu le ama ii vawt sate theampo ka thansak tu sia bangza in pha ziam!

Psalm Late 74

Minam bup Suatak natu Thungetna

¹Banghangin hi bangin kote hong nusia ni ziam, Pathian awng? Nangma mite tungah a tawntungin na thin uuksak tu ni ziam?

²Khuangei lai pek a, nangma mama atu na teal sa mihingte phawk in, sal tanna sung pan nangma minam tu a, na tat sate phawk in. Khatvei lai a, na teenna mun Zion Mual sia phawk in.

³Hi a laltham sate mun ah pai in; ih ngalte in Biakinn sungah na theampo lalsak zo hi.

⁴Na ngalte in na Biakinn sungah zawna mualsuana taw au zo uh hi; amate in tua munah zawna lim in laandial khai zo hi.

⁵Amate in hei taw thing a phuk thing vawtte taw kibang hi.



- ⁶Amate in a hei le a sekpui uh taw a kizeam thingpheak theampo saattham hi.
- ⁷Amate in nangma ii Biakinn lalsakin mei taw hal uh hi; amate in nang hong kibiakna mun ninsak hi.
- ⁸Amate in eite hong sucip nuam hi; ngam sung a thiangthona mun theampo haltum uh hi.
- ⁹Koma ii a thiangtho kitepteena lim theampo bo siat zo hi; kamsang kuama taang nawn ngawl a, hi sia bang tanvei khuangei tu ziam ci in kuama in he ngawl hi.
- ¹⁰Pathian awng, bang tan vei, ih ngalte in nang hong nuisan tu ziam? Na min a tawntungin hong leal tu ziam?
- ¹¹Banghangin kote nong hu tu sia nial ni ziam? banghangin na khutte na nung sangah seal ni ziam?
- ¹²Ahihang Pathian awng, nang sia a kipat panin koma kumpipa na hi hi; nangma in kote tamvei ma nong hun zo hi.
- ¹³Na thahatna lian taw tuipi na khen a, tuipi sung nganhing lianpuite lutang na sutham hi;
- ¹⁴Leviathan nganhing lianpui ii lutang na sutham a, a luang sia senneal ngam sung a, nganhingte vaakna in na nei hi.
- ¹⁵Ciktui le tuisamte na luangsak a, ngunliante na kangsak hi.
- ¹⁶Nangma in sun le zan na bitphua a, ni le tha a omna tek ah na koi hi;
- ¹⁷nangma in leitung ii mong na omsak hi; khuakhal le phalbi hun na vawt hi.
- ¹⁸Ahihang Topa awng, na ngalte ii nang hong nuisat uh sia ciamtee in, pathian sel amate in nang hong zawngsak uh hi.
- ¹⁹A cimaw na mite a ngilo a ngalte khut sungah nusia heak in; a kisiatvawt na mite mangil heak in!



²⁰Kote taw na vawt thuciamna sia ciamtee in. Ngam kingsong a zingna mun theampo ah zawthawk buaina om hi.

²¹A kinengcip mihingte maizumsak heak in; tua mizawng le mi cimawte in hong pok taken.

²²Pathian awng, nangma thu in hong kithawn tan a, na vai panpui in! Sun khuateak in pathian sel mihingte in nang hong nuisan za zan ahi hunlam ciamtee in.

²³Na ngalte ii thin uuk auna le nang hong langpante ii a ngamlum tawntungna na mangil heak in.

Psalm Late 75

Thukhenmang Pathian

¹Pathian awng, lungdam kong ko uh a, nang tungah lungdam hong ko hi ung! Nang bangza lian ci ka thangsak uh a, na nei a lamdang nate ka son uh hi.

²Pathian in “Thukhen natu hun khat ka ciangtan zo a, thu maanna taw thu ka khen tu hi.

³Bitphua sa a nungta theampo liingin leitung mama a ngawk zongin a tawdapte a kho in ka koi tu hi.

⁴A seksolte a kisakthei ngawl natu ka son hi;

⁵a ki suantaakna uh a kheal natu ka son hi,” ci hi.

⁶Thukhenna sia nisuana le nitumna pan ahizong saksang pan le thangsang pan ahizong hong pai ngawl hi.

⁷Thukhenmang sia Pathian hi; ama in pawlkhat sia mawsak a, pawlkhat sia suaktasak hi.

⁸Topa in a khut sungah hai khat toai in, a thin uukna zu ciik taw kidim hi. Ama in tua zu bungh keak in a seksol theampo in ne uh hi; a mal bo dongin amate in ne siat uh hi.

⁹Ahihang kei ka hile Jacob ii Pathian thu ka son tu le ama pokna la ka sak tu tawp ngei ngawl tu khi hi.



¹⁰Ama in mihing seksolte thahatna suktansak tu a, ahihang thutangte thahatna sia kikhanto tu hi.

Psalm Late 76

Ngalzopa Pathian

¹Pathian sia Judah ngam sungah kihe hi; ama min sia Israel ngam sungah ki upat hi.

²Ama in Jerusalem ah a inn nei hi; Zion Mual tungah teang hi.

³Tua munah ama in ngalte ii ngalhiam theampo ahi thaltangte, a lumte le a namsaute sutham hi.

⁴Pathian awng, na minthang lawlawm hi! Na ngalte na zawna mual pan nong heak kik ciang, na vaanglian lawlawm hi.

⁵A ngalkap hangte sia a neisa theampo uh kiluak siatin amate in tu in a thite mutna ah a mut laitak hi a, amate hatna le thiamna theampo sia kimanna a nei bua hi.

⁶Jacob Pathian awng, nangma in amate na tawn ciang siphute le a tung tote pukin thi uh hi.

⁷Ahihang Topa awng, nang sia a kuama theampo in hong kiita hi. Na thin uuk ciang na omna ah kuama in thuak zo ngawl hi.

⁸Vantung panin na thu khenna na kitelsak hi; leitung ah a ki nengcip theampo hut natu,

⁹thukhen tu in nong dinto tak ciang, leitung sia lau in thim khipkhep hi.

¹⁰Mihingte thin uukna in nang atu in pokna tam vaial a pian natu hi bek hi; ngal kidona pan a taang laite in nangma ii poai a khaam tan tu uh hi.

¹¹Ama piak tu a na kamciamte Topa na Pathian tungah pia vun; no a nai a om minam theampo awng ama atu letsongte puak vun. Pathian in ama kiita tu in mihingte a vawt hi;

¹²ama in a kiphasak kumpipa tapate kiniamkhiaksak in, kumpi liante sia lausak vadil hi.



Psalm Late 77

Dongtawk Hun sungah Heenepna

- ¹Pathian tungah nging takin ka au hi; nging takin ka au ciang ama in hong za hi.
- ²Ngimna hun sungah Topa tungah thu ka ngen hi; zan khuateak in thungen in ka khut ka laamto hang, heenepna ka mu bua hi.
- ³Pathian ka ngaisut ciangin ka vuisa hi;, khua ka ngai susut ciang ka thinkiam hi.
- ⁴Ama in zan khuateak khangciim in hong koi hi; ka thinngim mama ahikom ka pau zo bua hi.
- ⁵A bo sa nite ka ngaisun a, taanglai kumte ka phawk hi.
- ⁶Zan hunte khua ngaisusutna in ka zangh hi; ka ngaisusun a, hi bangin keima le keima ka kidongh hi:
- ⁷“Topa in hong nial top tu ziam? Ama in eite dik hong sa ngei nawn ngawl tu ziam?”
- ⁸Ama in eite hong it nawn ngawl ziam? A kamciamte kip nawn ngawl ziam?
- ⁹Pathian in hesuakna a nei tu mangil zo ziam? A thin uukna taw khuangai huai a sak theina theak zo ziam?
- ¹⁰Tuaciangin, “Na ka sak bel in hi thu ahi hi— Pathian sia a vaang lian nawn ngawl ci thu hi,” ka ci hi.
- ¹¹Topa awng, na nasepna liante ka ciamtee tu hi; hun bo sa sungah a lamdang na sepnate ka phawk kik tu hi.
- ¹²Na sep sa theampo ka ngaisun tu hi; a nasia mama na sepnate theampo ka ngai susun tu hi.
- ¹³Pathian awng, na sep na vawt theampo thiangtho hi. Nang za in a lian pathian om ngawl hi.
- ¹⁴Nangma in nalamdang a vawt Pathian na hi hi; na thahatna sia minam tuatuamte tungah na lak hi.



¹⁵Jacob le Joseph suan na mite, na vaangletna taw na hun hi.

¹⁶Pathian awng, tuite in nangma hong mu ciang lau uh a, tui pithukte sia liing hi.

¹⁷Meeikaaite in nguatui buak suk hi; van panin vanto nging a, khualengte mun theampo ah taangkeak hi.

¹⁸Na vanto sia kipee in nging a, khualeng in leitung taangsak hi; leitung liing in ngawk hi.

¹⁹Tui kihualte tungah na vak hi; tuipi thuk na kantan hangin, na khawni a kimu thei bua hi.

²⁰Nangma in Moses le Aaron ii a uk na mite sia tuucingpa bangin lam na pui hi.

Psalm Late 78

Pathian le A mite

¹Ka mite awng, kong hilna hong ngai tavun a, ka pauna hong nadon tavun.

²Ciim kamtepteete kong zangh tu a, hun bo sa sung a, a telhak thute,

³ih taangpupite hong son, ih zaak sa ih heak sa te, kong sonthiang tu hi.

⁴Hi thute ih tate tungah ih im buatu hi. Topa ii a vaangletna, a sepna liante le a lamdang a vawt sa te sia khang kikte tungah ih son tu hi.

⁵Ama in Israel mite tungah thukhamte pia a, Jacob suan le paalte tungah thupiakte pia hi. Amate ii tate tungah ama thukhamte hil tu in ama in ih taangpupite sawl hi.

⁶Tua hile khangkikte in tua thute he thei tu a, amate in a tate tungah sonsawn nanak tu uh hi.

⁷Hi bangin amate in zongh Pathian muang a, ama sepna sate mangil ngawlin, ama thupiakte ni tawntung tu uh hi.

⁸Amate in a leedo te le thu ni ngawl, Pathian a upna uh a kho ngawl, ama tungah a thumaan top ngawl a taangpupite bang ahi buatu uh hi.



- ⁹Ephraim mite in thal le thaltang taw kithoai napi ngal kido ni in taikeak uh hi.
- ¹⁰Amate in Pathian taw a thuciamna a len bua uh hi; ama thukham a zui bua uh hi.
- ¹¹Ama sep sate le, nalamdang lakna a vawt a mu uh te amate in a mangil zo uh hi.
- ¹²A taangpupite ii mu tang in Egypt ngam Zoan zaangleitam ah Pathian in nalamdang laknate vawt hi.
- ¹³Ama in tuipi kikhensakin amate kantansak hi; tuite sia pang bangin dingtosak hi.
- ¹⁴Ama in sun in meeikaai taw, zan khuateak in meikuang taw amate lampui hi.
- ¹⁵Ama in senneal ngamsung suangpите khentham in a thukna pan a piang tui sia amate pia hi.
- ¹⁶Ama in suangpi sung pan lui khat piangsak a, ngun bangin tui luangsak hi.
- ¹⁷Ahihang amate in Pathian tungah khialna vawvawt lai uh a, senneal ngam sungah amate in Saangbel Pa a leedo uh hi.
- ¹⁸A duci ante ngetna taw Pathian ze et hamtang uh hi.
- ¹⁹Amate in Pathian langpan in : “Pathian in senneal ngam sungah an pia thei tu ziam?”
- ²⁰“Ama in suangpi saat in tui luangsak vahawn peu hi; ahihang ama in eite zongh anluum hong pia thei tu ziam? tuaciang ama mite sa pia thei tu ziam?” ci uh hi.
- ²¹Tua ahikom tuabangin amate pauna a zaak ciang Pathian a thin uuk hi; ama in a mite meikuang taw sim a, amate tungah a thin uukna sia khang seseam hi;
- ²²banghangziam cile amate in ama sungah upna nei ngawl a, amate hun tu in um ngawl hi.



- ²³Ahihang ama in a tung a om van paupui a, a kongkhate a kihon natu thu pia hi;
- ²⁴Ama in vantung panin amate antang pia a, amate neak tu in manna khiaksuk hi.
- ²⁵Tuabangin amate in vantung lalangte an ne uh a, Pathian in a du zaza pia hi.
- ²⁶Ama in nisuana sang vui vasak si a, ama vaangletna taw thangsang vuihamsak hi;
- ²⁷tuaciang a mite atu vacimte puaksuk a, vaalbo a om senneal za in tam hi;
- ²⁸ngiaphual satna laizang a buk kiimkot theampo ah tua vacimte taak hi.
- ²⁹Tua ahiciang mite an ne in a lungkim uh hi; Pathian in amate a duci teng pia hi.
- ³⁰Ahihang amate duna sia thai ngawl a, a nene laitak ma in,
- ³¹Pathian sia amate tungah thin uuk a, amate sung pan a hat bel pasalte le Israel khangno sung pan a pha bel teng thatlum hi.
- ³²Hi zata hi napi mihingte in mawna vawt lalai uh hi; Ama nalamdang laknate om napi amate in ama a muang bua uh hi.
- ³³Tua ahikom amate ii ni sia husan khat bangin ama in bosak a, a nuntakna sia thakhat thu lalna taw bosak hi.
- ³⁴Amate sung pan pawlkhat a thalup simin a om lai teng in ama kung zuan a, kisiik in thin tak taw thu ngen uh hi.
- ³⁵Amate in Pathian sia amate a hungpa hi a, amate hu tu in Vaanglianbelpa pai ahi hunlam phawk uh hi.
- ³⁶Ahihang a pauna uh te leilot thu vive hi a, bangma ci takpi thu a om bua hi.
- ³⁷Ama tungah amate in thumaan ngawl hi; ama taw a thuciamna tungah amate thumaan ngawl hi.



- ³⁸Ahihang Pathian in ama mite hesuak hi. Amate mawna maisak a, a susia bua hi. Ama in tamvei mama a thin uukna iip in a thin sona vei kenkon hi.
- ³⁹Amate sia a thi theite ahi lel hunlam, vuiva zok a, a bo kik paih bang ahi hunlam ama in phawk hi.
- ⁴⁰Senneal ngam sungah amate in ama bangtan vei leedo in, bangtan vei ama heesak ziam!
- ⁴¹Amate in makphet makphet in Pathian ze et uh a, Israel ii a thiangtho Pathian tungah thin natna piangsak hi.
- ⁴²Amate in ama vaangletna lian le a ngalte khutsung pan a suataksak ni mangil uh a,
- ⁴³Egypt ngam Zoan zaangleitam ah ama ii a nasia mama sepnate le nalamdang a laknate amate in mangil uh hi.
- ⁴⁴Ama in ngunte chisan suaksak a, Egypt mite in tui neak tu a nei bua uh hi.
- ⁴⁵Ama in tua mihingte sungah ngim pia tu in thote puak a, a leitanghte lalsak tu in ulolte paisak hi.
- ⁴⁶Ama in amate lo an a ne tu le a lote a lalsak tu in khaumawte puak hi.
- ⁴⁷Ama in amate ii sapit nguite ngial taw, a thei kungte vuuk taw thisak hi.
- ⁴⁸Ama in a ngante ngial taw, a tuu a keal honte keaktang taw in thatlum hi.
- ⁴⁹Thina vantung mite bangin hong pai ama thin uukna le thinsona a buaksukna taw ama in nasia takin amate thin ngimna pia hi.
- ⁵⁰Ama in a thin uukna iip ngawlin ahibuale amate nuntakna uh khoaikheetsak ngawlin, pul natna taw amate thatlum hi.
- ⁵¹Ama in Egypt ngam mite innkuan theampo sung pan a tapaciil teng thatlum hi.
- ⁵²Tuaciangin ama in tuucingpa bangin a mite lampui in pusuapui a, senneal ngam kantan pui hi.



- ⁵³Ama in amate ngammuang takin lampui a, amate a lau bua uh hi; ahihang tuipei in a ngalte khulum hi.
- ⁵⁴Ama in a zaw sa mualte tung, a thiangthona leitangh ah amate paipui hi.
- ⁵⁵A mite a mainaw uh ciang tua ngamah a teang mite ama in notkeak hi; tua leitangh sia Israel minamte hawmsakin amate ii innte sia a mite a pia hi.
- ⁵⁶Ahihang amate in Vaanglianbelpa Pathian leedo in, a zia en uh hi. Amate in a thupiakte a zui bua uh hi,
- ⁵⁷ahihang amate sia a taangpupite bangma in, leedo nopna thin le thumaan nop ngawlina thin nei uh a, thaltang koai khat bangma in muanhuai ngawl hi.
- ⁵⁸Amate in Pathian he ngawlte biakna munte taw ama thinuuk sak uh a, amate ii milimte taw ama thin sosak uh hi.
- ⁵⁹Pathian in tuate a mu ciang a thin uuk ahikom, ama mite a nial thiang hi.
- ⁶⁰Ama in eite taw hong teenkhopna sa a inn ahi Shiloh a om ama buk sia nusia hi.
- ⁶¹Ama in ama vaangletna le minthanna lim ahi Thukham Thingkuang sia eima ngalte in mansak hi.
- ⁶²Ama mite tungah ama thin uuk ahikom a ngalte in ama mite thatsak hi.
- ⁶³Tangvalte sia ngal sungah kithatlum a, ngaknute ii a teenpui tu kuama a om bua hi.
- ⁶⁴Thiampite ngual khut sa taw thi a, amate ii meingongte sia a kaa tu zongh ki oai ngawl hi.
- ⁶⁵A khakbel ciangin Topa sia a mutho bangin hong thoto hi; ama in sapittui ii a thot pasal thahat pa bang ahi hi.
- ⁶⁶Ama in a ngalte sia a kikhomsuan tu maizum huai lelna sungah not kik hi.
- ⁶⁷Ahihang ama in Joseph suante a nial hi; ama in Ephraim minamte a tealtuam bua hi.
- ⁶⁸Tuate taangin ama in Judah minam le a it mama Zion Mual teal zaw hi.



⁶⁹Ama in vantung a om a inn taw a kibang Biakinn sia tua munah sa hi; A tawntung a kho tu in tuasia leitung taw ma kibangin ama in kipsak hi.

⁷⁰Ama in a naseampa David teal hi;

⁷¹Ama in David sia ngantatna munte ah tuuhon a cinna pan la a, Pathian mihingte ii tuucingpa ahi Israel te kumpipa suaksak hi.

⁷²David in ama kaang sung om ngawl kipiakna taw amate khoi a, thiamna taw lampui hi.

Psalm Late 79

Minam Suatak natu Thungetna

¹Pathian awng, Pathian he ngawlte in na ngam hong sim zo hi. Amate in a thiangtho na Biakinn ninsak uh a, Jerusalem sia a zancip in nusia uh hi.

²Amate in na mite luang vaciikte neak tu le na naseamte luang ngamsate neak tu in nusia uh hi.

³Amate in na mite chisan sia tui bangin keesak hi; Jerusalem khuathing ah chisan sia tui bangin luang a, a thite a phum tu kuama taang nawn ngawl hi.

⁴Kiimkot minamte in kote hong leal zazan hi; amate in kote hong nuisan zazan a hong selno hi.

⁵Topa awng, kote tungah a tawntungin na thin hong uuk tu ni ziam? Na thin uukna sia mei bangin kuang tan tu ziam?

⁶Nang hong bia ngawl minamte le nang tung a thu hong ngen ngawlte tungah na thin uuk ta in.

⁷Banghangziam cile amate in na mite thatlum zo hi; na ngam zancipsak hi.

⁸Ka taangpupite mawna hu in kote daan hong pia heak in. Lametna theampo ka bosua siat zo uh a, tu in kote hong hesuak ta in.

⁹ Pathian awng, kote hong hu tan a hong hun tan; nangma mama na ki upat natu in, kote hong suatak tan, a ka mawnate uh hong maisak tan.



¹⁰Banghangin minamte in “Na Pathian uh koi sungah om ziam?” ci in hong dong tu ziam? Na naseamte chisan a buaksak hu in tua minamte tungah daan na piak sia kote in hong musak tan.

¹¹Thongtaakte ii a taunate ngai ta in a, na vaangletna lianpi taw a thi tu in a kikoisate suatak in.

¹²Topa awng, minam dangte ii nang hong lealna hu in amate tungah a see sali in thuk kik in.

¹³Tuasia ciang na nganhon sungah tuute ahi ko na mite in a tawntungin lungdam kong ko tu uh a, hong pai lai tu hun theampo sungah nang kong pok tu uh hi.

Psalm Late 80

Minam Kipuaphat kik natu Thungetna

¹Israel te ii Tuucing pa awng, hong ngai tan; Na tuu hon lampuipa awng, hong za tan. Cherub te ii tung sang, na kumpi tokhum tungah a to pa awng,

²Ephraim, Benjamin le Manasseh minamte tungah nangma le nangma hong kilaak tan. Na thahatna kote hong lak tan; hong pai tan a hong hun tan!

³Hong siapui kik tan, Pathian awng! Na hesuakna hong lak tan tua hi le ka suakta tu uh hi!

⁴Topa Vaanglianbelpa Pathian awng, bangtan vei dong na mihingte thungetna tungah hong thin uuk tu ni ziam?

⁵Heena sia neak tu in kote nong pia zo a, dawn tu in thitui haipui khat nong pia zo hi.

⁶Eite kiimkot ngamte in ka leitangh kituu in na kisimsak hi; ka ngalte in kote hong leal zazan hi.

⁷Hong puapha kik tan, Vaanglianbelpa Pathian awng! Na hesuakna hong lak tan, tuasia ciang ka suakta tu uh hi.

⁸Nangma in sapit ngui khat Egypt panin na la a, minam dangte hawlkeak in amate leitangh tungah tuasia na suan hi.



⁹Nangma in tuasia a khan natu in mun khat na thiangsak hi; zungthuk thasuk a ngambup huamin zaam hi.

¹⁰A lim taw mualte siin hi; a baakte in Cedar thingkung liante deap hi.

¹¹A baakte sia Mediterranean Tuipi dongin beak a, Euphrates ngun dong zaam hi.

¹²Banghangin a kiimkot uumna dalte talthamsak ni ziam? Tu in tua mun a kantan pawpo in sapit ngate ngu thei hi;

¹³ngalhte in siikcil a, ngamsate in an in nei hi.

¹⁴Vaanglianbelpa Pathian awng, ko sang hong nga tan! Vantung panin ko hong ensuk tan; hong pai tan a na mite hong hun tan!

¹⁵Hong pai tan a, hi na suan sa sapit ngui le a hat tu a, na suan sapit ngui moi sia hong hung tan!

¹⁶Ih ngalte in tua sapit ngui sia mei taw halin saattan zo hi; amate sia thin uukna taw ngau in a, lalsak in!

¹⁷A thahat mama in na vawt minam, na tealsa mite dalin keamcing in.

¹⁸Nang kung panin ka tai kik ngei buatu uh hi; kote hong nungtasak tan, tua hile nang kong pok tu uh hi.

¹⁹Hong puapha kik tan, Topa Pathian Vaanglianbelpa awng. Na hesuakna hong lak tan, tuasia ciang ka suakta tu uh hi.

Psalm Late 81

Poi khaamna La

¹Ei hong hungpa Pathian tungah lungdam in au vun; Jacob ii Pathian tungah pokna la sa vun!

²Music tum kipan vun a, thikdaalkualte tum vun; tengtongte le liamlote taw aw hoite ngingsak vun.

³Thadet ciang le thalik ciangin poaikhaam natu in lemle tum vun.

⁴Hisia in Israel ngamsung thukham hi a, Jacob Pathian ii thupiak ahi hi.



⁵Ama in Egypt ngam a sim ciangin Israel mite tungah tua thukham a piak ahi hi. Heak ngei ngawl aw khat in hi bangin a ci ka za hi,

⁶“Note nungzaang panin na vanhngit uh kong laakkeaksak hi; na puak uh uksuangte kong khiaksuksak hi.

⁷Ngim na nga laitakin nong sam uh a, kong hun hi. Ka bukna vuipe sung panin kong zo a, Meribah cikte ah note kong ze et hi.

⁸Ka mite awng, kidop natu kong sonte ngai vun; Israel awng, ka thu nong ngai tu uh ka thangai mama hi!

⁹Note in pathian dang peuma na bia ngei buatu uh hi.

¹⁰Keima in Egypt ngam pan note hong pusua Topa na Pathian ka hi hi. Na kam uh kaa vun, an kong vaak tu hi.

¹¹“Ahihang ka mite in ka thu hong ngai nuam ngawl a, Israel te in ka thu hong ni ngawl tu hi.

¹²Tua ahikom amate sia a thinpuina uh taw kizui in a uuk bang po ka paisak a, a vawt nop po ka vawtsak hi.

¹³Ka mite in ka pau hong ngai hen a, ka thu hong ni le ka oai mama hi ih ve!

¹⁴A ngalte manlang takin ka zawsak tu a, a ngal a sa theampo ka zawthalsak tu hi.

¹⁵Kei hong ensante in kiitakna taw ka mai ah hong kun tu uh hi; amate ii thuak daan sia a tawntungin a kikhomsuan tu uh hi.

¹⁶Ahihang note sia a limbel zungtaang taw kong vaak tu a, ngam khuaitui taw kong lungkimsak tu hi.”

Psalm Late 82

Ukpi Lianbel Pathian

¹Pathian in vantung council kikhopna ah hun uk hi; tua pathiante kikhopna sungah ama in hi bangin thukhensat hi:



²“A maan ngawl thukhennate kheal vun; mihing seksolte ngum nawn heak vun!

³A zawngte le tangate panpui tavun; ki taangsapna a neite le a cimawte tungah a kilawm in en vun.

⁴Amate mihing seksolte khut sung panin suatak tavun.

⁵“Note in bangza in tel ngawl nu ziam! Bangza in nangh nu ziam! Note na ngamta khial siat zo uh a, leitung ah thukhaikim ngamtatna bo zo hi.

⁶“Note in pathiante na hi uh hi' kong ci hi;

'note theampo sia a Saangbel Pa ii tate, na hi uh hi.'

⁷Ahihang mihingte bangma in na thi tu uh hi; na nuntakna uh sia kumpipa tate khat pawpo ii nuntakna bangin bo tu hi.”

⁸Hong pai tan, Pathian awng, leitung hong uk tan; ngam theampo sia nangma neisa ahi hi.

Psalm Late 83

Israel te ii A ngalte A zaw natu Thungetna

¹Pathian awng, thim om heak in; huthe ngawlin om heak in, daitak om tha ka tawte!

²En in! Na ngalte in hong leedo a, nang hong ensante in nang hong leedo laitak hi.

³Amate in na mite lang khat panin thuku ngeal uh a, nangma ii na panpui mite thasawm uh hi.

⁴Amate in, “Hong pai tavun, amate ngam sutham tawng, tua hile Israel te sia a tawntungin ki mangil tu hi,” ci uh hi.

⁵Amate in a ngealna tungah lungkim tek a, nang lang khat ah pang tek uh hi:

⁶Tuate sia Edom le Ishmael te; Moab le Hagrite mite;

⁷Gebal, Ammon le Amalek mite, Philistia le Tyre mite ahi uh hi.



⁸Lot ii suan Ammon le Moab ii pawlpui a thahat Assyriate zongh amate sangah pang hi.

⁹Midian mite le Kishon Ngun a om Sisera le Jabin tungah na vawt bangin amate tungah vawt in.

¹⁰Endor ah nangma in amate na zothal a, amate luang lei ah a muat uh hi.

¹¹⁻¹²“Pathian neisa leitangh theampo eima atu in la tawng” a ci Oreb le Zeeb tungah na vawt bangin amate lampuite tungah vawt in; Zebah le Zalmunna te na zaw thal bangma in amate a ukte theampo zo thal in.

¹³Pathian awng, amate sia leivui bangin thezau in a, vui ii seamkeak taangphawte bang hisak in.

¹⁴Mei ii duithuk a kak bang, mualte meikuang in a kaksak bangin

¹⁵na vuipei suangval taw amate del in a, a kiitak huai na vuipei taw amate lausak in.

¹⁶Amate maitang sia maizumna taw na tuam in, Topa awng, amate in na vaangletna telsak in.

¹⁷Amate lelina thuakin a tawntungin lau ngawp taken a, maimawlina sungah amate thi taken.

¹⁸Nangma bekma in Topa na hi hunlam, leitung bup a lianbel ukpa na hi hunlam amate in he taken.

Psalm Late 84

Pathian ii Inn Thangaina

¹Vaanglianbelpa Topa awng, na Biakinn bangza in thangai khi ziam!

²Tua munah ka om nuam mama hi! Topa Biakinn sungah om tu ka thangai hi. Ka nuntakna buppi taw a nungta Pathian tungah lungdam in la ka sa hi.

³Tonbawmte ngangawn in bu vawt a, pialpiate in amate buk tek nei hi; amate in na biaknataw taw a kinaina ah a note keam uh hi, Vaanglianbelpa Topa ka kumpipa le ka Pathian awng.



⁴Na Biakinn sungah teang a, a tawntung nang tungah pokna la a sate in mi lungdamte ahi uh hi.

⁵Nangma kung pan thahatna a ngate le a thiangtho Zion Mual ah Pathian biak tu a lawpte in thupha ngate ahi uh hi.

⁶Amate in Baca kongaw mualkuam a kantan uh ciangin tua mun sia ciktui phulna mun hong suak hi; khuapi ngua in tuicintheina munte dimsak siat hi.

⁷Amate a papai uh ciang, hat vaial a, amate in pathiante ii Pathian sia Zion mual tungah a mu tu uh hi.

⁸Ka thungetna hong za tan, Topa Vaanglianbelpa Pathian awng. Hong ngai tan, Jacob Pathian awng!

⁹Pathian awng, na teal sa kumpipa kote kumpipa thupha hong piaksak tan.

¹⁰Na Biakinn sungah ni khat hun zakna sia leidang mun khat pawpo ah kum tulkhat zak sangin phazaw hi; Mihing seksolte inn sungah ka teen sangin ka Pathian inn kongkha ah ka ding nuamzaw hi.

¹¹Topa in ei hong sungsia pa le a minthang kumpipa hi a, ama in cikna le minphatna taw eite thupha hong pia hi. A maan a seamte tungah ama in na phate khat zongh a danh bua hi.

¹²Vaanglianbelpa Topa awng, nang hong muangte in bangza in a lungdam uh ziam!

Psalm Late 85

Minam Noptuam natu Thungetna

¹Topa awng, na leitangh na hesuak zo hi; nangma in Israel te na nuamsasak kik zo hi.

²Nangma in na mite mawnate na maisak zo a, amate tatkhialna theampo na pengsak zo hi.

³Amate tungah na thin uukna teng na thaisak zo a, na thin uuk thangsiatna zongh na vei kenkon kik zo hi.



⁴Hong puapha kik tan, Pathian kote ngumpa awng, kote nong diksak ngawl na thaisak in!

⁵Ko tungah a tawntungin nong thin uuk tu ziam? Na thin uukna thai ngei nawn ngawl tu ziam?

⁶Kote hong thahatsak kik tan; tua hile ko na mite in nangma kong pok kik tu uh hi.

⁷Topa awng, nong itna kip hong lak tan, tuaciang nangma ngupna le huna kote hong pia tan.

⁸Topa Pathian paunate ka ngai nginge hi; ih mawmawtna ziate zui kik bua po leang ama in ei a mite tungah kilemna hong kamciam hi.

⁹Ama a thasiate hun tu in ama kinging takpi a, ama hong ompuina taw hong huutna in ih ngam ih lei ah kho top tu hi.

¹⁰Ki itna le thumaanna ki situa tu hi; thutang le kilemna kingawngkoai tu hi.

¹¹Mihingte thumaanna in lei panin van banto tu a, tuaciang Pathian thutang in vantung panin ensuk tu hi.

¹²Topa in eite hong nuamsasak tu a, ih leitangh in anlaak tu tam mama piangsak tu hi.

¹³Thutang suana sia Topa mai ah pai tu a, ama atu lampi sial khol tu hi.

Psalm Late 86

Hu natu Thungetna

¹Topa awng, hong ngai tan a, hong zo tan, banghangziam cile kei sia cimaw in thazawm khi hi.

²Kei sia na tungah hong thumaan ka hikom thina pan hong hun tan; kei sia na naseampa hi a nang hong muang ka hi ciang, hong hun tan.

³Nangma in ka Pathian na hikom, kei hong hesuak tan; sunkhua teak nang tungah thu kong ngen hi.



- ⁴Topa awng, na naseampa hong lungdamsak tan, banghangziam cile ka thungetnate nang kungah hong thengto hi.
- ⁵Ko tungah nangma na pha a, nong mai sasak hi, nang tungah thu hong ngente theampo atu in itna kip taw na kidim hi.
- ⁶Topa awng, ka thungetna hong ngai tan; hu ngen a kong auna hong za tan.
- ⁷Ngimna hunte sungah nang kong ko hi, banghangziam cile nangma in ka thungetnate nong zo hi.
- ⁸Topa awng, nang taw a kibang pathian om ngawl hi, nang sep bang a seam kuama om ngawl hi.
- ⁹Na bitphua sa minam theampo hong pai in na mai ah kun tu hi; amate in na letna hong pok tu hi.
- ¹⁰Nangma in thahat in a lamdang nate na vawt hi; nangma bek Pathian na hi hi.
- ¹¹Seam a nong oaite hong hil tan, Topa awng, thumaan takin na thu kong ni tu hi; a kicing kipiakna taw, na na ka sep natu hong hil tan.
- ¹²Topa ka Pathian awng, ka thin theampo taw nang kong pok tu hi; Na letna sia a tawntungin ka thangsak tu hi.
- ¹³Nong itna kip sia kei atu bangza in lian ziam! thaankuul pan mama in nangma in kei nong hun zo hi.
- ¹⁴Pathian awng, mihing kiphasakte in kei hong langpan tu in hong pai hi; mihing tatkha hon pawlkhat kei thatlum tu in hong hanciam hi — nang hong thusim ngawl mihingte ahi uh hi.
- ¹⁵Ahihang Topa awng, nang sia, a hesuak thei le a it thei Pathian na hi a, a thin uai tawntung, a dik tawntung le a thumaan tawntung na hi hi.
- ¹⁶Kei sang hong nga tan a kei hong hesuak tan; hong thakhosak tan a hong hun tan, banghangziam cile ka nu bangma in na na ka seam hi.
- ¹⁷Na phatna a kitelna hong lak tan, Topa awng; kei hong ensante in heenepna le huna nong piak a mu uh ciangin a mai zum tu uh hi.



Psalm Late 87

Jerusalem Khua Pokna

- ¹Mual thiangtho tungah Topa in ama ii khuapi saat hi;
- ²Ama in Israel ngam sung mun dang theampo sangin Jerusalem khuapi it zaw hi.
- ³Pathian khuapi awng, nang huvau a lamdang a sonte ngai in:
- ⁴“Kei thu hong ni minam tuatamte tepteena lai ka vawt ciangin Egypt le Babylon ka hel tu hi; Philistia, Tyre le Ethiopia te sia Jerusalem ah a teangte tepteena lai sungah ka sim tu hi,” ci hi.
- ⁵Zion taw kisai in, hi minam theampo sia ama neisa hi a, Vaanglianbelpa in ama sia a tha khosak tu hi” kici tu hi.
- ⁶Topa in mihing phaza ciamtee lai vawt tu a, tua mite theampo sia Jerusalem khua mi in hel tu hi.
- ⁷Amate laam in la sa uh a, “Thupha ka saan uh theampo ii naak sia Zion ah om hi” ci uh hi.

Psalm Late 88

Hu nget Auna

- ¹Topa Pathian ka ngumpa awng, nitangtum in au a hu kong ngen hi, tuaciangin zanin na mai ah kong pai hi.
- ²Ka thungetna hong ngai tan; hu ngen a kong auna hong ngai tan!
- ³Ngimna tam mama kei tungah hong tung zo a, ka thi dektak hi.
- ⁴A thi tu in a om midangte theampo bangma ka hi hi; ka thahatna theampo bo hi.
- ⁵Mithite sungah kei hong kinusia hi; thalup thuak a, thaankuul sung a lumte, nangma ii na makngil biing, na hu thei nawn ngawlte taw ka kibang hi.
- ⁶Nangma in keima sia thaankhuk thukte sung, a zing bel le a thukbel dum sungah nong lawn suk zo hi.



⁷Na thin uukna kei atu ngit mama a, tua ii tuihual in keima hong delpeak zo hi.

⁸Ka ngualtamhte in hong taisansak zo ni hi; amate atu in kei sia a kiihuai nong suaksak zo hi. Kei sia hong kikhabil a, ka suakta thei bua hi;

⁹ka thuakna hangin ka mit thazawm hi. Topa awng, nisim in nang kong biakpui a, thungen in ka khutte nang kong lapto hi.

¹⁰Mithi sate atu nalamdang laknate vawt kana ni ziam? Amate hong tho in nang hong pok kana ziam?

¹¹Thaankuul sungah na itna kip kison kana ziam? tua ahibuale siatna omna munah nang ii thumaanna om kana ziam?

¹²Tua khuazingna munah nang ii nalamdang laknate kimu ziam, tua ahibuale a kimangil cip sate ii ngam sungah nang ii phatnate kimu ziam?

¹³Topa awng, nang tungah hu ngenin kong biakpui hi; zingsim in nang tungah thu kong ngen hi.

¹⁴Topa awng, banghangin kei hong nial ni ziam? Banghangin kei hong nungngat ni ziam?

¹⁵Ka khanmoi lai pan ma in ka thuak a, thina taw ka kinai ngei hi; Daan nong piakna vanhngit hu in kei ka tul zo hi.

¹⁶A nasia na thin uukna in kei hong delpeak hi; a kiitak huai nong donate in kei hong lalsak hi.

¹⁷Tuate in keima sia namthuam bangin sun khuateakin hong kiim um hi; mun theampo panin kei hong neneak hi.

¹⁸Ka ngualtamh phabelte ngangawn in nong nusia sak zo a, khuazing bekma sia kei kitholpui ahi hi.

Psalm Late 89

Minambup Ngimnga Hun a Biakna La

¹Topa awng, a nong itna kip sia la in ka sa tawntung tu hi; na thumaanna a tawntungin ka thangsak tu hi.



- ²Na itna in a tawntung atu in kikhomsuan tu ci in ka he a, na thumaanna in van bangin kip hi.
- ³“Ka teal mihing pa taw thuciamna khat ka vawt zo hi; ka naseam pa David tungah kamciam ka pia zo a,
- ⁴“Nangma suan ahi khat in kumpi in maang tawntung tu hi; na kumpi khangngui sia a tawntungin kong kepsak tu hi,’ ka ci hi,” nangma in na ci hi.
- ⁵Vantungte in a lamdang na vawtte la in hong sak hi; Topa awng amate in na thumaanna la in sa uh hi.
- ⁶Topa awng vantung ah nang taw a kibang kuama om ngawl hi; vantung mi a minpiang nang kimpui kuama om ngawl hi.
- ⁷Mi thiangthote council kikhopna ah nang hong kiita hi; amate theampo in nang hong thasia in ding uh hi.
- ⁸Vaanglianbelpa Topa Pathian awng, nang za in kuama thahat ngawl hi; Topa awng na theampo ah nang na thumaan hi.
- ⁹A thahat tuipei na uk hi; tua ii a thin uuk tuihualte na thimsak hi.
- ¹⁰Nganhingpui Rahab sia na sucip a, na thatlum hi; Na thahatna lianpi taw na ngalte na zothal hi.
- ¹¹Vantung in nangma aa hi a leitung zongh nangma neisa ma ahi hi; simlei le a sung a om theampo nangma vawt hi.
- ¹²Saksang le thangsang na bitphua hi; Tabor Mual le Hermon Mualte in lungdam in nangma la hong sak hi.
- ¹³Bangza in na vaanglian ziam! Bangza in na thahatna lian ziam!
- ¹⁴Na kumpi ngam sia thumaan thutang le thukhaikim khenna tungah kidoppha hi; ki itna le thumaanna sia na sep na vawt theampo ii sungah kilangh hi.
- ¹⁵Nangma lasakna taw hong biate le na dikna khuavak sungah a teangte sia mi lungdamte ahi uh hi.



¹⁶Nangma hangin amate sia sunkhua in lawpna nei uh a, amate in na phatna hu in nang hong pok uh hi.

¹⁷Nangma in zawna lianpите nong pia hi; na itna sungah zawna nong mualsuasak hi.

¹⁸Topa awng, nangma in kote hong dalpa nong tealsak hi; Israel ii a Thiangtho Pathian awng, nangma in ko atu kumpipa nong pia hi.

David tungah Pathian ii Kamciam

¹⁹A thumaan na naseamte tungah taanglai in mu kholna khat na piak sungah, “Ngalkap minthang khat huna ka pia zo hi; mihingte sung pan ka teal sa khat kumpi tokhum ka pia zo hi.

²⁰Ka naseam pa David sia sathau thiang noina taw kumpi in ka koi zo hi.

²¹Ka thahatna ama taw om tawntung tu a, ka vaangletna in ama hatsak tu hi.

²²A ngalte in ama zo ngeingawl tu hi; mihing seksolte in ama zo ngawl tu hi.

²³A ngalte ka sucip tu a ama a ensan theampo ka that tu hi.

²⁴Ama ka it tu a, ama tungah ka thumaan tu hi; ngalzo tawntung tu in ama ka siam tu hi.

²⁵Mediterranean panin Euphrates ngun dong a kumpi ngam ka keau tu hi.

²⁶Ama in kei tungah ‘Nangma in ka pa le ka Pathian na hi hi; nangma in kei hong dalpa le hong ngumpa na hi hi’ hong ci tu hi.

²⁷Ama sia ka tapaciil in ka vawt tu a, kumpi theampo sung pan a lianbel hi tu hi.

²⁸Ama tungah ka kamciam ka kholet tu a, ama taw ka thuciamna sia a tawntungin a kikhomsuan tu hi.

²⁹Ama ii kumpi khangngui sia van bangin kip tu hi; ama ii suan khat sia kumpi in maang tawntung tu hi.

³⁰“Ahihang a suan a paalte in ka thukham a ni bua a, ka thupiakte bangin a nungta bua uh le,



- ³¹amate in ka hilnate a melsia a, ka thukhamte a len bua ahile,
- ³²amate mawnate huvau in daan ka pia tu hi; amate khialnate huvau in ka thuaksak tu hi.
- ³³Ahihang David ka itna ka bosak buatu a, ama tungah ka kamciam ka peal buatu hi.
- ³⁴Ama taw ka thuciamna ka tatsak buatu a, a tungah ka piak ka kamciam sa khat zongh ka dok kik buatu hi.
- ³⁵“A tawntung atu in khat vei lian, ka min thiangtho taw kamciam ka vawt zo a: David tungah ka leilot ngei buatu hi.
- ³⁶Ama in suan le paal nei tawntung tu a, ni a taan lai theampo in keima in a kumpi ngam ka etsak tu hi.
- ³⁷Tuasia in van ah a om thumaan tetti a pang soltha bangin kip tu hi.” na ci hi.

Kumpipa Ngal Lelna Kaamal

- ³⁸Ahihang na teal sa kumpipa tungah na thin uuk hi; ama taisan in na nil hi.
- ³⁹Na naseampa taw na thuciamna sia na tatsak zo a, a kumpi lukhu sia buan sungah na vawk zo hi.
- ⁴⁰Nangma in a khuapi luphungte na sutham zo a a kulhpite a cimh sa in na nusiak hi.
- ⁴¹Kantan in a pai po in a neisate nguksak hi; a innpaamte theampo in ama nui san uh hi.
- ⁴²Ama ngalte sia ngal zawna na pia zo hi; amate theampo na lungdamsak hi.
- ⁴³Ama ngalhiamte a luithong na suaksak zo a, ngal kidona sungah na lelsak zo hi.
- ⁴⁴A kumpi ciangkhut na laaksak zo a, a kumpi tokhum sia lei denna in na neizo hi.
- ⁴⁵A hun ngawlin ama na huaisak zo a, maimawlina taw ama na tuam hi.

Kitat natu Thungetna



⁴⁶Topa awng, nangma le nangma a tawntungin kiseal tu ni ziam? Na thin uukna bangtan vei mei bangin kuang tu ziam?

⁴⁷Ka nuntakna bangza in tom ziam ci sia hong phawsak tan; kote theampo sia a thi thei tu a nong bitphua ahi hunlam phawk in!

⁴⁸Akua thi ngei ngawlin, nungta thei tu ziam? Mihing in thaankhuk pan bangbangin ama le ama kikeam thei tu ziam?

⁴⁹Topa awng, tu ma sia a, na itna tettite koisung om ziam? David tung kamciam na vawtte koisung om ziam?

⁵⁰Kei na naseam pa hong kilan zazanna le Pathian he ngawlte hong haamsiatna ka thuakte hong makngilsak heak in.

⁵¹Topa awng, thaankhuk panin "Na ngalte in na teal sa kumpipa leal zazan hi! a paina po ah amate in leal zazan uh hi.

⁵²A tawntungin Topa pok vun! Amen! Amen!.

Psalm Late 90

LAIBU A LINA (Psalm Late 90—106) **Pathian le Mihing**

¹Topa awng, nangma in a tawntungin kote inn na hi hi.

²Mualte na bitphua ma, simlei na piansak ma in nangma in a om tawntung Pathian na hi a, a tawntungin Pathian na hi tu hi.

³Kote sia ka hina uh ah cia kikin nong sawl hi; kote leivui nong suak kiksak hi.

⁴Kum tulkhat sia nang atu in ni khat bang ahi hi; tuate in a bo sa zeini taw kibang a, zan lai hun tomno khat taw kibang hi.

⁵Nangma in tuipawm ii taai bangin kote nong paipui hi; mangmat khat bang zaa ka hi bek uh hi. Kote sia zingsang in meang a,

⁶khangto in a paak, nitak sang ciang vulin a thi lopate taw ka kibang uh hi.



⁷Na thin uukna in ko hong susia hi; thinso in na nge ngawpna in ko hong lausak hi.

⁸Ka mawna uh te na mai ah koi in, ka maw kuna uh te na mu theina ah na koi hi.

⁹Na thin uukna in ka khan uh hong tomsak hi; ka khan uh sia kihuaui khat bangin mang vadi hi.

¹⁰Kote ii hun nei theampo in kum sawmsali hi — ka hat uh le kum sawmliat hi; Tuatate in ngimna le heena teng hong puak ahi bek hi; nuntakna sia hai ngawlin kiman ziau a, kote sia mumun ka om nawn bua uh hi.

¹¹Na thin uukna ii thahatna buppi a kua in thuak ngei ziam? Na thinsona sia bangza lauhuai thei ci sia akua in he ziam?

¹²Ka ciim thei natu uh in ka nuntakna uh bangza in tom ziam ci sia hong hiltan.

¹³Na thin uukna bangtan khuangei lai tu ziam? Topa awng, na naseamte tungah mulkimna hong nei tan!

¹⁴Ka nuntak tawntung lungdam in la ka sak thei natu uh in zingsim in na itna kip hong dim tan.

¹⁵Lungmanna ka thuak uh kumte theampo sungah heena nong piak za ma in tu in lungdamna hong pia tan.

¹⁶Ko na naseamte in na lianpi na sepnate hong musak tan; ko ii suan le paalte in a minthang, na thahatna musak in.

¹⁷Topa kote Pathian awng, na thuphate ko taw hong om taken. Ka sep ka vawt uh theampo sungah zawna hong pia tan!

Psalm Late 91

Ei Hong Dalpa Pathian

¹Ngammuan natu in Topa kung a pai, a kua po ahizong Vaanglianbelpa dalna sungah a om pawpo in



- ²ama tungah: “Nangma in kei hong hungpa le hong dalpa na hi hi; Nangma in ka Pathian na hi hi; nang sungah muanna kong nei hi,” ci thei hi.
- ³Ama in a kiseal launa theampo pan le thi thei natna theampo panin, nang hong keam tu hi.
- ⁴Ama in a thakhuite taw nang hong uap tu hi; ama khoina sungah na ngammuang tu hi; Ama thumaanna in nang hong dal tu a, hong hung tu hi.
- ⁵Zan in launate le sun in thakhat thu in hong sim theite na kiita buatu hi,
- ⁶ahibuale khuazing sungah hong vaat thei pul natnate ahizong suntang in hong thatlum thei a ngilote ahizong na kiita buatu hi.
- ⁷Na kungah mihing tulkhat pukin a thi zong, na kiimkot ah tulsawm a thi hialzong nang bangma hong kilaw ngawl tu hi.
- ⁸A seksolte daan a kipiakzia na en tu a, na mu tu hi.
- ⁹Nangma in Topa sia nang hong hungpa in na nei zo a, a Saang Belpa sia nang hong sungsiapa in na nei zo hi,
- ¹⁰tua ahikom siatna khat pawpo in nang hong vaat ngawl tu a, na inn nai ah ngoltolna hong theng ngawl tu hi.
- ¹¹Pathian in a vantung lalangte nang hong cing tu, na paina po ah hong dal tu in tavaw tu hi.
- ¹²Na peang in suang sui tha in na liam ngawl natu, amate in a khut taw nang hong dom tu hi.
- ¹³Tawpите le ngulte, tawpi hangte le ngul ngu neite na tuancil tu hi.
- ¹⁴Pathian in, “Kei hong itte ka hun tu a, Topa a hong saangte ka hung tu hi.
- ¹⁵Kei hong biapui ciangin amate ka zo tu hi; ngim a nga ciangin amate taw ka omkhawm tu hi. Amate ka suatak tu a, ka upat tu hi.
- ¹⁶Amate sia khan sauna tel ka pia tu a, amate ka ngum tu hi,” ci hi.

Psalm Late 92

Pokna La khat



- ¹Topa awng, nang tungah lungdam ko tu le Saang Bel Pathian awng, nangma upatna la sak tu sia bangza in pha ziam,
- ²zingsim in tatsat ngawl na itna thangsak tu, zan simin na thumaanna pualaak tu le
- ³khau taw a kithua tum theite le tengtong taw music hoite tumin lungdamkona sia bangza in pha ziam.
- ⁴Topa awng, a lian mama na sepnate in kei hong lungdamsak hi; na sepsa na vawtsate hu in lawpin la ka sa hi.
- ⁵Topa awng, na tuk na diannate bangza in lian ziam! Na ngaisutnate bangza in thuk ziam!
- ⁶Hi thu in mihing mawmaw khat ii heak zawk hi ngawl hi; a nangh khat in tel zo ngawl hi:
- ⁷a seksolte sia lopa bangin po thei tu a, a maan ngawlin a seamte nuamsa thei tu hi; ahitazong amate kilalcipsak tu hi,
- ⁸banghangziam cile Topa awng, nang sia a tawntungin a lianbel na hi hi.
- ⁹Na ngalte thi tu hi ci in ka he uh a, a seksol theampo kizothal tu hi.
- ¹⁰Ngam khuital bangin nong hatsak zo hi; lungdamna taw thupha nong pia zo hi.
- ¹¹Ka ngalte ngallelna ka mu zo a, a seksolte kaanate ka za zo hi.
- ¹²Thutangte palm kungte bangin limci tu hi; amate Lebanon ah Cedar thingkungte bangin khang tu hi.
- ¹³Amate sia Topa inn sungah a kisan, ih Pathian Biakinnpi sungah a limci,
- ¹⁴haam napi nga a nga lai, a tawntung a hing, a kho thingkungte bang ahi hi.
- ¹⁵Hisia in Topa thumaan a, kei hong hungpa sia khial ngawl hi ci in lak hi.

Psalm Late 93

Pathian in Kumpipa hi



¹Topa in kumpipa hi. Ama in uk zawkna le thahatna sia puan bangin silh hi. Leitung sia a omna munah kho takin kiphut a khiin thei hi ngawl hi.

²Topa awng, na kumpi tokhum sia a kipat pan ma khotop a, hun kipat ma in nangma na om khol zo hi.

³Topa awng, tuipi thukte in a aw uh ngingsak hi; tuate in a aw uh khanin hawk uh hi.

⁴Topa in vantung ah a lianbel in maang hi, tuipi liante hawkna sangin lianzaw a, tuipi ii tuihualte sangin thahatzaw hi.

⁵Topa awng, na thukhamte a tawntungin kho a, a tawntung le a tawntungin na Biakinnpi sia thiangtho takpi hi.

Psalm Late 94

A Theampo Thukhenmang Pathian

¹Topa awng, nangma in daan a pia Pathian na hi hi; na thin uukna kilanghsak in!

²Nang sia mihing theampo ii thukhenmang na hi hi; hong tho tan a, a kiphasakte amate taw a kiphu bang na pia in!

³Mihing seksolte a bangtan vei lungdam lai tu ziam? Topa awng, bang tan khuangei lai tu ziam?

⁴Khialna lian neite bangtan vei kiphasak lai tu a, amate khialna liante tungah bangtan vei kisuangtaak lai tu ziam?

⁵Topa awng, amate in na mite sucip hi; amate in nangma mite nengcip hi.

⁶Amate in meingong tangate thatlum uh a, ih ngam sungah a teang khual mite suamlum uh hi.

⁷Amate in, “Topa in ei hong mu ngawl hi; Israel Pathian in hong phawk ngawl hi,” ci uh hi.

⁸Ka mite awng, bangbangin taza dongin mawmaw in ngoai thei nu ziam? Bang hun ciangin tel tu nu ziam?



- ⁹Eite bil a vawt Pathian in za thei ngawl tu ziam? Eite mittang a vawt Pathian in mu thei ngawl tu ziam?
- ¹⁰Minamte a hil a pau pa in amate daan pia ngawl tu ziam? Mihing theampo ii syapa ahi ama in pilna nei ngawl ziam?
- ¹¹Amate ngaisut sia Topa in he hi; Amate khua ngaisutna telmeal a om ngawlzia ama in he hi.
- ¹²Topa awng, nangma ii na lamlakte, nangma ii na thukham na hil mite in bangza a lungdamte ahi ziam!
- ¹³Mihing seksolte mat natu in vuum a ki taw dong nangma in ama sia ngimna hunte pan na ommuangsak hi.
- ¹⁴Topa in a mite nusia ngawl tu hi; ama neisa mihingte taisan ngawl tu hi.
- ¹⁵Thukhen zumte ah thukhaikim khenna hong piang kik tu a, a thutang mihing theampo in tua thukhaikim khenna panpui tu hi.
- ¹⁶Mihing seksolte langpan in kei atu akua ding ziam? Siatna a vawtte langpan in kei sangah akua hong pang ziam?
- ¹⁷Topa in hong hu ngawl hi ka pole a thimthuna ngam a manlang tak ka zot zawk ngei zo tu hi.
- ¹⁸“Kei ka liik laitak hi” ka ci hi; ahihang Topa awng, nong itna kip in hong khuangkhosak hi.
- ¹⁹Thintoi a ka thin a ngim simin, nangma in nong heeneam a nong lungdamsak hi.
- ²⁰Sumnguk ne thei thukhenmangte, a khaikim ngawl thu, thutak a suate,
- ²¹Mihing phate a thasawmte a maw ngawl khat thidaan a plate sia nang taw a kipawl thei bua uh hi.
- ²²Ahihang Topa in kei hong hung hi; ka Pathian in kei hong dal hi.
- ²³Ama in amate ngitlo hu in daan pia tu a, a mawnate hu in susia tu hi; Topa ih Pathian in amate susia tu hi.



Psalm Late 95

Pokna La khat

- ¹Hong pai tavun, Topa pok tek tawng! Ei hong dal Pathian tungah ih lungnopna hangin la sa tek tawng!
- ²Ama mai ah lungdamkona taw pai in, a lungdam huai pokna late sa tawng.
- ³Banghangziam cile Topa in a vaanglian Pathian hi a, pathian dang theampo tungsia ah a vaanglian kumpipa ahi hi.
- ⁴Ama in lianghawng thuk belte panin mualsaang belte dong leitung buppi uk hi.
- ⁵Ama in ama vawt sa tuipei uk hi; ama mama ii a piangsak leitung zongh uk hi.
- ⁶Hong pai tavun, kunin ama bia tek tawng; eite hong Vawtpa, Topa mai ah khupdin tek tawng!
- ⁷Ama in eite Pathian ahi hi; eite sia ama hong khoi mite ih hi a, ama ii a vaak tuuhon ih hi hi. Tuni in ama son teng ngai vun:
- ⁸“Na taangpupite ii Meribah ngam Massah senneal ngam sungah a omlai bangin na thinpui sak heak vun.
- ⁹Tua munah amate atu ka vawt theampo sia amate in mu napi amate in kei hong sit in hong phin zazan hi.
- ¹⁰Kum sawmli sitset tua mite tungah ka thasiat suak hi. ‘Amate in bangza in thumaanna sel ziam! Amate in ka thupiakte zui tu a nial uh hi’ ka ci hi.
- ¹¹Ka thin uuk a, a ciliap huai kiciamna ka vawt hi: ‘Na ommuang natu a kong khapsa ngam sungah na tum ngei buatu uh hi’ ka ci hi,” ci hi.

Psalm Late 96

Pathian A lianbel Kumpipa

(1Khang Tangthu 16.23-33)

- ¹Topa tungah la thak khat sa vun! Leitung theampo awng, Topa tungah la sa vun!



²Topa tungah la sa vun a, ama pok vun! Ama ii eite hong ngupna lungdamna thupha nisimin thangsak vun.

³Ama minthanna minamte tungah thangsak vun, ama ii a vaanglian nasep nate mihing theampo tungah thangsak vun.

⁴Topa in lian a nasia tatakin pok tu ahi hi; pathian dang theampo sangin ama vaang piak zawk tu ahi hi.

⁵Minam dangte theampo ii pathiante sia milim hi lel bek hi, ahihang Topa in vantungte bitphua hi.

⁶Minthanna le vaangletna in ama kiim uum hi; a Biakinnpi sia vaangletna le hoina taw kidim hi.

⁷leitung mihing theampo awng, Topa pok vun. A minthanna le a thahatna pok vun.

⁸Topa ii a minthang a min pok vun; biakpiakna khat kengin ama Biakinnpi sungah pai vun.

⁹A thiangtho Pa hong kilangh ciangin ama mai ah kun vun; leitung bup awng ama mai ah liingin om vun!

¹⁰Minam theampo munah “Topa in kumpipa hi! Simlei sia kho takin kiphut a kikhiin thei ngawl hi; ama in mihingte thukhaikim taw thu a tan tu hi” ci vun.

¹¹Lei le van awng, lungdam vun! Tuipi awng, na sungah om nuntakna nei teng taw hawk vun;

¹²lote awng na sungah a om teng taw lungdam vun! Taam sungah om thingkungte in

¹³leitung uk tu in Topa hong pai ciang, lungdam in au tu uh hi. Ama in leitung mite sia thukhaikim taw a pha in a uk tu hi.

Psalm Late 97

Alianbel Ukpa Pathian



¹Topa sia kumpipa hi! Leitung awng lungdam in! Tuipi sungah a om, no tuikulhte awng, lawp tek vun!

²Meeikaai le khuazing in ama kiim uum hi; ama in thutang le thukhaikim taw uk hi.

³Meikuang sia a mai ah pai a, a kiimkot ah a om a ngalte kaangtum hi.

⁴Ama khualeng in simlei taangsak hi; tuasia Leitung in mu in liing hi.

⁵Mualte sia Topa mai ah, Leitung theampo ii Topa mai ah khuainun bangin tui tham hi,

⁶Vantungte in ama thutang thangsak uh a, minam theampo in ama minthanna mu uh hi.

⁷Milim bia a minpiang peuma maizum kingasak tu hi; pathian theampo in Topa mai ah kun uh hi.

⁸Zion mite lungdam uh a, Judah khuapite lawp tek uh hi, banghangziam cile na thukhenna hang ahi hi, Topa awng.

⁹Vaanglianbelpa Topa awng, nang sia Leitung theampo a ukpa na hi hi; pathian dangte theampo sangin na lianzaw lai hi.

¹⁰Topa in siatna a ensante it hi; ama in ama mite nuntakna dal hi; mihing seksolte thahatna panin amate suatak hi.

¹¹Thutangte tungah khuavak taang a, mip hate tungah lungdamna om hi.

¹²No a thutang theampo awng, Topa ii a sep sate hu in lungdam vun! A thiangtho Pathian in bang teng seam zo ci sia phawk vun a, ama tungah lungdamko vun.

Psalm Late 98

Simlei A uk Pathian

¹Topa tungah la thak khat sa vun; ama in nalamdangte vawt zo hi! Ama neisa vaangletna le a thiangtho thahatna taw ama in zawna nga zo hi.



²Topa in a zawna thu thangsak hi; ama ngupna vangletna sia minamte hesak hi.

³Ama in Israel te tungah a kamciam sia thumaanna le itna kip taw kholet hi. Mun theampo ah a om mihingte in ih Pathian ii zawna mu zo uh hi.

⁴leitung theampo awng, Topa tungah lungnopna la sa vun; late le lungnop aunate taw ama pok vun!

⁵Topa tungah pokna late sa vun! tengtongte tumin music ngingsak vun!

⁶Lemle le sakii te tum vun a, Topa, ih kumpipa tungah lungdam in au vun.

⁷Tuipi awng, na sungah nuntakna nei teng taw hawk vun; leitung awng, na tungah a teang theampo taw la sa vun!

⁸Ngunte awng, khutbeang vun; no mualte awng, Topa mai ah lungnopna taw lasa khawm vun,

⁹banghangziam cile ama in leitung uk tu in hong pai hi. Ama in leitung mite sia thukhaikim taw a pha in uk tu hi.

Psalm Late 99

Pathian Alianbel Kumpipa

¹Topa sia kumpipa ahi hi; tuaciang mihingte liinglawng uh hi. Ama in Cherub te ii tung sang, a kumpi tokhum tungah to a, leitung sia kilok hi.

²Topa sia Zion ah thahat hi; ama sia minam theampo tungah a lian bel ahi hi.

³Mihing sim in ama ii a lian le a vaang nei a min pok tu uh hi. Ama thiangtho hi!

⁴A thahat kumpipa awng, nangma in a maan nate na dei hi; nangma in Israel ngam sungah thukhaikim khenna omsak zo ni hi; nangma in thutang le phatna nong paipui hi.

⁵Topa ih Pathian pok vun; a kumpi tokhum mai ah bia vun! Ama thiangtho hi!



⁶Moses le Aaron in ama ii thiampite hi a, Samuel sia ama tungah thu ngen pa ahi hi; amate in Topa biakpui a, ama in zo kik hi.

⁷Ama in meei khuam panin amate paupui hi; amate tungah ama piak thukhamte le a thupiakte amate in zui uh hi.

⁸Topa kote Pathian awng, na mite ngetna na zo kik hi; A mawnate hu in amate daan na piak hial hangin, mawmaisakna a pia Pathian khat na hi hunlam amate na lak hi.

⁹Topa ih Pathian pok vun a, ama mual thiangtho ah bia vun! Topa ih Pathian thiangtho hi.

Psalm Late 100

Pokna La khat

¹Simleibup awng, Topa tungah la sa vun!

²Topa sia lungnopna taw bia vun; ama mai ah lungdamna late taw hong pai tavun.

³Topa sia Pathian hi ci in ciamtee vun. Ama in eite hong vawt a, eite in ama aa ih hi hi; eite sia ama mihingte ih hi a, ama tuuhonte ih hi hi.

⁴Biakinn kongpite sungah lungdamkona taw tum vun; pokna taw a suumsung ah pai vun. Ama tungah lungdamko in ama pok vun.

⁵Topa pha hi; ama itna in bo maw a, ama thumaanna sia a tawntungin kikhomsuan hi.

Psalm Late 101

Kumpipa ii Kamciam

¹Ka la in thumaanna le thukhaikim khenna huvau hi a, nang kong sak hi, Topa awng.

²Ka ngamtatna sia sitbaang ngawl tu hi. Bang hun ciang kei kungah hong pai tu ni ziam? Ka inn sungah nuntakna thiangtho taw ka nungta tu a,

³a pha ngawl sia ka thuak zo buatu hi. Pathian kung pan a nungkinte ngamtatnate ka ngaimaw hi; amate taw kipee awna bangma ka nei buatu hi.



⁴Thumaan ngawlin ka om buatu a, ngitlona sungah ka kihel buatu hi.

⁵Ngualdang khat po a thimtham in a ngensia thei te ka pawlvawt buatu hi; a ki phasak a kisathei mihing khat sia ka dual zo buatu hi.

⁶Pathian tungah a thumaante sia ka thukim tu a amate sia ka kumpi inn sungah ka teangsak tu hi. A thumaan a citakte sia keima na ka seamsak thei tu hi.

⁷Ka kumpi inn sungah leilot thu son thei kuama a teang buatu hi; a kihisak peuma kei omna munah a om buatu hi.

⁸Ih ngam sungah om mihing seksolte sia ni khat zawkciang ni khat ka susia tu hi; mihingsia theampo Topa khuapi panin ka hawlkhia siat tu hi.

Psalm Late 102

Khangno Ngimnga khat ii Thungetna

¹Topa awng, kong thungetna hong ngai tan a, hu ngen a ka auna aw hong za tan!

²Ngim ka nga laitakin hong nungngat heak in! Kei hong ngai tan a kong biapui ciangin a manlang in hong zo tan!

³Ka nuntakna sia meikhu bangin bo vadi hi; ka pumpi sia mei bangin kuang hi.

⁴Lopa ko bangin hong kivaat hi; an zongh ka du nawn bua hi.

⁵A ngingin ka tau hi; ka vun le ka ngu bek taw ka om hi.

⁶Keima in senneal ngam sungah a om sane vacim khat bang le, a zancip khua kinusia sungah a om simbu khat bang ka hi hi.

⁷Khangciim in ka lum hi; innkhum tungah om vacim lungzuang khat bang ka hi hi.

⁸Nitangtum in ka ngalte in hong leal hi; kei hong nunaute in keima min tomlawna in zangh uh hi.



- 9-10 Na thin uukna le na thinsona hu in, vut sia an in ka nei a, ka thituite sia ka tuineak taw kihel hi. Nangma in nong tawm a nong vawk hi.
- 11 Ka nuntakna in nitak niliap bang hi a, keima in lopa ko taw ka kibang hi.
- 12 Ahihang Topa awng, nangma in kumpipa na hi tawntung hi; khang theampo in nang hong ciamtee tu hi.
- 13 Nangma in tho in Zion tungah mulkimna na nei tu hi; tua khuapi tungah hesuakna na nei tu hun hong theng zo hi! Hi sia in a ki ciangtan hun hi.
- 14 Tua khua sia kisia zo hi napi na naseamte in it hi, tuasia zancip zo ahitazong amate in khuangaihuai sa hi.
- 15 Minam tuatuamte in Topa kiita tu hi; leitung ah kumpite theampo in ama vaangletna kiita tu hi.
- 16 Topa in Zion a sak kik ciangin ama in ama letna pualaak tu hi.
- 17 A kitaisan sa a mite thungetna ama in ngai tu a, za tu hi.
- 18 Mihing a piang ngawl laite in Topa a pok thei natu, khangkik te atu in ama sep sate lai taw khum tavun.
- 19 Topa in a saangna a om ama ii thiangtho mun panin hong ensuk a, ama in vantung pan in simlei ensuk hi.
- 20 Ama in thongtaakte tauna za a, thi daan a kipiata suaktasak hi.
- 21 Tua ahikom ama min sia Zion ah kithangsak tu a, Jerusalem ah ama kipok tu hi.
- 22 Topa bia tu in minamte le kumpi ngam tuatuamte hong kikhop ciangin tuabangin kipok tu hi.
- 23 Topa in ka khanmoi lai in hong thazawmsak hi; ama in ka khan hong tomsak zo hi.
- 24 Pathian awng, ka huai maa tu in kei hong la heak in. Topa awng, nangma in a tawntungin na nungta hi;



²⁵khua ngeipi lai in nangma in leitung na bitphua a, nangma khut mama taw vantungte na vawt hi.

²⁶Amate bo vangeu tu a, ahihang nang sia na om lai tu hi; amate in puan bangin a tul tu hi. Nangma in amate puan bangin na vawk tu a, amate a bo tu hi.

²⁷Ahihang nangma in a tawntungin na kibang a, na nuntakna a bo ngei bua hi.

²⁸Ih tate sia thin muang takin nungta tu a, nangma ii dalna sungah amate suan le paalte sia ngammuang tu uh hi.

Psalm Late 103

Pathian Itna

¹Ka thaa awng, Topa pok in! Ka nuntakna theampo awng, ama min thiangtho pok in!

²Ka thaa awng, Topa pok in a, ama bangza dik ziam ci sia mangil heak in.

³Ka mawna theampo ama in hong maisak a, ka natna theampo hong damsak hi.

⁴Ama in thaankuul thet natu panin hong keam a, itna le hesuakna taw thupha hong pia hi.

⁵Muvanlai bangin hatin ka moisua kik natu in ka nuntakna sia na phate taw ama in hong dimh hi.

⁶A kinengcipte panpuina taw Topa in thukhen a, amate ii ngatuakte pia hi.

⁷Ama ii ngealnate Moses tungah ama in pualaak a, ama sepna liante Israel mite musak hi.

⁸Topa in hong hesuak a hong it in, thin uuk hak a ki itna kip taw kidim hi.

⁹Ama in hong tei thapai ngawl hi; a tawntungin a thin uuk ngawl hi.

¹⁰Ama in eite taw a kiphu bangin daan hong pia ngawl a, ih mawnate le ih tat khialnate bangin hong thuk ngawl hi.



- ¹¹Van le lei a kikhualaat za in ama a zaktate a itna sia lian mama hi.
- ¹²Nisuana sia nitumna pan a kikhualat za in ih mawngate sia eite sung pan tuabang za ma kikhuala in hong khiinsak hi.
- ¹³Pa khat in a tate tungah dik ahi bangma Topa sia ama a zaktate tungah dik hi.
- ¹⁴Eite bang taw kivawt ci sia ama in he hi; ama in eite leivui ih hi sia phawk nginge hi.
- ¹⁵Eite ih hile ih nuntakna sia lopa bang ahi hi. Ngam paak khat bangin ih khang a ih palh hi;
- ¹⁶Tua zawkciang a tungah vui hong va a, tua paak bo in- kuama in mu kik ngawl hi.
- ¹⁷Ahihang Topa a zaktate atu in ama itna in a tawntungin kikhomsuan a, ama phatna sia khang tawntung in kikhom hi,
- ¹⁸Ama thuciamna sungah a thumaante le ama thupiakte citakna taw a zuite atu in ama phatna sia khang tawntung in kikhom hi.
- ¹⁹Topa in a kumpi tokhum sia vantung ah koi hi; ama in mun theampo a uk kumpipa ahi hi.
- ²⁰Ama thupiakte zui a, ama ci bang a nangai no, a thahat vantung lalangte awng Topa pok vun.
- ²¹Ama deina bangin a ngamta no, ama naseam, vantung a om vaang nei theampo awng, Topa pok vun!
- ²²Topa pok vun, ama ukna sung mun theampo ah ama ii bitphua sate awng. Topa pok in, ka tha awng!

Psalm Late 104

A Bitphuapa Pokna

- ¹Ka thaa awng, Topa pok in! Topa ka Pathian awng, nang bangza in na lian ziam! Nangma in kumpi zaletna le minthanna in



- ²puan bangin hong tuam hi; Nangma le nangma khuavak taw na kituam hi. Vantungte tui puan buk khat bangin na phal hi.
- ³Tuaciangin na inn sia tungsang a om tuite tungah na sa hi. Meeite sia siphuleang bangin na zangh a, vui ii thate tungah na to hi.
- ⁴Vui sia kamtaite bangin na zangh a, khualeng sia na naseamte bangin na zangh hi.
- ⁵Simlei sia a tawdapte ii tungah kho takin na phut a, a kikhiin ngei buatu hi.
- ⁶A tungah tui pi sia puantual khat bangin na koi a, tui in mualte a khum hi.
- ⁷Tuite na tei ciangin tai uh hi; na thupiakna aw hong zaak ciangin nawtai uh hi.
- ⁸Tua tuite sia mualte tung le leikuamte sungah luang a, na see sa mun zuan uh hi.
- ⁹Leitung a khuum kik nawn ngawl tu in a kan thei ngei ngawl tu ngamngi na omsak hi.
- ¹⁰Ciktuite munkuam sungah na luangsak a, ngunte mualte kilaklaw ah na luangsak hi.
- ¹¹Tuate in ngamsate atu tui ngasak hi; tua munah ngam laate a dangcim uh hi.
- ¹²A hui ah a om thingkungte tungah vacimte bu vawtin lasa uh hi.
- ¹³Mualte tungah van panin nguatu na puaksuk a, leitung sia na thuphate taw kidim hi.
- ¹⁴Khuite atu in lopa na posak a, mihingte zak tu in thingnote na posak hi, tua ahikom amate in lo ante ciing thei a,
- ¹⁵a lungdam natu in sapittui, a maitai natu in olive thau, a thahat natu in anluumte piangsak hi.
- ¹⁶Lebanon mual tungah Topa ii a suan a neisa Cedar thingkungte in nguatu tam mama a nga uh hi.



- ¹⁷Tua munah vacimte in a bu vawt uh hi; hilniang vacimliante in mang taakthing tungah a bu vawt uh hi.
- ¹⁸Sathakte in mualdawn saangte tungah teang a, ngalhvangte in suangliangte ah buu uh hi.
- ¹⁹Thate teptee natu in tha na bitphua hi; ni in a tum tu hun he hi.
- ²⁰Nangma in zan na vawt a, khuazing sungah ngamsa theampo pusuak hi.
- ²¹Tawpi moite in sa a vai ciang hawk uh a, Pathian piak an zong uh hi.
- ²²Ni a sua ciangin amate a kua zuanin lum uh hi.
- ²³Tuasiasia ciangin mihingte in naseam tu in kuan a nitak dongin na seamsuak uh hi.
- ²⁴Topa awng, nangma in na tam mama na vawt zo hi! Ciimna taw tuate theampo na vawt hi! Simlei sia na bitphua nuntakna neite taw kidim hi.
- ²⁵A kisim zo ngawl nganhingte a lian, a no a teen khopna tuipi sia lianin zai hi.
- ²⁶A tungah teambawte khualhaw a, a sungah na vawtsa tuipi nganhingpui Leviathan kimai hi.
- ²⁷Tuete theampo in an a taangsap hun ciang a pia tu in nang hong suang hi.
- ²⁸Nangma in amate an na pia a, a ne uh hi; an na piak ciang amate a lungkim uh hi.
- ²⁹Na nungngat ciangin amate lau uh hi; na hu na laak ciangin amate thi in, amate pianna leivui ah cia kik uh hi.
- ³⁰Ahihang amate hu na mop ciang a kubitphua uh hi; Nangma in leitung ah nuntakna thak na pia hi.
- ³¹Topa minthanna kikhomsuan taken! Ama vawt sate tungtaang ah Topa lungdam taken!
- ³²Ama in simlei en a, leitung a liing hi; ama in mualte tham a, meikhu pusuak hi.



³³Ka nuntak lai tawntung Topa tungah la ka sa tu hi; ka nuntak laiteng ka Pathian tungah pokna la ka sa tu hi.

³⁴Ka la in ama lungkimsak taken, banghangziam cile ka lungdamna sia ama kung pan hong pai ahi hi.

³⁵Mawneite leitung panin kilalcipsak taken; mihing seksolte om nawn heak hen. Ka thaa awng, Topa pok in! Topa pok in!

Psalm Late 105

Pathian le Ama Mite

(1Khang tangthu 16.8-22)

¹Topa tungah lungdamkona pia vun a, ama letna thangsak vun; ama sep sate minam tuatuamte tungah son vun.

²Topa tungah pokna la sa vun; a lamdang a sep sa nate thu son vun.

³Ama neisa ih hi hu in lungdam vun; ama a bia theampo lawp taken.

⁴Hu ngen tu in Topa zuan vun; a kizom suakin ama bia vun.

⁵⁻⁶A naseampa Abraham ii suante, a teal pa Jacob ii suante awng: Pathian ii a sep nalamdang laknate le a thukhennate phawk vun.

⁷Topa in ih Pathian hi; ama thupiakte in leitung bup atu ahi hi.

⁸Ama in a thuciam sia a tawntung kholet tu a, ama kamciamte khang tul dongin kipsak tu hi.

⁹Abraham taw thukimna a vawt sia le Isaac tungah a kamciam sia ama in kipsak tu hi.

¹⁰A tawntungin a kikhom tu thuciamna khat Topa in Jacob taw vawt hi.

¹¹“Canaan ngam nang kong pia tu a, nangma neisa hi tu hi,” ama in ci hi.

¹²Pathian mite sia ciitawm a, Canaan ngamah zin tang uh hi.

¹³Amate sia ngam khat pan ngam khat ah, kumpi ngam khat pan ngam khat ah vak kawkoai uh hi.



- ¹⁴Ahihang Pathian in amate kuama ii zawthawk tu oai bua hi; amate a dal natu in kumpipate tungah hi bangin kidop natu thupia hi:
- ¹⁵“Ka teal sa ka naseamte susia heak vun; ka kamsangte thutha heak vun,” ci hi.
- ¹⁶Topa in amate ngamah kialpi tungsak a, a an uh a vekpi in laaksak hi.
- ¹⁷Ahihang ama in sal bangin a kizuak Joseph a kici mihing khat amate mai ah paikholsak hi.
- ¹⁸Ama sonkhol thu a tangtun mateng in ama peangte thikkhau kithaak a, thikkol sia a ngawng ah kibul hi.
- ¹⁹Pathian kammal in ama sia maan hi ci in lak hi.
- ²⁰Tuasia ciangin Egypt ngam kumpipa in ama suaktasak hi; minamte a ukpa in ama suaktasak hi.
- ²¹Ama in Joseph sia a ngamukna teng lampui tu le, a ngambup ukpa tu in koi a,
- ²²kumpipa ii uliante tungsia ah vaangneina le kumpipa ngaisutna a plate lamlak tu in thuneina pia hi.
- ²³Tua zawkciang Jacob sia Egypt ngamah pai a, tua ngam ah teang hi.
- ²⁴Topa in a mite tungah ta tam mama pia a, a ngalte sangin hatsak zaw hi.
- ²⁵Ama in ama mite Egyptte ii a ngaimawk natu in vawt a, ama naseamte theambawl hi.
- ²⁶Tua zawkciang ama in a naseampa Moses le a teal pa Aaron paisak hi.
- ²⁷Amate in Pathian ii a nasia mama sepnate seam a Egypt ngamah nalamdang laknate vawt hi.
- ²⁸Tua ngam sungah Pathian in khuazing puak hi, ahihang Egyptte in ama thupiakna a ni bua uh hi.
- ²⁹Ama in ngunte chisan suaksak a, a ngasate theampo thisak hi.
- ³⁰A ngambup sia ulolte dimteak a, kumpipa inn ngangawn ulol taw kidim hi.



- ³¹Pathian in thupia a, tho le thataa sia a ngambup sung hataak in om hi.
- ³²Nguatui taangin ngialtang le khualeng te amate ngam sungah a puak hi;
- ³³amate ii sapitnguite le theikungte lalsak a, thingkungte theampo nuaitan hi.
- ³⁴Ama in thupia a khaumawte hong pai in, sim zawk ngawl mak tampi pha uh hi:
- ³⁵tuante in a ngam sungah thingno lopa theampo netum uh a, lo ante theampo khawngsiat uh hi.
- ³⁶Ama in Egypt ngam ah innkuante theampo sung pan tapaciil teng thatlum hi.
- ³⁷Tua zawkciang ama in Israel te pusua pui hi; amate in ngun le kham pua uh a, amate a vekpi in cidam in thahat uh hi.
- ³⁸Egyptte in amate kiita ahikom amate ii a nusiak ciangin a lungdam uh hi.
- ³⁹Pathian in a mite tungah meei lomkhat koi a, zan in khuavak pia tu in meikuang khat koi hi.
- ⁴⁰Amate in ngen a, ama in vamimte puak hi; ama in amate lungkim natu in vantung pan an khiak hi.
- ⁴¹Ama in suangpi khat hong a tui hong phulkeak hi, tua tui in senneal ngam sungah ngun bangin luang hi.
- ⁴²A naseampa Abraham tungah a thiangtho kamciam a piak teng ama in ciamtee hi.
- ⁴³Tua ahikom ama in a tealsa a mite pusuapui a, amate in lawpna taw la sa in au uh hi.
- ⁴⁴Ama in midangte ii leitanghte amate tungah pia a, tuaciang a lo teng a tansak sia,
- ⁴⁵a mihingte in ama thukhamte a zui natu le a thupiak theampo a zui natu in a vawt ahi hi. Topa pok vun!

Psalm Late 106



A mite tungah Topa ii phatna

- ¹Topa pok vun! Topa tungah lungdamko vun, banghangziam cile ama pha hi; ama itna in a tawntungin kip hi.
- ²A sep sa na liante theampo akua in son zo tu ziam? Akua in a kicingin pok thei tu ziam?
- ³Ama thupiakte ni a, a tawntungin a maan in a seamte sia mihing lungdamte ahi hi.
- ⁴Topa awng, na mite na hu ciangin kei hong phawk tan; amate na ngup ciang kei zongh hong hel tan.
- ⁵Na mihingte nopsakna hong musak tan a, na minam ii lungdamna, na mihingte ii lungdam angdannate hong siimsak tan.
- ⁶Ka taangpupite ii maw bangma in ko zongh ka maw zo uh hi; kote in seksolin ka ngilo uh hi.
- ⁷Egypt ngam ah ka taangpupite in Pathian ii a lamdang a sepnate tel ngawl hi; tam vei tak ama itna a lak hunte amate in mangil hi, tuaciangin San Tuipi ah amate in Vaanglianbelpa leedo uh hi.
- ⁸Ahihang ama in a kamciam sa bangin a vaanglet thahatna lian a lak na in amate hun hi.
- ⁹Ama in San Tuipi tungah thupia a, tua tuipi kang hi; ama in a mite leiko tung tawnsak in lampui hi.
- ¹⁰A ensante khut sung panin amate hun hi; a ngalte khutsung panin amate suatak hi.
- ¹¹Ahihang a ngalte ahile tuitaa siat hi; khat zongh a taang bua hi.
- ¹²Tuasia ciang a mite in ama kamciamte um in pokna la a sak uh hi.
- ¹³Ahihang amate in ama sep sa teng mangil pai uh a, ama ii ngaisut piakna ngak ngawlin ngamta uh hi.
- ¹⁴Senneal sungah amate duhopna taw kidim a, Pathian ze et uh hi;



¹⁵tua ahikom amate nget teng ama in pia a, a kiitak huai mama natna khat zongh amate sungah puak hi.

¹⁶Tua senneal ngam sungah amate in Moses le Topa ii a thiangtho naseampa Aaron a eang uh hi.

¹⁷Tuasia ciang lei kihong in, Dathan sia lei in valh a, Abiram le a innkuanpuite lei in hukcip hi;

¹⁸a nungzuite tungah meikuang paisuk a, tua mihing seksolte kaangtum hi.

¹⁹Amate in Sinai ah kham taw khuitalno lim khat vawtin tua milim bia uh hi;

²⁰amate in Pathian minthanna sia lopa a ne nganhing khat ii lim taw theak uh hi.

²¹Egypt ngam sungah ama ii a nasia mama sepnate taw amate a hun Pathian, amate in mangil uh hi.

²²Tua munah ama in bang a lamdang nate vawt ziam! San Tuipi ah ama in bang lamdangsak huai nate vawt ziam!

²³Pathian in a mite ka lalsak tu a ci ciangin ama ii teal a naseampa, Moses in Pathian mai ah dingin a thin uukna khaamin amate a lalsak ngawl natu in thoh hi.

²⁴Tua zawkciang amate in tua ngamnuam a nolh uh hi, banghangziam cile amate in Pathian kamciam a um bua uh hi.

²⁵Amate in a tuipuan buk sungah om in phun a, Topa aw a nangai nuam bua uh hi.

²⁶Tua ahikom amate sia senneal ngam sungah a thisak natu ahizong

²⁷a suan a paalte Pathian he ngawlte kawm ah a kithethaangsak natu ahizong, ngamdang ah a thisak natu ahizong ama in a ciliap huai kidop thei natu thu pia hi.

²⁸Tuaciang Peor ah Pathian mihingte in Baal biakna pawm uh a, nuntakna nei ngawl pathiante tungah a kipia sangaw biak piaknate ne uh hi.



- ²⁹Amate in a ngamtatna taw Topa thin uukna toklosak uh a, a kiitak huai natna khat amate sungah hong tung hi.
- ³⁰Ahihang Phinehas dingto in a mawte daan a piak ciang, tua pul natna thai hi.
- ³¹Hi thu sia ama maipha nga natu in tua hun pan kipan kiciamtee a hong pai lai tu hun theampo sung ah kiphawk tu hi.
- ³²Meribah ciktui ah tua mite in Topa thin uuksak uh a, amate hu in Moses ngim nga hi.
- ³³Amate in ama thin siasak ahikom ngaisun phot ngawlin ama pau tan hi.
- ³⁴Amate in Topa thupiak bangin Pathian he ngawlte a mon bua uh hi,
- ³⁵tuabang ci thada amate taw nupa in kiteang uh a, doaibiate ii ziate zui uh hi.
- ³⁶Pathian mite in milim bia uh a, tua in amate lalna piangsak hi.
- ³⁷Amate in a tapate a tanute sia Canaan milimte tungah sangaw biakpiakna in nei uh hi.
- ³⁸Amate in tua mawnei ngawl patangno numeinote thatlum uh a, tua kithalupnate in ngam ninsak hi.
- ³⁹A ngamtatna uh taw amate le amate kininsak in Pathian tungah a thumaan bua uh hi.
- ⁴⁰Tua ahikom Topa sia ama mite tungah thin uuk hi; ama in thasiat huai sa hi.
- ⁴¹Ama in amate sia Pathian he ngawlte ii khut sungah nusia a, a ngalte in amate uk uh hi.
- ⁴²Amate sia a ngalte in zothaw a, amate khutnuai thengsiat uh hi.
- ⁴³Tamvei ma Topa in a mite suatak ahihang, amate in ama leedo tu teal zaw ahikom amate sia mawna sungah a thuk zaw in taaksuk uh hi.



⁴⁴Ahizong amate ii au in a biapui ciang Topa in za a, amate dongtaw nate phawsak hi.

⁴⁵Amate atu in a thuciamna phawk a, ama itna lianpi hu in amate maisak hi.

⁴⁶Ama in amate a vawtsia theampo tungah, hesuakna thin neisak hi.

⁴⁷Topa kote Pathian awng, hong hun tan, nang tungah lungdam kong ko thei natu le na min thiangtho kong pok thei natu in, minam tuatuamte sung panin, hong kaikhawm kik tan.

⁴⁸Israel Pathian, Topa pok vun; tu le a tawntungin ama pok vun! A kuama theampo in “Amen!” ci tahen. Topa pok vun!

Psalm Late 107

LAIBU A NGANA (Psalm Late 107—150) Pathian ii Phatna Pokna

¹“Topa tungah lungdamko vun, banghangziam cile ama pha hi; ama hong itna in kikhomsuan hi!”

²Ama hong ngup sa note theampo in hi kammalte lo kikin Topa pok vun. Ama in na ngalte kung panin hong suatak a,

³ngamdang pan le niswana, nitumna, sak le thang panin no hong ciapui kik hi.

⁴Pawlkhatte in senneal ngamsung lampi om ngawlna ah vakthap a, a teen natu khuapi paina lampi a mu zo bua uh hi.

⁵Amate ngilkial in dangtaak a, lametna bangma a nei nawn bua uh hi.

⁶Tuasia ciang a ngim ngana sung pan amate in Topa biapui uh a, ama in a cimawkna uh sung pan hun hi.

⁷Ama in lampi tang khat tawnin amate lampui a, a teen thei natu khuapi khat ah then hi.

⁸Amate atu nalamdang a septe hang le ama itna kip hu in amate in Topa tungah lungdamko tu uh hi.



- ⁹Ama in a dangkote dangcimsak a, a ngilkialte an phate taw vaak hi.
- ¹⁰Pawlkhatte khuangaina le khuazing sungah teang a, luangta in thikkol kithaak uh hi,
- ¹¹banghangziam cile amate in Vaanglianbelpa Pathian thupiakte nalh a, ama hilnate nial uh hi.
- ¹²Amate in na ham sepna taw a tha uh tul hi; amate puk tu a, kuama in a hu buatu uh hi.
- ¹³A ngim nga uh ciang amate in Topa biakpui a, ama in a dongtawna uh panin hun hi.
- ¹⁴Ama in amate sia khuangaina le khuazing sung pan pusua a, a thikkolte sukthapsak hi.
- ¹⁵Amate atu a lamdang na a septe hang le a itna kip hu in amate in Topa tungah lungdamko hamtang tu uh hi.
- ¹⁶Tau taw kivawt kongkhate ama in saattham a, a ki uumna thikzawlte sutan hi.
- ¹⁷Pawlkhatte mawmaw a, a mawna hu le a ngitlo hu in thuak uh hi;
- ¹⁸amate in an kii a, thi dedek in om uh hi.
- ¹⁹Tuaciang a ngim nga uh ciangin amate in Topa sam a, amate cimawkna sung pan ama in hun hi.
- ²⁰Ama in a thupiakna taw amate damsak a, thaankuul panin hun hi.
- ²¹Amate atu a lamdang na a septe hang le a itna kip hu in amate in Topa tungah lungdamko hamtang tu uh hi.
- ²²Ama tungah sangaw biakpiakna taw lungdamko tu kul a, lungdam lasakna taw ama sep sa theampo son kul tu hi.
- ²³Pawlkhatte in tuipite tungah teambawte taw khualhaw in tuipe tung panin a nuntak natu zong uh hi.



- ²⁴Amate in Topa vawt thei nate mu uh a, tuipei tungah a lamdang a vawtte mu uh hi.
- ²⁵Ama in thupia a, vuipei nasia mama khat hong va a, tua in tuihualte thawn hi.
- ²⁶Teambawte vui sung a saangna ah kilawnto in, a thukna ah tumsuk hi. Tuabang lauhaina sungah teambaw naseamte a thinkiam uh hi;
- ²⁷amate sia zukhamte bangin lutu in hoi vatut uh a, amate thiamna theampo sia a kizangh thei bua hi.
- ²⁸A ngim nga uh ciang amate in Topa biakpui a, a cimawkna uh panin ama in hun hi.
- ²⁹Ama in a kinuai vuipei suangvalte thimsak a, tuihualte dai hi.
- ³⁰Tua launate a ven hu in amate lungdam a, amate thet nopna teambaw tawlngakna mun ngammuanna taw then hi.
- ³¹Amate atu nalamdang a septe hang le a itna kip hu in amate in Topa tungah lungdam a ko hamtang tu hi.
- ³²Mihingte kikhopna sungah amate in ama letna thangsak hamtang tu a, upate thu kikapna mai ah ama pok tu uh hi.
- ³³Topa in ngunte kangcipsak a, ciktuite a luangsak nawn bua hi.
- ³⁴Tua munah a teangte ii seksolna hangin, ama in leiphate ci al lei ngamtul suaksak hi.
- ³⁵Ama in senneal ngam sia tuicingna mun suaksak a, leikona mun sia ciktui luanna in kheal hi.
- ³⁶Ama in a ngilkialte tua munah teangsak a, amate in a teen natu in khuapi khat saat uh hi.
- ³⁷Amate in lote ah thaici tu in sapit ngui suan uh a, anlaak hun ciang tam mama la uh hi.



³⁸A mite ama in thupha pia a, ta tam mama hing uh hi; Khui honte zongh a kiam ngawl natu in ama in kepsak hi.

³⁹A ngitlo zawthawkna le ngim nganate hangin, Pathian mite ngallel in zawnsak a thuak uh ciang,

⁴⁰amate a zothawte ama in ngaimawkna lak a, lampi om ngawlina senneal ngam sungah vakthapsak hi.

⁴¹Ahihang taangsapna a neite sia amate lungmanna panin ama in suatak a, a innkuanpuite tuu hon bangin pungsak hi.

⁴²Thutang mite in hi thu mu in lungdam uh a, ahihang a seksol theampo thimsak hi.

⁴³A ciimte in hi thute ngaisun thei taken; Topa ii itna kip ngaisun thei taken.

Psalm Late 108

Ngalte Zaw natu Hu nget Thungetna

(Psalm Late 57.7-11; 60.5-12)

¹Lung muanna a cingin ka nei hi, Pathian awng! La ka sa tu a, kong pok tu hi! Khanglo in ka tha awng!

²Ka tengtong le ka khausai tumtheite awng, khanglo vun! Tung sunni zongh ka phong tu hi.

³Topa awng, minamte sungah nangma lungdam kong ko tu hi. Mihingte kawm panin nang kong pok tu hi.

⁴Na itna kip in vantungte kalh hi; na thumaanna in vante ban hi.

⁵Pathian awng, van ah na letna le leitung bup ah na minthanna lak in.

⁶Na thahatna taw kote hong hun tan; na it na mite suatak thei natu in ka thungetna hong zo tan.

⁷Ama biakinn thieng panin Pathian in, “Zawna mualsuana taw Shechem ka khentham tu a, Sukkoth ngamkuam sia ka mihingte ka hawmsak tu hi.

⁸Gilead sia kei aa hi a, Manasseh zongh kei aa, ahi hi; Ephraim sia ka thik lukhu hi a, Judah sia ka kumpi ciangkhut hi.



⁹Ahihang Moab sia ka kisilna kuangin ka zangh tu a, ka neisa hi ci in a kitel natu in Edom tungah ka peangdap ka lawn tu hi. Philistine te tungah zawna mualsua in ka au tu hi,” ci hi.

¹⁰Pathian awng, ngal nan natu in a ki uumcip khuapi sungah akua in kei hong tumpui tu ziam? Edom ah akua in kei lam hong pui tu ziam?

¹¹Hong nial takpi zo ni ziam? Ka ngalkap honte taw mainawt in hong kuanpui ngawl tu ni ziam?

¹²Ngalte langpanin ko hong hu tan; Mihingte ki huna in mannung ngawl hi.

¹³Pathian ei sang hong pang le eite in ih zo tu hi; ama in ih ngalte a zothal tu hi.

Psalm Late 109

A Ngim nga Pasal khat ii Phunna

¹Pathian awng, nang kong pok hi; thim om top heak in!

²Mihing seksolte le leilot theite in kei hong sim hi. Amate in kei huvau leilot thu son hi,

³Kei hong siatson hi, a thu om ngawl bulin kei hong sim hi.

⁴Amate it in amate atu thungetsak ka hi hangin amate in kei hong ngalvawt hi.

⁵Amate in kei tungah phatna sia siatna taw, itna sia etsatna taw hong thuk kik hi.

⁶Ka ngalpa tungah thusit tu in a maan ngawl thukhenpa khat teal in a, ama ngalte khat ma in ama mawsiatsak in.

⁷Ama thu kisit in a maw hunlam kilangh taken; ama thungetna ngangawn khialna lian khat bangin kituat taken!

⁸A nuntakna hai ngawlin bo taken; midang khat in a nasep lua taken!

⁹A tate sia tanga suak taken a, a zi meingong taken!



- ¹⁰A tate inn nei ngawl khutdaw ngente suak taken; a siacip sa a teenna pan amate kinot taken!
- ¹¹A leitote in a neisa theampo laaksak taken a, ama sep thaman theampo khual mite in nga taken.
- ¹²Kuama in ama tungah dik ngei kaheak hen a, ama nusiak tangate sia kuama in khei heak hen.
- ¹³A suan a paal theampo mong taken a, khang kik sungah a min kimangil taken.
- ¹⁴A taangpupite ngitlona sia Topa in ciamtee hen a, a nu mawnate maisak ngei heak hen.
- ¹⁵Amate mawna sia Topa in a tawntungin ciamtee taken a, ahizong amate sia kimangil biing taken.
- ¹⁶Tua pa in cikna thiamna ngaisun ngei ngawl hi; ama in a zawng, taangsapna a neite le a hu tu a nei ngawlte siatvawt in thatlum hi.
- ¹⁷Ama in ngual tomlaw thanuam ahikom, ama kitomlaw taken! Ama in thupha pia nuam ngawlhet ahikom, kuama in ama thupha pia heak hen!
- ¹⁸Ama in haamsiatna sia a puansilh bangin ngeina see hi; ama haamsiatnate in a pumpi tui bangin tuamh taken a, a ngu a taang sungah sathau bangin zenh taken!
- ¹⁹Tua haamsiatnate in ama sia puan bangin tuam taken a, kawngkhau bangin ama vial top taken!
- ²⁰Topa awng, kei hong langpanin kamsia a pau ka ngalte tungah tuabangin daan pia in.
- ²¹Ahihang Vaanglianpipa ka Topa awng, nong kamciam sa bangin kei hong hu tan a, a pha na itna hangin kei hong suatak tan.
- ²²Keima in zawngin ka kitaangsamh hi; ka thinsung tawng dongin na hi.
- ²³Nitak niliap bangin ka bo dektak hi; lungno khat bangin hong kiseamkeak zo hi.



²⁴Anneak kisap hu in ka khupte huang hi; keima in vun le ngu bek taw ka om hi.

²⁵Mihingte in kei hong mu ciangin hong nuisan uh hi; selnona taw a lu uh hong peisan hi.

²⁶Topa ka Pathian awng, kei hong hu tan; na itna kip hu in hong hun tan!

²⁷Kei hong hunpa sia nangma na hi hunlam ka ngalte hesak in.

²⁸Amate in kei hong tomlaw thei tu ahihang nangma in thupha nong pia tu hi. Kei hong siatvawtte in lelna thuk taken a, keima, na naseam pa hong lungdamsak tan.

²⁹Ka ngalte sia mindaina taw kituam taken; amate in a maizumna sia puantual bangin silh taken.

³⁰Topa tungah lungdamkona nging takin ka pia tu hi; mihingte kikhopna sungah ama ka pok tu hi,

³¹banghangziam cile ama in mizawng pa hung a, a thi tu in a koite kung panin amate suatak hi.

Psalm Late 110

Topa le A teal Kumpipa

¹Ka Topa tungah Topa in, “Na ngalte na peang nuai ah ka koi dong hi sung ka ziatsang ah to in” ci hi.

²Zion panin Topa in na kumpi vaangletna hong khan tu hi. Ama in, “Na ngalte uk in” ci hi.

³Na ngalte na sim ni ciangin na mite in amate uuk thu in nang hong pawm tu hi. Zingsang tuung daaitui bangin na khangnote in nang kung mual thiangtho tungah hong pai tu hi.

⁴Topa in ciliap huai kamciam khat vawt a dok kik ngawl tu hi: “Nangma in Melchizedek pan a kinguizui thiampi nam sungah a tawntungin thiampi khat na hi tu hi,” ci in kamciam pia hi.



⁵Topa in na ziatsang ah om hi; ama a thin a uuk ciangin kumpite zothal siat tu hi.

⁶Minam tuatuamte tungah ama in thutan tu a, ngal kisimna phual sia mithiluang taw dimsak tu hi; leitung kumpite theampo zo siat tu hi.

⁷Kumpipa in lamhui ah a luang lui tui ne tu a, tuasia ciang kithakho sua in, zawna taw a ding tu hi.

Psalm Late 111

Topa Pokna

¹Topa pok vun! Ama mite kikhopna ah ka thin theampo taw Topa ka pok tu hi.

²Topa ii septe bangza in lamdang ziam! Tuate hu in a lungpilte in tuate thu a tel nuam uh hi.

³Ama sep theampo sia patoaina le minletna taw kidim hi; ama thutang in kip tawntung hi.

⁴Topa in ama a lamdang na a septe eite makngil tu a dei bua hi; ama dik a hesuak thei hi.

⁵Ama a zaktate atu in ama in an pia hi; a thuciam a mangil ngei bua hi.

⁶Minam dangte leitangh amate a piakna taw in a mite tungah ama in a vaang neina lak hi.

⁷A sep a vawt theampo sungah ama thumaan a thutang hi; ama thupiakna theampo in muan thamman hi.

⁸Tuete in a tawntungin kikhomsuan hi; thumaan thutak le thutang taw a kipia ahi hi.

⁹Ama in a mite suaktasak a, amate taw a kip tawntung thuciamna khat vawt hi. Ama thiangtho in vaanglian hi!

¹⁰Topa zatakna in ciim natu lampi ahi hi; ama thupiakte a zui theampo tungah thu khentel thiamna pia hi. Ama sia a tawntungin pok tu ahi hi.



Psalm Late 112

Mipha khat ii Lungdamna

¹Topa pok vun! Topa zakta a, a thupiakte zui tu nuam a sa sia in mihing lungdam ahi hi.

²Mihing pha khat ii tate sia a ngam sungah thahat tu uh hi; ama suan le paalte thupha kipia tu hi.

³Ama baangkua sia nei le lamh taw kicing tu a, ama a tawntungin nuamsa tu hi.

⁴Mihing phate, ngual a hesuak theite, a dikte le thutangte atu in khuazing sungah khuavak a taang hi.

⁵Ngual tungah ngo takin sum pukthaak a, a nasepna thumaanna taw a seam sia in mihing lungdam ahi hi.

⁶Mipha khat in lel ngei ngawl tu hi; ama sia kiphawk tawntung tu hi.

⁷Ama in thusia zaak tu a patau bua hi; ama upna kho a, a ama in Topa muang hi.

⁸Ama sia thinngim ngawlin a lau bua hi; a ngalte ii a lel tu uh sia ama in mu nak tu hi.

⁹A kitaangsamte tungah ama in ngo takin pia a, ama cikna thiamna sia bo ngei ngawl hi; ama thahat tu a, kizakta tu hi.

¹⁰Mihing seksolte in hi thu mu in a thin uh uuk hi; amate in etsatna taw ngau in tuateng taw amate a bo uh hi; amate lametnate a tawntungin mangthang hi.

Psalm Late 113

Topa Phatna Pokna

¹Topa pok vun! Topa naseamte awng, ama min pok vun!

²Tu le a tawntungin ama min kipok taken.

³Nisuana pan nitumna ah Topa min pok vun!



⁴Topa in minam theampo uk hi; Ama minthanna sia vantungte sangin saang zaw hi.

⁵Topa ih Pathian taw a kibang kuama om ngawl hi. Ama sia tungsang a saangna ah teang a,

⁶ahihang ama in vantungte le leitung en tu in kunsuk hi.

⁷Ama in leivui sung panin mizawngte phongto hi; kitasamte a lungmanna panin laamto hi,

⁸tuaciang a mite ii kumpipa tapate ahi, kumpipa tapate taw kithawlsak hi.

⁹Ama in tasel nupi sia a inn sungah vaang pia hi; ama in tanu tapa piakna taw ama lungdamsak hi. Topa pok vun!

Psalm Late 114

Paisan Poai La khat

¹Israel te in Egypt ngam pan pusuak a, Jacob suante in tua ngamdang sia a nusiat ciang,

²Judah sia Topa ii minam thiangtho suak a, Israel sia ama neisa suak hi.

³San Tuipi in en in taikeak hi; Jordan Ngun in a luan tawlna hi.

⁴Mualpite sia keal bangin leang valet uh hi; mualnote sia tuunote bangin kilawn kawkoai hi.

⁵Tuipi awng, nang tuabangin na taikeak natu bang thu piang ziam? Tuaciang, Jordan awng, banghangin na luan tawlna ni ziam?

⁶No, mualpite awng, banghangin kealte bangin leang valet nu ziam? No, mualnote awng, banghang tuunote bangin kilawn kawkoai nu ziam?

⁷Leitung awng, Topa hong pai hu in, Jacob Pathian hong om hu in liing in.

⁸Ama in suangpite sia tuicingte, suangliang kipte sia ciktui luangte in a kheal sia ahi hi.

Psalm Late 115

A maan Pathian khat



- ¹Nang tung bek ah, Topa awng, na itna kip le na thumaanna kip hangin kote tungah hi ngawlin, nang tung bek ah minthanna hong kipia taken.
- ²Banghangin minam tuatuamte in, “Na Pathian uh koisung ah om ziam?” ci in hong dongh tu ziam?
- ³Ih Pathian in vantung ah om hi; ama in a uuk pawpo seam hi.
- ⁴Amate pathiante sia ngun le kham taw kivawt a, mihing khutte taw kivawt hi.
- ⁵Tua pathiante in kamte nei ahihang pau thei ngawl a, mittangte nei ahihang, khua mu thei ngawl hi.
- ⁶Amate in bilte nei ahihang khua za thei ngawl a, naakte nei ahihang a ngim za thei ngawl hi.
- ⁷Amate in khutte nei ahihang tham thei ngawl a, peangte nei ahihang lampai thei ngawl hi; amate in aw ngingsak thei ngawl hi.
- ⁸Tuabangte vawt a tuate ma a muangte in amate vawt milimte bang suak siat taken.
- ⁹No, Israel te awng, Topa muang vun. Ama in no hong hu a hong dal hi.
- ¹⁰No, Pathian thiampite awng Topa muang vun. Ama in no hong hu a hong dal hi.
- ¹¹No, ama a biate theampo awng, Topa muang vun. Ama in no hong hu a hong dal hi.
- ¹²Topa in eite hong phawk a thupha hong pia tu hi; ama in Israel te le Pathian thiampite theampo thupha pia tu hi.
- ¹³Ama a zaktate theampo a lian, a no a kibangin ama in thupha pia tu hi.
- ¹⁴Topa in no le na suan na paalte uh tungah hin le toai hong pia taken!
- ¹⁵Van le lei a vawt Topa in note thupha hong pia taken.
- ¹⁶Vantung sia, Topa bek ii neisa hi a, ahihang simlei sia mihingte atu in pia hi.



¹⁷Topa sia, mithite ahi ngam thimna a zuansukte peuma in pok ngawl hi.

¹⁸Ahihang ei a nungtate in tu le a tawntungin ama tungah lungdam ih ko tu hi. Topa pok vun!

Psalm Late 116

Thina pan A kingum khat ii Pathian Pokna

¹Topa ka it hi, banghangziam cile ama in ka aw hong za hi; ama in ka thungetnate hong ngai hi.

²Ka biapui simin ama in hong ngai hi.

³Thi tu lau huaina sia ka kiimkot ah om hi; thaankuul kiitak huaina in kei hong neak hi; kei sia launa le thintoina taw ka kidim hi.

⁴Tuasia ciang Topa sia hi bangin ka sam a, “Hong thuum khi hi, Topa awng, kei hong hun tan!” ka ci hi.

⁵Topa sia hesuak thei a, pha hi; ih Pathian in khuangai huai hong sa thei hi.

⁶Topa in a hun tu a nei ngawlte sungsia hi; a lau huaina sungah ka om ciangin ama in kei hong hun hi.

⁷Ka lungtang awng, kimuang in, banghangziam cile Topa in kei tungah pha hi.

⁸Topa in thina panin kei hong suatak hi; ama in ka thitui hong khaamsak a, hong lelsak ngawl hi.

⁹Tua ahikom Topa omna a nungtate teenna leitung ah ka vak hi.

¹⁰“Hong kisucip hi,” ka ci ciang ngangawn zong,

¹¹ka lau a, “Kuama muan thei tu om bo” ka ci ciang ngangawn zongin ka um cinten lai hi.

¹²Topa ii kei tungah a phatna theampo hu in ama bang pia thei tu khi ziam?

¹³Kei hong hutna lungdamkona in Topa tungah sapittui biakpiakna ka pia tu hi.

¹⁴A mite theampo kikhopna ah ka kamciamsa sia ama ka pia tu hi.



¹⁵A mite khat a thi ciangin Topa in bangza in na sa ziam!

¹⁶Kei sia na naseampa khi hi, Topa awng; ka nu ii nang atu hong sepsak bangma in kei zongh in nang atu kong seam hi. Thina panin nong hun zo hi.

¹⁷Lungdamko sangaw biakpiakna kong pia tu a, nang tungah thungetna kong nei tu hi.

¹⁸⁻¹⁹Na mite theampo kikhopna mun, Jerusalem na Biakinnpi thiangtho sungah, ka kamciamsa sia kong pia tu hi. Topa pok vun!

Psalm Late 117

Topa Pokna

¹Topa pok vun, minam theampo awng! Ama pok vun, mi theampo awng!

²Ama ii eite hong itna in lian a, a thumaanna sia a tawntung atu ahi hi. Topa pok vun!

Psalm Late 118

Zawna hu a Lungdamko Thungetna

¹Topa tungah lungdamko vun, banghangziam cile ama pha hi, tuaciang ama hong itna in a tawntung kip hi.

²Israel te in: “Ama itna kip tawntung hi” ci taken.

³Pathian thiampite in “Ama itna kip tawntung hi” ci taken.

⁴Ama a bia theampo in “Ama itna kip tawntung hi” ci taken.

⁵Ka ngim ngana sungah Topa ka biakpui hi; ama in hong zo a hong suaktasak hi.

⁶Topa in keima taw hong omkhawm a, kei ka lau buatu hi; akua in kei bang hong law thei tu ziam?

⁷Topa sia kei hong hu pa hi a, ka ngalte lelna a thuk sia ka mu tu hi.

⁸Topa muanna in mihing muan tu sangin phazaw hi.

⁹Topa muanna in mihing lampuite suan tu sangin phazaw hi.



- ¹⁰Ngai tam mamate ka kiim ah om hi; ahihang Topa vaang taw amate ka susia hi!
- ¹¹Amate ka kiimkot mun theampo ah a om uh hi; ahihang Topa vaang taw amate ka susia hi!
- ¹²Ka kiimkot panin amate in khuai bangin hong uumci hi, ahihang ling sung kaangmei bangin amate kaangtum paih hi; Topa vaang taw amate ka susia hi.
- ¹³Kei sia nasia takin hong kisim a hong zo uh hi, ahihang Topa in kei hong hu hi.
- ¹⁴Topa in vaang hong pia a hong hatsak hi; ama in kei hong hun zo hi.
- ¹⁵Pathian mite tuipuan bukta sungah zawna lungdamna taw a auna ngai vun: “Topa vaanglet thahatna in tu a bang a suaksak hi!
- ¹⁶Kidona sungah ama vaanglet thahatna in eite zawna ah hong then zo hi!” ci uh hi.
- ¹⁷Kei ka thi buatu hi; ka nungta zaw tu a, Topa sepsate ka thangsak tu hi.
- ¹⁸Ama in nasia takin kei daan hong pia zo hi, ahihang ama in kei hong thisak bua hi.
- ¹⁹Biakinn kongpita kei hong hon tavun; a sungah tumin, Topa tungah lungdam ka ko tu hi!
- ²⁰Hisia in Topa kongpi hi; thutangte bek tum thei hi.
- ²¹Topa awng, nang kong pok hi, banghangziam cile nangma in ka aw nong za a, zawna nong pia zo hi.
- ²²Innsate in mannung sa ngawl a, a nil suangtum sia a thupibel hong suak hi.
- ²³Hisia in Topa ii sepsa ahi hi; tua in bangza mu nop huai ziam!
- ²⁴Hisia in Topa zawna ni ahi hi; lungdam in poai vawt tawng!
- ²⁵Hong hun tan, Topa awng, hong hun tan! Kote zawna hong pia tan, Topa awng!



²⁶Topa min taw hong pai pa, Pathian in thupha pia taken! Topa Biakinn panin nang thupha kong pia uh hi.

²⁷Topa sia Pathian hi; ama in ei tungah hong pha hi. Na khut sung uh ah thingsawlte toai in poai khamna kipan vun a, biaknatau kiimkot in pai vun.

²⁸Nangma in ka Pathian na hi a, lungdam kong ko hi; na letna ka thangsak tu hi.

²⁹Topa tungah lungdamko vun, banghangziam cile ama pha hi, tuaciang ama itna a tawntungin kip hi.

Psalm Late 119

Topa Thukham

¹Topa thukham bangin nungta a, a nuntakna a sit baang ngawlte in mihing lungdamte ahi hi.

²Ama thupiakna a zuite, a thin theampo taw ama thu a nite in mihing lungdamte ahi uh hi.

³Amate in ngamatat khial a nei ngei bua uh hi; Topa lampi a tawn uh hi.

⁴Topa awng, nangma in na thukhamte ko nong pia zo a, thumaan takin ka zui natu nong sawl hi.

⁵Nong hilnate thumaan tak a, ka kepcing natu sia bangza in lametna nei khi ziam!

⁶Na thupiakte theampo ka nadon le, ka mai hong zumsak buatu hi.

⁷Thutang taw na thu khennate ka heheak ciangin, thinsung thiangtho taw nang kong pok tu hi.

⁸Na thukhamte ka zui tu hi; Kei hong nusia ngei heak in!

Topa Thukham Zuina

⁹Khangno khat in ama nuntakna bangbangin a thiangtho in a keam thei tu ziam? Na thupiakte zuina taw keam thei tu hi.

¹⁰Ka thin theampo taw nang atu sep tu ka hanciam hi; na thupiakte zui ngawlna panin hong keamcing tan.



¹¹Nang tungah kong maw ngawl natu in na thukhamte ka thin sungah ka keam hi.

¹²Nang kong pok hi, Topa awng; nangma thu le late hong hil tan.

¹³Thukham nong piak sa theampo nging takin ka lo kik tu hi.

¹⁴Hau mama tu sangin na thukham zuina sungah lungpilna ka nei zaw hi.

¹⁵Nong lamlaknate ka kantel hi; nong hilnate ka mitsuan hi.

¹⁶Na thukhamte sungah nuam ka sa hi; nong thupiaknate ka mangil buatu hi.

Topa Thukham sungah Lungdamna

¹⁷Ka nuntak thei natu le nong hilnate kong nit thei natu in, kei na naseampa tungah hong dik tan.

¹⁸Na thukham sungah a lamdang thumaante ka mu thei natu in ka mit hong honsak tan.

¹⁹Hi sung leitung ah tawm vei bek ka om tu hi; na thupiakte kei kung pan seal heak in.

²⁰Na thu khennate a tawntungin ka he nuam a, thangai in ka thinna hi.

²¹A kiphasakte na mawsak hi; na thupiakte a ni ngawlte haamsiatna thuak taken.

²²Na thukhamte ka kepcing hu in kei hong leal a, hong nomute taw hong kipealsak tan.

²³Ngam ukte kisitua in kei hong thasawm uh hi, ahihang nangma hilnate ka kantel tu hi.

²⁴Na lamlaknate in kei thinnopna hong pia hi; tuate in ngaisutna hong plate ahi hi.

Topa Thukham Zui natu Thin Khensatna

²⁵Leivui sungah lelta taw ka lum hi; nong kamciam sa bangma in hong hingsak tan.



²⁶Ka sepsa theampo nang tungah kong pualaak a, nangma in nong zo hi; nangma thu le late hong hil tan.

²⁷Na thukhamte ka tel thei natu in hong hu tan, tua ciangin a lamdang nong hilnate ka ngaisusun tu hi.

²⁸Heena in keima hong khucip hi; nong kamciam sa bangin hong hatsak tan.

²⁹A maan ngawl lampi ka zui ngawl natu in hong keam tan a, na phatna zui in na thukham hong hil tan.

³⁰Thu nit tu ka teal zo hi; na thu khennate ka nadon zo hi.

³¹Na lamlakna ka zui zo hi, Topa awng; maizum hong ngasak heak in.

³²Na thukhamte thalawp takin ka zui tu hi, banghangziam cile nangma in tel theina a tamzaw nong pia tu hi.

Tel thei natu Thungetna khat

³³Topa awng, na thukhamte ii khiakna hong hil tan, tua hile a tawntungin ka zui tu hi.

³⁴Na thukham kei tungah hong thiangson tan, tua hile ka zui tu hi; ka thin theampo taw ka keam tu hi.

³⁵Na thupiakte hong zuisak tan, banghangziam cile tuate sungah lungdamna ka mu hi.

³⁶Hau natu sangin na thukham zui nopna thin hong pia zaw tan.

³⁷A manh nei ngawl nate nadon na panin hong keamcing tan a, nong ciamsa bangma kei tungah hong dik tan.

³⁸Na thu hong nite tungah na piak kamciam sia na naseampa kei tungah hong tungsak tan.

³⁹Lealna thuak tu ka launa panin hong hun tan; na thu khennate bangza in lamdang ziam!

⁴⁰Na thupiakte ka zui nuam hi; nuntakna thak hong pia tan, banghangziam cile nangma in thumaan thutang na hi hi.

Topa Thukham Muanna



⁴¹Topa awng, kei bangza hong it ni ziam hong lak tan a, na kamciam sa taw kizui in, kei hong ngum tan.

⁴²Tuasia ciang kei hong lealte ka zo thei tu hi banghangziam cile na kammal ka muang hi.

⁴³A tawntungin thumaan hong pau theisak tan, banghangziam cile ka lametna sia nangma thukhen nate sungah om hi.

⁴⁴Na thukham sia a tawntung pan a tawntung dongin ka zui tu hi.

⁴⁵A cialcing suatakna sungah ka nungta tu hi, banghangziam cile na hilnate zui tu ka hanciam hi.

⁴⁶Kumpipate mun ah na thupiaknate ka son tu a, maizum in ka nei buatu hi.

⁴⁷Na thupiakte zuina sungah thinnopna ka nga hi, banghangziam cile tuate ka it hi.

⁴⁸Na thukhamte thasia in ka it hi; na lamlaknate a thukin ka ngaisusun tu hi.

Topa Thukham tungah Kimuanna

⁴⁹Na naseam pa kei tung a, nong kamciam sia ciamtee in; tuasia in lametna hong pia hi.

⁵⁰Ka ngimna sung ngangawn ah keima hong kiheeneam hi, banghangziam cile na kamciamna in nuntakna hong pia hi.

⁵¹A kiphasakte in kei hong zawnsak tawntung hang, na thukham panin ka pial ngei bua hi.

⁵²Topa awng, taanglai a na thukhennate ka ciamtee a, tuate in heenepna hong pia hi.

⁵³Mihing seksolte ii na thukham a paltan ka mu ciangin thin uukna taw ka kidim hi.

⁵⁴Leitung ka nuntak hun tom no sungah na thupiakte huvau la in ka phuak hi.

⁵⁵Topa awng, zanin nang kong phawk a, na thukhamte ka ngaisun hi.



⁵⁶Na thupiakte zuina in ka lungdamna ahi hi.

Topa Thukham tungah Kipiakna

⁵⁷Topa awng, ka dei theampo sia nangma na hi hi; na thukhamte zui tu in kong kamciam hi.

⁵⁸Nong kamciam sa bangma kei tungah hesuakna nong nei natu in ka thin theampo taw kong ngen hi!

⁵⁹Ka ngamtat nate ka ngaisun zo a, nong lamlaknate zui natu kamciam kong pia hi.

⁶⁰Na thupiakte zui natu ka haisaang bua a, ka manlang hi.

⁶¹Mihing seksolte in kei thaang hong sia zo hi, ahihang na thukham ka mangil bua hi.

⁶²Thutang taw na thu khennate hangin nangma pok tu in zan kimlai ka khanglo hi.

⁶³Keima in nang atu hong sepsakte theampo le, na thukhamte a zuite theampo ii lawm ka hi hi.

⁶⁴Topa awng, leitung in na itna kip taw kidim hi; na thupiakte hong hil tan.

Topa Thukham ii Manphatna

⁶⁵Topa awng, nangma kamciam na kholet zo a, na naseam pa kei tungah nong dik hi.

⁶⁶Ciimna le heakna hong pia tan, banghangziam cile na thupiaknate ka muang hi.

⁶⁷Daan nong piak maa in ka paikhial bul hi, ahihang tu in na pau kong ni hi.

⁶⁸Nangma in na pha a, na thuthiam hi! Na thupiakte hong hil tan.

⁶⁹Mihing kiphasakte in kei huvau leilot thu son zo uh hi, ahihang na lamlaknate ka thinsung theampo taw ka zui hi.

⁷⁰Hi mihingte in tel theina bangma nei ngawl hi, ahihang kei in na thukham sungah nuam ka sa hi.



⁷¹Daan ka thuakna in kei atu in pha hi, banghangziam cile na thupiakte hong hesak hi.

⁷²Leitung ah om sum le pai theampo sangin nong piak na thukham in kei atu in khiakna nei zaw hi.

Topa Thukham sungah Thukhaikim khenna

⁷³Nangma in kei nong bitphua a, nong keamcing hi; tel theina hong pia tan, tua hile na thukhamte ka he tu hi.

⁷⁴Nang hong upatte in kei hong mu ciangin a lung uh dam tu hi, banghangziam cile na kamciam ka muang hi.

⁷⁵Topa awng, na thukhennate tang hi ci in ka he hi, tuaciang daan nong piak zongh nangma thumaan hang ahi hi.

⁷⁶Na naseampa kei tungah nong kamciam sa bangma in na itna kip in kei hong heeneam taken.

⁷⁷Kei hong hesuak tan, tua hile ka nungta tu hi, banghangziam cile na thukham sungah thinnopna ka nei hi.

⁷⁸A kiphasakte in a maan ngawl bulin kei hong suankhial ahikom maizumna nga taken; kei ka hile nangma lamlaknate thuk takin ka ngaisusun tu hi.

⁷⁹Nang hong zaktate na thupiakte a hete theampo kei kungah hong pai taken.

⁸⁰Lelna maizumna taw ka kipeal natu in na thupiakte a cing takin hong zui theisak tan.

Suatak natu Thungetna

⁸¹Topa awng, nong ngup tu kong ngakna in, ka tha tul zo hi; na kammal sungah muanna ka nei hi.

⁸²“Bang hun ciang hong hu tu ni ziam?” ci in kong dawdok kawmin nong kamciamte muangmaw a ka e etna in ka mit taak zo hi.

⁸³A kivawk sa savun tuithawl bangin kei sia kimanna ka nei nawn bua hi; ahihang na thupiakte ka mangil bua hi.



⁸⁴Bangtan vei hong ngak lai tu khi ziam? Kei hong siatvawtte bang hun ciangin daan pia tu ni ziam?

⁸⁵Na thukham a zui ngawl mihing kiphasakte in kei hong thaangsia natu in vuum a to zo uh hi.

⁸⁶Na thupiak theampo muan thamman hi; mihingte in leilot thu taw kei ngim hong pia hi — kei hong hu tan!

⁸⁷Amate in kei hong thatlum dektak zo hi, ahihang na thupiakte ka ngaingon ngei bua hi.

⁸⁸Na itna kip hu in kei tungah hong dik tan, tua hile na thukhamte ka zui thei tu hi.

Topa Thukham Upna

⁸⁹Topa awng, na kammal in kikhomsuan tu hi; tua in vantung ah kip tawntung hi.

⁹⁰Na thumaanna sia khang theampo dong kikhomsuan hi; nangma in simlei sia a om natu mun ah na nga a, tuabangma in om top hi.

⁹¹Tuni dong na theampo amate om babang tekin om hi, banghangziam cile nangma thupiak hang le amate theampo sia na naseamte a hi siat uh hang ahi hi.

⁹²Na thukham in ka lungnopna ii naak hi bua thong le ka thuaknate taw ka thi zo tu hi.

⁹³Na lamlaknate ka ngaingon ngei buatu hi, banghangziam cile tuate taw keima a nungta in nong keam hi.

⁹⁴Kei sia nangma aa khi hi — kei hong hun tan! Na thupiakte zui tu ka hanciam zo hi.

⁹⁵Mihing seksolte in kei hong thatlum tu in hong ngak hi, ahihang na thukhamte a thukin ka ngaisusun hi.

⁹⁶Na theampo sia a kiciangtan in om hi ci in ka he hi; ahihang na thupiakna sia sitbaang ngawl hi.



Topa Thukham Itna

⁹⁷Na thukham bangza it khi ziam! Tua thu nitangtum in ka ngaisun hi.

⁹⁸Na thupiak sia kei taw a tawntungin omkhawm a, kei sia ka ngalte sangin hong ciim sak zaw hi.

⁹⁹Ka syate theampo sangin ka tel zaw hi, banghangziam cile keima in nong lamlaknate thuk takin ka ngaisusun hi.

¹⁰⁰Pasal haamte sangin ciimna lianzaw ka nei hi, banghangziam cile na thupiakte ka zui hi.

¹⁰¹Ngamtat sia theampo ka pial hi; banghangziam cile na thu ka ni nuam hi.

¹⁰²Na lamlaknate ka ngaingon bua hi; banghangziam cile nangma in ka syapa na hi hi.

¹⁰³Na lamlaknate thum mama a, khuaitui sang ngangawn in thum zaw hi!

¹⁰⁴Na thukhamte panin ciimna ka nga hi; tua ahikom a sia ngamtatna theampo ka ensan hi.

Topa Thukham pan Khuavak

¹⁰⁵Na kammal in kei lam hong lak tu meiinn hi a ka lampi atu khuavak ahi hi.

¹⁰⁶Na lamlakna maante zui natu in, a ciliaphuai ka kamciam sia ka len tu hi.

¹⁰⁷Topa awng, ka thuaknate sia lauhuai takpi hi; nong kamciam sa bangma in hong nungtasak tan.

¹⁰⁸Topa awng, lungdamko ka thungetna hong saang tan a, na thupiakte hong hil tan.

¹⁰⁹Ka nuntakna khaamh tu in ka kinging tawntung hi; na thukham ka mangil bua hi.

¹¹⁰Mihing seksolte in thaang taw kei hong sia hi; ahihang na thupiakte zui ngawlin ka om bua hi.

¹¹¹Na thupiakte sia a tawntungin keima neisa ahi hi; tuate in ka lungnopna ahi hi.



112Ka thi ni matengin na thukhamte zui tu in ka khensat zo hi.

Topa Thukham sungah Ngammuanna

113Nang tungah a phatak hong thumaan ngawlte ka ensan hi, ahihang na thukham ka it hi.

114Nangma in kei hong hungpa le hong dalpa na hi a; na kamciam sungah lametna ka nei hi.

115No, mawnei mite awng, kei kung panin tai vun. Ka Pathian thupiakte ka zui tu hi.

116Nong ciam sa bangma in thahatna hong pia tan, tua hile ka nungta tu hi; ka lametna sungah hong thinkiamsak heak in!

117Ka ngammuan natu in hong len tan, tuaciang na thupiakte a tawntungin ka nadon tu hi.

118Na thukhamte a zui ngawl peuma na nial hi; amate thimthel ngiimnate sia a mannung bua hi.

119A seksol theampo sia ninteak bangin na ngaisun hi, tua ahikom na lamlaknate ka it hi.

120Nangma hu in ka lau hi; na thukhennate hu in launa taw ka kidim hi.

Topa Thukham Zuina

121A phate le a maante ka seam zo hi; ka ngalte khut sungah hong nusia heak in!

122Na naseampa na hu tu sia kamciam pia in; a kiphasakte in hong zothawsak heak in.

123Nong hut natu kong etna, nong kamciam sa ngupna ka etna in ka mit taak zo hi.

124Nong itna kip taw kizui in kei tungah hong vawt tan a, na thupiakte hong hil tan.

125Keima in na naseam pa ka hi hi; na hilnate ka heak thei tu in, tel theina hong pia tan.



126Topa awng, na sep tu hun zo hi, banghangziam cile, mihingte in na thukham hong zui ngawl hi.

127Kham le, kham phabelte sangin na thupiakte ka itzaw hi.

128Tua ahiciang na lamlaknate theampo ka zui a, lam khialna theampo ka ngaimaw hi.

Topa Thukham Zui nopna

129Na hilnate lamdang hi; ka thin theampo taw ka zui hi.

130Na hilnate na thiang sonna in khuavak pia a, a he ngawlte ciimna pia hi.

131Na thupiakte ka deina hangin kamkaa in ka haihaw liang hi.

132Kei sang hong nga tan a, nang hong itte theampo tungah na ngamtat bangma in kei hong hesuak tan.

133Nong kamciam sa bangin liik natu pan hong keam tan; siatna in hong zosak heak in.

134Na thupiakte ka zui thei natu in kei hong zothawte kung panin hong hun tan.

135Nong ompuina taw thupha hong pia tan a, na thukhamte hong hil tan.

136Mihingte in na thukham hong zui ngawl hu in ka thitui ngun bangin luang hi.

Topa Thukham ii Thukhaikimna

137Topa awng, nangma in thumaan thutang na hi a, na thukhamte maan hi;

138zui tu ngeina na piakte sia pha tatak a, maan hi.

139Ka ngalte in, na thupiakte thusim ngawl ahikom ka thin uukna sia, ka sungah mei bangin kuang hi.

140Na kamciam sia bangza in taksua ziam! Tuasia bangza in diksa khi ziam!

141Kei sia a thupi ngawl ka hi a, zawnsak ka thuak hi, ahihang na hilnate ka ngaingon bua hi.

¹⁴²Na thutang sia a tawntungin kikhomsuan tu a, na thukham sia maan tawntung hi.

¹⁴³Ngimna le thintoina taw ka kidim hi, ahihang na thupiakte in lungnopna hong puak hi.

¹⁴⁴Na lamlaknate a tawntungin thutang ahi hi; tel thiamna hong pia tan, tua hile ka nungtakpui tu hi.

Suatak natu Thungetna khat

¹⁴⁵Ka thin theampo taw nang kong sam hi; Topa awng, hong zo tan, tuaciang na thupiakte ka zui tu hi!

¹⁴⁶Nang kong sam hi; hong hun tan, na thukhamte ka tang tu hi.

¹⁴⁷Nisua ma in hu ngenin nang kong sam hi; na kamciam sungah ka lametna om hi.

¹⁴⁸Na lamlaknate ka thuk ngaisusutna in zan khuateak in khangciim in ka lum hi,

¹⁴⁹Topa awng, nong itna in kip ahikom hong za tan; nong hesuakna hong lak tan a, ka nuntakna hong keamcing tan.

¹⁵⁰Mihing tatkhate in kei hong neak vaial hi; amate sia na thukham a tang ngei ngawlte ahi hi.

¹⁵¹Ahihang Topa awng, nangma in keima nai ah nong om a, na thupiakte theampo kho top hi.

¹⁵²Na lamlaknate ka heak zawk ngei zo hi; tuate sia a kikhomsuan tu in na vawt ahi hi.

Hu nget Maangkaana

¹⁵³Ka thuakna hong en tan a, hong ngum tan, banghangziam cile na thukham ka ngaingon bua hi.

¹⁵⁴Ka vai hong nan pui tan a, hong suaktasak tan; nong kamciam sa bangin hong hun tan.



155A seksolte kingum ngawl tu hi, banghangziam cile amate in na thukhamte a ni bua uh hi.

156Ahihang, Topa awng, na mulkimna in lian hi; na hesuakna hong lak tan a hong hun tan!

157Keima in ngalte le hong zothaw theite tam mama ka nei hi, ahihang na thukhamte ka zui khial ngei bua hi.

158Tua ngual leeheak theite ka et ciangin kiihuai ka sa hi, banghangziam cile amate in na thupiakte a len bua uh hi.

159Topa awng, na lamlaknate bangza in it khi ziam cisia, hong mu tan. Na itna in kikheal ngei ngawl ahiciang hong hun tan!

160Na thukham laingil in thumaanna hi a, a tangin na thukhennate theampo sia kip tawntung hi.

Topa Thukham sungah Ki aapna

161Mihing vaang neite in a maan ngawlin kei hong do hi, ahihang na thukham ka thasia hi.

162Na kamciamte hu in bangza ka lungdam ziam — Sumngum kikholna a mu khat bangin ka lungdam hi.

163Leilot thu theampo ngaimaw in ka huatsa hi, ahihang na thukham ka it hi.

164A tang na thukhennate hu in nisim in sali vei nang tungah lungdam kong ko hi.

165Na thukham a itte in a bit lungmuanna nei a, amate a puksak thei bangma a om bua hi.

166Topa awng, nong ngup tu ngakin ka om a, nong sawl po ka seam hi.

167Na hilnate ka ni hi; ka thinsung theampo taw tuate ka it hi.

168Na thupiakte le nong lamlaknate ka zui hi; ka sep ka vawt theampo na mu hi.

Hu natu Thungetna



¹⁶⁹Hu ngen a kong auna nang kung hong theng taken, Topa awng! Nong kamciam sa bangin tel theina hong pia tan!

¹⁷⁰Kong thungetna hong ngai tan a, na kamciam sa om bangin hong hun tan!

¹⁷¹A tawntungin nang kong pok tu hi, banghangziam cile nangma in na thukhamte nong hil hi.

¹⁷²Na thukham tungtaang ah la ka sa tu hi, banghangziam cile na thupiaknate maan hi.

¹⁷³Kei hong hu tu in a tawntungin hong kinging tan, banghangziam cile na thupiakte ka zui hi.

¹⁷⁴Topa awng, hong ngum tu nong huna sia bangza in thangai khi ziam! na thukham sungah lungdamna ka mu hi.

¹⁷⁵Nang kong pok thei natu in nuntakna hong pia tan; na lamlaknate in kei hong hu taken.

¹⁷⁶Ngam am tuuno khat bangin ka vakthap hi; Tua ahikom hong pai in na naseampa keima hong zong tan, banghangziam cile na thukhamte ka ngaingon bua hi.

Psalm Late 120

Hu natu Thungetna

¹Ngim ka nga ciangin Topa ka sam a, ama in hong zo hi.

²Topa awng, leilot theite le ngual theam theite kung pan hong hun tan.

³No a leilot theite awng, Pathian in bang hong law tu ziam? Bangbangin daan hong pia tu ziam?

⁴Ngalkapte thaltang hiamte le meikam sa taw daan hong pia tu hi.

⁵Note kawm ah teen sia Meshech ah teen bang ahizong, Kedar mite kawm sungah teen bang ahizong, sia hi.

⁶Kilemna a ngaimawte taw ka teen khop zawk ngei lei zo hi!

⁷Kilemna vai ka son ciangin amate in ngalvai hawm uh hi.



Psalm Late 121

Ei Hong dal Topa

- ¹Kei hong kihuna koisung pan hong pai him ci in mualtung ka ento hi.
- ²Kei hong kihu natu sia van le lei a vawt Topa kung panin hong pai hi.
- ³Ama in nang hong puksak ngawl tu hi; nang hong dalpa in a tawntungin khangciim hi.
- ⁴Israel a dalpa in lusu ngeingawlin mu ngeingawl hi.
- ⁵Topa in nang hong cing tu hi; ama sia na kungah nang hong dal tu in om hi.
- ⁶Sunin ni in nang hong liamsua ngawl tu a, zanin tha in zong nang hong nasak ngawl tu hi.
- ⁷Topa in nang sia launa theampo panin hong dal tu hi; ama in nang hong keamcing tu hi.
- ⁸Ama in na sungtanna le, na puswana ah tu le a tawntungin nang hong dal tu hi.

Psalm Late 122

Jerusalem Pokna La

- ¹“Topa inn ah pai ka tawng” hong ci a om ciangin ka lungdam hi.
- ²Tu in eite sia hi sung Jerusalem kongpite sung sangah ih ding hi!
- ³Jerusalem sia a etlawm, a hoi in a kipua kik khuapi khat ahi hi.
- ⁴Topa thupiak bangin ama tungah lungdamko tu in, Israel minamte hong paina mun ahi hi.
- ⁵Israel kumpipate in a mite tungah thukhen tu in hi sungah to uh hi.
- ⁶Jerusalem khuapi ah kilemna a om thei natu thungen vun: “Nang hong itte in khangto taken.
- ⁷Na suumsung sangah kilemna om taken a, na kumpi innte ah ngal muanna om taken,” ci vun.



⁸Ka mealheakte le ka ngualtamhte ka ngaisutna in Jerusalem tungah, “Kilemna om taken!” ka ci hi.

⁹Topa ih Pathian inn atu in na nopsak natu thu ka ngen hi.

Psalm Late 124

A mite A Sungsia Pathian

¹Topa in ei sangah hong pang ngawl hile bang suak tu hi ziam? Hong zo tavun, Israel awng!

²“Topa ei sangah hong pang ngawl hi zen thong le,

³ih ngalte ii hong sim ciang, thin sona taw eite a hingtang in hong valhlum zo tu hi;

⁴tuaciang namthuam in hong taikeak zo tu a, tui in hong khum zo tu hi,

⁵a lauhuai khuanawl in tui hong tasak zo tu hi.”

⁶Ih ngalte ii hong lalthapsak tu, a oai ngawl Topa tungah lungdamko tawng.

⁷Savaipa thaang sung pan a suakta vacim khat bangin ei zongh ih suakta zo hi; a thaang taltham zo a, eite suakta hi hing!

⁸Simlei vantung a vawt Topa kung panin eite hong huna hong pai ahi hi.

Psalm Late 126

Suatak natu Thungetna

¹Topa in Jerusalem ah hong siapui kik ciangin mang bang phet ma ahi hi!

²Bangza in ih nui a, lungnuam in la ih sa ziam! Tuasia ciang minam dangte in ei huvau sia, “Topa in amate atu in na lianpi seam zo hi” a ci uh hi.

³Na lianpите ei atu hong seam takpi zo hi; bangza in ih lungdam ziam!

⁴Ngua in nguntui kang a, a kona mun ah tui a puak kik bangin, Topa awng, ko hong nuamsasak kik tan.

⁵Thitui taak a, thaici a tute sia lungnopna taw an lasak in!

⁶Thitui taak a thaici pua in a kuante sia an la a hong cia kik uh ciangin lungdam in la a sa tu uh hi.



Psalm Late 127

Pathian ii Phatna Pokna

¹Topa in inn a sa buale inn sate ii dianna in a luithawthong ahi hi; Topa in khuapi a dal buale ngalvilte ii cinna sia a luithawthong ahi hi.

²Zingsang thopal a, nitak lum hakin kivaak kitaa natu nasia takin nasep sia, a luithawthong ahi hi. Banghangziam cile Topa in ama itte atu a mut lan ngangawnin vaihawm sak hi,

³Tanu tapate sia Topa hong piak letsong hi; amate sia thupha tatak khat ahi hi.

⁴Mihing khat ii a khanmoi lai a hin tapate sia ngalkap khat ii khut sungah om thaltangte bang ahi hi.

⁵Tuabang thaltang tam a neipa sia mihing lungdam ahi hi. Thukhenna munah a ngalte taw a kisik ciangin ama in a lel ngei buatu hi.

Psalm Late 128

Topa Thunitna Thaman

¹Topa thu ni a, a thupiakte babangin a nungtate in mihing lungdam ahi uh hi.

²Na nasepna in na kisap tu teng hong sik tu hi; nangma in na lungdam tu a, na nuamsa tu hi.

³Na zi in na inn sungah a ngathiam sapit ngui taw kibang tu a, na sabuai kiim ah na tate in olive kung moite taw kibang tu hi.

⁴Topa thu a ni mihing khat sia, tu a bang keakin thupha kipia takpi tu hi.

⁵Topa in Zion panin nangma thupha hong pia taken! Na khan tawntung Jerusalem nopsakna hong musak taken!

⁶Tunu tupa mealmu tu in hong nungtasak taken! Israel te tungah kilemna om taken!

Psalm Late 129

Israel ii Ngalte Langpan Thungetna



¹Israel awng, na khangmoi lai pan ma kipan na ngalte in bangza in hong siatvawt zo zen ziam ko tungah hong son tan.

²“Khangmoi ka hi lai pan ma kipan ka ngalte in hong siatvawt zazan hi, ahihang amate in hong zo zo ngawl hi.

³Amate in ka nungzaang nasia takin hong liamsak a, lo kithovuung sa khat taw ka kibang hi.

⁴Ahihang a thutang pa Topa in saltanna panin hong suatak zo hi.”

⁵Zion a ensante theampo in lelma le notkeakna thuak taken.

⁶Amate sia innkhum tungah a po, a khan ma a kocip lopate bang hi taken;

⁷tuante sia kuama in khawmtua ngawl a, a lom in zongh kipua ngawl hi.

⁸Tuante kantan in a pai kuama in “Topa in thupha hong pia taken! Topa min taw thupha hong pia khu hi” ci ngawl tu hi.

Psalm Late 130

Hu natu Thungetna

¹Topa awng, ka thinkiam dikdekna panin nang kong biakpui hi.

²Topa awng, ka auna hong za tan; hu ngen a kong sapna hong ngai tan!

³Nangma in ko mawnate hong teptee sak hi thong lete akua peuma puavawkna pan suakta thei tu ziam?

⁴Ahihang nangma hong thasia in kong din thei natu uh in, nangma in nong maisak hi.

⁵Topa hong hu natu lawpin ka ngakla a, ama kammal ka muang hi.

⁶Ngilvilte in zingsang khuavak tu kaal a ngalaak mama sangin, Topa ka ngakla zaw hi.

⁷Israel awng, Topa muang vun, banghangziam cile ama itna in kip a, ama in hong hun nuam tawntung hi.

⁸Ama in Israel a mite sia amate mawna theampo panin ngum tu hi.

Psalm Late 131



Kiniamkhiak in Muanna taw Thungetna

¹Topa awng, ka kiphatsaknate ka kheal zo a, ka kisaktheinate ka nungngat zo hi. Thu liante ahizong, kei atu a haksa leilam thute ahizong patau in ka nei bua hi.

²Tua taangin lungkim thinnuamin ka om zaw hi. Nute kaang sungah nauno khat ommuangin a lup bangin ka sungah lungmuanna om hi.

³Israel te awng, Topa sia tu le a tawntungin muang tavun.

Psalm Late 132

Biakinnpi Pokna

¹Topa awng, David le ama ii thuak haksatnate mangil heak in.

²Topa awng, a vaanglian Jacob Pathian nangma tungah hong kamciamna, hong kiciamnate phawk in:

³“Inn ah ka cia buatu a, lupmun ka zuan buatu hi;

⁴Topa atu mun khat, a vaanglian Jacob Pathian teenna tu inn khat, ka piak mateng,

⁵ka tawlinga buatu a, ka mu buatu hi,” ci hi.

⁶Bethlehem khua ah Thukham Thingkuang huvau ka za uh a, Jearim lote sungah tua thingkuang ka mu uh hi.

⁷“Topa inn ah pai tawng; a kumpi tokhum mai pan bia tawng” ka ci uh hi.

⁸Topa awng, na vaangletna lim ahi na Thukham Thingkuang taw na Biakinnpi sungah hong pai tan a, hi sungah a tawntungin hong om tan.

⁹Na thiampite in a maan sepate vawt tawntung taken; na mihingte in lungdamna taw au taken!

¹⁰Na naseampa David tungah kamciamna khat na pia hi; Topa awng, na teal sa kumpipa nial heak in.

¹¹David tungah ciliap huai takin kamciamna khat na pia hi; tua kamciam sia na daw k kik tu in na piak ahi bua hi; “Na tapate sung panin khat kumpi ka suaksak tu a, ama in nang zawkciang ngam a uk tu hi.



¹²Na tate in ka thuciamna sungah thumaan a, amate tungah ka piak thute a zui le, amate ii tate zongh in a tawntungin kumpi suakin na za hong lua tu hi.”

¹³Topa in Zion sia teal zo hi; ama teenna tu in vawt nuam hi.

¹⁴“Hi sia in a tawntung in, ka teen natu hi; hi mun in ka uk nopna mun ahi hi.

¹⁵Zion tungah ama kikap theampo kicing takin ka pia tu hi; a mizawngte an pia in ka lungkim sak tu hi.

¹⁶A thiampite sia a sepna theampo ah thupha ka pia tu a, ama mihingte in la sa in lungnopna taw a au tu uh hi.

¹⁷Hi sungah David ii suan khat sia kumpi lian khatin ka siam tu hi; hi sungah ka teal sa kumpipa ukna ka keamcing tu hi.

¹⁸A ngalte sia maizumna taw ka tuam tu a, ahizong ama kumpingam khangto in nopci tu hi.

Psalm Late 133

Kilemin Nuntakna Pokna

¹Pathian mihingte kituiton takin a teen khop uh ciang bangza in lamdang a, bangza in nuam ziam!

²Tua in Aaron lutung a, a kibuak a luzaang pan a khamul ah a puantual kithepna mong dong a luangsuk sathau manpha sia taw kibang hi.

³Tua in Hermon Mual tung, Zion mualte tungah a kia daaitui taw kibang hi. Tuasia in tawpna a nei ngawl nuntakna a kici Topa ii thupha piak tu a kamciamna mun ahi hi.

Psalm Late 134

Pathian Pok natu Sapna

¹Zan hun sung Biakinn sungah a naseam, ama naseam theampote awng, hong pai tavun a, Topa pok vun!

²Ama Biakinn sungah thungetna taw na khut uh laam vun a, Topa pok vun!



³Van le lei a vawt Topa in Zion panin, note thupha hong pia taken!

Psalm Late 135

Pokna La

¹Topa pok vun! no Topa naseamte awng, ama min pok vun.

²Topa inn sung le, ih Pathian Biakinnpi sungah a dingte awng, Topa pok vun!

³Topa pok vun, banghangziam cile ama pha hi; ama min pokna late sa vun, banghangziam cile ama dik hi.

⁴Ama in ama atu in Jacob teal a, ama aituum tu in Israel mite teal hi.

⁵Ih Topa lian hi ci in ka he a, pathian dang theampo sangin lianzaw hi.

⁶Vantung le leitung ah ahizong, tuipi sung le a nuai a thuknate ah ahizong ama uuk pawpo a vawt hi.

⁷Ama in leitung mong panin vuipei meeite hong puak hi; ama in vuipei suangvalte atu in khualeng vawt a, tuaciangin vuite sia a kholna sung pan hong pusua hi.

⁸Egypt ngam ah ama in mihing le nganhingte ii taciil tek a kibangin thatlum hi.

⁹Tua munah nalamdangte le a lamdadangte kumpipa le a upate daan piak natu in vawt hi.

¹⁰Ama in ngam tuatuam tam ma susia a, a thahat kumpite thatlum hi.

¹¹Tuate sungah Amor kumpipa Sihon, Bashan kumpipa Og, le Canaan kumpi theampo kihel hi.

¹²Amate ii leitanghte sia ama in a mite pia hi; ama in tuate Israel mite pia hi.

¹³Topa awng, nangma sia Pathian hi ci in a tawntungin hong kithangsak tu hi; khang theampo in nang hong ciamtee tu hi.

¹⁴Topa in ama mihingte hung tu hi; ama in a naseamte hesuak tu hi.

¹⁵Tua minamte ii pathiante sia mihingte ii khut taw a vawt tawm kham le ngun taw a kivawtte ahi hi.



¹⁶Amate in kam nei ahihang a pau thei bua hi, mit nei ahihang a mu thei bua uh hi.

¹⁷Amate in bil nei ahihang khua a za thei bua uh hi; amate sia hu ngawngawn a sang thei bua uh hi.

¹⁸Tuate a vawtte le a muangte theampo sia amate vawt sa milimte bang ma suak taken!

¹⁹Israel mite awng, Topa pok vun; no Pathian thiampite awng, ama pok vun!

²⁰No Levi mite awng, Topa pok vun; no ama a biate theampo awng, ama pok vun!

²¹Topa sia Zion ah pok vun, a inn ahi Jerusalem ah pok vun. Topa pok vun!

Psalm Late 136

Lungdamkona La

¹Topa tungah lungdamko vun, banghangziam cile ama pha hi; ama itna kip tawntung hi.

²Pathiante theampo sung pan a lianbel pa tungah lungdamko vun, ama hong itna kip tawntung hi.

³To theampo sung pan a thahat bel pa tungah lungdamko vun, ama itna kip tawntung hi.

⁴Ama bek in nalamdang lakna liante vawt hi; ama itna kip tawntung hi.

⁵Ama ciimna taw vantungte vawt hi; ama itna kip tawntung hi.

⁶Ama in simlei sia tuithukna tungah sa hi; ama itna kip tawntung hi.

⁷Ama in ni le tha vawt hi; ama itna kip tawntung hi.

⁸Ni in sun hun a uksak hi; ama itna kip tawntung hi;

⁹tha le aksi te in zan hun a uksak hi; ama itna kip tawntung hi.

¹⁰Ama in Egyptte tapa cill teng that hi; ama itna kip tawntung hi.

¹¹Ama in Israel mite Egypt ngam panin pusuapui hi; ama itna kip tawntung hi;



- ¹²a khut thakhona, a baan thahatna taw pusuapui hi; ama itna kip tawntung hi.
- ¹³Ama in San Tuipi khen hi; ama itna kip tawntung hi.
- ¹⁴tua kantan in a mite lampui hi; ama itna kip tawntung hi;
- ¹⁵ahihang Egypt kumpipa le a ngalkap teng tuitasak hi; ama itna kip tawntung hi.
- ¹⁶Ama in a mite senneal ngam kantan in lampui hi; ama itna kip tawntung hi.
- ¹⁷Ama in a thahat kumpite that hi; ama itna kip tawntung hi;
- ¹⁸Ama in kumpi minthangte thatlum hi; ama itna kip tawntung hi.
- ¹⁹Amor mite kumpipa, Sihon thatlum hi; ama itna kip tawntung hi.
- ²⁰tuaciang Bashan kumpipa Og thatlum hi, ama itna kip tawntung hi.
- ²¹Amate ngam teng a mite piaksak hi; ama itna kip tawntung hi.
- ²²A naseam Israel tungah tua ngamte pia hi; ama itna kip tawntung hi;
- ²³Ngah ih lel ciangin ama in hong mangil ngawl hi; ama itna kip tawntung hi.
- ²⁴Ama in ih ngalte khut sung panin hong suatak hi; ama itna kip tawntung hi.
- ²⁵Ama in nuntakna nei theampo an pia hi; ama itna kip tawntung hi.
- ²⁶Vantung a om Pathian tungah lungdamko vun, ama itna kip tawntung hi.

Psalm Late 137

Satang Israel te Kaana

- ¹Babylon ngunte hui ah ka to uh hi; tua munah Zion ka phaw uh ciangin ka kap uh hi.
- ²A nai a om pakngiam kungte tungah ka tengtongte uh ka khai uh hi;
- ³Ko hong pummatte in la sa in hong sawl hi. Amate ngualnop natu in “Zion la hong sak tavun” hong ci uh hi.
- ⁴Ngual ngam ngual lei ah bangbangin Topa tungah la sa thei tu khu ziam?



⁵Jerusalem awng, nang kong mangil le tengtong zongh tum thei ngei nawn bua tong!

⁶Nang sia ka lungnopna lianbel na hi hunlam kong ngaisun bua a, nang kong mangil le, la zongh sa kik thei ngei nawn bua tong!

⁷Topa awng, Jerusalem a kilaak ni in Edomte ngamtatna na phawk in. “A bul dongin maimot vun” a ci kikik uh sia na phawk in.

⁸Babylon awng, nang sia hong kilalsak tu hi. Kote tungah nong vawtna sa teng hong thuk kik te —

⁹na nausente uh hong laaksak in suangpi tungah hong teaklupsak te sia mihing lungdam ahi uh hi.

Psalm Late 138

Lungdamko Thungetna

¹Topa awng, ka thin theampo taw lungdam kong ko hi; tua pathiante mai ah nangma pokna la kong sak hi.

²A thiangtho na Biakinpi sang maingatin, kunin na min kong pok hi, banghangziam cile itna kip le na thumaanna hang ahi hi, na min le na thupiaknate sia a lianbel in nong lak hang hi.

³Kong sam ciangin nong zo kik hi, na thahatna taw kei nong thakhosak hi.

⁴Topa awng, leitung ah kumpi theampo in nang hong pok tu hi, banghangziam cile na kamciamte amate in za zo uh hi.

⁵Amate in na sep na vawt sate le na minthanna liante huvau in la hong sak tu hi.

⁶Nang sia tungsang ah, saang mama na hihang, a kiniamkhiakte na khoi a, a kiphasakte sia nang kung panin a buu thei bua hi.

⁷Ngimnate in kei hong uumci ciangin nangma in nong keamcing hi. A thin uuk ka ngalte nong dosak a na vaangletna taw kei nong hun hi.

⁸Na kamciam sa theampo na seam tu hi; Topa awng, na itna kip tawntung hi. Na pat sa nasep sia a khuangkhim dongin hong seam tan.



Psalm Late 139

Pathian ii A kicing Heakna le Khoina

- ¹Topa awng, nangma in nong sit ngiingeei zo a nong he hi.
- ²Nangma in ka sep ka vawt theampo na he hi; ka ngaisutna theampo a khuala na panin na he hi.
- ³Na ka sep laitk ziam ka tawlngak laitak ziam, nong mu hi; ka ngamtatna theampo na he hi.
- ⁴Ka pau ma ngangawn in ka son tuteng na he zo hi.
- ⁵Nangma in ka kiimkot mun theampo ah na om hi; na vaangletna taw kei nong dal hi.
- ⁶Kei nong heakna sia thuk leih hi; kei tel zawk ahi bua hi.
- ⁷Nangma pial in koisung zuan thei tu khi ziam? Nang omna pan koisungah ka tai thei tu ziam?
- ⁸Vantung ah paito ka leng zong tua munah na om tu hi; mithi khua ah lumh ka leng zong tua munah na om veve tu hi.
- ⁹Nisuana kalhin ka leang hial zong ahibuale nitumna sang a khuala belna ah teang ka leng zong
- ¹⁰kei hong lampui tu in tuak ma ah na om tu hi, kei hong hu tu in tuak ma ah na om tu hi.
- ¹¹Khuazing ii hong sealcip natu, tua ahibuale ka kiimkot khuavak sia zan a suak tu in ka ngen thei hi,
- ¹²ahihang khuazing ngangawn nang atu in a zing tuan bua a, zan sia suntang bangin a taang hi. Khuazing le khuavak sia nang atu in kibang hi.
- ¹³Nangma in ka pumpi sungah om na theampo na bitphua hi; Ka nu naubu sungah ka pumpi nong ngawmtua hi.
- ¹⁴Nangma kong pok hi, banghangziam cile nangma in kiitak tu na hi hi; na sep na vawt theampo tumdangin lamdang hi. Tuasia ka thinsung theampo taw ka he hi.



¹⁵Ka ngute kipiangsak in, ka nu naubu sungah pha takin kingawmtua a, a thimtham in ka khanto hunin, tua munah ka om hunlam nong he hi.

¹⁶Ka sua ma in kei nong mu zo hi. Kei atu hong kisee sa ni le hunte a kipat ma in na laibu sungah kiciamtee siat zo hi.

¹⁷Pathian awng, na khua ngaisutnate sia kei tel tu bangza haksa ziam, bangza ta tam ziam!

¹⁸Keima in tuate sim hi leng senvui za sangin tamzaw tu hi. Ka khanlaw ciang zong nangma taw ma ka omkhawm lai hi.

¹⁹Pathian awng, mihing seksolte hong thalupsak le te oai meak ing! mihing molngolte in keima nguak hong koi le uuk meak ing!

²⁰Amate in nangma taw kisai in seksol kamte hong zangh uh hi; na min siat thethei natu in pau uh hi.

²¹Topa awng, nang hong ngaimawte bangza in ensan khi ziam! Nang hong leedote bangza in nomu khi ziam!

²²Amate sia ngaimawk tawpin ka ngaimaw hi; amate keima ngal bangin ka nei hi.

²³Kei hong sit tan, Pathian awng, ka thinsung hong he tan; hong sittel tan a, ka ngaisutnate hong mu thak sak tan.

²⁴Ka sungah siatna a om ziam maw hong mu tan a, tawntung lampi ah kei lam hong pui tan.

Psalm Late 140

Kidal natu Thungetna

¹Mihing tatsiate kung panin hong hun tan, Topa awng, mihing molngolte kung panin hong keamcing tan.

²Amate in a tawntungin a sia vawt tu a sawm ku uh a, kihau thei natu in ngual a hol tawntung uh hi.

³Amate ii leeite sia hong thisak thei ngulte taw kibang hi; amate kammal in ngulsok ngu bang ahi hi.



⁴A seksolte thahatna panin hong dal tan Topa awng, ka puk natu hong sawm kuu molngol mite kung panin hong keamcing tan.

⁵Mihing kiphasak te in thaang hong sia hi; amate in khau thaangte pha in lampi dungah kei hong mat natu in thaangte keak sa in koi uh hi.

⁶“Nangma in ka Pathian na hi hi,” Topa tungah ka ci hi. Topa awng, hu ngen a kong auna hong za tan!

⁷Vaanglianpipa ka Topa awng, a tha kho kei hong hungpa, nangma in ngal kidona sungah nong dal zo hi.

⁸Topa awng, a seksolte ii deite pia heak in; amate sawmku thute tangtungsak heak in.

⁹Ka ngalte in hong zosak heak in; amate ii kei hong tawn nate amate tungah tusak kik in.

¹⁰Meikam san vahem te amate tungah taak taken; dum sungah amate kilawn suk taken a, pusuak ngei nawn heak hen.

¹¹Midangte maw a suan khialte in tangtung heak hen; mihing ngoltolte sia siatna in ban ta hen a, lalsak taken.

¹²Topa awng, nangma in mizawngte vai le, a cimawte ii nga tuak thute ah na panpui sia ka he hi.

¹³A thutangte in nang hong pok takpi tu hi; amate sia nangma omna munah teang tu uh hi.

Psalm Late 141

Nitak Thungetna

¹Nang kong sam hi, Topa; tu in hong hu tan! Kong sam ciangin hong ngai tan.

²Kong thungetna a namtui biakpiakna in hong saang tan a, ka khutte kong lapto sia nitak sangaw biakpiakna khat bangin hong saang tan.

³Topa, ka kam ah a cing tu khat, ka muk kongkha ah ngalvil khat koi in.



⁴A maan ngawl sep nopna le, mihing tatsiate seksolnate pop nopna pan hong keam tan. Amate ii poai khamna sungah ka kihel ngei ngawl natu hi hen.

⁵Mihing pha khat in deisakna taw hong tei in daan zongh hong pia thei hi, ahihang mihing ngilote ii upatna ka saang ngei buatu hi, banghangziam cile amate ngamtat siatnate langpang in thu ka ngen tawntung hi.

⁶Amate a ukte sia suangliang tung panin a kilotsuk tak ciang mihingte in ka kammalte sia maan sa tu uh hi.

⁷A bebek in a ki ektham thing bangin amate ii ngute sia thaam kiil ah kithethaang tu hi.

⁸Ahihang nang kong muang tawntung hi, Vaanglianpipa ka Topa awng. Nong dalna ka zong hi; Hong thisak heak in!

⁹Amate ii kei hong siana thaangte panin hong dal tan a, thusia vawtte khauthaang panin hong hung tan.

¹⁰Kei bangma tat ngawlin ka pai lai takin, a seksolte sia amate ii thaang sung ma ah awk taken.

Psalm Late 142

Hu natu Thungetna

¹Hu ngenin Topa ka sam hi; ama ka mangkaa hi,

²Ka lungkim ngawlina theampo ama ka puak hi; ka ngim ngana theampo ama tungah ka son hi.

³Ka ci ka law he ngawlin lel ka sawm ciang, ama in ka ngamtat natu he hi. Ka lampi totna ah ka ngalte in kei thaang hong sia ku zo hi.

⁴Ka kiim ka paam ka et ciangin kei hong hu tu kuama ka mu bua hi, kuama hong dal tu a om bua hi. Kuama in kei hong awlmawk bua hi.

⁵Topa awng, nang tungah hu ngenin kong au hi; Topa, nangma in kei hong dalpa na hi hi; hi nuntakna sungah ka dei theampo kicinna in nangma na hi hi.



⁶Hu ngen a, kong auna hong ngai tan, banghangziam cile ka thin kiamcip zo hi. Ka ngalte kung panin hong hun tan; amate sia kei atu in hat lei hi.

⁷Ka thin ngimna pan suatakna hong pia tan, tuasia ciang kei tungah nong phatna hangin na mite kikhopna sungah nang kong pok tu hi.

Psalm Late 143

Hu natu Thungetna

¹Topa awng, ka thungetna hong za tan! Na thutang sungah kong mangkaana hong ngai tan; na thumaanna hangin kei hong zo tan!

²Kei na naseam pa thusitna hong thuaksak heak in; nang muna ah a maw ngawl kuama a om bua hi.

³Ka ngalpa in savai bangin hong vai a hong zothal hi. Ama in thongzing khat sungah hong khum zo a, ngei tawnglai ah a thi sate bang ka hi hi.

⁴Tua ahikom ka ci ka law ka he nawn bua a thasua ka sawm hi; ka thinkiam dikdek hi.

⁵A bo sa nite ka phawk hi, na sepsa theampo ka ngaisun hi, na ngamtatna sa theampo ka thin sungah ka sut kikik hi.

⁶Thungenin ka khutte nang kungah kong laamto hi; lei ko bangin ka thaa in nang hong dangko law hi.

⁷Tu ma in hong zo tan, Topa! lametna theampo ka bosua zo hi. Kei kung panin buu heak in, na buu le kei sia mithi khua a zuansukte taw ka omkhawm tu hi.

⁸Zing simin na itna kip hong phawksak kik tan, banghangziam cile nangma kong muang hi. Ka thungetnate nang kung hong theng hi, ka tot tu lampi hong lak tan.

⁹Kidalna nga tu in nang kungah kong pai hi, Topa; ka ngalte kung panin hong suatak tan.

¹⁰Nangma in ka Pathian na hi hi; na deina bang ka vawt thei natu hong hil tan. Kei tungah hong dik tan a, a muanhuai lampi ah lam hong pui tan.



¹¹Topa awng, nong kamciam sa bangma in hong suatak tan; na phatna taw ka ngim ngana sung pan hong hun tan!

¹²Kei nong itna hu in ka ngalte that in a, kei hong zothaw theampo na susia in, banghangziam cile kei sia na naseam pa ka hi hi.

Psalm Late 144

Zawna nga Kumpipa ii Pathian tungah Lungdamkona

¹Kei hong sungsia pa Topa pok vun! Ama in ngal kidozia kei hong hil a, ngalsim tu in hong kingingtasak hi.

²Ama in kei hong dalpa le hong hungpa ahi hi, ka belna le ka ngumpa, ngammuan natu in, ka muanpa ahi hi. Minamte kei khut nuai ah ama in hong zawsak hi.

³Topa awng, nangma in na phaw tham tu in a thi thei mihingte bang hi a; athi thei lelte po banghangin thusim ni ziam?

⁴Amate sia vui muut khat taw kibang hi; ama khan sia a kantan ziau nilim khat bang ahi hi.

⁵Topa awng, van khentham in hong pai suk tan; mualte tham in, tua hile tuate in meikhu pusua tu hi.

⁶Khualeng tee vazalte tha in a, na ngalte thethaang in; na thaltangte kap in a, amate taikeaksak in.

⁷Tungsang panin hong baansuk tan. Tuithukna pan hong dokto tan a, hong suatak tan; ngamdang mite thahatna panin hong hun tan,

⁸amate in thumaan son ngei ngawl a, kiciam napi leilot lai hi.

⁹Nang tungah la thak khat kong sak tu hi, Pathian awng; tengtong tumin la kong sak tu hi.

¹⁰Kumpipate tungah zawna na pia a, na naseampa David na suatak hi.

¹¹A ngilo ka ngalte kung panin hong hun tan; thumaan son ngei ngawl a, kiciam napi a leilot lai, ngamdang mite thahatna panin hong suatak tan.



¹²Ka tapate uh a khanmoi lai ma in thahatin a khang thingkungte bang hi taken. Ka tanute uh sia kumpi inn kinghte a zeam khuam hoite taw kibang taken.

¹³Ka ansaal uh te an namcin taw kidim taken a, ka lo sungah tuute in a tul a then in pung taken.

¹⁴Ka khuite uh zongh a no tol, a sumsi om ngawlin ta tam mama nenei taken. Khua sung ih lampite ah ngimnga kikona aw nging heak hen.

¹⁵Hi thute bangin a piang minam sia mi nuamsa ahi hi; Pathian sia Topa in a nei mite in mihing lungdamte ahi uh hi.

Psalm Late 145

Pokna La

¹Na letna ka thangsak tu hi, ka Pathian le ka kumpipa awng; a tawntung a tawntung in lungdam kong ko tu hi.

²Nisim in nang tungah lungdam kong ko tu hi; a tawntung a tawntung in nang kong pok tu hi.

³Topa sia lian ahikom, nasia takin pok tu ahi hi; ama letna in tel zawk ahi bua hi.

⁴Na sepsate hu in khang khat panin khang khat ah hong kipok tu hi; amate in a nasia mama na sepnate thangsak tu hi.

⁵Amate in na minthanna le na letnazia son tu uh a, a lamdang na septe thuk takin ka ngaisusun tu hi.

⁶Mihingte in na sepna lianpitem son tu a, na letna ka thangsak tu hi.

⁷Amate in na phatna theampo son tu a, na thuthiamna la in sa tu uh hi.

⁸Topa in ki itna le hesuakna nei a, thinsau in itna kip taw kidim hi.

⁹Ama sia mihing sim tungah pha in, a vawt theampo tungah mulkimna nei hi.

¹⁰Topa awng, na bitphua sa nuntakna nei theampo in nang hong pok tu a, na mite theampo in lungdam hong ko tu hi.



- ¹¹Amate in na kumpi vaangletna ii minthanna sia thuson in nei tu a, na thakhona thu son tu uh hi,
- ¹²tuasia ciang mihing theampo in na sepna lianpите he tu a, na kumpingam sungah na min letzia hong he tu uh hi.
- ¹³Na ukna kip tawntung a, nang sia a tawntungin kumpipa na hi hi. Topa in a kamciamnate tungah thumaan a, a ngamatna sung theampo ah hesuak thei hi.
- ¹⁴Ama in ngim a ngate theampo hu hi; a puksa theampo phongto hi.
- ¹⁵Nuntakna a nei theampo in lametna taw nang hong mitsuan a, amate kisap ciangin an na pia hi.
- ¹⁶Amate a khom tu in na pia a, kitaangsapna theampo ah na lungkimsak hi.
- ¹⁷Topa in ama sepna theampo sungah thutang a, a ngamatna sung theampo ah hesuak thei hi.
- ¹⁸Ama a kote, thintak taw a samte nai ah ama om hi.
- ¹⁹Ama a zaktate ii kitaangsapnate ama in sik hi; amate auna za in hun hi.
- ²⁰Ama a it theampo ama in sungsia hi, ahihang a seksolte susia tu hi.
- ²¹Topa ka pok tawntung tu hi; ama bitphua sa nuntakna nei theampo in a min thiangtho a tawntungin pok taken.

Psalm Late 146

Ngumpa Pathian Pokna

- ¹Topa pok vun! Ka thaa awng, Topa pok in!
- ²Ka nuntak lai teng ama ka pok tu hi; ka khan tawntung ka Pathian tungah la ka sa tu hi.
- ³Na muanna uh sia mihing lampuite tungah koi heak vun; mihing kuama in no hong hun thei ngawl hi.
- ⁴Amate a thi ciangin leivui ah cia kik uh hi; tua ni in amate ngealna theampo bo hi.



⁵Jacob Pathian sia ama ii hupa in a neipa le Topa amate Pathian in a muang pa sia mi nuamsa hi a,

⁶ama sia vantung, leitung le tuipi, tuaciang tuateng sung a om theampo a Bitphuapa ahi hi. Ama in a kamciamte kholet tawntung hi;

⁷Zawthawk a thuakte sangah pangin thukhen a, a ngilkialte an pia hi. Topa in thongtaakte suakta sak hi,

⁸mittawte khua musak hi. Ama in a puk sate phongto hi; a thutang ama mite it hi.

⁹Ih ngam sungah khual mi hong teangte ama in sungsia hi; ama in meingongte le tangate hu hi, ahihang a seksolte sia siatcip natu mun ah then hi.

¹⁰Topa sia a tawntung kumpipa ahi hi. Zion awng, na Pathian sia hun theampo ah maang tu hi. Topa pok vun!

Psalm Late 147

Vaanglianbelpa Pathian Pokna

¹Topa pok vun! Ih Pathian tungah, pokna la sak tu pha hi; ama pok tu sia nuam a maan hi.

²Topa in Jerusalem thaksua kik a, ngamdang ah saltangte hong ciapui kik hi.

³Ama in a thintamte damsak a, a liammate tuamsak hi.

⁴Ama in aksite a phak za tu see a, khat simin a min taw sam hi.

⁵A lian a thakho sia eite Topa hi; ama ciimna in kitee thei ngawl hi.

⁶Ama in a kiniamkhiak te laamto a, ahihang a seksolte lei ah sucip hi.

⁷Topa tungah pokna biakna late sak vun; Ih Pathian tungah tengtong music tum vun!

⁸Ama in van ah meeite phal hi; ama in leitung atu in nguatui pia a, mualte tungah lopa posak hi.

⁹Ama in nganhingte an pia a, va-ak note a au uh ciang an vaak hi.



¹⁰Ama ii nuam a sak sia siphu thahatte hi ngawl a, ama ii dik a sak zongh ngalkap hangte ahi bua hi.

¹¹Ahihang ama in ama a zaktate le ama itna kip a muangte tungah lungkim hi.

¹²Topa pok in, Jerusalem awng! Na Pathian pok in, Zion awng!

¹³Ama in na kongpite khosak a, na mite thupha pia hi.

¹⁴Na ngamngi uh te bitsak a, zungtaang phabelte taw hong lungkimsak hi.

¹⁵Ama in simlei tungah thupia a, ama ci babang, a manlang in kiseam hi.

¹⁶Ama in vuuk sia puanvan khat taw kibangin phal a, thuamluak sia leivui bangin thethaang hi.

¹⁷Ama in ngial sia suangpim bangin puak a, ama puak khuasik sia kuama in a thuak zo bua hi.

¹⁸Tuasia ciang ama in thupia a, tuikhalte tuitham hi; ama in vui vasak a, tui luangsak hi.

¹⁹Ama in a mite tungah thupuak a, lamlaknate le thukhamte Israelte pia hi.

²⁰Ama in minam dangte tungah hi bangin a seam bua hi; amate in ama thukhamte a he bua uh hi. Topa pok vun!

Psalm Late 148

Vaannuai ii Pathian A pok natu Samna

¹Topa pok vun! No, tungsang a saangna a teangte awng, vantung panin Topa pok vun.

²Ama ii vantung lalang theampo, ama ii vantung ngalkaphonpi theampo awng, ama pok vun.

³Ni le tha awng, ama pok vun; a taang aksite awng, ama pok vun.

⁴A saangbel vantungte le van ii tungsia a om tuite awng, ama pok vun.

⁵Amate theampo in Topa min pok tek taken! Ama in thupia a, amate kubitphua hi;



⁶Ama thupiakna taw amate tek sia a om na sasan ah a tawntungin kikoi a, tuaciang amate in a thu ni ngawlin a om thei bua hi.

⁷Leitung panin Topa pok vun, tuipi nganhingliante le tuipi thukte;

⁸a thupiak a zui khualeng le ngialte, vuuk le meeite, vui thahatte awng.

⁹Pok vun, mualniamte le mualsaangte, a nga thei thingkungte le taamthingte;

¹⁰innsa ngamsa nganhing theampo, a awmtaal nganhingte le vacimte awng.

¹¹Ama pok vun, kumpipate le mihing theampo, kumpi tate le a dang ngamukte;

¹²ngaknute le tangvalnote, khanghaamte le patangte zongh in pok vun.

¹³Amate theampo in Topa min pok tek taken! Ama min in a dang theampo sangin lianzaw hi; ama minthanna in van le lei ii tungsia ahi hi.

¹⁴Ama ii a it mama Israel mite ahi ama mite theampo in ama a pok natu in ama in ama ii minam thahatsak hi. Topa pok vun!

Psalm Late 149

Pokna La

¹Topa pok vun! Topa tungah la thak khat sa vun; a thumaan a mite kikhopna sungah ama pok vun!

²Israel awng, nang hong Bitphuapa hangin lungdam vun; Zion mite awng, na kumpipa hangin lawp vun.

³Ama min sia lapna taw pok vun; ama pokna in khuang le tengtongte tum vun.

⁴Topa in a mite tungtaang ah thinnopna nei hi; ama in a kiniamkhiak te zawna taw patoai hi.

⁵Pathian mihingte in zawna mualsuana tungah lawp in zan khuateak lungdam takin late sa tek taken.

⁶Pathian a pok ciang nasia takin au taken,

⁷mi namdangte zaw natu le, a mihingte daan pia natu;



⁸a kumpipate thikkhau a khii natu, a lampuite uh thikkol a bul natu le,

⁹Pathian thupiak bangin minam dangte daan a piak natu in a khut sungah namsauhiamte toai kawm taken. Hisia in Pathian mite ii zawna ahi hi. Topa pok vun!

Psalm Late 150

Topa Pok vun!

¹Topa pok vun! Pathian sia ama Biakinnpi sungah pok vun! Vantung ah ama thahatna pok vun!

²A sep sa na lianpите hu in ama pok vun. Ama letna lianpi pok vun.

³Lemlete taw ama pok vun! Tengtongte le liamlote taw ama pok vun.

⁴Khuangte le lapna taw ama pok vun. Tengtongte le tamngaite taw ama pok vun.

⁵Daalkopsaite taw ama pok vun. Daalkopsai nging tatak taw ama pok vun.

⁶Nuntakna a nei theampo in Topa pok vun! Topa pok vun!



Paunakte

Paunakte 1

Paunakte Manneina

- ¹Israel kumpipa David tapa Solomon ii paunakte ahi hi.
- ²Hisung a paunakte in ciimna le ngaisutpha khentel natu le a khiakna thuk kamtepteete tel natu in hong hu tu hi.
- ³Tuate in pilvangna taw bangbangin nungta tu, bangbangin thumaan tu a, thutang tu, thukhual tu ci in nang hong hil thei tu hi.
- ⁴Tuate in heakna a nei ngawl lai khat pilsak thei tu a, tuaciang in khangnote kicinna a nei thei natu dan hil hi.
- ⁵Hi paunakte in a ciimte ii heakna ngawngawn belap thei a, pilna saang a neite lamlak hi,
- ⁶tuasia ciangin amate in paunakte ii a kiseal khiaknate he thei tu a, mihing ciimte dok thu telhakte zongh tel thei tu uh hi.

Khangmoite Ngaisut Piakna

- ⁷Heakna na nei natu in Topa thasiana na nei phot kul hi. Mihing mawmawte in ciimna awlmawk ngawlin kan nuam ngawl hi.
- ⁸Na pa le na nu hong sonte pha takin nadon in, ka tapa awng.
- ⁹Amate hong hilnate in a et hoi dial khat, khi khat ii na meal hong hoituamsak bangin na ngamtatzia hong puua tu hi.
- ¹⁰Ka tapa awng, mimawte hong ze et ciangin zui heak in.
- ¹¹A zezen in, amate in “Hong pai tan; ih thalup tu khat zong ka tawng! Mawna nei ngawl khat cimthoina in ngalvawt sin ve tawng!
- ¹²Amate ih mutang in nungta a, cidam hikale amate tungah ih law nop teng ih man zawk ciang thi siat tu hi!
- ¹³Hauna namcin le ih innte sia ih sutol vanhte taw a kidim in ih mu tu hi!



¹⁴Hong pai tan a hong pawm tan, ih nguk theampo ih hawmtek tu hi,” hong ci tu hi.

¹⁵Ka tapa awng, mihing tuabangte taw kithawl heak in. Amate kung pan kiheam in.

¹⁶Amate in a sia khat a vawt tu ngakla hi. Amate in thatlum tu in kinging tawntung hi.

¹⁷Na mat nop vacim sia ii mutang in thaang nasia hang, bangma phatuam ngawl hi,

¹⁸ahihang mihing tuabangte in amate le amate thaang kisia uh a, tua thaang sungah amate thi tu uh hi.

¹⁹Mihing suamna in a suamte nuntakna siik kik vaciat hi, molngolna taw a nungta khat pawpo tungah tuabangma in tung hi.

Ciimna in hong Sam

²⁰Ngai in! Ciimna in khuapi lampi liante sung le vanhzuakna phual ah hong sam hi,

²¹khuapi kongpite le mihingte kisiktuana munte ah a nging tatak au in hong sam hi:

²²“Mihing mawmawte awng! bangtan vei mawmaw nuam nu ziam? Heakna bangtan vei ciammui vawt tu nu ziam? Heak tu sawm nawn ngawl nu ziam?

²³Kong tei ciangin hong ngai tavun; ngaisutna pha kong pia tu a, ka heaknate kong hawm tu hi.

²⁴Hong sasam khi hi, hong pai tavun ci in hong thaw khi hi, ahihang hong ngai nuam ngawl nu hi. Kei sia hong nadon nuam ngawl nu hi.

²⁵Ngaisutna kong piak theampo thusim ngawl nu hi, kong hil kong pau tu zongh nong oai ngei bua uh hi.

²⁶Tua ahikom ngim na nga ciang, kong nuisan tu hi. Launa lian tatak in nang hong nawk a,



²⁷na tungah vuipei suangval bangin hong va a, ngimna vuipei hong puak hi, nang sia natna le cimawkna taw na om hun ciangin kong nunau tu hi.

²⁸Tuaciang ciimna nong kan tu a, ahihang kong zo buatu hi. Mun theampo ah hong zong ka lete zong nong mu buatu hi.

²⁹Heakna bangma hunin na thusim ngei bua a Topa thu nit tu zongh na nial tawntung hi.

³⁰Ngaisutna kong piakte na dei ngei bua a, kong hil kong pau ciangin nong nadon bua hi.

³¹Tua ahikom, nangma taw a kiphu bangin na nga tu hi, tuaciang nangma ngamtatna ma in na ci hong nasak tu hi.

³²Heakna nei ngei ngawlte thi hi, banghangziam cile amate in ciimna nial uh hi. A mawmawte sia awlmawk a neithe ngawlina in amate lalsak hi.

³³Ahihang a kuama po kei thu hong ngaite in ngammuanna nei tu hi. Ama sia thinmuang in om tu a, a launa tu bangma thu a om buatu hi.”

Paunakte 2

Ciimna ii Tel

¹Ka tapa awng, kong hilte sin in a, vawt a kong sawlte bangma hunin mangil heak in.

²Ciimna thute ngai in a, tuate heak tu in hanciam in.

³Hi hi, ciimna ngen in; a thuk mu theina nei natu mangkaa in.

⁴Ngun ahizong a kiseal sum manphate ahizong na zon tu bangin nasia tak zong in.

⁵Tuabangin na ngamta ahile Topakiitakna sia bangziam ci in na he tu a, Pathian thu heakna in na nei tu hi.

⁶Ciimna a pia sia in Topa hi; ama kung pan heakna le tel theina hong pai hi.

⁷Ama in huna pia a, thutang, thumaante a sungsia hi.



- ⁸Midangte tungah a kilawm tu bangin a ngamtate ama in sungsia a, ama tungah a kipiante cing hi.
- ⁹Ka pau nong ngai le, a maan, a tang le a kilawmte na he tu hi. Na vawt tute na he tu hi.
- ¹⁰A ciim na suak tu a, na heakna in nopsakna hong pia tu hi.
- ¹¹A thuk na mu theina le na telna in nang hong sungsia tu hi,
- ¹²tuaciang a maan ngawlte na vawt ngawl natu in hong khaam tu hi. Amate pauna taw ngimna a piangsak mite kung panin tuate in hong keam tu hi,
- ¹³tuabang mite in thutang nuntakzia nusia in mawna khuazing sungah a teang uh hi,
- ¹⁴tuabang mite in a maan ngawl sepna sungah nuamsa a, tuaciang in khiakna nei ngawl siatnate ah thanuam uh hi,
- ¹⁵amate sia mihing suantaak ngawl a muan thamman ngawlte ahi uh hi.
- ¹⁶Nangma in numei paktat khat po ii kamthum taw hong zolnate na nalh zo tu hi,
- ¹⁷ama in a pasal tungah thumaan ngawlin biakna taw a kiciamna a mangil nu ahi hi.
- ¹⁸Ama inn ah na haw le thina lampi ah khual a hawhaw na hi hi. Tua munah pai tu sia mithi khua a neak na hi hi.
- ¹⁹Ama kung a haw peuma hong heak kik ngei ngawl hi. Tua pa in nuntakna lampi ah hong kilee kik ngei nawn ngawl hi.
- ²⁰Tua ahikom mihing phate lamlaknate zui in thutang nuntakna taw nungta hamtang in.
- ²¹Thutang mi, thumaan takkhate, hisung eima ii leitangh tungah a nungta tu hi.
- ²²Ahihang Pathian in mihing seksolte leitung panin dokkhe tu a, hi mawneite leitung panin thingnote baw bangin a bot tu hi.



Paunakte 3

Khangmoi Pasalte Ngaisut pha Piakna

- ¹Ka tapa awng, kong hilte mangil heak in. Vawt a, kong sawlte a tawntungin ciamtee in.
- ²Kong hilnate in khansauna le nuntakna nuam hong pia tu hi.
- ³Thuciipna le thumaanna thasua ngei heak in. Na ngawng kiimkot ah vet in a; na lungtang tungah at in.
- ⁴Hi bangin na ngamta le Pathian le mihingte in nang dik hong sa tu hi.
- ⁵Na thin theampo taw Topa muang in. Nangma ii he na kisakte bangma hunin muang heak in.
- ⁶Na sep na vawt theampo sungahTopa phawk in, tua hile ama in a maan lampi hong lak tu hi.
- ⁷Na hi bang sangin a ciim zaw in kituat heak in, Topa thuni lel in a, a maan ngawlte vawt tu nial in.
- ⁸Tuabangin na hile zatui pha bang hong hi tu a, na liamnate hong damsak in, na natnate hong nuamtuamsak tu hi.
- ⁹Leitangh tung pan a piang theampo sung pan a phabel sia piakna taw Topa patoai in.
- ¹⁰Tuabangin na hile na ansaal sia antangte taw kidim tu a, na khol natu om ngawl liang dongin sapittui tam mama na nei tu hi.
- ¹¹Ka tapa awng, Topa in tekna, hilna hong nei ciangin pha takpi in nadon in a, kidop natu hong piak thu hi ci in saang in.
- ¹²Nu le pate in a kiphatsak pui a ta khat, a tek a hil bangma Topa in ama ii itte tek hi.
- ¹³A ciim a hong kikheal mihing — telthiamna a nei pa in mihing lungdam ahi hi.
- ¹⁴Tua sungah ngun sangin meetna tam om zaw hi; nang atu in kham sangin manh neizaw hi.



- ¹⁵Ciimna sia suang manphate sangin manpha zaw hi; deihuai na sak na khat pawpo taw zong a kitee ngat thei bua hi.
- ¹⁶Ciimna in khansauna hong pia a, hauna le minphatna zongh hong pia hi.
- ¹⁷Ciimna in na nuntakna hong nuamsak tu a, thinmuang takin hong tonpui tu hi.
- ¹⁸Mihing ciimte sia a lungdamte ahi uh hi; ciimna in nuntakna pia tu hi.
- ¹⁹Topa in simlei sia ama ciimna taw bitphua hi; ama heakna taw van sia a omna mun ah koi hi.
- ²⁰Ama ciimna in ngunte luangsak hi, tuaciang leitangh atu in meeikaaite in nguatui piasak hi.
- ²¹Ka tapa awng, na ciimna le a thuk na muna sia keamcing in kholet in. Na kung panin taisua heak in.
- ²²Tuate in nangma nuntakna hong pia tu hi, a nuam le lungdam nuntakna hong pia tu hi.
- ²³Na paina lampi ah sumsina om ngawlin na pai tu a, zongh na lutu beak buatu hi.
- ²⁴Lupna na zot ciang zong na lau buatu a, zan khuateak in mut ciitak in na mu tu hi.
- ²⁵Miseksolte tungah vuipei suangval bangin thakhatthu a tung thei lal theinate patau in na nei buatu hi.
- ²⁶Topa in nang hong keamcing tu hi. Ama in thaang sungah nang hong awksak buatu hi.
- ²⁷Banghun po in na hi thei lai teng a kitaangsamhte tungah phatna vawt in.
- ²⁸Tutawm in na hu thei tu ahi nale zing ciang dong na innpaamte in ngaksak heak in.
- ²⁹Na innpaamte tungah siatna a piangsak thei bangma sawm heak in; amate in nang hong muangin na nai ah hong teang hi.



³⁰Nang tungah siatna hong vawt ngei ngawl mihing khat taw bangbang po thu om kale kam kinial heak in.

³¹Mihing molngolte eang heak in a, amate ngamtat bangin ngamta tu in khensat heak in,

³²banghangziam cile Topa in ngamtat pha ngawl a vawtte ngaimaw a, ahizong thutangte sia ama mimuan in koi hi.

³³Topa in mi seksolte inn ah haamsiatna koi a, ahihang a thutangte inn thupha pia hi.

³⁴Ama in a kisatheite zangh ngawlin, a kiniamkhiakte maipha pia hi.

³⁵Mihing ciimte in a pok huai minphatna nga tu a, ahizong mihing mawmawte in maimawlna bekma nga thua tu hi.

Paunakte 4

Ciimna ii Phattuamna

¹Ka tapa awng, na pa hong hilmate ngai in. Pha takin nadon lete telthiamna na nei tu hi.

²Nang kong hil sia pha ahikom a vekpi in ciamtee in.

³Ka nu le ka pa ii tapa khat bek ahi keima ka patangno lai in,

⁴ka pa in hong hil hi. Ama in, “Ka ci theampo ciamtee in a, mangil ngei heak in. Kong sawl bangin ngamta in, tua hile na nungta tu hi.

⁵Ciimna le thuthuk mu theina kanh in! Kong cite sia mangil heak in a, awlmawk ngawlin om heak in.

⁶Ciimna taisan heak in; tua hile tuasia in nang hong hung tu hi; ama it in, tua in nang hong keamcing tu hi.

⁷Ciimna ngana sia na vawt thei sung pan a thupibel ahi hi. A dang theampo na nga tazong thuthuk muna ma kanh in.

⁸Ciimna thangai in, nang hong liansak tu hi. Ciimna pom in, minphatna hong pia tu hi.



- ⁹Ciimna in na minthanna lukhu ahi tu hi,” hong ci hi.
- ¹⁰Ka tapa awng, hong ngai tan. Kong son tute thupi laak in, tua hile khan sau in na nungta tu hi.
- ¹¹Ciimna le a maan lampi taw nuntakzia hong hil zo khi hi.
- ¹²Ciim takin kal na suan le bangma in na lampi hong khak ngawl tu a, na tai ciangin na lutu buatu hi.
- ¹³Na sinsate a tawntungin ciamtee in. Na sin pilna sia na nuntakna ahi hi — pha takin keamcing in.
- ¹⁴Mi ngilote paina ah pai heak in. Mi seksolte ngamtatna ettee in zui heak in.
- ¹⁵Tuabangin vawt heak in! Siatna pan kikeam in! Nial in a, na pai ngei bangin pai in.
- ¹⁶Mi seksolte sia a maan ngawl ngamtatna khat peuma a vawt bua uhle mutthip thei ngawl uh hi. Khat po a liamsua bua uhle amate mutthip thei ngawl uh hi.
- ¹⁷Seksolna le molngolna sia amate atu in an le tui bang ahi uh hi.
- ¹⁸Thutangte tot lampi sia sun dongin, a taang vaial nisuak tuung taw kibang hi.
- ¹⁹Mi seksolte lampi ahile zan bangin zing hi. Amate in liik ahihang bang tungah, lutu ziam ci in a mu thei bua uh hi.
- ²⁰Ka tapa awng, ka ci teng pha takin nadon in. Ka kammalte ngai in.
- ²¹Tuate in nangma taisansak heak in. Tuate ciamtee in a, na thinsung ah keam in.
- ²²Tuate in a tel theite tungah nuntakna le cidamna pia tu hi.
- ²³Na khua ngaisutna dan kidawm in; na nuntakzia sia na khua ngaisutna in zeam hi.
- ²⁴A maan ngawl peuma bangma son ngei heak in. Ngual theamna le leilot thu peuma zangh heak in.



²⁵Citak kimuanna taw maisang mitsuan in; maizumna taw kuun heak in.

²⁶Na sep po pha takin ngeal phot in, tua hile nasep theampo a maan suak tu hi.

²⁷Siatnate pial in a, tang takin mai sangah kalsuan in. A maan lampi panin kal khat zongh pial heak in.

Paunakte 5

Palngulna huvau Kidop natu

¹Ka tapa awng, hong nadon tan a, ka ciimna le thuthuk ka muna hong ngai tan.

²Tuaciang ngamtat luheakzia ahi tu bang na he tu a, na kammalte in heakna na nei hunlam hong lak tu hi.

³Pasal dang khat ii a zi muk sia khuaitui bangin thum tha tu a, ama ii hong tawpna in olive thau bang neal tu hi,

⁴ahihang a zawkciang tua nu in a sia a kha le natna bek hong nusiak hi.

⁵Ama in mithi khua hong zotpui tu hi; ama tot lampi in thina lampi hi.

⁶Ama in nuntakna lampi tungah a om bua hi; vakthapin bang teng piang ziam ci zongh a tel bua hi.

⁷Tu in hong ngai tavun, ka tapate awng, ka pau teng mangil ngei heak vun.

⁸Tuabang numei panin kikeam vun! Ama baangkua nai ngawngawn zongh neak tha heak vun!

⁹Na neak uhle, nidang na nei ngei kizataknate sia midangte in lua tu a, hesuakna sel mite khutsa taw na khanthi tu uh hi.

¹⁰Hi hi, khual mite in na hauna theampo la siat tu a, na thalaw sa theampo sia ngualdang khat atu hi tu hi.

¹¹Na thi natu lupmun tungah na tatau tu a, na sazang le na thangolte kinetum tu hi,



¹²tuasia ciang, “Banghangin he thei ngawl khi ziam? Banghangin khat po in teksak ngei ngawl ka na khi ziam?”

¹³Ka syate thu ka ngai bua a, amate ka thusim bua hi.

¹⁴Tuaciang thakhat thu in mipi mai ah maizum minsiat ka thuak sia keima le keima ka kihe hi,” na ci tu hi.

¹⁵Na zi tungah thumaan in a, na itna sia ama bekma pia in.

¹⁶Numei dang taw na nei na tate in bangma phattuumna hong pia ngawl tu hi.

¹⁷Nangma tate nangma hong hu tu in hong khang tu a, ngualdang a hu tu ahi bua hi.

¹⁸Tua ahikom na zi taw lungdam vun a, na teenpui nu taw thinnuamin om in—

¹⁹ama sia sazuk bangin ngaibaang in thuzawk huai hi. Ama ngaibannate taw na lungdamsak in; ama hong itna in nangma tuamsak in.

²⁰Ka tapa awng, banghangin na itna sia numei dang khat pia tu ni ziam? Banghangin ngualdang khat zi ii ngaibannate lungngul zaw tu ni ziam?

²¹Topa in na ngamtatna theampo hong mu hi. Na paina theampo ama in hong encik hi.

²²Mi seksol khat ii mawnate sia thaang khat ahi hi. Amate mama ii mawna ngeen sungah amate awk uh hi.

²³Amate in a pumpi ki uk zo ngawl ahikom thi uh hi. Amate mawmawt biingna in a thaankuul uh ah amate puak tu hi.

Paunakte 6

A tamzaw lai Kidop natu

¹Ka tapa awng, ngualdang khat ii leibatte vaipuak la tu in kamciamna vawt ngei ziam?



- ²Nangma kammal ma in hong man kik ngei a, nangma kamciam in thaang hong sia ngei ziam?
- ³Tua ahile ka tapa awng, nang sia tua mihing pa khut sungah om ni hi, ahihang hi sia vai taw na kipeal natu a manlang in ama va zuan tan a, hong maaf natu in hesuak ngen tan.
- ⁴Mumu in, tawlnga in om thawthong nawn heak in.
- ⁵Savaipa thaang panin vacim ahizong, sazuk ahizong a suatak bangin tua thaang panin pusuak in.
- ⁶Mihing dathamte in mitsate nuntakzia pan he thei taken.
- ⁷Amate in lampui ahizong, hausa, ukpi ahizong nei ngawl hi,
- ⁸ahihang amate in phalbi sung atu a kinginna in khal lai in an koikhol hi.
- ⁹Mihing datham pa in bangtan vei lupna tungah lum tu ziam? Bang hun ciang hong tho peetma tu ziam?
- ¹⁰Ama in, “Tawmvei mu zok tong, leekoai in tawmvei tawlnga sin tong” ci hi.
- ¹¹Ahihang a mut lanin zawinna in hiam toai ngualsuamte bangin ama sim tu hi.
- ¹²Mihing ngautak ngawl, mi seksolte in leilot thu sonin vakvai hi.
- ¹³Amate nang hong theam natu in a mit suukin a khut uh vik hi,
- ¹⁴tua sung theampo ah siatna taw kidim in a khel thinsung taw mun theampo ah nawngkaina piangsak tu in hol kawkoai hi.
- ¹⁵Hi thu hangin amate heak khol ngawlin lalna in amate vaat tu a, tuaciangin amate sia thi theina ciang dongin liam tu uh hi.
- ¹⁶⁻¹⁹Topa ii a etsat le a dual zawk ngawl thu nam sali om hi: Ki phatsakna maipuak, a theam thei leei, mawnei ngawlte a thatlum khut, seksol sawmin a ngaisun thinsung, siatna vawt tu a, a zuan ngang peangte, leilot thu khat zawkciang khat a son tetti, lawm le ngual sungah buaina pian natu a heltua pa cite ahi hi.

Palngulna huvau Kidop natu



- ²⁰Ka tapa awng, na pa hong sonte vawt in a, na nu hong hilte mangil ngei heak in.
- ²¹Amate ii kammalte phawk tawntungin a, na thin sungah kip takin ciamtee in.
- ²²Amate hong hilnate in khual na haw ciangin hong hu tu hi, zanin hong hung tu hi, tuaciang sunin ngaisutna pha hong pia tu hi.
- ²³Amate hong hilnate sia a taang khuavak hi; amate hong teknate in nuntakzia hong hil thei hi.
- ²⁴Tua hilnate in numei pha ngawlte kung panin hong keam tu hi; midangte zite ii zolna kammalte pan hong keam tu hi.
- ²⁵Amate meal phatna ip la heak in. Amate sikvil mit hana sungah awk heak in.
- ²⁶Pasal khat in anluum khat manh za taw pumpi zuak numei khat nga thei hi, ahihang palngul mawna in a neisa theampo bosak tu hi.
- ²⁷Na puan kaang ngawl hetin na awm ah meikuang na toai thei tu ziam?
- ²⁸Na peang kaang ngawl hetin meikam tungah na pai thei tu ziam?
- ²⁹Ngual zi a luppui sia tuabangza ma in lauhuai hi. Tuabang a ngamta theampo in ngimna thuk tu hi.
- ³⁰A ngilkial laitak a, an a ngu nguta khat sia mihingte in zawngsak ngawl hi;
- ³¹ahitazong ama a kiman le a see sali in liau tu hi — a neisa theampo a kawngkolh kul tu hi.
- ³²Ahihang palngul mawna a vawt mihing khat in ngaisut kaakna nei ngawl ahi hi. Ama le ama a kilalsua hi lel hi.
- ³³Ama a min kisiasak tu a, kivelpheang tu hi; a tawntungin maimawl tu hi.
- ³⁴Pasal khat in a zi a muan nawn ngawl ciang a thin uuk za sangin a thin uuk zawk hun om ngawl hi; ama thuk kikna in ciangtan nei ngawl hi.



³⁵Ama in liau sum bangma a saang bua tu hi; letsong bangza po in a tam ta zongin a thin uukna thai zo ngawl tu hi.

Paunakte 7

¹Ka tapa awng, ka paunate ciamtee in a, kong sawlte vawt tu mangil ngei heak in.

²Kong sawlte seam lete na nungta tu hi. Na mittangte na huuk bangin kong hilnate kidawm in zui in.

³Kong hilnate a tawntung keamcing in; na lungtang tungah at in.

⁴Ciimna sia na suapui nu bangin ngaisun in a, thuthuk muna sia na ngualtamh phabel bangin ngaisun in.

⁵Tuate in ngual zite panin nang hong keam tu hi, zolna kam pau thei numeite panin hong keam tu hi.

A paktat Numei

⁶Khatvei lai in ka khelki panin a pua sang khua ka et le

⁷bangma a khua he seam ngawl lai tangval tam mama ka mu hi, tuate sungah a mawmaw khat a tuamin ka ciamtee hi.

⁸Ama in numei khat ii teenna nai, lampi sia tawnin ama pai hi,

⁹tua hun sia nitak khuazin zawk ahi hi.

¹⁰Tuasia ciang tua nu in ama taw kisi hi; tua nu sia pumpi zuak numeite bangin kizeam a, tuaciang ama in niimna khat nei hi.

¹¹Ama sia ahang a maizum maw numei khat hi a, lampi ah vak tawntungin tua ahibuale

¹²lamkingh pan ngakin ding hi, khat vevei sia lampi ah, khat vevei le vanhzuakna phual ah ngakin om hi.

¹³Ama in tangvalpa ngawngkoai in tawp a, a mittang salhin,

¹⁴“Tuni in biakpiakna ka vawt a, sangaw biakpiakna pan sa zongh ka nei hi.



¹⁵Tua ahikom nangma zong tu in kong pusuak hi. Kong mu nop bangma in hi sungah na om hi!

¹⁶Ka lupna sia Egypt pan puanneal a pawl khat taw ka siin zo hi.

¹⁷Tua lupna sia myrrh, aloe le cinnamon thingnamtuite taw ka namtuisak zo hi.

¹⁸Hong pai tan! Zan khuateak in lumkhawm tawng. Khat le khat kikoai in nuamsa tawng.

¹⁹Ka pasal sia inn ah om ngawl hi. Khual khuala a haw laitak hi.

²⁰Ama in sum tam ma keng a, nipi nii sung hong cia ngawl tu hi,” ci hi.

²¹Tuabangin ama in tangvalpa sia ama thiamna taw zol a, numei ii kamthum kamzol in tangvalpa zo hi.

²²Thakhat thu in ama sia ngaw tu in a kipaipui khuital bangin numei nu taw pai a, thaang sungah a awk tu sazuk bangin kilawn in tai hi;

²³tua thaang sia thaltang ii a lungtang a vutlet natu mun hi. Ama sia ngen sungah a tum vacim bang hi a — ama nuntakna lauhuai ahi hunlam a he bua hi.

²⁴Tu in, ka tapate awng, hong ngai tavun. Ka pauna hong nadon tavun.

²⁵Tuabang numei khat in na thin zosak heak vun: ama nung zuizen heak vun.

²⁶Ama in pasal tam mamate ii lalna hi a, a kisim zo ngawl mihing tam mamate ii thina piangsak hi.

²⁷Ama inn ah na haw le mithi khua a zuazuan na hi hi. Tua in thi natu lamban khat ahi hi.

Paunakte 8

Ciimna kipok

¹Ngai vun! Ciimna in hong sam hi. Thu tuatna hong kijiil hi.

²Lampi hui mualbawkte le lamkaate ah ding hi.

³Khuapi sung tumna mun, kongpite hui ah ama in hi bang in au hi:



- ⁴“Mihingte awng, hong mangkaa khi hi; leitung ah a om theampo sam khi hi.
- ⁵Puicing ngawllai nu ziam? Puicin natu in kisin vun. Mawmaw nu ziam? Ngaisut theina na nei natu in sin vun.
- ⁶Ka kammal pha mamate hong ngai tavun; kong son theampo maan hi.
- ⁷Ka ci teng thumaan hi; leilot thu ngaimaw khi hi.
- ⁸Ka pau theampo thumaan hi; a maan ngawl ahibale lampui khialna bangma om ngawl hi.
- ⁹Thuthuk a mu thei mihing khat atu in thiang sitset hi; pha tak a, a kihil sa khat atu in tel ol hi.
- ¹⁰Ngun sangin kong lamlakna teal zaw vun; kham phabel sangin heakna teal zaw vun.
- ¹¹“Keima in Ciimna ka hi hi, suangmanphate sangin ka phazaw hi; na dei theampo, kei taw a kitee ngat thei bangma om ngawl hi.
- ¹²Keima in Ciimna ka hi hi, thuthuk mu theina ka nei hi; keima in heakna le thukhenna maan ka nei hi.
- ¹³Topa zatakna in a sia ngaimawkna ahi hi; ki phatsakna le kisaktheina, siatna lampite le a maan ngawl kammalte ka ngaimaw hi.
- ¹⁴Ngealnate ka nei a, tua bangin ka seam suak hi. Tel thiamna ka nei a, ka thahat hi.
- ¹⁵Kumpite ngamukna le ngamukte ii upadi phate a vawtna ah ka hu hi.
- ¹⁶Leitung ah ngam uk theampo in keima huna taw ngam uk hi, ngam uliante ahizong nam liante ahizong ka hu hi.
- ¹⁷Kei hong itte ka it hi; kei hong zong po in hong mu thei hi.
- ¹⁸Haunate le minphatna, nopsakna le zawna piak tu ka nei hi.
- ¹⁹Kei tung pan na ngate in kham phabel sangin phazaw a, ngun citak sangin phazaw hi.
- ²⁰Thutang lampi ka tawn hi; thukhaikim lamzinte ka zui a,



- ²¹kei hong itte hauna ka pia hi, a innte uh sum le paaite taw ka dimsak hi.
- ²²“Topa in a masa phit bel in kei hong bitphua a, khua ngeipi lai in a nasep phitbel ka hi hi.
- ²³A kipatciil tatak ma in kei hong kivawt hi, simlei a kipat maa in a masabel ka hi hi.
- ²⁴Tuipite a pian maa, ciktui te a om maa in ka piang zo hi.
- ²⁵Mualpite pian maa, mualnote a omna tu tek ah a kikoi maa in ka piang zo hi,
- ²⁶Pathian in leitung le a lote a vawt maa, ahibale leitangh masabel khutdim a vawt maa ngawngawnin ka piang zo hi.
- ²⁷Van sia a om natu mun ah ama ii koi hun lai, tuipi kantan in vanmong a phalh lai,
- ²⁸van ah meeikaaite a koi lai, tuipi tuinaakte a hon lai le,
- ²⁹tuipi tuite ama ii ciza sangin a saangzaw ngawl tu in thu a piak lai, leitung tawdapte a phaa lai in tua munah kei ka om zo hi.
- ³⁰Keima in ama kungah inn limsuaithiamte bangin ka om hi, kei sia nisimin ama ii lungnopna naak ka hi hi, tuaciang ama taw om sia nuam ka sa tawntung hi,
- ³¹simlei taw lungdam in mihing namte dik a sa pa ka hi hi.
- ³²“Tu in, khangmoite awng, hong ngai tavun. Ka ci bangin vawt vun, na lung uh dam tu hi.
- ³³No hong kihilte ngai vun. Ciim vun a; ngaingon heak vun.
- ³⁴Kei thu hong ngaipa in lungdam tu hi — Nisim in ka kongbiang ah om a, ka inn sung tumna pan hong ngak pa sia mihing lungdam ahi hi.
- ³⁵Kei hong mu pa in nuntakna mu a, tuaciang Topa in ama diksa tu hi.
- ³⁶Kei hong mu ngawl pa in ama le ama kiliamsua hi; a kuama po kei hong ensan sia in thina dei ahi hi.”



Paunakte 9

Ciimna le Mawmawtna

- ¹Ciimna in a inn sa a, khuam sali phut hi.
- ²Ama in poai vawt natu nganno khat ngosak in, sapittui sungah hel thei tuatuamte a hel zawkciang sabuai phaasak hi.
- ³Ama in a naseam numeite sam a, khuasung a saang belna mun pan hi bangin ausak hi;
- ⁴“Heakna nei ngawl mite awng, hong tum tavun!” Tuaciang mi mawmawte munah ama in;
- ⁵“Hong pai tavun a, ka an ne in, ka hel sa sapittui ne vun.
- ⁶Heakna nei ngawl mihingte taw kitholna nusia vun a, nungta vun. Heakna lampi zui in” ci hi.
- ⁷Mihing kisathei khat na hil na pau le hong lanna bek na thuk tu hi. Mihing tatsia khat na tei le thinnatna bekma na nga tu hi.
- ⁸A kisathei khat bangma hunin hilin pau heak in; ama in tua hu in nang hong ensan tu hi. Ahihang mihing ciim khat hilin pau lete ama in nang hong zakta tu hi.
- ⁹A ciimte khat ii tungah na ci pawpo in ama ciimsak seseam tu hi. A thutang khat ii tungah na son khat sia in ama ii heakna belap hi.
- ¹⁰Ciim natu in Topa na thasia maksak kul hi. A Thiangtho Pa na he le telthiamna nei na hi hi.
- ¹¹Ciimna in kum tam mama na khan hong sausak tu hi.
- ¹²Ciimna na nei le a hampaha tu sia in nangma na hi a, ciimna na nial le a thuk tu sia nangma na hi hi.
- ¹³Mawmawtna sia a au vazak, heakna nei ngawl, a maizum maw numei khat taw kibang hi.
- ¹⁴Ama in a kongbiang ah to a, ahibuale khuasung a saangbelna mun ah to in,



¹⁵amate nasep tek ngaisun a, hong papai mihingte tungah:

¹⁶“Hong tum tavun, heakna nei ngawl mihingte awng!” ci hi. A mawmawte mun ah:

¹⁷“A kingu tuidam in thum zaw hi. A kingu anluum in lim zaw hi” ci hi.

¹⁸Ama ii inn sungah a tumte thi a, a tum sate sia tu in mithi khua, a thukna ah a om hunlam tua numeinu ii a theam zawkte in a he bua uh hi.

Paunakte 10

Solomon ii Paunakte

¹Hite sia Solomon ii paunakte ahi hi: Tapa ciim in a pa angtangsak a; a mawmaw sia in a nu khuangaisak hi.

²Thumaan ngawl na taw na nga hauna in bangma phattuumna hong pia ngawl tu hi, ahihang thumaanna in na nuntakna hong ngum thei hi.

³Topa in mihing phate ngilkialsak ngawl tu hi; ahihang a seksolte sia amate deite a ngasak buatu hi.

⁴Dathamna in zawna piangsak tu a, ahizong nasep hatna in hong hausak tu hi.

⁵Mihing khua ngaisun thei khat in a hunlai in lo ante kaikhawm hi; anlaak hun sungteng mutna in mindaina hi.

⁶Mihing pha khat in thupha saang tu hi. Mihing seksol khat ii kammalte in a ngoltol pianzia phualseal hi.

⁷Mihing phate sia thupha saanna hi ci in kiciamtee tu hi, ahihang mihing seksolte sia kimangil pal tu hi.

⁸Mihing khua ngaisun theite in ngaisut pha piakna saang thei hi. Mawmawt kam a pau mite sia siatna sung theng tu hi.

⁹Thumaan mihingte thinmuang hiithiat a, ahizong thumaan ngawlte mat thuak tu hi.



- ¹⁰Thumaan thutak a im te in buaina piangsak a, ahizong phualseal ngawlin a son ngamte in kilem natu in naseam ahi uh hi.
- ¹¹Mihing pha khat ii kampaute in nuntakna tuinaak hi a, ahizong a seksol khat ii kammal in a ngoltol pianzia phualseal hi.
- ¹²Ki etsatna in buaina thawn a, ahizong itna in tatkhialna theampo maisak hi.
- ¹³Mihing a pilte in khiakna nei in pau a, ahizong a mawmawte daan piak kul hi.
- ¹⁴A ciimte in heakna a nga thei za in la a, ahizong mihing mawmawte hong pau ciang buaina taw kinai hi.
- ¹⁵Hauna in a haute hung a; zawinna in a zawngte susia hi.
- ¹⁶Nasep pha sepna thaman in nuntakna hi a, ahizong mawna in mawna dang tamzaw lai sung hong then hi.
- ¹⁷Kihil kipau ciangin a ngai mihingte nungta tu a, ahizong amate khialna a pualaak nuam ngawlte atu in lauhuai hi.
- ¹⁸Mihing khat ama ii etsatna a phualseal sia in leilot pa ahi hi. Thu nawnsan a kizelsak sia in mihing mawmaw ahi hi.
- ¹⁹Kam tam pau vaial lete mawna vawt vaial hi thei tha tu ni hi. Mihing ciim na hile pau ngawlin om khipkhep tu ni hi.
- ²⁰Mihing pha khat ii kammalte in ngun ciitak bang hi a, a seksol khat ii ngaisutnate in manh nei ngawl hi.
- ²¹Mihing pha khat ii kammalte in mihing tam mama phattuumna pia tu a, ahizong nangma le nangma sia mawmawtna taw na kithatlum thei tu hi.
- ²²Nang hong hausak sia in Topa ii thupha ahi hi. Nasep hanciamna in hong hauzawsak thei ngawl hi.
- ²³A maan ngawl sep diksakna sia mawmawtna hi. Mihing pilte in ciimna sungah nuamsa uh hi.



²⁴A thutangte in amate deite nga a, ahizong a seksolte in a kiitak bel teng nga tu hi.

²⁵Vuipi suangval hong pai in a seksolte seamkeak a, ahizong mihing thumaante a tawntung suakta hi.

²⁶Bangma hunin mihing datham pa khat in nang atu bangma seamsak ngei heak in; ama sia na ha le zuhau a kilem ngawl bang ahibale na mittang sungah meikhu bangin hong nuammawsak tu hi.

²⁷Topa thu ni lete na khansau zaw tu hi. Mihing seksolte sia thi hun ngawlin khanthi uh hi.

²⁸Mihing phate lametnate in thinnopna sung hong then a, ahizong mihing seksolte in mai sangah lamet tu bangma a nei thei bua uh hi.

²⁹Topa in thumaan mihingte sungsia hi; ahizong a ngamta khialte susia hi.

³⁰A thutang mite in ngammuanna nei tawntung tu a, ahizong mihing seksolte a ngam sungah a nungta buatu hi.

³¹A thutang mihingte in ciim kampau uh a, ahizong kamsia a pau leei sia kikhak tu hi.

³²A thutang mihingte in a dik thute pau tu he a, ahihang a seksolte in ngual thin nat natu bek pau nithi uh hi.

Paunakte 11

¹Topa in khaikhin maan ngawl a zanghte ensan hi. Toaisuang maante hangin ama lungdam hi.

²Mihing kphasak te hai ngawlin maimawl tu hi. Kiniamkhiakna sia ciimna hizaw hi.

³Mihing pha na hile thumaanna in lam hong lak hi. Mihing a muanhuai ngawlte sia amate thumaan ngawlina in susia hi.

⁴Na thi ni hong thet ciang haunate in bangma phattuumna hong pia zo ngawl tu hi, ahihang thumaanna in na nuntakna hong ngum thei hi.



- ⁵Thumaanna in mihing pha khat ii nuntakna olsak zaw hi, ahihang mihing seksol khat in ama puk natu ama mama in piangsak tu hi.
- ⁶Thutang hina in a thumaante suatak hi, ahihang a muanhuai ngawlte sia amate duhopna thaang sungah awk hi.
- ⁷Mihing seksol khat a thi ciangin ama lametna zongh ama taw thi khawm hi. Haunate sungah thinmuanna sia bangma ahi bua hi.
- ⁸A thutangte sia ngimna pan kidal hi; a seksolte tungah ngimna tung zaw hi.
- ⁹Mihing, pathian selte thu sonna in nang hong lalsak thei a, ahizong thutangte ciimna in nang hong hun thei hi.
- ¹⁰A thumaante in hamphatna a nei uh ciangin khuapi sungah lungdamna om a, a seksolte a thi uh ciang lungdamna aw nging hi.
- ¹¹A thutangte ii thupha a piak uh ciangin khuapi khat sia khua thupi suak hi; ahihang khuapi khat sia a seksolte kammalte taw kilalsak hi.
- ¹²Ngual zawnsak kampauna in mawmawtna hi. Khua ngaisun thei khat na hile na thim khipkhep tu hi.
- ¹³Thu nawnsan son khat sia thuku huvau ah kimuang thei ngawl hi, ahihang a muan taak khat sia na muang thei hi.
- ¹⁴Lampuina a nei ngawl minam khat sia puk tu hi. Ngaisutna a pia thei tam mama a om le ngammuanna om hi.
- ¹⁵Khualmi khat ii leiba losak tu in kamciam na pia le na khuangai tu hi. Kamkum bua lete nangma atu phazaw hi.
- ¹⁶A thuthiam numei khat kizakta a, ahizong ngamtat pha ngawl numei khat sia a minpaanna ahi hi. A datham mihing khat in sum a nei ngei buatu a, ahihang a phul zo khat in a hau tu hi.
- ¹⁷Na dik le nangma le nangma kiphatvawt na hi hi. na ngilo le nangma le nangma kiliamsua na hi bek hi.
- ¹⁸Mihing seksolte in a tatakin bangma meetna a nga bua hi, ahihang a maan in na ngamta le thaman hong kipia takpi tu hi.



- ¹⁹A maan a, ngamta tu khensatna a nei sia nungta tu hi, ahihang akua po ahizong a maan ngawl ngamtatna a vawt hamtang sia thi tu hi.
- ²⁰Topa in mihing thinsiate ngaimaw hi, ahizong a maan a ngamtate it hi.
- ²¹Mihing ngilote daan kipia tu ci sia a pealmaw hi, ahihang thutang mite ahile suakta tu hi.
- ²²Thu khensatna pha a nei ngawl numei khat ii meal phatna in vok naak ah kham naakbaa taw kibang hi.
- ²³Mihing phate ii deite sia phatna taw tawp tawntung hi; mihing seksolte ii a deite a nga uh ciang a kuama po thin uuk hi.
- ²⁴Mihing pawlkhat sia a sum uh zangh vapeak a hau vaial hi. A dangte sia kidawm in zangh hi napi zawng vaial hi.
- ²⁵Ngo vapeak vun, tua hile na nuamsa tu uh hi. Ngual hu vun, no zongh hong kihu tu hi.
- ²⁶A manh khan tu ngak a, antang a kholte sia mihingte in haamsiat hi, ahihang tua bang khol ngawlin a zuak paihte sia ngual in pok hi.
- ²⁷Na mungtupnate a pha le nang hong kizakta tu hi, ahihang ngimna na zong le tuasia ma na nga tu hi.
- ²⁸A hauna uh a suangte in tangngam lai a, thingteete bangin a pul tu uh hi, ahihang thutangte in khal lai a, thingteete bangin a khang tu uh hi.
- ²⁹Amate ii baangkuate sungah ngimna a piangsakte in a tawpna ah bangma a nei buatu uh hi. Mi mawmawte sia miciimte ii naseam a suak tawntung tu uh hi.
- ³⁰Thutang in nuntakna pia a, ahihang ngoltolna in nuntakna bosak hi.
- ³¹Mihing phate hi leitung ah thaman kipia ahiciang mihing seksolte le mimawte daan kipia tu hi ci sia na he hamtang tu hi.

Paunakte 12



- ¹A kuama po heakna a deite in a khial ciangin hil tu uuk hi. Kihil kipau tu dei ngawlina in mawmawtna hi.
- ²Topa in mihing phate tungah lungkim a, ahizong siatna a ngealte puavawk hi.
- ³Seksol tatsiatna in thinmuanna pia ngawl a, ahizong mihing thutangte in dinmun kip nei hi.
- ⁴Zi pha khat in a pasal ii angtna le lungnopna ahi hi; ahihang a pasal a maizumsak zi khat in a pasal ii ngu sungah cancer natna khat taw kibang ahi hi.
- ⁵A thumaan mihingte in a kilawm bangin hong vawt tu hi; mihing seksolte in theam tu bek hong sawm hi.
- ⁶Mihing seksolte ii kammalte in mihing thatlum thei a, ahihang a thutangte ii kammalte in tawna a thuakte suatak hi.
- ⁷Mihing seksolte in kiamsukin suan le paal nei ngawl a, ahihang thutangte ii baangkuate sia nungta paisuak hi.
- ⁸Na pil le, nang hong kipok tu hi; na mawmaw le nang hong kinomu tu hi.
- ⁹Milian khat bang kiheang in ngilkial a ih om sangin nuntak natu a thalaw mihing thawthong khat hi leang phazaw hi.
- ¹⁰Mihing pha khat in a ngannote pha takin en a, ahihang mihing seksolte in nganno tungah tatkha hi.
- ¹¹Nasep hanciam lotho mi khat in neak tu tam mama nei hi, ahihang kimanna om ngawl nasepnate taw hun bosakna in mawmawtna hi.
- ¹²Mihing seksolte uuk theampo sia, a sia vawt tu zonna ahi hi, ahihang thutangte a dinmun kho hi.
- ¹³Mihing seksolte khat in ama ii pauna taw thaang sungah awk hi, ahihang a thumaan khat in ama le ama ngimna pan kipusua hi.
- ¹⁴Na thaman sia na pauna le na sepna tung pan kituat tu hi; nang taw a kiphu bang na nga tu hi.



- ¹⁵Mihing mawmawte in amate le amate maan kisa tawntung hi. Mihing ciimte in ngaisut piakna ngai hi.
- ¹⁶A mawmaw khat in diksak ngawl na a nei ciang manlang takin kilanghsak hi. Mihing khua ngaisun theite in ngual ii lanna kam a awlmaw buatu hi.
- ¹⁷Thumaan na son ciangin thukhaikim khenna piang hi; ahihang leilotna in a kikkaikim ngawl thukhenna piangsak hi.
- ¹⁸Ngaisun phot ngawl a, pauna in namsau taw sat bangin thuk bunin liamsak thei hi, ahihang ciim kampauna in damsak thei hi.
- ¹⁹Leilot thu sia ngei kho ngawl a, thumaan thutak sia a tawntungin nungta hi.
- ²⁰Siatna a ngealte in muanmawk ngawl thusia khat tawk tu a, ahihang phatna a seamte in lungdamna nga tu hi.
- ²¹Thutang mite tungah a sia na khat zongh tung ngawl hi, ahihang a seksolte in ngimna sim ngawl bangma a nei bua uh hi.
- ²²Topa in leilot theite ensan hi, ahihang a kampau sa a kholette diksa hi.
- ²³Mihing khua ngaisun theite in a heak uh thute son vazai ngawl hi, ahihang mihing mawmawte in a heak ngawl na uh teng ma thangsak hi.
- ²⁴Nasep hamciamna in thahatna hong pia tu hi; na dathamna in sal hong sua tu hi.
- ²⁵Thin ngimna in lungdamna hong suddol thei hi, ahihang kamthiam in hong lungpilsak tu hi.
- ²⁶A thutang pa sia a lawm pa atu in lam hilpa hi tu a, ahihang a seksol khat ii lampi in amate lam pialpui hi.
- ²⁷Na da a tham le na zon sia na nga ngei buatu a, ahizong nasep na hanciam le hauna na nga tu hi.
- ²⁸Thutang hina in nuntakna lampi hi; seksolna sia thina lampi ahi hi.

Paunakte 13



- ¹Tapa ciim khat in a pa ii a hil a pau ciangin nadon a, ahihang a kisathei mihing khat in khial khi hi a ci ngei bua hi.
- ²Mihing phate sia amate pauna tung panin thaman kipia tu a, ahihang ngual theam theite sia andu ngilkial bangin molngol ngamtatna dei hi.
- ³Na pau po kidawm in a, na nuntakna huu in. Kidawm ngawlin a pau khat in ama le ama kisiatsua hi.
- ⁴A datham khat in na khat pawpo bangza a dei hangin a nga ngei buatu hi. Naseam hat khat in a dei po nga tu hi.
- ⁵Mihing thumaante in leilot thute ngaimaw hi, ahihang mihing seksolte ii kammal in maizum huai a, minpaan huai hi.
- ⁶Thutang hina in a maw ngawlte hung hi; seksolna in mawneite ii pukna hi.
- ⁷Mihing pawlkhat sia a hau bangin kiheang ahihang, bangma a nei bua uh hi. A dang pawlkhat sia a zawng bangin kiheang ahihang, nei le lamh a nei uh hi.
- ⁸Sumhau khat in a nuntakna a huuk natu in a sum a zak kul a, ahihang a zawng khat sia ama a tawng tu kuama a om bua hi.
- ⁹Thutangte sia khuavak taang kiukiau khat taw kibang hi; a seksolte sia meiinn a mit vangeu taw kibang hi.
- ¹⁰Kisak theina in ngim ngana simngawl bangma dang a piangsak bua hi. Ngaisutna ngetna in ciim zawkna hi.
- ¹¹Ol takin hauna na nga le na bosak pal tu hi. A haksa zaw in na thalaw le a tamzaw na nei tu hi.
- ¹²Lametna a bo ciang ngaisutna zongh lal a, ahihang na uukna khat a tangtun ciang thinnopna taw hong kidimsak hi.
- ¹³Ngaisutna phate na nial le ngimna a zong na hi hi; tuasia zui lete na ngammuang tu hi.
- ¹⁴A ciimte hong hilnate sia nuntakna ii tuinaak hi; tuate in launa sungah na om ciang hong suaktasak tu hi.



¹⁵Pilna in kithasiana piangsak a, ahihang a muanhuai ngawlte sia lalna lampi a tawn uh hi.

¹⁶Khua ngaisun thei mihingte in a ngamtat ma in ngaisun phot tawntung hi, ahihang mihing mawmawte in a heak ngawlna uh thangsak hi.

¹⁷A muan thamman ngawl kamtaite in ngimna piangsak hi, ahihang a muanhuaite in kilemna hong then hi.

¹⁸Kihilna a ni nuam ngawl po sia zawngin mindai tu hi. A kuama po kihil kipauna a ngai sia kizakta hi.

¹⁹Na dei po na nga tu sia bangza in pha ziam! Mihing mawmawte in siatna nusia nuam ngawl hi.

²⁰A ciimte taw na kithawl le na ciim tu hi. Mihing mawmawte taw na kipawl le na lal tu hi.

²¹Ngimna in mawneite mun theampo ah zuizen a, ahihang mihing thutangte thaman in na phate kipia tu hi.

²²Mihing pha khat in a tute atu hauna nusiak tu hi, ahihang mawneite hauna sia thutangte kung zuan tu hi.

²³A kitho ngawl lote in mizawngte atu, an tam mama piangsak thei hi, ahihang a maan in a ngamta ngawlte in mizawngte thaw tu khaktan hi.

²⁴Na tapa hilna in daan na pia buale ama a it ngawl na hi hi. Ama na it nale hil in.

²⁵Thutangte in a neak tu a kicing nei a, ahihang a seksolte sia a ngil uh kial tawntung hi.

Paunakte 14

¹Numeite ciimna taw innsung kipuua a, ahihang mawmawtna in tuate susia hi.

²Thumaan in, tua hile Topa thasiana lak ni hi; thumaan heak in, tua hile Topa na thasia ngawlna lak ni hi.

- ³A mawmaw kiphasakte kam tam pau hi; a ciimte ii kammal in amate huu hi.
- ⁴Lotho tu khuita a om buale na ansaal hawm tu a, ahihang tua khuitalte a om hu in na ansal sia antang taw kidim tu hi.
- ⁵A muan taak tetti khat in thutak son tawntung a, ahihang a muan thamman ngawl khat in leilot thu simngawl a dang a son bua hi.
- ⁶A ki nasiasak mihingte bangma hun a ciim thei ngei buatu hi, ahihang mihing pilvangte in olno takin tel thei hi.
- ⁷Mihing mawmawte kung pan kikeam in; amate in nang hong hil tu bangma a nei bua uh hi.
- ⁸Banghangin mihing pil khat sia ciim ziam? Banghangziam cile ama in a sep tu he hi. A nangh khat sia banghangin mawmaw ziam? Banghangziam cile ama in he siat kisa hi.
- ⁹Mihing mawmawte in mawna a vawt le zong phamaw sa ngawl hi, ahihang mihing phate in maw kimaisak tu dei hi.
- ¹⁰Na thinnopna sia nangma aituam hi; na thin natna zongh nangma aituam hi. Kuama in tuate nang taw hawm thei ngawl hi.
- ¹¹Mihing pha khat ii inn sia mihing ngilo khat ii inn a kisuksiat zawkciang zong kip lai tu hi.
- ¹²Lampi maan nasak khat in thina sung hong then thei hi.
- ¹³Nuina in heena seal thei hi. Lungdamna a bo zawkciang heena sia tua munah om tawntung hi.
- ¹⁴Mihing pha ngawlte in amate taw a kiphu bangin nga tu hi. Mihing phate in amate sepnate tung pan thaman nga tu hi.
- ¹⁵A mawmaw khat in na theampo um tu hi; khua ngaisun theite in a kalsuan natu kidawm hi.
- ¹⁶Mihing ciimte in ngim ngana pan a kikep thei natu kidawm hi, ahihang mihing mawmawte sia kidawm ngawlin ngamta memeang hi.



- ¹⁷A thinngem mihingte in a mawmawt huai nate seam hi; a ciim zawte in dai takin om hi.
- ¹⁸Heakna nei ngawlte in a mawmawtna taw a kiphu bang nga uh hi, ahihang a pilte tungah heakna sia thaman in kipia hi.
- ¹⁹Mihing ngilote in thutangte mai ah kiniamkhiak in kun a, maipha a zong tu hi.
- ²⁰Mizawng khat sia kuama in a dei bua hi, a innpaamte ngangawn in, a dei bua uh hi, ahihang a hau khat in lawm tam ma nei hi.
- ²¹Na lungdam nuam le a zawngte tungah dik in; mi khat po zawnsakna sia mawna ahi hi.
- ²²A pha na vawt le ngualdang ii muanna le zatakna na thalaw tu hi; a sia na vawt le a ngamta khial na hi hi.
- ²³Na na seam le nuntak natu na thalaw tu hi; thuson in na to thawthong le na zawng tu hi.
- ²⁴Mihing ciimte in hauna thaman saang a, ahihang a mawmawte sia amate ciim ngawlna panin kihe hi.
- ²⁵Tetti khat in thumaan a son ciangin ngual nuntakna huu hi; ama in leilot thu a son ciangin ngual leeheak ahi hi.
- ²⁶Topa thasiana in mihing khat le a innkuanpuite atu in kimuanna le ngammuanna pia hi.
- ²⁷Thina na pial nuam ziam? Topa thasiana in nuntakna tuinaak ahi hi.
- ²⁸Kumpipa khat ii letna sia mihing bangza uk ziam, ci thu taw kisai hi; a uk tu mihing a nei buale ama in bangma ahi bua hi.
- ²⁹Dai takin na om le nang sia a ciim na hi hi, ahihang na thin a ngeam le, bangza mawmaw ci a lak hi bek ni hi.
- ³⁰Thin nopna in pumpi cidamsak hi, ahihang eenna thin in cancer natna taw kibang hi.



³¹Mizawngte na nengcip le a vawt pa Pathian simmaw na hi hi; ahihang mizawngte tungah dikna in biakpiakna nam khat ahi hi.

³²Mihing seksolte in amate tatsiatnate taw amate le amate kiam suk natu piangsak hi, ahihang mihing phate sia amate takkhana in huu hi.

³³Ciimna sia mihing pilvangte ii ngaisutna theampo sungah om hi; a mawmawte in ciimna huvau bangma a he bua hi.

³⁴Thutang hina in minam lian khat suaksak hi; mawna in minam khat ii min daisak hi.

³⁵Kumpipate in nasep thiam uliante diksa uh a, ahihang nasep thiam ngawlte daan pia uh hi.

Paunakte 15

¹Awneam taw kizona in thin uukna thaisak a, ahihang aw tawlok in thinsosak hi.

²Mihing ciimte a pau uh ciang heakna deihuaisak a, ahihang mihing mawmawte in nawnsan thu son nuam sap uh hi.

³Topa in mun theampo ah bangteng piang ci in mu hi; na pha ih seam a, a sia ih seam zong ama in hong en nginge hi.

⁴Kamthiam in nuntakna piangsak a, ahihang ngitlo kampauna in na thin hong siasak hi.

⁵Na pa hong hilnate na awlmawk ngawl tu sia mawmawt huai hi; ama hilna paunate saan theina in ciimna ahi hi.

⁶A thutang mihingte in a hauna uh keamcing hi, ahihang mihing seksolte in hun haksa hong thet ciang a neisate bosua uh hi.

⁷Heakna sia mihing a ciimte in kizelsak a, mihing mawmawte ii kizelsak hi ngawl hi.

⁸Mihing phate thunget ciang Topa lungkim hi; ahihang mihing seksolte hong paipui sa ngaw biakpiaknate ensan hi.



⁹Topa in mihing ngilote ngamtatziate ensan hi, ahihang a maan a seamte it hi.

¹⁰A maan ngawl sep na nei le nasia takin daan hong kipia tu hi; kipuaphat tu na uuk buale na thi tu hi.

¹¹Mithi khua ngangawn in zongh, tua munah bang om ziam ci inTopa ii heak tu sia khaam thei ngawl hi; tua ahile bangbangin mihingte in amate khua ngaisutna sia Pathian mai ah seal thei tu ziam?

¹²A kisathei mihingte in kipau kihil tu a uuk bua uh hi; a ciim zawte tung panin ngaisutna a ngen ngei bua hi.

¹³Mihingte sia a lungdam uh ciangin maitui uh a, ahihang a hee uh ciangin thinkiamna maipuak nei hi.

¹⁴Mihing pilvangte in he thua nuam hi, ahizong a nanghte in heak ngawl na taw lungkim uh hi.

¹⁵Mizawng khat ii nuntakna sia thasaan in dian tawntungna hi a, ahihang mihing lungdamte in a nuntak nuamsa tawntung uh hi.

¹⁶Hau a ngim nga tu sangin, zawng a Topa kiitakna in phazaw hi.

¹⁷Ki etsatna a omna munah salim bel neak sangin na it mihingte taw antee neak khop sia phazaw hi.

¹⁸Thinngemna in kam kinialna piangsak a, ahihang thinsauna in kilemna hong then hi.

¹⁹Na da a tham le mun theampo ah haksatna na thuak tu a, ahihang na thumaan le ngim na nga buatu hi.

²⁰Ta ciimte in a pate lungdamsak hi. A mawmawte bek in a nute maimawlsak hi.

²¹Mihing nanghte in a mawmawtna taw lungdam uh hi, ahihang a ciimte in a maan sia bek seam tu hi.

²²Ngaisut piakna na nga thei theampo la lete zawna na nga tu hi; tua ngawl taw zawna na nga buatu hi.



²³A hun taw a kilawm a kiphu tu kammal zak thei sia bangza in thinnopna om ziam!

²⁴Mihing ciimte in nuntakna lampi ah paito uh a, thina lampi a tawnsuk bua uh hi.

²⁵A ksathei mite ii baangkua sia Topa in susia tu a, ahihang ama in meingong khat ii neisa sia a huu tu hi.

²⁶Topa in ngitlo ngaisutnate ngaimaw hi; ahihang ama in kamthiamte diksa hi.

²⁷Thumaan ngawlin meetna nga tu na sawm le na innkuan in ngimna sung na theng tu hi. Sumnguk ne heak in tua hile na khan sauzaw tu hi.

²⁸Mihing phate in ngual kam a zo maa in ngaisun masa uh hi. Mihing ngilote in manlang takin zo kik a, ahihang buaina piangsak hi.

²⁹Mihing phate thu a nget ciang Topa in ngai hi, ahihang ama in a ngilote a awlmawk bua hi.

³⁰A maitaite in nang hong lungdamsak hi, tuaciang lungdamhuai thute in na thin hong nuamzawsak hi.

³¹Nang hong kihil hong kipau ciangin na nadon le a ciim na hi hi.

³²Heak nopna na nei buale nangma le nangma kisiatvawt na hi hi. Kipau kitekna na saang thei le na ciim seseam tu hi.

³³Topa thasiana in pilna heakna khat ahi hi. Patoaina na saan thei maa in na kiniamkhiak masak kul tu hi.

Paunakte 16

¹Eite in tupna sawmna vawt ka leang Pathian deina bang bekin tangtung hi.

²Na sep na vawt theampo maan hi ci in ngaisun tha tu ni hi, ahihang Topa in na tupna laingil tungah thu hong khen hi.

³Na ngealnate Topa in thupha hong piak natu in ngen in, tua hile na sep tak ciang zawna taw, maa na tun tu hi.



- ⁴Topa vawt sa khatsim in a tawp natu khat tek om hi; a seksolte tawp natu sia lalna ahi hi.
- ⁵A kisathei pawpo Topa in ensan hi; ama in amate daan thuak natu panin a suaktasak buatu hi.
- ⁶Thumaan vun a, citak vun, Pathian in na mawna hong maisak tu hi. Topa thuni vun, thusia bangma na tungah hong tung ngawl tu hi.
- ⁷Topa na lungkimsak ciangin na ngalte zongh lawm le ngual na suaksak thei tu hi.
- ⁸Thumaan ngawl na taw sum tam mama nga sangin thumaan takin thalaw vateeina taw sum tawmno khat nei sia phazaw hi.
- ⁹Nangma in ngealna vawt thei tu na hihang Pathian in na ngamtatnate hong heak hi.
- ¹⁰Kumpipa in Pathian ii thuneisakna taw pau hi; ama thukhennate sia maan tawntung hi.
- ¹¹Topa in khaikhin toaisuangte le vanhteena a maan tu dei a, vanhzuak theampo a kilawm in zuak tu dei hi.
- ¹²Kumpipate in ngitlona dual zo ngawl hi, banghangziam cile a khaikim thukhenna in kumpi khat thahatsak hi.
- ¹³Kumpipa khat in thumaan thutak za nuam a, thumaan a sonte ama in maipha pia tu hi.
- ¹⁴Mihing ciim khat in kumpipa lungdam in a om thei natu hanciam tu hi; kumpipa a thin a uuk le khat po in thi law thei hi.
- ¹⁵Kumpipa ii maipha piakte sia khuakhal kipat hun a, ngua zusak meeikaaite bang ahi hi. Tua sungah nuntakna om hi.
- ¹⁶Kham le ngun sangin ciimna le heakna phazaw hi — phazaw pek hi.
- ¹⁷Miphate in siatna a pial lampi tawn in khualhaw hi; tua ahikom na pai natu en in kidawm tan — tua in na nuntakna hong hun thei tu hi.



- ¹⁸Ki phatsakna in siatna sungah hong then a, kisaktheina in kiamsukna sung hong then hi.
- ¹⁹A kisathei khat hi a, tuaciang a pawlte ii a sutol vanh hawmte ih nga sangin, kiniamkhiak a zawngin om leang phazaw hi.
- ²⁰Nang hong kihilnate nadon in tua hile zawna na nga tu hi; Topamuang lete na lungdam tu hi.
- ²¹A ciim a puicing mihing khat sia ama ii tel theina a neina pan kihe hi. Ama sia kamthum pau vaial a, ngual huai vaial hi.
- ²²A ciimte atu in ciimna sia nuntakna tuinaak ahi hi, ahihang mihing mawmawte pilsak tu hanciamna sia hun bo thawthong hi.
- ²³Mihing pilvangte in a pau ma in ngaisun khol uh hi; tuasia ciang amate pauna sia ngual zaak nop suak seseam hi.
- ²⁴Kamthiam paunate sia khuaitui bang hi a, thum in, cidam natu pha hi.
- ²⁵A maan lampi hi ci in na up sia in thina sung hong then thei hi.
- ²⁶Naham seam khat ii an kamlimna in a nasep hatsak zaw lai hi, banghangziam cile ama in a ngilvasak nuam hi.
- ²⁷Mihing ngilote in ngualdangte ngim nga natu in lam zong uh hi; amate kammalte mama ngitlona taw kuang hi.
- ²⁸Ngual ngensiatna sia mihing seksolte in kizelsak hi; amate in buaina pian natu in hol a ngualtamh hina zongh khentham hi.
- ²⁹A molngol mihingte in a lawmte theamin lalna sungah tumpui hi.
- ³⁰Nang hong maitui a hong mitsukte kidawm in; amate in a sia pawlkhat ngaisun zo hi.
- ³¹Khansauna sia a thutangte ii thaman ahi hi; puakkaanna in minthanna kumpi lukhu ahi hi.
- ³²Thahatna sangin thinsauna phazaw hi. Khuapi teng bup na uk siat sangin nangma le nangma na ki uk zawk tu sia phazaw hi.



³³Mihingte in Pathian deina a heak natu in aisaan uh a, ahizong a zokikna sia Pathian ma ii khensatna bang ahi hi.

Paunakte 17

¹Thinngimna taw kidim inn khat sung anneakpoai ah anneak sangin anluum ko bekkhat thinnuam a, neak sia phazaw hi.

²A pilvang naseam khat in a mannung ngawl a Topa ii tapa tungah thunei tu a, a ngamh sung pan khen khat lua tu hi.

³Kham le ngun sia mei taw hal in kisit hi, Topa in mihing khat ii thinsung sit hi.

⁴Mihing ngilote in ngitlo ngaisutnate diksa a, leilot theite in leilot thu diksa hi.

⁵Mihing zawngte na nuisan le, amate a vawt Pathian a selno na hi hi. Midang khat ii kaamsiatna tungtang ah diksa in na om le daan na thuak tu hi.

⁶Patangnote in a pate huvau in a angtan uh bangin pasal haamte in a tute huvau in angtang uh hi.

⁷Ngual ii zatakte in leilot thu son ngawl hi, tuaciang mihing mawmawte in a manhnei thuson tu bangma he ngawl hi.

⁸Mihing pawlkhat in sumnguk piakna sia mitbum bang hi thei tu in ngaisun uh hi; amate in sumnguk piakna taw na theampo seam thei tu in um hi.

⁹Mihingte ii hong it tu na nuam uh le no tung hong khial ciangin maisak vun. Tatkhialnate teptena in ngualtamh hina khentham thei hi.

¹⁰A mawmaw khat sia zakhat vei saatna taw a heak tu sangin, a pilvang khat in khat vei teina taw tam zaw he thei hi.

¹¹Buaina a piangsak tawntung mihing seksolte kungah thina sia kamtai ngilo khat bangin hong pai tu hi.

¹²A mawmawt huai tupna taw a komla mihing mawmaw pawlkhat taw kimu tu sangin, a note a kimatsak vompui khat taw kisi leang phazaw hi.



- ¹³Thupha khat sia thusia taw na thuk le na baangkua sungah siatna a veng ngei buatu hi.
- ¹⁴Kam kinial kipatna in tuicimna phung pan tuikee kipat bang hi; a nasiat maa in tawp vun.
- ¹⁵A maw ngawl khat mawsakna ahizong mi seksol khat tha thongna ahizong Topa atu in ngaimawkhuai khawm hi.
- ¹⁶Mihing mawmaw khat ii tungah pilna sin natu sum bosakna in phat tuamna om ngawl hi, banghangziam cile ama in pianpui khentel theina nei ngawl hi.
- ¹⁷Ngualtamhte in a ki itna kilak tawntung uh hi. Ngimna thuak khawm tek tu ih hi buale unau khat ih hi manh bang om ziam?
- ¹⁸Khua ngaisun ngawl te bekma in ngual leiba losak tu in kamciam tu hi.
- ¹⁹Mawna a lamnai sia in ngimna vawt a lamnai ahi hi. A tawntungin na kisuangtaak le ngimna a zawzong na hi hi.
- ²⁰A sia vive ngaisun a, a paute in a pha mu tu lamet thei om ngawl a — siatna bek mu tu hi.
- ²¹Mawmawthuai nasepte a seam tate ii nu le pa atu in heena le khuangaina simngawl a dang bangma a om bua hi.
- ²²Maituina in na ci hong damsak hi. Mainuu in om tawntungna in vuitat zok ngawl thina ahi hi.
- ²³A maan ngawl thukhen maangte in sumnguk ne ku hi, tuasia ciang a khaikim thukhenna kivawt nawn ngawl hi.
- ²⁴Mihing pilvang khat in a ciim ngamtat tu tum hi, ahihang a mawmaw khat in mun tuatuam ah pai tu kipan hi.
- ²⁵Ta mawmawte in a pate atu in heena le a nute atu in thinnat khuangaina piangsak hi.
- ²⁶A maw ngawl khat liau piak tu sia maan ngawl hi; mihing phate daan a khak ciangin thukhaikim khenna lampialsak hi.



²⁷Ama le ama a kimuang khat sia pau tawntung ngawl hi. A om hithiat mihingte sia thuthuk tatak muna nei hi.

²⁸A tawpna ah, mihing mawmaw khat ngangawn zongh pau bua hen a, a kam im in om le a ciim a pilvang ma kisa thei hi.

Paunakte 18

¹Ngual taw a kituiton thei ngawl mihingte sia amate bek a kikinte ahi hi; midangte ii maan hi ci in a heakte a thukim pui buatu hi.

²Mihing mawmaw khat in na khat a tel le a tel ngawl sia phamaw a sa bua hi; ama ii uuk sia ama bangza in pil khi ziam, ci in a lak nuam hi bek hi.

³Mawna le maizumna tonkhawm hi; na zaktakhuaina taan lete a luangin zawnsakna na nga tu hi.

⁴Mihing khat ii kammalte in ciimna ii naak, tuipi bangin a thuk le a thiang luamtui luang bang hi thei hi.

⁵A mawte angvan a, a maw ngawlte tungah a kikhaikim in thukhen ngawlna sia maan ngawl hi.

⁶A mawmaw khat po in kam kinialna a phuang le, ngual ii vel tu a zong ahi hi.

⁷A mawmaw khat a pau ciangin ama le ama kilalsak hi a; ama kampauna taw thaang sungah ki awksak hi.

⁸Ngual ngensiatna sia lim mama a, bangza in kivalh suk nuam ziam!

⁹A datham mihing khat sia ngual a lalsak thei khat za in sia hi.

¹⁰Topa sia, tausaang kho taw kibang a, thutangte in zuanin ngammuanna nga thei hi.

¹¹Mihaute ahile amate hauna in, a saang a kho khuapi luphungte bangin, amate dal hi ci in ngaisun hi.

¹²A kiniamkhiak ngawlte kuama in a zakta bua hi; mihing a kisatheite sia lalna lampi zuan ahi hi.



¹³Ngual kam na zo maa in ngai masa in. Tuabangin na hi buale nang sia mawmaw a, ngual a thusim ngawl na suak hi.

¹⁴Na nat ciangin nuntak nopna thin in nang hong luhaisak thei hi, ahihang tuasia na bosua tha le na lamet khakbel sia bo hi.

¹⁵Mihing pilvangte in lawp tawntung a, pilna sin tu kinginsa in om uh hi.

¹⁶Mihing thupi khat taw na kisi nuam ziam? Letsong khat puak lete ol takin na kisi thei tu hi.

¹⁷Thukhenzum sungah, a pau phitbel pa sia a langkhat pa ii thu a dok mateng a maan son bang hi tawntung hi.

¹⁸Thukhenzum sungah a thahat mihing nii sia thu nei in a kilangpan tan le mee sawksak in thu saatsat thei hi.

¹⁹Na mealheakte hu lete amate in khuapi luphung kho khat bangin nang hong dal tu hi, ahihang amate taw na kihau le a innkha uh hong khasan tu hi.

²⁰Na ci pawpo taw kizui in thupiangte na nuntakpui kul tu hi.

²¹Na kampauna in nuntakna hong keam thei a, tua ahibuale zong hong lalsak thei hi; tua ahikom na kammal tung pan a piang thute lungkimin na thuak kul hi.

²²Zi khat na nei ciang na pha khat mu na hi hi; tuasia in nang tungah Topa pha hi ci in hong lak hi.

²³Mizawng khat in a pau ciangin kamthiam a zak kul hi, ahihang mihau khat in ngual kam a zo ciangin kamkhalh zangh hi.

²⁴Ki ngualtamh hina pawlkhat sia kho ngawl hi, ahihang ngualtamh pawlkhatte ahile suapui laipeete sangin thumaan zaw hi.

Paunakte 19

¹A leilot thei a mawmaw khat hi tu sangin, zawng napi a thumaan khat ih hi tu phazaw hi.



²Heakna om ngawl thalawpna in pha ngawl hi; a ngakla thinsung in ngimna sungah nangma hong then tu hi.

³Mihing pawlkhatte in amate ii mawmawt ngamtatnate taw kilal sua a, tuasia ciang Topa mawsiat uh hi.

⁴Mihaute in ngualtamh thakte mu tawntung hi, ahihang a zawngte in ngualtamh tawmno a nei sun teng keam zo ngawl hi.

⁵Thukhenzum sungah leilot thu na son le daan na thuak tu hi — suatakna a om buatu hi.

⁶Mihing thupite ii maipha a nga tu in a kuama po hanciam uh hi; a kuama po in phattuumna a pia theite ii ngualtamh ka hi uh ci tek hi.

⁷Mizawng khat ii a mealheakte ngangawn sia ama in konlaw thei ngawl hi, ama ii ngualtamh a nei ngawl sia lamdang ngawl hi. Bangza in hanciam kale ama in kuama a nga zo bua hi.

⁸Nangma le nangma kiphatvawt in a, na sin thei theampo sin in; tuaciang na sin sa teng ciamtee in, tua hile na khangto tu hi.

⁹Thukhenzum sungah leilot thu a sonte peuma daan piakna pan suakta ngawl tu hi; ama a lal ahi hi.

¹⁰A mawmawte a nuam leilam in nungta heak hen a, salte in lianzaw tate uk heak hen.

¹¹Khua ngaisun thei khat na hile na thin tomna na uk zo tu hi. Nang tung hong taa khial khat a om ciang awlmawk ngawlin om theina in phatna lian khat ahi hi.

¹²Kumpipa ii thin uukna in tawpi hawk bang ahi hi. Ahihang ama ii phatvawtna sia ih dei laitak a zu nguatui bang ahi hi.

¹³A mawmaw tate in a nu le a pate lalna sung then thei hi. A nawnsan zi sia mal khakhat in a taak vakek tui taw kibang hi.

¹⁴Mihing khat in a nu le a pa tung panin inn le sumte lua thei a, ahihang Topa bek in khua ngaisun thei zi khat pia thei hi.

- ¹⁵Na datham nuam le datham in; mumu lel in, ahihang ngilkial in na om tu hi.
- ¹⁶Pathian thukhamte tang in, na khan sauzaw tu hi; na thusim buale na thi tu hi.
- ¹⁷A zawngte tungah na piak ciangin Topa tungah pukthaak na hi a,Topa in hong lo kik tu hi.
- ¹⁸Na tate heak thei natu in a khan moi laitak ma in tek in. Tuabangin na vawt buale amate le amate a kilalsua natu in a huhu na hi hi.
- ¹⁹Mihing khat a thin a ngam le ama in a piang thute thuaksak in. Ngim nga natu panin khatvei na hun ngei le na hut kik kul tu hi.
- ²⁰Ngaisut piakna ngai in heakna sin tu na lungngul le ni khat ni ciang na ciim tu hi.
- ²¹Mihingte in na namcin ngeal thei hi, ahihang Topa deina bang bekin piang tu hi.
- ²²Duhopna in min paanna hi; mizawngte in a leilot theite sangin phazaw lai hi.
- ²³Topa thu ni in na om le khansau in na nungta tu hi, lungkim in siatna pan suakta in na om tu hi.
- ²⁴Mihing pawlkhatte a kam sungah an zongh kibak naap ngawl za dongin datham mama hi.
- ²⁵Kisaktheina sangin a phazaw ngamtatna a he ngawlte ii a heak thei natu in, kisaktheinate sia daan kipia tu hi. Na ciim le nang tungah hong kipau hong kihil ciangin na tel tu hi.
- ²⁶A maizumhuai, a minpaan pa bek in a pa siatvawt tu a, ahibale a inn panin a nu not tu hi.
- ²⁷Tapa awng, pilna sinna na tawp le na heak sate zongh hai ngawlin na ngaingon tu hi.



²⁸Tetti khat in mihing khat pawpo supna baina pia nuamin a khensat zawkciang thumaan thukhenna om thei nawn ngawl hi. A seksol mihingte in a sia nate sin tu lamnai hi.

²⁹A kihisak a mawmaw khat in velna vuakna nga tatak tu hi.

Paunakte 20

¹Zu tamlei neakna in aw saangsak a, hong mawmawsak hi. Zu khamna sia ngoaihuai hi.

²Hong ngalh tawpi khat na kiitak tu bangin a thin uuk kumpipa khat kiita in; ama thin uuksakna in eima le eima kithalupna hi.

³Kam kinialnate sia a mawmaw khat po in pan thei hi; tuate panin kikepna in a zatak huai ngamtatna ahi hi.

⁴A hun lai in lo thaw tu a datham mama lotho pa khat in anlaak tu a nei buatu hi.

⁵Mihing khat ii khua ngaisutnate sia, tuikhuk thuk sung a tui bang ahi hi, ahihang thuthuk mu thei khat in tua tui toai thei hi.

⁶Mihing theampo in amate sia bangza thumaanin citak ziam ci thu son thei tek hi, ahihang tuabang ahi takpi mihing sia zazon in om tu hi!

⁷A pa uh thumaan a, a maan nasep a seam le, a tate sia hampaha uh hi.

⁸Kumpipa in thukhenna ah to a, a sia a mu ciang khentel hi.

⁹Khat pawpo in ama thinsung thiangtho a, mawna taw kipeal zo ing a ci thei takpi tu ziam?

¹⁰Topa in a maan ngawl khaikhin toaisuangte le vanh teena a zangh mihingte ensan hi.

¹¹Patangnote zongh amate ii sep le vawt taw amate sia bang ziam ci in lak hi; amate thumaan ziam, pha ziam na son thei tu hi.

¹²Topa in khua mu thei natu mittangte le khua zaak thei natu bilte hong pia hi.



- ¹³Na hunte mumutna in na zangh le na zawng tu hi; komla in, tua hile neak tu tam mama na nei tu hi.
- ¹⁴Vanh lei thei khat in a manham lei hi ci in phun ahihang, a manh a nee zawkna taw a nga sia kiphatsak pui hi.
- ¹⁵Na son sia bangziam ci in na he le, kham le suangmanpha te sangin a manpha zaw na khat a nei na hi hi.
- ¹⁶Khual mi khat ii leiba teng losak tu in kamciam a pia mi mawmaw khat sia ama neisate laaksakin a lo dong vaukhamna in koisak khol kul hi.
- ¹⁷Thumaan ngawl na taw na nga nate sia an limbel neak bangin diksa tha tu ni hi, ahihang hai ngawlin hun khat ciang, tuate in kamdim senvui baak bang hi tu hi.
- ¹⁸Ngaisut piakna pha saang in, zawna na nga tu hi; ngalsimna sungah ngealna om ngawlin ngaldel mang thawthong heak in.
- ¹⁹Ngualngen khat in thuku a keam thei ngei buatu hi. Mihing a kam tamleite kung pan kikeam in.
- ²⁰Na nu le na pa na tomlaw le na nuntakna sia khuazing sungah meinn mit bangin bo tu hi.
- ²¹Hauna ol vaial in na nga le nang atu pha ngawl vaial tu hi.
- ²²Ngual ii hong khialnate nangma thuk kik tu in ngaisun heak in. Topa muang in, ama in a maan in seam tu hi.
- ²³Topa in a maan ngawl khaikhin le toaisuang a zangh mihingte ensan hi.
- ²⁴Topa in ih tot tu lampi khensat zo hi; tua ahile bangbang in khat pawpo in ama nuntakna ii zotna sang a tel thei tu ziam?
- ²⁵Pathian tungah piak tu kamciam na vawt maa in, pha tak ngaisun phot in. A zawkciang khuangai tha tu ni hi.
- ²⁶A ciim kumpipa khat in akua in a maan ngawl seam ziam ci in he tu a, tua pa hesuak ngawlin daan pia tu hi.



²⁷Topa in khua ngaisut theina le a pha a sia heak theina hong pia hi; eima le eima ih kiphualseal zo bua hi.

²⁸Kumpipa khat sia, ama ukna in thumaan, thukhaikim le a kilawm bangin a sep laiteng a ukna kip tu hi.

²⁹Khangnote ii thahatna thupi ih sa a, khanghaamte puakkaang ih zakta hi.

³⁰Khat vevei thuakna haksa khat in, ih nuntakzia hong khealsak hi.

Paunakte 21

¹Topa in luitui luanna lam ol takin a heak bangin kumpipa khat ii ngaisutna uk hi.

²Na sep na vawt theampo maan sa tha tu ni hi; ahihang Topa in na tupna laingilte tungah thukhen hi ci in ciamtee in..

³A maan le ahi tu bangin seam in; tua in sangaw biakpiakna sanginTopa lungdamsak zaw hi.

⁴Mihing seksolte sia amate ii a kihisakna le a kisaktheina in uk hi, tuaciang hisia in mawna ahi hi.

⁵Pha takpi ngeal in, tam mama na nei tu hi; na lawplai lei le a kicing na nei ngei buatu hi.

⁶Thumaan ngawl na taw na nga hauna bo pal tu a, ahihang thina thaang sung hong tumpui maa in bo ngawl tu hi.

⁷Mihing seksolte sia amate ii molngol tatna taw lal uh a, amate in a maan sep tu nial uh hi.

⁸Mimawte in lampi koai tawn uh hi; a maw ngawlte in a maan seam hi.

⁹A nge hat zi khat taw inn khat sung tenkhop sangin innkhum tungah teang leang phazaw hi.

¹⁰Mi seksolte in ngilkial andu bangin siatna vawt nuam hi; amate in kuama tungah hesuakna nei ngawl hi.



- ¹¹A kihisak khat in daan a khak ciangin khua ngaisun meal ngawl khat ngawngawn in pil law hi. A ciim khat in ama a kihilna tung panin pilna nga tu hi.
- ¹²Thumaan thutang ahi Pathian in, mihing seksolte inn sungah bang piang ziam ci in he a, a seksolte siatcipsak tu hi.
- ¹³Mizawngte auna aw ngai tu na nial le, hu tu dei a, nangma hu ngetna aw hong kizaaksak ngawl tu hi.
- ¹⁴Mihing khat po in nang tungah hong thin uuk le letsong khat piak ku na taw ama thim tu hi.
- ¹⁵Thukhaikm khenna a m ciang, ciangin mihing phate lungdam uh hi. Ahihang mihing ngilote thinkiamsak hi.
- ¹⁶A kilawm ngamtatna pan, a puapial pawpo thina in ngak nginge h i.
- ¹⁷A nuam leilam nuntaknate, sapittui le anlim neak lei nate in nang hong hausak ngei ngawl tu hi.
- ¹⁸Mihing seksolte in mihing phate thuaksak tu a hanciam ngimna teng, amate tung ma ah tuu kik hi.
- ¹⁹A ngenge, a phuphun zi khat taw teenkhop sangin senneal ngam sungah teang leang phazaw hi.
- ²⁰Mihing ciimte in hauna le nopsakna taw nungta uh hi, ahihang mihing mawmawte in sum a nga pawpo a manlang thei zaza in zangh uh hi.
- ²¹Dik in a, thumaan in, tua hile khan sau in na nungta tu hi; ngual dangte in hong zakta tu a, ahi tu bangin hong phatvawt tu hi.
- ²²A pil a thiam ngalkapmaang khat in mihing thahatte ii a cin khuapi khat sia la zo hi, tuaciangin amate ii muan khuapi luphungte susia hi.
- ²³Buaina taw na kipeal nuam le, na kampau kidawm in.
- ²⁴A kihisak mihing khat hong lak tan, tua hile a kisathei, a kiphasak le ngual atu a ngaisun ngawl mihing khat kong lak tu hi.



- ²⁵Nasep tu a nial mihing datham khat in ama le ama kithat hi bek hi;
- ²⁶a dei teng a nga natu a ngaisut sia ama nasep hi bek hi. Thumaan thutang khat ahile pia thei a, ngo takin pia hi.
- ²⁷Mihing seksolte ii sangaw biakna a piak ciang, a tuanin ngitlo thin taw a pia le Topa in huatsa hi.
- ²⁸A leilot khat ii tetti panna sia ki um ngawl hi, ahihang thu a ngaisun kaak mihing khat ii kammal sia kisaang hi.
- ²⁹Thumaan thutang mihingte in amate le amate kimuang uh hi; a seksol mihingte in a thiam thei za in a kivawttawm uh kul hi.
- ³⁰Mihingte ciimna pilna, kivakna le thuthuk muna cite sia — Topain nang hong langpan le, tuate in kimanna nei ngawl hi.
- ³¹Ngalsim natu in siphute na kinging khol sak thei hi. Ahihang ngal zawna hong pia pa in Topa ahi hi.

Paunakte 22

- ¹Minphatna le hau mamana khat sasang teal tu hi le uh te minphatna teal vun.
- ²A haute le a zawngte in hi sia nei khawm hi: Topa in amate nii a vawtkhop ahi hi.
- ³Mihing khua ngaisun theite in ngimna hong pai ciangin mu thei a pial uh hi, ahihang khua ngaisun meal ngawl khat sia tua sungah tum vacin tu a, a zawkciang kisiik tu hi.
- ⁴Topa thuni vun a, kiniamkhiak vun, tua hile hauna, patoaina le khan sauna na nga tu hi.
- ⁵Na nuntakna na it le, lamdung ah a kisia mihing seksolte matna thaangte na pial vun.
- ⁶Patang khat ii a nuntakzia tu na hil vun, tua hile a khan tawntung in ciamtee tu hi.



⁷Mizawngte in sumhaute ii sal ahi uh hi. Sum na pu le leeiTopa ii sal na suak hi.

⁸Thukhaikim ahi ngawl thaici na tu uhle siatna hong po to tu hi, tuaciang ngual na zawthawkna uh sia a tawpna hong hi tu hi.

⁹Piakna sungah na ngo vun a, na an uh mizawngte na hawm vun. Tua hu in thupha na saang tu hi.

¹⁰A kihisak mihing sia na pial vun, tua hile kam kinialna, kihauna le min kisiatsakna a om nawn buatu hi.

¹¹Thinsung thianthona le kamthiam paunate na dei le kumpipa sia nangma lawm hi tu hi.

¹²Leilot theite ii kammalte maan ngawl hi ci in lakna taw Topa in thumaan thutak sia keamcing hi.

¹³Pasal datham pa in inn veu ah om hi; pusuak leng tawpi in hong man thei tha tu hi ci hi.

¹⁴Palngulna sia thaang hi a — Topa thin uukna a thuakte tua thaang sungah awk hi.

¹⁵Patangte in mawmawt huai ngamtatna le bawlpelnate a nei sia a ngeina hi lel hi, ahihang a kilawm bang a, ngoai bekna taw amate ngamtat zia tu kihil thei hi.

¹⁶Na hau natu in mihaute tungah letsong na pia a, ahibuale mizawngte na zothaw le nangma zongh na zawng tu hi.

Ciim Kamteptee Sawmthum

¹⁷Ngai vun, mihing ciimte pauna kong hil tu hi. Amate hilciannate kan vun,

¹⁸tuaciang ciamtee in, na zangh kik thei le na lungdam tu hi.

¹⁹Topa na pummuan tu ka dei hi; tua hu in tu in hong son tu khi hi.

²⁰Nang atu in paunak sawmthum kong at zo hi. Tuante sungah heakna le ngaisut pha piaknate om hi,



²¹tuaciang tuate in thumaan thutak sia bang tak ziam ci in hong hil tu hi. Tuazawkciang tuate a zong tu in hong kipaisak ciang a maan thu nong ciapui tu hi.

-1-

²²Hi thei tang ci in mizawngte tung pan hamphatna la heak vun; thukhenzum ah cimaw in a dingte tung pan hamphatna la heak vun.

²³Topa in amate ii thu sia amate taangin nialsak tu a, amate nuntakna a lauthawn po ii nuntakna kilauthawn tu hi.

-2-

²⁴Mihing thinngam, thin ngeamte ngualtamh in na man heak vun.

²⁵Amate omziate na zui tha tu a, na kikheal kik zo buatu uh hi.

-3-

²⁶Mi dangkhat ii leibate losak tu in kamciam pia heak vun.

²⁷Lo zawk ngawl na khat nei lete na lupna dongin amate in hong laaksak tu hi.

-4-

²⁸Na taangpupite ii innngi longi phute na khin heak vun.

-5-

²⁹Nasep pha tak a, a seam mihing khat hong lak tavun, tuaciang mihing tam mamate sang a phazaw, kumpite kitholpui tu dong a, a kilawm khat kong lak tu hi.

Paunakte 23

-6-

¹Mihing thupi khat taw an nekhawm tu in na to uh ciang, ama sia akua ziam ci in phawk nginge tavun.

²An na du mama uh zong na kidawm tavun.

³Ama hong lui anlimte tungtaang ah duhop neak heak vun; hong zolna khat po zongh hi thei tha tu hi.

-7-



⁴Hau tu na hanciamna ah nangma le nangma na tha a bo ngawl natu in ciimna a khom na nei in.

⁵Na sumte sia muvanlai khat a tha hong po in a leen bangma in thakhat thu bo thei hi.

-8-

⁶Mihing a iiciilte sabuai ah an na ne heak vun, tua ahibuale zong anlim hong luite hu in duhop neak heak vun.

⁷“Tawm beak ne lai in” hong ci kale hong ci takpi hi ngawl thei hi. Ama ngaisutna sia ama tatak ma ahi hi.

⁸Na neak sa teng na lua kik tu a, na sialpokna theampo a vaal thong hi tu hi.

-9-

⁹Mihing mawmaw khat sia a ngaisut thei natu in na sonpui heak vun; ama in thupi sa thei meal ngawl hi.

-10-

¹⁰Bangma hun in innngi lo ngiluite na khiin ngei heak vun, ahibuale tangate neisa leitangh na sut heak vun.

¹¹Topa sia amate ii a vaanglian a dal pa hi a, nang hong langpan in amate ii thu a pha takin sonsak tu hi.

-11-

¹²Na syapa hong hilna pha tak nadon in a, na sin thei theampo sin in.

-12-

¹³Patangte tungah tek tu le pau tu haisaang heak in. A kilawm bang a, a ngoai bekna in ama thisak ngawl tu hi.

¹⁴A tatak in ci leang ama nuntakna kihun zongh hi thei hi.

-13-

¹⁵Tapa awng, nong ciim le ka lungdam mama tu hi.

¹⁶Ciim kamte na pau ka zaak ciang ka angtang tu hi.

-14-



¹⁷Mimawte eang heak in; Topa thasiana sia na nuntak sung na thintoi thu hisak in.

¹⁸Tuabang hilete na maivang tu hi.

-15-

¹⁹Ngai in ka tapa awng, ciim in a na nuntakzia thuk takin ngaisun in.

²⁰Sapittui tam lei a nete, ahibale an aam theite taw na kithawl heak in.

²¹Zukhamte le antuangte zawng vaial tu hi. Anneak le mut sia nasep in na nei le hai ngawlin puansia ngapkaai na silh tu hi.

-16-

²²Na pa thuson ngai in; ama ngawl taw piang thei ngawl tu ni hi. Na nu a khanhaam ciangin ama thupi na saknate lak in.

²³Thumaan thutak, ciimna, sintheina le khua ngaisut theina, hite sia a manh piaktaak a, ahizong na zuak tu in manpha lei hi.

²⁴Mihing thutang khat ii pa in a lungdam natu thu om hi. Tapa ciim khat tungtaang ah na angtang thei hi.

²⁵Na pa le na nu sia nang huvau in angtang taken; tua lungdamna sia na nu pia in.

-17-

²⁶Tapa awng, hong nadon tan a, ka nuntakna sia nangma ettee tu hisak in.

²⁷Pumpi zuak numeite le a paktat numeite sia a lauhuai thi theina thaang ahi uh hi.

²⁸Amate in ngualsuam phalakte bangin hong ngakin pasal tam mamate thumaan ngawl suaksak hi.

-18-

²⁹⁻³⁰Zu tam ne leilam a, a nam thak a ne nuam lai khat kei hong lak tan, tuaciang a thinngim mama, khuangaihuai a kisa, ngual buaisak tawntung le lungkim ngawlin a phun tawntung khat kong lak tu hi. A mitsan neinoi a, a pial thei tu hi napi liamnate nei hi.



³¹Sapittui sia bangza po in san kilkel in, hai sungah tee vasip a, valhsuk ol hikale na ze etsak heak vun.

³²A khuavak ni zing ciang ngul ngu hang ii tuk bang hi na sa tu hi.

³³A kiitak huai lului na mu tu a, na ngaisutna le na kampauna a thiangtho vaset buatu hi.

³⁴Tuipi tungah teambaw ngui bang, teambaw kilawn tung to a, a saangna ah hong veeito bang na hi tu hi.

³⁵“Hong kivua hi nak tu hi ve aw,” na ci tu a, “Vel zazan thuak hi vak ing, ahihang ka phawk bua hi. Banghang khangciim thei ngawl khi ziam? Zu tawm ma kisamh lai ing,” na ci tu hi.

Paunakte 24

-19-

¹Mihing tatsiate na eang heak vun a, amate pawlpui tu in na hanciam heak vun.

²Buaina piansak tu sia amate ngaisut pi hi lel hi; amate a pau sim in mihing khat pawpo ii thin nasak tu hi.

-20-

³Innkuante in ciimna le telthiamna doppha in kisa hi.

⁴Heakna omna munah inn doituamte sia a manpha na hoite taw kizeam hi.

-21-

⁵Ciimna in thahatna sangin phazaw hi. Hi hi, heakna sia thahatna sangin thupi zaw hi.

⁶A tawpkhakna ah ngal na do maa in pha takpi na ngeal uh kul a, tuaciang ngaisut piakna pha tam na ngana zui in zawna zongh na nga zaw thei tu hi.

-22-

⁷Ciimkam tepteete sia mihing mawmaw khat ii tel tu in thuk lei hi. Amate in a thupi kikupnate sungah a son tu bangma he ngawl hi.

-23-



⁸Thusia bebek na ngeal le, buaina piangsak pa ci in na minthang tu hi.

⁹Mihing mawmaw khat ii ngaisut tupnate sia mawna taw kidim hi. Midangte siatson bebek a kinte ngual in ensan hi.

-24-

¹⁰Phatmawk hun sungah, na thaneam le a thaneam takpi ma na hi hi.

-25-

¹¹Mihing khat sia thumaan ngawl thu taw a kithat tu na mu le ama na hut natu in haisaang heak in.

¹²Kei taw bang kisai ziam ci tha tu ni hi, ahihang Pathian in na thinsung tawng hong he a, tua tungah thukhen tu hi. Ama in nang hong en nginge hi; ama in he hi. Tuaciang na sep babang in ama in thaman hong pia tu hi.

-26-

¹³Tapa awng, khuitui ne in; khuitui pha hi. Khuai lu sung a, khuitui sia na leei tungah thum ahi bangma

¹⁴ciimna sia na thaa atu in pha hi ci in na telthiang tu hi. Ciimna nga in, tua hi le na mai vang tu hi.

-27-

¹⁵Mihing thumaan khat suttol tu a tum, ahibale a inn a laaksak nuam mihing seksol pa bang hi heak vun.

¹⁶Mihing thumaan khat in bangtan vei po a puk hial zong tho kik tawntung tu hi; ahizong lalna in mihing seksolte siasak tu hi.

-28-

¹⁷Na ngal pa lalna a thuak ciangin lungdam heakin a, tuaciang a lutu ciangin lungdam heak vun.

¹⁸Ngual tungtuan nopna na nei leTopa in hong he tu a, a dei buatu hi; tuasia ciang Topa in amate daan piak awl thei tu hi.

-29-

¹⁹Mihing ngilote hangin na thin ngimsak heak in; amate eang heak in.

²⁰Mihing seksol khat sia a mai bing hi — lamet tu a nei bua hi.



-30-

²¹Ka tapa awng, Topa thasiana nei in a, kumpipa zongh zakta in. Kumpipa langpan in a leedote taw bangma kipee awna nei heak in;

²²tuabang mihingte tawmvei no sungin siacip thei hi. Pathian ahibuale kumpipa piansak thei lalna sia na he ziam?

Ciimna Paunak A dangte

²³Mihing ciimte in hite zongh na ci lai hi: Thukhen pa khat atu in nguptuam nei sia maan ngawl hi.

²⁴Mikhial khat khial ngawl hi a cile ama sia mihing theampo in haamsiat in ensan tu hi.

²⁵A mawte daan a pia thukhenmangte ahile khangto tu a, ngual phat sonna nga tu hi.

²⁶A thumaan kam zokikna in lawm tatak hina lim khat ahi hi.

²⁷Na lo ante laak pha zo a, na nuntak natu thalaw thei tu in na kimuan mateng, inn sa heak in a baangkua phut heakin.

²⁸A thu om ngawlin ngualdang khat langpan in tetti pang heak in, ahibuale zong ama ii huvau telkhial thei thute phuang heak in.

²⁹“Ama ii kei hong vawt bangin ama tungah vawt tong! Ama thuk tong!” ci heak vun.

³⁰Pasal datham le a mawmaw khat ii lo sung le sapit huan sungah ka vak hi.

³¹Tua munte sia lingkungte le lopate in khunel hi. A huang uumna phungte zongh cimh zo hi.

³²Hite ka en a, khua ka ngaisut ciang tua tung panin hi bang heakna khat ka nga hi:

³³na uuk le mu zok in. Leekoai in tawmvei tawlnga in,

³⁴ahihang na mut lanin zawngkhalna in hiam toai phalak khat bangin hong nawk tu hi.

Paunakte 25



Solomon Paunak Dangte

- ¹Judah Kumpipa Hezekiah kumpi zum sung pan a kikuu kik Solomon paunakte hi sungah ki at lai hi.
- ²Pathian ii a seal thute hu in ama zatak ih pia hi; kumpipate sia tua thu a thiangin a sontel uh hu in zatak ih pia hi.
- ³Kumpipa khat ii ngaisut sia na he ngei bua uh hi; ama ngaisutnate in ei bat zawk ahi ngawl, van saang bang, tuipi thuk bang ahi hi.
- ⁴Ngun sung panin a nin teng a laakkeak ciangin ngun seakpa in na hoi mama khat piangsak thei hi.
- ⁵Kumpipa kung panin ngaisutna pia mihing siate heam le uh te a kumpi ukna sia thukhaikim khenna om hi ci in thang tu hi.
- ⁶Kumpipa mai ah na din uh ciangin hong nasia ngaisut natu in hanciam heak vun a, mihing thupi bangin kiheang heak vun.
- ⁷A thupi zaw ngualdang khat atu na dinmun awn a hong kisawl sangin dinmun saangzawna ah kaato a hong kisawl tu sia phazaw hi.
- ⁸Na muna uh khat taw kisai in thukhenzum theng papaih heak vun. Tetti dang khat in nang muna sia maan ngawl hi ci in hong lak thei le banglaw tu ni ziam?
- ⁹Na innpaamte taw ngaisut kisik ngawlna khat na nei uh le noma sungah kilemtua tavun a, thuku khat po pualaak se heak vun.
- ¹⁰Tua ahibuale mihing theampo in thuku keamcing thei ngawlte ci in hong he tu a, tua maizumna na pu zo ngei buatu uh hi.
- ¹¹Ngaisutna khat pha tak a, pualaak theina in ngun tung kham taw zep bang ahi hi.
- ¹²Thuakna sa a nei mihing khat ii kidop tu thupiakna a saang nuamte sia kham khutzungbute ahibuale kham pha belte taw a kivawt kizepnate sangin phazaw hi.



- ¹³A muanhuai kamtaipa in anlaak hun nisat laitak tuivot bangin, a sawlpa atu lungpilna ahi hi.
- ¹⁴Piak tu kamciam in a pia ngei ngawte sia nguatui paai ngawl meeikaai le vuite bang ahi hi.
- ¹⁵Thin sau takin zolna in a tha khobel kinanna sutham thei a, ngamukte thin sung ngangawn zo thei hi.
- ¹⁶Na kisap za sangin a tam zaw khuaitui ne heak vun; a tam lei le hong luasak tha tu hi.
- ¹⁷Na innpaamte mun haw vazut lei heak vun; amate in hong cimtaak tu a, hong ngaimaw thei tu hi.
- ¹⁸A maan ngawl kimawsakna sia, namsau, moltawng, ahibuale thaltang hiam bangin kiitak huai hi.
- ¹⁹Phatmawkna sungah a muanhuai ngawl khat muan thaakna sia ha ngawk sa taw an thai nop bang, ahibuale peangbaai sa in lampai taw kibang hi.
- ²⁰A thin kiamcip khat kungah lasakna sia khuasik laitak a puan suusakna, ahibuale a liamma sung ci noisakna taw kibang hi.
- ²¹Na ngalpa a ngil a kial le an pia in; a dang a ko le dawn tu khat pia in.
- ²²Maizumna taw ama na kaangsak tu a, tuaciang Topa in thaman hong pia tu hi.
- ²³Saksang vui in ngua hong puak bangma ngual ngensiatna in thin uukna hong puak takpi hi.
- ²⁴A nge hat zi khat taw inn khat sungah tenkhop sangin innkhum tungah teang leang phazaw hi.
- ²⁵A khak belin, a khualana mun pan thupha zaakna in na dangko laitak tuivot neak bang ahi hi.
- ²⁶Mihing pha khat in mihing ngilo khat ii thu a zawp ciang ciktui nin ahibuale ngu a kitha tuikhuk khat hong phawksak hi.



²⁷Khuaitui tam lei sia nang atu pha ngawl hi, tuasia bangma, pokna tam lei nga tu hanciam zongh pha ngawl hi.

²⁸Na thin uukna na khaam zo buale luphung taw a ki uum ngawl, a kisim thei khuapi dongdai bangin na cimaw tu hi.

Paunakte 26

¹A mawmaw khat pok natu sia khal lai vuuk taak ahibuale anlaak hunlai nguazu tu bang keakin suak thei ngawl hi.

²A thuak tu ma in na kilawm bua nale haamsiatna in bangma hong law zo ngawl tu hi. Tuat in leleang a, tuk hun a nei ngawl vacimte taw kibang hi.

³Siphu khat sia saat kul a, laa khat sia kamkhau bul kul a, tuaciang a mawmaw khat sia vel kul hi.

⁴A mawmawt huai dokna khat na zo le, a dongh pa bangma a mawmaw na hi hi.

⁵A mawmawt huai dokna khat sia a mawmawt huai ma in zo kik lete, a dongh sia in ama kingaisut bangin a pil ngawl hunlam kiphawk tu hi.

⁶Mihing mawmaw khat kamtai in na sawl le, nangma peang a saattan bang na hi thei hi; buai natu a zong hi ni hi.

⁷A mawmaw khat in paunak khat a zak theina sia a koncip khat zongh ii a peang a zak thei bang bek hi.

⁸A mawmaw khat po pokna in saili kuung tungah suangtang kikhit bang bek ahi hi.

⁹A mawmaw khat in ciimkam teptee a zak ciang zukham khat ii a khutsung pan ling tangciak a daw nop hong phawksak hi.

¹⁰Thacialpa khat in hong pai a mawmaw khat pawpo a cial ciang, a kisai theampo ii thin natna ahi bek hi.

¹¹A mawmaw khat in mawmawt vai khat a nii veina in a vawt kik le a luak sa a ne kik ui khat taw kibang hi.



- ¹²A ciim ngawl khat ciim a kisa sia sangin, a mawmawbel khat phazaw lai hi.
- ¹³Mihing dathamte banghangin a inn uh pan puswak ngei ngawl ziam? Amate in bang kiita ziam? Tawpите ziam?
- ¹⁴Mihing dathamte sia a lupna tungah kilum lelet uh hi. Innkha khat pattaa tungah a kihei za sangin, tua pa in a khuala zaw theng ngawl hi.
- ¹⁵Mi pawlkhatte sia a kam sungah an a kibak tu takpi zongh datham hi.
- ¹⁶A datham mihing khat in, amate ngaisut thiamna a lak thei pasal sali sangin pilvangzaw in kingaisun tu hi.
- ¹⁷Nang taw kisai ngawl thu khat taw kam kinialna sungah kihelna sia khuasung lampi tawnin ui khat a bil pan zap taw kibang hi.
- ¹⁸⁻¹⁹Mihing khat in ngual theam a, a zawkciang ka ciammuina zam a cite sia, a lauhuai ngalhiam taw a kimai mihing thin am khat taw kibang hi.
- ²⁰Thing om buale mei mit hi; kingenna om buale kihauna bo hi.
- ²¹Meihol in meikamte linghsak a, thing in mei kuangsak hi, buaina a piangsakte in kam kinialna kipee suaksak hi.
- ²²Kingenna sia lim mama hi! Bangza in valh thanuam hi ziam!
- ²³Na ngaisut takpi teng seal a, thumaan son ngawlina in a manh ol leibeal zutna in a kizangh cimbeng taw kibang hi.
- ²⁴A kihitheamsak mihing khat in ngual a etsatna sia kisialpokna kammalte taw seal hi.
- ²⁵A kampaunate ahile zaaknop huai tha tu hi, ahihang um heak vun, banghangziam cile a thin sungah ki etsatna a dim in om hi.
- ²⁶A ngual etsatna sia phualseal zo tha tu hi kale, mihing theampo in a ngitlo ngamtatnate mu tu hi.
- ²⁷Ngual thaang a sia mihingte sia amate ma awk kik vacin hi. Min a cimhsak mihingte sia min in vuknel hi.



²⁸Leilot thu taw ngual thinnat natu a vawt nuam khat sia na etsat kul hi. Thumaan ngawl sonna in siatna sim ngawl a dang a piangsak bua hi.

Paunakte 27

¹Zing ciang thu taw kisai in kisuangtaak khol heak vun. Tua hun le tu kilaklaw bang piang tu ziam na he bua uh hi.

²Midangte in poksak vun— khualmite ngangawn in poksak vun; bangma hunin noma le noma kipok heak vun.

³Mawmawt ngamtatna pan a piang thei ngimnate sia suang le sen ii ngitna taw kisontee thei ngawl hi.

⁴Thin uukna sia tatkha a, lalna piangsak thei hi, ahihang kieenna sia bangma taw kiteengat thei ngawl hi.

⁵Mihing khat ii a khialna hu in a kilangh in hilna pauna sia kei bangma hong awlmawk ngawl hita a, hong ci saang phazaw hi.

⁶Ngualtam khat in hong nasak tha hial zong, a pha piang le a deina hi. Ahihang na ngal khat in a khut taw na liangko pan hong koai ciang — na kikeam vun!

⁷Na ngil a va laitak in khuaitui zongh na du buatu hi, ahihang na ngilkial laitak in, ankha khat zongh thum hi.

⁸A inn pan a puapial khat pawpo sia, a bu sung pan a leang vacim taw kibang hi.

⁹Paaknamtui le sathau namtuite in hong lungdamsak zaw a, ahihang ngimna in na thinnopna bosak hi.

¹⁰Nangma ngualtamhte ahizong na pa ngualtamhte ahizong mangil heak in. Ngim na nga le na suapuipa kungah hu ngen heak in; na nai a om innpaam khat in a khuala a om na suapuipa sangin hong hu thei zaw hi.

¹¹Ciim in, ka tapa awng, tua hile ka lungdam tu hi; kei tungah maw hong zong khat po munah ka zokik natu om hi.



¹²Mihing khua ngaisun theite in ngimna hong pai ciangin mu thei a pial uh hi, ahihang khua ngaisun meal ngawl khat sia tua sungah tum vacin tu a, a zawkciang kisiik tu hi.

¹³Khual mi khat ii leiba teng losak tu in kamciam a pia mi mawmaw khat sia ama neisate laaksakin a lo dong vaukhamna in koisak khol kul hi.

¹⁴Zing tuungin na ngualtamh te awnging takin nuksetna kam taw na phong le a haamsiat taw zong na kibang thei hi.

¹⁵A nge hat zi khat sia nguazuk ni a, mal khatkhat veu a taak vakek tui taw kibang hi.

¹⁶Bangbangin ama thimsak thei ni ziam? Vui vak ciang dal tu ahibuale na khut sungah sathau na hum zawk tu na hanciam ngei ziam?

¹⁷Thik le thik kitaat a kihiamsak bangin mihingte in khat le khat tung panin heakna nga hi.

¹⁸Theikung khat pha takin ou lete theinga na ne tu hi. A Topa a ou naseam khat sia kipatoai tu hi.

¹⁹Tui sungah hong leng kik na mu sia nangma maitang hi a, tuasia bangma na thin sungah na mu sia nangma tatak na hi hi.

²⁰Mihingte ii deina sia mithi khua bang ahi hi — a tam zaw lai mun awng om tawntung hi.

²¹Meisa in kham le ngun a tak le a theam sit a; mihing khat ii minthanna zongh ki sit thei hi.

²²A mawmawte a thi dektak dongin na vuak bel hang amate mawmawtna lakeak zo ngawl lai tu ni hi.

²³Na tuute le na khuite na hi theiza in pha tak vak in,

²⁴banghangziam cile hauna sia kip ngawl hi. Minamte ngangawn a tawntungin kip ngawl hi.

²⁵Taangphawte na tan a, tua zawkciang lo sung pan a piang kik tu taangphawte a khan lan in mualpangh ah lopate na meet hi.



²⁶Na tuute pan a piang tuumulte taw puansilte na vawt thei hi, tuaciang keal pawlkhat na zuak manh sum taw leitangh na lei thei hi.

²⁷A om lai kealte in nangma le na innkuanpuite, tuaciang na naseam numeite atu zongh noai hong pia tu hi.

Paunakte 28

¹Mihing seksolte sia kuama ii del ngawl bulin tai hi, ahihang a thumaan mihing khat in tawpi bangin hang hi.

²Minam khat a maw ciang ngam uk khat zawkciang khat kilaih tu hi. Ahihang ngam khat sia a pilvang, khua ngaisun thei lampuite a nei le, thahat tu a, kip tu hi.

³Mizawngte a zawthawk vawt thunei mihing khat sia lo an a lalsak vui le ngua taw kibang hi.

⁴Thukham na thusim buale mihing seksolte sangah pang na hi hi; ahizong thukham na ni le amate a langpan na hi hi.

⁵Mihing ngilote in thukhaikim khenna sia bangziam ci in a he bua uh hi, ahihang Topa a biate in pha takin tel uh hi.

⁶Zawng a, thumaan tu sia, hau a thumaan ngawl sangin phazaw hi.

⁷Thukham a zui khangno khat in mihing pilvang ahi hi. A mannung ngawl ngualtamh a nei pa sia a pa maimawl na ahi hi.

⁸Mihingte tungah summeet thakna le ngual duupna taw na hau le na hauna teng mizawngte tung a thudik khat ii khut sung theng tu hi.

⁹Thukham na zui buale na thungetnate sia Pathian atu in a ngaimawk huai, zaak thada suak tu hi.

¹⁰Mihing thumaan khat a sia vawt tu in na theam le nangma thaang sung ma ah na taaksuk tu hi. Mawbaang ngawlte thaman a pha kipia tu hi.

¹¹Mihaute sia amate ciim kisa tawntung a, ahihang ngual ii ngamtatzia a thukmu thei mizawng khat in he zaw hi.



¹²Mihing phate in ukna za hong nga ciang mihing theampo lungdamin poai khaam uh a, ahihang mihing siate in ngam a uk ciang mihingte buu uh hi.

¹³Na mawnate seal tu na hanciam le nuntak sungin zawna na nga ngei buatu hi. Mawna pualaak vun a, nusia vun; tuasia ciang Pathian in na tungah hesuakna hong lak tu hi.

¹⁴Topa thu ni tawntung in, tua hile na lungdam tu hi. Na thin na pui sak le siatna sung na theng tu hi.

¹⁵A seksol ngamuk khat ii lang ah, mizawngte a hu tu a om bua hi; ama sia tawpi hawk le an zongin a vakkot vompui bangin kiitakhuai hi.

¹⁶Khua ngaisutna pha a nei ngawl ngamuk khat sia cizat nei ngawl kumpi khat ahi hi. Thumaan ngawl na a ngaimaw khat in khuangei mama ngam uk tu hi.

¹⁷Mihing that pa khat sia ama atu thaankuul a manlang thei za in a to pa ahi hi. Na tho heak vun.

¹⁸Thumaan leute ngammuangin na om tu uh hi. Na thumaan bua le thakhat thu in na puk tu hi.

¹⁹Nasia tak a diang lotho pa in neak tu tam mama nei hi. Hun a bosak thawthong mihingte sia, zawng tawntung tu uh hi.

²⁰Thumaan mihingte in nuntakna kicing taw lungdamin a nungta tu uh hi. Ahihang hau tu kaal na ngakla uh le daan na thuak tu uh hi.

²¹Nguptuam nei thukhenna in maan ngawl hi. Ahihang thukhenmang pawlkhat in sumnguk tawmno po deina ngawngawnin a maan ngawlin naseam tu hi.

²²Kaangsung bek a he mihing duhopte in hau tu ngakla in diang ahi ciang, zawna ii vaat tu hun a he bua uh hi.

²³Khat pawpo pau in hil vun, a zawkciangin ama in sialpokna sangin diksa zaw tu hi.



²⁴A nu a pate neisa ngukna in mawna in a ngaisun ngawlte sia nguta dangte taw kilamdang ngawl hi.

²⁵Duhopna in ngimna bek piangsak hi. Topa na muantu sia phazaw pek hi.

²⁶Nangma bek ii ngaisutna teng zuina in mawmawtna hi. Ngammuangin om vun a, tuaciang a ciimzawte hilnate zui vun.

²⁷Mizawngte pia vun tua hile bangma hun na kitaangsamh buatu hi. A zawngte na en bua uh le mihing tam mama in hong haamsiat tu hi.

²⁸Mihing pha ngawlte in ukna za a nga ciang mihingte buu uh hi. Ahihang amate a za ataak uh ciang a thutang mite in uk kik tu hi.

Paunakte 29

¹Nang hong kipau hong kihil simin na thin na puisak vaial le ni khat ni ciang sukcipna na thuak tu a, na lu na phong kik zo nawn buatu hi.

²A thutang ngamukpa khat hong lak tavun, a lungdam ngam mite kong lak tu hi. A seksol ngamukpa khat hong lak tavun, a thinngim ngam mite kong lak tu hi.

³Ciimna thupi na sa le na pa in nang hangin angtang tu hi. Pumpi zuak numeite tungah, sumzakna sia a mawmawthuai maizakna hi.

⁴Kumpipa in thukhaikim khenna thinbot in a nei le a ngam thahat tu a, ahizong ama in sum bekma thinbot in a nei ciang a ngam lalsak tu hi.

⁵Na ngualtamhte na sialpok le, nangma le nangma thaang kisia na suak hi.

⁶Mi ngilote amate mawna sungah awk hi, thumaan mihingte ahile lungdam in suakta hi.

⁷Mihing pha khat in mizawngte nga tuakte he a, ahihang mihing seksolte in tuabangte a tel thei bua uh hi.

⁸Ngualdangte atu khualna a nei ngawl mihingte in khuapi bup buaisak thei hi. Mihing ciimte in thimsak khipkhep hi.



- ⁹Mi pilvang khat in a mawmaw khat tungah thu a vawt ciang, mi mawmaw sia nui bekin, aw saang taw kam ngaldo pau hi.
- ¹⁰Ngual thalup tu a ciza ngawl mihingte in a thumaan pawpo ngaimaw hi, ahihang thumaan mihingte in tuabang mihing khat ii nuntakna huu tu hi.
- ¹¹Mihing mawmawte in a thin uukna uh kilanghsak hi, ahihang khua ngaisun theite in thinsau in a thin uukna iip hi.
- ¹²Ngamuk khat in a maan ngawl thu a kizate a nadon le, a ulian theampo sia leilot theite ahi tu uh hi.
- ¹³Mizawng pa le ama a zothaw pa in hi sia nei khawm hi — Topain amate ngeal sia mittang pia khawm hi.
- ¹⁴Kumpipa khat in mizawngte nga tu a kilawm thute a panpui le ama in kum saupi ngam uk tu hi.
- ¹⁵Patangte atu in hilna le tekna sia pha hi. Patangte in amate uuk bang bekin a khang le a nute maizumsak tu hi.
- ¹⁶Mihing ngilote ngamukna za hong nga ciang khialna lian khang hi. Ahihang a thutangte in tuabang mihingte ii kiamsukna mu tu in a nungta tu hi.
- ¹⁷Na tate tek vun, tua hile a tawntungin ama hu in na angtang tu hi. Amate in maizum natu ahang thu omsak ngei ngawl tu hi.
- ¹⁸Pathian ii lamlak ngawl minam khat sia thu kinitna om ngawl minam ahi hi. Pathian thukham a zui pa in mihing lungdam ahi hi.
- ¹⁹Naseamte sia thusonpuina bek taw na hil na pau thei bunu hi. Amate in hong tel thei tu ahihang hong thusim tuan bunu uh hi.
- ²⁰Ngaisun ngawlin a pau khat po atu sangin, a ngoai a mawmaw khat atu lametna om zaw hi.
- ²¹Na naseam khat sia a no panin, a dei theampo na pia le ni khat ni ciang na neisa theampo ama in hong suanthal tu hi.
- ²²Mihing thinngamte in kihauna le buaina tam mama piangsak hi.



²³Kisaktheina in, kiamsukna sung hong then tu a, ahizong na kiniamkhiak le hong kizakta tu hi.

²⁴Nguta khat ii kipawl puipa sia a ngal cii phabel ahi hi. Thukhenzum sungah thumaan a son le ama daan kipia tu a, tuabang a son buale Pathian in haamsiat tu hi.

²⁵Midangte ii nang hong ngaisutnate thin nopmawk in na nei tu sia lauhuai hi, ahizong Topa na muang le ngammuangin na om tu hi.

²⁶A kuama po in ngamuk khat ii hong deisakna kithangai tek hi, ahihang Topa tung pan bekin thukhaikim khenna na nga thei hi.

²⁷Thutangte in miseksolte ensan a, miseksolte in thutangte ensan hi.

Paunakte 30

Agur ii Kammalte

¹Hite in Jakeh tapa Agur ii a ciliap huai kammalte ahi hi: “Pathian in kei taw omkhawm ngawl hi, Pathian kei taw omkhawm ngawl hi, tuaciang keima cimaw khi hi.”

²Keima in mihing khat taw sangin nganhing khat taw ka kibang zaw hi. Mihing khat ii nei tu a kilawm khua ngaisut theina ka nei bua hi.

³Ciimna ka sin ngei bua hi, tuaciang Pathian thu bangma heak ka nei bua hi.

⁴Akua in vantung thu heaknate a cingin nei ngei ziam? A kua in vui sia, a khut sungah man ngei ziam? Tua ahibuale tui sia puanbek taw tun ngei ziam? Tua ahibuale leitung ngamngite phut ngei ziam? Na he le, ama kua ziam? Ama tapa in akua ziam?

⁵Pathian in a kamciam theampo keamcing hi. Ama ii huuk tu a zong theampo atu in ama sia lum taw kibang hi.

⁶Ama ii son ngei ngawl khat pau hi na cile ama in hong sua kik tu hi, tuaciang a leilotpa na hi hunlam hong lak tu hi.

Paunak Dangte

⁷Pathian awng, ka thi ma in thu nam nii kong ngen hi:



⁸leilot ngawl natu in hong keamcing tan, tuaciang hau le hong hausak heak in a, zawng le hong zawngsak heak in. Tua ahikom an ka taangsap za bek hong pia ka po in.

⁹Ka kham vaalin an ka nei le, nang hong tulmaw bong kong ci tha tu hi. Ahihang ka zawng le, ka nguta tha tu a, ka Pathian ii min daina kong suaksak tu hi.

¹⁰Naseamte a Topa tungah sonsia ngei heak vun. Tua hu in haamsiatna le ngimna na nga tu hi.

¹¹A pate haamsiatin a nute a thupi sim ngawl mihing om hi.

¹²A nin thei za in, nin napi thiangtho a kisa mihing om hi.

¹³Pha mama a kisa mihing om hi — oh, bangza in amate le amate pha kisa ziam?

¹⁴A zawngte le a kitaangsamhte tung pan ngitlo vai taw a nga thei zaza uh a duup mihing om hi; tua bangin amate nuntakna a zong uh mihing om hi.

¹⁵Liit khat in tanu nii nei a, a min sia “Hong pia tan!” hi khawm hi. A lungkim ngei ngawl, na nam li om hi:

¹⁶Mithite khua, tasel numei, nguatu a kisamh leiko, le a kisumit zo ngawl meikuangte ahi hi.

¹⁷A pa sia ngual nuizaak tu in ciammuina in a nei ahibuale a nuhuai a zawngsak mihing khat pawpo sia vaciikte in a sa ne nak le pha hi, tua ahibuale zong a mittangte ngam va-akte in khel le pha hi.

¹⁸Ka tel zawk ngawl a lamdang mama li om hi:

¹⁹van ah a leang muvanlai, suangpi tung a vak ngul, tuipi tungah lam am ngawlin a pai teambaw, le pa khat le numei khat a kidei theina citeng ahi hi.

²⁰Zi thumaan ngawlte ngamtatna in hi bang ahi hi; ama in palngul mawna vawt a, tua zawkciang kibual a, “Ahihang, a maan ngawl bangma vawt nei bong!” ci lai hi.

²¹Leitung ngangawn ii dual zawk ngawl na nam li om hi:



- ²²sal khat kumpipa a suak sia, a du theampo a nei mi mawmaw khat,
- ²³pasal a nga a etsat huai numei khat, a tonu omna a suan naseam numei khat.
- ²⁴Leitung ah nganhing no mama napi pil citak a pil li om hi:
- ²⁵Mitsa; tuate in thaneam mama ahihang a an neak tu uh khal sungin khol hi.
- ²⁶Liang lai a, teang ngalhvang nam khat: tuate in thahat ngawl hi, ahihang liang lai suangpite kawmah teang thei hi.
- ²⁷Khaumaw: tuate in kumpipa nei ngawl ahihang hi vadium in vak hi.
- ²⁸Innhik: na khut sungah khat kihum thei ahihang kumpi teenna inn sungah kimu thei hi.
- ²⁹Lam a pai uh ciang a etlawm mama na nam li om hi:
- ³⁰nganhing sungteng pan a thahat bel le kiitak mama a nei ngawl tawpi;
- ³¹kealtal, akhui pokngai le a mite mai ah a om kumpipate.
- ³²Kiphatsak natu le a sia ngeal natu za dongin na mawmaw le tawlnga phot in a, khua ngaisun in!
- ³³Noai na sasau le thawbat na nga tu hi. Midang khat ii naak na suu le, chi luang tu hi. Na thin na sosak le ngimna sungah na theng tu hi.

Paunakte 31

Kumpipa tungah ngaisut piakna

- ¹Kumpipa Lemuel tungah a nu ii a ciliaphuai kampaunate in hi teng hi;
- ²“Nangma in ka thungetna hong kizokikna ka it ka tapa na hi hi. Nang tungah bang kong son tu ziam?
- ³Na tha nei theampo numei le pa omkhopna huvau in zangh heak in a, na sum theampo numei tungah zangh heak in; tuate in kumpipate susia hi.
- ⁴Hong ngai tan, Lemuel awng. Kumpipate in sapitui ne ngawl tu hi, ahibuale, zu duna nei ngawl tu hi.



⁵Zu a neak uh ciang amate in thukhamte mangil in, kitaangsapna a nei mihingte ii nga tuak thute ngaingon uh hi.

⁶Zu sia a thi dektak mihingte, a thin ngim mamate atu ahi hi.

⁷Amate in a zawinna le a khuangaina a makngil thei natu in dawn taken.

⁸Amate atu, thu a son thei ngawl mihingte atu in sonsak in. A cimaw theampo ii nga tu a kilawmte sungsia in.

⁹Amate taangin pau in a, thutang thukhenpa hi in. A zawngte le taangsapna a neite ii nga tuak thute sungsia in.

Zi Zaktel

¹⁰A zaktel mama zi khat mu natu bang za in haksa ziam! Ama in suangmanpha te sangin tam mama in manpha zaw hi.

¹¹A pasal in ama tungah muanna nei a, tuaciang a pasal a zawng ngei buatu hi.

¹²Tua nu in a nuntak lai tawntungin a pasal tungah phatna vawt a bangma hunin siatna a thuaksak bua hi.

¹³Ama in tuumul puante le puannealte takin komla tawntung hi.

¹⁴Vanh pua teambawte bangin ama in a khuala munte panin inn ah an hong ciapui hi.

¹⁵Zingsang khuavak maa tho in innkuan anneak tu vawt a, a naseam numeite sep tu teng zongh son hi.

¹⁶Ama in leitanghte en in lei hi, ama thalaw sa sum taw sapit kungte ciing hi.

¹⁷Ama in naham seam hi a, thahatin lawp hi.

¹⁸Ama in a sep a vawt theampo ii manphatna he a, khuazan dong in naseam hi.

¹⁹Ama in khauzomin ama puan tu tak hi.

²⁰A zawngte le a kitaangsamh te ngo takin pia hi.



- ²¹Vuuk a kiak hangin a thin a ngim bua hi, banghangziam cile a innkuanpuite in puanlum nei uh hi.
- ²²Ama in luppha puanvante takin puanneal sannum phate silh hi.
- ²³A pasal sia mihing tam ii heak, lampui ngam mite sung pan khat ahi hi.
- ²⁴Ama in puansil le kawngkhaute vawtin vanhzuakte munah zuak hi.
- ²⁵Ama hat a, ngual in thasia in mailam atu a patau bua hi.
- ²⁶Ama in a pau ciang kamneam le ciimkam taw pau hi.
- ²⁷Ama in a tawntungin komla a, a innkuanpuite kisapte vak hi.
- ²⁸A tate in ama thupi a sakna uh lak a, a pasal in pok hi.
- ²⁹A pasal in: “Numei tam mamate in zipha vive hi a, ahihang tuate theampo sung pan nang sia a phabel na hi hi,” ci hi.
- ³⁰Ngaibanna in hong theam thei a, mealhoina zongh bo thei hi, ahihang Topa a zakta numei khat sia kipok tu hi.
- ³¹Ama sep le vawt theampo tungah minphatna pia vun. Ama in mihing theampo ii zatakna a nga tu in kilawm hi.



Thuhilsya

Thuhilsya 1

Nuntakna sia Luithawthong hi

¹Hite sia David ii tapa Jerusalem kumpipa ahi Thuthuk ngaisunpa ii kammalte ahi hi.

²Thuthuk ngaisunpa in a luithawthong, luithawthong hi, ci hi. Nuntakna sia luithawthong, a vekpi luithawthong hi.

³Na nuntak sungah naseam in na diang uh a, ahihang bang teng na lak tu om na ziam?

⁴Khang khat piangin, khang khat bo hi, ahizong simlei sia a om ngei in om hi.

⁵Ni suak kik lai in, tum kik lai a, a sua natu mun ah heak kikin suak kik leleau hi.

⁶Vui zongh thang sangah vasuk,sak sangah vato, a kot a kotin va a, kipan kik nithi hi.

⁷Ngun theampo tuipi sungah luangsuk a, ahihang tuipi dimleet tuan ngawl hi. Ngunte kipatna ah tuite heak kik a, tuaciang kipan kik leleau hi.

⁸Na theampo in hong thin ngimsak a, thin ngimna sia kam taw son zawk hi ngawl hi. Ih mittang in a mu cim thei ngawl a, bil in a zaak cim ngei ngawl hi.

⁹A piang ngei sa tengma piang kikik tu hi. A kiseam ngei sa tengma kiseam kikik tu hi. Simlei tung bup ah a thak bangma om ngawl hi.

¹⁰Amate in, “En vun, hi sungah bang ziam maw a thak khat om hi!” ci uh hi. Hi ngawl hi, a piang ngei sa hi lel hi, ei sua ma pek a, a piang sa hi.

¹¹Hun bo sa sung a thupiangte kuama in ciamtee ngawl a, tu le maisang kilaklaw hun sungah a piang thute kuama in ciamtee tuan ngawl tu hi.

Thuthuk ngaisunpa ii Sin sate

¹²Kei, Thuthuk ngaisunpa sia Jerusalem ah Israel te kumpipa ka hi ngei hi.



¹³Hi leitung ah a kiseam na theampo kanthiang in sin tong ci in tupna ka nei hi. Pathian in eite tungah a ngimhuai haksatna hong pia hi.

¹⁴Hi leitung ah a kiseam theampo ka mu zo a, a luithawthong vive hi ci in kong son hi. Tuasia in vuiva delkot taw kibang hi.

¹⁵A koaite na maam thei bua a, a om ngawl nate na sim thei bua hi.

¹⁶Keima le keima, “Mihing thupi khat ka suak zo a, ka mai ah Jerusalem a ukte sangin ka ciim zaw pek hi. Ciimna le heakna tatak tel ing,” ka kici hi.

¹⁷Heakna le mawmawtna, ciimna le thin ap nate a ki lamdanna kan tu in ka khensat hi. Ahihang vuiva del taw ka kiban tu sia ka he hi.

¹⁸Ciim vaial leang thin ngimna tam vaial a, heak vaial na in hong ngimsak vaial zawsap hi

Thuhilsya 2

¹Lungdamna zongin nuam kasak babangin om tong ci in ka khensat hi. Ahizong hi sia zongh luithawthong hi veve hi.

²Nuina in mawmawt huai a, nopsakna in bangma phattuumna hong pia ngawl ci sia ka mu hi.

³Ciimna ka thangaina in kei hong sasawn a, keima le keima thinnop ka kipiak natu in zu ne in hunnuam zak tu ka khensat hi. Hi leitung ah tawmvei a nuntak hunsung mihingte ngamtat zia tu sia hi sia a pha bel hi vak ci in ka ngaisun hi.

⁴Na lianpite ka seam zo hi. Keima atu in innte ka sa a, sapit huante ka vawt hi.

⁵Huan vawtin thingno ka ciing a, a sungah thingnga kung namcin om hi.

⁶Tuate tuibuak natu in tuikhukte ka to hi.

⁷Sila tam mama ka lei a, ka innsung suak sila tam mama om hi. Jerusalem khua ah a teang ngeite theampo sangin nganno tam zaw ka nei hi.



⁸Ka ukna ngam kumpi sumkholnate panin ngun le khamte ka la hi. Pasal le nupite in la sa in hong ngualnuamsak a, pasal khat ii dik asak numei ka dei zaza ka nei hi.

⁹Hi hi, kei ka lian a, Jerusalem khua ah a teang ngei khat po sangin ka lian zaw a, ka ciimna bo ngei ngawl hi.

¹⁰Ka dei pawpo ka nga hi. Nopsakna a min piang bangma ka kidan bua hi. Ka sep sa theampo tungah ka kisuangtaak a, hite theampo sia ka min phatna tel ahi hi.

¹¹Tuaciang ka sep sa theampo le haksa tak ka sepnate ka ngaisun a, bangma khiakna a nei ngawl hunlam ka phawk hi. Tuasia in vuiva del taw kibang a, ki manna om vet ngawl hi.

¹²Bangbang po ahizong kumpi khat in ama mai a, a seam kumpite ii sep sa teng seam thei bek hi. Tua ahikom ciimna ahibuale maitatna, ahibuale mawmawtnate bangziam cisia ngaisut ka kipan hi.

¹³Oh, he ing, “Khuavak sia khuazing sangin a phat zawk bangma, ciimna sia mawmawtna sangin phazaw hi.

¹⁴Mihing ciimte in a pai natu mun mu thei a, a mawmawte in mu thei ngawl hi,”. Ahihang eite theampo atu in mai sangah a kibangin ih thuak tu thu in hong ngak nginge ci sia zongh ka he hi.

¹⁵Keima in hi bang, “Mihing mawmawte tungah a tung thu sia kei tung zongh ah hong tung tu hi. Tua ahikom ka ciim mama na in bang meetna hong pia ziam?” ci in ka ngaisun hi. Bangma hong pia ngawl hi, na khat beak zongh hong pia ngawl hi,” ci in ka zokik hi.

¹⁶Kuama in mihing ciimte phawk ngawl a, kuama in a mawmawte phawk ngawl hi. Hong pai tu hunte sungah ih vekpi in hong kimangil siat tu hi. A ciim le a mawmaw a kibangin ih thi siat tu hi.

¹⁷Tua ahikom nuntakna in kei atu bangma khiakna nei ngawl hi, banghangziam cile nuntakna in ngimna sim ngawl bangma hong puak ngawl hi. Na theampo a luithawthong hi a, vuiva del bang ahi hi.



¹⁸Naseam in ka thalawte khiakna nei ngawl hi, banghangziam cile ka za hong laih tu sia atu in a nusiak tu ka hi hunlam ka he hi,

¹⁹tuaciang tua pa a ciim ahile, a mawmaw ahi akua in he ziam? Ahizong ka sep ka vawt theampo, ka ciimna ii hi leitung ah kei atu a thalaw theampo ama in lua tu hi. A vekpi a luithawthong ahi hi.

²⁰Tua ahikom nasia tak na ka sep sia ka kisiik hi.

²¹Na khat pawpo atu in na ciimna, na heakna le na thiamna theampo taw naseam a, a zawkciang tua na sia a seam ngawl het khat tungah na nusiak lel tu hi. A luithawthong hi a, maan zongh maan ngawl hi.

²²Na nuntak sungah thin ngim tak ngimin na na sep hangin bang na lak tu om na ziam?

²³Na nuntak laiteng na sep na vawt theampo in thin ngimna le thin natna simngawl bangma dang hong puak ngawl hi. Zan ngawngawn in na mutmawk law hi. A vekpi a luithawthong ahi hi.

²⁴Mihing khat ii a pha bel a sep thei sia neak tu dawn tu le a thalaw sa teng taw a lungkim tu ahi hi. Ahizong, hi sia ngangawn Pathian kung pan hong pai hi, cisia ka phawk hi.

²⁵Tua ngawlin bangbangin neak tu le lungkim natu koisung pan nga thei tu ni ziam?

²⁶Pathian a lungdamsak te tungah Pathian in ciimna, heakna, le lungdamna pia hi, ahihang mimawte ii thalaw sate ama a lungkimsakte tungah a piak thei tu in ama in mawneite na seamsak, sum thalawsakin sum kholsak hi. A vekpi a luithawthong ahi hi. Tuasia in vuiva delkot bang ahi hi.

Thuhilsya 3

Na theampo in Hun nei tek

¹Hi leitung ah a piang na theampo Pathian see sa bangin piang hi.

²Ama in pian natu le thi natu hun, suan tu hun le bawkeak tu hun,

³thalup tu hun le damsak tu hun, phelthap tu hun lesakto tu hun ciangtan hi.



- ⁴Ama in hee natu hun le lungdam natu hun, mau tu hun le lap tu hun,
⁵ki it tu hun le ki etsat tu hun, kinap tu hun le kinap ngawl tu hun, ciangtan hi.
- ⁶Ama in zon tu hun le bosua tu hun, top tu hun le vawk tu hun,
⁷balthap tu hun le phaw tu hun thim dide in om tu hun le pau tu hun ciangtan hi.
- ⁸Ama in it tu hun le etsat tu hun, ngal kisim tu hun le kilem tu hun ciangtan hi.
- ⁹Ih sep ih vawtte theampo pan bang meetna nga hi ziam?
- ¹⁰Pathian in vanh ngitpi eite hong sot ka he hi.
- ¹¹Ama in na theampo atu hun a lem tu in ciangtan hi. Ama in maisang hong pai tu thute heak nopna thin hong pia ahihang ama ii sep le vawtte a cingin hong telsak ngei ngawl hi.
- ¹²Tua ahikom ih nuntak laiteng ih lungdam tu le ih sep thei bang a pha bel ih sep tu ahi hunlam ka he hi.
- ¹³Ih sep thaman taw ne in dawnin, ih nopsak tu ahi hi. Tuasia in Pathian ii letsong ahi hi.
- ¹⁴Pathian ii sep theampo sia a tawntung atu ahi hunlam ka he hi. Bangma belap heak in a, bangma daw k kik heak in. Pathian ii na a sep khat sia ama ih zatak natu ahi hi.
- ¹⁵A piang na khat ahibuale a piang tu na khat sia a piang ngei sa ahi hi. Pathian in na khat sia a kibangin piangsak kikik hi.

Leitungah Thumaan ngawl na

- ¹⁶Tua bek dom ngawlin hi leitungah thutang le thumaan om tu kilawm napi ngitlo khansiatnate na mu sia kei zongh ka mu hi.
- ¹⁷Keima le keima, “Pathian in mihing phate le mihing siate a kibangin thu khen tu hi, banghangziam cile na a kiseam theampo sia a hun a kiciangtan bangin piang tu hi,” ka kici hi.



¹⁸Eite nganhingte sangin ih phat zawk tuan ngawl na hong lak tu in Pathian in eite hong ze et ci in ka khensat hi.

¹⁹A tawpna ah ih thuk tute in a kibangin mihing le nganhing hong ngak hi. Nganhing bangma in mihing zongh thi hi. Amate in a kibangin nuntakna hu nei hi. Mihing khat sia nganhing khat sangin phazaw tuan ngawl hi, banghangziam cile amate atu in nuntakna in khiakna nei ngawl hi.

²⁰Amate mun khat zuankhawm tu a, leivui suak tu uh hi. Amate leivui pan hong paikhawm uh a, leivui ah ciakhawm kik tu uh hi.

²¹Banghangin khat po in mihingte ii thaa sia tungsang zuanto a, nganhingte ii thaa ahile leinuai zuansuk hi, ci in tel thei tu ziam?

²²Tua ahikom ih sep thei a pha bel sia ih sepsa tungah ih lungkim thei tu ahi sia ka phawk hi. Ih vawt thei dang bangma om ngawl hi. Ih thi zawkciang bang suak tu cisia ih heak thei natu lampi om ngawl hi.

Thuhilsya 4

¹Tuaciang hi leitung ah a piang thumaan ngawl na theampo ka en kik hi. A kisiatvawtte kakap a, kuama in hu ngawl hi. Kuama in amate hu ngawl tu hi, banghangziam cile amate a siatvawtte in thahatna nei hi.

²A thi le a bo sate ka eang hi, a nungta laite sangin amate nuamsa zaw pek hi.

³Ahihang tuate sangin a hamphazaw laite sia hi leitung ah a piang thumaan ngawl a mu ngei ngawl, a piang ngawllaite ahi hi.

⁴Mihingte in ngual a zaw natu in banghangin nasia tak na seam ziam ci zongh ka tel zo hi, banghangziam cile a innpaamte a een hang ahi hi. Ahihang tuasia in a luithawthong ahi hi. Tuasia in vuiva del taw kibang hi.

⁵Mihing khat pukthi liang dongin leekoai in a omcipna sia mawmawt vai hi, amate in ci hi.

⁶Tua zongh hi thei tha tu hi, ahihang vuiva man nuam a, khut nii taw komlaak tawntung sangin thinnopna taw, tawmno ih nei sia phazaw hi.

⁷Nuntakna sungah luithawthong ahi, thu dang khat zongh ka mu hi.

⁸Hi sungah ama nguakin a teang khat om hi. Ama in tapa le nei ngawl, suapui le nei ngawl hi kale ama sia na seam tawntung a, bangma hunin a hauna taw lungkim ngei ngawl hi. Ama le ama nopsaknate nialin, akua atu in nasia takin na seam ziam? Tuasia zongh luithawthong hi a, tuaciang a ngim huai mama nuntakzia ahi hi.

⁹Khat sangin nii phazaw hi, banghangziam cile amate ngeal in a kizen zaw in na seam khawm thei hi.

¹⁰Amate khat a puk le a dang khat in phongto thei hi. Ahihang khat nguak a om khat sia puk le manhsa hi lel hi, banghangziam cile kuama a hu tu om ngawl hi.

¹¹Khua a sik le nii lumkhawm leang khualum thei hi, ahihang nang nguak bangbangin na khua lumsak thei tu ziam?

¹²Khat nguak ii lel tu kisimna sia nii in zo thei hi. Khauzam thum taw a kipheak khauzeen sia a tat tu haksa hi.

¹³⁻¹⁴Mihing khat sia zawnna panin a ngam ii kumpi suak tu in khangto thei a, ahibuale thonginn pan kumpi tokhum dong kaato thei hi, ahizong a khan haam ciang ngual ii ngaisut pha piakte saan ngawl tu dongin a mawmaw le, tua pa sangin khangmoi a zawng a pil khat phazaw hi.

¹⁵Hi leitung ah a teang mihing theampo ka ngaisun a, amate sungah kumpipa ii dinmun a la tu khangmoi khat a om sia ka phawk hi.

¹⁶Kumpipa khat ii a uk mihingte sia kisim zo ngawl tha tu a, ama a thi zawkciang ama nasep sate hangin a lungdam khat beak om ngawl tu hi. Tuasia in luithawthong ahi hi. Tuasia in vuiva del bang ahi hi.

Thuhilsya 5

Kamciam Pia Memeang Heak in.

¹Biakinnpi ah pai tu kidawm in. Tua munah pai in thusin tu sia, a maan le a maan ngawl a he ngawl mihing mawmawte ii sangaw biakpiakna sangin phazaw hi.

²Na pau ma in ngaisun phot in a, Pathian tungah kamciam vawt memeang heak in. Ama sia vantung ah om in, nang sia leitung ah om a, tua ahikom na pau tu za sangin a tam zaw pau heak in.

³Na thin ngimna a tam zaza in na mang sia vaial tu hi. Kam tam na pau zaza in mawmawt kamte na pau tha tu hi.

⁴Tua ahikom Pathian tungah kamciam na piak ciang, a man lalangan tangtungsak in. Ama in mihing mawmawte diksa ngawl hi. Na kamciam bangin vawt in.

⁵Kamciam pia a, nasep ngawl sangin kamciam piak awl lete phazaw hi.

⁶Khial tha ing ci in Pathian thiampipa mai ah na son kul tu ahikom, na kampauna in khialna sung thensak heak in. Banghang na tungah Pathian thin uuksak ni ziam? Nasep sa theampo ama in banghang laltham siatsak ni ziam?

⁷Bangza in mang na man a, bangza in a luithawthong nasep naseam zong, ahibuale bangza in na pau hial zong, Pathian na zatak veve kul lai tu hi.

Nuntak sia Luithawthong hi

⁸Kumpite in mizawngte vawtsia in amate hamphat natu te danh in thumaan ngawlin thu a khen na mu ciang lamdang sa heak in. Ulian khat pawpo sia a tung sia a ulian sia in vuumsit a, amate ngeal sia a tung sawn a sia in vuumsit lalai hi.

⁹Kumpi khat ngawngawn in thaw an suang hi.

¹⁰Sum na it le na lungkim ngei ngawl tu a, hau tu na lunggul le na dei theampo na nga ngei buatu hi. Tuasia in a luithawthong ahi hi.

¹¹Na hau vaial le na vaak tu tam vaial tu hi. Na meet belna sia na hau hunlam na heak sia bekma hi tu hi.

¹²Naseam khat sia a neak khom tu zongh nei thei a, nei ngawl thei si hi, ahizong ama sia zanin a mut nuam lel hi. Sumhaupa sia, nei leilam ahikom thin ngim a, zanin mutthip thei ngawl hi.



¹³Hi leitung ah a lauhuai ka mu thu khat om hi: mihingte in a ki taangsap uh ciang a zak tu in a sum tawm uh hi,

¹⁴tuaciang nasep pha ngawl khat tungah sumhcip in a tate atu zongh bangma kheet ngawl hi.

¹⁵Hi leitung ah pumnguak in ih sua bangma, pumnguak in ih nusia hi. Bangza po ih seam zong ih ken thei bangma om ngawl hi.

¹⁶Hi thu maan ngawl hi! Ih pai lai bang lianin ih cia kik hi. Na ih seam a, vui man tu in ih hanciam hi, ahihang bang nga na hi ziam?

¹⁷Eite sia khua zing sungah heena, thin ngimna, thin uukna le cinat thuakin ih nungta hi.

¹⁸Hi sungah ka phaw thu om hi: Pathian ii hong piak nuntak tomno sungin ih sep thaman ne in dawnin, nuamsa in ih om tu sia a pha bel ahi hi. Hisia in mihing ii thuak tu nuntakzia ahi hi.

¹⁹Pathian in mihing khat hauna le neisa lamhsa pia in tuate tungah a lung a damsak le ama sia lungkim in a sep a vawt tungah nuamsa tu hi. Hisia in Pathian letsong ahi hi.

²⁰Pathian in ama lungdamsak ahikom, a nuntakna a tom hunlam thin ngim leilam ngawl tu hi.

Thuhilsya 6

¹Hi leitung ah a nasia mama a maan ngawl a thutanna khat om cisia ka mu hi.

²Pathian in mihing khat sia hauna, min phatna le neisa pia hi, hi hi, a dei theampo pia hi, ahihang tua vanhte tungah nopsakna pia ngawl hi. Khualmi khat po in nopsak law tu hi. Tuasia in a luithawthong ahi hi, maan ngawl het hi.

³Mihing khat in ta zakhat nei in, a khansau kale, bangtan vei po a nungta zong, ama ii tel tu lungdam na a nga bua a, a thi ciang pha tak a kiphum buale, nausen a thisa in a suak sia phazaw lai hi, ka ci hi.



⁴Tua nausen a sua hu in phattuumna om ngawl hi; ama sia khuazing sungah bo in kimangil hi.

⁵Tua nausen in sun khuavak sia mu ngei ngawl a, nuntak zongh bangbang hi ci in he ngawl hi, ahihang ama in a no belin tawlngakna a mu hi.

⁶Ama in kum tulnii nungta kale, a nuntak sung thinnopna a nei ngei buale a thi sa a suak tua nausen sia phazaw hi. A tatak ci leang amate ngeal in a zot natu mun kibang hi.

⁷Mihing khat in bang khat po a neak thei natu in naseam ahihang a kicing in nei ngei ngawl hi.

⁸Bangbangin mihing ciim khat sia a mawmaw khat sangin nuamsa zaw ziam? Mizawng khat in nuntak natu zia a heak hangin bang phatuam ziam?

⁹Tuasia in a luithawthong hi. Tuasia in vuiva delkot bang ahi hi. Na neisa taw na lungkim tu sia, na dang dei tawntung sangin phazaw hi.

¹⁰Na a piang theampo sia taanghtawng lai pan a piang tu in a kisp sa hi a, mihing khat in ama sangin a hat zaw mihing khat ii kam nial thei ngawl ci sia ih he siat hi.

¹¹Na nial vaial le a luithawthong hi vaial a, nang sia phazaw tuan ngawl ni hi.

¹²Nilim bangin a papai nuntakna sia a luithawthong ama nuntakna hi a, a tom a nuntak sungah mihing atu a phabel sia akua in he thei tu ziam? Bangbangin mihing khat in a thi zawkciang leitung ah bang thu piang tu cisia he thei tu ziam?

Thuhilsya 7

Nuntakna huvau Ngaisutna

¹Min phatna sia a manham paaknamtui sangin phazaw a, na thi ni sia na sua ni sangin phazaw hi.



²Khuangaina inn ah pai sia poai vawtna inn ah pai sangin phazaw hi, banghangziam cile a nungta lai eite theampo thina in hong ngak nginge hi cisia hong phawksak hi.

³Heena in nuina sang phazaw a; na mai hong khingsak tha tu ahitazong, na heakna khangsak hi.

⁴Lungdamna thu a ngaisun tawntung mihing sia mihing mawmaw ahi hi. Mihing ciim khat in thina thu ngaisun hi.

⁵Mihing nawmte ii pokna la hong sak sangin mihing ciimte ii hong teih sia phazaw hi.

⁶Mihing mawmaw khat a nui ciang, mei sungah lingkung hal puak vazak bang ahi hi. Bangma khiakna nei ngawl hi.

⁷A ciim khat in mihing khat pawpo a theam ciang a mawmaw khat bangin ngamta suak hi. Sumnguk na ne le na ngamtatzia lalsak, na hi hi.

⁸Na khat pawpo ii a tawpna sia a kipatna sangin phazaw hi. Thin sauna sia kiphatsakna sangin phazaw hi.

⁹Na thin tomna uk in; diksak ngawlna nei tu sia mawmawt huai hi.

¹⁰“Oh! banghangin nidang in na theampo phazaw ziam?” ci in dongh peuma heak in. Tua in pil thudok hi ngawl hi.

¹¹Mihing nungta peuma sia a ciim tu kismh a, tua in ngamh lua bangza in pha hi.

¹²Sum in hong thin nopsak bangin ciimna zongh in hong thin nuam sak hi. Ciimna in hong keamcing a, hi sia in heakna ii phattuamna ahi hi.

¹³Pathian ii sep sate ngaisun in. Pathian ii a koaisak sate akua in bangbangin maam thei tu ziam?

¹⁴Nang atu in nate a dik a pha in a pian ciang lungdam in a, ngimna hong pai ciang ciamtee lel in: Pathian in lungdamna le ngimna pia khawm a; a zawkciang bang piang tu ci, na he ngei bua hi.



- ¹⁵Ka nuntakna sia a luithawthong hi a, ahizong ka nuntak sungin thu theampo ka mu zo hi. Mihing khat sia pha napi thi a, a dang khat sia, sia napi nungta hi.
- ¹⁶Tua ahikom pha lei heak in a, ciim lei heak in— banghangin nangma le nangma ki thatlum tu ni ziam?
- ¹⁷Ahizong ngilo lei heak in a, mawmaw lei heak in— banghangin na hun a tun ma in thi tu ni ziam?
- ¹⁸Tua a leilam te ngeal pial in. Pathian na thasia le na maa vang tu hi.
- ¹⁹Khuapi uk mihing sawmte ii khuapi khat atu a vawt thei sangin ciimna in mihing khat atu tam vawt zaw hi.
- ²⁰Leitung ah a maan bek seam tawntung in, khialna khat a vawt ngei ngawl kuama om ngawl hi.
- ²¹Mihingte ii thuson theampo ngai heak in— na naseampa ii hong sonsiatna za tha tu ni hi,
- ²²Nangma zongh in midangte tamvei mama na sonsiat sia kihe nginge ni hi.
- ²³Hite theampo ahile ahi ngawl khentel tu in ka ciimna ka zangh hi. A ciim tu ma in khensatna ka nei hi, ahizong kei hi zawk hi ngawl hi.
- ²⁴Nuntakna ii a khiakna akua in mu thei tu ziam? Tuasia eite atu in thuk lei a, heak tu in haksa lei hi.
- ²⁵Ahihang keima in pilna, thiamna heak natu in ka ki aap a, pilna mu in, thupiangte a hang ka heak natu, pil ngawl na sia bangza in ngitlo huai a mawmawt huai ziam ci thu heakna tu in nasia takin ka hanciam hi.
- ²⁶Thina sangin a khaa zaw khat ka mu hi— tua in numei ahi hi. Ama ii hong itna in thaang bang ahibuale ngeen bangin nang hong man tu a, ama hong koaina in thikkhau khat bangin nang hong heencip tu hi. Pathian deina bangin a ngamta sia in tuabang numei pial thei a, ahizong a khial sia, a thaang sungah awk hi.



²⁷Hi hi, hi thute ii a khiakna ka zazon ciang tawtawm in ka mu hi. Thuthuk ngaisunpa in ci hi.

²⁸A khiakna dang ka zon hangin ka mu bua hi. Tulkhat sungah ka zatak tu pasal khat ka mu thei hi, ahizong numei khat zongh ka mu bua hi.

²⁹Hisia in ka sin theampo ahi hi: Pathian in eite a thumaan tu in hong vawt hi napi paulap tuatuam zongin eima le eima ih kikai awksak hi.

Thuhilsya 8

¹Nate ii khiakna tatak sia mihing ciim khat bek in he hi. Ciimna in ama maitaisak a, a mai siatna teng bosak hi.

Kumpipa Thu ni in

²Kumpipa ii ci bangin vawt in a, Pathian tungah kamciam pia memeang heak in.

³Kumpipa in a uk po vawt thei a, tua ahikom ama omna pial in; tuabang a lauhuai munah om heak in.

⁴Kumpipa in a thu neina taw ngamta a, ama sepna sia kuama in thato thei ngawl hi.

⁵A thupiakte na nit lai tengin ngimna na thuak buatu a, tuaciang mihing ciim khat in koibang le banghun ciang vawt tu ci sia he hi.

⁶Na theampo vawt natu a hun maan le sepzia maan om a, ahihang ih heak thu tawm lei hi!

⁷Bang hong piang tu cisia kuama in ih he bua a, ei hong son tu kuama om ngawl hi.

⁸Kuama in thina pial thei ngawl a, a thi tu ni khangkhan thei ngawl hi. Tua in ih pial thei ngawl ngal kisimna khat hi a, ih ngel ku thei bua hi.

Khansiate le Thutangte

⁹Hi leitung ah a kivawt sate ka ngaisut ciang hite theampo ka mu a, hi leitung ah mihing pawl khat in thahatna nei a, pawl khat te in tuate khutnuai ah thuak uh hi.



¹⁰Hi hi mi ngilo khansiate amate thaankuul sungah kiphum ka mu a, ahihang thaannual pan a cia kik uh ciang a phum mihingte in amate ii khansiat a vawtna, khuapi sung mama ah amate pok uh hi. Tuasia in a luithawthong ahi hi.

¹¹Banghangin mihingte in ol vazeang in khutkhial ziam? Banghangziam cile khut khialna sia man lalang in daan a kipiak ngawl hang ahi hi.

¹²Mihing khial khat in khut khialna zakhat vei vawt a, ahizong nungta veve hi. Oh, hi hi, amate kampau nate ka he a, “Pathian thu na ni uh le na theampo a pha in piang tu hi,

¹³ahizong mihing ngilote atu in phatna om ngawl tu hi. Amate ii nuntak hun sia nilim taw kibang a, Pathian thu ni ngawl ahikom amate khanthi tu hi,” ci hi.

¹⁴Ahihang hite nawnsan thu ahi hi. Leitung ah bang thu piang ziam ci sia en vun; khat vevei mihing thutangte in misiate ii thuak tu daante thuak a, misiate in thutangte min phatna tel nga hi. Hisia in a luithawthong hi, ka ci hi.

¹⁵Tua ahikom mihing khat in a nuntak sungin nuam asak tu ngawl a dang om ngawl ahikom anne, tuidawn in, a lungkim tu bek a hina ka he hi. Pathian in hi Leitung ah nuntakna a piak hun sung teng, ama in a sep thaman nga thei tu hi bek hi.

¹⁶Ciim tu hanciam in hi Leitung ah bang piang cisia ka tel ciangin sun zong zan zong mu ngawlin na om thei sia ka phawk hi,

¹⁷tuaciang Pathian in bang seam cisia ka tel zo bua hi. Bangza po na hanciam bel hang na tel zo ngei buatu hi. Mihing ciimte in he kisa tha tu hi, ahihang amate he ngawl uh hi.

Thuhilsya 9

¹Hi thute theampo khua ngeipi le nasia takin ka ngaisun a, Pathian in mihing ciimte le mihing thutangte ngamtatna te, amate ki itna le kihuatna ngangawn uk hi cisia ka phawk hi. A mai ah bang om ziam ci sia kuama in he ngawl hi.



²A kilamdanna om tuan ngawl hi. Thutangte le a ngilo te, a phate le a siate, biakna hanciamte le a awlmaw ngawlte, sangaw biakpiakna a vawtte le a vawt ngawlte tungah a kibangin thina theng hi. Mihing pha khat sia mihing khial khat taw ki tumdang ngawl a, tom lo in a kiciam khat le a kiciam ngawl khat kitumdang tuan ngawl hi.

³Thina sia mihing theampo tungah a kibangin tung a, hi thu mama zongh, leitung ah a piang na dangte bangma in maan ngawl hi. Mihingte a nuntak laiteng a thinsung uh sia siatna le mawmawtna taw kidim a, amate thakhat thu in thi uh hi.

⁴Ahizong leitung ah a nungta khat pawpo in lametna pawlkhat nei a, ui nungta khat sia tawpi thi sa khat sangin phazaw hi.

⁵Hi hi, a nungtate in a thi tu uh he a, ahizong a thite in bangma he ngawl hi. Amate in min phatna tel bangma nei tuan ngawl a, amate kimangil cip hi.

⁶A ki itna, a kihuatna, cii le sa uukna te a vekpi in amate taw thi khawm hi. Hi leitung ah a piang nate khat pawpo sungah amate kihel kik nawn ngawl hi.

⁷Pai in, na an ne in a, lungdam in; na zu ne in maitai in. Pathian in dik sa hi.

⁸A tawntung lungdam in, maitai in.

⁹Pathian hong piak hi leitung ah a mannung ngawl na nuntak hunsung teng na it numei taw a nuamin nungta in. A mannung ngawl nite a nuamin zangh in, banghangziam cile, tuasia bekma na ngim thaman na saan tu hi tu hi.

¹⁰Na sep pawpo hanciam in seam in, banghangziam cile mithite ngamah, tukna, dianna om ngawl, khua ngaisutna, heakna, ciimna om ngawl tu hi—tua mun sia na zotna tu mun ahi hi.

¹¹Thudang khat zongh ka he lai hi, hi leitung ah tai ngang theampo in zawna nga tawntung ngawl a, ngalhang theampo in ngalzo tawntung ngawl hi. Mihing ciimte in nuntak natu thalaw tawntung zo ngawl a, mihing pilte zongh hau tawntung ngawl hi, hi theina a nei theampo dinmun sang theng tuan ngawl hi. Kaamsiatna sia mihing theampo tungah tung hi.



¹²Na hun hong thet tu na he ngei bua hi. Thakhat thu in vacimte thaang sungah a kimat bang, ngasate ngeen taw a kimat bangin, eite zongh ih muanmawk ngawl het laitakin thaang sungah hong kiman hi.

Ciimna le Mawmawtna tungtaang Ngaisutna

¹³Nadang khat ma ka mu a, ciimna sia hi leitung ah a thupi in a kingaisut zia ahi hi.

¹⁴Khuapino khat om a tua sungah mihing tam teang ngawl hi. A thahat kumpipa khat in tua khuapino sim hi. Ama in uumci a, a luphungte sutham tu in kipan hi.

¹⁵Tua khua ah mizawng ahihang khuapino khat a hu zo tu mihing pil mama khat teang hi. Ahizong kuama in ama phawk ngawl hi.

¹⁶Ciimna sia hatna sangin phazaw hi ka ci tawntung hi, ahizong kuama in mizawngpa sia mihing ciim in ngaisun ngawl a, ama paunate kuama in nadon ngawl hi.

¹⁷A kamneam mihing ciim khat ii pauna sia mihing mawmaw hon khat kikhopna sungah a lampuipa auna ngai tu sangin phazaw hi.

¹⁸Ciimna in ngalhiamte sangin a pha seam thei zaw a, ahizong mihing khial khat in na pha tam mama lalsak thei hi.

Thuhilsya 10

¹Tho thi sate in paaknamtui bungbup khat uisak thei a, mawmawtna tawmno khat in ciimna lian bel siasak thei hi.

²Mihing ciim khat in a maan khat a sep tu le, a mawmaw khat in a maan ngawl a sep tu sia a ngeina ahi hi.

³Ama mawmawtna sia lampi ah a kisikpui khual mite ngangawn in tel pai a; ama mihing mawmaw ahi hunlam mihing theampo in hesak hi.

⁴Nang hong ukpa na tungah a thin a uuk le nasep tawp tu ngen heak in; thim dide in na om le a nasia khialnate zongh kimaisak thei hi.



- ⁵Hi leitung ah a dik ngawl thu khat ka mu a — ngamukte ii a kilawm ngawl ngamtatna ahi hi.
- ⁶Mihing mawmawte thu neina dinmun kipia a, mihaute kimel sia hi.
- ⁷Silate siphu tungah to a, kumpinamte silate bangin peang taw vak ka mu hi.
- ⁸Dum na to le a sungah na taak tu a; luphung khat na sulet le ngul khat in nang hong tu tu hi.
- ⁹Suangkhuk ah na na seam le suang taw na liam tu hi. Thing na ek le tua nasepna taw na liam tu hi.
- ¹⁰Na hei a mawl a, na taat buale na zak ciang na nasep haksa zaw tu hi, maisang atu zeak khol sia pha hi.
- ¹¹Ngul ai thiam napi na tusak masa a, ahile ngul ai na thiam sia a phat tuamna om ngawl hi.
- ¹²Mihing ciim khat ii kampauna in ama min phasak a, ahizong mihing mawmaw khat sia ama kammal ma in siasak hi.
- ¹³Ama in a mawmawt huai kampau a, mawmawt kam taw khup hi.
- ¹⁴A mawmaw khat sia papau in lului hi. Kuama in maisang thupiung tu he ngawl a, ih thi zawk ciang bang suak tu cisia kuama in hong son thei ngawl hi.
- ¹⁵Inn lam a zong kik thei ngawl, a mawmaw leilam khat sia a nasepna taw zawm law tu hi.
- ¹⁶Ngam uk kumpipa khangmoi lai in, ngam lampuite in zan tha pai in poai a khaam uh le, tua ngam sia ngim nga hi.
- ¹⁷Ahizong kumpipa in ama thu in thu a khensat thei a lampuite in a hun maanin an ne in, amate le amate zu khamcip ngawl natu, a ki uk zo le tua ngam sia a hampha ngam ahi hi.
- ¹⁸Pasal khat a datham lei in a innkhum a pua buale a inn kuai tu a, a inn cimh tu hi.



¹⁹Poai khaamna in nang hong lungdamsakin, zu in hong maitaisak hi, ahizong khat zongh sum ngawl taw na nga thei bua hi.

²⁰A thimtham in kumpipa son sia heak in a, sumhaupa sia na aituam lupna khansung zongh ah sonsia heak in. Vacim khat po in na pau teng amate thu puakin son tha tu hi.

Thuhilsya 11

Miciim khat ii Sep

¹Na sumte ngamdang taw sum vawtna ah zangh in, tua hile ni khat ni ciang a meet nga tu ni hi.

²Na sumte mun tuatuam ah koi in a— mun tam mama ah sum vawt in— banghangziam cile hi leitung ah bang kaamsiatna thuak tu cisia na he bua hi.

³Thingkung khat sia, koisang po ah a puk zong poimaw ngawl hi, a puna mun ah om tu hi. Meei te a niim ciang nguazu hi.

⁴Vuite le khuahunte a phat dong ngakin na om le bangma hunin an na ciing ngei buatu a, bangma hunin an na la ngei buatu hi.

⁵Pathian in na theampo vawt a, ama sep le vawtte numei naupaai khat ii sulh sungah nuntakna thak khat a kipat na tel zawk ngawl bangin na tel zo bua hi.

⁶Zing ahizong nitak ahizong an ciing in. A pha in po tu maw, ahibuale anciin hun khat sia hun khat sang phazaw tu cisia na he ngei bua hi.

⁷Sun khuavak nuam nasak thei sia thupha ahi hi.

⁸Na khan a sau le na nuntak sung lungdam in om in. Bangtan vei na nungta zong khua ngei zaw thi tu na hi sia phawk in. Mai sangah lamet tu bangma om ngawl hi.

Khangnote Ngaisut Piakna

⁹Khangnote awng, na khangmoi hun nuamsa vun. Na khanmoi lai in lungdam vun. Na vawt nop po vawt vun a, na thin ii dei babang zui vun. Ahihang Pathian in na vawtna tungah thu hong khen tu cisia ciamtee tavun.



¹⁰Bangma in thin ngimsak heak vun a, bangma in nasak heak vun, khangmoi hun khuangei ngawl tu nu hi.

Thuhilsya 12

¹Na thinngim tu ni le a kum hong thet ma, “Nuntak paw nuamsa bong” na ci ma, na khangmoi lai in nang hong Bitphuapa phawk in.

²Tua hun sia, ni le tha le aksite ii tanna nang atu in a dial hun le ngua meei a ven nawn ngawl hun ahi hi.

³Tuasia ciang nang hong dal na baante liing tu a, tu laitak a, a hat na peangte tha zawm tu hi. Na hate na an thai tu in tawm lei tu a, na mitte mangin khua pha tak na mu thei buatu hi.

⁴Na naa ngong tu a, lampi ah awngingte na za buatu hi. An ngoaina sette a kingoai ciang ahizong, tumtheite a kitum ciang ahizong, nakheng phaksap vamial in na za tu a, ahizong vacim khat po haam in na mut hong phawng tu hi.

⁵Mun saangna ah na kiinta tu a, na lampai ciang lauhuai tu hi. Na puakkaang tu a; nangma le nangma kikai vakiat in, na uuk theampo bo tu hi. Eite in a khakbel ih tawlngak natu mun ih zuan tu a, lampite ah mauna om tu hi.

⁶Ngunkhau tat tu a, kham meiinn taaksuk in tamtham tu hi; tuikhuk ah khauzeen sia tatin tuibeal zantham tu hi.

⁷Ih pumpite leivui ah cia kik tu a, ih thaa ahile nuntakna hong pia pa Pathian kung zuan kik tu hi.

⁸Luithawthong, luithawthong, Thuthuk Ngaisunpa in ci hi. A vekpi a luithawthong ahi hi.

Thu Ngawmtuana

⁹Thuthuk Ngaisunpa sia ciim ahikom ama in a heak thute mihingte tungah hil hi. Ama in paunakte encian a, tuate a maanna sittel hi.

¹⁰Thuthuk Ngaisunpa in a zaaknop huai in thuson a, a at kammalte maan tatak hi.

¹¹Mihing ciimte ii paunakte sia tuucingte ii tuute a cinna tu a, a zak ciangzumte bang hi a, a khoptua paunakte sia khotak a a kikhen thikpimte bang ahi hi. Tuata sia eite theampo hong cing ih tuucingpa Pathian ii hong piak ahi hi.

¹²Ka tapa awng, kidop tu thudang khat omlai hi. Laibute a ki at sia tawp hun ci om thei ngawl a, lai tam lei simna in pumpi thazawmsak hi.

¹³Hite theampo zawkciang son tu thu khat bek omlai hi: Pathian thasia in a, a thupiakte ni in, banghangziam cile hite theampo sia mihing a ki bitphuana thu ahi hi.

¹⁴Pathian in ih sep ih vawtte theampo, a pha ahizong, a sia ahizong, ih vawt kute ngangawn dongin thu hong khen tu hi.



Solomon ii La

Solomon ii La 1

¹Solomon ii phua la a pha bel teng

La A ngui Khatna

Ngaknu iisak

²Na muk taw nong namh a, nong itna in zu sangin thum zaw hi.

³Na pum tungah a namtui na khat om a, na min in tuasia ma phawlo hi. Nang hong it thei ngawl numei om ngawl hi.

⁴Hong pui tan a, ih tai tu hi; ka kumpipa hong hi tan a, na innkhan sungah hong paipui tan. Ih lungdam khawm tu a, nasia tak dawn khawmin, ki itna sungah suakta takin ih omkhawm tu hi. Numei theampo ii nang hong it sia lamdang ngawl hi!

⁵Jerusalem numeite awng, kei ka ci vom hi, ahihang ka meal pha hi. Kedar a senneal ngam tui puanbuk bangin vom ka leng Solomon ii kumpi inn sungah puankhaite bangin ka mealpha hi.

⁶Ka ciivom hu in, hong nomu heak vun, banghangziam cile nisa ka thuak hang ahi hi. Ka suapui pate in kei tungah hong thin uuk ahikom sapit huan sungah na hong seamsak hi. Keima le keima ka kipua tu hun ka nga bua hi.

⁷Kong it ka lawm awng kei hong son tan, na ngannotate koi sungah na tha tu ziam? Sunkim nisa ciang koi sungah tawlna tu ni ziam? Tuucing dangte ii tuuhon kawm ah banghang kong zon kul tu ni ziam?

Tangval iisak

⁸Numei sung pan a it huai bel awng, a mun he ngawl ni ziam? Pai in tuuhonte zui tan; na kealte atu in tuucingte ii buk hui ah lo hingna mun zong tan.

⁹Kong it ngaino awng, Pharaoh ii ngalleang a kai siphutalte a thin thosak siphupui bangin pasalte thin na thosak hi.



¹⁰Na sam sia na biangkho tungah hoi niingniang a na ngawng kiim ah suang manphate bangin kibaang hi.

¹¹Ahihang nang atu in khamkhi ngui khat ih vawt tu a ngun kizepna taw ih zeam tu hi.

Ngaknu iisak

¹²Ka kumpipa sia a lupna tungah lum a, ka paaknamtui ngim kizel hi.

¹³Ka lawmpa ka awm tungah hong lup ciang myrrh ngim namtui nam hi.

¹⁴Ka lawmpa sia Engedi sapit huante sungah a palh duisung paakte bang ahi hi.

Tangval iisak

¹⁵Kong it ka lawm awng bangza in na mealpha ziam; na mittangte bangza in it huai wakil ziam?

Ngaknu iisak

¹⁶Kong it bel awng, na etlawm mama a, nong lungkimsak mama hi! Lopa hingte ih lupna hi tu a;

¹⁷Cedar thingte sia ih inn thulnuai hi a, cypress kungte ih innciing dap hi tu hi.

Solomon ii La 2

¹Keima in Sharon ah ngampaak khat ka hi lel a, mualkuam ah unok paak khat ka hi lel hi.

Tangval iisak

²Ling kawm a unok paak khat bangin numeite sungah ka lawmnu om hi.

Ngaknu iisak

³Ka it bel ka lawmpa sia tangval dangte taw teengat ciang thingtang sungah apple kung khat taw kibang hi. Ama limnuai ah ka to nuam a, a nga sia thum ka sa hi.



⁴Ama in a an neakna innpi sungah kei hong paipui a, itna mai taw hong en hi.

⁵Lungzuan duangvul ka hikom sapit nga kote taw ka tha hong dimsak tan a, apple nga taw hong thak sua tan!

⁶A baan veisang hong khamsak a a ziatsang khut taw hong koai hi.

⁷Jerusalem numeite awng, ka ki itna nong pheltan ngawl natu in a zuanngang sazukte le sazate min lo in kei hong kamciam tavun.

La A ngui Niina

Ngaknu iisak

⁸Ka it ka lawmpa ii aw ka za hi. Ama sia mual tungah tai kawmin hong pai a, mualbaw note kantan in ka kung hong zuan hi.

⁹Ka it ka lawmpa sia saza khat bang, sazuk moi khat bang ahi hi. Ama sia ka innpang kungah ding hi. Ama in kongkha pan puankhaite paillet in innsung sang hong en hi.

¹⁰Ka it ka lawmpa in kei hong paupui hi.

Tangval iisak

Ka it ka lawm awng, hong pai tan, ka lawmnu awng hong pai tan.

¹¹Phalbi bo zo a, nguatui kang zo hi;

¹²ngam sungah paakte palh hi. Hi hun sia lasak hun hi a, lo sungah vakhute kuul kiza hi.

¹³Theite min tu kipan a, sapit paak ngim namtui zongh kiza zo hi. Tua ahiciang hong pai tan, ka it ka lawm awng; Ka lawmnu awng hong pai tan.

¹⁴Nang sia suanghawng kawmah a buu vakhu khat bang na hi hi. A ngaibaang na meal hong musak tan a, a lungzuan huai na aw hong zasak tan.

¹⁵Ih sapit nguite paak zo ahikom ngia honte ii a lalcipsak ma in ngiano honte man in.

Ngaknu iisak



¹⁶Ka lawmpa sia keima aa hi a, keima in ama aa ka hi hi. Ama in a nganhonte unok paak sungah,

¹⁷zinghui a vak vahiau ma le khuavak mahiat dong cing hi. Ka lawmpa awng, Bether mual lian tungah a om saza khat le sazuk moi khat bangin hong heak kik tan.

Solomon ii La 3

¹Ka lupna tungah ka lum a zan simin, ka it ka lawmpa ka mang in ka manh hi. Ama ka zong a, ahihang ka mu zo bua hi.

²Khuapi sungah ka vavak a, a lamliante le a lamzinte kantan in, ka it ka lawmpa ka zong hi, ahizong ka mu zo bua hi.

³Khuapi a cing ngalvilte in kei hong mu hi. Amate tungah “Ka lawmpa na mu uh ziam?” ci in ka dongh hi.

⁴Amate ka nusiak po ciang ka lawm pa ka mu hi. Ama ka lencip a, ka nu ii inn sung ka suana innkhan sung ka thet pui dong ama ka thasua bua hi.

⁵Jerusalem numeite awng, ko ii ki itna nong pheltan ngawl natu in, a zuannang sazukte le sazate min lo in kei hong kamciam tavun.

La A ngui Thumna

Ngaknu iisak

⁶Senneal ngam pan meikhu khuam khat bang, ngim namtui le sum vawtte ii zuak paaknamtui bang, myrrh thingnaai namtui taw hong pai sia a bang ziam?

⁷Solomon kumpipa a kumpi tokhum tungah to in, kizawng in hong pai hi. Israel ngam a ngalkap pha bel sawmlukte in cing uh hi.

⁸Amate theampo namsau zak thiam tek hi. Amate sia ngalsim a thiam ngiingeei sa ngalkap luite ahi uh hi. Zanin a sim a om le a do tu in amate namsau khat tek toai uh hi.

⁹Solomon Kumpipa sia a pha bel thing taw a kivawt kumpi tokhum tungah to in, kizawng hi.



¹⁰A khuamte sia ngun taw kizeam a; a tungah kham taw a kizeam puan kikoi hi. A tophate sia Jerusalem numeite ii itna takpi taw a taa puan sannum taw kituam hi.

¹¹Zion numeite awng hong pai tavun a Solomon Kumpipa en vun. Ama in a zi nei ni, a lungdam ni le a thinnop ni in a nu ii a lu tungah a khuhsak kumpi lukhu sia khu hi.

Solomon ii La 4

Tangval iisak

¹Kong it ka lawmnu awng, na meal pha lawlawm hi! Na mai sealna dial ii nungah a it huai na mittangte tee vaset hi. Na sam sia Gilead mualpangh suk a, keal hon tai bangin kithing hi.

²Na hate sia a mul a kimeet tawm, a kisil thiang tuute bangin paak hi. Khat beak zongh kisam peal ngawlin kikim diimdiam hi.

³Na mukte puansan khaupheang khat bang hi a; na pau ciang bangza in etlawm ziam? Na biangte sia na kisealna dial nungah san sitset hi.

⁴Na ngawng sia ngalhangte zak lum tulkhata a kikhai zeizoina ngil kilkel in a beam David ii tusaang taw kibang hi.

⁵Na noaite sia unok paak kawm ah an ne a, a taa khawm saza, sazuk peangte bang ahi hi.

⁶Keima in zinghui a vak vahiau mateng le khuavak mahiat dong myrrh thingnaai namtui mual, ngim namtui mualtung ah ka om tu hi.

⁷Ka it ka lawmnu awng, na mealpha lawlawm a; Paubanna na nei bua hi!

⁸Ka zi awng, Lebanon mual panin kei hong zui tan, Lebanon panin hong zui tan, Tawpite le pawlbeamte teenna, Amana Mualdawn, Senir Mualdawn le Hermon Mualdawn panin hong tuaksuk tan.

⁹Ka lawmnu le ka zi awng, na mit ha zia le na khi aw ziate in ka thin ka lung hong vut hi.



¹⁰Ka lawmnu le ka zi awng, nong itna in ka thin hong nuamsak hi. Nong itna sia zu sangin thum zaw a, na paaknamtui sia a dang hel namtuite sangin namtui zaw hi.

¹¹Ka lawmnu awng, na muk sia khuaitui bangin thum a, na leei sia kei atu in, khuinoai le khuaitui ahi hi. Na puansilhte sia Lebanon ii paaknamtui namcinte nam hi.

¹²Ka lawmnu, ka zi sia thuku huan, a ki uumcip huan, aituam tuinaak ahi hi.

¹³Tua munah thingkungte dawngin khang hi. Amate sia talee kung bangin po a, nga pha belte nga hi. Henna thingnamtui, nard thingnaai namtui, saffron, calamus le cinnamon pan kipan thing ngim namtuite kamh ngei ngawl hi.

¹⁴Tua munah a namtui bel myrrh le aloe te po hi.

¹⁵Lebanon Mualliante pan in luamtui a luang sukthe le ciktui te in tua huan tui kawtsakin lei zensak hi.

Ngaknu iisak

¹⁶Khanglo vun, Saksang vui, Thangsang vui awng, ka huan sungah va vun; ngim namtui taw dimsak vun. Ka it ka lawmpa sia ama ii huang sungah hong pai in thingnga a lim bel teng ne taken.

Solomon ii La 5

Tangval iisak

¹Kong it ka lawmnu, ka zi awng, Ka huan sungah ka tum zo hi. Ka hel namtuite le ka myrrh thingnamtuite khawmtua in; ka khuaitui le ka khuaiphaangte ka ne a; ka zu le ka noai ka ne hi.

Ngaknute iisak

Lawmtate awng, itna taw na kham teakin ne in, dawn vun!

La A ngui lina

Ngaknu iisak

²Ka mut laan in ka thin ciim hi. Ka mangin ka lawmpa in kongkha hong kingin ka heang hi.



Tangval iisak

Ka lawmnu ka ngaino, ka vakhu awng, hong tumsak tan, ka lu sia daaitui taw kawt a ka sam sia meeizunh taw tuamh hi.

Ngaknu iisak

³Ka nik ka puante suut siat zo khi hi, banghangin silh kik teang kik tu khi ziam? Ka peangte sil zo khi hi, banghangin ninsak kik tu khi ziam?

⁴Ka lawmpa in a khut taw kongkha len a, ama hong nai ci in ka thin tho hi.

⁵Ama tumsak tu in ka ki ngingta khol zo hi. Kong hon tu ka kipat ciang ka khutte myrrh thingnaai namtui taw, ka khutmete myrrh thingnaai tui taw kizut hi.

⁶Ka lawmpa kongkha ka hon hi, ahihang ama om nawn ngawl hi. Ama aw za nuam lawlawm ing! Ka zon hang ama ka mu zo bua a, ka biapui hang ama in hong zo ngawl hi.

⁷Khuapi a cing, ngalvilte in hong mu a, amate in hong saatin, hong chidupsak hi. Khuapi luphung a cingte in ka lukhu hong eaukeaksak hi.

⁸Jerusalem numeite awng, ka lawmpa na mu uh le kei sia ama ngai in vul khi hi, ci in nong sonsak natu uh in kamciam kei hong pia tavun.

Ngaknute iisak

⁹Numei theampo sung pan a meal pha bel nu awng, na lawmpa sia ngualdang khat po sangin lamdang in, tum pian zaw ziam? Tuabang liang a kamciam kong piak tu uh sia, ama huvau bang a lamdang vahut om na ziam?

Ngaknu iisak

¹⁰Ka lawmpa sia etlawm in hat hi; ama sia tulsawm sung pan khat ahi hi.

¹¹A maitang sia taungo bang hi a neal hi; a sam kiil a, va-ak vom bangin vom hi.

¹²A mittangte sia luamtui luang khat ii hui a vakhute bang, noaitui taw kisil a, luhui ah a ding vakhute bangin pha kilkel hi.



¹³A biangkhoté sia paak le hel namtuite taw a kidim huan khat bangin etlawm hi. A mukte sia myrrh thingnamtui tui taw a kawt dikdek unok paakte taw kibang hi.

¹⁴A khutte sia a et hoi a pha in piang a, ama in suangmanpha khutzungbute bun hi. A pumpi sia suangmanpha dum taw a kizeam saiha Neal taw kibang hi.

¹⁵A pheizangte sia kham tungah a kingaa muan khuam taw kibang hi. Ama sia kumpi mealpu a, Cedar kungsang pona Lebanon mualliante bang ahi hi.

¹⁶A kampaute thum a, zaak nop huai mama hi. A kampaute nial tu khat mama zongh om ngawl hi. Jerusalem numeite awng, ka it ka lawmpa sia hi bangteng ahi hi.

Solomon ii La 6

Ngaknute iisak

¹A meal pha bel numei awng, na it na lawmpa koi sungah pai ziam? Na mu natu kong hu thei natu uh in bang lampi tawn ziam, hong son tan.

Ngaknu iisak

²Ka lawmpa sia balsam thing pona mun a huan sungah pai zo hi, Ama in a tuu honte a huan sungah tha a, unok paakte lo hi.

³Ka lawmpa sia keima aa hi a, keima in ama aa ka hi hi. Ama in a tuu honte unok paak sungah tha hi.

La A ngui ngana

Tangval iisak

⁴Kong it awng, nang sia Tirzah bangin na meal pha a, Jerusalem khuapi bangin it huai in, hi khuapi liante bangin na meal phatna in husan ngangawn hong tawp thasak liang hi.

⁵Kei sang hong nga heak in, na mai in hong khiicip hi. Na samte sia Gilead mual pangh suk a keal honte tai valet bangin kithing hi.



⁶Na hate sia a ksilthiang tuu honte bangin paak hi. Khat beak zongh a peuhe om ngawlin kikim diimdiam hi.

⁷Na mai sealna dial nungah na biangkote san sitset hi.

⁸Kumpipa in zi sawmluk, zino sawmliat, a kisim zo ngawl ngaknu moi nei taken!

⁹Ahihang keima in khat bek ka it a, ama sia vakhu khat bangin it huai hi. Ama sia a nu ii tanu khat bek a nei hi a, a nu ii a it mama tanu ahi hi. Numei theampo in ama en in pok uh hi; a zi le a zinote in ama pokna la sa uh hi.

¹⁰Zingsang khuavak taw a kibang hi sia nu akua ziam? Ama a mealpha a, taang hiihee a, ni bang tha bang in tee hi.

¹¹Ngamkuam sungah thingnote en tu, sapit ngui tung a, a teeno suakte en tu le talee kung tung a, a paakte en tu in Almond kungte sungah ka paisuk hi.

¹²Ngal siphuleang hawlpa ii ngal sim tu lawpin a liin bangin nang kong it hu in ka liing hi.

Ngaknute iisak

¹³Shulam ngaknu awng, laam in, laam in, Na lap kong en tu uh hi.

Ngaknu iisak

A ngual a ngual a hong en te ii kilaklaw ah ka lap sia banghangin hong en nuam nu ziam?

Solomon ii La 7

Tangval iisak

¹Nang sia a tuanngen ngaknu khat na hi hi! Na peangdap sungah na peangte hoi lawlawm hi. Na pheizangte phatzia sia limsuai thiamte ii limsuai taw kibang hilhel hi.

²A kamh ngei ngawl zu namtui kuang khat tua munah om hi. Mangtaang vawng khat tua munah om a, unok paakte in kiim uum hi.

³Na noaite sia a taa khawm vahel a peang sazuk, a om khawm vahel saza nii taw kibang hi.



⁴Na ngawng sia saiha tusaang khat taw kibang hi. Na mitte sia Heshbon khuapi kongpi hui ah a om tuicingte bang ahi hi. Na naak sia, Damascus khua a cing Lebanon tusaang bangin ithuai hi.

⁵Na lutang sia Carmel Mual bangin saangto kiukiau hi. Na sam kipheakte sia puancil vom pha belte bangin te vasip a; ama ii phatna in kumpipa ii mit le thin suu hi.

⁶Na meal pha mama a, hoi lawlawm nii hi; Nong itna in ka lung hong kimsak siat hi.

⁷Palm thingkung khat bangin na ngaibaang a, na noaite sia date nga bom kaaite bang ahi hi.

⁸Palm kung khat tungah kaato in a nga ka lo tu hi. Kei atu in na noaite sia sapit bom bang hi a, na ngim sia apple min bang namtui in,

⁹Na muk sia zu pha bel taw kibang hi.

Ngaknu iisak

Tua ahile zu sia ka it ka lawmpa kungah luang taken a, a muk le a ha khuum taken.

¹⁰Ka lawmpa neisa ka hi a, ama in dik hong sa hi.

¹¹Ka lawmpa awng, hong pai tan a, ngam sungah pai in khuanote ah zan ngiak tawng.

¹²Zingtuung in ih tho tu a sapit nguite, a khang ziam, paakte a palh ziam, talee kungte a paak ziam ih en tu hi. Tua munah kong itna kong pia tu hi.

¹³Mandrakes dei aikung namtui ngim na za tu a, tuaciang thingnga lim theampo sia ih kongbiang hui ah om tu hi. Kong it awng, thingnga a lui le a thak nang atu in kong khealsiasak hi.

Solomon ii La 8

¹Nang sia ka nu ii a noai taw a vak ka suapuipa hi lete kong oai hi. Tua hile lampi ah kisi in kong namh zong kuama in hong awlmawk ngawl tu hi.

²Ka nu ii inn ah hong ciapui leng a ki itna zia hong hil lete uuk ing. Na neak tu in zu namtui le talee zu kong pia tu hi.

³Na baan veisang nong khamsak a, na ziatsang khut taw nong koai hi.

⁴Jerusalem numeite awng, ka ki itna uh nong pheltan ngawl natu uh in kei kamciam hong pia tavun.

La A ngui lukna

Ngaknute iisak

⁵Senneal ngam panin a lawmpa taw a kikoai sa in hong pai sia akua ziam?

Ngaknu iisak

Na suana mun ahi apple kung nuai pan, nang kong phong hi.

⁶Keima simngawl kuama dang it heak in a, keima simngawl kuama dang koai heak in. Ki itna sia thina bangza in vaanglian a, kingai na zongh thina za in kho hi. Ki itna sia mei bangin kuang a, kaangmei bangin lengkeak hi.

⁷Ki itna meikuang sia tui in tulmit zo ngawl a, namthuam in khuum zo ngawl hi. Ahizong khat po in a hauna taw ki itna lei a sawm le simmawkna bek nga tu hi.

Ngaknu ii suapui pate

⁸Suapui numeino khat ka nei uh a, a noaite no lai hi. Tangvalno khat hong pai in ama a heal ciang ka suapuinu atu bang vawt tu khu ziam?

⁹Ama luphung khat hile ngun tusaang khat kasaksak tu uh hi. A hizong ama kongpi khat hi le cedar thing pheakte taw ka dal tu uh hi.

Ngaknu iisak

¹⁰Keima in luphung ka hi a, ka noaite sia a tusaangte ahi hi. Ka it ka lawmpa in ama taw lungkimna le thinopna ka nei sia he hi.

Tangval iisak

¹¹Baal Hamon a kicina munah Solomon in sapit huan khat nei hi. Ama tung pan a saap lotho pawlkhat om hi, amate khat simin ngun dangka tulkhatek pia hi.



¹²Solomon awng na ngun dangka tang tulkhat la in a, lothote tungah amate tel tu zanii pia in. Kei ka hi le keima aituum sapit huan khat ka nei hi!

¹³Kong it awng, huan sung panin na aw hong zasak tan, ka kithol puite in na pauna aw za tu in hong ngak hi.

Ngaknu iisak

¹⁴Kong it ka lawmpa awng, saza khat bangin, hel namtuite pona mualtung ah a om, sazuktal moi khat bangin ka kungah hong pai tan.



Isaiah

Isaiah 1

¹Hi laibu sungah, Amoz ii tapa Isaiah tungah Judah kumpite ahi Uzziah, Jotham, Ahaz le Hezekiah te hun lai in, Judah le Jerusalem atu in, Pathian thu pualaak nate kihel hi.

Pathian in A Mihingte Hil

²Topa in, “Leitung le vantung awng, kong ci bang ngai vun! Ka vaak ka taa sa tate in kei hong langpan uh hi.

³Khuite in a Topa he uh a, laate in a Topa an piakna mun he hi. Ahihang Israel ka mihingte in tua za in he ngawl hi. Amate in tel mama ngawl hi,” ci hi.

⁴No a khial minam, siatna vawtin a ngilo mihingte a lal hi zo nu hi! Na khialnate in note hong kaisuk hi! Israel te ii a thiangtho Pathian, Topa nialin na nungngat uh hi.

⁵Banghangin hong langpan lalai nu ziam? Daan thuk thua nuam lai nu ziam? Israel te awng, na lu tung theampo liamma dim zo a, na thin uh ngim mama hi.

⁶Na lutang pan na peang dong na pumpi tung a dam mun om ngawl hi. Liamna chinumte, meimate le liamma vangte taw kidim nu hi. Na liammate kisil ngawlin, kituam ngawl hi. Zatuite kinoai ngawl hi.

⁷Na ngam uh lalcip zo a, na khuapite kihaltum zo hi. Na mutang in, ngamdang mihingte in na ngam uh hong laaksak a, na theampo susia cip uh hi.

⁸Jerusalem khuapi bek omlai a, tua zongh ki uumci in, sapit huan sungah huan cingpa ii buk le, tangmai huan ah thaampheang bangin, a hu tu le, a cing tu nei ngawl hi.

⁹Vaanglianbelpa Topa in mi pawlkhat hong suatak lai bathong le, Sodom le Gomorrah bang keakma in Jerusalem lalcip siat zo tu hi.



¹⁰Jerusalem awng, no hong ukte le na mihingte sia Sodom le Gomorrah bang keakma na hi uh hi. Topa in no tungah hong cina ngai vun. Ih Pathian ii no hong hilna nadon vun.

¹¹Ama in, “Kei tungah nong piakbul biakpiaknate theampo dei tu in hong um nu ziam? Nganhing a limci, a thaute le meihal biakpiakna a nong nei tuute sangin a tam zaw ka nei hi. Khuitalte, tuute le kealte ii chi cimtaak zo khi hi.

¹²Kei bia tu in nong pai uh ciang, hite theampo kei kungah keng tu in akua in hong sawl ziam? Ka Biakinn sung tuancil kawkoai tu in akua in hong sawl ziam?

¹³Nong paipui uh biakpiaknate kimanna nei ngawl hi. Na hal uh paaknamtui ngim ka kii hi. Thadet Poaite, Sabbath nite le biakna kikhopnate ka thuak zo bua hi. Tuate a vekpi in na khialnate uh in ninsak siat hi.

¹⁴Na Thadet Poaite le na ni thiangthote ka ensan a; tuate in vanhngit khat hi a, ka puakna in ka toi hi.

¹⁵“Thungen in na khutte na lapto ciang note kong en buatu hi. Bang zata thu na ngen ta uh zongin kong ngai buatu hi, banghangziam cile na khutte chi taw kituam hi.

¹⁶Noma le noma kithiansua vun. Ka mutang in a sia na vawt uh theampo vawt nawn heak vun. Hi hi, a sia ngamtatnate kheal vun a,

¹⁷tuaciang thumaan vawt tu kisin vun. Thutang sangah pang vun a, a kizawthawk vawtte hu vun, tangate sangah pang vun a, meingongte panpui vun” ci hi.

¹⁸Topa in, “Tu in thukhensat tawng. Note in mawna taw chisan na baang uh a, ahizong vuuk bang a thiangtho in kong sil tu hi. Note tungah a baangte chisan num ahizongin tuu mul bangin na kaang tu uh hi.

¹⁹Keima thu bek nong ni uh le lei pan a piang a pha nate na ne tu uh hi.

²⁰Ahihang kei nong langpan uh le note thi tu nu hi. Keima Topa in ka son zo hi,” ci hi.

Mawnei Khuapi



²¹Khatvei lai in a thumaan khuapi sia pumpi zuak numei khat bangin ngamta hi! Khatvei lai tua khuapi sia mihing thutangte taw kidim a, ahizong tu in tualthatte bekma taang lai hi.

²²Jerusalem awng, khatvei lai in nguntang bang na hi a, ahizong tu ciang na mannung bua hi; zu lim taw na kibang ngei a, ahizong tuciang tuidam bang bek na hi hi.

²³Na lampuite sia ngual leedote le ngutate ii lawmte veu hi a, amate in letsong le sumngukte saang tawntung uh hi. Amate in tangate zum kong maangkong ah panpui ngei ngawl a, meingongte thu sun ngai ngei ngawl hi.

²⁴Tua ahiciang tu in, Vaanglianbelpa Topa, Israel te ii a Vaanglian Pathian ii a cibang ngai vun: “Ka ngalte ahi note tungah phu kong la tu a, note in kei ngim nong pia nawn buatu uh hi.

²⁵Note tungah thu kong vawt tu hi. Thik sia mei taw a kithiansua bangin note thiantho ngawl na theampo kong thiansua tu hi.

²⁶Taanghlai in na nei uh bangma in no hong uk tute le ngaisutna pha hong pia theite kong pia tu hi. Tua zawkciang Jerusalem sia thumaan le thutak khuapi kici tu hi,” ci hi.

²⁷Topa thumaan ahikom, Jerusalem le tualai ah a om a kisiik kik theampo ama in ngum tu hi.

²⁸Ahihang khialna a vawtte le ama a langpante theampo ama in sucip tu a; ama a taisan peuma ama in thatlum tu hi.

²⁹Thingkungte na biak ngei hang le biakna huante na vawt ngei uh hu in na mai uh zum tu hi.

³⁰Note in a thi dek limkung khat le, kuama tui buak ngawl husuan khat taw kibangin na vulcip tu uh hi.

³¹Mei eak khat hu a, taangvawng a kak bangma in, mihing thahatte ii a sia a vawt hu in, amate kimoncip tu a, amate lalcipna sia kuama in phel zo ngawl tu hi.

Isaiah 2

Tawntung Kilemna

(Micah 4.1-3)

¹Hisia sia Judah le Jerusalem taw kisai Amoz ii tapa Isaiah tungah Pathian thu piak ahi hi:

²Maisang hunin Biakinn dinna mun ahi hi mual in muallian theampo sung pan a saang bel hi tu a, mualno theampo tungah dokto tu hi. Tua munah minam tam mama hong pai tu a,

³a mihingte in hi bangin ci tu uh hi, “Topa ii mual, Israel te Pathian Biakinn ah kaato tawng. Ama in ih sep tu a dei bang ih sep thei natu in hong hil tu hi; ama teal sa lampite ih tawn tu hi. Banghangziam cile Jerusalem pan Topa ii thuhilna hong pai tu a; Zion panin ama in a mihingte tungah thu son tu hi.”

⁴Ama in minam liante sungah thu nawngkaite khensat tu hi. Amate in a namsaute lo thawna tu le a teite thingbaak heuna nam in seak tu uh hi. Ngam khat le ngam khat kido nawn ngawl tu a, ngal sim tu in kithoai kik nawn ngawl tu hi.

⁵Tu in, Jacob suan le paalte awng, Topa hong piak khuavak sungah kalsuan tek tawng!

Kisak theina Kilalcipsak tu

⁶Pathian awng, Jacob suan le paalte a hina mite na nusia zo hi! Nisuana sang pan le Philistia pan kipan ngamsung tengah mitbum nasepnate dim zo hi. Mihingte in ngamdang ngeinate zui hi.

⁷Amate ngam sia ngun le kham taw kidim a, amate ii sum le paaite bo hun nei nawn ngawl hi. Amate ngam sia siphu taw kidim a, a siphuleangte sim zawk hi ngawl hi.

⁸Amate ngam sia milim taw kidim a, amate khut taw a vawt sa uh nate amate in bia uh hi.

⁹A vekpi in kimaizumsak tu a, ki nomu tu hi. Amate mawna maisak heak in Topa awng!



¹⁰Topa ii thin uukna le a vaangletnate a minthannate taw kipeal natu hanciam in amate mualkawm suanghawng sung ahibuale leihawng to in tua sungah buu tu uh hi!

¹¹Mihingte kiphatsakna a kibosak tu le, mihingte kisaktheina a kisiatthapsak tu ni khat hong theng tu hi. Tuasia ciang Topa bekma kipok tu hi.

¹²Tua ni ciang Vaanglianbelpa Topa in a vaanglian theampo le, a kiphasakte a kiliansakte theampo khiasuk tu hi.

¹³Ama in Lebanon Cedar kung saangte le Bashan ngamsung limthingte theampo susiacip tu hi.

¹⁴Ama in mualsaangte le mualnote,

¹⁵tausaang theampo le a muanhuai kulhpangte theampo tamkimsak tu hi.

¹⁶Ama in a lianbel le a pha bel teambawte ngangawn tum suksak tu hi.

¹⁷⁻¹⁸Mihing kiphatsak nate bo tu a, mihing kisakthei nate ki lalsak cip tu hi. Milimte mangthang siat tu a, tua ni in Topa bekma kipok tu hi.

¹⁹Topa in leitung lok tu in hong pai ciang, mihingte in Topa ii thin uukna taw a kipeal natu le a vaangletna le a minthanna pan a kisealcip zawk natu hanciam in mualkawm suanghawng sung ahibuale leihawng to in tua sungah buu tu uh hi.

²⁰Tua ni hong thet ciang, kham le ngun taw amate vawt sa milimte amate ma in vawkkeak tu a, tuate sia buite le bakte nusiak tu uh hi.

²¹Topa in leitung lok tu in hong pai ciang, mihingte in Topa thin uukna, vaangletna le a minthannate pan, a kipeal thei natu hanciam in leihawngte sung le suangmual kawm kuulte sungah buu tu uh hi.

²²A thi thei mihingte muanin nei nawn heak vun. Amate in bang kimanna nei uh ziam?

Isaiah 3

Jerusalem Khua sungah Buaina



¹Tu in Topa, Vaanglianbelpa Topa in Jerusalem le Judah pan mihingte ii suan le muan na theampo le mihing theampo laaksak tu kithoai hi. Topa in amate ii an le tui,

²a ngalhangte le a ngalkapte, a thukhen maangte le a kamsangte, a maisang thu tu aisaan theite le a ngam lampuite,

³a ngalkap sang lampuite le a mihon lampuite, a ngam thu kinte thupiangte uk tu a mitbum thiamte theampo laaksak tu hi.

⁴Topa in mihingte sia patang mealmawlte in uksak tu hi.

⁵Mihing theampo khat le khat tungnut kituu tu hi. Khangmoite in khanghaamte zakta ngawl tu a, a mannung ngawl mihingte in a tungsia te zakta ngawl tu hi.

⁶Amate nam sung pan mihing khat a teal tu hun khat theng tu a, a teal pa tungah, “Nang na hile puansilh tawm tu nei buang na hi ciang, hi bang ngim le kham hun sungah kote lampui hong seam ka ven,” ci tu uh hi.

⁷Ahizong ama in, “Kei hi ngawl khi hi! Hong hu zo ngawl tu khi hi. Ka inn sungah anneak puansilh om ngawl hi. Na lampui hong seamsak heak vun!” ci in zokik tu hi.

⁸Hi peu hi, Jerusalem sia a lal tu hi zo hi! Judah sia lalcip hi! Amate kampau theampo le a vawt theampo in Topa langpan hi; amate in Pathian mama sia a langh takin selno hi.

⁹A ngual doidanna sia amate puk natu ahi hi. Sodom mite bangin amate in a langh takin khialna vawt uh hi. Amate a lal tu hi zo a, a tuu bangin at uh hi.

¹⁰Thumaan mihingte lungdam tu uh a, amate atu in thuphate hong pai tu hi. Amate a sepna bang zui in nopsakna nga tu uh hi.

¹¹Ahihang mi ngilote a lal tu hi zo hi, amate in ngual tung a vawt bangin tu in amate tungah kivawt tu hi.



¹²Sum pukthaakte in ka mite zawkthawk vawt a, a leiba tote in amate theam uh hi. Ka mite awng, na lampuite in lam hong pui khial ahikom, na tot natu lampi na he bua uh hi.

Topa in A mite Thukhen

¹³Topa sia a mite tung thu sung tu le thukhen tu in kithoai zo hi.

¹⁴Topa in ama mihingte ii upate le lampui uliante thukhenna munah hong paipui hi. Ama in hi bangin mawsiat a, “Note in sapit huante na suddol uh a, na inn uh te sia mizawng te tung pan na laak uh vanhte taw kidim teak hi.

¹⁵Ka mite na sukciip natu le mizawngte tung zawthawk vawt natu thu bangma na nei bua uh hi. Keima, Vaanglianpipa Topa, Vaanglianbelpa ka pau zo hi,” ci hi.

Jerusalem Numeite tung Kidop natu Thupiakna

¹⁶Topa in, “En vun Jerusalem numeite kiphasak mama hi! Amate vandak sa in lampai uh hi. Amate sikvil tawntung hi. Amate a kalsuan tomsakin hi vakhiang pai a, a peang a hakte ngingsak vasiaal hi.

¹⁷Ahihang amate daan ka pia tu hi, a sam uh ka meetsak tu a, lutol in ka nusia tu hi,” ci hi.

¹⁸Topa in Jerusalem numeite tung pan tuabang a, a kiphatsakna ahi nate theampo a siakmit tung a, a bul kizepnate, a lutung a te, a ngawng tung a te,

¹⁹le a khut tung a te theampo a laak tu hun ni khat hong theng tu hi. Ama in a maisit nate le

²⁰a lukhute; a baan tung le a kawngah a vom aite

²¹a khutmete tungah a bulh khutzungbute le a naak a te;

²²a paoipuante, puantualte puanvante le a dangka ipte theampo;

²³a vang silsial a puanza note, a saiha dialnote, ngawng awte le lutung khu maisit puansaute la siat tu hi.

²⁴Paaknamtuite a zak luangin amate uih valut tu hi; kawngkhau phate luangin khauhual teang tu hi; a sam phate taangin a lu uh tol tu hi;



puanphate luangin, puansia ngapkaai ksilhsak tu hi; a meal hoina in maizumna suak tu hi!

²⁵Hi hi. Khuapi sung pasalte, a thahat bel ngangawn, ngal sungah kithatlum tu hi.

²⁶Khuapi kongpите mau in kap tu a, a khuapi mama sia a puan teng kisuutsak a a pumngwak in lei ah a to numei khat taw kibang tu hi.

Isaiah 4

¹Tua hun hong thet ciang, numei sali in pasal khat lencip in; “Koma le koma kivaak in, puansilh nikten ka heang tu uh a, ahitazong ko pasal taan ci ka maizum seal natu in, nang sia koma pasal hi hong cisak ka po in,” ci tu uh hi.

Jerusalem Kipua kik tu

²Topa in ngam sungah a om ankung le thingkung theampo a khantosak tu le, a limciitsak tu hun hong theng tu hi. A nungta lai Israel mihing theampo in a ngamsung pan a piang an kungte hu in lungpilna le kiphatsakna nei tu uh hi.

³Jerusalem ah a taanglai, Pathian ii a nungta lai tu a teal sa, theampo sia, mi thiangtho kici tu hi.

⁴Topa in ama vaangletna taw minamte tung thukhen in thiansua tu a, Jerusalem mawna le tua munah chi kibua sia silthiang tu hi.

⁵Tua zawkciang Zion mualtung le tua munah a kikhawmte theampo tungah, sun hun in meeikaai khat, zanhun in meikhu le meikuang taang sitset khat Topa in puak tu hi. Pathian minthanna in khuapibup huamin dal tu hi.

⁶Ama minthanna in sun in a khuapi ni satna pan lia tu a, vuipe le nguapi pan bukna le belna muan mun khat hisak tu hi.

Isaiah 5

Sapit huan ii La

¹Hi la kong sak laitak hong ngai tan, Ka lawmpa le ama sapit huan taw kisai la khat hi a, ka lawmpa in lei pha mama mualtung khat ah sapit huan khat nei hi.



²Ama in leito in suang teng vawk a; ama in sapitngui pha belte suan hi. Ama in tuate a cin natu in tusaang khat sa in, sapit ngate a cil natu in leidum khat to hi. Ama in sapit min tu ngak hi, ahihang sapit nga theampo thuk siat hi.

³Tuabang hi a, tu in ka lawmpa in, “Jerusalem le Judah ngamah teang no mite awng, kei le ka sapit huan tungah thu hong khen tavun.

⁴Hi thu taw kisai ka sep laak bang om ziam? Tuaciang ka muanmawk bang sapit phate piang ngawl a, banghang sapit thuk piang thong ziam?

⁵“Hi bangin ka sapit huan tungah ka vawt tu hi: a kiim uumna daaite ka lakeak tu a, a uumna ngawlte thiaktan in, ngamsate in nesakin, ka tuancilsak tu hi.

⁶Lopa in ka khunelhsak tu hi. Sapit kungte ka heu buatu a, a lei zongh ka tho buatu hi; tuasia luangin, lingte ling kungte in ka khunelhsak tu hi. Tuasia zawkciang ngua a zuksak ngawl natu in meeite ngangawn ka khaam tu hi” ci hi.

⁷Israel sia Vaanglianbelpa Topa ii sapit huan hi a, Judah mite sia ama suan sa sapit kungte ahi hi. Topa in amate a pha vawt tu in muangmaw a, ahihang amate in tual that zaw uh hi. Ama in amate sia thumaan thutang vawt tu in muangmaw a, ahihang amate ii vawtsiat a thuk te in thumaanna dei in kap uh hi.

Mihingte Vawt Ngitlona

⁸Note a lal hi zo nu hi! Na neisa inn le lote belap natu in na lei thathua uh hi. Hai ngawlin midangte ten natu mun om ngawl tu a, tua leitangh tungah noma bekma na teang tu uh hi.

⁹VaanglianbelpaTopa in, “Hi a lian a pha inn theampo hawmin lal tu hi.

¹⁰Sapit kung acre nga ciinna leitangh in sapittui gallon nga bekma piangsak tu hi. Ancii seau sawm in antang seau khat bek piangsak tu hi,” hi bang a ci ka za zo hi.



¹¹Note a lal hi zo nu hi. Zingsang zu ne tu in na thopal uh a, nitak ngei hial po ma zu ne zu khamin na om uh hi.

¹²Na poai sung uh ah tengtong, thikdaalkualte, tamngaite, na tum uh a, zu na ne uh hi. Ahihang Topa in bang seam cisia na tel bua uh a,

¹³tua ahikom thong taak tu in hong kipuak tu hi. Na lampuite ngilkial in thi tu a, nautaang mite dangko in thi tu uh hi.

¹⁴Mithi khua in amate ne tu in kamkat hi. Ama in Jerusalem miliante sia a ngamlum nautaang mihonte taw valhtum khawm tu hi.

¹⁵A kuama po kimaimawlsak tu a, a kiphasak theampo kiniamsuksak tu hi.

¹⁶Ahihang Vaanglianbelpa Topa in ama letna sia thutang sepna taw lak a, ama thianthona sia a mite tungah a thu khenna taw lak hi.

¹⁷A sia sa khuapite sungah tuute in lopa ne tu a, kealnote in a tatna tu mun mu tu hi.

¹⁸Note a lal hi zo nu hi! Na khialnate uh pan suatak natu in na kisaan zo bua uh hi.

¹⁹Note in, “Topa in ka vawt tu hi a ci bangin hi vabil in vawt taken, tua hile ih mu thei tu hi. Israel ii a thiangtho Pathian in ama tupnate vawt hen; a thin sungah bang ngaisun ziam en tek tawng,” na ci uh hi.

²⁰Note a lal hi zo nu hi! Note in a siate pha hi, a phate sia hi na ci uh hi. Note in khuazing sia khuavak ah, khuavak sia khuazing ah na heak uh hi. Note in a kha sia a thum, a thum sia a kha na ci uh hi.

²¹Note a lal hi zo nu hi! Noma sia ciim kisa, pil mama kisa si nu hi.

²²Note a lal hi zo nu hi! Zu ne hat te awng! Zu namcin helin na neak tu uh hangsan in launa nei ngawlte awng!

²³Ahitazong sumnguk taw mawnei mite na suakta sak zeang uh a, mawnei ngawlte ii thutang nga natu na nial uh hi.

²⁴Tua ahiciang tu in, taangphaw le lopa ko ngimngeamte mei a kak bangma in, na zungte muatin na paakpalhte kongaw tu a, hui in lenkeak tu hi;

banghangziam cile, noma in Vaanglianbelpa Topa Israel te ii a thiangtho Pathian ii ei hong hilna thu na nial zo uh hi.

²⁵Topa sia a mite tungah thin uukin amate daan pia tu in a khut vaan hi. Mualte liing tu a, mithi luangte ninteak bangin lampi tungah ki nusia tu hi. Tuasia ngangawn zong Topa thin uukna thai zo ngawl lai tu a, daan pia tu in a khut vaan lai tu hi.

²⁶Topa in, a khuala na a om minam khat sapna tu in lim khat pia hi. Amate leimong pan hong pai natu in Topa in phit tum in sam hi. Tuasia ciang amate manlang takin hong pai paih hi!

²⁷Amate kuama toi ngawl a; lutu in a liik om ngawl hi. Amate mutsuak in lusu in, mu ngei ngawl hi. Kawngkhau khat zongh kawm ngawlin peangdap khau khat zongh tat ngawl hi.

²⁸Amate thaltangte hiam a, a thalte kaa tawm tu bekin eal pinpen uh hi. Amate ii siphu peangcinte thausuang bangin sak a, a leangmuite suumpei bangin pei hi.

²⁹Ngalkapte sia, tawpите in ngam sa khat man a, amate kung pan kuama ii a laaksak thei ngawl natu munah tua in, a hawk bangin au uh hi.

³⁰Tua ni a thet ciang, amate in tuiپی nging bangin nging takin Israel mite hawksan tu uh hi. Ngam hisia en vun! Khuazinna le ngim thuakna! Khuavak sia khuazing in valhtum hi.

Isaiah 6

Pathian in Kamsang khat tu in Isaiah Sam

¹Uzziah Kumpipa thi kum in, Topa ka mu hi. Ama sia saang a, a kisaang khai in kumpi tokhum tungah to a, a kumpi puan sia Biakinn buppi dim hi.

²A kiimkot ah meikuang bang ahi Seraphim vantung mite ding a; amate khat sim in tha luk tek nei hi. Tha nii taw a mai tek sealin, tha nii taw a pumpi tek sealin, a dang tha nii tek taw leang uh hi.



³Amate khat le khat kism in: “Thiangtho, thiangtho, thiangtho! Vaanglianbelpa Topa sia thiangtho hi! Ama minthanna in leitung dimh hi,” ci in au uh hi.

⁴Amate awnging in Biakinn tawdappha liingsak a, Biakinn mama meikhu taw kidim hi.

⁵Keima in, “Kei atu bangma lam et om ngawl hi! Kei a lal hi zo ing, banghangziam cile ka muk pan a pusuk kammal theampo sia khialna veu hi a, a kampau theampo khialna veu ahi mite sungah ka teang hi. Tuabang teng ahitazong, Kumpipa, Vaanglianbelpa Topa sia ka mittang vateak taw ma in ka mu zo hi,” ka ci hi.

⁶Tuasia ciang Seraphim vantung lalangte khat biaknatau pan taitee taw meikam khat dep a toai in ka kungah hong leang suk hi.

⁷Ama in meikam taw ka muk hong bitsak a, “Hi in na muk hong thu zo hi, tu in na mawna bo siat zo a, na khialna teng kimai sak zo hi,” hong ci hi.

⁸Tuaciang Topa in, “Akua sawl tu khi ziam? Akua in eite kamtai hi tu ziam? a ci ka zaak ciang, “Keima pai tu khi hi! Hong sawl tan!” ci in ka zokik hi.

⁹Tuaciang ama in nangma na pai tan a, hi thu mihingte tungah son tan ci in hong sawl hi; “Bang zata na ngai uh zong, na tel thei buatu uh a, bang zata na en uh zong bang piang cisia na he buatu uh hi”.

¹⁰Tuaciang ama in keima tungah, “Hi mihingte lungmusakin, a na ngongsak in a, a mittawsak in, tua hile amate khua mu thei ngawl, khua za thei ngawl, tel thei ngawl tu hi. Tuabang ahiciang ka kung hong zuan tu a, a ci ka damsak tu hi,” hong ci hi.

¹¹Keima in, “Hi bangin bang tan vei khua ngei tu ziam? Topaawng?” ci in ka dongh hi. Ama in, “Khuapite kisia cip a, a ngamkhing dide dong, innte innhawm a sua dong, a ngam a lei ngamkhing dide dong hi tu hi.

¹²Keima in mihingte a khuala na ah puakin a ngambup ka ngamkhing didesak tu hi.



¹³A ngam sungah mihing sawm sung pan khat bek a taang ta zongin, tuasia pa ngangawn kilalcipsak tu a; ama in a kiphuktan sa lim thingkung bul khat taw kibang tu hi,” ci in hong zo hi. (Tua thingbul sia Pathian mihingte kipat thakna lakna lim ahi hi.)

Isaiah 7

Ahaz Kumpipa atu Thupuak

¹Jotham ii tapa le, Uzziah ii tupa ahi, Ahaz Kumpipa in Judah ngam a uk lai in ngal piang hi. Syria Kumpipa Rezin le Israel Kumpipa Remaliah ii tapa Pekah in Jerusalem khua sim a, ahihang la zo ngawl hi.

²Syria ngalkapte Israel ngamsung theng zo hi ci thu Judah kumpipa kung a thet ciang ama le a mite theampo lauthawng mama in vui sungah thingkungte a ngawk bangin ngawk vadil uh hi.

³Topa in Isaiah tungah, “Kumpipa Ahaz taw kimu tu in na tapa Shear Jashub paipui in. Ama sia puan khuite nasepna phual paina lampi, tuicing tungnung kung pan tui laakna luam mongah mu tu nu hi.

⁴Ama tungah, kidawm in a om khinkhian in, lau heak in, ci in son in. Kumpipa Rezin le ama ii Syria mite le Pekah Kumpipa ii thin uukna te sia meikuang valiat thingkhua nii panin meikhu sia sangin lauhuai ngawl zaw hi.

⁵Syria sia Israel le a kumpipa taw tup le sawm khat nei hi.

⁶Amate in Judah ngam simin amate sangah Judah mite a pan natu in tawngin, Tabeel ii tapa kumpi tu in koi sawm uh hi.

⁷“Ahihang Topa ahi, Keima in, hi thu piang ngei ngawl tu hi, ci in ka thangsak hi.

⁸Banghangziam? Syria sia ama khuapi Damascus sangin thahat zaw ngawl a, Damascus sia kumpipa Rezin sangin thahat zaw ngawl ahihang hi. Israel ngam ahile, ngam khat a sua zawk nawn ngawl natu in kum sawmluk le kum nga sungin kitamtham dipdeap tu hi.



⁹Israel sia a khuapi Samaria sangin thahat zaw ngawl a, Samaria sia Pekah kumpipa sangin thahat zaw ngawl hi. “Na upna a kho bua ahile na kip zo buatu hi,” ci hi.

Immanuel Limlakna

¹⁰Topa in Ahaz tungah thudang khat puak hi.

¹¹“Limlakna khat hong piak natu in, Topa na Pathian tungah ngen in. Tuasia in a thukbel mithite ngam leinuai pan ahibuale a saangbel vantung pan hi thei hi,” ci hi.

¹²Ahaz in, “Limlakna ngen ngawl tu khi hi. Topa ze et ngawl tu khi hi,” ci in zokik hi.

¹³Isaiah in hi bang zokik a, “David Kumpipa suan le paalte awng, tu in ngai vun. Mihingte na thin ngimsakna uh sia khop zo a, Pathian zongh thinngimsak lai tu nu ziam?”

¹⁴Tuabang ahile pha hi, Topaama mama in limlakna khat hong pia tu hi: naungil om ngaknu moi khat in tapa khat nei tu a, a min ‘Immanuel’ ci tu hi. 7.14 *Mt 1.23*¹⁵A sia a pha khen thei tu in ama a let ciang mihingte in khuinoai dawn in khuaitui ne tu hi.

¹⁶Tua hun hong thet ma ngangawn in, note hong lausak kumpi niite ii ngamte ki nusia cip tu hi.

¹⁷“Judah ngam pan Israel kumpi ngam a kikhen zawkciang a piang ngei ngawl haksatna niite Topa in nangma, na minamte tung le kumpi innkuante tungah tungsak tu hi — ama in Assyria kumpipa hong puak tu hi.

¹⁸“Tua hun hong thet ciang Egyptte Nile ngunnaak a khuala belna pan tho bangin hong pai natu le, Assyriate in amate ngam pan khuai bangin hong pai natu in limlakna in, Topa in phiit tum tu hi.

¹⁹Amate liim nitnut in mualkawm, luamkawm, suanghawngte sungah hong pai tu a, lingkung kawm theampo le ngantatna mun theampo dim tu uh hi.



²⁰“Tua hun hong thet ciang, Topa in Assyria kumpipa sia na sam meet tu in Euphrates ngunngal khat pan sam tu a, ama in na khamulte, na samte le na pumpi tung multe meet tu hi.

²¹“Tua hun hong thet ciang, lothopa khat in khuila khat le keal nii bekma suatak zo ahitazong in,

²²tuante in noaitui tam mama pia tu a, ama kisapte kicing siat tu hi. Hi hi, ngam sungah a kinusia, a nungta lai tawmno tengin, a neak tu khuinoai le khuaitui nei tu uh hi.

²³“Tua hun a thet ciang sapit huan pha mama, sapit kung tulkhat a om huan khat ciang dangka tulkhat a mante sia lingkung bek in khannel tu hi.

²⁴Mihingte in thal le thaltang taw tua munah sa vai tu uh hi. Hi hi, a ngambup sia ling le lingkungte taw kidim tu hi.

²⁵Khatvei lai a, ankung kiciinna mualte theampo sia lingte in po nelh siat tu a, tua munah kuama pai ngawl tu hi. Khui le tuute tatna ngam hi tu hi,” ci hi.

Isaiah 8

Isaiah ii Tapa Mihingte tungah Limlakna khat

¹Topa in ka tungah, “Lai atna suangpheak lian khat la in a, tua tungah mipite tel thei tu in laimal lian taw: Manlang suttol, manlang laaksak (Maher-Shalal-Hash-Baz) ci in at in.

²Hong heakpui tu in a muanhuai tetti nii, thiampi Uriah le Jeberechiah ii tapa Zechariah sam in,” hong ci hi.

³Tua zawk tawmvei ciang ka zi naungil om hi. Ka tapa uh a sua ciang, Topa in, ka tungah, “A min, Manlang suttol, manlang laaksak (Maher-Shalal-Hash-Baz) ci in phuak in.

⁴Patang in, ‘Nu awng’, ‘Pa awng’ a ci thei ma in, Damascus khua hauna theampo le Samaria khua pan sutol vanhte theampo Assyria kumpipa in la in pua siat tu hi,” hong ci hi.

Assyria Kumpipa hong Pai



⁵Topa in kei hong paupui kik hi.

⁶Ama in, “Hi mihingte in dam vadi a a luang Shiloah nguntui nial ahikom Rezin le Pekah Kumpite mai ah lau in liing vadil tu a,

⁷Topa ahi Keima in, Judah ngam sim tu in Assyria kumpipa le a ngalkapte theampo ka paipui tu hi. Euphrates nguntui pawmin, ngun vaalbote theampo a khup siat bangin amate kuan tu hi.

⁸Judah ngam sungah tuipawm bangin amate pai tu a, liangko dong tui khangin na theampo khum siat tu hi,” ci hi. Pathian sia eite taw omkhawm hi! Ama ii tha kiphalte in ngam hu hi.

⁹No minam dangte awng, kiitakna taw kikhawm tua vun! Ngai vun! Ngam khuala ah a om note awng ngai vun. Ngalsim tu in kithoai vun, ahihang kiita vun! Hi hi, kithoai vun, ahihang kiita vun!

¹⁰Tupna nei vun! Ahihang tangtung ngei ngawl tu hi. Na uuk theampo son vun! Ahihang a luithawthong vive hi, banghangziam cile Pathian sia kote taw om hi.

Topa in Kamsangpa Kidop natu Thupia

¹¹Mihingte tot lampi ka tot ngawl natu in Topa in a vaangletna taw kei tungah kidop natu thu hong hil hi. Ama in,

¹²“Hi mihingte vaihawmna pawlpui heak in a, amate kiitakte kiita heak in.

¹³Keima, Vaanglianbelpa Topa ka thiantho hunlam phawk in. Na kiitak tu sia Keima ka hi hi.

¹⁴Keima ii a lamdang thianthona hangin mihingte puk theina suangtum khat taw ka kibang a; Keima in Judah le Israel ngam mite le Jerusalem khua mite awk natu thaang khat taw ka kibang hi.

¹⁵Amate tam mama lutu tu a; pukin ki sucip tu hi. Amate thaang sungah awkin kiman tu uh hi,” ci hi.

Mithite Thudok ngawl natu Khaamna



¹⁶No, ka nungzuite sia, Kei tungah Pathian hong piak thute pha takin a keam tu na hi uh hi.

¹⁷Topa sia ama mite ii mu thei ngawl tu in ama le ama kiseal hi, ahizong keima in ama ka muang a, ka lametna ama tungah ka koi hi.

¹⁸Topa hong piak sa tate taw hi munah ka om hi. A kumpi tokhum Zion mual tungah a om, Vaanglianbelpa Topa in, eite sia Israel mite tungah a nungta thuhilna in hong puak hi.

¹⁹Ahihang mihingte in, maisang thu tu aisaan theite le a phun vasup aisaante tungah thu dongh vun ci in hong sawl tu hi. Amate in, “A tatak in ci leang, mihingte in thaa te thu dok tu hi a, tuaciang a nungtate luangin a thi sate taw thu kikap tu ahi hi.” hong ci tu uh hi.

²⁰Amate tungah, “Topa in no hong hilna thute ngai vun! Aisaante thu ngai heak vun. Amate hong son thute no atu kimanna om ngawl tu hi,” ci in zokik vun.

Ngim nga Hun

²¹Mihingte ngam sungah thinkiam ngilkial in vak kawkoai tu uh hi. Amate ngilkial thin uuk in a kumpipa le a Pathian haamsiat tu uh hi. Amate in vantung en to in, ahibuale

²²lei a salhsuk zongin ngimna khamna le khuazing ngawl buang bangma mu ngawl tu hi. Amate a lauhuai khuazing sungah kihawlkeak tu hi. Amate hi bang hamsatna hun sung pan a kipeal natu lampi om ngawl tu hi.

Isaiah 9

Maisang Kumpi tu

¹Zebulun minamte le Naphtali minamte teenna ngam sia minsiatna thuak ngei a, ahizong mai sangah hi ngam sia Mediterranean tuipi niswana ngamsang pan kipan Jordan ngunggal khat dong le minam dangte teenna Galilee ngam ngangawn dongin ngam thupi suak tu hi.



²Khuazing sungah a vak mihingte in khuavak taang mama khat mu zo hi; Amate sia khuazing cipna ngam khat ah teang uh a, ahizong tu in amate tungah khuavak taang hi.

³Topa awng, nangma in amate lungdamna lian na pia zo hi, nangma in amate na lungdamsak zo hi. Amate in nangma sepsak sate sungah lungdam uh a, mihingte in an a laak ciangin ahibuale vanh kisutte a hawm uh ciangin a lungdam bangma in lungdam uh hi.

⁴Banghangziam cile, nangma in amate ii vanhngit puakna hakkol le amate ii liangko a saat, ciangkutte na thiaktan zo hi. Nidang lai a Midian ngalkapte na zaw bangkeak ma in na mite vawtsia in a zothaw minam sia na zo zo hi.

⁵Ngalsim a hong kuan ngalkapte ii peangdapte le chi baang amate puante theampo sia mei taw kihaltham tu hi.

⁶Eite atu nausen khat hong suak hi! Ei atu tapa khat hong kipia hi! Tuaciang ama in eite hong ukpa hi tu hi. Ama sia, “Lamdang, Thu lakpa” “Vaanglian Pathian,” “Tawntung Pa,” “Kilemna Kumpi Tapa,” kici tu hi.

⁷Ama ii kumpi vaangletna sia kizom in khang tato tu a; ama ngam sungah kilemna a tawntung om tu hi. Ama in David kumpipa ii za lai tu a, ama vaangletna in thumaanna le thutanna bulphu in tu pan kipan hun bo dongin uk tu hi. Vaanglianbelpa Topa in hite theampo seam nanak tu hi.

Topa in Israel te Daan pia tu

⁸Topa in Israel kumpi ngamsung Jacob suan le paalte tungah thukhenna pia zo hi.

⁹Israel mite theampo, Samaria khuapi sung a teang pawpo te in Topa in hi thu vawt zo hi ci in he tu hi. Tu in amate kiphasak in kisathei uh hi. Amate in,

¹⁰“Uksuang innte pukcip zo hi, ahihang suanginn taw ka lai tu hi. Theiteak thing zawlsaute ki attan zo hi, ahihang a pha bel ahi Cedar thing taw ka lai tu hi,” ci uh hi.

¹¹Amate sim tu do tu in, Topa in a ngalte nawm hi.



¹²Nisuana sang pan Syria le nitumna sang pan Philistia in Israel valhtum tu in a kam uh kaa zo hi. Tua bangza ngangawn zongin Topa thin uukna thaisak zo ngawl a daan pia tu in a khut vaan lai hi.

¹³Israel mihingte kisiik kik ngawl hi; Vaanglianbelpa Topa in amate daan a piak zawk ngangawn zongin, Topa kung zuan kik tuan ngawl hi.

¹⁴Ni khat sungin Topa in Israel lampuite le a mihingte daan pia tu a; a lu le a mei saattan tu hi.

¹⁵A khanghaam le a zatak huai pasalte sia a lu hi a, leilot thu a hil kamsangte sia a mei ahi hi!

¹⁶Hi mihingte lampuite in amate lamkhialsak a, lungmang bikbeksak hi.

¹⁷Tua ahiciang Topa in tangvalte khat zongh suaktasak ngawl tu a, meingongte le tangate khat zongh hesuak ngawl tu hi, banghangziam cile mihing theampo in Pathian thu um ngawl a, ngilo in kamsia nano pau uh hi. Hi thute hangin Topa thin uukna thai zo ngawl a, daan pia tu in a khut kivaan lai tu hi.

¹⁸Mihingte ngitlona in lingkungte le lingte a kaangtumsak mei bangin kuang hi. Meikhu lomtangh van ah a kaatosak ngamkaang bangin kuang hi.

¹⁹Vaanglianbelpa Topa thin uukna hangin ama ii daan piakna sia ngam sungah meikuang bangin kuang a, mihingte lalcipsak hi. Kuama in a suapuipa awlmawk tuan ngawlin ama atu bek ngaisun hi.

²⁰Ngamsung koima po ah mihingte in a zontawm, a mutawm an bekno khat pawpo ne a, ahihang a ngil uh va ngei ngawl hi. Amate in a tate ii sa ngangawn ne uh hi!

²¹Manasseh mihingte le Ephraim mihingte khat le khat kisim a, tuaciang amate in Judah sim khawm uh hi. Tuabangza ngangawn zongin Topa thin uukna thaisak zo ngawlin; daan pia tu in a khut ki vavaan lai hi.

Isaiah 10



¹Note a lal na hi zo uh hi! Note in ka mite zawthawk nopna taw a kilawm ngawl thukhamte na vawt uh hi.

²Tuabangin mizawngte tung pan amate taw kisai a nga tuakte le amate ii thutang nga natu te khaktan in na taansak uh hi. Tuate sia meingongte le tangate ii neisate na sutol zia uh ahi hi.

³Pathian in note daan hong piak ciang note in bang na law tu uh ziam? Ama in ngam khuala khat panin ngimna haksatna note tungah hong puak ciang bang na law tu uh ziam? Hong hu tu zongin koisung ah na tai tu uh ziam? Na nei na lamte koi sungah na phual tu uh ziam?

⁴Note ngal kisimna sungah hong kithatlum tu hi, ahibuale zong thongtaakte bangin hong kikai keak tu hi. Tuabang ngangawn taw zongh in Topa thin ukna thai ngawl lai tu a; daan pia tu in a khut kivaan lai tu hi.

Assyria Kumpipa Pathian ii Nazak

⁵Topa in, “Assyria awng! Nang sia ka thin hong uuksakte daan piakna khetbuk khat bangin kong zangh hi.

⁶Kei hong thin uuksak mite ahi Pathian um ngawl minam khat sim tu in Assyria ka puak hi. Keima in amate sia vanh suddol tu, vanh ngu tu le lampi tung a ninte bangin mite tuancil tu in ka sawl hi,” ci hi.

⁷Ahihang Assyria kumpipa in mite ii chi le naai keesak natu tupna nei hi. Ngam tam mama siatsak tu sawm hi.

⁸Ama sia kiphasak in, “Ka ngalkap maangte theampo kumpi veu ahi hi!

⁹Keima in Calno le Carchemish khuapite, Hamath le Arpad khuapite ka zo hi. Samaria le Damascus ka zo hi.

¹⁰Milim a bia ngamte daan pia tu in ka khut ka eal hi. A milimte sia Jerusalem le Samaria a om milimte sangin tam zaw hi.

¹¹Samaria le amate ii milim theampote ka sucip siat zo a, tuabang keak ma in Jerusalem le tua munah a kibia milimte ka siasak tu hi,” ci hi.

¹²Ahihang Topa in, “Zion mual tung le Jerusalem khua sungah ka nasep teng ka man ciang, Assyria kumpipa sia ama ii kisuanna le kiphatsak nate theampo hu in daan ka pia tu hi,” ci hi.

¹³Assyria kumpipa in, “Keima in a khawng a kheak in vawt zo ing. Ka hat a, ka ciim a, ka pil hi. Ngam khat le ngam khat kilaklaw ngamngite melmangin, amate khol sa vanhte ka sut siat hi. Keima in khuita khat bangin tua lai ah a teang mite ka tuanthal zo hi.

¹⁴Leitung ngamte sia vacim bu khat taw kibang a, a tuite ol zeang tak khoptua bangin keima in mite haunate ka khawmtua ziau hi. Kei hong lauthawn tu in a thaphil ngam la om bo, kei hong oksan tu in a kamkaa khat beak la om bo!” ci in kisuang hi.

¹⁵Ahihang Topa in, “Hei khat in ama a zangh pa sang lian zaw ing ci thei tu ziam? Thingatnaam khat in ama thing atna in a zangh pa sangin thupi zaw ziam? Khetbuk khat in mihing khat laamto ngawl a; mihing khat in khetbuk laamto hi,” ci hi.

¹⁶Tu in pha tak a, a kivaak tua mite daan pia tu in VaanglianbelpaTopa in natna puak tu hi. Amate ii pumpi sungah a kuang tan mei khat om tu hi.

¹⁷Israel te ii khuavak ahi, Pathian sia mei khat suak tu hi. Israel te ii a thiangtho Pathian sia meikuang khat suak tu a, tua in ni khat thu in na theampo lingkung le lingtee ngangawn kaangtum tu hi.

¹⁸Taam thuk te le lo pha te sia natsia khat ii mihing khat a lalsak bangin, kisiacipsak tu hi.

¹⁹Dui sungah thingkung a taanglai tawm mama tu a, patang khat ngangawn in a kung phaza sim thei tu hi.

Tawmcik hong Heak kik tu

²⁰Israel mi a suakta teng in amate a bocip siatsak dektak minam sia a suan nawn ngawl natu hun khat hong theng tu hi. Amate in Israel te ii a Thiangtho Pathian Topa muang takpi tu hi.



²¹Israel mite sung pan tawmno khat amate ii vaanglian Pathian kungah cia kik tu uh hi.

²²Israel mite tu in tuipi hui a om senneal za in tam mama ahitazong tawmno bek cia kik tu uh hi. Mihingte atu in siatna sia a kikoi sa hi a, thuak tu in kilawm tatak hi.

²³Hi hi, Vaanglianbelpa Topa in vawt tu khi hi, a ci sa bangma in ngam sung theampo ah siatcipna ama in thengsak tu hi.

Topa in Assyria Daan pia tu

²⁴Vaanglianpipa Topa Vaanglianbelpa in Zion ah a teang a mite tungah, “Egyptte in note hong zawthawk vawt tawntung bangin Assyriate in note hong zawthawk vawt hial zongin amate kiita heak vun.

²⁵Tawmvei no sungin, note daan kong pia siat man tu a, tuasia zawk ciang amate ka moncip tu hi.

²⁶Vaanglianbelpa ahi Topa Keima in, Oreb Suangpi ah Midian mite ka vawt bangin ka ciangkhut taw amate ka saat tu hi. Egypt mite daan ka piak bangin Assyria mite daan ka pia tu hi.

²⁷Tuasia hun hong thet ciang Assyria ukna sung pan note kong suatak tu a, amate hakkol sia note liangko tungah vanhngit hi nawn ngawl tu hi,” ci hi.

Ngalte in Sim

²⁸Ngalte in Ai khuapi la zo hi! Amate in Migron khua kantan zo hi! A vanhte Michmash ah koi uh hi!

²⁹Amate in mualciangh kantan in Geba khua ah zan ngiak uh hi! Ramah khuasung a teang mite lau in, Saul kumpipa teenna Gibeah khua mite taikeak uh hi.

³⁰Gallim mite awng, au vun! Laishah mite awng, ngai vun! Anathoth mite awng, a aw zo vun!

³¹Madmenah le Gebim khua mite a suatak natu in tai uh hi.



³²Tuni in ngalte Nob khua sungah om a, tua mun panin amate in Jerusalem khuapi, Zion Mual a khuttum lak uh hi.

³³Vaanglianbelpa Topa in amate sia thingbaakte heu bangin saattan tu hi. Amate sung pan a kiphasak bel le a saangbelte zongh kisaat tan in kiniamsak tu hi.

³⁴Ngam tawngtol sungah thingte hei taw a kiphu tan bangin, Lebanon mual ah thing hoibelte ngangawn a puk bangin, Topa in amate phuktan tu hi.

Isaiah 11

Ngal Kilemna Ngam

¹David kumpi khang kizopna sia a kiphuktan sa thingkung khat taw kibang hi; ahihang thingbul khat pan a baak meang thak a po bangma in, David suan le paalte sung panin kumpi thak khat khangto tu hi.

²A mite a uk natu in Topa ii thaa in ama sia Ciimna pilna le heakna pia tu hi. Ama in Topa deina he in zatakna nei tu a,

³Topa thunitna sungah nuamsa tu hi. Ama in mit taw muna le nakheng taw zaakna bangin thukhen ngawl tu hi;

⁴ama in mizawngte thumaan in thukhen a, hu tu nei ngawl mite a maan bangin panpui tu hi. Ama thupiak bangin mite daan kipia in, mi ngilote thi tu uh hi.

⁵Ama in a mite thumaan thutak taw uk tu hi.

⁶Ngiate le tuute kilemin teang khawmin, pawlbeamte sia kealnote taw lumkhawm tu hi. khuinote le tawpi note anne khawm tu uh a, patangnote in amate cing tu uh hi.

⁷Khuipuite le vompuite an ne khawm tu uh a, a note kilem in lumkhawm tu uh hi. Khuite in taangphaw a neak bangma in tawpите zongh in taangphaw ne tu uh hi.

⁸Nauno khat ngu a nei ngul khat kungah kimai in a om hial zongh in bangma kilaw ngawl tu hi.



⁹Pathian ii a thiangtho mual Zion tungah liamna baaina a sia bangma om ngawl tu hi. Tuipte sia tui taw a kidim bangma in leitung sia Topa thu heakna taw kidim tu hi.

Satang Mite Cia kik tu

¹⁰David kumpi suan pan kumpi thak khat sia minam tam mama te atu in lim khat ahi natu hun khat hong theng tu hi. Amate sia a kumpi khuapi sungah kikhawm in ama zatakna pia tu uh hi.

¹¹Tua ni a thet ciang, Topa in ama vaangletna zangh kik tu a, ama ii mite sung pan Assyria le Egypt ngamsung, Pathros, Ethiopia, Elam, Babylon, Hamath ngamsung le tuipi tuikulhte tung, le tuipi dung ngamte ah a kinusia mite a inn uh ah puak kik tu hi.

¹²Topa in a kithethaang Israel le Judah mite kaikhawm kikin, leitung kingh li panin a ciapui kik natu thute minamte lak natu in lim lakna dial khat phut tu hi.

¹³Israel ngam in Judah ngam eang nawn ngawlin, Judahte sia Israel te ngal hi ngawl tu hi.

¹⁴Amate in nitumna sangah a teang Philistine mite sim khawm tu a, nisuana sangah a teang mite do khawm tu uh hi. Amate in Edom le Moab mite zothal tu a, Ammon mite in amate thu ni tu uh hi.

¹⁵Topa in Suez Tuidok kangsakin, Euphrates ngun kansak natu in ama in vuisa vasak a, mi theampo ii a kantan zawk natu in luino sali bek khe lai tu hi.

¹⁶A taangpupite in Egypt ngam a nusiak lai in amate atu lampi lian khat a om bangma in, tua munah a nungta lai Israel a mite atu in Assyria ngam pan mihonpi suatak natu lampi lian khat om tu hi.

Isaiah 12

Lungdam Kona La



¹Mihingte in hi bang la asak tu ni khat hong theng tu hi. “Nang kong pok hi, Topa awng! nang in kei tungah nong thin uuk hi, ahihang tu in nong heeneam a, na thin uuk nawn ngawl hi.

²Pathian sia kei hong ngumpa hi; Ama muangin, ka lau buatu hi. Topa in vaangletna le thahatna kei hong pia a; ama sia kei hong ngumpa ahi hi.

³Tui thiang in a dangko te, a lungdamsak bangma in, Pathian ii mihingte zongh ama ii a ngup ciangin lungdam hi,”

⁴Mihingte in la asak tu ni khat hong theng tu hi. “Topa tungah lungdamko vun! Nang hong hu tu in ama sam vun! Ama septe minam theampo tungah son vun. Ama bang zata lian ziam cisia mihingte tungah son vun!

⁵Topa in a lamdang na liante seam siat zo ahikom ama tungah la sa vun. Hi thuthang sia leitung buppi in za taken.

⁶Zion ah a teang mi theampo in au in la sa taken! Israel te ii a thiangtho Pathian sia lian a, ama in a mite sungah teang hi,”

Isaiah 13

Pathian in Babylon Daan pia tu

¹Hisia sia Babylon taw kisai, Amoz ii tapa Isaiah ii Pathian tung pan a nga thupuak ahi hi.

²Mual kolh khat tungah ngal simna laandial khaito vun! A kiphasak khuapi kongpite a sim natu lakna in na ngalkapte nasia takin oksan in a, na khut laamto in.

³Topa in a thiangtho ngal khat sim tu le ama a thin uuksakte daan pia tu in a kiphasak le a muan huai a ngalkapte sam zo hi.

⁴Mualtung ngamlumna aw— mihonpite ngamlumna aw, minam tam mamate le kumpi ngamte kikhawm in ngamlumna awte ngai vun. Ngalkap tam mamate ii Topa in a ngalkapte ngalsim tu in kithoaisak hi.

⁵Amate sia leimong ah a om ngam khualate pan hong pai uh hi. Topa sia a thin ukna taw leitung bup lalthamsak tu in hong pai hi.



- ⁶Na sa in au vun! Vaanglianbelpa ii sukcip tu ni, Topa ii ni, hong nai hi.
- ⁷Mihing theampo ii khutte zaw vadil tu a, mihing theampo a thin hatna kiam tu hi.
- ⁸Amate a vekpi in launa le nasak mama na thuak tu a, numei nausuak tu bangin na sa bot sa tu hi. Amate khat le khat launa taw ki en tu a, maizum in a mai uh san tu hi.
- ⁹A thin uuk, a thin so vilvel le a ngilo Topa ii ni hong theng hi. Leitung sia dui kisuaksakin, mawnei theampo kilalcipsak siat tu hi.
- ¹⁰Aksi theampo le aksi honpite taang nawn ngawlin, ni a sua ciang taang ngawlin mial tu a, tha taang ngawl tu hi.
- ¹¹Topa in, “Leitung ah siatna ka thengsak tu a mi ngilote theampo a khialna hu in daan ka pia tu hi. A kiphasak theampo ka niamsak tu a, a kihisak theampo le a tatsiate theampo daan ka pia tu hi.
- ¹²A nungta sunte kham sangin ka tawmsak zaw tu hi.
- ¹³VaanglianbelpaTopa Keima in, ka thin uukna ka lak ni in, vantungte lau in ka liingsak tu a, Leitung sia ama omna pan ka thingkeak tu hi.
- ¹⁴“Babylon ah a teang ngamdang mite sia savaite kung pan a suakta sanang bang le a cing om ngawl tuute bangin amate ngam tek ah tai in kikhen tham tu uh hi.
- ¹⁵Mat a thuak pawpo kihollum tu hi.
- ¹⁶Amate mutangin a nausente a thi tu in leiden na kinei tu a, a innte kiphuulin, a zite buanin kikhial pui tu hi,” ci hi.
- ¹⁷Topa in, “Babylon sim tu in Medeste ka nawm tu hi. Amate in ngun sia bangma thusim ngawlin, kham zongh awlmawk ngawl uh hi.
- ¹⁸Amate in a thal le a thaltangte taw tangvalte thatlum tu uh hi. Amate in nausente hesuak ngawlin, patangte khuangai huai sa ngawl tu uh hi.



¹⁹Babylon sia kumpi ngam theampo sung pan a et hoi bel hi a; tuasia in a mite kiphatsakna ahi hi. Ahihang Topa ahi, Keima in, Sodom le Gomorrah ka vawt bangin Babylon ka lawnthal tu hi!

²⁰Tua munah kuama teang kik nawn ngawl tu hi. A vak kawkoai Arab mite kuama in tua munah puanbuk phut ngei nawn ngawl tu a, tuucingpa in tua munah a tuu honte tha ngei nawn ngawl tu hi.

²¹Tua mun senneal ngamsate teenna le simbute bu tomna mun hi tu hi. Tua munah vacim kalaoh te teangin sathakte thingbek suangbek sungah kinuntaw tu uh hi.

²²Tausaang te le kumpi innte sungah ngam ui le ngiate auna aw hawl tu hi. Babylon khuapi a siat tu hun theng zo hi! A nite cing dektak zo hi,” ci hi.

Isaiah 14

Saltanna pan Heak kikna

¹Topa in ama mihing Isrealte khatvei ma hesuak kik leleau tu a, ama mihing in teal kik tu hi. Topa in amate a ngamah teangsak kik tu a, ngamdang mite pai in tua mun ah amate taw teang khawm tu uh hi.

²Topa ii Israel mihingte a piak sa ngamah Israel mihingte cia kik natu in minam dang tam mama in hu tu a, tua munah minamdangte sia Israel ii sila seam tu uh hi. Khatvei lai in Isreal a man te sia tu in Israel in man tu a, khatvei lai Israel mihingte a zawthawk vawtte sia Isreal mihingte in uk tu hi.

Mithi Khua ah Babylon Kumpipa

³Topa in Isreal mite natna ngimna a thuakna pan le nasep ham a kisepsakna panin toithaina pia tu hi.

⁴Topa in hi bang a piak ciang, Israel mite in Babylon kumpipa sia: “A tatsia kumpipa pukvawk zo! Ama in kuama zawthawk vawt kik zo nawn ngawl tu hi!

⁵Topa in a ngilo ngamukte

⁶thin uuk velvol a, a mite a zawthawk vawtte le, a laak sa ngam mite a vawtsia tan tawntungte ii vaangletna bosak zo hi.



⁷Tu in leitung theampo ah kilemna le thinnopna om a, kuama po thinnuam lungdam in la sa uh hi.

⁸Kumpipa a zatak hu in Lebanon ngam a om taakthingte le Cedar kungte lungdam uh hi, banghangziam cile tu in ama thi zo a, amate a phuktan tu kuama om nawn ngawl hi!

⁹Babylon kumpipa muak tu in mithi khua kinging hi. Leitung ah a vaanglian mite ii thaate vak hiithuut kawkoai hi. Kumpite ii thaate sia a kumpi tokhumte pan tho uh hi.

¹⁰Amate a vekpi in ama ausan in, “Tu in nang sia koma bangma in thazawm zo ni hi! Nang sia koma khat bangma na hi hi!

¹¹Tumthei tengtong awngingte taw hong kipok bul hi ve, ahihang tuciang hi mun mithi khua theng thong ni hi. Thanhte na luppha hi a, na zanpuante zongh thanh vive ahi hi,’ ci uh hi,” ci in nunau tu uh hi.

¹²Babylon Kumpipa nikonghong aksi awng, vantung panin nong taak suk zo hi! Ni dangin minamte na zo a, ahizong tu in lei ah hong ki khiasuk zo ta hi.

¹³Nang in vantung ah kaato in, na kumpi tokhum sia a saangbel aksi tung pek ah koi tu in na ngaisun hi. Nang in milim pathiante kikhopnasaksang ah a om mual tungah kumpi khat bangin to tu in na kingaisun hi.

¹⁴Nangma in meei dawn ah ka kaato tu a, Vaanglianbelpa taw ka kibang tu hi, na ci hi.

¹⁵Ahizong mithi khua a thuk belna munah nang hong kipuak suk zo zaw hi.

¹⁶Mithite in nang hong salh ngengu in, hong kamkat tu hi. Amate in, “Hisia pa in leitung lok a, kumpi ngamte a liingsak pa ahi nam?

¹⁷Hisia pa in khuapite lalcipsakin, leitung senneal ngam a suak sak pa ahi nam? Hisia pa in a thongtaakte suatak ngeingawlin, a inn uh ah a ciasak ngei ngawl pa ahi nam?” ci in dongh tu hi.

¹⁸Leitung kumpite theampo sia a pha bel le a hoi bel amate thaankuul ah kiphum uh a,

¹⁹ahihang nang in thaankuul nei ngawlin, na luang sia a muatcip tu in kivawk hi. Na luang sia ngal kisimna sungah a kithatlum ngalkapte ii luangte in sealcip a, suanghawng sung khat ah kivawk khawmin kituancil hi.

²⁰Nangma in na ngam susia a, na mite mama na thatlum hi, tua hu in nang sia kumpi dangte bangin hong kiphum ngawl tu hi. A ngilo na innkuanpuite kuama nungta ngawl tu hi.

²¹Kithalupna kipan hen! Hi kumpipa ii tapate sia a taangpupite khialna hangin thi tu uh hi. Amate kuama in leitung uk ngei nawn ngawl tu a khua le tui saat zo ngei nawn ngawl tu hi.

Pathian in Babylon Lalcipsak tu

²²Vaanglianbelpa Topa in, “Babylon simin, ka siasak tu hi. Keima in nausente pan kipan kuama ka khoaikhe buatu hi, a nungta kuama om ngawl tu hi. Topa ahi, Keima in, ka son zo hi.

²³Keima in Babylon khuapi buannawng pui khat ka suaksak tu a, tua munah simbute teang tu hi. Babylon sia munphia khat taw ka phiat tu a, tua in na theampo phiatkeak tu hi. Vaanglianbelpa Topa Keima in ka son zo hi,” ci hi.

Pathian in Assyria Mite Lalcipsak tu

²⁴Vaanglianbelpa Topa kiciam zo a; “Ka tup bangin piang tu hi. Vawt tu in ka khensat sa bangin kivawt tu hi.

²⁵Israel ka ngam sungah Assyriate ka lalcipsak tu a, ka mual tungah amate ka tuancil tu hi. Ka mihingte Assyriate ii hakkol pan le amate ii puak tu a vanhngitte pan ka suatak tu hi.

²⁶Hi tupna sia leitung buppi atu hi a, minamte daan pia tu in ka khut ka vaan hi,” ci hi.

²⁷Vaanglianbelpa Topa in hi sia vawt tu in khensat zo hi; ama in daan pia tu in a khut vaan zo a, kuama in khaam thei ngawl hi.

Pathian in Philistinete Lalcipsak tu

²⁸Hi thu sia Ahaz Kumpipa thi kum in, a kipualaak thu ahi hi.



²⁹Philistia mite awng, note hong saat ciangkhut sia kithiaktan hi, ahihang note lungdamna tu thu om ngawl hi. Ngul khat a thi ciang, a ngilo zaw seseam khat a taangin hong pai hi. Ngul ii tui panin a leang thei ngulpui khat keu hi.

³⁰Topa in a mite sung pan a cimaw mizawngte tuucing pa bangin a keam tu a, thinmuang takin amate omsak tu hi. Ahizong no Philistine mite tungah nasia takin kialpi ama in tungsak tu a, khat zongh hong hingkhoai ngawl tu hi.

³¹Philistine khuapi theampo awng, huna ngenin au vun! Na vekpi un lauthawng in om vun! Saksang pan ngalkapte hong paina leivui khu sia meei bangin hong pai a, tua ngalkapte sungah a lauthauh khat zongh om ngawl hi.

³²Philistia ngam pan hong pai kamtaite bangbang muak tu khu ziam? Topa in Zion khua kipsak zo a, haksatna a thuak a mite sia tua munah bukna muanhuai mu tu hi, ci in amate ka son tu uh hi.

Isaiah 15

Pathian in Moab Lalcipsak tu

¹Hisia sia Moab taw kisai thupuak ahi hi. Zan khat thu in Ar le Kir khuapite kilalcipsak a, Moab ngam thim dide hi.

²Dibon khua mihingte biakna munah kap tu in mual tungah kaato uh hi; Nebo le Medeba khuapite hangin Moab khua mite nasia takin kap uh a; khuangai in a samte le a khamulte meet uh hi.

³Lamzinpi tungah a om mite khau-ip puan kisilhsak a; innkhum dawn le khuapi leitual ah a om mite mau in kap uh hi.

⁴Heshbon le Elealeh khua mite kapin, amate kaana awnging sia Jahaz khua dongin kiza thei hi. Ngalkapte ngangawn liingin; a hanna teng bo siat hi.

⁵Ka thin takpi taw Moab atu in ka kap hi! A mite Zoar khua le Eglath Shelishiyah ah tai zo uh hi. Pawl khat te Luhith lampi ah kap kawmin paito uh a, pawl khat ahile Horonaim khua ah kap kawmin tai a, suakta uh hi.



⁶Nimrim Luitui kang hi, tua luitui ah a po lopate vul zo a, lohing bangma om nawn ngawl hi.

⁷Mihingte sia amate neisa theampo taw a suatak natu hanciam in Pakngiam Kuam kantan in pai uh hi.

⁸Moab ii ngamngi theampo ah kaana awnging kiza hi. Eglaim le Beerelim khuate ah kaana aw kiza hi.

⁹Dibon khua ah nguntui sia chisan bangin san a, Pathian in tua lai ah a om mite atu in a thuk tu a nasia zawlai pawlkhat koilai hi. Hi hi, Moab ngam sungah a kikhe lai mi theampo chisan luangin kithalup ngawpna khat om tu hi.

Isaiah 16

Moab atu Lametna Om ngawl

¹Senneal ngam sungah a om Sela khuapi pan Moab mihingte in Jerusalem ah a om ngamukpa tungah tuuno khat letsong in puak uh hi.

²Vacimte a bu uh pan a ki nawkeak bangin amate in Arnon Ngun vaalbo tung pan ngakin a ci a law he ngawlin vak kawkoai uh hi.

³Amate in Judah mihingte tungah, “Bang seam tu khu ziam hong son tavun. Thingkung khat in suntang ni sat kimlai in a lim bel tu khat a piak bangma in kote hong dal tavun a, na limnuai ah hong tawlngasak tavun. Ko sia ngaltaite ka hi uh hi, kuama ii hong mu thei ngawlna munah hong seal tavun.

⁴Na ngam sungah ko hong teangsak tavun. Kote hong lalcipsak nuamte kung pan hong dal tavun,” ci uh hi.

(Zawthawk vawtna le suksiat nate bo tu a, ngam lalsak mite kibo sak tu hi.

⁵Tua zawkciang, David suan le paal sung pan khat sia kumpi suak tu a, ama in mihingte thumaanna le itna taw uk tu hi. Ama in a maan sep tu manlang tu a, thumaan thutang bek seamsak tu hi.)



⁶Judah mihingte in, “Moab mihingte bang zata in kiphasak ci thu ih za zo hi. Amate a kihisakna le a kiletsakna ih he hi, ahihang amate ii kisuantaakna sia a luithawthong hi,” ci uh hi.

⁷Moab mihingte ngimna a thuak hu in kap tu uh hi. Kir Heres khuapi sungah a omlai in a neak bul uh anlimte a phaw kik uh ciangin amate a vekpi in kap tu uh hi. A thin kiam tu uh hi.

⁸Heshbon khua hui a lote le Sibmah ii sapit huante kilalsak hi- tua sapit huan pan a piang sapittuite in minam ukte zu khamsak ngei bul hi. Khatvei lai in Jazer khuapi dong, niswana sang senneal ngam dong, nitumna sang Tuipi Thi ngalkhat dong sapit kungte zaam hi.

⁹Jazer atu ka kaa bangma in tu in Sibmah ii sapit kungte atu in ka kap hi. Mihingte lungdamsak natu in anlaak poai om ngawl ahikom Heshbon le Elealeh atu in ka thitui taak hi.

¹⁰Tu in lo ngam pha sungah kuama lungdam ngawl hi. Sapit huan sungah kuama au ngawlin la sa ngawl uh hi. Zu vawt tu in kuama in sapit ngate cil ngawl uh hi; lungdam in, au nate bo hi.

¹¹Moab atu in he in Kir Heres atu in khuangai in ka tau hi.

¹²Moab mihingte in mualsaang tung a biakna munte le a biakinnte ah thungen tu in pai ahihang ngim thawthong uh a, amate atu bangma phattuamna om ngawl hi.

¹³Tuasia sia Moab taw kisai Topa thupuak maksak ahi hi.

¹⁴Tu inTopa in, “Kum thum a cin lianin Moab ii hauna letnate mangthang tu a, a mite tam mama sung pan tawm bek suakta in, thazawm tu uh hi,” ci hi.

Isaiah 17

Pathian in Syria le Israel Daan pia tu

¹Topa in, “Damascus sia khuapi khat hi nawn ngawl in; ninthuk kholna mun khat hi tu hi.



²Syria khuapite kinusia cip tu hi. Tua mun sia tuu le khui tatna mun hi tu a, kuama in tuate bengkeak ngawl tu hi.

³Israel sia a dal tu om ngawl tu a,, Damascus in a suatakna bosua tu hi. Syria te a nungta laite sia Israel mihingte bangma in mai mawl tu uh hi. Keima, Vaanglianbelpa Topa in ka son zo hi,” ci hi.

⁴Topa in, “Israel ii letna a bo tu ni khat hong theng tu a, a hauna sia zawinna taw kilaih tu hi.

⁵Israel sia ankung a kisaattan an a kila sa lo khat bang le, Rephaim Kuam sung lo khat ah ansangh teng a kikaikhop zawkciang a kolh lo khat taw kibang tu hi.

⁶Israel mihing tawm bekma nungta lai tu a, a dawn pek ah a om pum nii pum thum simngawl teng, ahibuale, a nuaisang a baakte tungah a kikhe lai tawmno teng po simngawl, a nga teng theampo a kilo siat sa olive kung khat taw kibang tu hi. Keima, Topa Israel te Pathian in, ka son zo hi,” ci hi.

⁷Tua ni a thet ciang, mihingte in amate a Bitphuapa ahi, Israel te ii a thiangtho Pathian kungah hu ngenin zuan tu uh hi.

⁸Amate in a khutte taw a vawttawm biaknataute suang nawn ngawl tu a, ahibuale a khut vateak taw a vawt sa— Asherah pathiannu limte le ngim namtui halna taute muang nawn ngawl tu hi.

⁹Tua ni a thet ciang a muanhuai khuapite sia Israel te kung pan a taikeak Hivte le Amorte ii nusiak khuapite bangin lalcipin kinusia tu hi.

¹⁰Israel awng, nang hong suaktasak le suangpi khat bang a hong dal Pathian na mangil zo hi. Tuasia bek dom ngawlin, ngamdang milim pathian biak natu in biakna huan thiangthote na vawt hi.

¹¹A kungte na suan ni zing mama in meangin a paak hial zongin an laak tu na nei peang buatu hi. Haksatna le a dam thei ngawl natna bek om tu hi.

Ngal Ngamte Kizo

¹²Ngam thahatte buaina sia tuipi nging bang, tuihual puite kisuk bangin, sa lialua hi.



¹³Ngalte sia tuihualte bangin maisang manaw in pai uh hi, ahihang Pathian in amate tei ahikom nungkin kikin, suumpei sungah taangphawte bang le mual tungah leivuite bangin kiseam keak hi.

¹⁴Nitak in amate kiitak huai mama a, ahihang zingsang in bo hi. Hisia sia ih ngam hong suttolte theampo ii thuak tu ahi hi.

Isaiah 18

Pathian in Ethiopia Daan pia tu

¹Ethiopia ngunte ngalkhat thaphil nging a kizaakna munah ngam khat om hi.

²Tua ngam panin, pompa taw a kivawt ngunkuung taw tongciinte Nile ngun zui in paisuk uh hi. Zak tangzang kamtaite awng, na inn uh ah cia kik vun! Nguntuite ii khentan, na ngam uh ah vaanglian a, a thahat, a tun saangin, a ciineal, leitung buppi ii kiitak na mite tungah thu khat puak kik vun.

³Ngai vun, leitung ah a teang mite theampo awng! Mualdawn ah a kikhai tu limlakna laandial khat en vun! Lemle a kitum tu aw ngai vun!

⁴Topa in kei tungah, “Keima in anlaak hun zan khualum lai daaituite a taak bang vakhial le, sun lai nitaang kiukiau bangin vantung pan kong ensuk tu hi.

⁵Sapit ngate a kikaikhop ma, a paakte a pul siat ciang le a ngate a min ciang sapit kung pan a baakte baak heuna nam taw ol takin, a kiheu bangin, ngalte in Ethiopia te ol takin susia tu hi.

⁶A ngalkap te ii mithi luangte sia vacimte le ngamsate atu in ki nusia thal tu hi. Khal sungin vacimte in tuate ne in, phalbi sungin ngamsate in ne tu uh hi,” hong ci hi.

⁷Ngunte ii khenthap hi ngam a thahat le a vaanglian hi minam, a tun saang a, a ciineal, leitung theampo ah a ki kiita hi mihingte tung pan in Vaanglianbelpa Topa ii biakpiakna a san tu hun khat hong theng tu hi. Vaanglianbelpa Topa a ki biakna mun Zion Mual tungah amate hong pai tu uh hi.

Isaiah 19

Pathian in Egypt Daan pia tu



¹Hisia sia Egypt ngam taw kisai thupuak ahi hi. Topa sia meei tungah to in, manlang mama in Egypt ngamah hong pai hi. Ama mai ah Egypt milimte liingin, Egypt mihingte a hanna bo hi.

²Topa in, “Egypt ngam sungah tualngal thosakin, unau khat le khat, innpaam khat le khat ka kidosak tu hi. Khuapi khat le khat kisim in, kumpi khat le khat vaangletna kituu in kisim tu uh hi.

³Egyptte ii tupnate lalsakin, a thin kho nate ka siasak tu hi. Amate in a milimte tungah huna ngenin, aisaante le mithite ii thaa te tungah thu dongh tu uh hi.

⁴A ngoltol a tatsia kumpi khat tungah Egyptte aapin ka uksak tu hi. Keima, Vaanglianbelpa Topa in ka son zo hi,” ci hi.

⁵Nile nguntui kiamsuk in, ngun sia dadam in kang tu hi.

⁶Nguntui luanna tuilamte dadam in ko in ui tu hi. Pumpa kung le phaipheng kungte ko ngaw tu a,

⁷Nile ngundung vaalbo tungah a kiciing ankung theampo ko ngaw in, hui in seamkeak tu hi.

⁸Nile ngunsung ngasa manin a nungtate theampo tau in kap tu uh hi; a ngasa tangthaakna le a ngeente kimanna nei ngawl tu hi.

⁹Puankaang neal puan takte thinkiam tu uh hi;

¹⁰thiamtakte le khutthiam naseamte thinkiam dikdek in khuangai tu uh hi.

¹¹Zoan khua lampuite sia mi mawmawte ahi uh hi! Egypt mipil belte in a mawmawt huai ngaisutna hil uh hi! Amate in taanglai mipilte le kumpite zalaih tu ka hi uh hi ci in bangbangin kumpipa tungah son ngam ziam?

¹²Egypt kumpipa awng, na mipilte koisungah om ziam? Egypt atu in Vaanglianbelpa Topa in bang tupna nei cisia mipilte in nang tungah hong son thei tha tu hi.

¹³Zoan le Memphis lampuite mawmaw uh hi. Amate sia minam lampui tute ma hi a, ahihang lampui khial uh hi.



¹⁴Topa in a lungman huai bialbual ngaisutna amate in piasak hi. Tua hu in, Egypt in a maan ngawl theampo seamin, zukham khat ama luak naal tawk bangin ama hoi vatut hi.

¹⁵Egypt ngam sungah a om, a hau a zawng, mi thupi mi thupi ngawl, kuama in Egypt hu thei ngawl hi.

Egypt in Topa Bia tu

¹⁶Egypt mihingte sia numeite bangin a maizum tu hun khat theng tu hi. Vaanglianbelpa Topa in amate daan pia tu in a khut a vaan sia a mu uh ciang amate lau in liing tu uh hi.

¹⁷Egypt mihingte daan pia tu ci in Vaanglianbelpa Topa ii tupna thu a phaw kik simin Egypt mihingte in Judah kiita tu uh hi.

¹⁸Tua hun a thet ciang, Egypt khuapi ngate sungah Hebrew kam kipau tu hi. Tualai a mihingte in Vaanglianbelpa Topa min taw kiciamna vawt tu uh hi. Khuapite sung pan khuapi khat sia, “Ni ii Khuapi” kici tu hi.

¹⁹Tuasia hun a thet ciang, Egypt ngam sungah Topa biak piakna tau khat om tu a Egypt ngamngi ah, ama min in khansuang khat kiphut tu hi.

²⁰Tuate sia Vaanglianbelpa Topa ii Egypt ngam sungah a om a kilakna lim hi tu hi. Tualai ah a om mite a ki zawthawk ciang le Topa tungah huna a nget uh ciang, ama in amate suaktasak tu in mihing khat puak tu hi.

²¹Topa sia Egypt mihingte tungah ama mama kilangh tu a, tuaciang mihingte in ama he in, bia tu a, biakpiakna le meihal biakpiaknate pia tu uh hi. Amate in Topatungah a ciliap huai thuciamna vawtin, tua a kiciamna bangin seam tu uh hi.

²²Topa in Egyptte daan pia tu hi, ahihang tua zawkciang damsak tu hi. Amate in Topa sang nga tu uh a, ama in a thungetnate za in a ci uh damsak tu hi.

²³Tua hun a thet ciang, Egypt le Assyria ngam kilaklaw ah lampi lian khat om tu hi. Tua ngam mihingte khat le khat kihaw in amate in Topa bia khawm tu uh hi.



²⁴Tua hun ciang, Israel sia Egypt le Assyria taw kipawl tu a, hi minam thumte leitung buppi atu in thupha hi tu uh hi.

²⁵Vaanglianbelpa Topa in amate thupha pia in, “No, ka mi ahi Egyptte awng; no kong bitphua sa ahi Assyriate awng no kong teal sa mi ahi Israete awng, thupha kong pia tu hi,” ci tu hi.

Isaiah 20

Pum nguakin A Om Kamsangpa Lim

¹Assyria Kumpipa Sargon thupiakna taw in, Assyria ngalkapmaang lian belpa in Philistine khuapi Ashdod sim hi.

²Tua hun ma kum thum lai in Topa in Amoz ii tapa Isaiah tungah a silh laizang khau-ip puan le a peangdapte sut tu in sawl hi. Ama in thu ni in a pumngvak le a peang nguakin vak kawkoai hi.

³Ashdod khua a kilaak zawk ciang, Topa in, “Ka naseampa Isaiah sia a pum ngvak, a peang nguakin kum thum sung vak kawkoai hi. Hi thu in Egypt le Ethiopiate tungah maisang bangteng piang tu cisia, lakna lim ahi hi.

⁴Tua ngamte nii pan a mat silate sia a pum nguakin Assyria kumpipa in paipui tu hi. Egypt mite maizum pia tu in, a moi a haam ci tuan om ngawlin, a ngoaibul zongh kiseal ngawlin a pum ngvak le a peang nguakin vak tu uh hi.

⁵Ethiopiate muangin le Egyptte hangin a kiphasak tha te a khial hunlam kiphawksak tu a, a thin uh kiamin a lametna uh bo siat tu hi.

⁶Tuasia hun a thet ciang, Philistia ngam tuipe dungah a teang mite in, ‘Assyria kumpipa kung pan ei hong hu tu in ih suan ih muan bel mite bangtat thong ziam en vun! Eite bangbang nungta thong tu hi ziam?’ ci tu uh hi,” ci hi.

Isaiah 21

Babylon ngam Bo natu Mukholna

¹Hisia sia Babylon taw kisai thupuak ahi hi. A lauhuai ngam khat panin suumpei khat bangin senneal ngam kantan in, tuasiatna hong pai tu hi.



²A kiitak huai mu kholna khat ka mu a, kilee heakna le lalcipna ahi hi. Elam ngalkapte awng, sim vun! Media ngalkapte awng, khuapite kiim uum vun! Babylon ii a piansak haksatna le thuaknate theampo Pathian in bosak tu hi.

³Mu kholna sungah ka zaak le ka mute in hong lausakin, numei khat nau a tut ciangin na asak bangin na ka sa hi.

⁴Ka lu hong vai in, lau in ka liing hi. Nitak hong thet tu kaal ka ngakla a, ahihang hong thet takpi ciang liinna le launa bekma hong puak hi.

⁵Ka mu kholna ah anneak poai khat kingingin ka mu hi; leangnate to natu in puan saate kipha hi. Amate an ne tui dawnin a om laitak thakhat thu in thupiakna khat nging hi; “Ulian te awng! Na lumte pua khol vun!” ci hi.

⁶Tua zawkciang Topa in kei tungah, “Pai in a ngalvil khat koi in, a mu bangin thu hong puak tu in sawl in.

⁷Ama in mihing nii veu siphu tungto in hong pai ahizong, laa tung le kalaoh tungah a to mihing a mu le pha takin amate a etcik tu ahi hi,” hong ci hi.

⁸Ngalvilpa in, “Topa awng, a sun a zan in ngalvil in ka ding tan hi,” ci hi.

⁹Thakhat thu in amate hong theng hi! Mihing nii veu nii veu siphu tung to hi. Ngalvilpa in, thu puak hi, Babylon bo zo hi! Amate ii biak milim theampo lei ah tamtham dipdeap in om hi,” ci hi.

¹⁰Israel ka mihingte awng, mangtaang bangin no hong kicil zo hi, ahihang tu in Israel te ii Pathian ahi, Vaanglianbelpa Topa tung pan ka zaak, a zaaknop huai thute kong son zo hi.

Edom taw kisai Thupuak

¹¹Hisia in Edom taw kisai thupuak ahi hi. Edom pan khat in kei hong samin, “Ngalvil pa awng, bang hun ciang zan hun kiman tu ziam? Bang hun ciang bo tu ziam hong son tan,” hong ci hi.

¹²Ka zokikna pan, “Zingsang hong thetheng hi, ahizong zan hun hong theng kik leleau tu hi. Nong dongh nuam kikik le hong pai kikin hong dongh tan,” ka ci hi.

Arabia taw kisai Thupuak



¹³Hisia in Arabia taw kisai thupuak ahi hi. Dedan mi, Arabia ngamkol sungah kalaoh hon taw khualhaw zan ngiak note awng,

¹⁴note kungah hong pai tuidu dangtaak mihingte tui pia vun. Tema ngam mihing note awng, ngaltaite an pia vun.

¹⁵Namsau taw kithalupna pan, thal taw ki kaalupna pan le ngal launa theampo pan a suakta tu in mihingte tai uh hi.

¹⁶Tua zawkciang Topa in kei tungah, “Kum khat sung lianin Kedar minamte ii a letna theampo bo tu hi.

¹⁷Kedar mite sung pan thal toaite sia ngalhang belte hi a, ahihang amate sung pan tawm bek taang lai tu hi. Israel te ii Pathian Topa ahi Keima in ka son zo hi,” hong ci hi.

Isaiah 22

Jerusalem taw kisai Thupuak

¹Hisia in Mukholna Kuam taw kisai thupuak ahi hi. Bang thu piang ziam? Banghangin khua mite theampo in innkhum tungah poai vawtin om uh ziam?

²Khua buppi au in ngamlum lialua a, lawpna taw kidim hi. Hi ngal sungah a thi na mite sia ngal simin, thi hi ngawl hi.

³Na lampuite theampo taikeak in, thaltang khat zongh a kap ma in kiman uh hi.

⁴Ka mihing a thite theampo atu in nasia tak ka kaa thei natu in, tu in keima nguak hong nusia tan. Hong heeneam heak in.

⁵Hi hun sia Mukholna Kuam sungah a piang liinglawng patauna, ngal lelina le a hi biaibuai hun hi a, tuate sia Vaanglianbelpa TopaVaanglianpipa in ei tungah hong thengsak hi. Ih khuapi uumna luphungte kisaattham zo a, huna ngenin auna awte mualte kilaklaw ah hawl hi.

⁶Elam ngam pan ngalkapte thal le thaltang toai in siphu tung to in, hong pai uh hi. Kir ngam pan ngalkapte a lumte taw kithoai sa in om uh hi.



⁷Leipha mama Judah kuam sia ngalleangte taw kidim in, siphu tung to ngalkapte Jerusalem kongpitemai ah ding uh hi.

⁸Judahte ngal dalnate theampo cimhtham hi. Tuabang a pian ciang, ngalvanh koina phual pan ngalhiamte na la uh hi.

⁹⁻¹⁰Jerusalem luphung koisung teng pua tuak cisia na mu hi. Jerusalem khua ah a om innte theampo na en kawkoai a, khuapi luphungte pua kik natu in, zak tu suangte nga natu in, inn pawlkhat na pheltham hi. Tui khol natu in,

¹¹tuili a lui pan a luangsuk tuite khol natu in khuapi sungah tuibeam khat na vawt hi. Ahihang nidang lai pekin, hite theampo hong zeaksak le a piangsak Pathian na thusim bua uh hi.

¹²Tuaciang Vaanglianpipa Topa, Vaanglianbelpa in a kap tu a mau tu le sam meettol in, khau-ip puan silh tu in note hong sam hi.

¹³Tua kawm sung pan nui in poai na vawt uh hi. Neak tu in tuu le khuite na ngo uh a zu na dawn uh hi. Noma in, “Eite ih hi le ne in dawnin ih om tu hi! Zing ciang thi tu ih hi hi,” na ci uh hi.

¹⁴Vaanglianpipa Topa, Vaanglianbelpa ama mama in kei hong paupui a, “Amate a nuntak lai teng a siatna kimaisak ngei ngawl tu hi. Keima, Vaanglianpipa Topa Vaanglianbelpa ka pau zo hi,” hong ci hi.

Shebna tungah Kidop natu Thupiak

¹⁵Vaanglianbelpa Topa in keima tungah kumpi innkuan sung thuzeakpa ahi, Shebna kungah pai in hi bangin ci tan,

¹⁶“Nang akua kisa ni ziam? Mualtung suang sungah nangma atu thaan khuk khuak tu in bang thu nei ni ziam?”

¹⁷Thupi zongh thupi tha tu ni hi, ahihangTopa in nang hong zamin hong vawk tu hi.

¹⁸Ama in bawlung top bangin nang hong tawm tu a, a lian zaw na ngam khat ah hong vawk tu hi. Na kisak thei pui mama ahi siphu leangte ii kungah na thi tu hi. Na Topa ii innkuan maimawlsak ni hi.



¹⁹Topa in na na sepna mun panin hong not tu a, na min le na za letna pan hong khia suk tu hi,” hong ci hi.

²⁰Topa in Shebna tungah, “Tuabang a pian ciang, Hilkih ii tapa, ka naseampa Eliakim ka sam tu hi.

²¹Na puantual ama ka silsak tu a, na kawngkhau taw ama sawmin, na thu neina theampo ama tungah ka pia tu hi. Ama in Jerusalem le Judah mite tungah pa khat bang hi tu hi.

²²David ii suan le paal kumpi nuai ah a pawlcing thu neina ama ka pia tu hi. Ama in thu neina tawtangte nei tu hi; ama hon sia, kuama in khak ngawl tu a, ama kha sia, kuama in hong ngawl tu hi.

²³Ama sia vanh khaina khat bangin kip takin ka khosak tu a, ama ii be le phung bup atu in maipha ngana ii naak hi tu hi.

²⁴“Ahizong a bete le ama a bealte theampo sia ama atu in vanhngit khat suak tu hi. Amate sia vanh khaina ah um le bealte a kikhai bangin ama tungah kibomkhai tu hi!

²⁵Tuabang a pian ciang kho takin a kikhen vanh khaina sia kawmin in taak tu hi. Tua in a tungah a kikhai nate theampo ii bona hi tu hi,” ci hi. Topa pau zo hi.

Isaiah 23

Phoenicia taw kisai Thupuak

¹Hisia in Tyre taw kisai thupuak ahi hi. Tuipi tung a pai teambaw hawlte awng, khuangai in kap vun! Teambaw tawlngakna na khuapi Tyre sia kilalsak zo hi; a innte le teambaw tawlngakna munte lalcip in om hi. Na teambawte Cyprus pan hong heak kik ciang hi thute na za uh hi.

²Sidon sumvawtte awng, tau in kap vun!

³Egypt ngamah a piang antangte lei tu zuak tu le minam theampo taw sum vawt kipee tu in tuipi kantan in mihingte na paisak uh hi.



⁴Sidon khuapi awng, na maimawl hi! Tuipi le tuipi thuk liante in nang hong nialin, “Kei ta khat zongh nei ngei bong. Tapate, tanute ka nei ngei bua hi” ci hi.

⁵Tyre khua lalna thu a zaak uh ciang Egypt mite ngangawn liinglawng in thinkiam tu uh hi.

⁶No Phoenicia mite awng, he in au vun! Spain ngamah tai sawm vun!

⁷Hisia in taanglai pekin a kisaat Tyre khua nuam hi thong na ziam? Tuipi kantan in ngamthak saatin a teang tu mite a puak sia hi khuapi ahi ziam?

⁸Kumpi khuapi ahi, leitungah ngual ii zatak sumvawt sumhaute ii khuapi ahi, Tyre khua ah hi bang theampo a pian natu in akua in vaihawm ziam?

⁹Vaanglianbelpa Topa in vaihawm hi. Amate ii kiphatsak nate a bo natu le a zatak huai a uliante maizum natu in Topa in vaihawm hi.

¹⁰Spain ngamah ngamthak saatin a teang no mihingte awng, pai in lotho vun! No hong khoi tu kuama om nawn ngawl hi.

¹¹Topa in tuipi tungah a khut vaan in kumpi ngamte lawn thal zo hi. Phoenicia sum vawtna phualpi a kilalsak natu in ama in thu pia zo hi.

¹²Sidon khuapi awng, na lungdamna bo zo in, na mite in zawthawk vawt thuak uh hi. Amate Cyprus ah a tai zongin, a thin muang tuan ngawl tu uh hi.

¹³(“Tyre khuapi ngamsate phualpi a suaksak sia Assyriante hi ngawlin, Babylonte ahi uh hi. Ngal matna tusaangte a sa, Tyre khua kulhte a pheltham le khuapi a lalcip in a nusiante sia Babylon mihingte ahi hi.)

¹⁴Tuipi tung a pai teambaw hawlte awng, khuangai in kap vun! Na muan uh khuapi sia kilalcipsak zo hi.

¹⁵Tyre khua sia kumpi khang khat, kum sawmsali sung a kimakngil tu hun hong theng tu hi. Tua kumte a cin zawk ciang, Tyre sia la sungah numei pumpi kizuak nu bang hi tu hi.



¹⁶Kuama ii phaw ngawl pumpi kizuak numei nu awng, na tengtong la in khuapi kiimkot in pai in! Pate khatvei na kung hong zot kik thei natu in tengtong tumin na late sa kik in.

¹⁷Kum sawmsali a cin ciang, Topa in Tyre khuapi sia ama sep ngei ma seam kiksak tu a, leitung kumpi ngam theampo ah ama le ama a pumpi kizuak tu hi.

¹⁸Ama ii sumvawtna pan a thalaw sumte Topatungah kipia tu hi. Ama in tua sumte kholcip thawthong ngawlin, Topa a bia mite in amate atu a kisamh an le puante leina in zangh tu hi.

Isaiah 24

Topa in Leitangh Daan pia tu

¹Topa in leitangh lalsakin ngamkhingsak tu hi. Ama in lei maitang lalcipsakin, a mite thethaang tu hi.

²Mihing theampo ii thuakna kibang kim in, thiampite le mihingte silate le tote, vanh leite le vanh zuakte, sum pukthaakte le sumpute, a hau a zawng, a thuakna uh kibang kim tu hi.

³Leitangh tamtham in kisiacip tu hi. Topa in son zo a tuabangin kivawt tu hi.

⁴Leitangh ko ngaw in tulcip hi; leitung buppi zawngkhal hi; lei le van a nii in lalcip hi.

⁵Mihingte in Pathian thukhamte paltan na le a tawntungin a kikhomsuan tu a vawt thuciamna siatsakna taw leitangh ninsak uh hi.

⁶Tua ahikom Pathian in leitangh haamsiat zo hi. A mite in amate ii vawt bangin thuak uh hi. A nungta mihing tawm vaial hi.

⁷Sapit nguite vulcip in zu kam vangau hi. Nidang in a lungdamte tu in khuangai in,

⁸lungdamna tengtong le khuang ngingte thim zo hi.

⁹Zu a neak uh hang lungdam in la sa thei nawn ngawlin, kuama in a limna he nawn ngawl hi.



- ¹⁰Khuapi sungah na theampo kibuai in om a, kuama ii bangma a law thei ngawl natu in amate a inn sung tek ah kikhabil uh hi.
- ¹¹Zu a om nawn ngawl hu in mihingte lampi ah au uh hi. Lungdamna theampo mangthang siat zo a, leitung pan kibosak zo hi.
- ¹²Khuapi sia siacip in, a kongpите kisaat tham zo hi.
- ¹³Hi sia in leitung theampo ah a om minam theampo tungah a piang tu thu ahi hi. Tuasia in Olive ngate kithing siatin, sapit kung tung pan sapit nga sanghte a kilaw siat zawkciang a ki nusia, lo taw kibang tu hi.
- ¹⁴A suakta sun te lungdam in la sa tu uh hi. Nitumna sangah a om te in Topa ii letna thu son tu a,
- ¹⁵nisuana sangah a om te in ama pok tu uh hi. Tuipi dungah a teang mihingte in Israel te ii Pathian Topapok tu uh hi.
- ¹⁶Leimong a khuala belna panin a thumaan Israel minamte a pokna late ih za tu hi. Ahihang kei atu in lametna bangma om ngawl hi! Kei zawm dikdek ing! Ngual theamte in thatheam lai a, amate ki theamna nasia vaial hi.
- ¹⁷Mihing theampo awng, hong ngai tavun! Launate, dumte le thaangsia nate in note hong ngak nginge hi.
- ¹⁸A lauhuai na pan suatak tu a hanciam pawpo dum sungah taak tu a, dum sung pan a suakta pawpo thaang sungah kiman tu hi. Bing le beal a sun bangin vantung pan ngua zu tu a, lei tawdapte liing tu hi.
- ¹⁹Leitangh kektham in, tamtham in, kikhen tham tu hi.
- ²⁰Leitangh mama sia zukham khat bangin hoi vatut tu a, vui pi sungah vui ii seam buk bangin puk tu hi. Leitung sia khialnate in nengcip ngawpin, pukvawk in tho kik ngei nawn ngawl tu hi.
- ²¹Topa ii, tungsang vaang neite le leitung ukte daan a piak tu hun khat hong theng tu hi.



²²Dum sungah thongtaakte bangin Pathian in kumpite kaikhawm tu hi. Amate daan piak tu hun hong thet matengTopa in amate thong sungah khabil tu hi.

²³Tha mial tu a, ni taang nawn ngawl tu hi, banghangziam cile, Vaanglianbelpa Topa sia kumpi hi tu hi. Jerusalem khua Zion Mual panin ama in uk tu a, mipi lampuite in a vaangletna mu tu uh hi.

Isaiah 25

Pokna La

¹Topa awng, nangma in ka Pathian na hi hi; nang kong upat tu a, na min ka pok tu hi. Nangma in nalamdangte na vawt siat zo hi; taanglai pek a na tupnate thumaan takin na vawt siat zo hi.

²Khuapite na susia zo a, a kulhte na lalcipsak zo hi. Ih ngalte iisak kumpi innte bocip zo hi.

³A thahat ngam mite in nang hong pok tu hi; a tatsia mite ii khuapi sungah nang hong ki kiita tu hi.

⁴Mizawngte le a cimawte in nang kungah hong tai zo a, ngim le kham hun sungah thinmuanna nga uh hi. Vuipi vak ciang bukna pia in ni sat ciang nilim na pia hi. A tatsia mite in phalbi vuipi bangin sim a,

⁵kongaw ngamah nguatui hang bang ahi hi. Ahihang Topa nangma in ih ngalte na thimsak zo hi; Mihing tatsiate ii aunate, nisa sia meei ii a votsak bangin, na thimsak hi.

Pathian in Anneak Poai khat Vawt

⁶Vaanglianbelpa Topa in hi sung Zion Mual tungah leitung minamte theampo atu in a lim bel an le a ciik bel zu taw anneak poai khat vawt tu hi.

⁷Hi lai ah minam theampo ii heena meeikaaite ama in thakhat thu in hepsak tu hi.

⁸Vaanglianpipa Topa in thina a tawntungin lalcipsak tu hi! Ama in mihing theampo ii thitui nawlsak in a mite ii leitung mun theampo ah a thuak maimawl nate laaksak tu hi. Topa ama mama in ci zo hi.



⁹Tuasia a pian ciang, mihing theampo in, “Ama ih Pathian hi! Ama ka muang zo uh a, ama in hong suatak zo hi. Ama in Topa hi! Ama ka muang uh hi; tu in lungdam thin nuam in ka om uh hi. Banghangziam cile ama in kote hong ngum zo hi,” ci tu uh hi.

Pathian in Moab Daan pia tu

¹⁰Topa in Zion Mual dal tu hi, ahihang nganhing eak sungah taangphawte a kitotcil bangin Moab mihingte kituancil tu hi.

¹¹Amate in tui op tu hanciam bangin a khut vaan tu uh hi, ahihang Pathian in amate niamsak tu a, a khutte tung thei ngawlin tumsuk tu hi.

¹²Topa in Moabte ii a muanhuai luphung saangte susia in leivui suaksak tu hi.

Isaiah 26

Pathian in A Mihingte Ngalzawna Pia tu

¹Judah ngam sungah mihingte in hi la asak tu ni khat hong theng tu hi; Ih khuapi muanhuai hi! Pathian mama in tua luphungte cing hi!

²Khuapi kongpite hongin thumaan ngamta minamte le thutang minamte tumsak vun.

³Topa awng, nang hong muangin, tupna kho a nei mihingte a kicing thinnopna na pia hi.

⁴A tawntung Topa muang in; ama in a tawntungin eite hong dal tu hi.

⁵Ama in mihing kiphasakte kiniamkhiaksak hi; a teenna khuapi muanhuai lalsakin a kulhte cimhthamsakin, leivui suaksak hi.

⁶Zawhawk vawt a thuak mihingte in tu in tua khua zothal a, a peang nuai ah tuancil uh hi.

⁷Topa awng, mihing phate atu in a tot lampi maaisakin, na tamkimsak hi.

⁸Na deina bang kong zui uh a, nang sungah lametna kong koi uh hi; Kote deina theampo sia nangma na hi hi.

⁹Zan in ka thin theampo taw nang kong phawk uh hi; leitung le a mihingte tungah thu na khen ciang amate theampo in thumaan thutang he tu uh hi.



¹⁰Mihing khansiate tungah nang dik napi in, amate in thumaan thutang vawt tu he ngawl uh hi. Mihing thumaante teenna hi ngam ngangawn zongh ah amate khialna vawt veve lai hi; amate in na vaangletna awlmawk ngawlin nial uh hi.

¹¹Na ngalte in amate daan na piak tu hunlam he ngawl uh hi. Topa awng, amate maizumsak in a, thuaksak in; amate atu in, na koisak sa daan piaknate thuaksak in. Na mihingte na it mama zia amate lak in.

¹²Topa awng, kote nei le lamh nong pia tu hi; kote ii matutna theampo sia nangma ii nasep hang ahi hi.

¹³Kote Topa Pathian awng, kote sia ngual dang in hong uk zo a, ahihang nangma bekma in kote Topa na hi hi.

¹⁴Tu in amate thi zo a, nungta kik ngawl tu hi; amate ii thaa te thoto ngawl tu hi, banghangziam cile nangma in amate daan na pia zo a, na lalsak zo hi. Kuama in amate phawk nawn ngawl hi.

¹⁵Topa awng, nangma in ko minamte nong khangtosak a, a ngamngi theampo na keak hi; hi thu in nang hong minthangsak hi.

¹⁶Topa awng, na mihingte daan na pia hi, a thin ngim ciangin nang tungah thu hong ngen uh hi.

¹⁷Numei in naungil a tut ciang na sa in a kaa bangin Topa awng, kote nong kapsak zo hi.

¹⁸Kote in na sa bot sa in om ka hi uh hang bangma a piang bua hi. Kote ngam atu in ngal zawna bangma ka nei bua uh hi; bangma tangtut ka nei bua uh hi.

¹⁹Ih mipui a thi sate nungta kik tu uh hi! A pumpi uh nungta kik tu uh hi. Thaan sungah a lumte theampo thoto tu a, lungdamin la sa tu uh hi. A tee vasip daaitui in leitung a hinsak bangin Topa in taanglai pek a, a thi sate nungtasak kik tu hi.

Thu Khenna le Kipua kikna

²⁰Ka mihingte awng, na innsung uh ah tum vun a, na inn uh khak vun. Pathian ii thin uukna a thai mateng tawmvei sung buu zii vun.



²¹Topa in vantung a teenna mun panin leitung mihingte a khialna uh hangin daan pia tu in hong pai tu hi. Leitung ah a kithatlum ku mihingte kipualaak tu a, leitangh in a kithatlumte seal nawn ngawl tu hi.

Isaiah 27

¹Tua ni in tuipei sungah a om nganhing pui that tu le a kizial a a kual a kiitak huai Leviathan ngul sia daan pia tu in Topa in a vaang nei thina namsau zangh tu hi.

²Tua ni in a dei huai sapit huan thu Topa in son tu a,

³“Keima in tua huan cingin tui ka buak tawntung hi. Kuama suk siat thei ngawl tu in sun le zanin ka cing hi.

⁴Sapit huan tungah ka thin uuk nawn ngawl hi. A nawnkaisak ling le lingkungte a om le ka haltum tu hi.

⁵Tuabang hi ngawlin ka mite ii ngalte in, kei ii huuk tu a dei le, keima taw kilemna hong vawt taken. Hi hi, amate in kei taw kilemna vawt taken,” ci tu hi.

⁶Mai lam sangah, Jacob ii suan le paal ahi Israel mihingte, thingkung khat bangin zung tha tu a, hong mom in a paak palh tu hi. Leitung sia amate ii nga taw kidim tu hi.

⁷Topa in Isrealte ii ngalte nasia tak daan a piak za in Israel te sia nasia tak daan pia ngawl a, a thi a bo zongh tam ngawl hi.

⁸Topa in a mihingte saltang tu in a puakna taw daan pia hi. Topa in amate sia niswana sang pan hong va vui ngilo in seamkeaksak hi.

⁹Ahizong, Israel te ii khialnate sia, lawkite ii biaknatau suangte leikaang bangin a ki ngoaicip zawkciang, le Asherah doainu limlak nate a bo zawkciang, le ngim namtui halna biakna taute a om nawn ngawl ciang bekin, kimaisak bek tu hi.

¹⁰A muanhuai khuapi sia lalcip in om hi. Ngam tawngtol bangin kinusia hi. Ngan thana le ngan lupna mun suak hi.



¹¹Thingbaakte kongaw in taltan a, numeite in thingkang tu in tom uh hi, banghangziam cile mihingte in bangma tel ngawl ahikom amate a bitphua pa Pathian in amate hesuak ngawl tu a, thuthiamna lak ngawl tu hi.

¹²Tua ni in, Euphrates ngun pan kipan Egypt ngamngi dong, taangcilte in a zungtaang le a sii a khen bangin, Topa in a mihingte khat zawkciang khat kaikhawm tu hi.

¹³Tua ni a thet ciang, Assyria le Egypt ngamah saltang in a om Israel te theampo tua mun pan sap kikna tu lemle khat kitum tu hi. Amate hong cia a, Jerusalem khua biakna taw kisai mual tungahTopa bia tu uh hi.

Isaiah 28

Saksang Kumpi ngam tungah Kidop natu Thupiak

¹Israel kumpi ngam sia a lal hi zo hi! Ama ii minthanna sia a zukham lampuite ii lu tungah a khuk paak taw kivawt kumpi lukhute vul bangin vul hi. A kiphask amate ii lute sia paaknamtui pha tak kinoai napi, zu a kham hu in khuaphawk ngawlin tua munah lum uh hi.

²Topa in amate sim tu in a kinging a vaanglian, a thahat khat nei a, tua pa sia hui le ngial bang, ngua bing le beal sun bang, tuipawm hawktai bang, tuiliim bangin hong pai in tua ngam zothal tu hi.

³Tua zukham lampuite kiphatsakna sia peang nuai ah kituancil tu hi.

⁴Tua a kiphask lampuite ii a kiamsuk minthanna sia tuk tun ma a theipal min taw kibangin a min masa pawpo kilo in, a kine khawng papai bangin mang vangeu tu hi.

⁵Vaanglianbelpa Topa sia a nungta lai ama mihingte atu in paak taw kivawt a minthang kumpi lukhu bang ahi tu ni khat theng tu hi.

⁶Ama in thukhen maangte tungah thutang heak theina thin pia tu a, khuapi kongpi cingte sia hong kisim ciang, thin hanna pia tu hi.

Isaiah le Judah ii Zukham Kamsangte

⁷Kamsangte le thiampite ngangawn zu kham in hoi vatut uh hi. Zu le zuhang tam ne lei ahikom amate lungmang in lutu uh hi. Kamsangte zukham lei



ahikom Pathian ii musak mu kholnate tel zo ngawl uh a, thiampite zongh zukham lei ahikom amate kungah a kipuak thute khensat thei ngawl uh hi.

⁸A tona sabuai theampo luak taw kidim in, a thiangtho mun khat zongh om ngawl hi.

⁹Amate in kei hong phunsan uh hi. Amate in, “Tua pa in akua ka hil ci in kingaisun ziam? Akua in ama ii thupuak dei ziam? Ama ii thupuak sia a nu noai taw a kikhen tuung naunote atu bekin pha hi!

¹⁰Laimal khat zawkciang mal khat, lailam khat zawkciang lam khat, thu khat zawkciang thu khat ama in ei hong hil tiuteu hi,” ci uh hi.

¹¹Kei thuson nong ngai bua uh ahile, no tungah thu hong hil tu in kam tumdang a pau ngamdang mite Pathian in zangh tu hi.

¹²Topain note theampo tungah tawlngakna le nopsakna hong pia napi ama thu na ngai bua uh hi.

¹³Tua hu in laimal khat zawk mal khat, lailam khat zawk lam khat, thu khat zawk thu khat, Topa in no hong hil tu ahi hi. Tua zawkciang kal khat na suan simin na lutu tu uh hi. Note hong kiliamsak tu a, thaang sungah hong ki awk sakin, thong hong kitaaksak tu hi.

Zion atu Innkingh Suang

¹⁴Jerusalem khua pan hi mihingte a uk, a kisathei no mihingte awng, tu in Topa thu ngai vun.

¹⁵Note in thina taw thuciamna khat na vawt zo uh a, mithi khua taw thukimna khat ka nei zo uh hi, ci in na kisuangtaak uh hi. Siatna hong pai ciang, hong pial tu hi ci in na muang uh hi, banghangziam cile no hong hu tu in theamna le leilotnate na suang uh hi.

¹⁶Tu in Vaanglianpipa Topa in, “Keima in Zion ah a kip a kho inn tawdap khat ka koi hi. Tua sungah innkingh suang sah khat ka phut a, tua tungah hi kammalte, ‘A kho Upna sia a thin zongh sau hi.’ ki at hi.



¹⁷Thu tanna sia inn tawdap teena khau hi a, thu maanna sia teena khaukhai hi tu hi,” ci hi. Ngialtang le vuipei in na bel na suan leilot nate theampo seamkeak tu a, tuiliim in nang hong kikepna lalcipsak tu hi.

¹⁸Thina taw na kiciam nate kiphiat tu a, mithi khua taw na thukim nate kiphiat tu hi. Siatna ii hong nawk ciang, note hong zothal tu hi.

¹⁹Ama in note sia zing simin hong su kikik tu hi. Sun zong zan zong na thuak kul tu uh hi. Topa kung pan hong pai thuthak sim in patauna thak hong puak tu hi!

²⁰A kikhuathuang tham ngawl lupna tom lei khat tung lum a, puanvan toi lei silhin, lup tu a hanciam paunak sungah mihing khat pa taw na kibang tu hi.

²¹Topa in ama ngamtatna te a lamdang hial zong ama ii ngaisut bang a vawtna tu in Perazim Mualtung le Gibeon kuam ah ngal a sim bangin sim tu hi. Ama in a lamdang a nasepnate zo siat tu hi.

²²Keima ii kidop natu kong thuhilte nuisan heak vun! Na nuisan uh le, na suatak natu uh haksa vaial zaw tu hi. Ngam buppi lalcipsak natu in Vaanglianbelpa Topa ii thukhensat nate ka za zo hi.

Pathian ii Ciimna

²³Kong paunate ngai vun a, kong sonte thupi laak vun.

²⁴Lotho pa khat in an ciin natu in tawlnga ngawl liangin lei pua thapai ngawl hi.

²⁵Khatvei leitangh a pua zawkciang ama in dill anciite le cumin anciite tu hi. Ama in zungtaang le mangtaang te a ngual in tu a, a lo hui sangah ancii dang te tu hi.

²⁶Ama in a nasep tu zia he hi, banghangziam cile Pathian in ama hil zo hi.

²⁷Ama in dill anciite le cumin anciite saat natu in khetbuk ngit khat zangh ngei ngawl hi; tua luangin ama in a pha bek ciangkang zaangte zangh hi.



²⁸Ama in tawp hun nei ngawlin zungtaang cil ahihang lalsak ngawl hi, banghangziam cile antangte zantham ngawlin leang taw cilna zia ama in he hi.

²⁹Hi bang ciimna heakna theampo sia VaanglianbelpaTopa kung pan hong pai ahi hi. Pathian ii tupnate sia ciimna taw kidim a, tuate a tawntungin tangtung hi.

Isaiah 29

Jerusalem ii Thuakna

¹Pathian ii biaknatau ahi Jerusalem mama a lal hi zo hi! David ii ngiana khuapi sia a lal hi zo hi! An neak poai le poai khaamna taw kum khat, kum nii omsak zii po vun,

²tua zawkciang, “Pathian ii biaknatau” a kici khuapi tungah Pathian in siatna thengsak tu hi. Kaana le tauna om tu a, a khuapi buppi sia chi taw a kituam biaknatau khat bang hi tu hi.

³Pathian in tua khuapi sia simin, kiim uum in, uumci tu hi.

⁴Jerusalem sia leinuai pan thuson nuamin a hanciam thithaa khat bang le leivui sung pan a phun vasup aw khat taw kibang tu hi.

⁵Jerusalem awng, nang hong sim ngamdang mite theampo leivui bangin kimut keak tu a, a kiitak huai ngalkapte sia taangphaw bangin leangkeak tu hi. Muanmawng ngawl het le thakhat thu in,

⁶Vaanglianbelpa Topa in vanto le zinliing taw nang hong suatak tu hi. Ama in vuipe nguapi le a kuang vazak mei khiak tu a,

⁷tuasia ciang Pathian ii biaknatau khuapi a sim minamte ii ngalkap hon theampo, a ngalhiam le a ngalvanh a vekpi, zanin mangmat bangin mang vadi tu hi.

⁸Jerusalem sim tu in a kikhawmtua minamte theampo sia, ngilkial in a pukthi dek mihing khat in a mangin an ne a, a khanlaw ciang a ngilva tuan ngawl ahibuale, tuidu dangtaak mihing khat in a mangin tui ne a, a khanlaw ciang a dangko thai tuan ngawl taw kibang tu hi.



A ki awlmawkw ngawl Kidop natu Thupiakte

⁹Pai vun a, kimawmawsak vun! Pai vun a na mit uh kitawsak vun! Zu ne ngawl bulin zukham vun! Zu mal khat zongh ne ngawlin hoi vatut vun!

¹⁰Mutthip natu in Topa in na mut uh suaksak hi. Kamsangte sia mihingte ii mittang hi tu a, ahihang Pathian in a mit sealcipsak hi.

¹¹Kamsangte mukholnate theampo ii a khiakna sia note hong lak ngawl tu a; a kikhakcip laizial khat taw kibang tu hi. Laisim thei khat kungah paipui in, nang hong sim tu in sawl le te a laibu kikhak cip ahikom kei sim thei bong hong ci tu hi.

¹²Laisim thei ngawl khat tungah tua lai pia in hong simsak tan ci in sawl le te, ama in kei sim thei bong ci in hong zokik tu hi.

¹³Topa in, “Hi mihingte in kong bia tu uh hi hong ci a, ahihang amate kammalte sia khiakna nei ngawlin, a thin sung in thudang ngaisun hi. Amate biakna sia bangma hi ngawlin, a teptee pak uh mihingte zui tu ngeinate bekma hi lel hi.

¹⁴Tua ahiciang keima in amate muanmawkw khol ngawlin haksatna khat zawkciang khat a tungah ka tungsak tu hi. Mihing ciimte a mawmaw suakin, a pilna theampo sia kimanna nei ngawl tu hi,” ci hi.

Maisang atu Lametna

¹⁵A tupnate Topa tungah a iimcip nuamte, a lal hi zo hi! Amate a tup a sawmte vawt ku uh a, kuama in hong mu buan te, hong he buan te ci in ngaisun uh hi.

¹⁶Amate in na theampo lumlet uh hi. Beal seakpa le tungman a koi sia thupi zaw ziam? Mihing khat ii a vawt sa na khat in a vawt pa tungah, “Nang in kei nong vawt bua hi,” ahibuale, “Na vawt sia nangma in na he bua hi,” ci thei tu ziam?

¹⁷Paunak sungah, khua ngei ngawlin taam ngam sia lo ngam hong suak tu a, tuaciang lo ngam sia taam ngam suak kik tu hi, ci hi.



¹⁸Tua ni ciang, nangongte in a ngingin a kisim laibu sia za thei tu a, khuazing sungah a teang mittawte in, a mit uh hakin khua mu tu uh hi.

¹⁹Zawng in, a kiniamkhiak mihingte in, Topa ahi, Israel ii a thiangtho Pathian ii a piak lungdamna sia khat vei mu kik tu uh hi.

²⁰Tuasia sia midangte a zawthawk vawtte le Pathian a zawngsakte ii bona hi tu hi. Maw nei theampo kilalcip siatsak tu hi.

²¹Ngual dang a sonsiate, mihing pha ngawlte daan piak tu a khaktante, le thumaan mihingte tunga a maan bangin thu a kikhen thei ngawl natu a khaktan leilot thusonte Pathian in lalsak tu hi.

²²Tua ahikom tu in ngimna pan Abraham a suatak, Israel te ii Pathian Topa in, “Ka mihingte awng, note hong ki maimawl sak nawn ngawl tu a, maizumna taw na mai uh daang nawn ngawl tu hi.

²³Keima kong piak tanote na mu uh ciang, keima sia Israel ii a thiangtho Pathian ka hi hunlam na phawk tu uh hi. Zatakna nong pia tu uh a, a lamdang kiitakna taw ka mai ah na ding tu uh hi.

²⁴Mihing mawmawte in thu tel thei tu a, a phuphun mihingte sia a kihil tu lungdam tu uh hi,” ci hi.

Isaiah 30

Egypt taw A manh nei ngawl Thuciamna

¹Topa in, “Judah ngamukte a la hi zo hi, banghangziam cile amate in kei hong langpan uh hi. Amate in kei tupna ahi ngawlte zui in, kei deina om ngawl bulin thuciamnate vawt in, mawna khat zawkciang khat vawt thathua uh hi.

²Kei thu hong dongh ngawlin amate in huna ngen tu in Egypt ah pai uh hi. Egyptte ii huuk tu a thangai manin, Egypt kumpipa muang uh hi.

³Ahihang kumpipa in amate hu zo ngawl tu a, Egyptte ii huukna in siatna taw tawp tu hi.

⁴Amate ii tongciinte sia Egyptte ii khuapite ahi, Zoan le Hanes theng zo napi,



⁵Judah mihingte in amate huna a pia tu, a muanna bang a tangtun zo ngawl minam, a muan thamman ngawl minam, a muan thaak phaphot sia kisiik kik tu uh hi,” ci in son zo hi.

⁶Hi thu sia thangsang senneal ngam sungah a om nganhingte taw kisai Pathian thupuak ahi hi. “Tongciinte sia tawpите teenna, a ngu hang ngulte le a leang thei ngulpui omna, a lau huai ngam sungah vak kawkoai uh hi. Amate huna mal khat zongh a pia thei ngawl minam khat atu in a manham letsongte a kalaoh le a laate tungah suan uh hi.

⁷Egyptte piak huna sia manh nei ngawl hi. Tua ahikom Egypt sia, ‘Kuama bangma a law thei ngawl ngulpui’ ci in min ka phua hi,” ci hi.

Thuni ngawl Mihingte

⁸Mihingte bang taw kibang ziam cisia laibu khat sungah at in ci in Pathian in kei hong sawl hi, tua hi le mihingte bangza in tatsia ziam ci in teptena kho khat om tu hi.

⁹Amate in Pathian langpan tawntung, leilot tawntungin, Topa hilnate ngai tu nial tawntung uh hi.

¹⁰Amate in kamsangte thim khipkhep tu in sawl uh hi. Amate in, “A koi sia maan ziam ci in ko hong son heak vun. Koma zaak nopte bek hong son tavun. Koma om ngei po om kapo taw ung.

¹¹Ka lampi uh hong awn tavun a, hong khak heak vun. Na Israel te ii a thiangtho Pathian ii thu sia za nuam ngawl khu hi,” ci uh hi.

¹²Ahizong Israel te ii a thiangtho Pathian in, “Kei kong sonte thusim ngawlin zawthawkna le theamna na suang uh hi.

¹³Mimaw na hi uh hi. No sia a tungsang pan a kektham suk pang khat taw kibang nu hi; heak khol ngawlin cimh tu nu hi.

¹⁴Zan niknek ahikom meikhuk sung pan meikam lua tham natu ahizong, tuikhuk sung pan tui sua tham natu ahizong a bek lian zongh a om ngawl leibeal khat bangin nang hong kitamthamsak tu hi” hi bangin ci hi.



¹⁵Vaanglianpipa Topa Israel te ii a thiangtho Pathian in mihingte tungah, “Hong heak kik tavun a, keima hong muang hiithiat tavun. Tua hile na tha uh hat tu a, ngammuang tu nu hi,” ci hi. Ahihang nong nial uh hi.

¹⁶Tuasia luangin, siphu tai ngang mama tung to in na ngalte khutsung pan suatak tu na sawm uh hi. Maan nu hi- suatak natu ahile noma sep tu ma hi peu hi! Na siphute ngang khop heu hi ci in ngaisun nu hi, ahihang no hong delte ngang zaw lai tu hi!

¹⁷Ngalte ngalkap khat na mu uh ciang note a tulkhat in na taikeak tu uh a, tuaciang ngalte nga in note theampo hong taikeaksak zo tu hi. Mualdawn ah a kiphut laandial mung liliai khat sim ngawl buang na ngalkap honte sung panin bangma kinusia ngawl tu hi.

¹⁸Tuabang hi napi note hong hesuak nuamin Topa in hong ngak veve hi. Ama sia note tungah hesuakna lak tu in a kithoai sa in om hi. Banghangziam cile ama in a tawntungin thumaan thutang vawt hi. Topa tungah muanna a nei te in mi lungdamte ahi hi.

Pathian in A Mihingte Thupha pia tu.

¹⁹No Jerusalem ah a teang mihingte kap nawn ngawl tu nu hi. Topa sia thuthiam a, ama tungah huna ngenin na kaa uh ciang ama in hong zo tu hi.

²⁰Topa in note haksatna hong phul letsak tu a, ahizong ama mama tua munah note hong hil tu in om tu hi, tua ahiciang note in ama na zon uh kul nawn ngawl tu hi.

²¹Lam ziatsang hi kale veisang hi kale na pial uh ciang na nungsang pan ama in, “A lampi in hi sia hi, Zui in,” hong cina aw na za tu hi.

²²Ngun taw kizut in kham taw a kituam na milimte na la tu uh a, tuaciang nin bangin vawkkeak in, “Bo mang vun!” ci in na ausan tu uh hi.

²³Ankungte na ciin po uh ciang a po, a khan natu in Topa in ngua zusak tu a, anlaak ciang an tam mama hong lasak tu hi, tuaciang na ngante in a tat natu mun zai nei tu uh hi.

²⁴Na lo hong thawsak khuitalte le laate in an pha bel le a lim bel ne tu uh hi.



²⁵Na ngalte ii kulhte a kilaak ni ciang le a mite a kithalup ni ciang, muallian le mualnote theampo tung panin luitui luang tu hi.

²⁶Tha in nitaan za ma in taang tu a, ni in a taan ngeina sangin a zasali vei in taang zaw tu a, ni sali ii nitaanna ni khat a ngawm taw kibang tu hi. Topa in a mihingte tungah a thuaksak liammate tuamsakin a damsak ciangin hi thu theampo hong piang tu hi.

Pathian in Assyriate Daan pia tu

²⁷Topa ii vaangletna le minthanna sia a khuala panin kimu thei hi. Meisa le meikhu in Topa ii thin uukna lak hi. Ama a pau ciang a kammalte mei bangin kuang hi.

²⁸Tui pawm in na theampo a taikeak bangin a mai ah vui vasak hi. Tua in minamte phiatkeak in susia ngawpin, amate ii a sia a tupnate bosak hi.

²⁹Ahizong Pathian ii mihing, note in, biakna taw kisai poaikhaam ni zan a, na vawt uh bangin lungdam in la na sa tu uh hi. Israel te a hu; Topa Biakinn ah a pai uh lai in tamngai aw zui in na pai uh bangin na lung uh dam tu uh hi.

³⁰Topa in ama vaangletna aw mihing theampo in zasakin, ama ii thin uuk mama na thu phawksak tu hi. Meikuang in, vanto in, ngialkia in, bing le beal a sun bangin nguazu tu hi.

³¹Assyria mite in Topa ii aw a zaak uh ciang le a daan piakna nasia mama ahi hunlam a phaw uh ciang, lau tu uh hi.

³²Topa in amate ngim a piak kikik ciang a mite in khuang le tengtong aw zui tu uh hi. Pathian ama tatak ma in Assyria mite sim tu hi.

³³Assyria kumpipa kihal natu mei phualpi mun, nidang pek panin kivawt zo hi. Tua mun sia thukin zai a, thing a vum in kiseng hi. Topa ii husan ahi a kipee meikuang in ama hal tu hi.

Isaiah 31

Pathian in Jerusalem Sungsia tu

¹Egypt ngamah huna ngenin a paite a lal hi zo hi! Amate in Egyptte ii ngalkap thahatna ahi siphute, siphuleangte le ngalkapte suang uh hi. Ahihang



amate in Isreal mite ii a thiangtho Pathian ahi, Topasuang ngawlin huna zongh ngen ngawl uh hi.

²Topa in a sep sia he hi! Ama in siatna tungsak hi. Ama in mi pha ngawlte le amate a panpuite daan ka pia tu ci in tawng a tuabangin seam hi.

³Egyptte sia pathiante hi ngawlin— leitung mihing bekma hi. Amate ii siphute in a lamdang tuam hi ngawl hi. Topa in na a sep tak ciang, a hat minamte puk tu a, ama ii a hu a thaneam minamte puk tu hi. Tua minamte ngeal kilalcipsak khawm tu hi.

⁴Topa in kei tungah, “Tuucingte bang zata in a au hial zongin amate in tawpi khat sia a matlup sa ngan luang kung pan bengkeak zo ngawl hi. Tuasia bangma in, keima, Vaanglianbelpa Topa ii Zion Mual ka kepna pan hong khaktan thei kuama om ngawl hi.

⁵Vacim khat in a bu tung pan a tano a cin bangma in keima, VaanglianbelpaTopa in, Jerusalem cing in ka hu tu hi,” hong ci hi.

⁶Pathian in, “Israel mihingte awng, kei tungah nong khial zo uh a, nong langpan zo uh hi. Ahitazong tu in kei kung hong zuan kik tavun!

⁷Ngun le kham taw na vawt sa uh ahi khialna milimte note theampo ii na vawkkeak tu uh hun khat hong theng tu hi.

⁸Assyria sia ngal sungah kilalcipsak tu hi, ahihang mihingte thahatna taw hi ngawl hi. Assyriate ngal kisimna pan tai tu a, a tangvalte sia sila in kikai tu hi.

⁹A kumpipa lau in tai tu a, a ngalkap maangte lauthawng mama ahikom ngalsimna in a zak a laandial nusia tu uh hi,” ci hi. Jerusalem khua ah a kibia Topa tua munah a meihal biakpiakna a kuangsak Topa pau zo hi.

Isaiah 32

A thumaan Kumpipa

¹Khatvei ciangin thumaanna taw a uk kumpi khat le, thutanna taw a uk ngam lampuite om tu hi.



²Amate khat simin vui vak ciang le suangval vak ciang belhna le bukna bang hi a, senneal kongaw ngam sungah luitui luang bang le ngam kolhna munah a om suangpi lian khat ii lim bang hi tu hi.

³Tuaciang amate ii mit le bil in mihing cimawte kispna mu in, za tu uh hi.

⁴Amate thintom nawn ngawlin, tua dom ngawlin deisakna thin taw telthiang takin a ci nopnate son tu uh hi.

⁵Kuama in mihing mawmaw khat sia zatak huai sa ngawl tu a, mihing tatsia khat sia mipha ci ngawl tu hi.

⁶Mihing mawmaw khat in mawmawt kam veu pau in, a sia vawt tu vive ngaisun hi. A nasep le a kampau in Topa selnona vive hi a, ama in ngilkial dangtaakte an le pia ngei ngawl, tui le pia ngei ngawl hi.

⁷Mihing mawmaw pa sia ngilo in, a sia vive vawt hi; leilot thu taw mizawngte siatsak sawmin, a nga tu a kilawmte khaktansak tu sawm hi.

⁸Ahihang a zatak huai mipa in thumaan takin ngamta a, thumaanna sangah kho din hi.

Thukhenna le Kipua kikna

⁹Thintoi nei ngawl, a ol hiithiat in, a nungta no numeite awng, ka ci bang hong ngai tavun.

¹⁰Tu laitakin lungkim tha tu nu hi, ahihang mai ciang tu hunin sapit ngate na law tu uh om ngawl tu a, na thin uh kiam tu hi.

¹¹Thin ngimna le nei ngawlin, nuntak ol in na nungta uh hi; ahihang tu in, patau in liing vun! Na puante sutkeak vun a na kawngah puansia bulom sawm vun.

¹²Khuangai in na awm uh beang vun, banghangziam cile lei pha na lote le na sapit huante kilalsak zo a,

¹³ling le lingkungte ka mihingte ii leitangh tungah po zo hi. Mihingte lungdam takin a tenna innte theampo atu le nuntakna nuam khuapi atu in kap vun.



¹⁴Kumpi inn ngangawn ki nusia tu a kumpi teenna khuapi kiloai cip tu hi. Innte le amate a dal kulhte a tawntung lalcip tu hi. Ngam laate tua munah vakin tuute an zong tu uh hi.

¹⁵Ahizong Pathian in ama thaa khatvei ma hong puak kik tu hi. Leitangh siate leipha suak kik tu a, lo panin an tam mama piang tu hi.

¹⁶Ngamsung mun theampo ah thumaanna le thutanna bek kiseam tu hi.

¹⁷Mihing theampo in thumaan seam tek tu ahikom, kilemna le ngam muanna om tawntung tu hi.

¹⁸Pathian mihingte ii innte sia thinnopna le ngam muanna taw kidim tu a, thin ngimna om ngawl tu hi.

¹⁹(Ahihang ngam tawngtol sungah ngial kia in, khuapi kicimtham sak tu hi.)

²⁰Anciin natu tui kicing piikpeak in, laate ngante a uk bang po a tat natu mun muanhuai a nei mihingte theampo bang zata in lungdam tu uh ziam?

Isaiah 33

Hu nget Thungetna

¹Ih ngalte a lal hi zo hi! Kuama in amate suttol ngawl, leeheak ngawl napi in, amate in ngual ii na suttol in leeheak uh hi. Ahihang ngual na a sutol tu le a leeheak tu hun bo tu a, tuaciang amate mama in ngual ii sutol le leeheak thuak tu uh hi.

²Topa awng, kote hong hesuak tan. Ka muan uh sia nangma na hi hi. Ni khat zawk ni khat kote hong khoi tan a thin ngim hunin, hong hun tan.

³Ko atu ngal nong simsak ciangin minamte sia ngalsimna awnging panin taikeak uh hi.

⁴Amate ii neisate kikhuplup tu a ngalvanh laak bangin kilaaksak tu hi.

⁵Topa bangza in lian ziam! Ama in na theampo uk hi. Ama in thutanna le thumaanna taw Jerusalem dimh tu a,

⁶ngambup kipsak tu hi. Ama in a mite a tawntungin keamcing in, ciimna le heakna pia tu hi. A nei lianbel uh sia Topa a thasiana uh ahi hi.



⁷Ngalhang mihingte in hu ngen uh hi. Kilemna om natu a hanciam tongciinte nasia takin kap uh hi.

⁸Lampi liante lauhuai mama ahikom kuama in tawn ngawl hi. Kiciamnate pealin, thukimnate kipaltan hi. A kizakta khat zongh om nawn ngawl hi.

⁹Leitangh kinusia cip in a awng thongin om hi. Lebanon ngam tawngtol ah thingte vul zo in, Sharon kuamtam leipha sia senneal ngam bang hi a, Bashan ngam le Carmel mual tungah thingkungte a tee pul uh hi.

Topa in A ngalte Kidop natu Thupia

¹⁰Topa in minamte tungah, “Tu in kong diang tu hi. Ka vaangletna kong lak tu hi.

¹¹Na tupnate kimanna om ngawl a, na nasep theampo luithawthong hi. Ka thaa sia note hong lalcipsak tu meikam khat bang ahi hi.

¹²Leikaang nga natu in suang a kihal bangin na z anvui tu uh a, lingkungte vut suakin a kihaltum bang na hi tu uh hi.

¹³A naina le a khualana ah a om mihingte theampo in ka sep sate za tek taken a, ka vaangletna he taken,” ci hi.

¹⁴Zion ah mawnei mihingte lau na taw liing uh hi. Amate in, “Pathian ii thukhenna sia a kuang tawtung mei khat taw kibang hi. Tuabang meikuang sia akua in thuak zo thong tu ziam?” ci uh hi.

¹⁵Thumaan son in a maan na seam uh le na thuak zo tu uh hi. Na thangui na thatang uh sia mizawngte theamna in zangh heak vun a, sumnguk sang heak vun. Mihing thalup a sawmte taw ahizong, a dang a sia vawtte taw ahizong, kipawl heak vun.

¹⁶Tua hile na suakta tu uh hi; a muanhuai kulh sungah om bangin thin muang lung muangin na om tu uh hi. Note in anneak tu le tuidawn tu na nei tu uh hi.

Minthanna taw a kidim Maisang

¹⁷A zai mama ngam khat et hoi takin a uk kumpipa sia khat vei na mu kik tu uh hi.



¹⁸Nidangin na kiitak ngamdang mi shiadongte le thukante sia thu nung khat hi lel tu hi.

¹⁹Na tel thei ngawl uh kampau in, a kihisak ngamdang mite na mu nawn buatu uh hi.

²⁰Ih biakna poaite khaamna khuapi ahi, Zion khua en vun, Jerusalem khua en vun! Ten natu in bang zata in a muan huaina mun khat ahi ziam? Tua in a khetphinte a kidok ngei ngawl, a sawmna khaute a tattan ngei ngawl, a kikhin ngei ngawl puanbuk khat taw kibang tu hi.

²¹Topa in a minthanna eite hong lak tu hi. Ngun zaite le lui zaite hui ah ih teang tu hi, ahihang ngal teambawte tua sungah pai nawn ngawl tu uh hi.

²²⁻²³Tua teambawte tungah a kizangh khaute theampo luithawthong hi; Teambaw puankhakte kiphah thei ngawl hi! Ih ngalsang ngalkap honte ii na manpha theampo ih matsak tu a, vanh tam mama tu ahikom peangbaite ngangawn zongin hawmtel khat tek nga tu uh hi. Topa mama sia ih kumpi hi tu a; ama in eite hong ukin hong keamcing tu hi.

²⁴Ih ngam ah a teang mite kuama in ka cina ci in phun kik ngei nawn ngawl tu a, tuaciang khialna theampo kimaisak tu hi.

Isaiah 34

Pathian in A ngalte Daan pia tu

¹Minam theampote awng, hong pai tavun! Hong kikhawm ta vun a hong ngai tavun. Leitung buppi le Leitung ah a teang mihingte theampo hi lai ah hong pai in thu ngai hen.

²Topa sia minamte theampo le a ngalkap honte theampo tungah thin uuk hi. Topa in amate a lalcip tu in ningkhiin zo hi.

³Amate ii luangte kiphum ngawlin, tua lai ah a muat a ui in om tu hi; tuaciang mualte chi taw san tu hi.

⁴Ni, tha le aksite leivui suak tu hi. Van sia laizial bangin kizial in mang vadi in, aksite sia sapit kung tung pan le theikung tung pan a teete a pul bangin taak tu hi.



- ⁵Topa in vantung ah a namsau puah khol zo in, suksiat tu in a see sa Edom mite tu in saat tu hi.
- ⁶Topa namsau sia amate chi le thau taw kituam tu a, biakpiakna in a kinei tuu le kealte chi le thaute bang hi tu hi. Topa in hi biakpiakna sia Bozrah khuapi ah pia tu a; ama in hi kithalupna lian mama khat Edom ngam sungah piang sak tu hi.
- ⁷Mihingte sia ngam khuita le khuita note bangin pukvawk in, leitangh sia chisan taw sanin nganthau taw kituam tu hi.
- ⁸Tu hun siaTopa in Zion a suatak tu le a ngalte a zaw tu hun ahi hi.
- ⁹Edom ngunte sia thingnaai suak tu a, leitangh sia kan suak tu hi. Ngam buppi sia kattazasi bangin kuang tu hi.
- ¹⁰Sun taw zan taw kuang top in, a khu sia van ah kaato tawntung tu hi. Tua ngam sia khang khat pan khang khat ngam tul suakin kuama in khualhaw in kantan kik ngei ngawl tu hi.
- ¹¹Simbu le va-akte in tua ngam lua tu uh hi. Leitung a pian ma bang keakin tua mun sia Topa in ngam kawngkol suaksak tu hi.
- ¹²Ngam uk tu kumpi om ngawl tu a, lampuite theampo bo siat tu uh hi.
- ¹³Kumpi innte theampo sung le luphung taw ki uum khuapite ah ling le lingkungte po in, ngia le simbute tua sungah teang tu uh hi.
- ¹⁴Ngamsate tua lai ah taa tu a, doait khat le khat kibiakpui tu uh hi. Zantaa doai in a tawngak natu mun zongin tua munah pai tu hi.
- ¹⁵Simbute in a bu uh tomin a tui uh tui in, a no uh keu in tua munah khoi in keam tu uh hi. Vacikhte khat zawkciang khat tua munah kikhawm tu uh hi.
- ¹⁶Topa ii laibu sungah a nungta ngamsate ii thu zong vun a, bang ci nuam ziam sim vun. Hi ngamsate hi lai ngam sungah bo ngawl tu a, a kopin om siat tu hi. Tuabang ahi natu in Topa in thupia zo hi. Ama mama in ngamsate kaikhawm tu hi.



¹⁷Tua leitangh amate a hawmsak tu le tel khat tek a pia tu sia Topa ahi hi. Amate in tua leitangh tungah khang sim khang simin teang tu uh a, a tawntungin nei suak tu uh hi.

Isaiah 35

Thianthona Lampi

¹Senneal ngam lungdam tu a, ngam tawngtol sungah paakte palh tu hi.

²Senneal ngam in la sa in, lungdam in au tu hi; Tuasia in Lebanon mualte bangin et hoi a, Carmel le Sharon lote bangin lei pha tu hi. Mihing theampo in Topa ii et hoina, a letna le a vaangletnate mu tu uh hi.

³A toi khutte le tha zawmin a liing vadil khupte a tha khosak vun.

⁴“Hat vun a lau heak vun! Pathian sia note hong suatak tu le na ngalte uh daan pia tu in hong pai tu hi,” ci in a thinkiamte theampo son vun.

⁵Mittawte in khua mu thei tu uh a, nangongte in khuaza thei tu uh hi.

⁶Peangbaite leangin laam tu uh a, a pau thei ngawlte lungdam in au tu uh hi. Senneal ngam sungah luituite luang tu hi;

⁷a sa mama sen sia tuili khat suak tu a, a ko leitangh sia ciktui taw kidimh tu hi. Ngiate ten ngeina munah buannawng sung a po lopa le pumpa kungte po tu hi.

⁸Tua munah, “Thianthona ii lampi” a kici lampi lian khat om tu hi. Mawneite kuama in tua lampi tawn nawn ngawl tu a; tua lampi a zuite mihing mawmaw te in lam khialsak ngawl tu hi.

⁹Tua munah tawpите om ngawl tu a; a kiitak huai nganhingte in tua lampi kantan ngawl tu hi. Topa ii suatak sa mihingte in tua lampi tawnin a inn uh ah cia tu uh hi.

¹⁰Amate in thinnopna taw la sa in, au in lungdamna taw Jerusalem khua theng tu uh hi. Amate hena le khuangaina taw kipeal tawntungin lungdam tawntung tu uh hi.

Isaiah 36

Assyriate in Jerusalem Lauthawn



(2Kumpite 18.13-27; 2Khangtangthu 32.1-19)

¹Hezekiah ii Judah kumpi a sep zawk kum sawm le kum li kumin, Assyria kumpipa Sennacherib in Judah ngam sungah khuapi muanhuai theampo simin la hi.

²Tuasia ciang Sennacherib kumpipa in ama ii ulian pa le ngalkap hon khat Lachish pan Jerusalem ah Hezekiah Kumpipa a tum natu thupia tu in paisak hi. A ulian pa sia puantakte nasepna phual paina lampi, tuili tungnung pan tui laakna tui lampi kungah omna la hi.

³Assyria ulianpa taw kimu tu in Judah mite ulian thum; kumpi inn sung sai pa Hilkiyah ii tapa Eliakim; kumpi innsung thuzeakpipa, Shebna; le thu teptena ukpa Asaph ii tapa Joah pai uh hi.

⁴Assyria ulian pa in, banghangin Hezekiah Kumpipa sia hi zata in kisuang kimuang in om ziam ci sia kumpipa in he nuam hi ci in amate son hi.

⁵Ama in, “Ngal sim thiamna le thahat natu munah kampau lelel bek kizangh thei tu in um nu ziam? Assyria te sim tu in akua in note hong hu tu in muangmaw nu ziam?”

⁶Egyptte in hong hu tu hi ci in muangmaw nu hi, ahihang tuabangin na muanmawkna sia pumpa kung khat ciangkhut in zak taw kibang tu a— taltan in na khut hong sun tu hi. Egypt kumpipa a suang mihing khat papao sia hi bang veu ahi hi,” ci in thudokna nei hi.

⁷Assyria ulianpa in hi bangin dongh thua lai hi, “Tua ahibuale note in Topa na Pathian ka suang uh hi nong ci tu uh ziam? Hezekiah in biaknatau mun khat bek ah Pathian na bia tu uh hi ci in Judah le Jerusalem mite tungah thu a son lai in a lalcipsak sia Topa ii munsaang biakinn le biaknataute ahi hi.

⁸Kumpipa min tawin kikhap Thukimna khat ih vawt tu hi. Siphu tung to tu mihing tam mama na nga zo uh le siphu tul nii kong pia tu hi.



⁹Note in Assyria ngalkap mang a za nobel khat ngangawn zongh na dem zo buatu uh hi; tua hi napi Egyptte kung panin leang le siphu ngalkapte hong puak tu na muangmaw lai uh hi.

¹⁰Pathian ii panpuina ngawl taw kei in na ngam uh hong simin lalsak zo tu in hong um nu ziam? Topa mama in na ngam uh simin lalcipsak tu in kei hong sawl hi,” ci hi.

¹¹Tuasia ciang Eliakim, Shebna, le Joab in ulianpa tungah, “Kote heak Aramaic kam in hong paupui tan. Hebrew kam taw hong paupui heak in; luphung tungah a om mihingte theampo in hong ngai hi,” ci hi.

¹²Ama in, “Assyria kumpipa in note le na kumpipa tung bek ah hi thute theampo son tu in hong paisak hong sa nu ziam? Hi ngawl hi, noma taw kibangin amate eak le zuntuite ma ne in, luphung tungah a to mihingte tung zongh ah ka son tu hi,” ci in zokik hi.

¹³Tuaciang ulianpa dingto in Hebrew kam taw au in, “Assyria ngamukpa ii hong thuson ngai vun.

¹⁴Hezekiah in note hong theam ngawl natu in Assyria ngamukpa in note tungah kidop natu in thu hong hil hi. Hezekiah in note hong ngum thei ngawl hi.

¹⁵Tua ahikom Topa suan le muanin nei tu in ama in note zolsak heak vun. Topa in note hong ngum tu le, Assyria ngalkapte in na khuapi simin a laak natu pan tawlna kik tu in ngaisun tha heak vun.

¹⁶Hezekiah ii thu ngai heak vun! Assyria kumpipa in na khuapi uh pan pusuak in nong tum natu in note thu hong pia hi. Note theampo na sapit ngui tung uh pan sapit ngate, na theikung uh pan thei ngate hong kinesak a, na tuikhuk uh pan tui hong kidawnsak tu a,

¹⁷sapittui na dawn thei natu uh in sapit ngui om a, anluum vawt natu in antang omna na ngam uh taw a kibang ngam khat ah ka kumpipa ii hong omsak mateng tuabangin na om tu uh hi.



¹⁸Topa in note hong hun tu ci in ngaisutna taw Hezekiah in note theamsak heak vun. Minam dangte khat pawpo ii pathiante in Assyria kumpipa ii khut sung panin amate ngam hun zo na ziam?

¹⁹Tu in Hamath le Arpad ii pathiante koi sungah om ziam? Sephavaim ii pathiante koi sungah om ziam? Akua in Samaria hun zo ziam?

²⁰Hi ngamte theampo ii pathiante sung pan pathian khat pawpo in ih kumpipa khut sung pan bang hunin, amate ii ngam hun ngei ziam? Tua ahile Topa in Jerusalem hun thei hi ci in a bang in hong ngaisunsak ziam? ” ci hi.

²¹Hezekiah Kumpipa ii sonkhol bangma in amate thim khipkhep in om a; kam khat zongh huthe ngawl hi.

²²Tuaciang Eliakim, Shebna, le Joah in khuangai in a puante balkeak in Assyria ulianpa ii ci teng kumpipa kungah pai in ko uh hi.

Isaiah 37

Kumpipa in Isaiah ii Ngaisutna Dongh

(2Kumpite 19.1-7)

¹Hezekiah Kumpipa sia amate ii thupuakte a zaak pawpo ciang khuangai in a puan balkeak a, khau-ip puan silhin Topa Biakinn zuan hi.

²Ama in kumpi innsung ukpa Eliakim, zumsung thuzeakpipa Shebna, le thiampi khanghaamte sia Amoz ii tapa kamsang Isaiah kungah puak hi. Amate zongh in khau-ip puan silh uh hi.

³Hi thu sia Isaiah tungah a puak tu kumpipa ii thusonte hi a, “Tuni sia ngim thuak ni khat ahi hi; daan ih khak ni le ih maimawl ni ahi hi. Numei khat nau suak tu kithoai zo napi, a tha zawm lei hu in a suak zo ngawl taw ih kibang hi.

⁴Assyria kumpipa in a ulian bel pa sia a nungta Pathian nunau tu in paisak zo hi. Hi bang nunaunate Topa na Pathian in za taken a, nunauna kampaute daan pia taken. Tua ahiciang a nungta lai ih mite atu in Pathian tungah thungen vun,” ci hi.



- ⁵Isaiah in Hezekiah Kumpipa tung pan thu a nga ciang,
⁶hi bangin zokik hi: “Topa in note hong hun zo ngawl tu hi ci a, Assyriate ii hong son hangin na patau ngawl natu uh in Topa in note hong son hi.
⁷Assyria ngamukpa sia a ngam ah a cia kik natu in Topa in kamleang khat zasak tu a, tua zawkciang Topa in tua munah ama a thisak tu hi,” ci hi.

Assyriate in Tawng kik

(2Kumpite 19.8-19)

- ⁸Assyria kumpipa sia Lachish khua pan ding zo a, Libnah khuapi kiim le paam tengah ngalsim in a omna thu Assyria ulianpa in za ahikom kumpipa thu dongh tu in tua munah ama pai hi.
- ⁹Ethiopia kumpipa Tirhakah in Egypt ngalkapte lampui in Assyriate sim tu in hong kuanna thu sia Assyriate in za zo hi. Kumpipa in hi thu a zaak ciang, Judah Kumpipa Hezekiah tungah lai khat thaak a,
- ¹⁰“Na muan uh pathian in note sia ka khutsung theng ngawl tu hi ci in note hong son zo hi, ahitazong tua thu in note theamsak heak vun.
- ¹¹Assyria kumpipa in lalsak tu in, a khensat sa ngam khat pawpo sia lalsak a hina thu na za zo uh hi. Suakta tu in ki um nu ziam?
- ¹²Ka taangpupite in Gozan, Haran le Rezech khuapite lalcipsakin, Telassar ah a teang Betheden mite thatlum a, amate ii pathiante khat zongh in amate hun zo ngawl hi.
- ¹³Hamath, Arpad, Sepharvaim, Hena le Ivvah khuapite ii kumpite koi sungah om ziam?” hi bangin ci hi.
- ¹⁴Hezekiah Kumpipa in kamtaite tung pan laithak sia saangin sim hi. Tua zawkciang Biakinn ah pai in Topa mai ah tua laithak koi in,
- ¹⁵Cherubim tungah thu nengin,
- ¹⁶“Cherubim tungah a to Vaanglianbelpa Topa Israel ii Pathian awng, nangma bekma Pathian hi a, leitung kumpi ngam theampo na uk hi. Nangma in leitung le vantung na bitphua hi.



¹⁷Tu in Topa awng, hong ngai tan a, kote tungah hong piang thute hong en tan. A nungta Pathian ahi nang tungah Sennacherib ih hong nunauna thute theampo ngai in.

¹⁸Topaawng, Assyria kumpite in minam tam mama susia in, a ngam uh ngamkhingsak a,

¹⁹pathian ahi vet ngawl, a pathiante haltumsakin— tuate sia pathian tatak hi ngawl a, khut taw a vawttawm thing le suang po ii limte bek ahi sia ka he siat uh hi.

²⁰Tu in Topa kote Pathian awng, nangma bek Topa na hina thu leitung kumpi ngam theampo in a heak natu in, Assyria khut sung panin kote hong suatak tan,” ci hi.

Kumpipa tungah Isaiah ii Thupuak

(2Kum 19.20-37)

²¹Tuaciang Kumpipa Hezekiah ii thungetna, Topa ii zona thu Isaiah in a heak ciang Isaiah in Hezekiah kungah thu puak tu in kamtai paisak hi.

²²Topa in, “Sennacherib awng, Jerusalem khuapi in nang hong nuisan in hong nunau hi.

²³Na zawnsak le na nuisat sia akua hi tu na um ziam? Israel te ii a thiangtho Pathian Keima hong zawngsak na hi hi.

²⁴Na siphuleang theampo taw Lebanon mualsaang bel sia na zawna thu kei tungah kisuangtaak tu in na naseamte nong puak hi. Nangma in a saang bel cedar thingkung le a hoi bel cypress kungte tua munah phuktan in, ngam tawngtol a thuk belna dong na thetna sia kei tungah kisuantaak na in nong nei hi.

²⁵Ngamdang ah tuikhuk to in tui na neak theina le na ngalkapte in Nile ngunpi sia kangcip in a siikcil na na kiphatsak pui hi.

²⁶Taanglai pek pan hite theampo ka ngeal sa ahi hunlam za ngei ngawl ni ziam? Tua thu tu in ka zomto hi. Khuapi muanhuaite sia teak vum venvon in a kikholna mun na suasak natu in thahatna kong pia hi.



²⁷Tualai ah a teang mite sia thahatna nei ngawl a, lau in liing uh hi. Amate in lo sungah lopate bang ahibuale innkhum tungah a po lopate nisuana sang pan vuisate ii seamkeak bang ahi hi.

²⁸“Ahitazong nang ii thu theampo, bang vawtin, a koisung teng pai cisia ka he siat hi. Ka tungah na thin uukna ka he hi.

²⁹Na thin uukna thu le na kiphatsakna thu he siat zo ka hikom tu in na naak ah thikkoai khat kong thua tu hi. Na kam ah kamkhau thua in, nong paina lampi zui in kong cia kiksak tu hi,” ci hi.

³⁰Tuaciang, Isaiah in Hezekiah Kumpipa tungah, “Hi thu in maisang hong piang tu lakna lim ahi hi. Tu kum le mai kum ciangin an lipote bek na ne tu uh hi; ahizong kum kik ciangin thaici tu in an na la tu uh a, sapit ngui suanin a nga na ne tu uh hi.

³¹Judah minam sung pan a suakta mite in khangto in, lei thukna ah zung tha in a nga nga thingkungte bang hi tu hi.

³²Jerusalem khuasung le Zion Mual tungah a suakta mihing om tu hi, banghangziam cile VaanglianbelpaTopa in hi bang piangsak tu in khensat zo hi.

³³“Tuaciang hi thu sia Assyria kumpipa taw kisai Topa son sa ahi hi. ‘Ama in hi khuapi sung tum ngawl tu a, thaltang khat taw zong kap ngawl tu hi. Lum toai ngalkapte kuama khuapi nai ah pai ngawl tu a, a kiim ah ngalnan natu kulh kivawt ngawl tu hi.

³⁴Ama sia hi khuapi sungah tum ngawlin, hong paina lampi ma zui in cia kik tu hi. Keima Topa in pau zo khi hi.

³⁵Ka minthan natu le ka naseampa David tungah ka kamciam hu in hi khuapi cingin ka dal tu hi,’ ci hi,” ci hi.

³⁶Topa ii vantung lalang khat Assyriate ngiaphual ah pai in ngalkap 185,000 thatlum hi. A zingsang khuavak tuungin tua munah amate a thi siatin kisial hi!



³⁷Tuaciang Assyria kumpipa Sennacherib sia nungkin in Nineveh ah heak kik hi.

³⁸Ni khat ni in ama in a biakinn sungah a pathian Nisroch bia in a om laitak a tate sung pan nii ahi Adrammelech le Sharezerte in amate namsaute taw ama thatlum in, tua zawkciang Ararat ngamah ngel uh hi. A tate sung pan a dang khat ahi Esarhaddon in a kumpi za lua hi.

Isaiah 38

Hezekiah Kumpipa ii Natna le Dam kikna

(2Kumpite 20.1-11, 2Khangtangthu 32.24-26)

¹Hi hunin Hezekiah Kumpipa a cina in thi dektak hi. Amoz ii tapa, kamsang pa Isaiah in ve a, ama tungah, “Topa in a kul theampo vawt siat hen, banghangziam cile dam kik ngawl tu hi hong ci hi. Tua ahiciang a thi tu in kinging in,” ci hi.

²Tuaciang Hezekiah sia pang sang nga in hi bangin thungen hi:

³“Nangma tungah thumaan tak muan huai takin na na ka sepdate le sepsak tu nong dei bangin a tawntung hanciam in ka nasepdate hong phawk tan, Topa awng,” ci hi. Tuaciang ama sia nasia tak kap tu in kipan hi.

⁴Tuaciang, Topa in Isaiah tungah hi bangin thupia hi.

⁵Hezekiah kungah pai kik in a, ama tungah, “Na taangpupi David ii TopaPathian ahi, Keima in, na thungetna ka za zo a, na thituite ka mu zo hi; na nuntakna kum sawm le kum nga kong khangkhan tu hi.

⁶Assyria kumpipa khut sung pan nangma le Jerusalem khuapi kong suatak tu a, hi khuapi ka sungsia suak tu hi,” ci in son in.

²¹Isaiah in kumpipa tungah na meima thei naai noai lete dam kik tu ni hi ci in son hi.

²²Tuaciang Hezekiah Kumpipa in, “Biakinn ah ka pai zawk natu bang lim in hong lak tu ziam?” ci in dongh hi.

⁷Isaiah in, “Topa in hong kamciam bang a takpi a suana lim nang tungah hong lak tu hi.



⁸Ahaz Kumpipa ii a vawt keallei tungah, Topain a lim nung sangah kal sawm heak kiksak tu hi,” ci in zokik hi. Tuaciang a lim kal sawm heak kik hi.

⁹Hezekiah a natna pan a dam kik zawkciang, hi pokna la at hi;

¹⁰Ka khan kimlai takin mithi khua zuan tu hi thong tang a, Huaikut teakkut in nungta ngawl tu hi tang a, ci in ka ngaisun hi.

¹¹A nungtate omna hi leitung ah Topa mu ngei nawn ngawlin, A nungta mi kuama mu nawn ngawl tu hi tangh a ci in ka ngaisun hi.

¹²Puanbuk khat a ki phelthap bang, thiambu pan puan a ki attan bangin, ka nuntakna hong ki attan a, hong kibosak hi. Pathian in ka nuntakna hong bosak hi ci in ka ngaisun hi.

¹³Tawpi in ka ngute hong thiatan bang keakin zan khuateak na sa in ka au hi. Pathian in ka nuntakna hong bosak hi ci in ka ngaisun hi.

¹⁴Ka aw neamin nging zo ngawl a, vakhu bangin ka kuul hi. Vantung ka etna in ka mit toi hi. Topa awng, hi ngimna theampo pan hong suatak tan.

¹⁵Hi thu sia Topa vawt sa hi a, kei in bang ka ci thei thong tu ziam? Ka thin ngim lei in, ka mu thei bua hi.

¹⁶Topa awng, nang atu le, nang atu bekma in ka nungta tu hi; Ka ci hong damsakin, hong nungtasak tan.

¹⁷Ka thin ngimna sia thinnopna suak tu hi. Lauhuaina theampo pan ka nuntakna nong ngum hi; ka khialna theampo nong maisak hi.

¹⁸Mithi khua ah a om mite kuama in nang hong pok thei ngawlin, mithite in nang ii thumaanna hong muang thei ngawl uh hi.

¹⁹Tu laitakin nang kong pok uh bangin, nang hong pokte sia a nungta laite ahi hi. Pate in a tate tungah na thumaan nate son uh hi.

²⁰Topa awng, kei nong damsak zo hi. Tumtheite tumin nang pokna la ka sa tu uh hi. Ka nuntak lai uh teng in, na Biakinn sungah pokna la ka sa tu uh hi.

Isaiah 39

Babylon pan Kamtaite



(2Kumpite 20.12-19)

¹Tua hun laitakin Baladan ii tapa, Babylon kumpipa ahi Merodach Baladan in Hezekiah Kumpipa ci natna thu za ahikom lai khat le letsong khat thaak hi.

²Hezekiah in kamtaite pha takin zindo a, a hau nate— a ngun le a kham, a hel namtui le a paaknamtui te, ban ah a ngalvanh theampo lak hi. A vanh kholna munah vanhte ahizong, a ngamsung theampo ah vanhte ahizong a lak ngawl khat zongh om ngawl hi.

³Tuaciang kamsang Isaiah sia Hezekiah Kumpipa kungah pai in, “Hi mite koisung pan hong pai a, nang tungah bang hong ci ziam” ci in dongh hi. Hezekiah in, “Amate sia a khuala mama na ngam Babylon pan hong pai ahi uh hi,” ci in zokik hi.

⁴“Amate in kumpi inn sungah bang teng mu ziam?” ci in Isaiah in a dok ciang, “Na theampo mu uh hi. Vanh kholna munah amate ka lak ngawl bangma om nawn ngawl hi,” ci in Hezekiah in zo hi.

⁵Tuaciang Isaiah in kumpipa tungah, “Vaanglianbelpa Topa in,

⁶na kumpi inn sungah a om na taangpupite pan tu ni dong a kikhoh sa vanh theampo Babylon khua ah a kipuak tu hun khat hong theng tu hi. Bangma taang ngawl tu hi.

⁷Nangma sung pan a piang na suan na paalte pawl khat, Babylon khua ah kipaipui tu a, Babylon kumpipa inn sungah naseam tu in a cil kinget tu hi,” ci in son hi.

⁸Hezekiah Kumpipa in ama ii nuntak sung tengin thinnopna le thinmuanna om tu hi, a ci nopna ahi hunlam tel ahikom, “Topa kung pan hong pai nong son thute pha hi,” ci in zokik hi.

Isaiah 40

Lametna Kammalte

¹Ih Pathian in, “Ka mite heeneam vun” ci hi. “Amate heeneam vun!

²Jerusalem mite hanthawn vun. Amate in ngei hial ma thuak zo a, tu in a khialnate kimaisak zo hi ci in son vun. A khialna theampo atu amate a kicingin daan ka pia zo hi,” ci hi.

³Aw khat in, “Ngam tawngtol sungah Topa atu in lampi khat vawt vun! Ih Pathian atu in senneal ngam sungah lam sial vun!

⁴Kuamthuk theampo dimh vun; muallian theampo maaitamsak vun. Mualnote sia zaangtam suak tu a, mual le luam ngam teng kinealsak tu hi.

⁵Topa ama mama in hi thu kamciam zo ahikom, Topa minthanna kilangh in, mi theampo in mu tu uh hi,” ci hi.

⁶Aw khat hong ngingin, “Thu khat thangsak in!” hong ci hi. “Bangbang au tu khi ziam” ci in ka dongh hi. “Mihing theampo sia lopa taw kibang a; ngam sungah a om paakte sangin khuangei nungta zaw tuan ngawl hi.

⁷Topa in amate vui in a seamsak ciang lopate kongaw in paakte vul hi. Mihingte sia lopate bangma hi lel hi.

⁸Hi hi, lopate kongaw in paakte vul a, ahihang ih Pathian ii kammal sia a tawntung kip hi,” ci hi.

⁹Jerusalem awng, mualsaang tungah kaato in a lungdamna thu thangsak in! Zion awng, nging takin au keakin, lungdamna thute son in! Lau ngawlin sonkeak in. A Pathian uh hong pai tu hi ci in Judah kuate tungah son vun!

¹⁰Vaanglianpipa Topa sia vaangletna taw uk tu in hong pai a, ama ii a suatak sa mite hong tonpui hi.

¹¹Tuucing pa khat bangin ama in a tuu honte keamcing tu hi; ama in tuunote kaikhawm in, a baan ah toai in, a nute dam takin paipui tu hi.

Teengat thei ngawl, Israel ii Pathian

¹²Akua in khut dim taw tuipi tee thei tu ziam? ahibuale a khut taw akua in vantung tee thei tu ziam? Akua in hai khat sungah leitung leitangh heang thei tu ziam? tua ahibuale akua in mualliante le mualnote toai tee thei tu ziam?

¹³Bang vawt tu ci sia Topa tungah akua in son thei tu ziam? Akua in ama hil thei tu ahibuale ngaisutna pia thei tu ziam?



- ¹⁴Nate bangbangin kivawt tuak hi ci a, heak natu le tel natu in Pathian in akua dongh ziam?
- ¹⁵Topa atu in minamte sia bangma hi ngawlin; tuimal khat bang zongh hi ngawl hi; a khuala na ah a om tuikulh te sia leivui bangin zaang hi.
- ¹⁶Lebanon ngam dui sungah a om nganhing theampo sia ih Pathian biakpiak natu in kicing zo ngawl a, a thingkungte zongh biakpiakna hal natu in tawm lei hi.
- ¹⁷Minam theampote sia ama atu in bangma tham hi ngawl hi.
- ¹⁸Pathian sia akua taw kitee ngat thei tu ziam? Ama sia bang taw kibang hi ci in na son thei tu uh ziam?
- ¹⁹Ama sia, thikseakte in kham taw zut a, ngun huanna sungah a sun suk khutthiamte ii vawt milim taw kibang ngawl hi.
- ²⁰Ngun le kham taw a vawt zo ngawl pa in a muat thei ngawl thing taw vawt tu teal zaw hi. A pukvawk ngawl tu milim khat vawt tu in ama in khutthiamna neipa khat zong hi.
- ²¹He ngawl nu ziam? Nidang pekin note tungah hong kison hi ngawl ka na ziam? Leitung sia bangbangin kipan cisia za ngei ngawl nu ziam?
- ²²Tuasia in vantung a saang belna le leitung ii tungsia ama kumpi tokhum tungah a to pa ii vawt sa ahi hi; a nuai ah om mite sia mitsa nocik bang ahi hi. Puan dalna khat a kikhak bang le a sungah ten natu in puanbuk khat a kiphah bangin Ama in van phal hi.
- ²³Ama in a vaanglian ngamukte khiasuk in bangma ngawl suaksak hi.
- ²⁴Amate sia thingkung moino, a po tuung a zung kho ngawllaite taw kibang hi. Topa in vui a vaksak ciang amate kongaw in taangphaw bangin leenkeak hi.
- ²⁵A thiangtho Pathian sia a kua taw kitee ngat thei tu ziam? Ama taw a kibang a dang akua om ziam?



²⁶Vantung ento in! Na mu aksite akua in bitphua ziam? Ngalkap honkhat lampui bangin, aksite lam a puipa in aksite a phak za he a, a min taw sam vateu hi! Ama vaanglian mama a— amate khat zongh peuhe ngei ngawl hi!

²⁷Israel te awng, ngimna na thuak nate le kilawm ngawlin na thuaknate Topa in hong heaksak ngawl a hong awlmawk ngawl hi ci in banghangin phun nu ziam?

²⁸He ngawl nu ziam? Za ngawl nu ziam? Topa sia tawntung Pathian ahi hi; Ama in leitung theampo bitphua hi. Ama sia toi ngei ngawl a, ngim ngei ngawl hi. Ama ii ngaisutnate kuama in tel ngawl hi.

²⁹Ama in a thazawmte le a toite thahatsak hi.

³⁰Khangmoite ngangawn a tha uh kiam hi; tangvalte a tha uh bo in puk thei hi.

³¹Ahihang hu tu dei in Topa a muangte in a tha a dim kik mu tu uh hi. Muvanlai bangin amate a tha taw leangto tu hi; amate a tai hangin toi ngawl tu uh hi; lam a pai uh hangin ngim ngawl tu uh hi.

Isaiah 41

Israel tungah Pathian ii Kamciam

¹Pathian in hi bangin ci hi, “A khuala ah a om ngamte awng, thimdide in om vun a ka thu hong ngai tavun! Zum ah na thu sung tu in kinging vun; thu son thei natu hun nga tu nu hi. Akua thumaan ziam ci in khensat tu in pai tek tawng.

²“Niswana sang panin ngalzo pa hong paipui a, a paina theampo ah ngal a zosak sia akua ziam? Kumpite le minamte tungah ama zawna a pia sia akua ziam? Leivui bang keakin amate sia a namsau in saatsuk hi. Taangphaw sia vui ii letkeak bangin a thaltangte in amate thethaang hi.

³Ngal muangin ama in a nung pan delin zui a, a peang in lei thutha man ngawl tu za in manlang hi!



⁴Hi bangin, a piangsak sia akua ziam? Tangthu suak tu in a ngaisun sia akua ziam? A kipatciil pan kipan Keima Topa ka om a, Keima Topa Pathian sia a khakbel dongin ka om tu hi.

⁵“A khuala ngam mite in ka sep sate mu zo hi; amate kiitakna taw lau in liing uh hi. Tua ahikom amate a vekpi kikhawm in hong pai uh hi.

⁶Khutthiamte sia khat le khat kihu in ki hanthawn uh hi.

⁷Lettama pa in kham seakpa tungah ‘Pha mama hi!’ ci hi. Milim a Neal tu a seakpa in thikpim taw a kilh pa hanthawn hi. Amate in, ‘A kipeena pha hi’ ci uh hi— tuaciang amate in milim sia a koina munah kho takin kilh uh hi.

⁸“Ahihang nang, ka naseampa Israel awng, kong tealsa mi na hi a, ka lawmpa Abraham ii suan le paalte na hi hi.

⁹Leimong panin nang kong paipui hi; a khuala bel a kingh panin kong sam a, ‘Nang sia ka naseam pa ni hi’ kong ci hi. Kei in nang kong nial bua a, ahihang nang kong teal hi.

¹⁰Lau heak in— nang kong ompui hi! Keima in na Pathian ka hi hi— bangma in nang lausak heak in! Kong thahatsak tu a, kong hu tu hi; kong keamcing tu a, kong ngum tu hi.

¹¹“Nang tungah hong thin ukte sia ngallel maizumna he tu uh hi. Nang hong sim mite thi tu a,

¹²leitung panin mang vadi tu uh hi.

¹³Keima in na Topa Pathian ka hi hi; nang kong thahatsak a, ‘Lau heak in; hong hu tu khi hi’ ci in kong son hi,” ci hi.

¹⁴Topa in hi bangin ci hi, “Israel awng, note in mi cii tawmte le a thazawmte na hi uh hi. lau heak vun; hong hu tu khi hi. Keima, Israel ii a thiangtho Pathian sia nang hong ngumpa ka hi hi.

¹⁵Hiam in ha thak a nei ancilna bangin kong vawt tu hi. Note in mualliante cilin na susia tu uh hi; mualnote leivui suak tu hi.



¹⁶Amate sia vui sungah na lawn tu uh hi; vui va in amate seamkeak a, vui pi in amate thethaang tu uh hi. Tuasia ciang keima in na Pathian uh ka hikom na lungdam tu uh hi; Israel ii a thiangtho Pathian ahi keima nong pok tu uh hi.

¹⁷“Ka mite tuidu in tui a zon uh ciang, a dang a ko ciang, Topa ahi, Keima in, amate thungetna ka zo tu hi; Israel te ii Pathian ahi Keima in, amate ka nusia ngei buatu hi.

¹⁸Mualkolte laizang ah ngunte ka luangsak tu a, zaangtamte sungah ciktui ka luangsak tu hi. Senneal ngam sia tuili ka suaksak tu a, leiko na mun sia ciktui luang ka suaksak tu hi.

¹⁹Senneal ngamah cedar kungte, acacia, myrtle le olive kungte ka posak tu hi. Ngamkolna ah taam taakthingte juniper le cypress thingte po tu hi.

²⁰Topa ahi Keima in hi nate vawt zo hi ci sia mite in mu in he tu uh hi. Israel te ii a thiangtho Pathian in hi thute a piansakna amate in he tu uh hi,” ci hi.

Topa ii Pathian Maan ngawlte a Thatona

²¹Israel te ii kumpi ahi, Topa in son tu nei hi; “No minamte ii pathiante awng, na thu uh hong sung tavun. Na kinialpina na thute hong paipui tavun!

²²Hi sungah hong pai tavun a bang piang tu ziam hong sonkhol tavun, tua hile hong pian ciang ih he tu hi. A piang sa thute zum ah thiang son vun a, amate ii cinopna hong son tavun.

²³Note sia pathiante hi ci in kong heak thei natu in mai sangah bang thu hong piang tu— ci sia hong son tavun! Thupha pawlkhat vawt vun a, ahibuale siatna pawlkhat thengsak vun. Launa le liinna taw hong kidimsak tavun.

²⁴Nang le na vawtte theampo bangma hi ngawl hi; Nang hong biate kiihuai hi!

²⁵Nisuana sangah a teang mihing khat ka teal zo hi. Saksang pan sim tu in ama ka puak tu hi. Beal seakpa khat in tungman a totcil bangin, ama in ngamukte buan bangin tuancil tu hi.



²⁶Maan tatak nu hi kong ci thei tu uh in hi thu piang tu hi ci in akua in son khol nu ziam? Tuabang kuama in son ngawl nu hi. Kam khat zongh pau ngawl nu hi; khat zongh in na kampau za ngawl hi!

²⁷Zion mite tungah tua thu a son phit bel sia, Topa ahi, Keima ka hi hi; ‘Na mite hong pai hi! Amate inn ah hong cia uh hi!’ ci thu son tu in Jerusalem ah kamtai khat ka puak hi.

²⁸Pathiante sung ka et ciang, son tu a nei kuama om ngawl a; ka thudokte khat zongh in hong zo thei ngawl hi.

²⁹Hi pathiante sia a vekpi in a luithawthong ahi hi; amate in bangma vawt thei vet ngawl hi— hi milimte sia thazawm in vaang nei ngawl hi,” ci hi.

Isaiah 42

¹Topa in, “A tha ka hatsak ka naseampa sia hi sungah om hi- Keima in ama tealin, ka lungkim hi. Ka tha taw ama ka dimh zo a, minam theampo tungah thumaanna puak tu hi.

²Ama au ngawlin, a aw saangsak ngawlin, lampi ah a ngingin pau ngawl tu hi.

³Ama in pompa kungkoai khat thiaktan ngawlin, lalciin meitaang phe valep sia mitsak ngawl tu hi. Ama in mihing theampo tungah a kip thutanna thengsak tu hi.

⁴Ama in thin kiam ngawl tu hi; leitung ah thumaanna piangsak tu hi. A khuala ngamte in ama ii thuhilna ngakla uh hi,” ci hi.

⁵Pathian in vantungte bitphua in, phalkeak hi; ama in leitung le leitung ah a teangte theampo vawt hi; a mite theampo tungah nuntakna le husanna pia hi. Tuaciang tu in, Topa Pathian in a naseampa tungah,

⁶“Topa ahi, Keima in, leitungah thumaan na kiseam ziam kiseam ngawl ziam ci thu en tu in nangma kong sam a vaangletna kong pia zo hi. Nangma tungtawn in mite theampo taw thuciamna khat ka vawt tu hi; nangma tungtawn in minamte tungah khuavak ka pia tu hi.



⁷Mittawte ii mitte na hong tu a a zing thong sungah a tote nangma in na suatak tu hi.

⁸“Keima bek ma Topa na Pathian ka hi hi. Pathian dang khat tungah ka minthanna kihawm ngawl tu hi; kei hong kipoknate sia milimte ka hawmsak buatu hi.

⁹Ka son khol thute tu in tangtung hi. Tu in a piang ngawl lai thu thakte hong pian ma ngangawn in, kong son tu hi.” ci hi.

Pokna la

¹⁰Topa tungah la thak khat sa vun; leitung theampo awng, ama pokna la sa vun! Tuipi tung khualhawte awng, ama pok vun! Tuipi sungah nganhingte theampo awng; ama pok vun! ngam khuala nate le tua munah a teangte theampo awng, la sa vun!

¹¹Senneal ngam le a khuapite in Pathian pok hen; Kedar mite in ama pok hen! Sela khuapi sungah a teangte in mualdawnte pan lungdam in au hen!

¹²Ngam khuala na sungah a teangte in Topa tungah pokna le minthanna pia hen!

¹³Topa sia ngalhang pa bangin ngalsim tu in kuan hi; Ama sia ngal do tu lawpin kithoi hi. Ama in ngal phawngin au a, hanla sam hi. Ama in a ngalte tungah a vaangletna lak hi.

Pathian In A mite Hu tu in Kamciam

¹⁴Pathian in, “Khua ngei hial po ma ka thim dide hi; ka mite ka paupui bua hi. Ahitazong tu in ka sep tu hun hong theng zo hi; numei naungil tun tu bangin ka au hi.

¹⁵Mualnote le mualliante lalcipsak tu in lopa le thingkungte ka kongawsak tu hi. Ngundungte senneal ngam suaksakin, tuilite ka kangsak tu hi.

¹⁶“Mittaw ka mite sia amate tot ngei ngawl lampite tawnin lam ka pui tu hi. Amate khuazing sia khuavak suaksakin a tam kim ngawl ngam sia amate mai ah tamin ka nealsak tu hi. Hite sia ka kamciam hi a, peal ngawlin ka tangtungsak tu hi.



¹⁷Milimte a muangte theampo, milimte a pathian hi a cite theampo ki maizumsakin, ki maimawlsak tu hi.” ci hi.

Israel te ii Thuheak Ngawlina

¹⁸Topa in, “Ngai vun, no nangong mite awng! A nai in en vun, no mittawte awng!

¹⁹Ka naseampa sang khuamu ngawl zaw khat pawpo om ziam? Kamtai in ka sawlpa sang nangong zaw khat pawpo om ziam?

²⁰Israel awng, nang in tam mama mu zo ni hi, ahihang nang atu in bang khiakna nei ziam? Na khuazaak natu in bil na nei hi, ahihang bang tatak na za ziam?” ci hi.

²¹Topa sia hong ngum nuam mama Pathian hi a, tua ahikom a thukhamte le a thuhilnate thupisak hi, tuaciang ama in tate a mite ii zatak tu dei hi.

²²Ahihang tu in mite kisuttol zo in, leisung thong ah kikalhcip in thong sungah kiphual hi. Amate ii vanhte kiphul in ki suttol a, amate hun tu in kuama hong pai ngawl hi.

²³Note sung pan akua in hi thu ngai tu nu ziam? Tu pan kipan pha takin, ngai ngawl tu nu ziam?

²⁴A sut ngawpte tungah Israel te a pia sia akua ziam? Eite ii a tungah ih khial Topa mama in pia hi! Ama deina bangin ih nungta bua a, ama hong hilna bang ih mang bua hi.

²⁵Tua ahiciang ama ii thin uuk mama nate eite hong phawksakin, ngal kisimna hong thuaksak hi. Ama ii thin uukna sia mei bangin Israel mite theampo sungah kuang hi, ahihang bang thu piang ziam cisia eite in ih he ngei bua hi; tua ih thuakna panin eite in bangma ih phawk thei tuan bua hi.

Isaiah 43

Pathian in A mite Suaktak tu Kamciam

¹Israel awng, nang hong bitphua Topa in, “Lau heak in— Kong ngum tu hi. Na min taw kong sam zo hi— nang sia Keima mi na hi hi.



²Tui thukte na kantan ciang, nang taw kong omkhawm tu hi; na thuaknate in hong zo zo ngawl tu hi. Mei na kantan ciang, na kaang buatu hi; vawtsiat, haksatnate in nang hong nasak ngawl tu hi.

³Banghangziam cile keima in Topa na Pathian, Israel te ii a thiangtho Pathian, nangma hong ngumpa ka hi hi. Nangma kong suatak natu in Egypt ka thasua tu a, nangma kong the natu in Ethiopia le Seba ka thasua tu hi.

⁴Na nuntakna ngum tu in minamte theampo ka thasua tu hi. Banghangziam cile nang sia kei atu in manpha ni hi. Nang kong it a kong upat hi.

⁵Lau heakin— nangma hong ompui khi hi! “Ni suana a khualana pan le nitumna sang a khuala belna panin, na mite inn ah kong ciapui tu hi.

⁶Saksangte tungah amate paisak vun ka ci tu a; thangsang te tungah amate khaktan nawn heak vun ka ci tu hi. Ngam khuala na pan le leitung mun theampo panin ka mite heak kik taken.

⁷Amate sia keima mite hi a, keima hong minthangsak tu in ka bitphua ahi hi,” ci hi.

Israel sia Topa ii Tetti

⁸Pathian in, “Ka mite zum ah sam vun. Amate in mittang nei hi napi, a mit uh taw hi; amate in bil nei hi napi, a nangong uh hi!

⁹Thu kisitna munah hong pai natu in minamte sam vun. Amate ii pathiante sung pan akua in maisang thu son khol thei ziam? Amate sung pan akua in tu a, a piang thu sia sonkhol ziam? Hi pathiante in a son khol thute maanin, amate kammalte maan hi, ci in a kilangh natu in, a tetti te hong paipui taken.

¹⁰“Israel mite awng, note in ka tetti te na hi uh hi; Ka naseam tu in kong teal hi, tua ahikom kei hong he in nong um tu uh a, keima bekma Pathian ka hi sia na tel tu uh hi. Keima sim ngawl pathian dang om ngawl hi; om ngei ngawlin, maisang zongh ah om ngei ngawl tu hi.

¹¹“Nang hong hun thei tu sia Topa ahi, keima khat bekma ka hi hi.



¹²Bang hong piang tu cisia ka sonkhol zo a, tuaciang nang hong hu tu in kong pai hi. Ngamdang pathian in hi bang vawt ngei ngawl hi; note in ka tettite na hi uh hi.

¹³Keima in Pathian ka hi a, a tawntungin ka hi tu hi. Kuama in ka vaangletna panin suakta thei ngawl tu hi; ka septe kuama in kheal thei ngawl tu hi,” ci hi.

Babylon pan Suatakna

¹⁴Israel te ii a thiangtho Pathian, note hong ngum Topa in, “Note hong ngum tu in, Babylon a sim tu ngalkapte kong puak tu hi. Khuapi kongpite ka siasak tu a, amate auna awte in kaana aw suak tu hi.

¹⁵Keima in Topa a thiangtho na Pathian ka hi hi. Israel awng, no kong bitphua a, keima in note kumpi ka hi hi,” ci hi.

¹⁶Nidang lai pekin Topa in tuipi kantan in lampi khat vawt a tui peite kantan in lamzin khat vawt hi.

¹⁷Ama in a thahat ngalkap hon khat siasak in, tuate sia siphu ngalleang le siphu ngalkapte ahi hi. Amate pukin tho kik nawn ngawl a, meivak kuang muutmit bang ahi hi.

¹⁸Ahizong Topa in, “Nungsang thute ciamtee heak vun a, taanglai a piang thute ngaisun heak vun.

¹⁹A thak na khat ka vawt tu sia en vun. Tuasia hong piang zo hi— tu in mu thei nu hi! Ngam tawngtol sungah lampi khat ka vawt tu a, tualai ah note atu in tui ka luangsak tu hi.

²⁰Ngamsate ngangawn in kei hong upat tu hi; ka teal sa mite tui pia tu in senneal ngam sungah nguntui ka luansak ciang ngiate le vacim kalaoh te in kei hong pok tu uh hi.

²¹Amate sia keima atu in ka vawt mite hi a, amate in keima hong pokna la sa tu uh hi!” ci hi.

Israel ii Mawna



²²Topa in, “Israel awng, ahihang nang in kei nong cimtaak zo hi, nang in kei nong bia bua hi.

²³Nangma in tuu taw na meihal biakpiaknate kei kungah nong paipui bua hi; na biakpiakna taw kei nong upat bua hi. Biakpiakna te ngen in vanhngit kong suan bua a; ngim namtui ngen in, thinngim kong pia bua hi.

²⁴Nang in kei atu in ngim namtui na lei bua a, na nganhingte ii thau taw nong lungkimsak bua hi. Ahihang na khialna taw kei tungah vanhngit nong suan zaw pum a, khialna na vawtnate tawin ka thin nong ngimsak hi.

²⁵Ahitazong, na mawna hong maisak sia keima Pathian hi in, keima ka hikom in hi bangin ka vawt hi. Na khialnate ka ciamtee buatu hi.

²⁶“Zum ah pai tawng; nang hong kimawsakna thu hong paipui tan! Nangma in thumaan na hina thu lak tu in na thu sung in!

²⁷Na taangpupi masa belpa uh khial hi; na lampuite ka tungah hong khial hi,

²⁸no hong ukte in ka biakna mun thiangtho sia ninsak uh hi. Tua ahikom Israel tungah lalcipna kong thengsak hi; ka mite selnona ka thuaksak hi,” ci hi.

Isaiah 44

Topa bekma Pathian hi

¹Topa in, “Israel, ka naseampa, ka teal mi, Jacob suan le paalte awng, tu in ngai vun.

²Nang hong bitphua Topa ka hi hi; na sua hun pan kipan, kong hu zo hi. Lau heak in; nangma in kong it kong teal sa ka naseam pa na hi hi.

³“A dangko leitangh tungah tui ka pia tu a leiko tungah luitui ka luangsak tu hi. Na tate tungah ka thaa ka bua tu a, na suan na paalte tungah ka thupha ka pia tu hi.

⁴Amate in pha takpi in tui a kibuak lopate le, luitui luangte hui ah a po pakngiam thingte bangin khang tu uh hi.



⁵“Mite, khat zawkciang khat in, ‘Keima in Topa aa ka hi hi,’ ci tu hi. Amate in Israel mite taw kipawl tu in hong pai tu uh hi. Misim in a baan tungah Topa min at in ama le ama sia Pathian ii mihing khat ka hi hi,’ ci tu hi.” ci hi.

⁶Israel dalin, a uk Topa, Vaanglianbelpa Topa in, “Keima in a masa bel, a khakbel, Pathian khat bek ka hi hi. Keima sim ngawl pathian dang om ngawl hi.

⁷Keima sep bangin akua dang in seam thei ziam? A kipatna pan a tawpna hun dong a piang tu thu theampo akua in son khol thei ziam?

⁸Lau heak vun, ka mite awng! Taanglai hun pan kipan tu hun dong hong piang tu theampo ka son siat sa thu note in na he uh a, tuaciang, note in ka tetti na hi uh hi. pathian dang a om ziam? Ka zaak ngeingawl a vaanglian pathian dang om ziam?,” ci hi.

Milim Biakna Kinunau

⁹Milim a vawt mite theampo mannung ngawlin, amate ii manh nei sak pathiante sia luithawthong hi. Hi bang pathian a biate sia a mit uh taw in, bangma he ngawl uh a— amate kimaimawlsak tu hi.

¹⁰pathian bangin biak tu in thik milim vawt tu sia bangma manna om ngawl hi!

¹¹Tuabangte a bia theampo in maizumna nga tu hi. Milim a vawt mite sia mihing ma hi lel uh hi. Amate hong paisak tavun a thu sitna thuaksak vun— amate kilausak tu a, maimawlina thuak tu uh hi.

¹²Thik seakpa in thikthem khat la in pum taw zaap hi. Ama ii a thahat khut taw ama dei bang lim a sua natu in, sek vikin seak hi. Ama in na a sep ciang, ngilkial dangtaak in toi hi.

¹³Lettama pa in thing pitee hi. Ama inn sungah a koi tu in, ama in leikaang taw lim khat at in, ama na zakte taw khuakin, a meal pha mihing lim khat vawt hi.



¹⁴Ama in a zak tu in cedar kungte phuk tu hi, tua ahibuale limthing ahizong cypress thing ahizong taam sung panin teal tu hi. Tua ahibuale a hing sitset thingkung nam khat (laurel kung) suanin a khan natu in nguatuhi ngak tu hi.

¹⁵Mihing khat in thingkung khat sia thingthu tu le milim vawt natu in zangh hi. Ama in thing khen khat sia a meilum oai tu le anluum em natu in zangh hi; khen khat taw pathian vawtin bia hi.

¹⁶Ama in thing pawl khat sia meikhuk ah thut hi; sa em in ne a, lungkim hi. Ama in mei oai in, “Khualum a bang zata nuam ziam! Mei sia pha mama ta a!” ci hi.

¹⁷Thing a om lai teng taw ama in milim khat vawt a, tuaciang a mai ah kun in bia hi. Ama in milim tungah thungen in, “Nang in ka pathian na hi hi—hong ngum tan!” ci hi.

¹⁸Tuabang mite sia mawmaw leilam ahikom amate in bangteng vawt khu ziam ci zongh he ngawl hi. Amate in thumaan thutak a mu thei ngawl natu in, a mit uh si in, a tel thei ngawl natu in a ngaisutna khak uh hi.

¹⁹Milimte a vawtpa in hi bangin a ci tu ciimna heakna nei ngawl hi, “Thing kim khat ka thuttum hi. Meikam tungah anluum pawl khat ka em a, sa zongh em in ka ne hi. A omlai thingte sia milim in ka vawt hi. Hi munah thingtawng khat ii mai ah ka kun hi!”

²⁰Ama sia vut ne te taw kibang lel hi. Ama ii mawmawt ngaisut nate in lamkhialsak zo a ama sia kihu zo nawn ngawl hi. A khut sungah a toai milim sia pathian hi ngawl het ahi hunlam ama in he ngawl hi.

Topa A Bitphuapa le Ngumpa

²¹Topa in, “Israel awng, hi thu ciamtee in; nanging ka naseampa na hi sia ciamtee in, Ka naseam tu in nang kong bitphua a, bangma hunin nang kong mangil ngei buatu hi.

²²Na khialnate meeikaai bangin ka bosak zo hi. Ka kungah hong cia kik tan; keima in nang hong ngumpa ka hi hi,” ci hi.



²³Lungdam in au vun, no vantungte awng! Au vun, lei thuk munte awng! Lungdam in au vun, muallian te le ngam sungah a om thingkungte theampo awng! Topa in a letna sia a mi Israel te ngupna taw in hong lak zo hi.

²⁴“Keima in Topa nang hong ngumpa ka hi hi. Keima in nang hong bitphuapa ka hi hi. Keima in Topa, na theampo A bitphuapa ka hi hi. Keima nguakin vantungte ka zalhkeak hi; leitung ka vawt lai in, kuama in kei hong hu ngawl hi.

²⁵Maisang thu tu aisaan theite ka mawmawsak a, aksi en thiamte ii thuson kholnate ka melmang hi. Mipilte ii kammalte ka nial a amate pilna sia a mawmawt huai ahi hunlam ka langhsak hi.

²⁶Ahihang ka naseampa in thuson kholna khat a nei ciang ka tupnate pualaak tu in, kamtai khat ka puak ciang tua tupnate le sonkhol nate ka tangtungsak hi. Jerusalem ah mite teang kik tu hi ci in Jerusalem tungah ka son a, Judah ngam khuapite kisa kik tu hi ci in Judah ngam khuapite ka son hi. Tua khuapite sia a kisiacip na sung pan tho to tu hi.

²⁷Thupiakna kam khat taw tuipi ka kangcipsak hi.

²⁸Keima in Cyrus tungah, ‘Nangma in keima luangin a uk tu pa na hi hi; Keima dei bangin na seam tu hi: Jerusalem khua a kisa kik natu le Biakinn tawdappha a ki pha kik natu in thu na pia tu hi,’ ka ci hi,” ci hi.

Isaiah 45

Topa in Cyrus Nasep pia

¹Topa in Cyrus sia kumpi tu in teal zo hi. Topa in minamte zo tu in ama sawl zo hi; kumpite ii vaangletna hawkkeak tu in Topa in ama puak hi; Topa in khuapi kongpite Cyrus atu in hong tu hi. Cyrus tungah Topa in,

²“Keima in muallian mualnote tamkimsakin, na lampi ka pua tu hi. keima in taungo kongpite thiaktan in a thikzawlte ka saattham tu hi.

³A zingna munah a kikoi sumngumte le a thimtham munah a kiphual sumngumte nang kong pia tu hi; tuasia ciang keima in Topa ka hi hunlam le Israel ii Pathian in na minlo in nang hong sam zo hi cisia na tel tu hi.



⁴Ka teal sa mi ahi Israel ka naseam pa hu tu in nang kong sawl hi, nang in kei hong he ngawl na hitazong upatna lian kong pia hi.

⁵“Keima in Topa ka hi hi; pathian dang om ngawl hi. Na kitaangsap thahatna sia, nang in kei hong he ngawl na hihang kong pia tu hi.

⁶Leimong khat pan leimong khat dongah a om mihing theampo in keima sia Topa ka hina thu le pathian dang om ngawl a hina thu a heak thei natu in hi bangin ka vawt ahi hi.

⁷Keima in khuavak le khuazing ka bitphua khawm hi; thupha le thusia ka puak khawm hi. Topa ahi, Keima in hite theampo ka vawt hi.

⁸Keima in ngalzawna sia ngua bangin vantung pan ka zusak tu a, a saang tu in lei kihong tu a thutanna le suatakna paak hong palh tu hi. Topa ahi, Keima in hisia ka tungsak tu hi,” ci hi.

Bitphua Topa le Tangthu

⁹A dangte theampo taw ma a kibang leibeal khat in ama a vawtpa kam nial ngam tu ziam? Tungman in beal seakpa tungah bang vawt ni ziam ci in dongh ziam? Beal in ama a vawt beal seakpa tungah thiam bate ci in phunsan ziam?

¹⁰Akua in a nu a pate tungah, “Banghang hi bang keak a hong piangsak nu ziam?” ci ngam tu ziam?

¹¹Israel te ii a thiangtho Pathian ahi, Topa maisang atu thu a piangsak pa in, “Ka tate taw kisai in kei tungah thu nong dok natu hi kale kei in bang vawt tu kilawm hi ci in nong son thei natu thu na nei bua hi!

¹²Keima in leitung a vawtpa le tua tungah a teang tu minam a bitphuapa ka hi hi. Ka vaangletna taw vantungte ka phalkeak a; ni, tha le aksite ka uk hi.

¹³Ka sawmna bang a tangtut thei natu le nate thumaan a sua natu seam tu in Cyrus ka sawl hi. Ama khualhawna lampi theampo ka tangtansak tu hi. Ama in ka khuapi, Jerusalem sa kik tu a, ka mi koltaangte suaktasak tu hi. Hi thu vawt tu in kuama in ama cial ngawlin, sumnguk pia ngawl hi” ci hi. Vaanglianbelpa Topa in son zo hi.



¹⁴Topa in Israel tungah, “Egypt le Ethiopiate hauna sia no atu hi tu a, a tun saang Seba mite sia na sila uh suak tu hi; thikkol kibal in na nung uh hong zui tu hi. Amate in note mai ah kunin, ‘Pathian sia note taw om khawmin—ama bekma Pathian hi’.

¹⁵A mite a ngum, Israel te ii Pathian sia, ama le ama a kisealcip Pathian ahi hi.

¹⁶Milim a vawtte a vekpi in a mai uh kizumsak tu hi; amate a vekpi a mai uh kimawlsak tu hi.

¹⁷Ahihang Israel ahile Topa in ngumin, a ngal zawna a tawntungin kip hi. Ama mite a mai uh kimawlsak ngei ngawl tu hi,’ ci in pualaak tu uh hi,” ci hi.

¹⁸Topa in vantungte bitphua a— ama sia Pathian ahi hi! Ama in leitung vawt a— a kip a kho suaksak hi. Ama in leitung a awngthong ngamtul vawt ngawlin, mihing teenna mun tu in piangsak hi. “Keima in Topa ka hi a, Pathian dang om ngawl hi,

¹⁹Keima ii ka tupnate thu ku in ka son ngei bua a, ka phualseal bua hi. Kuama ten ngawl a awngthong ngam tulna munah kei hong zong tu in Israel te ka sawl bua hi. Keima in Topa ka hi a, thumaan son in, A maan nate ka pualaak hi,” a ci pa sia ama ahi hi.

Leitung ii Topa le Babylon ii Milimte

²⁰Topa in, “Kumpi ngam lal in a suakta minamte theampo awng, hong pai tek tavun; thu kisit tu in no mama om vun! A thing milimte taw thuangsia khawmin amate a ngum thei ngawl pathian tungah thungen mite— hi mite in bangma heak nei ngawl uh hi!

²¹Hong pai tavun a, na thu uh zum ah son vun; thu neite khat le khat kikum hen. Thupiang tute akua in taanglai in son khol ziam? A mite a ngum Pathian, Topa sia Keima hi ngawl kana khi ziam? Keima ngawl pathian dang om ngawl hi.

²²“Leitung mihing theampo te awng, tu in kei kungah hong kiheak tavun a, ngupna nga tavun! Keima bek Pathian ka hi hi.



²³Ka kamciam sia maanin, kikheal ngawl tu hi. Keima in ciliaphuai takin ka kiciam hi. Mihing theampo hong pai in ka mai ah hong khupdin tu uh a, kei tungah thumaan tu in hong kiciam tu uh hi.

²⁴“Amate in keima taw bekin ngalzawna om a thahatna kinga hi ci tu uh hi; ahihang kei hong ngaimawte theampo in maimawlna thwak tu uh hi.

²⁵Topa ahi, Keima in, Jacob ii suan le paalte theampo ka suatak tu a, amate in kei hong pok tu uh hi.

Isaiah 46

¹Hisia in Babylon ii pathiante bona thu ahi hi! Bel le Nebo sia khatvei lai in kibia a, ahihang tu in amate sia late tungah kisuan in, a toi ngannote vanhngit khat suak hi.

²Milimte in amate le amate kingum thei ngawl hi; amate kiman in ki paipui hi. Hi thu sia Babylon ii pathiante bona thu ahi hi!

³“Ka mite sung pan a taanglai Jacob suan le paalte theampo awng, hong ngai tavun. Na sua uh pan kipan kong ou kong pau hi.

⁴Keima in note Pathian ka hi a, na huai na teak na puakkan dong kong ou kong keam tu hi. Keima in note kong vawt a kong keamcing tu hi; note kong hu tu a, kong suatak tu hi.

⁵“Akua taw hong tee ngat tu nu ziam?” Topa in ci hi. “Kei taw a kibang akua dang om ziam?

⁶Mihingte in a dangka ipte hongin khamte suakeak hi; toaiteena taw ngunte tee uh hi. Amate in milim pathian vawt tu in khamseak khat cial hi; tuaciang amate kunin tua milim bia uh hi.

⁷Amate in a liangko tungah suanto in pua uh hi; Ama om natu munah koi in, tua lai ah om a, koima dangah kin thei ngawl hi. Khat pawpo in ama tungah thungen le ama in zo thei ngawlin, ahibuale ngimna khamna panin ngum thei ngawl hi.

⁸“Hi thu ciamtee vun, no mihing khialte awng; ka vawt sate ngaisun vun.



⁹Nidang lai a, a piang thute phawk vun; Keima bekma Pathian hi a, kei taw a kibang kuama dang om ngawl a hina thu phawk tavun.

¹⁰A kipatna panin a piang tu thu ka son khol zo hi; bang hong piang tu cisia taanghlai pek panin ka son khol zo hi. Ka tupnate tangtung ngawlin om ngei ngawl tu a, vawt tu ka sawm theampo ka vawt tu hi, ka ci hi.

¹¹Nisuana sang panin mihing khat hong pai tu in ka sam hi; Ama in muthi bangin hong tuak sukin ka tup sate tangtungsak tu hi. Keima ii ka son sa bangma in, kivawt tu hi.

¹²“Ngal zaw natu khuala mama lai hi ci in a ngaisun no mihing thinpuite awng, kei hong ngai tavun.

¹³Zaw natu ni, kong thengsak pal tu a— khuala nawn ngawl het tu hi. Ka mualsuana ki haisaangsak ngawl tu hi. Jerusalem ka ngum tu a Israel te tua munah minthanna ka pia tu hi,” ci hi.

Isaiah 47

Babylon tungah Thukhenna

¹Topa in, “Babylon awng, na kumpi tokhum tung pan hong tuaksuk tan a, leivui sungah to in. Nangin khatvei lai in ngaknu thiangtho khat bang na hi a, a kizo ngei ngawl khuapi khat bang na hi hi, ahihang nang sia na moi milmel na neal ngiingeei nawn bua hi! Tu in nang sia sal khat na hi hi!

²An ngoaina suangpheak pei in! An ngoai in! Na lutuam sut in! Na puanpha silhte sut in! Luite kantan tu in na nikte zepto in!

³Na pumngvak na om sia mihingte in hong mu tu hi; zawnsak huai le maizum huai in amate in nang hong mu tu hi. Keima in phu ka la tu a, kuama in hong tho ngawl tu hi,” ci hi.

⁴Israel te ii a thiangtho Pathian in eite hong suatak a— Ama min sia Vaanglianbelpa Topa ahi hi.

⁵Topa in Babylon tungah, “Khuazing sungah thim dide in to khipkhep in; Amate in nang sia mi namcin te ii kumpinu hong ci nawn ngawl tu hi!



⁶Ka mite tungah ka thin uuk hi; ka mihing in ka tuat nawn bua hi; Nangma khut sungah amate kong pia a; amate na hesuak bua hi. Khanghaam nupi pasalte ngangawn na vawtsia hi.

⁷A tawntungin kumpinu khat hi tu in na ki um a, hi thute na thin sungah ngaisun ngawlin ahibuale bangbang bo tu cisia na ngaisun bua hi.

⁸“Nopsakna bek dei in, muanhuai in bit a kisa sia awng, hi thu ngai in. Nang taw a kibang kuama dang khat zongh om ngawl a— Pathian za in lian na kisa hi. Nangma in meingong nu ka suak ngei buatu a, ka tate thina bona thuak ngei ngawl tu hi ci in na ngaisun hi.

⁹Ahihang tawmvei no sung, ni khat thu in, thu hite ngeal piang tu hi. Mitbum pilna theampo na zak hang na pasal le na tate na khuai sua veve tu hi.

¹⁰“Na phat ngawl nate kuama in hong mu thei buante ci in ngaisun ni hi; nangma le nangma na thin na muang hi. Na ciimna le na pilna in nangma lam hong pialsak a, Nangma le nangma, ‘Keima in Pathian ka hi hi— kei bang khat zongh om ngawl hi,’ na kici hi.

¹¹Nang tungah lalna hong theng tu a, na mitbum thiamna in khak zo ngawl tu hi. Mang zongin na mat ngei ngawl siatna— nang tungah thakhat thu in hong theng tu hi!

¹²Na no lai pek panin na zak na mitbum thiamna le na dei aite a vekpi in keamcing in. Amate in nang hong hu thei tha tu hi, na ngalte na lauthawn thei tha tu hi.

¹³Ngaisutna hong kipiak hangin vawt zawk na nei bua hi. Na aisaante aksi taw kisai thu sin te , vantungte a khawk a khawkin khenin lim suaite le nang tungah bang thu piang tu ci in tha sim tha simin nang tungah hong sonte paisakin ngumsak in.

¹⁴“Amate in taangphaw bekno taw kibang tu a, mei khat in kaangtum tu hi! Amate le amate ngangawn kihun zo ngawl tu uh a— amate mei oai lum valit bang hi ngawlin meikuang sia amate atu in sa lei tu hi.



¹⁵Na khan tawntungin thu na dok aisaante in— nang atu hong sepsak tu sia tuabang teng ma ahi hi. Amate in nang hong nusia siat tu a amate san tek pai in, nang hong hun tu in kuama taang ngawl tu hi,” ci hi.

Isaiah 48

Pathian sia Maisang hun ii Topa

¹Hi thu ngai vun, Judah pan a piangsuk Israel mite awng: Note in Topa min taw kiciam in Israel te Pathian ka bia tu uh hi ci nu hi— Ahizong na kam bek uh hi a, na pau bangin na zui bua uh hi.

²Tuaciang a thiangtho khuapi ah a teang mite ka hi uh a, Israel te ii Pathian ahi Vaanglianbelpa Topa a suangte ka hi uh hi ci in, na kiphasak lalai uh hi.

³Topa in Israel tungah, “Taanglai pekin bang thu hong piang tu cisia ka sonkhol hi; tua zawkciang thakhat thu in ka piangsak hi.

⁴Na thinpui uh sia thik le taungo bangin sak mama tu cisia ka he hi.

⁵Na milim uh te in hite piangsak hi na ci thei ngawl natu uh in, keima in taanglai pek pan noma ii maisang thupiang tu te a pian ma in ka sonkhol hi.

⁶“Ka sonkhol sate theampo tu in tangtung zo ahikom; ka sonkhol thute maan hi ci in na pualaak tu uh bek ahi hi. Nidang in kong pualaak ngei ngawl lai hong pai tu thuthakte, tu in kong son tu hi.

⁷Tu hun ciang bekin ka piangsak hi a; nidang in hi bang piang ngei ngawl hi. A piang sa hi thong le a vekpi in ka heak sa thu hi na ci tu uh hi.

⁸Note sia a tawntung ngual langpan ci in hong kihe ahikom note sia muan tu hi ngawl ci in kong he hi. Tua hu in hi thu na za ngei vet bua uh a, na nakheng sung uh ah hi kammal tum ngei ngawl hi.

⁹“Mihingte in ka min hong pok natu in ka thin uukna ka vei kenkon hi; kong suksiat ngawl natu in ka iip kenkon hi.

¹⁰Meikhuk sungah ngunte a kisit bangma in note sia meisa thuakna sungah kong sit zo hi, ahihang note sia bangma manh nei ngawlin kong mu zo hi.



¹¹Hi bang ka vawt sia keima atu hi a— ka min ka paansak buatu a ahibuale minthanna sia kuama dang kihawm ngawlin keima atu bek hi tu hi,” ci hi.

Topa ii Teal Lampuipa, Cyrus

¹²Topa in, “Hong ngai tavun, kong sap Israel mite awng! Keima in a masa bel le a khak bel Pathian ka hi hi, Keima bek Pathian ka hi hi!

¹³Leitung kipatna sia ka khut taw ka vawt a, vantungte ka phalkeak hi. Leitung le vantung ka sap ciang, thakhat thu in hong pai in ka mai ah ding uh hi.

¹⁴“Note theampo kikhawm in ngai vun! Keima ii teal sa mipa in Babylon sim tu hi ci in pathiante khat zongh in sonkhol thei ngawl uh hi; ama in keima dei bangin seam tu hi.

¹⁵Keima in thu a son pa le ama a sam pa ka hi hi; Keima in ama ka lampui a, ngal zawna ka pia hi.

¹⁶“Tu in hong pai in ka kung hong neak tavun a, ka ci bang hong za tavun. A kipat ciil a kipan a langh takin thu ka son a, ka kammalte ka tangtung tawntungsak zo hi,” ci hi. (Tu in Vaanglianpipa Topa in a vaangletna kei hong pia zo a, kei hong sawl zo hi.)

A Mite atu Topa ii Tupna

¹⁷Israel te ii a thiangtho Pathian, note hong ngum Topa in; “Keima in note Topa Pathian ka hi a, note phattuum natu hong hil nuam pa le na zui tu a kilawm lampi hong lak pa ka hi hi.

¹⁸“Kong thupiate ngai hi po le uh te! a kang ngeingawl luamtui bangin thuphate note atu in luang tu hi. Tuipi vaal ah tuihualte bangin zawna na tung theng tu hi.

¹⁹Na suan na paalte senneal za in tam tu a, keima maiah amate min kiphiat ngawlin, kiskusia ngei ngawl tu hi,” ci hi.

²⁰Babylon pan pusuak in, suakta takin pai vun! lungdamna taw hi thuphate au in son vun; “Topa in a naseampa Israel ngum zo hi!” ci in mun theampo ah thangsak vun.



²¹Topa in a mite a sa, a ko senneal ngam sungah lampui in a pai lai in, amate a dangko ngawl uh hi. Amate atu in ama in suang sung pan tui phuulsak hi; ama in suang sutham in, tui hong luang hi.

²²“Mawneite atu in a bitna mun om ngawl hi,” Topa in ci hi.

Isaiah 49

Israel sia Minamte atu Khuavak

¹Ngam khuala ah a teang minamte awng, ka thuson hong ngai tavun! Ka pian ma in, Topa in kei hong teal zo a, a naseam tu in kei hong see khol zo hi.

²Ama in ka kammalte namsau bangin hiamsak hi. Ama ii khut taw kei hong khoi hi. Ama in thaltang bangin kei hong vawt a, zaktawm thei tu in hong hiamsak hi.

³Ama in ka tungah, “Israel awng, ka naseampa na hi hi; nangma hangin, mihingte in kei hong pok tu hi,” hong ci hi.

⁴Keima in, “Ka seam zo hi, ahihang kimanna om ngawl hi! Ka thatang theampo zangh siat zo hi veang i, ahihang bangma ka tangtun bua hi,” ka ci hi. Tua hi kale ka vaite hong panpui tu in Topa ka muang thei veve hi; Ama in ka sepna thaman hong pia tu hi.

⁵Ka pian ma in Topa in nasep tu hong see hi; ama in keima sia a mite kaikhawm kik tu le, a kithethaang Israel mite kaikhawm kik tu in a naseam hong suaksak hi. Topa in upatna kei hong pia hi; ama in ka thahatna bulpi ahi hi.

⁶Topa in kei tungah, “Nangma sep tu in nasep lian zaw khat ka nei hi. Ka naseampa awng. A suakta lai Israel mite laamto tu bek hi ngawlin, minamte tungah khuavak ahi tu in nang kong vawt tu hi— tuabangin leitung theampo in ngupna nga tu uh hi,” hong ci hi.

⁷A ki thusim ngawlhet pa, minamte ii etsat pa le ngamukte ii naseam pa tungah Israel te ii a thiangtho Pathian le ngumpa in hi bangin ci hi. “Kumpite in na suatak hong mu tu a, nang tungah zatakna hong lak tu in ding tu uh hi. Kumpi tate zongin hong mu tu uh a, nangma mai ah zatakna taw hong kun tu



uh hi,” ci hi. hi thu piang nanak tu hi, banghangziam cile Topa in a naseampa teal zo hi; Israel te ii a thiangtho Pathian in a thuciamnate

Jerusalem a kipua kikna

⁸Topa in a mite tungah, “Note ngup tu hun hong thet ciang, maipha kong pia tu a, huna nong ngette kong pia tu hi. Note kong keam, kong hu tu a, note tungtawn in mite theampo taw thuciamna khat ka vawt tu hi. Tu laitakin a kinusia na ngam sungah, note kong teangsak kik tu hi.

⁹Keima in thongtaak mite tungah, ‘Suakta takin pai vun!’ ka ci tu a, khuazing sungah a omte tungah, ‘Khuavakna ah pusuak vun!’ ka ci tu hi. Amate sia mual tungah a taa tuute taw kibang tu uh hi;

¹⁰amate ngilkial ngei ngawlin dangko ngei ngawl tu hi. Nisa le senneal sa in amate bangma tatsak ngawl tu hi, banghangziam cile amate a itpa in lampui hi. Ama in amate sia ciktui ah paipui tu hi.

¹¹“Keima in mualliante kantan in lampi lian khat ka vawt tu a, ka mite khualhaw natu in lam khat ka pua tu hi.

¹²Ka mite sia ngam khuala,saksang le nitumna sang le thang sangah a om Aswan khuapi panin hong pai tu uh hi,” ci hi.

¹³Vantungte awng, la sa vun! Leitung awng, lungdam in au vun! Mualliante la sa in au hen! Topa in a mite heeneam in, ngimna a thuak a mite hesuak tu hi.

¹⁴Ahihang Jerusalem mite in, “Topa in eite hong nusia zo hi! Ama in eite hong mangil zo hi,” ci uh hi.

¹⁵Tuasia ciang Topa in, “Numei khat in ama ii tasen mangil in ama ii hin le toai nausen it ngawlin om thei tu ziam? A nu in a tasen a mangil zezen tha hial zongin, keima in note kong mangil ngei buatu hi.

¹⁶Jerusalem awng, nang kong mangil thei ngei bua hi! Ka khutza lamlai ah na min ka at zo hi.

¹⁷“Nang hong pua kik tu mite hong theng nai zo a, nang hong lalcipsakte tai tu uh hi.



¹⁸Na kiim na paam khuadak kawkoai in bang thupiang ziam en in! Na mite kikhawm uh a— inn ah hong cia uh hi! Keima in a nungta Pathian ka hi tatak bangma in, mothak khat in a kizepna suangmanpha a ki phatsak pui bangma in na mite hangin na kiphasak tu hi.

¹⁹“Na ngam sia kisiacip in kinusia a— ahihang tu in tualai ah a teang tu hong pai mite atu in toi lei tu hi. A kisiacip in nang hong nusia mite in nang taw a kikhuala na ah kikhin tu uh hi.

²⁰Ngamdang saltanna pan a piang na mite in ni khat ni ciang, na tungah, ‘Hi leitangh toi lei hiat a— ih ten natu a zaizaw kisamh hing!’ hong ci tu uh hi.

²¹Tuaciang nangma le nangma, ‘Patang hite theampo kei atu in akua in piangsak ziam? Kei in ka tate bosua zo a ka nei thua zo nawn bua hi, saltang in kei hong kinot keak a— hi patangte akua in vaak thong ziam? Keima nguak hong kinusia a— hi patangte koisung pan hong pai hi thong ziam?’ na kici tu hi,” ci in zokik hi.

²²Vaanglianpipa Topa in a mite tungah, “Keima in minamte tungah lim ka lak tu a, amate in na tate inn ah hong puak tu uh hi.

²³Kumpite sia no tungah pate bang hong hi tu hi; kumpinu te sia nute bang hong hi tu hi. Amate in na mai uh ah kun sukin hong upat tu uh hi; amate in note zatakna hong lak tu uh hi. Tuasia ciang Topa ka hina thu na he tu uh hi; keima ii hu tu a ngak peuma thin kiam ngawl tu uh hi,” ci hi.

²⁴Ngalkap khat ii sutol sa vanhte na la kik thei tu ziam? A thahat khat pa ii mat sa koltaangte na suatak thei tu ziam?

²⁵Topa in, “Hong piang tu thute sia tuabang keak ahi hi. Ngalkapte ii mat sa thongtaakte ki laksak tu a, a thahatte ii sutol sate kimatsak tu hi. Nang hong do peuma ka sim tu a, na tate ka suatak tu hi.

²⁶Nang hong vawtsiate khat le khat ka kithatlumsak tu hi; amate mihing thalup nopna le thin uukna taw a thin uh so tu hi. Tuaciang minam theampo in kei sia, nang hong ngumpa le hong suatak pa, Topa ka hina thu he tu uh



hi. Amate in kei sia Israel te ii a thahat Pathian ka hina thu he tu uh hi,” ci in zokik hi.

Isaiah 50

¹Topa in, “Pasal khat in a zi a khul bangin keima in ka mite hawlkeak hong sa nu ziam? Tua ahile, zi khulna laite koisung ah om ziam? Mihing khat in a tate sila in a zuak bangin, keima in note saltang tu in zuak hong sa nu ziam? Hi ngawl hi, noma mawna hangin saltang in a pai na hi uh a, noma khut khialna hangin hong kihawl khia ahi hi.

²“Ka mite hun tu kong pai ciang banghangin ka mite khat zongh in hong awlmawk ngawl ziam? Ka sap ciang amate in banghang hong zo ngawl ziam? Amate hun tu in keima thazawm lei ka hi ziam? Ka thupiakna taw in tuipi tui ka kangsak thei a— ngunte senneal ngam suaksakin, tui ki sap hu in tua sungah a om ngasate thi hi.

³A thi sate atu khuangai bang keakin, vantung sia ka zingsak thei hi,” ci hi.

Topa ii Naseampa ii Thunitna

⁴Vaanglianpipa Topa in a ngim a toite ka thahatsak thei natu in ka pau tute hong hil zo hi. Ama ii hong hil tute ka ngai thei natu in zingsim in ama in kei hong lawpsak hi.

⁵Topa in thu tel theina kei hong pia zo a, keima in ama langpan ngawlin ka nungngat bua hi.

⁶Kei hong saatte ka nungzaang ka ngat hi. Amate in kei hong selno zazan a, ka khamulte hong phaisak ciang le ka maitang hong cilphii ciangin ka ngat nginge hi.

⁷Ahihang amate ii hong lealna in kei bangma hong tatsak zo ngawl hi, banghangziam cile Vaanglianpipa Topa in kei hong hu hi. Hong vawtsiatna ka thuak tenton hi. Kei hong kimaimawlsak ngawl tu cisia ka he hi.

⁸Banghangziam cile Pathian hong nai a, ama in mawna ka nei ngawlna thu pualaak tu hi. Kei tungah akua in thu hong vawt ngam tu ziam? Zum ah pai tek tawng! Hong langpan tu in hong kuan taken!



⁹Vaanglianpipa Topa mama in kei hong panpui a — tua hi le akua in kei sia mawnei hi ci in tetti pang thei tu ziam? Kei tungah thu hong vawtte theampo bo mang tu hi; amate sia nget ii neak puan bangin bo tu uh hi.

¹⁰Topa zakta in, a naseampa thu a ni note theampo awng, na paina uh lampi zing tatak tha tu hi. Ahihang Topa muangin na Pathian uh suang vun.

¹¹Ngualdangte lalcipsak tu a sawm note theampo sia noma ii sawmnate in noma hong lalcipsak tu uh hi. Topa ama mama in hi thu piangsak tu hi; thinngim lungmanna na thuk tu uh hi.

Isaiah 51

Jerusalem tungah Heenepna Kammalte

¹Topa in, “Ngup tu dei a, kei kungah hu ngen tu in hong pai note awng, ka thuson hong ngai tavun. Nong paina uh suangpi, hong kitaw na suangkuk sia ngaisun vun.

²Na taangpupi Abraham le note pianna Sarah ngaisun vun. Abraham ka sap lai in, ama in ta nei ngawl hi, Ahihang keima in ama thupha ka pia a tate ka pia hi; Ama ii suan le paalte ka pungsak hi.

³“Keima in a lal sa Jerusalem ah a teangte theampo ka hesuak tu hi. Ama ii ngam in senneal ngam ahihang Eden huan taw kibangin, huan khat ka suaksak tu hi, Tualai ah lungdamna le thinnopna om tu a, kei tungah lungdam hong ko in pokna la hong sak tu uh hi.

⁴“Ka mite awng, hong ngai tavun, ka thusonte ngai vun; Minamte tungah thu ka hil hi; keima thukham in amate tungah khuavak puak tu hi.

⁵Keima manlangin kong pai tu a, amate ka ngum tu hi; Ka ngal zawna tu hun hong nai zo hi. Keima in minamte ka uk tu hi. A khuala ngamte in ka pai tu hong ngak hi; amate in ka ngup tu lametna taw hong ngak uh hi.

⁶Vantungte ento vun; leitung en vun! Vantungte sia meikhu bangin mang vadi tu hi; leitung sia puanlui sa bangin paat vadil tu a, a mite theampo sia tho bangin thi tu uh hi. Ahihang keima ii suatakna ka piak sia kip tawntung tu hi; ka ngalzawna in kip tawntung tu hi.



⁷“Thumaanna he in, na thin sung uh ah keima thuhilna a vom mite awng, ka thu hong ngai tavun. Mite in hong selno in hong lan ciangin lau heak vun;

⁸amate sia ngetlungte ii neak puan bangin mang vadi tu uh hi! Ahihang kong paipui suatakna sia kip tawntung tu hi; ka ngalzawna sia a tawntungin kho tu hi,” ci hi.

⁹Khanglo in, Topa awng, ko hong hu tan! Na vaangletna zanghin ko hong ngum tan; Taanglai hun a na zak ngei bangma in zangh in. Tuipi ngulpui Rahab saatin a neensem pa sia nangma na hi hi.

¹⁰Na hut sa mite in tui a kantan thei natu in, tui kantanna lampi khat vawt a, tuipi a kangsak sia zong nangma na hi hi.

¹¹Na suataksak mite in thinnopna taw lungdam in au a, lasa in Jerusalem theng tu uh hi. Amate a tawntungin heena khuangaina taw kipeal in lungdam tawntung tu uh hi.

¹²Topa in, “Keima in nang hong thahatsak pa ka hi hi. Banghang lopa sangin ngei a nungta ngawl zaw a thi thei mihing kiita tu nu ziam?”

¹³Note hong piangsak, vantungte a phalkeak, leitung ii tawdap a pha Topa mangil zo nu ziam? No hong vawtsiate ii thin uukna le no hong siasak nuamte banghang note in kiita tawntungin om tu nu ziam? Amate thin uukna in note bangma hong law thei ngawl tu hi.

¹⁴Thongtaakte sia kisuatak pal tu hi; amate khansau in, nungta in an neak tu a kicing nei tu uh hi.

¹⁵“Keima in Topa na Pathian ka hi hi; tuipi saukeak in a tuihualte ka hawksak hi. Keima min sia Vaanglianbelpa Topa ahi hi!

¹⁶Keima in vantungte ka phalkeak a lei ii tawdap ka pha hi. Jerusalem tungah, ‘Nangin keima mihing na hi hi! Nang tungah thu kong hil zo a, ka khut taw nang kong dal hi,’ ka ci hi,” ci hi.

Jerusalem ii Thuakna A bona



¹⁷Jerusalem awng, khanglo in! Nangma le nangma kiphong in tho in! Topa ii a thin uukna taw hong piak daan piakna hai na dawn zo hi; na dawn suk zo a, nang hong hoisak vatut hi.

¹⁸Nang hong lampui tu kuama om ngawl a, na mite sung pan na khut pan nang hong kai tu kuama om ngawl hi.

¹⁹Nang tungah tuasiatna a thuapin hong tung zo hi; na ngam sia ngal in siasak zo a, na mite pukthi zo hi. No hong hesuak tu kuama om ngawl hi.

²⁰Lamkingh theampo ah na mite thazawm in puk uh a, amate sia savaipa thaang sungah sazuk awk taw kibang hi. Amate in Pathian ii thin uukna thuak zo uh hi.

²¹Zukham bangkeakin a hoi vatut ngimna a thuak no Jerusalem mite awng,

²²Topa na Pathian uh in no hong sungsia a tuaciang, “Ka thin uukna taw kong piak hai sia na khut sung pan ka la kik hi. No hong hoisak vatut zu sia na ne nawn buatu uh hi.

²³Tua hai sia, no hong vawtsiate, note lampi tungah hong lumsak a ninteak siicip bangin hong siikcipte tungah ka pia tu hi,” ci hi.

Isaiah 52

Pathian in Jerusalem Suatak tu

¹Jerusalem awng, thahat in a, lian kik in! Pathian ii a thiangtho khuapi awng, puan et hoi silh in! Pathian um ngawl mite na kongpите sungah tum kik ngei nawn ngawl tu uh hi.

²Jerusalem awng, nangma le nangma kisuaktasak in! Leivui sung pan thoto in a, kumpi tokhum tungah to in. A kiman Zion mite awng, no hong khiina thikkhaute suut vun!

³Vaanglianpipa Topa in a mihingte tungah, “Sal na tan lai un, no atu in sum hong kipiaksak ngawl hi; tuasia bangma in no hong kisuatak natu in bangma hong kipiaksak ngawl tu hi.



⁴Egypt ngam sungah ngamdang mite bangin a teang tu in na pai uh lai in, noma uk thu in na pai uh hi; ahitazong, Assyriate in zawthawk thu taw no hong la a, no atu in bangma hong pia ngawl hi.

⁵Tu in Babylon ah tuabangma in piang hi; note salin na om uh a, no atu in bangma hong kipia ngawl hi. No hong ukte kiphasak, kihisak in kei hong zawngsak tawntung uh hi.

⁶Khatvei ciangin note tungah thu hong sonpa keima Pathian ka hina thu na he tu uh hi,” ci hi.

⁷Mualte kantan in, thuphate, kilemna thute puak a hong pai kamtaipa ih mu tu sia lamdang lawlawm hi! Ama in ngalzawna thangsak a Zion tungah, “Na Pathian sia kumpi ahi hi!” ci hi.

⁸Khuapi a cingte au uh a, lungdam in au tek uh hi. Zion ah Topa hong heak kik sia amate in a mit tek taw mu thei uh hi.

⁹A kisia Jerusalem awng, lungdam in au vun! Topa in a khuapi suatak tu a, a mite heeneam tu hi.

¹⁰Topa in ama ii a thiangtho vaangletna zangh in, a mite ngum tu a, leitung theampo in mu tu uh hi.

¹¹Biakinn vanh a pua note theampo awng, Babylon nusia vun. A kikhaam vanhte thutha heak vun; a thiangtho in om vun a hi khuapi nusia vun.

¹²Tutung in hi bingbung in nusiak kul ngawl tu hi; suatak tu hanciam ngawl tu nu hi. Topa na Pathian in note lam hong pui tu a, na kiim na paam uh pan hong dal tu hi.

A thuak Naseampa

¹³Topa in, “Ka naseampa in ama ii nasepna zo tu a, ama sia nasia takin kipok tu hi.

¹⁴Mihing tam mama in ama a mu uh ciang lamdang sa uh hi; Ama sia mihing taw kibang ngawl za dongin a meal hem hi.



¹⁵Ahihang tu in minam tam mama in ama lamdang sa tu uh a, kumpite sia lamdang asakna taw uh in pau thei ngawl liang tu uh hi. A heak ngei ngawl thu pawlkhat amate in mu in tel tu uh hi,” ci hi.

Isaiah 53

¹Mihingte in, “Tu a ih thupuak akua in um thei tu ziam? Hi thu sungah Topa ii khut akua in mu thei tu ziam?

²Leingum sungah zung a tha thingkung no khat bangin ama ii naseampa a khanto sia Topa deina ahi hi. Ama ih et nop natu in a zatak huai a meal ip laak tu bangma om ngawl hi, ih thinbot natu bangma om ngawl hi.

³Ama ih zawngsak a, ih nial hi; ama in natna ngimna thuak hi. Ama sia kuama in en beak ngawlin— bangma in ih heang bua hi.

⁴“Ahihang ama in ei ih natna tu teng thuakin, ih ngimna tu teng pua hi. Tua kimlai in ama thuakna sia Pathian ii daan piak hi ci in ih ngaisun hi.

⁵Tuabang hi ngawlin eite khialna hangin ama in liamna thuak a, ih siatna hangin vuakna thuak ahi hi. Ama daan thuakna hangin eite ih dam a, ama vuak a thuakna hangin eite ih cidam hi.

⁶Eite ih vekpi in a mangthang tuute taw ih kibang a, eima santek ah ih pai hi. Ahihang eite theampo ii thuak tu a kilawm daan thuakna sia ama ii tungah Topa in suan hi.

⁷“Ama sia nasia tak kivawtsia a, ahihang ki niamkhiakna taw thuak hi; kam khat zongh huthe ngawl hi. Ngaw tu a a kipaipui tuuno khat bang le a mul meet tu a kipaipui tuu khat a haam ngawl bangin, ama in kam khat beak pau ngawl hi.

⁸Ama sia kiman in thina thuak tu in thu kikhen hi, ama tung a piang tu thu sia kuama in awlmawk ngawl hi. Ih mite ii khialnate hu in ama kithatlum hi.

⁹Ama in leilot thu son ngei ngawlin, khialna khat zongh vawt ngei ngawl hi napi, mi ngilote taw thaam sungah kisial khawmin, sumhaute taw kiphum khawm hi,” ci in zo uh hi.

¹⁰Topa in, “Hi bang a thuakna sia keima deina ahi hi; a thina in mawna maisak natu a biakpiakna ahi hi. Tua ahi ciang ama in a suan le a paalte mu tu hi; Ama a khan sau in, ama sung panin ka tupna tangtung tu hi.

¹¹Haksatna a thuak zawkciang ama in lungdamna nga kik tu hi. A thuakna a luithawthong ahi ngawl sia ama in he tu hi, Ama sia a thumaan keima naseampa hi a ka lungdam hi. Mihing tam mama taangin ama in daan piakna thuak tu a, ama hangin amate mawna ka maisak tu hi.

¹²Tua ahiciang ama sia milian le mi thahatte sungah upatna dinmun kipia tu hi. Ama in lungkim takin a nuntakna pia a, mihing pha ngawlte thuak bangin thuak hi. Ama in mimaw mikhial tam mamate ii luangin ding a, amate ii mawna khialna a kimaisak natu in thungetsak hi,” ci hi.

Isaiah 54

Topa ii Israel A Itna

¹Jerusalem awng, nang in tassel numei khat bang na hi zo a, ahihang tu in lungdam in la sa in na au thei hi. A pasal taw a omkhawm tawntung numei khat sangin tu in nang in ta tam na nei zaw tu hi.

²Na teenna puanbuk khan in; a khau sausak in khetphinte khen kip in!

³Na ngamkiim theampo ah na ngamngite na keak tu hi; tu laitak a minam dangte teenna ngam sia na mite in lua kik tu hi. Tu laitak a a kinusia khuapite sia mihing taw kidim kiksak tu hi.

⁴Lau heak in— na mai hong kimawlsak kik ngawl tu hi; hong kizawngsak ngawl tu hi. Na pasal nei tuung a na pasal tung a na thumaan ngawnate le, meingong khat bangin, thinkiam a na lunglen mama nate na mangil tu hi.

⁵Nangma hong bitphuapa in na pasal bang hong hi tu a— ama min sia Vaanglianbelpa Topa ahi hi. Israel te ii a thiangtho Pathian in nangma hong ngum tu a— ama in leitung buppi ukpa ahi hi.

⁶Israel awng, nang sia a pasal ii taisat thinngim mama in a om zimoi khat taw na kibang hi. Ahihang Topa in ama kungah nang hong sam kik a,

⁷“Tawmvei no sung nang kong nusia hi; itna lian taw kong pui kik tu hi.



⁸Ka thin uuk hangin tawmvei no sung kong nungngat a, ahihang a tawntungin nang kong itna kong lak tu hi,” hong ci hi. Nang hong ngum Topa in tuabangin ci hi.

⁹“Leitung ah tuipi liim kik nawn ngawl tu hi ci in Noah hun lai in kong kamciam hi. Na tungah hong thin uuk kik ngawl tu khi hi ci in tu in kong kamciam hi, nang kong tei buatu a daan kong pia buatu hi.

¹⁰Mualliante le mualnote a cimh ta zongin, nang kong itna bo ngei ngawlin, thinnop natu kong kamciam sia ka len tawntung tu hi,” hong ci hi. Nang hong it Topa in tuabang ci hi.

Mailam Jerusalem

¹¹Topa in, “Nang hong heeneam tu om ngawl, ngimna a thuak, a hu tu om ngawl khuapi, Jerusalem awng, na phungkawngte suangmanpha taw ka ciang kik tu hi.

¹²Na tusaangte suangmanpha san taw, na kongpite mei bang a taang suangmanpha taw, na kulh theampo a manpha suang taw ka vawt tu hi.

¹³“Keima mama in na mite ka hil tu a, nopsakna le thinnopna ka pia tu hi.

¹⁴Thutanna le thumaanna in na tha hong khosak tu hi. Zawthawk vawtna le launa, patauna taw na kipeal tu hi.

¹⁵Khat po in nang hong sim le, kei thukimna om ngawlin hong sim hi a; nang hong sim pawpo puk tu hi.

¹⁶“Pumzaapna meikhuk vawtin hiam a seek thikseek pa, ka bitphua hi. Ngual thalup natu in hiam te a zangh ngalkap pa zongh ka bitphua hi.

¹⁷Ahihang ngalhiam pha bel sia zongh in nang bangma hong law zo ngawl tu hi; nang hong mawsiatte theampo na nial thei tu hi. Ka naseamte ka panpui tu a, zawna ka pia tu hi,” ci hi. Topa in ci zo hi.

Isaiah 55

Pathian ii Piak Hesuakna



¹Topa in, “A dangko theampo awng, hong pai tavun— hi lai ah tui om hi! Hong pai tavun, no sum nei ngawlte awng— antang lei vun a ne vun! Hong pai tavun! zu le khuinoai lei vun— bangma manh piak kul ngawl hi!

²Banghangin ngilva dangva na ngawl po in sum zangh thawthong nu ziam? Banghang na thalaw sa sumte zangh napi ngilkial lalai nu ziam? Hong ngai tavun a, kong ci bangin seam vun, tua hile an lim bel na ne tu uh hi.

³“Tu in ngai vun, ka mite awng, ka kungah hong pai tavun! ka kungah hong pai tavun tua hile nuntakna na nga tu uh hi! Note taw kiciamna kho khat ka vawt tu a, David tungah ka kamciam sa thuphate kong pia tu hi.

⁴Keima in ama sia minamte lampui le a ukpa khat in ka koi a, ama tungtawn in mihonpate tungah ka vaangletna ka lak hi.

⁵Tu in note in ngamdang mite na sam tu uh hi; khatvei lai in amate in note hong he ngawl uh hi, ahihang tu in note taw kizom tu in hong zuan tu uh hi! Keima, Topa na Pathian, Israel te ii a thiangtho Pathian in, hi te theampo ka piangsak tu a, minthanna le upatna note kong pia tu hi,” ci hi.

⁶Topa hong nai laitakin ama kung zuan vun a, ama tungah thungen vun.

⁷Mi ngilote in amate ii nuntakna zia nusia taken a, a ngaisutna siate kheal taken. Topa ih Pathian kung amate in zuan taken; Topa in hong hesuak thei a, khialnate hong maisak papai hi.

⁸Topa in, “Ka ngaisutnate no a taw kibang ngawl a, ka paiziate no a taw kilamdang hi.

⁹Leitung panin vantungte a kikhualat za in, keima paizia le ka ngaisut ziate sia no ii paizia le na ngaisutna ziate taw kikhuala hi.

¹⁰“Ka kammal in leitung tuibuak tu a van pan hong taaksuk vuuk le nguautui taw kibang hi. Amate in ankungte khangtosakin neak tu an le ciin tu anciite piangsak hi.

¹¹Keima kam panin a pusuak kammal zongh tuabangma hi tu a— a hawm nguakin ka kungah hong heak kik ngawl tu a, sep tu a ka ngealna bangin tangtung a; ka sawl teng theampo seam tu hi.

¹²“Lungdamna taw Babylon na nusia tu uh hi; thinnopna taw khuapi pan hong kipaipui tu hi. Mualliante le mualnote in la sa tu uh a, thingkungte in lungdam in au tu uh hi.

¹³Tu laitak in lingte omna munah cypress kungte po tu hi; lingkungte luangin myrtle kungte poto tu hi. Tua in a tawntung a kho tu lim khat hi tu a, Keima Topa ii sep sate phaw kikna khat hi tu hi,” ci hi.

Isaiah 56

Pathian ii Mite sungah Minam Theampo Kihel tu

¹Topa in a mihingte tungah, “Khuangei ngawlin note hong ngum tu ka hikom, thumaan thutang seam vun.

²Sabbath tang tawntungin a zangh khial ngawl mite thupha ka pia tu hi. A sia bangma a ngamta ngawlte thupha ka pia tu hi,” ci hi.

³Pathian ii mite taw a kipawl sa ngamdang mi khat in, “Topa in kei sia ama ii mite taw Pathian hong biakhawmsak ngawl tu hi,” ci heak hen. A kinget sa pa khat in ta nei thei ngawl tu ahikom, Pathian ii mite sungah kihel thei ngawl tu khi hi ci in ngaisun ngei heak hen.

⁴Topain tuabang a ngaisun pa tungah, “Sabbath ni na tanna taw kei nong zatak vawt a, ka thuciamna sia thumaan tak lenin kei nong lungdamsak le,

⁵Ka Biakinn sung le ka mihingte sungah tanu tapa nei a na minthan tu sangin na min khuangei zaw kiciamtee tu hi. Nang hong kimangil ngei nawn ngawl tu hi,” ci hi.

⁶Topa in ama mihingte sungah a kihel, ama it in a na a seam, Sabbath ni tang a, ama ii thuciamna kip takin a len ngamdang mite tungah,

⁷“Biakna taw kisai a thiangtho ka mual ahi, Zion ah kong paipui tu a, ka thungetna inn sungah kong lungdamsak tu a, biakpiakna ka tau tungah nong



piak biakpiaknate kong saang tu hi. Ka Biakinn sia minam theampo atu in thungetna inn kici tu hi,” ci hi.

⁸Ngamdang a saltanna pan ama mihing Israel te inn ah a ciapui pa ahi Vaanglianpipa Topa in, amate taw kipawl tu in midangte kong paipui lai tu hi ci in kamciam pia zo hi.

Israel ii Lampuite Kipuavawk

⁹Topa in ngamdang minamte ngamsa bangin hong pai in ama mite netum tu in sawl hi.

¹⁰Ama in, “Ka mite kidop natu thupia tu in, a kingaisun lampuite theampo, a mit uh taw siat hi! Amate in bangma he ngawl hi. Amate in ngual a nak ngawl inn cing uite taw kibang a amate sia lulum in mang man uh hi. Amate in mumut ma nuamsa uh hi!

¹¹Amate sia a dei zaa nga ngei a kisa ngawl a duhop uite taw kibang uh hi. Hi lampuite in thu heakna bangma nei ngawl uh hi. Amate uk bang tekin ngamta in amate phattuanma tu tek zong uh hi.

¹²Hi zu khamte in, ‘Zu tawm la tawng i, ih dawn zawkza dawn tawng! Tuni sangin zing ciang nuam zaw kan tu hi!’ ci uh hi,” ci hi.

Isaiah 57

Israel te ii Milim Biakna sia Kipuavawk

¹Miphate thi a, kuama in tua thu tel ngawlin ngaisut zongin nei ngawl uh hi. Ahihang amate thi ciang, khuangai tuasiatna in amate bangma law thei ngawl hi.

²Ngamtatna pha a ngamtate in thina sungah thinnopna le tawlngakna mu uh hi.

³No mawneite awng, thu khenna thuk tu in hi munah hong pai tavun! Note in aisaante, nupa kiplangulte, le pumpi zuak numeite sangin na phazaw tuan bua uh hi.

⁴Note in akua ciammui zazan nu ziam? No leilot mite in akua selno nu ziam?



⁵Leitangh phasak tu milim pathiante ka bia uh hi ci in, biakna taw kisai a thiangtho thingkungte nuai ah numei le pa khialna na vawt uh hi. Luihui ah a om suang hawngte sungah na tate biakpiakna in na pia uh hi.

⁶Tua mun panin suangnealte la in pathiante bangin na bia uh hi. Biakpiakna in zu amate na buak uh a antang biakpiakna na puak uh hi. Hi bang teng theampo diksa tu in nong um uh ziam?

⁷A saang mualte tungah biakpiakna pia tu le numei le pa khialna vawt tu in na pai uh hi.

⁸Na innmai kongkha sung sangah pumngwak a om na milimte na koi uh hi. Noma in kei nong nusia uh hi; Note in na puante suutin noma taw lumkhawm tu a na cial na it uhte taw, na lupna zai tungah na lumkhawm uh hi. Tuabangin tua munah na pumpi deina uh na lung na kimsak uh hi.

⁹Note in paaknamtui le sathaute kinoai in Molech pathian bia tu in na pai uh hi. Biak tu pathiante zong tu in mun theampo, mithi khua ngangawn ah kamtaite na paisak uh hi.

¹⁰Milim pathian dangte na zonna uh in na toi uh a, ahizong na tawp thong ngei bua uh hi. A pumngwak a om na milimte uh in thahatna hong pia ci in ngaisun na hikom na tha zawm ngei bua hi.

¹¹Topa in, “Kei nong theam a kei nong makngil cip natu uh in note hong lausak tua pathiante sia akuate ziam? Khuangei hial ka thim om hithiat manin kei hong upat nawn ngawl nu ziam?”

¹²Na ngamtatna uh a maanin na ngaisun uh hi, ahihang na ngamtatna ka pholaak tu a, tuasia ciang na milimte in nang hong hu zo ngawl tu hi.

¹³Huna ngen a na au ciang, tua na milimte in nang hong ngum hen! Vuimut khat in amate seamkeak tu hi! Ahihang kei hong muangte sia tua leitangh tungah teang tu a ka Biakinn sungah kei hong bia tu uh hi,” ci hi.

Pathian ii Huna le Damsakna Kamciam

¹⁴Topa in, “Ka mite ka kungah hong heakkik taken. Amate lampi a nokkhaksak theampo khin vun! Lamzik vun a, a zak vahial thei tu koi vun!”



¹⁵“Keima in a saang le a thiangtho, a tawntung a nungta Pathian ka hi hi. Keima in a saang le a thiangtho na munah ka teang hi, ahihang mite ii hong muanna le lametna a nga kik thei natu in mawna kisiik kik a, a kiniamkhiak vadeam mite taw zongh in ka teangkawm hi.

¹⁶Keima in ka mihingte nuntakna ka pia a, amate mawsiat nawn ngawlin, amate tungah ka thin uuk ngei nawn ngawl tu hi.

¹⁷Amate ii mawna le duhopna hu in amate tungah ka thin uuk a, tua hu in amate daan pia in ka nusia hi. Ahihang amate a thin uh sah in a ngamtat ngei bangin ngamta veve uh hi.

¹⁸“Amate ngamtatnate ka mu zo hi, ahihang amate ka damsak tu hi. Amate lampui in hu in, a hee a kapte ka heeneam tu hi.

¹⁹A naina le a khuala na ah a om mihingte theampo tungah, thinnopna ka pia hi! Ka mihingte ka damsak tu hi.

²⁰Ahihang mi ngilote sia a tawlna ngei ngawl, a kilok tawntung a tuihual ii buan le nin a paipui tuipei taw kibang hi.

²¹Mawneite atu in thinmuanna om ngawl hi,” Topa in ci hi.

Isaiah 58

A maan An tanna

¹Topa in, “A nging theiza in au vun! Israel ka mite tungah a khialnate son vun!

²Amate in ni simin kei hong bia uh a, ka pai ziate heak tu le ka thukhamte zui tu sia ka lawp uh ci hi. Amate in kei hong biak sia nuamsa ahikom a maan thukham ka piak tu sia ka dei uh hi ci uh hi,” ci hi.

³Mihonpite in, “Topa in hong phawk ngei ngawl ahile eite in banghangin an tang tu hi ziam? Ama in hong awlmawk ngawl ahile banghangin eite in anne ngawlin om tu hi ziam?” ci in dongh uh hi. Topa in amate tungah, “A maan tak ci leang an na tan kawmin noma aituam phattuum natu na zong uh a, na naseamte na zawthawk vawt uh hi.

⁴Na an tanna in nang hong ngoltolsak a ngual taw kihau in hong kibuansak hi. Hi bang a an tannate taw nong thungetnate ngai tu in nong um uh ziam?

⁵An na tan ciang nangma le nangma ngim kipia na hi hi; lopate bangin na lu na kunsuk uh a na lup natu in khau-ip puan le vutte na pha uh hi. Tua sia an tang na ci uh sia ahi ziam? Tuasia taw lungkim tu in nong um uh ziam?

⁶“Kei dei an tanna sia hi bang ahi hi; zawthawk na thikkolte le a maan ngawl a kivawtna hakkolte suutin, zawthawk vawt a thuakte suataksakna ahi hi.

⁷Ngilkialte na an uh hawm vun a inn nei ngawl mizawngte atu in na inn uh hon vun. Puan silh tu a nei ngawl mite puan pia vun a, na bete na hu tu uh, nial heak vun.

⁸“Kong deisakna sia zingsang ni bangin na tungah hong taang tu a, na liamna mate dam pal tu hi. Note hong ngum tu in note taw kong omkhawm tawntung tu hi; keima in na kiim na paam theampo panin kong dal tu hi.

⁹Thu nong nget uh ciang, kong pia tu hi. Nong sam uh ciang kong zo tu hi. “Ngual zawthawk vawtna te ngual zawnsaknate theampo le kam sia paunate theampo na kheal uh le;

¹⁰ngilkialte an pia in, kitaangsapna a nei mite tungah a kitaangsapnate na pia uh le; na kiimkot uh a khuazing sia sun khuavak suak tu hi.

¹¹Tuaciang note lam kong pui tawntung tu a na phate taw kong lungkimsak tu hi. A cidam a thahat in kong koi tu hi. Tui tam a nga huan khat, a kang ngei ngawl ciktui khat taw na kibang tu uh hi.

¹²Taanglai pekin a siate na mite in sa kik tu a, phung kiciang a luite tungah dingsak kik tu uh hi. Note sia khua uumna pang sa kik a inn a sia sate a pua kik, mihingte hong kici tu hi,” ci hi.

Sabbath Tanna Thaman

¹³Topa in, “Sabbath sia thiangthosakin tua ni in noma meet natu bek zong ngawlin, ka ni thiangtho ni sia manh neisakin zakta in khualhaw ngawl, naseam ngawl, tua ni in kam mannung ngawl pau ngawlin na om uh le,



¹⁴keima na na sepna uh thaman in lungdamna na mu tu uh hi. Leitung mun theampo ah hong ki upat tu in kong vawt tu a, na taangpupi Jacob tungah ka piak leitangh sia lungdam nuamsa in na lua tu uh hi. Topa, Keima in ka son zo hi,” ci hi.

Isaiah 59

Kamsangpa in Mite ii Khialna Mawsiat

¹Topa sia note hong ngum tu in thaneam mama in, huna na ngetna aw za tu in nangong mama tu in ngaisun heak vun.

²Na khialnate uh hangin ama in hong za ngawl ahi hi. Pathian bia tu na kisin uh ciang Pathian taw hong khentan sia na khialnate uh ahi hi.

³Note in leilot thu sonna, thatang zawthawk suanna, le mihing thana taw na khial uh hi.

⁴Thukhen zum ah na kaa uh hangin note sang pan thumaanna na nei bua uh hi. Thu na zaw natu in leilot thu na suang uh hi. Ngualdang nat natu na tup uh bang na seam uh hi.

⁵⁻⁶A sia ngaisutna na nei uh sia ngu nei ngulpui khat ii tuite bang ahi hi. A tui khat sutham lete ngul khat pusuak hi! Ahihang na tup na sawmte in nang tungah phattuamna hong pia ngawl tu hi— tuate sia momkhau taw a kitak puante bangin a luithawthong hi tu hi.

⁷A sia vawt tu na tum tawntung uh a, tuasia vawt tu na ngakla thei mama uh hi. Khialna mawna nei ngawl mite thalup tu na haisaang ngei bua uh hi. Na paina pawpo uh a sia a lal in na nusia uh a,

⁸note omna po ah kuama thinmuang ngawl hi. Na sep theampo uh maan ngawl hi. Note in lamkoai khat na zui uh a, tua lampi a zuite kuama thin muang ngei ngawl tu hi.

Mihingte in A mawna Pualaak

⁹Mihingte in, “Ei hong zawthawk vawtte khut sung panin Pathian in banghangin hong ngum ngawl ziam ci thu tu in ih he hi. Ih pai natu eite in khuavak ih lam en hi, ahihang khuazing bekma om a,



¹⁰mittawte bangin ih zawt kawkoai hi. Eima in suntang takpi in, zan bang keak le, mithi khua khuazing sungah a om bang keakin, ih lutu hi.

¹¹Eite lauthawng in ih thin ngim hi. Zawthawk vawtna pan le ahi ngawlin hong kivawtna pan hong ngum tu in Pathian ih thangai a, ahihang bangma piang ngawl hi.

¹²“Topa awng, nang tungah kong khialna uh tam mama hi. Ka khialnate uh in kote hong mawsiat hi. Tuata a vekpi in ka he siat uh hi.

¹³Nang kong langpan uh a, hong nialin, kong zui bua uh hi. Midangte zawthawk vawtin nang kung pan lam ka pial uh hi. Ka ngaisutnate uh khial hi; ka thu son uhte leilot thu vive ahi hi.

¹⁴Thutang kihawlkeak a, thumaanna in hong neak thei ngawl hi. Thumaanna in mihon kikhopna sungah lutu a, thumaan thutanna in tua munah om natu mun nga zo ngawl hi.

¹⁵Thumaanna tawm leilam ahikom a sia a pial sia in vawtsiatna thuak hi,” ci uh hi.

Topa in A mite Suatak tu Kithoai

Topa in hi thu mu zo a, thutang om ngawl ahikom a lungkim ngawl hi.

¹⁶Zawthawk vawtna a thuak mite a hu tu in mihing khat beak zong om ngawl a mu ciang Topa in lamdang sa hi. Tua ahikom amate suatak tu le ngalzawna nga natu in ama in a thahatna zangh tu hi.

¹⁷Ama in thumaanna sia thik laktong puasilh bangin silh tu a ngupna vaangletna sia thik lukhu bangin khu tu hi. Ngimna a thuak mite luangin phulaakna le daan piakna, a pha ngawlte a pha vawt nopna thinsung sia, puan bangin silh tu hi.

¹⁸Ama in a ngalte sia a khuala na ngamah a teangte ngangawn daan pia tu hi.

¹⁹Ni suana pan nitumna dongah a teang mite theampo in ama le a vaangletna lian kiita tu uh hi. Ama in nguntui pawm bang le, vuipei bangin hong pai tu hi.



²⁰Topa in a mite tungah, “Keima in note hong dal tu le khialnate pan a kisiik kik note theampo ngum tu in, Jerusalem ah kong pai tu hi.

²¹Note taw thuciamna khat ka vawt hi: ka vaangletna le ka thuhilnate a tawntung atu in note kong pia zo a, tu pan kipan note in ka thu nong ni tu uh a, na tate le na suan na paalte in a tawntungin ka thu hong nit natu uh in na hil tu uh hi,” ci hi.

Isaiah 60

Jeruslaem ii Maisang Minthanna

¹Tho in, Jerusalem awng, ni bangin taang in; Topa minthanna sia na tungah taang hi!

²Minam dangte sia khuazing in tuamcip tu a, Ahihang Topa khuavak sia na tungah taang tu hi; Ama ompuina khuavak sia nang taw omkhawm tu hi.

³Minamte sia na khuavak kizuansak tu a, kumpite na zing nisuak thak kizuansak tu hi.

⁴Bang thu piang ziam na kiim na paam en in: Inn ah hong cia tu in na mite kikhawm uh hi! Na tapate uh mun khuala pan hong cia tu uh hi; Na tanute sia patangnote bangin kitoai tu hi.

⁵Hi thu mu in na lungdam tu hi; Na lungdam leilam in na liing liang tu hi. Minamte ii haunate nang kungah hong kipuak tu a, Tuipi ngal panin amate ii haunate hong pai tu hi.

⁶Midian le Ephah panin, kalaoh honpite hong pai tu hi. Amate sia Sheba panin hong pai tu a, Kham le ngim namtui hong paipui tu hi. Mihingte in Topa sep sa thuphate son tu uh hi!

⁷Kedar le Nebaiothte ii tuute theampo biakpiak na in nang kungah hong kipuak tu a, Topa lungkim natu in biaknatau tungah kipia tu hi. Topa in a Biakinn sia minthangsak seseam tu hi.

⁸Vakhute ngil a zuan bangin Meeikaai bangin hong pai hiithuut teambawte sia bang teambawte ahi ziam?

⁹Tua teambawte sia ngam khuala na pan hong pai hi a, Pathian ii mite inn ah hong ciapui ahi hi. Israel te ii a thiangtho Pathian minam theampo in a mite a zaktasak Topa min upat natu in, Amate in ngun le kham hong paipui uh hi.



¹⁰Topa in Jerusalem tungah, “Ngamdang mite in na luphungte ciang kik tu a, A kumpite in nangma na seam tu uh hi. Ka thin uukin nang daan kong pia a, Ahihang tu in ka maipha le kong hesuakna nang kong lak tu hi.

¹¹Minamte ii kumpite in amate ii haunate nang kungah hong paipui natu in, na kongpite sun le zan in kihong tu hi.

¹²Ahihang nangma na a seam ngawl minamte sia ki lalcipsak tu hi.

¹³“Ka Biakinn mealhoisak natu, ka khuapi minthansak natu, Lebanon taamthing sung panin a phabel thing ahi, taakthing, juniper le cypress te sia Nangma, Jerusalem khuasak kik natu in hong kipuak tu hi.

¹⁴Nang hong zawthawk vawt mite ii tapate hong pai tu a, Nangma hong zatakna lak tu in kun tu hi. Khatvei lai in nang hong zawngsak mite theampo sia na peang ah bokin hong bia tu uh hi. Amate in nang sia, ‘Topa ii khuapi,’ ‘Zion, Israel ii A thiangtho Pathian ii khuapi,’ hong ci tu uh hi.

¹⁵“Nang sia hong kinusia nawn ngawl, hong ki ensan nawn ngawl tu a, A kinusia khuapi le a ngamkhing khuapi na hi nawn buatu hi. Keima in nang sia a lian le a meal hoi in kong vawt tu a, A tawntung, a tawntungin lungdamna munin kong vawt tu hi.

¹⁶A nu in a tasen a kepcing bangma in minamte le kumpite in nang hong keam cing tu hi. Topa ahi Keima in nang kong ngum zo a, Israel ii a vaanglian Pathian in nang hong suataksakna thute na he tu hi.

¹⁷“Keima in, taungo luangin kham, thik le thing luangin Ngun le taungo, suang luangin thik kong puak tu hi. Nang hong ukte in nang hong zawthawk vawt nawn ngawl tu hi; Thumaanna le kilemna taw amate in kong uksak tu hi.

¹⁸Thazaw suangin kizawthawkna awte kiza nawn ngawl tu hi; Suksiatna in na ngam hong siasak kik nawn ngawl tu hi. Luphung khat bangin nang kong dal, kong cing, kong pau tu hi; Nang hong ngum zo ka hikom nong pok tu hi.

¹⁹Sun hunin ni in na khuavak hi nawn ngawl tu a, Zan hunin tha zongh na khuavak hi nawn ngawl tu hi; Keima Topa sia a tawntung na khuavak ka hi tu hi; Ka minthanna khuavak sia nang tungah taang tu hi.



²⁰Na he na khuangaina nite bo tu hi. Keima Topa sia a tawntung na khuavak ka hi tu a, ni le tha sangin kho zaw tu hi.

²¹Na mite theampo in a maan seam tu a A tawntungin tua ngam lua tu hi. Mihing theampo tungah ka letna lak tu in amate ka phut a, ka vawt hi.

²²Na minam sung pan a no bel le a ki niamkhiak bel Innkuan ngangawn zongh a thahat minam khat bangin lian tu hi. A hun cin ciang keima in hi thu thakhat thu in ka piangsak tu hi. Keima in Topa ka hi hi!” ci hi .

Isaiah 61

Tatkhiatna Lungdamna Thu

¹Vaanglianpisa Topa in a tha taw kei hong dim zo hi. Mizawngte tungah lungdamna thupha puak tu, Thin kitamthamte a damsak tu, A kimante suatak tu le Thong sungah a kikhumte suatak natu thupuak tu in Ama in kei hong teal zo a hong puak zo hi.

²Topa in a mite a ngupna tu hun le A ngalte a zaw tu hun hong theng zo hi ci sia Thangsak tu in kei hong sawl zo hi. A he a khuangaite theampo heeneam tu in ama in kei hong sawl zo a,

³Zion ah a om a khuangai mite tungah Thin ngimna luangin thinnopna, le lungdamna, Heena luangin pokna la khat puak tu in kei hong paisak hi. Amate sia Topa mama ii suan sa Thingkungte taw kibang tu uh hi. Amate theampo in a maan seam tu uh a, Pathian sia ama ii sepnate hu in kipok tu hi.

⁴Amate in khuangeipi ma a lal in a om khuapite sa kik tu uh hi.

⁵Ka mite awng, ngamdang mite in, na na seam tu uh hi. Amate in na tuu honte cing, Na lo uh tho in na sapit huante cing tu uh hi.

⁶Note sia Topa ii thiampite, Ih Pathian ii naseamte hong kici tu hi. Note in minamte haunate na nopsak pui tu uh a, Note in amate ii hauna sia noma hauna ahikomin Na kisak thei pui tu uh hi.



⁷Na maizumna uh le na min daina uh te bo tu hi. Note in noma ngamah na teang tu uh a, Na haunate uh a see ni in khangto in Na nopsakna uh le na lungdamna uh kip tawntung tu hi.

⁸Topa in, “Thutang ka dei a, kizawthawkna le khialna ka huatsa hi. Ka mite thaman thumaan takin ka pia tu a, Tawntung thuciamna khat amate taw ka vawt tu hi.

⁹Amate in minamte sungah minthang tu uh hi; Amate a mu theampo in keima ii thupha ka piak sa minam khat ahi hunlam he tu uh hi,” ci hi.

¹⁰Topa sepna hangin Jerusalem lungdam hi. Jerusalem sia mothak khat pasal a nei ni in a kizeam bang ahi hi. Pathian in ama sia ngupna le ngalzawna taw tuam zo hi.

¹¹Anciite po in a meento bang keak ma in Vaanglianpipa Topa in a mite ngum tu a, Minamte theampo in ama pok tu uh hi.

Isaiah 62

¹Jerusalem hanthawn tu in thu ka son tu hi; Ama a kingup mateng le, Ama ii ngal zawna in zan a meisip khat det bang a taan mateng ka thim om buatu hi.

²Jerusalem awng, minamte theampo in na ngalzawna hong mu tu uh hi! A kumpite theampo in na minthanna mu tu uh hi . Nang sia Topa ama vateak ii hong phua min thak khat taw hong kism tu hi.

³Nangma in Topa atu a hoi kumpi lukhu khat taw na kibang tu hi.

⁴Nang sia, “A kinusia” hong kinaa nawn ngawl tu a, Na ngam sia, “A kinusia Zi” kici nawn ngawl tu hi. Na min thak sia, “Pathian sia Ama taw Lungdam hi,” kici tu hi. Na ngam sia, “Lungdam takin Kitenpui” kici tu hi, Banghangziam cile Topa sia nangma taw lungkim in Topa sia na ngam atu in a pasal bang hi tu hi.



⁵Tangval khat in ngaknu thiangtho khat zi in a tenpui bangma Nang hong vawt Ama in nang hong tenpui tu hi. Zi neipa in a zi a diksak bangma in, Na Pathian in nangma dik hong sa tu hi.

⁶Jerusalem awng na luphungte tungah ngalvilte ka koi zo hi. Amate sia sun zong zan zong thimdide ngei ngawl tu hi. Amate in Topa thuciamna sia Topa phawksak tu a, mangilsak ngei ngawl tu hi.

⁷Topa in Jerusalem khua a puaphat kik mateng le, Leitung theampo ii pok khuapi a suasak kik mateng, amate in Topa sia tawlngak hun pia ngawl tu hi.

⁸Topa in a ciliap huai kiciamna khat vawt zo a, Ama vaangletna taw tua kiciamna tangtungsak tu hi: “Na antangte sia na ngalte an hi nawn ngawl tu a, Ngamdang mite in na zu ne nawn ngawl tu uh hi.

⁹Ahihang no an a ciingte le antang a late in An ne in, Topa na pok tu uh hi. No sapit kung ciingin a kaikhawmte in Ka Biakinn sungah zu na ne tu uh hi,” ci hi.

¹⁰Jerusalem mite awng, khuapi panin pusuak vun a Hong heak kik na mite atu in lam khat ziik vun! Lampi lian khat ziik vun; suangte heam vun! Mihingte heak thei tu in tepteena lim khat khai vun.

¹¹Topa in Leitung theampo ah thu a thansakna panin: “Topa sia no hong ngum tu in hong pai a, Ama ii suatak sa mite hong tonpui hi, ci thu Jerusalem mite tungah son vun,” ci hi.

¹²No sia, “Pathian ii A thiangtho Mite” “Topa Ngup sa Mite” hong kici tu hi. Jerusalem sia, “Pathian ii It Khuapi,” “Pathian ii Nusiat Ngawl Khuapi” kici tu hi.

Isaiah 63

Minamte tungah Topa ii Ngalzawna

¹“Edom ngam Bozrah khua pan hong pai hi sia pa akua ziam? Puansan silh in pha tak a kizeam, vaangletna le thahatna taw hong pai hi sia pa akua ziam?” Ngum tu in vaangletna a nei, ama ngal zawna thu thangsak tu in hong pai, Topa ahi hi.



²“Sapitzu vawt tu in sapit nga a cilpa taw ki bangin, bang hang in a puan tuabang keakin san ziam?”

³Topa in, “Keima in sapit ngate ka totcil bangin minamte ka tuancil zo a, kei hong hu tu in kuama hong pai ngawl hi. Thin uukin amate ka tuancil a, amate ii chi sia ka puan tung theampo ah baang zo hi.

⁴Ka mite ngup tu hun hong theng zo hi ci in ka khensat hi. A ngalte daan piak tu hun hi zo hi.

⁵Ka et ciang kei hong hu tu kuama a om ngawl hunlam mu in, lamdang ka sa hi. Ahihang ka thin uukna in keima hong thahatsak a, kei mama in ngal ka zo hi.

⁶Ka thin uukna taw in minamte theampo tuancil in ka sutham hi. Amate ii nuntakna chisan sia lei ah ka sung hi,” ci in zo hi.

Israel te tungah Topa ii Phatna

⁷Topa ii a kho itna thu ka son tu hi; Ei atu in ama sep sate theampo hangin ama ka pok hi. Ama ii hesuakna le tawntung itna hangin Israel mite ama in thupha tam mama pia zo hi.

⁸Topa in, “Amate in ka mite hi uh hi; kei hong theam ngawl tu uh hi,” ci hi. Tua ahikom Topa in amate sia

⁹amate ii thuakna theampo panin, ngum hi. Amate a ngum sia vantung lalang khat hi ngawl a, Topa ama mama ahi hi. A itna le a hesuakna taw amate suatak hi. Ama in a bo sa hun sungah amate keamcing tawntung hi,

¹⁰ahihang amate in Topa leedo in a thaa thiangtho khuangai sak hi. Tua hu in Topa sia amate ngal suakin amate do hi.

¹¹Ahizong amate in Topa naseampa Moses ii hun bo sate phawk kikin, “A mite ii lampuite tuipei panin a suatak Topa sia tu in koi sungah om ziam? Moses tungah a thaa a pia, Topa sia koi sungah om ziam?”

¹²⁻¹³Ama minthan tawntung natu in Moses tungtawnin a vaangletna taw na lian a seam pa, tuipei tuite khen a, tuithuk kantan in a mite a lampui



pa Topa koi sungah om ziam?” ci in dongh uh hi. Topa in paipui a, amate ngam siphu bangin a peang siina mun kho mama a, lutu ngei ngawl hi.

¹⁴Khuite leipha kuam sungah a ki paipui bangin Topa in a mite tawlngasak hi. Topa in a mihingte hi bangin lampui a ama min ki upatsak hi.

Hesuakna le Hu natu Thungetna

¹⁵Topa awng, a thiangtho le a minthang na teenna vantung panin, ko hong ensuk tan. Ko nong thin nopmawk belna sia koi sungah om ziam? Na vaangletna koi sungah om ziam? Nong itna le nong hesuakna koi sungah om ziam? Ko hong ngaingon heak in.

¹⁶Nangma in kote pa na hi hi. Ka taangpupi Abraham le Jacob te in ko hong phawk ngawl uh hi, ahihang Topa kote hong suatak tawntung pa nangma in kote pa na hi hi.

¹⁷Banghangin na lampi panin kote lam hong pialsak ni ziam? Banghangin nang kung pan lampial tu in ka thin uh sahsak ni ziam? Na na a seam mihingte atu le a tawntung nangma aa ahi mihingte na ngaisutna in hong heak kik tan.

¹⁸Na mi thiangthote ahi, kote sia, ka ngalte in tawmvei sungteng hong notkeak hi; amate in na biakna mun thiangtho sia tuancil hi.

¹⁹Nangma in kote hong ukpa ahi ngei ngawl bangkeak, kote in nangma mi ahi ngeingawl bang keakin nong vawt hi.

Isaiah 64

¹Banghangin vantung hongkeak in hong paisuk ngawl ni ziam? Mualte sia nang hong mu a, hong kiita in liing tu uh hi.

²Meisa khat tungah a kisuang tuiso bangin amate liing tu uh hi. Hong pai tan a na vaangletna na ngalte tungah lak in, minamte na mai ah liingsak in!

³Nong pai lai in kote muanmawk khol ngawl a lauhuai nate na vawt hun khat om hi; mualte in nang hong mu in, hong kiita in liing uh hi.



⁴Ama sungah lametna a nei mihingte atu in na a seam, nangma bang Pathian khat kuama in mu ngei ngawl a, za zongh za ngei ngawl uh hi.

⁵Na dei bangin nuntak tu a ciamtee te le thumaan na seam in a lungdamte na phatvawt hi. Ko tungah na thin uuk hi, ahizong kote in khialna ka vawt veve uh hi; na thin uuk mama hi kale zongin taanglai pan kipan kote in khialna ka vawt tan uh hi.

⁶Eite theampo ih khial siat zo hi. Ih ngamtatna a phabelte ngangawn puan nin taw kibang veve lai hi. Ih khialnate hangin vui ii letkeak thingtee vulte taw ih kibang hi.

⁷Thungen in nang kung hong zuan kuama om ngawl a, huna ngen tu in nang kung hong pai kuama om ngawl hi. Ka khialnate uh hangin nangma in ko kung pan kisealin nong nusia zo hi.

⁸Ahizong Topa awng, nangma in kote Pa na hi hi . Kote in tungman bang hi a, nang in beal seakpa bang na hi hi. Kote theampo nangma bitphua sa ka hi uh a,

⁹tua ahikom ko tungah hong thin uuk lei heak in a, ka khialnate uh taw ko hong khii top heak in. Kote sia nangma mihingte ka hi uh hi; kote hong hesuak tan.

¹⁰Na khuapi thiangthote sia senneal ngam khat bang ahi hi, Jerusalem sia kinusia in lalcip hi,

¹¹thiangtho in a et hoi, ka taangpupite ii nang hong pokna mun ahi ka Biakinn uh sia, mei in kaangtum zo hi. Kote ii nop kasakna mun theampo lal siat zo hi.

¹²Topa awng, hi thute theampo phamaw sa tuan ngawl ni ziam? Nangma la bangma tungh ngawlin kote ka thuak zawk ngawl tu za dongin ngim hong thuaksak tu ni ziam?

Isaiah 65

Ngalphuangte tungah Pathian ii Daan piakna



¹Topa in, “Keima in ka mihingte ii thu ngetnate zo tu in a kinging sa in om napi, amate in thu ngen ngawl uh hi. Amate ii hong mu thei tu in om napi, amate in hong zong beak bua uh hi. ‘Hi lai ah om khi hi; hong hu tu khi hi!’ ci in a zo pai tu in om kinken napi, minamte in ka tungah thu hong ngen ngawl uh hi.

²Thin sah in a maan ngawl ngamta a amate uuk bang po a pai ka mite muak tu in a kinging sa in ka om tawntung hi.

³Amate maizum maw in ka thin hong uuksak tan lai hi. Biakna taw kisai a thiangtho huante ah amate in doai biakpiakna te vawtin doai biaknatau tungah ngim namtui hal uh hi.

⁴Zanin mithite ii thaa te tungah thu dongh tu in leihawng sung le thaan ah amate pai uh hi. Amate in voksa ne in doai biakpiakna in a nei sate huanna satuite hawp uh hi.

⁵Tuaciang amate in midangte tungah, ‘Ko kung hong neak heak vun; ko sia no ii thuthaak tu in thiangtho leilam khu hi!’ ci uh hi. Tuabang mihingte ka thuak zo bua hi— amate tungah ka thin uukna sia a mit ngei ngawl meikuang khat taw kibang hi.

⁶“Amate daan piak tu in ka khensat zo a, amate ii thuak tute lai sungah kiciamtee zo hi. Amate ii sep sate ka en thong buatu a,

⁷amate ii khialna le a taangpupite ii khialnate hangin amate in thuak tu hi. Amate in doaibiakna mual tungah paaknamtui hal in keima hong sonsia uh hi. Tua ahiciang amate ii ngamtatna sate taw kizui in amate a kilawm bangin daan ka pia tu hi,” ci hi.

⁸Topa in, “Sapit nga phate kuama in lalcipsak ngawl hi; amate in sapittui in vawt zaw uh hi. Ka mihingte a vekpi in ka lalcipsak buatu a— ka na a seamte ka ngum tu hi.

⁹Israel te sung panin Judah minamte thupha ka pia tu a, amate ii suan le paalte in ka mualtung ngam lua tu uh hi. Ka na a seam, ka tealsa mihingte tua ngamah teang tu uh hi.



¹⁰Amate in kei hong bia tu uh a, a tuute le a khuite sia a tatna tu mun ahi nitumna sangah a om Sharon Zaangtam le niswana sangah a om Ngimna Kuam sungah paipui tu uh hi.

¹¹“Ahihang kei hong nusia in, ka mual thiangtho Zion a awlmawk ngawl, kaamthu bek a suang milim pathiante ahi Gad le Meni a bia note atu in thu tuam hi tu hi.

¹²Note kong sap ciang nong zo bua uh a, kong paupui ciang nong ngai ngawl uh hu in, thi ngamh in na thi tu uh hi. Ka thu nit ngawl tu le a sia vawt tu na teal uh hi.

¹³Tua ahikom keima hong bia in ka thu hong nite in neak tu dawn tu hau tu uh a, ahihang note in ngilkial dangtaak in na om tu uh hi, ci in kong son hi. Amate lungdam tu a, ahihang note na mai uh mawl tu hi.

¹⁴Amate lungdamin la sa tu uh a, no na hi uh le thin tamtham in na kap tu uh hi.

¹⁵Ka teal sa mihingte in na min sia haamsiatna in zangh tu uh hi. Vaanglianpipa Topa Keima in nang kong thatlum tu hi. Ahitazong ka thu hong nite min thak khat ka phua tu hi.

¹⁶Leitung ah thupha piak tu a ngen pawpo in a thumaan Pathian ii thupha piak tu ngen tu uh hi. Kiciamna vawt pawpo in a thumaan Pathian min taw kiciam tu uh hi. A bo sa hunsung a ngimnate bo mang tu a kimangil tu hi,” ci hi.

Leithak le Vanthak

¹⁷Topa in, “Keima in leithak le vantung thakte ka vawt hi. Nungsang hun a thupiangte kimangil siat tu hi.

¹⁸Ka bitphua sa sungah lungdam thinnuam in om tawntung vun. Ka vawt sa Jerusalem khuathak sia thinnopna taw kidim tu a, a mite lungdam tu uh hi.

¹⁹Jerusalem le a mite hu in keima mama thinnopna taw ka kidim tu hi. Tua munah kaana, hu ki ngetna om ngawl tu hi.



²⁰Nausente a sen in thi nawn ngawlin, mihing theampo in amate nuntak hun ciam vaal khanghaam in nungta tu uh hi. Kum zakhat bang a nungtate khangmoi in ki ngaisun tu hi. Tuasia hun ma in a thite sia keima in amate daan ka piak limlakna khat hi tu hi.

²¹⁻²²Mihingte in inn sa tu uh a, tua sungah teang tu uh hi— tua innte sia kuama dang in zangh ngawl tu hi. Amate in sapit huan vawtin a sapittui ne tu uh hi— midang in neaksak ngawl tu hi. Thingkungte bangin, ka mihingte khansau in nungta tu uh hi. Amate ii sep sa nate amate ma in lungdam takin ne tu uh hi.

²³A nasepna maa pai tu a, a tate in tua siatna thuak ngawl tu uh hi. Keima in amate le a suan a paalte a tawntungin thupha ka pia tu hi.

²⁴Ka tungah thu hong ngetna a man ma ngangawn in a thungetnate ka zo tu hi.

²⁵Ngiate le tuunote an ne khawm tu hi; tawpите in khui anneak bangin, taangphaw ne tu a, ngulte sia kiitak huai nawn ngawl tu hi. Ka mual thiangtho, Zion tungah liamna baaina le siatna bangma om ngawl tu hi,” ci hi.

Isaiah 66

Topa in Minamte ii Thukhen

¹Topa in, “Vantung sia ka tokhum hi a, leitung sia ka peang ngakna ahi hi. Tua ahiciang a koibang inn le a koibang mun sia ka ten natu in sa thei tu nu ziam?

²Keima mama in vaannuai buppi ka bitphua hi! Kiniamkhiak in a kisiik kikte, kei hong kiita in ka thu hong nite dik ka sa hi.

³Mihingte sia a uuk bangpo in ngamta uh hi. Amate in biakpiakna in khuital khat ngo, ahibuale mihing khat biakpiakna in pia; tuuno khat taw bia, ahibuale ui khat ii ngawng thiaktan, antang biakpiakna pia, ahibuale vokte ii chi pia; ngim namtui pia ahibuale milim tungah thu nget sia amate atu in kibang siat hi. Amate in a kiihuai biaknate diksa uh hi.



⁴Tua ahikom amate tungah— amate ii kiitak tuasiatna te ka theng sak tu hi— banghangziam cile ka sap ciangin kuama in hong zo ngawl a, ka pau ciangin kuama in hong ngai ngawl uh hi. Amate in ka thu nit ngawl tu le a sia vawt tu ma teal zaw uh hi,” ci hi.

⁵Ama kiita in a thu a ni note in, Topa ci bang ngai vun; “Kei tungah nong thumaan hu in, na mihingte sung pan mama in pawlkhat in note hong ensan in bangma in hong heang ngawl tu hi. Amate in no hong selno in, ‘Lungdam takin na nuntak uh kong mu thei natu uh in, Topa in a letna hong lak hen a, hong ngum taken’ hong ci uh hi. Ahihang amate mama maimawl tu uh hi!

⁶Ngai vun! Khuapi sungah ngamlumna, Biakinn sungah aw nginna sia Topa ii a ngalte daan a piakna awnging ahi hi!

⁷“Ka khuapi thiangtho sia naungil tut natna a thuak ngei ngawl nau a suak pai nupi khat taw kibang hi.

⁸Tuabang thute akua in mu ngei a za ngei ziam? Ni khat thu in ngam khat piang ngei ziam? Ngam khat a pian ma in Zion in khua ngei thuak ngawl tu hi.

⁹Ka minamte nausua hun ciang keima in paipui a, tuaciang suaksak ngawl tu in hong ngaisun heak vun,” ci hi. Topa in son zo hi.

¹⁰Jerusalem taw lungdam khawm vun; ama atu in lungdam vun, hi khuapi a it note theampo awng! Tu in ama taw lungdam khawm vun, ama atu in a hee a kap note theampo awng!

¹¹Nausen in a nu noai tawpin nop asak bangin note in Jerusalem ii nopsaknate nuam na sa tu uh hi.

¹²Topa in, “Tawntung nopsakna kong pia tu hi; a kang ngeingawl nguntui bangin minamte ii haunate note tungah hong luang tu hi . Note sia a nu in omh in, a kaang tungah toai a itna taw a ou nausen khat taw na kibang tu uh hi.

¹³A nu in a tasen a heenep bangin, keima in Jerusalem khua sungah note kong heeneam tu hi.

¹⁴Hi thu a pian na mu uh ciang, na lung uh dam tu hi; note hong thahatsakin hong cidamsak tu hi . Tuasia ciang Topa Keima in, ka thu hong nite hu in, ka ngalte tungah ka thin uukna ka lakna thu na he tu uh hi,” ci hi.

¹⁵Topa sia meikuang taw hong pai tu hi. Ama in a thin uuk nate tungah daan pia tu in vuipi ii tha te tungah to tu hi.

¹⁶Ama in mawna nei hi ci in a mu leitung mihingte theampo mei le namsau taw daan pia tu a— tam mama kithatlum tu hi.

¹⁷Topa in, “Biakna taw kisai a thiangtho huan sungah kingual ngitngut in a paite, voksa, zunam sa le a dang a kiihuai ante ne in, doai biak natu in amate le amate a kithiansua mite ii a bo mang tu hun nai zo hi.

¹⁸Amate ii ngaisutna le a nasepnate ka he hi. Ngam theampo ii mite khawmtua tu in kong pai hi. Amate hong pai hon ciang, ka vaangletna in bang vawt thei cisia mu tu uh a,

¹⁹amate daan pia pa ka hi sia he tu uh hi. “Ahihang amate sung pan pawlkhat ka khe tu a ka minthanna, a za ngawl, ahibuale ka letna le ka thahatna a mu ngawl lai minamte le ngam khualate ahi, Spain, Libya le thalkap thiam Lydiate, Tubal le Greecete kungah ka puak tu hi. Amate in hi minamte sungah ka letna pualaak tu uh hi.

²⁰Amate in na ngam mipuite theampo sia hi ngamte pan keima atu letsong in hong paipui kik tu uh hi. Israel mite in biakpiakna antangte biakna taw kisai bung thiangtho sungah Biakinn ah hong paipui bangma in amate in na ngam mipuite sia siphu tung, laa tung, kalaoh tung le siphu ngalleangte le khui leangte tungah pua in ka mual thiangtho Jerusalem ah hong paipui tu uh hi.

²¹Keima in amate pawlkhat sia thiampite le Levite ka suaksak tu hi.

²²Leitung thak le vantung thakte in keima vaangletna taw kho tu ahi bangma in, na suan na paalte le na min kip in kho tu hi.

²³“Thadet Poai sim le Sabbath Ni simin minam theampo in kei hong bia tu in hi mun Jerusalem ah hong pai tu uh hi,” Topa in ci hi.



²⁴“A cia uh ciang amate in kei hong langpan mihingte ii luanghawmte mu tu uh hi. Amate a ne thanhte thi ngei ngawl tu a, amate kihalna meite kimit ngei ngawl tu hi. Amate sia minam theampo ii muna ah kiihuai tu uh hi,” ci hi.



Jeremiah

Jeremiah 1

¹Hi laibu sia Benjamin ngam sunga om Anathoth khua a thiampite khat ahi, Hilkiyah ii tapa Jeremiah ii thu sonte a kiteptee na ahi hi.

²Amon ii tapa Josiah sia Judah kumpi a sua zawk kum sawm le kum thum kum in Topa in Jeremiah paupui hi.

³Josiah ii tapa Jehoiakim kumpi a sua ciang Topa in Jeremiah paupui leleau hi. Tuasia zawkciang, Josiah ii tapa Zedekiah kumpi a sua zawk kum sawm le kum khat dong Topa in ama tam vei mama paupui hi. Tua kum a tha nga tha ciang Jerusalem mite ngamdang ah sal tang uh hi.

Jeremiah A kisapna

⁴Topa in kei tungah,

⁵“Nuntakna kong piak ma in kong teal zo a, na nu sung pan na sua ma in minamte tungah kamsang khat tu in kong teal hi,” hong ci hi.

⁶“Vaanglianpipa Topa awng, kei thuson thiam bong; moi lei lai ing,” ci in ka zokik hi.

⁷Ahihang Topa in kei tungah, “Kei ka moi lei hi ci heak in, kong sawl bangin mite kungah pai in, son tu a kong thupiak theampo amate tungah son siat in.

⁸Amate kiita heak in, banghangziam cile Keima in nangma hong dal tu in kong ompui tu hi, Topa ahi, Keima in kong ci zo hi!” hong ci hi.

⁹Tuaciang Topa in a khut hong thaakin, ka mukte hong tham a, tuaciang kei tungah, “Ngai in, na pau tu kammalte na kam sungah ka koi zo hi.

¹⁰Ngam theampo le kumpi theampote a longhkeak tu le a kaikeak tu, a susia tu le a lawnthal tu, a sa tu le a suan tu in thu neina tuni in nang kong pia hi” hong ci hi.

Mu kholna Nam nii

¹¹Topa in, “Jeremiah awng, bang na mu ziam?” ci in kei hong dongh hi. Keima in, “Almond thingbaak khat ka mu hi,” ci in ka zo kik hi.



¹²Topa in, “Maan ni hi, Kei zongh ka thusonte a tangtung tu ngak nginge khi hi,” ci hi.

¹³Tua zawkciang Topa in, “A dang bang na mu ziam?” ci in kei hong dongh leleau hi. Keima in, “Sak sangah tuibeal a so, hi sangah hong puk dektak khat ka mu hi,” ci in ka zokik hi.

¹⁴Topa in kei tungah, “Hi ngam sungah a teang mihingte theampo tungahsaksang panin tuiso bangin siatna hong theng tu hi,

¹⁵banghangziam cilesak sangah a teang minamte theampo hong pai tu in ka sam hi. Amate ii kumpite in a kumpi tokhumte uh sia Jerusalem kongpite ah ahizong, luphung kiimkot ah ahizong, Judah khuapi dangte ii kiimkot ah ahizong phut tu uh hi.

¹⁶Keima in ka mihingte daan ka pia tu hi. Banghangziam cile amate in khialna vawt zo uh hi; amate in kei hong nusia zo uh a, pathian dangte tungah biakpiakna pia in, milim vawtin bia uh hi.

¹⁷Kithoai in, Jeremiah awng; pai tan a son tu a kong sawl theampo amate son tan. Tu in amate kiita heak in, na kiita ahile amate taw na omkhop ciang kong kiitasak vaial tu hi.

¹⁸⁻¹⁹Ngai in, Jeremiah awng! Hi ngam sungah om mihing theampo— Judah kumpite, uliante, thiampite le mipite in nang hong langpan tu uh hi. Ahihang tuni in amate na nalh zawk natu in thahatna kong pia tu hi; nangma in kulh taw a ki uum khuapi khat bang, thik khuam khat bang le taungo luphung khat bang na hi tu hi. Amate in nang hong zo ngawl tu uh hi, banghangziam cile nang hong dal tu in kong ompui tu hi, Topa Keima in ka ci zo hi,” hong ci hi.

Jeremiah 2

Pathian ii Israel A khoina

¹Topa in Jerusalem khua sungah a om mihingte theampo tungah hi thu thangsak tu in kei hong sawl hi.



²“Na khangno lai in na thumaanna ih kiten sawng lai a kei nong itnate ka phawk hi; senneal ngam ah nong zui a, a kitho ngawl lai dui sungah kei nong zui hi.

³Israel awng, nang in keima aa bek na hi a; nangma in a thiangtho ka neisa na hi hi. Nang hong nasak mihingte theampo tungah tuasiatna le ngimna ka tungsak hi. Keima Topa in ka ci zo hi,” hong ci hi.

Israel ii taangpupite ii Mawna

⁴No Jacob ii suan le paalte, Israel minamte awng, Topa ii hong thuhilna ngai vun.

⁵Topa in, “Na taangpupite in kei tungah bang hong mawsiat ziam? Banghangin kei hong nusia ziam? Amate in a manh nei ngawl milimte bia in amate mama a manh nei ngawl suak uh hi.

⁶Keima in amate Egypt ngam pan suatak in: dui sung senneal ngam le dumkhuk sung, leiko sung le, kuama ten ngawl a lau huaina mun le kuama pai ngei ngawl na munah amate lampui hi napi ing amate in kei bangma in hong heang ngawl hi.

⁷Keima in amate thaw an le a dang a phate a neak natu in leiphana mun ka thetpui hi. Tua hi napi amate in ka ngam siasakin amate ka piaksa ngam ninsak uh hi.

⁸Thiampite in, ‘Topa koisung om ziam?’ ci in dongh ngawl uh hi. Keima ii thiampite mama in kei hong he ngawl uh hi. Ngam ukte in kei hong langpan uh a; kamsangte in Baal min suangin thuson uh a, tuaciang bangma kimanna a nei ngawl milimte bia uh hi.

Topa in A Mite Mawsiat

⁹“Tua ahikom Keima, Topa in ka mite ka mawsak tu hi. A suan le a paalte dongin thu ka vawt tu hi.

¹⁰Nitumna sang Cyprus tuikulh ah pai in, tuaciang pawlkhat nisuana sang Kedar ngamah paisak in. Ni dangin hi bang thu piang ngei ngawl cisia na mu tu hi.



¹¹Ngamdangte kuama in a pathian uh sia pathian tatak ahi ngawl hang a dang pathian taw theak ngei ngawl uh hi. Ahihang ka mite in amate min a thangsak Pathian Keima sia, amate atu bangma a vawtsak thei ngawl pathian taw hong theak zo uh hi.

¹²Tua ahikom Keima in vantung sia lau in, a liin natu le lamdang asak mama natu in thu ka pia hi,

¹³banghangziam cile ka mite in khialna nam nii vawt zo uh hi; amate in a thiangtho ciktui ahi, Keima hong nusia zo uh hi, tuaciang amate in tui a cing thei vet ngawl a kektham tuikhukte to uh hi.

Israel ii Thumaan ngawl na hu a A piang

¹⁴“Israel sia sal hi ngawl hi; sal nam in piang ngawl hi. Tua ahile bang hangin a ngalte in vai uh ziam?

¹⁵Amate in tawpi bangin ama hawk san uh hi; amate in ama ngam senneal ngam suaksak zo a, a khuapite lalcipsak zo a, kinusia cipsak zo hi.

¹⁶Hi hi, Memphis le Tahpanhes mite in ama lu ngu sutham zo uh hi.

¹⁷Israel awng, hi teng na tungah na thengsak hi! Nang lam kong pui laitakin nangma in Topa na Pathian ahi Keima nong nusia hi.

¹⁸Nile nguntui ne tu in Egypt ngamah na paina taw bang phatuamna nga tu na ki um ziam? Euphrates nguntui ne tu in Assyria ngamah na paina taw bang phattuumna nga tu na ki um ziam?

¹⁹Nangma siatna in nangma daan hong pia tu a, kei nong nung ngatna in nang hong puavawk tu hi. Topa na Pathian ahi Keima hong nusia a, kei tungah thumaan in na om nawn ngawl tu sia bangza ta in khaa in maan ngawl cisia na tel tu hi. Keima, Vaanglianpipa Topa Vaanglianbelpa in ka ci zo hi,” ci hi.

Israel in Topa Biak tu Nial

²⁰Vaanglianpipa Topa in, “Israel awng, nidang lai pekin ka thu nong nial a; nong bia bua hi. Numei paktatte bangin mualno saang theampo tung le thingkung hing theampo nuai ah ta nei theina pathiante na bia hi.



²¹A phabel thaici sung pan deiteal sapit ngui bangin nang kong suan zo hi. Ahihang bang suak zo ni ziam en in! A muatcip, kimanna nei ngawl sapit ngui taw na kibang hi.

²²Satpia phabel taw na sil zongin na mawna baang lai sia ka mu veve tu hi.

²³Bangbangin nangma le nangma na kininsak bua a, Baal ka bia ngei bua na ci thei tu ziam? Ngamkuam sungah khialna na vawt hi; na vawt sate en in. Nang sia a leetai kawkoai senneal ngamsung a zuan a huuk lai a kizual ngam ngawl kalaoh khat taw na kibang hi.

²⁴Kalaoh a huuk laitakin, akua in uk thei tu ziam? A talte a ngeam nuam pawpo in ngim kul ngawlin; a huuk hunin ama nga tawntung hi.

²⁵Israel awng, pathian dang ii nung na delna taw in na peang toisak nuam heak in a, na dangkosak nuam heak in. Ahihang nangma in, ‘Hi ngawl hi! hong heak kik ngawl tu khi hi. Keima in ngamdang pathiante ka it a amate nung ka zui tu hi,’ na ci hi,” ci hi.

Israel sia Daan piak tu Kilawm

²⁶Topa in, “Nguta khat a kimat ciang a mai a kizumsak bangma in, no Israel mite theampo na kumpite, na uliante, na thiampite le kamsangte na mai uh hong kizumsak tu hi.

²⁷Thingkung khat sia ka pa hi, suangtum khat sia ka nu hi a cite theampo na mai uh hong kizumsak tu hi. Keima kung hong zuan ngawl a hong taisan na hi uhkom hi thu piang tu hi. Ahihang ngimna na thuak uh ciang hong ngum tu in hong pai tan nong ci uh hi.

²⁸“Noma atu na vawt sa uh pathiante koi sungah om ziam? Ngimna na thuak uh ciang amate in hunsak ve vun— amate in hong hu thei ahile! Judah awng, khuapi na neiza ma in pathian tam mama na nei hi.

²⁹Na phunna uh sia a bang hi ka bel ziam? Banghangin kei hong langpan nu ziam?



³⁰Keima in no daan kong pia hi, ahihang bangma phatuam ngawl hi; keima in no hong hilsak nawn heak vun. Tawpi hangsan khat bangin, no in na kamsangte uh na thatlum zo uh hi.

³¹Israel mite awng, ka kampau hong ngai tavun. Kei in note atu in senneal ngam khat bang ka hi ngei ziam, khuazing le a lauhuai ngam khat bang ka hi ngei ziam? Tua ahile, banghangin, ka uk bang po in ka ngamta tu uh a, nang kung kong zuan ngei nawn buatu uh hi na ci thei uh ziam?

³²Ngaknu khat in a kizepnate, ahibuale, mothak khat in a kiteenna a, a silh mopuante mangil thei ziam? Ahihang ka mite in a kisim zo ngawl ni tam mama sung hong mangil zo uh hi.

³³Lawm zonna zia na thiam mama uh hi. Numei a sia bel zongh in no kung panin hong sin thei hi.

³⁴Na puante uh sia innphuulte ii chisan baang ngawlin, mizawngte le mawna nei ngawlte ii chisan baang hi. “Ahihang, hi bang teng hi napi,

³⁵nang in, ‘Kei in mawna ka nei bua hi; ka tungah Topa thin uuk nawn ngawl takpi hi’ na ci hi. Ahihang Keima, Topa in, mawna ka nei bua hi na ci hu in, daan kong pia tu hi.

³⁶Ngamdang mite ii pathian kung na zot hu in nangma le nangma na manh na kisuhsak zo hi. Assyriate in na thin hong kiamsak bang keak ma in, Egyptte in na thin hong kiamsak tu hi.

³⁷Nang in Egypt ngam panin maizumna taw na lu tungah khut nga sa in na heak kik tu hi. Topa ahi, Keima in, na muan mite ka nial zo hi; amate tung panin phattuumna bangma na nga buatu hi,” ci hi.

Jeremiah 3

A Thumaan ngawl Israel

¹Topa in, “Pasal khat in a zi khulin, a zi in a pasal nusia in pasal dang khat ii zi a suak a, ahile a pasal masa in ama tenpui kik thei ngawl tu hi. A tenpui kik ahile a ngam ninsak siat ahi hi. Ahihang, Israel awng, nang in lawm tam mama na nei zawkciang tu in ka kung nong zuan kik nuam hi!



²Mualdawnte ento in. Pumpi kizuak khat bang a na ngamtat ngawl na mun a om ziam? Arab mite in a suam tu mite ngam sungah a pan bangin nang in lam paam ah lawm na pang hi. Na pumpi kizuakna taw in ngam na ninsak zo hi.

³Tua hu in nguatui kangin, ngua nungte zongh zu ngawl hi. Numei paktat khat bangin maizum na nei bua hi.

⁴“Tu in kei tungah, ‘Nangma in ka pa na hi a, ka nolai pan kipan kei nong it zo hi.

⁵Kei tungah nong thin uuk tawntung buatu a; kei tungah na thin nong ngam tawntung buatu hi’ nong ci hi. Israel awng, tua in nangma ci hi a, ahihang a sia na vawt thei theampo na vawt hi” ci hi.

Israel le Judah Kisiik kik tu

⁶Josiah kumpi in a maan lai in, Topa in kei tungah, “A thumaan ngawl numei Israel ngamtatna na mu zo ziam? Ama in kei hong taisan zo a, mualsaang theampo tung le thingkung hing theampo nuai ah pumpi kizuak numei khat bangin ngamta zo hi.

⁷Ama in hi teng theampo a vawt siat zawkciang, kei kung hong zuan kik nanak tu in ka ngaisun hi. Ahihang ama hong heak kik ngawl a, ama ii suapui thumaan ngawl nu Judah in tuate theampo mu siat hi.

⁸Israel sia keima kung pan tai zo a, pumpi kizuak khat suak zo ahikom keima in ama khulin ka nawkeakna thu sia Judah zongh in mu hi. Ahihang Israel ii a thumaan ngawl suapui nu Judah sia lau ngawl hi. Ama zongh pumpi kizuak khat suak a,

⁹a maizum mama ngawl hi. Ama in ngam ninsakin, suangtum le thingkungte biakna taw in a pasal palngul in khialna vawt hi.

¹⁰Hi bang teng zawkciang Israel ii thumaan ngawl a suapui nu Judah in ka kungah heak kik tu in hong kinei theam a; thin tatak taw hi ngawl hi. Topa ahi, Keima in ka ci zo hi,” hong ci hi.



¹¹Tuaciang Topa in kei tungah, Israel sia ama kung pan tai zo ahitazong, a thumaan ngawl Judah sangin phazaw tuak lai hi, ci in hong son hi.

¹²Topa in kei tungah pai in Israel te tungah, “Thumaan ngawl Israel awng, ka kungah hong heak kik tan. Keima in hesuak thei pa ka hi a, ka thin uuk ngawl tu hi; nang tungah a tawntungin ka thin a uuk buatu hi.

¹³Na khialna le Topa na Pathian na langpan nate thiang takin pualaak in. Thingkung hing theampo ii nuai ah ngamdang pathiante taw na khial kawkoai nate le ka thu na nit ngawlnate pualaak in. Topa ahi Keima in ka ci zo hi.

¹⁴“Thumaan ngawl mite awng, hong heak kik tavun; keima neisa na hi uh hi. Khuapi sim panin khat tek le be le phung sim panin nii tek kong la tu a, Zion mual ah kong puak kik tu hi.

¹⁵Ka thu hong ni ngamukte kong pia tu a, amate in pilna le thiamna taw note hong uk tu uh hi.

¹⁶Tuaciang tua ngam sungah pungin mihing na tam zawk uh ciang, mihingte in ka Thuciamna Thingkuang ii thu son nawn ngawl tu uh hi. Amate in tua thu ngaisun nawn ngawl tu a, zongh phawk nawn ngawl tu uh hi; amate in kul zongh sa ngawl tu uh a, a dang khat zongh vawt tuan ngawl tu uh hi.

¹⁷Tua hun hong thet ciang, Jerusalem sia ‘Topa ii Kumpi Tokhum,’ kici tu a, ngam mi theampo tua munah keima bia tu in kikhawm tu uh hi. Amate in a thin puina le a thin siatnate ii sawlna bangin seam nawn ngawl tu uh hi.

¹⁸Israel mite sia Judah mite taw kipawl tu uh a, amate in a saltanna ngamsungsaksang pan paikhawm tekin, na taangpupite ii a tawntung a lua tu ka piak sa ngam ah cia kik tek tu uh hi,” hi bang ci in, ci a hong sawl hi.

Pathian Mite ii Milim Biakna

¹⁹Topa in, “Israel awng, nang sia ka tapa bangin kong saang nuam a, leitung theampo sung pan a phabel ngamnuam khat kong pia nuam hi. Kei sia pa nong nak tu le ka kung pan na tai kik nawn ngawl tu ka dei hi.



²⁰Ahihang a pasal a palngul a thu maan ngawl zi khat bangin kei tungah nong thumaan bua hi. Topa ahi, Keima in ka ci zo hi,” ci hi.

²¹Mualdawnte ah awnging khat kiza hi; tua in Israel mite kaana le tauna aw ahi hi; banghangziam cile amate nuntakna in khialna taw kidim ahi uh hang le Topa a Pathian uh a makngil hang ahi hi.

²²Topa kung pan a tai note theampo awng, heak kik tavun; ama in note hong damsak tu a, thumaan hong suaksak tu hi. Note in, “Hi hi; Ama in kote Pathian uh ahi manin kote Topakungah pai khu hi.

²³Mualdawn ah ka milim biakna uh in kote hong hu vet ngawl hi. Israel te atu huna in Topa ih Pathian kung pan bekin hong pai hi.

²⁴Ahihang a maizum huai milim pathian ahi Baal biakna in, ih tuu honte le khui honte, ih tapate le ih tanute— taanghlai pan kipan ih taangpupite ii a thalaw sa theampote hong sumsisak siat zo hi.

²⁵Eite in maizum in lum in ih maimawlina in eite sealsak ka tawng. Eima le ih taangpupite in Topa ih Pathian tungah ih khial tawntung zo hi; ama ii thupiakte ih ni ngei bua hi,” ci nu hi.

Jeremiah 4

Kisi kik natu Sapna

¹Topa in, “Irsael mite awng, heak kik na sawm uh le, ka kungah hong heak kik tavun. Ka ngaimawk milimte na vawk uh a, ka tungah nong thumaan uh le,

²ka min suang a na kiciam tu uh sia no atu in thumaan thutang hi tu hi. Tuasia ciang minam theampo in amate ii tungah thupha ka piak natu hong ngen tu uh a, amate in kei hong pok tu uh hi,” ci hi.

³Topa in Judah mite le Jerusalem khua mite tungah, “Na thaw ngawl lai uh lote tho vun; ling kawm sungah na anciite tu heak vun.

⁴No Judah mite le Jerusalem khua mite awng, na Topa ahi keima taw na vawt uh thuciamna sia keamcing vun a, ka tungah hong ki aap tavun.

Tuabangin na hi bua uh le, a siate na vawtna uh hu in ka thin uukna sia mei bangin kuang tu a, tua meikuang a mit tu kuama om ngawl tu hi,” ci hi.

Judah sia Ngal taw sim tu Kithawmvau

⁵Ngamsung theampo ah lemle tum vun! A nging le a kitel thiingin au vun! Judah mite le Jerusalem khua mite tungah a muanhuai khuapite ah a tai natu son vun.

⁶Zion paina lampi hil vun! Na suatak natu in tai vun! Haisaang heak vun! Topa insak sang panin tuasiatna le sukcipna lian hong puak hi.

⁷Tawpi khat in a bukna mun pan hong pai bangin, ngamte a siasak tu sia hong kuan zo hi. Judah susia tu in ama hong pai hi. Judah ngam khuapite a siacip in kinusia tu a, kuama teang ngawl tu hi.

⁸Tua ahiciang khau-ip puan silh in, kapin tau vun banghangziam cile Topa thin uukna sia Judah panin puapial ngawl lai hi.

⁹Topa in, “Tua ni ciang Kumpite le kumpi uliante a thin kiam tu uh hi; thiampite ingh dimdum tu uh a, kamsangte a dipkua tu uh hi,” ci hi.

¹⁰Tuasia ciang keima in, “Vaanglianpipa Topa awng, Jerusalem mite theam vawk zo ni hi! Kilemna om tu hi ci zo ni hi, ahihang amate ii longtawl ah namsau khat na tuuk nginge hi,” ka ci hi.

¹¹Vui a sa mama khat senneal ngam panin Jerusalem mite sangah hong va tu hi cina thu sia Jerusalem mite tungah a kison tu hun hong theng zo hi. Tua vui sia anvaaite a mut keak vui bang bek hi ngawl tu a—

¹²Topa ii sawlna taw a va vui sia tuasia sangin thahat zaw tu hi! A mite tungah thukhenna a pia sia Topa ama mama ahi hi.

Ngalte in Judah ngam Kiim uum

¹³En vun, meeite bangin ngalte hong pai hi. Amate ii ngal siphuleangte sia suumpei taw kibang a, a siphute sia muvanlaite sangin manlang zaw uh hi. Ei a bo hi zo hing! Ei a lal hi zo hing!



¹⁴Jerusalem awng, na thin sung panin ngitlona silh thiingin, tua hile nang hong kingum tu hi. Na thin sungah ngitlona thin bang tan vei ngaisun tu ni ziam?

¹⁵Dan khuapi le Ephraim mualnote tung pan hong pai kamtaite in thusiate zasak uh hi.

¹⁶A khuala ngam khat panin ngalte hong paina thu Jerusalem tungah son tu le minamte hilkhoh tu in amate hong pai uh hi. Hi ngalte in Judah ngamsung khuapite ausan tu uh a,

¹⁷mihingte lo hung bangin Jerusalem kiim uum tu uh hi, banghangziam cile a mite in Topa a langpan hang ahi hi, Topa in ci zo hi.

¹⁸Judah awng, na nuntakna zia le na nasepna sate in hi thu na tung hong then hi. Na mawna in hi thuakna piangsak a; tua in na lungtang hollet hi.

A mite atu Jeremiah ii A khuangaina

¹⁹Na nang ei! A natzia ka thuk zo bua hi! Ka lungtang! Ka lungtuk ngam vasat hi! Thim khipkhep in ka om thei bua hi; lemle aw le ngal simna aw ka za hi.

²⁰Siatna khat zawkciang khat hong theng a; ngam sung theampo kisia siat hi. Thakhat thu in ih bukthe ki siasak hi; a puankhaite kileam keak hi.

²¹Bangtan vei ngal kisim ka mu lai tu ziam? Bangtan vei lemle aw ka za lai tu ziam?

²²Topa in, “Ka mite mawmaw uh hi; amate in kei hong he ngawl uh hi. Amate sia patang mawmawte bang hi uh a; heak theina bangma nei ngawl uh hi. Amate sia siatna vawt thiam bek a, phatna vawt thei ngawl uh hi,” ci hi.

Hong theng tu Siatna Jeremiah ii Mu kholna

²³Leitung ka en a— tulin maai thong hi; vantung ka en a— khuavak om ngawl hi.

²⁴Mualliante ka en a— amate liing hi, mualnote a nung le a mai ah kivei hi.



²⁵Khua ka et le mihing kuama om ngawl a; vacimte ngangawn leang siat uh hi.

²⁶Lo ngam leipha teng senneal ngam suak zo a; Topa ii thin uuk mama na hu in a khuapite kisia cip hi.

²⁷(Topa in leitung buppi dui suak tu hi ci hi, a hihang siacip diipdeapsak ngawl tu hi.)

²⁸Leitung sia naangin mau tu a; Vantung sia khuazing tu hi. Topa ii son sa hi a, a thin kheal kik ngawl tu hi. Ama in a khensat sa hi a, kheal kik ngawl tu hi.

²⁹Siphu ngalkapte le thal toai ngalkapte ii aw a zaak uh ciang mihing theampo tai keak tu uh hi. Pawlkhat sia ngam tawngtol sungah tai tu a; a dangte ahi uhle suangtum kawm ah kaato tu uh hi. Khuapi theampo a hawm nguakin kinusia tu a, tua khuate sungah kuama teang kik ngawl tu hi.

³⁰Jerusalem awng, nang a lal sa na hi zo hi! Banghangin puansan silh ni ziam? Banghangin ngun le kham kizepnate awh in na maitang zeam ni ziam? Nangma le nangma a hoi a na kizep nate lui thawthong hi! Na lawmngaite in nang hong nial zo a nang hong that nuam hi.

³¹Numei khat nausuak tu a, a kap bang aw khat ka za hi, taciil a suak numei khat ii ciik-au taw kibang hi. Tua in Jerusalem ii hu sam liang a a kaana hi a, a khut zan in, “Kei a lal sa hi zo ing! Keima that tu in amate hong pai hi!” ci hi.

Jeremiah 5

Jerusalem ii Mawna

¹Jerusalem mite awng, lamdungte zui in tai vun! Na kiim na paam en vun! Khuadak vun! Vanh zuakna munte zong vun! A thumaan a ngamta le Pathian tungah thumaanna a zong mihing khat na mu thei uh ziam? Na mu thei uh ahile Topa in Jerusalem ii mawna maisak tu hi.

²Topa ka bia tu uh hi na ci uh hangin, na thin tatak uh taw na ci uh hi ngawl hi.



³Topa in thumaanna zong tatak hi. Ama in no hong saat hi, ahihang no in na awlmawk bua uh hi; ama in no hong hualcip hi, ahihang thuhilna na ngai tuan bua uh hi. Na thin uh pui in na khialna uh panin na kisiik kik bua uh hi.

⁴Tuasia ciang Keima in, “Hite sia hesuakhuai a bangma a he ngawlte bek hi. Amate in a mawmawt huai in ngamta uh hi; amate in a Pathian zia le he ngawl, Topa deina zongh he ngawl uh hi.

⁵Mihingte kungah vaangletna taw ka pai tu a, amate taw thu ka son tu hi. A tatakin ci leang amate in a Pathian a nget sia he a, Topa deina tel uh hi,” ci in ka ngaisun hi. Ahihang amate theampo in Topa ii thu neina nialin a thu ni nuam ngawl uh hi.

⁶Tua hu in dui tawngtol sung pan tawpите in amate petlum tu uh hi; senneal ngam pan ngia honte in amate semcip tu a, pawlbeamte in a khua sung ngeam kawkoai tu uh hi. Tua mihingte a pusuak uh le ki maltham tu hi, banghangziam cile a khialna uh tam mama a, Pathian taisan mun lei hi.

⁷Topa in, “Ka mite ii khialnate bang hangin maisak tu khi ziam? Amate in kei hong taisan in pathian maan ngawlte bia zo uh hi. ka mite sia a ngilva dong ka vaak a, ahihang amate in nupa kipalngul nate vawtin pumpi kizuakte taw a hun zangh uh hi.

⁸Amate sia a innpaamte ii zite lamnai siphu tal ngilva phitphet in a kivaak a lante bang ahi hi.

⁹Hi thute hangin amate daan pia ngawlin, hi bang minamte tungah phu la ngawl tu khi ziam?

¹⁰Ka mite ii sapit huante saattan tu in ngalte ka paisak tu hi, ahihang a vekpi in ka susiasak buatu hi. A baakte heu in ka sawl tu hi, banghangziam cile a baakte sia kei aa hi ngawl hi.

¹¹Israel mite le Judah mite in kei hong leeheak cip uh hi. Topa ahi, Keima in ka ci zo hi,” ci in dongh hi.

Topa in Israel Nial



¹²Topa ii mite in ama nial in, “Ama in bangma vawt takpi ngawl tu hi. Ih tungah haksatna hong theng ngawl tu hi; ngal ahizong kialpi ahizong ih thuak buatu hi,” ci uh hi.

¹³⁻¹⁴Kamsangte sia vui-ip bang hi lel uh a, Topa kung pan hong pai thu son tu bangma nei ngawl uh hi amate in ci uh hi. Vaanglianbelpa Topa Pathian in kei tungah, “Jeremiah awng, hi mihingte in tuabang thute son ahikom ka kammalte sia na kam sungah mei bangin ka kuang sak tu hi. Mihingte in thing bang hi tu a, tua mei in amate kaangtum tu hi, ” hong ci hi.

¹⁵Israel mihingte awng, ngam khuala pan no hong sim tu in Topain minam khat hong paipui hi. Tua minam sia a thahat le minam lui khat hi a, a kam na heak ngawl uh minam khat ahi hi.

¹⁶A thal toai mihingte sia kuama hesuak ngawlin mihing a that a thahat ngalkapte ahi uh hi.

¹⁷Amate in na lo an uhte le na inn an uhte ne tu uh a; na tapate le na tanute thatlum tu uh hi. Amate in na tuu honte le na khuite ngolum tu uh a, na sapit nguite le na thei kungte susia tu uh hi. Na muan mama uh kulh taw a ki uum khuapite a ngalkapte in susia tu uh hi.

¹⁸Topa in, “Ahihang tuasia hun ciang ngangawn zongin ka mite ka susia cip buatu hi.

¹⁹Hite theampo kei in bang hang vawt khi ziam ci in amate in hong dok ciang Jeremiah awng, amate in kei hong taisan a, a ngam sungah ngamdang pathiante ii na a sep bangma in, amate ii ngam ahi ngawl ngamsung khat ah ngamdang mite ii na seam tu uh hi, ci in amate son tan,” ci hi.

Pathian in A mite Kidop natu Thupia

²⁰Topa in, “Jacob ii suan le paalte le Judah mite tungah son in:

²¹Ngaisutna nei ngawl no mi mawmawte, mit nei napi a mu thei ngawlte, bil nei napi a za thei ngawlte awng, ngai vun.

²²Keima inTopa ka hi hi; banghang hong kiita ngawl nu ziam? Banghang ka mai ah liing ngawl nu ziam? Tuipi mongah tuipi dalna ngamngi tu in sen ka



koi a, tui ii kantan thei ngawl a tawntung tui dalna ngamngi ahi hi. Tuipi a kilok to hial zong kantan zo ngawl tu a; tuihualte a hawk ngawp zong phultan zo ngawl tu hi.

²³Ahihang no mihingte awng! Na thin uh pui in nong langpan uh hi; Kei nong pial uh a nong taisan uh hi.

²⁴Keima in a hun ciangin tuk ngua le khal ngua hong zusakin kumsim in anlaak hun hong pia hi napi ing kei zatak tu na ngaisun ngei bua uh hi.

²⁵Tua hu in, na khialnate uh in hi na pha na nga tu uhte hong khaktan hi.

²⁶“Mi ngilote ka mite ii sungah teang uh hi; Amate in vacimte man tu in thaang a sia mite bangin mihingte man tu in thaangsia in pang uh hi.

²⁷Savaipa khat in a bawm sungah a dimteak vacim a khum bangin amate in a sutol vanhte taw a inn dim uh hi. Tua ahikom amate sia thahat in hau a,

²⁸ankham in thau uh hi. Amate in ngitlona lam ah a pha bek ci bang he ngawl uh hi. Amate in tangate sia amate nga tu a kilawm bangin pia ngawl uh hi. A kinengcip te tungah thumaanna nei ngawl uh hi.

²⁹“Tua ahikom, Keima Topa in, hi thute hangin amate daan ka pia tu hi; hi minam tungah phu ka la tu hi.

³⁰A lauhuai le thin patauna thu khat ngam sungah piang zo hi:

³¹kamsangte in leilot thu bek son uh hi; thiampite in kamsangte thupiakna bangin uk uh a, ka mite in phamaw sa ngawl uh hi. Ahihang a tawpna hun a thet ciang amate in bang law tu uh ziam,” ci hi.

Jeremiah 6

Ngalte in Jerusalem Kiim Uum

¹Benjamin mite awng, na suatak natu uh in tai vun! Jerusalem khua panin ngel ku vun! Tekoa khua ah lemle tum vun a, Beth Haccherem khua ah heaksakna meikhu khusak vun. Tuasiatna le lalcipna sia saksang pan pai tu hong kipan hi.

²Zion khuapi et hoi hi, ahihang kiskusia tu hi;



³kumpite in a ngalkapte uh taw tua munah ngiaphual saat tu uh hi. Amate in khuapi kiimkot ah a bukthe uh sa in, a uuk na tek po ah ngiak tu uh hi.

⁴Amate in, “Jerusalem sim tu in kithoai vun! Kithoai vun! Sun laitakin ih sim tu hi!” ci tu uh hi. Ahihang amate ma in, “Hai lei zo hing, nitum dektak zo a, ih limte sau zo hi.

⁵Zan ciangin ih sim tu a; khuapi dal kulhte ih susia tu hi,” ci tu uh hi.

⁶Vaanglianbelpa Topa in Jerusalem uumci natu in thing kungte phukin leivum a vawt natu in hi kumpite thupia hi. Ama in, “Keima in hi khuapi daan ka pia tu hi, banghangziam cile hi khuapi in ngual zothaw lei hi,” ci hi.

⁷Tuikhuk in a tui a thiansak bangin, Jerusalem khua in a siatna thaksua hi. Khua sungah ngoltolna le suksiatna thu ka za a; ci natna le liamnate vive ka mu hi.

⁸Jerusalem mite awng, hi ngimnate sia na kidop natu uh hi taken, tua ahibuale no kong nusia tu hi; na khuapi sia kuama ii ten ngawl na mun senneal ngam ka suaksak tu hi,” ci hi.

Ngaltho nuam Israel

⁹Vaanglianbelpa Topa in keima tungah, “Israel sia sapit nga a kilo thiang sapit huan kol khat bangin kikol thiangsak tu hi. Tua ahikom hun omlai in mihing na suatak thei theampo suatak in,” hong ci hi.

¹⁰Keima in, “Amate ii tungah son in kidop natu thu ka pia hial zong akua in kei thuson hong ngai nuam thong tu ziam? Amate a thin uh pui a, na thu ngai nuam ngawl hi; son tu a, kei nong sawlte amate in nuisan bek hi.

¹¹Amate ii tungah na thin uukna sia keima sung zongh ah meisa bangin sa a, Topa awng, ka thuak zo nawn bua hi, ci in ka zo kik hi. Tuaciang Topa in, keima tungah, “Ka thin uuk nate lampi ah om patangte tung le tangvalte kikhopna munah buak in. Pasalte le zite kila tu a, a huai mama ngangawn zongh kikhe ngawl tu hi.

¹²A innte sia midangte kipia tu a, a lote le a zite uh sia tuabang ma in midangte kipia tu hi. Hi ngam mite daan ka pia tu hi.



¹³A kuama po, a lian a no in thumaan ngawlin sum zong uh hi; kamsangte le thiampite ngangawn zongh in mite theam uh hi.

¹⁴Ka mite ii liamna maate sia a huntham kok hi bek zam ci in amate in ngaisun uh hi. Pha siat ngawl napi, ‘Pha siat hi.’ amate in ci uh hi.

¹⁵Hi a kiihuai nate a sep uh komin amate a mai uh zum ziam? Hi ngawl hi. A mai uh zum dek ngawl hi; maizumna zia tu zongh he ngawl uh hi. Tua ahi ciang midangte a puk bangma in amate puk tu uh hi; amate daan ka piak ciang, amate bona hi tu hi. Keima Topa in ka ci zo hi,” hong ci hi.

Israel in Pathian ii Lampi Nial

¹⁶Topa in a mite tungah, “Lamkaa bom ah dingin khuadak vun. Tang lampite le a pha bel lam sia koisung ziam ci in dongh vun. Tuasia tawn vun, tua hile thinnuam in na om tu uh hi,” ci hi. Ahihang amate in, “Hi ngawl hi, tawn ngawl tu khu hi!” ci hi.

¹⁷Tuaciang kidop natu lemle tumna aw ngai tu in Topa in ngalvilte koi hi. Ahihang amate in, “Ngai ngawl tu khu hi!” ci uh hi.

¹⁸Tua ahikom Topa in, “Minam dangte awng, ngai vun, ka mite tungah bang thu piang tu ci sia he vun.

¹⁹Leitung awng, ngai vun! Amate in ka thuhil nate nial a, ka kammalte mang ngawl ahikom, amate ii sawm nate theampo taw kizui in daan piakna in hi mite tungah siatna ka tungsak hi.

²⁰Sheba ngam panin ngim namtui hong puak sia le a khuala ngam pan hel namtui hong puakte bangma ka awlmawk bua hi. Amate ii hong piakte ka saang buatu a; amate ii biakpiak nate in kei hong lungkimsak ngawl tu hi.

²¹Tua ahikom hi mite lutu in ka puksak tu hi. Pate le tapate thi tu uh a, tuasia bangma in innpaamte le lawm le ngualte thi tu uh hi,” ci hi.

Saksang pan Ngal in Sim

²²Topa in, “Saksang ngam khat panin mite hong pai uh a; a khuala na pan a thahat ngam lian khat in ngal sim tu in ki thathoai hi.



²³Amate in a thal le a namsaute toai uh a; ngilo in ngual hesuakna thin nei ngawl uh hi. Amate in a siphu tungah a to uh ciang, a husan uh sia tuipei tuihual bangin nging hi. Amate in Jerusalem sim tu in a kithoai sa in om uh hi.” ci hi.

²⁴Jerusalem mite in, “Tua thute ih za zo hi, tuaciang ih khutte zaw hi; thin ngimna in hong lencip in nau tun numei khat bangin na ih sa hi.

²⁵Ngam sungah ih pai ngam bua a lampi tung zongh ah ih vak ngam bua hi, banghangziam cile ih ngalte in hiam toai a, ih kiim ih paam theampo lauhuai siat hi, ” ci uh hi.

²⁶Topa in a mite tungah, “Khau-ip puan silh in vut sungah liik vun. Tapa khat a nei sun sia in a thi san bangin thitui taak vangul in kap vun, banghangziam cile no hong susia tu pa in thakhat thu in hong sim tu hi.

²⁷Jeremiah awng, thik na sit tu bangin, ka mihingte sit in a, amate bang taw kibang ziam cisia telthiang in.

²⁸Amate a vekpi in a thinpui ngaltho nuamte hi a, a thin uh sia taungo le thik bangin sak uh hi. Amate sia a sia in ngamta siat uh a, vak kawkoai in heltuana thu poai kawkoai uh hi.

²⁹Pummei sia nasia takin kuang ahihang thik eakseau sia tui ngawlin luang ngawl hi. Ka mite a thiantho natu sep suak lai tu sia lui thawthong hi, banghangziam cile a ngilo mite taanglai veve hi.

³⁰Amate sia a mannung ngawl ngun eak kici tu hi, banghangziam cile Keima Topa in amate ka nial zo hi,” ci hi.

Jeremiah 7

Biakinn sungah Jeremiah Thuhil

¹⁻³Topa in kei sia Judah mite ii biakna pia tu in a tumna Biakinn kongpi ah hong puak hi. Ama in tua munah ding tan a, Israel te ii Pathian, Vaanglianbelpa Topa ii amate tungah a son tu thute zasak tan: “Na nuntak zia uh le na ngamtatnate uh kikheal vun, tua hile hi munah kong teang suaksak tu hi.



⁴‘Ei suakta zo hing! Hisia sia Topaii Biakinn ahi hi, hisia sia Topa ii Biakinn ahi hi, hisia sia Topa ii Biakinn ahi hi!’ a ci ci uh tua theamna kammalte um nawn heak vun.

⁵“Na nuntak zia uh kikheal vun a, na nasep uhte tawlnge vun. Khat le khat a pha in kivawt vun.

⁶Ngamdang mite, tangate le meingongte zothaw nawn heak vun. Hi ngam sungah khialna nei ngawl mite that heak vun. Pathian dang bia nawn heak vun, banghangziam cile tua in noma hong lalsak tu hi.

⁷Na kikheal uh le, na taangpupite tungah a kum tawnin a lua tu ka piak sa hi ngam sungah kong teang suaksak tu hi.

⁸“En vun, leilot thute um nu hi.

⁹Note in nguta in, ngual thatin, nupa palngulna vawtin, leilot thu taw kiciam in, Baal tungah biak piaknate pia in, nidang a na heak ngei ngawl uh pathiante na bia uh hi.

¹⁰Ka huasaakte hite na vawt uh a, tua zawkciang ka Biakinn sung, Keima omna ah pai in dingin, ‘Ei suakta zo hing!’ na ci uh hi.

¹¹Ka Biakinn sia misuamte bukna in ngaisun nu ziam? Keima in na vawt uh te kong mu zo hi.

¹²Keima nong biak natu mun a, ka teal maksak phit ahi Shiloh ah pai tavun a, Israel ka mite ii khialnate hu in tua khua ii tungah bang vawt khi ziam, en tavun.

¹³Hi khialnate theampo na vawt siat zo uh a kong papau kong hihil hangin nong ngai bua uh hi. Kong sam ciang nong zo nuam bua uh hi.

¹⁴Tua ahikom, Shiloh tungah ka vawt bangin note ii muan ahi, Keima ii Biakinn tungah ka vawt tu hi. Na taangpupite uh le noma tungah kong piak sa hi munah Shiloh tungah ka vawt bang keak ma in ka vawt tu hi.



¹⁵Na bete uh ahi, Israel mihingte ka nawkeak bangma in kong mu thei ngawl na munah note kong notkeak tu hi. Keima, Topain ka ci zo hi,” hong ci hi.

Mihingte ii Thu Nit Ngawl na

¹⁶Topa in, “Jeremiah awng, hi mihingte atu in thungetsak heak in. Amate taangin kapin thungen heak in; kei tungah hesuak hong ngen heak in, banghangziam cile nong ngetna hong ngai ngawl tu khi hi.

¹⁷Amate in Judah ngam khuapite sung le Jerusalem khua lampite ah bang teng vawt ci sia mu ngawl ni ziam?

¹⁸Patangte in thing tomin, pasalte in meithut a, numeite in vantung kumpi nu a ci uh pathian nu atu in muh beang, muh em in om uh hi. Ka thin nat natu in, amate in pathian dangte tungah biakpiakna in zu buak si uh hi.

¹⁹Ahihang amate ii thin a nasak sia, keima ma ka hi ziam? Hi ngawl hi, amate le amate a ki nasak hi a, amate le amate maizum kipia ahi uh hi.

²⁰Tua ahikom Vaanglianpipa Topa Keima in, hi Biakinn tungah ka thin uuk mama na ka buak tu hi. Mihingte tung le nganhingte tungah a kibangin, thingkungte le ankungte tung ngangawn zongh ah a kibangin ka buak tu hi. Ka thin uukna sia kuama sukmit thei ngawl meikuang bang hi tu hi.

²¹“Ka mite awng, biak piakna pawl khat sia biaknatau tungah na haltum uh a, pawl khat sia ne thei tu nu hi. Ahihang Topa Keima in, a vekpi in ne thei nu hi kong ci hi.

²²Egypt ngam panin na taangpupite ka laak lai in meihal biakpiakna le a dang tuatuum biakpiakna taw kisai thupiakna ka nei bua hi.

²³Ahihang keima in amate Pathian ka hi thei natu le amate sia keima ii mite ahi thei natu in ka thu a nit natu thu ka pia hi, tua hile keima in amate ii Pathian ka hi tu a, amate sia keima ii mite hi tu uh hi. Tuaciang ka thupiak bangin a nuntak thei natu in amate tungah ka son hi, tua hile amate a mailam vang tu uh hi.



²⁴Ahihang amate in ka thu ni ngawl uh a, nadon ngawl uh hi. A thinpui le a thin ngitlo nate ii sawl bang pawpo in amate seam zaw ahikom, amate phazaw ngawlin sia vaial zaw uh hi.

²⁵Na taangpupite Egypt ngam pan a pusua ni pan kipan tuni ciang dong ka naseam kamsangte kong puak tan viuveu hi.

²⁶Ahihang kuama in a thu ngai ngawlin nadon ngawl uh hi. Na taangpupite uh sangin na thin uh pui zaw in langpan kan zaw nu hi.

²⁷“Tua ahikom, Jeremiah awng, ka mite kungah hi thute theampo son tu ni hi, ahihang amate in na thu hong ngai ngawl tu uh hi; amate na sam tu hi, ahihang hong zo ngawl tu hi.

²⁸Amate Topa a Pathian ahi, Keima ii thu a mang ngawl minam hi a, kihil in daan a kipiak hang tel thei tuan ngawl uh hi ci in amate tungah son in. Thumaanna om nawn ngawl a, son zongh in kinei nawn ngawl hi.

Hinnom Kuam ah Khialna Vawtna

²⁹“Jerusalem mite awng, kap vun; Na sam uh at tan vun a, vawk vun. Mual dawnah mithi phumna la sa vun, banghangziam cile Keima Topa ka thin uuk a, ka mite ka nial zo hi.

³⁰“Judah mite in thusia khat vawt zo uh hi. Amate in ka huasaak a milimte ka Biakinn sungah koi in ka Biakinn ninsak uh hi.

³¹A tapate le a tanute mei sungah biakpiakna in a nei thei natu in Hinnom Kuam sungah Topheth kici, biaknatau khat amate in sa uh hi. Hi sia vawt tu in amate thu ka pia bua hi— hi thu ka thin sung zongh ah ka ngaisun tha ngei bua hi.

³²Tua ahikom, tua mun sia Topheth ahizongin Hinnom Kuam ahizong a kici nawn ngawl tu hun hong theng tu a, Kithana Kuam kici zaw tu hi. Mithi phum natu mundang om ngawl tu ahikom amate in tua munah mithite phum tu uh hi.

³³Mithi luangte sia vacimte le ngamsate ii an suak tu a, tuate a beng tu kuama om ngawl tu hi.



³⁴Tua ngam sia senneal ngam suak tu hi. Judah ngam khuapite sung le Jerusalem khua lampite tungah thinnopna le lungdamna awte le mopoai lungdamna awte ka bosak tu hi.

Jeremiah 8

¹“Tua hun ciang Judah ngam kumpite le uliante, thiampite, kamsangte le a dang Jerusalem ah a teang mihingte ii ngute a thaun sung pan kila keak tu hi.

²A ngute kikhawm tua a, kiphumsak tu ci thada, lei tungah eaklei bangin pheang om tu hi. Tuata sia a it uh, a na a sepsak uh, thu a dok uh le a biak uh ahi ni, tha le aksite mai ah kipho tu hi.

³Hi a ngilo minamte sung pan a nungta lai sun ka thethaangna munah a teang teng in a nuntak tu uh sangin thi nuam zaw tu uh hi. Kei Vaanglianbelpa Topa in ka ci zo hi,” ci hi.

Mawna le Daan piakna

⁴Topa in ama ii mihingte tungah hi bangin son tu in kei hong sawl hi, “Mihing khat a pu ciang, tho kik ngawl ziam? Mihing khat lam a khial ciang, heak kik ngawl ziam?”

⁵Tua ahile, ka mite awng, na milimte uh ma len lingleng in hong heak kik nawn ngawl a, banghangin kei kung pan lampial nu ziam?

⁶Pha tak ma in ka ngai hi, ahihang thumaan na son bua uh hi. Na ngitlona uh hu in khat zongh na khuangai bua uh hi. ‘Bang khialna vawt ka na khi ziam’ ci in khat zongh in na dongh bua uh hi. Siphu in ngal sim tu a tai bangin, a kuama po amate ii lampi tek ah a pai uh hi.

⁷Vakaangte ngangawn in heak kik tu hun he uh hi; vakhute, pialpate le vaphitte in mun dangah tai tu hun he uh hi,. Ahihang ka mite awng, no kong ukna thukhamte na he bua uh hi.

⁸Note in ko ka ciim uh a, na thukhamte ka he uh hi, bangbangin ci thei tu nu ziam? En vun, thumaan ngawl laithiamte in thukhamte kheal uh hi.

⁹Na mipilte uh mai zumin kikoi hi; amate lungmangin a ci a law he ngawl uh hi. Amate in ka kammalte nial uh hi; tu in amate in bang pilna nei uh ziam?



¹⁰Tua ahikom a lote lo nei thak te ka pia tu a, a zite pasal dang ka pia tu hi. A lian a no a vekpi in thumaan ngawlin sum vawt sawm uh hi. Kamsangte le thiampite ngangawn zongh in mihonte theam uh hi.

¹¹Ka mite ii liammate a huntham kok bang bek amate in sua uh hi. Pha siat ngawl napi in ‘Pha siat hi!’ amate in ci uh hi.

¹²Ka mite awng, hi a kiihuai nate na vawt uh manin na mai uh a zum ziam? Hi ngawl hi, na mai uh zum vet ngawl hi; maizum natu zia zongh na he bua uh hi! Tua ahikom midangte pu bangma in na puk tu uh hi; daan kong piak ciang, tua in na bona uh hi tu hi. KeimaTopa in ka ci zo hi.

¹³“Anlapa in a lo an a kaikhop bangma in, keima in ka mite ka kaikhawm nuam hi; ahihang amate sia a nga nga ngawl sapit ngui khat bang le, a nga nga ngawl theikung khat bang ahi hi; a teete ngangawn vul zo hi. Tua ahikom, hi ngam a la tu in minam dangte thu ka pia zo hi.”

¹⁴Pathian ii mihingte in dongh uh hi, “Banghangin to lalai hi ziam? Hong pai tavun, a muanhuai khuapi ah ih tai tu a tua munah ih thi tu hi. Ih Topa Pathian in ei sia a thi tu in hong see zo hi; ama in ih neak tu ngu hong pia zo hi, banghangziam cile eima in ama tungah ih khial zo hi .

¹⁵Kilemna le cidamna ih lamem hi, ahihang bangma kimanna om ngawl a; launa hong theng zaw pumsai hi.

¹⁶Dan khuapi sungah ih ngalte hong theng zo uh hi; A siphute ii a naak thin uh ih za hi. A siphute a haam uh ciang ngam buppi liing hi. Ih ngam le ih ngamsung a, a om na theampo, ih khuapi le khua mite theampo susia tu in ih ngalte hong pai zo uh hi.”

¹⁷Topa in, “Kidawm vun! No sungah a ngu nei le a kizual thei ngawl ngulte kong tha tu a, amate in no hong tu tu uh hi,” ci hi.

A Mite atu Jeremiah ii Khuangaina

¹⁸Ka khuangaina kidamsak thei ngawl hi; ka thin na mama hi.

¹⁹Ngai vun! Ngamsung mun theampo ah ka mite ii kaana aw ka za hi, “Zion khua ah Topa om nawn ngawl ziam? Zion ii kumpipa tua munah om nawn

ngawl ziam?” ci in kap uh hi. Amate ii kumpipa ahi, Topa in zokik a, “Banghangin na milimte biakna le a manh nei ngawl na ngamdang pathiante na paaina uh taw in kei hong thin uuksak nu ziam?” ci hi.

²⁰Mihingte in, “Khuakhal hun la bo zo in, an la kila siat zo a, ahihang ei la hong kingum ngawl lai hi,” ci in kap uh hi.

²¹Ka mite thuakna hangin ka thin na hi; thinkiam dikdek in ka kap hi.

²²Gilead ah zatui om ngawl ziam? tua munah zato thiamte om ngawl ziam? Tua ahile banghangin, ka mite kidamsak ngawl thong ziam?

Jeremiah 9

¹Ka lu sia tuikhuk hi hen a, ka mitte thitui ii naak hi le paw uk nang, tua hi thong le a kithatlum ka mite atu in a sun a zan in ka kap zo tu hi.

²Ka mite nusia in senneal ngam sungah om natu mun khat nei thei leng ka uk hi. Amate sia a thu maan ngawl siat, mihingte a leeheak hon khat hi uh hi.

³Amate sia leilot thu son tu in kinging tawntung uh hi, thumaanna taw sangin thumaan ngawl na taw ngam uk zaw uh hi. Topa in, “Ka mite in thusia khat zawkciang khat vawtin kei sia a Pathian bang zongh in hong sim bua uh hi,” ci hi.

⁴A kuama po in a lawmpa kidawm in a pawlpui kul tu hi, kuama in a suapuipa muang thei ngawl hi; banghangziam cile suapui theampo sia Jacob bangin ngual theam thei a, a kuama po in a lawmte sonsia hi.

⁵⁻⁶Amate theampo in a lawmte lam khialpui uh a, kuama in thumaan son ngawl hi; amate in a leeite uh leilot thei natu hil uh a khialna a vawt uh tawlna ngawl tu hi. Amate in siatna khat zawkciang khat vawt uh a; theamna taw a ngamtatna te khat zawk khat kizawm hi. A mite in ama nial hi Topa in ci hi.

⁷Tua ahikom Vaanglianbelpa Topa in, “Ka mite thik bangin em in ka thiangthosak tu a, ka sittel tu hi. Ka mite in a sia vawt zo a— amate bang law tuan thei tu khi ziam?”



⁸Amate ii leeite sia thi theina thaltangte bang hi uh a; leilot thu veu son uh hi. Misim in a innpaam sia tungah kam pha pau hi, ahihang thaang siana kam hi nginge hi.

⁹Hi thute hu in amate daan pia ngawl tu khi ziam? Hi bang minam khat tungah phu la ngawl tu khi ziam? Keima Topa in ka ci hi,” ci hi.

¹⁰Keima in, “Mualte atu in mau in, ngamsung lonona munte atu in ka kap tu hi. Banghangziam cile tuate kongaw a, kuama in kantan ngawl hi, ngannote aw kiza nawn ngawl hi; vacimte leang siat zo a, ngamsate tai siat zo hi,” ka ci hi.

¹¹Topa in, “Jerusalem khua sia nin kholna le, ngiate teenna mun ka suaksak tu hi; Judah ngam khuapite sia kuama ii ten nawn ngawl na senneal ngam suak tu hi,” ci hi.

¹²Keima in, “Topa awng hi ngam sia kuama a pai ngawl natu in banghangin kisia cip a senneal ngam bangin kongaw ziam? Akua in hi bang thute tel thei tu za in ciim tu ziam? Midangte tungah sonsawn thei tu in akua ii tungah na thiang son ziam?” ci in ka dongh hi.

¹³Topa in, “Ka mite in ka piak hilna taisan ahikom hi thu piang hi. Amate in ka thu hong mang ngawlin ka ci bangin ngamta ngawl uh hi.

¹⁴Tua kawmkaal ah, a thin uh pui in a taangpupite ii hil bangin Baal milimte bia uh hi.

¹⁵Tua ahikom, Vaanglianbelpa Topa Israel ii Pathian, Keima ii vawt tu sia ngai in: Ka mite neak tu in thingkung khate ka pia tu a, a dawn tu in ngutui ka pia tu hi.

¹⁶Amate ahizong a taangpupite ahizong ii a zaak ngei ngawl minamte sungah amate ka thethaang tu a, amate ka siatcipsak siat matengin amate do tu in ngalkapte ka puak tu hi,” ci in zo hi.

Jerusalem Mite in Huna Ngen

¹⁷Vaanglianbelpa Topa in, “Bang piang ziam ngaisun vun! A kapte hong pai natu in sam vun, mithi vuina late a sa numeite sam vun,” ci hi.



¹⁸Mi honpi in, “Ih mittangte thitui taw a kidim mateng le, ih mitmulte kaana taw a kawt mateng thivui la ei hong sak natu le hong manlang natu in amate son vun,” ci uh hi.

¹⁹Zion khua sung a kaana aw ngai vun; “Ih lalcip zo hi! Hong ki maizumsak mama zo hi! Ih innte hong suksiat cip sak zo ahikom ih ngam ih nusiat kul tu hi,” ci uh hi.

²⁰Keima in, “Topa thu ngai vun, no numeite awng, a kammalte thudon vun. Na tanute sia kaa dan tu hil vun a, na lawmte sia mithi vui lasak zia hil vun.

²¹Thina sia ih khelkite panin hong sungtang a, ih kumpi inn sung hong tum hi; Thina in lampite ah patangte le sumbukte ah tangvalte vaatlum hi.

²²Mithi luangte sia, lo sungah eaklei vum bang, anlata in taang at a, a nusiat bangin, kuama ii khop ngawl antang bangin, mun theampo ah ki thethaang kawkoai hi. Hi thu sia son tu a Topa ii kei hong sawl ahi hi,” ka ci hi.

²³Topa in, “Miciimte in amate ii ciimna, mi thahatte in amate ii thahatna, mihaute in amate ii haunate kiphatsakpui heak hen.

²⁴Mihing khat pawpo in a kiphasak nuam ahile, keima hong heakna le hong telna kiphatsak pui tahen; banghangziam cile ka itna in kipin kho a, thumaan le thutang ka seam hi. Hite sia ka thin hong nuamsakte ahi hi. Topa Keima in ka ci zo hi,” ci hi.

²⁵⁻²⁶Topa in, “A sam uh a tom in a meet Egypt, Judah, Edom, Ammon, Moab mite le senneal ngam a teang mite daan ka piak tu hun hong theng tu hi. Hi mite theampo a vun uh ki at hi napi, vun ki atna taw kisai zui tu thuciamna zui ngawl uh hi. Hi mite le, Israel mite kuama in ka thuciamna zui ngawl uh hi,” ci hi.

Jeremiah 10

Milim Biakna le Biakpiakna Maan

¹Israel mite awng, note hong paupuina Topa' kammal ngai vun.

²Ama in, “Minam dangte omzia zui heak vun; minam dangte in vantung a lim lamdangte kiita in lau hi kale note in ki awlmawksak heak vun.

³Hi mite ii biakna sia manh nei ngawl hi. Ngam sungah thingkung khat kiphuk in; tua sia khut thiampa in a hiamte taw sui in

⁴ngun le kham taw zeam hi. A puk ngawl natu in thikpim taw kilh hi.

⁵Tuabang milimte sia tangmai ciinna lo sungah vacimte lau natu in a kikhai milimte bang ahi hi, tua milimte pau thei ngawl a; lampai thei ngawl ahikom puak kul hi. Tuate kiita heak vun; Na siat natu uh bangma vawt thei ngawl a, na phat natu bangma vawt thei ngawl hi,” ci hi.

⁶Topa awng, nang taw a kibang kuama om ngawl hi; nang na thahat a, na min lian in vaang nei hi.

⁷Minam theampo ii kumpi nang sia, akua in upat ngawlin om tu ziam? Nang sia upat tu in na kilawm hi. Minamte ii mipil theampote sung pan hi kale amate ii kumpite sung pan hi kale nang bang kuama om ngawl hi.

⁸Amate sia a vekpi in ngoai in mawmaw uh hi. Thing taw kivawt milimte kung pan amate in bang sin thei tu ziam?!

⁹A milimte sia Spain ngam pan a piang ngun taw, Uphaz ngam pan a piang kham taw kituam a, khut thiamte ii vawt veu hi siat hi; tuate sia puantak thiamte ii a taa puan engdup le puan sandupte kisilhsak hi.

¹⁰Ahihang Topa, nangma in Pathian tatak na hi a, a nungta Pathian le tawntung kumpipa na hi hi. Na thin uuk ciangin leitung liing a; minamte in na thin uukna thuak zo ngawl uh hi.

¹¹(Leitung le vantung a vawt ngawl pathiante sia kisiacipsak tu hi ci in no mihingte in amate son tu nu hi. Amate sia leitung koima ma ah om nawn ngawl tu hi.)

Pathian Pokna La khat

¹²Topa in a vaangletna taw leitung vawt a; ciimna taw leitung bitphua in vantungte zalh hi.

¹³Ama ii thupiakna taw in vantung ah a om tuite hawk a; ama in leimong panin meeite hong paipui hi. Ama in nguatui sungah khua lengsakin a vanh kholna panin vuivasak hi.



¹⁴Hi thu a mu uh ciang, mihingte mawmaw in a thin a lung amh uh hi; milim vawtte in a milim uh hu in a mai uh zum law uh hi; banghangziam cile amate ii vawt pathiante sia maan ngawl a, nuntakna nei ngawl uh hi.

¹⁵Amate sia kimanna nei ngawlin ki zawngsak tu hi; Amate daan pia tu in Topa hong pai ciang amate kisia cip tu hi.

¹⁶Jacob ii Pathian sia amate bang hi ngawl hi; ama in na theampo a vawt pa hi a, ama in ama mi tatak tu in Israel mite teal zo hi. Ama min sia Vaanglianbelpa, Topa ahi hi,

Hong tung tu Saltanna

¹⁷Jerusalem mite awng, note sia ngal ii uumci mite na hi uh hi! Na neisate uh kaikhawm vun.

¹⁸Topa in hi ngam sung pan note hong lawnthal tu hi; Khat zongh kikhe ngawl dongin Topa in note hong hualcip tu hi. Topa in ci zo hi.

¹⁹Jerusalem mite hi bangin au hi, “Nasia takin ih liam hi! ih liam maate dam ngawl tu hi. Hite sia ih thuak zawk tu khat po hi vak ci in ih ngaisun hi!

²⁰Ih puan bukte kisia zo a; a sawmna khaute tattan zo hi. Ih tate uh la tai siat zo a; ih puan bukte hong saksak kik tu kuama om nawn ngawl hi; A kongkha puante uh a khaisak tu kuama om ngawl hi,” ci uh hi.

²¹Keima in, “Ih lampuite mawmaw a; lamlak tu in Topa thu dongh ngawl hi. Tuasia hu in amate a maa uh pai ngawlin, ih mite kithethaang hi.

²²Ngai vun! Thu khat hong theng zo hi! Saksang ngam khat sungah buaina lian khat om hi; a ngalkapte in Judah ngam khuapite sia ngiate teenna senneal ngam suaksak tu hi,” ci in ka zo hi.

²³Topa awng, kuama in ama ii maisang nuntakna uk thei ngawl ahi hunlam ka he hi; kuama in ama nuntakna zeak thei ngawl hi.

²⁴Topa awng, na mihingte hong hil tan, ahihang na thin uuk ciang a nasia lei in hong hil heak in a, daan hong pia heak in; nong pia le thi tu khu hi.



²⁵Na thin uukna sia nang hong bia ngawl minamte tung le nang hong nial mite tungah tungsak in. Amate in na mite that in, ko hong susia cipin ih ngam sia a sia sa in nusia uh hi.

Jeremiah 11

Jeremiah le Thuciamna

¹Topa in kei tungah,

²“Hi thuciamna thute ngai in. Judah mite le Jerusalem khua mite tungah

³hi thuciamna a ni ngawl misim ii tungah Israel ii Topa Pathian Keima in, haamsiatna ka tunsak sia son in.

⁴Hi thuciamna sia thikseakna pummei taw a kibang Egypt ngam pan amate ka paipui lai a, a taangpupite taw ka vawt uh thuciamna ahi hi. Ka thu hong nit natu le ka thu piak theampo vawt tu in amate ka son hi. Ka thu hong ni uhle, amate sia ka mite hi tu uh a Keima in amate Pathian ka hi tu hi ci in amate ka son hi.

⁵Tuabangin ahi uhle tu a amate ii neisa ngamhoi ngampha sia kong pia tu hi ci a, a taangpupite tungah ka vawt kamciam sia Keima in ka tangtungsak tu hi,” hong ci hi. Keima in, “Hi hi, Topa awng,” ka ci hi.

⁶Tuaciang Topa in keima tungah, “Judah ngam khuapite le Jerusalem khuasung lampite ah pai tan. Tua munah ka thu son keak tan a thuciamna thute ngai a, a zui natu in mihonpite tungah son tan.

⁷A taangpupite Egypt ngam pan ka paipui lai in, ka thu hong nit natu in amate nasia takin ka hil a, tuni dong ma in ka hihil lai hi.

⁸Ahihang amate in ka thu hong ngai ngawl uh a, hong ni ngawl uh hi. A vekpi in a ngei a ngei bangma in a thin uh pui in ngilo veve uh hi. Thuciamna a zui tu in thu ka pia zo hi, ahihang zui nuam ngawl uh hi. Tua ahikom thuciamna sungah a ki at daan a vekpi in amate tungah ka tungsak hi,” hong ci hi.

⁹Tuaciang Topa in kei tungah, “Judah mite le Jerusalem khua mite in Kei hong thasawm uh hi.



¹⁰Amate in ka thu hong nial, a taangpupite ii khialnate sang zuan kik uh hi; Amate in pathian dangte bia uh hi. Israel le Judah mite in a taangpupite uh taw ka vawt khop uh thuciamna paltan zo uh hi.

¹¹Tua ahikom tu in, Keima,Topa in amate tungah lalcipna ka tunsak tu le kuama a suatak ngawl natu a kidop natu in thu ka pia hi. Amate in huna ngenin kei kungah a kap liang uh zong ka ngai buatu hi.

¹²Tuasia ciang Judah mite le Jerusalem khua mite sia biakpiakna a piak uh a pathiante kungah pai tu uh a, huna ngenin kap tu uh hi. Ahihang tua pathiante in hi lalcipna hun a thet ciang amate ngum thei ngawl tu hi.

¹³Judah mite in khuapi a nei zaza ma milim pathian nei uh a, Jerusalem khua ah a teang mite in khuapi sungah om lampite za ma in a kiihuai Baal pathian biaknatau tam mama vawt uh hi.

¹⁴Jeremiah awng, hi mihingte taangin kei tungah thu hong ngen heak in a, hong pakaai heak in. Amate sia ngim nga in a hu tu in kei hong sap ciang amate ka ngai buatu hi,” hong ci hi.

¹⁵Topa in, “Ka it mihingte in a sia vawt uh hi. Ka Biakinn sungah bang thu nei thei nawn tu ziam? Amate in kamciam vawtna le sangaw biakpiakna taw in lalcipna khaam thei tu in ki um uh ziam? Tuasia ciang a lungdam tu uh ziam?

¹⁶Khatvei lai in amate sia a nga hoi nga thiam a, tee a hau olive kung khat taw ka santee hi; ahihang tu in, a teete mei taw halin a baakte ka thiaktan tu a vanto bangin nging tu hi.

¹⁷“Keima, Vaanglianbelpa Topa in Israel le Judah ka phut hi; ahihang tu in kong siasak tu hi ci in ka tawng hi. Hi siatna sia amate tungah amate ma in tungsak uh hi. Banghangziam cile amate in khialna vawt uh hi; Baal tungah biakpiakna a piak hu in amate in kei hong thin uuksak hi,” ci hi.

Jeremiah A Kithasawmna

¹⁸Ka ngalte ii kei hong thasawmna thu Topa in kei hong son hi.



¹⁹Thalup tu a a kipaipui mawna nei ngawl tuuno khat bang ka hi hi. Amate ii a pha ngawl a sawmnate keima hong siatsakna ahi hunlam ka he bua hi. “Thingkung a nga thiam laitakin phuk tan tawng; ama sia kuama ii a phaw nawn ngawl natu in thatlum tawng,” amate in ci uh hi.

²⁰Tuaciang keima in thungen in, “Vaanglianbelpa Topa awng, nangma in thutang a khen thukhen maang khat na hi hi; mihingte ii ngaisutna le thin sung na sittel hi. Na khut sungah ka thu kong aap zo hi; tua ahikom hi mihingte tungah phu na laakna hong musak tan,” ka ci hi.

²¹Anathoth mite in kei sia hong kithatlum le hong oai hi. Tuaciang amate in Topa ii thu na sason lai le kong thatlum tu uh hi hong ci uh hi.

²²Tuasia ciang Vaanglianbelpa, Topa in, “Amate daan ka pia tu hi! A tangvalte ngal sungah kithatlum tu a; a patangte sia ngilkial in pukthi tu uh hi.

²³Anathoth mite tungah tuasiatna ka tunsak tu hun ka khensat zo hi. Tuasia hun a thet ciang, kuama suakta ngawl tu uh hi,” ci hi.

Jeremiah 12

Jeremiah in Topa Thu dongh

¹Topa awng, nang taw thu ih kinial ciang, nang na maan zaw nak hi. Ahihang nang tungah thu maanna thu kong dongh tu hi, banghangin mi ngilote nuamsa ziam? Banghangin thu maan ngawl mite a tup uh tangtung ziam?

²Nangma in amate na suan a, amate in zung tha uh hi, amate khangto in a nga nga uh hi. Amate in a kam in nang hong pok tawntung uh hi, ahihang a thinsung tatak uh taw nang hong thusim ngawl uh hi.

³Ahihang, Topa awng, kei nong he a; ka nasepna le bang zata nang kong it zia na mu hi. Tuute ngaw tu a, a kikaikeak bangin hi mi ngilote kaikeak in; amate a kithalup tu hun dong keamcing in.

⁴Ih ngam sia bang tan vei kongaw tu a, lo theampo sungah lopate bang tan vei vul tu ziam? Nganhingte le vacimte thi dektak hi, banghangziam cile ih mite ii ngitlo hu ahi hi, ih mite in ‘Pathian in ih sep ih vawtte hong mu ngawl hi’ a ci uh hang ahi hi.” ci hi.



⁵Topa in, “Jeremiah awng, mihingte taw tai kidem a, toi na hi thong le, bangbangin siphu taw tai kidem thei thong tu ni ziam? leikolna munah na dingto thei bua zen le, Jordan ngun hui dui sungah bangbangin dingto thei thong tu ni ziam?

⁶Na suapuite le na innkuan puite ngangawn in nang hong leeheak zo hi; amate sia nang hong dote taw kipawl hi. Amate in kamthum taw hong paupui uh zong um heak in,” ci hi.

A Mite hangin Topa ii Khuangaina

⁷Topa in, “Israel ka nusia zo hi; ka teal sa minam ka nial zo hi. Ka it mihingte a ngalte khut sungah ka pia zo hi.

⁸Ka tealsa mite in kei hong langpan uh hi; dui sungah a om tawpi khat bangin amate in kei hong hawksan uh hi; tua ahikom amate ka ensan hi.

⁹Ka tealsa mite sia muthite ii a kiimkot pan a tuk siasua vacim khat taw kibang hi. Poai siim tu in ngamsate sam vun!

¹⁰Hong uk ngamdang mi tam mama in ka sapit huan siasak uh hi, amate in ka lote tuancilsak uh a; a dei huai ka leitangh senneal ngam suaksak uh hi.

¹¹Amate in ka ngam sia pawl suaksak uh a; ka mu tangin ngamkhing hi. Ngam buppi sia senneal ngam suaksak a, ahihang kuama in awlmawk ngawl hi.

¹²Senneal ngam mun saang na theampo kantan in hong sut tu in mihingte hong pai zo hi. Ngam buppi susia tu in ngal ka piangsak zo hi; kuama thin nuam thin muangin om thei ngawl hi.

¹³Ka mite in zungtaang ciing uh a, ahihang lopa hamh at uh hi; amate nasep hanciam mama ahi uh hang bangma nga ngawl uh hi. Ka thin a uk mama hu in a ante kisia hi,” ci hi.

Israel ii Innpaamte tungah Topa ii Kamciam

¹⁴Topa in, “Israel ka mite tungah ka piak sa ngam a siasak Israel ii ngam paamte thu taw kisai keima in son tu thu pawlkhat ka nei hi. Keima in tua mi ngilote sia thingkung khat a zung pan a kibot keak bangin amate ii ngam panin ka la keak tu a, amate kung pan Judah mite ka suatak tu hi.



¹⁵Ahihang amate ka laakkeak zawk ciang amate ka hesuak tu hi; a minam simin, amate ii leitangh tung le a ngam tek ah ka paipui kik tu hi.

¹⁶Amate in khatvei lai in ka mite Baal min taw kiciam tu in a hil bangma in, amate in a thin theampo uh taw ka mite ii biakna saang thei in, “Topa a nuntak bangma in’ ci in a kiciam uh le— amate zongh keima mi suak tu a, a maa uh vang tu uh hi.

¹⁷Ahihang minam khat pawpo in thu a mang bua ahile, tua minam sia ka botkeak tu a ka susiacip tu hi. Keima Topa in ka ci hi,” ci hi.

Jeremiah 13

Pat Puan Ngoaipuan Tom

¹Topa in pai in, pat puan ngoaipuan tom pawlkhat lei a, teangin hong sawl hi; ahizong tuikawtsak heak in hong ci hi.

²Tua ahikom tua ngoaipuan tomte lei in ka teang hi.

³Tuaciang Topa in kei hong paupui leleau a,

⁴“Euphrates ngun ah pai in, suanghawng khat sungah tua ngoaipuan tomte phual in,” hong ci hi.

⁵Tua ahikom ka pai a Euphrates ngun hui ah tua ngoaipuan tomte ka phual hi.

⁶Khuangei dingdeng zawkciang in Topa in Euphrates ngun ah pai kik tan a, ngoaipuan tomte la tan hong ci hi.

⁷Hong sawl bangin ka pai kik a, ka phualna mun ka thet ciang puante siacip zo a, a kizak thei nawn ngawl sia ka mu hi.

⁸Tuaciang Topa in kei hong paupui leleau hi. Ama in,

⁹“Judah mite ii kiphatsak na le Jerusalem mite ii kiphatsakna lian mama sia hi bangin ka siacipsak tu hi.

¹⁰Hi mi ngilote in ka thu hong mang nuam bua uh hi. Amate sia a ngei bangma in a thin uh pui in ngilo uh a, pathian dangte bia in a na seam uh hi.



Tua ahikom, amate sia a kizangh thei nawn ngawl, hi ngoaipuan tomte bang suak tu uh hi.

¹¹Ngoaipuan tomte in kawng ah a bel cinten bangma in Israel le Judah mite theampo in keima hong bel cinten tu ka dei hi. Hi bang a ka vawtna in amate sia ka mi a sua thei natu, hong pok thei in ka min a patak thei natu ka deina ahi hi; ahihang amate in ka thu hong ni nuam ngawl uh hi,” ci hi.

Sapit Thambeal

¹²Topa Pathian in keima tungah, “Jeremiah awng, sapit thambeal theampo zu kidimh tu hi, ci in Israel mite son in. Sapit thambeal theampo zu a kidip tu sia he khu hi ci in amate in hong zokik tu uh hi.

¹³Tuaciang Keima Topa in hi ngam sungah a om mihingte theampo: David ii suan le paal kumpite, thiampite, kamsangte le Jerusalem khua mite theampo zu a kham dong ka piak tu amate son in.

¹⁴Tuaciang a huai a khang a kibangin sapit thambeal khat le khat a kisukthap bangin amate ka sutham tu hi. Khuangai huaisakna, itna le hesuakna te in amate ka thatlum tu hong khaam thei ngawl tu hi,” hong ci hi.

Jeremiah in Kiphatsak ngawl natu Thupia

¹⁵Israel mite awng, Topa in son zo hi! Na thin uh neamsakin a thu ngai vun.

¹⁶Topa ii khua a zinsak ma mual liante tungah na lutu uh ma in; na lam et uh khuavak sia khuazing bikbek a suasak ma in, Topa na Pathian uh upat vun.

¹⁷Ka thu nong ngai bua uh le na kiphatsak na uh hangin ka kap ku tu a; thitui taakin nasia takin ka kap tu hi. banghangziam cile Topa ii mite sia saltang tu in kipaipui zo hi.

¹⁸Topa in kei tungah, “Kumpipa le a nu sia a kumpi tokhumte tung panin a tuaksuk natu in son in, banghangziam cile amate ii a pha mama a kumpi lukhute a lu tung uh panin a taaksuk hang ahi hi.

¹⁹Judah ngam thangsang khuapite sia ngalte in uumci zo a, a sungah kuama tum thei ngawl hi. Judah mite theampo a saltanna munah kipai pui siat zo hi,” hong ci hi.



²⁰Jerusalem awng, en vun! Na ngalte uh siasaksang pan hong paisuk uh hi! Nangma ii kep tu a hong kipia mihingte, na kiphatsak pui ahi na mite koi sungah om ziam?

²¹Na lawm na ngual in na ngaisut mihingte kekeak in nangma hong zo in hong uk ciang bang na ci tu ziam? Nausuak numei khat na asak bangin na sa in na om tu hi.

²²Banghangin, hi thute theampo na tungah hong piang ziam— banghangin na puante hong kileamkeaksakin, hong kibuan in hong kikhialpui ziam— ci in na dongh le na mawna a nasiat lei lawlawm hang ahi hi.

²³Mihing civom pa khat in a civom sia theak thei tu ziam, pawlbeam khat in a pawlna vawk thei tu ziam? A theak thei uh ahile siatna sim ngawl vawt dang a nei ngawl no zongh in a pha vawt tu sin thei tu nu hi.

²⁴Senneal ngam pan a hong va vui in taangphaw a muutkeak bangin Topa in note hong thethaang tu hi.

²⁵Hisia sia noma taw kisai in ama ii a vawt tu a, a khensat sa hi, Ama in ci hi. Banghangziam cile noma in ama na mangil zo uh a pathian maan ngawlte na muang zo uh hi.

²⁶Topa ama mama in note puante hong hawkeaksak tu a, na mai uh a zum tu in hong pholaak tu hi.

²⁷Ama ii a huasaak nate na vawt uh ama in mu zo hi. Pa khat in a innpaampa ii zi a ompui nop bang, ahibuale siphu tal lan khat ii siphu nu khat a zuzui bangin mualtung hi kale lo sung hi kale ah pathian dangte na zot uh sia ama in hong mu zo hi. Jerusalem mite awng, a lal hi zo nu hi! Bang hun ciangin thiangtho kik ngei thong tu nu ziam?

Jeremiah 14

Nasia tak Nguatui Hang

¹Nguatui hanna taw kisai in Topa in kei tungah,

²“Judah kap in om a; a khuapite bo mang dedek hi, a mite khuangai in lei ah bok uh a, Jerusalem khua mite in huna ngenin au uh hi.



³Sumhau mihingte in a naseamte uh tui toai tu in paisak uh a; amate tuikhuk ah a pai uh le, tui om ngawlin a bealhawm nguak taw heak kik uh hi. Thin kiam lungmangin, amate in a mai uh seal hi.

⁴Ngua zu ngawl ahikom leiko ngawp a, lothote thin kiamin, a mai uh seal hi.

⁵A neak tu lopa om ngawl ahikom ngam sungah sazukupui in a no suaktuung nusia hi.

⁶Ngam laate in mualno te dawn ah dingin ngam uite ii hudiik bangin hu diik vahut uh hi; a neak tu lopa om ngawl ahikom a mitte in khua mu thei ngawl uh hi.

⁷Ka mite in kei hong oksan in, ‘Ka khialnate uh in ko hong mawsak ahitazong, Topa awng, nong kamciam sa bangma in kote hong hu tan. Kote in nang kung pan tamvei ma ka tai zo uh a; nang tungah kong khial zo uh hi.

⁸Nangma bekma Israel ii lametna na hi a, nangma bekma in kote kisiatna pan hong ngum pa na hi hi. Banghangin ka ngam sung uh ah khualmi khat bangin om a; zan khat bek a taam khualhaw pa bangin om ni ziam?

⁹Banghangin muanmawk khol ngawl patauna nei mihing khat bangin, kuama a hu zo ngawl ngalkap khat bangin om ni ziam? Topa awng, a tatak in, nang in ko taw nong om khawm hi! Kote in na mite ka hi uh hi; hong nusia heak in’ hong ci uh hi,” hong ci hi.

¹⁰Hi mihingte taw kisai in Topa in, “Amate in kei kung pan tai nuam uh a, tuaciang amate le amate ki uk zo ngawl tu hi. Tua ahikom amate tungah ka lungkim ngawl hi. A pha ngawl a vawt nate ka ciamtee tu a, a khialnate uh hu in amate daan ka pia tu hi,” ci hi.

¹¹Topa in kei tungah, “Hi mihingte hu tu in kei tungah huna hong ngen heak in,

¹²Antang in huna hong ngen hial zonghin hong ngetnate ka ngai buatu hi; meihal biakpiakna le antang taw biakpiakna te hong piak uh hangin, amate ii tungah ka lungkim ngawl tu hi. Amate sia ngal sungah ahizong kialpi tunna taw ahizong, natna taw ahizong ka thatlum zaw sap tu hi,” hong ci hi.



¹³Tuaciang keima in, “Vaanglianpipa Topa awng, hi ngamah ngal kidona le kialpi tunna om ngawl tu hi, banghangziam cile nangma in ih ngam sungah kilemna bek om tu hi ci in hong kamciam zo ci in kamsangte in mipite tungah a son sia na he hi,” ka ci hi.

¹⁴Tua ahitazong Topa in zokik hi, “Tua kamsangte in keima min suangin leilot thu son uh hi. Amate ka sawl bua a, amate tungah thupiak ka nei bua a, amate kam khat beak zongh ka paupui bua hi. Amate ii a son mu kholna sia kei kung pan hi ngawl hi; mailam thu piang tu a son khol thute sia amate ngaisut phuatawm ki manna a nei ngawl thu ahi hi.

¹⁵Keima, Topa in ka sawl ngawl bulin ka minsuang in hi ngamah ngal kidona le kial tung ngawl tu hi ci a, a son kamsangte tungah bang law tu khi ziam ci thu no tungah kong son hi— ngal kidona le kialpi taw amate ka thatlum tu hi.

¹⁶Amate ii hi thute a sonna mihingte, hi bangma in kithatlum tu hi. A luangte sia Jerusalem khua lampi tungah kilawn thal tu a, a phum tu kuama om ngawl tu hi. Hi thu sia amate le a zite, a tapate le a tanute theampo tungah tung tu hi. Amate ii ngitlo na thaman amate in ka thuaksak tu hi.”

¹⁷Topa in ka khuangaina thute mipite tungah hi bangin son tu in kei hong sawl hi: “Sun zong zan zong ka thitui luang taken, tawp hun nei ngawlin kap ka tong, banghangziam cile ka mite nasia tatakin kiliamsak a, na sa uh hi.

¹⁸Lolai ah ka pai ciangin, ngal kisimna a, a kithat mithi luangte ka mu hi; khua sungah ka pai ciangin a pukthi mite ka mu hi. Kamsangte le thiampite in amate ii nasep tek seam ahi uh hang, amate in bang seam ci zongh he meal ngawl uh hi.”

Mipite in Topa tungah Maangkaa

¹⁹Topa awng, Judahte nialcip zo ni ziam? Zion mite ngaimaw ni ziam? Banghangin a dam zo nawn ngawl tuza dongin liamma hong thuaksak ni ziam? Thin nopna ka zong uh hi, ahihang phatna bangma hong tung bua hi, cidam tu ka lamem uh hi, ahihang launa bek hong tung zaw hi.



²⁰Topa awng, nang tungah kong khial zo uh hi; koma ii khialnate le ka taangpupite ii khialnate kong pualaak uh hi.

²¹Nong kamciamnate phawk in a, kote hong ngaimaw heak in; na minthanna tokhum omna mun Jerusalem mindaisak heak in. Ko taw na vawt thuciamna sia paltan heak in.

²²Minamte ii vawt milimte in ngua zusak thei ngawl hi; van in ama ii thu taw ngua zusak thei ngawl hi. Topa kote Pathian awng, hite theampo a vawt pa nangma na hikom nang sungah lametna kong nei uh hi.

Jeremiah 15

Judah Mite Thuak tu

¹Tuaciang Topa in kei tungah, “Moses le Samuel ngangawn hi munah dingin ka tungah hesuak hong ngen hial zongh in, hi mihingte tungah hesuakna ka nei tuan bua tu hi. Amate taisak vun; ka muna ah omsak heak vun.

²Koi sungah pai tu khu ziam ci in amate in nang hong dongh uh le, keima in hi bang ka ci sia amate son in: Pawlkhat sia natna taw thi tu in kisee a— tua mun sia amate pai natu mun ahi hi! A dangte sia ngal sungah thi tu in kisee a— tua mun sia amate pai natu mun ahi hi! Pawlkhat sia pukthi in thi tu in kisee a— tua mun sia amate pai natu mun ahi hi! A dangte sia saltang a kipaipui tu in kisee a— tua mun sia amate pai natu mun ahi hi!

³Keima, Topa in, a lau huai thu nam li amate tungah tung tu in ka khensat zo hi: Ngal sungah amate kithatlum tu hi; a luangte ui in kaikeak in; vacimte in ne tu a, a om laiteng ngamsate in ne tu hi.

⁴Hezekiah ii tapa Manasseh in Judah ngamah kumpi a sep laitak in Jerusalem khua ah a sia a vawt thute hangin leitung mite theampo ka liinglawngsak tu hi,” hong ci hi.

⁵Topa in, “Jerusalem mite awng, akua in no hong hesuak tu ziam, akua in no hong khuangai pui tu ziam? Na om zia uh hong dongh tu in akua in hong ngak zo tu ziam?

⁶Noma in kei nong nial zo uh a; nong nungngat zo uh hi, ka thin uukna iip zo ngawl ka hikom ka khut zalh in kong susia hi.

⁷Ngamsung khuasim ah taangphaw bangin vui sungah note kong lawn hi. Ka mite awng, note kong susia hi, Na ngitlo ngamatnate uh na kheal ngawl uh hang komin na tate uh ka thatlum hi.

⁸Tuipi hui ah sennealte sangin note ngam sungah meingong tam zaw hi. Na tangvalte uh a khansan laitakin ka that a, a nute in ka thuaksak hi. Thakhat thu in amate tungah thin ngimna le launa ka thengsak hi.

⁹A tapa salite ii a thi sat nupi nu sia satham vei in butthi in a hu samh hi, ama ii sun khuavak sia khuazing suak a, ama sia maimawl in a thin na hi. No sung pan a nungta laiteng na ngalte in kong thatlumsak tu hi. Keima, Topa in ka ci zo hi,” ci hi.

Jeremiah in Topa Mawsiat

¹⁰A lungdam ngawl pa sia keima ka hi hi! Banghangin ka nu in leitung ah kei hong hing ziam? Ngam sungah mihing theampo taw kihau in thu kinial tu ka hi thong hi. Sum ka pukthaak bua a sum ka pu bua hi; tua hi napi ngual theampo in kei hong haamsiat veve hi.

¹¹Topa awng, nangma ii na pha takin ka seam bua a, ka ngalte in ngim nga a haksatna thuakin, a omlai takin amate taangin nangma tungah hesuakna ka ngetsak bua ahile amate ii hong haamsiatnate theampo tangtung taken.

(¹²Kuama in thik thiaktan zo ngawl hi, Saksang pan hong pai taungo taw kihel thik sia kuama in thiaktan zo ngawl hi.)

¹³Topa in keima tungah, “Ngamsung theampo ah khialna a vawt hu in amate daan pia tu in ka mite ii nei le lamh sum le paaite laaksak tu in ngalte ka puak tu hi.

¹⁴A thu a la a heak ngei ngawl na ngamah a ngalte ii na ka seamsak tu hi, banghangziam cile ka thin uukna sia meikuang taw ki bangin a tawntungin kuang tu hi, ” hong ci hi.



¹⁵Tuasia ciang keima in, “Topa awng, he ni hi. Hong phawkin hong hu tan. Kei hong vawtsiate tungah phu hong lasak tan. Amate tungah na thin a uai le, amate ii kei hong thalup nop sia tangtung tu hi. Nangma hangin kei hong kiselno sia phawk in.

¹⁶Nangma in nong paupui a na kammal theampo kong ngai hi. Topa, Vaanglianbelpa, Pathian awng, keima in nangma aa ka hi a tua ahikom na kammalte in ka thin hong nuamsak a hong lungdamsak hi.

¹⁷Keima in midangte taw ciammui in nuamsa in ka hun ka zangh bua hi. Nong thupiak ka nitna in keima bek in ka om a thin uukna taw ka kidim hi.

¹⁸Banghang ngim thathuak lai khi ziam? Banghangin ka liammate kibawl thei ngawl ziam? Banghangin dam ngawl tu ziam? Khuakhal sung luitui kang bangin thin kiamsak tu hong sawm ni ziam?” ka ci hi.

¹⁹Hi thu taw kisai in Topa in, “Nong heak kik ahile kong la kik tu a, ka naseampa na suak kik tu hi. Thu mannung ngawl po na son sangin thupha thu tak nei na son le, ka kamsang na suak kik tu hi, Nangin mipite kungah pai kul ngawlin, amate in nang kung hong zuan zaw tu uh hi.

²⁰Hi mite tungah taungo ciitak taw a kivawt khua uumna dal taw kong kibang sak tu hi. Amate in nang hong sim uh hangin hong zo buatu hi. Nang hong dal tu le hong keamcing tu in nang taw kong om khawm tu hi.

²¹Mi ngilote le mi molngolte ii khut sung panin nang kong suatak tu hi. Keima, Topa in ka ci zo hi,” ci in zokik hi.

Jeremiah 16

Jeremiah ii Nuntak zia Topa Deisakna

¹Topa in hi bangin kei hong paupui leleau hi.

²“Hi bang munah zi nei heak in a ta la nei heak in.

³Hi munah a piang tate tung le a nu a pate ii tungah bang thupiayang tu cisia na tungah kong son tu hi.



⁴Amate a lauhuai natna taw in thi tu uh hi, kuama in amate kaa ngawl tu a, phum ngawl tu hi. Amate ii luangte lei ah eaklei bangin kithu tu hi. Amate sia ngal sungah kithat tu a, ahibuale ngilkial pukthi in thi tu hi, a luangte sia vacimte le ngamsate ii an hi tu hi.

⁵“Mithi kaana inn sungah tum heak in. Kuama khuangai pui heak in. Ka mite sia thinnopna thupha ka pia nawn buatu a, itna le hesuakna ka nei nawn buatu hi.

⁶Hi ngamah a hau le a zawngte thi tu uh a, kuama in amate phum ngawlin, kaa ngawl tu hi. A khuangaina a lak natu in kuama in ama le ama nam taw ki at ngawl tu a, a sam uh meet ngawl tu hi.

⁷A it khat a thi ciang heenepna in, kuama in ama tui le an neak pui ngawl tu hi. A pa le a nu a thite ngangawn kuama in khuangai pui ngawl tu hi.

⁸“Anneak poai vawtna inn sungah tum heak in. Anne tuidawn tu in amate taw tokhawm heak in.

⁹Vaanglianbelpa Topa Israel te ii Pathian Keima ii ka son tu thute ngai in. Ngual nopna awte, kipaakna le mopoai lungdamna awte ka thimsak tu hi. Hi lai ah om mihingte sia hi thupiang mu tu in nungta tu uh hi.

¹⁰“Hi thu teng amate tungah na son ciang, amate in, banghangin Keima in hi ngimna lian amate tungah thengsak khi ziam? A khialna bang ahi ziam? Topa ih Pathian tungah bang khialna vawt ziam ci sia amate kidongh tu uh hi.

¹¹Tuasia ciang Topa in hi bangin ci hi ci in amate tungah son in hong ci hi, ‘Na taangpupite in kei hong taisan in ngamdang pathiante ii na seamin bia uh hi. Amate in kei hong nusia in ka thuhil nate ni ngawl uh hi.

¹²Ahihang no sia na taangpupite uh sangin sia zaw lai nu hi. Na vekpi in thinpui le mi ngilote na hi uh a, ka thu nong ni bua uh hi.

¹³Tua ahikom hi ngam panin note le taangpupite ii heak ngei ngawlina ngamah kong notkeak tu hi. Tuasia ciang tua munah a sun a zan in milim pathian dangte ii na na seam tu uh a, Keima in no kong hesuak buatu hi.’ ”



Saltanna pan Heak kikna

¹⁴Topa in, “Egypt ngam pan Israel mite a paipui a nungta Pathian ci in keima min taw mihingte a kiciam nawn ngawl hun hong theng tu hi.

¹⁵Amate in, saksang ngam pan le amate ka thethaangna ngamdang theampo panin Israel mite hong paipui a nungta Pathian ci in Keima min taw kiciam zaw tu uh hi. A taangpupite tungah ka piak sa amate ngamah ka ciasak kik tu hi. Keima Topa in ka ci zo hi,” ci hi.

Hong tung tu Daan piakna

¹⁶Topa in, “Ngasa mante tam mama hong pai tu in ka vaitha tu a, hi mite ka mansak tu hi. Tua zawkciang savaite tam mama ka vaitha tu a, amate in muallian mualno tung theampo le suangte kilaklaw suanghawng sungah amate vai tu uh hi.

¹⁷Amate vawt theampo ka mu hi. Ka mai ah a kiseal bangma om ngawl hi; amate ii khialnate ka mu ngawl bangma om ngawl hi.

¹⁸Amate ii khialna le ngitlo nate hu in a zaa nii ka liausak tu hi, banghangziam cile mithi luangte bang a nuntakna a nei ngawl milimte taw amate in ka ngam ninsak uh a, amate ii milim pathiante taw ka ngamsung dimh uh hi,” ci hi.

Jeremiah ii Topa Muangin A Thungetna

¹⁹Topa awng, nangma in kei hong dal a thahatna hong pia pa na hi hi; ka ngim nga laitakin nong hu hi. Leimong panin minam dangte nang kungah hong pai tu uh a, “Ka taangpupite in pathian maan ngawl simngawl bangma dang nei ngawl hi, a nei uhte sia bangma kimang ngawl milimte bek ahi hi.

²⁰Mihing khat in ama atu pathian vawt thei tu ziam? Vawt thei ngawl tu hi, a vawt thei a ahile, tuate in pathian tatak hi ngawl tu hi,” hong ci tu uh hi.

²¹Topa in, “Tua ahile tu le a tawntung atu in ka vaangletna le ka thahatna sia minamte in ka hesak tu a; amate in Topa ka hi sia he tu uh hi,” ci hi.

Jeremiah 17

Judah ii Mawna le Daan A kipiakna



¹Topa in, “Judah mite awng, na mawna uh sia thik laikung taw ki at hi; tuate sia na lungtang tungah suangmanpha mukzum taw ki at in, na biaknatau kinghte tungah kikhen hi.

²Na mite in pathian nu Asherah atu in ngamsung thingkung hing theampo ii kung, mualno dawnte le mual liante tungah,

³a kiphut milimte le biaknataute bia uh hi. Na ngamsung theampo uh ah na vawt uh khialnate theampo hu in na neisa na lamh sa uh le na sum na paaite na ngalte in kong sutsak tu hi.

⁴Kong piak sa ngam zongh na taan tu uh a, na heak ngei ngawl uh ngam khat ah na ngalte ii na kong seamsak tu hi, banghangziam cile ka thin uukna sia meikuang bang hi a, a tawntungin kuang tu hi,” ci hi.

Topa pauna A nanam

⁵Topa in, “Kei kung panin tai a mihing a muang pa, a thi thei mihing thahatna a suang pa sia Keima in ka puavawk tu hi.

⁶Ama sia senneal ngamah a po bangma dang a po ngawl kongaw ngam ci al ngamah a khang, sawlpaang kung khat bang ahi hi. Ama tungah thupha bangma piang ngei ngawl hi.

⁷“Ahihang kei hong muang pa ahile thupha ka pia tu hi.

⁸Ama sia luihui ah a po a zung luitui sungah a tha thingkung khat bang ahi hi. A teete hing tan ahikom ama in nisat khuakhal hun hong thet ciang phamaw sa tuan ngawl hi; ngua a zu bua hial zonghin ama in thinngim tuan ngawlin; a nga nga tan hi;

⁹“Akua in mihingte thinsung he thei ziam? tuabangza a ngual a theam thei a dang bangma om ngawl hi; a natna nasia lei ahikom a dam thiang tu haksa tu hi.

¹⁰Keima, Topa in, mihingte ngaisutna ka pheet a, a thinsungte ka sitthiang hi. Ama nuntakna zia le a ngamtatzia taw kizui in ka pia kim hi,” ci hi.



¹¹Thu maan ngawl a sum nga pa sia ama ii tuui ahi ngawl tuuidang a op vacim khat taw kibang hi. A khan tungto laitak ma in ama in a haunate taan tu a, a tawpna ah bangma kimanna nei ngawl a mawmaw khat suak tu hi.

¹²Ih Biakinn sia a kipatciil pan ma in muallian khat tungah a ding a minthang kumpi tokhum khat taw kibang hi.

¹³Topa awng, nangma in Israel mite ii lam et pa na hi a, nang hong taisan mihingte theampo a mai uh kizumsak tu hi. Amate sia leivui sungah min ki at bangin bo vadi tu uh hi, banghangziam cile amate in nuntakna ciktui thiangtho ahi Topa nangma, hong nusiak hang ahi hi.

Jeremiah in Topa tungah Huna Ngen

¹⁴Topa awng, hong damsak lete ka dam thiang tu a; hong hon lete ka suakta tatak tu hi; kong pok pa sia nangma bek na hi hi!

¹⁵Mihonte in kei tungah, “Topa ii ei hong tawnnate koi sungah om ziam? Tu in tuate hong tungsak taken!” hong ci uh hi.

¹⁶Ahihang, Topa awng, amate tungah tuasiatna na thetsak tu kong sawl ngei bua a; amate ii ngim a thuk tu zongh ka deisak bua hi. Topa awng, nangma in hi thu na he a; ka sonte na he hi.

¹⁷Kei hong lausak heak in; ngimna hong thet ciang ka belpa na hi hi.

¹⁸Kei hong vawtsia mihingte a mai mawlsak in a, ahizong Topa awng, kei hong tongsak tan. Amate lausak in a, ahihang kei hong lausak heak in. Amate tungah tuasiatna tungsak in a amate a bebek in susia in.

Sabbath Tanzia

¹⁹Topa in kei tungah, “Jeremiah awng, pai tan a Judah ngam kumpite ii khuapi sung tumna le puswana Mipite ii Kongpi ah ka thu son tan; tuaciang Jerusalem kongpi dangte theampo ah pai tan.

²⁰Kumpite le Judah mite theampo le Jerusalem khua sungah a teang mihingte theampo le hi kongpite pan a tum mihingte theampote in ka thu a ngai natu in son in.



²¹A nuntakna uh a it le Sabbath ni in vanh pua heak hen ci in amate tungah son in; Jerusalem kongpите kantan in bangma tumpui heak hen,

²²ahibuale Sabbath ni in thiangthosak taken.

²³A taangpupite in ka thu hong ngai ngawl a, hong nadon ngawl hi. Amate a thin pui in; ka thu hong ni nuam ngawlin ka hilnate saang nuam ngawl pumsai uh hi.

²⁴Ka thu piak theampo hong nit natu in hi mihonte tungah son in. Sabbath ni in hi khuapi kongpите kantan in amate in bangma tumpui ngawl tu hi. Amate in Sabbath ni sia ni thiangtho in tang tu uh a, na bangma seam ngawl het tu uh hi.

²⁵Tuaciang a kumpite le a uliante in Jerusalem kongpите ah tum tu uh a David ii nei kumpi vaangletna nei tu uh hi. Judah mite le Jerusalem mite taw amate siphu leang tung le siphu tungah tokhawm tu uh a, Jerusalem khuapi sia mihing dim tawntung tu hi.

²⁶Mihingte sia Judah khuapite le Jerusalem khua a kiim a paam khuate panin hong pai tu uh hi; amate in Benjamin ngam pan, mualpeang pan, mualliante pan le Judah ngam thangsang panin hong pai tu uh hi. Amate in ka Biakinn ah meihal biakpiakna le a dadang biakpiaknate, antang le paaknamtui taw biakpiaknate, lungdamko biakpiaknate hong paipui tu uh hi.

²⁷Ahihang amate in ka thu hong nit kul tu a Sabbath ni sia ni thiangtho in a tan uh kul tu hi. Tua ni in amate in Jerusalem kongpите kantan in vanh bangma pua ngawl tu uh hi. A pua uh ahile Jerusalem kongpите mei taw ka hal tu hi. Mei in Jerusalem khua kumpi innte kaangtum tu a kuama in phel zo ngawl tu uh hi,” hong ci hi.

Jeremiah 18

Beal seakpa ii Inn ah Jeremiah Haw

¹Topa in kei tungah,

²“Beal seakpa ii inn ah haw suk in a, tua munah thu kong son tu hi,” hong ci hi.

³Tua ahikom tua munah ka haw a, beal seakpa a leangmui ah naseam ka mu hi.

⁴Beal a seak ciang a tungman a pha bua ahile tua tungman sia nadang khat in vawt kik hi.

⁵Tuaciang Topa in kei tungah,

⁶“Beal seakpa in tungman taw a dei babang a vawt bangma Israel mihing note tungah ka dei babang kong vawt thei natu thu nei ngawl khi ziam? Beal seakpa khut sungah a om tungman bangin note in ka khut sungah na om uh hi.

⁷Hun khat pawpo ciang minam khat ahibuale kumpi ukna ngam khat sia a zung pan longh tu khi hi, thiaktan tu khi hi, ahibuale susia tu khi hi ci ka hi ta zong,

⁸tua minam in a siatna panin a kikheal kik a ahile siatna ka thuak sak tu hi ka ci sa sia ka thuaksak buatu hi.

⁹Ahitazong, minam khat ahibuale ngam khat ka phut tu, ka sa tu hi ka ci zawkciang,

¹⁰tua minam in ka thu hong ni bua a, a sia a vawt veve le tua minam tungah phatna ka vawt tu ka ci sate ka vawt nawn buatu hi.

¹¹Tua ahikom tu in, Judah mite le Jerusalem mite kungah amate ii siatna tu tupna nei a amate daan pia tu in a kinging sa in ka om sia son in. Khialna vawtin a nuntaknate a kikheal natu, a omzia le a nasepnate uh a lai natu in amate tungah son in.

¹²Amate in, ‘Hi ngawl hi, banghang kikheal tu khu ziam? Koma uuk bangin mihing thinpui le mihing ngilo hi tu khu hi,’ ci in zo tu uh hi,” hong ci hi.

Mihonpi in Topa Nial

¹³Topa in, “Nidang in tuabang thu piang ngei zo ziam minam theampo tungah dongh vun. Israel mite in a kiitakuai na khat vawt zo uh hi!



¹⁴Lebanon mual saangte vuuk in tuam ngawlin om ngei ziam? Mualtung pan hong luang a vot luite kang ngei ziam?

¹⁵Ahihang ka mite in kei hong mangil zo uh a; milimte kungah ngim namtui hal uh hi. A tot natu lampi ah lutu ahi uh manin, a tot ngei lamlui zui nawn ngawlin a kisial ngawl lamzinte tawn uh hi.

¹⁶Amate in hi ngam sia a tawntung a ki nomu tu in a kiitak huai ngam suaksak uh hi. Tua lampi a tawn mihingte theampo in tua ngam a mu uh ciang mulkim huai sa tu uh a, lamdang sa in a lu pei tu uh hi.

¹⁷Keima in ka mite a ngalte mai ah, nisuana sang vui ii leivui a seamkeak bangin ka thethaang tu hi. Amate ka nungngat tu a; haksatna hong thet ciang ka hu buatu hi,” ci hi.

Jeremiah Kithasawm

¹⁸Tuaciang mihonpi in, “Jeremiah taw kisai in na pawlkhat seam sin tawng! Hong hil tu in thiampite, ngaisutna hong pia tu in miciimte le Pathian ii thu hong son tu in kamsangte om tawntung tu hi. Ama tungah thu ih vawt tu a, ama thuson peuma ih ngai buatu hi,” ci uh hi.

¹⁹Tuaciang hi bangin thu ka ngen hi, “Topa awng, ka thusonte hong ngai tan a kei thu taw kisai in ka ngalte ii sonnate ngai in.

²⁰A pha sia a sia taw lo kik tu ma ahi ziam? Tua hi napi amate in ka taaksuk natu in leidum khat to zo uh hi. Na kungah kong pai a, na thin uukna taw amate na vawtsiat ngawl natu in amate luangin kong son sia phawk in.

²¹Ahihang tu in Topa awng, a tate uh ngilkial in pukthisak in; amate ngal sungah thisak in. Numeite a pasalte le a tate in thi sansak in; pasalte sia natna taw thisak in, tangvalte ngal kisimna ah thisak in.

²²Hil khol ngawlin mi ngilo hon khat amate innte phuul tu in paisak in; amate lau in ausak in. Amate in ka taak natu in dum khat to uh a, hong mat natu in thaang hong sia uh hi.



²³Ahihang Topa awng, amate ii kei hong thasawmnate theampo na he hi. Amate ii ngitlo nate maisak heak in a, a mawna maisak heak in. Nangma mai ah amate ngual lelsak in a; na thin uuk lai tak ma in amate sucip in” ka ci hi.

Jeremiah 19

A kitam Thambeal

¹Topa in leibeal khat lei tu in hong sawl hi. Ama in ulian pawlkhat le thiampi sung pan a uhaam zawhiat pawlkhat paipui in,

²tuaciang Potsherd Gate Kongpi kantan in Hinnom Kuam ah pai tan; hong ci si hi. Tua munah hong son tu thute a son tu ka hi hi.

³Topa in hi bangin son tu in kei hong sawl hi, “Judah kumpite le Jerusalem khua mite awng, Keima, Vaangliangbelpa Topa Israel mite ii Pathian, ii kong son tu thu ngai vun, hi munah tuasiatna khat ka thengsak tu a tua thu a za theampo ingh keikoi tu uh hi.

⁴Hi bangin ka vawt tu hi, banghangziam cile mihingte in kei hong nusia zo uh a, hi mun sia pathian dangte biakpiakna taw in ninsak zo uh hi— tua pathiante sia amate, a taangpupite Judah kumpite ii a thu a heak ngei ngawl pathiante ahi uh hi. Amate in hi mun sia mawna nei ngawl mihingte ii chi taw kidimsak uh hi.

⁵Tuaciang amate in biakpiakna in a tate uh mei sungah halin Baal biak natu in biaknatau vawt zo uh hi; hi bang a vawt tu thu ka pia ngei bua hi; ka thin sung zongh ah ka ngaisun tha ngei bua hi.

⁶Tua ahikom hi mun sia Topheth ahibuale Hinnom Kuam a kici nawn ngawl natu hun hong theng tu hi. Tua mun sia Kithalupna Kuam kici zaw tu hi.

⁷Hi munah Judah le Jerusalem mite ii tupnate theampo ka khak tu hi. A ngalte in ka zosak tu a ngal kidona ah a ngalte in ka thatlumsak tu hi. A mithi luangte sia vacimte le ngamsate ii an tu in ka pia tu hi.

⁸Hi khuapi tungah a lauhuai mama siatna ka tungsak tu a tua khua a kantante pawpo in ingh liangin lamdang sa mama tu hi.



⁹Ngalte in khuapi kiim uum tu a, a mite thalup tu hanciam tu uh hi. Ngalte in uumci in lauhuai mama ahikom khuapi sung sangah a om mihingte sia khat le khat a sa uh kine tu uh a, a tate ii sa ngangawn ne tu uh hi,” hong ci hi.

¹⁰Tuaciang keima taw a paikhawm mihingte mai sanh ah beal saattham tu in Topa in keima hong sawl hi.

¹¹Tuaciang Vaanglianbelpa Topa in hi bangin ci hi ci in amate tungah son tu in keima hong sawl hi, “Hi mihingte le hi khuapi ka sutham tu a, a kipua kik thei nawn ngawl a tamtham hi leibeal taw kibang tu hi. Mithi phum natu mun dang om nawn ngawl ahikom mihingte in a mithite sia Topheth ngangawn ah phum tu uh hi.

¹²Keima in hi khuapi le khuapi sungah a teang mihingte Topheth bangin ka vawt tu hi ci in kong kamciam hi.

¹³Jerusalem khua a innte, Judah kumpite ii innte le a tatakin ci leang inn theampo ii khuvumte tung pan aksite tungah ngim namtui hal biakna a kipiakna innte le pathian dangte tungah biakpiakna zu a kibuakna munte theampo a vekpi in Topheth mun bangin a nin suak siat tu uh hi,” ci hi.

¹⁴Tuaciang Topa in a thu thangsak tu a, hong sawlna Topheth panin ka cia hi. Biakinn sungah pai in, dingin mi theampo tungah,

¹⁵Vaanglianbelpa, Topa Israel mite Pathian in hi bang ci hi, “Ka tungsak tu hi ka ci sa daan theampote hi khuapi le a naina a om khua note theampo tungah ka tungsak tu hi; banghangziam cile na thin uh pui in kong son thu na ngai nuam bua uh hi,” ci in ka son hi.

Jeremiah 20

Jeremiah le Thiampi Pashhur Kilem ngawlina

¹Hi thute ka thansak sia Biakinn ukpa Immer ii tapa thiampi Pashhur in a zaak ciang ama in,

²kei hong saat a thikkol hong bulin Biakinn sung Benjamin Kongpi tungnung hui ah hong koi hi.



³A zingsang ciang, Pashhur in kol hong suut zawkciang, keima in ama tungah, “Topa in nang sia Pashhur ci in hong sam ngawl hi, ‘Mun theampo ah Launa’ ci in nang hong sam zo hi.

⁴Topa ama mama in ‘Nang sia nangma le nangma kipatausak tu le na lawmte patausak tu in kong vawt tu a, a ngalte in a namsau uh taw na lawmte a thalup siat na mu tu hi. Keima in Judah mihingte theampo Babylon kumpipa khutsung ka then siat tu hi; pawl khat a ngamah sal in ciapui tu a, pawl khat thatlum tu hi.

⁵Hi khuapi ii hauna theampo, a neisa a lamh sa le a vanhte theampo, Judah kumpite ii sum le paaite dongin a ngalte in ka sutkolsak tu a, a khawng a kheak in Babylonia ah ka paipuisak tu hi.

⁶Pashhur awng, nang na hile, nangma le na innkuanpuite theampo zongh hong kiman tu a, Babylonia ah hong kipaipui tu hi. Tua munah na thi tu a na theam zazan bul na lawmte taw hong kiphum khawm tu hi,’ ci hi,” ka ci hi.

Jeremiah in Topa Mawsiat

⁷Topa awng, nangma in kei nong theam a, keima in theam ka thuak hi. Nangma in kei sangin na hat zaw a, kei nong zo thaw hi. Mihing theampo in kei hong nunau uh a; sunkhua teakin amate in kei hong nuisan uh hi.

⁸Thu ka son simin, ka au keak kul a, “Ngoltolna! Kisiatna!” ci in ka au hi. Topa awng, nangma thu ka thansak hu in a tawntungin simmawkna le zawnsakna ka thuak hi.

⁹Ahihang, “Topa ka mangil tu a ama min taw in thu ka son nawn buatu hi,” ka ci ciangin, na thu sia meisa bangin ka sungah kuang hi. Iimcip tu ka hanciam hangin, ka iim thei mama bua hi.

¹⁰Mihing theampo kihua a, “Mun theampo ah launa om hi! Tua ahikom thu neite tungah ama khia tawng,!” a ci ka za hi. Ka it bel ka lawmte ngangawn zongh in ka puk tu bek ngak uh hi. “Kitheam zo tha tu hi, tuasia ciang ih man thei tu a, phu ih lam tu hi,” amate in ci uh hi.



¹¹Ahihang Topa awng, nangma in keima sangah nong pang a na thahat in na vaanglian hi, Kei hong vawtsiate sia ngal lel tu uh hi. Amate a min kipaansak tawntung tu uh hi, banghangziam cile amate tangtung thei ngawl hi. Amate ii minpaanna sia kimangil ngei ngawl tu hi.

¹²Ahihang, Vaanglianbelpa, Topa awng, mihingte sia thumaan takin na sittel a; amate ii thinsung le a ngaisutna na he hi. Tua ahikom ka ngalte tungah phu na laakna hong musak tan, banghangziam cile na khut sungah ka vaite kong aap zo hi.

¹³Topa tungah la sa vun! Topa pok vun! Ama in mi ngilote khutsung panin a kivawtsia te suatak hi.

¹⁴Ka sua ni haamsiat in! Ka nu sung pan ka sua ni mangil in!

¹⁵“Hi sia pano hi! Tapa khat nei ni hi!” ci a ka pa tungah kamtai a, ka pa a lungdamsak pa haamsiat in.

¹⁶Ama sia Topa in hesuak ngawlin, a suksiat khuapite bang hi taken. Ama in zingsang in bot sa a kaana aw le sun in ngal patauna aw za taken,

¹⁷banghangziam cile ama in ka pian ma in hong thatlum ngawl hi. Hong thatlum hi thong le ka nu ngilsung sia ka thaana hi zo tu hi.

¹⁸Banghangin ka nu ngilsung panin suak khi ziam? Ngimna le heena khuangaina bek thuakin maizumna taw ka nuntakna bosak tu khi ziam?

Jeremiah 21

Jerusalem ii Ngallel tu Kison khol

¹Judah Kumpi Zedekiah in Malchiah ii tapa Pashhur le Maaseiah ii tapa thiampi Zephaniah te ka kungah hong puak a, hi bangin hesuak hong ngen hi,

²“Ko atu in Topa hong paupuisak tan, banghangziam cile Babylon Kumpipa Nebuchadnezzar le a ngalkapte in khuapi uumci hi. Topa in nalamdang khat ko atu in hong sepsak taken a, Nebuchadnezzar heak kik natu zawthawk thu zangh taken,”



³Tuaciang Topa in kei hong paupui a Zedekiah ii kei kungah hong sawl mihingte tungah,

⁴Topa Israel te ii Pathian in hi bangin ci hi ci in Zedekiah tungah son tu in ka sawl hi, “Zedekiah awng, Babylon kumpipa le a ngalkapte a sim na ngalkapte ka zo tu hi. Na ngalkapte ii ngalhiamte khuapi laizang ah ka seng tu hi.

⁵Keima in ka tha om za, ka thin uukna, ka vei laakna le ka thin sona taw in nang kong sim tu hi.

⁶Hi khuapi sungah a teang mihingte theampo ka thatlum tu hi; mihing le nganhing a kibangin natna ngilo taw thi tu uh hi.

⁷Ahitazong, nangma le na khutnuai a uliante, ngalsung, kialpi pan le natna ngilo pan a, a suakta mihonpite sia— No hong that nuam Nebuchadnezzar Kumpipa le na ngalte in na vekpi in kong mansak tu a, Nebuchadnezzar in note hong thatlum tu hi. Ama in note hesuakna le deisakna hong nei ngawl tu a khat zongh hong khoaikhe buatu hi. Keima Topa in ka ci zo hi,” ci hi.

⁸Tuaciang Topa in mihingte tungah hi bangin son tu in kei hong sawl hi, “Ngai vun! Keima, Topa in na teal tu uh in nuntakna lampi le thina lampi kong pia tu hi.

⁹Khuapi sungah a om a kuama po sia ngal kisimna ahibuale ngilkial in ahibuale natna ngilote taw kithatlum tu hi. Ahihang tu laitak a khuapi a sim Babylon mite kungah pai in a ki aap pawpo kithat ngawl tu hi; ama in a nuntakna suatak tu hi.

¹⁰Hi khuapi sia maaf tuan ngawlin suksiat tu in ka thin ka khensat zo hi. Babylon kumpipa khut sungah kipia tu a, ama in mei taw haltum tu hi. Keima, Topa in ka ci zo hi,” hong ci hi.

Judah Kumpi Innkuan tungah Thukhenna

¹¹⁻¹²Topa in David ii suan le paal, Judah kumpi innkuan tungah hi thu son tu in kei hong sawl hi; “Keima, Topa ii ka son sia ngai vun. Nisim in maan takin thukhen vun. Ngual theam a thuak pa sia ama a theam pa khut sung panin



dal vun. Tuabangin na vawt bua uhle, thusia na vawt sia in a kimit thei ngawl meikuang khat bangin ka thin uukna kuangsak tu hi.

¹³Jerusalem awng, nang in kuam tung, a saangna ah na to a, zaangtam tungah suangtum dokto khat bang na hi hi. Ahihang nang kong sim tu hi. Kuama in nang hong sim zo ngawl tu a na kidalna te hong sutham zo ngawl tu hi ci ni hi.

¹⁴Ahihang na sepnate taw kizui in nang daan kong pia tu hi. Na kumpi inn mei taw ka hal tu a, a kiim a paam a om na theampote tua mei in kaangtum tu hi. Keima, Topa in ka ci zo hi,” hong ci hi.

Jeremiah 22

Judah Kumpi Inn ah Jeramiah ii Thupuak

¹⁻²Topa in David suan le paal, Judah kumpipa inn ah pai tan a, tua munah a kumpipa, a khutnuai a uliante le Jerusalem mite kungahTopa thusonte ngai tu in son tan, ci in kei hong sawl hi.

³Topa in, “Keima, Topa in thumaan le thutang na vawt vun ci in no thu kong pia hi. Theamna a thuak pa sia a theam pa ii khutsung panin dal vun. Ngamdang mi ahizong, tangate le meingongte ahizong vawtsia heak vun; hi a thiangtho munah mawna nei ngawl mihingte that heak vun.

⁴Kong thupiak bangin na seam takpi uh le, David ii suan le paalte sia kumpi suak tawntung tu uh hi. Tuaciang amate sia, a khut nuai a uliante le a mite taw in, siphuleang le siphu tungah to in hi kumpi inn kongpite panin tumin pusuak tu uh hi.

⁵Ahihang kong thu piakte nong ni bua uh le, hi kumpi inn sia siacip tu hi ci in ka kiciam hi. Keima, Topa in ka ci zo hi.

⁶“Kei atu in, Judah ii kumpi inn sia Gilead ngam le Lebanon Mualliante bangin hoi hi; ahihang kuama ii ten ngawlina a ngamkhing mun khat ka suaksak tu hi.



⁷Tua kumpi inn a susia tu in mihingte ka puak tu hi. Amate in a hei uh tek hong keng tu uh a, cedar khuam phate phukin meikuang sung denna in nei tu uh hi.

⁸“Tua zawkciang ngamdang mite tam mama in kantan tu uh a, tuaciang Keima, Topa in banghangin hi khuapi lian tungah hi bangin vawt ziam ci in khat le khat kidongh tu uh hi.

⁹Tuasia ciang na Pathian, Keima taw na kiciamna uh nusia in pathian dang bia in a na na sepsak uh hang hi, ci in amate in zokik tu uh hi,” ci hi.

Joahaz taw kisai Jeremiah ii Thupuak

¹⁰Judah mite awng, Josiah kumpipa kaa heak vun; ama thi hangin thasia heak vun. Ahihang a tapa Joahaz atu in nasia takin kap vun; ama sia hong heak kik nawn ngawl tu le a pianna ngam mu kik ngei nawn ngawl tu in amate in paipui uh hi.

¹¹Judah kumpipa ahi a pa ii za a lai Josiah ii tapa Joahaz taw kisai in Topa in hi bangin ci hi, “Ama in hi mun panin pai zo a, hong heak kik nawn ngawl tu hi.

¹²Ama sia a paipuina ngamah thi tu a, hi ngam mu kik ngei nawn ngawl tu hi.”

Jehoiakim taw kisai Jeremiah ii Thupuak

¹³Thumaan ngawl na taw a inn a sa pa le ngual theamna taw a inn a keak pa, a ngam mite a thawthong in a na a seamsak pa le a thaman a pia ngawl pa in siatna thuak taken.

¹⁴“Inndawl tungnung ah khan a zai hemhom innkhat ka sa tu hi,” a ci pa in siatna thuak taken. Tuaciang ama in a inn sungah khelkite thua in, cedar thingpheak taw thuap thua in za san taw zut hi.

¹⁵Midangte inn sangin a phazaw cedar thing taw na inn nasak na sia in kumpi phazaw khat hong suaksak ziam? Na pa sia a nuntak nuamsa hi. Ama sia a tawntung a thumaan a thutang hi a, a sepna theampo ah a maa pai hi.



¹⁶Ama in mizawngte tungah thutang taw thukhen a, tua hu in ama atu in na theampo a pha suak hi. Tuabang ahi theina in Topa a heak hang ahi hi.

¹⁷Ahihang nangma in nangma kaangsung tu bek na mu thei a; mawna nei ngawlte thatin na mite nasia takin na zawthawk vawt hi. Topa in ci zo hi.

¹⁸Tua ahikom, Topa in Judah Kumpipa Josiah ii tapa Jehoiakim thu taw kisai in hi bangin ci hi, “A thi hu in kuama kap ngawl tu hi; ‘Bangza he huai ziam, ka lawm awng! Bangza he huai ziam!’ ci in kuama kap ngawl tu hi. ‘Ka Topa awng! ka kumpipa awng!’ ci in kuama kap ngawl tu hi.

¹⁹Laa a thi ciang a kiphum bangin a luang kikaikeak in Jerusalem ii kongpite pua sangah kivawk tu hi.”

Jerusalem taw kisai Jeremiah ii Thupuak

²⁰Jerusalem mihingte awng, Lebanon ngamah pai vun a au vun, Bashan ngamah pai vun a kap vun; Moab mualtung panin au vun banghangziam cile na pawlpuite theampo kizo siat zo hi.

²¹Na nopsak uh laitakin Topa in no hong paupui hi. Ahihang na ngai bua uh hi. Na nuntak uh sung theampo in tuabang vive hi nu hi; Topa thu na ni ngei bua uh hi.

²²Na lampuite uh sia vui in seamkeak tu a, na pawlpuite uh sia ngalte in sal a manin, na khuapi sia a min kidaisak in ki maizumsak tu hi. Banghangziam cile a pha ngawl na vawt uh hang ahi hi.

²³Lebanon pan a na laak uh cedar thing sungah thin muangin om nu hi; ahihang numei khat a nau a tut ciangin na asak bangin ngimna na thuak uhciang bangzata in hesuakhuai tu nu ziam?

Jehoiachin tungah Pathian ii Thukhenna

²⁴Topa in Judah Kumpi Jehoiakim ii tapa Jehoiachin Kumpipa tungah, “A nungta Pathian ka hi bangma in, ka ziatsang khut tungah min tupna khutzungbu na hi hial zongh in, nang kong suut tu a,



²⁵na kiitak mihingte le nang hong thatlum nuam mihingte tungah kong aap tu hi. Babylon Kumpipa Nebuchadnezzar le a ngalkapte tungah kong aap tu hi.

²⁶Saltang tu in nangma le na nu kong not tu hi. Na pianna uh ahi ngawl na ngamah na pai tu uh a, tua munah na thi khawm tu uh hi.

²⁷Hi ngam sia na mu kik nuam tu uh hi, ahihang na heak kik ngei nawn buatu uh hi, ” ci hi.

²⁸Keima in, “Jehoiachin Kumpipa sia kuama ii dei ngawl a a kivawk mang thambeal tamh khat bang suak zo ziam? Tua hu in ama le a tate sia amate heak ngei ngawl na ngamah saltang tu in ki paipui ahi ziam?” ka ci hi.

²⁹Leitung, leitung, leitung awng! Topa kammal ngai vun:

³⁰ “Hisia pa sia maa a tun ngei ngawl tu le, a tate a khuaisua tu in a ki ningkhiin sa hi. Ama in David ii kumpi tokhum lua in, Judah ngam a uk tu in suan le paal nei ngawl tu hi. Keima Topa in ka ci zo hi,” ci hi.

Jeremiah 23

Maisang atu Muanmawkna

¹Ama mite suksiatsak a, a thethaangsak ngam uk uliante tungahTopa ii thukhenna in bangza in lauhuai tu ziam?

²Ama mihingte keamcing tu a, a kingaisun ngamukte taw kisai in Topa Israel ii Pathian in hi bangin ci hi: “Ka mihingte nong kepcingsak bua uh hi; na thethaang uh a na hawlkeak uh hi. A sia na vawt uh hu in tu in daan kong pia tu hi.

³Ka mihingte a taanglai teng ka thethaang na ngamte panin ka kaikhawm tu a, a ngam ah ka ciasak kik tu hi. Amate in ta tam mama nei in pung mama tu uh hi.

⁴Amate a khoi a keam tu in ngamukte ka koi tu hi. Ka mihingte sia lau nawn ngawl patau nawn ngawl tu a, daan ka pia kik buatu hi. Keima, Topa in ka ci zo hi,” ci hi.



⁵Topa in, “David suan sung pan thumaan khat kumpi tu in ka teal tu hun hong theng tu hi. Tua kumpipa in ciimna taw ngam uk tu a thumaan thutang taw in a ngam buppi uk tu hi.

⁶Ama kumpi a sua ciang, Judah mite ngam muang tu a, Israel mite thin nuamin om tu uh hi. Ama sia ‘Topa Eite Kingupna’ (Jehovah Tsidkenu) kici tu hi.

⁷Topa in ci hi, “Egypt ngam pan Israel mihingte a pusua pui a nungta Pathian Keima min taw mihingte ii a kiciam nawn ngawl hun hong theng tu hi.

⁸Saksang ngam pan le amate ka thethaangna ngamdang theampo panin Israel mihingte a pusua pui a nungta Pathian Keima min taw amate in kiciam zaw tu uh hi. Tuaciang amate sia a ngamsung mama ah teang tu uh hi. ”

Kamsangte taw kisai Jeremiah ii Thupuak

⁹Ka thin kitamtham in ka liing hi. Topa hang le ama ii kammal thiangthote hangin, zu tam ne lei a zu kham pa khat taw ka kibang hi.

¹⁰Tua ngam sia Topa tungah a thumaan ngawl mihingte taw kidim hi; amate sia ngitlo nuntakna taw nungta in a thu neina uh zangh khial uh hi. Topa ii haamsiatna hangin hi ngam sia khuangai in om a, ngamsung lonote kongaw hi.

¹¹Topa in, “Kamsangte le thiampite in Pathian nei ngawl uh a; ka Biakinn sung ngangawn ah tatsiatna a vawt amate ka man hi.

¹²Amate ii tot lampite sia naalin khuazing tu hi; amate ka lutusak tu a, ka puksak tu hi. Amate ii tungah tuasiatna ka thengsak tu a; amate ii daan thuak tu hun hong theng tu hi. Keima, Topa in ka ci zo hi.

¹³Samaria ii kamsangte ii mawna ka mu zo hi; amate in Baal min suangin thuhil uh a ka mite lam pialpui uh hi.

¹⁴Ahihang Jerusalem khua a kamsangte in a sia zaw lai a vawt ka mu hi; amate in nupa kipalngul in leilot thu son uh hi; mihingte a ngitlona uh pan a kikheal ngawl natu in mihing pha ngawlte hanthawn zawlai uh hi. keima muna ah amate sia Sodom le Gomorrah mite bangma in sia siat uh hi.



¹⁵“Tua ahikom, Jerusalem khua a kamsangte taw kisai in, Keima, Vaanglianbelpa Topa in hi bangin ka ci hi; A neak tu in a kung khate ka pia tu a a dawn tu in nguza ka pia tu hi, banghangziam cile amate in Pathian zia bang ahi ngawl na thu sia ngam buppi ah zelsak uh hi,” ci hi.

¹⁶Vaanglianbelpa Topa in Jerusalem mite tungah, “Kamsangte ii thusonte ngai heak vun, amate in a maan ngawl lam etnate hong dimh uh hi. Amate in Keima ii kammal hi ngawl, amate ii ngaisut tawmte note tungah hong son uh hi.

¹⁷Ka thu son hong ngai nuam ngawl mihingte tungah, amate in poimaw bo na theampo amate atu in pha tu zam ci veve lai uh hi. Amate in mihing thinpui khat sim tungah tua siatna in ama thutha ngei ngawl tu hi ci in son uh hi,” ci hi.

¹⁸Keima in, “Hi kamsangte kuama in Topa ii ngaisutna thuku te he ngei ngawl uh hi. Amate kuama in Topa ii thuson za ngei ngawl, tel ngei ngawl, ngai ngei ngawlin nadon ngei ngawl uh hi.

¹⁹Ama ii thin uukna sia vuipi nguapi bangin mi ngilote ii lu tungah puaktham tu a,

²⁰ama ii tupna teng a vekpi a vawt siat mateng in a thin uukna thai ngawl tu hi. Mailam sangah a mite in hi thu telthiang tu uh hi,” ka ci hi.

²¹Topa in, “Hi kamsangte ka puak bua hi, ahihang amate pai veve uh hi. A son tu thu ka piak ngawl ahihang ka min suangin thuson veve uh hi.

²²Amate in ka ngaisutna thuku te he hi thong ka pole ka thusonte ka mite tungah thangsak zo tu uh a, a nuntakna pha ngawlte le a pha ngawl a ngamtatna te nusiasak siat zo tu hi.

²³“Keima in munkhat bek ah a om hi ngawlin mun theampo ah a om Pathian ka hi hi.

²⁴Ka mu thei ngawl tu in a buu thei tu kuama om ngawl hi. Vantung leitung mun theampo ah ka om hunlam he ngawl nu ziam?



²⁵Amate mang sungah ka thu sonte Keima in amate pia zo hi ci a Keima min taw leilot thu a son kamsangte ii thusonte ka he hi.

²⁶Tua kamsangte in amate ii phuatawm leilot thu taw ka mite bangtan vei lam khialsak tu uh ziam?

²⁷A taangpupite in Kei hong mangil in Baal kung a zot bang keakin, ka mihingte tung a, a son a mangte in Kei hong mangilsak tu hi ci in amate in ngaisun uh hi.

²⁸Mangman kamsang pa in hi thu sia mang bekma hi ci taken a, ahihang ka thuhilna a za kamsang pa in ka thu thumaan takin thangsak taken. Taangphaw le zungtaang tang kitee ngat thei tu ziam?

²⁹Ka kammal sia suangtum a bebekin a sutham mei le sek taw kibang hi.

³⁰Khat le khat ii kammalte la a, Keima ii kammal hi ci a, a thangsak kamsangte ka langpan hi.

³¹Keima kung pan hong pai hi ci a amate ii aituam kammal a son kamsangte zongh ka langpan si hi.

³²Keima, Topa ii ka son sia ngai vun! Leilot thu nguaktang ahi amate ii mangte a son kamsangte ka langpan hi . Amate in hi mangte sonin a leilotna uh le a kiphatsak na uh taw in ka mite lam khialpui uh hi. Amate ka paisak bua a thu la ka pia bua hi, mihingte atu in amate kimanna nei vet ngawl hi. Keima Topa in ka ci zo hi,” ci hi.

Topa ii Vanh ngit

³³Topa in keima tungah, “Jeremiah awng, ka mite khat pawpo ahibuale, kamsang khat ahibuale thiampi khat in ‘Topa ii thupuak sia bang ziam?’ ci in nang hong dok ciang, nangma in ama tungah ‘Nangma in Topa atu in vanhngit khat na hi a, ama in nang hong puavawk tu hi,’ na ci tu hi.

³⁴Ka mite khat pawpo in ahibuale kamsang khat ahibuale thiampi khat in, ‘Topa ii Vanhngit’ ci kammal a zangh zezen ahile ama le a inn kuanpuite daan ka pia tu hi.



³⁵Tuasia luangin, khat po in a lawmte le a mealheakte tungah ‘Topain bangbangin zokik ziam? Topa in bang ci ziam’ ci in dongh zaw taken.

³⁶Tua ahikom amate in ‘Topa ii Vanhngit’ ci kammalte zangh nawn ngawl tu uh hi, banghangziam cile khat pawpo in a zangh ahile, ka thuson sia ama atu in vanhngit takpi khat ka suaksak tu hi. Mihingte in amate ii Pathian, a nungta Pathian, Vaanglianbelpa Topaii kammalte lumlet uh hi.

³⁷Jeremiah awng, kamsangte tungah ‘Topain zokikna bang hong nei ziam? Topa in bang son ziam?’ ci in dongh in.

³⁸Amate in ka thupiak sia a ni bua uh a, ‘Topa ii Vanhngit’ ci kammalte a zangh uh le tuaciang;

³⁹Keima in amate le a taangpupite tungah ka piak sa khuapi sia ka la takpi tu a, ka omna panin a khuala na ah amate taw ka vawkkhop tu sia amate tungah son in.

⁴⁰Bangma hunin a kimangil ngei ngawl tu a tawntung maizumna le min paanna amate tungah ka tungsak tu hi,” hong ci hi.

Jeremiah 24

Theinga Bawm nii

¹Topa in Biakinn mai ah a kikoi theinga bawm nii kei hong lak hi. (Hi thu sia Babylon Kumpipa Nebuchadnezzar in Jerusalem khua panin Jehoiakim ii tapa Judah Kumpipa Jehoiachin sia Judah kumpi lampui uliante, khut thiamte le naseam thiamte theampo taw Babylon khua ah saltang tu in a paipui zawkciang thupieng ahi hi).

²Bawm a masa sia sungah a om theingate sia a min pal theinga phate hi a, a dang bawm sia ii sungah a om theingate sia limci ngawlin neak thei tu bang zongh a hi ngawl theinga pha ngawlte ahi hi.

³Tuaciang Topa in keima tungah, “Jeremiah awng, bang na mu ziam?” hong ci hi, “Theinga ka mu hi. A limcite sia limci mama a, a limci ngawlte sia limci ngawl leilam ahikom neak thei tu hi ngawl hi,” ci in ka zokik hi.

⁴Tuaciang Topa in keima tungah,



⁵“Keima, Topa Israel mite ii Pathian in Babylon ah a kipaipui mihingte sia hi theinga limcite bangin a pha in ka ngaisun a, ka phat vawt tu hi.

⁶Amate ka cing tu a, hi ngamah ka ciapui kik tu hi. Amate ka khangtosak tu a, ka susia buatu hi, amate ka botkeak buatu a ka suan tu hi.

⁷Keima Topa ka hi hunlam heak nopna thinsung amate ka pia tu hi. Tuasia ciang amate sia ka mihingte hi tu uh a, Keima in amate ii Pathian ka hi tu hi, banghangziam cile amate in a thin theampo uh taw ka kung hong zuan kik tu uh hi.

⁸Ahizong Judah Kumpipa Zedekiah, a khutnuai ngam uk uliante le hi ngam sungah a om suak Jerusalem khua mi a taanglai sunte ahibuale Egypt ngamah a taite sia neak tu a, a pha ngawl leilam hi theingate bangin Keima Topa in amate theampo ka vawt tu hi.

⁹Amate tungah tuabang tuasiatna ka thengsak tu a, leitung minamte theampo lau tu uh hi. Mihingte in amate nuizaakna lelin nei in, ciammui, nunau selno in, amate ka thethaangna mun theampo ah amate ii min sia haamsiatna in zangh tu uh hi.

¹⁰Amate le a taangpupite tungah ka piak sa ngam sungah amate khat zongh a taan nawn ngawl dongin amate tungah ngal kidona, kialpi tunna le natna ngilo ka tungsak tu hi,” hong ci hi.

Jeremiah 25

Saksang pan Ngal

¹Josiah ii tapa Jehoiakim sia Judah kumpi a sua zawk kum li kum in, Judah mite theampo taw kisai Topa ii thupuak khat ka nga hi. (Hi hun sia Nebuchadnezzar ii Babylonia kumpi a sua a kum khat kum ahi hi).

²Keima in Judah mite le Jerusalem mite theampo ii tungah,

³“Amon ii tapa Josiah sia Judah kumpi a sep zawk kum sawm le kum thum kum a kipan tuni ciang dong, kum kul le kum thum sung, Topa in ka tungah thu hong son a, ama ii hong sonte na tungah son ngawlin ka om ngei bua hi. Ahihang bangma na nadon bua uh hi.



⁴Topa in ama naseam kamsangte na kungah hong paisak tawntung hi napi a thu na ngai bua uh a, na awlmawk bua uh hi.

⁵Nang le na taangpupite ii a tawntung na lua tu in Topa ii hong piak sa ngam sungah na ten tan thei natu uh in, na ngitlo nate uh le a sia a na ngamtatnate uh panin na kikheal natu uh kamsangte in no tungah hong son uh hi.

⁶Pathian dang na biak ngawl natu uh le tuate ii na nasep ngawl natu uh, na khut taw na vawttawm uh milimte biakna taw Topa na thin uuksak ngawl natu in kamsangte in no tungah hong son hi. Topa thu na ni uhle, ama in note daan hong pia ngawl tu hi.

⁷Ahihang Topa ama mama in a thu na ngai ngawl na thu son hi. Tuasia luangin, na milim uh taw ama na thin uuksak uh a, daan hong piakna sia no tungah noma le noma in tung sak nu hi.

⁸“Tuabang a, a thu na ngai nop ngawl uh manin VaanglianbelpaTopa in,

⁹Keima insaksang ngamah a om mihingte theampo le ka naseam Babylon Kumpipa Nebuchadnezzar ka sam tu hi. Keima in Judah le a ngam sungah a teang mihingte theampo le a kiim a paam a om ngamte theampo sim tu in amate ka sam tu hi. Keima in hi ngam le a kiim a paam ngamte ka susia cip tu a, tuaciang a tawntungin a siacipin ka nusia tu a, dip hong kuasak mun suak tu hi. Keima, Topa in ka ci zo hi.

¹⁰Amate lungdam in a au nate, a kipaakna le mopoai sung lungdamna awngingte ka thimsak tu hi. Amate in a meiinnte atu in meitui nei ngawl tu uh a, neak tu antang om nawn ngawl tu hi.

¹¹Hi ngam buppi kisia thamin kinusia tu a, ngamkhing mun suak tu hi, a kiim ah ngamte in kum sawmsali sung tawntung Babylon kumpipa ii na seam tu uh hi.

¹²Tua zawkciang Babylonia le a kumpipa sia a mawna uh hu in daan ka pia tu hi. Tua ngam ka susia tu a, a tawntung lalcip in ka nusia tu hi.



¹³Jeremiah tungtawn a ka son minamte tungah ka thengsak tu ci a ka thawmvauna tuasiatnate theampo— hi laibu sungah a kikhum tuasiatnate theampo taw Babylonia daan ka pia tu hi.

¹⁴Amate ii sep sa bangin Babylonia te ka thuk kik tu a, minam tam mamate le kumpi liante in amate salin kai tu uh hi, ci hi,” ka ci hi.

Minamte tungah Pathian ii Thukhenna

¹⁵Topa Israel ii Pathian in keima tungah, “Hi lai ah ka thin uukna taw a kidim zu hai khat om hi. Kong paisakna minam theampote kungah tua hai paipui in tua hai sung pan amate in nesak in.

¹⁶Amate in tua hai sung pan a neak uh ciang soai vadeng tu uh a, a thin uh amh tu uh hi, banghangziam cile amate do tu in ngal ka puak hang ahi hi,” hong ci hi.

¹⁷Tuasia ciang tua hai sia Topa ii khut tung panin ka la a, Topahong sawlna minam theampote tungah pia in tua hai sung panin ka nesak hi.

¹⁸Amate kongaw ngam khat, a et nop huai ngawl het dip hong kuasak mun a sua natu le, mihingte ii ama te min sia haamsiatna in a zak natu in— tu hun dong a kizak lai bangma Jerusalem le Judah ngam khuapite theampo, a kumpite uh le a lampuite uh taw tua hai sung panin kidawnsak hi.

¹⁹⁻²⁶Hai tuasia sung pan a ne tu a dangte theampo ii min tepteena lai sia hi bang ahi hi; Egypt kumpipa, a khut nuai uliante le lampuite; Egypt mite theampo le Egypt ngam sungah a om ngamdang mite theampo; Uz ngamah kumpite theampo; Philistine ngam ii khuapite Ashkelon, Gaza, Ekronte ii kumpite theampo le Ashdod khuapi ah a taang lai kumpite; Edom, Moab le Ammon mite theampo; Tyre ngam le Sidon ngam kumpite theampo; Mediterranean tuipi hui a om ngamte ii kumpite theampo; Dedan, Tema, le Buz ii khuapite; A sam uh a tomin a meet mite theampo; Arabia ngam kumpite theampo; Kongaw ngam minamte ii kumpite theampo; Zimri, Elam, le Media ngam kumpite theampo; Saksang ngam kumpite theampo, a khuala a nai ci om ngawlin, khat zawk ciang khat in ne tu uh hi. Leitung a, minam theampo in ne tu uh hi. A khak belin Babylonia kumpipa in ne tu hi.



²⁷Tuaciang Topa in keima tungah, “Mipite tungah Keima, Vaanglianbelpa Topa, Israel ii Pathian in, amate tungah ngal ka thengsak hangin amate zukham in a luak dong, pukin a thaw kik zawk ngawl za dong zu ne tu in thu ka piak sia son in.

²⁸Amate in na khut tung panin hai la nuam ngawlin a dawn nuam bua uh le a dawn nanak uh kul tu hi Vaanglianbelpa Topa in ci zo hi ci in amate son in.

²⁹Keima khuapi sungah suksiat nasep ka kipan tu hi. Daan thuak ngawl tu in kingaisun uh ziam? Hi ngawl hi, amate sia daan kipia tu hi, banghangziam cile leitung mite theampo tungah ngal ka thengsak tu hi. Keima, Vaanglianbelpa Topa in ka ci zo hi.

³⁰“Jeremiah awng, ka son theampo nangma in taangko tu ni hi. Hi mihingte tungah hi bang son tu ni hi. ‘Topa in vantung panin hawk tu a, vantung a saangna panin vanto bangin nging tu hi. Ama in a mite hawksan tu a; sapit nga a cilpa khat bangin ama au tu hi. Leitung ah a om theampo in ama aw za tu a,

³¹leimong dongin a aw hawl tu hi. Topa in minamte tungah thu khat nei hi. Ama in mihingte theampo thu kisit tu in paipui tu a, mi ngilote thatlum tu hi. Topa in ci zo hi, ’ci in,” hong ci hi.

³²Vaanglianbelpa Topa in tuasiatna sia ngam khat zawkciang ngam khat ah theng tu a, vupi suangval khat sia leimong a khuala na mun ah va tu hi, ci hi.

³³Tua ni in Topa ii thalup sa mite ii luangte sia leimong khat panin leimong khat ah ki thethaang in om tu hi. Kuama in amate kaa ngawl tu a, a luangte kila ngawlin kiphum ngawl tu hi. Amate sia ninthuk kiseng bangin lei tungah kiseng tu hi.

³⁴Lampuite awng, kap vun, ka mite a cing a keamte awng, a ngingin kap vun! Naang in leivui sungah liik vun. Note hong kithalup tu hun hong theng zo a, tuutalte bangin note hong kitem tu hi.

³⁵Na suatakna tu uh lampi om ngawl tu hi.



³⁶⁻³⁷Thin ngimin tau in kap vun, banghangziam cile Topa in a thin uukna taw in na minam hong susia zo a, na ngamnuam uh a siacip in nusia zo hi.

³⁸Tawpi khat in akua a nusiak bangin Topa in a mite nusia zo hi. A lauhuai ngal kidona le Topa ii a kiitak huai thin uukna in hi ngam kongaw ngam suaksak zo hi.

Jeremiah 26

Jeremiah Thu kisit

¹Josiah ii tapa Jehoiakim Judah kumpi a sua zawk po ciang,

²Topain keima tungah, “Biakinn huang sungah ding in a, Judah ngam khuapite pan tua munah Pathian bia tu in, hong pai mihingte tungah son tu a kong sawlte theampo thangsak in. Kheet nei heak in.

³Tua mihingte in na thu hong ngai tu a, a pha ngawl a ngamtatnate uh kheal thei tha tu hi. A kikheal uhle, amate ii ngitlo ngamtatna hang a, amate suksiat tu in ka tup ka ngaisut sia ka kheal kik tu hi,” hong ci hi.

⁴Topa in mipite tungah son in ci a hong sawlna panin, “Keima,Topa in, kong thuhilnate na zui na uh taw ahizong

⁵note kungah kong paisak nithi ahi, ka naseamte, kamsangte ii pauna kammalte na nadon na uh taw ahizongin ka thu nong ni tu uh hi, ci in son zo khi hi. Amate ii a sonte na ni ngei bua uh hi.

⁶Thu na ni bua lalai uhle, Shiloh khua tungah ka vawt bangin hi Biakinn tungah ka vawt tu a, leitung minamte theampo in hi khuapi ii min sia haamsiatna in zangh tu uh hi,” hong ci hi.

⁷Thiampite, kamsangte le hong pai mihingte theampo in Biakinn sungah ka son hi thute za uh hi.

⁸Topa ii son tu a hong sawl theampo ka son tu ka man zawk ciang amate in kei hong man uh a au in, “Hi bang na son hu in thalup tu in kilawm ni hi!



⁹BanghanginTopa ii min taw hi Biakinn sia Shiloh khua bang suak tu a, tuaciang hi khuapi kiskusia cip in kuama teang ngawl tu hi ci ni ziam,” hong ci uh hi. Tuaciang mihonte in kei hong uumci uh hi.

¹⁰Judah ngam lampuite in hi thu a zaak uh ciang, kumpi inn pan Biakinn ah manlangin pai uh a, Kongpi Thak ah omna la uh hi.

¹¹Tuasia ciang thiampite le kamsangte in ngam lampuite le mihonte tungah, “Hisia pa thalup tu kilawm hi, banghangziam cile ii khuapi siatson hi. Na bil uh taw na za tek zo uh hi,” ci uh hi.

¹²Tuaciang keima in, “Hi Biakinn le hi khuapi ka siat sonna na zaak uhte theampo sia, Topa in taangko tu a kei hong sawl hi.

¹³Na nuntak ziate uh le na ngamtat ziate kikheal vun a, Topa na Pathian thu ni vun. Tuabangin na hi uhle, na tung uh ah siatna thengsak tu in a son sa sia Topa in a thin kheal tu hi.

¹⁴Kei ka hile, noma khut sungah ka om hi! Pha nasak uhle maan na sak uh bang pawpo in ka tungah hong vawt tavun.

¹⁵Ahihang hi thu telcian vun; kei nong that uhle, noma le hi khuapi sung mihingte sia mawna nei ngawl mihing khat thatin maw nei na tang tu uh hi, banghangziam cile hi kidop natu thu no tungah son tu in hong sawl pa sia Topa ahi hi,” ka ci hi.

¹⁶Tuaciang ngam lampuite le mihonte in thiampite le kamsangte tungah “Hisia pa in Topa ih Pathian min taw eite tungah thu hong son ahikom kithatlum ngawl tu hi,” ci uh hi.

¹⁷Tua zawkciang, upate pawlkhat ding to in a kikhawm mipite tungah hi bangin,

¹⁸“Hezekiah sia Judah kumpi ahi lai in, Moresheth khua mi kamsang Micah in mi theampo tungah Vaanglianbelpa Topain hi bangin, ci hi: ‘Zion sia lo bangin kitho tu hi; Jerusalem sia ninthuk suak tu a, Biakinn dinna mual sia dui suak tu hi,’ ci in son hi.



¹⁹Hezekiah Kumpipa le Judah mihingte in Micah thatlum ngawl uh hi. Hezekiah in Topa zatak vawtin Topa ii mai pha a nga natu in hanciam zaw lai hi. Amate tungah tuasiatna ka thengsak tu hi a ci siaTopa in a thin kheal kik hi. Tu in eima in a lau huai tuasiatna khat eima tung ma ah ih thengsak dektak hi!” ci uh hi.

²⁰(Kiriath Jearim khua pan Shemaiah ii tapa Uriah a kici midang khat om hi. Ama in Jeremiah bang keak ma in Topa min suangin hi khuapi le minamte son sia hi.

²¹Jehoiakim Kumpipa le a ngalkapte le uliante in Uriah ii thuson a zaak uh ciang, kumpipa in Uriah thalup tu in hanciam hi. Ahihang tua thu Uriah in za a, tuaciang lau in Egypt ngamah tai hi.

²²Tua hangin Jehoiakim Kumpipa in, Achbor ii tapa Elnathan le midang pawlkhat sia Uriah man tu in Egypt ngam ah paisak hi.

²³Amate in Uriah sia Jehoiakim Kumpipa kungah puak kik uh hi. Kumpipa in Uriah thatlum in a luang sia mihon kiphumna thaam mual ah vawk hi.)

²⁴Ahihang keima sia Shaphan ii tapa Ahikam in hong panpui ahikom thalup tu in mipite khut sungah hong ki aap ngawlin hong kithat ngawl hi.

Jeremiah 27

Jeremiah in Khuital Hakkol Pua

¹Josiah ii tapa Zedekiah in Judah ngam kumpi a sua tuungin Topain keima tungah,

²Savun khau le thing taw hakkol khat vawt tu le ka ngawng ah bul tu in kei hong sawl hi.

³Tuaciang Jerusalem khua ah Zedekiah Kumpipa taw kimu tu a hong pai tongciinte tungtawn in Edom, Moab, Ammon, Tyre, le Sidon Kumpite tungah thu khat puak tu in Topa in keima hong sawl hi.

⁴Vaanglianbelpa Topa, Israel ii Pathian, Topa in hi bangin ci hi ci in a kumpite tungah a son natu in a tongciinte thupia tu in kei hong sawl hi:



⁵“Ka vaangletna le ka thahatna taw in leitung, mihing, leitung ah a teang nganhingte theampo ka bitphua a, tuate sia ka piak nop pawpo tungah ka pia hi.

⁶Ka naseam Babylon Kumpipa Nabuchadnezzar khut sungah hi minamte theampo a koi pa sia Keima ka hi hi, tuaciang ngamsate ngangawn in ama ii na ka seamsak hi.

⁷Minam theampo in ama ii na seam tu uh a, ama ngam a bo tu hun a thet mateng in minamte in ama ii tapa le tupa ii na seam tu uh hi. Tua zawkciang ama minamte in a thahat minam dangte le kumpi liante ii naseam tu uh hi.

⁸“Ahihang minam khat pawpo ahibuale kumpi ngam khat pawpo in, Nebuchadnezzar ii ukna sungah a tum bua ahile tua minam sia, Nebuchadnezzar ii ka suksiat cipsak mateng in keima in ngal taw, kialpi taw, natna taw in daan ka pia tu hi.

⁹Na kamsangte ahibuale, mang matna taw ahizong, mithite ii thaa samna taw ahizong mitbum taw ahizong mailam thupiang tute a son khol thei a ci sia ii thu ngai heak vun. Amate theampo in Babylon kumpipa khut sungah na tum ngawl natu in no hong son hi.

¹⁰Amate in no hong theam a, na ngam uh panin a khuala na ah na paina tu uh hong piangsak tu uh hi. Keima in no kong hawlkeak tu a, kong sucip tu hi.

¹¹Ahihang minam khat pawpo in Babylon kumpipa khut sungah tum a, a na a seam le, tua munah lotho tu le a teang tu in ka om suak sak tu hi. Keima,Topa in ka ci zo hi,” hong ci hi.

¹²Judah Kumpipa Zedekiah tungah ta bangma in, ka son a, “Babylon kumpipa khutnuai ah tum in. Ama le a mite ii naseam in, tua hile na nungta tu hi.

¹³Banghangin nang le na mite in ngal taw ahibuale kialpi taw ahibuale natna taw in thi tu nu ziam? Tua thu sia Babylon kumpipa khutnuai ah a tum ngawl minam khat pawpo tungah piang tu hi ci a, Topa ii son sa thu ahi hi.

¹⁴Babylon kumpipa khutnuai ah na tum ngawl natu uh a, hong son kamsangte ii thu ngai heak in. Amate in nang hong theam hi.



¹⁵Kamsangte sia kei ii sawl hi ngawl a, leilot thu son tu in ka sawl bua hi. Topa in ci hi. Tua ahikom ama in nang hong bengkeak tu a, nang le na tungah hi leilot thute hong son kamsangte kithatlum tu hi,” ka ci hi.

¹⁶Tuaciang Topa in hi bangin ci hi ci in thiampite le mipite tungah, ka son hi: “Biakinn sum le paaite Babylon panin kila kik pal tu hi ci a, a son kamsangte thuson sia ngai heak vun. Amate in no hong theam hi.

¹⁷Amate ii thu ngai heak vun! Babylon kumpipa khutnuai ah tum vun tua hile na nungta tu uh hi! Banghangin hi khuapi sia ninthuk suak tu ziam?

¹⁸Amate in kamsang tatakte hi in, ka thu a um tatakte ahi uh le, Biakinn sung le kumpi inn sungah a omlai sum le paaite Babylon ah a kipuaksak ngawl natu in Keima, Vaanglianbelpa Topa tungah hong ngen ta uh hen,” ka ci hi.

(¹⁹⁻²⁰Nebuchadnezzar Kumpipa in Judah ngam Kumpipa, Jehoiakim ii tapa Jehoiachin le Judah ngam le Jerusalem khua uliante Babylon khua ah a paipui lai in ama in khuamte, tau tuikuang, leangte le Biakinn vanh manpha a dang pawlkhatte nusia hi.)

²¹“Jerusalem khuasung Biakinn sung le kumpi inn sungah a ki nusia vanh manphate taw kisai in Keima, Vaanglianbelpa Topa Israel te ii Pathian ii ka sonte ngai vun:

²²Tuate sia Babylon ah kipua tu a, ka kat mateng in tua munah om suak tu hi. Tua zawkciang tuate ka la kik tu a hi munah ka koi kik tu hi. Keima, Topa in ka ci zo hi,” ci in ka son hi.

Jeremiah 28

Jeremiah le Kamsang Hananiah

¹Zedekiah kumpi a sua zawk a kum lina a tha ngana tua kum ma in Gibeon khua mi Azzur ii tapa kamsang Hananiah in Biakinn sungah kei hong paupui hi. Thiampite le mipite om honna ah ama in keima tungah,

²Vaanglianbelpa Topa, Israel te ii Pathian in “Babylonia kumpipa vaangletna ka susia zo hi.



³Nebuchadnezzar Kumpipa ii Babylonia khua ah a paipui Biakinn vanh manphate theampo kum nii sungin hi munah ka ciapui kik tu hi.

⁴Keima in Judah Kumpipa, Jehoiakim ii tapa Jehoiachin zongh Babylonia ah saltang a, a pai Judah mite theampo taw ka sam kik tu hi. Hi hi. Keima in Babylonia kumpipa vaangletna ka susia tu hi. Keima, Topa in ka ci zo hi,” ci in hong son hi.

⁵Tuasia ciang thiampite le Biakinn sungah a ding mipite theampo ii mai ah, Keima in Hananiah tungah,

⁶“Lamdang hi! Topa in hi bangin seam taken! Topa in na sonkhol sia tangtungsak tu a, salin a kikai mihing theampote le Biakinn vanh manphate theampo Babylon panin hong ciapui kik tu hi ci in ka um takpi hi.

⁷Ahihang na tung le mipite tungah ka son thu sia ngai in.

⁸Nang le kei ii om ma a a om, taanghlai a thuson kamsangte in minam tam mamate tung le a thahat a vaanglian kumpi ukna ngam liante tungah ngal, kialpi le natna theng tu hi ci in sonkhol zo uh hi.

⁹Ahihang kilemna le thinnopna hong theng tu hi ci a son khol kamsang pa sia, ama ii sonkhol nate a tangtung takpi ahile Pathian ii sawl tatak kamsang hi ci in kisaang thei pheang tu hi,” ka ci hi.

¹⁰Tuasia ciang Hananiah in ka ngawng pan hakkol hong la in a bebek in thiaktan hi.

¹¹Tuaciang ama in mipi mai ah, “Nebuchadnezzar Kumpipa ii minam theampote ii ngawng ah a bul hakkol sia hi bangin ka thiaktan tu hi Topa in ci hi; tuaciang ama in hi nasep sia kum nii sung sang seam tu hi,” ci in son hi. Tuaciang ka nusia hi.

¹²Hisia zawk tawmvei ciang Topa in keima tungah,

¹³Pai in na Hananiah kungah son tan: “Topa in, thing hakkol khat sia thiaktan zo peu tu ni hi, ahihang thik hakkol khat taw ka lai tu hi, ci hi.



¹⁴Vaanglianbelpa Topa, Israel te ii Pathian in hi minamte theampo tungah thik hakkol ka bul tu a, amate in Babylonia Kumpipa Nebuchadnezzar ii na seam tu uh hi, ci hi. Topa in ngamsate ngangawn in Nebuchadnezzar ii na ka seamsak tu hi, ci hi,” hong ci hi.

¹⁵Tuaciang Hananiah tungah hi thu ka son a, hi bangin belap in, “Ngai in, Hananiah awng! Nang sia Topa ii hong sawl na hi bua hi. Hi mihingte leilot thu na umsak hi.

¹⁶Tua ahikom Topa ama mama in nang hong hep tu sia son hi. Tu kum bo ma in na thi tu hi, banghangziam cile Topa langpan tu in mipite na son zo hi,” ka ci hi.

¹⁷Tua kum tha sali tha in Hananiah thi hi.

Jeremiah 29

Babylonia ah a om Judah Mite tungah Jeremiah ii Laithak

¹Jerusalem khua panin Nebuchadnezzar in Babylonia khua ah salin a paipui thiampite, kamsangte, mihonte ii lampuite le a dangte theampo ii tungah lai khat ka thaak hi.

²Hi lai sia Jehoiachin Kumpipa, a nu, kumpi innsung a ukte, Judah ngam lampuite le Jerusalem khuapuite, khut thiamte le naseam thiamte a saltanna munah a kipaipui zawkciang ka at ahi hi.

³Tua lai sia Judah Kumpipa Zedekiah ii Babylonia Kumpipa Nebuchadnezzar tungah a thaak hi a Shaphan ii tapa Elasah le Hilkiyah ii tapa Gemariah khut tungah ka pia hi. Tua lai sungah,

⁴“Vaanglianbelpa Topa Israel ii Pathian in Jerusalem panin Babylonia ah Nebuchadnezzar ii salin a paipuisak mihingte theampo tungah hi bangin ci hi.

⁵Inn sa vun a teang vun. Huan vawt vun a, a sungah na ciin uhte ne vun.

⁶Kiteang vun a ta nei vun. Ama te zongh ta a nei thei natu in na tate uh zongh kiteangsak vun. Na pungto tu uh a, na kiamsuk buatu uh hi.

⁷Sal a kong paisakna khuapite ii phattuam natu in naseam vun. Amate taangin ka tungah thu ngen vun, banghangziam cile amate a nuamsa uhle no zong na nuamsa tu uh hi.

⁸Note sungah a teang kamsangte hi kale maisang thu ka son khol thei hi a ci midangte in hi kale na theamsak ngawl natu in Keima, Topa Israel ii Pathian in note kong hilkhol hi. Amate ii mangte na thudon heak vun.

⁹Amate in ka min taw no tungah leilot thu hong son uh hi. Amate ka sawl bua hi. Keima, Vaanglianbelpa Topa in ka ci zo hi,' ci hi.

¹⁰“Topa in, ‘Babylonia ah na om zawk uh kum sawmsali a cin ciang no atu a kong thin nopmawkna kong lak tu a, ka kamciam babang a tangtung tu in na khua na tui uh ah na cia kik tu uh hi.

¹¹No atu in tupna ka neite, siat natu hi ngawlin mi nuamsa vaial na sua natu uh tupnate, no mai sangah lametna kong piak tu tupnate keima bek in ka he hi.

¹²Tuaciang kei nong sam tu uh hi. Ka kungah pai in thu nong ngen tu uh hi. Tuaciang kong zo tu hi.

¹³Kei nong zong tu uh a, nong mu tu uh hi. Banghangziam cile na thin sung theampo uh taw nong zon tu uh hang ahi hi.

¹⁴Hi hi, Kei nong mu tu uh a, na ngam uh ah kong koi kik tu hi, ka ci hi. Note kong thethaangna ngam theampo le mun theampo panin kong kaikhawm kik tu a, saltang a kong puak ma na omna mun ah kong ciapui kik tu hi. Keima, Topa in ka ci zo hi,' ci hi.

¹⁵“Topa in Babylonia ah kamsangte note hong pia hi, ci nu hi.

¹⁶David ukna ngam a uk kumpipa le hi khuapi sungah a om mihingte, noma taw saltang tu a, a pai khawm ngawl na bete uh taw kisai in Topa thusonte ngai vun.

¹⁷Vaanglianbelpa Topa in, ‘Keima in amate tungah ngal, kialpi le natna ka thengsak tu a, amate sia a kine thei ngawl theinga muat bang ka hisak tu hi.



¹⁸Ngal, kialpi le natna taw amate ka zuizen tu a, leitung mite theampo in tuasia a mu uh ciang lau tu uh hi. Mun theampo ah amate ka thethaang tu a, amate ii thuakna hangin mihingte in ingh in lau tu uh hi. Mihingte in amate ciammuina in nei tu uh a, a min uh sia haamsiatna in zangh tu uh hi.

¹⁹Hi thu sia amate tungah tung tu hi, banghangziam cile amate in ka naseam kamsangte tungtawn a ka puak tawtung ahi ka thute a nit ngawl uh hang ahi hi. Amate in ngai nuam ngawl uh hi.

²⁰Babylonia khua ah saltang in kong puak note theampo awng, Keima, Topa ii ka son sia ngai vun,' ci hi.

²¹“Vaanglianbelpa Topa, Israel ii Pathian in, ama min taw no tungah leilot thu hong son Kolaiah ii tapa Ahab le Maaseiah ii tapa Zedekiah ii thu son zo hi. Topa in amate sia Babylonia Kumpipa Nebuchadnezzar khut sungah aap tu a, Babylonia kumpipa in noma mu tang ma in thatlum tu hi, ci zo hi.

²²Jerusalem pan Babylonia ah saltang a, a kipuak mihingte in khat pawpo a haamsiat nop uh ciang amate in, ‘Babylonia Kumpipa ii a hingtang a meisung a em Zedekiah le Ahab bangin Topa in nang hong vawt taken,’ ci tu uh hi.

²³Hi bangin a thuak tu ma uh hi, banghangziam cile amate in khialna liante vawt uh hi— nupa palngul nate vawtin Topa ii min taw leilot thute son uh hi. Hi thu sia Topa ii dei ngawl ahi hi; amate ii vawt theampo ama in he hi. Ama sia amate ii langpang tetti ahi hi. Topa in ci zo hi,” ci in ki at hi.

Shemaiah ii Laithak

²⁴⁻²⁵Vaanglianbelpa Topa, Israel ii Pathian in Nehelam mi Shemiah tungah thu khat son tu in hong sawl hi. Shemaiah in ama min mama taw in Jerusalem khua mite theampo tung le Maaseiah ii tapa thiampi Zephaniah tung le thiampi dangte theampo ii tungah lai khat thaak hi. Zephaniah tungah a thaak hi lai sungah: Shemaiah in,

²⁶“Topa in Jehoiada taangin nangma thiampi in hong koi zo hi, tua ahi ciang tu in nang sia Biakinn sungah a lian bel na hi hi. Kamsang khat in a kivawt



tawm mihing mawmaw pawpo a ngawng ah thikkol na bul tu sia nangma nasep ahi hi.

²⁷Banghangin mihonte tungah kamsang khat bang a thu a son Anathoth khua mi Jeremiah tungah hi bangin vawt ngawl ni ziam?

²⁸Ama sia thu sonsak tu hi nawn ngawl hi, banghangziam ci le ama in Babylonia ah a om mipite tungah, tua munah khua ngei ma sal na tang tu uh a, inn na sa tu uh hi, teangin huan na vawt tu uh a, na ciin uhte na ne tu uh hi, a ci hang ahi hi,” ci hi.

²⁹Zephaniah in tua laithak ka tungah hong sim hi,

³⁰Tuasia ciang Topa in,

³¹⁻³²Shemaiah ii thu taw kisai in Babylon ah thongtaakte theampo tungah hi thu puak in ci in kei hong sawl hi. “Keima, Topa in, Shemaiah le a suan a paalte theampo daan ka pia tu hi. Ama in ka sawl ngawl bulin kamsang khat bangin no tungah thu hong son in leilot thu note in hong umsak uh hi. Ama in no sungah suan le paal nei ngawl tu hi. Ama in ka mite atu in a pha ka vawt tu nate mu tu in nungta ngawl tu hi. Banghangziam cile ka mite ii keima hong langpan natu in ama in sawl hi. Keima, Topa in ka ci zo hi,” hong ci hi.

Jeremiah 30

A Mite tungah Topa ii Kamciam

¹Topa, Israel mite ii Pathian in,

²keima tungah, “Kong son theampo laibu khat sungah at in,

³banghangziam cile Israel le Judah ka mite, a ngam ka piak kik tu hun hong theng tu hi. A taangpupite tungah ka piak sa ngamah ka heak kik sak tu a, amate in tua ngam tang kik tu uh hi. Keima, Topa in ka ci zo hi,” hong ci hi.

⁴Topa in Israel le Judah mite tungah,

⁵“Launa le, patauna aw khat ka za a, thinnopna aw ka za bua hi.



⁶Tu in tawlnga in ngaisun vun! Pasal in nau nei thei ziam? Tua ahile banghangin pasal sim in numei nautun bangin a ngil hum ziam? Banghangin a kuama po a mai daang ziam?

⁷A lauhuai mama ni khat hong theng tu a; nidang taw kitee thei ngawl tu hi— ka mite ii ngimna thuk hun hi tu a, ahihang amate suakta veve tu uh hi,” ci hi.

⁸Vaanglianbelpa Topa in, “Tua ni hong thet ciang, a ngawng uh ah a kibul hakkol ka thiaktan tu a, a thikkolte ka vawk tu hi. Amate in ngamdang mite ii sal hi nawn ngawl tu hi.

⁹Amate in Topa a Pathian le, kumpi ka suasak tu David ii suan le paal khat ii na seam zaw tu uh hi.

¹⁰“Ka mite awng, lau heak vun; Israel mite awng, patau heak vun. Ngam khualana na saltanna ngam uh panin kong suatak tu hi. Na ngam uh ah nong cia kik tu uh a, thin nuam takin na teang tu uh hi; na thin uh muang tu a, kuama in no hong lausak ngawl tu hi.

¹¹Note kungah kong pai tu a kong ngum tu hi. Kong thethaangna ngam mite theampo ka susia tu a, ahihang no kong susia buatu hi. Daan thuk ngawlin no kong omsak buatu hi; ahihang daan kong piak ciang, a kilawm in kong pia tu hi. Keima, Topa in ka ci zo hi,” ci hi.

¹²Topa in a mite tungah, “Na meimate uh dam thei ngawl a, Na liammate uh kidamsak thei ngawl hi.

¹³No hong ou tu kuama om ngawl a, Na meima uhte bawl natu zatui om ngawlin, na dam tu uh sia muanmawk om ngawl hi.

¹⁴Na it uh na lawmte theampo in no hong mangil zo a; amate in no hong thusim nawn ngawl hi. Keima in note sia ngal khat bangin kong sim a, na mawna uh tam mama a, na ngitlona uh lian ahikom na daan thuk uh nasia mama hi.



¹⁵Na liamma uh hangin phuphun nawn heak vun; Na dam natu om ngawl hi. Na khialna uh tam mama a, na ngitlona uh lian ahikom hi bangin daan kong pia hi.

¹⁶Ahihang tu in no hong valhtumte theampo kivalhtum tu a, na ngalte uh theampo salin kikai tu uh hi. No hong zawthawk vawtte theampo kizawthawk vawt tu a, no hong suamte theampo kisuam tu hi.

¹⁷No kong damsak kik tu hi; Na ngalte in, ‘Zion sia a kipuavawk sa khat hi a, kuama in awlmaw ngawl uh hi,’ ci ahitazong na meima uhte ka damsak tu hi. Keima, Topa in ka ci zo hi,” ci hi.

¹⁸Topa in, “Ka mite a ngam ka pia kik tu a, a innkuan simin hesuakna ka nei tu hi; Jerusalem khuapi kisa kik tu a, a kumpi inn sia a omna ngei ma ah kikoi kik tu hi.

¹⁹Tua munah a teang mihingte in pokna la sa tu uh a, lungdam in au tu uh hi. Ka thupha piakna taw amate pung tu uh a, ka thupha piakna in amate upatna ngasak tu hi.

²⁰Nidang a, a nei vaangletna ka pia kik tu a, kip takin ka phut kik tu hi; amate a vawtsiate theampo daan ka pia tu hi.

²¹⁻²²Amate a uk tu sia amate ii minam sung pan ma in hong pai tu a, amate kumpi tapa sia amate minam sung pan ma in hong pai tu hi. Ka sam ciang ama in kei hong neak tu hi, banghangziam cile sam ngawlin akua hong pai ngam tu ziam; Amate sia ka mite hi tu uh a, keima in amate ii Pathian ka hi tu hi. Keima, Topa in ka ci zo hi,” ci hi.

²³⁻²⁴Topa ii thin uukna in vuipi nguapi hi a, mi ngilote lu tungah puaktham tu hi. Vawt tu in a tup theampo a tangtun siat mateng in ama tawlnga ngawl tu hi. Maisang hunah a mite in hi thu telthiang tu uh hi.

Jeremiah 31

Israel te ii Inn ah A Cia kikna

¹Topa in ci hi, “Israel minamte theampo ii Pathian ka hi hun hong theng tu a, amate in ka mihingte hi tu uh hi.



²Thina pan a suakta tua mihingte senneal ngam sungah ka hesuakna ka lak hi. Israel mite a tawlngak nop uh ciang,

³A khualana pan amate kungah ka kilangh hi. Israel mite awng, no kong it tawntung a, tua ahikom kong it tawntungna kong lak tan tu hi.

⁴Khatvei ma kong pua kik tu hi. Khatvei ma na thikdaalkualte na la kik tu uh a, lungdam in na laam tu uh hi.

⁵Khatvei ma Samaria mual tungah sapit huan na vawt kik tu uh a, tua sapit huan a vawtte in Sapit huan pan a piangte ne tu uh hi.

⁶Hi hi, ngalvilte in Ephraim mualtung panin, ‘Zion ah ih TopaPathian kungah paito ka tawng’ ci in au in a sam tu hun hong theng tu hi.”

⁷Topa in ci hi, “Minamte sung panin a lianbel, Israel atu in lungdam in la sa vun Pokna la sa vun, ‘Topa in a mite ngum zo a; A taanglaite theampo suatak zo hi,’ ci vun.

⁸Keima in amatesaksang pan ka paipui tu a, leimong pan ka kaikhawm tu hi. Mittaw peangbaite, numei naupaaite le nausuak dektakte zongh amate taw hong pai tu uh hi, Amate sia minam lian khatin hong heak kik tu uh hi.

⁹Ka mite kap kawmin hong heak kik tu uh hi. Thungen kawmin amate ka heak kikipui tu hi. Tui omna lui ah amate ka paipui tu a, lamnuam totpui in amate lutu ngawl tu uh hi. Keima in Israel te ii pa khat bang ka hi a, Ephraim sia ka tapa lian bel ahi hi”.

¹⁰Topa in ci hi, “Minamte awng, hong ngai tavun a, ka kammalte a khuala na tuipei hui ah taangko vun. Ka mite ka thethaang hi, ahihang in amate ka kaikhawm tu a, tuucing pa in a tuuhon a kep bangin ka keam tu hi.

¹¹Israel mite ka suatak zo a, a thahat minam khat ii khutsung panin ka ngum zo hi.

¹²Amate hong pai in Zion mual tungah lungdam in la sa tu uh a, ka letsongte taw lungkim tu uh hi— Ka letsongte sia antang, zu, olive thau, tuu le khuite



ahi hi. Amate sia pha tak a, tui a kibuak husuan khat taw kibang tu a, amate in a kikap theampo nei tu uh hi.

¹³Tuaciang ngaknute laam tu uh a, lungdam tu uh hi, tuaciang pasal, khangmoi, khanghaam a thin uh nuam tu uh hi. Amate ka heeneam tu a, a kaana te thinnopna, a khuangai nate lungdamna ka suaksak tu hi.

¹⁴Thiampite anlim bel taw ka vaak tu a, ka mite ii a taangsap theampo ka pia tu hi. Keima, Topa in ka ci zo hi.”

Israel tungah Topa ii Hesuakna

¹⁵Topa in ci hi, “Ramah khua ah aw khat ki za a, thin nat tatakna taw kaana aw ahi hi. Rachel sia a tate atu in kap hi; a tate om nawn ngawl a, ama sia heenep tu uuk ngawl hi.

¹⁶Kap nawn heak in a, na thituite nawl in. Na tate atu in na sep theampo thaman nga ngawlin na om buatu hi; amate sia ngalte ii ngam panin hong heak kik tu uh hi.

¹⁷Na mai sang atu in lametna om hi; na tate inn hong zuan kik tu uh hi. Keima, Topa in ka ci zo hi.

¹⁸“Israel mite khuangai in a mau ka za hi, ‘Topa awng, ko sia a kizual ngawl nganhing khat bang ka hi uh hi, ahihang thu ni tu in kote nong hil hi. Ko hong ciapui kik tan; na kungah hong cia tu in kithoai khu hi, Topa kote Pathian awng.

¹⁹Nangma kung pan mundang ah ka pial uh hi, ahihang kong heak kik pai nuam uh hi. Daan nong piak zawkciangin khuangai in ka kun uh hi. Ka nolai a khialna ka vawt uh hu in maizum minpaan in ka om uh hi’.

²⁰“Israel awng, nang sia ka it bel ka tapa na hi a, ka it bel ka ta na hi hi. Na min ka law simin itna taw kong phawk hi. Nangma kong ngaisun tawntung a; kong hesuak tu hi.

²¹Lampi ah lamlaknate phutin lampi ciamtee in; na kipatna lampi zong kik in. Hong heak kik tavun, Israel mite awng, na nusiak uh khuate ah hong cia kik tavun.



²²Bangtan vei haisaang tu nu ziam? upna nei ngawl mihingte awng? A thak le a tumdang na pawlkhat ka bitphua zo a, numei khat in pasal khat a kep bangin tumdang hi”.

Pathian Mihingte ii Maisang Nopsak natu

²³Vaanglianbelpa Topa Israel ii Pathian in ci hi, “Mihingte a ngam ka piak kik ciang, Judah ngamsung le a khuapite sungah amate in hi bangin khatvei, ‘Topa in Jerusalem mual thiangtho, ama teenna mun thiangtho sia, thupha pia taken’ ci kik tu uh hi.

²⁴Judah ngamsung le a khuapite theampo ah mihingte teang tu uh a, lothote, tuucingte, a tuuhonte taw om tu uh hi.

²⁵A ngim mihingte a toi ka thaisak tu a, ngilkial a, a tha zawmte theampo an ka vaak tu hi.

²⁶Tuasia ciang mihingte in, ‘Lum in ka mu a, ka khanlaw a nuam hi,’ ci tu uh hi.

²⁷“Keima, Topa in Israel le Judah ngam sia mihingte le nganhingte taw ka dimhsak tu hun hong theng tu hi, ka ci hi.

²⁸Kidawm takin amate ka lokkeak, ka kaikeak, ka lotthal, ka suksiat le ka lalsak lai bangma in kidawm takin amate ka suan kik tu a ka sa kik tu hi.

²⁹Tua hun hong thet ciang, mihingte in, ‘A nu le a pate in sapit nga thuk ne a, a hihang a tate uh ii ha khim hi,’ ci nawn ngawl tu uh hi.

³⁰Tuabang hi zaw ngawlin, Sapit nga thuk a ne pawpo a hakhim tu a; a kuama po ama ii mawna hangin thi tu hi”.

³¹Topa in ci hi, “Israel mite le Judah mite taw thuciamna thak khat ka vawt tu hun hong theng tu hi.

³²Tua thuciamna sia a taangpupite a khut uh pan kai in Egypt ngam pan ka pusua pui lai a, a taangpupite taw ka vawt uh thuciamna lui taw kibang ngawl tu hi. Keima in amate ii a pasal bang hi napi ing amate in tua thuciamna zui ngawl uh hi.



³³Israel mite taw ka vawt tu thuciamna thak sia hi bang hi tu hi. Amate sung sangah ka thukham ka koi tu a, a lungtang tungah tuate ka at tu hi. Keima in amate ii Pathian ka hi tu a, amate sia ka mihingte hi tu uh hi.

³⁴Topa a heak natu uh in amate kuama in a ngam mipuite thu hil ngawl tu hi, banghangziam cile a nobel pan a lianbel dongin kei hong he siat tu uh hi. Keima in amate ii a khialnate ka maisak tu a, a khialnate ka ciamtee nawn buatu hi. Keima, Topa in ka ci zo hi”.

³⁵Topa in sunin khuavak taangsak tu in ni hong pia a, zan in a taang tu in tha le aksite hong pia hi. Ama in tuipei kihualsakin hawksak hi; ama ii min sia Vaanglianbelpa Topa ahi hi.

³⁶Khuahun paizia a kip lai theampo in, Israel sia minam khat in om tu hi ci in, kamciam pia hi.

³⁷Vantung a kitee thei ciang le leinuai a om leitaw dopphate a ki et thei ni khat ni ciang sia amate ii khialna a vawtnate theampo hu in ama in Israel mite nial pheang tu hi. Topa in ci zo hi.

³⁸Topa in ci hi, “Khuapi kingh Kongpi ii nitumna sangah a om Hananel Tausaang panin kipan Jerusalem khua buppi sia keima ii khuapi in a kisak kik tu hun hong theng tu hi.

³⁹Tuaciang ngamngi sia tua mun panin nitumna sang Gareb mual dong le Goah kiimkot teng hi tu hi.

⁴⁰Mithi phumna le ninteak kholna kuam buppi, le Kidron lui tungah lote theampo nisuana sangah om Siphu Kongpi ciang dong, keima a tu in mun thiangtho hi tu hi. Khuapi sia kipheltham kiskusia kik ngei nawn ngawl tu hi”.

Jeremiah 32

Jeremiah in Lo khat Lei

¹Topa in Zedekiah ii Judah kumpi a sua zawk kum sawm a cin kum, Kumpi Nebuchadnezzar zongh Babylonia kumpi a sua zawk kum sawm le kum liat a cin kum in kei hong paupui hi.



²Tua hunin Babylonia kumpipa ii ngalkapte in Jerusalem sim a, kumpipa innhuang sungah kei hong khacip hi.

³Zedekiah Kumpipa in kei sia tua mun a om thong sungah hong khum a, Topa ii son bang a ka son hu in kei hong mawsiat hi, Topa sonna pan, “Babylonia kumpipa in hi khuapi ka lasak tu a,

⁴Zedekiah Kumpipa suakta ngawl tu hi. Ama sia Babylonia kumpipa khut sungah ki aap tu a, ama taw maitang kimu in thuson tu hi.

⁵Zedekiah sia Babylonia ah ki paipui tu a, ama ka vil mateng tua munah om zii tu hi. Babylonia te a do hial zongin, zo ngawl tu hi. Keima, Topa in ka ci zo hi”.

⁶Topa in kei hong sonna panin,

⁷Ka pano Shallum ii tapa, Hanamel ka kungah hong pai tu a, Benjamin ngamsung Anathoth khua ah a lo sia hong lei tan, banghangziam cile a lei thei tu sung panin ka kinai pui bel ka mealheak nangma na om hi; ci in hong ngen tu hi, hong ci hi.

⁸Tuasia ciang, Topa ii ci bangma in, Hanamel sia ka omna zum huang sung, ka kungah hong pai in tua lo lei tu in kei hong sawl hi. Tua ahikom Topa in keima tungah hong son tatak zo hi ci sia ka he hi.

⁹Hanamel tung panin tua lo ka lei a, ama atu in sum ka toaitee hi; a manh sia nguntang sawm le sali tung hi.

¹⁰Thukimna lai vawtin letmat ka thu a, thu hong heak pui tu in tetti sam in, toaiteena taw sum ka toaitee hi.

¹¹Lo kileina lai nii ka vawt hi. Khat sia tazeik kitum ngawl a, a dang khat sia tazeik kitum hi. Keima kungah a nii ma in ka la a,

¹²Mahseiah ii tupa Neriah ii tapa Baruch tungah tua laite ka pia hi. Tua thukimna laite sia Hanamel le lo kilei thukimna lai a kivawt lai a, a thu hong heakpui tu letmat a thu tettite le zum huang sungah a to mihingte mai ah Baruch tungah ka pia hi.



¹³Amate theampo mai ah keima in Baruch tungah ka ci hi,

¹⁴“Vaanglianbelpa Topa Israel ii Pathian in, hi thukimna laite tazeik kitum sia hi kale a kitum ngawl sia hi kale a nii in la tu a, khua ngei a kikhom thei tu in leibeal sungah koi tu in nang thu hong pia zo hi.

¹⁵Vaanglianbelpa Topa, Israel ii Pathian in, hi ngam sungah a om innte lote le sapit huante kilei kik tu hi, ci hi”.

Jeremiah ii Thungetna

¹⁶Lo kileina lai sia Baruch tungah ka piak zawkciang thu ka ngen a,

¹⁷“Vaanglianpipa Topa awng, nangma in leitung le vantung sia na vaangletna le na thahatna taw na vawt a; nang atu in a haksa lei bangma om ngawl hi.

¹⁸Tul tam mamate tungah tawntung itna na lak zo a, ahihang a nu a pate ii khialnate hu in mihingte daan na pia si hi. Nangma in a lian le a vaang nei Pathian na hi a, Vaanglianbelpa Topa na hi hi.

¹⁹Nang in ngaisutna pha na nei a, naliante na vawt hi, mihingte ii a vawt theampo na mu a, amate ii sepna taw kizui in thaman na pia hi.

²⁰Nidang lai in Egypt ngamah nalamdang le a tumdang nate na lak a, tu ciang dongin Israel mite sung hi kale minam dangte theampo sungah hi kale na lak lai hi. Tua hu in mun theampo ah na minthang hi.

²¹Ih ngalte a patausak nalamdang le a tumdang nate lakna taw in Egypt ngam panin Israel na mite na paipui natu in na vaangletna le na thahatna na zangh hi.

²²A pu a pate tungah na kamciam sa bangma in, hi ngampha le leipha ngam sia amate na pia hi.

²³Ahihang amate in hi ngam hong theng a, ngam a lua uh ciangin na thupiak ni ngawl uh a, na thuhilna bangin ngamta ngawl uh hi; vawt tu a na thupiakte bang mama vawt ngawl uh hi. Tuasia hu in hi lalcipna theampo amate tungah na thengsak hi.



²⁴“Babylonia te in khuapi a laak natu in khuapi kiimkot ah leivum ciangin sim uh hi. Ngal, kialpi le natna in hi khuapi sia amate ii khutsung thengsak hi. Na son sate theampo a tangtun na mu thei hi.

²⁵Ahihang, khuapi sia Babylonia te in a la tu hi zo napi tettite mai ah lo lei tu a, thu hong pia sia Vaanglianpipa Topa nang mama na hi veve hi,” ka ci hi.

²⁶Tuaciang Topa in keima tungah,

²⁷“Keima in Topa ka hi a, minamte theampo ii Pathian ka hi hi. Kei atu in a haksa lei bangma om ngawl hi.

²⁸Hi khuapi sia Babylonia Kumpipa Nebuchadnezzar le a ngalkapte khut sungah ka pia tu a, amate in la in,

²⁹mei taw hal tu uh hi. A innkhum tung a Baal atu ngim namtui a halna le a dang pathian te atu zu a sunna mun ahi kei hong thin uuksak innte taw a vekpi in amate in halcip tu hi.

³⁰Amate tangthu a kipat pan kipanin Israel mite le Judah mite in ka thin hong nuamsak ngawl a, amate ii sepna vawtna hangin ka thin hong uuksak hi.

³¹Hi khua mite in tua khuapi asak ni pan kipan ka thin hong uuk sak a hong thangsiasak hi. Tua khua sia suksiat tu in ka khensat zo hi,

³²banghangziam cile Judah mite le Jerusalem khua mite in a kumpite le a lampuite, a thiampite le a kamsangte uh taw a sia a vawt uh hang ahi hi.

³³Amate in kei hong nungngat uh a, hil tawntung hi napi ing, hong ngai nuam ngawlin hong mang nuam ngawl uh hi.

³⁴Kei hong biak natu a, a kisa Biakinn sungah amate in a kiihuai milimte ngangawn koi uh a, Biakinn ninsak uh hi.

³⁵A tapa le a tanute Molech pathian tungah a biakpiak natu in amate in Hinnom Kuam ah Baal pathian biakna biaknataute vawt uh hi. Hi bang a vawt tu sia amate tungah thu ka pia bua hi. Tuabang nate a vawt tu uh le Judah mite a khialsak tu uh sia ka ngaisun tha ngei bua hi,” hong ci hi.



Lametna Kamciam

³⁶Topa Israel ii Pathian in kei tungah, “Jeremiah awng, mipite in, ngal kidona, kialpi le natna in hi khuapi sia Babylonia Kumpipa khut sungah thengsak tu hi ci uh hi. Tu in kong son tu thudang sia ngai in.

³⁷Ka thin uuk, ka thin sona taw in ka thethaangna ngamte theampo pan mihingte ka kaikhawm tu hi; hi munah ka ciapui kik tu a, thinmuang in hi munah ka teangsak tu hi.

³⁸Tua zawkciang amate in ka mite hi tu a, Keima in amate ii Pathian ka hi tu hi.

³⁹A nuntakna uh ah tupna khat bek ka pia tu hi: tua tupna sia amate ii phat natu le a suan le a paalte ii phat natu in, a tawntung Keima hong upat tu tupna ahi hi.

⁴⁰Amate taw a tawntung atu in thuciamna khat ka vawt tu hi. Amate atu in na pha ka vawtte ka tawlnga ngei buatu a, keima kung pan a puapial ngei ngawl natu in a thinsung theampo taw keima hong kiitak natu in ka vawt tu hi.

⁴¹Amate atu a na phate vawtna sungah nuam ka sa tu a, hi ngamah a tawntungin amate ka teangsak tu hi.

⁴²“Hi mihingte tungah hi siatna ka thetsak bangma in ka kamciam sa a phate theampo amate tungah ka tungsak tu hi.

⁴³Mihingte in, hi ngam sia mihing hi kale nganhing hi kale ii ten ngawl na senneal ngam bang hi tu a, tua ngam sia Babylonia te khut sungah kipia tu hi, ci uh hi. Ahihang hi ngam sungah a om lote khat vei kilei kik tu hi.

⁴⁴Mihingte in tua lote lei in lo kileina lai tungah min thu, tazeik tum tu a, tetti nei tu uh hi. Hi thu sia Benjamin ngam, Jerusalem kiim ah khuanote, Judah ngam khuapite le mualtung ngamah khuapite mualpeang ngamte le Judah thangsang ngamte ah piang tu hi. Keima in mihingte a ngam ah ka teangsak kik tu hi. Keima, Topain ka ci zo hi”.

Jeremiah 33



Lametna Kamciam Dang

¹Kumpi innhuang sungah thongtaak in ka om laitak in Topa ii thupuak sia ka kung hong theng kik hi.

²Leitung a bitphua, a vawt le a omna munah a koi Topa in keima hong paupui hi. A min Topa a kici ama in,

³“Nong sam uhle kong zo tu hi; na heak ngei ngawl lai a ki iimcip thu lamdang le thu tumdangte kong son tu hi.

⁴Keima, Topa, Israel ii Pathian in, Jerusalem innte le Judah ngam kumpi inn sia ngalte in kiim uum a, a sim hu in cimhtham tu hi ka ci hi.

⁵Mihing kimkhatte in Babylonte do tu uh hi, amate in ka thin uuk ka thangsiatna taw ka velvawk mithi luangte taw in innte dimsak tu uh hi. A mite ii ngamtat phat ngawl hu in hi khuapi ka nungngat zo hi.

⁶Ahihang hi khuapi le a mite a ci ka damsak kik tu hi, cidamna amate ka pia kik tu hi. Amate a kicing thinnopna le thinmuanna ka lak tu hi.

⁷Judah mite le Israel mite ka nuamsasak tu a, nidang a om ngei bangin ka pua kik tu hi.

⁸Keima tungah hong vawt khialnate panin ka thiansua tu a, amate ii khialnate le hong langpan nate ka maisak tu hi.

⁹Jerusalem sia kei atu in lungdamna, pokna le kisuantaakna ii kipatna hi tu a; leitung ah minam om theampo in, Jerusalem atu a thupha ka vawtnate le hi khuapi atu a nopsakna hauna ka piakna thute a zaak uh ciang, lau in liing tu uh hi,” ci hi.

¹⁰Topa in, “Mihingte in hi mun sia, mihing zongh nganhing zongh ii teen ngawl na kongaw ngam taw kibang hi ci uh hi. Amate cibang hi peu hi; Judah khuate le Jerusalem khua lampite awngthong a; tua munah mihing zongh nganhing zongh teang ngawl hi. Ahihang hi munte ah,

¹¹lungdamna, nopsakna le mopoai lungdam a auna awte na za kik tu uh hi. Mihingte in ka Biakinn ah lungdamko biakpiakna pia in la a sak na za tu uh hi; amate in, ‘Vaanglianbelpa Topa tungah lungdamko vun, banghangziam



cile ama pha a, ama hong itna kip tawntung hi,' ci tu uh hi. Hi ngambup sia ni dang bangma in ka nuamsasak kik tu hi. KeimaTopa in ka ci zo hi,," ci hi.

¹²Vaanglianbelpa Topa in, "Mihing nganhing teang ngawl a kongaw ngam bang ahi, hi ngam sungah nganno thana tu mun om kik tu a, tua munah tuucingte in a tuu uh cing tu uh hi.

¹³Mual tungah khuapite, mualnuai, Judah ngam thangsang, Benjamin ngam sung, Jerusalem kiim a khuate le Judah ngam sung khuapite ah, tuucingte in a tuute uh khatvei a phak za sim kik tu uh hi. Keima, Topa in ka ci zo hi," ci hi.

¹⁴Topa in, "Israel le Judah mite tungah kamciam ka vawt sia, ka tangtunsak tu hun hong theng tu hi.

¹⁵Tua hun ciang David ii suan le paal sung pan thumaan thutang khat kumpi in ka teal tu hi. Tua kumpipa in ngam sung theampo ah thudik le thutang in naseam tu hi.

¹⁶Judah mite le Jerusalem mite sia kisuatak tu a, thin muangin teang tu uh hi. Tua khuapi sia 'Topa, Eite Kingupna' kici tu hi.

¹⁷Keima, Topa in, Israel kumpi tu in David suan le paal ahi tawntung tu le,

¹⁸Levi minam sung pan meihal biakpiaknate, antang taw biakpiakna le biakpiakna dadangte piakna ah ka na a seam tu in, thiampite om tawntung tu hi ci sia kong kamciam hi," ci hi.

¹⁹Topa in keima tungah,

²⁰"Amate ii hun tek valian ah hong pai tawntung thei natu in sun hun taw thuciamna zan hun taw thuciamna ka vawt zo hi; tua ahi ciang tua thuciamna kiphel tan thei nawn ngawl hi.

²¹Tuasia bangma in ka naseam David taw, a suan a paal sung panin kumpi tu khat a nei tawntung natu in thuciamna khat ka vawt zo hi; Levi minamte sung pan a thiampite taw zonghin, ka na hong sepsak tawntung natu in kiciamna khat ka vawt zo hi; tua thuciamnate kiphel tan thei nawn ngawl hi.



²²Van ah aksite le tuipei vaal ah sennealte a kisim zawk ngawl bangma in amate sim zawk ngawl ahi natu in Keima in ka naseampa David ii suan le paalte le Levi minam sung panin thiampite ka pungsak tu hi,” hong ci hi.

²³Topa in keima tungah,

²⁴“Ka teal sa innkuan nii, Israel le Judah keima in nusia zo hi ci a mihingte ii a son uh sia na phawk ziam? Tua ahikom amate in ka mite zawngsak in minam khat in ngaisun nawn ngawl uh hi.

²⁵Ahihang Keima, Topa in, sun le zan taw thuciamna khat ka vawt zo a, leitung le vantung a uk thukhamte ka vawt zo hi.

²⁶Hi nate ka vawt takpi bangma in, Jacob ii suan le paalte le ka naseam David taw ka vawt thuciamna sia ka len nginge tu hi. Abraham, Isaac le Jacob ii suan le paalte a uk tu in David ii suan le paalte khat ka teal tu hi. Ka mihingte ka hesuak tu a, amate ka nuamsa sak kik tu hi,” hong ci hi.

Jeremiah 34

Zedekiah atu Thupuak

¹Babylonia Kumpipa Nebuchadnezzar le a ngalkapte le a khutnuai ah a om minam theampote ii ngalkapte in hu a Jerusalem le a naina a om khuapite a sim uh lai in Topa in keima hong paupui hi.

²TopaIsrael ii Pathian in Judah Kumpipa Zedekiah kungah pai in hi bangin son tan, “Keima, Topa in hi khuapi sia Babylonia kumpipa khut sungah ka aap tu a, ama in haltham tu hi.

³Na suakta buatu hi; hong kiman tu a, ama tungah hong ki aap tu hi. Nangma in ama taw maitang kisi in na kipaupui tu uh hi, tuaciang Babylonia khua ah na pai tu hi.

⁴Zedekiah awng, nangma taw kisai thu kong son sia ngai in. Nang sia ngal sungah hong kithatlum ngawl tu hi. Thin nuam takin na thi tu hi.

⁵Nangma mai ah kumpite ahi, na taangpupite a kiphum uhciang mihingte ii ngim namtui a hal bangma amate in nang atu in ngim namtui hal tu uh hi.



Amate in, ‘Ih kumpipa thi zo thong ee!’ ci in nang hong kaa tu uh hi,.
Keima, Topa in ka ci zo hi” ci in keima hong sawl hi.

⁶Tuaciang hi thu sia Jerusalem khua ah om Zedekiah Kumpipa kungah ka puak hi.

⁷Tua laitak hun sia Babylon kumpipa ii ngalkapte in tua khuapi a sim laitak ahi hi. Ngalkapte in Judah ngam sungah a taanglai kulh taw ki uum khuapi dang ahi Lachish le Azekiah zongh sim uh hi.

Salte Theamna

⁸⁻⁹Zedekiah Kumpipa le Jerusalem mite in, pa ahizong numei ahizong Hebrew a mipui salte tha in, kuama in Israel a mipuite salin a nei nawn ngawl natu in thukimna khat vawt uh hi.

¹⁰Mipite le a lampui uliante in a salte a suatak tu uh le sal a, a kai kik nawn ngawl natu thukim uh hi. Amate in a salte suatak uh hi.

¹¹Ahihang nungsang ciang amate in a thin uh kheal kikin, la kik uh a, sal ma in kai kik uh hi.

¹²Tuaciang Topa

¹³Israel te Pathian in, mipite tungah thuson tu in keima hong sawl na pan in, “Keima in na taangpupite uh a saltanna Egypt ngam pan ka suatak lai in amate taw thuciamna khat ka vawt hi.

¹⁴Hebrew sal khat pawpo in kum luk sung na na uh hong sepsak zawkciang a kum salina sungah ama na suatak tu uh hi ci in amate tungah ka son hi. Ahihang na taangpupite in ka thu hong nadon bua uh a ka sawl bang hong mang bua uh hi.

¹⁵Tunung hiat ma in na thin uh na kheal uh a, nong lungkimsak uh hi. Na vekpi ma in Israel na mipuite sia suataksak tu na thukim uh a, keima hong kibiakna Biakinn sung keima mai ah thuciamna khat na vawt uh hi.

¹⁶Ahihang na thin uh na kheal leleau uh a, ka min nong daisak uh hi. Amate ii uukna bang a na suataksak sa uh salte note theampo in na la kik uh a, salin na kai kik uh hi.



¹⁷Tua ahikom Keima, Topa in ka thu nong ni bua uh hi kong ci hi; Na Israel mipuite suatakna na pia bua uh hi. Tua ahile pha mama hi, suatakna kong pia tu hi. Tua suatakna sia ngal, natna le kialpi taw thina hi tu hi. No tungah kong vawtna taw leitung mite theampo ka lausak tu hi.

¹⁸⁻¹⁹Judahte le Jerusalem uliante, kumpi inn sungah uliante taw, thiampite, le lampuite theampo in, amate ii tum nii a sua khuital khat ii phel niite kilaklaw ah lampaina taw in keima taw thuciamna khat vawt uh hi. Ahihang amate in tua thuciamna palsat in thuciamna sung thu omte mang ngawl uh hi. Tua ahikom amate ii khuital tung a vawt bangin tua mihingte tungah ka vawt tu hi.

²⁰Amate sia amate a thatlum nuam a ngalte ii khut sungah ka aap tu a, a luangte sia vacimte le ngamsate in ne tu uh hi.

²¹Judah ngam Zedekiah Kumpipa le a uliante zongh amate a thatlum nuamte ii khut sungah ka aap tu hi. Amate sia noma hong simna pan a tawlna Babylon ngalkapte khut sungah ka aap tu hi.

²²Keima in thu ka pia tu a, hi khuapi ah amate hong heak kik tu uh hi. Amate in tua khuapi sim in, la in, mei taw haltham tu hi. Keima in Judah ngam khuapite sia kuama ii ten ngawlina kongaw ngam khat bang ka suaksak tu hi. Keima, Topa in ka ci zo hi,” hong ci hi.

Jeremiah 35

Jeremiah le Rechab Mite

¹Josiah ii tapa Jehoiakim sia Judah ngam ah kumpi a sep lai in, Topa in keima tungah,

²“Rechab ii be le phungte kungah pai tan a paupui tan. Tuaciang Biakinn sung khan khat ah amate paipui in zu pia in,” hong ci hi.

³Tuaciang Rechab ii be le phungte a vekpi in (Habazziniah ii tapa ahi a dang Jeremiah ii tapa) Jaazaniah le a suapuate theampo le a tapate theampo

⁴Biakinn ah ka paipui hi. Igdaliah ii tapa kamsang Hannan ii nungzuite khan sungah amate ka paipui hi. Hi khan sia Biakinn sungah thunei khat ahi,



Shallum ii tapa Maaseiah ii khan tungah om a, thunei dangte ii khante taw zong kinai hi.

⁵Tuaciang zu taw a kidim hai le pakante sia Rechad mite mai ah ka lui a, amate tungah, “Zu ne vun,” ka ci hi.

⁶Ahihang amate in, “Zu ne ngawl khu hi. Ka taangpupi uh Rechad ii tapa Jonadab in eima ih hizong ih suan ih paalte ahizong zu peuma ih ne ngei bahet tu hi hong ci hi.

⁷Ama in inn sa heak vun, lotho heak vun, lo zongh lei heak vun, sapit huan vawt heak vun hong ci lai hi. Khualmi bangin hi ngam sungah ka ten suak thei natu uh in thaampheang sungah ka ten tawntung natu uh in ama in kote thu hong pia hi.

⁸Jonadab ii kote thu hong piakte theampo ka zui uh hi. Koma mama in zu ka ne ngei bua uh a, ka zite ka tapate, ka tanute uh zongh in a ne ngei bua uh hi.

⁹⁻¹⁰Ten natu in inn la ka sa bua uh a, thaampheang buk sungah teangin sapit huante, lote, ahibuale antang zongh ka nei bua uh hi. Kote taangpupi Jonadab ii hong sawl theampo ka seam siat uh hi.

¹¹Ahihang Nebuchadnezzar Kumpipa in hi ngam a sim ciang Babylonian le Syria ngalkapte taw a kipial thei tu in Jerusalem khua zot tu ka khensat uh hi. Tua hu in Jerusalem ah ka teang uh hi,” ci in zokik uh hi.

¹²⁻¹³Tuaciang Vaanglianbelpa Topa, Israel ii Pathian in, pai tan a Judah mite le Jerusalem mite tungah son tan ci in keima hong sawl hi, “Keima, Topa in, banghangin ka thu ngai nuam ngawl a kong thupiakte mang nuam ngawl nu ziam? ci in no kong dongh hi.

¹⁴Zu neak ngawl natu in Jonadab ii thupiak sia a tu a tate in zui uh a, tuni ciang dong kuama in ne ngawl hi. No tungah kong sason hangin, ka thu nong ni bua uh hi.

¹⁵Ka naseam kamsangte theampo sia no kungah kong sawl tawntung zo a, na ngamtatna a siate na kheal natu uh le a maan nasep natu uh amate in note



hong son zo uh hi. Noma le na taangpupite tungah kong piak sa ngam sungah na ten top thei natu uh in, pathian dang na biak ngawl natu uh le a na nasep ngawl natu uh in amate in na kidop natu uh thu hong hil khol hi. Ahihang note in ka thu nong ngai nuam bua uh a nong thusim bua uh hi.

¹⁶Jonadab ii tu le tate in a taangpupite ii thupiakna mang uh hi, ahihang note in ka thu nong mang bua uh hi.

¹⁷Tua ahikom tu in, Keima, Vaanglianbelpa Topa, Israel ii Pathian in, no Judah mite le Jerusalem mite tungah ka kamciam sa siatna theampo kong tungsak tu hi. Hi bangin note tungah kong thengsak tu hi, banghangziam cile note tungah kong thusonte nong ngai bua uh a, kong sam ciang nong zo bua uh hi,” hong ci hi.

¹⁸Tuaciang, Vaanglianbelpa Topa Israel ii Pathian in hi bangin ci hi, “Na taangpupi Jonadab ii hong thupiak sia na mang zo uh a, hong thuhil nate theampo zui in hong sawl theampo na seam zo uh hi.

¹⁹Tua ahikom, Keima, Vaanglianbelpa Topa, Israel ii Pathian in Rechad ii tapa Jonadab in keima ii naseam tu in suan le paal pa khat tatsat ngawlin nei tawntung tu hi ci in kong kamciam hi,” ci in Rechad be le phungte ka son hi.

Jeremiah 36

Baruch in Biakinn sungah Laizial Sim

¹Josiah ii tapa Jehoiakim ii Judah ngam kumpi a sua zawk a kum li kumin, Topa in keima tungah,

²“Laizial khat la in a tua tungah Israel le Judah le minam theampote ii thu kong sonte at in. Josiah kumpi a sep lai in, na tungah kong son masak phit pan kipan tuni dong kong sonte theampo at in.

³Judah mite in amate tungah tungsak tu a ka sawm siat natu thute theampo a zaak uh ciang, a sia a ngamtatnate panin kikheal kik tha tu uh hi. Tuasia ciang a ngitlona uh le a khialnate ka maisak tu hi,” hong ci hi.

⁴Tuasia ciang Neriah ii tapa Baruch samin Topa ii ka tungah hong sonte theampo at tu in ka khaw hi. Tuaciang Baruch in laizial sungah at siat hi.



⁵Tuaciang keima in Baruch tungah a nuai ah thuhilnate ka pia hi. “Keima in Biakinn sungah pai thei natu thu ka nga nawn bua hi.

⁶Tua ahikom mipite ii antan kik hun ciangin tua munah nangma pai lete kong oai hi. Topa in ka tungah hong sonte theampo le keima ii nang tungah kong khawte amate ii a zaak thei tu uh in nangma in tua laizial sia nging takin na sim tu hi. Mihing theampo le a khua tek pan hong pai Judah mite ii a zaak thei natu mun ah sim in.

⁷Topa in a thin uukna lian mama le a thin sona taw hi mihingte thawmvau zo ahikom amate in Topa tungah thu ngenin, a siatnate panin kikheal thei tha tu uh hi,” ka ci hi.

⁸Tuaciang Baruch in ka sawl bang tatak ma in Biakinn sungah Topa ii kammalte sim hi.

⁹Jehoiakim ii Judah kumpi a sep zawk a kum nga kum, a tha kua tha in mihingte in Topa ii maipha piak tu a dei manin antang uh hi. Jerusalem khua ah a teang mite theampo le Judah ngam khuapite pan hong pai mihingte theampo in antang uh hi.

¹⁰Tuaciang mihingte theampo in thu a ngai laitakin, laizial sungah a kikhum ka thusonte theampo Baruch in sim hi. Biakinn sung, Shaphan ii tapa zum thuzeakpipa Gemariah ii khan panin Baruch in sim hi. Ama khaan sia Biakinn Kongpi Thak tumna taw a kinai a khan tung dawl ah om hi.

Upate tungah Laizial Kisim

¹¹Baruch in Topa ii kammal laizial sung pan, a sim sia Gemariah ii tapa Shaphan ii tupa Micaiah in za hi.

¹²Tuaciang Micaiah sia kumpi innsung thuzeakpipa ii zum khan ah uliante vaihawm kikhop laitakin pai hi. Zum thu zeakpipa Elishama, Shemaiah ii tapa Delaiah, Achbor ii tapa Elnathan, Saphan ii tapa Gemariah, Hananiah ii tapa Zedekiah le a dang uliante theampo tua munah om uh hi.

¹³Baruch in mipite tungah a sim thute Micaiah in a zaak theampo amate tungah son hi.



¹⁴Tuaciang uliante in Jehudi (Nethaniah ii tapa, Shelemiah ii tupa le Cushi ii tuselawn) sia Baruch kungah, mipite tungah a sim laizial sia hong paipui tu in son tan ci in sawl uh hi. Baruch in tua laizial sia amate kungah paipui hi.

¹⁵“To in a tua laizial sia ko hong sim tan” amate in ci uh hi. A ci bangin Baruch in sim hi.

¹⁶Baruch in tualai a sim zawkciang amate patau in khat le khat ki en in, “Kumpipa tungah hi thu ka son uh kul tu hi,” Baruch tungah ci uh hi.

¹⁷Tuaciang, “Tu in hong son tan, hite theampo bangbangin at thei ni ziam? Jeremiah in hong khaw ziam?” ci in amate in Baruch dongh uh hi.

¹⁸Baruch in, “Jeremiah in kammal khat zongh khe ngawlin kei tungah hong khaw a, keima in hi laizial tungah laitui taw ka at hi,” ci in zo hi.

¹⁹Tuaciang amate in Baruch tungah, “Nang le Jeremiah sia na buk uh kul tu hi. Na omna uh kuama in hesak heak vun,” ci uh hi.

Kumpipa in Laizial Hal

²⁰Uliante in tua laizial sia zum thuzeakpipa, Elishama khan sungah koi in, kumpipa ii khan ah pai in tua munah a thu a vekpi in kumpipa tungah ko uh hi.

²¹Tuasia ciang tua laizial la tu in kumpipa in Jehudi sawl hi. Ama in Elishama ii a khan panin tua laizial sia la a, kumpipa le kumpipa ii kiim ah a ding uliante theampo ii tungah sim hi.

²²Tua hun sia phalbi hun lai hi a, kumpipa sia a phalbi inn sungah mei oai in to hi.

²³Jehudi in khawk thum khawk li bang a sim zawk po ciang, kumpipa in namno khat taw tua laizial attan in meikhuk sungah thut hi. Laizial buppi a kaktum dongin ama in meikhuk sungah thut hi.

²⁴Ahihang kumpipa ahizong hi thute theampo a za siat a khut nuai ah uliante ahizong lau ngawlin khuangai ngawl uh hi.



²⁵Elnathan, Delaiah, le Gemariahte in laizial a hal ngawl natu in kumpipa tungah hesuak ngen hi napi, kumpipa in amate bangma awlmawk ngawl hi.

²⁶Tuaciang kumpipa in keima le ka lai at pa Baruch man tu in kumpipa tapa Jerahmeel sia Azriel ii tapa Seraiah le Abdeel ii tapa Shelemiahte taw thu pia khawm hi. A hihang Topa in ko hong phual ku hi.

Jeremiah in Laizial Dang At

²⁷Baruch tungah ka khaw bangin a ki at laizial sia Jehoiakim kumpipa in a haltum zawkciang Topa in,

²⁸laizial dang khat la in a masa laizial sungah a omte theampo tuasia sungah at tu in keima hong sawl hi.

²⁹Topa in kumpipa tungah hi bangin ci tan ci in kei hong sawl hi, “Laizial na haltum zo hi, tuaciang Jeremiah tungah, hi ngam ah Babylon kumpipa hong pai tu a, hi ngam le a mite le a ngannote susia tu hi ci in banghangin at ni ziam? ci in dongh zo ni hi.

³⁰Tua ahikom Topa Keima in tu in nang Jehoiakim Kumpipa tungah David ii ukna ngam sia na suan na paalte kuama in uk ngei ngawl tu hi kong ci hi. Na luang sia sun lai in nisa thuak tu le zan lai in daaitui thuak tu in kivawk tu hi.

³¹Na vekpi uh a na vawt uh khialnate hu in nangma, na suan na paalte le na khut nuai uliante daan kong pia tu hi. Nang na hi zong, Jerusalem le Judah mite ahizong, kong thuhil khol nate nong ni bua uh hi. Tua ahikom kong tawn khol sa tuasiatna sia na vekpi tungah kong tungsak tu hi,” hong ci hi.

³²Tuaciang laizial dang khat la in ka lai atpa Baruch tungah ka pia a, ka khaw theampo ama in at hi. Laizial masa sia sungah a om sate theampo le ama tungah ka khaw a kibang thudangte zongh ama in khum siat hi.

Jeremiah 37

Jeremiah tungah Zedekiah ii Hesuak ngetna

¹Babylon Kumpipa Nebuchadnezzar in Josiah ii tapa Zedekiah sia Jehoiakim ii tapa Jehoiachin taangin Judah ngam kumpi in koi hi.



²Ahihang Zedekiah le ama khutnuai ah uliante ahizong, mihonte ahizongin Topa ii ka tungah hong son thute mang nuam ngawl uh hi.

³Ka minam uh luangin Topa ka Pathian uh tungah thungen tu hong sawl tu in Zedekiah Kumpipa in Shelemiah ii tapa Jehucal le Maaseiah ii tapa thiampi Zephaniahte hong paisak hi.

⁴Tua lai hunin thong sungah kei hong kikhum ngawl lai a, mihonpite sungah ka vak kawkoai thei lai hi.

⁵Babylon ngalkapte in Jerusalem kiim uum zo uh hi, ahihang Egypt ngalkapte in Egypt ngamngi kantan zo hi ci thu amate a zaak uh ciang amate nungkin kik uh hi.

⁶Tuaciang Topa, Israel ii Pathian in,

⁷Zedekiah tungah son tu in hi bangin keima hong sawl hi, “Egypt ngalkapte sia nangma hong hu tu in hong pai a, ahihang a ngam uh ah heak kik tu uh hi.

⁸Tuasia ciang Babylonia te hong pai kik tu uh a, Jerusalem khuapi simin, la in, mei taw haltum tu uh hi.

⁹Babylonia te hong pai kik nawn ngawl tu hi ci a na ngaisut thak ngawl natu khat le khat na kitheam ngawl natu, Keima, Topa in thu kong hil khol hi, banghangziam cile amate hong pai nanak tu hi.

¹⁰Babylonia ngalkapte a buppi na zo zong a liamte bek taanglai a, puanbuk sungah lum ahi hial uh zong, tuate ma hong thoto veve tu a, hi khuapi haltum tu uh hi,” hong ci hi.

Jeremiah Kiman in Thong kitaaksak

¹¹Egypt ngalkapte hong nai hu in Babylonian ngalkapte Jerusalem pan nungkin uh hi.

¹²Ka innkuan neisate sung pan ka lua tu ka telte la tu in Jerusalem khua panin dingin Benjamin ngamah ka pai hi.



¹³Ahihang Benjamin Kongpi ka thet ciang tua lai ah kongpi cing ngalkapte a uk bu pa, Shelemiah ii tapa Hananiah ii tupa Irijah in ka pai tu hong khaam a, “Babylon mite kungah taiku tu sawm hi ngawl ni ziam?” hong ci hi.

¹⁴“Tuabang hi ngawl hi! tai sawm ngawl khi hi,” ci in ka zo hi. Ahihang Irijah in ka thuson hong ngai bua hi. Ama in kei hong manin uliante kungah hong paipui zaw sap hi.

¹⁵Amate ka tungah thin uuk mama in hong saatin zum thuzeakpi pa Jonathan ii inn, thonginn a a kivawt inn sia sungah hong khum in taw hong kalhcip uh hi.

¹⁶Leinuai khan khat sungah kei hong kikhum a, tua munah khua ngei hial ma hong kikoi hi.

¹⁷Tua zawkciang Zedekiah Kumpipa in keima hong sam a, kumpi inn sungah ama in, “Topa kung panin bang thu hong pai ziam?” ci in kei thu hong dongh tuam hi. “Thu om hi” ci in ka zo a, “Nang sia Babylon kumpipa khut sungah hong ki aap tu hi,” ci in ka belap hi.

¹⁸Tuaciang keima in, “Thong sungah nong khum natu in nangma tungah ahizong, na khutnuai uliante tungah ahizong, hi mipite tungah ahizong bang khialna vawt khi ziam?”

¹⁹Babylon kumpipa in nang le hi ngam hong sim ngawl tu hi ci a, nang tungah hong son, na kamsangte bang tat ziam?

²⁰Tu in Kumpipa awng, ka thu son nong ngai natu le kong nget sia nong vawtsak natu in hesuak kong ngen hi. Nong hesuakna in Jonathan ii innsung thong ah hong puak kik heak in. Nong puak kik ahile, tua munah thi takpi tu khi hi,” ci in ka dongh hi.

²¹Tua ahikom Zedekiah Kumpipa in kumpi inncingte omna khan sungah kei hong kikhum natu in thu hong pia hi. Tua munah ka om a, khua sungah anluum a bo siat dong ni simin anluum lum khat veu anluum vawtna panin kei hong kipia hi.

Jeremiah 38



Tuikhuk Kang sa khat sungah Jeremiah

- ¹Mattan ii tapa Shephatiah, Pashhur ii tapa Gedaliah, Shelemiah ii tapa Jehucal, le Malchiah ii tapa Pashhurte in mipite tungah,
- ²Topain, “Khuapi sungah a om suak peuma ngal taw ahibuale kialpi taw, ahibuale natna taw in thi tu uh hi. Ahihang pusuak in Babylonian te khut sungah a tum pawpo kithatlum ngawl tu a; ama in a nuntakna beak peuma suatak tu hi, ci hi,” ci a ka son sia za uh hi.
- ³Topa in, “Keima in hi khuapi sia Babylon ngalkapte khut sungah ka pia tu a, amate in la tu uh hi, ci hi,” ci in amate tungah ka son si hi.
- ⁴Tuaciang uliante kumpipa kungah pai in, “Hisia pa ki thisak hamtang tu hi. Hi bang a, a pau hu in khuapi sungah om ngalkapte le khuapi sungah a taanglai midangte theampo sia thin kiam sak uh hi. Ama in mihingte hu tu hanciam ngawl hi; amate nasak nuam bek hi,” ci uh hi.
- ⁵Zedekiah Kumpipa in, “Tua ahile pha hi. Na vawt nop bangpo in ama vawt vun; hong khak thei ngawl khi hi,” ci in zo hi.
- ⁶Tuaciang amate in kei hong paipui a kumpi innhuang sungah a om Kumpipa Tapa Malchaiah ii tuikhuk sungah khau taw in hong khiasuk uh hi. Tuikhuk sungah tui om ngawl a, buan bek om in, tua buan sungah ka tumsuk hi.
- ⁷Ahitazong, kumpipa inn sungah naseam ulian, Ethiopian mi cilnge sa Ebedmelech in amate ii tuikhuk sungah hong khiak thu za hi. Tua laitakin kumpipa sia Benjamin Kongpi ah thukhen a, a to laitak ahi hi.
- ⁸Tua ahikom Ebemelech sia tua munah pai in kumpipa tungah,
- ⁹“Kumpipa awng, hi mihingte khial hi. Amate in Jeremiah sia tuikhuk sungah khia uh a, tua munah ngilkial in thi tu hi, banghangziam cile khua sungah an om nawn ngawl hi,” ci hi.
- ¹⁰Tuaciang kumpipa in, Ebedmelech sia ama taw mihing thum pai khawm sakin, ka thi ma in kei sia tuikhuk sung pan hong laak kik natu in, thupia hi.



¹¹Tua hikom Ebedmelech sia mihingte taw kumpipa innsung vanh kholna khan ah pai in puansia pawlkhat la in, keima omna tuikhuk sungah khau taw hong khiaksuk hi.

¹²Khau in ka baan hong natsak ngawl natu in ama in ka leenuai ah puansia dapin hong sawl hi. Hong sawl bangin ka vawt a,

¹³tuasia ciang amate in tuikhuk sung panin kei hong kaito in hong pusua hi. Tua zawkciang kumpi innhuang sungah kei hong kikoi hi.

Zedekiah in Jeremiah ii Ngaisut piakna Ngen

¹⁴Khatvei lai in Zedekiah Kumpipa in Biakinn tumna kongkha a thumna ah hong sam a, ama in “Thu khat kong dongh tu a, thumaan hong son lete ka oai hi,” hong ci hi.

¹⁵Keima in, “Thumaan hong son leng, nong that tu a, ngaisutna hong pia leng la, nong ngai buatu hi,” ci in ka zo hi.

¹⁶Tuasia ciang Zedekiah Kumpipa in, “Nang kong that buatu a, nang hong that nuam mihingte khut sungah kong aap buatu hi ci in eite nuntakna hong pia Pathian, a nungta Pathian min taw ka kiciam hi,” ci in hong kamciam ku hi.

¹⁷Tuasia ciang Zedekiah Kumpipa tungah Vaanglianbelpa TopaIsrael ii Pathian in, “Babylonia kumpipa ii uliante khutnuai ah na tum le, na nuntakna hong ki khoaikhe tu a, hi khuapi kihaltum ngawl tu hi. Nangma le na innkuanpuite na suakta tu uh hi.

¹⁸Ahihang na tum bua uh le, hi khuapi sia Babylonian te khut sungah ki aap tu a, amate in haltum in amate ii khutsung panin na suakta buatu hi,” ci hi ci in ka son hi.

¹⁹Ahihang kumpipa in, “Babylonian te kungah a tai ih ngam mite ka kiita hi. Amate ii khut sungah kei hong ki aap tu a, kei hong vawtsia tu hi,” ci in zo hi.



²⁰Keima in, “Nang sia amate khut sungah hong ki aap ngawl tu hi. Topa ii thu na nit natu in hesuak kong ngen hi; tua hile na theampo nang atu in pha tu a, na nuntakna hong kihu tu hi.

²¹Ahihang a khut nuai ah na tum nuam buale bang hong piang tu ci sia Topa in ka mu kholna sungah hong lak zo hi.

²²Tua ka mu kholna sungah Judah kumpipa inn sungah a ki nusia numeite theampo Babylonia kumpipa ii khutnuai naseam uliante ii kungah kipaipui ka mu hi. Amate a pai kawmin, a thusonte ngai vun; ‘Kumpipa ii lawm phabelte in ama lampui khial a, amate in ama zothaw hi. Tu in ama peangte buan sungah tumsuk zo a, ama lawmte in nusia zo uh hi,’ ci uh hi.” ka ci hi.

²³Tuasia ciang keima in, “Na zite uh le na tate theampo uh sia Babylonian te kungah ki paipui tu a, nang zongh na suakta buatu hi. Nang sia Babylonia kumpipa in salin hong kai tu a, hi khuapi sia mei taw ki haltum tu hi,” ci in ka belap hi.

²⁴Zedekiah in, hi ih kipaupuina thute kuama in hesak heak in, tua hile na nuntakna lauhuai ngawl tu hi.

²⁵Nang taw ka thuson sia uliante in hong za thong le, amate hong pai in bang son nu ziam ci in nang hong dongh tu uh hi. A vekpi in amate na son le kong that buatu uh hi ci in amate in hong kamciam tu uh hi.

²⁶Thong sungah a thi tu in hong puak kik ngawl natu in ka ngen hi ci bek po in, ” ci in zokik hi.

²⁷Tuasia ciang uliante theampo hong pai in kei thu hong dongh a, kumpipa hong sawl bang tatak ma in amate tungah ka son hi. Amate ii vawt thei tu bangma dang om ngawl hi, banghangziam cile ka ki paupuina uh sia kuama in hong ngai ku ngawl hi.

²⁸Jerusalem khua a kilaak ni dong kumpi innhuang sungah kei hong kikoi hi.

Jeremiah 39

Jerusalem khua Bona



¹Zedekiah ii Judah kumpi a sua zawk a kum kua kum a tha sawm tha in Babylonia Kumpipa Nebuchadnezzar sia a ngalkap theampo taw hong pai in Jerusalem sim hi.

²Zedekiah ii kumpi a sua zawk kum sawm le kum khat kum, tha li tha, ni kua ni in khuapi lumphungte ki sulet hi.

(³Jerusalem khuapi a kilaak ciang Babylonia kumpipa khutnuai uliante theampo hong pai in Kongpi Laita ah to uh hi. Tuata sia Nergal Sharezer, Samgar Nebo, Sarsechim le a dang Nergal Sharezer ahi uh hi.)

⁴Zedekiah Kumpipa le a ngalkapte theampo in a piang thu a mu uh ciang amate sia zan lai in khuapi pan ngelku tu hanciam uh hi. Amate in kumpi huansung lam tawnin lumphungte ngeal kilaklaw kongkha kantan in, Jordan Kuam ah ngelku uh hi.

⁵Ahihang Babylonian ngalkapte in delin Zedekiah sia Jericho khua nai zaangtam ah man uh hi. Tuasia ciang amate in Zedekiah sia Hamath ngamsung Riblah khua ah a om Nebuchadnezzar Kumpipa kungah paipui uh a, tua munah Nebuchadnezzar in Zedekiah tungah thukhen hi.

⁶Riblah khua ah Nebuchadnezzar Kumpipa in Zedekiah ii tapate sia Zedekiah ii mu tang ma in thatlum a, Judah ngam kumpi uliante theampo zongh thatlum hi.

⁷Tua zawkciang ama in Zedekiah ii mittangte khelsak a, Babylonia ah paipui tu in kol bul hi.

⁸Tua hun laitak ma in Babylonian te in kumpipa inn le mipite ii innte haltum in Jerusalem khua lumphungte sutham uh hi.

⁹A khakbel in ngalkap hon ukpa , Nebuzaradan in, khuapi sungah a taanglai mite sia ama ii kung a zuan mite taw Babylonia ah saltang tu in paipui khawm hi.

¹⁰Ngalkap mangpa, Nebuzaradan in, bangma nei ngawl a, a zawngkhal bel mihing pawl khat Judah ngamah nusia in sapit huante le lote pia hi.

Jeremiah ii Suatakna



¹¹Ahihang Nebuchadnezzar Kumpipa a nuai a thute pia tu in ngalkap hon ukpa , Nebuzaradan tungah thupia hi.

¹²“Pai in a Jeremiah zongin pha takin keam in. Vawtsia heak in a a dei pawpo vawtsak in” ci hi.

¹³Tua ahikom Nebuzaradan in kumpi uliante Nebushazban le Nergal Sharezer le Babylonia kumpipa ii ulian dangte theampo taw

¹⁴Kumpi innhuang sung panin kei hong la uh hi. Amate in Shaphan ii tupa Ahikam ii tapa Gedaliah kungah, hong kep tu in keima hong aap uh hi. Gedaliah sia ngalmuang takin kei inn hong then tu pa ahi hi. Tuabangin ka mite sungah ka teang hi.

Ebedmelech atu Lametna

¹⁵Kumpi innhuang sungah thong hong kitaaksak lai in, Vaanglianbelpa Topa, Israel ii Pathian in hi bangin ci hi, ci in,

¹⁶Ethiopia mi Ebedmelech tungah son tu in Topa in kei hong sawl hi. “Ka vawt tu hi ka ci bangkeak ma in hi khuapi tungah nopsak natu hi ngawlin siatna ka thengsak tu hi. Hi bangin hong pian ciang a mu tu in tua munah na om tu hi.

¹⁷Ahihang Keima, Topa in nang kong keamcing tu a, na kiitak mihingte khut sungah nang hong ki aap ngawl tu hi.

¹⁸Nang sia kong keamcing tu a, hong kithatlum ngawl tu hi. Kei hong muang na hikom na nuntakna suakta tu hi. Keima,Topa in ka ci zo hi,” hong ci hi.

Jeremiah 40

Gedaliah kungah Jeremiah Om

¹Ngalkap mangpa Nebuzaradan in Ramah khua ah kei hong suatak zawkciang, Topa in kei hong paupui hi. Keima sia kol bul sa in, Babylonia ah luangta tu in a kipaipui Jerusalem le Judah midangte theampo taw hong kipaipui khawm zo hi.

²Ngalkap mangpa in keima hong sam tuam a, “Na Topa Pathian in hi ngam sia suksiat tu in tawng a,



³ama in ka vawt tu hi a ci sia tu in vawt zo hi. Na mite in Topa tungah khialna vawtin a thu ni ngawl a hi hu in hite theampo piang hi.

⁴Tu in na khut ah a kibal kolte kong suutsak tu a kong suaktasak tu hi. Kei taw Babylonia ah na pai nuam le na pai thei hi. Keima in nang kong keamcing tu hi. Ahihang na pai nuam buale pai kul ngawl hi. Hi ngam buppi sungah na uukna mun po teal in a, na uukna pawpo ah pai in,” hong ci hi.

⁵Bangma pau ngawl a ka om ciang, Nebuzaradan in, “Babylonia kumpipa ii Judah ngam khuapite uk tu in a koi Shaphan ii tupa Ahikam ii tapa Gedaliah ii kungah pai kik tan. Ama taw a mite sungah teang a, tua ahibuale na pai nopna mun po ah pai in om tan,” hong ci hi. Tuaciang ama in letsong khat le nguai an hong henin hong paisak hi.

⁶Mizpah ah Gedaliah taw om tu in ka pai a, ngam sungah a taanglai mihingte sungah ka teang hi.

Judah Ngam ukpa Gedaliah

(2Kumpite 25.22-24)

⁷Judah ngalkapmaang pawlkhatte le ngalkap pawlkhatte in a ngalte khut sungah tumna vawt ngawl uh hi. Amate in, Babylonia Kumpipa in Gedaliah sia ngamukpa in koi zo a, Babylonia ah saltang tu a, a kipaipui ngawl mite theampo ngamsung pan a zawng bel mite teng uk tu in a kikoina thu za uh hi.

⁸Tuasia ciang Nathaniah ii tapa Ishmael, Kareah ii tapa Johanan, Tanhumeth ii tapa Seraiah, Netophah mi Ephai ii tapate le Maacah mi Jezaniah le a ngalkapte sia Mizpah khua ah a om Gedaliah kungah pai uh hi.

⁹Gedaliah in amate tungah, “Babylonian te tungah tumna na vawt tu uh sia lau kul ngawl hi ci in kamciam kong pia hi. Hi ngam sungah teangin Babylonia kumpipa ii naseam leute no atu in pha siat tu hi.

¹⁰Keima mama Mizpah ah ka teang tu a, Babylonian te hi munah hong pai ciangin na taangmi uh ka hi tu hi. Sapit tui thingnga le olive sathaute khawmin khol vun a, na laak uh khuate ah teang vun,” ci hi.



¹¹Tuasia laitakin, Moab ngam, Ammon ngam, Edom ngam le ngamdang ah a om Israel te theampo in, Babylonia kumpipa ii Israel te pawlkhat Judah ngam sungah a om suaksakna thu le Gedaliah sia a ngamukpa in a koina thu za uh hi.

¹²Tua ahi manin, amate in a kithethaang na ngamte nusia in Judah ngamah cia kik uh hi. Amate Mizpah khua Gedaliah kungah pai in, tua munah zu le thingnga tam mama khawmtua uh hi.

Gedaliah Kithat
(2Kumpite 25: 25-26)

¹³Hisia zawkciang, Babyloniante khutnuai ah a tum nuam ngawl Jonahan le ngalkapte ii lampuite sia Mizpah khua Gedaliah kungah pai in,

¹⁴ama tungah, “Ammon Kumpipa Baalis in nangma hong that tu in Ishmael hong paisak sia he ngawl ni ziam?” ci hi. Ahihang Gedaliah in tua thu um ngawl hi.

¹⁵Tuaciang Johanan in Gedaliah tungah, “Keima hong paisak tan a Ishmael hong thatsak tan, tua hile a that sia pa kuama in he ngawl tu hi. Banghangin ama in nang hong kithatsak thong tu ziam? Nang hong kithat thong le tua in na kiim ah hong kikhawm Jew mite theampo kithethaangsak tu a, Judah ngamah a taanglai mite theampo ii tungah tuasiatna thengsak tu hi,” ci ku hi.

¹⁶Ahihang Gedaliah in, “Tuabang hi heak in! Ishmael thu na son sia maan ngawl hi!” ci in zo hi.

Jeremiah 41

¹Tua kum a tha sali tha in, kumpi innkuan sung pan innkuanpui khat ahi, kumpipa khutnuai ah upa lianbelte sung pan upa lianbel khat ahi, Elishama ii tupa le Nethaniah ii tapa, Ishmael sia mihing sawm taw ngamukpa Gedaliah taw kimu tu in Mizpah ah pai uh hi. Amate mun khat ah an a neakkhop hon tek lai takin,

²Ishmael le ama taw kithawl mihing sawmte in a namsau uh dokin Gedaliah thatlum uh hi.



³Ishmael in Mizpah khua Gedaliah kungah a om Israel mite theampo le Babylonia ngalkap tua munah a omte zongh thatlum hi.

⁴A zing ciang, Gedaliah a ki thalupna thu kuama heak ma in,

⁵Shechem, Shiloh le Samaria panin mihing sawmliat hong theng uh hi. Amate in a khamul uh meetin a puan uh eaukeak in, amate le amate kisun ngawp uh hi. Amate in Biakinn ah piak tu in antang le paaknamtui keng uh hi.

⁶Ishmael sia amate muak tu in Mizpah panin kap kakawm in pai hi. Amate kung a thet ciang Ishmael in, “Gedaliah en tu in hong tum ka ve vun,” ci hi.

⁷Khuapi sung a tum po uh ciang, Ishmael le a mite in amate thatin a luang uh tuikhuk khat sungah vawk uh hi.

⁸Ahihang amate ii pawlsung panin mihing sawm in Ishmael tungah, “Ko hong that heak in! Zungtaang, mangtaang, olive thau le khuaitui lo lai ah phual ku nei khu hi,” ci hi. Tua ahikom Ishmael in amate that ngawl hi.

⁹Ishmael ii thalup mihingte ii luangte a vawkna tuikhuk sia Israel Kumpipa Baasha ii Asa Kumpipa a sim lai a Asa Kumpipa ii taw tuikhuk lian khat ahi hi. Ishmael in tua tuikhuk sia mithi luang taw dimsak hi.

¹⁰Tuaciang Ishmael in Babylon ngalkapte a uk ngalkapmaang pa Nebuzaradan ii Gedaliah ii kep tu in a koi kumpipa ii tanute le Mizpah khua ah a omlai mihonte theampo thongtaaksak hi. Ishmael in amate thongtaaksak a, tuaciang Ammon ngamsang zuanin paipui hi.

¹¹Johanan le ama taw a omkhawm ngalkap uliante theampo in Ishmael ii tatsiatna thu za uh hi.

¹²Tuasia ciang amate in a mihingte uh taw ama del uh a Gideon tuili lian hui ah pha uh hi.

¹³Ishmael ii mat thongtaakte in Johanan le ama taw hong paikhawm ngalkap lampui uliante a mu uh ciang a lungdam in,

¹⁴amate kung zuanin tai uh hi.



¹⁵Ahihang Ishmael le a mihing liatte sia Johanan khutsung panin suakta in, Ammon ngam ah ngelku uh hi.

¹⁶Tuaciang Ishmael in Gedaliah a thalup zawkciang Mizpah pan a, thongtaak a a mat ngalkapte, numeite patangte le kumpi inn sung a cilnge sa naseamte sia Johanan le ama taw a om ngalkap lampui uliante in uk uh hi.

¹⁷⁻¹⁸Babylonia kumpipa ii ngam uk in a koi Gedaliah sia Ishmael in thalupsak ahikom amate in Babylonian te kiita uh hi. Tua ahikom amate sia Babylonian te taw a kipeal thei natu in Egypt ngamah tai uh hi. Lampi ah amate sia Bethlehem khua hui Chimham ah tawlnga uh hi.

Jeremiah 42

Mipite in Amate atu Thungetsak tu in Jeremiah Sawl

¹Tuaciang ngalkap lampui uliante theampo le Kareah ii tapa Johanan le Hoshaiiah ii tapa Azariah le mihonte a lian a no ka kungah hong pai uh a,

²“Kong nget uh sia hong vawtsak tan! Topaka Pathian uh tungah kote atu in thu hong ngetsak tan. A nungta lai kote theampo atu in thu hong ngetsak tan. Khatvei lai in mihing tam mama ka hi uh hang tu in nangma nong mu bangin mihing tawmno bek ma ka taanglai uh hi.

³Ka pai natu uh lampi le ka sep tu uh nateTopa ka Pathian uh in ko hong lak natu in thu hong ngetsak tan,” hong ci uh hi.

⁴Keima in, “Tua ahile pha hi. Nong nget uh bangin Topa ih Pathian tungah thu ka ngen tu a, ama ii hong ci babang kong son tu hi. Bangma kong iim buatu hi,” ci in ka zokik hi.

⁵Tuaciang amate in keima tungah, “Ko atu a Topa ih Pathian ii nangma tungah hong piak thupiakte theampo ka ni bua uh le Topasia ko hong langpan thumaan le thutak tetti hi taken.

⁶Dik ka sa uh zong dik ka sa bua uh zong ama tungah thungetsak tu a, kong sawl uh Topa ih Pathian ii thu ka ni tu uh hi. Ama thu ka ni uh le ka mai uh vang tu hi,” hong ci uh hi.

Jeremiah ii Thungetna Topa ii Zona.



⁷Ni sawm zawkciang Topa in kei hong paupui hi;

⁸tua ahikom keima in Johanan sia ama taw a omkhawm ngalkap lampui uliante theampo le mihing dangte taw ka sam khawm hi.

⁹Keima in amate tungah, “A kungah hesuak ngen tu a, nong sawl na pa ahi Topa Israel ii Pathian in,

¹⁰‘Hi ngamah na teang suak nuam uh le, kong susia buatu a, kong laamto tu hi; kong phut tu a kong phaikeak buatu hi. Siatna kong thetsak manin ka khuangai hi.

¹¹Babylonia kumpipa kiita nawn heak vun. Noma kong ompui a, ama khut sung panin kong suatak tu hi.

¹²Keima in a hesuak thei pa ka hi manin, ama in no tungah hesuak theina ka neisak tu a, na ngam le na khua uh ah hong ciasak kik tu hi. Keima, Topa in ka ci zo hi,’ hong ci hi.

¹³⁻¹⁵“Ahihang Judah ngam sungah a taanglai note in Topa na Pathian thu na nial buatu uh a, hi ngamah ten tu na nial buatu uh hi. Noma in, ‘Hi ngawl hi, ngal do nawn ngawl natu mun, ngalsim tu kisamna aw zaak nawn ngawl na mun, ngilkial ngawl na mun ahi, Egypt ngamah pai in ka teang tu uh hi.’ na ci buatu uh hi. Hi bangin na ci uhle Vaanglianbelpa Topa, Israel ii Pathian in , ‘Egypt ah pai in ten tu na tum tatak uh le,

¹⁶na kiitak uh ngal in no hong pha tu a, na kitaak uh kialpi in na nung uh pan hong del in tualai mun, Egypt ah na thi tu uh hi.

¹⁷Egypt ngamah tai a, ten tatak tu a sawm mihingte theampo sia ngal taw ahibuale kialpi taw ahibuale natna taw in thi tu uh hi. Khat zongh nungta ngawl tu a, amate tungah ka thetsak tu tuasiatna sia khat zongin peal thei ngawl tu hi,’ ci hi.

¹⁸“Topa, Israel, ii Pathian in, ‘Ka thin uukna le ka thin sona Jerusalem khua mite tungah a kibuak bangma in, Egypt ngam ah na pai uhle ka thin sona sia note tungah hong kibuak tu hi. Midangte ii hong muna ah a cizathuai na suak



tu uh hi; Mite in note ciammuina in hong nei tu a na min uh sia hamsiatna in zang tu uh hi. Hi mun sia na mu kik ngei nawn buatu uh hi,' ci hi," ka ci hi.

¹⁹Tuaciang ka zomto lai a, "Topa in Judah ngamah a taang lai note Egypt ngam ah na pai ngawl natu in hong son zo hi. Tua ahikom tu in na kidop natu in kong hil khol zo hi,

²⁰na pai uh ahile thi thei natu dongin khialna vawt na hi tu uh hi. Noma atu in Topa ih Pathian tungah thungetsak tu in nong sawl uh a, ama ii hong thupiak theampo seam tu uh in kamciam nong pia uh hi.

²¹Tu in no tungah kong son zo hi, ahihang Topa ih Pathian in no tungah son tu a hong sawlte theampo na ni bua uh hi.

²²Tua ahikom, hi thu ciamtee vun; na pai nopna uh le na ten nopna uh ngamah ngal taw ahibuale ngilkialna taw, ahi buale natna taw in na thi tu uh hi," ci in ka son hi.

Jeremiah 43

Egypt ngamah Jeremiah Kipaipui

¹Topa, amate Pathian ii amate tungah son tu a hong sawlte theampo mipite tungah ka son zo hi.

²Tuaciang Hoshaiiah ii tapa Azariah le Kareah ii tapa Johanan le a kiphasak midangte theampo in kei tungah, "Leilot ni hi. Topa kote Pathian in Egypt ngamah ka pai ngawl natu uh le ka ten ngawl natu uh kote tungah son tu in nang hong sawl ngawl hi.

³Babylonian te in ko hong zothaw tu a, hong that nuam uh le hong thatin Babylonia khua ah saltang tu in hong paipui nuam le hong paipui thei natu in Neriah ii tapa Baruch in ko hong langpan in, nang hong hanthawn hi," hong ci uh hi.

⁴Tua ahikom Judah ngam sungah om tu a Topa ii thupiak sia, Johanan hi kale ngalkapbu te hi kale mipite hi kale khat zongh in ni ngawl uh hi.



⁵Tuaciang Johanan le ngalkapbu te theampo in Judah ngamah a taanglai te theampo sia, a kithethaang na ngamte pan hong heak kik mihingte theampo taw Egypt ngamah paipui uh hi;

⁶Tuate sia pate, numeite, patangte le kumpipa ii tanute ahi uh hi. Amate in Gedaliah ii kepcing tu a ngalkap hon ukpa Nebuzaradan ii nusiak mihingte theampo le Baruch le keima hong paipui uh hi.

⁷Amate in Topa ii thupiak sia ni ngawlin Egypt ngam Tahpanhes khua dong pai uh hi.

⁸Tua munah Topa in ka tungah,

⁹“Suangtum lian pawl khat la in a, hi khuapi sung kumpi inn tumna mai lampi dawl tung a, a pha suangpheak sah ii nuai ah phum in; tuabang na vawt sia Israel mi pawlkhat in musak in,

¹⁰Tuaciang, Vaanglianbelpa Topa Israel ii Pathian, keima in, ka naseam Babylon Kumpipa Nebuchadnezzar sia hi munah kong puak tu a, ama in tua na phum suangtumte tungah a kumpi tokhum phut tu a, a kumpi puanbuk sia tuate ii tung ma ah phal tu hi, ci sia amate tungah son in.

¹¹Nebuchadnezzar hong pai tu a, Egypt zo tu hi. Natna taw thi tu in a see sa tua mihingte sia natna taw thi tu a, sal a kai tu in a kisee sate salin kikai tu a, tuaciang ngal sungah kithat tu in a kisee sate, ngal sungah kithat tu hi.

¹²Egypt ngam pathiante ii biakinnte mei taw ka hal tu a, tuaciang Babylonia kumpipa in a pathiante mei taw halin, ahibuale pua in paipui tu hi. Tuucing pa in a puan tung pan khate vawkin a thiansak bangin, Babylonia kumpipa in Egypt ngam thiangsak tu a, tua zawkciang ngal zo in cia tu hi.

¹³Ama in Egypt ngam Heliopolis khua a, a thiangtho biakna taw kisai khansuangte susia tu a, Egypt pathiante ii biakinnte haltum tu hi,” hong ci hi.

Jeremiah 44

Egypt ngam Israel te tungah Topa ii Thupuak



¹Egypt ngamsung Migdol, Tahpanhes, Memphis khuapite le Egypt ngam thang sangah a teang Israel te theampo taw kisai in Topa in ka tungah thu hong son hi.

²Vaanglianbelpa Topa Israel ii Pathian in, “Jerusalem khuapi tung le Judah ngam khuapi dangte theampo ii tungah suksiatna ka thetsak sia noma mama in na mu zo uh hi. Tua khuapite sia tu dong ma in siacip lai a, kuama teang ngawl hi.

³Banghangziam cile tua khua mite in a sia vawtin ka thin hong uk sak uh hi. Amate in amate ahizong noma na hi uh zong, na taangpupite ahizong ii biak ngei ngawl pathian dangte tungah biakpiakna pia in a na seam uh hi.

⁴Ka naseam kamsangte note kungah tatsat ngawlin kong paisak a, amate in ka ngaimawk a lauhuai hi bang nate na vawt ngawl natu in note hong son uh hi.

⁵Ahihang note in na ngai bua uh a, na awlmawk bua uh hi. Pathian dangte tungah a sia biakpiak ngamtatna na vawt uh sia na kheal nuam bua uh hi.

⁶Tua ahikom ka thin uukna le ka thin sona sia Judah ngam khuate le Jerusalem lampite tungah ka buak a, tuate sia mei taw ka hal hi. Tuni a na mu uh bangma in tuate sia a kisiacip in om a, a kiitak huai suak hi.

⁷“Tua ahikom Vaanglianbelpa Topa, Israel ii Pathian keima in, banghang tuabang thusiate noma le noma tungah vawt nu ziam? ci in tu in kong dongh hi. Na mite kuama a kikheet ngawl natu in, pasal, numei, patang le nausente tungah siatna thengsak nuam nu ziam?

⁸A teang tu in na thetna uh hi Egypt ngamah, milim na biakna uh le a dang milim pathiante tungah biakpiakna na neina uh taw in banghangin kei hong thin uuksak nu ziam? Leitung mihing theampo in no hong nunau natu le haamsiatna in na min a zak natu in noma le noma na kisiatsak natu bekin hi bangin vawt na hi uh ziam?



⁹Judah ngam khuate sung le Jerusalem khua lampi tungah na taangpupite , Judah ngam kumpite le a zite, noma le na zite ii na a sia a kici theampo na vawt uh sia mangil zo nu ziam?

¹⁰Ahihang tuni dong ciang noma le noma na kiniamkhiak bua uh hi. Keima upatna le zatakna nong nei bua uh a, noma le na taangpupite tungah kong piak thukhamte theampo bangin na nungta bua uh hi.

¹¹“Tua ahikom, Vaanglianbelpa Topa Israel ii Pathian keima in, note kong langpan tu a Judah ngam theampo ka susia tu hi.

¹²A taanglai sun Judah mite, Egypt ngamah pai in ten tatak tu a sawm teng sia a vekpi in ka mon siat tu hi. A lian a no amate a vekpi in Egypt ngamah ngalsung ahibuale kialpi taw in thi tu uh hi. Amate sia mihingte muna ah a lauhuai suak tu uh hi, amate nunau tu uh a, a min uh haamsiatna in zangh tu uh hi.

¹³Jerusalem daan ka piak bangma in Egypt ngamah a teang mihingte ngal, kialpi le natna taw in daan ka pia tu hi.

¹⁴Judah mi a taanglai Egypt ngamah teang tu a, a paite kuama suakta ngawl tu a, nungta ngawl tu uh hi. Khatvei a ten kik nopna mun Judah ngamah amate khat zongh heak kik ngawl tu uh hi. Ngaltai tawmno simngawl kuama heak kik ngawl tu hi,” ci hi.

¹⁵Tuaciang a zite in pathian dangte tungah biakpiakna a nei hunlam a he pate theampo le tua munah a ding numeite theampo a kipan Egypt ngam thang sangah a teang Israel te— mihonpi tam mama in— keima tungah,

¹⁶“Topa min taw thu nong sonte hong ngai nuam ngawl khu hi.

¹⁷Ka vawt tu uh hi ka cite theampo ka vawt tu uh hi. Koma le ka taangpupite , ka kumpipa uh le kumpi ulian lampuite in Judah ngam khuapite sung le Jerusalem khua lampite ah ka vawt ngei uh bangma in, kote pathiannu vantung kumpinu tungah biakpiakna ka pia tu uh a, ama tungah biakpiakna zu ka buak tu uh hi. Tuabangin ka vawt uh ciang an hau in, nuamsa in, ngimna ka nei bua uh hi.



¹⁸Ahihang Vantung Kumpinu tungah biakpiakna ka nei nawn ngawl uh ciang le ama tungah zu taw biakpiakna ka buak nawn ngawl uh hun pan kipan bangma ka nei nawn bua uh a, ka mite uh sia ngalsung le kialpi taw in thi uh hi,” hong ci uh hi.

¹⁹Tuaciang numeite in, “Vantung Kumpinu ii meal taw kibang muh vawt a, biakpiakna pia in zu ama tungah ka buak uh ciang ka pasalte a lungkim uh hi,” ci in belap uh hi.

²⁰Tuaciang ka pauna hi bang a hong zokik pasalte le numeite theampo ii tungah keima in,

²¹“Nangma le na taangpupite hi kale, na kumpipate le kumpi lampui uliante hi kale, ngamsung mihonte hi kale Judah ngam khuate sung le Jerusalem khua lam tungah biakpiakna na vawt uhte Topa in he ngawl ahibuale mangilin ngaisun nu ziam?

²²Tuni mama in na ngam uh sia a lalcip sa in om a, a sungah kuama teang ngawl hi. Na ngitlona uh le a sia na vawtna uhte Topa in thuak zo nawn ngawl ahikom na ngam uh sia a lauhuai mun suak a mihingte in a min sia haamsiatna in nei uh hi.

²³Topa ii hong thupiakte theampo ni ngawlin ama tungah na khial uh hang le milim pathian dangte tungah biakpiakna na piak uh hu in hi bang tuasiatna no tungah hong theng hi,” ka ci hi.

²⁴⁻²⁵Keima in mihingte theampo tung, a tatuan in numeite tung, Egypt ngam sungah a teang Judah mite tungah Vaanglianbelpa Topa, Israel ii Pathian ii son thu sia ka son hi: “Noma le na zite in Vantung Kumpinu kungah a ciliap huai kamciamna na vawt zo uh hi. Ama ii tungah biakpiaknate na piak natu uh le zu biakpiakna na buak natu in na kamciam zo uh a, na kamciam uh bangin na tangtungsak zo uh hi. Tua ahile, pha hi! Na kamciam uh len vun! Na kamciam uh bangin seam vun!

²⁶Ahihang Keima, Topa in Egypt ngam a a teang no Israel mite theampo tungah a vaanglian ka min taw kamciam ka vawt sia, tu in ngai vun. ‘A



nungta Vaanglianpipa Topa taw ka kiciam hi!’ ci in na kiciam natu in ka min kuama in kong zanghsak kik ngei nawn buatu hi!

²⁷Note a nuamsa ngawlin kong vawt tu hi, bek dom ngawlin hong kilalcipsak tu hi. Note khat zongh kikhe ngawlin, ngal taw ahizong, natna taw ahizong na mong tu uh hi.

²⁸Ahihang tawmno khat thina pan na suakta tu uh a, Egypt ngam panin Judah ngamah na heak kik tu uh hi. Tuasia ciang a nungta laite in akua ii kammal sia maan ziam, keima kammal maw, amate ii kammal maw ci sia he tu uh hi.

²⁹Hi munah daan kong pia tu a, tuaciang note tungah siatna kong thengsak tu hi ci a ka kamciam sia a tangtun takpi na Keima, Topa in note kong lak tu hi.

³⁰Judah ngam Kumpipa Zedekiah sia ama a thatlum nuam a ngal pa ahi Babylon Kumpipa Nebuchadnezzar tungah ka aap bangma in, Egypt ngam Kumpipa Hophra sia ama a thatlum nuam a ngalte khut sungah ka aap tu hi,” hong ci hi.

Jeremiah 45

Baruch tungah Pathian ii Kamciam

¹Josiah ii tapa Jehoiakim ii Judah ngam kumpi a sua zawk a kum li kum in Baruch in ama tungah ka khaw bangin at hi. Tuaciang keima in ama tungah,

²Topa Israel ii Pathian in hi bang ci hi, “Baruch awng,

³‘kei paw cimaw zo ing! Topa in ka haksatnate khuangaina taw hong belap hi. Ka tatauna taw ka ngim zo a ka toi thai thei ngawl hi!’ na ci hi.

⁴“Ahihang, Keima, Topa in kasak sate ka baltham tu a ka phu sate ka botkeak tu hi. Leitung buppi sia hi bangin ka vawt tu hi.

⁵Nang atu a tuam vilvel a hong kivawt natu zong ni ziam? Zong heak in! Mihing theampo tungah siatna ka thengsak tu a, ahihang nang sia na paina po ah thi ngawlin na suakta valiai tu hi. Keima Topa in ka ci zo hi,” ci in ka son hi.



Jeremiah 46

Carchemish ah Egyptte ii Ngallelna

- ¹Topa in minam dangte ii thu ka tungah hong son a,
- ²Egypt ii thu taw in hong pan hi. Jehoiakim ii Judah kumpi a sua zawk a kum li kumin Eupharates ngunhui Carchemish khuapi ah Babylonia Kumpipa Nebuchadnezzar ii a zaw Egypt Kumpipa Neco ii ngalkapte thu Topa in hi bangin ci hi:
- ³“Egypt ngalkapbu te au in, ‘Na lumte la vun a, ngalsim tu in kuan vun!
- ⁴Na siphute kamkhau thua vun a, a tungah to vun! A tangin kingual vun a na thik lukhute khu vun! Na teite taat vun! Na thik puante silh vun!’ ci uh hi.
- ⁵“Ahihang keima in bang mu khi ziam?” ci in Topa in dongh hi. “Amate lau in heak kik uh hi. A ngalkapte kinot kik a, a ngalte kiita mama ahikom nungsang enkik ngawlin a ngang thei zaza in tai uh hi.
- ⁶A manlang a taite zongh taisuak thei ngawl a, a ngalkapte suakta thei ngawl uh hi. Saksang, Euphrates ngun hui ah amate lutu in puk uh hi.
- ⁷Nile ngun bangin khang a, nguntui pawm bang ahi sia akua ziam?
- ⁸Nile ngun bangin khangto a, nguntui bang a a pawm sia Egypt ahi hi. Egypt in, ‘Ka khangto tu a, leitung buppi ka khum tu hi; khuapite le khuapi sungah a teang mihingte ka susia tu hi.
- ⁹Siphute a pai natu le ngalleangte a mui a pei natu thupia vun! Ngalkapte kuansak vun: Ethiopia le Libya pan lum toai ngalkapte le, Lydia mi thalkap thiamte kuansak vun’ ci hi,” ci hi.
- ¹⁰Tuni sia Vaanglianpipa Topa, Vaanglianbelpa ii ni hi: tuni in ama in phu la tu a; tuni in ama in a ngalte daan pia tu hi. A namsau in a kham dong amate ne tu a, a kham dong a chi uh dawn tu hi. Tuni in Vaanglianbelpa insaksang Euphrates ngunhui ah a ngalte biakpiakna in nei hi.
- ¹¹Egypt mite awng, Gilead ah pai vun a cidamna zatui zong tavun! Na zatuite theampo kimanna nei ngawl a; bangma in nang hong damsak thei ngawl hi.



¹²Minamte theampo in na maizumna za zo a; na kaana mihing theampo in za zo hi. Ngalkapte khat le khat kituan tha a, a nii in lei ah puk uh hi.

Nebuchadnezzar Hong paina

¹³Babylonia Kumpipa Nebuchadnezzar Egypt sim tu in hong pai ciang, Topa in kei hong paupui hi, Ama in,

¹⁴“Egypt ngamsung kuate Migdol, Memphis le Tahpanhes ah taangko in: ‘Noma le noma a kihu tu in kinging vun; na neisa theampo uh ngal kisimna sungah ki susia tu hi!

¹⁵Banghangin a thahat note pathian Apis puk ziam? Topa in ama saat vawk hi!’ ci in.

¹⁶Note ngalkapte lutu in puk zo hi; amate khat le khat ii tungah, ‘Manlang vun! Ih inn le ih mite kung zuanin ngalte namsau pan suakta tawng!’ kici uh hi.

¹⁷“Egypt kumpipa min thak khat vaw vun— ‘Kam uang taw bek a hunpha a bosak thawthong pa’ ci vun.

¹⁸Vaanglianbelpa Topa Keima sia kumpipa ka hi hi. A nungta Pathian ka hi hi. Mualdangte sangin Tabor mual a saan zawk bangin, Carmel mual in tuipei tungah saang a, a dawk to bangin, No hong sim sia pa ii thahatna lian tu hi.

¹⁹Egypt mite awng! luangta tu in kithoai vun. Memphis khua sia senneal ngam kisuaksak tu a, kisiacip in kuama teang ngawl hi.

²⁰Egypt ngam siasaksang panin hong leang thataa ii a pe khuipui limci khat taw kibang hi.

²¹A cial sa ngalkapte ngangawn khuinote bangin cimaw uh hi. Amate in nang kenkon in do ngawlin; nungkin in tai siat uh hi. Amate ii ngim thuak tu ni le siatna a thuak tu hun hong theng zo hi.

²²A ngalte ii ngalkapte in a neak vaial uh ciang, Egypt sia ngul haam bangin haamin taikeak hi. Thingphuk naseamte in thingte phukin taam ngam a sukthap uh bangin,



²³amate in ama sia hei taw sim uh hi. A mite sia sim zawk ngawl tu za in tam mama a, a ngalkapte sia khaumawte sangin tam zaw uh hi.

²⁴Egypt mite sia maizum in kikoi a, saksang pan hong pai mihingte in amate zothal uh hi. Keima, Topa in ka ci zo hi,” ci hi.

²⁵Vaanglianbelpa Topa Israel ii Pathian in, “Thebes khua ii a pathian Amon sia Egypt le a pathiante le a kumpipate taw daan ka pia khawm tu hi. Egypt kumpipa le ama a umte theampo ka la tu a,

²⁶amate a that nuam Babylonia Kumpipa Nebuchadnezzar le a ngalkapte khut sungah ka aap tu hi. Ahihang hun khat ciang, nidang hun a ten ngei bangma in Egypt ngamah mihingte teang kik tu uh hi. Keima, Topa in ka ci zo hi.

Topa in A mite Ngum tu

²⁷“Ka mite awng, lau heak vun, Israel mite awng, patau heak vun. Na thongtaakna uh ngam khuala na pan kong suatak tu hi. Na ngam na inn uh ah na cia kik tu uh a nuam takin na teang tu uh hi; ngam muangin na om tu uh a, kuama in no hong lausak ngawl tu hi.

²⁸Note kungah kong pai tu a kong ngum tu hi. Note kong thethaang na munah a teang minamte theampo ka susia tu a, ahihang no kong susia buatu hi. Daan piak ngawlin note kong tha thong buatu hi; ahihang a kiphu za in daan kong pia tu hi. Keima, Topa in ka ci zo hi,” ci hi.

Jeremiah 47

Philistia taw kisai Topa ii Thupuak

¹Egypt kumpipa in Gaza khua a sim ma in Philistia mite taw kisai in Topa in keima tungah thu hong son hi.

²Ama in: “En in! Sak sangah tui khang a, nguntui pawm bangin luang tu hi. Tua tuite in leitung le a tungah om na theampo, khuapite le a sungah a teang mihingte khuum tu hi. Mihingte in hu ngenin au tu uh a; lei tungah om misim in nasia takin kap tu hi.



³Amate in, siphu khuasii ngingte, ngalleang ngingte, leangmui pei a kingoai ngingte za tu uh hi. Pate in a khut uh a pangh ah kaai niingniang tu a, a tate uh en kik tu in hong heak kik ngawl tu uh hi.

⁴Philistia suksiat tu hun, Tyre le Sidonte kung pan a, huna a nga sunte theampo khatan tu hun hong theng zo hi. Keima, Topa in Crete tuikulh pan a hong pai Philistiate theampo ka susia tu hi.

⁵Gaza mite tungah heena khuangaina lian theng zo a, Ashkelon ii mite dai dide in om uh hi. Philistia mi a om laiteng bang tan vei kap tu uh ziam?

⁶‘Topa ii Namsau awng! Bangtan vei vaat lai tu ni ziam? Na paai sungah cia kik in a, tua munah om in a tawlna in!’ ci in na au uh hi.

⁷Ahihang a sep tu nasep ka piak sa ahiciang, bangbangin tawlna thei tu ziam? Ashkelon le tuipi hui ah a teang mihingte sim tu in ka sawl zo hi,” ci hi.

Jeremiah 48

Moab Ngam Kisuksiatna

¹Vaanglianbelpa Topa in Moab ngam taw kisai hi bangin ci hi: “Nebo khua mite hesuak vun— a khua ki susia hi! Kiriathaim khua kila zo a, a kulh kipheltham zo hi, a mite maizum in kikoi zo hi.

²Moab ngam ii minthanna bo zo hi. Ngalte in Heshbon la zo a, Moab minamte suksiat tu sawm uh hi. Madmen khua kithimsak tu a, ngalkapte in tuancil tu uh hi.

³Horonaim mite in, ‘Molngolna! Kilalsakna!’ ci in au uh hi.

⁴“Moab sia kilalcipsak zo hi; patangte kaana aw ngai vun.

⁵Luhith mual kaatona lam tawntung ah amate ii kaana awte, Horonaim khuapi paisukna lampi ah ngimin khamin a kaana awte ngai vun.

⁶‘Manlang vun, na suatak natu uh in tai vun! Senneal ngam a om ngam laate bangin tai vun!’ amate in ci uh hi.



⁷“Moab awng, na thatang le na hauna na suang hi, ahihang tu in nang ngangawn hong kizo tu a; na pathian Chemosh sia a uliante le a thiampite taw saltang khawm tu uh hi.

⁸Khua khat beak zongh kisiatna pan suakta ngawl tu a; mualkuam le zaangtamte ngeal ki siacipsak tu hi. Keima, Topa in ka ci zo hi.

⁹Moab atu in khansuang khat phut vun; hai ngawlin kisia tu hi. A khuapite kisia tu a, tua sungah kuama teang kik nawn ngawl tu hi,” ci hi.

(¹⁰A thin theampo taw Topa ii na a seam ngawl pa sia haamsiat vun! Mihing a vaat ngawl, a that ngawl pa haamsiat vun!)

Moab Khuapite Kisia

¹¹Topa in, “Moab sia thin muangin om tawntung a, ngamdang ah sal kitangsak ngei ngawl hi. Ama sia beal khat pan beal khat sungah a kilaih kawkoai ngei ngawl zu taw kibang hi. A limna lal ngei ngawlin lim tawntung hi.

¹²“Tua ahiciang tu in zu buak bang a Moab mite a bua mang tu in mihingte ka paisak hun hong theng tu hi. Amate in a sapit beal hawmsak tu a, tua zawkciang sutham tu uh hi.

¹³Tuaciang Israel mite, a muan uh Bethel pathian in a mai uh a zumsak bangma in Moab mite sia, Chemosh a pathian in a mai uh zumsak tu uh hi.

¹⁴“Moab mite awng, banghangin ngalhangte ka hi uh a, ngalsim thiam ngalkapte ka hi uh kici nu ziam?

¹⁵Moab le a khuapite kisasak zo a; a tangval phabelte kithatlum zo hi. Keima in kumpipa, Vaanglianbelpa Topa ka hi a, keima in ka ci zo hi.

¹⁶Moab ngam ii ngim thuk tu nai zo a, a siat natu hong theng pal tu hi.

¹⁷A kiim ah a teangte le a minthanna a he mihingte theampo awng, Moab ngam atu in kap vun. ‘A minthanna le a vaangletna om nawn ngawl a, a nasia mama a ngamukna vaang bo zo hi,’ ci vun.



¹⁸Dibon khua ah a teangte awng, minpha a na omna uh panin hong tuaksuk ta vun a leivui sungah hong to tavun. Moab a siasak tu pa hi sungah om a, a kulhte siacip in nusia zo hi.

¹⁹Aroer khua ah a teang note awng, lamhui ah dingin ngak vun; a taikeak mihingte tungah bang thu piang ziam ci sia dongh vun.

²⁰‘Moab puk zo hi, Moab atu in kap vun; maizumna thuak hi. Moab ngam kisiatna thu sia Arnon ngun dungah son tavun!’ ci in amate in zo tu hi.

²¹⁻²³“Mual zaangtam tungah a om khuapite ahi Holon, Jahzah, Mephath, Dibon, Nebo, Beth Diblathaim, Kiriathaim, Bethgamul, Bethmeon te tungah thukhenna theng zo hi.

²⁴Kerioth le Bozrah ahi uh hi. A khuala le a nai a om Moab ngam khuapite theampo ii tungah thukhenna theng zo hi.

²⁵Moab ii thahatna kisutham zo a; a vaangletna kisiasak zo hi. Keima, Topa in ka ci zo hi,” ci hi.

Moab Mite Kiniamkhiaksak tu

²⁶Topa in, “Moab zukhamsak vun, banghangziam cile ama in kei hong langpan hi. Moab sia ama luak sungah leiliik tu a midangte nui tu uh hi.

²⁷Moab awng, Israel mite na nunau sia phawk in. Mihing suamte pawl taw a kiman khawm bangin amate na vawt uh hi.

²⁸“Moab ngamah a teang no mihingte awng, na khua uh nusia vun! Pai in liangpangh ah teang vun! Liangpangh ah bu a vawt vakhu sia taw kibang tavun.

²⁹Moab mite kiphask mama hi! A mite kiphatsakna, a kisk theina, a kiletsakna, a kivawt tawmna le amate le amate thupi a kiskna thute ka za zo hi.

³⁰Keima, Topa in amate ii a kihisakna thu ka he hi. Amate ii kiphatsakna sia bangma penh zo ngawl a, a vawtnate sia ngei kho ngawl tu hi.



³¹Tua ahikom Moab ngamsung a om misim atu le Kir Heres mite atu in ka kap tu hi.

³²Jazer mite atu sangin Sibmah mite atu in ka kaana nasia zaw tu hi. Sibmah khuapi awng, nangma in a baakte Tuipi Thi kantan a, Jazer ciang dong a zaam sapitngui khat taw na kibang hi. Ahihang tu in na khuakhal ante le na sapit ngate kisia zo hi.

³³Lungdamna le thinnopna sia Moab ngam leiphana panin kila zo hi. Sapit tui ngoaina panin sapit tui ka luan ka tawpsak hi; zu vawt a lungdam in a au tu kuama om ngawl hi.

³⁴“Heshbon mite le Elealeh mite kap uh a a kaana aw sia Jahaz ciang dongin kiza thei hi; Tua kaana aw sia Zoar khua mite in za thei uh a Horonaim le Eglath Shelishiyah khuate dongin kiza hi. Nimrim lui ngangawn kang zo hi.

³⁵Moab mite sia a biakna mun uh ah meihal biakpiaknate le a pathiante tungah a biakpiaknate a piak ngawl natu in ka khaam tu hi. Keima, Topa in ka ci zo hi.

³⁶“Tua ahikom mithi vuina pompa a tum khat bangin Moab atu le Kir Heres mite atu in ka kap hi; banghangziam cile a neisa theampo a bo siat hang ahi hi.

³⁷Amate a vekpi a sam le a khamulte meet uh hi. Amate a vekpi in a khut kuikeak uh a, misim in khau-ip puan silh hi.

³⁸Moab ngamsung innkhum theampo le khuasung kikhopna theampo ah mithi kaana ngawl bangma dang om ngawl hi, banghangziam cile kuama dei ngawl tuibeal khat bangin Moab ka sutham zo hi.

³⁹Moab ngam kitamtham zo hi! Kap vun! Moab kimaizumsak zo hi. Moab kisiacip zo a, a kiim a paam minamte theampo in nuisan uh hi. Keima, Topa in ka ci zo hi,” ci hi.

Moab atu Suatakna Om ngawl

⁴⁰A tha a phal muvanlai khat bangin ngam khat in Moab ngam tungah hong suktun tu hi ci in Topa in kamciam zo hi,



⁴¹tuaciang a khuapite le a kulhte kila tu hi. Tua ni in Moab ii ngalkapte sia numei nausuak tu a, a patau bangin patau tu uh hi.

⁴²Moab sia kisia tu a, minam khat suak zo nawn ngawl tu hi, banghangziam cile ama in kei hong langpan hang ahi hi.

⁴³A lauhuai, dum le thaangte in Moab mite ngak nginge hi. Topa in ci zo hi.

⁴⁴A lauhuai na pan taiku tu a hanciam pawpo dum sungah taak tu uh a, dumsung panin a kaato pawpo thaang sungah kiman tu uh hi. Banghangziam cile Moab mite lalthap natu in Topa in hun ciangtan zo hi.

⁴⁵Hu tu a nei ngawl ngaltaite in Sihon kumpipa ii khatvei a uk ngeina khuapi ahi Heshbon khua sungah bel natu zong tu in hanciam uh hi, ahihang tua khua sia mei in kaangtum hi. Ngalsim a kin Moab mihingte ii ngam le mualsaangte sia mei in kaangtham zo hi.

⁴⁶Moab mihingte hesuak vun! Chemosh pathian a bia mite kisia zo a, a tapate le a tanute thongtaak tu in ki paipui zo hi.

⁴⁷Ahihang mailam sangah Topa in Moab sia nuamsasak kik tu hi. Hite theampo sia Moab tungah a piang tu thu Topa ii son sa ahi hi.

Jeremiah 49

Ammon tungah Topa ii Thukhenna

¹Ammon thu Topa in hi bangin son hi: “Israel pasalte koisung ah om ziam? A ngam a hung tu kuama om ngawl ziam? Banghangin Gad minamte ii ngam sia Molech pathian a bia mihingte in lasakin tua munah teangsak ziam?”

²Ahizong Rabbah khuapi ah a teang mihingte ii ngalkidona aw ka zaaksak tu hun hong theng tu a, a khuapi kisiacip in a khuanote kihaltum tu hi. Tuasia ciang Israel in a ngam a laaksak mite kung pan a ngam la kik tu uh hi.

³Heshbon mihingte awng, au in kap vun! Ai sia kisiasak zo hi! Rabbah numeite awng khuangai in kap vun! Khau-ip puan silh in kap vun! Lungmang in tai kawkoai vun. Na pathian Molech sia a thiampite le a uliante taw saltang tu in ki paipui tu hi.



⁴A thumaan ngawl mihingte awng banghangin kisathei nu ziam? Na thahatna kiam susuk hi. Banghangin na thahatna uh suangin kuama in ko hong sim ngam buante ci thei nu ziam?

⁵Na kiim na paam panin launa kong thengsak tu hi. Na taikeak siat tu uh hi. Na suatak natu uh in na tai tek tu uh a, na ngalkapte a kaikhawm kik tu kuama om ngawl tu hi.

⁶“Ahihang nidang ciang Ammon sia ka nuamsasak kik tu hi. Keima,Topa in ka ci zo hi,” ci hi.

Edom tungah Topa ii Thukhenna

⁷Vaanglianbelpa Topa in Edom thu hi bangin son hi, “Edom mite in thumaan taw a thukhenna uh bosua zo ziam? Ngaisutna pha a plate in bangbang vawt le pha tu ci in son thei nawn ngawl ziam? A pilna theampo bo siat zo ziam?

⁸Dedan mite awng, kiheak vun a tai vun! Buu vun! Esau ii suan le paalte ka susia tu hi, banghangziam cile amate daan ka piak tu hun hong theng zo hi.

⁹Mihingte in sapit nga a law uh ciang a ngui tungah tawm khe uh a ngutate in zanin hong pai ciang amate ii dei teng bek la uh hi.

¹⁰Ahihang Esau ii suan le paalte a nguaktang in ka koi zo a, a bukna munte ka kilanghsak zo hi, tua ahikom amate buu thei nawn ngawl uh hi. Edom mite a vekpi in kiskusia zo hi. Khat zongh taang ngawl hi.

¹¹Na tangate ka kungah hong koi tavun. Keima in amate ka keam tu hi. Na meingong numeite in kei hong beal thei hi.

¹²“Daan piak tu a, a kilawm ngawl mite ngangawn in daan thuakna hai pan dawn tu ahile, daan piak ngawlin suakta tu in kingaisun nu ziam? Hi ngawl hi, tua hai pan dawn hamtang tu nu hi!

¹³Bozrah khuapi sia a kiitak huai mun le kongaw ngam suak tu hi ci in keima mama in ka kiciam zo hi; mihingte in tua khua sia ciammuina in nei tu uh a, a min sia haamsiatna in zangh tu uh hi. A kiim a paam a om khuanote theampo a tawntungin kisiacip tu hi. Keima, Topa in ka ci zo hi,” ci hi.



¹⁴Keima in, “Edom awng, Topa kung panin thu khat ka nga zo hi. Minamte in a ngalkapte khawmtua in nang hong sim tu in a kithoai natu amate tungah son tu in Topa in kamtai khat sawl zo hi.

¹⁵Topain nang hong thaneamsak tu a kuama in nang hong zakta ngawl tu hi.

¹⁶Na kiphatsakna in nang hong theam zo hi. Amate in nangma hong kiita tu hi ci a na ngaisut za in kuama in nang hong kiita ngawl hi. Nang in liangkawm tung le mualdawn saangna ah na teang a, muvanlai khat bangin a saangna ah na ten hangin Topa in nang hong khiasuk veve tu hi. Topa in ci zo hi,” ka ci hi.

¹⁷Topa in, “Edom tungah a theng tu suksiatna sia nasia mama tu a, a kantan theampo in lamdang sa in ingh tu uh hi.

¹⁸Sodom khua, Gomorrah khua le a kiim a khuate a kisiatsak bangin Edom khua kisiasak tu hi. Tua munah kuama teang kik nawn ngawl tu hi. Keima, Topa in ka ci zo hi.

¹⁹Tawpi in Jordan Ngundung ngam tawngtol sung pan lopa hingna dui sungah a pai bangin, keima kong pai tu a, Edom mite a ngam uh panin thakhat thu in ka taikeaksak tu hi. Tuasia ciang Keima ii teal ulian lampuipa in ngam uk tu hi. Kei taw kitee ngat thei tu akua om ziam? Akua in kei hong thato ngam tu ziam? Kei hong nalh zo tu ukpa akua om ziam?

²⁰Tua ahikom Edom mite suksiat natu ka tupna le Teman khuapi sung mite tungah vawt tu ka tupnate ngai vun. A patangte uh ngangawn kikaikeak tu a, a kuama po liinglawng tu uh hi.

²¹Edom a puk ciang leitung buppi kiliing tu bangza in nging tu a, patau in a kaana aw sia Aqaba tuipi dok dongin kiza tu hi.

²²Muvanlai in a tha phalin sa man tu, a suktun bangin ngalte in Bozrah sim tu hi. Tua ni in Edom ngalkapte sia nausuak numei bangin thin patau in om tu uh hi,” ci hi.

Damascus tungah Topa ii Thukhenna



²³Topa in Damascus ii thu hi bangin son hi: “Hamath le Arpad khuapite sungah a teang mihingte sia thusia a zaak uh manin thin ngimin lau in om uh hi. A patauna te tuipi bangin amate tungah kihual a, amate tawlna thei ngawl uh hi.

²⁴Damascus mite sia a tha uh zawmin lau in taikeak uh hi. Numei nausuak tu bang keakin na sa in ngim thuakin om uh hi.

²⁵Tua a minthang a lungdam bul khuapi sia kinsia cip zo hi.

²⁶Tua ni in a tangvalte sia khuapi sung lampi tungah kithat tu uh a, a ngalkapte theampo ki maaimot tu hi.

²⁷Damascus luphungte mei taw ka hal tu a, Benhadad ii Kumpi inn sia ka haltum tu hi. Keima, Vaanglianbelpa Topa in ka ci zo hi,” ci hi.

Kedar Minam tung le Hazor Khuapi tungah Thukhenna

²⁸Babylonia Kumpipa Nebuchadnezzar ii a zaw Kedar minamte le Hazor ii uk ngamte taw kisai in Topa ii cina panin: “Kedar mite sim vun a niswana sangah a om minamte susia vun!

²⁹A puanbukte le a tuu honte, a buk kongkha puankhaite le a buk sungah a om a nate theampo laksak vun. A kalaoh te la vun a a mite tungah, ‘Na kiim na paam theampo ah launa om hi’ ci in son vun.

³⁰“Hazor mihingte awng, a khuala na ah tai vun a buu vun ci in Keima, Topa in kong son khol hi. Babylonia Kumpipa Nebuchadnezzar in no tungah sawmna nei a, hi bangin ama in,

³¹‘Hong pai tavun! Ngam muangin in ngalmuang a kisa mite ih sim tu hi! A khuapi in kongpi la nei ngawl, taw kalh natu tawbu la nei ngawl a kidal vet ngawl hi,’ ci hi.

³²“A kalaoh te le a hul, a khoaite theampo la vun! A sam uh a tom in a meet mihingte sia mun theampo ah ka thethaang tu a, mun theampo pan amate tungah tuasiatna ka thengsak tu hi.



³³Hazor ngam sia a tawntungin kongaw ngam kisuaksak tu a, ngiate bek tua munah teang tu hi. Tua munah kuama teang kik ngei ngawl tu hi. Keima, Topa in ka ci zo hi,” ci hi.

Elam tungah Topa ii Thukhenna

³⁴Zedekiah ii Judah kumpi a sua zawk pociang, VaanglianbelpaTopa in Elam ngam thu ka tungah hong son hi.

³⁵Ama in, “Elam ngam a thahatsak thalkap thiamte theampo ka that tu hi.

³⁶Mun theampo panin Elam ngam sia hui in ka seamsak tu a, a ngaltai mite a thet ngawl na ngam khat beak om ngawl dongin a mite mun theampo ah ka thethaang tu hi.

³⁷Amate a that nuam a ngalte Elam mite in ka kiitasak tu hi. Ka thin uuk mama na taw in Elam mite ka susia tu a, ka maaimot thiang dongin amate do tu in ngalkapte ka puak tu hi.

³⁸A kumpite le a lampui uliante ka susia tu a, tua munah ka kumpi tokhum ka phut tu hi.

³⁹Ahihang nidang ciang Elam mite ka nuamsasak kik tu hi. Keima, Topa in ka ci zo hi,” ci hi.

Jeremiah 50

Babylon A Kilaakna

¹Babylon khuapi le a mite taw kisai in Topa in hi bangin ka tungah hong son hi:

²“Minamte tungah hi thu taangko in! Hi thu thangsak in! Lim lak in a, a thu pualaak in; iim heak in! Babylon bo zo hi! A milim pathian Marduk kitamthamsak zo hi! Babylon ii milimte maizum in ki omsak zo hi; a kiihuai a milimte kisutham hi!

³“Saksang panin minam khat Babylon sim tu in hong theng zo a Babylonia sia kongaw ngam suaksak tu hi. Mihing le nganhingte taikeak tu uh a, tua munah kuama teang ngawl tu hi,” hong ci hi.

Israel ii Heakkikna



⁴Topa in, “Tua hun hong thet ciang, Israel le Judah mite ngeal kap kawmin hong pai tu uh a, a Pathian keima hong zong tu uh hi.

⁵Amate in Zion khua paina lam dongh tu uh a tuaciang tua san ah pai tu uh hi. Amate in keima taw a tawntung kiciamna khat vawt tu uh a, bangma hunin palsat ngei ngawl tu uh hi.

⁶“Ka mite sia tuucingte ii mualtung tengah a manthan sak a tuute taw kibang hi. Amate sia tuute bangin mual khat pan mual khat ah vakthap kawkoai uh a, a inn omna mun mangil zo uh hi.

⁷Amate sia a mute theampo in sim uh hi. A ngalte in, ‘Amate sia Topa tungah khial uh hi, tua ahikom hi bang a amate tungah ih vawt sia kikhial ngawl hi. A taangpupite in Topa muang hi, tua ahiciang amate mama in Topa tungah a thumaan tu uh ahi hi,’ ci uh hi.

⁸“Israel mite awng, Babylonia panin taikeak vun! Ngam hi sia taisan vun. A taisan masa bel hi vun!

⁹Sak sangah a om a thahat minam pawl khat ka hanthawn tu a Babylonia ka simsak tu hi. Amate in tua ngam sim tu in a thuangin kingual tu a, zo tu uh hi. Amate sia thal taw mui a kap ciang a khial ngei ngawl savai thiamte ahi uh hi.

¹⁰Babylonia khuapi kiphuul tu a, a phuulte in a dei theampo la tu uh hi. Keima, Topa in ka ci zo hi,” ci hi.

Babylon ii Bona

¹¹Topa in, “Babylonia mihingte awng, ka minamte na suddol uh hi. Note lungdam in na kipaak uh a, khuipui ancil in a pai kawkoai khat bang le sipu haamin a vak kawkoai khat bang na hi uh hi,

¹²ahihang na khuapi lian uh sia kizawngsak tu a, kimaizumsak tu hi. Babylonia sia minam theampo sung panin a ngina ngawl bel minam suak tu a, a kongaw le tui om ngawl senneal ngam suak tu hi.

¹³Ka thin uukna hu in Babylon ah kuama teang ngawl tu hi; A siacip in ki nusia tu a, tua mun kantan in a paite theampo in lamdang sa in ingh tu uh hi.



¹⁴“Thal toaite awng, Babylon sim tu in kingual vun a kiim uum vun. Na thaltang theampo uh taw Babylon kap vun, banghangziam cile ama in keima Topa tungah hong khial zo hi.

¹⁵Babylon khuapi kiimkot ah ngalsim aw taw au vun! Tu in Babylon in ngallel zo hi. A khuapi luphungte ki sulet zo a ki cimhthamsak zo hi. Keima in Babylonian te tungah phu ka la hi. Tua ahikom amate tungah phulam vun a, midangte tungah a vawt uh bangin amate tungah vawt vun.

¹⁶Tua ngam sungah thaici kituu heak hen a, an kila heak hen. Tua munah a teang ngamdang mite theampo in Babylon a sim ngalkapte kiita tu uh a, a khua le a ngam ah cia kik tu uh hi,” ci hi.

Israel te ii Heak kikna

¹⁷Topa in ci hi, “Israel mihingte sia tawpite ii delmang le a kithethaang tuute bang ahi uh hi. A masa bel in amate sia Assyria kumpipa in sim a, tua zawkciang Babylonia Kumpipa Nebuchadnezzar in a ngu khimtham hi.

¹⁸Tua ahikom, Keima, Vaanglianbelpa Topa , Israel ii Pathian in, Assyria kumpipa daan ka piak bangma in Nebuchadnezzar Kumpipa le a ngam daan ka pia tu hi.

¹⁹Israel mite a ngamah ka teangsak kik tu hi. Amate in Carmel Mualtung le Bashan ngam sungah a ciin ante ne tu uh a, Ephraim le Gilead ngamte sungah a piang ante theampo a du bangin in ne tu uh hi.

²⁰Tua hun a thet ciang, Israel ngamah khialna kimu ngawl tu a, Judah ngamah ngitlona kimu ngawl tu hi, banghangziam cile a nuntakna ka kheet lai mihingte ii khialna ka maisak tu hi. Keima,Topa in ka ci zo hi”.

Babylonia tungah Pathian ii Thukhenna

²¹Topa in ci hi, “Merathaim mite le Pekod mite sim vun. That vun a susia cip vun. Kong thupiak theampo vawt vun. Keima, Topa in ka ci zo hi.

²²Hi ngamah ngal kisimna aw kiza a, suksiatna nasia takin om hi.



²³Babylonia in leitung buppi sek taw seaktham a, tu in tua sek sia kitamthamsak zo hi! Tua ngamah a piang thute minam theampo in lamdang sa uh hi.

²⁴Babylonia awng, kei nong do a, na awk hunlam zongh he ngawl na hi hang, thaang kong siana sungah na awk zo hi.

²⁵Ka ngalhiamte ka koina mun ka hong zo a ka thin uukna taw in tua ngalhiamte ka pusua keak zo hi, banghangziam cile Keima, Vaanglianpipa Topa, Vaanglianbelpa in, Babylonia ah sep tu nasep ka nei hang ahi hi.

²⁶Mun theampo pan sim vun a, a antang kholna munte hong keak vun! Na sutol vanhete antang sen bangin seng to vun! A ngam susia vun! Bang mama khe heak vun!

²⁷A ngalkapte theampo that vun! Amate mon vun! Babylonia mihingte a lal na hi zo uh hi! Amate daan piak tu hun hong theng zo hi!” ci hi.

(²⁸Ngaltaite Babylon pan ngelku in Jerusalem theng uh a, amate in Babylon mite ii ama Biakinn tungah a vawt nate hu in Topa ih Pathian in bangbangin phu la ci sia son uh hi.)

²⁹“Babylon sim tu in thalkap thiamte son vun. Thal le thaltang a zangh thiamte theampo kuansak vun. A khuapi kiim uum vun a khat zongh suaktasak heak vun. A vawt bangin thuk kik vun, midangte tungah a vawt bangin ama tungah vawt vun, banghangziam cile ama in Israel ii a Thiangtho Pa, Keima kiphatsakna taw hong langpan hi.

³⁰Tua ahikom a tangvalte sia khuapi sung lampi tungah kithatlum tu a, a ngalkapte theampo sia tua ni in kimaimot tu hi. Keima, Topa in ka ci zo hi.

³¹“Babylonia awng, nang sia kiphatsakna taw kidim ni hi. Tua hu in Vaanglianpipa Topa Vaanglianbelpa, Keima in nang kong langpan hi! Nang dan kong piak tu hun hong theng zo hi.



³²A kiphasak na ngam sia lutu in puk tu a, kuama in nang hong phongto ngawl tu hi. Na khuapite mei taw ka hal tu a, a kiim ah a om theampo kaangtum tu hi,” ci hi.

³³Vaanglianbelpa Topa in, “Israel mite le Judah mite in zawthawk vawtna thuak uh hi. Amate a mante theampo in amate hi cinten in cingin pusuaksak ngawl tu hi.

³⁴Ahihang amate a suatak tu pa sia thahat a, ama min sia Vaanglianbelpa Topa ahi hi. Ama mama in amate thu vaan tu a, leitung ah kilemna thengsak tu a, ahihang Babylonia mihingte tungah ngimna theng tu hi,” ci hi.

³⁵Topa in ci hi, “Babylonia ah thina theng tu hi! A mihingte, a ukte le a mipilte tungah thina theng tu hi.

³⁶Leilot kamsangte tungah thina theng tu hi— bang mawmawt uh ziam! A ngalkapte tungah thina theng tu hi— bangza in lau huai ziam!

³⁷A siphute le a ngaleangte susia vun! A cial ngalkapte tungah thina theng tu hi— bangza in zawm ziam! A sum a paaite susia vun suddol in la vun.

³⁸A ngamah nguatui hangsak vun a, a ngunte kangsak vun. Babylonia sia a kiitak huai milim biakna ngam hi a, milimte hu in mihingte a mawmaw kisua uh hi.

³⁹“Tua ahikom Babylon sia doaite, tha ngilote le vacim thiangtho ngawlte teenna ngam suak tu hi. Tua munah bangma hun in mihing teang kik ngei nawn ngawl tu hi.

⁴⁰Sodom khua, Gomorrah khua le a kiim a khuate ka suksiat bangin Babylon ka susia tu hi. Tua munah kuama teang kik ngei ngawl tu hi. Keima, Topa in ka ci zo hi.

⁴¹“Sak sangah a om ngam panin a khuala a om a thahat minam khat hong pai hi; kumpi tam mama ngal do tu in kithoai uh hi.

⁴²Amate in a thalte le a namsaute toai uh hi; Amate sia ngilo a ngual hesuakna nei ngawl uh hi. A siphute tung a to uh ciang, tuipi hawk bangin nging hi. Babylonia sim tu in amate kithoai uh hi.

⁴³Babylonia kumpipa in tua thu za a, a khutte zaw hi. Ama in numei nausuak tu bangin thin ngimna le tak ngimna thuak hi.

⁴⁴“Jordan ngundung duithuk sung pan lopa hingna ngam ah a pai to tawpi khat bangin Keima, Topa kong pai tu a, Babylonian te a khuapi uh pan thakhat thu in ka taikeaksak tu hi. Tuasia zawkciang lampui ka tealpa in ngam uk tu hi. Kei taw kitee ngat thei tu akua om ziam? Akua in kei hong thato ngam tu ziam? Hong langpan ngam tu kumpi akua bang om ziam?”

⁴⁵Tua ahikom Babylon khuapi suksiat natu ka tupna le a mite tungah ka vawt tu zia ka sawmna hong ngai tavun. A patangte ngangawn kikaikeak tu a, mihing theampo kilausak tu hi.

⁴⁶Babylon a bo ciang, a bona awnging nasia tu ahikom leitung buppi liing tu hi. Patau in a auna awte minam dangte in za tu uh hi,” ci hi.

Jeremiah 51

Babylonia tungah Thukhen Thuana

¹Topa in ci hi, “Babylonia le a mihingte lalsak tu in vuipei ka vasak tu hi.

²Vuipei in taangphaw a seamkeak bangin Babylonia susia tu in ngamdang mite ka puak tu hi. Tua suksiatna ni a thet ciang, amate in mun theampo pan sim tu a, a ngam sia a kol in nusia tu uh hi.

³A ngalkapte a thalkap tu le a thik puan a silh tu hun pia heak vun. A tangvalte khoaikhe heak vun! A ngalkap buppi mon vun.

⁴Amate sia a khuapi sung lampi tungah kiliamsak tu a, thi tu uh hi.

⁵Amate in Israel ii a Thiangtho Pa, Keima tungah hong khial zo ahitazong Keima, Topa Pathian Vaanglianbelpa in Israel le Judah ka taisan bua hi.



⁶Babylonia panin tai vun! Na suatak natu in tai vun! Babylonia ii khialna hangin thipui heak vun. Keima in tu in a tungah phu ka la a, a kiphu bangin daan ka pia hi.

⁷Babylonia sia leitung buppi zu a khamsak ka khut sungah a om kham hai khat bang ahi hi. Minamte in a zu ne in a thin am uh hi.

⁸Babylonia sia thakhat thu pukin kisiacipsak hi! Ama kaa vun! A liam ma bawl natu in zatui la vun; dam zo thei lai tha tu hi.

⁹Tua munah a teang ngamdang mite in, ‘Babylonia hu tu in ka hanciam uh hi. Ahihang hai lei zo hi. Tu in nusia in ih ngam zuan kik ka tawng. Pathian in Babylonia sia a tha neiza theampo taw daan pia zo a, sia dipdeapsak zo hi,’ ci uh hi”.

¹⁰Topa in ci hi, “Ka mite in, ‘Topa in ih thumaan nate lak zo hi. Pai in Topa ih Pathian ii nasepte Jerusalem mite tungah son ka tawng’ ci in au uh hi”.

¹¹Topa in Babylonia suksiat tu a sawm hu in Media kumpite hanthawn hi. A Biakinn a suksiat hu in ama in hi bangin phulam tu ahi hi. Ngal a sim ngalkapmaang te in, “Na thaltang hiam vun! Na lum uh la in kithoai vun!

¹²Babylon ii luphungte sim tu in lim lak vun. Phualcingte belap in thahatsak vun! Ngalvil koi vun! Ngalte a bulu tu in ngalkap koi vun!” ci in thupia hi. Topa in Babylonia mihingte tungah ka vawt tu hi a ci sia vawt zo hi.

¹³Tua ngam in ngun tam mama nei a, sum hau mama hi, ahihang ama hun bo zo a, a nuntakna khauzam sia kisaattan zo hi.

¹⁴Vaanglianbelpa Topa in Babylonia sim tu in mihing tam mama, khaumaw honpui bangin paipui tu a, ngalzawna taw amate au tu uh hi ci in a nuntakna taw kiciam hi.

Pathian Pokna La khat

¹⁵Topa in a vaangletna taw leitangh vawt a; ama ciimna taw leitung bitphua in vantungte phal hi.



¹⁶Ama ii thupiakna taw in vantung ah tuite hawk a; ama in leimong panin meeite paipui hi. Ama in ngua sungah khualeng lengsak a, a bumngua kholna inn panin vui vasak hi.

¹⁷Hisia a mu uh ciang, mihingte thin am in mawmaw uh hi; Milim a vawtte kimaizumsak hi. Banghangziam cile amate ii vawt milimte sia, a maan ngawl pathian hi a, nuntakna nei ngawl hi.

¹⁸Tuate sia manh nei ngawl a, etsat tu ahi hi; Topa ii amate daan pia tu hong pai ciang amate kisia sak tu hi.

¹⁹Jacob ii Pathian sia amate bang hi ngawl hi; Ama sia na theampo a vawtpa hi a, ama mi tatak tu in ama in Israel teal zo hi. Ama min sia Vaanglianbelpa Topa ahi hi.

Topa ii Sek

²⁰Topa in ci hi, “Babylonia awng nang sia ka sek na hi a, ka ngalhiam na hi hi. Minamte le kumpi ngamte sukcip natu,

²¹ Siphu le a tungah a tote sukthap natu, Ngalleang le a leang hawlte sukthap natu,

²² pate le numeite thalup natu, Khanghaamte le khangmoite thalup natu, tangvalte le ngaknute thalup natu,

²³ tuucingte le a tuu honte thalup natu, lothote le a lotho siphute thalup natu, ukpите le uliante sukcip natu in nang kong zangh hi”.

Babyloniante Daan piakna

²⁴Topa in ci hi, “Jerusalem tungah siatna a vawtte theampo hu in Babylonia le a mite tungah phu ka laak sia na mu tu uh hi.

²⁵Babylonia awng, nang sia leitung buppi a susia muallian khat taw na kibang hi, ahihang Keima, Topa in na ngal ka hi hi. Nang kong man tu a, lei taw kong kikimsak tu a, vut kong suaksak tu hi.

²⁶Ninthuk na suak tu a nang sung panin suangte khat zongh innsak natu in kizangh kik nawn ngawl tu hi. A tawntungin senneal ngam khat bang na hi tu hi. Keima, Topa in ka ci zo hi.



²⁷“Ngalsim natu in heaksakna lim pia vun! Minamte ii zaak thei tu in lemle tum vun! Babylonia sim tu in minamte kithoaisak vun! Ngalsim tu in Ararat ngam, Minni ngam le Ashkenaz ngamte son vun. Ngalsim lampui tu in ngalkap mang khat see vun. Khaumaw hon khat bangin siphute keng vun.

²⁸Babylonia sim tu in minamte kithoaisak vun. Media kumpite, a lampuite le a khutnuai naseam uliante le amate ii uk ngamte theampo ii ngalkapte vaitha vun.

²⁹Leitung sia lau in liing hi; banghangziam cile Babylonia ngam sia kuama ii ten ngawlina senneal ngam suaksak tu a, Topa in ama ii ngealna a tangtutsak hang ahi hi.

³⁰Babylonian ngalkapte ngalsim nawn ngawlin a kulh sungah om uh hi. Amate a thin uh no in numeite bang hi zo hi. A khuapi kongpite kisiasakcip zo a, a innte mei in kaang hi.

³¹Ama ii khuapi sia a pangh theampo panin kisutham zo hi ci in Babylonia kumpipa tungah ko tu in kamtai khat zawkciang khat tai hi.

³²Ngalte in ngun kantanna mun sia la zo a ngalpanna kulh teng mei taw hal zo hi. Babylonian ngalkapte patau uh hi.

³³Khua ngei ngawlin ngalte in ancilna munah taangcil bangin amate saat vawkin tuancil tu uh hi. Keima, Vaanglianbelpa TopaIsrael ii Pathian in ka ci zo hi,”.

³⁴Babylonia kumpipa in, Jerusalem sia saattan in ne hi. Ama in tui koina beal khat bangin khuapi hawm suaksak a, ngulpui khat bangin ama in valhtum hi, ama in a dei teng la in a dang teng vawk hi.

³⁵Zion mite in, “Hong ngoltol vawtna hangin Babylon in thuak taken!” ci ta uh hen. Jerusalem mite in, “Koma ii thuakna hu in Babylonia in thuak taken!” ci ta uh hen.

Topa in Israel Hu tu



³⁶Tua ahikom Topa in Jerusalem mite tungah, “Na thu uh kong panpui tu a na tung uh ah vawtsiatna hong vawt hu in na ngalte uh in ka thuaksak tu hi. Babylon te ii tuinaak le a ngunte ka kangsak tu hi.

³⁷Tua ngam sia ngamsate teenna ninthuk suak tu hi. Tua mun sia thaadam huai mun hi tu a; kuama teang ngawl tu hi, a mute theampo in cizat huai sa tu uh hi.

³⁸Babylonia te theampo sia tawpите bangin hawk tu a, tawpi note bangin thuum tu uh hi.

³⁹Amate duhop uh ziam? Amate atu in anneak poai khat ka vawt tu a, zukham lungdam in ka omsak tu hi. Amate mu tu uh a khanglo ngei ngawl tu hi.

⁴⁰Tuunote, kealte le tuutalte bangin amate thalup tu in ka paipui tu hi. Keima, Topa in ka ci zo hi,” ci hi.

Babylon ii Thuak tu

⁴¹Topa in Babylon thu hi bangin son hi, “Leitung buppi ii pok khuapi sia kila zo hi! Minam dangte atu in Babylon sia a thaadam huai suak zo hi.

⁴²Tuipi in Babylon khua luan nelh zo a, tuihual in khum zo hi.

⁴³Khuapite thaadam huai suak zo a, kuama ten ngawl, pai ngawl na tui om ngawl senneal ngam bang ahi hi.

⁴⁴Babylon mite ii pathian Bel sia daan ka pia tu a, a nguk sa vanhte ka pia kiksak tu hi; minamte in ama bia nawn ngawl tu uh hi. “Babylon ii luphungte cimh zo hi.

⁴⁵Israel mite awng, tua mun panin tai vun! Na nungta nuam uh le ka thin uukna taisan vun.

⁴⁶Kamdawn na zakte hu in na thin uh kiamsak heak vun a, lau heak vun. Kumsim in ngam sungah kizawthawk vawtna kamdawn le kumpi khat le khat kidona kamdawn thang hi.



⁴⁷Tua ahikom Babylon ii milim pathiante ngim ka piak tu hun hong theng hi. A ngam buppi kimaizumsak tu a, a mite theampo kithatlum tu hi.

⁴⁸Saksang pan ama susia tu in hong pai minamte khut sungah Babylonia a bo ciang leitung le vantung ah a omte theampo lungdam in au tu uh hi.

⁴⁹Babylonia mihingte in leitung theampo a mihingte thisak hi, Israel te tam mama thisak ahikom tu in Babylon bo tu hi. Keima, Topa in ka ci zo hi,” ci hi.

Babylonia ah a om Israel te tungah Pathian ii Thupuak

⁵⁰Topa in Babylonia a om a mite tungah; “Thina panin suakta zo nu hi! Tu in pai vun! Ngak heak vun! Na khua le na ngam uh taw ki khuala na hi uh hangin Keima na Topa hong ngaisun tavun a Jerusalem phawk vun.

⁵¹Note in, ‘Th min hong kidaisak zo a hong kimaizumsak zo hi; Ngamdang mite in Biakinn sung a thiangtho na munte la zo ahikom bangma ka ci thei nawn bua uh hi’ na ci uh hi.

⁵²Tua ahikom Babylon khua a milimte tungah thu ka khen ni tu hun le ngamsung theampo ah a liamte a tau tu hun hong theng tu hi ka ci hi.

⁵³Babylon sia vantung ah kaato thei in, tua munah ngal nanna kulh kho vawt thei hi kale zongin tua kulh susia tu in mihing ka puak veve tu hi. Keima, Topa in ka ci zo hi,” ci hi.

Babylon Suksiat Thuana

⁵⁴Topa in ci hi, “Babylon khua sungah kaana aw le, ngamsung kisuksiatna hu in khuangaina aw ngai vun.

⁵⁵Babylon ka susia tu a, a ngamlumna aw ka thimsak tu hi. Ngalkapte in tuihual bangin del in a nging tatakin au in sim uh hi.

⁵⁶Amate Babylon susia tu in hong pai uh hi; a ngalkapte kiman a, a thalte kithiaktan hi. A ngilote daan a pia sia Pathian Keima ka hi a, a kiphu bangin Babylon daan ka pia tu hi.



⁵⁷A ngamukte, a mipilte, a lampui uliante le a ngalkapte zu ka khamsak tu hi. Amate mu in khanglo ngei ngawl tu uh hi. Keima kumpipa in ka ci zo hi; Keima in Vaanglianbelpa Topa ka hi hi.

⁵⁸A thahat Babylon luphungte lei ah kicimsuksak tu a, A saang khuapi kongpите kihaltum tu hi. Minamte ii nasepna sia bangma in kimang ngawl hi; a hanciamnate kaangtum zo hi. Keima, Vaanglianbelpa Topa in ka ci zo hi”.

Jeremiah ii Thupuak sia Babylon ah Kipuak

⁵⁹Zedekiah Kumpipa a hu pa sia, Mahseiah ii tupa, Neriah ii tapa Seraiah ahi hi. Zedekiah ii Judah kumpi a sua zawk a kum li kumin, Seraiah sia Zedekiah taw Babylonia ah paikhawm a, keima in Seraiah sia thu pawl khat ka hil hi.

⁶⁰Keima in Babylonia tungah a theng tu suksiatnate theampo le Babylonia taw kisai thudangte theampo tepteena laibu khat sungah ka at hi.

⁶¹Keima in Seraiah tungah, “Babylon na thet ciang hi laibu sungah a ki at thute theampo mipite tungah a ngingin sim in.

⁶²Tuaciang, “Topa awng, hi mun na susia tu a, a tawntung kongaw ngam suak in, a nungta, mihing hi kale nganhing hi kale om ngawl tu hi ci in na son zo hi,’ ci in thungen in.

⁶³Seraiah awng, hi laibu sia mipite tungah na sim zawkciang, suangtum khat tungah khit in a, Euphrates ngun sungah vawk in,

⁶⁴Tuaciang, ‘Hi bangin Babylonia tungah tung tu hi— Babylonia sia tui sungah tumsuk tu a lawt to kik ngei ngawl tu hi. Banghangziam cile Topa in suksiatna sia Babylonia tungah a thetsak tu hang ahi hi,’ ci in.” ka ci hi. Jeremiah ii kammalte sia hi teng ahi hi.

Jeremiah 52

Jerusalem Bona (2Kumpite 24.18-25.7)

¹Zedekiah sia Judah kumpi a sua lai in kum kul le kum khat pha a, Jerusalem panin kum sawm le kum khat uk hi. A nu ii min sia Hamutal hi a, Libnah khuapi ah a teang Jeremiah ii tanu ahi hi.

²Jehoiakim Kumpipa ii khialna a vawt bangma in Zedekiah Kumpipa in Topa tungah khialna vawt hi.

³Topa sia Jerusalem le Judah mite tungah thin uuk mama ahikom ama in amate a mu thei ngawl na munah not mang hi. Zedekiah in Babylonia Kumpipa Nebuchadnezzar langpan hi.

⁴Tuasia ciang Zedekiah ii kumpi a sua zawk a kum kua kum, a tha sawmna ni sawm ni in Nebuchadnezzar in a ngalkapte theampo taw pai in Jerusalem sim uh hi. Amate in khuapi pua sangah ngiaphual saatin, khuapi kiimkot ah ngal uumci na luphung vawt uh hi.

⁵Tuaciang Zedekiah ii kumpi in a maan zawk kum sawm le kum khat a phak dong tua khuapi uumci uh hi.

⁶Tua kum a tha lina ni kua ni in kialpi nasia mama a, khuasung mite in bangma neak tu nei nawn ngawl ahikom,

⁷khuapi uumna luphungte ki sulet hi. Babylonia ngalkapte in khuapi uumci hi napi, Judah ngalkapte theampo zan lai in ngelku uh hi. Amate in kumpi huan paina lam luphung nii kilaklaw luphung a pee kongpi kantan in Jordan Kuam sang zuanin tai uh hi.

⁸Ahihang Babylonian ngalkapte in Zedekiah Kumpipa kotdel in Jericho khua nai zaangtam ah man uh hi, a ngalkapte theampo in Zedekiah taisan uh hi.

⁹Zedekiah sia Nebuchadnezzar Kumpipa kungah kipaipui hi. Tua lai in Nebuchadnezzar sia Hamath ngam Riblah khua ah om a tua munah Nebuchadnezzar in Zedekiah tungah thukhen hi.

¹⁰Riblah ah Nebuchadnezzar in Zedekiah ii tapate a pa ii mu tang ma in that hi, tuaciang ama in Judah ngam ulian dangte zongh that hi.

¹¹Tua zawkciang, ama in Zedekiah ii mittangte khelsak a kol thaakin Babylon ah paipui hi. Zedekiah a thi ni dong Babylon thong sungah om hi.

Biakinn Suksiatna

(2Kumpite 25.8-17)

¹²Nebuchadnezzar ii Babylonia Kumpi a sep zawk kum sawm le kum kua kum a tha ngana, ni sawm ni in, kumpipa tungah ngaisutna a pia pa le a ngalkap mang pa Nebuzaradan sia Jerusalem khua ah tum hi.

¹³Ama in Biakinn, kumpi inn le Jerusalem khua sungah uliante theampo ii innte mei taw haltum hi;

¹⁴tuaciang a ngalkapte in khuapi luphungte sutham uh hi.

¹⁵Tuaciang Nebuzaradan in khua sungah a taanglai mite, khut thiam a taanglaite le Babylonia mite kungah a taite Babylonia ah paipui hi.

¹⁶Ahihang ama in inn le lo nei ngawl, a zawngbel mihing pawlkhatte Judah ngam sungah nusia in sapit huan le lo sungah naseam tu in koi hi.

¹⁷Babylonian mite in Biakinn sungah a om taungo khuamte le khuileangte le taungo tuikuang lian sia sutham in taungote theampo amate in Babylon ah paipui uh hi.

¹⁸Amate in kawpiate, biakna tau thianthosakna a, a kizangh vut luanate, meiinn puana a, a kizangh nate, ngan ngaw biakpiakna chi donna kuangte, ngim namtui halna a, a kizangh kuangte le Biakinn kikhopna a, a kizangh tau taw a kivawt nate theampo zongh la uh hi.

¹⁹Amate in kham ahibuale ngun taw a kivawt nate theampo la uh hi: tuate sia kuangnote, meikam luana thik bealpeute, sangaw biakpiakna a chi donna bealte, vutluanate, meiinn khuamte, ngim namtui halna a, a kizangh kuangte le zu sunna biakpiakna bealte ahi uh hi.

²⁰Solomon Kumpipa ii Biakinn a zak tu a vawt tau vanhte ahi khuam niite, khuileangte, tuikuang lian sia le, a nanna khuital sawm le niite sia ngit lei ahikom a ngitna ki khaitee zo ngawl hi.

²¹⁻²²A khuam niite sia kibang linlian hi. Khat sia pi 27 saang a a kiimkot pi 18 pha hi. Tuate sia a sunghawm a, a thik sia letmat thum saa hi. Khuam dawn ah tau taw a kivawt a baw khat om a pi 7 le lang saang hi; a kiimkot sia talee thingnga lim taw kizeam a, a vekpi in taungo taw kivawt hi.

²³Khuam sim zepna a vekpi in talee nga zakhat om a, sawmkua le luk sia lei panin kimu thei hi.

Judah Mite Babylonia ah Kipaipui
(2Kumpite 25.18-21, 27-30)



²⁴Tua bek dom ngawlin ngalkap hon ukpa , Nebuzaradan in thiampi saangpa Seraiah, thiampi lian a niina Zephaniah le Biakinn upa lian thum te thongtaak tu in paipui hi.

²⁵Khuasung panin ama in ngalkapte a uk ngalkap hon ukpa , khua sungah a taanglai kumpipa ngaisutna a plate sung pan mihing sali, ngalkap zum lai a keam, ngalkapmaang pa a hupa le a dang mihing thupi sawmlukte paipui hi.

²⁶Nebuzaradan in amate sia Hamath ngam sung, Riblah khua ah a om,

²⁷Babylon kumpipa kungah paipui hi. Tua munah kumpipa in amate saatin thatlum hi. Tuabangin Judah mite a ngam uh panin saltang tu in kipaipui hi.

²⁸Hisia in Nebuchadnezzar ii sal a, a paipui mite thu teptena ahi hi; Kumpi a sep zawk a kum sali kum in ama in mihing 3,023 paipui hi.

²⁹A kum sawm le kum liat kum in, Jerusalem panin mihing 832; le

³⁰a kum kul le kum thum kumin, Nebuzaradan in mihing 745 paipui hi. A vekpi in mihing 4600 kipaipui hi.

³¹Evilmerodach sia Babylonia kumpi a sua kumin ama in Judah kumpipa Jehoiachin khuangai huai asak manin thong panin pusua hi. Hi bang, a suataksak ni sia Jehoiachin thongtaak a, a kipaipui zawk kum sawmthum le kum sali kum tha sawm le tha niina ni kul le ni nga ni ahi hi.

³²Evilmerodach in Jehoiachin phat vawt a Babylonia ah ama taw thongtaak khawm kumpi dangte sangin upatna tam zaw pia hi.

³³Tua ahikom Jehoiachin sia a thong puante kilaihsakin a nuntak lai teng kumpipa ii sabuai ah an kinesak hi.

³⁴A nuntak sung nisim a kisp nate lei natu in Jehoiachin sia dangka pia tawntung hi.



Kaatap late

Kaatap late 1

Jerusalem Khua Mite ii Khuangaina

¹Khatvei lai in mihing taw a kidim Jerusalem khuapi bangza in ngamkhing ziam, Leitung ii khatvei a upat ngei ama sia tu in meingong nu khat bang ahi hi; khuapi teng po pan a tuanngen bel sia sal dinmun ah taaksuk zo hi.

²Zan thapai in ama kap a; thitui a biangkho ah luang suk vahii hi. A lawm a ngual masa te khat zongh ama heeneam tu kikhe ngawl hi, A kipawlpuite in ama leeheak in, tu in a ngalin pang tek ta uh hi.

³Judah ii mite sia a cimaw inn pan zawthawk thu taw a kihawlkeak salte ahi uh hi. Ngamdang ah amate sal in om a, a mun, a ngam ci tu nei ngawl uh hi— Ngalte in kiim uum a suatak natu lampi bing hi.

⁴Ni thiangtho nite ah biakna pia tu in, Biakinn ah kuama hong pai ngawl hi. Tua mun ah lasa ngaknute in vawtsiatna thuak a, a thiampite thuum vangum thei bek hi. Khuapi kongpите hawm a, Zion in ngim thuak hi.

⁵A ngalte in ama zo a, amate khutnuai ah koi hi. A khialna tam mamate hangin Topa in ama ngim thuaksak hi; A tate kipummat in saltang tu in kipaipui hi.

⁶Jerusalem phatna sia maaimang siat zo hi. A lampuite sia sazuk ngilkial a zawngkhal, Savaite mai ah a tai ciang a thabo vadilte bang ahi hi.

⁷Tu in a ngamkhing, a siacip sa Jerusalem khua in nidang a phat hun nung phaw kik hi. A ngalte khut sung a thet ciang a hu tu kuama om ngawl hi. A ngal lel na sia a ngalte in nuisan uh hi.

⁸A minphatna teng bo a, a nguaktang in om in ngual zawnsak thuak hi. Ama tau in maizum in a mai seal hi. Jerusalem in lipkhaphuai mawna taw ama le ama kininsak hi.

⁹A thiantho ngawl na ol tak kimu a, ahizong ama thuak natute ama in awlmawk ngawl hi. Ama ngallelna nasia leilam a kuama in ama heeneam thei ngawl hi. A ngalte in zothal a, ama in Topa tungah hesuak ngen in kap hi.



10Ngalte in a sumngum theampo suddol hi. Topa ii Gentilete pai tu a khaamna mun Biakinpi sung mama ah a ngalte a tum uh ama in mu hi.

11A mite in bang khatpo neak tu a zon uh ciang tau vangui uh hi; Amate in a nuntak thei natu in a sumngumte an taw theak uh hi. “Kei hong en ka ven, Topa awng, ka ngim nga zia hong mu tan,” ci in khua mite au vadel hi.

12“Kei hong en ka ven!” ci in ama kantan in a pai theampo tungah ko hi. “Kei thuak bangin kuama in na thuak ngei ngawl hi. Topa in a thin uuk laitak hong thuaksak sia na lawlawm hi.

13“Ama in tung sang pan meikuang hong khiaksuk a tua meikuang in ka sung hong kaang hi. Ama in kei thaang hong sia a, lei ah hong sial hi. Tuaciang ama in hong taisan a, a thuak tan tu in hong nusia hi.

14“Ama in ka khialna theampo ciamtee a, a vekpi in sawm khawm hi; Tuate ka ngawng kiim ah hong awsak a, a ngitna thuak la in ka thazawm hi. Topa in ka ngalte khut sungah hong aap a bangma ka law zo bua hi.

15“Topa in ka ngalkap thahatbelte theampo nuisan lel a; Ama in ka tangvalte lalthamsak tu in ngalkap honkhat puak hi. Sapit ngoaina sungah sapit ngate kingoai thap bangin ka mite ama in sucip hi.

16“Tua hu in ka mittangte thitui taw kidim hi. Kuama in hong heeneam thei ngawl a, kuama in hong hanthawn thei ngawl hi. Ngalte in hong zothal a, ka mite in bangma nei nawn ngawl uh hi.

17“Ka khutte zan ka leng kuama in hong hu ngawl hi. Mun theampo pan kei hong sim tu ngalte Topa in sam zo hi. Amate in a kiihuai nate bangin kei hong vawt hi.

18“Ahihang Topa sia thutang hi a, keima in a thu ni ngawl ka hi zaw hi. Hong ngai tavun, mun theampo a om mite awng; a na thuak a ka om hong en tavun. Ka ngaknute le ka tangvalte sia sal in kipaipui siat zo hi.

19“Ka pawlpui te ka sam a, ahihang amate in hong hu nuam ngawl hi. Thiampite le lampuite sia khuapi lampite ah a nuntak natu an zongin a vana ah thi siat uh hi.

²⁰“Topa awng, na kasak nate, ka thin bot vangui nate hong en tan! Ka mawnate hangin khuangai in ka thin tamtham hi. Lampite ah tualthana om a, innsung ngangawn ah thina theng hi.

²¹“Ka tau nate hong ngai tan, hong heeneam tu kuama om ngawl hi. Lalcipna nong thuaksak manin ka ngalte lungdam uh hi. Nong kamciam ni hong tungsak tan a, keima thuak bangin ka ngalte in thuaksak in.

²²“Amate ngitlo nate theampo hu in amate ningkhiin in, Ka mawnate hu in daan nong piak bangma in amate daan pia in. Thasiatna taw ka tau a, ka thin ka lung na hi,” ci hi.

Kaatap late 2

Topa ii Jerusalem Daan A piakna

¹Topa in a thin uukna taw Zion sia khuazing taw tuam cip hi. A vantung hoina te ama in zancipsak zo hi. A thin uuk ni in a Biakinnpi ngangawn nusia hi.

²Topa in Judah ngam khuano theampo hesuakna om ngawlin lalthamsak a, Ngam dalna kulhpite baltham hi. Ama in kumpi ngam le a ukte maizum pia hi.

³Ama in a thin so in Israel te thahatna saat tham hi. Ngalte hong sim ciang ama in hong hu nuam ngawl hi. Kaangmei bangin ama in ei hong zaap keak a, na theampo lalthamsak hi.

⁴Eite sia ngal bang phetin a thaltangte taw hong tuung hi; Ih lungdamna le ih kisak pui thei te theampo ama in thatlum hi. Hi lai Jerusalem ah ama thin uukna meikuang ih thuak hi.

⁵Topa in ngal khat bangin Israel sucip hi. Ama in a kulhte le kumpi innte a zancip sa in nusia hi. Ama in Judah mite tungah a bo thei ngawl heena tungsak hi.

⁶Ama in ama ih biakna mun Biakinnpi sia a bebekin sutham hi. Ama in ni thiangthote le Sabbath nite bosak hi. Kumpipa le thiampipa in ama thin uukna a kibangin thuak khawm uh hi.



⁷Topa in a biaknatau nial a, a thiangtho a Biakinpi taisan hi. Ama in Biakinn pangte sia ngalte in balthamsak hi. Khatvei lai in lungdamna taw ih biakna munah amate ngal zo in au uh hi.

⁸Zion khuapi luphungte a cipthap tu sia Topa in ciangtan zo hi. A vekpi a sia siat tu in ama in see zo hi. Tu in tausaangte le luphungte zancip dipdeap hi.

⁹Kongpite sia leivum suangvum sungah kivuhcip a, a zawlte a bebek in kivaat tham zo hi. Kumpipa le uliante tu in sal in om hi. Thukham kihil nawn ngawlin, kamsangte in mu kholna Topa tung pan nga ngawl hi.

¹⁰Jerusalem ii pasal huaite sia huthe ngawlin lei ah to nilneal uh hi. A lu tungah leivui kithe in khau-ip puan silh uh hi. Ngaknu note lei ah a lu kun uh hi.

¹¹Ka ka kaana in ka mitte paat zo a, ka thin sia nat tawpin na hi. Ka mite lalthapna hangin hee in ka vul ngawp hi. Patangnote le nausente khuapi lampite ah butthi uh hi.

¹²Ngilkial dangtaak in amate in a nute kaa uh hi. Amate sia a liamte bang phetin lampi ah puk uh a, Tuaciang a nute ii kaang sungah dadam in thi uh hi.

¹³Jerusalem awng, kong it Jerusalem awng, bang kong ci thei tu ziam? Bangbangin nang hong heeneam thei tu khi ziam? Kuama in hi bang peuma in thuak ngei ngawl hi. Na tuasiatna sia tuipi bangin mong nei ngawl a, bangma muanmawk tu om ngawl hi.

¹⁴Na kamsangte in leilot thu ngawl po nang tungah son tu nei ngawl hi. Amate thuhilna in na mawna pholaak ngei ngawl ahikom nang hong theam ahi hi. Amate in na kisii kik tu a kul ngawl tu dongin nang khua hong ngaisunsak hi.

¹⁵Khuapi kantan in a pai mihingte in nangma hong zawnsak et uh hi. Amate in Jerusalem ii zanthapna sia a lu uh thingin nuisan uh hi: “Hisia tua khuapi hoi sia ma hi kana ziam? Hi sia leitung bup ii kiphatsak pui sia hi ka na ziam?” ci uh hi.

¹⁶Na ngalte theampo in hong selno in etsatna taw nang hong salh uh hi. Amate mukmen in zawnsak kam taw, “Khuapi lalthamsak zo hing! hi sia ih nga laak bel ni hi!” ci uh hi.

¹⁷Topa in hong tawna teng a khak belin tungsak hi. Ama in eite hun saupi lai a kidop natu hong hil sa bangin hesuakna mama om ngawlin hong lalthamsak hi. Ama in ih ngalte in ngalzosak a, ih ngal lel hu in amate lungdamsak hi.

¹⁸Jerusalem awng, na luphungte in Topa tungah ko taken! Na thituite a sun a zan in nguntui bangin luangsak in; heena le khuangaina taw nangma le nangma kivulcipsak in!

¹⁹Zan khua teak Topa tungah ko tu in tho thithe in! Na thin na lung theampo a mai ah lui in a, ama tungah- lampi kingh sim ah pukhong in a thi tu na patangte atu in hesuak ngen in.

²⁰En in, Topa awng, ngimna na thuaksak mihingte en in! Nupite in a it a tate ii sa ne uh hi! Thiampite le kamsangte sia Biakinnpi sung mama ah kithatlum hi!

²¹A moi a haam a kibangin lampi ah thi uh hi. Ngalte in ngaknu le tangval teng namsau taw thatlum uh hi. Na thin uuk ni in hesuak ngawlin amate na thatlum hi.

²²Nangma in kei hong lauthawngsak tu in ka ngalte sia poai siim tu bangin na sam a, amate in kei hong uumci uh hi. Tuaciang tua na thin uuk ni in kuama suakta zo ngawl hi. Amate in itna taw ka vak ka taa ka tanote suamlum uh hi.

Kaatap late 3

Daan piakna, Kisii kikna le Lametna

¹Pathian ii daan piakna bangbang tatak hi tu ziam ci in a he sia keima ka hi hi.

²Ama in khuazing sungah a thuk seseam, a thuk seseam in kei hong hawlkeak hi.



- ³Tuaciang ama in hong hesuak ngawlin kei hong vel kikik, hong vel kikik hi.
- ⁴Ama in ka samal bakkeaksakin ka sa kilanghsak a, ka ngu ka taang thiaktan hi.
- ⁵Ama in ngimna le heena thong sungah kei hong khum hi.
- ⁶Ama in a ui thina khuazing sungah kei hong teangsak hamtang hi.
- ⁷Ama in thikkhau taw hong heen a, suatak tu lametna nei ngawl thongtaak luangta khat ka hi hi.
- ⁸Hu ngenin nging takin ka au a, ahizong Pathian in hong ngai ngawl hi.
- ⁹Lam ka pai ciang ka hoi vatut a, ka heakna theampo ah suangpangte in ka mai hong khak hi.
- ¹⁰Vompui khat bangin ama in kei hong pang a, tawpi khat bangin ama in kei hong zam hi.
- ¹¹Ama in lampaam ah kei hong del a, hong balneen in hong nusia hi.
- ¹²Ama in a thal keak a, kei sia a thal taw kap tu in hong tuung hi.
- ¹³Ama in a thaltangte taw ka pumpi thuk bunin hong kap hi.
- ¹⁴Mihingte in sun khuateak in kei hong nuisan a, amate theampo atu in kei sia ciammuina ka suak hi.
- ¹⁵An le tui hong piak taangin ama in thuakkha in hong thuaksak hi.
- ¹⁶Ama in ka maitang lei ah hong tat a, suangtum tungah ka ha sutan hi.
- ¹⁷Cidamna, thinnopna le lungdamna cite bangziam ci sia ka mangil zo hi.
- ¹⁸Khuangei nungta nawn ngawl tu khi hi; Topa sungah ka lametna bo zo hi;
- ¹⁹Natna ka thuakna, inn le lo nei ngawlin ka om nate ka ngaisut sia thina ngu kha ahi hi.
- ²⁰A tawntungin tuate ka ngaisun a, ka thin kiam hi.
- ²¹Ahizong hi thu khat ka phaw ciang, lametna hong piang kik hi.
- ²²Mong nei ngawl Topa ii hong itna le hong hesuakna kizom suak a;



- ²³zing khuavak bangin thak suak tawntung a, ni suak pealmaw bang ahi hi.
- ²⁴Topa sim ngawl nei dang nei ngawl ka hikom ama tung bek ah ka lametna ka koi hi.
- ²⁵Ama a muangte theampo tungah Topa pha hi.
- ²⁶Tua ahikom thin sauna taw ama ih ngak tu— eite hong ngum tu in ama ih ngak tu— phabel hi.
- ²⁷Ih khan moi lai in hi thin sauna sin tu pha bel hi.
- ²⁸Ngimna ih thuak ciang thin sau le thimdide in eima nguak ih to tu ahi hi.
- ²⁹Ki pum aap in ih kun tu ahi hi, banghangziam cile lametna om thei lai tha tu hi.
- ³⁰Hong kivua in hong kizawngsak kale tuate theampo ih saang thiam tu hi.
- ³¹Topa sia hesuakna taw kidim a, a tawntungin eite hong nial ngawl tu hi.
- ³²Ama in eite heena hong thuaksak thei tha tu hi, ahihang ama ii eite hong itna sia maan in kho hi.
- ³³Ama in eite hong khuangaisak, hong natsak sia nuamsa tuan ngawl hi.
- ³⁴Topa in thong sungah thin ngimna ih thuak nate he hi.
- ³⁵Ama ii eite hong piak hamphatna te ih taan ciang ama hee hi;
- ³⁶Thukhen zum ah thutang khenna a om ngawl ciang ama hee hi.
- ³⁷Topa deina bang bekma in kiseam tawntung hi.
- ³⁸Ama thu piakna bangin a pha le a sia a kibangin piang hi.
- ³⁹Ih mawna hangin daan hong ki piak ciang bang hang phuphun tu hi ziam?
- ⁴⁰Ih kalsuan nate en pha kikin Topa kungah heak kik tawng.
- ⁴¹Vantung a om ih Pathian tungah ih thinsung kongkha hongin thungen tawng,
- ⁴²“Topa awng, kote maw in, kong langpan uh a, nangma in nong maisak bua hi.



- 43“Nangma in kote nong zuizen a nong thatlum hi; na thin ukna in na hesuakna sealcip hi.
- 44Na thin sona meeikaai saa lei ahikom kote thungetnate na kung hong theng zo ngawl hi.
- 45Nangma in kote simlei bup ii nin kholna bung in nong vawt hi.
- 46“Kote ngalte theampo in kote hong langin hong nunau uh hi.
- 47Kote in tuasiatna le lalcipna ka thuak zo uh a, launa le kiitakna taw ka nungta uh hi.
- 48Ka mite siatcip hu in ka thitui nguntui bangin luang hi.
- 49“Ka thitui kang thei ngawlin
- 50Topa in vantung pan hong ensuk a, eite hong mu dong ka thitui luitui bangin luang hi.
- 51Khuapi sungah numeite bang tawk cisia ka mu ciang ka khuangai hi.
- 52“Kei hong ngai mawk natu thu nei ngawl ngalte in, vacim khat bangin thaang sungah kei hong awksak hi.
- 53Amate in leidum khat sungah ka hing tangin hong khiasuk a suangtum pui khat taw akua vang huh uh hi.
- 54Tui in kuum tu in hong kithoai a, tuaciang thina a nai sia ka ngaisun hi.
- 55“Topa awng, dum tawtawng panin nang kong sam hi,
- 56Kong sapna hong ngai tan ci in kong nget ciangin nong za hi.
- 57Nong zo a, lau heak in nong ci hi.
- 58“Topa awng, kei hong hun tu in nong pai a, ka nuntakna nong suatak hi.
- 59Kei sangah pangin thu hong khen tan; kei tungah a maan ngawl hong kivawtnate na he hi.
- 60Ka ngalte ii hong etsatzia le hong thasawm zia na he hi.



⁶¹“Topa awng, amate ii kei hong lan nate na za zo hi, amate ii hong thasawm nate theampo na he hi.

⁶²Amate in sun khuateak in kei hong vawtsiat natu thu kikum in vaihawm uh hi.

⁶³Amate in zingsang pan khua zan dong ciammuina in kei hong nei uh hi.

⁶⁴“Topa awng, amate ngamtatnate hu in amate daan pia in.

⁶⁵Amate haamsiat in, thin kiamna taw kidimsak in!

⁶⁶Amate vai zui in a, leitung pan phiat mang in!” ci uh hi.

Kaatap late 4

Jerusalem khua A bo zawkciang

¹Ih kham tee vakilte mualmang zo hi; Biakinnpisakna suangte lampi ah ki thethaang in om hi.

²Kham bangin ei atu a, a manpha Zion ii tangvalnote tu in leibeal thawthongte bangin kivawt lel hi.

³Ngiapui ngangawn zongh in a note noai pia tu hi, ahihang ka mite ahile a tate tungah a tatsia kalaoh vacim puite bang ahi hi.

⁴Amate in a nausente ngilkial dangtaak in thisak hi; patangte in an ngenin vak hi, ahihang kuama in amate an pia ngawl tu hi.

⁵An limbel a ne ngei mihingte sia lampi ah anngawlin thi uh hi; nopsakna inn sung pan a khangte in an zongin ninbung tok uh hi.

⁶Ka mite sia thakhat thu in Pathian khut sa a thuak Sodom a teang mihingte sangin nasia zaw in daan kipia hi.

⁷Ih kumpi tapate sitbaang ngawl, vuuk bangin thiangtho, thahat in taktai a cidam siuseau tek hi.

⁸Tu in amate sia kuama heak ngawlin lampi ah puk peakpuk uh a, thi in a mai mual uh hi; a vun uh thingko bangin ko in a ngute tungah bel hi.



- ⁹Ngaw sung a a thite sia neak tu an om ngawl a, dadam in a thi, a thi khakte sangin phazaw lai hi.
- ¹⁰Ka mite tungah a tung tuasiatna sia cizat huai mama hi, a nute in a tanote an in a neak tu in tui huan uh hi.
- ¹¹Topa in a thin uuknate khe nawn ngawlin hong buak hi. ama in mei taw Zion halin kaangtumsak hi.
- ¹²A kuama peuma, ngamdang a ukte ngangawn in Jerusalem ii kongpi sungah ngalte tum thei tu ci in um ngawl uh hi.
- ¹³Ahihang hi bang thute piang hi, banghangziam cile maw nei ngawl mihingte a thisak hu in a kamsangte maw a, a thiampite a khial uh hang ahi hi.
- ¹⁴Mittawte bangin a lampuite lampite ah vakvai uh a; chisan baang ngawp ahikom kuama in amate tham ngam ngawl uh hi.
- ¹⁵Mihingte in amate oksan a, “Tai vun! note kiihuai nu hi! Kei hong thutha heak vun!” ci uh hi. Tua ahikom amate ngam khat pan ngam khat ah pai kawkoai a, kuama in saang ngawl hi.
- ¹⁶Topa in amate awlmawk nawn ngawl a, ama mama in amate thethaang hi. Ama in ih thiampite le ih lampuite bangma in hong hensak ngawl hi.
- ¹⁷Eite in hong pai ngawl tu bul huna lamen in et zawk nawn ngawl tu dong khua ih e en hi. Eite in piak tu nei ngawl ngam khat tung pan huna ih ngangak hi.
- ¹⁸Ngalte in eite hong encik a, lampi liante ah vak zongh ih vak thei bua hi. Ih ni te bo zo a, a tawpna hong theng zo hi.
- ¹⁹Muvanlaite van pan suktun a hong len sang a manlang zaw in amate in ei hong delsuk hi. Amate in mual tungah ei hong sulzui a; senneal ngamah muanmawk ngawlin amate in ei hong man hi.
- ²⁰Amate in ngalte khut sung pan hong dal zo tu in ih muan, ih nuntakna naak a hi, Topa ii teal sa kumpipa man uh hi.

²¹Nui vun, Edom le Uz mite awng; na lungdam thei uh lai teng lungdam vun. Na tuasiat natu uh zongh hong tung tu hi; note zongh maizumna taw na pum nguakin na hoi vacit tu uh hi.

²²Zion in a mawna thaman pia zo a, Topa in salin eite hong koi nawn ngawl tu hi. Ahihang Edom awng, Topa in nang daan hong pia tu hi, ama in na ngamtat khialnate pholaak tu hi.

Kaatap late 5

Hesuak natu Thungetna

¹Topa awng, ko tung a hong piang thute phawk in. Kote hong en tan a, ka maizumna uh mu in.

²Kote neisa sia khualte khut sungah om a; ngamdangte sia kote inn sungah teang hi.

³Kote pate sia ngalte in thatlum zo a, tu in kote nute sia meingong suak uh hi.

⁴Kote dawn tu tuidamte manh piak kul a, kote thu tu thingkangte lei kul hi.

⁵Kalaohte le laate bangin hong kihawl ngawp a, toi mama hi kale ung hong tawlngasak ngawl hi.

⁶Nuntak valiai natu an nga natu in Egypt le Assyria ah an ngenin ka pai uh hi.

⁷Kote taangpupite maw uh hi; ahihang tu in amate om nawn ngawl a, amate mawna hu in kote in ngimna ka thuak uh hi.

⁸Salte sangin a phazaw tuan ngawl mihingte in kote hong uk a, amate khutsung pan kuama in kote hong hun thei ngawl hi.

⁹Ngamsung theampo ah tualthatte vak kawkoai a, an ka zon uh ciang, luang ka khaam uh hi.

¹⁰Ngilkialna in kote ka ci uh hong suuksak a, kote vunte meikhuk bangin a sat dong ka thuak uh hi.

¹¹Zion Mualtung mama ah kote zite hong buansak uh a, Judah ngam khuano sung theampo ah kote tanute hong khialpuisak uh hi.



- ¹²Kote lampuite hong matsakin ngui awksak a; kote pasal huaite hong zataksak bua uh hi.
- ¹³Kote tangvalte sia sal bangin zawthawk thu taw an ngoaisak uh a; patangnote sia a thing puak uh khopin hoi vatut uh hi.
- ¹⁴Khanghaamte khuapi kongpi ah to nawn ngawl a, khangmoite in la sa nawn ngawl uh hi.
- ¹⁵Kote lungdamna kote nuntakna pan tai siat zo a, kote lapna teng sia khuangaina taw kilaih hi.
- ¹⁶Kote kisuantaak nate khat zongh taang nawn ngawl hi. Kote ka khial uh a, tu in a bo ka hi uh hi.
- ¹⁷Kote ka thin ka lung mama uh na a, kote thituite hangin pha tak khua ka mu thei bua uh hi.
- ¹⁸Zion Mual sia ngamkhing ngamdai in kinusia ahikom tua a kisia sa munte ah ngam uite vak hi.
- ¹⁹Topa awng, ahihang nangma in, a tawntung Kumpipa na hi a, hun tawp dongin na uk tu hi.
- ²⁰Banghangin tu tan vei kote hong nusia ni ziam? Kote nong phawk kik ngei tu ziam?
- ²¹Na kung ah kote hong ciapui kik tan, Topa! awng kote hong ciapui kik tan! Taanghlai kote minthanna teng hong pia kik tan!
- ²²Tua ahibuale kote a tawntungin hong nial tu ni ziam? Na thin uukna in ciangtan nei ngawl ziam?



Ezekiel

Ezekiel 1

EZEKIEL II PATHIAN A MU PHITNA

(1.1-7.27)

Pathian Tokhum

¹Kum sawmthum kum a tha li na a ni nga ni in Babylon ngam Chebar ngunhui ah keima Buzi ii tapa thiampi Ezekiel in Judah mi saltangte taw ka teang khawm hi. Vantung kihong a, tuaciang mu kholna taw Pathian ka mu hi.

(²Tua hun sia Jehoaiachin Kumpipa sal in a ki paipui zawk a kum nga kum ahi hi.)

³Chebar Ngunhui tua Babylonia ngamah, Topa hong paupuina ka za a, tuaciang ama ii vaangletna ka phawk hi.

⁴Khua ka dakto lesaksang pan vuipei suangval hong va ka mu hi. Meeikaai lian pui khat sung pan khualeng hong tee vazua a, a kiimkot van taang hi. Khualeng tee vazalna munah taungo bang khat taang hi.

⁵Suangval laizang ah mihing pianzia lim bangin nganhing nungta li ka mu hi,

⁶ahihang tuate khat simin maitang li le tha li tek nei uh hi.

⁷A peangte mam a, amate in khuita peangcin bang nei uh hi. Tuate sia taungo nawt thiang bang keakin tee uh hi.

⁸Maitang li le tha te bek dom ngawlin, amate in, a tha khat tek ii nuai ah mihing khut li tek nei uh hi.

⁹Nganhingte khat simin, a tha uh nii tek phalin, a thakhui dawn te kiphasakin, kingh li nei suak uh hi. Amate a kikhin uh ciangin, a pumpi uh kiheak ngawlin a vekpi in kikhin uh hi.

¹⁰A nungta nganhing khat sim in a kibang ngawl maitang nam li tek nei uh hi; tuate sia a maisang ah mihing maitang, a ziat sangah tawpi maitang , a vei sangah khuita maitang, a nung sangah muvanlai maitang ahi uh hi.



- ¹¹Nganhing khat sim ii thakhui niite kilaamto a, a hui ah nganhing dang khat ii thakhui dawnte taw kisisak hi, tuaciang amate ii tha a omlai nii tek sia a pum tung tek ah zep uh hi.
- ¹²Nganhing li te in, mun khat tek nga ahikomin, lu heak kul ngawlin a uuk na po ah a vekpi in pai thei uh hi.
- ¹³Nganhingte sungah meisip kuang bang khat om a, tua meikuang sia a tawntungin kikhin hi. Tua meikuang sia lengkeak in khua leng sak hi.
- ¹⁴Tua nganhingte sia khualeng manlang za in nung le mai ah tai uh hi.
- ¹⁵Nganhing lite ka et ciangin nganhing khat ii pangh ah leangmui khat tek, leangmui li te in, lei pha in, ka mu hi.
- ¹⁶Tua leangmui lite khat le khat kibang uh hi; tuate khat simin suangmanpha bang keakin tee hi. Tuaciang leangmuite khat simin, a sungah leangmui dang khat tang takin a kikimin, kiheang hi.
- ¹⁷Tuabangin leangmuite sia a ukna sang pawpo ah pai thei uh hi.
- ¹⁸Tua leangmuite ii kiilte sia mittang te taw kituam uh hi.
- ¹⁹Nganhingte a kikhin simin leangte taw kikhin khawm a, nganhingte lei panin a kikhaanto ciangin, leangmuite zongh a kikhaangto uh hi.
- ²⁰Nganhingte sia amate ukna po ah pai uh a, leangmuite zongh a nganhingte bang tatak ma in pai uh hi, banghangziam cile nganhingte in leangmuite uk uh hi.
- ²¹Tua ahikom nganhingte a tuk sim le a tawlngak simin le lei panin a kikhaangto simin leangmuite zongh in tuabang tatak ma in zui uh hi.
- ²²Tua nganhingte ii lu tung san ah a tee vazal palaang taw a kivawt bealpeu a ki khumsin a, a kikoi taw a kibang khat om hi.
- ²³Tua ii nuai ah nganhingte dingin, khat simin a thate nii phal to a, a hui a om sia ii thadawn taw kiphasak a, a omlai tha niite taw a pumpi seal hi.



²⁴A len uh ciang a tha kizapte ii aw ka za hi; tua aw sia tuipi hawk bang hi in, ngalkap hon lampai bang, Vaanglianbelpa Pathian ii aw bang ahi hi. A len uh a tawp ciang, amate in a tha uh khup uh hi.

²⁵Ahihang amate lu tungah a om a khuplam a, a kikoi bealpeu taw a kibang sia panin, aw nging khat kiza veve hi.

²⁶Tua ii tungah Sapphire suangmanpha taw a kivawt kumpi tokhum taw a kibang khat om a, tua tokhum tungah mihing taw a kibang lim khat to hi.

²⁷Tua lim sia meikhuk laizang ah a om tau bangin taang hi. Tua in a kiim a paam theampo nasia takin taangsak hi.

²⁸Tua ii sungah sangun meal namcin om hi. Tuasia in Topa ii omna a kilanghsak khuataang ziazua sia ahi hi.

Pathian in Kamsang khat tu in Ezekiel Sam

Hisia ka mu ciangin lei ah ka mailam in ka puksuk hi. Tuaciang aw

Ezekiel 2

¹khat ka za a, “A thi thei mihing awng, hong paupui nuam khi hi, ding to in,” hong ci hi.

²Tua aw ii a pau laitakin Pathian ii thaa ka sungah hong tum a, ka peang taw dingto tu in, hong phong hi; tuaciang tua aw in a kizomin,

³“A thi thei mihing awng, Israel mihingte kungah kong puak tu hi. Amate in hong lee do in, a taangpupite bangma in hong lee do lai uh hi.

⁴Amate a thin uh pui in kei hong zakta bua uh hi. Tua ahikom keima Vaanglianpipa Topa in amate tungah ka cinopte son tu in nang kong sawl hi.

⁵Tua tualngalte in nang thu hong ngai uh zong hong ngai bua uh zong, amate kawm ah kamsang khat om ci sia he tu uh hi.

⁶“Ahihang a thi thei mihing awng, amate ahizong, amate hong ci pawpo ahizong, na kiita ba het tu hi. Amate in nang hong zawngsak tu a, hong nalh tu hi; aikam hon kawm a ten bang hi tu hi. Tuabang ahihang tua tualngalte ahizong, amate ih hong cite ahizong na kiita bua veve tu uh hi.



⁷Amate in hong ngai kale hong ngai bua kale son tu a kong sawl babang na son tu hi. Amate sia bangbangh tualngalte ziam cisia ciamtee tan.

⁸“A thi thei mihing awng, kong sonte hong ngai tan. Amate bangin tualngal in tho heak in. Na kam kaa in a, kong piak tu sia ne in,” a ci sia ka za hi.

⁹Khut khat kei sang hong kithaak ka mu a, laizial khat a toai hi.

¹⁰Tua khut in tua laizial sia phalin, tuaciang a lang le a lang ah lai ki at ka mu hi. Khuangai a kaana te le mauna tau nate a na ki at hi.

Ezekiel 3

¹Pathian in, “A thi thei mihing awng, laizial hi sia ne in; tua zawkciang Israel mite kungah pai in paupui tan,” hong ci hi.

²Tua ahikom ka kam ka kaa a, tuasia ciangin ama in laizial sia ka neak tu in hong pia hi.

³Ama in, “A thi thei mihing awng, kong piak hi laizial sia ne in; tua taw na ngil vasak in,” hong ci hi. Ka neak ciang, khuitui bangin a thum hi.

⁴Tua zawkciang Pathian in, “A thi thei mihing awng, Israel mite kungah va pai tan a, na son tu in kong sawl po va son tan.

⁵A tel hak ngamdang kam a pauna ngamah kong paisak bua a, Israel te kungah kong paisak hi.

⁶Na tel ngawl kam hamsa a pau ngam liante kungah hong paisak hi leng, amate in nang thu hong ngai tha tu hi.

⁷Ahihang Isrelte khat zongh in nang pau hong ngai nuam buatu uh hi. Amate in kei pau ngangawn hong ngai ngawl tu hi. Amate theampo sia thinpui in langpan nopna thin vive nei uh hi.

⁸Tu in nang sia amate bangma in na thin kong puisak tu a, na thin kong khosak tu hi.

⁹Suangpi bangin kong kipsak tu a, diamond suang manpha bangin kong sahsak tu hi; tua tualngalte kiita vet heak in,” hong ci hi.



¹⁰Pathian in zom a, “A thi thei mihing awng, pha takin ngai in a, kong son pawpo ciamtee in.

¹¹Tua zawkciang saltang a om, na ngam mipuite kungah pai in, na pau hong ngai a, hong ngai bua zong, Kei VaanglianpipaTopa ii amate tungah son a kong sawl teng va son tan,” hong ci hi.

¹²Tua zawkciang, Pathian thaa in kei hong laamto a, tuaciang ka nung pan a hawk a nging aw khat ka za a, “Van tungah Topa minthanna pok vun!” ci hi.

¹³Vui sungah nganhingte thaphil aw le zinliing nging za in a nging leangmuite aw ka za hi.

¹⁴Topa ii vaangletna sia ka tungah thahatna lianpi taw hong theng a, tuaciang a thaa in kei hong paipui ciangin diksa ngawlin, ka thin a uuk hi.

¹⁵Tua ahikom, saltangte teenna Chebar ngunhui Tel Abib ah ka pai a tua munah ni sali sung ka om a, ka mu ka zaak thu in hong ngawtcip hi.

Topa in Ezekiel Ngalvil nasep Pia

(Ezekiel 33.1-9)

¹⁶Ni sali a cin zawkciang, Topa in kei hong paupui a,

¹⁷“A thi thei mihing awng, Israel minamte ngalvil tu in nang kong koi tu hi. Kidop natu nang tungah kong piak thute, amate tungah sonsawn tu ni hi.

¹⁸Mihing ngilo khat a thi tu in ka taangko a, ahizong a ngamtatna kikheal in a thi natu pan suatak natu in na son bua ahile, ama sia mimaw pi ma in a thi tu hi, ahihang ama thina sia nang tungah hong kisiik tu hi.

¹⁹Mihing ngilo khat kidop natu thu na pia a, ahihang ama in mawna kikheal ngawlin maw nei ma in thi tu hi, ahihang nang nuntakna hong kikhoaikhe tu hi.

²⁰Mihing pha takpi khat in, ngitlo nasep hong kipan a, tuaciangin ama sia a lauhuai dinmun ah ka koi ciang, kidop natu na pia bua ahile ama thi tu hi. Ama ii khialnate hu in ama thi tu hi. A nasep phate ka tepteesak bua tu hi; tuaciangin ama thina sia nangma hang hi tu hi.



²¹Mihing pha khat a maw ngawl natu in, na hil a, na thu hong ngai in mawna a vawt buale ama sia nungta tu hi; tuaciang nang nuntakna zong hong kikhoaikheetsak tu hi,” hong ci hi.

Ezekiel Pau thei Ngawl tu

²²Topa ii hong ompuina nasia takin ka phawk a, “Ding in a, ngamkuam sungah pai in, tua munah nang kong paupui tu hi,” hong cina aw ka za hi.

²³Tua ahikom ngamkuam sungah ka pai a, Chebar Ngunhui ah ka mu bangma in tua munah Topa vaangletna ka mu hi. Lei ah ka mailam in ka puksuk hi.

²⁴Ahihang Topa thaa ka sungah hong tum a, ka peang taw dingto tu in hong phong hi. Topa in ka tungah, “Inn ah cia in a, inn sungah nangma le nangma kikhabil in.

²⁵Khauzeen taw nang hong ki heencip tu a, a thi thei mihing awng, mipi sungah na pai thei buatu hi.

²⁶Hi tualngal a tho nuam mihingte kidop natu na son thei ngawl natu in, na leei ka zawsak tu hi.

²⁷Tua zawk kong paupui kik ciang le, pau theina vaang kong piak kik ciangin, Keima, Vaanglianpipa Topa in bang ci khi ziam cisia amate na son tu hi. Amate pawlkhat in hong ngai tu a, ahihang pawlkhat te in nang hong awlmawk ngawl tu hi; banghangziam cile amate sia tualngal tho minam ahi uh hi.” hong ci hi.

Ezekiel 4

Ezekiel in Jerusalem A ki Uumci natu zia Lak

¹Pathian in, “A thi thei mihing awng, uksuang khat la in a, na mai ah koi in, tuaciang a tungah Jerusalem khuapi lim ngiit in.

²Tuaciang ngalte ii Jerusalem khuapi a uumci na lim lak natu in, leidumte, leiciante, ngalkap ngiaphual te le kulh sukthapna moltumte a kiimkot ah koi in.



³Thik daalkuang khat la in, nang le khuapi kilaklaw ah pangte taangin koi in. Khuapi maingat in. Tua khuapi sia ki uumci a, a uumci sia nangma ni hi. Hisia in Israel ngam mite atu in lim khat a hi tu hi.

⁴⁻⁵“Tua zawkciang, na veisang pangh delpha in lum in, tuaciangin Israel ngam mite ii mawna sia nang tungah kong koi tu hi. Ni 390 sung tua munah na om tu a, amate mawna hu in na thuak tu hi. Amate ngim thuak tu, kumkhat atu in, ni khat veu na thuak tu hi.

⁶Tua teng na man zawkciang, na ziatsang pangh delpha in a, Judah mite mawna hu in ni 40 sung thuak in. Amate ngim thuakna kum khat ciang ni khat hi tu hi.

⁷“Jerusalem khuapi a ki uumci sia mitsuan nginge in. Khuapi sia na khuttum taw vau zazan in a, tua khuapi siat natu thu son khol in.

⁸Tua khuapi a ki uumci hun a bo mateng na pangh langkhat pan a langkhat ah na ki lumlee thei ngawl natu in, kong heencip tu hi.

⁹Tu in maangtang, zungtaang ham, benaang, be, taangzik le maangtang namdang khat pawlkhat veu la in. A vekpi hel in anluum vawt in. Tua anluum sia ni 390 sung na veisang delpha na lup hun sungah na neak tu an ahi tu hi.

¹⁰Ni khat in anluum pound lang veu hong kipia tu a, a zing ciang dong na khom tu hi tu hi.

¹¹Tuidam zongh a kiciangtan in na ne tu a, ni khat in hai nii veu na ne tu hi.

¹²Mihing eakko taw mei na taw tu a, na anluumte a kaam tungah em in mihing theampo ii nang hong mu theina munah na ne tu hi,” ci hi.

¹³Topa in, “Hisia sia a ngam uh pan ka thethaang a ngamdang ah a ten uh hun ciang, thukham ii oai ngawl an namte Israel mite ii a neak tu lim ahi hi,” hong ci hi.



¹⁴Ahihang ka zokik a, “Vaanglianpipa Topa awng, tuabang hong hisak heak in! Bangma hun in keima le keima ki ninsak ngei ngawl khi hi. A nin a ki ngaisun ante peuma ne ngawl khi hi,” ka ci hi.

¹⁵Tua ahikom Pathian in “Pha hi, khui eak kong zanghsak tu a, tua mei in thutin tua tungah na anluum na em tu hi,” hong ci hi.

¹⁶A belap thua lai na pan, “A thi thei mihing awng, Jerusalem atu anluum hong paina ka khaktan tu hi. A anneak a tuidawn uh lealte vathiam in hong om uh ciang, tua munah a teang mihingte sia khuangai in a thin ngim tu uh hi.

¹⁷Amate in neak tu le dawn tu an le tui hong nei ngawl tu a, a thin uh kiamin, a mawna uh hu in a ci a sa kiam tu uh hi,” hong ci hi.

Ezekiel 5

Ezekiel in A sam meet

¹Topa in “A thi thei mihing awng, namsau hiam khat la in a, na khamul le na sam teng meet kol in. Tuaciang tua na sam le multe la in, khaikhin taw na tee zawkciang, khen thum in khen in.

²Khen thum sua khen khat sia hong uumci na a ven ciang, khuapi sungah hal in. A dang khen thum a khen khat sia na namsau taw tanneen in khuapi kiimkot ah poai in, a omlai teng sia hui sungah poai in a, ka namsau taw ka delkot tu hi.

³Sam tawm keam in a, na puan mong ah tun in.

⁴Tua zawkciang sam tawm la leleau in a, mei sungah vawk in, kaangtum sak in. Tuate panin Israel ngam bup ah kaangmei hong kizel tu hi,” hong ci hi.

⁵Vaanglianbel Topa in “Jerusalem en in, Ama sia leitung bup ii zanglai ah ka koi a, ngamdangte sia a kiimkot ah om hi.

⁶Ahihang Jerusalem in ka thupiakte hong nalh a, ngamdangte sangin a ngilo zawkna hong lak a, kim le paam ngamdangte sangin thuni ngawl zaw hi. Jerusalem in ka thupiakte nial a, ka thukhamte a zui bua hi.



⁷Tu in Jerusalem awng, kei Vaanglianbelpa pauna hong ngai tan. Ka thukhamte ni ngawl a ka thupiakte na zui ngawl ciang, na kiim na paam ngamte sangin ngimna tam piangsak zaw ni hi. Ngamdangte ngeinate na zui zo ta hi.

⁸Tua ahikom Vaanglianbel Topa keima in na ngal khi hi ci in kong son hi. Minam theampo ii mu thei tu in, na tungah thu kong khen tu hi.

⁹Ka ngaimawk nate theampo na vawt hu in, Jerusalem sia nidang a ka piak ngei ngawl, mai sang zongh a ka piak nawn ngawl tu ngimna daan ka pia tu hi.

¹⁰Tua hu in Jerusalem a om nute pate in a tate ii sa a ne tu uh a, tate in a nute a pate sa a ne tu uh hi. Daan kong pia tu a, a nungta lai sun zongh mun theampo ah kong thethaang tu hi.

¹¹Tua ahikom, “Keima in a nungta Pathian ka hi bangma in— hi sia in Vaanglianpipa Topa ii kammal hi— nangma in ka Biakinpi sia siatna namcin a kiihuai ngamtatna te taw ninsak na hikomin, hong hesuak ngawlin kong saatvawk tu hi.

¹²Na mite sung pan khen thum sua khen khat sia khuapi sungah natna taw le ngilkialna taw in thi tu hi; a dang khen thum sua khen khat sia khuapi pua sangah namsau taw ki saatvawk tu hi; tuaciang a khak bel khen thum sua khen khat sia hui sungah ka thethaang tu a, namsau taw ka zuizen tu hi.

¹³“Ka lung a kim dong ka thin uukna le ka thangsiatna te na phawk tu hi. Hite theampo a pian ciang, na thumaan ngawl na hu in thin so a, Topakeima in na tungah thu hong son zo ka hi hunlam na tel tu hi.

¹⁴Na kiim na paam pan a minamte, nang hong kantan pawpo in nang hong selno tu a, a kiheam tu uh hi.

¹⁵Kiim le paam ngamte panin, nang ngim kong piak ciangin, na kiim le na paam ngam theampo te lau vadil tu uh hi. Amate in nang sia hawmthawkna taw hong en tu uh a, hong nunau tu uh hi.



¹⁶Na anneak tu hong paina ka khaktan tu a, kong pukthisak tu hi. Nang hong lalsak tu a, a kikap thaltangte in kha a, na in a bot bangin ngilkial na ii a nat zia sia na phawk tu hi.

¹⁷Na tate thatlum tu in, ngilkialna le ngamsa ngilote kong tha tu a, tuaciangin nangma thatlum tu in, natna, ngoltolna le ngalte kong tha tu hi, Keima, Topa in ka son zo hi,” hong ci hi.

Ezekiel 6

Topa in Milim Biakna Ningkhiin

¹Topa in kei hong paupui hi.

²Ama in, “A thi thei mihing awng, Israel te sang en in a amate tungah kong thupiakte son in.

³Vaanglianpipa Topa ii kammalte ngai tu le, Vaanglianpipa Topa keima ii mualpite mualnote, luamthukte le kuamtamte tungah ka son thute ngai tu in Israel mualpite son in. Mihingte ii milim te a biakna munte susia tu in ngal namsau khat kong puak tu hi.

⁴Biaktaute laltham tu a, ngim namtui halna biaknataute ki susia tu hi. A biak uh milimte mai ah tua munah om mihingte theampo kithatlum tu hi.

⁵Israel te mithi luangte ka thezau tu hi. Amate ii ngu le taangte biaknatau kiim theampo ah ka thezau tu hi.

⁶A biaknataute theampo le a milimte a kisukthap natu, a ngim namtui halna biaknataute a kilalthapsak natu le, a vawt sa uh theampo a bo cimit natu in Israel khuapite theampo kilalthamsak tu hi.

⁷Mihingte sia mun theampo ah kithatlum tu hi. Tuaciang a nungta laiteng in keima sia Topa ka hina hong tel tu uh hi.

⁸“Ki thalupna pan pawlkhatte kisuaktasak tu a, ngam tuatuamte ah ka kithethaangsak tu hi,

⁹tua munah amate sal in teang tu uh hi. Tua munah amate in kei hong phawk tu uh a, keima in amate ngim pia in maizum ka piak sia he tu uh hi,



banghangziam cile amate ii thumaan ngawl thinsung in kei hong taisan a, amate in kei sangin milimte deizaw uh hi. Amate in ngamtatna a sia a vawtte le, a etthawk huai a nuntak ziate hu in amate le amate kiihuai kisa tu uh hi.

¹⁰Amate in keima sia Topa ka hi na le kidop natu a, ka thupiakte sia kitawn thawthongna ahi ngawl na he tu uh hi,” hong ci hi.

¹¹Vaanglianpipa Topa in, “Na khut nuai in! Na peang taw lei tuan in. Israel te ii khansiatna le a kiihuai nate a vawt hu in khaungai in kap in. Amate sia ngal taw ahizong ngilkialna taw ahizong, natna taw ahizong thi tu uh hi.

¹²A khuala na a, a omte a ci uh na in a thi tu uh hi; A nai na a omte sia ngal sungah kithatlum tu hi. A taanglai teng sia ngilkial in thi tu uh hi. Amate in ka thin uukna ii thahatna theampo phawk tu uh hi.

¹³Mithi luangte sia milimte kawm le biaknataute kiimkot le mualnote dawn sim, mualpite dawn sim, thingkung hingte nuai le, limthing liante sim ii nuai, milimte tungah meihal sangaw biakpiakna mun sim ah kithethaang tu hi. Tuasia ciangin mihing theampo in keima sia Topa ka hi hunlam hong he tu uh hi.

¹⁴Hi hi, keima in ka khut ka vaan tu a, amate ngam ka lalthamsak tu hi. Thangsang senneal ngam pan kipansaksang Riblah khuapi dong Israel mite teenna mun khat zongh khoaikhe ngawlin ngam awngthong ka suaksak tu hi. Tuasia ciangin, a kuama po in Keima sia Topa ka hi hunlam hong he tu uh hi,” hong ci hi.

Ezekiel 7

Israel Bokuan

¹Topa in kei hong paupui hi.

²Ama in “A thi thei mihing awng, hisia in Vaanglianpipa Topa Keima ii israel ngam tungah ka son ahi hi. Hi sia in ngambuppi atu in a tawpna ahi hi!

³Israel awng, a tawpna hun hong theng zo hi. Nang in ka thin uukna na phawk tu hi, banghangziam cile na sep na vawt tungtaang ah thukhenna



hong pia khi hi. A thasiat huai na ngamtatna theampo hong thuk kik tu khi hi.

⁴Nang hong khoaikhe ngawl tu khi hi, tua ahibuale nang tungah hesuakna hong nei ngawl tu khi hi. Keima sia Topa ka hi hunlam na heak natu in a thasiat huai na ngamtatna te hu in, daan kong pia tu hi,” hong ci hi.

⁵Hisia in Vaanglianpipa Topa ii kammal hi: "Na tungah tuasiatna khat zawkciang khat hong tung tu hi.

⁶A vekpi kiman zo hi. Hisia a tawpna ahi hi. Nang sia a man hi zo ni hi.

⁷Ngam sungah a teang no mihingte atu in a tawpna hong theng hi. Mualpitemung biakpiakna munte ah poai kikhaam nawn ngawlin buaina bek a om tu hun hong nai zo hi.

⁸“Hai ngawlin ka thin uukna ii thahatna na phawk tu hi. Na sepna tungah thukong khen a, a thasiat huai na ngamtat nate kong thuk kik tu hi.

⁹Nang kong khoaikhe buatu a, kong hesuak buatu hi. Keima sia Topa ka hi hunlam le nangma ngim hong pia sia keima ka hi hunlam na heak natu in, a thasiat huai na ngamtatna te hu in ngim kong pia tu hi,” a ci hi.

¹⁰Tuasiatna ni hong theng tu hi. Molngol ngamtatna pung vaial hi. Ki phatsakna sia a saangbel mun theng hi.

¹¹Molngol ngamtatna in khansiat ngitlona tam piangsak vaial hi. Amate neisa a hauna a phatna ahibuale a minthannate bangma a kikhe nawn buatu hi.

¹²A hun hong theng hi. Sumlei sumzuak sia khiakna a nei nawn ngawl tu ni hong nai hi, banghangziam cile Pathian ii ngim piakna sia a kuama theampo tungah a kibangin tung tu hi.

¹³Sumvawt a kuama po in, a sup sa teng a nga kik dong a nungta buatu hi, banghangziam cile Pathian thin uukna sia a kuama theampo tungah theng hi. A khansiate luhai thei ngawl tu hi.



¹⁴Lemle kitum a mihing simin kithoai khol hi; ahihang kuama ngalsim tu in kuan ngawl hi, banghangziam cile Pathian ii thin uukna sia a kibangin mihing sim tungah tung tu hi.

Israel ii Khialna hangin Daan piakna

¹⁵Lampi liante ah ngal kisimna om a, ngilkialna le natna om hi. Ngam pua sangah a om khat pawpo sia ngal kisimna ah thi tu a, khuapi sung a om khat pawpo sia natna le ngilkialna taw thi tu hi.

¹⁶Kimkhatte sia ngamkuam pan a lau vakhute bangin mual tungah suakta to tu hi. A mawna uh hu in amate theampo mau tu uh hi.

¹⁷A kuama po ii khutte sia thazawm tu a a khupte huang tu hi.

¹⁸Amate in khau-ip puan silhin liing ngawp tu uh hi. A lute uh kimeet tol tu a, kimaizumsak tu hi.

¹⁹Amate in a kham le a ngunte uh sia lampi ah nin vawk bangin vawk tu uh hi, banghangziam cileTopa ii thin uuk ciangin, kham le ngun in amate hun zo ngawl hi. Kham le ngun in amate deina lungkimsak thei ngawl a, a ngil uh vasak thei ngawl hi. Kham le ngun in amate sia mawna sung zotpui hi.

²⁰Khatvei lai in amate in a pha mama a khi a hakte ki phatsakpui hi kale tu in amate in tuate sia a kiihuai milimte vawtna in zangh uh hi. Tua hu in Topa in amate haunate huatsasak hi.

²¹Topa in, “Ngamdang mite in amate ka suamsak tu a, thukham paltante in amate hauna theampo la in, a ninsak tu uh hi.

²²Ka sumngum kholna Biakinnpi mindaisakin, phalakte in phuulin, a nitsak ciangin amate nasepna ka nawngkaisak buatu hi.

²³Na theampo buai a, ngamsung sia tualthana taw kidim a, khuapite sia molngol ngamatatna taw kidim hi.

²⁴A khan sia bel minamte hi munah kong paipui tu a, na innte uh ka tangsak tu hi. Na biakpiakna munte minamdangte in a nitsak ciang, na mi a thahat belte in a kimanna uh bosua tu uh hi.



²⁵Thin kiamna hong theng tu hi. Thin nopna na zong tu uh hi; ahihang na mu ngei buatu uh hi.

²⁶Tuasiatna khat zawkciang khat hong kizui tu a, thusia sia tui bangin na kungah luang tu hi. Bangteng mu khol ziam ci in hong son tu in kamsangte tungah na dongh tu uh hi. Thiampite in ngam mite a hil tu bangma nei ngawl tu uh a, tuaciang upate in ngaisut pha a piak tu nei ngawl tu uh hi.

²⁷Kumpipa khuangai in mau tu a, kumpipa tapa lametna taan in, tuaciang mihonpite lau in, liing tu uh hi. Na sep sa na vawt sa te theampo hu in, nang ngim kong pia tu a, ngual tungah thu na khen bangin, na tungah thu kong khen tu hi. Hisia in, Keima siaTopa ka hina nang hong lak tu hi,” ci hi.

Ezekiel 8

Jerusalem ah Milim Biakna

¹Sal tan zawk zawk a kum luk, tha luk tha, a ni nga ni in, Judah mi saltangte lampuite ka inn sungah kei taw hong tokhawm uh hi. Thakhat thu in Vaanglianpipa Topa thahatna ka tungah hong theng hi.

²Ka etto ciang mihing bang tatak meikuang bang khat mang mu in ka mu hi. A kawng nuai sia teng sia meikuang taw kibang a, a kawng tungsia teng sia taungo nawt thiang bangin tee hi.

³Ama in khut taw a kibang khat hong vaanin ka sam panin hong zam hi. Tua zawkciang hi mang muna sungah Pathian ii thaa in vui sung a saangna ah kei hong khaito a Jerusalem ah hong paipui hi. Ama in biakinnpi ii kongpisaksang tumna sung nungah hong paipui a, tua mun ah Pathian a thin uuksak milim khat om hi.

⁴Tua munah Cheber Ngunhui ah ka omlai a ka mu, Israel te ii Pathian omna mun hi ci in a lak a teekeak khuavak sia ka mu hi.

⁵Pathian in kei tungah “A thi thei mihing awng,saksang en in,” hong ci hi. Ka et ciang, biaknatau kongpi tumna hui ah a om biaknatau kungah Pathian a thin uuksak milim khat ka mu hi.



⁶Pathian in kei tungah hong ci hi, “A thi thei mihing awng, a piang nate na mu ziam? Israel mite ii hi sungah a vawt a kiihuai ngamtatna na mu ziam? Ka mun thiangtho pan a khuala vaial na ah, hong not keak Israel mite ii hi sungah a sep a kiihuai nate en in. Hi sangin a maizum huai zaw nate na mu tu hi”.

⁷Ama in leitual puasang tumna ah hong paipui a, panghawng khat hong lak hi.

⁸Ama in, “A thi thei mihing awng, pang sia hi sung mun sulet in,” hong ci hi. Pang ka sulet a kongkha khat ka mu hi.

⁹Ama in, “Tum in amate ii tua munah a sia le a kiihuai na a septe en in,” ci in hong sawl hi.

¹⁰Tua ahikom tumin ka et ciang, pang tungah ngul limte le a dang a thiangtho ngawl nganhing limte le Israel mite ii a biak a dang limte a kisuai ka mu hi.

¹¹Israel mite lampui mihing sawmsalite tua munah a om uh hi. Tuatae ii sungah Saphan ii tapa Jazaniah zongh kihel hi. Amate khat simin ngimnamtui halna khat tek toai in, ngimnamtui a hal sia pan meikhu zaamto hi.

¹²Pathian in hong dongh hi,, “A thi thei mihing awng, Israel lampuite ii a sepkute na mu ziam? Amate a vekpi in lim taw a kidim khan sungah biak piakna vawt uh hi. Amate kam zonna sia Topa in hong mu ngawl hi! Ama in hi ngam taisan zo hi! ci uh hi”

¹³Tua zawkciang, Topa in ka tungah, “Tuatae sangin a kiihuai zaw lai a vawtte na mu tu hi,” hong ci hi.

¹⁴Tua ahikom ama insaksang Biakinnpi kong ah hong paipui a, Tammuz doai a thi hu in a kap numeite hong lak hi.

¹⁵Ama in, “A thi thei mihing awng, tuasia na mu ziam? Tuasia sang a kiihuai zaw lai nate mu tu ni hi,” hong ci hi.



¹⁶Tua ahikom ama in Biakinnpi leitual sungnung ah hong paipui hi. Tua biak mun thiangtho na tumna nai biaknatau le kongkha kilaklaw ah pasal kul le nga khawng a om hi. Amate in biakmun thiangtho sia nungngat in, nisuana sang nga in kunsuk a, nisuak sia bia uh hi.

¹⁷Topa in kei tungah, “A thi thei mihing awng, tu a sia na mu ziam? Hi Judah mihingte in hi sunga na mu a kiihuai a vawtte theampo le ngamsung theampo a, a kizel molngol ngamtat nate taw a lung a kim bua uh hi. Tuateng bek dom ngawlin ka thin uuk seseam natu in, amate hi Biakinnpi sungah hong pai in tuate hong seam uh hi. En in amate thuak zawk ngawl tu za dongin, kei hong selno hi!

¹⁸Amate in ka thin uukna theampo thuak tu hi. Amate ka khoaikhe buatu a, ka hesuak buatu hi. Amate in a nging thei zaza in ka tungah thu hong ngen tu uh hi. Ahihang amate aw ka ngai buatu hi,” hong ci hi.

Ezekiel 9

Jerusalem Daan Kipia

¹Tua zawkciang Pathian hi bang a au ka za hi. “Khuapi daan a pia tu note awng, hi sungah hong pai tavun. Na ngalvanhte hong keng tavun,” ci hi.

²Thakhat in pasal luk sia Biakinnpi iisaksang kongpi puanung pan hong pai a ngalhiam khat tek keng uh hi. Amate taw puankaang Neal Puan a silh lai at natu a keng pasal khat om hi. Amate a vekpi hong pai in, taungo biaknatau hui ah ding uh hi.

³Israel te Pathian om hi ci a kilakna a taang vazai khuavak sia tha nei nganhingte ii a om maksakna mun panin kilaamto in, Biakinnpi kongpi mai ah kikhin hi. Topa in puankaang Neal Puan a silh pasalpa sam a,

⁴“Jerusalem khuapi bup sungah pai tan a, khuapi sungah a kiihuai nate theampo a kivawtte hu in, a khuangai ngim a thuakte theampo ii talki tungah tepteena vawt tan,” ci hi.

⁵Tuaciangin a dang pasalte munah Pathian in, “Khuapi sung theampo ah ama zui in that tavun. Kuama khoaikhe heak vun, kuama hesuak heak vun.



⁶Pasal huaite, tangvalte, ngaknute, nute le patangte thatlum siat vun. Ahihang a talki tungah tepteena a om pawpote thutha heak vun. Hi lai ka Biakinpi panin pan vun,” a ci ka za hi. Tua ahikom amate in Biakinn sungah a ding lampuite panin pan uh hi.

⁷Pathian in amate tungah, “Biakinpi ninsak vun. A leitualte mithi luang taw kidimsak vun. Nasep kipan vun,” ci hi. Tua ahikom, amate in khuapi sungah khua mite thatlum tu in kipan uh hi.

⁸A kithalup vapawh hun sung tengin, tua munah keima bek ka om hi. Ka maitang sia leipha in ka boksuk a, “Vaanglianbel Topa awng, Israel ngam sungah a taang sun mite theampo thalup siat tu dongin Jerusalem tungah tuabang lawlawm in na thin uuk ziam?” ci in ka au hi.

⁹Pathian in, “Israel le Judah mite in a lauhuai mama khialna nei uh hi. Amate in ngambup sungah tual that a, Jerusalem sia khialna namcin taw kidimsak hi. Amate in, Keima Topa in, amate ngam nusia zo hi, tua hu in amate mu thei ngawl hi hong ci hi.

¹⁰Ahihang amate tungah hesuakna nei ngawl tu khi hi, amate ii ngual tungah a vawt uh bangin, amate tungah ka vawt tu hi,” ci in hong zo hi.

¹¹Tua zawkciang, puankaang neal puan a silh pa heak kikin, Topa tungah , “Nong thupiak bangin ka seam zo hi,” ci in thu a puak hi.

Ezekiel 10

Pathian Minthanna in Biakinpi Nusia

¹Tha nei nganhing nungtate ii tung san a bealpeu kikhup sin bang sia ka en a, a tungah sapphire suang manpha taw a kivawt kumpi tokhum bang khat a om hi.

²Pathian in puankaang neal puan a silh pa tungah “Nganhingte ii nuai, muipeite ii kilaklaw ah pai in na khutdimin suang meihol kamte toai in khuapi tungah the suk in,” ci hi. Ama a pai ka en hi.

³Tha nei nganhingte sia ama ii tum laitakin Biakinpi thang sangah ding uh hi; tuaciang a leitual sungnung sia meeikaai in tuam hi.



⁴Topa ii omna po ah a taang ziazua sia nganhingte kung pan kikhangto a Biakinn tumna ah kikhin hi. Tua zawkciang meeikaai in Biakinnpi tuam a, leitual sia taang pempom hi.

⁵Tha nei nganhingte thaphil aw sia a leitual puanung sia dongin kiza hi. Tua awnging sia Vaanglianpipa Pathian ii aw bang ahi hi.

⁶Topa in puankaang neal puan silh pa tungah nganhingte ii nuai muipeite kawm pan meikuang la tu in, sawl hi. Tua pa pai in tua muipei khat ii hui ah ding hi.

⁷Nganhingte sung pan khat in, amate sungah a om meikuang sia a khut taw sawkin, meikamte la in, puankaang neal puan silh pa ii khut sungah koi hi. Tua pa in meikamte la in, tuaciang amate a pai uh hi.

⁸Nganhingte khat simin, a thakhui nuai tek ah mihing khut bang veu a nei ka mu hi.

⁹⁻¹⁰A kibang linlian leangmui pei li zongh ka mu hi. Tuatae sia nganhing khat ii hui tek ah om hi. Leangmuite sia suang manpha bangin taang a, tuaciang khat ii sungah leangmui dang khat a kitangin kipheikham hi.

¹¹Nganhingte a kikhin uh ciang, a kiheak kul ngawlin a pai nopna pawpo ah pai thei uh hi. Amate sia a pai nopna san tek ah paikhawm tek uh a, kiheak a kul bua hi.

¹²Amate ii pumpite nungzaangte, khutte thate le leangmuite sia mittang vive taw kidim hi.

¹³Hi leangmuite sia ka mang mu maksak sungah ka mute taw kibang hi.

¹⁴Nganhing sim in maitang li veu nei uh hi. A masa phitbel sia khuita maitang hi a, a niina sia mihing maitang hi a, a thumna sia tawpi maitang le a lina sia muvanlai maitang ahi uh hi.

¹⁵(Amate sia Chebar Ngunhui ah ka mu nganhingte ma ahi uh hi). Nganhingte vui sungah kikhangto in,



¹⁶a kikhin uh ciangin leangmuite in zui uh hi. Amate in leang tu in, a thakhuite a phil uh ciang leangmuite in a zui lai uh hi.

¹⁷Nganhingte a tawlngak uh ciang leangmuite zongh tawlna uh hi; tuaciang nganhingte a len uh ciang leangmuite in zui uh hi; banghangziam cile nganhingte in leangmuite a uk uh hi.

¹⁸Tuaciang Topa ii omna po ah a taang ziazua sia in, Biakinnpi tumna mun nusia in nganhingte ii tungsia mun khat ah kikhin uh hi.

¹⁹Amate in a thate uh phal in, lei panin ka mu tangin leangto uh a, leangmuite in zui uh hi. Amate sia Biakinnpi ii nisuana sang kongpi ah tawlna a, a taang ziazua sia amate tungsia ah om hi.

²⁰Chebar Ngunhui Israel te Pathian nuai ah ka mu sa nganhingte ma hi ci sia ka tel hi.

²¹Amate sim in maitang li tek, tha li tek le, thakhui nuai tek ah mihing khut taw a kibang khat tek nei uh hi.

²²A maitangte sia Chedar Ngunhui ah ka mu maitang te taw kibang linlian hi. Nganhing sim in a maisang tek ah tang takin kikhin uh hi.

Ezekiel 11

Jerusalem Kiningkhiin

¹Pathian ii thaa in kei hong laamto a, Biakinn kongpi nisuana sangah hong paipui hi. Tua kongpi naina ah mihing kul le nga ka mu hi. Tuata sungah ngam lampui mite ahi, Azzur ii tapa Jaazaniah le Benaiah ii tapa Pelatiah te ka mu hi.

²Pathian in kei tungah, “A thi thei mihing awng hi pasalte in, a sia vawt tu ngaisutna tupna nei a, khuapi sungah ngaisutna pha ngawl a pia uh hi.

³Amate in ‘Eite in hai ngawlin innte ih sa kik tu hi. Khuapi sia an huanna beal bang hi a, tuaciangin, ei sia a sungah a kihuan sa taw ih kibang hi. Ahihang tua beal in ei sia meisa panin hong dal zo hi,’ a ci uh hi.

⁴Tua ahi ciangin, tu in a thi thei mihing awng, amate phat ngawl na son keak in, ” hong ci hi.

⁵Topa ii thaa in kei hong uk a, Topa in mihingte tungah hi kam vaithakte son tu in hong sawl hi, “Israel mite awng bang veu son a bang veu tupna nei ci sia kong he hi.

⁶No in hi khuapi sungah mihing tam mama thatin, lampi liante sia mithi luang taw a kidim hi.

⁷“Tua ahikom hi sia sia Keima Vaanglianbel Topa ii nangma tungah kong son sia ahi hi. Hi khuapi sia an huanna beal hi takpi hi. Ahihang a sa bang sa ziam? Na thalup sate ii luangte hi ngawl ziam? Hi lai ah om ngawl tu nu hi. Khuapi pua sangah hong vawk tu khi hi.

⁸Namsaute na kiita uh ziam? Namsau taw hong sim tu kong puak tu hi.

⁹Khuapi pua sangah kong lakeak tu a, ngamdang mite kong aap tu hi. Thina daan kong pia zo hi.

¹⁰Tuaciangin note sia noma ngamsung ngal kisimna ah hong kithatlum tu hi. Tuasia ciang mihing theampo in Keima, Topa ka hi hunlam hong tel tu hi.

¹¹Beal ii a sung a sate a huuk bangin hi khuapi in no hong hu ngawl tu hi. Israel ngam koisung po na om uh zongin, daan kong pia tu hi.

¹²Kiimkot ngamte ii thukhamte ni in, kei thukhamte paltan in, ka thupiakte na nit ngawl uh ciangin, Kei sia Topa ka hi hunlam nong he tu hi,” hong ci hi.

¹³Kamsangte thu sonkholte ka son laitakin, Polatiah tosuk in thi hi. Lei le ka maitang kisi in ka boksuk a, ‘Hi heak in Vaanglianpipa Topa awng, Israel ngam sungah a taanglai sun theampo thatlum siat tu ni ziam?’ ci in ka au hi.

Saltangte tungah Pathian Kamciam

¹⁴Topa in kei hong paupui hi. Ama in,

¹⁵“A thi thei mihing awng, Jerusalem ah a teang mite in, nang le saltang a om na Israel mipuite ii thu a son uh hi. Amate in, ‘Saltangte sia Topa taw



kikhuala lei lawlawm uh hi. Topa in hi ngam sia ei lua tu in hong pia zo hi,' ci uh hi.

¹⁶“Tu in kong son teng sia na saltanpui teng tungah son in. Ngamdang a khuala na ah teang tu a, a puak sia pa le ngamdang ah a thethaang pa sia keima ka hi hi. Ahitazong tawmvei hun sung sia amate paina ngamah amate taw ka om tu hi.

¹⁷“Tua ahikom, Keima, Vaanglianpipa Topa in ka ci teng amate tungah son in. Ngamdang ah ka thethaang na munte panin amate ka khawmtua kik tu a, Israel ngam ka pia kik tu hi.

¹⁸Amate hong heak kik uh ciangin, a mu uh a ninnoi a kiihuai milimte theampo vawk siat tu uh hi.

¹⁹Thin thak le ngaisutna thak amate ka pia tu hi. A thinpui a suang thin uh ka laaksak tu a, thunit theina thin ka pia tu hi.

²⁰Tuasia ciang amate in, ka thukhamte zui tu a, keima sia amate Pathian ka hi tu hi.

²¹Ahihang a ninnoi le a kiihuai milimte a bia nuam ka mite daan ka pia tu hi,” hong ci hi. Vaanglianpipa Topa in son zo hi.

Pathian Vaangletna in Jerusalem Nusia

²²Nganhing nungtate leang tu in hong kithoai a, leangmuite in a lenna a zui uh hi. Israel te ii Pathian ii a taang vazal khuataang sia amate ii tungsia ah om hi.

²³Tuasia ciangin a taang vazal khuataang sia in khuapi nusia in, tua ii niswana sang mualpi zuan hi.

²⁴Mu kholna sungah Pathian ii thaa in kei hong laamto a, saltangte teenna Babylonia ah hong paipui kik hi. Tua zawkciang mu kholna hong bo a,

²⁵tuaciangin saltangte munah Topa ii hong lak theampo ka son hi.

Ezekiel 12

Kamsangpa Ngaltai khat bang



¹Topa in kei hong paupui hi.

²Ama in, “A thi thei mihing awng, nang sia tualngal hon sungah teang ni hi. Amate in mittang te nei ahihang khua mu ngawl hi. Bilte nei ahihang khua za ngawl hi. Banghangziam cile amate in tualngal thin a nei hang ahi hi.

³“Tu in a thi thei mihing awng, ngaltai khat tu bangin vanh lom khat tuun in khuazin ma in ding in. Mun khat nusia in mundang khat na zot sia a kuama theampo in musak in. Tua hile tualngalte in nang hong phawk tha tu hi.

⁴Amate in nang hong mu thei tu in, ni omlai in sal tai tu bangin, na vanhthe heang in. Tuaciangin ngaltai tu bangin nitak a na din sia ensak in.

⁵Amate in hong etcik laitakin, na inn pang tungah a hawng khat vut in, na vanh sia tua mun panin la keak in.

⁶Na vanhthe na liangko ah suanin, na pai natu lampi na mu thei ngawl natu in na mit sawm in, khuazing sungah na pai sia musak in. Na vawt teng sia Israel te kidop natu hi tu hi,” hong ci hi.

⁷Topa ii vawt tu hong sawl bang teng ka vawt hi. Tua ni in ngaltai tu khat bangin ka vanhthe ka heang hi. Tua nitak khuazin ciang, ka khut taw pang hawng khat ka vut a, ka pusuak hi. Mihing theampo mu tangin ka liangko ah ka vanh kisan in ka ding hi.

⁸A zingsang ciang Topa in kei hong paupui hi.

⁹Ama in “A thi thei mihing awng, tu in Israel tualngalte in bang vawt ni ziam ci in nang hong dongh tu hi.

¹⁰Vaanglianpipa Topa, Keima ii amate tungah ka pauna teng son in. Hi kam vaithak sia Jerusalem a uk Kumpipa tapa le tua mun ah a teangte theampo atu ahi hi.

¹¹Na vawt teng sia amate tungah a piang tu thute ii limte ahi sia amate son in. Amate sia ngaltaite le ngalmatte hi tu hi.



¹²Amate kumpipa tapa in, khuazing sungah a liangko ah a vanh pua in, ama atu a kitolet panghawng panin a suakta tu hi. Ama in a mit a sawm tu uh a, a pai natu lampi a mu buatu hi.

¹³Ahihang ka ngen ka zaak tu a, a sungah ama ka awksak tu hi. Tua zawkciang ama sia Babylon khuapi ah ka paipui tu a, tua khuapi mu ngawlin ama sia thi tu hi.

¹⁴A zum naseppuite, ngaisutna a plate le ama a cingte theampo, mun theampo ah ka thethaang tu a, mihingte in thalup tu in amate zong tu uh hi.

¹⁵“Mi namdangte sung le ngamdang mite sungah ka thethaang tak ciang amate in Kei, a Topa ka hi hunlam hong tel tu uh hi.

¹⁶Amate sungah mihing tawmno khat sia ngal kidona, kialpi le natna a tuatuam sung pan ka luhaisak tu hi. Tuasia ciangin, tua mun ngamdangte kawmah amate ngamtatna sia bangza in kiihuai ci sia a tel uh a, Kei Topa ka hi hunlam tel tu uh hi,” hong ci hi.

A liing Kamsangpa ii Lim

¹⁷Topa in kei hong paupui hi.

¹⁸Ama in, “A thi thei mihing awng, an na neak ciang liing ngawpin, tui na dawn ciang kiitakna taw ngawk ngawp in.

¹⁹A ngam ah a taanglai Jerusalem mite tungah Vaanglianpipa Topa ii kam vaithak sia hi sia hi, ci in ngambup ah son in. Amate in an a neak uh ciangin liing tu a, tui a dawn uh ciangin kiitakna taw a ngawk ngawp tu uh hi. A ngam uh sia bangma om nawn ngawl dongin kithiak siat tu hi, banghangziam cile tua munah a teangte khat sia in, thukham a palsat hang ahi hi.

²⁰Tu laitak mihing taw a kidim khuapite sia kilalcipsak tu a, tuaciangin a ngam sia duisung kisuaksak tu hi. Tuasia ciangin, amate in KeiTopa ka hi hunlam hong he tu uh hi,” hong ci hi.

A zaaknop huai Paunak khat le A zaaknop huai ngawl Kam vaithak khat

²¹Topa in kei hong paupui hi.



²²Ama in, “A thi thei mihing awng, banghangin Israel mite in hi paunak sia lo kikik nuam hi tu ziam? Hi paunak sia, ‘Hunte papai a, son kholnate tangtung ngawl hi,’ ci hi.

²³Tu in Kei Vaanglianpipa Topa in hisia huvau ka ci nop sia amate mun ah son in, tua paunak sia ka bosak tu hi. Tuasia Israel ah kison kikik ngawl tu hi. Tuasia sangin, "A hun hong theng zo hi, son kholna te hong tangtung tu hi" ci in son in.

²⁴“Israel mite sungah mu kholna maan ngawl om nawn ngawl tu a, lam pialsak thei kamsaanna om nawn ngawl tu hi.

²⁵Keima Topa in amate tungah son tu khi hi, tuaciangin ka son babangin tung tu hi. Hai nawn ngawl tu hi. No tualngalte awng, noma nuntakna hun sungah ka vawt tu na kidopna tu kong piakte vawt tatak tu khi hi, kei son zo khi hi,” Vaanglianbel Topa in kong ci hi.

²⁶Topa in kei tungah hong ci hi,

²⁷“A thi thei mihing awng, Israel mite in mu kholna le na son kholnate sia maisang a khuala pi hun atu hi, ci in a ngaisun uh hi.

²⁸Tua ahikom, Keima, Vaanglianpipa Topa in son zo khi hi;” Haisaang nawn ngawl tu hi. Ka son sa te kiseam tu hi. Kei, VaanglianpipaTopa in son zo khi hi.

Ezekiel 13

A maan ngawl Kamsangte atu Son kholna

¹Topa in hong paupui hi.

²Ama in, “ A thi thei mihing awng, amate phuatawm kamsaanna a son Israel kamsangte nalh in. Topa kammalte a ngai nату in amate sawl in,” hong ci hi.

³Hi sia sia Vaanglianpipa Topa ii ci ahi hi. “Hi a mawmaw kamsangte a lal hi zo hi! Amate in a ngaisut tawm thu bek sonin mu kholnate phuak tawm uh hi.



⁴Israel mite awng, na kamsangte uh sia khuapi lalcipna sungah a teang ngiate bangma in mannung ngawl hi.

⁵Amate in luphung cimhna munte cing ngawl a, ciang zongh ciang kik ngawl hi. Tua ahi ciang, Israel te sia Topa ii ni, ngal hong thet ciang kihung thei ngawl tu hi.

⁶Amate mu kholna sia maan ngawl a, amate son kholnate sia leilot thu hi. Amate in kei kam vaithak hi ci in son ahihang, keima in amate sawl ngawl khi hi. Tua hi napi in, amate in amate kammalte tangtung tu in a um lalai uh hi.

⁷Amate munah ka ci hi. Na mu khol uhte sia a theam hi. Son kholna na son uhte sia leilot thu hi. Tuata sia kei kammal in na nei uh hi. Ahihang no tungah kei hong son ngawl khi hi”.

⁸Tua ahikom Vaanglianpipa Topa in amate tungah “Na kammal uhte sia a theam thu hi a, na mu kholna uhte sia leilot thu hi. No hong langpan khi hi.

⁹A maan ngawl mu kholna a neite le lampialna tu son kholna a nei no kamsangte daan kong pia tu hi. Thukhen tu in ka mite a kikhop ciang, tua munah na om buatu hi. Israel minamte tepteena lai sungah na min uh a kihel buatu hi. Na ngam uh ah, na heak kik ngei buatu uh hi. Tuasia ciangin kei sia Vaanglianbel Topa ka hi hunlam na he tu uh hi.

¹⁰“Kamsangte in ka mite sia na theampo pha hi ci in lampialsak uh hi. Na theampo pha siat ngawl hi. Ka mite in luphung sia suangtum hon khat taw a kawmin ciang a, tuaciang kamsangte hong pai in, tua pang sia suangkaangtui taw zut in, seal hi .

¹¹Luphung cimhtham dektak ci in, kamsangte son vun. Buak bangin ngua ka zusak tu a, a tungah ngialtangte hong kia tu a, vuipi thahat khat in seam tu hi.

¹²Luphung sia topcip tu hi. Mihing theampo in, suangkaangtui ii kimanna sia bang ziam ci in nang hong dongh tu uh hi,” ci hi.



¹³Tu in hi sia sia Vaanglianpipa Topa ii pauna hi. “Ka thin uukna taw lumphung susia tu in, vuipei thahat khat, bing le beal sun bangin ngialtangte ka puak tu hi.

¹⁴Amate ii suangkaang tui taw a zut lumphung sia vaat thapsak tu, saat thap tu le a phungkawng suangtumte bek kheetsak lai tu ka sawm hi. A lumphung sia cimhtham tu a, note theampo hong dellum tu hi. Tuasia ciang a kuama po in kei sia Topa ka hi hunlam hong he tu uh hi.

¹⁵“Lumphung le tua lumphung suangkaangtui taw a zutte in ka thin uukna ii thahatna a thuak tu uh hi. Tuasia ciangin, tua lumphung bo zo a, tuasia bangma in suangkaangtui taw a zutte zongh bo siat zo hi, ci in nang kong son tu hi.

¹⁶Na theampo a phat ngawl laitakin, pha siat hi ci a Jerusalem tungah thupha a son kamsangte sia bo siat zo hi,” Vaanglianpipa Topa in son zo hi.

A Maan ngawl Numei Kamsangte atu Son kholna

¹⁷Topa in, “Tu in a thi thei mihing awng, na mite sungah mailam thupiang tu a sonkhol numeite en in. Tu ate nalh in.

¹⁸Tuasia ciang, Vaanglianpipa Topa in, amate tungah bang ci ziam ci sia amate tungah son in, “No numeite a bo hi uh te! Note in midangte nuntakna ii tungah thu na nei thei natu uh in, a kuama theampo atu in, bum le ai taw a kivawt khut tuamnate na khuisak a, a kuama po ii lu tungah a khip tu in, bum le ai taw a kivawt dialnote na vawtsak uh hi. Ka mihingte tungah thina le nunna vaang na nei nuam uh a, tua vaang sia noma phattuumna tu bek in na zangh nuam uh hi.

¹⁹Mangtaang tang tawm le anluum na deina uh in, ka mite mai ah ka mai hong mawlsak nu hi. Thi tu a, a kilawm ngawl mihingte na thatlum uh a, nungta tu a kilawm ngawl mihingte na nungtasak uh hi. Tua ahikomin, ka mite tungah leilot thu na son uh a, amate in hong um uh hi,” ci hi.



²⁰Tu in hi sia Vaanglianpipa Topa ii ci teng ahi hi. "Thina le nuntakna tungah thu na nei nopna uh hangin, na zak uh khut tuamnate ngaimaw khi hi. Na baante uh panin ka laaikeak tu a, na uk sung mihingte ka suaktasak tu hi.

²¹Na dialno uhte ka baltham tu a, ka mite na vaangletna pan a tawntung atu in, khatvei ka suaktasak tu hi. Tuaciangin, kei sia Topa ka hi hunlam na he tu uh hi.

²²Mihing phate ka liamsak nop ngawlte, na leilotna taw a thin uh na kiamsak uh hi. Mihing khansiate a siatna uh a nusiak tu uh le, a nuntakna uh a kihukna tu pan na khak tan uh hi.

²³Tua ahikom, tu in na mu kholna a maan ngawlte le lam hong pialsak son kholnate bo zo hi. Keima, Topa ka hi hunlam na heak natu in na vaangletna pan ka mihingte ka suatak hi," ci hi.

Ezekiel 14

Pathian in Milim Biakna Ningkhiin

¹Israel lampuite pawlkhat Topa ii deina dongh tu in hong haw hi.

²Tua zawkciang in Topa in kei hong paupui hi.

³Ama in, "A thi thei mihing awng, hi mite in a thin uh sia milimte pia zo a, milimte in, amate mawna sungah thet pui hi. Amate in hong thu dokte zokik tu in hong um ziam?"

⁴"Tu in amate tungah, Keima, Vaanglianpipa Topa in, bang ci khi ziam ci sia son in: Israel te milim tungah a thin a pia peuma le mawna sung a thetpui zawkciang, kamsangte thu a dongh te in, kei tung pan ka zokikna na nga tu hi— tua in milimte taw a kiphu zokikna hi tu hi.

⁵Tua milimte in Israel te sia kei kung pan lampialsak hi; ahihang ka zokiknate taw amate ii thumaanna nga kik tu in ka lamen hi.

⁶Tua ahikom tu in, kei Vaanglianpipa Topa ii Israel te tungah ka ci teng son in: hong heak kik tavun a, a kiihuai milimte nusia vun.



⁷“Israel te khat po ahizong, Israel mihingte sungah a teang ngamdang mi khatpo in, kei kung pan lampial in, milimte bia a, tua zawkciang, kamsangte thu a dongh le Keima, Topa in ama thu dokte ka zokik tu hi.

⁸Ama ka langpan tu hi. Ama sia ngual ii ettee tu in ka koi tu hi. Ama sia ka mihonpite kawm panin, Kei, Topa ka hi hong heak natu in ka heam tu hi.

⁹Kamsang khat in theam thuakin, a maan ngawl zokikna a pia le Kei, Topa in ama theam ka hi hi. Israel mite kawm panin ama ka heam tu hi.

¹⁰A kamsangpa le a dongh pa sia daan a kibangin nga tu hi.

¹¹Israel te in kei hong taisan ngawl natu le a khialna uh taw amate le amate a kininsak ngawl natu in hi bangin ka vawt tu hi. Amate in ka mihingte hi tu a, Keima in amate Pathian ka hi tu hi,” Vaanglianpipa Topa in son zo hi.

Noah, Daniel le Job

¹²Topa in kei hong paupui a,

¹³“A thi thei mihing awng, ngam khat in khial a, kei tungah hong thumaan buale, ka khut ka vaan tu a, a ngam ii a an ngana lampi sia ka susia tu hi. Kialpi ka tungsak tu a, mihing le ngannote a kibangin ka thatlum tu hi.

¹⁴Noah, Daniel, Job, mihing thumte tua munah a teang hial zong, amate phatna in amate nuntakna bekma suatak bek tu uh hi,” Vaanglianpipa Topa in son zo hi.

¹⁵“Tua ahibuale ngamsa ngilote ka paisak tu a, mihingte thatin, kuama ngamsung khual a haw ngam ngawl dongin ka lauhuaisak tu hi.

¹⁶Tua mihing thumte keak tua munah a teang hial zong, Kei Vaanglianpipa Topasia a nungta Pathian ka hi bangma a tate uh zongh a hun zo buatu uh hi. Amate nuntakna bek kihung zo tu a, a ngam sia duipui suak tu hi.

¹⁷“Tua ahibuale, ngal ka thengsak tu a, a lalsak thei ngalhiamte taw mihingte le ngannote a kibangin ka maaimotsak tu hi.



¹⁸Tua mihing thumte keak tua munah a teang zong, Keima, Vaanglianpipa Topa sia a nungta Pathian ka hi bangma in, a tate uh zongh, a suatak zo buatu uh a, amate nuntakna bek a hu zo tu uh hi.

¹⁹“Tua ngamah a kilaw thei natna tungsak in, ka thin uukna taw nuntakna tam mama la in, mihing le ngannote ka thalup ciang,

²⁰Noah, Daniel le Job te keak tua munah a teang zongin, Keima, Vaanglianpipa Topa sia a nungta Pathian ka hi bangma, amate in a tate zongh, a hun zo buatu uh hi. Amate phatna in amate nuntakna bek a hung zo tu uh hi,” ci hi.

²¹Hi sia sia Vaanglianpipa Topa ii pauna ahi hi, ‘Jerusalem tungah ngimna nasia bel nam li tungsak tu khi hi. Ngah, kialpi, ngamsa ngilote, le natna te in mihingte le ngannote a kibangin susia tu uh hi.

²²A suakta khatpo om a, a tate a suatak le na kungah hong pai ciang, en ka po in. Amate bangzata sia in, ngilo ci sia na mu ziam? Tuaciang Jerusalem tungah ngimna ka piakte sia bangza in piak tuak ziam ci sia tel in;

²³tuasia ciangin na ka vawt peuma sia a hang om ci sia na tel tu hi,” ci in Vaanglianpipa Topa in son zo hi.

Ezekiel 15

Sapit ngui taw Sontena

¹Topa in kei hong paupui hi.

²“A thi thei mihing awng, sapit ngui le thingkung bangbangin kitee ngat thei tu ziam? Thingtang sung a thingkungte le sapit baakte ii tee ngat hang bang phattuamna om ziam?

³Bang khatpo vawt natu in zangh thei na ni ziam? Thawn in sui a vanh khaina beakin kizangh thei na ziam?

⁴Ama sia meitawna in kizangh thei bek hi. A mongte nii kaangin a lai sia meihol a sua zawk ciangin, tua taw bang kivawt thei ziam?



⁵A kihal ma ngangawn in kimanna nei ngawl hi. Tu in mei in kaang a, hol a sua seseam ciang mannung ngawl vaial hi.

⁶Tu in hisia in Vaanglianpipa Topa ii ci nop teng ahi hi. “Thingtang sung pan khaungui kila in a kihal bangin, ka mihingte Jerusalem pan ka la tu a,

⁷daan ka pia tu hi. Amate in meikuang khat panin suakta zo hi, ahihang tu in meikuang in kaangtum tu hi. Amate ngim ka piak ciangin Keima siaTopa ka hi hunlam hong tel tu uh hi.

⁸Amate in kei tungah hong thumaan ngawl ahikom a ngam sia dui ka suaksak tu hi,” ci in Vaanglianpipa Topa in son zo hi.

Ezekiel 16

A Thumaan ngawl Jerusalem

¹Topa in kei hong paupui kik hi.

²Ama in, “A thi thei mihing awng, Jerusalem te ii a kiihuai ngamtatnate lakin telsak in.

³Vaanglianpipa Topain Jerusalem tungah a ci teng son in. “Nang sia Canaan ngamah piang ni hi. Na pa sia Amor mi hi a, na nu sia Hit mi ahi hi.

⁴Na sua lai in kuama in na lai hong tan ngawl, hong sil ngawl, ci taw hong zut ngawl a, puan taw hong tun ngawl hi.

⁵Kuama in nang hong hesuak in, nang atu hite hong vawtsak ngawl hi. Na sua lai in kuama in hong it ngawl hi. Nang sia lozau sung a hong kivawk hi.

⁶“Tuaciangin kei kong pai a, na chi sungah na kisan kong mu hi. Chisan taw na kituam a, ahizong na thi tu kong oai bua hi.

⁷Thingkungno limci bangin kong khangsak hi. Na khang tato a, ngaknu no na suak hi. Na noaite zongh hong bawk a, na sam zongh sau ahihang na pumnguak in na om hi.

⁸“Nang kantan in kong pai kik ciang, ngual a dei thei tu hun theng zo na hi sia kong mu hi. Na pumpi nguaktang sia ka puantual silh taw kong khu a,



itna kamciam kong pia hi. Hi hi kiteenna kam kiciamna kong pia a, nang sia keima a na suak hi,” ci hi. Vaanglianpipa Topa son teng hi teng ahi hi.

⁹“Tua zawkciang, tui taw na chisan teng kong silhsak hi. Olive thau taw kong zut hi.

¹⁰A kizeam puantual kong silhsak a, savun phabel taw kivawt peangdap kong pia a, puankaang neal dial kong khimsak a, nai laktong puasilh kong silhsak hi.

¹¹Suang manpha taw kivawt hak le khi taw kong zeam hi.

¹²Naakbaa le bilbaate kong pia a, a hoi mama kumpi lukhu na khuk tu kong pia hi.

¹³Kham le ngun taw kivawt kizepnate na nei a, a kizeam puankaang neal puan le, naaipuan na silh tawntung hi. Taangvui pha bel taw a kivawt anluum na ne a, khuaitui le olive thau neak tu na nei hi. Na mealphat sia nasia mama a, kumpinu na suak hi.

¹⁴Ngam simin a kicing na mealphatna taw na min thang hi, banghangziam cile a ithuai mama tu in hong vawt sia keima ka hi hang hi,” ci hi. Hi sia VaanglianpipaTopa ci ahi hi.

¹⁵“Ahihang na meal phatna le na minthanna te zanghin hong pai po na luppui hi.

¹⁶Na puansilh pawlkhate biakna munte ah zepna in na nei a, pumpi zuak numeite bangin na pumpi sia a kuama theampo na pia hi.

¹⁷Ngun le kham kizepna kong piakte na la a, pate lim vawtin tuate taw palngul mawna na vawt hi.

¹⁸A kizeam puanneal kong piakte, tua milimte in na silhsak a, olive le ngimnamtui kong piakte milim biakna in na zangh hi.

¹⁹An kong pia a, anvui phabel olive thau le khuaitui kong pia hi; ahihang milimte tung pan maipha na nga nopna in, milimte biakpiakna in na nei hi,” Hi sia Vaanglianpipa Topa ii ci ahi hi.



²⁰“Tuaciangin kei taw na nei tapate tanute la in, milim biakna in na pia hi. Kei tungah na thumaan ngawl sia, sia khop zo sa ngawlin;

²¹ka tate milim biakpiakna in nei thua lalai na hi ziam?

²²Pumpi zuakin a kiihuai na nuntak sungah na no lai nangma chisan sungah na pumngwak in na ki sasan lai hun khatvei beak na phawk nawn bua hi.”

Jerusalem ii Nuntak sia Pumpi zuak khat bang

²³Vaanglianpipa Topa in, “Nang sia a lal hi zo a! Lal zo ni hi! Siatna theampo na vawt zawkciang,

²⁴lampi hui sim ah milim biak natu mun le pumpi zuak natu mun na vawt hi.

²⁵Na meal phatnate buan sungah na kai zo hi. Hong pai pawpo munah nangma le nangma na ki aap a, nisim in na paktatna na khan vaial hi.

²⁶A lan mama na innpaam Egyptte taw na lumkhawm a, na paktatna taw kei nong thin uuksak hi.

²⁷“Tu in nang daan kong piak natu in, ka khut ka laamto zo a, ka thupha nang ii tel teng kong la kik tu hi. Nang kong ensan a, na ngamtat nate kiihuai a sa, Philistinete tungah nang kong aap zo hi.

²⁸“Banghangziam cile midangte taw lungkim zo ngawl na hikom Assyriate na del hi. Nang sia amate atu pumpi zuak nu na hi a, amate in nang sia hong lungkimsak zo peang bua hi.

²⁹Sumvawt minam Babylonte mun zongh ah pumpi zuak na seam hi. Ahihang amate in nang hong lungkimsak zo tuan ngawl hi”.

³⁰Vaanglianpipa Topa pauna hi sia hi. “Nang in a maizum maw pumpi zuak nu bangin na seam hi.

³¹Lampi lian theampo tungah milim biakna tu le pumpi kizuak natu inn na sa hi. Ahihang pumpi kizuak numei bangin sum dei na hi bua hi.

³²Nang sia na pasal na it sangin khual mite taw palngul mawna a vavawt numei sia taw na kibang hi.



³³Pumpi zuak nu sia sum taw kitham hi. Ahihang nang in na lawmpate theampo letsong na pia a, nang taw lumkhawm tu in mun theampo panin hong paite sumnguk na pia hi.

³⁴Nang sia a tumpian pumpi zuak nu na hi hi. Kuama in tua bang na sua natu in, zawthawk thu taw hong vawt om ngawl hi. Thaman nang hong kipia ngawl a, nangma in na pia zaw hi. Hi hi, nang sia lamdang ni hi,” ci hi.

Pathian ii Jerusalem tung Thukhenna

³⁵Tua ahiciang tu in, nang pumpi zuak Jerusalem awng; Topa ii hong ci teng ngai in.

³⁶Hi sia Vaanglianpipa Topa ii ci hi: “Pumpi zuak numei khat bangin, na puan na sut khe a, na lawmpate le a kiihuai milimte tungah nang le nang kipia in, tua zawkciang, milimte tungah sangaw biakpiakna in, na tate thatlum in, milim biakpiakna in na nei hi.

³⁷Hi sia hu in na it lawmpate le na etsat, na lawmpate ka khawmtua tu hi. Amate in kong kiim umsak tu a, tua zawkciang na puante kong suut siatsak tu a, na nguaktang a na om sia amate in kong ensak tu hi.

³⁸Palngul mawna le tualtha na taw kong ningkhiin tu a, ka thin uukna le ka thin sona taw nang sia thi daan kong pia tu hi.

³⁹Amate ii tha hatna nuai ah nang kong koi tu a, pumpi na zuakna le milim na biakna innte sia amate in baltham tu uh hi. Amate in na nikten na puansilh te le na kizepna suang manpha te hong laaksak in, na nguaktang tatak in hong nusia tu uh hi.

⁴⁰Amate in nang suang taw hong deang tu in mihonte thawn tu uh a, a namsau uh taw hong neensem tu uh hi.

⁴¹Amate in na innte hong haltumsak tu a, na daan thuakna sia numei honte in hong en tu uh hi. Na pumpi zuak sia kong tawlnga sak tu a, na lawmpate letsong na piak sia kong tawpsak tu hi.

⁴²Tua zawkciang in ka thin uukna hong veng tu a, ka thim tu hi. Ka thin a uuk nawn bua tu a, kong eang nawn buatu hi.



⁴³Na khanmoi lai in bangbangin hong phatvawt khi ziam ci sia na mangil zo hi. Tua ciangin nasep na vawt theampo taw kei nong thin uuksak hi. Tua hangin na ngamtatnate theampo atu in, nang in kong liau sak hi. A kiihuai ngamtatnate belapna in, banghangin numei le pa khialna ngamtat ngina ngawlte vawt ni ziam?” Vaanglianpipa Topa in ci hi.

Tanu in A Nu sun

⁴⁴Topa in Jerusalem awng, “Tanu in a Nu sun ci paunak sia mihingte in nang tungah hong zangh tu hi.

⁴⁵Nang sia na Nu ii tanu hi takpi ni hi. Ama in a pasal le a tate ensan hi. Na suapui numeite taw kibang ni hi. Amate in a pasalte le a tate huatsa hi. Nang le na suapui numei khuapuite in Hit sia, nu in nei a, Amor sia, pa in nei hi.

⁴⁶“A u nu siasak sangah a om, Samaria le a khuanote ahi hi.

⁴⁷Amate paina khuani te zui in a kiihuai ngamtat bang na zui ciangin na lung kim ziam? Lungkim vet ngawl ni hi. Na vawtna theampo sia tawmvei zawk po ciang amate sangin lawn zaw ni hi.

⁴⁸“Keima in a nungta Pathian ka hi takpi bangma in,” VaanglianpipaTopa in ci hi. “Na suapui nu Sodom le khaunote in siatna khaatna sia nang ii vawt za liangin vawt ngawl hi.

⁴⁹Ama le a tanute sia kiphasak hi, banghangziam cile amate in neak tu kicing a, ngal kilemin dai takin nungta uh hi, ahihang amate in mizawngte le hamphatna a selte a awlmaw bua uh hi.

⁵⁰Amate in kisathei in, thinpui in ka ngaimawwk teng veu vawt uh hi. Tua ahikom na heak sa bangma amate sucip khi hi.

⁵¹“Samaria in nangma ii vawt, khialna a lang zongh a vawt bua hi. Ama sangin a kiihuai zaw in na ngamta hi. Nang le na suapui dangte ih etkak ciangin amate sia maw hi napi a maw ngawl bangza in kimu hi.

⁵²Tu in min siatna na thuak kul tu hi. Nang mawnate sia na suapui numeite mawna taw tee ngat ciang, amate sia a maw ngawl taw kibang hi. Tu in na



suapui dangte sia, a thiangtho bangin ki musak na hi ciang, maisan liangin, maizum thuak in,” ci hi.

Sodom le Samaria Kipua kik tu

⁵³Topa in Jerusalem tungah, “Sodom le a khuanote, Samaria le a khuanote khangto in, ka nuamsasak kik tu hi. Hi hi, nang zongh khangto in kong nuamsasak kik tu hi.

⁵⁴Nangma le nangma na maizum tu a, tua na maimawl na te hangin, na suapui numeite bangza in nuamsa ci sia lak tu hi.

⁵⁵Amate nei le lamh taw nuamsa kik tu a, tuaciang nang le na khuanote zongh hong kipuapha kik tu hi.

⁵⁶Na kisakthei hun lai in, Sodom sia ciammuina in nei hi ngawl ni ziam?

⁵⁷A sia na vawtte hong kipholaak ma in, tuabangin ngamta ni hi. Tu in nang zongh ama bangma na hi hi. Edomte, Philistinete le nang hong ensante ii selno nunau na hi hi.

⁵⁸A kiihuai zummawk thute nasep hu in, na thuak kul hi.” Topa in son zo hi.

A kip Tawtung Thuciamna khat

⁵⁹Vaanglianpipa Topa in, “Na thuciamnate paltan a, na kamciamte ngaingon na hikom a kiphu bangin kong vawt tu hi.

⁶⁰Ahihang na khanmoi lai in kong thuciamte ka kholet a, tuaciang a tawtung a kip tu thuciamna khat nang taw ka vawt tu hi.

⁶¹Na unu le na naunu na nga kik ciangin, na ngamtatna sate phawk kik in, na mai zum tu hi. Nang taw ih thuciamna sungah a kihel ngawl hangin, amate sia na tanute bangin hong om tu uh hi.

⁶²Nang taw ka kamciamte ka thaksua tu a, tuaciang Keima sia Topa ka hi hunlam na he tu hi.

⁶³Na khialna theampo kong maisak tu a, ahizong, na ngamtat khialnate phawk kik in, maizum leilam in na kam zongh na kaa ngam buatu hi,” Vaanglianpipa Topa in son zo hi.



Ezekiel 17

Muvanlai le Sapit ngui Sonteeana

¹Topa in kei hong paupui a,

²“A thi thei mihing awng, Israel mite tungah thu sontee na khat son in a,

³Kei, Vaanglianpipa Topa in hi bangin ci hi; Muvanlai a lian mama khat om a, a thate zongh lian in hoi mama a, a thakhui te zan in a zai in phal hi. Ama in Lebanon mualpite ah leangin cedar thingkung khat ii dawn thiaktan a,

⁴sumvawtte ngamah paipui in, sumbuk khuapi khat ii sungah koi hi.

⁵Tua zawkciang ama in, thingno khat Israel ngam panin la a, a khangsak tu tui om tawntungna lei phana mun khat ah suan hi.

⁶A kung hong meang a, a niam, a zai a zam sapit ngui khat hong suak hi. A baakte muvanlai sangah hong khangto a, zung thukte tha hi. Sapit ngui sia a baak le a teete taw kidim hi.

⁷Tuaciang a lian mama, a thalian, a mul a saa mama muvanlai dang khat om hi. Tu in sapit ngui in, ama ii pona huansung sangin, tui tam zaw a nga zaw natu, lametna taw a zung le a teete tua muvanlai sang ngasak hi.

⁸Ahihang sapit ngui sia leipha na, tui kicingna munah kisan zo a, a tee meang tu a, a nga nga in a limci mama sapit ngui a sua natu ahi hi.

⁹“Tua ahikom, Kei, Vaanglianpipa Topa in, hi bangin ka dongh hi. Hi sapit ngui sia hingin a khang tu ziam? Muvanlai masa sia in a zung botin, sapit ngate zuk keakin, a baakte thiaktan in, vul sak ngawl tu ziam? Sapit ngui a bawkeak natu thahatna lianpi ahizong, minam lian ahizong kul ngawl tu hi.

¹⁰Hi hi, hi sapit ngui sia kisan hi, ahizong hingin a khang tu ziam? Nisuana sang vui in a nawk ciang vul ngawl tu ziam? A po munah vul ngawl tu ziam?

Thu sonteeana ii Khiakna

¹¹Topa in kei tungah,



¹²“Hi tualngalte munah hi sonteena ii a khiakna a he uh ziam, ci sia dongh in. Amate tungah son in a, Babylonia kumpipa Jerusalem ah hong pai a, tuaciangin kumpipa le uliante Babylonia ah siapui uh hi.

¹³Ama in kumpipa innkuanpuite khat la in, kiciamna khat vawt a, ama ii tungah thumaan tu in, kiciamsak hi. Ama in mihing thupi pawlkhat luangkhaam in siapui a,

¹⁴Amate in a kiciamna bang a zui natu le a leedo kik ngawl natu in, a deina ahi hi.

¹⁵Ahihang Judah kumpipa in leedo veve a, Egypt ngam ah siphu le ngalkap honpi khat sam tu in palai paisak hi. Ama in a tupna a tangtun tu ziam? Ama in tuabang teng taw suakta tu ziam? Ama in kiciamna paltan thei ngawl tu a daan thuak ngawlin, om thei ngawl tu hi.

¹⁶“Keima a nungta Pathian ka hi sia maan ahi bangma hi kumpipa in a kiciamna le kumpi tokhum tungah a koi Babylonia kumpipa taw a kamciam le a thu kiciamna paltan ahikom Babylonia ah thi tu hi.

¹⁷Babylonia kumpipa in mihing tam mama a thalup natu in, kulhte leidumte vawt ahikom a thahat Egypt kumpipa ngalkapte ngangawn in ama hu zo ngawl tu hi.

¹⁸Ama in a kiciamna le a kamciamte paltan hi. Hite theampo ama in vawt ahi ciangin ama a suakta buatu hi,” ci hi.

¹⁹Vaanglianpipa Topa in ci hi, “Kei a nungta Pathian ka hi takpi bangma in ka min taw kamciam a piak sa kiciamna paltan ahikom daan ka pia tu hi.

²⁰Savaipa ngen ka khak tu a, ama ka man tu hi. Babylonia ah ka paipui tu a, kei tungah hong thumaan ngawl ahikom tua munah daan ka pia tu hi.

²¹Ngal sungah ama ngalkap phabelte kithatlum tu hi. Tuaciang a thi mong teng mun theampo ah ki thethaang tu hi. Tuaciang Kei, Topa ka hi sia na he tu hi.”

Pathian ii Lametna Kamciam



²²Vaanglianpipa Topa in hi bangin ci hi, “Cedar thingkung pui ii dawn khat ka zam tu a, tuaciang a meang moino khat ka thong tu a, mualsaang bel khat,

²³Israeal mualsaang bel ii tungah ii tungah ka suan tu hi. A baak tha tu a, cii a nei tu hi. Tuaciangin a thanop huai mama cedar kung suak tu hi. Vacim namcin tua ii tungah teang tu a, a lim beal tu uh hi.

²⁴Ngamsung thingkung theampo in Keima, Topa ka hi sia hong tel tu uh hi. Thingkung saangte ka tan tu a, tuaciang a niam thingkung te a saangin ka khangsak tu hi. Thingkung hingte ka vulsak a, tuaciang thingkung kote, ka hingsak tu hi. Keima, Topa in son zo khi hi. Vawt tu ka ci te ka vawt tatak tu hi,” ci hi.

Ezekiel 18

Misim ii sep tu Tavuan

¹Topa in kei hong paupui a, hi bangin hong ci hi.

²“Israel ngam sungah paunak a kilo kikik sia bang ziam? ‘Nu le pate in sapit thuk ne a, a tate a ha khim uh hi,”

³“Keima a nungta Pathian ka hi tatak bangma in,” Vaanglianpipa Topa in ci a, “Israel ngam ah hi paunak sia na lo kikik nawn buatu uh hi.

⁴Mihing theampo ii nuntakna sia keima aa hi a, nute pate nuntakna le tate nuntakna dong sia keima aa hi. Mihing a maw sia a thi tu sia hi.

⁵“Sonteena in mihing pha mama, thumaan thutang khat om hi.

⁶Ama in Israel te milim bia ngawlin, a kikhaam biakna munah biakna a kipia ante ne ngawl hi. Ama in ngualdang khat ii zi sia zolsak ngawlin, a nin suak numei khat ompui ngawl hi.

⁷Ama in kuama theam ngawl a neisa sut ngawl hi. Sumpute ii a vanh aapte pia kik a ngilkialte an vaak in, puansilh selte puan pia hi.

⁸Ama in sum meet pukthaak ngawl hi. A sia vawt tu nial in, thu kituu na sungah a tang in thukhen hi.



⁹Tuabang mihingte in ka thukham tang a, ka thupiakte ni hi. Ama sia thutang a, tua ahiciang nungta tu hi,” Vaanglianpipa Topa in ci hi.

¹⁰“Tuaciang sonteena in, hi mipha pa in, tapa khat nei a tua tapa in ngualsuam in that a,

¹¹a pa ii vawt ngei ngawl phat ngawlnate vawt hi. Ama in a kikhaam biakna munah, a kipia ante ne in, ngualdang zi zolin, luppui hi.

¹²Ama in a zawngte theam a, suamin, sumpute ii a aap vanhte tang hi. Ama doai biakna munah pai in, a kiihuai milimte bia hi,

¹³tuaciang summeet pukthaak hi. Ama a nungta tu ziam? Nungta vet ngawl tu hi. Ama in hi a kiihuai nate theampo vawt ahikom thi tu hi. Ama ii thina hangin ama kimawsiat tu hi.

¹⁴“Tu in mihing a niina pa in, tapa khat nei hi. Ama in a pa ii vawt theampo mu hi. Ahihang a pa lamlakna zui ngawl hi.

¹⁵Ama in Israel te biakpiakna munah milim bia ngawl, a kikhaam biakna munah a kipia ante ne ngawl hi. Ama in ngualdang khat ii zi zolsak ngawl a,

¹⁶kuama nengcip ngawlin, kuama suam ngawl hi. Sum pupa ii aap vanhte pia kik hi. A ngilkialte anvaak a, puansilh selte puan pia hi.

¹⁷Siatna vawt tu nial a, summeet pukthaak ngawl hi. Ka thukhamte tang a, ka thupiakte ni hi. A pa maw hu in, ama sia thi ngawl tu hi. Ama sia nungta tatak tu hi.

¹⁸A pa ahile ngual theam a, suam a, mihing theampo tungah siatna vawt hi. Tua ahikom ama mama ii vawt mawnate hu in thi hi.

¹⁹“Banghangin a tapa in a pa mawna hu in thuak ngawl ziam? ci tu nu hi. A zokikna sia tapa in a maan le a phate seam hi. Ama in ka thukhamte keamcing in, belcing takin zui hi. Tua ahikom ama sia nungta tatak tu hi.

²⁰A khial a maw pa sia thi tu hi. Tapa khat in a pa ii a mawna hu in thuak ngawl tu hi. Pa zongh in tapa ii mawna hu in thuak ngawl tu hi. Mipha sia a



pha vawtna hu in thaman kipia tu a, misia pa in a sia avawt na hu in thuak tu hi.

²¹“Mihing ngilo khat in, mawna vawt nawn ngawlin, ka thukhamte tangin, ama in a pha le a maan a seam le, ama thi ngawl tu a, ama nungta tatak tu hi.

²²A mawna theampo kimai sak tu a, ama nungta tu hi. Banghangziam cile ama in a maan in ngamta hi.

²³Mihing pha ngawl khat a thi ciang dik sa tu nong um ziam?” Vaanglianpipa Topa in dongh hi. “Dik sa ngawl khi hi; kisiik kikin nungta le oai zaw khi hi,” ci hi.

²⁴Ahihang mihing thutang khat in, phatna a vawtte khealin, siatna theampo vawt tu hong kipan in, misiate ii a kiihuai ngamtatna te hong seam le a nungta tan lai tu ziam? Nungta ngawl tu hi! A pha a sepnate khat zongh kiteptesak ngawl tu hi. A thumaan ngawl na le a mawna hu in thi tu hi.

²⁵“Ahihang Vaanglianpipa Topa ngamtatna maan ngawl hi na ci uh hi. Israel te awng kei hong ngai tavun. Na ka vawt zia sia maan ngawl hi na ci uh ziam? A maan ngawl sia noma ngaisut zia hi zaw hi.

²⁶Mihing thutang khat in a pha nasepte tawpin, a siate sep tu a kipan le tuasia ciang ama sia thi hi. Ama thi sia a ngamtat siatna hang ahi hi.

²⁷Mihing ngilo khat in mawna a vawt sia khealin, a maan a pha a vawt le ama in ama nuntakna hu ahi hi.

²⁸Ama in ama sep le vawtte phawkin mawna a vawt kheal ahikom ama thi ngawl a, nungta tan lai tu hi.

²⁹Tuaciang no Israel mite in, ‘Vaanglianpipa Topa sep sia maan ngawl hi ci nu hi’ na ci takpi uh ahi ziam? Noma ii zia le tong a maan ngawl hi zaw hi.

³⁰“Tu in kei Vaanglianpipa Topa in, no Israel te tungah hong ci khi hi. Note khat ii sim tungah na vawt uh bangin, thu kong khen tu hi. A sia a kha na vawt theampo uh nusia vun, na mawna in noma susiasak heak vun.



³¹A sia a kha na vawt uh theampote kheal vun a, thin thak lungthak na nei tavun. No Israel mite banghang thi nuam nu ziam?

³²Kuama a thi tu dei ngawl khi hi. Na mawnate panin, kikheal vun a, nungta tavun,” Vaanglianpipa Topa in ci hi.

Ezekiel 19

Khuangai La

¹Israel te kumpi tapate nii atu hi khuangai la sa tu in Topa in kei hong sawl hi:

²Na nu uh sia tawpipui taw bangza in kibang ziam! Ama in a note sia a kiitak huai tawpi talte kawm ah khangsak hi.

³A no khat khangsak a, savai zia hil a; mihing sa ne khat suak hi.

⁴Minam tuatuamte in ama ii thu za in, vuum taw a sia uh hi. Thikkoai zum taw ama sia Egypt ngamah kaikeak uh hi.

⁵A nu in a lametna a bo dong ngak top hi. Tua zawkciang a no dangkhat khangsak leleau a, tuasia a kiitakhuai tawpi tal khat suak hi.

⁶Hong khanthin tak ciang, tawpi dangte taw kithawl in vak hi. Ama zongh savai thiam in mihing sa ne khat suak hi.

⁷Ama in kulhte susia in khuapite lalcip sak hi. Ngamsung mite sia ama hawk a zaak simin lau mama uh hi.

⁸Minamte in ama do tu in mun tuatuam pan pai in kikhawm uh hi. Amate in a sa siana ngen hong phal a, tua sungah ama man uh hi.

⁹Kuang sungah khumin Babylonia kumpipa kungah paipui uh hi. Amate in ama sia Israel mual ah a hawk a kizaak nawn ngawl natu in cing uh hi.

¹⁰Na nu sia luihui ah a kisan sapit ngui taw kibang hi. Tui kham ahikom, a ngui sia tee le nga taw kidim hi.

¹¹A baakte sia takin kho a, kumpi ciangkhut hong suak hi. A ngui in meeikaai ban tu dongin khangto a, a kuama po in ama saang a, a tee taw kidim sia mu uh hi.



¹²Ahihang a thin uk khutte in a zung pan longhto in lei ah vawk uh hi. Nisuana vui in a ngate kosak hi. A baakte kithiaktan a, ko in kihaltum hi.

¹³Tu in ama sia senneal ngamsung tui om ngawl na lei kona ah kisan hi.

¹⁴A ngui zikpi sia mei in kaang a, a baakte le a ngate kaangtum hi. A baakte bangma hun in takin kho kik ngei nawn ngawl tu a, kumpi khawmvaan suak ngei nawn ngawl tu hi. Hi sia khuangai la hi a; a kisa kikik la ahi hi.

Ezekiel 20

Topa Deina le Mihing ii Nalhna

¹Saltang in ka om zawk uh a kum sali kum, a tha nga, a ni sawm ni ahi hi. Israel te lampuite pawlkhat Topa deina dongh tu in hong pai a, ka mai ah a to uh hi.

²Tua zawkciang Topa in hong paupui hi.

³“A thi thei mihing awng, hi mihingte munah Vaanglianpipa Topa in hi teng ci hi va ci tan. Ka deina dongh tu hong pai ahi uh ziam? A nungta Pathian ka hi bangma, kei tungah bangma thu donghsak ngawl tu khi hi. Kei, Vaanglianpipa Topa in kong ci zo hi.

⁴“A thi thei mihing awng, amate tungah thu tan tu in na kinging zo ziam?: Tua ahile thu tan in. A taangpupite ii a kiihuai ngamtatna uhte phawksak in.

⁵Ka ci teng son in. Israel ka teal lai in kamciam khat ka pia hi. Amate tungah Egypt ngamah ka kilangh a, amate mun ah: Keima in Topa na Pathian khi hi, ci khi hi.

⁶Tuasia lai in amate Egypt ngam pan ka pusuapui natu kamciam ka pia a, leitangh teng po pan a pha bel lei manpha ngam, amate atu ka teal sak sa ngamah paipui tu ka kamciam hi.

⁷A kiihuai milim a it uh te vawkin, Egyptte pathian theamte taw a kinitsak ngawl natu in thu ka pia hi, banghangziam cile Keima, Topa na Pathian ka hi hi ci in ka son hi.



⁸Ahihang amate in kei hong nalh a, ka thu hong ngai bua uh hi. Amate in a kiihuai milimte vawk ngawlin Egyptte pathiante a nusia bua uh hi. Tua mun Egypt ngam ah ka thin uukna tha theampo thuaksak tu in ka kinging zo hi.

⁹Banghangziam cile amate teenna minamte zaakna ah Egypt ngam pan hong pusuapui tu khi hi ci in Israel te tungah thangsak zo ka hikom tuabangin ka ngamta bua hi, tuabangin ngamta leng keima min siatna ma hi tu hi.

¹⁰“Tua ahikom Egypt ngam pan senneal ngamah ka paipui hi.

¹¹A zuite theampo nuntakna a pia, ka thupiakte le ka thukhamte ka hil hi.

¹²Amate le kei kilaklaw thukimna lim tu in Sabbath tanna ka vawt a, keima Topa in amate ka thianthosakna a phawk natu ahi hi.

¹³Ahihang senneal ngamsung ngangawn ah kei hong nalh uh hi. A zuite theampo nuntakna a pia ka thukham le ka thupiakte amate in paltan uh hi. Amate in Sabbath sia daicipsak uh hi. Amate senneal ngamah ka thin uukna tha theampo taw sucip tu in ka kinging zo hi.

¹⁴Ahihang Egypt ngam pan Israel mite ka pusuapui hong mu minam dangte mai ah ka mindai tu ahikom tuabangin ka ngamta bua hi.

¹⁵Tua ahikom senneal ngamah kiciamna khat ka vawt a, leitangh po pan a pha bel, lei manpha, leihoi amate ka piak sa ngamah kong then nawn buatu hi ci in ka kamciam hi.

¹⁶Kiciamna ka vawt sia banghangziam cile amate in ka thupiakte nial in, ka thukhamte paltan in ka Sabbath min siasak uh hi. Amate in milim ma bia nuam zaw uh hi.

¹⁷“Ahihang amate hesuakhuai ka sa a, tua senneal ngamah thalup ngawl tu in ka khensat hi.

¹⁸Tua taangin, amate sungah khangnote kidop natu thu ka pia hi. Na taangpupite vawt thukhamte tang heak vun; amate tan ngeinate zui heak vun; tua ahibuale a milimte uh taw noma na ki ninsak heak vun.

¹⁹Keima in Topa na Pathian ka hi hi. Ka thukhamte le ka thupiakte zui vun.

²⁰Sabbath ni thiangthosak vun a, tua hile tuasia in ih kiciam khopna lim hi tu a, tuaciang keima sia Topa na Pathian ka hi hunlam hong phawksak tu hi.

²¹“Ahihang tua khang kikte zongh in kei hong nalh uh hi. Amate in ka thukhamte paltan a, a zuite atu nuntakna a pia ka thupiakte a zui bua uh hi. Sabbath min a siasak uh hi. Amate senneal ngamah ka thin uukna tha theampo taw tha tu in ka kinging zo hi.

²²Ahihang Egypt ngam pan Israel mite ka pusuapui hong mu minam dangte mai ah ka mindai tu ahikom tuabangin ka ngamta bua hi.

²³Tua ahikom senneal ngamah kamciam dang khat ka vawt a, amate leitung theampo ah thethaang tu in ka kiciam hi.

²⁴Hi bang a ka hi sia banghangziam cile amate in ka thupiakte nial a, ka thukham paltan in ka Sabbath min siasak a, a taangpupite ii biak milimte ma bia uh hi.

²⁵“Tuasia ciang thukham pha ngawlte ka pia a, nuntakna a piangsak ngawl thupiak te ka pia hi.

²⁶A kipiak na uh taw amate ka ninsak a, a tapa upa belte zongh sangaw biakpiakna in ka piasak hi. Hi sia sia amate ngim ka piakna hi a, Keima Topa ka hina ka lakna ahi hi.

²⁷“Tua ahiciang tu in a thi thei mihing awng, Israel te munah Kei, Vaanglianbel Topa in hi bang ci khi hi. Hi sia sia a taangpupite ii a thumaan ngawlna taw hong zawnsak vawtna nam khat ahi hi.

²⁸Kamciam ka piakna ngamah ka paipui hi. Mualsaangte le thingkung hing te a mu uh ciang amate in tuate theampo tungah sangaw biakpiakna pia uh hi. A sangaw biakpiakna le a piak zu in kei hong thin uuksak hi.

²⁹Na zot uh munsaangte bang sa ka bel nu ziam?: ci in amate ka dongh hi. Tua hun pan kipan ‘Mun Saangte’ kici suak hi.



³⁰Tu in Israel mite munah ka ci teng son in. Banghangin na taangpupite mawna teng ma maw kikik tu nu ziam? Tuaciang a milimte ma dedel tu nu ziam?

³¹Tuni dong ngangawn in na piak ngei tengma pia in, noma le noma tua milimte taw ki ninsak in, na tate uh sangaw biakpiakna in, mei sungah na hal uh hi. Tuasia zawkciang no Israel mite in kei deina bang ziam? ci in dongh tu in nong pai lalai uh hi. Keima, Vaanglianpipa Topa sia, a nungta Pathian ka hikom kei tungah thu bangma hong donghsak nawn ngawl tu khi hi.

³²Mi namdang thing le suang a biate bang suak nuamin na thin uh na khensat zo uh hi. Ahihang tuabang suak ngei ngawl tu hi.

Pathian in Daan pia in Maisak

³³“Kei, Vaanglianpipa Topa sia a nungta Pathian ka hi bangma, kidop natu thu kong pia hi. Ka thin uuk hu in ka thahat khut le ka vaangletna theampo taw kong uk tu hi.

³⁴Na kithethaang na ngam theampo pan kong khoptua kik tak ciang ka thin uukna le ka thahatna kong lak tu hi.

³⁵‘Ngamte ii Senneal Ngam’ a kici na ah kong paipui tu a, na maitang ah kong ningkhiin tu hi.

³⁶Sinai senneal ngamah na taangpupite uh ka puavawk bangin tu in kong puavawk tu hi,” Vaanglianpipa Topa in ci hi.

³⁷“Ngaat takin no kong uk tu a, ka thuciamna kong nisak tu hi.

³⁸No sung pan hong leedo theite le mi mawte ka lakeak tu hi. Tu a a teenna leitanghte panin amate ka la khia tu a, ahizong Israel ngamah ka heak kiksak buatu hi. tuasia ciang Kei, Topa ka hi hunlam hong he tu uh hi,” ci hi.

³⁹Vaanglianpipa Topa in, “Tu in no Israel mite awng, noma uuk babangin om vun. Na milimte ma bia tavun. Ahihang kidop natu kong piak na pan, hi sia zawkciang ka thu nong nit uh kul tu a, milim biakpiakna taw ka min thiangtho na daisak nawn buatu uh hi.



⁴⁰Tua ngam ka mual thiangtho Israel mualpi saang ii tungah no Israel mite theampo in kei nong bia tu uh hi. No dik kong sa tu a, tuaciang sangaw biakpiakna a phabelte le a thiangtho letsongte nong paipui tu ka lamen tu hi.

⁴¹Na kithethaang na ngamte panin kong tua zawkciang, na sangaw biakpiakna na halte kong saang tu a, tuaciang ngam tuatuamte in kei a thiangtho ka hi na hong mu tu uh hi.

⁴²Na taangpupite tungah piak tu in ka kamciam na ngam Israel ah kong siapui kik ciang, Kei sia Topa ka hi hunlam na he tu uh hi.

⁴³Tuasia ciang a thasiat huai na vawt uhte le noma le noma bangbangin kininsak nu ziam ci sia na phawk kik tu uh hi. Noma le noma sia siatna na vawtte theampo hu in na kikii mama tu uh hi.

⁴⁴A zatak huai ka min ka vuumsit ciangin no Israel te in Kei, Topa ka hi sia na he tu uh hi, banghangziam cile na ngitlona na siatnate taw a kiphu in kong thuk bua hi,” VaanglianpipaTopa pau zo hi.

Thangsang Kaangmei

⁴⁵Topa in kei hong paupui a,

⁴⁶“A thi thei mihing awng, thangsang en in. Thangsang taam ngam siat natu son khol in.

⁴⁷Thangsang taam ngam tungah Vaanglianpipa Topa ii ci teng ngai tu in sawl in: En vun! Keima in mei khat hal khi hi, tuasia in na sungah a hing a ko thingkung theampo kaangtum tu hi. Bangma in tua kaangmei sia sumit zo ngawl tu hi. Tua kaangmei sia thangsang paninsaksang dong kizel tu a, mihing theampo in meisa thuk tu uh hi.

⁴⁸Amate in keima Topa ii hal hi ci in a mu tu uh a, kuama in a sumit thei buatu hi,” hong ci hi.

⁴⁹Ahihang keima in ka nial a, “Vaanglianpipa Topa awng, tuabangin hong vawtsak heak in. Ngual theampo in kei sia tel tu a haksa kam soaiheam taw kampau hi hong ci zo hi,” ka ci hi.

Ezekiel 21



Topa ii Namsau

¹Topa in kei hong paupui hi.

²Ama in, “A thi thei mihing awng, Jerusalem le mite biakpiakna munte lang in mawsiat zazan in. Israel ngam tungah a kidop natu in,

³Keima, Topa in ci khi hi; Keima na ngal ka hi hi. Ka namsau ka dok tu a, a pha taw a sia taw na vekpi in kong that siat tu hi.

⁴Saksang pan thangsang dong a kuama theampo tungah ka namsau kong zangh tu hi.

⁵Mihing theampo in Kei, Topa in ka namsau dok zo ka hina le sot kik nawn ngawl tu ka hi sia hong he tu uh hi.

⁶“A thi thei mihing awng, na lungtang sung sia thin ngimna taw a tamtham bangin tau in. Mihing theampo ii hong mu theina munah khuangaina taw tau in.

⁷Amate in banghangin tau ni ziam hong ci ciangin, hong tung tu thu hang hi ci in. Tua hong tun tak ciang a thin uh sia launa taw hong kidim tu a, a khut uh kaikin in, a thin letna uh hong bo tu a, a khupte uh hong liing tu hi. A hun hong theng zo hi; tu hun ahi hi,” Vaanglianpipa Topa in pau zo hi.

⁸Topa in kei tungah,

⁹“A thi thei mihing awng, maisang thu tu sonkhol in a, mihingte tungah Kei, Topa in bang ci khi ziam ci sia son in: Namsau khat, Namsau khat sia kitaat a kinawt zo hi.

¹⁰Mihing tha natu in kitaat zo a, khualeng bang a tee vazial tu in kinawt zo hi. Thin nop natu bangma om ngawl hi, banghangziam cile ka mite in kidop natu le ngim piak natu theampo awlmawk ngawl hi.

¹¹Namsau sia zak tawm thei tu in kinawt zo hi. Mihing that pa khut sungah a ki aap tu in kitaat hiam a, kinawt thiang zo hi.



¹²Thasiatna taw aukeak in, a thi thei mihing awng, hi namsau sia keima mite tung le Israel lampuite tungah a kizangh tu hi. Ka mihingte theampo taw cipin amate kithatlum tu hi. Thinkiam in na awm beang in!

¹³Ka mite ka sit na hi. Amate in a kisiik kik tu a nial ahile hite theampo amate tungah tung tu hi.

¹⁴“Tu in, a thi thei mihing awng, kam saanna son in. Na khutte beang in, tua hile namsau in saat kikik tu hi. Tua namsau sia mihing a that namsau, mihing a lausak namsau, mihing a ngolum namsau ahi hi.

¹⁵Tuasia in ka mite thinkiamsak a lutusak hi. Amate khuapi sia a that tu in kinging a, khualeng bang a, a tee vazal namsau khat taw in ka tawng hi.

¹⁶A hiam namsau awng, na ziat na vei vaat ngawp in! Na ngatna theampo vaat ngawp in.

¹⁷Kei zongh ka khutte ka beang tu a, tuaciang ka thin uukna thai tu hi, Kei, Topa in son zo khi hi,” ci hi.

Babylon Kumpipa ii Namsau

¹⁸Topa in kei hong paupui hi.

¹⁹“A thi thei mihing awng, Babylon kumpipa a namsau taw hong pai thei natu lampi nii teptee sa in koi in. A nii ngealin, ngam khat sung panin kipan khawm tu hi. Lamkaa ah lim lakna khuam khat phut in.

²⁰Khat in Ammonte khuapi Rabbah paina lam hi ci in Kumpipa lak tu hi, a dang khat sia in Judahte khuapi kulh taw a ki uum Jerusalem paina lak tu hi.

²¹Babylonia kumpipa in lamkaa, lim lakna khuam hui ah ding hi. Koi sia tawn zaw tu ci sia a tel natu in a thaltangte lok in milimte dongin a sangaw biakpiakna nganhing ii thin en hi.

²²Tu in a ziatsang khut in “Jerusalem” ci in a kilak thaltang toai hi. Tua ai in a pai natu khuapite sukthap natu thingluangte taw a kithoai natu, kido na aw au tu, kongpите sutham tu, dumte to in kidalna vawt tu a hil hi.



²³Jerusalem mite in hi bang piang thei tu in a um bua uh hi. Banghangziam cile ngallem kiciamna a vawt uh hang ahi hi. Ahihang son kholna in amate mawna phawksak tu le amate sia kipum mat tu a hina kidop natu thupiakna ahi hi.

²⁴Hi sia sia, Keima Vaanglianpipa Topa ii ci ahi hi. Na mawnate kipholaak zo hi. Nang bangza a mawnei na hi sia a kuama po in hong he hi. Na ngamtatnate pan na mawna uh kilak hi. Nang sia nawlkhin sa hi zo na hikom nang sia na ngalte khut sungah kong aap tu hi.

²⁵“Nang a ngilo a thiangtho ngawl Israel te lampui pa awng, na ni a khak bel ah na ngim natu ni sia hong pai hi.

²⁶Keima, Vaanglianpipa Topa in son zo khi hi. Na kumpi lukhu le na dialpui suut in. Khat zongh a ngeina bang hi kik nawn ngawl tu hi. Mizawngte a lian tu in laamto in: A uk miliante khiasuk in!

²⁷Siatna, siatna vive! Hi hi, khuapi sia ka siacipsak tu hi. Ahihang khuapi daan a pia tu in ka teal pa hong pai mateng hi thu a tung buatu hi. Ama tungah tua nasep ka pia tu hi.

Namsau khat le Ammonte

²⁸“A thi thei mihing awng, kam saanna son in. Israel a zawngsak Ammonte tungah Kei, Vaanglianpipa Topa ii ka ci teng son in. Amate munah hi bangin ci in: Namsau khat sia a lalcipsak tu in kithoai zo hi. Khualeng bangin a tee vazal tu le a that tu in kinawt zo hi.

²⁹Na mu kholte a theam hi a, na sonkholte sia leilot thu hi. Nang sia ngilo a khan sia ni hi, tuaciang a khak bel na ngim nga natu ni sia hong papai laitak hi. Na ngawng ah namsau hong tu tu hi.

³⁰“Namsau a paai sungah thun kik vun! Nang kong bitphuana mun, na pianna ngamah nang thu kong khen tu hi.

³¹Ka thin uukna meizang leang bangin kong tha ciang note in na phawk tu uh hi. Siatcipsak zia a thiam mihing molngolte tungah nang kong aap tu hi.



³²Nang sia meikuang in hong haltham tu hi. Na chisan sia na ngam sungah kee tu a, kuama in nang hong phawk nawn ngawl tu hi;” Topa in son zo hi.

Ezekiel 22

Jerusalem ii Mawnate

¹Topa in kei hong paupui hi.

²Ama in “A thi thei mihing awng, tual thatte taw a kidim khuapi sia tungah thukhen tu in na kinging zo ziam? A kiihuai a vawt theampo ama ii munah sonthiang in.

³Khuapi tung ah Kei, Vaanglianpipa Topa ii ci teng son in: Na mite tam mama suamlum in nangma le nangma milim biakna taw kininsak na hikom, na hun hong theng hi.

⁴Tua tual thana te tungtaang ah maw na hikom le na vawt sa milimte taw kininsak na hikom na ni hong pai zo a, na hun hong cing zo hi. Tua hu in minam dangte in kong selnosak a, ngamdang theampo in kong nunausak hi.

⁵Ngam a nainate le a khuala nate in thukham na zui ngawl hu in hong nunau uh hi.

⁶Israel lampuite theampo in amate thahatna suangin tual a that uh hi.

⁷A nu a pa a zatak vawt khuapi sungah kuama om ngawl hi. Ngamdang mite na theam uh a, meingongte le tangate tung pan hamphatna na zong uh hi.

⁸Mun thiangtho te na zakta bua uh a, Sabbath na tang bua uh hi.

⁹Na mite pawlkhat in midangte thi daan a thuak natu in leilot thu na son uh hi. Pawlkhat te in milim biakna sa ne uh hi. Pawlkhat te numei le pa khialna a lungkim babangin vawt uh hi.

¹⁰Mihing pawlkhatte in a pate zi uh taw lumkhawm uh hi. Mihing pawlkhat te in numei a nin nei laitak in zawthawk thu taw a khialpui uh hi.

¹¹Pawlkhatte in palngul mawna vawtin, pawlkhatte in a mote ahibuale a suapuisseal numeite zolin khialpui uh hi.



¹²Na mite pawlkhat in sum ne in tual that uh hi. Pawlkhatte in, a Israel mipuite tungah summeet pukthaakna taw hau law uh hi. Amate in kei hong mangil uh hi,” Vaanglianpipa Topa in son zo hi.

¹³“Ngual na suamlupna uh le ngual na sutolna tungah ka khuttum taw kong tumsuk tu hi.

¹⁴Na tungah kong vawt teng kong vawt siat zawkciang na khut uh lapto zawk natu in hanna ahibuale hatna nei lai tu in na ki um uh ziam? Keima, Topa in ka pau zo a, ka pau kammal bangin ka ngamta hi.

¹⁵Na mite ngam sim le minam sim sungah ka thethaang tu a, a sia na ngamtatnate ka bosak tu hi.

¹⁶Tuaciang mi namdangte in no hong nomu tu a, ahihang Keima sia Topa ka hi hunlam nong he tu uh hi,” ci hi.

Pathian ii Thiansuana Pummei

¹⁷Topa in kei tungah,

¹⁸“A thi thei mihing awng, Israel te sia kei atu bangma mannung ngawl hi. Amate sia thik lamsang, tau, thikkaang, thik hak le ngunte a kilaak zawkciang pummei sungah a taanglai thik eakte taw kibang hi.

¹⁹Tua ahikom kei, Vaanglianpipa Topa in amate munah, amate sia tua nate bangma in manh nei ngawl hi ka ci hi. Amate theampo Jerusalem ah ka paipui tu a,

²⁰ngun, suang, tau, thik, hak le thikkaang te thiansakna pummei sungah a ki zotpui bangma in ka zotpui tu hi. Ka thin uukna le ka thin sona in meikuang ii nate a tuithapsak bangma in amate ka tuithamsak tu hi.

²¹Hi hi, Jerusalem ah amate ka khawmtua tu a, a nuai uh ah mei thut in ka thin uukna taw amate ka tuithamsak tu hi.

²²Amate sia ngunte pummei sungah a tuithap bangma in, Jerusalem ah ka tuithamsak tu a, tuasia ciang amate in Topa ii thin uukna hong phawk tu hi,” hong ci hi.

Israel Lampuite ii Mawnate



²³Topa in kei hong paupui kik a,

²⁴“A thi thei mihing awng, Israel te munah son in a, a leitangh uh sia thiangtho ngawl ahikom ka thin uukna taw ngim pia tu khi hi.

²⁵A lampuite sia, a thalup sa nganhingte tungah a hawk tawpите taw kibang hi. Amate in mihingte that a, a sum le a neisa uh a laak thei theampo laaksakin a tual thalup hu in numei tam mama meingong suaksak uh hi.

²⁶Thiampite in ka thukham paltan a, a thiangtho ante ciliap ngawl hi. Amate in a thiangtho nate le a thiangtho ngawlte a khen bua uh hi. Amate in na a thiangthote le a ninte kilamdanna hil ngawlin, Sabbath a ngaingon uh hi. Tua taw kizui in Israel mite in kei hong zakta bua uh hi.

²⁷Kumpi zum ulian seamte sia nganhing a mat sate a laitham ngiapuite taw kibang uh hi. A hau natu in amate in tual that uh hi.

²⁸Mihingte in pang sia suangkaang tui taw a zut uh bangin kamsangte in hi mawnate seal uh hi. Amate in mu kholna a maan ngawlte mu a, son kholna maan ngawlte veu son uh hi. Amate in kei, Vaanglianpipa Topa kampau ka lai in heang a ahihang Kei, Topa in amate ka paupui bua hi.

²⁹Sumhaute in ngual theamin suam uh hi. Amate in a zawngte vawtsia a, khual mite tung pan hamphatna la uh hi.

³⁰Keima in ka thin uukna taw ka sukcip ciang kulh a cing zo tu, kulh a cipna munah ding a, a ngam a hu zo tu khat ka zong hi. Ahizong kuama ka mu zo bua hi.

³¹Amate ii a sia ngamtatna teng hu in ka thin uukna meikuang bangin ka paisak tu a, ka lalcipsak tu hi,” Vaanglianpipa Topa in son zo hi.

Ezekiel 23

Mawnei Unau Numeite

¹Topa in kei hong paupui a,

²“A thi thei mihing awng, khatvei lai in numei unau nii a om hi.



³A khanmoi lai in Egypt ngamah a ngaknu thiangtho na bosua a, pumpi zuakte suak uh hi.

⁴A u zaw ii min sia Oholah (ama in Samaria taang) hi, tuaciang a nau zaw sia Oholbah (ama in Jerusalem taang) hi. A nii in ka tenpui a, amate in tate hong hinpui uh hi.

⁵Oholah sia keima neisa hi napi ama in pumpi zuak na seam suakin Assyria pan, a lawmpate atu in huukna lanna taw a kidim veve hi

⁶Amate sia puan sannum a kibang a silh ngalkapte, mi nampite, ulian za neite hi a, a vekpi in a mealhoi siphu ngalkap bute ahi uh hi.

⁷Ama sia Assyria uliante theampo ii zak pumpi zuak nu hi a, ama ii sikvil na in Assyria milimte a biak dongin ama le ama a kinin sak hi.

⁸Egypt ngamah a ngaknu thiangthona bosua a, a pumpi zuak a kipat bangin zom suak lai hi. Numeino ahi lai pan ma in, pasalte in ama luppui in, pumpi zuak khat bangma in a zak sa ahi hi.

⁹Tua ahikom a dei mama Assyria a lawmpate tungah ama ka aap hi.

¹⁰Amate in a puan suutsakin a pum nguak a koi zawkciang, a tapate le a tanute matsakin ama sia namsau taw thatlum uh hi. Mun theampo ah numeite in tua nu ii thuk thute nawnsem uh hi.

¹¹“A suapui nu Oholibah in mu ahihang ama sia Oholah sangin khai zaw a, pumpi zuak hi kaan zaw lai hi.

¹²Ama zongh Assyria nampite, min nei za neite, a tee ziazua puan kibang a silh ngalkapte le siphu ngalkap bute le mealhoi khangmoite theampo atu in huukna le lanna taw kidim seseam hi.

¹³Ama sia a ngamtatna pak mama a, a unu za ma in sia tatak hi ci in ka mu hi.

¹⁴⁻¹⁵“Paktatna sungah ama sia a thuk vaial in kidia hi. Ama sia Babylon uliante ii lim pang tungah a kikhen a, a san zelizol taw a kizut, dialno a kawng ah teangin, a lu tungah a kizeam dial a khimte in a thin khoi mama hi.



¹⁶Ama in tua limte a mu po ciang uukna taw kidim a, Babylonia ah kamtai te paisak hi.

¹⁷Babylonian te sia ama taw om khawm tu in hong pai uh hi. Amate in ama zangh ngawpin, ninsak ngawp ahikom a khakbel ciang amate sia ama in kiihuai sa hi.

¹⁸Ama le ama sia mipi mai ah pumpi zuak nu a hina a kuama theampo heak tu in a kipholaak hi. A suapuinu bangma in ama zongh kiihuai ka sa hi.

¹⁹Ama sia pumpi zuak khai zaw seseam khat hong suak a, a ngaknutno lai Egypt ngamah pumpi zuak a sep bangma in seam suak hi.

²⁰Ama sia siphute le laa tal te bangin huukna le lanna taw a kidim pasalte a sikvil na taw dei hi.

(²¹Oholibah awng, Egypt ngamah na ngaknutno lai in na paktat nate, pasalte ii na noai hong kimai pui le ngaknut thiangthona na bosua bangin na ngamta kik nuam hi.)

A Naunu tungah Pathian Thukhenna

²²“Tu ahile Oholibah awng, hi sia sia Kei, Vaanglianpipa Topa ii nang tungah kong ci teng hi. Na lawmpate sia cimtaak zo ni hi, a hihang nang tungah amate kong thin uuksak tu a, nang hong kiim uum tu in kong paipui tu hi.

²³Babylonian te le Chaldeante, Pekod, Shoa, Koa le Assyria pasalte theampo kong paipui tu hi. Tua mealhoi mi thupite le uliante, a thupi zalian le siphu ngalkap uk uliante kong khawmtua tu hi.

²⁴Amate in ngalleang le vanh puakna leangte keng in ngalkap hon khat taw hong do tu uh hi. Lum le thik lukhu taw kidal in nang hong kiim uum tu hi. Nang sia amate tungah kong aap tu a, amate thukham ngeina om bangin nang tungah thu hong khen tu hi.

²⁵Nang tungah hong thin uuk ka hikom amate zongh in thin uukna taw hong diang tu uh hi. Na naak le na bilte hong at tansak tu a, na tate hong thalupsak tu hi. Hi hi, na tapate na tanute na kung pan la in a hingtangin mei taw hal tu hi.



²⁶Na puansilh lai hong suutkeaksak tu a, na kizepna na manphate hong laaksak tu uh hi.

²⁷Egypt ngam ah na omlai pan kipan na huuk na lannate le a maizum huai na ngamtatnate kong khealsak tu hi. Milimte na en nawn buatu a, Egypt ngam na lungngul nawn buatu hi,” ci hi.

²⁸Hi sia sia Vaanglianpipa Topa ii ci ahi hi: “Na ngaimawk le kiihuai nasak minamte khut sungah nang kong aap tu hi.

²⁹Tuaciang amate in nang hong ensan ahikom, amate in na thalaw a, na nga sa theampo hong laaksak tu a, tuaciang na puan hong suutsak zawkciang pumpi zuak khat bangin hong pholaak tu hi. Na lanna le na pumpi zuakna in

³⁰hi teng na tungah hong tungsak hi. Nang sia ngam tuatuam te ii pumpi zuak nu na hi a, amate ii milimte taw nangma le nangma na kininsak zo hi.

³¹Na suapui nu ii khuani teng ma zui na hikom, daan piakna hai a kibangin kong dawnsak tu hi”.

³²Vaanglianpipa Topa in, “Na suapui nu hai panin na dawn tu hi; tua hai sia lian in thuk hi. Mihing theampo in hong maisiat tu a, hong nunau tu hi; tua hai sia dim hi.

³³Nang hong cimawsak tu a, hong khamsak tu hi. Kiitakna le lalna hai sia na suapuinu Samaria ii hai ahi hi.

³⁴Na dawn tu a na dawnkang tu hi, tua hai kitam bekte taw na noai na zen tu hi. Vaanglianpipa Topa in ka son zo hi,”

³⁵Tu in hi sia sia Vaanglianpipa Topa ii ci ahi hi, “Kei hong mangil in hong nungngat na hi ciang na lanna le na pumpi zuakna hu in na thuak tu hi,” ci hi.

Unau Numei Niite tungah Pathian Thukhenna

³⁶Topa in kei tungah, “A thi thei mihing awng, Oholah le Oholibah tungah thukhen tu in na kinging zo ziam? A kiihuai a ngamtatna te taw amate mawsiat in,



³⁷Amate in palngul mawna le tualthana a vawt uh hi— palngul mawna sia milimte taw vawt a, kei taw ka hin tate hong thalupsak hi. Ka tate milim biakpiakna in hong neisak hi.

³⁸Ta teng bek vawt ngawl hi. Ka biakinnpi ninsakin, ka kipsak sa ka Sabbath sia paltan uh hi.

³⁹Ka tate milim biakpiakna in a thalup ni mama in ka Biakinnpi ah hong pai in ninsak uh hi.

⁴⁰“Pehial pehial in amate in ngam khuala na ah a om pasalte tungah kamtaite paisakin sam uh a, amate hong pai tek uh hi. Unau numeite nii in kibual in mitvun vom za kinoai in kizepna na manphate taw kizeam uh hi.

⁴¹Amate in tokhum hoi khat tungah to in, a mai ah sabuai khat dim na phate koi uh a, tuate sungah ngimnamtui le olive thau ka piakte zongh koikhawm uh hi.

⁴²Bangma thin ngimna a nei ngawl mihon khat ii aw kiza hi, senneal ngam panin hong kipaipui pasal hon khat ahi uh hi. Amate in numeite baan ah hakbulsakin a lu tungah a hoi kumpi lukhute a khusak uh hi.

⁴³Keima le keima hi bangin ka ngaisun a, palngul mawna taw a tul sa numei pumpi zuak bangin amate kizangh hi ta a, ka ci hi.

⁴⁴Amate in hi pumpi zuakte lun kikik nithi uh hi. Amate in a paktat Oholah le Oholibah kung zuan kikik uh hi.

⁴⁵Mihing thumaante in amate sia palngul mawna le tual thana taw a ningkhiin tu uh hi, banghangziam cile amate in palngul mawna vawt in a khut uh chisan baang hi.”

⁴⁶Hi sia in Vaanglianpipa Topa ii ci ahi hi, “A lausak tu le a suam tu in mi ngilo honkhat hong paipui tavun.

⁴⁷Tua mi ngilote in suang taw deang taken a, a namsau uh taw simin a tate uh thalupsakin, a inn uh haltumsak taken.

⁴⁸Ngamsung buppi ah paktat nate ka bosak tu a, numei a minpiang ii a kidop thei natu in amate bang palngul ngamtatna a tat ngawl natu in ka vawt tu hi.

⁴⁹Tuaciang no unau numei niite awng, na paktatna uh le na milim biakna mawnate hu in daan kong pia tu hi. Tuasia ciang Kei sia Vaanglianpipa Topa ka hi nong he tu uh hi,” ci hi.

Ezekiel 24

A Eakseau Anbeal

¹Sal ka tan zawk a kum kua kum tha sawm le, ni sawm ni in, Topa in kei hong paupui hi.

²Ama in, “A thi thei mihing awng, tuni sia bang ni ziam ci sia at in, banghangziam cile tuni in Babylonia kumpipa in Jerusalem khua uumci tu a kipat ni ahi hi.

³Hong leedo ka mite munah Kei, VaanglianpipaTopa ii piak sonteena sia son in; Mei tungah beal suang vun a tua sungah tui dimh vun.

⁴Sabak a phabel teng thasuk vun— saliangte le sapheite— a ngu limci belte zongh thasuk vun.

⁵A phabel tuute sa zangh vun a, beal nuai ah thing thut vun. Tui sosak vun. A ngu le a sate sosak vun,” ci hi.

⁶Hisia Vaanglianpipa Topa ii ci nop teng hi: Tualthatte ii khuapi sia lal tu manaw hi! Ama sia bangma hunin a kikiat ngei ngawl beal eakseau taw kibang hi. Sate bak khat zawkciang bak khat kiten a, khat zongh kikhe ngawl hi.

⁷Khuapi sungah tual kithat hi, ahihang chisan sia leivui ii seal thei natu lei tungah keesak ngawl hi. Chisan sia suangtum tung bek ah keesak hi.

⁸A kiseal thei ngawl natu tua munah chisan te ka nusia a, thin uukin phu kilaak thei natu in ka vawt hi.”

⁹Hisia Vaanglianpipa Topa ii ci ahi hi, “Tual thatte ii khuapi sia lal tu masuan hi! Keima mama in thingkangte ka sia to tu hi.



¹⁰Thingkang a tam zaw lai hong paipui tavun! Meikuang zaap vun. A sa suang vun. A phuan tui phulkeaksak vun. A ngute haltham vun!

¹¹Tu in taungo bealhawm sia a san dongin meikam tungah suang vun. Tua hile a eakseau teng kaingin, a kok zawkciang beal sia thiangtho kik tu hi.

¹²Ahizong tua eakseau kelte ahile a vekpi in meikuang sungah bocip tuan ngawl tu hi.

¹³Jerusalem awng na paktatna in nang hong ninsak zo hi. Thiansua tu in kong hanciam hangin, na nin top veve lai hi. Ka thin uukna a cingin na thuak mateng na thiangtho kik buatu hi.

¹⁴Keima, Vaanglianpipa Topa in ka son zo hi. Ka dian tu hun hong theng zo hi. Na mawnate kong maisak buatu a, hesuakna ahizong, mulkimna ahizong, kong nei buatu hi. Na ngamtatna sa tungah nang sia daan hong kipia tu hi,” Vaanglianpipa Topa in son zo hi.

Kamsang pa ii Zi Thina

¹⁵Topa in kei hong paupui a,

¹⁶ama in, “A thi thei mihing awng, mihing na it bel khat sia vuak khat taw in ka la tu hi. Phun thei ngawl tu, kap thei ngawl tu, thitui zongh taaksak thei ngawl tu ni hi.

¹⁷Naang in na om hunlam kuama in hesak heak in. Khuangaina lim na lakna in lukhu khu ngawl, peangdap thua ngawlin vak heak in. Na maitang seal heak in a, a khuangaite an neakte ne heak in.”

¹⁸Zing tuungin mihingte taw thu ka son hi. Tua nitak in ka zi hong thi a, a khuavak ni ciang hong kisawl bangin ka ngamta hi.

¹⁹Mihingte in, “Banghang hi bangin kithoai ni ziam hong ci hi.”

²⁰Tua ahikom, amate tungah, “Topa in hong paupui a,

²¹no Israeslte tungah hi kam vaithak son tu in hong sawl hi: No in Biakinnpi ii vaang na kiphatsak pui uh hi. Pha sa in a en tu na pai uh hi.



Ahizong, Topa in Biakinn sia ninsak tu hi. Tuaciang Jerusalem ah na nusiak na innkuanpui khangmoite ngal sungah kithat tu hi.

²²Tuasia ciang keima ngamtat bangma in na ngamta tu uh hi. Na maitang uh na seal buatu uh a, a khuangaite anneakte na ne buatu uh hi.

²³Lukhu khu ngawl, peangdap thua ngawlin om heak vun a, mau ngawl, kap ngawlin om vun. Na mawna uh hu in na kiamcip tu uh a, na tau hon tu uh hi.

²⁴Tuasia ciang kei sia no ii lim khat kong hi tu a, keima ngamtat babangin na ngamta tu uh hi. Topa in hite hong pian ciangin no in ama sia Vaanglianpipa Topa ahi na he tu uh hi,” ka ci hi.

²⁵Topa in, “Tu in a thi thei mihing awng, amate sung panin a kisak thei pui, a lungpilna ahi, a etnop le a haw nop a kho Biakinnpi sia, ka lakeak tu hi. A tapate le a tanute ka laaksak tu hi.

²⁶Hi bangin ka vawt ni in, lalna sung pan a suakta khat po in, thupiangte nang tungah hong ko tu hi.

²⁷Tua ni in na taan sa kampau theina sia na nga kik tu a, ama taw na kipaupui tu uh hi. Hi bangin nang sia mihingte ii lim na hi tu a, amate in kei sia Topaka hi hong tel tu uh hi,” ci hi.

Ezekiel 25

Ammon ngam langpan a Kamsaanna

¹Topa in kei hong paupui a,

²ama in “A thi thei mihing awng, Ammon ngam langin, sonsia in.

³Keima, Vaanglianpipa Topa ii citeng hong ngai taken: Ka Biakinnpi minpaan a na mu tu Israel ngam a laltham a na mu tu le Judah mite sal in a pai na mu tu na lung uh dam hi.

⁴Tuabangin na lung uh dam ahikom, nisuana senneal ngamsang pan minamte in nang kong zothalsak tu hi. Amate in na ngam sungah ngiaphual hong saat tu a, tua munah teang tu uh hi. Noma neak tu thingngate ne in noaituite dawn tu uh hi.



⁵Rabbah khuapi sia kalaoh khoaina mun ka suaksak tu a, Ammon ngam bup sia tuu khoaina mun ka suaksak tu hi, tuasia ciang Keima, Topa ka hi sia nong he tu uh hi.

⁶“Hi sia Vaanglianpipa Topa ii ci ahi hi: Na khut beangin, lungdam in na kilawn uh hi. Israel ngam na zawngsak uh hi.

⁷Tuabang na hi hu in ngamdangte tungah kong aap tu a, amate in hong suamin hong phuul tu uh hi. Kong sutham zan tu a, ngam khat in na ding kik zo nawn buatu a, noma ngam na ci tu uh a om nawn buatu hi. Tuasia ciang Keima, Topa ka hi nong he tu uh hi.”

Moab ngam langpan a Kamsaanna

⁸Vaanglianpipa Topa in “Moab in Judah sia ngamdangte theampo taw kibang hi a ci hu in,

⁹Moab ii ngamngi a cing khuapite ngual in ka simsak tu a, khuapi phabel ahi— Beth Jeshimoth, Baal Meon, le Kiriathaim te ngangawn kihel tu uh hi.

¹⁰Nisuana senneal ngam sang minamte in Moab le Ammon te ka zothalsak tu hi, tuasia ciang Moab sia ngam khatin ding zo nawn ngawl tu hi.

¹¹Moab ngim ka pia tu a, amate in Keima, Topa ka hi sia hong he tu uh hi,” ci hi.

Edom ngam langpan a Kamsaanna

¹²Vaanglianpipa Topa in, “Edom mite in Judah tungah tatkha phu lamna vawt a, tua phulamna in Edom tungah tawntung mawna then hi.

¹³Tu in ka taangko na ah Edom daan ka pia tu a, tua munah mihing le nganhingte theampo ka that tu hi. Teman khuapi pan Dedan khuapi dong lei awng thong ka suaksak tu a, a mite ngal sungah kithatlum siat tu uh hi.

¹⁴Israel ka mite in kei taangin Edom tungah phu lam tu a, tuaciang Edom in ka thin uuk ka thin sona hong phawk tu uh hi. Kei ii phu lamna a thuakte sia bangbangziam ci sia Edom in tel tu hi,” Vaanglianpipa Topa in son zo hi.

Philistia ngam langpan a Kamsaanna



¹⁵Vaanglianpipa Topa in, “Philistine te in a tawntung a ngal ahite tungah tatsia takin phu la in ngaimawkna taw laltham sak uh hi.

¹⁶Tua ahikom Philistine ka sim tu a ka maaimot siat tu hi. Philistine zaangtam ah a nungta a kikhe theampo ka lalcipsak tu hi.

¹⁷Amate nasia takin daan ka pia tu a, phu lamna a cingin ka vawt tu hi. Amate in ka thin uukna phawk tu uh hi. Tuasia ciang Keima, Topa ka hi sia he tu uh hi,” ci hi.

Ezekiel 26

Tyre langpan a Kamsaanna

¹Sal ka tan zawk a kum sawm le kum khat kum, a ni khat ni in Topa in kei hong paupui hi.

²Ama in: “A thi thei mihing awng, Tyre khua ah a teang mite ii a lungdam au ngawpna thu in hi sia hi. Jerusalem kisaat tham zo hi! A sum vawt thahatna teng bo zo hi! Ama in ei lang hong pang zo nawn ngawl tu hi! ci in amate au uh hi.

³“Tua ahile tu in hi sia in, Kei Vaanglianpipa Topa ii ka pauna ahi hi! Tyre khuapi awng, keima in na ngal ka hi hi. Nang hong sim tu minam tam mama kong kuansak tu a, tuaciangin amate tuihual bangin a dawl a dawlin hong pai tu uh hi.

⁴Amate in, na khuapi kulh phungte siasak tu uh a, na tusaangte cimhthamsak tu uh hi. Tua zawkciang a leivui teng ka phiatkeak tu a, suangtum bek ka nusia tu hi.

⁵Tua tuipi sungah suangpi sia kilawt to tu a, ngasa paaite in a ngen uh a tungah pho tu uh hi. Kei VaanglianpipaTopa in son zo khi hi. Minamte in Tyre khuapi phul tu uh hi.

⁶Tuaciang amate in a namsau uh taw a ngamsung a om khuapi sungah a teang mite thatlum tu uh hi. Tuasia ciang Tyre in Topa ka hi sia hong he tu hi,” ci hi.



⁷Vaanglianpipa Topa in, “Kumpi theampo sung pan a lianbel Babylonia kumpipa Nebuchadnezzar sia Tyre khua sim tu in kong kuansak tu hi. Ama insaksang panin ngalkap honpi khat siphu le ngalleang taw siphu ngalkapte taw hong kuan tu hi.

⁸Ngam sungah a om khuapi sungah a teangte ngal kidona sungah kithatlum tu uh hi. Ngalte in dum to in, phungciang in, kidal natu kulhte, nang hong do hong nan natu in vawt tu uh hi.

⁹Amate in na kidalna kulhte sia sukthapna thingluang taw suu in na ngal vilna tusaangte thikte taw saat tham tu uh hi.

¹⁰A siphute ii peang pan a leang leivui khu in, nang hong khunelh tu uh hi. Siphute ii kai leangte le ngalleangte ii awnging in a lal sa khuapi ii kongpite a kantan ciang, note luphung liingsak tu uh hi.

¹¹Amate siphu ngalkapte in, a namsau uh taw na mite that tu uh hi. Na khuam lianpite lei ah puksak tu uh hi.

¹²Na ngalte in na hauna uh le na sumbuk zuak uhte la tu uh hi. Na luphung uhte sutham in, na inn nuam uhte hong saat thapsak tu uh hi. Amate in a suangtumte, a thingte le a suangpimte la tu uh a, tuipi sungah sung tu uh hi.

¹³Na lasak uhte ka tawlngasak tu uh a, na tengtong la awte ka thimsak tu hi.

¹⁴Ngasa paaite ii ngen a pho thei natu in, suangtum pui bek kong nusiat tu hi. Khuapi sia kisa kik ngei nawn ngawl tu hi. Kei Vaanglianpipa Topa in son zo khi hi,” ci hi.

¹⁵Vaanglianpipa Topa in Tyre tungah, hi bang teng cinop nei hi. “No hong ki zawthal ciang, vaalbo ah a teang mihingte in, hong ki motcip ngawp lai a na ciik au na aw, uh a zaak uh ciangin, lau vadil tu uh hi.

¹⁶Tuipi sungah a vak a cia minamte ii kumpite theampo in amate Kumpi Tokhum panin tuak tu uh hi. Amate in a puantual te uh le, a kizepna puante suutin, liing vadil in lei ah to tu uh hi. Noma ii thuakte hu in, amate thim thei ngawlin liing tu uh hi.



¹⁷Amate in, hi mithi vui la sia nang hong sak tu uh hi: Khuapi minthang sia kilalcipsak zo hi! A teambawte tuipi panin bocip zo hi. Hi khuapi ah a teang mite in tuipte uk hi. Tuaciang vaalbo ah a teang mite lausak siat hi.

¹⁸Tu in ama ii bo ni in, Tuikulhte liing a, Tuaciang a mihingte in tuabang lalcip na a mu uh ciangin ingh uh hi.”

¹⁹Vaanglianpipa Topa in: “Nang sia kuama ten ngawlna khuapi lalcip sa te bang kong suaksak tu hi. Tuipi tuithuk in nang kong khumsak tu hi.

²⁰Mithite teenna khua taanghlai a, a nungta mihingte kungah kong puak tu hi. Tua leinuai ngam, tawntung siatna munah mithite taw omkhawm tu in, kong koi tu hi. Tua hu in a nungtate ngamah a om kik tu in, na sungah kuama hong teang kik ngei nawn ngawl tu hi.

²¹A lauhuai mama ettee tu kong suaksak tu a, tua in na bocip natu hi tu hi. Mihingte in nang hong zong tu a, ahihang hong mu zo nawn ngawl tu uh hi,” Vaanglianpipa Topain son zo hi.

Ezekiel 27

Tyre Atu Mithi Vuina La

¹Topa in kei tungah:

²“A thi thei mihing awng, Tyre khua atu in mithi vuina la khat sa in.

³Tua Tyre khua tuipi hui a kiphut tuipihui dung theampo ah a teang mihingte taw sum a vawt khuapi tungah VaanglianpipaTopa ii ci teng son in. “Tyre awng, a kicing na phatna suangtaak ni hi.

⁴Na inn sia tuipi hi. Nang hong sate in teambaw pha khat bangin hong sa hi.

⁵Amate in Hermon Mual panin, innthing tu in, mangtaak thingte zangh hi. Na teambaw dial khuam tu in, Lebanon panin Cedar thing la uh hi.

⁶Amate in Bashan panin ngunkuang hawna tu in, limthingte la uh hi. Na teambaw suat sia Cyprus pan a laak taakthing taw vawt a, tuaciang saiha taw zeam uh hi.



⁷Na teambaw puankhak uh sia puankaang neal puan taw kivawt hi. Egypt pan a kizeam saiha dial puan zial a khuala na panin ol takin kitel thei hi. Na puanbuk sia puan phabel taw kivawt a, Cyprus tuikulh pan puan sannumte ahi hi.

⁸Na ngunkuang hotte sia Sidon le Arvad khuapite pan ahi uh hi. Na teambaw naseamte sia noma mihing a thiambelte ahi uh hi.

⁹Teambaw sung lettamate sia Babylon pan a pha tak a thiam sate veu ahi uh hi. Tuipi sung a pai teambaw theampo ii teambaw naseamte sia, na sumbuk sungah sum lei sum zuak naseamte veu ahi hi.

¹⁰“Persia, Lydia le Libya pan ngalkapte in na ngalkap sung ah na hong seam uh hi. Amate in a lum uh le a thik lukhute uh sia na ngalkap inn sungah khai uh hi. Amate sia na minthanna tu in a dingte ahi uh hi.

¹¹Arvad khuapi pan ngalkapte in na luphungte hong cinsak a, Gamad pan a te in na ngalvilna tusaangte hong cinsak hi. Amate in a lum uh te na luphung tungah khai uh hi. Amate in nang hong et hoi sakte ahi uh hi.

¹²Spain ngamah sum na vawt a, ngun, thik, thikkaang le hakte la in, vanh tam mamate thena in na nei hi.

¹³Greece, Tubal le Meschah ah sum na vawt a, salte le taungo vanhte leina in na nei hi.

¹⁴Siphu, ngal siphu le laate lei natu in na vanhte Beth Togarmah panin na zuak hi.

¹⁵Rhodes mite in nang taw sum vawt hi. Tuipi hui a a teang mihing tam mamate in saiha le thingvomte taw hong theak uh hi.

¹⁶Syria mite in na vawt nate le na vawt sa vanhte hong lei uh hi. Amate in suang eng, puan sannum, paakzep puan, puanneal kaang, kep le suangsante sia vanhte leina in hong zangh hi.

¹⁷Judah le Israel mite in vanhte hong leina in, zungtaang, khuaitui, olive thau le hel namtuite hong pia hi.



18-19 Damascus mite in na vanh uhte hong lei a, Helbon pan zu le Sahar pan tuumulte a manh tu in hong pia hi. Amate in thik le hel namtuite taw na sumbuk vanhte hong lei uh hi.

20 Dedan mihingte zongh in, na vanhte sia siphu nungdap samul puanvan hamte taw hong theak uh hi.

21 Arabiate le Kedar ngamukte in, na vanhte uh sia tuuno, tuu le kealte taw hong theak uh hi.

22 Sheba le Raamah pan sumvawtte in, na vanhte uh sia suangmanpha, kham le hel namtuite phabelte taw hong theak uh hi.

23 Haran khuapite ahi Canneh le Eden, Sheba sumvawtte, Asshur le Chiland khuapite theampo in nang taw sumzuak sumlei hong seam uh hi.

24 Amate in puan manhamte, puan sannumte, paak taw a kizeam puante le dappha puan a pawl im-iamte le pha tak a kihual khaupheakte le khausante hong zuak uh hi.

25 Na vanhte sia vanh puakna teambawte taw kipua hi. Nang sia tuipi sungah a pai, vanh ngit a kiheang teambaw taw na kibang hi.

26 Na ngunkuang hotte in tuipi sang hong paipui ciang, nisuana sang vuipei in lei taw ki khuala na ah hong lalsak hi.

27 Sumbuk vanh na neite theampo, na teambaw naseamte theampo, na teambaw lettamate le sumvawtte, teambaw tungah ngalkapte theampo sia—tuipi sungah na teambaw a kisiat ciangin, bo siat mang siat hi.

28 Tuitaa teambaw naseamte ii auna aw sia vaalbo tungah hawl hi.

29 “Teambaw theampo tu in kinusia hi. tuaciang teambaw naseam theampote, vaalbo tungah kaato hi.

30 Amate in nasia takin, nang atu in mau uh hi. a lutung ah leivui kithe in, vuttun sungah kilumliik uh hi.

31 Nang hu in, amate a lu uh meettol a, khau-ip puante silh uh hi. Amate kapin a thin na sa mama uh hi.

³²Amate in nang atu mithi vuina la khat hong sak hi: “Tyre taw a kua tee ngat thei tu hi ziam?, Tuipi sungah tu in a thimcip Tyre awng.

³³Tuipi ngal ah na sumbuk vanhte a pai ciang, nang in minam theampo ii kisapnate na kicingsak hi. Na sumbuk vanh taw kumpipate a hau ki suaksak hi.

³⁴Tu in nang tuipi sungah lalcip zo ni hi. Tuipi liante ii taw a thukna ah a taak hi zo ni hi. Na vanhte le nang atu na a seam theampo nang taw tuipi sungah mantalak in mang zo nu hi.

³⁵“Vaalbo ah a teang theampote in, na thuaknate hu in, liinglawng uh hi. A kumpipate ngangawn lau in a maitang uh ah, launa lim kilak hi.

³⁶Nang sia a tawntung bo in, mangthang zo ni hi. Tuaciang leitung theampo ah sumvawtte patau siat a, nang thuaknate bang a thuak thaak tu lau uh hi.

Ezekiel 28

Tyre Kumpipa langpan a Kamsaanna

¹Topa in kei hong paupui a, Ama in:

²“A thi thei mihing awng, Tyre khua ukpa tungah, Keima, Vaanglianpipa Topa ii ka ci teng son in: Ki phatsakna taw kidim in, pathian khat ka hi na ci hi. Tuipi ii kiim uum kumpi tokhum tungah, pathian khat bangin ka to hi, ci ni hi. Nang sia pathian khat bangin, kiheang hi kale te, tuabang hi ngawl ni hi, thi thei ni hi, pathian pianzia nei ngawl ni hi.

³Nangma sia Daniel sangin ciim zaw kisa ni hi, tuaciang nang tungah a kiseal thuku om thei ngawl tu in na um hi.

⁴Na ciimna le na thiamnate in kham le ngunte taw hong hausak hi.

⁵Nangma in sumvawt thiamnate taw meetna na vavawt hi. Na haunate hu in, nang bangza in kiphasak ni ziam!

⁶“Tua ahiciang tu in hi sia sia, Keima, Vaanglianpipa Topa ii ka ci ahi hi, pathian khat bangin ciim kisa na hikom,



⁷cizat a nei ngawl ngalte kong paisak tu a, kong simsak tu hi. Na ciimna le na thiamna taw na kholsa na pha theampo amate in susia tu uh hi.

⁸Amate in nang hong thatlum in, tui sung than ah hong puak uh hi.

⁹Amate in nang thatlum tu in hong kuan ciangin pathian khat ka hi na ci lai tu ziam? Hong thatlum tute na maingat ciang, nang sia a thi thei na hi tu a, pathian zia bang na hi ba het tu hi.

¹⁰Pathian he ngawl ngamdang mite khut sa taw ui thi in na thi tu hi. Keima, Vaanglianpipa Topa in thupia zo khi hi,” hong ci hi.

Tyre Kumpipa Zatakna

¹¹Topa in kei hong paupui kik hi. Ama in:

¹²“A thi thei mihing awng, Tyre kumpipa tungah a tung tu thuaknate atu in, khuangai in. Ama munah Keima, Vaanglianpipa Topa ii ci teng son in: khat vei lai in nang sia kicingin ettee huai pa na hi hi. Bangza in ciim in et hoi ni ziam?

¹³Pathian huansung Eden ah na teang a, suang manpha namcin taw na kizeam hi. Rubies, diamonds, Topaz, beryl, carnelian, jasper; sapphires, emeralds, le garnets suangte taw na kizeam hi. Nang in kham taw na kizeam hi. Nang hong kibitphua lai in tuate sia nangma atu in a kivawt ahi hi.

¹⁴Tua munah nang hong cing tu in, a kiitak huai vantung lalang khat ka koi hi. Ka mual thiangtho tungah na teang a, suangmanpha tee wakil te kawm ah na vak hi.

¹⁵Na ngamtatna sia nang hong bitphua hun pan kipan, a sia vawt tu na kipat dong paubanna na nei bua hi.

¹⁶Nang in sumlei sumzuakna taw na komla a, hite in ngoltolna le mawna sung hong then hi. Tua ahikom ka mual thiangtho kong nusia sak a, vantung lalang nang hong cing pa in, suangmanpha tee vasiak kawm pan nang hong bengkeak hi.



¹⁷Na mealphat hu in, na kiphasak a, tuaciang na minthanna in, a mawmaw khat bangin hong ngamtasak hi. Hisia hu in nang sia lei denna in kong nei a, kumpi dangte kidop natu in kong nusia hi.

¹⁸Sumzuak sumleina ah a sia na vawt a, na biakpiakna mun sia na lalsak hi. Tua ahikom tua khuapi sia a kaangtum tu in ka hal hi. Nang hong ente theampo in, tu in vut le vai na sua hong mu uh hi.

¹⁹Nang sia a tawntung bo in mangthang zo ni hi. Tuaciang nang hong he ngei minamte theampo sia patau siat a, nang thuakte bang a thuk tu lau uh hi,” ci hi.

Sidon langpan a Kamsaanna

²⁰Topa in kei tungah,

²¹“A thi thei mihing awng, Sidon khuapi sia sonsia in lang in.

²²Amate tungah, Keima, Vaanglianpipa Topa ii citeng sonin. Keima in na ngal ka hi hi. Sidon awng, nang tungah kong vawtte hu in, mihingte in kei hong pok tu uh hi. Na sungah a teangte daan pia a, kei bangza in thiangtho ka hi sia, ka lak ciang, amate in Keima, Topa ka hi hunlam hong he tu uh hi.

²³Nang tungah natnate kong tungsak tu a, na lampi liante ah chi ka luangsak tu hi. Mun theampo panin, nang hong kisim tu a, na mihingte kithatlum tu uh hi. Tuasia ciang Keima, Topa ka hi hunlam nong he tu uh hi,” hong ci hi.

Israel Thupha Kipia tu

²⁴“Israeslte nunau a, a zawngsak kiim le paam ah ngamte kuama in, ling bangin Israel te a liamsak nawn buatu hi. Tuaciang amate in kei sia Vaanglianpipa Topa ka hi hunlam hong he tu uh hi,” Topa in ci hi.

²⁵Vaanglianpipa Topa in, “Israel mite ka thethaang na ngamte panin, ka siapui kik tu a, tuaciang minam theampote in Keima sia, a thiangtho ka hi hunlam hong he tu uh hi. Ka naseampa Jacob tungah ka piak amate ngam ah Israel mite teang tu uh hi.

²⁶Tua munah amate sia ngal muangin teang tu uh hi. Amate in inn sa in sapit huan vawt tu uh hi. Amate a zawngsak vawt a ngampaamte theampo sia daan



ka pia tu a, Israel te sia ngam muangin om tu uh hi. Tuasia ciang amate in, Kei sia a Topa, a Pathian ka hi hong he tu uh hi,” ci hi.

Ezekiel 29

Egypt ngam langpan a Kamsaanna

¹Sal ka tan zawk uh kum sawm kum, tha sawm le ni sawm le ni nii, ni inTopa in kei hong paupui hi.

²Ama in, “A thi thei mihing awng, Egypt Kumpipa sonsia in. Ama le Egypt ngam leitangh theampo ngim ka pia tu hi.

³Hi thu Vaanglianpipa Topa ii Egypt kumpipa tungah a ci ahi hi. Kei sia nangma ngal ka hi hi, ngun sung a om awle pui awng, Nile ngun zongh nangma vawt sa hi a, nangma neisa hi na ci hi.

⁴Na kha ngu paillet in, thikkoai taw kong sun tu a, na ngun sungah a om ngasate nangma tungah kong belsak tu hi. Tua zawkciang na tungah a bel ngasa theampo taw Nile ngunsung pan kong kaito keak tu hi.

⁵Senneal ngam sungah ngasa theampo taw kong vawk tu hi. Na luang sia lei ah kisial tu a, kiphum ngawlin kinusia tu hi. Nganhingte le vacimte an tu in na luang ka pia tu hi.

⁶Tuasia ciang Egypt mite theampo in, Topa ka hi hunlam hong he tu uh hi. Topa in ci hi, "Israel te in no Egypt mite suangin nungta hi; ahihang note in a tak ngawl ciangkang khat sangin phat zawkna nei ngawl nu hi.

⁷Amate in nang hong neal ciang na taltan tu a, a leenuai sunlet in, a ciang na ki thiaksak hi”.

⁸Tu in, Kei, Vaanglianpipa Topa in kong son a, namsau taw no kong simsak tu a, na mite le na nganhingte hong thalupsak tu hi.

⁹Egypt ngam sia a kinusia ngamthim suak tu hi. Tuasia ciang, Topa ka hi hunlam nong he tu uh hi. “Nile ngun sia nangma vawt sa nangma neisa ci na hikom in,



¹⁰Keima in nang le Nile ii ngalpa ka hi hi. Egypt ngam theampo saksang Migdol khuapi pan kipan thangsang Aswan khuapi, Ethiopia ngamngi dongin, ngamkhing ka suaksak tu hi.

¹¹Mihing ahizong, nganhing ahizong, tua ngam sungah pai in, kantan nawn ngawl tu hi. Banghangziam cile, kum sawmli sung tua ngamah kuama teang ngawl tu hi.

¹²Egypt ngam sia a kinusia cip, leitung bup a ngamkhing belin ka vawt tu hi. Banghangziam cile kum sawmli sung Egypt ngam khuapite sia khuapi dang theampo sangin a lalcip zaw suak tu hi. Egypt mite ngaltaite ka suaksak tu a, minamdang ngam theampo ah tai in peamta in teang tu uh hi.

¹³Vaanglianpipa Topa in ci hi, "Kum sawmli zawkciang Egypt mite ka thethaang na ngamte panin ka kaikhawm kik tu a,

¹⁴Egypt ngam thang sang amate ten cilna munah, ka teangsak tu hi. Tua munah ngam zawngkhal khat hi tu a,

¹⁵Kumpi ngam theampo sung pan a ngina ngawl bel suak tu a, ngamdangte kuama uk kik zo nawn ngawl tu uh hi. Ngam zawngkhal mama in vawt tu ka hikom minam dang ngam khat zongh amate dei bangin zeak zo ngawl tu uh hi.

¹⁶Israel in Egypt sia suan le muan in nei nawn ngawl tu hi. Egypt ii thuakna te in amate a suan sia khial ahi hunlam, Israel phawksak tu hi. Tuasia ciang Israel in Keima, Vaanglianpipa Topa ka hi hunlam hong phawk tu uh hi”.

Nebuchadnezzar Kumpipa in Egypt ngam Zo tu

¹⁷Sal ih tan zawk kum kul le kum sali kum, tha masa bel, ni khat ni inTopa in kei hong paupui hi.

¹⁸Ama in: “A thi thei mihing awng, Babylonia kumpipa Nebuchadnezzar in Tyre khua sim hi. A ngalkapte vanh ngit leilam a puaksak hu in, a sam uh zukin a lutol a, a liangkote kokkeak hi. Ahihang tua ngimna thaman a kumpipa le a ngalkapte in bangma leaplaw a nei bua uh hi.



¹⁹Tua ahikom tu in Keima, Vaanglianpipa Topa in ci khi hi: Egypt ngam leitangh Nebuchadnezzar pia khi hi. Ama in Egypt te neisa hauna theampo suddol in laaksak tu a, a ngalkapte thasum in tiapui tu hi.

²⁰Egypt ngam sia ama sepna thaman in ka pia hi; banghangziam cile, a ngalkapte in kei atu naseam ahihang hi. Keima, Vaanglianpipa Topa in son zo khi hi.

²¹“Tua thu hong tun ciang Israel mite ka thahatsak tu a, Ezekiel awng, mihing theampo ii zaak thei natu mun panin, thu kong sonsak tu a, tuasia ciang keima sia Topa ka hi hunlam hong he tu uh hi,” hong ci hi.

Ezekiel 30

Topa in Egypt Daan pia tu

¹Topa in keima hong paupui kik hi.

²Ama in, “A thi thei mihing awng, kamsang in a, Keima Vaanglianpipa Topa ii son teng thangsak in. Hi kammalte au in son in. A lauhuai ni hong tung tu hi!

³A ni hong nai zo hi, Topa ii a dian tu ni hong nai zo hi. Minamte atu in meeikaai ni le ngimna ni hi.

⁴Egypt ngamah ngal tung tu a, Ethiopia ngamah ngim thuakna lianpi om tu hi. Egypt mite tam mama kithatlum tu hi. A neisa theampo kisuddol in, a ngamsia a lal in kinusia tu hi.

⁵“Tua ngal in, Ethiopia, Libya, Lydia, Arabia, Kub ngamte pan a a kicial ngalkapte zongh that tu a, ka minamte ngangawn that tu hi.

⁶Topa in ci hi, “Saksang Migodol khua pan, thangsang Aswan khua dong Egypt ngam a hute theampo ngal sungah kithatlum tu hi. A kiphasak Egypt ngalkapte kilalcipsak tu hi, Keima Vaanglianpipa Topa in son zo khi hi.

⁷A ngam sia leitung ngam theampo ah a ngamkhing bel suak tu a, a khuapite theampo a lalcip sa in kinusia tu hi.



- ⁸Egypt ngam mei taw ka hal tu a, ngam huute theampo a ki thalup ciang, amate in Keima sia Topa ka hi hunlam hong he tu uh hi.
- ⁹“Tuabangin Egypt ngam a siat hun hong tun ciangin, bangma khua phawk ngawlin a om Ethiopiate kungah kamtaite teambaw taw ka paisak tu a, amate sia liinglawng in, lau mama tu uh hi, tua ni hong theng tu hi”.
- ¹⁰Vaanglianpipa Topa in: “Babylonia kumpipa Nebuchadnezzar zangh in Egyptte hauna theampo ka susiacip tu hi.
- ¹¹Ama le a kiitak huai a ngalkapte, ngam susia tu in, ngamsung theampo ah hong pai tu hi. Namsau taw Egypt sim tu a, ngamsung theampo mithi luang taw kidim tu hi.
- ¹²Nile nguntui ka kangsak tu a, mi ngilote khut sungah Egypt ka then tu hi. Ngamdang mite in a ngamsung theampo nusia tu hi. keima VaanglianpipaTopa in ka son zo hi,” ci hi.
- ¹³Vaanglianpipa Topa in, “Memphia ah a om milimte le pathian maan ngawl te ka sucip tu hi. Egypt ngam a uk tu kuama a om nawn buatu a, mihing theampo ka lausak vadil tu hi.
- ¹⁴Egypt ngam thangsang teng ngamkhing ka suaksak tu a,saksang Zoan khuapi mei taw ka hal tu hi. Thebes khuapi daan ka pia tu hi.
- ¹⁵Egypt ngam sung kulh khuapi, lian Pelusim khuapi sia ka thin uukna ka thuaksak tu a, Thebes ii nei le lamh theampo ka sucip tu hi.
- ¹⁶Egypt ngam mei taw ka hal tu a, tuaciang Pelusium sia daan nasia takin thuak tu hi. Thebes khuapi uumna pangte kibaltham tu a, namthuam in tua khuapi a khumcip tu hi.
- ¹⁷Heliopolis le Bubastis khuapi tangvalte ngal sungah thi tu a, a dang teng sal in kikai siat tu hi.
- ¹⁸Egypt ii kiphatsakpui vaangletna le thahatna ka sucipsak ciang, Tahpanhes khuapi khuazing tu hi. Meeikaai in Egypt ngam tuam tu a, tuasia ciang a khuapi sungah mihing theampo kiman in thongtaak siat tu hi.



¹⁹Egypt ngam hi bangin daan ka piak ciang, amate in Topa ka hi hunlam hong he tu uh hi.

Egypt Kumpipa Vaangletna Siatham

²⁰Sal a ih om zawk kum sawm le kum khat kum tha masa bel ni sali ni inTopa in kei hong paupui hi.

²¹Ama in, “A thi thei mihing awng, Egypt ngam kumpipa khut ka thiaktan zo hi. A khut dam kik in, namsau a toai kik zawk natu, kuama in a khut puan taw tunsak ngawl, puan taw in kuasak ngawl hi.

²²Tua ahi ciang hi sia Keima, Vaanglianpipa Topa ii ci ahi hi: Egypt kumpipa ngal ka hi hi. A khutte ngeal a dam lai sia le, a kital sa sia ka thiatansak tu a, a khut sung pan namsau taak tu hi.

²³Egyptte leitung ngam theampo ah ka thethaang tu hi.

²⁴Tua zawkciang Babylonia kumpipa ii khut thahatsak in, ka namsau a khut sungah ka pia tu hi. Ahihang Egypt kumpipa khut ka thiaktan tu a, a ngalte mai ah tau in a thi tu hi.

²⁵Hi hi, ama a tha ka kiamsak tu a, Babylonia kumpipa ka thahatsak tu hi. Ka namsau ka piak ciang, ama in Egypt ngamsang ngat tu a, ta ciang mihing theampo in Topa ka hi hunlam a he tu uh hi.

²⁶Egyptte leitung theampo ah ka thethaang tu hi. Tuasia hun ciang, Topa ka hi hunlam amate in hong he tu uh hi,” ci hi.

Ezekiel 31

Egypt ngam le Cedar Thingkung Tee ngat

¹Sal ih tan zawk kum sawm le kum khat kum, tha thum zawk ni masa bel ni in Topa in keima hong paupui hi.

²Ama in, “A thi thei mihing awng, Egypt kumpipa tung le a mite theampo tungah hi bangin son in: Bangza in thahat ni ziam! Bang taw hong tee ngat thei tu khi ziam?”



³Lebanon ngam a cedar thingkung taw kibang ni hi. Tua thingkung ii baakte hoi a, a tee taw kidim in, Van ah meei ban dongin saang to hi.

⁴A khangtosak tu tui om a, leinuai ngunte in tui pia hi. A pona po ah tui kibuak a, thing pona theampo ah luite luang hi.

⁵Tui kham ahikom, thingkung dangte sangin saang zaw hi. A baakte boai in zau hi.

⁶Vacim namcin in a baakte tungah bu vawt uh hi; A lim nuai ah ngamsate in no nei uh hi; Leitung minam theampo in ama lim bealhin tawlna uh hi.

⁷Bangza ta in tua thingkung etlawm ziam? A kung saangin a baakte zau hi. A zungte in a thukna a, a luang tuite bansuk hi.

⁸Pathian huan sungah a om cedar thingkung taw kitee ngat thei ngawl hi. Ama bangin baak a nei taakthing khat zongh om ngawl hi. Ama bang baak pha nei in Pathian huan sungah a tee meang pha om ngawl hi.

⁹A et hoi tu in keima in a baakte ka zaamsak hi. Pathian ii huan Eden ah om thingkungte theampo in du ngawk uh hi.

¹⁰“Tu in kei, Vaanglianpipa Topa in van ah meei a bat dongin a saang, thingkung tungah bang piang tu ziam kong son tu hi. Saangto vaial in khangto a, kiphasak vaial hi;

¹¹tua ahikom, ama nialin, ngamdang kumpi khatin ka tangsak hi. Ama ngitlona taw kizui in ama tungah kivawt tu hi.

¹²Cizatna a nei ngawl ngamdang mite in phuk in nusia tu hi. A baakte le a zik taltante, ngamsung mual theampo le kuam theampo ah taak tu hi. A lim nuai a beal ngei minam theampote in nusia tu uh hi.

¹³Vacimte tua a puk sa thingkung tungah hong tu tu a, ngamsate in a baakte tot nelh tu uh hi.

¹⁴Tua ahikom, tu pan kipan bangza po in tui kham hi kale thingkung khat zongh, a saang mama in khangto in van ah meei banin dokto nawn ngawl tu



hi. A thi thei mihing bangin lal in thi siat tu a, mithi khua ah a thi sate nung zui tu uh hi,” hong ci hi.

¹⁵Hi sia in Vaanglianpipa Topa ci ahi hi: “Mithite khua ah tua thingkung a zot ciangin, lei nuai tuite in heena lim lakna in ka tuamsak tu hi, Ngunte le luinote ka luangsak nawn buatu hi. Thingkung thi zo ahikom Lebanon mualte tungah khua ka zingsak tu a, tua sungah a po thingkungte theampo ka vulsak tu hi.

¹⁶Mithi khua ah tua thingkung ka puksuksak ciang tua aw in minam theampo liingsak tu hi. Eden huan thingkung theampo le deiteal, tui buak mithi khua a theng sa Lebanon thingkung theampo a lungdam tu uh hi.

¹⁷Mithite khua a thi sate kungah ama taw pai khawm tu uh hi. Tuaciang ama ii lim nuai a bealte theampo ngam theampo ah ki thethaang tu hi.

¹⁸“Tua thingkung sia Egypt kumpipa le a ngam mite theampo ahi hi. Eden huansung thingkung ngangawn amate bangin saangin etlawm ngawl hi, ahihang tu in Eden huan thingkungte bangma in, mithi khua ah paisuk tu a, ngalsung a thite le Pathian he ngawlte nung a zui tu uh hi. Keima, in ka pau zo hi,” Vaanglianpipa Topa in ci hi.

Ezekiel 32

Egypt Kumpipa Awle khat taw Tee ngat

¹Ih sal tan zawk kum sawm le kum nii kum, tha sawm le tha nii, ni masa bel ni in, Topa in kei hong paupui hi.

²Ama in, “A thi thei mihing awng, Egypt kumpipa tungah hi bangin a ciliap huai kidop natu thupia in. Keima thupiak hi bangin son in: Minamdang theampo sungah tawpi khat bangin na kingaisun a, ahizong nang sia ngun sungah a kilok awle khat taw na kibang zaw hi. Na peangte taw tui na nusak ngawp a, ngunte na ninsak hi.

³Minam theampo hong kikhop uh ciang, ka ngen taw kong paai tu a, tua ngen sia amate in vaalbo ah ka kaisak tu hi.



⁴Lei ah nang kong vawk tu a, vacimte le nganhingte theampo na sa ne tu in ka kaikhawm tu hi.

⁵Mualte le zaangkuamte a muat sa na luang taw ka dimsak tu hi.

⁶Mualte a kizel dong le luamte a dim dongin na chisan ka luangsak tu hi.

⁷Nang kong sukcip ciang, van kilangh ngawlin ka seal tu a, aksi theampo ka mitsak tu hi. Ni sia meei in ka liasak tu a, tha sia taang nawn ngawl tu hi.

⁸Van ah khuavak taang theampo ka sumit tu a, na ngam sia ka zingcipsak tu hi. Keima, Vaanglianpipa Topa in ka son zo hi.

⁹“Na zaak ngei ngawl ngamte tungtawn in, na lalcip na thu ka thansak ciang, minam tam mamate a thin ngim tu uh hi.

¹⁰Nang tung kong vawtnate hu in minam tam mamate liinglawng tu uh hi. Ka namsau ka vik ciang kumpite lau in, patau tu uh hi. Na lal na puk ni ciang mite theampo a nuntak natu patau in liing tu uh hi,” ci hi.

¹¹Vaanglianpipa Topa in Egypt kumpipa tungah, “Babylonia kumpipa namsau ngal na thuk tu hi.

¹²A tatsia ngam pan ngalkapte in a namsaute uh taw na mite theampo ka thatsak tu hi. Na minam theampo le na kiphatsak pui nate theampo ka lalcipsak tu hi.

¹³Tui omna po ah a taa na ngante kong ngawlupsak tu hi. Tui a nusak kik tu mihing le nganhingte om nawn ngawl tu hi.

¹⁴Na ngunte le tuite ciim sitset in ka luangsak tu hi. Keima, Vaanglianpipa Topa in pau zo khi hi.

¹⁵Egypt ngam sia ngamthim suakin, a sungah a teang theampo ka lal siatsak ciang Keima, Topa ka hi hunlam amate in hong he tu uh hi.

¹⁶Hi a ciliap huai kidop natu ka thu piak sia mithi vuina la suak tu hi. Ngam theampo pan numeite in tua la sia Egypt le a mite theampo tungah khuangaina lak natu in, sa tu uh hi. Keima, Vaanglianpipa Topa in pau zo khi hi,” ci hi.



Mithite Khua

¹⁷Sal ih tan zawk kum sawm le kum ni kum tha masa bel ni sawm le ni nga ni in Topa in kei hong paupui hi.

¹⁸Ama in, “A thi thei mihing awng, Egypt mite atu in khuangai in. Amate sia a thahat ngamdangte taw mithi khua ah puaksuk in.

¹⁹Amate tungah : Ngualdang khat sangin na meal hoi zaw sa nu ziam? Mithi khua ah na tuaksuk tu uh hi; Pathian zia a he ngawlte taw thaan sungah lumkhawm tu nu hi.

²⁰“Ngal sungah a thite taw Egypt mite thi tu uh hi. Amate theampo a that tu in namsau khat kinging khol zo hi.

²¹Ngahang mama te le Egypt ngam sang pang theampote in mithi khua pan Egyptte a muak uh hi. Amate in: ‘Pathian zia a he ngawl ngal sungah a kithatte hong tuaksuk in, hi sungah lum uh hi!’ ci in au uh hi.

²²“Tua munah Assyria om hi; a ngalkapte thaan in kiim uum hi. Amate ngal sungah kithat siat a,

²³amate thaan sia mithi khua a thuk belna munah om hi. A ngalkapte theampo ngal sungah thi a, ama thaan sia ngalkapte thaan in kiim uum hi. Ahihang khat vei hunlai in amate in a nungtate ngam liinglawngsak uh hi.

²⁴Tua munah Elam om a, a ngalkapte thaan in kiim uum hi. Amate ngal sungah kithat siat a, vun at ngawl ma in mithi khua ah tuaksuk hi. A nuntak lai in ngual lauthawngsak a, ahihang tu in thi in maimawl uh hi.

²⁵Elam sia ngal sungah a thite taw lum a, a ngalkap thite thaan in kiim uum hi. Amate theampo vun ki at ngawlin ngal sungah a thite vive ahi uh hi. A nuntak lai in ngual lauthawngsak a, ahihang tu in amate thi in a maimawl in ngalsung a thite taw kisial khawm hi.

²⁶“Tua munah Meshech le Tubal te zongh a ngalkapte thaan taw ki uum in om uh hi. Amate theampo vun ki at ngawlin ngal sungah a thite vive ahi uh hi. Ahihang, khat vei hunlai in amate in a nungta te ngam liinglawngsak uh hi.



²⁷Mithi khua ah ngalhiam cing taw pai in a namsaute khamsakin, a lumte a pum tungah koi in taanghlai ngalhangte bangin amate sia upatna taw in kiphum ngawl hi. Hi ngalhangte sia khatvei hunlai in a nungtate liinglawngsak tu in a tha uh hat hi.

²⁸“Tuabangin Egypt mite sia ngal sungah a kithat vun at ngawlte kilaklaw ah ki nengcip in om tu uh hi.

²⁹“Edom sia a kumpite le a uliante taw tua munah om hi. Amate sia a thahat ngalkapte hi a, ahihang tu in ngal sungah a kithat vun at ngawl ngalkapte taw mithi khua ah lum uh hi.

³⁰“Saksang kumpipa tate theampo tua munah om uh hi. Sidonianta zongh tua munah om uh hi. A thahatna in khatvei lai in ngual liinglawngin lausak ngei hi. Ahihang tu in amate sia ngalsung a thite taw vun at ngawlin mindai in kiphum khawm uh hi. Amate in mithi khua ah a paisukte taw a kibangin mindaina thuak khawm uh hi.

³¹“Ngal sungah a kithatte a mu uh ciang Egypt kumpipa le a ngalkapte in dik a sa tu uh hi,” Vaanglianpipa Topa in ci hi.

³²“A nungta te lausak tu le liinglawngsak tu in Egypt kumpipa ka sawl hi. Ahihang ama le a ngalkapte theampo sia kithatlum tu a, ngal sungah a thi, vun at ngawlte theampo taw kisial tu hi,” ci in Vaanglianpipa Topa in pau zo hi.

Ezekiel 33

Pathian in Ezekiel Ngalvil nasep pia

(Ezekiel 3.16-21)

¹Topa in keima hong paupui hi.

²Ama in, “A thi thei mihing awng, ngam khat tungah ngal ka thetsak ciang bang suak tu ci thu na mite son in. Tua ngam mite in amate sung pan ngalvil tu khat teal uh hi.

³Ngalte hong pai a mu ciang a kingin thei natu in ama in ngalko daak tum hi.



⁴Tua ngalko daak tum za napi khat pawpo in awlmawk ngawlin, ngalte in ama a that le tua pa ii thina sia ama kimawsiat tu hi.

⁵Ama khialna hu in ama thi hi, banghangziam cile ngalko daak thusim ngawl hi. Thusim hi ka pole ama suakta tu hi.

⁶Ngalvilpa in ngalte hong pai mu napi, ngal a ko buale ngalte hong pai in tua mawneite that tu uh hi, ahihang mawneite thina sia ngalvilpa tungah kimawsiat tu hi.

⁷“Tu in, a thi thei mihing awng, nang Israel ngam ii ngalvilpa in kong koi hi. Nang tungah kidop natu thu kong piak pawpo amate zasak sawn tu ni hi.

⁸Mihing ngilo khat a thi tu in ka taangko a, ahizong a ngamtatna kikheal in a thi natu pan suatak natu in na son bua ahile, ama sia mimaw pi ma in a thi tu hi, ahihang ama thina sia nang tungah hong kisiik tu hi.

⁹Mihing ngilo khat kidop natu thu na pia a, ahihang ama in mawna kikheal ngawlin maw nei ma in thi tu hi, ahihang nang nuntakna hong kikhoaikhe tu hi.

Misim ii sep tu Tavuan

¹⁰Topa in keima hong paupui hi. Ama in, “A thi thei mihing awng, Israel te tungah amate pau sa kammalte son kik in: ‘Eite in khialna le siatna ih vawt vanh ngit ih pua hi. Ih tha bo hi, bangbang nungta tu hi ziam?’

¹¹Amate tungah son in a, Keima, Vaanglianpipa Topa in a nungta Pathian ka hi bangma in, maw nei khat zongh a thi tu ka dei bua hi. A mawna kikheal in a nuntak tu ka dei zaw hi. Israel mite awng, na khialnate theampo pan kikheal vun. Banghang thi nuam nu ziam?

¹²“A thi thei mihing awng, tu in Israel mite tungah, mihing pha khat in khialna a vawt le a phatnate in ama suatak zo ngawl tu hi. Mi ngilo khat in siatna a vawt nawn buale ama daan kipia nawn ngawl tu a, mipha khat in siatna vawt tu a kipan le a nuntakna kisuatak tuan ngawl tu hi.



¹³Mipha khat tungah a nuntakna tu kamciam pia in, ahihang ama in a pha a vawt sate kicing zo sa in, mawna a vawt le phatna a vawt sate keima in ka tepteesak nawn buatu hi. A mawnate hu in ama thi tu hi.

¹⁴Mi ngilo khat thi tu hi ci in thupia zo ka hihang, ama in mawna vawt nawn ngawlin thupha le thumaan a vawt le—

¹⁵sonteena in a sum pukthaak manin a laak vanhte pia kikin a nguk sa vanhte a pia kik le a mawna vawtte pan kikheal in, nuntakna a pia thukham a zui le ama thi ngawl tu a, nungta tu hi.

¹⁶Khialna a vawtte ka maisak tu a, thumaan le a pha a vawtte hu in ama nungta tu hi.

¹⁷“Tuaciang na mite in ka vawt sate maan ngawl hi hong ci hi: Hi ngawl hi, amate lampi a maan ngawl hi zaw hi.

¹⁸A thumaan khat in thupha a vawt tawlnga in a sia a vawt le tua hu in ama thi tu hi.

¹⁹Mi ngilo khat in a mawna kikheal in, a maan le a pha a vawt le a nuntakna suatak zo hi.

²⁰Ahihang Israel mite awng, ka vawt sate maan ngawl hi hong ci nu hi. Keima in na sepna bangin thu kong khen tu hi,” hong ci hi.

Jerusalem khua Bona Thu

²¹Ih sal tan zawk kum sawm le kum nii kum ni nga ni in, Jerusalem khua pan hong taiku khat in Jerusalem khuapi bo zo hi ci in hong son hi.

²²Ama hong pai maa a zein itak in, Topa hong ompui na nasia takin ka phawk hi. A zingsang tua pa hong thet ciang, Topa in kampau kik theina vaang hong pia kik hi.

Mihingte Khialnate

²³Topa in kei hong paupui hi.

²⁴Ama in, “A thi thei mihing awng, Israel ngam sungah a siacip sa khuapite sungah a teang mite in: ‘Abraham sia mihing khat bek hi a, ama tungah



ngambup kipia hi. Ei ih hi le mihing kitam mama a, tua ahiciang tu in tua ngam sia eima ngam ahi hi,' ci uh hi.

²⁵“Keima, Vaanglianpipa Topa ii ci teng amate son in: A sungah chisan a omlai sa na ne uh hi. Milimte bia in, tual na that uh hi. Hi leitangh sia koma neisa hi ci in, bang in hong ngaisunsak ziam?

²⁶Na namsaute suang nu hi. Na ngamtatna uh kiihuai hi. Mihing theampo in palngul mawna vawt nu hi. Hi leitangh sia koma neisa hi ci in, bang in hong ngaisunsak ziam?

²⁷“Keima, Vaanglianpipa Topa in a nungta Pathian ka hi bangma in, tua khuapi siacip sate sungah a teang mihingte kithat tu hi ci in a kidop natu thu ka piak sia son in. Ngam sungah a teang teng sia ngamsate in nelum tu hi. Mualtung le leihawng sungah a buu te theampo natna taw in thi tu hi.

²⁸Keima in tua ngam sia a kinusia a ngamkhing ngam ka suaksak tu a, a kiphatsakpui a vaangletna bo tu hi. Israel mualte ngam dui thukpui suak tu a, kuama in khualhaw in tua ngamte kantan thei ngawl tu hi.

²⁹Mihingte a khialna uh hu in daan ka piak ciang le a ngam sia ngamthim ka suasak ciang Topa ka hi hunlam amate in hong he tu uh hi,” hong ci hi.

Kamsangpa Thu puakna pan Thupiangte

³⁰Topa in, “A thi thei mihing awng, na mite in khuapi uumna pang hui ahibuale amate kongkhate ah a kisik uh ciang nangma thu bebek son uh hi. Amate khat le khat ‘Topa in tu in bang hong ci ziam, pai in ngai tawng,’ kici uh hi.

³¹Tua ahikom, ka mite na thuson ngai tu in a hon in hong pai uh hi, ahihang seam tu na son bangin amate ngamta ngawl hi. Ki itna kamthumte pau ahihang a duhop ngei ma in duhop veve lai uh hi.

³²Amate atu in nang sia tengtong tum a, lawmla a sasa pa khat bang lel na hi hi. Na kampau theampo hong ngai napi kam khat beak zongh hong ni ngawl hi.

³³Ahizong, na kampau theampo hong tangtung tu a, hong tangtung tatak ciang kamsang khat amate sungah om ahi hunlam amate in he tu uh hi,” hong ci hi.

Ezekiel 34

Israel ngam Tuucingte

¹Topa in kei hong paupui hi.

²Ama in, “A thi thei mihing awng, Israel ngamukte mawsiat in, kamsaanna taw, Keima, Vaanglianpipa Topa ii kong ci teng amate mun ah son in: No Israel ngam tuucingte awng a bo hi zo nu hi: Noma le noma bek kikeam in na tuute na keam bua uh hi.

³Note in noai taw kivaak in, tuumul taw a kivawt puante silh in, a limci bel tuute ngo in a sa na ne uh hi. Ahihang tuute na keamcing ngei bua uh hi.

⁴Note in tuu zawngkhalte na ou bua uh a, a cinate bawl ngawlin, a liamte a liamna tuamsak ngawl, a lampialte khoi nawn ngawl ahibuale a bote na zong kik bua uh hi. Tuasia luangin na vawtsia lalai uh hi.

⁵Tuute in a cing nei ngawl ahikom, amate peakkeak in, ngamsate in manin a sa ne uh hi.

⁶Ka tuute mualtung le mualsaang na munte ah a vakvai uh hi. Leitung theampo ah peakkeak in zon tu, kat tu in na ngaisun bua uh hi.

⁷“Tu in, no tuucingte awng, Topa ahi Keima son bang hong ngai tavun.

⁸Keima in a nungta Pathian ka hi bangma, keima thuson nong ngai tu uh hi zaw hi. Ngamsate in ka tuute manin, thatin a sa ne uh hi, banghangziam cile tuucing om ngawl hi. Ka tuucingte in tuute kanin zong ngawl hi. Amate le amate bekma kikeam in, tuute a keam bua uh hi.

⁹Tua ahikom, no tuucingte awng, ka thuson hong ngai tavun.

¹⁰Keima, Vaanglianpipa Topain note ngal ka hi na thu ka thangsak hi. Ka tuute na khutsung pan ka la kik tu a, bangma hunin amate ii tuucingte kong hisak nawn buatu hi. Noma le noma bekma kikeam tu in kong koi nawn



buatu hi. Na khutsung pan ka tuute ka suatak tu a, note in kong nesak nawn
 buatu hi.

Tuucing Pha

¹¹“Keima, Vaanglianpipa Topa in kong ci na pan Keima mama in ka tuute ka
 zong tu a, ka keam tu hi.

¹²Tuucingte in a kithethaang tuute kaikhawm in a kep bangma in ka tuute ka
 keam tu hi. Khuazing le a lauhuai tuasiatna ni a, a kithethaang na mun
 theampo panin amate ka khawm kik tu hi.

¹³Ngam tuatuamte pan amate ka sam tu a, amate kaikhawm kikin, amate
 teenna leitangh tungah ka siapui kik tu hi. Israel ngam luinote le
 mualsaangte ah keima in heakpui kikin, lopa hingna ah ka taasak kik tu hi.

¹⁴Israel ngam mualtung le ngamkuam lohingna theampo ah amate ngal
 muang takin ka taasak tu hi.

¹⁵Keima in ka tuute a cing tuucingpa ka hi tu a, a tawlngak natu mun thimna
 mun ka zonsak tu hi. Keima, VaanglianpipaTopa in ka pau zo hi.

¹⁶“Keima in a bote ka zong tu a, a lampial te ka khoi kik tu hi, a liamte a
 liamna ka tuamsak tu a, a cinate ka damsak kik tu hi, ahihang thau in a
 thahatte ka sucip tu hi, banghangziam cile keima in thumaan in a ngamta
 tuucingpa ka hi hi.

¹⁷“Tu in no ka tuuhonte awng, Keima, Vaanglianpipa Topa in kong ci in a,
 note khatsim tungah thu kong khen tu a, note sung pan a pha le a pha
 ngawlte, tuu le kealte khen bangin kong khen tu hi.

¹⁸Note pawlkhat in lopa limci na neak uh taw na lung uh kim zo ngawlin na
 khawnlaakte ngangawn na tuancil uh hi. Tui thiango te na dawn uh a, na
 dawn vaal uh teng sikcil in na nusak uh hi!

¹⁹Ka tuudangte in na totcil lopate le na nutsak sa tuite ma ne uh hi.

²⁰“Tu in Keima, Vaanglianpipa Topa in a thahat le a thazawng tuute thu kong
 khen tu hi, ci in kong son hi.



²¹Note in tuu a cidam ngawlte na kii uh taw si ngawpin tuuhonte taw na khen uh hi.

²²Ahihang ka tuute ka suatak tu a, kuama in ka vawtsiasak nawn buatu hi. Ka tuute khat ii sim tungah thukhen in a sia le a pha ka doi tu hi.

²³Ka naseampa David bang ahi kumpi khat amate cing tu tuucing khat ka pia tu a; amate keam tu hi.

²⁴Keima, Topa in amate Pathian ka hi tu a, ka naseam pa David bang ahi kumpi khat in amate a uk tu hi. Keima in ka pau zo hi.

²⁵Amate thin muang hiithiat in a om natu amate taw thuciamna khat ka vawt tu hi. Ngamsa ngilote theampo a ngamsung pan ka heam tu a, tuasia hun ciang ka tuute ngalmuang takin lo sungah om tu a, taam sungah lum tu uh hi.

²⁶“Amate ka thupha ka pia tu a, ka mual thiangtho kiimkot ah ka teangsak tu hi. Tua munah a kikap hunin thupha nguatui ka zusak tu hi.

²⁷Thingkungte a nga nga tu a, lote pan anpiang in, mihing theampo thinmuang takin amate ngam tek ah a teang tu uh hi. Ka minamte thikkol suutsakin, a saltanna pan ka suataksak ciang Topa ka hi hunlam amate in he tu uh hi.

²⁸Pathian he ngawl minamte in amate neisa te suddol nawn ngawl tu a, ngamsate in ne lum nawn ngawl tu hi. Amate ngal muang takin teang tu a, kuama in lauthawn nawn ngawl tu hi.

²⁹Leipha leihoi na ah lote ka pia tu a, a ngam sungah ngilkialna ka omsak nawn buatu hi. Ngamdangte in selno nawn ngawl tu hi.

³⁰Mihing theampo in Israel te ka huk le keima minam ahi hunlam he tu uh hi. Keima, Vaanglianpipa pau zo khi hi.

³¹“No, ka tuute, kong vaak sa tuuhonte sia, keima mihingte na hi uh a, keima in note Pathian ka hi hi,” Vaanglianpipa Topa in ci hi.

Ezekiel 35

Pathian ii Edom Daan A piakna



- ¹Topa in keima hong paupui hi.
- ²Ama in, “A thi thei mihing awng, Edom ngam phat ngawl na sonsia in.
- ³Keima, Vaanglianpipa Topa ii son teng mipi te tungah son in: Edom ngam mualte awng, Keima sia na ngal ka hi hi. Nangma sia a kinusia a ngamkhing mun kong suaksak tu hi.
- ⁴Na khuapite lalcip in ka nusia tu a, Na ngam leitanghte a ngamkhing ka suaksak tu hi. Tua hun ciang Topa ka hi hunlam na he tu hi.
- ⁵“Nang sia Israel te ii ngal na hi tawntung a, a khialna hu in ngimna a thuk tu, na tuasiat hun laitakin Israel mite na thi mangsak hi.
- ⁶Tua ahikom, Keima, Vaanglianpipa Topa in a nungta Pathian ka hi bangma in thina sia na thuk tu hi a, peal thei ngawl tu ni hi. Tual that na hikom, nang thalup tu in hong kizuizen tu hi.
- ⁷Edom mualtung ngam sia ngamkhing mun ka suaksak tu a, tua ngam kantan in khual a haw pawpo ka thatlum tu hi.
- ⁸Mual le kuam te sia ngalsung a thi mithi luangte taw ka dimsak tu hi.
- ⁹A tawntungin a ngamkhing mun kong suaksak tu a, na khuapite sungah kuama teang kik ngei nawn ngawl tu hi. Ta sia ciang Topaka hi hunlam nong he tu uh hi.
- ¹⁰“Keima in Judah le Israel ngamte ii Topa Pathian hi napi ing, hi ngamte nii sia a leitangh te taw nangma ii neisa hi, na ci hi.
- ¹¹Tua ahikom Keima, Vaanglianpipa Topa sia a nungta Pathian ka hi bangma, ka minamte na huatsana, na eenna le na thin uukna te kong thuk kik tu hi. Amate tungah na vawtsiat nate hangin daan hong pia ka hi hunlam amate in he tu uh hi.
- ¹²Tuaciangin, nangma in, “Israel mualte sia a ngamkhing suak tu a, keima neisa hi zo hi,” ci in zawnsakna taw na pau nate Keima Topa in za ka hi hunlam na he tu hi.



¹³Kei hong sonsia in, kiphatsakna taw na kam paute theampo kong za siat hi,” ci hi.

¹⁴Vaanglianpipa Topa in kong ci in ah, “Nang a ngamkhing in kong vawt tu a,

¹⁵Keima neisa Israel a lalcip ciang na lungdam bangma in leitung buppi in na kiamsuk a lungdam tu uh hi. Seir mual theampo le Edom ngam theampo a ngamkhing mun suak tu hi. Tua hun ciang Keima in Topa ka hi hunlam mihing theampo in he tu uh hi.

Ezekiel 36

Israel te tungah Pathian Thupha

¹Topa in, “A thi thei mihing awng, Israel mualte tungah ka thu son in a,

²Keima, Vaanglianpipa Topa ii amate tungah ka son tu thute hi bang hi: Israel ii a ngalte in lungkimna taw en in, ‘Tu in hi taanghlai mualte sia koma aa hi,’ ci hi.

³“Tua ahikom kamsang in a, Keima, Vaanglianpipa Topa ii son teng zasak in. A ngampaamte in Israel mualte la in, a sutol ciang, misim in Israel te nunau hi.

⁴Tu in no mualsaangte, luamnote le ngamkuamte, no a kilalcipsak sa munte, a kinusia sa khuapite, na kiimkot ngam theampo ii sutol in a nunaute awng, Keima, Vaanglianpipa Topa ii son teng hong ngai tavun.

⁵“Keima, Vaanglianpipa Topa in, a kiimkot ngamte le a tatuan in Edom ngam tungah ka thin uuk mama na taw thu ka son hi. Amate in ngaimawkna le lawp toai na taw keima leitanghte le nganthana lote amate neisa in nei uh hi.

⁶“Israel ngam tungah kamsaanna son in a; mualte, luamte, ngamkuamte tungah ngamdangte ii sonsiatna le maimawlsak nate hangin ka thin uuk laitak kong ci teng son in.

⁷Keima, Vaanglianpipa Topa in na kiimkot ngamte maimawl sak tu khi hi, ci in a ciliap huai kamciam kong pia hi.



⁸Ahihang, Israel ka mihingte awng, Israel ngam mualte tungah thingkungte po kik tu a, a tee boai in a nga nga kik tu hi. Hai ngawlin inn ah nong cia kik tu uh hi.

⁹Nangma sang kong pang hi, na leitangh ka kitho kiksak tu a, ankungte kiciing kik tu hi.

¹⁰Na minam ka pungsak tu hi. Khuapite sungah na teang tu uh a, a kisia sate theampo na pua kik tu uh hi.

¹¹Na ngannote le mihingte kong pungsak tu hi. Ni dang sangin na khang zaw tu uh a, suan le paal tam mama na nei tu uh hi. Na ten ngei bangin tua munah kong teangsak tu a, nidang sangin na nuamsa zaw tu uh hi. Tua hun ciang Topaka hi hunlam nong he tu uh hi.

¹²Israel ka mihingte awng, tua ngamah kong teangsak kik tu hi. Tua ngam sia noma ngam suak tu a, na tate pukthisak kik nawn ngawl tu hi.

¹³“Keima, Vaanglianpipa Topa in: Israel in mihing sa ne ngam hi a, a ngam sungah a tate kisuum hi ci in a kison sia thumaan ahi hi.

¹⁴Ahihang tu pan kipan na tate hong suam mihing sa ne khat hi nawn ngawl tu hi. Keima, Vaanglianpipa Topa in pau zo khi hi.

¹⁵Hong selno ngamte thu zui kul nawn ngawl tu a, a mite ii hong nunau zongh na mu nawn buatu uh hi. Tua ngam in hi minam ii tate suam nawn ngawl tu hi. Keima, Vaanglianpipa in ka pau zo hi,” ka ci hi.

Israel ii Nuntakna Thak

¹⁶Topa in kei hong paupui hi.

¹⁷Ama in, “A thi thei mihing awng, Israel te a ngam sungah a ten lai in, a nuntak zia le a ngamtatna taw a ngam a ninsak uh hi. Amate omzia sia numei thasim in nin nei in biakna taw kisai a thiangtho ngawl bangin ka ngaisun hi.

¹⁸Amate in a ngam sungah a tualtha nate hang le a milim biakna taw in a ngamsung a nitsak nate hu in ka thin uukna daan a thuak tu uh hi.



- ¹⁹Amate nuntak zia le a om ziate ka huasaak hu in ngamdang ah ka thethaang hi.
- ²⁰A paina theampo ah ka min thiangtho mindaisak a, mihingte in, ‘Hite in Topa mite hi napi Topa ngam a taisan uh kul hi.’
- ²¹Ka min thiangtho atu Kei in thin ngimin hong thin toisak hi, banghangziam cile Israel mite in a paina theampo ah ka min daisak uh hi.
- ²²“Tu in Keima, Vaanglianpipa Topa ii thupiakte Israel mite tungah son in: ka vawt tu thute in no Israel te atu hi ngawl a, na thetna mun theampo ah na daisak sa ka minthiangtho atu ahi hi.
- ²³Minam theampote tungah ka min thiangtho ii vaangletna ka lak ciangin na daisak ka min hu in keima siaTopa ka hi hunlam amate in hong he tu uh hi. Keima, Vaanglianpipa Topain ka pau zo hi. Nangma hong zangh in minam theampote tungah a thiangtho ka hi sia ka lak tu hi.
- ²⁴Minam theampo le ngam theampo pan kong la kik tu a, na ngamah kong ciapui kik tu hi.
- ²⁵Tuithiangtho kong the tu a, milimte le hong ninsak nate theampo pan kong thiansua tu hi.
- ²⁶Lungtang thak le thin thak kong pia tu hi. Suang bangin a sah na lungtang kong laaksak tu a, thu a ni thei lungtang kong pia tu hi.
- ²⁷Ka thukhamte le ka kamciamte theampo na zui thei natu in ka thaa kong khum tu hi.
- ²⁸Tua hun ciang, na taangpupite tungah ka piak sa ngamah na teang tu uh hi. Note in keima minam na hi tu uh a, Keima in noma Pathian ka hi tu hi.
- ²⁹Hong ninsak nate theampo pan kong hun tu hi. Na anciite thupha ka pia tu a, an tam mama na at tu uh a, kial hong tung nawn ngawl tu hi.
- ³⁰Minam theampote sungah kialpi hu in na mindai ngawl natu na thingnga kungte le na lote pan an tam mama ka piangsak tu hi.



³¹Na ngitlo nate le a pha ngawl na ngamtatnate theampo na phawk na mawna le na khialna te uh hu in, noma le noma na kinunau tu uh hi.

³²Israel awng, hi te theampo sia nang hu in seam ka hi ngawl hunlam na heak tu ka dei hi. Na vawtsa nate hu in na maizum in na maimawl tu ka dei hi. Keima, VaanglianpipaTopa in ka pau zo hi.”

³³Vaanglianpipa Topa in, “Na mawna theampo pan kong thiansua zawkciang na khuapite ah kong teangsak kik tu a, a lalcip sate theampo na pua kik tu uh hi.

³⁴Na lo paam ah a pai pawpo in lopa in na lote khunelh in duipui suak ahi hunlam mu tu uh hi, ahihang na lote kong thosak kik tu hi.

³⁵Mihingte theampo in hi ngam duipui a sua son tek hi kale tu in Eden Huan bang hi zo a, khuapite ki sutham, kiphul in a kisia sa in om, hi kale tu in mihing teang kik zo a, kulh taw ki uum zo hi.

³⁶A bo ngawl a taanglai na ngampaamte in Keima, Topa in a kikhul sa lote tho kik in, a lal sa khuapite a pua kik Topa ka hi hunlam hong he tu uh hi; Keima, Topa in ka vawt tu hi ci in kong kamciam zo a, ka kamciam bangin ka vawt tu hi,” ci hi.

³⁷Vaanglianpipa Topa in, “Israel te in ka tungah hu ka ngensak kik tu a, tuasia ciang tuuhon bangin amate ka pungsak tu hi.

³⁸Tu laitak in a lalcip khuapite poai sung sangaw biakpiakna in a kipia tuute taw a kidim Jerusalem khuapi bangin mihing taw kidim kik tu hi. Tuasia hun ciang Keima, Topa ka hi hunlam hong he tu uh hi,” ci hi.

Ezekiel 37

Mithi Ngutei Omna Ngamkuam

¹Topa ii a vaanglian hong ompui na ka phawk a, ama thaa in mithi ngutei taw kidim ngamkuam ah hong paipui a, tua munah hong koi hi.

²Ama in ngamkuam sungah hong vapui kawkoai a, mithi ngutei sa tam mama ka mu hi.



³Ama in kei tungah, “A thi thei mihing awng, hi mithi ngute a nungta kik thei tu ziam?” hong ci hi. Keima in, “Vaanglianpipa Topa awng, nangma bekma in zo thei tu ni hi,” ci in ka zokik hi.

⁴Ama in, “Mithi ngute tungah ka thuhil in. Mithi ngu hite in Topakammal ngaisak in.

⁵Keima Vaanglianpipa Topa ii ci teng son in: Keima in hu ka mop tu a, nuntakna ka pia kik tu hi.

⁶Thangui le sazangte ka pia tu a, vun taw ka tuam tu hi. Hu ka mop tu a, ka nungtasak kik tu hi. Tua hun ciang Topa ka hi hunlam na he tu uh hi,” ci hi.

⁷Tua ahikom hong kisawl bangin thu ka phuang hi. Ka thuson laitak mama in, awnging siasua ka za a, mithi ngute hong kipee kik vazuai hi.

⁸Ka mit taw ka mu tang mama in, mithi ngute thangui le sazangte taw kituam a, tua zawkciang vun in tuam hi. Ahihang a pumpi sungah nuntakna a om bua hi.

⁹Pathian in ka tungah hong ci hi: “A thi thei mihing awng, mithi hite sungah hu a khum natu le nuntakna a piak kik natu in, vui sungah thupia in ci in Vaanglianpipa Topa in hong sawl hi, ci in son in.”

¹⁰Hong kisawl na bangin thu ka phuang hi. Pumpite sungah nuntakna hong tum a, nungta in hong dingto hi. Ngalkap honbup khat a pha tu za in a tam hi.

¹¹Pathian in kei tungah, “A thi thei mihing awng, Israel mihingte sia hi mithi ngute taw kibang hi. Amate in ka ngu uh tei zo a, maisang bangma muanmawkna nei nawn ngawl khu hi, ci uh hi.

¹²Tua ahikom Israel ka mite tungah Keima, Vaanglianpipa Topa in a thaankhukte ka hongkeak tu hi ci in thu phuang in. Keima in amate ka lakeak tu a, Israel ngamah ka puak kik tu hi.

¹³Ka mite kiphumna thaante hongin amate ka laakkeak ciang, Topa ka hi hunlam amate in hong he tu uh hi.



¹⁴Hu ka mop tu a, nungtasak kik in; a ngamah ka teangsak kik tu hi. Tuasia ciang amate in kei sia Topa ka hi hunlam he tu uh hi. Hi bangin ka vawt tu ci in kamciam ka piak bangin ka vawt tu hi. Keima, Topa in ka son zo hi,” hong ci hi.

Judah le Israel Kumpi ngam khat Suak

¹⁵Topa in kei hong paupui kik hi.

¹⁶Ama in, “A thi thei mihing awng, thing ciangkhut khat la in a tungah ‘Judah Kumpi Ngam’ ci in at in. Tua zawkciang a dang khat la in ‘Israel Kumpi Ngam’ ci in a tungah at in.

¹⁷Tua zawkciang a mong veve pe in, ciangkhut khat bek bangin na khut sungah toai in.

¹⁸Na mipuite in a khiakna bang ziam ci in hong dok ciang

¹⁹Keima, Vaanglianpipa Topa in, Israel ngam ci in a ki at ciangkhut sia la in, Judah Ngam ci in a ki at ciangkhut sia taw ka koikhop tu sia amate son in. Ciangkhutte ngeal sia khat ka sua tu a, ka khut sungah ka toai tu hi.

²⁰“Ciangkhutte ngeal sia mihingte mu tu in na khut sungah toai in.

²¹Tua zawkciang Keima, Vaanglianpipa Topa in a paina ngam theampo panin, ka mite theampo kikhawm kikin amate ngam leitangh tungah ka ciapui kik tu sia amate tungah son in.

²²Israel ngam mualte tungah amate, minam khat in ka ngawm tu hi. Kumpi khat bek in amate uk tu a, minam nii ahizong, kumpi ngam nii ahizong in kikhen nawn ngawl tu hi.

²³A kiihuai milimte taw amate le amate kininsak nawn ngawl tu a, mawna taw lal nawn ngawl tu hi. Amate sia kei hong melsiatna mawna lampi theampo pan ka suaktasak tu hi. Amate ka thiansua tu a; amate sia keima mite hi tu a, Keima in amate Pathian ka hi tu hi.

²⁴Ka naseam pa David taw kibang kumpi khat nei tu uh hi. Kumpi khat ii khutnuai ah amate pumkhat suak tu a, thumaan takin ka thukhamte a zui tu uh hi.



²⁵Ka naseam pa Jacob tungah ka piak sa a taangpupite teenna ngam ah teang tu uh hi. Tua munah a tate le a suan a paal te theampo, a tawntungin teang tu uh hi. Ka naseam pa David bang ahi kumpi khat in amate a tawntungin uk tu hi.

²⁶Amate a tawntung ngal muangin a om thei natu, amate taw thuciamna khat ka vawt tu hi. Amate thupha ka pia tu a, a minam pungsakin, ka Biakinn a teenna ngamah a tawntungin ka khosak tu hi.

²⁷Amate taw ka teangkawm tu a, Keima in amate Pathian ka hi tu a, amate in keima minam ahi tu uh hi.

²⁸Ka Biakinn sia amate sungah a tawntung atu ka phu ciang, minam theampo in Keima, Topa in Israel sia ka minam in ka teal hunlam hong he tu uh hi,” hong ci hi.

Ezekiel 38

Pathian ii vanhzak Gog

¹Pathian in kei hong paupui hi.

²Ama in, “A thi thei mihing awng, Magog ngam sungah om Mesheh le Tubal ngam ukpipa Gog ii phat ngawlrate son in. Ama sonsia in a,

³Keima, Vaanglianpipa Topa ama ngal ka hi hunlam sia ama tung son in.

⁴Ama leeheak zazan in a kha ngu sia thikkoai bulin ama le a ngalkapte theampo ka kaikeak tu hi. Ama ngalkap honpite, a siphute uh le, a kibang puan a silh siphu tung to ngalkapte tam mama a, ngalkapte theampo in lum le namsau khat tek toai uh hi.

⁵Persia ngam, Ethiopia ngam le Libya ngam pan mite sia amate sang pangin lum le thik lukhute nei siat uh hi.

⁶Saksang Gomer ngam le Beth Togarmah ngamte panin, ngalkapte theampo le ngam tuatuam pan ngalkapte in ama panpui uh hi.

⁷A kinging khol natu son in, a thupiak tu ngak in, a ngalkapte theampo kinging khol sa in omsak hen.



⁸Kum tam mama zawkciang, ngam theampo pan a cia kik, ngal muang mihingte teenna ngam sim tu in ama ka sawl tu hi. Ama in ngei mama a kinusia sa a ngamkhing mun ahihang tu in mihingte ngal muang takin a teenna mun Israel mualte sim tu hi.

⁹Ama le a ngalkapte le ama taw kipawl ngam tam mamate in vuipei bangin sim tu a, mei bangin a ngamsung a tuamcip tu uh hi,” ci hi.

¹⁰Hi sia in Vaanglianpipa ii Gog tungah a son ahi hi: Tua hun hong thet ciangin nang in thusia khat na ngaisun tu hi.

¹¹Nang in thinmuang takin a teang, khuapite ngaldalna kulh taw a ki uum ngawl, a hung tu om ngawl ngam khat sim tu in na khensat tu hi.

¹²A lalcip sa khuapi sungah a teang mite ii neisate suddol in na laaksak tu hi. Amate sia ngam theampo pan kikaikhawm a, tu in vul le khoai, nei le lamh hong nei a, leitung lamkaa bomte ah a teang uh hi.

¹³Sheba le Bedan mite le Spain ngam khuapite pan sum vawtte in, nang hong dongh tu hi. ‘Na ngalkapte ngual neisate suddol tu le a sim tu in na khawm zo ziam? Ngun le kham vul le khoai nei le lamh sate theampo laaksak siatin, tua vanhte theampo siapui tu na sawm ziam?’ ci in dongh tu hi,” ci hi.

¹⁴Tua ahikom, vaanglianpipa Topa in ama ci teng Gog tungah son tu in kei hong paisak a: “Tu in Israel ka minamte thin muang in a ten laitakin nangma in

¹⁵saksang na teenna pan, ngam tam mama pan, a thahat mama le a tam mama ngalkapte theampo siphu tung to in, lampui in na kuan tu hi.

¹⁶Suangval vui ngamsung theampo kantan in a vak bangin Israel ka mite na sim tu hi. A hun hong thet ciang, nang tungtawn in ka thiantho na le Keima a kua ka hi sia minamte in hong heak natu in, ka ngam sim tu in nangma kong paisak tu hi.

¹⁷Ka naseam Israel kamsangte tungtawnin, ka thaansak tu a ni hong thet ciang, Israel te sim tu in khat kong puak tu hi ci a nidang pek pan ka sason sia nangma na hi hi,” Vaanglianpipa Topa in son zo hi.



Pathian ii Gog Daan A piakna

¹⁸Vaanglianpipa Topa in, “Israel mite Gog ii a sim ciang, ka thin uk mama tu hi.

¹⁹Ka thin uuk mama hu in tua ni ciang Israel ngamah nasia takin zinliing tu hi ci in ka thangsak hi.

²⁰Ngasa le vacim theampo, nganhing a lian a no theampo le leitung ah a om mihing theampo in kei hong kiita in a liing tu uh hi. Mualte le liangte cim tu a, luphung theampo puk tu hi.

²¹Gog mite tuasiatna nam tuatuam taw ka lauthawn tu hi. Keima, Vaanglianpipa in son zo khi hi. Ama mihingte khat le khat namsau taw kisaat tu hi.

²²Chisan luanna le natna taw ama daan ka pia tu hi. Nguapi le ngialkia, meikaang le kantui te ama le a ngalkapte tung le ama taw kipawl minam tuatuam te tungah bua suk tu hi.

²³Hi bangin keima Vaangletna le ka thiantho na sia minam theampo ka lak tu hi. Tua hun ciang amate in Topaka hi hunlam hong he tu uh hi,” ci hi.

Ezekiel 39

Gog A kizawna

¹Vaanglianpipa Topa in , “A thi thei mihing awng, Meshech le Tubal ngamte ukpi pa Gog phat ngawlna son in a, Keima sia a ngal ka hi hunlam ama son in.

²Keima in ama lam thak khat ah ka heak tu a,saksang pek panin, Israel ngam mualte a thet dong ama ka tonpui tu hi.

³Tuaciang a vei sangah a toai thal le a ziat sangah a toai thaltangte ka bekkeaksak tu hi.

⁴Gog le a ngalkapte, a kipawlpuite Israel mualte tungah thi tu uh a, a mithi luangte sia ngamsate le vacimte an ka suaksak tu hi.



⁵Keima, Vaanglianpipa Topa ii son sa bangma in, amate lozau sungah thi tu uh hi.

⁶Magog ngam le thinmuang takin a mite teenna tuipi dung theampo mei taw ka hal tu hi. Tua hun ciang mite theampo in, Keima, Topa ka hi hunlam hong he tu uh hi.

⁷Israel ka mite in ka min thiangtho hong heak takpi natu in ka vawt tu a, tua hun ciang, ka min ka daisak nawn buatu hi. Tuaciang, minamte in Keima, Topa sia Israel te ii a thiangtho Pathian ka hi hunlam hong he tu uh hi,” ci hi.

⁸Vaanglianpipa Topa in, “A thu ka sason ni sia hong tung takpi tu hi.

⁹Israel ngam khuapite ah a teang mite pai in, a kinusia ngalhiamte thingthu tu in tom tu uh hi. Lumte, thalte, thaltangte, tei le molte thingin thut tu a, kum sali dong khom tu uh hi.

¹⁰Amate in lo sung pan ahibuale, duisung taamte pan thingthu tu tom kul ngawl tu hi. Banghangziam cile amate in ngalvanh kinusiate mei a thut tu nei uh hi. Amate suamin a vanh a suttolte, amate in suamin, a vanh suttol tu uh hi,” Vaanglianpipa Topa in son zo hi.

Gog Kiphumna

¹¹Topa in, “Hi thute hong pian ciang, Gog kiphumna tu mun khat, Israel ngam Khualhawte Ngamkuam sung Tuipi Thi ii niswana sangah ka pia tu hi. Gog le a ngalkapte theampo tua munah kiphum tu a, tua kuam sia Gog ii Ngalkapte ii Kuam” kici tu hi.,

¹²Israel mite in tha sali tawntung mithi luangte theampo phumin a leitangh thiangthosak kik tu uh hi.

¹³Ngamsung a teang mihingte theampo in mithi phumpui tu a, ka ngal zaw ni ciangin, amate minphatna kipia tu hi. Keima, Vaanglianpipa in ka son zo hi.

¹⁴Tha sali a bo zawkciang leitangh a thianthosak thei natu in, ngamsung theampo ah khualhaw tu le mithi luang a kiphum ngawllai theampo zongin a phum tu in pasalte kiteal tu hi.



¹⁵Amate ngam sungah vak kawkoai in, mithi ngu khat a mu simin, amate in tua ii hui ah teptena khat vawt tu a, tua hile thaankhuk tote pai in, Gog ii Ngalkapte ii kuam ah phum thei tu uh hi.

¹⁶(Tua mun taw a kinai na ah ngalkapte min a kitap khua khat om tu hi) Tuabangin a leitangh kithiangthosak kik tu uh hi,” ci hi.

¹⁷Vaanglianpipa Topa in kei tungah, “A thi thei mihing awng, amate atu ka vawt biakpiakna sate ne tu in, kiim le paam theampo pan vacim le nganhingte theampo hong pai natu in sam in. Tuasia in Israel mual tungah poai a lian mama khat hi tu a, tua munah amate in sa ne in chi dawn thei tu uh hi.

¹⁸Amate in tuutalte ahibuale, tuunote ahibuale kealte ahibuale, khuita thaute bangin a kithatlum ngalkapte ii luangte ne in, leitung ngamukte ii chisante dawn tu uh hi.

¹⁹Sangaw biakpiaknate bangin hi mihingte ka thalup ciangin, vacimte le nganhingte in a chi le a thaute theampo a kham dongin ne in a dawn tu uh hi.

²⁰Keima sabuai tungah amate in siphute le siphu tungtote, ngalkapte le ngalhang mihingte ii sa a neak zawk zaza ne tu uh hi. Keima, Vaanglianpipa in ka son zo hi,” hong ci hi.

Israel ngam Kipua kikna

²¹Topa in, “Minam theampo in ka vaangletna ka musak tu a thumaan a ka thu khensat natu in bangbangin ka thahatna zangh khi ziam ci sia ka lak tu hi.

²²Israel te in tua hun pan kipan Keima sia Topa a Pathian ka hi hunlam hong he tu uh hi.

²³Minam theampo in kei tungah mawna hong vawt nate hangin Israel te ngamdang ah sal a suana thu a tel tu uh hi. Amate nusia in a ngalte in ka zosak a, ngal sungah ka thatlumsak hi.

²⁴Amate a ninnoi na le a ngitlo nate taw a kilawm bangin ka thuaksak a, amate ka nungngat hi,” ci hi.

²⁵Vaanglianpipa Topa in, “Ahihang tu in Jacob suan le paal Israel mite ka hesuak tu a, ka nuamsasak kik tu hi. Ka min thiangtho ka sungsia tu hi.

²⁶Kuama in lauthawn nawn ngawlin, amate a ngam sungah ngal muangin khat vei a ten kik ciangin, keima hong leeheak hu in, amate bangbangin a mindai ci sia a mangil thei tu uh hi.

²⁷Keima thiangtho ka hi hunlam sia minam theampote ka lak natu in, a ngalte teenna ngam theampote panin ka mite ka siapui kik tu hi.

²⁸Tua hun ciangin, ka minamte in Keima, Topa a Pathian ka hi hunlam hong he tu uh hi. Hi thu amate ii a tel theina sia, keima in amate sal suak tu in ka puak a, tu in amate khawm kikin, khat zongh kikhe ngawlin, amate ngamah ka puak kik hu ahi hi.

²⁹Israel mite tungah ka thaa ka buak tu a, amate ka nusia kik nawn buatu hi. Keima, Vaanglianpipa Topa in son zo khi hi,” ci hi.

Ezekiel 40

MAILAM BIAKINN MUKHOLNA (40.1-48.35)

Jerusalem ah Ezekiel Kipaipui

¹Ih sal tan zawk kum kul le kum nga kum, Jerusalem khua a kilaak zawk kum sawm le kum li kum kumthak ni sawm ni in, Topa ii nasia tak hong ompui hunlam ka phawk a, ama in mundang ah hong paipui hi.

²Mu kholna sungah Pathian in Israel ngam sungah hong paipui a, mualsaang khat tungah hong koi hi. Ka mai ah khuapi lian khat taw kibang inn pawlkhat ka mu hi.

³Ama in a nai zaw in hong neaksak a, tuaciang tausan bangin a tee mihing khat ka mu hi. Ama in pikhau khat le piciang khat toai in kongpi hui khat ah ding hi.

⁴Ama in “A thi thei mihing awng, en in, pha takin hong ngai tan a kong lak na theampo nasia takin kin vawt in, banghangziam cile nang sia hi thu huvau



in hi sungah hong kipuak na hi hi. Na mu theampo Israel mite tungah son tu na hi hi,” kei tungah hong ci hi.

Nisuana Kongpi

⁵Ka mu sia Biakinn hi a, a kiimkot ah luphung khat om hi. Tua pa in pi 10 a sau ama piciang la in tua luphung tee hi. Tua luphung sia pi 10 saang a, pi 10 saa hi.

⁶Tua zawkciang nisuana sang a maingat kongpi ah ama pai hi. Keallei tungah ama kaato in a dawn ah a tumna pi tee a, pi 10 thuk hi.

⁷Tua ngal ah lamzin khat om a, ngalvilna innkhan thum a lang veve ah om hi. Tua innkhante in a kikim kingh li tek nei a, pi 10 tek sau hi. A khante kilaklaw pang te pi 8 saa hi. Ngilvilna innkhan ngal ah pi 10 a sau lam khat om a, Biakinn a maingat tumna innkhan paina ahi hi.

⁸⁻⁹Ama in innkhan pitee a pi 14 thuk hi. Tua innkhan sia Biakinn taw a kinai bel lam tawpna hi a, a mong bel pang sia pi 4 saa hi.

¹⁰(Hi ngalvilna innkhan lam lang le lang ah a omte sia a letna kikim linlian a, a kilaklaw pang zongh a saana kibang siat hi.)

¹¹Tua zawkciang tua pa in kongpi lam ii zaina pi tee hi. Kongpi lampi sia pi 22 pha a, kongpitem khat le khat kilaklaw sia pi 16 pha hi.

¹²Ngilvilna khan sim ii mai ah pang a niam letmat 20 a saang le letmat 20 a saa khat om hi. (A khan kiimkot pangte pangh khat ciang pi 10 veu pha hi.)

¹³Tua zawkciang, innkhan khat ii a nung pang pan a lang khat lam ii nungsang pang dong ama in pitee a, pi 42 pha hi.

¹⁴Innkhan mong khak bel sia leitual paina hi. Tua innkhan sia ama in pitee a, 34 zai hi.

¹⁵Kongpi ii pang puasang pang pan a khakbel innkhan dong sia a vekpi pi 84 sau hi.



¹⁶Pusuana hawng note sia a puasang pangte le khante kilaklaw a sungsang pangte ah om siat hi. Lampi a maingat sungsang pangte tungah palm kung limte kisuai hi.

A Puasang Leitual

¹⁷Tua pa in a puasang leitual ah lam zui in hong paipui hi. Tua munah puasang pang bealhin innkhan sawmthum kivawt a, tuate mai ah suang kipha a,

¹⁸a puasang leitual kiimkot dongah kipha hi. Hi a puasang leitual sia a sungsang leitual sangin niam zaw hi.

¹⁹A sungsang leitual pai natu in kongpi khat a saang zawna munah om hi. Tua pa in kongpите kilaklaw pitee a, pi 168 pha hi.

Saksang Kongpi

²⁰Tua zawkciang tua pa in a puasang leitual painasaksang kongpi pitee hi.

²¹Ngalvilna innkhan thum lampi lang le langah a omte, a kilaklaw a om pangte le tumna khante theampo sia niswana kongpите bang linlian ahi hi. Kongpi lampi ii sauna vekpi sia pi 84 hi a a zaina vekpi sia pi 42 hi.

²²Tumna innkhan, khelkite le palm lim kisuaite sia niswana kongpi tungah a omte taw kibang hi. Kongpi dong kal sali kisan a, tumna innkhan sia leitual sang nga in a mong ah om hi.

²³Leitual kantan insaksang kongpi pan a sungsang leitual paina a dang kongpi khat om a, niswana sangah omte bangma ahi hi. Tua pa in kongpите nii kilaklaw pitee a, pi 168 pha hi.

Thangsang Kongpi

²⁴Tua zawkciang tua pa in thang sangah hong paipui a, tua munah kongpi dang khat ka mu uh hi. Ama in a sungsang pang le tumna innkhante pitee a, a dangte taw ma kibang hi.

²⁵Kongpi ii innkhante sungah a dang kongpите bangma in khelkite om hi. Kongpi ii sauna a vekpi pi 84 pha a, pi 42 zai hi.



²⁶Kal sali suanto ciang tua mun kitheng a, tua mun tumna innkhan zongh leitual maingatin a mong ah om hi. Pusuana lampi a maingat a sungsang pangte tungah palm kungte lim kisuai hi.

²⁷Hi lai zongh ah a sungsang leitual paina kongpi om hi. Tua pa in a niina kongpi dong pitee a, pi 168 pha hi.

A sungsang Leitual: Thangsang Kongpi

²⁸Tua pa in thang sang pan a sungsang leitual ah hong paipui hi. Ama in kongpi pitee a, a puasang pang a om kongpite taw kibang hi.

²⁹⁻³⁰A ngalvilna khan, a tumna innkhan le a sungsang pangte sia a dang kongpite taw kibang hi. Hi kongpite ii innkhante ah khelkite zongh om hi. A sauna vekpi sia pi 84 hi a, pi 42 zai hi.

³¹A tumna innkhan in leitual dang sang nga a, palm kung limte sia lampi dungzui pang tungah kisuai hi. Hi kongpi dong kal liat kisan hi.

A sungsang Leitual: Nisuana Kongpi

³²Tua pa in nisuana kongpi lamzui in a sungsang leitual ah hong paipui hi. Ama in kongpi pitee a, a dangte taw kibang hi.

³³A ngalvilna innkhan, a sung tumna khan le a sungsang pangte sia a dang kongpite taw kibang hi. A kiimkot khelki om kawkoai a, sung tumna khansung zongh ah om hi. A sauna vekpi sia pi 84 hi a, pi 42 zai hi.

³⁴Sung tumna innkhan in a puasang leitual maingat hi. Palm limte sia lampi dungzui pangte tungah kisuai hi. Hi kongpi dong kal liat kisan hi.

A sungsang Leitual: Saksang Kongpi

³⁵Tua zawkciang tua pa insaksang kongpi ah hong paipui hi. Ama in tuasia pitee a, a dangte taw in kibang hi.

³⁶A dangte bangma in tuasia in ngalvilna khante, a sungsang kizeam pangte, sung tumna khante le a kiimkot ah khelkite nei hi. A sauna vekpi sia pi 84 hi a, a zaina sia pi 42 ahi hi.

³⁷Sung tumna khan in a puasang leitual maingat hi. Palm kungte lim lampi dung pang tungah kisuai hi. Hi kongpi dong kal liat pha hi.



Saksang Kongpi Nai ah a om Innte

³⁸A puasang leitual ahsaksang a sungsang kongpi taw kipee in innkhan khat om hi. Leitual a maingat sung tumna dong kihong a, tua lai ah biakpiakna in a kihal tu nganhing luangte amate in tui taw sil uh hi.

³⁹Hi sung tumna innkhan sungah sabuai li om a, a lang le lang ah ni veve kikoi hi. Sabuai niite tungah amate in biakpiakna in a kipia nganhingte, a pum bupin kihal tu ahizong mawna le khialna hang a biakna ah piak tu nganhingte ahizong that uh hi.

⁴⁰Innkhan pua sangah a kibang sabuai li om a, saksang kongpi tumna lang le lang ah nii veve kikoi hi.

⁴¹Biakpiakna nganhingte ngawlup natu in a vekpi in sabuai liat om a: sabuai li a khan sung sangah a dang li a puasang leitual ah om hi.

⁴²Innpeam sungah a om pumbup meihal biakpiakna hal natu in a kizangh sabuai li te a ki attan suangtum taw kivawt ahi hi. Tuata sia letmat 20 saang a, a dawn kiimkot sia letmat 30 veu zai hi. A zaina le a sauna kikim hi. Sangaw biakpiakna ah a zak vanh teng tua sabuaite tungah kikoi hi.

⁴³Sabuaite mong kiimkot ah letmat 3 a zai khinte a paisuak in om hi. Sabuaite tungah biakpiakna nganhing sate theampo kikoi hi.

⁴⁴Tua zawkciang ama in a sungsang leitual ah hong paipui hi. A sungsang leitual sang a nga innkhan nii om a, khat insaksang kongpi hui pan thangsang maingat a, khat in thangsang kongpi hui pansaksang maingat hi.

⁴⁵Tua pa in thangsang a nga innkhan sia Biakinn naseam Thiampite atu hi a,

⁴⁶Saksang a nga innkhan sia biaknatau ah naseam thiampite atu hi hong ci hi. Thiampi theampo sia Zadok ii suan le paahte hi a, amate sia Topaomna munah ama naseam tu in a kipaisak Levi minamte bek ahi uh hi.

A sungsang Leitual le Biakinnpi

⁴⁷Tua pa in a sungsang leitual pitee a, a pangh simin pi 168 veu zai hi. A sauna le a zaina kibang hi. Nitumna sangah Biakinnpi om a, tua ii mai ah biaknatau om hi.



⁴⁸Tua zawkciang ama in Biakinn sung tumna innkhan ah kei hong paipui hi. A tumna lam ama in pitee a, pi 9 saang a, pi 24 zai in pi 5 a saa pang a lang le langah om hi.

⁴⁹Sung tumna innkhan sia pi 34 zai in, pi 20 saang a, tua mun thet natu in keallei kithung hi. Sung tumna a lang le langah khuam khat veve om hi.

Ezekiel 41

¹Tua zawkciang, tua pa in A Thiangtho Mun laizang innkhan sungah hong paipui hi. Ama in tua mun paina lampi pitee a: pi 10 saang in,

²pi 18 zai a, a lang le a lang pangte pi 8 veu saa hi. Ama in innkhan mama pitee a: pi 68 sau in pi 34 zai hi.

³Tuaciang ama sia a sungnung khakbel innkhan ah pai hi. Ama in tua mun paina lampi pitee a: pi 3 thukin pi 10 zai hi, a lang le a lang a pangte pi 12 veve saa hi.

⁴Ama in innkhan mama pitee a, pi 34 sau in pi 34 zai hi. Hi innkhan sia a laizang innkhan ii ngal ah om hi. Ama in kei tungah “Hi mun sia a Thiangtho bel Mun hi,” hong ci hi.

Biakinn Pang nealin A kisa Innkhante

⁵Tua pa in Biakinn sungsang pang ii saana pitee a, pi 10 pha hi. Biakinn kiimkot ah Biakinn pang nealin, pi 7 veu a zai innkhanno a kipee in kisa hi.

⁶Hi innkhante dawl thum pha a, dawl khat simin innkhan sawmthum om hi. Biakinn ii a dawl simin, a puasang pang sia a nuai dawl pang sangin pa zaw hi, tua ahikom a tung innkhante pang tungah kilh kul ngawlin kinga hi.

⁷Biakinn pangte a puasang pan et ciang, a dawl simin, a dawn dong, a saa a kikim in kimu hi. Biakinn puasang pang tung nealin, innkhante pua sangah a zai keallei kidaw a, tuabangin a nuai dawl pan, a lai dawl le a tungnung bel dawlte ah kikaato thei hi.

⁸⁻¹¹Hi innkhante puasang pang sia pi 8 saa a, Biakinnsaksang innkhante paina innkha khat om a, thangsang innkhante paina innkha khat om hi. Biakinn kiimkot ah pi 8 a zai leicial khat ka mu a, lei pan pi 10 saang a, Biakinn



pangh ah om innkhante phung tawdap taw kikim hi. Leicial le thiampite zak innkhante kilaklaw ah pi 34 a sau mun awng khat, Biakinn ii pang dung tengah om hi.

Nitumna sang A Om Innpi

¹²Mun awngthong ii mong bel, Biakinn ii nitumna sangah pi 150 a sau pi 116 a zai inn khat om a; a kiimkot pang sia pi 9 saa hi.

Biakinn Teena Vekpi

¹³Biakinn puasang teng tua pa in pitee a, pi 168 sau hi. Biakinn nungsang pan mun awngna kantan in nitumna inn mong dong pi 168 pha hi.

¹⁴Biakinn mai le a ziat le vei a om mun awng sia kingawm in pi 168 pha hi.

¹⁵Nitumna sang innpi ii sauna ama in pitee a, a lang le a lang a om innpeam dokte dong pi 168 pha hi.

Biakinn Thu A pawlcing

¹⁶Biakinn sung tumna innkhan, a Thiangtho Mun le A Thiangthobel Mun teng theampo sia suat pan khelki dong thing taw ki uum hi. Hi khelkite theampo sia kituam thei hi.

¹⁷Biakinn pang sungsang, innkhate tung dong a saanna ciang sia, palm le cherubim lim kisuai te taw kituam hi.

¹⁸Innkhan sung theampo ah palm kung le cherubim limte a kithek in kisuai hi. Nganhing simin maitang nii veu nei uh hi:

¹⁹a lang khat ah palm kung sang a maingat mihing maitang khat om a, a lang khat ah thingkung sang a maingat tawpi maitang khat om hi. Pang tung theampo sia

²⁰suat pan innkhate tung dong kibang siat hi.

²¹A Thiangthobel Mun ii innkha khuamte sia a saanna le a zaina kikim hi.

Thing taw Kivawt Biaktau

A Thiangthobel Mun tumna ii mai ah



²²thing biaknatau taw kibang na khat om hi. Tuasia sia pi 5 saang a, pi 4 zai hi. A kingh khuamte, a bul le a pangh theampo thing taw kivawt hi. Tua pa in kei tungah, “Hi sabuai siaTopa omna ah a ding sia ahi hi.” hong ci hi.

Inkhate

²³A Thiangtho Mun paina lampi tawpna ah innkha khat om a, a Thiangthobel Mun paina lampi zongh ah a dang khat zongh om hi.

²⁴Hi sungah, a lai pan a kihong thei khen nii nei kongkha khat om hi.

²⁵Pang tungah a kisuai bangin a Thiangtho Mun innkhante tungah palm kung le cherubim te lim kisuai hi. Sung tumna khan ii innkha puasang sia thing taw kituam hi.

²⁶Hi innkhan pangh ah khelkite om a, a pangte sia palm kung lim taw kizeam hi.

Ezekiel 42

Biakinn Hui a Inn Niite

¹Tua zawkciang tua pa in a puasang leitual pan Biakinnsak sangah hong paipui a, tuaciang Biakinnsak sangah a om inn khat ah hong paipui hi. Tua inn sia Biakinn nitumna sang taw kikhuala ngawl hi.

²Hi inn sia pi 168 sau a, pi 84 zai hi.

³Inn pangh khat in, Biakinn dungzui a om pi 34 a zai mun awng sia maingat a, a lang khat in leitual pua sangah suang kipha lamzin sia maingat hi. Tua inn sia dawl thum in kivawt a, a tung dawlte sim sia a nuai dawl sangin nungsang neak zaw in kivawt hi.

⁴Hi innpi iisaksang pang dungah pi 16 a zai, pi 168 a sau lampi khat le sung tumna kongte om hi.

⁵A dawl tungnung innkhante sia a nuai a te sangin ciak zaw hi, banghangziam cile a nungsang neak zaw in a kivawt hang ahi hi.

⁶A dawl sung theampo ah a innkhante sia, cial tungah om a, innhuang sungah a om inn dangte bangin khuam nei ngawl hi.



7-8A nuaisang dawl ah inn puasang pang sia pi 84 sau a, a sauna ii lang ahi hi. A taanglai pi 84 sungah innkhante om hi. A tungnung bel inndawl ah innpi sauna bup dungzui in innkhante om hi.

9-10Hi innkhante nuai inn ii nisuana sang mong, leitual pan pang kipatna munah leitual puasang paina kongkha khat om hi, Biakinn thang sangah Biakinn nitumna mong innpi taw a kikhuala ngawl na ah a kibang linlian inn khat om hi.

11Innkhante mai ahsaksang a om sia taw a kibang lampi khat om hi. A zaina le a sauna kikim a, a vawtzia le sung tumnate zongh kibang hi.

12A inn ii thangsang nisua na mong, a pang kipatna innkhan nuai ah kongkha khat a om hi.

13Tua pa in keima tungah hong ci hi, “Hi innte ngeal thiangtho hi. A sungah Topa omna munah a tum thiampite in, a thiangtho bel biakpiakna ante ne uh hi. A innkhante thiangtho ahi manin thiampite in a thiangtho bel biakpiaknate: antang biakpiaknate, mawmai biakpiaknate ahibuale mawphel biakpiaknate tua munah koi tu uh hi.

14Thiampite in Biakinn sung a tum zawkciang le a puasang leitual ah a pusua kik nop ciang, hi innkhante sungah Topa atu na a sep laitakin, a silh puan thiangthote suutin amate in nusia tu uh hi”.

Biakinn Mun Teena

15Biakinn sungsang mun teng tua pa in pitee tu a man zawkciang, ama in keima nisuana kongpi pan hong pusua pui a, a puasang mun teng pitee hi.

16Ama in pician la in, nisuana sang teng pitee in, pi 840 pha hi.

17-19Tua zawkciang ama insaksang, thangsang le nitumna sang teng pitee a, a sauna kibang tek in pi 840 tek pha hi.

20Tua ahikom a pangh li teng kikim siat a pangh khat sia 840 tek pha hi. Tua pang in a thiangtho mun le a thiangtho ngawl mun khen hi.

Ezekiel 43

Biakinn ah Topa Heak kik



- ¹Tua pa in nisuana sang a nga kongpi ah kei hong paipui a,
- ²Tua lai ah Israel Pathian ii ompuina a tee vazal khuavak khat nisuana sang pan hong pai ka mu hi. Tui kihual nging bangin, Pathian aw nging a, a tee vazal khuavak in leitung taangsak hemhom hi.
- ³Hi mukholna in Pathian ii Jerusalem khua siasak tu hong pai lai in ka mu sia le Chebar Ngunhui ah ka mu mukholna taw kibang hi. Tuaciang, keima le keima ka khup lamin ka bok hi.
- ⁴A tee vazal khuavak sia in, nisuana kongpi kantan in, Biakinn sungah tum hi.
- ⁵Topa ii thaa in kei hong laamto in, a sungsang leitual ah hong paipui a, tua mun pan Biakinn sia Topa vaangletna taw kidim ka mu hi.
- ⁶Tua munah tua pa sia ka kungah hong ding a, Biakinn sung pan Topa hong paupui ka za hi.
- ⁷“A thi thei mihing awng, hi lai ah kumpi tokhum om hi. Hi lai Israel mite sungah teangin, amate a tawntung ka uk tu hi. Israel mite le a kumpite in pathian dang biakna taw ahizong, a thi sa kumpite luang hi munah kepna taw ahizong, ka mun thiangtho mindai sak kik nawn ngawl tu hi.
- ⁸Kumpite in a kumpi inn kongkha khuamte le a samkiilte sia ka Biakinn kongkha le kongkha samkiilte nealin vawt a, tua ahikom ka kilaklaw uh pang khat bek in dal hi. Amate in a kiihuai a ngamtat nate theampo taw ka min thiangtho daisak ahikom, ka thin uukna taw amate ka lalcipsak hi.
- ⁹Tu in amate pathian dangte bia nawn ngawl tu a, a kumpite ii mithi luangte heam tu uh hi. Tuabang a ngamtat uh ciang, amate sungah ka teang tawntung tu hi,” hong ci hi.
- ¹⁰Topa in a pau zom a, “A thi thei mihing awng, Israel mite tungah Biakinn thu son in a, a kivawt tu zia tupnate amate sinsak in. Khialna a vawtte hangin amate maizumsak in.



¹¹A vawt sate hu in a mai a zum uh le, Biakinn vawt tu tupnate amate son in: a vawt tu lim, a sung tumna le pusuana, a pung, a vanh theampo vawt tu zia le a zui tu thukhamte le ngeinate theampo son in. Hi thute theampo amate atu in at in, tua hile amate in na theampo bangbang kingeal ci sia mu thei tu a, ngeina theampo zui thei tu uh hi.

¹²Hi thu sia Biakinn thukham ahi hi: Biakinn omna mualdawn le a kiimkot mun theampo sia ciliaphuai in thiangtho hi,” ci hi.

Biaktau

¹³Hite sia biaknatau pi teenate ahi hi. Biakinn pi teena ah a kizangh piciang pikhaute ma kizangh hi. Biakinn ii a bul kiimkot ah letmat 20 a thuk, letmat 20 a zai, tuiluanna khat om a, a tungah a puasang pan letmat 10 a saang ngongtuam taw kituam hi.

¹⁴Biaktau nuainung bel khen sia a bul tung pan pi 4 saang hi. A khan kik sia a mong pan letmat 20 zai in a kiimkot ah kivawt a, pi 7 saang hi. A khen kizom kik sia a mong pan letmat 20 zai in a kiimkot ah kivawt hi.

¹⁵A tungnung bel dawl biakpiaknate halna sia zongh pi 7 saang hi. A kingh li ah a dokte sia a dangte saangin saangzaw hi.

¹⁶Biaktau dawn sia a kikim linlian kingh li nei hi a, kingh khat sia pi 20 veu sau hi.

¹⁷A laizang dawl zongh a dung a vai kikim a, pi 24 sau in, pi 24 zai hi. A mong sia letmat 10 a saang ngongtuam taw kituam hi. (Tui luanna sia letmat 20 zai hi.) Nisuana sangah biaknatau tung kaatona keallei om hi.

Biaktau Aapna

¹⁸Vaanglianpipa Topa in, kei tungah, “A thi thei mihing awng, kong sonte hong ngai tan. Biaktau a kisak ciangin, meihal biakpiakna le biakpiakna ah a kingo nganhingte ii chi a tungah the in aapna vawt tu nu hi.

¹⁹Zadok suan le paal ahi Levi minam thiampite bek in Keima omna ah hong pai in ka naseam tu uh hi. Keima, Vaanglianpipa Topa in hi thu kong pia hi.



Amate tungah mawphel sangaw biakpiak natu in, khuital moi khat na pia tu hi.

²⁰Nangin a chi pawlkhat na la tu a, biaknatau dawn kingh li ah kiite le a lai dawl biaknatau kinghte tung le a kiimkot a mong theampo na noai tu hi. Hi bangin biaknatau na thiangthosak tu uh a na aap tu uh hi.

²¹Mawmai biakpiakna in a kipia khuital sia nang in na la tu a, Biakinn huan ii a puasang, a kiciangtan sa munah na hal tu hi.

²²A zing ciangin a mealhem ngawl kealtal khat kengin mawmai biakpiakna in pia tu ni hi. Biaktau sia khuital chisan taw na thiansak bangma in, kealtal chisan taw thiansua in.

²³Tua teng na man zawkciang, a nii ngealin a mealhem ngawl khuital moi khat le tuatal moi khat kengin,

²⁴Keima kungah hong paipui tan. Thiampite in tua nganhingte tungah citui the tu a, Keima tungah biakpiakna in hal tu uh hi.

²⁵Ni sali sung nisimin mawmai biakpiakna in keal khat, khuital khat tuatal khat pia tu ni hi. A vekpi in a mealhem ngawl het te hi tu hi.

²⁶Ni sali sung thiampite in biaknatau thiansua tu a, zak thei tu in kinging kholsak tu hi.

²⁷Nipi a bo zawkciang thiampite in meihal biakpiakna le mite ii kipawlkhop biakpiaknate biaknatau tungah piak kipan tu uh hi. Tua hun ciang note theampo tungah ka lungdam tu hi. Keima, Vaanglianpipa Topa pau zo khi hi,” hong ci hi.

Ezekiel 44

Nisuana Kongpi Kizakna

¹Tua pa in Biakinn nisuana sangah a om a puasang kongpi ah hong paipui hi. Kongpi kikhak a,

²Topa in kei tungah, “Hi kongpi kikhakcip tu a, kihong kik ngei nawn ngawl tu hi. Mihing kuama in kizanghsak ngawl tu hi, baanghangziam cile, Keima,



Israel Pathian Topa in tua kongpi kantan in ka tum zo hi. Hi kongpi kikhak top tu hi.

³Ngam ukpa ahile keima omna ah a thiangtho an ne tu in pai thei tu hi. Ama in kongpi pan tum in a sungnung bel innkhan lian sia kantan in pusuak tu hi,” hong ci hi.

Biakinn Tum natu Zui tu Ngeinate

⁴Tuaciang tua pa insaksang kongpi tawnin Biakinn mai ah kei hong paipui hi. Ka et ciang Topa Biakinn sia Ama ompuina a tee vazal khuavak taw kidim ka mu hi. Keima le keima lei ah ka boksuk hi.

⁵Tuaciang Topa in kei tungah, “A thi thei mihing awng, na mu theampo le na zaak theampo pha takin ngaisun in. Biakinn taw kisai zui tu thukhamte le ngeinate kong son tu hi. Biakinn sungah a kitumsak tute le a kipusuaksak tu mihingte le a kitumsak ngawl tu mihingte pha takin ciamtee in.

⁶“Israel minam hong langpante tungah, Keima, Vaanglianpipa Topa in a kiihuai amate ngamtatnate thuak zo nawn ngawl tu khi hi ci sia son in.

⁷Keima Biakna in nganhing thau le chisan hong kipiak ciangin ka thu a ni ngawl vun at ngawl ngamdang mite ka Biakinn sungah a tumsak uh hu in amate in ka Biakinn ninsak uh hi. Tuabangin a kiihuai a ngamtatnate uh taw ka mite in ka thuciamna paltan uh hi.

⁸Ka Biakinn sungah a zeksa a thiangtho biakpiaknate amate in seam ngawlin ngamdang mite in seamsak zaw uh hi.

⁹“Keima, Vaanglianpipa Topa in vun at ngawl ngamdang mi, ka thu hong ni ngawlte, Israel mite taw a teang khawm ngamdang mite ngangawn ka Biakinn sungah tum thei ngawl tu hi, ci in ka thangsak hi,” hong ci hi.

Levite Thiampiza pan Kipuavawk

¹⁰Topa in kei tungah, “Israel midangte taw kei hong taisan khawm a, milim a bia Levi mite ngim ka pia tu hi.



¹¹Amate in ka Biakinn sungah kongpите cingin Biakinn nasepte seam in keima na seam tu uh hi. Amate in mihingte ii meihal biakpiakna ah a piak nganhingte ngo tu a mihingte kisapnate sepsak tu uh hi.

¹²Ahihang amate in Israel mite atu in milim biakpiakna vawtsak a, tuabangin mihingte mawna sungah paipui ahikom, Keima, Vaanglianpipa Topa in, amate daan ka pia tu hi, ci in ciliap huai kiciamna ka vawt hi.

¹³Amate in thiampite bangin keima na seam ngawl tu a, kei atu a thiangtho khat pawpo ii a nai zongh neak ngawl tu a, Thiangthobel Mun ah tum ngawl tu hi. Hite in a kiihuai a ngamatnate hu in, amate thuak daanpiakna ahi hi.

¹⁴Biakinn sungah na ham sep tu teng sia amate ka see siat tu hi,” hong ci hi.

Thiampite

¹⁵Vaanglianpipa Topa in, “Hi thiampite sia Levi minam Zadok ii suan le paalte ahi hi. Amate in Israel midangte ii kei hong taisat zawkciang zongin, Biakinn sungah thumaan takin, kei na seam suak uh hi. Tua ahiciang tu in amate sia ka omna ah hong pai in sangaw biakpiakna nganhingte ii chisan le a thaute taw kei biakpiakna hong nei tute ahi uh hi.

¹⁶Amate bekma ka Biakinn sung tum tu a, biakna tau ah seam tu a, Biakinn biakpiakna lampui tu hi.

¹⁷Amate Biakinn sungah sungnung paina kongpi a tum ciangin puankaang neal puan silh tu uh hi. Biakinn leitual sungnung le Biakinn sungah na a sep laitakin amate in samul taw kivawt puante silh ngawl tu uh hi.

¹⁸A khua ul ngawl natu in amate in puankaang neal puan taw kivawt dial khim tu a, puankaang neal sungten teangin, kawngkhau sawm ngawl tu uh hi.

¹⁹Mihonpите omna a puasang leitual ah a pai ma in, amate in Biakinn sung a nasepna ah a silh puante sut tu a, a thiangtho innkhante sungah nusia tu uh hi. A thiangtho biakpiakna puante in mihonpите ngim a piak ngawl natu in amate in puandang silh tu uh hi.



²⁰“Thiampite in a lu sam meettol ngawl tu a, a sam sausak ngawl tu uh hi. Amate in a sam a kilawm bekin koi tu uh hi.

²¹Thiampite in sungnung leitual ah a pai ma in, zu ne ngawl tu hi.

²²Thiampi khat in a kikhul sa numei khat tenpui ngawl tu hi; Israel numei thiangtho khat ahibuale thiampi dang khat ii zi, meingong nu bek taw teang tu hi.

²³“Thiampite in ka mite tungah a thiangtho le a thiangtho ngawlte kilamdanna le biakpiakna a thiangtho le a thiangtho ngawlte hil tu hi.

²⁴Thukhen tu thu khat a pian ciangin, keima thukham bangin, thiampite in thukhen tu hi. Amate in biakna poate keima piak zui tu thukham le ngeinate bangin vawt tu a, amate in ka Sabbath thiangthosak tu uh hi.

²⁵“Thiampi khat sia mithi luang a thamna taw in minin suak ngawl tu hi. Ahizong a nu a pa, a tate khat pawpo ahibuale a suapui pa le pasal nei ngawl lai a suapuinu ii luang a tham le minin suak tu hi.

²⁶Ama a thiantho kik zawkciang, ni sali sung ngak tu a,

²⁷tuaciang Biakinn leitual sungnung ah pai in, kithiansuana in sangaw biakpiakna pia tu hi. Tua hile ama in Biakinn sungah na seam kik thei tu hi. Keima, Vaanglianpipa Topa ka pau zo hi.

²⁸“Israel mite tungah ka piak khang khat pan khang khat ah kilua susuk tu sung panin thiampite tel sia thiampite nasep ahi hi. Israel ngamah thiampite in nei le lamh nei ngawl tu a, amate kikap theampo sia keima ka hi hi.

²⁹Antang taw biakpiakna, mawna le khialna kiphel natu biakpiakna le kitatna in a kipia theampo sia thiampite an hi tu a, Israel ngamah keima atu in a kipia tuam theampo amate in nga tu uh hi.

³⁰Thiampite in anpal sung pan a limci belte le kei tungah hong kipia theampo tang tu uh hi. Mihingte in anluum a em simin, a em masak bel sia biakpiakna in thiampite tungah pia tu uh hi. Tuasia ciang amate inn sungah ka thupha tung tu hi



³¹Thiampite in vacim le nganhing a thite khat pawpo ii sa ahizong, nganhing dang khat pawpo ii thalup nganhing sa ahizong, ne ngawl tu uh hi,” ci hi.

Ezekiel 45

Topa atu Ngam

¹Minam sim tungah piak tu leitangh a kihawm ciang, khen khat sia Topatungah ki aap tu hi. Hi leitangh sia tai 10 sau in tai 8 zai tu hi. Hi mun bup sia thiangtho tu hi.

²Hi munah Biakinn atu a kikim linlian kingh li nei khat om tu a, a pangh sim in pi 840 pha tu a, a kiimkot ah pi 84 a zai mun awng khat om tu hi.

³Hi mun ii lang, tai 10 a sau, tai 4 a zai khen khat kitee tu a, a thiangtho bel mun Biakinn om tu hi.

⁴Tuasia sia ngam ii a thiangthona mun khat hi tu a, Topa Biakinn ah a seam thiampite atu a kikoi tuam mun ahi hi. Tua sungah amate innte le Biakinn mun leitangh om tu hi.

⁵A lang a taanglai mun teng sia Levite biakinn naseamte neisa tu in kikoi tuam tu hi. Tua munah amate teenna tu khuate om tu hi.

⁶A thiangtho mun ii zom ah tai 10 a sau, tai 2 a zai khen dang khat, Israel mite peuma ten thei natu mun khuapi khat tu in kikoi tuam tu hi.

Ngam ukpa atu Leitangh

⁷Ngam ukpa atu leitangh zongh kikoi tuam tu hi. Mun thiangtho ii nitumna ngamngi pan nitumna sang Mediteranean tuipi dong; niswana ngamngi pan niswana sang ngam mong dong hi tu a, Israel minamte atu a kipia a zaina za in zai tu hi.

⁸Hi mun sia ngamukpa ii lua tu Israel ngam leitangh hi tu a, tua ahikom ama in a mite zawthawk vawt nawn ngawl tu a, ahihang a omlai ngam theampo sia Israel minamte neisa hisak tu hi.

Ngam ukpa ii Zui tu Thute

⁹Vaanglianpipa Topa in, “No Israel ngamukte awng, khialna na vawt uh khua ngei lei zo hi! Na molngolna uh le ngual na vawtsiat nate tawlnga vun. A pha



le a maan bek vawt vun. Ka minamte a ngam uh pan hawlkeak kik ngei nawn ngawl tu nu hi. Keima, Vaanglianpipa Topa in hi teng kong son hi.

¹⁰“Mihing sim in toaisuang le khaikhin a maan zangh tu hi.

¹¹“A ko teena ephah sia a tui teena bath taw kibang tu hi. Homer sia a maan teena ahi hi. Et kakna in Homer vanh teena a nuai a bang ahi hi.

1 homer = 10 ephah = 10 baths

¹²“A ngit teenate a nuai a bang hi tu hi.

20 gerahs = 1 shekel

60 shekel = 1 mina

¹³⁻¹⁵“Hi thute doppha in biakpiakna na pia tu uh hi: Zungtaang: a piang theampo sung pan 1/60 Mangtaang: a piang theampo sung pan 1/60 Olive Thau: a kung pan a piang theam po sung pan 1/100 Bath taw teena: 10 baths = 1 homer = 1 kor) Tuu: Israel lomoina pan a piangte 200 sung pan 1 “Antang taw biakpiakna, nganhing bup biakpiak kipawlkhop biakpiak natu nganhingte nong paipui tu uh hi, tua hile na khialnate uh hong kimaisak tu hi. Keima, Vaanglianpipa Topa in thu kong pia hi.

¹⁶“Ngamsung mite theampo in hi biakpiaknate Israel a uk ngamukpa kungah paipui nanak tu hi.

¹⁷Ngam ukpa in Israel ngambup ii Thadet Poaite Sabbathte le a dang poaite theampo atu in nganhing pum bup meihal biakpiakna, antang biakpiakna le zu biakpiaknate theampo a piak tu sia, ama tavuan ahi hi. Ama in mawmai biakpiakna, antang biakpiakna, nganhing pumbup meihal biakpiakna le kipawlkhop biakpiaknate Israel mite ii mawnate maisak natu in pia tu ahi hi,” ci hi.

Poaite

(Pusuana 12.1-20; Thiampite 23.33-43)

¹⁸Vaanglianpipa Topa in, “Thadet ni masabel ni in noma in khuital mealhem ngawl khat taw sangaw biakpiakna nei in, Biakinn thiansua tu nu hi.



¹⁹Thiampipa in mawmai sangaw biakpiakna ii chisan pawlkhat la tu a, Biakinn innkha khuamte tung, biaknatau kingh li te tung le a sungsang leitual kongpi khuamte tung noai tu hi.

²⁰Thasim ni sali ni in, mawmai biakpiaknate, a heak ngawl hu in ahibuale a thupi ngaisut ngawl hu in mawna a vawt khat pawpo luangin noma in a kibangin na vawt tu uh hi. Hi bangin Biakinn na thiangtho sak tu uh hi.

²¹“Tha masabel nisawm le ni li ni in noma in Paisan poai vawt tu in na kipan tu uh hi. Ni sali sung tol saw ngawl anluum bek mihingte theampo in ne tu hi.

²²Poai ni masabel ni in ngamukpa in khuital khat ama mawna le a mite theampo ii mawnate atu mawmai biakpiakna in pia tu hi.

²³Ni sali sung a mealhem ngawl khuital sali le tuatal salite nisim in ama in Topatungah biakpiakna in pia tu a, a pum bupin meihal biakpiakna in hal tu hi. Ama in nisim in kealtal khat taw zong mawmai sangaw biakpiakna nei tu hi.

²⁴Khuital khat le tuatal khat sangaw biakpiakna in a kingaw simin antang taw biakpiakna in antang pheal khat le olive thau thawl thum pia tu hi.

²⁵“Tha sali tha nisawm le ni nga ni a kipan Buk Poai atu in a kibang mawna hang biakpiakna, a kibang meihal biakpiakna le a kibang antang le olive thau taw biakpiaknate ni sali sung nisim in ngamukpa in pia tu hi,” ci hi.

Ezekiel 46

Ngam ukpa le Poaite

¹Vaanglianpipa Topa in, “A sungnung leitual tumna niswana sang kongpi sia, ni luk nasep sung kikhak tu a, ahihang Sabbath ni le Thadet Poai ni in kihong tu hi.

²Ngam ukpa in, a puasang leitual pan kongpi tawnin innkhan lian ah pai tu a, thiampite ama meihal biakpiakna le kipawlkhop biakpiakna a vawt hun sung teng ama kongpi khuamte hui ah ding tu hi. Tua mun kongpi ah ama in



biakpiakna vawt tu a tuaciang pusuak tu hi. Kongpi sia nitak dong kikhak ngawl tu hi.

³Sabbath sim le Thadet Poai simin, mihingte theampo zongh in kunin kongpi maiah Topa bia tu uh hi.

⁴Sabbath ni in ngamukpa in Topa tungah a mealhem ngawl tuuno luk le tuutal khat pumbup meihal biakpiakna in hal tu in paipui tu hi.

⁵Tuutal khat simin ama in antang pheal lang biakpiakna in paipui tu a, tuaciang tuuno khat sim in ama in a piak nop pawpo paipui tu hi. Antang pheal lang sim in olive thau thawl thum veu ama in paipui tu hi.

⁶Thadet Poai sungah a mealhem ngawl khuital moi khat, tuuno luk le tuutal khat ama in pia tu hi.

⁷Khuital khat le tuutal khat a piak simin, antang pheal lang pia tu a, tuaciang tuuno khat a piak simin ngamukpa in, a piak nop po taw pia khawm tu hi. Antang pheal lang a piak simin olive thau thawl thum pia tu hi.

⁸Ngam ukpa in kongpi innkhan lian sia nusia in a tumna lampi ma zui in pusuak tu hi.

⁹“Poai khat pawpo ah mihingte in Topa bia tu hong pai ciang, saksang kongpi pan a tumte in, biakna a vawt zawkciang, thangsang kongpi pan pusuak tu a, thangsang kongpi pan a tumte insaksang kongpi pan pusuak tu hi. Kuama in a tumna mun pan pusuak kik ngawl tu a, a kingalsai kongpi pan pusuak tu hi.

¹⁰Ngam ukpa sia mihingte pai ciang tum tu a, mihingte pusua ciangin pusuak tu hi.

¹¹Poai vawt nite le Poaite ah khuital le tuutal khat a piak simin, antang pheal lang taw pia tu a, tuuno khat a piak simin biakpiakna a vawt pa in, a piak nop pawpo pia tu hi. Olive thau thawl thum sia antang pheal lang taw veu pia khawm tu hi.

¹²“Ngam ukpa in Topa tungah a thinzaw za biakpiakna a nei nop ciang, pumbup meihal tu biakpiakna taw ahizong, kipawlkhop biakpiakna taw



ahizong, sungnung leitual paina nisuana sang kongpi sia ama atu kihong tu hi. Ama in Sabbath ni a biakpiakna a vawt hangin, biakpiakna vawt tu a, kongpi sia ama cia kik zawkciang kikhak tu hi,” ci hi.

Nisim Biakpiakna

¹³Topa in, “Zing simin, a mealhem ngawl kum khat a pha tuuno khat siaTopa tungah biakpiakna in a pumbup in hal tu hi. Hi biakpiakna sia nisim in kinei tu hi.

¹⁴Zing simin, zungtaang pound 5 taw hel tu in olive thau thawl khat taw pia khawm tu a, Topa tungah hi biakpiakna ngeinate sia a tawntungin zui tu ahi hi.

¹⁵Tuuno, zungtaang le olive thaute sia Topatungah zing sim a tawntungin biakpiakna in piak tu ahi hi,” ci hi.

Ngam ukpa le Leitangh

¹⁶Vaanglianpipa Topa in, “Ngam ukpa in, a neisa leitangh mun khat pawpo a tate khat tungah, letsong in a pia le tua tapa in tang tu a, a innkuan ii neisa khat bang hi tu hi.

¹⁷Ahihang ngamukpa in, a neisa leitangh khat pawpo a naseam khat pawpo tungah a pia le Kipua kik Kum a tun ciang, ngamukpa ii neisa suak kik leleau tu hi. Tua leitangh sia ama neisa hi a, ama le a tate bek in, a tawntungin nei thei tu hi.

¹⁸Ngam ukpa in a mite ii neisa te laaksak ngawl tu hi. Ama in a tate tungah a piak leitangh khat pawpo sia ama atu a kikoi sung pan bek hi tu a, tua hile, ama in ka mite khat pawpo sia amate leitangh laaksakna taw zawthawkna vawt ngawl tu hi,” ci in thupia hi.

Biakinn Anbukte

¹⁹Tua zawkciang, tua pa in,saksang a ngaa, a sungnung leitual thangsang kongpi ah a om innkhante ah kei hong paipui hi. Hite sia thiampite atu a thiangtho innkhante ahi uh hi. Innkhante ii nitumna sang mun khat ama in kaw k a,



²⁰tuaciang “Hi mun sia thiampite ii maw mai sangaw biakpiakna in a kipia sate huan natu mun, ahibuale kitat natu a kipia biakpiakna le anvuite em natu mun ahi hi. Tua ahiciang a thiangtho ngawl na khat pawpo mihingte ngim a piak thei natu mun puanung leitual ah kipaipui ngawl tu hi,” ci hi.

²¹⁻²²Tua zawkciang ama in a puasang leitual ah kei hong paipui a, a kingh li sim ah leitual no zaw pi 68 a sau, pi 84 a zai khat tek a om sia hong lak hi.

²³Leitualte khat sim sia sung pangte taw ki um a, pangneal in meikhukte kivawt hi.

²⁴Tua pa in kei tungah, “Hite sia mihingte ii sangaw biakpiakna a piak sate Biakinn ah naseamte ii a huanna mun anbukte ahi hi,” hong ci hi.

Ezekiel 47

Biakinn pan A luang Luitui

¹Tua pa in Biakinn tumna ah hong heakpui kik hi. Sungtumna kong nuai pan tui hong phul a, Biakinn mai nisuana sangah luang hi. Hi tui in Biakinn thangsang nuai pan biaknatau thangsang kantan in luangsuk hi.

²Tuaciang tua pa insaksang kongpi lam tawnin Biakinn huang pua sangah kei hong paipui a nisuana sang a ngaa kongpi ah hong paipui kawkoai hi. Luino khat kongpi thang sangah luang hi.

³A piciang taw tua pa in nisuana sang luidung zuisuk in kaih 560 tee a, tuaciang ama in tua ah luitui tan tu in hong sawl hi. Tui sia ka siakmit ciang bek pha hi.

⁴Tua zawkciang ama in a dang kaih 560 tee a, tuaciang tui sia ka khup ciang pha hi. A dang kaih 560 tee suk a, tui sia ka kawng ciang dong pha hi.

⁵Ama in kaih 560 tee thua a, tua lai ah tuithuk mama ahikom tui ka tan zo nawn bua hi. Tui thuk lei ahikom tui op ngawlin kikantan zo ngawl hi.

⁶Ama in kei tungah, “A thi thei mihing awng, hi thu theampo pha takin ciamtee in,” hong ci hi. Tua zawkciang tua pa in ngunhui ah hong heakpui kik a,



⁷tua mun ka thet ciang, thingkung tam mama ngunlang le lang ah om ka mu hi.

⁸Ama in kei tungah, “Hi tui sia nisuana sang tawnin Jordan Kuam le Tuipi Thi dongah luang suk hi. Tuipi Thi sungah a tum suk ciang, tuipi tui al sia tuithiangtho taw lai hi.

⁹Luitui luanna mun theampo ah nganhing namcin le ngasa namcinte om tu hi. Hi luitui in Tuipi Thi sungah tuite thiangthosak tu a, tuaciang a luanna mun po ah nuntakna piangsak tu hi.

¹⁰Engedi Cik tuite panin Eneglaim Ciktuite dong tuipi vaalbo tungah ngasa mante om tu a, tua munah a ngeente a ko tu in phal tu uh hi. Mediterranean Tuipi sungah ngasa namcin tam mama a om bangma in hi luitui sungah ngasa namcin tam mama om tu hi.

¹¹Ahihang vaalbo dungah a om buannawngte le tuicing note sungah tuite kithiangsak ngawl tu hi. Tua tuite ci pian natu in tua munah om tawntung tu hi.

¹²Lui lang le lang vaalbo tungah anneak tu in thingkung namcinte po tu hi. A teete vul ngeingawl tu a, a nga nga tawntung tu hi. Tha sim in amate in nga thakte nga tu hi, banghangziam cile Biakinn pan a luang luitui in amate tui pia hi. A thingkungte in an piangsak tu a, tuaciang a teete sia mihingte cidam natu in kizangh tu hi,” hong ci hi.

Ngamngite

¹³Vaanglianpipa Topa in, “Hite in minam sawm le nii te sungah leitangh a kihawm tute ii ngamngite hi a, Joseph minamte in ngamkhen nii nga uh hi.

¹⁴Keima in na taangpupite tungah hi ngam piak tu in a ciliaphuai takin ka kamciam sa hi a, tu in noma sungah a kibang diimdiam in hawm vun.

¹⁵Saksang ngamngi in Mediterranean Tuipi pan nisuana sang Hethlon khuapi dong, pai tu a, Hamath Ciangh tawnin Zedad khuapi dong,



¹⁶Berothah le Sibraim khuapite dong (Tua khuapite sia Damascus kumpi ngam le Hamath kumpi ngam kilaklaw ah om hi,) le Ticon khuapi dong (Hauran ngamngi hui ah om) hi tu hi.

¹⁷Tua ahikomsaksang ngamngi sia Mediterranean pan nisuana sang Enon khuapi dong, asaksang pan Damascus le Hamath ngamte dong ahi hi.

¹⁸“Nisuana sang ngamngi sia Damascus le Hauran ngam kilaklaw munkhat pan thang sangah paisuk a, Jordan Ngun in Israel ngam sia nitumna sang le Gilead ngam sia nisuana sangah khen in Tuipi Thi hui ah a om Tamar dong ahi hi.

¹⁹“Thangsang ngamngi sia Tamar pan thangsang nitumna ah pai in Kedesh Meribah ciktui dong lesaksang nitumna sang Egypt ngamngi dung Mediterranean Tuipi dong ahi hi.

²⁰“Nitumna ngamngi sia Mediterranean hi a,sak sangah pai in Hamath Mual ciangh ii nitumna mun khat dong ahi hi.

²¹“Hi leitangh sia na minamte sungah hawm vun.

²²a tawntung noma neisa hi tu hi. Ngamdang mi noma taw a teang khawm te le hi lai munah a suak na suan le paalte theampo zongh in leitangh na hawm uh ciang a nga tu bang tel nga tu uh hi. Amate sia Israel minamte bangma in kingaisun tu a, Israel minamte taw lai meetang sawkin amate tel tek leitangh nga tu uh hi.

²³Ngamdang mi a teang khat sim in ama taw a teang khawm Israel minamte taw a kibangin ama tel nga tu hi. Keima, Vaanglianpipa Topa ka pau zo hi,” ci hi.

Ezekiel 48

Minamte Leitangh Hawmna

¹⁻⁷Saksang ngamngi sia Mediterranean tuipei pan nisuana sang Hethlon khuapi, Hamath Mual ciangh, Enon khuapi, dongah a paisuak, Damascus le Hamath kumpi ngamte kilaklaw ngamngi dong ahi hi. Minam khat sim in leitangh khen khat tek, nisuana ngamngi pan nitumna ngamngi



Mediterranean Tuipi dong a nuai a, a kingual bangin saksang pan thangsang dong nga tu hi. Dan Asher Napthali Manasseh Ephraim Reuben Judah

Ngam Laizang ah A tuam Khen Leitangh

⁸Tua leitangh ii zom khen sia a tuam vilvel in zak tu in kikoi tuam tu hi. Hi mun siasaksang pan thangsang dong tai 10 hi tu a, a minamte atu in lei khen a kipiak bangma in niswana pan ni tumna dong a suana kibang tu hi. A Biakinn sia hi leikhen sungah om tu hi.

⁹Hi lei khen sia a laisaan ah tai 10 a sau tai 6 a zai a tuam vilvel khawk khat sia Topa atu in kipia tu hi.

¹⁰Hi a thiangtho khawk khat sia thiampite ii neisa hi tu hi. Amate ii neisa khawk sia niswana pan nitumna ah a sauna tai 10, sak pan thangsang a zaina tai 4 pha tu hi. Topa ii Biakinn sia hi lei khawk ii a laizang santak a kikoi tu hi

¹¹Hi mun thiangtho sia Zedok suan le paal thiampite atu ahi hi. Amate in keima thumaan takin hong pia a, Israel midangte ii ngamtat khial a vawt ciang Levi minamte kihel ahihang Zadok suan le paal te kihel ngawl hi.

¹²Tua ahikom amate in Levi te leitangh taw kizom in muntuam khat nei tu a, tua mun a thiangtho bel mun hi tu hi.

¹³Levi te zongh in muntuam khat nei tu a, thiampite lei khawk ii thangsang hi tu hi. Hi mun sia niswana pan nitumna dong tai 10 hi tu a, saksang pan thangsang dong tai 4 hi tu hi.

¹⁴Topa tungah a ki aapna mun sia leitangh a pha belna mun hi a, hi mun sia midang khat pawpo tungah kizuak thei ngawl, kitheak thei ngawl, kikhin thei ngawl tu hi. Tua mun sia thiangtho a, Topa neisa ahi hi.

¹⁵A taanglai a tuam vilvel mun sia tai 10 sau in tai 2 zai a, a thiangtho mun hi ngawl ahitazong ngam mite in a kulna bangin a zak tu ahi hi. Tua munah amate teangin leitanghte zangh thei tu hi. A khuapi sia a laizang ah om tu a,

¹⁶tua mun kiimkot ah a pangh kikim tu hi, a pangh mun khat ciang kaih 2520 hi tu hi.



¹⁷Khuapi kiimkot ah a pangh simin kaih 140 a zai mun awng khat veu om tu hi.

¹⁸Khuapi a kisak zawkciang mun awng lai leitangh, mun thiangtho ii thangsang lian ah tai 4 tai 2 a pha niswana sang mun le tai 4 tai 2 a pha nitumna sang mun sia khuapi sungah a teang mihingte in lo in tho tu hi.

¹⁹Khuapi sungah a teang pawpo akua minam ahizong tua munah lotho thei tu hi.

²⁰Tua ahikom a laizang mun a kikoi tuam sia in a kiimkot pangh li nei tu a, pangh khat sim tai 10 pha tu hi. Tua sungah khuapi mun zongh kihel tu hi.

²¹⁻²²Biakinn omna mun ii niswana sang le nitumna sang thiampite leitangh, Levi te leitangh le khuapi, mun awng lai leitangh teng sia ngamukpa neisa ahi hi. Tua mun in niswana sang ngamngi dong, nitumna sang Mediterranean Tuipi dong, saksang pan Judah minamte ngam le thangsang pan Benjamin minamte ngam dong ahi hi.

Minam Dangte atu Leitangh

²³⁻²⁷Hi muntuam ii thangsang, a omlai Israel minamte in khen khat tek, niswana sang ngamngi pan nitumna sang Mediterranean Tuipi dong, saksang pan thangsang dong a nuai a bangin lua tu hi. Benjamin Simeon Issacher Zebulun Gad

²⁸Gad minamte ii luana mun thangsang ngamngi sia Tamar pan thangsang nitumna sang Kadesh Ciktui dong, tua zawkciang Egypt ngamngi pansaksang nitumna sang Mediterranean Tuipi dong ahi hi.

²⁹Vaanglianpipa Topa in, “Tuabangin Israel minamte ii lua tu in a ngam leitangh sia a khen a khen in kihawm tu hi,” ci hi.

Jerusalem Kongpite

³⁰⁻³⁴Jerusalem khuapi sung tumna sawm le nii om hi. Pangh li sung pan pangh khat sim in kaih 2520 pha a, kongpi thum tek nei in kongpi khat minam khat ii min khat tek kiphuak hi. Saksang pang a kongpite ii minte sia Reuben, Judah, le Levi hi a; niswana sang pang a kongpite sia Joseph,



Benjamin le Dan hi a; thangsang pang a kongpite sia Simeon, Issachar le Zebulun te hi a; nitumna sang pang a kongpite sia Gad, Asher le Naphtali ahi hi.

³⁵Khuapi pangh li a kiim uum pang ii sauna sia kaih 10080 pha hi. Tu pan kipan tua khuapi ii min sia, 'Hi mun ah Topa om hi!' (*Jehovah Shammah*) hi tu hi.



Daniel

Daniel 1

DANIEL LE A LAWMTE TANGTHU

(1.1-6.28)

Nebuchadnezzar ii Inn ah a Om Tangvalte

- ¹Jehoiakim ii Judah kumpi a sua zawk a kum thum kumin, Babylon Kumpipa Nebuchadnezzar in Jerusalem khuapi simin uumci hi.
- ²Topa in, Jehoiakim Kumpipa sia Nebuchadnezzar Kumpipa in mansak a, Biakinn na manpha pawl khatte lasak hi. Ama in a mat mihing pawlkhatte Babylon khua ama pathiante biakinn ah ciapui a, a mat vanh manphate biakinn vanh kholna khan ah koi hi.
- ³Kumpipa in Israel saltangte sung pan ukpi nam le ulian namte tangval pawlkhat teal tu in a khutnuai ulian bel Ashpenaz thupia hi.
- ⁴Tua a teal mihingte sia kumpi inn sungah naseam thiamte a sua thei natu in a meal hoi, a pilvang, pha tak nasep a kisinsak sa, thu he pal le pumpi tung paubanna nei ngawlte hi tu hi. Amate sia Babylon lai a sim thei natu le a at thei natu in Ashpenaz in hil tu hi.
- ⁵Kumpi inn sungah a om mihingte bangma in amate sia ni simin an le zu a piak natu kumpipa in thupia si hi. Hi bangin kum thum a sin zawkciang kumpipa mai ah kilak tu uh hi.
- ⁶Tuabang a kitealte sung panin Daniel, Hananiah, Mishael, le Azariah kihel a, a vekpi in Judah nam ahi uh hi.
- ⁷A khutnuai ulian bel pa in amate sia min thak phua in; Belteshazzar, Shadrach, Meshach le Abednego ci hi.
- ⁸Daniel in kumpi inn sung pan a kipia an le zu neakna taw in ama le ama biakna sangah a kininsak ngawl natu in a thin khensat ahikom ama in Ashpenaz tungah huna ngen hi.
- ⁹Pathian in Ashpenaz sia Daniel tungah hesuakna thin neisak hi.



¹⁰Ahizong Ashpenaz in kumpipa kiita ahikom ama in Daniel tungah, “Kumpipa in na neak tu le na dawn tu see sa nei zo ahikom, khangno dangte ban zo ba zezen tha lete ama in kei hong thatlum tu hi” ci hi.

¹¹Tuasia ciang Daniel sia ama le a lawmdang thumte cing tu in Ashpenaz ii a koipa kungah pai hi.

¹²Ama in, “Ni sawm sung hong sin tan a, ka neak tu uh anteete le ka dawn tu tui hong pia tan.

¹³Tuaciang kumpi an a ne khangno dangte taw hong ettee khawm tan a, nong muna bangin thu hong khen tan” ci hi.

¹⁴Ashpenaz in ni sawm sung encik tu in thukim hi.

¹⁵A hun a cin ciang amate sia kumpi an a nete sangin a cidam tuak zaw, a tha hat tuak zaw uh hi.

¹⁶Tua ahikom tua ni pan kipan amate a cing pa in Kumpipa ii piak an luangin anteete ne suaksak hi.

¹⁷Pathian in tua tangval lite sia heak theina, pilna le thuthuk tel theinate pia hi. Tua bek dom ngawlin ama in Daniel sia mukholna le mang khiak thiamna pia hi.

¹⁸Kumpipa ii ciangtan kum thum a cin ciang, Ashpenaz in tangvalte theampo sia Nebuchadnezzar kungah paipui uh hi.

¹⁹Kumpipa in amate paupui siat a, Daniel, Hananiah, Mishael le Azariah sia a dangte sangin dik sa zaw hi. Tua ahikom amate sia kumpipa inn sungah a vaihawm pawl suak uh hi.

²⁰Kumpipa in a bangbang thu haksa nano dongh kale hi mihing lite in ama ii ngamsung theampo a mitbum thiamte le aisaan theite theampo sangin a sawm vei in he zaw uh hi.

²¹Daniel sia kumpi inn ah Persia Kumpipa Cyrus ii Babylon a zaw dong om suak hi.

Daniel 2



Nebuchadnezzar ii Mang

- ¹Nebuchadnezzar kumpi a sua zawk a kum nii kumin ama in mang khat man hi. Tua mang in ama thinngimsak mama a, mu thei ngawl hi.
- ²Tua ahikom ama tungah a mang khiakna son tu in aisaan thiamte, mitbum thiamte, ngual bum theite le khangneite samsak hi. Amate hong pai in Kumpipa mai ah a din uh ciang Kumpipa in,
- ³amate tungah, “Mang khat ka man a, hong thinngimsak hi. Tua ka mang ii a khiakna he nuam khi hi,” ci hi.
- ⁴Amate in Aramaic kam pau in, Kumpipa tungah, “Kumpipa awng na khansau taken! Na mang hong son tan, tua hile a khiakna kong son tu uh hi” ci in zo uh hi.
- ⁵Kumpipa in amate tungah, “Ka mang nong son natu uh le, a khiakna nong son nanak natu uh in, ka khensat zo hi. Nong son thei bua uhle, na khut le na peangte kong semtansak tu a, na inn uh sia nin kholna inn ka suaksak tu hi.
- ⁶Ahizong ka mang le a khiakna nong son thei uhle letsong le min phatna lian kong pia tu hi. Tua ahiciang tu in, ka mang sia bang hi a, a khiakna bangziam cisia hong son tavun,” ci hi.
- ⁷Amate in kumpipa tungah, “Kumpipa awng na mang hong son phot lete, a khiakna kong son tu uh hi” ci kik uh hi.
- ⁸Tuaciang, kumpipa a nging in au a, “Ka ngaisut sa bangma hi nu hi! Hun sau thethei natu hanciam nu hi, banghangziam cile ka mang nong son bua uhle,
- ⁹na vekpi a kibangin daan pia tu ci a ka khensat sia na heak uh hang ahi hi. Kei tungah leilot thu nong sason uh sia na lungkim tek uh ma ahi hi, banghangziam cile hun hong kilaih tu hi ci in na lamet uh hang ahi hi. Ka mang sia bangziam hong son tavun, tua hile a khiakna zongh hong son thei tu ci in ka he tu hi” ci hi.
- ¹⁰Kumpipa ii thudok mipilte in, “Kumpipa awng, na heak nop bang hong son thei tu, hi leitung ah mihing khat beak om ngawl hi. Kumpipa dom ngawlin,



milian bel le a vaanglian bel khat beak in, aisaan theite, mitbum thiamte le khangneite tungah tuabang thute a dongh ngei kuama om ngawl lai hi.

¹¹Kumpipa ii nong thu dokna sia haksa mama ahikom pathiante sim ngawl hong son thei tu khat zongh om ngawl a, amate in mihingte sungah teang ngawl hi” ci in zo uh hi.

¹²Tua hu in, kumpipa thin uk mama a, Babylon ngamsung kumpi thudok mipilte theampo thalup siat tu in thupia hi.

¹³Tua ahikom amate theampo thalup siat tu in thu kipia a, tuate sungah Daniel le a lawmte zongh kihel hi.

Tua Mangkhiakna Pathian in Daniel Lak

¹⁴Tuaciang Daniel sia mihing that tu a thu a piak, kumpipa a cing ngalkapte a uk mangpa Arioch kungah pai hi. Kampau kidawm a,

¹⁵ama in banghangin kumpipa in tuabang thungam vasat khat suaksak ziam ci in, Arioch tungah dongh hi. Tuaciang Arioch in Daniel tungah thupiang teng son hi.

¹⁶Thakhat ma in kumpipa kungah Daniel pai in kumpipa ii a mang khiakna a son thei natu in hun tawmvei sung a ngak lai natu in ngen a, nga hi.

¹⁷Tuaciang Daniel, inn ah cia a, thupiang teng a lawmte Hananiah, Mishael le Azariah tungah son hi.

¹⁸Vantung Pathian in amate hesuak a, tua thuthukte son thei in, Babylon ngamsung a kumpi thudok mipil dangte taw a ki thalup khop ngawl natu in, thungen tu in ama in a lawmte sawl hi.

¹⁹Tuaciang tua zan in thuthuk sia Daniel mu kholna sungah kilangh a, ama in vantung Pathian pok hi:

²⁰“Pathian sia ciim in vaanglian hi! Ama a tawntung a tawntungin pok vun.

²¹Ama in hunte le khua hunte uk hi; ama in kumpite khan a kumpite phiat hi; ciimna le pilna a pia pa sia ama ahi hi.



²²Ama in thuthukte le thukute pholaak hi; ama in khuazing sungah a kiphualte he a, ama mama sia khuavak in uumci hi.

²³Ka taangpupite Pathian awng, nang kong pok a, kong upat hi. Nangma in ciimna le thahatna nong pia zo a; Ka thungetna hong saangin, kumpipa tungah ka son tu thute nong lak zo hi” ci hi.

Daniel in Tua Mang le A Khiakna Kumpipa tung Son

²⁴Tua ahiciang Daniel sia kumpipa ii thudok mipilte that tu a a sawl pa Arioeh kungah pai hi. Daniel in Arioeh tungah “Kumpipa ii thudok mipilte that heak in. Kumpipa kungah hong paipui tan, a mang khiakna ka son tu hi” ci hi.

²⁵Thakhat in Arioeh in Daniel sia Nebuchadnezzar Kumpipa omna ah paipui in kumpipa tungah, “Kumpipa awng, Judah saltangte sung panin na mang khiakna a son thei tu khat mu zo khi hi” ci in son hi.

²⁶Kumpipa in (Belteshazzar zongh a kici) Daniel tungah, “Ka mangmat sia le a khiakna nong son thei tu ziam” ci hi.

²⁷Daniel in, “Kumpipa awng, hong son thei tu in, aisaan thiam, mitbum thiam, khangneite le aksi en thiamte kuama om ngawl hi.

²⁸Ahihang thuthuk a pualaak vantung ah Pathian khat om hi. Ama in maisang thupiang tute, nangma Kumpipa tungah hong zasak zo hi. Na mutthip laitak a na mu kholna mang sia tu in kong son tu hi.

²⁹“Kumpipa awng, na mut laitak in, maisang thupiang tute mangin na man a, thuthuk a pholaak Pathian in a piang tu thu hong lak khol hi.

³⁰Tu in midangte saangin ka pil zawk man hi ngawl hi, ahizong kumpipa in na mangmat a khiakna le na ngaisut thu na heak natu in tua thuthukte kei tungah hong kilangh hi.

³¹“Kumpipa awng, na mu kholna sungah a taang hemhom a kiitak huai milim lian mama khat na mai ah ding na mu hi.

³²Tua milim lutang sia kham ciitak taw kivawt a, a awm le a baante sia ngun taw kivawt in, a kawng le a pheizangte sia taungo taw kivawt hi.



³³A peangte thik taw kivawt a, a peangpakte khen khat thik taw kivawt in, khen khat tungman taw kivawt hi.

³⁴Tua milim na et laitak, kuama thuthaak ngawl het in, liang tung pan suangtum lian khat hong liiksuk a, thik le tungman taw a kivawt milim ii peangte kha in tamthamsak hi.

³⁵Thakhat in thik, tungman, taungo, ngun le khamte tamneen ngawp a, khuakhal lai ancilna mun a leivuite taw kibang hi. Vui in tuate seammang a, bangma taang nawn ngawl hi. Ahizong tua suangtum sia khang vaial a, mual cia pha a, leitung buppi huam hi.

³⁶“Na mangmat sia tu a bang ahi hi. Tu in nangma Kumpipa tungah a khiakna kong son tu hi.

³⁷Kumpipa awng, nangma in kumpi theampo sung panin a lianbel na hi hi. Vantung Pathian in nang sia ngam uklian in hong koi zo a, vaangletna, thahatna le upatna hong pia zo hi.

³⁸Ama in nang sia leitung ah a teang mihingte le nganhingte le vacimte theampo uk tu in hong koi zo hi. Nangma in kham lutang na hi hi.

³⁹Nang zawkciang nang saang a no zaw kumpi ngam khat hong piang tu a, tua zawkciang leitung buppi a uk tu taungo ahi kumpi ngam thumna piang tu hi.

⁴⁰Tua zawkciang kumpi ngam lina hong piang tu hi, thik bangin asak na theampo sutham in a tamthamsak thik in na theampo a sukthap bangin tua ngam in kumpi ngam masa teng theampo sutham in ngoaivui tu hi.

⁴¹A peangpak le a peangmete khen khat sia thik hi a, khen khat tungman a hina zongh na mu hi. Tua in a kikhen tham ngam hi tu hi, a cina ahi hi. Tungman le thik kingawm ahikom tua in thik ii thahatna a khom khat nei tu hi.

⁴²Peangmete khen khat thik hi a, khen khat tungman a hina sia ngam khen khat thahat in khen khat thazawm tu, ci nopna ahi hi.



⁴³Thik le tungman a kihel khawm na mu hi. Tua kumpi ngamukte in kingawm tu hanciam in zi le ta in kiman tu uh a, ahihang thik le tungman a kimat thei ngawl bangma in kingawm thei ngawl tu uh hi.

⁴⁴Tua kumpite hun sungin, vantung Pathian in a bo ngei ngawl tu kumpi ngam khat phut tu hi. Tua ngam sia kuama in zo zo ngawl tu a, ahizong tua ngamin ngamdangte theampo zo ngawp in kip tawntung tu hi.

⁴⁵Kuama ii thuthaak ngawl bulin liang tung pan hong liik suangtum khat in thik, taungo, tungman, ngun le kham taw a kivawt milim sia a denvawk na mu hi. A lian Pathian in mai sangah bang piang tu thu, nangma kumpipa tungah hong son hi. Na mangmat sia ahi bang vateak in kong son zo a, a khiakna zongh a maan bangin kong son zo hi” ci in zokik hi.

Kumpipa in Daniel Minphatna Tel pia

⁴⁶Tuaciang Nebuchadnezzar Kumpipa lei ah kunsuk in, sangaw piakkhiat biakpiakna le biakpiakna Daniel tungah piak tu in thupia hi.

⁴⁷Kumpipa in, “Na Pathian sia pathian theampo sung pan a lianbel, kumpite tungah Topale thuthukte a pholaak pa ahi hi. Hi thu ka he hi, banghangziam cile nangma in hi thuthukte na pualaak thei hang ahi hi” ci hi.

⁴⁸Tuaciang kumpipa in Daniel sia letsong pha tam ma pia in a za khangsak a, Babylon ngam teng uksakin, kumpi thudok mipilte theampo ii lampui in koi hi.

⁴⁹Daniel ii ngetna bangma in kumpipa in Shadrach, Meshach le Abednego te sia Babylon ngamke uk tu in koi a, Daniel ahile kumpi inn sungah om suak hi.

Daniel 3

Nebuchadnezzar in Mihing Theampo Kham Milim Bia tu in Thupia

¹Kumpipa Nebuchadnezzar in pi sawmkua a saang le pi kua a zai kham milim khat vawt a, Babylon ngamke Dura zaangtam ah phut hi.

²Tuaciang kumpipa in a ulian theampo, kumpi tapate, ngamukte, ngam uk zomte, menzite, sumkeam maangte, thukhen maangte, khuapi uk maangte le



ngam sungah milian dangte theampo a pai tek natu in thupia hi. Amate sia Kumpipa Nebuchadnezzar ii milim aapna poai siim tek tu ahi hi.

³Kumpi uliante theampo milim aap tu in kikhawmtua a, milim mai ah a din uh ciang,

⁴thu puak khat in aw nging takin au a, “Minam theampote, minam tuatuamte le pau nam tuatuamte theampo awng!

⁵lemle aw na za tu uh a, baja, tengtong, tamngai, zithers le a dang tum thei theampo in hunghuan tu hi. Tum thei teng tum hong kipat po ciang, Nebuchadnezzar ii phu sa kham milim mai ah kunin na bia tu uh hi.

⁶Kun in a bia ngawl peuma sia, thakhat thu in meiphual sung denna kinei tu hi,” ci hi.

⁷Tuabangin, minam theampo, minam tuatuamte le pau nam tuatuamte in tum thei a nging awte a zaak pawpo uh ciang, kunin Nebuchadnezzar phu sa kham milim bia uh hi.

Daniel ii Lawmte Thum Thu ni ngawlin Kimawsiat

⁸Tuasia ciang Babylon mite pawlkhat in Jew mite a siat son natu hunpha khat nga uh hi.

⁹Amate in Nebuchadnezzar kumpipa tungah, “Kumpipa awng, nungta tawntung tan!

¹⁰Tum theite hong kitum pawpo ciang, mihing theampo kunin kham milim bia tu le

¹¹tua milim mai ah kun ngawlin a bia ngawl peuma meiphual sungah kibum tu hi ci in nangma Kumpipa in thu na pia zo hi.

¹²Babylon ngam khen uk tu a na koi nangma Kumpipa ii thu a ni ngawl Shadrach, Meshach le Abednego a kici Jew mi pawlkhat om hi. Amate in na pathian le bia ngawl na phu sa milim mai ah la kun ngawl uh hi,” ci uh hi.

¹³Tua ahikom kumpipa a thin uuk mama a, tua mihing thumte a mai ah a kipuak natu in thupia hi.



¹⁴Kumpipa in amate tungah, “Shadrach, Meshach le Abednego awng, ka pathian bia nuam ngawl a, ka phu sa kham milim mai ah kun nuam ngawl hong kici sia a maan ma a hi nam?

¹⁵Tua ahi ciang tu in lemlete, bajate, tamngaite, zitherste, tengtongte le tum thei tuatuam theampote ii aw na zaak po uh ciang kun in tua milim bia vun. Na bia bua uhle, thakhat thu in a lingh mama meiphual sungah hong kithut tu hi. No hong hun zo tu pathian khat pawpo om tu in um nu ziam?” ci hi.

¹⁶Shadrach, Meshach le Abednego in, “Kumpipa awng, hi thu hong zo kik ngawl tu khu hi.

¹⁷Ka biak ka paai uh Pathian in meiphual sung pan le na khut sung pan in hong hun nuam le hong hun thei tu hi.

¹⁸Ahizong hong hun bahial zong Kumpipa awng, na pathian ka bia tuan buatu uh a, na phu sa na kham milim mai ah zongh ka kun buatu uh hi, cisia hong heaksak khol tan” ci in zo uh hi.

Daniel ii Lawmte Thum Thalup tu Thu Kikhen

¹⁹Tuaciang Nebuchadnezzar Kumpipa in Shadrach, Meshach le Abenego tungah a thin uuk mama a, a mai san liang hi. Tua ahikom ama in a sat ngeina sang a sali vei in meiphual a satsak zawk natu in a mite thupia hi.

²⁰Tuaciang ama in a mite sung pan a thahat belte in hi mihing thum teng sawmcip in a lingh mama meiphual sungah vawk tu in thupia hi.

²¹Tuaciang amate in tua mihing thumte sia laktong le puantual silh sa le lukhu khu sa in sawmcip uh a, a lingh mama meiphual sung denna in nei uh hi.

²²Tu in, kumpipa in meiphual a sat mama natu in ngat takin thupia ahikom tua mihingte thum meikuang sungah a bum ngalkapte sia meikuang in zaaplum hi.

²³Tuaciang Shadrach, Meshach le Abednego sia heencip sa in a lingh mama meikuang laizang ah taaksuk hi.



²⁴Nebuchadnezzar sia lamdang sa in ding vat hi. Ama in a ngam uliante tungah, “Mihing thumte heencip in meiphual sungah khia zo hi ka na ngawl hi ziam?” ci in dongh hi. Amate in, “Hi hi, Kumpipa awng,” ci in zokik uh hi.

²⁵“Tua ahile banghangin meikuang sungah mihing li kot vavaa in mu khi ziam? Amate kiheencip ngawl a, liam zongh liam tuak beak ngawl uh hi-tuaciang a lina pa sia vantung lalang khat taw kibang hi” ci in dongh hi.

Tua Mihing Thumte Kisuatak a, Za Khanna Kipia

²⁶Tuaciang Nebuchadnezzar sia meiphualpi kongkha kungah paito a, “Shadrach! Meshach! Abednego! A lianbel Pathian ii naseamte awng, hong pusuk tavun!” ci in sam hi. Tuaciang amate thakhat thu in pusuk uh hi.

²⁷Kumpipa tapate, ngamukte, ngam uk zomte le kumpi ngam uliante theampo in mei ii kak ngawl mihing thumte en tu in hong kikhawm uh hi. Amate a sam zongh kaang ngawl, a puante zongh kaang ngawl a, meikhu ngim zongh nam ngawl uh hi.

²⁸Kumpipa in, “Shadrach, Meshach le Abednego ii Pathian pok vun. Ama in a vantung lalang sawl a, ama muangin, ama na a seam hi mihingte suatak hi. Amate in ka thupiakte ni ngawlin amate ii Pathian sim ngawl pathian dang mai ah kunin a biak tu sangin a nuntak nate khaam zaw uh hi.

²⁹“Tuaciang tu in minamte, minam tuatuamte, pau nam tuatuamte sung pan khat pawpo in Shadrach, Meshach le Abednego ii Pathian sonsiatna kampau a om le a khut a peang kithiaktan tu a, a innte nin kholna kisuaksak tu hi, ci in thu ka pia hi. Hi bangin a suatak thei Pathian dang om ngawl hi,” ci hi.

³⁰Tuaciang kumpipa in Shadrach, Meshach le Abednego sia Babylon ngamke sungah a za uh khangsak hi.

Daniel 4

Nebuchadnezzar ii A nii veina A mang Mat

¹Nebuchadnezzar Kumpipa in leitung ah a om ngam minam theampote, minam tuatuamte, pau nam tuatuam a paute theampo tungah a nuai a thute puak hi: “Kong nukset hi!



- ²A lianbel Pathian ii ka tungah hong lak lim le a lamdang thute ngai vun.
- ³“Pathian ii eite hong lak nalamdangte lian lawlawm hi! A vawt nalamdangte vaanglian lawlawm hi! Pathian sia a tawntungin kumpi hi a, ama in a tawntungin uk tu hi.
- ⁴“Keima in kumpi inn sungah ka teang hiithiat a, nuamsa mama in ka om hi.
- ⁵Ahitazong a patau huai mang khat ka manh a, ka mutthip laitak in a lau huai mu kholnate ka mu hi.
- ⁶Ka mang khiakna hong son thei tu in, Babylon ngam sung kumpi thudokte theampo ka kungah hong pai natu in thu ka pia hi.
- ⁷Tuaciang aisaan theite, mitbum thiamte, khangneite le aksi enthiante theampo kisam a, amate tungah ka mang ka son hi, ahizong amate in a khiakna hong son thei bua uh hi.
- ⁸Tuaciang Daniel (a min dang Belteshazzar, ka pathian min a kitap pa) hong tum hi. A thiangtho pathiante ii thaa sia ama sungah om ahikom, ama tungah ka mang ka son hi. Ama tungah:
- ⁹Aisaante sung pan a lianbel, Belteshazzar awng, a thiangtho pathiante ii thaa sia na sungah om in thuthuk theampo na heak thei hunlam ka he hi. Hi sia in ka mang hi. A khiakna hong son tan.
- ¹⁰“Ka mut ciik laitakin leitung laizang ah thingkung lian mama khat mu kholna ka nei hi.
- ¹¹Tua thingkung sia van a phak dongin khang vaial khang vaial a, leitung mihing theampo in mu thei uh hi.
- ¹²A teete limci mama a leitung bup ii khamkhop tu za in a nga nga hi. Ngamsate in a lim beahin, vacimte in a baak tungah bu tom uh a, nuntakna nei a minpiang theampo in a nga ne uh hi.
- ¹³“Ka mu kholna thu ka ngaisut laitakin a khua phawk vilvel a pilvang vantung lalang khat vantung pan hong tuaksuk ka mu hi.



¹⁴Ama in ngingin au a, ‘Tua thingkung phuktan in a, a baak teng saattan in, a tee teng heu thiang in a, a nga thethaang in. A nuai a nganhing teng le thingbaak tungah vacim teng bengkeak in.

¹⁵Ahizong a bul sia thik le taungo kual taw khit in lei ah nusia in. Tua mun dui sungah lopa taw nusia in. “ ‘Tu in hisia pa tungah daaitui kia taken a, ama in nganhingte le thingkungte taw teangkawm taken.

¹⁶Ama in kum sali sung mihing ngaisutna nei ngawl tu a, ahizong nganhing ngaisutna nei tu hi.

¹⁷Hi thu sia a pilvang le a phawk vilvel vantung lalangte ii thukhenna ahi hi. Tua ahi ciang mun theampo ah om mihing theampo in, A lianbel Pathian in leitung mite ii kumpi ngam sungah thu nei a, ama ii teal pawpo mihing thupi ngawl bel ngangawn zongh kumpi suaksak thei hi ci thu he taken, ci in taangko hi.’

¹⁸“Ka mangmat sia hi bang hi,” Nebuchadnezzar kumpipa in ci hi, “Tu in Belteshazzar awng, a khiakna hong son tan. Ka kumpi thudokte kuama in hong son thei ngawl hi. Ahizong nang sungah a thiangtho pathiante ii thaa om ahikom nong son thei hi,” ci hi.

Daniel in tua Mangkhia

¹⁹Tuaciang Belteshazzar zongh a kici Daniel lau mama ahikom bangma pau thei ngawl hi. Kumpipa in ama tungah, “Belteshazzar awng, tua mang le a khiakna in lausak heak in,” ci hi. Belteshazzar in, “Kumpipa awng, mang le a khiakna sia nang tungah hong tung ngawlin na ngalte tungah tung zaw le ka oai hi.

²⁰A saang mama van a ban thingkung sia leitung mihing theampo in mu thei uh hi.

²¹A teete limci mama a, leitung bup a vaak khom zo tu in a nga nga hi. Ngamsate a nuai ah tawlna in, vacimte a baak tungah bu tom uh hi.



²²“Kumpipa awng, nangma in a saang a thahat thingkung na hi hi. Khangto in lian mama na hikom vantung na baan to a, na vaangletna sia leitung buppi ah kizel hi.

²³Kumpipa nangma in na et laitakin, vantung lalang khat vantung panin hong tuaksuk a, ama in ‘Thingkung phuk in a, usia cip in, ahizong lei sungah a bul usia in. A bul ah thik le taungo kual vial in a, dusing lopate taw usia khawm in. Hisia pa tungah daaitui kia taken a tua munah kum sali sung nganhingte taw teang taken.’ ci hi.

²⁴“Kumpipa awng, a khiakna sia hi bang hi a, A lianbel Pathian in nang tungah hong tung tute hong lakna ahi hi.

²⁵Mihingte sung panin hong kihawlkeak tu a, ngamsate taw na teang khawm tu hi. Khuita bangin kum sali sung lopa ne in dui sungah na mu tu a, na tungah daaitui hong kia tu hi. Tuaciang A lianbel Pathian in leitung kumpi ngam uk tu a, ama teal pawpo kumpi suak hi ci sia na saang tu hi.

²⁶Vantung lalangte in lei sungah tua thingbul a ki nusiati natu in thupia hi. Ta sia in, Pathian in leitung theampo uk hi ci in, na heak ciang kumpi na sua kik tu hong sonna ahi hi.

²⁷Tua ahiciang kumpipa awng, kong thuhilna hong ni tan. Mawna vawt nawn heak in a, a maan in ngamta in, a zawnge hesuak in. Tua hile na nuamsa tato tu hi,” ci in zo hi.

²⁸Hi thu theampo Nebuchadnezzar Kumpipa tungah tung siat hi.

²⁹Tha sawm le tha nii zawk bek ciang, ama in Babylon a kumpi innkhuvum tungah a va kawkoai kawmin,

³⁰ama in, “En vun, Babylon khua bangza ta lian ziam! Ka vaangletna, ka thahatna, ka minthanna le ka letnate lak natu in ka khuapi in ka sa hi,” ci hi.

³¹A pau zongh khuangkhem ngawl lai in, vantung pan aw khat hong nging a, “Nebuchadnezzar kumpipa awng, ka thu son ngai in! Na kumpi vaangletna sia tu in na tung pan hong kilaaksak hi.



³²Nangma sia mihing dinmun pan hong kibeng tu a, ngamsate taw teang khawmin, khuital bangin kum sali sung lopa na ne tu hi. Tuaciang, A lianbel Pathian in mihingte ii kumpi ngam uk a, a dei pawpo sia kumpi suaksak thei ahi hunlam na he tu hi,” ci hi.

³³Hi kammalte tangtung pai hi. Nebuchadnezzar sia mihing dinmun pan kibengkeak a, khuital bangin lopa ne hi. A pum tungah daaitui kia in a mul sia muvanlai mul za in sau a, a khutcinte sia vacim peangcin za sau hi.

Nebuchadnezzar in Pathian Pok

³⁴Kumpipa in, “Kum sali a cin zawk ciang vantung ka ento a, ka thin hong ciim kik hi. A lianbel Pathian ka pok a, a nungta tawntung pa tungah upatna le minthanna ka pia hi. “Ama in a tawntungin uk tu a a ngam sia kip tawntung tu hi.

³⁵Ama in leitung mite bangma in a sim bua a; vantung mite le leitung mite ama in uk hi. Ama deina kuama in nial thei ngawl a, a vawt nate kuama in dongh thei ngawl hi.

³⁶“Ka thin a ciim kik ciang ka kumpi za, ka minthanna le ka ngam minthannate hong kipia kik hi. Ulian ka mite le ka thudok mipilte in hong muak uh a, nidang sangin a lianzaw minthanna le ka kumpi za hong kipia kik hi.

³⁷“Tu in Keima Nebuchadnezzar in Vantung Kumpipa pok in, upat in, a min ka thangsak hi. Ama ii a vawt theampo thumaan thutang hi a, ama in a ki phasak a, a ngamta pawpo kiniam khiak sak thei hi,” ci hi.

Daniel 5

Belshazzar ii Anneak Poai

¹Zan khat Belshazzar Kumpipa in anneak paoipi khat vawt a, uliante tulkhath samin zu nekhawm uh hi.

²Zu a neak laitakin a pa Nebuchadnezzar ii Jerusalem Biakinn pan a laak kham hai, ngun haite le kuangte sungtan pui tu in thupia hi. Kumpipa in ama



le a uliante, a zite le a zinote taw zu a neak thei natu in tua haite la in a sawl ahi hi.

³Thakhat thu in khamhaite le kuangte kitumpui a, a vekpi in tuate taw zu ne in

⁴kham, ngun, taungo, thik, thing le suang taw a kivawt pathiante pok uh hi.

⁵Thakhat thu in mihing khut khat kilangh a kumpi innsung meiinnte kung pan mei a taang belna pang tungah lai at hi. Kumpipa in lai a at tua khut mu hi.

⁶Kumpipa lau mama in, a mai daang a, a khup liing tu kipan hi.

⁷Ama in mitbum thiamte, aisaan thiamte le aksi enthiante sam tu in mihing pawlkhat oksan hi. Tua mihingte hong thet ciang, kumpipa in amate tungah, “Hi lai a sim thei, a khiakna hong son thei pawpo sia kumpi puantual sannum kisilhsak tu a, minphatna khamkhi a ngawng ah aw in kumpi ngam sungah a zalian a thumna in ka koi tu hi.” ci hi.

⁸Kumpipa thudok mipilte theng uh a, ahihang lai ki at sia a sim thei le kumpipa tungah a khiakna a son thei kuama om ngawl hi.

⁹Belshazzar Kumpipa sia a thin ngimna taw in a mai daang vaial a, a uliante in a ci a law he ngawl hi.

¹⁰Kumpipa ii nu in kumpipa le a uliante ngamlum lialuana aw za a an neakna khan sungah tum hi. Ama in, “Kumpipa awng nungta tawntung tan! Hi bangin thin ngim le maidaang in om heak in.

¹¹Na ngam sungah a thiangtho pathiante ii thaa a nei mihing khat om hi. Na pa kumpi ahi lai in, hi sia pa in, pathiante ii ciimna taw kibangin ciimna, heakna le ngaisut pilna nei hi. Tuaciang na pa, Nebuchadnezzar Kumpipa in ama sia aisaan thiamte, mitbum thiamte, mibum theite le aksi enthiante ukpi tu in koi hi.

¹²Ama in ngualdang taw kibang ngawlin, hi theina nei a, ciim in, mang khiak thei pilna, thu dokna a haksa nanote zo theina le thuthukte sontel theina nei



hi; tua ahikom kumpipa in Belteshazzar ci a, a min a phua pa Daniel sam in, tua hile ama in hite theampo ii khiakna hong son siat tu hi,” ci hi.

Daniel in A ki at Lai ii Khiakna Son

¹³Daniel sia thakhat in kumpipa kungah kipaipui a, kumpipa in Daniel tungah, “Judah ngam pan ka pa, kumpipa ii hong ciapui Judah salte sung pan Daniel na hi nam?

¹⁴A thiangtho pathiante ii thaa sia na sungah om a thiamna, heakna le ciimna na nei hunlam ka za hi.

¹⁵Hi lai at sim tu le a khiakna son tu in thudok mipilte le mitbum thiamte hong kipaipui napi amate in a khiakna he zo ngawl hi.

¹⁶Nangma in a khiakna kiphualsealte le thuthukte son thei hi, ci in tu in ka za zo hi. Hi lai ki at sia na sim thei a, a khiakna nong son thei le, kumpipa puantual san hong kisilhsak tu a, minphatna khamkhi na ngawng ah aw in, kumpi ngam sungah a zalian a thumna na hi tu hi.” ci hi.

¹⁷Daniel in, “Na letsongte nangma atu keam po in, ahibuale ngualdang khat po pia in. Kumpipa awng, lai ki at sia kong sim tu a, a khiakna kong son tu hi.

¹⁸“A lianbel Pathian in na pa Nebuchadnezzar sia kumpi lian khat in koi a, zatakna le vaangletna pia hi.

¹⁹Ama sia lian mama ahikom ngam theampo, minam theampo, pau nam theampote in ama kiita in liing uh hi. Mihing khat pawpo a thatlum nuam le thatlum a, a nungtasak nuam le nungtasak hi. Ama in a upat nop pawpo upat a, a mai mawlsak nop pawpo maimawlsak hi.

²⁰Ahizong ama sia kiphasak, thinpui, ngilo ahikom a kumpi tokhum pan kinot a, a minthanna taan hi.

²¹Ama sia mihing dinmun pan kihawlkeak a, nganhing ngaisutna hong nei hi. Ama ngam laate taw teangkhawm in, khuital bangin lopa ne a, daaitui dal tu nei ngawlin a pua sangah lum hi. A lianbel Pathian in mihingte ii kumpi



ngam theampo uk a, ama ii dei pawpo tungah tua ngamuknate pia thei hi ci sia a khak belin ama in phawk hi.

²²“Ahihang nangma, a tapa in, hi thu theampo he hi napi na kiniamkhiak bua hi.

²³Vantung Topa na langpan a, a Biakinn pan na laak haite kuangte nong paipui hi. Nangma, na uliante, na zite le na zinote in tua haite taw zu ne in, kham, ngun, taungo, thik, thing le suang taw a kivawt khua mu thei ngawl, khua za thei ngawl a, bangma a he ngawl pathiante na pok uh hi. Ahitazong na thi na nun tu hong khensat a, na sep na vawt theampo hong uk Pathian na upat bua uh hi.

²⁴Tua hu in Pathian in hi kammalte at tu in tua khut sawl hi.

²⁵“Tua a ki at kammal in hi bang ahi hi: ‘Sim, sim, khaitee, kikhen.’ (MENE, MENE, TEKEL, U-PARSIN) ahi hi.

²⁶A khiakna in hi bang ahi hi: ‘Sim’ ii a khiakna in Pathian in na ngam uk hunte hong simsak zo a, a hun bo zo hi;

²⁷‘Khaitee’ ii a khiakna in nang sia toaitee na tungah hong kitee zo a, zaang lei in hong kimu hi.

²⁸‘Kikhen’ ii a khiakna in na ngam kikhentham a Medes le Persia mite tungah kipia zo hi,” ci hi.

²⁹Thakhat ma in Belshazzar in Daniel sia kumpi puantual sannum silhsak tu le minphatna khamkhi a ngawng ah awsak tu in a naseamte thupia hi. Tuaciang ama in Daniel sia a ngam sungah zalian a thumna in koi hi.

³⁰Tua zan mama in Babylon kumpipa Belshazzar sia kithatlum a,

³¹tua laitak kum sawmluk le kum nii a pha Medes mi Darius in kumpi za la hi.

Daniel 6

Tawpite khuk sungah Daniel



- ¹Darius in a ngam sung theampo uk tu in ngam ukpi, za le kul koi tu in khensat hi.
- ²Tua ukpите a lampui tu le kumpipa deina bang a seam tu in Darius in Daniel le a dang mihing nii teal thua hi.
- ³Daniel sia ngam ukpi dangte le vaihawmpite dangte sangin nasep thiam pal zaw hi. Ama sia pil mama ahikom kumpipa in a ngambup uk tu in koi tu in ngaisun hi.
- ⁴Tuasia ciang vaihawmpite dangte le ngam ukpi tengin Daniel ii ngam uk nasepna encik a, a khialna zon tu hanciam uh hi. Ahihang Daniel sia a thumaan le a ciitak khat ahikom amate in a khialna le a thumaan ngawlmu zo ngawl uh hi.
- ⁵Amate khat le khat kikum uh a, “Daniel sia a biakna taw kisai mawsiat natu thu ih mu buale mawsakna tu thudang ih mu buatu hi,” ci uh hi.
- ⁶Tuaciang amate kumpipa taw kimu tu in pai uh a, “Darius Kumpipa awng, nungta tawntung tan!
- ⁷Na ngam sungah naseam koma vaihawmpite, Thudokte, ngam ukpите, ngam ukpi zomte le a dang uliante theampo in kumpipa in ngat tak a zui tu thukham khat nong vawt tu in thukim zo khu hi. Tu zo ni sawmthum sung teng kumpipa nang kung sim ngawl, pathian kungah ahizong, mihing khat pawpo kungah ahizong thungen om thei ngawl tu hi, ci in khaam in. Hi thukham a paltan peuma tawpi a dim a kikhum khuk sungah kivawk tu hi.
- ⁸Tua ahiciang kumpipa awng, hi thukham lai hawm in a, a tungah na min thu in. Tua hile tua lai sia a kikheal thei ngawl Medes le Persian thukham suak tu hi,” ci uh hi.
- ⁹Tuasia bangma in Darius Kumpipa in thukham tungah a min thu hi.
- ¹⁰Kumpipa thukham sia kumpipa in a min thu zo hi, ci thu Daniel in a heak ciang a inn ah cia hi. A inn dawltung a khaan khat sungah Jerusalem khuasang a maingat khelki te om hi. Tua munah, a vawt ngei sa tawntung



bangma in, khelki kihong te ah khupdin in ni khat sung thumvei Pathian tungah thungen hi.

¹¹Daniel ii a ngalte in Pathian tungah Daniel thunget a mu uh ciang,

¹²a vekpi in Daniel mawsak tu in kumpipa kungah pai uh hi. Amate in, “Kumpipa awng, tu zo ni sawmthum sung kumpipa kung simngawl, pathian kung ahizong, mihing khat pawpo kung ahizong thungen a om le tawpi a dim a, a kikhum khuk sungah kikhia tu hi ci in thukham sungah na min na thu zo hi,” ci uh hi. Kumpipa in, “Hi hi, tua in, a kikheal thei ngawl a ngat Medes le Persiate thukham khat ahi hi,” ci in zokik hi.

¹³Tuaciang amate in kumpipa tungah, “Judah salte khat ahi Daniel in kumpipa nangma hong zakta ngawlin, na suasak thukham sia ni ngawl hi. Ama in ni khat sung thumvei peal ngawlin thungen hi,” ci uh hi.

¹⁴Kumpipa sia hi thu a zaak ciang a thin nuam ngawl a, Daniel a suatak thei natu lam zongin nitum dong khua ngaisun hi.

¹⁵Tuaciang tua mihingte kumpipa kungah pai kik a, ama tungah, “Kumpipa awng, nangma in Medes le Persiate upadi bangin kumpipa ii thu piak sa sia kikheal thei ngawl hi ci thu na he hi,” ci uh hi.

¹⁶Tuasia ciang kumpipa in Daniel sia tawpi a dim a kikhum khuk sungah paipui in a khiak natu in thupia hi. Kumpipa in Daniel munah, “Maan tak a na biak na Pathian in nang hong suatak taken,” ci hi.

¹⁷Kuama in Daniel a suataksak thei ngawl natu in suangtum khat taw tawpi khuk vang khakin, kumpipa min thuna tazeik le uliante min thuna tazeik taw tua suangtum khen uh hi.

¹⁸Tuaciang kumpipa a inn ah cia kikin tua ni zan in mittang khat zongh si ngawl, an la ne ngawl, nopna vawt ngawlin om hi.

¹⁹Zingsang khuavak tuungin kumpipa tho in, tawpi khumna khuk ah pai hi.



²⁰Tua mun a thet ciang, “A nungta Pathian ii naseam Daniel awng, thumaan tak a, na biak na Pathian in tawpi kam sung pan hong hun thei ziam?” ci in patauna taw biakpui hi.

²¹Daniel in, “Kumpipa awng, nungta tawntung tan!

²²Tawpите in kei hong liamsua ngawl natu in Pathian in tawpi kamte a humcip tu in a vantung lalang sawl hi. Kumpipa awng mawna ka nei ngawl hunlam le nang tungah kong khial ngawl hunlam Pathian in he a hikom hi bangin vawt hi,” ci in zo hi.

²³Kumpipa lungdam leilam a, tawpите khumna khuk sung pan Daniel a ki kaito natu in thupia hi. Tuabangin Daniel kaito uh a, liamna a nei vet ngawl hunlam mu uh hi, banghangziam cile ama in Pathian muang hi.

²⁴Tua zawkciang kumpipa in Daniel a mawsak mihingte theampo man tu in thupia a, a zite le a tate taw tawpi taw kidim khuk sungah khiasak hi. Khuk taw a thet maa ngangawn in, tawpi te in amate mat khat sua in a ngu a taang theampo duangleam hi.

²⁵Tuaciang Darius Kumpipa in leitung a om minam theampote, minam tuatuamte le pau nam tuatuamte tungah laithak a, “Kong nukset hi!

²⁶Ka ngam sung a om mihingte theampo in Daniel ii Pathian a kiitak natu le a zatak natu in thu ka pia hi. “Ama in a nungta Pathian hi a, a tawntungin uk tu hi. A ngam kisia ngei ngawl tu a, a vaangletna bo ngei ngawl tu hi.

²⁷ Ama in ngum in suatak a, vantung le leitung ah a lamdang le nalamdangte vawt hi. Ama in Daniel sia tawpите kamsung pan suatak hi,” ci hi.

²⁸Daniel sia Darius ii maan hun sung le Persia mi Cyrus ii maan hun sungin nuamsa hi.

Daniel 7

DANIEL IN A MUKHOL NATE SON

(7.1-12.13)

Daniel ii Nganhing Lite A mu kholna



¹Belshazzar ii Babylon kumpi a sep a kum khat kumin mang khat ka man a zanin mu kholna khat ka mu hi. Ka mang mat sia lai taw ka at a, tua zan a ka mu sia ka tepteena in

²hi bang ahi hi: Mun theampo pan hui hong va a, tuipi mai seam ngawp hi.

³Tuipi sung pan nganhing lian li pusuak a, khat le khat kibang ngawl hi.

⁴A masa bel sia tawpi taw kibang a, ahizong muvanlai khat bangin tha nei hi. Ka et laitakin a thate tong hi. Tua nganhing sia ki laamto in mihing bangin kiding tosak hi. Tuaciang ama sia mihing ngaisutna kipia hi.

⁵A niina nganhing sia a nung peangte taw a ding vompui khat taw kibang hi. Ama in a hate taw telngu thum pu a, awnging khat in ama tungah, “Tho in sa na neak zawk zaza ne in!” ci hi.

⁶Ka et laitakin pawlbeam taw a kibang nganhing khat kilangh a, ahizong a nungzaang ah vacim tha taw a kibang tha li om in lutang li nei hi. Thu nei mama khat in kimu hi.

⁷Ka et lalai le, nganhing a lina kilangh hi. Ama sia vang nei a lauhuai in kiitak huai hi. A mat sate sia a thik ha lian taw khimtham in tua zawkciang tuancil hi. Nganhing dangte taw kibang ngawlin, ama in kii sawm nei hi.

⁸Tua kiite ka et laitakin, a dang kiite sungah kiino khat hong poto ka mu hi. Tua kiino in tua munah a om sa kii thumte phulkeak hi. Hi kii in mihing mittangte le kiphatsak mama na kam a pau kam khat nei hi.

A tawntung A nungta khat ii Mu kholna

⁹Ka et laitakin kumpi tokhumte hong kiko i hi. A nungta tawntung mihing khat sia tua kumpi tokhumte khat tungah to hi. A puante vuuk bangin paak a, a sam sia tuumul taw kibang hi. Meikuang leangmui tungah a kinga a kumpi tokhum sia, meikaang a,

¹⁰tua mun panin meikuang a kipee in hong puasuak hi. Ama ii naseam tu in mihing tul tam mama tua munah om a, ama mai ah mihing mak tam mama ding uh hi. Thukhen natu hun kipan a, laibute kihong hi.



¹¹Ka et laitakin tua kiino ii kiphatsakna kam a papau ka za thei lai hi. Ka et lalai ciang nganhing a lina sia kithatlum a, a luang sia meikuang sungah kivawk in kisucip hi.

¹²Nganhing dangte ahile a vaangletna kilaaksak a, ahizong a nuntak lai natu hun ciangtan khat kipia hi.

¹³Hi mu kholna ka mu ni zanin mihing taw a kibang khat ka mu hi. Ama sia meeikaai in kiim uum in ka kung hong neak a, tuaciang a nungta tawntung pa kung zuanin tua pa taw kimu hi.

¹⁴Mi namcinte, minam tuatuamte, pau nam tuatuam paute theampo in ama ii na a sep natu in ama sia thu neina, upatna le kumpi vaangletna kipia hi. A thu neina in a tawntungin kip tu a, a kumpi ngamukna bo ngei ngawl tu hi.

Mu kholnate A Khiakna Kison

¹⁵Ka mu kholnate in hong patausak a, ka thin ngim mama hi.

¹⁶Tua munah a ding mihingte khat kungah ka pai to a, hite theampo ii khiakna hong son natu in ka dongh hi. Tuaciang ama in a khiakna hong son hi.

¹⁷Ama in, “Hi nganhing lian lite sia leitung ah a piang tu kumpi ngam lite ahi hi.

¹⁸Tuaciang A lianbel Pathian ii mihingte in kumpi vaangletna nga tu a, a tawntung a tawntungin keam tu uh hi,” hong ci hi.

¹⁹Tuaciang a dangte taw kibang ngawlin kiitak huai mama a, a mat sate sia a taungo peangcin le a thik ha taw balneen in a tuancil nganhing a lina ii thu sia ka he nuam kan lai hi.

²⁰A lu tung a om kii sawmte ii thu le a zawkciang hong poto a, kii thumte a pukvawksak kii sia ii thu ka he nuam hi. Ama in mittangte le kam khat nei a, kiphatsak mama na kam pau hi. Ama sia a dangte khat pawpo sangin kiitak huai zaw hi.

²¹Ka et laitakin, tua kii in Pathian ii mihingte do in zothal hi.



²²Tuaciang a nungta tawntung mihingpa hong pai a, A lianbel Pathian ii mihingte ngumin thu khen hi. Pathian mihingte ii kumpi vaangletna a nga natu hun hong theng zo hi.

²³Hi sia keima tungah hong kison a khiakna ahi hi: “Nganhing lina sia leitung ah a om tu kumpi uk ngam lina hi a, kumpi uk ngam dangte theampo taw kilamdang tu hi. Ama in leitung buppi sutham in tuancil tu hi.

²⁴Kii sawmte sia tua kumpi ngam uk tu kumpi sawmte hi. Tuaciang kumpi dang khat hong piang tu a, ama sia a om masate taw kilamdang mama tu a, kumpi thumte lawnthal tu hi.

²⁵Ama in A lianbel Pathian sia sonsia tu a Pathian ii mihingte vawtsia tu hi. Ama in amate ii biakna taw kipawl thukham le poi vawtna hunte khealsak tu in hanciam tu a, Pathian ii mihingte sia ama ii khut sungah kum thum le kumlang om tu hi.

²⁶Tuaciang vantung thukhenna om tu a, ama vaangletna laaksakin, ama sucip dipdeap tu hi.

²⁷Leitung kumpi uk ngam theampo ii vaangletna le letna sia A lianbel Pathian ii mihingte tungah kipia tu hi. Amate kumpi vaang sia bo ngei ngawl tu a, leitung ukna za a neite theampo in amate thu ni in a na seam tu uh hi,” hong ci hi.

²⁸Hi sia, thu teptena ii tawpna ahi hi. Ka lau mama hu in ka mai daang a, thu theampo keima thin sung bekah ka koi hi.

Daniel 8

Daniel ii Tuutal khat le Keal khat A mu kholna

¹Belshazzar kumpi a sua zawk a kum thum kumin a nii veina mu kholna ka nei hi.

²Ka mu kholna sungah thakhat in Elam ngamkhen sung a ki uumcip Susa khuapi sungah keima le keima ka kimu hi. Keima sia Ulai ngunhui ah ka ding a,



³tua ngunhui ah kiisau nii a nei tuutal khat ka mu hi; a kii khat sia a dang sia sangin sau zaw in thak zaw hi.

⁴Tua tuutal in a kiite taw, nitumna sang,saksang le thangsang a sik kawkoai sia ka en hi. Nganhing dangin tho zo ngawl a, a khut sung pan suakta zo ngawl hi. Ama sia a uk bang po ngamta in kisathei hi.

⁵Bang a ci nopna ahi tam maw ci in lungmang a ka om laitak, nitumna sang pan keal khat hong tai vingveng a, a tai ngang mama ahikom a peang in lei zongh pha ngawl hi. Ama in a mitte kilaklaw ah a kician mama kii khat nei hi.

⁶Ama in ngunhui ah a ding ka mu tuutal sangah pai in, a tha nei zaza taw tuutal sii hi.

⁷Keima in tuutal a sik ka en hi. Ama sia a thin uuk mama ahikom, tua tuutal sii ngawp in, a kiite nii taltansak hi. Tuutal in a nan zawk natu thangui thatang nei ngawl hi. Ama sia lei denna in kinei a, kituancil in, a hun zo tu kuama om ngawl hi.

⁸Tua keal sia kisathei vaial a, ahizong a thahat bel laitakin a kii taltan hi. Tua a kii pona munah a kician mama kii li poto a, tuate in mun tuatuam tek kawkh uh hi.

⁹Tua kii lite sung pan, khat sung pan kiino khat po a, a vaangletna in thangsang le nisuana sang le Kamciamna Ngam sangah ngam keak hi.

¹⁰Ama sia vantung ngalkapte, aksite mama do zawk natu in thahat a, pawlkhatte leitung ah lawn suk in tuancil hi.

¹¹Ama in vantung ngalkap Maangpipa ngangawn langpan in ama tungah nisim a kipia biakpiaknate khaamin Biakinn usia hi.

¹²Tua munah nisim biakpiakna a piak luangin mihingte in khialna vawt uh a, biakna maan sia lei ah lawnthal uh hi. Tua kii in a sepna theampo ah maa tun hi.



¹³Tuaciang vantung lalang khat in a dang khat ii munah, “Mu kholna sung a a kimu hi thute bangtan vei khua ngei lai tu ziam? A kiihuai khialna in nisim biakpiaknate bangtan vei khak tu ziam? Vantung ngalkapte le Biakinn sia bangtan vei kituancil tu ziam?” ci in a dok ka za hi.

¹⁴A dang vantung lalang in, “Ni 1150 ngei tu a, tua hun sungah nitak le zingsang biakpiakna kivawt ngawl tu hi. Tuasia zawkciang Biakinn sia a ngeina bangin kipua kik tu hi,” ci in a zokikna ka za hi.

Vantung lalang Gabriel in Mu kholna ii A Khiakna son

¹⁵Mu kholna ii a khiakna tel nuam a ka hanciam laitak, tha khat thu in ka mai ah mihing khat hong ding hi.

¹⁶Ulai Ngun ngal pan bia puina aw khat ka za a, “Gabriel awng, ama ii mu sia ii a khiakna ama tungah son in,” ci hi.

¹⁷Gabriel hong pai in ka kungah hong ding a, lau mama ka hikom lei ah ka puk hi. Ama in kei tungah, “A thi thei mihing awng, a khiakna tel in. Na mu kholna sia leitung bo natu thu taw kisai hi,” hong ci hi.

¹⁸Ama ii thu a son laitakin butthi in lei ah ka puk hi. Ahihang ama in hong phong to a hong dingsak kikin,

¹⁹ama in, “Pathian thin uukna hangin hong piang tu thute kong lak hi. Mu kholna in hun bo natu lakna ahi hi.

²⁰“Kii nii a nei tuutal na mu sia Media le Persia kumpi uk ngamte ci nopna ahi hi.

²¹Keal sia Greece kumpi uk ngam ci nopna hi a, a mitte kilaklaw ah a po a kician kii sia kumpi masa bel ci nopna ahi hi.

²²A kii po masa bel sia a tal zawkciang a po kii lite sia, a kikhen zawkciang hong piang tu kumpi ngam li a ci nopna ahi hi. Ahihang tua ngam lite sia a masa bel kumpi uk ngam za in thahat ngawl tu uh hi.

²³“Tua kumpi ukna ngamte a bokuan ciang ngilo mama uh ahikom amate daan kipia tu hi, tuaciang ama thu bek thu a sa, siatna nguicing a vawt le ngual theam thei kumpi khat piang tu hi.



²⁴Ama a thahat tu a, ahihang ama ii thahatna hi ngawl tu hi. Ama in a lauhuai siatna piangsak tu a, a sep theampo zo tu hi. Ama in mihing thahatte le Pathian ii mihingte susia tu hi.

²⁵Ama sia thimthel pil ahikom ngual theamna taw in a maa tun tu hi. Ama kiphasak tu a, hil khol ngawlin mihing tam mama susia tu hi. Ama in kumpite sung pan a lianbel Kumpipa ngangawn langpan tu a, ahihang mihing thahatna zangh ngawlin ama ki susia tu hi.

²⁶Nitak le zingsang biakpiakna thu taw kisai a, nang tung hong kison sa hi mu kholna tangtung tu hi. Ahihang hi mu kholna thu a tangtun tu hun khua ngei lai tu ahikom tu in thuku in koi in,” hong ci hi.

²⁷Ka thin ngim in ni tam ma ka cina hi. Tuaciang thoto in kumpipa hong sawl ka nasep ka seam kik hi, ahihang ka mu kholna in ka lung hong mangsak a, ka teal zo bua hi.

Daniel 9

A Mite atu Daniel Thungen

¹Xerxes ii tapa, Mede mi Darius in Babylon ngam uk hi.

²Ama kumpi sua a kum khat kumin keima Daniel in a thiangtho laibute simin Topa ii kamsang Jeremiah tungah a son kum sawmsali sung Jerusalem kisia tu hi, a ci sia thu ka ngaisun hi.

³An tangin, khau-ip puan silh in vut sungah to in, Topa Pathian tungah nasia takin thu ka ngen hi.

⁴Topa ka Pathian tungah thungen in ka mite ii khialnate ka pualaaq hi. Keima in, “Topa Pathian awng, nang na lian a kong upat uh hi. Na thuciamna tungah na thumaan a, nang hong it te le na thupiakna bang a nite a tawntungin na it hi.

⁵“Kote khialna ka vawt zo uh a, ngilo in a pha ngawl ka vawt zo uh hi. Sep tu in nong thupiakte kong nial zo uh a, thumaan nong lakna pan ka pial zo uh hi.



⁶Kote kumpite, ko hong ukte, kote taangpupite le ko minam bup tungah na min taw thu a son na naseam kamsangte ii thu ka ngai bua uh hi.

⁷Topa awng, nangma in a tawntungin a maan na seam a, ahizong ko ka hi uhle koma le koma ka mai ka kimawlsak uh hi. Judea ngam le Jerusalem khua sungah a teang kote theampo le a nai le a khualana ngam tuatuam ah na thethaang Israel mite theampo atu in hi thu maan hi. Banghangziam cile amate in nang tungah hong thumaan ngawl hi.

⁸Kote kumpite, ko hong ukte le kote taangpupite in a maizum huai in ngamta uh a, Topa nang tungah hong khial zo uh hi.

⁹Kote in nang hong langpan zo ka hita uh zongin nang in nong hesuak a, nong maisak hi.

¹⁰Topa kote Pathian awng, na naseam kamsangte tungtawn in nong piak thukhamte bangin nungta tu a nong sawl sia kong ni bua uh hi.

¹¹Israel mite theampo in na thukhamte paltan in na son thute ngai nuam ngawl uh hi. Nang tungah kong khial uh hi, tua hu in na naseam pa Moses ii thukham sungah a ki at bangin ko tungah haamsiatna nong tungsak hi.

¹²Kote tung le kote hong ukte tungah kong vawt tu hi nong ci sa bangma in nong vawt hi. Leitung a om khuapi dang khat po sangin Jerusalem khuapi sia a nasia zaw in daan na pia a,

¹³Moses thukham sungah a kison daan theampo nong thuaksak hi. Topakote Pathian awng, ahihang tu ngangawn zongin ka khialna te kisiik in, ahibuale na thumaan nate zuina taw nang hong lungdamsak tu in, tupna sawmna ka nei bua uh hi.s

¹⁴Topa kote Pathian awng, nangma in kote daan hong pia tu in na kithoai a, nong pia takpi hi. Banghangziam cile nangma in a maanin na seam tawntung a, koma in na thu kong ni bua uh hi.

¹⁵“Topa kote Pathian awng, na mite Egypt ngam pan nong paipuina taw in na vaangletna nong lak a, na vaangletna kiciamtee lai hi. Ka khial zo uh a, ka maw zo uh hi.



¹⁶Nidang in kote nong huu zo hi, tua ahikom Jerusalem tungah hong thin uuk nawn heak in. Tua in na khuapi, na mual thiangtho ahi hi. Ko khialna le ka taangpupite uh ii ngitlona hangin ka kiim ka paam ngam mite theampo in Jerusalem le na mite hong nomu uh hi.

¹⁷Pathian awng, ka thungetna le kong pakaaina hong ngai tan. A kisia sa na Biakinn hong pua kik tan, tua hile mihing theampo in Pathian na hi hunlam hong he tu uh hi.

¹⁸Pathian awng, ko hong ngai tan. Ka ngim thuakna uh le na min a pu khuapi ii thuaknate hong en tan a, hong mu tan. Ko ii ngamtat phatna suang hi ngawlin, nangma ii hesuakna suangin thu kong ngen uh hi.

¹⁹Topa awng, hong za tan, Topa awng, hong maisak tan. Topa awng, hong ngai tan a, hong seam tan! Mihing theampo in Pathian na hi hunlam hong heak natu in haisaang heak in! Hi khuapi le hi mihingte sia nangma aa ahi hi,” ka ci hi.

Gabriel in Kamsaanna Sonthiang

²⁰Keima khialna le Israel ka mite ii khialna pualak in thu ka ngen a, Topa ka Pathian tungah a Biakinn thiangtho nidang ngeina bangin a pua kik natu tatsat ngawlin hesuak ka ngen hi.

²¹Thu ka nget laitakin, ka mu khol masak lai a ka mu sa Gabriel sia ka omna munah hong leangsuk hi. Tua hun sia nitak sang biakpiak tu hun ahi hi.

²²Ama in, “Daniel awng, hi kamsaanna na tel thei natu hu tu in kong pai hi.

²³Pathian tung hesuak ngen tu na kipat ciang ama in hong zo hi. Ama in nang hong it ahikom tuasia thu son tu in kong pai hi. Tu in mu kholna kong sonthiang laitak thudon in.

²⁴“Mawna le ngamtat siatna pan na mite le na khuapi thiangtho a suatak natu in Pathian in kum sawmsali, sali vei sung ciangtan zo hi. Mawna kimaisak tu a, tawntung thumaanna hong om tu hi, tuasia ciang mu kholna le kamsaanna tangtung takpi tu a, a thiangtho Biakinn sia ki aap kik tu hi.



²⁵Hi thuciamte na tel in: Jerusalem khua a kipua kik natu thu hong kipiak hun pan kipan Pathian ii teal lampui pa hong thet dong kum sali mun sali vei ngei tu hi. Jerusalem sia a lampite le a kulh te taw kivawt kik tu a, kum sawmluk le kum nii, sali vei kum dong kho tu a, ahihang hi hun sia buaina hun hi tu hi.

²⁶Tua hun a bo ciang Pathian teal sa lampui pa sia khialna nei ngawl bulin kithat tu hi. Tua khuapi le Biakinn sia a thahat ngamukpa khat ii ngal sim tu in hong kuan ngalkapte in susia tu hi. A tawpna in tuiliim bangin hong pai tu a, Pathian ii see sa ahi ngal kisimna le suksiatna hong paipui tu hi.

²⁷Tua ukpa in mihing tam mama taw kum sali atu thukimna kho khat vawt tu hi; tua hun khenlang hong cin ciangin ama in sangaw biakpiakna le biakpiak nate bosak tu hi. A kiihuai a kiitak huai lim sia Biakinn dawn saang belna tungah kikoi tu a, Pathian see sa bangin tua munah a koi pa a bo mateng in tua munah om top tu hi,” ci in hong son hi.

Daniel 10

Tigris Ngun hui ah Daniel ii Mu Kholna

¹Cyrus ii Persia ngam uklian a sua zawk a kum thum kumin Belteshazzar a kici Daniel tungah thu khat kilangh hi. Tua thu in thumaan ahihang tel hak mama hi. Tua thu sia ama tungah mu kholna taw in kison hi.

²Tua hun laitakin keima Daniel in, nipi thum sung tau in ka om hi.

³Nipi thum a cin mateng in keima in anlim ahizong sa ahizong zu ahizong ka ne bua a, ka sam zongh ka pot bua hi.

⁴Tua kum tha masa tha ni kul le ni li ni in Tigris Ngunlian hui ah ka ding hi.

⁵Ka etto le puankaang neal puanpaak silh a, kham kawngkhau sawm mihing khat ka mu hi.

⁶A pumpi sia suangmanpha bangin taang hi. A maitang sia khualeng bangin taang a, a mittangte sia mei bangin leng vazal hi. A baan le a peangte sia taungo kizut thiang bangin te wakil a, a aw sia mi honpi au bangin nging hi.



⁷Tua mu kholna a mu sia keima bek ka hi hi. Keima taw a omkhawm mihingte in bangma mu ngawl uh a, ahihang amate lau a tai in, buu uh hi.

⁸Tua munah keima bek ka taang a, hi a lamdang mu kholna sia ka en hi. Ka tha om nawn ngawl a, ka meal kikheal ngawp ahikom, kuama in hong tel ngawl hi.

⁹Ama ii aw ka zaak ciang khua phawk ngawlin butthi in lei ah ka puk a, ka khuplam in ka bok hi.

¹⁰Tuaciang khut khat in hong len in, ka khut le ka khup taw hong thosak a; ka liing vadil lai hi.

¹¹Tua vantung lalang in ka tungah, “Daniel awng, Pathian in nang hong it hi. Dingto in a, kong son tu thu pha takin ngai in. Na kungah keima hong kipuak zo hi,” hong ci hi. Ama in hi thu a son zawkciang, liing vadil kawm ma in ka dingto hi.

¹²Tua zawkciang vantung lalang in, “Daniel awng, lau heak in. Tel theina na nei natu in ki niamkhiak tu a, na khensat ni masa bel ni pan kipan Pathian in na thunget nate hong za zo hi. Na thungetna bang hong pia tu in kong pai hi.

¹³Persia ngam cing vantung lalang in ni kul le ni khat sung hong khak hi. Tuaciang vantung lalangte ii ukpi khat ahi Michael sia kei hong panpui tu in hong pai hi, banghangziam cile Persia ngam sungah keima nguak hong kinusia hi.

¹⁴Mai lamsang na mipuite tungah a piang tu thute telsak tu in hong pai ka hi hi. Hi thu sia maisang a piang lai tu mu kholna ahi hi,” ci hi.

¹⁵Ama in hi bang hong son ciang, pau thei ngawlin lei ka sal hi.

¹⁶Tuaciang mihing taw a kibang tua vantung lalang in a khut hong thaak a, ka muk hong thamsak hi. Keima in ama tungah, “Topa awng, hi mu kholna in ka tha hong zawmsak mama a, ka ci liing vadil top hi.

¹⁷A Topa mai ah a ding sila khat taw ka kibang hi. Bangbangin hong paupui thei tu khi ziam? Thangui thatang ahibuale husan tu ka nei bua hi,” ka ci hi.



¹⁸Ama in khat vei hong len kik leleau a, tuasia ciang ka tha hat zaw hi.

¹⁹Ama in, “Pathian in nang hong it hi, tua ahikom bangma in thin ngimsak heak in a, lausak heak in,” ci hi. Hi teng a ci zawkciang ka tha hat zaw seseam a, “Topa awng nong son tu po hong son tan. Ka ci hong damsak zaw ni hi,” ka ci hi.

²⁰⁻²¹Ama in, “Banghang a na kungah hong pai khi ziam ci sia na he ziam? Thumaan Laibu sungah a ki at thute lak tu in hong pai ka hi hi. Tu in cia kikin Persia ngam cing vantung lalang sia ka sim tu hi. Tua zawkciang Greece ngam cing vantung lalang hong kilangh tu hi. Israel te a cing vantung lalang Michael sim ngawl kei hong hu tu kuama om ngawl hi.

Daniel 11

¹Ama in kei hong hu tu le hong dal tu in tavuan nei hi.

²Tua hi a, tu a kong son tu thu in thumaan ahi hi,” ci hi.

Egypt le Syria Kumpi Ngamte

Vantung lalang in, “Kumpi thum in Persia ngam uk tu a, tua zom in a dang teng sangin a hau zaw kumpi a lina hong khang tu hi. Ama in a thahat bel laitak le a haubel laitakin Greece kumpi ngam thato tu hi.

³“Tua zawkciang ngalhang kumpi khat piang tu hi. Ama in ngamliau khat uk tu a, ama uuk bang pawpo in vawt tu hi.

⁴Ahizong a thahat bel laitakin a ngam kitamtham tu a, khen li kisua tu hi. Ama ii suan le paal ahi ngawl kumpite in ama taangin kumpi seam tu a, ahihang amate in ama vaangletna za in vaang nei ngawl tu uh hi.

⁵“Egypt ngam kumpipa a thahat tu hi. Ahizong a ngalkap mang lianbelte khat sia thahat zaw lai tu a, ngam a zai zaw uk tu hi.

⁶Kum tam mama zawkciang Egypt kumpipa in Syria kumpipa taw kipawl khopna vawt tu a, a tanu zong a zi tu in pia tu hi. Ahihang tua kipawl khopna sia kho ngawl tu a, tua numei nu, a pasal, a ta le a tonpui naseamte theampo kithatlum tu hi.



⁷Tua zawk hai ngawlin Egypt kumpipa tanu ii bete khat kumpi suak tu hi. Tua kumpipa in Syria kumpipa ii ngalkapte sim tu a, a kulh sungah tum in zo tu hi.

⁸Ama in amate ii milim pathiante le tua milim pathiante biak piakna in a zak kham le ngun taw kivawt nate sia Egypt ngamah pua kik tu hi. Kum tam ma kilem in a om zawkciang,

⁹Syria kumpipa in Egypt ngam sim tu a, ahihang ama sia ki nungkinsak kik tu hi.

¹⁰“Syria kumpipa ii tapate ngalsim tu in kithoi tu a, ngalkap tam mama khawm tu hi. Kumpipa tapate sung pan khat in tui liim bangin ngalte ii kulh sim tu hi.

¹¹Egypt kumpipa a thin uukna taw in Syria kumpipa sim tu a, a ngalkapte tam mama matsak tu hi.

¹²Ama a ngal zawna le ngalkap tam mama a thalup hu in kiphasak tu a, ahihang ngal zo tan ngawl tu hi.

¹³“Syria kumpipa cia kikin a masa a nei ngalkap phaza sang a tam zaw ngalkap khawm tu hi. A hun cing asak ciang ama in ngalhiam taw a kinging phitphet sa a, a om ngalkap tam mama taw kuan kik tu hi.

¹⁴Tuaciang mihing tam mama in Egypt kumpipa leedo tu uh hi. A mu sa mu kholna hu in, Daniel awng, na minam sung pan a maitat mihing pawlkhat in leedo tu uh hi, ahizong lel tu uh hi.

¹⁵Tua ahikom Syria kumpipa in kulh taw a ki uum khuapi khat uumci in la tu hi. Egypt ngalkapte in ngal do suak ngawl tu hi. Amate sung pan a hatbel pa ngangawn zongh in tha nei ngawl tu hi.

¹⁶A nang tu om nawn ngawl ahikom Syria ngalkap pa in a uk bang pawpo in amate vawt tu hi. Ama in Kamciamna Ngam sungah ding tu a, tua ngam sia a khut nuai ah koi tu hi.



¹⁷“Syria kumpipa in a ngalkap buppi zanghin ngalsim tu ngaisun hi. Tuaciang a ngal pa ii ngam a suksiat natu in ama in a ngalpa taw kipawlna khat vawtin a tanu taw kiteangsak tu hi; ahihang ama ngaisutna tangtung ngawl tu hi.

¹⁸Tua zawkciang ama in tuipi hui ah ngamte sim tu a, tam mama zo tu hi. Ahihang ngamdang lampui khat in ama zo tu a, a kisak theina teng bosak tu hi; ama in Syria kumpipa ii kisak theina sia ama Syria kumpipa mama tungah tungsak kik nanak tu hi.

¹⁹Kumpipa in ama ngam kulhte zuan kik tu hi, ahihang ama in ngallel tu a, tuabangin ama bo tu hi.

²⁰“Kumpi dang khat in ama nungzui tu a, tua kumpipa in a ngam hauna khanto natu in phiangshia khonna taw mihingte nengcip tu in ulian khat sawl tu hi. Tawmvei no sungin tua kumpipa kithatlum tu a, ahizong mihonpi mu na ah hi ngawl tu a ngal sungah zongh hi ngawl tu hi,” ci hi.

A Ngilo Syria Kumpipa

²¹Vantung lalang in son thiang tato in; “Syria kumpipa a zom tu pa sia kumpi tu in a kilawm ngawl mi ngilo khat hi tu hi. Ahihang ama in muanmawk khol ngawlin, hong pai tu a ngual theam thiamna taw kumpi za suan tu hi.

²²Ama thu a nial pawpo, Pathian ii Thiampi Sang ahi keak zonghin kinil keakin, kibosak tu hi.

²³Kilemna vawtna taw, ama in minam dangte theam tu a, ama sia minam no khat bek uk hi napi a thahat vaial tu hi.

²⁴Ama in kingin natu thu pia khol ngawlin ngamhau khat sim tu a, a taangpupite kuama ii vawt ngei ngawl nate vawt tu hi. Tuaciang ama in ngal sungah a laak vanhete le nate sia a nungzuite hawmsak tu hi. Ama in ngal dalna kulhte sim tu in ngeal tu hi, ahihang ama hun bo pal tu hi.

²⁵“Ama in Egypt kumpipa sim tu in hang takin ngalkap tam mama khawm tu hi. Egypt kumpipa zongh in amate sim tu in a hat mama le ngalkap tam mama taw kinging tu hi. Ahihang Egypt kumpipa sia kitheam tu a, ngal zo ngawl tu hi.



²⁶A kinaipui bel thudok mipilte in ama siasak tu uh hi. A ngalkapte tam mama ki thatlum tu a, ki bosak tu hi.

²⁷Tuaciang tua kumpite ngeal sabuai khat ah an nekhawm tu uh hi. Ahihang a thinsung pha ngawl khawm uh a, khat le khat kitheam tu uh hi. A hun theng ngawl lai ahikom a dei bang nga ngawl tu uh hi.

²⁸Syria kumpipa sia Pathian mite ii biakna suksiatsak tu khensat sa in ngal sungah a vanh laakte theampo taw a ngam zuan kik tu hi. Ama sia a uuk bangpo in ngamta tu a, tua zawkciang a ngam ah cia kik tu hi.

²⁹“Tua zawkciang ama in Egypt ngam sim leleau tu a, ahihang hi hun ciang thutuam khat piang tu hi.

³⁰Rome mite in ama sim tu in teambaw taw hong pai tu a ama lau thawng tu hi. “Tuaciang ama a thin uukin heak kik tu a, Pathian ii mite biakna susia tu in hanciam tu hi. Ama in tua biakna a taisan sate ii heltuana zui tu hi.

³¹A ngalkap pawlkhatte in Biakinn ninsak tu uh hi. Amate in nisim biakpiaknate tawpsak tu uh a, A kiihuai A kiitak huai nate koi tu uh hi.

³²Theamna taw kumpipa in a biakna uh a nusia sa mihingte ii panpuina nga tu hi, ahihang Pathian nungzui mihingte in do kik tu uh hi.

³³Mihingte ii a ciim lampuite in amate ii ciimnate midang tam mama hawm tu uh hi. Ahihang tawmvei sungin amate pawlkhat ngal sungah kithatlum tu a, ahibuale mei taw kihal lum tu a, tuaciang pawlkhatte sia kisuttol tu a, thong kitaaksak tu hi.

³⁴Tuabangin tha na a thuak laitakin, Pathian ii mihingte in huna tawmno khat nga tu uh a, ahizong amate a pawl pui mihing tam mama te sia amate phat tuam natu bek a, a pawlpui ahi hi.

³⁵Tua mihing ciim lampuite pawlkhat kithatlum tu a, ahihang hi sia hu in mihingte ki thiansua tu hi. Hi bang sepna sia Pathian ii see sa hun, a thet dong kizom suak tu hi.



³⁶“Syria kumpipa in ama uuk babangin ngamta tu hi. Ama in Pathian sangin lian zaw ing, A lianbel Pathian sang zongin lian zaw ing, ci in ki phasak tu hi. Ama sia Pathian ii daan a piak matengin kiphasak thei tu hi. Pathian in ama ii ngeal sa bang vateak in vawt tu hi.

³⁷Kumpipa in a taangpupite ii biak pathian le numeite ii it pathian zongh melsia tu hi. A tatak in ama in pathian theampo melsia tu hi, banghangziam cile ama sia tuate sangin lian zaw kisa hi.

³⁸Tuate luangin ama in kulhte a dal pathian sia upat zaw tu hi. Ama in a taangpupite ii a biak ngei ngawl pathian tungah kham, ngun, suang manphate le a dang a manpha letsongte pia tu hi.

³⁹Ama ii kulhte cing tu in, ama in ngamdang pathian a bia mihingte zangh tu hi. Ama in, ama ukpa in a saangte minphatna lian pia tu a, zaletna lian pia in minphatna tel in leitangh pia tu hi.

⁴⁰“Syria kumpipa ii hun a bo dektak ciang, Egypt kumpipa in ama sim tu a, Syria kumpipa in a tha nei theampo taw, siphuleangte, siphute le teambaw tam mama zanghin Egypt kumpipa sim kik tu hi. Ama in namthuam bangin ngam tam mama sim tu hi.

⁴¹Ama in Kamciamna Ngam ngangawn sim in, tul tam mama that tu hi. Ahihang Edom ngam, Moab ngam le Ammon ngam sungah a taanglai sun teng suakta tu uh hi.

⁴²Ama in tua ngamte theampo a sim ciang, Egypt ngam ngangawn ki khoaikhe ngawl tu hi.

⁴³Ama in Egypt ngam ii a phual kham le ngun le a dang a neisa a manpha teng laaksak tu hi. Ama in Libya le Ethiopia ngam zo tu hi.

⁴⁴Tuaciang, nisuana sang pan lesaksang pan a hong piang thuthak in ama patausak tu a, tuaciang ama in thin uuk tatakna taw simin, mihing tam mama that tu hi.



⁴⁵Ama in a kumpi puanbuk liante ngangawn sia Biakinn dinna mual le tuipei kilaklaw ah sa tu hi. Ahihang ama a hu tu kuama om ngawl a tua munah ama thi tu hi,” ci hi.

Daniel 12

Hun Khak bel

¹Puankaang neal puanpaak silh vantung lalang in, “Tua hun ciang na mite a cing, a lian vantung lalang Michael kilangh tu hi. Tuaciang minamte ii a pian pan kipan a thuak ngei ngawl a nasia bel ngimna hun theng tu hi. Tua hun a thet ciang Pathian ii laibu sungah a min a ki at na mihingte theampo kingum tu hi.

²A thi sate tam mama nungta kik tu uh hi; pawlkhatte sia tawntung nuntakna nga tu uh a, pawlkhatte in tawntung maimawlna thuak tu uh hi.

³Lampui ciimte sia vantung khuavak taw taangkhawm tu uh hi. A pha ngamtat tu in mihing tam thu a hilte sia aksi bangin taang tawntung tu uh hi,” ci hi.

⁴Ama in kei tungah, “Daniel awng, tu in leitung a bo dong laibu khup in a, a tungah tazeik tum in. Tua hun sungin, mihingte tam mama in bang thu piang tu ziam ci thu a heak nopna taw hanciam thawthong tu uh hi,” hong ci hi.

⁵Tuaciang keima in ngunlang khat veve ah a ding mihing nii ka mu hi.

⁶Amate khat in tuilu sang a khuala zaw hiatna ah a ding vantung lalang tungah, “Hi nalamdang piangte sia bang tan vei ngei tu ziam?” ci in dongh hi.

⁷Vantung lalang in a khutte nii vantung sangah laamto a, a tawntung Pathian min taw a ciliap huai kamciamna khat vawt hi. Ama in, “Kum thum le kum lang hi tu hi. Pathian ii mite a kivawtsiatna a bo ciang hi thute theampo tangtung siat tu hi,” ci ka za hi.

⁸Ama thu son ka za hi, ahihang a ci nopna ka tel bua hi. Tua ahikom, “Ahihang Topa awng, bangbangin bo tu ziam?” ci in ka dongh hi.



⁹Ama in, “Daniel awng, tu in pai tu ni hi, banghangziam cile hi thute sia huntawpna hong thet mateng kuama ii heak ngawl tu in, thuku hi a, sealcip tu ahi hi.

¹⁰Mihing tam mama kithiansua tu hi. Mi ngilote in tel thei ngawl tu uh a, ngilo paisuak tu uh hi; mi ciimte bekin tel thei tu uh hi.

¹¹“Nisim biakpiakna te a ki tawpsak hun pan, tua ahibuale A kiihuai le A kiitak huai hun pan kipan ni 1290 ngei tu hi!

¹²Ni 1335 bo dong thumaan in a ngak zote sia in mihing lungdamte hi!

¹³“Tua ahiciang, nangma, Daniel awng, hun tawp dongin thumaan in. Tuaciang na thi tu hi, ahihang hun bo ciang na minphatna tel saang tu in na tho tu hi,” ci in zo hi.



Hosea

Hosea 1

¹Hisia in Kumpi Uzziah, Jotham, Ahaz le Hezekiah te Judah ngamah kumpi in a maan hun le Jehoash tapa Jeroboam Israel kumpi in a maan hun a, Beeri tapa Hosea tungah Topa ii piak thupuak ahi hi.

Hosea ii Zi le Tate

²Topa in Hosea tungtawn a, Israel a paupui phitbel hunin Hosea tungah, “Pai in a, zi nei in; na zi sia thumaan ngawl tu a, na tate ama banglian ma hi tu hi. Tuasia bangma ka mite in kei hong nusia in, thumaan ngawl suak uh hi,” ci hi.

³Tuabangin Hosea in Diblaim tanu Gomer kici numei khat tenpui hi. Amate in taciil tapa khat a nei zawkciang,

⁴Topa in Hosea tungah, “A min ‘Jezreel’ phuakin, banghangziam cile Israel kumpipa ii taangpupi Jehu ii Jezreel ah tual a thate hu in hai ngawlin Israel kumpipa daan ka pia tu hi. Jehu suan le paaite ii kumpi khang ka bosak tu hi.

⁵Tua hun ciang Jezreel Kuam ah Israel ii ngalkap thahatna ka susia tu hi,” ci hi.

⁶Gomer in a niina ta khat nei kik a, numei ahi hi. Topa in Hosea munah, “A min ‘it ngawl a ci nopna’ (Lo-Ruhamah) phuak in, banghangziam cile Israel mite tungah ka itna ka lak nawn buatu a a mawna ka maisak nawn buatu hi.

⁷Ahihang Judah mite tungah ka itna ka lak tu hi, Keima, amate Pathian Topa in amate ka hun tu hi, ahihang ngal kisimna — namsau thal le thaltang, siphu le siphu ngalkapte ka zangh buatu hi,” ci hi.

⁸Gomer in a tanuno noai a tensak zawkciang ama nau paai kik a, tapa dang khat nei hi.

⁹Topa in Hosea mun ah, “Na tapa min ‘Ka mi hi ngawl’ (Lo-Ammi) ci in phuak in, banghangziam cile Israel mite sia ka mi hi ngawl a, kei sia amate Pathian ka hi bua hi,” ci hi.

Israel Kipua kik tu



¹⁰Israel mite sia a kisim zo ngawl, a kitee zo ngawl tuipi sen bangin tam tu hi. Tu in Pathian in amate mun ah, “Note sia ka mite hi ngawl nu hi,” ci hi, ahihang ama in amate tungah, “Note sia a nungta Pathian tate na hi uh hi!” a ci ni hong theng tu hi.

¹¹Judah mite le Israel mite kingawm kik tu hi. Amate in amate atu lampui khat teal tu a, khatvei ma amate sia a ngam sungah khangto in nuamsa kik tu uh hi. Hi hi, Jezreel ii ni sia ni thupi ni khat hi tu hi!

Hosea 2

¹Tua ahikom Israel na mipuite sia, “Pathian ii mite” le “Topa ii it mite” ci vun.

Thumaan ngawl Gomer - Thumaan ngawl Israel

²Ama sia ka zi hi nawn ngawl a, keima sia ama pasal ka hi nawn ngawl hang, ka tate awng, na nu tungah, thuum in son vun. Ama ii palngul mawna le pumpi kizuaknate a kheal natu in son vun.

³A kheal buale a suani bangma in a pumngwak om tu in a nik a puan ka sutkeaksak tu hi. Leiko le lei kolhna mun taw kibangin ka vawt tu a, ama sia dangko in thi tu hi.

⁴⁻⁵A tate tungah hesuakna ka nei buatu hi, amate sia a maizum maw pumpi kizuak nu ii tate ahi hi. Ama mama in, “Ka lawmpate munah ka pai tu a - amate in an le tui, samul puan le pat puan, olive thau le zu hong pia tu hi,” ci hi.

⁶Tua ahikom ama sia lingdai taw ka uum tu a, a mai khaktan tu in luphung ka ciang tu hi.

⁷Ama in a lawmpate del tu hi, ahihang pha zo ngawl tu hi. Ama in amate zong tu a, ahihang mu ngawl tu hi. Tuasia ciang ama in, “Ka pasal masa sia kungah heak kik ka tong- tua ka kiten hun lai sia tu hun sang nuam zaw ka na ve” ci tu hi.

⁸Ama ii Baal biakna ah a zak ngun le kham theampo le olive thau, zu le antang a pia sia keima ka hi hunlam ama in phawk ngei ngawl hi.



⁹Tua ahikom anlaak hun ciang ka piak sa antang le zute ka la kik tu a, tuaciang a silh tu ka piak samul le patpuante ka sukeaksak tu hi.

¹⁰A lawmpate mai ah a nguaktangin om tu in a puan a nikte ka sukeaksak tu a, kuama in ka khutsung pan ama suatak zo ngawl tu hi.

¹¹Ama ii poaipi khaamnate theampo kumsim le thasim a poaite Sabbath poaite le a biakna taw kisai kikhopna dangte theampo ka bosak tu hi.

¹²Amate atu in a kipiakna hu a, a lawmpate ii hong thapnate hi a ci sapit kungte le theikungte ka siasak tu hi. Ama sapit huante le a thingnga huante duipui ka suaksak tu a, ngamsate in susia tu hi.

¹³Baal tungah ngimnamtui halin kizepna tuatuamte taw kizeamin a lawmpate a del hun lai a kei hong makngil hu in ama daan ka pia tu hi. Topa in son zo hi.

Topa ii A mite A Itna

¹⁴Tua ahikom ama sia senneal ngam sungah ka pai pui kik tu a; tua munah itna kammalte taw ama ka zol kik tu hi.

¹⁵A sapit huante ama tungah ka pia kik tu a, Thinngimna Kuam sia lam etna kongkha ka suaksak tu hi. A khanmoi lai, Egypt ngam pan hong pusua lai bangma in tua munah ka thu hong ngai kik tu hi.

¹⁶Tuaciang kei sia ka pasal ci in khatvei hong sam kik tu a - ama ii Baal ci in hong sam nawn ngawl tu hi.

¹⁷Baal min ka losak kik ngei nawn buatu hi.

¹⁸Tua hun ciang ka mite a liamsak ngawl natu in ngamsate le vacimte taw thuciamna ka vawt tu hi. Ngalhiam theampo ahi, namsau le thalte zongh ngam sung panin ka sot siat tu a, ka mite sia kilemna le ngam muanna sungah ka teangsak tu hi.

¹⁹Israel awng, ka zi kong suaksak tu a; a maan le thumaan ka hi tu hi; A kip ki itna le hesuakna kong lak tu a, tuaciang a tawntungin keima neisa kong suaksak tu hi.



²⁰Ka kamciamte kipsak in keima neisa kong hisak tu hi. tuaciang kei sia Topa hi ci in nong saang tu hi.

²¹⁻²²Tua hun ciang Israel ka mite ii thungetna ka zo tu hi. Leitangh tungah ngua ka zusak tu a, tuaciang leitangh in lo an, sapit le olive ngate piangsak tu hi.

²³Ka mite tua ngamah ka teangsak tu a, ka nuamsasak tu hi. “A ki it ngawl” a kicite tungah itna ka lak tu a, tuaciang “Ka mi ahi ngawl” a kicite tungah, “No sia ka mite nu hi,” ka ci tu hi. Tuaciang amate in, “Nang sia kote Pathian hi ni hi,” ci in hong zo tu uh hi.

Hosea 3

Hosea le A Thumaan ngawl Numei

¹Topa in kei tungah, “Pai kik tan a, a lawmpa taw palngul mawna a vawt numei tungah na itna lak tan. A milimte sapitnga ko pia thanuam in pathian dangte sang maingat kale Israel mite ka it veve bangin tua nu it tu ni hi,” hong ci hi.

²Tua ahikom tua nu ka lei natu in ngun dangka sawm le nga le mangtaang hum seau sali ka pia hi.

³Khua ngeipi pumpi zuak ngawl le palngul mawna vawt ngawlin kei hong ngakin na om kul tu hi, ama munah ka ci hi; tuaciang hi hunsung tengin kei zongh in ama ka ngak tu hi.

⁴Hi bang lian ma in, Israel mite in, kumpi le lampui nei ngawl, sangaw biakpiakna le suangkhuam thiangtho nei ngawl, aisaan natu milim le limte zangh ngawlin hunsau mama sung a nuntak kul tu hi.

⁵Ahihang Israel mite in amate Pathian Topa kung le amate kumpi David suan le paal khat ii kung a zot kik tu hun khat tung tu hi. Tuaciang amate in Topa kiita tu a, ama ii letsong phate saang tu uh hi.

Hosea 4

Topa ii Israel te A Mawsiatna



¹Hi ngam sungah a teang mihingte tungah Topa in mawsiatna khat nei hi. Israel awng, ama pauna ngai vun: “Hi ngam sungah thumaanna hi kale ki itna hi kale om ngawl a, mihingte in kei sia Pathian in hong saang ngawl hi.

²Amate in kamciamte vawt a, paltan hi; leilot a, tualthat a, nguta in, tuaciang palngul mawna vawt uh hi. Ngamtat siatna khangto a tualthana khat zawkciang khat om hi.

³Tua ahikom ngam kaangko tu a, ngam sungah nuntakna nei theampo thi tu hi. Nganhing theampo le vacimte le ngasa ngangawn thi tu hi,” ci hi.

Topa in Thiampite Mawsiat

⁴Topa in, “Kuama in mihingte mawsiat ahibuale, tei heak hen- ka lungkim ngawl na sia noma thiampite tung ahi hi.

⁵Sun taw zan taw note na khial uh a, kamsangte zongh no sangin phazaw tuan ngawl hi. Na nu Israel ka susia tu hi.

⁶Ka mite sia kei hong saang ngawl ahikom a lal hi zo hi. No thiampite in kei nong saan tu nialin ka hilnate nial nu hi, tua ahikom no kong nial a, na tapate ka thiampi tu in ka saang buatu hi.

⁷“No thiampite tam vaial a, ka tungah na khial vaial uh hi, tua ahikom na minphatna uh sia minsiatna ka suaksak tu hi.

⁸Ka mite khialna tung pan hau na hi uhkom amate khial vaial le na oai uh hi.

⁹Tua mihingte daan thuk bangma in na thuk tu uh hi! Siatna na vawt hu in kong liausak tu a, daan kong pia tu hi.

¹⁰Note in sangaw biakpiakna pan, na saan uhte na ne tu uh hi. Ahihang na ngilkial veve tu uh hi. Ta tam nei theina milim pathiante na bia tu uh hi, ahihang ta na nei tuan buatu uh hi, banghangziam cile note in pathian dangte nungzui tu in kei kung pan na kilee kik zo uh hi,” ci hi.

Topa in Lawki Biakna Puavawk

¹¹Topa in, “Zu a lui ahizong, a thak ahizong in ka mite ii khua phawna nguksak hi!



¹²Amate in thingbek khat tung pan thu pualaakna ngen hi! Ciangkang khat in amate heak nopte son hi! Amate in kei hong nusia zo uh hi. Pumpi zuak a suak numei khat bangin amate le amate pathian dangte tungah ki aap zo hi.

¹³Mualliante dawn mun thiangthonate ah amate in sangaw biakpiaknate pia uh a, mualnote tung thingsaang thingboaita nuai ah ngimnamtui hal uh hi, banghangziam cile a lim sia nuam lawlawm hi! “Tua hu in, na tanute sia pumpi zuakte suak a, na mote in palngul mawna vawt uh hi.

¹⁴Hi kale, hi sia hu in amate daan pia ngawl tu khi hi, banghangziam cile noma mama zongh biakinn pumpi zuak numeite taw omkhawm in, amate taw lawki sangaw biakpiaknate na pia khawm uh hi. Paunak khat sungah, ‘Khua ngaisutna nei ngawl mihingte kilalcipsak tu hi,’ a ci bang ahi hi.

¹⁵“No Israel te in kei tungah hong thumaan ngawl hi ka leute Judahte in tuabang mawna nei heak taken. Gilgal ah ahibuale Bethaven ah biakpiakna vawt heak vun, tua ahibuale tua munah a nungta Topa min taw kamciam vawt heak vun.

¹⁶Israel mite sia laate bangin thinpui hi. Bangbangin ngantatna lopa hing sungah amate tuuno bangin an vaak thei tu khi ziam?

¹⁷Israel mite sia milimte ii ngau tawk hi. Amate lampi tek tawn lel taken.

¹⁸Zu tam mama a neak zawkciang amate pumpi zuakna taw a lung uh kim hi, minphatna saang minsiatna dei zaw uh hi.

¹⁹Amate vuipi seam bangin kiseamkeak tu a, a lawki sangaw biaknate hangin amate a mai uh kizumsak tu hi.

Hosea 5

¹“No thiampite awng hi thu ngai vun! Israel mite awng, nadon vun! Kumpi baangkua sung a omte awng, ngai vun! No sia, thutang khen tu in hong kisee te hi napi- note tungah thukhenna hong theng tu hi! Note in Mizpah Mual ah thaang khat, Tabor Mual tungah ngen kikhak khat,

²Acacia khuapi ah dumthuk khat na hi uh a, na vekpi in daan kong pia tu hi.

³Israel bangbang hi ziam, he khi hi- ama sia kei kung pan kiseal thei ngawl hi. Ama thumaan ngawl a, a mite sia kei hong bia tu in kilawm ngawl hi,” ci hi.

Hosea in Milim Biakna Kidop tu Thupia

⁴Mihingte ngamtat siatna in a Pathian kung a heak kik tu khak hi. Milim biakna in amate lencip a, amate in Topa saang ngawl uh hi.

⁵Israel mite kisak theina in amate khialna kilanghsak hi. Amate khialna in amate lutu in puksak a, Judah mite amate taw puk khawm uh hi.

⁶Amate in a tuute le a khuite Topa tungah sangaw biakpiakna tu in pia ahihang amate atu phattuamna om ngawl hi. Amate in Topa mu thei ngawl uh hi, banghangziam cile Topa in amate nusia zo hi.

⁷Amate Topa tungah thumaan ngawl a; a tate Topa neisa hi ngawl hi. Tua hi a, tu in amate le a leitangh kisia pal tu hi.

Judah le Israel Kido

⁸Gibeah ah ngal dona lemle tum vun! Ramah ah patau daak saat vun! Bethaven ah hanla sam vun! Benjamin mite awng ngal simin kuan vun.

⁹Daan thuak tu ni hong tung tu a, Israel kizancipsak tu hi. Israel mite awng, hi thu tung tatak tu hi!

¹⁰Topa in, “Kei ka thin uk hi, banghangziam cile Judah mi lampuite in Israel simin, a ngam suddol hi. Tua ahikom amate tungah namthuam bangin daan ka buak suk tu hi.

¹¹Israel sia zawkthawkna thuak a; ama neisa tatak ahi leitangh sia taan hi, banghangziam cile huna piak tu a nei ngawlte munah huna ngen hamtang hi.

¹²Israel tungah siatna ka tungsak tu a, Judah mite tungah lalcipna ka tungsak tu hi.

¹³“Israel in ama le ama a cinat mama a kimu ciang le Judah in ama le ama a liammate a kimu ciang, Israel in Assyria ngam uk lianpa kungah hu ngenin pai hi; ahihang ama in a natna le a meimate damsak thei ngawl hi.



¹⁴Keima in tawpi khat bangin Israel le Judah mite ka sim tu hi. Keima mama in amate ka balneen tu a ka nusia tu hi. Amate ka kaikeak ciang kuama in hun zo ngawl tu hi.

¹⁵“Keima in a khialna hu in a thuak thei za a thuak dong le kei hong zon kik mateng ka mite ka nusia tu hi. Ngimna a thuak ciang amate in kei hong zon tu hanciam tha tu uh hi,” ci hi.

Hosea 6

Mihingte ii Kisii kik tatak Ngawlina

¹Mihingte in, “Topa kungah heak kik tawng! Ama in hong liamsak zo a, ahihang ama in hong damsak kik nanak tu hi, ama in hong baksak zo a, ahihang ama in ih liammate hong tuamsak tu hi, hong tuamsak tu hi ngawl ziam?

²Ni nii, ni thum sungin eite tha thak hong pia kik tu a, ama omna ah ih nungta tu hi.

³Topa ih heak natu hanciam tawng. Tuk ngua hong zu a, leitangh tui a buak bang ahizong, a hun maan a, khua a vak bang ahizong ei kungah ama hong pai tatak tu hi,” ci uh hi.

⁴Ahihang Topa in, “Israel le Judah awng, bang hong law tu khi ziam? Kei nong itna uh sia zingsang mokkaai bangin manlang tak mang a; ni saang ciang a bo pai daaituite bang ahi hi.

⁵Tua hu in ka kamsangte no kungah thukhenna le lalna thu puakin kong paisak zo hi. Note tung pan ka dei thu sia thiang in kician sinsen hi:

⁶Nong it tawntungna ka dei a, na sangaw biakpiakna hi ngawl hi. Ka mite ii kei hong heak tu sia meihal biakpiakna hong piak sangin ka dei zaw hi.

⁷“Ahihang amate in ngamsung Adam khua a tum pociang amate taw thuciamna ka vawt sia paltan uh hi.

⁸Gilead sia mi ngilote le tualthatte taw a kidim khuapi khat ahi hi.



⁹Thiampite sia mihing khat suam nuam a, pangin a ngak phalak hon khat taw kibang hi. A thiangtho mun Shechem paina lampi ngangawn ah amate in tualthat uh hi. Tuaciang amate in hi siatna theampo vawt kaltang uh hi!

¹⁰Israel ngam sungah a cizat huai na khat ka mu zo hi: ka mite sia amate le amate milim biakna taw kininsak uh hi.

¹¹“Tuaciang no Judah mite na hi uh le, na sep na vawtte tungtaang ah daan piak tu hun khat zongh ka ciangtan zo hi.

Hosea 7

¹“Israel ka mite ka cidamsak nop le a nopsak a khanto kik tu ka vawtsak nop simin, amate khan siatna le ngitlo ngamtatnate bebek ka mu hi. Amate khat le khat kitheamin, innphuul vanh ngu in, lampi ah ngual suam uh hi.

²A ngamtat siatna theampo ciamtee tu ka hi hunlam amate in ngaisun thei ngawl uh hi; ahihang a khialnate in amate tuamcip a, a khialnate musak ngawlin ka om thei bua hi,” ci hi.

Kumpi Inn sung a Thusia sawmna

³Topa in, “Mihingte in kumpipa le a uliante sia a pha ngawl a sawmnate taw theam uh hi.

⁴Amate theampo thumaan ngawlin citakna nei ngawl uh hi. Anluum em pa in anvui thauin, meikuang lingh mama tungah anluum emin, a sat mama bangin a ki etsatna lingh mama hi.

⁵Kumpipa ii poai vawt ni in amate in kumpipa le a uliante zu khamin mawmawsak hi.

⁶Hi hi, amate in a sawmna uh sia meisa bangin kuang hi. Amate thin ukna sia zan khuateak in sa a, zingsang in meikuang bangin leng hi.

⁷Amate in a thin uuk mama na uh taw amate a ukte thatlum uh hi. A kumpipate khat zawkciang khat kisuamlum ahihang huna ngenin kuama in kei tungah thu hong ngen ngawl uh hi,” ci hi.

Israel le Minam dangte



⁸Topa in, “Israel mite sia anluum minphang khat taw kibang hi. Amate in a kiimkot ngamte suang a,

⁹hi ngamdangte a suanna in amate thahatna valhtum ahi hunlam phawk ngawl uh hi. Amate ii ni sia kiciangtan hi, ahihang amate in tua ngangawn zongh he ngawl uh hi.

¹⁰Israel mite kisak theina in amate khialna kilanghsak hi. Hi bang a piang tu theampo piang zo kazu amate sia Kei, Topa a Pathian kungah hong cia kik ngawl uh hi.

¹¹Inn vakhu mawmaw khat bangin Israel te leang vakhang top hi; a masa phitin amate in Egyptte tungah huna ngen uh a, tua zawkciang Assyriate kungah tai uh hi!

¹²Ahihang keima in amate vana ah ngeen khakin vacimte mat bangin ka man tu hi. A ngamtat siatnate hu in amate daan ka pia tu hi.

¹³“Amate a lal hi zo hi! Amate in kei hong taisan a, hong leedo hi. Amate kisia cip tu hi. Amate suatak nuam ka hihang amate ii kei hong biakna maan ngawl hi.

¹⁴Amate in thin tak taw thu hong ngen ngawl uh hi, tua sangin amate lei ah kisepin lawkite ngamtat bangin kapin mau uh hi. Zu le antang a nget ciang doaibiate bangin amate le amate kikui uh hi. Bangza in hong leedo thong ziam!

¹⁵Keima in amate vaakin, a thahatsak pa hi napi, amate in kei vawtsiat hong sawm uh hi.

¹⁶Amate kei kung pan kiheak tawntungin thahatna nei ngawl pathian khat tuu uh hi. Amate sia thalkawng koai khat bang in muan huai ngawl hi. A lampuite in kisak theina kampau ahikom amate thi ngam in thi tu a, tuaciang Egyptte nui tu uh hi,” ci hi.

Hosea 8

Milim A Biak hu in Topa in Israel te Puavawk



¹Topa in, “Patau daak tum vun! Ngalte muvanlai bangin ka ngam sungah hong suktun hi! Ka mite in amate taw ka vawt ka thuciamna paltan a, ka hilna langpan hi.

²Amate in kei hong he a, na mite hi ung ci in amate ii Pathian hong nak hang,

³amate in a phate nial hi. Hi thu hu in a ngalte in amate delkot tu hi.

⁴“Ka mite in kumpite teal hi, ahihang amate thuthu in teal hi. Amate in lampuite teal hi-ahihang kei thukim puina om ngawl hi. Amate in a ngun le a kham la in milim in vawt a- amate lal natu ahi hi.

⁵Samaria khuapi a teang mite ii a biak kham khuita sia ka ensan hi. Amate tungah ka thin uuk mama hi. A milim biakna a kheal natu in bangtan vei hai lai thong tu ziam?

⁶Israel khut thiam khat in milim vawt a, tua in pathian hi vet ngawl hi! Samaria ah a kibia kham khuita sia a bebekin kisutham tu hi!

⁷Amate in vuipi thaici a tu ciang, suangval at tu hi! A min ngawl lo ante in bangma hun anluum piangsak thei ngei ngawl hi. A piangsak hial zong, ngamdang mite in netum tu hi.

⁸Israel mite sia ngamdangte taw kibang zo a, leibeal tamtham sa khat bangin kimanna nei ngawl hi.

⁹Ngam laate bangin a thinpui Israel mite amate san tek zuan hi. Amate in Assyriate tungah hu ngen tu in pai a, amate sungsia tu in ngamdang mite sum taw tham hi.

¹⁰Ahihang tu in amate ka khawmtua tu a, daan ka pia tu hi. Assyria ngam uk lianpa in amate a nencip ciang, hai ngawlin bot sa in amate kilep vadel bek tu uh hi.

¹¹“Isreal mite in khialna thiansua natu biaknatau tam vaial vawt a, khialna vawt natu mun tam vaial nei hi lel hi!



¹²Mipite atu in a kisim zo ngawl thuhilnate ka at hi, ahihang amate in tuate sia thu lamdangpi bangin nial lel uh hi.

¹³Amate in sangaw biakpiakna kei tungah vawt uh a, tua sangaw biakpiakna sa ne uh hi. Ahihang Keima, Topa in amate tungah ka lungkim ngawl hi, tu in amate khialna ka phawk kik tu a, tuate hu in daan ka pia tu hi. Egypt ngamah amate ka puak kik tu hi!

¹⁴“Israel mite in kumpi innte sa uh hi, ahihang amate in amate A vawtpa mama mangil uh hi. Judah mite in kulh taw a ki uum khuapite saat uh hi. Ahihang a kumpi innte le a khuapite a kaangtham tu meikuang ka khiak suk tu hi,” ci hi.

Hosea 9

Hosea in Israel Daan piak natu Taangko

¹Israel mite awng, lawkite bangin na poaipite khaam heak vun. Note in na Pathian nungngat zo in, ama tungah thumaan nawn ngawl nu hi. Leitangh tung theampo ah pumpi kizuakte bangin Baal pathian tungah noma le noma na kizuak zo uh a, ama hong piak hi ci a na ngaisut uh lo ante dik na sa uh hi!

²Ahihang hai ngawlin antang le olive thau a kicing in na nei buatu uh a, zu om ngawl tu hi.

³Israel mite sia Topa ii leitangh tungah taang ngawl tu a, Egypt ah heak kikin Assyria ah a kikhaam ante ne tu uh hi.

⁴Tua ngamdangte ah amate in Topa tungah zu biakpiakna le sangaw biakpiakna vawt thei ngawl tu uh hi. Tua ante in, a ne pawpo ninsak tu a, mithi vuina ah anneak bang hi tu hi. Amate ngilkial thai zok natu bekma hi tu a, Topa ii Biakinn ah biakpiakna khat bangin khat zongh kipaipui ngawl tu hi.

⁵Tuaciang Topa upat natu poaipi khaam hunte a tun ciang, amate in bang law peuma tu ziam?



⁶Tuasiatna hong pai in, mihingte a kithethaang ciang Egyptte in amate khawmtua tu a - Memphis ah vui tu in khawmtua tu hi! A ngun sumngumte le khatvei lai a, a innte dinna mun sia lopa le lingkungte in khu nelh tu hi.

⁷Mihingte amate ii nga tu a kilawm daan piakna hun hong theng hi. Tua hun hong thet ciang Israel te in he tu hi! “Hi kamsang pa sia a mawmaw khat hi. Hi Pathian ii thu moppa sia a thin am hi,” ci nu hi. Na khialna a let lawlawm manin kei nong ensan uh hi.

⁸Pathian in Israel a mite kidop natu thupia tu in kamsang khat bangin kei hong sawl hi. Tua hi kasap ka paina po ah vacim khat bangin thaangsia in mat tu nong hanciam uh hi. Pathian ii leitangh tung mama ah mihingte sia kamsangpa ii ngal ahi hi.

⁹Gibeah ah a ngamtat bangin amate a sep avawtna ah siattawp in sia hi. Pathian in a khialna ciamtee tu a, tua hu in amate daan pia tu hi.

Israel ii Mawna le A thuk tu Thute

¹⁰Topa in, “Israel ka mu cil in senneal ngam sungah a po sapit ngate mu bang ahi hi. Na taangpupite ka mu phit hunin thei min hun a, a min masate mu bang ahi hi. Ahihang Peor Mual ah hong pai ciang amate in Baal bia tu in kipan a, hai ngawlin a it pathiante bangma in mu thada huai suak hi.

¹¹Israel letna sia vacim khat leang bangin leang tu hi. Amate sungah patangte piang ngawl tu a, numei naungai le naupaai om nawn ngawl tu hi.

¹²Ahihang patang a kep tu om hial kale tuate ka laaksak tu a, a nungta in khat zongh ka khoaikhe buatu hi. Hi mihingte ka taisat ciang amate tungah a lauhuai nate piang tu hi,” ci hi.

¹³Topa awng, a tate savai bangin a kivai le, a kithalup ka mu thei hi.

¹⁴Tua mite tungah vawt tu nang tungah bang hong dongh tu khi ziam? A numeite ciingsak in! A nausente a op thei ngawl tu in vawt in!

Israel tungah Topa ii Thukhenna

¹⁵Topa in, “Amate ngamtat siatnate theampo Gilgal pan kipan hi. Amate ka etsat kipatna sia tua mun pan ahi hi. Amate ngitlo ngamtatnate hu in ka



ngam panin amate ka hawlkeak tu hi. Amate ka it nawn buatu hi; a lampuite theampo in kei hong langpan zo uh hi.

¹⁶Israel mite sia a zung ko a, a nga nga ngawl thingkung khat taw kibang hi. Amate in ta nei ngawl tu a, a nei hial zong a it mama a tate ka thalupsak tu hi,” ci hi.

Israel atu Kamsangpa Pauna

¹⁷A na ka sepsak Pathian in a mite nial tu hi, banghangziam cile amate in a thu ngai ngawl uh hi. Amate sia ngam tuatuamte kawmah a vakvaite suak tu uh hi.

Hosea 10

¹Israel mite sia a ngathiam sapit ngui khat taw kibang hi. A ci thei vaial ciang biaknatau tam seseam vawt uh hi. A leitanghte in tam a piansak seseam ciang a biak uh suangkhuam a meal hoi vaialin vawt uh hi.

²A lungtang uh theamna taw a kidim mite sia tu in a khialna uh hu in thuak tu uh hi. Pathian in amate biaknataute sutham tu a, a khuam thiangthote susia tu hi.

³Hi mihingte in hai ngawlin, “Eite kumpi ih nei ngawlina sia Topa ih kiitak ngawl hang hi. Ahihang kumpipa khat in ei atu in bang hong vawtsak thei tuan tu ziam?” ci tu uh hi.

⁴Amate in a luithawthong kamte pau in, a maan ngawl kamciamte vawtin a mannung ngawl lemthu vawt uh hi. Thutang sia thutang ngawl suakin, lothaw sa sungah a ngu nei lopate bangin po hi.

⁵Samaria khuapi ah a teang mite lau tu uh a, Bethel ah kham khuita a bo hu in mau tu uh hi. Amate le milim biakna a, a seam thiampite sia tua milim ngai in kap tu uh hi. Kham bangin a hoinate a kihawkeaksak ciang amate kap tu uh hi.

⁶A milim sia a lian ngam uk lianpa maivil natu in Assyria ah kipua tu hi. Tua ngaisut piaknate a zui hu in Israel min sia tu a kimaizumsak tu hi.

⁷Tui tungah a taai thingbek khat bangin a kumpipa kipaipui tu hi.



⁸Israel mite ii milim biakna mun Aven mualtung biakna mun sia kilalcipsak tu hi. Ling le lopate a biaknatau tungah po tu hi. Mihingte in mualpite tungah, “Hong seal tavun!”, ci in le mualnote tungah, “Hong siin tavun!” ci in au tu uh hi.

Topa in Israel tungah Thukhen

⁹Topa in “Gibeah ah a khial kipat pan kipan Isrel mite kei tungah a khialna uh kheal ngawl hi. Tua ahikom Gibeah ah ngal in amate delin pha tu hi.

¹⁰Khialna taw a kidim hi mihingte ka sim tu a, daan ka pia tu hi. Ngam tuatuamte in amate langpan tu in kikaizawn tu a, amate khialna tam mamate hu in amate daan kipia tu hi.

¹¹“Israel sia khatvei lai in taangcil tu a pha takin a kihil taangcil nuamin a kinging khuila khat bang ahi hi. A hoi a ngawng tungah hakkol khat bul tu le nasep hamsa zaw seamsak tu in ka khensat hi. Judah in lo thawna ka kaisak a, Israel in lei kalthapna ka kai sak hi.

¹²Keima in, “Noma atu in leithak tho vun a, thutang suana phutin, kei nong biakna pan a piang thuphate at vun. Na Topa ahi Kei sangah nong heak kik tu hun zo hi. Tuaciang kong pai tu a, no tungah thupha kong buak tu hi,” ka ci hi.

¹³Ahihang siatna thaici na tu uh a, tuate anlaak in na nei uh hi. Na leilotna pan a piang ngate na ne zo uh hi. “Na siphuleangte le ngalkap tam na neina na suan hu in

¹⁴na mite tungah ngal hong theng tu a, na kulh theampo kisia tu hi. Tua ni in Kumpi Shalman ii Betharbel khuapi ngal sungah a lalcip sak le, nute le a tate a kihualup siat ni bang, hi tu hi.

¹⁵Bethel khua mite awng, a kiitak huai siatna na vawt uh hu in hi thu note tungah hong tung tu thu ahi hi. Ngal kido a kipat po ciang Israel kumpipa thi tu hi,” ci hi.

Hosea 11

Pathian ii A langpan A mite A itna



- ¹Topa in, “Israel sia a nolai in ka it a, ka tapa bangin Egypt ngam pan ka sam hi.
- ²Ahihang ka tapa awng ci in ka sap mun seseam ciang a khuala vaialna ah hong taisan hi. Ka mite in Baal tungah sangaw biakpiakna pia hi; amate in milimte atu in ngimnamtui hal uh hi.
- ³Ahitazong, Israel lampai tu a hil sia keima ka hi hi. Ka mite ka khut taw ka toai hi, ahihang keima ii ka ou ahi hunlam amate in saang ngawl hi.
- ⁴Itna taw keima sangah amate ka kai hi. Ka laamto a ka biangkho taw kipha in ka toai hi; kunsukin amate an ka pia hi.
- ⁵“Kei kungah hong heak kik nuam ngawl ahiciang, Egypt ma ah a heak kik uh kul tu a; tuaciang Assyriate in amate uk tu hi.
- ⁶Ngal in a khuapite nawkkeak tu a, a kongpite sutham siat tu hi. A uuk bangpo ngamta ahikom amate in ka mite susia tu hi.
- ⁷Amate in kei kung pan puapial tu bebek ma sawm vatan uh hi. Amate hakkol a kisan hu in kap tu uh hi, ahihang kuama in a vanh dawn ngawl tu hi.
- ⁸“Israel awng, bangbangin nang hong thasua thei tu khi ziam? Bangbangin nang hong nusua thei tu khi ziam? Admah ka sukci bangin nang hong sucip ngei tu khi ziam? tua ahibuale Zeboiim tung ka vawt bang nang hong vawt ngei tu khi ziam? Ka lungtang in tuabang hong vawtsak ngawl tu hi! Nang kong itna sia nasia lei hi.
- ⁹Ka thin uuk hu in nang daan kong pia buatu hi; Israel sia ka susia kik buatu hi. Banghangziam cile kei sia mihing hi ngawlin Pathian ka hi hi. Keima a Thiangtho Pa in note taw kong om khawm hi. Thin uukin nang kung kong pai buatu hi.
- ¹⁰“A ngalte tawpi bangin ka hawksan ciang ka mite in kei hong zui tu hi. Amate in nitumna sang pan kei kung manlangin hong zuan tu uh hi.



¹¹Amate Egypt pan vacim bangin ngang takin hong zuan tu a, Assyria pan vakhute bangin hong pai tu uh hi. Amate a inn tek ah ka ciasak kik tu hi. Keima Topa in ka ci zo hi,” ci hi.

Israel le Judah Kipuavawk

¹²Topa in, “Israel mite in kei sia leilot thu le theamna taw hong kiim uum a, Judah mite in kei a thumaan le a thiangtho Pathian sia hong langpan lalai uh hi.

Hosea 12

¹Zing pan nitak dong Israel mite ngamtatnate theampo mannung ngawl a, siatna vive hi. Kileeheak na le ngoltol ngamtatna sia amate sungah khangto vaial hi. Amate in Assyria taw ngallem kiciamna vawtin Egypt taw sum vawt khawm uh hi,” ci hi.

²Judah mite tungah Topa in mawsiat nopna khat nei hi; Israel zongh mihingte ngamtatna bangin daan pia tu hi. Amate sepna sate bangin ama in thuk kik tu hi.

³A taangpupi Jacob sia a peang a suapuipa Esau taw a nu ngil sungah a omkhop lai in kibabuan a; Jacob hong khan ciang ama in Pathian buan hi —

⁴ama in vantung lalang khat buanin zo hi. Ama kapin thupha ngen hi. Tuaciang Bethel ah ih taangpupi Jacob kungah Pathian pai in paupui hi.

⁵Hisia in Vaanglianbelpa Topa Pathian ahi hi — Topa cisia ama ih biak natu min ahi hi.

⁶Tua ahikom tu in Jacob suan le paalte awng, na Pathian muang vun a, ama kungah heak kik vun. Pathian tungah thumaan in thutang vun. Ama ii note atu hong sepsak tu thinsau takin ngak vun.

Thukhenna Kammal A zom

⁷Topa in, “Israel mite sia Canaan mite bangma in thumaan ngawl uh hi; amate in vanh leite sia toaisuang maan ngawl taw theam thanuam uh hi.

⁸Amate in ‘Ko hau khu hi, sum tam mama khol zo khu hi. Kuama in thimthelna taw hau hi ci in, ko hong mawsiat thei ngawl hi,’ ci uh hi.



⁹Ahihang, Egypt ngam pan hong pusua pui Keima, Topa na Pathian in, senneal ngamsung note kungah kong pai lai a, na ten uh bangin tuipuan buk sungah kong teangsak kik tu hi.

¹⁰“Kamsangte ka paupui a, mu kholna tam mama ka pia hi, tuaciang kamsangte tungtawnin ka mite kidop natu thu ka pia hi.

¹¹Tua hi napi Gilead ah milimte kibia a, tua a biate thi tu hi. Gilgal ah khuitalte sangaw biakpiakna in kipia a, tua munah biaknataute lozau sungah suang khol suak tu hi,” ci hi.

¹²Ih taangpupi Jacob sia Mesopotamia ngamah tai a, zi khat a nga natu in tua munah midang khat ii na seamin a tuute cing hi.

¹³Egypt a saltanna pan Israel mite a suatak tu le a ou tu in Topa in kamsang khat puak hi.

¹⁴Israel mite in Topa nasia takin thin uuksak hi; amate ngitlona hangin a thi tu in amate kilawm hi. Topa min a siatsak hu in Topa in amate daan pia tu hi.

Hosea 13

Israel tung A khakbel Thukhenna

¹Hun bo sa sungah Ephraim minamte a pau ciang, Israel minam dangte lau a, amate in Ephraim thupi et hi. Ahihang mite in Baal bia in khialna vawt uh hi, tua ahiciang hi sia hu in amate thi tu uh hi.

²Mihing ngaisutna le mihing khut taw ngun milimte vawt uh a— a biak tu in thik milimte vawtna taw amate in khialna vawt thua seseam uh hi. Tuaciang amate in, “Tuata tungah sangaw biakpiakna pia vun!” ci uh hi. Bangbangin mihingte in tua milim— khuita lim a, a kivawtte— nam thei tu ziam!

³Tua ahikom hi mihingte sia zingsang mokkaaite bangin mang tu a, nisua tung a daaituite bangin bo tu uh hi. Amate sia taangcilna phual pan, vui ii seamkeak a site bang hi tu a, meikhu suana pan a pusuk meikhu bang hi tu uh hi.



⁴Topa in, “Keima in Topa note Pathian, Egypt pan a hong pusuapui pa ka hi hi. Kei sim ngawl Pathian dang nei ngawl nu hi: Keima bekma note hunpa ka hi hi.

⁵Senneal lei kona ah note kong keam hi.

⁶Ahihang ngam phana ah na tum uh ciang na ngil uh va in na lung uh kim a, tuaciang, kiphasak in, kei nong mangil uh hi.

⁷Tua ahiciang tawpi khat bangin no kong sim tu hi. Na paina lampi uh ah pawlbeam khat bangin kong pang tu hi.

⁸Vompui khat a note a bosua bangin note kong sim tu a, kong baltham tu hi. Tawpi khat bangin a munah kong netum tu a, ngamsate khat bangin kong balneen tu hi.

⁹“Israel mite awng hong susia tu khi hi! Tuasia ciang akua in no hong hu thei tu ziam?

¹⁰Note in kumpi khat le lampuite na ngen uh hi, ahihang amate in na ngam uh bangbang hu thei tu ziam?

¹¹Ka thin uukin note tungah kumpite kong pia zo a, ka thangsiatna taw amate ka lak zo hi.

¹²“Israel ii mawna le khialnate kiciamtee a, a kiteptee nate bit takin kikeam hi.

¹³Israel in nuntak natu hun pha nei napi a mawmawt lei hu in tua nuntakna la thei ngawl hi— a suak dektak nausen khat sia a nu sul sung pan a pusuak nuam ngawl hamtang taw kibang hi.

¹⁴Hi mihingte sia thina ngam pan ka ngum buatu a, ahibuale thina vaang pan ka suatak buatu hi. Thina awng, na pul natnate hong paipui tan! Mithite teenna ngam awng, na lalcipsak theina hong paipui tan! Hi mihingte ka hesuak nawn buatu hi.



¹⁵Israel sia lopa bangin pung kale, seneal ngam pan nisuana vuisa khat ka vasak tu a, a tuinaakte le a tuikhukte kangsak tu hi. Tua vuisa in a manh nei na a minpiang lenmang tu hi.

¹⁶Hong langpan ahikom Samaria daan kipia tu hi. A mite ngal sungah thi tu uh hi. Nausente sia lei saatna in kinei tu a, naungai nupite a ngil kikui thapsak tu hi,” ci hi.

Hosea 14

Israel tungah Hosea ii Thuumna

¹Israel mite awng, Topa na Pathian kungah heak kik vun. Na khialna uh in note hong lutusak a, hong puksak hi.

²Topa kungah heak kik vun a, hi thungetna sia ama tungah na biakpiakna uh hisak vun. “Ka khialna uh a vekpi hong maisak tan a, ka thungetna uh hong saang tan. Tuaciang kong kamciam uh bangin nang kong pok tu uh hi.

³Assyria in eite hong hung thei ngeingawl a, ngal siphute in eite hong dal thei ngawl hi. Eite in ih milimte tungah amate sia ih Pathian hi ih ci kik ngei nawn buatu hi. Topaawng, nangma in bel tu dang a nei ngawlte na hesuak hi,” ci vun.

Topa in Nuntakna Thak Israel te Kamciam

⁴Topa in, “Ka mite ka kung ka then kik tu hi. Ka thin theampo taw amate ka it tu a, amate tungah ka thin uuk nawn ngawl hi.

⁵Israel mite tungah kei sia ngam kona ah nguatu bang ka hi tu hi. Amate in paakte bangin a palh tu hi. Lebanon thingkungte bangin zungkip tha tu hi.

⁶Amate in khantona thak taw nungta tu a, olive kungte bangin etlawm tu hi. Lebanon Cedarte bangin amate namtui tu hi.

⁷Khatvei ma amate sia keima sungsiat angvanna sungah nungta tu uh hi. Amate in ankung bangin khangto tu a, sapit huante bangin ngathiam tu hi. Amate sia Lebanon zu bangin minthang tu hi.



⁸Israel mite sia milim biakna taw kisai nawn ngawl tu hi. Amate ii thungetnate ka zo tu a, amate ka keam tu hi; A tee pul ngei ngawl thingkung bangin amate ka uap tu a, amate ii thupha theampote ii naak ka hi hi,” ci hi.

Thukhupna

⁹A ciimte in hi sung a, a ki atte telthiam taken a, amate in a thin sungah ciing taken. Topa ii lampite maan a, thutang mihingte in zui in nungta uh hi, ahihang mikhialte lutu in puk uh hi, banghangziam cile amate in tua thute ngaingon uh hi.



Joel

Joel 1

¹Hi sia in Pethuel tapa Joel tungah Topa ii thupuak ahi hi.

Lo An Lal hu in Mihingte Khuangai

²Khanghaamte awng, nadon vun Judah ngamsung a om mihing theampo awng ngai vun. Hi bang thu noma khansung ahizong na taangpupi khansung ahizong piang ngei ziam?

³Na tate tungah hi thu son vun; amate in a tate tungah sonsawn tu hi. Tuatate in a khang kikte tungah sonsawn tu hi.

⁴Khaumaw hon khat zawkciang hon khat in lo ante topha hi; Hon khat ii nusiak sate hon dang khat in khawngtum hi.

⁵No zu khamte awng, khanglo vun a kap vun. No zu dawnte awng, kap vun; sapittui thak vawt natu sapit ngate kilalcipsak zo hi.

⁶Khaumaw ngalkap hon khat in ih ngam hong sim hi; amate thahat a, tam lei a, kisim zo ngawl hi; a hate tawpi ha bangin hiam hi.

⁷Amate in ih sapit nguite lalcipsak zo a; ih theikungte khimtham zo hi. Amate in thingbaakte a kaang dongin a haw khok keak hi.

⁸A tenpui tu pa a thi ciang ngaknu khat a khuangai bangin no mite awng kap vun.

⁹Biakinpi sungah piak tu antang ahizong zu ahizong om ngawl hi; Topa piak tu bangma nei ngawl ahikom thiampite mau hi.

¹⁰Lote kolh hi; leitanghte mau hi banghangziam cile ankungte kilalcipsak a sapit ngate kikocipsakin, Olive kungte kikongawsak hi.

¹¹Lothote awng, khuangai vun; Sapit huan cingte awng kap vun, Banghangziam cile zungtaangte, mangtaangte, hi ankung theampo kilalthamsak hi.

¹²Sapit ngui le theikungte kongaw zo hi; thingnga kungte theampo vulin thi zo hi. Mihingte lungdamna bo hi.



¹³No, biaknatau ah naseam thiampite awng, khau-ip puan silhin kap vun! Biakinn sungah tumin, zan khuateak mau vun! Na Pathian na piak tu uh antang le zu om ngawl hi.

¹⁴Antan natu thu pia vun; mipi kikhawmsak vun! Lampuite le Judah mi theampo Topa na Pathian Biakinn sungah kikhawmtua in, ama tungah kap vun!

¹⁵Vaanglianbelpa ii siatna hong tunsak tu Topa Ni nai hi; Tua ni in bangza launa piang tu ziam!

¹⁶Ih ante a lalcipsak ciang cimaw in ih enlel hi. Ih Pathian Biakinn sungah lungdamna om ngawl hi.

¹⁷Anciite leitangh ko sungah thi hi. Khol tu antang om ngawl a, tua ahikom ansaal hawmte lalcip hi.

¹⁸Khuihonte zongh ngilkialin haam uh hi, banghangziam cile amate atu lopa om ngawl hi; tuuhonte zongh in thuak uh hi.

¹⁹Topa awng, nang kong ausan hi, banghangziam cile mei ii halthap bang keakin ngan thana le thingkungte kongaw hi.

²⁰Luituite kang ahikom ngamsate ngangawn in nang hong ko uh hi.

Joel 2

Topa Ni atu Kidop natu Khaumawte taw lak

¹Lemle tum vun; Pathian ii mual thiangtho Zion tungah patauna aw ngingsak vun, Judah mite awng, liing vun! Topa Ni hong tung pal tu hi.

²Tua ni sia khuatuap le khuazin ni, a zing le meeikaai ni khat hi tu hi. Mual tungah khuazing kizel bangin khaumaw ngalkap hon hong mainawt hi. Hi bang peuma om ngei ngawl a, om kik ngei nawn ngawl tu hi.

³Meikuang bangin amate in thingnote netum hi. Amate mai sangah ngam sia Eden Huan bang hi a, ahihang amate nung sangah tua ngam sia a kol senneal ngam ahi hi. Amate kung pan, bangma suakta ngawl hi.

⁴Amate siphu taw kibang a; ngal siphute bangin tai uh hi.



⁵Mualdawn ah a lento uh ciang siphuleangte bangin puak vatel in nging a; amate sia lopa kote mei taw hal bangin puak hi. Amate sia ngalsim tu in a kithoai ngalkap hon khat bangin kingual uh hi.

⁶Amate a nai uh ciang kuama theampo lau in; maitang theampo daang vadil uh hi.

⁷Ngalhangte bangin amate in sim a; luphung tungah ngalkapte bangin kaato uh hi. A vekpi in mai sangah tang takin mainawt uh a, a pai natu san pial ngawlin,

⁸Khat le khat mai kikhak ngawl uh hi. Ngal nannate kantan uh a, kuama in khak zo ngawl hi.

⁹Amate in khuapi bulu in; a kulh luphung kantan uh hi; amate inn tungah kaato in ngutate bangin khelki pan tum uh hi.

¹⁰Mai ah a manaw uh ciang lei ngawk a; van liing hi. Ni le tha mial a, aksite taang nawn ngawl hi.

¹¹Topa in a ngalkapte tungah vanto aw taw thupia hi. A thumang ngalkap honte tam a, thahat hi. Topa Ni sia bangza in lauhuai ziam! akua in thuak zo tu ziam?

Kisii kik natu Kikaizotna

¹²Topa in “Ahihang tu mama in, thintak taw kisiik in kei sangah antanna, kaana le mauna taw hong heak kik tavun.

¹³Na thin taphapna in na heena laksak vun; na puansilh balthapna taw kicing ngawl hi,” ci hi. Topa na Pathian kungah cia kik vun. Ama cingh a, hesuakna taw kidim hi; ama a thinsau a, a kamciam len hi; ama in khialna maisak tu in kinging tawntung a, daan pia ngawl hi.

¹⁴Topa na Pathian in a thin kheal tha tu a, an hauna taw nang thupha hong pia tu hi. Tuaciang antang le zute ama na pia thei tu hi.

¹⁵Zion Mual ah lemle tum vun; Antan natu thupia vun a, mipi kikhop sam vun!



¹⁶Mihingte khawmtua vun; a thiangtho kikhop natu in kithoaisak vun; luhaamte hong paipui tavun; patangte le nausente zongh khawmtua vun. A kiteangtawm nupate zongh a inn uh nusia in hong pai kul tu uh hi.

¹⁷Biaktau le Biakinn baangkua kilaklaw a, Topa na a seam thiampite kapin thungen tu a; “Topa awng, na mite hesuak in. Ngamdangte in, ‘Na Pathian koisung om ziam?’ ci in hong zawngsak hong nunausak heak in,” ci tu uh hi.

Pathian in Leitangh Phasak kik

¹⁸Tuaciang Topa in ama leitangh atu thinbot a; ama in a mite hesuak hi.

¹⁹Ama in amate tungah: “Tu in an le zu le olive thau no kong pia tu a, na lung uh kim tu hi. Ngamdang mite in no hong zawngsak nawn ngawl tu hi.

²⁰Saksang pan hong pai khaumaw ngalkap honte ka heam tu a, pawlkhatte senneal ngam sungah ka hawlkeak tu hi. A mai ngual teng Tuipi Thi sungah, a nung ngual teng Mediteranian Tuipi sungah, ka hawlkeak tu hi. A thiluangte muat in ui tu hi. Note tungah hong vawtnate hangin amate ka susia tu hi,

²¹“Lote awng, lau heak vun, Topa hong sepsak sate hu in lungpil in lungdam vun.

²²Nganhingte awng lau heak vun, Ngan thana munte hingin, thingkungte a nga nga a; thei nga le sapit nga zongh tam mama om hi.

²³“Zion mite awng, lungdam vun, Topa na Pathian ii note atu a sep sate hu in lungdam vun. Ama in tangngam ngua a khomin hong pia a; ama in phalbi nguante no atu hong buaksuk in, tuk ngua zongh hong piak ngei bang hong pia hi.

²⁴Taang cilna munte sia antang taw kidim tu a; thing nga sukna hui a leidumte sia zu le olive thau taw dimleet tu hi.

²⁵Khaumaw honte ii na lo an hong neaktumsak kumte sungah na sup uh te kong pia kik tu hi. Hi khaumaw ngalkap honte hong puak sia keima ka hi hi.



²⁶Tu in neak tu tam mama na nei tu uh a, na ngil uh va tu hi. Na lamdangte no atu hong sepsak Topa na Pathian na pok tu uh hi. Ka mite kizawnsak vawt kik ngei nawn ngawl tu hi.

²⁷Tuaciang, Israel awng, note sungah ka om na he tu uh a, Keima in Topa, note Pathian ka hi a, Pathian dang om ngawl hi. Ka mite kizawngsak kik ngei nawn ngawl tu hi.

Topa ii Ni

²⁸“Tua zawkciang a kuama po tungah ka thaa ka buak tu a; Note tapa le tanute uh in ka thu thangsak tu uh hi; note pasal huaite in mang man tu uh a, note khangnote in mu kholna mu tu uh hi.

²⁹Tua hun ciang naseam nupite le pasalte tung ngawngawn ah ka thaa ka buak tu hi.

³⁰“Tua ni hun hong thet tu kingin khol thei natu in van le lei ah kidopna tu limte ka pia tu a; chisan luanna, meikuang le meikhu khuamte om tu hi.

³¹A lian le a lauhuai Topa ii ni a thet ma in, ni kimialsak tu a, tha in chi bangsan tu hi.

³²Ahihang Topa tungah huna a ngen theampo kingum tu hi. Topa ci bangin “Jerusalem a om pawlkhatte suakta tu a; ka teal mite nungta tu uh hi,” ci hi,” ci in zokik hi.

Joel 3

Pathian in Minamte Thukhen tu

¹Topa in, “Tua hun ciang Judahte le Jerusalemte khanto nopsakna ka pia kik tu hi.

²Minam theampo ka khawmtua tu a, Thukhenna Kuam ah ka paipui tu hi. Ka mite tung a, a vawtsa theampo bangin tua munah amate tungah thu ka khen tu hi. Amate in Israel te ngamdang ah thethaang siat uh a, Israel ka ngam khentham uh hi.



³Amate in, ngalmatte akua teng in nga tu ci nuangtang lawnin khensat uh hi. Pumpi zuakte le zu leina in zak tu in, Amate in patangno le numeinote salin zuak uh hi.

⁴“Tyre, Sidon le Philistiate theampo awng, bang hong law nuam nu ziam? Bang khat po hangin hong thuk kik nuamin, kinei nu ziam? Tuabang na hi uh le keima in manlang takin kong thuk kik tu hi!

⁵Note in ka ngun ka khamte la in, ka sumngum manphate na biakinn ah na ciapui uh hi.

⁶Judah le Jerusalem mite amate ngam pan a khuala pek ah paipui in Greekte tungah na zuak uh hi.

⁷Tu in amate na zuakna munte pan ka ciapui kik tu hi. Amate tung na vawt uh bangin note tungah kong vawt tu hi.

⁸Na tapate le na tanute Judah mite tungah ka zuaksak tu a; amate in a khualana Sabeante tungah zuaksawn tu hi. Keima Topa in ka ci zo hi.

⁹“Minamte sungah hi thu thangsak vun; ‘Ngalsim tu in kithoai vun; na ngalhangte sam vun; na ngalkapte khawm vun a, kuan vun!

¹⁰Na lo thawna thikzumte uh seak vun a, namsau suaksak vun, na thingno attanna namte tei sua vun. Thaneamte ngangawn zongh in ngalsim tu uh hi.

¹¹Manlang in hong pai tavun, no kiim le paam a ngamte awng, kuam sungah kikhawm tavun,’ ci vun” ci hi. Topa awng, amate sim tu in, na ngalkapte puak suk in!

¹²“Minamte kithoai tu a, Thukhenna Kuam sungah hong pai kul tu hi. Tua munah kiim le paam ngam theampote tungah thukhen tu in Keima, Topa ka to tu hi.

¹³Amate ngilo mama hi; anlaak hun lai ankungte satan bangin amate saattan vun; sapit ngate sapit ngoaina sung dimin a tui a let dong a kingoitham bangin amate ngoaitham vun.” ci hi.



¹⁴A tul a tulin Thukhenna Kuam sungah om uh hi. Tua munah Topa ii ni hong theng pal tu hi.

¹⁵Ni le tha liapin, aksite taang nawn ngawl hi.

Pathian in A mite Thupha Pia tu

¹⁶Zion mual pan Topa hawk a; a awsia Jerusalem pan vanto nging bangin ngingin; van le lei liing hi. Ahihang ama in a mite sungsia tu hi.

¹⁷“Tuaciang Israel awng, keima in Topa na Pathian ka hi hunlam nong tel tu uh hi. Ka mual thiangtho Zion tungah ka teang hi. Jerusalem sia khuapi thiangtho khat hi tu a; ngamdangte in tua khuapi zothal kik ngei nawn ngawl tu uh hi.

¹⁸Tua hun ciang mualliante sia sapit huan taw kidim tu a, mualno sim ah ngan honte kimu tu hi; Judah ngam theampo atu in tui tam mama om tu hi. Topa Biakinn panin lui khat luang tu a, tua lui in Acacia Kuam tui pia tu hi.

¹⁹“Egypt ngam sia senneal ngam khat suak tu a; Edom sia kisia in dui suak tu hi. Banghangziam cile amate in Judah simin maw nei ngawl, a mite thatlum uh hi.

²⁰⁻²¹A kithatte ii phuu ka lam tu hi; A mawte ka thasua buatu hi. Ahihang Judah le Jerusalem sia a tawntungin mite teenna mun hi tu hi, tuaciang keima Topa sia Zion Mualtung ah ka teang tu hi.” ci hi.



Amos

Amos 1

¹Hite sia Tekoa ngam khuapino khat sung a tuu cingpa Amos ii kammalte ahi hi. Judah ngam ah Uzziah kumpi in maang a, Israel ngam ah Jehoash tapa Jeroboam sia kumpi in a khan hun, zinliin ma kum nii lai in, Israel huvau hi thute theampo Pathian in Amos tungah lak hi.

²Amos in, “Topa sia Zion mual pan hawk a; Ama ii aw sia Jerusalem pan vanto bangin nging hi. Ngan thana munte ko a, Carmel mual a lopate vulcip hi,” ci hi.

Israel ii Ngampaamte tungah Pathian ii Thukhenna. Syria

³Topa in, “Damascus mite khial kikik khial kikik ahiciang amate daan pia tatak tu khi hi. Amate in Gilead mite tungah maitatin vawtsia hi.

⁴Tua ahikom Kumpipa Hazael iisak kumpi inn sia meikuang ka khiak tu a, Kumpi Benhadad ii kulhte ka haltham tu hi.

⁵Damascus khuapi kongpite ka sutham tu a, Aven Kuam a teang mihingte le Betheden ukpa ka hawlkeak tu hi. Syria mite sia Kirte ngam ah luangta in kipaipui tu hi,” ci hi.

Philistia

⁶Topa in “Gaza mite khial kikik khial kikik ahiciang amate daan ka pia tatak tu hi. Amate in ngam bup mihingte paipui in Edom mite tungah salin zuak uh hi.

⁷Tua ahiciang Gaza khuapi luphung tungah meikuang ka khiak tu a, a khuapi kulhte ka haltum tu hi.

⁸Ashdod le Ashkelon khuapite ii ukpate ka hawlkeak tu hi. Ekron khuapi daan ka pia tu a, Philistine mite a taanglai theampo thi tu uh hi,” ci hi.



Tyre

⁹Topa in, “Tyre mite khial kikik, khial kikik ahiciang amate daan ka pia tatak tu hi. Amate in ngambup mihingte Edom ah peamta suak tu in paisak a, kilawmtak natu thukimna a vawt sia len ngawl hi.

¹⁰Tua ahikom Tyre khuapi luphung tungah meikuang ka khiak tu a, a kulhpite ka haltham tu hi,” ci hi.

Edom

¹¹Topa in, “ Edom mite khial kikik khial kikik ahiciang daan ka pia tatak tu hi. Amate in a suapui Israel te savai bangin vai a, tawm zongh hesuak ngawl hi. Amate thin ukna in ciangtan nei ngawl a, a thin ukna uh thaisak ngei ngawl uh hi.

¹²Tua ahikom Teman khuapi tungah meikuang ka khiak tu a, Bozrah kulhpite ka haltum tu hi,” ci hi.

Ammon

¹³Topa in, “Ammon mite khial kikik khial kikik ahiciang amate daan ka pia tatak tu hi. Amate in ngam a keau nop hu in ngal a sim ciang Gilead ah naupaai numeite ngangawn ii ngil kуйeak uh hi.

¹⁴Tua ahikom Rabbah khuapi luphungte tungah meikuang ka khiak tu a, a kulhpite ka haltum tu hi. Tuaciang ngal kisim ni in ki ausan ngawp tu a, kisimna sia vuiپی suangval bangin kitom tu hi.

¹⁵Amate kumpipa le a uliante peamta suak tu in pai tu uh hi,” ci hi.

Amos 2

¹Topa in, “Moab mite khial kikik khial kikik ahiciang amate daan ka pia tatak tu hi. Amate in Edom kumpipa ii ngute sia, zawnsak vawtna taw haltham a vut suaksak hi.

²Moab ngamah meikuang ka khiak tu a, Kerioth kulhpite ka haltham tu hi. Ngal kisimna sungah ngalkapte au a, lemle tumin kisimna aw sa lialua sungah Moab mite thi tu hi.

³Moab ngamukpa le ngam lampuite theampo ka thatlum tu hi.” ci hi.



Judah

⁴Topa in, “Judah mite khial kikik khial kikik ahiciang amate daan ka pia tatak tu hi. Amate in ka hilnate zawngsak a ka thupiakte zui ngawl uh hi. A taangpupi ii biak a maan ngawl pathiante ma in amate lam pialsak hi.

⁵Tua ahikom Judah tungah meikuang ka khiak tu a, Jerusalem kulhpite ka haltum tu hi,” ci hi.

Israel tungah Pathian ii Thukhenna

⁶Topa in, “Israel mite khial kikik khial kikik ahiciang amate daan ka pia tatak daisak hi.

⁸Biakpiakna mun theampo ah, a zawngte tung pan leiba taangin a laak puante tungah pasalte lum uh hi. Amate in lei a bate tung pan a laak zute, a Pathian biakinn sungah ne uh hi.

⁹“Hi zata hi napi ka mite awng cedar thingkungte bangin saang a, limthingte bang a, a thakho, Amorte ka suk cimitna sia noma kong khualna ahi hi.

¹⁰Egypt ngam panin kong pusua pui a, senneal ngam kantan in kum sawmli sung lam hong pui in, tuaciang noma atu in Amorte ngam kong pia hi.

¹¹Na tapate pawlkhat kamsang tu in ka teal a, na khangmoi tangval pawlkhatte Nazirite tu in ka teal hi. Hi thute thutak hi ka na ngawl ziam, Israel mite awng? Keima Topa in ka ci zo hi.

¹²Ahihang tua Nazirite te zu na nesak uh a, ka thupiak kammalte son ngawl tu in kamsangte thu na pia uh hi.

¹³Tu in note lei ah kong henpeak tu a, antang a dimin a kiheang leang khat bangin na mau tu uh hi.

¹⁴Tai manlangte zongh suakta ngawl tu uh hi, mihing thakhote a tha bo tu a, tuaciang ngalkapte in amate nuntakna uh hu zo ngawl tu uh hi.

¹⁵Thal toaite in nalh zo ngawl tu a, tai manlangte suakta ngawl tu a, siphu tung a to mihingte in a nuntakna uh suatak ngawl tu uh hi.



¹⁶Tua ni in a hang bel ngalkapte zongh a ngalhiam khia in tai tu uh hi,” ci in Topa in son zo hi.

Amos 3

¹Minam bup in Egypt ngam pan ama ii hong pusua pui Israel mite awng, note huvau a Topa pauna hi thu ngai vun:

²“Leitung bup minam theampo sung pan kong heak le kong thin nop mawk sia noma bek na hi uh hi. Tua thu in na khialna uh nasiasak seseam a, tuate hu in daan kong piak kul tu hi,” ci hi.

Kamsangpa ii Nasep

³Vaihawmna om khol ngawlin mihing nii khualhaw khawm thei tu ziam?

⁴Tawpi in sa mat tu mu ngawl bulin taam sungah hawk thawthong na ziam? Tawpi moi khat in mat a nei buale a kua sungah ngalh vangam na ziam?

⁵Thaang a kisia aitaana khat om buale vacim awk ngei na ziam? Thaang sia a pealsak khat a om buale ama thu in peal na ziam?

⁶Khuapi sungah ngal patau lemle a kitum ciang khua mite lau ngawlin om na ziam? Topa in haksatna a puak buale khuapi sungah haksatna theng tu ziam?

⁷Vaanglianpipa Topa in a naseam kamsangte tungah a tupna kilanghsak phot ngawlin bangma seam ngawl hi.

⁸Tawpi a hawk ciang a lau ngawl akua om na ziam? Vaanglianpipa Topa a pau ciang a thu taangko ngawlin akua om thei ziam?

Samaria Lal natu

⁹Ashdod le Egypt kumpi, kumpi innte ah, a teangte tungah; “Samaria kiimkot mualte tungah kikhawm vun a, tua munah a nasia mama buaina le khutkhial mawna a kivawtte en vun.” ci in ko vun.

¹⁰Topa in, “Hi mihingte in a innpite uh sia ngitlona le maitatna taw a laak uh vanhte taw dim uh hi. Amate in thumaanna tu zia ngawngawn tel ngawl uh hi.



¹¹Tua ahikom ngal in a ngam kiim uum in, a kidalna uh susia tu a, a innte phuulsak tu uh hi,” ci hi.

¹²Topa in, “Tuucing khat in tawpi khat ii a neak mong tuupeang nii ahibuale tuubil khat bekma a top kik vathiam bangma, tu in lupna nuam niknek tungah a lum Samariate tawm cik bek luhai tu nu hi.

¹³Tu in ngai vun, Jacob suan le paalte tungah kidopna tu zacak vun,” VaanglianpipaTopa in ci hi.

¹⁴Israel te a khialna hu in, daan ka piak ni ciang, Bethel a biaknataute ka sutham tu hi. Biaktau sim ii a kingh suangtumte kisutham tu a, lei ah puk tu uh hi.

¹⁵Phalbi innte le khuakhal innte ka susia tu hi. Saiha taw a kizeam innte zancip in, cim tu hi; inn lian theampo ki lalcipsak tu hi,” ci hi.

Amos 4

¹A tha neamte siatvawt a, mizawngte zothaw in, na pasalte ii zuhang hong piak kinken tu a ngen, Bashan a khuipui pha tak a a kivaakte bangin a thau vialvual no Samaria numeite awng, hi thu ngai vun!

²VaanglianpipaTopa thiangtho ahi bangma ama in, “Amate in note thikkoai taw hong kai tu nite hong theng tu hi; note khat sim in thikkoai khat tung a, a awk ngasa khat bang na hi tu uh hi.

³Luphung a vang nai belna ah note hong kikai keak tu a, a pua ah hong kilawnthal tu hi,” ci in kamciam zo hi.

Israel ii Thu Heak Thei ngawlna

⁴Vaanglianpipa Topa in, “Israel mite awng, na nuam uh le mun thiangtho Bethel ah pai in khialna vawt tavun! Gilgal ah pai in na tha neiza uh taw khial tavun! Zing sim zing simin sangaw biakpiak tu ngannote hong paipui tavun a, ni thum simin na sawm a khat hong paipui tavun.

⁵Pathian tungah lungdamkona in na anluum te pia vun a, na piakthua uh piakna tungtaang ah kisuangtaak vun! Hisia in na sep tha nop uh thu ahi hi.



⁶“Na khuapite theampo uh ah kialpi a tungsak sia Keima khi hi, ahihang kei kung nong zuan kik bua uh hi.

⁷Na lo an uhte ii kisap bel hun laitakin nguatu ka zusak bua hi. Khuapi khat sungah ngua ka zusak a, khat sungah ngua ka hangsak hi. Lo khat sungah nguazu a, a dang khat kocip hi.

⁸Dangkona taw zawmin, khuapi tam mamate ii mihingte sia khuapi khat ah tui mu tu ki um in a pai uh hang neakkhom tu a mu bua uh hi. Tua hi napi kei kung nong zuan kik bua uh hi.

⁹“Na lo an uh kocipsak tu in vuisa ka vasak hi. Khaumawte in na huan an uh le na sapitngui uhte, na theikung uhte le na olive kung uhte netum uh hi. Tua hi napi ka kungah nong heak kik bua uh hi.

¹⁰“Pul natna khat Egypt ah ka tunsak bangin no tungah kong tungsak hi. Na khangnote uh ngal sungah kong thalupsak a, na siphu uh kong laaksak hi. Na ngiaphual uh ah mithi uih taw na naakvang kong dim hi. Tuabang hi napi kei kungah nong heak kik tuan bua uh hi.

¹¹“No pawlkhatte sia Sodom le Gomorrah ka suksiat bangin kong susia hi. No a nungta valiik pawlkhatte sia meikhuk pan a kiten thingbaak kaangmong bang na hi uh hi. Tuabang hi napi ka kung nong zuan kik tuan bua uh hi,” Topa in ci hi.

¹²“Tua ahikom, Israel mite awng, note daan hong pia tu khi hi. Hi bangin vawt tu ka hi ciang ka thukhenna thuk tu in kithoai sa in om vun!” ci hi.

¹³Pathian sia mualliante a vawt pa le vuite a bitphuapa ahi hi. Ama in a khua ngaisutnate mihing in telsak hi; ama in sun sia zan suaksak hi. Ama in leitung saangna ah vak hi. Hisia in ama min ahi hi: Vaanglianbelpa Topa Pathian!

Amos 5

Kisii kik natu Samna

¹Israel mite awng, note atu in hi thivui la kong sak sia ngai vun:

²Ngaknu thiangtho Israel puk zo hi! Tho kik ngei nawn ngawl tu hi! Ama sia lei ah ki nusia in om hi, kuama in ama phong ngawl hi.



³Vaanglianpipa Topa in, “Israel khuapi khat in ngalkap tulkhat paisak a, zakhat bek heak kik hi; khuapi dang khat in zakhat paisak a, sawm bek heak kik hi,” ci hi.

⁴Topa in Israel mite tungah, “Kei kungah hong pai tavun, tua hile na nungta tu uh hi.

⁵Biakpiakna vawt tu in Beersheba ah pai heak vun. Bethel khua ah kei hong zong heak vun— Bethel khua sia a luithawthong hi tu hi. Gilgal khua ah pai heak vun— a mite peamta kisua siat hi” ci hi.

⁶Topa kungah pai vun, tua hile na nungta tu uh hi. Na pai bua uh le Israel mite tungah, meikuang bangin Topa hong theng tu hi. Bethel mite mei in kaangtum tu hi. Kuama in tua mei sumit thei ngawl tu hi.

⁷Thumaan sia thumaan ngawlin a vawt le ngualdang neisa theamin a laaksak note, a lal sa na hi uh hi!

⁸Topa in siluk le zawlzawng aksite vawt hi. Ama in khuazing sia khuavakin vawt a, sun sia zan in vawt hi. Ama in tuipi tuite samin lei ah buak hi. Ama min sia Topa ahi hi.

⁹Ama in a thahatte le kulh muanhuaite lalcipsak hi.

¹⁰Note in thukhen zum ah thumaan ngawl a nalhte le thumaan sonte na ensan uh hi.

¹¹A zawnge le a ngim ngate na zothaw uh a, a antangte na suddol uh hi. Tua hu in nomasak sa suanginn pha sungah na teang buatu uh a, sapit huan pha sungah na ciin uh sapittui na ne buatu uh hi.

¹²Na mawna uh bangza in kiitak huai a, mawna khialna bangza vawt nu ziam ci sia ka he hi. Mihing phate vawtsia in, sumnguk na la uh a, thukhenna zum ah mizawngte thumaan in thu a kikhen tu na khaam uh hi.

¹³Tua ahiciang hi bang hunsia laitakin thu ngaisun thei mi pilte thim khipkhepin a om sia ahi tu ma ahi hi!



¹⁴Na nuntak thei natu in siatna vawt ngawlin a pha vawt sawm vun. Tua hile Vaanglianbel Topa Pathian sia kote kungah om hi na ci uh bangin note taw om takpi tu hi.

¹⁵Thusia ensan in thumaan dei vun. Thu khenna zum ah thumaan son vun. Hi minamte sung panin nungta a, a taanglai te Topain hesuak thei tha tu hi.

¹⁶Tua ahikom Vaanglianpipa Topa Vaanglianbelpa in, “Khuapi lampite ah heena, kaana le tauna om tu hi. Lotho mite ngawngawn kap tu a a kicialte taw kopin mithi kaa tu in kisam tu hi.

¹⁷Sapit huan theampo sungah mauna om tu hi. Hite theampo hong theng tu hi, banghangziam cile keima in note daan pia tu in kong pai hi,” Topa in ci zo hi.

¹⁸Topa ni a ngakla note atu in bangza in lauhuai tu ziam! Tua ni in bang phattuamna note hong pia tu ziam? Note atu in tua ni sia khuavak ni hi ngawlin khuazin ni hi tu hi.

¹⁹Tua ni sia tawpi kung pan tai a, vompui taw a kisi pasal khat bang hi tu nu hi! Tua ahibuale pasal khat inn hong cia sia pang tung zawt napo kinei ngul ii tuk sia taw kibang tu hi!

²⁰Topa ni in khuazing hong paipui tu a khuavak hong paipui ngawl tu hi; tua ni sia maitaina om ngawlin lungzin ni khat hi tu hi.

²¹Topa in, “Na biakna poaite hua khi hi; tuate thuak zo ngawl khi hi!

²²Meihal biakpiakna le antang biakpiakna nong piak uh ciang kong saang buatu hi; kei nong biakna tu a, thau takin na vak uh, nganhingte kong saang buatu hi.

²³A nangon huai na lasak uhte tawp vun; na tengtong awte uh ngai nuam ngawl khi hi.

²⁴Tuate taangin thutang sia lui bangin luang taken a, thumaanna sia a kang ngei ngawl ngun bangin luang taken.

²⁵“Israel mite awng, senneal ngam kantan in kum sawmli sung kong paipui lai in sangaw biakpiakna le piaknate kong ngen bua hi.

²⁶Ahihang tu in na kumpi pathian Sakkuth ii lim le na aksi pathian Kaiwan limte na biak man un, tua milimte sia

²⁷Damascus kalin saltang tu in kong paipui ciang, na ken uh kul tu hi,”
Vaanglianbelpa Pathian a kici Topa in ci hi.

Amos 6

Israel Lalcipna

¹Samaria ah ngammuang kisate le Zion ah nuntak nuam a, a teang— no Israel ngam lian sung a miliante, ngual ii hu hong ngetnate atu in bangza in lauhuai ziam!

²Pai in Calneh khuapi en tavun. Tuaciang khuapi lian Hamath ah paisuak tavun a, tua zawkciang, Philistine te khuapi Gath ah paisuk tavun. Amate in Judah le Israel kumpi ngamte sangin phazaw ziam? Amate ngam sia no a sangin zaizaw ziam?

³Tuasiatna ni theng ci sia na he nuam bua uh a, ahizong na nasep uh in tua ni sia naisak seseam hi.

⁴A nuam niknek na lupna tung a lum a, khuino sa le tuuno sa taw a kivaak note atu bangza in lauhuai ziam!

⁵David bangin la phuakin, tengtong tawsak tu dik na sa uh hi.

⁶Zu sia beal taw na taal uh a, paaknamtui phabelte na zangh uh hi, ahihang Israel zancipna tungtaang ah na mau bua uh hi.

⁷Tua ahiciang note sia a masa phitbel in salin a pai tute na hi uh hi. Na poaipi uh le na anneak poai uhte bo vangeu tu hi.

⁸Topa Pathian Vaanglianbelpa in hi a ciliap huai kidopna tu thupia zo hi: “Israel mite ii kiphatsakna ka ngaimaw hi; amate ii inn nuam neknokte ka huatsa hi. Amate khuapi le a sung a om theampo ngalte ka pia tu hi,” ci hi.

⁹Innkuan khat sungah pasal sawm a kikhe le amate thi tu uh hi.



¹⁰Mithi vui tu a kisee sa tavuan nei mithipa ii bepa in a luang innpua ah paipui tu hi. A bepa in inn sungah a taanglai pawpo tungah “Tua munah khat po nang taw a om omlai ziam?” ci in sam tu hi. Tua pa in “Om bo!” ci in zo tu hi. Tuaciang a bepa in, “Pau heak in! Topa ii min ih law thaak ngawl natu ih kidawm tu hi,” ci tu hi.

¹¹Topa in thu a piak tak ciang, innlian innnote a bebekin kisaattham tu hi.

¹²Suangpi tungah siphute kinuntaw ziam? Mihingte in khuitaw taw tuipei tungah lotho ziam? Ahizong note in thutang sia ngu na suaksak uh a, a maan sia a maan ngawl na suaksak uh hi.

¹³Lodebar khuapi na laak man un, na kiphasak uh hi. “Karnaim khua la zo tu in thahat ngawp hi zam,” ci in na kiphasak uh hi.

¹⁴Topa Pathian Vaanglianbelpa ama mama in, “Israel mite awng, na ngam uh lua tu in ngamdang ngalkap hon khat hong paisak tu hi. Tuате in Hamath Mual Cianghsaksang pan thangsang Arabah Lui dong ah note hong nuaicip tu hi,” ci hi.

Amos 7

Khaumaw hon Mu kholna

¹Vaanglianpipa Topa tung pan mu kholna khat ka nga hi. Tua mu kholna sungah kumpipa ii tel, sa an a ki at zawk bek le lopate po kik tu a kipat zawkciang khaumaw honpui khat Topa in a piangsak ka mu hi.

²Ka mu kholna sungah, khaumaw in ngam sungah a hing theampo netum a, tuaciang keima in, “Vaanglianpipa Topa awng, na mite khialna maisak in! Bangbangin amate nungta zo tu ziam? Amate tawm mama a, thaneam mama uh hi!” ka ci hi.

³Topa in a thin kheal kik a, “Na mu bang tangtung ngawl tu hi,” ci hi.

Meikuang mu kholna

⁴Vaanglianpipa Topa tung panin mu kholna dang khat ka nei hi. Tua sungah a mite meikuang sungah ama in daan pia tu in kithathoai ka mu hi. Mei in



leinuai a tuipi lian sia kaangtham a, tuaciang leitangh mama kaangtham tu in kipan hi.

⁵Tuasia ciang keima in, “Vaanglianpipa Topaawng, tawlnga in! Na mite bangbangin nungta thei tu ziam? Amate tawm mama a, thaneam mama hi!” ka ci hi.

⁶Topa sia a thin kheal kikin, “Hi sia zongh tangtung peang ngawl tu hi,” ci hi.

Khauhang Saina khat Mu kholna

⁷Topa tung pan mu kholna dang khat ka nei hi. Tua sungah ama sia a tang tu in khauhang taw a kitee, pang khat hui ah ding ka mu hi. Ama khut sungah khauhang khat om hi.

⁸Ama in, “Amos awng, bang na mu ziam?” ci in kei hong dongh hi. “Khauhang saina khat” ci in ka zo hi. Tuaciang ama in “Ka mite pang a tang ngawl khat taw a kiban hunlam lakna in hi khauhang saina ka zangh hi. Amate daan ka piak tu thu ka thin ka kheal kik buatu hi.

⁹Isaac ii suan le paalte biakpiakna munte kisia tu hi. Israel te ii a thiangtho munte zancip in kisia tu hi, Kumpi Jeroboam ukna ngam ka bosak tu hi.” ci hi.

Amos le Amaziah

¹⁰Tuaciang Bethel ii thiampi Amaziah in Israel te Kumpipa Jeroboam tungah thu khat puak hi: “Amos in mihingte sungah nang hong thasawm hi. Ama kammalte in ngam susia tu hi.

¹¹Hi sia ama pauna hi; ‘Jeroboam sia ngal kisimna ah thi tu hi, tuaciang Israel mite sal in amate ngam sung pan kipaipui tu hi,’ ci hi.”

¹²Tuaciang Amaziah in Amos tungah, “Kamsang pa awng, tu a teng pha zo hi! Judah ngamah heak kik tan a, tua lai ah thuhil tan. Amate in nang sum taw hong tham taken.

¹³Hi lai Bethel ah kamsaanna zangh nawn heak in. Hi mun sia kumpipa ii biakpiakna mun hi a, ngambup ii biakinn hi,” ci hi.



¹⁴Amos in, “Kei sia ngual bang a sum thangaina taw kamsang seam nam ka hi bua hi. Keima in tuucingpa khat ka hi a, theikungte ka keamcing hi.

¹⁵Ahikang Topa in ka tuucin nasepna pan hong la a ama mi Israel mite tungah kamsaanna thu puak tu in pai in hong sawl hi.

¹⁶Tua ahikom tu in Topa paunate ngai in. Nangma in kamsaanna ka tawlngak natu le, Israel mite langpanin ka thuhilna ka tawlngak natu nong son hi.

¹⁷Tua ahikom Amaziah awng, Topa in na tungah, ‘Na zi sia khuapi lian sungah pumpi zuak khat suak tu a, na tate ngal sungah kithatlum tu hi. Na leitangh kihawmtham tu a, ngualdang kipia in, tuaciang nangma mama lawki ngam khat sungah na thi tu hi. Tuaciang Israel mite amate neisa leitangh pan leidang ah sal suak tu in kipaipui hamtang tu hi,’ hong ci hi” ci in zo hi.

Amos 8

Thingnga Bawm khat Mu kholna

¹Mu kholna dang khat Vaanglianpipa Topa tung pan ka nei hi. Tua sungah thingnga bawm khat ka mu hi.

²Topa in, “Amos awng, bang mu ni ziam? ” ci in hong dongh hi. “Thingnga bawm khat” ci in ka zokik hi. Topa in kei tungah, “Israel ka mite bona hong theng zo hi. Amate daan ka piak tu ka thin ka kheal kik buatu hi.

³Tua ni ciang kumpi innsung a late sia kaana le mauna aw suak tu hi. Mithiluangte mun theampo ah om tu hi. Tuata a thimtham in kivawk tu hi,” hong ci hi.

Israel ii Bo natu

⁴Ngam sung a mizawng susiate le a ki taangsamhte a tuanpeak note awng, hi thu ngai vun.

⁵Noma le noma hi bangin, “Ni thiangthote kiman memeang hen a, ih antang zuak thei memeang leang uk hing, bang hun ciang Sabbath kiman tu a, ih sumzuakte zom thei kik tu hi ziam? Tuasia ciang, khaikhin maan ngawlte zanghin sum leite khaikhin maan ngawl taw theam in, na manh ih khan thei tu hi.

⁶Zungtaang mannung ngawlte a manh tamin ih zuak thei tu hi. A peangdap kop khat ii manh zongh a pia zo ngawl, mizawng leiba a lo zo ngawl khat ih zong tu a, ama sia salin ih lei tu hi,” na kici uh hi.

⁷Topa, Israel te Pathian, “Amate ngitlo ngamtatnate ka mangil ngei buatu hi.

⁸Tua ahikom zinliing tu a, ngamsung a om misim in ngim nga tu hi. Ngambup kithing tu a, Nile ngun bangin khang tuak kiam tuak tu hi.

⁹Ni sia sun kimlai in ka tumsak tu le suntang in khua ka zin sak tu hun hong theng tu hi. Keima Vaanglianpipa Topa ka pau zo hi.

¹⁰Na poaipite mithi vuina ka suaksak tu a, na lungdam late heena, kaana ka suaksak tu hi. Na lu uh a tolin kong meetsak tu a, khau-ip puan kong silhsak tu hi, tapa khat bek a nei sia thi a, a nu le a pa a kaa bangin kong kapsak tu hi. Tua ni sia a tawp dongin thasiat huai tu hi.

¹¹“Ngam sungah kialpi ka tunsak natu hun hong theng tu hi. Mihingte in ngilkial tu ahihang andu ngilkial hi ngawl tu hi. Dangko tu ahihang tuidu dangko hi ngawl tu hi. Amate in Topa thupuak kammalte heak nopna ngilkial le dangko hi tu hi. Keima, Vaanglianpipa Topa ka pau zo hi.

¹²Mihingte sia Tuipi Thi pan Mediterranean ah, tuaciangsaksang pan nisuana sangah vakvai tu uh hi. Amate in mun theampo ah Topa thupuak kammalte zong tu uh hi, ahihang mu ngawl tu uh hi.

¹³Tua ni in, cidam khangmoi pasalte le numeite ngangawn dangko in top vanek tu uh hi.

¹⁴Samaria te milim ‘Dan ii pathian’ ahibuale ‘Beersheba ii pathian’ min taw a kiciam mihingte puk tu a, tho kik nawn ngawl tu uh hi,” ci in kiciam zo hi.

Amos 9

Topa ii Thukhennate

¹Biaktauhui ah Topa ding ka mu hi. Ama in thupia a: “Biakinn phungkawng a ngawk natu in a khuam dawnte nasia takin saat vun. Tua khuampi dawnte taltansak vun a, mihingte lu tungah taaksak vun. A taanglai mihingte ngal



sungah ka thatlum tu hi. Kuama suakta ngawl tu a, khat zongh suakta ngawl tu hi.

²Mithi khua dong to sukin a tuaksuk hial zong, tua sung ma ah ka man tu hi. Vantung keak ah a kaato zong ka kaisuk tu hi.

³Carmel mualdawn ah a buu hial uh zong amate ka zong tu a, ka man tu hi. Kei kung pan tuipi taw ah a buu hial uh zong ngulpui in ka petsak tu hi.

⁴A ngalte in manin luangta in ciapui kale amate a thalup natu thu ka pia tu hi. Amate ka sukcip tu le amate ka hu ngawl tu sia khensat zo khi hi,” ci hi.

⁵Vaanglianpipa Topa Vaanglianbelpa in leitung tham a, leitung liing hi; tua munah a teang theampo mau uh hi. Leitung bup sia Nile Ngun bangin khang tuak kiam tuak hi.

⁶Topa in a inn vantungte ah sa a, leitung ah vankhuum koi hi. Ama in tuipi tuite samin leitung ah buak hi. Ama min sia Topa ahi hi!

⁷Topa in, “Israel mite awng, note kong ngaisut bangza ma in Ethiopia mite ka ngaisun hi. Note Egypt pan kong paipui bangma in, Philistinete Crete pan, Syria te Kir pan ka paipui hi.

⁸Keima, Vaanglianpipa Topa in khialna a dim hi Israel kumpi ngam encik nginge khi hi, lei mai pan hi ngam ka sucip tu hi. Ahihang Jacob suan le paalte theampo ka mon siat buatu hi.

⁹“Israel mite sia ansakna ciang sungah a kisa antangte bangin thupia in thingin ka lok tu hi. A nguatngat ngawl theampo heam tu in amate ngam tuatuamte kawmah thing in ka lok tu hi.

¹⁰Ka mite sung pan ‘Haksatna sia Pathian in eite kungah hong theng sak buan te’ a ci, maw nei theampo sia ngal sungah kithatlum tu hi,” ci hi.

Israel te ii Maisang Kipua kik natu

¹¹Topa in, “Inn zancip sa khat taw a kibang David kumpi ngam ka pua kik tu ni khat hong theng tu hi. A luphung pangte pua kikin ka phasak kik tu hi. Ka pua kik tu a, nidang tawnglai bang ka hisak kik tu hi.



¹²Tuabangin Israel mite in Edom ngam sungah a omlai sun teng le keima ngam ahi ngei theampo zothal tu hi,” hi thute a piangsak tu Topa in ci hi.

¹³Topa in, “Hi bang nite hong tung tu hi, Lo ante kila man ngawl liangin a khan tu hun, sapit ngate zu in kivawt man ngawl liangin a khan tu hun hong theng tu hi. Mualpite tung pan sapittui thum taak vakeu tu a, mualnote tung pan tui bangin luang tu hi.

¹⁴Ka mite sia amate ngam sungah ka ciapui kik tu a, A khuapi zancip sate, sa kikin, tua munah teang tu uh hi. Amate in sapit huan vawt tu uh a sapittui ne tu uh hi. Amate in huan vawt tu a, a ciinte ne tu uh hi.

¹⁵Ka mite sia ka piak sa ngam sungah ka phut tu hi, tuaciang amate sia kiphai keak kik ngawl tu hi,” ci hi. Topa na Pathian pau zo hi.



Obadiah

Obadiah 1

¹Hi sia in Obadiah ii kamsaan Edom ngam taw kisai Vaanglianpipa, Topaii thusonte ahi hi.

Topa in Edom Daan pia tu

Topa in a kamtaipa minam tuatuamte tungah paisak a, tuaciang eite in ama thupiakte ih za zo hi. “Kithoai vun! Edom sim tu in kuan tek tawng!” ci hi.

²Topa in Edom tungah, “Nang thaneam in kong vawt tu a, kuama theampo in nang hong zawngsak tu hi.

³Na kiphatsakna in nang hong theam zo hi. Na khuapi sia suang taw kivawt kulhpi hi a; na inn sia mualtung a saangna ah om hi, tua ahikom nangma le nangma ‘Akua peuma in kei hong kaisuk zo tu ziam?’ na kici hi.

⁴Na inn sia muvanlai bu bangin a saangna ah na vawt a, aksi kawmah a om bang na hi hial zongin, Nang kong kaisuk tu hi.

⁵“Zan in ngutate hong pai ciang, amate in a dei teng bek la uh hi. Mihingte in sapit nga a law uh ciang, amate in a sangh tawm khe tawntung uh hi. Ahizong nang sia na ngalte in hong thiak sitset zo hi.

⁶Esau ii suan le paalte awng na sumngumte hong kisut khawng zo hi.

⁷Na kipawlpuite in nang hong theam zo a, amate in nang sia na ngam pan hong notkeak zo hi. Na kilempui minamte in nang sia tu in hong zothal zo hi; Nang taw an nekhawm na lawmte in nang thaang hong sia zo hi. amate in nang sia, ‘A pilna ta zata koi sungah koi ziam?’ hong ci uh hi.

⁸“Edom daan ka piak ni in, a mipilte ka susiacip tu a, tuaciang a ciimna theampo ka zutmaai tu hi.

⁹Temante ii ngalhangte kilausak vadil tu a, tuaciang Edom a ngalkap theampo kithatlum tu hi.

Edom Daan piakna ii A hang



¹⁰“Jacob ii suan le paal na suapui pate suamin that na hikom, nang sia hong kisia tu a a tawntungin na min hong kidaisak tu hi.

¹¹Ngalte ii a kongpite a sukthap ni in na tungh nuam bua hi. Jerusalem ii haunate ciapui a, amate sungah a hawmtham ngamdangte bangza ma in nang na sia hi.

¹²Judah mi na suapuite kaamsiat a thuak lai in nuisan nial buale te pha hi. Amate ii kisiat ni in na lungdam tu hi ngawl hi. Amate ii lungzuan khuangai ciang na nuisan buatu hi.

¹³Amate ii lalna a thuak ni in ka mite ii khuapi sungah a nuisan tu in na tum buatu a, a tuasiat ni in amate ii a haunate na suddol buatu hi.

¹⁴Suatak tu hanciam in a taite man tu in lamkaa ah na ding buatu hi. Amate ii ngim nga ni in ngalte khut sungah na aap buatu hi.

Pathian in Minamte Thukhen tu

¹⁵“Minamte theampo tungah Keima, Topa in thu ka khen tu a ni nai zo hi. Edom awng, na ngamtatna bangin nang hong kivawt tu hi. Na piak bangin nga kik tu ni hi.

¹⁶Ka mual thiang tungah daan piakna haikha sia ka mite in dawn zo hi. Ahizong a kiimkot a minamte in a kha zawlai daan piakna hai dawn lai tu uh a, a dawn khawng zawkciang mangcip vangeu tu uh hi.

Israel ii Ngalzawna

¹⁷“Ahizong Zion Mual tungah pawl khatte suakta tu uh a, tuaciang tua mun sia a thiangtho mun hi tu hi. Jacob mite in amate neisa tu in a kipia leitangh sia tang tu uh hi.

¹⁸Jacob le Joseph mite meikuang bang hi tu hi, amate in Esau mite sia ankung ko sate mei ii kak bangin susia tu uh hi. Esau suan le paalte khat zongh suakta ngawl tu hi, Keima, Topa pau zo khi hi.

¹⁹“Judah ngam thangsang a teang mite in Edom ngam lua tu a; nitumna sang mualpeang a teang mihingte in Philistia la tu hi. Israel mite in Ephraim le Samaria ngam tang tu a; Benjamin mite in Gilead ngam la tu hi.



²⁰Israel ngamsaksang pan saltang ngalkap honte hong heak kik tu a; Phoenicia pansaksang Zarephath dong zothal tu uh hi. Jerusalem pan Sardis ah saltangte in Judah ngam thangsang khuapite la tu uh hi.

²¹Jerusalem ngalzote in Edom ngam simin, uk tu uh hi. Tuaciang Topa ama mama kumpi hi tu hi,” ci hi.



Jonah

Jonah 1

Jonah in Topa Thu ni ngawl

- ¹Ni khat ni in Topa in Amittai tapa Jonah paupui hi.
- ²Ama in, “Khuapi lian ahi Nineveh khua ah pai tan a, hi thute son tan; amate ii ngamnat siatnate ka he hi,” ci hi.
- ³Ahihang Jonah in Topa taw a kipeal thei natu in a kisawl na sangah pai ngawlin a kisawl ngawl na sangah pai hi. Ama Joppa khua ah pai in, tua munah Spain ngamah a pai tu teambaw khat mu hi. Teambaw to manh tu sum a piak zawkciang Topa taw a kipeal thei natu in Spain ngamah pai tu in teambaw hawlte taw teambaw tungah kaa hi.
- ⁴Ahizong Topa in vuipei suangval khat tuipei tungah vasak a, suangval nasia mama ahikom teambaw a tapthap tu lauhuai hi.
- ⁵Teambaw naseamte patau mama ahikom amate tek ii biak pathian tung tek ah huna ngenin au uh hi. Tua zawkciang, a lauhuai ngawl zaw hiat natu in a vanh puakte tui sungah lawn suk uh hi. Tua hun sung teng Jonah sia teambaw taw ah tuaksukin lumin mutthip hi.
- ⁶Teambaw ukpa in tua munah ama mu a, ama tungah, “Banghangin mu thong ni ziam? Tho in a, hong hu natu in na pathian tungah thungen in. Ama in eite hong mulkimin ih nuntaknate hong suatak tha tu hi,” ci hi.
- ⁷Teambaw naseamte khat le khat kikum uh a, “Hi bang a lauhuai sung hong then sia akua khialna ziam, ci sia a zong tu in lai meetang sawk tawng,” kici uh hi. Amate in a saw uh ciang Jonah min hong suak hi.
- ⁸Tuaciang amate in, Jonah tungah, “Tua ahile tu in hong son tan! Hi thu hangin akua mawsiat tu hi ziam? Hi lai ah bang vawt ni ziam? Koisung ngam pan hong pai ni ziam? Bang minam ni ziam?” ci uh hi.
- ⁹“Kei Hebrew minam ka hi hi,” ci in Jonah in zo hi. “Lei le tuipei a vawt, vantung Pathian, Topa ka bia hi,” ci hi.



¹⁰Jonah in amate tungah ama siaTopa kung pan taiku ahi hunlam son thua hi. Teambaw hawlte lau mama a, ama tungah, “Banghang hi bang ngamta thong ni ziam?” ci uh hi.

¹¹Suangval nasia vaial a, teambaw hawlte in ama tungah, “Suangval a thim thei natu in bang hong law tu khu ziam?” ci in dongh uh hi.

¹²Jonah in, “Tuipi sungah hong lawnsuk tavun, tua hile suangval thim tu hi. Hi a lauhuai suangval na taw uh sia keima khialna hang hi ci in ka he hi,” ci in zokik hi.

¹³Teambaw hawlte in tuabang ngamta ngawl zaw in vaalbo a thet thei natu a tha neiza uh taw nasia tak teambaw hot uh hi. Ahihang vuipi suangval nasia vaial, nasia vaial a, amate koima theng ngawl uh hi.

¹⁴Tuaciang amate in Topa biakpui uh a, “Topa awng, thu hong ngen ung, hi sia pa nuntakna ka thisak uh hu in thi daan hong pia heak in! Topa awng, nang sia hite theampo tungah tavuan nei ni hi; nangma nasep hi,” ci uh hi.

¹⁵Tua zawkciang amate in Jonah toaito in tuipi sungah khiasuk uh a, thakhat thu in suangval thim hi.

¹⁶Hi thu hangin teambaw hawlte in Topakiita mama uh a, amate in sangaw biakpiakna khat pia in ama naseam tu in kamciam pia uh hi.

¹⁷Topa sawl bangin ngasapui khat in Jonah valh a, Jonah sia ngasapui ngil sungah sun thum le zan thum om hi.

Jonah 2

Jonah ii Thungetna

¹Ngasa ngilsung tawng pan Jonah in Topa a Pathian tungah thungen a:

²“Ka ngimnga laitakin Topa awng, nang kong biakpui a, nangma in nong zo hi. A thi sate teenna munthuk panin, nong hu natu in ka au a, nong za hi.

³A thukna mun tuipi taw mama ah kei nong vawksuk a, tuite ii hong uumcipna munah a thahat na tuihual theampo in kei hong khumcip hi.

⁴Na omna pan hawlkeak sa ka hi a, na Biakinn thiangtho mu kik ngei nawn ngawl tu in ka kingaisun hi.



⁵Tui in hong khum a, hong haaksak hi; tuipi in hong khumcip a, tuaciang tuipi tuipaante in ka lu vialin tuamcip hi.

⁶Mualpite ii bul kongpите a tawntung a kikhak ngamsung ka zuansuk hi. Ahizong Topa ka Pathian awng, nangma in a thukna munte panin a nungta in nong la kik hi.

⁷Ka nuntakna a kiam susuk ka phaw ciang Topa awng, nang tungah thu kong ngen a, na Biakinn thiangtho pan nong za hi.

⁸A mannung ngawl milim biate in, nang hong taisan zo uh hi.

⁹Ahihang kei ka hile na tungah pokna la ka sa tu hi; sangaw biakpiakna khat kong nei tu a, ka kamciam bang ka seam tu hi. Ngupna sia Topa tung pan hong pai hi!” ci hi.

¹⁰Tuaciang vaalbo tungah Jonah lua tu in Topa in ngasa thupia a, tuabangin ngasa lua hi.

Jonah 3

Jonah in Topa Thu ni

¹Topa in Jonah khat vei paupui kik hi.

²Ama in, “Khuapi lian Nineveh ah pai tan a, a mite tungah kong thupiak teng taangko tan,” ci hi.

³Tua ahikom Jonah in Topa sawl bang ni in Nineveh khua ah pai a, tua khua lian lawlawm a khatvei kantan natu in ni thum hai hi.

⁴Jonah sia khua sungah tum a, ni khat tangciing a pai zawkciang ama in taangko a, “Ni sawmli sungsang Nineveh khua kisiatham tu hi!” ci hi.

⁵Nineveh khua mite in Pathian ii thupiak um uh hi. Tua ahiciang amate in antan tu le mihingte theampo a lianbel pan a nobel dong kisiik kikna lakna in, khau-ip puan silh tu in khensat uh hi.

⁶Nineveh kumpipa in hi thu a zaak ciang, a kumpi tokhum pan dingto in, a puantual suut a, khau-ip puan silhin vuttun sungah tosuk hi.



⁷Ama in Nineveh khua mite tungah thu thansakna khat puak a: “Hi thu sia kumpipa le a uliante tung pan thu piak khat ahi hi. Kuama in bangma ne ngawl tu hi; mihing theampo, ngannote le tuute anneak tuidawn tu kikhaam hi.

⁸Mihing theampo le nganhing theampo in khau-ip puan silh tu hi. Mihing simin Pathian tungah nasia takin thungen tu a, ngitlo ngamtatna le siatna lam a, a tuk a diannate nusia tu hi.

⁹Pathian a thin kheal kik tha tu hi; ih thi ngawl natu Pathian in a thin uukna thaisak tha tu hi.” ci hi.

¹⁰Pathian in amate ngamtatna teng mu a; amate in a ngitlo ngamtat ziate nusia zo ci in mu hi. Tua ahikom ama in a thin khealin daan pia tu a ci bangin pia ngawl hi.

Jonah 4

Jonah ii Thin uukna le Pathian ii Hesuakna

¹Jonah sia hi thu hangin lungdam ngawl hetin thin uuk hi.

²Tua ahi ciang ama thungen a, “Topa awng, ka inn pan ka din ma in tu bang ngengeei in ngamta tu ni hi, hong ci kana ngawl khi ziam? Tua hu in Spain ngamah taithaap tu, ka hi thei za in hanciam khi hi! Nang sia a it thei le a hesuak thei, a thinsau tawntung, a cingh tawntung, a thin kheal a, daan a pia ngawl kik tawntung Pathian hi, ci in kong he hi.

³Tua ahiciang tu inTopa awng hong thisak tan. Ka nuntak nial sang thi leng phazaw hi,” ci hi.

⁴Topa in zokik a, “Na thin uuk thei natu in nang bang thu nei thawthong ni ziam?” ci hi.

⁵Khuapi niswana sangah Jonah pai in tosuk hi. A bel tu in thaampheang khat vawt a, a lim ah to in Nineveh bang peuma a tat ziam ci in ngakin en hi.

⁶Tuaciang Jonah ii pha tak a, a lim a bel thei natu in Topa Pathian in a kung hing khat posak hi. Hi a kung hing hangin Jonah lungkim mama hi.



⁷Ahizong a zing ciang khuavak tuungin, Pathian thupiakna taw lung khat in tua a kung hing sia ne a, a kung hing sia thi hi.

⁸Nisua zawkciang Pathian in niswana sang pan vuisa vasak a, a lutung nisa in a em hu in Jonah butthi tu in kithoai hi. Tua ahikom ama thi nuam hi. Ama in, “Ka nuntak nial sang thi leng phazaw hi,” ci hi.

⁹Ahihang Pathian in ama tungah, “Hi a kung hing taw kisai in thin uuk thei natu bang thu nei ni ziam?” ci hi. Jonah in zokik a, “Thi ngam natu za in—thin uuk natu thu tuatuam ka nei hi!” ci hi.

¹⁰Topa in ama tungah, “Hi a kung hing sia zan khat thu in po a, a zing ciang bo hi; a po natu ahizong a khan natu ahizong nang sep bangma om ngawl hi. Hi napi tua a kung hing hu in khuangai thawthong ni hi!

¹¹Tua ahile a lian mama Nineveh khua patang mealmawl 120,000 vaal omna le nganhing tam mama omna khua sia, bangza kan in hesuak ngawlin om tu khi ziam!” ci hi.



Micah

Micah 1

¹Judah ngamah kumpi Jotham, Ahaz le Hezekiah te a maan laitak, Moresheth khua mi ahi Micah tungah Topa in hi thu puak hi. Samaria le Jerusalem taw kisai in Micah tungah Topa in hi thute lak hi.

Samaria le Jerusalem atu Kaala

²Hi thu ngai vun, no ngamte theampo awng; simleitung a teang mite theampo awng hi thu ngai vun! Vaanglianpipa Topa in note langpanin tetti pang tu hi. Ngai vun! Ama in a vantung biakinn pan son hi.

³Topa sia ama mun thiangtho pan hong pai hi; ama hong paisuk tu a, mualpite dawn ah vak tu hi.

⁴Tuaciang meikhuk sungah khuainun a tuithap bangin mualpite ama nuai ah tuitham tu hi; Mualnote tung pan tui luangsuk bangin tua mualte kuam sungah luangsuk tu hi.

⁵Hite theampo tung tu hi, banghangziam cile Israel mite khialin, Pathian langpan uh hi. Israel te ii langpanna sia akua ki mawsiat tu ziam? Ngambup khuapi mama ahi Samaria hi! Akua in Judah ah milim biakna taw khial ziam? Jerusalem ama mama hi!

⁶Tuaciang Topa in, “Samaria sia ngam tanzau nin kholna mun sapit ngui ciin natu mun ka suaksak tu hi. A khua sungah suangte zongh kuam sungah ka sunsuk tu a, a khuapi phungkawngte ka kilanghsak tu hi.

⁷A milim manpha theampo a bebekin ki suzan tu a, biakinn sungah pumpi zuak numeite tungah a kipia nate theampo mei taw kihaltumin, a milimte theampo a kinusia ninthuk suak tu uh hi. Samaria in hi vanh ninte a pumpi kizuakna taw nga a, tu in a ngalte in tua vanh ninte mun theampo ah a om biakinn pumpi kizuate atu in pua tu uh hi,” ci hi.

⁸Tuaciang Micah in, “Hi sia hu in mauin ka kap tu hi. Ka khuangaina ka lakna in peangdap thua ngawl, puan silh ngawlin ka vak kawkoai tu hi. Ngam ui bangin ka haam tu a, kalaoh vacim bangin ka tau tu hi.



⁹Samaria ii liammate kidamsak thei ngawl hi, tuaciang Judah zongh tuabangma in thuak tu hi; lalcipna sia, ka mite teenna Jerusalem kongpite mama ah theng zo hi,” ci hi.

Ngalte in Jerusalem Neak

¹⁰Gath a om ih ngalte tungah ih ngallelna thu son heak vun; na kaa uh musak heak vun. Beth Leaphrah mite awng na thinkiamna lakna in leivui sungah kilumliik vun!

¹¹No Shapir khua mite awng, maizum le pum nguakin ngamdang ah saltang vun. Zaanah ah a teangte a khuapi sung pan pusuak ngam ngawl uh hi. Bethazel mite mauna na zaak uh ciang tua munah bukna om ngawl hi, ci in na he tu uh hi.

¹²Maroth mite in huna a nga natu ngakla mama uh hi, banghangziam cile Topa in Jerusalem khua paam dong ah siatna theng sak zo hi.

¹³Lachish a, a teang note awng, na siphute leangte tungah khit vun. Note in Israel mite khialna na zui uh a, tuabangin Jerusalem na khialsak uh hi.

¹⁴Tu in Judah mite awng, Moresheth Gath khuapi tungah mangpha thaak tavun. Israel kumpite in Achzib khua pan huna nga ngawl tu hi.

¹⁵Mareshah mite awng, na khuapi a la tu ngalte khut sungah Topa in no hong aap tu hi. Israel te ii lampuite pai in Adullam suanghawng sungah buu tu uh hi.

¹⁶Judah mite awng, na it patangnote atu in khuangai in na sam uh meettan vun. Vaciik bangin lutol in om vun, banghangziam cile na patangnote sia ngamdang ah sal in no kung pan kila tu hi.

Micah 2

Mizawng A nengcip sia ii Thuak tu Thu

¹Mu ngawl liangin ngitlona a tum a sawmte atu in bangza in lauhuai tu ziam! Zingsang, hunpha a nga pawpo ciang a tup sa ngitlonate amate in vawt uh hi.

²Amate in lote a dei uh ciang suddol uh a, innte a dei uh ciang la uh hi. A kuama po ii innkuan le neisa bit ngawl hi.



³Tuaciang Topa in, “Note tungah lalna puak tu in ngeal khi hi, tuaciang note suakta thei ngawl nu hi. Ngimna sungah na om uh na kimu tu uh a, tuaciang kiphasak in na vak nawn buatu uh hi.

⁴Tua hun a tun ciang, mihingte in no thusia lalcipna huvau sonteena in nei tu a, hi na thuak uh thute langui in sa tu uh hi: Eite ih lalcip dikdek zo hi! Topa in ih ngam ih lei la zo a, Tuaciang ei hong mante tungah hong pia zo hi,” ci hi.

⁵Tua ahiciang Topa ii mite tungah leitangh a kipiak kik tu hun a thet ciang note khat atu tel om ngawl tu hi.

⁶Mihingte in kei thu hong hil uh a, tuaciang hi bangin, “Kote thu hong hil heak in. Tuabang thute hong hil heak in. Pathian in kote hong min daisak ngawl tu hi.

⁷Israel mite haamsiatna thuak tu in ngaisun nu ziam? Topa in a thinsausak zo nawn ngawl ziam? Tuabang tatak ma in ngamta tu ziam? Thumaan naseamte ama in hesuakna taw paupui kana ngawl ziam?” ci hi.

⁸Topa in zokik a, “Note in ka mite sia ngalte bangin sim nu hi. Pasalte ngalphual pan cia a, inn ah ngam muangin om tu kisa kale, note in a laktong puasilh a nungsang pan nguksak tu in na ngak uh hi.

⁹Ka mite ii numeite a innnuam pan na hawlkeak uh a, amate ii tate tung pan keima thupha piakte na suddol tawntung uh hi.

¹⁰Tho vun a, kuan vun; hi lai ah ngam muanna om nawn ngawl hi. Na mawnate in hi mun sia lalna sung then hi.

¹¹“Hi mihingte in, ‘Zu le zuhang note atu in luang tu hi ci in kam ka sang hi’ a ci kamsang leilot thu sonin a vak ngual theamte diksa uh hi.

¹²“Ahihang no Israel mi a taanglai theampo kong kaikhawm tu hi. Tuute a khawk sungah a cia bangin keima in kong khawmtua tu hi. Tuute taw a kidim ngan thana mun bangin na ngam sia mihing tam mama taw khatvei kidim kik tu hi,” ci in zo hi.



¹³Pathian in amate atu in lampi honsak tu a, a saltanna mun pan amate suatak tu uh hi. Amate in khuapi kongpite sutham in suakta tu uh hi. A kumpipa ahi, Topa mama in amate pusuapui tu hi.

Micah 3

Micah in Israel ii Lampuite Sonsia

¹Ngai vun Israel a uk note awng! Note thumaan thutang dei tu hong kingaisun hi,

²hi napi, note in a phate ngaimaw in a siate na it uh hi. Ka mite a hingtangin a vun na hawk uh a, a ngute tung pan a sa na hoai uh hi.

³Ka mite na netum uh hi. A vun hawkin, a ngu thiaktan in an beal taw huan tu sa bangin na saatcip uh hi.

⁴Topa tungah na au tu hun hong theng tu a, ahihang ama in hong zo ngawl tu hi. Note thungetna ama in hong ngai ngawl tu hi, banghangziam cile a sia nate na seam uh hi.

⁵Sum taw a thamte tungah kilemna om tu hi ci in kamciam a, ahihang a tham zo ngawlte tungah ngal om tu ci in a tawng kamsangte in ka mite theam hi. Hi kamsangte tungah Topa in,

⁶“Kamsangte awng, na ni uh bo dektak hi; no tungah ni tum tu hi. Ka mite lamlak khial na hi uh ciang kamsaan mu kholnate na nei nawn buatu uh a, son khol thei bangma na nei nawn buatu uh hi.

⁷Mailam atu a son kholte a tangtun ngawl hu in min sia tu hi. Amate theampo ki enthaw tu hi, banghangziam cile Pathian in amate thu zokik ngawl hi.

⁸Ahihang kei ka hile Topa in a thaa le a vaangletna taw hong dim a, thutang heak theina le Israel mite tungah amate khialna bangziam ci in son ngamna hanna hong pia hi.

⁹Thutang ngaimaw in, a maan sia a maan ngawl a sua, no Israel ngamukte awng, hong ngai tavun.



¹⁰Pathian ii khuapi Jerusalem sia tual thana le thutan ngawl na phung tawdap tungah na sa uh hi.

¹¹Khuapi ukte in sumnguk neak natu in uk a, thiampite in thasum neak natu in Thukham phen a, kamsangte in sum nga natu in thu pualaak hi— a vekpi ma in Topa sia amate taw omkhawm hi citek uh hi. Amate in “Ko tungah siatna hong tung ngawl tu hi. Topa sia ko taw omkhawm hi,” ci uh hi.

¹²Tua ahikom note hu in Zion sia lo bangin kitho tu a, Jerusalem sia nin kholna suakin, Biakinn mual sia dui suak tu hi.

Micah 4

Topa ii Vannuai Kilemna taw Ukna

¹Mailam hun ah Biakinn dinna mual sia a saangbel mual khat hi tu a, mualnote theampo tungah dokto tu hi. Minam tam mamate tua munah tuiluang bangin hong pai tu a,

²tuaciang a mite in hi bangin, Topa ii mual Israel te ii Pathian Biakinn ah kaato tawng, Banghangziam cile seam a hong oaite ama in hong hil tu hi; ama teal sa lampi ih zui tu hi. Banghangziam cile Topa ii hilna sia Jerusalem pan hong pai hi; Zion panin ama in a mite paupui hi,” ci tu uh hi.

³Minamte kilaklaw, a nai a khuala a vaangliante kilaklaw a, a kituu thute ama in lemtua tu hi. Amate in a namsaute lothawna in seak tu a, a teipite thingbaak heuna nam sua tu hi. Minamte ngal kido kik nawn ngawl tu a, ngal kido kik tu in kingingta nawn ngawl tu hi.

⁴A sapit huan le a theikung sungah mihingte theampo kilem in teang tu hi, tuaciang kuama in ama lausak ngawl tu hi. Topa Vaanglianbelpa in hi kamciam pia zo hi.

⁵Minam simin amate tek ii pathian bia in a thu ni uh hi. Ahihang eite in Topa ih Pathian a tawntung a tawntung ih bia tu a, a thu ih ni tu hi.

Saltanna pan Israel Cia kik tu

⁶Topa in, “Daan ka piak a, sal in ngim thuak mihingte ka khoptua kik tu hun hong theng tu hi.



⁷Amate liamin, bai a, inn panin kikhuala hi, ahihang a omlai sunte atu kipat kikna thak khat ka vawtsak tu hi. Amate minam lian khat suak tu hi. Zion Mual tungah amate tua hun pan kipan a tawntungin ka uk tu hi,” ci hi.

⁸Nang Jerusalem, Pathian ii tuucing bangin a mite a etcikna tusaang, noma neisa kumpi ngam khuapi sia khatvei khuapi suak kik tu hi.

⁹Banghang a nging tatakin kap nu ziam? Nausuak tun numei khat bangin banghang thuak nu ziam? Kumpi na nei ngawl hang uh le na upate a thi uh hang ziam?

¹⁰Jerusalem mite awng nausuak tu numei bangin kisaan in tau vun, banghangziam cile tu in khuapi na nusia tu uh a, ngam sungah na teang tu uh hi. Babylon ah na pai uh kul tu hi, ahizong tua munah Topa in na ngalte khutsung uh pan hong hun tu hi.

¹¹Minam tam mamate note sim tu in kikhawm zo hi. Amate in, “Jerusalem kisia nanak tu hi! Hi khuapi a zancip in ih mu tu hi!” ci uh hi.

¹²Ahihang hi minamte in Topa ii thin sungah bang om ziam ci in he ngawl uh hi. Lo ante cil tu in a kaikhop bangin amate daan piak tu in a kikaikhop ahi hunlam amate in tel ngawl uh hi.

¹³Topa in, “Jerusalem mite awng, pai vun a, na ngalte daan pia vun! Thikkii a nei le taungo peangcin a nei khuital khat bangin kong hatsak tu hi. Note in minam tam mamate na henpeak tu uh a, ngoltol thu taw a nga haunate Keima,leitung buppi ii Topa nong pia tu uh hi,” ci hi.

Micah 5

¹Jerusalem mite awng, na ngalkapte khawm vun! Eite hong kikiim uum hi! Amate in Israel lampuipa sim uh hi!

Pathian in Bethlehem pan Ukpa khat Kamciam

²Topa in, “Bethlehem Ephrathah khua awng, nangma in Judah ngam sungah khuapi nobel khat na hi a, ahizong nang sung pan Israel a uk tu khat ka piangsak tu hi. Ama be le ngui in taangh tawng pek taw kizom hi,” ci hi.



³Tua ahikom naupaai nu in tapa khat a nei mateng Topa in a mite ngalte khut sungah nusia tu hi. Tuaciang ngamdang a peam a mipuite le a mite kingawm kik tu hi.

⁴Ama hong pai ciang, ama in a mite Topa tung pan hong pai tha hatna le Topa Pathian mama ii kumpi min taw uk tu hi. A mite ngammuang takin om tu uh hi, banghangziam cile leitungbup mihingte in ama letna tel tu a,

⁵ama in kilemna puak tu hi.

Kitatna le Daan piakna

Assyriate in ih ngam hong sim a, ih kulh ih taapte a kaan ciang, amate do tu in a hatbel ih lampuite ih puak tu hi.

⁶Ngalhiam tha hatna taw amate in Nimrod leitangh Assyria zo tu hi. Tuaciang Assyriate in ih ngam hong sim ciang amate in Assyriate khut sung pan eite hong hun tu hi.

⁷Israel mite tua kisimna sung pan a suakta laite sia ngam tam mamate atu in Topa piak hin kikna daaituite bang hi tu a, thingnote tung a nguazu bang hi tu hi. Amate in Pathian suang tu a, mihing suang ngawl tu hi.

⁸Minam tuatuamte sungah a taanglai mite sia duisung ahizong, ngan thana mun ahizong, tawpi savai khat bang hi tu hi: ama in tuute sungah tum a, tuute manin a bek a bekin leamtham hi, tuaciang suatak natu lam-etna om ngawl hi.

⁹Israel in a ngalte zo siatin susia siat tu hi.

¹⁰Topa in, “Tua hun ciang, na siphute la siatin na siphu leangte ka susia siat tu hi.

¹¹Na ngam sungah na khuapite ka lalcipsak tu a, na kidalna theampo ka balkeak tu hi.

¹²Na zak uh na bum na ai theampo ka sutham tu a, khutlam en aisaan thei khat zongh ka khoaikhe buatu hi.



¹³Na milimte le na biak suangkhuam thiangthote ka sutham tu hi; note in no mama ii vawttawm nate na bia nawn buatu uh hi.

¹⁴Na ngam sungah om pathian nu Asherah milimte ka baltham tu a, na khuapite ka susia tu hi.

¹⁵Ka thu ni ngawl minam theampote tungah thin uukna lianpi taw phu ka la tu hi,” ci hi.

Micah 6

Topa ii Israel te Thusuana

¹Topa ii Israel te thu a suana thu ngai vun. Topa awng tho in, na thu sung in; mualpите le mualnote in na son teng za taken.

²No mualpите le a tawntung a kip no simlei tawdapte awng, Topa thu ngai vun! Topa in a mite thusua hi. Ama in Israel tungah mawsiatna khat vawt tu hi.

³Topa in, “Ka mite awng, note tungah bang hong vawt zo khi ziam? Note atu vanh ngitpi bangbangin suak zo khi ziam? Hong zo tavun.

⁴Egypt ngam pan kong pusua pui hi; saltanna pan kong suatak hi; Note lam hong pui tu in Moses, Aaron le Miriam kong puak hi.

⁵Ka mite awng, Moab kumpi Balak in note bang law hong sawm a, Beor tapa Balaam in bangbangin zokik ziam cisia phawk kik vun. Acacia ngiaphual pan Gilgal paina lampi ah bangteng piang ziam cisia phawk kik vun. Hite phawk kik vun tua hile note ngum tu a ka septe tel tu nu hi,” ci hi.

Topa ii tangkal Thu

⁶Vantung Pathian Topa bia tu ka pai ciang ama atu bangteng keng tu khi ziam? Biakpiakna a hal tu khuino phabelte keng tu khi ziam?

⁷Tuu tul tam mamate ahizong, tatsat ngawlin lui bang a luang Olive thaute ahizong puak leng Topa a lungkim tu ziam? Ka khialna hu in ka tapaciil ka pia tu ziam?



⁸Hi ngawl hi Topa in thupha hong son zo hi. Ama ii ei tung pan hong tangkal sia hi sia hi: thutang seam tu, ki itna kho lak tu le kiniamkhiakin ih Pathian taw kipawl khawmin nuntak tu ahi hi.

⁹Topa kiitakna in ciimna hi. Ama in khuapi sam a, “No khuapi sung a kikhawm mite awng! Ngai vun!

¹⁰Mi ngilote ii inn sungah thumaan ngawlna taw a nga sumngumte om hi. Amate in ka ngaimaww khaikhin maan ngawlte zangh uh hi.

¹¹Bangbangin khaikhin le toaisuang maan ngawl a zanghte a khialna maisak thei tu khi ziam?

¹²Na sumhaute in mizawngte dawpkang a, note theampo leilot thusonte na hi uh hi.

¹³Tua ahikom, na khialna uh hangin na lalna uh le na siatna tu uh seam tu in ka kipan zo hi.

¹⁴An na neak uh hang na kham buatu uh a— na ngil uh kial veve lai tu hi. Vanhte na paipui tu uh a, ahizong na keamcing zo buatu uh hi. Na kepcing vanh pawpo ngal sungah ka susia tu hi.

¹⁵Lo an na tu tu uh a, ahihang an na la buatu uh hi. Olive ngate sathau suak tu in na ngoai tu uh a, ahihang na zangh ngei buatu uh hi. Zu na vawt tu uh a, ahihang na ne ngei buatu uh hi.

¹⁶Hi bang hong piang tu hi, banghangziam cile note in kumpi Omri le a tapa kumpi Ahab ii ngamtat siate na zui uh hang ahi hi. Amate ngamtat ziate zomto na hi uh ciang kong siacipsak tu a, a kuama po in note hong zawngsak tu hi. Mun theampo a, om mite in note hong zawnsak vawt tu uh hi,” ci hi.

Micah 7

Israel te ii Ngamtat Siatna

¹Ka lametna bo hi! Thingnga pangh sa le sapitnga thot sa a vil mihing ngilkial khat taw ka kibang hi. Sapit theampo le theinga lim theampo kilo tum zo hi.



²Ngam sungah thumaan mihing khat zongh om nawn ngawl a, Pathian tungah kuama thumaan ngawl hi. Misim in tual thalup thei natu hunpha ngak hi. Misim in a ngam mipuite savai bangin vai hi.

³Amate siatna vawt tu thiam siat uh hi. Uliante le thukhen maangte in sumnguk ne uh hi. Mihing thu nei khat in ama uuk teng amate tung son a, tuabangin amate vaihawm khawm uh hi.

⁴A pha belte le a thumaan belte ngangawn lopate bangin mannung ngawl uh hi. Pathian in amate a cing kamsangte tungtawnin amate a hilkhoh bangin ama in mihingte daan a piak tu ni hong theng zo hi. Tu in amate lungmang uh hi.

⁵Na innpaam sia um heak in a, na ngualtamh zongh muang heak in. Na zi tungah na pauna ngangawn kidawm in.

⁶Hi hun sungah tapate in a pate sia a mawmaw bangin vawt a, tanute in a nute langpan uh hi, mothakte in a tonupite taw kihau a, mihing khat ii ngal sia ama innkuanpuite ma ahi hi.

⁷Ahizong keima in Topa ka zong tu hi; kei hong hun tu Pathian thin muang takin ka ngak tu hi. Ka Pathian in kei hong za tu hi.

Topa in Ngupna Hong puak

⁸Ih ngalte in ei tung a hong kisuan natu thu nei ngawl hi. Ei ih pukvawk zo a, ahihang ih tho kik tu hi. Tu laitak khuazing sungah ih om a, ahihangTopa in khuavak hong pia tu hi.

⁹Eite in Topa tungah ih khial zo hi, tua ahikom tu in ama thin uukna tawm vei ih thuak kul tu hi. Ahihang a tawpna ah ama in eite hong dal tu a, ei tungah hong tat khialnate thumaan taw hong laisak tu hi. Ama in khuavak sung hong then tu a, hong ngupna ih mu dong ih nungta tu hi.

¹⁰Tuaciang ih ngalte in hi sia mu tu a, amate ki maizumsak tu hi— “Topa na Pathian uh koisung a om ziam?” ci in hong tatawte ma hi tu hi. Amate ngallelna, lamlai buan bang a kitotcil nate ih mu tu hi.



¹¹Jerusalem mite awng, khuapi luphungte cian kik tu hun hong theng tu hi. Tua hun ciang na ngam kikeak tu hi.

¹²Na mite mun theampo— niswana Assyria pan, thangsang Egypt pan, Euphrates Ngun ngamkuam sung pan, tuipi ngalkhat pan le tawngpalek mualte pan no kungah hong heak kik hi tu hi.

¹³Ahihang leitangh sia a tunga teangte ngitlo khansiat hu in senneal ngam suak tu hi.

Topa ii Israel A hesuakna

¹⁴Topa awng, na teal sa mihingte tungah tuucing khat hong hi tan. Amate in dui sungah a tuatuam in teang hi kale, a kiimkot ah leihoi om hi. Nidang tawng lai a kivaak bangin ngam phana Bashan le Gilead ah amate pai in kivaak taken.

¹⁵Topa awng, Egypt pan nong pusuapui lai hun a na vawt bangin kote atu in nalamdang vawt in.

¹⁶Minamte in hi sia mu tu a, a thahatna theampo kawm pan a lungmang tu uh hi. Thin kiamin amate a kam im tu uh a, a bilte hum tu uh hi.

¹⁷Amate leivui sungah ngulte bangin bokvak tu uh a, a kulhpite pan liingin lau in hong pai tu uh hi. Amate in ih Topa ih Pathian kungah kiitakna taw hong heak kik tu uh hi.

¹⁸Topa awng, nang bang ahi pathian dang om ngawl hi; a nungta lai na mite ii khialnate na maisak hi. A tawntung in thin uukin na om bua a, nong itna kip nong lakna ah nuam na sa hi.

¹⁹Nangma in kote khat vei ma nong hesuak kik tu hi. Ka khialnate na peang nuai ah na siikcip tu a, tuipi taw ah na khiasuk tu hi!

²⁰Taanghlai ih taangpupite tungah na kamciam bangin Abraham le Jacob ii suan le paal na mite tungah na thumaanna le na it tawntungna na lak tu hi.



Nahum

Nahum 1

¹Hi thu in Nineveh khua taw kisai thu hi a, Elkosh khua mi Nahum ii mu kholna khat tepteena ahi hi.

Nineveh tungah Topa ii Thin uukna

²Topa Pathian in ama a demte kuama dual ngawl hi; ama in ama a langpante daan pia hi. A thin uukna taw amate thuk kik hi.

³Topa thin uuk memeang ngawl a, ahizong ama vaanglian in a khialte daan pia ngawlin thasua ngei ngawl hi. Topa paina ah suangval va a; Meeite sia a peang taw a siina pan leivui khute ahi hi!

⁴Ama in tuipei thupia a, tuipei kang hi! Ama in ngunte ko ngiungeusak hi. Bashan lote kocip in, Carmel Mual sia a puang suak in, tuaciang Lebanon paakte vul hi.

⁵Topa mai ah mual pi te liing a; ama mai ah mualnote tuitham hi. Topa a kilangh ciang leitung kithing a; leitung le a mite theampo liing hi.

⁶Ama thin uuk ciang akua in thuak zo tu ziam? A lauhuai mama a thin uukna akua in thuak zo tu ziam? A thin uukna meikuang buak suk a; suangtumpuite ama maiah leivui suak tu in tamtham hi.

⁷Topa pha hi; ngimna hun sungah a mite sungsia hi. Ama kung a zuante ama in keamthiam hi.

⁸Ngalhawk lian khat bangin a ngalte sucip siat a; ama a langpante thina sungah puak hi.

⁹Topa langpan in bang vawt sawm nu ziam? Ama in no hong susia tu hi. Kuama in khatvei kaan ama nalh ngawl hi.

¹⁰Lingngui kivialte le taangphaw ko bangin nang hong kihaltum tu hi.

¹¹Nineveh awng, ngitlona taw kidim Topa vawtsiat a sawm mihing khat nang kung pan hong pai hi.



¹²Hisia in a mi Israel te tungah Topa ii son sia ahi hi. “Assyriate hat in mihing tam kale amate kisusiicip in, bo tu hi. Ka mite awng, note in kong thuaksak a, ahizong tuabangin kong thuaksak kik buatu hi.

¹³Tu in note tungah Assyriate vaangletna ka bosak tu a, hong kiheenna thikkhaute ka sutan tu hi,” ci hi.

¹⁴Hisia in Assyriate taw kisai Topa thutanna ahi hi: “Amate min zomto tu in amate in suan le paal nei ngawl tu hi. Amate pathiante ii biakinnte sungah a om milimte ka sutham tu hi. Assyriate atu in thaankuul khat ka vawt khol tu hi- amate a nungta tu in kilawm ngawl uh hi,” ci hi.

¹⁵En vun, thupha puak kamtai khat mualtung tawnin hong pai hi! Ama in zawna taangko tu in hong pai ahi hi! Judah mite awng, na poaipi khaam vun a, Pathian tung ah ciliap huai takin, piak kik tu na kamciam sate pia vun. Mingilote in na ngam uh hong sim ngei nawn ngawl tu hi. Amate sia kilalsak diipdeap zo hi!

Nahum 2

Nineveh khua Bona

¹Nineveh awng, nang hong kisim hi! Nang hong sutham zaan tu vaangletna hong pai zo hi. Kulhte pan pang vun! Lampi cing vun! Ngalsim tu in kithoai vun!

²(Israel mite a ngalte ii sutol maa hun lai bangin a minthanna pia kik tu in Topa kithoai hi.)

³Ngalte sang ngalkapte in lumsante toai a, a kibang puansante silh hi. Amate ngalsim tu in kithoai hi! a ngalkap siphuleangte meikuang bangin te vazak hi! A siphute pai nuamin a peang lalaam zo hi!

⁴Lampite kantan in siphuleang tai kheukho a, khuapi leitual sungah ki nuntaw lialua hi. Amate sia mei lomsawmte bangin taang vazia a, khualeng bangin peak kawkoai hi.

⁵Ngalkap maangte kisam a; mainawt in a pai ciang amate lutu uh hi. A simte in khuapi uumna taap sang del in a lumte taw kidal uh hi.



⁶Ngunhui a kongpите kihong keak a; kumpi inn sia launa taw kidim hi.

⁷Kumpinu kiman a; a naseamte vakhu bangin kuul uh a; khuangai in a awm beang uh hi.

⁸A cimhtham tui cimna khat pan tuiluang bangin Nineveh pan mihingte pusuaq uh hi! “Tawlnga vun! Tawlnga vun!” ci in aw nging hi- ahizong kuama heak kik ngawl hi.

⁹Nguntangte phuul vun! Khamtawnte phuul vun! Khuapi sia sumngum taw kidim hi!

¹⁰Nineveh sia kilalcipsak, ki nusia in, ngamkhing hi. Launa taw thin tui vadil a; khupte liing vadil in, thabo vangeu hi; maitang zongh daang vadel hi.

¹¹Tawpите ii kua khat taw a kibang, tawpi moite ii ki vaakna mun ahi, tawpi talte le tawpipui vana, a note ngammuang a a omna khuapi sia tu in koi sungah om ziam?

¹²Tawpi in a neak tu sa manin a zi le a note atu balneen a, ama in akua hawng sia sa balneen taw dimh hi.

¹³“Keima in na ngalpa ka hi hi!” Topa Vaanglianbelpa in ci hi. “Na siphu leangte haltham tu khi hi. Na ngalkapte ngal sungah kithatlum tu a, midangte tung pan na laakte theampo la siat tu khi hi. Na palaite ii ngetnate kiza nawn ngawl tu hi,” ci hi.

Nahum 3

¹A leilot hat, tual kitha na khuapi, suutol tu le phuul tu hial bek in hauna taw kidim sia, a lal hi zo hi!

²Ngan no a kisaatna a nging, leangmui peite nging, Siphute kitaw vatamh in a nging, siphu leangte kithing aw ngai vun!

³Siphu ngalkapte in del a, namsaute tee vazak, teite nizang la vazak! Mithiluangte kiciang in vum vinvun, mithiluangte sim zawk pang ngawl- Mithiluangte pal tha in mihingte lutu uh hi.



⁴Pumpi zuak nu Nineveh sia daan kipia zo hi. Dei huai in thina piangsak thei ai taw kidim a, ama in minamte ai taw zol in sal suaksak hi.

⁵Topa Vaanglianbelpa in, “Daan kong pia tu hi, Nineveh awng! Na maizum huaina theampo ngamdangte ii hong mu thei tu in na pumngwak kong koi tu hi.

⁶Zawnsakna na tungah kong zangh tu a, a kiihuai ninteak taw kong siin tu hi. Mihingte in lau in nang hong salh tu uh hi.

⁷Nang hong mu po nungkin kik tu hi, Amate in, ‘Nineveh sia zancip zo hi! Akua in ama hesuakhuai sa ziam? Akua in ama heeneam nuam tu ziam?’ ci tu uh hi” ci hi.

⁸Nineveh awng, nang sia Egypt khuapi Thebes, sangin phazaw ni ziam? Ama zongh pang bangin a dal tu ngun khat nei hi— Nile ngun sia ama kidalna ahi hi.

⁹Ama in Ethiopia le Egypt uk hi, ama vaangletna ciangtan om ngawl hi; Libya sia ama taw pang khawm hi.

¹⁰Thebes mite salin kipaipui veve hi. Lampi kingh sim ah a patangte kivellum hi. A lampuite thikkol bul sa in kipaipui a, a mante in hawm tek hi.

¹¹Nineveh awng, nang zongh zu khamin na puk tu hi: Nang zongh na ngalte kung pan suatak natu na hanciam tu hi.

¹²Na kulhte theampo sia thei min a nga theikungte bang hi tu a; theikungte thing vun, tua hile a nga na kamsung mama ah taak hi!

¹³Na ngalkapte sia numeite bang hi a, na ngalte mai ah na ngam sia kihukna sel hi. Na kongpите kilhnate sia meikuang in lalsak tu hi.

¹⁴Ngalte hong uumci tu kingin kholna in tui toai vun a, na kulhpите ciangthua in khosak vun! Uksuang vawt natu in buan cil vun a, uksuang kuangte kingin sa in koi vun!



¹⁵Bang po na vawt zong hong kihallum veve tu hi, ahibuale ngal sungah hong kithatlum veve tu hi. Khaumaw te ii lo ante a khawntum bangin note hong kimaimot tu hi. Khaumawte bangin na pung uh hi!

¹⁶Van a aksite sangin sumvawtte a tamzaw na piangsak hi! Ahizong tu in tuate thot zo a, khaumawte a tha phalin a leang bang ahi hi.

¹⁷Na uliante sia khuasik ni in pang tung a bok khaumaw hon khat bang ahi uh hi. Ahizong ni hong sua ciang amate leangin, a zotna mun kuama in he ngawl hi!

¹⁸Assyria ngam uk lianpa awng, na ngamukte thi uh hi, na uliante a tawntung mutthip uh hi! Na mite mualtung tengah ki thezau a, inn ah a siapui kik tu kuama om ngawl hi.

¹⁹Na liam na ma bawl natu om ngawl a, na meimate ki damsak thei ngawl hi. Na lalcipna thu a za theampo in lungdam in a khutbeang uh hi. A bomaw na ngitlona uh pan, a suakta akua om thong na ziam?



Habakkuk

Habakkuk 1

¹Hi thu sia Topa ii kamsang Habakkuk tungah a pualaak thu ahi hi.

Thumaan ngawl na hangin Habakkuk Phun

²Topa awng, nong zaak dong bangtan vei kong biakpui tu a, bang hun ciang ngongtatna pan hong hun tu ni ziam?

³Tuabang ngimnate banghangin hong musak ni ziam? Tuabang tatsiat nate bangbangin en thong thei ni ziam? Siatna le ngongtatnate sia ka kiimkot ah om a, kihauna le kidona mun theampo ah om hi.

⁴Thukham in thu nei zo ngawlin a luithawthong suak a, thu a maanin seam ngei ngawl hi. Thutang thute kileekai in mi ngilote in thumaan mite zo zawsap hi.

Topa Zo kikna

⁵Tuaciang Topa in a mite tungah “Na kiim na paam a minamte encik vun, tua hile na mu uh thute hangin lamdang na sa tu uh hi. Na zaak ciang zong na up ngawl natu dong bang khat po kong vawt tu hi.

⁶Tua a kiitak huai a om thim thei ngawl Babylonte tungah vaangletna ka pia hi. Amate in ngamdangte a zaw natu in leitung theampo ah kuan tu hi.

⁷Amate in kiitakna le launa kizelsak a, amate kiphasak in a dei bang thukhen hi.

⁸“A siphute pawlbeam sang manlang zaw a, a ngilkial ngiapuite sangin kiitak huai zaw hi. A siphu ngalkapte ngam khuala pan hong pai a; a siphute in lei khuat uh hi. Muvanlaite suktun in a mat tute a zap bangin hong pai uh hi.

⁹“A ngalkap honte in a subong tu in hong pai uh a, amate a thet ciang a kuama po lau vadil hi. A ngal matte, senvui za in tam hi.

¹⁰Amate in kumpipate sia zawsak vawt a, uliante sia nuisan zazan lel hi. Bang kulh po ahizong amate a khaktan zo om ngawl a, amate in a kulhte lei sunnel in la hi.



¹¹Tuaciang amate vuiva bangin paisuak a, a thahatna sia a pathian za in ngaisun uh hi,” ci hi.

Habakkuk Topa tungah Phun kik

¹²Topa awng, a kipatciil a kipan nangma in Pathian na hi hi. Nangma in ka Pathian na hi a, thiangtho in, a tawntungin na om hi. Topa ka Pathian le hong dal pa awng, nangma in Babylonte na teal zo a, daan hong pia tu in amate tha na hatsak hi.

¹³Ahizong banghangin hi mingilote, a thumaan ngawlte koithong thei ni ziam? Na mittangte sia siatna et natu in thiangtho leih a, ahi ngawl a ngamta mite na mu thei bua hi. Tua ahikom amate sangin a thutang zawte hong suksiat ciangin banghangin om thim thei ni ziam?

¹⁴Banghangin mihingte sia amate lam a hil tu ukpa nei ngawl ngasa le lungno hon khat bangin vawt thei ni ziam?

¹⁵Babylonte in ngasa tangthaak bangin mihingte man uh hi. Amate in ngen taw kaikeak in a ngasa mat te tungtaang ah lungdam in au ngawp lai hi!

¹⁶Amate in a ngeente uh ngawngawn bia in tuate atu sangaw biakpiakna vawt hi, banghangziam cile na theampo sung pan a pha belte tua ngeente in ngasak hi.

¹⁷Amate in a tawntungin namsau zangh in, hesuakna nei ngawlin minamte thatlum tawntung tu ziam?

Habakkuk 2

Topa ii Habakkuk A Zo kikna.

¹Ka ngalvilna tusaang tungah ka kaa tu a, ka lungkim ngawl nate taw kisai Topa ii hong zokikna le hong son tu thute ngakin ka en tu hi.

²Topa in hi bangin: “Thakhat thu in et po ciang a kisim thei tu in kong lak thu sia suangpheak tungah thiang takin at in.

³Lai taw at phot in, banghangziam cile a tangtut tu hun theng ngawl lai hi. Ahihang hun sia manlangin hong theng tu a, kong lak sia tangtung tu hi.



Hong pian tu sia hong hai tha tu hi, ahizong ngak kenkon in; hong tangtung tatak tu a, hong haisaang ngawl tu hi.

⁴Ka thupuak sia hi thu hi; ‘A khansiate nungta ngawl tu a, ahizong thutangte Pathian tungah thumaan ahikom nungta tu uh hi,’ ka ci hi,” hong ci hi.

Thutang ngawlte Lal natu

⁵Hauna in hong theam thei hi. A duhop mihingte kiphasak a thim om thei ngawl hi— thina sia a lungkim thei ngawl bangin amate zong lungkim hun nei ngawl hi. Tua hu in amate in ngam khat zawkciang ngam khat amate atu in suanthal hi.

⁶Ngallelte in ngalzote thato tu a, huasaakna lak tu hi. Amate in “Noma neisa ahi ngawlte laksak na hi uhciang a lal na hi uh hi! Note tungah lei hong bate zawthawk thu taw siikin bang tanvei na hauna uh belap nuam lalai nu ziam?

⁷Ahizong, na heak ngawl lanin, noma ngual zothalte sia leiba nei na suak tu uh a, a meet taw na piak tu in zawthawk thu taw hong kisawl tu hi. Ngalte hong pai in hong liingsak tu hi. Na vanhte hong suddol tu uh hi!

⁸Ngam tam mama ah mihingte na suddol uh hi, ahizong tu in a nungta laite in no hong suddol in hong suan tu hi, banghangziam cile noma in tual na that uh a, leitung mite tung le khuapite tungah maitatna na nei uh hang ahi hi.

⁹Na lal zo uh hi! Ngongtatna taw na laak uh te taw na innkuanpuite na hausak uh a; na inn uh sia siatna le launa pan ngam muang tu in na hanciam uh hi.

¹⁰Ahihang na tup na sawmnate in na baangkua uh hong maizumsak hi; ngam tam mamate na sukthap uh hangin noma tungah lalna na piangsak uh hi.

¹¹Luphung suangte ngangawn in hong langpan in au a, zawlsaute zongh in tua auna awte taangko hi.

¹²Na lal zo uh hi! Khuapi sia kithalupna taw na saat uh a, tual thana taw na dingsak uh hi.



¹³Na zawthal minamte in a mannung ngawl nasepna te taw a tha a ngal uh bosak a, amatesak sate theampo kaangtum siat hi. Hi sia Topa Vaanglianbelpa ii vawt ahi hi.

¹⁴Ahihang tuipei sia tui taw a kidim bangin leitung sia Topa vaangletna heakna taw kidim tu hi.

¹⁵Note na lal zo uh hi! Na thin uukna hu in na innpaam te uh, niam koi in min siasak nu hi; zukham bangin amate na hoisak uh hi.

¹⁶Noma zongh min phatna sangin maizumna taw na kituam zaw tu uh hi. Noma zongh zu ne in hoi vabak tu nu hi. Topa in daan piakna hai hong dawnsak tu a, na minphatna uh sia min siatna hong suak tu hi.

¹⁷Lebanon taamthing na phuktham uh a; tu in noma hong kiphuk tan tu hi. A ngamsate na that uh a, tu in tua ngamsate in hong lausak tu hi. Hi thu hong piang tu hi, banghangziam cile leitung le a khuapite tungah na ngongtat nate hang le tual na tha uh hang ahi hi.

¹⁸Milim ii kimanna bangziam? Mihing ii vawt na khat hi lel a, leilot thu ngawl po bangma hong son ngawl hi. Tuabang a pau thei beak ngawl pathian, a vawtpa in muanin a nei sia, bang phattuum pui tu ziam!

¹⁹Note a lal na hi zo uh hi! Thingbek khat tungah “Khanglo in” tua ahibuale suangtum khat tungah “Tho in” ci nu hi. Milim in note na khat pawpo hong lak thei ziam? Kham le ngun taw kituam tha tu hi, ahizong a sungah nuntakna om ngawl hi.

²⁰Topa sia a Biakinn thiango sungah om hi; ama omna munah leitung mihing theampo in thim dide in om taken.

Habakkuk 3

Habakkuk Thungetna

¹Hisia kamsangpa Habakkuk thungetna ahi hi.

²Topa awng, na sep na vawtte ka za zo a, lamdang ka sa mama hi. Tu in ko hun sung zongh ah nasep lianpi na sep ngeite hong seam kik tan. Na thin uuk ciang zong hesuakna hong nei tan.



³Pathian sia Edom panin hong pai kik tu hi; a thiangtho Pathian sia Paran mualte pan hong pai kik tu hi. Ama phatna in vantungte siin a, leitung sia ama pokna taw kidim hi.

⁴Ama sia khualeng vaangtaang taw hong pai in; a khut pan khuavakte leng keak a, tua munah a vaangletna kiseal hi.

⁵Ama in natnate a mai ah paisak a, thina ii a zui tu in thupia hi.

⁶Ama a tawlngak ciang, leitung liing a, Ama ii hong etna taw minamte liinglawng hi. A tawntung a om mualte tam tham a; ni dang in, a va ngeina mualte a kip tawntung mualte kiasuk hi.

⁷Cushan mite launa ka mu a, Median mite liinglawng uh hi.

⁸Topa awng, ngunte in hong thin uuksak ziam? Nang hong thin sosak sia tuipi ahi ziam? Na mite tungah zawna na puak ciang suangval meeikaaite sia na leang hi a, a tungah na to hi.

⁹Na thal zangh tu in na kinging zo hi, thaltangte kap tu in na kithoai hi. Na khualeng in simlei khentham hi.

¹⁰Mualte in nang hong mu ciangin, liing uh a, van panin tui buasuk hi. Leinuai a tuite hawk vabuat a, tuihualte saangto in khang hi.

¹¹Na thaltang manlangte a tee vazial ciang le na teite a tee valep ciang ni le tha zongh a omna mun ah tawlna hi.

¹²Leitung kantan in na thin uukna taw kal na suan a; thin uukna taw minamte na tuancil hi.

¹³Na mite le na teal kumpipa ngum tu in na kuan hi. Mi ngilote ii lampuite na vaatsuk a, a nungzuite na maaimot hi.

¹⁴A zawngte mun thimtham ah a sungawpte bangin Kote thethaang tu in, vuipi bang hong pai ciang na thaltang in a ngalkap hon ukpa kaplet hi.

¹⁵Na siphute taw tuipi na tuancil a, tuaciang a thahat tuite phuan hi.



¹⁶Hite theampo ka za a, ka liing hi ka muk sia launa taw liing hi. Ka pumpi zaw vaneal hi, ka nuai ah ka peangte khuasui vatut in om hi. Ko hong simte Pathian in daan a piak hun hong tun tu thim dide in ka ngak tu uh hi.

¹⁷Theikungte nga ngawl a, sapit nguite a nga bua zong, olive kungte nga ngawl a, lo sungah anlaak tu a om bua zong, tuute theampo thi siat a, khuibuk theampo a hawm siat zong,

¹⁸ka lungdam in ka thin nuam veve lai tu hi. Banghangziam cile Topa Pathian sia ka hunpa ahi hi.

¹⁹Topa in thahatna hong pia hi. Sazuk bangin ka peang hong khosak a, mual tungah hong keamcing hi.



Zephaniah

Zephaniah 1

¹Hi thu in Amon tapa Josiah Judah kumpi a sep laitak Topa ii Zephaniah tungah a piak thu ahi hi- (Zephaniah pa Cushi, Cushi pa Gedaliah, Gedaliah pa Amariah hi a, Amariah pa sia Kumpi Hezekiah ahi hi.

Topa Thukhenna Ni

²Topa in, “Keima in leitung na theampo, ka lalcipsak tu hi,

³mihing le nganhing, vacim le ngasa dongin ka lalcipsak tu hi. Mi ngilote bo natu ka vawt tu hi. Mihing minpiang ka lalcip sak tu a, kuama kikhoaikhe ngawl tu hi. Keima Topa in ka son zo hi.

⁴“Jerusalem mite le Judah mite theampo daan ka pia tu hi. Baal biakna a khakbel te a bo siat dong le tua nasep a seam lawki thiampite dong takin ka lalcipsak tu hi.

⁵Innkhum tungah kaato a, ni, tha, aksite a bia pawpo ka lalcipsak tu hi. Kei hong bia hong pai a thumaan tu in kiciamna zongh vawt zo napi Molech pathian tungah tomlo in a kiciam theampo ka lalcip sak tu hi.

⁶Kei hong nungngat a, kei hong zui nawn ngawlte, ka kungah lamlak natu ngen a, hong zuan nawn ngawlte ka lalcipsak tu hi,” ci hi.

⁷Topa thukhen tu ni hong nai zo ahikom ama omna munah thim dide in om vun. Topa sia a mite sangaw biak piakna ah pia tu in kithoai saan hi. Judahte a suddol tu in ngalte sam hi.

⁸Topa in, “Tua kingawlup ni in, lampui uliante, kumpi tapate le ngamdangte ngeina a zui theampo daan ka pia tu hi.

⁹Lawkite bang a biakpiakna a vawt theampo le a tote innsung sutol vanh taw a kidim natu a a ngute le a thatte theampo daan ka pia tu hi,” ci hi.

¹⁰Topa in, “Tua ni ciang, Jerusalem Ngasa Kongpi ah kaana aw na za tu uh hi. Khuapi a thak zawna munah tauna aw le mual tungah sukthapna awnging lian khat na za tu uh hi.



¹¹No, khua taw sangah a teangte awng, hi thu na zaak uh ciang kapin mau vun, banghangziam cile sumvawtte theampo thi siat tu uh hi!

¹²“Tua hun ciang in meiinn khat ka la tu a, Jerusalem ka zong tu hi. Mihing amate le amate ki lungkimsak a, kimuang in, ‘Topa in bangma a sia a pha vawt ngei bo’ a cite daan ka pia tu hi.

¹³Amate hauna kisuttol tu uh a, a innte ki susia tu hi. Amate in amatesak innte sungah teang ngei nawn ngawl tu a, a ciin sa sapit nguite pan sapittui ne ngei nawn ngawl tu uh hi,” ci hi.

¹⁴Topa ii Ni a thupi sia hong nai zo hi— hong nai mama zo a, manlang in hong tung tu hi! Tua ni sia siatna ni hi tu hi, banghangziam cile, ngalkap hangsan belte zongh thinkiam in kap tu hi!

¹⁵Tua ni sia thin uuk ni khat, haksatna le thinkiam ni khat, hi tu a, ngimna ni, tuasiatna le lalcipna ni khat, khuazing le khuathim ngawpna ni khat, meeikaai a, a vom neamnum ni khat hi tu hi.

¹⁶Ngal lemle aw le ngal kisimna aw le auna taw ngalkapte in luphungte le tausaangte taw a kidal khuapite a simthap ni hi tu hi.

¹⁷Topa in, “Mihingte tungah tuasiatna lalna ka tunsak sia nasia mama tu a, amate khat sim in mittawte bangin lei a zawt tu uh hi. Amate in kei tungah hong khial ahikom a chisante tui bang luang tu a, a mithi luangte lei ah kisial in muat tu uh hi,” ci hi.

¹⁸Topa in a thin uukna hong lak ni ciang a ngun a khamte theampo zongin amate a hu zo buatu hi. Leitung bup sia a thin uukna meikuang in kaingin haltham tu hi. Leitung mihing theampo thakhat thu in a nuntakna bosak tu hi.

Zephaniah 2

¹A maizum maw ngam awng, khua phawk tavun,

²paak bang vulin na thi maa in, Topa thin uukna a kuang sia na tung hong thet maa in, ama thin uukna hong lak maa in, khua phawk tavun.



³Ama thu ni note le ngam sungah a kiniamkhiak theampo awng, Topa sangah hong kiheak tavun. A maante vawt vun a, Topa mai ah noma le noma kiniamkhiak vun. Tua hileTopa thin uukna hong lak ni ciangin daan khak natu panin suakta tha tu nu hi.

Israel kiim A ngamte Lal natu

⁴Gaza khua ah a kinusia kuama om ngawl tu hi. Ashkelon khua kinusia tu hi. Nilang sungah Ashdod khua mite kihawlkeak tu hi, tuaciang Ekron khua ah, mihingte sia amate khuapi pan kihawlkeak tu hi.

⁵Tuipi hui ah a teang no Philistine mite awng, a bo hi zo nu hi. Topa in no tungah thukhen zo hi. Ama in, hong susia tu a, khat zongh na taang buatu uh hi.

⁶Tuipi hui na ngam uh sia tuucingte buk le tuukhawkte omna lozau suak tu hi.

⁷Judah mi a nungta laiteng in na leitangh uh lua tu hi. Amate in a ngan honte thana in nei tu a, Ashkelon innte ah ngiak tu uh hi. Topa a Pathian sia amate taw omkhawm tu a, amate nuamsasak kik tu uh hi.

⁸Topa Vaanglianbelpa in, “Moab le Ammon mite in ka mite a zawnsakna le a nomuna ka za zo a, a ngam ka sut tu hi ci a, a kiphatsakna zongh ka za zo hi.

⁹Israel te Pathian, a nungta Topa ka hi bangma in Moab le Ammon sia Sodom le Gomorrah bangin kilalcipsak tu hi, ci in ka kiciam hi. Amate sia cikhuk le a zantham top mun, lopa bek pona mun suak tu hi. Ka mi a nungta laite in amate vanh suddol tu a, a leitangh laaksak tu uh hi,” ci hi.

¹⁰Topa, Vaanglianbelpa ii mite selno a kiphatsakna le kisaktheina taw a om Moab le Ammon mite daan a piak tu zia sia hi bang ahi hi.

¹¹Topa in amate lausak tu hi. Ama in leitungte pathiante sia bangma ngawl suaksak tu a, tuaciang ngam theampo in amate ngam tek ah Topa bia tu hi.

¹²Topa in Ethiopia mite zongh thisak tu hi.

¹³Topa in Assyria lalsak natu in a vaangletna zangh tu hi. Nineveh khuapi sia a ki nusia sa khua zancip tui om ngawl senneal ngam suaksak tu hi.

¹⁴Tua mun in tuuhon, khuihon le nganhing nam tuatuamte ngiaphual ahi tu hi. Tua ngiaphual ah simbute teangin kongkha vangte pan in haam tu hi. Baangkua keallei ah va-akte haam tu hi. A innsakna innkal cedar thingte ki lakeak tu hi.

¹⁵Khuapi kiphasak, ama thahatna suang a ngam muang a kisa khat tungah tuabangin piang tu hi. A mite in amate khuapi sia simlei tungah khuapi lianbel in ngaisun uh hi. Bangza a ngamthimna mun suak tu ziam, ngamsate tawl ngakna mun suak lel hi. Tua mun kantan in a pai pawpo in a mu ciang laungawp in ton valeam tu hi.

Zephaniah 3

Jerusalem ii Mawna le Kitatna

¹A mite a zothaw, tatsia in ngalphuang nuam Jerusalem sia a lal hi zo hi.

²Ama in Topa thu ngai ngawl a, ama a kiteknate zongh saang ngawl hi. Ama in Topa muang ngawlin, huna zongh ngen ngawl hi.

³A lampui uliante sia tawpi hawk bang ahi uh hi; a thukhen maangte sia ngiapui ngilkialte bang hi a, duhop lei kisa in a zing ciang dong sangu khat zongh khe ngam ngawl uh hi.

⁴Kamsangte in sep nop vacin nei ngawl a, thimthel uh hi, thiampite in a thiangtho nate ninsak uh hi; tuaciang Pathian thukhamte sia amate phattuum natu in deikai uh hi.

⁵Ahihang Topa sia khuapi sungah omlai hi; ama in na phate vawt a, a pha ngawlte vawt ngeingawl hi. Zingsim a pealmaw in a mite tungah thutang lak hi. Hi na ve thutang ngawl mite in a maan ngawlte ma vawt tan a, a mai zongh a zum beak bua uh hi.

⁶Topa in “Minam theampo ka maaimot zo hi; a khuapite ka susia tham a, a luphungte le a tusaangte a zancip sa in ka nusia hi. A khuapite kinusia a, lampite a hawm in om a, mihingte kuama om nawn ngawl hi.



⁷Ka ngaisutna ah tuasia ciang ka mite in kei hong thasia tu a, ka tek nate hong saang tu, ka hilnate mangil ngawl tu in ka tuat hi. Ahihang hai ngawlin a ngamtat ngei bangin a pha ngawl bebek in ngamta leleau uh hi.

⁸Topa in, “Ngak zi vun, minamte ka mawsak tu ni ngak vun. Ka thin uukna ii thahatna tep tu in minamte le kumpi ukna ngamte khoptua tu in ka thin ka khensat zo hi. Ka thin uukna meikuang in simlei bup ka kaangthamsak tu hi.

⁹“Tuaciang ngam tuatuamte sungah mihingte ka kikhealsak tu a, amate in kei tung bek ah thu hong ngen tu uh hi. Amate in pathian dangte tungah thungen nawn ngawl tu a, keima thu hong ni tu uh hi.

¹⁰Ngam khuala Ethiopia pan ngangawn in a kithethaang ka mite in kei tungah piakna hong pia tu uh hi.

¹¹Tua hun ciang, no ka mite in kei nong leedo hu in na mai a zum nawn buatu uh hi. A kiphasak le a kisathei theampo ka heam tu a, ka mual thiangtho tungah kei nong do kik ngei nawn buatu uh hi.

¹²Kei kungah hu ngenin hong zuan tu a kiniamkhiak a, a kinovawt mihing pawlkhat tua lai ah ka nusia tu hi.

¹³A taanglai Israel mite in kuama tungah khial ngawl tu a, leilot thu son ngawlin ngual a theam buatu uh hi. Amate maa vang in ngammuang tu a, kuama a kiita buatu uh hi,” ci hi.

Lungdamna La

¹⁴Israel mite awng, Lungdamna taw la sa in au vun! Jerusalem awng, na thin theampo taw lungdam vun!

¹⁵Topa in na daan thuakna bosak zo hi; Na ngalte theampo hong nilkeaksak hi. Topa, Israel kumpipa sia note taw om khawm hi; lau natu tu in bangma thu om ngawl hi.

¹⁶Jerusalem tungah hi bangin a ci tu hun hong theng tu hi. “Lau heak in, Zion khuapi awng! Na khutte zaw vadek in khai heak in!



¹⁷Topa na Pathian sia nang taw omkhawm hi; ama thahatna in zawna hong pia hi; Topa in nang tungah hong lungdam tu hi, tuaciang ama itna sungah nuntakna thak hong pia tu hi. Ama in la sa tu a, na tungah lungdam tu hi.

¹⁸Mihingte poai sungah a lungdam bang in hi tu hi.” Topa in “Lal natu hong tawn nate ka vengsak zo hi; tuaciang na min daina teng kong laaksak zo hi.

¹⁹Hun hong tung tu hi! Nang hong zothawte daan ka pia tu hi, a peangbai theampo ka hun tu a ta ciang saltangte theampo inn ah ka siapui tu hi. Amate maizumna sia minphatna taw ka lai tu hi; tuaciang leitung theampo in amate pok tu uh hi.

²⁰A hun hong tung tu hi! A kithethaang na mite inn ah kong siapui tu hi; Simlei tung bup ah na min kong thangsak tu a, tuaciang khatvei a khangto a nuamsa in kong vawt kik tu hi,” Topa in ci zo hi.



Haggai

Haggai 1

Topa in Biakinn Sak kik natu Sawl

¹Darius in Persia ngam uklian a sep a kum niina kum, a tha luk tha ni masa bel ni in kamsangpa Haggai tungtawn in, Topa in thu son hi. Shealtiel tapa Judah ngam uk Zerubbabel atu le Jehozadak ii tapa Thiampi Saang Joshua atu thupuak ahi hi.

²Vaanglianbel Topa in Haggai tungah, “Hi mihingte in tu hun sia Biakinnsak kik natu hunpha hi ngawl hi, ci uh hi,” ci hi.

³Tuaciang Topa in kamsangpa Haggai tungtawn in hi thu teng mihingte tungah pia hi:

⁴“Ka mite awng, ka Biakinn a zancip sa in a om laitakin pha tak a kisa innte sungah banghang note teang tu nu ziam?

⁵Note tungah bang thupiang cisia mu ngawl nu ziam?

⁶Thaicii tam mama na tu uh a, ahizong an tawm bek na la uh hi. Anneak tu na nei uh a, ahizong na khamkhop tu na nei bua uh hi. Zu neak tu na nei uh a, ahizong na kham tham tu na nei bua uh hi. Puansilh na nei uh a, ahizong a lum tham tu na nei bua uh hi. Tuaciang naseam khat in a nuntak khom natu thalaw zo ngawl hi.

⁷Hisia banghangin piang ci in na he uh ziam?

⁸Tu in mual tungah kaato tavun a, inn thingte la vun, tuaciang Biakinn sa kik vun; tuaciang kei ka lungkim tu a, a kilawm bangin kei hong kibia tu hi.

⁹“Anlaak tu tam mama na lamem uh a, ahizong tawmno bek piang hi. Tuaciang na an uhte na sungkhum uh ciang kong seamkeaksak hi. Banghang tuabang vawt khi ziam? Banghangziam cile note mi sim in ama inn tu sa in a komlaak laitakin ka Biakinn sia a zancip sa in om hi.

¹⁰Tua hu in ngua zu ngawl a, bangma po thei ngawl hi.



¹¹Leitangh tung, mualte tung, anciinna lo sung, sapit huansung, olive ciinna lo, an namcin kiciinna tung, mihingte tung, ngannote tung, na ciin sa theampo tungah nguataui kong hang sak hi,” ci hi.

Mihingte in Topa Thupiak Ni

¹²Tuaciang Zerubbabel, Joshua le Babylonia ngam saltanna pan hong cia kik theampo in Topa a Pathian sawl bangin vawt uh hi. Amate lau uh a,Topa ii kamtaipa, kamsang Haggai thu ni uh hi.

¹³Tuaciang Haggai in Topathupuakte mihingte tungah pia hi. “Note taw kei kong omkhawm tu hi, ci in kong kamciam hi,” ci hi.

¹⁴Topa in mihing theampo tungah Biakinnsak natu thu mop hi; tua mihingte sia Judah ngamukpa Zerubbabel, Thiampi Saang Joshua, le saltanna pan hong cia kik mite theampo ahi hi. Amate in Vaanglianbel Topa a Pathian Biakinn ah nasep hong kipan uh hi.

¹⁵A hun sia Darius ngam uklian pa maan zawk kum nii kum, tha luk tha, ni kul le ni li ni ahi hi.

Haggai 2

Biakinn Thak ii Nasiatna

¹Tua kum a tha sali tha, ni kul le ni khat ni in Topa in kamsang pa Haggai tungtawn in paupui kik hi.

²Ama in Haggai tungah Shealtiel tapa Judah ngamukpa Zerubbabel le Thiampi Saang Joshua le mite tungah a son tu in, hi bangin sawl hi.

³“No sungah mihing khatpo in Biakinnpi bangza in nasia kana ziam ci in a ciamtee lai na om uh ziam? Tu in bangbangin na mu uh ziam, tu a sia, bangma ngawl bang hi tha tu hi.

⁴Ahizong tu in note khat zongh thinkiam heak vun. Na seam vun banghangziam cile no taw keima kong omkhawm hi.

⁵Egypt ngam pan nong pusua uh lai in a tawntung note taw kong omkhawm tu hi ci in kamciam kong pia hi. Tu zonghin note taw kong omkhawm nginge lai hi, tua ahikom lau heak vun.



⁶“Hai ngawlin van le lei, leitangh le tuipi kong thing tu hi.

⁷Ngam theampo ka lawnthal tu a, amate sumngum theampo hi lai ah hong kipuak tu hi, tuaciang Biakinn sia hauna taw kidim tu hi.

⁸Simlei tung a ngun theampo le kham theampo sia keima aa ahi hi.

⁹Biakinn thak sia a lui sia sangin nasia zaw tu hi, tuaciang tualai ah ka mite maa vanna le kilemna ka pia tu hi,” Topa Vaanglianbelpa in son zo hi.

Kamsangpa in Thiampite Thu dongh

¹⁰Darius ii ngam uklian a sep zawk a kum niina, a tha kua tha, ni kul le ni li ni in Topa Vaanglianbelpa in kamsangpa Haggai paupui kik hi.

¹¹Ama in “Thiampite ngaisutna dongh a:

¹²Sonteena in sangaw biakpiakna sungah a kithiansua sabek khat sia a thiampi puantual sungah tuun ci tawng. Ama in a puantual taw anluum ahizong, an min sa, zu, olive thau, tua ahibuale an a min piang khat pawpo thutha le, tua ante thiangsak tu ziam?” ci hi. Dokna a kinei ciang Thiampite in, “Thiangsak buan teh” ci uh hi.

¹³Tuaciang Haggai in “Sonteena, mihing khat in, mithi a tham hu in nin hi, ci tawng. Tua ahile hi ante khat pawpo ama in tham le tuate zongh a nin ahi tu ziam?” ci in dongh hi. Thiampite in zo a, “Hi tu hi,” ci uh hi.

¹⁴Tuaciang Haggai in “Hi ngam sungah mihingte le a piansak nate theampo tungah thupiangte a kibangin piang hi; Topa in, ci ahikom biaknatau tungah a biakpiakna theampo nin hi,” ci hi.

Topa in A Thupha Piak tu Kamciam

¹⁵Topa in “Note tungah hong piangte mu thei ngawl nu ziam? Biakinn nasak kik ma in,

¹⁶ansaal khat ah pai in an seau kul om tu in na muangmaw uh hi. Ahizong seau sawm bek om hi. Thambeal sung pan zu gallon sawmnga duup tu in na kimuangmaw uh a, ahizong gallon kul bek om hi.



¹⁷Na ciin sa theampo tungah vuisa kong vasak a, na theampo lalsak tu in ngialtang kong kiasak hi, ahizong na kisiik tuan bua uh hi.

¹⁸Tuni sia tha kua tha, ni kul le ni li ni hi a, Biakinn phungkawng a kiman ni hi. Tu pan kipan bang hong piang tu ziam en tavun.

¹⁹Antang om nawn ngawl a, sapit nguite, theikungte, talee le olive kungte nga ngawl lai hi kale, tu pan kipan thupha kong pia tu hi,” ci hi.

Topa in Zerubbabel Kamciam Pia

²⁰Tua tha, ni kul le ni li ni in Topa ii Haggai tungah thupuak a niina sia,

²¹Judah ngamukpa Zerubbabel atu ahi hi. “Keima in van le lei thing tu in kithoi khi hi,

²²kumpi ukna ngamte lawnthal in a vaangletnate ka bosak tu hi. Siphuleangte le a hawlte ka sawnthal tu a; siphute thi in, a hawlte khat le khat kithatlum tu uh hi.

²³Tua ni ciang ka naseampa Zerubbabel awng, nang kong la tu a, keima min taw na uk natu in nasep kong pia tu hi. Nang sia kong teal sa khat na hi hi,” ci hi. Topa Vaanglianbelpa in son hi.



Zechariah

Zechariah 1

Topa kungah A Mihingte A cia kik natu Sapna.

¹Persia ngamah Darius ngam uk lianpa a maan zawk a kum niina a tha liat tha sungah Topa in Iddo tupa, Berechiah tapa kamsangpa Zechariah tungah hi thu pia hi.

²Vaanglianbelpa Topa in mihingte tungah hi thu son tu in Zechariah sawl a, “Keima, Topa sia na taangpupite tungah ka thin uuk mama hi,

³ahihang tu in no tungah kong ci hi, ‘Kei kungah hong kiheak tavun, tua hile kei zongh no sangah kong kiheak tu hi.

⁴Na taangpupite taw kibang nawn heak vun. Khuangeipi lai in kamsangte in amate kungah ka thu son uh a, ngamtat siate ngamta ngawlin a maw nawn ngawl natu in thuhil uh hi. Ahihang amate in ka thu hong ngai nuam ngawlin hong mang nuam bua uh hi.

⁵Na taangpupite le tua kamsangte nungta nawn ngawl hi.

⁶Na taangpupite tungah ka naseam kamsangte tungtawn in thu piakna le kidop natu thute ka pia hi, ahihang amate in tuate thusim ngawl a, a ngamtatna taw kizui in ngimna thuk uh hi. Tuasia ciang amate kisiikin, Keima, a Vaanglianbelpa Topa in amate taw a kiphu bang le ka sep tu tatak a ka khensat bangin daan ka piak sia hong telthiang uh hi,’ ” ci hi.

Kamsangpa ii Siphute A mu kholna

⁷Darius ngam uk lianpa a maan zawk a kum niina (Shebat tha) a tha sawm le tha khat, ni kul le ni li ni zanin Topa in mu kholna sungah thu khat hong pia hi.

⁸Topa vantung lalang khat siphu san khat tungah a to ka mu hi. Ama sia myrtle kici thingkungte kawm kuam sung khat ah ding a, a nung sangah siphu dang a san, a pawl tiptep, le a kaangte om hi.

⁹Ama ka dongh a, “Topa awng, hi siphute in bang khiakna nei ziam?” ka ci hi. Ama in, “Bang khiakna nei ziam ci sia kong lak tu hi.



- ¹⁰Topa in amate leitung a enkot tu in a paisakte ahi hi,” ci in hong zo hi.
- ¹¹Amate in vantung lalang tungah, “Leitung theampo ah pai zo ung, leitung buppi sia cimaw in ki zothal zo hi,” ci uh hi.
- ¹²Tuaciang vantung lalangi, “Vaanglianbelpa Topa awng, Jerusalem tung le Judah ngam khuapite tungah kum sawmsali sung thin uuk zo ni hi. Amate na hesuak tu bang tan vei hai lai tu ziam?” ci hi.
- ¹³Heenepna kammal taw vantung lalang tungah Topa in zokik hi.
- ¹⁴Tuaciangi Vaanglianbelpa Topa pauna taangko tu in vantung lalangi kei hong sawl hi. “Ka khuapi thiango Jerusalem atu in thinbotna le itna thukpi ka nei hi,
- ¹⁵tuaciang kilemna le ngamdaina taw a om ngamte tungah ka thin uuk mama hi. Banghangziam cile ka mite tungah ka thin uukna iip kenkon in ka om laitak tua ngamte in ka minamte thuakna nasiasak sesem hi.
- ¹⁶Tua ahikom Jerusalem khuapi tungah ka hesuakna lak tu in kong pai kik zo hi. Ka Biakinn kipua pha kik tu a, khuapi kisa kik tu hi,” hong ci hi.
- ¹⁷Vantung lalang in Topa kammal hi teng taangko tu in hong sawl hi. “A khuapite nuamsa kik tu a, ama in Jerusalem khatvei hu kikin, ama khuapi in nei kik tu hi, Vaanglianbelpa Topa in ci hi,” hong ci hi.

Sakiite Mu kholna

- ¹⁸Mu kholna dang sungah khuital kii li ka mu hi.
- ¹⁹Keima hong paupui vantung lalang tungah “Hisakiite a khiakna bang ziam,” ci in ka dongh hi. Ama in “Tuata sia Judah, Israel le Jerusalem mite a kithethaang sak leitung ngamliante a ci nopna ahi hi,” ci in hong zo hi.
- ²⁰Tuaciang Topa in sek a toai naseam pasal li hong lak hi.
- ²¹Keima in “Hi mite bang vawt tu in hong pai ziam?” ci in ka dongh hi. Ama in “Amate in Judah ngam sutham in a mite a thethaangsak ngamte a lausak tu le a lawnthal tu in hong pai hi,” ci in hong zo hi.

Zechariah 2



Piteena Khau Mu kholna

¹Mu kholna dang khatah a khut sungah piteena khau a keng pasal khat ka mu hi.

²“Koisung pai tu ni ziam?” ci in ka dongh hi. Ama in, “Jerusalem bangza in sau a, bangza in zai ziam, ci in tee tu khi hi,” ci in hong zo hi.

³Tuaciang keima hong paupui vantung lalang sia mai sangah kal hong suan ka mu a, vantung lalang dang khat ama taw kisi tu in hong pai hi.

⁴A masa sia in a khat sia munah “Zia sung a pi khau toai khangmoipa sia munah va tai tan a, Jerusalem ah mihing le ngannote tam leilam tu ahikom luphung taw uum tu in lianlei tu hi.

⁵Topa in ama mama khuapi huu tu in khuapi kiimkot a luphung bangin mei taw uumci tu a, ama tua munah a minthanna theampo taw teang tu hi, ci in kamciam zo hi va ci tan,” ci hi.

Saltangte Inn ah Cia kik tu Kisam

⁶⁻⁷Topa in a mite tungah, “Mun theampo ah note kong thethaang hi. Ahihang tu in, no saltangte awng, Babylonia panin suakta in Jerusalem ah heak kik tavun.

⁸Khat pawpo in note hong saat le, ama in manpha bel kasak sia saat ahi hi,” ci hi. Tua ahikom Vaanglianbelpa Topa in a minamte vanh a suddol minam tungah hi thu son tu in keima hong sawl hi.

⁹“Topa ama mama in note hong sim tu a, khatvei lai a na sal ahi ngeite in na vanh uh hong suddol kik tu hi,” hong cisak hi. Hi thu hong pian tak ciang Topa ii kei hong sawl hi ci in, a kuama theampo in he tu uh hi.

¹⁰Topa in, “Jerusalem mite awng, lungdamin lasa vun! Note taw teangkhawm tu in kong pai hi!” ci hi.

¹¹Tua hun ciang ngam tam mama sia Topa kungah pai tu a, ama mite suak tu uh hi. Ama sia note sungah hong teang tu a, note kungah kei hong puak hi cisia na he tu uh hi.



¹²Judah mite sia ngam thiangtho sungah Topaii nei tuam hong suak kik tu a, Jerusalem khua sia ama itbel khuapi hong suak kik tu hi.

¹³Mihing theampo awng, Topa mai ah thim dide in om vun, banghangziam cile ama sia a teenna mun thiangtho panin hong pai hi.

Zechariah 3

Kamsangpa ii Thiampi Saang pa A mu kholna

¹Mu kholna dang khat ah Topa in Thiampi Saang Joshua sia Topavantung lalang mai ah dingin a om hong lak hi. Tuaciang Joshua hui ah Satan ding a, Joshua tungah mawna suan tu in kinging hi.

²Topa vantung lalangin Satan munah, “Topa in nang hong puavawk taken, Satan awng! Jerusalem a it Topa in nang hong puavawk taken. Hi Joshua sia meikhuk sung pan a kiten kik thingkhua khat taw kibang hi,” ci hi.

³Joshua sia puanninte silh in tualai ah ding hi.

⁴Vantung lalang in a vantung sawllamhte munah, “Hi sia pa ii a silh puannin teng suutkeak vun,” ci hi. Tua zawkciang ama in Joshua munah “Na mawna teng kong laak keaksak zo a, na silh tu puanthakte kong pia tu hi,” ci hi.

⁵Ama in a sawllamhte munah, Joshua lu tungah dial thiang khat a khipsak natu in sawl hi. Tuabangma in amate in seam uh a, Topa vantung lalang a din sung ma in amate in puanthakte silhsak uh hi.

⁶Tuaciang vantung lalang in Joshua tungah,

⁷Vaanglianbelpa Topa in: “Ka thukhamte zui in kong sawl thute na seam le, tuasia ciang ka Biakinn le a leitualte uk tu in kong koisuak tu a, ka omna munah a om vantung lalangte thungetna ka zaak bangin na thungetnate kong za tu hi.

⁸Nang, Thiampi Saang ahi Joshua awng; ngai in, Joshua ii thiampi a seppuite awng, ngai vun, no mailam sang a, hun phate ii lim ahite awng, ngai vun; Thingbaak a kici pa ka naseam pa kong lak tu hi!



⁹Joshua mai ah mai sali a nei suang khat ka koi hi. Tua tungah lai kong khen tu a, ni khat thu in hi ngam ii mawna teng ka lakeak tu hi.

¹⁰Tua ni hong thet ciang, note khat simin na sapit le na theikung uh taw a ki uum na huang sungah kilemma le ngam muanna siim tu in na innpaamte na sam tu uh hi, ci hi,” a ci hi.

Zechariah 4

Mei vakna khuam Mu kholna

¹Kei hong pau pupui vantung lalang sia hong pai kik a, a mu kimlai phok bang phetin kei hong phong hi.

²“Bang na mu ziam?” ci in hong dongh hi. “Kham taw a kivawt meivak khuam khat” ci in ka zo hi. “A dawn ah sathau koina kuang khat om hi. Meivak khuam tungah meiinn sali om a, a simin meikhau nei tek uh hi.

³Meivak khuam lang le lang ah olive thingkung khat veve om hi.”

⁴Tuaciang vantung lalang munah, “Hite ii khiakna bang ziam? Topa awng” ci in ka dongh hi.

⁵“He ngawl ni ziam?” ci in hong dongh hi. “He ngawl khi hi, Topa awng,” ci in ka zo hi.

^{10^b}Vantung lalang in, “Meiinn salite sia, leitung theampo a mu Topamittang salite ahi hi,” hong ci hi.

¹¹Tuaciang keima in “Meivak khuam lang le lang ah a om olive kungte nii in bang a ci nopna ziam?”

¹²Olive thau sunna khamlawng niite hui a, olive baak niite sia bang a ci nopna ziam?” ci in ama ka dongh hi.

¹³Ama in, “He ngawl ni ziam?” hong ci hi. “He bong Topa awng” ci in ka zokik hi.

¹⁴Tuaciang ama in “Hite sia leitung theampo ii Topa Pathian na a seam tu a Pathian teal sa le sathau a noi sa mihing niite ahi hi,” ci hi.

Zerubbabel tungah Pathian Kamciam



⁶Vantung lalang in Topa tung pan hong pai hi thu Zerubbabel tungah son tu in kei hong sawl hi. “Ngalkap vaangletna hang hi ngawl, nangma thahatna hang hi ngawl, ahihang keima thaa bek taw na maa na tun tu hi.

⁷Mual za a a lian hong khak hong hal haksatnate na mai panin mang tu hi. Biakinn na sa kik tu hi, tuaciang suang a khak bel sia a om natu sanah na cian ciang mihingte in ‘Hoi hi, Hoi hi!’ ci in, au tu uh hi.” Topa in ci hi.

⁸Topa tung panin thupuak dang khat hong theng hi.

⁹Ama in, “Zerubbabel in Biakinn tawdap pha zo a, a innsak zo thiang tu hi. Tuabang hong pian ciang nang sia amate kungah keima ii kong paisak na hi hunlam ka mite in hong tel tu uh hi.

¹⁰^aAmate thinkiam hi, banghangziam ci le nasepna sia tawmbek khangto hi. Ahihang amate in Zerubbabel ii biakinn asak tato mu tu uh a, amate lungdam tu uh hi,” ci hi.

Zechariah 5

Laizial Leang Mu kholna

¹Khua ka et kik le vui sungah laizial leang khat ka mu hi.

²Vantung lalang in ka mu sia hong dongh hi. Ka zokikna pan, “Lai kizial, pi sawmthum sau, pi sawm le pi nga zai, khat vui sungah leang hi,” ka ci hi.

³Tuaciang ama in kei tungah “Tua tungah leitung theampo ah a tung tu haamsiatna ki at hi. A lang khat laizial tungah ngamsung panin nguta a minpiang kinotkeak tu hi, ci in ki at a, a lang khat ah, kiciam a leilot thu a son theampo zongh kikaikeak tu hi, ci in ki at hi.

⁴Vaanglianbelpa Topa in hi haamsiatna ka tungsak tu a, tua in nguta theampote inn le kiciam in leilot thuson theampote inn sungah tum tu hi ci hi. Tua haamsiatna sia amate inn sungah teang tu a, tua innte lalcip in nusia tu hi,” hong ci hi.

Bawm sungah Numei A mu kholna

⁵Vantung lalang hong kilangh kik a, “En in na dang khat hong pai leleau hi!” hong ci hi.



⁶“Bang ziam?” ci in ka dongh hi. Ama in “Tua in bawm khat hi a, leitung bup mawna lim ahi hi,” ci in hong zo hi.

⁷Bawm sitna sia hak taw kivawt hi. Ka et le, a sitna hong kilaam to a, tua bawm sungah numei khat to hi.

⁸Vantung lalang in, “Hi numei in, ngitlo khansiatna lim lak hi,” ci hi. Tuaciang ama in numei sia bawm sungah hensuk a, a sitna taw sin kik hi.

⁹Ka etto ciang hilniang vacimlian ii thate bang a, a hat thate taw keima sangah hong leang numei nii ka mu hi. Amate in bawm hong zam suk a, lenpui uh hi.

¹⁰Vantung lalang tungah, “Amate in koi sungah paipui tu ziam?” ci in ka dongh hi.

¹¹Ama hong zona pan, “Ama atu Biakinn asaksak natu mun Babylonia ah paipui tu uh hi. Biakinnsak a kiman ciang, biak tu in tua munah bawm sia kikoi tu hi,” hong ci hi.

Zechariah 6

Siphuleang Li Mu kholna

¹Mu kholna dang khat ma ka mu leleau hi. Taungo mual nii kilaklaw panin siphuleang li hong pusuak ka mu hi.

²Leang khatna sia siphu sante, a niina sia siphu vomte,

³a thumna sia siphu kaangte, a lina sia siphu pawl tiptepte in kai hi.

⁴Tuaciang vantung lalang ka dongh a, “Topa awng, hi siphuleangte a khiakna bang ziam?” ka ci hi.

⁵Ama in hong zo a, “Hite sia vuipi lite hi a, amate in leitung bup ii Topaomna pan hong pai tawm ahi hi,” hong ci hi.

⁶Siphu vomte kai leang siasaksang Babylonia ah paito a, siphu kaangte nitumna sang zuan hi, siphu pawl tiptepte thangsang ngam zuansuk uh hi.



⁷Siphu pawl tiptepte hong pusua ciang, amate in leitung enkot nuam kisa in a pai kaal ngakla uh hi. Vantung lalang in, “Pai tavun a, leitung enkot tavun!” a ci ciang pai uh hi.

⁸Tuaciang vantung lalang in hong ausan a, “Saksang Babylonia ah a pai siphute in Topa thin uukna thimsak zo hi,” hong ci hi.

Joshua Kumpi lukhu khuhsak natu Thupiakna

⁹Topa in hi thu hong pia hi.

¹⁰Ama in “Sal ahi Heldai, Tobijah le Jedaiahte ii piak letsongte la in Zephaniah tapa Josiah inn ah thakhat in pai in. Hi mihingte theampo Babylonia ah a saltanna pan hong heak kik siat zo hi.

¹¹Amate hong piak kham le ngunte taw kumpi lukhu khat vawt in a, Jehozadak tapa Thiampi Saang Joshua lu tungah khusak in.

¹²Ama munah Vaanglianbelpa Topa in, “Thingbaak a kici mihing khat ama omna sasan ah khangto tu a, Topa Biakinn sa kik tu hi.’

¹³Biakinn sa tu ama hi a, kumpi khat upat natu kilawm teng ama in tangin, a mite uk tu hi. Thiampi khat ama kumpi tokhum huiah ding tu a, amate in kilemna le kituiton natu seam khawm tu hi,’ ci hi ci in son hi.

¹⁴Tua kumpi lukhu sia, Heldai, Tobijah, Jedaiah le Josiahte upatna le phawk natu in Topa Biakinn sungah om tu hi,” ci hi.

¹⁵A khuala a om mihingte hong pai tu a, Topa Biakinn sak kik nasep hong hu tu hi. A kisak man ciang, Vaanglianbelpa Topa in kei sia nang kungah hong paisak ci in na he tu uh hi. Topa na Pathian hong thupiak teng na zui uh le hi thu teng theampo hong piang tu hi.

Zechariah 7

An tanna Maan ngawlte Topa in Mawsak

¹Darius sia ngam uk lianpa in a maan zawk a kum lina, Kislev a kici a tha kuana, a ni li ni in Topa in kei tungah thu khat hong pia hi.



²Bethel mite in Sharezer le Regemmelech le a mite Vaanglianbelpa TopaBiakinn ah Topa thupha ngen tu le

³thiampite le kamsangte tungah hi thute dongh tu in paisak uh a, “Biakinn kilalsak siat zo ahikom kum tam mama sung ka vawt sa uh bangin tha nga tha in antang in mau in om lai tu khu ziam?” ci uh hi.

⁴Hi thu sia Topa ii kei tungah hong thupiak ahi hi.

⁵Ama in, “Ngamsung a mite le thiampite hi kum sawmsali sung tawntungin a tha nga na le a tha sali na ah khuangai in an a tan uh ciang kei hong upat ahi bua uh hi, ci in amate tungah son tan.

⁶Amate in a neak a dawn uh ciang amate lungkim natu bek a ne a dawn uh hi,” ci hi.

⁷Jerusalem khanto hun mihing taw a kidim lai, mihing tam mamate khuapi sung bek ah teang ngawlin thangsang ngam le nitumna sang mualpeangte zongh ah a ten hun lai pekin kamsang masate tungah thupiak sa ahi hi.

Thunit Ngawl hu in Sal Suana

⁸Topa in Zechariah tungah hi thu puak hi:

⁹“Khua ngeipi lai in ka minamte munah hi thupiakna ka pia hi. ‘A maanin thukhen vun a, khat le khat dikna le kihesuakna nei tavun.

¹⁰No sungah hong teang ngamdang mite ahizong, a cimawte ahizong, meingong tangate zothaw ngawl tu nu hi. Khat le khat kisuksiat natu a nanam in sawm ngawl tu nu hi,’ ka mite tungah ka ci hi.

¹¹“Ahihang ka minamte sia thinpui in hong ngai nuam ngawl uh hi. Amate in a thinsung kongkhate khakin,

¹²a lungtangte suangtum bangin sahsak uh hi. Khua ngeipi lai a kamsangte tungtawn a ka hil thute ngai nuam ngawl ahikom, ka thin uuk mama hi.

¹³Ka pau ciang hong ngai ngawl uh ahikom, thu hong nget uh ciang ka zo bua hi.



¹⁴Amate ngamdang ah peam tu in, suangval vuipi seamkeak bangin ka bengkeak hi. Hi ngampha sia ngamkhing in ki nusia a, kuama a teang bua hi.

Zechariah 8

Jerusalem Pua kik natu Topa Kamciam

¹Vaanglianbelpa Topa in Zechariah tungah hi thu puak hi.

²“A mite ka it lei lawlawm manin Jerusalem ka hu tu kal ka ngakla hi. Tua itna in a ngalte tungah hong thin uuksak hi.

³Ka khuapi thiangtho Jerusalem ah ka cia kik tu a, tua lai ah ka teang tu hi. Tua khuapi sia a citak khuapi kici tu a, Vaanglianbelpa Topa mual sia a thiangtho mual kici tu hi.

⁴Khatvei ma, nupi huai pasal huaite, huai leilam kisa in sin ciangkhut khunin a vakte sia khuapi lampi ah to kik tu uh hi.

⁵Tuaciang lampi liante sia a kimai numeino patangno taw kidim kik tu hi.

⁶“Tu in a om lai minamte atu in hi thu suak thei ngawl tu bang hi kale kei atu in a suakmaw bangma om ngawl hi.

⁷Ka minamte a kipaipuina ngamte pan ka suatak tu a,

⁸Jerusalem ah teang tu in niswana le nitumna panin amate ka khawmtua kik tu hi. Tuaciang amate sia ka minamte hi tu a, keima in amate thumaan le thutang taw a uk a Pathian ka hi tu hi.

⁹“Hangsan vun! Ka Biakinn sa kik tu in, a tawdap a kipha lai hun a kamsangpa pau kammal teng ma, tu in na za uh hi.

¹⁰Tua hun ma in kuama in mihing ahizong nganhing ahizong tha cial zo ngawl a, a ngalte kung pan kuama suakta ngawl hi. Mihingte khat le khat ka kilangpansak hi.

¹¹Ahihang tu in, hi minamte sung pan a nungta laite sia nidang a te taw ka kibangsak bua hi.



¹²Amate in ngammuang takin lo ante ciing tu hi. A sapit nguite hong nga tu hi. Leitangh in ante piangsak tu a, ngua tam mama hong zu tu hi. Hi thuphate theampo a suakta lai ka ngam mite tungah ka pia tu hi.

¹³Judah le Israel mite awng, hun bo sa sungah ngamdang mite in, a kihaamsiat uh ciangin ‘Judah le Israel mite ngim thuak bangin thuak tavun’ khat le khat kici uh hi. Ahihang note kong hun tu a, tuaciang tua ngamdang mite khat le khat in, ‘Judah le Israel te tungah a tung thuphate tung taken!’ kici tu uh hi. Tua ahikom hangsan vun a, lau heak vun,” ci hi.

¹⁴Vaanglianbel Topa in, “Na taangpupite ii hong thin uuksak ciang, amate lalcipsak tu ka sawm a, ka thin kheal kik ngawlin ka tup bangin ka seam suak hi.

¹⁵Ahihang tu in Jerusalem le Judah minamte thupha piak ka sawm hi. Tua ahikom lau heak vun.

¹⁶Nasep tu hi teng ahi hi. Khat le khat thumaan son vun. Thukhen zum ah kilemna a om thei natu in thu tang takin khen vun.

¹⁷Khat le khat kinatsak tu tum heak vun. Kiciamna taw leilot tetti pang heak vun. Leilotna, a maan ngawl thukhenna le ngoltolnate ka ngaimaw hi,” ci hi.

¹⁸Vaanglianbelpa Topa in Zechariah tungah hi thu puak hi.

¹⁹“Tha li, tha nga, tha sali le tha sawm na ah antan nate sia Judahte atu in lungdam thinnop poai khaamna suak tu hi. Thu tak le kilemna dei tavun” ci hi.

²⁰Vaanglianbelpa Topa in, “Khuapi tam mamate panin mihingte Jerusalem ah a pai tu hun hong theng tu hi.

²¹Khuapi khat pan hong pai mihingte in khuapi dang pan hong pai mihingte tungah ‘Ko VaanglianbelpaTopa bia tu le ama thupha ngen tu in pai tu khu hi. Ko taw paikhawm tawng,’ ci tu uh hi.

²²Mihing tam mama le minam a hat mamate sia Vaanglianbelpa Topa bia tu le ama thupha ngen tu in Jerusalem ah pai tu uh hi.



²³Tua hun ciang, ngamdang mi sawm sia Judah mi khat kungah, hong pai tu a, ‘Pathian sia note taw om hi ci in za ka hi uh ciang mailam nuntakna tu vaihawmna sungah kong kihel nuam uh hi,” ci tu uh hi.

Zechariah 9

Ngampaamte tungah Thukhenna

¹Hi thu sia Topa thupuak ahi hi: Ama in Hadrach ngam le Damascus khuapi tungah daan piakna thutan zo hi. Israel minamte bek hi ngawlin Syria khuapi zongh Topa neisa ahi hi.

²Hadrach taw a ki ngamngi Hamath zongh ama neisa ahi bangma, Tyre le Sidon khuapite le a khut thiamna te theampo zongh ama neisa ahi hi.

³Tyre in ama atu in khuapi kulhpite vawt a, ngun le khamte a khol sa tam leilam kisa in nin khol bangin kiciang venvon hi.

⁴Ahihang a neisa theampo Topa in laaksak tu hi. Ama haunate sia Topa in tuipi sungah vawksak tu a, a khuapi haltum tu hi.

⁵Ashkelon khuapi in hi teng mu tu a, lau tu hi. Gaza khuapi zongh in mu tu a, na sa mama tu hi. Ekron zongh tuabang hong hi tu a, a lametna bo tu hi. Gaza in a kumpi hong taan tu a, Ashkelon sia a teang om ngawlin kinusia tu hi.

⁶Chi kihel minamte in Ashdod ah hong teang tu uh hi. Topain, “Tua a kiphasak Philistinete theampo ka niamsak tu hi.

⁷Amate in chi omlai sate ahibuale a kikhaam andangte ne nawn ngawl tu uh hi. A nungta laite theampo ka minamte suak tu a, Judah minam sungah be khat in om tu uh hi. Ekron sia Jebus te bangma in ka minam suak tu uh hi.

⁸Ka ngam ka cing tu a, ngalkap honte in ka kantansak buatu hi. Kumpi ngilote in ka minamte ka zothawsak nawn buatu hi. Ka minamte thuakna sa teng mu siat zo khi hi,” ci hi.

Hong piang tu Kumpipa

⁹Lungdam vun, lungdam vun, Zion mite awng! No Jerusalem mite awng, lungdam in au vun! En vun, na kumpipa uh no kungah hong pai hi! Ama in



zawna le mualsuana taw hong pai hi. Ahihang kiniamkhiak in laa tungah to hi. Laano, laapui ii a no tungah to hi.

¹⁰Topa in, “Ngal siphu leangte Israel pan ka bosak tu a, Jerusalem pan siphute ka la tu hi. Ngal kisimna sung a kizangh thalte ka lalcipsak tu hi. Na kumpipa in ngam tuatuamte sungah kilemna omsak tu hi; ama in tuipi khat pan tui pi khat dong, Euphrates Ngun pan leimong dong uk tu hi,” ci hi.

Pathian Minamte Kipua kik natu

¹¹Topa in, “Sangaw biakpiakna chisan taw thuciamna hangin na saltanna, tui om ngawlina dumsung pan note kong suaktasak tu hi.

¹²Heak kik vun, tu in lametna nei no saltangte awng; na ngam muanna munah heak kik vun. Na thuakna sa theampo hangin a zaa nii in thupha kong piak kikna, tu in note tungah kong son hi.

¹³Greece mite do tu in Judah sia ngalkapte thal bangin, Israel sia thaltang bangin, Zion a pasalte sia namsau bangin ka zangh tu hi,” ci hi.

¹⁴Topa sia a minamte tungah hong kilangh tu hi. Ama in a thaltangte sia khualeng bangin kap tu hi. Vaanglianpipa Topa in a lemle tum tu a, thangsang pan hong va vuipi suangval taw kuan tu hi.

¹⁵Vaanglianbelpa Topa in a mite sungsia tu hi. Tuaciang amate in a ngalte lalthamsak tu uh hi. Amate sia ngal kisimna sungah zukhamte bangin au tu uh a, amate in a ngalte chisan luangsak tu uh hi. Tua chisan sia Biaktau tungah beal sung pan a kisung biakpiakna bangin luang tu hi.

¹⁶Tuucingpa in a tuute launa pan a huuk bangin, tua ni ciangin, Topa in a minamte hun tu hi. Amate sia ama ngam sungah kumpi lukhu tung a kisuang suang manphate bangin taang tu uh hi!

¹⁷Tua ngam sia bangza in pha in hoi tu ziam! Khangnote sia tua ngam pan piang thaw an le sapit tui neakna taw a thahat tu uh hi.

Zechariah 10

Suatak natu Topa in Kamciam



- ¹Tuk lai in Topa tungah nguatui ngen vun. Meeikaaisakin ngua zusak a, mihing theampo atu in ankung a hingsak pa sia Topa ahi hi.
- ²Mihingte in milimte le aisaante thu dongh uh hi. Ahihang amate zokiknate sia leilot thu le luithawthong thu ahi hi. Pawl khat in mangkhia a, ahihang tuate in nang hong lampialsak bek hi; amate hong piak thinnopna sia manh nei ngawl hi. Tua ahikom mihingte sia tuu bote bangin vakthap uh hi. Amate sia lampui nei ngawl ahikom ngim nga uh hi.
- ³Topa in, “Ka minamte a uk ngamdang mite tungah ka thin uuk hi, amate daan ka pia tu hi. Judah mite sia keima aa hi, tuaciang keima Vaanglianbelpa Topa in amate ka keam tu hi. Amate sia a thahat ka ngal siphute hong hi tu uh hi.
- ⁴Amate sung panin ka mite a uk tu ngamukte, lampuite le ngalkap maangte hong piang tu hi.
- ⁵Judah mite sia a ngalte lampi buan sungah a siikcil ngalkapte bangin ngalzo tu uh hi. Amate in ngalsim tu uh hi, banghangziam cile Topa in amate panpui a, amate in a ngalte siphu ngalkapte ngangawn zothal tu uh hi.
- ⁶“Keima in Judah mite ka hatsak tu hi; Israel mite ka suatak tu hi. Keima in amate tungah khuangai huaisakna ka nei tu a, a vekpi in inn ah ka ciapui kik tu hi. Amate sia, ka nial ngei ngawlte bang hi tu hi. Keima in amate ii Topa a Pathian ka hi hi; A thungetnate ka zo tu hi.
- ⁷Ngalkapte bangin Israel mite sia thahat tu uh hi. Zu ne te bangin lungdam tu uh hi. A suan a paalte in hi zawna phawk tu uh a, Topa nasepnate hangin lungdam tu uh hi.
- ⁸“Ka mite ka sam tu a, ka kaikhawm tu hi. Amate ka suatak tu a, a ngei bangin ka tamsak mama tu hi.
- ⁹Ngam tuatuamte sungah amate thethaang hi kaleng, ngam khualana pan ngawngawn in kei hong phawk tu uh hi. Amate le a tate suakta tu uh a, inn ah cia khawm tu uh hi.



¹⁰Egypt le Assyria panin amate inn ah ka ciapui tu a, amate mun le ngamah ka teangsak tu hi. Amate Gilead le Lebanon zongh ah ka teangsak tu hi; ngambup sia mihing taw kidim tu hi.

¹¹Amate in ngimna tuipte a kaan uh ciang, keima Topa in, tuihualte ka vaatmaai tu a, Nile ngun thuk sia leiko suak tu hi. A kiphasak Assyria kikhia suk tu a, a thahat Egypt in a thahatna taan tu hi.

¹²Keima in ka minamte a tha ka hatsak tu hi, amate in kei hong bia tu a, ka thu hong mang tu hi,” ci hi, Topa in ci zo hi.

Zechariah 11

A khansia Ngam Ukte Taakna

¹Lebanon awng, mei in na cedar thingkungte a kaktum thei natu in na kongkhate hongin.

²Cypress thingkungte awng, kap in mau vun — cedar thingte puk zo hi; tua thingkung minthangte kilalthamsak siat zo hi: Bashan limthingte awng, kapin mau vun — taamthing zingte kiphuk siat zo hi.

³Ngam ukte khuangai in kap hi; amate minthanna bo zo hi; Tawpите hawk ngai vun; Jordan ngunhui, amate teenna duithuk sia ki lalthamsak zo hi.

Tuucing Niite

⁴Topa ka Pathian in kei tungah, “Ngaw tu a kikoi tuu honte cing in.

⁵Tua tuute sia a tote in that ahihang a thatte daan kipia ngawl hi. Amate in a sa uh zuakin, “Topa pok vun! Ei hau zo hing!” ci uh hi. A tuucingte ngangawn in hesuakna nei ngawl uh hi,” hong ci hi.

⁶(Topa in, “Leitung ah kuama hesuak nawn ngawl tu khi hi. A ukte khut sungah mihingte theampo sia keima mama in ka koi tu hi. Hi ngamukte in leitung zaanthamsak tu a, amate thahatna panin tua leitung ka suatak buatu hi,” ci hi.)

⁷Tuu a lei, a zuakte in kei hong cial a, kei sia a kingo tu tuute a cingpa ka suak hi. Ciangkang nii ka la a, khat sia “Maipha piakna” ka ci a, khat sia ‘Ki pumkhatna’ ka ci hi. Tuaciang tuuhonte ka cing hi.



⁸Kei hong ensan tuucing dang thumte tungah ka thin a sau zo bua hi, amate teng sia tha khat sungin ka tawpsak hi.

⁹Tua zawkciang tuuhonte tungah, “Note ii tuucing pa hi nawn ngawl tu khi hi. A thi tu teng thi vun a, a kilalsak tu teng laltum hen. A taanglai teng in amate khat le khat kisucip ta uh hen,” ka ci hi.

¹⁰Tua zawkciang ‘Maipha piakna’ a kici ciangkang la in, Topa ii minam theampo taw a vawt thuciamna phiatna tu in tua ciangkang ka thiaktan hi.

¹¹Tua ahikom tua thuciamna sia, tua ni in kiphiat hi, tuu a zuak le a leite in kei hong en nginge a, ka sep ka vawtte tungtawn in Topain thuson hi ci in amate in he uh hi.

¹²Amate tungah, “Na uuk takpi uhle ka sep thaman hong pia tavun. Na uuk takpi bua uhle noma tang vun,” ka ci hi. Tua ahikom amate in ka thaman tu in nguntang sawmthum hong pia hi.

¹³Topa in, keima tungah “Tua sumte Biakinn sum kholna ah koi tan hong ci hi. Tua ahikom kei taw kiphu a, tam asak mama uh sum sawmthum la in Biakinn sum kholna ah ka koi hi.

¹⁴Tua zawkciang ‘Ki pumkhatna’ a kici ciangkang niina sia ka thiaktan a, Judahte le Israel te ki pumkhatna kitamtham hi.

¹⁵Tuaciang Topa in keima tungah “Khatvei ma tuucingpa heang leleau in a, tu tung sia a mannung ngawl tuucingpa heang in.

¹⁶Ka tuuhonte en tu in tuucing khat ka koi hi, ahihang ama in lalna a thuak tu tuute le huu ngawl; a bote le zong ngawl, a liamte le bawl ngawl, a cidamte zongh anvaak ngawl hi. Tuabang a sep tu luangin ama in tuu a thaubelte ii sa ne in a peangcinte balkeak hi.

¹⁷Tua a mannung ngawl tuucingpa a lal hi zo hi! Ama in a tuuhonte nusia zo hi. Ama thahatna sia ngalte in lalcipsak tu hi. A baan ngawtaak tu a, a ziatsang mit taw tu hi,” hong ci hi.

Zechariah 12

Mai sangah Jerusalem Kitat natu



¹Hi thu sia Israel taw kisai van a phal, lei a bitphua, mihingte nuntakna a pia Topa tung pan hong pai ahi hi. Ama in

²“Jerusalem sia zu hai khat bangin ka vawt hi, a kiimkot a ngam tuatuamte in ne tu a, zu kham bangin hoi vatut tu uh hi. Amate in Jerusalem a uumci uh ciangin, Judah khuapi dangte zongh ki uumci tu hi.

³Ahihang tua hun hong thet ciang, Jerusalem sia suangtum ngitpui khat bangin ka vawt tu a, laamto tu a kipan ngam pawpo liam tu hi. Leitung bup ngamte kipawlin ama sim tu uh hi.

⁴Tua hun ciang a siphute theampo ka lausak tu a, a tung tote ka mawmawsak tu hi. Judah mite ka keamcing tu a, ahihang a ngalte ii siphute a mit ka tawsak tu hi.

⁵Tuaciang Judah be le phungte in amate le amate tungah, ‘Vaanglianbelpa Topa in Jerusalem ah a teang a mite thahatna pia hi’ ci tu uh hi.

⁶“Tua hun ciang Judah be le phungte taamthing sungah ahibuale, thaw an a min lo sung a meikuang bangin ka vawt tu hi- amate in a kiimkot ngamte lalthamsak tu uh hi. Jerusalem mite khuapi sungah ngammuang in om tu uh hi.

⁷“Keima, Topa in Judah ngalkapte zawna ka pia masa tu hi, tua hile David suan le paalte le Jerusalem mite ii a nga tu upatna sia a dang Judah mite nga tu upatna sangin lian zaw ngawl tu hi.

⁸Tua hun ciang Topa in Jerusalem a teangte dal tu a, amate sungah a zawngkhal belte ngangawn David bangin hat tu uh hi. David suan le paalte in amate sia Topa ii vantung lalang bang ahizong Pathian mama bang ahizong lampui tu uh hi.

⁹Tua hun ciang Jerusalem sim tu a kipan ngam theampo ka laltham sak tu hi.

¹⁰“Keima in David suan le paalte le Jerusalem a teang midangte sia hesuak theina thaa le thunget hatna thaa taw ka dim tu hi. Amate in nam taw a tupluppa en tu uh a, amate in tapa khat bek a nei a thisua sia a kaa bangin



kap tu uh hi. Amate in a tapaciil a khuaisuate bangin kapin nasia tak mau tu uh hi.

¹¹Tua laitakin Jerusalem ah heena kaana sia Megiddo zaangtam a Hadad-rimmon atu heena le kaana za in nasia tu hi.

¹²⁻¹⁴Ngamsung innkuan simin mau in om tu uh a, tuate sia David suante innkuan, Nathan suante innkuan, Levi suante innkuan, Shimei suante innkuan, a dang innkuante hi tu uh hi. Ngamsung innkuan simin mau tek tu uh a, pasalte sia numeite taw kihel ngawlin a tuamin mau tu uh hi.

Zechariah 13

¹Vaanglianbelpa Topa in “Tua hun hong thet ciang, David suan le paalte le Jerusalem mite mawna le milim biakna pan thiansua tu in tuinaak khat kihong tu hi.

²Tua hun ciang ngam sung pan milimte min theampo ka phiat thiang tu a, kuama in ciamtee nawn ngawl tu uh hi. Kamsang ka hi a ci theampo le, milim biak nopna thinsung theampo ka bosak tu hi.

³Tuaciang khat po in kamsaanna a zomto nuam hamtang le, a pa le a nu in nang sia hong kihatlum tu hi, ci tu hi, banghangziam cile ama in Topa ii kammalte pau a kinei a, leilot thu a son hang ahi hi. Ama in kam a sang veve le, a pa le a nu in nam taw hollum tu hi.

⁴Tua hun hong thet ciang kamsang kuama in a mu kholna hu in kiphasak ngawl tu a, kamsang khat bangin ngamta ngawlin, kamsangte puan hampuite ngual theam natu in silh ngawl tu hi.

⁵Tuabang ci zaw ngawlin, ‘Kei kamsang hi bong, kei lothopa khi hi, ka khan tawntung lo ka tho hi’ ci zaw tu hi.

⁶Tuasia ciang khat po in, ‘Na awm a liammate bang ziam?’ ci in a dongh le ‘Lawmte khat ii inn pan ka nga hi’ ci in zo tu hi,” ci hi.

Pathian Tuucingpa Thalup natu Thupiakna



⁷Vaanglianbelpa Topa in, “Namsau awng, khanglo in kei atu a seam tuucingpa sim tan! Ama thatlum in, tuaciang tuute ki thethaang tu hi. Ka minamte ka sim tu a,

⁸tuaciang, ngambup sungah mihingte see thum sua see nii thi tu uh hi.

⁹A taanglai khen thum sua khen khat teng sia ka sit tu a, meikuang taw ngunte a kithianthosak bangin amate ka thiangthosak tu hi. Kham a kisit bangin amate ka sit tu hi. Tuaciang amate kei tungah thu hong ngen tu a, kei in ka zo tu hi. Amate tungah ka minamte ahi hunlam ka son tu uh a, amate in kei sia amate Pathian ka hi hunlam pualaak tu uh hi,” ci hi.

Zechariah 14

Jerusalem le Minam Dangte

¹Topa thukhen in a to tu ni nai zo hi. Tuaciang Jerusalem kiphuul tu a, na mutang in a vanh laakte kihawm tu hi.

²Topa in Jerusalem sim tu in minam theampo khawmtua tu hi. Khuapi kila in, innte kiphuul tu a, numeite kibuan in kikhialpui tu hi. Khua mite a lang sia sal in kipai pui tu a, ahihang a taanglai teng khuapi pan kipaipui ngawl tu hi.

³Tuaciang, nidang lai in a sim ngei bangma in Topa kuanin tua minamte sim tu hi.

⁴Tua hun ciang ama sia Jerusalem nisuana sang Olive mual tungah ding tu hi. Tuaciang Olive Mual sia nisuana sang pan nitumna sangah kuam lian khat in phel nii in khen tu hi. Mual a lang siasak sangah kikhin tu a, a lang sia thang sangah kikhin tu hi.

⁵Mual lang khat dongin a kithung hi kuam panin note na suakta tu uh hi. Judah Kumpipa Uzziah hun lai a zinliinna taw a sathap lai in na taangpupite tai bangin na tai tu uh hi. Topa ka Pathian sia vantung lalang theampo taw hong pai tu hi.

⁶Tua hun hong thet ciang, khuasik le vuukkhal



- ⁷le khuazing cite om nawn ngawl tu hi. Zan ngangawn suntang bang hi tu hi. Hi thu a pian tu hun Topa bekin he hi.
- ⁸Tua ni hong thet ciang, Jerusalem panin tui thiangtho hong luang tu a, a lang sia Tuipi Thi ah, a lang sia Mediterranean tuipi ah luang tu hi. Tua tui sia tuk taw khal taw kum tawntung in, luang tu hi.
- ⁹Tuaciang Topa sia leitung theampo ii kumpipa in hong mang tu a, mihing theampo in ama sia Pathian in bia tu a, tua min ma taw in he tu uh hi.
- ¹⁰Saksang Geba panin thangsang Rimmon dong ngam theampo zaangtam kisua tu hi. Jerusalem sia kiim le paamte sang saang zaw tu hi. Khuapi sia Benjamin kongpi pan Kingh Kongpi, nidang kumpi omna ngei dong, Hananel Tausaang pan kumpite sapittui suukna dongin kithung tu hi.
- ¹¹Mihingte tua munah ngam muangin teang tu a, a lauthawng nawn buatu uh hi.
- ¹²Topa in Jerusalem khuapi a sim minam theampote tungah a kiitak huai mama natna tungsak tu hi. Amate nungta nginge lai in a sa uh muat tu hi. A mitte uh le a leeite muatmang tu hi.
- ¹³Tua hun ciang Topa in amate thin amsak biaibuai in lausak tu a, mihing simin a kungah a om khat pawpo manin lai tu hi.
- ¹⁴Judah mite in Jerusalem huu tu in ngaldo tu uh hi. Amate in minam dangte theampo ii hauna, kham, ngun le puan tam mamate kilaaksak tu hi.
- ¹⁵A kiitak huai mama natna khat sia ngal phual a om nganhingte theampo, siphute, laate, kalaohete, laano namte tung zongh ah tung tu hi.
- ¹⁶Tua zawkciang Jerusalem khua a sim minam dangte sung pan a taanglaite theampo in Vaanglianbelpa Topa sia kumpi hi ci in bia tu le Buk Poai khaam tu in kum simin Jerusalem khua ah pai tu uh hi.
- ¹⁷Minam khat pawpo in Vaanglianbelpa Topa sia kumpi bangin paai in biak tu a nial le amate ngamah ngua zu ngawl tu hi.



¹⁸Egyptte in Buk Poai, a khaam tu a nial le, Jerusalem ah pai tu a nialte le Pathian a bia nuam ngawlte tungah a lauhuai mama natna Topa ii a tunsak sia amate tungah tung tu hi.

¹⁹Egyptte le a dang minam dangte theampo in Buk Poai a khaam bua ahile hi daan amate tungah tung tu hi.

²⁰Tua hun ciangin siphu ngawlok ngangawn “Topa atu a ki tavaw” ci kammal ki at lai tu hi. Biakinn sung a an huanna bealte zongh biaknatau mai a kuangte bangma in thiangtho tu hi.

²¹Jerusalem khua le ngamsung a an huanna beal theampo sia Vaanglianbelpa Topa biakpiakna a zak tu in kituam koi tu hi. Tua bealte sia sangaw biakpiakna a pia po in biakpiakna sate huanna in zangh tu hi. Tua hun hong thet ciang Vaanglianbelpa TopaBiakinn sungah sumzuakte le sumleite khat zong om nawn ngawl tu hi.



Malachi

Malachi 1

¹Hisia in Malachi ii Israel mite tungah a son tu Topa ii a piak thu ahi hi.

Topa ii Israel te A itna

²Topa in a mite tungah, “No kong it tawntung hi,” ci hi. Ahihang amate in zokik a, “Kote nong itna bangbangin hong lak na ni ziam?” ci uh hi. Topa in zokik a, “Esau le Jacob sia unau laipee ahihang Jacob le a suan a paalte ka it a,

³tuaciang Esau le a suan a paalte ka ensan hi. Esau ii mualtung ngamte ka sutham a, a leitangh sia ngamsate atu in ki nusiat hi,” ci hi.

⁴Esau suan le paal Edomte in “Ka khuapite uh hong suksiatsak hi, ahihang tuate ka sa kik tu uh hi,” a ci le Topa in “Sa kik ma hen ka baltham kik tu hi,” ci in a zokik tu hi. Mihingte in amate tungah “Ngitlo khan siatna ngam le Topa ii a tawntung a thin uukna ngam” ci tu uh hi.

⁵Israel mite in hite a mittang uh taw mu tu a, tuaciang “Israel ngam pua sia ngangawn ah Topa sia thahat hi,” ci tu uh hi.

Topa in Thiampite Teih

⁶Vaanglianbelpa Topa in thiampite tungah, “Tapa khat in a pa thasia a, innteang khat in a Topa zakta hi. Keima in na pa uh ka hi a, — banghangin hong upat ngawl nu ziam? Keima in na Topa khi hi, banghang hong zakta ngawl nu ziam? No in kei hong zawngsak napi in, ‘Bangbangin hong zawngsak khu ziam?’ na ci lai uh hi.

⁷Bangbangziam cile hi bang hi— ka biaknatau tungah a mannung ngawl ante nong pia uh hi. Tua zawkciang note in, “Bangbangin hong zakta ngawl khu ziam, ci in nong dongh uh hi. Hong son tong ka biaknatau na zawngsakna uh le bangma in na thu sim ngawl na uh taw nong zatak ngawl na uh kilangh hi.

⁸A mittaw, a nangh, a peangbai, ngannote taw sangaw biakpiakna nong nei uh ciang, tuabangte sia bangma phamaw sa ngawl, na hi uh ziam? Ngam



ukpa tungah tuabang ngannote pia ka sin vun. Note tungah ama lungkim in maipha hong pia tu ziam?”

⁹Tu in no thiampite awng, ko tungah Pathian hong dik natu in ngen sin vun. Ama in na thungetna hong zo ngawl tu a, tua in noma mawna hang hi tu hi.

¹⁰Vaanglianbelpa Topa in, “Ka biaknatau tungah a mannung ngawl meite na hal thei ngawl natu in note khat po in Biakinn kongkhate khak le ka oai hi. No tungah ka lungkim ngawl a; kei kung nong paipuina biakpiaknate kong saang buatu hi.

¹¹Leimong khat pan mong khat a om mihingte in kei hong upat uh hi. Mun theampo ah amate in ngim namtui hong hal a, tuaciang a saan thamman sangaw biakpiaknate hong pia hi. Amate theampo in kei hong upat uh hi.

¹²Ahizong note in keima biaknatau sia bangma manh nei ngawlin na son uh a, tua biaknatau tungah na piak uh ante thupi ngaisut ngawl na hi uh ciangin, keima hong zawngsak na hi uh hi.

¹³“Hite bangza in cimtaak huai ziam! ci in nong mukmen uh hi. Nong biakpiak natu in na nguk uh ngannote tua ahibuale a peangbai, a nanghnote nong paipui uh hi. Note tung pan tuabangte hong saang tu in hong um nu ziam?”

¹⁴A nganhon sung pan a limci khat keima tungah piak tu in hong kamciam napi, hong theam in a mannung ngawl nganno khat kei tungah sangaw biakpiakna in hong piapa in haamsiatna thuak taken! Banghangziam cile kei sia kumpi lian khat ka hi a, ngam theampo pan mihingte in kei hong kiita uh hi,” ci hi.

Malachi 2

¹Vaanglianbelpa Topa in thiampite tungah, “Hi thupiakna sia note atu hi:

²Na sep na vawtna taw keima nong upat vawt tu uh hi. Kong ci bangin nong ngai bua uh ahile no tungah haamsiatna kong tungsak tu hi. Na kivaak natu a, na saan uh vanhte tungah haamsiatna ka tung sak tu hi. A tatak in ci leang,



tuante tungah, haamsiatna tungsak zo khi hi, banghangziam cile kong thupiakte no in na thupi sim bua uh hi.

³Na tate daan ka pia tu a, na sangaw biakpiakna nganhingte ii eak sungah na mai kong taat tu hi— tuaciang note eak kholna munah hong kipaipui tu hi.

⁴Tuaciang hi thupiakte kong piak hunlam na he tu a, tuasia ciang Levi suan le paal thiampite taw ka kiciamna a peal nawn buatu hi.

⁵“Amate ii hong thasia natu in ka thuciamna sungah ka kamciam sa nuntakna le nopsaknate ka pia hi. Tua hunlai in amate in kei hong zakta a hong kiita hi.

⁶Amate in a maante hil a, a maan ngawlte hil ngawl hi. Amate in kei taw hi vadium in nungta uh a; amate in a maan teng bek seam ngawlin midang tam mamate siatna a vawt ngawl natu in hu uh hi.

⁷Pathian a maan a heak natu in hilna sia thiampite nasep ahi hi. Mihingte in amate kungah pai in ka deina sin tu uh hi, banghangziam cile amate sia Vaanglianbelpa Topa ii kamtaite ahi uh hi.

⁸“Ahihang tu in no thiampite in lampi maan panin na pial zo uh hi. Na hilnate in mihing tam mamate khialsak hi. Note taw ka vawt thuciamte na paltan uh hi.

⁹Note in ka deina nong ni bua uh a, ka mite na hil uh ciang zong, khat le khat doidan na hi uh kom, keima in note sia Israel mite in kong zawngsaksak tu hi.

Mihingte Pathian tungah A Thumaan ngawlna

¹⁰Eite theampo in a kibang pa nei kana ngawl hi ziam? A kibang Pathian in eite theampo hong bitphua kana ngawl ziam? Tua ahile eite khat le khat kilaklaw ih kamciamte paltan a, ih taangpupite taw Pathian ii a vawt thuciam sia zawngsak tu hi ziam?

¹¹Judah mite in Pathian tungah a kamciamte paltan a Jerusalem le ngamsung bup ah a thasiat huai mama nate vawt uh hi. Amate in Pathian ii a it Biakinn ninsak uh hi. Ngamdang pathian a bia numeite, pate in tenpui uh hi.



¹²A kuama po hi bangin a ngamtate sia Israel huam mi pawlte sung pan Topa in heam taken a, Vaanglianbelpa Topa tungah biakpiakna a paipui ei minamte sungah hong kihel kik nawn heak taken.

¹³Na ngamtatna dang khat sia hi bang hi. Ama tungah na biakpiaknate hong saang nawn ngawl ahikom kap a mau in, Topa biaknatau sia na thitui taw na khuumsak uh hi.

¹⁴Banghangin hong kisaang nawn ngawl ziam ci in na dongh uh hi. Tua thu banghangziam cile na khanmoi lai a na tenpui na zi tungah na kamciamte na paltan sia ama in a heak hu ahi hi. Na zi sia na koppui hi a, a thumaan pasal ka hi tu hi ci in na kiten uh lai in Pathian mai ah kamciam na hihang ama tungah na kamciamte na paltan zo hi.

¹⁵Pathian in ama le nang sia pumkhat thinkhat tu in hong vawt hi kana ngawl ziam? Hi thu sungah ama ii tupna sia bang ziam? Pathian ii mihing tatak a suak tu in tate na nei natu ahi hi. Tua ahikom kuama in a zi tungah kamciam a piakte paltan heak hen.

¹⁶“Nupa kikhenna sia ngaimaw khi hi,” Israel te Topa Pathian in ci hi. “Note khat po in a zi tungah tuabang khansiatna a vawt ciang ngaimaw khi hi. Na zi tungah thumaan tu a, na kamciam na paltan ngawl natu in kidawm in.”

Thukhenna Ni hong Nai hi

¹⁷Na kampauna uh taw Topa na toisak uh hi. Ahihang, “Ama bangbangin toisak khu ziam?” ci in na dongh uh hi. “Vaanglianbelpa Topa in ngamtat siate pha sa hi, tuabangte diksa takpi hi” ci nu hi. Tua ahibuale, “A thutang a ih heen Pathian sia koi sungah om hi tu ziam?” ci in na dongh uh hi.

Malachi 3

¹Vaanglianbelpa Topa in zokik a, “Ka lampi a sial khol tu in ka kamtaipa ka paisak tu hi. Tuasia ciang na zon uh Topa sia ama Biakinn sungah thakhat thu in hong pai tu hi. Mu tu in na ngalaak uh kamtaipa hong pai tu a, ka thuciamnate hong taangko tu hi.”



²Ahihang ama hong pai ni sia akua peuma in thuak zo tu hi ziam? Ama hong kilangh ciang akua nungta zo tu ziam? Ama sia puan a thiangsak satpia le thik a thiangsak thei meikuang taw kibang hi.

³Ngun tuisakin a thiangthosakpa khat bangin ama sia thukhen tu in hong pai tu hi. Thik seakpa in kham le ngun tuisakin a thianthosak bangin Topa kamtaipa in thiampite thiangtho sak tu a, tuabang a maan biakpiakna sia Topa kungah hong paipui tu hi.

⁴Nidang hun bangma in Judah le Jerusalem mite ii piakna sia Topa in saang thanuam kik tu hi.

⁵Vaanglianbelpa Topa in, “Note thukhen tu in note kungah kong pai tu a, bum le ai toaite, palngul mawna vawtte, leilot tetti pangte, a kicial naseamte ii thaman a neaktumsakte, meingong tanga le ngamdang mite tungah meet natu a zongte le kei hong zakta ngawlte theampo tungah mawsakin thu ka khen tu hi.”

Sawm a khat Piakna

⁶Keima in Topa ka hi a, ka kikheal bua hi. Tuaciang no, Jacob suan le paalte zongh na mong siat balai uh hi.

⁷Note maiah na taangpupite bangma in ka thukhamte pan na puapial uh a, na zui bua uh hi. Kei kungah hong heak kik tavun, tua hile kei zongh no sang kong nga tu hi. Ahizong “Nang sangah bangbangin hong heak kik tu khu ziam?” ci in nong dongh uh hi.

⁸Tua ahile thu khat hong dongh tong, mihing khat in Pathian a theam tu sia a kilawm tu ziam? Kilawm dek ngawl hi, hi napi no in kei nong theam uh hi. “Bangbang in maw?” ci nu hi. Sawm a khat le sumpi piakna sungah, hong theam nu hi.

⁹Note tungah haamsiatna khat hong tung hi, banghangziam cile minam buppi in kei nong theam uh hi.



¹⁰Biakinn sungah an tam mama a om thei natu in sawm a khat a cingin hong paipui tavun. Kei hong sin tavun, vantung khelkite ka hong tu a, na pha namcinte kicing takin kong buaksuk na mu tu uh hi.

¹¹Lungnote in na lo ante a lalsak buatu a, na sapit nguite sapit nga taw kidim tu hi.

¹²Tuaciang, na ngam uh sia ten natu in leitangh pha hong suak tu ahikom minam theampote in mi nuamsa te hong ci tu uh hi.

Hesuak natu Pathian Kamciam

¹³Topa in, “Kei taw kisai in a zaak thada huai na pau uh hi,” ci hi. “Ahizong note in, nang taw kisai bang teng pau na khu ziam? ci nu hi.

¹⁴Note in, “Pathian na ih sep a luithawthong hi. Ama hong sawl bang a ih sep hangin bang kimanna om a, ih ngamtatna sate hangin khuangaina lim Vaanglianbelpa Topa mai ah ih lak hangin bang phat tuamna om ziam?

¹⁵Ih mu bangin ci leang mihing kiphasak teng ma in nuamsa uh hi. Ngamtat siate sia ci thei bek ngawlin a ngamtat siatnate uh taw Pathian thin sauna ze et napi, bangma tat tuan ngawl hi,” na ci uh hi.

¹⁶Tuaciang Topa a kiita mihingte khat le khat kipaupui a, Topa in amate son teng ngai in za hi. Amate omna ah Topa a kiitate le a zaktate tepteena laibu khat ki at hi.

¹⁷“Amate sia ka minamte hi tu hi.” Vaanglianbelpa Topain ci hi. “Ka dian ni hong tun tak ciang amate sia keima neisa hi tu hi. Ama atu a sepsak tapa tungah pa in hesuakna a nei bangin amate tungah hesuakna ka nei tu hi.

¹⁸Kei atu hong sepsakte le hong sepsak ngawlte, thutangte le a ngilote tungah a piang thute a kilamdanna, ka mite in khatvei mu kik tu uh hi,” ci hi.

Malachi 4

Topa Ni Hong theng tu

¹Vaanglianbelpa Topa in, “A kiphasakte theampo le misiate theampo taangphaw bangin a kak tu ni hong theng tu hi. Tua ni in amate kaangtum tu a, amate taw kisai bangma a taang nawn buatu hi.



²Ahihang kei thu hong ni note tungah kong ngupna vaangletna sia ni bangin hong suak tu a, nizang bangin damna hong puak tu hi. Ngan khawk sung pan a kipusuaksak khuinote bangin nuam na sa tu uh hi.

³Ka dian ni ciang, a ngilote na zothal tu uh a, amate sia na peangnuai leivuite bangin na tuancil tu uh hi.

⁴“Israel mite theampo ii zui tu a, Sinai Mual Moses tungah ka piak thukham le thupiakte, le ka naseampa Moses ii hilnate ciamtee tavun.

⁵“Ahihang a lauhuai le a lian Topa hong pai tu ni hong thet maa in kamsangpa Elijah kong paisak tu hi.

⁶Ama in pate le tate hong ngawmtua kik tu hi, tua ahibuale keima hong pai in, na ngam kong sukcip kul tu hi.



Chin, Siyin - All Bible

Matthew

Matthew 1

Jesus Christ ii Taangpupite

(Luke 3:23-38)

¹Abraham ii suan, David ii tu le ta ahi, Jesus Christ ii taangpupite ii min tepteena lai sia hi bang hi a, Abraham pan David kumpipa dong, a taangpupite ii minte a nuai a bang ahi hi.

²Abraham ta Isaac, Isaac ta Jacob, Jacob ta Judah le a suapuute ahi hi.

³Judah in a zi Tamar taw Perez le Zerah hing a, Perez ta Hezron, Hezron ta Ram,

⁴Ram ta Amminadab, Amminadab ta Nahshon, Nahshon ta Salmon,

⁵Salmon ta Boaz hi. Boaz ii nu sia Rahab ahi hi. Boaz in a zi Ruth taw Obed hing a Obed ta Jesse hi.

⁶Jesse ta sia David Kumpipa ahi hi. David pan Babylon khua ah Israel mite salin a kimat hun dong, a nuai a bangin taangpupite khang kiciamtee hi. David in Uriah zi taw Solomon hing a,

⁷Solomon ta Rehoboam, Rehoboam ta Abijah, Abijah ta Asa,

⁸Asa ta Jehoshaphat, Jehoshaphat ta Jehoram, Jehoram ta Uzziah

⁹Uzziah ta Jotham, Jotham ta Ahaz, Ahaz ta Hezekiah,

¹⁰Hezekiah ta Manasseh, Manasseh ta Amon,

¹¹Amon ta Josiah, Josiah ta Jehoiachin le a suapuute ahi uh hi.

¹²Babylon ah salin a kiciapui pan kipan Jesus khang dong a nuai a bangin taangpupite khang kiciamtee hi. Jehoiachin ta Shealtiel, Shealtiel ta Zerubbabel,



¹³Zerubbabel ta Abiud, Abiud ta Eliakim, Eliakim ta Azor,

¹⁴Azor ta Zadok, Zadok ta Achim, Achim ta Eliud,

¹⁵Eliud ta Eleazar, Eleazar ta Matthan, Matthan ta Jacob,

¹⁶Jacob ta Joseph hi a, Christ kici Jesus Nu Mary pasal ahi hi.

¹⁷Tua ahikom Abraham khang panin David khang dong khang sawm le khang li hi a, David khang pan Babylon ah salin a ki paipui uh dong khang sawm le khang li, Babylon te mat hun pan Messiah sua dong khang sawm le khang li ahi hi.

Jesus Christ Suana

(Luke 2:1-7)

¹⁸Jesus Christ suana sia hi bang ahi hi. A nu Mary sia Joseph taw teang tu in a kidongh sa ahi hi. Ahihang a kiteen uh ma in, ama Thaa Thiangtho taw naungil om hi.

¹⁹Joseph sia thumaan a ngamta tawntung pa khat hi a, ahizong ngual mai ah Mary maimawlsak nuam ngawl ahikom amate nii bek vaihawm in kikhen sawm hi.

²⁰Tuabangin a ngaisut laitak in, Vantung lalang khat a mang sungah hong kilak a “David ii suan Joseph awng, Mary sia na zi tu in tenpui kiita heak in. Banghangziam cile ama Thaa Thiangtho in ngaisak hi.

²¹Ama in tapa khat hong hing tu a, a min Jesus ci in na phuak tu hi — banghangziam cile ama in a mite mawna pan a hun tu hi,” ci hi.

²²“Tu in hite theampo a pianna sia Topa kamsangpa sonkhol teng a khuangkhim natu ahi hi.

²³Ngaknu thiangtho khat naungil om tu a, tapa khat hing tu a, a min Immanuel kiphuak tu hi.” (Tua in “Eite taw Pathian om khawm hi”, a ci nopna hi.)

²⁴Joseph khanglo in vantung lalang sawl bangma in Mary tenpui hi.

²⁵Ahihang taciil nau a sua dong a zi ompui ngawl hi. Tuaciang Joseph in nau min Jesus ci in phuak hi.



Matthew 2

Nisuana sang pan Leangnate

¹Jesus sia Herod Kumpipa maan lai in, Judea ngam Bethlehem khua ah suak hi. Tua zawk hai ngawlin aksi huvau a kante in nisuana sang pan Jerusalem ah hong pai uh a,

²“Jewte Kumpipa tu in a piang nausen sia koisung a suak ziam,” ci in dongh hi. “Nisuana sang panin ama ii aksi hong suak ka mu uh a, ama bia tu in kong pai uh hi,” ci uh hi.

³Herod Kumpipa in hi thu a zaak ciang, Jerusalem a om midangte bangma in liinglawng hi.

⁴Ama in thiampi liante theampo le Thukham hil sya theampo kaikhawm in, “Messiah koi sungah suak tu ziam?” ci in dongh hi.

⁵“Judea ngam Bethlehem khua ah suak tu hi, banghangziam cile kamsang khat in hi bangin zo hi:

⁶‘Judah ngam Bethlehem khua awng Judah ngam khuapi thupite sungah, nang sia a nobel na hi bua hi, banghangziam cile nang sung panin, ka Israel mite lamlak tu lampuipa khat, hong piang tu hi.’ ”

⁷Tua ahikom Herod in nisuana sang pan hong pai leangnate sam ku a, aksi a kilang bang hun tatak ziam, ci in dongh hi.

⁸Tuaciang, hi bang sawlna taw Bethlehem ah paisak hi. “Pai tavun a, patangno sia phatak hong zong tavun. Na mu zawk uh ciang hong zasak kik tavun, kei zongh pai in ka bia tu hi,” ci hi.

⁹⁻¹⁰Tuaciang amate ding kik a, nisuana sang pan a mu sa uh aksi sia ma a pai kawmin mu uh hi. Amate in tua aksi a mu ciangin, a thinnopna le a lungdamna kison zo ngawl hi! Aksi sia amate mai ah pai a patangno omna tung san a thet ciang tawlna hi.

¹¹Amate inn sungah tum a patangno le a nu Mary a mu uh ciang khupdin in bia uh hi. Amate in a ken uh a letsongte khamh, thingnamtui le paaknamtuite sua in pia uh hi.



¹²Pathian in amate Herod kungah, a heak kik ngawl natu in, a mang sungah hilkhoh ahikom lampi dang khat tawn in, a ngamah cia kik uh hi.

Egypt ah Taipui

¹³Amate a pai zawkciang, Topa vantung lalang khat Joseph mang sungah kilang a, “Herod in patangno sia that tu in zong tu hi. Tua ahikom patangno le a nu Egypt ngamah taipui tan, cia kik a kong sawl dong, tua munah om tavun,” ci hi.

¹⁴Joseph tho a patangno le a nu Egypt ngamah zan lai in, taipui hi.

¹⁵Tua munah Herod thi dong taam uh hi. “Egypt ngam pan ka Tapa ka sam hi,” ci thu kamsangpa ii sonkholnate a tangtunna ahi hi.

Patangnote A Kithalupna

¹⁶Nisuana sang pan hong pai mihing pilte in theam ahi hunlam Herod in a phaw ciangin a thin uuk mama hi. Bethlehem khua sung le a kiim a paam a om, kum nii le a nuaisia patangno theampo thalup tu in thupia hi. Mipilte ii aksi a mu hun taw tuatin tuabangin ngamta hi.

¹⁷Kamsangpa Jeremiah ii a sonkholna teng hi bangin tangtung a:

¹⁸“Ramah ngamah nasia tak kaana awnging khat kiza hi. Rachel sia a tate a thi siat hu in kiheeneam zo ngawlin kap hi.”

Egypt ngam pan Heakkikna

¹⁹Herod thi zawkciang Egypt ngam a om Joseph mang sungah Topa vantung lalang khat kilangh a,

²⁰“Tho in nauno le a nu, Israel ngam ah ciapui kik tan. Banghangziam cile patang a that nuam sia thi zo hi,” ci hi.

²¹Tua ahikom Joseph tho a, nauno le a nu taw Israel ngam ah cia kik uh hi.

²²Ahihang Judea ngamah Herod za a laihto sia Archelaus hi, ci in Joseph in a zaak ciang tua ngam a pai tu lau hi. A mang sungah a ngamtat natu kihil thua ahikom Galilee ngamah pai in Nazareth khua ah teang hi.

²³Kamsangte sonkhol bangin, “Ama sia Nazareth mi kici tu hi,” a cina thu tangtung hi.



Matthew 3

Tuiphumpa John Thuhilna

(Mark 1.1-8; Luke 3.1-18; John 1.19-28)

- ¹Tua hun laitakin Tuiphumpa John sia Judea senneal ngamah hong pai a, thuhil kipan hi.
- ²“Na mawna uh pan kisiik kik vun, banghangziam cile Vantungngam hong nai zo hi!” ci hi.
- ³Kamsangpa Isaiah kammal sia John huvau a sonkholna hi a, “Senneal ngam sungah mihing khat hong tangko a, “Topa atu in lampi pua khol vun; Ama khualhaw natu in lamzin tang khat vawtsak vun!” ” ci hi.
- ⁴John ii puansilh sia kalaoh mul taw kitak a, ama in savun kawngkhau thua in, ama an sia khaumaw le ngam khuaitui ahi hi.
- ⁵Mihingte in Jerusalem pan, Judea ngamkhen bup le Jordan ngunhui ngam theampo panin hong pai uh hi.
- ⁶Amate in a mawna uh pualaak a, tuaciangin Jordan ngun sungah ama in tuiphum hi.
- ⁷Pharisee te le Sadducee te tam ma ama kungah tui kiphum tu in, hong pai a mu ciangin, amate tungah, “No ngul ngilote awng — Pathian ii daan hong piak natu panin suakta tu nu hi ci in akua in hong son ziam?”
- ⁸Mawna pan kisiina lim kilanghsak vun.
- ⁹Na taangpupi Abraham suan le paalte na hi uh hu in, daan thuak natu pan suakta tu in, kimuangmaw heak vun. No tungah hong ci khi hi, Pathian in hi suangte zongh la in Abraham suan le paalte suaksak thei hi!
- ¹⁰Thingkungte phuk tu in a bul ah, heimai kingat zo hi, ngapha a nga ngawl thingkung theampo kiphuk tu a, meimang sungah kisp tu hi.
- ¹¹Na kisiina uh a kitel natu in tui kong phum hi, ahihang kei nung pan hong pai lai tu pa in no sia Thaa Thiangtho le meikuang taw hong baptize tu hi. Kei sangin ama lian zaw pek a, a peangdap toai tu zonghin ka kilawm bua hi.



¹²Ama in taangkheaplau a khut sungah toai zo hi. Zungtaangte hong kheap tu a taangtang teng taangsal sungah khawmtua in, taangsi taangvai teng a mit ngei ngawl meikuang sungah hal tu hi,” ci hi.

Jesus tui a kiphumna
(Mark 1.9-11, Luke 3.21-22)

¹³Tua hun laitakin Galilee pan Jesus hong theng a, John ii tuiphum tu in, Jordan ngun John kungah hong pai hi.

¹⁴Ahihang John in ama tho tu in kithoai a, “Kei sia nangma ii nong tuiphum tu hizaw napi, kei kungah nang hong paizaw ni ziam?” ci hi.

¹⁵Ahihang Jesus in zokik a “Pathian deina theampo a kicin natu in, tu in hong seam tan,” ci hi. Tuaciang John zongh thukim hi.

¹⁶Jesus tui a kiphum zawk po ciang tui sung pan hong pusuak to hi. Tuaciang ama atu van kihong a, Pathian ii Thaa ngam vakhu bangin hong tuaksuk in, ama tungah hong tu a mu hi.

¹⁷Tuaciang van panin aw khat in, “Hisia in ka it ka Tapa hi a, ama tungah ka lungkim hi,” ci hi.

Matthew 4

Jesus ii Ze-et Thuakna
(Mark 1.12-13; Luke 4.1-13)

¹Tua zawkciang Thaa in Jesus sia Doaimangpa ii ze et tu in ngam sungah paipui hi.

²Sun sawmli le zan sawmli an ne ngawlin a om zawkciang Jesus ngilkial hi.

³Tuasia ciang Doaimangpa hong pai a, “Pathian Tapa na hi le suang hite anluum suaksak in,” ci hi.

⁴Ahihang Jesus in zo a, “Laithiangtho in, ‘Mihingte sia anluum bek taw nungta thei hi ngawl a, Pathian kam sung pan a pusuak kammal khat sim nuntak pui hi,’ ” ci hi.

⁵Tua zawkciang Doaimangpa in Jesus sia Khuapi Thiangtho Jerusalem ah paipui a, Biakinn khuvum a saangbel na ah suanto hi.

⁶“Pathian Tapa na hile nangma le nangma kitaaksuksak in, banghangziam cile Laithiangtho in ci hi, ‘Pathian in a vantung lalangte nang huvau in sawl tu a, na peang beak zongh suang taw a ki sutha ngawl natu in, a khut taw hong domto tu hi.’ ”

⁷Jesus in zokik a, “Ahihang Laithiangtho in, ‘Na Topa Pathian na ze et heak vun,’ zongh ci si hi,” ci hi.

⁸Tuaciang Doaimangpa in mualsaang mama khat ii tungah paipui a, leitung ngam tuatuamte ii letna theampo lak hi.

⁹“Khupdin in kei hong bia lete, hi teng theampo nang kong pia tu hi,” ci hi.

¹⁰Tuasia ciang Jesus in, “Satan awng, tai in! Laithiangtho in, ‘Na Topa Pathian bek bia vun a, Ama tu bek sepsak vun!’ ci hi,” a ci hi.

¹¹Tuasia ciang, Doaimangpa in Jesus nusia a, vantung mite hong pai in Jesus ou uh hi.

Jesus Galilee ah Nasep Kipan

(Mark 1.14-15; Luke 4.14-15)

¹²Jesus in John thong sungah kikhum hi, ci in a zaak ciang, ama Galilee ah pai hi.

¹³Ama Nazareth khua ah taam ngawlin, Zebulun le Naphtali ngamsung Galilee tuili hui khuapi Capernaum ah teang tu in pai hi.

¹⁴Hi bang a ngamtat sia, kamsangpa Isaiah pauna teng a tangtun natu ahi hi.

¹⁵“Zebulun ngam le Naphtali ngam, Tuipi sung zotna lampi tung, Jordan ngun lang khat, Galilee, Gentilete ngam!

¹⁶Khuazing sung a teang mihingte in, Khuavaktaang lian mama khat mu tu hi. Thina khuazing ngamsung a teangte tungah khuavak a taang tu hi.”

¹⁷Tua hun pan kipan Jesus in, “Na mawna uh pan kisiik kik vun, banghangziam cile Vantungngam hong nai zo hi,” ci in ama thuhilnate hil tu in a kipan hi.

Jesus in Ngasa mante Li Sam

(Mark 1.16-20; Luke 5.1-11)



¹⁸Galilee tuili hui ah a va laitakin, Jesus in ngasa mante ahi unau nii Simon (Peter kici) le a suapuipa Andrew, tuili sungah ngeen khat taw ngasa manin a om mu hi.

¹⁹Jesus in amate tungah, “Hong zui tavun, mihing mante kong suaksak tu hi,” ci hi.

²⁰Thakhat in a ngeente nusia in ama zui paih uh hi.

²¹Tua mun pan a paisuak uh ciang Zebedee tapate unau James le John mu hi. Amate in a pa taw ngunkuang sungah a ngeen te puua in om uh hi. Jesus in amate sam hi.

²²Thakhat in a ngunkuang le a pa nusia in zui uh hi.

Jesus in Hilna, Thuhilna le Damsakna seam

(Luke 6.17-19)

²³Jesus Galilee ngambup ah vakin, synagogue te ah hilna nei a, Kumpingam Lungdamna Thu thuhilna nei in, natna satna namcin le ciluang natna a neite damsak hi.

²⁴Ama thu sia Syria ngambup ah kizel ahikom mihingte in, cina theampo, natna satna le mealhem theampo: doai veite, butthi theite, langngawte, ama kungah paipui in — Jesus in damsak siat hi.

²⁵Galilee ngam khuapi sawmte le Jerusalem, Judea le Jordan ngunngal panin, mihonte in zui uh hi.

Matthew 5

Mualtung Thuhilna

¹Jesus in mihonpite a mu ciangin mual tungah kaato hi. A nungzuite a kiim ah kikhawm a,

²tuaciang ama in amate hil tu in kipan hi.

Lungdamna Tatak

(Luke 6.20-23)

³“Thaa thu ah a zawngkhal hunlam a kihete in, mihing lungdamte ahi hi; Vantungngam sia amate aa ahi hi!



4“A thuum a taute in mihing lungdamte ahi uh hi! Pathian in amate heeneam tu hi.

5“A kiniamkhiakte in mihing lungdamte ahi uh hi; amate in Pathian kamciamte a saang tu uh hi!

6“Ngilkial dangtaak bang a thumaan thutang a deite in mihing lungdamte ahi uh hi; Pathian in a kicing lungkimna pia tu hi!

7“Ngual hesuak theite in mihing lungdamte ahi uh hi; Pathian in amate hesuak tu hi!

8“Thinsung thiangthote in mihing lungdamte ahi uh hi; amate in Pathian mu tu uh hi!

9“Kilemna a vawtte in mihing lungdamte ahi uh hi; Pathian in ka tate ci tu hi!

10“Pathian deina bang ngamtatna hangin vawtsiat a thuakte in, mihing lungdamte ahi uh hi; Vantungngam in amate aa hi tu hi!

11“Kei nungzui na hi uh hu in ngual in hong zawngsak hong vawtsia in, ngitlo leilot thu a nanam taw mawna hong zong le mihing lungdamte na hi uh hi.

12Na thin nuamsak vun, lungdam vun, banghangziam cile vantung ah na thaman saan tu hong kikoisak sia lian mama hi. Taanglai kamsangte zongh tuabang ma in, na kivawtsia hi.

Ci al le Khuavak

(Mark 9.50; Luke 14.34-35)

13“Mihingte atu in no ci taw na kibang uh hi. Ahihang ci sia aalna a thai le ki alsak kik thei nawn ngawl hi. Tua in kimanna nei nawn ngawl a, kivawk in, mihingte in tuancil tu hi.

14“No sia leitung bup atu in khuavak taw na kibang uh hi. Mualtung ah a kisa khuapi sia a kiseal thei bua hi.

15Mei a det ciang, kuama in kuang taw sincip ngei ngawl hi. Innsung a om theampo a taan natu mun meivakna tungah kikoizaw hi.

16Tuasia bangma in, napha na sep uhte mihingte in a mu ciang, vantung a om na Pa uh a pok natu in, amate mai ah na khuavak uh taangsak vun.



Thukham taw kisai Hilna

¹⁷“Moses thukham le kamsangte hilnate bosak tu in hong pai hong sa heak vun. A bosak tu hong pai hi ngawlin, a khuangkimsak tu in hong pai ka hizaw hi.

¹⁸Na theampo ii tawp natu a khuangkhir dong mateng, simlei le vanpi a kip laiteng, thukham sung a thu nobel khat zongh a bo thong buatu hi.

¹⁹Tua ahikom, a kuama po thukham sung pan a nobel khat ni ngawlin midang zongh tuabangin a nit ngawl natu a hil sia in Vantungngam sungah a nobel hi tu hi. Tuaciangin a kuama po ahizong thukham ni a, midangte zongh tuabangin a nit natu a hil sia Vantungngam sungah lian tu hi.

²⁰A tatak in kong ciciang, Pathian deina bang na vawtna sungah Thukham hil Syate le Pharisee te sangin na thumaan zaw uhle Vantungngam sungah na tum thei tu uh hi.

Thin uukna huvau Hilna

²¹“Mihing na that uhle thusitna na thuk tu hi. ‘Mihing na that heak vun,’ ci in taanghlaite kihilna sia na he uh hi.

²²Ahihang tu in kong ci in ah: a suapuipa tungah a thin uuk pawpo te in thusitna thuk tu hi, akua po ahizong a suapuipa ngina ngawl hi, a ci peuma, Councilte mai ah kipaipui tu a, a kuama po a suapuipa mannung ngawl mihing mawmaw, a ci peuma hell meikuang sungah a pai tu lauhuai hi.

²³Tua ahikom biaknatau tungah biakpiakna nei tu in, na kithoai laitakin, na suapuipa in, nang tungah lungkim ngawlnei hi, ci in na phawk le,

²⁴na piak tu vanh sia biaknatau mai ah nusia phot zii tan a, na suapuipa taw kilemna vawt phot tan, tua zawkciang hong pai kik tan a, Pathian tungah biakpiakna nei pheang in.

²⁵“Khatpo in thu hong vawt a, zumkong hong then le a hun omlai, zum na thet ma in, na kituu uh thu sia saatmit masa tavun. Tua ahibuale ama in thukhenmangte tungah hong then tu a, tuate in palikte munah hong aap in, thonginn sungah hong khum tu hi.



²⁶A maan tatak kong ci ciangin, tua na liau sum teng a cingin na piak siat mateng thonginn sung pan na suakta thei buatu hi.

Kipalngulna huvau Hilna

²⁷“ ‘Nupa kipalngul heak vun’ ci thu na za zo uh hi.

²⁸Tu in hi bangin kong ci hi: khat po in numei khat khialpui nopna thin taw a en le a thin sungah nupa palngul khialna vawt hi zo hi.

²⁹Tua ahikom na mit ziatsang in hong mawsak le khelkeak in vawk in! hell sungah na pumpi bup in na pai sangin, pumpi cing ngawlin, om lete phazaw hi.

³⁰Na khut ziat sangin hong khialsak le, saattan in vawk in. Na pumpi cingin hell sungah na pai sangin, khutsamh peangsamh in om lete phazaw pek hi.

Kikhulna huvau Hilna

(Matthew 19.9; Mark 10.11-12; Luke 16.18)

³¹“ ‘A zi a khul mihing khat pawpo in kikhulna lai pia taken,’ kici sii hi.

³²Ahihang tu in kong ci in ah: nupa vang kitan ngawlina sim ngawl thudang taw pasal khat in a zi khul a, tua nu in pasal dang khat a nei kik le, nupa palngul mawna a vawtsak suak hi. A pasal kik sia zongh in, nupa palngul mawna vawt ahi hi.

Kiciamna huvau Hilna

³³“ ‘Na kamciam vawtte ciampeal heak vun. Topa tungah vawt tu a na kamciamnate uh na vawt vun,’ ci in khangluite tungah a kipia thute na heak sa uh hi.

³⁴Ahihang tu in kong cina panin: kamciam na kipiak uh ciangin kiciamna zangh heak vun. Vantung min lo in na kiciam heak vun, banghangziam cile tua in Pathian tokhum ahi hi;

³⁵leitung taw zong kiciam heak vun, banghangziam cile tua in a peang ngakna ahi hi; Jerusalem min lo in zongh kiciam heak vun, banghangziam cile tua in Kumpi lianpa khuapi ahi hi.



³⁶Na lutang taw zonghin na kiciam heak in, banghangziam cile na samzam khat a kaang tu le a vom tu in na vawt thei bua hi.

³⁷A hite ‘Hi’ ma ci vun, ahi ngawlte ‘Hi ngawl’ ma ci vun — tua tungsia pauna sia Ngilopa kung pan hong pai ahi hi.

Thuk kikna huvau Hilna

(Luke 6.29-30)

³⁸“ ‘Mittang khat luang mittang khat, hatang khat luang hatang khat, ci thu na zaak sa uh hi.

³⁹Ahihang kei kong cina pan: no tungah hong khialte na thuk kik heak vun; khat po in na biangkho ziatsang hong beang le na biangkho veisang zongh na ngat vun.

⁴⁰Tuaciang khat po in na laktong khat dei in zum ah thu hong vawt le na laktong puasilh zongh na piathua lai vun.

⁴¹Tua mun a ngak ngalkapte in, tai khat vanh pua in hong sawl le, tai nii puaksak vun.

⁴²Khat po in na khat hong ngen le pia vun; khat po in na khat hong zawng nuam le zawn vun.

Ngalte It natu

(Luke 6.27-28, 32-36)

⁴³“ ‘Na lawmte it vun a, na ngalte ensan vun,” ci thu na zaak sa uh hi.

⁴⁴Ahihang kei kong cina pan: na ngalte it vun a hong siatvawtte atu thungetsak vun.

⁴⁵Vantung a na Pa tate na sua thei natu in, tuabangin ngamta vun. Banghangziam cile ama in mihing phate tung le mihing siate tungah a kibangin ni taangsak a, na pha seamte le a sia seamte tungah zongh ngua zusak hi.

⁴⁶“No hong itte bek na it uh le, Pathian in banghangin thaman hong pia tu ziam? Shiadongte ngangawn zongh, tuabangin ngamta kana ngawl ziam?”



⁴⁷Tuaciangin na lawmte bek na paupui uh le, ngualdang taw bang na kilamdanna uh om ziam? Doai biate zongh in tuabangin ngamta kana ngawl ziam?

⁴⁸Vantung a na Pa uh cialcing ahi bangma in, no zongh na cialcing uh kul hi,” ci hi.

Matthew 6

Cimaw Huna huvau Hilna

¹“Biakpiakna na vawt uh ciangin, ngual ii hong mu tu in, ngual sungah vawt heak vun. Tuabangin ngual sungah na vawt uhle, vantung a na Pa kung pan, thaman khat zongh na nga buatu hi.

²“Mihing cimaw khat huna na nei uh ciangin, mihing a kihi theamsakte in lampi liante tung le biakna innte ah a vawt uh bangin, pokngaina taw vawt heak vun. Amate ahile, mihingte pok tu thangai in tuabangin ngamta hi. A tatakin ka ci ciang, amate in, a thaman uh a cing takin kipia zo hi.

³Ahihang a cimaw khat na hu uh ciangin, na lawm pha bel khat zongh in hesak heak vun.

⁴Tuasia ciangin kuama in hong heakpui ngawl tu hi. Tuaciang a kilangh ngawl a, na nasep hong mu, na Pa in thaman hong pia tu hi.

Thunget huvau Hilna

(Luke 11.2-4)

⁵“Thu na nget uh ciangin a kihisak mihingte bangin ngen heak vun! Amate lamkaa khawng le biakna innte ah ngual mu tu in ding a thungen thanuam uh hi. A tatakin ka ci ciang, amate a thaman uh a cing takin kipia zo ahi hi.

⁶Ahihang no thu na nget uh ciangin, inndoi sungah tumin, inn na kha zawk uh ciang, a kimu thei ngawl, na Pa tungah thungen tavun. Tua hile a kilangh ngawl a na ngamtatna uh hong mu na Pa in thaman hong pia tu hi.

⁷“Thu na nget uh ciangin, doai biate bangin, khiakna nei ngawl kammalte zangh heak vun, amate in thunget sau thethei a zak uh ciangin, Pathian in za tuan tu in um uh hi.



⁸Amate bang hi heak vun. Na nget uh maa in na Pa uh in, na kitaangsap uh teng hong he siat zo hi.

⁹Tua ahiciang hi bangin thu ngen vun: Vantung a om kote Pa awng: Na min thiangtho ki upat taken;

¹⁰na Kumpingam hong piang taken; Vantung ah na deina a kicin bangin Leitung ah kicing taken.

¹¹Tu ni in ka khamkhop tu an hong pia ta in.

¹²Ko tungah hong khialte ka maisak uh bangma, Kote khialna zongh hong maisak ta in.

¹³Ze-etna haksa hong thuaksak heak in a, Ngilopa kung pan hong tan ta in. Uk zawkna, vaangletna le minthanna Nang aa hi tawntung taken, Amen.

¹⁴“Ngual ii note tung a hong khialnate na maisak uh le, vantung a na Pa zongh in, note khialna hong maisak tu hi.

¹⁵Ahihang ngual khialna na maisak bua uh le na Pa zongh in note khialna hong maisak ngawl tu hi.

Antan huvau Hilna

¹⁶“Tuaciang, an na tan uh ciang, a kihisak theamte bangin maikhing in om heak vun. Amate sia a antan hunlam uh ngual heak tu in kipua ngawl lui in om hi. A tatak in ka ci ciang, amate in a thaman uh a cing takin a kipia sa ahi hi.

¹⁷An na tan uh ciang, na mai uh phiatin na sam uh pot vun,

¹⁸tua hi le na antan uh hunlam ngualdang in hong he tuan ngawlin, a kimu ngawl na Pa bek in hong he tu hi. Tuaciang, nangma bek heak a na ngamtat sia na Pa in, hong mu tu a, thaman hong pia tu hi.

Vantung Hauna

(Luke 12.33-34)

¹⁹“Na nei na lam uhte, nget ii neak tu, a eakseau tu le ngutate in phuul a, a nguk theina, Leitung ah noma atu in khol heak vun.



²⁰Tua hi zaw ngawlin, na nei na lamh uhte, nget neak thei ngawl, eakseau theingawl ngutate in phuul a, a nguk thei ngawl na, vantung ah na khol vun.

²¹Banghangziam cile na neisate omna munah na thin na lung uh om tu hi.

Pumpi Khuavak

(Luke 11.34-36)

²²“Mittangte sia pumpi atu in meivak ahi hi. Na mittangte a cidam le na pumpi khuavak taw kidim tu hi. Ahihang na mittangte a pha buale na pumpi khuazing sungah om tu hi.

²³Tua ahikom na sungah om khuavak sia khuazing hi thong le bangza in zingcip tu ziam?

Pathian le Neisate

(Luke 16.13; 12.22-31)

²⁴“Kuama in to nii ii sal hi thei ngawl hi. Ama in khat ensan tu a, khat it tu hi; khat ii tungah thumaan tu a khat puavawk tu hi. Pathian le sum ii sal na seam khawm thei buatu hi.

²⁵“Na nuntak thei natu in, an le tuite ahizong, na pumpi atu in puante ahizong, tuate huvau thintoi heak vun, kong ci sia hisia hang ahi hi. Nuntakna sia an sangin manpha zaw kana ngawl ziam? Pumpi sia puan sangin manpha zaw kana ngawl ziam?

²⁶A leang kawkoai vacimte en vun: amate in thai tu ngawl, an la ngawl a, saal sungah an khol ngawl hi; ahihang vantung ah na Pa in, amate vaak hi! Note sia vacimte sangin manpha mama zaw ngawl kana nu ziam?

²⁷Note sung pan thin ngimna taw na khan uh bekno khat beak sauzawsak thei natu nu ziam?

²⁸“Tuaciang puansilh tu banghangin thintoi nu ziam? Duisung paakte en tavun, bangbangin khang ziam: amate in na le seam ngawl a, puansilh nikten le vawt ngawl hi.

²⁹Ahihang a maan tatakin kong ci ciangin, Solomon Kumpipa in, a hau mama hang, hi paakte za in a hoi puan nei ngawl hi.



³⁰Tuni in po a, zing ciang a bo tu meikhuk sung a kihal tu lopa — hi lopa a zeam sia Pathian hi. Ama ii no hong zep zawk tu muang ngawl nu ziam? Na nei uh upna sia bangza in no ziam!

³¹“Tua ahikom, ‘bang ka ne tu a, bang ka dawn tu? bang puan ka silh tu ziam?’ ci in thin ngim heak vun.

³²(Hite sia doai biate ii thinbot thei bul thute ahi hi.) Vantung a om na Pa in, hite theampo na kitaangsap uh hong he nginge hi.

³³Tua sangin Pathian Ukna-ngam le ama in nang tung pan bang dei ziam, ci sia zong masa vun, tua hile ama in nadang theampo zongh hong sik tu hi.

³⁴Tua ahikom zing ciang atu in, thin ngim heak vun; zingciang in ama khom tu ma thinngimna nei tu hi. Nisim hong piang thinngimnate belap kul ngawl hi.

Matthew 7

Ngual tung Thukhenna

(Luke 6.37-38,41-42)

¹“Pathian ii note tungah thu hong khen ngawl natu in, ngual tungah thu na khen heak vun,

²banghangziam cile ngual tungah thu na khen uh babangin note tungah Pathian in thu hong khen tu hi. Ngual tungah na zak uh na ngeina let uh teng ma no tungah hong kizangh tu hi.

³Tua ahile banghangin na suapuipa mittang sung ninteak sia mu thei in, noma mittang sung a thingluang sia phawk thei ngawl nu ziam?

⁴Noma mittang sunga, thingluang khat om nginge sia, awlmawk ngawlin na suapuipa munah, ‘Na mittang sungah ninteak sia laaksak tong,’ banghangin ci ngam nu ziam?

⁵No a kihisak minamte awng! Noma mittang sungah thingluang sia la keak phot vun, tua hile na suapuipa mittang sung ninteak sia na laak thei natu in, thiang takin na mu thei tu uh hi.



⁶“A thiangtho nate uite na pia heak vun — amate in noma hong pet kik zaw tu hi. Vokte mai ah na suang manphate na na lot heak vun — amate in a peang nuai a siikcip lel tu hi.

Ngen, Zong, Kingh

(Luke 11.9-13)

⁷“Ngen vun na nga tu uh hi; zong vun na mu tu uh hi; kingh vun, kongkha hong kihon tu hi.

⁸Banghangziam cile a ngen pawpo in nga a, a zong khat pawpo in mu a, a kingh sia kongkha kihon hi.

⁹Pa ahi note khat pawpo, na tate in anluum hong nget uh ciang, suangtum na pia tu uh ziam?

¹⁰Tua ahibuale ngasa hong nget ciang, ngul na pia tu uh ziam?

¹¹Na phat ngawl uh kawm panin na tate atu napha piak tu na he uh hi. Tua ahile, vantung ah na Pa in a ngente tungah na phate bangza in hong pia zaw kan tu ziam?

¹²“Noma tungah hong kivawt le na oai uh bangin, ngual tungah na vawt vun; tuasia in Moses Thukham le kamsangte hilnate ii a khiakna ahi hi.

Kongbiang Ciak Thu

(Luke 13.24)

¹³“Kongbiang ciak sungah na tum vun, banghangziam cile hell ngam kongbiang sia zai a, tua mun paina lampi sia tot ol hi, tua lampi a tawn mihing tam mama om hi.

¹⁴Ahihang nuntakna sung tum natu kongbiang sia ciak a, tua mun pai natu lampi sia tot hak hi, tuaciang tua lampi a mu mihing tawm hi.

Thingkung le A nga

(Luke 6.43-44)

¹⁵“Leilot kamsangte na up ngawl natu kidawm vun; amate a puatham ah tuu bangin hong pai tu a, a sungsang uh sia ngia hangsan bang hi tu hi.

¹⁶A ngamtatna uh panin amate na tel tu uh hi. Lingsawl te in, sapit nga ngei ngawl a, lingkungte in theipum nga ngei ngawl hi.



¹⁷Thingkung cidamte in a nga pha nga a, ahihang thingkung ngina ngawlte sia a nga pha nga ngawl uh hi.

¹⁸Thingkung cidamte in, a nga pha ngawl nga thei ngawl a, thingkung ngina ngawlte in a nga pha nga thei ngawl hi.

¹⁹Thingkung khat pawpo a nga a pha buale kiphuk in meisung ah kisp hi.

²⁰Tua ahiciang leitot kamsangte amate nasepna tung pan na tel thei tu uh hi.

No Hong He ngei Bong

(Luke 13.25-27)

²¹“ ‘Topa, Topa’ hong ci theampo Vantungngam sungah a tum siat buatu hi, vantung ah ka Pa deina bang a ngamtate bek tum tu hi.

²²Thukhenna Ni hong thet ciang, mihing tam mama te in, ‘Topa, Topa! Na min taw Pathian thuhil in, na min taw doate tam mama notkeak in, nalandang tam mama vawt hi ngawl khu ziam?’ ci tu uh hi.

²³Tuasiasia ciang, ‘Note hong he ngei bong, Ka kung pan taikeak vun, no misiate awng!’ ka ci tu hi.

Innsa Niite

(Luke 6.47-49)

²⁴“Tua ahikom, kei kammal hite za a, a zaak uh bang a zuite sia suangpi tungah inn sa mihing ciimpa taw kibang hi.

²⁵Nguazu in khuanawl hong sua ciang, tua inn vui in nawmngawp hi. Ahihang tua inn suangpi tungah kisa ahikom a puk bua hi.

²⁶“Ahihang kei kammal hite za napi in, a zui ngawlte sia sen tungah inn sa mihing mawmaw pa taw kibang hi.

²⁷Ngua zu in, khuanawl suak a, vui in a nawmngawp ciang, tua inn cimhtham hi. Tua in a lauhuai puna ahi hi!”

Jesus Thuneina

²⁸Jesus in hi thusontena a nei zawkciang, mi honpi in ama hilzia lamdang sa uh hi.

²⁹Ama Thukham hil syate taw a kibang bua hi; ama in thuneina taw hil hi.



Matthew 8

Jesus in Pasal khat Damsak

(Mark 1.40-45 Luke 5.12-16)

- ¹Jesus mualtung pan hong tuaksuk ciang mihonpite in zui uh hi.
- ²Tuasia ciangin miphaak khat hong pai a, Jesus mai ah khupdin in “Topa hong damsak nuam po lete hong damsak thei tu ni hi,” ci hi.
- ³Jesus in a khut zaam a, ama thamin, “Hong damsak nuam khi hi, dam tan,” ci hi. Thakhat thu in, pasalpa a natna pan dam hi.
- ⁴Tua zawkciang Jesus in, “Ngai in, kuama munah son heak in a, thiampipa kungah pai vingveng in, na pumpi vealsak tan; na damthiangna thu ngual theampo hong heak natu in, Moses thupiak bangin sangaw biakpiakna vawt tan,” ci hi.

Jesus in Rome Ngalkap hon ukpa ii Naseampa Damsak

(Luke 7.1-10)

- ⁵Jesus Capernaum khua sungah a tum lai takin, Rome ngalkapmaang khat taw kisi a, tua pa in Jesus munah hu ngen hi.
- ⁶“Topa awng, ka naseampa sia inn ah cina in lum a, tung thei ngawlin ngim mama hi,” ci hi.
- ⁷“Na inn ah hong pai in, damsak tu khi hi,” Jesus in ci hi.
- ⁸Ahihang ngalkap hon ukpa in, “Topa awng, ka inn sungah nang nong pai tu sia ka kiphu bua hi. A dam natu thu hong piaksak po lete ka naseampa dam tu hi,” ci hi.
- ⁹“Keima mama zongh uliante khutnuai ah om a, keima khutnuai a ngalkapte om hi. Khat tungah, ‘Pai in’ ci leng pai a, ‘hong pai tan’ ci leng hong pai hi. Ka salpa munah hi sia seam in ci leng seam hi,” ci hi.
- ¹⁰Jesus in hi thu a zaak ciangin, lamdang sa in, a nungzuite munah, “A tatak in ka ci ciang Israel ngam sungah hi bang upna mu ngei ngawl khi hi,” ci hi.
- ¹¹“A maan tatak ka ci ciang, nisuana le nitumna panin, mihing tam mama hong pai tu a, Vantungngam sungah Abraham, Isaac le Jacob taw anneak poai sungah hong tokhawm tu hi.



¹²Ahihang tua Kumpingam sungah om tu a kilawmte, khuazing sungah kivawk tu a, tua munah kapin ha ngoai in om tu hi.”

¹³Tua zawkciang, Jesus in ngalkap hon ukpa munah, “Va cia tan, na upna bangin hong kivawt sak tu hi,” ci hi. Tuaciang ngalkap hon ukpa naseampa tua hun laitak ma in dam hi.

Jesus in Mihing Tam mama Damsak

(Mark 1.29-34; Luke 4.38-41)

¹⁴Jesus in Peter inn ah pai a, tua munah Peter sunghnu a ci suukin lupna tungah om mu hi.

¹⁵Jesus in Peter sunghnu khut thamsak hi; a cisa natna dam a, tho in Jesus zindo hi.

¹⁶Nitak ciang mihingte in Jesus kungah doaivei tam mama hong paipui uh hi. Jesus in thaa ngilote kammal khat taw notkeak a, tuaciang cina theampo damsak hi.

¹⁷“Ama mama in ih natna satnate hong puaksak a, ih ciluang natna hong laakkeaksak hi,” ci in Isaiah kamsangpa ci teng a tangtun natu in seam ahi hi.

Jesus Nungzui Tute

(Luke 9.57-62)

¹⁸Jesus in a kiim a mihonpite a mu ciang, a nungzuite munah tuili ngalkhat ah a pai natu in sawl hi.

¹⁹Thukhamhil Sya khat in, “Sya awng, na paina po ah paikhawm tu in, ka kinging hi,” ci hi.

²⁰Jesus in, “Ngiate in kua nei a, vacimte in bu nei uh hi. Ahihang Mihing Tapa in lup natu le, tawlngak natu a nei bua hi,” ci in zokik hi.

²¹A nungzui ngei dang khat in, “Topa awng, hong ciasak tan a, ka pa na vui phot tong,” ci hi.

²²Jesus in, “Hong zui tan, mithi le mithi kivui taken,” ci hi.

Jesus in Vuipi suangval Thimsak

(Mark 4.35-41, Luke 8.22-25)

²³Jesus ngunkuang tung to a, a nungzuite zongh in ama zui uh hi.



²⁴Thakhat thu in a kiitak huai vuipi suangval khat tuili tungah hong va a, ngunkuang sia tui ii a khup tu lauhuai hi. Ahihang Jesus mutthip hi.

²⁵Nungzuite a kungah pai in, phong uh hi. “Hong hun tan, Topa, thi dektak khu hi,” ci uh hi.

²⁶Jesus in, “Banghangin taza liangin lau nu ziam? Na upna uh bangza in no ziam?” ci hi. Tua zawkciang ama dingto a, vuipi le tuihualte a thim natu in thupia a, tuasia ciangin thim dide hi.

²⁷Mihing simin lamdang sa uh hi “Hisia pa bangbang mihing hi thong ziam? Vui le tuihualte ngangawn in a thu ni hi,” ci uh hi.

Jesus in Doavei Pasal Nii Damsak

(Mark 5.1-20; Luke 8.26-39)

²⁸Tuili ngalkhat Gadara ngamah Jesus a thet ciangin, thaan hawng sung pan hong pusuak pasal nii taw kisi uh hi. Hi mihingte doavei a, kiitak huai mama ahikom tua lampi tawnin, kuama khualhaw ngam ngawl uh hi.

²⁹Thakhat in amate cik-au uh a, “Nang Pathian Tapa awng, ko bang hong law nuam ni ziam? A hun hong thet ma in, daan pia tu hong pai ni ziam?” ci uh hi.

³⁰Tuak nai ah vok hon khat taa uh hi.

³¹Tua ahikom doate in Jesus munah, “Nong notkeak tu ahile zia lai a vok honte sungah hong tumsak tan,” ci in ngen uh hi.

³²Jesus in, “Pai tavun,” ci hi. Tua ahiciang amate in a omna uh nusia in paisan a, vokte sungah tum uh hi. Vok hon bup liangpangh ah kinuntaw sukin, tuili sungah tuitaa in thi siat uh hi.

³³Vok cingte tai in khua sungah tum a, tua munah doaveite tung a thupiang theampote son siat uh hi.

³⁴Tua ahikom khuapi sung pan mihingte Jesus taw kisi tu in hong pai tek uh hi; ama a mu uh ciangin a ngam uh panin a pusua natu ngen uh hi.

Matthew 9

Jesus in Langngaw khat Damsak



(Mark 2.1-12; Luke 5.17-26)

- 1 Jesus in ngunkuang tungah to kik in tuili langkhat ama khuapi ah cia kik hi.
- 2 Tua munah mihing pawlkhat in a langngaw pasal khat lupna tungah a lum sa in, Jesus kungah hong paipui uh hi. Jesus in amate upna bangza lian ziam ci in a mu ciang, langngaw pa munah, “Na thin kiliansak in, ka tapa awng. Na mawna hong kimaisak zo hi,” ci hi.
- 3 Tuasia ciangin Thukham hil syate pawlkhat in, “Hisia pa in Pathian min daisak hi,” ci in phun uh hi.
- 4 Jesus in amate thinsung a ngaisut uhte he ahikom, “Banghangin tuabang thinsiatnate khuangaisut in nei nu ziam?”
- 5 “Na mawna hong kimaisak zo hi,” ci le ‘tho in a lampai in,’ ci koisia ol zaw ziam?
- 6 Mihing Tapa in leitung ah mawmaisak theina thu nei hi, ci in kong lak tu hi,” ci hi. Langngaw pa munah, “Tho in, Na luppha luakin, na inn ah cia tan,” ci hi.
- 7 Pasal pa tho in a inn ah cia hi.
- 8 Mihonte in a mu uh ciangin liinglawng uh a, mihingte tungah tuabang thu nei theina a piak hu in, Pathian pok uh hi.

Jesus in Matthew Sam

(Mark 2.13-17; Luke 5.27-32)

- 9 Jesus in tua mun nusia in lamdung zui in a pai laitak Matthew a kici shiadong khat a zum sungah a to mu hi. Tua pa munah, “Hong zui tan,” ci hi. Matthew zongh dingin zui hi.
- 10 Jesus Matthew inn ah an ne in a om laitak, shiadong tam mamate le a dang a kipuavawk te hong pai a, Jesus le a nungzuite taw an ne khawm uh hi.
- 11 Hi bangin a om uh, Pharisee te pawlkhat in mu a, “Banghangin na Syapa uh hi bang mihingte taw an ne khawm ziam?” ci uh hi.
- 12 Jesus in za a, “Mihing a cidamte in zatomang kisamh ngawl a, cinate bek in kisamh uh hi.



¹³“Sangaw biakpiakna ka dei bua a, cikna thuthiamna bek ka dei hi,’ ci Laithiangtho ii khiakna sia kan phot tavun. Mihingphate sam tu in kong pai bua a, mawneite sam tu in kong pai hi,” ci in zokik hi.

An tanna huvau Dokna

(Mark 2.18-22; Luke 5.33-39)

¹⁴Tua zawkciang, Tuiphumpa John nungzuite hong pai a, Jesus tungah, “Ko le Pharisee te in an tang nithi a, banghangin na nungzuite in an tang ngawlhet ziam?” ci in dongh uh hi.

¹⁵Jesus in, “Mopoai sungah zi neipa a omlai teng a leangnate khuangai thei tu in na um uh ziam? Ni khat ni ciang zi neipa amate sung pan kila tu a, tuasia ciang amate an tang tu uh hi.

¹⁶“Kuama in laktong puasilh lui sa khat puanbek thak taw phaw ngei ngawl hi. Tuabangin phaw le puanthak sia hong ton tu a puan lui sia, ekkeak seseam tu hi.

¹⁷Tuabangma in savun thawl lui sungah sapittui a thak kithaal ngei ngawl hi, banghangziam cile sapittui in savun thawl hong saantham tu hi. Sapittui buakeak in a thawl zancip tu hi. Tua hi ngawl zaw in, sapittui a thak sia savun thawl thak sungah kithaal le a nii ma in lal ngawl tu hi,” ci hi.

Ulian khat ii Tanu le Jesus Puanmong A Tham Numei

(Mark 5.21-43; Luke 8.40-56)

¹⁸Jesus in hi bang a pau laitakin, Jew ulian khat hong pai a, a mai ah khupdin in, “Ka tanu a thi zawk hiat bek ahi hi. Ahitazong hong pai lete a, ama tungah na khut nga lete, ama nungta kik tu hi,” ci hi.

¹⁹Tuasia ciang Jesus dingin ama zui a, nungzuite in tonpui uh hi.

²⁰Kum sawm le kum nii tawntung chibua natna a vei numei khat Jesus nung pan hong pai a, a puanmong tham hi.

²¹“A puan bek ahizong tham leng dam tu hi veang,” ama le ama kici hi.

²²Jesus hong kingeilee kik a, numei sia a mu ciangin, “Na thin kiliansak in, ka tanu awng! Na upna in hong damsak zo hi,” ci hi. Tua hun lianin, numeinu dam thiang hi.



²³Tua zawkciang Jesus ulianpa inn sungah tum hi. Mithi vui tu tumthei thiamte le a ngamlum lialua mihonte a mu ciang,

²⁴“Na vekpi pusuak vun. Numeino sia thi ngawl hi, a mu hi bek hi,” ci hi. Tuasia ciangin amate in Jesus nuisan uh hi.

²⁵Ahihang mihonte a kipusuasak siat zawkciang, numeino ii inndoi tuam sungah Jesus tumin a khut a let ciangin, numeino thoto hi.

²⁶Hi thu huvau tua ngamkhen sung bup ah thang hi.

Jesus in Mittawte Nii Damsak

²⁷Jesus in tua mun nusia in a pai ciang, mittaw niite in ama zui tu in kipan uh hi. “David Tapa awng, ko hong hesuak tan,” ci in au uh hi.

²⁸Jesus inn sungah a sungtan zawkciang, mittaw nii ama kungah hong pai a, Jesus in, “No hong damsak thei tu in nong um uh ziam,” ci in dongh hi. “Topa, hong um ung,” ci uh hi.

²⁹Tuasia ciangin Jesus in, a mitte thamsak a, “Na up uh bangin piang taken!” ci hi.

³⁰Tuasia ciangin amate in khua mu thei uh hi. Jesus in, “Hi thu kuama tungah son heak vun,” ci in nasia takin khaam hi.

³¹Ahihang amate pai in, Jesus thu, tua ngamkhen bup sungah kizel in thangsak uh hi.

Jesus in A Pau thei ngawl Pasal khat Damsak

³²Mittawte a pai zawkciang mihing pawlkhat in, doaivei in a pau thei ngawl pasal khat Jesus kungah hong paipui uh hi.

³³Ahihang a doai a kinawkeak zawk po ciangin ama hong pau paih a, a om theampo in lamdang sa uh hi. “Hi bang peuma Israel ngam sungah mu ngei bua hing!” ci uh hi.

³⁴Ahihang Pharisee te in, “Doaite nawkeak thei natu vaang sia doaimangpa piak hi,” ci uh hi.

Jesus in Mihingte Hesuak huai sa



³⁵Jesus in khuapi khuanote ah vak kotin haw kawkoai hi. Synagogue te ah hilna nei in Kumpingam Lungdamna Thu, thuhil in nei a, natna satna namcin le ciluang natna damsak hi.

³⁶Mihonte a et ciangin, hesuakhuai sa hi, banghangziam cile tuucing om ngawl tuuhonte bangin, amate thinngim cimaw in, om uh hi.

³⁷Tua ahikom nungzuite munah, “Anlaak tu tam mama a, ahihang lo sungah an la tu, tawm hi.

³⁸Tua ahikom an neipa tungah, an la tu naseam tam mama hong sawl natu, thu na ngen vun,” ci hi.

Matthew 10

Nungzui Sawm le Nii

(Mark 3.13-19; Luke 6.12-16)

¹Jesus in nungzui sawm le niite khawmin, doai ngilo naw theina le, natna satna le ciluang natna theampo damsak thei natu thupia hi.

²Nungzui sawm le nii teng sia hi teng ahi hi; a masa phit in Simon (Peter zongh kici) le a suapuipa Andrew, Zebedee ii tate James le a suapuipa John;

³Philip le Bartholomew; Thomas le shiadongpa Matthew; Alphaeus ii tapa James, Thaddaeus;

⁴Minam it pa Simon, le Judas Iscariot kici Jesus leeheakpa ahi hi.

Sawm le Niite Nasepna

(Mark 6.7-13, Luke 9.1-6)

⁵Hi sawm le nii teng hi bangin thupiakna taw Jesus in sawl hi: “Gentile mite ngamsung mun khat pawpo le Samariate khuapi pawpo ah, pai heak vun.

⁶Tuu bangin a mangthang Israel mite kungah paizaw vun.

⁷Pai tavun a, ‘Vantungngam hong nai zo hi!’ ci in thuhil tavun.

⁸Cinate na damsak vun a, mithite na nungtasak kik vun, a cizathuai a phaakte damsak vun a, doaite not vun. A thongin na saan uh bangma, manh la ngawlin pia tavun.

⁹Na za ip sungah kham, ngun le tau sumte pua heak vun.



¹⁰Nguai an keng heak vun a, puan laih natu le peangdap laih natu keng thua heak vun, ciangkhut zongh keng heak vun. Naseam khat sia a ki taangsap tu teng, kipia tu hi.

¹¹“Khuapi khat ahizong, khuano khat ahizong, na thet uh ciang, a sungah tum vun a, no zin hong do nuam khat po zong phot vun, tua mun pan na din kik uh dong, zin kheal heak vun.

¹²Inn khat sungah na tum uh ciangin, ‘Thupha na nga tavun,’ ci vun.

¹³Tua innteakte in, hong saang a, ahile, thupha nga tavun ci a, na paupui nate, tua munah kip taken, ahizong, hong saang nuam bua ahile tua na piak thuphate daw k kik tavun.

¹⁴Tuaciang innkuan khat po khua khat po in hong saang nuam bua a, na thuson hong ngai nuam buale, tua mun taisan tavun a, na peangnuai leivuite thin vaset tavun.

¹⁵A tatak kong ci ciang thukhen ni ciangin tua khua mite sangin, Sodom le Gomorrah khua mite tungah Pathian in hesuakna lak zaw tu hi.

Hong tung tu Vawtsiatnate

(Mark 13.9-13; Luke 21.12-17)

¹⁶“Ngai vun! Note tuu bangin ngiahon sungah kong tha hi. Ngul bangin pilvang vun a, ngam vakhu bangin cingh tavun.

¹⁷Kidawm tavun, banghangziam cile mihingte in hong man tu a, zum ah hong then in, synagogue te ah hong vel tu hi.

¹⁸Kei hu in note sia ngamukte le kumpite mai ah hong kipuak tu a thu hong sit tu hi. Amate tung le Gentilete tungah Lungdamna Thupha huvau na son thei natu hi tu hi.

¹⁹Amate in note thu kisit tu in hong aap ciangin, na pau tu uh le na pausia tu uh te tungtaang ah thinngim heak vun; a hun hong thet ciangin na pau tu uhte hong kipia tu hi.

²⁰Banghangziam cile kammal na pau uh te sia no kammal hi ngawl tu hi; na pa ii Thaa tung pan note tungtawnin hong pausak ahi hi.

²¹“Mihingte in a suapuite thalup tu in aap tu a, pate zongh in tate tungah tuabangma in ngamta tu hi; tate zongh in nute pate langpan tu a, thatlumsak tu uh hi.

²²Kei hangin a kuama theampo in, hong ensan tu hi. Ahihangin a tawp dong a thuak zo sia kihun tu hi.

²³Khuapi khat sungah hong ki vawtsiat ciangin, khuapi dang khat ah tai vun. A tatakin kong ci ciang, Mihing Tapa hong pai kik maa in, Israel te khuapi theampo ah na nasep, na khuangkhem zo buatu uh hi.

²⁴“Nungzui khat sia a syapa sangin lianzaw ngawl hi; sal khat sia a Topa sangin lianzaw ngawl hi.

²⁵Tua ahikom, nungzui khat sia a syapa taw a kikim ciangin, lungkim taken a, sal khat zongh in a Topa taw a kikim ciangin, lungkim taken. Baangkua pabel sia Beelzebul a kici le, a innkuan pui dangte zongh min a sia sesem taw kici tu hi.

Akua Kiita tu

(Luke 12.2-7)

²⁶“Tua ahikom, mihingte kiita heak vun. Tu laitakin a kiseal theampo kilangh tu a, thuku theampo kipualaak tu hi.

²⁷Khuazing sungah kong son theampo khuavak sungah na son kik tu uh hi. Tuaciang a thimtham a na zaak theampo, innkhum tung panin, na thangsak tu uh hi.

²⁸Pumpi that thei a, a thaa a that thei ngawlte na kiita heak vun; hell sungah thaa le pumpi a lalcip khawmsak thei Pathian kiita zaw vun.

²⁹Banghangziam cile dangkasan pheak khat taw tonbawm nii kilei thei hi, ahibelhang na Pa ii thukimna ngawl taw tonbawm khat zongh leitung ah taak thong ngawl hi.

³⁰Note na hi uhle na lu tungah na samzante dongin hong kisim sak siat sa ahi hi.



³¹Tua ahikom lau heak vun; note sia tonbawm tam mamate sangin manpha zaw nu hi.

Pualaakna le Christ Nialna

(Luke 12.8-9)

³²“Mihingte mai ah khat po in kei neisa a hina a pualaak le, vantung ka Pa mai ah, kei zongh in tuabangma in ka pualaak tu hi.

³³Ahihang mihingte mai ah khatpo in kei hong nial a ahile, vantung ka Pa mai ah kei zongh in ka nial tu hi.

Kilemna hi ngawl Namsau khat

(Luke 12.51-53; 14.26-27)

³⁴“Leitung ah kilemna puak tu in hong pai hi, ci in ngaisun heak vun; kilemna puak tu in hong pai hi ngawl khi hi, namsau khat puak tu in hong pai khi hi.

³⁵Tapate in a pate langpan tu a, tanute in a nute langpan tu a, mote in a tonupite langpansak tu in hong pai ka hi hi;

³⁶mihing khat ii a thuk laakbel a ngal sia, ama innkuanpuite ma hi tu hi.

³⁷“Kei sangin a nu a pa a itzaw sia kei nungzui tu in kiphu ngawl hi; kei sangin a tapa ahibuale a tanu a it zaw te kei nungzui tu in kiphu ngawl hi;

³⁸a kuama po, a thinglamte kisuanin ka nung hong zui ngawlte, kei nungzui tu in kiphu ngawl hi.

³⁹A nuntakna a nga natu a hanciam khat pawpo sia a nuntakna taan tu hi; ahihang a kuama po kei hangin a nuntakna a taan le, nuntakna tatak nga tu hi.

Thamante

(Mark 9.41)

⁴⁰“A kuama po no hong saangte sia, kei hong saang ahi hi; tuaciang kei hong saangte sia kei hong sawlpa saang ahi hi.

⁴¹A kuama po in mihing khat sia Pathian thupha puak a hina taw a saang le Pathian thupha puakte ii thaman kihawm tu hi. A kuama po in mihing khat



sia mihing pha a hina taw a saang le mihing phate ii thaman ma kihawm tu hi.

⁴²Hi sunga ka nungzuite sung pan, a nobel khat sia, keima nungzui ahi hu in, tuidam hai khat bek a pia zong a maan takin thaman saang tu hi,” ci hi.

Matthew 11

Tuiphumpa John Kamtaite

(Luke 7.18-35)

¹Jesus in a nungzui sawm le niite tungah hi hilnate a nei zawkciang, tua mun nusia in tua mun taw a kinai khuapite ah hilna le thuhilnate nei tu in pai uh hi.

²Tuiphumpa John in a thongtaakna mun panin, Christ nasepnate a zaak ciangin, a nungzuite pawl khat kamtai in ama kungah paisak hi.

³Amate in Jesus tungah “Hong son tan, John ii ‘Hong pai lai tu hi,’ a ci sia nangma ni ziam maw, ngualdang khat muangmaw lai tu khu ziam?” ci in dongh hi.

⁴Jesus in, “Heak kik tavun a, John munah na mu na zaak uh teng son kik tavun:

⁵mittawte khua mu in, peangbaite lampai thei a, miphaakte kidamsak in, nangongte khuaza thei a, a thisate ki nungtasak kik in, a zawngte tungah Lungdamna Thupha kihil hi.

⁶Kei hong muang la ngawlte bangza in lungdam ziam!” ci hi.

⁷John nungzuite a cia kik laitakin, Jesus in John ii thu teng mihonte tungah son hi: “Senneal ngam sungah om John kungah na pai uhciang, bang teng mu tu in kimuangmaw nu ziam? Vui ii a kuaikhum lopate khat po ziam?

⁸A bangbel mu nuamin kuan nu ziam? Puansilh hoi nano a silh pasal khat mu nuam na hi uh ziam? Mihing tuabang a, a kizeamte kumpite teenna innpите huang sungah teang bek hi!

⁹Hong son tavun; bang mu tu in pai nu ziam? Kamsang khat ahi ziam? Hi tatak hi, na mu uh sia kamsang thawthong bek hi ngawl hi.



¹⁰Banghangziam cile John sia Laithiangtho in: ‘Pathian in, ka kamtaipa na mai ah na lampi hong honsak khol tu in ka paisak tu hi, a ci sia pa hi.’

¹¹A tatak ka ci ciangin tuiphumpa John in, a piang ngei mihing khat pawpo sangin lianzaw hi. Ahihang Vantungngam sungah a om a nobel khat sia John sangin lianzaw hi.

¹²John ii thuhil a kipat pan tuni dong tatak ma Vantungngam in nasia takin zawthawk thu taw suutolna thuak hi, a ngoltol mihingte in laak tu in hanciam uh hi.

¹³John khang dong ma in, kamsang theampote le Moses thukhamte in, Kumpingam thu huvau son uh hi;

¹⁴tuaciang amate thuhilte na um nuam uh le John sia Elijah hi a, hong pai tu a kisonkhol sa sia ahi hi.

¹⁵Tua ahiciang bil na nei uh le ngai vun.

¹⁶“Tu in, tu hun a mihingte bang taw teengat tu khi ziam? Amate sum zuakna phual a to, patangte taw kibang hi. Pawlkhat in pawldang khatte oksan a;

¹⁷‘Mo kiteenna music kong tum uh a, laam nuam ngawl nu hi! Mithi vuina la kong sak uh a, kap nuam ngawl nu hi!’ kici uh hi.

¹⁸John in an tang a sapitui ne ngawlin hong pai ciang, ‘Ama ii sungah doai om hi,’ mihing theampo in ci uh hi.

¹⁹Mihing Tapa hong pai a, ama in ne in dawnin a om leleau ciang, ‘Hi pa en vun! Antuangpa, zutuangpa, shiadongte le pawlsung pan a kipuavawkte ii lawmpa!,’ mihing theampo in ci uh hi. Ahitazong Pathian ii ciimna sia maan tatak hi ci in a piang thute panin kilak hi.”

Thu Um ngawl Khuapite

(Luke 10.13-15)

²⁰Jesus ii nalamdang lakna a tamzaw a vawtna khuapite sungah a teang mihingte in, a mawna uh panin, kisiik kik tuan ngawl ahikom, ama in tua khuapite tei hi.



²¹“Nang atu in bangza in lauhuai ziam, Chorazin awng! Nang atu in bangza in lauhuai ziam, Bethsaida awng! Tyre le Sidon khuate tungah note sungah hong kivawt nalamdang laknate kivawt thong le, a mihingte in khau-ip puan silh in, amate tungah vut kithe in, mawna kisiik kikna a lak zawk ngei zo tu hi.

²²A tatak in ka ciciang, Pathian thukhenna Ni hong thet ciang, no tung sangin Tyre le Sidon khua mite tungah Pathian in hesuakna tam lak zaw tu hi.

²³Tuaciangin, Capernaum, nang na hile, nangma le nangma vantung dongin kilapto sawm na hi ziam? Hell khuk sungah na kisepsuk tu hi. Nang sungah a kiseam nalamdang laknate Sodom khua ah kiseam thong le tua khua sia tuni dongin kip lai tu hi.

²⁴A tatak in kong ci ciang, Pathian thukhen ni hong thet ciangin, note sangin Sodom khua tungah Pathian in hesuakna tamzaw lak tu hi.”

Kei kungah Hong pai in, Tawlnga vun

(Luke 10.21-22)

²⁵Tua hun laitakin Jesus in, “Simlei le vantung ii Topa, Pa awng hi thute mihing ciim mihing thiamte tung panin, na sealcip a, bangma he ngawl lai mihingte tungah lak na hikom na tungah ka lungdam hi.

²⁶Hi hi, Pa, hi bangin a pian tu sia na deina ahi hi,” ci hi.

²⁷“Ka Pa in na theampo kei hong pia zo hi. Pa simngawl kuama in Tapa a tel zo bua a, Tapa le Tapa ii a telsak nop a teal mihingte simngawl kuama in Pa a tel bua hi.

²⁸“Vanngit pua in, a toite theampo awng, kei kungah hong pai tavun, tawlngakna kong pia tu hi.

²⁹Ka hakkol la in kisan vun, kei tung pan hong kisin tavun, banghangziam cile keima in cingh in a kiniamkhiak pa ka hi hi; tua ahikom toithaina na nga tu uh hi.

³⁰Banghangziam cile, hakkol kong sot tu sia puak nop a, vanh kong sot tu sia zang hi,” ci hi.



Matthew 12

Sabbath huvau Dokna

(Mark 2.23-28; Luke 6.1-5)

¹Tua zawk khuangei ngawlin Jesus in Sabbath ni khat zungtaang lo sungah vak hi. A nungzuite a ngilkial ahikom zungtaang huite hiat in a humte ne uh hi.

²Pharisee te in hi bang a ngamtat uh a mu ciangin Jesus munah, “En in, Sabbath ni in na nungzuite hi bangin a ngamtat sia ih thukham taw kileebul hi,” ci hi.

³Jesus in, “David le a mite a ngilkial uh laitak a ngamtatna thu a ki atte sim ngei ngawl nu ziam?”

⁴Ama in Pathian inn sungah a mite taw tum in, amate neak tu a kilawm ngawl thiampite bek neak tu kilawm anluum thiangtho a neakna thu sim ngeingawl nu ziam?

⁵Tua ahibuale thiampite in Sabbath sim ma in Biakinn sungah Sabbath thukham khial napi in, mawsakna a nga tuan ngawlna thu Moses thukham sungah sim ngeingawl nu ziam?

⁶A tatak in kong ci ciang, hi sungah Biakinnpi sangin a lianzaw khat om nginge hi.

⁷Laithiangtho in, ‘Thuthiamna ka dei a, sangaw biaknate ka dei bua hi,’ a ci sia he tatak hi leute, a maw ngawl khat sia mawsak lalai ngawl tu nu hi.

⁸Banghangziam cile Mihing Tapa sia Sabbath ii Topa ahi hi,” ci hi.

Pasal Khut lang Zaw Khat

(Mark 3.1-6; Luke 6.6-11)

⁹Jesus in tua mun nusia in Synagogue inn khat ah pai hi.

¹⁰Tua munah pasal khat sia khut lang khat zaw in om hi. Mihing pawlkhat in, Jesus ngamtat khialna encik in, a maw natu zong nuam ahikom hi bangin dongh uh hi, “Sabbath ni in cina damsak tu sia ih thukham taw kileebul ziam?” ci uh hi.



¹¹Jesus in, “Note sungah mihing khat in tuu khat nei le a, tua tuu sia Sabbath ni in dum sungah taaksuk le ama in dum sungah zamh suk in pusua ngawl tu ziam?”

¹²Mihing tuu khat sangin manh nei zaw ngawp hi! Tua ahiciang ih thukham in, Sabbath ni in mihing khat pawpo ih hu tu sia hong oai hi,” ci hi.

¹³Tua zawkciang a khutzawpa ii munah, “Na khut vaan in,” ci hi. Ama in a khut vaan a, a khut langkhat sang bangma in, a khut damthiang hi.

¹⁴Tuasia ciangin Pharisee te pusuak in Jesus a thalup thei natu vaihawm uh hi.

Pathian Teal sa Naseampa

¹⁵Jesus in ama a kithasawmna thu a zaak ciangin, tua mun pan in ama mundang zuan a, mihon tam mama in zui uh hi. Ama in cina theampo damsak hi.

¹⁶Tuaciangin, kei thu kuama munah son heak vun, ci in thupia hi.

¹⁷Hi bang vawtna sia kamsangpa Isaiah ii a sonkhol sa teng a tangtut natu ahi hi.

¹⁸“Hi sungah ka teal sa ka naseampa om hi. Ka lung hong kimsak ka itpa ahi hi. ama tungah ka Thaa ka pia suk tu a, tuaciang ama in, ka thukhenna minam tuatnamte (Gentile) tungah thangsak tu hi.

¹⁹Ama in thu nial ngawl tu a, a au buatu hi. Lampi lian tungah au vazakin thu a son buatu hi.

²⁰Ama in a kikuaihum sa pompa a thiaktan buatu a, a mit dek tak meiinn zongh a mit buatu hi. Ama in thutang khenna ii zawna a ngasak dong hanciam tu hi.

²¹Tuaciang ama tungah minam theampo in lametna nei tu hi”.

Jesus le Beelzebul
(Mark 3.20-30; Luke 11.14-23)



²²Tua zawkciang mihing pawlkhat in Jesus kungah doai a vei hu in mittaw a, a pau thei ngawl pasal khat hong paipui uh hi. Khua mu thei a, a pau thei natu in, Jesus in damsak hi.

²³Jesus sep teng a mu uh ciang mipite in lamdang sa uh hi. Amate in, “David tapa hi takpi tu ziam?” ci in dongh uh hi.

²⁴Pharisee te in hi thu a zaak uh ciang “Doaite a ukpa Beelzebul in ama vaangletna pia a tua hu in doaite notkeak thei hi thong zam,” ci uh hi.

²⁵Jesus in amate khua ngaisutnate tel ahikom amate tungah, “Ngam khat pawpo pawl tuatuam in kikhen hen a, kidado le tua ngam a kip ngei buatu hi. Khuapi khat ahizong innkuan khat ahizong, pawl tuatuam in kikhen in, kihau siasua le a kitamtham tu hi.

²⁶Tua ahikom Satan ngam sung zongh ah pawl tuam khat in, a dang pawltuam dangkhatte do in a om uhle Satan ngam a kikhen tham hi zo a, hai ngawlin zantham tu hi.

²⁷Beelzebul hong piak vaangletna taw doaite notkeak hi hong ci nu hi. Pha hi, tua ahile na nungzuite akua in doai nawkeak theina vaang pia ziam? Na nungzuite ngamtatna panin, na khial hunlam kitel hi!

²⁸Hi ngawl hi. Doai nawkeak natu vaangletna hong pia sia Beelzebul hi ngawl a Pathian Thaa ahi hi. Tua ahikom hi thu mama in, Pathian Ngam sia note tungah hong theng zo hi,” ci in kitelsak hi.

²⁹“Kuama in mihing thahatpa inn sungah tumin, a neisa ol takin a laaksak thei bua hi, tua mihing a thahatpa sia a leehen cip phot kul hi. A leehen zawkciang bekma in, a inn kiphul thei pheang tu hi.

³⁰“Khat pawpo kei sang a hong pang ngawl sia in kei hong langpan pa ahi hi; khat pawpo hong kaikhawm pui ngawl sia in, a thezau tatak pa ahi hi.

³¹Hi thu hangin kong ci in ah, mihingte mawna le kamsia paunate kimaisak thei hi; ahizong Thaa Thiangtho sonsiate kimaisak zo ngawl tu hi.



³²Mihing Tapa a sonsiate kimaisak thei hi; ahihang Thaa Thiangtho a sonsiate tuhun ahizong, maisang a tawntung ahizong kimaisak ngawl tu hi.

Thingkung khat le A nga thu

(Luke 6.43-45)

³³“Thingnga pha a pian natu in, thingkung cidam kul hi; thingkung cidam ngawlte panin thingnga mannung ngawlte piang hi. Thingkungte a nga pan in kihe hi.

³⁴No ngul ngilo suante awng — mihing ngilote na hi uh ciang, bangbangin thupha son thei tu nu ziam? Banghangziam cile thinsung pan a, a dimleet teng sia kam panin kipau ahi hi.

³⁵Mihing phate in a thinsung a ngaisutna pha a khol sa te dongin pau uh a; mihing ngilote in a thinsung thusia a kholte panin kamsia pau hi.

³⁶“A tatak in kong ci ciang, Thukhenna Ni ciangin, mihing sim in, phattuumna hong pia ngawl kammal khat a paute tungtawn in, thusitna thuak tu hi.

³⁷Noma kammalte mama in, na maw uhle na tan uh thu hong khen tu hi.”

Na lamdang khat Ngetna

(Mark 8.11-12; Luke 11.29-32)

³⁸Tua zawkciangin Thukham hil syate le Pharisee te pawl khat in, “Syapa awng, nalamdang lakna na vawt ka mu nuam uh hi,” ci hi.

³⁹Jesus in, “Tu hun mihingte sia, bangza ta in sia a Pathian nei ngawl ziam! Na lamdang lakna hong ngen na hi uh ziam? Hong pia ngawl tu khi hi! No tung a hong kipia tu nalamdang lakna in kamsangpa Jonah, nalamdang lakna sia bek hi tu hi.

⁴⁰Jonah in sun thum le zan thum ngasapui ngil sungah a om bangin, Mihing Tapa zongh sun thum le zan thum leithukna sungah om tu hi.

⁴¹Thukhenna Ni ciangin Nineveh khua mite hong ding tu a, note hong mawsak tu hi, banghangziam cile amate in Jonah thuhilna a zaak uh ciangin a mawna uh pan kisiik kik hi; a maan tak kong ciciang in hi sungah Jonah sangin a lianzaw khat om hi.



⁴²Thukhenna Ni ciangin, Sheba kumpinu zongh hong ding tu a, note hong mawsak tu hi, banghangziam cile, ama in a khuala mama ngam pek pan in, Solomon kumpipa ciimna taw thuhilna ngai tu in khual hong haw hi; a maan tak kong ci ciangin, hi lai ah Solomon kumpipa sangin a lianzaw khat om hi.

Thaa Ngilo hong Heak kikna

(Luke 11.24-26)

⁴³“Mihing khat sung pan doai ngilo khat sia a pusua ciang a tawngak natu zongin, munko ngawtaakna ngam ah vak kawkoai hi.

⁴⁴A mu ngawl ciang, ‘Ka inn zuan kik ka heu tong,’ ama le ama kici a, a inn ah a cia kik le a inn awng a, kipua thiang sa in a om mu hi.

⁴⁵Tuasia ciangin ama pusua in, ama sangin a sia zaw lai doaidang sali hong tumpui a, tua munah teang uh hi. A tawpna ah tua doai ii teenna mihing sia a kipat lai sangin lawmawk zaw hi. Tu lai mihing siate tungah hi bangma piang tu hi,” ci hi.

Jesus Nu le A Suapuate

(Mark 3.31-35; Lk 8.19-21)

⁴⁶Jesus in mihonpate thu a hil laitakin, A nu le a suapuate hong theng hi. Amate in paupui nuam in doipua ah ding uh hi.

⁴⁷Tua munah a om mihing khat in ama munah “En in! Na nu le na suapuate in hong paupui nuamin doipua pan in hong ngak hi,” ci hi.

⁴⁸Jesus in, “Ka nu akua ziam? Ka suapuate a kua teng ziam?” ci hi.

⁴⁹Tuaciang, a nungzuite kawkin, “En vun! hite sia ka nu le ka suapuate ahi uh hi.

⁵⁰Vantung ah ka Pa deina bang a ngamtate sia ka suapuate, ka suapuate le ka nu ahi hi,” ci hi.

Matthew 13

Thaicii Poaipa Thusontena

(Mark 4.1-9; Luke 8.4-8)

¹Tua ni ma in Jesus inn pan pusua in, tuili hui ah to a, thuhilna nei hi.



²A kiim ah hong kikhawm mihonpite tam mama ahikom, hilna nei tu in ama ngunkuang tungah to a, mipite vaalbo ah ding uh hi.

³Ama in thu tam mama son sawn natu in, thusonteenate zangh hi. “Khatvei lai in, pasal khat sia thaici poai tu in kuan hi.

⁴Lo sungah thaicite a poai ciangin, thaici pawlkhat sia lamzin tungah taakin, vacimte pai a, ne siat uh hi.

⁵Thaicii pawlkhat lei daina suang tungah taak hi. Tawmvei sungin thaici po hi, banghangziam cile lei thuk ngawl hi.

⁶Ahihang ni a sat ciangin ankung note kaanglum hi; zungthuk tha ngawl ahikom, ankungte ko ngawtaak cip hi.

⁷Thaicii pawlkhat lingphung sungah taak a, tua lingte khangin ankungte deapcip hi.

⁸Ahihang thaici pawlkhat lei phana ah taakin, ankungte hui a; a kung pawlkhat ii tung pan a zaa zakhat, pawlkhat a zaa sawmluk, pawlkhat a zaa sawmthum in nga hi.”

⁹“Bil nei po in za tavun!” ci in Jesus in a thuson khup hi.

Thusonteenaa ii Deina

(Mark 4.10-12; Luke 8.9-10)

¹⁰Tuaciangin nungzuite Jesus kungah pai a, “Mihingte tungah thu na son ciangin, banghangin thusonteenaa veu taw thuson ni ziam?” ci in dongh uh hi.

¹¹Jesus in, “Vantungngam thuku sia note tungah hong kipia hi; ahihang amate tungah kipia ngawl hi.

¹²Banghangziam cile neisa khat po a nei kholte tungah kipia thua tu hi, tam seseam a nei natu in, kipia thua tu hi; ahihang bangma a nei ngawl khat tung panin a nei sun teng zongh, kilaaksak tu hi.

¹³Amate tungah thusonteenaa taw thu ka son sia, banghangziam cile, amate in e en ahihang mu ngawl a, ngangai ahihang za ngawlin tel ngawl uh hi.

¹⁴Tua ahikom, Isaiah sonkholna sia amate tungah kibal thei hi; ‘Hi mihingte in ngangai ahihang tel ngawl tu hi. Amate in e en ahihang mu ngawl tu hi.



¹⁵Banghangziam cile amate thin bulthu zo a, a bil uh kihuh cip zo in, a mit uh si cip zo uh hi. Tua hi buale a mittang uh taw mu tu a, a bil uh taw za tu a, a thinsung uh taw tel tu uh hi. Tuaciang kei kungah hong zuan tu uh hi. Tuasia ciangin amate ka damsak tu hi, Pathian in ci hi.’

¹⁶“Note na hi uhle bangza in hampha nu ziam! Na mittangte khua mu uh a, na bilte in khuaza uh hi.

¹⁷A tatak ka ci ciang, kamsang tam mama le Pathian mi thiangtho tam mamate in, no mu teng mu nuam a, note zaak teng za nuam ahihang amate in mu ngawlin za ngawl uh hi.

Jesus in Thaicii poaipa Thusonteena Sonthiang

(Mark 4.13-20; Luke 8.11-15)

¹⁸“Tua ahile ngai vun, thaici poaipa thusonteena sia hi bang ahi hi.

¹⁹Kumpingam thu huvau thu kisonte za napi a tel ngawlte sia lampi tungah a taak thaicite taw kibang hi. Ngilopa hong pai a amate ii sungah a kituu thute laaksak hi.

²⁰Suang tungah a taak thaicite sia a thu a zaak uh po ciang, lungdam takin a saangte ahi uh hi.

²¹Ahihang a thu in amate sungah a thuk in tum ngawl a, khua ngei khom ngawl uh hi. Tua ahikom haksatna le vawtsiatna hong pai ciangin amate puk uh hi.

²²Lingphung sung a thaici taakte sia a thu a zate ma hi a, ahihang nuntak natu thinngim in, hau tu a uukte hi a, tuate in khulup ahikom a nga a hui a nei bua uh hi.

²³Tuaciangin lei phana ah a taak thaicite ahile a thu za in a telte ahi uh hi: amate in a zaa zakhat, pawlkhat in a zaa sawmluk, pawlkhat in a za sawmthum in a nga uh hi.”

Mimphei Thusonteena

²⁴Jesus in thusonteena dang khat son a: “Vantungngam thu sia hi bang ahi hi. Pasal khat in a lo sungah thaici pha poai hi.



²⁵Zan khat ciang, ngual theampo ii mut laanin, a ngalte khat hong pai a, taangkungte ii kawmah mimphei cii tuu in nusia hi.

²⁶A kungte po in a huite lua tu in a kipat ciangin, mimpheite kilangh hi.

²⁷Lo neipa naseamte hong pai a, “Topa awng, lo sungah na poai thaicite thaici pha veu hi kana ngawl ziam?, koisung pan mimpheite hong piang ziam?” ci uh hi.

²⁸Ama in, ‘Ngalte pawlkhat ii ngamtatna hi,’ ci in zo hi. ‘Mimpheite, kuan in botkeak le ung nong oai ziam?’ ci in dongh uh hi.

²⁹‘Oai ngawl khi hi; mimphei na baw uh ciangin taang zongh na botkeak tha tu uh hi.

³⁰Anlaak hun dongin mimphei le taangte na po khawmsak lel vun. Tuasia ciangin anlatae munah, mimphei teng bot phot vun a, lomsawm in hal vun, tuasia zawkciang taang teng la in ka saal sungah khum vun,’ ” ka ci tu hi, ci hi.

Thing ankam tang Thusonteen

(Mark 4.30-32; Luke 13.18-19)

³¹Jesus in thusonteen dang khat ma son hi: “Vantungngam thu sia hi bang hi. Pasal khat in thing ankam cii la in lo sungah poai hi.

³²Ama sia thaici a minpiang a nobel ahi hi, ahihang hong let ciang, ankung lianbel suak hi. Ama sia thingkung pui suak ahikom vacimte in a baakte kawm ah bu hong vawt uh hi.”

Tol Thusonteen

(Luke 13.20-21)

³³Jesus in thusonteen dang khat ma son lai hi: “Vantungngam thu hi bang hi. Numei khat in tol tawm la in anvui khum khat dim taw hel a, a vekpi in hong pawm hi.”

Jesus ii Thusonteen A Zakna

(Mark 4.33-34)

³⁴Jesus in mipite tungah hi thute a son ciangin thusonteen zangh hi; thusonteen ngawl peuma taw thu khat zongh son ngawl hi.



³⁵Hi bangin ahi sia kamsangpa pauna a tangtut natu ahi hi, “Amate tungah ka pau ciangin thusontena ka zangh tu hi; Simlei a kubitphua pan kipan a kihe ngei ngawl thute amate tungah ka son tu hi.”

Jesus in Mimphei Thusontena Sonthiang

³⁶Jesus in mipite nusia in innpi sungah a tum ciangin, a nungzuite ama kungah hong pai a, “Lo sungah mimphei thu thusontena sia ii khiakna hong son tan,” ci uh hi.

³⁷“Thaicii pha a tuu pasalpa sia Mihing Tapa ahi hi; lo sia hi leitung ahi hi.

³⁸Thaicii pha sia Kumpingam mite ahi hi; mimphei sia a ngilopa neisa mihingte ahi uh hi.

³⁹Tuaciangin mimphei leisung a tuu ngalpa sia Doaimangpa ahi hi. Anlaak hun sia hunbona ahi hi, anlata sia vantung lalangte ahi hi.

⁴⁰Mimpheite kitawm in meikuang sungah a kihal bangma in, hun bo ciang, tuabangma a hi tu hi:

⁴¹Mihing Tapa in, midangte a khialsakte le a sia vawt theampo khawm tu in, a vantung lalangte sawl tu a,

⁴²tuaciangin amate in tua mite meiphual sungah sep tu hi, tua munah amate kapin ha ngoai tu uh hi.

⁴³Tuaciangin Pathian mihingte ahile Pa ii Ngam sungah ni bangin taang tu uh hi. Bil nei po in za tavun!

Sum Kiphual Thusontena

⁴⁴“Vantungngam thu hi bang ahi hi. Pasal khat in lo khat sungah sum kiphual khat mu hi. Ama in lei huk kikin, lungdam mama ahikom a neisa theampo zuak a, tua zawkciang pai kikin, tua lo lei hi.

Suangmanpha Thusontena

⁴⁵“Vantungngam thu in hi bang hi si hi. Pasal khat in suangmanpha zong a,

⁴⁶a hoi tangtuam mama khat a mu ciangin, a neisa theampo zuak in, tua suangmanpha lei hi.

Ngeen Thusontena



⁴⁷Vantungngam thu in hi bang ahi hi. Ngasa man pawlkhat in a ngeen uh tuili sungah paai in ngasa namcin man uh hi.

⁴⁸A ngeen uh a dim ciangin, vaalbo ah ngasate hawm tu in kaito a, ngasa phate pheal sungah kikoi in, ngasa manpha ngawlte kivawk hi.

⁴⁹Hun bo ciangin hi bangin ki ngamta tu hi: vantung lalangte pai in mihing phate kawm pan in mihing ngilote khawmtua in,

⁵⁰meiphual sungah amate vawk tu a, tua munah ha ngoai in kap tu uh hi.

Thumaan Thakte le A lui

⁵¹Jesus in, “Hi thute na tel uh ziam?” ci in dongh hi. “Tel khu hi,” ci uh hi.

⁵²“Tua ahikom, Thukham hil syate khat pawpo sia Vantungngam sung ah nungzui a sua ciangin bang taw kibang ziam cile vanh kholna inndoi sung pan, vanh thak le vanh lui te a pusua inn neipa taw kibang hi,” ci hi.

Nazareth ah Jesus Kinial

(Mark 6.1-6; Luke 4.16-30)

⁵³Jesus in hi thusontena thute a son zawkciang tua mun nusia a,

⁵⁴ama ii khua ah cia hi. Ama in Synagogue ah hilna nei a, a zate in lamdang sa uh hi. “Koisung pan in ciimna hi bangte nga ziam? A nalamdang vawtte bangbangziam?”

⁵⁵Ama sia lettama pa tapa ma hi kana ngawl ziam? A nu sia Mary ma hi a, a suapuite sia James, Joseph, Simon le Judas te hi kana ngawl ziam?

⁵⁶A suapui numeite zongh hi lai ma ah teang hon kana ngawl ziam? Koisung panin hite theampo ka nga ci ziam?” ci uh hi.

⁵⁷Tua hi a amate in a saang thei bua uh hi. Jesus in amate munah, “Kamsangpa khat sia ama khua le ama innkuan sung ngawl buang mundang theampo ah kizatak vawt hi,” ci hi.

⁵⁸Amate in upna nei ngawl ahikom, tua munah nalamdang lakna tam a vawt bua hi.

Matthew 14

Tuiphumpa John Thina



(Mark 6.14-29; Luke 9.7-9)

- ¹Tua hun laitakin Galilee ngamukpa Herod in Jesus thu za hi.
- ²A uliante munah, “Ama sia Tuiphumpa John hong nungta kik hi vangiat tu hi, ci hi. Tua hu in, nalamdang lakna vawt theina vaang nei hi tu hi,” ci hi.
- ³Banghangziam cile Herod in John a kimat natu thupia zo a, thong sungah khum hi. Hi bangin a vawt na sia Herod in a suapuipa Philip zi Herodias a tenpui hang ahi hi.
- ⁴Tuiphumpa John in Herod munah, “Herodias na tenpui sia suak ngawl hi,” ci ngei zo hi.
- ⁵Herod in ama thatlum nuam ahihang, Jew mite kiita hi, banghangziam cile Jew mite in John sia kamsang khat hi ci in ngaisun uh hi.
- ⁶Herod suani in a kikhawmte mai ah Herodias tanu laam hi. Herod lungkim mama a;
- ⁷“Nong nget pawpo kong pia tu hi, ci in ka kiciam hi!” ci in kamciam pia hi.
- ⁸A nu sawl bangin, “Hi sungah tu ma in, kuangdal khat sungah John ii lutang hong pia tan!” ci hi.
- ⁹Kumpipa sia khuangai hi, ahihang leangnate mai ah, kamciam a piak sa ahikom a nget bangin, a kivawt natu thupia hi.
- ¹⁰Tua ahikom thong inn sungah John ii ngawng tansak hi.
- ¹¹A lutang sia kuangdal tungah koi in, ngaknu nu kipia a, ama in a nu piasawn hi.
- ¹²John nungzuite hong pai a, a luang pua in phum uh hi; tua zawkciang amate pai in Jesus munah son hi.

Jesus in Mihing Tulnga Vaak

(Mark 6.30-44; Luke 9.10-17; John 6.1-14)

- ¹³Jesus in John thute a zaak ciangin, ngunkuang khat sungah to in, a ngamkhingna mun khat ah ama nguakin pai hi. Mipite in tua thu za ahikom a khuapi uh nusia in leilam panin ama zui uh hi.



¹⁴Jesus in a ngunkuang tung pan tuak a, mihonpite a mu ciangin, tua mite hesuakhuai sa in cinate damsak hi.

¹⁵Tua nitak in a nungzuite in ama kungah hong pai uh a, “Tu in ni zongh niam mama zo hi. Hi mun sia ngamkhing mun ahi hi. Mihonpite paisak in a, khuano sungah amate le amate neak tu an leisak lete pha hi,” ci uh hi.

¹⁶“Amate paisak kul bo, amate neak tu an note in pia vun,” ci hi.

¹⁷“Hi sungah ih nei theampo kingawm in anluum nga le ngasa nii hi,” ci in zo uh hi.

¹⁸“Tua hile tuate keima kungah hong paipui tavun,” Jesus in ci hi.

¹⁹Ama in mipite sia lopa tung a to siat natu in thupia hi; tua zawkciangin anluum nga le ngasa nii te la in, van ento a, Pathian munah lungdamko hi. Ama in anluumte baltham in nungzuite pia a, nungzuite in mipite piasawn uh hi.

²⁰Misim in ne in kham tek uh hi. Tua zawkciangin nungzuite in, a neak vaal uh khum sawm le khum nii dim in seng uh hi.

²¹Numei le patang simngawl, pasal an ne sia tulnga bang pha uh hi.

Jesus Tui tengah Lampai

(Mark 6.45-52; John 6.15-21)

²²Mipite a inn tek ah cia in a sawl zawkciang, tuili ngal ah paikhol tu in, a nungzuite ngunkuang sungah tosak hi.

²³Mipite a ciasak siat zawkciang, ama nguakin mual tengah thungen tu in kaato hi. Nitak khuaniam hun dongin Jesus in tua munah ama nguakin om hi;

²⁴tua hun laitakin ngunkuang sia tuili sungah khuala ma theng zo a, vui va ahikom ngunkuang sia tuihual in lok zazaan hi.

²⁵Zingsang nai thum le nai luk kilaklaw in, Jesus in tuitung nungzuite sangah hong pai hi.

²⁶Tuitung ah a pai a mu ciangin, amate patau mama uh hi. “Thithaa hi tu hi!” ci in lau in ciik au uh hi.



²⁷Jesus in amate tungah thakhat in, “Na thin uh kiliansak vun! Lau heak vun! Keima khi hi,” ci in paupui hi.

²⁸Tuasia ciangin Peter in, “Topa na hi takpi le nangma kungah tui tungah kong pai thei natu in thu hong pia tan,” ci hi.

²⁹“Hong pai tan!” Jesus in ci hi. Tua ahikom Peter sia ngunkuung sung pan pusuak a, tuitung Jesus kungah lampai tu in kipan hi.

³⁰Ahihang vui va ngawp sia a mu ciangin lau in tui sungah taaksuk tu in kithoai hi. “Topa hong hun tan!” ci in au hi.

³¹Thakhat in Jesus in ama zamh in, “Upna no pa awng, banghangin muang la ni ziam?” ci hi.

³²Amate nii sia ngunkuung sungah hong thengin vui zongh thim hi.

³³Tuasia ciangin ngunkuung sung a om nungzuite in Jesus bia uh hi. “Pathian Tapa takpi ma na hi hi!” ci in au uh hi.

Gennesaret ah Jesus in Cina Damsak

(Mark 6.53-56)

³⁴Amate sia tuili kantan in Gennesaret vaalbo ah kaa uh hi,

³⁵Tua munah mihonte in Jesus ahi hunlam he uh hi. Tua ahikom kiimkot ngamte ah cinate vaitha in, Jesus kungah paipui hi.

³⁶A puanmong beak ahizong cinate a thamsak natu in, ama tungah ngen uh hi. Tuaciang a puanmong a tham theampo damsak hi.

Matthew 15

Taangpupite ii Hilna

(Mark 7.1-13)

¹Tua zawkciang Jerusalem panin, Thukham hil syate pawlkhat Jesus kungah pai in,

²“Banghangin na nungzuite in ih taangpupite hilnate ni ngawl ziam? A anneak ma in a ngeina bangin a khut sil ngawl hi!” ci in dongh hi.

³Jesus in, “Tua ahile Pathian thupiakte banghang ni ngawlin, noma phuatawm kihilnate zui nu ziam?”



⁴Banghangziam cile Pathian in, ‘Na pa le na nu zakta vun’. Tuaciang ‘A pa ahibuale a nu a haamsiat pawpo sia thalupna thuak taken,’ kici hi.

⁵Mihing khat in a pa ahibuale a nu a hu thei natu na khat pawpo a nei sia, ‘Hi sia Pathian atu a kipia sa hi’ ci pole,

⁶a pa zatak vawt kul nawn ngawl hi, ci in thuhil nu hi. Hi bangin noma kihil tawmnate na zui uh ciangin, Pathian thupiaknate paltan na hi uh hi.

⁷No a kihi theamsakte awng! no huvau Isaiah sonkholnate bangza in maan ziam!

⁸‘Hi mite in a kammal uh taw kei zatakna hong pia hi; ahihang a thinsung sia kei taw kikhuala hi,’ Pathian in ci hi.

⁹Kei hong biakna sia amate atu in kimanna om ngawl hi. Banghangziam cile amate in mihingte vawttawm ngeina sia, kei ii thukham bangin kihil uh hi!”

Mihing khat A Ninsak thei Nate

(Mark 7.14-23)

¹⁰Tuaciang Jesus in mihonpite samin hi bangin ci hi, “Ngai vun a tel tavun!

¹¹Mihing khat a kam sungah a tum suk sia in ama zeksa ngeina bangin ninsak ngawl hi, a kamsung pan hong pusuak sia in ama ninsak hi,” ci hi.

¹²Tua zawkciangin a nungzuite, ama kungah pai in, “Tu a na pau teng a zaak ciangin, Pharisee te ii maktak hunlam na he ziam?” ci in dongh uh hi.

¹³“Vantung a ka Pa ii suan ngawl peuma a kung simin kibotkeak tu hi,” ci in Jesus in zo hi.

¹⁴“Amate tungtaang ah thinngim heak vun! Amate sia mittawte lampui mittawte ma ahi uh hi; mittaw khat in a dang mittaw khat lam a lak le, a nii in dum sungah taak suk tu hi,” ci hi.

¹⁵Peter in, “Hi thu sonteena sia hong sonthiang tan,” ci hi.

¹⁶Jesus in, “No sia ngualdangte sangin ciimzaw tuan ngawl nu ziam?

¹⁷Tel ngawl nu ziam? Mihing khat a kamsung a tumsuk peuma sia a ngilpi uum sung theng suk a, tua sung panin a pumpi puasah ah pusuak hi.



¹⁸Ahihang kamsung pan a pusuakte sia thinsung pan hong pai hi a, hite in mihing khat sia zeksa taw kisai in ninsak hi.

¹⁹Banghangziam cile a thinsung panin, ngitlo ngaisutnate hong pai a, ama sia mihing thalup natu, palngul natu, numei le pa khial natu; suutol natu, leitot natu le ngual min siatsak natu, in lamlak ahi hi.

²⁰Hite in mihing khat sia ninsak hi. Ahihang amate ci bangin, khutsil ngawlin anneakna in, mihing khat sia ninsak ngawl hi.”

Numei khat ii Upna

(Mark 7.24-30)

²¹Jesus in tua mun pan dingin, Tyre le Sidon khuapi taw a kinai ngam ah pai hi.

²²Tua ngamah a teang Canaan numei khat ama kungah hong pai hi. “David Tapa awng!” ci in au a, “Topa hong hesuak tan! Ka tanu doai vei in ngim mama hi,” ci hi.

²³Ahihang Jesus in ama kam khat zongh a paupui bua hi. A nungzuite hong pai a, “Ama ciasak in! Ama in ei hong zui a, au tawntung hi!” ci uh hi.

²⁴Tuaciang Jesus in, “Kei sia tuu mangthang Israel mite mun bek ah hong kipaisak hi,” ci hi.

²⁵Ahihang numeinu in a peang kungah bok a, “Topa awng hong hu tan!” ci hi.

²⁶Jesus in, “Tate ii anneak tu laaksak in uite ii piaksak tu sia kilawm ngawl hi,” ci hi.

²⁷Tua ahikom tua nu in, “Tua thu in thumaan hi. Topa awng, ahihang uite ngangawn zongh, a tote sabuai tung pan a taak annengte ne kana ngawl ziam?,” ci in zo hi.

²⁸Tua hi a Jesus in, “Nang sia upna lian a nei numei khat na hi hi! Na deina bang nang tungah hong tung tu hi,” ci hi. Tua hun lian laitakin a tanu damthiang hi.

Jesus in Mihing Tam mama Damsak



²⁹Jesus in tua mun nusia in Galilee tuili hui ah pai hi. Mualtung khat ah kaato in to hi.

³⁰Ama kungah mihon hong paite in peangbai, mittaw, a koncip, a pau thei ngawl le cina dang tam mama te, Jesus kungah paipui uh a; Jesus in amate damsak hi.

³¹A pau thei ngawlte pau thei a, a koncipite dam in, peangbaite lampai thei a, mittawte in khua a mu thei uh ciang, tua munah mihingte in, lamdang sa in Israel te Pathian minthang pok uh hi.

Jesus in Mihing Tulli Vaak

(Mark 8.1-10)

³²Jesus in a nungzuite samin “Hi mihingte hu in ka thin nuam ngawl hi, banghangziam cile, tu in ni thum pha zo a, bangma neak tu nei ngawl hi. Anvaak phot ngawlin cia thongsak nuam ngawl khi hi, banghangziam cile, a inn uh a zot ciang lampi ah ngilkial in pukhong siat tu hi,” ci hi.

³³Nungzuite in, “Hi senneal ngam sungah mihing hiza neakkhom tu an, koisung pan nga thong tu khu ziam?” ci uh hi.

³⁴“Anluum bangza nei nu ziam?” ci in Jesus in dongh hi. “Anluum sali le ngasa no tawm nei ung,” ci in zo uh hi.

³⁵Tua ahikom Jesus in mipite lei ah tosak hi.

³⁶Tuasia ciang Jesus in anluum sali le ngasate la in, Pathian tungah lungdam a ko zawkciang, balneen in a nungzuite pia hi; tuaciang in nungzuite in mipite piasawn uh hi.

³⁷Amate theampo in ne uh a, kham tek uh hi. Nungzuite in a neak vaal uh khum sali dimin seng lai uh hi.

³⁸Numei patang sim ngawlin pasal an ne peuma mihing tullu pha uh hi.

³⁹Tua zawkciang mipite sia Jesus in ciasak a, ama zongh ngunkuang tungah to in Magadan ngamah pai hi.

Matthew 16

Na Lamdang Ngetna



(Mark 8.11 -13; Luke 12.54-56)

¹Pharisee te pawlkhat le Sadducee te pawlkhat Jesus kungah hong paite in ama sia Pathian thukimpui ahile ahi ngawl a tel nopna in, aita in, nalamdang lakna khat a vawt tu in ngen uh hi.

²Ahihang Jesus in, “Nitum laitakin ‘Van san ahikom, khuapha vak’ na ci uh hi.

³Tuaciang zingtuung in ‘Van san a, niim ahikom nguazu vak’ na ci uh hi. Van en in khuahunte sonkhol thei nu hi, ahihang hi hunte taw kisai in limte na khia thei bua uh hi!

⁴Hi hun ah mihingte bangza in khansia a Pathian um ngawl ziam? Na lamdang lakna hong ngen na hi uh ziam? Vawt ngawl tu khi hi! Jonah nalamdang lakna khat sia bekma note tungah hong kipia tu hi,” ci hi. Tuaciang, amate nusia in paisan hi.

Pharisee te le Sadducee te ii Tol

(Mark 8.14-21)

⁵Nungzuite tuili ngalkhat ah a pai uh ciangin anluum a ken tu mangil uh hi.

⁶Jesus in, “Kidawm vun; Pharisee te le Sadducee te ii tol panin kidawm tavun,” ci hi.

⁷Amate kikum uh a, “Hi bang a hong ci sia anluum ih ken ngawl hang ahi ka tawm,” ci uh hi.

⁸Jesus in amate bang teng kikum ci in he a, “Banghangin anluum na nei ngawl uh teng po kikum nu ziam? Na upna uh bangza no ziam!

⁹Tel thei ngawl lalai na hi uh ziam? Anluum nga baltham in mihing tulnga in a neak lai in, khum bangza dimh kana nu ziam?

¹⁰Tuaciang anluum sali sia mihing tullu in bangbang in ne kana ziam? Khum bangza dimh kana nu ziam?

¹¹Tua ahile anluum huvau ka sonna hi ngawl ahi hunlam tel thei ngawl nu ziam? Pharisee te le Sadducee te ii tol panin kikeam tavun!” ci hi.

¹²Tuaciang nungzuite in anluum sung a tolte pan a kikep tu thuson hi ngawl a, Pharisee te le Sadducee te hilna panin kikep natu son ahi hunlam tel uh hi.



Jesus huvau Peter ii Sonthiangna

(Mark 8.27-30; Luke 9.18-21)

¹³Jesus in Caesarea Philippi khuahui ngamkhen ah pai a, tua munah, “Mihing Tapa sia ngual in akua ci ziam?” ci in a nungzuite dongh hi.

¹⁴“Pawlkhath in Tuiphumpa John hi hong ci a pawlkhath in Elijah hi hong ci hi, tuaciang a dangte in Jeremiah ahibuale kamsang dang khat hi vak hong ci uh hi,” ci in zo uh hi.

¹⁵“Note in kei sia akua hi nong ci uh ziam?” ci in dongh hi.

¹⁶Simon Peter in zo a, “Nang sia Messiah, a nungta Pathian Tapa na hi hi,” ci hi.

¹⁷Jesus in, “John tapa Simon awng, nang sia mihing hampaha khat na hi hi! Hi thutak sia mihing chi le sa sung pan nang tung a hong pai ahi bua a, vantung a ka Pa kung pan in, hong kipia thu ahi hi,” ci hi.

¹⁸“Tuaciang, a maan takin kong ci ciang, Peter awng: nang sia suangpi na hi hi, tuaciangin, hi suangpi phungkawng tungah ka pawlpi ka phut tu a, thina ngangawn zongh in a zo zo buatu hi.

¹⁹Vantungngam tawtangte nang kong pia tu a, leitung a na khate vantung ah kikhak tu a, leitung a na honte vantung ah kihon tu hi,” ci hi.

²⁰Tua zawkciang, ama sia Messiah ahi hunlam kuama munah a son ngawl natu in a nungzuite munah thupia hi.

Jesus in A Thuak natu le A Thi natu Sonkhol

(Mark 8.31-9.1; Luke 9.22-27)

²¹Tua hun panin kipan a nungzuite munah Jesus in thianga takin son a, “Jerusalem ah ka pai kul tu a, upate, thiampi liante le Thukham hil syate tung panin, nasia takin thuak tu khi hi. Hong kithatlum tu a, ahihang, ni thum zawkciang, nuntakna sungah hong kiphongto kik tu hi,” ci hi.

²²Peter in Jesus sia samtuamin tei hi. “Topa awng, tuabangin na thuak tu sia Pathian in hong khaam taken! Tuabang peuma in, nang tungah hong piang heak hen!” ci hi.



²³Jesus kingeilee in, Peter munah, “Kei kung pan in tai in, Satan awng! Nang sia kei mai hong khaktan na hi hi, banghangziam cile hi khua ngaisutnate sia Pathian kung panin hong pai hi ngawlin, mihing pianzia sung pan hong pai ahi hi,” ci hi.

²⁴Tua zawkciang Jesus in a nungzuite munah, “Khat po in kei hong zui nuam le ama le ama kinial in, a thinglamte pua in, ka nung hong zui taken.

²⁵Banghangziam cile, a nuntakna a huu nuam sia in taan tu a, ahihang kei hu a, a nuntakna a taan sia in nuntakna mu tu hi.

²⁶Mihing khat in leitung theampo a nga zonghin, ama nuntakna a taan le bang meetna nei tu ziam? Meet ngawl tu hi! Ama nuntakna a nga kiksak natu a piak thei khat zongh om ngawl hi.

²⁷Banghangziam cile Mihing Tapa in Pa vaangletna le a vantung lalangte taw hong pai ciangin, ama in mihing khat sim ii a sepna babang in thaman pia tu hi.

²⁸A tatak kong ci ciang, hi lai ah a om mihing pawlkhatte ahile, Mihing Tapa Kumpipa in hong pai a mu mateng in a thi buatu hi,” ci hi.

Matthew 17

Jesus Meal Kikhealna

(Mark 9.2-13; Luke 9.28-36)

¹Ni luk zawkciang Jesus in Peter, James le John te unau samin mual tungah paipui to a tua munah amate teng nguak om uh hi.

²Amate mu tangin meal kikhealna sia Jesus tungah hong piang hi: a maitang sia ni bangin taang a, a puansilhte sia tee ziazua hi.

³Tua zawkciang Jesus sia Moses le Elijah taw thu son khawmin a om uh nungzui thumte in mu uh hi.

⁴Tua ahikom Peter in, “Topa hi munah ih om sia bangza in nuam ziam? Na uuk le nang atu buk khat, Moses atu buk khat, le Elijah atu buk khat, puanbuk thum kong saksak tu uh hi,” Jesus munah ci hi.

⁵Tuabangin a pau laitakin, meei taang khat in amate teng tuam a tuaciangin meeikaai sung panin awnging khat in, “Hi sia in ka it ka Tapa hi a, ama tungah ka lungkim hi; a thu na ngai tavun,” ci hi.

⁶Nungzuite in tua aw a zaak uh ciangin, amate sia lau mama ahikom lei ah bokcip uh hi.

⁷Amate kungah Jesus hong pai in, amate tham in, “Tho vun, lau heak vun!” ci hi.

⁸Tua ahikom amate in a et uh ciang Jesus sim ngawl kuama dang a mu bua uh hi.

⁹Mual tung pan hong tuaksuk kawmin Jesus in, “Mihing Tapa sia thina pan a kithawsak kik mateng hi mukholna sia kuama tungah son heak vun,” ci in thupia hi.

¹⁰Tuaciang nungzuite in Jesus tungah, “Thukham hil syate in Elijah hong pai masa tu hi banghangin ci ziam?” ci in dongh uh hi.

¹¹Jesus in, “Elijah sia hong pai masa takpi hi, tuaciang in ama in na theampo kithoai sa in koi tu hi,” ci hi.

¹²“A tatak in ka ci ciang, Elijah hong pai zo a, ahihang mihingte in ama tel ngawl ahikom, ama tungah a uuk uh bang tek po in, ngamta uh hi. Tuasia bangma in, amate in Mihing Tapa zongh vawtsia tu uh hi,” ci hi.

¹³Tuasia ciangin a nungzuite in ama sia Tuiphumpa John huvau son hi ta a, ci in tel uh hi.

Jesus in Doavei Patang khat Damsak

(Mark 9.14-29; Luke 9.37-43)

¹⁴Mihonpite kungah amate hong heaksuk kik zawkciangin pasal khat Jesus kungah pai a, a mai ah khupdin in,

¹⁵“Topa, ka tapa hong hesuaksak tan! Ama butthi thei a, kaikin in, mei sungah ahibuale tui sungah puksuk thei hi.

¹⁶Na nungzuite kungah ka paipui uh hangin, amate in damsak thei ngawl uh hi,” ci hi.



¹⁷“Bangza ta in um zo ngawlin khial nu ziam, no mihingte awng! No taw bangtan vei hong omkhawm tu khi ziam? A bang tan vei hong dual zo tu khi ziam? Patang sia keima kungah hong paipui tavun!” ci hi.

¹⁸Jesus in doai tungah thupia a, tuasia ciangin patang sung pan doai pusuak a, tua hunlian ma in dam hi.

¹⁹Tua zawkciang amate nguakin a om laitak, nungzuite Jesus kungah hong pai a, “Banghangin doai hi sia notkeak thei ngawl khu ziam?” ci in dongh uh hi.

²⁰Jesus in, “Banghangziam cile noma in upna kicing nei ngawl nu hi. A tatak in kong ci ciang, ankamtang cia upna nei hi leute hi mual munah, ‘Hi sung panin zialai ah kikkiin in,’ ci in sawl leute kikkiin tu hi. Na khat pawpo na vawt thei tu uh hi,” ci hi.

²¹Thungetna le antanna in, hite pawl notkeak zo bek a, na dang in notkeak zo ngawl hi.

Jesus in A thi natu Son kik

(Mark 9.30-32; Luke 9.43-45)

²²Nungzuite theampo Galilee ah hong kikhop uh ciangin, Jesus in amate tungah, “Mihing Tapa sia mihingte khut sungah thalup tu in ki aap dektak zo hi.

²³Tua mihingte in ama sia thatlum tu hi. Ahihang ni thum zawkciangin amantakna sungah kiphongto kik tu hi,” ci hi. Nungzuite sia khuangai mama uh hi.

Biakinn atu Shia Piakna

²⁴Capernaum khua ah Jesus le a nungzuite hong thet uh ciangin, Biakinn atu shiadongte hong pai a, Peter munah, “Na syapa in Biakinn atu shia a pia ziam?” ci in dongh hi.

²⁵“Pia hi,” ci in Peter in zo hi. Peter inn sungah a tum zawkciang, Jesus pau masa a “Simon awng, nang ngaisutna bangbang ahi ziam? Hi leitung kumpite tungah akua bangte in sum zuakna tung pan shia pia ziam? Ngamsung mite in pia ziam maw ngamdang mite in pia ziam?” ci hi.



²⁶“Ngamdang mite in pia hi,” Peter in ci hi. “Pha hi, tua ahile ngamsung mite in piak kul ngawl hi.

²⁷Ahihang mihingte thin uuksak nuam bua hing. Tua ahikom tuili ah pai tan a, ngasa tangthaak tan. Ngasa a awk phitbel sia manin, a kamsung en lete, dangka tang khat om tu hi. Biakinn shia piak tu in kei atu le nang atu kicing tu hi. Va la tan a, ih shiate amate va pia tan,” ci hi.

Matthew 18

Akua Lianbel Ziam?

(Mark 9.33-37; Luke 9.46-48)

¹Tua hun laitakin a nungzuite sia Jesus kungah hong pai a, “Vantungngam sungah akua lianbel ziam?” ci in dongh uh hi.

²Tua ahikom Jesus in patang khat samin, amate mai ah dingsak a,

³“A tatak in kong ci ciang kikheal in patangte bang na suak bua uhle Vantungngam sungah na tum thei buatu uh hi.

⁴Vantungngam sungah a lianbel sia in, ama le ama kiniamkhiak a, hi patang bang ahite ahi hi.

⁵Tuaciangin hi bang patang khat kei min taw a saangte in, keima hong saang ahi hi.

Maw natu Ze-etna

(Mark 9.42-48, Luke 17.1-2)

⁶“Mihing khat po in patang khat ii kei hong upna a lalsak le, tua pa ngawng ah an ngoaina suangpheak kikhii in tuipi thukna sungah kikhiasuk le phazaw hi.

⁷Mihingte upna a lalsak thei nate hangin, hi leitung atu bangza in kiitak huai ziam? Tuabangte sia hong piang tawntung tu hi, ahihang tuabang a piangsakte atu in, bangza in lauhuai ziam?

⁸“Na khut ahibuale na peang in, na upna hong taansak le saattan in vawk in! Tawntung meikuang sungah khutcing peangcing hong kikum sangin, nuntakna sungah khutsamh peangsamh in tum lete phazaw hi.



⁹Tuaciang mittang khat in na upna hong taansak le, khelkeak in vawk in! Hell meikuang sungah mittangte ngeal taw hong kibumsuk sangin mittang lang khat sel in, nuntakna sungah tum lete nang atu in, phazaw hi.

A Bo Tuu Thusonteen

(Luke 15.3-7)

¹⁰“Hi patang khat po na zawnsak ngawl natu in, na kidawm vun. Amate ii vantung lalangte sia ka Pa omna munah om tek nginge hi, ci in hong son ka hi hi.

¹¹Banghangziam cile Mihing Tapa sia a bote hun tu in hong pai ahi hi.

¹²“Mihing khat in tuu zakhat a nei sung pan, tuu khat a bosua sia in bang law tu in na um uh ziam? Ama in a omlai tuu sawmkua le kua mual tungah taasakin nusia a, a bosua tuu sia zong tu in kuan hi.

¹³Ama in tua tuu a bosua sia a mu ciangin, a bo ngawl sawmkua le kua tungah a lungdamna sangin, hi a bosua tuu khat tungtaang ah lungdam zaw tu hi.

¹⁴Tuabangma in vantung a na Pa in, hi patangte khat po a bo tu sia a oai bua hi.

Hong khial Suapuipa Khat

¹⁵“Na suapuipa in nang tungah hong khial le, va pai tan a, ama khialna teng lak tan. Noma tuam in kilemtua tavun. Na thu hong ni a ahile na suapuipa na nga kik zo hi.

¹⁶Ahihang hong ni nuam buale, ngualdang khat le nii mai ah son pui in, tua hile Laithiangtho ci bangin, ‘na mawsakna teng sia mihing nii le a tam zaw in tetti in hong pang tu hi.’

¹⁷Tuaciangin amate zongh in, a sonpui thei ba lai le, pawlpi bup mai ah a vekpi in son siat tavun. Pawlpi thu zongh a ni nuam bua ahile, ama sia doai biate khat bang ahizong, shiadongpa bang ahizong ngaisun tavun.

Khana le Honna



¹⁸“Tua ahikom na vekpi tungah hong ci khi hi: leitung ah na kha uh te vantung zongh ah kikhak tu hi; leitung ah na hon uhte vantung zongh ah kihon tu hi.

¹⁹“Thudang kong son lai natu panin, mihing nii in leitung ah na khat pawpo tungtaang ah thukim in thu a ngen uh le, vantung ka Pa in hong vawtsak tu hi.

²⁰Banghangziam cile ka min taw nii le thum kikhopna sungah amate taw ka om khawm hi,” ci hi.

Mawmaisak ngawl Naseampa Thusonteen

²¹Tuaciang Peter in Jesus kungah pai a, “Topa, ka suapuipa in ka tungah hong khial kikik le bangtan vei maisak tu khi ziam? Sali vei dong ziam?” ci hi.

²²“Sali vei dong hi ngawlin, sali mun sawmsali vei dong, maisak in,” Jesus in ci hi.

²³“Banghangziam cile Vantungngam sia hi bang ahi hi. Khatvei lai in kumpipa khat in a naseamte sazian sit tu in khensat hi.

²⁴Hi bangin vawt tu a kipat ciangin, amate sung panin, talen awn tam mama leiba nei khat hong kipaipui hi.

²⁵Naseampa in a liau tu sum nei ngawl hi. Tua ahikom Kumpipa in, tua pa ii zi taw a tate taw a neisa theampo taw sila a zuak tu in thupia hi. A leiba kilo natu ahi hi.

²⁶Kumpipa mai ah naseampa khupdin hi. “Thinsau takin hong ngak lai tan, kong bat thempo hong lo kik tu khi zam,’ ci in ngen hi.

²⁷Kumpipa zongh in ama sia khuangaihuai sa in, a leiba teng maisakin thawthong hi.

²⁸“Tuaciangin tua naseampa pusuak in, ama tungah sum tawm a ba naseam dang khat taw kisi uh hi. Tua pa sia manin a tawlsaan a, ‘Sum nong bat teng hong lo tan,’ ci hi.



²⁹A naseppuipa in a mai ah bokin ‘Thinsau takin hong ngak lai tan; sum kong bat teng hong lo siat tu khi zam,’ ci hi.

³⁰Ahizong ama in za nuam ngawlin, a leiba a lo siat dong thong sungah khum hi.

³¹Naseam dangte in, thupiang teng a mu ciangin, a thin nuam ngawlin, kumpipa kungah pai in thupiang theampo son uh hi.

³²Tua ahikom ama in naseampa sam a, ‘Nang a mannung ngawl silapa awng, ka tungah nong bat theampo hong maisak tan ci in nong nget hu in, hong maisak siat khi hi.

³³Nang kong hesuak bangin, na naseppuipa na hesuak tu kilawm hi ngawl ziam?’ ci hi.

³⁴Kumpipa thin uuk mama a, naseampa in ama tungah a bat theampo a lo siat dong thongtaak tu in puak hi,” ci hi.

³⁵Jesus in a thukhupna ah, “Na thintak taw na suapuipa na maisak buale vantung a ka Pa in mihing sim in tuabang hong vawt tu hi,” ci hi.

Matthew 19

Jesus in Nupa Kikhulna huvau Thuhil

(Mark 10.1-12)

¹Jesus in hi teng a ci zawkciang, Galilee ngam nusia in Jordan ngun ngalkhat Judea ngam ah pai hi.

²Mihonpi in zui a, tua munah amate damsak hi.

³Pharisee te pawlkhat in, ama aita nuam ahikom hi bangin dongh uh hi. “Pasal khat in a zi sia bang thu po taw ahizong a khul nuam le khul thei hi ci thu, ih thukham in a oai ziam?” ci uh hi.

⁴“A kipatciil in Bitphuapa in mihing sia pa khat le numei khat vawt hi, ci in a ki at Laithiangtho sia sim ngei ngawl nu ziam?”

⁵Tuaciangin hi thu hangin, ‘Pasal in a pa le a nu nusia tu a, a zi taw kingawm in, amate ngeal sia khat suak tu hi,’ Pathian in ci hi.



⁶“Tua ahikom amate sia nii hi nawn ngawlin khat suak hi. Tua ahikom Pathian ii ngawmsate mihing in khen thei ngawl tu hi,” ci hi.

⁷Pharisee te in, “Tua ahile banghang Moses in, Pasal in a zi a khul le kikhulna lai pia taken, ci in thukham vawt ziam?” ci in dongh uh hi.

⁸Jesus in, “Moses in zi khul thei natu thu hong pia hi, banghangziam cile noma sia hil hak mama nu hi. Ahihang bitphua ciil hunin tuabang thu om ngawl hi.

⁹A tatak in kong ci ciang, pasal khat in a zi sia, vaang kitan ngawlina sim ngawl, thudang taw a khul a, numei dang a tenpui le ama in palngul mawna vawt ahi hi,” ci hi.

¹⁰A nungzuite in ama tungah, “Pasal le zi kilaklaw ah ngamtat natu sia tu a bang ahi thong le kiteang ba leang phazaw hi,” ci uh hi.

¹¹Jesus in, “Hi kihilna sia mihing theampo atu kici ngawl a, Pathian ii piakte atu bek hi:

¹²Banghangziam cile pate ii zi a nei thei ngawl natu thu tam mama om hi; pawlkhat sia a nei thei ngawl tu in piang hi; pawlkhat sia ngual in tuabang tu ma in vawt hi; tuaciang pawlkhat in Vantungngam thu hangin nei ngawl hi. Hi kihilna a saang theite in, tuabangin ngamta taken,” ci hi.

Jesus in Patangnote Thupha pia

(Mark 10.13-16; Luke 18.15-17)

¹³Mihing pawlkhat in patangte tungah khut nga a, thungetsak tu in Jesus kungah paipui uh hi; ahihang nungzuite in tua mihingte tei hi.

¹⁴Jesus in, “Patangte ka kungah hong pai taken, khaam heak vun, banghangziam cile Vantungngam sia tuabangte atu ahi hi,” ci hi.

¹⁵Amate tungah a khut nga a tua zawkciang in paisan hi.

Sumhau Khangnopa

(Mark 10.17-31; Luke 18.18 -30)

¹⁶Khatvei lai in Jesus kungah pasal khat hong pai hi. “Sya awng, tawntung nuntakna nga natu in, bang nasep pha ka seam tu ziam?” ci in Jesus dongh hi.

¹⁷“A banghangin na phate huvau kei tungah hong dongh ni ziam? A pha khat bekma om hi. Nuntakna sungah na tum nuam le thupiakte tang in,” Jesus in ci hi.

¹⁸Ama in “A bang thupiakte ziam?” ci in dongh hi. Jesus in “Mihing that heak in, palngul mawna vawt heak in, ngu heak in, leitot thu taw ngual suankhial heak in;

¹⁹na pa le na nu zakta in, nangma le nangma na ki it bangin na innpaamte zongh it in,” ci in zokik hi.

²⁰“Hi thupiakte theampo ka zui siat sa hi,” khangnopa in ci hi. “A dang bang ka sep tu kul lai ziam?” ci hi.

²¹Jesus in ama munah, “Na cialcing nuam le, va pai tan a, na neisa theampo zuak in, sum na nga teng a zawngte pia tan, tua hile vantung ah na hau tu hi; tua zawkciang ka nung hong zui tan,” ci hi.

²²Khangnopa in hi thuteng a zaak ciangin khuangai in paisan hi, banghangziam cile ama hau mama hi.

²³Jesus in a nungzuite munah “A tatakina ka ciciang sumhaute Vantungngam sung a thet tu sia haksa mama tu hi.

²⁴Kong ci kik hi: kalaoh khat phin bilvang sungah a thawl tu sangin sumhaute Pathian Ngam sungah a tum tu sia haksa zaw lai hi,” ci hi.

²⁵Nungzuite in hi thu a zaak uh ciangin, amate lungmang mama uh hi. “Tuabang hi thong le akua peuma ngupna nga thei tu ziam?” ci uh hi.

²⁶Jesus in amate tangtan in en a, “Mihing atu in suak thei ngawl ahihang Pathian atu na khat pawpo suak thei hi,” ci hi.

²⁷Tuaciang Peter in, “En in, na theampo nusia in nang hong zui khu hi, bang ka nga tu uh ziam?” ci hi.

²⁸Jesus in, “A maan takin kong ci hi. Mihing Tapa sia hong pai tu Khang Thak hun sungah minthanna kumpi tokhum tungah hong to ciangin, no kei hong



zui sawm le niite zongh kumpi tokhum tungah to in Israel minam sawm le niite na uk tu uh hi.

²⁹Tuaciang a kuama po kei hu in, a inn, a suapuipate, a suapuinute, a pa, a nu, a tate, a leitangh khat pawpo a nusiata in, a see zakhat sangin tamzaw in saang tu a, tawntung nuntakna kipia tu hi.

³⁰Ahihangin tu laitak a masate hong nungkhak tu a, tu laitak a nungkhakte hong masa tu hi,” ci hi.

Matthew 20

Sapit huan sungah Naseamte thu

¹“Vantungngam sia hi bang hi. Khatvei lai in pasal khat in a sapit huan sungah diang tu in, mihing pawlkhat cial tu in, zingtuungin kuan hi.

²A kipia ngeiza ngun dangka pheak khat tek piak tu in, thukim in a cial te sia sapit huan sungah kuansak hi.

³Zingsang nai kua sa in sumzuakna a pai ciang, mihing pawlkhat nasep nei ngawlin om mu hi.

⁴Tua ahikom amate munah, ‘No zongh sapit huan sungah diang tavun, a kilawm bangin, nitha hong pia tu khi hi,’ ci hi.

⁵Tua ahikom amate kuan uh hi. Tuaciang sun nai sawm le nai nii sa ciang le nitak nai thum sa ciangin tuabang ma in mihing cial hi.

⁶Nai nga saat dektak ciangin, sumzuakna munah a pai le, midang pawlkhat a ding thawthong mu leleau hi. ‘Banghangin naseam ngawlin ni khat bup hi sungah na hun bosak thawthong nu ziam?’ ci in dongh hi.

⁷‘Kuama in hong cial ngawl hi,’ ci uh hi. ‘Tua ahile no zongh sapit huan sungah diang tavun,’ ci in sawl hi.

⁸‘Nitak ciangin huan neipa in a tha lampuipa munah, ‘Naseamte va sam tavun a, a nitha uh pia tan, a khakbel a kicialte pan panin pia tan a, a kicial masate pia khak tan’ ci in sawl hi.

⁹Nai nga ciangin nasep kipante sia, ngun dangka tang khat tek pia hi.



¹⁰Tua ahikom a kicial phitbelte in, thaman saang tu hong pai uhciang dangka tam zaw nga tu in ki um uh hi; ahizong amate zongh ngun dangka tang khat tek ma kipia hi.

¹¹Amate in a sum saan uh ciang, thacialpa phunsan hi.

¹²‘A khakbel a kicialte in, nai khat bek seam hi, ko sia nitang tum in sun nisa sungah diang khu hi, ahitazong ko nong piak za ma amate pia ni hi!’ ci hi.

¹³“Tuasia ciang, ‘Lawmte awng, hong ngai tavun, hong theam ngawl khi hi. Ngaisun leute ni khat bup thaman tu ngun dangka tang khat taw lungkim a kong cialte na hi uh hi.

¹⁴Tu in na ni thaman uh la in cia tavun. A khakbel a kicial hi sia pa zongh, no kong piak za ma pia nuam khi hi.

¹⁵Keima sum tungtaang ah ka uuk bang po in, zeak thei natu thunei hi kana ngawl khi ziam? Itciil ngawlin, ka piakte banghangin eang nu ziam?’ ci in zo hi.”

¹⁶Jesus in a thukhupna ah, “Tua ahiciang a khakte masa tu a, a masate khak tu hi,” ci hi.

Jesus in a Thi natu a Thumveina a Sonna

(Mark 10.32-34; Luke 18.31-34)

¹⁷Jesus in Jerusalem khua sang zuanin, a pai ciang, lampai kawmin a nungzuite munah thu son tuam hi.

¹⁸“Ngai vun, Jerusalem khua ah ih paito tu a, tua munah Mihing Tapa sia, thiampi liante le Thukhamhil syate tungah ki aap tu hi. Amate in, ama tungah thalup natu in thukhen tu uh hi.

¹⁹Tua zawkciang Gentilete tungah aap tu a, tuate in selno zazan in, vel tu a, thatlum tu hi; ahihang ni thum zawk ciangin, ama sia nuntakna sungah tho kik tu hi,” ci hi.

Nu khat ii Hu ngetna

(Mark 10.35 -45)

²⁰Tuaciang Zebedee zi sia a tate nii taw Jesus kungah pai a, a mai ah kun in huna khat ngen hi.



²¹“Bang nuam ni ziam?” ci in Jesus in dongh hi. “Kumpi na sua ciangin, hi ka tate nii sia khat na ziat sangah khat na vei sangah, na tosak natu in, kamciam hong pia tan,” ci in nupi nu in zokik hi.

²²Tapate nii munah Jesus in, “Na nget uh sia bang ziam ci in tel ngawl nu hi. Hi thuakna hai ka dawn tu sia dawn zo na tu nu ziam,” ci hi. “Dawn zo tu khu hi,” ci uh hi.

²³“Ka hai sia dawn takpi tu nu hi, ahihang ka ziatsang le ka veisang a to tute sia kei teal thei hi ngawl hi. Hi munte sia ka Pa ii see sa mite atu ahi hi,” ci hi.

²⁴Nungzui dang sawm teng in hi thu a zaak ciangin, tua unaute nii tungah amate thin uuk hi.

²⁵Tua ahikom Jesus in amate khawmtua a, “Leitung mihing uliante in a khutnuai a omte tungah uk theina thu nei a, lampuite in thu neina theampo nei hi, ci in na he uh hi.

²⁶Ahizong hi thu sia note zui tu ngeina hi ngawl tu hi. Note sungah khat in a lianbel a suak nuam le ama sia note ii naseam hi tu hi.

²⁷Note sungah lampui a suak nuamte na sila hi tu hi —

²⁸Mihing Tapa in ngual na sawl tu in hong pai ngawl a, naseam tu le a nuntakna pia in, mihing tam mamate tan tu in hong pai hi,” ci hi.

Jesus in Mittaw Nii Damsak

(Mark 10.46; Luke 18.35-43)

²⁹Jesus le a nungzuite in Jericho khua a nusiak ciang, mihonpi khat in zui uh hi.

³⁰Lampi hui ah a to mittaw nii in Jesus hong pai hi ci in a zaak ciangin, “David Tapa awng, ko hong hesuak tan, Topa awng,” ci in au uh hi.

³¹Mipite in amate tei in, a ngamlum ngawl natu in a sawl uh hang, amate a nging seseam in au a, “David Tapa awng, ko hong hesuak tan Topa,” ci uh hi.

³²Jesus in amate nii sam a, “Bang hong vawtsak leng na uuk uh ziam,” ci in dongh hi.



³³“Topa, khua nong musak tu uuk ung,” ci uh hi.

³⁴Jesus in amate sia khuangai huai sa in, a mitte thamsak a; thakhat in, amate khua mu thei a, amate in ama zui uh hi.

Matthew 21

Zawna taw Jerusalem Khuasung Tumna

(Mark 11.1-11; Luke 19.28-40; John 12.12-19)

¹Jesus le nungzuite in Jerusalem khua hong nai uh a, Olive Mual Bethphage a kicina mun hong theng hi. Tua munah Jesus in, a nungzuite nii sawlin paikholsak a,

²hi bangin thupia hi; “Na mai a om khuano sia ah pai tavun, tua munah laapui khat kikhii in om thakhat thu in na mu tu uh a, laano zongh a pui kungah om tu hi. A khau suutin a nii in keima kungah hong paipui tavun.

³Tuaciang khat po in, bang khatpo hong cile “Topa in tulmaw hi”: ci po leute thakhat in hong tha tu hi,” ci hi.

⁴Hi bangin a pian theina sia kamsangpa sonna teng a tangtut natu ahi hi.

⁵“Zion khuapi munah son vun, En vun, na kumpipa no kungah hong pai hi! Ama kiniamkhiak in laa tungah to a, laa ii ta laano tungah to hi.”

⁶Tua ahikom nungzuite in Jesus sawl bangin pai in vawt uh hi:

⁷laa le laano hong paipui uh a, a laktong puasilh uh dapin, Jesus in a tungah to hi.

⁸Mihonpi in a laktong puasilh uh lampi ah pha in a dangte in thingsawl saatin, lam tungah pha uh hi.

⁹Jesus mai le a nung panin a pai mihonte in, “David Tapa minthang hen! Topa min taw hong pai pa tungah Pathian in thupha pia taken! Hosanna, Pathian in pokna nga taken!” ci in au uh hi.

¹⁰Jerusalem khua sungah Jesus hong tum ciang, a khuathing ngamlum lialua uh hi. “Ama sia akua ziam?” ci in mipite in dongh uh hi.



¹¹“Hi pa sia Galilee ngam Nazareth pan kamsangpa Jesus hi,” mihonte in ci in zo uh hi.

Jesus Biakinn ah Pai

(Mark 11.15-19; Luke 19.45-48; John 2.13-22)

¹²Biakinn sungah Jesus tumin sumzuak sumlei theampote notkeak hi. Sum theakte ii sabuai le vakhu zuakte ii tokhumte sawnthalsak hi,

¹³tuaciang, “Laithiangtho sungah Pathian in, ‘Ka Biakinn sia thungetna inn’ kici tu hi, ci hi, ahihang note in ngutate bukna na suaksak uh hi!” ci hi.

¹⁴Mittaw le peangbai te Biakinn sung ama kungah hong pai uh a, amate damsak hi.

¹⁵Thiampi liante le Thukhamhil syate in, Jesus ii nalamdang a vawt hu le, patangte ii “David Tapa tungah Hosanna, kipok taken!” a ci hu in amate thin uuk hi.

¹⁶Tua ahikom amate in Jesus munah, “Amate in bangteng ci ziam, na za ziam?” ci in dongh hi. “Ka za takpi hi, Laithiangtho sungah sim ngei ngawl nu ziam? ‘Patangte le nausente kamsung panin, pokna a kicingin na piangsak hi’ ci hi,” ci in Jesus in zo hi.

¹⁷Jesus in amate nusia in Bethany zuan tu in, khuapi puasias ah paisuak a tua munah tua zan taam hi.

Jesus in Theikung Tomlaw

(Mark 11.12-14;20-24)

¹⁸Zingtuungin khuasung sang hong zot kik ciang, Jesus a ngilkial hi.

¹⁹Ama in lamhui ah theikung khat mu in vil a, ahihang a tee sim ngawl bangma a mu bua hi. Tua ahikom thingkung tungah, “Nang sia nga kik thei nawn ngawl tu ni hi!” ci hi. Thakhat thu in theikung kongaw cip paih hi.

²⁰Nungzuite in a mu ciangin lamdang sa uh hi. “Banghang hi za in kocip paih thei ziam?” ci uh hi.

²¹Jesus in “A tatak in kong ci ciang, um in muang la ba po leute hi thei tungah ka vawt bangin na vawt thei tu uh hi. Hisia bek zongh hi ngawlin, hi



mual munah, ‘Tho to in a, tuipi sungah kilawnsuk in,’ ci leute, tuabang ma in hong hi tu hi.

²²Na um uhle thungetna taw na nget uh po na nga tu uh hi,” ci hi.

Jesus Thuneina huvau Dokna

(Mark 11.27-33; Luke 20.1-8)

²³Biakinn sungah Jesus heak kik a, hilna a nei ciangin, thiampi liante le upate in, “Hi bang na sep thei natu in bang thuneina nei ni ziam? Akua in hi thunei theina hong pia ziam?” ci in dongh uh hi.

²⁴Jesus in, “Kei zongh kam khat hong dongh tu khi hi, tuasia nong zo thei uh le a bang thuneina taw hite seam khi ziam cisia kong son tu hi,” ci in zokik hi.

²⁵“John ii baptize piak theina thu sia, koisung pan hong pai ziam? Pathian tung pan ziam maw mihing tung pan ziam?” ci hi. Amate teng kinial uh a, “Bangbang ci tu hi ziam? ‘Pathian tung pan ci tu hi leang, tua hile banghangin John sia um ngawl nu ziam?’ hong ci tu hi.

²⁶“Ahihang ‘mihing tung pan’ ci thong leang, mipite kiitak huai hi, banghangziam cile amate theampo in John sia kamsang khat hi ci in saang hi,” ci uh hi.

²⁷Tua ahikom amate in Jesus munah, “He ngawl khu hi,” ci uh hi. Tuasia ciangin, amate tungah Jesus in, “Kei zongh hite bang thuneina taw vawt khi ziam ci in kong son peang buatu hi,” ci hi.

Tapa Niite taw Thusontena

²⁸“Tu in hi thu bangbang na ngaisun uh ziam? Khatvei lai in pasal khat in tapa nii nei hi. A tapa lianzaw sia kungah ama pai in, ‘Tapa awng, sapit huan ah tu ni in na kuan tan,’ ci hi.

²⁹Ama in, ‘Uuk ngawl khi hi’ ci napi a zawkciangin a thin kikheal kik in kuan hi.

³⁰Tua zawkciang a pa in a tapa dang khat sia munah tuabangma in sawl hi. Tua tapa in, ‘Pa, hi taken,’ ci napi a kuan bua hi.



³¹Tapate nii sung pan akua in a pa thu ni zaw ziam?” ci hi. “A tapa lianzaw sia in ni zaw hi” ci uh hi. Tuaciang Jesus in amate tungah, "Kei kong ci in ah: Shiadongte le numei paktatte in Pathian Ukna ngam sungah note sangin theng masa zaw tu hi.

³²Banghangziam cile Tuiphumpa John hong pai a, thumaan lampi hong hil napi, ama na um bua uh hi; ahihang shiadongte le numei paktatte in um uh hi. Hite na mu zawk ngangawn in, na thin uh kikheal in na um nuam bua uh hi.”

Sapit huan A Saapthawte Thusonteena

(Mark 12.1-12; Luke 20.9-19)

³³Jesus in “Thusonteena dang khat ngai vun,” ci hi. “Khatvei lai in leitangh nei khat in, sapit huan khat vawt a, a kiimkot dal vawtin, sapittui suuk natu dum to a, lo hun natu teitan khat daw hi. Tua zawkciang a lo tuasia saapthawsak tu in, ngual a aap zawkciang, ama khualhaw tu in ding hi.

³⁴Sapit nga law hun ciangin, ama tel tuteng a saang tu in, huanthote munah a silate paisak hi.

³⁵Huan thote in silate man a, khat sia saatin, khat sia that uh a, khat sia suangtum taw deang uh hi.

³⁶Leitangh neipa in a silate a tamzaw paisak leleau hi, ahihang huan thote in a masate tungah a ngamtat uh bangma in, taa kik uh hi.

³⁷A khakbel ciangin, ‘Ka tapa buang hong zataksak tu zam,’ ci in, a tapa sawl hi.

³⁸Ahihang huan thote in a tapa a mu uh ciangin, ‘Hisia huan neipa tapa hi. Hong pai tavun, thatlum tu hi; tua hile a neisa teng ih tang thei tu hi!’ ci uh hi.

³⁹Tua ahikom ama man in, sapithuan pua sangah a lot zawkciang, thatlum hi.

⁴⁰“Tu in huan neipa sia sapit huan sungah hong pai tak ciangin huan thote bang law tu ziam?” ci in Jesus in dongh hi.



⁴¹“Ama in tua misiate thatlum nanak tu a, a hun zui in, thaw ante, ama saan tu bangun a pia tu ngualdangte tungah sapit huan sia saapthaw tu in aap tu hi,” ci in zo hi.

⁴²Jesus in, “Laithiangtho ci thu sia sim ngeingawl nu ziam? ‘Innsate ii mannung ngawl asak a nil suangtum sia a kizangh bel suangtum hong suak hi. Hi thu in Topa ii nasep na hi a; ih mu ciangin lamdang mama hi!’

⁴³“Tua ahikom kong ci hi, Pathian Ngam sia no kung pan in, kila tu a, nga pha a piangsak mihingte tungah kipia tu hi.

⁴⁴Hi suang tungah a taak sia a kuapo ahizong zantham in vui tu hi; tua suang sia khat po ii tungah a taak ahile tua pa zantham in thi tu hi.”

⁴⁵Pharisee te le thiampi liante in Jesus thuson nate za uh a, amate a ci nopna ahi hunlam tel uh hi.

⁴⁶Tua ahikom ama sia mat sawm uh a, ahihang amate in mihonpite kiita uh hi, banghangziam cile amate in Jesus sia kamsang khat hi ci in ngaisun uh hi.

Matthew 22

Mopoi Thusonteen

(Luke 14.15-24)

¹Jesus in mihingte munah thusonteenate zangh kikin thu son hi.

²“Vantungngam thu sia hi bang ahi hi. Khatvei lai in kumpipa khat in a tapa atu mopoi anneakna khat vawt tu in kipan hi.

³Ama in a naseamte sawl a mopoi hong siim natu in, khualhilsak hi. Ahihang amate pai nuam ngawl hi.

⁴Tua ahikom naseam dangte paisak a, khual a kihilte munah hi bang sawl hi. ‘Ka poi sia tu in a kipan thei tu hi zo hi; ka khuital le ka khuino thaute kingo zo hi, na theampo kinging sa in om zo hi. Mopoi ah hong pai tavun!’

⁵Ahihang khual a kihilte in awlmawk ngawlin amate nasep tekma sep san uh hi: khat in a lokuan a, a dang khat in a sumbuk ah pai in,

⁶a dangte in kumpipa naseamte pummat a, velin thatlum uh hi.



⁷Kumpipa thin uuk mama ahikom a ngalkapte paisak a, mihing that te thatlum in a khuapi halthapsak hi.

⁸Ama in a naseamte sam a, ‘Ka mopoai kipat thei lian tu in, om zo ahihang ka khualhil sate mopoai taw kiphu ngawl hi.

⁹Tu in lampi liante ah pai tavun a, mihing na mu zaza uh sam tavun,’ ci hi.

¹⁰Tua ahikom naseamte in lampi liante ah pai in a mu theampo le mihing pha mihing sia a kibangin khawmtua uh hi; tuaciang in mopoai vawtna inn dim hi.

¹¹“Kumpipa sungtang in a leangnate a et ciang, mopoai puan silh ngawlpa khat mu hi.

¹²‘Lawm awng, mopoai puan silh ngawlin hi sungah bangbangin hong tum thei ni ziam?’ ci in dongh hi. Ahihang tua pa in a zo natu a he bua hi.

¹³Tuasia ciang kumpipa in naseamte munah, ‘Hisia pa a khut a peang letheen vun a, doipua khuazingna ah vawk tavun. Tua sungah ama kapin ha ngoai tu hi,’ ” ci hi.

¹⁴Jesus in a thukhupna ah, “Tam mama kizam tu a tawmbek kiteal tu hi,” ci hi.

Shia Piakna huvau Kidokna

(Mark 12.13-17; Luke 20.20-26)

¹⁵Pharisee te pai a, kam doknate taw Jesus aita sawm uh hi.

¹⁶Tua zawkciang amate in, a nungzuite pawlkhat le Herod mihingte pawlkhat paisak uh hi. “Sya awng, thumaan na son hi ci in hong he khu hi. Pathian ii mihingte atu a deisak thutakte, mihingte in bang ngaisun ci patau ngawlin na hil hi. Banghangziam cile mihingte maitang na zakta bua hi.

¹⁷Bangbang ngaisun ni ziam?, Rome Kumpipa shia ih piak tu sia, ih Thukham taw kisi ziam, kisi ngawl ziam? hong son tan?” ci uh hi.

¹⁸Ahihang Jesus in amate thin sungah, thusia a sawmna, he ahikom, “A kihi theamsakte awng! banghangin hong aita nu ziam?



¹⁹Shia piak tu sumtang sia hong lak tavun,” ci hi. Amate in sumtang a kungah paipui uh hi,

²⁰Jesus in, “Hite akua lim le akua min ziam?” ci in dongh hi.

²¹“Kumpi lianpa aa hi” ci in zo uh hi. Tua ahikom Jesus in, “Pha hi, Kumpi lianpa sum sia Kumpi lianpa na pia vun a, Pathian sum sia Pathian na pia vun,” ci hi.

²²Hi thu a zaak uh ciangin amate in lamdang sa uh hi; ta ciangin ama nusia in paisan uh hi.

Thina pan Thaw kikna Thu dokna

(Mark 12.18-27; Luke 20.27-40)

²³Tua ni in Sadducee te pawlkhat Jesus kungah pai a, “Mihingte in thina pan tho kik ngawl tu hi,” ci uh hi.

²⁴“Syapa awng, Moses ci na panin, pasal khat sia ta nei ngawlin a thi le a suapuipa in meingongnu sia tenpui taken, tua hile ta a nei uh ciang, mithipa ta bangin, kingaisun tu hi.

²⁵Tu in hi sungah unau pa sali om ngei hi. A lianbel sia in zi nei in ta nei ngawlin thi a meingongnu sia, a suapuipa in lua hi.

²⁶Tuabangma in a niina a thumna panin kipan a salina dongin meingongnu lua susuk uh hi.

²⁷A khakbel ciangin meingongnu zongh thi hi.

²⁸Tu in mithite thawkik ni ciangin tua numei sia akua ii zi hi tu ziam? A vekpi in ama tenpui ngei tek hi,” ci uh hi.

²⁹Jesus in, “Pathian vaangletna le Laithiangtho na heak ngawl uh hu in bangza in khial nu ziam!

³⁰Banghangziam cile mithite a thaw kik ciang, vantung ah a om vantung lalangte bang hi tu a, kiteenna om ngawl tu hi.

³¹Tu in mithite thaw kikna thu, Pathian hong son thute sim ngei ngawl nu ziam? Ama in,



³²‘Keima in Abraham Pathian, Isaac Pathian, Jacob Pathian ka hi hi,’ ci hi. Ama in a nungtate Pathian hi a, a thisate Pathian ahi bua hi,” ci hi.

³³Mihonte in hi thu a zaak uh ciangin, a hilmate lamdang sa uh hi.

A Lian Thupiakna

(Mark 12.28-34; Luke 10.25-28)

³⁴Sadducee te a pau natu a heak ngawl dongin, Jesus in a koi zawk ciang, Pharisee te hong kikhawmtua uh a,

³⁵amate sung panin, Thukham hil sya khat in, Jesus sia thudokna khat taw aita sawm hi.

³⁶“Sya awng, Thukham sung teng pan koisia lianbel ziam?” ci in dongh hi.

³⁷Jesus in, “ ‘Na Topa Pathian sia na thin theampo, na thaa theampo le na ngaisutna theampo taw it in.’

³⁸Hisia in a lianbel le a thupibel Thupiak ahi hi.

³⁹A niina Thupiak thupibel sia tuasia taw ma in kibang hi: ‘Nangma le nangma na ki it bangin midangte zongh na it in.’

⁴⁰Moses Thukham theampo le kamsangte hilna theampo sia hi thu niite kibilphu hi,” ci hi.

Messiah huvau Dokna

(Mark 12.35-37; Luke 20.41-44)

⁴¹Pharisee te pawlkhat a kikhop uh ciangin Jesus in,

⁴²“Messiah huvau bangbang in ngaisun nu ziam? Ama akua ii suan ziam?” ci in dongh hi. “Ama sia David suan hi,” ci uh hi.

⁴³Jesus in “Tua hile banghangin Thaa in David munah, ‘Topa’ cisak ziam?” ci in dongh hi. David in,

⁴⁴“Topa in ka Topa munah: Na ngalte na peang nuai ah ka koi dong, hi sung ka ziat sangah hong to tan,’ ci hi.

⁴⁵“David in ama sia ‘Topa’ ci ahile Messiah sia bangbang in, David ii suan hi thei tu ziam?” ci in Jesus in zokik hi.



⁴⁶Jesus dokna kuama in a zo thei bua uh a, tua ni pan kipan kuama in ama thu a dongh ngam nawn bua uh hi.

Matthew 23

Jesus in Thukham hil Syate le Pharisee te pan Kidop natu Hil

(Mark 12.38-39; Luke 11.43,46; 20.45-46)

¹Tuaciang Jesus in mipite tung le nungzuite tungah thu son hi.

²“Thukham hil syate le Pharisee te sia Moses Thukham a phen thei tu, thu neite ahi hi.

³Tua ahikom amate in vawt a hong sawl peuma ni in zui vun; ahihang amate ngamtatnate zui heak vun, banghangziam cile amate in a hil uh bangin ngamta ngawl uh hi.

⁴Mihingte ii nungzaang ah vanhngit a puak hakte sia amate ma ii sot to ahi hi, ahihang amate in tua vanhngitte puakpui tu in, a khutme dawn zongh a tung nuam bua uh hi.

⁵Mihingte mu tu in amate in na theampo seam uh hi. Amate talki tung le a baante tungah Laithiangtho kammal a ki at savun pheakte bangza in beak ziam, en vun! A laktong puasilh mong a teapkaaite zongh bangza in sausak ziam!

⁶Poi sungah amate tona a nuambelte ahizong, synagogue sungah a kikhaam sa tonate ahizong amate in to thanuamsap a;

⁷amate in vanhzuakna munah ngual ii paupui tu thangai a, ‘Syapa’ ci in a sap tu uuk uh hi.

⁸Note sia ‘Syapa’ kici ngawl tu nu hi, banghangziam cile note sia unau khat vive hi a, Sya khat bek na nei uh hi.

⁹Tuaciangin hi leitung ah kuama ‘Pa awng’ ci heak vun, banghangziam cile vantung a Pa khat bekma na nei uh hi.

¹⁰‘Lampui pa awng,’ zongh na kicisak heak vun, banghangziam cile Messiah khat bek ma na lampui uh ahi hi.

¹¹No sungah a lianbel sia in note naseam hi tu hi.



¹²A kuapo ama le ama a kiliansak sia kiniamsak tu a, a kuama po a kiniamkhiak sia, thupi in kikoi tu hi.

Jesus in Amate Kihi theamsaknate Mawsiat

(Mark 12.40; Luke 11.39-42, 44, 52; 20.47)

¹³“Thukham hil syate le Pharisee te awng! Note atu in bangza in lauhuai ziam? No a kihi theamsakte awng! Ngual mai panin, vantung Ngam kongkha khaktan nu hi, tuaciang noma mama in tua sungah na tum nuam bua uh hi, tum nuam in a hanciamte zongh, a tum tu na oai bua uh hi!

¹⁴Thukham hil syate le Pharisee te awng! No atu in bangza lauhuai ziam? A kihi theamsakte awng! Meingongte na zo thaw uh a, a inn uh na phuul uh hi. Tua zawkciang na thunget a sau mama in na kivawt tawm uh hi! Tua hu in daan na thuk tu sia nasia mama tu hi!

¹⁵“Thukham hil syate le Pharisee te awng! No a kihi theamsakte awng! No atu in bangza in lauhuai ziam? Noma upna sungah mihing khat na nga thei natu in, tuipei tungah pai a, ngam theampo kantan in pai nu hi; tuaciang tuabangin nungzui khat na nga zawk uhciang, noma sangin hell ngam sungah a zaa nii in theng tu in a kilawm suaksak nu hi.

¹⁶“Mittaw ngual lamlakte awng! No atu in bangza in lauhuai ziam? ‘Biakinn taw a kiciamte a kamciam a peal hangin phamaw ngawl hi; ahihang Biakinn sungah khamte taw a kiciamte sia a kamciam bangin a vawt uh kul hi,’ na ci uh hi.

¹⁷Mittaw mawmawte awng! koi sia thupi zaw ziam, kham hi zaw ziam, kham a thiangthosak Biakinn sia hi zaw ziam?

¹⁸Na kihil thua lai na uh pan, ‘Biaktau taw a kiciamte sia a ciampeal hangin phamaw ngawl hi; ahihang biakna tau tung a om nate taw a kiciamte sia a kamciam bangin tung tu hi,’ ci nu hi.

¹⁹Na mit uh bangza in taw ziam! Biakpiak natu in a kikoi nate thupi zaw ziam maw, tua nate a thiangthosak biaknatau sia thupi zaw ziam?

²⁰Tua ahikom mihing khat in biakna tau taw a kiciam le, tua biaknatau le a tung a om na theampo taw ama kiciam ahi hi;



²¹tuaciang Biakinn taw kiciam ciangin tua Biakinn le a sung a teang Pathian taw zongh kiciam hi si a,

²²tuaciang khatpo in vantung taw a kiciam le Pathian tokhum le a tungah a to pa taw kiciam ahi hi.

²³“Thukham hil syate le Pharisee te awng! A kihi theamsakte awng! No atu in bangza lauhuai ziam? An me sungah hel thei lonamsia, masala le thing namtuite dongin, see sawm sua see khat sia Pathian na pia uh hi, ahihang Thukham sungah a kihil a thupi tatak ahi, thutang khenna, hesuakna le thumaannate na awlmaw bua uh hi. Hite zongh na zak tu uh hi a, a dangte zongh na awlmawk ngawl tu hi saap ngawl hi.

²⁴Mittaw ngual lamlakte awng! Na dawn tu uh tui sung pan tho khat po sia nasia takin na chit uh hi; ahihang kalaoh khat na lopvalh uh hi!

²⁵“Thukham hil syate Pharisee te awng! A kihi theamsakte awng! No atu in bangza lauhuai ziam? Hai le kuang sia a puasang teng na sil uh hi, ahizong sungsang sia zawthawk thu le duhopna taw na nga uh nate taw kidim hi.

²⁶Pharisee mittawte awng! Hai sia a sungsang sil phot leute a puasang zongh thiang tu hi.

²⁷“Thukham hil syate le Pharisee te awng! A kihi theamsakte awng! No atu in bangza lauhuai ziam? No sia suangkaangtui taw a kizut thanbuk taw kibang nu hi, tuate sia a puasang hoi ahihang a sungsang ah mithi ngu le mithi muat taw kidim hi.

²⁸Tuasia bangma in no sia a pua sang panin a kuama po ii muna ah a hoi bang na hi uh hi, ahihang na sunguh ahile kihi thepsakna le mawna taw kidim nu hi.

Jesus in A Daan Thuak tu uh Sonkhol

(Luke 11.47-51)

²⁹“Thukham hil syate le Phariseete! A kihi theamsakte awng! No atu in bangza lauhuai ziam? Kamsangte atu in thaankuul sia a et hoi tu in na vawt uh a, mip hate atu in, tepteena khan sia na zepsak uh hi;



³⁰Tuaciangin ka taangpupite khan lai in, a nungtate hi le ung amate ii septe seam buan ci ung, kamsangte that buan ci ung, ci nu hi.

³¹Tua ahikom kamsangte a thatlumte ii suante na hi uh hunlam noma pauna panin kipholaak na hi uh hi.

³²Tua ahiciang na taangpupite ii pat sa nate na zaw dong seam vet tavun!

³³Ngul le ngul ii suante awng, hell sungah hong kikhiak suk natu panin, bangbangin suakta tu in ki um nu ziam!

³⁴Tua ahikom, kamsangte, mihing ciimte le syate sia note kungah kong paisak tu hi; tuate pawlkhat na thatlum tu uh a, pawlkhat thinglamte tungah na kilh tu a, pawlkhat sia synagogue inn sungah na vel tu uh a, khuapi khat pan khuapi khat ah na delkot tu uh hi.

³⁵Tua hu in mawna nei ngawl Abel pan a kipan, sangaw na biaknatau le Biakinn kilaklaw a na thalup uh Berechiah tapa Zechariah le mawna nei ngawl bul a na thalup uh theampo hangin thuak tu daan sia note tungah hong tung tu hi.

³⁶A tatak in kong ci ciang mihing that theampo hangin na thuak uh daan sia tu hun mihingte ii tungah hong tung tu hi!

Jesus ii Jerusalem A itna

(Luke 13.34-35)

³⁷“Jerusalem, Jerusalem awng! Nang in kamsangte na thatlum a, Pathian kamtaite suangtum taw na hua hi. Akpui in aknote a thakhui nuai ah a uap bangin, bang tan vei na mihingte angvan nuam khi ziam? ahihang na oai bua hi!

³⁸Tua ahikom Biakinn sia kitaisan tu a, a hawm in om tu hi.

³⁹Hong ci khi hi; tu pan kipan, ‘Topa min taw hong pai pa sia Pathian in thupha pia taken,’ na ci uh mateng in, kei nong mu kik nawn buatu hi. ” a ci hi.

Matthew 24

Jesus in Biakinpi Lalthap natu Son

(Mark 13.1-2; Luke 21.5-6)



¹Biakinn pan Jesus a pusua zawkciang a nungzuite in Biakinn huangsung a inn dangte lak nuam in neak uh hi.

²Jesus in, “Hi hi, en tek vun. A tatak in kong ci ciang, hi sungah suangte khat zongh a omna ngei san ah om nawn ngawl tu hi; a vekpi kipheltham siat tu hi,” ci hi.

Ngimna le Siatvawtna
(Mark 13.3-13; Luke 21.7-19)

³Jesus in Olive Mual tungah a to laitakin, a nungzuite ama kungah hong pai tuam uh hi. “Hi thu sia bang hun ciangin hong tung tu a, tuaciang nong pai kik tu le hun bo hun, a kilak natu in bang hong piang tu ziam?” ci in dongh uh hi.

⁴Jesus in, “Kidawm tavun, kuama in theamsak heak vun.

⁵Banghangziam cile mihing tam mamate kei min zanghin hong pai tu a, ‘Keima in Messiah ka hi hi’ ci tu a mihing tam mama theam tu hi.

⁶A naina ah ngal kidona aw na za tu uh a, a khualana ah ngal kidona thu hong kison tu hi; ahihang patau heak vun. Tuabangte hong piang nanak tu a, ahihang hun bona hong theng zo hi, cina hi ngawl hi.

⁷Ngam khat le ngam khat kisim tu hi; kumpi khat le khat kido tu hi. Mun theampo ah kialpi tung tu a, zinliing tu hi.

⁸Hite theampo sia nautut kipat ciang, a nat bang ahi hi.

⁹“Tua zawkciang note hong kiman tu a, daan piak tu le thalup tu in hong ki aap tu hi. Keima hu in mihing theampo in note hong ngaimaw tu hi.

¹⁰Mihing tam mama in tua hun ciangin, a upna uh nusia tu hi; amate khat le khat kileeheak tu a, khat le khat kingaimaw tu hi.

¹¹Tua zawkciang leitot kamsang tam mama piang tu a, mihing tam mama theam tu hi.

¹²Tuabangin siatna hong kizel tu a, mihing tam mamate ki itna kiam tu hi.

¹³Ahihang a tawp dong a thumaante kingum tu hi.



¹⁴Tuaciangin, hi Kumpingam Lungdamna Thupha sia, leitung theampo ah tetti tu in minam theampo tungah kihil kawkoai tu hi; tua zawkciang hun bona hong theng tu hi.

A Kiitak huai Mama Thu
(Mark 13.14-23; Luke 21.20-24)

¹⁵“Kamsangpa Daniel ii son ‘A kiitak huai mama thu sia’ na mu tu uh hi. Tua in a thiangthona munah ding tu hi.” (Hi lai a sim sia in tel taken!)

¹⁶“Tuaciang Judea a omte in mual tungah tai taken.

¹⁷Innkhum tung a om mihing khat in ama ii vanhte la tu in tuaksuk nawn heak hen.

¹⁸Lo sungah a om mihing khat in a laktong puasilh la tu in, heak kik nawn heak hen.

¹⁹Tua hun sungah a om numei naupaaite le nau noailuaite atu in bangza he huai tu ziam?

²⁰Na tai tu uh hun sia phalbi lai le Sabbath ni ahi ngawl natu in Pathian tungah thungen vun.

²¹Banghangziam cile tua hun ah ngimna sia leitung a kipat pan kipan, tuni dong a piang ngei ngimnate theampo sangin nasia zaw pek tu hi. Tuabang ngimna sia maisang zongh ah om kik ngei nawn ngawl tu hi.

²²Ahihang Pathian in a ni sia khiam suk zo hi; tua hi buale kuama a suakta buatu hi. Ahitazong a tealtuam mihingte atu in Pathian in a ni khiam tu hi.

²³“Tuasia ciang khat po in, ‘En in, hi sungah Messiah om hi!’ ci in ahizong, ‘Zia sungah om hi!’ ci in ahizong hong cile um heak vun.

²⁴Banghangziam cile Messiah theam le kamsang theamte hong piang tu hi; hi thei hile Pathian teal sa mihingte ngangawn a theam natu in, amate in nalamdang lakna liante le a tumdang nate tam mama hong vawt tu hi.

²⁵Ngai vun! a hun hong thet ma in hong sonkhol zo khi hi.



²⁶“Tua ahibuale mihingte in, ‘En vun, ama sia senneal ngam sungah om hi!’ hong cile zong, tua munah pai heak vun; tua ahibuale ‘En vun, ama sia hi sungah buu hi,’ hong cile zong na um heak vun.

²⁷Banghangziam cile Mihing Tapa sia vantung buppi ah nisuana pan nitumna dong a kantan khualeng taang bangin hong pai tu hi.

²⁸“Mithi luang omna mun po ah vaciikte kikhawmtua tu hi.

Mihing Tapa hong Paina

(Mark 13.24-27; Luke 21.25-28)

²⁹“Tua hun ah ngimnate zawk a hai ngawlin, ni hong taang nawn ngawl tu a, tha zongh taang nawn ngawl tu hi, aksite van panin taaksuk tu a, van ah a om nate sia amate ii zinh tek panin kipialsak siat tu hi.

³⁰Tuasia ciang Mihing Tapa ii lim sia van ah hong kilangh tu hi; Mihing Tapa sia van ah meeikaai tung pan vaangletna le minthanna lianpi taw hong pai a mu uh ciangin, leitung mihing theampo kap tu uh hi.

³¹Lemlepui aw hong nging tu a, tuaciang ama in leimong kingh lite ah a vantung lalangte sawl in, amate in ama teal sa mite leimong khat pan mong khat dongin khawmtua tu hi.

Theikung taw Thuheak theina

(Mark 13.28-31; Luke 21.29-33)

³²“Theikung in hilsak tavun. A baakte zongh hingin hong moisua ciangin, a teeno meang tu in kithoai a, tuasia ciang khuakhal hong nai hi ci in na he uh hi.

³³Tuasia bangma in, hite theampo na mu uh ciangin, a hun hong nai a, hong kipapan zo hi, ci in na he tu uh hi.

³⁴Tu laitak a nungta mihingte a thi siat ma in, hi thu sia hong piang tu hi ci in phawk tavun.

³⁵Vantung le simlei a bo tu hi, ahihang ka kammalte a bo ngei buatu hi.

Kuama in a Ni le a Nai He ngawl

(Mark 13.32-37; Luke 17.26-30; 34-36)



³⁶“Ahitazong tua a ni le a nai tu sia kuama in he ngawl hi — vantung ah vantung mite ahizong, Tapa ahizong, he ngawl hi; Pa bek in he hi.

³⁷Mihing Tapa hong pai natu sia Noah hun lai thupiang bang hi tu hi.

³⁸Tuipi liim ma in mihingte an ne tui dawnin om a, numei le pa kiteangin, Noah ii teambaw sungah a tum tatak ni dong sia tuabangin om uh hi.

³⁹Tua hi napi tui ii a taikeak dongin, bang thu piang ziam ci in amate in a phawk bua uh hi. Mihing Tapa hong pai ciang zong tuabangma hi tu hi.

⁴⁰Tua hun laitakin pasal nii sia lo sungah naseam khawm tu hi: khat kila tu a khat kikhe tu hi.

⁴¹Numei nii an ngoaina ah diang tu hi: khat kila tu a, khat kikhe tu hi.

⁴²“A kingingta sa in om vun, banghangziam cile Topa hong pai tu ni sia na he bua uh hi.

⁴³Inn neipa khat in ngutate ii hong pai hun tu he le, mu ngawlin om tu a, ngutate in inn a phuulsak buatu hi, ci in na heak uh ahi hi.

⁴⁴Tua ahiciang no zongh, a tawntung kinging sa in om vun, banghangziam cile Mihing Tapa in na muanmawk ngawl hun laitakin hong pai tu hi.

Thumaan Ahibuale Thumaan ngawl Naseampa

(Luke 12.41-48)

⁴⁵“Thumaan a, a ciim naseampa sia akua bangte ziam? Ama sia naseam dangte a uk tu le a hun a hun in an a pia tu in a kikoipa ahi hi.

⁴⁶A Topa hong cia laitakin a kisawl bang a naseam hi ci in a Topa ii mu naseampa sia bangza in lungdam tu ziam?

⁴⁷A tatak in kong ci ciang, a Topa in tua naseampa sia a neisa theampo uk tu in koi tu hi.

⁴⁸Ahihang tua naseampa sia a ngina ngawl khat ahile, a Topa sia hong cia hak lai vak, ci in ama le ama kitheam tu a,

⁴⁹tuaciangin a nasep khoppui naseam dangte saatin, zukham theite taw, an ne zu ne in om tu hi.



⁵⁰Tuaciangin tua naseampa ii Topa sia a muanmawk ngawl hun le a heak ngawl ni hun khat ciang hong cia tu hi.

⁵¹A Topa in ama sia nasia takin ngim pia tu a, a kihi theamsakte ii thuak tu teng thuaksak tu hi. Tua munah ama sia kap in ha ngoai tu hi,” ci hi.

Matthew 25

Ngaknu Sawmte taw in Thusontena

¹“Tua hun ciangin Vantungngam sia hi bang hi tu hi. Khatvei lai in ngaknu sawm sia a meivak uh la in, zineipa muak tu in pai uh hi.

²Ngaknu ngate mawmaw a, a dang ngate ciim hi.

³A mawmaw nga teng in meiinn keng ahihang meitui keng thua ngawl uh hi,

⁴a ciimte ahile meiinn atu meitui bung dimin keng thua uh hi.

⁵Zineipa theng hak ahikom, ngaknute lusu in mu uh hi.

⁶“Zankim zawkciangin tangkona aw khat hong nging a, ‘Hi sungah zineipa hong pai hi. Hong pai tavun a muak vun,’ ci hi.

⁷Ngaknu sawmte khanglo in a meiinnte puua uh hi.

⁸A mawmawte in a ciimte munah, ‘Na meitui uh tawm hong hawm tavun, banghangziam cile ka meiinnte mit tu hi’ ci uh hi.

⁹A ciimte in, ‘hi thei mama ngawl hi; no atu le ko atu in kicing ngawl hi. Sumbuk ah pai in lei tavun;’ ci uh hi.

¹⁰Tua ahikom a mawmaw ngaknute sia meitui lei tu in pai uh hi; tuaciang amate pai laanin zineipa hong theng hi. A kinging sa a om ngaknu nga teng sia ama taw kiteenna poai ah sungtang uh a, tuaciang kongkha kikhak hi.

¹¹“Tua zawkciangin ngaknu dangte hong theng hi. ‘Topa, Topa! Hong tumsak tan!’ ci in au uh hi.

¹²‘Hong tumsak mama ngawl tu khi hi! No hong he ngawl khi hi,’ ci in zineipa in zo hi.”



13“Tua ahikom kikeam khol vun, banghangziam cile, a ni tu le a nai tu na he bua uh hi,” ci in Jesus in thukhup hi.

Naseam Thumte Thusonteen
(Luke 19.11-27)

14“Tua hun ciangin Vantungngam sia hi bang hi tu hi. Khatvei lai in pasal khat in khualhaw sawm hi; a naseamte samin a neisa teng aap hi.

15Mihing simin amate thiamna om bangin, ama in pia hi: khat ii tungah kham dangka tulnga pia hi; a dang khat ii tungah tulnii, a dang khat ii tungah tulkhat pia hi. Tua zawkciang ama sia khualhaw tu in ding hi.

16Dangka tulnga a kipia naseampa in, thakhat ma in sumvawt in, a dang tulnga ma ngathua hi.

17Tuasia bangma in dangka tulnii a nga sia zongh in, a dang tulnii ma nga thua hi.

18Ahihang dangka tulkhat a nga naseampa in pai a, leidum to in, a Topa dangka teng phual hi.

19“A khua ngei zawkciang naseamte ii Topa hong cia kik a, amate sum tepteen tek sit hi.

20Dangka tulnga a saang naseampa hong pai a, a dang tulnga ama tungah aap hi. ‘Topa, dangka tulnga hong pia ni hi. En in! Hi sungah dangka tulnga ka meetsak hi,’ ci hi.

21‘Pha hi, a thumaan naseam pha pa awng, na tawmno tungah thumaan na hikom, na tampite uk tu in kong koi tu hi. Kei taw lungdam khawm tu in hong pai tan!’ ci hi.

22“Tuaciang tulnii a kipia naseampa hong pai a, ‘Topa, dangka tulnii hong pia ni hi. En in! Hi sungah ka thalaw dangka tulnii om hi,’ ci hi.

23‘Pha hi, a thumaan naseam pha pa awng! Na tawmno tungah thumaan na hikom, na tampite uk tu in, kong koi tu hi. Kei taw lungdam khawm tu in hong pai tan!’ ci hi.



²⁴“Tuaciang in dangka tulkhat a saang naseampa hong pai a, ‘Topa, nang sia mihing sonham khat na hi hunlam kong he hi; na tuu ngawl na munah a at pa, na poai ngawl na munah anla pa na hi sia kong he hi.

²⁵Lau ka hikom pai in, lei sungah na sum teng ka phual hi. En in, hi sungah na neisa teng om hi,’ ci hi.

²⁶“ ‘A datham misia naseampa awng! Ka tu ngawl na munah at a, ka poai ngawl na munah a lapa hi, ci in hong he na hi ziam?’ a Topa in ci hi.

²⁷“Tua ahile pha hi; ka sum teng sia sum khol na munah na koisak po lete, kong cia kik ciang a meet taw a vekpi nga kik tu hi ngawl khi ziam?

²⁸Tu in a sum laaksak vun a, tulsawm a neipa piaksak tavun.

²⁹Banghangziam cile, a neisate tungah a tamzaw kipia thua tu a hau seseam tu hi; ahihang bangma a nei ngawlpa tung pan a nei susun kila tu hi.

³⁰Hi naseam ngina ngawlpa ahile — doipua khuazing sungah not tavun; tua munah kap in ha ngoai tu hi,’ ci hi.

A khakbel Thukhenna

³¹“Mihing Tapa sia Kumpi bangin vantung lalangte taw hong pai ciangin, a kumpi tokhum tungah to tu a,

³²tuaciangin minam theampo ama mai ah kikhawm tu hi. Tua zawkciangin ama in tuu cing khat ii tuu le keal a khen bangin pawl nii in khen tu hi.

³³Ama in thumaan thutang mite sia a ziat sangah koi tu a, a dang teng sia a veisang ah koi tu hi.

³⁴Tuaciang Kumpipa in ziatsang a om mihingte munah, ‘Hong pai tavun; Ka pa ii thupha piakte awng! Simlei a kubitphua ciil panin no atu a kipua khol sate lua tu in hong pai tavun.

³⁵Ka ngilkial laitakin an nong vaak uh hi, ka dangko laitakin tui nong pia uh hi; zin in ka vak laitakin na inn uh ah zin nong do uh a,

³⁶puansilh ka sel laitakin puan nong khu uh hi; ka cinat laitakin nong ou uh a, thong sungah nong ve uh hi’ ci hi.



³⁷“A thumaan thutang mihingte in, ‘Topa, bang hun in ngilkial a na om hong mu a, an hong vaak ka na khu ziam?, ahibuale na dangko a tui neak tu, banghun in hong pia kana khu ziam?’

³⁸Khualmi in bang hunin nong vaak a, ka inn uh ah zin hong do ngei khu ziam? ahibuale puansilh sel in bang hunin na om a puan hong khu ngei kana khu ziam?

³⁹Bang hunin na cinat ahizong, na thongtaak lai ahizong, hong mu ngei a hong ve kana khu ziam?’ ci uh hi.

⁴⁰Kumpipa in, ‘A maan tak ka ci ciang, hi ka suapuite a nobel khat tungah na vawt uh sia kei tung a hong vawt na hi uh hi!’ ci in zo tu hi.

⁴¹“Tuaciangin a veisang a tote munah, ‘Kei kung pan tai vun, no Pathian ii haamsiat sate awng! Doaimangpa le a lalangte atu a kivawt khol sa tawntung meikuang sungah pai tavun.

⁴²Ka ngilkial laitak in hong vaak ngawl nu hi, ka dangko laitak in ka neak tu bangma nong pia bua uh hi;

⁴³khualmi in ka om a na inn sungah nong saang bua uh hi, puansilh ka sel laitak puan taw nong khu bua uh hi; ka ci a na zong thong ka taak zong, nong ou nong khoi bua uh hi,’ ci hi.

⁴⁴“Tuasia ciang amate in, ‘Topa, ngilkial dangtaak a, khualmi in, puansilh sel a cina le na thongtaak, bang hun hong mu ngei a, hong hu ngawl kana khu ziam?’ ci in zo tu uh hi.

⁴⁵Kumpipa in, ‘Kei kong cina pan, hi lai ah mihing thupi ngawlbelte khat na hu nop ngawl uh ciang, keima hong hu nuam ngawl na hi uh hi.’

⁴⁶Tua ahikom hite sia tawntung daan thuak natu sungah kipuak tu a, ahizong a thumaan thutangte sia tawntung nuntakna sungah pai tu hi,” ci hi.

Matthew 26

Jesus a Kithasawmna

(Mark 14.1-2; Luke 22.1-2; John 11.45-53)

¹Jesus in hi thu teng hilna a nei zawkciang a nungzuite munah,



²“Na heak uh bangma, ni nii zawkciang Paisan Poai hong theng tu a, tuaciang Mihing Tapa sia thinglamte tungah thalup tu in ki aap tu hi,” ci hi.

³Tuaciang, Thiampi Lianbelpa Caiaphas teenna inn ah thiampi liante le upate kisitua uh a,

⁴Jesus man ku in a thalup thei natu ngeal uh hi.

⁵“Poai hun sungah vawt ngawl tu hi, tuabang hi thong leang, mipite hong ngamlum tu hi,” ci uh hi.

Bethany ah Jesus Sathau Kinoai

(Mark 14.3-9; John 12.1-8)

⁶Jesus in a phaak Simon a kici pa ii inn Bethany ah om hi.

⁷Jesus an a neak laitakin numei khat hong pai a, a manham sathau namtui suangngo thawl dim khat hong keng a, Jesus lu tungah buak hi.

⁸A nungzuite in a mu uh ciangin a thin uuk uh hi. “Banghangin hi bangin pakvawt ziam?”

⁹“Hi sathau namtui zuak leang, sum tam mama kinga tu a, mizawngte kipia thei tu hi!” ci uh hi.

¹⁰Jesus in amate thusonnate za ahikom amate munah, “Banghangin hi sia nu thin nuam maw se nu ziam? Ama in kei atu in nasep pha nasep hoi khat hong seam ahi hi.

¹¹Mihing a zawngte sia note taw hong om tawtung tu ahihang kei sia, note taw hong om khawm tawtung ngawl tu khi hi.

¹²Ama in ka kivui natu in ka pumpi sia paaknamtui hong noai khol hi.

¹³A tatak in kong ci ciang, hi Lungdamna Thupha leitung theampo ah a kihil na mun po ah, ama nasep sia ama a kiphawk natu in, kison tawtung tu hi,” ci hi.

Judas in Jesus Leeheak tu in Thukim

(Mark 14.10-11; Luke 22.3-6)

¹⁴Tua zawkciang nungzui sawm le nii sung pan khat ahi — Judas Iscariot a kici sia — thiampi liante kungah pai in,

¹⁵“Jesus hong leeheak leng bang hong pia tu nu ziam?” ci in dongh hi. Amate in ngun dangka sawmthum la in a sim zawkciang pia uh hi.

¹⁶Tua hun pan kipan Judas in Jesus a aap thei natu hunpha zong tan hi.

Jesus a Nungzuite taw Paisan An Nekhawm

(Mark 14.12-21; Luke 22.7-14; 21.23; John 13.21-30)

¹⁷Tolsaw ngawl anluum poai ni masa ni in nungzuite Jesus kungah hong pai a, “Paisanpoai an koisung ah kong vawtsak tu uh ziam?” ci in dongh uh hi.

¹⁸“Khuapi sungah tum tavun a, pasal khat kungah, ‘Syapa in, ka hun hong theng zo hi; ka nungzuite taw Paisanpoai na inn ah vawt tu khu hi,’ ci in son tavun,” ci hi.

¹⁹Nungzuite in Jesus sawl bangin, ngamta uh a, Paisanpoai anneak natu vawt khol uh hi.

²⁰Nitak ciangin, Jesus le a nungzui sawm le niite an ne tu in to uh hi.

²¹Anneak laitakin Jesus in, “A maan takin ka ci ciang note sung pan khat in kei hong leeheak tu nu hi,” ci hi.

²²Nungzuite a thin uh nuam ngawl a, khat zawkciang khat in, “Topa, kei hi ngawl buang ka hi ziam?” ci in dongh uh hi.

²³“Ankuang sungah anluum kei taw sawk khawm sia in kei hong leeheak tu hi.

²⁴Mihing Tapa sia Laithiangtho in thi tu hi a ci bangma in thi tu a, ahihang Mihing Tapa a leeheak sia atu in, bangza in lauhuai ziam? Tua pa atu in pian awl zaw le phazaw hi,” ci in zo hi.

²⁵A leeheakpa Judas in, “Syapa, kei ka hi ziam?” ci in dongh hi. Jesus in “Nangma ci bangma ahi hi,” ci in zo hi.

Topa Zan an

(Mark 14.22-26; Luke 22.14-20; 1Corinthians 11.23-25)

²⁶A an neak uh laitakin, Jesus in anluum bek khat la in, lungdamko thungetna a nei zawkciang, baltham in a nungzuite pia hi. “La in ne vun, hisia in ka pumpi ahi hi,” ci hi.



²⁷Tua zawkciang hai la in, Pathian tungah lungdamko a, amate pia hi. “Na vekpi in ne vun,

²⁸hi sia in ka chisan hi a, Pathian thuciamna a kipsak, mihing tam mamate mawna a kimaisak natu a bua ka chisan ahi hi.

²⁹Kei kong cina pan, ka Pa Ngam sungah note taw sapittui thak ka neak mateng hi sapittui sia ka ne nawn buatu hi,” ci hi.

³⁰Tua zawkciang amate la sa in, Olive Mual zuanin pai uh hi.

Jesus in Peter ii Nial natu Teng Sonkhol

(Mark 14.27-31; Luke 22.31-34; John 13.36-38)

³¹Tuaciangin Jesus in amate munah, “Zan ciang tatak ma in no na vekpi in taikeak in kei hong nusia siat tu nu hi, banghangziam cile Laithiangtho in, ‘Pathian in tuucingpa thatlum tu a, tuute sia kithethaang tu hi,’ ci hi.

³²Ahihang nuntakna sungah hong kiphok to kik ciangin, note mai Galilee ah ka na paikhol tu hi,” ci hi.

³³Peter in Jesus munah, “A dangte theampo in hong nusia zong, kei kong nusia buatu hi!” ci hi.

³⁴Jesus in Peter munah, “A maan takin kong ci ciang, zan ciang ak khuan maa in thum vei kei nong nial tu hi,” ci hi.

³⁵Peter in, “Nang taw thi khop tu a kul le zong, tuabangin hong nial ngawl tu khi hi,” ci in zo hi. Nungzui dangte zongh in, tuabang ma in ci tek uh hi.

Jesus Gethsemene ah Thungen

(Mark 14.32-42; Luke 22.39-46)

³⁶Tua zawkciang Jesus in a nungzuite taw Gethsemene a kicina mun khat ah pai a, amate munah, “Zia sungah thungen a ka pai laanin hi sungah na to vun,” ci hi.

³⁷Ama in Peter le Zebedee ii tate nii paipui hi. Heena le thin ngimna in ama khunelh hi,

³⁸tuaciangin amate munah, “Ka thin ngim mama a thi dektak khi hi. Hi sungah na om vun a, mu heak vun,” ci hi.



³⁹Ama sia tawm a paiphei zawkciang, lei ah bokcip in, thu ngen hi. “Ka Pa awng, ahi thei le hi thuakna hai sia kei tung pan hong laaksak tan! Ahihang kei dei bang hi ngawlin, nangma deina bang hi taken,” ci hi.

⁴⁰Tua zawkciang, a nungzuite thum kungah heak kik a, amate mu sa in om mu hi; tuaciang in Peter munah, “Bangbangin note thum in nai khat sung takpi zongh kei hong ngak zo ngawl nu ziam?”

⁴¹Na na ngak kenkon vun a, ze etna sungah na pu ngawl natu in, thu na ngen vun. Thin sung in uukna nei a hihang, pumpi sia thazawm hi,” ci hi.

⁴²Khat vei ma, Jesus pai in thu ngen hi, “Ka Pa awng, hi hai ka dawn phot ngawl peuma in, hi thuakna hai sia hong ki laaksak ngawl tu ahile nangma deina bang hi taken,” ci hi.

⁴³Khatvei ma hong heak kik a, nungzuite sia a mu sa in mu leleau hi; amate hak zo mama ngawl hi.

⁴⁴Jesus in amate khatvei nusia kikin, a kammal zak ngei teng ma pau kikin, a thumvei na thungen hi.

⁴⁵Tua zawkciang nungzuite kungah heak kik a, “Tu dong mu lai in tawnga lai nu ziam? En vun! Mimawte khut sungah Mihing Tapa a ki aap tu hun hong theng zo hi.

⁴⁶Tho vun, Pai ka tawng. En vun! Kei hong leeheakpa hi sungah om hi!” ci hi.

Jesus Kimatna

(Mark 14.43-50; Luke 22.47-53; John 18.3-12)

⁴⁷Jesus sia tuabangin a papau laitak, nungzui sawm le nii sungah khat ahi Judas hong theng hi. Namsau le moltawng a toai, thiampi liante le upate ii a sawl mihon khat, ama in hong tonpui hi.

⁴⁸Ngual leeheakpa in mihonte munah lim khat lak zo hi: “Ka nap tu pa sia na dei uh mihingpa hi tu hi. Man vun!” ci hi.

⁴⁹Judas in Jesus kungah tangtan in pai a, “Thupha nga tan, Syapa,” ci in nam hi.

⁵⁰Jesus in zo a, “Na sep tu po seam memeang in, lawm awng!” ci hi. Tua zawkciang amate hong pai in, Jesus man in lencip uh hi.

⁵¹Jesus taw omkhawm khat in, a namsau dokin Thiampi Lianbelpa ii salpa saat a, a bil saattan hi.

⁵²Jesus in, “Na namsau thun kik in. Namsau a zamte sia namsau taw ma thi tu hi,” ci hi.

⁵³“Ka Pa munah hu ngen nuam hi leng ama in vantung ngalkap hon sawm le hon nii sangin a tamzaw thakhat thu in, hong puak tu ahi hunlam he ngawl nu ziam?

⁵⁴Ahihang tuabang hi thong le, Laithiangtho in hi teng tung tu hi, a ci sia koibangin tung nawn tu ziam?” ci hi.

⁵⁵Tua zawkciang mipite tungah Jesus in, “Mihing that taiku bangin hong ngaisun a, namsau le moltawng taw kei man tu in hong kuan na hi uh ziam? Ni simin Biakinn sungah to in hilna ka nei lai in, nong man bua uh hi.

⁵⁶Ahihang hite theampo sia kamsangte ii Laithiangtho sung a at teng a tangtun natu ahi hi,” ci hi. Tuaciangin a nungzuite theampo ama nusia in taikeak uh hi.

Council mai ah Jesus

(Mark 14.53-65; Luke 22.54-55; 63-71; John 18.13-14, 19-24)

⁵⁷Jesus a mante in Thiampi Lianbelpa Caiaphas inn ah paipui uh a, tua sungah Thukham hil Syate le upate kikhawm uh hi.

⁵⁸Peter in a khuala thithim na pan in Thiampi Lianbelpa leitual dong zui hi. Ama sia leitual ah ngalkapte taw tokhawm in bangbangin thu hong piang ziam ci in encik hi.

⁵⁹Thiampi liante le Council bup in Jesus a thalup thei natu in, leitot tetti pawlkhat zon tu in hanciam uh hi,

⁶⁰mihing tam mama hong pai uh a, ama huvau leitot thu tam mama son ahitazong, a mat thei natu thu, bangma a mu bua uh hi. A khakbel ciangin, pasal nii hong ding a,

⁶¹“Hisia pa in Pathian ii Biakinn baltham in ni thum sung ka sa kik thei tu ci hi,” ci hi.

⁶²Thiampi Lianbelpa hong ding a Jesus munah, “Nang tungah maw hong kisuante na zokik natu he ngawl ni ziam?” ci hi.

⁶³Ahihang Jesus a huthe bua hi. Khat vei ma Thiampi Lianbelpa in ama tungah, “A nungta Pathian min taw nang sia kiciamna hong vawtsak khi hi: Pathian Tapa Messiah na hi ziam, hong son tan,” ci hi.

⁶⁴“Nangma ci bang ahi hi. Ahihang na vekpi tungah kong ci hi: tu pan kipan Mihing Tapa sia Vaanglianbelpa ii ziatsang ah to a, van a meeikaai tung pan hong pai na mu tu uh hi!” ci hi.

⁶⁵Tuasia ciangin Thiampi Lianbelpa in, a puan hong baltham a, “Pathian min a daisak pa! Tetti dang kul nawn ngawl hi. Pathian min a daisak na sia na zaak tek uh hi.

⁶⁶Bangbang ngaisun tu nu ziam?” ci hi. Amate in, “Ama sia mawnei hi, a thi kul hi,” ci uh hi.

⁶⁷Tua zawkciang amate in, a maitang cilphii in, saat uh hi; tuaciangin a beangte in,

⁶⁸“Messiah awng, hong beang sia akua ziam, hong son thei ka sin in,” ci uh hi.

Peter in Jesus Nial

(Mark 14.66-72; Luke 22.56-62; John 18.15-18; 25-27)

⁶⁹Peter sia leitual ah to in a om laitak Thiampi Lianbelpa ii naseam numei khat hong pai a, “Nang zongh Galilee mi Jesus taw a kithawl khat hi ngawl ni ziam?” ci hi.

⁷⁰Ahihang amate theampo ii zaakna ah, ama in nial hi, “Bangteng sason ni ziam he ngawl khi hi,” ci hi.

⁷¹Tuaciangin leitual tumna kongbiang ah pai hi. Naseam numei dang khat ma in mu a, “Ama sia Nazareth khua mi Jesus taw a kithawl khat hi,” ci in mite tungah son hi.



⁷²Peter in nial leleau a, “Tuasia pa he bong ci in kiciam khi hi,” ci in zo hi.

⁷³Tua zawkciang tua munah a ding pasal pawlkhat in Peter kung hong zuan a, “Nang zongh ama mite khat ma hi tatak ni hi. Bang po na ci zong na pau zia in nang sia hong pholaak hi,” ci uh hi.

⁷⁴Tuasia ciang Peter in, “Thumaan son khi hi, ci in kiciam ing! thumaan son ngawl ka hile Pathian in daan hong pia taken! Mihing zia sia pa he ngawl khi hi!” ci hi. Tua zawk hiat ciangin ak khuang hi.

⁷⁵Peter in Jesus ii ama tungah “Ak khuan maa in thum vei hong nial tu ni hi,” ci in a son teng phawk hi. Ama pusuak in nasia takin kap hi.

Matthew 27

Jesus Pilate kungah Kipaipui (Mark 15.1: Luke 23.1-2; John 18.28-32)

¹Zingsang tuungin thiampi lian theampo le upate in Jesus a thalup natu vaihawm uh hi.

²Amate in Jesus thikkhau taw khi in, paipui a, Romete ii ngamuk mangpa Pilate kungah aap uh hi.

Judas Thina (Sawltak 1.18-19)

³Ngual leeheakpa Judas in Jesus sia thidaan kipia tu hi, ci in a heak ciangin, ama kisiik kikin, a ngun dangka sawmthum teng thiampi liante, upate kungah paipui hi.

⁴“Mihing mawna nei ngawl khat a thi tu in, leeheak ka hikom ka maw zo hi!” ci hi. Amate in, “Tua thu ko taw bang kisai nawn ziam? Tua thu sia nangma taw kisai bek hi!” ci in zokik uh hi.

⁵Judas in a dangka teng Biakinn sungah vawk in nusia a, tua zawkciang ama pusuak in ama le ama awklum hi.

⁶Thiampi liante in dangka tangte tawmin, “Hisia in chisan ii manh hi a, ih Thukham in chisan manh sia Biakinn sumkholna ah khol tu khaam hi,” ci uh hi.



⁷Amate teng tua sum tungtaang ah thukimna a nei zawkciang, Bealseakpa Lo a kici sia, ngamdang mite thaan tu in, tua sum taw lei uh hi.

⁸Tua hu in tua lo sia “Chisan Lo” tu dong ma in kici hi.

⁹Tuasia ciang kamsangpa Jeremiah ii sonkhol teng tangtung hi. “Amate in, Israel mite ii ama man tu a, a thukim uh ngun dangka sawmthum la in,

¹⁰Topa ii keima hong sawl bangin bealseakpa ii lo sia lei uh hi.”

Pilate in Jesus Thu Dongh

(Mark 15.2-5; Luke 23.3-5; John 18.33-38)

¹¹Jesus sia Romete ii ngamuk mangpa mai ah ding a, tua pa in, “Nang sia Jewte ii kumpipa na hi ziam?” ci in dongh hi. “Nangma cibang ahi hi,” ci in Jesus in zo hi.

¹²Ahihang thiampi liante le upate ii mawsiatnate huvau sia bangma zona a nei bua hi.

¹³Tua ahiciang Pilate in, “Hi thute taw hong mawsak nate za ngawl ni ziam?” ci hi.

¹⁴Ahihang Jesus in kammal khat zongh a zo bua hi, tuasia ciangin ngamuk mangpa in lamdang sa mama hi.

Jesus Thidaan Kipia

(Mark 15.6-15; Luke 23.13-25; John 18.39-19.16)

¹⁵Paisan Poai a tun simin, Romete ngamuk mangpa in mipite ii ngetna bangin, thongtaak khat veu suataksak tu ngeina nei hi.

¹⁶Tua laitakin Barabbas a kici a minthang thongtaak pa khat om hi.

¹⁷Tua ahikom mipite hong kikhop ciang, Pilate in amate tungah, “ Barabbas hong suatak leng deizaw nu ziam maw, Messiah a kici Jesus hong suatak leng deizaw nu ziam?” ci in dongh hi.

¹⁸Jew mi thuneite in, Jesus eang ahikom ama khut sungah aap ahi hunlam sia ama in tel hi.



¹⁹Pilate sia thukhenna innsung a to laitakin a zi in kamtaisak a: “Mawna nei ngawl tua pa tungtaang ah kihel heak in. Tuzan in ama huvau ka mang sungah nasia takin thuak khi hi,” ci hi.

²⁰Thiampi liante le upate in Pilate ii Barabbas suatak a piak natu le, Jesus a thalup tu a nget natu in mipite hol uh hi.

²¹Ahihang Pilate in mipite munah, “Hite nii sung pan koi sia hong tha leng na deizaw uh ziam?” ci in dongh hi. “Barabbas,” ci in zo uh hi.

²²“Tua ahile Messiah a kici Jesus sia bang law tu khi ziam?” ci in Pilate in dongh hi. “Thinglamte tungah thatlum in,” ci tek uh hi.

²³Ahizong Pilate in, “Ahihang ama in bang khialna vawt na ziam?” ci in dongh hi. Tuasia ciangin, amate in a aw neiza uh taw au in, “Thinglamte tungah thatlum in,” ci uh hi.

²⁴Pilate in tu bang taw kinga zo ngawl tu hi ci a mu ciangin, ngamlumna piang thei tu hi, ci a mu manin tuidam tawm la in, mipite mai ah a khutsil a, “Hisia ii thina taw kisai kei hang hi ngawl hi! Hisia in noma ngamtatna hang ahi hi!” ci hi.

²⁵“Ama thina hangin thuak tu a om babang koma le ka suan ka paalte tungah hong tu taken!” ci in mipibup in zo hi.

²⁶Tua zawkciang Pilate in, amate dei bangin Barabbas tha hi; Jesus sia a velsak zawkciang thinglamte tungah thalup tu in aap hi.

Ngalkapte in Jesus Nunau zazan

(Mark 15.16-20; John 19.2-3)

²⁷Tua zawkciang Pilate ii ngalkapte in Jesus sia ngamuk mangpa inn ah paipui uh a, ngalkap honbup sia ama kim ah kikhawm hi.

²⁸Amate in a puansilhte suukeaksak a, puantual san khat silhsak hi.

²⁹Tua zawkciang lingngui taw kumpi lukhu khat vawt in a lu ah khusak hi, tuaciangin ciangkang khat a khut ziatsang ah koi uh a; tua zawkciang a mai ah khupdin in nunau uh hi. “Jewte ii kumpipa a khansau taken!” ci uh hi.

³⁰Amate in ama cilphii in, a ciangkang sut kik a, a lutang saatna in nei uh hi.



³¹Amate in a ciammui vawt zazan zawk uh ciang, a puantual sia suusak kikin, ama ii a silh ngei teng silhsak kik hi. Tua zawkciang thinglamte tungah thatlum tu in paipui uh hi.

Jesus Thinglamte tungah Kithat
(Mark 15.21-32; Luke 23.26-43; John 19.17-27)

³²Amate a pusua uh ciang, Cyrene mi Simon a kici khat taw kisi uh a, ngalkapte in zawthawk thu taw Jesus thinglamte puasak uh hi.

³³Amate in Golgotha a kici “Lungu Mun” theng uh hi.

³⁴Tua munah amate in sapittui le tuikhaa nam khat hel in, Jesus pia uh hi; ahihang ama in tep bek in a ne bua hi.

³⁵Amate in Jesus sia thinglamte tungah kilh uh a, aisaanna taw in a puan teng hawm uh hi.

³⁶Tua zawkciang tua munah to in ama en uh hi.

³⁷A lutung san ah ama kimawsakna laimal teng taak uh hi. “Hisia in Jesus hi. Jewte Kumpipa hi,” ci in at uh hi.

³⁸Tua zawkciang in phalakte nii zongh Jesus ziat sangah khat vei sangah khat khaikhawm uh hi.

³⁹Tua mun kantan a hong pai mihingte in Jesus sia lusuk sanh lupei sanhin nunau zazan uh hi.

⁴⁰“Biakinn baltham in ni thum zawkciang a sa kik tu pa, Pathian Tapa na hile, nangma le nangma kihun in! Thinglamte tung pan hong tuaksuk tan,” ci uh hi.

⁴¹Tuabang tatak ma in thiampi liante, Thukham hil syate le upate in selno uh hi.

⁴²“Ngualdang sia hun zo ahihang ama le ama kihun thei ngawl hi. Ama sia Israel te Kumpipa hi ka na ngawl ziam! Thinglamte tung pan hong tuaksuk le, tuasia ciang ama ki um tu hi!

⁴³Ama in Pathian muang a, Pathian Tapa ka hi ci hi. Tua ahile Pathian in tu in hun nuam ziam en tawng!” ci uh hi.



⁴⁴Thinglamte tungah ama bangin a kikhai phalakte ngangawn in, ama sia tuabang ma in selno uh hi.

Jesus ii Thina

(Mark 15.33-41; Luke 23.44-49; John 19.28-30)

⁴⁵Nisun ciangin ngambup sia khuazing in sin cip a, nai thum sung khuazing hi.

⁴⁶Nai thum saat tu bang ciangin Jesus in aw nging tatak taw, “Eli, Eli, Lema Sabachthani!” ci in au hi. A khiakna sia “Ka Pathian, Ka Pathian awng! Banghang hong nusia ni ziam?” a cina hi.

⁴⁷Tua munah a ding mihing pawlkhatte in za a, “Ama in Elijah sam hi!” ci uh hi.

⁴⁸Amate sung pan khat tai in, sapittui haau sungah puansia pap in, ciangkang tungah sawm in a neak tu in, ama kam ah taa to hi.

⁴⁹Ahihang pawlkhatte in, “Ngak vun! Elijah in ama hun tu in hong pai ziam, en tawng!” ci uh hi.

⁵⁰Tuaciang Jesus a nging takin a au kik zawkciang a hui tat hi.

⁵¹Tuaciangin Biakinn sungah kidalna puan a kikhai sia a lu pan a taw dong khen nii in kizensuk hi. Zinliing a suangpite kikhentham in,

⁵²thaante kihong in, Pathian ii mihing a thi sate tam ma kitho kiksak hi.

⁵³Amate in than nusia in, Jesus ii thina pan a thaw kik zawkciang, Khuapi Thiangtho sungah tum uh a, tua munah mihing tam mama in amate mu uh hi.

⁵⁴Ngalkap hon ukpa le Jesus a cing ngalkapte in zinliing le thupiang dang theampo a mu uh ciang, lau mama a, “Ama sia Pathian Tapa tatak hi!” ci uh hi.

⁵⁵Galilee pan a zui, ama a hu numei tam mamate a khuala na ah ding in Jesus en uh hi.

⁵⁶Tuate sungah Mary Magdalene, James le Joseph nu Mary, Zebedee ii zi kihel hi.



Jesus Kivuina

(Mark 15.42-47; Luke 23.50-56; John 19.38-42)

⁵⁷Nitak ciangin, Arimathea panin sumhau khat hong theng hi. A min Joseph hi a, ama zongh Jesus ii nungzui khat ahi hi.

⁵⁸Ama in Pilate omna ah pai in Jesus luang ngen hi. Pilate in Jesus luang sia Joseph piak natu in thupia hi.

⁵⁹Tua ahikom Joseph in la a, puanneal kaang thak taw a tun zawkciang,

⁶⁰ama ii thaankuul sungah koi hi. Tua thaankuul sia suangpi a khuak thak ahi hi. Tua zawkciang, ama in suangtumpui khat thaan kuavang mai ah liik in a kha zawkciang cia hi.

⁶¹Mary Magdalene le Mary dang khat sia thaan maingat in to uh hi.

Thaancing Ngalkapte

⁶²A khuavak ni sia Sabbath ni hi a, thiampi liante le Pharisee te in Pilate taw kimu uh a,

⁶³“Topa awng, mihing leitot pa in a nuntak lai in, ‘Ni thum zawkciang, nuntakna sungah hong kitho kiksak tu hi,’ a ci ngei sia ka phawk uh hi.

⁶⁴A nungzuite hong pai in, a luang ngu a, mihingte munah thina pan thosak zo hi a ci thei ngawl natu in, a ni thum ni ciang dong thaan sia pha takpi a kicin natu thupia in. A leilotthu son khak tu sia in, a masa sia sangin sia zawlai tu hi,” ci uh hi.

⁶⁵Pilate in, “Ngalkap pawlkhat paipui vun a, thaan sia a muanhuai theiza in cingsak tavun,” ci hi.

⁶⁶Tua ahikom amate pai in, thaan kongvang sia a bit thei natu in, suang tungah tepteena khen in ngalkapte ii cin tu in nusia uh hi.

Matthew 28

Thaw kikna

(Mark 16.1-10; Luke 24.1-12; John 20.1-10)

¹Sabbath zawkciang, Nipi ni khua hong vak ciangin, Mary Magdalene le Mary dangkhat thaan vil tu in pai uh hi.



²Thakhat in zin nasia takin liing hi. Topa vantung lalang khat van pan hong tuaksuk a, thaan kong huhna suangtum liikkeak in a tungah to hi.

³Ama meal sia khualeng taw kibangin, a puansilh sia vuuk bangin paak hi.

⁴A cingte lau mama ahikom, liingin mithi sate taw kibang uh hi.

⁵Vantung lalang in numeite paupui hi. “Lau heak vun. Thinglamte tungah a kithat Jesus sia zong nu hi ci in kong he hi.

⁶Ama in hi sungah om ngawl hi! Ama hong son sa bangma in ki tho kiksak zo hi. Hi sungah hong pai tavun a, a lupna hong en tavun.

⁷Tu in manlangin pai tavun a, a nungzuite munah, ‘Ama sia thina pan kithosak zo a, tu in ama in note mai Galilee ah pai tu hi; tua munah ama na mu tu uh hi!’ ci tavun. Kong son sate ciamtee tavun,” ci hi.

⁸Tua ahikom amate in, thaan sia manlang takin nusia a, lau kawm si lungdamna taw kidim si in, nungzuite kungah thupuak tu in tai uh hi.

⁹Thakhat in Jesus in amate taw kisi a, “Thin nopna na nga tavun,” ci hi. Amate in ama kungah hong neak uh a, a peang koai in bia uh hi.

¹⁰Jesus in, “Lau heak vun; Pai tavun a, ka suapuite tungah, Galilee ah pai tu in sawl tavun, tua munah amate in kei hong mu tu hi,” ci hi.

Thaancing Ngalkapte Thukona

¹¹Numeite sia amate pai natu ah a pai laanin, thaancing ngalkapte pawlkhat khuapi sungah heak kikin, thiampi liante tungah thupiang theampo ko uh hi.

¹²Thiampi liante in upate taw kisi in, kikapna khat nei uh hi. A ngalkapte sum tam mama pia uh a,

¹³tuaciangin, “Zan ka mut laanin nungzuite hong pai a, a luang hong ngu hi, na ci tu uh hi.

¹⁴Tuaciangin ngamuk mangpa in hi thu a za tha le, note mawna a hi ngawl hunlam ka na son tu uh hi, bangma thin ngim natu om ngawl hi,” ci uh hi.

¹⁵Ngalkapte in sum la in, a kisawl na bangin vawt uh hi. Tua hi a, tua thupuakna sia tuni dong Jewte sungah kizel hi.



Jesus A Nungzuite Munah Kilak

(Mark 16.14-18; Luke 24.36-49; John 20.19-23; Sawltak 1.6-8)

¹⁶Nungzui sawm le khatte in Galilee ngam mual tungah Jesus sawl bangin pai uh hi.

¹⁷Ama a mu ciangin, pawlkhat in um tak ngawl ahitazong, amate in bia uh hi.

¹⁸Jesus in amate kungnai neakin, “Vantung le leitung ah thunei theina theampo a vekpi in kei hong kipia zo hi.

¹⁹Tua ahiciang pai tavun, mun theampo ah mihing theampo ka nungzui suaksak tavun: Pa, Tapa le Thaa Thiangtho min taw tui na phum tavun,

²⁰tuaciang ka thu piakte theampo a zui natu hil tavun. Tuaciang hun bo dongin note taw kong omkhawm tawntung tu hi,” ci hi.



Tep tee bang Lungdamna Thu

Tep tee bang Lungdamna Thu 1

Tuiphumpa John Thuhilna

(Matthew 3.1-12; Luke 3.1-18; John 1.19-28)

- ¹Hi thu in Pathian Tapa Jesus Christ Lungdamna Thupha ahi hi.
- ²Kamsangpa Isaiah at sa bangin kipan hi. “Pathian in ‘Ka kamtaipa sia na lampi hong honkholsak tu in, na mai ah ka paisak tu hi.’
- ³Senneal ngam sungah mihing khat hong au a, “Topa atu in lampi puakhol vun; ama khualhaw natu in lamzin tang khat vawtsak vun!” ci hi.
- ⁴Tuabangin John sia senneal ngam sungah hong kilak a, ama in thuhil in tuiphum hi. “Na mawna pan kisiik kik vun a, tui kiphum vun, tua hile Pathian in na mawnate hong maisak tu hi,” mipite tungah ci hi.
- ⁵Judea ngam pan le Jerusalem khua panin John thuson ngai tu in mihing tam mama pai uh hi. Amate in a mawnate pualaak uh a, tua zawkciang Jordan Ngun sungah, ama in tuiphum hi.
- ⁶John in kalaoh mul taw a kitak puan silh a, savun kawngkhau thua in, a anneak sia khaumaw le ngam khuaitui ahi hi.
- ⁷Mihingte ii munah, ama in, “Kei nung pan hong pai lai tu pa sia kei sangin lianzaw pek hi. Kunin a peangdap khau suut tu zongh in ka kilawm bua hi.
- ⁸Note sia tui taw tui kong phum hi, ahihang ama in Thaa Thiangtho taw hong baptize tu hi,” ci in taangko hi.

Jesus ii Kituiphum na le Ze-et A Thuakna

(Matthew 3.13-4.11; Luke 3.21-22; 4.1-13)

- ⁹Tua zawk ngei ngawlin Jesus sia Galilee ngam Nazareth khua panin hong pai a Jordan ah John in tuiphum hi.
- ¹⁰Tuisung pan Jesus a thaw to po ciangin, van kihong a, Thaa sia ama tungah ngam vakhu bangin hong tuaksuk mu hi.
- ¹¹Vantung pan in aw khat nging a, “Nang sia ka it ka Tapa na hi hi. Nang tungah ka lungkim hi,” ci hi.



¹²Thakhat in Thaa in ama senneal ngam sungah paisak hi.

¹³Tua munah Satan in ama ni sawmli sung ze et hi. Tua munah ngamsate zongh om a, ahizong, vantung lalangte hong pai in ama hu hi.

Jesus in Ngasa Paai Mihing Li Sam

(Matthew 4.12-22; Luke 4.14-15; 5.1-11)

¹⁴John thong sungah a kikhum zawkciang, Jesus Galilee ngam ah pai a, Pathian Lungdamna thupha hil hi.

¹⁵“A hun hong tung zo hi, Pathian Ngam hong nai zo hi. Na mawnate uh pan kisiik vun a, Lungdamna Thupha um vun!” ci hi.

¹⁶Jesus Galilee tuili hui ah a va laitakin, ngasa paai mihing nii, Simon le a suapuipa Andrew ngeen taw ngasa man in om mu hi.

¹⁷Jesus in, “Hong pai tavun, mihing mante kong suaksak tu hi,” ci hi.

¹⁸Thakhat in amate in, a ngeen uh nusia in ama zui uh hi.

¹⁹Ama in mai sangah tawm a pai ciang, Zebedee ii tapate James le Johnte unau mu hi. Amate a ngeente puua in ngunkuang sungah om uh hi.

²⁰Jesus in a mu po ciangin sam hi; amate in a pa uh Zebedee le a cial sa naseamte ngunkuang sungah nusia in Jesus zui uh hi.

Doavei Pasal Khat

(Luke 4.31-37)

²¹Jesus le a nungzuite Capernaum khua hong theng uh a, Sabbath kik ni ciangin, Jesus in Jewte ii synagogue ah pai in hilhna nei tu in kipan hi.

²²A thuhilna a za mihingte in ama thuhil zia lamdang sa uh hi, banghangziam cile, Thukham hil syate bang hi ngawlin, ama in thuneina taw thuhil hi.

²³Tua zawk hiat ciangin doavei pasal khat synagogue sungah hong tumin cik-au hi.

²⁴“Nazareth mi Jesus awng, kote bang hong nuammaw ni ziam? Ko hong lalcipsak tu in hi sungah hong pai na hi ziam? Nang akua na hi hunlam hong he khu hi — Nang sia a thiangtho Pathian kamtaipa ni hi,” ci hi.



²⁵Jesus in doai munah, “Pau heak in, pasalpa sung pan hong pusuak tan!” ci in thupia hi.

²⁶Doai in pasalpa thing zazaan a, a nging in a cik-au zawkciang pasalpa sung pan pusuak hi.

²⁷Mihingte theampo in lamdang mama sa uh a, “Bangbang thu hi thong ziam? Tu a sia kihilna thak khat ahi ziam? Hisia pa in doaithe tungah thunei a, thu a piak ciangin doai in a thu ni hi!” ci in khat le khat kikum uh hi.

²⁸Tuabangin Jesus huvau thupiangte Galilee ngam mun theampo ah manlang takin kizel hi.

Jesus in Mihing Tam mama Damsak

(Matthew 8.14-17; Luke 4.38-41)

²⁹Jesus in a nungzuite taw synagogue nusia in Simon le Andrew te inn ah paisuak uh hi. Nungzui James le John zongh kihel hi.

³⁰Simon sunghnu a cina in lum a, suuk hi. Jesus hong thet po ciangin, tua thu ama tungah son hi.

³¹Ama in nupinu kungah pai in a khut pan kaito in thosak hi. A suuk natna thai a, amate zin do hi.

³²Ni tumin nitak hun a thet ciang, mihingte in Jesus kungah, cinate le doaveite paipui uh hi.

³³Khuapi sung pan mihing theampote innmai ah kikhawm uh hi.

³⁴Jesus in natna satna namcin taw a na theampo damsakin, doavei tam mama a doai nawkeaksak hi. Ama in doaithe ii pau tu khaam hi, banghangziam cile amate in Jesus sia akua ziam ci in he uh hi.

Jesus in Galilee ah Thuhil

(Luke 4.42-44)

³⁵Zingtuung khuavak maa in, Jesus tho in tua inn nusia hi. Khuapi puasang a ngamkhingna mun khat ah pai in thungen hi.

³⁶Ahihang Simon le a kitholpuite in ama zong tu in pai uh hi.



³⁷Tuaciang ama a mu uh ciangin, “A kuama po in nang hong zong hi,” ci uh hi.

³⁸Ahihang Jesus in, “Hisung kiim le paam khua dangte sung zongh ah ih pai kul tu hi. Tua munte zongh ah thu ka hil kul tu hi, banghangziam cile, tua nasep ma seam tu in hong pai ka hi hi,” ci hi.

³⁹Tua hi a, ama in Galilee ngambup synagogue te ah thuhil in doaité not hi.

Jesus in Pasal Khat Damsak

(Matthew 8.1-4; Luke 5.12-16)

⁴⁰A phaak nasia mama khat Jesus kungah hong pai a, khupdin in, “Hong damsak nuam po lete hong damsak thei tu ni hi,” ci in hu ngen hi.

⁴¹Jesus in ama khuangai huai sa in, a khut vaan in tham hi. “Hong damsak nuam khi hi, dam tan, ” ci in zokik hi.

⁴²Thakhat thuin pasalpa a natna damthiang paih hi.

⁴³Tua zawkciang, Jesus in ama nasia tak talin, paisak paih a,

⁴⁴“En in, hi thu kuama munah son heak in, pai vingveng tan a, thiampipa in vealsak tan,” ci in a sawl zawkciang, “Mihing theampo tungah na thianthona a kilangh tu in, Moses sawl bangin, sangaw biakpiakna vawt tan,” ci hi.

⁴⁵Ahihang pasalpa pai in mun theampo ah hi thupiang sia son kawkoai hi. Pasalpa in nasiatak son ahikom Jesus sia khuapi khat pawpo ah, mipite ii mutang in, a tum ngam nawn bua hi. A ngamkhingna munte ah ama om a, mihingte in mun theampo panin ama kung zuan uh hi.

Teptee bang Lungdamna Thu 2

Jesus in Pasal Langngaw khat Damsak

(Matthew 9.1-8; Luke 5.17-26)

¹Ni tam kihal ngawlin Jesus Capernaum khua ah pai kik hi, tuaciang ama inn ah om hi, ci in kiza hi.

²Tua ahikom mihing tam mama hong kikhawmtua uh a, om natu mun awng zongh om nawn ngawl liangin kongbiang puasia dongin dim uh hi. Jesus in thu a hihil laitakin,



- ³pasal li hong theng a, Jesus kungah langngaw pasal khat puak hi.
- ⁴Ahizong mihonpite hu in cina sia Jesus kung tatak a then zo bua hi. Tua ahikom amate in Jesus omna sanh innkhum sulet uh a, pasalpa phak tungah lumsakin, innkhum sukletna pan khiasuk uh hi.
- ⁵Amate in bangza in upna nei ci sia Jesus in a mu ciang, langngaw pa munah, “Ka tapa awng, na mawnate hong kimaisak zo hi,” ci hi.
- ⁶Tua munah a to Thukham hil syate in,
- ⁷“Banghangin hi bangin pau ngam ziam? Hisia in Pathian min daisakna hi. Pathian bekma in mawnate maisak thei hi!” ci in ngaisun hi.
- ⁸Thakhat in Jesus in amate ngaisutna teng tel ahikom, “Banghang tuabangin ngaisun nu ziam?”
- ⁹Hi langngawpa tungah ‘Na mawnate hong kimaisak zo hi’ cile, “Tho in, na phak luakin lampai in,’ ci koisia ol zaw ziam?”
- ¹⁰Tua ahibuale Mihing Tapa in leitung mawmaisak theina nei hi, ci in no tungah lak tu khi hi,” ci in langngawpa munah,
- ¹¹“Tho in, na phak luakin cia tan, hong ci khi hi!” ci hi.
- ¹²Amate mu tangin pasalpa tho a, a phak luakin lawn paih hi. Amate in lamdang sa mama in, Pathian pok uh hi. “Hi bang peuma mu ngei bua hing!” ci uh hi.

Jesus in Levi Sam

(Matthew 9.9-13; Luke 5.27-32)

- ¹³Jesus Galilee tuili hui ah pai kik hi. Mihon khat ama kungah hong pai hi, tuasia ciangin amate thuhil tu in kipan hi.
- ¹⁴A pai kakawm in, Alphaeus ii tapa Levi kici shiadongpa a zum sungah to in om mu hi. “Hong zui tan” ci hi. Levi zongh ding vangiat in zui hi.
- ¹⁵Tua zawkciang Jesus Levi inn ah an ne hi. Shiadongte hon khat le a dang a kinialnamhte pawlkhat in, Jesus zui a, Jesus le a nungzuite taw an ne khawm uh hi.



¹⁶Pharisee a kici Thukham hil syate in, Jesus shiadongte le a kinialnamhte taw an ne khawm in om a mu uh ciangin, “Banghangin ama in mihing tuabangte taw an ne khawm ziam?” ci in dongh uh hi.

¹⁷Jesus in amate thu kidok za a, “Mihing cidamte in zatomangpa tulmaw ngawl a, cinate bek in zatomang tulmaw uh hi. Mihingphate sam tu in kong pai bua a, a kinialnamhte sam tu in kong pai hi,” ci hi.

An tanna huvau Dokna
(Matthew 9.14-17; Luke 5.33-39)

¹⁸Hun khat lai in, Tuiphumpa John ii nungzuite le Phariseete an tang uh hi. Mihing pawlkhat Jesus kungah hong pai a, “Banghangin Tuiphumpa John nungzuite le Phariseete nungzuite in an tang a, na nungzuite in, banghangin an tang ngawl ziam?” ci in Jesus dongh uh hi.

¹⁹Jesus in, “Mopoai an kivaakna sungah leangnate in an ne ngawlin om tu na um uh ziam? Om ngawl tu hi! Zineipa sia amate taw a om khop laiteng amate in tuabang a ngamta buatu hi.

²⁰Ahihang ni khat ni ciangin zineipa sia amate kung pan hong kila tu a, tuasia ciangin an tang tu hi,” ci in zokik hi.

²¹“Kuama in puanlui ek sa sia puanthak taw phaw ngei ngawl hi, banghangziam cile puanthak sia a ton ciangin a lui sia ekkeak tu a eksak seseam tu hi.

²²Tuasia bangma savun thawl lui sungah sapittui thak kuama in thaal ngei ngawl hi, banghangziam cile sapittui thak sia in savun thawl lui sia saantham tu a, a sapittui le a thawl lalcip tu hi. Sapittui thak sia savun thawl thak sungah thaal tu hi zaw hi,” ci hi.

Sabbath huvau Dokna
(Matthew 12.1-8; Luke 6.1-5)

²³Jesus sia Sabbath ni khat zungtaang lo tawntan in pai hi. A nungzuite zongh ama taw kithawl a, zungtaang huite hiat tu in kipan uh hi.

²⁴Tuasia ciang Phariseete in Jesus munah, “En in, Sabbath ni na nungzuite ii zia bang a ngamtat tu sia ih thukham in khaam hi,” ci uh hi.



²⁵Jesus in, “David in bang khat po a neak tu a kisap mama hun laitakin, a ngamtatna sim ngei ngawl nu ziam? Ama le a mite a ngilkial hi.

²⁶Tua ahikom Pathian inn sungah tumin Pathian a kipia sa anluum ne hi. Tua hun laitak sia Abiathar in Thiampi Lianbel a sep laitak hi. Ih Thukham bangin ci leang thiampite bek in hi anluum a neak thei natu ahi hi, ahihang David in ne a, a mite zongh pia hi,” ci in zokik hi.

²⁷A thukhupna ah Jesus in, “Sabbath sia mihingte ii phat natu in a kivawt hi a, mihing sia Sabbath atu a kivawt a hi bua hi.

²⁸Tua hi a, Mihing Tapa sia Sabbath ngangawn ii Topa ahi hi,” ci hi.

Teptee bang Lungdamna Thu 3

Khutlang khat A zaw Pasal khat

(Matthew 12.9-14; Luke 6.6-11)

¹Tua zawkciang Jesus in Jewte synagogue ah pai a, tua munah khutlang khat a zaw pasal khat om hi.

²Jesus ngamtat khial tu a encik mihing pawlkhat tua munah om ahikom Sabbath ni in, Jesus in cina damsak ziam, a damsak bua ziam, ci in encik nginge uh hi.

³Jesus in pasalpa munah, “Hi sung mai sangah hong pai tan,” ci hi.

⁴Tua zawkciang mipite munah, “Ih Thukham in Sabbath ni in, bangteng sep tu hong oai ziam? Ngual hu tu ziam maw ngual ngim pia tu ziam? Mihing khat nuntakna hun tu ziam maw that tu ziam?,” ci in dongh hi. Ahihang amate kam khat zongh a pau bua uh hi.

⁵A kiimkot a et ciangin, Jesus in amate tungah thin uuk ahitazong hesuakhuai sa si hi, banghangziam cile amate a thin uh pui mama a, a ngaisutna uh zongh maan ngawl hi. Tua zawkciang pasalpa munah, “Na khut vaan in,” ci hi. Ama in a khut vaan a, a khut dam kik hi.

⁶Tua ahikom Phariseete sia synagogue nusia in thakhat in Herod pawlte pawlkhat taw kisi uh a, Jesus thalup tu in, vaihawmna nei uh hi.

Tuili hui ah Mihon khat



⁷Jesus le a nungzuite Galilee tuili sangah pai uh a, mihonpi in zui hi. Amate in Galilee, Judea,

⁸Jerusalem, Idumea ngam, Jordan ngun nisuana sang ngam, Tyre le Sidon khuapite kiim le paam ngamte panin hong pai hi. Hi mite theampo sia Jesus sep le vawt teng a zaak hu in, Jesus kungah hong pai uh hi.

⁹Mihing tam mama a, ama a kihencip thak ngawl natu in nungzuite munah ngunkuang khat zongin sawl hi.

¹⁰Ama in mihing tam mama damsak hi, tuaciang natna nei peuma in ama tham tu in kiphulung ngawp uh hi.

¹¹Thaa ngilo vei mihingte in a mu uh ciangin, amate mai ah puk in, cik-au uh a, “Nang sia Pathian Tapa ni hi” ci hi.

¹²Ama sia akua ahi hunlam kuama tungah a son ngawl natu in, thaa ngilote munah Jesus in nasia takin thupia hi.

Jesus in Nungzui Sawm le Niite Teal

(Matthew 10.1-4; Luke 6.12-16)

¹³Tua zawkciang Jesus in mualtung khat ah kaato in, ama dei teng a kungah samtuum hi. A kungah amate in zuan a,

¹⁴tuaciangin ama in sawm le nii tealin, sawltakte ci in min vaw hi. “Kei taw a omkhawm tu in, no teng hong teal zo khi hi, thuhil tu zongin kong paisak tu a,

¹⁵doaite nawkeak natu thu na nei tu uh hi,” ci hi.

¹⁶Sawm le nii a teal teng sia hi teng ahi hi, Simon (Jesus in Peter ci in min a piak sia),

¹⁷Zebedee tapate unau James le John, (Jesus in min pia a, Boanerges ci, a khiakna, “Vanto mihingte”);

¹⁸Andrew, Philip, Bartholomew, Matthew, Thomas, Alphaeus ii tapa James, Thaddaeus, Minam itpa Simon,

¹⁹le Jesus a leeheakpa Judas Iscariot te ahi hi.

Jesus le Beelzebul



(Matthew 12.22-32; Luke 11.14-23; 12.10)

²⁰Tua zawkciangin Jesus inn ah cia hi. Mipi hong kikhawm leleau ahikom Jesus le a nungzuite in anneak hun tu a nga bua uh hi.

²¹A innkuanpuite in a zaak uh ciangin ama keam tu in hong pai uh hi, banghangziam cile mihingte in, “Ama a thin am zo hi,” ci uh hi.

²²Jerusalem pan hong pai thukhamhilhsya pawlkhatte in, “Ama sungah Beelzebul om hi!” ci uh hi. “Tuasia doaita sung pan a lianbel sia hi, ama tungah doai nawkeak thei natu vaang a pia sia pa hi,” ci uh hi.

²³Tua ahikom Jesus in amate a kungah samin, thusontena taw amate tungah son hi. “Satan in bangbangin Satan notkeak thei tu ziam?”

²⁴Ngam khat sia pawl tuatuam in kikhen hen a, khat le khat kido le tua ngam tamtham tu hi.

²⁵Innkuan khat pawl tuatuam in kikhen in, pawlkhat le pawlkhat kido le tua innkuan sia kitamtham tu hi.

²⁶Tua hi a Satan ngam sia pawltuam in kikhen le, kip ngei ngawl tu a, tamtham in bocip tu hi.

²⁷“Thahatpa, a kileehen phot mateng kuama in a inn phuul zo ngawl tu hi. Tua zawkciang bekma phuul thei pheang hi.

²⁸“A tatak ka ci ciang, mihingte a mawnate uh le a pausiatnate pan kimaisak thei hi.

²⁹Ahihang Thaa Thiangtho a sonsiate sia, kimaisak ngei ngawl tu hi, banghangziam cile ama in tawntung mawna vawt ahi hi,” Jesus in ci hi.

³⁰(Tuabang a ci sia banghangziam cile mihing pawlkhat in, “Ama sia thaa ngilo vei hi,” a ci uh hang hi.)

Jesus ii Nu le A Suapuate

(Matthew 12.46-50; Luke 8.19-21)

³¹Tua zawkciangin Jesus nu le a suapuate hong theng hi. Amate in doipua ah dingin, ama taw kimu tu in samsak hi.

³²Jesus kiim ah a to mihonte in, “En in, na nu le na suapuipate le na suapuinueite in innpua panin hong ngak a nangma taw kimu nuam hi,” ci uh hi.

³³Jesus in, “Ka nu akua ziam? Ka suapuipate akua ziam?” ci hi.

³⁴Ama in a kiim ah a to mihingte en in, “En vun! Hite sia ka nu le ka suapuite ahi hi!

³⁵“Pathian dei bang a ngamtate sia, ka suapuipa, ka suapuinu le ka nu ahi hi,” ci in zokik hi.

Teptee bang Lungdamna Thu 4

Thaicii Poaipa Thusonteen

(Matthew 13.1-9; Luke 8.4-8)

¹Jesus in Galilee tuili hui ah hilhna nei tu in kipan kik hi. A kiim ah mihing tam mama ahikom ama in ngunkuung sungah tuak in to hi. Tui tungah ngunkuung om a, mihonte tui hui vaalbo ah ding uh hi.

²Ama in thusonteen zanghin, thu tam mama hi bangin hil hi:

³“Ngai vun! khatvei lai in, pasal khat thaici poai tu in kuan hi.

⁴Ama in lo sungah thaicite a poai ciangin, pawlkhat lamzin dung ah taakin, vacimte in tawm khawng uh hi.

⁵Pawlkhat lei daina suang tungah taak hi. A lei thuk ngawl ahikom hai ngawlin, thaicite poto hi.

⁶Tuaciang, ni hong sat ciangin, ankungnote kaanglum hi, a zung thuk ngawl ahikom ankungnote ko ngawtaak hi.

⁷Thaicii pawlkhat sia lingphung sungah taak a, tua lingte in khan nelhin deapcip ahi hu in a nga zo bua hi.

⁸Ahihang thaici pawlkhat sia lei phana ah taak ahikom, a kung hong po a, khangin a nga hong nga hi, tua a nga pawlkhat in, a za sawmthum, a zaa sawmluk le a dangte in a zaa zakhat dongin nga hi.”

⁹“Bil na nei uhle hi thu za tavun!” ci in Jesus in a thuson khup hi.



Thusonteenate ii Deina
(Matthew 13.10-17; Luke 8.9-10)

¹⁰Jesus ama nguakin a om laitak nungzui sawm le niite le a thuson a za pawlkhatte ama kungah hong pai a, thusonteenate a sontel natu in, dongh uh hi.

¹¹No tungah Pathian Ngam thuku sia hong kipia zo hi,” ci in Jesus in zokik hi. “Ahihang a puasang om ngualdangte in, thusonteenate taw veu in a za tu uh hi.

¹²“Tuasia ciang: ‘Amate in e en ahihang a mu buatu hi; ngangai tu ahihang a tel buatu hi. Banghangziam cile amate in mu thei, za thei thong le Pathian kungah heak kik tu uh a, tuaciang ama in a mawna uh maisak tu hi.’ ”

Jesus in Thaicii Poaipa Thusonteenate Sontel
(Matthew 13.18-23; Luke 8.11-15)

¹³Tuaciang Jesus in, “Hi thusonteenate tel ngawl nu ziam? Tua ahile thusonteenate dangte koibang in tel tu nu ziam?

¹⁴Thaicii poaipa in Pathian kammalte poai hi.

¹⁵Mihing pawlkhatte lam dungah a taak thaicite taw kibang hi, a thu a zaak po ciangin, Satan hong pai in laaksak hi.

¹⁶Ngualdang pawlkhatte suang tungah a taak thaici taw kibang hi. A thu a zaak po ciang lungdam takin saang hi.

¹⁷Ahihang a thu in amate sungah thuk bun ngawl ahikom, khua ngei a khom bua uh hi. Tua ahiciang tua thu hangin ngimna le vawtsiatna hong pai ciang, thakhat thu in amate pukik uh hi.

¹⁸Ngualdang pawlkhatte lingphung sungah taak thaicite taw kibang hi. Hite sia a thu a zate ahi hi.

¹⁹Ahihang nuntakna tu thin ngimna, hau nopna le a dang deinate in deapcip ahikom nga a nga thei bua uh hi.

²⁰Ahihang mihing pawlkhatte lei phana a, a kipoai thaicite bang ahi hi. Amate in a thu za a, saangin, a nga nga uh hi, pawlkhat a zaa sawmthum, pawlkhat a zaa sawmluk, pawlkhat a zaa zakhat dongin nga uh hi.

Kuang taw A Kikhup Meiinn

(Luke 8.16-18)

²¹Jesus in, “Mihing khat pawpo in meiinn hong sungtan pui in kuang nuai ah ahibuale lupna nuai ah koi ngei ka na ziam? Mei vakna khuam tungah koi hi ngawl ziam?”

²²A kisealcip thute peuma a kipualaak tu a, a kisiin theampo kihongkeak tu hi.

²³Bil na nei uh le za tavun!” ci in zomto hi.

²⁴Jesus in, “Na zaak uh sia pha takin ngai vun! Ngual tungah na zak thukhenna sia Pathian in no tungah thukhenna in hong zangh tu hi — a nasia zaw lai in thu hong khen tu hi.

²⁵Na pawlkhat a nei sia tungah kipia thua tu hi, bangma a nei ngawl sia tung pan tawmbek a nei sun teng zongh kilaaksak tu hi,” ci hi.

Thaicii Pote Thusonteen

²⁶Jesus in a ci lai na panin, “Pathian Ngam sia hi bang ahi hi. Pasal khat in ama lo sungah thaici poai hi.

²⁷Ama zanin mu a, sunin diang hi, tua laan theampo in thaici hong po a hong khang hi. Ahihang bangbangin piang ziam ci in a he bua hi.

²⁸Leitangh mama in ankungnote posakin, ngasak hi, a masa bel in a kung moi suakin ngap hong toai a, a khakbel in a ngapte sungah a tang a dim in om hi.

²⁹An a ngau ciangin a kungte mihingte in a phiau taw attan uh hi, banghangziam cile anlaak hun hong theng ahi hi.

Ankamcii Thusonteen

(Matthew 13.31-32; 34; Luke 13.18-19)

³⁰“Pathian Ngam sia bang taw kibang ih ci tu ziam?” ci in Jesus in dongh hi. “Bang thusonteen taw sontel tu hi ziam?”

³¹Tuasia hi bang hi. Pasal khat in ankamcii, leitung a thaici a nobel sia la in leisung tu hi.



³²Tawmvei zawkciang poto a, ankungte sung pan a lianbel hong suak hi. A baakte zongh lian mama ahikom vacimte hong pai in, a lim bealin bu vawt uh hi,” ci hi.

³³Jesus in mihingte munah hi thuhil a, hi bang thusontena dang tam mama zongh zangh hi, amate ii tel thei zaza son hi.

³⁴Amate tungah thusontena ngawl taw thuson nuam ngawl a, ahihang a nungzuite bek a om ciang, amate munah a vekpi in sontel hi.

Jesus in Vuipi suangval Thimsak

(Matthew 8.23-27; Luke 8.22-25)

³⁵Tua nitak in Jesus in a nungzuite munah, “Tuili langkhat ah pai tawng,” ci hi.

³⁶Tua ahiciang amate in mihonte tua munah nusia hi, A nungzuite zongh ngunkuang tungah kaa uh a, tua sungah Jesus to khol zo hi, tuaciang amate in ama ngunkuang taw paipui uh hi. Tua munah ngunkuang dang zongh om hi.

³⁷Thakhat thu in nasia tak vuiva a, tuihual ngunkuang sungah kisp suk hi, tuasia ciangin ngunkuang sung tui dim dektak hi.

³⁸Jesus sia ngunkuang nungsang ah lukham khat khamin mu hi. Nungzuite in phong a, “Syapa awng, thilum siat dek ih hi sia awlmawk ngawl ni ziam?” ci uh hi.

³⁹Jesus tho a, vuipi tungah “Thim vun,” ci a, tuihual tungah “Kilok heak vun!” ci in thu pia hi. Vuipi tawlna in tuihual thim dikdek hi.

⁴⁰Jesus in nungzuite munah, “Banghangin lau nu ziam? Tu dong upna nei ngawl lai nu ziam?” ci hi.

⁴¹Ahihang amate lau mama uh a, “Hisia pa a bang mihing hi thong ziam? Vuipi le tuihualte ngangawn in a thu ni hi!” khat le khat kici uh hi.

Teptee bang Lungdamna Thu 5

Jesus in Thaa Ngilo vei Pasal khat Damsak

(Matthew 8.28-34; Luke 8.26-39)



- ¹Jesus a nungzuite taw Galilee Tuili lang khat Gerasa ngam theng hi.
- ²Ngunkuang sung pan a pusua po ciang, mithi phumna thaankuul khat sung pan hong pai pasal khat taw Jesus kisi hi. Hisia pa thaa ngilo vei
- ³ahikom thaan sungah teang hi. Kuama in ama thikkhau taw zong khit thei nawn ngawl uh hi:
- ⁴tam vei ma a khut le a peang pan thikkhau taw kikhii ahihang a khii simin, ama in thikkhaute saantat in peangkol thikte zongh sutham hi. Ama kuama zaw zawkngawl tu dongin hat mama hi.
- ⁵Sun le zan in thaan kawm le mualtung kantan in vak a, cik-au in ama le ama suanghiam taw ki at bul hi.
- ⁶Jesus a ngalmu ciangin, hong tai a, ama mai ah khupdin in,
- ⁷“A saangbel Pathian Tapa awng! Kei bang hong law nuam ni ziam? Kei daan nong piak ngawl natu in Pathian tung kiciam in” ci in aw neiza taw au hi.
- ⁸(Banghangin hi bang ci ziam cile Jesus in, “Thaa ngilo awng, pasalpa sung pan hong pusuak tan!” a ci hu ahi hi.)
- ⁹Tua hi a Jesus in, “Na min bang ziam!” ci in dongh hi. “Ka min sia ‘mihonpi’ hi —” ci hi, “Kote tam tatak ka pha uh hi!” ci hi.
- ¹⁰Tua ngam panin, thaa ngilote a nawkeak ngawl natu in Jesus tungah thaa ngilo in ngen top hi.
- ¹¹Tua mualpangh ah vok honpi khat an zongin taa uh hi.
- ¹²Tua ahikom thaa ngilote in Jesus munah, “Vokte kung zuanin a sunguh ah ka tum thei natu thu hong pia tan,” ci uh hi.
- ¹³Ama in tuabangin thupia a, doaita in pasalpa sung panin pusuakin vokte sungah tum uh hi. Vok honbup — tuhnii bang a pha tu teng — liangpangh ah kinuntaw ngawp a, tuili sungah tuitaa in thi siat hi.
- ¹⁴Vokcingte tai in, hi thu khuapi sung le lote sungah kizelsak hi. Mihing tam mama in bang thupieng ci en tu in pai tek uh hi,



¹⁵Jesus kungah a thet uh ciangin, doai hon tam mama a vei pasalpa mu uh hi. Tua pa sia tua munah to a, puan silhin thinciim in om hi, tuasia ciang amate theampo lau uh hi.

¹⁶A mute theampo in doaivei pasalpa tung le vokte tungah bang thupiung ci thu ngual mun ah sonsawn uh hi.

¹⁷Tua ahikom amate ii ngam a nusiak natu in Jesus sawl uh hi.

¹⁸Jesus ngunkuung tungah kaa tu a kithoai ciangin doaivei ngeipa in “Hong zuisak tan,” ci in ngen hi.

¹⁹Ahihang Jesus in a zuisak nuam bua hi. “Na inn ah cia zaw tan a, Topa in nang tungah bang hong vawt a, bangza in hong dik ziam ci thu na innkuanpuite munah son tan,” ci hi.

²⁰Tua ahikom pasalpa pai in Khuapi Sawmte ah ama tungah Jesus ii nasepna teng son hi. A za theampo in lamdang sa uh hi.

Jairus Tanu le Jesus ii Puanmong A Tham Numeinu

(Matthew 9.18-26; Luke 8.40-56)

²¹Jesus in tuili kantan in a langkhat ah pai hi. Tua tuili hui ah mihonpi khat Jesus kiim ah kikhawm uh hi.

²²Jewte synagogue khat a lampui upa Jairus kici khat in, Jesus peangah bok a,

²³“Ka tanu zawm mama hi. Hong dam kik natu in, hong pai in a tungah na khut hong ngaksak tan,” ci in nasia takin ngen hi.

²⁴Tuaciang Jesus in ama taw paikhawm hi. Mihing tam mama Jesus taw tonkhawm ahikom a kiim theampo pan kiphulung uh hi.

²⁵Kum sawm le kum nii tawntung chibua natna nasia mama a thuak numei khat tua sungah kihel hi,

²⁶zatomang tam mama te in bawl a, a sum a paai theampo bo in kibawl ahihang damzaw ngawlin lawmawk seseam hi.

²⁷Ama in Jesus thu za ngei ahikom mihonte sung Jesus nungsang pan zui in,



- ²⁸“A puanmong beak tham thei leng dam tu khi hi,” ci hi.
- ²⁹A puan a thamsak ciang a chibua sia thakhat in kang hi, tuaciang a ngim nga tawntungna pan damna a nga hunlam kiphawk hi.
- ³⁰Thakhat in ama sung pan vaangletna pusuak hi ci in Jesus in, phawk a mipite sangah kiheak in, “Akua in ka puan hong tham nu ziam?” ci hi.
- ³¹A nungzuite in, “Mihonpite ii hong neakcip na mu hi, bangbangin akua in hong tham nu ziam, ci ni ziam?” ci in zokik uh hi.
- ³²Ahihang Jesus in ama a tham sia a tel dong en kawkoai hi.
- ³³Numeinu in ama tungah bang thupiang ci in phawk ahikom, lau in liing a, Jesus sangah pai hi, a peang ah khupdin in, ama tungah a thu theampo son siat hi.
- ³⁴“Ka tanu awng, na upna in hong damsak zo hi. Thinnuam in pai tan, na ngim ngana pan dam tan,” Jesus in ci hi.
- ³⁵Tuabang Jesus a pau laitakin Jairus inn pan kamtai pawlkhat hong pai a, “Na tanu thi zo hi, banghangin Syapa ngim papia lai ni ziam?” ci uh hi.
- ³⁶Jesus in amate thuson nangon thaakin, “Lau heak in, um po in” ci hi.
- ³⁷Tua zawkciang Peter, James le a suapuipa John sim ngawl ngualdang kuama a paipui bua hi.
- ³⁸Amate Jairus inn theng uh a, a kap taw a au taw buai in om Jesus in mu hi.
- ³⁹Ama sungtang in tua mihingte munah, “Banghangin hi bangin buai nu ziam? Banghangin kap nu ziam? Numeino thi ngawl hi, a mu hi bek hi,” ci hi.
- ⁴⁰Amate in ama nuisan uh hi. Tua ahikom amate theampo, doipua ah pusuaksak siat a, numeino ii pa, a nu le nungzuite thum taw inn doituamna sung numeino lupna ah tum uh hi.
- ⁴¹Ama in numeino sia a khut pan kaito a, ama tungah, “Talitha, koum,” ci hi. A khiakna sia “Numeino awng, tho in hong ci khi hi,” ci na hi.



⁴²Ama thakhat thu in thoto a, a kiim tengah kotva tu in kipan hi. (Ama kum sawm le kum nii pha hi.) Hi bangin, hong pian ciangin, mihingte in lamdang sa mama uh hi.

⁴³Ahihang Jesus in kuama munah a son ngawl natu in, nasia takin khaam hi, tuaciangin, “Bang khat pawpo a neak tu pia vun,” Jesus in ci hi.

Teptee bang Lungdamna Thu 6

Nazareth ah Jesus Kinial
(Matthew 13.53-58; Luke 4.16-30)

¹Jesus in tua mun nusia in ama khua Nazareth ah cia kik a, a nungzuite in zui uh hi.

²Sabbath ni in synagogue ah thuhil tu in kipan hi. Tua munah mihing tam mama om hi; tuaciang ama thuson a zaak uh ciang, amate in lamdang sa tek uh hi. “Hite theampo koisung pan ama in nga ziam?” ci uh hi. “Ama tungah a kipia ciimna bang ciimna ziam? Ama in nalamdang laknate bangbangin vawt thei ziam?”

³Ama Mary tapa James, Joseph, Judas le Simon ii suapui letamapa hi ngawl ziam? A suapui numeite zongh hi sung ma ah teang siat hi ka na ngawl ziam?” ci in, a nial uh hi.

⁴Jesus in, “Kamsang khat sia ama khua, ama beete le a innkuanpuite simngawl po in, mun theampo ah zakta uh hi,” ci hi.

⁵Cina tawmte tungah khut nga a, a damsak simngawl tua sungah nalamdang laknate, a vawt thei bua hi.

⁶Ama in mihingte ii upna a nei ngawl uh sia, lamdang sa mama hi.

Jesus in Nungzui Sawm le Niite Sawl
(Matthew 10.5-15; Luke 9.1-6)

Tua zawkciangin Jesus in tua mun kiim le paamte ah pai in mihingte hilna nei hi.

⁷Ama in nungzui sawm le niite samin, nii veu nii veu paikhawm tu in sawl hi. Doai ngilote tungah thuneina amate tungah pia a,



⁸“Na khualhawna uh ah, ciangkhut simngawl a dang keng heak vun — anluum hi kale, an khonna ip hi kale, na za-ip sungah sum hi kale, pua heak vun.

⁹Peangdapte thua vun a, ahizong laktong keng thua heak vun.

¹⁰No hong saangna inn ah tung tavun a, tua mun pan na din kik uh mateng tua inn ah taam tavun.

¹¹Khua khat po ah no hong kisaang bua a, hong ngai nuam bua ahile, nusia vun a, na peang tung leivuite na thin tavun. Tuate amate kidop natu thupiakna ahi hi,” ci thua hi.

¹²Tuabangin amate pai in mihingte a mawna uh pan a kisiik kik natu thuhil uh hi.

¹³Amate in doate tam mama notkeak in, cina tam mama olive thau taw zut in damsak uh hi.

Tuiphumpa John Thina

(Matthew 14.1-12; Luke 9.7-9)

¹⁴Tu in Herod Kumpipa in hi thute theampo za hi, banghangziam cile, Jesus ii minthanna mun theampo ah kizel hi. Mihing pawlkhat in, “Tuiphumpa John nungta kik hi! Tua hu in ama in nalamdang vawt thei natu, vaang nei hi,” ci uh hi.

¹⁵A dangte in, “Ama Elijah hi,” ci uh hi. Ahihang a dangte in “Ama taanghlai kamsangte bangin kamsang khat hi,” ci uh hi.

¹⁶Herod in a zaak ciangin, “Ama Tuiphumpa John hi! a lu ka tansak sa hi napi, hong nungta kik hi!” ci hi.

¹⁷Herod ama mama in, John a mat natu in thupia a, thikkhau khi in thong sungah khum hi. Herod in hi bang a, a ngamatat sia banghangziam cile a suapuipa Philip ii zi Herodias a tenpui hang ahi hi.

¹⁸Tuiphumpa John in Herod munah, “Na suapuipa ii zi na tenpui sia suak ngawl hi!” a ci tawntung hang ahi hi.



¹⁹Tua ahikom Herodias in John tungah lungkim ngawlin, thalup sawm ahihang Herod hu in a that thei bua hi.

²⁰Herod in John kiita hi, banghangziam cile John sia mihing thiangtho, mihing pha hi ci in he a, tua ahikom ama keamcing hi. A hilna a zaak simin a thin nawngkai mama ahitazong, Herod in John thuson ngai nuam hi.

²¹A khakbel ciang Herodias in hunpha khat nga hi. Herod suani hi a, ama in kumpi sung ulianbel theampo, ngalkapmaangte le Galilee ii khuanu khuapa te atu in poai vawt hi.

²²Herodias ii tanu pai in hong laam a, Herod le a leangnate theampo lungkim uh hi. Tua ahikom Kumpipa in ngaknunu munah, “Bang na dei ziam? Na dei pawpo hong pia tu khi hi, ” ci hi.

²³“Nong nget theampo hong pia tu khi hi, ka ngam a lang khen dongin hong pia tu khi hi, ci in ka kiciam hi!” ci in kamciam tam mama pia hi.

²⁴Tuasia ciang ngaknunu pusuak a, a nu munah, “Bang ngen tu khi ziam?” ci in dongh hi. “Tuiphumpa John ii lutang,” ci in zokik hi.

²⁵Ngaknunu kumpipa kungah manlang takin, heak kik a, “Tuiphumpa John ii lutang, tu mama in hi lai ah kuangdal khat tungah hong pia tan,” ci in ngen hi.

²⁶Kumpipa hi thu huvau in khuangai mama hi, ahihang a leangna theampo ii mai a kiciamna a vawtsate hu in, a nial thei bua hi.

²⁷Tua ahikom a cing khat paisak paih in, John ii lutang hong paipui natu thu pia hi. A cingpa pusuak in, thong sungah pai a, John ii lutang saattan hi;

²⁸tuaciang kuangdal khat ii tungah koi in ngaknunu pia a, tua nu in a nu pia sawn hi.

²⁹John ii nungzuite in hi thu a zaak uh ciangin, a luang la in vui uh hi.

Jesus in Pasal Tulnga Vaak

(Matthew 14.13-21; Luke 9.10-17; John 6.1-14)

³⁰Sawltakte hong cia kik uh a, Jesus taw kisi in, amate sep teng le hilna teng ko uh hi.



³¹Mihing a pai a cia kithalee in tam mama ahikom, Jesus le a nungzuite anneak hun zongh a nga bua uh hi. Tua ahikom amate munah, “Eima teng nguak mun khat ah pai in, tawmvei no sung na toitan thei natu uh in, eima bek om tawng,” ci hi.

³²Tua ahikom amate ngunkuang taw pai in, a ngamkhingna mun khat zuan uh hi.

³³Ahitazong, mihing tam mama in, amate pai mu uh a, a kuate ziam ci in tel paih ahikom, khuapi theampo pan hong pai uh a, leilam tawn in amate mai ah tai in, Jesus le a nungzuite thet ma in, tua munah theng uh hi.

³⁴Jesus in hi mihonpi khat a mu ciang, khuangai huai sa hi, banghangziam cile amate sia tuucing nei ngawl tuuhonte bang ahi hi. Tua ahikom amate thu tam mama hil tu in kipan hi.

³⁵Ni hong niam ciangin, nungzuite ama kungah pai uh a, “Tu in ni zongh niam mama zo a, hi sung sia ngamkhing mama mun khat ahi hi.

³⁶Mipite losung ahizong, khuano sung ahizong, a neak tu khat pawpo lei tu in paisak in,” ci hi.

³⁷“Noma in a neak tu khat pawpo pia vun,” ci in Jesus in zokik hi. “Amate vaak natu ngun dangka zanii manh anluum lei le hong oai ni ziam?,” ci in amate in dongh uh hi.

³⁸Tua ahikom, Jesus in, “Anluum bangza nei nu ziam? Pai in en tavun,” ci in dongh hi. “Anluum luum nga le ngasa pum nii kinei hi,” ci in zokik uh hi.

³⁹Jesus in a nungzuite munah mipite a pawl a pawlin, lopa hing tungah tosakin sawl hi.

⁴⁰Tua ahikom mipite a ngui in to a, pawlkhat zakhat, pawlkhat sawmnga in to uh hi.

⁴¹Tua zawkciang Jesus in anluum nga le ngasa nii teng la a, van ento in, Pathian tungah lungdamko hi. Ama in anluumte baltham in mipite hawmsak tu in a nungzuite tungah pia hi. Ngasa pum nii te zongh, amate sungah hawm siat hi.



⁴²A om theampo in a kham in ne tek uh hi.

⁴³Tua zawkciang nungzuite in, anluum le ngasa a khamvaal uh khum sawm le khum nii dimin seng lai uh hi.

⁴⁴An a kivaak sia pasal tulnga pha hi.

Jesus Tuitung Lampai
(Matthew 14.22-33; John 6.15-21)

⁴⁵Mipite a cia laanin Jesus in nungzuite ngunkuang tungah tosak a, tuili lang khat Bethsaida khua ah a pai khol tu in sawl hi.

⁴⁶Kikhen nату mipite tungah mangpha a thaak zawkciang ama thungen tu in mual tungah kaato hi.

⁴⁷Nitak ciangin ngunkuang tuili zanglai ah theng a, Jesus ama nguakin lei ah om hi.

⁴⁸Ama in a nungzuite ngunkuang nasia tak hot a om mu hi, banghangziam cile amate in vui vakna sang maingat in hot uh hi; tuaciang zingsang nai thum le nai luk kilaklaw in Jesus amate sang tui tungah lam hong pai hi. Ama ina nungzuite suang khial tu in kithoai a,

⁴⁹ahihang amate in tui tungah Jesus lam a pai mu uh hi. “Thithaa hi,” ci in ngaisun in cik-au uh hi.

⁵⁰Ama a mu uh ciangin, amate a lau tek mama uh hi. Jesus in amate thakhat in paupui a, “Na thin uh liansak vun! Keima khi hi. Lau heak vun!” ci hi.

⁵¹Tuaciangin ama ngunkuang tungah to a, tuasia ciangin vui hong thim hi. Nungzuite in lamdang mama sa uh a,

⁵²banghangziam cile amate in, mihing tulnga an kivaakna ii a khiakna tatak a tel bua uh hi; amate ngaisutna in a ban zo bua hi.

Jesus in Gennesaret khua Cinate Damsak
(Matthew 14.34-36)

⁵³Amate in tuili kantan in, Gennesaret vaalbo ah kaa a, tua munah a ngunkuangte khau khit uh hi.



⁵⁴Amate in ngunkuang a nusiak po ciang, mihingte in Jesus meal tel paih uh hi.

⁵⁵Tua ahikom mihingte in ngambup sungah del kawkoai uh a; ama om hi a kici na mun theampo ah cinate phak tungah sialin ama kungah puak uh hi.

⁵⁶Jesus paina po khuapi, khuano le losung a om mihingte in cinate vanhzuakna phual ah paipui uh a, a puanmong beak a tham tek thei natu in, ama tungah ngen uh hi, tuaciang a thamte theampo dam uh hi.

Teptee bang Lungdamna Thu 7

Taangpupite ii Kihilna

(Matthew 15.1-9)

¹Jerusalem pan hong pai Phariseete pawlkhat le Thukham hil syate pawlkhat, Jesus kiim ah kikhawm uh hi.

²Amate in nungzui pawlkhatte an a neak tu ciang ngeina bangin, khutthiang ngawl taw an ne mu uh hi — koibang ziam cile amate in Phariseete hil bangin, a khut uh sil ngawl hi.

³(Phariseete le Jew te peuma in, amate ii taangpupite hil, ngeina tuatuamte nasia takin zui uh hi: a khut uh ahi tu bangin a sil bua uh le an ne ngawl uh hi;

⁴vanhzuakna phual pan a kinga peuma, tui taw sil phot ngawlin ne ngawl hi. Hai, kuang le beal, taukuang le lupnate ahi tu bang a, silthiang natu ngeina dang tam mamate zui uh hi.)

⁵Tua ahikom Phariseete le Thukham hil syate in Jesus munah, “Banghangin na nungzuite in, taangpupite hil ngeinate zui ngawlin, an a neak tu uh ciang a khut thiang ngawl taw anne ziam?” ci in dongh uh hi.

⁶Jesus in a zokikna ah, “Isaiah in note thu a sonkholna bangza in maan ziam! A kihi theamsak minamte awng, ama in hi bangin at hi: ‘Pathian in, hi mite in a kammal bek uh taw, kei zatakna hong pia uh hi, ahihang a thinsung uh kei taw kikhuala uh hi.



⁷Amate ii hong biakna sia kimanna om ngawl hi, banghangziam cile amate in mihingte vawttawm ngeinate Pathian ii Thukham bangin hil uh hi!’ ci hi.

⁸“No in Pathian thupiakte vawkin mihingte ii hilnate na ni uh hi.”

⁹“Noma ii kihilna te na kholet thei natu in Pathian thukhamte na nial zia uh na thiam uh hi.

¹⁰Bang ci nuam khi ziam cile Moses in ‘Na nu le na pa thasia vun,’ tuaciang, ‘A kuama po a nu a pa a haamsiat sia thina thuak taken,’ ci hi.

¹¹Ahihang no hilna ah nu le pa hu thei natu na khat pawpo, ‘Hi sia Corban,’ hi, (Pathian atu a kipia sa hi) ci po le,

¹²nu le pa a hu ngawl hangin, phamaw ngawl hi, ci nu hi.

¹³Hi bang kihilnate khat tung pan khat na kipiak sawn uh ciang Pathian kammal a mel suak nu hi. Hi thu taw a kibang na ngamtatna dang uh zongh tam mama omlai hi,” Jesus in ci thua hi.

Mihing khat A Ninsak Nate

(Matthew 15.10-20)

¹⁴Jesus in mihonpите khatvei ma sam kikin, “Na vekpi in hong ngai tavun a, tel vun.

¹⁵A pua sang pan hong tum nate bangma in, mihing khat sia zeksa taw kisai in ninsak ngawl hi. A sung pan hong pusuak to sia in mihing khat ninsak hi zaw hi,

¹⁶Bil a neite in za tavun” ci hi.

¹⁷Ama mihonpите nusia in, inn sungah a tum ciang, a nungzuite in, hi hilhna hong sontel tan ci uh hi.

¹⁸“No sia ngualdangte sangin ciimzaw tuan ngawl nu hi. Tel ngawl nu ziam? A pua sang pan hong tum suk na khat pawpo in mihing khat sia ninsak ngawl hi,

¹⁹banghangziam cile a thin sungah tum ngawlin, a ngilpi um sungah a tum zawkciang a pua sangah pusuak hi,” Jesus in ci hi. (Hi bang a ci ciang Jesus in, an a minpiang neak tuak hi, ci ahi hi.)



²⁰Tuaciang ama in a ci lai na pan, “A sung sang pan hong pusuakte in mihing khat ninsak hi.

²¹Banghangziam cile mihing khat ii a sung, a thinsung panin ngaisutna pha ngawl piang a, tuate in paktatna, kisutolna, kithalupna,

²²nupa kipaIngulna, duhopna, ngamtat siatna tuatuam; kitheamna, maizum mawkna, ki-enna, kingen siatna, kiphatsakna, le mawmawtna —

²³hi siatnate theampo sia mihing khat ii sung pan hong pai nate hi a, tuabangte in amate ninsak hi,” ci hi.

Nupi Khat ii Upna
(Matthew 15.21-28)

²⁴Tua zawkciangin Jesus Tyre khuapi hui ngamkhen ah pai tu in ding hi. Inn khat sungah tum a, tua munah ama a om hunlam kuama heak tu oai ngawl ahihang a bucip zo bua hi.

²⁵A tanu thaa ngilo vei nupi khat in, Jesus thu za ahikom thakhat in hong pai a, a peang ah bok hi.

²⁶Nupinu sia Gentile mi hi a, Syria ngam Phoenicia ngamkhen sung pan a piang ahi hi. Ama in a tanu sungah a om doai a nawkeaksak natu in Jesus munah ngen hi.

²⁷Ahihang Jesus in, “Tanote vaak masa phot tawng, tuate anneak laaksakin, ui piaksak tu kilawm ngawl hi,” ci hi.

²⁸“Topa awng, tano teng anneak mongte sabuai nuai pan, ui ngangawn in ne laibuang hi ngawl ziam!,” ci in nupinu in zo hi.

²⁹Tua ahikom Jesus in, “Tuabangin nong zona hangin, va cia tan, doai sia na tanu sung pan pusuak zo hi cisia na mu tu hi!” ci hi.

³⁰Nupinu a inn ah cia a, a sung pan doai pusuak sa a tanu lupna tungah a lum mu hi.

Jesus in Nangong, A pau thei ngawl khat Damsak

³¹Jesus in Tyre kiim le paam teng nusia in Sidon kantan in Galilee ah pai a, Khuapi Sawm ii ngamkhente tawn hi.



³²Mihing pawlkhat in pasal nangong a pau thei ngawl khat hong paipui a, ama tungah Jesus ii a khut a ngak tu ngen uh hi.

³³Tua ahikom Jesus in ama nguakin mihonpite kung pan a khuala thithimna ah samtuan a, pasalpa ii bil sungah a khutme thunin, cilphii in pasalpa ii leei thamsak hi.

³⁴Tua zawkciang Jesus in, van ento a, phiing vahumin, “Ephphatha,” “Kihong in!” ci hi.

³⁵Thakhat in pasalpa in khuaza thei a, a pau theingawl na pan olno takin paukik thei hi.

³⁶Tuaciangin mipite munah hi thu kuama tungah a son ngawl natu in, ama in khaam vaial kale mipite in son vaial uh hi.

³⁷A za theampo in lamdang sa mama uh hi. “Na theampo bangza in vawt thiam ziam! Ama in nangongte ngangawn khua zasak thei a, a pauthei ngawlte dongin pausak thei hi,” ci uh hi.

Teptee bang Lungdamna Thu 8

Jesus in Mihing Tulli Anvaak

(Matthew 15.32-39)

¹Khua ngei ngawlin mihon dang khat hong kikhawm hi. Tua mihingte anneak tu bangma a nei nawn ngawl uh ciangin, Jesus in a nungzuite a kungah sam a,

²“Hi mite khuangai huai ka sa hi, banghangziam cile amate in ni thum tawntung kei taw hong om khawm a, tu in bangma neak tu nei nawn ngawl hi.

³An ne ngawlin ciasak leang, lamkaal ah pukhong siat tu hi, banghangziam cile pawlkhatte a khuala pek pan hong pai ahi hi,” ci hi.

⁴A nungzuite in, “Hi sung senneal ngamah koisung panin, mihing hi za ii anneak tu mu tu hi ziam?” ci uh hi.

⁵“Anluum bangza nei nu ziam?” ci in Jesus in dongh hi. “Luum sali” ci in zo uh hi.



⁶Ama in mihonte lei ah to tu in sawl hi. Tua zawkciang ama in anluum sali teng la in, Pathian tung lungdamko in, balneen a, nungzuite ii mihonte a hawmsak tu in pia hi; tuabangma in nungzuite in hawm uh hi.

⁷Amate in ngasano pawlkhat zongh nei uh hi. Jesus in hite atu lungdamko a, nungzuite tungah hawm vun ci hi.

⁸⁻⁹Mihing sim in ne uh a, kham tek uh hi — anne mihing pawpo tullu bang pha hi. Tua zawkciangin nungzuite in anneak mong a khop ciang khum sali dim pha hi. Jesus in mipite ciasak a,

¹⁰thakhat thu in nungzuite taw ngunkuang tung zuanin Dalmanutha ngamah pai uh hi.

Phariseete in Na lamdang Lakna Ngen

(Matthew 12.38-42; Matthew 16.1-4)

¹¹Phariseete pawlkhat Jesus kungah pai a, ama taw kam kinial uh hi. Amate in Jesus thaangsia bangin sia nuam ahikom Pathian lungkimpuina a om le a om ngawl a tel nopna in, nalamdang lakna khat ngen uh hi.

¹²Ahihang Jesus phiing vahumin, “Banghangin tu lai mihingte in nalamdang lakna veu hong ngen ziam? Hong pia ngawl tu khi hi kong ci hi! Hi mihingte tungah tuabang laknate kipia ngawl tu hi!” ci hi.

¹³Amate nusia in ama ngunkuang tung zuan kik a, tuili ngalkhat ah pai tu in kipan hi.

Phariseete le Herod ii Tol

(Matthew 16.5-12)

¹⁴Nungzuite in anluum a kicing a ken tu mangil a, ngunkuang sungah luum khat bek nei hi.

¹⁵“Kidawm vun a, Phariseete le Herod ii tol panin, kikeam tavun,” Jesus in ci hi.

¹⁶Amate sung teng tua thu kikum uh a: “Hi bang a hong ci sia anluum ih nei ngawl hang a, hong ci hi vak,” ci uh hi.



¹⁷Jesus in amate kikap tuamna teng tel paih ahikom, “Banghangin anluum nei ngawl huvau kikum nu ziam? Tel ngawl lai, he ngawl lai nu ziam? Na thin uh kiphel ngawl het ziam?”

¹⁸Mit nei napi — mu thei ngawl nu ziam? Bil nei napi — za thei ngawl nu ziam?”

¹⁹Anluum nga taw mihing tulnga ka vaak lai in, a khawn laak uh bangza khawm kana nu ziam? Ciamtee nawn ngawl nu ziam?” ci hi. “Khum sawm le khum nii,” ci in zo uh hi.

²⁰“Tuaciang anluum sali taw mihing tullu ka vaak lai in a khawn laak uh khum bangza khawm kana nu ziam?” ci hi. “Khum sali,” ci in zo uh hi.

²¹“Tua hi napi tel ngawl lalai nu ziam?,” ci hi.

Bethsaida ah Jesus in Mittaw Pasal khat Damsak

²²Amate Bethsaida khua hong theng a, ama ii tham tu in mittaw pasal khat mihing pawlkhat in Jesus kungah hong paipui hi.

²³Jesus in mittawpa ii khut pan len a, khua pua sangah paipui hi. Pasalpa mittang ah a cilphii zawkciang Jesus in ama tungah a khut nga a, “Khua na mu thei ziam,” ci in dongh hi.

²⁴Pasalpa in khuadak a, “Mihingte mu thei khi hi, ahizong amate thingkung lampaite taw kibangin ka mu hi,” ci hi.

²⁵Jesus in pasalpa mittang tungah a khut nga kik hi. Tuasia ciang pasalpa in khua pha tatak a et le, khua mu thei kik a, na theampo thiang takin mu thei hi.

²⁶Jesus in a inn ah ciasak a, “Tua khuano sungah pai kik nawn heak in,” ci in thupia hi.

Peter in Jesus Thu Thiangson

(Matthew 16.13-20; Luke 9.18-21)

²⁷Tua zawkciang Jesus le a nungzuite Caesaria Philippi khua hui khuanote ah pai uh hi. A pai kawmin, “Ngual in kei, akua hi hong ci ziam,” ci in dongh hi.

²⁸“Pawlkhat in Tuiphumpa John hi hong ci hi, a dangte in Elijah hi hong ci a, kamsang khat hi hong ci zongh om hi,” ci in zokik uh hi.



²⁹“Note in kei, akua hi nong ci uh ziam?” ci hi. Peter in, “Nang sia Messiah ni hi,” ci hi.

³⁰Tuasia ciang Jesus in, “Kei huvau kuama munah son heak vun,” ci in thupia hi.

Jesus in A Thuak natu le A Thi natu Sonkhol

(Matthew 16.21-28; Luke 9.22-27)

³¹Tua zawkciang Jesus in anungzuite hilna nei tu in kipan hi. “Mihing Tapa in nasia takin thuak tu a, upate, thiampi liante le Thukham hil syate in nial tu uh hi. Ama thatlum tu a, ni thum zawkciang nuntakna sungah tho kik tu hi,” ci hi.

³²Ama in hi thu amate tungah thiangson mama hi. Tua ahikom Peter in ama sam tuam in tei hi.

³³Ahihang Jesus hong kingeilee a, a nungzuite en in, Peter tei hi. “Kei kung pan tai in Satan awng, na khua ngaisutna Pathian kung pan hong pai hi ngawlin, mihing pianzia sung pan hong pai ahi hi!” ci hi.

³⁴Tua zawkciang Jesus in mihonte le a nungzuite ama kungah sam a, “Mihing khat po in kei hong zui nuam a ahile ama le ama kinial in, a thinglamte pua in hong zui taken.

³⁵Banghangziam cile a nuntakna a hu nuam sia in taan tu hi; ahihang kei hang le Lungdamna thu hang a nuntakna a taan sia in ngup nga tu hi.

³⁶Mihing khat in simlei bup a nga hangin, a nuntakna a taan le meetna nei tu ziam? Meet ngawl tu hi!

³⁷A nuntakna a nga kik natu in, a piak thei tu bangma om ngawl hi.

³⁸Pathian he ngawl, hi ngitlona khang hun sungah mihing khatpo in, kei le keima thu hangin, a mai a zum le, Mihing Tapa sia Pa ii vaangletna le a thiangtho vantung lalangte taw hong paikhop ciangin, Mihing Tapa zongh in tuasia pa atu a maizum tu hi.

Teptee bang Lungdamna Thu 9



¹Hi bangin pau thua lai hi. “A tatak in kong ci ciang, hi sungah a om mihing pawlkhatte in Pathian Ngam sia vaangletna taw hong pai a mu uh mateng a thi buatu hi,” ci hi.

Meal Kikhealna

(Matthew 17.1-13; Luke 9.28-36)

²Ni luk zawkciang Jesus in Peter, James le John te samin mualsaang khat tungah kaato pui hi, tua munah amate teng bek om uh hi. Amate mu tangin Jesus meal hong kikheal a,

³tuaciang a puansilhte paakin tee a — leitung a khat pawpo ii thiansak thei sangin paak zaw lai hi.

⁴Tuaciang nungzuite thum in Jesus sia Elijah le Moses taw thuson khawmin om mu uh hi.

⁵Peter in Jesus munah, “Syapa awng, hi sungah ih om sia bangza in pha ziam! Buk thum sa tawng, khat nang atu, khat Moses atu, khat Elijah atu,” ci hi.

⁶Ama le a lawmte lau mama ahikom a pau tu he meal ngawl uh hi.

⁷Tuaciangin meeikaai khat hong piang a, a limh taw amate tuamcip hi, tuaciangin meeikaai sung panin aw khat in, “Hi sia ka it ka tapa hi — ama thu ngai vun!” ci hi.

⁸Amate in manlang takin a kiimkot a et uhle kuama dang a mu bua uh a, Jesus bek amate taw om a mu uh hi.

⁹Mualtung pan hong tuaksuk ciangin Jesus in, “Mihing Tapa sia thina pan a thawkik mateng in na mu uh teng kuama munah son heak vun,” ci hi.

¹⁰Amate in a thupiak bangin om uh hi, ahihang amate sung teng kikum uh hi. “Thina pan thokik ci sia bang a ci nopna ziam?” ci uh hi.

¹¹Tuaciang amate in Jesus munah, “Thukham hil syate in banghangin Elijah hong pai masa tu ci ziam?” ci in dongh uh hi.



¹²A zokikna pan, “Na theampo pua khol tu in Elijah hong pai masa takpi hi. Ahitazong, banghangin Laithiangtho in Mihing Tapa in nasia takin thuak tu a, ama kinial tu hi, ci ziam?”

¹³Ahihang a tatakin kong ci ciang, Elijah hong pai takpi zo hi. Laithiangtho ii ama thu a son sa bangma in, mihingte in amate uuk bang po in ama vawt uh hi,” ci hi.

Jesus in Thaa Ngilo Vei Patang khat Damsak

(Matthew 17.14-21; Luke 9.37-43)

¹⁴Amate nungzui dang teng kungah a thet ciang, a kiim ah mihonpi na om a, Thukham hil syate taw kam kinial in om a mu uh hi.

¹⁵Mihonpite in Jesus a mu ciangin lamdang sa mama uh a, ama delin muak tek uh hi.

¹⁶Jesus in a nungzuite munah, “Amate taw bang teng kinial nu ziam?” ci in dongh hi.

¹⁷Mihon sung pan pasal khat in zo a, “Syapa awng, nangma kungah ka tapa kong paipui hi, banghangziam cile ama doaivei in a pau thei bua hi.

¹⁸Thaa ngilo ii ama a vawtsiat sim in, leiliik in, a kam pan cilphuan tha a, a haci in, a pum buppi tak hi. Na nungzuite munah thaa ngilo hong nawkeaksak natu ka nget hang, amate in a not zo bua uh hi,” ci hi.

¹⁹Jesus in, “A um ngawl mihingte awng! bang tan vei no taw hong omkhawm zo tu khi ziam? Bang tan vei hong khual zo tu khi ziam? Patang sia ka kungah hong paipui tavun!” ci hi.

²⁰Amate in patang sia Jesus kungah paipui uh hi. Jesus a mu po ciang thaa ngilo in patang sia kikaikinsak a, lei ah pukin kilumliik a cilphuan tha hi.

²¹Jesus in, “Hi bang ahi thei zawk ngei zo ziam?” ci in a pa dongh hi. “A no lai pan ma hi,” ci in zokik hi.

²²“Tam vei ma doai in ama thatlum nuamin meikuang sung le tui sungah lawn nithi hi,” ci hi. “Nong hu theina a om le, ko hong hesuak tan a hong hu tan,” ci hi.



²³Jesus in, “Nangma mama in na um nale hong hu thei khi hi, upna a nei khat tungah na theampo suak thei hi,” ci hi.

²⁴Thakhat in a pa au a, “Upna nei khi hi, ahihang kicing tham ngawl hi. A kicing zaw ka nei natu in hong hu tan!” ci hi.

²⁵Mipite in ama uumci tu a kithoai sia Jesus in mu ahikom thaa ngilo tungah, thupia a, “Nangong le a ngoai thaa ngilo awng, patang sung pan hong pusuak tan a, ama sungah tum kik nawn heak in, ci in thu kong pia hi,” ci hi.

²⁶Thaa ngilo cik-au a, patang sia nasia takin a kikaikinsak zawkciang pusuak hi. Patang sia mithi luang bang hi a, a kuama po in “Ama thi zo hi,” ci uh hi.

²⁷Ahihang Jesus in patang khut pan zam a, a phokto ciang ama hong ding hi.

²⁸Jesus inn sungah a sungtan zawkciang a nungzuite in a tuamin dongh a, “Banghangin kote in doai not zo ngawl khu ziam?” ci uh hi.

²⁹“Hi bangte sia thungetna sim ngawl nadang in notkeak thei ngawl hi,” Jesus in ci hi.

Jesus in Ama Thi natu Son kik

(Matthew 17.22-33; Luke 9.43-45)

³⁰Jesus le a nungzuite in, tua mun nusia in Galilee kantan in pai uh hi. Jesus in ama omna kuama heak tu a dei bua hi,

³¹banghangziam cile ama in “Mihing Tapa in ama a thatlum tu mihingte tungah ki aap tu hi. Ahihang ni thum zawkciang nuntakna sungah ama tho kik tu hi,” ci in a nungzuite hilh hi.

³²Ahihang amate in hi hilna bangziam ci in a tel bua uh a, dongh zongh a dongh ngam bua uh hi.

Akua Lianbel Ziam?

(Matthew 18.1-5; Luke 9.46-48)

³³Amate Capernaum khua hong theng a, inn sungah a tum zawkciang, Jesus in a nungzuite munah, “Lampai kawmin na kinial uh sia bang thu ziam?” ci in dongh hi.



³⁴Ahihang amate in a zokik nuam bua uh hi, banghangziam cile lampi tungah a kinial uh thu sia, akua lianbel ziam ci thu ahihang hi.

³⁵Jesus to a, nungzui sawm le niite samin, hi bangin ci hi, “A kuama po note sungah, a lianbel tu a nuam sia in, ama le ama a nobel in kikoi in, ngual theampo ii naseam in na om uh kul tu hi.”

³⁶Tua zawkciang ama in patangno khat leenin, amate mai ah dingsak hi. Patangno sia koai in hi bangin ci hi,

³⁷“A kuama po ka min taw hi patangte khat a saang sia in kei hong saang ahi hi; tuaciangin a kuama po kei hong saang sia”

Eite Hong langpan Ngawlte peuma ih Pawl hi

(Luke 9.49-50)

³⁸John in, “Syapa awng, pasal khat in nangma min taw doai a nawnot ka mu uh a, a kheal natu ka sawl uh hi, banghangziam cile ama ei pawl ahi bua hi,” ci hi.

³⁹Jesus in, “Thoh heak vun, banghangziam cile kei min taw lamdang lakna a vawt khat in kei hong sonsia memeang ngawl tu hi.

⁴⁰Banghangziam cile ei lang hong pang ngawl po, ei sang a hong kipawl ahi hi.

⁴¹A tatakin kong ci ciang, keima mi na hi uh hu in, tuidam hai khat hong sua sia in, a thaman saang tatak tu hi.”

Mawna Tu Ze-etna

(Matthew 18.6-9; Luke 17.1-2)

⁴²“Hi patangno khat ii kei hong upna a bosuasak mihing khat sia a ngawng ah an ngoaina suang lian khat khi hen a, tuipi sungah kivawk le phazaw hi.

⁴³Tua ahikom na khut khat in na upna hong lalsak le saattan in! Khut nii taw hell ngam, a mit ngei ngawl meisa sungah na pai uh sangin, khut langkhat nguak taw nuntakna sungah tum leute phazaw hi.

⁴⁴Tua munah amate a ne thanhte in thi ngei ngawl a, amate a hal mei in mit ngei ngawl hi.



⁴⁵Tuaciang na peang khat in na upna a lalsak ahile, saattan in! Hell sungah peang nii taw na pai uh sangin, peanglang nguak taw nuntakna sungah tum zaw leute phazaw hi.

⁴⁶Tua munah amate a ne thanhte in thi ngei ngawl a, amate a hal mei in mit ngei ngawl hi.

⁴⁷Tuaciang na mittang khat in na upna uh a lalsak ahile khelkeak in! Pathian Ngam sungah mittang langkhat nguak taw tum leute hell sungah mittang nii taw hong kivawk sangin phazaw hi.

⁴⁸‘Tua munah amate a ne thanhte in thi ngei ngawl a, amate a hal mei sia mit ngei ngawl hi.’

⁴⁹“Sangaw biakpiakna sia cii taw a kithiansua bangma in, mihing sim zongh meikuang in thiansua tu hi.

⁵⁰“Cii sia pha hi; ahihang ama in a alna a bosua le, bangbangin alsak kik thei tu nu ziam?” “Na sung uh a, kingualtamh theina cii na nei tavun, khat le khat kilemna taw na om tavun,” ci hi.

Teptee bang Lungdamna Thu 10

Kikhulna huvau Jesus in Hil

(Matthew 19.1-12; Luke 16.18.)

¹Tua zawkciang Jesus in tua mun nusia in, Judea ngam ah pai a, Jordan Ngun kantan hi. Mihonpite hong kikhawm kik a, a hilh ngei tawntung sa bangma in amate hil hi.

²Phariseete pawlkhat ama kungah hong pai a, ama aita tu in hong kipan uh hi. “Ih Thukham in, pasal khat in a zi a khul tu oai ziam hong son tan,” ci uh hi.

³Jesus in thudokna khat taw zo a, “Moses in bang thukham hong pia ziam?” ci hi.

⁴Amate zokikna pan, “Moses in pasal khat sia a zi a khul natu in, lai pia pole, khul thei hi,” ci uh hi.



⁵Jesus in amate tungah, “Moses in hi bang thukham a at sia banghangziam cile noma hilh zawk a pang ngawl na hi uh hang hi.

⁶Ahihang a kipatciil bitphua hun lai in, Laithiangtho ii ci bangin ci leang, ‘Pathian in pa khat le numei khat vawt hi.

⁷Tuaciang hi thu hangin, pa khat in a pa le a nu nusia in a zi taw kingawm tu hi.

⁸Tuaciang amate nii sia khat suak tu hi.’ Tua ahikom amate nii hi nawn ngawlin, khat ahi hi.

⁹Tua hi a, Pathian ii ngawm sa sia, kuama in khen heak hen,” ci hi.

¹⁰Inn sungah amate a sungtan zawkciang a nungzuite in hi thu huvau dongh uh hi.

¹¹Amate munah, “Pasal khat a zi khul a, zi dang khat a nei sia in, a zi tungah nupa kipalngul mawna vawt ahi hi.

¹²Tuasia bangma in, numei khat in a pasal khulin, pasal dang a nei le, nupa kipalngul mawna vawt ahi hi,” ci hi.

Jesus in Patangnote Thupha pia

(Matthew 19.13-15; Luke 18.15-17)

¹³Mihing pawlkhat in patangte tungah Jesus ii khut a ngaksak tu dei in, ama kungah hong paipui uh hi, ahihang nungzuite in amate tei uh hi.

¹⁴Jesus in hi bang a ngamtat uh a mu ciangin, thin uuk a amate tungah, “Patangte ka kungah hong pai taken, khaam heak vun, banghangziam cile Pathian Ngam sia hi bangte atu ahi hi.

¹⁵A tatak in kong ci ciang, patangno khat ii saan bangin Pathian Ngam a saang ngawl peuma in, tua sungah a tum thei buatu hi.”

¹⁶Tua zawkciang patangnote, a khut taw toai in, khat sim tungah a khut nga a, thupha pia hi.

Sumhaupa

(Matthew 19.16-30; Luke 18.18-30)



¹⁷Jesus ding tu in a kipat kik ciangin, pasal khat hong tai a, ama mai ah khupdin in, “Sya pha awng, tawntung nuntakna ka nga natu in bang ka vawt tu ziam?” ci in dongh hi.

¹⁸“Pathian khat bek sim ngawl, a pha kuama om ngawl hi. Banghangin kei pha hong ci ni ziam?,” ci in Jesus in dongh hi.

¹⁹“Thukhamte na heak hi a: ‘Mihing that heak in; palngul mawna vawt heak in; nguta heak in; leilot thu taw ngual suankhial heak in; ngual theam heak in; na pa le na nu zakta in.’ ”

²⁰“Syapa awng, ka no lai mama panin, hi thukhamte ka zui siat zo hi,” pasalpa in ci hi.

²¹Jesus in ama itna taw en in, “Na kisap khat bek om lai hi. Va pai tan a na neisa theampo zuakin, na sum nga teng mizawngte pia tan; tuasia ciang vantung ah hauna na nei tu hi; tua zawkciang hong pai tan a, ka nung hong zui tan,” ci hi.

²²Pasalpa in hi thu a zaak ciangin a maikhing a, khuangai in a paisan hi, banghangziam cile ama hau mama hi.

²³Jesus in a nungzuite en kawkoai a, amate munah, “Sumhaute Pathian Ngam sungah a tum tu sia, bangza in haksa tu ziam!” ci hi.

²⁴Nungzuite in hi kammalte lamdang mama sa uh hi, ahihang Jesus in, “Ka tate awng, Pathian Ngam sungah tum tu, bangza in haksa ziam!”

²⁵Sumhau khat ii Pathian Ngam sung a tum tu sia, kalaoh khat ii phin bilvang sungah a tum tu sangin haksa zaw hi,” ci lai hi.

²⁶Hi bang a ci ciang, nungzuite lungmang seseam a, khat le khat in, “Tua ahile akua ngupna nga thei tu ziam?” kici uh hi.

²⁷Jesus in amate tangtanh in en a, “Mihingte atu hi sia suak thei ngawl hi, ahihang Pathian atu in suak maw ngawl hi. Pathian atu in na theampo suak thei hi,” ci hi.

²⁸Tuasia ciang Peter in, “En in, kote in na theampo nusia in, nangma hong zui khu hi,” ci hi.

²⁹Jesus in, “Hi hi, khat pawpo in inn ahizong, suapui pate ahizong, suapui numeite ahizong, nu, pa, tate le lote ahizong, kei hang le Lungdamna Thupha hangin a nusia le,

³⁰ama in hi khang hun sungah tamzawsin nga tu hi. Ama in innte, suapui pate, suapui numeite, nu, pa, tate le lote a zaa zakhat tam zaw in nga tu hi, siatvawtna zongh thuk tu hi, tuaciang hong pai pheang tu hun sungah tawntung nuntakna nga tu hi.

³¹Ahihang tu laitak a masa ahi mihing tam mamate sia a khak hi tu a, tu laitak a khakte sia a masa hi tu hi, ci hi.”

Jesus in A thi tu Thumvei A Sonna

(Matthew 20.17-19; Luke 18.31-34)

³²Jesus le a nungzuite Jerusalem zuanin pai uh hi. Jesus in a patau a nungzuite mai ah paikhol hi; a nung pan a zui mihingte zongh lau uh hi. Khatvei ma Jesus in a nungzui sawm le niite sam tuam a, ama tungah a piang tu thute son hi.

³³“Ngai vun, ei teng Jerusalem ah ih pai tu a, tua munah Mihing Tapa sia thiampi liante le Thukham hil syate tungah ngual in aap tu hi. Amate in thidaan pia tu a, tua zawkciangin Gentilete khut sungah ki aap tu hi,

³⁴tua mite in ama selno in, cilphii tu a, vel in thatlum tu uh hi; ahihang ni thum zawkciang ama nuntakna sungah tho kik tu hi,” ci hi.

James le John Unau ii Hu ngetna

(Matthew 20.20-28)

³⁵Tua zawkciang Zebedee tate ahi James le John sia Jesus kungah hong pai hi. “Syapa awng, ko atu hong vawtsak lete kong oai uh thu khat om hi,” ci uh hi.

³⁶“Bang ziam?” ci in Jesus in dongh hi.



³⁷“Na minthanna Ngamsung na kumpi tokhum tungah na to ciangin, ko zongh na ziatsang ah khat, na veisang ah khat, nong tosak tu ka uuk uh hi,” ci hi.

³⁸Jesus in amate munah, “Nong nget uh sia bangziam ci in na tel bua uh hi. Ngim thuakna hai ka dawn tu sia dawn thei natu nu ziam? Kei ii ki baptize bangin, no zongh ki baptize thei natu nu ziam?” ci hi.

³⁹“Hi thei tu khu hi,” ci in zokik uh hi. Jesus in, “Hai ka dawn tu sia no zongh dawn takpi tu nu hi, ka ki baptize bang keak ma in, no zongh ki baptize tu nu hi.

⁴⁰Ahihang ka ziatsang le ka veisang a to tute sia, kei in teal thei natu thu ka nei bua hi. Hi munte sia ama puakholsak te atu in, Pathian in pia tu hi,” ci hi.

⁴¹A nungzui dang sawmte in, hi thu huvau a zaak ciangin, James le John tungah thin uuk uh hi.

⁴²Tua ahikom, Jesus in amate theampo samin, “Pathian he ngawlte a ukte hi a kici mihingte in a mite tungah vaangnei a, a lampuite in thuneina a cingin nei hi, ci in na he uh hi.

⁴³Ahihang no sungah hi bang hi ngawl tu hi. Khat po in a lian tu a uuk uh le, a dang teng ii naseampa hi tu hi;

⁴⁴no sung pan khat in lampui a uuk le, ama sia a dang theampo ii salpa hi tu hi.

⁴⁵Banghangziam cile Mihing Tapa ngangawn zongh, ngual in ama na a sepsak tu in hong pai bua hi; ngual atu a seam tu le, a nuntakna pia in, mihing tam mama tan tu in hong pai hi,” ci hi.

Jesus in Mittaw Bartimaeus Damsak

(Matthew 20.29-34; Luke 18.35-43)

⁴⁶Amate Jericho khua hong theng a, tuaciangin Jesus sia a nungzuite le mihonpi khat taw a din kik uh ciangin, lamhui ah Timaeus ii tapa mittaw khutdaw ngen Bartimaeus a kici khat to hi.



⁴⁷Ama in Nazareth mi Jesus hong pai ci in a zaak ciangin, “David Tapa Jesus awng; kei hong hesuak tan!” ci in au hi.

⁴⁸Mipite sung pan pawlkhat in teih in, a thim natu in, sawl uh hi. Ahihang ama in awnging seseam in au a, “David Tapa Jesus awng, Kei hong hesuak tan,” ci hi.

⁴⁹Jesus tawlna a, “Na sam tavun,” ci hi. Tua ahikom amate in mittawpa sam hi. “Lungdam in! Ama in hong sam hi, ding in,” ci uh hi.

⁵⁰Ama in a puantual suutin, vawk a, lawp takin Jesus kungah pai hi.

⁵¹Jesus in, “Nang atu bang hong vawtsak lengh, na nuam ziam?” ci in dongh hi. “Syapa awng, khua mu thei kik nuam khi hi,” ci in zokik hi.

⁵²“Pai tan, na upna in hong damsak zo hi,” Jesus in ci hi. Thakhat in ama khuamu thei a, tuaciang Jesus zui in pai hi.

Teptee bang Lungdamna Thu 11

Jerusalem ah Zawna taw Tumna

(Matthew 21.1-11; Luke 19.28-40; John 12.12-19)

¹Amate Jerusalem hong nai ciang, Bethphage le Bethany khuapite taw a kinai, Olive Mual ah theng uh hi. Jesus in nungzuite nii sia mai ah pai kholsak a,

²hi bangin sawl hi: “Na mai a khuano sia ah pai tavun. Tua mun na thet po uh ciang, bangma hun a tung a kito ngei ngawl laano khat kikhit in, om na mu tu uh hi. A khau suut tavun a, hi sungah hong paipui tavun.

³Tuaciang khat po in banghangin tuabang hi nu ziam hong cile, Topa in taangsamh hi, hong puak kik paih tu hi, na ci vun,” ci hi.

⁴Tua ahikom amate pai a, laano sia khuasung lampi tung, inn khat ii kongkha khuam tungah kikhit in om mu uh hi. Amate in khau a suut uh ciangin,

⁵a hui ah a dingte in, “Tua laano khau na suut uh sia bang tu ci nu ziam?” ci uh hi.

⁶Amate in Jesus ii sawl bangin zo uh a, tuasia ciangin tuate in paisak uh hi.



⁷Amate in laano sia Jesus kungah hong paipui uh a, a puantual uh tua nganno tungah pha in, Jesus a tungah to hi.

⁸Mihing tam mamate in a puantualte lampi tungah pha uh hi, a dangte in lo sung pan thingsawl saattan in lampi tungah pha uh hi.

⁹A mai ah a paite le a nung pan a zuite in, hi bangin au uh hi, “Hosanna, Pathian pok vun. Topa Pathian min taw hong pai pa sia Pathian in thupha pia taken!

¹⁰Hong tung tu ih pa David Kumpipa ngam Pathian in thupha pia taken, Hosanna, Pathian pok vun!” ci uh hi.

¹¹Jesus Jerusalem khua theng a, Biakinn sungah tumin, na theampo enkot hi. Ahihang ni niam zo ahikom, a nungzui sawm le niite taw Bethany khua ah pai uh hi.

Jesus in Theikung Haamsiat

(Matthew 21.18-19)

¹²A zing ciang, amate Bethany pan hong heak kik ciang Jesus a ngilkial hi.

¹³A ngalkhat ah theikung khat a tee puitung mama in mu hi, tua ahi ciang theinga khat po a om ziam ci in en tu in pai hi. Ahihang a kung a thet ciangin, theitee bek mu hi, banghangziam cile a nga hun ahi bua hi.

¹⁴Jesus in, “Nang tung pan kuama in theinga ne nawn heak taken!” ci hi. A nungzuite in a pau teng za uh hi.

Biakinn ah Jesus Pai

(Matthew 21.12-17; Luke 19.45-48; John 2.13-22)

¹⁵Amate Jerusalem a thet ciangin, Jesus in Biakinn ah pai in sumlei sumzuak theampo notkeak siat hi. Ama in sum theakte ii sabuai sawnthalsak a, vakhu zuakte tokhum lumleesak hi,

¹⁶tuasia ciang ama in kuama vanh pua a Biakinn leitual kantan in a pai tu a oai bua hi.

¹⁷Mihingte hi bangin hil hi: “ ‘Ka innpi sia minam theampo atu in thungetna inn kici tu hi,’ ci in Pathian in a sonna Laithiangtho sungah ki at hi ngawl ziam? Ahizong note in, ngutate bukna phual na suaksak uh hi!” ci hi.



¹⁸Thiampi liante le Thukham hil syate in, hi thu za uh a, tua hu in, Jesus a thalup thei natu lampi zong tu in, kipan uh hi. Amate in Jesus kiita uh hi, banghangziam cile mipite in ama ii hilna sia lamdang a sa uh hi.

¹⁹Nitak sang ciangin Jesus le a nungzuite in khuapi nusia uh hi.

Theikung taw Kihilna

(Matthew 21.20-22)

²⁰A zingsang ciang zingtuungin, lampi zui a, a pai uh ciang, amate in theikung a mu uh hi. Tuasia in a zung dongin a thisuk hi.

²¹Peter in bang thu om ci in ciamtee ahikom Jesus munah, “En in, syapa awng, theikung na haamsiat sia thi zo hi!” ci hi.

²²Jesus in amate munah, “Pathian um vun.

²³A tatak in ka ci ciang, khatpo in hi mual sia munah tho in tuipi sungah kispin in ci sawl hen a, a thin sungah a um takpi le, a ci sa teng tung tatak tu a, a up bangin piang tu hi.

²⁴Hi thu hangin a tatak in kong ci ciangin: Thu na nget uh ciang, bang khatpo na ngen uh le a nga sa bangin kingaisun vun, tua hile na nget uh po hong kipia tu hi.

²⁵Thungenin na din uh ciang, khatpo tungah diksak ngawlina na nei uhle, maisak tavun,

²⁶tua hile vantung a om na pa in, no ii mawna zongh hong maisak tu hi,” ci in zokik hi.

Jesus ii Thuneina huvau Dokna

(Matthew 21.23-27; Luke 20.1-8)

²⁷Amate Jerusalem ah khatvei ma hong theng kik hi. Jesus Biakinn sungah a va laitakin, thiampi liante, Thukham hil syate le upate ama kungah hong pai a,

²⁸“Hi bangte na vawt natu in bang thu nei na hi ziam? Akua in tua thuneina hong pia ziam?” ci in dongh uh hi.



²⁹Jesus in zokik a, “Kei zongh thu khat kong dongh tu hi, nong zo thei uhle hite vawt natu bang thunei khi ziam, ci in kong son tu hi.

³⁰Tua ahile John ii tuiphum piak theina sia Pathian kung pan hong pai ziam maw: mihing kung pan hong pai ziam? hong son tavun,” ci hi.

³¹Amate sung teng kinial tu in hong kipan uh a, “Bang ci tu hi ziam? ‘Pathian kung pan’ ci hi leang, tua hile ‘banghangin John um ngawl nu ziam?’ hong ci tu a,

³²“Ahihang ‘Mihing tung pan’ ci hi leang.’ ”(Amate in mipite kiita hi, banghangziam cile John sia a kuama po in kamsang khat hi ci in um tek uh hi.)

³³Tua ahikom amate in Jesus munah, “He ngawl khu hi,” ci uh hi. “Tua ahile kei zongh, bang thu taw hi nate vawt khi ziam ci sia hong son ngawl tu khi hi,” Jesus in ci hi.

Teptee bang Lungdamna Thu 12

Sapit huan A Saapthawte taw Thu Thusonteen

(Matthew 21.33-46; Luke 20.9-19.)

¹Tuaciang Jesus in amate tungah thusonteen taw thu son hi. “Khatvei lai in pasal khat in sapit huan vawt a, dal taw uum in, a tuisukna set a koi natu leidum a taw zawkciang lo hun natu teitan daw hi. Tua zawkciang, a saapthaw nuamte in saapsakin ama khualhaw hi.

²Sapit nga law hun ciangin, ama tan tu tel teng a la tu in, a silate khat paisak hi.

³Lo saapte in tua silapa manin, saat a, a ngawlnguak in ciasak hi.

⁴Tua zawkciang huan neipa in, sila dang khat ma paisak hi; lo saapte in a lutang pan vel a, a maizum huai dongin vawt uh hi.

⁵Huan neipa in sila dang khat ma paisak lai hi; tuasia pa thatlum uh hi; a dang tam mama zongh tuabangma in vawt uh a, pawlkhat vel in, pawlkhat thatlum uh hi.



⁶Tuabang a sawl thei tu a taanglai mihing sia a it a tapa bek ahi hi. A khakbel ciangin ama in a tapa lo saapte munah paisak hi, ‘Ka tapa hi buang ahiciang, thasia hamtang vak’ ci hi.

⁷Ahihang tua lo saapte in, “Hisia pa lo neipa tapa hi. Hong pai tavun, that tawng, tua hile a neisate eima aa suak tu hi!” ci uh hi.

⁸Tua ahiciang amate in lo neipa tapa manin thatlum uh a, a luang sapit huan pua sangah vawk hi.

⁹“Tua hile huan neipa in bang a law tu ziam?” ci in Jesus in dongh hi. “Ama hong kuan tu a, tua mihingte a thalup zawkciang, sapit huan sia lo saap dangte tungah aap tu hi.

¹⁰Laithiangtho sungah hi bangin a ki at sia sim ngei ngawl lawlawm nu ziam? ‘Innsate ii mannung ngawl hi ci a, a nil suangtum sia a thupibel suangtum suak hi.

¹¹Hi thu in Topa ii zeakna ahi hi; mu nop huai mama hi ngawl ziam?”

¹²Jew lampuite in Jesus mat sawm uh hi, banghangziam cile amate in hi thusontena sia amate huvau a sonna hi ci in tel uh hi. Ahihang mipite kiita ahikom amate in paisan uh hi.

Shia Piakna huvau Kidokna

(Matthew 22.15-22; Luke 20.20-26)

¹³Phariseete pawlkhat le Herod ii pawlmitte pawlkhat in thudokna taw Jesus aita tu in paisak uh hi.

¹⁴Amate Jesus kungah hong pai uh a, “Syapa awng, ngualdang ii ngaisutnate awlmawk ngawlin thumaan a son pa hi, ci in kong he uh hi. Mihing min le zate zongh thupi sim tuan ngawlin Pathian ii mihingte atu a deisak thute hil hi, ci in kong he uh hi. Ih thukham in Rome Kumpi lianpa, shia ih piak tu khaam ziam? Pia tu hi ziam, pia ngawl tu hi ziam, hong son tan,” ci uh hi.

¹⁵Ahihang Jesus in amate ii thimthel pilna teng tel a, ‘Banghang in kei thaang hong sia nuam nu ziam? Ngun dangka khat hong paipui tavun, hong en sin tong,” ci hi.



¹⁶Amate in khat paipui a, ama in “Hi te akua maitang lim le akua min ziam?” ci hi. “Ngam uk lianpa aa hi,” ci in a zokik uh hi.

¹⁷Tua ahikom Jesus in, “Tua ahile pha hi, Ngam uk lianpa neisa sia Ngam uk lianpa ma pia vun, Pathian ii neisa sia Pathian ma pia vun,” ci hi. Tuasia ciangin amate in Jesus sia lamdang sa uh hi.

Thina pan Thawkikna Thu Dokna

(Matthew 22.23-33; Luke 20.27-40)

¹⁸Mihingte thina panin thokik ngawl tu hi a ci Sadduceete pawlkhat Jesus kungah hong pai in,

¹⁹“Syapa awng, hi thukham sia Moses in ei atu in a at ahi hi: ‘Pasal khat in a zi thisan in ta a nei buale, a pasal ii suapuipa in meingongnu sia tenpui taken, tua hile ta a nei uh ciangin mithipa ta hi ci in ki ngaisun tu hi,’ ci hi.

²⁰Khatvei lai in unau pa sali om hi: a lianbel sia in zi nei a, ta nei ngawlin thi hi.

²¹Tua zawkciang a niina pa in, tua numei teenpui a, tuaciang ama zongh ta nei ngawlin thi hi. A thumna pa zongh tuabang ma ahi hi,

²²tuaciang a dangte theampo zongh tuabang hi siat hi: unau sali bupin tua numei tenpui tek a, ta nei ngawlin thi tek hi. A khakbel in tua numei zongh thi hi.

²³Tu in thawkik ni ciang, tua nu sia akua zi hi tu ziam? A sali in tenpui tek hi,” ci uh hi.

²⁴Jesus in, “Bangza in telkhial nu ziam! Na tel khial uh sia banghangziam, ci in na he uh ziam? Banghangziam cile no sia Laithiangtho ahizong Pathian vaang ahizong na he bua uh hi.

²⁵Banghangziam cile a thite sia nuntakna sungah a thaw kik ciangin, amate vantung lalangte bang hi tu a, a kiteang buatu hi.

²⁶Tu in a thite phoktona taw kisai in: Moses ii Laibu sungah sawlpaang kuang sia ii thu sim ngei ngawl nu ziam? Tua sungah ki at a, Pathian in Moses tungah, ‘Kei sia Abraham ii Pathian, Isaac ii Pathian, Jacob ii Pathian ka hi hi,’ ci hi.



²⁷Ama in a nungtate ii Pathian hi a, a thisate ii Pathian ahi bua hi. Tel khial mama nu hi!” ci in zo hi.

Thukham Lian

(Matthew 23.34-40; Luke 10.25-28)

²⁸Thukham hil sya khat, tua kam kikupna sungah om hi. Jesus in Sadduceete pha takin zokik thei ahi sia mu hi, tua ahikom ama in, thudok nop khat taw Jesus kungah pai hi, “Thukham sung teng pan koi sia thupi bel ziam,” ci hi.

²⁹Jesus in zo a, “A thupibel sia hisia hi, ‘Israel awng, ngai vun! Topa ih Pathian sia ama bekma Topa ahi hi.

³⁰Topa na Pathian sia na thin theampo, na thaa theampo, na ngaisutna theampo le, na thatang theampo taw it in.’

³¹A niina a thupi bel thukham sia, ‘Nangma le nangma na ki it bangin na innpaamte it in’ Hite nii sangin a thupizaw thukham dang om ngawl hi,” ci hi.

³²Thukham hil syapa in, Jesus munah, “Pha mama hi, Syapa awng, na ci bangin Topa bekma Pathian hi a, ama ngawl pathian dang om ngawl hi na ci sia thumaan hi.

³³Tuaciangin mihingte in Pathian sia a thin theampo, a ngaisutna theampo, le a thatang theampo taw a it tu uh kul hi; tuaciangin ama a ki it bangma in a innpaamte a it tu kul hi. Nganhing taw Pathian sangaw biakpiaknate le a dang biakpiakna sangin, hi thukham niite zui tu thupi zaw hi,” ci hi.

³⁴Jesus in tua pa ii zokikna ciim kammal hi ci in mu ahikom, ama munah, “Nang sia Pathian ngam taw kikhuala ngawl ni hi,” ci hi. Hisia zawkciang kuama in Jesus thudang a dongh ngam nawn bua uh hi.

Messiah taw kisai Thudokna

(Matthew 22.41-46; Luke 20.41-44)

³⁵Biakinn sungah hilna a nei laitak Jesus in, “Thukham hil syate in bangbangin Messiah sia David ii suan hi ci thei ziam?



³⁶Thaa Thiangtho in David sia hi bangin pausak hi: ‘Topa in ka Topa tungah: Na ngalte na peangnuai ah kong koisak mateng, hi sung ka ziat sangah hong to tan ci hi.’

³⁷“David mama in, ‘Topa’ ci hi; tua ahile Messiah sia David ii suan hi thei tu ziam,” ci hi.

Jesus in Thukham hil Syate kung pan Kikep natu Hil

(Matthew 23.1-36; Luke 20.45-47)

Mihon khat in Jesus ii thuson lungdam takin ngai uh hi.

³⁸Amate a hil kawmin hi bangin ci hi, “Puantual silh in sumzuakna munah, ngual ii zatak biak tu thangai in, a vak thanuam Thukham hil syate panin kikeam vun,

³⁹synagogue sungah a kikoituam tokhumte le poai sungah a nuambel na munah to thanuam uh hi,

⁴⁰Amate in meingongte zo thaw in, a inn uh suddol in, a sau pupui a thungetna taw amate ngamtatna phualseal uh hi. Tua hu in amate daan thuak tu nasia seseam tu hi!” ci hi.

Meingongnu ii Sumkhiak

(Luke 21.1-4)

⁴¹Biakinn sum kholna hui ah Jesus a to laitak, ama in mihingte sumkhiak zia en hi. Sumhau tam mama in sum tam ma khia uh hi;

⁴²tuaciangin a zawng meingongnu khat hong pai a, pya khat tang taw a kikim dangkasan pheak nii khia hi.

⁴³Ama in nungzuite sam in, “A tatak in ka ci ciang midangte sangin, hi meingongnu in tam khia zaw hi.

⁴⁴Banghangziam cile a dangte in a nei vaal a lamh vaal uh teng khia uh hi, ahihang hi meingongnu in a zawn kawm pan, a nei theampo khia siat hi — a nuntak a kivaak natu a nei sun teng pia siat hi,” ci hi.

Teptee bang Lungdamna Thu 13

Jesus in Biakinn Lalthap natu Son

(Matthew 24.1-2, Luke 21.5-6)



¹Jesus in Biakinn pan, a puasua laitak, a nungzuite khat in, “Sya awng, En in! Innsakna suangte le a innte bangza in pha ziam!” ci hi.

²Jesus in, “Hi innpuite mu hi ngawl ni ziam? Suangtum khat zongh ama omna ngei munah a om buatu hi; a kilawnthal ngawl khat zongh a om buatu hi,” ci in zo hi.

Ngimna le Vawtsiatnate
(Matthew 24.3-14; Luke 21.7-19)

³Jesus Biakinn ngal Olive Mual tungah to in a om laitak Peter, James, John, le Andrew hong pai uh a, a tuamin thu sonpui hi.

⁴“Hi thu bang hun ciang hong tung tu ziam hong son tan, tuaciangin hite a pian natu bang limte in lak tu ziam?” ci hi.

⁵Jesus in, “Kidawm vun a, kuama in theamsak heak vun.

⁶Kei min taw mihing tam mama hong pai tu a, ‘Keima in tuasiapa khi hi!’ ci in mihing tam mama theam tu hi.

⁷Tuaciangin ngal kisimna awnging a naina ah ahizong, a khualana ah ngal kidona thu ahizong, na zaak uh ciangin patau heak vun. Tuate sia a pian tu ma hi a, ahihang a tawp natu hi ngawl lai hi.

⁸Ngam khat le ngam khat hong kisim tu a; kumpi khat le kumpi khat hong kido tu hi. Mun theampo ah zinliing tu hi, tuaciangin kialpi tung tu hi. Hite sia nausuak tu a tut kipat bang ahi hi.

⁹“Noma le noma na kikeam vun. No sia hong kiman tu a, zum mai ah hong kithen tu hi. Synagogue te ah hong kivel tu hi, Lungdamna Thupha son tu le, keima hu in ngamukte le kumpite mai ah note na ding tu uh hi.

¹⁰Ahihang a tawpna hong thet ma in, Lungdamna Thupha sia mihing theampo tungah kihil siat tu hi.

¹¹Tuaciang no hong kiman a, zum mai ah hong ki paipui ciangin, na pau natu uhte thin ngim khol heak vun; a hun hong thet ciangin, hong kihil babang in, na pau tu uh hi. Banghangziam cile na kammal zak tu te sia no ii pau ahi buatu hi; Thaa Thiangtho kung panin hong pai hi tu hi.



¹²Mihingte in a suapuite thalup tu in aap tu uh hi, tuaciang, pate in a tate tuabang ma in vawt tu hi. Tate in nute pate langpan in, thatsak tu uh hi.

¹³Mihing theampo in note kei hu in, hong ensan tu hi. Ahihang a tawp dong a thuak zote in ngupna a nga tu hi.

Kiitak huai mama Thu

(Matthew 24.15-28; Luke 21.20-24)

¹⁴“ ‘A kiitak huai mama thu’ sia a kilawm ngawl na munah hong piang, na mu tu uh hi.” (Hi lai a simte ii teptee tu thu hisia ii khiakna sia bangziam ci in tel tavun!) “Tua hun ciangin Judea ngam a omte in mual tungah tai taken.

¹⁵Innkhum tung a pasal khat in, a ken tu na khat pawpo la in, tuaksuk in a hun bosak heak hen.

¹⁶Lo sung a om pasal khat in a laktong puasilh la tu in, a inn ah heak kik nawn heak hen.

¹⁷Numei naupaaite le nau noailuaite atu in, tua hun sia bangza in haksa tu ziam!

¹⁸Hi thute a pian hun sia phalbi laitak ahi ngawl nату in, thu na ngen tavun!

¹⁹Banghangziam cile tua hun a ngimnate sia Pathian ii leitung a bitphua pan tu hun dong leitung mihingte ii heak ngei sangin nasia zaw pek tu hi. Tuabang ngimna sia maisang zongh ah a om nawn buatu hi.

²⁰Ahihang Topa in tua nite khiamsuk zo hi; tua hi buale kuama nungta zo ngawl tu hi. Ama teal sa mihingte a khualna in tua nite khiam zo hi.

²¹“Tuaciang khat po in, ‘En vun, hi sungah Messiah om hi!’ ci in ahizong, ‘En vun, zia sungah om hi!’ — ci in ahizong hong ci a om le na um heak vun.

²²Banghangziam cile Messiah theamh le kamsang theamhte hong piang tu hi. Hi thei hile, Pathian ii teal sa mihingte ngawngawn a theam tu in, amate in nalamdang lakna a tumdang nate hong vawt tu hi.

²³Na kidawm vun! A hun hong thet maa in, na theampo hong son zo khi hi, ci hi.

Mihing Tapa hong Pai natu



(Matthew 24.29-31; Luke 21.25-28)

²⁴“Ngimna hun zawkciang hong pai tu nite ah ni hong taang nawn ngawl tu a, tha zongh taang nawn ngawl tu hi,

²⁵aksite van panin taaksuk tu hi, van a om nate a paina lampi ngei panin lampial tu hi.

²⁶Tua zawkciang in Mihing Tapa sia hong kilangh tu a, meeikaai sungah vaangletna le minthanna lianpi taw hong pai tu hi.

²⁷Ama in vantung lalangte leimong kingh li ah paisak tu a, Pathian ii teal sa mihingte leimong khat pan mong khat kilaklaw ah khawmtua tu hi.

Theikung taw Thuheak Theina

(Matthew 24.32-35; Luke 21.29-33)

²⁸“Theikung in hilsak tavun. A baakte hong hing a hong moisuak in a tee note suak tu in a kithoai ciangin, khuakhal hun hong nai zo hi, ci in na he uh hi.

²⁹Tuasia bangma, hi thute hong pian na mu uh ciangin, a hun hong nai zo hi, ki papan tu in kithoai zo hi, ci in na he tu uh hi.

³⁰Tu laitak hunin a nungta mihingte a thi siat ma in hi thute hong tung tu hi — ci in na ciamtee tavun.

³¹Vantung le simlei hong bo tu hi, ahihang ka kammalte bo ngei ngawl tu hi.

Kuama in A Ni le A Nai He ngawl

(Matthew 24.36-44)

³²“Ahihang kuama in a ni le a nai hong tun hun tu a he bua hi, van a vantung lalangte hikale Tapa hikale in a he bua a, Pa bek in he hi.

³³Na kinging vun a, na kipilvangsak vun, banghangziam cile a hun hong tun tu na he bua uh hi.

³⁴Mihing khat khualhaw tu in dingin, a naseamte in inn ngaksak a, khat simin a sep tu tek a vaithak zawkciang, kong cingpa munah a cin thiam natu in, a vaitha sia taw kibang hi.

³⁵Tua ahikom, na kikeam tavun, banghangziam cile, innteakpa bang hun ciang hong cia kik tu, ci in na he bua uh hi — nitak zongh hi thei, zankim zongh hi thei, tua ahibuale zingtuung ahibuale nisua laitak zongh hi thei hi.

³⁶Thakhat thu in hong theng le, a mu sa in na om uh hong si buale pha hi.

³⁷No tungah kong son teng mihing theampo tungah ka son ahi hi. A kingingta sa in om vun!” ci hi.

Teptee bang Lungdamna Thu 14

Jesus A Ki Thasawmna

(Matthew 26.1-5; Luke 22.1-2; John 11.45-53)

¹Tu in Paisan Poai le Tol saw ngawl Anluum Poai sia ni nii samh lai hi. Thiampi liante le Thukham hil syate in Jesus sia a thimtham in man a thalup thei natu in lampi zong uh hi.

²“Poai sungah vawt ngawl tu hi, tua ahibuale mihingte hong ngamlum tu hi,” ci uh hi.

Bethany ah Jesus Sathau Kinoai

(Matthew 26.6-13; John 12.1-8)

³Jesus sia Bethany khua a miphaak Simon a kici khat inn ah a om hi. Jesus in an ne in a om laitak numei khat hong pai in, suangngo thawl khat dim a manpha mama sathau namtui hong keng a, Jesus lu tungah buak hi.

⁴Tua munah a om mihing pawlkhatte thin uuk a, khat le khat ii munah, “Sathau namtui pakvawt sia bang a phattuamna om ziam?”

⁵Ngun dangka zathum sangin a tamzaw kikhawng thei tu a, mizawngte kipia thei tu hi,” ci in, nasia takin numei nu ngamtatna mawpusak uh hi.

⁶Ahihang Jesus in, “Ama koi po vun! Note in ama sia bang nuam maw nu ziam? Ama in kei atu in, nasep pha khat a seam hi.

⁷Mizawngte note taw hong omkhawm tawntung tu a, na hu nop uh simin na hu thei tu uh hi. Ahihang kei note taw hong om khawm tawntung ngawl tu khi hi.

⁸Ama in a hi thei tawpin seam zo hi, ka kivui tu hun hong thet maa in, ka pumpi sathau hong noai a hong pua khol ahi hi.

⁹A tatak in ka ci ciang, leitung theampo ah Lungdamna Thupha a kihil lai tengin ama ii vawt teng sia ama phawna taw kison tu hi,” ci hi.



Judas in Jesus Leeheak tu Thukim

(Matthew 26.14-16; Luke 22.3-6)

¹⁰Tua zawkciang nungzui sawm le nii sungah a kihel Judas Iscariot sia thiampi liante kungah Jesus leeheak tu in pai hi.

¹¹Ama son teng amate lungkim a, sum piak tu in kamciam pia uh hi. Tuabangin Judas in amate khut sungah Jesus a aap thei natu hunpha khat zong hi.

Jesus in A Nungzuite taw Paisan Poai An Nekhawm

(Matthew 26.17-25; Luke 22.7-14; 21-23; John 13.21-30)

¹²Tolsaw ngawl Anluum Poai ni phitbel ni in, Paisan poai atu tuuno a kingo hi a, nungzuite in, “Paisan poai an sia koisungah pai in hong vawt kholsak tu khu ziam?” ci in dongh uh hi.

¹³Tuasia ciang Jesus in amate sung pan nii paisak a, “Khuapi sungah pai leute pasal khat tuibeal taw tuitoai sia na mu tu uh hi.

¹⁴Ama tumna inn ah va zui tavun, tuaciang inntekpa munah, ‘Syapa in, ka nungzuite taw Paisan poai an ka neak natu inn doituam sia koi sung ziam?, ci hi, va ci tavun,’ ci hi.

¹⁵Tuasia ciangin ama in inndawl tungnung ah doituam lian khat hong lak tu a, anlui natu le to natu kipua khol sa in om tu hi. Tua munah a kul teng, ei atu in a kipua khol sa in om tu hi,” ci hi.

¹⁶Nungzuite zongh pai in, khuapi sung a thet uh ciang na theampo Jesus ii son sa bang tatak ma in a om mu uh hi. Tua munah Paisan poai an tu vawt uh hi.

¹⁷A nitak ciangin Jesus a nungzui sawm le niite taw hong pai hi.

¹⁸Sabuai ah an ne in a om laitak Jesus in, “No sung pan kei taw an ne khawm khat in, kei hong leeheak tu nu hi,” ci hi.

¹⁹Nungzuite a thin uh nuam ngawl a, khat zawkciang khat in, “Kei hong ci na hi bana ziam?,” ci in dongh uh hi.

²⁰Jesus in “Noma sawm le nii sung pan khat hi tu nu hi, ankuang sungah anluum keima taw a sawk khawm sia hi tu hi.



²¹Laithiangtho ii ci bangin, Mihing Tapa ahile thi tu a, ahihang Mihing Tapa a leeheakpa atu in bangza in lauhuai ziam? Tua pa atu in pian awl zaw le phazaw hi!” ci hi.

Topa Zan an

(Matthew 26.26-30; Luke 22.14-20; 1Corinth te 11.23-25)

²²Amate an a neak uh laitakin, Jesus in anluum bek khat la in, lungdamkona thungen a, balneen in a nungzuite pia hi. “Hisia in ka pumpi ahi hi. Ne vun,” ci hi.

²³Tua zawkciang hai la in, Pathian tungah lungdam a ko zawkciang, amate pia hi, tuaciangin amate in dawn uh hi.

²⁴“Hisia in mihing tam mamate atu a kibua ka chisan hi, Pathian thuciamna a kipsak ka chisan ahi hi.

²⁵A maan takin ka ci ciang, Pathian Ngam sungah sapittui thak ka dawn mateng, hi sapittui ka dawn nawn buatu hi,” Jesus in ci Jesus in Peter Nial tu teng Sonkhol

(Matthew 26.31-35; Luke 22.31-34; John 13.36-38)

²⁷Jesus in “Note theampo in kei nong taisan tu uh hi. Banghangziam cile Laithiangtho in, ‘Pathian in tuucingpa thatlum tu a, tuaciang a tuute kithethaang tu hi,’ ci hi.

²⁸Ahihang nuntakna sungah hong kiphok to ciangin, note mai Galilee ah ka na pai khol tu hi,” ci hi.

²⁹Peter in, “A dang theampo in hong nusia zong, kei kong nusia buatu hi!” ci hi.

³⁰Jesus in Peter munah “A tatak in kong ci ciang, zan ciangin ak nii vei a khuan maa in thum vei kei nong nial tu hi,” ci hi.

³¹Peter in, “Nangma taw thi khop keak a kul zongin, tuabang peuma hong nial ngawl tu khi hi!” ci in kho takin zo hi. Nungzui dangte zongh in tuabang ma in ci tek uh hi.

Jesus Gethsemene ah Thungen

(Matthew 26.36-46; Luke 22.39-46)



³²Amate Gethesemane a kici mun hong theng uh a, Jesus in a nungzuite munah, “Thu ka nget laanin hi sungah na to vun,” ci hi.

³³Ama in Peter, James le John te paipui hi. Ama sia heena le thin ngimna taw kidim hi,

³⁴tuaciang amate tungah, “Ka thin sungah ka heena lian mama ahikom ka thi dektak hi. Hi sungah na om vun a, mu heak vun,” ci hi.

³⁵Ama tawm pai thua lai a, lei ah bokin, ahi thei le ngim thuak natu hun a peal thei natu in thungen hi.

³⁶“Pa awng, Ka Pa awng! Na theampo nang atu in suak thei hi. Hi thuakna hai sia kei kung pan hong laaksak tan. Ahihang kei deina bang hi ngawlin, nangma deina bang hi taken,” ci in thungen hi.

³⁷Tua zawkciangin hong heak kik a, a nungzuite thum sia mutthip sa in om mu hi. Ama in Peter munah, “Simon awng, mu ni ziam? Nai khat zongh hong ngak zo ngawl ni ziam?”

³⁸A nungzuite tungah, “Na ngak vun a, ze etna sungah na puk ngawl natu in, thungen vun. Thin sung in uukna nei ahihang pumpi sia thazawm hi,” ci hi.

³⁹Ama khatvei ma pai kik a, a kammal zak ngei teng taw ma in thu ngen kik hi.

⁴⁰Tua zawkciangin ama nungzuite kungah hong heak kik a, nungzuite mutthip sa in om mu hi. Amate in Jesus tungah bang son tu ci a he bua uh hi.

⁴¹Ama a thum veina hong heak kik ciangin, nungzuite munah, “Tu dong mu lai in, tawnga lai nu ziam? Tu a teng pha zo hi! A hun hong theng zo hi! En vun, Mihing Tapa sia mimawte khut sungah ki aap tu hi zo hi.

⁴²Tho vun a, pai ka tawng. En vun, kei hong leeheak tu pa hi sungah om hi!” ci hi.

Jesus Kimatna

(Matthew 26.47-56; Luke 22.47-53; John 18.3-12)

⁴³Jesus tuabangin a pau laitakin, nungzui sawm le niite sung pan khat ahi Judas hong theng hi. Thiampi liante, Thukham hil syate le upate ii sawl

mihon khat namsau le moltawng toai in, Judas taw hong kithawl khawm uh hi.

⁴⁴“Ka nap pa sia na mat nop uh sia hi tu hi, man vun a, a cing tu kisp in paipui tavun,” ci in Judas in mipite limlakna pia khol hi.

⁴⁵Judas hong thet po ciangin Jesus kungah pai in, “Syapa awng!” ci in namh hi.

⁴⁶Tuabangin Jesus man uh a, lencip uh hi.

⁴⁷Ahihang tua munah a ding khat in, a namsau dokin Thiampi Lianbelpa ii salpa saat a, a bil saatkeaksak hi.

⁴⁸Jesus in amate tungah, “Mihing that taiku man tu bang phetin, kei hong man tu takpi namsau le moltawng taw hong kuan nu ziam?

⁴⁹Nisim in Biakinn sungah no taw omkhawm in hilna kong nei a nong man bua uh hi. Ahizong Laithiangtho a tangtut kul hi,” ci hi.

⁵⁰Tuaciangin nungzuite theampo in ama nusia in taikeak uh hi.

⁵¹Puankaang neal khat bek a silh tangval khat in, Jesus zui hi. Amate in tangvalpa man tu in kithoai uh hi.

⁵²Ahihang ama in a puan nusia in, a nguak tangin tai hi.

Councilte in Jesus Thusit

(Matthew 26.57-68; Luke 22.54-55; 63-71; John 18.13-14; 19-24)

⁵³Tua zawkciang Thiampi Lianbelpa inn ah Jesus paipui uh hi. Tua munah thiampi liante theampo, upate le Thukham hil syate kikhawm uh hi.

⁵⁴Peter in a khuala thithimna panin Thiampi Lianbelpa ii leitual dong zui hi. Tua munah ngalkapte taw meilum oai in to hi.

⁵⁵Thiampi liante le Council buppi in, Jesus a thalup thei natu, a mawna zong ahihang a mu zo bua uh hi.

⁵⁶Mihing tam mama in leilot thu taw Jesus mawsak hikale amate khat le khat zongh a thu a kisi bua uh hi.



⁵⁷Tuaciangin pawlkhat hong ding a, Jesus mawsak natu in, leilot thu hi bangin son uh hi.

⁵⁸“Mihingte vawt Biakinn hisia ka baltham tu a, ahihang ni thum zawkciang mihingte vawt ngawl khat ka sa kik tu hi,’ ci in a pauna ka za uh hi,” ci hi.

⁵⁹Ahitazong amate ngawngawn a thu uh a kisi thei bua uh hi.

⁶⁰Thiampi Lianbelpa amate theampo ii mai ah ding a, Jesus thu dongh hi. “Hong mawsaknate na zokik natu nei ngawl ni ziam?” ci hi.

⁶¹Jesus huthe ngawlin om a, kam khat zongh a pau bua hi. Tuaciangin Thiampi Lianbelpa in, khatvei ma, “Nang Thupha toai Pathian Tapa Messiah na hi ziam,” ci hi.

⁶²“Hi khi hi, no theampo in, Mihing Tapa sia Vaanglianbelpa ziat sangah to in, vantung ah meeikaaite taw hong pai na mu tu uh hi,” ci in Jesus in zo hi.

⁶³Thiampi Lianbelpa in, a puantual eautham a, “Tetti dang kul nawn ngawl hi.

⁶⁴Pathian min a daisak hunlam na zaak tek uh hi. Bangbangin thukhen tu nu ziam?” ci hi. Amate theampo in ama a langpan siat uh hi. Ama maw hi, thalup kul tu hi, ci uh hi.

⁶⁵Amate pawlkhat in Jesus cilphii in, a mit a sawmsak zawkciang saat uh hi. “Akua in nang hong saat ziam, son thei tan,” ci uh hi. Tuaciangin ngalkapte in la in beang uh hi.

Peter in Jesus Nial

(Matthew 26.69-75; Luke 22.56-62; John 18.15-18; 25-27)

⁶⁶Thiampi Lianbelpa ii naseam numei khat hong pai laitakin, Peter leitual ah om lai hi.

⁶⁷Ama in Peter mei oai in om a mu ciang, encian a, “Nang zongh Nazareth mi Jesus taw kithawl ni hi,” ci hi.

⁶⁸Ahihang ama in nial hi. “He bong, a bang teng son ni ziam ci ka he bua hi,” ci in lampi ah paisan hi. Tuasia laitakin aklui khat khuang hi.



⁶⁹Naseam numeinu in tua munah a mu ciang, a dingte zaak tu in, “Ama sia amate sung pan khat ahi hi,” ci kik hi.

⁷⁰Ahihang Peter in nial kik hi. Tawmvei zawkciang tua munah a dingte in Peter munah, “Nang, amate mi khat na hina sia nial zo ngawl tu ni hi, banghangziam cile nangma zongh Galilee ngam pan na hi hi,” ci uh hi.

⁷¹Tuasia ciangin Peter in, “Thumaan son khi hi, ci in ka kiciam hi, thumaan ka son buale Pathian in daan hong pia taken. Na son uh sia pa hong heaksak ngawl khi hi,” ci hi.

⁷²Tuasia ciangin aklui a nii veina khuang hi. Tuaciang Peter in Jesus ii ama tungah, “Aklui nii vei a khuan ma in, hong he ngawl khi hi, ci in thum vei nong nial tu hi,” a ci teng phawk hi. Tuaciang ama in thuak zo ngawlin kap hi.

Teptee bang Lungdamna Thu 15

Pilate Mai ah Jesus

(Matthew 27.1-2; 11-14; Luke 23.1-5; John 18.28-38)

¹Zingsang tuungin thiampi liante sia upate, Thukham hil syate le Council bup taw a manlang in hong kisitua uh a, amate in vaihawmna nei uh hi. Amate in Jesus thikkhau taw khi uh a, Pilate kungah paipui in aap uh hi.

²Pilate in, “Nang Jewte ii kumpipa na hi ziam?” ci in dongh hi. Jesus in, “Nangma ci bang ahi hi,” ci in zo hi.

³Thiampi liante in Jesus mawsiatna hau mama uh hi.

⁴Tua ahikom Pilate in, “Amate kam zo ngawl tu ni ziam? Hong mawsaknate theampo ngai in,” ci kik hi.

⁵Jesus in kammal khat zongh zo tuan ngawl ahikom Pilate in lamdang sa hi.

Jesus Thidaan Kipia

(Matthew 27.15-26; Luke 23.13-25; John 18.39— 19.16)

⁶Paisan Poai kivawt simin mihingte ii nget thongtaak khat pawpo Pilate ii suataksak thei ngeina khat om hi.

⁷Tua hun laitakin kumpi leedona a vawt tualthat thongtaak te sungah Barabbas a kici khat zongh om hi.



⁸Mihonpite hong kikhawm a, Pilate tungah a vawt ngei bang a vawt natu ngen tu in hong kipat uh ciangin,

⁹ama in, “Jewte kumpipa sia suatak leng, hong oai zaw nu ziam?” ci in dongh hi.

¹⁰Thiampi liante in Jesus a een na hangin, ama tungah a aap uh hunlam thiangtel mama hi.

¹¹Ahihang thiampi liante in mihonpite hol a, Pilate in Barabbas a suataksak zawk natu ngensak uh hi.

¹²Pilate in mihonpite munah, “Tua ahile Jewte kumpipa na ci uh sia bang law leng hong oai nu ziam? ” ci hi.

¹³Amate in, “Thinglamte tungah thatlum in!” ci in au uh hi.

¹⁴“Ahihang ama in bang khialna nei ziam?” ci in Pilate in dongh hi. Amate in “Thinglamte tungah thatlum in!” ci in a nging seseam in au uh hi.

¹⁵Pilate in mihonpite lungkimsak nuam ahikom Barabbas tha hi. Tua zawkciangin Jesus velsak a thinglamte tungah thalup tu in aap hi.

Ngalkapte in Jesus Nunau Zazan

(Matthew 27.27-31; John 19.2-3)

¹⁶Ngalkapte in Jesus sia ngamuk mangpa leitual sumsung sangah paipui a, ngualdang theampo zongh sam uh hi.

¹⁷Amate in puantual san khat Jesus in silhsak a, lingngui taw a kivawt kumpi lukhu khat a lu tungah khusak uh hi.

¹⁸Tua zawkciang amate in, “Jewte kumpipa a khansau taken!” ci in zatakna kipia theamsak uh hi.

¹⁹Amate in a lu pan saat a, cilphii in a mai ah a zakta bang keakin khupdin in, kun uh hi.

²⁰A selnona uh teng a man zawkciang puantual san sia ama tung pan suutin, ama puansilh ngei teng silhsak kik uh hi. Tua zawkciang thinglamte tungah thalup tu in paipui uh hi.

Jesus Thinglamte tungah Kikilh



(Matthew 27.32-44; Luke 23.26-43; John 19.17-27)

²¹Ngam sung pan khuapi sungah hong pai Simon a kici pasal khat taw lampi ah kisi a, ngalkapte in ama sia zawhawk thu taw Jesus ii thinglamte puasak uh hi. (Tua Simon sia Cyrene pan hi a, Alexander le Rufuste ii pa ahi hi.)

²²Amate in Jesus sia Golgotha a kici munah paipui uh hi. Tua mun a min “Lungu Mun” cina hi.

²³Tua munah amate in Jesus sia sapittui le myrrh a kici zatui nam khat a hel sia tul tu in, kipan uh hi. Ahihang ama in a dawn nuam bua hi.

²⁴Tuaciangin ama thinglamte tungah kilh a, a puansilh teng aisaanna taw akua in nga tu ci in a et zawk uhciang hawm uh hi.

²⁵Thinglamte tungah a kilh hunin zingsang nai kua saat hi.

²⁶“Jewte Kumpipa” hi ci in a kimawsakna lai ki at hi.

²⁷Amate in ngualsuam phalakte nii zongh thinglamte khat veve tungah kilh uh a, khat sia Jesus ii ziatsang, khat sia a vei sangah kilh uh hi.

²⁸(Laithiangtho sungah ‘Ama in leitung thukham paltante thuak bangin thuak hi,’ a citeng a tangtun natu ahi hi.)

²⁹Tua mun kantan in a pai mihingte in, lusuk san lupei sanh in nunau zazan uh hi. “Hei! Biakinpi baltham in ni thum zawkciang ka sa kik thei tu ci ni hi.

³⁰Tu in thinglamte tung pan tuaksuk tan a, nangma le nangma kihun in!” ci uh hi.

³¹Tuabangma in, thiampi liante le Thukham hil syate in Jesus selno zazan uh a, amate khat le khat hi bangin kici uh hi. “Ngualdang hun hi ve ahihang ama le ama kihun thei ngawl hi!

³²Israel Kumpipa Messiah en sin tawng, thinglamte tung pan hong tuaksuk thei ziam maw, tua hile ama um vak hing!” ci uh hi. Tuaciang in Jesus taw thinglamte tung a kikilh te nii zongh in Jesus nunau zazan uh hi.

Jesus Thina

(Matthew 27.45-56; Luke 23.44-49; John 19.28-30)



³³Nisun laitakin ngambup khuazing in tuam cip a, nai thum sung khuazing hi.

³⁴Nai thum sa ciangin Jesus in a nging tatakan au a, “*Eloi, Eloi, lema sabachthani,*” ci hi. A khiakna sia, “Ka Pathian, ka Pathian awng, banghangin hong nusia ni ziam,” ci na ahi hi.

³⁵Tua munah mihing pawlkhat a omte in ama auna za a, “Ngai vun, ama in Elijah sam hi!” ci uh hi.

³⁶Amate sung pan khat in puansia khat la in, sapittui haau sungah a pap zawkciang, ciangkang dawn ah sawm hi. Tuaciang Jesus ii muuk ah taa in, “Om zii tawng! Elijah sia thinglamte tung panin ama suut tu in hong pai le hong pai ngawl en lai tawng!” ci hi.

³⁷Jesus in nging takin au in, thi hi.

³⁸Biakinn sungah kidoina puankhak sia a lu pan a taw dong khen nii kisua in kizen suk hi.

³⁹Tua mun thinglamte mai ah a ding ngalkap hon ukpa in, Jesus thi zia mu hi. “Hi mipa sia Pathian Tapa takpi hi!” ci hi.

⁴⁰Numei pawl khat tua munah om a, a khuala thithimna mun khat pan en uh hi. Amate sungah a kihel teng sia Mary Magdalene, a khangmoi zaw James le Joseph nu Mary le Salome te ahi uh hi.

⁴¹Amate in Galilee ngamah Jesus a om lai zui uh a, a hu tawntung te ahi uh hi. Ama taw Jerusalem khua a hong paikhawm numei dang tam mama zongh om uh hi.

Jesus Kivuina

(Matthew 27.57-61; Luke 23.50-56; John 19.38-42)

⁴²⁻⁴³Nitak ciangin Arimathea mi Joseph hong theng hi. Ama sia Council sungah a kizakta upa khat hi a, Pathian Ngam hong thet tu a ngakpa khat ahi hi. Tua ni sia kingin ni hi (Sabbath maa ni khat) tua ahikom Joseph in Pilate kungah hang takin pai a Jesus ii luang ngen hi.

⁴⁴Jesus thi zo hi ci a zaak ciangin, Pilate in lamdang sa hi. Ama in ngalkap hon ukpa sam a, Jesus a thi zawk a ngei zo ziam ci in dongh hi.

⁴⁵Ngalkap mangpa ii thu kona teng a zaak zawkciangin, Pilate in Joseph tungah Jesus luang pia hi.

⁴⁶Joseph in puankaang neal khat lei a, a luang la suk in, tua puanza sungah tuunin, suangpi a kikhuak thaan khat sungah sial hi. Tua zawkciang ama in thaan kongvang ah suangtum pui khat taw khak hi.

⁴⁷Mary Magdalene le Joseph nu Mary in ngakin en a, Jesus luang koina mu uh hi.

Teptee bang Lungdamna Thu 16

Thawkikna

(Matthew 28.1-8; Luke 24.1-12; John 20.1-10)

¹Sabbath ni bo zawkciangin, Mary Magdalene, James ii nu Mary le Salome in Jesus luang a zut natu in hel namtuite keng uh hi.

²Nipi ni zingtuung, nisua ciangin, amate thaan ah pai uh hi.

³⁻⁴Lampi ah khat le khat hi bangin a kikum uh hi, “Thaan kong panin akua in suangtumpui sia hong liik keaksak tu ziam?” (A suangtum sia lian mama hi.) Tuaciangin amate in a etto uh ciangin a suangtum sia a kiliik sa in om mu uh hi.

⁵Tuabangin amate thaan sungah tum uh hi, tua munah tangval khangmoi khat a ziatsang ah to in a na om a, puantual kaang khat silh hi, tuaciangin amate lau mama uh hi.

⁶“Lau heak vun. Thinglamte tungah a kithat Nazareth mi Jesus, zong na hi uh kong he hi. Ama hi sungah om ngawl a — tho kik zo hi! En vun, ama kisialna mun hi sung ahi hi.

⁷Tu in Peter pan kipan a nungzuite munah hi thu puak tavun: ‘Ama note mai Galilee ah pai khol zo hi; tua munah ama hong son ngei bangin, na mu tu uh hi,’ ” ci hi.

⁸Tua ahikom amate in lungmang patau in thaansung pan, pusuak in tai uh hi. Amate in lau ahikom, kuama munah, bangma a son bua uh hi.

THUKHUPNA LUI

Mary Magdalene tungah Jesus Kilak



(Matthew 28.9-10; John 20.11-18)

⁹Nipi ni zingtuungin Jesus thina pan a thaw kik zawkciang, a masa phitbel in Mary Magdalene tungah ama kilak hi, tua numei nu sung pan doaita sali Jesus in a hawlkeaksak ngei hi.

¹⁰Ama pai in Topa kitholpuite munah son hi. Amate kapin, tau in om uh hi.

¹¹Jesus nungta a, ama tungah kilak hi ci in numeinu ii son ciangin, amate in a um bua uh hi.

Nungzui Niite tungah Jesus Kilak

(Luke 24.13-35)

¹²Hisia zawkciang, nungzuite nii ngamsung a pai laitakin Jesus sia a nam tuatuam in kilak hi.

¹³Amate heak kikin, nungzui dangte munah a son uh hangin amate in a um bua uh hi.

Sawm le khat tungah Jesus Kilak

(Matthew 28.16-20; Luke 24.36-49; John 20.19-23; Sawltak 1.6-8)

¹⁴A khakbel in, Jesus sia nungzui sawm le khatte anneak laitakin kilak hi. Jesus in amate teih hi, banghangziam cile amate in upna nei ngawl a, a thin uh pui ahikom, a nuntak kik a mute thu son a um zo bua uh hi.

¹⁵Ama in, “Leitung theampo ah pai tavun a, mihing theampo tungah Lungdamna Thupha hil tavun.

¹⁶A kuapo ahizong um in, tui a kiphumte kingum tu hi, a um ngawlte ahile puavawkna thuk tu hi.

¹⁷Thu umte nalamdang vawt thei natu vaang kipia tu hi; amate in keima min taw doaita a not tu uh hi; amate kam tumdangin pau tu uh hi;

¹⁸ngulte zam in ngu khat pawpo a ne zongin, bangma tat ngawl tu hi; amate in cinate tungah a khut uh nga tu a, cinate dam tu hi,” ci hi.

Van ah Jesus Kila to

(Luke 24.50-53; Sawltak 1.9-11)

¹⁹Topa in amate taw thu a son zawkciang, ama vantung ah kila to in Pathian ziat sangah to hi.



²⁰Nungzuite mun theampo ah pai in, thuhil uh hi, tuaciang Topa in amate taw naseam khawm a, amate thuhilnate sia maan hi ci in a kilak natu in, nalamdang laknate vawtsak thei hi.]

THUKHUPNA LUI A DANGKHAT

⁹[Numeite in Peter le a lawmte kungah pai a, amate tungah a kison thute a tom in son sawn uh hi.

¹⁰Hisia zawkciang, Jesus ama mama in, nungzuite tungtawn in, nisuana pan nitumna ah, a thiangtho, a hing top, tawntung ngupna thu puak hi.]



Luke

Luke 1

¹Ka it Theophilus awng: Mihing tam mama in eite sungah thupiangte amate ii thiam thei za tek in at zo uh hi.

²A kipat panin a mute le a thu a thangsakte ii hong son bang teng veu ma at uh hi.

³Tua ahiciang hi thute a kipat pan a, pha takpi in ka et thiang uh ahikom, a kipialcian in na heak natu in, phamaw hi ci in kong at hi.

⁴Nang tungah hong kihil a thute, a maan le a cingin na heak natu in kong at hi.

Tuiphumpa John Sua natu Sonkholna

⁵Judea ngamah Herod Kumpipa a maan laitakin, Zechariah a kici thiampi khat om a, ama sia thiampi Abijah ii pawlkhen sungah a kihel thiampi khat ahi hi. A zi min Elizabeth hi a, ama zongh thiampi suan ahi hi.

⁶Amate ngeal Pathian mai ah ngamtatna phate taw a nungtate hi a, Topa ii thukham le thupiaknate a zuite ahi uh hi.

⁷Amate in ta a nei bua uh hi, banghangziam cile Elizabeth sia ta nei thei ngawl a, Zechariah taw amate ngeal huai mama khawm zo uh hi.

⁸Ni khat Zechariah sia Biakinn sungah a thiampi nasep seam a, nisim biakpiakna hunzeakna sungah ama ii hun hong tung hi.

⁹Thiampite ngeina om bangin, ama biakna tau tungah ngimnamtui hal tu in, aisaanna taw a kiteal ahi hi. Tua ahikomin Topa Biakinn sungah tum a,

¹⁰mipite in ngimnamtui hal hunsung theampo doipua panin thungen in ngak uh hi.

¹¹Topa vantung lalang khat ama kungah hong kilak a, ngimnamtui halna biaknatau ii ziat sangah ding hi.

¹²Zechariah in ama a mu ciangin, patau in lau hi.



¹³Ahihang vantung lalang in hi bangin ci hi, “Zechariah awng, lau heak in! Pathian in na thungetna hong za zo a, na zi Elizabeth in tapa khat hong hin pui tu hi. A min John ci in na phuak tu uh hi.

¹⁴Bangza ta in na lungdam in na thinuam tu ziam? Midang tam mamate zongh ama hong sua ciangin, bangza ta in lungdam tu ziam!

¹⁵Ama Topa muna ah mi thupi khat hong hi tu hi. Ama in sapittui le zu ne ngawlin a om kul tu hi. A nu ngilsung pan kipan ama Thaa Thiangtho taw kidim tu hi.

¹⁶Tuaciangin ama in Israel mite tam mama amate Topa Pathian kungah zotpui kik tu hi.

¹⁷Ama in kamsangpa Elijah bangin, vaangletna le thahatna taw Topa maiah paikhol tu hi. Ama in pate le tate hong ngawmtua kik tu hi, thu ni ngawl mihingte thutang ngaisut theina sungah hong kiheisak kik tu a, Topa atu a kivawt khol mihingte a pian natu in seam tu hi.”

¹⁸Zechariah in vantung lalang tungah, “Tu a na son teng thutak hi ci in koibang tel thei tu khi ziam? Kei le pasal huai hi zo a, ka zi zongh huai zo hi,” ci hi.

¹⁹Vantung lalang in zokik a, “Kei sia Gabriel ka hi hi. Pathian omna munah a om pa ka hi a, hi lungdamna thupha, nang kungah hong puak tu le nang taw ki paupui tu in, hong kisawlpa ka hi hi.

²⁰Ahihang kong thupuakte um ngawl ni hi, hi kale a hun hong tun tak ciang, ka ci bangin hong piang tu a, hong um ngawl na hikom, na pau thei nawn buatu hi. Kong thuciam teng a tun mateng in, pau thei nawn ngawl dide tu ni hi,” ci hi.

²¹Tua hun sung teng mipite in doipua panin ngak top uh a, Biakinn sungah ama ngei tapo hun a zak hu in, lamdang sa uh hi.

²²Hong pusua kik tak ciangin, ama pau thei nawn ngawl hi, tua ahikom, Biakinn sungah ama in mu kholna mu hi ci in he uh hi. Kammal khat zongh huthe thei nawn ngawl ahikom khut taw lim lak hi.



²³Biakinn sungah nasep tu teng a man zawkciang in, Zechariah a inn ah cia hi.

²⁴Tua zawk tawmvei ciangin, a zi Elizabeth naungil om a, tha nga sung puapial nawn ngawl hi.

²⁵“Tu peetma ciang ahile Topa in hong hu zo hi, ngual mai ah ka maizum ka minpaanna teng ama in hong vawksak zo hi!” ci hi.

Jesus Sua natu Kisonkhol

²⁶Elizabeth naungil a om zawk tha luk a cin ciangin vantung lalang Gabriel sia Galilee ngam Nazareth a kici khua khat ah Pathian in paisak hi.

²⁷Kumpipa David suan Joseph a kici khat taw kiteang tu, kiciamna a vawt sa ngaknu khat atu in, thupuak tu in a kisawl ahi hi. Ngaknu nu ii min Mary ahi hi.

²⁸Vantung lalang in ama kungah pai in, “Thin nopna na nga ta in! Topa nang taw hong omkhawm a, nasia takin thupha hong pia hi!” ci hi.

²⁹Mary sia vantung lalang ii thupuak huvau in, thin ngim mama a, ama kammalte ii khiaknate ngaisusun hi.

³⁰Vantung lalang in, “Mary awng, lau heak in. Nang tungah Pathian hong thuthiam mama zo hi.

³¹Nangma in nau na paai tu a, a sua ciang a min Jesus ci in na phuak tu hi.

³²Ama hong thupi tu a, a Saang Bel Pathian ii Tapa kici tu hi. Topa Pathian in a taangpupi David bangma in kumpipa suaksak tu hi.

³³Tuaciangin ama Jacob ii suan, a tawntung a maang kumpi hong hi tu a, ama ngam bo hun nei ngawl tu hi,” ci hi.

³⁴Mary in vantung lalang tungah, “Keima in, ngaknu thiangtho ka hi hi, koi bangin tu a na son bangin suak thei tu ziam?” ci hi.

³⁵Vantung lalang in, “Nang tungah Thaa Thiangtho hong om tu a, Pathian vaangletna in nang hong uap tu hi. Hi thu hu in, patang thiangtho sia Pathian Tapa kici tu hi.



³⁶Na bee nu Elizabeth ngaisun ka po in, ngual in ama tasel tu in a see sa hi, ahizong a huai mama kawm panin, tu in naungil a om zawk tha luk pha zo hi.

³⁷Banghangziam cile Pathian in na khat beak vawt mawk a nei bua hi,” ci hi.

³⁸“Kei sia Topa naseam nu khi hi, hong ci babang in, kei tungah hong tung taken,” Mary in a ci zawkciang vantung lalang in nusia hi.

Elizabeth kungah Mary Haw

³⁹Tua zawk hiat ciangin Mary kithoai cingteng in Judea ngam mualtung khua khat ah manlang takin pai hi.

⁴⁰Ama in Zechariah inn sungah tum in Elizabeth biakpui hi.

⁴¹Mary biapuina aw a zaak ciangin Elizabeth sung a om nauno lungdam in kisaan hi. Elizabeth Thaa Thiangtho taw kidim a,

⁴²aw nging tak taw hi bangin ci hi. “Nang sia numei a minpiang thupha a saangbel nu na hi hi, na hin tu nauno in, thupha nga taken!

⁴³Ka Topa ii nu takpi kei kung a hong haw natu dongin, banghangin hi bangza a thupi thu hong piang ziam?

⁴⁴Banghangin tuabangin ci khi ziam cile nong paupuina aw ka zaak po ciang, ka sung a nauno lungdam in kilawn hi.

⁴⁵Topa ii hong thupuakte hong piang tatak tu ci a, na up thei hu in, thupha saang na hi hi!” ci hi.

Mary ii Pokna La

⁴⁶Mary in ci a, “Ka thin ka lung in Topa pok hi;

⁴⁷Pathian ka Ngumpa hangin ka thaa lungdam hi.

⁴⁸Banghangziam cile ama in kei a kithusim ngawl a naseam nu hong phawk hi. Tu a kipan mihingte in, thupha saang nu hi hong ci tu hi.

⁴⁹Banghangziam cile Vaanglian Pathian in kei tungah nasep lian hong sep hu ahi hi. Ama min thiangtho hi;

⁵⁰khang khat pan khang khat, Ama a patoaita tungah hesuakna pia hi.



⁵¹A thahatna baan hong vaan a, a kiphasakte le tuabang mihingte tupnate mangta tamsak hi.

⁵²Ama in kumpi liante a tokhum uh panin khiasuk a, a niamte laamto hi.

⁵³A ngilkialte neakpha taw vaak a, a haute khut hawm nguak taw taisak hi.

⁵⁴Ama in ih taangpupite tungah a thuciamte kholet a, a naseam ahi Israel hu tu in hong pai hi.

⁵⁵Ama in Abraham tungah hesuakna a piak tu in a ciam sate, a suan a paal theampo tung dong ah piak tu in, a tawntungin phawk hi.”

⁵⁶Mary tha thum bang Elizabeth kungah a taam zawkciang cia kik hi.

Tuiphumpa John ii Suana

⁵⁷Elizabeth a nau sua tu hun hong cing a, tapa khat hing hi.

⁵⁸Topa ama tungah thuthiam mama hi ci in a innpaamte le a mealheakte in za uh a, lungdam pui tek uh hi.

⁵⁹Nausen nipi khat a phak ciangin, a vunteap attansak tu in, hong pai uh a, a pa min la in, “Zechariah” ci in phuak uh hi.

⁶⁰Ahihang a nu in, “Hi ngawl hi! A min John hi tu hi.’ ci hi.

⁶¹“No phung sungah min tuabang om ngawl hi,” a ngualte in ci uh hi.

⁶²Tuasia ciangin a pa tungah bang min phuak tu hi ziam ci in lim taw dongh uh hi.

⁶³Zechariah in lai atna thingpheak ngen a, “A min John hi,” ci in at hi. Amate in lamdang sa mama uh hi.

⁶⁴Tua hun lian laitakin, Zechariah hong pau thei kik a, Pathian pok hi.

⁶⁵A innpaamte patau siat a, tuaciang hi thute Judea ngam mualtung tengah kizel hi.

⁶⁶A zate theampo in, “Hi nausen bangbang mi hong suak tu ziam,” ci in ngaisutna le thudokna sia a thinsung tek ah om hi, banghangziam cile Topa vaang ama tungah om hi, ci in thiangtel hi.



Zechariah ii Kamsaanna Thu

⁶⁷John ii pa Zechariah Thaa Thiangtho taw kidim a, tuaciang ama in Pathian kam a saan teng son hi:

⁶⁸“Israel Pathian Topa pok tek tawng! Ama in a mite hun tu in hong pai a, suaktasak hi.

⁶⁹Ama in a vaanglian Hunpa khat hong pia a, a naseampa David suan ahi hi.

⁷⁰Taanglai in a kamsang thiangthote tungah,

⁷¹ih ngalte le hong ensante theampo ii thahatna pan hong hun tu in hong kamciam zo hi.

⁷²Ama in ih taangpupite tungah hesuakna hong lak tu in, hong ciam zo a, ama kamciam thiangtho phawk kik tu in hong khaam zo hi.

⁷³⁻⁷⁴Ih taangpupi Abraham tungah a ciliap huai kamciam taw ih ngalte khut sung panin hong hut zawk natu le ngammuang in ama ii na seam tu in hong kamciam zo hi.

⁷⁵Tua ahikom ama mai ah ih nuntak lai theampo a thiangtho le thutang in, ih om thei natu ahi hi.

⁷⁶Nang, ka tapa, a Saang Bel Pathian kamsangpa hi hong kici tu hi. Nang in Topa mai ah na paikhol tu a, a lampi na sialsak khol tu hi.

⁷⁷Ama mihingte tungah mawna kimaisakna taw ngupna piang tu hi, ci in na son tu hi.

⁷⁸Ih Pathian sia hesuak thiam a, thinneam hi. Ama in ngupna zing khuavak ei tungah hong taangsak tu a,

⁷⁹tuaciangin thina khuazing lim sung a teangte theampo tungah vantung panin hong taang tu a, thinnopna lampi tung, ih kalsuanna ah hong lampui tu hi.”

⁸⁰Nausen sia pumpi le thaa sungah hong khangto hi. Ama Israel mipite mai ah a kilak hun dong senneal ngamsung ah teang hi.

Luke 2



Jesus Suana
(Matthew 1.18-25)

- ¹Tua hun laitakin Augustus Kumpi lianpa in Rome Kumpi uk sung bup mihing kisimna omsak tu in thupia hi.
- ²Hi a masa phitbel mihing kisimna a kivawt hun laitakin Quirinius sia Syria ngam ngamuk mangpa ahi hi.
- ³Tua ahikom mihing simin amate khua tek ah min khum tu in pai uh hi.
- ⁴Joseph zongh Galilee ngam Nazareth khua panin Judea ngam Bethlehem khua, David Kumpipa suana munah hong pai hi. Joseph tua khua ah hong pai theina thu sia, ama in David suan ahihang ahi hi.
- ⁵Ama taw a kiteang tu dokzu a kipia sa ahi Mary taw min khum khawm tu in pai uh hi. Ama naungil om sa hi a,
- ⁶Bethlehem khua ah a taam sungin, a nausua tu hun cing hi.
- ⁷A tapaciil suak a, zin tun natu zinbuk awng nawn ngawl ahikom, puan taw a nau tuunin khui ankuang sungah sial hi.

Tuucingte le Vantung lalangte

- ⁸Tua ngamah tuucing pawlkhat om a, zan lai in a tuute cingin dui sungah ngiak uh hi.
- ⁹Vantung lalang khat amate kungah kilangh a, tuaciang Topa vaang amate tungah taang hi. Amate lau mama uh hi.
- ¹⁰Ahizong vantung lalang in, amate munah, “Lau heak vun. Mihing theampo atu, a lungdam huai mama, lungdamna thupha no tungah puak tu in kong pai hi.
- ¹¹Tuni mama in David khua ah note hong Hunpa — Christ Topa suak zo hi.
- ¹²Thumaan a hina na tel natu in, nausen khat puan taw kituun in, khui ankuang sungah kisial na mu tu uh hi,” ci hi.
- ¹³Thakhat thu in, vantung lalang honpi tua vantung lalang ii kungah kilangh a, Pathian pokna la sa uh hi.



¹⁴“Van a saangbelna ah Pathian minthang taken, ama ii dik a sak leitung mihingte tungah thinnopna om taken!” ci uh hi.

¹⁵Vantung lalangte van ah a cia kik zawk uh ciangin, tuucingte khat le khat hi bangin kici uh hi, “Eite Bethlehem khua ah pai in, Topa hong son sa thupiang sia en tawng,” ci uh hi.

¹⁶Tuaciang amate manlangin pai uh a, Mary, Joseph le khui ankuang sungah nausen kisial mu uh hi.

¹⁷Tuucingte in ama a mu uh ciangin nausen huvau vantung lalang ii son sa teng son kik uh hi.

¹⁸A za theampo in tuucingte son thute lamdang sa uh hi.

¹⁹Mary in hi thute a vekpi in ciamtee a, thuk takin khua ngaisun hi.

²⁰Tuucingte zongh cia kik a, amate ii mu le a zaak thute hu in Pathian pokna la sa uh hi; vantung lalang ii son bang tatak ma ahi hi.

Jesus Min Kiphuak

²¹Nipi khat zawkciang in, nausen ii vunteap at tu hun hong theng a, vantung lalang ii ama naungil om maa a piak sa min ahi Jesus ma phuak uh hi.

Biakinn ah Jesus Ki aap

²²Moses Thukham ii thupiak bangin Joseph le Mary te ii a kithiansua natu hun hong theng hi. Tua ahikom amate in patangno sia Topa tungah aap tu in Jerusalem ah paipui hi,

²³banghangziam cile Topa thukham sungah: “Tapa suakciil peuma Topa atu in ki aap tu hi,” ci in ki at hi.

²⁴Topa thukham sungah a om bangma in, amate in ngam vakhu kop khat ahibuale inn vakhu moi nii taw sangaw biakpiakna vawt tu zonghin pai uh hi.

²⁵Tua hun laitak in Jerusalem khua ah Simeon kici pasal khat om hi. Ama sia mihing pha Pathian kiita pa hi a, Israel te a kingup tu ngakin a om khat ahi hi. Thaa Thiangtho ama taw om a,



²⁶Topa ii a ciam sa Messiah a mu mateng a thi ngawl natu in, thinmuanna pia hi.

²⁷Thaa Thiangtho in lampui a, Simeon Biakinn sungah tum hi. A nu le a pa in patangno Jesus sia thukham zeksa teng vawt tu in, Biakinn sungah a paipui uh ciangin,

²⁸Simeon in patang toai in, Pathian tungah lungdamko hi:

²⁹“Tu in Topa awng, nong kamciam na kholet zo a, na naseampa thinnuam takin, hong laawnsak thei tu na hi zo hi.

³⁰Ka mittang mama taw nong tatna ka mu zo hi,

³¹tua thu mihing theampo ii mitmu thei in na vawt khol zo hi:

³²Gentilete tungah na deina a kipualaak natu le na minam Israel mite tungah minthanna a puak khuavak khat na hi hi.” ci hi.

³³Patang ii pa le nu in hi bangin Simeon ii a thuson a zaak uh ciangin lamdang sa uh hi.

³⁴Simeon in amate thupha a piak zawkciangin, a nu tungah hi bangin ci hi, “Hi patang sia Israel mi tam mamate ii a kingup natu le a siatcip natu in, Pathian teal sa ahi hi. Ama sia mihing tam mama ii a langpan tu, Pathian ii lim lakna khat hi tu a,

³⁵tuaciangin tua mihingte thinsung thuku theampo kipualaak tu hi. Tuaciang khuangaina in, namsau hiam khat bangin, nangma thin mama hong tamsak tu hi.”

³⁶⁻³⁷Asher suan Phanuel ii tanu Anna a kici nupi meingong huai mama kamsangnu khat om hi. Ama kum sali sung bek a pasal in nuntak pui a, tu in a kum sawmliat le kum li pha zo hi. Ama in Biakinn nusia ngei ngawl a, sun taw zan taw Pathian bia in an tangin thungen hi.

³⁸Tua hun laitak ma in, ama hong theng a, Pathian tungah lungdam a ko zawkciang, Jerusalem a suatak tu Pathian a ngakte theampo tungah patangno ii thu son hi.



Nazareth ah A Ciakikna

³⁹Joseph le Mary in Topa Thukham zeksate a sep tu teng a sep zawkciang Galilee ngam Nazareth khua a inn uh zuan kik hi.

⁴⁰Patang hong khang a hong hat hi; ama ciimna taw kidim a, tuaciangin ama tungah Pathian thupha om hi.

Patangno Jesus Biakinn sungah

⁴¹Jesus ii nu le pa sia Paisan Poai siim tu in, kumsim in Jerusalem ah pai uh hi.

⁴²Jesus kum sawm le kum nii a phak ciangin, a pai ngei uh bangma poai siim tu in pai uh hi.

⁴³Poai man ciangin inn ah cia kik tu in amate pai uh a, ahizong patangno Jesus sia Jerusalem ah taam hi. A nu le a pate in a he bua uh hi;

⁴⁴amate in mihon sungah a om ma in ngaisun ahikom ni khat bup a pai zawk uhciang a lawmte le a mealheakte kawm tengah zong uh hi.

⁴⁵Amate in Jesus mu ngawl ahikom Jerusalem ah heak kikin zong uh hi.

⁴⁶A nithum ni ciangin biakinn sungah Jew syate taw tokhawm a thu ngai thu dongh in a om mu uh hi.

⁴⁷Ama ii ciim kammal taw a zona te a za theampo in lamdang sa uh hi.

⁴⁸A nu le a pa in ama a mu uh ciangin lamdang sa in, a nu in a tapa ii munah, “Ka tapa awng, banghangin hi bangin hong vawt ni ziam? Na pa le kei in, nang kong zazonna in ka thin uh ngim mama hi,” ci hi.

⁴⁹Ama in zokik a, “Banghangin kei hong zong nu ziam? Ka pa inn sungah ka om tu a kul hunlam he ngawl nu ziam?” ci hi.

⁵⁰Ahizong a nu le a pa in ama zokikna thu a tel bua uh hi.

⁵¹Tua ahikom Jesus amate taw Nazareth ah heak kik a, tua munah amate thu ni in om hi. A nu in hi thute theampo a thin sungah keam hi.

⁵²Jesus sia a pumpi le ciimna ah hong khangto a, Pathian le mihingte tung panin maipha nga hi.



Luke 3

Tuiphumpa John Thuhilna

(Matthew 3.1-12; Mark 1.1-8; John 1.19-28)

¹A hun sia Kumpi lianpa Tiberius ii a maan zawk kum sawm le kum nga a cin hun hi a; Pontius Pilate sia Judea ngamuk mangpa hi in, Herod sia Galilee ngamukpa hi a, a suapuipa Philip sia Iturea ngamkhen le Trachonitis ngamukpa hi; Lysanias sia Abilene ngamukpa hi,

²tuaciang Annas le Caiaphas sia thiampi lianbelte ahi uh hi. Tua hun laitakin senneal ngam sungah a om Zechariah ii tapa John tungah Pathian kammal hong theng hi.

³Tua ahikom John in Jordan Ngundung ngamkuam bup ah thuhil a, “Na mawna uh kisiik kik vun a, tui kiphum vun, tua hile Pathian in na mawna uh hong maisak tu hi,” ci hi.

⁴Kamsangpa Isaiah laibu sungah a ki at bangma in: “Senneal ngam sungah mihing khat hong au a: ‘Topa atu lampi sialkhol vun; ama khualhaw natu in lamzin tang khat vawtsak vun!’

⁵Ngamkuam theampo kivuh tu a, Muallian le mualnote theampo kiziik tam tu hi. Lam kingkoai theampo kimam in, Lam ham theampo a neal in kivawt tu hi.

⁶Minam theampo in Pathian ii ngupna mu tu hi,’ ci hi.”

⁷Mihonpite John ii tuiphum tu in, hong pai tek uh hi. Amate tungah, “No ngul honte awng, Pathian ii hong tunsak tu daan pan, suakta thei tu nu hi ci in akua in no hong son ziam?”

⁸Na mawna uh pan na kisiik kikna uh kilanghsak vun. Tuaciangin ko sia Abraham sia kote taangpupi ci in, noma le noma na kici tuan heak vun. Kei kong cina pan, Pathian in suangtum hite zongh la in, Abraham suan le paal in vawt thei hi!

⁹Thingkungte phuk tu in a bul ah, hei mai kingat zo hi; nga pha a nga ngawl thingkung theampo kiphuk tu a, meimang sungah kisp tu hi.”



- ¹⁰Mipite in, “Tua hile bangbang a ngamta tu khu ziam?” ci in dongh uh hi.
- ¹¹“Laktong silh nii a neite in, a nei ngawlte silh khat hawm taken, an a nei te zongh in tuabangma in hawm taken,” ci in zokik hi.
- ¹²Shiadong pawlkhat zongh tui kiphum tu in hong pai a, “Sya awng, ko zongh bangbang ka ngamta tu uh ziam?” ci in dongh uh hi.
- ¹³“Na khon tu uh sangin a tamzaw khon heak vun,” amate tungah ci hi.
- ¹⁴Ngalkap pawlkhat in, “Ko zongh bangbang a ngamta tu khu ziam?” ci in dongh uh hi. Amate tungah, “Zawhawk thu taw kuama tung pan sum la heak vun, leilot thu taw kuama tungah thu zong heak vun. Na thasum uh taw lungkim vun,” ci hi.
- ¹⁵Mihingte ii lametna sia khang tu in kipan a, amate in John sia Messiah ahi ka tawm maw ci in ngaisun uh hi.
- ¹⁶Tua ahikom John in amate tungah, “Kei ka hile tui taw tui kong phum hi, ahihang kei sangin a lian zaw pek khat hong pai lai tu hi. Ama ii peangdap khau suut tu zongh in ka kilawm bua hi. Ama in Thaa Thiangtho le meikuang taw hong baptize tu hi.
- ¹⁷Ama in ankheap natu taangkheaplaw, a khut sungah toai zo hi, zungtaangte hong kheap tu a, a tang teng saal sungah khawmtua in; a theap teng a mit ngei ngawl meikuang sungah hal tu hi,” ci hi.
- ¹⁸John in Lungdamna Thupha mipite tungah a nanam in hil a, amate tek ii nuntakna ziate a kikheal thei natu in hanthawn hi.
- ¹⁹Ahizong John in ngamuk mangpa Herod tei hi, banghangziam cile ama in a suapuipa ii zi Herodias tenpui a, phat ngawlina zongh tam ma vawt hi.
- ²⁰Tuaciang Herod in John sia thong sungah a khumna taw in ngamtatna a sia seseam khat vawt hi.

Jesus Tui Kiphumna
(Matthew 3.13-17; Mark 1.9-11)

- ²¹Mihing a om theampo tui a kiphum zawk uh ciangin, Jesus zongh tui kiphum hi. A thunget laitak van kihong a,

²²Thaa Thiangtho sia a kimu thei pumpi taw ngam vakhu bangin a tungah hong tu hi. Tuaciang aw khat van panin hong nging a, “Nang sia ka it ka Tapa na hi hi. Nang tungah ka lungkim hi,” ci hi.

Jesus ii Taangpupite

(Matthew 1.1-17)

²³Jesus naseam tu in hong kipat laitakin ama kum kum sawmthum bang pha zo hi. Ama Joseph ii tapa hi ci in mihingte in ngaisun uh a, Heli ii tapa Joseph,

²⁴Matthat ii tapa Heli, Levi ii tapa Matthat, Melchi ii tapa Levi, Jannai ii tapa Melchi, Joseph ii tapa Jannai

²⁵Mattathias ii tapa Joseph, Amos ii tapa Mattathias, Nahum ii tapa Amos, Esli ii tapa Nahum, Naggai ii tapa Esli,

²⁶Maath ii tapa Naggai, Mattathias ii tapa Maath, Semein ii tapa Mattathias, Josech ii tapa Semein, Joda ii tapa Josech,

²⁷Joanan ii tapa Joda, Rhesa ii tapa Joanan, Zerubbabel ii tapa Rhesa, Shealtiel ii tapa Zerubbabel, Neri ii tapa Shealtiel,

²⁸Melchi ii tapa Neri, Addi ii tapa Melchi, Cosam ii tapa Addi, Elmadam ii tapa Cosam, Er ii tapa Elmadam,

²⁹Joshua ii tapa Er, Eliezer ii tapa Joshua, Jorim ii tapa Eliezer, Matthat ii tapa Jorim, Levi ii tapa Matthat,

³⁰Simeon ii tapa Levi, Judah ii tapa Simeon, Joseph ii tapa Judah, Jonam ii tapa Joseph, Eliakim ii tapa Jonam,

³¹Melea ii tapa Eliakim, Menna ii tapa Melea, Mattatha ii tapa Menna, Nathan ii tapa Mattatha, David ii tapa Nathan,

³²Jesse ii tapa David, Obed ii tapa Jesse, Boaz ii tapa Obed, Salmon ii tapa Boaz, Nahshon ii tapa Salmon,

³³Amminadab ii tapa Nahshon, Admin ii tapa Amminadab, Arni ii tapa Admin, Hezron ii tapa Arni, Perez ii tapa Hezron, Judah ii tapa Perez,



³⁴Jacob ii tapa Judah, Isaac ii tapa Jacob, Abraham ii tapa Isaac, Terah ii tapa Abraham, Nahor ii tapa Terah,

³⁵Serug ii tapa Nahor, Reu ii tapa Serug, Peleg ii tapa Reu, Eber ii tapa Peleg, Shelah ii tapa Eber,

³⁶Cainan ii tapa Shelah, Arphaxad ii tapa Cainan, Shem ii tapa Arphaxad, Noah ii tapa Shem, Lamech ii tapa Noah,

³⁷Methuselah ii tapa Lamech, Enoch ii tapa Methuselah, Jared ii tapa Enoch, Mahalaleel ii tapa Jared, Kenan ii tapa Mahalaleel,

³⁸Enosh ii tapa Kenan, Seth ii tapa Enosh, Adam ii tapa Seth, Pathian ii tapa Adam.

Luke 4

Jesus Ze-et Thuakna

(Matthew 4.1-11; Mark 1.12-13)

¹Jordan ngun panin, Jesus Thaa Thiangtho taw kidim in, hong heak kik a, tua Thaa in senneal ngamsung dong lampui in paisak hi,

²tua munah Doaimangpa in ni sawmli ze et hi. Tua hun sung teng theampo bangma neak nei ngawl ahikom, tua hun a bo ciangin a ngilkial hi.

³Doaimangpa in “Pathian Tapa na hi le, suang hi sia anluum a sua natu in thupia in,” ci hi.

⁴Ahizong Jesus in, “Mihingte sia anluum bek taw nungta thei hi ngawl hi, ci in laithiangtho sung ki at hi,” ci in zokik hi.

⁵Tuasia ciangin Doaimangpa in la to a thakhat thu in leitung ngam theampo lak hi.

⁶“Hi vaangletna le hi hauna theampo kong pia tu hi. Hite theampo keima khut sung a hong ki aap sa hi a, ka piak nop po ii tungah ka pia thei hi.

⁷Kei hong bia lete hite theampo nangma neisa suak tu hi,” Doaimangpa in ci hi.



⁸Jesus in “Laithiangtho in na Topa Pathian bek na bia tu a, ama atu bekma na seam tu hi ci hi!” ci in zokik hi.

⁹Tuaciang Doaimangpa in ama Jerusalem ah paipui a, Biakinn khuvum a saangbelna ah suanto in, ama tungah hi bangin ci hi. “Pathian Tapa na hile hi sung panin nangma le nangma kilawn suk in.

¹⁰Banghangziam cile, ‘Pathian in nang hong keam tu in, a vantung lalangte sawl tu hi,’ laithiangtho in ci hi.”

¹¹Bang ci lai ziam cile, “Amate in a khut uh taw hong domto tu a, na peang beak zongh suang taw a kithutha buatu hi,” ci hi.

¹²Ahizong Jesus in, “Laithiangtho in, ‘Na Topa Pathian na ze et heak in’ ci hi,” ci in zokik hi.

¹³Doaimangpa in Jesus a nanam in a ze et zawkciang, tawm vei sung nusia hi.

Jesus in Galilee ngamah Nasep Kipan

(Matthew 4.12-17; Mark 1.14-15)

¹⁴Tua zawkciangin Jesus Galilee ngamah heak kik a, tuaciangin Thaa Thiangtho vaangletna sia, ama taw omkhawm hi. Ngamkhen sung bup ah, ama thu hong thang hi.

¹⁵Ama in synagogue sungah hilna nei a, a kuama po in pok hon uh hi.

Nazareth ah Jesus Kinial

(Matthew 13.53-58; Mark 6.1-6)

¹⁶Tuaciang in Jesus Nazareth khua ama khanna munah cia kik a, Sabbath ni in synagogue ah a pai ngei bangin pai hi. Ama dingin Laithiangtho sim tu in kithoai a,

¹⁷tuaciangin kamsang Isaiah ii laibu aap uh hi. Laibuzial phel a, hi bang a ki atna mun mu hi.

¹⁸“Topa ii Thaa kei tungah hong om hi, banghangziam cile mizawngte tungah Lungdamna thupha puak tu in kei hong teal hi. A kimante suatakna a pia tu le, mittawte khua a mu kik natu, nencip a thuakte suatakna thu a thangsak tu,



¹⁹Topa in amate a ngup natu hun hong theng zo hi, ci in thuthangsak tu in kei hong kisawl hi,” ci hi.

²⁰Jesus in Laithiangtho zial in, a keampa tungah a aap zawkciang ama to hi. Synagogue sungah a to theampo in, ama lamdang et tek uh a,

²¹“Hi laithiangtho kammal hong kisim teng na zaak uh bangin, tuni in hi thu teng hong tangtung zo hi,” a ci hu in, lamdang et tek ahi uh hi.

²²Kammal taknei taw a pau thiam hu in mihingte thinsung hong suu hi. “Ama sia, Joseph ii tapa hi kana ngawl ziam?” ci uh hi.

²³Amate munah, “ ‘Zato mangpa awng, nangma le nangma kidamsak phot in,’ ci paunak sia kei tungah hong zangh tu ci in kong up nginge ma ahi hi. Tua bek dom ngawlin, Capernaum khua ah a kivawt na zaak uhte hi lai ka khua zongh ah vawtin hong sawl lai tu nu hi.

²⁴A tatak in kong ci ciang, kamsangte sia, amate khua ah kisaang ngei ngawl hi,” Jesus in ci lai hi.

²⁵“Hong ngai tavun: Elijah hun sung kum thum le kum lang nguatui kang a, ngambup kialpi a tun laitakin Israel ngam sungah meingong tam mama om hi.

²⁶Ahitazong Elijah sia Israel ngam sungah meingongte khat beak ii kungah a ki paisak bua hi, ahihang Sidon ngamkhen Zarephath khua ah teang meingong khat ii kungah, ki paisak hi.

²⁷Tuaciangin kamsangpa Elisha hun ciangin Israel ngam sungah a kiitakhuai phaak natna vei tam mama om hi; ahitazong Syria mi Naaman sim ngawl khat beak zongh a kidamsak bua hi,” ci hi.

²⁸Synagogue sung om mihingte in, hi thu a zaak uhciang thin uuk uh hi.

²⁹Amate dingin Jesus khuapua sangah kai a, a khuamual liang tung pan lotsuk sawmin paipui uh hi.

³⁰Ahihang ama mihonte kantan in paisuak hi.

Thaa Ngilo khat A vei Pasal khat

(Mark 1.21-28)



³¹Tua zawkciangin Jesus Galilee ngam Capernaum khua ah pai a, Sabbath ni in mihingte tungah thuhil hi.

³²Ama thuhil zia lamdang sa uh hi, banghangziam cile ama in thuneina taw pau hi.

³³Synagogue sungah doai ngilo khat ii thaa a vei pasal khat om a, ama in nging takin ciik au hi.

³⁴“Aw Nazareth mi Jesus awng, ko bang hong law nuam ni ziam? Hong susiacip tu in hong pai ni ziam? Nang akua ci in hong he khu hi; nang sia Pathian ii a thiangtho kamtaipa ni hi!” ci hi.

³⁵Jesus in thaa tungah thupia a, “Thim in, pasalpa sung pan pusuak in!” ci hi. Doai in mihingpa sia amate mai ah lei denna in nei a, bangma dang tatsak ngawlin a sung pan pusuak hi.

³⁶Mihing theampo in lamdang sa uh a, khat le khat hi bangin kici uh hi. “Tu a kammalte bangbang kammal ziam? Thuneina le vaangletna taw hisia pa in, thaa ngilote thupia a, tuaciang amate pusuak hi!” ci uh hi.

³⁷Jesus huvau thu kipuakte, tua ngamsung mun theampo ah kizel hi.

Jesus in Mihing Tam mama Damsak

(Matthew 8.14-17; Mark 1.29-34)

³⁸Jesus in synagogue nusia in Simon inn ah pai hi. Simon sunghnu a cisa in suk a, amate in Jesus munah tua thu son uh hi.

³⁹Ama lupna ah Jesus pai in, cina nu kung ding a, cina nu ciisuk natna pan a dam natu in thupia hi. A ciisuk hong thai a, thakhat in tho in, amate zindo hi.

⁴⁰Ni a tum zawkciang in, natna satna a tuatuam a veite peuma a lawmte in Jesus kungah hong paipui uh hi; mihing sim tungah a khut nga a, damsak siat hi.

⁴¹Mipite sung panin, doaite pusuak a, “Nang sia Pathian Tapa na hi hi,” ci in au uh hi. Jesus in doaite a pau ngawl natu thupia hi, banghangziam cile ama sia Messiah ahi hunlam doaite in he uh hi.

Jesus in Synagogue sungah Thuhil

(Mark 1.35-39)



⁴²Khua hong vak ciangin, Jesus in khuapi nusia in, a ngamkhingna mun khat zuan hi. Mipite in, ama zong tu in kipan uh a, a mu ciangin, a taam lai natu in tho uh hi.

⁴³Ahihangin, amate tungah, “Pathian Ngam huvau, Lungdamna thupha sia khuapi dangte zongh ah, ka hil kul tu hi, banghangziam cile tua nasep seam tu ma in, Pathian ii hong sawlpa ka hi hi,” ci hi.

⁴⁴Tuasia bangma in, ama in ngambup sung synagogue te ah thuhil hi.

Luke 5

Jesus in Nungzui Masa Phitbelte Sam

(Matthew 4.18-22; Mark 1.16-20)

¹Ni khat Jesus Gennesaret Tuili hui ah dingin mipite in Pathian thu ngai tu in, ama sangah neak ngawp nuamin a kiphulung uh hi.

²Ama in ngunkuang nii vaalbo tungah kikaito sa in om mu hi; ngasa paaite in a ngeen uh a sil laanin, a nusiak uh ahi hi.

³Ngunkuangte sung pan khat sia Simon aa hi a — Jesus in tua tungah kaa in — vaalbo panin tawm a khualana ah sawnin sawl hi. Jesus ngunkuang tungah to in, mihonte hilna nei hi.

⁴A son tu teng a man zawkciang in, Simon munah, “Na ngunkuang tui thukna munah sawn lai in, tuaciang in nang le na seppuite ngasa man tu in na ngen uh hong khiasuk tavun,” ci hi.

⁵Simon in, “Topa, zan khuateak in diang zo a, bangma man ngawl khu hi. Ahihang nangma in nong sawl ahile, ngeente ka khiasuk tu uh hi,” ci hi.

⁶Amate in a khiaksuk uh ciangin, ngasa tam mama man a, a ngeente ektham dektak hi.

⁷Tuasia ciangin ngunkuang dang khat sung pan a seppuite, amate hu tu in sam uh hi. Amate hong pai a, ngunkuangte ngeal dimin, ngasa a sun uh ciangin, a ngunkuangte tui sungah tum dektak hi.



⁸Simon Peter in bang thu teng piang, ci in a mu ciangin, Jesus mai ah, ama khupdin in, “Topa awng, kei kung pan kiheam in! Kei sia mimawpa khi hi!” ci hi.

⁹Ama le a ompui dangte in, ngasa tam mama a mat uh sia lamdang sa uh hi.

¹⁰Simon seppui ahi Zebedee tate James le John zongh in, lamdang sa uh hi. Jesus in Simon tungah, “Lau heak in; tu pan kipan mihingte na man tu hi,” ci hi.

¹¹Amate in a ngunkuang uh vaalbo tungah kaito a, a neisa theampo nusia in, Jesus nung zui uh hi.

Jesus in Pasal khat Damsak

(Matthew 8.1-4; Mark 1.40-45)

¹²Khatvei Jesus khuapi khat sungah om a, tua munah, a kiitakhuai mama phaak natna a vei, pasal khat om hi. Ama in Jesus a mu ciangin, a mai ah bok a, “Topa, nong thiangthosak nuam le hong thiangthosak thei ni hi,” ci in thum hi.

¹³Jesus in a khut vaan a, ama tham in, “Thiangthosak nuam khi hi. Thiangtho tan!” ci hi. A natna teng thakhat in dam hi.

¹⁴Jesus in, “Kuama munah son heak in, ahizong thiampipa kungah pai paih tan a, ama in vealsak tan; tua zawkciang, a kuama theampo in damzo hi, ci in hong heak natu in, Moses ii sawl bangin, sangaw biakpiaknate vawt tan,” ci hi.

¹⁵Ahihang Jesus thu thang seseam a, tuaciang mihonpite in ama thuson ngai tu le, a natnate pan damna a nga tek natu in, a kungah pai uh hi.

¹⁶Ahihang Jesus a ngamkhingna munte ah thungen tu veu in pai hi.

Jesus in Langngaw Pasal khat Damsak

(Matthew 9.1-8; Mark 2.1-12)

¹⁷Ni khat Jesus ii a thuhil laitak, Galilee ngam, Judea le Jerusalem panin Phariseete pawlkhat le, Thukham hil syate to hon uh hi. Cinate a damsak natu in, Topa vaangletna Jesus tungah om hi.



¹⁸Mihing pawlkhat in pumlang a zaw khat, a lupna taw zawng a, innsung Jesus mai ah tumpui tu in hanciam uh hi.

¹⁹Ahizong mihonte hangin a tumpui natu, lampi a mu zo bua uh hi. Tua ahikom amate in cina sia innkhum tungah puato in, suangpheak pawlkhat a lokkeak zawk uh ciang, mihonte laizang Jesus mai ah a lupna taw ma in khiasuk uh hi.

²⁰Tua mite in bangza in upna nei ci, Jesus in a mu zawkciang pasalpa tungah, “Na mawna hong kimaisak zo hi, lawm awng,” ci hi.

²¹Thukham hil syate le Phariseete in, “Pathian min daisakna kampau hisia pa akua ziam! Mawna maisak thei sia, Pathian khat sim ngawl a dang om ngawl hi,” amate tetek kici uh hi.

²²Jesus in amate ii khuangaisut na teng he ahikom hi bangin ci hi. “Banghangin tuabangin khuangaisun nu ziam?”

²³“Na mawna hong kimaisak zo hi,” ci sia le “Tho in a lampai in,” ci sia koi sia ol zaw ziam?”

²⁴Tua ahikom mihing Tapa in, leitung ah mawnate maisak theina thu a nei hunlam kong lak tu hi,” ci hi. Tua zawkciang in pumlang a zaw pasalpa munah, “Tho in, na lupna luak in a, inn ah cia tan, hong ci khi hi!” ci hi.

²⁵Thakhat thu in, amate mai ah pasalpa tho a, lupna luakin, Pathian min pokna taw inn ah cia hi.

²⁶Amate theampo in lamdang a sak tawpin lamdang sa uh hi. Launa taw kidim in, Pathian pok kawm a, “Tuni in, bangza in a tumdang nate mu thong hi ziam?” ci uh hi.

Jesus in Levi Sam

(Matthew 9.9-13; Mark 2.13-17)

²⁷Tua zawkciang Jesus pusuak a, Levi kici shiadongpa a zum sungah to in a om mu hi.

²⁸Jesus in ama tungah, “Hong zui tan,” ci hi. Levi zongh dingin na theampo nusia in zui hi.

²⁹Tua zawkciangin Levi in ama inn ah, Jesus atu in anvaakna poai lian khat vawt a, a leangnate sungah shiadongte tam ma le midangte kihel hi.

³⁰Pharisee pawlkhat le tuate sung pan Thukham hil syate in Jesus nungzuite tungah lungkim ngawl na hi bangin ci uh hi. “Banghang in shiadongte le a kipuavawkte taw anne khawm tuidawn khawmin om nu ziam?” ci in dongh uh hi.

³¹Jesus in, “Mihing cidamte in zato mangpa a kitaangsam bua hi, cinate bek in kitaangsam uh hi.

³²A zatakhuai mihingte a kisiik natu in a sam tu kong pai bua a, a kipuavawkte a sam tu in kong pai hi,” ci in zokik hi.

Antanna taw kisai Thudokna

(Matthew 9.14-17; Mark 2.18-22)

³³Mihing pawlkhat in Jesus tungah, “John ii nungzuite in an tang mun mama in thungen hi, tuabang ma in, Phariseete ii nungzuite zongh in, ngamta uh hi; ahihang na nungzuite in anne tuidawn in om uh hi,” ci uh hi.

³⁴Jesus in zo a, “Mopoai sungah zineipa a om laiteng, leangnate an kidan thei na ziam? Kidan thei ngawl hi!

³⁵Ahihang zineipa amate kung pan kilaak zawk ciangin amate in an a tang tu uh hi.”

³⁶Jesus in hi thusonteen a sia zongh amate tungah sonthua hi. “Kuama in puanthak khat leap in, puanlui sa phawna in nei ngei ngawl hi. Tuabangin hile, puanthak sia lalsak a, puanlui sia zongh a phawna taw kilawm ngawl tu hi.

³⁷Savun thawl lui sa sungah kuama in sapittui thak thaal ngei ngawl hi, banghangziam cile sapittui thak in savunthawl lui sia saantham tu a, sapittui bua in, savun thawl lal tu hi.

³⁸Tua sangin sapittui thakte sia savunthawl thak sungah kithaal zaw tu hi.

³⁹Tuaciangin sapittui kumlui a dawn sate in sapittui thak a du buatu hi, ‘A lui sia phazaw hi,’ ci hi.”



Luke 6

Sabbath ni huvau Thudokna

(Matthew 12.1-8; Mark 2.23-28)

¹Sabbath ni khat, Jesus in zungtaang lote kantan in pai hi. A nungzuite in zungtaang huite hiat uh a, a tangte ne uh hi.

²Pharisee pawlkhatte in, “Sabbath ni a, vawt thei ngawl tu hi ci in, Thukham ii a cite banghangin vawt nu ziam?” ci in dongh uh hi.

³“David le a ngalkapte a ngilkial uh ciangin, a ngamtatna uhte sim ngei ngawl nu ziam?”

⁴Ama in Pathian inn sungah tumin, Pathian a kipia sa anluum la in, ne a, a lawmte zongh pia hi, a tatak in ci leang tuate thiampite ngawl po ii neak thei natu ngeina om ngawl hi,” ci in Jesus in amate zokik hi.

⁵Tuaciang Jesus in a thukhupna ah, “Mihing Tapa sia Sabbath ii Topa ahi hi,” ci hi.

Khutlang zaw Pasal khat

(Matthew 12.9-14; Mark 3.1-6)

⁶Sabbath nidang khat ah Jesus synagogue ah pai a, thuhil hi. A khut ziatsang a zaw pasal khat tua munah om hi.

⁷Thukham hil syate le Phariseete in Jesus tungah mawna zong nuamin, Sabbath ni in cina a damsak ziam a damsak bua ziam, ci in a khial tu encik hi.

⁸Ahihang Jesus in amate thinsung he siat ahikom pasalpa tungah “Ding in a, hi sung mai sangah hong pai tan,” ci hi. Pasalpa tho a, dingto hi.

⁹Tuaciang Jesus in tua mite tungah, “Ih Thukham in Sabbath ni in bang teng sep tu hong oai ziam? ci in hong dongh khi hi. Ngual hu zaw tu hi ziam maw? Ngual nasak zaw tu hi ziam? Mihing khat ii nuntakna huu zaw tu hi ziam maw susia zaw tu hi ziam?” ci in,

¹⁰a kiim a om theampo a et zawkciang; pasalpa tungah, “Na khut vaan in,” ci hi. Tuabangin ahiciang a khut dam kik hi.



¹¹Amate a thin uuk mama a, Jesus bang law thei tu hi ziam, ci in kikum uh hi.

Jesus in Nungzui Sawm le Niite Teal

(Matthew 10: 1-4; Mark 3.13-19)

¹²Tua hun laitakin Jesus, mual tungah kaato in, zan khuateak Pathian tungah thungen hi.

¹³Khuavak ciangin, a nungzuite ama kungah sam a, amate sung pan nungzui tu sawm le niite teal hi, tuate sawltakte kici hi:

¹⁴Simon (Peter ci in min vaw hi) le a suapuipa Andrew; James le John, Philip le Bartholomew,

¹⁵Matthew le Thomas, Alphaeus ii tapa James le Simon (minam it a kici pa),

¹⁶James ii tapa Judas le ama a leeheakpa, Judas Iscariot ahi uh hi.

Jesus Hilna le Cidamsakna

(Matthew 4.23-25)

¹⁷Mualtung pan sawltakte taw Jesus hong tuaksuk kik ciangin, zaanglei tam mun khatah a nungzui mihing hon khat taw ding hi. Judea ngambup pan le Jerusalem le tuipi hui khuapi Tyre le Sidon pan, hong kingawmtua mihon khat, tua munah om uh hi;

¹⁸amate in Jesus thuhilna ngai tu le a natna uh pan a damsak tu thangai in hong pai ahi uh hi. Thaa ngilote ii siatvawt mihingte zongh hong pai a, dam uh hi.

¹⁹Mihing theampo in ama tham tu in, hanciam uh hi, banghangziam cile ama tung panin, vaang hong pusuak a, amate damsak siat hi.

Lungdamna le Khuangaina

(Matthew 5.1-12)

²⁰Jesus in a nungzuite en a, “No a zawngte in a lungdam te na hi uh hi. Pathian Ngam sia note aa ahi hi!

²¹“Tu laitak a ngilkialte in a lungdamte na hi uh hi; na ngil uh a va tu hi! “Tu laitak a kapte in a lungdamte na hi uh hi; na nui tu uh hi!



²²“Mihing Tapa hangin ngual in hong ensan a, hong nial in hong lang in, misiate awng hong cile, a lungdamte na hi uh hi!

²³Tuabangin thu hong pian ciangin lungdam vun a, lungpilna taw na diang vun, banghangziam cile no atu vantung ah thaman lian khat kikoisak hi. Banghangziam cile amate ii taangpupite zongh in kamsangte tungah tuabang ma in, na ngamta uh hi.

²⁴“Ahizong tu laitak no a haute atu in bangza in lauhuai ziam; no sia a nuam a nungta sa hi zo nu hi!

²⁵Tu laitak no a ngilvate atu in bangza in lauhuai ziam; na ngil uh kial tu hi!
“Tu laitak no a nuite atu bangza in lauhuai ziam; tau in na kap tu uh hi!

²⁶“Mihingte in hong phat son ciangin bangza in lauhuai ziam; amate taangpupite zongh in leilot kamsangte, tuabang ma in na son uh hi.

Ngalte It natu

(Matthew 5.38-48; 7.12)

²⁷“Ahizong hong zate tungah kong ci hi: Na ngalte it vun, hong ensante tungah thupha vawt vun,

²⁸hong haamsiatte tungah thupha pia vun a, hong siatvawtte atu thungetsak vun.

²⁹Khat po in na biang lang hong beang le, a lang zongh na beang thuasak vun; khat po in na laktong puasilh a la le, na laktong zongh na piathua vun.

³⁰Bang khat pawpo hong ngen a om le na pia vun, na neisa uh hong laaksak a om le, na ngen kik heak vun.

³¹Noma tungah hong kivawt le na oai uh bangin, ngual tungah na vawt vun.

³²“No hong itte bek na it uhle, banghangin thupha saang tu nu ziam? Mimawte zongh in amate a itte it hi!

³³Tuaciang in no tungah thupha hong vawtte tung bek ah thupha vawt leute, banghangin thupha khat saang tu nu ziam? Mimawte ngangawn zongh in tuabangma in ngamta hi!



³⁴Hong lo kik tu a na muanmawk uhte tung bekah na pukthaak uh le, bangbangin thupha khat saang tu nu ziam? Kilo kik tu lam etna taw mimaw tetek zongh kipukthaak hi!

³⁵Tuabang hi ngawl hi! Na ngalte it vun, amate tungah thupha vawt vun; sum pukthaak tavun a lo kik tu na thangai heak vun. Tua hile no in thaman lian khat na nga tu uh a, a Saang Bel Pathian tate na suak tu uh hi, banghangziam cile ama sia lungdamna a he thei ngawlte le mihing ngilote tungah thuthiam hi.

³⁶Na Pa uh sia hesuak thiampa ahi bangma in, no zongh ngual na hesuak tavun.

Ngual tungah Thukhenna

(Matthew 7.1-5)

³⁷Ngual tungah thu na khen heak vun, tua hile Pathian in no tungah thu hong khen ngawl tu hi, ngual na mawsak heak vun, tua hile Pathian in hong mawsak ngawl tu hi; Ngual mawna na maisak vun, tua hile Pathian in note mawna hong maisak tu hi.

³⁸Ngual na piak uh bangin, Pathian in hong pia tu hi. Ngual na piakna uh taw kizui in a kihen ikek a kilok cinten, a teena khum a vuum a dimleet in Pathian in no tungah hong pia tu hi,” ci hi.

³⁹Tuaciang Jesus in hi thusontena son hi: “Mittaw khat in mittaw dangkhat lam a pui thei buatu hi; tuabangin lampui le a nii in dum sungah taak khawm tu hi.

⁴⁰Sangpatangpa in a syapa sangin, lianzaw ngawl hi; sangpatang peuma a sin tuteng a man zawk ciangin, a syapa bang hong hi pheang tu hi.

⁴¹“Banghangin na suapuipa mittang sung a ninteak sia mu thei in nangma mittang sungah thingluang sia phawk thei ngawl ni ziam?

⁴²Na suapuipa munah, ‘Suapui awng nong hesuakna in, na mittang sungah ninteak sia hong laakkeaksak tong,’ na ci hang, nangma mittang sung a thingluang sia zongh mu thei ngawl hi ngawl ni ziam? No a kihi theamsakte awng! A masa phit in noma mittang sung a thingluang sia lakeak phot vun,



tuasia zawkciang in na suapuipa mittang sung pan ninteak sia na laak thei natu in, a thiang takin, na mu thei tu uh hi.

Thingkung le A Nga thu

(Matthew 7.16-20; Matthew 12.33-35)

⁴³“Thingkung cidam khat in thingnga pha ngawl a nga bua a, tuaciang thingkung pha ngawl khat in thingnga pha a nga bua hi.

⁴⁴Thingkung sim in a nga taw in a kung ii omzia kitel thei hi; Ngamling kung tung panin thei nga na lo bua uh a; lingkung tung panin sapit nga na lo bua uh hi.

⁴⁵Mihingpha pa in, a thin sungah a kholsa phatnate panin, thuphate pusua a; mihing pha ngawl pa in thusiate pusua hi. Banghangziam cile thin sungah a dimin a om bangin kam panin kison hi.

Insa Niite thu

(Matthew 7.24-27)

⁴⁶“Banghangin ‘Topa, Topa’ cici napi, kong son bang vawt ngawl nu ziam?

⁴⁷Mihing khat po in, kei kungah hong pai in, ka kammal hong ngai a, ka thu hong nite sia bang taw kibang ziam cisia kong lak tu hi.

⁴⁸Ama sia innsapa khat khuamkua a thuk in to a, suangpi inn doppha in a nei pa taw kibang hi. Namthuam a, tua inn nawkngawp ahihang pha takin kisa ahikom a ngawk zo bua hi.

⁴⁹Ahizong ka thu hong ngai a, ka sawl bangin hong ni ngawlte sia inn doppha a nei ngawl inn sa pa taw kibang hi; namthuam in a nawk ciangin tua inn thakhat thu in puk a — bangza ta in a lauhuai lalthapna ziam!” ci hi.

Luke 7

Jesus in Rome Ngalkap hon ukpa ii Naseampa Damsak

(Matthew 8.5-13)

¹Jesus in mihingte tungah hiteng a ci zawkciang, Capernaum khua ah pai hi.

²Tua munah Rome ngalkap hon ukpa ii a it mama a naseampa khat om a; ama thi dektak in a cina hi.



³Ngalkap hon ukpa in Jesus thu a zaak ciang, a naseampa a damsak nop manin Jesus sam tu in Jew upate pawlkhat paisak hi.

⁴Amate in Jesus kung a thet ciangin, “Hisia pa hu lete kilawm mama ka sa uh hi.

⁵Ama in ih mite hong it a, synagogue khat zongh ko atu in hong saksak hi,” ci in nasia takin thuumsak uh hi.

⁶Tua ahikom Jesus a samte taw paikhawm hi. A inn nai hong thet uh ciangin, ngalkap hon ukpa in a lawmte paikholsak a, hi bangin Jesus tungah cisak hi, “Topa awng, ngimnga thong tu ni hi. Kei inn sungah nang nong pai tu sia ka kiphu bua hi,

⁷nang kungah kei kong pai tu hang zong kilawm kisa ngawl khi hi. Thupia po lete, ka naseampa dam tu hi.

⁸Keima zongh thunei uliante khutnuai ah naseam khat ka hi a, keima ii khutnuai zongh ah ngalkapte om hi. Khat ii munah, ‘Pai in!’ ka cile, pai a; ‘Hong pai tan!’ ka cile, hong pai hi. Ka sila pa munah, ‘Hisia vawt in!’ ka ci ciang zong, ama in vawt hi,” ci hi.

⁹Jesus in hi thuteng a zaak ciangin, lamdang sa hi; a nung pan a zui mihingte sangah kingeilee in, “Hi bang upna Israel mite sung ngangawn zongh ah ka mu ngei bua hi!” ci hi.

¹⁰Kamtaite ngalkap hon ukpa inn ah cia kik a, a naseampa a dam sa in mu uh hi.

Jesus in Meingong Khat ii Tapa Nungtasak kik

¹¹Tuazawk tawmvei ciangin Jesus in Nain a kici khua khat ah a nungzuite le mihon khat taw kithawl in pai uh hi.

¹²Khuapi kongpi a thet lian laitakin mihing pawlkhat thaankuan tu in hong pusuak hi. Mithipa sia meingong khat ii khat bek a nei sun tapa hi a, khuasung panin mihon in meingongnu zui uh hi.

¹³Topa in ama a mu ciangin hesuakna thin taw kidim a, “Kap heak in,” ci hi.



¹⁴Tuasia ciangin Jesus in mithi luang kung zuanin tham a, a kuang puate in dinh uh hi, Jesus in, “Tangval awng! Tho in kong ci hi!” ci hi.

¹⁵Mithi pa hong tho to a, pau tu in a kithoai ciang Jesus in, a nu aap kik hi.

¹⁶Amate theampo lau in, Pathian pok uh hi. “A lian mama kamsangpa khat ei sungah piang zo hi! Pathian in a mite ngum tu in hong pai zo hi!” ci uh hi.

¹⁷Hi bang Jesus ii thusia ngamsung le a kiimkot ngamkhente ah kizel hi.

Tuiphumpa John Kamtaite

(Matthew 11.2-19)

¹⁸John ii nungzuite in hi thuteng John tungah a son uh ciangin,

¹⁹ama in mihing niite Topa tungah hi bangin thudongh tu in paisak hi. “Nang sia John ii hong pai tu hi a cisia ma na hi ziam? tua ahibuale ngualdang ka na lam en lai tu uh ziam?”

²⁰Amate in Jesus kung hong thet uh ciangin, “Nang sia hong pai tu pa tatak na hi na ziam? Tua ahibuale mihing dangkhat ka lam en lai tu uh ziam? ci in Tuiphumpa John in nangma kungah kote hong donghsak uh hi,” ci hi.

²¹Tua hun laitak mama in Jesus in, mihing tam mama te a natna a satna uh pan le, thaa ngilo veina uh panin damsak a, mittawte tam ma khua musak hi.

²²Ama in John ii kamtaite tungah, “John kungah heak kik tavun a, na mu uh na zaak uh teng son tavun: mittawte in khuamu a, peangbaite phatak lampai thei a, a phaakte kidamsak a, nangongte in khuaza a, mithite kitho kiksak a, a zawngte tungah Lungdamna Thupha kihil hi.

²³Kei hong muangla ngawlte bangza in a lungdamte ahi uh ziam!” ci in zokik hi.

²⁴John ii kamtaite in a nusiak zawk uh ciang, Jesus in John ii thu, mihonte tungah son tu in kipan hi: “John ii thuhilna ngai tu in, senneal ngam sungah na pai uh ciangin, bang mu tu in na ki muangmaw uh ziam? Vui ii khulup lopate ziam? A bang bel en tu in pai nu ziam?”

²⁵Bang en tu in pusuak nu ziam? Puanhoi nano silh pasal khat ziam? Tuabang a kizeam a, a nuamin a nungtate sia kumpi teenna innte bek ah om hi!



²⁶Hong son tavun, bang en tu in pusuak nu ziam? Kamsangpa khat ahi ziam? Hi hi, ahizong no ii mu sia kamsang khat sangin lianzaw pek hi.

²⁷Banghangziam cile John sia Laithiangtho sungah: ‘Pathian in na lampi hong honkholsak tu in, kamtai khat na mai ah ka na puak tu hi’ a ci sia ahi hi.”

²⁸Jesus in, “A tatak in ka ci ciang John sia mihing a, a minpiang khat pawpo sangin, lianzaw hi. Ahihang Pathian Ngam sungah a nobel pa in, John sangin lianzaw hi,” ci in belap hi.

²⁹Mihing theampo in ama thu za uh hi; amate a tuan in shiadongte in Pathian ii dei thumaan thutangte saang thei in John in tuiphum zo hi.

³⁰Ahihangin Phariseete le thukham hil syate in amate atu, Pathian ii tupna te nial in, John ii tuiphum tu a uuk bua uh hi.

³¹Jesus in kampau zomto suak a, “Tuhun a mihingte bang taw hong teengat tu khi ziam? Amate bang taw kibang ziam?”

³²Amate vanh zuakna phual ah, a to patangte taw kibang hi. Pawlkhat in a dang pawlkhatte ausan a, ‘Mopoai la hong sak ung, ahihang laam nuam bua uh teh! mithi vuina la hongsak ung, ahizong kap nuam bua uh teh!’

³³Tuiphumpa John hong pai in, ama in an tang a, sapittui ne ngawlin a om ciangin ‘doaivei hi!’ ci nu hi.

³⁴Mihing Tapa hong pai a, ama in ne in dawn in, a om leleau ciangin, ‘En vun. An tuang pa, sapittui kham thei pa, shiadongte le a kipuavawkte ii lawmpa!’ ci nu hi.

³⁵Hi na ve, Pathian ciimna a saang theite theampo atu in, thumaan hi ci in kilak hi,” ci hi.

Pharisee Mi Simon Inn ah Jesus

³⁶Pharisee khat in Jesus anne tu in sam a, Jesus in tua pa inn ah pai in, anne tu in to hi.



³⁷Tua khuapi sungah mawneinu khat teang hi. Jesus sia Pharisee pa inn ah anne hi, ci in a zaak ciangin sathau namtui suangngo thawl khat dim paipui a,

³⁸Jesus ii nungsang a peang hui ah dingin, kap in a thitui taw Jesus ii peang kawtsak hi. Tua zawkciang a sam taw Jesus peangte nawl in, a peangte namh a, tuate tungah paaknamtui buak hi.

³⁹Pharisee pa in a mu ciangin, “Hisia pa sia kamsang hi takpi le ama a tham numei hisia akua hi ci in he tu a, bangbang mawna taw nungta cisia he tu hi!” ama le ama kici hi.

⁴⁰Jesus in, “Simon awng, kong son tu thu khat om hi,” ci hi. “Hi hi, syapa awng, hong son tan” ci hi.

⁴¹“Sumpuk thaak khat pa tungah leiba mihing nii om hi,” Jesus in ci hi “Khat in dangka tang za nga ama tungah ba a, a khat sia in sawmnga ba hi.

⁴²A nii ma in, lo kik zo ngawl ahikom, ama in amate ngeal ii leibatte maisak hi. Tua hile, a koi sia zaw in ama a it zaw tu ziam?” ci hi.

⁴³“Ka up mawk in, a tamzaw a kimaisak sia in it zaw tu hi,” Simon in ci in zo hi. “Na ci bang maan hi,” Jesus in ci hi.

⁴⁴Numeinu sangah nga in Simon tungah hi bangin ci hi, “Hi numei mu hi ngawl ni ziam? Na inn sungah kong tum a, ka peangsil natu tuidam takpi zong nong pia bua hi, ahihang hisia nu in a thitui taw ka peang hong silsak a, a sam taw hong nawlkosak hi.

⁴⁵Nang in napna taw nong muak bua hi. Ahihang hisia nu in kong thet pan kipan ka peang hong nam hi.

⁴⁶Ka lu ah ka thii tu olive thau nong pia bua hi, ahihang hisia nu in paaknamtui taw ka peangte hong noisak hi.

⁴⁷Kei kong ci in a, ama ii, itna lianpi hong lakna sia in, ama mawna tam mamate kimaisak zo hi, ci na thu kiciansak hi. Tua hi a, tawmbek a kimaisakte in itna tawmbek lak tu hi,” ci hi.



⁴⁸Tua zawkciang Jesus in numei nu munah “Na mawnate kimaisak zo hi,” ci hi.

⁴⁹Sabuai ah a to dangte in, “Mawnate ngangawn a maisak hisia akua ziam,” amate sung tengah ci uh hi.

⁵⁰Ahihang Jesus in, numeinu munah, “Na upna in hong ngum zo hi; thinnuam in pai tan,” ci hi.

Luke 8

Jesus ii Kitholpui Numeite

¹Tua zawk tawmvei zawkciang, Jesus khuapi le khuanote ah, khualhaw in Pathian Ngam huvau Lungdamna Thupha hil hi. Nungzui sawm le niite in zui a,

²tuabang ma in numei pawlkhat le amate sung panin, thaa ngilo veina le natna satna dang a damsakte, Mary (Magdalene a kici), ama ii sung pan doai sali a nawkeaksak nu;

³Herod ii zumsung ulian khat ahi Chuza ii zi Joana; le Susanna le a dang numei tam mama, Jesus le a nungzuite hu natu in, amate neisun po a pia pawlkhat in kitholpui uh hi.

Thaicii Poaipa Thu taw Thusonteenaa

(Matthew 13.1-9; Mark 4.1-9)

⁴Khua khat panin khua khat ah mihingte in Jesus kungah hong pai uh hi; mihon tam mama hong kikhop zawkciang, Jesus in hi thusonteenaa son hi.

⁵“Khatvei lai in, pasal khat in thaici poai tu in kuan hi. Lo sungah thaici a poai ciangin, thaici pawlkhat lamzin tungah taak a, tua munah kisiikcip in vacimte in tawm khawng uh hi.

⁶Pawlkhat suang tam na munah tu a, a kung hong po tak ciang ngawtaakcip hi. Banghangziam cile, tua mun san lei sungah tui a nol bua hi.

⁷Thaicii pawlkhat lingkung sungah tu a, tua lingkung taw khangkhawm in, lingkung in deapcip uh hi.



⁸Tuaciang thaici pawlkhat leipha na ah tu hi; a kung po a, a kung sim in a zaa zakhat tek nga hi.” Tuaciang Jesus in a thuson khup a, “Bil neipo in hi thu za tavun!” ci hi.

Thusonteena ii Khiakna

(Matthew 13.10-17; Mark 4.10-12)

⁹A nungzuite in Jesus tungah hi thusonteena ii khiakna dongh uh a,

¹⁰ama ii a zokikna pan, “Pathian ngam thu thuthukte heakna no tungah hong kipia zo hi. Ahizong ngualdang a tu in, sonteena taw kipia hi, amate in en napi in a mu thei ngawl, ngai napi in a tel thei ngawl natu in kivawt hi.

Jesus in Thaicii Poaipa taw Thusonteena Sonthiang

(Matthew 13.18-23; Mark 4.13-20)

¹¹“Thusonteena ii khiakna in hi bang ahi hi: thaici sia Pathian kammal ahi hi.

¹²Lamzin tungah a tu thaicite sia a thu a zate hi; ahihangin Doaimangpa hong pai a, ngupna a nga ngawl natu le a up ngawl natu in, a thinsung uh pan tua Pathian thu sia laaksak hi.

¹³Suang tamna munah thaici a tute sia Pathian thu lungdam takin za a a saangte hi. Ahizong a thu in thukbun ngawl hi; tawmvei hunsung teng um phot ahihang, ze etna hong pai ciangin, amate puk uh hi.

¹⁴Lingkawm a thaici a tute sia a thu za a, ahizong thinngimna, hau nopna le leitung nopsaknate in khunel a, amate minh hun a nei bua hi.

¹⁵Leipha sung a atu thaicite sia a thu za a, thunitna thinsung pha taw keamcing a, a nga a nga dong a zomto suakte ahi uh hi.

Kuang taw A Kikhup Meiinn

(Mark 4.21-25)

¹⁶“Kuama in meiinn vaakin kuang taw khup ahizong, tua ahibuale lupna nuai ah ahizong koi ngei ngawl hi. Hong sungtangte ii muthei tu in, meivakna khuam tungah vaak zaw uh hi.

¹⁷“A kiseal nate theampo a kilangh in kipusua tu a, a kikhupsin theampo kimu tu a, kipualaak siat tu hi.



¹⁸“Tua ahiciang na thu zaak uhte kidawm tavun; banghangziam cile a neite tungah tamzaw kipia tu a, a nei ngawlte tung panin, nei a kihak tawmnote ngangawn zongh ki laaksak tu hi.”

Jesus ii Nu le A suapuite
(Matthew 12.46-50; Mark 3.31-35)

¹⁹Jesus ii nu le a suapuate ama kungah pai uh a, ahizong mipite hangin ama taw a kisi thei bua uh hi.

²⁰Jesus munah khat in, “Na nu le na suapuate innpua ah ding a, nang taw kimu nuam hi,” ci hi.

²¹Jesus in amate theampo munah “Ka nu le ka suapuate sia Pathian thu za a, a zuite ahi hi,” ci hi.

Jesus in Vuipi suangval Thimsak
(Matthew 8.23-27; Mark 4.35-41)

²²Nikhat Jesus in a nungzuite taw ngungkuang sungah to uh a, “Tuili ngalkhat ah pai tawng,” ci hi. Tuabang ma in kipan uh hi.

²³Amate tuabang in tui tungah a pai laitak, Jesus mutthip hi. Thakhat thu in tuili tungah suangval hong vasuk a, ngungkuang sungah tuicing tu in kithoai ahikom, amate atu in lau huai mama hi.

²⁴Nungzuite in Jesus kung pai in phong a, “Topa, Topa! Ei teng thi dektak zo hing!” ci uh hi. Jesus tho in vuipi le tuihualte thupia a, tuate thimin, dai dide hi.

²⁵Tua zawkciang nungzuite munah, “Na upna uh koisung om ziam,” ci hi. Ahihang amate in lamdang sa in lau uh a, khat le khat hi bangin kici uh hi. “Hisia pa akua ziam? Ama in vuipi suangval le tui kihualte tungah thu a piak ciangin tuate in, a thu ni uh hi!” ci uh hi.

Jesus in Doavei Pasal khat Damsak
(Matthew 8.28-34; Mark 5.1-20)

²⁶Jesus le a nungzuite tui tungah paisuak uh hi. Galilee tuili ngal Gerasa ngamkhen theng uh hi.

²⁷Jesus vaalbo ah a kaa ciangin, tua khuami doavei khat in muak hi. Tuasia pa khuangeipi hun sung puansilh ngawlin om a, inn ah om nuam ngawlin thanhawng sungah teang hi.



²⁸Ama in Jesus a mu ciangin nasia takin au a, a peang kungah kileiden in, “A saangbel Pathian Tapa Jesus awng! Kei bang hong law nuam ni ziam? Daan nong piak ngawl natu hong thum khi hi,” ci hi.

²⁹Hi bangin a ci thei sia banghangziam cile, Jesus in thaa ngilo munah, ama sung pan a pusua natu thupia zo ahihang hi. Tam vei mama thaa ngilo in ama man a, ama thong sungah a khut le a peangte thikkol bulin a kikhum hang, a thikkolte saantat in, senneal ngam sungah doai in not hi.

³⁰Jesus in, “Na min bang ziam,” ci in dongh hi. “Ka min sia ‘Mihonpi’ ahi hi,” ci hi — banghangziam cile ama sungah doai tam mama tum hi.

³¹Tua doaite in Jesus munah, a hawng thukpui sungah a puak ngawl natu in thum hi.

³²Tua taw a kinaina mualpangh ah, vok hon khat an zongin taa uh hi. Doaite in Jesus munah tua vakte sungah a tumsak natu in, ngen uh a, Jesus thukim hi.

³³Amate in pasalpa sung pan pusua a, vakte sungah tum uh hi. Vok honbup sia mualpangh liang pan kinuntaw suk a, tuili sungah tuitaa in thi siat hi.

³⁴Vokcingte in thupiang teng mu ahikom amate tai in, khuapi sung le lote ah a thu thangsak hi.

³⁵Mihingte in bang thupiang ziam ci in, en tu in Jesus kungah hong pai uh ciang, ama sung pan, doai a kinawkeaksak sia pa, puansilh sa in, thinciim takin, Jesus peang kungah to hi; tuasia ciangin amate lau siat uh hi.

³⁶Tua thupiangte a mute in ngualdangte munah tuasia pa sia bangbang in kidamsak ci thu son uh hi.

³⁷Tua ngam ah mihing theampo in, Jesus sia mundang a zot natu in, sawl uh hi, banghangziam cile amate lau mama uh hi. Tua ahikom Jesus in ngunkuang tungah kaa in ding kik hi.

³⁸A sung pan doai a nawkeaksak pa in, “Hong zuisak tan,” ci in Jesus munah thum hi. Ahihang Jesus in heak kiksak a,



³⁹“Na inn ah cia kik tan, Pathian in nang tungah na hong sepnate son tan,” ci hi. Pasalpa zongh in, khuasung kantan in pai a, Jesus ii ama tungah a nasep teng son hi.

Jairus Tanu le Jesus Puanmong A tham Numei khat

(Matthew 9.18-26; Mark 5.21-43)

⁴⁰Jesus sia tuili langkhat ah hong heak kik ciangin mite in muak uh hi, banghangziam cile amate in ama ngak in om top zo uh hi.

⁴¹Tuasia ciangin Jairus kici mihing khat hong theng hi; ama sia tua munah a om synagogue ulian khat ahi hi. Ama in Jesus peangah bok a, a innah a haw natu in thuum hi,

⁴²banghangziam cile kum sawm le kum nii a pha khat bek a nei a tanu sia thi dektak hi. Jesus taw hong tonkhawm a, a kiimkot panin mihonpite in phultha tek uh hi.

⁴³Tuate sungah kum sawm le kum nii chibua top numei khat kihel hi; ama kibawl theina theampo taw kibawl zo ahihang kuama in a damsak zo bua hi.

⁴⁴Ama in mihonpite sung, Jesus ii nungsang pan hong pai a, a puanmong thamsak hi. Thakhat in a chibua sia thai hi.

⁴⁵Jesus in, “Akua in hong tham nu ziam,” ci hi. Amate in nial tek uh hi. Peter in, “Mipite in na kiimkot pan in hong neak tek hi,” ci hi.

⁴⁶Ahizong Jesus in, “Hong tham khat om hi, banghangziam cile ka pum sung panin, vaangletna a pusua hunlam ka he hi,” ci hi.

⁴⁷Numeinu in ama kiphawk zo ci in a heak ciangin liing ngawp in pai a, Jesus peangah bok hi. Tua munah a om mihing theampo ii muna ah ama ii puanmong a thamsakna thu le, thakhat in a kidamsakna thu son hi.

⁴⁸Jesus in ama tungah, “Ka tanu awng, na upna in hong damsak zo hi, Thin nuam takin, pai tan,” ci hi.

⁴⁹Jesus in hi bangteng a pau laitakin, ulianpa inn pan kamtai khat hong pai a, Jairus munah, “Na tanu thi zo hi. Topa ngim pia nawn heak in,” ci hi.



⁵⁰Ahihang Jesus in tua thu za a, Jairus munah, “Thintoi heak in; um po in, ama dam tu hi,” ci hi.

⁵¹Tua inn a thet ciangin ama in Peter, John, James le numeino ii nu le pa simngawl a dang teng a sungtan tu a oai bua hi.

⁵²Tua sungah a om theampo in numeino hu in kap in mau in om uh hi. Jesus in, “Kap heak vun; numeino thi ngawl hi — a mu hi bek hi!” ci hi.

⁵³Amate in Jesus nuisan uh hi, banghangziam cile numeino thi zo hi ci in he uh hi.

⁵⁴Ahihang Jesus in numeino khut pan kaito in, “Ka ta no awng, tho in!” ci hi.

⁵⁵Numeino hong nungta kikin, thakhat thu ama hong tho to a, tuaciang Jesus in a neak tu bangkhat po a piak natu in a kiim a om mite sawl hi.

⁵⁶A pa le a nu in nasia takin lamdang sa uh hi, ahihang Jesus in thupiang teng kuama tung a son ngawl natu in khaam hi.

Luke 9

Jesus in Nungzui Sawm le Niite Khualhawsak

(Matthew 10.5-15; Mark 6.7-13)

¹Jesus in a nungzui sawm le niite sam a doai naw natu le cinate damsak natu in, vaangletna le thuneina pia hi.

²Tua zawkciang Pathian Ngam thuhil tu le cinate damsak tu in amate paisak hi.

³Amate tungah hi bang teng ci masa hi, “Na khualhaw natu ah bangma keng heak vun; ciangkhat ahizong, sum ngetna ip ahizong, an ahizong, sum ahizong, puan laih natu ahizong, keng heak vun.

⁴Hong kisaang na inn pawpo ah tung vun a, tua khua na nusiak uh dong tua inn ah taam tavun;

⁵no hong kisaang ngawl na mun khuate peuma nusia vun a, a kidop thei natu in na peang leivuite na thin tavun,” ci hi.



⁶Nungzuite kuan in khuano theampo kantan in pai a, Lungdamna Thupha hil in, mun theampo ah cinate damsak hi.

Herod Lungmanna

(Matthew 14: 1-12; Mark 6.14-29)

⁷Galilee ngamukpa Herod in, thupiang theampo a zaak ciangin, a lungmang mama hi, banghangziam cile mihing pawlkhat in, tuiphumpa John hong nungta kik hi ci uh hi.

⁸Pawlkhat in Elijah hong kilangh zo hi a ci om a, pawlkhat in taanglai a kamsang khat hong tho kik hi ci uh hi.

⁹Herod in, “John ii ngawng tansak zo khi hi; ama thu huvau ka zaak sia akua bel hi tu ziam?” ci hi. Tua zawkciang in ama in, Jesus a mu thethei natu in hanciam hi.

Jesus in Mihing Tulnga Anvaak

(Matthew 14.13-21; Mark 6.30-44; John 6.1-14)

¹⁰Sawltakte hong cia kik uh a, amate sep sa theampo Jesus tungah ko uh hi. Amate sam in, amate thu in Bethsaida khuapi zuan uh hi.

¹¹Mihonte in tua thu a zaak uh ciangin, ama zui uh hi. Ama in tua mite pha takin saang a, Pathian Ngam thuhil in, a kisamh te damsak hi.

¹²Ni tum tu kuan ciangin, nungzuite sawm le nii ama kungah hong pai a, “Mipite khuano sungah ahizong, lo sungah ahizong, an le ngiabuk zong tu in paisak in, banghangziam cile hi lai mun sia a tongta mama mun khat ahi hi,” ci uh hi.

¹³Ahihang Jesus in, “Amate neak tu bang khat pawpo noma mama in pia vun,” ci hi. Amate in “Ka nei theampo uh a kingawm anluum nga le ngasa nii hi bek hi. Hi mihonbup atu an lei tu in pai le hong oai ni ziam?” ci in zokik hi.

¹⁴(Pasalte tulnga bang pha hi). Jesus in a nungzuite tungah, “Mihonpite khawl khat ciangin sawmnga bang veu in tosak vun,” ci hi. balneen in, mipite sungah hawm tu in a nungzuite pia hi.



¹⁷Amate in ne hon a, a kham teak in a neak zawk uh ciang, a neak vaal nungzuite in khum 12 dim nga uh hi.

Jesus Thu Peter in Pualaak
(Matthew 16.13-19; Mark 8.27-29)

¹⁸Ni khat Jesus ama nguak in thungen a, a om laitak nungzuite ama kungah hong pai uh hi. “Mihonte in kei akua hi hong ci ziam,” ci in dongh hi.

¹⁹“Pawlkhath in Tuiphumpa John hi hong ci hi. A dangte in Elijah hi hong ci om a, a heap in taanglai a kamsangte khat hong nungta kik hi vak hong ci uh hi,” ci in zo hi.

²⁰“Note in kei akua hi nong ci uh ziam?” ci in dongh hi. Peter in zo a, “Nang sia Pathian ii Messiah ni hi,” ci hi.

Jesus in A Thi natu le A Thuak natu Sonkhol
(Matthew 16.20-28; Mark 8.30; 9.1)

²¹Tuaciang Jesus in hi thu kuama tungah a son ngawl natu in nasia tak thupia hi.

²²Ama in, “Mihing Tapa in nasia takin thuak tu a, upate, thiampi liante le thukham hil syate in nial tu hi. Ama kithatlum tu hi, ahihang ni thum zawkciang in nuntakna sungah kitho kiksak tu hi,” ci in son lai hi.

²³Tuaciangin amate theampo tungah hi bangin ci hi, “Kei nung hong zui nuam khat po in ama le ama kinial in a thinglamte nisim in pua in hong zui taken.

²⁴Banghangziam cile a kuama po ama nuntakna a hu nuam sia in taan tu a, ahihang kei hangin a nuntakna a taan sia in a nuntakna a hu tu hi.

²⁵Mihing khat in leitung theampo a nga hangin ama nuntakna a sumh ahibuale a taan le bang phatuam ziam? Phattuumna om ngawl het hi!

²⁶Mihing khat in kei le ka hilnate tungtaang ah a mai a zum le, Mihing Tapa in ama vaangletna, Pa vaangletna le vantung lalang thiangthote ii vaangletna taw hong pai ciangin tua mipa tungah a maizum tu hi.

²⁷A maan takin kong ci ciang, hi lai a om pawlkhath in Pathian Ngam a mu phot ngawlin a thi buatu hi.”



Meal Kikhealna

(Matthew 17.1-8; Mark 9.2-8)

²⁸Hi thute a son zawk nipi khat bang zawkciang, Jesus in Peter, John le James sam a, mual tungah thungen tu in paipui hi.

²⁹Ama thu a nget laitak in, a maitang pianzia hong kikheal a, a puansilh te kaangin tee ziazua hi.

³⁰Thakhat thu in mihing nii hong theng a, ama taw kipaupui hi. Amate sia Moses le Elijah hi a;

³¹amate in vantung vaangletna taw hong kilangh in, Jerusalem ah a thi natu Pathian tupna huvau a khuangkheim nai na thu Jesus taw kikum uh hi.

³²Peter le a kitholpuite mutthip in om uh a, ahizong a khanlaw ciangin Jesus ii vaangtaang le ama taw a ding khawmte nii mu uh hi.

³³Tua mihingte nii in Jesus a nusiak ciangin, Peter in, “Topa hi sungah ih om sia bangza in nuam ziam? Buk thum sa tawng, nang atu khat, Moses atu khat, Elijah atu khat sa tawng,” ci hi. (Ama in bangteng pau cisia a he tak bua hi).

³⁴Tuabang a pau laitak in, meeikaai khat hong piang a, amate tuam hi. A meeikaai sia nungzuite tungah zaam ahikom amate lau uh hi.

³⁵Meeikaai sung panin aw khat nging a, “Hi in ka teal sa ka Tapa ahi hi — ama aw na ngai tavun!” ci hi.

³⁶Awnging sia a tawp ciangin, Jesus ama nguak om hi. Nungzuite in pau ngawlin, a mu nate tua hun laitak kuama munah a son bua uh hi.

Jesus in Thaa Ngilo vei Patang khat Damsak

(Matthew 17.14-18; Mark 9.14-27)

³⁷A zing ciangin Jesus in a nungzuite thum taw mualtung panin tuaksuk a, mihon khat in Jesus muak uh hi.

³⁸Mihon kawm panin mihing khat au a, “Sya awng! kong thum hi. Tapa khat bek ka nei sia — hong etsak tan.

³⁹Doaite khat in au khat sua in, ama man a, ama ii kam pan cilphuan tha in butthi kaikinsak a, tawlnga ngawlin vawtsia a, thasua nuam ngawl hi.



⁴⁰Na nungzuite munah hong nawkeaksak natu ka nget hangin, hong naw keaksak thei ngawl hi.”

⁴¹Jesus in zokik a, “No upna nei ngawl le mikhialte awng, no taw bang tan vei hong omkhawm zo tu a, bang tan vei hong dual zo tu khi ziam? Na tapa hi sungah hong paipui tan,” ci hi.

⁴²Patang sia hong paipui laitak in doai in leidenna in nei a, butthi kaikinsak hi. Jesus in thaa ngilo tungah thupia a, patang sia damsakin, a pa tungah aap kik hi.

⁴³Mihing a om theampo in Pathian ii a lian mama a vaangletna lamdang sa uh hi.

Jesus in A Thi natu huvau Sonkik

(Matthew 17.22-23; Mark 9.30-32)

A vawt theampo mihingte in lamdang asak laitak in, Jesus in nungzuite munah hi bangin ci hi.

⁴⁴“Kong son tu teng na ma ngil heak vun! Mihing Tapa sia mihingte ii vaangletna khut sungah ki aap tu hi,”

⁴⁵Ahizong a nungzuite in hi thu ii khiakna a tel bua uh hi. A tel zawk ngawl natu in kiphual seal a, tuaciang amate in, hi thu huvau dongh ngam ngawl uh hi.

Akua Lianbel Ziam?

(Matthew 18.1-5; Mark 9.33-37)

⁴⁶Nungzuite sungah akua lianbel ziam ci thu kinialna piang hi.

⁴⁷Jesus in amate thinsung ah bang ngaisun ziam ci thu tel ahikom, patangno khat la in, ama kungah dingsak a, amate tungah hi bangin ci hi,

⁴⁸“Mihing khat pawpo in, hi patangno sia kei min taw a saang le keima hong saang ahi hi; tuaciang kei hong saang sia in kei hong sawlpa saang ahi hi. Banghangziam cile, no sungah a nobel sia in, a lianbel ahi hi,” ci hi.

Nang hong Langpan ngawl po Nang sangah hong Pang hi

(Mark 9.38-40)



⁴⁹John hong pau a, “Topa awng, nangma min taw doaita notkeak khat ka mu a, a kheal natu ka tho uh hi, banghangziam cile ama ei pawl ahi bua hi,”

⁵⁰Jesus in ama tung le a nungzui dangte tungah, “Ama na tho heak vun, banghangziam cile no hong langpan ngawl peuma no sang hong pawl ahi hi,” ci hi.

Samaria Khuano khat in Jesus Saang nuam ngawl

⁵¹Jesus vantung ah a kilaak tu a nai ciangin, a thin hong khensat a, Jerusalem khua sang manaw in pai hi.

⁵²Ama mai ah kamtaite paikholsak a, Samaria khuano khat sungah tumin na theampo ama atu kinging khol sa a om natu in sawl hi.

⁵³Ahihang tua munah a mihingte in ama a saang bua uh hi, banghangziam cile ama Jerusalem khua sang manaw in a pai sia a kitel hang ahi hi.

⁵⁴Nungzuite James le John in hi thu a mu uh ciangin, “Topa awng, amate haltham tu in, van pan meikuang khat samsuk le ung nong oai ziam,” ci uh hi.

⁵⁵Jesus in kingeilee in tei hi.

⁵⁶Tua zawkciang Jesus le a nungzuite khuano dang khat ah pai uh hi.

Jesus Nungzui Tute

(Matthew 8.19-22)

⁵⁷Lampi ah a pai laitak in, mihing khat in Jesus tungah, “Na paina theampo ah kong zui tu hi,” ci hi.

⁵⁸Jesus in zokik a, “Ngiate in kua nei uh a, vacimte in bu a nei uh hi, ahihang Mihing Tapa in a lusial natu mun zongh a nei bua hi,” ci hi.

⁵⁹Midang khat munah, “Hong zui tan,” ci hi. Ahihang tua pa in, “Topa awng, ka pa hong vuisak phot tan,” ci hi.

⁶⁰Jesus in, “Mithite le mithite kivui taken, nang na hile pai in, Pathian Ngam thu thangsak tan,” ci hi.

⁶¹Midang khat in, “Kong zui tu hi Topa awng, ahihang ka innkuanpuite taw ki vaithakna vawt phot tong,” ci hi.



⁶²“Mihing khat lotho a kipan sia in, nungsang a lee et kikik le Pathian Ngam atu in, ama kimanna om ngawl hi,” Jesus in ci hi.

Luke 10

Jesus in Sawmsali le Niite Kuansak

¹Hisia zawkciang Topa in, a dang sawmsali le nii teal a, nii veu kop in, ama mama ii pai natu khua le munte ah paikholsak hi.

²Jesus in amate tungah, “Anlaak tu tam hi, ahihang an kaikhawm tu naseam tawm hi. A an la tu in, naseamte hong puak natu in, anneipa tungah thungen vun” ci hi.

³“Pai tavun! Ngia hon sungah tuunote tha bangin kong tha hi.

⁴Sumbawm ahizong, thung ahizong, peangdap ahizong keng heak vun; Lampi ah ngual paupui tu in tawlnga heak vun.

⁵Inn khat pawpo sungah, na tum uh ciang, a masa phit in, “Hi inn ah thupha hong tung taken!” na ci vun.

⁶Thupha a saang nuam mihing khat po a om le na thupha piak uh kip taken a, tuabang ahibuale, na thupha piak uh dok kik tavun.

⁷Tua inn ah taam tavun a, hong piak pawpo ne in, dawn vun, banghangziam cile naseam khat sia thaman a saan tu kilawm hi. Inn khat pan inn khat ah kikhiin kawkoai heak vun.

⁸Khuapi khat sungah na tum uh ciang, no hong kisaang ahile, na mai ah hong kilui pawpo ne vun,

⁹tua khua ah cinate damsak vun a, ‘Pathian ngam no taw hong kinai zo hi!’ ci in mite tungah son vun.

¹⁰Ahihang khuapi khat sungah, na tum uh ciangin, no hong kisaang bua ahile, lampi ah pusuk tavun a,

¹¹‘Na khua leivui ka peang tungah hong baangte kong thinh kik uh hi, ahizong Pathian Ngam no taw kinai zo hi, ci phawk vun!’ ci tavun.



¹²A tatak ka ci ciang, Thukhenna Ni ciangin, Pathian in, tua khua sangin, Sodom khua hesuak zaw tu hi.

Thu Um ngawl Khuapite

(Matthew 11.20-24)

¹³“Nang atu in bangza in lauhuai ziam? Chorazin awng! nang atu in bangza lauhuai ziam? Bethsaida awng! no sungah hong kivawt nalamdangte Tyre le Sidon ah kivawt thong le tua khua mite in, a mawna te pan kisiik kikna, a kilangh natu in, khua ngeipi pek lai panin, khau-ip puan silh in to in amate le amate vut kithe tu uh hi!

¹⁴Pathian in Thukhenna Ni ciangin, note sangin Tyre le Sidon khuate hesuak zaw tu hi.

¹⁵Capernaum awng! Nang na hile nangma le nangma vantung ah na kilaamto nuam ni ziam? Hell sungah hong kisepsuk tu hi!” ci hi.

¹⁶Jesus in a nungzuite munah, “No thuson hong ngaite in, kei thu hong ngai ahi hi. No hong nial peuma in, kei hong nial ahi hi,” ci hi.

Sawmsali le Niite Cia kikna

¹⁷Sawmsali le niite in, lungdamna lianpi taw cia kik uh a, “Topa awng, na min taw thu ka piak uh ciangin doaite ngangawn in ka thu uh hong ni hi!” ci hi.

¹⁸Jesus in zokik a, “Vantung panin Satan sia khualeng bangin a taaksuk ka mu hi.

¹⁹Ngai vun! Ngulte le aikamte na totcip natu le na Ngalpa ii thahatna na zaw zawk natu in, no tungah thuneina hong pia zo khi hi, bangma in no hong susia zo ngawl tu hi.

²⁰Ahizong thaa ngilote ii na thu uh hong nit sia, lungdam heak vun, vantung a, na min uh a kiteptee hu in, lungdam zaw tavun,” ci hi.

Jesus Lungdam

(Matthew 11.25-27; 13.16-17)

²¹Tua hun laitakin Jesus Thaa Thiangtho in lungdamna taw kidimsak a, hi bangin ci hi. “Pa awng, van le lei ii Topa! Na tungah ka lungdam hi,

banghangziam cile mihing pilte le mihing ciimte mun panin na seal a, na seal thute pilna a nei ngawlte tungah na lak hi. Hi hi, Pa awng, hi bang tu ma na deina ahi hi,” ci hi.

²²“Ka pa in na theampo kei hong pia zo hi. Tapa akua ziam ci sia Pa sim ngawl kuama in a he bua hi, tuaciang Pa akua ziam ci sia Tapa le Tapa ii heaksak tu in a tealte ngawl po in a he bua hi,” ci hi.

²³Tuaciang Jesus in, a nungzuite sang nga in, hi bang ci tuam hi, “Na mu uh nate hu in, bangza in hampaha nu ziam!

²⁴Kei kong cina pan, kamsang tam mamate le kumpite in, no ii mute mu nuam ahihang mu ngawl uh hi, za nuam ahihang za ngawl uh hi,” ci hi.

Samaria Miphapa taw Thusonteen

²⁵Thukham hil sya khat hong pai in Jesus aita nuam a, “Sya awng, tawntung nuntakna ka nga natu in bang ka vawt tu ziam?” ci in dongh hi.

²⁶Jesus in zokik a, “Laithiangtho in bang ci ziam, nang tua thu bangbang in na tel ziam” ci hi.

²⁷Tua pa in zokik a, “Na Topa Pathian sia na thin theampo, na thaa theampo, na thahatna theampo le na ngaisutna theampo taw na it in. Tuaciangin nangma le nangma na ki it bangma in, na innpaamte na it in,” ci hi.

²⁸Jesus in, “Na ci teng maan hi, tuabangin ngamta lete na nungta tu hi,” ci in zokik hi.

²⁹Ahihang Thukham hil syapa in, ama le ama kitangsak nuam ahikom, hi bangin Jesus dongh thua hi, “Ka innpaam pa sia akua ziam?” ci hi.

³⁰Jesus in zokik a, “Khat vei lai in pasal khat, Jerusalem panin Jericho khua ah a paisuk laitak in, ngual suam phalakte in suam a, a pum tung a om teng sutin, saat zazan a, a thi dektak in nusia uh hi.

³¹Thiampi khat tua lampi tawnsuk luilam ahihang, tua a liampa a mu ciangin, lampi langkhat ah pial in, paisan hi.



³²Tuabangma in, Levi mi khat hong pai a, mihing liampa a mu ciangin, lam lang khat tawnin paisan hi.

³³Ahihang khualhaw Samaria pa khat hong pai a, mihing liampa a mu ciangin, a thin sungah hesuakhuai sakna taw kidim hi.

³⁴Ama kungah zuan a, a liammate sathau le sapittui noisak in, tuamsak hi. Tua zawkciangin, a liampa sia a laa tungah suanto a, zintun inn khat ah paipui in ou hi.

³⁵A zing ciangin, ama in ngun dangka pheak nii la in, zin innneipa pia hi. ‘Ama na ousak in. Kong pai kik ciangin, ama tungah na bona dang theampote zongh kong pia tu hi,’ ” ci hi.

³⁶Tuaciang Jesus in thukhupna in, “Nang ii ngaisutna ah, tua mihing thumte sung pan akua bel in, mihing suamte ii sukciappa tungah innpaamte ngamtat tu bangin, ngamta na sa ziam?” ci hi.

³⁷Thukham hil syapa in, “Ama tungah a thuthiam sia hi,” ci in zokik hi. Jesus in, “Tua ahile paitan a, tuabang in seam tan,” ci in zokik hi.

Jesus in Martha le Maryte Inn ah Haw

³⁸Jesus le a nungzuite a papai uh ciang, khuano khat theng a, Martha a kici numei khat in a inn ah zin do hi.

³⁹Ama in Mary a kici suapui numei khat nei a, tua nu in Topa peang kungah to in, ama hilnate ngai hi.

⁴⁰Martha sia nasep theampo ama ki awn ahikom diksa ngawlin hong pai a, “Topa awng, ka suapuinu in na theampo kei sep tu in, hong nusiat sia kilawm na sa ziam?” Kei hong hu natu in hong sawlsak tan!” ci hi.

⁴¹Topa in zokik a, “Martha, Martha awng, Na tam mama tungah thinngim in buai ni hi.

⁴²Ahihang a kisamh khat bek om hi. Mary in vawt tu a kilawm sia teal zo hi. Ama tung pan tuasia ki laaksak ngawl tu hi,” ci hi.

Luke 11

Jesus in Thungetzia Hil



(Matthew 6.9-13; 7.7-11)

¹Ni khat ni in Jesus in mun khat ah thungen hi. A man ciangin a nungzuite khat in, “Topa awng, John ii a nungzuite a hil bangin, ko zongh thunget natu hong hil tan,” ci hi.

²Jesus in amate tungah, “Thu na nget uh ciangin hi bangin ci vun: ‘Pa awng, Na min thiangtho ki upat taken; Na Ngam hong piang taken,

³Nisim in ka khamkhop tu an hong pia ta in,

⁴Ko tung hong khialte ka maisak uh bangma in, kote khialna zongh hong maisak ta in, Ze-etna haksa hong thuaksak heak in,’ ” ci hi.

⁵Jesus in a nungzuite munah, “Sonteena in no sung pan khat in, na lawmte inn khat ah, zankim laitak pai in, ‘Lawm awng, anluum thum hong puk tan.

⁶Ka lawmte khat khualhaw in ka inn ah hong tung a ka piak tu nei ngawl khi hi!’ ci leute tuasia ciang,

⁷na lawmpa in a inn sung panin hong zokik hen a, ‘Hong nawngkai sak heak in! Kongkha kikalh zo a, ka tate zongh lum siat zo hi; tho kik in bang khat po kong piak tu suak thei ngawl hi,’

⁸hong cile bangbang hi tu ziam? A ngualtamh khat na hikomin hong tho kik a, anluum hong piak ngawl hang maizum ngawlin ngen kenkon po lete ama in, tho in na kitaangsap theampo hong pia tu hi.

⁹Tua ahikom a tatak in kong ci ciang: Ngen vun, hong kipia tu hi; zong vun, na mu tu uh hi; kingh vun, kongkha hong kihon tu hi.

¹⁰Banghangziam cile a ngente theampo in nga tu a, a zongte theampo in mu tu hi; a kingh pawpo tungah kongkha kihon tu hi.

¹¹Pa ahi note khatpo in, na tapa ii ngasa hong nget ciang, ngul na pia tu uh ziam?

¹²Aktui hong nget ciangin, aikam na pia tu uh ziam?



¹³Na phat ngawl uh kawm panin, na tate atu na pha piak tu na he uh hi. Tua ahile vantung a om na Pa uh in, a ngente tungah Thaa Thiangtho pia kan ngawl tu ziam!” ci hi.

Jesus le Beelzebul
(Matthew 12.22-30; Mark 3.20-27)

¹⁴Jesus in a pau thei ngawl doai khat notkeak hi; doai hong pusua zawkciang mihingpa pau thei hi. Mihonpi in lamdang sa uh a,

¹⁵ahizong pawlkhatte in, “A nawkeak thei natu vaang a pia pa sia, doaite sung pan a lianbel Beelzebul ahi hi,” ci uh hi.

¹⁶A dang pawlkhatte in Jesus aita a, ama nasepna tungtaang ah Pathian lungkimpuina a om le a om ngawl a tel nopna in, nalamdang lakna khat ngen uh hi.

¹⁷Ahihang Jesus in amate ngaisutna teng tel ahikom, amate tungah hi bangin, ci hi, “Ngam khat sia ama le ama kikhen in a kido le bangma hun in kip ngei ngawl tu hi; innkuan khat zongh kikhen in a kilem buale tamtham tu hi.

¹⁸Tua ahikom Satan ngam sung teng zongh pawl tuatua in kikhen hen a, khat le khat kido le, bangtan vei kip tu ziam? Note in kei sia Beelzebul ii vaangletna taw doaite not hi hong ci nu hi.

¹⁹Kei in tuabangin doaite not ka hile, na nungzuite in bangbangin not ziam? Noma ii nungzuite in, na khial uh hunlam lak hi!

²⁰No ci bang hi ngawl hi. Pathian vaang taw doaite not ka hi zaw hi, tuaciang Pathian Ngam sia no sungah hong theng zo hi, ci in hi thu mama in lak hi.

²¹“Pasal thahat khat in a ngalhiamte taw kithoai sa in a inn a cing le, a neisa theampo bit tu hi.

²²Ahihang a hat zaw khat in ama simin a zo le, a suan a muan ngalhiam theampo sut tu a, tua pa ii neisa ngalvanh teng ama in ngual hawmsak hi.

²³“Khat pawpo kei sang hong pang ngawl sia in kei hong langpan takpi ahi hi; khat pawpo in kei hong khoptua pui buale a tatak in a thethaang ahi hi.

Thaa Ngilo hong Heak kikna
(Matthew 12.43-45)



²⁴“Thaa ngilo khat in mihing khat sung pan a pusua zawk ciangin, munko na ah vak in, tawlngak natu zong hi. Tawlngak natu a mu buale ama le ama hi bangin, ‘Ka inn ah cia kik tong,’ kici hi.

²⁵Tuabangin a cia kik ciangin, a inn sia a thiangtho in kipua sa in om mu hi.

²⁶Tuaciang in ama sangin a ngilo zaw thaa dang sali hong ciapui a, amate in tua sungah teang uh hi. A tawpna ah tua mihingpa sia, a kipat lai sangin lawmawk zaw hi,” ci hi.

Lungdamna Tatak

²⁷Jesus in hi teng a ci zawkciang, mihonpi sung pan in numei khat in, “Nang hong hing a noaitui hong pia numei in, bangza in thupha nga ziam!” ci hi.

²⁸Ahizong Jesus in, “Tua sangin Pathian kammal za a, a zuite in bangza in thupha nga zaw ziam!” ci in, zokik hi.

Na lamdang Khat Ngetna

(Matthew 12.38-42)

²⁹Mipite in Jesus kiim pan in, hong uumci uh ciangin, “Tu hun mihingte bangzata in ngilo ziam! Na lamdang lakna khat hong ngengen hi. Ahizong Jonah ii nalamdang lakna sia simngawl, a dang bangma kipia ngawl tu hi.

³⁰Nineveh khua mite atu in kamsangpa Jonah sia, lim lakna khat ahi bangma in, Mihing Tapa zong tuhun mihingte atu in, lim lakna khat hi tu hi.

³¹Thukhenna Ni ciangin, Sheba Kumpinu hong ding tu a, tu hun mihingte hong mawsak tu hi. Banghangziam cile ama ngam panin Solomon Kumpipa ii ciimna taw hilnate ngai tu in khual hong haw hi. A tatak in ka ci ciang, Solomon sangin a lianzaw khat hi sungah om hi.

³²Thukhenna Ni ciangin, Nineveh khua mite hong ding tu a, no hong mawsak tu hi, banghangziam cile amate in Jonah thuhilna a zaak uh ciangin a mawna uh panin, kisiik kik uh hi; a tatak in ka ci ciang, hi sungah Jonah sangin a lianzaw khat om hi!

Pumpi ii Khuavak

(Matthew 5.15; 6.22-23)



³³“Kuama in mei a vaak ciang phual ngawl a, kuang taw zonghin khup ngawl hi. Tua hi ngawl zaw in, hong sungtang po ii mu thei tu in, meivakna khuam tungah kikoi hi.

³⁴Na mittangte uh sia na pumpi atu meivak taw kibang hi. Na mittang uh a cidam le, na pumpi uh sia khuavak taw kidim hi; ahizong na mittang uh a pha buale na pumpi bup uh sia khuazing sungah om tu hi.

³⁵Tua ahikom na pumpi sungah khuavak sia khuazing na suaksak heak vun.

³⁶Na pumpi bup uh sia, khuavak taw kidim a khen khat po khuazing sungah a om ba nale, meivak sia na tungah hong taan bangma in, a vekpi taang tu hi.”

Jesus in Phariseete le Thukhamhil Syate Mawsak

(Matthew 23.1-36; Mark 12.38-40)

³⁷Jesus in a pau tuteng a man zawkciang, Pharisee khat in anne tu in sam hi. Tua ahikom ama pai in anne tu in to hi.

³⁸Pharisee pa in Jesus anneak maa in a khut sil ngawlin om a mu ciang lamdang sa hi.

³⁹Tua ahikom Topa in ama tungah, “Tu in no Phariseete na kuang na hai uh a puasang panin na thiangsak uh hi. Ahihang na sungsang uh ah ngitlona le ngoltolna taw na kidim uh hi.

⁴⁰A mawmawte awng! A puasang a vawt Pathian in a sungsang zongh vawt hi ngawl ziam?

⁴¹Ahihang na kuang le na haite ii sung a omte sia a zawngte pia leute no atu in na theampo sia zeksa huvau in thiang tu hi.

⁴²“No Phariseete atu bangza in lauhuai ziam! Pathian atu in, ante, lonamsia, bokbawnkha le huansung pan a piang an tuatuate tung pan sawm a khat na pia uh hi. Ahihang Pathian it natu le thutang khenna ngaingon nu hi. A dangte zongh ngaingon tuan ngawlin hite na sep tatak tu uh ahi hi.

⁴³“No Phariseete atu in, bangza in lauhuai ziam! Synagogue sungah a kikhealsia tokhumte na thangai uh a, vanh zuakna munah kizatak piaknate dik na sa uh hi.



⁴⁴Bangza in lauhuai ziam! No sia a kilangh ngawl thaan, ngual ii a tungtawn a, a heak ngawlin a sicilte taw na kibang uh hi,” ci hi.

⁴⁵Thukham hil sya khat in, “Sya awng hi teng na ci ciangin ko zongh hong selno na hi hi,” ci hi.

⁴⁶Jesus in zo a, “No thukham hil syate atu zongh bangza in lauhuai ziam! Mihingte ii nungzaang ah vanhngitte na suan uh a, ahihang tua vanhngitte puak zawk natu in, na khutme dawn beak zongh taw na hu nuam bua uh hi.

⁴⁷No atu in bangza in lauhuai ziam! Na taangpupite ii suamlup kamsangte atu in a hoi mama thaante na vawt uh hi.

⁴⁸Tua ahikom noma ii na sepna in na taangpupite ii ngamtatnate a lungkimpui na suak uh hi. Amate in kamsangte suamlum a, note in a thaan uh na vawtsak uh hi.

⁴⁹Hi thu hu in Pathian ii Ciimna in hi bangin ci hi. ‘Kamsangte le kamtaite ka paisak tu hi. Amate in pawlkhat thatlum tu a, a dangte siatvawt tu uh hi.’

⁵⁰Tua ahikom simlei kubitphua pan kipan a kisuamlum kamsang theampote hangin, tu hun a mihingte daan kipia tu hi,

⁵¹Abel kisuamlupna pan kipan biaknatau le Thiangtho Mun, kilaklaw ah Zechariah a kisuamlupna dong huam tu hi. Hi hi, hong son khi hi, tu hun a mihingte tuate theampo hu in, daan kipia tu hi!.

⁵²“Thukham hil syate awng, no atu in, bangza in lauhuai ziam! Heakna kikholna inn kongkha tawtangte na keam uh hi; tua inn sungah noma tatak na tum nuam bua uh a, tum tu in a hanciamte na khaktan uh hi!” ci hi.

⁵³Jesus in tua mun a nusiati ciangin, Thukham hil syate le Phariseete in ama nasia takin a maw natu zong uh a, thu tam mama dongh uh hi.

⁵⁴Paukhialna khat po taw a mat thei natu in, aita uh hi.

Luke 12

Kihisak theamna Kidop natu Jesus in Hil

(Matthew 10.26-27)



¹Mihing tul tam mamate kiphulung in khat le khat peang kisiik tha in a om laitak Jesus in a nungzuite munah a masa phit bel in hi bang ci hi, “Phariseete ii tol panin na kikeam vun — amate kihisak theamna ka ci nopna hi.

²A kisiin theampo kihong tu a, thuku a minpiang kipholaak tu hi.

³Tua ahikom khuazing sungah a kison peuma sun tangin kiza tu a, inn doituam kikhak sungah na kihua u peuma innkhum dawn panin ki au keak tu hi.

Akua Kiita tu ziam?

(Matthew 10.28-31)

⁴“Ka lawmte awng, hong ci khi hi. Pumpi bek that thei a tua zawkciang a sia zaw a hong vawt thei ngawlte na kiita heak vun.

⁵Kiitak tu akua ziam ci sia kong lak tu hi. Pathian na kiita vun, ama in a thalup zawkciang meikuang sungah bum thei lai hi. Hong um tavun, na kiitak tu uh sia ama ahi hi!

⁶“Tonbawm nga ciang dangka san pheak nii taw kizuak hi ngawl ziam? Hi nave tonbawm khat zongh Pathian in mangil ngawl hi.

⁷Na lu tung a samzante ngangawn hong kisimsak siat sa ahi hi. Tua ahikom lau heak vun. No sia tonbawm tam mamate sangin manpha zaw nu hi.

Christ Pualaakna le Nialna

(Matthew 10.32-33; 12.32; 10.19-20)

⁸“A maan takin kong ci ciang, mipite mai ah keima ii mihing ahi hunlam a pualaakte sia Mihing Tapa zongh in Pathian vantung lalangte mai ah tuabangma in a pualaak tu hi.

⁹Ahihang mihonpi mai ah kei hong nialte sia Mihing Tapa in Pathian vantung lalangte mai ah nial tu hi.

¹⁰“Mihing Tapa langpanna kam khat a pau pawpo sia kimaisak thei hi; ahizong Thaa Thiangtho langpanna kamsia a pau khat pawpo kimaisak ngawl tu hi.



¹¹“Synagogue mai ah ahizong, ngam uk maangte le hong ukte mai ah ahizong, thusit tu in hong kipaipui ciang noma bangbangin kihung tu a, bang teng pau tu ci in thinngim heak vun.

¹²Banghangziam cile Thaa Thiangtho in tua hun ciangin na pau natu hong hil tu hi.”

A mawmaw Sumhaupa taw Thusonteen

¹³Mihon sung panin pasal khat in Jesus tungah, “Syapa awng, ka pa ii nei le lamh hong nusiatte, ka suapuipa ii hong hop natu in hong sawlsak tan,” ci hi.

¹⁴Jesus in zokik a, “Pasalpa awng, no nii kilaklaw ah neisate hawm tu le thukhen tu in akua in kei tungah thuneina hong pia ziam?” ci hi.

¹⁵Amate tungah hi bangin ci thua hi. “Duhopna namcinte pan in, noma le noma kikeam tavun. Banghangziam cile bangza po in a haubel hangin mihing khat ii nuntakna tatak sia neisa lamhsate hi ngawl hi.”

¹⁶Tua zawkciang Jesus in hi thusonteen amate tungah son hi: “Khat vei lai in, sumhau khat om a, a leitangh tung panin thaw an tam mama piang hi.

¹⁷Ama le ama hi bangin khua ngaisun hi, ‘Ka an theampo ka koi natu ansaal nei ngawl khi hi. Bang law tu khi ziam?’

¹⁸‘Hi bangin vawt tong,’ ama le ama kici hi, ‘Ka ansaal luite pheltham tong ii, a lianzaw in ka sa tu a, tua munah ka an teng le ka vanh dang teng ka khol tu hi.

¹⁹Tuasia ciangin keima le keima hi bangin ka kici tu hi. Mihing hamphapa awng! Kum tam mama na khom tu na pha theampo nei zo ni hi. A ol nano in nungta tan a, ne in dawn lel in. A nuam in om tan!’

²⁰Ahihang Pathian in ama tungah hi bangin ci hi, ‘Mihing mawmaw pa awng! Zan ciang mama in na nuntakna na aap kul tu hi; tua hile nangma atu na khol sa hi teng sia akua in tang tu ziam?’ ” ci hi.

²¹Tuaciang in Jesus ii a thukhupna ah, “Pathian muna ah hauna ahi ngawl leitung haunate amate atu a kholte sia tu a ih son sia pa bang ahi hi,” ci hi.

Pathian Muan natu



(Matthew 6.25-34)

²²Tua zawkciang Jesus in a nungzuite munah, “Tua ahikom nuntak natu a kismah ante atu ahizong, pumpi atu a kismah puante atu ahizong, tuate huvau in, thinngim heak vun kong ci hi.

²³Nuntakna in an sangin thupizaw pek a, tuaciang pumpi in puante sangin thupi zaw hi.

²⁴Va-akte en vun: amate in ancii te tu ngawlin, an le la ngawlin, ansaal le beamte a nei bua hi. Pathian in amate vaak hi! Vacimte sangin note tam mama in manpha zaw pek nu hi!

²⁵No sungah akua in thinngimna taw na khan uh tawm na khangkhan thei uh ziam?

²⁶A son thamman ngawl tuabang thuno khat zongh, na vawt thei bua uhle, na dang tungtaang ah banghangin thin ngim nu ziam?

²⁷Unok paakte en vun, bangbangin khang ziam: amate in na le seam ngawl a, khau le zom ngawl hi. Ahizong a tatak ci leang Solomon Kumpipa a haubel sia zongh hi paakte sangin a hoi zaw puansilh nei ngawl hi.

²⁸Tuni in hing a zing ciang a vul, a kihal lopate a zeam sia Pathian ahi hi. Ama in no sia puan taw hong khu seseam ngawl tu ziam? Na nei uh upna sia bangza in no ziam!

²⁹“Tua ahikom bang ka ne tu, bang ka dawn tu ci in thintoi heak vun.

³⁰(Banghangziam cile leitung ah, Pathian a he ngawlte in, hi bang teng thinbot in nei uh hi.) Na Pa in hite na kisp hunlam uh hong he hi.

³¹Ama Ngam na zong masa vun. Tua hile ama in hite theampo zongh hong pia thua tu hi.

Vantung Hauna

(Matthew 6.19-21)

³²“Tuu honno te awng, lau heak vun. Banghangziam cile na Pa in Ngam hong pia nuam hi.



³³Na neisa theampo zuak vun a, na nga uh sumte a zawngte pia vun. Na hauna uh sia van ah na khol vun, tua munah a manh sul ngei ngawl tu hi. Banghangziam cile tua munah ngutate in ngu thei ngawl a, nget in ne thei ngawl hi.

³⁴Banghangziam cile na sum na paai omna munah, na thin na lung uh zongh om tu hi.

A Kingingta sa Naseamte

³⁵“Hong tung tu thu khat pawpo atu in, a kingingta sa in om vun. A diang tawm tu in puansilh khol sa le meiinn vaak sa in om vun.

³⁶Mopoi panin a Topa hong cia kik tu a ngak naseamte bang na hi vun. Ama hong cia a, kongkha hong kih ciangin, amate in thakhat thu in kongkha hon tu uh hi.

³⁷Ama hong cia kik ciangin a kinging sa a om, a khuaphawk naseamte, a Topa in a mu ciang amate bangza ta in thupha a nga tu ziam? A maan takin kong ci ciangin, a Topa in a laktong puasilh suut tu a, amate a tosak zawkciang anvaak tu hi.

³⁸Zankim laitak ahizong, tua zawkciang ahizong, ama hong cia hun in, a kinging sa a om naseamte in bangza ta in thupha a nga tu ziam?

³⁹Inn nei khat in nguta hong pai tu hun he khol le a inn sia nguta in phuulsak ngawl tu ci in na tel uh hi.

⁴⁰No zongh a kinging sa in om vun, banghangziam cile, Mihing Tapa sia na muanmawk ngawl uh hun khat in hong pai tu hi,” ci hi.

Thumaan ahibuale Thumaan Ngawl Naseam

(Matthew 24.45-51)

⁴¹Peter in, “Topa awng, tu a thusontena sia ko atu na ci ziam tua ahibuale ngual theampo atu ziam?” ci hi.

⁴²Topa in, “Tua ahile thumaan a, a ciim naseampa akua ziam? Tua pa in a inn a uk tu le, naseam dangte a hun ciang an pia tu in a Topa ii sawlpa ahi hi.



⁴³A Topa hong cia kik ciang, hi bangin naseampa nasep mu thongle naseampa bangza ta in lungdam tu ziam?

⁴⁴A tatak ka ciciang, a Topa in tua naseampa sia a neisa theampo a uk tu in koi tu hi.

⁴⁵Ahizong tua naseampa in a Topa hong cia kik tu khua ngei lai tu zam ci in, naseam dang pate le numeite vel ngawp tu in kithoai hen a, anne tuidawn zukham in om le,

⁴⁶a Topa sia muanmawk ngawl ni khat, a heak ngawl hun khat ciangin hong heak kik tu hi. A Topa in ama saat zazan tu a, thu ni ngawlte ii thuak teng thuaksak tu hi.

⁴⁷“A Topa ii seam le a oai teng, tel napi a, a seam tu in, a kithoai ngawl tua naseampa nasia takin, velna kithuaksak tu hi.

⁴⁸Ahizong a Topa ii deina tel ngawlin, vel thuak natu ngamtatna a nei le, ama sia a nasia lei ngawlin kivel tu hi. Tam a kipiarte tung panin tam kingen tu hi; tam seseam a kipiarte tung pan, a tam seseam kingen tu hi.

Jesus hangin Kikhenna piang

(Matthew 10.34-36)

⁴⁹“Leitung a hal tu in kong pai a, tu in a kitaw sa hile ka oai hi!

⁵⁰Ki baptize na ka nga tu khat om a, tuasia a kimanthiang mateng in bangza in ka thin patau ziam!

⁵¹Leitung ah kilemna puak tu in hong pai hong sa nu ziam? Hi ngawl hi, kilemna hi ngawlin, kikhenna pia tu in kong pai hi.

⁵²Tu panin kipan mihing nga a pha innkuan khat sia kikhen tu a, a langah thum pang tu a, a langah nii pang tu hi.

⁵³Pate in tapate langpan tu a, tapate in pate langpan tu hi; nute in tanute langpan tu a, tanute in nute langpan tu hi; tonupite in mote langpan tu a, mote in tonupite langpan tu hi,” ci in zokik hi.

Hunte Khentel Theina

(Matthew 16.2-3)



⁵⁴Mipite tungah Jesus in hi bangin ci hi. “Nitumna sang pan meeikaai khat na mu uh ciang nguazu vak thakhat thu in na ci uh a, zu takpi hi.

⁵⁵Tuaciang thangsang panin vui hong vak na phaw uh ciangin, nisa vak, na ci uh a, sa takpi hi.

⁵⁶A kihisak theamte awng! van le lei en in khuahunte na sonkhol thei uh hi; tua ahile banghangin tu hun ii a khiakna tel ngawl nu ziam?

Hong Langpante taw Kilem vun

(Matthew 5.25-26)

⁵⁷“Thumaan thutang vawt tu in banghang khensat ngawl nu ziam?

⁵⁸Mihing khat pawpo in na tungah thu hong vawt in zum tungah hong then le thukhen zum na thet maa in, na ki tu uh thute ama taw kilemtua tu in hanciam vun. Tua ahibuale thukhen maangte mai ah hong kai in, tuate in palikte khut sungah hong aap tu a, thong sungah hong khum tu hi.

⁵⁹A maan tak kong ci ciang, tua munah na om tu a, na liau sum a cin dong thong na taak tu uh hi.”

Luke 13

Mawnate pan Na Kisiik kik buale Thi tu

¹Tua hun laitakin, tua munah a om mihing pawlkhat in, Jesus tungah sangaw biakpiakna pia in Pathian a bia Galilee mite Pilate ii a thalup huvau son uh hi.

²Jesus in zokik a, “Tua Galilee mite sia tuabangin a kithalup hu in, Galilee midangte sangin mawzaw ahi hunlam kilangh hi ci nuam na hi uh ziam?

³Hi ngawl het hi! A tatakin kong ci ciang, no zongh na mawna uh pan na kisiik kik bua uhle amate bangma in na thi tu uh hi.

⁴Siloam ah tusaang khat a cipsuk lai in, sawm le liat a thina thu bangbangin na ngaisun uh ziam? Hi mite in Jerusalem midang theampote sangin mawna lianzaw nei ahi hunlam kilangh hi ci in na ngaisun uh ziam?

⁵Hi ngawl het hi! A tatak kong ci ciangin no zongh na mawna pan, na kisiik kik bua uhle, amate bangma in na thi siat tu uh hi.”



A Nga Thei ngawl Theikung taw Thusonteena

⁶Tua zawkciang Jesus in hi thusonteena amate tungah son hi. “Khatvei lai in mihing khat ii sapit huan sungah theikung khat po hi. Ama in theinga vil tu in pai ahihang bangma a mu bua hi.

⁷Tua ahiciang huan tho pa tungah hi bangin ci hi. ‘En in, theinga vil a ka pai zawk kum thum pha zo a, bangma mu ngawl khi hi. Phuktan in! lei tulsak tu in banghang kihoai ziam?’

⁸Ahizong huan tho pa in zokik a, ‘Topa awng, kumkhat sung teng na thutha heak lai in a kung kiimkot to in eaklei kong buak tu hi.

⁹Theikung sia hong nga le pha seseam hi, tuabang ahibuale na phuk thei tu hi,’ ” ci hi.

Sabbath Ni Jesus in Numei Koncip khat Damsak

¹⁰Sabbath ni khat Jesus in synagogue khat ah thuhilna nei hi.

¹¹Tua munah numei khat thaa ngilo vei in, kum sawm le kum liat a cina hi. Ama bawngcip in a dingmaam thei bua hi.

¹²Jesus in a mu ciangin biakpui a, “Numei awng na natna pan in na suakta zo hi!” ci hi.

¹³A tungah a khut nga a, tuasia ciang thakhat thu in, dingmaam a, Pathian pok hi.

¹⁴Synagogue keam upa pa in Sabbath ni a, Jesus ii cina a damsak hu in, a thin uuk hi. Tua ahikom mipite tungah, “Nipi khat sungah na ih sep natu ni luk om hi. Tua ahiciang, tua nite ah cidam nga tu in hong pai tavun a, Sabbath ni in hong pai heak vun” ci hi.

¹⁵Topa in zo a, “No mihing a kihi theamsakte awng! No sungah khat pawpo in, Sabbath ni in na khuita ahizong, na laa uh ahizong, tui pia tu in, a buk sung panin, pusua hi ngawl nu ziam?”

¹⁶Tu in hi munah Abraham tanu khat Satan in kum sawm le kum liat kol bul in om hi. Sabbath ni in tua kolkhau pan in suut tu in kilawm ngawl ziam?” ci hi.



¹⁷A zokikna kammalte hu in, a ngalte a mai uh zum a, mipite ahile, a lamdang nasepnate tungah lungdam uh hi.

Thing Ankamtang taw Thusonteena

(Matthew 13.31-32; Mark 4.30-32)

¹⁸Jesus in, “Pathian Ngam sia bang taw kibang ziam? Bang taw ka teengat tu ziam?” ci in dongh hi.

¹⁹“Tuasia in hi bang hi. Mihing khat in thing ankamcii tang khat la a huansung ah tu hi. A kung khangin, thingkung suak hi. Vacimte in a baak kawmah bu vawt uh hi,” ci hi.

Tol taw Thusonteena

(Matthew 13.33)

²⁰Jesus in dongh kik a, “Pathian Ngam sia bang taw teengat tu khi ziam?”

²¹Tuasia in hi bang hi. Numei khat in tol tawm la a, anvui khum khat dim taw hel in, a vekpi in pawm hi.”

Kongkha Ciak Thu

(Matthew 7.13-14; 21-23)

²²Jesus in khuapi le khuanote kantan kawmin, hilna nei a Jerusalem sang zuan hi.

²³Pawlkhath in dongh a, “Topa awng, mihing tawm bek in ngupna nga tu ahi ziam?” ci hi. Jesus in zokik a,

²⁴“Kongkha ciakna sungah na tum thei natu in, hanciam vun; banghangziam cile mihing tam mamate in tum tu in hanciam tu a, a tum zo buatu uh hi.

²⁵Inn nei pa in tho in, kongkha hong khak tu hi. Tuasia ciang doipua pan in, kongkha kingh in, ‘Topa kong hong hon tan,’ na ci uh hang, ‘No koisung pan hong pai ci hong he ngawl khi hi,’ ci tu hi.

²⁶Tuasia ciang, ‘Nang taw anne khawm tuidawn khawmte khu hi, ka khuapi sung a thu zongh hong hil ni hi!’ na ci uh hi.

²⁷Ahihang hi bangin hong ci tu hi. ‘Ka kung panin tai vun, mihing ngilote awng!’ hong ci tu hi.



²⁸Abraham, Isaac, Jacob le kamsang dangte sia Pathian Ngam sungah mu a, noma teng doipua a hong kipuavawk ciangin, bangza in kap in ha ngoai in om tu nu ziam!

²⁹Mihingte sia nisuana le nitumna, sak le thang panin hong pai tu a, Pathian Ngam sungah poai hong siim tu uh hi.

³⁰Tuasia ciangin tu laitakin a nungkhakte hong masa tu a, tu laitakin a masate hong nungkhak tu hi,” ci hi.

Jesus ii Jerusalem A itna

(Matthew 23: 37-39)

³¹Tua laitak ma in Phariseete pawl khat, Jesus kungah hong pai a, “Hi sung panin pusuak in, leidang mun khat zuan tan, banghangziam cile Herod in nang hong that nuam hi,” ci hi.

³²Jesus in zo a, “Noma pai tavun a, tua ngia tungah hi bangin ci tavun. ‘Tuni le zing ciangin, doai ka not tu a, cina ka damsak tu hi, a ni thum ni ciangin ka nasep ka man tu hi.’

³³Ahihang tuni, zing ciang le thai ciangin ka pai tu kul hi. Jerusalem sim ngawl mundang ah kamsangte kithalup tu ngeina om ngawl hi.

³⁴“Jerusalem, Jerusalem awng! Nang in kamsangte na thatlum a, Pathian kamtaite na deanglum uh hi! Akpui in a note a tha nuai ah a huai bangin, tam vei ma na mite ka huai nuam hi. Ahizong nong oai bua hi.

³⁵Tua ahikom na Biakinnpi uh sia kinusia cip tu hi. A tatak in ka ci ciang, ‘Topa min taw hong pai pa tungah Pathian thupha tung taken,’ na ci uh hun mateng kei nong mu buatu hi,” ci hi.

Luke 14

Jesus in Ciina pa khat Damsak

¹Jesus sia Phariseete lampui khat ii inn ah Sabbath ni khat, an ne tu in pai hi; tua munah a om mihingte in Jesus encik uh hi.

²A khut le a peang a tum pasal khat Jesus kungah pai a,



³tuasia ciang Jesus in Thukham hil syate le Phariseete munah hi bangin dongh hi. “Ih Thukham in Sabbath ni in cina damsak tu oai ziam, oai ngawl ziam?”

⁴Ahihang amate a pau nuam bua uh a, Jesus in pasalpa sam in damsakin ciasak hi.

⁵Tua zawkciang amate tungah “No sungah na tapa uh khat ahizong, na khuital uh khat ahizong Sabbath ni in tuikhuk sungah taak luilam le tua Sabbath ni mama in thakhat thu kaito kik ngawlin na om tu uh ziam?” ci hi.

⁶Ahizong amate in hi thu huvau a zo thei bua uh hi.

Kiniamkhiakna le Zindo Thiamna

⁷Leangnate pawlkhat in tona nuambel teng a teal uh Jesus in a mu ciang, a om theampo ii zaak tu in hi thusontena son hi.

⁸“Mopoai siim tu in hong kikap ciang, tona nuambelna ah to paih heak vun. No sang in a thupi zaw mihing khat po zongh kismh tha tu a,

⁹no hong samkhawm inntek pa in no kungah hong pai in, ‘Ama na tona awn in,’ hong cile maimawl in a niambel tona dangkhat ah na to uh hong kul tu hi.

¹⁰Tua sangin hong kikap ciangin a niam belna ah to leute na inntekpa hong pai tu a, ‘lawmpa awng, hong pai in tona a nuam zawna ah hong to tan,’ hong cile leangna dangte theampo ii mai ah maipha na nga tu uh hi.

¹¹Banghangziam cile ama le ama a kiliansakte kiniamsak tu a, ama le ama a kiniamkhiak te kiliansak tu hi.”

¹²Tua zawkciang Jesus in a inntekpa tungah, “Zing an ahibuale nitak an neakpui tu in na sap uh ciang, na lawmte, na suapuite, na mealheakte le na innpaam sumhaute sam heak in — banghangziam cile, amate zongh in, hong sam kik tu a, tuabang teng taw in na vawtna bang hong kipia kik tu hi.

¹³Anneak poai na vawt ciangin, a zawngte, a koncipte, a peangbaite, le mittawte na sam tan;



¹⁴tua hile thupha na saang tu hi, banghangziam cile amate in hong thuk kik zo ngawl tu hi. Mihing phate thaw kik ni ciangin Pathian in hong thuk kik tu hi,” ci hi.

Poi Lian vawtna taw Thusontena

(Matthew 22.1-10)

¹⁵Sabuai ah a to mihing khat in hi thu a zaak ciangin Jesus tungah “Pathian Ngamsung poi vawtna ah a to tute sia bangzata in thupha nga ziam?” ci hi.

¹⁶Jesus in ama tungah, “Khatvei lai in mihing khat in, poi liankhat vawt a, tua munah ama in mihing tam mama sam hi.

¹⁷Anneak tu hun hong thet ciangin leangnate munah hi bang a sonna tu in a naseampa sawl hi, “Hong pai tavun, na theampo a kinging sa in om zo hi!”

¹⁸Ahihang amate khat zawkciang khat in kam zong tek hi. A masa bel pa in a naseampa tungah, ‘Lo khat ka lei a, pai in ka vil kul tu hi; hong hesuak tavun,’ ci hi.

¹⁹A dang khat in, ‘Khuita kap nga ka lei a, naseam thei ziam seam thei ngawl ziam, ci in ka sinsak kul tu hi; hong hesuak tavun,’ ci hi.

²⁰A dang khat in, ‘Ka zi nei zawk hiat hi a, tua hu in hong pai thei ngawl tu khi hi,’ ci hi.

²¹Naseampa a Topa kungah pai kik a, hi thuteng son hi. A Topa thin uuk mama a, a naseampa munah, ‘A manlang in khuasung lam theampo ah pai tan a, a zawngte, a koncipte, mittawte, le peangbaite hong ciapui tan,’ ci hi.

²²Hai ngawlin naseampa in, ‘Topa awng, nong thupiak bangin ka seam zo hi, ahizong a tamzaw lai om thei natu mun awng lai hi,’ ci hi.

²³Tuasia ciang a Topa in naseampa tungah, ‘Ngam sung lampi liante le lampinote ah pai tan a, ka innsung a dim tu in, mihingte hong tumsak tan.

²⁴A tatak ka ci ciang, khual ka hil maksakte kuama in ka nitak an tep ngawl tu hi!’ ” ci hi.

Jesus Nungzui Sua thei natu

(Matthew 10.37-38)



- ²⁵Khatvei mihonpite Jesus taw tonin, a paikhop laitak, amate tungah ,
- ²⁶“A kuama po kei nung hong zui tu sia in, a pa, a nu, a zi, a tate, a suapuipate, a suapuinumeite le ama mama sang zongh in kei hong it zaw buale kei nungzui a suak thei buatu hi.
- ²⁷Ama thinglamte pua in hong zui ngawl po ka nungzui a suak thei buatu hi.
- ²⁸No sung panin mihing khat in, tausaang khatsak a sawm le, ama in a masa phitbel in, ngeal phot tu a, sum bangza bo tu ziam ci in tuat tu hi, asak zawk natu sum a kicing in a nei le a nei ngawl en phot tu hi.
- ²⁹A nei buale a phungkawng a cian zawkciang, tua tausaang a man zo buatu hi; hi thu a mu a hete theampo in a nuisan uh hi.
- ³⁰“Hisia pa in inn sa tu kipan ahihang a man zo bua hi,’ ci tu uh hi.
- ³¹Kumpipa khat in mihing tulsawm taw, mihing tulkul a nei kumpi dang khat sim a sawm le, ama to phot tu a, a nalh zawk natu, tha a khom nei ziam, ci sia khensat phot tu hi.
- ³²Tha a khom a nei buale, kumpipa dangkhat ii kungah a kikhualat lai in, kilemna thu kikum tu in, kamtaite paisak tu hi.
- ³³Tuabang ma in note khat pawpo in na neisa theampo na nusia bua uhle, ka nungzui na suak thei buatu uh hi” ci hi.

A al ngawl Ci

(Matthew 5.13; Mark 9.50)

- ³⁴“Ci sia pha hi, ahihang a alna a bo le ki alsak kik thei nawn ngawl hi.
- ³⁵Leitangh atu le pha ngawl, eaklei zong kizangh thei ngawl a; kivawk hi. Bil nei po in hi thu na za tavun!” ci in Jesus in thukhup hi.

Luke 15

A Kibosua Tuu

(Matthew 18.12-14)

- ¹Ni khat shiadongte le ngual ii puavawk mihing pawlkhatte in, thu ngai tu in Jesus kungah pai a,



²tuasia ciangin Phariseete le Thukham hil syate phun lialua uh hi, “Hisia pa in ngual ii puavawkte taw in an ngangawn zongh ne khawm hi!” ci uh hi.

³Tua ahikom Jesus in amate tungah hi thusontena son hi.

⁴“No sungah khat in tuu zakhat nei hen a, tuu khat bosua le bang law tu ziam? Ama in tuu sawmkua le kua teng ngantatna ah nusia in a kibosua sia a mu dadong zong tu hi.

⁵A mu ciangin lungdam mama in a liangko mualsuan in,

⁶inn ah siapui tu hi. Tua zawkciang a lawmte le a innpaamte sam in, ‘Ka lungdam mama hi, ka bosua tuu sia ka mu zo hi. Lungdam poai vawt tawng,’ ci tu hi.

⁷Tuasia bangma in kei kong ci ciang, a kisiik kik ngawl mihing zatak huai sawmkua le kua te sangin a kisiik kik mawnei khat hu in vantung ah lungdamna lian zaw tu hi.

A Kibosua Sumtang

⁸“Tua ahibuale numei khat in dangka tang sawm a nei sung pan, khat bosua le — bang law tu ziam? Ama in mei de tu a, a innsung phiat in, a mu mateng mun theampo pha tak zong tu hi.

⁹A mu ciang a lawmte le a innpaamte kaikhawm in, ‘Ka lungdam mama hi, ka bosua dangka tang sia ka mu zo hi. Lungdam poai vawt tawng!’ ci tu hi.

¹⁰Kei kong ci ciang, tuasia bangma in, mihing mawnei khat a kisiik kik hu in, Pathian vantung lalangte lungdam hi.”

Tapa Taimang Thu

¹¹Jesus in a son lai na pan, “Khatvei lai in pasal khat in tapa nii nei hi.

¹²A nauzaw sia in a pa tungah, ‘Pa awng, kei ii ka lua tu neisate tu in hong khen tan,’ ci hi. Tua ahikom a pa in a neisate a tapate nii khensak hi.

¹³Ni tawmvei zawkciangin, a tapa nozaw sia in, ama neisa teng zuak siat a, inn nusia in a sum teng taw pusuak hi. Ngam khualana khat ah pai a, tua munah a sum teng zangh maai siat hi.



¹⁴A nei theampo zangh khawng hi. Tuaciangin tua ngamah kialpi lian khat tung a, ama bangma nei nawn ngawlin om hi.

¹⁵Tuabang ahi ciangin, tua ngam mite khat ii kungah naseam tu in pai a, tua pa in lo sungah vakte cing tu in sawl hi.

¹⁶Vakte ii neak bengap te ne nuam liang ahihang kuama in a neak tu bangma a pia bua uh hi.

¹⁷A khakbel ciangin khua phawk a, 'Ka pa inn ah a cial naseamte zongh in, a khawn laak tu dongin an nei a, kei sia hi munah pukthi tu in ka om hi!

¹⁸Ding in ka pa kungah zuan tong, Pa awng, Pathian tung le nang tungah kong khial zo hi.

¹⁹Na tapa ci tu in ka kilawm nawn bua hi; na naseam khat bangin hong omsak tan ci tong,' ci hi.

²⁰Tua ahikom ama dingto in a pa kung zuan kik tu in kipan hi. "A inn a thet natu khuala ma samh lai kasap, a pa in mu hi; khuangai huai sa in del a, ngawngkoai in namh hi.

²¹'Pa awng, Pathian tung le nangma tungah hong khialzo khi hi. Na tapa ci tu in ka kilawm nawn bua hi,' ci hi.

²²Ahihang a pa in naseamte sam a, 'Hong manlang tavun! Puantual phabel sia la tavun a, silhsak vun. A khutme ah khutzungbu bulsak vun a, peangdap thuasak vun.

²³Tua zawkciang khuino thau sia hong kai tavun a, ngo in aneak poai vawt tawng!

²⁴Banghangziam cile hi ka tapa sia thi zo a, ahizong tu in hong nungta kik hi; ama bo a, tu in kimu zo hi.' Tua hu in, poai vawt tu in kipan hi.

²⁵"Tua laitakin tapa lianzaw sia lokuan hi. Hong cia lam inn hong thet dektak ciang, lapna le lasakna awte za hi.

²⁶Tua ahikom naseamte khat sam a, 'Bang thu bang la ziam?' ci in dongh hi.



²⁷‘Na naupa hong cia kik a, khui thau sia na pa in ngo hi, banghangziam cile cidam ludam a, a tapa a nga kik hang ahi hi.’

²⁸A tapa lianzaw sia thin uuk mama a, innsung zongh ah a tum nuam bua hi; tua ahikom a pa pusuak a, a tapa ii hong sungtan natu kun hi.

²⁹Ahihang a pa ii kam zo a, ‘En in kum hi tan vei sal bangin na na hong sepsak a, na thu piakte hong nial ngei ngawl khi hi. Kei bang nong pia ngei ziam? Keal khat beak zongh ka ngualtamhte taw ka neak tu nong pia ngei bua hi!

³⁰Ahihang hi na tapa in pumpi zuak numeite tungah a sum teng zangh tum siat a, tuaciang inn hong thet ciangin khuino thau sia ngaw ni hi!’ ci hi.

³¹A pa in, ‘Ka tapa awng, nang sia a tawntungin keima taw hi sungah a om ni hi. Ka neisa theampo nangma aa, ahi hi.

³²Ahihangin na naupa sia thi zo a, tu in hong nungta kik hi; ama bo a, tu in kimu zo hi. Tua ahikom lungdam in poai ih vawt kul hi,’ ” ci hi.

Luke 16

A Thimthel Sumkeampa

¹Jesus in a nungzuite munah, “Khat vei lai in sumhaupa khat in a neisate a zeak tu, naseam khat nei hi. Tua naseampa in sumhaupa ii sum teng zangh tum hi, ci in sumhaupa tungah kison ahi ciang,

²sumhaupa in sam a, ‘Na ngamtatna kong zaak sia bangbang tatak ziam? Ka neisate na zeaknate, a cing takin hong lak tan, banghangziam cile kei ii neisa zeakpa hi thei nawn ngawl tu ni hi’ ci hi.

³Naseampa in hi bangin khua ngaisun hi, ‘Ka Topa in ka nasep pan hong tawpsak tu hi. Bang law tu khi ziam? Dum to tu in tha ka nei bua a, khutdaw nget tu la ka maizum hi.

⁴Ka nasep ka taan ciangin ka ngualtamhte in amate inn ah hong saan natu bangbang ngamta tu ci he zo ing!’ ci hi.



⁵Tua ahikom a Topa tungah lei a ba theampo khawmtua hi. A masa phitbelpa munah, ‘Ka Topa tungah nang bangza ba ni ziam,’ ci hi.

⁶‘Olive thau pheal zakhat ka ba hi,’ ci in zokik hi. ‘Hi sungah na sazian om hi, to in, sawmnga ci in at in,’ ci hi.

⁷Tua zawkciang khat ii tungah, ‘Nang bangza ba ni ziam? —’ ‘Zungtaang seau tulkhat,’ ci in zo hi. ‘Hi sungah na sazian om hi, zaliat ci in at in,’ ci hi.

⁸Tua hu in, a Topa in a thumaan ngawl sumkeampa ii thimthel pilna teng pok hi; banghangziam cile hi leitung mihing thimthelte sia vai tuatuam sepna ah khuavak sung om mihingte sangin pilzaw pek hi.”

⁹Jesus in hi bang ci thua hi. “Kei kong cina pan: tawntung inn ah no hong kisaan thei natu in leitung haunate na piakna uh taw ngualtamh zong vun.

¹⁰Thu note tungah a thumaante sia thuliente tung zongh ah thumaan tu hi; thunote tungah a thumaan ngawlte sia thuliente tung zongh ah a thumaan buatu hi.

¹¹Tua ahile leitung haunate tungah na thumaan bua uh ahile hauna tatak ah bangbangin hong kimuang ngam tu ziam?

¹²Ngual neisa tungah na thumaan bua uh ahile, no tungah na neisate akua in hong pia nuam tu ziam?

¹³“Naseam khat po in to nii ii sila sepsak thei ngawl hi; ama in khat sia ensan tu a, khat it tu hi; khat tungah thumaan tu a, khat sia ngaimaw tu hi. No sia Pathian le sum ii sila, na seam khawm thei buatu hi,” ci hi.

Jesus ii Pauna Tatuamte

(Matthew 11.12-13; 5.31-32; Mark 10.11-12)

¹⁴Phariseete in hi thute a zaak uh ciangin Jesus sia ciammuina in nei uh hi, banghangziam cile amate sum deite ahi uh hi.

¹⁵Jesus in, “No sia noma le noma ngual mai ah a kithutang sakte na hi uh hi, ahizong Pathian in na thinsung theampo hong he hi. Banghangziam cile mihingte ii thupisak nate sia Pathian muna ah manh a nei bua hi.



¹⁶Tuiphumpa John hun ciang dongin Moses ii thukhamte le kamsangte lai atte in thu nei hi; tuasia pan kipan Pathian ngam lungdamna thupha kisonin mihing sim in, tua sungah a tum zawk natu in hanciam tek uh hi.

¹⁷Ahizong tua Thukhamte sungah thu theklek no khat a bo tu sangin van le lei a bo tu ol zaw tu hi.

¹⁸A zi a khul pasal khat in numei dang khat taw a teang kik le nupa kipalngul mawna vawt ahi hi. Tuaciangin a kikhul numei khat a teenpui pa in nupa kipalngul mawna vawt ahi hi.

Sumhaupa le Lazarus Thu

¹⁹“Khatvei lai in sumhau khat om a puansilh manham tatakte silh in, nisim in nuamsa mama in nungta hi.

²⁰Tua laitak in, Lazarus kici mizawngpa khat zongh om a, ama meima taw kidimin, sumhaupa ii baangkua ah ki paipui bul hi,

²¹sumhaupa sabuai pan a taakte ne tu in lametna taw tuabangin om hi. Uite ngangawn in a meimate liasak tu in pai hi.

²²Mizawngpa thi a vantung lalangte in, vantung anneak poai Abraham kungah to tu in, puato uh hi. Sumhaupa zongh thi in kivui hi,

²³Hell sungah ngim nga mama in, ama in a etto le, a khuala na munah, Abraham le a kungah Lazarus a om mu hi.

²⁴Tua ahikom ama in biakpui a, ‘Pa Abraham awng! Hong hesuak tan. Lazarus ii khutme dawn tui sungah pap in ka leei hong votsak taken, banghangziam cile hi mun meikuang sungah ngimnga mama khi hi’ ci hi.

²⁵Ahizong Abraham in, ‘Na nuntak lai in nang sia na pha theampo hong kipia zo a, Lazarus ahile a sia theampo thuak hi. Tua thu phawk tan. Ahihang tu in ahile nang ii natna satna na thuak laitak ama in hi munah nuamsa in om hi.

²⁶Tuabek dom ngawlin ih kilaklaw ah luamthuk pui khat om a, ko kung panin no kungah kipai thei ngawl a, no kung pan in ko kungah kuama hong pai thei ngawl hi,’ ci hi.



²⁷Sumhaupa in, tua ahile Pa Abraham awng, hesuak hong ngen ing, Lazarus sia ka pa inn ah va paisak tan,

²⁸tua munah suapui nga nei khi hi. Natna ngimna thuakna hi munah amate beak hong pai ngawl natu in pai in sonkhol le ka oai hi,' ci hi.

²⁹Abraham in, 'Na suapuite in Moses le kamsangte nei hi. Tuate ii hilkholnate ngai taken,' ci hi.

³⁰Sumhaupa in zokik a, 'Tuabang bek kicing tham ngawl tu hi, pa Abraham awng! Ahizong a thi sate khat tho kikin amate kungah pai le, tuasia ciangin a mawna uh pan kisiik pheang tu uh hi,' ci hi.

³¹Ahizong Abraham in, 'Amate in Moses le kamsangte ii thu a ngai nuam bua uhle mithi sa khat hong thaw kik hial hangin a um tuan buatu uh hi,' ” ci hi.

Luke 17

Mawna

(Matthew 18.6-7; 18.21-22; Mk 9.42)

¹Jesus in a nungzuite munah, "Maw thei natu ze et nate hong pai tu ma ahi hi, ahihang tua ze etna a piangsakte tungah bangza in lau huai ziam!

²Mihing khat in hi patangnote khat a pusak sangin a ngawng ah an ngoaina suang lian khat khii in tuipi sungah kivawk suk le, ama atu in phazaw hi.

³Tua ahiciang nasepna po ah kidawm vun! "Na suapuipa a maw le tei in, a kisiik le maisak in.

⁴Ama in ni khat sungah sali vei hong khial a, a sim in, 'Kisiik khi hi,' hong cile na maisak hamtang kul tu hi," ci hi.

Upna

⁵Sawltakte in Topa tungah, "Ka upna uh hong khangsak tan," ci uh hi.

⁶Topa in zokik a, "Ankamtang cia upna nei leute hi naailung kung munah, 'Nangma le nangma kibot in tuipi sungah kiphut in!' ci leute zong na thu uh hong ni tu hi.

Naseam khat ii Vaipuak



⁷“Sonteena in no sungah khat in lotho ziam, tuucing ziam naseam khat nei hi, ama lo panin hong cia po ciang, manlang in na an ne in, na ci tu uh ziam?”

⁸Tuabangin kici ngawl hi! Bang kici zaw ziam cile, ‘Ka nitak an na thuuk in, awmdap na silh zawkciang, ka neak ka dawn laitakin hong ngak tan, tua zawkciang, nangma ne in ci tu nu hi.

⁹Naseampa in sawlna teng a sep hu in, ama tungah lungdam khi hi citaak ngawl hi ngawl ziam?”

¹⁰No zongh tuabang ma na hi natu ahi hi; hong kisawlteng nasep zawk uh ciangin, ‘Ei sia naseam ma kihi lel a, ih sep tu teng ma a kiseam hi bek hi,’ ci tu nu hi.

Jesus in Mihing Sawm Damsak

¹¹Jesus in Samaria le Galilee ngamngi tawn in Jerusalem ah pai hi.

¹²Khuano khat sungah a tum laitakin mihing phaak sawm taw kisi hi. Amate sia ama kung panin, tawm a khuala na ah dingin,

¹³“Jesus awng! Topa awng! ko hong hesuak tan!” ci in au uh hi.

¹⁴Jesus in amate a mu ciang, “Pai tavun a, na thiampite in vealsak tavun,” ci hi. Amate a pai kakawm in, damthiang uh hi.

¹⁵A damthiangna a kiheak ciangin, amate sung pan khat hong heak kik a, nging takin Pathian pok hi.

¹⁶Ama in Jesus peangah bok in, lungdamko hi. “Hisia pa sia Samaria mi ahi hi.

¹⁷Jesus in, “A kidamsak mihing sawm pha hi; a dang teng koisung ah om ziam?”

¹⁸Banghangin hi minam dang pa bek in, Pathian tung lungdamko tu in hong heak kik ziam?” ci hi.

¹⁹Tuaciangin Jesus in ama tungah, “Ding in, pai tan; na upna in hong damthiangsak zo hi,” ci hi.

Pathian Ngam hong Thet natu

(Matthew 24.23-28; 24.37-41)



²⁰Pharisee mi pawlkhat in Jesus munah “Pathian Ngam bang hun ciang hong tung tu ziam?” ci in dongh uh hi. A zokikna ah, “Pathian Ngam sia, tuabangin mit a mu thei in hong theng ngawl tu hi.

²¹Kuama in, ‘En vun, hi munah om hi!’ tua ahibuale ‘Zia sungah om hi!’ ci thei ngawl tu hi! banghangziam cile Pathian Ngam noma sungah om hi,” ci hi.

²²Tua zawkciang a nungzuite munah “Hun khat ciangin note in, Mihing Tapa ii nite sung pan ni khat beak, na mu nop tu hun hong theng tu hi, ahizong na mu buatu uh hi.

²³Mihingte in “En vun, zia sungah!” tua ahibuale, “En vun hi sungah!” hong ci om tu hi, ahihang tuate, zong tu in pai heak vun.

²⁴Khualeng sia vanmong khat pan mong khat ah kizel in, a taankeaksak bangma in, Mihing Tapa zongh ama ii ni hong tun ciangin tuabangma hong hi tu hi.

²⁵Ahizong ama in nasia takin hong thuak masa tu a, tu hun mihingte in hong nial tu hi.

²⁶Mihing Tapa hun zongh Noah hun lai bangma hong hi tu hi.

²⁷Mihingte in neakna le dawnnate vawt tan in, Noah ii teambaw sung a tum ni dong ma, numei le pa kiteang a, tuaciangin tuipei liim sia in, amate thatlum siat hi.

²⁸Tua hun sia Lot ii hun taw zong kibang tu hi. Mihing sim in neakna dawna, vanh leina vanh zuakna, ankung ciinna, innsakna taw hun zangh uh hi.

²⁹Sodom khua pan in Lot a pusua ni in, van pan, kaan le meikuang nguazu bangin zusuk a, amate theampo thatlum siat hi.

³⁰Mihing Tapa hong kilaak ni ciangin, tuabang ma hi tu hi.



³¹Tua ni in innkhum tung a om mihing khat in, a neisa la suk tu in, inn sungah tuaksuk nawn heak hen; tuasia bangma in losung a om mihing khat in, a inn ah cia kik nawn heak hen.

³²Lot ii zi na phawk tavun.

³³A nuntakna a huu nuam sia in, taan tu hi; a nuntakna a taan sia in kihuu tu hi.

³⁴A maan takin kei kong ci ciang, tua zanin mihing nii lupna tungah a lumkhawmte: khat kila tu a, khat sia kinusia tu hi.

³⁵Numei nii anngoai khawm a omte: khat kila tu a, khat kinusia tu hi.

³⁶Pasal nii lo sungah a diangkhawmte: khat kila tu a, khat kikhe tu hi.

³⁷Nungzuite in ama tungah, “Koisung ah hi bangin piang tu ziam, Topa,” ci in dongh uh hi. Jesus in, “Thiluang omna munah vaciikte kikhawm tu hi,” ci hi.

Luke 18

Meingongnu le Thukhenmangpa Thu taw Thusonteen

¹Tua zawkciang Jesus in a nungzuite tungah thinkiam ngawl a, a thunget tawntung natu a hilna in thusonteenate son hi.

²“Khua khat ah thukhenmangpa khat om a, ama in Pathian le kiita ngawl, mihing maitang le a zakta ngawlhet khat ahi hi.

³Tuaciang in tua khua ma ah, nupi meingong khat om a, ama thukhenmangpa kungah pai tawntung in, “Ka ngalte kung pan in hong hung tan,” ci in ama ii nga tu a kilawm bang ngen hi.

⁴Khua ngei hialma thukhenmangpa in bangma hisak nuam ngawl ahihang, a khakbel ciangin hi bangin khua ngaisun hi, ‘Pathian le kiita ngawlin mihingte zongh zakta ngawl ka hi hang,

⁵hi meingongnu in hong nawngkaisak ahikom, ama ii nga tu a kilawm bang a nga thei natu in ka khensak tu hi. Tuabangin ka hi buale, ama hong pai tawntung tu a, a khakbel ciangin ka thuak zo buatu hi,’ ” ci hi.

⁶“Thumaan ngawl thukhenmangpa ii kammalte ngai vun.



⁷Tua ahile Pathian in ama ii mihingte, sun taw zan taw hu ngen in a au te ii phat tuam natu in thukhensak ngawl tu ziam? Amate a hu tu sia a haisaang tu ziam?

⁸A maan tak ka ci ciangin, amate sangah pangin, a manlang takin thu khensak tu hi. Ahitazong Mihing Tapa ii hong pai kik ciangin leitung ah upna a mu tu ziam?” Topa in ci thua hi.

Phariseepa le Shiadongpa Thusontena

⁹Amate le amate pha kisa mama a, ngualdang theampo a zawngsak mihingte tungah Jesus in hi thusontena zangh hi.

¹⁰“Khatvei lai in mihing nii Biakinn ah thungen tu in pai hi: Khat sia Pharisee pa hi a, khat sia shiadongpa ahi hi.

¹¹Pharisee pa in ama nguak ding a, thungen hi. ‘Pathian awng na tungah ka lungdam hi, banghangziam cile kei sia ngualdangte bangin ka duhop bua a, leilot ngawlin, numei le pa palngul khialna ka vawt bua hi. Zia sungah shiadongpa bang hi ngawl ka hikom na tungah ka lungdam hi.

¹²Nipi khat sungah ni nii an ka tang a, ka nga sung panin, see sawm sua see khat nang kong pia hi,’ ci in thungen hi.

¹³Ahihang shiadongpa ahile a khualana ah ding a, vantung zongh ento ngam ngawlin, a awm beang a, ‘Pathian awng, kei mimawpa hong hesuak tan!’ ci hi.

¹⁴A tatak ka ci ciang, Pharisee pa bang hi ngawlin shiadongpa sia mipha tangin cia hi. Mihing simin a kiliansakte kiniamsak tu a, a kiniamkhiakte a thupi in kikoi tu hi,” ci hi.

Jesus in Patangnote Thupha Pia

(Matthew 19.13-15; Mark 10.13-16)

¹⁵Mihing pawlkhat in a nausente tungah Jesus ii a khut nga a thupha a piak tu in paipui uh hi. Nungzuite in hi bang a ngamtatte mu a tei uh hi,

¹⁶ahihang Jesus in patangnote sam a, “Patangnote kei kungah hong pai tu khaam heak vun, banghangziam cile Pathian Ngam sia hi bangte aa ahi hi.

¹⁷Hi thu ciamtee vun! Hi patangno khat bang a, Pathian Ngam a saang thei ngawlte tua ngam sungah a tum thei buatu hi,” ci hi.

Sumhau Pa

(Matthew 19.16-30; Mark 10.17-31)

¹⁸Jewte lampui khat in, “Sya pha awng, tawntung nuntakna ka nga natu in bang ka vawt tu ziam,” ci in dongh hi.

¹⁹“Banghangin Sya pha hong ci ni ziam? Pathian khat sim ngawl kuama a pha om ngawl hi.

²⁰Thukhamte na heak hi: ‘Nupa ki palngul heak vun, mihing that heak vun; nguta heak vun; leilot thu taw kuama mawsak heak vun; na nu le na pa zakta vun,” ci hi.

²¹Pasalpa in zokik a, “Ka nolai panin hi thukhamte ka zui siat sa hi,” ci hi.

²²Jesus in hi thu a zaak ciangin ama tungah, “Na khat nasep tu kisamh lai ni hi. Na neisa teng zuakin a, na sum nga teng a zawngte pia in, tua hile vantung ah hauna na nei tu hi; tua zawkciangin hong pai tan a, ka nung hong zui tan,” ci hi.

²³Ahizong pasalpa in hi thu a zaak ciang khuangai mama hi; banghangziam cile ama hau mama hi.

²⁴Jesus in a khuangai mama na a mu ciangin, “Sumhaute ii Pathian Ngam sungah a tum tu bangza in haksa ziam!

²⁵Sumhau khat ii Pathian Ngamsung a tum tu sangin, kalaoh khat ii phin bilvang sungah a tum tu ol zaw hi,” ci hi.

²⁶Tua thu a zate in, “Tua ahile akua peuma in ngupna nga zo thong tu ziam? ci in dongh uh hi.

²⁷Jesus in zo a, “Mihing atu a suak thei ngawlte Pathian atu in suak thei hi,” ci hi.

²⁸Tua zawkciangin Peter in, “En in! Ka inn uh nusia in nang kong zui uh hi,” ci hi.



²⁹Jesus in amate tungah, “Hi hi, A maan tatak ka ci ciangin, Pathian Ngam atu in, inn ahizong, zi ahizong, suapuite ahizong, nu le pate ahizong, tate ahizong, a nusiate in,

³⁰hi hun sung mama ah, a tamzaw in nga tu a, hong pai lai tu hun sungah tawntung nuntakna nga tu hi,” ci hi.

Jesus in Ama Thi tu Thum vei A sonna

(Matthew 20.17-19; Mark 10: 32-34)

³¹Jesus in a nungzui sawm le niite sam tuam a, amate tungah, “Ngai vun. Mihing Tapa huvau kamsangte ii at theampo a tangtun natu mun Jerusalem ah ih pai tu hi.

³²Ama Gentilete tungah hong ki aap tu a, amate in ciammuina in nei tu a, selno in cilphii tu uh hi.

³³Amate in saat tu a thatlum tu hi, ahihang ni thum zawkciang in nuntakna sungah tho kik tu hi,” ci hi.

³⁴Ahihang hi thute khat zong nungzuite in a tel bua uh hi; tua kammalte ii khiakna sia amate mun panin kiseal a, Jesus in bang thu son ziam, ci in amate in a tel bua uh hi.

Jesus in Mittaw Khutdaw ngen khat Damsak

(Matthew 20.29-34; Mark 10: 46-52)

³⁵Jesus sia Jericho khua nai hong thet ciangin, lampi hui a mittaw khat khutdaw ngenin to hi.

³⁶Mihonte in kantan in hong pai ama in a zaak ciangin, “Bang thu ziam?” ci in dongh hi.

³⁷“Nazareth khua mi Jesus in hong kantan hi,” amate in ci uh hi.

³⁸Ama au a, “David tapa Jesus awng! Kei hong hesuak tan!” ci hi.

³⁹Mai a pai mihonpite in tei a, thim in sawl hi. Ahihang ama in a nging seseam in au a, “David tapa awng! Hong hesuak tan!” ci hi.

⁴⁰Tua ahikom Jesus tawlnga a, mittaw pa ama kungah hong paipui natu in thupia hi. Ama hong nai ciangin Jesus in,



⁴¹“Nang atu bang hong vawtsak leng na uuk ziam?” ci hi. “Topa awng, khua ka mu kik nuam hi,” ci hi.

⁴²Jesus in ama tungah, “Tua ahile khua mu tan! Na upna in hong damsak zo hi,” ci hi.

⁴³Thakhat thu in ama in khua hong mu thei a, Pathian tungah lungdamko in Jesus zui hi. Mihonpite in a mu ciangin Pathian pok tek uh hi.

Luke 19

Jesus le Zacchaeus

¹Jesus in Jericho khua sungah tumin kantan hi.

²Tua munah shiadong pipa ahi sumhaupa Zacchaeus kici khat om hi.

³Ama in Jesus sia a koi bang mi hi a, ci in mu nuam ahihang a tuntom khat ahikom mihonte hangin Jesus a mu thei bua hi.

⁴Ama in mihonpite mai ah tai a, tua mun kantan in hong pai tu Jesus mu nuam in theiteak kung khat tungah kaato hi.

⁵Jesus in tua mun a thet ciangin a tung ento in, “Zacchaeus awng, a manlangin hong tuaksuk tan, tu nitak nangma inn ah hong taam tu khi hi,” ci hi.

⁶Zacchaeus hong tuaksuk paih a, lungdamna lianpi taw Jesus muak hi.

⁷A mu mihing theampo phun tek a, “Hisia pa in, maw neipa khat ii inn ah zintung thong hi!” ci uh hi.

⁸Zacchaeus ding a, Topa tungah hi bangin ci hi. “En in, Topa awng! Ka neisa a lang mizawngte ka pia tu hi; tuaciangin khat po ka theam ngei le a zaa li in ka lo kik tu hi,” ci hi.

⁹Jesus in ama tungah, “Ngupna sia tuni in hi baangkua ah hong theng hi; banghangziam cile hisia pa zongh Abraham ii suan khat ahi hi.

¹⁰Mihing Tapa sia a bo a mangte zong tu le a ngum tu in hong pai hi,” ci hi.

Kham Dangkatang taw Thusonteen

(Matthew 25.14.30)



¹¹Mipite in hi thu ngai in a om laitakin, Jesus in thusontena khat son thua hi. Ama tua laitakin, Jerusalem theng dektak zo ahikom mipite in Pathian Ngam hong kilangh pal tu hi vak ci in muangmaw uh hi.

¹²Tua ahikom ama in, “Khatvei lai in ulian khat sia ngam khualapi khat ah kumpi suak tu in pai a, tuasia zawkciang cia kik sawm hi.

¹³A vai din ma in a naseamte sawm sam a, kham dangka khat tek pia in hi bangin ci hi. “Ka om ngawl sungteng in hisia taw bangza na meetsak thei uh ziam kisin vun,” ci hi.

¹⁴Tu in a ngam mite in ama ensan uh a, kamtaite in delsak a, ‘Ko hisia pa ka kumpi tu in dei ngawl khu hi,’ cisak uh hi.

¹⁵“Tua pa kumpi kisuaksak a, hong heak kik hi. Sum bangza tek meetsak ziam cisia a heak thei natu in, thakhat thu in a naseamte a mai ah samsak hi.

¹⁶A masa in khat hong pai a, ‘Topa awng, nong aap kham dangka khat ii tung panin, a dang sawm ka meetsak hi,’ ci hi.

¹⁷Ama in, ‘Pha mama hi. Nang in naseam pha khat na hi hi! Nasepno tung zongh ah thumaan na hi ciang, khuapi sawm kong uksak tu hi,’ ci hi.

¹⁸A niina naseampa hong pai a, ‘Topa awng, kei khat nong piak sia ii tung pan kham dangka nga ka meetsak hi,’ ci hi.

¹⁹Hisia pa ii tungah, ‘Nang sia khuapi nga hong uksak tu khi hi,’ ci hi.

²⁰Naseam dang khat hong pai a, ‘Topa awng, hi lai ah na kham dangka om hi, mainawlna puan sungah ka na phual hi.

²¹Nang sia mihing haksa mama khat na hikom kong kiita hi; nangma neisa ahi ngawlte na la a, na poai ngawlna tung pan a at pa na hi hi,’ ci hi.

²²Ama in, ‘Naseam taktai ngawlpa awng! Nangma kammal taw ma in, nangma hong kiman kik tu hi. Kei mihing haksa khat hi a, ka neisa ngawl bul la a, ka poai sa ngawl bul a atpa ka hi nong he hi.

²³Tua ahile banghangin ka sum sia dangka kholna zum ah koi ngawl ni ziam? Tua hile kong cia kik ciang a meet taw nga kik tu khi hi,’ ci hi.

²⁴Tua zawkciang in a kungah a dingte munah, “A kham dangka ama tung pan laaksak vun a, dangka sawm a nei naseampa pia vun,”

²⁵Ahihang amate in, ‘Topa awng, ama in sawm nei zo hi,’ ci uh hi.

²⁶Ama in zokik a, ‘A tatak in ka ci ciangin, bang khatpo a nei mihing sia ii tungah a tamzaw kipia tu hi; ahihang bangma a nei ngawl mihing khat ii tung panin a nei sun po kilaaksak lai tu hi,’ ci hi.

²⁷Tu in a kumpipa tu in hong dei ngawl ka ngalte, hi munah hong paipui tavun a keima mai ah that vun,’ ci hi,” ci in son hi.

Jesus in Zawna taw Jerusalem Zuan

(Matthew 21.1-11; Mark 11.1-11; John 12.12-19)

²⁸Jesus in hi teng ci in Jerusalem zuan tu in amate mai ah pai hi.

²⁹Olive mual ah a om Bethphage khua le Bethany khua nai a thet ciangin, a nungzuite nii paisak khol a, hi bangin thupia hi:

³⁰“Na mai ah a om khua ah pai tavun. Khuasung na tum uh ciang, bangma hunin a tungah a kito ngei ngawl lai laano khat kikhit in a om na mu tu uh hi. Hong suut tavun a, hi sungah hong paipui tavun.

³¹Khat po in banghangin suut nu ziam ci in hong dongh le Topa in tulmaw hi ci vun,” ci hi.

³²Amate a pai uh ciangin na theampo Jesus ii son bangin a om mu uh hi.

³³Amate in laano ii khau a suut ciangin, a neipa in, “Banghangin suut nu ziam?” ci in dongh hi.

³⁴“Topa in tulmaw hi,” ci in zokik hi.

³⁵Amate in laano Jesus kungah paipui hi. Tua zawkciang in amate in a laktong puasilh suut a, laano tungah dapin, Jesus suanto hi.

³⁶Laano tungah to in a pai ciangin, mihonpite in a laktong puasilh uh lampi tungah pha uh hi.



³⁷Ama Jerusalem nai ah hong thet ciang Olive Mual sang paisukna munah, ama nungzui mihonpite in nalamdangte a mu hu in, awnging tak taw lungdamko in, Pathian pok uh a,

³⁸“Topa min taw hong pai Kumpipa tungah Pathian in thupha pia taken! Vantung ah thinnopna om taken a, Pathian minthang taken!” ci uh hi.

³⁹Tuasia ciangin mihon sung a kihel Pharisee mi pawlkhat in Jesus tungah, “Sya awng, na nungzuite a thim natu in sawl in!” ci uh hi.

⁴⁰Jesus in “A tatak in ka ci ciang, amate in a thim uh le, suangtumte mama in au tu in hong kipan tu hi,” ci hi.

Jerusalem atu in Jesus Kap

⁴¹Ama khuapi taw a kinai vaialna hong theng a, khuapi a mu ciangin kaatap in,

⁴²“Thinnopna om thei natu in tuni in bang kismah ziam ci in he thei thong lete maw! Ahizong tua thu mu thei ngawl ni hi!

⁴³Hun khat hong theng tu a, na ngalte in na kiimkot panin phung leecian bangin hong uumci tu a, hong khakcip in, mun theampo panin hong sim tu hi.

⁴⁴Amate in na khuapi lalthamsak tu a, na tate uh taw hong moncip siat tu hi; suangtum khat beak zongh a omna ngei ah hong om nawn buatu hi, banghangziam cile Pathian in no hong ngum tu in hong pai hunlam na phawk bua uh hi.”

Jesus Biakinn ah Pai

(Matthew 21.12-17; Mark 11.15-19; John 2.13-22)

⁴⁵Tua zawkciang Jesus Biakinn sungah tum in sumzuakte not tu kipan a,

⁴⁶hi bangin ci hi, “Laithiangtho sung a ki-atna ah, Pathian in ‘Ka biakinn sia thungetna inn kici tu hi,’ ci hi. Ahihang note in ngutate bukna mun na suaksak uh hi,” ci hi.

⁴⁷Ni simin Jesus in Biakinn sungah thuhil hi. Thiampi liante, Thukham hil syate, le mihon lampuite in ama thatlum nuam uh hi;



⁴⁸ahihang, amate in tuabang a pian thei natu in, lampi a mu bua uh hi, banghangziam cile mihonte in, kammalno khat zongh a zak khial tu uh uuk ngawlin, ama pauna ngai top uh hi. Original typing

Luke 20

Jesus Thuneina huvau Dokna

(Matthew 21.23-27; Mark 11.27-33)

¹Ni khat Jesus in Biakinn sungah mihonpite Lungdamna Thu huvau hilna le thuhilna a nei laitakin, Thiampi liante, Thukham hil syate, le upate hong pai a,

²ama munah, “Hi bangin na ngamtat thei natu in, bang thu nei ni ziam? Akua in tuabang thunei theina hong pia ziam?” ci uh hi.

³Jesus in, “Kei zongh thu khat kong dongh tu hi.

⁴John ii tuiphum piak theina sia Pathian ii tung panin hong pai ziam maw mihing tung pan hong pai ziam, hong son tavun” ci hi.

⁵Amate sung teng kam kinial a, “Bang ci tu hi ziam? Pathian tung pan ci leang, ‘Tua ahile banghangin John um ngawl nu ziam?’ hong ci tu hi.

⁶Tuabang ci bua ii, ‘Mihing tung pan’ ci leang la, mihonpite in ei suangtum taw hong deanglum tu hi, banghangziam cile amate in John sia kamsang khat hi ci in um uh hi.

⁷Tua ahikom, “Koisung pan hong pai ziam ci he ngawl khu hi,” ci in zo hi.

⁸Jesus in amate tungah “Tua ahile kei zongh bang thuneina taw hi bangin ngamta khi ziam ci in kong son buatu hi.” ci hi.

Sapit huan A saapthawte taw Thusonteena

(Matthew 21.33-46; Mark 12.1-12)

⁹Tua zawkciang Jesus in mihonpite tungah hi thusonteena son hi. “Khatvei lai in, mihing khat in sapit kungte suan in, pawlkhat in saapsak a, khua ngei ma inn nusia hi.

¹⁰Sapit ngate law hun ciangin a silate khat paisak a, ama tel tu sapitte ngensak hi. Ahizong huan saapte in, a silapa vel a bangma pia ngawlin heak kiksak hi.



¹¹Tua ahikom sila dangkhat paisak kik hi; ahihang huan saapte in ama zongh vel a, maizum pia in, bangma ngawl taw heak kiksak hi.

¹²Tua zawkciangin ama in sila thumna sia paisak hi; huan saapte in tua pa zongh liamsak in huang pua ah vawk hi.

¹³Tuasia ciangin huan neipa in, “Bang law tu khi ziam? Ka it ka tapa paisak tong: tua hile amate in na thasia nanak tu hi!” ci hi.

¹⁴Ahihangin huan saapte in tua pa a mu ciangin khat le khat kikum a, “Hi sia huan neipa ii tapa hi. Thatlum tawng, tua hile a neisa teng ei aa suak tu hi!” ci uh hi.

¹⁵Tua ahikom sapit huan pua sangah ama not in thatlum uh hi. Jesus in hi bangin dongh hi, “Tua ci leang sapit huan neipa in huan saapte bang law tu ziam?”

¹⁶Ama in hong pai tu a, tua mihingte thatlum in, sapit huan sia ngualdang in saapthawsak tu hi,” ci hi. Mihonpi in hi thu a zaak uh ciangin, “Tuabang suak thei ngawl tu hi!” ci uh hi.

¹⁷Jesus in amate en a, “Tua ahile hi Laithiangtho in bang ci nuam ziam? Innsate ii mannung ngawl hi ci a a nil suangtum sia a thupibel suangtum suak hi.

¹⁸Tua suang tungah a puk peuma a bek a bekin kikhén tu a, tuaciang in tua suang khat po ii tungah hong taaksuk le tua pa sia leivui bangin zantham tu hi,” ci hi.

Shia Piakna huvau Dokna

(Matthew 22.15-22; Mark 12.13-17)

¹⁹Thukham hil syate le thiampi liante in tua munah Jesus mat sawm uh hi, banghangziam cile amate in, ama ii son thusontena sia amate a cina ahi hunlam he uh hi. Ahizong amate in mihonpíte kiita uh hi.

²⁰A mat thei natu hun pha zong uh hi. Thuneite le Rome ngamuk mangpa tungah Jesus a aap thei natu in, thinsung takpi taw thu dongh nuam bang a kiheang tu mihing pawlkhat sumnguk pia in paisak a, Jesus aita uh hi.



²¹Hi thudawpte in Jesus tungah, “Sya awng na paunate le na hilnate maan hi, ci in ka he uh hi. Mihingte ii let le no sia na awlmawk bua a, Pathian ii mihingte atu, a deisak thumaan thute hil hi, ci in kong he uh hi.

²²Tua ahile ei thukham in Rome Kumpi lianpa tungah shia piak tu khaam ziam maw khaam ngawl ziam hong son tan,” ci hi.

²³Ahihang Jesus in amate thin kukal teng phawk a,

²⁴“Ngun dangka khat hong la tavun. Akua lim le min a tungah ki-at ziam?” ci hi. “Kumpi lianpa aa hi,” ci uh hi.

²⁵Jesus in “Pha hi, tua ahile Kumpi lianpa neisa Kumpi lianpa pia tavun a, Pathian neisa Pathian pia tavun,” ci hi.

²⁶Tua mun mihonpite mai ah a mat thei natu thu mal khat zongh om ngawl ahikom amate thim khipkhep in om a, a zokik nate lamdang sa uh hi.

Thina pan Thaw kik natu huvau Dokna

(Matthew 22.23-33; Mark 12.18-27)

²⁷Tuaciangin mithite tho kik nawn ngawl tu hi, a ci Sadduceete Jesus kungah hong pai a, hi bangin ci uh hi:

²⁸“Sya awng, Moses in hi thukhamte ei atu in a at hi: ‘Mihing khat in ta nei ngawlin a thi le, tua pa ii suapuipa in, meingongnu tenpui in, mithipa ii ta tatak bangin, a ki ngaisun thei tu in, ta neipui tu hi,’ ci hi.

²⁹Khat vei lai in unau pa sali om hi: a ubel sia in zi nei a, ta nei ngawlin thi hi.

³⁰Tua zawkciang a niina sia in a numei sia tenpui hi.

³¹Tua zawkciangin a thumna sia zongh tuabang ma ahi hi. A unau sali bup in, tuabang ma hi siat hi — ta nei ngawlin thi siat uh hi.

³²A khakbel in numeinu zongh thi hi.

³³Tu in mithite nungta tu in hong thaw kik ciangin numei sia akua ii zi hi tu ziam? Amate sali in tenpui tek hi,” ci uh hi.

³⁴Jesus in, “Tu hunin numeite le pate kiteang hi,



³⁵ahihang thina pan tho kikin, a nungta tu a kilawm le hong pai pheang tu hun sungah kiteenna om nawn ngawl tu hi.

³⁶Amate vantung lalangte bang hi tu a, a thi thei buatu hi. Amate Pathian tate a suak uh hi, banghangziam cile amate thina pan in tho kik uh hi.

³⁷A thite nuntakna sungah kitho kiksak tu hi, ci in Moses in thiangtho takin lak hi. Sawlpaang kuang thu huvau a sonna munah Topa sia ama in, Abraham Pathian, Isaac Pathian, le Jacob Pathian,” ci hi.

³⁸Ama a nungtate Pathian hi a, a thisate Pathian hi ngawl hi banghangziam cile ama mun panin mihing theampo nungta hi,” ci in zo hi.

³⁹Thukham hil syate pawl khat in, “Na zokikna pha mama hi, Sya awng!” ci uh hi.

⁴⁰Banghangziam cile amate in bangma a dongh ngam nawn bua uh hi.

Messiah huvau Dokna

(Matthew 22.41-46; Mark 12.35-37)

⁴¹Jesus in, “Bangbangin Messiah sia David ii suan hi tu hi kici thei ziam?

⁴²Banghangziam cile David ama mama in Psalm thubu sungah, “Topa in ka Topa ii tungah: Hi sung ka ziat sangah hong to tan

⁴³na ngalte na peang nuai ah ka koi dong” ci hi.

⁴⁴“David in ‘Topa’ ci hi; tua ahile bangbangin Messiah sia David ii suan hi thei tu ziam,” ci hi.

Jesus in Thukham hil Syate pan A Kidop natu Hil

(Matthew 23.1-36; Mark 12.38-40)

⁴⁵Mihing theampo in ama thu a ngai laitakin, a nungzuite munah,

⁴⁶“Thukham hil syate panin kikeam tavun, amate puantual silh in, vak nuam a, vanhzuakna munah ngual ii zatak tu thangai hi; amate in synagogue te sungah a kikhaam kholsa tona ah to tha nuam uh a, anneak poaite ah mun phabelna ah to nuam hi.



⁴⁷Amate in meingongte zothaw uh a, a inn a lo suddol in, tuaciang, ngual ii pha asak tu a deina in, a sau tatak thungen uh hi! Amate ii daan thuak tusia nasia seseam tu hi!” ci hi.

Luke 21

Meingongnu ii Sumpi

(Matthew 12.41-44)

¹Jesus in a kiim a et ciangin Biakinn sum kholna sungah sum haute ii sumpi khiak a mu hi,

²tuaciang a zawng mama meingongnu khat ii dangka san pheak nii a khiak zongh mu hi.

³Ama in, “A tatak kong ci ciang, hi a zawng meingongnu in ngual dang theampo sangin tam zaw khia hi.

⁴Banghangziam cile a dangte in a nei vaal uh khia a, ahihang nupinu in zawng mama hi kale a nuntakna tu teng theampo pia hi,” ci hi.

Jesus in Biakinn Lalthap natu Son

(Matthew 24.1-2; Mark 13.1-2)

⁵Nungzuite pawlkhat in, “Biakinn sia, a suangmanphate taw ahizong, Pathian tungah biakpiakna vanhte taw ahizong bangza ta in etlawm ziam,” ci uh hi.

⁶“Hite theampo na mu uh hi — suangtum khat zongh ama omna munah a om nawn ngawl hun khat hong theng tu hi; suangtum khat sim kilawn suk tu hi,” ci hi.

Ngimna le Vawtsiatna

(Matthew 24.3-14; Mark 13.3-13)

⁷Amate in, “Syapa awng, hi thu bang hun ciang hong piang tu ziam? Hi thu hong pian ciangin bang lim teng taw hong kilak tu ziam?” ci in dongh uh hi.

⁸Jesus in, “Kinging ta khol vun, ngual in theamsak heak vun. Mihing tam mamate in kei min taw hong pai tu a, ‘Kei in ama ka hi hi! A hun hong theng zo hi!’ hong ci tu hi. Ahihang amate ii nung na zui heak vun.

⁹Ngual thu le tualngal thu na zaak uh hangin lau heak vun. Tuabangte hong piang phot tu hi. Ahizong hun bo natu hong nai zo cina hi ngawl lai hi,” ci hi.



¹⁰A thuson zomto a, “Ngam khat le ngam khat kido tu a, kumpi khat le khat kisim tu hi.

¹¹A lau huai zinliinna, kialpi tunna, pulpi tunna sia mun theampo ah om tu a, a lamdang a lau huai nate van panin piang tu hi.

¹²Ahizong, hi thute theampo a pian maa in, note hong kiman tu a, hong kivawtsia tu hi; synagogue te ah thu kisit tu in, hong ki aap tu a, tuaciang thong sungah hong kikhum tu hi; keima hu in no sia kumpite le ngamukte mai ah hong kithen tu hi.

¹³Hi hun sia no atu in Lungdamna Thupha na son thei natu hunpha hong hi tu hi.

¹⁴No le no na kidal natu, na thinngim ngawl natu in a hun hong tun maa in, na thin uh khensat khol tavun;

¹⁵banghangziam cile na ngalte ii hong nial thei ngawl natu le hong nalh thei ngawl natu in, kammalte le ciimnate kong pia tu hi.

¹⁶No sia na nu na pate, na suapui pate, na mealheakte le na ngualtamhte in hong aap tu a, note pawlkhat thina na thuak tu uh hi.

¹⁷Kei hu in no sia mihing theampo in hong ensan tu hi.

¹⁸Ahihang na lutung pan samzam khat zong a sumsi buatu hi.

¹⁹Kip takin ding vun. Noma le noma na kingum tu uh hi.

Jerusalem Lalthap natu Jesus in Son

(Matthew 24.15-21; Mark 13.14-19)

²⁰“Jerusalem sia ngalkap honpite in hong kim uum na mu uh ciang, tua khuapi lalthap natu nai hi, ci in na he tu uh hi.

²¹Tua hun ciangin Judea ngam a omte in, mualtung tu in tai taken; khuapi sung a omte in khua a nusiak uh kul tu a, ngamsung a omte in khuapi sung zuan heak hen.

²²Banghangziam cile tua hun “Daan piak hun” a kici Laithiangtho ii son sia a tun natu ahi hi.



²³Tua hun laitakin, naungaite le nau noailuai neite atu in bangza in haksa tu ziam! Hi ngamah a kiitak huai mama ngimna tung tu a, hi mihingte tungah Pathian daan tung tu hi.

²⁴Pawlkhath namsau taw kithat tu a, a dangte ngam theampo ah thongtaak tu in ki paipui tu hi; tuaciangin amate ii hun a cin mateng in Gentilete in Jerusalem sia a peang taw tuancil tu hi.

Mihing Tapa hong Pai natu
(Matthew 24.29-31; Mark 13.24-27)

²⁵“Ni le tha le aksite tungah nalamdangte piang tu hi. Leitung ngambupte sungah thin lalna om tu a, tuipi tuihawkte le tui kihualte kiita tu uh hi.

²⁶Leitung ah bangteng tak hong piang ziam ci in a ngak mihingte in launa taw butthi tu hi, banghangziam cile vantung a om nate sia amate ii zin tek panin pial mang siat tu uh hi.

²⁷Tuaciang Mihing Tapa hong kilangh tu a, vaangletna le minthanna taw meeikaai sungah hong pai tu hi.

²⁸Hi thute piang tu in hong kipat ciangin, dingto vun a, vandak vun, banghangziam cile hong kingup tu hun hong nai zo hi,” ci hi.

Theikung Pianzia taw Thuheak theina
(Mt 24.32-35; Mk 13.28-31)

²⁹Tua zawkciang Jesus in hi thusonteen, amate tungah son hi. “Theikung le thingkung dangte ngaisun vun.

³⁰Tuate ii teenote hong suak na mu uh ciang, khuakhal hong nai zo hi, ci in na he uh hi.

³¹Tuasia bangma in hi nalamdangte na mu uh ciang, Pathian Ngam hong theng dektak hi, ci in na he tu uh hi.

³²Tu laitak a nungta teng ii thi siat maa in, hi thute hong piang tu hi, ci in ciamtee tavun.

³³Van le lei zongh hong bo tu hi, ahizong ka kammalte bothong ngei ngawl tu hi,” ci hi.

Kingingta sa in Om natu



³⁴Na kidawm tavun, no sia a vaalkaai neakna dawnnate le leitung nuntak natu thinngimnate taw na hun uh na bosak heak vun, ahibuale tua Ni in nang sia thakhat thu in thaang sungah mat bangin na awk tu hi.

³⁵Banghangziam cile, leitung mun theampo ah mihingte tungah tua thusia hong tung tu hi.

³⁶Hong piang tu hi thute pan suatakna taw na kantan zawk natu uh le, Mihing Tapa mai ah na din natu in, thahatna na nei natu kinging khol sa in, om in thungen tawntung tavun.

³⁷Tua hunsung Jesus in nisim in Biakinn sungah thuhilna hun zangh a, zan hun ahile Olive Mual tungah zangh hi.

³⁸Zing tuungin mihing theampo in ama ii hilna ngai tu in Biakinn ah pai uh hi.

Luke 22

Jesus Thalup A Kisawmna

(Matthew 26.1-5; Mark 14.1-2; John 11.45-53)

¹Paisan poai a kici Tolsaw ngawl Anluum Poai nai zo hi.

²Thiampi liante le Thukham hil syate in mipite kiita ahikom a thimtham in Jesus a suamlup thei natu lampi zon tu hanciam uh hi.

Judas in Jesus Leeheak tu Thukim

(Matthew 26.14-16; Mark 14.10-11)

³Tuasia laitakin nungzuite sawm le nii sung pan khat ahi Iscariot kici Judas ii sungah Satan tum hi.

⁴Tua ahikom Judas pusuak a, Thiampi liante le Biakinn a cing Uliante munah Jesus a leeheak thei natu thute kikap pui hi.

⁵Amate lungdam a, sumpiak tu thukim hi.

⁶Amate a lungkim a, mipite heak ngawl laanin, Jesus amate khut sungah a aap thei natu hunpha zong tu in, kipan hi.

Jesus in Paisan Poai Anneakna Nei tu in Vaihawm

(Matthew 26.17-25; Mark 14.12-21; John 13: 21-30)



⁷Paisanpoai an tu in tuuno a kingaw ni, Tolsaw ngawl Anluum Poai Ni hong theng hi.

⁸Jesus in Peter le John sia hi bangin kam vaitha a paisak hi: “Pai tavun a, Paisanpoai an ih neak tu in vawt khol tavun,” ci hi.

⁹“Koi sungah vawtkhol le ung nong oai ziam,” ci in dongh uh hi.

¹⁰Ama in zokik a, “Khuapi sungah na tum uh ciangin, tui thambealno khat a pua pasal khat in hong muak tu hi. Ama tumna inn ah zui tavun,

¹¹tuaciang innteakpa munah ka nungzuite taw Paisanpoai an ka neak natu inn doituam sia koisung ziam ci in Syapa in hong dongsak hi,” ci tavun.

¹²Amate in anneak thei natu a kisamh theampo taw a vawtkhol sa inn doituam lian, inntung dawl hong lak tu hi,” ci hi.

¹³Amate a pai uh ciangin, na theampo Jesus ii son bang tatak ma in a om mu a, Paisanpoai an tu vawt khol uh hi.

Topa Zan an

(Matthew 26.26-30; Mark 14.22-26; 1Cor. 11.22-25)

¹⁴A hun hong cin ciangin Jesus in Sawltakte taw sabuai ah to hi.

¹⁵“Thalup ka thuk maa in, no taw hi Paisanpoai an neakhop tu ka uuk mama hi!

¹⁶Banghangziam cile a tatak in ka ci ciang, Pathian Ngam sungah, hi neakna dawnna ii khiakna a kikhuangkhim mateng in hi an ka ne nawn buatu hi,” ci hi.

¹⁷Tuaciang Jesus in hai la a, Pathian pokin hi bang ci hi. Hisia la vun a, no sungah hawm tavun.

¹⁸A maan tak kong ci ciangin Pathian Ngam hong thet mateng in hi sapittui ka dawn nawn buatu hi,” ci hi.

¹⁹Tua zawkciang in anluum bekno khat la a, Pathian pokin, a balneen zawkciang amate pia a, hi bangin ci hi. “Hisia no atu hong kipia ka pumpi ahi hi. Kei nong phawna in, hi bang na vawt vun,” ci hi.



²⁰Tuasia bangma nitak anneak zawk ciang, amate hai pia a, hi bangin ci hi. “Hi hai sia Pathian thuciamna thak no atu a hong kibua ka chi taw, a kikipsak sia ahi hi.

²¹Ahizong en vun! Kei hong leeheak tu pa sia hi sabuai ah kei taw ankuang um khawm hi!

²²Pathian khensatna sa om bangin, Mihing Tapa sia thi tu hi, ahihang tuabang a ama a leeheak pa atu in, bangza in lauhuai ziam!” ci hi.

²³Tuaciangin amate sung teng ah tuabang a ngamta tusia akua hi ziam ci in kidongh uh hi.

Letna Thu huvau Kinialna

²⁴Nungzuite sungah thu kinialna khat piang a, amate sungah akua lianbel in kingaisun tu ziam, ci thu ahi hi.

²⁵Jesus in amate tungah “doai biate ii kumpite in a mite tungah vaang nei a, ngamukte sia ‘Mihingte ii Lawmte hi’ kici hi.

²⁶Ahihang no sia tuabang na hi buatu uh hi; bangbang hi zaw tu nu ziam cile, a lianbel sia in a nobel bangin na om tu uh a, a lampui sia in naseam bangin na om tu uh hi.

²⁷An ne tu in a to pa lianzaw ziam maw ankuang a lui pa lianzaw ziam? A to pa lianzaw hi. Ahizong in note sungah kei sia ankuang luipa bangin kong om hi.

²⁸“Haksatna ka thuk lai theampo in, kei nong ompui uh hi;

²⁹ka Pa in ukna za hong piak bangma in no zong kong pia tu hi,

³⁰ka ngamsung ka sabuai ah no sia kei taw anne tuidawn khawm in, na om tu uh a, kumpi tokhum tungah to in, Israel minam sawm le niite na uk tu uh hi.

Jesus in Peter ii Nial natu Sonkhol

(Matthew 26: 31-35; Mark 14.27-31; John 13.36-38)

³¹“Simon, Simon awng! Ngai in! Lothopa ii zungtaang le taangphawte a khen bangma in, a phate le a siate hong khen natu in, Satan in no theampo hong ze et natu thu nga zo hi.

³²Ahihang, Simon awng, na upna a lal ngawl natu in, thu kong ngetsak hi. Tuaciang kei sangah nong kiheak kik ciangin na suapuite a tha khosak tu ni hi,” ci hi.

³³Peter in zo a, “Topa nang taw thongtaak khawm tu le, a thi khawm tu in, ka kinging zo hi,” ci hi.

³⁴Jesus in, “Peter awng, a maan takin kong ci ciangin, ama ka he ngei bua hi ci in thum vei nong nial mateng, tuzan in ak khuang ngawl tu hi,” ci hi. “Sumbawm, thung le peang dapte, ngawl taw kong paisak hunlai in, kitaangsap na na nei ngei uh ziam?” ci in dongh hi. “Bangma kitaangsap nei ngei bua ung,” ci hi.

³⁶“Ahizong tu in ahile, sumbawm ahibuale thungte a nei po in, keng taken; namsau a nei ngawl peuma in a laktong puasilh zuak taken a, lei taken.

³⁷Banghangziam cile a maan takin kong ci ciang, ‘Ama thukham paltan a, a mawte bangin, kithuaksak tu hi,’ ci a laithiangtho sungah kei ii thu a ki at teng tangtung tu hi,” ci hi.

³⁸Nungzuite in, “En in! Topa awng, hi sungah namsau nii om hi!” ci uh hi. Ama in zokik a, “Tu za pha zo hi,” ci hi.

Olive Mual tungah Jesus Thungen

(Matthew 26.36-46; Mark 14.32-42)

³⁹Jesus in khuapi nusia in, a tawntung a pai ngei bangma in, Olive Mual ah pai a, nungzuite zongh ama taw pai hi.

⁴⁰Tua mun a thet ciangin amate tungah hi bangin ci hi, “Ze-etna sungah na puk ngawl natu in, thu ngen tavun.”

⁴¹Amate kung panin, muiden khat tan bang a khuala na ah pai lai a, khupdin in thungen hi.

⁴²“Pa awng, nang deina ahile hi thuakna hai sia kei kung pan hong laksak tan. Ahizong kei deina bang hi ngawlin, nang deina bang hi taken,” ci hi.

⁴³Tuaciang vantung pan in, vantung lalang khat kilangh a, ama tha khosak hi.



⁴⁴Thin ngimna lianpi taw nasia seseam in thungen hi; a khua ulsa chimal bangin lei ah taak hi.

⁴⁵A thungetna pan dingto a, a nungzuite kungah a pai ciangin, amate a khuangai lei hu in, ngimin mu uh hi.

⁴⁶Ama in, “Banghang in mu nu ziam? Ze-etna sungah na puk ngawl natu in, tho vun a thungen vun,” amate munah ci hi.

Jesus Kimatna

(Matthew 24.47-56; Mark 14.43-50; John 18.3-11)

⁴⁷Jesus in thu a son saan laitakin, nungzui sawm le niite sung pan khat ahi Judas lampui in mihonpi khat hong theng hi. Ama in Jesus namh tu in pai hi.

⁴⁸Ahihang Jesus in, “Judas awng, Mihing Tapa sia kinapna taw leeheak na hi ziam,” ci hi.

⁴⁹Jesus taw a omkhawm anungzuite in bangteng hong piang tu ci in a mu uh ciang, “Topa awng, ka namsaute ka zangh tu uh ziam,” ci in dongh uh hi.

⁵⁰Amate sung pan khat in Thiampi Lianbelpa ii sila pa bil ziatsang satansak hi.

⁵¹Ahihang Jesus in, “Tuteng pha zo hi!” ci in a bil tham a, damsak hi.

⁵²Jesus in thiampi liante Biakinn cing uliante le upate ama man tu in, hong paite tungah, “Mihing that taiku khat man tu bangin namsau le moltawng taw hong kuan nu ziam?”

⁵³Biakinn sungah nisim in no taw kong om a, ahizong kuama in mat nong sawm bua uh hi. Ahihang tu laitak sia khuazing vaangletna ii uk hun laitak hi a, na dian tu uh hun ahi hi,” ci hi.

Peter in Jesus Nial

(Matthew 26.57-58; 69-75; Mark 14.53-54; 66-72; John 18.12-18; 25-27)

⁵⁴Amate in Jesus man a Thiampi Lianbelpa innah paipui hi; tuaciang a nungsang a khuala thithimna pan Peter in zui hi.

⁵⁵Leitual laizang ah meiphual khat kithut a, meikiim ah a tote kawm ah Peter zongh to hi.



⁵⁶Tuabangin mei oai a om a mu ciangin, naseam numei khat in, a mai salh in en a, “Hisia pa zongh Jesus taw kithawl hi!” ci hi.

⁵⁷Ahihang Peter in nial a, “Numei awng, kei ama ka he ngei bua hi!” ci hi.

⁵⁸Tawmvei zawkciang pasal khat in Peter mu a, “Nang zongh amate khat na hi hi!” ci hi. Ahihang Peter in, “Pasal pa awng, hi ngawl khi hi!” ci in zokik hi.

⁵⁹Nai khat bang zawkciang in, pasal dangkhat ma in, nasia takin ci hamtang a, “Hisia pa, Jesus taw a kithawl hunlam up laak om bo, banghangziam cile ama zongh Galilee mite khat ahi hi!” ci hi.

⁶⁰Ahihang Peter in, “Pasal pa awng, nang bangteng sason ci sia hong heakpui ngawl khi hi!” ci in zokik hi. Tuabang a papau laitakin thakhat thu in ak hong khuang hi.

⁶¹Topa hong ngeilee a, Peter a tangtan in en hi, tuaciang Peter in Topa ii ama tungah a son sa sia phawk hi. “Tu zan ak khuan ma in, nang kong he bua hi, thumvei na ci tu hi,” ci a, a son sa sia phawk hi.

⁶²Peter pusuak in nasia takin kap hi.

Jesus, Kiselno in Kivel
(Matthew 22.67-68; Mark 14.65)

⁶³Jesus a cing mite in ama selno in vel uh hi.

⁶⁴Amate in a mit tuamsak a, “Akua in hong saat ziam, son in!” ci in dongh uh hi.

⁶⁵Tuaciangin kamsia nano taw a nanam in selno uh hi.

Jew Councilte mai ah Jesus
(Matthew 26.59-66; Mark 14.55-64; John 18.19-24)

⁶⁶Khuavak ciangin, amate thiampi liante le thukham hil syate kisitua uh a, tuaciang Jesus sia Councilte mai ah paipui uh hi.

⁶⁷“Nang, Messiah na hi ziam? hong son tan,” ci uh hi. Ama in zo a, “Hong son leng hong um ngawl tu nu hi;

⁶⁸tuaciang thu hong dongh leng hong zo ngawl tu nu hi.



⁶⁹Ahihang tu pan kipan Mihing Tapa sia Vaanglianbel Pathian ziat sangah hong to tu hi,” ci hi.

⁷⁰Amate theampo in, “Tua ahile nang sia Pathian Tapa na hi ziam?” ci hon uh hi. Ama in “Noma ci bang ka hi hi,” ci hi.

⁷¹Tuaciang amate in, “Tetti dang kul nawn bo! Ama kammalte ih zaak tek hi!” ci uh hi.

Luke 23

Pilate mai ah Jesus Kipaipui

(Matthew 27.1-2; 11-14; Mark 15.1-5; John 18.28-38)

¹A kikhawm theampo hong ding a, Pilate mai ah Jesus paipui uh a,

²tua munah amate in hi bangin mawsiat uh hi: “Hisia pa in, ka minamte lampui khial in, Kumpi lianpa zongh shia piak ngawl natu in, mihingte hol in, ama le ama Messiah kumpipa ka hi hi a ci laitakin ka man uh hi,” ci hi.

³“Nang sia Jewte ii Kumpipa na hi ziam?” ci in Pilate in dongh hi. “Nangma ci bang ahi hi,” ci in Jesus in zokik hi.

⁴Tuasia ciangin Pilate in thiampi liante le mihonte tungah “Hisia pa mawsak natu thu bangma mu ngawl khi hi,” ci hi.

⁵Ahihangin amate in nasia seseam in mawsak uh a, “A thuhilna taw Judea ngambup mite buaisak tu in, kipan hi. Galilee ngam pan in hong kipan a, tu in hi sung hong theng hi,” ci uh hi.

Herod mai ah Jesus Kipuak

⁶Pilate in hi thu a zaak ciangin, “Hi pa Galilee mi ziam?” ci in dongh hi.

⁷Ama in Jesus sia Herod ii ukna ngam mi khat hi, ci in a tel ciang Jerusalem ah tua hun laitak hong om Herod kungah puak hi.

⁸Herod in Jesus a mu ciangin, a lungdam mama hi, banghangziam cile ama thu za ngeizo a, a mu nop zawk khuangei zo hi. Jesus in nalamdang lakna pawlkhat vawt tu in Herod in muangmaw hi.

⁹Tua ahikom Herod in Jesus thu tam mama dongh a, ahihang Jesus in a zo bua hi.



¹⁰Thiampi liante le thukham hil syate mai sangah pai a, nasia takin Jesus mawsak uh hi.

¹¹Herod le a ngalkapte in Jesus etsatna taw selno hi; tua zawkciang puantual pha khat silhsak in, Pilate kungah puak kik uh hi.

¹²Tua ni mama in Herod le Pilate ngualtamh suak uh hi; tua masia hun ahile amate kingal vilvel uh hi.

Jesus Thidaan Kipia

(Matthew 27.15-26; Mark 15.6-15; John 18.39-19.16)

¹³Pilate in Thiampi liante, lampuite le mihonte sam a, amate munah,

¹⁴“Hisia pa in, mihingte lampui khial hi, ci in nong paipui uh hi. Tu in noma mai ah thu ka sit ciangin na mawsak nop uh mawmate khat zongh ama in vawt ngawl hi, ci in ka mu hi.

¹⁵Dom ngawlin Herod zongh in, a maw na tu a mu zawk ngawl hu in, hong puak kik hi. Hisia pa in thina thuakna tu taw kilawm ngamatna bangma a vawt bua hi.

¹⁶Tua ahiciang ama ka saatsak zawkciang, ka tha tu hi,” ci hi.

¹⁷Paisan Poai om sim in, Pilate in thongtaakte khat veu amate atu in a suataksak a ngeina hi.

¹⁸Mihon bup in, “Ama that in! Barabbas sia koma atu in suaktasak in!” ci in au uh hi.

¹⁹(Barabbas sia khuapi sungah buaina khat a om hu le, mihing thalupna thu khat hu in, thong kitaaksak ahi hi.)

²⁰Pilate in Jesus suatak nuam a, tua hu in mihonte tungah son kik hi.

²¹Ahihang amate in ausan kik a, “Thinglamte tungah thatlum in! Thinglamte tungah thatlum in!” ci uh hi.

²²Pilate in a thumveina hi bangin ci hi. “Ahihang ama in bang khialna vawt ziam? Thina thuakna tu za dong ngamatna a vawt bangma ka mu bua hi! Tua ahikom ama ka saat tu a, tua zawkciang ka tha tu hi,” ci hi.



²³Jesus sia thinglamte tungah thalup natu in, amate in tawlna ngawlin au uh a, a khakbel ciangin amate auna in zo hi.

²⁴Tua ahikom Pilate in amate ii nget thidaan sia Jesus tungah pia hi.

²⁵Buaina hu le mihing thalupna hang a, thong a kitaaksak, amate ii dei sia pa suaktasak a, tuaciang amate uuk babang a vawt tu in, Jesus aap hi.

Thinglamte tungah Jesus Kithat

(Matthew 27.32-44; Mark 15.21-32; John 19.17-27)

²⁶Ngalkapte in Jesus paipui uh a, tuabang a pai laitakin, ngamsung pan khuapi sungah hong pai Simon a kici Cyrene khua mipa taw kisi uh hi. Amate in tuasia pa man a, thinglamte suan in Jesus nungzui in puasak hi.

²⁷Mihonpi khat in ama zui a, tuate sungah numei pawlkhat in ama kaa a, mau a om uh hi.

²⁸Jesus in amate sang nga in, “Jerusalem numeite awng! Kei atu in kap heak vun, noma atu le na tate atu in kap po vun.

²⁹Banghangziam cile, ‘Numei tanei thei ngawlte le nau noailuai a nei ngei ngawlte bangza in hampah ziam?’ a kici hunte hong theng tu hi.

³⁰Tua hun sia mihingte ii, mualpuite tungah, ‘Ko tungah hong cim tavun!’ mualnote tungah, ‘Hong seal tavun!’ a kici hun hi tu hi.

³¹Banghangziam cile thingkung a hin lai in, hi bangin kivawt ahile, a ko ciang bang suak tu ziam?” ci hi.

³²A dang phalakte nii zong Jesus taw kithat tu in, paipui uh hi.

³³Amate “LUNGU” a kici na mun a thet ciangin, tua munah Jesus sia thinglamte tungah kilh uh a, phalakte nii zongh a ziatsang ah khat, a veisang ah khat kilh uh hi.

³⁴Jesus in “Pa awng, amate mawna maisak in! Amate in bang vawt uh ci zongh a tel bua uh hi,” ci hi. Tuaciang amate in aisaanna taw ama puante hawm uh hi.



³⁵Jesus sia lampuite in ciammuina in nei uh a, “Ngualdang zongh hun thei hi; Pathian ii teal Messiah ahile ama le ama kihun ve hen!” a ci uh laidak in mihonte in, dingin en hon uh hi.

³⁶Ngalkapte zongh in, selno uh hi: amate in ama kungah kaato uh a, sapittui haau pia uh hi.

³⁷“Jewte kumpipa na hile nangma le nangma kisuaktasak in,” ci uh hi.

³⁸Ama ii tungah, “Hisia in Jewte ii Kumpipa ahi hi,” ci in ki at hi.

³⁹Ama taw a kikhaikhawm phalakpa khat in selno hi. “Nang Messiah hi ngawl ni ziam? Nangma le nangma kisuaktasak in a, ko zong hong suaktasak tan!” ci hi.

⁴⁰Ahihang phalak dangkhat pa in, ama tei a, “Pathian kiita ngawl ni ziam? Nang in ama bangma in daan na thuak hi.

⁴¹Ahihang ei ih hile ih ngamtatna taw a kiphu tu in, ih thuak ahiciang ahi tu ma hi; ahihang ama in khialna bangma vawt ngawl hi,” ci hi.

⁴²Tuaciang ama in Jesus munah, “Jesus awng, Kumpi in nong pai ciangin, kei hong phawk tan!” ci hi.

⁴³Jesus in ama munah, “A maan tak kong ci ciang, tuni in nang sia keima taw Paradise ah na om tu hi, ci in kong kamciam hi,” ci hi.

Jesus Thina

(Matthew 27.45-56; Mark 15.33-41; John 19.28-30)

⁴⁴Sun nai sawm le nai nii hun bang ciangin ni taang nawn ngawl a, nitak nai thum dong ngamsung buppi khuazing hi;

⁴⁵tuaciang Biakinn sungah innkhan doina puankhai sia khen nii kisua in, kizentham hi.

⁴⁶Jesus in nging takin hi bang hong au hi, “Pa awng! Na khut sungah ka thaa kong aap hi!” a ci zawkciang ama thi hi.

⁴⁷Ngalkap hon ukpa in a piang thu teng mu a, ama in Pathian pok hi. “Ama sia mihing pha tatak khat hi!” ci hi.

⁴⁸A en tu kikhawm mipite in, a piang sa thu teng a mu zawk uh ciangin, innah cia in, hee leilam in a awm beang uh hi.

⁴⁹Jesus taw a kihe theampo le Galilee ngam pan ama a zui numeite in, ngal et uh hi.

Jesus Kiphumna

(Matthew 27.57-61; Mark 15.42-47; John 10.38-42)

⁵⁰Judea ngam Arimathea khua mi Joseph kici khat om hi. Ama a zatakhuai mihing pha khat hi a, Pathian Ngam hong thet tu a ngakpa ahi hi.

⁵¹Ama Council Upa khat ahihang, a lawmte ii thukhenna le, ngamtatnate a thukim bua hi.

⁵²Ama in Pilate omna ah pai in, Jesus luanghawm ngen hi.

⁵³Tuasia zawkciang in, a luang khiasuk a, puangkaang neal khat taw a tun zawkciang, kuama kisial ngeingawlna, a kikhuak suanghawng thaang khat sungah sial hi.

⁵⁴Tua ni sia nipi zawk ni nga ni hi a, Sabbath ni hong theng dektak hi.

⁵⁵Galilee ngam pan Jesus nung a zui numeite Joseph taw hong pai uh a, thaang le Jesus luang kisialna mu uh hi.

⁵⁶Tua zawkciangin amate in a luang zut natu in, hel namtui le paaknamtuite vawtkhol tu in innah cia kik uh hi. Sabbath ni in thukham ii thupiak bangin amate tawlna uh hi.

Luke 24

Thawkikna

(Matthew 28.1-10; Mark 16.1-8; John 20.1-10)

¹Nipi ni zingsang tuungin, numeite thaang vil uh a, amate helkholasa sathau namtuite keng uh hi.

²Thaang kongvang panin, suangtumpui sia a kiliik sa in mu uh a,

³tua ahikom amate a sungah tum uh hi; ahihang amate in Topa Jesus luang a mu bua uh hi.



⁴Hi thu lamdangsa in, tua munah a din laitakin, thakhat thu in mihing nii, a taang mama puansilh in, amate kungah ding uh hi.

⁵Numeite lau mama in, a kun uh ciangin, tua mihingte nii in, “A thisate ii omna munah, banghangin a nungta khat hong zong nu ziam?”

⁶Ama hi sungah om ngawl hi; ama kitho kiksak zo hi. Galilee aa a omlai, no tung a hong thusonte phawk kik tavun.

⁷“Mihing Tapa sia mawneite khut sungah ki aap in, thinglamte tungah kithat tu a, a ni thum zawkciang in nuntakna sungah hong thoto kik tu hi,” ci hi.

⁸Tuasia ciangin numeite in a kammalte phawk kikin,

⁹thaan pan heak kik a, hi thute theampo nungzui sawm le khat te le, a dangte tungah son uh hi.

¹⁰Tua numeite Mary Magdalene, Joanna, le James ii nu Mary hi a; amate teng le a dang numeite in hi thuteng sawltakte tungah son uh hi.

¹¹Ahihang sawltakte in, numeite ii thuson luithawthong hi tu in, ngaisun uh a, a um bua uh hi.

¹²Ahizong Peter ding a, thaان sangah hong tai in; kunsuk in a et ciangin, thaان puan sim ngawl bangma dang a mu bua hi. Tuaciang in thupiangte huvau tumdang sa in, ama inn ah cia kik hi.

Emmaus khua A Paina

(Mark 16.12-13)

¹³Tua ni mama in Jesus nungzuite nii sia, Jerusalem pan tai sali a khualana Emmaus khuano ah pai a,

¹⁴tuaciang amate in tua hunsung thupiang teng kikum uh hi.

¹⁵Tuabang a kikap laitakin, Jesus ama mama in, neak a, amate taw tonkhawm hi;

¹⁶amate in Jesus mu napi a tel bua uh hi.

¹⁷Jesus in amate tungah, “Lampai kawm in khat le khat bang thu son nu ziam?” ci in dongh hi. Amate maikhing in ding uh hi.



¹⁸Amate ngeal sung panin Cleopas a kici pa in, “Jerusalem khual hong haw mihingte sung pan, tu sung teng a thupiangte a he ngawl sia nangma bekma hi thong ni ziam?” ci hi.

¹⁹“A bang thu ziam?” ci hi. “Nazareth mi Jesus tungah thupiangte hi,” ci in zokik hi. “Hisia pa in, kamsang khat hi a, ama sonte le sepna theampote vaang nei hi, ci in Pathian le mihing theampo ii ngaisut pa ahi hi.

²⁰Ka thiampi liante le ngamukte in thidaan thuk tu in aap uh a, tuaciang ama thinglamte tungah kithat hi.

²¹Israel te suatak a pia tu pa hi tu hi ci in ka lam en uh hi! Tua ban ah hi thu hong pian zawk sia tu in a ni thum ni hi zo hi.

²²Koma pawl sungah numei pawlkhat in hong liinglawngsak hi; amate khuavak bekin thaun vil uh a,

²³ahihang a luang a mu zo bua uh hi. Amate hong heak kikin, vantung lalangte a muna thu le ama sia nungta kik a hina thu son uh hi.

²⁴Ka pawl uh sung pan a heap thaun ah pai uh a, numeite thuson bang tatak in om a mu uh hi; ahihang ama a mu bua uh hi,” ci hi.

²⁵Jesus in amate tungah “Bangza ta in mawmaw nu ziam? Kamsangte son theampo bangza um hak nu ziam?”

²⁶Messiah in hite a thuk phot tu kul a, tua zawkciangin vaangletna sungah tum tu hi ngawl ziam?” ci hi.

²⁷Jesus in amate huvau Moses ii laibute pan a kipan kamsangte lai at theampo dong Laithiangtho a vekpi sungah a kison teng sonthiang hi.

²⁸A pai natu khuano sia a thet nai tu ciangin, Jesus in a paisuak tu bangin ki omsak hi.

²⁹Ahihang amate in tho uh a, hi bangin ci uh hi. “Koma kungah hong taam tan, ni zong tum dektak zo a, khuazing tu hi,” ci uh hi. Tua ahikom amate kungah taam tu in pai hi.

³⁰Amate taw anne tu in to a, anluum la in thupha a piak zawkciang in, balneen in amate pia hi.

³¹Tuasia ciangin amate mit hong kihong a, ama tel uh a, ahihang amate kung panin ama bo hi.

³²Amate khat le khat hi bangin kici uh hi, “Lampi tungah Laithiangtho hong sonthiang laitakin ih thinsung meikuang taw hal bang hi kana ngawl ziam?” ci uh hi.

³³Amate ding pai a, Jerusalem khua ah pai kikin, nungzui sawm le khat te le a dangte kikhawm a om a mu uh ciang,

³⁴hi bangin ci uh hi. “Topa tho takpi zo hi! Simon tungah kilak hi!”

³⁵Tuaciang amate nii in lampi tungah a piang thu le, anluum a balneen ciang, Topa ahi hunlam a telna uh bangteng son uh hi.

Jesus A Nungzuite tungah Kilak

(Matthew 28.16-20; Mark 16.14-18; John 20: 19-23; Sawl 1.6-8)

³⁶Mihing niite in hi thu teng a sason laitakin, thakhat thu in Topa amate laizang ah ding a, “Thin nopna na nga tavun,” ci hi.

³⁷Thithaa khat mu kisa in amate patau mama hi.

³⁸Ahihang ama in, “Banghangin patau nu ziam? Banghangin hi up laaknate na thin sungah hong piang ziam?”

³⁹Ka khut ka peang hong en tavun. Keima tatak ma ka hi hunlam hong en tavun. Hong tham tavun, banghangziam cile thithaa in ngu le taang le samalte, tu a ka nei nong mu thei uh bangin a nei bua hi,” ci hi.

⁴⁰Hi teng ci in amate a khutte le a peangte lak hi.

⁴¹Amate in a um thei balai hi, banghangziam cile, amate lungdamna le lamdangsakna taw kidim uh hi; tua ahikom ama in, “Neak tu khat po na nei uh ziam?” ci in ngen hi.

⁴²Amate in ngasa pumhuan bek khat pia uh a,

⁴³amate ii mu tangin la in ne hi.



⁴⁴Tua zawkciang ama in, “Note taw kong om lai a, kong son sa thu teng veuma ahi hi: kei taw kisai a ki at, Moses thukhamte, kamsangte lai atte, le Psalmte hong tangtun kul hi,” ci hi.

⁴⁵Tua zawkciang amate Laithiangtho a tel natu in, ama in a thinsung uh honsak a,

⁴⁶tuaciang ama in amate tungah, “A ki at sia hisia hi: Messiah in thuak tu a, ni thum zawkciang in thina pan tho kik tu a;

⁴⁷tuaciang ama min taw kisiik kikna le mawmaisakna sia Jerusalem pan kipan minam theampo tungah kihil tu hi.

⁴⁸No sia hi thute ii tetti na hi tu uh hi.

⁴⁹Tuaciangin ka Pa ii hong kamciamna noma sungah kong puak tu hi. Ahihang note in vantung pan vaangletna note tungah hong thet dong khuapi sungah na ngak tu uh hi,” ci hi.

Jesus Van ah Kila

(Matthew 16.19-20; Sawltak 1.9-11)

⁵⁰Tuaciang ama in amate teng khuapi sung pan Bethany dong paipui a, tua munah khutlaam in thupha pia hi.

⁵¹Thupha a piak zanglai in, ama sia amate taw kikhen a, vantung ah kila to hi.

⁵²Amate in, ama a biak zawk uhciang, lungdamna lianpi taw kidim uh a, Jerusalem ah heak kik in,

⁵³a hun nei uh theampo Biakinn sung Pathian tungah lungdamkona in zangh uh hi.



John

John 1

Nuntakna Kammal

- ¹A kipat ciilin, Kammal na om khol zo hi; tua Kammal in Pathian taw om a, tua Kammal in Pathian ma ahi hi.
- ²A kipat ciil lai mama panin Kammal in Pathian taw a om sa ahi hi.
- ³Ama tungtawn in Pathian in na theampo piangsak hi; a kubitphua theampo ama ngawl taw a kipiangsak na khat beak a om bua hi.
- ⁴Tua Kammal in nuntakna ii naak ahi hi. Tuaciang hi nuntakna in mihing a minpiang atu in khuavak hong puak hi.
- ⁵Khuavak in khuazing sungah taang a, khuazing in sumit zo ngei ngawl hi.
- ⁶Pathian in John min nei ama kamtaipa hong paisak a,
- ⁷mihing theampo in za a, a up natu in, tua khuavak thu mihingte tungah a son tu hong pai ahi hi.
- ⁸Ama tatak ahile khuavak hi ngawl hi; khuavak ii thu son tu in hong pai ahi hi.
- ⁹Hi khuavak in khuavak tatak hi a — leitung ah hong pai in mihing sim tungah a taang hi.
- ¹⁰Kammal in leitung ah om a, Pathian in leitung sia ama tungtawn in piangsak hi napi, leitung in ama a he bua hi.
- ¹¹Ama in ama ii ngamsung ma a hong pai ahihang a mite in ama a saang bua uh hi.
- ¹²Ahizong pawlkhat in ama saangin um uh hi; tua ahikom ama in tuate tungah Pathian tate sua thei natu thu pia hi.
- ¹³Amate leitung pianziate taw Pathian tate a suak hi ngawl hi, cinopna in, pa khat ii hin tate bangin a piang ahi bua hi; Pathian mama sia amate ii Pa ahi hi.



¹⁴Kammal in mihing hong suak a, thuthiamna le thumaan thutak taw kidimin, ei sungah hong teang hi. Eite in ama vaangletna, Pa ii Tapa khat bek a hina taw a saan vaangletna ih mu zo hi.

¹⁵John in ama huvau son hi. Ama in, “Hisia pa sia a thu ka sason pa hi a, ‘Kei nung pan hong pai hi, ahihang kei sangin lianzaw hi, banghangziam cile kei ii pian maa in ama om zo hi,’ ka ci sia ahi hi,” ci in au hi.

¹⁶A kidim a om, ama thuthiamna sung panin, ei theampo thupha hong pia zo a, khat zawkciang khat hong piak ahi hi.

¹⁷Pathian in Moses tungtawn in Thukham pia hi. Ahihang thuthiamna le thumaan thutak sia Jesus Christ tungtawn in hong pai hi.

¹⁸Kuama in Pathian mu ngei ngawl hi. Pa kungah a om, Pathian ma ahi, Tapa khat bek in Pathian hong hesak hi.

Tuiphumpa John ii Thupuak

(Mt 3.1-12; Mk 1.1-8; Lk 3.1-18)

¹⁹Jerusalem khua a om Jew thuneite in John kungah thiampite le Levite pawlkhat paisak a, “Nang akua ni ziam?” ci in donghsak uh hi.

²⁰John in a zo thada bua a, phualseal ngawlin hi bangin thiangson hi. “Kei Messiah hi ngawl khi hi,” ci hi.

²¹“Tua ahile akua ni ziam? Elijah ni ziam?” ci in dongh uh hi. “Hi ngawl khi hi,” ci in John in zo hi. “Kamsangpa ni ziam?” ci in dongh uh hi. “Hi ngawl khi hi,” ci in ama in zokik hi.

²²“Tua ahile a kua ni ziam hong son tan” ci uh hi. “Ko hong sawlte munah thu ka puak kik uh kul hi. Nangma le nangma bang kici ni ziam?” ci uh hi.

²³Isaiah kamsangpa ii sonna teng doppha in, John in hi bangin zo hi: “Kei sia ‘Senneal ngam sungah a au khat ii aw ka hi hi: Topa ii khualhaw natu lampi tangsak vun!’ ”

²⁴Phariseete ii kamtaite in,

²⁵John munah, “Nang Messiah le hi ngawl, Elijah le hi ngawl, Kamsangpa le hi ngawl na hile, banghangin tuiphum ni ziam,” ci in dongh uh hi.

²⁶“Kei in tui taw tui kong phum hi, ahihang no sungah na heak ngawl uh khat om hi.

²⁷Ama kei nung panin hong pai ahihang ama peangdap suut tu zong ka kilawm bua hi,” ci in John in zo hi.

²⁸Hi thu theampo sia John ii tui a phumna Jordan Ngun ii nisuana sangah a om Bethany khua ah piang hi.

Pathian Tuuno

²⁹A zing ciangin John in ama kungah hong pai Jesus a mu ciangin, “Leitung buppi mawna a lakhia Pathian Tuuno, zialai ah om hi!

³⁰“Mihing khat kei nung panin hong pai tu a, ama in kei pian maa in om khol zo ahikom, kei sangin ama lianzaw hi,’ ci in ka sason sia pa ahi hi.

³¹Ama sia akua hi tu ziam, ci in ka he bua hi, ahihang Israel mite ii ama a heak natu in kei sia tui taw tuiphum tu in kong pai hi,” ci hi.

³²Tuaciang in John in hi bangin tetti pang hi: “Thaa sia vantung panin ngam vakhu bangin hong tuaksuk a, ama tungah hong tu ka mu hi.

³³Ama ahi hunlam telcian tatak ngawlin ka om lai hi, ahihang tui taw tuiphum a hong sawl Pathian in, “Thaa sia hong paisuk in mihing khat ii tungah, hong tuaksuk na mu tu hi; ama sia Thaa Thiangtho taw hong baptize tu pa hi,’ ci in hong son zo hi.

³⁴Tuasias mu zo khi hi, tuaciangin ama sia Pathian Tapa hi ci in hong son khi hi,” John in ci hi.

Jesus ii Nungzui Phitbel teng

³⁵A zing ciangin John tua munah ama nungzuite nii taw a dinkhop kik laitak in,

³⁶Jesus hong pai mu hi. “Zia sia in Pathian Tuuno hi!” ci hi.

³⁷Nungzuite nii in tu a bangin a son za uh a, tuaciangin Jesus taw ton uh hi.



³⁸Jesus kiheak a, amate in a nung a zui a mu ciang, “Bang zong nu ziam?” ci in dongh hi. Amate in, “Koisung a teang ni ziam, Rabbi awng,” (“Syapa” a ci nopna) ci in dongh uh hi.

³⁹“Hong pai in hong en tavun,” ci in zo hi. (Tua hun sia nitak nai li bang hi) Tua ahikom amate in ama taw paikhawm a, a teenna a mu uh hi, ama taw tua ni hun om lai teng a zangh khawm uh hi.

⁴⁰Tuate sung pan khat in Simon Peter ii suapui Andrew ahi hi.

⁴¹Thakhat in a suapuipa Simon mu in hi thu ko hi. “Ko Messiah mu zo khu hi,” (Hi kammal sia Christ a cinopna hi) ci in ko hi.

⁴²Tua zawkciang ama in Jesus kungah Simon paipui hi. Jesus in ama en in, “Na min sia Simon hi a, John ii tapa ni hi, ahihang nang sia Cephas hong kina tu hi,” ci hi. (Cephas ii khiakna sia Peter ma hi a, "suangpi khat" a ci nopna hi.)

Jesus in Philip le Nathanael Sam

⁴³A zing ciangin Jesus in, Galilee ngamah pai tu in, khensat hi. Ama in Philip mu a, “Hong zui tan,” ci hi.

⁴⁴(Philip sia Andrew le Peter te ii teenna Bethsaida khua pan ahi hi.)

⁴⁵Philip in Nathanael a mu ciang, “Moses ii thukham laibu sungah a thu a at pa le, kamsangte zongh ii a thu a at pa mu zo khu hi. Ama sia Nazareth pan Joseph tapa Jesus hi,” ci in ama munah son hi.

⁴⁶“Nazareth panin na pha khat papo piang thei thong tu ziam,” ci in Nathanael in dongh hi. “Hong pai in hong en tan,” ci in Philip in zo hi.

⁴⁷Jesus in ama kungah Nathanael hong pai a mu ciangin, ama thu hi bangin son hi. “Hi sungah, Israel mi tatak khat om hi; ama in paubanna nei ngawl hi!” ci hi.

⁴⁸Nathanael in, “Bangbangin hong he ni ziam,” ci in dongh hi. “Philip ii hong sam maa theikung nuai ah na om lai in, kong mu zo hi,” ci in Jesus in zo hi.

⁴⁹Nathanael in, “Syapa awng, nang sia Pathian Tapa na hi hi! Israel Kumpipa na hi hi!” ci hi.



⁵⁰Jesus in, “Theikung nuai ah na om lai in, kong mu zo hi kong ci hu bek in, um na hi bua ziam? Hisia sangin a lian zaw lai na tam mama na mu tu hi!” ci hi.

⁵¹Tuaciang in amate tungah, “Thumaan hong son khi hi: vantung kihong na mu tu a, Mihing Tapa tungah Pathian ii vantung lalangte a tuaksuk a kaato kithalee in om na mu tu hi,” ci hi.

John 2

Cana khua ah Mopoi

¹Ni nii zawkciang Galilee ngam Cana khua ah mopoi khat om hi. Tua munah Jesus ii nu om a,

²Jesus le a nungzuite zongh, tua mopoi siim tu in, khual kihil uh hi.

³A sapittui teng a kihawm siat zawkciang, Jesus ii nu in ama munah, “Amate in sapittui nei nawn ngawl hi,” ci hi.

⁴Jesus in, “Bang vawt tu khi ziam ci sia nang hong son kul bo, ka hun hong tung ngawl lai hi,” ci in zo kik hi.

⁵Jesus ii nu in, naseamte munah, “Ama hong sawl babangin vawt vun,” ci hi.

⁶Jewte sia a zeksa kithiansua ngeinate nei uh a, tuaciang tuasia atu in tui litre zakhat bang veu a ta, tui thambeal luk om hi.

⁷Jesus in naseamte munah, “Hi thambealte tui dimh vun,” ci hi. Amate in thambeal ngong ciang in tui dimh uh a,

⁸tua zawkciang ama in, “Tu in tui hong suak tavun a, poai ukpa kungah paipui tavun,” ci hi. Tua pa kungah tui a paipui uh le,

⁹tu in tua tui sia sapittui suak zo a, ama in tep hi. Ama in hi sapittui koisung pan hong pai ci in a he bua hi (ahihang tui suakin a paipui naseamte in ahile he uh hi); tua ahikom zineipa sam a,

¹⁰“Ngualdangte in, sapittui limbel teng veu hawm masa a, leangnate ii tam mama a neak zawkciang, sapittui dang thawthong teng hawm hi. Ahihang nang na hile sapittui limbel teng tu dongin na khealsia hi!” ci hi.



¹¹Jesus in hi a masabel nalamdang lakna sia Galilee ngam Cana khua ah vawt hi; tua munah ama minthanna kilanghsak a, a nungzuite in ama um uh hi.

¹²Hisia zawkciang, Jesus le a nu, a suapuipate le nungzuite sia Capernaum khua ah pai uh a, tuak ah ni tawmvei sung taam uh hi.

Jesus Biakinnpi sungah Pai
(Mt 21.12-13; Mk 11.15-17; Lk 19.45-46)

¹³Paisan Poai hun hong theng dektak ahikomin, Jesus Jerusalem ah pai hi.

¹⁴Tuak Biakinnpi sungah khuite, tuute, inn vakhute, zuakin a om mite le sum theakte zongh sabuai ah to in a om mu hi.

¹⁵Tua ahikom ama in kivelna khauhual vawtin, nganhing theampo, tuu le khuite zongh Biakinnpi panin notkeak hi; sum theakte ii sabuai sawnthalsak a, a dangkaatangte kithethaang hi;

¹⁶tuaciangin inn vakhu zuakte munah, “Hite hiak pan heam vun! Ka Pa inn sia vanh zuakna mun suaksak heak vun!” ci hi.

¹⁷A nungzuite in, Laithiangtho ii, “Na inn ka thangaina in, ka sungah mei bangin kuang hi, Pathian awng,” a ci teng phawk uh hi.

¹⁸Jew thuneite in, “Hi bang ngamtat thei natu in, na thu ngana sia bang nalamdang lakna taw hong lak tu ni ziam?” ci in thudokna taw zo kik uh hi.

¹⁹Jesus in, “Hi Biakinnpi baltham vun, ni thum sungin sa kik tu khi hi,” ci in zo hi.

²⁰“Ni thum sungah sa kik thei tu ni ziam? Hi Biakinnpi sak natu sia kum sawmli le kum luk hai hi,” ci uh hi.

²¹Ahihang Jesus ii son biakinn sia ama ii pumpi ahi hi.

²²Tua ahikom thina panin ama a kithaw kiksak ciangin a nungzuite in, hi thu a son sia phawk kik uh a, amate in laithiangtho le Jesus ii a sonsate um uh hi.

Mihing Pianzia Jesus ii Heakna

²³Paisan Poai sungin Jerusalem ah Jesus a om laitakin, ama ii nalamdang laknate a mu uh hu in, mihing tam mamate in ama um uh hi.



²⁴Ahihang Jesus in muang ngawlin amate tungah ama le ama a ki aap ngam bua hi, banghangziam cile ama in amate he siat hi.

²⁵Ama tungah amate thu sia kuama ii son kul ngawl hi, banghangziam cile ama mama in amate ii thinsung teng a heaksa hi.

John 3

Jesus le Nicodemus

¹Nicodemus minnei Jewte lampui khat om a, Pharisee te ii pawlmi ahi hi.

²Zan khat Jesus kungah ama pai in, “Rabbi awng, nang sia Pathian ii sawl sya khat hi ci in kong he uh hi. Pathian in hong ompui buale, na vawvawt nalamdang laknate, kuama in vawt thei ngawl tu hi,” ci hi.

³Jesus in, “Thumaan hong son khi hi: nii vei a suak kik buale, kuama in Pathian Ngam mu thei ngawl tu hi,” ci in zo hi.

⁴“Bangbangin mihing a kxanthin sa khat sia nii vei suak kik thei tu ziam? A nu ngil sungah tumin nii vei suak kik thei ngawl het tu hi!” Nicodemus in ci hi.

⁵Jesus in “Thumaan hong son khi hi. Tui le Thaa taw a suak buale, kuama Pathian Ngam sungah tum thei ngawl tu hi.

⁶Nu le pate sung panin a suak mihing khat sia ci le sa mi hi a, ahihang Thaa sung panin a suak sia in thaa mi ahi hi.

⁷Note theampo na sua kik uh kul tu hi kong cina hangin, lamdang na sa heak in.

⁸Vui in a uukna po ah va hi; a vak ciang a nging na za hi, ahihang koisung pan hong pai a, koisung zuan ziam ci na he bua hi. Thaa taw a suak mihing simin, tuabang ma ahi hi,” ci in zokik hi.

⁹Nicodemus in, “Bangbangin hi thu suak thei tu ziam,” ci in dongh hi.

¹⁰Jesus in, “Nang sia Israel ngam sung sya thupi khat na hi hi, hi thu tel ngawl ni ziam?”



¹¹Keima in nang tungah thumaan hong son khi hi: ka heak uh te kong son a, ka mu uhte hong ko khu hi, tua hi napi kuama in ko ii thupuak sia saang nuam ngawl nu hi.

¹²Hi leitung nate ii thu kong son ciangin, hong um ngawl nu hi, tua ahile vantung nate ii thu kong son ciang, bangbangin hong um thei thong tu nu ziam?

¹³Tuaciangin vantung pan a hong paisuk Mihing Tapa sim ngawl kuama vantung ah kaato ngei ngawl hi,” ci in zo hi.

¹⁴Senneal ngamsung thingkhuam tungah Moses ii taungo ngul a khai bangmain Mihing Tapa zongh kikhai tu hi,

¹⁵tuasia in ama a umte theampo ii tawntung nuntakna a nga thei natu ahi hi.

¹⁶Pathian in leitung mite it mama ahikom, khat bek a nei a Tapa hong pia a, ama a um peuma in thi nawn ngawlin tawntung nuntakna a nga natu ahi hi.

¹⁷Banghangziam cile Pathian in a Tapa sia leitung ii a thukhenpa tu hi ngawl a, a hunpa tu in leitung ah hong paisak hi.

¹⁸Tapa a umte thukhenna thuak ngawl hi; a um ngawlte ahile thukhenna a thuaksa hi zo hi, banghangziam cile amate in, Pathian ii Tapa khat bek sia a um bua uh hi.

¹⁹Hisia in thukhenzia hi: khuavak sia leitung ah hong pai zo hi, ahihang mihingte in, khuavak sangin khuazing deizaw uh hi, banghangziam cile amate ngamtatnate sia hi.

²⁰A sia a vawt theampo in khuavak ngaimaw a, khuavak sungah hong pai ngawl tu hi, banghangziam cile amate ii a tatsiatnate kilanghsak nuam ngawl hi.

²¹Ahihang thumaan a seamte in, amate ii ngamtatna sia Pathian thunitna ahi hunlam tua khuavak in a lak thei natu in khuavak sungah a pai hi.

Jesus le John



²²Tua zawkciang, Jesus le a nungzuite in, Judea ngamkhen sungah hong pai uh a, tua munah amate taw hun zangh khawmin, tuiphumna pia hi.

²³Salim pan a kikhuala ngawl na Aenon ah tui tam ahikom John zongh in tui sungah tuiphumna pia hi. Mihingte in ama zuan uh a, tuaciang ama in, tuiphum hi.

²⁴(Hisia in thong sungah John a kikhum maa hun ahi hi.)

²⁵John ii nungzui pawlkhat in Jewte khat taw a zeksa kisilna huvau kam kinial uh hi.

²⁶Tua ahikom amate John kungah pai in, “Syapa awng, Jordan ngun nisuana sangah nang taw a om ngei ama thu na sason sia, na ciamtee lai ziam? Tu in ama zongh in, tuiphum a, a kuama po in, ama kung zuan tek uh hi!” ci hi.

²⁷John in, “Pathian in a pia buale kuama in, bangma nga thei ngawl hi.

²⁸‘Kei Messiah hi ngawl khi hi, ahihang ama mai ah, kei hong kipaisak khol hi’ ka ci ciang noma tatak ma keima ii tettite na hi uh hi,

²⁹Mo ahile zineipa ii neisa hi. Ahihang a kungah a ding thungai in a om zineipa ii lawmpa in zineipa aw a zaak ciangin a lungdam hi. Hisia in keima lungdamna a pawlcinna ahi hi.

³⁰Ama hong thupi vaial tu a, kei sia thupi ngawl vaial tu khi hi,” ci in zo hi.

Vantung pan Hong pai Pa

³¹Tungsang pan hong pai sia in, a kuama theampo sangin, lian zaw hi. Leitung pan hong pai sia in, leitung neisa hi a, leitung nate thuson in nei hi. Ahihang vantung pan hong pai sia in, a kuama theampo ii tungsia ahi hi.

³²Ama in a mu sate le a zaaksate son hi, ahihang ama ii thu hong puak sia kuama in saang ngawl hi.

³³Ahihang ama ii thupuak a saang pawpo in Pathian thumaan hi, ci thu kipsak hi.

³⁴Pathian ii sawlpa in, Pathian ii kammalte pau hi, banghangziam cile Pathian in ama Thaa taw kidimsak hi.



³⁵Pa in a Tapa it a, na theampo ama vaangletna sungah koi hi.

³⁶Tapa a um pawpo in, tawntung nuntakna nei hi; Tapa ii thu a ni ngawl po sia nuntakna a nei buatu a, Pathian ii daan piakna nuai ah om lai tu hi.

John 4

Jesus le Samaria Numei

¹Jesus in John sangin, nungzui tamzaw nga a, tuiphum hi ci thu Phariseete in za uh hi.

²(A tatakin Jesus in kuama tuiphum nei ngawl hi; ama nungzuite bek in tuiphum uh hi.)

³Tua ahikom Jesus in tuabang a kisonna a zaak ciang, Judea ngam nusia in Galilee ah pai kik hi;

⁴tua mun a paina lampi sia Samaria ngam a kantan tu kul hi.

⁵Samaria ngam Sychar kici khuano khat ah ama theng hi, tua khua sia Jacob ii a tapa Joseph a piak lo sia taw kikhuala ngawl hi.

⁶Jacob ii tuikhuk tua munah om a, Jesus sia a khualhawna pan toi in, tua tuikhuk hui ah to hi. Tua hun sia sunkim laitak khawng ahi hi.

⁷Samaria numei khat tui toai tu in hong pai a, tuasia ciang Jesus in ama munah, “Tui neak khat hong pia tan,” ci hi.

⁸(A nungzuite khua sungah an lei tu in pai uh hi.)

⁹Tua numei in, “Nang Jew mi hi a, kei Samaria mi khi hi — tua hi a, banghangin tui hong ngen thei ni ziam,” ci in zo hi (Jewte in Samariate ii zak hai le kuangte zangh khawm ngawl hi.)

¹⁰Jesus in, “Pathian in bang teng pia a, nang tungah tuineak tu hong ngen sia akua ziam, ci thu tel thong lete nangma in ama mun ah na ngen tu hi, tuaciang ama in nuntakna tui hong pia tu hi,” ci hi.

¹¹Tua numei in, “Syapa awng tuipeal nei ngawl ni hi, tuaciang tuikhuk sia thuk hi. Tua nuntakna tui, koisung pan nga tu ni ziam?”



¹²Hi tuikhuk hong pia sia in ih taangpupi Jacob hi; ama le a tapate le a nganno honte, a vekpi in hi tuikhuk panin dawn tek uh hi. Jacob sangin lianzaw kisa na hi ba na ziam,” ci hi.

¹³Jesus in, “A kuama po hi tui a dawn sia in, a dangko kik tu hi,

¹⁴ahihang kei ii ka piak tui a dawn peuma a dangko kik ngei nawn ngawl tu hi. Ka piak tu tui sia ama sung pan ciktui khat hong suak tu hi, tua in nuntakna a pia tui hi tu a, tuaciangin tawntung nuntakna pia tu hi,” ci in zo hi.

¹⁵“Syapa awng, tua tui kei hong pia tan! Tua hile ka dangko kik ngei nawn ngawl tu a, tui toai tu in hi sungah ka pai a kul nawn buatu hi,” tua numei in ci hi.

¹⁶“Pai in, na pasal sam tan, tuaciang hong pai kik tan,” Jesus in ci hi.

¹⁷Ama in, “Kei pasal khat zongh ka nei bua hi,” ci in zo hi. Jesus in, “Pasal khat zongh nei bong na ci sia thumaan hi.

¹⁸Pasal nga na teenpui ngei zo a, tu a na teenkhop puipa sia na pasal tatak hi ngawl hi. Thumaan hong son ni hi,” ci in zokik hi.

¹⁹“Syapa, nang sia kamsang khat na hi hunlam kong he hi.

²⁰Ka Samaritan taangpupite in, hi mualtung ah Pathian bia hi, ahihang no Jewte in Jerusalem sia koma ii Pathian biakna tu mun hi, ci nu hi,” tua numei in ci hi.

²¹Jesus in ama munah, “Hong um tan, numei awng, Pa sia hi mual tungah ahizong, Jerusalem ah ahizong mihingte ii biak ngawl tu hun hong tung tu hi.

²²No Samariate in na biak uh akua ziam, ci in he tatak ngawl nu hi; ahihang ko Jewte in, ka biak uh sia ka he uh hi, banghangziam cile ngupna sia Jewte tung panin hong pai hi.



²³Ahihang Pathian ii Thaa vaangletna taw Pa sia ahi bang tatakin ama ii dei biakna maan taw mihingte ii biak tu hun hong tung tu a, tu mama in hi sungah hong tutung zo hi.

²⁴Pathian sia Thaa hi a, mihingte in ama Thaa ii vaangletna bekma taw ama sia ahi bang tatakin bia thei hi,” ci hi.

²⁵Tua numei in, “Messiah hong pai tu a, ama hong pai ciangin, thu theampo hong son tu hi, ci in ka he hi,” ci hi.

²⁶“Nang taw a kipaupui keima in tuasia pa ka hi hi,” Jesus in ci hi.

²⁷Tua hun laitakin Jesus nungzuite hong heak kik a, Jesus sia numei khat taw thu sawson in om a mu uh ciang, amate in lamdang sa mama uh hi. Ahihang kuama in, “Nang bang nuam ni ziam,” ci in tua numei mun ahizong, “Banghangin hisia nu taw thuson ni ziam,” ci in ama mun ahizong a dongh bua uh hi.

²⁸Tuasia ciangin tua numei in a tuibeal nusia in, khua sungah heak kik a, tua lai mihingte munah,

²⁹“Keima ngamtat ngei theampo hong son sia pa en tu in hong pai tavun. Ama in Messiah ahi thei tu ziam?” ci hi.

³⁰Tua ahikom, amate in khua nusia in, Jesus kungah pai uh hi.

³¹Tua hun sungin, a nungzuite in Jesus munah, “Syapa awng, bang khat pawpo ne in!” ci uh hi.

³²Ahihang ama in, “No ii heak ngawl anneak tu ka nei hi,” ci in zo hi.

³³Tua ahikom nungzuite amate teng kidongh a, “Khat po in ama an puak zo hi tu ziam?” ci uh hi.

³⁴Jesus in, “Kei ii an sia, kei hong sawlpa ii deina ka zui tu le hong piak nasep ka zaw tu ahi hi.

³⁵Noma in “Tha li zawkciang sia anlaak hun hi,” ci thei khat nei nu hi. Ahihang lote pha tak en vun; tu in lo ante min zo a, laak hial tu bek in om zo hi, ci in kong son hi!



³⁶An la pa sia thaman kipia a, ama in tawntung nuntak natu ante kaikhawm hi; tua ahikom thaici poaipa le anlapa lungdam khawm tu hi.

³⁷‘Mihing khat in thaici poai a, a dang khat in anla hi,’ a ci sia thumaan hi.

³⁸No ii thawna ahi ngawl lo khat sungah anla tu in hong paisak khi hi; ngualdangte in tua munah seam uh a, tuaciang in no sia amate sepna tung panin hamphatna na nga uh hi,” ci hi.

³⁹Tua numei ii “Keima ngamtat ngei theampo hong son hi,” a cina hangin tua Samaria khuami tam mama in Jesus um uh hi.

⁴⁰Tua hi a Samaria mite ama kungah hong pai ciangin, amate kungah a taam natu in kunh uh hi, Jesus in tua munah ni nii taam hi.

⁴¹Ama thusonna hu in a tamzaw seseam in um uh hi;

⁴²tua numei munah amate in, “Tu in um khu hi, nang nong son sia hang hi ngawl a, koma mama in ama thuson ka zaak uh hang hi, ama leitung Hunpa ahi takpi sia ka he uh hi,” ci uh hi.

Jesus in Ulian khat ii Tapa Damsak

⁴³Tua munah ni nii a taam zawkciang Jesus vaidingin, Galilee ngam zuan hi.

⁴⁴Banghangziam cile ama mama in, “Kamsangpa khat sia ama ii ngam sungah kizakta ngawl hi,” ci hi.

⁴⁵Galilee ngam a thet ciangin, tua lai mihingte in muak uh hi, banghangziam cile amate Paisan Poai siimin Jerusalem ah pai a, poai sungah ama vawt theampo mu siat zo uh hi.

⁴⁶Tua zawkciang Jesus Galilee ngam Cana khua ah pai kik hi, tua mun sia ama in tui pan sapittui a suasakna mun ahi hi. Tua munah kumpi naseam ulian khat om a, a tapa sia Capernaum khua ah a cina hi.

⁴⁷Ama in Jesus Judea ngam panin Galilee ngam ah hong pai hunlam a zaak ciangin Jesus kungah pai a, Capernaum khua ah a thi dektak a tapa a damsak natu in ngen hi.



⁴⁸Jesus in, “No sungah nalamdang laknate le, a lamdangte na mu bua uhle, kuama in na um ngei bua tu uh hi,” ci hi.

⁴⁹Ulianpa in, “Syapa awng, ka tapa a thi maa in hong zui tan,” ci in zo kik hi.

⁵⁰Jesus in ama munah, “Pai tan, na tapa nungta tu zam!” ci hi. Tua pa in Jesus kammalte um in pai paih hi.

⁵¹Inn ah a cia lamin a naseamte in, “Na tapa nungta tu hi!” ci thu taw ama muak uh hi.

⁵²A tapa a dam zawhiat sia banghun ziam ci in amate tungah a dok ciang, “Zeini nitak sang nai khat hun in, a ci suk hong thai hi,” ci in zo hi.

⁵³Tuasia ciang Jesus ii, “Na tapa nungta tu hi,” a ci hunlian ma ahi sia a pa in phawk hi. Tua ahikom ama le a innkuanpui theampo in um uh hi.

⁵⁴Hisia in Judea pan Galilee ah hong pai zawkciang Jesus ii vawt nalamdang lakna a niina ahi hi.

John 5

Tuili ah Cidamsakna

¹Tua zawkciang, Jerusalem khua Biakna poai ah Jesus pai hi.

²Jerusalem Tuu Kongpi hui ah, talap nga taw kithua tuicing khat om hi; tua mun sia Hebrew kam in Bethzatha kici hi.

³Mittaw peang bai langngaw cina honpui khat sia, tua talapte sungah lum uh hi.

⁴Amate in tui a kilok tu ngak uh hi, banghangziam cile tu le tu in Topa ii vantung lalang khat in tua tui sungah tuaksuk a, tui sau hi. Tui kinok laitak a tuaksuk phit cina sia in, bang natna po a vei zong damthiang hi.

⁵Kum sawmthum le kum liat cina sa pasal khat tuak ah om hi.

⁶Jesus in tua pa a lup sia mu a, khua ngei mama a cinat hunlam he hi; tua ahikom, “Na dam nuam ziam?” ci in dongh hi.



⁷Cinapa in, “Syapa awng, tui a kinok laitak kei hong khiasuk tu, hi sungah kuama ka nei bua hi; tuisung theng nuamin, ka hanciam hang, ngualdang veu tuaksuk masa hi,” ci in zo hi.

⁸Jesus in “Tho in, na lupna phak luakin a, lampai in,” ci hi.

⁹Thakhat thu in tua pasalpa dam hi; ama in a phak luakin, lampai kipan paih hi. Hi thu a pian ni sia Sabbath ni ahi hi.

¹⁰Tua ahikom Jew thuneite in a kidamsakpa munah, “Tuni Sabbath ni hi, na phak na puak tu sia ih thukham taw kisi ngawl hi,” ci uh hi.

¹¹Ama in, “Hong damsakpa in ka phak ka lua tu le lampai tu in hong sawl hi,” ci in zo hi.

¹²“Hi bang ngamta a hong sawlpa akua ziam,” ci in dongh uh hi.

¹³Ahihang damsakna a ngapa in, Jesus akua cisia a he bua hi, banghangziam cile tua munah mihon khat om ahiciang Jesus kiheam hi.

¹⁴Tuasia zawkciang Jesus in Biakinnpi sungah ama mu a, “Hong ngai tan, tu in dam zo ni hi; tua ahiciang, mawna vawt nawn heak in, tua ahibuale a nasia zaw thuk thei tu ni hi,” ci hi.

¹⁵Tua zawkciang pasalpa in paisan a, ama a damsak sia Jesus ahi hunlam Jew thuneite kungah son hi.

¹⁶Tua ahikom, amate in Jesus vawtsia tu kipan uh hi, banghangziam cile ama in hi cidamsakna Sabbath ni in seam hi.

¹⁷Jesus in amate tungah, “Ka Pa a tawntungin naseam a, kei zongh ka sep kul hi,” ci in zo hi.

¹⁸Hi bang a pauna in, Jew thuneite sia Jesus thalup tu sawmsak seseam hi; Sabbath thukham paltan bek domngawlin, Pathian sia ama ii aituum Pa hi a ci ciang, ama le ama Pathian taw a za kimsak hi.

Tapa ii Thuneina



¹⁹Tua ahikom amate kungah Jesus in, “A tatak in kong ci hi: Tapa in ama thu taw bangma vawt thei ngawl hi; a Pa ii vawt a mu teng bekma vawt hi. Pa ii vawt teng Tapa zongh in vawt hi.

²⁰Pa in Tapa it ahikom ama ii vawt teng theampo ma lak hi. Hite sangin a lian zaw lai a vawtte ngawngawn lak tu a, note theampo in lamdang na sa tek tu uh hi.

²¹Pa in mithite thosak a, nuntakna a piak bangma Tapa in a piak nopte tungah nuntakna pia hi.

²²Pa in kuama tungah thukhen ngawl hi. Ama in a Tapa tungah thukhen theina thu a cing pia hi,

²³tua thu sia mihing theampo in Pa a zatak bangma in, Tapa a zatak natu ahi hi. Tapa a zakta ngawl po in ama a sawl ahi Pa sia zakta ngawl hi.

²⁴“A tatak in kong ci hi: ka kammalte za a, kei hong sawlpa a um pawpo tawntung nuntakna nei hi. Amate tungah thu kikhen ngawl tu a, thina pan nuntakna sungah theng zo hi.

²⁵A tatak in kong ci hi: a hun hong tutung tu a — hong tung zo hi — tua hun ciang a thi sate in Pathian Tapa ii aw za tu a, tuaciangin a zate hong nungta tu uh hi.

²⁶Pa mama in nuntakna ii naak ahi bangma ama Tapa zongh nuntakna ii naak suaksak zo hi.

²⁷Tuaciang ama Tapa sia thukhen theina thu pia zo hi, banghangziam cile ama Mihing Tapa ahi hi.

²⁸Hi thu tungtaang ah lamdang sa heak vun; a thi sate theampo in ama aw za tu a,

²⁹thaankuul sung panin hong pusua tu hun hong thetheng tu hi; na pha a seamsate tho in nungta tu a, siatna vawtte tho in mawsakna thuak tu hi.

Jesus atu Tetti Pannate



³⁰“Keima aituam thuneina taw bangma ka vawt thei bua hi; Pathian hong son bang bekin thukhen ka hikom, ka thukhenna maan hi, banghangziam cile, keima dei bangin sep tu ka hanciam bua a, hong sawl pa dei bangin ka seam hi.

³¹Keima le keima tetti in ka kipang le, ka son sia maan tatak hi, ci in kisaang ngawl tu hi.

³²Ahihang kei taangin tetti hong pang a dang khat om a, tuaciangin kei huvau ama sonte maan hi, ci in ka he hi.

³³John sia na kamtaite na paisakna uh pa hi a, tuaciang ama in thumaan thutak son hi.

³⁴Mihing khat ii tetti panna ka nei tu kul tuan ngawl hi; hisia noma ii na suatak thei natu ka ci bekma ahi hi.

³⁵John sia mei inn taw kibang a, kuangin taang hi, tuaciangin tawmvei sung teng ama ii khuavak sia na leaplaw nuam uh hi.

³⁶Ahihang John ii tetti panna sangin, a lianzaw kei taang a ding tu tetti khat ka nei hi: Pa ii sep tu hong piakte ka sepna po in kei tangin a pau hi a, kei sia Pa hong sawl ahi hunlam lak hi.

³⁷Kei hong sawlpa ahi Pa zongh in, keima tangin tetti pang hi. Note in ama aw na za ngei bua uh a, a maitang zongh na mu ngei bua uh hi,

³⁸tuaciangin ama ii thu hong puak sia na thin sungah na keam bua uh hi, banghangziam cile a ma ii hong puakpa na um bua uh hi.

³⁹Laithiangthote na entel uh hi, banghangziam cile tuate sungah tawntung nuntakna mu tu na ki um uh hi. Tuaciangin hi Laithiangthote mama in, keima ii thu son hi!

⁴⁰Tua hi napi nuntakna na nga natu in kei kungah nong pai nuam bua uh hi.

⁴¹“Keima in mihingte ii pokna a zong hi ngawl khi hi.

⁴²Ahihang no bangbang mihing nam ci sia le na thin sungah ah Pathian itna na nei ngawl uh kong he hi.



⁴³Pa ii thuneina tengma kengin kong pai hangin nong saang bua uh hi; ahihang in khat po in ama ii thuneina taw hong pai ciang na saang tu uh hi.

⁴⁴No khat le khat kipok tu na thangai uh hi, ahihang khat bek ahi Pathian tung pan pokna nga tu na hanciam bua uh hi; tua ahile bangbangin kei hong um thei tu nu ziam?

⁴⁵Ahihang ka Pa mai ah note maw hong pusak tu sia, kei hi tu in hong um heak vun. Na lam et uh pa Moses sia note hong mawsak tu pa ma ahi hi.

⁴⁶Moses na um takpi uh le kei nong up tu uh hi zo hi, banghangziam cile ama in keima thu at hi.

⁴⁷Ahihang ama at thute um ngawl na hi uh nungsang, kei kampau bangbangin um thei tu nu ziam?” ci in zo hi.

John 6

Jesus in Pasal Tulnga Anvaak

(Mt 14.13-21; Mk 6.30-44; Lk 9.10-17)

¹Tua zawkciang, Galilee tuili (Tiberias Tuili zongh kici) kantan Jesus pai hi.

²Mi honpi khat in a nungzui hi, banghangziam cile cina damsakna taw ama ii nalamdang laknate mu uh hi.

³Jesus sia mualno khat tungah kaato a, a nungzuite taw to khawm hi.

⁴Paisan Poai hun hong nai hi.

⁵Jesus in a kiimkot a et ciangin, mi honpi khat ama kungah hong zuan mu a, tua ahikom Philip munah, “Koisung pan hi mihingte theampo ih vaak khom natu an lei thei tu hi ziam,” ci hi.

⁶(Hi bangin a ci sia Philip a ze etna hi; ama in a vawt tu tatak sia a heak khol sa hi.)

⁷Philip in, “Mihing sim ii tawmno tek a neak khom tu bek zongh ngun dangka zanii vaal taw anluum lei kul tu hi,” ci in zo hi.

⁸A nungzuite sung pan a dang khat Simon Peter ii suapuipa Andrew in,



- ⁹“Hi sungah om patangno khat in, mangtaang anluum nga le ngasa nii nei hi. Ahihang tuateng sia hi mitheampo atu in, kicing ngawl het tu hi,” ci hi.
- ¹⁰Jesus in amate tung ah “Mihingte tosak vun,” ci hi. (Tua munah lopa tam om hi.) Tua ahikom mihing theampo to siat uh hi; pasal 5,000 bang pha uh hi.
- ¹¹Jesus in anluumte la a, Pathian tungah lungdamko in, tua mun ah a to mihingteng hawm sak hi. Ama in tuabangma in ngasate zongh hawm a, amate a vekpi in a du zaza ne uh hi.
- ¹²Amate kham siat zawk uh ciang, a nungzuite munah ama in, “A neak vaal lai teng kaikhawm vun; bangma pakvawt bua tawng,” ci hi.
- ¹³Tua ahikom amate in a khopsiat uh ciangin, mihonte neak mangtaang anluum nga pan in, a bek neak vaal uh khum sawm le khum nii nga uh hi.
- ¹⁴Hi nalamdang lakna Jesus ii vawt a mu uh ciangin, tua munah a om mihingte in, “Hi sia leitung a hong pai tu Kamsangpa hi takpi hi!” ci uh hi.
- ¹⁵Amate hong pai in kumpi suaksak tu in zawthawk thu taw ama man tu kipan ahi sia Jesus in he hi; tua ahikom ama nguakin, mual tungah pai san kik hi.

Jesus Tui tungah Lampai

(Mt 14.22-33; Lk 6.45-52)

- ¹⁶Nitak sang ciangin, Jesus ii nungzuite tua tuili ah paisuk uh a,
- ¹⁷ngunkuang sungah to in, Capernaum ah tuili kantan in pai kik uh hi. Khua hong zan zo a, Jesus amate kung hong zuan ngawl lai hi.
- ¹⁸Tua hun laitak, nasia takin vuiva a, tui kilok hi.
- ¹⁹Nungzuite in kilometre 5 bang 6 bang ngunkuang a haw zawkciang, Jesus tui tungah lampai in, ngunkuang nai ah hong pai a mu uh ciang, amate lau uh hi.
- ²⁰“Lau heak vun, keima khi hi,” Jesus in ci hi.
- ²¹Tuasia ciangin amate tha lawp tak in, Jesus ngunkuang tungah kaasak uh a, amate zot nopna mun tuivaal ah thakhat thu in theng uh hi.



Mihingte in Jesus Zong

²²A zing ciangin, tuili langkhat ah a taam mihonpite in, tuamun ah ngunkuang khat bek a om hunlam phawk kik uh hi. Tua ngunkuang sungah, ama ii nungzuite taw Jesus pai khawm ngawlin amate nguak a pai hunlam phawk uh hi.

²³Topa ii lungdam a ko zawkciang mihon ii anluum neakna mun taw a kinaina tuili vaal ah, Tiberias pan hong pai ngunkuang dangte hong theng hi.

²⁴Mihonte in Jesus ahizong, ama ii nungzuite ahizong tua munah a mu ngawl uh ciang, ngunkuangte tungah kaa in, ama zong tu in Capernaum khua ah pai uh hi.

Jesus Nuntakna Anluum

²⁵Mihingte in Jesus tuili langkhat ah a mu uh ciangin, ama munah, “Syapa awng, hi sung bang hunin theng ni ziam,” ci uh hi.

²⁶Jesus in, “A tatak in kong ci ciang, kei nong zon uh sia, nalamdang ka laknate na tel uh hang hi ngawlin, anluum na du uh za a na neak uh hang ahi hi.

²⁷A sia thei an atu in, naseam heak vun; tua sangin a ki khomsuan tawntung nuntakna an atu in seam zaw vun. Hisia in Mihing Tapa ii no hong piak tu an ahi hi, banghangziam cile Pathian a Pa in, ama tungah lungkim tepteena koi zo hi,” ci in zo hi.

²⁸Tua ahikom, amate in, “Pathian in kote seam le hong oai te ka sep thei natu in bang vawt thei tu khu ziam,” ci in dongh uh hi.

²⁹Jesus in, “Pathian ii no septu a dei nasep sia, ama ii a sawlpa na up tu uh ahi hi,” ci in zo hi.

³⁰Amate in “Ko ii mu thei tu uh le nang kong up thei natu in, bang nalamdang lakna vawt tu ni ziam? Bang vawt tu ni ziam?”

³¹Laithianghto in ‘Ama in vantung panin amate neak tu anluum pia hi,’ a ci bangma in, ka taangpupite in senneal ngam sungah manna ne uh hi, ” ci in zokik uh hi.



³²Jesus in “A tatak in ka ci hi: Moses ii no hong piak anluum sia vantung pan hi ngawl hi. Vantung pan no atu anluum tatak hong pia pa sia ka Pa ahi hi.

³³Banghangziam cile, Pathian hong piak anluum sia in, hi leitung ah nuntakna a pia tu in, vantung pan hong paisuk pa ahi hi,” ci hi.

³⁴Amate in, “Topa awng, hi anluum hong pia tawntung tan,” ci in ngen uh hi.

³⁵Jesus in, “Keima in, nuntakna anluum ka hi hi. Kei kungah hong paite in, a ngilkial ngei nawn ngawl tu hi; kei hong umte in, a dangko ngei nawn ngawl tu hi.

³⁶Tu in note in kei hong mu zo napi nong um buatu uh hi, kong ci sa ahi hi.

³⁷Ka pa hong piak mihing theampo kei kungah hong pai tu hi. Kei kung hong zuan peuma ka nial ngei buatu hi,

³⁸banghangziam cile keima aituum deina a seam tu in vantung pan hong pai ka hi bua a, hong sawlpa deina a seam tu in, hong pai ka hi hi.

³⁹Tuaciang kei hong sawlpa ii deina sia, hong piak sa theampo sung pan khat zongh bosua ngawl het in, ni tawpkhak ni in, amate teng nuntakna sungah, ka thawsak siat tu sia ahi hi.

⁴⁰Banghangziam cile ka Pa ii deina sia, Tapa mu a, ama a umte theampo in tawntung nuntakna a nga natu ahi hi. Tuaciang ni tawpkhak bel ni in, amate nuntakna sungah ka thosak tu hi,” ci hi.

⁴¹“Keima in vantung pan hong paisuk anluum ka hi hi,” a ci hu in, mihingte in ama phunsan siasua uh hi.

⁴²Tua ahikom, amate in “Hisia pa sia Joseph ii tapa Jesus hi kana ngawl ziam? A pa le a nu ih heak hi. Tua ahile bangbang, tu in vantung pan kong paisuk hi, ci thei ziam?” ci uh hi.

⁴³Jesus in, “Noma sung tengah phun teaptup nawn heak vun.

⁴⁴Kei hong sawl Pa in kei kungah hong puak buale, kuama kei kungah hong pai thei ngawl hi; tuaciang ni tawpkhak ni ciang nuntakna sungah ama ka thosak tu hi.

⁴⁵Kamsangte in, ‘Pathian in mihing sim hil tu hi,’ ci in at zo hi. A kuama po Pa thu za a, ama kung pan a hete bek kei kungah hong pai hi.

⁴⁶Hisia ka ci ciang, khat po in, Pa mu ngei hi, cinopna hi ngawl hi; Pathian kung panin, hong pai sia bek in Pa mu ngei hi.

⁴⁷A maan takin kong ci hi: a um sia in tawntung nuntakna nga hi.

⁴⁸Keima in nuntakna anluum ka hi hi.

⁴⁹Na taangpupite in senneal ngam sungah manna ne uh hi, ahihang amate thi hi.

⁵⁰Ahihang vantung pan hong paisuk anluum sia nam tuam khat hi a, a ne peuma thi ngawl tu hi.

⁵¹Keima in vantung pan hong pai a nungta anluum ka hi hi. Khat po in hi anluum a ne le nungta tawntung tu hi. Ama ka piak tu anluum in, leitung mite nuntak thei natu a, ka piak ka taksa ahi hi,” ci in zo hi.

⁵²Hi thu in, amate sungah thin uuk a, kinialna kipansak hi. “Bangbangin hisia pa in, a taksa neak tu in, ei hong pia thei tu ziam?” ci uh hi.

⁵³Jesus in amate munah, “A maan takin kong ci hi: Mihing Tapa ii taksa na ne bua uh a, a chi na dawn bua uh le, note sungah nuntakna na nei buatu uh hi.

⁵⁴A kuama po ka taksa ne a, ka chi a dawnte in, tawntung nuntakna nga a, ni tawp khakbel ni ciangin nuntakna sungah ka thosak tu hi.

⁵⁵Banghangziam cile ka taksa sia an tatak hi a, ka chi sia dawn tu tatak ahi hi.

⁵⁶Ka taksa ne a, ka chi a dawn pawpo in kei sungah teang a, kei amate sungah ka teang hi.

⁵⁷A nungta Pa in kei hong sawl a, ama hangin, kei zongh ka nungta hi. Tuasia bangma in, kei hong ne peuma kei hangin nungta tu hi.



⁵⁸Tua hi a, hisia in vantung pan hong paisuk anluum ahi hi; na taangpupite neak anluum taw kibang ngawl hi. Amate in ne in thi veve hi, ahihang hi anluum a nete in, a tawntungin nungta tu uh hi,” ci hi.

⁵⁹Jesus in Capernaum khua synagogue ah hi teng hil hi.

Tawntung Nuntakna Kammalte

⁶⁰A nungzuite tam ma in hi thu za uh a, “Hi kihilcianna tel thei tu haksa lei hi. Akua in hi thu ngai zo thong tu ziam,” ci uh hi.

⁶¹Kuama ii son ngawl bul in, Jesus in amate ii phunna thu he ahikom, amate munah, “Hisia in, na thin uh hong kiamsak nuam ahi ziam?”

⁶²“Tua le, sonteena, Mihing Tapa sia ama om maksakna munah a paito kik mu le uh te bang na ci tu uh ziam?”

⁶³Nuntakna a pia sia Pathian ii Thaa ahi hi; mihing thahatna in mannung mama ngawl hi. No tung ah ka pau sa kammalte in nuntakna a pia Pathian ii Thaa hong tut ahi hi.

⁶⁴Ahihang no pawlkhat in um ngawl nu hi,” ci hi. (Jesus in a kipatcil pan ma, akua teng in um ngawl tu a, akua in ama leeheak tu cisia a heak sa ahi hi.)

⁶⁵Tuaciangin ama in “Ama ii tua bang ahi thei natu in, Pa in vawt buale, kuama kei kungah hong pai thei ngawl tu hi, kong cisia, hisia hang mama ahi hi,” ci thua lai hi.

⁶⁶Hisia hangin, Jesus ii nung a zuite tam mama heak kik uh a, ama taw tonkhawm nawn ngawl hi.

⁶⁷Tua ahiciang, nungzui sawm le niite munah ama in “No zongh, nong nusia nuam tu uh ziam?” ci in dongh hi.

⁶⁸Simon Peter in, “Topa, akua kung pai tu khu ziam? Tawntung nuntakna a pia kammalte nangma in na nei hi.

⁶⁹Tuaciangin nang sia Pathian kung pan hong pai, a Thiangtho Pa na hi hunlam tu in kong he uh a, kong um uh hi,” ci in zo hi.



⁷⁰Jesus in, “No sawm le nii teng, keima kong teal hi kana ngawl nu ziam? Tua hi napi, no sungah khat sia doai ahi hi,” ci hi.

⁷¹Ama in Simon Iscariot ii tapa Judas huvau son ahi hi. Banghangziam cile Judas sia nungzui sawm le nii sungah khat hi napi ama a leeheak tu pa ahi hi.

John 7

Jesus le A suapuiate

¹Tua zawkciang, Jesus Galilee ngam sungah khualhaw hi; ama in Judea ngam sungah khualhaw nuam ngawl hi, banghangziam cile, tuasung a om Jew thuneite in ama thatlum nuam uh hi.

²Buk Poai hun nai zo hi,

³tua ahikom Jesus munah a suapuite in, “, Nang nung hong zuite in na vawvawt nate hong mu thei natu, hi mun nusia in Judea ah pai tan.

⁴Ngual heak tu a nuam sia in, a sepna a sealcip bua hi. Hi bang nate seam na hi ciang na thu leitung bup in hesak lete pha hi!” ci uh hi.

⁵(A suapuiate ngangawn in ama a um bua uh hi.)

⁶Jesus in amate munah “Kei atu in a hun hong tung ngawl lai hi. Hun khat pawpo sia noma hun ahi hi.

⁷Leitung in note hong ensan thei ngawl tu hi, ahihang kei hong ensan hi, banghangziam cile, ama lampite pha ngawl hi, ci in ka son tawntung hi.

⁸Poai ah noma pai tavun. Hi poai ah kei pai ngawl tu khi hi, banghangziam cile kei atu in a hun hong tung ngawl lai hi,” ci hi.

⁹Hi teng ci in Galilee ah taam thua hi.

Jesus Buk Poai ah

¹⁰A suapuiate poai siim tu in a pai zawkciang, Jesus zongh pai hi; ahihang a kilangh ngawlin pai kuu hi.

¹¹Jew thuneite in, poai sungah ama zong uh hi. Amate in “Ama a koisung ah om ziam?” ci in dongh uh hi.

¹²Mihon sungah ama huvau kihau tek uh hi. Pawlkhat in “Ama mihing phakhat hi,” ci hi. Adangte in “Hi ngawl hi, ama in mihingte lamlak khial hi,” ci uh hi.

¹³Ahihang kuama in ama thu a kilangh in a son ngam bua uh hi, banghangziam cile amate in Jew thuneite kiita uh hi.

¹⁴Poi a lang bang a kiman zawkciang, Biakinn ah Jesus pai in hilcianna kipan hi.

¹⁵Jew thuneite in lamdang sa mama uh a, “Bangbangin hisia pa in, sang ah sinna bangma nei ngei ngawl napi hiza in he ziam?” ci uh hi.

¹⁶Jesus in, “Kei kong hil thu in keima aituum hilcianna hi ngawl a, kei hong sawlpa Pathian kung pan hong pai hi.

¹⁷Pathian dei bang a ngamta nuamte peuma in, Pathian kung pan hong pai thu ziam, tua ahibuale keima aituum thuneina taw hil khi ziam, he tu hi.

¹⁸Ama aituum thuneina taw a paupa sia, ama atu bek minthanna nga nuam a hanciam ahi hi. Ahihang a sawlpa ii minthan natu a deisakpa sia thumaan a, ama sungah leilot thu a om bua hi.

¹⁹Moses in note Thukham hong pia hi ngawl ziam? Ahihang note kuama in tua Thukham na zui bua uh hi. Kei banghangin thalup hong sawm nu ziam?” ci in zokik hi.

²⁰Mihonte in “Na sungah doai khat om hi! Akua in nang hong thatlum nuamin hanciam na ziam?” ci in zo uh hi.

²¹Jesus in, “Na lamdang lakna khat kong vawt a, lamdang mama nasa uh hi.

²²Moses in na tapate ii vunteap at natu in thu hong pia hi, (tua nasep a pan sia in Moses hi ngawl a, na taangpupite ahi hi), tua ahikom Sabbath ni in patang khat ii vunteap na at uh hi.

²³Patang khat Sabbath ni in vunteap na atsak uh ciangin, Moses Thukham paltan kisa ngawl na hi uhle, Sabbath ni in mihing khat ka dam thiangthosak hu in, banghangin kei tungah thin uuk nu ziam?



²⁴A puatham munate taw thukhennate kheal vun, thumaan munate taw thukhen vun,” ci in zo hi.

Ama Messiah ahi ziam?

²⁵Jerusalem a om mihing pawlkhat in, “Thuneite ii hanciamin a thalup nop uh sia, hisia pa hi ngawl ziam?

²⁶En vun! mipi mai ah a kilangh in a pau ciang zong, amate in ama langpanna kam bangma pau ngawl hi! Ama Messiah hi ci in amate in tel takpi ahi thei tu ziam?

²⁷Ahihang Messiah hong pai ciang ahile, ama koisung pan hong pai ci sia kuama in he ngawl tu hi. Hisia pa ahile hong paina ih he tek hi,” ci uh ih.

²⁸Jesus in Biakinnpi sungah a hil laitakin, awnging taw, “Kei hong he takpi nu ziam, tuaciang kei koisung pan hong pai ci in hong he nu ziam? Keima aituam thuneina taw hong pai ngawl khi hi. Ahizong kei hong sawlpa ahile thumaan hi. Note in ama na he bua uh hi,

²⁹ahihang keima in ka he hi, banghangziam cile, ama kung pan kong pai a, ama in hong sawl hi,” ci hi.

³⁰Tuasia ciangin amate in Jesus man tu in hanciam ahihang kuama in ama a thutha bua uh hi, banghangziam cile ama hun tung ngawl lai hi.

³¹Ahihang mihon sung pan, mihing tam mama in ama um a, “Messiah hong pai ciang, ama in hisia pa ii vawtte sangin a tamzaw nalamdang laknate, a vawt tu ziam,” ci uh hi.

Jesus A Man tu in, Biakinn cingte Kipaisak

³²Pharisee te in Jesus huvau mihonte ii kihuauna uh a zaak uh ciang, amate le thiampite in, Jesus a man tu in, biakinn cingte paisak uh hi.

³³Jesus in, “No taw tawmvei sung kong omkhawm lai tu a, tua zawkciang, kei hong sawlpa kungah ka pai tu hi.

³⁴Kei nong zong tu uh a, ahihang nong mu buatu uh hi, banghangziam cile, kei om natu munah no na pai thei buatu uh hi,” ci hi.



³⁵Jew thuneite in, amate teng kikum uh a, “Ei mu ngawl tu in, ama koisung pai sawm ziam? Ih mihingte teenna Greek khuapite ah ama pai in, Greek mite hilcian tu ziam?”

³⁶Eite in ama ih zon hang ama ih mu buatu a, ama om natu munah ei pai thei ngawl tu hong ci hi. Bang a ci nopna hi tu ziam?” ci uh hi.

Nuntakna A Pia Luituite

³⁷A thupibel ni poai khaam tawp ni in, Jesus dingto in awnging tak taw, “A kuama po a dangkote kei kungah hong pai in tui dawn taken.

³⁸Laithiangtho ii ci bangma in, kei hong um peuma in ama sung pan nuntakna a pia luitui hong luang tu hi,” ci hi.

³⁹Jesus in hi bang a pau sia ama a umte ii saan tu Thaa thu son ahi hi. Tua hun laitakin Thaa kipia ngawllai hi, banghangziam cile minthanna sungah Jesus kithosak ngawl lai hi.

Mihingte sungah Kikhenna

⁴⁰Mihon sung pan, mihing pawlkhat in, hi thu a son za a, “Hisia pa in Kamsang tatak sia hi!” ci uh hi.

⁴¹Adangte in, “Ama Messiah hi!” ci uh hi. Ahihang a dangte in, “Messiah sia Galilee pan hong pai ngawl tu hi.

⁴²Laithiangtho ii ci bangin Messiah sia David Kumpipa suan hi tu a, David teenna khua ahi Bethlehem ah suak tu hi,” ci uh hi.

⁴³Tua ahikom Jesus hangin, mihonte sungah kikhenna om hi.

⁴⁴Pawlkhat in Jesus man nuam ahihang kuama in ama a thutha bua hi.

Jew Thuneite ii Up ngawlzia

⁴⁵Biakinn cingte hong heak kik uhciang, thiampi liante le Phariseete in, “Banghangin ama hong paipui ngawl nu ziam,” ci in dongh uh hi.

⁴⁶Biakinn cingte in, “Hisia pa bangin, kuama kampau ngei om ngawl hi,” ci uh hi.

⁴⁷Pharisee te in “Ama in no zongh hong theam ahi ziam?” ci in dongh hi.



⁴⁸“Thuneite khat ahibuale Pharisee te khat in ama um hi ci in na he ngei uh ziam?

⁴⁹Hi mihonte in Moses Thukham he ngawl ahikom amate Pathian haamsiatna nuai a om hi!” ci uh hi.

⁵⁰Tua munah a om Pharisee te khat sia Jesus taw kimu tu in, a pai ngeipa Nicodemus ahi hi. Ama in a dangte munah,

⁵¹“Ih Thukham bangin ci leang, mihing khat sia bang ngamtatna teng nei ci, ih sit ih mu mateng in, ih mawsak thei bua hi,” ci hi.

⁵²Amate in, “Tua ahile pha hi. Nang zongh Galilee pan ma na hi ziam? Laithiangtho pha takin sim lete, Galilee pan kamsang hong pai ngei ngawl hi, ci in na he tu hi,” ci uh hi.

John 8

Numei le pa Palngul khialna A vawt Numei khat Kimatna

¹[Tua zawkciang ngual theampo cia siat ahihang Jesus in, Olive Mualtung ah pai hi.

²A zing ciang zing tuungin ama Biakinnpi ah pai kik hi. Mihing theampo ama ii kiim ah kikhawmtua uh a, tuaciangin ama to in amate hilcian tu in kipan hi.

³Thukham hil syate le Phariseete in, numei le pa palngul khialna a vawt laitak a mat uh numei khat hong paipui uh a, amate theampo ii mai ah, dingsak hi.

⁴Amate in Jesus munah, “Syapa awng, hi numei nu sia numei le pa palngul khialna a vawt laitakin kiman hi.

⁵Ih Thukham sungah Moses in tuabang numei khat sia suang taw denlup natu in thupia hi. Tu in bang na ci tu ziam?” ci uh hi.

⁶Amate in hi bangin a ci uh sia Jesus a mawsiat thei natu in a aitaana hi. Ahihang ama kunin, a khutme taw lei ah lai at hi.



⁷Amate in tuabangin thu a dok ciang, ama hong dingmaam a, amate tungah, “Note sungah akua po ahizong, mawna a vawt ngei ngawl het sia in ama suang taw deang masa taken,” ci hi.

⁸Tua zawkciang, kunsuk kikin lei ah lai at kik hi,

⁹Amate in hi thu a zaak ciangin, nusia siat uh hi, khanghaam teng masa in, khat zawkciang khat a vekpi cia uh hi. Tua munah a ding lai numei le Jesus bek taang hi.

¹⁰Jesus dingmaam in, ama munah, “Amate koi sung om siat ziam? Nang hong mawsak tu kuama om nawn ngawl ziam,” ci hi.

¹¹“Kuama om nawn ngawl hi, Topa awng,” ci in ama in zo hi. “Tua ahile pha hi, kei zongh in, kong mawsak bua hi. Pai tan, ahihang mawna vawt kik nawn heak in,” ci hi.]

Leitung Khuavak ahi Jesus

¹²Jesus in Phariseete tungah, “Keima in leitung khuavak ka hi hi. Kei hong zuite peuma in nuntakna khuavak nei tu a, khuazing sungah a vak ngei buatu hi,” ci hi.

¹³Pharisee te in, “Tu in nangma le nangma tetti a kipang hi bek ni hi; na sonte in bangma a maan thu lak tuan ngawl hi,” ci uh hi.

¹⁴Jesus in, “Hi ngawl hi, keima le keima tetti kipang hi leng zong, ka thuson teng maan hi, banghangziam cile koisung pan kong pai a, koisung zuan tu khi ziam ka kihe hi. Kei koisung pan hong pai a, koisung zuan tu ci sia note in nong he bua uh hi.

¹⁵Note in mihing pianzia taw bek thu na khen uh hi; kei in kuama tungah thu ka khen bua hi.

¹⁶Ahihang tuabangin vawt tu hi leng zong, ka thukhenna maan tu hi, banghangziam cile hisia sungah kei nguak hi ngawl khi hi; kei hong sawl Pa in keima taw om khawm hi.

¹⁷No thukham sungah tetti nii in a thukim ciang amate son sia maan hi, ci in ki at hi.



¹⁸Keima le keima tetti in ka kipang a, hong sawl Pa zongh in kei luangin tetti hong pang hi,” ci in zo hi.

¹⁹“Na pa koisung om ziam?” ci in amate in dongh uh hi. Jesus in, “Keima ahizong, ka Pa ahizong, na he bua uh hi. Keima hong he leute ka Pa zongh he tu nu hi,” ci in zo hi.

²⁰Jesus in hi thute theampo, Biakinn sung sumpi bungte koina inndoi sungah a hilcian laitakin a son ahi hi. Tuaciangin ama kuama in a man bua uh hi, banghangziam cile ama hun a tung bualai hi.

Ka Paina ah Note hong Pai thei ngawl tu

²¹Tuaciang Jesus in, “Kei ka pai tu hi; nong zong tu uh a, ahizong na mawnate sungah na thi tu uh hi. Ka pai natu munah, na pai thei buatu uh hi,” ci hi.

²²Tua ahikom Jew thuneite in, “Ama paina ah ei pai thei ngawl tu hi ci hi. Ama le ama kithatlum tu a cinopna ziam,” ci uh hi.

²³“Note in hi leitung, hisung a nuai sang ii neisa na hi uh hi, ahihang kei sia tungsang pan hong pai ka hi hi. No sia hi leitung pan na hi uh a, ahihang kei sia hi leitung pan ka hi bua hi.

²⁴Na mawnate sungah thi tu nu hi, kong ci sia tua hang ahi hi. Tuaciangin, ‘Keima sia keima ka hi hi,’ ci in nong um bua uh le, na mawnate sungah na thi tu uh hi,” ci in Jesus in zo hi.

²⁵“Nang akua ni ziam,” ci in amate in dongh uh hi. Jesus in, “A kipatciil pan ma a, kong son sa sia ka hi hi.

²⁶No ii tungtaang ah ka pau tu tam mama, kong mawsak natu tam mama ka nei hi. Ahizong kei hong sawlpa thumaan a, tuaciangin, ama tung pan ka zaak sa teng bekma leitung ah ka son hi,” ci in zo hi.

²⁷Jesus in Pa thu sawson ahi hunlam amate in a tel bua uh hi.

²⁸Tua ahikom ama in amate tungah, “Mihing Tapa na lapto uh ciangin, ‘Keima sia Keima ka hi’ hunlam na he tu uh hi; tuasia ciangin, keima aituam



thuneina taw bangma vawt ngawlin, Pa hong sawl bang bekin, pau ka hi sia nong he tu uh hi.

²⁹Tuaciangin kei hong sawlpa in kei hong ompui hi; kei nguak hong nusia bua hi. Banghangziam cile, ama diksakte ka vawt tawntung hi,” ci hi.

³⁰Jesus ii a son thu teng a za mihing tam mama in ama um uh hi.

Thumaanna in hong Suaktasak tu

³¹Tua ahikom Jesus in, ama a umte munah, “Ka hilciannate na ni uh le, ka nungzui tatakte na hi uh hi;

³²thumaan thutak na he tu a, tua thumaan thutak in no hong suaktasak tu hi,” ci hi.

³³Amate in, “Ko in Abraham suante hi a, kuama ii sila hi ngei ngawl khu hi. Tua hi a, ‘Na suakta tu uh hi’ na ci sia bang na ci nopna ziam,” ci in zo hi.

³⁴Jesus in, “A maan takin kong ci ciang, a kuama po mawna a vawt theampo in mawna ii sila ahi hi.

³⁵Sila khat sia baangkua khat ii neisa hi tawntung ngawl hi, ahihang tapa khat ahile baangkua khat ii neisa hi tawntung hi.

³⁶Tapa in hong suaktasak le na suakta takpi tu uh hi,

³⁷Abraham suan le paalte na hi uh sia kong he hi. Tua hi ka sap kei hong thatlum nuamin hanciam nu hi, banghangziam cile ka hilcianna na saang thei bua tu uh hi.

³⁸Kei sia ka Pa ii hong lak bang teng ka pau a, no sia na pa uh hong sawl teng na seam uh hi,” ci hi.

³⁹Amate in, “Ko ii pa sia Abraham hi,” ci in zo uh hi. Jesus in, “Abraham ii tate hi takpi leute, ama ii vawt teng ma vawt tu nu hi.

⁴⁰Pathian tung pan ka zaak thumaan sia ma kong son hi bek napi, hong thatlum nuamin hanciam nu hi. Abraham sia hi bangin ngamta ngawl hi!



⁴¹Note in, na pa sep teng naseam uh hi,” ci in zokik hi. “Pathian bekma, kote ii khat bek ka nei ka Pa uh hi a, tuaciangin ko sia ama tate tatak ka hi uh hi,” ci in amate in zo uh hi.

⁴²Jesus in, “Pathian sia na Pa uh ahi takpi le kei nong it natu ahi hi, banghangziam cile, Pathian kung panin kong pai a, tu in hi munah ka om hi. Keima aituam thuneina taw hong pai ka hi bua a, ama ii hong sawl ka hi hi.

⁴³Ka son teng banghangin tel ngawl nu ziam? Banghangziam cile kong thu puak sia na ngai zawk ngawl uh hang ahi hi.

⁴⁴No sia na pa uh doaimangpa ii tate na hi uh a, tuaciangin na pa uh deinate na zui nuam uh hi. A kipatciil pan kipan, ama sia mi thatpa hi a, thumaan sangah a pang ngei bua hi, banghangziam cile, ama sungah thumaan thutak a om bua hi. Ama in leilot thu a son ciangin, ama pianzia bangin pau ahi lel hi, banghangziam cile, ama sia leilot thei pa hi a, leilotna theampo ii a pa ahi hi.” ci hi.

⁴⁵Ahihang kei in thumaan kong son hi, tua hu in nong um bua uh hi.

⁴⁶No sungah akua in kei sia mawnei hi ci in hong lak thei tu nu ziam? Thumaan a son ka hi nale, banghangin hong um ngawl nu ziam?

⁴⁷Pathian kung pan hong pai pa in, Pathian kammalte ngai hi. Ahizong no sia Pathian kung pan na hi bua uh a, tua hu in hong ngai nuam ngawl tu nu hi,” ci hi.

Jesus le Abraham

⁴⁸Amate in Jesus munah, “Nang sia Samaria mi hi a, doai vei ni hi kong ci uh sia, maan hi ngawl khu ziam,” ci uh hi.

⁴⁹Jesus in, “Doai vei ngawl khi hi, ka Pa ka thasia hi, ahihang note in kei nong thasia bua uh hi.

⁵⁰Keima atu in patoaina ka zong bua hi. Ahihang tuabangin zong a, kei hong panpui in thu a khen khat om hi.

⁵¹A maan takin kong ci hi: a kuama po ka hilcianna a nite, a thi ngei buatu hi,” ci in zo hi.

⁵²Amate in, “Tu in nang sia doai vei na hi hunlam kong telcian uh hi! Abraham thi a, kamsangte zongh thi hi, tua hi napi na hilcianna a nite peuma thi ngei ngawl tu hi, ci ni hi.

⁵³Ih pa Abraham thi zo hi; Abraham sangin lianzaw khi hi a ci nuam na hi bua na ziam? Tuaciangin kamsangte zongh thi zo hi. Nang akua kisa ni ziam,” ci uh hi.

⁵⁴Jesus in, “Keima le keima ki thupisak tu hi leng, tua ki thupisakna sia, bangma manh nei ngawl tu hi. Kei hong thupisak sia in ka Pa hi a, ka Pathian uh hi, na ci sia pa ma ahi hi.

⁵⁵No sia ama na he ngei bua uh hi, ahihang kei in ka he hi. Ama he ngawl khi hi, ci tu hi leng, noma bangma in a leilot ka suak tu hi. Ahihang ama ka heak hi a, tuaciangin ama ii thu ka ni hi.

⁵⁶Na pa uh Abraham in kong pai hun a mu tu sia lawp hi; ama in mu zo a, a lungdam hi,” ci in zo hi.

⁵⁷Amate in ama munah, “Nang kum sawmnga zongh pha ngawl lai ni hi — Abraham sia mu zo ni ziam?” ci uh hi.

⁵⁸A maan takin kong ci hi, “Abraham pian ma in, ‘Keima’ ka om zo hi,” ci in Jesus in zokik hi.

⁵⁹Tuasia ciangin, amate in a den natu suangte zam ahihang Jesus kiheam a, Biakinnpi nusia hi.

John 9

Jesus in Mittaw sa a Suak khat Damsak

¹Jesus in lam a papai laitakin, mittaw sa a, a suak, pasal khat mu hi.

²A nungzuite in, “Syapa awng, akua mawna hangin, ama mittaw sa a suaksak ziam? Ama mawna hang ziam maw, a nu a pate ii mawna hang ziam,” ci in ama dongh uh hi.



³“Ama mawnate hang ahizong, a nu a pa mawnate hang ahizong, a mittaw hi ngawl hi. Pathian vaangletna ii nasepna ama sungah a kimu thei natu in a mittaw hi.

⁴Sun hun laiteng in kei hong sawlpa na ih sep kul tu hi; kuama ii na a sep thei ngawl zan hun hong theng tu hi.

⁵Leitung ah ka om laiteng, leitung atu in khuavak ka hi hi,” ci in zo hi.

⁶Hi bangin a ci zawkciang, Jesus in lei ah cilsia a, ciltee taw buan thau hi; ama in mittawpa ii mit buan noisak a,

⁷tuaciang, “Pai tan a, Siloam Tuicing ah na mai phiat tan,” ci hi. (Siloam cisia “Kisawl” a ci nopna hi). Tua ahikom mittawpa pai in, a mai a phia zawkciang, khuamu thei sa in hong heak kik hi.

⁸Tuasia ciangin a innpaamte le ama khutdaw ngenin a omlai a mu ngeite in, “Hisia pa sia khutdaw ngenin a to bul pa hi ngawl ziam?” ci uh hi.

⁹Pawlkhath in, “Ama hi peu hi,” ci hi, ahihang a dangte in “Ama hi ngawl hi; a kibanpui khat hi bek hi,” ci uh hi. Tua ahikom pasalpa in, “Keima in tuasia pa khi hi,” ci hi.

¹⁰“Tu in khua na mu thei sia bangbang tatak ziam?” ci in amate in dongh uh hi.

¹¹Ama in “Jesus a kici pa in buan tawm vawt a, ka mitte hong noisak zawkciang, Siloam ah na maiphiat tan, hong ci hi. Tua ahikom, pai a, ka mai ka phia zawk po ciangin, khua ka mu thei hi,” ci in zo hi.

¹²Amate in “Ama koisung ah om ziam,” ci in dongh uh hi. Ama in “He ngawl khi hi,” ci hi.

Phariseete in A Damna Thu kan

¹³Tuaciang amate in a mittaw ngeipa sia, Phariseete kungah paipui uh hi.

¹⁴Jesus in buan vawt a mittawpa a damsak ni sia Sabbath ni ahi hi.



¹⁵Tuasia ciang Phariseete in a mit khua a mu kik theina thu, pasalpa munah dongh kik uh hi. “Ama in ka mite buan hong noisak hi; ka mai ka phiat a, tu in khua ka mu thei hi,” ci in ama in zo hi.

¹⁶Phariseete pawlkhat in, “Hi bang a vawt, mihing in, Pathian kung pan hi thei ngawl tu hi, banghangziam cile ama in Sabbath Thukham ni ngawl hi,” ci uh hi. Ahizong a dangte in, “Bangbangin mawnei mi khat in, hi bang nalamdang laknate vawt thei tu ziam,” ci uh hi. Tuaciangin amate sungah pawl kikhenna khat hong om hi.

¹⁷Tua ahikom, Phariseete in pasalpa khatvei ma dongh kik uh hi. “Ama in na khuamu ngawl na pan hong damsak hi, ci ni hi — ama huvau bangbangin na ngaisun ziam?” “Ama kamsang khat hi,” ci in pasalpa in zokik hi.

¹⁸Jew thuneite in, bang po ahizong hisia pa mittaw a, tu in khuamu thei hi ci thu, a pa le a nu samin a dok phot ngawl peuma in a um nuam bua uh hi;

¹⁹tuaciangin, “Hisia na tapa ahi ziam? Ama mittaw sa in suak hi ci nu hi; tua ahile tu in bangbang khua mu thei ziam?” ci in dongh uh hi.

²⁰A pa le a nu in “Ama ka tapa uh hi a, tuaciangin mittaw sa in suak ci sia he khu hi.

²¹Ahihang bangbangin tu in khua mu thei a, akua in damsak ziam ci zongh ka he bua uh hi. Ama dongh vun; a khan haam zo hi, ama ii thu ama in hong zo thei hi!” ci uh hi.

²²Jew biakna thuneite ii lungkimna sa khat om a, a kuama po Jesus sia Messiah hi ci in a um peuma, synagogue sung pan kihawlkhia tu hi, ci ahikom amate in Jew biakna thuneite a kiitak hu in, a nu le a pa hi bangin ci ahi hi.

²³Tua hangin, “Ama a khan haam zo hi, ama dongh vun!” a nu le a pa in ci hi.

²⁴Mittaw sa a suakpa sia, a nii veina sam kik uh a, ama tungah, “Thumaan ka son tu hi, ci in Pathian mai ah kiciam in! Nang hong damsak pa sia, mimaw khat hi ci in he khu hi,” ci uh hi.



²⁵“Ama mimaw ahile ahi ngawl he ngawl khi hi. Ka heak thu khat sia: ka mittaw ngei a, tu in khua ka mu hi,” ci in zokik hi.

²⁶“Ama in bang hong law ziam? Na khua mu ngawl na pan, bangbangin hong damsak ziam?” ci in dongh uh hi.

²⁷“Kong son zo a, noma in nong ngai bua uh hi. Banghangin za kikik nuam nu ziam? No zongh ama nungzuite suak nuam nu ziam?” ci in ama in zo hi.

²⁸Amate in ama lang a, “Tuasia pa nungzui sia nangma ni hi; ko sia Moses ii nungzuite khu hi.

²⁹Pathian in Moses paupui hi, ci in he khu hi; ahizong ziasia pa ahile koisung pan hong pai ziam, ci sia he beak ngawl khu hi!” ci uh hi.

³⁰Tua pa in, “Bangza in a lamdang thu ziam! Ama koisung pan hong pai ziam ci in he ngawl nu hi, ahihang ama in kei sia ka khua mu ngawl na pan hong damsak zo hi.

³¹Pathian in mimawte ii ngetna ngai ngawl hi, ci in ih he hi; ama in ama zakta a, a sawl na bang a seamte ngetna bek ngai hi.

³²Simlei pianciil pan kipan, mittaw sa in a suak khat sia khua muna a pia kuama ii thu kiza ngei ngawl hi.

³³Hisia pa Pathian kung pan hong pai hi buale, bangma vawt thei ngawl tu hi,” ci in zo hi.

³⁴Amate in, “Nang sia mawna sungah suak a, mawna sung ma a khangto ni hi — ko hong hil tu in hanciam ni ziam?” ci in zo uh hi. Tuaciangin amate in ama synagogue panin hawlkhia uh hi.

Thaa Thu ah Mittaw

³⁵Jesus in bang thu teng piang ci in a zaak zawkciang, tuasia pa mu a, “Mihing Tapa na um ziam,” ci in dongh hi.

³⁶“Syapa awng, ka up thei natu in ama akua ziam hong son tan,” ci in zo hi.

³⁷Jesus in, “Ama mu zo ni hi, ama sia tu laitak nangma taw a kipaupui pa ma ahi hi,” ci hi.



³⁸“Ka um hi, Topa awng!” ci in Jesus mai ah ama khupdin hi.

³⁹Jesus in, “Mittawte khua a mu natu le khuamute mittaw a sua natu in, hi leitung ah thukhen tu in kong pai hi,” ci hi.

⁴⁰Ama kung a om Pharisee mi pawlkhat in, tu bang a pau za a, “Koma zongh mittaw hi hong ci nuam na hi bua na ziam?” ci in dongh uh hi.

⁴¹Jesus in, “Mittaw hizaw le uh te, a maw ngawl hi tu nu hi; ahihang khuamu thei khu hi, ci na hi uh kom, a maw nginge hi lai nu hi,” ci hi.

John 10

Tuucingpa Thusontena

¹Jesus in, “A tatak in kong ci hi: tuukhawk sungah a kongpi pan tum ngawlin leidang pan kaato a, a tum sia nguta le ngualsuam phalakte ahi hi.

²Kongpi pan a tum sia in, tuucingpa ahi hi.

³Kongkha cingpa in ama atu kongkha honsak hi; ama neisa tuute a min taw a sam ciangin a tuute in ama aw a za uh hi, tuaciang ama in, a tuute lampui in pusua pui hi.

⁴A tuute a pusuasak zawkciang, ama in a mai ah pai in, tuute in a nung zui uh hi, banghangziam cile a tuute in a aw tel uh hi.

⁵A tuute in ngualdang khat zui ngawl tu uh hi; tuabang mihing dang khat ii kung panin a tuute taikeak zaw tu hi, banghangziam cile tuute in tua pa aw a tel bua uh hi,” ci hi.

⁶Jesus in hi thu sontena son ahihang, amate in bang ci nuam ziam, a tel zo bua uh hi.

Tuucing Pha Jesus

⁷Tua ahikom Jesus in hi bangin ci kik hi. “A tatak in kong ci hi: Kei sia tuute ii kongpi ka hi hi.

⁸Kei mai a hong pai sa theampo sia ngutate le phalakte ahi uh hi, ahihang tuute in, amate aw a ngai bua uh hi.



⁹Keima in kongpi ka hi hi. A kuama po kei hong tawnin a tumte kingum tu hi; amate sungtang si, pusuak si tu a, nganthana mun mu tu hi.

¹⁰Ngutapa ahile a ngu tu, a that tu le a susia tu bekma hong pai hi. Kei kong paina sia, nuntakna na nga natu uh le a kicing nuntakna na nga thei natu uh ahi hi.

¹¹“Keima in tuute atu in a nuntakna a pia ngam tuucing pha ka hi hi.

¹²Tuu neipa a hi ngawl, a kicial tawm tuucingpa ahile ngiapui hong pai a mu ciangin, a tuute nusia in taisan hi; tua ahikom ngiapui in a tuute man a, kithethaangsak hi.

¹³A kicial tawm pa banghangin tai ziam cile, ama sia a kicialtawm hi bek a, tuute a awlmawk bua hi.

¹⁴⁻¹⁵Keima in tuucing pha ka hi hi. Pa in kei hong heak bangma in kei zongh in Pa ka he hi, tuasia bangma in ka tuute ka he a, amate in kei hong he uh hi. Amate atu in ka nuntakna ka pia ngam hi.

¹⁶Hi tuukhawk sung a om ngawl keima neisa tuu dangte zongh omlai hi. Tuate zongh ka paipui kul hi; amate in ka aw hong ngai tu a, tuucingpa khat ii a cin tuuhon khat suak tu uh hi.

¹⁷“Ka nuntakna ka nga kik natu in, keima nuntakna pia ngam ka hikomin, Pa in kei hong it hi.

¹⁸Kuama in kei kung pan ka nuntakna hong laaksak bua hi. Keima uuk thu in ka piak ahi hi. Ka piak tu le ka laak kik tu sia keima thu ahi hi. Hisia in ka Pa ii ka sep tu hong thupiak ahi hi,” ci hi.

¹⁹Tuaciang hi kammalte hu in mihingte sungah kikhenna om leleau hi.

²⁰Amate sung pan tam mama in, “Ama doaivei hi! Ama a thin am hi! Banghangin a thuson ngangai nu ziam?” ci uh hi.

²¹Ahihang a dangte in, “Doaivei pa khat in hi bangin thuson thei ngawl hi! Banghang doai khat in mittawte khua mu kiksak thei tu ziam,” ci uh hi.

Jesus Kisaang ngawl



- ²²Phalbi hun hi a, Biakinnpi Aapna Poai Jerusalem ah kivawt sung ahi hi.
- ²³Jesus sia Biakinn huang sung Solomon Talap sungah a vavak laitakin,
- ²⁴mihingte a kiim ah hong kikhawm uh a, amate in, “Bangtan vei thinngim hong pia tu ni ziam? Thumaan tatak sia hong son tan: nangma sia Messiah na hi ziam,” ci uh hi.
- ²⁵Jesus in “Hong son zo khi hi, ahihang kei hong um nuam ngawl hi tu nu hi. Ka Pa thuneina taw ka septe in keima luangin pau hi;
- ²⁶ahihang nong um bua tu uh hi, banghangziam cile note in ka tuute na hi bua uh hi,
- ²⁷Ka tuute in ka aw hong ngai hi; amate ka he a, amate in ka nung hong zui uh hi.
- ²⁸Amate tawntung nuntakna ka pia a, tuaciangin amate a thi ngei nawn buatu hi. Kuama in ka kung pan amate hong sut zo buatu hi.
- ²⁹Ka Pa hong piak sia na theampo sangin thupi zaw a, kuama in Pa ii kepcingna sung panin a sut zo buatu hi.
- ³⁰“Pa le keima in pumkhat ka hi uh hi,” ci in zo hi.
- ³¹Tuaciang mihingte in ama a den natu suang tawm kik uh hi.
- ³²“Ka Pa ii sep tu hong piak na pha tam mama noma mai ah kong seam zo hi; tuate sung pan koi sia ka sep hu in, suang taw den hong sawm nu ziam?” Jesus in ci hi.
- ³³Amate in “Na pha khat pawpo nasep hu in, hong deang nuam hi ngawl khu hi. Ahihang Pathian min na daisak hu in suang taw hong deang nuam khu hi! Nang sia mihing ma hi napi nangma le nangma Pathian in kivawt tu na hanciam hi,” ci in zo kik uh hi.
- ³⁴Jesus in “Na Thukham sungah ki at a, Pathian in ‘Note sia pathiante hi nu hi’, hong ci hi.
- ³⁵Laithiangtho ii ci sia a tawntungin maan hi, ci in ih he hi; tuaciang Pathian ii thupuak a nga tua mite sia 'pathiante' ci hi.



³⁶Kei ka hile Pa in hong teal a, leitung ah hong paisak hi. Tua ahile, Pathian Tapa khi hi ka ci ciang, bangbangin Pathian min daisak hi hong ci thei nu ziam?

³⁷Pa ii seam a hong oaite seam ngawl ka hile, tuasia ciangin hong um heak vun.

³⁸Ahihang tuate ma ka seam nale, Pa sia kei sung om a, kei sia Pa sungah om ka hina thu na up thei natu in, kei nong um bua uh zong, ka septe beak na up tu uh ahi hi,” ci in zo hi.

³⁹Khat vei ma amate in Jesus man tu in hanciam ahihang, amate khut taw kipeal hi.

⁴⁰Tua zawkciang Jesus in, Jordan ngun kantan in John ii tuiphumna munah pai kik a, tua munah taam hi.

⁴¹Mihing tam mama ama kungah hong pai uh hi. Amate in, “John in nalamdang laknate vawt ngawl hi. Ahihang hisia pa thu ama son theampo maan hi,” ci uh hi.

⁴²Tuaciang in, tua munah a om mihing tam mama in ama um uh hi.

John 11

Lazarus Thina

¹Bethany ah a teang Lazarus a kici pa a cina hi. Tua Bethany sia Mary le a suapuinu Martha ii teenna khua ahi hi.

²(Hi Mary sia Topa ii peang tungah sathau namtui buak a, a sam taw a nawlsak sia nu ahi hi. A cina Lazarus sia ama ii suapuipa ahi hi.)

³Unau numeite nii in Jesus tungah zacak a, “Topa awng, na it na lawmpa a cina hi,” ci uh hi.

⁴Jesus in a zaak ciangin, “Hi natna sia Lazarus ii thi natu natna hi ngawl hi; hi thu in Pathian minthan natu a piang hi a, tuaciang, tua tungtawnin Pathian Tapa ii minthanna a nga natu ahi hi,” ci hi.

⁵Martha, a suapuinu le Lazarus te sia Jesus in it hi.



⁶Tua hi napi Lazarus ii natna thu a zaak zawk zong, ama omna tua munah ni nii taam lai hi.

⁷Tua zawkciang a nungzuite munah, “Judea ngamah pai kik tawng,” ci hi.

⁸A nungzuite in, “Syapa awng, tu nung hiat ma in, tua munah mihingte in suang taw hong deang nuam zo hi; pai kik sawm lai ni ziam?” ci in zo uh hi.

⁹Jesus in, “Ni khat sungin, nai sawm le nai nii om hi kana ngawl ziam? Tua ahikom, a kuama po sun tangin a vak peuma in lutu ngawl hi, banghangziam cile ama in hi leitung khuavak mu hi.

¹⁰Ahihang ama in zan in a vak le lutu tu hi, banghangziam cile ama in khuavak nei ngawl hi,” ci hi.

¹¹Jesus in hi teng ci a, tua zawkciang, “Ih lawmpa Lazarus mutthip zo hi, ahihang pai in ka phong tu hi,” ci lai hi.

¹²Nungzuite in, “Topa awng, ama mutthip ahile a cidam tu hi,” ci in zo uh hi.

¹³Jesus in Lazarus thi zo hi a ci nopna ahihang amate in mut ngeina bang sia son sa uh hi.

¹⁴Tua ahikom, Jesus in thiang takin, “Lazarus thi zo hi,

¹⁵ahihang, no atu ka ngaisut ciang, na up thei natu in, ama taw ka omkhop ngawl sia ka lungdam hi. Ama kungah ih pai tu hi,” ci hi.

¹⁶Thomas (Apeang cina) in, nungzui pui te munah, “Ama taw ih thi khop thei natu in Syapa taw tek tawng!” ci hi.

Thawkikna le Nuntakna ahi Jesus

¹⁷Jesus hong thet ciang, Lazarus a kivui zawk ni li pha zo, ci in mu hi.

¹⁸Bethany sia Jerusalem panin kilometre 3 zongh a pha bua hi,

¹⁹tuaciingin, Judea mi tam mama Martha le Mary taw kimu tu in pai a, amate ii suapuipa thi hu in heeneam tu in pai uh hi.

²⁰Martha in Jesus hong pai hi ci in a zaak ciang, ama muak tu in pusuak hi, Mary ahile inn sungah om hi.



²¹Martha in Jesus munah, “Topa awng, hi sungah hong om hile te, ka suapuipa thi ngawl tu hi!” ci hi.

²²“Ahizong tu mama zongin, Pathian tungah na nget pawpo hong pia tu, ci in ka he hi,” ci hi.

²³“Na suapuipa sia nuntakna sungah tho tu hi,” Jesus in ci hi.

²⁴“Ni tawpkhak ni ciang ama nuntakna sungah tho tu hi, ci in ka he hi,” Martha in ci hi.

²⁵Tua nu munah Jesus in, “Keima in thawkikna le nuntakna ka hi hi. Kei hong um peuma a thi zongin a nungta tu hi;

²⁶tuaciang kei hong um a, a nungta theampo a thi ngei buatu hi. Hi thu na um ziam,” ci hi.

²⁷Ama in, “Um khi hi, Topa awng! Leitung ah hong pai tu, Pathian Tapa Messiah na hi sia hong um khi hi,” ci in zo hi.

Jesus Kap

²⁸Martha in hi teng a ci zawkciang heak kik in, a suapuinu Mary sam tuam hi. “Syapa hi sungah om hi, ama in nang hong kan hi,” ci in son hi.

²⁹Mary in hi thu a zaak ciang dingto a, ama taw kisi tu in manlang tak pai hi.

³⁰(Jesus khua sung hong theng ngawl lai a, Martha taw a kimuna munah omlai hi.)

³¹Mary heneam a innsung a omte in ama dingin manlang tak pusuak a mu uh ciang ama zui uh hi. Thaan ah a kap tu in pai tu hi vak ci in ngaisun uh hi.

³²Jesus omna ah Mary theng hi, ama a mu po ciangin, a peang ah bok hi. Ama in “Topa awng, hi sungah hong om hile te ka suapuipa thi ngawl tu hi!” ci hi.

³³Jesus in ama kakap a, ama taw a om mihingte zongh, kakap in a om mu hi; a thin hong suu a, khuangai mama hi.

³⁴“Ama koisung ah phum nu ziam?” ci in dongh hi. Amate in “Topa awng, hong pai in hong en tan,” ci in zo uh hi.



³⁵Jesus kap hi.

³⁶Mihingte in, “En vun, bangza in ama it ziam!” ci uh hi.

³⁷Ahihang amate sung pan pawlkhat in, “Mittawpa zongh khuamusak hi ngawl ziam? Lazarus sia a thi natu pan keam thei ngawl ziam?” ci uh hi.

Lazarus Nungtasak

³⁸Jesus hong khuangai kik mama a, suanghawng khat ii kongvang ah suangtum khat taw a kikhak thaan khat ah pai hi.

³⁹“A suang lakeak vun!” ci in Jesus in thu pia hi. Mithipa suapuinu Martha in “Topa awng, uih zo tu hi. Ama a kiphum zawk ni li pha zo hi,” ci in zo hi.

⁴⁰Jesus in ama munah, “Na um le Pathian vminthanna na mu tu hi ci in hong son hi ngawl khi ziam?” ci hi.

⁴¹Amate in suangtum lakeak uh hi. Jesus in khuadak to a, “Pa awng, ka thu nong ngai hu in lungdam kong ko hi.

⁴²Nong ngai tawntung hi, ci in kong he hi, ahizong tu bangin ka ci sia hi sungah om mihingte atu in kei nong sawl ahi hunlam a up thei natu ka deina ahi hi,” ci hi.

⁴³Hi bang teng a ci zawkciang, awnging tatak taw au in, “Lazarus awng, hong pusuak tan!” ci hi.

⁴⁴Ama hong pusuak a, a khut le a peangte thaanpuan taw kitun in, a maitang puan khat taw kituam hi. “Phelsak vun, ama paisak vun,” ci in Jesus in sawl hi.

Jesus Thalup A kisawmna

(Mt 26.1-5; Mk 14.1-2; Lk 22: 1-2)

⁴⁵Mary kungah haw tu a pai mihing tam mama in Jesus vawt teng mu uh a, ama um uh hi.

⁴⁶Ahihang pawlkhat Phariseete kungah heak kikin, Jesus sep teng ko uh hi.

⁴⁷Tua ahikom Pharisee te le thiampi liante Council taw kisitua in, “Bang law tu hi ziam? Hisia pa ii nalamdang lakna a vawt theampo en vun!



⁴⁸Hi bangin ama ih tha thong le, mihing theampo in ama um tu a, Rome thuneite in ih Biakinn le ih minam hong susia tu hi,” ci uh hi.

⁴⁹Amate sung pan tua kumin Thiampi Lianbel ahi Caiaphas kici sia in “Bang mawmawt nu ziam!

⁵⁰Minam bup ii lal tu taangin, pasal khat sia mihingte atu thi le note atu phazaw ahi hunlam phawk ngawl nu ziam?” ci hi.

⁵¹A tatak sia ama uuk thu taw, hi bangin pau ahi bua hi; tua taangin, ama tua kum sung Thiampi Lianbel ahi bangma, Jesus sia Jew mite atu in thi tu ci sia a son khol ahi zaw hi,

⁵²tuaciang, amate atu bek hi ngawlin, Pathian mihing a kithethaang theampo pumkhat suak tu in kaikhop natu zongh a sonkhol ahi hi.

⁵³Tua ni pan kipan Jew thuneite in Jesus a thalup natu, ngealnate nei uh hi.

⁵⁴Tua ahikom Jesus, Judea ngam ah a kilangh takin, khualhaw nawn ngawl hi, ahihang tua mun nusia a, senneal ngam nai Ephraim a kici khua khat ah pai in, a nungzuite taw taam hi.

⁵⁵Paisan Poai hun hong nai a, poai hun maa in ngamsung pan mihing tam mama kithiansua zeksa vawt tu in, Jerusalem ah pai uh hi.

⁵⁶Amate in Jesus zawzong uh hi, tuaciang, Biakinnpi sungah a kikhoptua uh laitakin khat le khat, “Bang na ngaisun uh ziam? Poai sungah hong pai ngawl het tu hi ngawl ziam?” ci in kidongh uh hi.

⁵⁷Thiampi liante le Phariseete in Jesus a kimat thei natu in ama omna a he a om le thu hong puak nanak tu nu hi, ci in thupia uh hi.

John 12

Jesus Bethany ah Sathau Kinoai

(Mt 26: 6.13; Mk 14.3-9)

¹Paisan Poai tu ni luk a kisap ciangin, Bethany ah Jesus pai a, thina pan a thawsak Lazarus ii inn ah tung hi.

²Amate in ama atu nitak an tua munah huansak uh hi. Martha in anhuan hu hi; Lazarus sia Jesus taw sabuai kiim ah a tokhawmte sungah khat hi.



³Tua zawkciang Mary in a manham mama nard sathau namtui litre lang hong paipui a, Jesus peang tungah buakin, a sam taw nawlsak hi. Sathau namtui in innsung bup zel hi.

⁴Jesus nungzuite khat ahi Judas Iscariot — ama a leeheak tu pa — in,

⁵“Banghang in sathau namtui sia ngun dangka zathum taw zuakin mizawngte kipia ngawl ziam?” ci in dongh hi.

⁶Ama hi bang a pau sia a zawngte awlmaw takpi hi ngawl a, ngutapa khat ahihang ahi hi. Ama in sumip keam a, sumte ama atu in a laku tawntung pa ahi hi.

⁷Ahihang Jesus in, “Ama koi po vun! Ka kiphum ni ciang atu in, ama ii neisunte keamsak po vun.

⁸Mizawngte sia no taw omkhawm tawntung tu hi, ahihang no taw kei omkhawm tawntung ngawl tu khi hi,” ci hi.

Lazarus A Kithasawmna

⁹Bethany ah Jesus om hi ci in a za mihing tam mama te in tua munah hong pai uh sia Jesus hang bek zongh hi ngawlin, thina pan Jesus ii a thawsak Lazarus mu nuam a, hong pai ahi uh hi.

¹⁰Tua ahikom thiampi liante in Lazarus zongh thalup natu vaihawmna nei uh hi,

¹¹banghangziam cile ama tung thupiang hu in Jew mi tam mama te in amate nial a, Jesus um uh hi.

Jerusalem ah Mualsuana taw Tumna

(Mt 21.1-11; Mk 11.1-11; Lk 19: 28-40)

¹²A zing ciangin Paisan Poai siim tu hong pai mihonpi in, Jerusalem khua ah Jesus hong pai tu thu za uh hi.

¹³Tua ahikom amate in palm thingbaakte la in, ama muak tu in pai uh a, “Pathian pok vun! Topa min taw hong paipa, Pathian in thupha pia taken! Pathian in Israel Kumpipa thupha pia taken!” ci in au uh hi.



¹⁴Jesus in laa khat mu in a tungah to hi, Laithiangtho in hibang in a at sia a tangtun natu ahi hi.

¹⁵“Zion khuapi awng lau heak in! Hi sungah na kumpipa hong pai a, laano tungah to hi.”

¹⁶A nungzuite in hi thu sia tua hun laitakin a tel bua uh hi; ahihang Jesus minthanna sungah a thawtosak ciangin, Laithiangtho in ama huvau, hi bangin at a, amate in hi bangin ama atu in vawt hi, ci sia phawk kik uh hi.

¹⁷Lazarus thaan sung pan sam a, thina pan a thawsak lai in, Jesus taw a omkhawm mihingte in bang thu piang ci thu kiko tek uh hi.

¹⁸Tuasia hu in mihon in ama muak uh hi — banghangziam cile hi nalamdang a vawt sia amate in za zo uh hi.

¹⁹Phariseete in khat le khat, “Na mu bang hi, eite in ih zo zo peuma bua hi! En vun, leitung bup in ama zuzui zo hi!” ci uh hi.

Greek te Pawlkhat in Jesus Zong

²⁰Jerusalem ah poai sung teng biakpiakna nei tu in a paite sungah Greek te pawlkhat om hi.

²¹Amate in Philip (Galilee ngam Bethsaida khua mi) kungah pai in, “Syapa awng, ko Jesus mu nuam khu hi,” ci uh hi.

²²Philip pai in Andrew kungah a son zawkciang, a nii in pai a Jesus munah son uh hi.

²³Jesus in, “Tu in Mihing Tapa ii a lian minthanna a saan tu hun hong tung zo hi.

²⁴A tatakin kong ci hi: zungtaang tang khat lei ah taak a, a thi phot buale tang khat nguak hi top hi. A thi le a tang tam piangsak hi.

²⁵A kuama po ama ii nuntakna a it sia in taan tu hi; ama ii nuntakna hi leitung ah a ngaimaw peuma in, tawntung nuntakna a keam ahi tu hi.



²⁶Ka naseam pa sia keima omna po ah keima taw a om tu in, kei atu hong sepsak nuam peuma in kei hong zui kul tu hi. Tuaciang kei atu a seam khat pawpo sia ka Pa in patoai tu hi.

Jesus in A Thi natu Son

²⁷“Tu in ka thinngim hi — tua hi a, bang son tu khi ziam? ‘Pa awng, hi hun sia kei tungah hong tungsak heak in,’ ci tu khi ziam? Ahihang kong paina thu in hi thuakna hun a nawk tu ma in hong pai ka hi hi.

²⁸Pa awng, nangma min thangsak in!” ci hi. Tuaciang vantung pan aw nging khat in, “Minthangsak zo khi hi, tuaciang in minthangsak lai tu khi hi,” ci hi.

²⁹Tua munah ding mihonte in tua awnging za a, amate sung pan pawlkhat in vanto hi ci a, a dangte in, “Vantung lalang khat in ama paupui hi!” ci uh hi.

³⁰Ahihang Jesus in, “Hi aw sia kei atu hi ngawlin no atu in hong nging ahi hi.

³¹Tu hun sia hi leitung ii thukhen thuak tu hun ahi hi; tu in hi leitung a ukpa kisanthal tu hi.

³²Leitung pan hong kilapto ciangin mihing theampo ka kungah ka kai tu hi,” ci hi.

³³(Hi bangin a pau sia ama thuak tu thina zia a sonna ahi hi.)

³⁴Mihonpi in “Ih Thukham in Messiah nungta tawntung tu in hong son hi. Tua ahile bangbang in Mihing Tapa kilaamto tu hi, ci thei ni ziam? Hi Mihing Tapa sia akua ziam?” ci in zo uh hi.

³⁵Jesus in zokik a, “Khuavak sia no sungah tawmvei hong om lai tu hi. Khuazing sia no tungah hong thet man ngawl natu in, khuavak na nei uh laitakin, na paina lampi ah paisuak tavun; banghangziam cile khuazing sungah a pai khat in a zot natu mun a he bua hi.

³⁶Tuaciang khuavak na nei uh laitak, khuavak ii mihingte na sua natu in, khuavak na um vun,” ci hi.

Mihingte Thu Up thei ngawlzia

Jesus in hi teng a ci zawkciang amate paisan in kiheam hi.



³⁷Nalamdang lakna hi zaata amate mai ah vawt zo hi napi amate in ama a um bua uh hi,

³⁸Tua in kamsangpa Isaiah ii sonna teng a tun natu ahi hi: “Topa awng, ko ii son thu sia akua in um na ziam? Topa in a kuate tungah a vaangletna pualaak ziam?”

³⁹Tua ahikom amate in um zo ngawl hi, banghangziam cile Isaiah in hi bangin ci lai hi,

⁴⁰“Pathian in amate ii mit tawsak a, a thinsung khacipsak hi, tua in a mit khua amu ngawl natu, a thinsung taw a tel ngawl natu, tuaciang amate in kei kungah hong heak kik in, keima ii amate kadam sakna tu ahi hi, Pathian in ci hi.”

⁴¹Isaiah ii hi bangin a ci sia Jesus ii vaangletna mu a, ama huvau a son hang ahi hi.

⁴²Tua zawk ngawngawn ciang zong Jew thuneite tam mama in Jesus um uh hi; ahihang Phariseete ii synagogue pan amate a hawlkeak ngawl natu in, a kilangh taakin a upna thu a son ngam bua uh hi.

⁴³Amate in, Pathian ii lungkimna sangin, mihingte lungkimna dei zaw uh hi.

Jesus Kammal taw Thukhenna

⁴⁴Jesus in awnging takin, “A kuama po kei hong umte in kei bek hong um hi ngawl a, kei hong sawlpa zongh um ahi hi.

⁴⁵A kuama po kei hong mu te in kei hong sawlpa zongh a mu ahi hi.

⁴⁶Kei hong um peuma khuazing sungah a omcip ngawl natu in leitung ah khuavak bangin kong pai zo hi.

⁴⁷Kong thupuak sia za napi a ni ngawlte tungah thu ka khen buatu hi. Leitung ngum tu in kong pai a, a tungah thukhen tu in kong pai bua hi.

⁴⁸Kei hong nial a, kong thupuak a saang ngawl peuma ama tungah thukhen tu khat a nei hi. Ka pau sa kammal te in ni tawpkhak ni ciangin ama ii thukhenpa hi tu hi!



⁴⁹Hi thu in thumaan hi, banghangziam cile keima aituam thu neina taw ka pau bua hi, ahihang kei hongawl Pa in ka son tu le ka pau tu thu hong pia hi.

⁵⁰Tuaciangin ama ii thupiakna in tawntung nuntakna hong puak hunlam ka he hi. Tua ahiciang ka thuson teng sia Pa ii son a hong sawl teng ahi hi,” ci hi.

John 13

Jesus in Ama Nungzuite Peang Silsak

¹Tu in Paisan Poai vawt tu ni khat samh lai hi. Jesus in leitung nusia in, Pa kung a pai natu hun hong thet sia he hi. Ama neisa leitung mihingte it tawntung a, a tawp dongin it hi.

²Jesus le a nungzuite nitak an nekhawm uh hi. Simon Iscariot ii tapa Judas thin sungah Jesus leeheak tu ngaisutna Doaimangpa in khum zo hi.

³Jesus in Pa ii vaangletna a cingin ama tungah a piak sia he hi; ama in Pathian kung pan hong pai a, Pathian kung a zot kik tu hunlam he hi.

⁴Tua ahikom sabuai pan dingin a puan tungsilh a suut zawkciang a kawng ah dial khat vet hi.

⁵Tua zawkciang kuang khat sungah tui a khomkhat sung a, nungzuite peang silsak tu le, a kawng a dial sia taw nawlsak tu in kipan hi.

⁶Simon Peter kung hong thet ciangin, “Kei peang hong silsak tu ni ziam? Topa awng,” ci hi.

⁷Jesus in “Tu a ka sep sia tu laitakin tel ngawl na hi uh hang nidang ciangin na tel tu uh hi,” ci in zo hi.

⁸Peter in “Bang hun po ahizong kei peang hong silsak ngei ngawl tu ni hi!” ci hi. “Na peang ka sil buale ka nungzui na hi nawn buatu hi,” ci in Jesus in zokik hi.

⁹Simon Peter in, “Tua ahile Topa awng, ka peang bek hong silsak heak in! Ka khut le ka lu zongh hong silsak tan!” ci hi.



¹⁰Jesus in, “A kibual sa pawpo sia thiang siat a, a peang sim ngawl sil a kul bua hi. No teng sungah khat sim ngawl thiango nu hi,” ci hi.

¹¹(Jesus in ama a leeheak tu pa sia he zo hi; tua hu in, “Khat sim ngawl thiango nu hi” ci hi.)

¹²Jesus in a peang uh a silsak zawkciang a puantungsilh silh kikin a tona ngei sabuai ah to kik hi, “Tu a, no tung a kong vawt teng na tel uh ziam?” ci in dongh hi.

¹³“Sya awng, Topa awng, hong ci nu hi, tuabang nong ci uh sia maan hi, banghangziam cile keima tuasia ka hi hi.

¹⁴Kei na Topa le na Syapa in na peang uh kong silsak zawk bek ahi hi. Noma khat le khat tuabangin, na kisilak vun.

¹⁵No ii ettee tu ngamtatna khat kong koisak hi, tua hi a kei ii no tungah kong hi bang tatakin, no zongh khat le khat tungah na ngamta tavun.

¹⁶A tatak in kong ci hi: sila khat sia a Topa sangin lianzaw ngawl a, kamtaipa khat sia a sawlpa sangin lianzaw ngawl hi.

¹⁷Tu in thumaan he zo na hi uhkom, seam paih le uh te bangza in a lungdamte hi tu nu ziam!

¹⁸“Na vekpi atu ka sonna hi ngawl hi; ka teal sate keima in ka he hi. Ahihang Laithiangtho sungah, ‘Kei taw ankuang uumkhawmpa in kei hong langpan hi,’ a ci sia a tun kul tu hi.

¹⁹‘Keima sia Keima ka hi’ hunlam hi thu a pian ciang nong up natu in hi thu a pian maa, tu in kong son hi.

²⁰A tatak in kong ci hi: ka sawlpa a saang pawpo in, kei zongh hong saang ahi hi; kei hong saang pawpo in kei hong sawlpa a saang ahi hi, > > ci hi.

Jesus in A kileeheak natu Sonkhol

(Mt 26.20-25; Mk 14.17-21; Lk 22.21-23)

²¹Jesus in hi teng a ci zawkciang ama a thin ngim mama a, a langh taakin hi bang pau hi, “A maan tak kong ci hi: no sung pan khat in kei hong leeheak tu hi,” ci hi.



²²A nungzuite khat le khat ki en a, ama ci nop sia akua ziam ci in lungmang mama uh hi.

²³Jesus ii it nungzui khat sia Jesus taw a kicial in to hi.

²⁴Simon Peter in tua pa neak pheii a, “Akua ci nuam ziam dongh in,” ci hi.

²⁵Tua ahikom tua nungzuipa in Jesus kung neak zaw in, “Akua ziam? Topa awng,” ci in dongh hi.

²⁶Jesus in, “Anluum bekkhat sia metui sungah papin ka piak tu sia pa hi,” ci in zo hi. Tua ahikom ama in anluum bekkhat la a, metui sungah a pap zawkciang, Simon Iscariot ii tapa Judas pia hi.

²⁷Judas in anluum a saan po ciangin, ama sungah Satan tum hi. Jesus in ama munah, “Na vawt tu po vawt memeang tan!” ci hi.

²⁸Jesus in banghangin hi bangin ci ziam ci sia sabuai ah a to teng in a tel bua uh hi.

²⁹Judas sia sumip keampa ahikom poai sungah amate kikap tu vanhte lei a sawl ziam, tua ahibuale a zawngte bang khat po piasak ziam, hi tu hi ci in nungzuite pawlkhat in ngaisun uh hi.

³⁰Judas in anluum saang a, thakhat in pusuak paih hi. Tua hun sia zan hun ahi hi.

Thukham Thak

³¹Judas ii paisan zawkciang Jesus in, “Tu in Mihing Tapa ii minthanna kilangh hi; tu in Pathian minthanna ama tungtawn in kilangh hi.

³²Tuaciang ama tungtawn in Pathian minthanna kilangh ahile, Pathian in Mihing Tapa minthanna ama mama sungah kilanghsak tu a, thakhat thu in tuabangin vawt tu hi.

³³Ka tate awng, kei sia no taw ngei hong omkhawm nawn ngawl tu khi hi. Note in kei nong zong tu uh hi; ahihang, Jew thunei mihingte munah ka ci sa bangin, ‘Kei pai natu munah note nong pai thei buatu hi,’ ci sia tu in kong son hi.



³⁴Tuaciang, tu in thukham thak khat kong pia hi: Khat le khat na ki it vun. Note kong it bangma in, khat le khat na ki it tu uh kul hi.

³⁵Khat le khat na ki it uh le mihing theampo in, no sia ka nungzuite na hina uh hong he tu hi,” ci hi.

Peter ii Nial tu Jesus in Sonkhol

(Mt 26.31-35; Mk 14.27-31; Lk 22.31-34)

³⁶“Koisung pai tu ni ziam Topa?” ci in Simon Peter in dongh hi. “Tu in kei pai natu ah nong zui thei buatu hi, ahihang nidang ciangin hong zui tu ni hi,” ci in Jesus in zo hi.

³⁷“Topa awng, banghangin, tu laitak nang hong zui thei ngawl tu khi ziam? Nang atu thi tu in ka kinging hi!” Peter in ci hi.

³⁸Jesus in, “Kei atu thi tu in kinging tatak ni ziam? A maan tak kong ci hi: ak khuan maa in ka he bua hi ci in thum vei hong nial tu ni hi,” ci in zo hi.

John 14

Pa kung Thet natu Lampi Jesus

¹Jesus in, “Thinngim in thin kiam heak vun,” ci hi. “Pathian um vun a, kei zongh hong um tavun.

²Ka Pa inn sungah inndoi tuam tam mama om hi, no atu omna pua khol tu in, ka na pai tu hi. Tuabang hi buale hi bangin kong son buatu hi.

³No atu pai in, omna ka pua khol zawkciang kong heak kik tu a, keima omna ah na om thei natu in ka kungah kong la tu hi.

⁴Ka pai natu mun hong then thei lampi sia na he uh hi,” ci hi.

⁵Thomas in, “Topa awng, koisung zuan tu ni ziam ci in hong he ngawl khu hi; tua ahiciang tua mun thet thei natu lampi sia koibangin he thei tu khu ziam?” ci in dongh hi.

⁶Jesus in, “Keima in lampi ka hi hi, thumaan thutak ka hi hi, nuntakna ka hi hi; kei taw ngawlin kuama in Pa kung a theng buatu hi.

⁷Tu in kei hong he zo na hi uh ciang, ka Pa zongh na he tu uh hi, tuaciang tu pan kipan ama na he uh a, na mu zo uh hi,” ci hi.



⁸Philip in, “Topa awng, Pa hong lak tan; tuasia ka kispah uh a vekpi hi,” ci hi.

⁹Jesus in, “No teng taw khuangei mama omkhawm zo khi hi; tua hi napi Philip awng, hong he ngawl lai ni ziam? Kei hong mu po in Pa a mu zo hi. Tua ahile banghangin ‘Ko, Pa hong lak tan’ ci ni ziam?”

¹⁰Philip awng, Pa sungah kei ka om a, kei sungah Pa a om hunlam um ngawl ni ziam?” ci hi. Tua zawkciang Jesus in a nungzuite munah, “No tung a kong son kammalte keima sung pan hong pusuak ahi bua hi. Ka sungah a om Pa in ama nasep a seam hi.

¹¹Pa sungah kei ka om a, kei sungah Pa a om hi kong ci ciangin, hong um tavun. Tua ahibuale zong ka sep ka vawtte hangin kei hong um tavun.

¹²A maan takin kong ci hi; kei hong um peuma in, ka vawt teng a vawt tu hi — hi hi, a thupi zaw zongh vawt tu hi, banghangziam cile kei Pa kung ka zuan tu hi.

¹³Tuaciangin keima min suang a nong nget pawpo, Tapa tungtawn in Pa minthan natu in kong vawtsak tu hi.

¹⁴Na khat pawpo kei min suangin nong ngen uh le kong vawtsak tu hi.

Thaa Thiangtho Piak tu Kamciam

¹⁵“Nong it uh le ka thupiakte na ni tu uh hi.

¹⁶Pa munah ka ngen tu a, ama in Hupa a dangkhat hong pia tu hi, ama in no taw a tawntungin hong omkhawm tu hi.

¹⁷Ama in Pathian ii thumaan thutak hong pualaak Thaa ahi hi. Leitung in ama saang thei ngawl hi, banghangziam cile ama mu thei ngawl a, he ngawl hi. Ahihang no in ama na he uh hi, banghangziam cile ama note taw omkhawm in, note sungah hong om hi.

¹⁸“Ka pai ciangin, no nguak kong nusia buatu hi; note kungah kong heak kik tu hi.



¹⁹Tawmvei zawkciangin, leitung in kei hong mu nawn ngawl tu hi, ahizong note in nong mu tu uh hi; tuaciang keima nungta ka hikom no zongh na nungta tu uh hi.

²⁰Tua ni hong thet ciang, kei Pa sungah om a, no sungah kei ka om bangma in, kei sungah no na om uh hunlam na he tu uh hi.

²¹“A kuama po ka thupiakte saangin, thu a nite sia kei hong it ahi hi. Ka Pa in kei hong it pawpo a it tu hi; kei zongh in ama ka it tu a, ama tungah keima le keima ka kilaak tu hi,” ci hi.

²²Judas (Judas Iscariot ahi ngawl sia) in, “Topa awng, bangbangin leitung ah kilaak ngawlin ko kungah hong kilaak tuam thei tu ni ziam?” ci hi.

²³Jesus in, “A kuama po kei hong it sia in ka hilcianna a zui tu hi. Ka Pa in tua pa it tu a, ka Pa le keima in ama kungah pai in, ama taw ka teang tu uh hi.

²⁴A kuama po kei hong it ngawl sia in ka hilcianna a zui buatu hi. Na zaak sa uh hi hilcianna sia kei aa hi ngawl a, kei hong sawlpa Pa kung pan hong pai ahi hi.

²⁵“No taw kong omkhop lai ma in, hi thu hong son zo khi hi.

²⁶Pa ii keima min taw hong paisak tu Thaa Thiangtho ahi Hupa in na theampo hong hil tu a, kong son teng zongh hong phawk kiksak tu hi.

²⁷“Thin nopna kong nusiat hi; keima aituam neisa thinnopna kong pia hi. Leitung ii piak bangin kong pia bua hi. Thinngim in thinkiam heak vun; lau heak vun.

²⁸‘Hong nusiat tu khi hi, ahihang no kung hong pai kik tu khi hi, ka ci sia na za zo uh hi.’ Nong it uh le Pa kung ka zot tu sia na lungdam tu uh hi; banghangziam cile ama kei sangin lianzaw hi.

²⁹Hite theampo a pian maa tu laitakin hong son khol zo khi hi, hong pian takpi ciangin, na up thei natu uh ahi hi.



³⁰No taw hun sauzaw thuson thei nawn ngawl tu khi hi, banghangziam cile hi leitung a ukpa hong pai hi. Ama in kei tungah bangma vaang hong nei bua hi,

³¹ahihang Pa ka itna sia, leitung in a heak kul tu hi; tua hu in ama ii thu hong piak babang in, na theampo ka vawt hi. “Hong pai tavun, hi mun panin pai tawng.

John 15

Jesus Sapitngui Tatak

¹“Keima in Sapitngui tatak ka hi a, ka Pa in huan neipa ahi hi.

²Ama in kei tungah a nga ngawl baak theampo sattan tu hi, sapit nga a ngana baak pawpo a thiantho natu le tamzaw a nga thei natu ho in heu tu hi.

³Note sia hilcianna kong piakte hangin hong kithiangthosak zo hi.

⁴Kei sungah hong om po tavun, no sungah kong om tu hi. A baak khat nguak bek a nga thei bua hi; a ngui taw a kizop ciang bekin nga thei hi. Tuasia bangma in kei sungah nong om bua uh le a nga na nga thei buatu uh hi.

⁵Keima in sapitngui hi a, note in a baakte na hi uh hi. A kuama po in kei sungah hong om a, ama sungah kei ka om le ama in nga tam mama nga tu hi; banghangziam cile kei ngawl taw bangma na vawt thei buatu uh hi.

⁶A kuama po kei sungah hong om ngawlte thingbaak bangin kivawk in, kocip hi; tuabang a baakte kitawm in meimang sungah kikum a, kaangtum hi.

⁷Kei sungah nong om uh a, ka kammalte note sungah a om le tuasia ciang na uuk pawpo nong ngen tu a, na nga tu uh hi.

⁸A nga tam na nga uh ciang ka Pa minthanna kilanghsak hi; tuabangin keima nungzuite na suak uh hi.

⁹Pa ii kei hong it bangma in note kong it hi; kong itna sungah kip vun.

¹⁰Ka Pa thupiakte ni a, ama itna sungah ka kip bangma in, kong thupiakte na ni uh le kong itna sungah na kip tu uh hi.



¹¹“Note sungah ka lungnopna a om natu le na lungnopna uh a kicin natu in hi thu kong son hi.

¹²Kong thupiak in hi thu ahi hi: keima ii kong it bangma in, khat le khat na ki it vun.

¹³Mihing khat ii a lawmte atu a nei thei a lianbel itna in amate atu ama ii nuntakna a piakna ahi hi.

¹⁴Tuaciangin, ka thupiak bangin na seam uh le, ka lawmte na hi uh hi.

¹⁵Naseamte awng, kong ci nawn bua hi, banghangziam cile naseampa in a Topa in bangteng vawt ziam, ci in a he bua hi. Tuasia taangin lawmte awng kong ci hi, banghangziam cile Pa kung pan ka zaak thu theampo kong son zo hi.

¹⁶Note in kei nong teal bua uh hi; keima in note a kikhomsuan a nga namte tam mama na nga natu in, kong teal a, nasep kong pia hi. Tua ahikom Pa in kei min taw, ama tungah na nget uh po, hong pia tu hi.

¹⁷Tua hi a, hi thu in note tungah kong thupiak ahi hi: khat le khat na ki it tavun.

Leitung ii Etsatna

¹⁸“Leitung in note hong ensan le keima hong ensan masa ahi sia phawk tavun.

¹⁹Note leitung neisa hi le uh te leitung in ama aituam bangin hong it tu hi. Ahihang hi leitung panin note kong teal zo a, note leitung neisa na hi nawn bua uh hi; tua hu in leitung in note hong ensan hi

²⁰Kong son sa thu phawk tavun: ‘Silapa in a Topa sangin lianzaw ngawl hi.’ Amate in kei hong vawtsia le no zongh hong vawtsia tu hi; amate in ka hilna a mang uhle no hilna zongh zui tu hi.

²¹Ahihang amate in hite theampo note tungah hong vawt tu hi, banghangziam cile note keima neisa na hi uh hi; banghangziam cile amate in kei hong sawlpa he ngawl hi.



²²Amate kungah pai in thuson ngawl hi leng amate in mawna a nei buatu uh hi; tu in ahile amate a mawna huvau in kamzon natu a nei nawn bua uh hi.

²³Kei hong ensan sia in ka Pa zongh ensan ahi hi.

²⁴Ngualdang ii vawt ngei ngawlte amate sungah vawt ngawl hi leng amate in mawna a nei buatu uh hi; tu in ahile amate in ka sep teng hong mu zo a, kei le ka Pa hong ensan khawm hi.

²⁵Ahizong, amate Thukham sungah, ‘Amate in thu om ngawlpi in, kei hong ensan hi,’ ci in a ki at sia, a tangtun natu hi bang teng a pian kul hi.

²⁶“Thaa ahi Hupa hong pai tu a — Pathian ii thumaan thutak le Pa kung pan hong paipa sia hong pualaak tu hi. Pa kung panin ama kong puak tu a, ama in kei thu hong son tu hi.

²⁷Tuaciang note zongh in kei thu na son tu uh hi, banghangziam cile a kipatciil panin note kei taw nong omkhawm zo uh hi.

John 16

¹“Na upna uh na thasua ngawl natu in, hi teng hong son khi hi.

²Note synagogue pan hong kihawlkhia tu a, tuaciang note hong thatlum khat po in tuabang a ngamtat sia Pathian atu naseam in a kingaisut hun hong theng tu hi.

³Mihingte in note tungah hi bang a ngamtat natu te sia amate in Pa ahizong kei ka hizong hong heak ngawl hang ahi hi.

⁴Ahihang hi bang kong sonna in, amate atu hite a sep tu hun hong thet ciang kong son sa teng na phaw thei natu uh ahi hi.

Thaa Thiangtho Nasepna

“A kipatciil in hite kong son bua hi, banghangziam cile keima in note taw ka omkhawm hi.

⁵Ahihang tu in hong sawlpa kung zuan tu khi hi, tua hi napi kuama in ka pai natu mun nong dongh bua uh hi.



⁶Tuaciang tu in hi thu kong son zawkciang na thinsung uh heena taw kidim hi.

⁷Ahihang thumaan thutak hong son khi hi: kei va pai leng no atu phazaw hi, banghangziam cile kei ka pai bua le Hupa note kungah hong pai ngawl tu hi. Ahihang kei ka pai le ama no kungah kong paisak tu hi.

⁸Tuaciangin ama hong pai ciangin, mawna thu, a maan thu le Pathian thukhenna huvau a ngaisutna uh te maan ngawl hi ci in leitung mihingte tungah kilanghsak tu hi.

⁹Amate in mawna huvau ngaisun khial hi, banghangziam cile amate in kei hong um ngawl hi.

¹⁰Amate in a maan thu zongh ngaisun khial hi, banghangziam cile kei Pa kung ka zuan tu a, note in nong mu nawn buatu uh hi;

¹¹tuaciang amate in, thukhenna thu telkhial hi, banghangziam cile hi leitung a ukpa tungah thu kikhen zo hi.

¹²“Thu son tu tam ma ka nei lai hi, ahihang tu laitak ahile note thuciin tu in tam lei tu hi.

¹³Ahizong Thaa hong pai ciangin, Pathian thumaan thutak hong pualaak pa in thumaan thutak theampo sungah lam hong pui tu hi. Ama in ama aituam thuneina taw hong son ngawl tu hi, ahizong ama zaak teng hong son tu a, hong piang tu thute hong son tu hi.

¹⁴Ama in kei minthanna hong pia tu hi, banghangziam cile ka sonte la tu a, tuateng note tungah hong son tu hi.

¹⁵Ka Pa neisa theampo keima neisa hi; tua hu in Thaa in ka piakte la in no tungah hong son tu hi,” kong ci hi.

Heena le Lungdamna

¹⁶“Tawmvei no sungin kei nong mu nawn buatu uh a, tuaciang tawmvei zawkciangin nong mu tu uh hi,” ci hi.



¹⁷A nungzuite pawlkhat in amate sungah kidongh uh a, “Bang ci nuam hi tu ziam? Tawmvei sung eite in ama mu nawn ngawl tu a, tawmvei zawkciang ih mu tu hi; tuaciang ama in, ‘Banghangziam cile Pa kungah ka pai tu hi’ ci si hi.

¹⁸“Tawmvei sung’ a ci sia bang a ci nopna ziam? Ama in bang thu teng son ci sia ih he bua hi!” ci uh hi.

¹⁹Jesus in ama thu dongh nuam ahi sia tel ahikom amate tungah, “ ‘Tawmvei sungin nong mu buatu uh a, tuaciang tawmvei zawkciang in nong mu tu uh hi,’ hong ci khi hi. Noma sung a na kidok thu in tu sia ahi ziam?

²⁰A tatak in kong ci hi: note au in kap tu nu hi, ahihang leitung lungdam tu hi; note hee tu nu hi, ahihang na heena uh sia lungdamna hong suak tu hi.

²¹Numei khat nau a sua tu ciangin, hee hi, banghangziam cile a ngim natu hun hong theng ahi hi; ahihang nau hong sua ciang ama in a ngimna teng mangil hi, banghangziam cile leitung ah nausen khat hong suak ahi hu in, ama lungdam hi.

²²Tuasia bangma na hi tu uh hi: tu in hee nu hi, ahizong kei in note kong mu kik tu a, na thinsung uh lungdamna taw kidim tu hi, tua lungdamna in kuama ii hong laaksak thei ngawl nam ahi hi.

²³“Tua ni hong thet ciangin, kei tungah bangma nong ngen buatu uh hi. A maan tatak kong ci hi: Pa in kei min suangin na nget pawpo hong pia tu hi.

²⁴Tuciang dong kei minsuanguin, bangma na ngen balai uh hi; na lungdamna uh a pawlcin thei natu in, ngen vun na nga tu uh hi.

Leitung Zawna

²⁵“Sonteena kammalte zangh in, hi thute kong son zo hi. Ahihang sonteena kammalte zangh ngawlin, Pa ii thu thiangu takin kong son tu hun hong theng tu hi.

²⁶Tua ni hong thet ciangin kei min suanguin na ngen tu uh hi; tuaciang no luanguin kong ngetsak tu hi kong ci bua hi,



²⁷Banghangziam cile Pa, ama mama in note hong it hi. Ama in banghang note hong it ziam cile noma in kei nong it uh a, tuaciang Pathian kung pan kong pai nong um uh hi.

²⁸Pa kung panin kong pai takpi a, leitung ah kong pai zo hi; tu in leitung nusia in, Pa kungah ka pai tu hi,” ci hi.

²⁹Tuasia ciang nungzuite in, “Tu ahile sonteena kamte zangh ngawlin a thiingin na son hi.

³⁰Na theampo na heak sia tu in kong he uh hi; kuama ii thu hong dok tu na kulsak bua hi. Hi thu in Pathian kung pan nong paina hong umsak hi,” ci uh hi.

³¹Jesus in, “Tu in na um uh ziam?

³²Note theampo kithethaang in, na inn tek zuanin, kei nguak nong nusiat tu uh hun hong theng tu hi, hi sung hong theng zo hi. Ahihang keima nguak ka hi bua hi, banghangziam cile Pa in kei taw omkhawm hi.

³³Kei taw ih kikopna hangin thinnopna na nga natu hi thu kong son sa hi. Leitung in ngim le kham hong thuaksak tu hi. Ahihang na thin uh liansak vun! Leitung ka zo zo hi,” ci in zo hi.

John 17

A Nungzuite atu Jesus Thungen

¹Jesus in hi teng a son zawkciang van ento in, “Pa awng, a hun hong theng zo hi. Tapa in nang tungah minthanna hong piak thei natu in, na Tapa tungah minthanna hong pia tan.

²Banghangziam cile ama tungah na piaksa mi teng tawntung nuntakna a piak thei natu in, mihing theampo tungah thuneina ama tungah na pia zo hi.

³Tuaciang in tawntung nuntakna ci sia in nangma Pathian maan ahi bek sia heakna le na sawlpa Jesus Christ heakna ahi hi.

⁴Na minthanna leitung ah ka lak zo hi; sep tu a nong piak nasep sia ka man zo hi.



⁵Pa awng! simlei pian maa a nangma taw a kibangin ih nei khop tua minthanna sia, tu in na mai ah kei hong pia tan.

⁶“Leitung pan a nong piaksa mite kungah nangma kong hesak zo hi. Amate nangma neisa hi a, amate kei nong pia zo hi. Amate in na kammal hong ni hi,

⁷tuaciang tu in, nong piak sa theampo nangma kung pan hong pai hi ci in amate in he uh hi.

⁸Nong piak thu teng amate tungah ka pia a, amate in saang uh hi; amate in keima nang kung pan hong pai ka hi sia maan hi ci in he uh hi, tuaciangin nong sawl ka hi hunlam um uh hi.

⁹“Amate atu in, thu kong ngen hi. Leitung atu thu ka ngen bua hi, nangma neisa ahi nong piakte atu in kong ngen hi.

¹⁰Keima neisa theampo nangma aa hi a, nang neisa theampo keima aa ahi hi; ka minthanna amate tungtawnin kilak hi.

¹¹Tu in kei nangma kung kong zuan hi; kei Leitung ah ka om nawn bua a, ahihang amate Leitung ah om hi. A Thiangtho Pa awng! Nang le kei khat ih hi bangma in, amate pumkhat ahi thei natu in, nong piak sa min ahi na min vaanglian taw amate keamcing ta in.

¹²Amate taw ka om khop lai in, nong piak sa min ahi na min vaanglian taw, amate ka keamcing zo hi, laithiangtho a tun thei natu, a mangthang tu in a kilaitan sa khat simngawl amate ka keam a, ka bosua bua hi.

¹³Tu in nang kungah kong zuan a, hi bang teng Leitung ah ka sonna sia in a thin sung uh ah ka lungnopna a cingin a nei thei natu ahi hi.

¹⁴Na thupuak amate ka pia a, tuasia ciang Leitung in amate ensan hi, banghangziam cile keima Leitung ii neisa ka hi ngawl bangma, amate Leitung ii neisa ahi bua hi.

¹⁵Hi Leitung panin amate na laak natu in, kong ngen bua hi, ahihang Ngilo Pa khut sung pan na kepcing natu in kong ngen hi.



¹⁶Keima leitung ii neisa ka hi ngawl bangma in, amate leitung ii neisa ahi bua uh hi.

¹⁷Thumaan thutak taw nangma atu in amate na keamtuum in; na kammal in thumaan thutak hi.

¹⁸Nangma in leitung ah kei nong sawl bangma in, amate leitung ah ka sawl hi.

¹⁹Amate zongh maan tak a, nang tungah hong ki aap thei natu, amate atu ka ngaisutsakna in, keima le keima nang tungah kong ki aap hi.

²⁰“Amate atu bek ngen ngawlin, amate ii thupuak hangin, kei hong um teng atu zongh kong ngen hi.

²¹Amate a vekpi in pumkhat ahi thei natu in kong ngen hi. Pa awng! Nangma in keima sungah nong om a, keima in nangma sungah kong om bangma in, amate in eima sungah hong om taken. Leitung in nong sawl ka hi hunlam hong up natu amate pumkhat suak thei taken.

²²Nang le kei pumkhat ih hi bangma, amate pumkhat ahi thei natu in, kei nong piak minthanna sia ma amate ka pia hi:

²³Leitung in nong sawlna thu le, keima nong it bangma amate na itna thu a heak thei natu, amate pumkhat a sua bup thei natu in, keima in amate sungah om in, nangma in keima sungah nong om hi.

²⁴“Pa awng! Amate nong piak sa hi a, nong piak sa ka minthanna sia a mu thei natu in, ka omna munah hong om tek tu ka dei hi; banghangziam cile, simlei a kipiansak maa in, nong it zo hi.

²⁵Thumaan thutang Pa awng! Leitung in nang hong he bua hi, ahihang keima in kong he hi, tuaciang hite in nong sawl ahi hunlam he uh hi.

²⁶Kei nong itna amate sungah a om thei natu le amate sungah kei zongh ka om thei natu in, nang sia amate in ka hesak zo a, tuabangma in ka seam suak lai tu hi,” ci hi.

John 18



Jesus Kimatna

(Mt 26.47-56; Mk 14.43-50; Lk 22.47-53)

- ¹Jesus in hi thungetna teng a nget zawkciang a nungzuite taw Kidron luam a kici sia kantan in pai hi. Tua munah huan khat om hi. Jesus le a nungzuite huan sungah tum uh hi.
- ²Leeheakpa Judas in hi huan ii omna he hi, banghangziam cile, Jesus in a nungzuite taw tam vei mama tua munah kisi ngei zo uh hi.
- ³Tua ahikom Judas in huan sungah pai a, Rome ngalkap honkhat Thiampi liante le Phariseete ii sawl biakinn cing pawlkhat keng hi, amate ngalhiam toai a, meinn le meila lom keng uh hi.
- ⁴Jesus in ama tungah a piang tu na theampo he ahikom ama, mai ah pai in, “Na zon uh sia akua ziam?,” ci in dongh hi.
- ⁵“Nazareth khua mi Jesus hi,” ci in amate in zo uh hi. “Keima khi hi,” ama in ci hi. Leeheakpa Judas sia amate taw tua munah ding hi.
- ⁶Jesus in, “Keima khi hi,” a ci ciangin, amate nungkin uh a, lei ah puk uh hi.
- ⁷Jesus in khat vei ma, “Na zon uh sia akua ziam?” ci in dongh hi. Amate in, “Nazareth khua mi Jesus hi,” ci uh hi.
- ⁸Jesus in “Keima khi hi, kong ci zo hi. Kei hong zong na hi uh le hi a dang teng ciasak vun,” ci hi.
- ⁹(“Pa awng, nong piak sate khat zongh ka bo sua bua hi,” a ci teng a tangtun thei natu in hi bang teng ci ahi hi.)
- ¹⁰Namsau khat a nei Simon Peter in a namsau dokin, Thiampi Lianbelpa ii silapa bil ziatsang satansak hi. Tua silapa ii min Malchus ahi hi.
- ¹¹Jesus in Peter munah, “Na namsau a pai sungah thun kik in! Ka Pa ii ka dawn tu a hong piak thuakna hai sia, dawn ngawl tu in hong um ni ziam?” ci hi.

Annas mai ah Jesus

- ¹²Tua zawkciang Rome ngalkapte, ngalkap hon ukpa le Jew biakinn cingte in Jesus man uh a, khau khii in,



¹³Annas kungah paipui masa uh hi. Ama sia tua kum a Thiampi Lianbel ahi Caiaphas ii sunghpa ahi hi.

¹⁴Mihing theampo atu in mihing khat thi le phazaw hi ci in Jew thuneite tungah ngaisutna a pia pa sia Caiaphas ahi hi.

Peter in Jesus Nial

(Mt 26.69-70; Mk 14.66-68; Lk 22.55-57)

¹⁵Simon Peter le a dang nungzui khat in Jesus zui uh hi. Tua nungzui dang khat sia in Thiampi Lianbelpa ii heak mama pa hi a, tua ahikom ama in Jesus taw Thiampi Lianbelpa huangsung dong pai hi,

¹⁶tua laitakin Peter kongpi puasias ah om hi. Tuaciang nungzui dangkhat sia pusuak kik a, kongpi ah a om numei sia a paupui zawkciang Peter tumpui hi.

¹⁷Kongpi a om numei sia in Peter munah, “Nang zongh ziasia pa ii nungzui khat hi kana ngawl ni ziam,” ci hi. “Kei ka hi bua hi,” Peter in ci hi.

¹⁸Khuasik ahikom silate le biakinn cingte in meihol thut in, a kiim ah mei oai in ding uh hi. Tua ahikom Peter zongh pai in amate taw dingin mei oai khawm hi.

Thiampi Lianbelpa in Jesus Thu dongh

(Mt 26.59-66; Mk 14.55-64; Lk 22.66-71)

¹⁹Thiampi Lianbel in Jesus munah a nungzuite thu le ama hilcianna huvau thu dongh hi.

²⁰“Mihingte mai ah ka son sa hi; ka hilcianna theampote sia mihing theampo hong paina mun synagogue te le Biakinnpi sungah kivawt hi. A thimtham in bangma ka son ngei bua hi.

²¹Tua hi kasap banghangin, thu hong dongh ni ziam? Ka pau hong zate dongh tan. Ka son thute amate munah dongh tan — amate in ka son thu teng he uh hi,” ci in Jesus in zo hi.

²²Jesus in hi bangin a ci ciang, tua munah biakinn cingte khat in Jesus beang a, “Bangbangin Thiampi Lianbel tungah tu bangin pau ngam ni ziam!” ci hi.



²³“Pau khial nei ka hile hi sungah omte theampo munah ka pau khialna son in. Ahihang ka pauna sia a maan thu ahile banghangin hong vua ni ziam?” ci in Jesus in zo hi.

²⁴Tuasia ciang Annas in Jesus heencip sa ma in Thiampi Lianbel Caiaphas kungah puak hi.

Peter in Jesus Nial kik

(Mk 26: 71-75; Mk 14.69-72; Lk 22.58-62)

²⁵Peter tua mun ma ah mei oai in om lai hi. Tua ahikom a dangte in, “Nang zongh ziasia pa ii nungzui khat hi ngawl ni ziam?” ci uh hi. Ahihang Peter in nial hi. “Kei ka hi bua hi,” ama in ci hi.

²⁶Peter ii a bil a satansak pa ii beete khat ahi Thiampi Lianbel ii sila khat in, “Ama taw huan sungah na om lai hong mu hi ngawl khi ziam?” ci in dongh hi.

²⁷Peter in, “Kei ka hi bua hi,” a ci leleau laitak — thakhat in aklui khat hong khuang hi.

Pilate mai ah Jesus

(Mt 27.1-2; 11-14; Mk 15.1-5; Lk 23.1-5)

²⁸Zing tuungin Jesus sia Caiaphas ii inn pan ngamuk mangpa kumpi inn ah kipaipui hi. Jew thuneite in kumpi inn sungsang ah a tum bua uh hi, banghangziam cile Paisan Poai anneak thei natu in amate zeksa vai in a thiangtho in om nuam uh hi.

²⁹Tua ahikom Pilate sia amate omna sangah pusuak in, “Hisia pa bang teng taw mawsak nu ziam?” ci in dongh hi.

³⁰Amate in, “Ama in khialna lian vawt buale nang kungah hong paipui ngawl tu khu hi,” ci in zo uh hi.

³¹“Tua ahile noma in, ama la vun a noma thukham taw kizui in thusit tavun,” Pilate in ci hi. Amate in, “Kote in kuama tungah thidaan dong piak thei natu thu nei ngawl khu hi,” ci uh hi.

³²(Jesus in a thi natu zia a sonna kammalte a tun natu hi bangin piang ahi hi.)



³³Pilate in kumpi inn sungah tum kikin Jesus sam hi, “Nang Jew mite ii Kumpipa na hi ziam?” ci in dongh hi.

³⁴Jesus in, “Hi thu dokna sia nangma thin sung pan hong piang ziam, ahibuale kei thu ngual in nang tungah hong son ziam?” ci hi.

³⁵Pilate in zokik a, “Jew mi khat hong sa ni ziam? Nangma kei tungah hong aapte sia nangma mipuite le thiampi liante ahi hi. Bang vawt nei ni ziam,” ci hi.

³⁶Jesus in, “Ka ngam sia hi leitung ah a om bua hi; ka ngam sia hi leitung ah om hile, Jew thuneite tungah hong ki aap ngawl natu in, ka nung hong zuite in do in hong hung tu hi. Hi ngawl hi, ka ngam sia hi sung hi ngawl hi!” ci hi.

³⁷Pilate in, “Tua ahile kumpipa khat na hi ziam?” ci in dongh hi. Jesus in, “Kumpipa hong ci sia nangma na hi hi. Hi leitung ah suak a, thumaan thutak sia ii thu son tu tupna khat taw in kong pai hi. Thumaan thutak ii neisa ahite peuma in kei thu hong ngai hi,” ci in zo hi.

³⁸“Tua ahile thumaan thutak sia bang ziam?” Pilate in dongh hi.

Jesus Thidaan Kipia

(Mt 27.15-31; Mk 15.6-20; Lk 23.13-25)

Tua zawkciang Pilate doipua ah pai kik a, mihingte tungah, “Hisia pa mawsak natu thu bangma ka mu zo bua hi,” ci hi.

³⁹“Ahihang noma ngeina khat na nei uh bangin, Paisan Poai sungah thongtaak khat ka suaktasak tawntung hi. Note atu Jewte Kumpipa suakta sak leng nong oai uh ziam,” ci hi.

⁴⁰Amate au khat sua in, “Hi ngawl hi, ama hi ngawl hi! Barabbas dei khu hi!” ci in zo uh hi. (Barabbas sia ngual suampa ahi hi.)

John 19

¹Tua zawkciangin, Pilate in Jesus pusua a, velsak hi.

²Ngalkapte in lingnguite taw kumpi lukhu khat vawtin, a lu tungah khusak uh hi; tua zawkciang puantual sannuum khat silhsak uh hi,



³tua zawkciang ama kungah hong pai uh a, “Jewte Kumpipa a khansau taken!” ci hi. Tuaciang amate vapai in beang uh hi.

⁴Pilate khatvei ma pusuak kikin mihon tung ah, “En vun, ama mawsak natu bangma ka mu ngawl na thu na mu natu in, ama hi sungah hong paipui tu khi hi,” ci hi.

⁵Tua ahikom Jesus sia kumpi ling lukhu khu in, puantual sannuum silh in hong pusuak hi. Pilate in, “En vun! Hi sungah ama om hi!” ci hi.

⁶Thiampi liante le biakinn cingte in amu uh ciang, “Thinglamte tungah that vun! Thinglamte tungah that vun!” ci in au uh hi. Pilate in amate munah, “Tua ahile noma in ama la in, thinglamte tungah that vun. Ama ka mawsak natu bangma thu mu ngawl khi hi,” ci hi.

⁷Mihon in zokik a, “Ama in Pathian Tapa ka hi ci ahikom a thidaan piak tu kilawm hi aci thukhaam khat nei khu hi,” ci uh hi.

⁸Pilate in hi thu a zaak ciangin, lau vaial hi.

⁹Ama kumpi inn sungah tum kik a, Jesus munah, “Nang koisung pan hong pai ni ziam,” ci in dongh hi. Ahihang Jesus in zo ngawl hi.

¹⁰Pilate in ama tungah, “Ka kam hong zo ngawl tu ni ziam? Phawk in, na suatak natu le thinglamte tungah hong kithalup natu thu nei khawm khi hi,” ci hi.

¹¹Jesus in, “Pathian hong piak hu bek in, kei tungah thu na nei hi. Tua ahiciang nang tungah kei hong aap pa in, mawna nasia zaw vawt ahi hi,” ci in zo hi.

¹²Pilate in hi thu a zaak ciangin, Jesus a suatak natu in lam zong hi. Ahihang mihon au kik a, “Ama na suatak le Kumpi lianpa ii lawm na hi bua hi! Kumpi khat ka hi a ci pawpo in, Kumpi lianpa a leedo pa ahi hi,” ci uh hi.

¹³Pilate in hi thute a zaak ciangin ama in Jesus doipua ah paipuisak a, “Suangpheak Kiphana” a kici thukhente tona ah (Hebrew kam in Gabbatha kici hi) to hi.



¹⁴Tua hun sia Paisan Poai a thet ma ni khat sunkim dektak hun ahi hi. Pilate in, “Hi sungah na Kumpipa uh om hi,” ci hi.

¹⁵Amate in, “Ama that vun! Ama that vun! Thinglamte tungah that vun!” ci in au uh hi. Pilate in “Na kumpipa uh thinglamte tungah ka thalupsak tu dei nu ziam,” ci in dongh hi. Thiampi liante in, “Kumpipa khat bek ka nei uh sia Kumpi lianpa sia hi!” ci in zo hi.

¹⁶Tuasia ciang Pilate in Jesus thinglamte tungah thalup tu in, amate tungah aap hi.

Jesus Kithat

(Mt 27.32-44; Mk 15.21-32; Lk 23.26-43)

Tua ahikom amate in Jesus la uh hi.

¹⁷A thinglamte pua in ama hong pusuak a, “Lungu Mun” a kici na hong theng hi. (Hebrew kam in Golgotha kici hi)

¹⁸Tua munah amate in thinglamte tungah khai uh hi; pasal nii zongh Jesus lang le lang ah thinglamte tung khai uh hi.

¹⁹Pilate in heaksakna laino khat at in, thinglamte tungah taak hi. “Jewte Kumpipa Nazareth khua mi Jesus,” ci in a at hi.

²⁰Jew mite tam ma in sim uh hi, banghangziam cile, Jesus a kikhaina mun sia khuapi taw a ki khuala bua hi. A lai taak sia Hebrew kam, Latin kam, le Greek kam in ki at hi.

²¹Thiampi liante in Pilate mun ah, “ ‘Jewte ii Kumpipa,’ ci in at heak in, ‘Hisia pa in, Jewte Kumpipa ka hi hi, ci hi,’ ci in at zaw in,” ci uh hi.

²²Pilate in, “Ka at sa sia ka at sa bangma in kip taken,” ci in zo hi.

²³Jesus thinglamte tungah a kilh zawkciang ngalkapte in ama puansilh te suutin, ngalkap khat sim in, khenkhat tek a cin tu in, khen li sua in hawm uh hi. Amate in puantual a silhsak sia zongh la uh hi, tua puantual sia khuina om ngawl a tuantung khat ahi hi.

²⁴Ngalkapte khat le khat kikum a “Hi sia balkeak bua tawng; akua in ih nga ziam, meesawk tawng,” ci uh hi. Laithiangtho sungah hi bang a ci sia a



tangtun natu ahi hi: “Amate in ka puante hawm a, ka Puantual a tu in kikhaam uh hi,” Hisia in ngalkapte ngamtatna ahi hi.

²⁵Jesus ii thinglamte taw a kinaina ah, a nu, a nu ii suapuinu, Clopas ii zi Mary le Mary Magdalene te ding uh hi.

²⁶Jesus in a nu le ama ii it nungzuipa a ding khawm mu hi; tua ahikom a nu munah “Ama sia na tapa hi,” ci hi.

²⁷Tua zawkciang a nungzuipa munah, “Ama sia na nu hi,” ci hi. Tua hun pan kipan nungzuipa in, a inn ah teang tu in, ama la in ciapui hi.

Jesus Thina

(Mt 27: 45-56; Mk 15.33-41; Lk 23.44-49)

²⁸Tu in na theampo khuangkchim siat zo hi, ci in Jesus in he hi; tuaciang laithiangtho kammal a tun natu in, Jesus in, “Ka dangko hi,” ci hi.

²⁹Tua munah kuang khat sungah sapittui haau om hi, tui hupna khat pap sukin, Hyssop thingbaak dawn ah a thua zawkciang, Jesus muk ah taa uh hi.

³⁰Jesus in tua sapittui a neak zawkciang, “Kizo zo hi!” ci hi. Tua zawkciang a lu kunsuk in thi hi.

Jesus Pangh Kisun

³¹Jew thuneite in, Pilate munah a kithatte ii peang a thiatan natu le, thinglamte tung pan a luangte a laaksuk thei natu in ngen uh hi. Hi bang a nget theina uh sia banghangziam cile tua ni sia nipi zawk Ninga ni hi a, hong pai tu Sabbath sia a thiangtho tuam a kingaisun ahikom Sabbath ni in a luangte thinglamte tungah a om tu a dei bua uh hi.

³²Tua ahikom a ngalkapte in, Jesus taw a kikhai khawmte a masa sia pa ii peangte thiaktan a, tua zawkciang a dang khat sia ii peangte zongh thiaktan uh hi.

³³Ahizong Jesus kung hong thet uhciang, ama a thi sa in mu ahikom, a peang a thiaktan bua uh hi.

³⁴Ahizong ngalkapte khat in, a tei taw Jesus pang a sut ciangin thakhat in chi le tui hong kee hi.



³⁵(Hi thu na up thei natu in, hi thupiang a mu pa in ama muna bangin hong son ahi hi. Ama thusonte a maan hi a, thumaan son ahi hunlam zongh a son pa in he hi.)

³⁶Hi bangin a kivawt sia Laithiangtho kammal a tun natu ahi hi: “Ama ii ngute khat zongh taltan ngawl tu hi,” ci hi.

³⁷Laithiangtho mundang khat ah, “Mihingte in amate ii holletpa sia a en tu uh hi,” ci si hi.

Jesus Kiphumna

(Mt 27.57-61; Mk 15.42-47; Lk 23.50-56)

³⁸Hisia zawkciang Arimathea khua mi Joseph in Pilate munah, Jesus luang a laak thei natu in ngen hi. (Joseph sia Jesus nungzui khat hi a, ahizong Jew thuneite a kiitakna taw a thimtham in a zuipa khat ahi hi.) Pilate in a luang phaam thei natu thupia ahikom Joseph in a luang la in paipui hi.

³⁹Zan lai in Jesus taw kimu tu in, a pai masa pa, Nicodemus sia Joseph taw ton hi, ama in thing namtui myrrh le aloe te a kihel toai khat bang hong paipui hi.

⁴⁰Tua pasalte nii in, Jewte ii kiphum tu ciang, a luang a pua kholna ngeina om bangin, Jesus luang la in, hel namtui thau taw zutin, puanneal taw tun uh hi.

⁴¹Jesus a kithalupna mun ah huan khat om a, tua munah kuama a kiphum ngei ngawl thaankuul thak khat om hi.

⁴²Sabbath hun tun maa ni khat ni ahi hu le, a thaankuul taw kinai si ahikom, amate in Jesus luang tua lai ah sial uh hi.

John 20

Thaankuul Hawm

(Mt 28.1-8; Mk 16.1-8; Lk 24.1-12)

¹Nipi ni zingsang tuung khuavak maa in, Mary Magdalene than vil tu a pai ciang, a kongvang pan suangtumpui sia kilakeak sa in a om mu hi.



²Ama in Simon Peter le a dang nungzui, Jesus ii itpa kung zuan in tai a, “Amate in Topa sia thaam pan la zo hi, ama koi sungah koi ziam ci sia he ngawl khu hi!” ci hi.

³Tuasia ciang Peter le a dang nungzui pa sia thaam ah pai uh hi.

⁴Amate nii in delh khawm ahihang nungzui dangkhat sia Peter sangin a ngang zaw tai ahikom thaam theng masa hi.

⁵Ama kun in thaankuul sung a et suk ciang a kitunna puannealte mu hi, ahihang a sungah tum ngawl hi.

⁶Ama nung pan Simon Peter hong pai a, thaankuul sung thakhat in tum paih hi. Ama in a kitunna puannealte lei ah om mu hi,

⁷tuaciang in Jesus lutang tunna puan zongh mu hi. Tua lutang kitunna puan sia puanneal dangte taw om khawm ngawl a, a kizial sa in om tuam hi.

⁸Tua zawkciang thaam a theng masa nungzui dang khat sia zongh tum hi; ama in mu a um hi.

⁹(Amate in, “Laithiangtho ii ama thina pan tho kik nanak tu hi,” a ci sia a tel bualai uh hi.)

¹⁰Tua zawkciang nung zuite inn ah cia kik uh hi.

Mary Magdalene kungah Jesus Kilangh

(Mt 28.9-10; Mk 16.9-11)

¹¹Mary thaam pua sangah dingin kap hi. A kaa kawmin kun a thaankuul sung en hi,

¹²tuaciang vantung lalangte nii puanpaak silh in, Jesus luang sialna ah, khat a luthung, khat a khawdop ah to in a om sia mu hi.

¹³“Numei awng, banghangin kap ni ziam?” ci in amate in dongh hi. Ama in, “Amate in ka Topa la a, koisung ah koi ziam, ci in ka he bua hi!” ci in zo hi.

¹⁴Tuaciangin ama a kiheak le, ama kungah a ding Jesus mu hi; ahihang ama in Jesus ahi hunlam he ngawl hi.

¹⁵“Numei awng, banghangin kap ni ziam? Na zon sia akua ziam?” ci in Jesus in dongh hi. Ama in huan neipa sa ahikom in, “Ama la zo na hi le, syapa awng, na koina hong son tan. Pai in ka la tu hi,” ci hi.



¹⁶Jesus in, “Mary awng!” ci hi. Numeinu ama sangah nga in, Hebrew kam in, “Rabboni!” ci hi. (Hi kammal sia Syapa a ci nopna hi.)

¹⁷“Hong len top heak in, banghangziam cile Pa kungah paito ngawl lai khi hi. Ahihang ka suapuiate kungah pai in vason tan. Ka Pa le amate ii Pa, ka Pathian le amate ii Pathian kungah heak kik tu khi hi,” Jesus in ci hi.

¹⁸Tua ahikom Mary Magdalene pai in nungzuite tungah, Topa a muna thu le ama ii son in a sawl teng son hi.

A Nungzuite Kungah Jesus Kilangh

(Mt 28.16-20; Mk 16.14-18; Lk 24.36-49)

¹⁹Nipi nitak khua niam sang hi a, nungzuite in inn kikalh in kikhawm tua uh hi, banghangziam cile amate in Jew thuneite kiita uh hi. Tuasia ciang Jesus hong tum a, amate sung ah hong ding hi. Ama in “Note sungah thinnopna om taken,” ci hi.

²⁰Hi teng a ci zawkciang ama in a khutte le a pang teng amate tungah lak hi. Nungzuite in Topa a mu uh hu in, lungnopna taw kidim uh hi.

²¹Jesus in, “Note sungah thinnopna om taken,” “Pa ii kei hong sawl bangma in, kei in note kong sawl hi,” ci kik hi.

²²Tua zawkciang amate tungah, a hu muutin, “Thaa Thiangtho saang vun.”

²³“Mihingte tungah mawmaisakna na pia uh le amate kimaisak tu hi; amate mawna na maisak bua uhle amate a kimaisak buatu hi,” ci hi.

Jesus le Thomas

²⁴Jesus hong pai lai in, nungzui sawm le niite sung pan khat ahi, Thomas (Apeang a kici) sia amate taw a omkhawm bua hi.

²⁵Tua ahikom nungzui dangte in, “Topa ka mu zo uh hi,” ci in ama tungah son uh hi. Thomas in, “A khut tung thikipim mapawnte mu a, ka khutme taw pawnte tham in ka khut taw a pangh ka tham buale ka um buatu hi,” ci hi.

²⁶Nipi khat zawkciang nungzuite inn sungsang ah omkhawm kik uh a, Thomas zongh om hi. Kongkhate kikalh ahihang, Jesus hong pai a, amate sungah dingin, “Note sungah thinnopna om taken,” ci hi.



²⁷Tua zawkciang, Thomas tungah, “Na khutme taw hi sung hong tham tan, ka khutte hong en tan; tuaciang na khut vaan in ka pangh hong tham tan. Um khial heak in, um takpi in!” ci hi.

²⁸Thomas in, “Ka Topa le ka Pathian awng!” ci in zo hi.

²⁹Jesus in, “Nong mu hu in hong um ni ziam? Hong mu ngawl napi a hong umte bangza in lungdam tu ziam!” ci hi.

Hi Laibu ii Deina

³⁰A nungzuite ii mutang in, Jesus in hi laibu sungah a kikhum ngawl, nalamdang lakna dang tam mama vawt hi.

³¹Ahihang hite hong ki atna sia Jesus in Pathian Tapa Messiah a hina thu, na up natu uh le ama na upna uh tungtawn in, nuntakna na nga thei natu uh ahi hi.

John 21

Jesus Nungzui Salite kungah Kilangh

¹Hisia zawkciang Jesus khatvei ma Tiberias Tuili ah nungzuite kungah kilaak hi. A kilaakzia hi bang ahi hi.

²Simon Peter, Thomas (apeang a kici), Nathanael (Galilee ngam Cana khua mi) Zebedee ii tapate, Jesus ii nungzui dangte nii sia kikhawmtua uh hi.

³Simon Peter in, “Kei ngasa paai in ka pai tu hi,” a dangte tungah ci hi. “Ko zong kong zui tu uh hi,” ci in a dangte in son uh hi. Tua ahikom amate in ngunkuang khat taw pai uh hi, ahihang tua ni zan bup bangma a man bua uh hi.

⁴Ni hong sua ciangin, Jesus tuivaal ah ding hi, ahihang nungzuite in Jesus ahi hunlam a he bua uh hi.

⁵“Tangvalte awng, bangma man ngawl nu ziam?” ci in Jesus in dongh hi. “Bangma man ngawl khu hi,” ci in zo uh hi.



⁶Ama in, “Na ngen uh ngun kuang ziat sangah paai leute pawlkhat man tu nu hi,” ci hi. Tua ahikom amate in ngen a paai uh ciang, a dawk kik zo nawn bua hi, banghangziam cile amate in ngasa tam mama man uh hi.

⁷Jesus ii it nungzuipa in, Peter munah, “Tu a sia Topa hi!” ci hi. Peter in Topa hi ci in a zaak ciang, a a puantung silh taw kitun hi, (Banghangziam cile ama in a puante suut hi) tuaciangin tui sungah leangsuk hi.

⁸Nungzui dangte in ngasa a dim ngeen sia kaikawm a, ngunkuawng taw vaalbo ah hong pai uh hi. Amate omna sia lei taw a kikhuala lei ngawl, metre za khat na bang ahi hi.

⁹Amate in vaalbo ah hong kaa uh ciangin, meihol kithut khat mu uh a, a tungah ngasa le anluum pawlkhat om hi.

¹⁰Jesus in, “Na mat tawm uh ngasa pawlkhat zongh hong paipui tavun,” ci hi.

¹¹Simon Peter ngunkuawng sungah tuakin, ngasa lian a dim ngen sia vaalbo ah kai hi, a vekpi in 153 pha hi; taza in tam ahidang a ngen ektham ngawl hi.

¹²Jesus in, “Hong pai tavun a ne vun,” ci hi. A nungzuite kuama in, “Nang kua ni ziam?” ci in a dongh ngam bua uh hi, banghangziam cile amate in Topa ahi sia he uh hi.

¹³Tua ahikom amate kung zuan in, anluum la in amate pia hi, ngasa zongh tuabang ma in pia hi.

¹⁴Hisia in Jesus ii thina pan a kithaw kiksak zawk, a nungzuite mun a kilaak a thum veina ahi hi.

Jesus le Peter

¹⁵An a neak zawk uh ciang Jesus in Peter mun ah, “John ii tapa Simon awng, hi ngualdangte ii hong it sangin, kei nong itzaw ziam,” ci hi. “Hi hi, Topa awng, nang kong it sia nangma in na he hi,” ci in ama in zo hi. Jesus in, “Ka tuunote na keam in,” ci hi.

¹⁶A nii veina Jesus in, “John ii tapa Simon awng, kei nong it ziam?” ci hi. Ama in, “Hi hi, Topa awng, nang kong it sia nangma in na he hi,” ci in zo hi. “Ka tuute na keam in,” Jesus in ci hi.



¹⁷A thum veina Jesus in, “John ii tapa Simon awng, kei nong it ziam?” ci hi. Peter sia Jesus ii, “Kei nong it ziam,” ci in thum vei dong a dok hu in, hee hi, tua ahikom ama munah, “Topa awng na theampo na he hi; nang kong it hunlam na he hi,” ci hi. Jesus in, ama munah “Ka tuute na keam in.

¹⁸A maan takin kong ci hi: na khanmoi lai in, a kinging sa in na om bul a, na uukna theampo ah na pai bul hi, ahihang na khanhaam ciangin, na khutte na vaan tu a, tuaciang khat in khau hong khii in, na uuk ngawl na ah hong paipui tu hi,” ci hi.

¹⁹(Hi bang a Jesus ii a ci sia Pathian minthan natu in Peter ii a thi natu teng a sonna hi. Tua zawkciang Jesus in, “Kei hong zui tan,” ci hi.

Jesus le Nungzui Dangkhat

²⁰Peter in, a kiheak ciang a nung ah Jesus ii it nungzui dang khat sia mu hi — An a neak uh lai Topa kung to a, neal kawm in, “Topa awng nang akua in hong leeheak tu ziam?” ci in a dongh sia pa ahi hi.

²¹Peter in a mu ciang, Jesus mun ah, “Topa awng, hisia pa bang bangin om tu ziam?” ci in dongh hi.

²²Jesus in zokik a, “Kong pai kik dong ama nungta in ka oai le zong nang bang nuam maw ni ziam, kei hong zui tan!” ci hi.

²³Tua ahikom tua nungzuipa thi ngawl tu hi, ci in Jesus nungzuite sungah thu kizel hi. Ahihang Jesus in ama a thi buatu hi, a ci hi ngawl hi; ama in “Kong pai kik dong nungta in ka oai le zong bang nuam maw ni ziam?” a ci ahi hi.

²⁴Ama sia hi thute a son nungzuipa hi a, lai taw zongh a atpa ahi hi; tuaciang ama ii sonte sia thumaan hi, ci in ih he hi.

Thukhupna

²⁵Tu in Jesus ii a sep nadang tam mama om hi. Tu ate theampo khat zawk ciang khat ki aat sak siat le leitung bup ah tua laibute ta zo ngawl tu hi ci in ka um maw hi.



Sawltakte

Sawltakte 1

¹Theophilus awng: Ka laibu masa sia sungah Jesus nasep a kipat pan a, kipan a sepna le hilnate theampo kong at zo a,

²Ama ii van kaa ni dong, huam hi. A kilaak to maa in, sawltak tu a tealte tungah Thaa Thiangtho vaang taw thupiakna nei hi.

³A thi zawk ni sawmli sungah amate tungah tamvei ma kilak a, ama sia nungta nginge ahi hunlam up laak om ngawl tu in, a nanam in kilak hi. Ama sia sawltakte in mu uh a, Pathian Ngam thu ama in sonpui hi.

⁴Amate hong kikhoptua uh ciangin, hi bang thupia hi: “Jerusalem nusia heak vun, no tungah kong son sa Pa ii kamciam hong piak sa letsong sia, na ngak vun,

⁵John in tuidam taw tui hong phum hi, ahihang ni tawmvei no sungin, note Thaa Thiangtho taw na ki baptize tu uh hi.

Jesus Van ah Kilato

⁶Sawltakte in Jesus taw a kisik uh ciangin, “Topa awng, Israel mite tungah a Ngam na pia kik tu ziam?” ci in dongh uh hi.

⁷Jesus in, “Hunte le thunei theinate sia ka Pa zeak hi a, bang hun ciang hi tu cisia no heak tu thu hi ngawl hi.

⁸Ahihang Thaa Thiangtho note tungah hong pai ciang, vaangletna taw na kidim tu uh a, Jerusalem pan kipan Judea ngambup le Samaria ngam le leimong dongin, ka tetti na hi tu uh hi,” ci hi.

⁹Hi teng a ci zawkciang, amate mu tangin, van ah ama kilato a, meeikaai in lia hi.

¹⁰Ama paina san vantung salh in, a om uh laitakin, puankaang silh pasal nii sia amate kungah hong ding a,



¹¹amate in, “Galilee mite awng, van ento in banghangin tua munah ding top nu ziam? Hi Jesus sia note kung pan vantung ah a kilaak to na mu uh bangma in, tuabang tatak ma in hong pai kik tu hi,” ci uh hi.

Judas Iscariot Laih pa

¹²Tua zawkciang Sawltakte in Olive Mual panin, Jerusalem ah cia kik uh a, tua mual sia khuapi panin, kilometre khat bang khuala hi.

¹³Amate Jerusalem khua sungah tumin, a taam ngeina mun inn tung dawl sungah om uh hi. Amate teng sia Peter, John, James le Andrew, Philip le Thomas, Bartholomew le Matthew, Alphaeus, ii tapa James, Minam it Simon, le James ii tapa Judas ahi uh hi.

¹⁴Jesus suapui pate, a nu Mary le numei dangte taw amate pawlkhat, thungen tu in kikhawmtua nithi uh hi.

¹⁵Ni tawmvei zawkciang in, thu um teng kikhopna khat om a, mihing za le kul bang pha uh hi. Tuaciang Peter sia thuson tu in, ding hi.

¹⁶“Ka suapuute awng, Thaa Thiangtho in David tungtawn in, Jesus a man tute, lam a lak Judas huvau a son kholna Laithiangtho kammalte a tangtut kul hi.

¹⁷Judas sia koma ii pawl mi khat ahi hi, banghangziam cile ko nasepna sungah, ama zongh nasep khat nei tu in, a kiteal pa ahi hi.”

¹⁸(Judas in ama ngitlo ngamtatna taw a nga sum taw lo khat lei a, tua sungah pukvawk in thi hi; ama sia puaktham in, a ngil keekeak hi.

¹⁹Jerusalem ah a teang mihing theampo in tua thu za ahikom, tua lo sia, amate kam in Akeldama, a khiakna sia “Chisan Lo” ci in min phuak uh hi.)

²⁰“Banghangziam cile Psalm late ii sungah ki at a, ‘Ama baangkua awngthong taken a, kuama a teang om heak hen,’ kici a, ‘A nasepna mun zongh midang khat in laih taken, ci in ki at si hi.’

²¹“Tua ahikom, Topa Jesus thaw kikna tetti in a pang tu mihing khat kote sungah hong kibelap kul hi.

²²Ama sia bangbang mihingte hi tu ziam cile, John ii tuiphumna huvau a hil hun pan kipan Jesus van ah a kilaak to dong a kilaklaw teng, Jesus khualhawna theampo sung, ko pawl sungah hong kihel top khat ahi kul hi,” ci hi.

²³Tua ahikom amate in, mihing nii ii min aap uh hi. Barsabbas a kici Joseph (Justus zongh kici si) khat le, Matthias ahi uh hi.

²⁴Tua zawkciang amate in, “Topa awng, mihing theampo ii thinsung na he hi. Tua ahiciang, Topa awng, hite nii sung pan koisia teal ni ziam hong lak tan.

²⁵Judas in a zot natu zuanin a nusiak sawltak za a awng sia dip natu in hong hesak tan” ci in thungen uh hi.

²⁶Tua zawkciangin amate in, tua mite nii sung pan, a kiteal natu in, lai aisaan a, Matthias kiteal ahikom, ama sawltak sawm le khatte ii pawl sungah kibelap hi.

Sawltakte 2

Thaa Thiangtho Hong paina

¹Pentecost ni hong thet ciangin, thu um theampo mun khat ah kikhawm uh hi.

²Thakhat thu in, van pan a nging khat hong om a, vui nasia tak a vak ngawp ciang, a luum himhum bang hi in, amate tona inn buppi sia tua a nging taw kidim hi.

³Tuasia ciangin amate in leei taw a kibang meikuang mu uh a, tua munah a om mihing khat sim sia, tua meikuang in thutha hi.

⁴Amate sia Thaa Thiangtho taw kidim uh a, Thaa ii a pausak bangin, kampau dangte taw pau uh hi.

⁵Tua laitak leitung theampo pan hong pai biakna kin Jewte Jerusalem khua ah teang uh hi.



⁶Hi awnging sia a zaak uh ciangin, mihon khat hong kikhawm uh hi. Amate linglawng ngawp uh hi. Banghangziam cile thu umte ii pauna sia, amate tek ii kam taw za uh hi.

⁷Lamdangsakna taw amate in hi bang ci uh hi. “Tu a bangin a pau mihingte sia Galilee mite ahi hi.

⁸Tua hi kasap amate pau sia, eima kam tek taw ih zaak sia bangbangziam?

⁹Eite sia Parthia, Media le Elam pan hi kale, Mesopotamia, Judea le Cappadocia pan, Pontus le Asia pan,

¹⁰Phrygia le Pamphylia pan, Egypt le Cyrene taw a kinai Libya pan, pawlkhat Rome pan,

¹¹Jew le Gentilete Jew biakna a suakte, tuaciang eite pawlkhat sia Crete le Arabia pan — hi napi ih mihing sim in eima kam tek taw Pathian nasep lianpi a sepna ih za tek hi!”

¹²“Hisia in bang thu ziam?” ci in lamdangsakna le lungdamna taw khat le khat kidongh uh hi.

¹³Ahizong pawlkhatte in thu umte sia nunau a, “Hi mihingte in zukham hi!” ci uh hi.

Peter ii Thu Sonna

¹⁴Tuaciang Peter in a dang sawltak sawm le khatte taw ding a, mihonte tungah nging takin thuson hi: “Jew minampuite le Jerusalem ah a teang note theampo awng, hong ngai tavun, hisia in bang thu ziam ci sia hong sonsak tavun.

¹⁵Hi lai a, mihingte sia no upmawk bangin, zukham hi ngawl hi. Tu laitak sia zingsang nai kua hi pheang hi.

¹⁶Tua hi zaw ngawlin, hisia in kamsangpa Joel ii son sa thu ahi hi:

¹⁷“Hisia in ni tawpkhak sang ciangin ka vawt tu thu ahi hi, Pathian in ci hi: Ka thaa ka buak tu hi. Na tapate le na tanute in, keima thu thangsak tu uh hi. Na khangnote in mang mu tu uh hi; Na khanghaamte in, mang man tu uh hi.



¹⁸Hi hi, pate zongh numeite zongh ka naseamte ngangawn tung zongh ah tua ni ciangin, ka thaa ka buak tu a, tuaciang amate in keima thu thangsak tu hi.

¹⁹Van ah a lamdang laknate ka vawt tu a, leitung ah a lamdang nate ka piangsak tu hi; chisan, meikuang le meikhu ciikte hong om tu hi:

²⁰Ni hong mial a hong zing tu hi. Tha in chi bangin san tu hi. A lian a minthang Topa Ni hong thet maa in, tuabang hong piang tu hi.

²¹Tua zawkciangin, huna ngen a, Topa a biakpui peuma kingum tu hi.'

²²"Hi kammalte ngai vun. Israel mipuite awng! Nazareth mi Jesus sia Pathian in ama tungtawn in a vawt nalamdang laknate le a lamdangte theampo hu in Pathian piak thunei pa tatak ahi hunlam kilangh hi. Noma mama in zongh, hi thu he nu hi, banghangziam cile hi lai note sungah hi thu piang hi.

²³Pathian in ama thu neina le tupna taw Jesus sia no khut sungah ki aap tu in zeak zo hi; tuaciang mimawte in, ama sia thinglamte tungah na kilhsakna uh taw note in ama na thatlum zo uh hi.

²⁴Ahihang Pathian in ama sia, a thite kawm pan phong kik a, thina ngau panin suaktasak hi, banghangziam cile, thina in ama thong sungah a khumcip tu sia suak thei ngawl hi.

²⁵Tua ahikom, David in ama huvau ah, 'Topa sia a tawntungin ka mai ah ka mu hi; ama sia ka kungah om ahikom, ngim ka nga buatu hi.

²⁶Hi thu hangin lungdamna taw ka kidim a, tuaciang ka kammalte in lungnopna taw kidim hi. Tuaciang kei sia a thi thei ka hi hangin, muanmawkna sungah, thin muangin ka tawInga tu hi,

²⁷banghangziam cile, nang in ka thaa sia mithite khua ah nong nusia buatu hi; nang in na naseampa thaang sungah a muatcip tu in nong oai buatu hi.

²⁸Nuntakna lampi nong lak zo a, tuaciang nangma nong ompuina in, lungdamna taw nong kidimsak tu hi,' ci hi.



²⁹“Suapuite awng, a minthang ih taangpupi David kumpipa thu sia thiangtho takin, ka son kul hi. Ama sia thi in kiphum hi. Ama thaan zongh tuni dongin, eima kungah om nginge hi.

³⁰Ama sia kamsang khat hi a, David ii suan sung pan khat sia, David bangma in kumpi khat a suasak natu, Pathian ii kamciam a piak sa ahi hunlam he hi.

³¹David in Pathian vawt tu khat mukhol zo ahikom, Messiah thaw kikna thu, hi bangin son hi. ‘Ama sia mithite khua ah kinusia ngawl hi. a pumpi thaan sungah muat ngawl hi.

³²Pathian in hi Jesus mama mithite sung pan phong a, ko theampo in hi thu ah tetti ka pang uh hi.

³³Ama sia Pathian ziat sangah to tu in kiphong a, ama in, a Pa kamciam bangma in, Thaa Thiangtho saang hi. Tuaciangin tu a na mu uh na zaak uh sia, ama letsong kote tungah hong buaksuk sia ahi hi.

³⁴Banghangziam cile vantung ah a kaato pa in David hi ngawl hi, ama in, ‘Topa in ka Topa tungah: Hi sung ka ziat sangah hong to tan.

³⁵Na ngalte na peang nuai ah peang ngakna bangin kong koisak mateng in’

³⁶Tua ahiciang Israel mite theampo ii telthiang tu thu in, hi Jesus thinglamte tungah na kilh uh pa sia, Topa le Messiah tu a, Pathian vawt sa ahi hi.

³⁷Tua mihingte in hi thu a zaak uh ciangin, nasia takin a thin uh ngim a, Peter le sawltak dangte munah, “Suapuite awng, bang law tu khu ziam?” ci uh hi.

³⁸Na mawnate uh hong kimaisak a, Pathian tel Thaa Thiangtho na saan natu in, note khat sim in, na mawnate pan kikheal nanak vun a, Jesus min taw tui kiphum tavun,

³⁹banghangziam cile Pathian kamciam sia, no le na tate tungah a kivawt hi a, tuaciangin, a khuala a omte atu hi a, Topa Pathian ii ama kungah a sam sa theampo atu ahi hi.”



⁴⁰Peter in amate tungah zolna le hanthotna kammal tam mama zangh a, “Hi mihing seksolte ii thwak tu daan pan suakta tavun!” ci hi.

⁴¹Mihing tam mama in a thuson um a, tui kiphum uh hi. Tua ni in mihing tulthum bang pawlpi sungah kibelap hi.

⁴²Amate in a hun neite uh sia, sawltakte tung pan thusinna in zangh a, kipawlna sung, pawl anneakkhopna le thungetna sungah kihel tek uh hi.

Thu Umte sungah Nuntakna

⁴³Nalamdang laknate le a lamdang a vawt tam mamate, sawltakte tungtawn in kivawt a, hi thu hu in mihing theampo in lamdangsakna taw kidim uh hi.

⁴⁴Thu umte theampo in kithawl vadium in, a neisate khat le khat kihawm in, om suak uh hi.

⁴⁵Amate in a neisate zuak a, mihing khat sim in, a kitaangsapna babang taw kizui in, a sum hawm uh hi.

⁴⁶Kipawlkhath in taw nisim in Biakinnpi ah kikhawm uh a, lungdamna le kiniamkhiakna thin taw, inn ah an zongh ne khawm uh hi,

⁴⁷Pathian pokin mihing theampo ii kideisakna thupha zongh nga uh hi. Topa in nisimin, ngupna nga mihing amate pawl sungah belap hi.

Sawltakte 3

Peangbai Pasal khat Kidamsak

¹Ni khat Peter le John sia thunget hun, nitak nai thum in Biakinn ah pai uh hi.

²Kongpi Hoi kicina munah a khan tawntung peangbai pasal khat om hi. Nisim in ama sia tua kongpi pan Biakinnpi sungah a tum tu mihingte ii tung pan sum ngen tu in kipum puak ahi hi.

³Peter le John sungtang tu a mu ciangin, bang khat po ama a piak tu in, ngen hi.

⁴Amate in pasalpa sia a tangtan in salh uh a, Peter in, “Hong en tan!” ci hi.



⁵Tua ahikom amate tung pan, na khat pawpo nga tu in, kimuanmawkna taw en hi.

⁶Ahihang Peter in, “Sum le paai nei ngawl khi hi, ahizong ka nei sun hong pia tu khi hi: Nazareth mi Jesus Christ min taw thoto in lampai in, ci in thu kong pia hi!” ci hi.

⁷Tua zawkciangin a khut ziatsang pan len in, dingsak hi. Thakhat thu in, pasalpa peangte le a siakmitte hat hi;

⁸ama in kilawn in, a peang taw ding a, lam pai hong kipan hi. Tua zawkciangin, amate taw Biakinnpi sungah tum a, kalsuan in, kilawn in, Pathian pok hi.

⁹Mihon bup in, tuabang kalsuan a, Pathian a pok laitakin, mu uh hi.

¹⁰“Kongpi Hoi” kici Biakinn tumna a, khutdaw ngenpa ahi hunlam, a heak uh ciangin, ama tung thupiang sia lamdang sa mama uh hi.

Biakinnpi sungah Peter Thusonna

¹¹Tua pasalpa in Peter le John len in, a om laitak, tua munah a om mihing theampo in Solomon ii Talaap a kicina mun dong del uh hi.

¹²Peter in mipite a mu ciangin, “Israel mipuite awng, banghangin hi tungtaang ah lamdang sa in, ko sia hong salh ngengu nu ziam? Ko ii vaangletna ahibuale Pathianzia neina taw, hi siapa lampaisak thei hong sa nu ziam?

¹³Abraham, Isaac le Jacobte Pathian, ih taangpupite ii Pathian in, na Naseampa Jesus sia Pathian piak minthanna pia hi. Noma in ama sia Jew lampuite tungah na aap uh hi. Pilate in ama suaktasak tu in, a khensat zawkciang zong, Pilate mai ah na nial uh hi.

¹⁴Ama sia thiangtho a, pha hi napi na nial uh a, ama taangin, mihing thatpa khat Pilate ii suatak a piak tu in, na ngen zaw uh hi.

¹⁵Tua hi a, nuntakna a pia pa, note in na thatlum uh hi. Hi kale Pathian in ama thina panin, phongto a, hi thu huvau ah, kote in tetti ka hi uh hi.



¹⁶Na mu uhte le na heak uhte sia, ama min ii upna taw kivawt hi; Na mu tek siat uh bangma in Jesus a upna in, ama damsak ahi hi.

¹⁷“Tu in ka mipui Israel te awng, note le na lampuite ii, Jesus tungah na ngamtat uhte, tel ngawl vai ahi hunlam hong he khi hi.

¹⁸Pathian in ni dang lai pekin, kamsang theampo ii muk panin, Messiah in a thuak kul tu hi, ci in a thu thangsak khol zo hi; tuaciang hi bangin tungsak hi.

¹⁹Tua ahiciang kisiik kik vun a, Pathian kung zuan vun, tua hile na mawnate hong kimaisak tu hi. Tuabang na hi uh le,

²⁰Topa hong ompuina panin, thahatna hong piang tu hi, tuaciangin, no atu a kiteal khol sa Messiah ahi Jesus sia ama in hong paisak tu hi.

²¹Pathian kamsang thiangthote ii khua ngei hunlai a, a son khol sa bangma in, na theampo a kithaksua siat dong, ama in vantung ah om hamtang tu hi.

²²Banghangziam cile Moses in, ‘Na Topa Pathian in kei hong paisak bangma in, kamsang khat hong paisak tu a, ama sia noma mite sung pan khat hi tu hi. Ama ii sep tu hong son thu theampo na ni tu uh hi.

²³Mihing khat pawpo in, tua kamsangpa cibang a ni ngawl sia Pathian mite sung pan kituam khenin kisia tu hi’ ci hi.

²⁴Tuaciangin Samuel le ama zawkciang hong piangte pan kipan, thu son tu a nei kamsang theampo in tu hun dongin a piang tawto thute son lai hi.

²⁵Kamsangte tungtawn a, Pathian kamciamte note atu ahi hi. Pathian le na taangpupite thuciamna a siimte na hi uh hi. Pathian in Abraham tungah, ‘Na suan na paalte tungtawn in, leitung mihing theampo thupha ka pia tu hi,’ a ci hi.

²⁶Tua ahikom note theampo in na ngitlo nate pan kikheal a, thupha hong piak thei natu in, Pathian in a Naseampa teal in note kungah hong sawl masa hi,” ci hi.

Sawltakte 4



Council mai ah Peter le John Thu kisit

- ¹Peter le John mihingte tungah thu a son laitakin, thiampite pawlkhat, biakinn cingte a ukpa le Sadduceete pawlkhat amate kungah theng uh hi.
- ²Amate lungkim ngawl hi, banghangziam cile, mithite thaw kik tu thu a kilanghsakna in, Jesus sia thina pan tho kik zo hi, cina thu sawltakte nii in mihingte tung a hil hu ahi hi.
- ³Tua ahikom amate in, sawltakte nii manin, ni niam zo ahikom a zing ciang dong thong sungah khum uh hi.
- ⁴Ahihang a thuson a za mihing tam mama in um a, thu um mi tulnga bang khang hi.
- ⁵A zing ciangin Jew lampuite, upate le Thukham hil syate, Jerusalem ah kikhawm uh hi.
- ⁶Amate in Thiampi Lianbel Annas, Caiaphas, John, Alexander, le Thiampi Lianbel ii innkuanpui dangte taw kimu uh hi.
- ⁷Amate in sawltakte sia a mai ah dingsak a, “Hi sia bangbangin seam nu ziam? Note in bang vaang nei a, akua min zangh nu ziam?” ci in dongh uh hi.
- ⁸Thaa Thiangtho taw a kidim Peter in zo a, “Minamte lampui le upate awng,
- ⁹peangbaipa tung thupha vawtna le ama a kidamsakna hu in, kote tuni in, thu sit thuak ka hi uhle
- ¹⁰noteng le Israel mi theampo in hi mihingpa sia thinglamte tung na thalup, Pathian ii thina pan a phok kik Nazareth mi Jesus Christ min taw damthiang in hi sung note mai ah hong ding ahi hunlam na heak uh kul tu hi.
- ¹¹Jesus sia Laithiangtho in hi bangin a ci pa ahi hi. ‘Innsa note ii na nil uh suang sia, a theampo sung pan a thupibel suang suak hi.’
- ¹²Ngupna sia ama bek tungtawn in kinga thei hi; leitung bup ah eite hong ngum thei tu in, Pathian piaksa midang khat zongh om ngawl hi,” ci hi.



¹³Council upate in, Peter le John sia mihing thawthong hi a, pilna nei ngawl hi napi, tuza in a hansanna sia lamdang sa uh hi. Tuasia ciangin amate ngeal sia Jesus kitholpui ngeite ahi hunlam phawk uh hi.

¹⁴Ahizong amate in bangma a ci thei bua uh hi, banghangziam cile a kidamsakpa sia, Peter le John taw tua munah dingkhawm in a om mu uh hi.

¹⁵Tua ahikom amate Council zum pan pusuak tu in sawl a, tua zawkciang amate sungah, kikum uh hi.

¹⁶“Hi mite bang law tu hi ziam?” ci in amate kidongh uh hi. “Jerusalem a teang mihing sim in, hi a lamdang sap nalamdang lakna amate in vawt uh hi, ci in he siat zo uh a, ih nial thei bua hi.

¹⁷Ahihang mihingte sungah, hi thu a kizel ngawl natu in, Jesus minsuang a, a pau kikik nawn ngawl natu amate tawngin thupia tawng,” ci uh hi.

¹⁸Tua ahikom amate sam a, sungtangsak kikin, Jesus min taw thu a son ngawl natu, a hil ngawl natu in thupia uh hi.

¹⁹Ahihang Peter le John in zokik a, “Pathian mai ah — note thu kong nit tu le, Pathian thu ka nit tu uh, koi sia maan zaw ziam, noma tek in khensat tavun.

²⁰Banghangziam cile ka mu sa uh, ka zaak sa uh thute son ngawlin, ka om thei buatu uh hi,” ci uh hi.

²¹Councilte in, nasia seseam in a kidop natu in, tawng a, thu a piak zawkciang suaktasak hi. Amate daan piak tu suak thei ngawl hi, banghangziam cile mi theampo in thupiang sa sia tungtaang ah Pathian pok kim uh hi.

²²Hi nalamdang lakna ahi a kidamsak pa sia kum sawmli vaal pha zo hi.

Thu umte in Han natu Thungen

²³A kisuataksak pociang Peter le John sia a pawlte kungah heak kikin, thiampi liante le upate ii son teng son uh hi.



²⁴Thu umte in a zaak uh ciang, Pathian tungah hi bangin thungen khawm uh hi: “Vantung, leitung le tuipe le a sungah a om theampo ii Topa le Bitphuapa!

²⁵Thaa Thiangtho tungtawn in, kote taangpu David, na naseampa tungah hi bangin na ci hi. ‘Banghangin Gentilete sia a thin uuk ngawp ziam; banghangin mihingte in a vaal thawthong in, sawmkuunate vawt ziam?’

²⁶Leitung kumpite in amate le amate kithoai khol in, tuaciangin ukpite kikhawmtua in, Topa le ama Messiah el uh hi.’

²⁷Banghangziam cile Herod le Pontius Pilate in hi khuapi ah Gentilete le Israel mite taw kisitua in, a thiangtho na Naseampa Jesus, Messiah tu a, na vawt pa sia langpan takpi uh hi.

²⁸Nangma vaangletna le na deina taw tuabangin piang hen ci a, na khensat sa theampo a tangtun natu in, amate kisitua uh hi.

²⁹Tu in Topa awng, amate hong tawnnate, na za in a, ko na naseamte in, na thu hangsan tak ka son thei natu in, hong piangsak tan.

³⁰Cidamna a pian natu in, na khut hong vaan tan a, nalamdang laknate le, a lamdang vawtte, a thiangtho na Naseampa Jesus min taw a kisphe thei natu, hong thukim tan,” ci uh hi.

³¹A thunget man uh ciangin amate kikhopna mun sia ki ngawk hi. Amate sia Thaa Thiangtho taw kidim a, Pathian thu sia hanna taw son tu in kipan uh hi.

Thu umte in A neisa Theampo Kumkhawm

³²Thu umte pawl sia thinkhat lungkhat in, om uh hi. Kuama in kei aituam neisa hi, a ci om ngawlin, a neisa uh theampo khat le khat kihawm vadium uh hi.

³³Sawltakte in Topa Jesus thaw kikna thu, vaangletna lian taw, tetti pang uh a, Pathian in thupha tam mama amate theampo tungah buak hi.

³⁴Amate pawl sungah kitaangsapna a nei kuama a om bua hi. Lo neite le inn neite in, zuakin a nga uh sumte paipui a,



³⁵sawltakte tungah aap uh hi. Tuaciang, tua sumte mihing sim in, a kispna uh bangin, hawm tek uh hi.

³⁶Tuaciang, Cyprus ah a suak, Levite mi Joseph, sawltakte ii Barnabas a nak pa (a khiakna “hantawnpa”)

³⁷in, a neisa lo khat zuakin, a sum teng paipui a, sawltakte tungah aap hi.

Sawltakte 5

Ananias le Sapphira

¹Ahihang Ananias min nei mihing khat om a, a zi Sapphira taw a neisa pawlkhat zuak hi.

²A zi zongh ii thukimpuina taw sum pawlkhat amate atu keam tuam a, a omlai teng sawltakte aap hi.

³Peter in, “Ananias awng, banghangin Satan in na thin uksak a, Thaa Thiangtho theam in, na neisate zuak man sum aheap banghangin keam ni ziam?

⁴Na neisa na zuak maa in, nangma aa ahi hi; tuaciang na zuak zawkciangin, tua sum sia nangma aa ma ahi hi. Tua hi kasap banghangin tuabang ngamtat tu khensat ni ziam? Mihingte a theam na hi bua hi — Pathian a theam suak zo ni hi!” ci hi.

⁵Ananias in hi thu a zaak po ciang, pukin thi hi; tuaciang tua thu a za theampo lau uh hi.

⁶Khangnote hong tum a, a luang tun in, pusuapui in phum uh hi.

⁷Nai thum bang kihal zawkciangin, bang thu piang ci he ngawlin a zi hong sungtang hi.

⁸Peter in ama munah, “Na neisa na zuak uh sung pan, hi teng sia nang le na pasal ii na nga uh a buppi ma ahi nam, hong son tan,” ci hi. “Hi hi, a buppi ma hi,” ci in zo hi.



⁹Tua ahikom Peter in ama tungah, “Banghangin nang le na pasal in, Topa ii Thaa sia ze et nu ziam? Na pasal a phumte sia tu laitakin, kongbiang ah om hi, nangma zongh amate in hong pua tu a, hong pusuapui tu hi!” ci hi.

¹⁰Thakhat thu in ama sia Peter peang ah puk in thi hi. Khangnote sungtang a, ama sia a thisa in mu uh hi, tua ahikom amate in doipua ah pusua in, a pasal hui ah phum uh hi.

¹¹Pawlpi bup le hi thu a za mihing theampo lau mama tek uh hi.

Nalamdang laknate le A lamdang vawtte Thu

¹²Sawltakte in mihingte sungah nalamdang laknate le a lamdangte tam mama vawt uh hi. Thu um theampo Solomon Talaap ah kisitua uh hi.

¹³Mihingte in amate sia phat son mama napi a puami kuama in a pawm ngam bua uh hi.

¹⁴Ahihang mihing tam vaial amate pawl sungah kibelap a — Topa a um pa le numei honkhat suak hi.

¹⁵Sawltakte nasepna hangin, lampite zui in cinate hong kipua a, Peter hong pai ciang cinate pawlkhat peuma tungah a lim beak a tuk thei natu dei in, lupnate tung le phakte tungah sial uh hi.

¹⁶Tuaciang in Jerusalem khuakiim khuate pan mihonpite hong pai in, cinate le doaiveite paipui uh hi; tuaciang amate theampo kidamsak hi.

Sawltakte Kivawtsia

¹⁷Thiampi Lianbelpa le a pawl a lawm theampo, le tua mun a om Sadducee pawlte in sawltakte sia nasia tak eang uh hi; tua ahikom thu vawt tu in khensat uh hi.

¹⁸Amate in sawltakte manin, nautaangte kikhumna thong sungah khum uh hi.

¹⁹Ahihang tua ni zanin Topa vantung lalang khat in thong kongkha hon a, sawltakte a pusuasak zawkciangin, amate tungah,

²⁰“Pai tavun a, Biakinn sungah dingin, hi nuntakna thak thu, mihingte tungah son tavun,” ci hi.



²¹Sawltakte in, a sawl bangin ni a, khuavak ciangin Biakinnpi sungah tumin, hilcianna nei tu in kipan uh hi. Thiampi Lianbel le a pawl a lawmte in Jew lampuite theampo Council bup kikhopna ah kikhawm tu in sam uh hi; tua zawkciangin sawltakte amate mai ah a paipui natu in thonginn ah thupia uh hi.

²²Ahihang thong ukte thonginn a thet uh ciangin, sawltakte thong sungah a mu bua uh a, tua hu in Council zum ah a thu bang teng son kik a,

²³“Thonginn ka thet uh ciangin, thong kongkhate kikalh bikbek in om a, kongkhacing theampo zongh thong kongcing in ka mu uh hi; ahihang kongkha ka hon uh ciang, a sungah kuama ka mu bua uh hi!” ci uh hi.

²⁴Biakinn cingte ukpa le thiampi liante in, hi thu a zaak uh ciangin, sawltakte bang tat hi tu ziam, ci in lamdang sa uh hi.

²⁵Tuasia ciang pasal khat hong sungtang a, amate munah, “Ngai vun! Thong sung a na khum uhte in mihonte hilcian in, Biakinnpi sungah om uh hi!” ci hi.

²⁶Tua ahikom Biakinn cing ukpa sia, a khutnuai mihingte taw pai in, sawltakte paipui kik uh hi. Amate in mihingte ii suangtum taw a den tu lau ahikom, sawltakte tungah zawthawk thu a zangh ngam bua uh hi.

²⁷Sawltakte sungtan pui uh a, Councilte mai ah, dingsakin, Thiampi Lianbel in thusit hi.

²⁸“Hisia pa min taw hilcian thei nawn ngawl tu nu hi, ci in nasia takin thu kong pia zo uh hi; ahihang tu in bang vawt kik nu ziam! Jerusalem khuazaang ah, na hilcianna uh kizelsak zo a, ama thina thu kote maw hong pusak nuam nu hi!” ci hi.

²⁹Peter le sawltak dangte in zokik a, “Pathian thu ka nit tu uh hi a, mihingte thu ka nit tu uh hi ngawl hi.

³⁰Note in Jesus thinglamte tungah kilh in, na thalup zawk uh ciang, ka taangpupite ii Pathian in Jesus thina panin phong kik hi.



³¹Israel mite a mawna uh panin, kisiik kik a, mawmaisakna a nga natu hunpha pia tu in, Pathian in ama thosak kik a, a ziat sangah koi in Lampuipa le Hunpa suaksak hi.

³²Ama thu a nite tungah a piak letsong ahi, Thaa Thiangtho le kote in hi thu huvau ah tetti ka hi uh hi,” ci uh hi.

³³Council upate sung a kihelte in, hi thu a zaak uh ciangin, a thin uh uuk mama a, sawltakte thatlum nuam uh hi.

³⁴Ahihang amate sung panin Phariseete Gamaliel kici Thukham hil syapa khat ahi ngual theampo ii zatak pa sia Council sungah hong ding hi. Ama in sawltakte tawmvei puasasak natu in thupia a,

³⁵tuaciang Councilte tungah, “Israel mipuite awng, hi mite tungah na vawt tu uh kidawm tavun.

³⁶Tu nung hiat in, Theudas kici khat hong piang a, ama le ama sia a nasia mama mi khat in kison a, tuaciang pasal zali bang in ama pawm uh hi. Ahihang ama sia kithat a, a nungzuite kithethaang in, a vai teng a bona thu na ciamtee uh hi.

³⁷Hisia zawkciangin, Galilee mi Judas kici khat mihing simna a kivawt hun lai in, hong piang hi; ama zongh nungzui mihonpi khat nei a, ahihang ama zongh kithatlum in, a nungzuite sia kithethaang hi.

³⁸Tua ahikom hi thu tungtaang ah, hi mite bangma law heak vun kong ci hi. Amate nguak koi nginge po vun! Banghangziam cile amate ngealna le sepna in, mihing sepna ahile hong bo tu a,

³⁹ahihang tuate in Pathian kung pan hong pai ahile, zo zo ngawl tu nu hi. Pathian langpan a, a do noma le noma kisua tu nu hi!” ci hi. Council in Gamaliel ngaisut piakna a ni hi.

⁴⁰Sawltakte sungtang in sawl a, vel in, Jesus min taw a hil nawn ngawl natu thupia hi; tua zawkciang amate tha uh hi.



⁴¹Sawltakte in Council a nusiati ciang, Jesus atu in maizum thuak tu, Pathian in kiphu sa ahikom lungdam uh hi.

⁴²Tuaciang nisim in Biakinnpi sung le ngual innte ah Jesus Messiah ii Lungdamna Thupha hilcianna le thuhilna nei uh hi.

Sawltakte 6

Hupa Salite

¹Tua zawk hun khat ciangin, a nungzuite khakhang a, Greek kampau Jewte le innteak Jewte kilaklaw ah kihau na khat piang hi. Greek kampau Jewte in nisim sum a kihawm ciangin, amate ii meingongte sia, kingaigon hi, ci uh hi.

²Tua ahikom sawltak sawm le niite in, nungzui theampo khawmtua a, “Ko sia sum vai taw komlaak hu in, Pathian kammal taw thuhilna, ka ngaigon tu uh sia maan ngawl hi.

³Tua ahiciang, suapuite awng, Thaa Thiangtho le ciimna taw a kidim hi ci in a kitel pasal sali noma sung pan hong teal tavun a, amate khut sungah, hi nasep sia ih aap tu hi.

⁴Ko ka hi uhle tuasia ciangin ka hun uh a bit in thungetna le thuhilna in, ka zangh tu uh hi,” ci uh hi.

⁵Pawl buppi ma in sawltakte ii ngaisut piakna bangin, lungkim uh ahikom, amate in, Thaa Thiangtho le upna taw a kidim Stephen, Philip, Prochorus, Nicanor, Timon, Parmenas, le Nicolaus a kici Antioch khua pan, a masa in Jew biakna ah a kikheal ngei Gentile mi khat teal uh hi.

⁶A pawl bupin tua mite teng sia sawltakte tungah aap uh a, sawltakte in thungetsakin, amate lu tungah a khut uh ngaa uh hi.

⁷Tuabangin Pathian kammal hong kizel to hi. Jerusalem khua ah a nungzuite khang vaial a, thiampi tam mamate in hi upna saang uh hi.

Stephen ii Kimatna

⁸Pathian ii a thupha nasia tak a piak, vaangletna taw kidim Stephen in, nalamdangte le a lamdangte tam mama mipite sungah vawt hi.



⁹Ahihang pasal pawlkhat in langpan uh a, tua mite sia sila pan a Kisuatak sa synagogue ah a kipawlte hi a, Cyrene pan le, Alexanderia pan Jewte kihel hi. Amate sia Cilicia ngamkhen le Asia ngamkhen te pan Jew dangte taw kikopin, Stephen taw kam kinial hong kipan uh hi.

¹⁰Ahihang Thaa in Stephen sia tuabang ciimna pia ahikom ama a pau ciangin a nalh zo bua uh hi.

¹¹Tua ahiciang amate in, pasal pawlkhat sumnguk pia a, “Moses le Pathian langpan in, a pauna za khu hi!” cisak hi.

¹²Hi bang danin mihonte, upate le Thukham hil syate hol uh hi. Amate in Stephen manin Council mai ah paipui uh hi.

¹³Tua zawkciangin, leilot tetti pang tu in, mihing pawlkhat sungtangsak hi. Amate in, “Hisia pa in, biakna taw kisai a thiangtho ih Biakinnpi le Moses Thukham el tawntung hi.

¹⁴Nazareth mi Jesus in, hi Biakinnpi sutham tu a, Moses tung pan hong paisuk ih ngeina theampo hong khealsak tu hi, ci in a son laitakin za khu hi!” ci uh hi.

¹⁵Council sungah a to te theampo in, Stephen en tek uh a, a maitang sia vantung lalang maitang taw kibangin mu uh hi.

Sawltakte 7

Stephen ii Thusonna

¹Thiampi Lianbel in Stephen munah, “Hi thu a maan ziam?” ci in dongh hi.

²Stephen in zokik a, “Suapuite le pate awng, hong ngai tavun! Ih taangpupi Abraham sia Haran ah teang tu in, a pai maa, Mesopotamia ah a ten laitakin, ama tungah vaanglian Pathian kilak a,

³‘Na innkuanpuite le na ngam nusia in, kong lak tu ngamah pai tan,’ ci hi.

⁴Tua ahikom a ngam nusia in, Haran ah pai hi. Abraham ii pa a thi zawkciang, tu laitak note teenna hi ngamah Pathian in kikhiinsak hi.



⁵Tua laitak hun in Pathian in, Abraham aituam neisa tu in, leitung metre khat kiimhuam zongh a pia bua lai hi, ahihang Pathian in piak tu in, kamciam pia hi, ama nung pan a suan a paalte atu zongh ahi hi. Pathian ii hi kamciam a piak hunin, Abraham in ta a nei bua hi.

⁶Pathian kamciam in hi bang ahi hi: ‘Na suan na paalte sia, ngamdang ah peam tu a, amate sila suakin kum zali tawntung kisiatvawt cip tu hi.

⁷Ahihang a silate tungah a kilawm thukhenna ka tungsak tu a, tua zawkciangin amate tua ngam panin pusuak in, hi sungah amate in kei hong bia tu hi,’ ci hi.

⁸Tuasia zawkciangin Pathian in, Abraham sia thuciamna ii lim tu in vunteap atsakna zeksa pia hi. Tua ahikom Abraham in, Isaac sua zawk nipi khat a cin ciangin, a vunteap atsak hi, Isaac in a tapa Jacob a vunteap atsak hi; Jacob in a minthang ih taangpupite sawm le niite ii vunteap atsak hi.

⁹“Jacob tate in a suapui Joseph sia eang uh a, Egypt ah sila in na zuak uh hi. Ahihang ama taw Pathian omkhawm hi.

¹⁰Tuaciangin a ngim ngana theampo pan suatak pia hi. Egypt kumpipa mai ah, Joseph a kilak ciang, Pathian in thuzawkhuaina le ciimna pia a, tuaciang kumpipa in Joseph sia ngamuk mangpa le kumpi bangkua a uk suaksak hi.

¹¹Tua zawkciang Egypt le Canaan ngambup ah kialpi tung a, ngimna nasia takin piang hi. Ih taangpupite in anneak tu nei ngawl a,

¹²tuasia ciang Jacob in Egypt ngamah antang om hi, ci in a zaak ciang, ama in ih taangpupite ahi a tate sia tuak ah a khat veina in paisak hi.

¹³A nii veina a pai ciang Joseph in ama le ama a suapuite munah kison a, tuasia ciang, Egypt kumpipa in Joseph innkuanpuite huvau he hi.

¹⁴Tua ahikom Joseph in, a pa Jacob tungah thupuaksak a, ama le a innkuan bup, a vekpi a kingawm mihing sawmsali le nga teng sia Egypt ngamah a pai natu in zasak hi.

¹⁵Tuaciangin Jacob sia Egypt ngamah pai a, tua munah ama le a tate thi hi.



- 16**A luanghawmte sia Shechem ah kitua hi. Abraham ii Hamor minamte tung pan a sum taw a lei, tuak a thaan sia sungah amate kiphum uh hi.
- 17**“Abraham tungah Pathian ii kamciam teng, a tunsak tu ciangin, Egypt ngamah ih minamte sia nasia tak khangto zo hi.
- 18**A khakbel ciangin, Joseph a he ngawl kumpi khat sia Egypt ngam uk tu in kipan hi.
- 19**Ama in ih taangpupite theambawl in, ngitlona taw a nausente a thi tu in daaipua ah a vawk natu thupia hi.
- 20**Hi hun sia Moses ii pian hun hi a, ama in a mealhoi mama patang khat ahi hi. Ama sia inn ah tha thum kikeam a,
- 21**inn panin a hep uh ciangin, kumpipa ii tanu in, ama sung pan a piang ta bangin vawt a, vaak in taa hi.
- 22**Egyptte ciimna theampo kisinsak a, mihing thupi khat ii kampau luheakzia hong nei hi.
- 23**“Moses sia kum sawmli a phak ciangin, a minampui Isrealte bangbangin kivawt ziam ci in kan tu in khensat hi.
- 24**Egypt mite khat in a minampui Israel te khat a siatvawt zazan sia ama in mu hi, tua ahikom hun tu in pai a, Egypt pa thatlum in phulam hi.
- 25**(Ama ngaisutna ah, a minampuite suatak natu in, Pathian in ama zangh tu hi ci in a mite in tel tu in um a, ahihang amate in a tel bua uh hi.)
- 26**A zing ciangin Israel te nii, kihau in om mu a, ama in lemtua tu in hanciampui hi. ‘Hong ngai tavun, note unau khat na hi uh hi; banghangin khat le khat kihau nu ziam?’ ci hi.
- 27**A lawmpa a siatvawt sia pa in, Moses sawn a, ‘Akua in nang sia ko hong uk tu le ko tungah, thukhen tu in hong koi ziam?’
- 28**Zeini a Egyptte khat na thalup bangin, kei hong thatlum nuam ni ziam,’ ci hi.



²⁹Moses in hi thu a zaak ciangin, Egypt ngam pan tai a, Midian ngam ah teang hi. Tua munah tapa nii nei hi.

³⁰“Kum sawmli hong kan zawkciangin Sinai mualhui senneal ngam sung sawlpaang kuang khat sungah vantung lalang khat Moses mai ah hong kilak hi.

³¹Moses in a mu teng lamdang sa in, a kitel zaw in a mu thei natu sawlpaang sang neak hi. Ahihangin Topa ii aw hi bangin za hi:

³²‘Kei sia na taangpupi Abraham, Isaac le Jacob ii Pathian ka hi hi’ ci hi. Moses lau in liing ngawp a, en ngam ngawl hi.

³³Topa in ama tungah, ‘Na peangdap suut in, banghangziam cile na dinna mun sia thiangtho hi.

³⁴Ka minamte Egypt ngamah vawtsiat a thuakna teng ka mu zo hi. Amate tauna ka za a, amate suatak tu in kong paisuk zo hi. Tu in hong pai tan; Egypt ngam ah hong paisak tu khi hi,’ ci hi.

³⁵“Moses sia Israel te ii a nial pa ahi hi. ‘Akua in nang sia, ko hong uk tu le ko tung ah thukhen tu in, hong koi ziam?’ ci in dongh uh hi. Sawlpaang kuang sung pan ama tung a kilak vantung lalang ii huna taw, Pathian in amate a uk tu le a suaktasak tu in ukpa le hunpa tu in, a thataak pa ahi hi.

³⁶Ama in Israel te sia Egypt ngam pan pusua pui a, ama in nalamdang laknate le a lamdangte taw, Egypt ngam, San Tuipi le kum sawmli sung senneal ngamsung ah lampui hi.

³⁷Israel te tungah, ‘Pathian ii kei hong thataak bangma in, Pathian in note atu kamsang khat hong paisak tu hi,’ tua pa in noma mi pui khat hi tu hi’ a ci pa sia Moses ahi hi.

³⁸Senneal ngamah a kikhawmtua Israel mite taw a om khawm pa sia Moses ahi hi; Sinai mual tungah ama a paupui vantung lalang sia le ih taangpupite taw tua munah omkhawm a, ei tungah hong piak sawn tu, Pathian ii a nungta thute ama in saang hi.



³⁹“Ahihang ih taangpupite in ama thu a ni nuam bua uh hi; amate in Moses puavawk in, Egypt ngam ah a heak kik thei le uuk uh hi.

⁴⁰Tua ahikom Aaron munah, ‘Eite hong lampui tu in milim pathian pawlkhat hong vawtsak tan. Egypt ngam pan hong pusua Moses sia bang tawk hi tu ziam he bua hing,’ ci uh hi.

⁴¹Tuasia ciangin, amate in khuital khat ii lim taw a kibang milim khat vawt a, sangaw biakpiakna nei in, amate vawttawm vangiat khat sia upat piakna in poaikhaam uh hi.

⁴²Tua ahikom Pathian in amate nungngat in, kamsangte laibu sungah, a om bangma in, van a aksite bia tu in thazau hi: ‘Israel mite awng! Kum sawmli tawntung senneal ngam sungah, sa na ngo uh a, nganhing taw biakpiakna, na vawt uhte sia, kei tungah hong vawt na hi bua uh hi.

⁴³Na puak uh sia Molech pathian ii tuipuan buk le noma aksi pathian Rephan lim ahi hi. Tuatte in noma ii na biak tu in, na vawttawm uh milimte ahi hi. Tua ahikom Babylon kalh ah sal in kong puak tu hi,’ kici hi.

⁴⁴“Ih taangpupite in Pathian ompuina a kilakna Puanbuk sia senneal ngam sungah keng kawkoai hi. Tua Puanbuk sia Moses tungah Pathian sawl bang le a kilak lim bangin a kivawt ahi hi.

⁴⁵A khaksang ciangin tua tuipuanbuk a saang, ih taangpupite in, amate mai ah, Pathian hawlkeak minamte ii ngam suan tu in, Joshua taw a pai uh ciangin, tua tuipuan buk sia keng uh hi. David khan hun dong, tua munah om hi.

⁴⁶Ama in Pathian maipha nga a, Jacob ii Pathian inn tu khat asak thei natu in Pathian tungah ngen hi.

⁴⁷Ahihang Pathian inn tu a sa pa sia Solomon ahi hi.

⁴⁸“Ahihang a saangbel Pathian sia mihingte sak inn sungah a teang bua hi; kamsangpa ci bangma in,



⁴⁹Vantung in ka kumpi tokhum hi, Topa in ci hi, tuaciangin leitung sia ka peang ngakna ahi hi. Bangbang innte, kei atu hong saksak tu ni ziam? kei ten natu mun sia koisung ziam?

⁵⁰Hite theampo keima vawt sa hi ngawl ziam?’

⁵¹Stephen in, “Note bangza in thinpui nu ziam! Bangza in note thin in Pathian he ngawl ziam? Pathian kammal na zaak ngawl natu in, bangza in nangong nu ziam! Na taangpupite bang lian hi nu hi: note zongh in Thaa Thiangtho nalh tawntung nu hi!

⁵²Na taangpupite ii a siatvawt ngawl kamsang khat beak om ngei kana ziam? Khuangei pek panin, Pathian ii a thutang Naseampa hong pai natu a sonkhol, Pathian kamtaite na thatlum uh hi. Tu in, note in ama leeheak a, suamlum nu hi.

⁵³Vantung lalangte hong piak Pathian ii thukham a saangte na hi uh hi — ahihang tua thukhamte ni ngawl nu hi!” ci lai hi.

Stephen Suangtum taw Kidenlupna

⁵⁴Council sung a kihelte in, Stephen thuson a ngai uh ciangin, amate in thin uukna taw a ha ngoai san uh hi.

⁵⁵Ahihang Stephen sia Thaa Thiangtho taw kidim a, vantung ento in, Pathian ii minthanna le Pathian ziatsang ah a ding Jesus mu hi.

⁵⁶“En vun! Vantung kihong mu khi hi, tuaciang Mihing Tapa sia Pathian ziat sangah, dingin om hi!” ci hi.

⁵⁷Council sung kihel mihingte in nging takin au a, a khut taw a bil uh hum hi. Tua zawkciang amate teng in, thakhat in ama del uh a,

⁵⁸khuapi pua ah lawn in, suangtum taw deang uh hi. Tua tetti te in amate puantualte sia, Saul kici tangval khat ii kep tu in, aap hi.

⁵⁹Amate in Stephen sia, suang taw a hawhua laitak in, ama in Topa biakpui a, “Topa Jesus awng, ka thaa hong saang tan!” ci hi.



⁶⁰Ama in khupdin a, awnging tak taw, “Topa! hi mite mawna na teptesak heak in!” a ci zawkciangin thi hi.

Sawltakte 8

¹Tuaciang Stephen a thalupna sia Saul in lungkimpui hi.

Saul in Pawlpi Siatvawt

Tua ni mama in Jerusalem a om pawlpi sia siatvawtna nasia takin thuak tu kipan hi. Sawltakte sim ngawl thu um dangte theampo sia Judea le Samaria ngamkhente sungah kithethaang siat uh hi.

²Thu umte pawlkhat in Stephen phum uh a, hee in awnging tak taw ama kaa uh hi.

³Ahihang Saul ahile Pawlpi sukthap natu hanciam hi; inn khat pan inn khat ah pai in, thu umte kaikeak a, pate zongh numeite zongh thonginn sung denna in nei hi.

Samaria ah Lungdamna Thupha Kihil

⁴A kithethaang thu umte in mun theampo ah pai in thuhil uh hi.

⁵Philip in Samaria khuapi ah pai in tua mun mipite tungah Messiah thuhil hi.

⁶Mihonpite in Philip ii thuson ngai a, nalamdang lakna a vawtte a mu uh ciang ama neakin phatak ngai uh hi.

⁷Mihing tam mamate sung pan doai ngilote sia a nging in au a, pusuak hi; pumzawte, peangbaite tam mama dam uh hi.

⁸Tua ahikom tua khuapi sungah lungnopna lian om hi.

⁹Tua khuapi ah Simon min nei pasal khat om a, tawmvei hun sung tengin Samariate sia ama ii mitbum lakna taw lamdang sasak hi. Ama sia mi thupi khat in kison a,

¹⁰tuaciang khuapi sungah om theampo kidoidanna om ngawlin, ama thu ngai uh hi. “Ama in 'Vaangletna Lianpi' a kici tua Pathian ii vaang sia ahi hi,” ci uh hi.



¹¹Khua ngei mama sung ama ii mitbum taw lamdang sasak ahikom, a thusonte pha takin ngai uh hi.

¹²Ahihang Pathian Ngam lungdamna thupha le Jesus thu Philip ii sonna a up ciangin, pate zongh numeite zongh tui kiphum uh hi.

¹³Simon mama zongh in um hi; tui a kiphum zawkciang Philip nai ah om top a, a nasia a lamdangte le nalamdang laknate a kivawt a mu ciangin lamdang sa hi.

¹⁴Jerusalem a om sawltakte in, Samaria a mihingte ii Pathian kammal a saan uh sia za ahikom amate in Peter le John sia tua mite kungah paisak hi.

¹⁵Amate hong thet uh ciang, Thaa Thiangtho a nga thei natu in, thu umte atu thungetsak hi.

¹⁶Banghangziam cile Thaa Thiangtho sia amate khat ii tung zongh ah tuaksuk ngawl lai hi; amate sia Topa Jesus min taw a ki baptize hi bek hi.

¹⁷Tuaciang Peter le John in, amate tungah a khut uh nga a, tuasia ciangin Thaa Thiangtho nga uh hi.

¹⁸Amate tungah sawltakte a khut a ngak uh ciangin, thu um mite tungah Thaa Thiangtho a kipiak sia Simon in mu hi. Tua ahikom Peter le John tungah sum pia in,

¹⁹“Ka khut ka ngakna pawpo tungah Thaa Thiangtho a nga natu in, hi vaangletna sia kei zongh hong pia tavun,” ci hi.

²⁰Ahihang Peter in zokik a, “Pathian letsong sia sum taw kilei thei tu in na up hu in, nang le na sum teng sia hell ah pai taken!

²¹Nang in kote nasepna taw kisai nawn ngawl ni hi, banghangziam cile, Pathian muna ah na thin maan ngawl hi.

²²Tua hi a, hi a sia na ngealna panin kisiik kik tan a, tuaciang tuabang ngaisutna na nei hu in, hong maisak natu in Topa tungah thungen tan.

²³Banghangziam cile nang sia ngual eenna thin taw a kidim mawna sungah, koltang pa hi, ci in kong mu hi,” ci hi.



²⁴Simon in Peter le John tungah, “Tu a nong ci teng kei tungah hong tun ngawl natu, nong hesuakna in Topa tungah thu hong ngetsak tavun,” ci hi.

²⁵Amate in tetti pangin Topa thute a thansak zawkciangin, Peter le John te Jerusalem khua ah cia kik uh hi. A cia lam in, Samaria ngam khuano tam mamate ah Lungdamna Thupha hil uh hi.

Philip le Ethiopia Maangpa

²⁶Topa vantung lalang khat in, Philip munah, “Kithoai in a, thangasang zuanin Jerusalem pan Gaza paina lampi zui in pai tan,” ci hi. (Hi lampi sia kizangh nawn ngawl hi.)

²⁷⁻²⁸Tua ahikom Philip in kithoai in pai hi. Tu in Ethiopia kumpinu ii sum kholna a uk cilkinget Ethiopia mi a thupi ulian khat sia a inn ah cia tu in pai hi. Ama sia Jerusalem ah Pathian bia tu in a na theng hi a, a siphuleang taw cia kik hi. Tuabangin a cia kawmin, Isaiah thubu sim hi.

²⁹Thaa Thiangtho in Philip munah “Pai tan a, tua leang taw a kinai in va om tan ” ci in sawl hi.

³⁰Philip in del a, a phak ciangin, ama in kamsangpa Isaiah thubu a sim sia za hi. “Na sisim teng na tel ziam?” ci in dongh hi.

³¹Ulian pa in “Hong thiangson khat a om buale bang ka tel tu ziam?” ci zo kik hi. Leang tungah Philip kaato tu in sam a, amate tokhawm hi.

³²A sim Laithiangtho mun sia hi bang ahi hi: “Ama in ngawlup tu in a kikai tuu khat taw kibang hi, ama in a mul a kimeetsak ciangin, a ham ngawl tuuno taw kibang hi. Kam khat zongh a pau bua hi.

³³Ama sia kizawnsak vawt a, thukhaikim khenna kitaansak hi. Ama suan le paalte huvau sia kuama in a son thei buatu hi, banghangziam cile, ama ii leitung nuntakna bo hi.”

³⁴Ulianpa in, Philip munah “Kamsangpa pauna hisia akua a ci nopna ziam hong son tan? Ama le ama kici nuam ziam maw midang khat ziam?” ci in dongh hi.



³⁵Tuaciang Philip in son tu in kipan hi; hi Lai Thiangtho kammal pan panto in, Jesus ii Lungdamna Thupha son hi.

³⁶Tuabangin a pai susuk ciangin tui omna mun khat theng hi, tuaciang Ulianpa in, “Hi sungah tui om hi. Tui ka kiphum natu in bang in hong khak ziam,” ci hi.

³⁷Philip in ama tungah “Na thin theampo taw na um le, tui kiphum thei tu ni hi,” ci hi. Ama in “Um khi hi. Jesus Christ sia Pathian Tapa hi, ci in um khi hi,” ci in zo hi.

³⁸Ulianpa in a leang a tawlngak natu thupia a, amate nii tui sungah tuaksuk in, Philip in ama tuiphum hi.

³⁹Tui sung pan hong kaato uh ciangin, Topa Thaa in Philip la hi. Ulianpa in ama mu kik nawn ngawl ahihang, lungnopna taw kidim in, a pai ngei in paisuak hi.

⁴⁰Philip sia Azotus khua ah theng ahi hunlam ama le ama kitel hi; ama Caesarea ah pai suak a, lamdung khua theampo ah Lungdamna Thupha hil hi.

Sawltakte 9

Saul Kikhealna

(Sawltakte 22.6-16; 26.12-18)

¹Tua hun laitak Saul in Topa nungzuite suamlup tu in nasia takin tawng tawntung hi. Thiampi Lianbelpa kungah pai a,

²Topa Lampi a zui pate le numeite a mu peuma man khawmin Jerusalem ah a ciapui thei natu, Damascus khua synagogue ukte a lak tu ama thu a kisonna lai a ngen hi.

³Damascus ah a pai lam in, khuapi a thet dektak ciang, thakhat thu in van pan a taang khat in, ama kiimkot theampo taan hi.

⁴Ama lei ah puk a, tuaciang aw khat hi bangin za hi. “Saul! Saul awng! banghangin kei hong vawtsia ni ziam?”

⁵“Akua ni ziam Topa?” ci in dongh hi. “Kei sia nong vawtsiat pa Jesus ka hi hi,” ci hi.



⁶“Ahihang, tho in a, khuapi sungah pai tan, Tua sungah na vawt tu a kul teng hong kison tu hi,” ci hi.

⁷Saul taw khual a hawkhawmte in, kam khat zongh pau ngawlin, ding uh hi; amate in awnging za ahihang, kuama a mu bua uh hi.

⁸Saul sia lei panin thoto a, a mit hak ahihang bangma a mu thei bua hi. Tua ahikom amate in, a khut pan len in, Damascus khua sung zotpui hi.

⁹Ni thum sung ama in khua a mu thei bua a, tua hun sungteng in, ama in an hi kale tui hi kale neak a nei bua hi.

¹⁰Damascus ah Ananias kici Tapidaw khat om hi. Ama in mu kholna nei a, Topa in ama munah, “Ananias awng!” ci in biakpui hi. “Hi sungah om ing, Topa” ci in zo hi.

¹¹Topa in ama munah, “Lampi Tang kicina munah, pai tu in kithoai in a, tuaciangin Judas inn ah Tarsus khua mi Saul kici khat va kan tan. Ama sia tu laitakin thunget saan hi,

¹²tuaciangin ama mu kholna sungah Ananias kici pasal khat hong pai a, khua a mu thei kik natu in, ama tungah a khut ngak sia mu zo hi,” ci hi.

¹³Ananias in zokik a, “Topa awng, mihing tam ma in, hisia pa thu hong son a, Jerusalem ah na mite tungah a cizat huai ama ngamtatna theampo hong kison hi.

¹⁴Nang hong biate theampo a mat thei natu in, thiampi liante tung pan, thu ngana taw, Damascus khua ah hong pai hi,” ci hi.

¹⁵Topa in ama munah, “Pai tan, banghangziam cile, ama sia Gentilete sung, kumpite sung le Israel mite sungah, ka min hong kiheak natu in, ka naseam tu in, ka teal zo hi.

¹⁶Tuaciang keima mama in kei ii hu a, a thuak tu theampo zongh ka lak tu hi,” ci hi.

¹⁷Tua ahikom Ananias pai a, Saul tunna inn sungah tum in, a tungah a khut nga hi. “Suapui Saul awng, hi sungah nong pai lai in, lampi ah nang tungah



hong kilak — ih Topa Jesus in, khua na mu thei kik natu le Thaa Thiangtho taw na kidim natu in nang kungah kei hong paisak hi,” ci hi.

¹⁸Thakhat thu in ngasa hawlip taw a kibang pawlkhat sia, Saul mittangte panin, hong taaksuk a, ama in khuamu thei kik hi. Ama ding a tui ki phum hi;

¹⁹Tuaciangin, an a neak zawkciang, a tha hat kik hi.

Saul in Damascus ah Thuhil

Saul sia Damascus ah thu umte taw ni tawmvei sung om tu in taam hi.

²⁰Ama in Jewte ii synagogue ah paisuak a, Jesus sia Pathian Tapa hi ci in thuhil tu in kipan hi.

²¹A zate theampo in lamdang sa in, “Jerusalem ah Jesus a biate a thatlum bul sia ama hi kana ngawl ziam? Tuaciangin hi lai hong paina thu zongh, thu umte man a, thiampi liante kungah ciapui tu, ngiimna taw hong pai hi ngawl ziam,” ci uh hi.

²²Ahihang Saul thuhilna in vaang nei vaial a, Jesus sia Messiah hi ci a, a son thiangna sia, up huai mama ahikom, Damascus khua ah a teang Jewte in, ama a nial thei bua uh hi.

²³Ni tam mama hong kan zawkciang, Jewte kikhawmtua a, Saul sia thalup sawm uh hi.

²⁴Ahihang amate sawmnate, ama tungah kison hi. Ama sia a thalup thei natu in, sun taw zan taw khuapi kongpate, encik uh hi.

²⁵Ahihang zan khat ciangin, a nungzuite in, Saul sia khuapi luphung vang khat pan bawm khat taw in khiasuk uh hi.

Saul Jerusalem ah Haw

²⁶Saul sia Jerusalem ah pai in, nungzuite pawl sungah tum sawm hi. Ahihang amate in, Saul sia nungzui khat hi, ci in um thei ngawl a kiita uh hi.



²⁷Tuaciang Barnabas in ama panpui a, sawltakte kungah paipui hi. Saul in lampi tungah Topa taw a kimuna thu le, Topa ii ama a paupuina thuteng zongh son hi. Damascus ah hang takin Jesus min thuhil a, zongh son si hi.

²⁸Tua ahikom Saul sia amate kungah taam a, Jerusalem khuathing bup ah vak kawkoai in, Topa min taw hang takin thuhil hi.

²⁹Ama in Greek kampau Jewte taw zongh, kam kikum in kinialna nei a, ahihang Saul sia amate in thasawm uh hi.

³⁰Thu umte in hi thu a phaw uh ciang, Saul sia Caesaria ah paipui a Tarsus khua ah puak uh hi.

³¹Tuabangin Judea ngam Samaria ngam le Galilee ngambup ah pawlpite in ngammuang takin om theina hun khat nga hi. Pawlpi sia Topa min thasiana taw a nuntak bangma in Thaa Thiangtho huna tungtawn in, thakho in pawlpi mi khangto hi.

Peter, Lydda le Joppa ah Khualhaw

³²Peter sia mun theampo ah khualhaw a, hun khat sia Lydda a teang Pathian mite kungah haw hi.

³³Tua munah Aeneas a kici pasal khat taw kimu a, tua pa sia kum liat tawntung a pum zawcip ahikom a tho thei bua hi.

³⁴Peter in “Aeneas awng, Jesus Christ in hong damsak hi. Tho in a, na lupna zial in,” ci hi. Tha khat thu in, Aeneas tho hi.

³⁵Lydda khua le Sharon khua a teang mihing theampo in, ama mu uh a, Topa kungah kiheak siat uh hi.

³⁶Joppa khua ah Tabitha kici numei khat om a, ama sia thu um khat ahi hi. (Ama ii Greek min sia Dorcas hi a, sazuk nam khat ci nopna hi) Ama in a hun nei theampo thupha vawtna le, a zawngte huna in zangh hi.

³⁷Tua hun laitakin ama in cina in thi hi. A luang sia kibual a, inn tung doituum khat sungah sial uh hi.



³⁸Joppa sia Lydda panin a khuala bua hi, tuaciangin thu umte in, Peter sia Lydda khua ah om hi ci in a zaak uh ciangin kamtai nii paisak a, “A manlang in hong pai tan,” cisak uh hi.

³⁹Tua ahikom Peter kithoai in a samte taw ton hi. Ama a thet ciangin, inntung doituam sungah paipui a, nupi meingong theampo in bawm hon a, kap kawmin, Dorcas a nuntak lai a, a vawt laktongte le laktong puasilhthe theampo lak uh hi.

⁴⁰Peter in amate theampo inn doituam pua sangah pusuaksak a, khupdin in thungen hi; tuaciang mithi luang maingat in, “Tabitha awng, tho in!” ci hi. Numei in a mit hak a, Peter a mu ciang, hong to hi.

⁴¹Peter in zam a, dingsak hi. Tua zawkciang thu um theampo sam a, meingongte zongh kihel in, amate tungah, numei sia a nungta in aap hi.

⁴²Hi thuthang sia Joppa khuazaang ah thang a, mihing tam mama in, Topa um uh hi.

⁴³Peter sia Joppa ah savun vawt ahi Simon kungah ni tam mama taam hi.

Sawltakte 10

Peter le Cornelius

¹Caesarea khua ah Rome kumpite ngalkap ahi “Italy Ngalkapte” kici ngalkap hon khat sungah ngalkap bu a seam Cornelius kici khat om hi.

²Ama sia biakna kin khat hi; ama le a innkuan bupin Pathian bia uh hi. Ama in Jew mizawngte a hu thei za in hu a, tuaciang tatsat ngawlin Pathian tungah thungen hi.

³Nikhat nitak nai thum bang hun mahiat in, ama in mang mu a, hi sitset in a muna ah Pathian vantung lalang khat in, “Cornelius awng!” ci hi.

⁴“Bang ziam Topa,” ci hi. Vantung lalang in, “Pathian in na thungetna le, a zawngte na hunate hangin lungdam a, na thunget na te uh hong zo tu kithoai hi.

⁵Tu in mihing pawlkhat Joppa ah paisakin, Simon Peter kici mihing pa samsak tan.

⁶Ama sia tuipi hui ah a teang savun vawt Simon inn ah zintung hi,” ci hi.

⁷Tua zawkciangin, vantung lalang in paisan hi, tuaciang Cornelius in a innsung a naseamte nii le biakna a kin, ama aituum a cing ngalkap khat sam hi.

⁸Thupiang teng amate tungah son in Joppa ah paisak hi.

⁹A zing ciangin, amate Joppa khua nai a thet laitak Peter in thungen tu in sun hun laitak innkhum tungah kaato hi.

¹⁰Ama in a ngilkial ahikom an ne nuam zo hi; tuabangin an neak tu a kivawt saan laitak ama in mu kholna nei hi.

¹¹Van kihongin mu a, bangziam maw puanzapui bang khat, kingh li panin kikhai in lei ah kikhiasuk khat mu hi.

¹²A sungah nganhing namcin le awmtaal a, a vak theite le ngam vacimte om hi.

¹³Aw khat in ama munah, “Peter awng tho in; hite ngo lum in a, ne in!” ci hi.

¹⁴Ahihang Peter in, “Ne mama bua tong, Topa awng! Biakna taw kisai, a thiang ngawlin a kikoite le nin hi a kici sate ne ngawl het tu khi hi,” ci hi.

¹⁵Tua aw taw ma in paupui kik a, “Pathian thiansak sate a nin in ngaisun heak in, ” ci hi.

¹⁶Hisia thumvei vaset a kici zawkciangin, van ah kila to kik hi.

¹⁷Peter in a mu kholna sia huvau ii khiakna lungmang in a om laitakin, Cornelius sawltakte in Simon inn mu uh a, kongbiang ah ding uh hi.

¹⁸“Hi sungah, Simon Peter a kici zin khat hong tung ziam,” ci in dongh uh hi.

¹⁹Peter in a mu kholna sia ii khiakna bangbang peuma ahi katawm, ci in tel tu in a hanciam laitak Thaa in, “Ngai in! hiak ah pasal thum in nang hong zon saan laitak hi.



²⁰Tua ahikom kithoi in a, tuaksuk in. Tuaciangin amate taw kithawl tu nakna heak in, banghangziam cile amate in keima sawl ahi hi,” ci hi.

²¹Tua ahikom Peter tuaksuk a, pasalte munah, “Na zon uh sia keima khi hi. Bang vai a hong pai nu ziam,” ci hi.

²²“Ngalkap bu Cornelius in kote hong sawl hi,” ci hi. “Ama sia Pathian a bia mihing pha khat hi a, Jewte theampo in zakta hi. Pathian vantung lalang khat in, ama tungah na son tu thute a zaak thei tu in nang hong sap tu in sawl hi,” ci hi.

²³Peter in amate sungtang tu in sam a, zan khat ngiaksak hi. A zing ciang kithoi in amate taw ding uh hi; tuaciangin Joppa pan nungzui pawlkhat taw zong, paikhawm uh hi.

²⁴A zing ciangin, Caesarea khua theng uh a, tua munah ama ii a sam mealheakte le a muan a ngualtamhte taw Cornelius in ngak hi.

²⁵Peter sia innsung tum tu a kithoi ciangin Cornelius in muak a, a peang ah bokin ama mai ah a kun hi.

²⁶Ahihang Peter in dingsak hi. Ama in, “Ding in, kei mama zongh mihing khat hi lel khi hi,” ci hi.

²⁷Peter sia Cornelius taw thuson kawmin, inn sungah a tum ciangin, mihing tam mama kikhawm mu hi.

²⁸Amate tungah, “Na heak tek uh hi a, Jewte khat sia Gentile te khat ii inn ah a haw tu ahizong, kithawl tu ahizong a biakna in oai ngawl hi. Ahihang Pathian in mihing khat pawpo biakna taw kisai in, thiang ngawl hi, nin hi, ka ci ngawl het natu in hong lak hi.

²⁹Tua ahikom nong samsak uh ciangin nial ngawlin kong pai hi. Tua ahiciang nong sapna thu sia banghangziam ci in kong dongh hi,” ci hi.

³⁰Cornelius in, “Tu nung ni thum lai tu bang hun nitak nai thum hun khawngin ka inn ah thu ka ngen hi. Thakhat thu in a tee wakil puan a silh pasal khat ka mai ah hong ding a,



³¹‘Cornelius awng! Pathian in na thungetna hong za a, ngual na hu thongna teng hong musak zo hi.

³²Mihing pawlkhat Joppa ah paisak in a, a min tatak Simon Peter kici, pasal khat sia samsak tan. Ama sia tuipi hui a teang savun vawt pa Simon kici khat inn ah tung hi,’ hong ci hi.

³³Tua ahikom thakhat in kong samsak a, na dikna hangin nong pai hi. Tu in Pathian mai ah ko teng na om ung, Topa ii nang son a hong sawl po ngai tu in hong ngak khu hi,” ci hi.

Peter Thusonna

³⁴Peter sia thuson tu hong kipan a, “Tu in Pathian in mihing theampo a kibangin ngaisun hi ci in ka phawk hi.

³⁵Ama a biate le a maan a ngamtate sia, bang minam po ahizong ama in saang hi.

³⁶Israel te tungah a puak thu na heak uh hi, mihing theampo ii Topa ahi, Jesus Christ tungtawnin kilemna Lungdamna Thu thansakna ahi hi.

³⁷Tuiphumpa John in tui kiphumna thu a hil zawkciang Galilee ngam pan Israel ngambup sungah thu lian a piang sia, na heak uh hi.

³⁸Nazareth khua mi Jesus tungah Pathian in Thaa Thiangtho le vaangletna a buak thu huvau tel nu hi. Ama in mun theampo ah pai in, thupha vawt a, Doaimangpa vaangletna nuai ah a om theampo damsak hi. Banghangziam cile Pathian sia ama taw om khawm hi.

³⁹Israel te ngamsung le Jerusalem ah a sep a vawt theampo tungtaang ah, kote in tetti ka hi uh hi. Amate in ama sia thinglamte tungah kilh in, thisak uh hi.

⁴⁰Ahihang Pathian in a ni thum ni ciangin, thina pan thosak a, ama kilanghsak hi,

⁴¹ahihang mihing theampo tungah hi ngawlin, Pathian ii tetti tu a hong teal sate, thina panin a thaw kik zawkciangin, ama taw an nekhawm tui dawnkhawmin a om kote tungah hong kilangh hi.



⁴²Tuaciang ama in, Lungdamna Thupha sia mihingte tungah a hil tu le a thi sate le a nungta laite tungah thukhen tu in, Pathian in ama a aap hunlam tetti pang tu in ko hong sawl hi.

⁴³Kamsang theampo in ama huvau sonsiat uh hi. Ama a umte theampo mihing sim in ama min vaangletna taw a mawnate kimaisak tu hi ci in son uh hi,” ci hi.

Gentilete in Thaa Thiangtho Saang

⁴⁴Tuabangin Peter a papau laitakin, thu ngai theampo tungah, Thaa Thiangtho tuaksuk hi.

⁴⁵Peter taw Joppa khua pan hong pai, Jew thu umte in, Gentilete tung zongh ah, Pathian Thaa Thiangtho letsong a buak sia lamdang sa uh hi.

⁴⁶Banghangziam cile amate in, kam tumdangte taw pau in, Pathian letna pok uh hi. Peter in,

⁴⁷“Hi mite in, eima saan bangma in, Thaa Thiangtho saang zo uh hi. Tua ahile amate tui taw ki baptize tu, akua in khaam thei tu ziam?” ci hi.

⁴⁸Tua ahikom Jesus Christ min taw, a ki baptize natu in thupia hi. Tua zawkciangin, ni tawmvei amate kungah a taam lai natu in, Peter thoh uh hi.

Sawltakte 11

Jerusalem Pawlpi ah Peter Thu ko kikna

¹Judea ngambup a om sawltakte, le thu um dangte in, Gentilete zongh ii Pathian kammal a saanna thu za uh hi.

²Peter sia Jerusalem ah a cia ciangin, Gentilete vunteap atna a deite in, Peter ngamtatna sit uh a,

³“Vunteap at ngawl Gentilete inn ah zintung in, an ngangawn ne khawm nu hi!” ci hi.

⁴Tua ahikom Peter in thupiang teng sia a patna panin son hi:



⁵“Joppa khua ah thu ka nget laitakin mu kholna khat ka nei hi. Van panin puanza bang na khat a kingh li pan kilen in, a kikhiasuk ka mu a, tuaciang ka kungah hong tawlna hi.

⁶Pha takpi ma in a sung ka en a, innsa, ngamsa, le awmtaal in a vak nganhingte le ngam vacimte ka mu hi.

⁷Tuaciang aw khat in hong paupui a, ‘Peter awng, tho in; hite ngo in a, ne in!’ hong ci hi.

⁸Ahihang keima in, ‘Ne peuma ba tong Topa awng! Biakna taw kisai a nin le a thiang ngawlin a kisepte sia, ka kam sungah tum ngei ngawl lai hi,’ ka ci hi.

⁹Tua aw taw vantung panin, hong pau leleau a, “Pathian thiansua sate sia bang po ahizong, a thiang ngawlin ngaisun heak in,” hong ci hi.

¹⁰Hi bangin thumvei hong kilak a, a khakbel ciangin, vantung ah kidok to kik hi.

¹¹Tua hun laitak lian in, Caesarea pan a hong kipaisak mihing thum sia, ka zintunna inn ah hong theng hi.

¹²Thaa in, amate taw haisaang ngawlin, ka tonkhop natu hong sawl hi. Joppa khua a thu uppui luk teng zongh in, Caesarea ah hong zui a, ka vekpi in Cornelius inn ah ka tum uh hi.

¹³Vantung lalang khat a inn ah na ding a, ‘Joppa khua ah mihing pawlkhat paisak tan a, Simon Peter kici khat sia samsak tan.

¹⁴Ama in nang le na innkuanpui theam ngupna na nga natu kammalte hong son tu hi,’ ci in hong son hi.

¹⁵Tuabangin thuson ka kipat ciangin, Thaa Thiangtho sia eite tungah a masa a hong pai bang tatakin, amate tungah tuaksuk hi.

¹⁶Tuaciang ‘John in tui taw hong phum hi. Ahihang no sia Thaa Thiangtho taw hong ki baptize tu hi,’ a ci Topa kam sia ka phawk hi.

¹⁷Topa Jesus ih up ciang ei tungah letsong hong kipiak bangin, Pathian in tua letsong sia Gentilete tung zongh ah pia hi, ci in thiangtho takin kimu hi; tua



ahile kei sia akua hi a, Pathian nasepna a khaktan zo tu pa, hi na khi ziam!”
ci hi.

¹⁸Hi thu a zaak uh ciangin, Peter sia mawsak nawn ngawlin, Pathian pok uh hi. “Tua ahile Pathian in, Gentilete tung zongh ah, kisii kik natu le nuntak natu hunpha pia zo hi!” ci uh hi.

Antioch Khua ah Pawlpi

¹⁹Stephen a suamlup zawkciang vawtsiatna hangin a kithethaang thu umte pawlkhat sia Phoenicia, Cyprus le Antioch dongin pai uh a, Jewte tung bek ah thuhil uh hi.

²⁰Ahihang Cyprus le Cyrene pan a, thu umte pawlkhat in Antioch khua ah pai in, Gentilete tung zongh ah Topa Jesus Lungdamna Thupha hil uh hi.

²¹Topa vaangletna sia amate taw kop a, mihing tam mama in thu um in, Topa sangah kiheak uh hi.

²²Hi thupha Jerusalem Pawlpi dong theng a, tua ahikom amate in, Barnabas sia Antioch khua ah paisak hi.

²³Ama hong theng a, Pathian ii a mihingte thupha a piakzia a mu ciangin ama lungdam a, Pathian tungah thin tak lung tak taw thumaan natu in, amate theampo hanthawn hi.

²⁴Barnabas in mihing pha khat hi a, Thaa Thiangtho le upna taw kidim in, mihing tam mama Topa kung then hi.

²⁵Tua zawkciangin Barnabas in Saul zong tu in, Tarsus khua ah pai hi.

²⁶A zon pa a mu zawkciangin Antioch khua ah paipui a, amate nii in, pawlpi mite taw kumkhat bup om khawmin, Pawlpi mihon khat hilcianna nei hi. Tuabangin Antioch khua ah thu umte sia Tapidawte ci in kina masabel hi.

²⁷Tua hun laitakin, kamsang pawlkhat in Jerusalem pan Antioch ah pai uh hi.

²⁸Amate sung panin, Agabus min nei khat hong ding a, simleitung theampo ah kialpi a tun natu Thaa vaangletna taw ama in son khol hi. (Kumpi lianpa Claudius maan hun laitakin, tua kialpi tung hi.)



²⁹Nungzuite in amate hi zawk zaza tek, Judea ngam ah a teang a thu up puite atu a neisate puak tu in, khensat uh hi.

³⁰Tubang ahi zawkciangin, a sum uh sia, Pawlpi upate ii nga tu in, Barnabas le Saul khut tungah thaak uh hi.

Sawltakte 12

A tam zawlai Vawtsiatna

¹Hi hun laitakin, Kumpipa Herod in, pawlpi mi pawlkhat vawtsia tu in kipan hi.

²Ama in John suapuipa James namsau taw thatlumsak hi.

³Hi bang a, a ngamtat ciangin, Jewte thukim hi ci in a mu ciang, Peter zongh mansak hi. (Hi hun sia Tolsaw ngawl Anluum Poai sung ahi hi.)

⁴Peter sia a kimat zawkciang thonginn sungah khum a, ngalkap li veu pawl li kisua a, tuate in cingsak hi. Ama mipite mai ah Paisanpoai zawkciangin thusit tu in Herod in ngealna nei hi.

⁵Tua ahikom Peter thong sungah koi a, ahihang pawlpi mite in Pathian munah ama atu in nasia tak thu ngenen uh hi.

Peter Thong sung pan Suakta

⁶Mipite mai ah Herod in Peter thusit tu ni zan maa in Peter sia thongcingte nii ii kilaklaw ah mutthip hi. Ama sia thikkhau nii taw kikhii a, a thong kongkha ah thongcingte in cing hi.

⁷Thakhat thu in Topa vantung lalang khat tua munah ding a, thonginn doituam sung khuataang khat hong om hi. Vantung lalang in, Peter liangko panin lokin phong a, “Manlang in! Tho in!” ci hi. Thakhat thu in, thikkhaute Peter khut panin kizuk hi.

⁸Tua zawkciangin vantung lalang in, “Na kawngkhau sawm in a, na peangdap thua in,” ci hi. Peter in tuabangin a vawt zawkciangin, vantung lalang in, “Na puantual silh in hong zui tan,” ci hi.



⁹Peter in thonginn doipua ah zui hi, ahizong ama in vantung lalang ii ngamtatna sia a takpi ma ziam ci in a tel bua hi; mukholna khat a mu kisa hi.

¹⁰Amate in thongcingte ii phual masa sia a kantan zawkciang a niina sia zongh kantan uh a, a khakbelin khuapi sung tumna thik kongkha ah theng uh hi. Amate atu in kongkha sia ama thu kihong a, amate pusuak hi. Tuaciang khuapi sung lampi khat a totsuk laitak thakhat thu in vantung lalang in Peter nusia hi.

¹¹Tua zawkciang Peter in ama tungah bang thu piang, ci in phawk a, “Tu in a maan tatak sia ka he hi!” ci hi. “Topa in a vantung lalang khat sia, Herod ii vaangletna pan le Jew te ii kei tungah hong piang tu a upna theampo pan hong suatak tu in, hong paisak hi,” ci hi.

¹²Ama dinmun kitel ahikom, ama in John Mark ii nu Mary inn ah pai a, tua munah mihon kikhawm a, thungen uh hi.

¹³Peter in kongkha puanung sia kingh a, Rhoda kici numei naseam khat in innhon tu in pai hi.

¹⁴Ama in Peter aw tel a, lungdam leilam in, kongkha zongh hon meal ngawlin, heak kik hi. Innsung a omte munah, Peter doipua ah ding hi, ci in son hi.

¹⁵“Na thin amh hi!” amate in ci uh hi. Ahihang numei nu in, a takpi ma hi, ci veve hi. Tua ahikom amate in, “Ama a keam vantung lalang hi vak,” ci uh hi.

¹⁶Tua lan tengin, Peter in kongkha kingh top hi. A khakbel ciangin, amate in kong hon uh a, Peter a mu uh ciangin, lamdang sa uh hi.

¹⁷Amate a thim natu in a khut taw lak a, thonginn sung pan Topa ii ama a pusuasakna thu teng son hi. “Hi thu James le thu um dangte munah son tavun,” a ci zawkciangin amate nusia in mun dang khat ah pai hi.

¹⁸Zingsang khuavak ciang, thongcingte sungah — Peter bang tawk ziam, ci in nasia takin buai uh hi.



¹⁹Herod in ama a zon natu thupia hi kale, a mu zo bua uh hi. Tua ahikom ama in thongcingte thudonghsak in thalup tu thupia hi. Hisia zawkciang, Herod in, Judea ngam nusia in, Caesarea ah hun tawmvei zangh hi.

Herod Thina

²⁰Herod in Tyre le Sidon mite tungah a thin uuk mama hi, tua ahikom amate in Herod taw kimu tu in, pai hon uh hi. A masa in kumpi inccingpa Blastus sia amate a hu tu in, a thin zosak phot uh hi. Tua zawkciang amate in Herod kungah pai in kilemna ngen uh hi, banghangziam cile amate ngam ii anneak tu sia kumpipa ii ngam panin nga uh hi.

²¹A kiciam ni a thet ciangin, Herod in a kumpi puantual silh in kumpi tokhum tungah to a, mipite tungah thusonna khat nei hi.

²²“A papau sia mihing hi ngawl a, pathian khat hi!” ci in amate au uh hi.

²³Thakhat thu in Topa vantung lalang khat in Herod velvawk hi, banghangziam cile ama in Pathian vaang a pia bua hi. Ama sia lungte in ne a thi hi.

²⁴Tua hun sungin, Pathian kammal kizel suak a, khang vaial hi.

²⁵Barnabas le Saul in, amate ii ngamthak nasep man a, John Mark, tonpui in Jerusalem pan heak kik uh hi.

Sawltakte 13

Barnabas le Saul Kiteal a Kipaisak

¹Antioch khua pawlpi sungah, kamsang pawlkhat le syate om hi: Barnabas, (Ciivompa kici)Simeon, (Cyrene pan)Lucius, (Ngamuk mangpa Herod taw a no ciang a khang khawm) Manaen le Saul ahi uh hi.

²Topa naseam in an tang a om laitak, Thaa Thiangtho in, “Barnabas le Saul sia, amate ka sapna bangin nasep seam tu in, kei atu koi tuam tavun,” ci hi.

³Amate an tangin thungen a, amate tungah a khut uh a ngak zawkciangin, paisak hi.

Cyprus ah



⁴Barnabas le Saul sia, Thaa Thiangtho in tuabangin sawl ahi bangma, Seleucia khua ah pai a tua mun panin, Cyprus tuikulh ah teambaw taw ding uh hi.

⁵Salamis khua a thet uh ciangin, Jewte ii synagogue te ah Pathian thuhil uh hi. A nasepna hu tu in, John Mark zongh amate taw om khawm hi.

⁶Amate in tuikulh kantan in, Paphos ah pai uh a, tua munah mitbum thiampa Bar-Jesus min nei, kamsang ka hi a ci Jewte khat taw kisii uh hi.

⁷Ama in tuikulh ngamuk mangpa Sergius Paulus ii ngualtamh khat hi a, tua pa in mihing ciim khat ahi hi. Ngam ukpa in Barnabas le Saul ama mai ah sam hi, banghangziam cile, ama in Pathian thu za nuam hi.

⁸Ahihang mitbum thiampa Elymas (Greek min) in amate langpan hi, ama in ngamuk mangpa sia tua upna panin, a lampial natu in, hanciam hi.

⁹Tuasia ciangin Paul a kici Saul in Thaa Thiangtho taw kidim hi; ama in mitbum thiampa tangtan in salh a,

¹⁰“Nang Doaimangpa tapa awng! Nang in a pha ci theampo ii ngalin pang ni hi. Nang in ngitlo thimthel pilna theampo taw kidim ni hi, tuaciangin, Topa ii thumaan thutakte sia leilot thu suaksak tu in hanciam tawntung ni hi!

¹¹Topa khut in tu in, nang tungah hong paisuk tu hi; na mit tawcip tu a, tuaciangin, sun khuavak sia hun khat sungteng na mu thei buatu hi,” ci hi. Thakhat thu in, Elymas in, ama mittangte khuavui tuamcip bangin, thuak a, ama khut lenin lamlak tu mihing zongin, vak kawkoai hi.

¹²Ngamuk mangpa in, thupiang teng a mu ciangin, ama in um hi. banghangziam cile Topa thu a kihilciannate nasia takin, lamdang sa hi.

Pisidia Ngam Antioch Khua ah

¹³Paul le a pawl a lawmte sia Paphos khua panin, teambaw taw ding a, Pamphylia ngam khuapi khat ahi Perga a thet uh ciangin, tuak ah John Mark in amate nusia in Jerusalem ah heak kik hi.

¹⁴Amate sia Perga pan paisuak in, Pisidia ngam Antioch khua theng a, tuaciang Sabbath ni in synagogue sungah tum in to uh hi.



¹⁵Moses Thukham le kamsangte lai atte a sim zawk uh ciangin, synagogue uliante in: “Suapuite awng, hanthot nopna thupuak nong nei uh le, mihingte tungah nong son tu ka dei uh hi,” ci hi.

¹⁶Paul dingto in, a khut vaan a, thuson tu in kipan hi: “Hiak ah Pathian bia in a om, Israel minampuite le Gentile theampo awng: hong ngai tavun!

¹⁷Israel minamte ii Pathian in ih taangpupite na teal a, Egypt ngam ah peamta in a teen hun sungin, minam lian khat in, na siam hi. Pathian in amate sia Egypt ngam panin, vaangletna lian taw pusua pui a,

¹⁸kum sawmli sung senneal ngam sungah, amate a thuak kenkon hi.

¹⁹Amate in Canaan ngam ah, minam salite lalsak in ama minamte in, a ngam uh luasak hi.

²⁰Hi hun sung theampo kum zali le kum sawmnga sung bang ahi hi. “Tuasia zawkciang Pathian in amate sia, kamsangpa Samuel hun dong, thukhenmangte pia hi.

²¹Tuaciang amate in, kumpi khat a nget uh ciang Pathian in Benjamin suan Kish ii tapa Saul sia kum sawmli sung kumpi seam tu in pia hi.

²²Saul a hep zawkciang Pathian in David sia kumpipa suaksak hi. Pathian in tua pa huvau hi bangin ci hi: ‘Jesse tapa David in ka thin taw a kisi mihing nam hi a, seam a ka oai theampo a seam tu pa khat hi ci in ka mu zo hi.’

²³David suan Jesus Pathian in kamciam a piak sa bangma in, Israel mite Hunpa hisak hi.

²⁴Jesus in a nasep a kipat maa in, John in Isrealte theampo a mawnate uh pan, kisiik kik hamtang in, tui a kiphum uh kul tu hi, ci in thuhil hi.

²⁵Tuaciang, John in a nasep a zaw kuan sang ciangin, mihingte munah, ‘Kei sia akua hong sa nu ziam? Kei sia note ii lamem a na ngak uh pa hi ngawl khi hi. Ahihangin ngai vun! Ama in kei nung ah hong pai lai tu a, ama peangdap suut tu in, ka kilawm bua hi,’ ci hi.



- ²⁶“Abraham suan Israel ka mipuite le, hi sungah Pathian a bia Gentilete theampo awng, hi ngupna thu ei tungah hong kipuak zo ahi hi!
- ²⁷Tua in banghangziam cile, Jerusalem ah a om mihingte le a lampuite in ama sia Hunpa ahi hunlam he ngawl a, Sabbath nisim a kisim kamsangte ii kammalte zongh a tel bua uh hi. Ahihang amate in Jesus a puavawk na uh taw, kamsangte sonna teng, a tangtungsak a suak hi.
- ²⁸Amate in, Jesus tungah thidaan a piak natu thu mu zo ngawl ahihang Pilate munah, a thalupsak natu in ngen uh hi.
- ²⁹Laithiangtho sungah ama huvau a kison theampo a vawt zawkciang amate in thinglamte tung pan khiasuk a, thaankuul khat sungah koi uh hi.
- ³⁰Ahihang Pathian in thina pan thosak kik hi.
- ³¹Tuaciang Galilee pan Jerusalem ah a khualhaw puite tungah ni tam ma kilak hi. Tu in amate in Israel mite tungah ama ii tetti te ahi uh hi.
- ³²⁻³³Tuaciangin Lungdamna Thupha no tungah hong puak tu in, kote hi sungah kong om uh hi: Pathian ii ih taangpupite tungah a sep a vawt tu kamciam a piak sia, Jesus nungta kik tu in, a thaw kiksakna taw, ei a suan a paalte tungah, tu in tua kamciam hong tungsak ahi hi. Psalm a niina sungah hi bangin ki at hi, ‘Nang in ka Tapa na hi hi; tuni in na Pa ka suak zo hi.’
- ³⁴Thina sung pan a thaw kik natu le, thaang sungah a muat ngei ngawl natu in, Pathian sonna in hi bangin ci hi, ‘David tungah ka kamciam a hi a thiangtho le a maan thupha sia no tungah kong pia tu hi.’
- ³⁵Laithiangtho mundang khat ah zongh hi bangin ci takpi hi. ‘Nang tungah a thumaan na naseampa thaang sungah na muatsak nuam batu hi.’
- ³⁶Banghangziam cile David in a nuntak lai in Pathian deinata a sepsak zawkciang thi a, a taangpupite taw kivui khawmin thaang sungah muat hi.
- ³⁷Ahihang Pathian ii thina pan a thaw kiksak pa sia thaang sungah muat ngawl hi.



38-39 Ka mipui Israel te awng, na heak tu ka dei uh thu sia Jesus tungtawn in mawnate kimaisakna hong kihilna thu hi; ama a um peuma in, Moses thukham ii hong suataksak zawk ngawl mawnate theampo panin, hong ki suataksakna thu ahi hi.

40 Tua ahikom kamsangte ii hi bangin a ci teng sia, no tungah hong tun ngawl natu in, kidawm tavun;

41 ‘En vun, ngual selno theite awng! Lamdang sa in thi tavun! Banghangziam cile tuni in ka nasep sia a khiakna hong son a om hial zong, na um thei buatu hi!’” ci hi.

42 Paul le Barnabas in synagogue a nusiak uh laitakin, Sabbath ni kik ciang, amate pai kik a, hi thute a son thua lai natu in mite in sam uh hi.

43 Kikhopna panin mipite a cia zawkciangin, Paul le Barnabas sia Jew mi tam mama le Jewte biakna sungah a tum Gentile mi tam mama in zui uh hi. Pathian thuthiamna sungah kip in, a nuntak natu sawltakte in, amate sonpui in hanthawn uh hi.

44 Sabbath ni kik ciangin, khuapi sung om mihing theampo phial in, Topa kammal ngai tu in pai uh hi.

45 Jewte in mihonpite a mu ciangin, eenna thin taw kidim uh a; Paul thusonte nialin, selno uh hi.

46 Ahihang Paul le Barnabas in, hang seseam in thuson uh hi: “Pathian thu no kungah hong kihil maksak tu kisamh hi. Ahihang tuasia nialin tawntung nuntakna taw noma le noma kiphu na kisak ngawl uh hu in, no hong nusia in, Gentilete kungah pai tu khu hi,” ci hi.

47 Banghangziam cile hi sia Topa ii hong thupiak ahi hi; ‘Leitung bup a kingup thei natu, Gentilete atu in nang sia khuavak khat in kong vawt zo hi,’ ci hi.

48 Gentilete in hi thu a zaak uh ciangin, lungdam a, Topa ii thupuak a pok uh hi; tuaciangin tawntung nuntakna nga tu a, a kiteal sate thu umte suak uh hi.

49 Tua ngam sung mun theampo ah Topa kammal kizel hi.



⁵⁰Ahihang Jewte in khuapi sung lampui upate le Pathian a bia Gentile numei a cithei thu neite hol uh hi. Amate in Paul le Barnabas vawtsiat kipan a, ngam puasias ah hawlkeak uh hi.

⁵¹Sawltakte in amate a nalhna in, a peang tungah a baang leivuite thin san uh a, Iconium ah paitan uh hi.

⁵²Antioch khua ah thu umte in lungnopna le Thaa Thiangtho taw kidim uh hi.

Sawltakte 14

Iconium Khua ah

¹Iconium khua zongh ah tuabangma in thu piang hi: Paul le Barnabas sia synagogue ah pai in thu a son uh ciangin, Jewte le Gentile mihing tam mama thu um hong suak uh hi.

²Ahihang a um nuam ngawl Jewte in, Gentilete holin thu umte langpansak hi.

³Sawltakte tua munah khua ngei ma taamin, Topa huvau hangsan takin hil uh hi; Topa thuthiamna huvau amate ii thupuakna maan hi sia le nalamdang lakna te le a lamdangte vawt thei na vaang Topa in amate tungah a piakna taw kiciansak hi.

⁴Khuapi sungah mihingte kikhen uh a: pawlkhat in Jewte panpui a, a dang teng in sawltakte sangah pang uh hi.

⁵Tua zawkciang, Gentilete le Jewte pawlkhat in amate ii lampuite taw kopin, sawltakte vawtsiat tu khensat a, suangtum taw den sawm uh hi.

⁶Sawltakte in hi thu a phaw uh ciangin, Lycaonia ngam khuapi liante ahi Lystra le Derbe khuate le a kiim ngam teng ah tai uh hi.

⁷Tua munah amate in Lungdamna Thupha hil uh hi.

Lystra le Derbe Khua sungah

⁸Lystra khua ah a pian pan kipan, a peangbai a, lampai thei ngei ngawl, pasal khat om hi.

⁹Tuak ah Paul thuson ngai in to hi. Paul in ama ii upna le kidamsak thei tu ci mu ahikom ama tangtan in en a,



¹⁰“Na peang taw dingmaam in!” nging takin ci hi. Pasalpa zongh kilawn to in, vak kawkoai hi.

¹¹Mihonpite in Paul nasepna a mu uh ciangin, amate in Lycaonia kam taw au tek uh a, “Pathiante sia mihing bang suakin, ei kungah hong paisuk hi!” ci uh hi.

¹²Amate in Barnabas sia Zeus ci in min pia a, Paul sia a thusonpipa ahikom, Hermes ci in min pia uh hi.

¹³Zeus pathian biakinn sia khuapi pua sangah om a, a thiampipa in khuitalte le paakte taw biakpiakna vawt natu in, khuapi kongbiang ah paipui hi. Banghangziam cile, ama le mihonpite in sawltakte sangaw biakpiakna pia nuam uh hi.

¹⁴Tua mite in bang vawt sawm ci thu a zaak ciangin Barnabas le Paul in, amate puansilh lai uh te baltham in tai a, mihonpite laizang tuu in,

¹⁵“Banghangin hi bangin, ngamta thong nu ziam? Ko zongh mihing thawthong hi a, noma bangma hi lel khu hi! Ko sia hi sungah, Lungdamna Thupha thangsak tu, hi a man nei ngawl nate panin a nungta Pathian sangah hong kiheaksak tu ka hi uh hi. Tua Pathian in vantung, leitung, tuipi, le tuate sung a om theampo a vawtpa ahi hi.

¹⁶A bo sa hunte sungah, ama in mihing theampo a uuk bang tek po in ngamtasak hi.

¹⁷Ahihang, ama ii na pha a vawtte taw ama a om hunlam sia kitel thiangsak tawntung hi: Ama in note vantung pan nguatui hong pia a, lo ante a hun maanin hong pia hi. Ama in an hong pia a, na thinsung uh lungdamna taw, hong kidimsak hi,” ci in au hi.

¹⁸Sawltakte in, hi bang teng pau napi mihonte ii amate sangaw biakpiakna a piak nopna pan khaam la dektak uh hi.

¹⁹Pisidia ngam Antioch khua pan le Iconium panin Jewte pawlkhat hong pai hi; amate sangah mihonpite zol zo in Paul sia suang taw deang a, tuaciang thi zo sa ahikom khua pua ah taalkai uh hi.



²⁰Ahihang thu umte ama kiimkot ah hong kikhoptua uh ciangin, ama thoto a, khua sungah pai kik hi. A zing ciangin ama le Barnabas sia Derbe khua zuan uh hi.

Syria Ngam Antioch ah a Heak kikna

²¹Paul le Barnabas in Derbe khua ah Lungdamna Thupha hil uh a, nungzui tam mama nga uh hi. Tua zawkciangin amate Lystra ah pai kik a, tua mun panin Iconium ah, tua zawkciang Pisidia ngam Antioch khua ah paisuak uh hi.

²²Amate in thu umte thakho sua uh a, upna sungah thumaan in a kip natu uh hanthawn uh hi. “Pathian Ngam sungah ih tum thei natu in, ngimna tam mama ih kantan kul tu hi,” ci in hil uh hi.

²³Amate in pawlpi omna theampo ah pawlpi sim in pawlpi upate tealin koi uh hi. Tua zawkciangin thungetna le an tanna taw amate sia, a muan uh Topa tungah aap uh hi.

²⁴Pisidia ngam a kantan zawk uh ciangin, Pamphylia ngam theng uh hi.

²⁵Perga khua mite tungah thu a hil zawk ciangin, Attalia khua ah pai uh hi.

²⁶Tua mun panin Antioch khua ah teambaw taw ding kik uh hi. Tua khua sia tu a, amate khuangkhem sa nasep sia atu in Pathian thuthiamna ii hong khoina sungah a ki aapna mun ahi hi.

²⁷Antioch a thet uh ciangin, amate in, pawlpi mite khawmtua a, amate tungah, Pathian nasepna theampo le Gentilete ii thu a up natu lampi a honsakna thute son uh hi.

²⁸Amate tua munah thu um mite taw khuangei ma taam uh hi.

Sawltakte 15

Jerusalem ah Kikhopna

¹Judea panin, Antioch ah mihing pawlkhat hong pai a, thu umte tungah, hi bangin hilcian tu in hong kipan in, “Moses thukham sungah a om bangin, na vunteap uh na at bua uh le, ngupna na nga thei buatu uh hi,” ci uh hi.



²Paul le Barnabas in hi thu huvau ah, amate taw nasia takin, kinial uh hi. Tua ahikom Paul, Barnabas le Antioch khua a om pawlkhat, Jerusalem ah hi thu taw kisai in pai a, sawltakte le upate taw kimu tu in, khensat uh hi.

³Pawlpi ii sawlna taw amate a pai hi a, Phoenicia le Samaria kantan in, a pai uh ciangin, Gentilete Pathian sangah hong kikhealna thu ko uh hi. Tua thu in thu um theampo, nasia takin lungdamsak hi.

⁴Jerusalem a thet uh ciangin, pawlpi in amate vai na dawn uh a, sawltakte le pawlpi upate tungah amate tungtawnin Pathian ii a sepna theampo son uh hi.

⁵Ahihang Phariseete pawlsung panin, thu um mi pawlkhat ding a, “Gentilete in, vunteap a at uh kul tu hi. Moses Thukham a nit natu son kul tu hi,” ci uh hi.

⁶Sawltakte le pawlpi upate, hi thu huvau kikum tu in, kisitua uh hi.

⁷Ngei ma a kinial zawk uh ciang, Peter ding a, “Ka suapuite awng, khua ngei pek lai in, Gentilete ii a zaak thei natu le a up thei natu in, Lungdamna Thupha hil tu in, no sung pan Pathian in keima hong teal ahi hunlam sia na heak uh hi.

⁸Tuaciang, a kuama po ii thinsung a tel Pathian in, Gentilete a saanna, a lakna in ei tungah hong piak bangma in, amate tungah Thaa Thiangtho pia hi.

⁹Ama in ei le amate hong doi tuan ngawl hi. Amate in um ahikom a mawnate maisak hi.

¹⁰Tua ahile eite ih hizong, taangh pupite ahizong, a puak zawk ngawl vanhte thu umte nungzaang ah suanin, banghang tu in Pathian ze et sawm nu ziam?

¹¹Suak ngawl hi! Eite in zongh amate bangma ih um a, Topa Jesus thuthiamna taw ngupna ih nga hi,” ci hi.

¹²Paul le Barnabas in Pathian ii amate tungtawn a, Gentilete sungah, nalamdang laknate le a lamdang theampo a sep a vawt a ko uh a zaak uh ciangin, a pawlbup thim dide in om uh hi.



¹³A son tu teng a man zawkciangin, James hong pau a “Hong ngai tavun, suapuite awng!

¹⁴Amate sung panin, ama atu minam tuam khat a laakna taw Pathian in Gentilete a thinbotna a lak phitna thu sia, Simon in a son zawk bek ahi hi.

¹⁵Kamsangte kammalte zongh hi thu taw kisi siat hi. Laithiangtho in hi bang ci hi.

¹⁶‘Hisia zawkciang Topa in kong heak kik tu ci hi, tuaciangin David kumpi ngam ka pua pha kik tu hi. A lalcipna pan ka sa kik tu a, ka thahatsak kik tu hi.

¹⁷Tuaciangin midang theampo le, keima neisa tu in ka sap sa Gentile mi theampo in kei hong zuan tu hi ci in,

¹⁸hi thu taangh tawng lai pek pan a hesak Topa in son hi.’

¹⁹James in, “Kei ngaisutna ah, Pathian sangah a kiheak saan Gentilete, ih buaisak ngawl tu sia thupi ka sa hi.

²⁰Tua hi ngawl zawin, amate tungah lai ih thaak tu a, milim biakna in a kizak hu in a thiangtho ngawl ante a neak ngawl natu; numei le pa khialna panin, a kikep natu; nganhing a tawl kimeak lumte sa a neak ngawl natu le sachi neak ngawl natu, lai thaakin ih son tu hi.

²¹Banghangziam cile, Moses Thukham sia Sabbath nisim in, synagogue te ah khuangei hial ma kisim zo a, ama kammalte sia khua sim ah kihil zo hi,” ci hi.

Gentile Thu Umte tungah Laithak

²²Tua zawkciangin, sawltakte le pawlpi upate in pawlpi mibup taw kikum a, Paul le Barnabas taw Antioch ah pai tu in, pawl sung pan mihing pawlkhat a teal natu khensat uh hi. Amate in Barsabbas kici Judas le Silas teal uh hi. Amate ngeal sia thu umte ii a zatak mama ahi uh hi,

²³amate in hi laithakte puasak uh hi: “Ko sawltakte le pawlpi upate, na suapuite in Antioch, Syria le Cilicia a teang Gentile suapuite theampo tungah, kipaupuina lai kong thaak uh hi.



²⁴Eima pawl sung panin, mihing pawlkhat in, amate ii sonna taw no hong thin ngimsak, hong nawngkaisak tu in, hong pai hi, ci in za khu hi; ahihang hi bangin hong ngamatat natu in, ko tung pan amate in bangma sawlna nga ngawl uh hi.

²⁵Tua ahikom ka kikhawm uh a, thataak pawlkhat tealin no kungah paisak tawng, ci in ka thukim siat uh hi. Amate sia ih it ih lawmte ahi Barnabas le Paul taw hong paikhawm tu hi,

²⁶amate sia Topa Jesus Christ nasepna atu, a nuntakna uh a bo tu a lauhuai dongin, a kipumpiakte ahi hi.

²⁷Tua ahikom, Judas le Silas kong paisak uh hi. Amate in lai taw kong at uh teng, kam taw hong son tu uh hi.

²⁸Thaa Thiangtho le ko ii thukimna pan, hi zui tu a kul ngeinate ngawl buang a dang vanhngit kong suan nuam bua uh hi:

²⁹milim biakna ah a kipia sa an peuma na ne heak vun; sachi na ne heak vun; a tawl a kimeaklum nganhingte sa na ne heak vun. Numei le pa khialna panin, na kikeam tavun. Hi teng na tang zo po leute pha tu hi. Dam tek tawng.” ci in at uh hi.

³⁰Thataakte kipaisak a, Antioch khua theng uh hi. Tua munah thu umte pawlbup in kikhawm a, a laithak sia pia uh hi.

³¹A laithak a sim uh ciangin, hanthotna kam in, amate lungnopna taw kidimsak hi.

³²Amate mama kamsang ahi Judas le Silas in, thu umte taw ngei ma thuson khawm uh a, thin letna le tha ngana neisak uh hi.

³³Tua munah hun tawmvei a zak zawk uh ciangin, thu umte in amate thinnuam takin tha kik uh a, amate in pai tu a sawlte kungah heak kik uh hi.

³⁴Ahihang Silas in tua munah taam tu in khensat hi.

³⁵Paul le Barnabas in, Antioch ah hun tawmvei sung zangh uh a, mi dang tam mama taw kikop in, Topa kammal hilcian in thuhil uh hi.



Paul le Barnabas Kikhen

³⁶Tawmvei zawkciang Paul in Barnabas tungah, “Heak kik tawng i, Topa kammal ih thuhilna khua sim ah a om ih suapuite munah haw kikin, amate bangbang om ziam, ci in dawp tawng,” ci hi.

³⁷Barnabas in, John Mark sia amate taw tonpui nuam hi.

³⁸Ahihang Paul in, tua pa a kaizot tu sia suak a sa bua hi. Banghangziam cile, a nasep man dong, ompui ngawlin, John Mark in amate sia Pamphylia ah nusia in heak kik hi.

³⁹Amate nasia takin kinial a, kikhen uh hi: Barnabas in Mark samin Cyprus zuan tu in, teambaw taw ding hi.

⁴⁰Thu umte in Topa ii a thuthiamna sungah a kepcing natu in, a aap zawkciang, Paul ahile Silas teal a, ding hi.

⁴¹Ama in Syria le Cilicia kantan in pai a, pawlpite thakho sua hi.

Sawltakte 16

Timothy in Paul le Silas taw Kop

¹Paul in Derbe le Lystra khua Timothy kici Tapidaw khat teenna ah khualhaw suak hi. A nu zongh Jew minam Tapidaw khat hi a, ahihang a pa sia Greek te ahi hi.

²Lystra le Iconium khua thu umte theampo in Timothy sia phat son tek uh hi.

³Paul in Timothy tonpui nuam ahikom a vunteap atsak hi. Ama in tuabang a vawtsak sia, banghangziam cile, tua munah a teang Jew theampo in Timothy ii pa sia Greek ahi hunlam he uh hi.

⁴Amate in khuate kantan in a pai uh ciangin, Jerusalem a sawltakte le pawlpi upate ii a khensat zui tu ngeinate thu umte tungah pia uh a, tua ngeinate a zui natu in sawl hi.

⁵Tua ahikom Pawlpite upna sungah kithakhosak vaial a, mihing zongh nisim in khangto hi.

Troas ah Paul ii Mukholna



⁶Amate in Phrygia le Galatia ngamte kantan in, khualhaw uh hi, banghangziam cile, Asia ngamkhen sungah amate ii thuhil tu Thaa Thiangtho in a oai bua hi.

⁷Mysia ngamngi a thet uh ciangin, amate in Bithynia ngamkhen sungah, pai tu in kithoai hi. Ahihang Jesus ii Thaa in a oai bua hi.

⁸Tua ahikom Mysia ngam kantan in khuahaw a, Troas khua ah amate paisuak uh hi.

⁹Paul in tua ni zanin a mu kholna sungah Macedoniate pasal khat a ding mu in, ama tungah “Macedonia ngamah hong pai tan a, hong hu tan!” ci in hesuak ngen hi.

¹⁰Paul in hi mukholna a mu zawk po ciang, Macedonia ah pai tu in, ka kithoai uh hi, banghangziam cile Pathian in, Lungdamna Thupha sia tua mun mite tungah hil tu in hong sam zo hi, ci in ka khensat uh hi.

Philippi Khua ah Lydia Kikhealna

¹¹Troas panin teambaw taw ka ding uh a, Samothrace tuikulh kan in, a zing ciangin Neapolis ka theng uh hi.

¹²Tua mun panin lei lam taw Philippi ah ka pai uh a, tua khuapi sia Macedonia ii ngamkhen masabel sia ii khuapi ahi hi. Tua in Rome kumpite ukna ngam khat hi si hi. Tua munah ni tam mama ka taam uh hi.

¹³Sabbath ni in khuapi puasia ah pusuak in, ngun hui ah Jewte thungetna mun khat om tu ka ngaisutna munah ka pai uh hi. Ka to uh a, tua munah a kikhawm numeite thu ka sonpui uh hi.

¹⁴Thu hong ngaite khat sia Thyatira khua pan Lydia hi a, ama in puansan zuak nu khat ahi hi. Ama in Pathian a bia numei khat hi a, Paul thusonna teng a ngai tu in, Topa ii a thinsung a honsak nu ahi hi.

¹⁵Ama le a innkuanpuite in tui a kiphum zawk ciangin, ama in ko hong sam hi, “Kei sia Topa a um tatak mihing khat ci in na khensat uh le, hong pai tavun a, ka inn ah hong taam tavun,” ci hi. Ama inn ah ka pai natu in hong zol hi.



Philippi Thonginn sungah

¹⁶Ni khat thungetna munah pai tu in ka papai uh laitakin maisang a hong piang pheang tu, thu a son khol thei doai ngilo vei innteang naseam numei khat taw ka kisi uh hi. Ngual ii mai lamsang thu tu sonkhol theina taw a tote atu sum tam mama thalawsak hi.

¹⁷Ama in Paul le ko hong zui a, “Hi mite in A saangbel Pathian naseamte hi! Note bangbang in kingum thei tu ci thu amate in hong thangsak hi!” ci in au hi.

¹⁸Ni tam mama sung hi bangin, Paul a thin uuk dong au a, Paul a thin uuk ciang kingeilee in, doai munah, “Jesus min taw numei nu sung pan na pusua natu thu kong pia hi,” ci hi. Tua hun lian laitak in, doai in numei nu sung panin pusuak hi!

¹⁹A tote in amate sum nga natu lampi bo ahi hunlam a phaw uh ciangin Paul le Silas sia pummat uh a, mihon kikhopna tual thunei upate mai ah kai uh hi.

²⁰Rome kumpi uliante mai ah paipui uh a, “Hi mite in Jewte hi a, koma khuapi sungah buaina piangsak hi.

²¹Amate in ko thukham a langpan ngeinate hil uh hi; ko sia Rome ngam mite khu hi, hi ngeinate saang thei ngawl, zangh thei ngawl tu khu hi,” ci uh hi.

²²Mihon zongh in, Paul le Silas a ngal vawtte sangah pang uh hi. Tua zawkciang uliante in, Paul le Silaste ii puan laithap sak a, saat tu in thupia uh hi.

²³Nasia takin, a kisaat zawkciang amate sia thonginn sung denna in kinei a, thong ukpa munah kho bikbek in a kalh natu thupia hi.

²⁴Hi thupiakna a nga ciangin, thong ukpa in, amate sia thonginn sungsang doituam sungah, khumin, a peangte thingkol bulsak hi.

²⁵Zankim hun ciangin, Paul le Silas in Pathian tungah thungen in, biakna late sa in om a, thongtaak dangte in ngai uh hi.



²⁶Thakhat thu in, nasia tak zinliing a, thonginn phungkawng tawdap theampo dong ngawk hi. Thakhat thu in, kongkhapi theampo kihong a, thongtaak theampo tung pan thikkolte peal siat hi.

²⁷Thong ukpa khanglo a, thong kongkhapi theampo kihong sa in, a om a mu ciang, thongtaak theampo suakta siat zo sa hi; tua ahikom, ama le ama kithatlum tu in, a namsau dok hi.

²⁸Ahihang Paul in, a aw nei za taw oksan in, “Nangma le nangma bangma kilaw heak in! Hi sungah kote om siat khu hi!” ci hi.

²⁹Thong ukpa in meivak khat ngen a, thonginn doituam sungah tai kawm in tum a, Paul le Silas te peang ah liingin bok hi.

³⁰Tua zawkciang, amate ngeal pusua in, “Tote awng, ngupna ka nga natu in bang vawt tu khi ziam?” ci in dongh hi.

³¹“Topa Jesus um in, tua hile, nangma hong kingum tu hi — nang le na innkuanpuite ngupna na nga tu uh hi,” ci uh hi.

³²Tuaciang amate in ama le ngualdang ama inn ah a omte tungah Topa kammal hil uh hi.

³³Tua zan tua hun mama in, thong ukpa in, amate pusuapui in, a liamna mate silsak hi; tuaciangin ama le a innkuan bupin tui kiphum paih uh hi.

³⁴Ama in Paul le Silas a inn ah ciapui a, anvaak hi. Ama le a innkuanpuite in lungnopna taw kidim uh hi, banghangziam cile, tu in amate in Pathian um zo uh hi.

³⁵A zingsang ciangin Rome kumpi thuneite in, palik bute paisak a, “Tua mihingte pusua vun,” ci in thupia uh hi.

³⁶Tua ahikom thong ukpa in, Paul munah, “Uliante in nang le Silas hong kisuataksak natu thu hong pia hi. Pusuak thei tu nu hi, tua hi a, thin nuam in na pai tavun,” ci hi.

³⁷Ahihang Paul in palik bute munah, “Ko bangma khialna lian nei ngawl khu hi. Ahihang mihonpите mai ah velna thuak khu hi — ko sia Rome ngam mite



hi napo khu hi! Tua zawkciang thonginn sung denna in hong kinei hi. Tuaciang tu leleau in a thimtham in, hong suaktasak nuam nu ziam. Suak thei ngawl tu hi! Rome uliante amate mama hi sungah hong pai hamtang taken a, hong pusuaksak taken,” ci hi.

³⁸Palik bute in hi kammal teng, Rome uliante munah ko uh hi; tuaciang amate in, Paul le Silas sia Rome ngam mi ahi hunlam a zaak uh ciangin, amate lau uh hi.

³⁹Tua ahikom amate pai in, Paul le Silaste tungah pakaai uh hi; tua zawkciang, thonginn sung pan pusuak in khuapi a nusiak natu in sawl uh hi.

⁴⁰Paul le Silas in thonginn nusia in, Lydia ii inn zuan uh hi. Tua munah thu umte taw kimu uh a, hanthotna kammalte a son zawkciang nusia uh hi.

Sawltakte 17

Thessalonica khua ah

¹Paul le Silas in Amphipolis le Apollonia kantan in khualhaw a, synagogue khat omna Thessalonica khua theng uh hi.

²Ama ii hun a zak ngei tawntung bangma in, Paul in tua synagogue ah pai hi. Tua munah Sabbaths ni thum sung Laithiangtho siisan in, mipite taw thu kikum a,

³Messiah in ngim thuk tu a, thina panin tho kik tu hi, ci in Laithiangtho taw kipsakin son thiak hi. Paul in, “No tungah kong pualaak hi Jesus sia Messiah ahi hi,” ci hi.

⁴Amate sung panin pawlkhat in um a, Paul le Silas te pawm uh hi; tuabangma in Pathian a bia Greekte hon khat le numei lampui tam mama te zongh in um a pawm uh hi.

⁵Ahihang Jewte in eang a, lamdung ah a vakthap mihing mannung ngawl pawlkhat khawmtua in, mihing ngilo nuam honkhat piangsak hi. Amate in a khuathing in buaisak uh a, Paul le Silas mu in mipite mai ah a kaikeak thei natu in Jason ii inn sim uh hi.



⁶Ahihang amate a mu ngawl uh ciang, Jason le thu um dang pawlkhat khuapi thuneite mai ah kai a, “Hi mite in mun theampo ah nawngkaisak uh hi! Tu zonghin amate ei khua ah hong pai uh a,

⁷tuaciang Jason in, amate sia ama inn ah keam hi. Amate theampo in, Kumpi lianpa ii thukhamte paltan a, Jesus a minnei kumpipa dang khat om hi ci uh hi,” ci in au uh hi.

⁸Hi kammal teng taw khuapi sungah mihonte le khuapi thuneite buaisak uh hi.

⁹Thuneite in Jason le a dang teng a suatak natu in, a kisamh za sum piasak a, tua zawkciangin amate paisak uh hi.

Berea khua ah

¹⁰Khuazan po ciang, thu umte in Paul le Silas sia, Berea khua ah puak uh hi. A thet ciangin, amate synagogue ah pai uh hi.

¹¹Tua khua mite in Thessalonica khua mite sangin ngaisun kaak thei zaw uh hi. Amate in lawpna lian taw thusonte ngai in, Paul thusonte maan tatak ziam ci in a heak natu in nisim in Laithiangtho en uh hi.

¹²Amate sung pan mihing tam mama in thu um a; Greekte a cithei numei tam mama le Greekte pasal tam mama zongh in um uh hi.

¹³Ahihang Thessalonica ah a om Jewte in, Pathian kammal sia Bereate tung zongh ah, Paul in hil zo hi ci in, a zaak uh ciangin, hong pai a, mihing ngilo nuam hon khat hol hi.

¹⁴Thu umte in thakhat thu in, Paul sia tuipi hui ah puak uh hi; ahihang Silas le Timothyte ngeal Berea ah taam uh hi.

¹⁵Paul a thate in Athens dong zui uh a, tua zawkciang Berea ah heak kikin, Silas le Timothy in, a manlang thei zaza in, a del natu Paul ii kam vaithak son uh hi.

Athens khua ah

¹⁶Silas le Timothy ngakin, a om laitak Paul in Athens khua ah milim biakna a dim in om a mu ciangin Paul sia nasia takin a thinkiam hi.



¹⁷Tua ahikom Jewte le Pathian a bia Gentilete taw synagogue sung le, nisim in hong pai pawpo taw zongh mipi kikhopna leitual ah Paul in thu kikuppui hi.

¹⁸Epicurean syate le Stoic syate zongh in, ama taw thu kinial uh hi. Pawlkhat in, “He ngawl napi, a kihesak hisia pa in, bang teng son nuam ziam,” ci in dongh hi. A dangte in, “Ama son sia in ngamdangte pathiante hi tuak hi,” ci in zo kik hi. Banghang hi bangin ci ziam cile, ama in Jesus thu le a thaw kikna thu a hil hang ahi hi.

¹⁹Tua ahikom amate in Paul sia Areopagus kici Athente ii council kikhopna munah paipui a, hi bangin ci uh hi, “Hi hilna thak na sason sia, he nuam khu hi.

²⁰Thu pawlkhat na son kong zaak uh te sia, ko atu in tumdang a, tua ahikom, a khiakna he nuam tu khu hi,” ci uh hi.

²¹(Banghangziam cile, Athens khua mi theampo le tuak ah a teang ngamdang mite in, thuthak sonna le zaakna taw a hun theampo zangh nuam uh hi.)

²²Khuapi council kikhopna mai ah Paul ding a, “Athente awng, na theampo sungah biakna lamsang kin mamate na hi hunlam ka mu hi.

²³Banghangziam cile na khuapi sung kantan in, ka pai a, na biakna munte ka et ciangin, ‘A kihe ngawl Pathian khat Atu,’ ci in biakna tau khat tungah, lai ki at ka mu hi. Tua ahiciang na heak ngawl bul na biak uh Pathian sia, tu in a thu kong thansak sia ahi hi.

²⁴Leitung le a sung a om theampo a vawt, Pathian sia vantung le leitung ii Topa hi a, mihing khutte taw a kivawt biakinnte sungah a teang bua hi.

²⁵Mihingte ii ama atu ih sepsakna pan, ih piak thei tu na khat zongh, ama atu in a kitaangsamh bua hi, banghangziam cile mihing theampo atu nuntakna, husanna le na theampo ama ii hong piak sa hi zaw hi.

²⁶Ama in mihing khat panin, mihing nam theampo bitphua a, leitung buppi ah teangsak hi. Ama in amate teen natu a hunte le a munte see khol sa in koi hi.



²⁷Mihingte ii ama a zon thei natu le ama a mu thei thaak natu in hi bangin vawt hi. Ahizong a tatak in Pathian in ei khat pawpo kung panin khuala ngawl hi;

²⁸mihing khat in, ‘Ama sungah ei ih nungta a, ngamta in ih om hi’ a ci bangma ahi hi. Noma ii la phua pawlkhat zongh in, ‘Ei zongh ama tate ih hi hi’ ci hi.

²⁹Ei sia Pathian tate ih hi zawk nungsang in, ama pianzia sia mihingte pilna le thiamna taw a kivawt kham, ngun le suang milim khat pawpo bangin ih ngaisun buatu hi.

³⁰Mihingte ii ama ih heak ngawl lai hunte, Pathian in heak ngawl bawl hikale tu hun ciang, mihingte a vekpi in mun theampo ah, amate tatsiatnate pan a kikheal natu ama in thupia hi.

³¹Banghangziam cile ama in, leitung bup ah thukhaikim taw, ama teal sa mihing khat zangh in, thu a khen natu in, ni khat, ciangtan sa in koi hi. Hi thu a maanna thu sia, tua pa thina panin a thawsak kikna taw mihing sim tungah a lak zo hi!” ci hi.

³²Thina panin a thawsak kikna huvau, Paul ii son a zaak uh ciangin, pawlkhat in nunauna in nei uh a, ahihang a dangte in, “Hi thu huvau na son sia za kik nuam lai khu hi,” ci uh hi.

³³Tua ahikom Paul in kikhopna nusia hi.

³⁴Pasal pawlkhat in ama pawmin thu um uh hi, tua sungah council mi ahi Dionysius, Damaris a kici numei khat le a dang pawlkhat zongh kihel hi.

Sawltakte 18

Corinth khua ah

¹Hisia zawkciang, Paul in Athens nusia in Corinth ah paisuak hi.

²Tua munah ama in Italy pan a zi Priscilla taw hong pai tawm Pontus khua ah a suak Jewte Aquila a kici khat taw kimu hi, banghangziam cile Kumpi lianpa Claudius in Jewte theampo Rome khua a nusiat natu in, thupia hi. Paul in amate taw kimu tu in pai a,



³amate taw taam khawm naseam khawm in om hi, banghangziam cile amate bangma in, Paul in a nuntak natu in tuipuan buk khui hi.

⁴Ama in Jewte le Greekte a telsak thei natu in, Sabbath nisim in synagogue ah thu kikum khawm uh hi.

⁵Macedonia pan Silas le Timothy a thet ciang, Paul in hunbit in thuhilna zangh a, Jesus sia Messiah hi ci in Jewte tungah tetti pang hi.

⁶Amate in nalh in, ama huvau kamsia a pau uh ciang, ama in a lungkim ngawlina a lakna in, a puan tungah leivui baangte thin a, “Na mangthang uh le noma mawna hang hi tu hi! Kei hang hi ngawl tu hi. Tu pan kipan Gentilete kungah pai tu khi hi,” ci hi.

⁷Tua ahikom amate nusia in, Titius Justus kici Pathian a bia Gentile mite khat ii inn ah teang tu in, pai hi; tua pa ii inn sia synagogue hui ma ahi hi.

⁸Jewte ii synagogue ah a lampuipa Crispus le a innkuanpui theampo in Topa um uh hi; Corinth a midang tam mama in ngupna thu za uh a, um in tui kiphum uh hi.

⁹Zan khat Paul in mu kholna nei a, Topa in ama tungah, “Lau heak in, na son ngei bangma in son in a, tua thu thasua heak in,

¹⁰banghangziam cile keima in nang hong ompui ka hikom, kuama in nang hong susia thei ngawl tu hi. Hi khuapi sung a om mihing tam mamate sia keima mi ahi hi,” ci hi.

¹¹Tua ahikom Paul in tua munah kum khat le kum lang taam a, mihingte tungah Pathian kammal hil hi.

¹²Gallio sia Rome kumpite in Achaia ngamuk mangpa tu in a koi uh ciangin, Jewte hong kikhawmtua a, Paul manin, thukhenzum ah paipui uh hi.

¹³“Hi sia pa in thukham taw a kisi ngawl biaknazia taw Pathian biak natu mihingte zol tu in hanciam hi!” ci uh hi.



¹⁴Paul in thuson tu in a kithoai laitak, Gallio in Jewte tungah, “Hi thu sia ngitlo khialna lian ahibuale khialna khat po a vawt ahi tha le, no Jewte tungah kong thinsau kenkon natu kilawm hi.

¹⁵Ahihang hi thu sia kammalte, minte le noma thukham taw kisai thu kinialna ahikom noma tek ma in khensat hamtang tavun. Tuabangte tungtaang ah thukhenpa seam ngawl tu khi hi!” ci hi.

¹⁶Tuaciangin amate sia zum sung panin, not hi.

¹⁷Amate theampo in synagogue lampuipa Sosthenes man uh a, zum mai ah vel uh hi. Ahihang Gallio in tuasia tawm zongh a awlmaw bua hi.

Antioch khua ah Heak kik

¹⁸Paul in Corinth khua thu umte taw ni tam ma taam a, tua zawkciang amate nusia in Priscilla le Aquila taw Syria ah teambaw taw ding hi. Cenchreae pan teambaw taw a din maa in, a kiciamna khat hu in, a lu a tol in meet hi.

¹⁹Amate in Ephesus khua theng a, tua munah Paul in Priscilla le Aquila nusia hi. Ama in synagogue ah pai a, Jewte taw thu kikum hi.

²⁰Amate in khuangei zaw a taam lai natu in ama thoh uh hi. Ahihang ama a thukim bua hi.

²¹Taam ngawl zaw in a din tu ciang, “Pathian deina ahile no kungah kong pai kik tu hi,” ci hi. Tuabangin ama Ephesus panin teambaw taw ding hi.

²²Caesarea a thet ciangin, Jerusalem ah pai a, pawlpi mite paupui in, tua zawkciang Antioch ah pai hi.

²³Tua munah hun tawmvei a zak zawkciang ding kik hi. Ama in Galatia le Phrygia ngamte kantan in pai a, thu um theampo thakho sak hi.

Ephesus le Corinth ah Apollos Haw

²⁴Tua hun laitak in Alexandria khua ah a suak Apollos kici Jewte pasal khat Ephesus khua ah hong pai hi. Ama in thuson thiam khat hi a, Laithiangtho zongh a khawng a kheak in he hi.



²⁵Ama sia Topa Lampi a kihil sa khat hi a, tha lawpna lianpi taw Jesus thu thangsak a, maan takin hil hi. Ahitazong ama heak sia in John ii tuiphum bek ahi hi.

²⁶Jewte ii synagogue ah hangsan tak thuson tu in kipan hi. Priscilla le Aquila in ama thu a zaak uh ciang, amate inn ah ciapui uh a, Pathian Lampi a maan zaw lai in hil thiang uh hi.

²⁷Tuasia ciang Apollos in Achaia ah pai tu in khensat a. tua ahikom Ephesus ah thu umte in, ama a huna in Achaia ngam a om thu umte laithaksak a, pha takin vai a mua natu in hanthawn uh hi. Ama a thet ciangin, Pathian thuthiamna taw thu um a suakte atu in, a huna lian mama hi.

²⁸Banghangziam cile, Jesus sia Messiah a hina thu, Laithiangtho siisan in a lak telna taw in mihonte mai ah, Jewte taw kam kinialnate sungah a mawngnei mama kam nialnate taw Jewte a nial zo hi.

Sawltakte 19

Ephesus khua ah Paul

¹Corinth khua ah Apollos a om laitak, Paul sia tua ngamkhen sungsang kantan in khualhaw a, Ephesus theng hi. Tua munah nungzuite pawlkhat mu a,

²tuaciang, ama in “Thu um mite na sua uh ciang, Thaa Thiangtho na nga uh ziam?” ci in dongh hi. Amate in “Thaa Thiangtho a om hunlam za zongh za bua ung,” ci in zo uh hi.

³“Pha hi, tua ahile bang tui kiphumna nam sia na saang uh ziam?” ci in Paul in dongh hi. “John tuiphumna sia hi,” ci in zo hi.

⁴Paul in, “John tuiphumna sia in mawnate pan a kisiikte atu ahi hi; tuaciang ama in Israel te tungah, ama nung pan hong paipa na um vun — tua pa in Jesus hi,” ci hi.

⁵Amate in hi thu a zaak uh ciangin, Topa Jesus min taw tui kiphum uh hi.



⁶Paul in amate tungah a khut nga a, Thaa Thiangtho amate tungah hong theng hi; amate in kam tumdangte taw pau uh a, Pathian ii ngupna thute zongh thangsak uh hi.

⁷Amate a vekpi in, sawm le nii khawng pha uh hi.

⁸Paul in Jewte synagoge ah pai a, tha thum sung hangsan takin mihingte tungah thuson a, amate taw thu kikum in, Pathian Ngam thu a upsak zawk natu hanciam hi.

⁹Ahihang pawlkhatte a thinpui in, a um nuam bua uh a, mihon bup mai ah amate in Topa Lampi sonsia uh hi. Tua ahikom Paul in amate nusia in, thu umte paipui a, nisim in Tyrannus lai hilna khan sungah kikapna nei uh hi.

¹⁰Hi bangin kum nii tawntung a kalsuanpui ciangin Asia ngamkhen a teang Jewte le Gentilete in Topa kammal za uh hi.

Sceva ii Tapate Thu

¹¹Paul tungtawn in Pathian in nidang in a om ngei ngawl, nalamdang laknate vawt hi.

¹²Ama zak mai nawlna le awmdalna puante ngangawn cinate kungah a kipaipui ciangin a natnate dam a, thaa ngilote zongh amate sung pan pusuak uh hi.

¹³Jewte pawlkhat khualhaw in vakkot a, thaa ngilo a notte zongh in thaa ngilo a naw natu in , Topa Jesus min zak tu hanciam uh hi. Amate in thaa ngilo te munah, “Paul ii a hil Jesus min taw keima in thu kong pia hi,” ci hi.

¹⁴Unau salite ahi, Jewte Thiampi Lianbel Sceva a kici sia ii tapate in hi bang seam uh hi.

¹⁵Ahihang thaa ngilo in amate tungah, “Jesus sia he khi hi, tuaciang Paul zongh he khi hi; ahihang no akua te nu ziam?” ci hi.

¹⁶Thaa ngilo veipa in amate nasia takin buan ngawp a, zocip siat hi. Tua ahikom a liam a bai le puan ekkeak sa in tua pa inn panin tai uh hi.



¹⁷Ephesus khua a teang Jewte le Gentilete theampo in hi thu za uh hi; amate sia launa taw kidim in, Topa Jesus min kipatoai seseam hi.

¹⁸Thu um mite sung pan tam mama hong pai a, amate ngamtatnasate mipi mai ah kheet nei ngawlin pualaak uh hi.

¹⁹Mitbum thiam tam mama in a laibute khawmtua in hong paipui uh a, mipi mu tangin, mei taw haltham uh hi. A laibu manh teng a kingawm ciang, nguntang tul sawmnga pha hi.

²⁰Topa thu sia hi bangin vaangletna taw kizel a, hat vaial hi.

Ephesus khua ah Buaina

²¹Hi thu teng a pian zawkciang Paul in Macedonia le Achaia ngam kantan in khualhaw a, Jerusalem ah paitan tu in, khensat hi. Ama in “Tua munah ka pai zawkciang, Rome khuapi zongh ah ka haw kul tu hi,” ci hi.

²²Tua ahikom ama a hute nii Timothy le Erastuste zongh Macedonia ngam ah paisak a, ama ahile, Asia ngamkhen ah hun a tam zaw zangh thua hi.

²³Hi hun laitakin, Ephesus khua ah Topa Lampi hangin buaina nasia khat hong om hi.

²⁴Demetrius min nei ngun seakpa in, a numeipathian Artemis ii biakinn limte veu, ngun taw vawt a, ama nasepna pan a naseamte meetsak mama hi.

²⁵Tua ahikom ama in, a naseam theampo le, tua nasepna taw a kibang a seam mihing dangte khawmtua in, “Pasalte awng, eite nopsakna in hi nasepna pan hong piang hi, ci in na heak tek uh ahi hi.

²⁶Tu in hi Paul a ci sia pa ii ngamtatna babang noma tek in mu thei a, za nu hi. Ama in khut taw vawttawm pathian in pathian hi peuma ngawl hi ci a, hi sung Ephesus khua le Asia ngamkhen bup phialma ah mihing tam tatak umsak zo hi.

²⁷Tuaciang ih nasepna a minsiat tu lauhuai hi. Tua bek dom ngawlin, Asia ngam le leitung mun theampo ii a biak tua a lian numeipathian Artemis ii biakinn zongh a luithawthong suakin — a letna teng a kisuksiat tu lauhuai hi!” ci hi.



²⁸Mihonpite in hi kamte a zaak uh ciangin, a thin so a, “Ephesus khua ah om Artemis ma lian hi!” ci in au uh hi.

²⁹Tua ngamlumna sia khuapi bup kilaw hi. A ngilo nuam mihon in, Paul ii khualhawpui Macedonia te nii Gaius le Aristarchus pummat a, poai lakna inn ah taipui uh hi.

³⁰Paul in mihonte mai ah, pai nuam ahihang, thu um mite in a oai bua uh hi.

³¹Ama lawm ngamkhen sungah thunei pawlkhatte in zongh poai inn ah ama le ama a kilaak ngawl natu in thu zacak uh hi.

³²Tua laitakin a kikhopna buppi sungah ngamlum seseam hi; pawlkhat in thu pawlkhat taw au a, a dangte in thudang khat taw au uh hi, banghangziam cile mihing a tamzaw in, amate banghangin kikhawmtua ziam ci zongh a tel bua uh hi.

³³Mihing pawlkhat in Alexander maw hi vak ci uh hi, banghangziam cile Jewte in ama sia mai ah paisak uh hi. Tuasia ciangin, Alexander in mihonpi a thim natu a khut vaanin ama a kihuk natu in, thuson tu hanciam hi.

³⁴Ahihang ama sia Jewte hi ci in a tel uh ciangin, a au ngei uh bangin, “Ephesus khua ah, Artemis lian hi!” ci in nai nii sung au hon uh hi.

³⁵A khakbel ciangin khuapi lai atpa in, mihonte thimsak thei hi. Ama in “Ephesus khuapuite awng! Ephesus khuapi sia a lian Artemis biakinn le vantung pan hong taaksuk suang thiangtho a keam sia ahi hunlam a kuama po in, ih heak ahi hi.

³⁶Hi thute kuama in nial thei ngawl tu hi. Tua ahikomin, note thim vun a, maitatna bangma vawt heak vun.

³⁷Amate in, biakinnte le phuul ngawl a, ih numeipathian huvau, kamsia le pau ngawl hi napi, note in pasal hite hi sungah hong paipui nu hi.

³⁸Demetrius le a naseamte in, mi pawlkhat tungah thu vawt nopna nei na hi uh le, thu neite le zumhon hun a maan thukhenzum ih nei hi; tua munah thu kivawt thei hi.

³⁹Ahihang tua sangin na dei zawk uh a om le, upadi bangin ngam mite kikhopna ah khensat kul tu hi.

⁴⁰Banghangziam cile, tuni a thupiang teng zawkciang, ei tungah buaina piangsak hi, ci in maw hong kizon kik tu lauhuai hi. Hi bangin buai natu bangma thu om ngawl a, hisia hang ci zongh ih son thei tu bangma om ngawl hi,” ci hi.

⁴¹Hi teng a ci zawkciangin, a ma in kikhopna tawpsak hi.

Sawltakte 20

Macedonia le Achaia ah

¹Tua buaina a thim zawkciang Paul in thu umte khawmtua a, hanthotna kammalte taw vaithakna nei hi. Tuaciang ama vaiding in Macedonia ah paisuak hi.

²Ama in tuak a ngamte kantan in pai a, thu tam mamate taw hanthawn hi. Tua zawkciangin Achaia ah pai in,

³tua munah tha thum taam hi. Syria ah pai tu in a kingin laitak, tuak ah Jewte in ama a thasawm hunlam phawk hi; tua ahikom Macedonia tawnin, heak kik tu khensat hi.

⁴Berea khua mi Pyrrhus ii tapa Sopater in ama tonpui hi; Thessalonica khua pan Aristarchus le Secundus; Derbe khua panin Gaius; Asia ngamkhen panin Tychicus le Trophimus; Timothy zongh in tonpui uh hi.

⁵Amate pai masa a, Troas panin ko hong ngak hi.

⁶Tol saw ngawl Anluum Poai zawkciang Philippi panin, teambaw taw ka ding uh a, ni nga zawkciangin amate taw Troas ah kisitua in, tua munah nipi khat sung hun ka zangh uh hi.

Paul ii Troas khua A haw khakbelna

⁷Nino nitakin neakkhopna nei tu in, ka kikaikhawm uh hi. Paul in a zing ciang vaiding tu ahikom, mite paupui a, zankim dong thuson hi.

⁸Ka kikhopna uh inn tung dawl sungah meiinn tam ma kide hi.



⁹Eutyclus kici tangval khat khelki tungah to a, Paul in tatsat ngawlin thuson ahikom, Eutyclus zongh a mut suak seseam a, a khakbel ciangin, mutthip in, inntung dawl thum panin, lei ah taaksuk hi. Amate in a top ciang, ama thi zo hi.

¹⁰Ahihang Paul tuaksuk a, ama tungah bok in koai a, “Patau heak vun, ama nungta lai hi!” ci hi.

¹¹Tuaciang ama in inn tungah kaato in, anluum baltham in ne hi. Nisua dong amate taw ngei ma thu a son zawkciang, Paul in paisan hi.

¹²Amate in tangval pa sia a inn ah, a nungta in ciapui a, a thin uh nuam mama hi.

Troas pan Miletus ah

¹³Koma in teambaw kungah ka pai masa uh a, teambaw taw Assos ka zuan uh hi. Tua munah, Paul in teambaw tungah hong kaa tu ahi hi. Ama in hi bang tu ma in, hong son sa hi a, ama in lei lam tawnin tua munah pai hi.

¹⁴Assos ah ka kisik uh ciangin, teambaw tungah ama hong kaato a, Mitylene khua ah ka paisuak uh hi.

¹⁵Tua mun panin teambaw taw ka ding uh a, a zing ciangin, Chios ngal ka theng uh hi. Ni khat zawkciangin, Samos ka theng uh a, a zing ciangin, Miletus ka theng uh hi.

¹⁶Asia ngamkhen sung tengah hun a bo thong ngawl natu in, Paul in Ephesus khua kantan in, teambaw taw pai tu khensat hi. Hi thei le Pentecost ni lapin, ama Jerusalem khua a theng tu in pai memeang hi.

Ephesus Upate tungah Paul ii Vaithakna

¹⁷Paul in Miletus panin, Ephesus ah thu zacak a, pawlpi upate ama taw a kimu natu in vaitha hi.

¹⁸Amate hong thet ciangin, Paul in amate tungah, “Asia ngamkhen ah kong thet phit ni pan kipan no taw hunbup bangbangh in zangh khi ziam, ci sia na heak uh ahi hi.



- ¹⁹Jewte ii hong thasawm hu in, haksatna hunte sungah Topa ii naseam bangin kiniamkhiakna theampo le, thitui tam mama taakin na ka seam zo hi.
- ²⁰Mipite mai le noma inn uh ah thuhilna le hilciannate kong nei ciangin, note phattuum natu in bangma kheet ka nei ngawl sia na heak uh ahi hi.
- ²¹Jewte le Gentilete tungah a kibangin a mawna tetek pan Pathian sangah kiheak kik a, ih Topa Jesus a up natu in, thupi takin kong phawksak hi.
- ²²Tu in Thaa Thiangtho thu ka nitna taw Jerusalem ah pai tu khi hi, tua mun ah bang tat tu khi ziam he ngawl khi hi.
- ²³Ngimmate le thonginn in, keima hong ngak hi, ci in khuapi sim ma ah Thaa Thiangtho in hong phawksak hi ci sia bek ka he hi.
- ²⁴Ahihang keima nuntakna sia bangma manh nei ka sa bua hi; keima vaipuak ka khuangkheim natu le Topa Jesus ii nasep hong piak ahi, Pathian thuthiamna Lungdamna Thupha ka thansak tu ka man thiang tu bek ka uuk hi.
- ²⁵“Pathian Ngam thuhil in, note theampo sungah kong vak zo hi. Tuaciang note sung pan kuama in, kei nong mu kik ngei nawn ngawl tu uh sia tu in ka he hi.
- ²⁶Tua ahikom tuni mama in, no tungah a ciliaphuai takin kong taangko hi: a mangthang khat po na om uh le, kei ii ka vaipuak lel hu hi ngawl tu hi.
- ²⁷Banghangziam cile Pathian tupna a buppi in kong sonna ah bangma kheet nei ngawl khi hi.
- ²⁸Tua ahikom noma le noma kikeam tavun a, Thaa Thiangtho ii noma khut sung a hong aap tuuhonte zongh en in keam tavun. A Tapa ii chisan tungtawnin, ama atu a piansak Pathian pawlpi ii tuucingte na hi tavun.
- ²⁹Kong nusiak zawkciangin, a kiitak huai ngiate, no sungah hong pai tu a, tua tuuhon a khoaikheet ngawl tu sia ka he hi.
- ³⁰Noma pawlsung pan ma in, pawlkhat in leilot thu taw thu umte amate a zui tu in, a zolh tu hun hong theng tu hi.



³¹Tua ahiciang encik tavun, kum thum sung sun taw zan taw thitui tam ma taakin note khatsim kong hilcian sia ciamtee tavun.

³²“Tu in no sia Pathian kepna sung le a thuthiamna thu sungah kong aap hi, tuasia in ama mihing theampo lemhto thei a, Pathian thuphate hong pia thei hi.

³³Kham ahizong, ngun ahizong, puansilhthe ahizong, kuama neisa ka dungawkw ngei bua hi.

³⁴Ka kitholpuite le keima kitaangsap na teng ka sik natu in hi ka khutte taw na ka sep sia noma tatak ma in, na he uh hi.

³⁵Topa Jesus mama in, ‘Saanna sangin piakna in lungdamna tam zaw hi’, a ci thu phawk kawmin, hi bangin nasia tak na sepna taw na theampo ah, a thazawmte ih hu nanak tu hi, ci in no tungah kong lak zo hi,” ci hi.

³⁶Paul in a son tu teng a man ciang, amate taw khupdin in, thungen hi.

³⁷Amate in ama koai a namh in, a vaithak uh ciang, a vekpi ma in kap uh hi.

³⁸Ama a mu kik nawn ngawl natu, a son hu in, amate a tuanin khuangai uh hi. Tuaciang amate in teambaw kungah ama tha uh hi.

Sawltakte 21

Jerusalem ah Paul Pai

¹Amate ka vaitha uh a, ka nusia uh hi. Teambaw taw a tangtan in, ka pai uh ciang, Cos ka theng uh hi; a zing ciangin Rhodes ka theng uh a, tua sung panin Patara ka zuan suak uh hi.

²Tua munah Phoenicia ah a pai tu teambaw khat ka mu uh a, tua ahikom teambaw tungah kaato in, ka ding uh hi.

³Cyprus a kimu theina ka theng uh a, tua zawkciang a thangsang Syria ah ka pai uh hi. Tyre khua ah ka kaa uh a, tua mun sia teambaw vanh sua natu mun ahi hi.



⁴Tua munah thu um mi pawlkhat ka mu uh a, amate kungah nipi khat ka taam uh hi. Amate in Paul sia Jerusalem ah a pai ngawl natu in, Thaa vaangletna taw thoh uh hi.

⁵Ahihang amate taw hun ka zak zawkciangin, vai ka ding uh a, koma pai natu ah ka pai uh hi. Amate in a zite a tate taw khuapi puasiasa dong hong tha in, vaalbo ah ka vekpi khupdin in thu ka ngen uh hi.

⁶Tua zawkciang, khat le khat kivaitha in teambaw tungah ko ka kaa uh a, amate inn ah a cia kik uh hi.

⁷Tui tung ka khualhawna uh ka zom tan uh a, Tyre pan, Ptolemais ah pai a, tua sungah thu umte ka nukset uh a, amate kungah ni khat ka taam uh hi.

⁸A zing ciangin ka ding uh a, Caesarea ka theng uh hi. Tua khua ah thupha puak syapa Philip ii inn ah ka taam uh hi. Ama sia Jerusalem ah a kiteal husya sali sungah khat ahi hi.

⁹Ama in Pathian thu a thangsak pasal nei ngawl tanu li nei hi.

¹⁰Tua munah ni tam ma ka taam uh sungin, Judea ngam panin, Agabus a kici kamsang khat hong theng hi.

¹¹Ama ko kungah hong pai a, Paul kawngkhau la in, ama le ama a khut a peang kisawm a, “Thaa Thiangtho cina pan: Hi kawngkhau a neipa sia Jerusalem ah hi bang danin Jewte in khaukhii tu a, Gentile te khut sungah aap tu hi,” ci hi.

¹²Hi thu ka zaak uh ciangin ko le a dang teng in Paul tungah Jerusalem ah a pai ngawl natu in ka thuum uh hi.

¹³Ahihang ama in, “Bang ka son ci nu ziam? Hi bangin kapin ka thin hong tamthamsak nu ziam? Jerusalem ah khau kikhii bek dom ngawlin, Topa Jesus hangin, tua munah a thi tu ngangawn zong kingingta zo khi hi,” ci zo kik hi.

¹⁴A thin zaw natu in ka sonpui zo bua uh a, ka ci ka law he ngawlin “Topa deina bang hi taken,” ka ci uh hi.



¹⁵Tawmvei tua sungah hun ka zak zawk uh ciangin, vanh teng kithoai in, Jerusalem ka zuan uh hi.

¹⁶Caesarea pan nungzuite pawlkhat zongh in hong tonpui a, ka taam natu uh Cyprus ngam mi thu um ciil khat ahi Mnason inn ah hong then hi.

James kungah Paul Haw

¹⁷Jerusalem ka thet uh ciangin, thu umte in, nuam takin vai hong muak hi.

¹⁸A zing ciangin, Paul taw James kungah ka haw uh hi; tua munah pawlpi upa theampo om uh hi.

¹⁹Paul in amate a nukset zawkciang, ama nasepnate tungtawn a, Pathian ii Gentilete sungah a sep a vawt theampo cing takin ko hi.

²⁰Ama thuson a zaak zawk uh ciangin, amate theampo in, Pathian pok uh hi. Tua zawkciangin, amate in Paul tungah, “Suapui Paul awng, Jewte mihing tul tam mama thu um hong suak zo uh a, amate theampo Thukham nasia takin, a zuite ahi sia na mu thei hi.

²¹Amate tungah nang ii thu a kisonna panin, Gentile ngamsung teng ah a teang Jew theampo ma in, Moses Thukham a nusiati natu, nangma in hilcian a, a tate ii vunteap a at ngawl natu le, Jew ngeinate a zui ngawl natu in sawl hi, ci thu ahi hi.

²²Amate in nang nong thet hunlam za nanak tu hi. Tua ahiciang bang law tu hi ziam?

²³Hi bangin na ngamtat tu in, kong dei uh hi. Kiciamna a vawt sa pasal li hi sungah om hi.

²⁴Amate taw va pai khawm tan a, amate ii kithiansuana poai sungah kihel in, sum bona teng zongh piaksak tan; tuasia ciangin, amate in a lu uh meettol thei tu hi. Hi bangin hi leang nang thu huvau hong kisonna sia thumaan a hi ngawl hunlam le, nangma mama sia Moses Thukham bang a, a nungta pa na hina thu akuama po in hong he tu hi.

²⁵Gentilete sung pan thu um a suakte ahile, lai khat thaak zo khu hi, milim biakna in a kizangh an lamsangte neak ngawl natu, chisan ahibuale nganhing



a kitawlmeakte a neak ngawl natu, tuaciang numei le pa paktatna pan a kikep natu in, thu ka khensat uh te, ka son uh hi,” ci hi.

²⁶Tua ahikom Paul in, tua pasalte paipui a, a zing ciangin amate taw a kithiansua hi. Tua zawkciang, ama sia Biakinnpi sungah tum a, kithiansuana hun a man tu dong le amate khat sim atu in sangaw biakpiakna a piak thei tu hun sia zongh ni bangza hi tu ziam ci sia zacak hi.

Biakinnpi sungah Paul Kiman

²⁷Ahihang, a ni sali hun a bo dektak laitakin, Asia ngamkhen pan hong pai Jewte pawlkhat in, Paul sia Biakinnpi sungah mu uh hi. Amate in mihonbup holh in, Paul pummat uh hi.

²⁸“Israel pasalte awng! Hong hu tavun! Hisia pa sia mun theampo ah pai in, Israel te, Moses Thukham le hi Biakinnpi langpan in, hilcianna a neipa hi. Tu zonghin, ama in Gentilete pawlkhat Biakinnpi sungah paipui in, hi a thiangtho mun sia ninsak hi!” ci in au uh hi.

²⁹(Hi bangin a ci theina sia Ephesus khua mi Trophimus sia Paul taw khuapi sungah kithawl khawm in mu uh a, Paul in, tua pa sia Biakinnpi sungah tumpui hi tu in muangmaw uh hi.)

³⁰Telmeal om ngawlin khuapi bup thu kizel a, mihingte tai lialua in, Paul man uh a, Biakinnpi pan kaikeak uh hi. Thakhat thu in Biakinnpi kongkhate kikhak hi.

³¹A ngilo nuam mihonpi in Paul thalup a sawm uh lai takin, Rome ngalkap hon ukpa tungah Jerusalem khuabup buai hi, ci in kiko hi.

³²Thakhat thu in tua ngalkap hon ukpa in ngalkap bu pawlkhat le ngalkap te samin mihonpite del uh hi. Mite in ama le ngalkapte a mu ciangin, Paul sia a vel nawn bua uh hi.

³³ngalkap hon ukpa in Paul kungah pai a, ama manin thikkhau nii taw khit tu in thupia hi. “Hi sia pa akua ziam? Ama in bang ngamtatna nei ziam,” ci in dongh hi.



³⁴Mihon sung pan pawlkhat in thu khat son a, a dang te in thudang taw au uh a, telmeal om ngawl ahikom, ngalkap hon ukpa in, bang thu tatak piang cisia a tel zo bua hi, tua ahikom ngalkapte teenna kulh huang sungah Paul paipui tu in, a mite sawl hi.

³⁵Keallei dong paipui uh a, tua zawkciangin ngalkapte in, a puak kul hi, banghangziam cile a ngilo nuam mihonpите thin so ngawp uh hi.

³⁶Amate theampo in, ama nung pan hong pai uh a, “That vun!” ci in aukeak uh hi.

Paul in Ama le Ama Kihung

³⁷Ngalkapte in kulh huang sungah Paul a tumpui dektak laitakin, ngalkap hon ukpa tungah, “Thu tawm kong son thei tu ziam?” ci hi. “Greek kampau hi ngawl ni ziam?” ci in ngalkap hon ukpa in dongh hi.

³⁸“Tua ahile nang sia khatvei lai a, ngalpuang in senneal ngam sungah ngalhiam toai mingilo tul li a lampui Egypt pa sia hi ngawl na hi bua ziam?,” ci hi.

³⁹Paul in, “Keima in Jew mi ka hi a, Cilicia ngam Tarsus khua ah suakin, khuapi thupi khat ii ngam mi ka hi hi. Hi mihingte tungah nong hesuakna in, thu hong sonsak tan,” ci hi.

⁴⁰Ngalkap hon ukpa in a khuan pia ahikom Paul in keallei tungah ding a, mihonte a thim natu in, a khut vik hi. Amate a thim uh ciangin, Paul in amate tungah Hebrew kam taw thuson hi:

Sawltakte 22

¹“Ka mipui Jew te awng, note mai ah keima le keima ka kihukna kammalte hong ngai tavun!”

²Hebrew kam in a pau a zaak uh ciang, amate thim seseam uh hi; tuaciang Paul in zom to lai a:

³“Kei sia Jew mi khat ka hi a, Cilicia ngam Tarsus khua ah ka suak a, ahihang hi sung Jerusalem ah, Gamaliel ii sangpatang khat in a khangto ka hi hi. Ih taang pupite ii nasia takin Thukham kihil nate, ka sin zo hi, tuaciang tuni in



hi sungah a om no theampo taw ma kibangin, kei zongh Pathian atu a ki aap mama pa ka hi hi.

⁴Hi Lampi a zuite sia a thi dongin, a siatvawtpa ka hi hi. Pate le numeite manin, thong sung denna in, a neipa ka hi hi.

⁵Thiampi Lianbel le Council buppi in, ka son teng sia, thumaan hi ci in hong lak thei tu hi. Amate kung panin, Damascus a om, ih mipui Jew te a laithakte zongh keima in ka nga hi. Tua ahikom, tua munah a om hi mite man tu in ka pai a, tuaciang amate thikkol bul sa in, Jerusalem ah daan piak tu in ka ciapui kik hi.

Paul in A Kikhealna Thuson

(Sawl. 9.1–19; 26.12–18)

⁶“Tuabangin khualhaw a, Damascus khua ka thet nai sun laitak hun khawngin, thakhat thu in van pan, a taang mama khuavak khat in ka kiimkot hong taankeak hi.

⁷Lei ah ka puksuk a, ‘Saul, Saul awng! Banghangin kei hong vawtsia ni ziam?’ hong cina aw khat ka za hi.

⁸‘Akua ni ziam Topa?’ ci in ka dongh hi. ‘Keima in nong vawtsiat Nazareth khua mi Jesus ka hi hi,’ hong ci hi.

⁹Kei taw a omkhawm mite in, khuataang sia mu ahihang, kei hong paupuipa aw a za bua uh hi.

¹⁰‘Bang vawt tu khi ziam, Topa’ ci in ka dok ciangin, Topa in kei tungah, ‘Tho in a, Damascus khua sungah pai tan, tua munah Pathian ii nangma sep tu hong seesak theampo hong kison tu hi,’ hong ci hi.

¹¹Khuataang mama sia hu in, ka mit hong taw a, tua ahikom ka ki tholpuite in, Damascus khua sung dong ka khut panin, hong len a hong paipui hi.

¹²“Tua khuapi sungah Ananias minnei pasal khat om a, ama sia biakna mi Thukham a zui tua mun ah a teang Jewte theampo ii a zatak pa ahi hi.

¹³Ama hong pai a ka kungah dingin, ‘Suapui Saul awng, khua mu kik in!’ hong ci hi. Tua hun lian laitakin, khua ka mu thei kik a, ama ka en hi.



¹⁴Ama in, 'Ih taang pupite Pathian in, ama deina a tel tu, a thutang a Naseampa a mu tu le ama aw taw a pau a za tu in nang hong teal zo hi.

¹⁵Banghangziam cile na mu le na zaak teng mihing theampo tungah a son tu in nang sia ama ii tetti khat na hi tu hi.

¹⁶Tu in banghang ngangak lai ni ziam? Tho in a, tui kiphum in, ama tung thungetna taw, na mawnate, kisilthiangsak in,' hong ci hi.

Gentilete tungah Thuhil tu in Paul Kisam

¹⁷“Jerusalem khua ah ka cia kik a, Biakinn sungah thungen in ka om laitakin, mu kholna khat ka nei a,

¹⁸tua sungah Topa ka mu a, ama in, 'Manlang takin Jerusalem nusia zok in, banghangziam cile hi sungah a om mihingte in, kei huvau tetti na pan nate hong saang ngawl tu hi,' hong ci hi.

¹⁹'Topa awng, synagogue te ah ka pai a, nang hong umte manin ka vel bul sia, amate in pha takin hong he nginge hi.

²⁰Tuaciang, na tettipa Stephen a kithalup lai in keima mama zongh tua munah ka om a, a thalup tu thukim in, a thatte ii puantualte zongh kepsak lai khi hi,' ci in ka zo hi.

²¹Kei tungah Topa in 'Pai tan,' 'banghangziam cile a khualana Gentilete kungah kong puak tu hi,' hong ci hi.

²²Paul ii hi bang teng a son ciang dong, amate in ngai uh hi; ahihang tua zawkciang in, amate in a aw nei za taw au a, “Ama heam vun! Thatlum vun! A nungta tu in kilawm ngawl hi!” ci uh hi.

²³Amate in ciik au uh a, a puansilh uh vik in, vui sungah leivui lawn uh hi.

²⁴Rome ngalkap hon ukpa in Paul sia kulh huang sungah paipuisak in, banghangin Jewte in hi bangin, ciik au in oksan ziam ci sia a kiheak thei natu ama vel in thu dongh tavun, ci in a mite thupia hi.



²⁵Ahihang vel tu in a sawmcip uh ciang, a kung a ding ngalkap bupa munah Paul in, “Rome ngam mi khat sia khialna lian khat pawpo atu thu kisit pepeu ngawllai in, vel tu sia, no atu upadi taw kisi na ziam?” ci in dongh hi.

²⁶Ngalkap bupa in tua thu a zaak ciang, ngalkap hon ukpa kungah pai in “Bang law tu ni ziam? Tuasia pa sia Rome ngam mi khat hi!” ci hi.

²⁷Tua ahikom ngalkap hon ukpa Paul kungah pai in, “Hong son tan, Rome ngam mi khat na hi ziam,” ci in dongh hi. “Hi khi hi,” ci in Paul in zo hi.

²⁸Ngalkap hon ukpa in, “Sum tam mama ka piak ciang ma in kei zongh ngam mi khat ka suak thei pheang hi,” ci hi. Paul in “Ahihang kei ka hile ka pian panin Rome ngam mi khat khi hi,” ci in zo hi.

²⁹Thakhat ma in, Paul thu a dongh tute ama kung pan heak kik uh hi; ngalkap hon ukpa sia Paul Rome ngam mi khat hi ci in a heak ciang, thikkol a bulsak huvau patau hi.

Council mai ah Paul

³⁰Ngalkap hon ukpa in, Jewte in Paul sia bang teng tatak taw mawsiat ziam, ci in he nuam hi; tua ahikom a zing ciangin, a thikkol susak a, tuaciang thiampi liante le Council bup kikhop natu in, thupia hi. Tuaciang, ama in Paul paipui a, amate mai ah dingsak hi.

Sawltakte 23

¹Paul in Councilte tangtan in en a, “Ka Israel mipuite awng! Pathian mai ah ka nuntakna zia sia tuni mama dong ka thin thiangtho a, kithasunna nei ngawl khi hi,” ci hi.

²Thiampi Lianbel Ananias in, Paul nai ah a dingte munah, a muk beksak vun, ci in sawl hi.

³Paul in, “Pathian in note hong vel tatak tu hi — no leikaang taw a kizut pang awng! Thukham taw kizui in, kei thu hong khen tu in, tuak ah na to uh a, ahihang kei vel tu a, na kisawl uh ciangin, Thukham paltan na hi uh hi!” ci hi.



⁴“Pathian Thiampi Lianbel pa selno ni hi!” ci in Paul kungah a om pasalte in ci uh hi.

⁵Paul in “Ka Israel mipuite awng, ama Thiampi Lianbel ahi hunlam ka he bua hi. Laithiangtho in, ‘Note ii na mite a ukpa sia sonsia thei ngawl tu nu hi,’ ci hi,” ci in zo kik hi.

⁶Tuate sungah pawlkhat Sadduceete hi a, a dangte sia Phariseete hi ci in, Paul in a mu ciangin, Councilte tungah, “Ka Israel mipuite awng! Kei in Phariseete suan Pharisee khat ka hi hi. Hi sungah thusit ka thuak theina ii a hang sia mithi sa te tho kik tu hi, ci in lametna ka nei hang ahi hi!” ci hi.

⁷Hi thu a son po ciangin, Phariseete le Sadduceete kihau tu in, hong kipan pah a, tuaciang, Council upate sia hong kikhen hi.

⁸(Banghangziam cile Sadduceete in thina panin mihingte tho kik ngawl tu hi, tuaciang, vantung lalang ahizong, thaa ahizong om ngawl hi, ci uh hi; ahihang Phariseete in, hi thu nam thum teng sia um siat hi.)

⁹Auna aw nging vaial a, Pharisee pawl mi Thukham hil sya pawlkhat hong ding a, nasia takin nalh uh hi: “Hisia pa tungah bangma khialna mu zo ngawl khu hi! Vantung lalang khat ziam, thaa khat ziam in, ama paupui takpi hi thei tu hi!” ci uh hi.

¹⁰Kam kinialna uh a aw hong ngam vaial a, ngalkap hon ukpa in, Paul pumpi mama a kilaitap tu lau hi. Tua ahikom tu a mipawlte sungah ngalkapte paisak a, amate kung pan Paul la keak in, ngalkap huang sunsang ah paipui uh hi.

¹¹A zan ciangin, Topa in Paul kungah ding a, “Lau heak in! Hi sung Jerusalem ah kei atu tetti pang zo ni hi, Rome khuasung zongh ah tuabangma in, seam nanak lai tu ni hi,” ci hi.

Paul Suamlup Kisawm

¹²A zingsang ciangin Jewte pawlkhat kisitua in, ngealna khat nei uh hi. Amate in Paul a thalup mateng in an le tui ne ngawl tu hi, ci in kiciamna vawt uh hi.



¹³Hi bang a ngeal khawmte mihing sawmli vaal pha uh hi.

¹⁴Tuaciang amate in thiampi liante le upate kungah pai a, “Paul ka thalup uh mateng bangma ne ngawl tu, ci in thupi takin, ka kiciam uh hi.

¹⁵Tuaciang, tu in, noma le Councilte in, Rome ngalkap hon ukpa munah, Paul ii thu a maanzaw kan nuam bangin, nong kiheang tu a, Paul hong paipui suk natu in na son tu uh hi. Ahihang hisung hong thet suk ma in, ama thatlum tu in ka kingingkhoh tu uh hi,” ci uh hi.

¹⁶Ahihang Paul suapuinu ii tapa in, hi kisuam nopna thu za hi; tua ahikom kulh huang sungah pai in a thu bang teng Paul munah son hi.

¹⁷Tuaciang Paul in ngalkap bute khat sam a, “Ngalkap hon ukpa kungah hi tangvalpa paipui tan; ama munah son tu thu khat ama in nei hi,” ci hi.

¹⁸Ngalkap bupa in paipui in, ngalkap hon ukpa kung then a, “Thongtaak Paul in hi tangvalpa nang kungah paipui tu in hong sawl hi. Banghangziam cile ama in nang tungah son tu thu khat nei hi,” ci hi.

¹⁹Ngalkap hon ukpa in a khut panin len a, ama mama in paipui in, “Kei tung nong son tu bang thu nei ni ziam?” ci in dongh hi.

²⁰Ama in, “Jew upa thuneite in, thukimna khat nei a, Paul ii thu a maan zaw kan nuam bangin, kivawt theam in, Councilte kungah Paul na paipuisuk natu in, zing ciang hong ngen tu hi.

²¹Ahihang amate thu na um heak in, banghangziam cile mihing sawmli vaal in, ama pangin ngak tu uh hi. Ama a thalup mateng, an ne ngawl tuidawn ngawlin, om tu in kiciamna vawt zo hi. Tu in amate in tuabang vawt tu in, kingingta zo a, nangma thukhensatna hong ngak lai hi,” ci hi.

²²Ngalkap hon ukpa in, “Hi thuteng nong ko hunlam kuama tungah son heak in, ” ci in tangvalpa ciasak hi.

Paul sia Ngamuk mangpa Felix kungah Puak

²³Tua zawkciangin, ngalkap hon ukpa in, ngalkapbu nii sam a, “Tu nitak nai kua in ngalkapte zanii Caesarea ah pai tu in, kithoisak vun a, tuate taw a



kop tu in, siphu ngalkap sawmsali le tei toai zanii taw a ding tu in kithoaisak vun,

²⁴Paul to natu siphu pawlkhat zongh, vaihawmsak tavun a, ngamuk manpa Felix kungah pha tak then tavun,” ci hi.

²⁵Tua zawkciangin, ngalkap hon ukpa in, hi bangin lai khat at hi.

²⁶“Claudius Lysias in a zatak huai ngamuk mangpa Felix kong paupui hi.

²⁷Jewte in hi siapa man a, thatlum tu in kithoai hi. Ama sia Rome ngam mi khat hi ci in ka heak hu in, ka ngalkapte taw pai in ka suatak hi.

²⁸Amate in bang teng mawsak nuam ziam ci in ka heak nopna taw amate ii Council ah ka paipui suk hi.

²⁹Kei muna pan ama in thi natu ahizong, thongtaak natu ahizong, a thuak natu za dong ama in ngamtat khialna bangma nei ngawl hi; a maw zonna uh sia amate thukham taw bek kisai ahi hi.

³⁰Tuaciang Jewte pawlkhat in a thasawmna uh ka zaak ciangin, nangma kungah puak tu in thakhat thu in ka khensat hi. Ama a mawsakte munah, ama sia nangma mai ah thu vawt tavun ka ci hi,” ci hi.

³¹Ngalkapte in thupiaknate seam suak uh hi. Amate in, Paul la a, tua nitak in, Antipatris dong paipui uh hi.

³²A zing ciangin peang a pai ngalkapte sia kulh huang ah heak kikin, siphu tung to ngalkapte taw paisuak tu in aap uh hi.

³³Amate in Caesarea ah paipui uh a, ngamuk mangpa lai pia in, Paul sia ama tungah aap uh hi.

³⁴Ngamuk mangpa in, laithak sim a, Paul munah bang ngamkhen sung pan ni ziam ci in dongh hi. Cilicia ngam pan ahi hunlam a tel ciangin,

³⁵ama in “Thu hong sua nuamte hong thet ciangin, na thu kong sit tu hi,” ci hi. Tua zawkciangin ama in, Paul sia ngamuk mangpa phualpi ah a cing taw a kikoi natu thupia hi.

Sawltakte 24



Jewte in Paul Mawsiat

¹Ni nga zawkciangin, Thiampi Lianbel Ananias in Caesarea ah upa pawlkhat le sitni Tertullus taw pai hi. Amate in Felix mai ah pai in, Paul a mawsakna thute son uh hi.

²Tuasia ciang, Paul samin, Tertullus in Paul a mawsakna thu hi bangin son hi: “A zatakhuai pa awng! na ciimna taw nong lampui hu in, khuangei mama sung kilemna om a, ih ngam phattuum natu, a kul kipuaphatna tam ma kivawt saan hi.

³Mun theampo ah a tawntung in, hi thu kiza nuam a, nangma tungah kilungdam tek mama hi.

⁴Ahizong na hun tam lei hong laaksak nuam ngawl khi hi, tua ahitazong, koma thu tawm kong son tu sia, nong ngai natu hesuak kong ngen hi.

⁵Hisia pa sia a kiitak huai mihing nawngkai khat in ka mu uh hi; ama in leitung mun theampo ah a om Jewte sungah, buaina phuang pa hi a, Nazarenes pawl ii lampuipa ahi hi.

⁶Ama in Biakinnpi ninsak tu in zongh hanciam ahi hu in ka man uh hi. Koma thukham taw kizui in, ama tungah thukhen tu ci in ka ngeal uh hang,

⁷ngalkap hon ukpa Lysias hong pai a, zawthawk thu taw ko khut sung pan hong sut hi. Tuaciang ama a mawsak nuamte in nangma mai ah hong pai natu in, Lysias in thupia hi.

⁸Hisia pa thu dongh lete, nangma ma in, ama ka mawsakna uh te tel siat tu ni hi,” ci hi.

⁹Jewte in hi mawna a kisotna sungah, hong pawm hon uh a, hi thu theampo maan hi, a ci uh hi.

Paul in Felix Mai ah Kihung

¹⁰Ngamuk mangpa in, Paul ii pau natu in, a khut taw sawl hi. Paul in, “Hi minam tungah kum tam mama thukhen in na om kong he a, tua ahikom nangma mai ah keima le keima ka kihuk tu sia ka lungdam hi.



¹¹Nangma hantang in thu kan theipa na hi bangma, tu nung ni sawm le ni nii sangin a tam zaw ngawl hun lai, biakpiakna vawt tu in Jerusalem ah ka pai hi.

¹²Biakinnpi sungah khat po taw kam kinialna ahizong, synagogue le khuapi sung mundang ah, mite hol in ngamlumsak natu hanthotna ahizong, ngamta ka hi hunlam Jewte in hong mu ngei ngawl hi.

¹³Tu in hong mawsiat nate zongh maan hi ci in, hong lak thei ngawl tu hi.

¹⁴Na mai ah ahi bang ka pualaak nop thu panin, amate ii maan ngawl hi a ci tua Lampi zui in ka taang pupite ii Pathian ka bia hi. Ahihang Moses Thukham le kamsangte thubute sung a ki at theampo sia kei zongh in ka um hi.

¹⁵Hi lai ah a om mihingte bangma in Pathian sungah lametna kibang khat ka nei thu sia, a pha taw a sia taw mihing theampo in thina pan tho kik tu ci thu ahi hi.

¹⁶Tua ahikom, Pathian mai le mihingte mai ah, kithasunna om ngawl thinsung thiangtho ka nei natu in, ka hanciam thei za in ka seam tawntung hi.

¹⁷“Jerusalem kum tam mama kanusiat zawkciang, ka mite kungah sum pawlkhat kengin, sangaw biakpiakna vawt tu in, tua munah ka pai hi.

¹⁸Biakinnpi sungah kithiansuana a zeksa nate, ka man zawkciang, tua biakpiakna ka vawt laitakin, amate in hong mu hi. Tua munah keima taw mihon om ngawl a, buaina bangma om ngawl hi.

¹⁹Ahihang Asia ngamkhen panin, Jewte pawlkhat hile om hi; tua mite in kei langpan natu nei ahile, amate mama hi sung na mai ah hong pai kul tu hi.

²⁰Tua ahibuale zong, Council mai ah ka din lai in, bang bang khialna lian ka vawt hong mu ziam ci in hi sungah a om mite in sonsak in —



²¹amate mai ah ka din lai in: ‘Mithite in tho kik tu hi, ci thu ka up hangin, tuni in nong thusit uh ka thuak hi,’ ci a ka son sia sim ngawl a son tu dang om ngawl hi,” ci hi.

²²Tuaciang Felix in, Lampi ii thu a heak siat sa ahi ciang, thusitna tawlngasak hi. Ama in “Ngalkap hon ukpa Lysias hong thet ciangin, na thu uh kong khensak tu hi,” ci hi.

²³Ama in Paul a keam ngalkap bupa munah, Paul sia a kepcing natu thupia ahihang, ama suatakna pawlkhat le a kitaangsapte a lawmte in a piak thei natu thupia hi.

Felix le Drusilla mai ah Paul dingsak

²⁴Ni tawmvei zawkciangin, Felix le Jew mi ahi a zi Drusilla hong pai uh hi. Ama in Paul samsak a, Jesus Christ upna huvau a thusonna ngai hi.

²⁵Ahihang Paul in ngamtat phatna, pumpi kitekna le, Thukhen Ni hong thet natu thute kikuppui top a, Felix sia lau hi. “Tu in na pai phot tan, hun pha ka nga ciangin, kong sam kik tu hi,” ci hi.

²⁶Tua laitak ma in, Paul in ama sumnguk pia tu in muangmaw hi; tua hu in ama samsak nithi in thu son pui hi.

²⁷Kum nii a kan zawkciangin, Porcius Festus in ngamuk mangpa Felix ii za laih hi. Felix in Jewte tung pan, maipha nga nuam ahikom, Paul sia thong sungah nusia hi.

Sawltakte 25

Paul in Kumpi lianpa tungah A zukhaan

¹Ngamkhen sungah hong thet zawk ni thum ni ciangin, Festus in Caesarea panin Jerusalem zuan a,

²Tua munah thiampi liante taw kikopin, Jew lampuite in, Paul langpanin thu vawt uh hi. Amate in Festus munah,

³Paul sia Jerusalem ah a paisak natu ngen uh hi, banghangziam cile amate in, lampi ah suamlup sawm uh hi.



⁴Festus in, “Paul sia Caesarea ah thongtaak in kikoi hi. Keima mama zongh hai ngawlin tua munah heak kik tu khi hi.

⁵Na lampuite sia Caesarea ah keima taw paikhawm in, Paul in khialna khat po vawt ahile, ama tungah maw kisuan taken,” ci hi.

⁶Festus in amate kungah ni liat pan ni sawm dong bang a taam zawk ciangin, Caesarea ah pai hi. A zing ciangin thukhenna zum ah to in Paul a sungtan pui natu in thupia hi.

⁷Paul a thet ciangin Jerusalem pan hong pai Jewte in, a kiimkot ah dingin, a nasia mawsakna tam mama nei ahihang amate in, a maan takin a lak thei bua uh hi.

⁸Ahihang Paul in ama le ama kihung a, “Jewte Thukham langpanna ahizong, tua ahibuale Biakinnpi langpanna ahizong, Rome Kumpi lianpa langpanna ahizong, bangma sep khial nei ngawl khi hi,” ci hi.

⁹Festus in Jewte ii maipha nga nuam ahikom, Paul munah “Jerusalem ah pai in, hi maw kisotnate huvau sia, tua lai keima mai ah thusitna na thuk nuam ziam,” ci in dongh hi.

¹⁰Paul in, “Kumpi lianpa ii thukhenna zummai ah thusit thuk tu in ka ding hi. Nangma mama ii na heak bangin, Jewte tungah bangma sep khial nei ngawl khi hi.

¹¹Thi daan taw kiphu in, thukham paltanna le sepna khat po nei hi leng suatak natu kong ngen bua hi. Ahihang amate ii kei tungah, maw hong sot nopnate sungah thumaan a om bua ahile, amate khut sungah kuama in kei hong aap thei ngawl tu hi. Kumpi lianpa tungah a zukhaan khi hi,” ci hi.

¹²Tuasia ciangin Festus in, ama ngaisutna a pia upate taw a kikap zawkciangin, “Kumpi lianpa tungah a zukhaan zo ni hi. Tua ahikom Kumpi lianpa kungah pai tu ni hi,” ci in zo kik hi.

Agrippa le Bernice mai ah Paul ding

¹³Hun tawmvei zawkciangin, Kumpipa Agrippa le Bernice sia Festus taw kimu nuam in Caesarea ah haw uh hi.



¹⁴Tua munah ni tam ma a om zawkciang, Festus in Paul omzia sia kumpipa tungah sonthiang hi. “Hi sungah Felix ii a nusiathongtaak pasal khat om hi,

¹⁵tuaciang, Jerusalem ah ka pai ciangin, Jewte ii thiampi liante le upate in, ama tungah thu vawtin, mawsak natu hong ngen uh hi.

¹⁶Ahihang ko Rome mite in khialna lian khat taw a kimawtsiat mihing khat pawpo sia ama tungah maw a suante taw maitang kisi in, ama tungah a kisuan mawnate panin, ama le ama a kihuk natu hun a nga mateng, kuama khut sungah aap thei ngawl ka hi uh hunlam ka son hi.

¹⁷Amate hi sungah hong pai ciangin, hun bosak thong ngawlin, a zing ciang mama in, thukhenna zum ah ka to a, a mihing pa sia hong paipui natu in ka sawl hi.

¹⁸Ama a langpante hong ding a, ahihangin ka muanmawk bangin, a sia khialna liante taw a mawsiat bua uh hi.

¹⁹Amate vai theampo sia a biakna le Jesus min nei mihing thisa khat ii thu huvau a kinial uh teng ahi hi; Paul in tua pa sia nungta hi, ci hi.

²⁰Hi thute tungtaang ah thu a cingin ka nga thei natu lam sia, ka khensat thei paih bua hi, tua ahikom Paul munah hi mawsiatnate huvau in Jerusalem ah, thu na kisit nuam ziam, ci in ka dongh hi.

²¹Ahihang Paul in a zukhaan hi; ama a kicin lai natu le, Kumpi lianpa ii thu a khen natu, ngen hi. Tua ahikom Kumpi lianpa kungah ka puak thei dong, ama a kicin lai natu in, thu ka pia hi,” ci hi.

²²Agrippa in Festus munah, “Kei mama in hisia pa thuson za nuam khi hi,” ci hi. “Zing ciangin ama thuson za tu ni hi,” ci in Festus in zo hi.

²³A zing ciangin Agrippa le Bernice sia, mipi kikhopna inndoi sungah ngalkap ukpate le khuapi lampui upate taw, nasia tak kithoai in hong pai a, kiletsakna taw hong tum uh hi. Festus in thupia a, Paul tumpui hi.

²⁴Festus in, “Kumpipa Agrippa le hi sungah ko taw a omkhawmte theampo awng: hi sung le Jerusalem a om Jewte theampo ii kei tungah hong khiakpa



sia hi siapa hi a, mu tek nu hi. Amate in ciik au uh a, nungta nawn mama heak hen, ci uh hi.

²⁵Ahihang thidaan taw a kiphu tu ngamtatna nei hi, ci in ka mu zo bua hi. Tuaciang, ama mama in Rome Kumpi lianpa tungah a zukhaan ahiciang puak tu in ka khensat zo hi.

²⁶Ahihang Kumpi lianpa tungah ama thu huvau a kician lai at tu bangma ka nei bua hi. Tua ahikom noma mai hi sungah kong paipui hi — a tuanin Kumpipa Agrippa mai ah kong paipui hi! tua hile a thu a kikat zawkciangin, thu pawlkhat ka at tu om thei tu hi.

²⁷Banghangziam cile, ama mawna hi bang teng hi ci in, a kician om ngawl pipi in, thongtaak pa khat ka puak tu sia, suak thei ka sa bua hi,” ci hi.

Sawltakte 26

Paul in Agrippa mai ah Kihung

¹Agrippa in Paul munah, “Nangma thu sia nangma mama ii son thei natu thu kong pia hi,” ci hi. Paul in a khut laam in, ama le ama sia hi bangin kihung hi.

²“Kumpipa Agrippa awng! Jewte ii maw hong zonna theampo pan, tuni in na mai ah keima le keima ka kihun thei tu le,

³a tuanin Jewte ngeinate le a thu kinial theina theampo pha takpi in tel na hikom hampha ka kisa hi. Tuaciang thinsau takin nong ngai natu in kong thuum hi.

⁴“Jewte theampo in ka no tuung a kipan, ka nuntakzia hong he hi. A masa in keima pianna ngam le tua zawkciang Jerusalem khua ah ka nuntakzia theampo hong he uh hi.

⁵Amate in tetti hong pansak nuam thong le, a ciil panin, biakna sungah a phinciing bel Pharisee pawlmi khat ka hi sia, hong heak tawntung sa hi.

⁶Tuaciang tu in hi sungah thusit ka thuakna ii a hang sia Pathian ii taang pupite tungah kamciam a piakte ka lamet hu ahi hi —



⁷koma minam sawm le niite ii a sun a zanin Pathian ka biak uh ciang tua kamciam bangin nga tu sia ko ii lamet thu ahi hi. Vaangnei Kumpi awng, hi lametna hangin, Jewte in kei sia hong mawsak hi!

⁸Banghang in no hi sungah a omte in, a thi sate sia Pathian in thosak kik tu in um thei ngawl nu ziam?

⁹Keima mama in Nazareth mi Jesus thu langpan in ka sep thei za in seam tong a ci pa ka hi hi.

¹⁰Tuabang sia Jerusalem ah ka ngamtatna ahi hi. Thiampi liante tung panin, thu ka nga a, Pathian mihingte tam ma thong sungah ka khum hi; tuaciangin, amate sia thidaan a kipiak ciangin, kei zongh in ka thukimpui hi.

¹¹Tam vei ma, synagogue te ah daan ka piasak a, a upna uh a kheal thei natu in, ka hanciam hi. Amate tungah ka thin uuk mama ahikom, ngamdang a khuapite ngawngawn ah, ka pai a ka vawtsia hi.

Paul in Ama Kikhealna Son

¹²“Hi bang tupna le sawmna seam tu in, Damascus khua ah ka pai a, thiampi liante ii thuneina le thupiaknate ka keng hi.

¹³Kumpipa awng, lampi tungah sun laitakin ni sangin, a taang zaw khuataang khat in kei le ka khualhawpuite, kiim ah van panin hong taangsuk keak hi.

¹⁴Ka vekpi in lei ah ka liik uh hi. Tuaciang aw khat ka za a, kei tungah Hebrew kam in, ‘Saul, Saul awng! Banghangin hong vawtsia ni ziam? Khuital khat in a neipa ii toai ngan hawlina ciang sia a peak kik bangin, nangma le nangma kikha kik in kiliamsua ni hi,’ hong ci hi.

¹⁵‘Akua ni ziam? Topa’ ci in ka dongh hi. Tuaciang Topa in, ‘Kei sia nong vawtsiat Jesus khi hi.

¹⁶Hikale tho in a ding in, nang tungah kong kilakna sia ka naseam tu a, kong koi nop hang ahi hi. Tuni a keima nong mu teng le maisang a kong lak pheang tu teng midangte munah son tu ni hi.

¹⁷Keima in Israel te le nangma kong puak natu Gentilete kung panin kong suatak tu hi.



¹⁸Nang in amate mit na honsak tu a, amate sia khuazingna sung panin, khuavakna ah, Satan vaangletna panin, Pathian kungah na kiheaksak tu hi. Tua hile amate in keima hong upna tungtawnin, a mawnate uh kimaisak tu a, Pathian tealsa mite sungah amate in omna nga tu uh hi.’

Paul in Ama Nasepna Son

¹⁹“Tua ahikom, Kumpipa Agrippa awng, vantung pan ka nga mukholna sia ni ngawlin ka om bua hi.

²⁰A masa phitbel in Damascus le Jerusalem ah, tua zawkciangin, Judea ngambup le Gentilete sungah, amate in a mawnate kisiik nanak a, Pathian sangah kiheak in, a kisii kikna thu a lak tu nasepte a sep natu in, thu ka hil hi.

²¹Hi thu hangin, Jewte in Biakinnpi sungah ka om laitakin hong man a, thatlum tu in, hanciam uh hi.

²²Ahihang tuni mama dong Pathian in hong hu top zo ahikom, hi sungah dingin a lian a no mi theampo tungah a kibangin, tetti ka pang hi. Tuabang ka son sia in kamsangte le Moses ii hong tung tu hi ci in a sonkhol teng ma ahi hi:

²³Jewte le Gentilete tungah ngupna khuavak thu thangsak tu in, Messiah in hong thuak kul tu a, thina panin a tho kik phitbel ahi tu hi, ci sia thu ahi hi,” ci hi.

²⁴Paul in ama le ama hi bang a kihuk ciangin, Festus in oksan a, “Paul awng, na thin amh hi! pilna tam na sinna in na thin hong amhsak hi!” ci hi.

²⁵Paul in, “Kei ka thin amh ngawl hi, A zatakhuai pa awng, keima in ahi thumaan thutak ka son hi.

²⁶Kumpipa Agrippa awng! Nang tungah hang takin hong son thei khi hi; banghangziam cile nangma in hite huvau he ni hi. A piang sa nate khat simin, ciamtee tu in kong um hi, banghangziam cile, hi thu sia kingsong khat ah a piangku thu hi ngawl hi.



²⁷Kumpipa Agrippa awng, kamsangte na um ziam? Na up sia hong he khi hi!” Paul in ci hi.

²⁸Agrippa in Paul munah, “Hi hun tomno sungah Tapidaw hong suaksak zo tu in ki um ni ziam?” ci hi.

²⁹“Hun tom kale, sau kale, nang le tuni a ka thuson hong ngaite theampo, hi thikkolte kihel ngawlin, keima bang na hi thei natu uh sia Pathian tungah ka thungetna ahi hi!” ci in zo hi.

³⁰Tua zawkciangin Kumpipa, ngamuk mangpa, Bernice le a dang teng ding a,
³¹a nusiaw zawk uh ciangin, khat le khat tungah, “Hisia pa in thongtaak natu ahizong, thi natu ahizong, bangma vawt nei ngawl hi,” kici uh hi.

³²Agrippa in Festus munah, “Kumpi lianpa tungah a zukhaan ngawl hile, hisia pa kitha thei tu hi,” ci hi.

Sawltakte 27

Paul Teambaw taw Rome ah pai

¹Italy ah teambaw taw pai tu a kikhensat zawkciang Paul le thongtaak dang pawlkhat sia “Kumpi lianpa ii ngalkaphon” sungah ngalkap bu Julius tungah amate in aap hi.

²Adramyttium pan teambaw khat tungah ka kaato uh hi, tuasia in Asia ngamkhen a teambaw tawngakna sang zuan tu in a kithoai teambaw hi a, tua taw ka ding uh hi. Thessalonica khua pan, Macedonia mi Aristarchus taw ka ton uh hi.

³A zingsang ciangin, Sidon ka theng uh hi. Julius sia Paul tungah hong dik a, a kitaangsap pawpo a kipiak thei natu in, a lawmte kungah hawsak thei hi.

⁴Tua mun panin ka paisuak uh a, ko sangah vui hong lee vak ahikom, a kibeal theina Cyprus tuikulh pangh vui kidalna mun tawnin ka pai uh hi.

⁵Cilicia le Pamphylia hui panin, tuipi ka kan uh a, Lycia ngam Myra khua ka theng uh hi.



⁶Tua munah ngalkap bupa in, Alexandria pan Italy ngam a zuan tu teambaw khat mu a tua teambaw tungah hong kaasak hi.

⁷Ni tam ma dam takin, ka pai uh a, Cnidus khua hui dong, a khakbel ciangin, haksa pi in, ka theng uh hi. Tuak sangah ka pai tan thei ngawl natu in, vui in hong khak ahikom, Salmone leidok hui panin Crete tuikul pangh vui kidalna mun bealin ka paisuk uh hi.

⁸Tuipi vaalbo ka neak uh a, Lasea khua pan a kikhuala ngawl Muanhuai Teambaw tawlngakna kicina mun haksa pi in ka theng uh hi.

⁹Tua sungah ni tam mama taam ka hi uhkom, tu in Mawphelna Ni zongh kan zo a, tui lam taw khualhaw tu sia lauhuai hi. Tua hikom, Paul in amate sia hi ngaisutna pia hi.

¹⁰“Pasalte awng, ih khualhawna sia, hi sung pan kipan, lauhuai tu in ka mu hi; vanhte le teambaw ii tungah siatna lian piang tu a, mihing thina zongh om tu hi,” ci hi.

¹¹Ahihang ngalkap bupa in, teambaw ukpa le a neipa thuson um zaw a, Paul sonte sia a thupi laak bua hi.

¹²Teambaw tawlngakna mun in phalbi sung om natu a phabel mun ahi bua hi; tua ahikom, mihing a tamzaw in, ahi thei le, tuipi tungah paisuakin phalbi sung teng a om thei natu mun Phoenix thet tu hanciam nuam uh hi. Crete a om Phoenix teambaw tawlngakna sia nitumna thangsang le nitumna saksang maingat hi.

Tuipi sungah Suangval

¹³Thangsang panin vui hong va vahiau a, mihingte in a tupna uh bangin, pai thei tu in ki um uh hi. Tua ahikom tawlngaksakna thikluum dokto in, Crete vaalbo hui a neak thei zaza neakin pai uh hi.

¹⁴Ahihang hai ngawlin, “Nisuana saksang vuipi” kici, vui thahat khat tuikulh panin hong vasuk hi.

¹⁵Vui in teambaw sawn a, vui sang maingat in, kipai thei nawn ngawl ahikom, hanciam tuan nawn ngawlin, vui ii seamna pawpo ah ka pai uh hi.

- ¹⁶Cauda tuikulh no ii thangsang ka kan uh ciangin, belh natu tawm om hi. Tua munah teambaw taw a kikop ngunkuang sia haksa pi in, ka hu zo uh hi.
- ¹⁷Amate in teambaw tungah tuasia kaito in, teambaw kiimkot khauzeen pawlkhat taw sawmcip uh hi. Amate in, Libya ngam sen vaalbote phulin teambaw a awk tu lau uh hi. Tua ahikom amate in, teambaw puankhakte, luak in, vui ii sawnna pawpo ah pai tu in a om uh hi.
- ¹⁸Suangval thahat sia, hong kizom tan ahikom, a zing ciangin, teambaw sungah a puak uh vanh pawlkhat tuipi sungah khia uh hi,
- ¹⁹a zing ciangin teambaw taw kisai vanhzak pawlkhat tuipi sungah khia uh hi.
- ²⁰Ni tam mama hun sung, ni ahizong, aksi ahizong, ka mu thei bua uh hi. Tuaciang vui nasia takin hong va tan hi. A khakbel ciangin, suatak natu lametna bangma ka nei nawn bua uh hi.
- ²¹Mihingte sia an ne ngawlin, khua ngei a om zawkciang, Paul in amate mai ah dingin, “Pasalte awng, ka thuson hong ngai po leute a, Crete panin din awl leang hi zaw hi; tua hile hi za supna le lalna taw ih kipeal tu hi.
- ²²Ahihang tu in kong thuum hi. Na thin uh liansak vun! Note khat zongh in, na nuntakna taan ngawl tu nu hi; teambaw bekma kisumh tu hi.
- ²³Banghangziam cile ama ii neisa ka hi a, ka biak Pathian ii vantung lalang khat tu zanin hong pai a,
- ²⁴‘Paul awng, lau heak in! Kumpi lianpa mai ah na din kul tu hi. Pathian in nang tungah hong phatna taw na khualhaw pui theampo ii nuntakna suatak zo ni hi’ hong ci hi.
- ²⁵Tua ahikom, pasalte awng, thin lian vun! Banghangziam cile, Pathian ka muang a, kei tungah hong kison bangin, tung tu hi, ci in ka um hi.
- ²⁶Ahihang eite sia tuikulh khat ii vaalbo ah hong kisawn tu hi,” ci hi.



²⁷Ni sawm le ni li ni zanin, vuipei suangval in, Mediterranean tuipi sungah ko hong then hi. Zankim hun khawngin, teambaw naseamte in, lei taw kinai zo hi vak hing, ci in ummaw uh hi.

²⁸Tua ahikom khau khat ii tungah, a ngit khat sawm a, a khiaksuk uh le, metre 40 thuk hi ci in mu hi; tawmvei zawkciang in, a tee kik uh le metre 30 thuk hi.

²⁹Amate in teambaw sia suangpi tung a tot tu lau ahikom, teambaw nungsang panin, tawlngaksakna thikluum li khia suk a, khuavak natu in, thungen uh hi.

³⁰Tua zawkciang teambaw naseamte in, teambaw panin a suatak natu in, hanciam uh hi; ngunkuang sia tui sungah khiasuk in, teambaw maisang panin, tawlngaksakna thikluum pawlkhat khia tu bangin kiheang uh hi.

³¹Ahihang Paul in ngalkap bupa le ngalkapte munah, “Hi teambaw naseamte sia teambaw tungah a om po bua uhle, no suatak natu lamet om ngawl hi,” ci hi.

³²Tua ahikom a ngunkuang khii na khau attan uh a, ngunkuang sia tui in taisak uh hi.

³³Khua hong vak mahiat in, Paul in a vekpi in, an tawm tek a neak natu in thuum a: “Tu in ni sawm le ni li ngak zo nu hi. Hi hunsung teng bangma neak nei ngawl nu hi.

³⁴Tua ahiciang an tawm tek na neak natu uh in, kong thuum hi; na thi ngawl natu in, an kitaangsamh hi. Na lu tung a samzam khat zongh, sum ngawl tu nu hi,” ci hi.

³⁵Hi bangin a ci zawkciang, Paul in anluum pawlkhat la in, Pathian pok in, amate theampo mai ah balneen in ne tu in kipan hi.

³⁶Amate a thin lian a, mihing simin anluum ne uh hi.

³⁷A vekpi kingawm in, mihing 276 teambaw tungah ka om uh hi.

³⁸Mihing simin, an a neak siat zawk uh ciangin, zungtaang teng tuipi sungah a vawkna taw teambaw vanh zaangsak uh hi.



Teambaw Kisia cip

³⁹Khua hong vak ciangin, teambaw naseamte in, vaalbo a tel meal bua uh hi. Ahihang amate in, vaalbo a nei tuidok to khat mu ahikom, ahi thei le tua munah teambaw sia kingaksak sawm uh hi.

⁴⁰Tua ahikom amate in tawngaksakna thikluumte ii khau attan in, tui sungah khiasuk uh a, teambaw heaknate sawmna khau a phel paih uh hi. Tua zawkciang vui in teambaw sia, a mai sangah a sawn natu, amate in teambaw mai sangah puan khai a, tuaciang vaalbo sang ka manaw uh hi.

⁴¹Ahihang teambaw in sen bo khat phul a, lei ah kinga hi; teambaw maisang sia awk in, a tungh thei nawn bua hi. Tua laitakin tuihual nasia mama ahikom, teambaw nungsang teng a bebek in tamtham hi.

⁴²Ngalkapte in, thongtaak theampo tui op a, vaalbo ah a suatak ngawl natu in, thalup sawm uh hi.

⁴³Ahihang ngalkap hon ukpa in, Paul hun nuam ahikom, tuabangin a ngamtat ngawl natu in thoh hi. Tua hi ngawl zaw in, tui op thei peuma, teambaw tung panin, leangin, vaalbo dong tui a op natu thupia hi;

⁴⁴a dangte in zui in, thingpheak ahizong, teambaw bek ahizong, a pom tek natu thupia hi. Hi bangin ka vekpi ma vaalbo ah ngammuang takin ka theng uh hi.

Sawltakte 28

Malta ah

¹Ngammuang in vaalbo tung ka thet uh ciang, tua tuikulh sia Malta hi ci in ka he uh hi.

²Tua munah a teang mihingte in, hong pawlvawt mama uh hi. Ngua zu tu kithoi in khuasik mama ahikom, amate in meimang sep in, hong muak uh hi.

³Paul in thingkang lom khat toai in, mei sungah a thut ciangin, meisa thuak la in, ngul khat hong pusuak a, ama khut tungah hong kivial hi.



⁴A khua mite in, Paul khut tungah a kaai ngul a mu uh ciangin khat le khat sia, “Hi sia pa in tualthat khat hi nak tu hi. Tuipi pan suakta ahihang a nuntak tu sia Kaam in oai ngawl hi,” ci uh hi.

⁵Ahihang Paul in, tua ngul sia mei sungah thing a, ama bangma tat ngawl hi.

⁶Amate in Paul sia a ci a sa tum keak tu a, tua ahibuale, pukvawk in a thi tu ngak hi. Ahihang ngei hial ma a thi tu a ngak zawk uh ciang, a tumdang piang ngawl ahikom, a ngaisutna uh kheal kik a, “Ama sia pathian khat hi ei!” ci uh hi.

⁷Tua mun panin a khuala ngawl na ah tuikulh ukpa Publius ii neisa lo pawlkhat om hi. Ama in hong muak a, ni thum sung zin hong do hi.

⁸Publius ii pa sia cisuk natna le ngilsan natna taw lupmun tung ngak hi. Paul in, ama ii inndoi sungah tumin, thungen a, ama tungah a khut nga in damsak hi.

⁹Hi bangin hong pian ciangin, tuikulh tung a cina dang theampo zongh hong pai tek a, dam siat uh hi.

¹⁰Amate in letsong tam ma hong pia a, teambaw taw ka din uh ciangin, khualhawna sung a ka kisap uh nate amate in teambaw tungah hong koisak hi.

Malta panin Rome ah

¹¹Tha thum zawkciangin, Alexandria panin, phalbi hunsung tua tuikulh tungah a taam “The Twin Gods (A Peang Pathiante)” a kici teambaw khat taw ka ding uh hi.

¹²Syracuse khuapi ka theng uh a, ni thum ka taam uh hi.

¹³Tua mun panin ka ding suak uh a, Rhegium khuapi ka theng uh hi. A zing ciang, thangsang panin, vuiva tu in hong kipan hi, tuaciangin ni nii sungin Puteoli khua ka theng uh hi.

¹⁴Tua munah thu um pawlkhat ka mu uh a, amate in nipi khat taamin hong sawl hi. Tua mun panin, Rome khua ka theng uh hi.



¹⁵Rome a thu umte in ko thu hong za a, Appius Sumbuk le Zin inn Thum a kicina kuate dong hong muak uh hi. Paul in amate a mu ciangin, Pathian tungah lungdamko in, tha nga tuam mama hi.

Rome khua sungah

¹⁶Rome khua sungah ka thet uh ciangin, Paul sia ama nguakin, a cing ngalkap sia taw a teang khawmsak hi.

¹⁷Ni thum zawkciangin, Paul in tua munah a om Jew lampuite sam a, kikhopna khat vawt hi. Amate hong kikhop ciang, amate tungah, “Ka Israel mipuite awng, ih mite tungah ahizong, taang pupite tung pan ih lua ngeina zeksate tung ahizong, langpanna bangma nei ngawl napi, Jerusalem ah kei thong hong taaksak a, Rome te tungah hong aap uh hi.

¹⁸Rome te in kei thu hong sit zawkciang, thi natu kilawm bangma sep nei ngawl ka hi komin, hong tha nuam hi.

¹⁹Ahihang Jewte in tuabang tu sia nalh ahikom, Kumpi lianpa tungah ka zukhaan kul hi, tua ahihang, ka mipuite langpanin mawsak natu ka nei bua hi.

²⁰Tua hangin, no taw kimu in kong paupui natu ka nget ahi hi. A tatak ci leang, Israel mite ii a lamet uh pa hu in, hi bangin kei thikkol hong kibal hi,” ci hi.

²¹Amate in ama munah, “Kote in nang thu huvau sia Judea panin, laithak ka nga bua uh hi, tua mun panin, ih mipuite hong pai in, nang taw kisai thupiang khat pawpo ahibuale a sia son tu khat po hong puak bua uh hi.

²²Ahihang nangma ngaisut nate ka za nuam uh hi, banghangziam cile, mun theampo ah mihingte in, na pawl puite a siatson tek sia ka he uh hi,” ci uh hi.

²³Tua ahikom, Paul taw a ni kiciam a, tua ni in mihing tam mama Paul omna ah hong pai uh hi. Zingsang pan zan dong, amate tungah Pathian Ngam thu hilthiang a, Moses Thukham le kamsangte lai at nate siisan in, Jesus thu a tel thei natu hanciam in son hi.



²⁴Pawlkhatte sia ama kammalte um uh a, ahihang a dangte in, a um bua uh hi.

²⁵Tua ahikom, amate kithukim thei ngawlin, Paul ii hi bangin, a ci zawkciang nusia uh hi. “Thaa Thiangtho in, Isaiah kamsangpa tungtawn in, na taang pupite tungah a sonna sia bangza in pha ziam!

²⁶Banghangziam cile ama in, ‘Pai in hi mite tungah son in: No in na ngangai, na ngangai tu a, na tel buatu uh hi; Na e en, na e en tu uh a, ahihang na mu buatu uh hi,

²⁷banghangziam cile, hi mite ii thin sia navaak ngawl hi, amate in a bil uh humcip a, a mit uh si hi. Tua hi bathong le, amate ii mit in mu tu a, a bil taw a za tu uh hi, tuaciang a thinsung in a tel tu uh hi, tuaciangin kei sangah hong kiheak tu a, amate ka damsak tu hi,’ Pathian in ci hi, ” a ci hi.

²⁸Tuaciang Paul ii thukhupna ah: “Tuasia ciang, Pathian ii ngupna thu sia Gentilete tungah, kipuak zo hi ci in note in na heak tu uh ahi hi. Amate in ngai tu hi!”

²⁹Paul in hi teng a ci zawkciang Jewte amate teng nasia tak kinialin a cia uh hi.

³⁰Paul in kum nii sung a saap inn sungah teang a, ama taw a kimu tu in a pai theampo leangna do hi.

³¹Ama in hangsan tak le suakta takin Pathian Ngam thuhil a, Topa Jesus Christ thu hilcian hi.



Romete

Romete 1

¹Pathian Lungdamna Thupha hil tu in a sap, sawltak khat tu a teal, Jesus Christ naseampa ahi Paul ii laithak hi.

²Tua Lungdamna Thupha a pian natu in Lai Thiangtho sungah a ki at sa bangma taanglai pek panin a kamsangte tungtawn in Pathian kamciam a piak sa ahi hi.

³Tua in ih Topa Jesus Christ, ama Tapa huvau ahi hi: ci le sa panin ama David suan hi a;

⁴Pathian pianzia taw ci leang thina panin a lian vaangletna taw a kithawsak kikna in Pathian Tapa a hina kilanghsak hi.

⁵Ama tungtawn in Pathian in mi namcin sung pan mihing theampo a up thei natu le a thu a nit thei natu in Christ hu in kei sia sawltak khat sua theina thupha hong pia hi.

⁶Jesus Christ neisa a suak tu in Pathian hong sap sa Rome khua a om note zongh hi thu in hong huam hi.

⁷Tua ahikom Pathian in hong it a, ama minam suak tu a hong sap sa no Rome khua a omte theampo tungah lai kong thaak hi. Ih Pa Pathian le ih Topa Jesus Christ in thuthiamna le thinnopna hong pia taken.

Lungdamko Thungetna

⁸A masa phitbel in no tungtaang ah Jesus Christ tungtawn in Pathian tungah lungdam ka ko hi, banghangziam cile leitung theampo in na upna thu uh hong za hi.

⁹A Tapa Lungdamna Thupha ka hilsak, ka thin theampo taw ka sepsak, tu a ka son teng sia thumaan a hina thu ah — Pathian in ka tetti ahi hi. No kong phaw tawntungna sia Pathian in,

¹⁰thu ka nget simin hong he hi. Pathian deina ahi nale tu in no kungah kong haw tu sia hong suaksak thei takpi le ci in ka ngen hi.



¹¹Note hong thakhosak tu, Thaa thupha hong hawm sawn tu in kong mu nuam mama hi.

¹²Ka cinopna pan kei upna hu in note phat tuamna nga in, note upna hu in kei zongh phat tuamna nga tu a, hun khat sungah a kihu tetek ih hina thu ka son nopna hi.

¹³Suapuite awng hi thu na teptee tu ka dei a, tamvei ma note kungah hong haw tu in ka ngeal zo hi, ahihang tuabang ka hi thei natu in bang khat po in hong khak tawntung hi. Gentilete sung panin a kikheal ka omsak bangma in, no sung pan zong kikhealsak zawk nei leng ka uk hi.

¹⁴Banghangziam cile heakna nei te ahizong a nei ngawlte ahizong, pilna neite ahizong a nei ngawlte ahizong mihing theampo ii tungah tavuan ka nei hi.

¹⁵Tua ahikom Rome khua ah a teang no tung zongh ah Lungdamna Thupha hil tu ka lawp hi.

Lungdamna Thupha ii Vaangletna

¹⁶Lungdamna Thupha sungah a kicingin muanna ka nei hi; tua in a umte theampo kingup natu Pathian vaangletna hi a Jew mite atu hi photin, tua zawkciang Gentilete atu zongh ahi hi.

¹⁷Banghangziam cile lungdamna thupha in Pathian le mihingte bangbangin kilemzawng thei tu ziam ci in hong pualaa hi: a patna panin atawp dong upna tungtawn in a piang ahi hi. Laithiangtho sungah “Upna tungtawn in Pathian mai ah thutang a kisuaksak sia in nungta tu hi,” ci hi.

Mihing Theampo Mawnei Siat

¹⁸Thumaan thu a kiheak tu a khaktan mihingte ngitlona le mawnate hu in Pathian thin uukna sia vantung panin hong kilanghsak hi.

¹⁹Pathian in amate daan pia hi, banghangziam cile mihingte ii Pathian a heak natu sia Pathian mama in amate tungah telthiangsak hi.

²⁰Pathian ii simlei a bitphua pan kipan a kimu thei ngawl Pathian phatna ahi, ama ii tawntung vaangletna le thaa pianzia te thiang takin kimu hi; tuate sia



Pathian ii vawt nate tung panin kitel thei hi. Tua ahikom mihingte in kam zon natu bangma a nei bua uh hi.

²¹Amate in Pathian he ahihang a upat tu bangin upat ngawl uh a, ama tungah lungdam a ko tu bangin ko ngawl uh hi. Amate khua ngaisutna mannung mama ngawl a, amate thinsung hawmin, khuazing taw kidim hi.

²²Amate ciim kisa ahihang mawmaw uh hi;

²³a nungta tawntung Pathian a biak tu luangin a thi thei mihing, vacim, ngamsa, awmtaal in a vak nganhingte meal taw kibang limte bia uh hi.

²⁴Tua ahikom, amate thinsung ah a uuk kiihuai ngamtatnate vawt tu in, Pathian in amate thazau a, tuaciangin amate khat le khat tungah maizum huai nate kivawt uh hi.

²⁵Pathian huvau thumaante sia leilot thu suaksak uh a, Bitphuapa Pathian bia ngawlin a bitphua sa nate bia zaw uh hi. Pathian a tawntungin kipok taken! Amen.

²⁶Amate hi bangin ngamta ahikom, Pathian in amate sia a maizum huai ci le sa deina sungah thazau hi. A numeite ngangawn in amate pumpi zak tu bangin zangh ngawlin ngeina ngawl bangin zangh uh hi.

²⁷Tua bangma in pate zongh in numei taw om khop tu sangin, pa le pa khial nopna thin nei uh hi. Pate in a maizum huai pa le pa khialnate vawt a, tua hu in amate taw a kiphu daante kipia hi.

²⁸Pathian huvau heakna maante sia mihingte in khua ngaisut in nei nuam ngawl ahikom Pathian in amate ngamtat tuak ngawlte ngamtat theina ngaisutna sungah thazau hi.

²⁹Amate in ngitlona, siatna, duhopna le kilalsak theina namcinte taw kidim a; ki eenna, kisuamlupna, kihauna, ngualtheamna le siatvawt nopna thin taw kidim uh hi. Amate nawnsan a,

³⁰khat le khat kingensia hi; amate in Pathian ensan a, sisuak in, kiphasak a kisuangtaak hi; siatna namcin phuang a; nute pate thu ni ngawl hi;

³¹Apha le asia khentel theina thinsung nei ngawl, kamciam len ngawlin ngual hesuak theina le thuthiamna nei ngawl hi.

³²Hi bangin a nungtate sia Pathian thukham in thidaan thuak hen a ci hunlam zongh amate in he uh hi. Ahitazong, a ngamtatna kheal ngawl bek dom ngawlin, tuabang a ngamtate zongh thukimpui lai hi.

Romete 2

Pathian Thukhenna

¹Note in ngual tungah thukhen hi ngawl nu ziam? Akua po na hi uh zong na paulap tu om ngawl hi. Banghangziam cile ngual tungah thu na khen uh ciangin noma zongh amate ngamtat bangma in na ngamta veve uh le noma le noma thu kikhen na suak uh hi.

²Pathian in hi bang a ngamtate tung thu a khen ciangin thutang taw thukhen hi ci in ka he uh hi.

³Ahihang no, ngual tung a thukhente awng, noma zongh in amate ngamtat bangma in ngamta na hi uh hi! Pathian thukhenna taw kipeal thei tu ki um na hi uh ziam?

⁴Tua ahibuale ama cikna, thiamna le dual zawknate zawnsak vawt na hi uh ziam? A tatak ci ciang Pathian cingh mama hi, banghangziam cile na kisiik kik natu in ama in hanciam in lam hong pui hi.

⁵Ahihangin note na thin uh pui in na lungtang uh sak hi, tua ahikomin Pathian thin uuk thangsiatna le thutang taw thu a khen Ni ciangin na daan khak tu uh sia a nasia seseam in hong kilangh tu hi.

⁶Banghangziam cile Pathian in mihing sim in a sep a vawt bangin thaman a pia tu hi.

⁷Mihing pawlkhat in nasep pha seam zomin minthanna, upatna le thi mawk nuntaknate Pathian kungah zong uh hi. Tuatate tungah Pathian in tawntung nuntakna pia tu hi.



⁸Mihingdangte ahile amate atu bek ngaisun in, thumaan nial in a maan ngawl thu zui uh hi; tuate tungah Pathian in a thangsiatna le a thin uukna buak tu hi.

⁹Siatna a vawt mihing theampo tungah thuakna le natna hong om tu a, Jewte masa phot tu a tua zawkciangin Gentilete zongin thuak tu hi.

¹⁰Ahihang Pathian in minthanna, upatna le thinnopna sia thupha vawtte theampo tungah, Jewte masa photin Gentilete zongh pia tu hi.

¹¹Banghangziam cile Pathian in mihing khatsim tungah a kibangin thukhen hi.

¹²Gentilete in Moses Thukhamte a nei bua uh hi; amate in Thukham puasiah om in, mawna vawtin mangthang uh hi. Jewte in Thukham nei uh hi; amate maw a Thukham in amate thukhen hi.

¹³Banghangziam cile Pathian mai ah thutang suana in Thukham zaakna taw piang ngawl a Thukham sawlnate zuina taw piang hi.

¹⁴Gentilete in Thukham nei ngawl hi; ahihang Thukham sawl bangin ngamta tu in amate le amate in a thin sunguh ah a khensat uh simin Thukham nei suak uh hi. Thukham nei ngawlte hi phot ahihang a neite suak uh hi.

¹⁵Amate ngamtatna in Thukham sawlnate a thin sunguh ki at hi ci in lak hi. A thin sunguh ah, kithasun theina le ki thutangsak theina a nei theina zongh in, hi thu maan hi ci in lak hi.

¹⁶Tua ahikom Lungdamna Thupha ka hilna bangin ci leang, mihing theampo ii a thimtham ngaisutnate tungah Jesus tungtawn in Pathian in thu a khen Ni ciang, tu a ih son bangin hong piang tu ahi hi.

Jewte le Thukham

¹⁷No, Jewte ka hi uh a cite awng, note sia Thukham suangin Pathian huvau ah a kisuangtaakte na hi uh hi;

¹⁸Pathian in bangbangin ngamta le hong oai ziam ci in na he uh a, Thukham panin a maan le a maan ngawl thute teal thei natu na sin zo uh hi;



- ¹⁹note in mittawte lamlak tu, khuazing sung a omte atu khuavak,
- ²⁰a mawmawte atu a hilpa, kkuatel ngawlte atu syapa na hi uh hi. Thukham sungah thumaan le heakna kicing in om hi ci in a kholette na hi uh hi.
- ²¹Ngual zongh hil thei na hi uh le noma le noma banghangin kihil ngawl nu ziam? “Nguta heak vun,” ci in na hil uh hi. Ahihang noma mama in na ngu uh ziam?
- ²²“Palngul mawna na vawt heak vun,” na ci uh hi— Noma in palngul mawna na vawt uh ziam? Milim biakna na ngaimaw uh hi — ahihang, biakinnte zawthawk thu taw na phul uh ziam?
- ²³Pathian Thukham nei hing ci in kisuangtaak nu hi — ahihang a thukham na paltanna uh taw Pathian min na paansak uh ziam?
- ²⁴Laithiangtho in, “No Jewte hu in Gentilete in Pathian sonsia hi,” ci hi.
- ²⁵Thukham na tang uh le na vunteap atna in manh nei hi; ahihang Thukham na tang bua uh le na vunteap at ba leute phazaw hi.
- ²⁶Gentile mite vunteap a at ngawlte in Thukham thupiakna a ni uhle Pathian in vunteap atte bangma in ngaisun ngawl tu ziam?
- ²⁷Tua ahikom Thukham nei a vunteap at napi in, tua Thukham a zui ngawl no Jewte sia vunteap at ngawl napi thukham a zui Gentilete in hong ningkhin tu hi.
- ²⁸Vunteap ki at takpi a, Jew tatak a kicite sia akua bangte hi peuma tu ziam? A puatham bek Jew hi a vunteap atna in ci le sa bek ahite Jew tatak kici ngawl hi.
- ²⁹Jew tatak a kicite sia a sungsang Jew hi a, a thinsung vunteap a ki at, tua zongh Pathian Thaa ii sepna taw a ki at hi in, thukham sep le vawt ahi ngawlte hi. Hi bang mite in mihingte pokna hi ngawlin Pathian pokna saang uh hi.

Romete 3



¹Tua ahile Jewte in Gentilete sangin hamphat zawkna khat po a nei ziam? Tua ahibuale vunteap atna ah bang phat tuamna om ziam?

²Phat tuamna nam tam mama om hi! a masa phitbel in Pathian in a thu a kizaaksak natu in Jewte muang phot hi.

³Ahihang hi thu huvau ah amate sungah thumaan ngawl pawlkhat om le, bang suak tu ziam? Hisia in Pathian thumaan ngawl tu hi cina hi tu ziam?

⁴Tuabang hi ngawl het hi. Mihing sim in leilot kale zong Pathian ahile a thumaan kul veve tu hi. Laithiangtho in hi bangin ci hi. “Na pau ciangin thumaan na hi hunlam kilak tu a, thu hong kisit ciangin a thu na zaw kul hi.”

⁵Ahihang eite thutang ngawl ih hina in Pathian sia thutang ahi hunlam kiciansak ahile eite in bang ih son tuan nawn tu ziam? Pathian in daan hong piak ciangin ama sia thutang ngawl hi ih ci thei ziam? (Tu a teng sia mihing ngeina bangin ka pau hi.)

⁶Hi vet ngawl hi! Pathian thutang ngawl hile bangbangin ama in leitung buppi thukhen thei tu ziam?

⁷Ahihangin keima ii thumaan ngawlina in Pathian thumaanna kiciansak zaw kan a, ama minthanna suaksak le bangbang hi tu ziam? Tua ahile banghangin kei mawnei hi ci in hong kipuavawk lalai tu ziam?

⁸Tua ahile banghangin “Thupha pianna tu in thusia vawt tawng,” ci ngawl hi ziam? Mihing pawlkhat in tu a ka ci bangin pau hi ci in mawsiatin hong lang hi! Tuabang mihingte in a kiphu bangin puavawkna thuak tu hi.

Kuama Thumaan Thutang Om ngawl

⁹Tua ahile ei Jewte in Gentilete sangin phazaw ih hi ziam? Hi tuan ngawl hi! Ka son sa bangma in Jewte le Gentilete sia a kibangin mawna vaangletna nuai ah om siat hi.

¹⁰Laithiangtho in, “A thumaan thutang kuama om ngawl hi.

¹¹A ciim kuama om ngawl a, Pathian a bia kuama om ngawl hi.



¹²Mihingte a vekpi in Pathian sang panin lampial zo a, amate lamkhial siat zo uh hi. Khat bebeak zongh kuama a pha naseam om ngawl hi.

¹³A kampau te in thi theina kitheamna thu taw kidim a; a leei uh panin leilot thu pusuak hi, a lau huai tawnnate ngulngu bangin a muk uh panin pusuak hi;

¹⁴a kam uh sia longsia khakngal taw kidim hi.

¹⁵Amate in ngual liamsua tu le a thatlum tu in palvang a,

¹⁶a paina theampo ah amate in siatna le lalna piangsak uh hi.

¹⁷Amate in kilemna lampi a he bua uh hi,

¹⁸Pathian thasia natu zongh a sin ngei bua uh hi,” ci hi.

¹⁹Leitung buppi Pathian thukhenna sungah a thet natu le mihingte kam zon theina theampo a bo thei natu in Thukham sungah thu omte theampo in Thukham khutnuai ah a omte atu ahi hunlam ka he uh hi.

²⁰Banghangziam cile Pathian mai ah Thukham tanna hangin kuama thutang suak zo om ngawl a; Thukham nasepna in mihing khat maw nei ahi hunlam a kiheak natu ahi hi.

Pathian in Eite Ama taw Thutang hong Suasak khopzia

²¹Ahihang tu in Pathian mihingte thutang a suasakzia hong kipualaak zo hi. Thukham le kamsangte lai atte in maan hi ci in tetti pang ahitazong, tuasia in thukham taw kisai ngawl hi.

²²Pathian in mihingte sia Jesus Christ a upna uh tungtawn in thutang suaksak hi. Christ a umte theampo tungah Pathian in hi bangin vawt hi, banghangziam cile kuama a kilamdang tatuan a om bua uh hi.

²³Mihing theampo maw siat zo a Pathian ii ngum tu in hong ompuina pan kikhuala siat uh hi.

²⁴Ahihang amate a suaktasak Jesus Christ tungtawn in, Pathian ii manh piak ngawlin hong piak thuthiamna letsong taw amate thutang kisuaksak hi.



25-26 Ama ii kipumpiak biakpiak natu in hong thina taw amate upna tungtawn in, mihingte mawna kimaisakna a pian natu in, Pathian in ama hong pia hi. Pathian in thutang ahi hunlam hong lak natu in, hi bangin a vawt hi. A bo sa hun sungah ama a thin uai a, mihingte mawnte hong tha thong hi; ahihangin tu in ama sia, thutang ahi hunlam a kilak natu in, mihingte mawna tungtaang ah na hong seam hi. Hi bangin Pathian in ama sia thutang ahi hunlam le Jesus Christ a um peuma thutang a suasakna thu hong lak hi.

27 Tua ahiciang eite kisuantaak natu bang om ziam? Bangma om ngawl hi! Tua hile thutang suana in koisung pan hong piang ziam? Thukham nitna sepna pan ziam? Hi ngawl hi, upna pan bek hi.

28 Banghangziam cile mihing khat sia Pathian mai ah upna tungtawn bek in thutang suak thei bek a, Thukham sawl bang a sepna pan hi ngawl hi ci in ih he hi.

29 Tua ahibuale Pathian sia Jewte ii Pathian hi bek ziam? Gentilete Pathian zongh hi ngawl ziam? Hi leilam hi.

30 Pathian sia khat hi a, Jewte zongh a upna uh tungtawn in, thutang suaksak a, Gentilete zongh a upna tungtawn in, thutang kisuaksak hi.

31 Upna in Thukham phiat hi ci nopna ahi ziam? Hi ngawl het hi; eite in Thukham ih kipsak zaw hi.

Romete 4

Abraham Etteena

1 Tua ahile ih pianna pa ahi Abraham thuakna sa tungtaang ah bang ih son tu ziam?

2 Ama ii ngamtatna tung panin Pathian in thutang suaksak ahile a kisuantaak natu nei tu hi — ahihang Pathian mai ah ama in bangma kisuantaak natu om ngawl hi.

3 Laithiangtho in, “Abraham in Pathian um a, tua a upna hu in Pathian in thutang suaksak hi,” ci hi.



⁴Naseam khat in sep thaman saang hi, tua thaman sia letsong kici thei ngawl hi; a thalaw sa hi ci in ki ngaisun hi.

⁵Ahihang sepna hi ngawl a upna a nei sia in, mimawte maw ngawl hi a ci Pathian a up hu in, a upna sia Pathian in saang a, thutang suaksak hi.

⁶Hi thu in David ii son, sepna kihel ngawl Pathian ii thutang hi ci in a saan, mihingte lungdamna ahi hi.

⁷“Tatkhialnate maisak a, a mawna a kisealsak te bangza in a lungdam ziam!

⁸Topa in a mawna tepteena lai sungah a teptee ngawl tu sia in mihing lungdam ahi hi!”

⁹Hi lungdamna David son sia vunteap atte bek atu ahi ziam? Hi ngawl hi! Vunteap at ngawlte atu zongh ahi hi. Banghangziam cile Laithiangtho sungah a ki at bangin ih son sa hi a, “Abraham in Pathian um a, tua a upna hangin Pathian in ama thutang hi, ci in saang hi.”

¹⁰Hi thu bang hun laitakin piang ziam? Abraham vunteap a at zawkciang ziam? A at maa ziam? A at maa hi a, a at zawk hi ngawl hi.

¹¹Ama sia a khak sang ciangin a vunteap at pheang hi. Vunteap a atna zongh, Abraham in Pathian um ahikom Pathian in ama a vunteap a at maa in thutang hi ci a tepteena lim ahi hi. Tua ahikom Abraham in Pathian um a, thutang hi ci in ama ii a saante theampo, a vunteap at vateal ta buale kuama theampo ii thaa lamsang ah a pa uh ahi hi.

¹²Ama in vunteap atte ii pa zongh hi a, vunteap a at bek dom ngawlin, ih pa Abraham vunteap a at maa a, upna taw a nuntakna sungah ama bangma in a nungta te ii pa zongh ahi hi.

Pathian Kamciam sia Upna tungtawn in Kisaang

¹³Pathian in Abraham le a suan a paalte munah hi leitung sia amate atu hi ci in kamciam pia hi, hi kamciam in Abraham ii thukham a nit hu hi ngawl a, a up hangin thutang hi ci a, Pathian in a teptee hu ahi hi.



¹⁴Banghangziam cile Pathian kamciam in Thukham a tangte atu hi thong le mihingte upna sia a lui thawthong suak tu a, Pathian kamciam zongh manh nei ngawl hi tu hi.

¹⁵Thukham in Pathian thin uukna piangsak hi; Ahihang thukham om ngawl na munah thukham paltanna om ngawl hi.

¹⁶Pathian kamciam in upna bulphu in nei a, tua ahikom Abraham suan le paal Thukham tangte bek hi ngawlin — Abraham up bangin a umte theampo tungah manh nei ngawlin a piak tu in kho takin vawt hi. Banghangziam cile Abraham in eite theampo ii thaa lam sangah ih pa ahi hi.

¹⁷Laithiangtho in, “Minam tam mama ii pa kong suaksak zo hi,” a ci bangma ahi hi. Tua ahikom a thisa a nungtasak kik thei, a om ngei ngawl laite thupiakna taw a piangsak thei, Abraham ii a up Pathian muna ah tua kamciam sia pha hi.

¹⁸Muanmawk lamet natu om ngawl kawm panin Abraham in um a muangmaw ahikom ama sia “minam tam mamate pa” suak hi. Laithiangtho in “Na suan na paal te aksi za in tam tu hi,” ci hi.

¹⁹Tua hun lai in ama kum zakhat dektak pha a, a pumpi sia a thithi ma hi zo a, tua bek dom ngawlin Sarah in ta nei thei ngawl ahitazong a upna a thaneam tuan bua hi.

²⁰Ama in a upna thasua ngawl a, Pathian kamciam zongh a muang la bua hi. A upna in ama thahatna taw kidimsak a, ama in Pathian pokna pia hi.

²¹Ama ii a thinsung tawng pan a upna sia, Pathian in kamciam a piak bangin tungsak tu hi ci in um hi.

²²Tua thu hangin Abraham in upna tungtawn in, “Pathian in thutang hi ci in saang hi.).

²³“Ama sia thutang hi ci in kisaang hi,” ci kammal zongh ama bek atu a kici ahi bua hi.

²⁴Ih Topa Jesus thina pan a tho kiksak ama a um, thutang hi ci in hong kiciamtee ei atu zonghin a ki at kammal ahi hi.

²⁵Jesus sia eite mawna hu in a thi tu in ki aap a Pathian mai ah thutang ih sua natu in nuntakna sungah ama kinungta kiksak hi.

Romete 5

Pathian taw Thutang Kisuak

¹Tu in eite upna tungtawnin Pathian in thutang hong suaksak a, ih Topa Jesus Christ tungtawnin, Pathian taw kilemna ih nei hi.

²Tu laitak a ih dinmun ahi Pathian thuthiamna sung a theng tu in upna tungtawnin ama in tua munah hong then hi. Tua ahikomin eite in Pathian minthanna ih siim natu lametna ih nei hu in ih kisuangtaak hi!

³Ih ngimnate hu zonghin ih angtang hi, banghangziam cile ngimna in thuakzawkna piangsak a,

⁴thuakzawkna in Pathian thukimna piangsak in, ama hong thukimpuina in lametna piangsak hi.

⁵Hi lametna in hong thinkiamsak bua hi, banghangziam cile Pathian hong piakthong letsong ahi Thaa Thiangtho zangh in ih thin sungah ama itna hong buak hi.

⁶Banghangziam cile cimaw a ih om laitakin Pathian ii a teal hun ciangin Christ sia mi ngilote atu in hong thi hi.

⁷Mihing thutang khat atu thina thuak tu sia thu haksa ahi hi. Mihing phakhat atu a thi ngam khat po zongh om tha tu hi.

⁸Ahihang Pathian in eite bangza in hong it ziam cile — mimawte ih hi tek laitakin Christ in eite atu in hong thi hia lawmte hong suaksak hi. Tu in Pathian lawmte hi zo ih hi le Christ nuntakna in bangza in hong ngum seseam tu ziam!

¹¹Ahihang tua teng bek hi ngawl hi; Pathian lawmte hong suaksak Topa Jesus Christ tungtawn a Pathian sepna tungah ih lungdam hi.



Adam le Christ

¹²Mihing khat tungtawn in mawna leitung ah hong theng a, tuaciang ama mawna in thina hong puak hi. Tua taw kizui in mihing suan theampo tungah thina hong kizel hi. Banghangziam cile mihing theampo maw zo uh hi.

¹³Thukham a kipiak maa in leitung ah mawna om zo hi; ahihang thukham om ngawlina ah mawna sazian kikoi ngawl hi.

¹⁴Ahihang Adam hun pan kipan Moses hun dongin thina in mihingte uk a, Adam bang a Pathian thupiakna a ni ngawlte bek hi ngawlin a dangte zongh thi uh hi. Adam sia hong pai pheang tu mihing khat ii lim ahi hi.

¹⁵Ahihang tuate ngeal kibang ngawl hi, banghangziam cile Pathian ii a thong a hong piak letsong in Adam mawna taw kibang ngawl hi. Tua mihing khat ii hu in mihing tam mama thi hi. Ahihang Pathian thuthiamna lian zaw pek a, tuasia bangma in mihing khat ahi Jesus Christ thuthiamna tungtawnin a thong a hong piak letsong sia lian zaw hi.

¹⁶Tuabangin Pathian piak letsong le mihing khat ii mawna kilaklaw ah kilamdanna om hi. Mawna khat hang “maw hi” ci a thukhenna piang a, ahihang mawna tam mama kale zong “maw ngawl hi” cina letsong kilawm ngawlin hong piang hi!

¹⁷Mihing khat mawna tungtawnin thina in hong uk hi. Ahihang Jesus Christ a kici mihing khat ii sepna taw kizui in bangza in a lianzaw thu piang ziam! Pathian ii a kicing thuthiamna le manh nei ngawl a hong piak thutang suana a saangte in Christ tungtawn in a zo nuntakna nga tu hi.

¹⁸Tua ahikom mawna khat in mihing theampo hong puavawk a, thukhenna a piansak bangma in thutang nasepna khat in mihing theampo suaktasak a, nuntakna pia hi.

¹⁹Mihing khat ii thunit ngawl hu in mihing theampo mawnei a kisuasak bangma in, mihing khat thunit hu in mihing theampo Pathian mai ah thutangte kisuaksak hi.



²⁰Mawna ngamtatna a khanto vaial natu in thukham kipia hi, ahihang mawna a khantona munah, Pathian thuthiamna khangto seseam hi.

²¹Tua ahikom mawna in thina taw hong uk bangma in, Pathian thuthiamna in thutang suana taw hong uk a, ih Topa Jesus Christ tungtawnin tawntung nuntakna sungah hong then hi.

Romete 6

Mawna ah Thi, Christ taw Pum khat suana ah Nungta

¹Tua ahile bang ih son tu ziam? Pathian thuthiamna a khanto vaial natu in mawna sungah ih nungta tan lai tu ziam?

²Hi ngawl het hi. Eite in mawna thisan zo ih hi ciang bangbangin mawna sungah nungtata lai tu hi ziam?

³Banghangziam cile hi thu na heak uh ahi hi. Eite Christ taw kikopkhawm tu in ih ki baptize ciang ama thina sung zongh ah a kikopkhawm tu in a ki baptize ih hi hi.

⁴Tua ahiciang ih ki baptize na taw eite ama taw kivuikhawm a, ama thina ih siim hi. Banghangziam cile Pa ii minthan thahatna taw Christ sia thina panin a kithawsak kik ciang eite zongh nuntakna thak sungah a nungtate ih sua natu ahi hi.

⁵Banghangziam cile ama thi bangma in ih thi ciangin ama taw pumkhat suak ih hile, ama a kinuntaksak kik bangma in, eite hong kinuntaksak kikna taw ama taw pumkhat ih suak tu hi.

⁶Tuaciangin hi thu ih he hi, ih nuntakna a lui sia thinglamte tungah Christ taw ih thisak zo a, mawna silate ih hi nawn ngawl natu, mawna vaangletna a kilalcipsak natu in ih nuntakna lui sia Christ taw ama thinglamte tungah kithisak zo ci ih he hi.

⁷Banghangziam cile mihing khat a thi ciangin mawna tha hatna panin a kisuaktasak ahi hi.

⁸Christ taw thi khawm zo ih hi nungsang, ama taw ih nungta khawm tu hi, ci zonghin ih um hi.



⁹Banghangziam cile Christ sia thina panin kitho kiksak zo a, bangma hunin a thi kik ngei nawn buatu hi — thina in ama uk ngei nawn ngawl tu hi.

¹⁰Tua ahi ciang ama thi ahi hu in, mawna in ama tungah vaang nei nawn ngawl hi; tu in ama nuntakna in Pathian taw kipawlkhawm in nungta ahi hi.

¹¹Tuasia bangma in no zongh mawna taw kipee thute ah a thi sa in, na ki ngaisun vun a, ahizong, Christ Jesus tungtawn in Pathian taw kipawlkhopna sungah a nungta in na kingaisun vun.

¹²Na ci le sa deina na zui ngawl natu in, a thithei na pumpi sia mawna in hong uk nawn ngawl tu hi.

¹³Tua bek dom ngawlin, a pha ngawl tupnate sungah a kizangh tu in na pumpi nate khat pawpo aap thei ngawl tu nu hi. Tua hi ngawl zaw in thina pan a kinungtasak kik mihingte bangin na pumpi uh thumaan thutang taw a kizak natu in, Pathian tungah kipia vun.

¹⁴Mawna in hong uk nawn ngawl tu hi; banghangziam cile note in thukham nuai ah nungta nawn ngawl a, Pathian thuthiamna nuai ah a nungta na hi zo uh hi.

Thutang ii Silate

¹⁵Tua ahile bang ci tu hi ziam? Thukham khut nuai ah om nawn ngawl a Pathian thuthiamna khut nuai ah om zo ih hile mawna ih vawt lai tu ziam? Hi ngawl hi!

¹⁶Mihing khat pawpo ii thu ni tu in noma le noma na ki aap uh ciangin a sila na suak uh sia maan takin na he uh hi — mawna sila na hi uh le thina taw kizom a, tua ahi bua a, thu nitna sila na hi uh le Pathian mai ah thutang suana taw kizom hi.

¹⁷Bang po ahizong Pathian tungah lungdamko tawng! Banghangziam cile khatvei lai in note in mawna silate na hi uh a, na saan sa uh hong kihil thumaan thutakte na thin theampo uh taw na ni zo uh hi.

¹⁸Note mawna panin hong kisuaktasak zo a, thutang ii silate na hi zo uh hi.



¹⁹(A zawngkhal mihing na hi uh hu in na tel thei tu in, ni sim ih zak kammal ol te kong zangh hi.) Khatvei lai in siatna le thiango ngawl na sungah a sia tu le a nin tu in noma le noma silate bangin na kipum aap uh bangma in, tu in thutang ii silate bangin tupna thiango sungah na kipia tavun.

²⁰Mawna silate na hi uh laitakin thumaan thutang taw na kipeal uh hi.

²¹Maizum huai nasak nate na vawt uh ciangin, bang meetna na nga uh ziam? Tuata taw a kizom thu in thina ahi hi!

²²Ahihang tu in note sia mawna panin hong kisuaktasak zo a, Pathian silate na hi uh hi. Na meetna uh sia nuntakna a cialcingin ama tungah na kipum aap na uh hi a, tua taw kizom thu in tawntung nuntakna ahi hi.

²³Banghangziam cile mawna thaman in thina hi a; ahihang tawntung nuntakna sia, ih Topa Jesus Christ taw ih kikopna hangin a thong a hong piak letsong ahi hi.

Romete 7

Nupa Kiteenna taw Sonteena

¹Suapuite awng, thukham huvau tel siat na hi uh ciang, son tu a kong kipat thu zongh tel mama tu nu hi. Mihing khat a nuntak laiteng bekma in thukham in uk hi.

²Sonteena in numei pasal nei khat sia, a pasal nuntak lai teng bekma in thukham in khii hi; ahihang a pasal a thi le a zi sia tua pasal taw a kikhii khawm tua thukham panin suakta hi.

³Tua ahikom a pasal nungta nginge lai in, numei in pa dang khat taw a teang le a pasal palngul hi kici tu hi; ahihang a pasal a thi le, thukham panin a suakta numei hi a, ngualdang khat a tenpui hangin ama in palngul mawna vawt ahi bua hi.

⁴Ka suapuite awng, note zongh tua taw kibang nu hi. Thukham tungtaang ah note zongh thi zo nu hi, banghangziam cile note in Christ pumpi khen khat veu na hi tek uh hi; tuaciang tu in Pathian tungah a taktai sepnate ih nei thei natu in thina pan a, a kitho kiksak Pa ii neisate na hi uh hi.



⁵Banghangziam cile mihing pianzia bangin ih nuntak laitakin Thukham ii holna taw maw nopnate in ih pumpi sungah na hong seam a, tuaciang thi theina nasepna sungah eite ih kiva mama hi.

⁶Bang po ahizong, tu in eite Thukham taw ih kipeal zo hi, banghangziam cile khatvei lai a hong luangtasak tua Thukham ih thisan zo hi. A ki at thukham ngeina lui bangin na ih seam nawn bua a, Thaa ii ngeina thak bangin ih seam hi.

Thukham le Mawna

⁷Tua ahile bang ih ci tu ziam? Thukham mama pha ngawl hi ih ci tu ziam? Hi ngawl het hi! Thukham in mawna a ci sia hong hesak hi zaw hi. Thukham in, “Nguan khat ii neisa na dungawk heak vun,” ci buale dungawk ci sia bang ziam ci in ka he buatu hi.

⁸Thukham ii sawl hu in mawna in ka sungah dungawk nopna tuatuam hong piangsak natu hunpha nga hi. Thukham om ngawl na munah mawna sia a thi ahi hi.

⁹Keima ma zongh khatvei lai in thukham ngawl taw ka nungta ngei hi; ahihang kikhaamna a om hunlam ka heak tak ciangin, maw nopna hong thahat a,

¹⁰tuaciang kei ka thi hi. Tuasia ciangin nuntakna a piangsak tu thukham sia kei atu thina ahi hi.

¹¹Mawna in hunpha nga in thukham tungtawnin na hong seam a, kei hong theam in hong thatlum hi.

¹²Tua ahikom Thukham in thiangtho a, thupiakna zongh thiangtho in pha a, tang hi.

¹³Tua ahile hi bang a pha thu khat in, kei thina hong piangsak hi ci tu hi ziam? Hi ngawl hi! Hong thisak sia in mawna hi, mawna in a pianzia maan tak ahi sia a kilangh natu in a pha khat hong zangh a, thina kei tungah hong piangsak ahi hi. Tua ahikom thu piakna a om hu in mawna ii a lau huai a phat ngawl na kician seseam hi.



Thinsung Buaina

- ¹⁴Thukham sia thaa taw kisai hi ci in ih he hi; ahihang keima in a thi thei mihing hi a, mawna sungah sila bangin a kizuak sa ka hi hi.
- ¹⁵Ka sep ka vawt sia bangziam ci in ka tel bua hi; banghangziam cile ka vawt nopte ka vawt bua a, ka vawt nop ngawl teng ka vawt hi.
- ¹⁶Ka vawt nop ngawlte ka vawt ciangin, Thukham sia maan hi ci in ka thukimpuina hong kilangh hi.
- ¹⁷Tua ahikom hite a vawt sia in kei tatak ka hi bua hi; ka sung a teang mawna sia ahi hi.
- ¹⁸Mihing ka hina sungah — a pha bangma om ngawl hi ci in ka he hi. Banghangziam cile a pha vawt nopna ka sungah a om bel hangin ka vawt thei bua hi.
- ¹⁹A pha ka vawt nopte ka vawt bua a, ka vawt nop ngawl a siate ka vawt zaw hi.
- ²⁰Ka vawt nop ngawlte ka vawt le tuabangin a vawt sia kei ka hi bua hi. Ka sung a teang mawna in vawt ahi hi.
- ²¹Tua ahikom ngeina khat om hi ci in ka phawk hi. A pha khat ka vawt nop ciangin, a sia vawt tu bek teal theina ka nei hi.
- ²²Ka sungah a nungta sia in Pathian thukham diksa hi.
- ²³Ahihang ka pumpi sungah ngeina dangkhat in na hong seam hi — ka thinsung ii dik asak ngeina sia a el ngeina ahi hi. Ka pumpi sung a na hong seam mawna taw kisai thukham ii thongtaakpa hong suaksak hi.
- ²⁴Bangza in a thin ngim mihing khi ziam! Thina sung hong zotpui hi pumpi panin akua in hong suatak tu ziam?
- ²⁵Ih Topa Jesus tungtawn in hong suaktasak Pathian tungah lungdamko tawng! Tua ahikom ka dinmun sia hi bang hi: keima hantang in ci leang Pathian thukham sia ka thinsung bek in zui zo a, ka mihing pianzia ahile mawna ngeinate zui hi.



Romete 8

Thaa sungah Nuntakna

- ¹Tu in Christ taw pum khat in a nungtate atu in kipuavawkna a om bua hi.
- ²Banghangziam cile Jesus Christ taw kop a nuntakna sungah hong then thaa ngeina in mawna le thina ngeinate panin hong suaktasak hi.
- ³Mihing thaneamna hu a Thukham ii vawt zawk ngawlte Pathian in vawt zo hi. Ama in mihing pianzia sungah mawna a bo cimitsak natu in mihingte mawna pianzia teng ma hong keng a, ama Tapa sia mawna kitat natu in hong pia hi.
- ⁴Pathian ii hi bang a sepna in ei mihing pianzia bang a nungta ngawl a, Thaa ngeina bangin a nungtate in Thukham ii thutang sua natu a deina a khuangkhim natu in seam ahi hi.
- ⁵Mihing pianzia bangin a nungtate thinsung sia ci le sa deina in uk hi. Thaa ii sawl bangin a nungtate thinsung sia Thaa ii deina in uk hi.
- ⁶Mihing pianzia in na uksak uh le thina piang a; Thaa in na uksak uh le, nuntakna le thinnopna piang hi.
- ⁷Tua ahiciang mihing khat sia mihing pianzia in a uk le Pathian ngal suak hi; banghangziam cile ama in Pathian thukham ni ngawl hi, a tatak ci ciang ni thei ngawl hi.
- ⁸Mihing pianzia a zuite in Pathian a lungdamsak thei bua hi.
- ⁹Ahihang note in mihing pianzia ii hong sawl bangin na nungta bua uh hi; Pathian Thaa note sungah hong nungta takpi ma ahi nale — Thaa ii sawl bangin na nungta uh hi. A kuama po Christ ii Thaa a nei ngawl sia in, Christ ii neisa ahi bua hi.
- ¹⁰Ahihang Christ note sungah hong teang le Thaa sia no atu in nuntakna ahi hi, banghangziam cile na pumpi uh mawna hangin thi tu ahitazong note Pathian taw hong kilemzawngsak hi.



¹¹Jesus thina pan a thosak kik Pathian Thaa note sungah hong teang le thina pan Christ a tho kiksak pa in, a Thaa note sungah a om hu in a thi thei na pumpi uh nuntakna hong pia tu hi.

¹²Tua ahikom suapuite awng, mihing pianzia ii deina bangin ih nuntak ngawl natu in zui tu vaipuak ih nei hi.

¹³Banghangziam cile mihing pianzia bangin na nungta uh le na thi takpi tu uh hi; ahihang mawna ngamtatnate Thaa taw na thatlum uh le na nungta tu uh hi.

¹⁴Pathian Thaa lampuina a zui mihing peuma Pathian tate ahi uh hi.

¹⁵Banghangziam cile Pathian hong piak Thaa in sila hong suaksak ngawl a, hong kiitasak ngawl hi; tua hizaw ngawlin, Thaa in Pathian tate hong suaksak a, Thaa vaangletna taw eite in Pathian tungah “Pa awng, ka Pa awng!” ih ci thei hi.

¹⁶Pathian Thaa in eima thaa taw kikopin, Pathian tate ih hina tetti in hong pang khawm hi.

¹⁷A tate ih hi zawk nungsang a mite atu a khealsia thuphate ih lua tu a, Christ atu a Pathian ii a koi nate zongh ih lua tu hi; banghangziam cile Christ ii thuakna ih thuakpui le a minthanna zongh ih lua tu hi.

Hong tung Pheang tu Minthanna

¹⁸Tu hun a ih thuakte in hong kilangh pheang tu, a minthanna taw kiteengat thei ngawl hi.

¹⁹A kibitphua sa theampo in Pathian tate sia akua bang teng hi tu ziam ci in hong kilaak tu kaal ngakla in om uh hi.

²⁰Banghangziam cile bitphua sate sia amate ii tupna le sawmnate a taan natu in, amate thu hi ngawlin Pathian deina taw puavawkna a thuak uh hi. Hi kale lametna omlai hi,

²¹bitphua sate in ni khat ni ciangin a muatcip theina sungah sila a tanna sung panin kisuaktasak tu a Pathian tate in suatak minthanna nga khawm tu uh hi.



²²Banghangziam cile nausuak tu tun a nat bangin tu hun dong ma bitphuasa theampo in nasakna taw tau in om hi ci ih he hi.

²³Ahihangin bitphua sate bek hi ngawlin Pathian ii a leap a letsong hong piak ahi ei Thaa a neite zongh in, Pathian tate hong suaksak a, ih nuntakna buppi hong suataksak tu ngakin ih sung sangah ih tau tek hi.

²⁴Banghangziam cile eite sia lametna hangin hong hun a; ahizong ih lametna sia ih mukhol thei le tuasia in lametna kici thei ngawl tu hi. A mu nate a muangmaw lai akua om ngei nu ziam?

²⁵Ahihang ih mu ngawl lai khat muangmaw ih hile, thinsauna taw ih ngak hi.

²⁶Ta bangma in eite in bangza in tha zawngkhal hi ka leang, eite hong hu tu in Thaa hong pai hi. Banghangziam cile eite in thu ih ngetzia tu ih he bua hi; kammal taw a kilo thei ngawlte tauna taw Pathian tungah Thaa in hong mangkaasak hi.

²⁷Tuaciangin mihingte thinsung a mu thei Pathian in Thaa khua ngaisutnate he hi; banghangziam cile Thaa in Pathian tungah a mite atu in ama dei babangin mangkaasak hi.

²⁸Pathian ii tupna taw a sam sa ahi ama a itte atu in na theampo Pathian in a phabel in piangsak hi.

²⁹Pathian teal sate a Tapa taw a kiban natu in, doituam a, tua hu in a Tapa in unau tam mama sung panin ta upabel suaksak hi.

³⁰Tua ahikom Pathian in a tuamin a koi sate sam a, a samte thutang suaksak hi, tua thutang a suasakte ama minthanna hawm hi.

Jesus Christ sungah Pathian hong Itna

³¹Hi teng zawkciang in ih son tu bang omlai tu ziam? Pathian ei sangah hong pang le akua in eite hong langpan thei tu ziam?

³²Pathian in hong langpan ngawl het tu hi. Ama in a Tapa takpi khoaikhe ngawlin, ei atu in hong pia hi! A Tapa ngangawn hong pia ahile — na theampo a thongin hong pia ngawl tu ziam?



³³Pathian teal sa mihingte tungah akua in, mawna zong thei tu ziam? Pathian mama in amate mawnei ngawl a suasakte ahi hi!

³⁴Tua ahile amate akua in maw pusak thei tu ziam? Thina thuak a, a kinungtasak kik pa, Pathian ziat sangah to a, Pathian tungah ei atu in hong ngetsakpa Christ Jesus in hong mawsak ngawl tu hi.

³⁵Tua ahile Christ ii eite hong itna panin, akua in hong khen thei tu ziam? Ngimna, haksatna, vawtsiatna, ngilkialna, zawwna, lau huaina, thinate khat pawpo in, hong khen thei tu ziam?

³⁶Laithiangtho in hi bangin a ci bangma “Nang hu in kote thina ii lauhuaina sungah a ni bup in ka om uh hi; kote sia a kingolum tu tuute bangin hong kivawt hi,”

³⁷Hong itpa tungtawnin eite in hi thute theampo sungah zawna kicing ih nga hi!

³⁸Banghangziam cile ama hong itna panin, bangma in hong khen thei ngawl tu hi ci in maan takin ka mu hi: thina ahizong nuntakna ahizong, vantung lalangte ahizong, vantung ukna le thahatna nei dangte ahizong, tu hun hi kale mailam hi kale,

³⁹leitung a saangbelna mun ahizong, lei nuai a thuk belna mun ahizong, bitphua sa a minpiang bangma in ih Topa Jesus Christ sungah ih neisa ahi Pathian hong itna taw hong khen zo a om buatu hi.

Romete 9

Pathian le Ama Mite

¹Thumaan ka son hi; Christ neisa ka hi a, ka leilot bua hi. Thaa Thiangtho ii a uk ka thinsung zongh in leilot ngawl ka hina hong tel thiangsak hi.

²Ka chi ka sa ahi ka mite atu in bangza in khuangai khi ziam! A kizom tan in bangza in lainat law khi ziam,

³a phattuumna om tu hi thong le amate atu in Pathian haamsiatna thuak leng a, Christ taw zong kikhen law leng zong ka uk hi.



⁴Amate in Pathian ii mihingte hi uh a; ama in amate sia a tapate suaksak in, a minthanna kilanghsak hi; amate taw kamciamna vawtin Thukham pia hi; amate in a maan biakpiakna nei uh hi; amate in Pathian kamciam saang uh hi.

⁵Amate in khanglui Hebrew minthangte ii suan le paal hi uh a, Christ ii mihing a hina taw amate minampui ahi hi. Na theampo a uk Pathian sia a tawntungin kipok taken! Amen.

⁶Pathian kamciam tangtung ngawl hi ci ngawl khi hi; banghangziam cile Israel mi theampo Pathian teal sa hi siat ngawl hi.

⁷Abraham ii suan theampo zongh Pathian tate hi siat ngawl hi. Pathian in Abraham tungah “Nang kong kamciamna panin na suan le na paalte Isaac tungtawn in na nei tu hi,” ci hi.

⁸Hisia a khiakna in mihing pian ngei bangin a piang thawthongte sia Pathian tate hi ngawl a, Pathian kamciam panin a piangte bek a suan le a paal tatakin kingaisun hi.

⁹Banghangziam cile Pathian kamciam sia, hi kammalte bangin kipia hi. “A hun ciangin kong pai kik tu a, Sarah in tapa khat hing tu hi.”

¹⁰Hisia bek hi ngawl hi, banghangziam cile Rebecca in ih pu Isaac ahi a pasal taw tapa nii nei hi.

¹¹⁻¹²Ahihang tapa khat teal tuam tu sia Pathian ii deina vingveng ahi natu thu huvau in, Pathian in a nu munah, “A u zaw in a nau zaw ii na sepsak tu hi,” ci hi. Ama in hi thu a pau laitakin amate ngealna piang ngawl lai a, a sia a pha bangma vawt a nei balai hi. Tua ahikom Pathian tealna in ama sapna tung pan hi a, amate sepna tung pan hi ngawl hi.

¹³Laithiangtho in, “Jacob ka it a, Esau ka ensan hi,” ci in a ki at bang ahi hi.

¹⁴Tua ahile bang ih ci tu ziam? Pathian in a kilawm tu bang a thukhen ngawl hi ih ci tu ziam? Kici thei ngawl hi.



¹⁵Banghangziam cile Moses tungah, “Ka hesuak nopte ka hesuak tu a; ka mulkimh nopte ka mulkimh tu hi,” ci hi.

¹⁶Tua ahikom mihing deina le sepna thu hi ngawlin, Pathian hesuakna tungah thu om zaw hi.

¹⁷Banghangziam cile Laithiangtho in Egypt kumpipa tungah a cina pan, “Hi tupna hang le ka vaangletna lak in, leitung theampo ah ka min a kiheak natu in, kumpi kong suaksak a nang kong zangh hi,” ci hi.

¹⁸Tua ahikom Pathian in a hesuak nopte tungah hesuak a, thin sakna a piak nopte tung ah thin sakna pia hi.

Pathian Thin uukna le Hesukna

¹⁹Note sung pan khat po in hong ci tu nu hi. “Hi bang ahile Pathian in mihing khat po tungah mawsakna pia thei tu ziam? Pathian deina akua in nial thei tu ziam?”

²⁰Ahihang lawmpa awng, Pathian kam a zokik tu in nang akua na hi ziam? Tungbeal khat in a vawtpa munah, “Banghangin kei hi bangin hong vawt ni ziam?” ci in a dongh thei bua hi.

²¹A tatak ci leang bealte a vawtpa in tungmante a dei babangin a zak thei natu thunei a, tungman tangh khat panin beal nii vawtin, khat sia hun thupi sung a zak tu, a khat sia hun thawthong sung a zak tu in vawt theina thunei hi.

²²Pathian nasepna zongh tuasia bangma ahi hi. Ama in a thin uukna lak nuam a, a vaangletna kihesak nuam hi. Ama a thin a uuksak lalcipna sung a theng tu mihingte thinsauna tatak taw thuak hi.

²³A kicing ama vaangletna zongh hong pualaak nuam a, a minthanna a nga tu in hong vawt sa eite a hesuakna a saang tu mihingte tungah tua a vaangletna hong buak hi.

²⁴Banghangziam cile eite sia Jewte sung pan bek hi ngawlin, Gentilete sung pan zong hong sap a minamte ih hi hi.



²⁵Hi thu in Hosea laibu sungah a son teng ahi hi, “Ka mihing ahi ngawlte ‘keima mihing’ ka ci tu hi. Ka it ngawl minamte sia ‘ka itte’ awng ka ci tu hi.

²⁶“Tuaciangin, note ka mihing hi ngawl nu hi,” a kicina mun mama ah amate a nungta Pathian tate kici tu hi.”

²⁷Tuaciang Israel mite huvau Isaiah in hi bangin ci hi: “Israel mite tuipei hui a sen bangin a tam hial hangin, amate sung pan in tawm bek kingum tu hi;

²⁸banghangziam cile Topa in leitung bup ah hai ngawlin a vai theampo thiangsak tu hi.”

²⁹Isaiah in a masa in hi bangin ci hi. “Vaanglianbelpa Topa in suan le paal tawm hong kheetsak ngawl hi kapo le, eite Sodom bang ih hi tu a, Gomorrah bang ih suak tu hi.”

Israel te le Lungdamna Thupha

³⁰Pathian mai ah thutang sua natu a hanciam ngei ngawl Gentilete sia a upna tungtawnin thutang suak uh hi, ih ci hi;

³¹Tua laitakin Pathian mihingte in Pathian mai ah thutang suana tu in thukham khat zong uh a, a mu bua uh hi.

³²Banghangin mu ngawl ziam? Banghangziam cile amate in upna bulphu ngawl a, sepna bulphu uh hi. Amate in laithiangtho sungah a kison “Lutuna Suang” tungah lutu uh hi:

³³“En vun, Zion ah suang khat ka koi a, tua in mihingte lutusak hi, amate a puksak tu suangpi ahi hi. Ahihang ama a umte a thin a kiam buatu hi.”

Romete 10

¹Suapuite awng, ka minamte ngupna a nga natu in ka thinsung theampo taw deisak in Pathian tungah thu ka ngetsak hi!

²Amate Pathian thu sung a kipia mama ahi hunlam tetti ka pang hi; ahihang amate kipiakna in heakna tatak bulphu ngawl hi.



³Pathian mai ah mihingte thutang a suasakzia he ngawl a, lampi tuam dang khat sial tu hanciam uh hi. Tua ahikom amate in Pathian ii mihingte thutang a suasakna sungah a ki aap bua uh hi.

⁴Banghangziam cile a umte theampo Pathian mai ah thutang a sua natu in Christ in thukham bosak zo hi.

Mihing Theampo atu Ngupna

⁵Pathian tung a thutang na sua natu in, Thukham nitna taw kisai in, Moses lai at in hi bang ahi hi: “Thukham sawl bangin a ngamta theampo in tua taw nungta tu hi.”

⁶Ahihang upna hang a Pathian mai ah thutang suana taw kisai in Laithiangtho in hi bangin ci hi. “Noma le noma vantung ah akua kaato tu ziam?” ci in kidongh heak vun. (Tuasia Christ khiaksukna, a ci nopna hi.)

⁷“Akua leinuai ah tuaksuk tu ziam?” ci in kidongh heak vun. (Tuasia in Christ thina pan a thawsak kikna, a ci nopna hi.)

⁸Hi bangin ci zaw hi: “Pathian hong piak kammal sia na kung nai ah om a, na muk tung le na thin sungah om hi.” — Tua in upna thu ka hil uh sia ahi hi.

⁹“Jesus in Topa hi ci in na kam taw pualaak a, na thinsung panin, Pathian in ama sia thina pan thosak kik hi ci in na um le ngupna na nga tu hi.

¹⁰Banghangziam cile ih thinsung pan ih up ciangin thutang ih suak a, ih kam taw ih pualaak ciangin hong kingum hi.

¹¹Laithiangtho in, “A kuama theampo ama a umte in a thin a kiam buatu hi,” ci hi.

¹²Hi thu in a kuama po huam siat hi. Banghangziam cile Jewte le Gentilete kilaklaw ah lamdanna a om bua hi. Pathian in mihing theampo ii Topa hi a, ama mun a ngen theampo atu in a kicing takin thupha pia hi.

¹³Laithiangtho ci bangma in Topa tungah huna a ngen theampo kingum tu hi.



¹⁴Ahihang ama a um bua uh le amate in bangbangin huna ngen thei tu ziam? A thupha puak a za bua uh le, amate in bangbangin um thei tu ziam? A thupha a kithangsak buale amate in bangbangin za thei tu ziam?

¹⁵Thuhil tute a kipaisak buale a thupha bangbangin kithangsak thei tu ziam? Laithiangtho ci bangma in, “Lungdamna thupha puak a hong paite peang sia bangza in etlawm ziam?”

¹⁶Ahihangin amate theampo in Lungdamna Thupha saang thei ngawl uh hi. Isaiah mama in, “Topa awng, ko thupuakte akua in hong um ziam?” ci hi.

¹⁷Tua ahikom upna in a thu zaakna pan piang a, a thu zaakna in, Christ ii thuhilna pan piang ahi hi.

¹⁸Tua ahile amate in a thu za ngawl hi tu ziam?, ci in kong dongh hi. Za hi — Laithiangtho in hi bangin ci hi: “Leitung theampo ah amate aw theng hi; Amate kammal leimong dong theng hi.”

¹⁹Tua ahile: Israel mite in he ngawl ziam? ci in kong dongh kik hi. Moses ama mama in hong zo phit hi: “Minam in a kisim ngei ngawl mihingte in, eenna thin hong neisak tu hi. A mawmaw minam khat zanghin na thin uh kong uuksak tu hi.”

²⁰Isaiah in hangsan seseam in hi bangin ci hi. “Hong zong ngawlte in kei hong mu hi; Hong kan ngawlte tungah ka kilak hi.”

²¹Ahihang Israel taw kisai in ama in, “Thu ni ngawlte le hong langpante tungah ni tangtum in muakin ka khut ka thaak hi,” ci hi.

Romete 11

Israel te tungah Pathian Hesuakna

¹Tua ahile Pathian in ama minamte nial hi ci tu hi ziam? Nial ngawl hi! Keima mama zongh Israel te ka hi a, Abraham suan, Benjamin nam sung a kihel khat ka hi hi.

²A kipat pan a teal sa ahi a minamte Pathian in nial ngawl hi, Pathian tungah Israel te sia Elijah in mawsak a, tua Laithiangtho kammalte na heak uh ahi hi:



³“Topa awng, amate in na kamsangte thatlum a na biaknataute susia hi; keima bekma taanglai khi hi. Tuaciang keima ngangawn hong thalup sawm lai hi,” ci hi.

⁴Pathian in bangbangin zokik ziam? “Keima atu in Baal pathian a bia ngawl mihing tulsali koi lai khi hi,” ci hi.

⁵Tu laitakin zongh tuabangma ahi hi. Thuthiamna taw Pathian teal sa mihing tawm om lai hi.

⁶A tealna in ama thuthiam hu hi a, amate sepna hang hi ngawl hi. Banghangziam cile Pathian tealna sia mihing sepna tung pan hi thong le thuthiamna ih ci sia in thuthiamna maan hi ngawl tu hi.

⁷Tua ahile bang ih ci tu ziam? Israel mite in a zon uh sia mu ngawl hi. Pathian teal tuam mi pawlkhat in mu bek hi. A dangte ahile Pathian samna nangon thaak hi.

⁸“Pathian in a thinsung uh le, a khua ngaisutna bulthusak hi; tuni dong vacin ma in, amate in a mit uh taw mu thei ngawlin a bil uh taw a za thei bua uh hi,” Laithiangtho in ci hi.

⁹Tuaciang David in, “Amate in a poaipi khaamna sungah thaang kisia taken a, kiman taken; amate puk hen a, daan kipia taken!”

¹⁰Khua a mu thei ngawl natu in a mit uh tawcip taken a, ngimna nencipna taw a tawntungin bawngcip taken,” ci hi.

¹¹Tua ahile Jewte a lutu uh ciangin a lalcip tu in a liik ziam? ci in kong dongh hi. Hi ngawl hi! Amate maw ahikom ngupna sia Gentilete tungah theng a Jewte ii een tu in kivawt ahi hi.

¹²Jewte ii mawna hu in leitung bup in thupha nasia takin saang hi. Tuaciang amate ii thaa zawngkhalna hu in Gentilete thupha nasia takin kipia hi. Tua ahile Jewte sia a pawlcing in a kihuam siat ciangin thupha saanna bangza in lianzaw seseam tu ziam!

Gentilete Kingupna



13Tu in no Gentilete tungah hong son ka hi hi: Gentilete atu a sawltakpa khat ka hi laiteng in, keima nasepna sungah ka kiphasak tu hi.

14Ka minampuite in eenna thin neisakin, pawlkhat beak amate sung pan ka suatak zo bua him maw ka ci hi.

15Banghangziam cile amate tuabangin a kinial ciangin leitung mihing dangte Pathian ngal dinmun panin, Pathian lawmte cina dinmun ah theng uh hi. Amate a kisaan ciangin bangbang hi tu ziam? A thite atu in nuntakna suak tu hi.

16Anluum a kileap masa sia Pathian atu in a kipia le a anluum buppi zongh ama aa ahi hi. Thingzungte Pathian atu in a kipia le a baakte zongh ama aa ahi hi.

17Inn olive thingbaak pawlkhat kithiaktan a ngam olive thingbaak sia inn olive thingkung tungah kipee hi. No Gentilete sia tua ngam olive thingbaakte taw na kibang uh hi, tu in Jewte ii a kho thaa nuntakna na nga uh hi.

18Tua ahikom thingbaak bangin a kithiaktante sia na zawngsak ba het tu uh hi. Banghangin note kiphasak thei tu nu ziam? Note in a baak khat na hi bek uh hi. Note in a zung na vaak na taa bua uh hi — a zung in note hong vaak hi.

19“Hi hi, ahihang kote om thei natu in a baakte kithiaktan hi ngawl ziam,” ci tu nu hi.

20Hi hi, amate a kithiaktan sia banghangziam cile amate in a up ngawl uh hang ahi hi. Note tu a na dinmun uh ah na om theina in, na up uh hang ahi hi. Ahihang kiphasak heak vun; tua hi ngawlin kiitakna thin nei tavun.

21A pianpui a baak ahi Jewte Pathian in dual tuan ngawl hi; no hong dual tu in na um uh ziam?

22Hisia san ah Pathian in bangza in cingh a, bangza nasia takin thukhen thei ziam ci in ih mu thei hi. Ama in a puk sate tungah nasia takin thukhen hi — ahihang ama ii cikna le thepna sungah na om uh le ama cingh hi. Tuabang na hi bua uh le, no zongh hong kithiaktan tu hi.



²³Tuaciang Jewte in a up thei ngawlna uh teng nusia hile, amate a om natu san ah kikoi kik tu hi; banghangziam cile Pathian in amate koi kik thei hi.

²⁴No Gentilete ahi ngam olive thingbaak sia kithiaktan a, ngeina om ngawlin, inn olive thingkung tungah hong kipee hi. Jewte sia inn olive thingkungte taw kibang hi, tua ahikom Pathian atu in, hi a kithiaktan a baakte amate kung tek tungah a pee kik tu ol zaw lai tu hi.

A vekpi tungah Pathian Hesuakna

²⁵Suapuite awng, thumaan thutak ahi thuku khat om a na heak tu uh ka dei hi. Tua in noma le noma ciim na kisakna uh hong khaam tu hi. Hi thu ahi hi. Israel mite thinpuina sia a tawntungin a om tu hi ngawl hi. Ahihang Pathian kungah Gentile mite a theng tu in a kisee za a cin dong bek hi tu hi.

²⁶Tuaciang hi thu in Israel mite theampo a kihut tu zia hi tu hi. Laithiangtho in: “Hunpa Zion panin hong pai tu a, Jacob suante tung panin ngitlona theampo heam tu hi.

²⁷Amate mawna ka maisak ciangin, amate taw hi thuciamna ka vawt tu hi,” ci hi.

²⁸Jewte in Lungdamna Thupha a nial uh hu in no Gentilete phattuam natu in Pathian ngalte suak uh hi. Ahihang Pathian tealna hangin a pute a pate hu in amate in, Pathian ii lawmte ahi uh hi.

²⁹Banghangziam cile tealin thupha a piakte tungtaang ah Pathian in a thin a kheal bua hi.

³⁰No Gentilete na hi uh le a bo sa hun sungah Pathian thu na ni bua uh hi; ahihang tu in Jewte thu nit ngawl hu in Pathian hesuakna na saang uh hi.

³¹Tuasia bangma in, note saan sa hesuakna hu in amate zongh Pathian hesuakna a saan thei natu, tu in Jewte in Pathian thu a ni bua uh hi.

³²Banghangziam cile amate theampo tungah a hesuakna a lak natu in Pathian in mihing theampo thunit nop ngawlna ii kol a bul luangtaate suaksak siat hi.

Pathian Pokna



³³Pathian hauna bangza in lian ziam! a ciimna le a heakna bangza in thuk ziam! Ama ii thukhensat nate akua in sontel thei tu ziam? Ama zia akua in he ziam?

³⁴Laithiangtho in: “Topa khua ngaisutna akua in he ziam? Akua in ama ngaisutna pia thei ziam?”

³⁵Hong lo kik tu in akua in ama tungah bang pia ngei ziam?”

³⁶Banghangziam cile na theampo ama bitphua sa hi a, na theampo ama tungtawnin piang a, ama atu ahi hi. Pathian tungah minthanna a tawntungin om taken! Amen.

Romete 12

Pathian Nasepna sungah Nuntakna

¹Tua ahikom suapuite awng, Pathian ii a lian mama hong hesuakna hu in hi bangin note tungah kong ngen hi; noma le noma Pathian tungah a hingtang biakpiakna in kinei tavun a, ama ii dik asak naseam tu in na ki aap tavun. Na piak tu uh biakna maan sia hisia ahi hi.

²Hi leitung pianzia zil in na om heak vun a, na thin sunguh kikhealthiangna taw Pathian in na sungsang uh panin na pua thak sitsetsak vun. Tua hile a pha, dik asak kicing asak Pathian deinate na he tu uh hi.

³Tuaciang Pathian ii thuthiamna letsong hong piak hu in, note theampo tungah hi bangin kong ci hi: Noma le noma a kilawm za sangin a sangzaw in na kingaisun heak vun. Tua hi ngawl zaw in, na khua ngaisutna sungah na hina bangin kingaisun tavun, tuaciangin mihing sim in Pathian piak upna za taw khat tek kisitna nei taken.

⁴Ih pumpi sungah na tam mama om hi, tuaciang hi nate in sepna tuatuam tek nei uh hi.

⁵Tuasia bangma in eite mihing tam ih hi hangin Christ sungah kipawlin pumkhat ih hi hi. Khat le khat pumpi sung nate bangin ih kizom hi.



⁶Tua ahikom ih saan letsong tuatuamte Pathian ii hong piak thuthiamna taw kizui in ih zangh tu hi. Ih letsong sia Pathian thupuakte son natu ahile upna ih neiza ciaciang taw ih son tu hi.

⁷Sepsak natu ahile zong ih sepsak tu hi. Hil natu ahile zong ih hil tu hi.

⁸Ngual hanthot natu ahile tuabangma in ih seam tu hi. A neisa ngual a hawmte in ngo takin hawm tu hi. Thuneina neite in nasep hanciam taken a, ngual tungah cikna le thepna a zanghte in maitai takin zangh tu hi.

⁹Ki itna in thin tak ahi tu thupi hi. A sia theampo ensan vun a, a pha ci theampo keamcing tavun.

¹⁰Khat le khat Tapidaw unau khat bangin ki it in, khat le khat kizatak vawt vun.

¹¹Nasep hanciam vun a, datham heak vun. Thinsungbup kipiakna taw Topa atu seam vun.

¹²Na lametna in hong lungdamsak taken a, ngim ngana sungah thinsau tavun. Tuaciang a tawntungin thungen tavun.

¹³Na neisa uh te na suapui a cimaw na Tapidaw puite hawm vun a, khual mite zindo tavun.

¹⁴Hong vawtsiate thupha a saan natu in Pathian munah thungetsak vun — hi hi, Pathian in haamsiat ngawlin thupha a piak natu ngen vun.

¹⁵A lungdamte taw na lungdam khawm vun a, a kapte taw na kap khawm vun.

¹⁶A kuama theampo atu a kibangin thinbotna na nei vun. Kiphasak heak vun a, nasep a niamte zongh seam thada heak vun. Noma le noma ciim kisa heak vun.

¹⁷A sia in hong vawt a om le a sia taw thuk heak vun. Mihing theampo ii pha hi ci in a ngaisutte sep tu hanciam vun.

¹⁸Mihing theampo taw kilem a na nuntak thei natu in, noma sang panin na vawt thei theampo na vawt vun.

¹⁹Lawmte awng, phu kilam heak vun. Pathian thin uukna ii a sep tu in koi zaw vun. Banghangziam cile Laithiangtho in, “Phu ka lam tu a, ka thuk kik tu hi, Topa in ci hi,” ci hi.

²⁰Laithiangtho ii ci bangma in phulam luangin, “Na ngalpa a ngil a kial le an na vak in, a dang a ko le a dawn tu khat na pia in, banghangziam cile hi bangin na sep hu in, a maizumna in meikaang bangin kaang tu hi.”

²¹Siatna in zosak heak vun; siatna sia phatna taw na zozaw vun.

Romete 13

Ngam uk Thuneite taw Kizopzia

¹Mihing khat simin ngam uk thuneite thu na ni vun, banghangziam cile Pathian oai ngawl po kuama in thuneina nei thei ngawl hi, tua thuneite sia amate sepna san tek ah Pathian koi ahi hi.

²A seam nginge lai thuneite a nalh sia in Pathian thupiak nalh suak hi; tuabangte in amate le amate tungah thukhenna a tungsak suak hi.

³Banghangziam cile ngamukte sia mihing phate ii kiitak tu hi ngawl a, mihing ngilote kiitak tu hi bek hi. Thuneipa kiita ngawlin na om nuam ziam? Tua ahile na pha khat seam in, ama in hong pok tu hi,

⁴banghangziam cile amate in Pathian naseam hi a, nangma phattuam natu in naseam hi. Ahihang ngitlona na vawt le lauthawng in, banghangziam cile ama in daan piak theina vaang nei tatak hi. Amate sia Pathian naseam hi a, mihing ngilote tungah Pathian daan tungsak hi.

⁵Hi thu hu in thuneite thu na ni tavun — Pathian daan piak thei hang bek zongh hi ngawlin noma in khentel theina thin na nei uh hang zongh ahi hi.

⁶Hi thu hu in shia na pia vun, banghangziam cile, tua thuneite in a kicing takin a sep uh ciangin, amate in Pathian atu seam a suak uh hi.

⁷Amate tungah na batte uh na lo vun, nangma pumpi tung pan ahizong na neisa tung pan ahizong shia cite peuma na pia vun, zatak tute na zakta vun a, upat tute na upat vun.

Khat le khat tungah Sepzia



⁸Ki itna khat sim ngawl kuama tungah leei na ba heak vun. Hi bangin a ngamta te Thukham zui ahi hi.

⁹Thukham sungah, “Na kupalngul heak vun; mihing na that heak vun; na nguta heak vun; midangte neisa dungawk thin na nei heak vun,” hite theampo le a dangte sia, “Na innpaamte nangma na ki it bangin na it in,” ci thukham in huam siat hi.

¹⁰Ki itna in a innpaamte tungah, ataa khial ngei buatu hi; tua ahikom ki itna in Thukham buppi nitna ahi hi.

¹¹Hisia na vawt uh kul hi, banghangziam cile, na mutna uh panin, na khanlaw natu a hun cing zo hi, ci in na he uh hi. Ih upciil lai sangin tu in ih kingup natu naizaw zo hi.

¹²Zan hun bo dek zo a, sun hun hong theng ma hi zo hi. Khuazing taw a kisai nate ih sepna panin tawp tawng; khuavak sungah kidona ngalvanhte zam tawng.

¹³Sun khuavak sungah a teangte bangin, eite a kilawmin ih ngamta tu hi — Lawplaina, zukhamna, a maizum huai ngamtatna, kihauna tua ahibuale ki eennate ih vawt buatu hi.

¹⁴Tuate taangin Topa Jesus Christ ngalhiamte zam in, ci le sa deina a lungkimsak thei lungngulnate na kheal tavun.

Romete 14

Na Suapui tungah Thukhen Heak in

¹Note sungah upna note na saang vun. Ahihang ama aituam ngaisutnate tungtaang ah na kinial heak vun.

²Mihing khat in a upna hu in, neak thei theampo a ne hi, ahihang upna no khat in nga le tee bek ne hi.

³Neakthei theampo a nepa in, tuabangin a ne ngawl pa zawngsak heak hen; tuabangma in nga le tee te bek a nepa in a sik theampo a nepa sit heak hen, banghangziam cile Pathian in ama zongh saang zo hi.



⁴Ngualdang khat ii naseamte a sit tu in nang in bang thu nei ni ziam? Amate nasepna a zaw le a lel huvau a sit tu in a Topa om hi. Amate in zo tu hi, banghangziam cile Topa in amate zosak tu hi.

⁵Mihing khat in ni tuam khat sia a dang nite sangin thupi zaw in ngaisun hi, tua laitakin mihing dang khat in ni theampo a kibangin ngaisun hi. Amate khat sim in a thinsung uh khensat taken.

⁶Ni tuam khat a thupi tuam in a ngaisun sia in Topa upatna taw ngaisun ahi hi; bang khat po a ne khat in Topa upatna taw ne ahi hi; banghangziam cile ama in Pathian ii a piak an atu in lungdamko hi. Bang khat po neak tu a ten sia zongh in Topa upatna taw a ten hi a, ama zongh in Pathian tungah lungdamko hi.

⁷Eite sungah khat zongh in ama nguak atu in a nungta ih om bua a — ama nguak atu in a thi zongh ih om bua hi.

⁸Ih nungta le Topa atu nungta hi a, ih thi le zong Topa atu thi ih hi hi. Tua ahikom ih thi a ih nungta zong Topa neisa ih hi hi.

⁹Banghangziam cile a thite le a nungtate ii Topa ahi natu in Christ thi a nuntakna sungah tho hi.

¹⁰Tua ahile note in na suapuute tungah banghangin thusit nu ziam — Banghangin no na theampo a ne te in na suapuute zawngsak nu ziam? Eite theampo thusitna thuk tu in, Pathian mai ah ih ding tu hi.

¹¹Banghangziam cile Laithiangtho in, “A nungta Pathian ka hi bangma in, mihing theampo ka mai ah khupdin tu a, tuaciangin mihing theampo in kei sia Pathian ka hina pualaak tu uh hi, Topa in ci hi,” ci hi.

¹²Tua ahikom eite khat simin ih hi babang Pathian tungah ih pualaak tu hi.

Na Suapuipa Puksak Heak in

¹³Tua ahikom khat le khat, thu ih kikhen buatu hi. Tua hi ngawl zaw in na khensat tu uh sia in hisia ahi hi. Na suapuipa lutu natu ahizong, mawna sung a puu natu ahizong bangma vawt heak vun.



¹⁴Topa Jesus taw ka kikopna panin ka heak thu khat in bangziam cile an khat pawpo in ama nguakin a nin om ngawl hi; ahihang mihing khat in an khat nin hi ci in a um le ama atu in tua an sia nin hi.

¹⁵Bang khatpo na neak uh sia in na suapuipa thin nop ngawl na a piangsak le ki itna taw ngamtatna hi nawn ngawl hi. Na neakna uh taw Christ ii thina taw a tat sa mihing khat na lalsak heak vun.

¹⁶Pha hi ci in na ngaisutte uh na zangh khial heak vun.

¹⁷Banghangziam cile Pathian Ngam in neakna le dawnna thu hi ngawl a, Thaa Thiangtho ii piak thutang suana, thinnopna le lungdamna thu ahi hi.

¹⁸A kua po ahizong hi bang a, Christ atu nasep a seamte in Pathian lungdamsak a, mihingte in lungkim pui hi.

¹⁹Tua ahikom khat le khat atu in thinnopna le ki thahatsak nate a piangsak nate na ngiim tu uh hi.

²⁰Anneak huvau taw Pathian nasepna lalsak heak vun. An theampo neak thei ahihang, mihing khat po mawna sungah a puksak tu an ne heak vun.

²¹Na suapuipa a puu natu a piangsak thei sa ahizongin, sapittui ahizongin, ngamtatna khat pawpo ahizong, tang leute ngamtatna maanbel ahi hi.

²²Hite huvau ah na upnate in nangma le Pathian kilaklaw thu hi a, tua ahikom na thin sungah keam po tavun. Maan a sakte a sep ciangin a kithasung ngawl pa sia a lungdampa ahi hi.

²³Ahihang ama in a neak a dawnte tungah thinnop ngawl na a nei le, tuate a neak laitak mama in, Pathian in ama mawsak hi, banghangziam cile ama ngamtatna in upna tungah a kibulphu bua hi. Upna a kibulphu ngawl na khat pawpo in mawna ahi hi.

Romete 15

Mihing dangte Diksak tu in Ngamta zaw vun

¹Upna sungah a thahat eite in, upna note vanh ngit dawnin ih hu natu ahi hi. Eima nop bek ih zong buatu hi.



²Tua hi ngawlin eite khat simin ih suapuipa phattuum natu le upna sungah ih khantosak natu in, ama diksak tu in ih ngamta tu hi.

³Banghangziam cile Christ in ama nop a kizui bua hi. Tuabang hi ngawlin, Laithiangtho ci bangin, “No hong lealte ii hong lealna sia kei tungah hong tu hi,” a ci bangin ngual atu in nungta hi.

⁴Eite thin sauna le hanthotna tungtawn a, upna ih nei natu in, Laithiangtho sungah a ki atte theampo in eite hong hil natu a ki at ahi hi.

⁵Thuakzawkna le hanthotna ii a naak ahi Pathian in, Jesus Christ zia na zuina uh taw note sungah tuabang khua ngaisutna hong piangsak taken.

⁶Note theampo in aw khat sa in, ih Topa Jesus Christ ii pa ahi Pathian na pok vun.

Gentilete atu Lungdamna Thupha

⁷Pathian minthan natu in Christ ii note hong saan bangma in, note zongh khat le khat na kisaang vun.

⁸Banghangziam cile Pathian in thumaan a, amate ii pute pate tungah a kamciamte tungsak tu ahikom,

⁹Gentilete ngangawn zongh in Pathian hesuakna a pok thei natu in Christ in Jewte naseampa suak hi kong ci hi. Laithiangtho in, “Tua ahikom Gentilete sung pan ka lungdamna nang tungah kong ko tu a, pokna la ka sa tu hi,” ci hi.

¹⁰Hi bangin ci thua hi, “Gentilete awng, Pathian mite taw lungdam vun!”

¹¹A ci kik na panin, “Topa pok vun, Gentile theampo awng; Pok vun, mihing theampo awng!”

¹²Isaiah zongh in, “Jesse suan khat hong piang tu a; ama in Gentilete a uk tu in hong pai tu hi, tuaciangin amate in ama tungah, lametna nei tu hi,” ci hi.

¹³Thaa Thiangtho thahatna taw, na lametna sungah na khanto natu in, lametna ii naak ahi Pathian in ama na upna uh hu in, lungdamna le thinnopna taw hong kidimsak taken.



Paul ii Hangsan tak Lai a at Ngamna

¹⁴Suapuite awng, note phatna taw kidim tu in kong um a, heakna ci theampo zongh nei in, khat le khat kihil thei tawntung tu in kong um hi.

¹⁵Ahihang kong phawksak ngei thute tungtawn in hi laithak sungah ka hangsan mama hi. Tuabangin ka han ngawpna in banghangziam cile Pathian in hunpha hong pia a, Gentilete atu a diang tu in,

¹⁶Jesus Christ naseampa hong suasak hang ahi hi. Gentilete sia Thaa Thiangtho in aap a, Pathian tungah a saan thamman biakpiakna ahi thei natu in Pathian tung panin Lungdamna Thupha hil in thiampi khat bangin ka diang hi.

¹⁷Jesus Christ taw pumkhat ka hina hangin Pathian nasep ka sepna huvau ah ka kisuangtaak thei hi.

¹⁸Gentilete ii Pathian thu a nit natu lamhil tu in Christ in kei tungtawn in na hong sepna sa hang bekin hang takin ka pau ngam hi. Tua nasepna sia kammal le ngamtatna taw hong seam zo a,

¹⁹nalamdang lakna le a lamdang nate ii vaangletna le Pathian Thaa ii vaangletna taw hong seam zo hi. Tua ahiciang Jerusalem pan Illyricum ah khualhaw in ka paina ah Christ huvau Lungdamna Thupha a cingin ka thangsak zo hi.

²⁰Ka tup ka sawmna in, ngualdang khat po ii cian sa phungkawngte tungah inn a sa ka sua ngawl natu in Christ min kiza ngei ngawlna munah Lungdamna Thupha thansak natu ahi tawntung hi.

²¹Laithiangtho zongh in, “A thu a kihil ngei ngawl mite in ama a mu tu hi, tuaciangin a za ngei ngawlte in a tel tu uh hi,” ci hi.

Paul ii Rome khua Haw tu A sawmna

²²Hi thu bangin note kungah kong pai tu tam vei ma hong kikhak zo hi.

²³Ahihang tu in hi ngamkhente sungah ka nasep man zo ka hi ciangin, kum tam ma note taw kimu nuamin, hong pai nuam top ka hi hu in,



²⁴tu in hong pai thei tu in ka ki um hi. Spain ngamah ka pai lamin note taw ka kimu nuam a, tawmvei kong taam zawkciangin, tua munah ka pai natu hong hu leute ka uk hi.

²⁵Ahitazong, tu laitak Jerusalem ah a om Pathian mite atu seam tu in ka pai tu hi.

²⁶Banghangziam cile Macedonia le Achaia pawlpite in Jerusalem ah Pathian mi a cimawte huna tu sum pia tu in, amate thu in khensat zo uh hi.

²⁷Hisia amate mama ii khensat ahi hi; ahihang a tatak in ci leang amate in tua mizawngte a hu tu sia a sep tu ahi hi. Jewte in thaa lam sangah thuphate Gentilete a hop bangma, Gentilete zongh in Jewte sia a leitung neisate taw a hu kik kul hi.

²⁸Hi nasep ka man zawkciang amate atu a kikhon sumte a bup in, amate tungah ka aap zawkciang Spain ngamah ka pai tu a, ka pai lam in kong baang tu hi.

²⁹Kong pai ciangin Christ thupha a kicing taw kong pai tu sia ka he hi.

³⁰Suapuite awng, ih Topa Jesus Christ hang le, Thaa ii hong piak itna hu in, Pathian tungah kei atu in nasia takin thu nong nget pui natu in kong thuum hi.

³¹Judea ngam thu um ngawlte khut sung pan hong kep natu le Jerusalem ah ka nasepna in Pathian mihingte atu a kisaang thei ahi natu in thu hong ngetsak tavun.

³²Tua hi a, lungdam in note kungah kong pai tu a, Pathian deina ahile, thathak laakna in note kungah kong haw tu hi.

³³Ih thinnopna ii naak ahi, Pathian in note theampo taw hong om taken. Amen.

Romete 16

Aituum Paupuina



- ¹Cenchreae pawlpi ah a seam ih suapuina Phoebe sia note tungah ka pokna kam kong thaak hi.
- ²Pathian mihingte ngamtat tu bangin Topa min taw ama na saang vun a, tuaciangin huna zongh note tung panin a kikap babang na pia vun; banghangziam cile ama in mihing tam ma ii lawmpaha hi a, kei atu zong lawmpaha khat ahi hi.
- ³Jesus Christ sungah ka naseppui Priscilla le Aquila tungah paupuina kam ka thaak hi;
- ⁴Amate in kei atu in a nuntakna aita ngam hi; amate tungah ka lungdam hi — kei nguak bek zongh hi ngawlin, Gentile pawlpi mite theampo zongh a lungdam uh hi.
- ⁵Amate inn ah a kikhawm pawlpi tung zongh ah paupuina kam ka thaak hi. Asia ngamkhen pan Christ a um phitbelpa, ka it ka lawm Epaenetus tung zongh ah paupuina kam ka thaak hi.
- ⁶Note atu in nasia takin na a seam Mary ka paupui hi.
- ⁷Ka Jew mipui, kei taw thongtaak khawm Andronicus le Junias tungah paupuina kam ka thaak hi; amate sia sawltakte in pha takin a heak uh hi a, kei sangin Tapidaw a suak masa zawte ahi uh hi.
- ⁸Topa kipawlina sungah ih seppui Ampliatus ka it ka lawm zongh ka paupui hi.
- ⁹Christ nasepna sungah ih seppui Urbanus le Stachys ka it ka lawmte zongh ka paupui hi.
- ¹⁰Apelles ka paupui hi, ama ii Christ tungah a thumaanna sia sit natu om ngawl hi. Aristobulus innkuanpuite tungah paupuina kam ka thaak hi.
- ¹¹Ka Jew mipui Herodion le Narcissus innkuanpuite sung Tapidaw suapuie ka paupui hi.
- ¹²Topa nasepna sungah a seam Tryphaena le Tryphosa luangin, Topa nasepna sungah nasia takin a seam ka it ka lawm Persis ka paupui hi.



¹³Topa nasepna sungah a kician tuamin a seam Rufus le a tapa bang tatak a hong vawt, a nu tungah paupuina kam ka thaak hi.

¹⁴Ka paupuina kam Asyncritus, Phlegon, Hermes, Patrobas le Hermas le a dang amate taw a om Christ mite ka thaak hi.

¹⁵Philologus le Julia, Nereus le a suapuina le Olympas le amate taw a om Pathian mite theampo ka paupui siat hi.

¹⁶Khat le khat unau ki itna taw ki paupui in na kinamh vun. Christ pawlpite theampo in no hong paupui hi.

A khakbel Kihilna

¹⁷Suapuite awng: pawl khenna piangsak a, mihingte upna a lumlette, tuaciang na saan sa kihilnate a langpante encik tavun a, amate kung pan na kikeam tavun.

¹⁸Banghangziam cile tuabangin a ngamtate in ih Topa Christ atu in a seamte hi ngawl a, amate ngilpi atu in a seamte ahi uh hi. Amate in kamneal le kisialpoknate taw bangma a he ngawl mihing pawlkhat a theam uh hi.

¹⁹Lungdamna Thupha tungah na thumaan uh sia a kuama po in hong he a, tua hu in note huvau in ka lungdam hi. A pha nate ah na ciim tavun a, a sia tungtaang ah na paubaang heak vun.

²⁰Tuaciang ih thinnopna ii naak ahi Pathian in Satan sia hai ngawlin na peangnuai ah siiktham tu hi. Ih Topa Jesus thuthiamna in note taw hong om taken.

²¹Ka naseppui Timothy in hong paupui hi; tuasia bangma Lucius, Jason le Sosipater, ka Jew minampuite zongh in hong paupui hi.

²²Hi lai a atpa keima, Tertius in Tapidaw kipaupuina lai kong thaak hi.

²³A inn sia pawlpi kikhopna in a kizangh ka zintunna pa Gaius zongh in hong paupui hi; khuapi sumkeampa Erastus le ih suapui Quartus in hong paupui hi.

²⁴Ih Topa Jesus Christ thuthiamna note theampo taw hong om taken.

Pokna Thunget Khupna



²⁵Eite in Pathian tungah minthanna pia tawng. Jesus Christ huvau Lungdamna Thupha ka hilna bang le a bo sa hun sau mama sungah a kiseal thumaan thutak hong kilak bangin Ama in na upna uh sungah kip takin na din thei natu in vawt thei hi.

²⁶Tu in ahile kamsangte lai atna sung panin tua thumaan thutak sia a kilanghtakna ah kikoi zo hi; tuaciangin a nungta tawntung Pathian sawlna taw minam theampo in um a, a nit thei natu in amate tungah kihesak zo hi.

²⁷Ama bek a ciim Pathian tungah Jesus Christ tungtawn in minthanna kip tawntung taken! Amen.



1 Corinth te

1 Corinth te 1

¹Pathian deina taw Jesus Christ sawltak tu in a kism Paul le ih suapuipa Sosthenes in —

²Corinth khua ah a om Pathian pawlpi tung le Pathian ii mi thiangthote suak tu in a kism sa, Jesus Christ taw kipumkhatna ah ama neisa a suak mi theampo, mun theampo ah amate le eite ii Topa ahi ih Topa Jesus Christ a bia mihing theampo tungah lai kong thaak hi:

³Ih Pa Pathian le Topa Jesus Christ in thuthiamna le thinnop kilemna hong pia taken.

Christ sungah Thuphate

⁴Jesus Christ tungtawnin note a thuthiamna hong piak hu in, ka Pathian tungah lungdam ka ko tawntung hi.

⁵Banghangziam cile Christ taw na kipumkhat uh hu in, kampauna le heakna theampo pan kipan na theampo ah a hau na suak zo uh hi.

⁶Christ ii thupha sia no sungah kip takin kiphut zo ahikom,

⁷Ih Topa Jesus Christ hong kilangh tu ngakin na om laitakin, thupha khat beak zongh na taan bua uh hi.

⁸Topa Jesus Christ ii Ni hong thet ni ciang, na pauban ngawl natu in ama in a tawpna dong kip takin hong keam sii tu hi.

⁹Eima Topa ahi a Tapa Jesus Christ taw kithawl khawm tu a, note hong sam Pathian sia ih muan tu Pathian ahi hi.

Pawlpi sungah Kikhennate

¹⁰Eima ii Topa Jesus Christ thuneina taw, ka suapui note theampo tungah kong mangkaa hi, note sungah kikhenna a om ngawl natu in, na ci uh po ki thukim vadium vun. Ngaisutna khat le tupna khat bek taw na kipawl siat vun.

¹¹Banghangziam cile, ka suapuite awng, note sungah kihauna om hi ci in Chloe ii innkuanpui pawlkhat in thiang takin hong son zo hi.



¹²Kong ci nopna pan, note khat sim in thu tuatuam son nu hi. Khat in “Kei sia Paul nungzui ka hi hi,” ci a; a dang khat in, “Kei sia Apollos nungzui ka hi hi,” ci a; a dangkhat in, “Kei sia Peter nungzui ka hi hi,” ci a; tuacing a dangkhat in, “Kei ma Christ nungzui khi hi,” na ci uh hi.

¹³Christ sia pawl tuatuam in ki khentham i! No atu in thinglamte tungah a thi sia in Paul hina ziam? Paul nungzui tu in tui na kiphum uh ziam?

¹⁴Crispus le Gaius sim ngawl, note kuamatui kong phum ngawl hu in, Pathian tungah lungdam ka ko hi.

¹⁵Tua ahikom kuama in note sia kei nungzui suak tu in tui kiphum hi hong ci thei ngawl tu hi.

¹⁶(Oh hihi, Stephanas le a innkuanpuite zongh tui phum peu khi hi; tua ngawl po hile kuama dang tui ka phum le ka phum ngawl ciamtee ngawl khi hi.)

¹⁷Christ in tuiphum tu in kei hong sawl bua hi. Ama in Lungdamna Thupha son tu in, hong sawl hi, tuaciang thinglamte tungah Christ a thina ii vaangletna a bo thong ngawl natu in, mihing ciimna kam zangh ngawlin son tu hong sawl hi.

Christ sia Pathian Vaangletna le Ciimna

¹⁸Banghangziam cile a thaa mangthang mihingte atu in thinglamte tungah Christ ii thina thu sia, luithawthong thu ahi hi, ahizong ngupna a nga eite atu in Pathian vaangletna ahi hi.

¹⁹Laithiangtho in, “Mihing a ciimte ii ciimna ka lalsak tu a, pilna saang neite ii heakna sia ka hepsak tu hi,” ci hi.

²⁰Tua ahile mihing ciimte, pilna saang neite ahibuale, leitung ah thu kinialna a thiamte sia bang suak tu ziam? Hi leitung ciimna sia mawmawtna hi ci in Pathian in lak zo hi!

²¹Banghangziam cile Pathian in ama ciimna hong zangh a, mihingte in amate ciimna taw Pathian a heak zawk ngawl natu in vawt hi. “Mawmawt” thu hi a ci uh kote thuhilna taw, Pathian in thu umte ngup tu in khensat zaw hi.



²²A up thei natu in Jewte in a maanna a lak tu nalamdang laknate kan uh a, tuaciang Greekte in ciimna kan uh hi.

²³Eite atu in thinglamte tung a kithat Christ thu ka thangsak uh a, tua thu sia Jewte atu in a maktak huai thu le Gentilete atu in a luithawthong thu ahi hi;

²⁴ahizong Pathian ii sap sa Jewte le Gentilete atu in hi thu sia Pathian vaangletna le Pathian ciimna ahi Christ ahi hi.

²⁵Banghangziam cile Pathian ii mawmawtna bang ahi sia in mihingte ciimna sangin ciimzaw a, tuaciangin Pathian ii thazawmna bang ahi sia in mihingte thahatna sangin hat zaw hi.

²⁶Suapuite awng, Pathian in note hong sap laitakin, na omzia uh ngaisun vun. Mihingte hong muna ah note ciim in vaanglian a, na cithei uh hi.

²⁷Pathian in mihing ciimte maizumsak natu in, leitung mite ii lui thawthong asakte teal a, mihing thahatte a maizumsak natu in, leitung mite ii thazawm asakte teal luih hi.

²⁸Leitung ii thupi a sakte, a lal sak natu in leitung ii a nomu, a zawnsak le bangma in a hen ngawlte teal hi.

²⁹Tua sia in, Pathian mai ah a kisathei tu kuama a om bua hi a ci nopna hi.

³⁰Ahihang, Pathian in note Christ Jesus taw hong kipumkhatsak zo hi; Pathian in Christ sia eite ii ciimna suaksak zo hi. Ama hangin Pathian mai ah thutang in hong koih hi; eite Pathian ii mithianghote suakin, hong suaktasak hi.

³¹Tua ahiciangin Laithiangtho in, “A kisuangtak nuamte in, Topa vawtsate tungah a kisuangtak kul tu hi,” a ci bangma ahi hi.

1 Corinth te 2

Thinglamte tung a kithat Christ ii Thu

¹Suapuite awng, Pathian ii a thumaan thuku hil tu in note kungah kong pai lai in kamthukte le pilna thiamna kong zangh bua hi.



²Banghangziam cile note taw ka om laitakin, Jesus Christ thu, a tuanin thinglamte tungah hong thina thute sim ngawl po thudang teng makngil natu ka khensat sa hi.

³Tua ahikom note kungah kong pai lai in, thazawmin launa taw ka liingcip a,
⁴thu kong hil ciangin mihing ciimna thiamna kammalte kong zangh bua hi, ahizong Pathian Thaa vaangletna hong lakna taw kong hil ahi hi.

⁵Tua ahikom note upna sia mihing ciimna tungah kinga ngawlin Pathian vaangletna tungah kinga zaw hi.

Pathian Ciimna

⁶Ahizongin thaa lamsang ah a kxanthin sate tung hile ciimna thu ka thangsak hi. Ahihang tua ciimna in hi leitung ciimna ahibale a bo kuan ahi, hi leitung vaangletna a nei leitung ukte ciimna ahi bua hi.

⁷Tua ka thansak ciimna thu sia mihingte heak ngawl tu a, a kiseal Pathian ciimna thuku hi a, ahihang eite minthanna tu in, leitung pian maa ngawngawn in, Pathian koi sa thu ahi hi.

⁸Hi leitung a uk mihingte kuama in, hi ciimna thu a he bua uh hi. He hile, a minthang Topa sia thinglamte tungah a thatlum buatu uh hi.

⁹Ahitazong, Laithiangtho in, “Kuama ii a mu ngei ngawl a zaak ngei ngawl, suak thei tu in a ngaisut ngei ngawl thu sia, ama a itte atu in Pathian ii a vawt khol sa ahi hi,” a ci bangma ahi hi.

¹⁰Ahihang Pathian in a Thaa taw tua thuku sia eite hong telsak hi. Tua Thaa in Pathian tupnate a kisealna a thu tawnggh dong ngangawnin na theampo a kan hi.

¹¹Mihing khat ii thu theampo sia ama sungah a om a thaa bekma in he hi; tua bangma in Pathian thu theampo zongh, Pathian Thaa bekma in he hi.

¹²Eite in hi leitung ii thaa ih saang bua hi; Pathian ii hong piak sa thu theampo ih heak thei natu in, Pathian hong puak Thaa a saangte ih hizaw hi.



¹³Tua ahikom, Thaa a neite tungah thaa taw kisai thumaan thutakte ka hil uh ciangin mihing ciimna ii hong hil kammalte ka pau bua uh a, Thaa ii hong hil kammalte ka pau uh hi.

¹⁴Tua Thaa a nei ngawl peuma in, Pathian Thaa kung pan hong pai letsongte a saang thei bua hi. Tuabang mihing khat in tel tatak ngawl hi; ama atu in tuate luithawthong thu ahi hi, banghangziam cile thaa bulphuna taw bekin a manh neina kikhentel thei ahihang hi.

¹⁵Tua Thaa a nei peuma in na theampo ii manh neina khentel thei ahihang kuama in ama tungah thu a khen thei bua hi.

¹⁶Laithiangtho in, “Topa thinsung akua in he ziam? Akua in ama ngaisutna pia thei tu ziam?” a ci bangma ahi hi. Ahizong, eite in Christ thinsung ih nei hi.

1 Corinth te 3

Pathian ii Naseamte

¹Suapuite awng, a tatak in ci leang, Thaa a nei mihingte tungah ka pau bangin note tungah kong pau thei bua hi; hi leitung ii neisa, Tapidaw upna sungah patang a hite bangin note tungah kong pau kul hi.

²No sia noaitui bek taw kong vaak a, antak kong pia bua hi, banghangziam cile antak ne thei tu na hi balai uh hi. Tu ma zonghin antak a ne thei tu hi ngawl lai nu hi,

³banghangziam cile note in hi leitung mihingte nuntak zia taw ma in na nungta lai uh hi. Note sungah ki eenna om a, khat le khat na kihau uh ciangin, hi thu in note leitung neisa na hi na uh le leitung om zia taw nungta na hina uh hong lak hi ngawl ziam?

⁴Note sung pan khat in, ‘Kei Paul nung ka zui hi,’ a dang khat in, ‘Kei Apollos nung ka zui hi,’ na ci uh ciang leitung thin nei mihingte bangin a ngamta hi ngawl nu ziam?



⁵A tatakan Apollos sia akua ziam? Tuaciang Paul sia akua ziam? Kote in note up thei tu in hong lampui Pathian naseamte hi bek lel khu hi. Topa ii seam a hong sawl bangin koma khat sim in a seam ka hi uh hi.

⁶Kei in thaici ka poai a, Apollos in a kung tuibuak in, ahihang a khangto sak sia Pathian ahi hi.

⁷A poaipa le tui a buakpa sia a thupi tatak bua hi. A thupi sia in Pathian ahi hi, banghangziam cile ama in a kung khangsak hi.

⁸A poaipa le tui a buakpa in kilamdanna nei ngawl hi; Pathian in amate sep babangin tel pia tek tu hi.

⁹Banghangziam cile kote sia Pathian taw kipawlin naseam khawmte ka hi uh a, note in Pathian ii lo na hi uh hi. Note in Pathian inn na hi sii uh hi.

¹⁰Pathian hong piak hesuakna thupha zangh in, innsa thiampa nasep teng ka seam a, a tawdap phungkawng ka phasak hi, tuaciingin ngualdang khat in tua ii tungah sa to hi. Ahihang mihing sim in, bangbangin inn kisa ziam, ci in a kidop kul hi.

¹¹Banghangziam cile Pathian in Jesus Christ sia khat bek ahi tawdap phungkawng tu in pha zo a, a dang tawdap phungkawng a kipha thei nawn buatu hi.

¹²Pawlkhatte in kham ahibuale ngun ahibuale suangmanpha sia phungkawng tungah innsakna in zangh tu hi; a dangte in thing ahibuale lopa ahibuale taangphaw zangh tu uh hi.

¹³Tuaciang mihing khat sim ii nasepna a phat le a phat ngawl sia Christ Ni in a pholaak ciingin kimu tu hi. Banghangziam cile tua Ni in meikuang in mihing sim ii nasepna kilanghsak tu hi; meikuang in tua nasepnate sittel tu a, a phatna le a siatna lak thiang tu hi.

¹⁴Phungkawng tungah a kisa sia meikuang in a kaangsak zo buale, innsapa in tel nga tu hi.



¹⁵Ahihang khat po nasepna sia a kaangtum le, a nasep teng sumh tu hi; ahihang ama hile kaangmei sung pan a suakta khat bangin ngupna nga tu hi.

¹⁶Note in Pathian biakinn na hi uh a, no sungah Pathian Thaa hong teang nginge ahi sia na he takpi uh hi!

¹⁷Tua ahikom khat po in Pathian biakinn a susia le, Pathian in ama susia tu hi. Banghangziam cile Pathian biakinn thiangtho a, note mama in ama biakinn na hi uh hi.

¹⁸Kuama in ama le ama kitheam heak hen. Note sungah khat po in ama le ama sia, leitung paizia taw etna in, ciim a kisa le a ciim takpi natu in a mawmawt phot kul tu hi.

¹⁹Banghangziam cile hi leitung ii ciimna hi ci in a ngaisutte sia Pathian muna ah luithawthong ahi hi. Laithiangtho in, “Pathian in a ciimte sia amate pilna thaang sungah man hi,” ci hi;

²⁰tuaciang Laithiangtho dangkhat in, “Topa in a ciimte ngaisutna sia mannung ngawl hi, ci in he hi,” ci hi.

²¹Tua ahikom kuama in mihingte vawt thei thute sungah kisuangtaak heak hen. A tatakina theampo note neisa ahi hi:

²²Paul, Apollos le Peter; hi leitung, nuntakna le thina, tu hun le maisang hun — hite theampo noma aa ahi hi,

²³tuaciangin note in Christ neisa hi a, Christ in Pathian neisa ahi hi.

1 Corinth te 4

Christ ii Sawltakte

¹Kote sia Pathian thumaan thukute a keamcing tu a, hong kikoi Christ ii naseamte hi ci in nong ngaisut tu uh ahi hi.

²Tuabang naseam khat ii a taangsap thu sia a Topa tungah a thumaan tu bek ahi hi.

³Tu in kei tungah note in ahibuale mihing muna bangin thu nong khen uh hang ka awlmaw bua hi; keima le keima zongh thu ka kikhen bua hi.

⁴Ki thasunna ka nei bua hi, ahihang tuasia in mawnei ngawl tatak hi ci na ahi bua hi. Kei tungah thu hong khen sia in Topa ahi hi.

⁵Tua ahikom note in a hun tatak hong thet ma in kuama tungah thu na khen heak vun. Thukhenna a khakbel sia in Topa hong pai dong a ngak kul tu hi; ama in khuazing sungah om thukute, khuavak sungah kilanghsak tu a, tuaciang mihingte thin sungah a kiseal tupna a pholaak tu hi. Tuaciang mihing sim in ama taw kilawm Pathian ii pokna nga tu hi.

⁶Tua ahiciang, suapuite kam teptee sungah, “Ngeina maante na zui vun,” ci in a om bangma in, a ci nopna heak thei natu in hi teng theampo sia Apollos le keima tungah ka sin zo a, koma nii sia ettee tu lim bangin ka kizangh uh hi. Note in mihing khat pawpo kiphatsak pui in, midang khat pawpo zawngsak heak vun.

⁷Akua in note ngualdangte sangin a thupizaw in hong piangsak ziam? Na neisa uh theampo Pathian hong piak sa hi ngawl ziam? Tua ahile pha hi, na neisa uhte sialetsong ahi ngawl bang phetin, bangbangin kiphatsak pui thei tu nu ziam?

⁸Na kisap uh theampo nei zo nu ziam? A hau sa hi zo nu ziam? Ko zongh kumpi suak ngawl lai a, no kumpipate suak zo nu ziam? Pha hi, kote noma taw kumpipate ka sua khop thei natu in kumpi suak takpi leute kong oai hi.

⁹Ko sawltakte sia vantung lalangte le mihing nambup ii a et tu in mihon mai ah thidaan thuak tu mite bang Pathian in a tawp khak na mun ma ah hong koi taw kibang ka sa hi.

¹⁰Christ atu in kote a mawmaw ka suak uh hi!ahihang note in Christ taw na kipumkhatna uh hu in, mihing ciimte na hi uh hi. Kote ka thazawm uh a, ahihang note sia na hat uh hi: Kote hong kizawngsak ahihang note hong ki zatak vawt hi!

¹¹Hi hun dong mama in kote ngilkial dangtaak in ka om uh hi; puansia ngapkaai ka sil uh a; kote hong kisaat hi; mun khat pan mun khat ah ka vak kawkoai uh hi;

¹²nasep haksate ka sep uh manin ka zawm dikdek uh hi. Hong kitomlaw ciangin thupha ka pia uh hi; hong ki siatvawt ciangin ka thuak uh hi;

¹³hong kilan ciangin kamthiam taw ka zokik uh hi. Kote in hi leitung ninteakte bang ka hi lel uh a; tu hun dong mama in, ko sia leitung mihing nialnamte ka hi uh hi!

¹⁴Hisia note tungah kong atna in, no hong maizumsak nuam hi ngawlin, keima ii ka it tate bang a, kong pau nop hang ahi hi.

¹⁵Bang hang ziam cile, na Tapidaw nuntakna sungah hong keam hong en tu 10,000 na nei hial uh zong pa khat bek na nei uh hi. Banghangziam cile Christ taw kipumkhat in na nuntakna sungah Lungdamna Thupha note tungah kong puak hu in note pa ka suak zo hi.

¹⁶Tua ahiciang keima ette in nong zui tu uh kong ngen hi.

¹⁷Hi thu hu in, Tapidaw nuntakna sungah ka it a thumaan ka tapa Timothy kong paisak hi. Christ Jesus taw kipumkhat a, nuntakna thak sung ah ka zui thubulphute le, mun theampo ah om pawlpiteng tungah ka hil thu sia ama in hong phawksak tu hi.

¹⁸Keima note kungah hong haw ngawl tu hi ci in nong ngaisut uh hu in, mihing pawlkhat a kiphasak zo uh hi.

¹⁹Ahizong Topa deina a om le, note kungah hong pai pal tu khi hi, tuasia ciang, hi mihingte in a kamteng bek hingawl a, bangza vaangletna nei ziam, ci sia keima tatak ma in ka mu tu hi.

²⁰Banghangziam cile Pathian Ngam in kammal bek taw sonna hi ngawlin vaangletna ahi hi.

²¹Ciang uai taw kong pai tu ahibuale ki itna le cikna taw kong pai tu a koisia deizaw nu ziam?

1 Corinth te 5

Pawlpisung Paktatna



¹Tu in, Pathian he ngawlte sung zongh ah a om ngei ngawl, a patau huai numei le pa paktatna note sungah om hi, ci in kison takpi hi. Pasal khat sia a nu kik taw lumkhawm hi, ci in hong kison hi!

²Tua ahile bangbangin kiphasak thei tu nu ziam? Tua ci thada, na khuangai mama natu uh hi a, tuabang a ngamta pasal sia zongh no kipawl na sung panin na hawlkhia tu uh hi.

³⁻⁴Ka pumpi sia note taw kikhuala hi ka leng, ka thaa sia note taw omkhawm nginge hi. Note taw keima om bang kek in hi a patau huai mama ngamtatna a neipa tungah Topa Jesus min suang in thukhenna ka pia zo hi. Na kikhop uh ciang kei zongh ka thaa taw kong kingawm a, Topa Jesus vaangletna ei sungah a om sia taw,

⁵Topa Ni ciang a thaa suatak natu in, a pumpi Satan suksiat natu in tua pa pumpi Satan na aap vun.

⁶Note na kiphatsak thei natu bangma om ngawl hi! Kam tepte khat ah “Tol tawmno khat in annoai bup pawmsak hi,” ci hi.

⁷Na thiantho sinsen natu in, mawna tol lui sia na lakeak vun. Tua hile tol saw ngawl annoai thak bang na hi tu a, tuabang tatak ma hi ci in, kong heak bang ma hi takpi vun. Banghangziam cile tu in Christ, ih Paisan Poai tuuno sia sangaw biakpiakna in kinei zo ahikom, ih Paisan Poai sia a kinging sa in om zo hi.

⁸Tua ahikom ih ngitlona le mawna tollui taw kivawt anluum taw hi ngawlin tol saw ngawl thumaanna le thianthona anluum taw ih Paisan Poai khaam tawng.

⁹Laithak kong at sa sia sungah mihing paktatte taw na kipawl heak vun ci in kong son zo hi.

¹⁰Tu in doai bia a mihing paktat, a duhop ahibuale, a nguta ahibuale milim a biate ka ci nopna hi ngawl hi. Tu ate pial natu sia, leitung pan na pusua siat uh kul tu hi.

¹¹U le nau khat ka hi uh a ci hang a paktat, a duhop, milim a biate, ngual a siatngen, a zukham, a nguta sia taw na kipawl heak vun, ka ci nopna ahi hi. Tuabang mihing khat taw ankuang uum khawm tu in na to heak vun.

¹²⁻¹³A tatakin a pua a om mihingte tungah thukhen tu sia kei taw kisai ngawl hi. Pathian in amate tungah thukhen tu hi. Ahihang noma pawl sung na pawlpuite tungah thu na khen tu uh hi ngawl ziam? Laithiangtho sungah, “Noma pawlsung panin a ngilo mihing pa na heam vun,” a ci bang ahi hi.

1 Corinth te 6

Tapidaw puite taw Thu kineina

¹Mihing khat in a Tapidawpuite khat taw thu a nei ciangin, Pathian mihingte ii a khensak tu luangin, bangbangin Pathian he ngawl thukhenmangte mai ah pai ngam ziam?

²Pathian mihingte in leitung ii a thukhen tu ahi hunlam he ngawl nu ziam? Pha hi, leitung ii a thukhen tu na hi uh le, thunote tungtaang ah thukhen zo ngawl nu ziam?

³Vantung lalangte tungah thukhen tu na hi uh hunlam kihe ngawl nu ziam? Tua ahile hi nuntakna sungah thute na khen thei zaw kan tu uh hi!

⁴Tuabang thute hong piang le, pawlpi sungah dinmun a nei ngawl mihingte ii thukhen tu in paipui tu nu ziam?

⁵Note atu in maizum huai mama hi! Thu kinei Tapidaw puite kilaklaw ah thu a khen thei tu mihing ciim khat beak na pawl sungah om nanak tu hi.

⁶Tua hi napi in Tapidaw thunei khat in a dang khat sia thukhen zum then a, thu um ngawlte in tua thu na khensak zezen uh hi!

⁷Note sungah na thu kineina uh mama in na nginat ngawl uh lak hi. Ngual in no tungah hong khial le no atu phazaw ngawl ziam? Ngual in hong suddol le no atu phazaw ngawl ziam?

⁸Tuabang a hi tu kimlai, noma suapui ahi te ngawngawn khat le khat kisuttol in khial nu hi!



⁹Mihing ngilote in Pathian Ngam lua ngawl het tu ci in he nu hi. Noma le noma kitheam heak vun; mihing a paktatte le milim a biate, palngul mawna a vawtte, pa le pa, numei le numei a khialte,

¹⁰na ngu thei ahibuale a duhopte, zukhamte, ngual ngensia theite, nguktate, hite kuama in Pathian Ngam lua ngawl tu hi.

¹¹Note pawlkhat in tuabang na hi uh hi. Ahihang note sia mawna panin hong kithiansua zo hi; Pathian tungah hong ki aap tuam zo hi. Topa Jesus Christ le eite Pathian ii Thaa in Pathian mai ah note thutang hong suaksak zo hi.

Na Pumpite Pathian Minthan natu zangh vun

¹²Khat po in, “Na khat pawpo ka vawt thei natu thu om hi,” ci tu hi. Hi hi; ahihang na theampo sia nang atu pha siat ngawl hi. Kei zongh na theampo ka vawt thei natu thu om hi ci thei khi hi, ahihang na khat pawpo in kei sia ama ii sila ka hisak bua tu hi.

¹³Khat po in, “An sia ngilpi atu hi a, ngilpi sia an atu hi,” ci tu hi. Hi hi; ahihang tuate ngeal sia Pathian in bosak tu hi. Pumpi sia numei le pa paktatna a zak tu hi ngawl a, Topa ii na seam tu ahi hi; tuaciang Topa in pumpi a vaak a taa ahi hi.

¹⁴Pathian in Topa sia thina pan tho kiksak a, tuaciang ama vaangletna taw eite zongh hong tho kiksak tu hi.

¹⁵Na pumpite uh sia Christ pumpi ii a khen tuatuamte ahi hunlam na he uh hi. Christ pumpi sungah a kihel khen khat la in pumpi zuak numei ii khen khat, suaksak tu khi ziam? Tuabang suak thei ngawl hi!

¹⁶Ahibuale pumpi zuak numei taw a pumpi a ngawm sia in ama taw ci le sa in pumkhat tak khat suak ahi hunlam he ngawl na hi bua uh ziam? Laithiangtho in, “Tuate nii in pumkhat suak tu hi,” ci in thiang tak son hi.

¹⁷Topa taw a kingawm khat sia ahile ama taw Thaa thu sungah pumkhat suak tu hi.



¹⁸Paktatnate na pial vun. Mihing khat ii mawna dang khat a vawt sia in a pumpi a lalsak bua hi; ahihang numei le pa lamsang a paktatna taw a maw sia ama pumpi tungah maw ahi hi.

¹⁹Na pumpi uh sia Pathian hong piak, note sungah a teang Thaa Thiangtho ii biakinn ahi hunlam he ngawl nu ziam? Note pumpi sia noma neisa hi ngawl a, Pathian neisa ahi hi;

²⁰ama in note manh pia a, hong lei sa na hi uh hi. Tua ahikom na pumpi uh sia Pathian minthan natu in zangh tavun.

1 Corinth te 7

Kiteenna vai Doknate

¹Tu in, nong laithakna uh thute huvau kong son tu hi. Pasal khat sia zi nei ngawlin om le pha hi.

²Ahihang paktat ngamtatna tam lawlawm ahikom, pasal khat sim in zi khat a nei tu hi a, numei khat sim in pasal khat a nei tu ahi hi.

³Pasal in a zi tungah a vaipuak zo a, zi in pasal tungah a vaipuak zo in, tuaciang a kitaangsapna tetek ah kilungkimsak tu hi.

⁴Zi in ama pumpi a uk hi ngawl a, a pasal ii uk ahi hi; tuasia bangma in a pasal in ama pumpi a uk hi ngawl a, a zi ii uk ahi hi.

⁵Hun khat sung thungetna in hun na zak thei natu uh thukimna nei masa na hi bua na uh le, khat le khat na kinial heak vun; ahihang tua zawk ciangin nupa ngeinate zom kik vun. Hi bangin hi le uhte pumpi kitek laakna hangin, a piang Satan ze etna na lel natu uh pan kikeam zo tu nu hi.

⁶Hi bang kong ci ciang thu hong pia hi ngawl a, a zangh nuamte zak thei hi cina ahi hi.

⁷A tatakin ci leang note theampo, keima bangin om thei leute kong oai zaw hi; ahitazong, mihing sim in Pathian tel ih saan tuam tek om a, khat atu in hi tel, a dang khat atu in tua tel, ci in om hi.



⁸Tu in zi le pasal nei ngawl laite le meingongte atu in keima bangin, noma nguak ma om suak le uhte phazaw hi ka ci hi.

⁹Ahihang ci le sa deina, na kitek zo bua uh le, zi le pasal nei vangiat tavun — uukna taw ommawk sangin kiteenna in phazaw hi.

¹⁰A kiteang sa mite atu in keima aituam thupiakna hi ngawlin, Topa thupiakna taw thu kong pia hi: zi in a pasal nusia ngawl het tu hi;

¹¹ahihang a nusia le ama nguakin tang om top tu hi, tua ahibuale a pasal taw kilem kikna vawt tu hi; tuaciang pasal khat in a zi khul thei ngawl tu hi.

¹²A dangte tungah (Topa ci hi ngawl a, keima ci hi): Christ mihing khat in thu um ngawl zi a nei a, tua nu in ama taw a teang tan tu in a thukim le, ama in a zi khul thei ngawl tu hi.

¹³Tuaciangin Tapidaw numei khat ii pasal sia thu um ngawl khat hi a, ahihang a zi taw a teang tan tu in a thukim le a zi in khul thei ngawl tu hi.

¹⁴Banghangziam cile a zi taw a kingawmna hangin thu um ngawl pasal khat sia Pathian in saang thei hi, tuaciang thu um ngawl zi khat sia Tapidaw pasal khat taw a kingawm uh hu in Pathian in saang thei hi. Hi bang hi ngawl hi thong le a tate sia doai biate tanote taw kibang tu uh hi; ahihang tu a bangin, Pathian in tua tate saang thei hi.

¹⁵Ahizong thu um ngawl sia in, a teenpui Tapidaw sia a nusia nuam le, nusia thei hi. Tuabang thute sungah Tapidaw ahi, zi ahizong, pasal ahizong, ama uuk bangin ngamta thei hi. Pathian in thinnop kilemna sungah nungta tu in nang hong sam zo hi.

¹⁶Bangbangin Tapidaw zi khat in na pasal ngupna ngasak zo ngawl tu ci paih thei tu ni ziam? Ahibale bangbangin Tapidaw pasal khat in na zi ngupna ngasak zo ngawl tu ci paih thei tu ni ziam?

Pathian Sapna bang Nungta in

¹⁷Note khat sim in Topa ii tel hong piak bang le Pathian ii hong sap lai na om uh bangin nungta suak tavun. Hisia in pawlpi theampo tungah zui tu ka hil thu ahi hi.



¹⁸Vunteap ki at sa khat in Pathian sapna a saang le ama in vunteap at kiteptee nate vawk tu hanciam kul ngawl hi. Vunteap a ki at ngawl khat in, Pathian sapna a saang le, vunteap at kul ngawl hi.

¹⁹Banghangziam cile pasal khat vunteap at le at ngawl sia bangma thupi ngawl hi; Pathian Thupiakte zui tu sia a thupi ahi hi.

²⁰Pathian ii sapna a saan hun lai a, a omzia babang in, mihing khat sim in om taken.

²¹Pathian hong sam laitak in sila khat na hi ziam? Phamaw ngawl hi; ahihang a suakta khat na sua thei natu hunpha na nga le tuasia zangh in.

²²Banghangziam cile Topa ii a sap sa sila khat sia Topa atu a suakta ahi hi; tuasia bangma in, Christ ii a sap sa a suakta mihing khat sia ama ii sila ahi hi.

²³Pathian in manh pia in hong lei sa na hi uh hi; tua ahikom mihingte sila na suak heak vun.

²⁴Ka suapuite awng, note khat sim in hong kisap lai hun a na omzia uh bangin, Pathian taw kithawl in na om top tu uh ahi hi.

Zi le Pasal Nei ngawlte le Meingongte

²⁵Tu in zi nei ngawl pasal nei ngawlte huvau nong dokna taw kisai in: Topa tung panin thupiakna nga ngawl khi hi. Ahihangin Topa hesuakna taw a muan taak khat bangin keima ngaisutna kong pia hi.

²⁶Tu a thin ngimna a om sia taw kisai in, pa khat in ama om babangin a om po tu sia phazaw hi, ci in ka ngaisun hi.

²⁷Zi na nei zo ziam? Tuabang na nei zo le kikhen tu sawm heak in. Zi nei ngawl lai ni ziam? Tua ahile zi zong heak in.

²⁸Ahihang zi na nei le mawna khat a vawt na hi bua hi; pasal nei ngawl numei khat in, pasal a nei le ama in mawna vawt ahi bua hi. Ahihang a kiteang mihingte ii nisim in a thuak thei ngimnate taw kipeal leute hong oai ka hi hi.



²⁹Ka suapuite awng, ka ci nop sia in hisia ahi hi: hun tam om nawn ngawl ahi ciang, tu pan kipan zi nei pasal neite in a nei ngawl bangin om tu uh hi;

³⁰a kapte, a hee ngawl bang; a nuite, a lungdam ngawl bang; na a leite, a leisa nate a nei ngawl bang,

³¹leitung thil le vanhte taw kisai in nasep neite in tuate taw hunbit a komla ngawl bangin a om uh kul tu hi. Banghangziam cile hi leitung in tu a bang ahile, ngei kip nawn ngawl tu hi.

³²Thin ngimna pan na suatak tu sia kong deisak hi. Zi nei ngawl khat in Topa nasepna thinbot hi, banghangziam cile ama in Topa lungkim natu hanciam hi.

³³Ahihang zi nei khat in leitung nate thinbot hi, banghangziam cile, a zi lungkimsak nuam hi;

³⁴tua ahikom ama sia a lang le a lang mun nii panin kikai hi. Pasal nei ngawl numei ahibuale ngaknu thiangtho khat in Topa ii nasepna thinbot hi, banghangziam cile ama in a pumpi le a thaa kipum aap tuam nuam hi; ahihang pasal nei numei khat in leitung nate thinbot hi, banghangziam cile ama in a pasal lungkimsak nuam hi.

³⁵Hi bang teng kong sonna in, noma kong hu nopna hang ahi hi. Note tungah kikhaatnate hong koi nuam hi ngawl khi hi. Tua hizaw ngawlin, a maan le ahi tu bangin seamin, Topa ii na na sepna sungah kheet nei ngawlin noma le noma na kipiak bup tu ka deina ahi hi.

³⁶Nupa kop tu in a kilungkim sa, a teang ngawl tu in a khensatte thu huvau: a pa sia in teenpui buale numei tungah a kilawm bangin ngamta ngawl kisa a, tuaciangin ci le sa uukna nasia mama ahikom a kiteen ngawlin phamaw hi ci in a ngaisun kik le, ama uuk bangma in amate kiteang taken. Hisia sungah khialna mawna om ngawl hi.

³⁷Ahihang pa khat sia zawthawk thu taw hi ngawlin, kiteang ngawl tu in a thin a khensat le, tuaciang ama deina ki uk takpi zo a, a vawt tu sia khensat zo ahi nale, tua numei a teenpui buale a pha in ngamta ahi hi.



³⁸Tua ahikom zi nei sia zongh thupha seam hi a, ahihang zi nei ngawl pasal sia in thupha seam zaw lai ahi hi.

³⁹Pasal nei numei khat in a pasal nuntak laiteng a suakta bua hi; ahihang a pasal a thi le a teenpui nop pawpo taw a kiteen thei natu in suakta hi, ahizong Tapidaw khat ahile bek teenpui thei tu hi.

⁴⁰Ahihang ama om ngei in om pole pasal a nei kik sangin a lungdam zaw tu hi. Tua in keima ngaisutna hi a, tuaciang keima zongh Pathian ii Thaa nei in ka kingaisun hi.

1 Corinth te 8

Milim Biakna ah A kizangh An huvau

¹Tu in milim biakna ah a kizangh an huvau lai nong thaak uh te kong son tu hi. Amate ci bangma in, “Eite theampo in heakna ih nei hi,” ci thu in thumaan ahi hi. Ahizong tuabang heaknate in mihing khat kisasattheisak hi; ahihangin itna in lemh to hi.

²Akuama po he a kisa sia in a heak tu bang tatak in he ngawl ahi hi.

³Ahihang Pathian a it mihing khat sia Pathian in he hi.

⁴Tua ahiciang, milim biak natu a kizangh an neakna huvau ah: milim ih ci sia a om takpi ngawl khat atu ahi sia ih he hi; eite in Pathian khat bek om ahi hunlam ih he hi.

⁵Vantung ah ahizong leitung ah ahizong “pathiante” a kicite a om hial zong, tuaciang “pathiante le Topate” tam ma om kale zong,

⁶eite atu in Pa ahi Pathian khat bek om hi, ama sia na theampo a Bitphuapa hi a, ama atu in eite a nungta ih hi hi; tuaciangin Topa khat bek ahi Jesus Christ om a, ama tungtawn in na theampo kubitphua a, ama tungtawn in eite ih nungta hi.

⁷Ahihang hi thumaan thutak sia mihing sim in he ngawl hi. Tuni dong ma mihing pawlkhat te in milimte huvau ah kingeina see zo a, tua a piaksa an a neak uh ciang milim khat ii neisa an ne bangin kingaisun lai uh hi; amate sia thu tel zo ngawl ahikom, tua an in amate ninsak ci in ngaisun uh hi.



⁸Ahizong an in Pathian taw kizopna phatuamsak ngawl tu hi; ih neak ngawl hang bangma ih sumh bua tu a, ih neak hang zong bangma kimeet tuan ngawl tu hi.

⁹Ahizong note suakta in na ngamtatna in, upna ah a thaneam mihingte mawna sungah na puksak ngawl natu in na kidawm tavun.

¹⁰Sonteena in hi thu huvau ah a thu tel la, mihing khat in “heakna” a ci sia a nei note, milim biakbuk ah na anneak hong mu tu ci leang; tuasia in milim biakna ah a kizangh an a neak ngam natu in thapia suak ngawl tu nu ziam?

¹¹Tua ahikom ama atu in Christ a thi, a thaneam hi na suapuipa sia nang ii “heakna” hu in lal tu hi!

¹²Hi bangin, na Tapidaw suapuite tungah na maw uh ciang le amate ii thu tel laakna na belap ciang Christ tungah a maw na tang uh hi.

¹³Tua ahikom an in ka suapuipa a khialsak le, ka suapuipa sia mawna sungah ka puksak ngawl natu in, sa ka ne kik ngei nawn buatu hi.

1 Corinth te 9

Sawltak khat ii Ngatuakte le Sep tute

¹Keima in a suakta mihing khat hi ngawl khi ziam? Sawltakpa khat hi ngawl khi ziam? Ih Topa Jesus mu ngei hi ngawl khi ziam? Topa atu ka sepna ii nga sia note hi ngawl nu ziam?

²Ngualdangte in sawltak khat bangin hong saang bua hial zong, note in nong saang takpi uh hi! Topa taw kipumkhat a na nuntak uh hu in, noma mama sia sawltak khat ka hina a kilakna ahi hi.

³Mihingte in hong sit ciang, hisia in keima le keima ka kihukna ahi hi:

⁴Ka nasepna hu in kei in an le tuite hong kipiak natu thu om hi ngawl ziam?

⁵Sawltak dangte, Topa suapuite le Peter ettee in, ka khualhaw ciang ka kitholpui tu Tapidaw zi khat nei thei natu thu om hi ngawl ziam?

⁶Tua ahibuale koma kivaak natu zongin na a seam sia Barnabas le kei bek hi khu ziam?



⁷Ama ii sum zangh a, ngalkap sung a seam ngalkap om ngei na ziam? A sapit huan sung pan a piang sapit nga a ne ngawl lothopa akua om ngei ziam? Ama tuute ii noai a ne ngawl tuucingpa a om ziam?

⁸Nisim a ettee thei hi bangte taw keima le keima ka kidep tu kul ngawl hi, banghangziam cile Thukham in tuabang ma in ci hi.

⁹Moses Thukham sungah, “Khuital khat an cil in na zak uh ciangin, a muk na tuamsak heak vun,” ci in ih sim hi. Tu in, Pathian in khuitalte a thin nuammaw ziam?

¹⁰Ama in tuabang a ci ciang koma hong ci nopna tatak hi ngawl ziam? Hi hi, tua thu in koma atu in a ki at ahi hi. Lothopa le anlapa in, an a kilate hawmkhawm tu ci in lametna taw diang ahi uh hi.

¹¹Kote in note sungah thaa thaici kong poai uh hi. Tuaciang note tung panin, leitung hamphatnate nga le ung tam lei tu ziam?

¹²Ngualdangte in note tung panin, hite nga natu lametna nei thei ahile, ko in a lianzaw ngawngawn muangmaw thei ngawl tu khu ziam? Ahihang hi ka nga tuak uhte hong zangh ngei ngawl khu hi. Tua hizaw ngawlin, Christ huvau Lungdamna Thupha lampi a nokkhaksak ngawl tu in haksatna theampo a thuak hi zo khu hi.

¹³Biakinn sungah naseamte in Biakinnpi panin an nga a, biakna tau tungah sangaw biakpiakna seamte in, a satel nga uh hi.

¹⁴Tuasia bangma lungdamna thupha a hilte in, tua ii tung pan a nuntak natu kivaak kitaana nga tu ci in Topa ii thu a piak sa hi.

¹⁵Ahihang hi ka ngatuak uhte ka zangh ngei bua a, tu a lai kong thaakna zongh tuabangte keima atu in a la nuam ka hi bua hi. Tua sangin ka thi masa nuam hi! Hi kisaktheinate kuama in a luithawthong thu a sua buatu hi.

¹⁶Lungdamna Thupha ka hil hu in, ka kisuantaak natu thu ka nei bua hi. Tuasia tatak ma seam tu in hong kisawl hi. Tuaciang lungdamna thupha hil ba leng kei atu in bangza in lau huai tu ziam!



¹⁷Keima uuk thu in ka tealna taw ka nasep seam hi leng, thaman hong kipiak tu ka lamem tu hi; ahihang sep tu pealmaw in nei a, a seam ka hi hi, banghangziam cile Pathian in kei hong muang a hi vaipuak hong aap hi.

¹⁸Tua ahile bang thasum ka saang ziam? Lungdamna thupha atu nasepna sungah ngatuakte la ngawl, sum la ngawlin, Lungdamna Thupha hil theina hunpha ka nga sia in, ka noptuamna thupha ahi hi.

¹⁹Keima in kuama ii sila ahi ngawl, mihing suakta khat ka hi hi; ahihang mihing a tam thethei ka nga natu in ngual theampo ii sila ka kisuaksak hi.

²⁰Jewte taw na ka sepkhop laitakin, amate ka nga thei natu in Jew khat taw kibangin ka nungta hi; Moses Thukham ukna nuai ah om ngawl ka hi hang, tuabang a omte ka nga thei natu in, Thukham ukna nuai ah a omte bangin ka ngamta hi.

²¹Tuasia bangma Gentilete taw na ka sepkhop ciangin, amate ka nga thei natu in, Jew Thukham puasias ah a om Gentilete khat bangin ka om hi. Hi bangin ih ci ciang, Pathian thukham ni ngawl khi hi ka cinopna hi ngawl hi; a tatak sia Christ Thukham nuai ah ka om hi.

²²Upna thaneamte kawm ah ka om ciang, amate ka nga thei natu in, amate khat bangin thaneam in ka om hi. Tua ahikom ahi thei tu lampi khat po taw ahizong amate pawlkhat beak ngupna a nga thei natu in, mihing theampo ii a diksak thethei tu in ka om hi.

²³Hite theampo sia lungdamna thupha hangin thupha ka hop thei natu a seam ka hi hi.

²⁴Tai kidemna sungah a kihel tam mama ahihang amate sung pan a zo khat bek in zawna tel nga ahi hunlam sia na heak uh ahi hi. Tua ahikom zawna tel na nga thei natu in tai vun.

²⁵A kikhomsuan ngawl paakkual lukhu khat a kikhuksak natu in, a kimai khat sim ii a sinna sungah a haksas mama kitekna nuai ah kipum aap hi; ahihang eite ih hile, a tawntungin a kip tel atu in ih seam hi.

²⁶Tua hu in matut natu mun khau kithungna dong ah, tang takin ka tai hi; tuasia hu ma in ngual a thong khial ngawl kithok thiampa taw ka kibang hi.

²⁷Tua kidemna ah ngual ka thato zawkciang a kihel zo ngawl pa ka sua ngawl natu in keima le keima kithong in ka pumpi ka ngimsak a, cing takin ka kitek hi.

1 Corinth te 10

Milim huvau Kidop natu

¹Suapuite awng, Moses nungzui ih taangpupite tungah bang piang ziam ci in na phawk kik natu ka dei hi. Amate a theampo in meeikaai ii dalna nuai ah om a, San Tuipi kantan in suakta siat uh hi.

²Meeikaai sung le tuipi sungah, amate teng Moses nungzui a hina uh taw ki baptize uh hi.

³A vekpi in thaa anluum a kibangin ne uh a,

⁴thaa tui a kibangin dawn uh hi. Amate taw a tonkhawm thaa suangpi panin tui dawn uh hi; tua suangpi sia Christ ma ahi hi.

⁵Tuabang ahi bel hang, amate a tamzaw tungah Pathian in diksa ngawl ahikom a luanghawm uh sia senneal ngam sungah kithethaang hi.

⁶Tu in hite theampo sia eite atu in, ettee tu lim hi a, amate dei bangin a sia nate ih dei ngawl natu kidopna hong piakna hi,

⁷tua bek hi ngawlin, amate pawlkhat ii milim a biak bangin, ih biak ngawl natu in kidop natu hong piak ahi hi. Laithiangtho ci bangin, “Mihingte in zuneakna le numei le pa maitatna a om poai sungah kihel uh hi”.

⁸Eite sia amate pawlkhat bangin, numei le pa paktatna a vawt uh bangin ih ngamta bua het tu hi — ni khat thu in amate mihing tulkul le tulthum puk in thi uh hi.

⁹Amate pawlkhat bangin Topa ih ze et bua het tu hi — amate ngul in tu lum hi.



- ¹⁰Amate pawlkhat bangin ih phuntaal bua het tu hi — Thina ii Vantung lalang in amate lalcipsak hi.
- ¹¹Hi thupiang theampo sia ngual ii ettee tu lim hi a, eite kidop thei natu in lai sungah a kiciamtee ahi hi. Banghangziam cile leitung bo kuan hun sungah eite ih om hi.
- ¹²Kip takin ding a kisa pawpo in, a puk ngawl natu in kidawm taken.
- ¹³Ze-etna na thuak sa uh theampo sia mihingte tungah a tung bul thu ahi hi. Ahihang Pathian in a kamciam kholet hi, tuaciang ama in a kip in na om thei natu note thuak zawk ngawl tu ze etna hong thuaksak ngawl tu hi; hong ki ze et ciangin zongh thuak zawk thahatna hong pia tu a, na suatak natu lampi khat hong hon tu hi.
- ¹⁴Tua ahi ciang ka it lawmte awng, milim biakna na pial tavun.
- ¹⁵Mihing thu tel theite tungah thuson tu bangin note tungah kong son hi; ka sonte sia noma le noma in na khensat tavun.
- ¹⁶Topa Zan An neakna hai hangin Pathian tungah lungdam ih ko hi; tua hai taw ih dawn ciang Christ chisan a siim khawmte ih hi hi. Tuaciang anluum ih balnen hi: hi a kibalneen anluum ih neak ciang, Christ pumpi a siim khawmte ih hi hi.
- ¹⁷Banghangziam cile tua anluum sia khat bek hi a, ei teng tam ih hihang, anluum khat bek ne khawm tek ih hi man eite pumkhat ih hi hi.
- ¹⁸Israel mite thu ngaisun vun; sangaw biakpiakna an a nete in, Pathian biakna tau nasepna sungah a kihel uh hi.
- ¹⁹Tua ahile milim ahibuale, milim biakna ah a kipia ante thupisak ka hi ziam?
- ²⁰Hi ngawl hi! Ka ci nopna in doai biate ii biakna tau tungah sa ngawte sia doaite atu a kipia hi a, Pathian tungah a kipia hi ngawl hi. Tuaciang doaite taw na kipawlkhop tu ka dei bua hi.



- ²¹Topa hai le doaithe hai pan zong, na dawnkhawm thei buatu uh hi; Topa sabuai le doaithe sabuai zongh zangh khawmin an na ne thei buatu uh hi.
- ²²Tua hibuale Topa sia ngual eang pa suaksak nuam ih hi ziam? Ama sangin eite hat zaw kisa ih hi ziam?
- ²³Amate in, “Na theampo vawt thei natu thu ih nei hi,” ci uh hi. Tuasia maan hi, ahihang na theampo pha siat ngawl hi. “Na theampo vawt thei natu thu ih nei hi,” — ahihang na theampo in hong hu thei ngawl hi.
- ²⁴Kuama in ama phat tuam natu a et tu hi ngawlin, ngualdangte phattuum natu a et thei tu kisamh hi.
- ²⁵Sa kizuakna munah a kizuak theampo na neak thei natu in suatakna na nei uh a, thinnopmawkna taw bangma dok kul ngawl hi.
- ²⁶Banghangziam cile Laithiangtho in, “Leitung le a sungah a om na theampo sia Topa neisa ahi hi,” ci hi.
- ²⁷Thu um ngawl khat in an ne tu in hong sam a, pai na sawm le thin nopmawkna taw bangma dongh se ngawlin na mai ah hong kilui po ne in.
- ²⁸Ahihang khat po in, “Hi an sia milim a kipia an hi,” hong cile, tua an sia hong sonpa atu khualna le, thinzaw ngawl hang komin, ne heak vun —
- ²⁹tuabang ka ci ciang, noma thinsung ka ci na hi ngawlin, hong sonpa thinsung ka ci nopna ahi hi. Hi thu tungtaang ah khat po in, “Tua ahile pha hi, ngualdang ngaisut natu khualna in, ka uk bang ka ngamtat tu, banghangin hong kikhaktan thei tu ziam, ci thei tu hi.
- ³⁰Ka an atu in, Pathian tungah lungdam ka ko nale, banghangin ngualdang khat in lungdam ka ko sa an huvau sia bangbangin hong sit thei tu ziam,” a ci om tu hi.
- ³¹Pha hi, na vawt pawpo, na neak na dawn pawpo Pathian minthan natu in vawt vun.
- ³²Jewte atu ahizong Gentilete atu ahizong, Pathian pawlpi atu ahizong, haksatna a piangsak ngawl nuntakzia taw nungta tavun.



³³Keima vawt bangin vawt po vun; ka vawt theampo sungah mihing khat sim ka lungkimsak natu in ka hanciam a, amate ngupna a nga thei natu in, keima phattuam natu ngaisun ngawlin, a vekpi phattuam natu ka ngaisun hi.

1 Corinth te 11

¹Christ zia le tong ka zui bangin, kei zia le tong hong zui tavun.

Biakpiakna sungah Lu Tuamna

²Nong phaw tawntung uh hu le note tungah kong piak hilciannate na zui uh hu in kong pok hi.

³Ahihang na tel tu uh ka dei thu pan, Christ in mihing theampo tungsia ah a lianbel hi a, pasal in zi tungsia ah a lianbel hi in, Pathian in Christ tungsia ah a lianbel ahi hi.

⁴Tua ahikom pasal khat in, mihon sungah a thunget ciang ahizong, Pathian thu a thansak ciang ahizong, a lu tungah khuk khat a nei le, Christ mindaisak suak hi.

⁵Tuaciang numei khat pawpo in mihon sungah thu a nget ciang ahizong, Pathian thu a thansak ciang ahizong, a lu tungah bangma a om buale, a pasal mindaisak suak a; a lu a meettol numei dangkhat taw, kilamdanna nei ngawl hi.

⁶Tua nu in a lu tungah khuk khat a nei buale, a sam zongh a meet vet tu ahi hi. Tuaciang khat in a lu a tol in meet tu ahibuale a sam a tan tu sia maizum huai thu ahi bangma a lu tungah tuamna khat nei le pha hi.

⁷Pasal khat in a lu seal kul ngawl hi, banghangziam cile ama in Pathian lim le vaangletnate, ama tung panin kilanghsak hi. Ahihang numei in pasal vaangletna a kilanghsak hi;

⁸banghangziam cile pa sia numei sung panin kubitphua ngawlin, numei sia pa sung pan ki bitphua hi.

⁹Pa in numei atu kubitphua hi ngawl a, ahihang numei in pa atu in a kubitphua hi.



¹⁰Tua ahiciang vantung lalangte hangin, numei in a pasal ii thuneina nuai ah om hi, ci in lak natu in a lu tuamna khat nei tu hi.

¹¹Ahihang Topa sung ih nuntakna ah, numei in pasal ngawl taw tuam din thei ngawl a, pasal zongh numei ngawl taw tuam din thei ngawl hi.

¹²Banghangziam cile numei sia pasal panin a kivawt bangma in, pasal zongh numei sung pan a suak ahi hi; tuaciangin na theampo a piangsak sia Pathian ahi hi.

¹³A lu tungah bangma a om ngawl numei khat sia mihon biak piakna sungah Pathian tung thu a nget tu sia a kilawm le a kilawm ngawl noma in khensat tavun.

¹⁴Banghangziam, leitung pianzia mama zongh in pasal samsau a hoai le a maizum huai hi a,

¹⁵ahihang numeite tungah tuasia in hoina khat hi ci in hong hil hi. Numei samsau sia ama a kituam natu in, a kipia ahi hi.

¹⁶Ahihang khat po in hi thu a nial nuam tha le, eite ih hi zong, Pathian pawlpite ahizong, biakpiakna ah ngeina dang kinei ngawl hi ci sia bekma son tu ka nei hi.

Topa Zan An

(Mt 26.26-29; Mk 14.22-25; Lk 22.14-20)

¹⁷Hi a nuai ah ngamtatzia tu hilnate sungah ahile no kong pok bua hi, banghangziam cile biak kikhopna ah a tatakin phatna sangin siatna piang zaw hi.

¹⁸A masa phitbel in na kikhopna uh sungah a kilangpan pawl tuatuamte om hi ci in hong kison hi; hisia in a maan na mun om tu ka um hi.

¹⁹(No sungah thutangzaw sia a kimu thiang natu in kikhennate ahile a om kul hi.)

²⁰A pawl in na kikhop uh ciang, na neak uh sia Topa Zan An hi ngawl hi.



²¹Banghangziam cile na neak uh ciang mihing khat sim in, noma an tek ma leap papai na hi uh kom pawlkhat sia ngilkial in na om uh a, a dang teng sia zukham in om hi.

²²Tuabangin na neak na dawn natu uh, inn tek nei hi ngawl nu ziam? Tua ahibuale Pathian pawlpi zawngsak in, a nei ngawlte na maizumsak nopna ziam? Hi thu huvau ah bang son tu in nong muangmaw uh ziam? No hong pok tu khi ziam? Hong pok ngawl het tu khi hi!

²³Banghangziam cile Topa hilcianna ama tung pan ka saante sia note tungah kong pia sawn hi: a thu in Topa Jesus a kileeheak tu nitak in, ama in anluum la a,

²⁴Pathian munah lungdam a ko zawkciang anluum balneen in, “Hisia in note atu in a kipia ka pumpi ahi hi. Kei nong phawna in hi bangin vawt vun,” ci hi.

²⁵Tuasia bangma zan an a neak zawkciang ama in hai la in, “Hi hai in ka chi taw a kikipsak Pathian ii thuciam thak ahi hi. Na dawn uh sim in, kei nong phawna in na dawn vun,” ci hi.

²⁶Hisia ii khiakna sia, hi anluum na neak uh sim le, hi hai panin na dawn uh simin ama hong pai kik dongin, Topa ii thina thu a thangsak na hi uh hi.

²⁷Hi thu taw kipee in khatpo in, ama zatak ngawlina taw Topa anluum ne a, hai a dawn le, tua mi in Topa pumpi tung le a chi tungah a maw ahi hi.

²⁸Tua ahikom mihing sim in, ama le ama kisittel phot tu a, tua zawkciang anluum ne in, hai panin dawn tu hi.

²⁹Banghangziam cile anluum a neak ciang le hai panin a dawn ciangin, Topa pumpi ii khiakna a tel bua le, a neak a dawn hu in ama le ama tungah thukhenna a tungsak suak hi.

³⁰Tua hu in note sungah mihing tam mama thazawm in a cina a, tam ma na thi zo uh hi.



³¹Eima le eima kisittel phot in hi leang, Pathian thukhenna sungah ih theng buatu hi.

³²Ahihang eite sia leitung bup taw hong kimawsak ngawl natu in, Topa in thu hong khen a, daan hong pia ahi hi.

³³Suapuite awng, tua ahikom, Topa Zan An ne tu in, na kikhoptua uh ciangin, khat le khat na kingak vun.

³⁴Tuaciang na kikhop uh ciangin a ngilkial khat po a om le, Pathian thukhenna nuai ah na tum ngawl natu in inn ah an ne taken hi. Thudangte sia, kong pai ciangin ih son tu hi.

1 Corinth te 12

Thaa Thiangtho Letsongte

¹Tu in Thaa Thiangtho letsong huvau nong at uh teng kong son tu hi. Ka suapuite awng, tuate huvau thumaan thutak sia na heak tu uh ka dei hi.

²Pathian he ngawlte na hi uh lai in, note sia nuntakna a nei ngawl milimte biakna sungah lampialna tam mama taw hong kipaipui ahi sia na heak uh hi.

³Pathian Thaa ii a lampuite kuama in, “Jesus in haamsiat thuak hen,” ci thei ngawl a, tuaciang Thaa Thiangtho lamlakna a om ngawl po kuama in, “Jesus in Topa hi,” ci thei ngawl hi ci thu kong hesak nuam hi.

⁴Thaa Thiangtho letsongte sia a nam tuatuam om hi, ahihang a kibang Thaa khatbek in tuate pia hi.

⁵Nasepna a nam tuatuam om hi, ahihang a kibang Topa khat atu kiseam hi.

⁶Sepna sungah thiamna nam tuatuam om hi, ahihang mihing sim atu amate sepna san tek ah thiamna nam tuatuam a pia Pathian sia a kibang hi.

⁷Mihing theampo phattuam natu in mihing khat sim sungah Thaa a om hunlam a nanam in kilak hi.

⁸Thaa in mihing khat tungah ciimna taw kidim thu khat pia a, a dang khat tungah tua Thaa ma in heakna taw kidim thu khat pia hi.



⁹Tua a kibang Thaa khat sia ma in mihing khat tungah upna pia a, a dang khat tungah cidamsakna vaang pia hi.

¹⁰Thaa in khat tungah nalamdang lak theina vaang pia a; a dang khat tungah Pathian Thuhil theina letsong pia hi; tuaciang a dang khat tungah, letsongte sia Thaa Thiangtho pan hong pai ahile ahi ngawl khentel theinate pia lai hi. Khat tungah kam tumdang pau theina pia a, a dang khat tungah kam tumdangte phen theina pia hi.

¹¹Ahihang hite theampo a vawtpa in a kibang Thaa khat bek ahi hi; tuaciangin ama uuk babangin letsong tuatuam mihing khat sim tungah pia hi.

Pumpi khat sungah Khentuamte

¹²Christ in khentuam tam a nei pumpi khat taw kibang hi. A khen tuatuamte taw kivawt ahihang, pumpi khat ahi veve hi.

¹³Tuasia bangma in, eite theampo sia Jewte ih hizong, Gentilete ih hizong, sila le sila ngawlte ih hizong, a kibang Thaa khat in, pumpi khat sungah hong ki baptize a, tuaciangin dawn tu Thaa khat sia ei theampo hong kipia zo hi.

¹⁴Banghangziam cile pumpi in khen khat bek taw a kivawt bua a, khentuam tam mama taw a kivawt ahi hi.

¹⁵Peang in, “Kei sia khut hi ngawl ka hiciang pumpi neisa ka hi bua hi,” cile zong tua in pumpi ii khen khat a hina a bosak tuan buatu hi.

¹⁶Tuaciangin bil in, “Kei sia mittang hi ngawl ka hi ciang, pumpi neisa ka hi bua hi,” cile zong tua in pumpi ii neisa a hina a bosak tuan buatu hi.

¹⁷Pumpi buppi in mittang khat hile bangbangin khua za thei tu ziam? Tuaciangin bil bek hile bangbangin a ngimnam he thei tu ziam?

¹⁸Ahizong Pathian in pumpi khen tuatuamte sia ama deina sasan tek ah koi hi.

¹⁹A buppi in a khen tuam nam khat bek hile pumpi a om buatu hi!

²⁰A khentuam tam mama om ahihang pumpi khat bek om hi.



²¹Tua ahikom mittang in khut kungah, “Nang kong tulmaw bua hi!” ci thei ngawl tu hi. Lutang in peang munah, “Nang kong tulmaw bua hi!” ci thei ngawl tu hi.

²²Tua hi ngawlin, pumpi sungah a thazawm tuak zaw pumpi khentuamte ngawl taw bangma ih vawt thei bua hi;

²³tuaciangin kimanna tam nei ngawlin ih hen tua khentuamte sia phatak ih kepcing te hizaw hi; tuaciang pumpi khentuamte sungah a et hoi keak ngawlte ahile ciliapna taw a tuan in ih kep kul a,

²⁴tuabang kep tuam tu sia pumpi sungah a hoi zaw khentuamte in a tulmaw bua hi. Pathian mama in ciliap tu a taangsamh khentuamte a kiciliap thei zawk natu in pumpi sia ngawmtua hi.

²⁵Tuabangin pumpi sungah kikhenna a om bua hi, ahihang ama ii khen tuatuamte khat le khat kithinbotna nei uh hi.

²⁶Pumpi sungah khen tuam khat in, thuakna a nei le, a dang khentuam theampo in thuakpui hi; khentuam khat a kipok le, a dang khentuam teng in lungdam pui tek hi.

²⁷Note theampo in Christ pumpi na hi uh a, tuaciang khat sim sia tua ii khentuam khat veu ahi hi.

²⁸Pawlpi sungah Pathian in a vekpi ma a omna tu san tek ah koi hi: a masa phit in sawltakte, a niina ah kamsangte, a thumna ah lai hil syate; tua zawkciangin nalamdang lakna a vawtte, tua zom ah cidamsakna vaang a kipiplate, ngual hu thei ahibuale, lamlak thiamte, tua ahibuale kam tumdang taw a paute ahi uh hi.

²⁹Amate in sawltakte, kamsangte, lai hil syate hi siat ngawl hi. Mihing khat sim in nalamdang lakna vawt thei natu in vaang ahizong,

³⁰cina damsakna ahizong, kam tumdang taw pauna le tua kamte phen theina sia ahizong vawt theina vaang a nei bua uh hi.



³¹Tua ahikom, letsong a thupizawte deibel in na nei tavun. Ahitazong, a vekpi sung pan a pha bel sia in a nuai a bang ahi hi.

1 Corinth te 13

Itna

¹Mihingte ii kampaute le vantung lalangte ii kampau ngangawn ka pau thei hial hangin, itna ka nei buale ka paute sia zam nging daak nging bang bek ahi hi.

²Pathian ii hu mop thuhil theina nei a; heakna theampo le thuku theampo telna nei a, mualte khiin zawk natu a kisamh upna teng ka nei hangin — itna ka nei buale kei sia bangma ka hi bua hi.

³Ka neisa na theampo pia siat in, ka pumpi ngangawn a kihallum tu dongin, ka piak hial hangin, itna ka nei buale, hite in kei atu bangma phatna hong pia bua hi.

⁴Itna in thin uai a, dik hi; itna in ki eenna nei ngawl a, kisathei ngawl, kiphasak ngawl hi;

⁵itna in philphit ngawl, duhop ngawl, thintom ngawl hi; itna in ngual khialnate ciamtee ngawl hi.

⁶Itna in ngitlona thu ah lungdam ngawl hi, thumaan thutak ah lungdam hi.

⁷Itna in thinkiam ngei ngawl a; a upna, a lametna le a thinsauna bo ngei ngawl hi.

⁸Itna in a tawntungin kip hi. A kipualaak thute om ahihang tawmvei atu bek ahi hi; kam tumdangte pau theina letsongte om ahihang bo tu hi; heakna letsong om ahihang bo tu hi.

⁹Banghangziam cile eite heakna le thupualaak theina letsongte sia cingtaak ngawl hi;

¹⁰ahihang a kicing sia hong thet ciangin a cingtaak ngawl teng bo tu hi.

¹¹Patang ka hi lai in ka pauna, ka phawna, ka khua ngaisutte in patang bang ahi hi; tu in pasal khat ka hi ciangin patang vai teng ka nusia hi.



¹²Tu in ih muna in, limlangh sungah a kimu thiang ngawl lim le meal bang ahi hi; tuazawk a hun hong thet ciangin, maitang kisi in ih mu tu hi. Tu a ka heak sia kicing tak ngawllai hi; tuazawkciang Pathian in kei hong heakna bangma in, a kicingin ka he tu hi.

¹³Tu laitakin a taanglai thu thum teng sia: upna, lametna le itna hi a; hi teng sung pan a lianbel sia in itna ahi hi.

1 Corinth te 14

Thaa ii Letsongte huvau Sonthuana

¹Tua ahikom na hanciam tu uh sia, ki itna ahi hi. Thaa Thiangtho letsongte, a tuanin Pathian thu thansak theina letsong na lungngul vun.

²Kam tumdang a pau sia in ngualdang tungah pau hi ngawlin, Pathian tungah pau ahi hi, banghangziam cile kuama in tel ngawl hi. Ama in Thaa vaangletna taw a kiseal thuman thutakte son ahi hi.

³Ahihang Pathian thu a thangsakte in mihingte tungah pau hi a, amate tungah huna, hanthotna le heenepna pia ahi hi.

⁴Kam tumdang taw a paute in ama phat tuam natu bek hi a, Pathian thu a thangsakte in pawlpi bup phattuamna a pia hi.

⁵No theampo kam tumdang pau thei leute kong oai hi; ahizong Pathian thu thansak theina letsong nei leute kong oai zaw hi. Banghangziam cile pawlpi bup in phattuamna a nga thei natu in, no sungah a khiakna a son thei pai om ahi bua nale, kam tumdang a paute sangin Pathian thu thansakna in manh nei zaw hi.

⁶Tua ahikom ka suapuite awng, no kungah kong pai ciangin, kam tumdangin hong pau leng, note atu in ka kimanna om tu ziam? Pathian tungpan thupualaakna, heakna, thuhilna ahibuale hilcianna khat pawpo ka nei buale note atu in bekcik zongh kimanna ka nei buatu hi.

⁷Nuntakna a nei ngawl tumthei tamngai ahizong, tengtongte ahizong la in —, a aw kitel thiang vaset in a tum buale akua in bang aw hi ci in tel thei tu ziam?



- ⁸Tuaciangin ngalkap sungah lemle tumpa in, sapna aw a kitel takin, a tum buale akua ngalsim tu in kinging thei tu ziam?
- ⁹Tuasia bangma in kam tumdang taw thu na sonte a thiang buale, akua in hong tel tu ziam? Na kammalte sia vui sungah bo thong tu hi!
- ¹⁰Sim leitung ah kampau nam tuatuam om hi kale, tuate sung pan khiakna nei ngawlkhath zongh a om bua hi.
- ¹¹Ahihang a kam ka tel bua le, hong paupui pa sia kei atu in ngamdang mi suak a, ama mun pan zong, keima in ngamdang mi ka suak hi.
- ¹²Thaa ii letsongte nga tu sia lawp na hi uh ciang, na dang theampo sangin pawlpi a khanto thei natu a hu tu in tua letsongte zak vaial tu na hanciam bel vun.
- ¹³Kam tumdang a pau sia in ama son teng a khiakna phen theina letsong a nga natu in, thungen nak taken.
- ¹⁴Banghangziam cile kam tumdang taw thu ka nget ciangin, ka thaa taw thungen takpi ka hihang ka thungetna sung ah ka ngaisutna kihel ngawl hi.
- ¹⁵Tua ahile bangbangin ngamta tu khi ziam? Ka thaa taw thu ka ngen tu hi, ahizong ka ngaisutna taw zong thu ka ngen tu hi; ka thaa taw la ka sa tu hi, ahihang ka ngaisutna taw zong la sa tu khi hi.
- ¹⁶Pathian tungah lungdam na ko ciangin thaa bek taw na ko le, kikhopna sungah a kihel mihing thawthong khat in, nang lungdamko thungetna sia “Amen” bangbangin hong ci pui thei tu ziam? Ama in nang pauna teng a tel thei natu thu om ngawl hi.
- ¹⁷Pathian tungah lungdamkona na thungetna sia pha teei ahihang ngualdang khat in phat tuamna nei ngawl het hi.
- ¹⁸No sangin kam tumdang tamzaw pau ka hikomin, Pathian ka pok hi.
- ¹⁹Ahihang pawlpi biak kikhopna sungah ngualdangte hilna tu in, kam tumdang kammal a tulsim in ka pau sangin, a kitel thei kammal nga ka pau zaw tu hi.



²⁰Ka suapuite awng, na khua ngaisutna uh ah, patang bang hi heak vun; siatna lam ah patang bang na hi vun, ahihang khua ngaisutna ah na khangthin vun.

²¹Laithiangtho sungah, “Kam tumdangte a pau mihingte tungtawn in, ka mihingte tungah ka pau tu hi, Topa in ci hi. Ngamdang mite kam le muk tungtawn in ka pau tu hi, tua ahibelhang ka mite in kei hong ngai buatu hi,” ci hi.

²²Tua ahikom, kam tumdang pauna letsong sia thu um ngawlte atu in aman lakna hi a, thu umte atu hi ngawl hi, thuhilna letsong ahile thu umte atu in a manlakna hi a, thu um ngawlte atu hi ngawl hi.

²³Tua ahikom pawlpi bup kikhawm hen a, tuaciangin mihing sim in, kam tumdangte taw a pau siasua laitakin — mihing thawthong pawlkhat ahizong, thu um ngawl pawlkhat ahizong hong pai le, note sia mawmaw siat hi hong ci ngawl tu ziam?

²⁴Ahihang mihing khat sim in Pathian thu a son laitakin thu um ngawl pawlkhat ahizong, mihing thawthong pawlkhat ahizong hong pai le a zaak thu taw a mawna kitel tu uh hi. Ama zaakna teng taw ama tungah thu kikhen tu hi,

²⁵ama ii thuku a ngaisut teng a pua ah hong kilangh tu a, ama in kunin Pathian bia in, “A maan tatak in Pathian sia hi sung, note sungah om hi!” ci in pualaak tu hi.

Pawlpi sungah Kalsuanzia

²⁶Suapuite awng, ka ci nop sia hi teng hi. Biakpiakna nei tu in na kikhop uh ciang, mihing khat in biakna la asak tu khat nei tu a, a dang khat in hilcian natu khat, a dangkhat in Pathian tung pan thupualaakna, a dang khat in kamtumdang taw thusonna, a dangkhat ma in thu kison teng phen theina, nei tu hi. Na theampo sia pawlpi phattuamna ahi tu kisamh hi.



²⁷Khat po in kam tumdang a pau le, nii ziam, ahibuale, a tambel in thum in pau tu a, tua zom ah khat zawkciang khat in a ban in pau tu hi, tuaciangin a dangkhat in a kici teng ii khiakna a phen kul tu hi.

²⁸Ahihang a phen thei a om buale, kam tumdang a paute thim taken a, ama le Pathian kilaklaw bek ah pau taken.

²⁹Pathian thupuak a sang nii le thum te in son tu a, a dangte in, a pauna teng sia a maan le a maan ngawl khensat tu hi.

³⁰Ahizong kikhopna sungah a to khat po in, Pathian ii thupuakna a sang le, a pau khat sia tawlna tu hi.

³¹Na vekpi in khat zawkciang khat in, Pathian thupuak sia thangsak thei tu nu hi, tuasia ciangin mihing sim in, heakna hong nei tu a, tha hong nga tu hi.

³²Pathian thu thansak thei na letsong sia a pau sia ii ukna nuai ah om tu hi.

³³Banghangziam cile Pathian in note sia ahi teaptuup tu in hong dei ngawl a, thu kihual le a kilem tu in hong dei hi. Pathian mihingte ii pawlpi theampo ii sung a bangma in,

³⁴numeite sia kikhopnate sungah thim khipkhep in om tu hi. Amate a pau tu ki oai ngawl hi; Jewte thukham ii a ci bangma in amate sia a ukte hi thei ngawl tu hi.

³⁵Amate in bang khat po heak nop a nei le, inn ah a pasalte uh dongh taken. Pawlpi sungah numeite a pau tu sia kilawm ngawl hi.

³⁶Tua ahibuale Pathian kammal sia no kung panin hong pai a hithei tu ziam?. Tua ahibuale note tung bek ah hong tung a hi ziam?

³⁷Mihing khat po in ama le ama Pathian kamtaipa a kisa a, tua ahibuale thaa letsong nei a kisa le, tu a note tungah kong at teng sia Topa thupiak hi ci in tel nanak tu hi.

³⁸Ahizong ama in hi thu a nadon buale ama na nadon heak vun.

³⁹Tua ahikom suapuite awng, Pathian thuthansakna ah, na lungngul tavun a, ahizong kam tumdang paunate na kham heak vun.



⁴⁰Na theampo ahi tu bang le, a kiphu a kilawm bangin vawt tu ahi hi.

1 Corinth te 15

Christ ii Thawkikna

¹Ka suapuite awng, na saan sa uh le na upna tung kho tak na dinna uh, kong hil Lungdamna Thupha huvau tu in kong phawksak kik nuam hi.

²Tua lungdamna thupha sia note tungah kong hil sia ahi hi. A luithawthong in a um nahi buana uh a, pha takin Lungdamna Thupha na kholet uh le tua thupha in note hong ngumtu hi.

³Keima ii ka nga sa teng note tungah kong pia sawn hi, tua thu in thupi bel hi: banghangziam cile Laithiangtho ii at bangma in Christ in eite mawna hangin thi hi;

⁴tuaciang ama kiphum a, ni thum zawkciang Laithiangtho ii at bangma in ama nuntakna ah kithosak hi;

⁵ama in Peter kungah kilak a, tua zawkciang sawltak sawm le niiteng kungah kilak hi.

⁶Tua zawkciang ama sia a nungzui za-nga vaalte kungah thakhat in kilak a, tuate sung pan pawlkhat thi zo ahihang a tam zaw sia nungta nginge lai hi.

⁷Tuasia zawkciang ama in James kungah kilak a, tua zawkciang sawltakte theampo kungah kilak hi.

⁸Keima in nau a sua tu hunin a suak ngawl khat bang ka hi tazongin — a khakbel in kei tung zongh ah hong kilak hi.

⁹Banghangziam cile keima in sawltak sung panin a nobel ka hi a — sawltak khat ci in minpu tu zong ka kilawm bua hi, banghangziam cile Pathian pawlpi ka vawtsia ngei hi.

¹⁰Ahihang Pathian thuthiamna taw keima sia hi bang ciang ka hi a, ama hong piak thuthiamna sia a luithawthong a suak bua hi. Tua hizaw ngawlin, kei sia sawltak dangte sangin, nasia zaw in na ka seam hi. Tua zongh kei nguak ii



sep tatak hi ngawlin Pathian thuthiamna sia kei taw kop in a seam khawm ahi hi.

¹¹Tua ahikom kei tung pan hong pai ahizong, amate tung pan hong pai ahizong, hisia ma ka vekpi in kong hil uh thu hi a, hisia ma in note ii up thu ahi hi.

Eite ii Thawkikna

¹²Tu in kote ii kong hil uh thu in, Christ sia thina panin kitho kiksak hi ci kasap, bangbang in note pawlkhat in a thite nuntakna sungah kitho kik sak ngawl tu hi, ci thei nu ziam?

¹³Tuasia in thumaan ahile Christ kitho kiksak ngawl hi tu hi;

¹⁴tuaciang thina pan Christ tho kik ngawl hile, kote hil tu bangma om ngawl tu a, note up tu bangma om ngawl tu hi.

¹⁵Tua bek dom ngawlin kote sia Pathian tungtaang ah leilot thu son hong kici tu hi, banghangziam cile Christ sia thina panin tho kik hi ci khu hi — ahihang mithite a nungta in ki thosak ngawl hi takpi ahile, ama in Christ a thosak ngawl ahi hi.

¹⁶Banghangziam cile a thite nuntakna sungah tho kik ngawl hile Christ zongh kithosak ngawl hi tu hi.

¹⁷Tuaciangin Christ kithosak ngawl hile, na upna uh sia cithep thu hong suak tu a, noma mawnate sung ma ah na mangthang lai uh hi.

¹⁸Christ sungah thu um mi a thite a bocip hi cina zongh ahi hi.

¹⁹Christ sungah ih lametna in, hi nuntakna sung atu bek pha in a dang omngawl ahile leitung theampo ah a khuangai huai belte ih hi tu hi.

²⁰Ahihang thumaan thu in bang ziam cile, Christ sia thina panin a kithaw kik sakna sia, thina sungah a mute zongh, kitho kiksak tu hi ci in a kip kamciam hong piakna ahi hi.

²¹Banghangziam cile thina in mihing khat tungtawnin hong pian bangma in, thina panin thawkikna zongh, mihing khat tungtawn in hong piang hi.



²²Adam taw a kipumkhat mihing theampo a thi bangma in Christ taw a kipumkhat theampo nuntakna sungah kitho kiksak tu hi.

²³Ahihang mihing sim amate hun tekin kitho kiksak tu hi: Christ sia a masa phitbel tho hi; tua zawkciang ama hong pai kik ciang, ama ii mihing teng tho tu hi.

²⁴Tuasia ciang a tawpna hong theng tu hi; Christ in thaa lamsang ah a ukte, thuneite, vaangletna a neite theampo zong tu a, tuaciangin a Kumpi Ngam sia Pa Pathian tungah aap tu hi.

²⁵Banghangziam cile Pathian in a ngalte theampo zo a, ama peang nuai ah a koisak dong Christ in uk tu hi.

²⁶A khakbel a zaw tu a ngal sia thina ahi hi.

²⁷Banghangziam cile Laithiangtho in, “Pathian in na *theampo* a peang nuai ah koi hi,” ci hi. A kithiang tel thu in “na theampo” ci ciangin, Christ ii peang nuai ah na theampo a koipa, Pa Pathian a kihel bua hi.

²⁸Ahihang Christ ukna nuai ah na theampo a kikoi zawkciang, Tapa ahi ama mama sia, na theampo ama nuai ah a koi Pathian nuai ah ama le ama kikoi tu hi; tuaciang Pathian in a vekpi uk siat tu hi.

²⁹Tu in mithite atu baptize na a vawtte bangbangin ih ngaisun tu ziam? Amate in bang phattuamna piangsak tu in ki muangmaw ziam? Pawlkhat ci bangin, a thite sia nuntakna sungah kitho kiksak ngawl tu ahile tua mihingte in, banghangin mithite atu baptize ziam?

³⁰Kote sia naisim in banghangin launa thuak hi tu khu ziam?

³¹Ka suapuite awng, nisim in thina maingat khi hi! Note hu in, ih Topa Christ Jesus taw kipumkhat a, ih nuntakna hangin note sungah ka nei hi kiphatsana in hi bangin hong pausak hi.

³²Ngamsa ngilote taw kido bang phet in, hi Ephesus khua ah ka dian nate sia mihing tupnate bek hile, ka nga tu bang phattuamna om tu ziam? Mithite sia nuntakna sungah kitho kiksak ngawl tu hile, “An ne zu dawn in om tawng,



banghangziam cile zing ciangin ih thi tu hi,” ci kam teptee om bangin ih om lel tu hi.

³³Theamna thuak heak vun. “Kitholpui pha ngawlte in ngamtatna pha lalsak hi.”

³⁴Ahi tu bangin khua hong phawk kik tavun a, na mawnate kheal vun. No pawlkhat in Pathian he ngawl na hi uh kom a maizum huai na hina uh kong hesak hi.

Thaw kikna Pumpi

³⁵Pawlkhat in, “Bangbangin a thisate kitho kiksak tu ziam? Amate in bangbang pumpi nei tu ziam?” ci tu nu hi.

³⁶No mihing mawmaw te! Thaici khat lei sungah na tu uh ciangin, a thi phot buale a po bua hi.

³⁷Tuaciang, zungtaang ahizong a dang thaici khat pawpo ahizong, tua na tu uh thaici sia a khangto tu, a kung po sa hi ngawlin, a thaici nguak a tu na hi uh hi.

³⁸Pathian in tua thaici tek sia ama dei bang a kung pia a; thaici khat sim atu in a kung pha pia hi.

³⁹Tuaciangin a nungta theampo ii sa sia a kibang sa nam khat bek ahi siat bua hi; Mihing sa in namkhat hi a, nganhingte, vacimte, ngasa te ii sa ina dang namtuam tek nei hi.

⁴⁰Vantung pumpite le leitung pumpite a om hi; vantung pumpi hoina le leitung pumpi hoina sia kilamdang hi.

⁴¹Ni in hoina a tuam nei a, tha ii hoina, tuaciang aksite hoina a tuam tek ahi hi; aksi tetek sung zongh ah, hoina a tuatuam in omlai hi.

⁴²Mithisate a kinuntak kiksak ciangin, tuabangma hi tu hi. Pumpi a kiphum ciangin a thi thei pumpi ahi hi; a kithawsak ciangin a thi maw pumpi ahi tu hi.



⁴³A kiphum ciangin a meal sia in tha nei ngawl hi. A kithawsak kik ciangin, a meal hoi in thahat tu hi.

⁴⁴A kiphum ciangin ci le sa pumpi hi a; a kithawsak kik ciangin, thaa pumpi ahi tu hi. Ci le sa pumpi a om bangma in, thaa pumpi zongh a om kul hi.

⁴⁵Banghangziam cile laithiangtho in “Mihing masa bel Adam sia nuntakna a nei mihing in kikitphua hi,"ci hi; ahihang a khakbel Adam sia nuntakna a pia Thaa ahi hi..

⁴⁶Thaa sia pai masa ngawl hi, ci le sa hi phot a, tua zawkciang thaa hi pheang hi.

⁴⁷Adam masa sia lei taw kivawt a, lei panin hong piang hi; Adam niina sia vantung panin hong pai hi.

⁴⁸Leitung ii neisa ahite sia lei taw kivawt khat taw ki bang hi; vantung neisate sia vantung pan hong pai pa taw kibang hi.

⁴⁹Lei taw a kivawtpa lim le meal ih puak bangma in, vantung pan hong pai tua Pa lim le meal ih pua tu hi.

⁵⁰Ka ci nop thu in, suapuite awng, chi le sa taw a kivawt sia in, Pathian ii Ngam nga thei ngawl a, a thi thei sia in thi thei ngawl na nei thei ngawl hi.

⁵¹⁻⁵²Hi a kiseal thuman thutak sia ngai vun: Eite theampo ih thi siat buatu hi, ahihang lemle khakbel sia a kitum ciang, eite in tawmvei no sungin, ih kikheal tu hi, mitphet khat sung za in manlang tu hi. Banghangziam cile lemle a kitum ciangin a thisate tho kik in thi kik ngei nawn ngawl tu a, ih vekpi in ih kikheal tu hi.

⁵³Banghangziam cile thina sia thi thei ngawl na ah a kikheal nak tu hi; a thi tu sia a thi thei ngawlin hong kikheal nanak tu hi.

⁵⁴Hisia hong piang in a thi thei sia a thi thei ngawlin a kikheal ciang, Laithiangtho kammal: “Thina kisucip zo hi; zawna ki khuangkhim zo hi!” a ci sia tangtung tu hi.



⁵⁵“Thina awng na zawna koisung om ziam? Thina awng, nanatsak theina vaang koisung om ziam?”

⁵⁶Thina in, a nasak tu vangletna sia mawna panin nga a, tuaciang mawna in a vaangletna sia Thukham panin nga hi.

⁵⁷Ahihang Topa Jesus Christ tungtawn in zawna hong pia Pathian tungah lungdam ih ko hi!

⁵⁸Tua ahikom, kong it suapuite awng, kip tak le maan takin om vun. Topa atu na nasep uh peuma a luithawthong suak ngawl het tu hi ci in na heak uh ahiciang Topa atu na nasepna sung ah a tawntung komla vun.

1 Corinth te 16

Thu Uppuite atu Piakna

¹Judea ngam ah Pathian mihingte huna sumkhon natu vai lai nong thaak uh sia taw kisai in kong son tu hi. Galatia ah a om pawlpite tungah ka sawl teng ma note in na vawt uh kul tu hi.

²Nipi nisim in na sum thalaw za uh taw kizui in sum pawlkhat na koi tuam hamtang vun a, na khol vun. Kong pai ciangin sumkhon a kul ngawl tu in na tawm vun.

³Kong pai zawk ciang Jerusalem ah na huna letsong uh te a puak tu in pha nasak uh mihingte sawl in ki heaksakna laite taw ih paisak tu hi.

⁴Keima pai hangin a phatuam tu le, amate taw kong tonkhawm thei tu hi.

Paul ii Tupna

⁵Macedonia sang ka manaw zawkciangin, note kungah kong pai tu hi — Banghangziam cile Macedonia kantan in kong pai kul tu hi.

⁶No kungah tawmvei hunsung hong taam tu khi hi, phalbi bup hong taam tha tu khi hi. Tuasia ciang ka khualhaw kik natu mun pawpo ah ka paitan thei natu in keima nong hu thei tu uh hi.

⁷Topa deina a om nale, tawmvei sung hong nawk nuam ziau bek a, a kimu tu hi ngawlin, note taw hun sau mama zak khop tu ka lamem hi.



⁸Pentecost ni dong hi lai Ephesus ah ka taam tu hi.

⁹Hong langpan mihing tam mama om ahihang, a lian le avawt thamman nasep natu in hunpha tatak khat a om hi.

¹⁰Timothy sia note kungah hong theng le, note sungah nuam a sak thei natu in na vawt vun, banghangziam cile ama sia keima bangma in Topa atu in a seam khat ahi hi.

¹¹Kuama in ama zawngsak heak vun a, kei kung hong kilee kik thei natu in, ama khual hawna thin nuam takin a zop to thei natu in na hu nanak vun; banghangziam cile ama sia suapuiteng taw hong heak kik tu ka lamem hi.

¹²Tu in suapui Apollos huvau ah, ama sia suapui dangte taw no kung hong haw natu in ka hanthawn hi, ahihang tu hun in hong pai tu sia a thin zo pai ngawl hi. Hun pha a nga ciang ahile, ama hong pai tu hi.

Kammal Khakbelte

¹³Pilvang in om vun, upna sungah kho din vun, hang vun a thahat vun.

¹⁴Nasepna theampo ah ki itna taw seam vun.

¹⁵Note in Stephanas le a innkuanpuite thu na heak uh hi; amate sia Achaia ah Tapidaw suakciilte hi a, Pathian mite atu nasepna sungah a kipiante ahi uh hi.

¹⁶Suapuite awng, hi bang mihingte ii lampuina le amate taw a diang a seam dang khat pawpo ii a lampuina na zui natu uh kong thuum hi.

¹⁷Stephanas, Fortunatus le Achaicus ii hong pai hu in ka lungdam hi; amate sia hong om thei ngawl note luang hi,

¹⁸amate in note hong thin liansak a, tuabang in kei zongh hong thinlian sak hi. Hi bang mihingte sia teptee thamman hi.

¹⁹Asia ngamkhen ah pawlpite in paupuina kam hong thaak hi; Aquila, Priscilla le amate inn ah a kikhawm pawlpi in Tapidaw kideisakna kamthiam taw hong paupui hi.

²⁰Hi sungah suapuite theampo in paupuina kam hong thaak hi. Khat le khat suapui khat hina taw kinamh tavun.



²¹*Keima Paul in hi kong paupuina* lai sia: keima khut tatak taw kong at hi.

²²Topa a it ngawl po haamsiatna thuk taken! *Maranatha* —Ih Topa hong pai taken!

²³Topa Jesus thuthiamna note taw hong om taken.

²⁴Christ Jesus sungah a om note theampo tungah kong itna om taken. Amen.



2 Corinth te

2 Corinth te 1

¹Pathian deina taw Christ Jesus ii sawltakpa ahi Paul le ih suapuipa Timothy in — Corinth khua ah Pathian pawlpi le Achaia ngambup ah Pathian mihingte theampo tungah lai kong thaak uh hi:

²Ih Pa Pathian le ih Topa Jesus Christ in thuthiamna le thinnop kilemna hong pia tahe.

Paul in Pathian tungah Lungdamko

³Pathian le ih Topa Jesus Christ ii Pa, hesuak thiam Pa, huna theampo hong paina Pathian tungah lungdamko tawng!

⁴Pathian tung pan ih saan hunate ma zangh in ngimna namcin a thuakte ih hu thei natu in, ama in ih ngimna theampo sungah hong hu hi.

⁵Christ thuakna tam mama sungah ih kihel bangin Christ tungtawn in Pathian huna tam mama ih nga hi.

⁶Ka thuak uh le note atu in, huna le ngupna na nga natu uh hi a; kote hong kihu le note zongh hong kihu a, kote ii thuakte ma zong thinsau tak in na thuak zawk natu thahatna hong kipia ahi hi.

⁷Tua ahikom note sungah ka lametna uh sia ngawk zo ngei ngawl hi; ko thuaknate nong thuak pui uh bangma in, huna ka nga uhte sungah note zongh na kihel uh sia ka he uh hi.

⁸Suapuite awng Asia ngamkhen sungah ngim ka ngana uh te kong phawksak nuam hi. Kote tungah hong kisan vanhte lian mama a ngit lei ahikom, nungta tu zong ka ki um ngam bua uh hi.

⁹Kote tungah thi daan hong kipia bangza in ka ngaisun uh hi. Ahihang hi thu sia, koma le koma kisuang ngawlin, a thite a thosak kik, Pathian khat bek ka suan thei natu uh in a piang ahi hi.



¹⁰Tuabang a kiitak huai thi thei natu panin, ama in hong ngum zo a, hong ngum lai tu hi; mai sang zongh ah ama in hong ngum kik lai tu hi, ci in lametna ama tungah ka nei zo uh hi,

¹¹tua in kote nong panpui na uh taw thu nong ngetsakna uh hang ahi hi. Tua ahikom kote atu thu tam mama hong ki ngetsaknate hong kizo tu a, Pathian in ko thupha hong pia tu hi; tuaciang mihing tam mama in, kote atu nging takin lungdamkona nei thei tu uh hi.

Paul ii Ngealnate Kikheal

¹²Hi leitung ah ka nuntakna uh le a tuan in note taw ka kizopna uh sia Pathian piak sa thinmanna le citakpina ii hong ukna le Pathian thuthiamna ii vaangletna hang hi a, mihingte pilna hang hi ngawl hi, ci in telthiang in ka kiphasak uh hi.

¹³⁻¹⁴Na sim thei tu le na tel thei tu teng bek kong at uh hi. Ahizong tu in a lalang bek hong tel tu na hi uh hang, ih Topa Jesus Ni hong thet ciang, note hu in ka kiphatsak uh bangma kote hu in na kiphatsak thei natu uh in a cingtak ma nong tel tu uh kong lamen uh hi.

¹⁵Hite theampo thumaan hi ci in ka tel thiang hu in, thupha nii vei na nga thei natu in note kungah haw tu in ka ngeal phot hi.

¹⁶Banghang ziam cile Judea ngam ah ka khualhaw natu taw kisai note tung pan huna dei ka hikom Macedonia ka pai lam le ka cia lam in note kungah baang tu in ka ngeal hi.

¹⁷Hi bang ka ngeal ciangin telmeal om ngawl bang hi nong sa uh ziam? Hi bangin ngealnate ka nei ciangin keima deina bek taw cikhat sua in, “Hi hi,” le ci a, “Hi bo,” le a ci sii ka hi ziam?

¹⁸Pathian ii thumaan a son bang tatak ma in, note tungah kong kamciamna sia “Hi hi” cile “Hi bo” ci sia thu hi ngawl hi.

¹⁹Banghangziam cile Silas, Timothy le keima kong hil Pathian Tapa Jesus Christ sia "hi" le "hibo" cikhop tu hi ngawl hi; ama sia Pathian ii “Hi” a cisia pa ahi zaw hi;



²⁰Banghangziam cile, Pathian kamciam theampo tungah “Hi” a ci pa ahi hi. Hi thu hangin Jesus Christ tungtawn a, Pathian minthan na ah “Amen” ka ci uh hi.

²¹Note taw kingawm in kote Christ taw kipawl khawm a, ih nuntakna hong kipsak sia in Pathian hi a; eite hong tuam koi sia Pathian ma hi in,

²²ama neisa ka hina uh kote tungah tepteena hong koi zo a, eite atu hong koikholsak na theampo a kipsakna in eite thin sungah Thaa Thiangtho hong pia pa in ama ahi hi.

²³Keima tetti tu in Pathian kasam hi — ama in ka thinsung hong he hi! Corinth khua ah kong paingawl nasia note kong dopna hizaw hi.

²⁴Na up hamtang tu uh thusia thupiakna taw kongsawl nuam bua uh a, na upna uh kip hi ci in kong he uh hi. Noma lungdam natu in note taw na aseam khawm ka hizaw uh hi.

2 Corinth te 2

¹Tua ahikom note kong heesak ngawl natu in note kungah pai kik ngawl tu in ka khensat zo hi.

²Bang hang ziam cile note hong heesak thong leng kei hong lungdamsak tu a kua omnawn tu ziam? Keima ii kong heesak te ma ombek tu hi.

³Tua hu in notung ah tua laithak kong aat ahi hi — Keima hong lungdamsak tute ma in hong heesak tu ahiciang, no kungah pai tu ka uuk bua hi. Banghangziam cile keima ka lung a dam le, note zongh lungdam ci in ka um hi.

⁴Lai kong thaak lai in thinsung buaingawpna le khuangaina taw thitui taakin lai kong at hi; ka tupna sia note kong heesak nopna hi ngawl a, bangza in note hong it khi ziam, ci in kong telsak nopna ahi hi.

A Mawpa tung Mawmaisakna

⁵Tu in mihing khat pawpo in, mihing khat a khuangaisak le kei bek hong heesak hi ngawlin, tawmno khawng bek ahizong — note theampo hong



heesak ahi hi. (Hi bangin ka ci sia ama tungah a nasia kamkhal ka pau nop ngawl hang ahi hi.)

⁶Note a tamzaw in hisia pa sia tu a bangma in daan pia zo na hi uh ciangin, pha zo hi.

⁷Tu in bang po ahizong ama mawna maisak tavun a, hee leilam in a thin a lal ngawl natu in na hanthawn vun.

⁸Tua ahikom ama na it takpi na uh na telsak natu in kong thuum hi.

⁹Tua lai kong thaak sia banghangziam cile ze etna sia bang bang in do zo a, tuaciangin kei ii hilna bangza dongin ni nu ziam ci in kong heak nop hang ahi hi.

¹⁰Khat po ii a ngamtatna tungtaang ah mawna na maisak uh ciang, kei zongh in ama ka maisak hi. Banghangziam cile maw ka maisak ciangin — tuabang a kul takpi ma ahile — Christ ii hong ompuina taw in note hang in mawmaisak ka hi hi;

¹¹Satan ngealnate he kahikom in; ama hong nopzaw ngawl natu in ka maisak ahi hi.

Troas ah Paul ii Thin ngimna

¹²Christ huvau Lungdamna Thupha hil tu in Troas khua ka thet ciang tua munah Topa in nasep natu lampi hon sa in a koi ka mu hi.

¹³Ahihang tua lai ah ih suapuipa Titus mu zo ngawl ka hikom nasia takin ka thin ngim hi. Tua ahikom tua munah a om mihingte mangpha thaak in Macedonia ah ka pai suak hi.

Christ tungtawn in Zawna

¹⁴Ahihang Pathian tungah lungdamnate ki ko taken! Banghangziam cile Christ taw kipumkhatna hu in, Pathian in Christ ngal zawna sungah a mat sate bangin Pathian in eite lam hong pui tawntung hi. Christ thu heakna sia mun theampo ah paaknamtui bangin a kizel natu in Pathian in eite hong zangh hi.



¹⁵Banghangziam cile eite sia Christ ii Pathian tungah a piak paaknamtui taw ih kibang a, ngupna a ngate le a mangthangte sungah ih kizel hi.

¹⁶A mangthangte atu in tuasia in ngual thisak thei a ui mama thina ngim hi a; ahihang ngupna a ngate atu in nuntakna a pia ngim namtui ahi hi. Tua ahile tuabang nasepte a seam zo tu akua om ziam?

¹⁷Kote sia Pathian thu takpi vanh man olte zuak bangin a son midang tam mama te taw ka kibang bua uh hi; ahihang Pathian in hong sawl ahikom, thinsung maan tak taw ama mai ah Christ naseamte bangin thu ka son uh hi.

2 Corinth te 3

Kiciamna Thak ii A Naseamte

¹Tu a teng ih son ciang koma le koma a kisuangtaak bang hikik nong sa uh ziam? Ngualdang pawlkhatte bangin note tungah piak tu ahizong, noma in ko tung a nong piak tu uh ahizong, ki phatsonna laite kul tu ziam?

²Noma mama sia mihing theampo ii heak tu le sim tu in, kote lungtang tungah a ki at, ka nei uh laithak sia na hi uh hi.

³Christ ama mama in hi laithak at in kote puak tu in hong thaak a hina thu kitel mama hi. Tua lai sia laitui taw ki at ngawlin, a nungta Pathian ii Thaa taw ki at a, suangpheak tungah ki at ngawlin, mihingte lungtang tungah ki at hi.

⁴Christ tungtawn in Pathian ka muan uh man in hi bangin ka ci thei uh hi.

⁵Hi nasep ka sep thei natu in koma sungah songgam tu septhaina bangma ka nei bua uh hi. Tua sep theina kanei uh sia Pathian kung panin hong pai ahi hi;

⁶Lai taw ki at Thukham pan hi ngawl a, Thaa pan hong piang thuciamthak a tu in, hong seam theisak sia ama ahi hi. A ki at thukham in thina piangsak a, ahihang Thaa in nuntakna pia hi.

⁷Thukham sia suangpheak tungah a kikhuak laimalte hi a, a kipiak laitakin, Pathian vaangletna kilangh hi. Moses maitang a taang sia mial vaial ahihang nasia takin taang ahikom, tua laitak Israel mite in a maitang a salh zo bua uh



hi. Thina hong puak Thukham in, ama hun sung tua za in vaangletna taw hong pai ahile,

⁸Thaa ii tukna le dianna taw kisai vaangletna in bangza in nasia zaw tu ziam!

⁹Kimawsakna a piangsak thu sia vaanglian ahile; ngupna a piangsak sia ii tukna le dianna sia bangza in vaanglian zaw tu ziam!

¹⁰Tu a vaangletna a taang zaw sia hang in a bo sa hunsung a, a taang mama vaangletna sia a bozo hi, kici thei hi.

¹¹Banghangziam cile, tawmvei sung bek a kikhom sia sung ah vaangletna om ahile a tawntungin a kikhomsuan vaangletna sia bangza in tam zaw kan tu ziam!

¹²Hi lametna ka nei uh hu in, kote ka hang mama uh hi.

¹³Kote in a maitang pan a vaangletna, a mial vaial in a bona sia Israel mite ii mu ngawl natu in, dial taw a maitang a seal, Moses bang ka hi bua uh hi.

¹⁴Amate thinsung kikhak takpi hi; amate in thuciam luithubute a sim uh ciang tuni dongin, tua dial in a thinsung uh siin lai hi. Mihing khat in Christ taw a kizop ciang bek in, tua dial sia kihep sak hi.

¹⁵Tuni ngangawn dongin Moses Thukham a sim uh ciangin tua dial in amate thinsung siincip lai hi.

¹⁶Ahihang kiheam thei hi. Moses thu Laithiangtho sungah: “Topa sang ah a kiheak ciangin ama dial sia kiheam hi,” ci hi.

¹⁷Tu in “Topa” ci a ki at sia Thaa ahi hi; Topa Thaa omna munah suatakna om hi.

¹⁸Tua ahikom eite theampo in, a kisiin ngawl maitangte taw Topa vaangletna kilanghsak vun. Thaa ahi Topa kungpan hong pai tua vaangletna sia ma in a nasia vaial vaangletna sung ah ama ii pianzia bang in eite hong kheal hi.

2 Corinth te 4

Tungbealte sungah Thaa Sumngum



- ¹Pathian in ama hong hesuakna taw hi nasep tu hong pia ahikom ka thin uh a kiam bua hi.
- ²Thuku theampo le a maizum huai ngamtat nate theampo ka vawk uh hi; theamna taw na ka seam bua uh a, Pathian kammal zongh leilot thu ka suaksak bua uh hi. Pathian muna ah thumaan khuavak kicing taw ka nungta uh a, mihing sim ii apha in a tel thei natu ka hanciam uh hi.
- ³Bang hang ziam cile, kong hil uh lungdamna thupha kiseal ahile a mangthangte mun pan bekma in a kiseal ahi hi.
- ⁴Hi leitung pathian ngilopa in amate thinsung khuziing ahikom um ngawl uh hi. Pathian taw a kibang linlian Christ ii minthanna huvau tua Lungdamna Thupha pan hong pai, amate tungah hong taang khuavak a mu thei ngawl natu in ama in vawt hi.
- ⁵Bang hang ziam cile, kote kong hil thu in koma ii thu ahi bua hi; Jesus Christ sia Topa hi ci in kong hil uh a, Jesus hangin note ii naseamte bang ka hi uh hi.
- ⁶“Khuazing sung pan khuavak hong taang tu hi!” a ci Pathian sia Christ maitang ah a taang Pathian vaangletna heak natu in kote thin sungah a khuavak hong taangsak Pathian sia ma ahi hi.
- ⁷Ahita zong vaangletna lianbel sia Pathian neisa hi a, kote aa hi ngawl hi ci sia a kilak natu in thaa thu ah sumngum a nei kote sia tungbeal thawthong taw kibang khu hi.
- ⁸Kote ngim nga nithi ka hi uh hang, ka lalcip bua uh a, khat vevei lungmang ka hi uh hang, thinkiam ngei ngawl khu hi;
- ⁹ngal tam mama a om hang ngualtamh sel ngei ngawl khu hi. Khat vevei nasia takin hong kiliamsua kale hong kiskusua zo ngawl hi.
- ¹⁰Jesus ii nuntakna ka pumpi uh sungah a kimu thei natu in, ama thina sia, a thi thei ka pumpi uh sungah ka vom top uh hi.



¹¹Hi a thi thei ka pumpi uh pan ama nuntakna a kimu thei natu in, ka nuntak sung tawntung, Jesus hangin thi tu launa ka nei tawntung uh hi.

¹²Thina in kote sungah na hong seam a, ahihang nuntakna in note sungah na hong seam hi, ci nopna hi.

¹³Laithiangtho in, “Um ka hikom ka son hi,” a ci hi. Tua upna thin bangma in kote zongh in um ka hi uh hu in, ka son uh hi.

¹⁴Topa Jesus sia nuntakna sungah a thosak kik Pathian in kote zongh Jesus taw hong thoto sak tu a, note taw kingawm in ama omna munah hong la khawm tu hi, ci in ka he uh hi.

¹⁵Hite theampo sia note atu hi a; Pathian thuthiamna in mihing a tam vaialte tungah a thet ciangin, amate in Pathian minthan natu in lungdamko thungetnate a tamzaw nei tu uh hi.

Upna taw Nuntakna

¹⁶Hi thu hu in kote ka thin uh a kiam ngei bua hi. Ih pumpi ci le sa sia dadam in muat tu lam manaw ahihang ih thaa nuntakna sia ni khat zawk ni khat hong kithaksua hi.

¹⁷Tuaciang, hi tawmvei hunsung ka thuak uh ngimna tawmnote in, tua ngimna taw tee thei ngawl, alian mama tawntung minthanna sungah kote hong then tu hi.

¹⁸Kote mitsot sia a kimu thei nate ahi bua a, a kimu thei ngawl nate ahi hi. A kimu theite sia tawmvei sung bek kikhom a, a kimu thei ngawlte sia a tawntungin kikhom hi.

2 Corinth te 5

¹Bang hang ziam cile, hi ih teenna buk — hisung leitung ah ih pumpi ki sia le — a tawntungin a kikhomsuan tu, eite teenna tu Pathian vawtsa, vantung ah inn khat hong nei sak hi ci in ih he hi.

²Vantung pan hong pai ih inn sia eite tungah hong kikhu natu ih thangaina sia, tu in nasia mama ahikom ih vuisa hi;



³tuabangin tuasia hong kisilh sak ciangin eite sia pumpi nei ngawlin ih om buatu hi.

⁴Hi leitung buk sungah ih ten laiteng in, hong ki zothaw kisa in ih tau hi; tuabang ih ci ciang hi leitung pumpi suut nuam ih hi bua a, thi theina sia nuntakna taw hong kikheal natu in vantung pumpi sia ei tung hong thua tu in ih deina ahi hi.

⁵Pathian in hi kikheal natu in, eite hong puakhol a, ei atu hong khealsiate theampo hong kipsak na in ama ii Thaa hong pia hi.

⁶Tua ahikom eite in thin letna taw ih kidim tawntung hi. Ih pumpi inn sungah ih omlai teng in, eite in Topa inn taw a kikhuala ih hi hi.

⁷Banghangziam cile eite in upna taw ih nungta a, muna taw ahi bua hi.

⁸Eite in thinletna taw ih kidim a, hi ih pumpi inn nusia in Topa taw om tu sia ih uuk zaw hi.

⁹Tua ahikom hi sung inn ah ahizong, tuasung inn ah ahizong thudang theampo sangin Ama ih lungkimsak tu sia ih deibel ahi hi.

¹⁰Banghangziam cile eite theampo thukhenna thuak tu in Christ mai ah ih ding nanak tu hi. Mihing khatsim in a leitung pumpi nuntak sungah ama sepna a pha a sia taw a kiphu a kilawm in nga tek tu uh hi.

Christ tungtawn in Pathian taw Kilawmtakna

¹¹Topa kiitakna ii a cinopna ka he uh a, tua hu in, ngual zongh, tuabang ahi thei natu in ka hanthawn uh hi. Pathian in kote sia a khawng a kheak in hong heak bangma in na thinsung uh ah, keima zongh hong he tu in kong muangmaw hi.

¹²Note tung ah ko le ko a ki phatson tu in a hanciam kik ka hi bua uh hi. Mihingte ngamatna en ngawl a, a meal a sa en in a kisuangtaakte na zokik thei natu in kote nong kiphatsak puitu ka deina uh a haang sia hong son nuam kahi zaw hi.

¹³A thin amh tatak ka hi uh ziam? Thin amh ka hi uhle Pathian atu hi a, tua ahibuale thinciim ka hi uh ziam? Tua ahile zong note atu hi.



¹⁴Christ hong itna in kote hong uk hi, tu in ahile mihing khat in mihing theampo atu thi hi ci in ka tel uh hi, tua in amate theampo sia ama thina sungah thi khawm hi a cinopna ahi hi.

¹⁵A nungtate in amate atu nungta nawn ngawlin amate atu thi a, ahihang amate atu in nuntakna sungah a kithosak kik pa atu a nungta ahithe i nату in ama in mihing theampo a tu thi hi.

¹⁶Tua ahiciang, mihingte munate taw kuama tungah thu ka khen nawn bua uh hi. Khatvei lai in Christ sia mihing munate taw thukhen ngei ka hita uh zong tu in tuabangin ka khen nawn bua uh hi.

¹⁷Mihing khat pawpo in Christ taw a om khawm le ama in mihing thak ahi hi; a nuntakna lui sia bo in a thak hong piang zo hi.

¹⁸Hiteng theampo Pathian nasepna hi a, ama in Christ tungtawn in, a ngalte ih hina panin a lawmte hong suaksak zo a, ngualdangte zongh a lawmte ih suasak natu in, eite tungah nasep hong pia hi.

¹⁹Ka thupuak uh sia in Christ tungtawn in Pathian in mihing nam theampo ama lawmte hong suaksak hi, ci thu ahi hi. Pathian in amate mawna sazian keam ngawl a, tuaciang bang bang ama in a lawmte suaksak cina thu a hilhna sia ko hong pia hi.

²⁰Tua ahiciang hisung ah kote Pathian ma in kote tungtawn in note tungah hong thuum bangma in Christ atu in thuson ka hi uh hi. Christ ii taangin kong thuum uh hi: Pathian in a ngalte na hina uh pan, a lawmte hong suaksak taken!

²¹= Ama taw ih kipumkhatna hangin Pathian bang a, thumaan thutang ih sua thei natu in, maw nei ngawl Christ sia Pathian in eima a tu in mawnei suaksak hi.

2 Corinth te 6

¹Tua ahi ciang, Pathian taw ko ii nasep khopna sungah Pathian thuthiamna a saangte in, tua thu thiamna sia a luithawthong a suasak ngawl natu in kong thuum uh hi.



²Pathian pauna ngai vun: “Note kong hesuakna kong laktu hun hong thet ciang, note kong za hi; note kong ngup tu ni hong thet ciang, note kong hu hi.” Ngai vun! Pathian hesuakna saan thei tu sia tuhun hi; ngupna ngatu ni sia tuni ahi hi!

³Ka nasepna uh taw kisai in khat pawpo ii mawna hong zon tu sia ka dei bua uh a, tua ahikom kuama haksatnate a nga natu in ka hanciam bua uh hi.

⁴Na ka sepna sung theampo ah Pathian naseamte ka hina uh ka lakna uh in, thinsau takin ngimna thuakzawkna, haksatna le buainate ka thuak kenkon zaw uh hi.

⁵Kote sia hong kivel a, thong hong khum in, hong vawtsia uh hi; naseam leilam in, mu ngawlin, an ne ngawlin ka om uh hi.

⁶Pathian naseamte ka hina uh sia thiangtho nuntakna, thu heakna, thinsauna le dikna — Thaa Thiangtho taw, ki itna tatak taw,

⁷a maan thuhilna le Pathian vaangletna teng taw ka lak uh hi. Thutang suana sia ka ngalhiam uh hi a, ngaldo natu le koma le koma kihukna tu in ka nei uh hi.

⁸Kote sia hong kithasia a, hong kizawngsak sii hi; hong kilang a hong kipok sii hi. Kote sia thumaan ka son uh hang a leilot theite bangin hong kivawt hi;

⁹ngual theampo in hong he ahihang a kihe ngei ngawlte bangin hong kivawt hi; nong mu uh bangma kote nungta napi a thisate bangin hong kivawt hi. Daan hong kipia ahizong, hong kithatlum ngawl hi;

¹⁰hong heesak ahihang ka lung uh dam tawntung hi; a zawng bang ka hi uh hangin, mihing tam mamate ka hausak uh hi; neisa bangma nei tuak ngawl ka hi uh hangin, na theampo a nei tatakte ka hi uh hi.

¹¹Corinth khua a om ka it lawmte awng! No tungah ip nei ngawlin kong son zo uh hi; ka thinsung kongkha uh kong hon siat uh hi.

¹²Note atu kote in ka thinsung kongkha uh hong kha hizaw ngawl khu hi; note in kote atu na thinsung kongkha uh hong kha nu hi.



¹³Tu in note sia ka tate bangin kong pau hi: note tungah kong nei uh thinpuak bangin, kote tungah thinpuak nong neina uh hong lak tavun. Na thin sung kongkha uh hong in na tanzausak vun.

Doai biate ii Hongzawna tupan Kidop natu

¹⁴Thu um ngawlte taw kipawl tu sia suak thei ngawl ahikom amate taw kibang in na na seam khawm heak vun. A maan le a maan ngawl sia bangbangin kipawl khawm thei tu ziam? Bangbang in khuavak le khuazing sia teang khawm thei tu ziam?

¹⁵Christ le Doaimangpa sia bangbangin thu kisi thei tu ziam? Thu um khat in thu um ngawl khat taw bang bangin na khat nei khawm thei tu ziam?

¹⁶Pathian biakinn in doai biakna milimte taw bangbang in thukim thei tu ziam? Banghangziam cile eite sia a nungta Pathian biakinn ih hi hi! Pathian in: “Ka mite sungah ka inn ka vawt tu a, amate sungah ka teang tu hi; keima in amate Pathian ka hi tu a, amate in keima mihingte ahi tu uh hi,” ci hi.

¹⁷Tuaciangin Topa in, “Amate nusia nanak in a, amate taw kikhen tavun. A thiangtho ngawlte taw bangma kipeena na nei heak vun, tua hile note kong saang tu hi, ci hi.

¹⁸Vaanglianbel Topa in, Keima in note ii Pa kong hi tu a, note sia ka tapate le ka tanute na hi tu uh hi, ci hi,” a ci hi.

2 Corinth te 7

¹Ka it ka lawmte awng, hi kamciamte theampo sia eite tungah hong kipia hi. Tua ahi ciang pumpi le thinsung a ninsak thei nate theampo panin kithiansua in, Pathian ih thasiana taw a thiangtho sinsen suak tawng.

Paul ii Lungnopna

²Kote na thin sung uh ah hong saang tavun. Kote kuama tungah khial ngawl khu hi; kuama siatsua ngawl, kuama tungah hamphatna la ngei ngawl khu hi.

³Noma mawsak nuam a, tuabangin kong ci hi ngawl hi; banghangziam cile tu masia a kong ci sa bangma in note sia kote atu in it huai mama na hi uh hang in, ih thi zong ih nung zong, a omkhawm tawntung ih hi hi.



⁴Note kong muang mama hi; note hangin ka kisuangtaak hi! Thin ngimna theampo sungah thin letna taw ka kidim lai hi; lungnopna taw ka kidim leet hi.

⁵Macedonia ka thet zawk uh ciang zong tawlngak hun ka nei bua uh hi. Haksatna sia mun theampo ah om a, ngual taw kihauna, thinsung patauna taw ka om uh hi.

⁶Ahihang a thinkiamte a han sua Pathian in Titus hong paina taw kote hong hanthawn hi.

⁷Ama hong pai hu bek hi ngawlin, noma ii ama na hanthotnate zong hong ko hu in hong lungdam sak hi. Kei nong mu nop mama na thu, na khuangai mama na uh le kei nong huuk natu in a kinging sa in na omnate uh hong ko hi; tua ahikom tu in ka lungdam seseam hi.

⁸Tua kong laithak sia in note hong khuangaisak ahile zong, tua ka at sia ka hee tuan bua hi. Tuasia in tawmvei sung teng hong khuangaisak sia ka heak ciangin, khuangai nuam leng khuangai thei tu khi hi.

⁹Ahihang tu in ka lungdam hi — kong heesak hang hi ngawlin, na heena uh sia in no hong kikhealsak ahi hu in ka lungdam hi. Tua heena sia Pathian in zangh a, tua ahikom note atu in, bangma asiat akha hong piangsak bua uh hi.

¹⁰Banghangziam cile Pathian ih zak heena in ngupna nga natu in thin kikhealna piangsak hi — tua sungah bangma kisii natu om ngawl hi! Ahihang mihing lel bek ii heena in thina piangsak hi.

¹¹Na heena uh sia Pathian in bang bang hi ziam cisia en vun: bangzata tuasia in nang hong lawpsak a, na maw ngawl na ah bangza in hong panpui nuam ziam! Tuabang thin uukna, patauna, thinsung phaw theinate, thangaina, a khialte daan piak nopna cite piangsak hi! Hi thu theampo ah note pau baang ngawl ci in noma le noma kilak zo nu hi.

¹²Tua ahikom tua laithak kong at hang, a khialpa ahibuale a thuakpa ngaisutna taw hong at hizaw ngawlin Pathian muna ah ko thu bangza in hong ni ci sia a kiheak natu hong at ka hizaw hi.



¹³Tua ahikom tha ka nga mama uh hi. Tha ka nga uh bek dom ngawl hi; thinnopna a nga natu in note theampo in tha na piakna uh Titus ii lungdam hu in, ka lung uh hong damsak hi!

¹⁴Titus mai ah note hangin ka kisuangtaak a, kei nong thinkiam sak bua uh hi. Note tungah thumaan kong son tawntung bangma in Titus mai a ka kisuantaakna uh sia a maan ahi hi.

¹⁵Note theampo in bangbang in ama thupiakte ni nuam a, bang bang in liinna le launa taw ama zindo cisia a phaw ciang ama in note hong itna khang seseam hi.

¹⁶Na theampo ah note kong suan thei manin ka lungdam mama hi!

2 Corinth te 8

Tapidawte Piakna

¹Koma suapuite awng, Pathian thuthiamna in, Macedonia pawlpite sungah bang matutna nei ziam ci sia kong hesak nuam hi.

²A thuak ngimna te taw amate nasia takin ki ze et hi; ahihang a lungnopna uh lian mama ahikom, amate zawng mama napi, piakna ah ngo thei mama uh hi.

³Amate in ahi theiza uh pia a, aci thei za tungsia ngangawn zongh pia uh hi, ka ci ngam hi. Amate uuk thu in

⁴Judea ngam a om Pathian mihingte huna sungah a kihel thei lei natu in ko tungah hesuak hong ngen uh hi.

⁵Tuate in kote lametna sang zonghin nasia zaw hi! A masa phit in amate Topa tungah kipia uh hi; tua zawkciang Pathian deina taw amate in kote tung zongh ah hong kipia hi.

⁶Tua ahi ciangin hi nasep a pan Titus tungah a zopto suak natu le hi itna taw kisai a tuan in nasepna uh sia a khuangkhim dong na sepna uh ah hong hu natu ka hanthawn uh hi.



⁷Note ii na nei uh a hi: thu upna, thusonna, thuheakna, midangte hu tu lawpna le kote nong itna uh theampo ah kicing mama nu hi. Tua ahikom in, itna taw kisai nasepna zong ah na ngo tatak tu uh kong dei uh hi.

⁸Zui tu ngeinate hong koisak ka hi bua hi. Ngualdangte sia tua zata in ngual hu nuam in a lawpna thu kong lakna taw note zongh ngual na itna uh sia bangza ahi tatak ziam ci in ka tel nopna ahi hi.

⁹Topa Jesus Christ thuthiamna sia na heak uh hi; ama sia hau mama napi in, ama zawinna taw note a hau na sua thei natu in note atu in ama le ama a zawngin hong kivawt ahi hi.

¹⁰Kei ngaisutna pan, ningkum a na pat sa uh nasep sia tu in na man thiang tu sia phazaw hi. Note sia a diang phitte na hi uh domngawlin, dian tu a uukte zongh na hi uh hi.

¹¹Tua ahiciang seam tanvet tavun a, man thiang tavun! Na ngeal uh lai in na lawp uh bangma in, man thiang tu zongh na lawp tavun a, tu in na neisun uh po taw naseam vun.

¹²Piak tu na thalawp uhle, na nei ngawlina tung pan hi ngawlin, na neina taw kizui in na piak tu za letsong sia Pathian in hong saang tu hi.

¹³⁻¹⁴Ngualdangte nop tuam natu in note tungah vanhngit hong suan nuam ka hi bua hi; ahihang tu laitakin note cithei na hi uhciang, a cimawte hu leute ma phabek tu hi; tua hile note na cimawk hun ciang amate cithei in no hong hu tu hi. Hi bangin noma ngeal a kikim in, na kihu vadium tu uh ahi hi.

¹⁵Laithiangtho in, “Tam a kaikhawm sia atu tam lei ngawl tu a, tawm a kaikhawm sia atu zongh tawmlei ngawl tu hi,” ci hi.

Titus le A kitholpuite

¹⁶Kote ii no hong husak nop bangma in Titus ii note lawp tak a hong husak Pathian tung ah bangza in ka lung uh dam ziam!

¹⁷Kote ngetna hong saang bek hi ngawl hi; note hong hu tu sia lawp a, ama hantang in note kung hong zot tu sia ama thu taw khensat hi.



¹⁸Lungdamna thuhil nasepna ah pawlpi theampo ii a thasia mama ih suapuipa khat sia ama taw kong paisak uh hi.

¹⁹Tuasia bek hi ngawlin, ngual ka hu nopna uh ka lak thei natu in Topa minthan natu ka sepsuak uh, hi itna taw kisai nasepna sungah kote taw khual a haw khawm tu in pawlpi teal sa, a kisee ahi hi.

²⁰Hi ngo tak a, letsong kipiaknate ka zeakna uh ah kuama a phun ngawl natu in ka kidawm uh hi.

²¹Ka tupna uh sia Topa mai bek ah hi ngawlin, mihingte mai zongh ah a maan in a seam nuam ka hi uh hi.

²²Tua ahikomin ih suapuipa sia amate taw kong pai khawmsak uh hi; tamvei ma a zia ka en zo uh a, a tawntung in ngual hu tu lawp mama hi ci in ka mu uh hi. Tu in ama in note tungah muanna hong nei tatak ciangin ama in ngual hu tu lawp vaial hi.

²³Titus ahile, keima naseppui hi a, note hong hu tu in keima taw naseampa ahi hi; amate taw a kithawl suapui dangte sia pawlpite taangmi hi a, Christ minthang sak hi.

²⁴Note kong kiphatsak pui na uh te thumaan hi ci in pawlpi theampo in a tel natu in amate tungah na itna uh na lak tavun.

2 Corinth te 9

Tapidaw Puite atu Huna

¹Judea ngamah Pathian mihingte atu huna a kipuak huvau in, lai kong at sia a kul vateal hi ngawl hi.

²Note sia ngual hu nuamte hi ci in kong he hi, tuasia bangma in Macedonia mite tungah note kong kisuantaakpui hi. “Achaia a om suapuite in, ningkum panin huna pia nuam zo hi,” ci in ka na son hi. Noma lawpna in amate a tamzaw thawn zo hi.

³Hi thu huvau note kong kiphatsak pui nate a luithawthong a sua ngawl natu in hi suapuite tu in kong paisak hi. Ahihang kong ci sa bangma in, amate na hu natu uh taw na kingingta khol vun.



⁴Ahizong, note tungah ta za muanna hong kinei napi keima taw Macedonia pan mihingte kong pai uh ciangin, huna taw a kinging sa in om bua leute, note maizum tu bek son ngawlin, kote atu zongh bangza in maizum huai tu ziam!

⁵Tua ahikomin, piaktu na kamciam sa letsongte a kinging khol sa in a om natu in, keima kong pai maa, hi suapuite hong pai khol tu sia hanthot tu kul ka sa hi. Tua hile kei kong thet ciang, kingin sa suaktu a, tuaciang piak tu a kul hang hi ngawlin, thinzawna taw a pianuam ka hina uh hong kilangh tu hi.

⁶Thaicii tawm a poaipa in an tawm bek at tu a; tam a poaipa in an tam mama a at tu hi, ci in na phawk tavun.

⁷Tua hi a, mihing sim in ama khensat sa om bangin pia tu a, thinnop ngawl na taw ahibua le piak ngawl a suak thei ngawl tu bangin ngaisutna taw pia ngawl tu hi; banghangziam cile lungdam thin zo takin a pia sia Pathian in diksa hi.

⁸Tuaciang noma atu in na kitaangsap theampo na nei tawntung natu le, thupha vawt natu theampo ah a kicing za sangin a tam zaw na nei natu in, Pathian in na kitaangsap za sangin a tamzaw hong pia thei hi.

⁹Laithiangtho in: “Ama in a kitaangsamhte tungah ngo takin pia a; ama dikna sia a tawntungin a kikhomsuan hi,” ci hi.

¹⁰Poi tu ancii le neak tu an hong pia Pathian in na kikap thaici theampo zongh hong pia tu a, tuate po in, anlaak ciang nangma ii ngo tak a na piakna tung panin an na hau tu hi.

¹¹Pathian in ngotak in a piathe i tawntung tu in, a khom in hong hau sak tawntungtu hi; tuabang in letsong na piak uh te kotung pan a nga uh ciang mihing tam mama in Pathian pok tu uh hi.

¹²Banghang ziam cile hi piakna, nasepna in Pathian mihingte kitaangsapna bek a hu hi ngawlin, Pathian tungah nasia tak lungdamko honna piangsak hi.



¹³Tuaciangin hi nasepna tungtawnin a kimu thei thute hang in, na up uh Christ lungdamna thupha tungah na thumaanna uh hu ahizong, amate ngualdang theampo taw ngo tak a na kihopna uh hu ahizong, mihing tam mama te in Pathian minthang sak tu uh hi.

¹⁴Tuaciang in note tungah Pathian ii thuthiamna alamdang in hong piak hu in, note atu amate in ki itna a thuk tatak taw thu hong ngetsak tu hi.

¹⁵A manh a kisep zo ngawl letsong hong piak hu in Pathian tungah lungdamko tawng!

2 Corinth te 10

Paul in Pathian Nasepna A Huukna

¹Keima Paul in keima aituam in kong thuum hi— Note taw ka omkhop ciangin dikin cingh a, no taw a ki khuala a ka om ciangin hangsan hong kici hi. Christ cikna le thiamna hu in kei zongh note kung kong pai ciangin, ka hangsan a kul tu dong hong kivawt ngawl natu kong thuum hi;

²banghangziam cile, leitung deinate taw ngamta hi hong cite tungah hangsan thei khi hi.

³Hi leitung ah a teang ka hi uh sia thumaan hi, ahihang leitung nate lungngulna taw ngalsim ka hi bua uh hi.

⁴Kidona sungah ka zak uh ngalhiamte sia leitung ngalhiamte hi ngawlin, kulh khote lalcipsak natu ka zak uh a thahat Pathian vaangletna ngalhiamte ahi hi. Kam kinialna maan ngawlte ka satmit uh hi;

⁵Pathian thu heak natu hong nokkhak sak thei kiphasakna teng ka sumit uh hi; ngaisutna a minpiang sia man in ka khumcip uh a, Christ ii thu ka nisak uh hi.

⁶Tuaciangin note na thumaanna uh na kitel thiangsak zawk ciangin, thumaan ngawl ngamtatna pawpo daan pia tu in ka kinging tu uh hi.

⁷Note sia nate ii a puatham omzia teng bek na en uh hi. Khatpo in Christ neisa in a kituat a om ziam? Pha hi, ama le ama ngaisun kik taken, banghangziam cile kote zongh ama za ma in, Christ neisa ka hi uh hi.



⁸Banghang ziam cile Topa ii thuneina hong piakte hu in, ka kisuangtaak ngawp tha le zong ka mai a zum bua hi — tua thuneina sia no kong sukcip natu hi ngawlin, kong lapto natu ahi hi.

⁹Ka lai hong thaakte taw no hong lausak nuam a, hanciam bang ka hi tu sia ka dei bua hi.

¹⁰Khatpo in, “Paul laithakte sia kamkhal kamciik veu zangh ahihang, ama tatak ei taw hong om ciang, ama thaneam in, a kammalte zongh bangma ahi tuan bua hi!” ci tha tu uh hi.

¹¹Tuabang mihing khat in note taw kong omkhop ngawl uh ciang laithakte sung kong at uh thu le, tua mun ah note taw kong om uh ciang ka vawt tu uh thute sia a kilamdang buatu hi ci in tel hamtang taken.

¹²A tatak ahile amate le amate a kiliansak mama te taw a kibang in, ka kituat bua a, ka kitee ngat ngam buatu hi. Amate bangza mawmaw ziam! Amate le amate ki en in, a kitee natu vawt tawm a khat le khat a kimu naza uh taw thu khente ahi uh hi!

¹³Ahizong ko ka hi uh le, ka kisuantaakna uh in, a omsa ciangtanna ngamte ka kantan bua tu uh hi; Pathian hong see sa nasep ciangtan nate sung bek ah ka kisuangtaak uh a, no sungah na ka sep uh sia zongh kihel hi.

¹⁴Tua ciangtanna huam sungah om na hi uh ciang, Christ huvau Lungdamna Thupha puakin note kungah kong pai uh ciangin tuate ka kan buatu uh hi.

¹⁵Tua ahikom Pathian hong koisak sa ciangtannate kal in midangte sepna sungah ka kisuangtaak bua uh hi. Tuasang in Pathian hong koisak sa ciangtanna sungteng ah seam tawntung a, na upna uh khangto thei in note sungah ka nasepna uh a taangzai zaw thei tu in ka lamen uh hi.

¹⁶Tuazawk ciangin Lungdamna Thupha sia note ii ngalkhat ngamte ah ka hil thei tu uh a, ngualdang khat ii lo sungah a kiseam sa nasep tungtaang ah kiphatsak natu a om buatu hi.

¹⁷Ahihang Laithiangtho in, “A kuama po a kisuangtaak nuam sia in, Topa sep sa tungah kisuangtaak taken,” a ci bang hi tu hi.



¹⁸Banghangziam cile mihing khat sia, ama le ama pha a kisak ciang hi ngawlin, a phat takpi hunlam a kimu ciangin tuapa sia Topa in pha hi ci in a ngaisun hi.

2 Corinth te 11

Paul le Sawltak Maan ngawlte

¹Ka mawmawt huai hun a om phial zonghin, nong dual zawk natu ka dei hi. Hong dual tavun!

²Pathian in note hong thinbot bangma in kei zongh in kong thinbot hi; note sia pasal khat bek taw kiteang tu a kamciam ka piak sa ngaknu thiangtho khat bang na hi uh a, tua pasal in Christ mama ahi hi.

³Eve sia ngul ii leilot pilnate taw a theam bangma in — na thinsung uh lal in Christ tungah a kicing le a thiangtho in na kipiakna uh te na nusiak thaak tu uh ka lau hi.

⁴Banghangziam cile kote ii kong hil Jesus ahi ngawl, Jesus a dang khat ii thuhil a hong pai pawpo sia lungdam n dual nu hi; kote tung panin, na nga uh Thaa le lungdamna thupha taw a ki bang ngawl het thaa le lungdamna thupha na saang uh hi!

⁵Note ii “sawltakte” na ci tuamte sangin kei sia bekcik zongh no zaw tuan in ka kingaisun bua hi!

⁶Thu sonna ah a kipan tuung hi ka leng heakna ah tua bang ka hi bua het hi; hi thu sia hun theampo sung le a khawng a kheak in thiang tak kong son tawntung sa ahi hi.

⁷Pathian Lungdamna Thupha sia note tungah kong hil ciangin thaman bangma kong la bua a; noma kong thupi vawt na in keima le keima ka kiniamkhiak hi. Tuasia in khial ka hi ziam?

⁸Note sungah kong sep laitakin pawlpi dangte in kei sia sum taw hong tham hi. Note kong hu natu in amate a suasuam citu bang ahi hi.

⁹Note sungah na ka sep laitakin, huna sum ka kisap ciang, no kong konlaw bua hi; Macedonia pan hong pai suapuite in ka kisap theampo hong puak hi.



A bo sa hunsung bangma in mai sang zongh ah: note atu in vanhngit ka hi ngei buatu hi!

¹⁰Achaia ngam koima theampo ah hi keima kisuantaakna sia, kuama in hong khaam ngawl tu ci in ka sungah a om Christ thumaanna taw kong kamciam hi.

¹¹Kong it ngawl hu in hi bangin pau ka hi ziam? Pathian in note kong it hunlam hong tel hi!

¹²Tua “sawltak” te in kote sep bangma ka seam uh ci in kisuantaak natu thukhat po a nei thei ngawl natu in, tu a ka sep teng ma ka seam tan lai tu hi.

¹³Tua mihingte sia sawltak tatakte hi ngawl hi — amate sawltak maan ngawlte hi a, a nasepna huvau leilot in Christ sawltak tatak te bangin a ki mealsealte ahi uh hi.

¹⁴Lamdangsak tu hi ngawl hi! Satan ngangawn zongh khuavak vantung lalang khat taw kibang tu in, kimealseal thei lai hi!

¹⁵Tua ahikom ama naseamte in, thutang naseamte taw kibang tu in a kimealseal le lamdangpi hi ngawl hi. A tawpna ah amate in a ngamatnate uh taw a kiphu bang tatak in nga tu hi.

Sawltak khat a hina taw Paul ii Thuaknate

¹⁶Keima sia a mawmaw in kuama in hong tuat heak hen kong ci kik hi. Ahizong tuabangin, nong ngaisun uh le zong, kiphatsak pui tu tawmno ka nei thei natu beak in a mawmaw khat bang in hong saang lamh tavun.

¹⁷Tu a ka papau teng ahile Topa ii hong pau sak tute hi ngawl hi; hi kisuantaakna vai ah a mawmaw khat bangin ka pau takpi hi.

¹⁸Ahihang mihing ngaisutna lel te taw zong a kisuangtaak om ahiciang, kei zongh tuabangma ka ngamta tu hi.

¹⁹Noma tekma ciim mama na hi uh komin, mihing mawmawte sia lungdam thakin na dual uh hi!



²⁰Note a uk bangpo hong sawlte, note tung pan na neisa hong duupte, thaang taw hong siate, hong nomute ahibuale na maitang hong beangte khat pawpo na dual uh hi.

²¹Tuabangte vawt tu in ih lauthauh lei na teng pualaak tu sia ka mai zum hi! Ahihang khat pawpo in bang khat po huvau in a kisuangtaak ngam a ahile — a mawmaw bangin pau tu ci leang — kei zongh ka kisuangtaak ngam tu hi.

²²Amate sia Hebrew mi ahi uh ziam? Kei zongh ka hi hi. Amate sia Israel te ahi uh ziam? Kei zongh ka hi hi. Amate sia Abraham suante ahi uh ziam? Kei zongh ka hi hi.

²³Amate sia Christ naseamte ahi uh ziam? A mawmaw bang ka hi tha ta zong, amate sangin a phazaw naseampa ka hi hi! A nasia zaw in na ka seam a, thong zong tamvei ka taak zaw hi, tamvei hong kivel zaw a, a tamvei zaw ka thi dektak bul hi.

²⁴Jewte in sawmthum le kua vei veu, nga vei tak hong saat hi;

²⁵thum vei sia Rome mite in hong saat hi; khatvei sia suangtum taw hong kihua hi. Thumvei teambaw lal ka tawk a, khatvei sia nai kul le nai li sung tui sungah ka om hi.

²⁶Ka khualhawna tam mama sungah namthuamna pan, ngualsuamte pan, Jew mipuite le Gentilete tung panin, lauhuaina ka thuak hi; khuapi sung, duisung ngampa, tuipi tung le ngualtamh thumaan ngawlte tung panin lauhuaina tuatuam ka thuak hi.

²⁷Nasep thil vawt ki tatsat ngawl a, mut ka nga ngawl hun tamvei mama hi; ka ngilkial hun le ka dangko hun om a; an ngina ka neak ngawl hun, belh tu sel in, puansilh ka nei ngawl hun tam pheivei hi.

²⁸Thildang a vaal lai, pawlpite theampo atu in, ka thinbotna in, nisim in ka ngim hi.

²⁹Mihing khat po a tha zawm ciangin, kei zongh in ka tha zawmpui hi; khat po mawna sang a puk ciangin, thin heena taw ka kidim hi.



³⁰Kisuantaak a kul tu ahile zong, ka thazawmna hong lak nate tungah ka kisuangtaak tu hi.

³¹Topa Jesus ii Pathian le Pa — a tawntungin ama min in thupha nga taken! — tua Pathian in ka leilot ngawl hunlam hong he hi.

³²Damascus khua ah ka omlai in Kumpipa Aretas khutnuai a om ngamkhen uk mangpa in kei hong mat natu in khuapi kongpite ah a cingte koi hi.

³³Ahihang khuapi luphung vang khat panin bawm khat taw kei sia hong kikhiasuk ciang ama kung sung pan ka suakta hi.

2 Corinth te 12

Paul Mukholnate le Thu Pualaaknate

¹Bangma phattuumna om ngawl ahitazong, ka kisuangtaak kul tu hi. Ahihang tu in Topa hong piak mukholnate le thu pualaaknate huvau kong son tu hi.

²Tu nung kum sawm le kum li lai in Tapidaw khat sia vantung a saang belna ah kila to hi ci in ka he hi. (Hisia in a piang tatak ma ziam maw, mukholna khat nei ahiziam ci sia ka he bua hi — Pathian bek in he hi.)

³⁻⁴Khat vei hong cikik leng, hisia pa sia Paradise ah kila to hi ci in ka he hi. (Tusia zong a piang tatak ma ziam maw mukholna nei ziam ci sia ka he bua hi — Pathian bek in he hi.) Tua munah kammal taw a kilo thei ngawl, mihing kam le muk ii son tuak ngawl kamte ama in za hi.

⁵Tua ahikomin hisia pa huvau ka kisuangtaak tu hi — ahihang ka thazawmna hong kilanghsak thute sim ngawl keima tungtaang ah ka kisuangtaak buatu hi.

⁶Hi ka son thu in thumaan ahikom, kisuangtaak nuam leng zong a mawmaw ka hi tuan buatu hi. Ahihangin kisuangtaak ngawl tu khi hi, banghangziam cile ka pauna hong zaakna le ka sepna hong muna za sang in a vaal in kuama ii hong thupi ngaisut tu ka dei bua hi.

⁷Na lamdang tam mama ka mute hu in, kiphatsakna taw ka kisakthei ngawl natu in keima pumpi sungah hong zo tu in Satan sawltak khat bangin na a



seam, a bot mama pumpi natna khat hong kipia ahikom, ka ki phatsak ngawl natu in hong khaam hi.

⁸Hisia hong laak keaksak natu in tua huvau Topa tungah thumvei vaset thu ka ngen hi.

⁹Ahihang ama hong zona in: “Ka thuthiamna in nang atu in kicing hi, banghangziam cile na thazawm ciangin keima vaang sia lian belh hi,” ci hi. Christ vaangletna in kei tung panin hong dalna ka phaw natu in, ka thazawmnate hu in ka kiphatsak sia ka lungdam belna ahi hi.

¹⁰Christ atu in thazawmna, kilealna, haksatna, vawtsiatna le buainate ah ka lung a kim hi. Banghangziam cile ka thazawm ciangin a thahat ka suak hi.

Corinth te atu Paul ii Thinbotna

¹¹Keima sia a mawmaw bang in ka ngamta hi — ahihang noma in tuabang a ngamta tu in nong vawt uh hi. Note in kei nong deina a lak tute na hi uh hi. Bang hang ziam cile bangma ka hi ngawl hangin, note ii a lamdang tuamin na ngaisut uh “sawltakte” sangin ka nozaw tuan bua hi.

¹²Sawltak ka hina a kilak natu in nalamdang laknate le a lamdangte tam mama note sungah hong kivawtte sia thinsauna tatak taw hong kivawt ahi hi.

¹³Sum taw huna tu kong konlaw ngawl sia simngawl, pawlpi dangte sangin a sizaw in kong vawtna bangbang om ziam? Nong hesuakna in tuabang ka phat ngawlnate hong maisak tavun!

¹⁴Tu in no kungah hong haw tu in thumvei ka kithoai zo a — note tungah bangma kong ngen buatu hi. Ka dei sia in na sum na paai uh hi ngawl a, noma mama na hi uh hi. A tatak in ci leang tate in nute pate a vak natu hi ngawlin, nute pate ii tate atu a vak natu hizaw hi.

¹⁵Ka nei theampo ka nuntakna dong zongh note kong hu natu in lungdam takin ka zangh khawng tu hi. Tua za in kong it mama hu in, nong itna uh khiam zaw pumsai tu nu ziam?



¹⁶Tua zawk ciang kei sia note atu in vanhngit ka hi ngawl na maan nasa tu uh hi. Ahizong khatpo in kei sia theamna zangh thei a, leilotnate taw note hong aita hi hong ci tu hi.

¹⁷Kamtai kong paisakte khat po tungtawn in note tung panin noptuam kong la ziam?

¹⁸Titus in hong pai in, Tapidaw suapui dang khat hong tonpui natu in keima nget ahi hi. Titus in a kilawm ngawlin, notung pan laak hong nei citu nu ziam? Ama le kei sia a kibang tupna te tungtawn in a kibangin ngamta hi ngawl khu ziam?

¹⁹Note mai ah a tawntungin koma le koma ki panghong bangin, nong ngaisun tha tu uh hi. Hi ngawl hi! Pathian mai ah Christ ii pau le hong oai bang in ka pau uh a, ka it lawmte awng, na ka vawt theampo uh sia, noma kong hu natu a, a kivawt ahi hi.

²⁰No kung kong thet ciangin kong dei bang na hi ngawl na uh kong mu tu le, nong dei uh bang keizong ka hi ngawl na nong mu tu ka lau hi. Kihaua le ki eenna, thintomna le kangsung heakna, kilealna le ki ngensiatna, kiphatsakna le kilemngawl na te kamu tu ka lau hi.

²¹Kong pai kik ciangin, a bo sa hun sung note tam mama in mawna na vawt uh a, ci le sa deina taw nu le pa mawna te —paktat ngamtatnate pan a kisiik kik ngawl mawneite hu in, keima ka kap tu a, note mai ah ka Pathian in kei hong maizum sak tu ka lau hi.

2 Corinth te 13

A khakbel Kidop natu Sonkholnate le Nuksetnate

¹Hisia in tu in note kungah a thum veina haw tu in kong paina ahi hi. “Kimawsiatna khat pawpo sia tetti nii ahibuale a tamzaw ii tetti pan nataw kip sak kul hi.” — laithiangtho ci bangma ahi hi.

²Hun bosa sungah mawna a vawt sa note tung le ngualdang theampo tungah kong son nuam hi; tu masia a, a nii veina kong pai lai in, hong ci zo khi hi, ahihang, tu in note kung pan a khualana ah om ka hiciang hong ci kik tu khi



hi: kong paikik ciang ahile kuama daan thuakna taw na kipeal thei buatu uh hi.

³Christ in keima tungtawn in hong ci tatak ma ahina tetti lakna na dei uh teng na nga tu uh hi. Ama in note taw hong sep khop ciang, a thazawm bua hi; a vaangletna no sungah hong lak zaw hi.

⁴Banghangziam cile, thinglamte tungah thisakna in, thazawmna khat ahitazongin, Pathian vaangletna taw ama nungta hi. Ama taw ih pumkhatna ah eite zongh ih thazawm hi; ahihang note taw ih kizop na ah ama ii nuntakna sung a om Pathian vaangletna sia ih siim khawm tek tu hi.

⁵Upna sungah nungta nu ziam ci in na kitel natu in, noma le noma kisit vun a, noma le noma thu na kikhen vun. Tua sung ah na lel bit bana uh le — Christ Jesus in note sungah hong nungta hi ci in he tatak na hina uh ziam?

⁶Kote ii lelngawl ka hi hunlam noma tel tu in kong muang hi.

⁷Kote zawna a lak tu hi ngawlin, ko sia a lelte bang zongh hi tha tu ka hi uh hang, a maansia na sep thei natu in na tatkhial ngawl natu Pathian tungah thu kong ngetsak uh hi.

⁸Banghangziam cile kote in thumaan thutak langpan in a seam thet te ka hi bua uh a, a panpui bek ka hi uh hi.

⁹Ko ka thazawm uh ciang, na thahat uh sia ka lung uh dam hi. Tua ahiciang note sia na cialcing thei natu in thu kong ngetsak sii uh hi.

¹⁰Tua hang in, hi laisia notaw ih khualat laitak kong aat ahi hi; note hong susia tu hi ngawlin, note kong puuaphat nopna in, Topa hong piak thuneina zangh in — no kung kong thet ciang hangsan in kong ci kulngawl tu in lai hong ngaal thaak ka hi hi.

¹¹Tuaciang tu in suapuited awng, mangpha na man tavun! Cialcin natu na hanciam vun; kong thuumna hong ngai tavun; khat le khat na ki thukim vun a; kilem takin na nungta vun. Tuaciangin ki itna le thinnop kilemna — Pathian sia note taw hong omkhawm tu hi.



¹²Khat le khat sia suapui kinapna taw na ki nukset tavun. Pathian mihing theampo in paupuina kam hong thaak hi.

¹³Topa Jesus Christ thuthiamna, Pathian itna le Thaa Thiangtho hong pawlpuina in note theampo taw hong om taken.



Galatia te

Galatia te 1

¹Mihingte kungpan hi ngawl, mihingte ii piansak thu zongh hi ngawl, thina pan Jesus a tho kiksak Pa Pathian le Jesus Christ kung pan sapna a nga sawltak ahi keima Paul ii tung pan ahi hi.

²Hi sungah a om keima taw a kizom suapuite theampo in Galatia ngam pawlpite tungah ki muana kam kong thaak uh hi:

³Ih Pa Pathian le Topa Jesus Christ in thuthiamna le thinnop kilemna hong pia taken.

⁴Tu a hun pha ngawl sia panin ih suaktakna tu in ih Pa Pathian deina a zuina taw, Christ in ama le ama eite mawna atu in hong kipia hi.

⁵Pathian tungah minthanna om tawntung taken! Amen.

Lungdamna Thupha Khat

⁶Note lamdang kong sa hi! Hun tawmvei no sungin Christ thuthiamna taw note hong sam pa, na taisan uh a, tuaciang lungdamna thupha dang khat na saang uh hi.

⁷A tatakin, “lungdamna thupha a dang” om tuan ngawl hi, ahihang hi bang a kong ci theina in mihing pawlkhat in Christ lungdamna thupha laih tu in hanciam uh a, na thin uh hong nawngkaisak hi.

⁸Ahihang kote ka hi uh zong, ahibuale vantung lalang khat keak ahizong, note tungah kong hil sa Lungdamna Thupha taw a kitumdangin hong hil a om le tua mi sia hell khuk sungah kivawk taken!

⁹Tu masia zonghin kong cizo uh hi, tu zonghin kong ci kik hi. Khat po in na saan sa uh Lungdamna Thupha sia taw a kitumdang khat hong hil a, ahile tua pa in hell khuk sungah ki vawk taken!

¹⁰Hi bang a ka pau sia mihingte diksak tu deina awsua hi na sa uh ziam? Hi ngawl het hi! Pathian diksak tu bek ka deina hi! Mihingte maipha nga nuam



a hanciam ka hi ziam? Tuabang hanciam lai ka hile Christ naseam khat ka hi buatu hi.

Paul Sawltak A Suana Daan

¹¹Ka suapuite awng, ka hil lungdamna thupha in mihing tung pan a piang thu hi ngawl hi ci sia kong son nuam hi.

¹²Mihing khat pawpo tung panin ka nga hi ngawl hi, kuama ii hong hil zongh ahi bua hi. Kei tungah hong pualak sia Jesus Christ ama mama ahi hi.

¹³Jewte biakna sungah ka kipiak laitakin, kei bangbangin a nungta mi ka hi na, bangbang in Pathian pawlpi hesuakna nei ngawlin ka siatvawt a, a siasak tu in ka hithei za ka hanciamnateng sia notung ah hong ki sonsa ahi hi.

¹⁴Jewte biakna ka zui sungteng in ka khanngual a tamzawte mai ah ka madawk a, ih pute ii taangh ngeina sung ah amate sangin a bungzaw ngawp khat ka hi hi.

¹⁵Ahihang, Pathian in ka pian maa ngangawn in a thuthiamna taw hong teal a, ama na a seam tu in hong sam hi. A khensatna hun hong cing a,

¹⁶Gentilete tungah ama huvau Lungdamna Thupha ka hil thei natu in a Tapa kei tungah hong pualak ciangin, ngaisutna pha ngenin kuama kungah ka pai bua a,

¹⁷kei mai a, sawltak a seamte taw kimu tu zonghin Jerusalem ah ka pai bua hi. Tua taangin, Arabia ah thakhatin ka pai a, tuazawk ciang Damascus ah ka heak kik hi.

¹⁸Tua zawk kum thum ciangin Peter tung pan thu za tu in Jerusalem ah ka pai a, nipi nii sung, ama kungah ka taam hi.

¹⁹Topa ii suapuipa James sim ngawl sawltak dangte ka mu bua hi.

²⁰Kong at teng thumaan hi. Leilot ngawl ka hi sia Pathian in hong he hi!

²¹Tua zawkciangin Syria le Cilicia ngamsung mun tuatuam ah ka pai hi.

²²Tua hun laitakin Judea pawlpite sung ah a om pawlpi mite in kei hong he bua uh hi.



²³Midangte ii hi bang a, a pau teng bekma a he uh hi: “Eite hong siatvawt ngei mipa in khatvei lai a lalsak tu in a hanciamh upna sia, tu in thuhilna in nei hi.”

²⁴Tuabangin amate in kei hu in Pathian pok uh hi.

Galatia te 2

Paul le A dang Sawltakte

¹Kum sawm le kum li zawkciang Barnabas taw Jerusalem ah ka cia kik uh a, Titus sia keima in ka tonpui hi.

²Pathian in ka pai natu hong pualak ahikom ka pai hi. Lampuite taw ka kimu tuamna sungah, Gentilete tung kahilh lungdamna thupha teng ka son thiang hi. A bo sa hun ahizong, tu laitak ahizong, ka nasepna sungah lelna ka thuk tu ka uuk bua hi.

³Ka kitholpuipa Titus sia Greek mi ahitazong zawthawk thu taw a vunteap ki atsak ngawl hi,

⁴ahizong mihing pawlkhat in vunteap atsak nuam hi. Christ Jesus taw ih kipumkhatna tungtawn in ih nga suatakna thu kan nuamin, hi mite pawlkhat sia ih thu uppuite bangin hong kivawt a, eite sungah thudawp tu in hong tum ku hi. Amate in eite sila in hong kai nuam hi,

⁵ahihang lungdamna thupha ii thumaanna sia note atu a kikepcing thei natu in, amate deina tawmvei bek zongh ih zawp hun a om bua hi.

⁶Ahizong tua lampui tu bang ahite — amate bang po ahizong kei a tu a lamdan ngawlina taw hi bangin pau ka hi hi; Pathian in a puasang pianzia te taw thukhen ngawl hi— tua lampui te in kei tungah ngaisutna thak piakna bngma hong nei ngawl hi ka ci hi.

⁷Jewte tungah lungdamna thupha hil tu nasep sia Peter tungah a piak bangin Pathian in kei sia Gentilete tungah lungdamna thupha hil tu in nasep hong piak sia amate in mu zawsap hi.

⁸Pathian vaangletna taw kei sia Gentilete atu in sawltak ka hi a, Peter sia Jewte atu in sawltak ahisak hang ahihi.



⁹Lampui bang ahi James, Peter le John te in Pathian ii hi nasep tuam hong piakna hong heakpui hi; tua ahikom amate in Barnabas le kei hong nukset a, tuasia in eiteng maa pangkhawm tek tu ci in limlakna ahi hi. Barnabas le kei sia Gentilete sungah seam tu a, amate sia Jewte sungah seam tu in ka thukim uh hi.

¹⁰Amate hong nget thu khat sia amate pawl sungah, a cimawte ka phaw pui natu hi a, tua thu in sep tu ka lawp thu ma ahi hi.

Antioch ah Paul in Peter Tei

¹¹Ahihang Antioch ah Peter hong pai ciangin, mihon mai ah ama ka nalh hi, banghangziam cile ama in khial citak ma in khial hi.

¹²James ii hong puak mihing pawlkhat tuamun athet maa in, Peter sia Gentile suapuite taw an ne khawm zo hi. Ahihang hi mite hong thet zawkciang, vunteap a atsak nuamte a kiitak hu in nungkin a, ama kikeamin Gentilete taw an a ne khawm nuam bua hi.

¹³Jew suapui dangte zongh Peter bangma in a lauthauh te bang hong hipaih hi; tua ciang Barnabas ngangawn zongh amate lauthauh ngamtatna in zo hi.

¹⁴Lungdamna thupha thumaan lampi tang sia, amate in tawn ngawl hi, ci in ka mu ciangin, Peter mun ah amate theampo mai ah hi bangin ka ci hi. “Nang sia Jew mi khat hi napi Gentilete bangin a nungta sa na hi a, Jewte bangin na nungta bua hi. Tua ahiciang Gentilete sia Jewte bangin a nuntak natu in bangbang zawthawk thu taw na sawlzo tu ziam,” ka ci hi.

Jewte le Gentilete in Upna taw Ngupna nga

¹⁵Eite ih pianna pan Jew tatak ma ih hi hi, “Gentile mawneite” a kici te ih hi bua hi.

¹⁶Ahizong mihing khat sia Jesus Christ upna tung bek tawnin, Pathian mai ah thutang kisuaksak hi ci in ih he a, Thukham ii deina bang sepna taw hi ngei ngawl hi. Eite zongh in Thukham ii deina bang ih sepna taw hi ngawlin, Christ ih upna tungtawn in Pathian mai ah thutang ih sua natu in, Christ Jesus ih um zo hi. Banghangziam cile Thukham ii deina zuina taw kuama Pathian mai ah thutang kisuaksak ngawl hi.



¹⁷Tua ahile Christ taw ih kipumkhatna pan thutang suak tu in, ih hanciam takciang, Gentilete za ma in mimawte in hong kimu ahile Christ sia mawna a piangsak tu in a seam ahi tu ziam? Hi ngawl het hi!

¹⁸Thukham ka phiat sate lemto kik tu ka kipan le — Thukham paltanpa khat in a ki pholak ka hi hi.

¹⁹Ahihang Thukham taw kisai in kei ka thi zo hi — Thukham mama in hong thatlum zo hi — Pathian atu ka nuntak thei natu ahi hi. Christ taw ama ii thinglamte tungah ka thi khawm zo hi,

²⁰tua in a nungta sia kei ka hi nawn bua a, ahihang kei sungah a nungta sia Christ ahi hi. Tu a ka nuntakna sia ahile kei hong it a, a nuntakna kei atu hong pia Pathian Tapa ka upna taw a nungta ka hi hi.

²¹Pathian thuthiamna nial tu ka uuk bua hi. Ahihangin mihing khat in Thukham tungtawnin Pathian mai ah thutang kisuaksak ahile Christ thina in khiakna nei ngawl a suak hi!

Galatia te 3

Thukham ahibuale Upna

¹Galatia mihing mawmawte awng! Akua in hong bum ziam? Jesus Christ thinglamte tungah a thina thu sia na mittang uh taw, thiang tak in na mu thei tu in hong kilak zo hi!

²Thu khat hong son tavun: Pathian Thaa sia Thukham ii deina, na zuina uh panin, saang nu ziam maw, lungdamna thupha za a, na upna uh pan nga izaw nu ziam?

³Bangbangin tu zata in mawmaw thei nu ziam! Pathian Thaa taw kipan phot nu hi; tu in noma thahatna taw khup sawm nu ziam?

⁴Na heak sa theampo no atu in bangma mama hi ngawl ahi ziam? Tawm peuma khiakna neinak tu hi!

⁵Pathian in Thaa hong pia a note sungah nalamdang laknate hong sep sia Thukham ii deina na zui uh hang ziam maw lungdamna thupha za a na up uh hang ziam?



⁶Abraham tungah thupiangte ngaisun vun; laithiangtho in, “Ama in Pathian um a, ama upna hangin Pathian in thumaan thutang in saang hi,” ci hi.

⁷Tua ahiciang Abraham suan tatakte sia upna a nei mihingte ahi hi, ci in natel natu ahi hi.

⁸Pathian in Gentilete sia upna tungtawn in thutang suaksak tu hi ci in laithiangtho in son khol hi. Tua ahikom laithiangtho in Lungdamna Thupha sia Abraham tungah, “Nang tungtawn in Pathian in mihing nam theampo thupha pia tu hi,” ci in son hi.

⁹Abraham in um a thupha kipia hi; tua ahikom a umte theampo ama bangin thupha kipia hi.

¹⁰Thukham zuina a suangte sia haamsiatna nuai ah nungta hi. Banghangziam cile laithiangtho in, “Akuama po Thukham laibu sungah a ki atteng a vekpi in a zui tawntung ngawlte sia Pathian ii haamsiatna nuai ah om hi!” ci hi.

¹¹Tu in kuama thukham taw Pathian mai ah thutang kisuaksak ngawl ci in thiang hi, banghangziam cile laithiangtho in, “Upna tungtawn in Pathian mai ah thutang a kisuaksak sia bek nungta tu hi,” ci hi.

¹²Ahihang Thukham in, upna taw a kisaina bangma om ngawl hi. “Akuama po thukham deina a vekpi in a seam peuma nungta tu hi,” laithiangtho in ci zaw hi.

¹³Ahihang Christ in ei atu a ki haamsiatna taw Thukham ii hong puak haamsiatna panin eite ama in hong tan zo hi! Banghangziam cile laithiangtho in, “Akuama po, thing tungah a kikhai sia in Pathian ii haamsiatna nuai ah om hi,” ci hi.

¹⁴Upna tungtawn in Pathian ii hong kamciam sa Thaa ih nga natu, Abraham tungah Pathian kamciam sa thuphate, Christ Jesus tungtawn in Gentilete tung a kipiak thei natu in Christ in tuabangin vawt ahi hi.

Thukham le Kamciam



¹⁵Ka suapuite awng, nisim a piang sonteena khat kong zangh tu hi: mihing nii in na khat tungtaang ah thukim in lungkimna lai a vawt uhle kuama in tua thukimna paltan thei ngawl a, belap thei ngawl hi.

¹⁶Tu in, Pathian in Abraham le ama ii suan pa tungah kamciamte pia hi. Laithiangtho in mihing a tam cina a lak “a suan a paahte” ci kammal zangh ngawlin, mihing khat bek a cinopna “a suan ” ci kammal sia Christ a cinopna hi.

¹⁷Ka son nop sia Pathian in Abraham taw thuciamna vawt a, ka kholet tu hi, ci in kamciam pia hi. Kum zali le kum sawmthum zawkciang a kipia Thukham in tua thuciamna paltan in Pathian kamciam sia phiath thei ngawl hi.

¹⁸Banghangziam cile Pathian letsong sia Thukham tungah kibulphu hile, ama kamciam tungah kibulphu ahi nawn bua hi. Ahizong ama kamciam hangin Pathian in Abraham sia tua letsong pia hi.

¹⁹Tua ahile Thukham ii tupna in bang ziam? Tatkhialna sia bangziam ci in a lak tu in a kibelap ahi hi, tuaciang tua Thukham sia kamciam a kipiakna pa, Abraham ii suan sia hong pian mateng a kho tu in a kingaisun ahi hi. Thukham sia vantung lalangte in hong thaaksuk a mihing khat in a kilaklaw ah palai hong seam hi.

²⁰Ahihang mihing khat nguak sepna sungah palai kul ngawl hi; tuaciang Pathian sia khat ahi hi.

Thukham ii Tupna

²¹Tua ahile Thukham sia Pathian kamciamte taw a kileebul ziam? Kileebul ngawl het hi! Banghangziam cile mihingte in nuntakna hong pia thei Thukham khat na saang zo ahile tua thukham zuina taw mihing sim in Pathian mai ah thutang ki suaksak thei tu hi.

²²Ahihang laithiangtho in leitung bup sia mawna vaangletna nuai ah om hi, ci hi; tua ahikom Jesus Christ upna bulphu a, a kipia kamciam sia, ama a umte tungah kipia hi.



²³Ahihang upna nei natu hun hong thet maa in Thukham in hi hong pai tu upna hong ki pualaak mateng eite theampo thongtaak bangin hong khabil hi.

²⁴Tuaciangin Upna tungtawn in Pathian mai ah thutang ih sua thei natu in, Thukham in Christ hong pai mateng hong uk hi.

²⁵Tu in upna nei natu hun sia hisung hong theng zo ahikom, Thukham in eite hong uk nawn bua hi.

²⁶Note theampo sia upna tungtawn in Christ Jesus taw na kipumkhatna uh hu in Pathian tate na suak siat uh hi.

²⁷Note Christ taw na kipumkhatna sung ah na ki baptize uh a, tua ciang Christ ama mama ii nuntakna taw puanbang in hong ki silh sak zo cinopna hi.

²⁸Tua ahikom Jewte le Gentilete, silate le sila ahi ngawlte, pate le numeite kilaklaw tek ah kilamdanna om nawn ngawl hi; Christ Jesus taw na kipumkhat uh ciangin note theampo sia pumkhat na hi uh hi.

²⁹Christ neisa na hina uhle, Abraham suante na hi uh a, Pathian hong kamciam sate na saang tu uh hi.

Galatia te 4

¹Ahihang tu in a kizom son tu ci leang — Pa ngamh a lua tu tapa in na theampo ama neisa ahihang, a khanmoi lai in sila bangin kivawt hi.

²Ama a khanmoi laitak in apa ii a hun ciam dong a vai teng a hawmsak tu le ama a entu in pasal pawlkhat om hi.

³Tuasia bangma in eite zongh thaa lamsang ah ih khanthin mateng in vaannuai buppi a uk thaa te ii sila in ih om hi.

⁴Ahihang a hun hong cin tak ciang, Pathian in a Tapa hong paisak hi. Ama sia mihing ahi leitung nu khat ii tapa bangin hong pai a, Jewte thukham nuai ah nungta hi,

⁵Pathian tate ih sua natu in thukham khutnuai a omte a tat natu in tuabang hong piang hi.



⁶Note sia a ma ii tapate na hina uh a lak natu in, Pathian in a Tapa ii Thaa sia ih thin sungah hong puak hi, tua Thaa in, “Pa awng, Ka Pa awng!” ci in au hi.

⁷Tua ahikom nang sila hi nawn ngawlin tapa khat na hi hi. Tuaciangin ama tapa hi zo na hikom, Pathian in a tapate atu a nei theampo nangma hong pia tu hi.

Galatiate atu Paul Thinbotna

⁸Hun bo sa sungah note in Pathian na he bua uh hi, tua hu in a maan ngawl pathiante ii sila in na om uh hi.

⁹Ahihang tu in Pathian na heak zawk uhciang — tua ahibuale Pathian ii no hong heak zawkciang cileang — bang hangin tua a zawngkhal, a khuangai huai ukna nei thaate kung zuan kik thei nu ziam? Banghangin amate sila suak kik nuam nu ziam?

¹⁰Nite, thate, khuahunte le kumte na thupi laak uh hi.

¹¹No huvau in ka thinngim hi! No atu ka sep sa teng bangma a kimang thei ngawl a suak buana tu ziam?

¹²Ka suapuute awng, hong ngen khi hi, keima bang hong hi tavun. Ahi tatak in ci leang kei zongh noma bangma ka hi hi. Kei tungah no nong khialna uh bangma om ngawl hi.

¹³Lungdamna thupha note kong hil maksakna ahang sia na phawk uh hi; ka cinat hu a hong hil ka hi hi.

¹⁴Ka pumpi omzia sia note atu in thinngimpi khat ahitazong, nong zawngsak bua uh a nong nial bua uh hi. Vantung lalang khat na saan tu uh bangin nong saang zaw uh hi; Christ Jesus na saan tu uh bangin, kei nong saang uh hi.

¹⁵Tua lai in lungdam mama nu hi! Ahitazong bang teng piangman ziam? Na mittang uh khelkeak in kei hong pia thei leute hong pia nuam liangin om nu hi, ci in keima tatak ma in ka son thei hi.

¹⁶Tua hile tu in thumaan thutak sia kong son hu in na ngalpa suak zo ka hi ziam?



¹⁷Tua midangte in note nasia takin hong thin nuammaw hi, ahihang amate tupna le sawmnate pha ngawl hi. Amate ii no hong kin bangin no zongh amate na kin thei natu in, no le kei hong khen nuam ahi hi.

¹⁸Tu in tuabang a kithin nopmawkna tatakte in tupna le sawmna pha hithongle — hisia in note taw kong omkhop ciang bek hi ngawlin, a tawntung maan hi.

¹⁹Ka it tanote awng, Christ pianzia note sungah hong pian mateng in, numeite nausuak tu a tut ciangin a bot bangma in ka thuak hi.

²⁰Tu laitakin note taw kong omkhawm thei nuam hi, tua hile kong ngaisut zia kikheal thei tu hi. Note atu in ka thin ngim mama hi!

Hagar le Sarah taw Sontena

²¹Thukham khutnuai a om nuamte, thu khat kong dongh tu hi. Thukham ii cina sia za ngawl nu ziam?

²²Abraham in tapa nii nei a, khat sia sila numei taw a hin hi a, a dang khat sia sila ahi ngawl a suakta numei taw a hin ahi hi.

²³Sila numei taw a hin tapa sia mihing pian ngei bang a, piang hi. Ahihang a suakta numei taw a hin sia in Pathian kamciamna pan piang hi, ci hi.

²⁴Hi te sia limlakna khat bangin ki he thei hi. Numei nii sia thuciamna nam nii hi. Sila in a piang tate a hing sia Hagar hi, tuaciang ama in Sinai mual ah a kivawt thuciamna ii lim ahi hi.

²⁵Hagar sia Arabia ngam Sinai mual lim hi a, a mihingte theampo taw sila kaai in a om lai hun Jerusalem khuapi ii lim ahi hi.

²⁶Ahihang vantung Jerusalem sia a suakta hi a, ama sia eite ii nu ahi hi.

²⁷Banghangziam cile laithiangtho in, “Tasel numei awng, lungdam in! lungdamna taw aukeak in! Nang nautut nat a he ngei ngawl nu awng! Banghangziam cile, a kitaisan numei in, a pasal ii a nusiak ngei ngawl numei sia sangin, ta tam a nei zaw tu hi,” ci hi.



²⁸Isaac sia kamciamna panin piang ahi bangma tu in no, ka suapuite awng, kamciamna pan a piang tate na hi uh hi.

²⁹Tua hunlai in a pian ngei bang a piang tapa in Pathian Thaa taw a piang tapa sia siatvawt hi; tu in zongh tuabangma ahi hi.

³⁰Ahihang laithiangtho in bang na ci ziam? “Sila numei le a tapa paikhia sak vun; banghang ziam cile sila numei ii tapa in a suakta numei ii tapa taw a pa lamhsa a lua khawm buatu hi,” ci hi.

³¹Tua ahikom ka suapuite awng, eite sia sila numei tate ih hi bua a, a suakta numei tate ih hi hi.

Galatia te 5

Na Suatakna Keam vun

¹Suatakna sia ei neisa hi — Christ in hong suaktasak zo hi! Tua ahikom a suakta mihingte bangin, ding vun a, sila na suak kik nuam heak vun.

²Ngai vun! Keima Paul in kong ci hi, na vunteap uh na atsak nuam uh le Christ in note atu kimanna nei ngawl het ahi hi.

³Khatvei ma kong ci kik hi, pasal khat peuma in a vunteap a atsak nuam le Thukham buppi a zui kul hi.

⁴Thukham zuina taw Pathian mai ah thutang sua natu a hanciam uh le noteng in noma le noma Christ kungpan a kikhaktan na hi uh hi. Note in Pathian thuthiamna puasias ah na om uh hi.

⁵Kote ka hi uhle ka lam etna uh sia Pathian in thutang hong suasak tu ci thu ahi hi; hi thusia ka upna uh tungtawn in Pathian ii Thaa vaangletna taw hong seam tu hi ci in ka ngak uh sia ahi hi.

⁶Banghangziam cile Christ Jesus taw pumkhat a ka om uh ciang vunteap atna ahizong at ngawl na ahizongin bangma kitumdanna a omsak bua hi; a thupi sia in ki-itna tungtawn a, na a seam upna ahi hi.

⁷Na vawt uh sia pha mama hi! Akua in thumaan thu na nit tusia hong khaktan ziam? Bangbangin ama in hong kaizawn ziam?



⁸No hong sam Pathian in tuabangin hong vawt ngawl hi.

⁹“A kithau sa anvui a khan natu in tol tawm bek kismh hi,” a ci uh bangma ahi hi.

¹⁰Ahihangin note huvau in thinmuanna ka nei lai hi. Topa taw pum khat in ih nuntakna in, ngaisutna tumdang na nei ngawl natu in hong lungmuangsak a, hong nawngkai sak pa sia akua po ahizong, Pathian in daan pia tu hi, ci in ka um hi.

¹¹Ahihang kei ka hile, ka suapuite awng, vunteap at kul hi ci in thu hilh lai ka hile banghangin hong kivawtsia lai ziam? Tua sia in thumaan hile Christ thinglamte thu ka hilna in bangma ngimna a piangsak buatu hi.

¹²No hong nawngkai sak mite tai siat le ka oai hi; zomsuak in amate le amate kinget taken!

¹³Ka suapuite awng, no sia a suakta tu in hong kismh hi. Ahihang hi suatakna in chi le sa deina ii hong ukna tu a paulap nuam hisak heak vun. Tua taangin ki itna taw khat le khat kihu vun.

¹⁴Banghangziam cile thukham buppi sia thukham khat in kingawm hi: “Nangma le nangma na ki it bangin na innpaamte na it in.”

¹⁵Ahihang ngamsate bangin na ngamta uh a, khat le khat kisu in na kiliamsak uh le, tuasia ciang kidawm tavun, tua ahibuale khat le khat ki lalcipsak tu nu hi.

Thaa le Mihing Pianzia

¹⁶Kong son thu in hi sia ahi hi: Thaa in na nuntakna uh zeaksak vun, tua hile mihing pianzia ii deinate na zawp buatu uh hi.

¹⁷Banghangziam cile ih mihing pianzia ii deite sia Thaa ii deite taw kilangpan hi, tuaciangin Thaa ii deite sia mihing pianzia ii deite taw kilangpan hi. Hite nii in kingal hi, na ngamtat nop uh bangin na ngamta thei bua uh hi a cinopna hi.

¹⁸Thaa in hong lampui le Thukham khutnuai ah na om nawn bua uh hi.



¹⁹Mihing pianzia ii sepna sia thiang takin kimu hi. Tua sia in nu le pa paktatna, a kiihuai le zummawk ngamtatnate;

²⁰milim biakna le bum le ai toaina te hi. Mihingte khat le khat kingalin kido uh hi; amate ki eangin, thin uukin, ultup uh hi. Amate apawl apawl in kikhen hi;

²¹kidungawkna, zukhamna, sikvil loklenna le hi bang a dangte ngamta uh hi. Kidop natu kong piak ngei bangin tu in kong ci hi: hi bang a ngamtate in Pathian Ngam lua ngawl tu hi.

²²Ahihang Thaa in itna, lungnopna, thinnop kilemna, thinsauna, dikna, phatna, thumaanna,

²³kiniam khiakna le eima le eima ki uk zawknate piangsak hi. Hi te a langpan thukham bangma a om bua hi.

²⁴Tuaciang Christ Jesus neisa ahite in, a mihing pianzia le tua ii uukna le deinate sia thi khawm sak zo hi.

²⁵Thaa in nuntakna ei hong pia zo hi; ama in ih nuntakna zongh hong uk nanak tu hi.

²⁶Ei sia khat le khat tungah kiphasakin, kitaw in, ih ki eang buatu hi.

Galatia te 6

Vanhngit Kipuakpui vun

¹Ka suapuite awng, tatkhialna nam khat po taw mihing khat a kiman le, thaa taw a nungta note in, ama sia a dinmun maan ah na koi vun; ahihang cikna thiamna na zangh hamtang vun. Tuaciangin note zongh ze etna na thuak ngawl natu noma le noma ki en in kidawm vun.

²Khat le khat vanhngitte na kidawn tavun, tuabang in Christ thukham a zyi tu uh hi.

³Khat po in ama sia bangma hi ngawl napi, hi a kisa le ama le ama kitheam hi bek hi.



⁴Mihing khat sim in ama le ama a ngamtatna kisit hen. Ngualdang khat ii ngamtatna taw ki teengat ngawlin, a pha a ngamta khat in ama ngamtat phatna tungah kisuangtaak thei taken.

⁵Banghangziam cile mihing sim in a vanh uh tek a puak kul tu hi.

⁶Tapidaw thu a kihil pasal khat in, ama neisa na pha theampo a Syapa taw hawm taken.

⁷Noma le noma kitheam heak vun; Pathian sia kuama theam zawk hi ngawl hi. Mihing khat in a poai bang lian in a at tu hi.

⁸Ama in a pianzia deina lo sungah a poai le, tua mun panin thina an kaikhawm tu hi; Thaa ii deina lo sungah a poai le Thaa panin tawntung nuntakna an kaikhawm tu hi.

⁹Tua ahikom na pha sepna sungah toi kisa ba tawng; banghangziam cile thinkiam in tawp bua po leang ih anlaak tu hun hong theng tu hi.

¹⁰Tua ahikom hunpha ih nga simin mihing theampo tungah a pha ih seam tu a, a tuan in upna sung a ih innkuanpuite tungah ih seam tu hi.

A khakbel Kidop natu Sonkholna le Nuksetna

¹¹Keima khut taw laithak kong at ciang, laimal lian taw ka aat sia mu tu nu hi!

¹²Note tungah zawthawk thu taw vunteap hong atsak nuamte sia, a puatham thute ah laiseal a, a kisuangtaakte ahi hi. Ahizong amate tuabang a vawtna sia, Jesus Thinglamte hu in vawtsiatna a thuak thei bua tha le ci in a ngaisut uh hang bek ahi hi.

¹³Vunteap at te ngangawn zongh Thukham a zui bua uh hi; note vunteap hong atsak nopna thu in, pumpi tung a zeksa vawtna sungah na tum uh sia, a kisuantaak thei natu ahi hi.

¹⁴Ahizong kei ka hile ih Topa Jesus Christ thinglamte bekma ka kiphatsak pui tu hi; banghangziam cile ama thinglamte taw in leitung sia kei atu a thisa hi a, keima in leitung atu in a thisa ka hi hi.



¹⁵Mihing khat vunteap a ki at le a ki at ngawl sia a phat mawkna mama om ngawl het hi; a pha maw sia in mihing thak suana ahi hi.

¹⁶A nuntakna sungah hi ngeina a zuite tungah thinnop kilemna lehesuakna om taken a — amate le Pathian mihing theampo tung zongh ah om taken!

¹⁷Thu khupna ah: kuama in kei tungah ngimna hong pia thuasak nawn heak vun, banghangziam cile ka pumpi tung a meima pawn omte in kei sia Jesus sila ka hina a lak hi.

¹⁸Ka suapuite awng, ih Topa Jesus Christ thu thiamna sia note theampo tungah hong om taken. Amen.



Ephesus te

Ephesus te 1

¹Pathian deina taw Christ Jesus sawltak khat ahi Paul in — Jesus taw kipumkhat nuntakna sungah a thumaan Ephesus khua Pathian mihingte tungah lai kong thaak hi;

²Ih Pa Pathian le Christ Jesus in thuthiamna le thinnopna hong pia taken.

Christ sungah Thaa Thuphate

³Ih Topa Jesus Christ ii Pa le Pathian tungah lungdamko tawng! Banghangziam cile Christ taw kipumkhatna sungah ama in eite sia vantung ngam taw kisai thaa thupha theampo hong pia hi.

⁴Christ taw kipumkhatna tungtawn in, ama mai ah sit baang ngawl le ih thiantho natu in, Pathian in leitung a vawt maa ngangawn in eite hong teal zo hi. Hong itna hangin,

⁵Pathian in Jesus Christ tungtawn in a tate hong suasak natu in a khensat sa hi a — hi thu in ama diksak le tupna ahi hi.

⁶A minthang a thuthiamna hu le a it a Tapa sungah eite a thawthongin hong piak letsong hu in, Pathian pok tawng.

⁷Banghangziam cile Christ ii chisan hangin eite kisuakta a, tua thu in ih mawna kimaisak hi, ci nopna hi. Pathian thuthiamna bangza in lian ziam,

⁸tua in, hi za ta a lian mama eite hong piak thuthiamna ahi hi. Ama ciimna theampo le a thuk mu theina taw,

⁹Pathian in a tupna sa bangin vawt a, a pawlcing tu in a khensat sa ama tupna thuku sia Christ zangh in, eite hong hesak hi.

¹⁰A hun hong tun ciang Pathian ii khuangkhim tu hi tupna in vantung leitung ah bitphua sa theampo kaikhawm tu a, amate lutang tu in Christ koi tu ahi hi.



¹¹Na theampo sia Pathian tupna le khensatna bangin kiseam a; Pathian in a kipatciil pan mama in a khensat sa thu bulphu in, ama tupna hu in eite Christ taw kipumkhat a, ama aituam mihingte ih sua natu in hong teal hi.

¹²Tua ahikom Christ sungah lametna a nei phit eite in, Pathian minthanna pok tawng!

¹³Ngupna sungah hong then thumaan thu ahi Lungdamna Thupha sia na zaak uh ciang, note zongh Pathian mihingte na suak uh hi. Note in Christ na um uh a, tuaciang Pathian in hong kamciam sa Thaa Thiangtho hong piakna taw ama neisa na hina uh kitelna in note tungah tazik hong tuum hi.

¹⁴Tua Thaa in Pathian ii mihingte hong kamciam sate ih nga natu kipsakna hi a, ama neisa ahite tungah suatakna a cingin Pathian in hong pia tu hi ci in hong lungmuangsak hi. Ama minthanna pok tawng!

Paul ii Thungetna

¹⁵Hi thu hu in, Pathian mihingte na itna uh le Topa Jesus na upna uhte ka zaak nungsang,

¹⁶note atu in Pathian tungah lungdamkona ka tawlna ngei bua hi. Ka thungetnate sungah kong phawk a,

¹⁷ih Topa Jesus Christ ii Pathian, a vaanglian Pa tungah nang hong ciimsak a ama na heak natu, Pathian hong lak tu Thaa hong piak natu in, ka ngen hi.

¹⁸Bang lametna nei tu in note hong sam a, a mite a piak tu a, a kamciam thuphate bangza in nasia, ci in na heak natu in na thinsung uh hong kihonsak a, a khuavak na mu thei natu in kong ngetsak hi,

¹⁹tuaciangin ei thu umte sungah na hong seam ama vaangletna sia bangza in lian ziam, ci in na heak natu kong ngetsak hi. Hi, eite sungah na hong seam hi a nasia thahatna in,

²⁰Christ thina pan thosak a, vantung ama tokhum ziatsang ah a tosak sia ma ahi hi.

²¹Christ in tua munah vantung ukpите, thuneite, vaangletna neite, tote theampo ii tung panin uk hi; ama in hi leitung ah ahizong hong pai pheang tu



leitung ah ahizong, thunei min le zate theampo sangin a lianzaw min le za nei hi.

²²Pathian in na theampo sia Christ peangnuai ah koi a, na theampo ah pawlpi ukpi Topa tu in ama a pia hi.

²³Pawlpi in Christ pumpi hi a, ki cinna ahi ama mama in mun theampo ah na theampo khuangkchim hi.

Ephesus te 2

Thina pan Nuntakna

¹A bo sa hun sungah note in na thunit ngawl hang le, na mawnate hangin thaa lamsang ah a thi sa na hi uh hi.

²Tua hunlai in note in, leitung ngitlona zia na zui uh hi; van awng sungah thaa vaangletnate a ukpa thu na ni uh hi, tua thaa in tu laitak in Pathian thu a ni ngawl mihingte a uk sia ma ahi hi.

³A tatakina eite zongh, amate bang ih hi ngei a, ih pianpui lungngulnate taw ih nungta hi, ih pumpi le ih thinsung taw a kisi bangin ih seam ih vawt hi. Ih pianlim in ngualdang bangma in, Pathian thin uukna thuak tu in, a kiciangtan sa ih hi hi.

⁴Ahihang Pathian hesuakna sia kicing lawlawm a, tuaciang eite hong itna sia lian mama hi.

⁵Tua hi a eite ih thunit ngawl na taw thaa lamsang ah a thi sa in ih om laitak Christ taw hong nungtasak kik hi. Pathian thuthiamna taw note hong kingum zo hi.

⁶Christ Jesus taw pumkhat ih hina taw vantung ngamah ama taw a uk khawm tu in, Pathian in eite ama taw hong thosak zo hi.

⁷Hi bangin a sepna sia Christ Jesus sungah hong lak ki itna atu in a tuanin a lian sap thuthiamna sia hong pai tu hun theampo a, a kikhomsuan tu in hong lakna ahi hi.



8-9 Banghangziam cile note in upna tungtawnin Pathian thuthiamna taw ngup sa na hi uh hi. Tua in note hanciamna hang hi ngawlin, note kisuantaak thaak ngawl natu in Pathian letsong ahi hi.

10 Eite in tu a ih hi babangin, Pathian hong vawtsa ih hi a, Jesus Christ taw kipumkhatna sungah ngamtat pha nuntakna nei natu in, hong bitphua sa ih hi hi, tua thu in eite sep tu in, hong koi kholsak sa ahi hi.

Christ sungah Pumkhat

11 Amate le amate “Vunteap atte” (Pate ii amate pumpi tungah a vawtte cinopna) a kici Jewte in “Vunteap at ngawlte” hong ci, pianna suana pan Gentilete ahi note in, hun bo sa sungah na omzia uh kiphawk tavun.

12 Tua hunlai in note in Christ taw kikhen in a omte na hi uh hi. Note in ngamdang mite na hi uh a Pathian teal sa mihingte na hi bua uh hi. Pathian ii mihingte tungah a kamciamte a bulphu thuciamnate sungah na kihel bua uh a, note in hi leitung ah lametna sel le Pathian sel in na nungta uh hi.

13 Ahihang tu in, Christ Jesus taw na kipumkhat uh hu in, a khuala a om ngei sa note sia Christ kipum piak biakpiak thina hu in a nai hong kithen zo hi.

14 Banghangziam cile Chirst ama mama in, Jewte le Gentilete minam khat hong suasakna taw eite tungah kilemna hong puak zo hi. Amate a khen, ngal a suaksak kidoina pang sia ama pumpi taw sutham zo hi.

15 Ama taw kipumkhatna hangin, minam niite sung pan, a thak minam khat a bitphua thei natu in, minam a doi Jewte thukham le a ngeinate theampo phiatin hong kilemsak hi.

16 Thinglamte tungah Christ a thi ciangin amate kilaklaw ah kingal vawtnate lalthamsak hi; ama thinglamte hangin, tua minamte ngeal sia pumkhat a suak tu in ngawmtua a, Pathian kungah zotpui kik hi.

17 Tua ahikom Christ hong pai in Pathian taw a kikhuala, no Gentilete tung le Pathian taw a kinai Jewte tungah kilemna thu ahi Lungdamna Thupha hong hil hi.



¹⁸Christ tungtawn in eite theampo, Jewte ih hi a, Gentilete ih hi zongin, Thaa khat sungah Pa omna ih theng thei hi.

¹⁹Tua ahikom, Gentilete sia, ngam dang mi, khualmi hi nawn ngawl a; tu in note in Pathian mihingte taw ngam mipui, Pathian innkuan sungah a kihel mihingte na hi uh hi.

²⁰Note zongh, sawltakte le kamsangte ii cian phung kawng tungah a kisate na hi uh a, tua phungkawng a kinghsuangpi in Christ Jesus ahi hi.

²¹Ama in innbup a lenpa hi a, khangtosakin Topa tungah a ki aap biakinn thiangtho a suaksakpa ahi hi.

²²Ama taw na kipumkhatna sung uh ah note zongh, Pathian ii a Thaa taw a teenna mun ah ngualdangte taw hong kisa khawm hi.

Ephesus te 3

Gentilete atu Paul Nasepna

¹Hisia thu hu in, no Gentilete atu Christ Jesus ii thongtaakpa keima Paul in, Pathian tungah thu ka ngen hi.

²Note phattuum natu in, Pathian in a thuthiamna taw hi nasep sia kei hong piakna thu, na za takpi zo uh hi.

³Pathian in a tupna thuku hong lak a, kei hong hesak hi. (Hi thu a tom in kong at zo hi.

⁴Kong lai at sa sia na sim uhle, Christ thuku ka heakna thu na he tu uh hi.)

⁵Hun bo sa sungah tua thuku sia mihingte tungah kison ngawl a, ahizong tu in Pathian in a thiangtho sawltakte le a kamsangte tungah Thaa taw lak zo hi.

⁶A thuku sia bangziam cile Gentilete le Jewte in Pathian thupha sia Lungdamna Thupha hangin saang khawm thei hi; amate in pumpi khat ii nate hi tek a, Pathian ii Christ Jesus tungtawn a kamciam a piakte nga tek hi.

⁷Ama vaangletna tungtawn in Pathian ii a tuam vilvel in hong piak letsong taw kei sia lungdamna thuhil naseampa ka suak hi.



⁸Keima in Pathian mihingte sung pan a nobel sia sangin a nozaw laipa ka hi hi; tua hi napi in, a kison zo ngawl Christ hauna Lungdamna Thupha Gentilete tungah a puak tu in Pathian in hamphatna hong pia hi,

⁹⁻¹⁰tuaciang mihing theampo in, koi bangin Pathian thuku sia kizeak thei tu ziam ci in a mu thei natu in hong seamsak hi. Na theampo a bitphua Pathian in, pawlpi hang a, vantung lalang a ukte le vantung ngamah vaangletna a neite, ama ciimna a nam tuatuamte, tu hun sungah a heak thei natu in, a thuku sia a bo sa khanghunte sungah sealin koicip hi.

¹¹Pathian in ih Topa Christ Jesus tungtawnin a kitaksua, tawntung tupna taw kizui in a vawt ahi hi.

¹²Christ taw ih kikopna le ama sungah ih upna hu in, Pathian omna munah kimuanna le hanna taw ih pai ngam hi.

¹³Tua zawkciang, note atu in thuak ka hikom, na thin a kiam ngawl natu in kong thuum hi; tuate theampo sia noma phattuum natu ahi hi.

Christ ii hong Itna

¹⁴Hi thu hu in ih Pa mai ah ih kupdin hi,

¹⁵ama tung pan vantung le leitung a om innkuan sim in a min maan a nga uh hi.

¹⁶Pathian in ama ii a kicing minthanna panin a Thaa tungtawn a, na sungsang mi sia hong hatsak natu in, vaang hong piak natu kong ngetsak hi,

¹⁷na upna hangin note thin sungah Christ hong teangin, ki itna thu ah zungthuk le, bulkip na nei natu in thu ka ngen hi,

¹⁸tuasia ciang note le Pathian mihingte theampo in Christ itna ii a zaina le a sauna, a saanna le a thuknate heak theina na nei tu uh hi.

¹⁹Christ hong itna a kicing takin, kihe thei ngei ngawl tu ahitazong, ama hong itna he thei in, Pathian zia mama taw na kidim sitset natu in, thu ka ngen hi.



²⁰Ih sungah a vaangletna taw hong sep hu in, ei ii nget thei le ngaisut theiza sangin tamzaw pek a seam thei pa:

²¹Pathian tungah pawlpi sung le Christ sungah minthanna sia hun theampo atu in a tawntung pan a tawntung dong, om taken! Amen.

Ephesus te 4

Pumpi Khat hina Thu

¹Tua ahiciang Topa na ka sep hu in, thongtaak keima in, Pathian ii note hong sap hun laitakin hong koisak bang nuntakna zia taw na nuntak natu in, kong hanthawn hi.

²A tawntungin kiniamkhiak in, cinghkamh in, na thinsausak tavun. Khat le khat kidualna taw itna kilak tavun.

³Na kilemna tungtawn a Thaa hong piak, no hong ngawmtua kipumkhatna sia a kep natu in na vawt theiza in na vawt vun.

⁴Note Pathian hong sapna sungah lametna khat a om bangma in, pumpi khat om a, Thaa khat om hi.

⁵Topa khat, upna khat, baptize na khat om hi.

⁶Mihing theampo ii Pathian le Pa khat bek om hi, tua Pathian in mihing theampo ii Topa hi a, ama in mihing theampo tungtawn in naseam a, mihing theampo sungah om hi.

⁷Eite theampo in Christ hong piakna taw kizui in, letsong a tuam khat tek ih nga hi.

⁸Laithiangtho in, “A saang mama na munah a paito lai in, ngalmat tam mama tonpui to hi. Ama in mihingte tungah tel pia hi,” ci hi.

⁹Tu in, “Ama a paito hi,” a ci sia bang ci nuam ziam? A ci nopna sia lei a thuk belna ah, paisuk masa zo hi, a ci nopna hi.

¹⁰Tua ahikom a paisuk pa in vantungte kalh a, a paiTopa ma hi a, vaannuai buppi sia ama a om siat thei natu in, a vawtpa ahi hi.



¹¹“Mihingte tungah, letsong hong pia sia” ama ahi hi, pawlkhatte sawltak nasep, pawlkhat sia kamsang nasep, a dangte thupha puak nasep, pawlpi keam le lai hil sya nasep pia hi.

¹²Christ pumpi a kisak to natu in Tapidaw nasepna ah sep natu in, ama in hi bangin, Pathian mihingte theampo puakhol natu in vawt hi.

¹³Pathian Tapa ih heakna le ih upna sungah pumkhat ih sua natu in eite theampo ih ki ngawmkhawm tu hi; mihing puicingte ih suak tu a, Christ ii tun tan le a phak cia ih banto tu hi.

¹⁴Tuaciangin phuatawm thimthel pilna taw ngual theam a, a thuhilna uh taw ngual a lampialsak thei te hu in vuivak kikheal pawpo le tui kihual pawpo ii a paipui patangte na hi nawn buatu uh hi.

¹⁵Ki itna thinsung nei in thumaan ih sonna taw lutang ahi Christ sang ah a nanam in ih khangto zaw tu hi.

¹⁶Ama ukna nuai ah pumpi sung a nate theampo kisi linlian a hong kipia sa kipeeawnate in, hong len khawm diimdiam hi. Tua ahikom pumpi sung na a tuatuamte in ahi tu bangin hong sep ciangin pumpi bup hong khang a, ki itna tungtawn in ama le ama hong kisa to hi.

Christ sungah Nuntakna Thak

¹⁷Tua ahikom, Topa min taw kidop natu thu kong pia hi: a khua ngaisutna uh a mannung ngawl Pathian he ngawl mihingte bangin na nungta heak vun,

¹⁸amate thinsung sia khuazingcip hi. Pathian piak nuntak ziate sungah amate atu bangma om ngawl hi, banghangziam cile amate in heakna nei ngawlin a thin uh pui hi.

¹⁹Amate in maizum he ngawl hi, amate in ngamtatna pha ngawlte sungah ki aap uh a, a thasiat huai thu tuatuamte sungah cizat nei ngawl uh hi.

²⁰Christ tung pan a na sin uhte in tuabang hi ngawl hi!

²¹Ama thu sia na zaak takpi sa uh hi a, note a nungzuite na hina uh taw Jesus sungah thumaan thu note hong kihil hi.



²²Nidang a na nuntakziate uh taw hong nungtasak na milui uh sia vawk keak vun; tua na milui uh sia in a maan ngawl duna le deinate taw hong lalcip sasak ahi hi.

²³Na thin sung uh le na ngaisutna uh sia a thakset na suaksak tavun,

²⁴tuaciangin, Pathian lim bangin kivawt a, a thiangtho, a thutang le nuntakna maan taw ama le ama hong kilak, na mithak suana uh sia na silh tavun.

²⁵Tua ahiciang, leilot thu son nawn heak vun! Mihing sim in a thu uppuite tungah thumaan son taken, banghangziam cile eite in Christ pumpi sungah nate ih hi khawm siat hi.

²⁶Na thin uh a uuk le, na thin uukna in, mawna sung thensak heak vun, na thin uukna taw nivui heak vun.

²⁷Doaimangpa hunpha na ngasak heak vun.

²⁸Ngual neisa a suddol thei sia in suddolna kheal taken a, ama nuntak natu a thalaw natu le a zawngte a hu thei natu in, naseam taken.

²⁹Kamsia pau heak vun, kammal manphate bek pau vun; kitaangsapna sungah a kizangh thei le hong sato thei kammalte pau vun, tua hile hong za po in, phattuumna nga tu hi.

³⁰Pathian ii suatak hong piak tu Ni kipsakna le Pathian neisa na hina hong ciamtee Pathian Thaa Thiangtho khuangaisak heak in.

³¹Thin natna, thin tomna le thin uukna theampo na vawk in. Ki oksatna ahibuale kilealna, thinsung ki etsatna a tuatumte theampo vawk in.

³²Tua hi ngawl zaw in, khat le khat tungah ki thuthiam vun a, thinneam tavun, Christ tungtawn in Pathian ii note mawna hong maisak bangma in, note zongh khat le khat mawna kimaisak tavun.

Ephesus te 5

Khuavak sungah Nuntakzia

¹Note sia Pathian it a tate na hi uh komin, ama bang na hi natu hanciam vun.



²Pathian diksak ngimnamtui biakpiakna le sangaw biakpiakna bangin, Christ in hong it a, a nuntakna hong piak bangma, itna in na nuntakna uh uksak vun.

³Note in Pathian mihingte na hi bangma in, numei le pa paktatna, a thasiat huai nuntakna le duhopnate note sungah son tu in zongh na nei vet heak vun.

⁴Kampauna sungah a kiihuai, mawmawt kammal le zummawk kammalte na zak tu uh zongh kilawm ngawl a, Pathian tungah lungdamkona kam na pau tu uh hizaw hi.

⁵A kuama po a paktatte, a thasiat huai a, a kithoaite le a duhopte (duhop sia milim biakna nam khat hi) in Pathian le Christ Ngam lua ngei ngawl tu hi ci sia pha takin he tavun.

⁶Mawmawt kammal taw kuama in theamsak heak vun; hi thute mama hu in, Pathian thin uukna sia ama thu a ni ngawlte tungah tung tu hi.

⁷Tua ahikom tuabang mihingte taw kizopna nei heak vun.

⁸Noma mama zongh khuazing sungah om ngei na hi uh hang Topa mihingte na sua uh ciangin, khuavak sungah na om uh hi. Tua ahiciang khuavak neisa mihingte bangin na nungta tavun,

⁹tua khuavak in na a pha theampo, thutang suana le thumaanna hong puak hi.

¹⁰Topa ii diksak thute sin vun.

¹¹Mihingte ii sep le vawt khuazing taw a kipawl a mannung ngawlte na thutha heak vun a, tua ngamtatnate ii a phat ngawlna pualaak zaw tavun.

¹²(Amate ii khuazing sungah a sep a vawt kute sia son tu zongh in maizum huai lei hi.)

¹³Tuaciang na theampo khuavak sungah hong ki pusua tak ciang, amate pianzia babang thiang takin hong kilangh tu hi;



¹⁴Banghangziam cile a thiang takin a kilangh na khat pawpo sia khuavak suak hi. Tua hu in hi bangin kici hi; “A mutthippa awng, khanglo in, tuaciang thina pan tho in, tua hile Christ sia nang tungah hong taang tu hi.”

¹⁵Tua ahikom na nuntakzia kidawm in, telmeal nei ngawlte bangin na nungta heak vun a, a ciimte bangin na nungta vun.

¹⁶Hunpha na nga simin, a pha in zangh in, banghangziam cile tu hun in ngitlo hun ahi hi.

¹⁷Tua ahikom mawmaw heak vun a, Topa in nang sia bang vawt le hong oai ziam cisia na heak tu in na hanciam vun.

¹⁸No hong lalsak thei, zu na kham heak vun: Thaa taw na kidim zaw tavun.

¹⁹Laithiangtho sungah psalm late, biakna late le a thiangtho late ii kammalte taw na kipaupui tavun; biakna late le psalm late sa in, na thinsung theampo taw Topa pok vun.

²⁰Topa Jesus Christ min taw na theampo atu in Pathian ahi Pa tungah a tawntungin lungdamna ko tavun.

Zite le Pasalte

²¹Christ na thasiana uh taw khat le khat tungah thu kinitna nei tavun.

²²Zite awng, Topa tungah na vawt tu bangin na pasalte thu ni tavun.

²³Banghangziam cile Christ in pawlpi tungah thu a nei bangma in, pasalte in zite tungah thu nei hi: tuaciangin Christ sia a pumpi ahi pawlpi ii Hunpa ahi hi.

²⁴Pawlpi in Christ tungah thunitna a nei bangma in, zite in pasalte tungah a khawng a kheak in thunitna nei taken.

²⁵Pasalte awng, na zite it vun. Christ in Pawlpi it a, a nuntakna a piak bangin na zite na it vun.

²⁶⁻²⁷Pawlpi sia thiangtho a, sit baang ngawl, paubanna om ngawl a, Pathian kammal ahi tui taw a kisil thiang zawkciang Pathian tungah tua pawlpi a ki aap thei natu in pawlpi atu Christ kipia hi.



²⁸Tua bangma in pasalte in amate pumpi a it bangma in, a zite a it natu ahi hi. Pasal khat a zi a itpa in, ama le ama ki it ahi hi.

²⁹(Kuama in ama pumpi a ensan a om bua hi. Christ ii pawlpi tung a, a vawt bangma in, mihingte in a pumpi sia an vaak in ou zaw hi;

³⁰banghangziam cile eite in ama pumpi ii nate ih hi hi.)

³¹Laithiangtho ii, “Hi thu hangin pa khat in a nu le a pa nusia tu a, a zi taw a kop tu hi. Tuaciangin amate nii sia khat suak tu hi,” a ci bangma ahi hi.

³²Laithiangtho sungah a thuk mama thuku khat kipualaak a, tua thu in Christ le pawlpi atu ahi hunlam ka tel hi.

³³Ahihang tuasia in note tung zongh ah kizangh thei hi; pasal khat sim in ama le ama a ki it bangin a zi it tu a, zite khatsim in a pasal zakta tu uh hi.

Ephesus te 6

Tate le Nute Pate

¹Tate awng, nute pate thu na nit tu uh sia na Tapidaw zui tu ngeina hi a, hisia in a maan sep tu ahi hi.

²“Na nu le na pa zakta in,” a ci sia kamciam taw a kizui thupiak masa bel ahi hi:

³“Tua hile na theampo sungah na khangto tu a, leitung ah na khan sau tu hi,” ci hi.

⁴Nute pate awng, na tate thin uuk natu in vawt heak vun. Tapidawte kitekna le kihilna taw khangtosak zaw vun.

Silate le Tote

⁵Silate awng, na leitung tote sia kiitakna le liinna taw a thu ni vun; tuabangin na hi uh ciang, Christ atu a seam bangmain thinsung takpi taw seam vun.

⁶Hong kipok tu thangaina taw amate hong mu sung teng bekin, tuabangin ngamta heak vun a; Christ ii sila bangin, Pathian dei sia na thin theampo taw seam vun.



⁷Sila na hina uh taw na na sep uh ciangin, mihingte bek atu seam hi ngawlin Topa atu a seam bangin maitai takin naseam vun.

⁸Topa in sila hikale sila ngawl hikale mihing sim ii a sep nasep pha tungtaang ah thaman pia tu ci in na phawk tavun.

⁹To ahite awng, silate tungah tuabang ma in na ngamta vun a, tawna kam na zangh nawn heak vun. Note le na silate in vantung ah Topa khat nei khawm a, tua pa in a kikhaikim in mihing khat sim tungah thu hong khen tu hi ci in phawk tavun.

Pathian Ngalvanh A bucing

¹⁰A khakbel in, Topa taw kikopna pan le ama vaangletna lianpi taw na thahat tavun.

¹¹Doaimangpa ngitlo theamnate na nalh zawk natu in, Pathian hong piak ngalvanhte theampo na silh vun.

¹²Banghangziam cile eite in mihing ngal ih do bua a, vantung a thaa ngilote hatna, ukna neite thuneite, hi khuazing hun sungah vaangletna neite ih do hi.

¹³Tua ahi ciang tu in Pathian ngalvanh te silh vun! Tua hile hun ngilo ni hong thet ciangin ngalte ii hong simna te na nalh zo tu uh a, a tawp dongin na sim zawk uh ciang na dinmun kip lai tu hi.

¹⁴Tua ahiciang, kawngkhau sawm bangin thutak taw, awmdal thua bangin thutang taw kithoai in,

¹⁵peangdap thua bangin Lungdamna Thupha a thangsak tu kinging vun.

¹⁶Hun theampo sungah upna sia lum bangin toai vun; banghangziam cile tua taw Ngilopa hong kapna thaltang kuangte theampo na tulmit thei tu uh hi.

¹⁷Ngupna sia thik lukhu bangin na saang vun a, tuaciangin Pathian kammal sia Thaa ii hong piak namsau bangin na zangh vun.

¹⁸Hite theampo thungetna taw seam vun a, Pathian munah huna na ngen vun. Thaa ii hong lampui bangin, hun theampo sungah thu na ngen vun. Hi



thu hu in pilvangin, thinkiam ngei heak vun; Pathian mihingte theampo atu thu na ngen tawntung vun.

¹⁹Lungdamna Thupha ii thuthuk sia hangsan tak le ngual ii tel tu ka son thei natu in, ka kithoai ciang, Pathian ii ka son tu thu hong hil natu kei atu zongh thu hong ngetsak tavun.

²⁰Tu laitakin, thonginn sungah om ka hi hang, hi Lungdamna Thupha atu in, keima sia tongciin ka hi hi. Lungdamna Thupha ka son tu bang a, hangsan takin ka son ngam natu thu hong ngetsak tavun.

A khakbel Paupuina

²¹Bangbangin om khi ziam ci in na heak thei natu in, Topa nasepna sungah thumaan naseam ih suapuipa Tychicus in kei huvau thu thakte hong son tu hi.

²²Tuasia hu in, kote ka vekpi in bangbangin om khu ziam ci thu hong son tu le, note hong hanthawn tu in — ama note kungah kong paisak laitak ahi hi.

²³Pa Pathian le Topa Jesus Christ in Tapidaw suapui theampo tungah thinnopna le ki itna, upna taw hong pia khawm taken.

²⁴Ih Topa Jesus Christ sia a thi ngei ngawl itna taw a it te theampo tungah Pathian thuthiamna hong om taken.



Philippi te

Philippi te 1

¹Christ Jesus naseamte ahi Paul le Timothy in — Christ Jesus taw pumkhat a om pawlpi lampuite le, Husyate a kihel Philippi ah a om Pathian miteng tungah lai kong thaak uh hi.

²Ih Pa Pathian le Topa Jesus Christ in thuthiamna le thinnop kilemna hong pia taken.

Laithak A simte atu Paul Thungetsakna

³Noma kong ngaisut simin, noma hu in ka Pathian tungah lungdam ka ko hi;

⁴tuaciangin noteng theampo atu thu ka nget simin thinnop lungdamna taw thu ka ngen hi,

⁵banghangziam cile ka kipat phit ni pan tu dong lungdamna thupha nasepna sungah nong hu zia uhte ka ngaisut hang ahi hi.

⁶Tua ahikom no sungah hi nasep pha hong patpui Pathian in nasep a kizaw tu hun Christ Jesus Ni ciang dong na hong seam suak tu ka ci ngam hi.

⁷Ka thin sungah no kong phawk tawntung hi! Tuabangin kong phaw sia kei atu in a kilawm thu ahi hi. Banghangziam cile, tu laitak thonginn sungah ka om laitak ahizong, lungdamna thupha ii a maanna sia huuk tu le kipsak tu in ka suatak laitak ahizong, Pathian ii hong piak hi phattuumna nong saan pui tek uh hi.

⁸A thuk in no kong phawna sia Christ Jesus mama ii thin sung pan hong luang hi ci in kong sonna sia, thumaan ahi hunlam ka tetti sia Pathian ahi hi.

⁹Ki itna na khanto sak seseam na tu, heakna maan le thukhenna maan na nei khop natu thu kong ngetsak hi,

¹⁰tua hile a phabel sia na teal thei tu uh hi. Tuasia ciangin Christ Ni hong thet hun in niinnoina teng le mawsiatna theampo taw na kipeal tu uh hi.

¹¹Pathian minthan natu le ama pok natu in Jesus Christ bek ii piansak thei a maan pilna thiamnate taw na nuntakna uh hong kidim tu hi.



Nuntakna in Christ hi.

¹²Suapuite awng, kei tungah hong tung thute sia lungdamna thupha khangto sak takpi ahi hunlam na tel tu uh ka dei hi.

¹³Tua thute taw kizom in, kumpipa inncing ngalkap bup le hi sung a om a dangteng in kei sia Christ naseam ka hi hu a thongtaak ka hi hunlam he siat uh hi.

¹⁴Tuaciang ngupna thu lau ngawlin a hil ngam vaial natu in thong sungah ka om hu in u le nau a tamzaw in Topa tungah thinmuan seseamna nei zaw hi.

¹⁵Amate sung panin pawlkhate ahile eenna le kingal vawtna thin taw Christ thuhil a, ahizong adangte in thupha deina takpi taw hil uh hi.

¹⁶Pathian ii kei sia lungdamna thupha a maanna dinpui tu nasep hong piak hunlam amate in he ahikom hite in ki itna taw ma thuhil uh hi.

¹⁷Adangte ahile Christ thu sia thinpha taw thang sak ngawl a, amate kaang sung vai tupna thintaw hil uh hi; thonginn sungah ka om laitak in hong nawnkaisak thei zaw tu in ngaisun uh hi.

¹⁸Phamaw ka sa bua hi! Hisia huvau ka lungdam hi — tupna maan taw ahizong, ahi bua zong Christ thu a nanam in a kihil hi pole ka lungdam veve hi. Tuaciangin ka lungdamna sia a kizom suak tu hi,

¹⁹banghangziam cile nong thungetsakna uh le Jesus Christ ii Thaa kung pan hong pai huna taw kei hong ki suaktasak tu ci sia ka he hi.

²⁰Deina tatak le lametna ka nei sia bangziam cile ka thi zong ka nung zong ka nuntakna buppi taw Christ vaang ka piak thei natu, hun theampo sung le a tuanin tu hun sung teng seseam in, hangsan tak in ka panmun ka lel ngei ngawl natu thu ahi hi.

²¹Nuntakna sia bang tu ziam? Kei atu in, nuntakna in Christ ahi hi. Tua ahi ciang thina sia, a tamzaw ngana tu ahi hi.

²²Ahizong ka nuntak ciangin a thupi nasepte seam thei zaw tu ka hile, thina le nuntakna, ka teal sawn tu ka he vaset bua hi.



²³Kei sia ka lang le ka lang panin hong kikang hi. Hi nuntakna nusia in Christ taw ka omkhawm nuam mama a, tua in a phazaw kan thu ahi hi;

²⁴ahihang no atu in ci leang a nungta in om lai leng thupi zawlai hi.

²⁵Hi thu thiangtel ka hikomin a nungta a om tu ka hina ka he hi, upna sungah noma khantona le thinnopna a kibelap natu in noteng taw kong om lai tu hi,

²⁶tua hile no kungah kong haw kik ciangin Christ Jesus taw ki pumkhat in na nuntakna sung ah kei nong kiphatsak pui seseam thei natu a hi hi.

²⁷Tu in a thupi thu in na nuntakna uh sia Christ lungdamna thupha ii dei bang tatak ahi natu thu ahi hi, tua hile kei kong pai thei a, kong pai maw zong note tupna kibang khat tung ah kip takin a dingte hi a, deina khat bek taw lungdamna thupha upna atu ngaldo khawmte na hi hunlam kong za tu hi.

²⁸Na ngalte na kiita heak vun; na thinlian tawntung tavun, tua hile amate in hong lel tu a, noma in na zo tu uh hi, banghangziam cile zawna hong pia sia Pathian ahi hi.

²⁹Ama um bek ngawlin, ama hang a ngimna na thuakna uh taw, Christ atu nasep thei natu in hamphatna nga na hi uh hang hi.

³⁰Tu in ngaldona sungah keima taw kopin na kihel thei tu uh hi. Tua ngal sia nidang zong ka do nong mu uh a, tu zongh in na zaak uh bangma in ka do lai hi.

Philippi te 2

Christ Kiniamkhiakna le A letna

¹Christ sungah na nuntakna in, hong thahatsak a, tuaciang ama hong itna in hong thinnuamsak hi. Note in Thaa taw na kipawlkhawm uh a, tuaciang khat le khat ii tungah dikna le ciliapna na zangh uh hi.

²Tua ahikom ka lungdamna nong pawlcinsak natu in ngaisutna kibangin, ki itna khat neikhawm a, thin khat lung khat hi in na om natu uh kong hantawn hi.



³Kaangsung atu tupna bek taw ahizong, kisak thei nopna lel taw ahizong bangma seam heak vun, tua hi ngawlzaw in, khat le khat ii tungah kiniamkhiakin noma sangin ngualdangte a phazaw in ngaisun tawntung zaw vun.

⁴Noma ii kinsante bek na en heak vun a, khat le khat ii kinsante zongh na ki etpui tavun:

⁵Christ Jesus ii a nei thinpuak na nei tavun.

⁶Ama in Pathian pianzia nei nginge a, ahihang Pathian taw kikim natu in zawthawk thu zangh in hanciam tu a ngaisun bua hi.

⁷Tua hi ngawlzaw in, ama uuk thu in a nei theampo nusia in naseampa pianzia la hi. Ama in mihing taw kibangin piang a, mihing bangin kilangh hi.

⁸Ama in kiniamkhiak a, a thi tu in thunitna lampi tawn a — a thina thinglamte tung dongah pai hi.

⁹Hi thu hangin Pathian in ama sia a saangbelna munah laamto a mindang khat pawpo sangin a lianzaw min pia hi.

¹⁰Tua ahikom Jesus min patoai natu in vantung, leitung ah nuntakna a nei theampo, nuai simlei ah a om theampo in khupdin tu uh a,

¹¹tuaciang a theampo in Pa Pathian minthan natu Jesus Christ sia Topa hi ci in, a kilangh takin thangsak tu uh hi.

Leitung ah Khuavak bangin a Taangte

¹²Tua ahikom ka itte awng, no kung kong om lai in ka thu nong nit tawntung uh bangma in, no taw kong om khop ngawl ciang ngawngawn in, ka thu nong nit tu uh sia thupi zaw hi. Na ngupna a kicin natu in launa le liinna taw na seam tan tavun,

¹³banghangziam cile ama deina na zui thei natu le na uuk natu in Pathian sia a tawntung na sung uh ah na hong seam hi.

¹⁴Na theampo ah phun ngawl, nial ngawlin seam vun,



¹⁵tua hile mawna le ngamtat siatna taw kidim leitung mite kawmah, a sitbaang ngawl Pathian tate bangin a maw ngawl, a thiangthote na suak thei tu uh hi. Aksite ii van ah a taan bangma in,

¹⁶nuntakna thu amate na son uh ciangin amate sungah na taang tu uh hi. Tuabangin na hi uhle Christ Ni hong thet ciangin, no kong kiphatsak pui natu a thu ka nei tu hi, banghangziam cile ka hanciamna sa le ka sepna sa teng a luithawthong hi ngawl hi ci in hong lak tu hi.

¹⁷Na upna ii Pathian a piak sangaw biakpiakna tungah piakkhiatna bangin ka nuntakna chisan kibua thei tha tu hi. Tuabang ahile zong ka lungdam a ka thinlawpna no theampo kong hawmsawn hi.

¹⁸Tuasia bangma in note zongh na lung uh na damsak vun a, na thinnopna uh kei nong hawm tu uh hi.

Timothy le Epaphroditus

¹⁹Topa deina a om le noma thu ka zaakna taw ka kihansua natu in Timothy kong pai palsak thei tu hi.

²⁰Ama bekma sia kei taw ngaisutna kisi a, no hong thin nuammaw tatak pa ahi hi.

²¹Midang khat pawpo ahile Jesus Christ atu sangin, ama aituum thute bek kin hi.

²²Ama taktai ziate bangbangin hong lak a, ama le kei sia pata bangin lungdamna thupha atu bangza in diangkhawm khu ziam ci sia na heak uh hi.

²³Tua ahikom ka vai bangbang takin hong piang tu ci in ka heak po ciang, no kungah ama kong paisak tu hi.

²⁴Keima mama no kung kong pai pal thei natu in Topa ka muang hi.

²⁵Keima hong hu tu in kamtai a na zak sa uh, kei taw kop a, naseam in ngal hong do pui ih suapui Epaphroditus kong paisak kultu hi ci in ka ngaisun hi.

²⁶Ama in note theampo hong mu tu kaal ngakla a, a cina hi ci in na zaak uh sia a thin nuam ngawl hi.



²⁷Ama a cina takpi peu a, thi dektak zawsap hi. Ahihang Pathian in ama hesuak a, ama bek hi ngawlin kei zongh, khuangaina nasia zaw ka thuak ngawl natu in hong hesuak hi.

²⁸Tua ahikom kong paisak tu sia ka thalawp kan hi. Tua hile ama na mu uh ciang na lungdam tu a, kei khuangaina bo tu hi.

²⁹Tua ahikom Topa sungah suapui khat a hina hangin lungdamna taw na saang vun. Ama bang ahi tua mi theampo tung ah zatakna lak ta vun,

³⁰banghangziam cile kei nong hu thei ngawl na munah huna hong piak natu in, Christ ii na a sepna sungah a luang khaam in a thi dektak pa ahi hi.

Philippi te 3

A maan Thutang Suana

¹Thukhupna ah, ka suapuite awng, Topa taw pumkhat na hina uh taw kisai in lungpil tavun. Ka at sa thute ka at kikik sia phamaw sa tuan ngawl khi hi, note thinmuan natu hi zaw hi.

²A sia a vawtte, tua uite, vunteap at kul hi a ci hamtangte, na encik tavun.

³A maan vunteap atna a neite sia amate hi ngawl a, eima ih hi zaw hi, banghangziam cile eite in Pathian sia ama Thaa taw ih bia a, Christ Jesus taw pumkhat a ih nuntakna sung ah, a lawpte ih hi hi. A puatham ci le sa limte tungtaang ah eite in muanna ih nei bua hi.

⁴Keima zongh tuabang thute muan thei natu a neipa ka hi hi. A puatham ci le sa limte muan thei tu thu nei ing a ci khatpo a om le tua bang ci thei natu thu a tamzaw ka nei hi.

⁵Ka sua zawk nipi khat a cin ciangin ka vunteap hong ki atsak hi. Ka pianna sia Israel mi in ka piang a, Benjamin suan hi in, Hebrew chi tatak ka hi hi. Jewte Thukham zuina taw kizom in keima in Pharisee khat ka hi hi,

⁶a biakna sangah tha lawp leilam ka hi komin, pawlpi ka siatvawt zazan hi. Mihing khat in thukham tanna taw thutang suak thei tu hile sitbaanna ka nei bua hi.



⁷Ahihang meetna in ka ngaisut thei thute theampo sia tu in Christ atu hangin supna hizaw hi ci in ka tuat hi.

⁸Tuate bek ahi bua hi: ka Topa Christ Jesus heakna thu sia manpha zaw pek ahi hu in na dang theampote sia supna hi ci in ka tuat hi. Ama hangin na theampo ka vawk zo hi; Christ ka nei thei natu le, ama taw pumkhat ka sua bit thei natu in na theampo sia ninbu lomtangh bang bekin ka ngaisun hi,

⁹Thukham zuina taw a kinga theite nam ahi keima aituam thutang suana khat sia ka nei nawn bua hi. Christ upna tungtawn in hong kipia, Pathian kung pan hong pai upna a kibalphu thutang sia tu in ka nei zo hi.

¹⁰Christ heak tu le ama thaw kikna vaangletna siim tu, ama thuaknate thuakpui tu, a thina sungah ama taw kiban tu sia ka dei bulpi ahi hi,

¹¹tua in keima mama thina pan nuntakna ah ka thaw kik tu ka lametna ahi hi.

Mungtupna sangah Tai

¹²Ka nasepna tangtun zo ing, tua ahibuale cialcing zo ing ci ngawl khi hi. Jesus Christ in ama atu in kei hong sungsuam zo a hina tel sia ka nga zawk natu in ka hanciam tan lai hi.

¹³Hi hi, ka suapuute awng, tua tel nga zo khi hi, ci in ka ngaisun bua hi; ahizong ka sepna khat sia, nungsang thute mangil in maisang thute ka phaak natu in ahi theiza ka hanciam hi.

¹⁴Tua ahikom Jesus Christ tungtawn in tungsang nuntak natu Pathian hong sapna ahi, tel a nga zo tu in tang takin mungtupna sangah ka tai hi.

¹⁵Thaa lamsang ah a kxanthin eite theampo in hi bang thin ih nei natu ahi hi. Ahihang no pawlkhat in thutuam na nei uh le Pathian in hong telsak tu hi.

¹⁶Tuabang ahi hial zong, tu dong ciang ih zui sa hi ngeinate taw ma mainawt tawng.

¹⁷Suapuute awng, keima ngamatat bangin hong zui tawntung tavun. Noma ettee tu a ngamatatna maan kong koisak sia a zuite nangaih tavun.



¹⁸Hi thute tamvei ma kong son ngei zo a, tu in thitui taw kong son kik hi: a nuntakna uh taw thinglamte tungah Christ thina ii ngal a suak mihing tam mama om hi.

¹⁹Amate sia a khakbel ciangin hell theng tu uh hi, banghangziam cile ci le sa deinate in a pathian ahi hi. A maizum huai, a thasiat huaite thangphatna in la uh a, leitung neisa nate bekma ngaisun uh hi.

²⁰Eite ih hile vantung ngam mite ih hi a, vantung panin ih Hunpa Topa Jesus Christ hong pai tu thalawp takin ih ngak hi.

²¹Ama in a thazawm a thi thei ih pumpite sia na theampo ama uk sung a thet natu, a vawt theina vaang zangh a, ama ii vaang nei pumpi taw kibangin hong vawt tu hi.

Philippi te 4

Kihilna

¹Tua ahikom suapuite awng, no sia kei atu bangza in na it huai uh a, bangza in hong phawk khi ziam! Nong lungdamsak mama uh a, note hu in ka angtang mama hi! — ka it suapuite awng, hisia in na nuntak sung teng Topa sungah na khodin tu uh zia ahi hi.

²Euodia le Syntyche te awng, kong nget nop thu in kei nong hesuakna in Topa sungah unau numeite bangin na thukim thei natu uh na hanciam vun.

³Tuaciang a thumaan ka naseppui nangma zongh in, hi numeite na hu tu ka dei hi; banghangziam cile amate sia Pathian ii nungtakna laibu sungah a om Clement le ka naseppui dangte theampo taw kop in, lungdamna thupha kizel natu in keima taw nasia tak a diangte ahi uh hi.

⁴Topa taw pumkhat na hi hu in, a tawntung lungdam tavun. Kong ci kik hi: na lungdam tavun!

⁵Mihing khat sim tungah na cikna uh lak tavun. Topa hong pai pal tu hi.

⁶Na khat pawpo atu in thin ngim heak vun, ahihang na thungetna theampo ah na kikap uh te, Pathian tungah lungdamko nopna thin taw na ngen tawntung vun.



⁷Tua hile mihing tel zawk ngawl Pathian ii thinnop kilemna in Jesus taw na kipumkhatna hangin, na thin na lung hong ngammuangsak tu hi.

⁸A khakbel kong ci nopna ah ka suapuute awng, thupha le a pok huai thute: a thumaan, mipi tan huai, a thutang, a thiangtho, a ithuaite le a thasiahuai nate na ngaisun tavun.

⁹Ka kammalte le ka ngamtatnate pan na heak uh, na saan uhte sia na zangh vateak tavun. Tua hile eite thinnop kilem na hong pia Pathian in no taw hong omkhawm tu hi.

Letsong huvau Lungdamkonate

¹⁰Topa taw kipumkhat a ka nuntak sungah a khuangei hun khat zawkciangin khatvei ma nong thin nopmawkna uh nong lak thei lai natu in, hunpha nga kik na hi uh ciangin ka lungdamna lian hi. Hong kin ngawl nu hi kong ci bua hi — nong thin nopmawkna uh nong lak tu hun om ngawl hi bek hi.

¹¹Hi bang ka ci ciang hong kingaigon ka sakna hi tuan ngawl hi, banghangziam cile ka nei babang taw lungkim natu ka sin sa ahi hi.

¹²Cimawkna le ci thei zawknate ka he hi. A koima pawpo ah bang hun po ahizong ngilvana le ngilkialna, hauna le zawwna sungah, lungkim thei natu in hi thuku ka sin sa ahi hi.

¹³Christ hong piak vaangletna taw na theampo phul zawk natu thuakzawk hatna ka nei hi.

¹⁴Tua ahitazong, ka ngim nganate ah nong hu uh sia na phat mamana uh hi.

¹⁵Lungdamna Thupha ka hil kipat sawng, Macedonia ka nusiati ciangin kei hong hu pawlpi sia noma bekma na hi hunlam noma Philippi te in pha tak ma na heak uh ahi hi; ka nganate le ka supnate ah noma bekma in nong sikpui uh hi.

¹⁶Thessalonica khua ah huna ka kisap laitakin khatvei bek hi ngawlin, huna nong thathaak uh hi.

¹⁷Letsong nga tute a thangai ka hi bua hi; na thupha vawt sate tungah a meet a kibelap tu ka mu nopna hizaw hi.



¹⁸Tua ahikom hi sungah nong piak sa uh theampo kong saanna lai om a — kicing vaial liang hi! Epaphroditus in na letsong uh theampo hong puak ahikom, tu in ka kitaangsap theampo nei zo khi hi. Tuata in Pathian mai ah ngimnamtui piak taw kibangin a saan nophuai le dik a sak biakpiakna hi.

¹⁹Tuaciang ka Pathian in Jesus Christ tungtawn in a kicing ama hauna theampo taw kizui in na kitaangsap theampo hong sik tu hi.

²⁰Ih Pathian le Pa tungah minthanna a tawntung tawntungin om taken! Amen.

A khakbel Nutsetnate

²¹Jesus Christ neisa ahi Pathian mihing khatsim tungah kong paupui hi. Hi sungah keima taw a om u le naute in nutsetna kam hong thaak hi.

²²Hi sungah a om Pathian mite theampo, a tuan in Kumpi lianpa inn sungah a omte in hong paupui hi.

²³Topa Jesus Christ thuthiamna note theampo taw om taken.



Colossae te

Colossae te 1

¹Pathian deina taw Jesus Christ ii sawltak khat ahi Paul le ih suapuipa Timothy in—

²Colossae khua ah a om Christ taw pumkhat ahi a thumaan suapuile Pathian mite tungah lai kong thaak uh hi. Ih Pa Pathian in thuthiamna le thinnopna hong pia taken.

Lungdamko Thungetna

³No atu thu ka nget uh ciang ih Topa Jesus ii Pa ahi Pathian tungah lungdam ka ko tawntung uh hi.

⁴Banghangziam cile Jesus Christ na upna uh le Pathian mihingte theampo na itna uh ka za uh hi.

⁵Lungdamna Thupha a maan thuhilna no tungah hong theng masa a, tua ii hong piak tu lametna sia na za zo uh hi. Tua hang komin vantung ah no atu in hong kikoisak na lamet uh sia ii tungah na upna le na itna uh, kingaa in om hi.

⁶Pathian ii thuthiamna na zaak phit ni uh pan kipan, no in a maan tatak na heak uh bangma in, tua lungdamna thupha in, thuphate hong puapuak a, leitung theampo ah kizel hi.

⁷Pathian thuthiamna sia kote taangin Christ thumaan naseampa ka nasep pui Epaphras tung panin heakna na nga uh hi.

⁸Ama in Thaa ii hong piak itna na neina uh ko tungah hong son zo hi.

⁹Tua ahikom note thu ka zaak pan kipan thu kong ngetsak tawntung uh hi. Ama deina tel theina le a Thaa ii hong piak ciimna le heakna theampo taw note hong kidimsak natu in Pathian tungah ka ngen uh hi.

¹⁰Tuaciang Topa deina bang nungta in ama diksak bang na vawt tawntung tu hi. Na nuntakna in nasep pha theampo piangsak tu a, Pathian heakna sungah na khangto tu uh hi.



¹¹Ama minthang vaangletna in note hong thahatsakin, tuasiaciang na theampo thinsauna taw na thuak zo tu uh hi.

¹²Thinnopna taw Pa tungah lungdam na ko tavun. A ma in khuavakna ngam sungah a mite ii lua tu a khealsiate nga tu in hong kilawmsak hi.

¹³Ama in khuazing vaangletna sung pan eite hong hun a, a it a Tapa ngamsung ah bit takin hong paipui hi.

¹⁴Ama hangin eite ih suakta a, mawna hong kimaisak zo hi.

Christ ii Mihing A hina le A nasep

¹⁵Christ sia mu thei ngawl Pathian ii pianzia muna ahi hi. Ama sia bitphua sa theampo sung pan Tapa upa bel ahi hi.

¹⁶Banghangziam cile vantung leitung na theampo, a kimu thei le a kimu maw nate thaa taw kisai vaangletna, tote, ukte le thuneite theampo sia ama tungtawn in Pathian in bitphua hi. Pathian in ama tungtawn in vaannuai buppi ama atu in bitphua hi.

¹⁷Christ sia tuate theampo om maa in om a, ama taw kikop in a omna mun tu tek ah om uh hi.

¹⁸Ama in a pumpi ahi pawlpi lutang hi a, ama in pumpi ii nuntakna naak ahi hi. Ama in Tapa upabel hi a, na theampo sungah ama bek a masa phitbel ahi natu in thina panin tho kiksak zo hi.

¹⁹Banghangziam cile Pathian ii khensatna om bangin Tapa in Pathian ii zia theampo a nei hi.

²⁰Tua ahikom Tapa tungtawnin Pathian in vaannuai buppi sia ama kung a thet kik thei natu in khensat hi. Thinglamte tungah a Tapa ii kipum piak, biakpiak thina tungtawnin Pathian in kilemna piangsak a, leitung vantung ah a om, na theampo ama kungah then kik siat hi.

²¹Hunkhat lai in note in Pathian taw na kikhuala uh a, ngitlo ngamtatna le ngitlo khua ngaisutna na nei uh manin a ngalte na hi uh hi.



²²Ahihang tu in ama omna munah a thiangtho, a kidoituam, a sitbaang ngawlin hong thet thei natu in a Tapa pumpi thina hangin Pathian in a lawmte hong suaksak zo hi.

²³A kho thu doppha tungah na thumaan tawntung vun a, lungdamna thupha na zaak ciil uh lai a na nga uh lametna taw na kipeal nuam heak vun. Leitung mihing sim tungah a kihil hi Lungdamna Thupha hu in keima Paul sia naseam khat suak ka hi hi.

Pawlpi Naseam khat bang a Paul ii Nasepna

²⁴Tu in no atu ka thuk nate tungtaang ah ka lungdam hi, banghangziam cile a pumpi ahi pawlpi atu Christ ii thuk tu a om laite a khuangkhem natu in keima in ci le sa taw ka thuk ciangin a hu ka hi hi.

²⁵Tuaciangin kei sia Pawlpi naseam tu in Pathian in hong vawt hi a, note phat natu in hi nasep lian sia sep tu in hong kipia hi. Tua nasep lian sia ama thu a cing takin thansak natu hi a,

²⁶tua thu in hun bo sa sungah mihing nam theampo te sung pan a kiseal, tuciangin ama mite tungah a kilak thuku ahi hi.

²⁷Pathian deina ahi, a tuanngen thuku sia a mite ii heak natu le mihing theampo atu ahi hi. Tua thuku in bang ziam cile Christ in note sungah om a tua hu in note in Pathian vaangletna na lua tu uh hi.

²⁸Tua ahikom Christ sia mihing khat sim tungah ka hil uh hi. Pathian omna munah mihing khat sim in Christ taw kikop in, a kxanthin natu in ciimna theampo taw hil in a kidop natu thu ka pia uh hi.

²⁹Hi nasep a kizaw thei natu in ka sungah na hong seam Christ ii nasia tak a tha hong piakna zangh in diangin ka kisaan hi.

Colossae te 2

¹Kei akua ci hong he ngawl midangte le Laodicea a om mihingte le note atu in bangzata haksa in naseam khi ziam ci sia kong son tu hi.

²Hi bang ka ngamtat sia amate thinletna taw a kidim natu le ki itna sungah a kikaizot natu, le thumaan heakna pan a piang thinmuanna a kicing hauna a

nei thei natu deina ahi hi. Hisia lam panin Pathian thuku ahi Christ ama mama sia amate in he tu uh hi.

³Pathian ciimna le heakna a kiphualseal sumngum theampo a kihonna tawtang sia ama ahi hi.

⁴Tua ahikom kong son hi, bangza po in phat tuak ahibelhang, kinialna maan ngawlte taw kuama in na theamsak heak vun.

⁵Banghangziam cile ka pumpi taw hong omkhawm ngawl ka hihang ka thaa taw note kungah kong om hi, tuaciangin Christ upna sungah kip takin na din khopna uh ka mu ciangin ka lungdam hi.

Christ sungah A kicing Nuntakna

⁶Jesus Christ sia Topa a na saan zawk uh nungsang, ama taw kikopin nungta tavun.

⁷Ama sungah zungthuk tha vun a, ama tungah na nuntakna uh sa to tavun, tuaciangin hong kihil sa bangin na upna sungah hat seseam vun. Lungdamkona taw na kidim tavun.

⁸Tua ahikom Christ sung pan ahi ngawl, vaannuai a uk thaa te ii mihingte tungah a piak susuk a mannung ngawl kitheamna, mihing ciimnate taw kuama in sila a hong mat ngawl natu in kikeam tavun.

⁹Banghangziam cile thaa pianzia sia Christ sungah mihing a hina sung mama ah a cing takin teang a,

¹⁰tuaciangin ama taw na kikop uh sungah a kicing nuntakna hong pia zo hi. Ama sia thaa lam sangah a ukte le thuneite khat sim sangin lianzaw hi.

¹¹Jesus taw kikopna sungah note vunteap at sa na hi uh a, mihing vun atzia taw hi ngawlin, hi mawna pumpi thahatna pan hong suatak Christ vun atnazia taw hong ki atzo hi.

¹²Ci nopna in na ki baptize uh ciang Christ taw a kivui sa na hizo uh a, na ki baptize na in thina pan a thokiksak Pathian vaangletna sungah na upna tungtawn in Christ taw a tho kik khawm zongh na hi uh hi.



¹³Hun khat lai in note sia thaa lam ah a thisa na hi uh a, na mawna uh hang le Thukham nei ngawl Gentilete na hi uh hang ahi hi. Ahitazong tu in Pathian in Christ taw nuntakna sungah hong then zo hi. Pathian in ih mawna theampo hong maisak zo hi.

¹⁴Ama in hong heencip ahi thusia tepteena leiba theampo hong phiatsak a, thinglamte tungah hong kilcip sak siat zo hi.

¹⁵Tuaciang tua thinglamte tungah Christ in thaa lam sangah ukna neite le thuneite vaangletna pan ama le ama kisuaktasak hi; tuate sia ama ngalzaw poai sungah sila in a kimante bangin mihonte mu tu in kai hi.

¹⁶Tua ahikom neak le dawn huvau ahizong, a thiangtho ni te huvau ahizong, Thadet poai le Sabbath nipi huvau ahizong note tungah zui tu ngeina vawtsak heak vun.

¹⁷Tuabangte theampo sia maisang a hong pai pheang tu nate lim ahi hi; a tatak sia Christ ahi hi.

¹⁸Vawttawm kiniamkhiakna le vantung lalangte bia in hong sawl a, mu khol thei tuam a neina hangin thupi a kisate ii hong puavawk tu sia noma le noma na ki oai heak vun. Bangma thu om ngawl bul in tuabang mihingte sia a mihing khua ngaisutna taw kisuangtaak uh a,

¹⁹tuaciang pumpi lutang ahi Christ thasua uh hi. Christ ukna nuai ah pumpi kipua to a, mihingte ngu le a sapiatte in a om natu san tek len in Pathian dei bangin khangto uh hi.

Christ taw Thina le Nuntakna

²⁰Note Christ taw thikhawm zo a, vaannuai a uk thaa te panin hong kisuaktasak zo hi. Tua ahile banghangin hi leitung ii neisa bangin nungta nu ziam?

²¹“Hisia tham heak in, tuasia tep heak in, a dang sia thutha heak in,” ci bang thukhamte banghangin ni nu ziam?

²²Hite in khatvei a kizak zawkciang, kimanna a nei nawn ngawl thute a cina hi; tuate in mihing vawttawm ngeinate le hilnate hi bek hi.



²³Tuabang ngeinate sia ciimna bulphu a piang hi tuak a, vantung lalangte biak tu sawl ngawpna sung, vawttawm kiniamkhiakna sung le pumpi nasia tak a ngim piakna sungah kizangh hi; ahihang tuate in pumpi deinate ukna tu in bangma manh nei ngawl hi.

Colossae te 3

¹Note nuntakna sungah Christ taw hong kithosak kik zo ahikom Pathian ziatsang kumpi tokhum tung Christ tona mun vantung ah a om nate thangai vun.

²Tua munah na ngaisutna uh phut vun a, hi leitung ah phut heak vun.

³Banghangziam cile note thi zo a, tuaciang na nuntakna uh sia Pathian sungah Christ taw kiseal zo hi.

⁴Na nuntakna tatak uh sia Christ hi a, tuaciang ama hong kilangh ciangin note zongh ama taw na kilangh khawm tu uh a, ama vaangletna na siim tu uh hi!

Nuntakna Lui le Nuntakna Thak

⁵Note in na sungah na hong seam leitung deinate na thisak uh kul tu hi, tuate sia numei le pa khialna, kiihuai ngamtatna, ci le sa deina zui nopna, ngamtat sia tatnopna, duhopna (duhopna sia milim biakna nam khat ahi hi) te ahi hi.

⁶Tua bangte hu in ama thu a ni ngawlte ii tungah Pathian thin uukna hong tung tu hi.

⁷Na nuntakna uh tuate hong huhnelh hunlai in noma mama zongh tuabang uukna deinate taw kipawl in na nungta ngei zo uh hi.

⁸Ahihang tu in note in, thin uukna, a sia thangaina, etsatna thinneina, hite theampo na vawk siat vun. Ki lealna le a kiihuai kammalte na muk uh pan pusuaksak ngei heak vun.

⁹Khat le khat na kitheam heak vun, banghangziam cile na nuntakna lui taw a kikop zongsang nate na suut zo uh a,



¹⁰a thak nuntakna zia na silh zo uh hi. Tua in, a kicing takin ama ih heak seseam natu in, Bitphuapa Pathian ii ama a suun tu in hong thaksua tawntung nuntakna thak ahi hi.

¹¹Tua hu in Gentile le Jew, vunteap at le at ngawl, khualmi le tualmi, sila le sila ahi ngawlte ci bangin kidoidanna om ngawl hi. Ahihang Christ sia na theampo hi a, na theampo sungah Christ om hi.

¹²Note Pathian mihingte na hi uh hi, ama in hong it a ama atu in hong teal hi. Tua ahikom note sia kiciliapna, cikna, kiniamkhiakna, thinneamna le thinsau nate puan bangin na silh uh kul hi.

¹³Khat le khat na kidual vun a, ngualdang khat tungah lungkim ngawl na a nei khat po na om uh ciangin, khat le khat ki maisak vun. Topa in note mawna hong maisak bangma in note zongh khat le khat na ki maisak vun.

¹⁴Tuaciangin hi kicina tungsia ah ki itna belap vun, tua in na theampo a cingin pumkhat suak tu in hong hen hi.

¹⁵Christ ii thinnopna hong piak sia bang tu ziam cile na thukhensat nate sungah lam hong lak tu in, hong piak ahi hi. Banghangziam cile hi thinnopna sia note theampo pumkhat sungah na omkhop natu in Pathian hong sapna thubul ahi hi. Tuaciangin lungdamko na thiam tavun.

¹⁶Christ hong thupuak sia a thupi zia theampo na thinsung uh ah hong teang taken. Khat le khat ciimna theampo taw kihil kilak tavun. Psalm late, pokna late le a thiangtho late na thinsung uh ah lungdamkona in Pathian tungah na sa vun.

¹⁷Na sep, na son uh theampote hu in, Pa Pathian tungah lungdam na ko uh ciangin, Topa Jesus min taw na vawt tu uh hi.

Nuntakna Thak sungah Aituam Kizopna

¹⁸Zite awng, na pasalte thu ni tavun, banghangziam cile Tapidawte bangin na ngamtat tu ahi hi.

¹⁹Pasalte awng, na zite uh na it vun, amate tungah na ngongtat heak vun.



²⁰Tate awng, nute pate tungah thu nit tawntungna sia Tapidawte vaipuak hi a, Pathian lungkim thu ahi hi.

²¹Nute pate awng, na tate uh a thin na uuksak heak vun, a thin na uuksak uh le a thin kiam tu hi.

²²Sila te awng, thu theampo ah na tote thu ni vun, pha hong sak tu deina taw amate hong etcik laitak bek hi ngawlin, Topa na thasia uh hu in, thin tak taw a thu ni vun.

²³Na nasep uh theampo sungah mihing atu hi ngawlin Topa atu a seam bangin kituat in na thin theampo taw naseam vun.

²⁴Topa in ama mihingte atu a khealsia thaman te note kipia tu hi ci in na phawk tavun. Banghangziam cile na Topa tatak in Christ ahi hi.

²⁵Tuaciangin ngamtat khialna a nei theampo sia a khialna bangin thuak tu hi, banghangziam cile Pathian in mihing sim a kibangin thukhen tu hi.

Colossae te 4

¹To ahite awng, na sila te tungah dikna thutang taw na ngamta vun. Vantung ah note zongh in Topa khat na nei uh hunlam phawk tavun.

Kihilnate

²Thungetna sungah thinkiam ngei heak vun. Thu na nget uh ciang na pilvang vun a, Pathian tungah lungdam na ko vun.

³Ko atu zongh hong ngetsak tavun, tua hile Pathian in Jesus thukute huvau ka hil natu hunpha hong pia tu hi. Banghangziam cile tua thu in tu laitak a, thongsung a ka omna thu ahi hi.

⁴Tua ahikom tua thu a thiang a, ka son tu bangin ka son thei natu in thu na ngetsak vun.

⁵Thu um ngawlte tung na ngamtatna uh ah ciimna na zangh vun a, hun pha na nga uh theampo a pha takin na zangh vun.



⁶Na kampau na uh sia a zaak nop huai hi tu a, a lawp huai hi tawntung tu hi, tuaciangin mihing khat sim tungah a maan kam zokikna taw na zokik thei tavun.

A khakbel Paupuina

⁷Ih it ih suapuipa Tychicus, a thumaan naseampa le Topa nasepna sungah ih naseppui pa in kei huvau thupiang thakte hong son siat tu hi.

⁸Note kungah ama kong paisakna in tua thu hang ahi hi, kote bangbangin om ka hi uh hunlam hong son ciangin na thin uh a nop natu ka deina ahi hi.

⁹Ama in Onesimus a kici khat taw hong ton hi, tua pa in a thumaan suapui hi a, no pawl sungah hong kihel khat ahi hi. Amate nii in hi sungah thupiang theampo hong son tu hi.

¹⁰Kei taw thong sungah a om Aristarchus in hong paupui hi, tuasia bangma Barnabas suapuissealpa Mark zongh in hong paupui hi. (Mark sia no sangah hong pai ahile vai na muak vun ci in sawlna zongh nga zo nu hi)

¹¹Justus zongh a kici Joshua zongh in paupuina kam hong thaak hi. Hite thum in Jewte sung pan hong kikhealte hi a Pathian ngam atu kei taw na a seam khawmte hi a, amate in nasia takin hong hute ahi uh hi.

¹²Epaphras zongh in hong paupui hi, ama in Jesus Christ naseampa khat hi a noma pawl sungah a kihel khat ahi hi. Ama in Pathian tungah note sia a khandhin le a cingtaak tak a, a thinzo Tapidawte, Pathian deina bang a, khuangkheim takin a zuite bangin kho takin, na din natu in nasia tatak in thu hong ngetsak tawntung hi.

¹³No atu le Laodicea le Hierapolis ah a om mihingte atu in nasia takin na a seampa hi ci in keima tatak ma in tetti ka pang hi.

¹⁴Ih it zato mangpa Luke le Demas in paupuina kam hong thaak hi.

¹⁵Laodicea khua ah a om ih suapuite le Nympha le tua nu inn ah a kikhawm pawlpi tungah thupha ka deisaknate na sonsak vun.



¹⁶Hi laithak na sim zawk uh ciangin Laodicea pawlpite zongh in na simsak hamtang vun. Laodicea khua a om ih suapuite hong puak tu lai sia zongh na sim vun.

¹⁷Tuaciangin Archippus munah, “Topa nasepna sungah, na sep tu hong kiptate na zaw thei natu na son in,” na cisak vun.

¹⁸*Paul ii hong paupuina* ci in keima khut tatak taw ma kong at hi. Koltaang ka hi hong mangil heak vun! Pathian thuthiamna in no taw hong om taken.



1 Thessalonica te

1 Thessalonica te 1

¹Paul, Silas le Timothy kung pan — Pa Pathian le Topa Jesus Christ ii neisa ahi Thessalonica pawlpi mite tungah: Thuthiamna le kilemna sia no aa hi taken.

Thessalonica te Nuntakna le Upna

²Note theampo atu in Pathian tungah lungdam ka ko tawntung a, tuaciang thungetna sungah na min kong lo tawntung uh hi.

³Upna na zakzia, itna na nei uh hu a, nasia takin na nasepna zia le ih Topa Jesus Christ sungah na lametna uh a kipzia sia ih Pa Pathian mai ah kong phawk uh hang ahi hi.

⁴Ko ii suapuite awng, Pathian in note hong it a, ama atu in hong teal sa na hi uh sia ka he uh hi.

⁵Banghangziam cile Lungdamna Thupha sia, kammal nguak taw hi ngawlin, vaangletna le Thaa Thiangtho taw zongh le a thumaan thutak saan tatakna taw no kungah kong puak uh hi. Note taw ka om uh lai in bangbangin nungta khu ziam ci in nong he uh hi; tuate in noma ii phat natu ahi hi.

⁶Koma le Topa ettee in nong zui uh hi; nasia takin thuak na hi ta uhzong, Thaa Thiangtho kung pan hong pai tua lungdamna thu taw kopin na saang zo uh hi.

⁷Tua ahikom note sia Macedonia le Achaia ah thu umte theampo atu in ettee tu khat na suak uh hi.

⁸Bangbangziam cile Topa thu in no tung pan Macedonia le Achaia kantan in pai a, tua bek dom ngawlin, Pathian na upna uh thu sia mun theampo ah thang hi. Tua ahikom thudang bangma ka son tuan tu kisamh ngawl hi.

⁹Tua mihing theampo in kong haw uh lai a, nong saan zia uh, milim biakna pan Pathian sangah na kikhealna uh te son tek a, a maan le a nungta Pathian atu sepsak tu le,



¹⁰hong tung tu Pathian thin uukna pan hong suatak, ama ii thina pan a thawsak, vantung pan hong pai tu — ama Tapa Jesus ngak tu in na om uh thute son hi.

1 Thessalonica te 2

Thessalonica khua ah Paul Nasep

¹Ko ii suapuite awng, no kung kong hawna uh sia, nguaksuak ngawl hi ci in noma mama ii na heak uh ahi hi.

²Noma kung Thessalonica ah kong pai uh maa in Philippi ah kote hong kivawtsia zo a, hong kizawnsak zia sia na heak uh ahi hi. Tuaciangin hong langpan tam kale, ama kung pan a hong pai Lungdamna Thupha note tungah kong son natu in, ih Pathian in thinletna hong pia hi.

³Note tungah kong mangkaana uh sia khialna ahibuale a thiangtho ngawl niimnate tungah kibulphu ngawl hi, khat po theam tu zongh ka hanciam bua uh hi.

⁴Tuate luangin Pathian in pau a hong dei bangin ka pau tawntung uh hi, banghangziam cile Lungdamna Thupha son tu in kote kiphu hi ci in ama in khensat hi. Mihingte diksak tu in ka hanciam bua uh hi, ahihang ka niimna uh hong sittel Pathian diksak tu in ka hanciam uh hi.

⁵Note kungah kong pai uh lai in, kisialpokna kampauna taw kong pai bua uh a, duhopna a phualseal natu kammalte kong zangh bua uh hi. Tuabang ka hi uh sia noma in nong he mama uh hi — Pathian sia koma tetti ahi hi!

⁶No tung pan hikale, ngualdangte tung pan hikale, kuama tung pan pokna nga tu in ka hanciam bua uh hi,

⁷Christ sawltakte ka hina uh taw, tuabang pokna no tung pan hong ngen thei hi napi, kong ngen bua uh hi. Ahihang note taw ka om uh lai in nu khat ii tate a kep bangin kong khoi uh hi.

⁸No kong it hu in Pathian kung pan hong pai Lungdamna Thupha bek hi ngawlin ka nuntakna uh no hong hawm tu in ka kinging uh hi. Note sia ko atu in a it huai mama na hi uh hi!



⁹Ko ii suapuite awng, ka sep ka dianna uh teng ciamtee nak vak uh te! Pathian tung pan hong pai Lungdamna Thupha no tungah kong hil uh ciangin, kong nawngkaisak ngawl natu uh in, a sun a zan in na ka seam uh hi.

¹⁰No thu umte tungah ka ngamtatna uh sia thiangtho, maan, khialna om ngawl ahi hunlam note in ka tettite na hi uh a, Pathian zongh ka tetti uh ahi hi.

¹¹Pa ii tate tung, a vawt tu bangin note khat sim tungah kong vawt uh na he uh hi.

¹²Ama Ngam le a minthanna hong hawm tu in hong sam Pathian ii diksak nuntakna a nei tu in, kong hanthawn a, kong heneam a, kong thawn top uh hi.

¹³Tuaciangin, Pathian tungah lungdam ka ko tawntungna uh ahang khat zongh om hi. Pathian thu kong puak uh lai in, mihing ii thupuak bang hi ngawlin Pathian thupuak bang ahi takpi sia na za uh a, na saang uh hi. Banghangziam cile no thu umte sungah Pathian in na hong seam hi.

¹⁴Ko ii suapuite awng, no sungah thupiangte ma Judea ah Pathian Pawlpite, tua mun a om Christ Jesus ii neisa mihingte tungah piang hi. Note in na mipuite ii vawtsiatna na thuak uh bangin, amate zongh Jewte ii vawtsiatna thuak hi,

¹⁵tua Jewte in Topa Jesus le kamsangte thatlum a, ko hong vawtsia uh hi. Amate Pathian atu in bangza in lungkim huai ngawl ziam! A kuama po atu in amate bangza in ngal bang ahi ziam!

¹⁶Ngupna a piangsak tu thute Gentilete tungah ka hil tu uh ngangawn khaktan tu in hanciam uh hi. Hi bangin amate paltan tawntung sa mawna theampo cingsak uh hi. Tu in Pathian thin uukna sia amate tungah a khakbel hong paisuk zo hi!

Amate kungah Paul A Haw kik Nopna



¹⁷Ko ka hi uhle suapuute awng, note taw tawmvei ih kikhen zawkciang — ka ngaisutna uh taw hi ngawlin, pumpi mama taw — bangza in no kong ngai a, kong mu kik natu bangza haksa in hanciam khu ziam!

¹⁸Note kungah kong heak kik nuam uh hi. Keima mama heak kik tu in khatvei bek dom ngawl ka kithoai bul a, ahihang Satan in ko hong oai bua hi.

¹⁹A huamin ci leang, note sia — ngualdang hi ngawl! — note sia kote lametna, lungdamna le zawna ka nga uh hu in Topa Jesus hong pai ciang, ama mai ah ka kisuantaakna na hi uh hi.

²⁰Note sia kote kiphatsakna le lungdamna tatak na hi uh hi!

1 Thessalonica te 3

¹A khakbel ciang ka thuak zo nawn bua uh hi. Tua ahikom Athens ah koma nguakin, om tu in ka khensat uh hi.

²Tua lan in, Christ thu Lungdamna Thupha hil a, Pathian atu ko taw naseamkhawm ko ii suapui Timothy kong paisak uh hi. Hong thakhosak tu le, na upna uh sungah hong hu tu in kong paisak uh a,

³hi siatvawtna hu in, kuama na nungtol kik ngawl natu ka deina uh ahi hi. Tuabang siatvawtna in Pathian ii ei atu adei na thu khat om hi ci in, noma ma in na he uh hi.

⁴Banghangziam cile noma taw ka om nginge laitakin, ko hong kisiatvawt natu te kong son khol zo uh hi; tuaciang na heak sa uh bangma in, tuabang tatak ma in hong piang hi.

⁵Tuasia hu in Timothy kong paisak kul hi. Vei zo nawn ngawl ka hikomin na upna uh dawp tu in ama kong paisak hi. Doaimangpa in no hong zia et zo a , ko nasep teng a luithawthong hi zo ci sia suak thei mama ngawl tu hi!

⁶Tu in Timothy hong heak kik zo a, tuaciangin ama na upna uh le, na itna uh taw kisai ka ngalak uh thu, hong puak hi. Ama in kote tung hong sonna pan, a pha in nong ngaisut tawntung na uh le, ko ii kong mu nop uh bangma no zongh in nong mu nopna thu ahi hi.

⁷Tua ahikom ka ngimna uh le ka thukna theampo sungah, note huuvau thin letna ka nei uh hi, suapuite awng. Ko hong thinliansak sia in noma upna ahi hi,

⁸Banghangziam cile tu in na nuntakna sungah Topa taw pum khat a, a kho in na ding upumkhat a hle a nungta takpите ih hi hi.

⁹Tu in note atu in Pathian tungah lungdam ka ko thei zo uh hi. Note hangin ama mai ah lungnopna ka nei uh hu in Pathian tungah lungdam ka ko uh hi.

¹⁰Maitang kisi a, kimu thei natu le na upna uh sungah akisam sia hong piak thei natu a sun a zan in, ka thin theampo taw thu ka ngen uh hi.

¹¹Ih Pa Pathian mama le ih Topa Jesus in no kungah kong pai thei natu in lampi hong sialsak taken!

¹²Khat le khat na ki itna uh le mihing theampo na itna sungah khangto vaial in, noma kong itna a lian za ma in na ki it natu uh, Topa in hong siam taken.

¹³Hi bangin ama in no thahatsak tu a, a neisa mihing theampo taw Topa Jesus hong pai ciang, ih Pa Pathian omna ah sit bang ngawl a thiangtho tu uh hi.

1 Thessalonica te 4

Pathian ii Dik asak Nuntakzia

¹A khakbel in ko ii suapuite awng, Pathian ii diksak nuntak zia sia, ko tung panin na sin sa uh ahi hi. Hi bang sia in note nuntak zia sia ma ahi hi. Tu in tua sang zong a nasiazaw in na nuntak natu uh Topa Jesus min taw kong ngen uh a, kong thawn uh hi.

²Banghangziam cile Topa Jesus thuneina taw hilna kong piakte na he uh hi.

³Pathian in note thiangtho in, nu le pa paktatna pan a thiangtho tak a, a kipealte na hi tu uh hong dei hi.

⁴No pasalte khatsim in, na zi uh taw a thiangtho le a thasia huai in nuntakzia tu na heak uh kul hi.

⁵Pathian a he ngawlte bangin ci le sa deina ta w na nungta heak vun.



⁶Tua ahikom hi thu tungtaang ah, kuama in ama Tapidawpuipa tungah khial ngawl tu a, hamphatna in la thei ngawl tu hi. Hithu kong son ngei zo uh a, tuabang a ngamtate Topa in daan pia tu hi, ci in nasia takin kidop natu kong son zo uh hi.

⁷Pathian in eite sia paktatna taw nungta ngawlin a thiangtho nuntakna taw a nungta zaw tu in hong sam hi.

⁸Tua ahikom, hi kihilna a nial pawpo sia mihing nial ahi bua a, a Thaa Thiangtho no tungah hong pia Pathian nial ahi hi.

⁹Noma thu up puite itna tu huvau lai at tu kul ka sa bua uh hi. Khat le khat na ki it natu in Pathian in no tung mama ah hong hil zo hi.

¹⁰Tuaciang a tatak ci leang Macedonia ngam mun theampo ah a om, suapui teng tungah tua bangin na ngamta zo uh hi. Tua ahikom koma suapuute awng, tu a sangzong a kician zaw lai in na ngamta tavun.

¹¹Kong son ngei sa bangma in, na nuntakna sungah nuam hithiatin na nuntak tu, noma taw kisai tebek ngaisut in nei tu, noma nuntak natu in na thalaw natu uh teng sia tup in na nei vun.

¹²Hi bang teng tawh in thu um ngawlte ii zatakna na nga tu uh a, tuaciang na kitangsapna tungtaang ah kuama na konlaw uh a kul buatu hi.

Topa hong Pai natu

¹³Ko ii suapuute awng, lametna a nei ngawlte bangin na khuangai ngawl natu in, a thisate huvau thumaan thutak na heak tu uh ka dei uh hi.

¹⁴Jesus thi a, tho kik hi, ci in ih um hi, tua ahikom ama um a, a thite sia Pathian in Jesus taw hong la kik tu ci in ih um hi.

¹⁵Tu a kong hil uh sia in Topa ii hilcianna ahi hi: Topa hong pai ni in, ei a nungta laite in a thisate mai ah ih pai buatu hi.

¹⁶Vantung lalangte sung pan a lianbel sia ii aw taw thupiak auna, Pathian lemle aw om tu a, taciang Topa ama mama vantung pan hong tuaksuk tu hi. Christ um a, a thite hong tho masabel tu a,



¹⁷tuahun in a nungta lai eite sia Topa taw vui sungah kisi tu in, amate taw meei sungah hong kikaikhawm tu hi. Tuabangin eite in a tawntungin Topa taw ih om khawm tu hi.

¹⁸Tua ahikom, hi kammalte taw khat le khat na ki hanthawn tavun.

1 Thessalonica te 5

Topa ii Hong Pai tu Na Kinging vun

¹Suapuite awng, hi thute hong pianna tu a hun a taang huvau, lai kong at tu uh kul sa ngawl khu hi.

²Banghangziam cile noma ma in Topa Ni sia, zan lai a, nguta khat hong pai bang in, hong pai tu hi, ci in a phatak na he uh hi.

³Mihingte in, < <Na theampo thim khipkhep hi, lungmuanna om hi, > > a ci laitakin thakhat thu in, siatna sia amate tungah hong theng vat tu hi! Nau a suak tu numei khat sia nautun a, a nat bangin thakhat in hong pai tu hi, tuaciang mihingte a suakta buatu uh hi.

⁴Ahihang no suapuite awng, note in khuazing sungah om ngawl nu hi, tua ahikom tua Ni in nguta khat hongpai a, lamdang na sak bang ahi buatu hi.

⁵Note theampo in khuavak ii neisa, sun hun ii neisa na hi uh hi. Eite sia zan ii neisa, khuazing sungah a omte ih hi bua hi.

⁶Tua ahikom ngualdangte bangin ih mutthip buatu hi; eite khangciim in ih pilvang tu hi.

⁷Zan sia mihingte mut hun hi; zan in amate zukham uh hi.

⁸Ahihang eite in sun hun ii neisa ih hi a, ih pilvang kul tu hi. Eite in upna le ki itna sia awmdalna in ih silh tu a, ih lamet ngupna sia thik lukhu bangin ih khuk kul hi.

⁹⁻¹⁰Pathian in eite sia a thin uukna thuak tu in hong teal bua a, Topa Jesus Christ tungtawn in, ngupna a nga tu in hong teal hi zaw hi. ¹⁰Ama hong pai ciang, ih thi a ih nung zong, ama tawh it nuntak khop thei natu in eite atu a thi ahi hi.



¹¹Tua ahiciang tu laitak a, na sep uh bangma in khat le khat ki hanthawnin na ki huu tavun.

A khakbel Hilna le Nuksetna

¹²Ko ii suapuite awng, Tapidaw nuntakna sungah lam hong lak, hong hil a, no sungah na hong seamte tungah ahi tu bang zatakna na piak natu in kong ngen uh hi.

¹³Amate sepna hu in itna le zatakna lianbel taw na kizom tavun. Noma sungah kilemna taw na om tavun.

¹⁴Ko ii suapuite awng, hi bangin kong hanthawn uh hi. A zuzaute kidop natu thu na pia vun a, a lauthaute na hansua vun, a thazawmte na hu vun, a kuama theampo tungah thinsau in na khual vun.

¹⁵Khialna sia khialna taw in na thuk heak vun a, khat le khat tung le mihing theampo tungah phatna vawt tu sia hun theampo sungah na tup na sawm uh na hisak tavun.

¹⁶A tawntungin lungdam vun,

¹⁷tawp hun nei ngawlin thu ngen tawntung vun,

¹⁸na theampo sungah lungdam ko vun. Christ Jesus taw poumkhat a, na nuntak sungah Pathian hong deisak thu in tu sia ahi hi.

¹⁹Thaa Thiangtho na khaam heak vun;

²⁰Pathian tungpan hi a kici kamsaannate sia zawngsak heak vun.

²¹Na theampo na sittel vun: a pha teng na keam tavun,

²²A sia namtheampo na pial tavun.

²³Eite thin nopna hong pia Pathian in note a nanam in hong thiangthosak taken, na nuntakna buppi - na thaa, na thinsung le na pumpi — hong keam taken, Topa Jesus Christ hong pai ciangin sepkhial vawtkhial theampo taw hong kipealsak taken.

²⁴Hong sampa ama in na hong seam tu hi, banghangziam cile ama thumaan hi.



²⁵Suapuite awng, ko atu zongh thu hong ngetsak tavun.

²⁶Thu um theampote suapui kinapna taw na kimuak tavun.

²⁷Thu ummi theampo tungah hi laithak na sim natu in Topa thuneina suangin kong thawn hi.

²⁸Ih Topa Jesus Christ thuthiamna no tungah hong om taken.



2 Thessalonica te

2 Thessalonica te 1

¹Paul, Silas le Timothy in — Ih Pa Pathian le Topa Jesus Christ neisa Thessalonica pawlpi mite tungah lai kong thaak uh hi:

²Ih Pa Pathian le Topa Jesus Christ in thuthiamna le thinnopna note tungah hong pia taken.

Christ hong Pai kik hun Thukhenna

³Ko ii suapuite awng, note atu in hun theampo ah Pathian ka pok uh kul hi. Tuabang ka ngamatat tu uh sia maan hi, banghangziam cile na upna uh nasia khan mama a, tuaciang note khat sim ii midangte na ki itna uh lian vaial hi.

⁴Pathian pawlpite sungah no huvau ka kisuantaakna uh sia in hi thu hang ahi hi. Vawtsiatna le ngimna teng theampo na thuak uh kawm panin, thuak zawkna le upna na nei tan uh hu in a kisuangtaak ka hi uh hi.

⁵Tu a na thuaknateng in Pathian thukhen na sia thumaan ahina kilang sak hi, tua in noma ii na ngimlaw uh ama Kumpi Ngam tawh akilawm hong suak sak tu hi,

⁶Pathian in a maan bangin seam tu hi: note hong thuaksakte tungah thuakna tungsak tu a,

⁷tuaciang no a thuakte le ko zongh nopsakna hong pia tu hi. Topa Jesus in ama ii a thahat vantung lalangte

⁸meikuang taw hong pai a, Pathian a nialte le Topa Jesus Lungdamna Thupha a zui nuam ngawlte daan pia tu hong pai ciang ama in tuasia seam tu hi.

⁹⁻¹⁰Ama mihing theampo le a thu um mihingte tung pan minthanna le vaang piakna a nga tu in, tua Ni Topa hong pai ciang, Topa mai le vaanglet minthan na pan amate kikhen tu a, tawntung lalcipna daan thuak tu hi. Note zongh, ko ii kong son thute um zo na hi uh ciangin tua thu um te sungah na kihel tu uh hi.



¹¹Note atu in a thu kong ngetsak tontungna in hi thu hang ahi hi. A nungta tu in ama hongsap na nuntakna sungah a kiphu a kilawm hong suasak natu in, Pathian munah kong ngetsak uh hi. Ama in a vaangletna taw phat natu na deina theampo le upna nasepna khuangkchim thei natu in hong tangtun sak taken.

¹²Hi bangin ih Pathian le Topa Jesus Christ thuthiamna taw ih Topa Jesus min in, note tung pan minthanna saang tu a, note zongh in ama tung pan minthanna na saang tu uh hi.

2 Thessalonica te 2

A Seksol Pa

pa

¹Ih Topa Jesus Christ hong pai kik natu le ama taw omkhawm tu in, ih kikhoptuana thu taw kizom in: suapuite awng,

²Topa hong pai tu Ni sia hong tung zo hi ci in a kison thu taw na khua ngaisutna uh nawngkaisak heak vun a, na thin kiam sak memeang heak vun ci in kong thuum uh hi. Hi thu sia kote kamsaanna ahibuale thuhilna, tua ahibuale laithak at na sungah kong son uh hi ci in kingaisun hi thei tha tu hi.

³Kuama in bangbang po ahizong na theamsak heak vun. Banghangziam cile tua Ni sia a khakbel Kileedona , hong om a, hell sung a theng tu in a kisp sa A Seksolpa hong kilangh mateng in hong tung ngawl tu hi.

⁴Ama in pathian a kici theampo ahibuale biak thei theampo langpan tu a, tuate tungsia ah ama le ama kikoi tu hi. Ama in Pathian Biakinpi sung ngangawn ah tum in to tu a, Pathian ka hi hi ci tu hi.

⁵Ciamtee ngawl nu ziam? Hite sia no taw ka omkhop lai in kong sonsiat sa ahi hi.

⁶Ahitazong, tu laitak hisia a pian ngawl natu in a khak khat om a, tuasia bangziam na heak uh hi. Tua ahikom a hun a cin ciang A Seksolpa hong kilangh tu hi.



⁷A lamdang Seksolna in tu in na hong seam zo hi, ahihang a khaktanpa a kihkepkeak matengin a piang tu thu sia piang ngawl lai tu hi.

⁸Tuasia zawk ciangin A Seksolpa sia hong kilaak tu a, ahihang Topa Jesus hong pai ciang, a kam sung pan a huu pusuak sia taw ama that tu a, a vaangletna taw lalcipsak tu hi.

⁹A Seksolpa sia Satan vaangletna taw hong pai tu a, nalamdang lakna a theamh le a lamdang na nam tuatuamte hong vawt tu hi,

¹⁰tuaciangin a lal tuteng tungah a seksol theamna namcin zangh tu hi. Amate lal tu hi, banghangziam cile amate a kihutna tu thumaan thutak sia a saang bua uh a, a it bua uh hi.

¹¹Tua ahikom Pathian in telkhalna vaang ama te sungah puak a, amate in a maan ngawl thute a up natu in na seamsak hi.

¹²Tua ahikomin, tua thumaan thutak a um ngawl, mawna sungah a nuamsa theampo, ki puavawk tu hi.

Note Ngupna nga tu hong Kiteal

¹³Topa hong it suapuite awng, note atu in Pathian tungah a tawntungin lungdam ka ko hamtang tu uh hi. Banghangziam cile Thaa ii vaangletna taw ama mithiangthote hongsuak sak natu le thuman thutak na up na uh tawh a kingum phitbelte na sua natu uh in Pathian ii tealte nahi uh hi.

¹⁴Lungdamna Thupha notung konghilna uh tungtawn in Pathian in hisia atu hong sam hi; Ama in ih Topa Jesus Christ minthanna tel na nga natu hong sam ahi hi.

¹⁵Tua ahikom ko ii suapuite awng, thuhilna le laithakna taw kong hil uh thumaante kholet vun a, kip takin ding vun.

¹⁶Ih Topa Jesus Christ ama mama le eite hong it a, a thuthiamna taw a kiam ngei ngawl thinletna le lametna kho hong pia, ih Pa Pathian in,

¹⁷a tawntungin a pha sep natu le pau natu hong hanthawn in hong thahat sak taken.



2 Thessalonica te 3

Ko atu Thu hong Ngetsak tavun.

¹A khakbel in ko ii suapuite awng, Topa thu sia note sungah na saan bangma in, manlang takin a kizel natu le thasuana taw a kisaan thei tawntung natu in, ko atu thu hong ngetsak tavun.

²Mihing seksolte le misiata khut sung pan Pathian ii hong suataksak natu in thu hong ngetsak sii ta vun; banghangziam cile mihing simin tua thu um ngawl hi.

³Ahihang Topa sia thumaan a, ama in note A Ngilopa kung pan hong keamcingin hong thahatsak tu hi.

⁴Note kungah kong son thute na zui uh bangma in zui paisuak tatak tu ci in note muanna thin kote sungah Topa in hong pia hi.

⁵Pathian hong itna le Christ ii hong piak thuak zawkna thukzaw in na tel thei natuTopa in lam hongpui taken.

Nasep tu Vaipuak

⁶Ko ii suapuite awng, kong lamlak nate zui ngawl a, datham nuntakzia a zangh suapuite theampo kung panin na kikeam tavun ci in Topa Jesus Christ min taw thu kong pia uh hi.

⁷Ko ngamtat bang na ngamtat tu uh sia noma ma in na heak uh ahi hi. Note taw ka om uhlai in ko datham ngawl khu hi.

⁸Manh piak ngawlin kuama tung pan huna saang ngawl khu hi. Tua taangin naseam a, diang khu hi; note khat po atu in supna zanna ka hi ngawl natu in a sun a zan in ka seam tan uh hi.

⁹Hi bangin ka hi uhsia, ngual ii hu tu le et tu in, a kilawm ngawl ka hi uh hang, ahi bua hi; nong ettee tu le nong zui tu in tuabangin ngamta ka hi uh hi.

¹⁰No taw ih omlai in, “Naseam nuam ngawl peuma an nesak ngawl tu hi,” kong ci uh hi.



¹¹Hi bangin kongci theina uh sia, no sungah mihing pawlkhat datham a, ngual nasepna kamkum in, nawnngkaaisak hi ci sim ngawl sep dang nei ngawl ci in ka za uh hi.

¹²Topa Jesus Christ min taw hi mihingte tungah ahi tu bangin nungta taken a, nasepna taw a nuntak natu thalaw taken, ci in kidop natu thu ka pia uh hi.

¹³Ahihang suapuite awng, a pha sepna sia cimtaak peuma heak vun.

¹⁴Hi laithak sungah kong son uh thute a zui ngawl tu khat po om tha tu hi. Tuabang ahile, ama sia ciamtee tavun a, na koi thong lel vun, tua hile, ama amai zum tu hi.

¹⁵Ahihang ama na ngal vawt heak vun; tua hi ngawl zaw in, suapui khat bangin a kidop thei natu na hil vun.

A khakbel Kammalte

¹⁶Eite thinnopna ii naak ahi Topa ama mama in, a tawntung le a nanam in, thinnopna hong pia taken. Topa in note theampo taw hong omkhawm taken.

¹⁷*Paul in kong paupui hi* ci in lai kong thaak sia keima khut tatak taw ka at hi: Laithak ka at sim ka minthuna sia hisia ahi hi; lai ka atzia hi bang ahi hi.

¹⁸Ih Topa Jesus thuthiamna in note theampo taw hong om taken.



1 Timothy

1 Timothy 1

¹Jesus Christ sawltak khat ahi Paul in, eite hong Ngumpa Pathian le eite lametna Jesus Christ thupiak na bangin —

²upna sungah ka tapa tatak ahi Timothy tungah lai kong thaak hi. Pa Pathian le Topa Jesus Christ in, thuthiamna, hesuakna le thinnopna nang hong pia taken.

Kihilna Maan ngawlte pan Kidop natu

³Macedonia ah ka pai lai kong sawl sa bangma in Ephesus ah na taam tu kong deisak hi. Tua munah mihing pawlkhat in a maan ngawl upna bulpите hil hi, amate tuabang hilna pan a tawp natu in, thu na pia in.

⁴Kinialna a piangsak tangthute le taangpupite khang teptena saute a vawk natu in na son in; tuate in upna bek taw a piang Pathian tupna tangtut natu in kizangh ngawl hi.

⁵Hi thupiakna ii tupna sia, lungtang thiangtho, thinsung thiangtho le upna tatak panin hong piang ki itna a khanto thei natu deina hi.

⁶Mihing pawlkhat in hite panin lampial in a mawmawt huai kam kikupnate sungah ngammang uh hi.

⁷Amate in Pathian thukham hil syate suak nuam ahihang, amate kammal tatak ma ahizong muan tatakna taw a son uh thute ahizong a tel bua uh hi.

⁸A kizak tu bangin a kizangh na le Thukham sia pha hi ci in ih he hi.

⁹Ih phawk tu a kul thu sia, thukhamte in mihing phate atu kipia ngawlin, thukham paltante le khialna lian vawtte, pathian selte le a mawte, biakna kin ngawl le thaa mi ahi ngawlte, pate nute a thatlumte, mihing thatte,

¹⁰numei le pa huvau a paktatte, numei le pa ngeina ngawlin a ngamtate, mihing a ngute, leilot in thumaan ngawl tetti a pangte tua ahibuale a pha a kho upna bulpi taw a kileebul in ngamtatna a neite atu in a kipia ahi hi.



¹¹Tuabang hilna sia ka thansak tu in hong ki aap, a minthang, thupha toai Pathian kung pan hong pai Lungdamna Thupha sungah kimu hi.

Pathian Hesuakna hu in Lungdamkona

¹²Ka nasep natu in thahatna hong pia Jesus Christ ih Topa tungah lungdam ka ko hi. Ama na seam tu in kilawm hong sakna le nasep hong piak hu in, ama tungah ka lungdam hi,

¹³hun bo sa sungah ama ngensia in, vawtsia in lang zazan ngei hi ka leng, upna ka nei maa, heak ngawl manin a ngamta ka hikom Pathian in kei hong hesuak hi.

¹⁴Tuaciangin ih Topa in a thuthiamna a kicing takin hong buak a, Jesus Christ taw kikopna sungah eite neisa ahi upna leh ki itna kei tungah hong pia hi.

¹⁵Jesus Christ in maw neite hun tu in leitung ah hong pai hi cisia thumaan hi: a cing takin up tu le saan tu ahi hi. Tua a mawte sung pan keima in a mawbelpa ka hi hi.

¹⁶Ahihang nungsang ciangin ama um in tawntung nuntakna a saang tute ettee tu in, kei a mawbelpa tungah Jesus Christ in thinsauna a cingin hong lak thei natu in, Pathian in kei hong hesuak hi.

¹⁷Tawntung Kumpipa, a thi thei ngawl, a kimu thei ngawl, khat bek ahi Pathian tungah upatna le minthanna a tawntungin hong om taken! Amen.

¹⁸Ka ta Timothy awng, nangma huvau a hun bo sa sungah kamsaan sonkholna a om bangin hi thupiakna sia na khut sungah muangin kong aap hi. Ngal pha tak na do thei natu in hi kammalte ngalhiam in zangh in a,

¹⁹na upna kholet in, thinsung thiangtho na nei tan. Mihing pawlkhat a thinsung uh pan a phaw thute ngai ngawlin upna lalsak uh hi.

²⁰Satan vaangletna nuai ah aapna taw daan ka piaksate sungah Hymenaeus le Alexander te kihel uh hi; Pathian min a daisak nawn ngawl natu in hi thu in amate hil tu hi.

1 Timothy 2



Pawlpi Biakpiakna

¹Tuaciang a masa phitbel kong hanthot nopna panin, mangkaana, thungetna, hungetna le lungdamkona sia mihing theampo atu Pathian tungah na vawt vun;

²eite nuam takin kilem vadium in om thei a, Pathian thasia in a kilawm ngamtatna taw ih nuntak thei natu in kumpite le a dang thu nei uliante atu thu ngetsak vun.

³Hi bangin a pha ih vawtte in Pathian ih Ngumpa lungkimsak hi,

⁴mihing khat sim ngupna nga a, thumaan a heak tu sia Pathian in dei hi.

⁵Banghangziam cile Pathian khat bek om a, Pathian le mihing hong kilemsak kik, mihing ahi Jesus Christ khat bek om hi.

⁶Ama in mihing nam theampo tat natu in, a nuntakna pia hi. Tua in a hun a cin ciang Pathian ii mihing khat sim ngupna a piak nopna thu a lakna hi a,

⁷tua thu hu in upna le thumaan thu thangsak tu in, Gentile te ii sawltak khat le sya khat bangin hong kipuak hi. A leilot ka hi bua a, thutak son ka hi hi!

⁸Pawlpi sungah biakpiak sim in, thin uukna le kinialna om ngawlin, a khut a laam thei, Pathian tungah a kipumpiak pasalte thu a nget tu in ka dei hi.

⁹Numeite zongh ngamtatna le kizepna ah a etlawm, a hoi ciaciangin kizeamin ngamta hen a; sam khawng a lamdadang in vawtna taw ahizong, khamte, keppuite le a manham nikten puansilhte taw kizeam ngawlin,

¹⁰biakna kin numeite taw a kilawm ngamtat phate taw om taken.

¹¹Numeite in thim khipkhep in om in, kiniam khiakna takpi taw sin taken.

¹²Amate in pasalte tungah thu a hil tu ahizong, thu a nei natu ahizong, ka oai bua hi; amate thim khipkhep in om taken.

¹³Banghangziam cile Adam kikitphua masa a, tua zawkciang Eve kikitphua hi.

¹⁴Tuaciangin theam a thuak sia in Adam hi ngawl hi; theam thuak a, Pathian thukham a paltan sia in numei ahi hi.

¹⁵Ahihang, ama in upna, ki itna le thianthona sia etlawmna taw zom suak to pole numei sia ta nei haksatna pan kingum tu hi.

1 Timothy 3

Pawlpi sung Lampuite

¹Pasal khat in pawlpi keam a suak nuam le, ama in nasep pha khat sep nopna nei hi cisia thumaan ahi hi.

²Pawlpi lampuipa in sit baanna nei ngawlte, zi khat bek a neite, thinpha neite, ama le ama ki uk zote, a cilngilte, zindo thiamte, ngual a hil theite hi tu hi.

³Ama sia zukham thei le a ngoltol hi ngawl tu a, tua hizaw ngawlin cingh tu a ngual taw kilem thei tu hi; ama in sum bek ngaisun ngawl tu hi;

⁴ama in a bangkua sung pha takin uk thei tu a, a tate in zatakna takpi taw a thu nisak thei tu hi.

⁵Banghangziam cile pasal khat in ama bangkua a uk natu zia a he buale Pathian pawlpi bangbangin keam thei tu ziam?

⁶Ama in Doaimangpa bangin kiphatsakna taw kidim a, pua vawkna a thuak ngawl natu in, upna sungah a khanthin sa khat hi tu hi.

⁷Ama in mindai in Doaimangpa thaang sungah a awk thak ngawl natu in, pawlpi puasiasa a om mihingte ii zatak khat hi tu hi.

Pawlpi sung Upate

⁸Pawlpi upate zongh a pha nuntak zia nei tu a, a citakte hi tu hi; amate in zu tam lei ne ngawl tu a, sum lam sangah duhop ngawl tu hi;

⁹amate in upna thumaan a kilakte thinsung thiangtho taw kholet tu hi.

¹⁰Amate kisinsak phot tu a, a kisinna a ong le seam tak tu hi.

¹¹A zite uh zongh, ngamtat zia a pha nei tu a, ngual ngen ngawl tu hi; amate in na theampo sungah thinpha nei in thumaan tu hi.

¹²Pawlpi upa khat in zi khat bek nei tu a, a tate le a baangkua sia pha takin uk thei tu hi.



¹³Pawlpi upa nasep pha takin a seamte in amate atu dinmun pha khat nga hi a, Jesus Christ sungah a upna hangsan takin son ngam tu hi.

A lian Thukuu

¹⁴Hi lai kong at laitakin no kungah hong pai in hong mu pal tu, ci in lametna ka nei hi.

¹⁵Ahihang kong hai tha le hi laithakin a nungta Pathian pawlpi, thumaanna khuam le a bul ahi Pathian baangkua sungah ih ngamtat natu hong hesak tu hi.

¹⁶Eite biakna in a lian thuku khat a hina sia kuama in, a nial thei buatu hi: Ama in mihing meal in hong kilangh a, Thumaan hi ci in Thaa in lak in, vantung lalangte in a mu uh hi. Ama thu sia minamte sungah kihil a, leitung theampo in ama um in, tuaciang vantung ah ama kila to hi.

1 Timothy 4

Sya Maan ngawlte

¹Thaa in thiangtho takin a sonna pan hun khaksang ciangin, mihing pawlkhat in a upna uh nusia tu hi; amate in, leilot thaa te thu ni tu a, doaithe hilna zui tu hi ci hi.

²Tuabang hilnate sia leilot theite in theamna taw kizelsak hi, amate thinsung sia thiksa taw hal bangin thi hi.

³Tuabang mihingte in nupa kiteenna le an pawlkhat neakna in khialna hi ci in hil hi. Ahihang thumaan a hete le a umte in lungdamkona thungetna taw a neak tu in, tua ante sia Pathian vawt ahi hi.

⁴Pathian bitphua sa nate theampo pha hi; bangma nil tu vawk tu om ngawl hi, ahihang na theampo lungdamko thungetna taw saan tu ahi hi,

⁵banghangziam cile Pathian kammal le thungetna in Pathian ii saan thei suaksak hi.

Jesus Christ ii Naseam Pha khat



⁶Nangma in thaa thu ah upna kammalte taw kivaak a, thuhilna maan na zui kawmin, hi kong hilnate suapuite sungah na son nale nangma in Jesus Christ naseam pha khat na hi tu hi.

⁷Ahihang a son thamman ngawl, Pathian taw a kisi ngawl, tua phua tawm tangthute pan na kikeam tan. Pathian dei bang na nuntak zawk natu in kisinna nei tan.

⁸Pumpi kitekna in phatna pawlkhat nei hi, ahihang thaa thu a kitekna in, tu hun le maisang ah hong pai tu hun atu nuntakna ahikom manpha zaw pek lai hi.

⁹Hi thu in up tu le a cing tak saan tu thumaan thutak ahi hi.

¹⁰Mihing theampo le, a tuan in a umte a Ngumpa, a nungta Pathian sungah lametna ih nei hu in eite in nasia takin hanciam a, na ih seam hi.

¹¹Hi lamlaknate le hilnate amate tungah son sawn in.

¹²Khangmoi na hina kuama in na zawngsaksak heak in a, na pauna, na ngamtatna, na itna, upna le thiangthona sungah, thu umte ii ettee tu hi tan.

¹³Kong pai mateng in, na hun le na hanciamnate mihonpite tungah Laithiangtho simna, thuhilna le hilna in, na zangh in.

¹⁴Na sungah a om Thaa thiangtho telte na ngaingon heak in, tuate sia kamsangte in pau a, pawlpi upate in na tungah khut hong ngak uh ciangin na nga uh ahi hi.

¹⁵Hite, na kisisin tan a, nangma le nangma tuate tungah hun kipia tan, tua hile na khantona ngual theampo in hong mu tu hi.

¹⁶Nangma le nangma ahizong na hilna ah ahizong kidawm in. Hite zom to tan; banghangziam cile tuabangin na vawt le nangma le na thusonna hong za te tungah phattuamna om tu hi.

1 Timothy 5

Thu Umte tungah ih Vaipuak



- ¹Pasal khanghaam zawte khat sia tei heak vun a, na pa bangin ngaisun in, na thuum zaw vun. Pasal khangmoi zawte na suapui bangin vawt vun,
- ²nupi a haamzawte sia na nute uh bang, numei a moizawte sia thinsung thiangtho tak taw na suapui numeite uh bangin na vawt vun.
- ³Amate nguak a, a om takpi meingongte thasia vun.
- ⁴Ahihang meingong khat in ta le tu a nei le, amate in amate innkuan sungah biakna huvau sep tu a neite sin phot taken, tua hile a nute a pate le a pute a pite ii ama tungah a sepnate a thuk kik hi tu hi, banghangziam cile tua in Pathian diksak thu ahi hi.
- ⁵Ama nguak om a, kuama ama a en tu a nei ngawl meingong khat in, a lametna sia Pathian tungah koi a, sun taw zan taw ama ii hu natu in thungen hi.
- ⁶Ahihang meingong khat ama le ama ci le sa nopsakna sungah a kidia khat sia nungta napi a thi sa ahi hi.
- ⁷Amate tungah kuama in maw a zon thei ngawl natu in, hi lamlaknate hil sawn in.
- ⁸Ahihang khat po in a mealheakte, a tuan in ama innkuanpuite a en nuam bua uh le ama in upna thu a nial suak a, ama sia thu um ngawlte sangin sia zaw lai hi.
- ⁹Meingong khat sia kum sawmluk a vaal balai nale meingong tepteena lai sungah hel heak vun. Tepteena lai sungah a tum thei tute sia khatvei bek pasal a neite,
- ¹⁰tuaciangin ngamtat pha nei hi ci in a kisonte: a tate pha takin a khangtosakte, a inn ah zin pha takin a dote, Tapidaw puite tungah a kiniamkhiakte, a ngim ngate a hute, na pha seam tu in a ki pumpiakte hi tu hi.



¹¹Ahihang a moi meingongte tua tepteena lai sungah hel heak vun, banghangziam cile a pumpi deina zui in pasal a nei nop kik ciang, Christ kung panin lampial uh hi,

¹²tuabangin ama tungah kamciam a piak sate paltan ahikom a maw suak uh hi.

¹³Amate in inn khat pan inn khat ah vak kawkoai in hunte a luithawthong in bosak uh hi; a siazaw lai thu in, amate in ngual ngen a, mihing theampo nuammaw in, a pau tuak ngawl thute pau uh hi.

¹⁴Tua ahikom kei deina ah meingong khangmoite in pasal nei in ta nei a, a baangkua uh en taken, tua hile ih ngalte in amate siatna a son tu hunpha a nga buatu uh hi.

¹⁵Banghangziam cile meingong pawlkhat in Satan nungzui tu in kipan zo uh hi.

¹⁶Ahihang Tapidaw numei khat in, a baangkua sungah meingong a om le, pawlpi tungah vanhngit suan ngawlin ama in en taken, tua hile pawlpi in khat nguak a om meingong tatakte en thei zaw tu hi.

¹⁷Pawlpi upa na pha tak a seam lampuite, a tuanin thuhilna le lai hilna nasia tak a seamte, thaman a thuap nii in nga tuak hi ci in ngaisut tu ahi hi.

¹⁸Banghangziam cile, Laithiangtho in, “Taang a cil khuita muk tuamsak heak vun,” ci a, “Naseamte in a thaman a nga hamtang tu kilawm hi,” ci hi.

¹⁹Upa khat a kimawsakna ah, nii ahibuale a tamzaw tetti a om buale, thu in sim heak vun.

²⁰Ngualdangte zongh a lau thei natu in a khialte mihonpi mai ah tei in.

²¹Na nasep theampo sungah kuama nguptuam niltuam nei ngawlin kong thupiakte na nit natu in Pathian mai, Christ Jesus mai le a thiangtho vantung lalangte mai ah ciliap huai takin kong sawl hi.



²²Topa naseam tu in aapna in mihing khat pawpo tungah na khut nga mameang heak in. Ngualdangte mawna vawtna sungah kihel heak in, nangma le nangma thiango in om in.

²³Na cinat thei tawntung hang komin, na ngilsung a nop natu tui bek dawn ngawlin sapittui tawm ne in.

²⁴Mihing pawlkhatte mawna sia kilangh papai a, a mawna hangin thu khenna thuak pai hi; ahihang pawl dang khatte mawna ahile dadam a kinung mu hi.

²⁵Tuabangma in ngamtat phatnate zongh kilangh pal a, a kilangh lei ngawlte ngangawn zongh kiseal cip thei ngawl hi.

1 Timothy 6

¹Kuama in, Pathian min le eite thuhilna a sonsiat ngawl natu in, sila ahi theampo in a tote sia zatakna piak tu kilawm hi, ci in ngaisun taken.

²Tapidawte nei silate in a tote simmaw heak hen, banghangziam cile, amate in unau khat ahi uh hi. Tua hi zaw ngawlin amate in a phazaw in na sepsak taken, banghangziam cile, phattuumna a ngate in amate ii a it thu umte ahi hi.

A maan ngawl Hilna le A maan Haunate

Hi thute hilin hanthawn in.

³Ih Topa Jesus Christ ii thumaan kammalte le ih biakna paizia taw a kisi ngawl thungui tumdang a hil sia in

⁴kiphatsakna taw a kidim hi a, heak a nei bua hi. Ama in a pha ngawl kam kinial le kihaunate kin a, tuasia in ki eenna, thu kisik ngawlna, kilealna thusia taw ki muan lakna,

⁵thumaan thutak nei ngawl a, thin sung maan ngawlte ii kam kinialna te piangsak hi. Amate in biakna sia sumhau thei natu lampi khat in ngaisun uh hi.

⁶Mihing khat in a nei pawpo taw a lungkim nale biakna in sumhau mama pa a suaksak takpi ma ahi hi.



⁷Hi leitung ah bang ih keng ziam? Bangma ih keng bua hi! Leitung panin bang ih pusuapui thei tu ziam! Bangma ih pusuapui thei buatu hi.

⁸Tua ahiciang eite in anneak le puansilh ih nei le, eite atu in a kicing hi zo hi.

⁹Ahihang sum a hau nuam mihingte sia ze etna thuakin, amate siatna le lalcipna sungah a kaisuk mawmawtna le siatna a piang thei deinate ii thaang sungah awk uh hi.

¹⁰Sum dei leilamna in, siatna namcin ii zung ahi hi. Pawlkhat in sumdei leilam ahikomin, upna pan pial in thin ngimna tam mama thuak uh hi.

Aituam Lamlakna

¹¹Ahihang Pathian mihing ahi nangma in, hi thute theampo na pial in. Thumaan thutanna, Pathian thu sungah nopsakna, upna, itna, thuak zawkna, ciknate na nei zawk natu hanciam in.

¹²Upna tai kidemna sungah na hi thei tawpin, tai in; tuaciang nangma atu in, tawntung nuntakna na saang in; banghangziam cile tetti tam mamate mai ah na upna kho takin na pualaak sa Pathian hong piak nuntakna ah nang hong sam ahi hi.

¹³Na theampo nuntakna a pia Pathian mai le Pontius Pilate mai ah a upna kho takin, a pualaak Christ Jesus mai ah, nangma thu kong piakna panin;

¹⁴ih Topa Jesus Christ hong kilak kik Ni mateng in, nang hong kipia thute zui in thumaanna taw na keamcing in.

¹⁵Kumpite Kumpi, Topa te Topa, thupha toai, Ama bek Ukpa ahi Pathian in, a hun a tun ciangin Ama hong kilanghsak tu hi.

¹⁶Ama bek thi maw a, khuavak sungah teang ahikom, kuama in a nai neak thei ngawl hi. Kuama in ama mu ngei ngawl a; kuama in ama mu thei ngei ngawl tu hi. Ama tungah upatna le tawntung ukzawkna om taken! Amen.

¹⁷Hi nuntakna sungah a kizangh nate taw a kiphatsak ngawl natu, tuabang a kho ngawl haunate tungah lametna koi ngawlin, ih nopsak natu a, ngo takin na theampo hong pia Pathian tungah lametna koi vun ci in a haute tungah na hil in.



¹⁸Nasep pha seam a, a pha ngamtatna nei in, ngo takin midangte a hop nop natu na hil in.

¹⁹Maisang atu in a kip doppha ahi sumngumte amate atu in a kholte suak tu uh hi. Tua hile amate in nuntakna maan tatak a nei hi tu hi.

²⁰Timothy awng, nangma khut sungah hong ki aapte pha takin keam in. “Heakna” ci in, a ki min vaw khial, kiihuai kampauna le mawmawt kam kinialnate na pial in.

²¹Banghangziam cile mihing pawlkhatte in tua pilna ka nei uh hi, ci in kingaisun uh a, tua hu in a upna lampi bo sua uh hi. Pathian thuthiamna in note theampo tungah om taken.



2 Timothy

2 Timothy 1

¹Christ Jesus taw kikop a, ih nei hong kikamciam nuntakna a thangsak tu in Pathian deina taw a kisawl Christ Jesus sawltakpa Paul in,

²Ka it ka tapa Timothy tungah lai kong thaak hi: Ih Pa Pathian le ih Topa Christ Jesus in thuthiamna, hesuakna le thinnopna hong pia taken.

Lungdamkona le Hanthotna

³Ka taangpupite sep bangin thinsung thiangtho taw a na ka sepsak Pathian tungah lungdam ka ko hi. Sun taw zan taw ka thungetna sungah nang kong phawk a, ama tungah lungdam ka ko hi.

⁴Na thituite ka phawk a, tua ahikom, ka lungdamna a kicin natu in, nang kong mu nuam mama hi.

⁵Na pi Lois le na nu Eunice te zongh ii a nei bang a na nei thintak upna sia ka phawk hi. Nang zongh tuabang ma in nei tu ni hi ci in kong muang tatak hi.

⁶Hi thu hu in, na tungah khut kong ngak ciang Pathian hong piak tel sia na nuntaksak natu in kong phawksak hi.

⁷Banghangziam cile Pathian hong piak Thaa in eite hong lauthauhsak bua hi; tua hizaw ngawlin, a Thaa in vaangletna, itna le eima le eima ki uk zawkna taw hong kidimsak hi.

⁸Tua ahikom, Topa atu tetti panna ah maizum heak in, Christ atu in thongtaakpa kei atu zonghin maizum heak in. Tua hi zaw ngawlin Pathian nasep natu thahatna hong piak bangin, Lungdamna Thupha atu thuakna sungah na kihel in.

⁹Ama in ama aituam mihingte ih sua natu in eite hong hun a, hong sam hi; eite ii sepnate hang hi ngawlin, ama tupna le thuthiamna hang ahi hi. Hun kipat maa in ama in Christ Jesus tungtawn in hi thuthiamna hong pia hi,



¹⁰Ahihang tu in ih Hunpa Christ Jesus hong paina tungtawn in tua thu hong kilak hi. Ama in thina vaangletna bosak zo a, tuabangin Lungdamna Thupha tungtawn in thimawk nuntakna hong lak zo hi.

¹¹Lungdamna Thupha a thangsak tu le a hil tu in, Pathian in sawltak nasep kei hong suan a,

¹²tuaciangin hi thu hu in hite ka thuak hi. Ahihang thinmuanna taw ka kidim nginge lai hi, banghangziam cile ka uppa ka he a, ama in kei hong muang a hong aap sa teng sia tua Ni dong ama in hong kepcingsak thei tu ci in ka he hi.

¹³Thumaan kammal kong hilte na kholet in a, na zui tu etteena in nei in, tuaciangin Christ Jesus taw kikopna sungah, eite aa ahi upna le ki itna sungah na kip in.

¹⁴Ih sungah hong teang Thaa Thiangtho vaangletna tungtawn in, nang tungah, hong kimuang a hong ki aap na phate keamcing in.

¹⁵Phygelus le Hermogenes kihel in, Asia ngam mihing theampo ii kei hong taisat siat sia na he hi.

¹⁶Topa in Onesiphorus innkuan sungah hesuakna tungsak taken, banghangziam cile tamvei ma ka thin hong nuamsak hi. Thonginn sungah ka om, ama in hong maizumpui ngawl a,

¹⁷Rome khua a thet po ciangin hong mu dawdong hong zong hi.

¹⁸Tua Ni ciangin Topa in ama tungah hesuakna pia taken. Ephesus khua ah zongh, kei atu in ama in bangza in hong seam ci sia na heak mama ahi hi.

2 Timothy 2

Jesus Christ ii Thumaan Ngalkappa

¹Ka tapa awng, nang na hi le, Jesus Christ taw ih kikopna tungtawn in ih nga thuthiamna hangin thahat in.

²Tetti tam mama te ii mai ah ka thansak hilnate la in, ngualdang a hil sawn thei tu a muanhuaite tungah aap in.

- ³Jesus Christ ii a thumaan a ngalkappa bangin ngimna thuak in,
- ⁴a seam lai ngalkap khat in, a mangpa diksak tu uuk a, khuami thawthongte ii vai sungah ki hel ngawl hi.
- ⁵Tai kidemna sungah a tai khat in ngeina a kikoite a zui buale tel saang thei ngawl hi.
- ⁶Lothopa khat nasep haksa a seam sia in, anlaak ciangin ama ii tel a masa bel a laak tu kul hi.
- ⁷Kong son teng sia na ngaisusun in, banghangziam cile Topa in hong telsak thei siat tu hi.
- ⁸Lungdamna Thupha sungah a kihil, keima thuhilna ahi, thina pan a kitho kiksak David suan ahi Jesus Christ sia na phawk tan.
- ⁹Lungdamna Thupha thuhilna in ka nei hu in, ka thuak a, mihing a maw a khialte bangin thikkol taw ngangawn in hong kikhit hi. Ahihang Pathian kammal sia thikkhau kibil ngawl hi.
- ¹⁰Jesus Christ tungtawn a hong pai ngupna le minthan tawntungna sia Pathian teal sa mite zongh in a nga thei natu in, na theampo ka thuak kenkon hi.
- ¹¹Hi thu sia thumaan hi: “Ama taw ih thi khawm zo ahile, ama taw ma in ih nungta khawm tu hi.
- ¹²Thuakna ih zom to suak le ama taw ih maangkhawm tu hi. Ama ih nial le, ama zongh in hong nial tu hi.
- ¹³Ih thumaan bua zonghin, ama sia hong thumaan top hi, banghangziam cile ama le ama kitheam thei ngawl hi.”

A Kikipsak Naseampa

- ¹⁴Mihingte tungah hi thu phawksak in a, tuaciang kam kinial in a kihau ngawl natu in, Pathian mai ah a ciliap huai kidop natu in hilkhoh in. Hite in bangma phat tuamna hong pia ngawl a, a zate atu in siatna piangsak bek hi.



- ¹⁵Pathian muna ah a kicing kikipsakna na nga natu in a phabel in naseam in a, nasep tungtaang ah a maizum natu a om ngawl naseampa bang hi in, Pathian thumaan thute a maan tak a hil theipa na hi in.
- ¹⁶A kiihuai le a mawmawt huai kam kikupnate pan kikeam in, tuate in mihingte Pathian kung panin a khuala zawna ah not hi.
- ¹⁷Tuabang kihilnate in ih sa hong neaksak meima vangte bang ahi hi. Tuabang a hil pasal niite sia Hymenaeus le Philetus ahi hi.
- ¹⁸Amate in thumaan lampi nusia in, ih thaw kikna sia hong piang zo hi ci in a hilna uh taw mihing pawlkhate upna lalsak hi.
- ¹⁹Ahitazong Pathian phaa sa a kip doppha sia kingawksak thei ngawl hi; tuaciang tua tungah hi kammalte ki at hi. “Topa in ama neisate he hi,” tuaciang “A kuama po Topa neisa ka hi a cite in ngamtat khialna pial tu hi.”
- ²⁰Inn lian khat ii sungah kuang le keau a namcin in om hi: pawlkhat sia ngun le kham taw kivawt a, a dangte sia thing le tungman taw kivawt hi, pawlkhate sia hun thupi sungah zak tu hi a, a dangte sia hun thawthong sungah zak tu hi.
- ²¹Khat po in a siate theampo panin, a kithiangsak le ama sia tupna theampo ah kizangh tu hi, banghangziam cile ama sia a Topa atu in a kipia a taktaipa hi a, na pha sep natu sung theampo ah a kizangh tu in kinging khol hi.
- ²²Khangno lungngulnate pialin, tuaciangin thumaan thutang, upna, ki itna, thinnopna sia, thinsung thiangtho taw Topa tungah huna ngen a, a aute taw nga khawm tu in na hanciam in.
- ²³Ahihang mawmawt huai le telmeal om ngawl kam kinialnate na pial in, tuate sia kihauna taw tawp ahi sia na heak ahi hi.
- ²⁴Topa ii naseampa in ngual taw kihau ngawl tu hi. Ama in mihing theampo tung a thin neam tu a, a thin uai sya pha hi tu hi.



²⁵Ama a langpante a puaphat kik ciangin, thu khualna zangh tu hi. Banghangziam cile Pathian in amate tungah kisii kikna pia in thumaan thutak a heak natu zongh hi thei tu hi.

²⁶Tuasia zawkciangin amate sia khuaphawk tu a, ama thu nisak nuam a, a manpa Doaimangpa thaangsung panin suakta tu uh hi.

2 Timothy 3

Ni Tawpkhak Nite

¹Ni tawpkhak hun ciangin hun haksa hong om tu hi, ci in na ciamtee in.

²Mihingte sia duhop, kaangsung he, kisathei, kiphasak tu hi; amate in ngual lang in, nu le pa thu ni ngawlin, lungdamna he ngawl, biakna nei ngawlin hong om tu hi.

³Amate sia dikna nei ngawl, hesuakna sel, ngual min siasak, ngoltol, kiitakhuai, a phate ensan,

⁴muan thamman ngawl, lothop, tuaciangin kisak theina taw kidim tu uh hi. Pathian sangin pumpi nopsakna deizaw tu uh hi.

⁵Amate in ih biakna sia a pua zuunna in nei tu a, ahihang a vaangletna tatak sia nial tu uh hi. Tuabang mihingte kung pan kiheam tan.

⁶Tuate sung pan pawlkhat sia ngual inn sungah tum in mawna vanhngit a pua, deina ukna tuatuam a nei numei thaneamte,

⁷sin nuam he nuam tawntung lei ahihang thumaan thutak a tel zo ngawl numeite, amate ii upna sangah zo uh hi.

⁸Jannes le Jambres in Moses a langpan uh bangma in — hi mihingte in thumaan thutak langpan uh hi. Amate sia a khua ngaisutna uh naseam ngawl a upna sangah a lel ahi uh hi.

⁹Ahihang amate sia mainawt ngawl tu hi, banghangziam cile mihing theampo in amate mawmawtna hong mu tu a, Jannes le Jambres te ii thuak bang ma ahi hi.

A khakbel Hilnate



¹⁰Ahizong nangma in ka hilna hong zui a ka ngamtatna hong zui in, nuntakna sungah ka tupna nong zui hi. Ka upna, ka thinsauna, ka itna, ka thuak zawkna,

¹¹hong kisiatvawtna le ka thuak thute theampo nong mu zo hi. Antioch, Iconium le Lystra ah siatvawtna nasia mama ka thuak sate theampo na he zo hi. Ahihang, Topa in tuate theampo pan hong suatak hi.

¹²A kuama po Jesus Christ taw kipawlin, Pathian dei bang nuntakna a nungta nuamte sia kivawtsia tu hi.

¹³Tuaciang mihing ngilote le a kimealsealte in, phat ngawlina pan, phat ngawl seseam na ah zuan tu uh a, ngual theamin amate le amate dongin theam thuak tu uh hi.

¹⁴Ahihang nang na hile hong kihil sa, kho takin na upna thumaan thutakte na zomto suak in. Na Syate sia akuate ziam ci in na he hi.

¹⁵Jesus Christ upna tungtawnin ngupna thu sungah hong lampui ciimna hong pia thei Lai Thiangtho sia na no ciang a, na heak sa thu ahi hunlam ciamtee tan.

¹⁶Laithiangtho sia a vekpi in Pathian hu mop ahi hi. Thumaan thutak hil natu, tei natu, khialna pua natu, a maan a nuntakna tu in hil natu sung theampo ah manpha hi.

¹⁷Tua ahikom, Pathian na a seamte in na phate theampo a vawt natu in, kicinna a cingin a nei thei natu ahi hi.

2 Timothy 4

¹Pathian mai le Kumpi a hong maang tu in hong pai tu, a thite le a nungtate tungah thukhen tu, Jesus Christ mai ah, ciliap huai takin kong sawl nopna panin,

²ngupna thu sia thuhilna in na nei in, (a hun hong tung ahizong, a hun cing ngawllai ahizong) upsak natu, tei natu, hanthot natu in thinsauna taw na thansak natu na vawt hamtang in.



³Mihingte in upna bulpi maante hong za nuam nawn buatu a, amate deina uh zui in, bilthak liang a, a zaak nop uh thute a son tu syate tam vaial hong khoptua tu hun hong theng tu hi.

⁴Amate in thumaan thute ngaina pan puapial in, phuatawm thute hong ngai nuamzaw tu hi.

⁵Ahihang nangma le nangma sia hunte theampo sungah na ki uk in; ngimnate na thuak kenkon in, Lungdamna Thupha thuhilpa nasepte naseam in a, Pathian naseam pa bangin nasep tu theampo na seam in.

⁶Kei ka hile sangaw biakpiak bangin hong kivawt tu hun, hong theng zo hi, upna ka keamcing zo hi.

⁷Tai kidemna ah ka hi thei tawpin ka hi zo a, ka tai tu tan ka tai zo hi, upna ka keamcing zo hi.

⁸Tu in thumaan thutang thukhenpa, Topa in tua Ni ciangin kei hong piak tu, Pathian mai ah thutang suana zawna thaman in kei hong ngak nginge hi. Kei bek hong pia tu hi ngawl a, ama hong pai kik tu itna taw a ngakte theampo zongh pia tu hi.

Aituam Kammalte

⁹Kei kungah hai ngawlin nong pai natu in, hong hanciam tan.

¹⁰Demas in hi leitung it zaw a, kei hong taisan zo hi. Thessalonica hong zot san hi. Crescens sia Galatia zuan hi, tuaciang Titus sia Dalmatia zuan hi.

¹¹Luke bek kei taw om lai hi. Mark sia mantan in hi sungah hong paipui tan, banghangziam cile ama in ka nasepna hong hu thei hi.

¹²Ephesus ah Tychicus ka paisak hi.

¹³Nong pai ciang Troas khua Carpus kungah ka nusiat ka laktong puasilh hong paipui tan; laibute zongh hong keng tan, savun taw a kivawt sia a tuan in ka dei hi.

¹⁴Thik seakpa Alexander in hong nawngkaisak mama hi. Topa in ama sepna sa tung pan thaman pia tu hi.



¹⁵Nang mama zongh ama tungtaang ah na kidawm in, banghangziam cile ama in ih ngupna thuhilnate nasia takin hong langpan hi.

¹⁶Keima le keima ka kihuk phitbel lai in, kuama in kei hong dinpui ngawl a hong taisan siat uh hi. Pathian in amate tungah na siik heak hen.

¹⁷Ahitazong Topa sia kei kungah hong om a, thahatna hong pia hi. Tuasia ciangin Gentilete theampo ii a zaak tu in ngupna thu a cing in ka thangsak thei hi; tuaciang kei sia thidaan panin hong suaktasak hi.

¹⁸Topa in kei sia siatna theampo panin, hong suatak tu a, ama Vantung Ngam sungah muanhuai tatak hong lato tu hi. Ama tungah vaangletna a tawntung le a tawntungin om taken. Amen.

A khakbel Paupinate

¹⁹Priscilla, Aquila le Onesiphorus te innkuan tungah paupuina kong thaak hi.

²⁰Erastus sia Corinth ah taam hi. Trophimus sia a cina ahikom Miletus ah ka nusia hi.

²¹Phalbi ma in nong pai natu hong hanciam tavun. Eubulus, Pudens, Linus le Claudia te in paupuina hong thaak hi. Tuasia bangma in Tapidaw suapui dangte zongh in hong thaak hi.

²²Topa sia na thaa taw hong om taken. Pathian thuthiamna sia note theampo taw hong om taken.



Titus

Titus 1

¹Pathian ii naseampa le Jesus Christ ii sawltakpa, keima Paul in lai kong thaak hi. Kei masia Pathian teal sate upna khantosak natu le, ih biakna ii hil thumaan thutak ah, a lampui tu in hong kiteal a, hong kipuak hi.

²Tua thumaan thutak sia tawntung nuntakna lametna tungah kiphut hi. A leilot ngawl Pathian in hi nuntakna sia, ei atu in, hun kipat pan ma hong kamciam zo a,

³tuaciang a hun hong tun tak ciangin, a thu hong puak sungah hong pualaak hi. Hi thu sia kei hong ki aap a, tuaciang ih Ngumpa Pathian hong thupiakna taw ka thangsak hi.

⁴Ih nei khop tek upna sungah ka tapa tatak ahi Titus tungah lai kong at hi. Pathian le ih Hunpa Christ Jesus in, thuthiamna le thinnopna hong pia taken.

Crete ah Titus ii Nasepna

⁵Septu a kitaangsamh lai teng, ahi tu bang in a vai hawk sak tu le khuapi simin pawlpi upate na koi thei natu in, Crete ah nang hong nusia ka hi hi. Kong vaithakte na phawk tan:

⁶pawlpi upa khat sia sitbaang ngawl tu hi; ama in zi khat bek nei ahi kul a tuaciang, a tate sia thu um mi hi tu a, a ukpo ngamta, ahi bua le thu ni ngawl a, a minthangte hi ngawl tu hi.

⁷Banghang ziam cile Pawlpi lampui khat sia Pathian ii nasepna a uk ahikom, ama sia paubanna nei ngawl tu hi. A ma sia a kihisak, a thintom, zukham thei, a molngol, ahi buale, sum lamsang a duhop hi ngawl tu hi.

⁸Ama in zindo thiam tu a, a phate dei tu hi. Ama le ama ki uk zo tu a, thutangin, thiangtho in, phinciing tu hi.

⁹Ama in up tu thubul taw a kisi, a muan thamman uptu thu kho takin len tu hi. Tuabang hile thumaan hilcianna taw ngualdangte hanthawn thei tu a, tuaciang, tua thumaan kihilna a nalh te ii khialna zongh lak thei tu hi.



¹⁰Banghangziam cile, tuabang mihing sia tam mama om a, a tuan in Jew biakna sung pan hong kikhealte in, amate ii thu nawnsan te taw ngual leedo in theam uh hi.

¹¹Maizum maw in sum nga nopna bek taw, a kilawm ngawl thute a hil na uh taw, innkuan bubup buaisak ahikom, a thuhil ih khaktan kul tu hi.

¹²⁻¹³Amate ii kamsang khat ahi thuman a son Crete mipui khat ma in, “Crete mite sia a leilot tawntungte, ngamsa ngilote le adatham antuangte hi,” ci hi. Hi thu hu in, amate nasia takin tei lete amate in a hoih a pha upna nei tu hi.

¹⁴Tuaciang Jewte ii phuatawm taangthute le thumaan thutak a nial mihingte ii thupiakte len nawn ngawl tu hi.

¹⁵Thinsung thiangtho mihingte atu in, na theampo thiangtho hi; ahihang a ninnoite le a um ngawlte atu in, bangma a thiangtho om ngawl hi, banghangziam cile amate thinsung le a khua ngaisutnate ninnoi hi.

¹⁶Amate in Pathian ka he uh ci ahihang, amate ngamtatnate taw kileebul hi. Amate sia ki etsatna taw kidim a, thu ni ngawl ahiciang a pha khat zongh seam tu in kiphu ngawl hi.

Titus 2

Uptu Thu Bul Maan

¹Ahihang nang na hile, uptu thubul maan taw a kisi thute na hil kul tu hi.

²Pasal khanghaam zawte sia a kilawm bang ngamtat na nei tu, khuangaisun thei tu, amate le amate ki uk zo tu; a upna uh maan tu, ki itna nei tu, tuaciang thuak zawkna a nei natu uh in na hil in.

³Tuasia bangma, numei khanghaamzawte a thiangtho nuntakna taw a nungta numeite bangin, a ngamtat natu hil in. Amate sia ngual ngensia theite hi ngawl tu a, sapittui ii sila hi ngawl tu hi. Amate in a pha teng hil thei tu a,

⁴amate sungah numei khangmoizawte in a pasal uh le a tate uh a it natu in hil tu uh hi,



⁵amate le amate ki uk zo, a thiangtho, tuaciang a pasalte ii thu a ni, baangkua nupi pha ahi thei tu in hil tu nu hi, tua hile Pathian kung pan hong pai thute, kuama in sonsia ngawl tu hi.

⁶Tuabangma in pa khangmoite sia, amate le amate ki uk zawk natu in hanthawn tan.

⁷Na theampo ah ngamtat phatna taw kisai in nangma mama a ettee taak na hi kul tu hi. Na hilna sungah deisak takpina le thupi laakna taw hil in.

⁸Sit thei tu ahingawl kammal kilawmte zangh in, tua hile na ngalte in, ei huvau asia hong pau natu, a heak ngawl uh ciangin, amate maizum thei tu uh hi.

⁹Sila te in na theampo sungah, a tote thu zawp tu a, amate lungkimsak tu hi. Amate kam zokik ngawl tu a,

¹⁰a neisa nguksak ngawl tu hi. Tua hi zaw ngawlin, silate in, a tawntung a uphuai le mihing pha ahi hunlam a lak kul tu hi, tua hile ih Ngumpa Pathian thu kihilna sia a sepna theampo ah manh neisak tu hi.

¹¹Banghangziam cile Pathian in mihing theampo ngupna nga natu in, a thuthiamna hong pualaak hi.

¹²Tua thu thiamna in, eite Pathian dei ngawl nuntakna zia, leitung taw kisai lungngul nate nusia in hong sawl a, hi leitung ah eima le eima ki uk zo nuntakna, thutang le Pathian deibang nuntaknate taw ih nuntak tu in hong hil hi.

¹³A lian ih Pathian le Hunpa Jesus Christ minthanna taw hong kilangh tu ih lam et thupha tun Ni ngak in, ih om laitak tuabangin ngamta tawng.

¹⁴Seksolna theampo pan ih suatak natu le ama bek ii neisa hi in, apha septu alawp, a thiangtho mite honghua sak natu in ama le ama sia ei atu hong kipia hi.



¹⁵Na thu hong ngaite, na hanthot ciang le na hil napau ciangin nangma thu neina theampo na zangh in a, hi thute na hil tan. Amate kuama in nang ma nomusak heak in.

Titus 3

Tapidawte Ngamtatzia

¹Ngamukte le thuneite thu zawpin a thu a nit natu le thupha theampo vawt tu in a kingin khol natu na mihingte na phawksak in.

²Kuama siat son ngawlin, ngual taw kilem a, a kuama theampo tungah, cikna thiamna a lak tawntung natu na son in.

³Banghangziam cile, eima zongh khatvei lai in, a mawmaw, thu ni ngawl le a khial thei mi ih hi ngei hi. Ci le sa deina le nopsakna namcin ii sila ih hi ngei hi. Ih nuntakna sia hazaakna le eenna taw ih zangh hi; ngual in hong ensan a, tuaciang ei zongh in ih ensan hi.

⁴Ahihang ih Ngumpa Pathian ii cikna le itna hong pualaak ciang,

⁵ama in ei hong ngum hi. Tua in eite ii na phate ih sep hang hi ngawl a, pianthakna le nuntakna thak hong pia Thaa Thiangtho tungtawn in, ama hong hesuakna taw hong ngup ahi hi.

⁶Pathian in Jesus Christ ih Hunpa tungtawn in, Thaa Thiangtho sia a kicing takin, eite tungah hong buak hi,

⁷tuasia ciangin ama thuthiamna taw, eite sia Pathian taw thutang suakthei in ih lamet ahi tawntung nuntakna hong neisak hi.

⁸Hisia in thumaan sonna ahi hi. Pathian umte in mihing khat sim atu thinbot thei a, aman phate sep natu in a hun uh a piak thei natu in hi thute na thupi laak tuam tu in ka dei hi.

⁹Ahihang a mawmawt huai kam kinial nate, taangpupite khang simna saute, kihauna le thukham huvau ki el nate na pial tavun. Tuatae sia phattuumna om ngawl a, manh nei ngawl hi.



¹⁰Pawl kikhenna a piangsak mihing khat ii tungah kidop thei natu, nii vei peuma na hil tavun, tua zawkciang ahile, ama taw na kipee nawn heak vun.

¹¹Tuabang mihingte paikhial a, a mawnate in ama a khial hunlam kilanghsak ahi sia na he hi.

A khakbel Hilnate

¹²Artemas ahibuale Tychicus sia nang kungah kong puak ciang, kei kung Nicopolis ah nong pai natu in hong hanciam tan, banghangziam cile, phalbi hun sia tua munah zak tu in ka khensat zo hi.

¹³Sitnipa Zenas le Apollos khualhaw hong kipat thei natu in na hu in a, a kisap tu theampo ahi thei za in na vaihawmsak in.

¹⁴A kitaangsam tatak teng a piak thei natu in mihingte in a hun uh sia thupha vawtna in a zak thei natu a sin uh kul tu hi; amate in a nuntak nate man nei ngawlin zangh heak hen.

¹⁵Ka ompui theampo in, hong paupui tek uh hi. Upna sungah ih lawmte theampo tungah nuksetna kam na sonsak in. Pathian thuthiamna sia note theampo taw hong om taken.



Philemon

Philemon 1

¹Christ Jesus atu a, thong a taak Paul le ih suapuipa Timothy kung panin — koma ngualtamh le ka nasep puipa uh Philemon tungah,

²Philemon le na inn ah a kikhawm pawlpi le koma suapuinu Apphia le ngalkap banga ka seppui uh Archippus tungah lai kong thaak hi.

³Ih Pa Pathian le ih Topa Jesus Christ in thuthiamna le thinnopna hong pia taken.

Philemon ii Itna le Upna

⁴Suapui Philemon awng, thu ka nget simin na min kong lo a, ka Pathian tungah lungdam ka ko hi.

⁵Banghangziam cile, Pathian mihing a kici peuma na itna le Topa Jesus sungah upna na neina thute ka za hi.

⁶Ka thungetna in, thu umte ih hina taw ih kipawl khopna sia Christ taw kikop a, ih nuntakna sungah ih nei thupha a minpiang a thuk zaw in ih tel thei natu ahi hi.

⁷Suapui awng, nong itna in, kei atu lungdamna lian mama le hanthotna nasia takin, hong pia hi. Pathian mihingte theampo ii thin nong nuamsak hi.

Onesimus atu Ngetsakna

⁸Hi thu hu in, Christ sungah na suapui khat ka hina taw, sep tu a kul khat sia hangsan takin kong sawl ngam hi.

⁹Ahihang nang hong it ka hikomin, kong thuum zaw hi. Keima Paul sia Christ Jesus ii tongciin hi a, ama hu in tu laitak mama in thongtaak hi napi, hi bangin thuumna kong zangh zaw hi.

¹⁰Tua ahikom, Onesimus atu ngetsakna khat kong nei hi. Ama sia Christ sungah ka tapa hi zo hi; banghangziam cile thong sungah ka om sung ma in, thaa vai ah ama ii a pa ka suak zo hi.



- ¹¹Hunkhat lai in ahile ama sia nang atu in, bangma kimanna om ngawl a, ahihang tu in, ama sia nang le kei atu in a kizangh thei khat hong suak hi.
- ¹²Ama ka thinbotna taw, tu in nang kungah ama kong puak kik hi.
- ¹³Lungdamna thupha hu in, luangta in ka om laitak, nangma luangin kei hong hu tu, ama sia hi sungah ka keam nuam hi.
- ¹⁴Ahitazong tuabangin, hu kong ngen hamtang nuam bua hi; tua sangin, nangma thu in na ngamtat tu kong dei zaw hi. Tua ahikom, na thukim ngawl po bangma ka vawt buatu hi.
- ¹⁵Onesimus sia nang kung panin tawmvei sung a tai sia, a tawntung na om khop tu hang hizaw thei tu hi.
- ¹⁶Tu in ama sia sila khat lel po hi nawn ngawlin, sila tungsia dinmun ah om zo hi: ama sia Christ sungah ih it suapuipa hi zo ta hi. Ama sia kei atu in bangza in, manpha ziam! Tuaciang nang atu zonghin, sila khat a hina le, Topa sungah suapuipa khat a hina taw bangza in manpha zaw lai tu ziam!
- ¹⁷Tua ahikom naseppui bangin, kei nong ngaisun le, keima nong saan tu bangin, ama na saang kik in.
- ¹⁸Nang tungah ngamtat khialna hong nei a, ahibuale, leiba hong nei le zong, keima kong bat bangin na ciamtee in.
- ¹⁹Hi sungah keima khut tatak taw ma in lai hong at khi hi. *Keima Paul in, kong lo kik vatei tu hi.* (A tatak in ci leang, nangma mama zongh kei tungah hong ba nginge na hi sia, kong phawsak tu kul ngawl hi.)
- ²⁰Tua ahikom suapui awng, Topa hu in, hi thupha hong seam tan; Christ sungah suapui khat hina taw ka thin hong nuamsak tan!
- ²¹Lai hi sia kong at laitakin, kong sawl bangin vawt hamtang tu in kong he hi — a tatakin kong sawl za sangin a tamzaw vawt tu ci in kong he hi.
- ²²Tuaciang kei atu in inn doituam khat, pua khol sa in na koisak in, banghangziam cile note theampo ii thungetna sia, Pathian in hong saang tu a, note kungah kei hong zuansak kik tu hi, ci in lametna ka nei hi.



A khakbel Vaithakna

²³Christ Jesus sungah ka thongtaakpui Epaphras in note hong paupui hi,

²⁴tuabangma in ka naseppui Mark, Aristarchus, Demas le Luke in note hong paupui uh hi.

²⁵Topa Jesus Christ thuthiamna sia note theampo taw hong om khawm taken.



Hebrew te

Hebrew te 1

A Tapa tungtawn in a kison Pathian Kammal

¹A bo sa hunin, Pathian in ih taangpupite tungah kamsangte tungtawnin, lam tuatuam taw tamvei ma paupui hi,

²Ahihang hi hun khakbel hunte ah, a Tapa tungtawnin hong paupui hi. Ama tungtawnin Pathian in vaannuai bup bitphua a, a khakbel ciangin na theampo a nei tu in ama sia Pathian ii teal sa ahi hi.

³Ama in Pathian minthanna vaangtaang hong lengsak a, ama sia Pathian ii hina zia bang tatak ma hi in, vaannuai buppi ama ii a vaang nei a kammal taw khosak hi. Mihingte ii mawnate a maisak thiang zawkciangin Vaanglianpipa Pathian ii ziatsang vantung ah to hi.

Pathian Tapa ii Letna

⁴Ama tungah Pathian piak min sia vantung lalangte min sangin lianzaw ahi bangma in, Tapa sia vantung lalangte sangin lian zaw hi.

⁵Banghangziam cile Pathian in vantung lalangte khat po tungah, “Nang sia ka Tapa na hi hi; tu ni in kei sia na Pa ka hi hi,” a ci ngei bua hi. Tuasia bangma in Pathian in, vantung lalangte khat po tungah, “Kei sia ama ii Pa ka hi tu a, ama sia ka Tapa hi tu hi,” ci ngei ngawl hi.

⁶Ahihang Pathian in a Tapa ciil leitung ah a paisak tu ciangin, “Pathian ii vantung lalangte theampo in ama bia tu hi,” ci hi.

⁷Ahihang Pathian in vantung lalangte huvau ahile, “Pathian in a vantung lalangte sia vui suaksak a, a naseamte sia meikuang suaksak hi,” ci hi.

⁸Tapa huvau ahile Pathian in: “Pathian awng, na ngam sia a tawntung pan a tawntung dongin kip tu hi! Nangma in na mihingte thutang taw na uk hi.

⁹A maan thute na dei a, a maan ngawl thute na ngaimaw hi. Tua hu in Pathian, na Pathian in nang hong teal zo hi. Tuaciang na lawmte a piak sangin nang tungah lungdamna le upatna a lianzaw hong pia hi,” ci hi.



¹⁰Ama in a ci laina panin, “Topa awng, nangma in a kipat ciil in simlei na bitphua hi, tuaciang na khut mama taw vantungte na vawt hi.

¹¹Tuate mangthang tu a, ahihang nang na kip tu hi; Tuate in puan bang lui in sia tu hi.

¹²Amate laktong puasilh bangin na thep tu a, puan bangin na laih tu hi. Ahihang nang na hile a tawntungin na kibang a, na nuntakna a bo ngei bua hi,” ci hi.

¹³Pathian in a vantung lalangte khat po ii tungah: “Na ngalte na peang nuai ah siisan in kong neisak mateng, ka ziatsang ah to in,” ci ngei ngawl hi.

¹⁴Tua ahile vantung lalangte sia bang ziam? Amate sia Pathian naseam thaa te hi a, ngupna a saang tute a hu tu in, a sawlte ahi uh hi.

Hebrew te 2

A Lian Ngupna

¹Tua hu in ei in thumaan thu ih zaak te pan, lam ih pial ngawl natu in ih kholet seseam kul hi.

²Vantung lalangte in ih taangpupite tungah a thupiakte maan hi ci in lak hi, tuaciang a zui ngawl a ni ngawl khat pawpo sia ama taw a kiphu in daan thuak tu hi.

³Tua hi a, hi zata in a lian ngupna thusim bua thong leang bang bangin suakta tu hi ziam? Topa ama mama in hi ngupna thangsak masa a, tuaciangin a zate in ei tung ah tua thu a maanna hong lak zo hi.

⁴Tua kawmkaal ah Pathian in nalamdang laknate, a tumdang tuatuamte vawtna le, Thaa Thiangtho letsong te a dei bangin a hawmsakna taw in amate tetti panna tungah tetti pang thua hi.

Ngupna Nga natu Lampuipa

⁵Pathian in hong pai tu ci in ih son leitung thak sia, a uk tu in vantung lalangte a koi bua hi.



⁶Tua hi ngawl zaw in Laithiangtho mun khat ah: “Pathian awng, mihingte sia bang zongh hi a; taza in banghang thinbot ni ziam? mihing ma hi lel napi a bang tu in thin nuammaw ni ziam?”

⁷Vantung lalangte sangin a niamzaw in tawmvei sung na koi a; upatna le minthanna ama na khusak hi,

⁸tuaciang na theampo tungah a uk tu in vawt hi;” ci hi. Pathian in mihing sia “na theampo a uk tu” in vawt hi. Hi thu in na theampo huam siat hi. Ahihang tu laitak hunin, mihing in na theampo uk hi, ci in ih mu bua hi.

⁹Ahihang Pathian thuthiamna tungtawn in, mihing theampo atu a thi tu in, vantung lalangte sangin tawmvei hunsung teng a niamzaw in a kivawt Jesus ih mu hi. Thina a thuak hu in tu in minthanna le upatna lukhu a khuh ih mu hi.

¹⁰Ta tam mama in ama vaangletna a siim thei natu in, na theampo bitphua in a keam Pathian in, Jesus sia a thuakna tungtawn in a cialcing pa a suasak tu sia a maan thu hi takpi hi. Banghangziam cile amate ngupna sung a then sia Jesus ahi hi.

¹¹Ama in mihingte sia a mawnate uh panin, thiansua a, tuaciang ama le tuabangin a kithiansua sa theampote in, Pa kibang a nei uh hi. Tua hu in Jesus in, amate sia innkuanpui a nak tu in, a mai a zum bua hi.

¹²Ama in Pathian munah, “Ka mite munah na sep sa teng ka son tu hi; amate ii a kikhopna sungah nang kong pok tu hi,” ci hi.

¹³Ama in, “Ka muanna sia Pathian tungah ka nga tu hi,” ci hi. Tuaciang, “Hi sungah Pathian hong piak patangte taw ka om hi,” zongh ci lai hi.

¹⁴Ama ci bangin tua patangte sia chi le sa taw a om mihingte ahi bangma, Jesus ama mama zongh amate bang hong suak a, amate mihing pianzia teng hong siim hi. Hi bang a hina sia banghangziam cile ama thina tungtawn in thina tungah vaang a nei doaimangpa a lalcipsak natu hi a,

¹⁵thina a kiitak hu in a nuntak sung teng sila a, a kaai mihingte tuabangin suaktasak hi.



¹⁶Banghangziam cile ama ii huna a piakte sia vantung lalangte hi ngawl hi ci in kitel thiang hi. Tua hi ngawl zaw in Laithiangtho ii son bangin, “Ama in Abraham ii suan le paalte a hu hi,” a ci bang hi zaw hi.

¹⁷Hisia hu in ama in a suapuite taw na theampo sungah a kiban uh kul hi, banghangziam cile mihingte a mawna pan mawmaisakna kipiak thei natu in, Pathian na a sepna ah, a thumaan ngual a hesuak thei Thiampi Lianbel a sua natu ahi hi.

¹⁸Tu in ama in ze etna a thuakte sia hu thei hi. Banghangziam cile ama mama zongh kize et zo a, thuak ngei zo hi.

Hebrew te 3

Jesus sia Moses sangin Lianzaw

¹Pathian hong sap sa zongh ahi, ka Tapidaw suapuite awng! Ih pualaak upna ii Thiampi Lianbel tu in, Pathian ii a sawlpa Jesus ngaisun vun.

²Pathian ii inn sungah Moses sia a nasepna a thumaan bangma in, ama in hi nasep seam tu in a teal Pathian tungah thumaan hi.

³Inn khat a sa pa in tua inn sangin upatna nga zaw hi. Tuasia bangma in, Jesus sia Moses sangin vaang piakna lianzaw taw kiphu hi.

⁴Inn theampo a sa khat tek om a, ahizong na theampo a vawt pa sia Pathian ahi hi.

⁵Moses sia Pathian inn sungah naseampa bangin, thumaan hi. Tuaciingin ama in maisang a Pathian ii son tu thute son hi.

⁶Ahihang Christ sia Pathian inn uk Tapa bangin thumaan hi. Eite in, ih lametnate sungah thinletna le kimuanna ih kholet le ama inn ih hi hi.

Pathian Mihingte atu Tawngakna Khat

⁷Tua ahikom Thaa Thiangtho cina taw kizui in, “Tuni in Pathian aw na za uhle,

⁸na taangpupite senneal ngam sungah a om uh lai, Pathian a langpan lai, Pathian a ze et uh hun lai bangin, na thin uh na saksak heak vun.



- ⁹Amate in kum sawmli tawntung ka sep teng mu zo napi Kei hong ze et uh a, hong sin zazan uh hi, Pathian in ci hi.
- ¹⁰Tua ahikom tua mite tungah ka thin uuk a, hi bangin ka ci hi, ‘Amate in kei tungah hong thumaan ngawl tawntung a, ka thupiakte hong nial uh hi.’
- ¹¹Ka thin uuk a, ‘Tawlngakna ka piak natu ngamah amate tum ngei ngawl tu hi!’ ” ci in: a ciliaphuai kamciamna ka vawt hi.
- ¹²Ka thu uppuite awng, a nungta Pathian kung pan na lampial ngawl natu in, no sungah kuama peuma in ngitlona thinsung le up ngawl na thin na nei ngawl natu in kidawm tavun.
- ¹³Laithiangtho sungah, "Tuni" a kici kammal sia a kizak thei lai teng mawna ii hong theam ngawl natu le na thin uh a sak ngawl natu in, khat le khat nisim in na kihuh zawk uh kul tu hi.
- ¹⁴Banghangziam cile a kipat pan ih nei kimuanna sia a tawp dongin ih kholet le ei theampo sia Christ taw a kikopte ih hi hi.
- ¹⁵Hisia Laithiangtho ii ci ahi hi: “Tuni in Pathian ii aw na za le, na taangpupite ii Pathian a langpan lai uh bangin na thin uh na saksak heak vun.”
- ¹⁶Pathian aw za a, ama leedo in a langpante a kuate ziam? Moses ii Egypt ngam panin a pusuapui theampo ahi hi.
- ¹⁷Pathian sia kum sawmli tawntung a kuate ii tungah thin uuk ziam? Senneal ngam sungah puk a, a thi mawneite tungah Pathian a thin uuk hi.
- ¹⁸Pathian in, “Amate tawlngakna ka piak natu ngamah a tum ngei buatu uh hi,” ci in, Pathian ii a ciliaphuai kamciam a piakte — akua pia ziam? Ama a leedote ahi hi.
- ¹⁹Amate in tua ngam sungah tum thei ngawl hi, banghangziam cile amate in um ngawl ahihang hi ci in ih he hi.

Hebrew te 4



¹Tu in Pathian in, ama son sa tawlngak nuam sia ih nga thei natu in kamciam hong pia hi. Tua ahiciang, tua tawlngak nuam sia saang ngawlin khat zongh om thaak ngawl tu eite kidawm tek tawng.

²Banghangziam cile eite zongh amate bangma in lungdamna thu ih za zo hi. Amate ahile tua thu za napi amate atu a phatuam bua hi. Banghangziam cile amate in a zaak uh ciangin upna taw a saang bua uh hi.

³Tua hi a, ei a umte in, Pathian hong kamciam sa tawlngak nuam sia ih saang hi. “Ka thin uuk a, hi bangin a ciliap huai kamciam ka vawt hi. ‘Amate in ka piak tu tawlngakna ngamnuam a tum ngei buatu hi!’ ” a ci bang tatak ma ahi hi. Ama nasep sia simlei a bitphua hun panin a kiman sa hi napi tu a bangin ci veve hi.

⁴Banghangziam cile Laithiangtho sung mun khat ah ni sali ni huvau hi bangin ci hi: “Pathian sia a nasepna theampo pan a ni sali ni in tawlnge hi.”

⁵Hi thu a kison kik leleau na ah, “Amate in tawlngakna ka piak natu ngamah a tum ngei buatu hi.” ci hi.

⁶Lungdamna Thu a za phit te in tua tawlngak nuam sia a saang bua uh hi. Banghangziam cile amate in a um bua uh hi. Tua ahikom a saang tu in, a deisak midang om hi.

⁷Hi thu sia koi bangin kilak ziam cile Pathian in, “Tuni,” a kici ni dang khat koi hi. Tua zawk kum tam mama ciangin, a kison sa Laithiangtho khaante sungah a om bangma in Pathian in David tungtawn in, tua thute hi bangin son hi: “Tuni in Pathian aw na za uh le, na thin na saksak heak vun.”

⁸Joshua in Pathian kamciam ahi tawlngak nuam sia mihingte tungah pia zo hi thong le, Pathian in nidang khat ciang son kik nawn ngawl tu hi.

⁹Tua ahikom ni sali ni in Pathian a tawlngak bangma in, Pathian mite atu in tawlngak nuam khat om lai hi.

¹⁰Banghangziam cile tua Pathian kamciam a piak tawlngak nuam sungah a tawlnge peuma in, Pathian tawlngak bangma in, amate nasepna pan a tawlnge tu uh hi.



¹¹Tua ahikom, amate upna a sel hu in tawlngakna a nga ngawl bang ih sua ngawl natu in, ei zongh tua tawlngakna sia ih saan thei natu in, ih hi theiza in hanciam tawng.

¹²Pathian kammal in nungta a, thahat in, lang nii hiam namsau sangin hiam zaw hi. Ama in thaa le thinsung kisiktuana mun, ngu le taang ngungeak kipeena mun teng paillet hi. Ama in mihing deina le lungngulna te tungah thukhen hi.

¹³Pathian mai ah bangma a kiseal thei bua hi; bitphua sa na theampo sia ama mai ah kipualaak siat hi. Tuaciangin ih sep ih vawt sa theampo tungah thu hong sit tu sia ama ahi hi.

Jesus Thiampi Lianbelpa

¹⁴Tua ahikom ih upna ih pualaak sate ii tungtaang ah eite kip tek tawng. Banghangziam cile eite in Thiampi Lianbelpa khat ih nei a, ama in Pathian omna tatak ah pai zo a, tua pa in — Pathian Tapa Jesus ahi hi.

¹⁵Ih Thiampi Lianbelpa in ei tha zawmna hong khuangai pui thei ngawlpa ahi bua hi. Tuabang hi ngawl zaw in, Thiampi Lianbel in, eima bangma in ze etna namcin na thuak a, ahizong a khial ngei bua hi.

¹⁶Tua ahikom, kimuanna nei in thuthiamna a omna mun Pathian kumpi tokhum kung zuan tek tawng. Tua munah hesuakna ih saang tu a, ih kitaangsap laitak hong hu tu in, thuthiamna ih mu tu hi.

Hebrew te 5

¹Thiampi lianbel peuma a mipuite sung panin kiteal a, mawmai natu sangaw biakpiakna le biakpiakna vawt tu in, amate taangin Pathian naseam tu a kitavaw te ahi hi.

²Ama mama in thaneamna tuatuam nei ahikom, thu tel ngawlte le khialna vawtte tungah ama in, cingh thei hi.

³Ama mama thaneam ahikom, a mihingte mawna atu bek hi ngawlin ama mawnate atu zongh sangaw biakpiakna a sep kul hi.



⁴Thiampi lianbelpa za sia ama le ama kiteal a, a kipia kuama om ngei ngawl hi. Aaron tungah a kipiak bangin — mihing khat sia Pathian ii samna bek taw thiampi lianbel kisuaksak hi.

⁵Tuasia bangma in Christ in ama le ama thiampi lianbel za a kipia bua hi. Pathian in ama munah, hi bangin ci zaw hi, “Nang sia ka Tapa na hi hi; tuni in Kei sia na Pa ka suak hi.”

⁶Mundang khat ah a sonna panin, “Nangma sia thiampi na hi tawntung tu hi. Melchizedek taw a kinguizui thiampi na hi tu hi,” ci hi.

⁷Leitung ah a nuntak lai in Jesus in thina pan a ngum thei, Pathian tungah a nging auna le thitui luanna taw thungetna le dei ngetnate nei hi. Ama kiniam khiak a, Pathian deina a zuipa ahi hu in, Pathian in za hi.

⁸Ama in Pathian Tapa ahihang, thuakna tungtawn in thu nitna sin hi.

⁹Ama sia a cingtaak a kisuasak zawkciang, ama thu a ni theampo atu in, tawntung ngupna ii a naak suak hi.

¹⁰Pathian in ama sia Melchizedek pan a kinguizui susuk thiampi lianbel in saang hi.

Upna Nusiati huvau Kidop natu

¹¹Hi thu tungtaang son tu tam mama om hi. Ahihang no tungah son tel thei tu haksa hi. Banghangziam cile note in thu na tel hak mama uh hi.

¹²Note in sya nasep natu uh, hun tam ma om zo napi — Pathian thu kipat ciilna khat pawpo hil na kul lai uh hi. Antak ne tu hi zo napi noai na neak uh kul lai hi.

¹³Noai ne khat pawpo sia patang hi lai a, a maan le a maan ngawl a khentel thei ngawl laite na hi uh hi.

¹⁴Antak sia ulian sate atu hi a, amate in, kisinna tungtawn in a pha le a sia khentel thei uh hi.

Hebrew te 6



- ¹Tua ahikom Tapidaw mite tungah thuhil phitnate nung sangah nusia in, a puicing kihilna taw eite mainawt tawng! A mannung ngawl nasepna le ngaisutna te nusia in Pathian ih up tu ahi hi;
- ²baptize na nanamte ahizong, khut ngakna ahizong, tawntung thukhenna le a thi sate thawkikna ahizong, kansuut kikik pheang nawn ba tawng.
- ³Eite mainawt tawng! Pathian in hong lungkimpui le, mainawt tu ahi hi.
- ⁴Banghangziam cile a upna uh a nusia sate sia a kisii kik natu in, kikaizawn kik thei nawn na ziam? Amate sia khatvei lai in Pathian ii khuavak sungah om ngei zo uh hi. Amate sia vantung letsong tep ngei zo uh hi. Amate sia Thaa Thiangtho zongh a saang ngei sa ahi uh hi.
- ⁵Pathian kammal pha hi ci in a tel sa, maisang a hong pai pheang tu, hun ii vaangletna zongh a he sa ahi uh hi.
- ⁶Tua zawkciang amate in a upna uh taisan uh hi! Amate sia a kisii kik tu sia suak thei nawn ngawl hi. Banghangziam cile, amate in Pathian Tapa sia Thinglamte tungah kil kik a, mipi mai ah a maizum huai in a pholaak ahi uh hi.
- ⁷Lothote atu a limci ankungte a posak nguatu a dawn leitangh te ii tungah Pathian in thupha pia hi.
- ⁸Ahihang lopa le lingkungte a posak a ahile, tua leitangh sia a mannung bua hi. Pathian ii haamsiat tu le, meikuang taw a halcip tu lau huai hi.
- ⁹Ahizong hi bangin ih pau hang, kong it lawmte awng, no atu sia ka lungmuang hi. Note ii ngupna taw kizui thupha a phazawte na nei uh sia kong he uh hi.
- ¹⁰Pathian sia thutang ngawlin a khenpa ahi bua hi. Ama in na a sepate ahizong, ama ii tungah itna na lakna uh ahi, Tapidawpui te ii tungah huna na piakte le na piapiak laite sia hong makngil sak ngawl tu hi.



¹¹Deisakna lianpi kong neisakna uh sia, bangziam cile, na lamet uh thute hong tangtung takpi thei natu in, na lawpna uhte a tawp dong in, mihing sim in, na kepcing tek tu ahi hi.

¹²Na datham tu sia kong deisak bua uh hi, Pathian ii kamciamte na nga natu in, a umte le a thinsaute bang na hi natu in kong deisak uh hi.

Pathian Kamciam a Tung Takpi tute

¹³Pathian in Abraham tungah kamciam a piak ciangin, a kamciam teng a tangtun natu ama in kiciamna vawt hi. Ama sangin a lianzaw om nawn ngawl ahikom, ama ii min taw kiciam hi.

¹⁴Ama in “Thupha kong pia tu a, suan le paal tam mama kong pia tu hi ci in kamciam kong pia hi,” ci hi.

¹⁵Abraham sia a thinsau ahikom Pathian ii kamciam teng a saang hi.

¹⁶Mihing khat in kiciamna a vawt ciangin, ama sangin a lianzaw khat ii min zangh a, tua in kinialna theampo bosak hi.

¹⁷Ama ii kamciam a piakte, a saang tute tungah, Pathian in a tup a sawmna peal ngei ngawl hi, ci in thiang takin telsak nuam ahikom a kamciamte sia, kiciamna taw in belap hi.

¹⁸Tua hi a, thu nam nii om hi, tuate sia kikheal thei ngawl a, Pathian in tua thute taw kisai in leilot thei ngawl hi. Tua ahikom ama sungah ngammuanna a ngate in, ih mai ah hong kikoi lametna sia kho takin ih let natu in nasia takin hanna ih nei hi.

¹⁹Hi lametna sia ih nuntakna atu in, thikluum kip bangin, ih nei hi. Tuasia in, maanin, muanhuai a, vantung biakinnpi a kidalna puankhai sia kantanin mun thiangtho sungnung ah pai hi.

²⁰Ei taangin, Jesus in eite mai tua munah pai khol zo hi. Tuaciang, Melchizedek thiampi sia taw a kinguizui, a tawntung atu in, thiampi lianbel hong suak hi.

Hebrew te 7

Thiampi Melchizedek



¹Hi Melchizedek sia Salem kumpipa hi a, a Saangbel Pathian ii thiampipa ahi hi. Abraham sia kumpi li taw kisim in, ngalzo a hong cia ciang, Melchizedek taw kisi a Melchizedek in thupha pia hi.

²Tuaciang Abraham in ngalte ii neisa a laak theampo tung pan see sawm sua see khat ama pia hi. (Melchizedek min ii khiakna masa sia “Thutang Kumpipa,” cina hi a, tuaciang, Salem kumpipa zongh kici ahikom, “Kilemna Kumpipa,” zongh kici si hi.)

³Melchizedek ii pa ahizong a nu ahizong a taangpupite min ahizong a kiciamtee mun om ngawl hi. A suana ahizong a thina ahizong tepteena om ngawl hi. Ama sia Pathian Tapa bang ahi hi. Ama in a tawntung in thiampi hi top hi.

⁴Tua ahikom ama bangza in lian ziam ci in na ngaisun thei uh hi. A minthang ih taangpupi ahi Abraham zongh in, ngal kisim na phual pan a, a nga vanhte sung pan see sawm sua see khat ama pia hi.

⁵Tuaciang, Levi suan thiampite sia Thukham in Israel mite tung pan see sawm sua see khat, a laak natu thu pia hi. Tuате in, a minampuite hi a, tua a minampuite sia Abraham suante ma ahi hi.

⁶Melchizedek sia Levi suan hi ngawl hi. Ahihang Abraham tung panin see sawm sua see khat la in, Pathian kamciam a saang Abraham sia thupha pia hi.

⁷Thupha a pia pa in, thupha a saang sia sangin, lianzaw ahi hunlam tel laak om ngawl hi.

⁸Thiampite tungtaang a, see sawm sua see khat sia, a thi mihingte in la hi. Ahihang Melchizedek ahile, Laithiangtho son bangma in, see sawm sua see khat sia a nungta pa in la hi.

⁹Bang ci nuam hi ziam cile, Abraham in see sawm sua see khat a piak ciangin Levi in zongh a pia suak hi (A suan a paalte in khon hi).

¹⁰A tatak in ci leang, Levi sia piang ngawl lai hi, Melchizedek in, Abraham taw a kimu lai in Levi sia a taangpupi Abraham pumpi sungah om hi, ci tu hi.

¹¹Levi thiampite bulphu in, Israel mite tungah Thukham a kipia ahi hi. Tu in Levi thiampite nasepna sia a cialcing sa hile thiampi namdang khat a pian kul ngawl tu hi. Tua Thiampi in Aaron za laih hi ngawlin, Melchizedek za laih tu a kulna sia hi thu hang ahi hi.

¹²Banghangziam cile thiampi huvau ah kikhealna a om ciang, thukham zongh a kikheal kul hi.

¹³Tu a ih son teng huvau sia ih Topa in phung dang pan hi a, ama bee le phung sung pan thiampi a seam ngei kuama a om bua hi.

¹⁴Ama sia Judah minam a piang ahi hunlam sia a kuama po ii heak ahi hi. Tuaciang thiampite huvau a son ciangin Moses in Judah min a lo ngei bua hi.

Melchizedek bang Thiampi Dangkhath

¹⁵A thu paizia sia thiang vaial hi; thiampi tuam dangkhath hong khang a, tua pa sia Melchizedek bangma ahi hi.

¹⁶Ama sia thiampi kisuaksak hi. Mihingte ngeina le zui tu thu omte taw hi ngawlin mong nei ngawl nuntakna khat ii vaang taw kisuaksak hi.

¹⁷Banghangziam cile Laithiangtho in, “Nang sia thiampi khat na hi tawntung tu hi. Melchizedek taw a kinguizui thiampi za lua pa na hi hi,” ci hi.

¹⁸Tua ahikom ngeina lui sia, kiheam hi. Banghangziam cile tua in thaneam a, a mannung bua hi.

¹⁹Banghangziam cile Moses thukham in bangma a cialcingsak thei bua hi. Tu in Pathian taw ih kinai thei natu lametna phazaw khat hong kipia zo hi.

²⁰Tua ban ah, Pathian kiciamna zongh om si hi. Midangte thiampi a kisuasak lai in, tuabang kiciamna a om bua hi.

²¹Ahihang Jesus sia kiciamna khat taw thiampi a sua natu Pathian in, “Topa in a ciliap huai kamciamna khat vawt zo a, tuasia a dawkkik buatu hi. ‘Nang sia a tawntungin thiampi na hi tu hi’ ” ci hi.

²²Tua ahikom hi a kilamdanna in, Jesus sia a phazaw thuciamna a kipsak pa zongh suaksak hi.



²³A kilamdanna dang khat zongh om lai hi: thiampi dang tam mama a om hi, banghangziam cile amate sia thithi a, a nasep uh a zomto thei bua hi.

²⁴Ahihang Jesus sia nungta tawntung ahikom ama ii thiampi nasep sia ngualdang a aap sawn bua hi.

²⁵Tua ahikom ama in, tu le a tawntung in, ama tungtawn a, Pathian kung a zuante sia hun thei hi, banghangziam cile ama in amate atu Pathian munah thu ngetsak tu in, a nungta tawntung hi.

²⁶Tua ahikom Jesus sia ih kitangsapnate hong kicingsak thei, Thiampi Lianbel ahi hi. Ama thiangtho a; ama in mawna ahizong, khialna ahizong, ama sungah a nei bua hi; ama sia mawneite sung panin, kidoi tuam a, vantungte sangin a saang zaw in kilaamto hi.

²⁷Ama sia thiampi lianbel dangte taw kibang bua hi; a masa phitbel in, ama mawna atu le tuazawkciang midangte mawna atu in, sangaw biakna nisim vawt kul ngawl hi. Ama le ama a kipiak ciangin, a tawntung atu in khat vei lian sangaw biakpiakna vawt zo hi.

²⁸Moses Thukham in a cialcing ngawl mihingte thiampi lianbel tu in sep hi; ahihang Thukham om zawkciang hong piang, Pathian ii kiciamna taw a vawt kamciam in a cialcing Tapa sia a tawntung atu in Thiampi suaksak hi.

Hebrew te 8

Ih Thiampi Lianbel Jesus

¹Ih son sa theampo ii bulpi in, tuabangin eite ii Thiampi Lianbel khat ih neina thu ahi hi. Tua pa in vantung ah Vaangnei Pathian tokhum ziat sangah to hi.

²Ama in mihingte ii sak ahi ngawl, Topa ii sak buk tatak ahi A Thiangthobel Mun ah thiampi lianbel seam hi.

³Thiampi Lianbel theampo sia Pathian tungah piakkhianate le nganhing taw biakpiaknate a pia tu in, a kispah ahi hi. Tua ahi bangma, ih Thiampi Lianbel zongh in, na khat peuma a piak nanak tu ahi hi.

⁴Jewte Thukham deina bangin letsong a pia tu in thiampite om ahi nungsang, hi leitung ah ama hong om le zong thiampi hi ngawl tu hi.



⁵A tatak in ci leang ama ii a thiampi nasep in vantung a sia a zui hi a, tua ii lim bek ahi hi. Tua in Moses ii sepna sia bangma ahi hi. Ama in Zeksa Puanbuk a sak tu ciangin, Pathian in, “Mualtung ah hong kilak sia ii lim bang tatak in, na theampo na vawt hamtang in,” ci hi.

⁶Ahihang tu in, Jesus a ki aap thiampi nasepna sia amate aa sangin lianzaw a, Pathian le a mihingte kilaklaw ah a vawt thuciamna sia zongh amate aa sangin, a phat zawk bangma ahi hi. Banghangziam cile tua thuciamna sia a phazaw nate kamciam piaknate tungah kidoppha ahi hu hi.

⁷A masa thuciamna sia khial ngawl hi thong le, a niina thuciamna sia kul ngawl tu hi.

⁸Ahihang Pathian in, a mihingte tungah khialna mu ahikom hi bangin ci hi. Topa in, “A nite hong tung tu a, tuasia ciangin thuciamna thak khat, Israel mite le Judah mite taw, ka vawt tu hi.

⁹Amate ii taangpupite taw thuciamna ka vawt bang ahi buatu hi. A khut uh pan kai in, Egypt pan ka pusuapui hunlai bang ahi buatu hi. Amate taw ka vawt thuciamnate tungah a thumaan bua uh hi, tua ahikom amate ka awlmawk bua hi.

¹⁰Tu in hisia in, maisang hong pai lai tu hun sungah, Israel mite taw ka vawt tu thuciamna ahi hi, Topa in ci hi: Ka thukhamte amate thinsung ah ka koi tu a, a lungtang tungah ka at tu hi. Kei sia amate Pathian ka hi tu a, amate sia ka mihingte ahi tu hi.

¹¹Amate kuama in a minam puite a hil sawn a kul nawn buatu hi. Tua ahibuale, “Topa he vun,’ amate a kici buatu hi. Banghangziam cile amate in kei hong he siat tu a, a nobel panin a lianbel dongin hong he tu hi.

¹²Amawna uh ka maisak tu a, a khialna uh ka ciamtee nawn buatu hi,” ci hi.

¹³Pathian in thuciamna thak sia a son ciangin, a masa sia luisak hi. Tuaciangin bang khat pawpo a lui a tul sate sia hai ngawlin bo mang tu hi.

Hebrew te 9

Leitung le Vantung ii Biakpiakzia



- ¹Thuciam masa sia in biakpiakna ngeinate le mihing vawt biakna mun zongh nei hi.
- ²Puanbuk khat kisa a, a puanung sia Thiangtho Mun kici hi. Tua sungah mei detna khuam le Pathian a piak anluum koina sabuai om hi.
- ³Kidalna puankhak a niina sia ii nung sangah Thiangthobel Mun a kici buk khat om hi.
- ⁴Tua sungah sathau namtui halna, kham biaknatau le, kham taw a kituam Thukham Thingkuang om a, a sungah manna koina kham uum le a teeno a suak Aaron ciangkhut le thukhamte a ki atna suangpheak niite om uh hi.
- ⁵Tuate tungah Pathian ompuina lim a lak, tha nei vantung mite om a, maw kimaisakna mun ii tung pan a tha taw siin uh hi. Ahihang tu lai tak sia tua nate theampo a vaikhua in son tu hun ahi bua hi.
- ⁶Hite sepzia sia hi bang ahi hi. Thiampite in nisim in buk puanung sungah tumin a sep tute seam uh hi,
- ⁷ahihang a sungnung doituam sungah, Thiampi Lianbel bek kumkhat in khatvei tum hi. Ama ii mawna le a mihingte ii a phaw thaak ngawl mawnate atu in, chisan la in, Pathian bia hi.
- ⁸Buk puanung sia a kip in a om laitengin Thiangthobel Mun kihong ngawllai hi, ci in Thaa Thiangtho in thiang takin hil hi.
- ⁹Hisia in tu hun kilakna lim khat ahi hi. Pathian tungah a kipia biakpiakna le, nganno taw biakpiakna in, a biate thinsung cialcing sak thei ngawl hi ci thu kimu hi,
- ¹⁰banghangziam cile tuate in an, neak le dawn kithiansuana tuatuamte hi bek hi. Hite sia a puatham zui tu ngeinate hi a, Pathian ngeina thak a piak sia a kipsak mateng atu hi bek hi.
- ¹¹Ahihang Christ sia hi lai a, a om sa na phate theampo ii Thiampi Lianbel tu in hong pai zo hi. Ama thiampi sepna buk sia lianzaw a, cialcing zaw hi;



tuasia in mihingte ii vawt hi ngawl, hi simlei taw a kibitphua khawm ahi bua hi.

¹²Christ in Thiangthobel Mun ah khatvei lian a tum zawkciang, ama in, kealte le khuitalte ii chi sia biakpiakna tu in a keng bua hi. Ama chisan piazaw in, ei atu tawntung ngupna hong ngasak hi.

¹³Kealte le khuitalte chi le khuino halna vaamte a kithee ciang biakna huvau a, a thiangtho ngawl mihingte thiangthosak hi.

¹⁴Hisia thumaan ahikom, Christ chisan in bangza in seam zozaw seseam tu ziam! Tawntung Thaa tungtawnin, ama in Pathian tungah ama le ama a cialcing sangaw biakpiakna in, kipia zo hi. Ama chisan in a mannung ngawl biakna huvau panin, ih thinsung hong thiangsak tu hi.

¹⁵Tawntung thupha Pathian kamciamte a saan thei natu in, Pathian sap sa mihingte atu, Christ in thuciam thak khat hong vawtsakna in, hisia hang ahi hi. Hisia kipiangsak thei hi, banghangziam cile thina khat om a thuciam masa sia a om kimlai ma in, mihingte a khialnate pan tua thina in suaktasak hi.

¹⁶Ngamh lua natu lai a kinusiat tungtaang ah tua lai atpa sia thi zo ci in a lak thei tu kismah hi,

¹⁷banghangziam cile thi zawkciang atu in a ki at lai sia, a at pa nuntak lai teng kizangh thei ngawl a, a at pa thi zawkciang bekin kizangh thei pheang hi.

¹⁸Tua hi a, thuciam masa sia ngawngawn zongh chisan zakna bek taw thu suak thei hi.

¹⁹A masa phitbel in Thukham sungah a thupiak theampo mihingte tungah Moses in sonthiang phot hi. Tua zawkciangin khuitalte le kealte chi la in tui taw a hel zawkciang, hyssop baak le tuu mulsan pawlkhat zangh in, Thukham laibu tung le mihingte tungah the hi.

²⁰Ama in “Hi chi in Pathian ii ih zui tu a, hong thupiak thuciamna a kipsak sia ahi hi,” ci hi.



²¹Tuasia bangma Moses in Thuciamna Buk tung le biakna ah a kizangh nate theampo tungah chi the hi.

²²Thukham ci bang hile na theampo phial ma chisan in thiansua a, chisan a buak ciang bekin mawmaisakna om takpi hi.

Christ Kipiakna in Mawmate Maisak

²³Vantung ah a om nate ii lim a late sia tuabangin kithiansua hi. Ahihang vantung nate mama in a phazaw biakpiaknate kulsak hi.

²⁴Banghangziam cile, Christ in a tatak sia ii lim ahi mihingte vawt Thiangtho Mun sungah a tum bua hi. Ama in vantung tatak ma ah tumin Pathian mai ah eite luangin, tu in a na kilak tawntung hi.

²⁵Jewte Thiampi Lianbel in Thiangthobel Mun ah kumsim in nganno chi taw tum hi. Ahihang Christ in ama le ama a kopia kikik bua hi,

²⁶tuabang hi thong le, simlei a kubitphua pan kipan tamveipi na thuak zo tu hi. Tu in hun theampo a tawp natu hong nai ciangin, ama le ama a kipiakna taw mawna kithiansua natu in, ama in a theampo atu, khatvei lian hong kilaak zo hi.

²⁷Mihing theampo khat vei tek thi tu a, tua zawkciang Pathian in amate tungah thukhen tu hi.

²⁸Tuasia bangma in, Christ zongh mihing tampite mawna a laaksak tu in, a nuntakna khatvei lian a kopia ahi hi. Ama sia a nii veina hong kilangh tu a, mawna taw kipekan tu hi nawn ngawlin, ama ngak nginge in a omte hun tu ahi hi.

Hebrew te 10

¹Jewte Thukham sia a tatakte ii a kicing le a maan lim ahi zo bua hi; hong pai tu na phate ii a kician tak ngawl a pianzia bek ahi hi. Tua sangaw biakpiaknate zongh kumsim in kopia tawntung hi. Tua ahile hi sangaw biakpiaknate tungtawnin, Thukham sia in Pathian kung a zuan mihingte bangbang hong cialcingsak thei tu ziam?



²Pathian a bia mihingte sia a mawna panin, ki thiansua takpi hi le amate sia mawna taw kithasung nawn ngawl tu a, sangaw biakpiakna theampo om nawn ngawl tu hi.

³Ahihang kum khat zawkciang kum khat sangaw biakpiaknate in, mihingte mawna phawksak kik tu hi.

⁴Banghangziam cile khuitalte le kealtalte chi in mawnate a la keak thei ngei bua hi.

⁵Hi thu hangin Christ sia leitung ah hong pai tu ciangin ama in Pathian tungah, “Sangaw biakpiaknate le piakkhiatna te na dei bua hi, ahihang kei atu in pumpi khat nong koisak khol zo hi.

⁶Nang in mawmaisak natu in biaknatau tungah nganhing a kipumhalte ahibuale sangaw biakpiaknate taw na lung a kim bua hi.

⁷Tuaciangin, ‘Thukham laibu sungah keima thu a ki at bangma in, Pathian awng, na deina bang a seam tu in, Hi sungah om ing,’ ka ci hi,” ci hi.

⁸Ama in a masa in, “Nang in sangaw biakpiakna, piaknate le mawnate laakkeak natu in, biaknatau tungah nganhing pumhalte na dei bua a, na lung a kim bua hi,” ci hi. Tua ahikom Pathian in sangaw biakpiaknate Thukham bangin kipia hi napi, tu a bangin na ci hi.

⁹Tua zawkciangin, ama in, “Pathian awng, na deina bang a seam tu in, hi sungah om khi hi,” ci hi. Tua ahikom Pathian in sangaw biakpiakna lui te phiat siat a, Christ ii kipumpiak biakpiakna taw theak hi.

¹⁰Pathian dei bangin Christ in ngamta ahikom, ama ii tawntung atu khatvei lian a pumpi a kipiakna hu in eite theampo mawna pan hong kithiansua hi.

¹¹Jew thiampite khat simin, a nasep sia nisim in seam a, biakpiak sangawna sia a kibangin tamvei ma pia hi; Ahihang hi sangaw biakpiaknate in mawnate a la keak thei ngei bua hi.



¹²Ahihang Christ in mawnate atu in, sangaw biakpiakna khat pia a, tua biakpiakna sia a tawntung atu in, kikhomsuan hi, tua zawkciang in, ama sia Pathian ziatsang ah to hi.

¹³A ngalte peang ngakna tokhum bangin a peang nuai ah Pathian ii a koi mateng, tu in tua munah ngak hi.

¹⁴Tua ahiciang ama in khatvei biakpiakna taw mawna pan a kithiansuate, a tawntung atu in cialcingsak hi.

¹⁵Tuaciangin Thaa Thiangtho zongh in, ama ii tetti panna hong pia hi. Hi bangin ci masa hi,

¹⁶“Hisia maisang ah hong pai tu hun sungah amate taw ka vawt tu thuciamna hi. Ka thukhamte amate lungtang sungah ka koi tu a, a thin sungah ka at tu hi,” Topa in ci hi.

¹⁷Tuaciangin ama in, “Amate mawnate le ngitlo ngamtatnate ka ciamtee nawn buatu hi” ci hi.

¹⁸Tua ahikom hi mawnate hong kimaisak zawkciangin, mawnate laak keak natu biakpiakna khat a kul nawn bua hi.

Pathian kung Zuan tawng

¹⁹Tuaciangin suapuute awng, Jesus thina hu in, Thiangthobel Mun ah ih tum natu in, suatakna a kicing takin ih nga hi.

²⁰Ama in eite atu ama ii pumpi ahi kidalna puankhak sia paillet in — a nungta lampi thak khat hong honsak hi.

²¹Pathian innpi a uk thiampi liankhat ih nei hi.

²²Tua ahikom thintak taw Pathian kung neakin, upna maan le, mawna kithasunna pan, a kithiansua sa lungtang le tuithiang taw a kisil sa pumpite taw zuan tek tawng.

²³Ih pualaak sa lametna kholet tawng, banghangziam cile Pathian in, hong kamciam sate sia kholet tu hi, ci in ih muang ngam hi.



²⁴Khat le khat kithinbot tawng, ki itna kilak in a pha ngamtat natu kihu tek tawng.

²⁵Pawlkhate bang hi ngawlin, eite in kikhoptua ngei sia thasua ba tawng. Topa ni hong nai hi ci in, mu na hi uh ciangin, khat le khat ki hanthawn seseam zaw tawng.

²⁶Banghangziam cile thumaan hong kiheaksak zawkciang, mawna ih vawt kaltang lai le, mawna maisak natu, biakpiakna khat beak zongh om nawn ngawl hi.

²⁷Hong pai pheang tu thukhenna le Pathian a langpante a lalcipsak tu a kiitak huai meikuang sia launa taw ngak a, ih om tu bek taang lai hi!

²⁸Moses thukham a paltan khat pawpo sia tetti nii ahibuale a tamzaw taw thukhenin a mawsak le hesuakna om ngawlin kithisak hi.

²⁹Tua ahile Pathian Tapa a zawngsak pa sia bang suak tu ziam? Mawna pan a, a thiansua Pathian thuciamna chisan a awlmaw ngawlte, thuthiamna Thaa a zawngsak te, bang tek suak tu ziam? Ngaisun vun, tuabang mihing khat thuak tu a kilawm daan sia bangza in nasia zaw tu ziam!

³⁰Banghangziam cile, “Phu ka lam tu a, ka thuk kik tu hi,” a ci sia pa le, “Topa in ama mihingte thu a khen tu hi,” a ci sia pa zongh ih he hi.

³¹A nungta Pathian khut sung thet tu sia bangza in lau huai ziam!

³²A bo sa hun sungah note, bangbang hi kana nu ziam, phawk kik vun. Tua lai in, Pathian khuavak sia no tungah hong taan zawkciang, na tam mama na thuak ngei uh hi. Ahitazong kisaan in na hanciamna ah, na lel bua uh hi.

³³Note khat vevei ngual sungah a kilangh in hong kivawtsia a, tuaciang hun dangte ah hi bangin a kivawtsiate na pawlpui ngam uh hi.

³⁴Thongtaakte na thuakpui uh a, na neisa theampo hong kimatsak ciangin, tua supna sia lungdam takin na thuak uh hi, banghangziam cile a tawntung a, a kikhomsuan tu, a phazaw pek khat, nei nginge lai na hi uh sia na he uh hi.



³⁵Tua ahiciang na thinletna uh thasua heak vun. Banghangziam cile tuasia in thaman lian mama taw hong kizom tu hi.

³⁶Pathian deina bangin na sep thei natu le, ama hong kamciamte na saan thei natu in, na thin na sausak kul tu hi.

³⁷Banghangziam cile Laithiangtho in, “Tawmvei no zawkciang, hong pai tu pa hong pai tu hi; ama haisaang ngawl tu hi.

³⁸Bang po ahizong a thutang ka mite in, um tu a nungta tu hi: ahihang amate khat po a heak kik le ama tungah ka lungkim ngawl tu hi,” ci hi.

³⁹“Eite in heak kik a, a mangthangte ih hi bua hi. Ei sia upna nei in a kingumte ih hizaw hi,” ci hi.

Hebrew te 11

Upna

¹Upna nei ih ci sia, lametna ih neinate tungah thinmuanna hi a, a kimu thei ngawl laite tungtaang ah muan ngamna ahi hi.

²Upna a nei hu in, taanglai mihingte sia Pathian lungkim hi.

³Vaannuai bup sia Pathian kammal taw kikitphua a, a kimu thei nate sia a kimu thei ngawl nate panin, kivawt hi ci in upna taw ih tel hi.

⁴Upna taw Abel ii Pathian tungah a biakpiakna sia Cain ii biakpiakna sangin phazaw hi. Ama upna tungtawn in, ama sia Pathian in thutang hi ci in a saan pa hi a, banghangziam cile Pathian mama in a piakte lungkim hi. Abel sia thi zo ahihang ama ii upna in thu hong son lai hi.

⁵Upna in Enoch sia thina panin keam hi. A thi tu luangin, Pathian in ama la to zaw a, kuama in ama mu thei nawn ngawl hi. Laithiangtho sungah Enoch sia a kilaak to maa in, Pathian lungdam sak hi, ci hi.

⁶Upna ngawl taw kuama in, Pathian lungdamsak thei ngawl hi, banghangziam cile Pathian kung a zuan peuma in, ama sia om takpi a, ama a zongte thaman pia hi, ci in, a up uh kul hi.



⁷Ama mu thei ngawl maisang a, hong tung pheang tu nate huvau, Pathian ii kingintaak natu a sonthe, Noah ii a zaak thei sia upna hang ahi hi. Ama in Pathian thu ni a, teambaw vawtin, tua sungah ama le a innkuanpuite kisuatak hi. Tua hu in leitung bup sia puavawkna thuak a, tuaciang upna pan hong pai thutang suana sia Noah in Pathian tung pan nga hi.

⁸Pathian ii kamciam a piak sa ngam pai tu in, Abraham in Pathian ii sapna a nit sia upna hang ahi hi. Ama in koisung pai tu ci in he ngawl pipi ma in, a ngam nusia hi.

⁹Pathian ii ama tungah, a kamciamsa ngamah ngamdang mi khat in a teen sia upna hang ahi hi. Ama in Pathian tung pan a kibang kamciamna ma a saang, Isaac le Jacob bangma in puanbuk sungah teang hi.

¹⁰Abraham in Pathian ii ngealin a sak, a bulkip khuapi ngak nginge hi.

¹¹Abraham huai mama zo a, a zi Sarah zongh ta nei thei ngawl hi napi upna in ama sia pa khat suaksak hi. Pathian in a kamciam sia tungsak tu hi, ci in muang hi.

¹²Abraham sia a thithi ma hi zo napi, hi pasal khat ii a suan le a paal sia van a aksi za le tuipei vaal ah a kisim zo ngawl senvui za ahi hi.

¹³Hi mite theampo sia upna sungah thi uh hi. Amate in Pathian kamciamte saang man ngawl a, a khualana pan ngal mu bek uh hi, ahitazong a lungkim laak veve uh hi. Tuaciang amate in hi leitung ah ngamdang mi le ngaltaite bang ahi uh sia pualaak uh hi.

¹⁴Tuabang a pualaakte in, amate aituam tu ngam khat zong hi ci in tel thiangsak hi.

¹⁵Amate in a nusiak sa ngam sia a ngaisusun nawn bua uh hi, ngaisun nuam le a heak kik natu hunpha om hi.

¹⁶Amate ii lungngul sia ngam phazaw, vantung ngam hi zaw hi. Tua ahikom Pathian in amate ii Pathian hi a kici sia a mai a zum bua hi. Banghangziam cile ama in, amate atu khuapi khat vawt khol sa in koisak hi.



¹⁷Pathian in Abraham a ze et lai in, a tapa Isaac sia sangaw biakpiakna bangin a pia ngamsak sia upna ahi hi. Abraham sia Pathian ii kamciam a piakna pa hi napi ama in a tapa khat bek a nei sia sangaw biakpiakna in nei tu kithoai hi.

¹⁸Pathian in Abraham tungah, “Isaac tungtawn in kong kamciam sa suan le paalte na nei tu hi,” ci hi.

¹⁹Abraham in Isaac sia thina pan Pathian in thosak kik thei tu tuat hi, tua ahiciang Abraham in Isaac sia thina panin nga kik — ci tu ahi hi.

²⁰Isaac in Jacob le Esau ii maisang atu thupha a piak sia upna hang ahi hi.

²¹Jacob in a thi mahiat in, Joseph tapate thupha a piak sia upna hang ahi hi. Ama in a ciangkhut dawnah kinang in Pathian bia hi.

²²Joseph in a thi dektak ciangin Israel mite Egypt ngam pan a pusua natu thu a son sia le ama luanghawm tungtaang ah a ngamtat natu uh a vaithak teng sia upna hang ahi hi.

²³Moses a sua zawk tha thum sung, a nu le a pa in, ama a sealcip uh sia, upna hang ahi hi. Amate in ama sia nauno hoi khat hi, ci in mu ahikom, kumpipa thupiakna a nit ngawl uh hang, a lau bua uh hi.

²⁴Moses hong kxanthin tak ciang kumpipa tanu ii a tapa a kici tu uuk ngawlin a nial sia upna hang ahi hi.

²⁵Tawmvei khawng mawna sungah a nopsak tu sangin, Pathian mihingte taw a thuak khop tu sia uukzaw hi.

²⁶Ama in Messiah hangin huasaakna a thuak tu sia, Egypt ngam ii hauna theampo sangin, kimanh zaw pek sa hi, banghangziam cile ama in maisang thaman a saan pheang lai tu te mitsuan hi.

²⁷Moses in kumpipa thin uuk tu lau ngawlin, Egypt ngam a nusiat sia upna hang ahi hi. A kimu thei ngawl Pathian sia a mu bang phetin, nungsang heak kik tu a uuk bua hi.

²⁸Thina ii Vantung lalang in, Israel mite tapa ciil theampo a thalup thaak ngawl natu in Paisan Poai piangsak a, kongkhate tungah chisan a kinoina zongh upna hang ahi hi.

²⁹Upna in San Tuipi leiko tung tot bangin, Israel mite kantan sak zo a, Egypt mite in kantan tu in a kipat ciang, tuipi in amate valhlum siat hi.

³⁰Israel mite Jericho khua ni sali kiimkot in a pai zawkciang tua khua luphungte a cip thapna in upna hang ahi hi.

³¹Pumpi zuak numei Rahab sia Pathian thu a ni ngawlte taw a kithalup khop ngawl natu in a keam sia upna ahi hi. Banghangziam cile ama in, Israel te ii ngalvilte pawlvawt in zindo hi.

³²Ka son tato lai tu ziam? Gideon, Barak, Samson, Jephthah, David, Samuel le kamsangte theampo ii thu ka son tu hun kicing ngawl hi.

³³Upna tungtawn in, amate in, ngam bubup sim uh a, zo uh hi. Amate in a maan nasepte seam a, tuaciang Pathian kamciamte saang uh hi. Amate in tawpите kam humcip a,

³⁴a kiitak huai meikuangte sumit in namsau taw thalup natu pan suakta uh hi. Amate sia thaneam kale thahatte suak uh hi; amate sia kidona sungah thahat a, ngamdang mi ngalkapte zothal uh hi.

³⁵Upna tungtawnin numeite ii a thisa a kinungta sak, a mealheakte nga kik uh hi. A dangte ahile, suatakna a saan tu nial in, a phazaw nuntakna sungah a thaw kiksak natu in, siatvawt zazan thuakin thi uh hi.

³⁶Pawlkhat sia kiselno in kivel a, pawlkhat sia thikkol kibil in, thong sungah kikhum hi.

³⁷Amate suang taw kideang hi, tum nii sua in ki attan a, namsau taw kithat hi. Amate tuuvun ahibuale, kealvun silh in vak uh hi — zawngkhal in, kivawtsia a, ahi ngawl lalam in kivawt uh hi.



³⁸Leitung sia amate taw a kiphu bua hi! Amate in ngaltaite bangin, senneal ngamsung le mual tungah vakthap in, suanghawng leihawng sungah a teang uh hi.

³⁹Upna a nei hu in hi mite theampo sia bangza in teptee huai ziam! Ahihang amate in, Pathian kamciam a saang man bua uh hi,

⁴⁰banghangziam cile Pathian in ei atu a phazaw tupna, hong neisak hi. Ama tupna sia, ei taw ih kitholkhopna sung bek ah, amate a cialcing pheang tu uh hi.

Hebrew te 12

Ih Pa Pathian

¹Ei ih hi le, ih kiimkot ah hiza a tam mihonpi tetti ih nei hi. Tua ahikom ih mai hong khak thei na theampo le hong lencip thei mawnate vawkin, ih mai ah tai natu om a, tai kidemna sungah citakna taw tai tek tawng.

²A kipatna pan a tawp dong upna a piangsak pa, a kicingsakpa Jesus mitsuan tawng. Ama sia thinglamte hangin thinkiam ngawl hi! Ama a ngak nginge lungdamna hangin, thinglamte tungah maizum thina sia pha maw sa ngawl zaw a, tu in Pathian tokhum ziatsang ah to hi.

³Ama thuakna teng ngaisun vun; bangza in maw neite ii a nasia tatak etsatna thuak ziam! Tua ahikom note zongh thinkiam heak vun, hanciam vun.

⁴Banghangziam cile mawna taw na kidona sungah thalup thuak tu dongin, na nalh tu uh kul ngawl lai buang hi.

⁵Pathian in a tate na hina uh taw hanthotna kam hong paute mangil zo nu ziam? “Ka tapa awng, Topa hong hil ciangin, phatak ngai in, hong tei ciangin thinkiam heak vun.

⁶Banghangziam cile Topa in a itte theampo hil a, a ta bangin a saante theampo daan pia hi.”

⁷Pa ii daan hong piak bang na thuak po vun; tua na thuakna taw Pathian in a tate bangin hong tuat hi cina sia kiciansak hi. A pa ii daan a piak ngei ngawl tapa a om ngei ziam?



⁸A tate theampo a piak bangin daan hong pia ngei bua ahile, ta tatak hi ngawlin, lamlak ta na hi uh hunlam kilangh hi.

⁹Ci le sa a ih pate tungtaang ahile amate in daan hong pia a, eite zongh in zatakna ih pia hi. Tua ahile thaa lamsang ih Pa tungah bangza in ki aap zaw tu a, nungta zaw tu hi ziam!

¹⁰Ci le sa a ih pate in pha a sak uh ciaciang, tawmvei sung daan hong pia hi; ahihang Pathian in, ahile, ama thianthona ih siim thei natu in eima phattuum natu a vawt ahi hi.

¹¹Eite daan hong kipiak ciangin, tua hun laitak ih lungdam natu hi ngawlin, ih hee natu hong pia hile kilawm hi. Ahihang nungsang ciangin, tuabang kitekna a thuakte in thumaan thutang nuntakna ii thinnopna thaman nga uh hi.

Hilna le Kidop natu

¹²Tua ahikom na khut uh a kha le laamto vun a, a huang vadil na khupte uh hatsak vun.

¹³Na peang a bai na sang a dam zawk natu le a kizak thei kik natu in, lamzin tang zui tawntung tavun.

¹⁴Mihing theampo taw na kilem tu hanciam vun a, a thiangtho nuntakna taw nuntak tu hanciam tavun, banghangziam cile kuama in tua ngawl taw Topa a mu buatu hi.

¹⁵Pathian thuthiamna pan na heak kik ngawl natu kikeam tavun. A khaa thingkung khangto a, lalna tam mama a piangsak ngu nei thingkung bang na hi heak vun.

¹⁶Esau bangin paktatna ahibuale thaa lamsang zawngkhalna kuama in na nei heak vun, ama in ta uzaw ii a nga tu hamphatnate theampo anneak khat taw zuak hi.

¹⁷Tua zawkciang in, na heak uh bangma, ama in a pa ii thupha saang nuam hi; ahihang ama kinolh hi, banghangziam cile ama in ama ii sep sate a kheal kik natu lampi sia thitui taak liangin a zon hang zong a mu thei bua hi.



¹⁸Note in Israel mite Sinai mual a zot uh bangin ci le sa ii phaw theinate ahi meikwang ahizong, khuazinna le khuangial ahizong, vuipi suangval ahizong,

¹⁹lemle aw le awnging khat ahizong, tuate kung nong zuan bua uh hi. Israel mihingte in tua awnging khat a zaak uh ciangin, kammal dang a zaak ngawl natu in, thuum uh hi.

²⁰Banghangziam cile amate in, “Nganhing khat ngawngawn in tua mual a thutha le suangtum taw hua lup kul tu hi,” ci in thupiakna sia a thuak zo bua uh hi.

²¹Tua a muna sia lauhuai leilam ahikom, Moses in “Lau in ka liing vadil hi!” ci hi.

²²Note Zion Mual le a nungta Pathian khuapi vantung Jerusalem, vantung lalang tul tam mamate omna ah nong pai zaw uh hi.

²³Note in vantung ah a min a kikhum Pathian taciilte lungdam takin a kikhopna ah nong pai uh hi. Note in mihing theampo thukhenpa Pathian kung le a kicialcingsak mihingphate ii thaa omna munah nong pai uh hi.

²⁴Thuciam thak a vawtpa Jesus kungah nong pai uh a, Abel chi ii sep sangin a phazaw pek nate hong kamciam, a kithe chi kungah nong zuan uh hi.

²⁵Tua ahikom kidawm vun a, a sonpa sia ngai nuam ngawlin, nial heak vun. Pathian thu leitung ah a son pa nadon ngawl a, a nialte a suakta bua hi. Vantung pan hong sonpa na thusim bua ahile bangbang suakta thei seseam tu hi ziam!

²⁶Ama aw in tua hun laitakin, leitung liingsak a, ahihang tu in ama in, “Leitung bek hi ngawlin, vantung zongh khatvei ma ka liingsak lai tu hi,” ci hi.

²⁷Hi kammal “khatvei ma” ci sia in bitphua sa nate ngawk zazan in, khiin tu a, a kingawksak thei ngawl teng bek taang lai tu a hina thiang takin lak hi.



²⁸Tua ahiciang, lungdam tek tawng, banghangziam cile eite in, a kingawk thei ngawl ngam ih nga hi. Ama lungkim tu bangin, eite in thasiana le kiitakna taw Pathian tungah lungdamko in, ama bia tek tawng;

²⁹banghangziam cile ih Pathian sia a haltum thei meikuang tatak ma ahi hi.

Hebrew te 13

Pathian Lungkimsak natu

¹Tapidaw mi unau khat bangin khat le khat ki it top vun.

²Na inn ah leangnate zin na do tu mangil heak vun. Tuabang a ngamta pawlkhat in vantung lalangte zin dawdo ahi hunlam a he bua uh hi.

³Thongsung a omte na phawk tavun a, noma zongh amate taw thongtaak khawm bangin kingaisun tavun. Ngim a thuakte na phawk tavun a, noma zongh amate taw ngim a thuak khawm bangin na kingaisun tavun.

⁴Nupa kiteenna sia a kuama theampo in zatak vawt taken a, pasalte le zite sia khat le khat tungah kithumaan hamtang taken. Pathian in a paktatte le a kpalngulte tungah thukhen tu hi.

⁵Na nuntakna uh sia sum le paai deina taw na kipealsak vun a, tuaciangin na nei uh sia taw na lungkim vun. Banghangziam cile Pathian in, “Bangma hunin kong taisan ngei buatu a, kong nusia ngei buatu hi,” ci hi.

⁶Tua ahikom hangsan takin, hi bangin ci tawng, “Topa sia kei hong hu pa hi a, ka pa tau buatu hi. Akua in kei bang hong law thei tu ziam?”

⁷No tungah Pathian thu hong son na lampui masate phawk vun. Amate bangbangin nungta a, bangbangin thi ziam ci in ngaisun in, amate upna bang na ettee tavun.

⁸Jesus Christ sia zeini, tuni le a tawntungin a kibang ahi hi.

⁹A lam dadang kihilna nam tuatuamte zui in, thumaan lampi pan pial heak vun. Neak le dawn vai thukhamte zuina taw hi ngawlin, Pathian thuthiamna pan, ih sungsang thahatna nga tu sia pha hi; neak le dawn lamsang thukham zuite tungah phattuam huna pia ngawl hi.



¹⁰Jewte ii biakna munah thiampi seamte in, ih biaknatau tungah om sangawte a neakthei natu thu nga ngawl hi.

¹¹Jewte ii Thiampi Lianbel in ngannote ii chi sia Thiangthobel Mun ah mawphel biakpiak natu in tumpui hi; ahihang ngannote ii pum sia ngiaphual puasias ah hal hi.

¹²Hi thu hu in, Jesus zongh mihingte mawna pan a chisan taw a thiansua natu in, khuapi puasang ah thi hi.

¹³Tua ahikom, eite zongh ngiaphual puasang, ama kung zuanin a maizumnate thuak pui tawng.

¹⁴Banghangziam cile hi leitung ah a kip khuapi khat zongh ih nei bua hi; eite in hong piang pheang tu khuapi sia ih zon laitak ahi hi.

¹⁵Tua ahikom, eite in Jesus tungtawn in ih sangaw biakpiakna taw Pathian pok tawntung tawng, Topa hi ci in a pualaakte ii kam taw a kipia biakpiakna in tuasia ahi hi.

¹⁶Na pha sep tu le khat le khat kihu tu sia, na mangil heak vun, banghangziam cile hite sia Pathian a lungkimsak sangaw biakpiakna ahi hi.

¹⁷Na lampuite ii thupiakna na zui vun. Amate ii thu na ni vun. Amate in tawlna ngawlin na thaa uh hong cinsak hi, banghangziam cile amate in, Pathian tungah amate nasep huvau sazian a lak kul tu hi. Amate thu na ni uhle amate sia lungdam takin, naseam tu hi; tua hi bua thong le, amate in heena taw naseam tu a, note atu in bangma phattuumna a om buatu hi.

¹⁸Ko atu thu hong ngetsak tan tavun. Thin thiangtho nei ung, ci ngam khu hi, banghangziam cile, a maan bekma seam tawntung nuam khu hi.

¹⁹Note kungah hai ngawlin, Pathian ii kei hong paisak kik pal natu thu nong ngetsak thua lai tu uh nasia tak kong thum hi.

Thukhup Thungetna

²⁰⁻²¹A nuntakna biakpiakna in a piak hu in Tuucing Lian ahi Topa Jesus sia Pathian in thina pan tho kiksak zo a, tuaciang a thina hu in a tawntung thuciamna sia ki kipsak zo hi. Kilemna Pathian in ama ii dei sia na vawt thei



natu in na kisap uh vanh pha theampo hong pia taken a, tuaciang ama diksak sia Jesus Christ tungtawnin ei sungah hong seam taken. Christ tungah minthanna a tawntung a tawntungin om taken! Amen.

Kammal Khakbelte

²²Suapuite awng, hi kihanthotna kammalte pha takin na ngai vun ci in kong thum hi; banghangziam cile hi laithak kong at sia saulei ngawl hi.

²³Ih suapui Timothy sia thongsung panin kipusuaksak zo hi, ci sia kong zacak nuam hi. Hong theng pal nale, noma taw kimu tu in, kong tonpui tu hi.

²⁴Pathian mite theampo le na lampuite theampo tungah kong nuksetna kam na zacak vun. Italy pan suapuite in hong nukset hi.

²⁵Pathian thuthiamna sia note theampo taw om taken.



James

James 1

¹Pathian le Topa Jesus Christ ii naseampa James in: leitung bup ah a kithethaang Pathian mite kong paupui hi.

Upna le Ciimna

²Ka suapuite awng, ze etna namcin na thuak ciangin hampaha in na kituat tavun,

³banghang ziam cile, na upna in tuabang ze etnate na zawzawk ciang, thuak zawkna piang hi ci in na he uh hi.

⁴Note sia a kicing, a khuangkchim, bangma a kitaangsamh ngawlte na hi natu in na thuak zawknote in note, puk ngawlin lam tawntung hong khosak taken.

⁵Ahihang note khat po in, ciimna na neibua le, a pia tu pa Pathian tungah thu ngen taken; banghangziam cile Pathian in ngo tatak le thuthiam takin, a vekpi tungah pia hi.

⁶Ahihang thu na nget uh ciangin, na up tu kul a, up laakna na nei ngawl het tu uh kisamh hi. Up laakna a nei khat pawpo sia, tuipi tungah vui ii seam kawkoai tuihual taw kibang hi.

⁷⁻⁸Tuabang mihing khat, a sepna theampo ah a thin a khensat thei ngawl khat sia in, Topa tung pan bangma nga tu in ngaisun heak hen.

Zawna le Hauna

⁹A zawng Tapidawte a zawna pan Pathian in a lapto ciangin a lungdam kul a,

¹⁰tuaciangin a hau Tapidawte sia Pathian in a khiasuk le a lungdam veve tu kul hi. Banghangziam cile a hau khat sia ngam lopa paak bangin bo tu hi.

¹¹Ni hong suak a, nisa in a kung hal a; a paak pulin a hoina teng siacip sak hi. Tuasia bangma in mihaupa sia a nasepna ah, a sep laitakin kisia tu hi.

Hong Sitna le Ze-etna



¹²Ze-et haksatna a thuak zote in a lungdam mihing ahi hi, banghangziam cile tuabang hong sit nate a zaw ciangin, Pathian a itte tungah a kamciam sa nuntakna sia tel in saang tu hi.

¹³Mihing khat sia tuabang haksatnate taw ze etna a thuak le, “Hi ze etna sia, Pathian kung panin hong pai hi,” ci heak hen. Banghangziam cile Pathian a hile a sia vawtna in ze et zo ngawl hi, tuaciang ama mama in kuama a zia et bua hi.

¹⁴Ahihang mihing khat sia, ama ii a pha ngawl deinate in kai a, a awk ciang, ze etna thuak ahi hi.

¹⁵Tuasia ciangin ama deina a pha ngawl sia in mawna paai in piangsak hi; tuaciang, mawna hong kxanthin tak ciangin thina piangsak hi.

¹⁶Ka it suapuute awng, theamna um heak vun!

¹⁷A pha tel le ziate le a cingtaak letsong theampo vantung panin hong pai hi; tuateng sia vantung khuavakte a bitphua, kikheal ngei ngawl a, ama kihei in khua a zingsak ngawl Pathian kung pan hong paisuk hi.

¹⁸Ama piansaknate theampo sung pan a madawk bel ih sua thei natu in, thumaan kammal tungtawn in, ama deina om babang eite hong piangsak hi.

Zaakna le Sepna

¹⁹Ka it suapuute awng, hi thu ciamtee tavun! Mihing khat simin thu ngai thu zakna ah manlang tu kul a, ahizong pau nasia manlang ngawl natu le thin uaih tu kul hi.

²⁰Mihingte thin uukna in, Pathian ii thutang tupna taangtung sak ngawl hi.

²¹Tua ahikom a kiihuai zongsang nate le seksolnate theampo vawk siat vun. Pathian tungah ki aap vun a, na thin sungah hong khum a kammal na saang vun, tua in note hong ngum thei hi.

²²Ama kammal ngaina bek taw noma le noma kitheam heak vun; tua thu sia ngamtatna taw zui paih zaw vun.



²³A kuama po kammal ngai a, a zangh ngawlte sia, limlangh sung ki en a, ama le ama apian babang in a kimu mihing khat taw kibang hi.

²⁴Ama le ama pha tak a ki et zawkciangin pusuak a, ama meal bangbang hi ziam cisia mangil paih hi.

²⁵Ahihang mihingte a suaktasak a kicing thukham sia pha takin a et zawkciang thupi ngaisut tawntung a, a zaak sia a mangil kik paih sia hi ngawlin, a zangh — a nuntak puite peuma sia Pathian in a sepna ah thupha pia tu hi.

²⁶Khat po in ama sia biakna kin mihing khat hi ing ci in a kingaisun ziam? Ama in a leei a uk zo buale ama ii a biakna sia a luithawthong suak a, ama le ama kitheam ahi hi.

²⁷Pa Pathian ii a thiangtho biakna tatak hi ci in, a ngaisut sia hi teng hi: tangate le meingongte ii thuakna sungpan khoina tu le leitung siatna panin eima le eima kikepna tu ahi hi.

James 2

Kidoidan huvau Kidop natu

¹Ka suapuite awng, a minthang Topa, ih Topa Jesus Christ thu umte na hi uh bangma in, a puasang omzia etna taw kuama doidan ngei heak vun.

²Sonteena in, mihau khat sia kham khutzungbu bun hen a, puanpha silhin, kikhopna munah hong pai hen a, tuaciangin mihing khat sia puansia ngapkaai silhin, kikhopna munah hong pai hi.

³Puan pha taw a kizeampa zatak piak zawkna taw, “Hi sung tona phabelh tungah to in,” ci a, ahihang mizawngpa munah “Nang zia lai ah ding in, tua ahibuale ka peang kung suat tungah to in,” ci leute

⁴tuasia ciangin noma pawlsung mama ah, kidoidanna a piangsak thin phangawl tupnate taw thukhen in a maw na hi uh hi.

⁵Hong ngai tavun, ka it suapuite awng! Pathian in hi leitung ah mizawngte sia, upna sungah a hau tu le ama a itte atu kamciam a piak kumpi ngam a lua tu in teal zo hi.



⁶Ahihang note in mizawngte sia na thusim bua uh hi! A kuate in no hong zothaw a, thukhen mangte mai hong then ahi ziam? Mihaute hi!

⁷No hong kipia sa tua minphatna a sonsiate sia amate ahi hi.

⁸Laithiangtho sungah a kimu Kumpi ngam ii thukham na zui uh le, aman in na a seam na hi tu uh hi. Tua thukham in, “Noma le noma na ki it uh bangma in, na innpaam pa na it vun,” ci hi.

⁹Ahihang mihingte tungah a puasang omzia muna taw na en uh le, mawna vawt na hi uh a, tuaciang thukham in nang sia thukham paltan pa bangin hong mawsak hi.

¹⁰A kuama po thukham khat a paltan pa in, thukham a vekpi in paltan ahi hi.

¹¹Banghangziam cile “Palngul mawna vawt heak vun,” a ci pa mama in “Mihing that heak vun,” zongh ci hi. Palngul mawna na vawt ba hial uh zong mihing na that uh le, thukham paltan na suak uh hi.

¹²Eite hong suatak thukham sia taw thu a kikhen tu mihingte bangin pau in, ngamta vun.

¹³Bang hang ziam cile hesuakna a nei ngawl mihing khat tungah thu a khen ciangin, Pathian in hesuakna a lak buatu hi; ahihang hesuakna in thukhenna zo hi.

Upna le Ngamtatnate

¹⁴Ka suapuute awng, khat po in upna ka nei ci napi in, a ngamtatnate taw a lak buale, bang phatuam ziam? Tua upna in, ama ngum thei tu ziam?

¹⁵Sonteena in u le nau sungah, puansilh kisamh tele, anneak tu kicingin nei ngawl om hi citawng.

¹⁶Amate tungah , “Pathian in thupha hong pia taken! Na khua lum in, na ngilva taken!” na ci uh hang, nuntak natu a kisamh nate na pia bua uhle na pauna in bang phattuumna om ziam?

¹⁷Upna ih ci zongh ta bangma hi: ngamtatnate a om ngawl upna in ama nguak ahikom a thi ahi hi.



¹⁸Ahizong khatpo in, hi bangin ci thei tu hi, “Mihing khat in upna nei a, a dangkhat in ngamtatnate nei hi,” ci hi. Keima zokikna in hi bang ahi hi. “Bangbangin mihing khat po in, ngamtatna om ngawl upna nei thei tu ziam? Ka upna sia ka ngamtatnate taw hong lak tu khi hi,” ka ci tu hi.

¹⁹Pathian khat bek om hi, ci in na um uh ziam? Pha hi! Doaite zongh in um a — kiitakna taw liing hi.

²⁰Mihing mawmawte awng! ngamtatna om ngawl upna in, kimanna nei ngawl hi, ci thu a kilak tu na dei uh ziam?

²¹Ih taangpu ahi Abraham sia bangbangin Pathian mai ah thutang a na suak ziam? Ngamtatnate pan hi, biaknatau tungah a tapa Isaac a piak ciang tua ngamtatna tungtawn in thutang a na suak hi.

²²Hi thu mu thei ngawl nu ziam? A upna le a ngamtatna sia kithua khawm a; a upna sia a ngamtatnate tungtawn in khuangkhim hi.

²³Tuaciang Laithiangtho in hi bang a ci ciangin, thumaan son ahi hi, “Abraham in, Pathian um a, tuaciang a upna hang komin, Pathian in ama sia thutang in saang hi.” Tua hi a, Abraham sia Pathian ii lawm hi kici hi.

²⁴Tua ahikom en leute, mihing khat sia ngamtatnate taw Pathian mai ah thutang suak a, a upna bek pan hi ngawl hi.

²⁵Numei pumpi zuak Rahab zongh tuabang ma hi. Ama in Pathian mai a thutang a sua sia a ngamtatna pan hi, Israel thudawpte huna pia in lampi dang khat panin, a suataksak ngamtatna pan ahi hi.

²⁶Tua ahikom thaa om ngawl pumpi sia a thi ahi bangma in, ngamtatna om ngawl upna sia zongh a thi hi.

James 3

Leei Thu

¹Ka suapuite awng, note sya seam nuam tam na om heak vun. Na heak uh bangma in ngualdang sangin ko syate tungah nasia zaw in thu hong kikhen tu hi.



²Ih vekpi in, sep khial ih nei bul hi. Ahihang mihing khat in, pau khialna a neingei bua ahile ama sia cialcing hi a, a pumpi bup zongh, a uk thei mi ahi hi.

³Siphu in ih thu hong nit thei natu in, a kam sungah kamkhau ih koi a, ih uukna pawpo ah ih paisak thei hi.

⁴Tua ahi buale teambaw khat ngaisun vun: tuaza in lian a, a thahat vui ii a seamna taw kihawl hi kale, a heakna no mama khat taw ki heak zo hi, tuaciangin teambaw hawlpa ii paisak nopna pawpo ah pai hi.

⁵Leei zongh tuabangma ahi hi: tuabang in no ahi hang, na liante huvau ah kisuangtaak thei hi. Meikuang no khat taw, duipui khat a kihal theina thu ngaisun vun!

⁶Tuaciang leei sia meikuang taw kibang hi. Ama sia khialna omna leitung hi a, ih pumpi sungah munla in hong om a, ih pumpi bup tungtawn in thusia kizelsak hi. Hell pan a hong pai meikuang taw in nuntaksung tawntung hong hal hi.

⁷Mihing in a nungta dang theampo — duisung nganhingte, vacimte, awmtaal in a vakte le, ngasate zualsak thei zo ahi hi

⁸Ahihang kuama in leei sia a zualsak zo ngei bua hi. Leei sia ngilo a, uk thei hi ngawlin, thi theina ngu taw kidim hi.

⁹Ih Topa le Pa tung lungdamkona in ih zangh a, Pathian taw a kibangin a kivawt ih mipuite haamsiatna in ih zangh sii hi.

¹⁰Lungdamkona le haamsiatna kammalte sia kamhawng khat sung panin pusuak khawm hi. Ka suapuite awng, tu bang hi tu kilawm ngawl hi!

¹¹Tuithum le tuikhaa sia ciktui naak khat sung pan pusuak khawm ngawl hi.

¹²Ka suapuite awng, theikung khat in olive ngate nga thei ngawl hi; sapit ngui khatin theingate nga thei ngawl hi; sii tui naak in tuithum piangsak thei ngawl hi.

Tung sang pan Ciimna



¹³Note sungah a ciim thutel thei na om uh ziam? Ama in tua sia a nuntakna pha ahizong, kiniamkhiakna le ciimna taw a pha sepnate taw ahizong lak taken.

¹⁴Ahihang na thin sungah eenna, thin natna le duhopnate a om le, ciim na kisakna taw thumaan thutak sia langpan in mawna vawt heak in.

¹⁵Tua bang ciimna sia vantung panin hong paisuk hi ngawl hi; tua in leitung neisa hi a, thaa taw kipawl ngawlin, doai pilna taw kisai hi.

¹⁶Ki eenna le duhopna omna munah buaina le siatna namcin zongh om hi.

¹⁷Ahihang tungsang pan ciimna sia amasa bel in thiangtho hi; tua in kilemna, cikna, lemwawngna zongh ahi hi. Tua in ki hesuakna taw kidim a, a pha sepnate piangsak hi; tua in, kidoidanna nei ngawlin, ki hithepsakna nei ngawl hi.

¹⁸Phatna in kilemna piangsakte ii thaicii panin a piang an laakna ahi hi.

James 4

Leitung taw Lemzawngna

¹Note sungah kihauna le kidona teng sia koisung pan hong pai ziam? Na sungah a kido tawntung leitung nopna na deina uh te pan hong pai ahi hi.

²Nate dei a, na nga thei ngawl uh ciangin, ngual thatlum tu in na kingingta uh hi; nate nasia takin na dei uh a, ahizong na nga zo bua uh hi, tuasia ciangin na kihau uh a, na kido uh hi. Na dei uh te na nga ngawl uh sia, banghangziam cile Pathian munah na ngen bua uh hi.

³Tuaciangin na nget uh ciang, na nga bua uh hi, banghangziam cile na niimnate pha ngawl hi; noma nopsak natu sung a na zak tu in na ngen uh hi.

⁴Thumaan ngawl mihingte awng! Leitung ii ngualtamh ih hi le Pathian ii ngal ih hi hunlam he ngawl nu ziam? A kuama po leitung ngualtamh a suak nuam sia Pathian ii ngal suak nuam ahi hi.

⁵Laithiangtho sungah, "Pathian ii ih sungah hong koisak thaa sia a lau huai lungngulnate taw kidim hi," a ci sia thumaan ngawlin ngaisun heak vun.



⁶Ahihang Pathian hong piak thuthiamna sia khohzaw kan lai hi. Laithiangtho in “Pathian in a kiphasakte nalh a, ahihang a kiniamkhiakte thuthiamna pia hi,” a ci bangma hi.

⁷Tua ahikom Pathian tungah ki aap vun. Doaimangpa nalh vun, tua hile note kung pan tai tu hi.

⁸Pathian kungah hong neak tavun, tua hile Pathian in note hong neak tu hi. Na khut uh sil vun, no mawneite awng! Na thin sunguh thiansua vun, no a kihitheamsakte awng!

⁹Heena, kaana, tauna taw om vun; na nuina uh sia kaana taw laih tavun a, na lungdamna uh sia, maikhinna taw laih tavun!

¹⁰Topa mai ah noma le noma kiniamkhiak tavun, tua hile ama in hong laamto tu hi.

Tapidawte Suapui khat tung Thukhen Kidop natu

¹¹Ka suapuite awng, khat le khat na ki sonsia heak vun. Tapidaw suapui khat a sonsia ahibuale a tung a thu a khen sia in, Thukham sonsia a thukhen ahi hi. Thukham tungah thu na khen le, Thukham a zui nawn ngawl, Thukham tung ah thukhenpa na hi uh hi.

¹²Pathian bekma thukham pia Pa le thukhenpa ahi hi. Ama bek in, ngum thei a, susia thei hi. Na mipuite tungah thukhen tu in nang sia akua kisa ni ziam?

Kisuantaakna ah Kidop natu

¹³“Tuni ahibuale zing ciangin, khua khat ah khual va haw tong i, tua lai ah kum khat bang taamin, sum meet vawt in, sum tam mama thalaw tong,” a cite awng hong ngai tavun.

¹⁴Na nuntakna sia zing ciangin bangbang hi tu ci ngawngawn na he bua uh hi! Note in tawmvei hong kilangh zok a, a bo kik meikhu valut khat taw na kibang uh hi.

¹⁵Na pau tu uh sia hi bang hizaw tu hi: “Topa deina ahile ih nungta tu a, hisia ahibuale ziasia ih vawt tu hi.”



¹⁶Ahihang no tu in kiphasak a, kisuangtaak nu hi; tuabang kisuantaakna theampo sia maan ngawl hi.

¹⁷Tua ahikom a pha tu he napi a pha a vawt ngawl sia in mihing mawnei ahi hi.

James 5

Sumhaute Kidop natu

¹Tu in, no sumhaute awng, hong ngai tavun! No tungah hong tung tu suakhialnate huvau kapin mau vun!

²Na hauna uh teng sia muat zo a, na puansilh teng sia nget in ne zo hi.

³Na khamte le na ngunte sia eakseau zo hi. Tuaciang hi a eakseaute in, no lang khat panin tetti hong hi tu a, meikuang taw ki bangin, na sa uh hong ne khawng tu hi. Hi ni tawpkhak hun sungah, note in haunate na khol zo uh hi.

⁴Na lo sungah naseam mihingte ii thaman na pia bua uh hi. Amate ii phunnate ngai vun! Na an uh hong laksakte ii auna sia Topa Vaanglianbel Pathian bil sungah theng zo hi.

⁵Hi leitung ah na nuntakna uh sia a liap a vaal nate le nopsakna taw kidim hi. Hong kingaw lup ni ciang na thau natu in noma le noma na kivaak zo uh hi.

⁶Mawna nei ngawl mihingte mawsak in, na thatlum zo uh hi, tuaciang amate in no hong nalh ngawl uh hi.

Thinsauna le Thungetna

⁷Tua ahikom, ka suapuite awng, Topa hong pai mateng in, na thin uh sausak vun. Lothopa khat in, leitangh tungpan an manpha hong pian natu sia, bangza in thinsauna taw ngak ziam en vun. Amate in khuapi ngua le tangngam ngua sia thinsau takin ngak hi.

⁸No zongh na thinsau kul hi. Na lametna uh saangsak vun, banghangziam cile Topa Ni hong pai tu nai zo hi.



⁹Ka suapuite awng, note khat le khat tungah lungkim ngawl na taw na ki phunsan heak vun, tua hile Pathian in no tungah thu hong khen ngawl tu hi. Thukhenpa sia hong nai zo a, kilangh tu in kithoai zo hi.

¹⁰Ka suapuite awng, Topa min suang in a pau kamsangte phawk vun. Thuakna sungah thinsau takin a thuakzo amate thuakzawk hatnasia ettee in nei tavun.

¹¹Amate sia mihing lungdamte hi ih ci hi, banghangziam cile amate in thuak zo uh hi. Job thin sauna te na za zo uh a, a tawpna ciang Topa ii piak kik nathu na he zo uh hi. Banghangziam cile, Topa sia hesuakna le ciliapna taw kidim hi.

¹²A thupi bel in cileang suapuite awng, kamciam na vawt uh ciangin tomlo in kiciam heak vun. Vantung taw ahizong leitung taw ahizong, nadang khat pawpo taw ahizong tomlo kiciam heak vun. A hina san na ci nop ciang, “Hi hi” bekma ci vun, ahi ngawl na ah, “Hi bo” ci po vun, tuasia ciangin Pathian ii thukhenna na thuak buatu uh hi.

¹³A ngim nga khat po no sungah na om uh ziam? Thungen taken. A lungdam khat po na om uh ziam? Ama in pokna late sa taken.

¹⁴A cina khatpo na om uh ziam? Pawlpi upate sam hen a, amate in thungetsakin, olive thau taw Topa minsuang in zut taken.

¹⁵Hi upna taw thungetna in cina dam sak tu hi. Topa in cidamna pia kik tu a, tuaciang mawna a vawtte kimaisak tu hi.

¹⁶Tua ahikom, na mawna uh sia khat le khat tungah kipualaak vun a, khat le khat thu na kingetsak vun, tua hile hong damsak tu hi. Mipha thumaan thutang khat ii thungetna in vaang nei hi.

¹⁷Elijah zong eima bangma mihing khat ahi hi. Ama in ngua a zuk ngawl natu in, nasia takin thungen a, kum thum le kum lang nguatui hang hi.

¹⁸Nguazuk kik natu thungen kik leleau a, van panin nguatui hong buaksuk a, lei in an piangsak hi.



¹⁹Ka suapuite awng, note sung panin, khat po in, thumaan lampi panin, lampial a, a dang khat in hong ciapui kik le,

²⁰hi thu phawk tavun: a kuama po mihing a maw khat sia ama ngamtat khialna pan hong khealsak ahile, tua mawneipa ii thaa a thina tu panin hun tu a, mawna tam mamate kimaisakna piangsak hi.



1 Peter

1 Peter 1

¹Jesus Christ ii sawltak Peter in — Pontus, Galatia, Cappadocia, Asia le Bithynia ngamte ah ngaltai a, a kithethaang Pathian teal sa mite tungah lai kong thaak hi.

²No sia Pa Pathian tupna taw hong tealsa hi a, Jesus Christ thu a ni tu le a chisan taw a kithiansua tu in, ama Thaa taw a thiangtho minam a suak sate na hi uh hi. Thuthiamna le thinnopna note sungah hong dim taken.

A nungta Lametna

³Topa Jesus Christ ii Pa le Pathian tungah lungdam ko tawng! Hong hesuakna lian ahi komin, Jesus Christ a thawsak kikna tawh nuntakna thak eite hong pia hi. Hi sia in a nungta lametna taw hong dimh a,

⁴tua ahikom a mite atu Pathian ii a koi, a thupha tam mamate anei tu in ih ki lamen hi. Ama in note atu tua thuphate vantung ah keam a, tua munah muat thei ngawl, lal thei ngawl le vul thei ngawlin om hi.

⁵Tua teng sia noma atu ahi hi, hun tawpkhak ni ciang akilaak khia tu a kinging sa in a om, ngupna sia upna tungtawn in a nga note atu in, Pathian vaang taw tuate hong kepcing sak hi.

⁶Na thuak uh haksatna namcin hu in tu laitak hun tawm vei no sung khuangaina na thuak uh kul hi kale, hi thute ah lungdam vun.

⁷Tua haksatna thuaknate in na upna uh maan hi ci in a kilak natu ahi hi. A kisia thei kham ngangawn zongh meisa taw kisit lai hi; tua ahikom kham sangin tam mama in a manh nei zaw na upna uh zongh a kip theui natu in hong kisit tu hi. Tua hile Jesus Christ hong kilaak Ni tak ciangin pokna, minthanna le vaang piakna na saang tu uh hi.

⁸Ama mu ngeingawl na hi uh hang na it uh a, tu zong ama mu ngawl na hi uh hang na um uh hi. Tua ahikomin, kam taw a kison zo ngawl dongin lungdamna lianpi taw nasia takin na lawp uh hi,



⁹Banghangziam cile ama na upna uh hu in na upna uh ii tupna bulpi a hi thaa ngupna sia na saang uh hi.

¹⁰Kamsangte ii phatak a zon le a kat sia hi ngupna taw kisai ma hi a, Pathian ii no tung hong piak tu hi letsong huvau amate in son khol zo hi.

¹¹Amate in tua thu sia bang hun ciang tung tu a, bangbang hong pai tu ziam cisia, heak tu in hanciam uh hi. Tua hun sia Christ in ngim thuak tu a, tua zawkciang minthanna taw kizom tu hi ci in amate sung a, a om Christ Thaa ii a sonkholna taw a lak hun sia ahi hi.

¹²Vantung pan in Tha Thiangtho ii vang taw a sawl, Lungdamna Thupha a thangsak, thupuakte tung pan tu in na zaak uh thute Pathian in hi kamsangte tungah a pualaakna ah cileang, amate nasep sia in amate phattuum na tu in a seam hi ngawl a, noma atu in a seam hizaw hi. Hi thute sia vantung lalangte dong ii a tel nop uh thu ahi hi.

A thiangtho Nuntakna tu Sapna

¹³Tua ahikom a diang tu in, kingin kholna khua ngaisutna nei tavun. Jesus Christ hong kilangh ciangin, note hong piak tu thupha tungah lametna a cingin nei tavun, na kipilvangsak vun.

¹⁴Pathian thu ni vun, tuaciang bangma na heak ngawl lai na nei uh, deinate in na nuntakna uh sia uksak heak vun.

¹⁵Tua hi ngawl zaw in, na sep na vawt theampo sungah note hong sam Pathian a thiantho bangma in thiangtho vun.

¹⁶Laithiangtho in, “Kei thiangtho ka hikom na thiangtho vun,” ci hi.

¹⁷Mihing khatsim ii a sep na bangin a kibang teena taw mihing theampo thu a khen Pathian tungah thu na nget uh ciang, Pa awng, na ci uh hi; tua ahiciang hi leitung ah nungta in na om uh laiteng ama thasia tavun.

¹⁸Banghang ziam cile na taangpupite pan na luasuk uh, a mannung ngawl nuntakzia pan na suatak natu in, note bang taw hong tan ci thu na he uh hi. Ngun le kham ci bang a kisia thei thilte taw hong kilei ngawl hi;



¹⁹a sitbaang ngawl, ahibuale a mealhem ngawl tuuno, Christ ii a manpha biakpiakna taw hong tan a hina he tavun.

²⁰Ama sia simlei a kubitphua maa in, Pathian teal kholsa hi a, hi ni tawpkhak nite sungah no atu hong kilaak ahi hi.

²¹Ama thina pan a thosak, minthanna a pia Pathian sia ama tungtawn in na um uh hi; tuaciang note upna le lametna sia Pathian tungah kibal hi.

²²Tu in thumaan thutak na zui uh hu in, noma le noma na kithiansua zo uh a, na thu uppui mihingte na it zo takpi tu uh hi. Na thin theampo taw khat le khat nasia takin ki it tavun.

²³Banghangziam cile a nungta tawntung Pathian kammal tungtawnin, a thi maw a nungta tawntung nu le pa khat ii tate bangin, na piangthak zo uh hi.

²⁴Laithiangtho in, “Mihing theampo sia lopa bang hi a, amate minthanna in duisung paakte taw kibang hi. Tua lopa ko a, tua paakte pul hi.

²⁵Ahihang Topa kammal sia a tawntungin kip hi,” ci hi. Hi kammal sia no tung a hong kithangsak tua Lungdamna Thupha ahi hi.

1 Peter 2

A nungta Suangpi le A thiangtho Minam

¹Tua ahiciang siatna a minpiang vawk siat in; leilotna, kihitheamsakna, ki eenna ahibuale kilealna kam note sungah om nawn heak hen.

²Nausen suak tuungte bangin Thaa Thiangtho noaitui tatak du tawntung tavun, tuabang a na neakna taw in na khangto tu uh a, ngupna na nga tu uh hi.

³Laithiangtho in, “Noma mama in, Topa sia bangza in dik ziam ci in na mu zo uh hi,” ci hi.

⁴Mihingte in mannung ngawl hi ci in a nial hi kale Pathian ii manpha asak, a teal, a nungta suangpi ahi, Topa kungah pai tavun.

⁵Nuntakna a nei suangte bangin pai tavun a, thaa biakinnsak natu in a kizanghte hi tavun, tua munah Jesus Christ tungtawn in, Pathian tungah a

saan thamman, thaa taw kisai sangaw biakpiakna a pia a thiangtho thiampite bangin na seam tu uh hi.

⁶Banghangziam cile Laithiangtho in, “A manh nei suang khat ka teal a, Zion ah phung tawdap suang tu in ka phut hi, tuaciang ama a um peuma in, a thinkiam ngei buatu uh hi,” ci hi.

⁷No a umte atu in hi suang sia manh nei mama hi; ahihang a um ngawlte atu in: innsate ii mannung asak ngawl a nial suang sia a vekpi sung pan a thupi bel hong suak hi,” ci hi.

⁸Laithiangtho mundang khat ma ah, “Hi suang in mihingte lutusak tu a, amate a liiksak suangpi suak tu hi,” ci hi. Kammal a up ngawl manin amate lutu uh hi; tuabang sia amate atu Pathian deisakna ahi hi.

⁹Ahihang note sia a kiteal sa minam, Kumpi thiampite, a thiangtho minam, Pathian aituam mite, khuazing sung pan a lamdang ama khuavak sung a nang hong sam pa Pathian ii a lamdang ngamatnate a thangsak tu a hong tealsate na hi uh hi.

¹⁰Hun khat lai in, note sia Pathian mite na hi bua uh hi, ahihang tu in ama mite na hi uh hi; hun khat lai in, Pathian hesuakna na he bua uh hi, ahihang tu in ama hesuakna na saang zo uh hi.

Pathian Silate

¹¹Hi leitung ah khual mite le ngaltaite ahi no ka lawmte tungah hi bangin, kong thuum nuam hi! Na pumpi ci le sa deinate zawp heak vun, tuate in thaa taw kido tawntung uh hi.

¹²Pathian he ngawlte kawm ah na ngamatna uh a phat mama hu in amate ii mihing tatsiate ci a hong zungkaw ciangin, na ngamatna phate hong mu tu a, ama hong pai Ni ciangin, Pathian pok tu uh hi.

¹³Topa hangin mihing thunei peuma ii ukna nuai ah om tavun: a lianbel thunei ahi Kumpi lianpa le,

¹⁴mihing tatsiate daan pia tu le, thupha a vawtte a pok tu in a koi, ngamkhen uk maangte khutnuai ah na om tavun.



¹⁵Banghangziam cile a pha na vawt uhte taw, mihing mawmawte ii a mot paunate na thimsak tu uh Pathian in hong deisak hi.

¹⁶A suakta mite bangin nungta vun; ahizong ngitlo ngamtatnate seal natu in na suatakna uh zangh heak vun a, Pathian silate bangin nungta tavun.

¹⁷Mihing theampo zatak vawt vun, na thu uppuite it vun, Pathian thasiana nei vun a, Kumpi lianpa zakta vun.

Christ Ngimthuakna lim Ettee na

¹⁸No naseamte in a dik thukhual theite bek hi ngawlin, a thuthiam ngawl a thinngam na tote zongh zatakna a cingin pia vun, amate ukna nuai ah na om uh kul hi.

¹⁹Ama deina na phawna uh hu in, ngimthuak ngawl tu bul na thuak uhle, hite tungtaang ah, Pathian in thupha hong pia tu hi.

²⁰Banghangziam cile na khialna hangin velna na thuak le bang phattuumna om na ziam? Ahihang a maan na sep uh ciang ngangawn in na thuak veve uh le, Pathian in tua hu in thupha hong pia tu hi.

²¹Pathian in no hong sapna sia hi thu hang ahi hi, banghangziam cile Christ ama mama in, no atu in thuak a, ama khuani na zui thei natu in ettee tu hong nusiak hi.

²²Ama in mawna vawt ngawl a, ama kam panin leilot thu pusuak hi ci in kuama in za ngei ngawl hi.

²³Ama a kilan ciangin lealna kamtaw thuk ngawl hi; ngimna a thuak ciang kuama tawng ngawl a thutang thukhenpa Pathian tungah a lametna nei zaw hi.

²⁴Eite mawna sungah thi a, thutang suana sungah nuntak thei natu in, Christ ama mama in, thinglamte tungah a pumpi taw ih mawnate hong puaksak zo hi. Ama liammate taw note hong damsak zo hi.

²⁵Note sia lam am tuute bang na hi uh hi, ahihang tu in na thaa uh hong Keampa le Tuucingpa zui tu in, hong kipui kik zo hi.



1 Peter 3

Zite le Pasalte

¹Tuasia bangma in, no zite awng na pasalte khat po Pathian thu um ngawl a om le, na ngamtatna taw Pathian thu um khat na suasak thei natu in na pasalte thu na nit uh kul hi. Pau tuan kul ngawl tu hi,

²banghangziam cile amate in noma ngamtatna sia bangza thiangtho in thasia huai ziam ci in hong mu tu uh hi.

³Na hoih natu sam vawtzia ahizong, suangmanphate ahizong nikten puansilh daan ahizong, tuabang tungtham kipuanate taw, kizeam heak vun,

⁴tuate taangin na hoihna sung ah Pathian muna a manh neibel ahi, a tul thei ngawl a dik cikna thiamna le thinsung pha na nei tu uh hi zaw hi.

⁵A bo sa hun sung biakna sungah a takkha, Pathian tungah lametna a neite sia, a pasalte thu a nitna uh tawh a meal hoi veu suak hi.

⁶Sarah zongh tuabangma ahi hi; Abraham thu ni a, ama Topa ci in sam hi. Na pha seamin bangma sep kiitak na nei buana uh le, tu in no sia Sarah ii tanute na hi uh hi.

⁷Tuasia bangma in no pasalte zongh, na zite uh thaneam zaw ahi hunlam a pha tel in nuntak pui tu kul hi. Amate zatak vawt tavun, banghangziam cile, amate zongh noma taw kibangin, Pathian ii nuntakna letsong sia sang khawm tu uh hi. Na thungetna uh hong nawngkaisak a om ngawl natu in, tu bang na ngamta tavun.

Thumaan Nasepna hu in Thuakna

⁸A tawpna ah: note theampo in a kibang ngaisutna le khuaheakna nei tavun; tuaciang khat le khat unau bangin ki it vun. Khat le khat tungah dik in, kiniamkhiak tavun.

⁹Ngitlona sia ngitlona taw thuk kik heak vun a, haamsiatna zongh haamsiatna taw thuk kik heak vun; tua hi ngawl zaw in thupha taw kithuk zaw vun, banghangziam cile, note Pathian hong sap lai in piak tu a hong kamciam sia thupha hi zaw hi.



- ¹⁰Laithiangtho in: “Nuntak nuam in a nungta nuamte le hunphate a mu nuamte in, kam sia pau heak hen a, leilot thuson kheal nanak taken.
- ¹¹Amate in siatna pan kikheal in phatna vawt nanak taken; amate in kilem natu a thin theampo taw a hanciam kul hi.
- ¹²Banghangziam cile, Topa in thutangte en a, a thungetna uh ngai hi; siatna a vawtte ahile ama in langpan hi,” ci hi.
- ¹³A pha vawt tu na lawp uh le, akua in hong nasak tu ziam?
- ¹⁴Ahihang thumaan nasepna na sep uh ciang ngangawn in na thuak uh le, bangza in lungdam tu nu ziam! Kuama kiita heak vun a, thinngim heak vun.
- ¹⁵Ahihang na thin sungah Christ sia thasiana nei tavun. Topa a hina bangin ama vaang pia vun. Na sungah lametna na nei uh sia son thiag tu in hong dongh khat pawpo na zo thei natu in a tawntung kinging tavun,
- ¹⁶ahihang tuabang na son uh ciang, cikna thiamna le kithasiana nei tavun. Na thin sungah, kithasunna omsak heak vun, tua hile hong kilealh ciangin, Christ nungzuite na hina uh taw na ngamtat phate hong sonsiate sia, amate pauna taw a maizum tu uh hi.
- ¹⁷Banghangziam cile Pathian deina ahinale a pha sepna hu a thuakna in, a sia sepna hu a thuakna sangin phazaw hi.
- ¹⁸Banghang ziam cile Christ in mawna hu in a tawntung atu khatvei lian thi zo hi, note Pathian kungah hong zot pui natu in mipha khat sia mawneite taangin thi zo hi. Ama pumpi thi ahihang thaa sungah ki nungtasak zo hi,
- ¹⁹tuaciang a thaa nuntakna taw ama pai in, thaa thongtaakte munah thuhil hi.
- ²⁰Hi thaa te sia Noah ii teambaw asak lai hun a, Pathian ii thin uai takin a ngak, Pathian thu a ni nuam ngawlte ii thaa te ahi hi. Teambaw sungah mihing tawmno — a vekpi in liat bek — tui in laamto in suaktasak hi,
- ²¹tua tui sia tu in note hong ki ngupna lim a lak, tui kiphumna ahi hi. Pumpi tung ciniinte sil thiagna hi ngawlin, thinsung khenteltheina pha taw Pathian



tengah kamciam piakna ahi hi. Tua in Jesus Christ thawkikna tungtawn a note hong ngum hi,

²²ama vantung ah pai zo a, Pathian ziat sang ah om in, vantung lalang theampo, vantungthuneite le vaang neite uk siat hi.

1 Peter 4

A kikheal Nuntaknate

¹Christ in a pumpi ngim thuak ahikom in, note zongh ama khua ngaisutna bangma nei in noma le noma na kithahatsak nanak vun; banghangziam cile a kuama po pumpi taw a thuak sate sia, mawna sungah a tualta nawn bua hi.

²Tua ahikom tu pan kipan in, na leitung nuntakna uh a om laiteng, mihing deinate in uksak heak vun a, Pathian deina in uksak hamtang vun.

³A bo sa hunsung ah Pathian he ngawlte ii sep nop teng, a khomin seam zo nu hi. Na nuntakna uh sia, zummawk ngamtatna, sikvilna, zu khamna, uangtatna, zu neakna, a thasiat huai milim biaknate taw zangh zo nu hi.

⁴Tu in Pathian he ngawlte in amate sansak po maitat, loklenna sungah na kihel nop nawn ngawl uh ciang, lamdang sa in note hong lang uh hi.

⁵Ahihang a nungtate le a thisate tengah thukhen tu in a kingingta sa Pathian mai ah amate in thusitna thuak tu hi.

⁶Mihing khat sim tengah, thu kikhen ahi bangma in, amate pumpi nuntakna tengah thukhen sa ahi, a thite zongh Lungdamna Thupha a kihilna sia, tua thu hang ahi hi; amate thaa nuntakna sungah Pathian nuntak bangin, a nuntak thei natu thu a kihil ahi hi.

Pathian Letsong A zeak Thiamte

⁷Na theampo ii hunkhakbel hong nai zo hi. Thu na nget thei natu in noma le noma ki uk thiamin, na pilvang tavun.

⁸Khat le khat thinsung takpi taw na ki it tu sia thupi ngaisut bel tavun, banghangziam cile ki-itna in mawna tam mama sincip hi.

⁹Phun ngawlin khat le khat zin kido thiam tavun.



¹⁰Mihing sim in Pathian letsong tuatuamte a zeak thiampa bangin, Pathian tung pan na saan letsong tumdang sia ngualdangte phattuam natu in zangh hamtang vun.

¹¹Thuhil pawpo in Pathian ngupna thute hil nanak taken a; na theampo ah Jesus Christ tungtawn in Pathian tungah pokna a kipiak thei natu in, na a seam pawpo in Pathian piak thangui thatang taw seam nanak taken, tua Pathian tungah minthanna le vaangletna a tawntung a tawntung in om taken. Amen.

Tapidaw khat hina taw Thuakna

¹²Ka it lawmte awng, a haksa ze etna na thuak uh hu in, lamdang sa heak vun, a piang ngei ngawl thute no tungah hong piang bangin ngaisun heak vun.

¹³Christ vaangletna hong kilangh ciangin, lungnopna a cingin na nga thei natu in, ama thuaknate thuakpui na hi uh komin, lungdam zaw tavun.

¹⁴Christ nungzui na hi uh hu in hong kizawngsak ahile, na lungdam tu uh hi; tua in a vaanglian Thaa ahi Pathian Thaa Thiangtho in no tungah a om ahi hang hi.

¹⁵Note sungah khat po in ngimna a thuak le zong, ama sia mihing that, nguta, khialna lian vawt, tua ahibuale, ngual tung ah thusia vawtnop hu hi heak hen.

¹⁶Ahizong Tapidaw na hi uh hu in a thuak na hi uhle, maizumh in nei heak vun, Christ minpu na hi uh hu in, Pathian tungah lungdamko tavun.

¹⁷Thukhen kipat tu hun hong tung zo a, Pathian aituam mihingte sia thu kikhen masa tu hi. Eite taw hong pan le Pathian kung pan hong pai Lungdamna Thupha a um ngawlte bang suak thong tu ziam?

¹⁸Laithiangtho in: “Miphate a kingup tu haksa hi; tua ahile Pathian a sel mawneite bang suak tu ziam?” ci hi.



¹⁹Tua ahiciang Pathian ii deina a om hu in a thuakte ahile, a kamciam a peal ngeingawl, amate a Bitphuapa tungah, a ngamtat phate taw amate le amate ki pum muan taken.

1 Peter 5

Pathian Tuuhon

¹Pawlpi upa khat ahi keima in no pawlpi upate tungah kong thuum hi. Keima sia Christ thuakna ii tetti khat ka hi a, maisang hong kilangh tu minthanna a nga tu khat ka hi hi.

²Pathian hong piak tuuhon a cingte hi vun a, sawl veilaak man po hi ngawlin Pathian hong deisak bangin, lawpna taw keam tavun ci in kong thuum hi. Na nasep uh sia thaman saan natu lel hi ngawlin, uukna takpi taw a seam hi tavun.

³Noma ii kep tu a hong ki aapte tungah zawthawkna taw uk tu hanciam ngawlin, tuuhon atu ettee pha na hi zaw vun.

⁴Tuaciang Tuucing Pipa hong kilangh ciangin, a taanna bo ngei ngawl tu minthanna lukhu na saang tu uh hi.

⁵Tuasia bangma in no khangmoi zawte zongh, khanghaam zawte thu na ni vun. Tuaciang note theampo khat le khat atu na kisepsak thei natu in, kiniam khiakna awmdal sia puan bang silh tavun; banghangziam cile, Laithiangtho in, “Pathian in a kiphasakte nalh a, a kiniamkhiakte tungah maipha pia hi,” ci hi.

⁶Pathian thahatna khut nuai ah kiniamkhiak vun, tua hile ama hunpha hong tun ciangin hong laamto tu hi.

⁷Ama in note hong thin nuam maw ahikom, na thin ngimna theampo ama aap vun.

⁸Pilvang vun a, encik vilvel vun! Na ngalpa Doaimangpa sia a valhlup tu khat po zong a, a hawk tawpi taw kibangin, na kiimkot ah hong vak hi.

⁹Na upna sungah kip vun a, ama na nalh vun, banghangziam cile, leitung theampo a om na thu uppuite zongh a kibang ngimnate thuak hi.



¹⁰Ahihang tawmvei na thuak zawk uh ciangin, Christ taw pumkhat hina taw, ama ii a bo maw minthanna nga tu a hong sam, thuthiamna theampo ii Pathian, ama mama in no hong cialcingsak tu a, kipsakna, thahatna le, bul khona hong pia tu hi.

¹¹Ama tungah vaangletna om tawntung taken! Amen.

A khakbel Vaithakna

¹²A thumaan Tapidaw suapui in ka ngaisut Silas hong huna taw, hi lai tomno kong at hi. Hi thu sia Pathian thuthiamna tatak hi ci in tetti pangin, kong hanthawn hi. Tua thu sungah kho takin ding vun.

¹³Pathian teal ahi, Babylon khua ah om na pawlpipui ii hong paupui bangma in ka tapa Mark zongh in hong paupui hi.

¹⁴Tapidaw ki it ki napna taw khat le khat kimuak tavun. Christ neisa ahi note theampo tungah thinnopna hong om taken.



2 Peter

2 Peter 1

¹Jesus Christ sawltakpa le silapa Simon Peter in — Ih Pathian le Hunpa Jesus Christ thumaan thutang tungtawn a, kote upna za in a manpha upna, a neite tungah lai kong thaak hi:

²Pathian le Jesus, ih Topa na heakna uh tungtawn in, thuthiamna le thinnopna kicing sia no aa hi taken.

Pathian Sapna le Tealna

³Pathian ii anei vaangletna in, ama minthanna le phatna nga tu a, hong sam pa ih heakna tungtawn in, Pathian thu sungah a maan nuntakna ih nei natu in, ih kitaangsap theampo ei tungah hong pia hi.

⁴Hi bangin hong kamciam sa ahi a lian mama le a manpha letsongte sia, leitung ah a om hong lalsak thei ci le sa deina pan suatakna na nga thei natu le ama pianzia na siim thei natu in hong piak ahi hi.

⁵Hi thu hang mama in, na hi thei tawpin phatna sia na upna tungah belap vun; na phatna tungah heakna belap vun;

⁶na heakna tungah pumpi ki ukzawkna belap vun; pumpi ki ukzawkna tungah thuak zawkna belap vun; na thuak zawkna tungah Pathian bang hina belap vun;

⁷Pathian bang hina tungah u le nau ki itna belap vun; tuaciang u le nau ki itna tungah ngual it theina belap vun.

⁸Hi kicinnte sia na kitaangsap uh hi a, tuaciangin tuate tam mama na nei uh le, tuateng in no sia ih Topa Jesus Christ heakna sungah a diang zo tan, a kizen in hong nungta sak tu hi.

⁹Ahihang hi kicinnte a nei ngawl peuma sia, a khua muna toi ahikom, a mawna luite pan kithiansua zo ahi hunlam mu thei ngawlin mangil zo uh hi.



¹⁰Tua ahikom ka suapuite awng, Pathian hong sapna le hong tealna sia a kip a khoa sua natu in a nasia zaw kan hanciam vun; tuabangin na hi uh le na upna na nusia ngei buatu uh hi.

¹¹Hi bangin ih Topa le Hunpa Jesus Christ ii tawntung Kumpi ngam sungah tum thei natu thu a cingin no hong kipia tu hi.

¹²Hi thute sia na heak sa uh hi, na saan sa thumaan thutak sungah kho takin a om sa na hita uh zong, kong phawksak kikik nuam hi.

¹³Hi thute na tepteena kong satsuasak tu sia, ka nuntak lai teng kei atu in a maan nasep hi ci in ka ngaisun hi.

¹⁴Ih Topa Jesus Christ ii a thiang tak a hong son sa bangin, hi a thi thei pumpi sia suut pal tu cisia ka kihe hi.

¹⁵Tua ahikom, ka thi zawkciang, hi thute a tawntungin na teptee thei natu lampi a ki hon natu, ka hi thei tawpin ka seam tu hi.

Christ Minthanna A mute

¹⁶Ih Topa Jesus Christ vaangletna taw hong pai natu thu kong heaksak ciangin, phuatawm taangthute ka siisan bua uh hi. Ama letna sia ka mit uh taw ka mu sa uh ahi hi.

¹⁷A vaanglianbel Pa in, “Hisia ka it ka Tapa hi a, dik ka sak pa ahi hi!” ci a, Pa Pathian in patoaina le minthanna a piak laitak, tua munah ka om uh hi.

¹⁸Hi aw vantung panin hong pai lai in, kote mama mual thiangtho tungah, ama taw ka om khawm uh a, ka za uh hi.

¹⁹Tua ahikom kamsangte son thute tungtaang ah thinmuanna ka nei seseam uh hi. Tua thute na thupi ngaisut tu pha hi, banghangziam cile, tua Ni khua hong vak a, nikonghong aksi na thin sung uh ah hong taan dong in, khuazingna munah meivak taang taw ki bang hi.

²⁰Ahizong, thildang a vaal lai, a thupi belhin Laithiangtho sung a om kamsaanna thu khat sia kuama in ama thu in, a khiakna son thei ngawl ahi hunlam ciamtee tavun.



²¹Banghangziam cile kamsaanna thute sia mihing deina pan bek hong pai ngeingawl a, ahihang Pathian kung pan hong pai thute a son uh ciangin, mihingte sia Thaa Thiangtho ukna nuai ah om hi.

2 Peter 2

Sya Maan ngawlte

¹A bosa hun in mihingte sungah kamsang maan ngawlte piang hi, tuasia bangma in no sung zongh sya maan ngawlte hong piang tu hi. Amate in hong lal sak thei upna bulpi maan ngawlte hong keng tu a, amate a tanh Topa nial tu hi, tuasia ciang thakhat thu in, amate le amate kilalsua tu hi.

²Tua hi napi in, mihing tam mama in amate paktat nopna lampite zui tu uh hi; tuaciang amate ngamtatna hu in ngualdangte in, thumaan Lampi sia sonsia tu uh hi.

³Hi sya maan ngawlte sia duhop ahikom amate phuatawm tangthute hong sonna taw no tung pan a meet hong vawt tu hi. Amate ii Thukhen pa sia a kingin zawk ngei zo a, amate a Lalsak pa khang lo zo hi!

⁴Pathian in a maw a khial vantung lalangte khoaikhe ngawlin, hell sung deenna in nei hi, amate tuamun khuazing sungah Thukhenna Ni ngak tu in koltaang hi.

⁵Taanglai leitung mite sia Pathian in a khoaikhe bua hi, Pathian a sel mihingte ii leitung ah tuipei liimsak hi; a ngup mihingte sia thumaan thutang a hil Noah le a dang mihing sali pha hi.

⁶Pathian a selte tung apiang tu sia muthei natu in, Sodom le Gomorrah khuapite sia meikuang taw Pathian in haltham hi.

⁷Ngeina pha zui ngawl a maitatte ii paktat ngamtatnate hu in a khuangai, mihing pha Lot bekma ama in suatak hi.

⁸Tua mihing pha Lot sia amate sungah teang a, ni khat zawkciang ni khat, amate ngamtat siatnate a mu a zaak ciangin, thin ngimin na sa mama hi.



⁹Tua ahikom Topa in Pathian dei bang a nungtate haksat kisinnate pan, bangbang suatak tu ci thu le mihing seksolte Thukhenna Ni ciang bangbang daan thuak sak tu ci sia he hi,

¹⁰a tuan in Pathian ii thu neina simmaw a, a kiihuai a pumpi deina a zuite daan piak tu in koi hi. Hi sya maan ngawlte sia hangsan a kisa thei hi, tuaciang minthanna a nei vantung mite a zakta bua uh a; a selno zawlai uh hi.

¹¹Hi a maan ngawl syate sangin a nasia zaw pekin a thakho zaw, a hatzaw vantung lalange zongh in, amate sia Topa mai ah selnona taw mawsiat ngawl hi.

¹²Ahihang hi mihingte in, amate thinsung pan, a piangtawm thute taw ngamta uh a, mat tu le thalup tu a, a piang ngamsate taw kibang uh hi; amate heak zawk ngawl na theampo selno nate taw do uh hi. Amate sia ngamsate bangin kithat tu hi,

¹³tuaciang amate in mihingte ngim thuaksak ahikom, ngimthuakna taw ma in kithuk kik tu hi. Ci le sa deina a thaisak tu ngamtatna khat pawpo suntangin a vawtna sia, amate nopsakna hi; ngual theam a nuntakziate nuamsa ahikom, na ankuang uumpui tu zong maizum huai a, mindai huai hi!

¹⁴Amate in numei paktatte sim ngawl a dang en nuam ngawl hi; a maw nopna bo ngei ngawl hi. Amate in a tha zawm mite sia thaang sung zotpui uh hi. A thin sung uh sia duhop natu a sin ahi hi. Amate sia Pathian haamsiatna nuai ah om uh hi!

¹⁵Amate in lampi tang nusia in, lam am uh hi; amate in a maan ngawl sepna taw sum a nga nuam Beor tapa Balaam lampi zui uh a,

¹⁶tuaciang tua pa sia a mawna hu in teih thuak hi. Ama ii laa a khoai sia mihing aw taw pau in, kamsangpa ii mawmawt ngamtatna khaam hi.

¹⁷Hi mihingte sia a kang sa cik taw kibang a, vuiپی suangval seamkeak meeikaaite bang ahi uh hi; Pathian in amate atu in, a zing belna mun khealsiasak hi.



¹⁸Amate in kiphatsakna le mawmawt kamte pau a, tuaciangin khialna sung pan a suakta tuungte zongh pumpi lungngul khialnate zangh in aitaah hi.

¹⁹Amate in tuabangte suatak natu kamciam pia ahihang, amate mama sia lalna zongsangna ii silate ahi uh hi — banghangziam cile mihing khat sia ama a nopzaw na khat pawpo ii sila ahi hi.

²⁰Mihingte in, leitung siatna thahatnate sung pan, ih Topa le ih Hunpa Jesus Christ heakna taw suakta zo hi napi, tuate ma in man kik a, zosak kik ahile, tuabang mihingte sia a kipat lai sangin a tawpna ah, a sia zaw mun theng hi.

²¹Amate tungah a kipia a thiangtho thupiakna pan a pial uh sangin, a heak uh thutang lampi sia he ngei phot buazaw le, amate atu phazaw lai tu hi.

²²Paunak sungah, “Ui khat in a luak sa ne kik a, a kisilthiang sa vok khat buan sungah bual kik hi,” ci thu a maan hunlam sia amate tung thupiang sia in lak hi.

2 Peter 3

Topa Hong pai tu Kamciamna

¹Ka it lawmte awng, hi sia in no tung kong laithak a niina hi. Laithakte ngeal sungah na thinsung a om a thiangtho ngaisutnate phawlo thei natu in, hi thute phawsak tu in kong hanciam hi.

²Taanglai in a thiangtho kamsangte sonnate le noma ii sawltakte tung pan na nga uh Topa le Hunpa thupiak sia na teptee tu ka dei hi.

³A masa phit in, hi hun khakbel sungah, a nuntakna uh pumpi deinate taw a uk sak mihing pawl khat hong pian tu sia na heak tu ka dei hi. Amate in hong nunau tu a,

⁴hi bangin, hong dongh tu uh hi. “Hong pai kik tu ci in kamciam hong pia ahi bua ziam? Ama koisung om ziam? Ih taangpupite sia thi siat zo hi, ahihang simlei kubitphua lai pan bangma in, na theampo kibang lai hi!”

⁵Khua ngei mama lai in, Pathian in thupia a, vantungte le leitung ki bitphua ahi sia amate in thusim ngawl kaltang uh hi. Leitung sia tui sung pan le tui taw in kipiangsak hi,



⁶Tuaciangin tua leitung lui sia tui taw ma in tuipi liimna taw kilalsak hi.

⁷Ahihang tu in a om, vantungte le leitung sia meikuang taw a kilalsak natu in, tua a kibang Pathian thupiak sia ma in koicing nginge hi. Pathian a sel mite thu kikhen natu le a kilalsak tu hun, a ni hong thet tu ngakin ki keam zii hi.

⁸Ahizong ka it lawmte awng nakhat na mangil heak vun! Topa muna ah ni khat le kum tulkhat sia a kilamdand na om ngawl hi; ama atu in tuate nii sia kibang hi.

⁹Mihing pawlkhatte ngaisut bang hi ngawlin, a kamciamte a tunsak natu in, Topa haisang ngawl hi. Ama, no tungah a thinsau hizaw hi, banghangziam cile ama in, kuama lalcipsak nuam ngawl a, a mawna uh pan kisiik siat sak nuam hi.

¹⁰Ahihang Topa Ni sia nguta bangin hong pai tu hi. Tua Ni ciangin vantungte a nging mama khat taw hong bocip tu a, vantung a om nate kuangkeak in, leitung le a sung a om theampo zong bo cimit tu hi.

¹¹Hite theampo tua bangin kilalcipsak tu ahile no sia bangbang mihingte hi tu kisamh tu ziam? Na nuntakna uh sia thiangtho tu a, Pathian tungah na ki aap tuam tu uh hi,

¹²vantungte kaangtum in bocip a, vantung a om nate a sa in a tuithapsak siat tu ni _ Pathian ii Ni ngak kawmin, hong thet pal thei natu nasep thei tawp in seam in.

¹³Ahihang ko ka hi uh le, Pathian kamciam omsa sia ka ngak uh hi: thumaan thutang ii a om nuam natu mun, vantung thakte le leitung thak ka ngak uh hi.

¹⁴Tuaciangin ka lawmte awng, tua Ni ngakin na om uh ciang Pathian mu na ah na thiantho natu, na sitbaang ngawl natu le ama taw na kilem natu in, ahi thei za in hanciam tavun.



¹⁵Ih Topa thin sauna sia ngupna na nga natu in, hunpha hong piakna hi ci in ngaisun tavun. Tua in Pathian piak ciimna zangin ih it suapui Paul ii hong laithak bangma ahi hi.

¹⁶A laithak theampo sungah tua thulu taw kisai in a at ciang a son thu in hi thu ahi hi. Ama laithakte sungah thu haksa pawlkhat om a, tuate sia heakna nei ngawlte le, kip takin a ding ngawlte in ahi ngawl lalam in son a, Laithiangtho hilna dangte zongh tuabangin son thei uh hi. Tuabangin amate le amate kilalsua uh hi.

¹⁷Ahihang no ka lawmte awng, hi thu na heak sa uh hi. A muanhuai na dinmun pan na puk ngawl natu le ngeina maan zui ngawl amaitatte ii khialnate taw hong lampui thaak ngawl natu in, kikeam tavun.

¹⁸Ahihang ih Topa le Hunpa Jesus Christ heakna le thuthiamna sungah na khangto suak vun. Ama tungah minthanna, tu le a tawntungin om taken! Amen.



1 John

1 John 1

Nuntakna Kammal

¹A kipatciil pan a om sa, nuntakna Kammal huvau note tungah lai kong thaak hi. Tua thu ka zazo uh a, ka mit taw ka mu zo uh hi; hi hi, mu zo khu hi, ka khut uh taw tham zo khu hi.

²Hi nuntakna mu thei in hong kilangh ciang, kote in ka mu uh hi; tua ahikom tua thu ka son uh hi, tuaciang koma hong heaksak ahi, Pa taw a omkhawm, tua tawntung nuntakna thu sia no tung zongh ah kong son uh hi.

³Pa le a Tapa Jesus Christ taw ka kipawlkhopna sungah nong pop thei natu in, ka mu ka zaak uh teng no tungah kong phuang uh hi.

⁴Kote lungnopna a pawlcing thei natu in tua thu kong at uh hi.

Pathian sia Khuavak hi

⁵Tu in a Tapa tung pan ka zaak thu le kong zaaksak uh thu in hi thu ahi hi: Pathian sia khuavak hi a, ama sungah khuazing om mama ngawl hi.

⁶Tua ahikom ama taw a kipawl khawm hi hing ci napi, khuazing sungah ih om veve le ih kampauna le ih ngamtatna ah a leilot ih hi hi.

⁷Ahihang eite khuavak sungah ih nungta le — ama sia khuavak sungah om ahi bangma in — eite khat le khat a kipawl theite ih hi a, tuasia ciangin a Tapa Jesus chisan in ih mawna theampo pan hong thiansua hi.

⁸Mawna nei bua hing ih cile eima le eima kitheam ih hi a, ih sungah thumaan thutak om ngawl ahi hi.

⁹Ahihang ih mawnate Pathian tungah ih pualaak le ama in a kamciamte keam tu a, tuaciang a maan sia seam hi: ama in ih mawnate hong maisak tu a, ih ngamtat khialna theampo pan hong thiansua tu hi.

¹⁰Maw ngei bua hing ih cile Pathian sia a leilot pa ih suaksak a, ama kammal eite sungah a om bua hi.

1 John 2



Ei Hong Hupa Christ

¹Ka tate awng, mawna khialna na vawt ngawl natu in hi lai kong at hi; ahihang khat po in mawna a vawt le Pa mai ah ei taangin hong ngetsak tu khat — thutangpa Jesus Christ ih nei hi.

²Tuaciang Christ mama in eite mawna bek hi ngawlin a kuama po ii mawna zongh maisakna a pianna pa ahi hi.

³Pathian thupiakte ih zui le tuasia ciangin ama a he ih hi hunlam ih tel hi.

⁴Khat po in ama ka he hi ci napi in, a thupiakte a zui bua le mihing leilot hi a, ama sungah thumaan thutak a om bua hi.

⁵Ahihang a kuama po a kammal a zui sia in Pathian a itna kicingtaaksak takpi zo hi. Pathian taw pumkhat ih hina hi thu in hong telsak thei hi:

⁶Pathian taw pumkhat in nungta ing a cite in Jesus Christ nuntak bangin a nuntak kul hi.

Thupiak Thak

⁷Ka it lawmte awng, tu a kong at hi thupiakna sia thuthak hi ngawl hi; tuasia in thupiaklui hi a, a kipatciil pan ma na neisa uh ahi hi. Thupiaklui sia noma ii zaak sa thu ahi hi.

⁸Ahihang tu a kong at thupiakna sia a thak hi, banghangziam cile tua ii a maanna sia Christ sungah kimu a, no sung zongh ah kimu hi. Banghangziam cile khuazing om nawn ngawl a, khuavak tatak sia taang zo hi.

⁹A kuama po khuavak sungah ka om ci napi a, a suapuite a ensan le ama in tu dong ma in khuazing sungah om hi.

¹⁰A suapuite a it te sia khuavak sungah teang ahikom ama sungah ngualdang khat khialsak thei natu bangma a om bua hi.

¹¹Ahihang a suapuipa a ensan khat pawpo sia khuazing sungah om ahi hi; ama khuazing sungah lampai a, khuazing in a mit tawsak ahikom, a zot natu he ngawl hi.



¹²Ka tate awng, na mawnate uh Christ hangin hong kimaisak zo ahikom lai hong thaak ka hi hi.

¹³Pate awng, a kipatciil pan a om pa na heak uh manin lai kong thaak hi. Tangvalte awng, Ngilo Pa zo zo na hi uh manin lai kong thaak hi.

¹⁴Ka tate awng, Pa na heak uh manin, lai kong thaak hi. Pate awng, a kipatciil pan a om pa sia na heak uh manin lai kong thaak hi. Tangvalte awng, note na tha uh hat ahikom lai kong thaak hi; Pathian kammal no sungah nungta hi, Ngilo Pa na zo zo uh hi.

¹⁵Leitung ahizong leitung na khat pawpo ahizong na it heak vun. Leitung na it uh le Pa it ngawl na hi uh hi.

¹⁶Leitung neisa ahi — hong mawsak thei eima atu deinate, mite in mu a, a dei sia le mihingte kiphatsakpui leitung na theampo — hite sia khat beak zongh Pa kung pan hong pai ahi bua hi; a vekpi leitung pan hong pai ahi hi.

¹⁷Leitung le a sungah a om, mihingte lungngul thei na theampote hong bo tu hi; ahihang Pathian deina bangin a seamte in a tawntungin nungta hi.

Christ ii Ngalpa

¹⁸Ka tate awng, hun khakbel hong nai zo hi! Christ Ngalpa hong pai tu hi ci in no tungah hong kison zo hi; tu in Christ ngalte tam mama hong kilangh zo a, tua ahikom hun khakbel sia nai zo hi ci in ih he hi.

¹⁹Hi mite in ei kipawl na sungah hong om tatak ngawl ahi hu in ei hong nusia hi; ei pawl sungah hong om hile ei taw om khawm top tu hi. Ahihang eite taw hong kipawlkhawm tatak ngawl ahi hunlam a kithiangtel thei natu in amate in hong nusia hi.

²⁰Ahihang Christ ii no tungah Thaa Thiangtho hong buak sia na saang zo uh hi, tua ahikom na vekpi in thumaan thutak na tel uh hi.

²¹Tua ahikom lai kong thaakna in thumaan thutak na tel ngawl uh hang hi ngawl hi; thumaan thutak na heak uh hang hi zaw a, tuaciangin thumaan thutak sung pan leilot thu hong piang ngeingawl ci zongh na heak uh ahi hi.



²²Tua ahile a leilot pa sia akua ziam? Jesus sia Messiah hi ngawl hi a ci pawpo in leilot pa ahi hi. Tuabang mihingte sia Christ ii Ngalte ahi hi — amate in Pa le Tapa nial khawm hi.

²³Banghangziam cile Tapa a nial pawpo in Pa zongh nial hi. Tapa a saang pawpo in Pa zongh nei hi.

²⁴Tua ahi ciang a kipat pan na zaak uh ngupna thu sia noma thinsung uh ah na kepcing tu ahi zongh tel tavun. Tua thu na keamcing uh le Pa le Tapa taw pumkhat in na nungta tawntung tu uh hi.

²⁵Tuaciangin Christ ama mama ii eite hong piak tu hong kamciam sia — tawntung nuntakna ahi hi.

²⁶Note hong theam tu a hong kipante ii thu hong at khi hi.

²⁷Ahihang note na hi uhle, Christ in a Thaa no tungah hong buak zo hi. Note sungah ama Thaa a om laiteng in hong hil tu kuama dang na kitaangsamh bua uh hi. Banghangziam cile ama Thaa in na theampo huvau hong hil a, hong hil teng sia thumaan hi a, khial ngawl hi. Tua Thaa ii hilna na ni vun a, Christ taw pumkhat in na om vun.

²⁸Hi hi, ka tate awng, ama taw pumkhat in na om vun, tua hile ama hong kilangh ciangin eite sia thin letna taw ih kidim tu a, ama hong pai Ni ciangin maizum in ih buk a kul buatu hi.

²⁹Christ sia thumaan thutang hi ci in na he uh hi; tua ahikom na heak tu uh thu sia a maanin a seam peuma Pathian ta hi ci thu ahi hi.

1 John 3

Pathian Tate

¹Pa in ei sia bangza in hong it ziam tel tavun! Ama hong itna lian mama ahikom ei sia Pathian tate hong kici hi — tuabang takpi ma ih hi hi. Leitung in Pathian he ngawl ahikom Leitung mite in ei hong he ngawl hi.

²Ka it lawmte awng, ei sia tu in Pathian tate ih hi hi, ahihang bang suak tu hi ziam ci in kician ngawl lai hi. Ahihang Christ hong kilaak ciangin eite sia



ama taw kibang tu ih hi hunlam ih he hi, banghangziam cile ama sia ahi bang tatak in ih mu tu hi.

³Christ sia thiangtho ahi bangma Christ sungah hi lametna a nei mihing peuma ama le ama a thiangtho in kikeam hi.

⁴A kuama po mawna khialna a vawt peuma in Pathian thukham paltan ahi hi, banghangziam cile mawna ih ci sia in thukham paltanna ahi hi.

⁵Mawmate a la keak tu in Christ hong kilangh hi a, ama sungah mawna om ngawl hi ci in na he uh hi.

⁶Tua ahikom Christ taw kipumkhat a, a nungta peuma mawna vawt tan nawn ngawl hi; ahihang a kuama po mawna a vawt tante sia ama a mu ngei ngawl ahibuale a he ngei ngawlte ahi hi.

⁷Ka tate awng, kuama in theamsak heak vun! Christ sia thumaan thutang ahi bangma a kuama po thutangan a seamte sia thumaan thutang ahi hi.

⁸A kuama po mawna a vawt tante sia Doaimangpa ii neisa ahi hi, banghangziam cile a kipat pan ma, Doaimangpa in mawna vawt zo hi. Tua hang ma in Doaimangpa ngamtatna teng a susia tu tatak ma Pathian Tapa hong kilangh hi.

⁹Pathian ta ahi peuma sia mawna a vawt tan bua hi, banghangziam cile Pathian pianzia mama ama sungah om hi; tuaciangin Pathian sia ama Pa hi zo ahikom mawna a vawt tan thei bua hi.

¹⁰Pathian tate le Doaimangpa tate kilaklaw ah, a kilamdanna in hisia ahi hi: thutangan a ngamta ngawl ahibuale ngual a it ngawl khat pawpo sia in Pathian ta ahi bua hi.

Khat le Khat na Ki it vun

¹¹A kipat pan ma na zaak uh thu in: eite khat le khat ih ki it hamtang natu thu ahi hi.

¹²Eite Cain taw ih kibang buatu hi; ama sia Ngilo Pa ii neisa hi a, a suapuipa tatak Abel thatlum hi. Banghang Cain in ama thatlum ziam? Banghangziam



cile ama ii ngamtatnate sia maan ngawl a, a suapuipa ngamtatnate maan ahihang hi.

¹³Tua ahikom ka suapuute awng, leitung mite in no hong ensan le, lamdang na sa heak vun.

¹⁴Eite in ih suapuute it ih hi hu in, thina nusia a, nuntakna sungah theng zo ih hi hunlam ih he hi. Ngual a it ngawl peuma sia thina vaangletna nuai ah om lai hi.

¹⁵Ngualdang a ensan peuma sia mihing that hi a, mihing that khat in, ama sungah tawntung nuntakna nei ngawl hi ci in na he uh hi.

¹⁶Christ in eite a tu a nuntakna hong piakna taw ki itna sia bangziam ci in ih he hi. Tua ahile eite zongh, ih suapuute atu ih nuntakna ih piak ngam kul tu hi!

¹⁷A hau khat in a cimaw, a suapuipa kispna mu napi hesuak ngawlin a en thong le Pathian ka it hi, bangbangin ci thei tu ziam?

¹⁸Ka tate awng, ih ki itna sia kam le muk bek ih hisak bua tu hi; ngamtatna taw a kilangh ki itna takpi ahi kul hi.

Pathian mai ah Thin Hanna

¹⁹Tua ahikom tu a bangin thumaan thutak sungah ih om hunlam ih he tu hi; Pathian mai ah kimuanna ih nei natu sia hi bang teng hang ahi hi.

²⁰Ih thin sungah maw ih kisa le, eite ii ih thinsung kitelna sangin Pathian sia lianzaw a, ama in na theampo he siat hi ci in ih he hi.

²¹Tua ahikom ka it lawmte awng, ih thin sung kitelna taw maw ih kisa buale Pathian mai ah thin hanna ih nei hi.

²²Ama thupiakte zui a, ama diksak bang ih ngamtat manin, ama tung pan ih nget pawpo ih nga hi.

²³Ama hong thupiak sia bangziam cile a Tapa Jesus Christ ih up tu le Christ ii hong thupiak bangma khat le khat ih ki it natu ahi hi.



²⁴A kuama po Pathian thupiakte a zui le ama sia Pathian taw kipumkhat in a nungta hi a, Pathian zongh ama taw pumkhat in nungta hi. Tuaciangin Pathian hong piak sa Thaa hangin Pathian sia ei taw kipumkhat in nungta ahi hunlam, ih he hi.

1 John 4

A maan le A maan ngawl Thaa

¹Ka it lawmte awng, Thaa ka nei a ci theampo na um heak vun, ahihang amate nei thaa sia Pathian kung pan hong pai ahile ahi ngawl na sittel tavun. Banghangziam cile mun theampo ah kamsang maan ngawlte pai kawkoai zo uh hi.

²Pathian Thaa ahile ahi ngawl sia hi bangin na tel thei tu uh hi: Jesus sia mihing khatin hong pai hi a ci pawpo Pathian kung pan hong pai Thaa a nei hi.

³Ahihang Jesus huvau hi thu a nial khat pawpo sia Pathian kung pan hong pai Thaa a nei bua hi. Ama nei tua thaa sia Christ ii Ngalpa kung pan hi; tuasia pa hong pai tu hi ci in na za zo uh a, tu in ama sia hi sung leitung ah om zo hi.

⁴Ahihang ka tate awng, note sia Pathian neisa na hi uh a, kamsang maan ngawlte na zothal zo uh hi, banghangziam cile no sungah a om Thaa sia leitung neisa ahite ii sung a om thaa sangin thahat zaw hi.

⁵Tua kamsang maan ngawlte in leitung nate thuson in nei uh hi, tuaciang leitung mite in amate thusonte ngai uh hi, banghangziam cile amate sia leitung ii neisa ahi uh hi.

⁶Ahihang ei sia Pathian neisa ih hi hi. Pathian a he peuma in ei thuson hong ngai hi. Pathian neisa ahi ngawl peuma in ei thuson hong ngai bua hi. Tua ahiciang thumaan thutak ii Thaa le a maan ngawl thaa kilamdanna sia, tu sia panin ih khentel thei hi.

Pathian sia Ki itna



⁷Ka it lawmte awng, eite khat le khat ki it tawng, banghangziam cile itna in Pathian kung pan hong pai hi. Ngual a it thei pawpo sia Pathian ta hi a, Pathian he hi.

⁸Ngual a it ngawl peuma sia Pathian a he bua hi, banghangziam cile Pathian in itna ahi hi.

⁹Tuaciang ama tungtawn in nuntakna ih nga thei natu in Tapa khat bek a nei sia leitung ah hong paisakna taw, Pathian in eite hong itna hong lak hi.

¹⁰Ki itna ih ci sia in hisia ahi hi: eite in Pathian a it ih hi bua a, Pathian in eite hong it manin ih mawna a mai natu in a Tapa hong paisak hi.

¹¹Ka it lawmte awng, hi bangin Pathian in hong it ahile, eite khat le khat ih ki it tu ahi hi.

¹²Kuama in Pathian mu ngei ngawl hi, ahihang eite khat le khat ih ki it le, Pathian sia ei taw pumkhat in hong omkhawm a, tuaciang ama itna ei sungah hong kicingsak hi.

¹³Eite Pathian taw pumkhat in ki nungta a, ama sia ei taw pumkhat in nungta hi ci in maan takin ih tel hi, banghangziam cile ama in ei tungah ama Thaa hong pia zo hi.

¹⁴Tuaciang Pa in a Tapa sia leitung Hunpa tu in hong paisak hi ci in ih mu a, ngual tungah ih son hi.

¹⁵Khatpo in Jesus sia Pathian Tapa hi ci in a pualaak le ama in Pathian taw pumkhatin nungta a, Pathian in ama taw pumkhatin nungta tu hi.

¹⁶Tuaciang Pathian ii ei atu a nei itna sia eima mama in ih he a, ih um hi. Pathian in itna hi, tuaciang ki itna sungah a nungta peuma Pathian taw pumkhat in nungta a, Pathian zongh ama taw pumkhatin nungta hi.

¹⁷Thukhenna Ni in thin hanna ih nei natu in eite sungah ki itna hong cingsak hi; hi leitung ah ih nuntakna sia Christ ii nuntakna bangma ahikom, eite tuabang thin hanna ih nei tu ahi hi.



¹⁸Ki itna sungah luana om ngawl a, a kicing itna in launa theampo hawlkeak hi. Tua ahi ciang, launa sia daan thuakna taw kizom ahikom kiitakna a nei te sungah itna kicing om ngawl hi.

¹⁹Pathian in ei hong it masa ahikom eima in ama ih it hi.

²⁰Khat po in Pathian ka it hi ci napi in a suapuite a ensan le ama sia leilot thusonpa ahi hi. Banghangziam cile a mu sa a suapuite a it buale a mu ngawl lai Pathian a it thei buatu hi.

²¹Christ ii eite hong thupiakna in hi sia hi: Pathian a it peuma in a suapuite zongh a it kul tu hi.

1 John 5

Leitung ih Zawna

¹Jesus sia Messiah hi ci a, a um pawpo sia Pathian ii ta khat ahi hi; tuaciang pa a it khat in a tapa zongh a it hi.

²Pathian it a, ama thupiakte zuina taw Pathian tate a it ih hi hunlam ih he hi.

³Banghangziam cile Pathian ih itna ii khiakna sia ama thupiakte ih zui hi ci nopna ahi hi. Tuaciang ama thupiakte sia ei atu in a haksa lei bua hi,

⁴banghangziam cile Pathian tate khat sim in leitung zothal thei hi. Tuaciang ih upna taw leitung zawna ih nga hi.

⁵A kua in leitung zo zo tu ziam? Jesus sia Pathian Tapa hi ci in a um sia bek ahi hi.

Jesus Christ huvau Tetti Panna

⁶Jesus Christ sia, tui a kiphumna tui le a thina chisan taw hong paipa ahi hi. Ama in tui nguak taw hong pai ngawlin, tui le chisan taw hong pai hi. Tuaciang Thaa mama in hi thu maan hi ci in tetti pang hi, banghangziam cile Thaa sia Thumaan thutak ahi hi.

⁷Tua sungah tetti thum pha hi:

⁸Thaa, tui le chisan hi a; a thum in a kibang tetti panna nei uh hi.



⁹Mihing tetti panna ih um hi; ahihang Pathian tetti panna kho zaw lai a, a Tapa huvau sia ama in tu bangin tetti pang hi.

¹⁰Tua ahikom a kuama po Pathian ii Tapa a umte in ama thin sungah hi tetti nei hi; ahihang a kuama po Pathian a um ngawlte in Pathian sia leilot pa suaksak hi, banghangziam cile Pathian ii ama Tapa huvau a son sa teng um ngawl ahihang hi.

¹¹Tua tetti in hi sia hi: Pathian in eite tawntung nuntakna hong pia zo a, hi nuntakna ii a naak sia a Tapa ahi hi.

¹²Tapa a nei a kuama po in hi nuntakna nei hi; Pathian Tapa a nei ngawl pawpo in nuntakna a nei bua hi.

Tawntung Nuntakna

¹³Pathian Tapa a um note — tawntung nuntakna na nei uh hunlam na heak natu in hi lai kong thaak hi.

¹⁴Eite in Pathian mai ah thinhanna ih nei hi, banghangziam cile ama deina taw kisi in bang khat po ih ngen le ama in hong za hi, ci in ih muang hi.

¹⁵Ih nget simin hong za hi: hi thu, thumaan hi ci in ih heak pan kipan, ama tungah ih nget teng ama in hong pia hi ci thu zongh ih he hi.

¹⁶Na suapuipa in thina dong a then thei tu ahi ngawl mawna khat avawt le ama nuntakna a pia tu Pathian munah thu ngetsak in. Hi sia in thina hong then thei mawnate ngawl buang atu in a kizangh thei ahi hi. Ahihang thina dong hong then thei mawna om a, tua tungtaang ah Pathian munah thunget saktu kong ci bua hi.

¹⁷Ngamtat khialna theampo mawna hi a, ahihang thina dong hong then ngawl mawna om hi.

¹⁸Pathian tate kuama in mawna vawt tan viuveu ngawl hi ci in ih he hi, banghangziam cile Pathian Tapa in ama keamcing a, Ngilopa in a susia thei bua hi.

¹⁹Simlei tung bupi sia Ngilopa ukna nuai ah om kale, ei sia Pathian neisa ih hi hunlam ih he hi.



²⁰A maan Pathian ih heak natu in Pathian Tapa hong pai zo a, teltheina hong piazo ahi hunlam ih he hi. Eite in a maan Pathian taw pumkhat hi in — ama Tapa Jesus Christ taw pumkhat in ih nungta hi. Hisia in a maan Pathian hi a, tawntung nuntakna ahi hi.

²¹Ka tate awng, a maan ngawl pathiante panin noma le noma na kikeam tavun!



2 John

2 John 1

¹Pawlpi Upa pa tung pan — A it huai nupi le a tate tungah itna tatak taw lai kong thaak hi. Tuaciang keima bek hi ngawlin thumaan thutak a he theampo in no hong it uh hi,

²banghangziam cile thumaan thutak sia ei sungah om a, a tawntungin om top tu hi.

³Pa Pathian le Pa ii Tapa Jesus Christ in thuthiamna, hesuakna le thinnopna hong pia taken; thumaan thutak le itna sung ah tua thute ei a hi taken.

Thumaan Thutak le Itna

⁴Na tate pawlkhat sia Pa ii hong thupiakna bangin thumaan thutak sungah om hi ci in ka mu ciangin ka lungdam mama hi.

⁵Tua ahikom, ka it Nupi nu awng, nang tungah kong nget nop sia: eite khat le khat ki it tawng ci thu hi. Hi kong at thu sia thupiak thak hi ngawl a; a kipatciil pan ih nei thupiak sia ma ahi hi.

⁶Tu a ka son itna ii khiakna sia Pathian thupiakte zui in ih nuntak kul hi ci nopna hi. A kipat pan na zaak siat sa uh bangma note theampo sia ki itna taw na nuntak uh kul hi, ci in thupiakna om hi.

⁷Leitung theampo ah ngual theam theite tam mama pai zo a, tua mite in Jesus Christ sia mihing in hong pai hi ci in saang nuam ngawl uh hi. Tua bang mihing khat sia ngual theampa hi a, Christ ii Ngal ahi hi.

⁸Tua ahiciang ih sepna sateng a tu taan ngawl a, na thaman a cingin na nga natu in kikeam tavun.

⁹Christ hilciahna sungah om nuam ngawlin, a pai khial pawpo in Pathian a nei bua hi. Hilhcianna sungah a kip peuma in Pa le Tapa nei khawm uh hi.

¹⁰Tua ahikom khat po hong pai a, hi hilhcianna hong keng bua uh le na inn sung uh ah tungsak heak vun; “Thin nopna na nga tan,” zongh na ci heak vun.



¹¹Banghangziam cile ama tung thinnopna om tu a deisak khat pawpo in ama ngamtat siatnate sungah kipawl khawm ahi hi.

A Khakbel Kammalte

¹²Kong son tu tam mama om ahihang laikung laite taw hong aat ngawl zaw tu khi hi; ih lungdamna a kicin natu keima hong haw in maitang kisi a thuson tu ka lamem zaw hi.

¹³Na it na Suapuinu ii tate in paupuina kam hong thaak hi.



3 John

3 John 1

- ¹Pawlpi Upa pa tung pan laithak— Keima it takpi ka lawm Gaius,
- ²Ka it ka lawmpa awng, thaa sungah thahat ci in kong heak bangma — na theampo ah maa pai dau pai in na cidam natu thu ka ngen hi.
- ³Thumaan thutak sungah a nungta tawntung na hi bangma — Tapidaw suapui pawlkhat hong theng a, nang sia thumaan thutak sungah takkha hi ci in hong son ciang ka lungdam mama hi.
- ⁴Ka tate thumaan thutak sungah a nuntak ka zaak sia sangin hong lungdamsak zaw thei a dang bangma a om bua hi.

Gaius Pokna

- ⁵Ka it ka lawmpa awng, na Tapidaw puite khualmi a hi laitak ngawngawn zong amate a tu nasepna ah thumaan in citak ni hi.
- ⁶Amate na itna thu teng hi sung pawlpi ah hong ko uh hi. Amate khualhawna sungah Pathian lungkim zia taw a paitan thei natu in na hu in.
- ⁷Banghangziam cile amate sia Christ ii na seam in khual a haw uh ciang, thu um ngawlte tung pan huna bangma saang ngawl uh hi.
- ⁸Tua ahikom ei Tapidawte in hi mihingte ii thumaan thutak a tu a sepna sungah a seppui ih hi thei natu in ih hu tu hi.

Diotrephes le Demetrius

- ⁹Pawlpi tungah laithak tomno khat ka at hi; ahihang amate ih lampui a suak nuam Diotrephes in kei ii ci bang sia hong thupi sim bua hi.
- ¹⁰Tua ahikom kong pai ciangin ama ngamtatna theampo: ko thu a cizaat huai a hong sonte le a leilot na teng ka pholaak tu hi! Ahihang tuateng bek hingawl lai hi; Tapidaw suapuite hong pai ciangin saang nuam ngawlin, tuabang a saang nuam te ngawngawn tho in, biakinn pan hawlkeak lai tu hi!



¹¹Ka it ka lawmpa awng, a pha ngawlte zui heak vun a, a phate zui tavun. Thupha vawt peuma Pathian neisa hi a; thusia vawt peuma in Pathian a mu bua hi.

¹²Demetrius sia ngual theampo in phat son hi; thumaan thutak mama in ama phat son hi. Tuaciang ko zongh tetti ka pang thua uh a, thumaan son ka hi uh sia na he uh hi.

A khakbel Kipaupuina

¹³Kong son nop tam mama om ahihang laikung laite taw kong at nuam bua hi.

¹⁴No taw kimu pal tu in lametna ka nei a, tua hun ciangin maitang kisi in ih son tu hi.

¹⁵Thin nopna nga tavun. Na ngualtamhte theampo in nuksetna kam hong thaak hi. Ko ii lawm teng zongh maitang kisi in na nukset sak vun.



Jude

Jude 1

¹Jesus Christ naseam, James ii suapuipa Jude kung pan— Pa Pathian itna sung le Jesus Christ ii kepcingna sung a nungta Pathian ii sapsate tungah laithak ahi hi:

²Hesuakna, thinnopna, ki itna a kicingin note aa hi taken.

Thuhilsya Maan ngawlte

³Ka it lawmte awng, ih nei khop tek ngupna huvau hong at nuam ing, ka ci laitakin, Pathian mihingte tungah a tawntung atu le khatvei bek a piak upna huvau ngal ih sim kul lai hi, ci in hanthot nopna ka thin sungah thakhat in hong suak hi.

⁴Pathian a nei ngawl mihing pawlkhatte ei sungah hong tum ku ahikom, amate ii pheangtat thei natu kam zonna in, Pathian thuthiamna thute siasak in, eima bek ii Topa ahi Jesus Christ sia nial uh hi. Ngeitawng lai in Laithiangtho in amate puavawkna a thuakna thute son khol zo hi.

⁵Na heak sa uh ahitazong, Topa in Israel te sia Egypt ngam pan suatak napi, a thu um ngawlte sia a khak sang ciangin, susiacip hi ci in kong phawksak nuam hi.

⁶Amate thuneina ciaciang sungah a om po ngawl, a teenna a nusia vantung lalangte phawk tavun: amate sia leinuai khuazingna ah tawntung thikkol kibil a, amate tungah thu a kitan tu Pathian ii Ni lianpi ni dong atu in Pathian in koi hi.

⁷Sodom, Gomorrah le a kiim khuapite zongh phawk tavun, tua vantung lalangte bangin ngamta a, numei le pa paktatna le ngeina ngawl banga mawna a vawt hi: amate sia mihing theampo ii a kidop thei natu in, tawntung meikuang sungah daan a thuak uh hi.

⁸Tuasia bangma in hi mihingte in amate pumpi tungah, mawna a vawtsak tu mukholnate nei a; amate in Pathian thuneina zawngsak in, tung sangah a minthangte nunau uh hi.



⁹Vantung lalangte sung pan a lianbel Michael zongh in hi bangin ngamta ngawl hi. Moses luanghawm sia Doaimangpa taw a kituu laitakin, Michael in Doaimangpa sia kamsia taw na lang ngawl a, “Topa in nang hong tei taken,” na ci bek hi.

¹⁰Ahihang hi mite in a tel ngawl nate sia nunau in, leal uh hi; tuaciang nganhing bangin, amate ii a pianpui thinsung uh taw a heak thei nate in amate lalsak uh hi.

¹¹Amate atu in bangza in lauhuai ziam! Amate in Cain ii lampi tawn uh hi. Balaam khial bangma in, amate sia sum huvau in puk uh hi. Korah ii tualngal taw a leedo bangin, amate zongh in hong leedo uh a, ama bangma in kilalsak hi.

¹²Amate sia ci le sa deinate taw maizum maw in om a, na kipawlkhop anneak poai uh hong nokkhaksakte ahi hi. Amate kaangsung atu bek kin hi. Amate sia vui ii seam nguatui a paai ngawl meeikaaite taw kibang hi. Khuakhal hun dongin a nga mama a nga ngawl thingkungte le a kizunglok a thicip sa thingkungte taw kibang hi.

¹³Amate sia tuipei sung a, tui kihualte taw kibang a, amate maizumna ngamtatnate sia, tuiphuante bangin kilangh hi. Amate sia khuazing cip belna sung, a tawntung a om natu mun Pathian ii a koi kholsak, a vakthap aksite taw kibang hi.

¹⁴Adam suan a khang salina, Enoch in hi bangin, amate huvau son khol hi. “Topa sia a vantung lalang thiangtho tul tam mama te taw hong pai tu a,

¹⁵mihingte theampo tungah thutanna vawt tu le, pathian awlmawk ngawl ngamtatnate le pathian sel mawneite ii a lau huai kam paunate tungah puavawkna vawt tu hi!” ci hi.

¹⁶Hi mihingte in a tawntung in, phunin ngual veu mawsiat uh hi; amate in a ngitlo nopna thinpuakte zui uh hi; amate le amate kisuangtaakin, a dei uh sia a nga thei natu in, ngualdangte sialpok uh hi.

Kidop natu Hilna le Thupiakna



¹⁷Ahihang lawmte awng, a bo sa hun sungah ih Topa Jesus Christ sawltakte ii hong son thute na phawk tavun.

¹⁸Amate in “Ni tawpkhak hun hong thet ciangin, note hong selno tu mihing hong piang tu a, tua mihingte in amate pathian selte deinate zui tu uh hi,” hong ci hi.

¹⁹Hi mihingte in kikhenna a piangsakte hi a, ci le sa deina in amate uk in, Thaa a nei bua uh hi.

²⁰Ahihang no, ka lawmte awng, a thiangthobel na upna tungah ki kipsak seseam vun. Thaa Thiangtho vaangletna sungah thungen tavun,

²¹tuaciang noma le noma sia Pathian itna sungah kikeamcing tavun, ih Topa Jesus Christ hesuakna taw tawntung nuntakna hong piak tu ngakin, na om uh laitak, tuabangin na ngamta vun.

²²A um tatak zo ngawlte tungah hesuakna na lak tavun;

²³midangte sia meikuang sung pan dokin, hun tavun; a dangte tungah hesuakna le kiitakna kithua in, na lak tavun a, ahihang amate paktat mawna taw nin a baang sa puante mama na ensan tavun.

Pokna Thunget

²⁴Tu in na puk ngawl natu in, hong keam thei a, ama minthanna mai ah a sitbaang ngawl le lungdamna lianpi taw hong then thei —

²⁵ama bek Pathian ahi ih Ngumpa tungah ih Topa Jesus Christ tungtawn in, minthanna, vaangletna, thahatna le thuneina sia, a bo sa hun theampo sung, tu le a tawntungin om top taken! Amen.



Thu Pualaakna

Thu Pualaakna 1

¹Hi laibu sia Jesus Christ ii pualaak thute a kiteptena ahi hi. Hai ngawlin, a tung tu thute a naseamte tungah a lak thei natu in, Pathian in hi pualaakna pia hi. Christ in a naseampa John tungah a heaksak natu in, ama kungah a vantung lalang paisak a,

²tuaciangin John in a mu theampo son siat hi. Hisia in Pathian ii thupuak le Jesus Christ ii a pualaak thumaante huvau thukona ahi hi.

³Hi laibu a simte le a zuite in mihing hamphate ahi hi! Banghangziam cile hi thute hong tun tu hun hong nai zo hi.

Pawlpi Salite tungah Paupuina

⁴Asia ngamkhen sung a om pawlpi salite tungah, John in lai kong thaak hi: Pathian tung pan hong pai thuthiamna le thinnopna sia note a hi taken, tua Pathian sia a om nginge, a om sa le hong pai pheang tu pa hi a, a kumpi tokhum mai ah thaa sali taw

⁵a thumaan tetti, thina pan a kithosak masabel le leitung kumpite theampo a ukpa Jesus ahi hi. Ama in ei hong it a, ama chisan hangin, eite mawna pan hong suatak hi,

⁶tuaciangin eite sia a Pathian le a Pa atu a seam tu in thiampi in hong vawt hi. Jesus Christ tungah minthanna le vaangletna sia a tawntung a tawntung in om taken! Amen.

⁷En vun, meei tungah ama hong pai hi! Mihing khat sim in ama mu tu hi, tuate sungah ama a holte zongh kihel tu hi. Leitung mihing theampo ama hu in khuangaina taw tau tu uh hi. Tuabangin hong piang tatak tu hi!

⁸“Keima in a masa phit le a khakbel ka hi hi,” ci in a om nginge, a omsa, le hong pai pheang tu, Vaanglianbel Topa Pathian in ci hi.

Christ ii Mukholna

⁹Keima in na suapuipa John ka hi a, tuaciang Jesus nungzui khat ka hina taw Pathian ngam lua tute ii thuak tu vawtsiatna noma taw a kibangin a thuak



kenkon na sep puipa ka hi hi. Kei sia Patmos tuikulh tungah hong kikoi hi, banghangziam cile, Pathian kammal le Jesus ii hong pualaak thumaan thutak ka thansak hang ahi hi.

¹⁰Thaa in Topa ii ni in, kei hong uk a, aw nging khat ka za hi, tua aw sia lemle aw bang hi a, ka nungsang panin hong paupui hi.

¹¹Tuasia in, “Na mu teng at in a, a laibu sia hi pawlpite omna khuapi sali ahi: Ephesus, Smyrna, Pergamum, Thyatira, Sardis, Philadelphia, Laodicea teng tungah thaak in,” ci hi.

¹²Akua in hong paupui ziam ci in ka nung ka kiheak ciang, kham meivakna sali ka mu hi,

¹³tuante kawmah mihing taw a kibang khat ka mu a, ama in a peang dong a tualsuk puan khat silhin, a awm kiimkot ah kham kawngkhau khat vet hi.

¹⁴Ama sam sia tuumul ahibuale vuuk bangin paak a, tuaciangin a mittang sia meikuang bang ahi hi;

¹⁵ama peang sia taungo a kithiangsak, a kinawt taw kibangin tai a, a aw sia tui teautuak hawk bang ahi hi.

¹⁶Ama in a khut ziat sangah aksi sali toai a, tuaciangin a kam sung panin a lang nii hiam namsau khat hong pusuak hi. A maitang sia sun lai nitaang bangin taang hi.

¹⁷Ama ka mu ciangin mithi sa bangin, a peang ah ka puk hi. Ama in a khut ziatsang ka tungah hong nga a, “Lau heak in! Kei sia a masa phit le a khakbel ka hi hi.

¹⁸Keima in a nungta pa ka hi hi! Keima sia ka thi zo a, ahihang tu in a tawntung a tawntungin, ka nungta hi. Thina le mithite khua ka uk hi.

¹⁹Tua ahikom nung ciangin, hong piang tu nate le tu laitak a om nate, na mu teng at in.

²⁰ka ziat sang khut sungah na mu aksi sali te le kham meivak khuam sali te ii a kiphualseal a khiakna sia hi bang ahi hi: aksi salite sia pawlpi salite ii vantung lalangte hi a, meivakna khuam salite sia pawlpi salite ahi hi.

Thu Pualaakna 2

Ephesus tungah Kam vaithak

¹“Ephesus khua Pawlpi ii vantung lalang tungah hi bangin at in: “Hisia in a khut ziat sangah aksi sali toai a, kham meikhuam salite kawm ah a vakpa ii hong kamvaithak ahi hi.

²Na sep teng kong he hi; bangza in haksa mama in naseam a, thin uai takin na om sia kong he hi. Mi ngilote dual thei ngawlin, sawltak ka hi uh hi a cite zongh ahi ngawl uh hunlam na tel zawk ciangin, leilot mihingte hi ci in na mu uh zongh kong he hi.

³Note na thin uh uai a, kei atu in thuakin, na thin uh na thasua bua uh hi.

⁴Ahihang note kong mawsakna khat sia hi thu ahi hi. A masa a nong it uh bangin, tu in kei nong it nawn bua uh hi.

⁵Bangza dongin kiam suk na hi uh sia ngaisun vun! Na mawnate uh panin kisiik vun a, na vawt phit uh sia vawt kik vun. Na mawnate uh pan na kisiik bua uh le, keima note kungah hong pai in, na meivakna uh a omna mun pan kong laaksak tu hi.

⁶Ahihang hisia in note atu phatna hi: keima ngaimawk bangma in, note zongh in Nicolaitans pawlte nasepna na ngaimaw uh hi.

⁷“Bil na nei uh le pawlpite tungah Thaa thusonnate ngai vun! “Pathian huan sungah a po nuntakna thingkung ii nga sia, zawna a ngate ii neak thei natu thu ka pia tu hi.

Smyrna tungah Kamvaithak

⁸“Smyrna khua pawlpi ii kamtai vantung lalang tungah hi bangin at in: “Hisia in a masa phitbel le a khakbel ahi, a thi sa a nungta kikpa tung pan kam hong vaitha hi.



⁹Na ngimna teng kong he hi; zawng hi ci in kong he hi — ahihang a tatak sia hau nu hi! Jewte khu hi a ci theamte ii no hong siatsonnate ka he hi; amate sia Satan ii neisa honkhat ahi uh hi.

¹⁰Na thuak lai tute a bangpo ahizong, lau heak vun. Ngai vun! Doaimangpa in note hong ze etna in, pawlkhat thonginn sung denna in hong nei tu a, na ngimna uh sia ni sawm sung teng hi tu hi. Thi tu keak a kul zong kei tungah hong thumaan tavun, tua hile nuntakna sia zawna tel in kong pia tu hi.

¹¹“Bil na nei uh le pawlpite tungah Thaa thusonnate ngai vun! “Zawna a ngate nii vei thina in a susia buatu hi.

Pergamum tungah Kam vaithak

¹²“Pergamum khua pawlpi tungah kamtai vantung lalang tungah hi bangin at in: “Hisia in a lang nii hiam namsau a neipa ii hong kam vaithak ahi hi.

¹³Satan ii kumpi tokhum a ngakna munah na ten uh kong he hi. Satan teenna tua munah a thumaan ka tetti Antipas a kithalup hun dongin, na upna uh na thasua bua uh a, kei tungah nong thumaan uh hi.

¹⁴Ahihang kong mawsiat nopna pawlkhat om hi: milim biakna an a neak natu le numei le pa paktat natu a kaizotna taw Israel te mawna sung a thengsak Balak tungah thu a hil Balaam thuhilna a zui pawlkhat na om uh hi.

¹⁵Tuasia bangma in Nicolaitans hilna a zui zongh na om uh hi.

¹⁶Tu in na mawnate uh pan kisiik kik vun! Na kisiik kik bua uh le ka kam sung pan a pusuak namsau taw tua mihingte a sim tu in, note kungah hong pai pal tu khi hi.

¹⁷“Bil na nei uh le pawlpite tungah Thaa thusonnate ngai vun! “Zawna a nga mihingte tungah a kiseal manna an pawlkhat ka pia tu hi. Amate khat tek tungah, a saangte ngawl po kuama dang ii heak ngawl minthak a ki at suangpheak khat tek ka pia sii tu hi.

Thyatira tungah Kamvaithak



¹⁸“Thyatira pawlpi ii kamtai vantung lalang tungah hi bangin at in: “Hisia in, a mittangte meikuang bang hi a, a peangte taungo nawtthiang bang ahi Pathian Tapa ii hong kam vaithak ahi hi.

¹⁹Note bang vawt ci sia kong he hi. Na itna, na thumaanna, na nasepna, le na thin uaina ka he hi. A masa na sep uh sangin tu in tamzaw seam ci in kong he hi.

²⁰Ahihang nang kong mawsiat nopna pan: Pathian naseam khi hi ci in a kivawttawm Jezebel numeinu sia dual ni hi. Ama hilna taw ama in ka naseamte lamkhialsakin, milim biakna ante neakna le, numei le pa paktatnate vawtsak hi.

²¹A mawnate a kisiik kik natu hun pia ka hi hang, ama in paktatna pan, kikheal nuam ngawl hi.

²²Tua ahikom ama le ama taw palngul mawna a vawtte sia lupna khat tungah, ka lawn tu a nasia takin thuk tu uh hi. Tua numei taw seksolna a vawtte a kisiik kik bua uh le, tu mama in ka ci sa bangin ka vawt tu hi.

²³A nungzuite zongh ka thatlum tu hi, tuasia ciangin pawlpi theampo in kei sia mihing theampo ii ngaisutna le a deina a hesiatpa ka hi hunlam hong he tu hi. Note khat tek na ngamtat uh babang in kong thuk tu hi.

²⁴“Ahihang Thyatira a om a dangte in, hi ngitlo kihilnate na zui bua uh a; ‘Satan ii a thuk thukute’ a kicite na tel bua uh hi. Note tungah vanhngit a dang hong suan ngawl tu khi hi, kong ci hi.

²⁵Ahihang kong pai mateng na neisate uh kip takin na kep uh kul tu hi.

²⁶⁻²⁸Zawna a ngate le a tawp dong ka dei bang a, a ngamta suakte sia ka Pa tung pan ka nga thuneina ka pia tu hi: minamte thik ciang taw a uk natu thuneina ka pia tu a, amate in leibeal bangin amate a bek a bekin tamthamsak tu uh hi. Amate tungah nikonghong aksi zongh ka pia tu hi.

²⁹““Bil na nei uh le pawlpite tungah Thaa thusonnate ngai vun!

Thu Pualaakna 3

Sardis tungah Kamvaithak



¹“Sardis khua pawlpi ii vantung lalang tungah hi bangin at in: “Hisia in Pathian ii thaa sali a neipa le aksi sali a neipa ii hong kamvaithak ahi hi. Nang in bangteng vavawt ci in kong he hi; thi na hihang nungta nginge a, na minthan sia kong he hi!

²Tua ahikom khanglo in a, na nei sunteng a thi cip ma in tha khosak in. Banghangziam cile na sep teng sia ka Pathian mai ah cing tak ngawl lai hi, ci in kong mu hi.

³Tua ahikom note hong kihil sa le na zaak sate phawk kik tavun; tua thute ni vun a, na mawmate uh pan kisiik kik vun. Na khanglo bua uh le, note kungah nguta bangin kong pai tu a, kong pai tu a hun ngangawn zongh na he buatu uh hi.

⁴Ahihang tua Sardis khua sungah a om pawlkhatte in, na puansilh uh na thiangsak zo uh hi. Puankaang silh in kei taw na vak khawm tu uh hi, banghangziam cile tuabang tu in na kilawm uh hi.

⁵Zawna a ngate in hi bang puankaang a silh tu hi, tuaciangin amate min sia a nungtate min khumna laibu sung pan ka phiat buatu hi. Ka Pa le a vantung lalangte mai ah amate sia keima neisa ahi hi, ci in a kilangh takin ka thangsak tu hi.

⁶“Bil na nei uh le pawlpite tungah Thaa thusonnate ngai vun!

Philadelphia tungah Kam vaithak

⁷“Philadelphia khua pawlpi ii vantung lalang tungah hi bangin at in: “Hi kamvaithak sia a thiangtho le a thumaanpa tung pan ahi hi. Ama in David ii neisa tawtang nei a, kongkha a hon ciang kuama in a khak thei bua hi, tuaciang kongkha a kha ciang kuama in a hong thei bua hi.

⁸Note bang vawt ci sia kong he hi; vaangletna tawm nei hi ci in kong he hi; ka hilmate nong zui uh a, kei tungah nong thumaan uh hi. Na mai uh ah kuama ii kha thei ngawl kongkha khat ka hong zo hi.



⁹Ngai vun! Jew mi a kici theam a leilot, tua Satan pawlte ahile, na peang uh ah a bok tu in kong paisak tu hi. Amate theampo in note kong it sia he tu uh hi.

¹⁰Thuak kenkon natu kong thupiakte, keamcing na hi uh komin, leitung bup mihingte ze et tu in, ngimna hong pai ciang, note zongh kong keamcing tu hi.

¹¹Hong pai pal tu khi hi, kuama in na zawna tel uh hong suu zawk ngawl natu in, na neisun uh teng keamcing tavun.

¹²A zo pa sia ka Pathian biakinn khuam ka suaksak tu a, ama in a nusia ngei buatu hi. Ama tungah ka Pathian min le ka Pathian kung vantung pan hong tuaksuk tu Pathain ii khuapi min ahi Jerusalem khuathak ii min ka at tu hi. Ama tungah ka minthak zongh ka at tu hi.

¹³“Bil na nei uh le pawlpite tungah Thaa thusonnate ngai vun!

Laodicea tungah Kamvaithak

¹⁴“Laodicea pawlpi ii vantung lalang tungah hing bangin lai at in: “Hisia in Pathian ii bitphua sa theampo ii pian kipatna, a maan tetti, a thumaan Amen ii hong kam vaithak ahi hi.

¹⁵Na sepsate ka he hi: Nang sia sa le sa ngawl, vot le vot ngawl, ci in hong he khi hi. Na sa le sa vet, na vot le vot vet lete kong oai hi.

¹⁶Ahihang sa le sa ngawl, vot le vot ngawlin a lum bek na hikom ka kam sung pan hong sia kik tu khi hi!

¹⁷Nang in ‘Kei sia hau in nuamsa ing; ka kisap theampo nei ing,’ ci ni hi. Ahihang bangza in zawngkhal in, hesuakhuai na hi hunlam na kihe bua hi! Nangma na zawng a, pumnguak na om a, na mittaw hi.

¹⁸Tua ahikom ngaisut kong piakna panin, na hau natu in kei kung pan kham, kham ciitak hong lei tan. A maizum huai pum nguaktang a na om sia na kiseal natu in, puankaang zongh hong lei tan. Khua na mu thei natu in, na mittang a na noi tu, za pawlkhat hong lei tan.

¹⁹Ka it te a vekpi in, tei in daan ka pia hi. Tua ahikom na thin takpi taw in, na mawnate pan kisiik kik in.



²⁰Ngai vun! Keima in kongkha kungah dingin ka kingh hi; khat pawpo in ka aw hong za in kongkha hong hon le, inn sungah tumin, amate taw an ka ne khawm tu a, amate zongh kei taw a ne khawm tu uh hi.

²¹Kei zongh zawna nga zo a, tu in ka Pa kung kumpi tokhum tungah ka to bangma in zawna a ngate ii tungah keima kung ka kumpi tokhum tungah to thei natu thu ka pia tu hi.

²²“Bil na nei uh le pawlpite tungah Thaa ii sonte ngai vun!”

Thu Pualaakna 4

Vantung ah Biakpiakna

¹Hi santak ah mu kholna dangkhat ka nei a, vantung ah kongkha khat kihong sa in a om ka mu hi. Tuaciangin lemle aw taw a kibang ka zaak ngeisa ahi kei hong paupuina awnging in “Hi sungah hong paito tan, hisia zawkciangin bangteng piang tu ziam, ci in kong lak tu hi,” hong ci hi.

²Thakhat thu in Thaa in kei hong uk hi. Tua mun vantung ah kumpi tokhum khat om a, a tungah mihing khat to hi.

³Ama maitang sia jasper le carnelian suangmanphate bangin, taang a, tuasia ciang a kumpi tokhum buppi kiimkot ah emerald suanghing bang ahi sangun khat om hi.

⁴Kumpi tokhum ii kiimkot ah a beam in, kumpi tokhum dang kul le li om a, tuate tungah upa kul le li puankaang silh in, kham kumpi lukhu khu in to uh hi.

⁵Kumpi tokhum pan khua hong leng vazal a, nging vangam in vanto hi. Tua kumpi tokhum mai ah Pathian thaa salite ahi meisip sali te kuang hi.

⁶A kumpi tokhum mai ah a thiang wakil limlangh tuipi taw a kibang khat zongh ka mu hi. Kumpi tokhum kiim a pangh khat sim panin a nungta nganhing li in uumci a, a nung a mai theampo mittang taw kidim hi.

⁷A masa bel sia tawpi taw kibang hi; a niina sia khuita taw kibang hi; a thumna sia mihing maitang nei hi; a lina sia muvanlai leang bang ahi hi.



⁸Nganhing lite khat simin tha luk tek nei a, tuaciang tua thate sungsang le puasang ah mittang taw kidim uh hi. Sun taw zan taw amate in a lasak a tawlna ngei bua uh hi: “Vaanglianbel Topa Pathian sia Thiangtho, thiangtho, thiangtho hi, ama in a om sa, a omlai, hong pai pheang tu pa hi,” ci uh hi.

⁹Kumpi tokhum tungah a to pa, a tawntung a tawntungin a nungta pa tungah nganhing li teng in minthanna, upatna le lungdamkona la sak uh hi.

¹⁰Tuabangin a sep uh ciangin upa kul le lite sia kumpi tokhum tung a to Topa mai ah boksuk in, a tawntung a tawntungin a nungta pa bia uh hi. Amate in a kumpi lukhute sia kumpi tokhum mai ah khiasuk in,

¹¹“Ka Topa le ka Pathian! Minthanna, upatna le vaangletna saang tu in na kilawm hi. Banghangziam cile nangma in na theampo na bitphua hi, tuaciangin nangma deina taw amate tungah pianna le nuntakna na pia hi,” ci uh hi.

Thu Pualaakna 5

Laizial le Tuuno

¹Kumpi tokhum tung a to pa ziatsang khut sungah laizial khat ka mu hi; tuasia in a lang le lang dim lai ki at a, tepteena sali taw kituum hi.

²Tuaciangin vantung lalang a hat mama khat ka mu a, ama in awnging tak taw, “Akua in hi tepteenate a baltham tu le laizial a hong tu in kiphu ziam?” ci in au hi.

³Ahihang vantung ah ahizong, leitung ah ahizong, leinuai ah ahizong, tua lai sia hongin a sung a en thei tu a om bua hi.

⁴Tua laizial a hong thei tu le, a sung a en thei tu a kiphu kuama kimu ngawl ahikom nasia takin ka kap hi.

⁵Tua zawkciang upate khat in, kei tungah, “Kap heak in, En in! Judah minam sung panin Tawpi ahi, a lian David suan pa in zawna nga zo a, ama in tepteena salite baltham in laizial hong thei tu hi,” hong ci hi.



⁶Tua zawkciangin kumpi tokhumte zanglai, nganhing lite le upate ii a kiim uumna sungah Tuuno khat a ding ka mu hi. Tua Tuuno in a kithatlum sa bang keak ahi hi. Ama in kii sali nei a, mittang sali nei hi, tuate sia Pathian ii thaa salite hi a, leitung bup ah a kipaisakte ahi hi.

⁷Tuuno in pai in kumpi tokhum tungah a to pa ziatsang khut panin, laizial sia la hi.

⁸Tuabang a vawt ciangin, nganhing li teng le upa kul le li teng sia Tuuno mai ah boksuk uh hi. Tengtong khat tek le ngimnamtui taw a kidim khamkhaw te nei tek uh a, tuate sia Pathian mihingte ii thungetna ahi uh hi.

⁹Amate in la thak sa uh a: “Nangma in laizial la tu le teptena hong tu in na kilawm hi. Banghangziam cile nangma hong kithatlum zo a, na kipumpiak thina taw, Pathian atu in, bee le phung sim, kam namcin sim, ngamsim le minam sim panin, mihingte na lei zo hi.

¹⁰Nangma in amate sia eima ii Pathian na a seam tu in thiampite ukna na suaksak zo a, tuaciang amate in leitung uk tu uh hi.”

¹¹Tuaciangin ka et kik le, tul tam mama le mak tam mama a pha vantung lalangte aw ka za hi! Amate in kumpi tokhum, nganhing li teng le upate kiimkot ah dingin,

¹²nging takin la sa uh hi: “Tuuno a kithatlum sia in vaang letna, hauna, ciimna, le thahatna upatna, minthanna le pokna, a saang tu in kiphu hi!” ci uh hi.

¹³Tuaciangin vantung, leitung, leinuai, tuipei sung — vaannuai ah nuntakna a nei theampo in hi bangin la a sak ka za hi: “Kumpi tokhum tungah a to pa le Tuuno tungah pokna, upatna, minthanna le thahatna a tawntung le a tawntungin om taken!”

¹⁴Nganhing nungta li teng in “Amen!” ci in zo uh hi. Tuaciangin upate in bok sukin, bia uh hi.

Thu Pualaakna 6

Teptenate



¹Tua zawkciang tepteena salite sung pan a masabel sia Tuuno in a hon ka mu a, nganhing nungta lite sung pan khat in, vanto bang ahi aw taw, “Hong pai tan!” hong ci hi.

²Ka et le, siphu kaang khat ka mu hi. A tungah a to pa in thal khat toai a, kumpi lukhu khat kipia hi. Ama in ngalzopa ii ngal zo tu in a kuan bangin siphu tungah to in kuan hi.

³Tuaciangin tepteena a niina sia Tuuno in hong a, tuasia ciang nganhing a niina sia in, “Hong pai tan!” hong ci hi.

⁴Siphu dang khat hong pusuak a, a san ahi hi. Mihingte khat le khat a kithalup natu in, a tungah a to pa sia leitung ah ngal kidona piansak natu vaang kipia hi. Ama sia namsau lian khat kipia hi.

⁵Tuasia zawkciang tepteena a thumna sia Tuuno in hong a, nganhing a thumna sia in, “Hong pai tan!” hong ci hi. Ka et le siphu vom khat om hi. A tungah a to pa in a khut sungah khaikhin kop khat toai hi.

⁶Nganhing lite sung pan khat ii aw tu bangin ka zaak khat in, “Ni khat thaman sia zungtaang litre khat, ni khat thaman tu mangtaang litre thum hi. Ahihang olive kungte le sapit nguite na lalsak heak vun!” hong ci hi.

⁷Tua zawkciang tepteena a lina sia Tuuno in hong a, nganhing nungta a lina sia in, “Hong pai tan!” hong ci hi.

⁸Ka et ciang, siphu a daang khat ka mu hi. A tungah a to pa ii min sia Thina hi a, a nung panin mithi khua in zui hi. Leitung ah a teangte see li sua see khat sia amate in ngal, kialpi, natna le ngamsate taw thalup thei natu in thu kipia hi.

⁹Tua zawkciang tepteena a ngana sia Tuuno in hong hi. Biaknatau nuai ah, Pathian kammalte a thansak uh hu le thumaanna taw tetti a panna hu a, a kithatlum te ii thaa te ka mu hi.

¹⁰Amate in awnging tak taw au uh a, “Vaanglianpipa Topa, a thiangtho thumaan pa awng! Leitung ah kote hong that mihingte tungah thu na khen tu le, daan na piak tu sia bang tan vei khua ngei lai tu ziam?” ci uh hi.



¹¹Amate khat sim sia puantual kaang khat tek kipia hi, tuaciangin amate a kithalup bangma in a nasep puite le a suapuite a thalup nopza a cin mateng a ngak zii lai natu in sawl uh hi.

¹²Tua zawkciang tepteena a lukna sia Tuuno in a hon ka mu hi. Zinh nasia takin hong liing a, ni sia puanham vom bangin hong vom a, tha sia chi bangin sancip hi.

¹³Vui nasia takin va a, theikungte a thin ngawp ciang, a nga ungte lei ah a pul bangin aksite lei ah taaksuk uh hi.

¹⁴Van sia laidal pheak kizial bangin bomang a, mual theampo le tuikulh theampo amate omna mun pan kikhiin siat hi.

¹⁵Tuasia ciang leitung kumpite le ngamukte, ngalkap maangte, sumhaute, a thahatte, a dang mihing theampote, silate, sila ngawlte, leihawng sung le mualtung suangpite nuai ah buu uh hi.

¹⁶Amate in mualte le suangpite munah, “Ko tungah hong cimhsuk ka heu vun a, kumpi tokhum tungah a to pa ii muna pan le Tuuno ii thin uukna panin, hong seal tavun.

¹⁷Amate ii thin uukna a kiitakhuai mama ni sia hi sungah hong theng a, akua in thuak zo tu ziam?” ci uh hi.

Thu Pualaakna 7

Israel Mite 144,000.

¹Hisia zawkciang leitung kingh li ah a ding vantung lalangte li ka mu a, leitung ah ahizong tuipei tungah ahizong, thingkung khat po tungah ahizong, vui a vak ngawl natu in amate in vuipei li lencip uh hi.

²Tua zawkciang a nungta Pathian tepteena toai in niswana sang pan vantung lalang a dang khat hong paito ka mu hi. Ama in awnging tak taw, leitung le tuipei lalsak tu a, Pathian ii vaang a piak vantung lalang lite sam hi.

³Tua vantung lalang in, “Pathian naseamte talki tungah tepteena a kivawt siat mateng, leitung, tuipei le thingkungte susia heak lai vun,” ci hi.

⁴Tuaciangin kei tungah talki tung Pathian tepteena a nga sia 144,000 pha hi ciin hong kison hi. Amate sia Israel minam sawm le niite pan hi a,

⁵⁻⁸nam khat ciangin tulsawm le tulnii veu ahi: Judah, Reuben, Gad, Asher, Napthali Manasseh, Simeon, Levi, Issachar, Zebulun, Joseph le Benjamin suante ahi uh hi.

A tam mama Mihonpi

⁹Hisia zawkciang ka et le, kuama ii sim zawk ngawl tu mihonpi khat om hi! Amate sia minam, be le phung, ngam tuatuam le kam namcin pan hi a, amate in puantual kaang silh a, a khut sungah palm sawl toai in Tuuno kumpi tokhum mai ah ding uh hi.

¹⁰Amate in awnging takin au uh a, “Kumpi tokhum tungah a to ih Pathian le Tuuno kung panin, Ngupna hong pai hi,” ci uh hi.

¹¹Vantung lalangte theampo kumpi tokhum, upate le nganhing nungta lite kiimkot ah ding uh hi. Tuaciangin amate in kumpi tokhum mai lei ah boksuk in Pathian bia uh a,

¹²“Amen! Pokna, minthanna, ciimna, lungdamkona, upatna, vaanglet thahatna ih Pathian in a tawntung le a tawntungin nei taken! Amen!” ci uh hi.

¹³Upate khat in, “Hi puantual kaang silhte akuate hi a, koisung pan hong pai ziam?” ci in hong dongh hi.

¹⁴“Topa awng, he ngawl khi hi. Nangma he ni hi,” ci in ka zo hi. Ama in, “Hite sia vawtsiatna nasia mama sung pan a suaktate hi. Amate in a puantualte sil thiang zo a, Tuuno chi taw kaangsak zo uh hi.

¹⁵Tua ahi hu in, amate sia Pathian kumpi tokhum mai ah dingin sun taw zan taw a biakinn sungah ama atu in na sepsak uh hi. Kumpi tokhum tungah a to pa in amate sia ama ompuina taw dal tu hi.

¹⁶Amate in ngilkial, dangko kik ngei nawn ngawl tu hi; ni le satna a nei dangte in amate sia kaangh ngawl tu hi,



¹⁷banghangziam cile kumpi tokhum laizang ah a om Tuuno in amate ii tuucingpa hi tu a, amate sia nuntakna a pia ciktuite ah paipui tu hi. Tuaciangin Pathian in amate mittang sung pan thitui theampo nawlsak tu hi,” hong ci hi.

Thu Pualakna 8

Tepteena Salina

¹Tuuno in tepteena salina sia hong hon ciang nai lang sung bang vantung ah thim dide hi.

²Tuaciangin Pathian mai ah a ding vantung lalang sali teng, ka mu a, amate tungah lemle sali kipia hi.

³Vantung lalang dangkhat kham taw kivawt ngimnamtui halna, a nei pa, hong pai in biaknatau mai ah ding hi. Pathian mihingte thungetna a belapsak natu in, ama sia ngimnamtui tam mama kipia a, kumpi tokhum mai a, a om khambiaknatau tungah piak tu ahi hi.

⁴Ngimnamtui ii a khu sia Pathian mihingte thungetna taw kopin, Pathian mai ah a ding vantung lalang khut panin zaamto hi.

⁵Tua zawkciang, paaknamtui halna sia vantung lalang in la a, biaknatau pan meikuang sia taw a dip zawkciang leitung ah lawnsuk hi. A nging vangam le a puak vazak in, van hong to a, khualeng vazal in zinliing hi.

Lemlete

⁶Tuaciangin vantung lalang salite in, lemle salite tum tu in hong kithoai uh hi.

⁷Vantung lalang a masa bel sia in, a lemle tum hi. Ngialtang le meikuang sia chi taw kihelin leitung ah hong kibuk suk hi. Leitung ii see thum sua see khat, thingkung see thum sua see khat le lopa hing theampo kaangtum siat hi.

⁸Tuaciang vantung lalang a niina sia in, a lemle tum hi. A kuang mualpi taw a kibang khat tuiپی sungah lawnsuk hi. Tuipi tui see thum sua see khat sia chisan suak a,



⁹tuisung nganhing see thum sua see khat thi a, teambawte see thum sua see khat lalcip hi.

¹⁰Tuaciang vantung lalang a thumna sia in, a lemle tum hi. Aksi lian khat meisip bangin, a kuang khat sia, van panin hong taaksuk a, ngunte le ciktuite ii see thum sua see khat tungah tu hi.

¹¹(Aksi sia ii min in “A Khaa” kici hi.) Tui see thum sua see khat sia tui khaa suak a, tuaciang mihingte tam mama tua tui a dawnna panin thi uh hi, banghangziam cile tua tui in tui khaa suak zo hi.

¹²Vantung lalang a lina sia in, a lemle tum hi. Ni sia see thum sua see khat, tha see thum sua see khat, aksi see thum sua see khat kivaattham a, tuasia ciangin amate ii taanna sia see thum sua see khat bo hi; sun see thum sua see khat le zan see thum sua see khat sung, khuavak a om nawn bua hi.

¹³Tua zawkciangin ka etle muvanlai khat leang a, hi bangin a pau ka za hi, “Oh liinna! launa! A dang vantung lalang thum teng in a lemle uh a tum ciangin, leitung ah a teang mihingte theampo in bangza in lauhuai tu ziam!” ci hi.

Thu Pualakna 9

¹Tuaciang vantung lalang a ngana sia in, a lemle tum hi. Aksi khat leitung ah a taaksuk ka mu a, tua aksi tungah a hawng thukpui sia ii tawtang kipia hi.

²Aksi in a hawng thukpui sia hong a, thik huanna meimang sung panin, a pusuak bangin meikhu hong pusuak hi; a hawng thukpui sung pan hong pusuak meikhu in nitaang le vuite zingcipsak hi.

³Meikhu sung panin khaumaw honte lei ah hong taak uh hi, tuaciang amate tungah aikamte ii nei ngute kipia uh hi.

⁴Thingkungte, lopate ahibale a kung dang khat papo a lalsak ngawl natu in, amate tungah thu kipia hi; Pathian ii tepteena a talki tungah a nei ngawl mihingte bek susia thei uh hi.

⁵Khaumawte in mihingte thisak ngawlin, tha nga hun sung teng ngim pia in, a vawtsiat natu bek thu kipia hi. Ngim piakna taw a vawtsiatna in, aikamte ii hong pe ciang, a bot sia taw kibang hi.

⁶Tua tha nga hun sungteng mihingte in thi thei natu lampi a zon uh hang, a mu buatu uh hi; amate in thi nuam tu hi kale, thina in amate taisan tu hi.

⁷Khaumawte sia ngalsim tu in a kinging siphute taw kibang uh hi; a lu tungah kham taw kivawt kumpi lukhute taw a kibangte nei uh a, a maitangte sia mihingte maitang taw kibang uh hi.

⁸A sam uh sia numeite sam taw kibang a, a ha uh sia tawpi ha taw kibang hi.

⁹A awm uh sia thik awmdalna bangte taw a kituam hi, tuaciang a tha uh panin a nging aw in ngal kidona sungah a tai siphu leang tam mamate ii nging taw kibang hi.

¹⁰Amate in mei nei a, aikam mei bangin hong de thei hi. Tua meite taw amate in mihingte tha nga hunsung a liamsak natu in vaang nei uh hi.

¹¹Amate in a uk kumpipa khat nei uh hi, tuasia pa sia a hawng thukpui a uk vantung lalang hi. Ama ii min sia Hebrew kam in Abaddon hi a, Greek kam in Apollyon hi. (“A Susia pa” a ci nopna hi)

¹²Liinna launa a masabel sia bo a, ahihang hisia zawkciangin hong piang tu liinna launa nam nii omlai hi.

¹³Vantung lalang a lukna sia in, lemle tum hi. Pathian mai ah kham biaknatau sia ii kingh li panin, aw khat hong nging ka za hi.

¹⁴A awnging in vantung lalang a lukna sia munah, “Eupharates ngun ah a ki heencip vantung lalang li teng tha vun,” ci hi.

¹⁵Vantung lalang li teng kitha hi; tu kum, tu tha, tuni, tu hun lian in mihing theampo ii see thum sua see khat a thalup natu in amate li sia a kingingta sa in kikoi hi.

¹⁶Siphu ngalkap awn zanii om hi ci in hong kison hi.



¹⁷Ka mukholna sungah siphute le a tung tote ka mu hi; amate in awmdalna sia meikuang bangin a san, sapphire suangmanpha bangin vancii, kaan bangin a eng silh uh hi. A siphute ii lutang sia tawpi lutang taw kibang a, a kam sung pan meikuang, meikhu le kaante hong pusuak hi.

¹⁸Mihingte sung pan see thum sua see khat sia siphute kamsung pan hong pusuak tuasiat ngimna lian nam thum ahi, meikuang, meikhu le kaan in thatlum uh hi.

¹⁹Banghangziam cile siphute vaangneina sia a kamsung le a mei ah om hi. Amate ii meite sia lu nei ngulte taw kibang a, mihingte a liamsak natu in zangh uh hi.

²⁰Hi tuasiat ngimna lian te ii thalup mong a taanglai mihingte in amate khut taw a vawttawm uh nate panin a kikheal kik nuam bua uh hi. Doai biakna tawp ngawlin, kham, ngun, taungo, suang le thing milim khua mu thei ngawl, khuaza thei ngawl, lam pai thei ngawlte a biak uh zongh a kheal bua uh hi.

²¹Amate in ngual a thalupna, bum le ai toaina, numei le pa paktatna le nguktaknate uh panin a kisiik kik bua uh hi.

Thu Pualaakna 10

Vantung lalang le Laizialno

¹Tua zawkciang a thahat vantung lalang a dang khat, vantung panin hong tuaksuk ka mu hi. Ama sia meei taw kituam a, a lutang kiimkot ah sangun khat in uum hi; a maitang sia ni taw kibang a, a peangte meikuang khuamte taw kibang hi.

²Ama in a khut sungah laizialno khat phal sa in toai hi. Ama in a peang ziatsang tuipi tungah nga in, a peang veisang leitung ah nga hi,

³tuaciang ama in tawpi hawk aw taw a kibang awnging taw oksan hi. A oksat zawkciang, vanto salite hawkin zo uh hi.



⁴Amate pau zawk po ciangin lai taw ciamtee tu in, at ka kipan hi. Ahihang vantung panin awnging khat ka za a, “Vanto salite ii pauna sia thuku in koi in, lai taw at heak in,” hong ci hi.

⁵Tuaciangin vantung lalang khat tuipi le leitung siisan in a ding ka mu sia in, a khut ziatsang vantung ah laamto in,

⁶a tawntung a tawntungin a nungta, vantung, leitung, tuipi le a sung a om theampo a bitphua Pathian min taw kiciamna pia hi. Vantung lalang in, “Haisaang nawn ngawl tu hi!

⁷Ahihang vantung lalang a sali na sia in, lemle a tum tak ciang, a naseam kamsangte tungah a son sa bangin Pathian in a thuku ngealna khuangkheim tu hi,” ci hi.

⁸Tua zawkciang vantung pan hong paupuina aw, ka zaak ngei sa aw sia in, kei hong paupui kik a, “Pai tan a, tuipi le leitung a siisan vantung lalang ii khut sungah laizial sia la tan,” hong ci hi.

⁹Vantung lalang kungah ka pai a, laizialno sia hong piak natu in ka ngen hi. Ama in kei tungah, “La in a ne in; na ngil sungah a thuk suak tu hi, ahihang na kam sungah khuaitui bangin thum tu hi,” hong ci hi.

¹⁰Laizialno sia ama khut tung pan la in ka ne hi, tuaciang ka kam sungah tuasia in khuaitui bangin thum hi. Ahihang ka valh zawkciang ka ngil sungah a thuk suak hi.

¹¹Tua zawkciang, “Nang in a tam mama ngamte, minam khente, kampaute le kumpipate taw kisai Pathian vaithak thu sia khat vei ma na thangsak kik tu hi,” hong ci hi.

Thu Pualaakna 11

Tetti Niite

¹Tua zawkciang kei sia ciangkang khat hong kipia a, a sau teena pician bang ahi hi, tuaciang hi bangin hong sawl hi, “Pai tan a, Pathian biakinn le a biaknatau sia va tee tan, tuaciang biakinn sungah biakpiakna a nei mihing phaza hong sim tan.



²Ahihang a huang puanung sia na tee heak in, banghangziam cile tua mun sia Pathian he ngawlte atu a kipia sa hi a, amate in Khuapi Thiangtho sia tha sawmli le tha nii sung tuancil tu uh hi.

³Ka tetti te nii khau-ip puan silh in, ka paisak tu a, amate in ni 1,260 sungteng Pathian ii thu vaithak thangsak tu uh hi,” hong ci hi.

⁴Tetti te nii a cite sia leitung Topa mai ah a ding olive kung niite le meivak khuam niite ahi uh hi.

⁵Khat po in amate vawtsia tu in a sawm le, a kamsung pan meikuang hong pusuk tu a, a ngalte lalcipsak tu uh hi; tuaciang hi bangin a kuama po amate susia nuam in a kipante sia kithatlum tu hi.

⁶Amate in van khakbil in Pathian thu vaithak a thansak hun sungin, ngua a zuk sak ngawl natu in thu nei uh hi. Amate in ciktuite chisan a suasak thei natu thu nei sii uh hi; tuaciang amate in a uuk ni sim po in, leitung sia tuasiat ngimna lian nam theampo taw ngim piak thei natu zongh thu nei uh hi.

⁷Amate in a thu vaithak a thansak zawk uh ciangin, a hawng thukpui sung panin hong pusuk nganhing sia in, amate sim tu hi. Tua nganhing in amate zo in thatlum tu a,

⁸a luangte sia amate ii Topa thinglamte tungah a kithalupna mun tua khuapi lian sia sung lampi tungah kisial tu uh hi. Tua khuapi ii a minsealh sia Sodom ahibuale Egypt kici hi.

⁹Ngam, minam, kampau namte le minam khente pan mihingte in a luangte sia ni thum le ni lang sung en tu a, a phumsak buatu uh hi.

¹⁰Leitung mihingte in hite nii ii thi hu in lungdam tu uh hi. Amate in lungdamna poai khaam in, khat le khat letsong kithaak tu uh hi; banghangziam cile tua kamsangte nii in, mihingte tungah ngimna tam mama tungsak hi.

¹¹Ni thum le ni lang zawkciang, Pathian kung pan nuntakna a pia husanna hong pai in, amate sungah tum a, tuaciangin amate hong dingto uh hi; a mu theampo lau mama uh hi.



¹²Tua zawkciang kamsangte nii in “Hi sungah hong pai to tavun!” ci in vantung panin awnging tatak khat za hi. A ngalte mu tangin, amate sia meeikaai khat taw van ah kaato uh hi.

¹³Tua hun laitakin nasia tatak in zinliing hi; khuapi ii see sawm sua see khat laltham a, mihing tul sali thi hi. A omlai mihingte lau in vantung ah om Pathian letna pok uh hi.

¹⁴Liinna launa lian a niina sia bo ahihang a thumna sia hong pai pal tu hi!

Lemle A salina

¹⁵Tua zawkciang vantung lalang a salina sia in a lemle tum a, vantung ah awnging tatak taw, “Leitung uk natu vaangletna in ih Topa le ama Messiah ii neisa hi a, ama in, a tawntung a tawntungin uk tu hi!” ci hi.

¹⁶Tuasia ciang a kumpi tokhumte taw Pathian mai ah a to upa kul le lite bokin Pathian bia uh a:

¹⁷“Topa Pathian vaanglianbelpa, a om sa le tu a om pa, Na vaangletna lian zangh in, ukna kipan tu na hikom lungdam kong ko uh hi!”

¹⁸Pathian he ngawlte thin uukna taw kidim hi, banghangziam cile na thin uuk tu hun le, a thite tungah thu na khen tu hun hong theng zo hi. Na naseam kamsangte, a lian a no nang hong thasia theampote minphatna thaman na piak tu hun hi zo a, Leitung a lalsakte in a lalsak tu hun hong theng hi!” ci hi.

¹⁹Vantung ah Pathian biakinn sia kihong a, Thukham Thingkuang sia tua munah kimu hi. Tuasia zawkciang khualengin, vanto ngawp a, zinliing in ngial nasia takin kia hi.

Thu Pualaakna 12

Numei le Ngulpui

¹Tua zawkciang van ah a lian lim lamdang khat hong kilangh hi. A puan silh sia ni hi a, tha sia a peangnuai ah koi in, aksi sawm le nii a nei kumpi lukhu a lu tungah a khu numei khat om hi.



²Ama sia nausuak pal tu hi a, nautun natna te a thuakna hangin ama aukeak hi.

³A dang lim lamdang khat zongh, van ah kilangh hi. Lu sali le kii sawm a nei, a lute khat ii sim tungah kumpi lukhu a khu, ngulpui san lian mama khat om hi.

⁴A mei taw van a aksite see thum sua see khat kaikeak in lei ah sepsuk hi. Ama in numeinu maiah dingin nau a sua po ciang, a nau neaksak tu in om hi.

⁵Tuasia ciangin numei in tapa khat hong nei a, tua tapa in leitung minam theampo thik ciang taw uk tu hi. Ahihang a tano sia kisut a Pathian kung le a kumpi tokhum kungah kipaipui hi.

⁶Numei sia senneal ngam sungah tai a, Pathian vawt kholsaksa tuak munah ni 1,260 dong ama kikeamcing tu hi.

⁷Tua zawkciang vantung ah ngal kisimna piang hi. Michael le a vantung lalangte in ngulpui do uh a, tua ngulpui in, ama lalangte taw kopin leedo hi;

⁸ahihang ngulpui sia kizothal a, ama le a lalangte vantung ah a om tu uh a ki oai nawn bua hi.

⁹Tua ciangin taangh ngulpui lian Doaimangpa ahibuale Satan a kici leitung bup a theampa ngulpui lian mama sia, ama ii lalang theampo taw leitung ah hong kispuk hi.

¹⁰Tua zawkciang, vantung ah aw nging tatak khat ka za a, “Tu in Pathian ngupna sia hong theng zo hi! Tu in Pathian in Kumpipa a hina, a vaangletna hong lak zo hi! Tu in ama Messiah in a thu neina hong lak zo hi! Banghangziam cile Pathian mai ah ding a, ih suapuite sun taw zan taw a mawsakpa sia, vantung panin kivawk zo hi.

¹¹Ih suapuite in Tuuno chi le thumaan thutang a thansakna uh taw zawna nga zo uh hi; amate in a nuntakna uh pia in thi ngam hi.

¹²No, vantungte le tua munah a teangte awng, lungdam vun! Ahihang leitung le tuipi atu bangzata in lauhuai ziam! Banghangziam cile doaimangpa sia no



kungah hong pai suk zo a, hun tawm cilik bek nei lai ahi hunlam he in, thangsiatna taw kidim hi,” a ci hi.

¹³Ngulpui in leitung ah a kivawksuk thu a tel tak ciang, tapano a hing numei sia del tu in kipan hi.

¹⁴Tua numei sia senneal ngam ama omna a zot natu in muvanlai lian khat ii thakhui nii kipia a, tua munah kum thum le kum lang sung ngulpui ii sim natu pan kikeamcing tu hi.

¹⁵Tuateng zawkciang ngulpui in numeinu ataaih tu in, a kamsung pan, khuanawl tui a pusuaksak hi.

¹⁶Ahihang lei in numeinu hu hi; tua lei in a kamkaa in ngulpui kamsung pan hong luang tui sia valh hi.

¹⁷Ngulpui sia numei tungah a thin uuk mama a, Pathian ii thupiakte zui a, Jesus ii pualaak thumaan tungah a kip numeinu ii suan a taang lai te sim tu in kuan hi.

¹⁸Tuaciangin ngulpui sia tuipi vaalbo ah ding hi.

Thu Pualaakna 13

Nganhing Niite

¹Tua zawkciang nganhing khat, tuipi sung pan hong pusuak ka mu hi. Ama in kii sawm le lutang sali nei hi; a kiite khat sim tungah kumpi lukhu khat tek om a, a lutang khat sim tungah Pathian selnona min khat tek om hi.

²Tua nganhing sia pawlbeam bang hi a, a peang sia vom peang bang hi in, a kam sia tawpi kam bang ahi hi. Ngulpui in tua nganhing tungah, ama vaangletna, a kumpi tokhum le alian thuneina teng pia hi.

³Nganhing lutang khat sia thi dek takin a liam taw kibang napi a liam ma sia dam kik zo hi. Leitung theampo in lamdang sa in hi nganhing zui uh hi.

⁴Ngulpui in tua nganhing tungah ama thuneinate pia ahikom, mihing theampo in ngulpui a bia uh hi. Amate in nganhing zongh bia uh a, “Akua in hi nganhing taw kibang ziam? Akua in ama do zo tu ziam?” ci uh hi.



⁵Nganhing sia Pathian selnona kamte taw a ki phatsak natu le tha sawmli le tha nii sung teng thunei thei tu in thu kipia hi.

⁶Ama in Pathian min, a teenna le vantung ah a teangte theampo haamsiat tu in kipan hi.

⁷Ama sia Pathian mihingte do tu le a zo tu in kivawt a, be le phung, ngam, pau namcin le minamte tungah thuneina kipia hi.

⁸A kithatlum Tuuno ii neisa ahi leitung kikitphua maa a nuntakna laibu sungah a kikhum min neite simngawl, leitung a teang mihing theampo in a bia tu uh hi.

⁹“Tua ahiciang bil na nei uh le ngai vun!

¹⁰Ngal mat tu in a ki tavaw peuma kiman takpi tu a, namsau taw thalup tu in a ki tavaw peuma namsau taw ma ki thatlum tu hi. Hite hu in Pathian mihingte tungah thuak zawkna le upna kisamh hi,” ci hi.

¹¹Tuaciang leitung panin hong pai to nganhing dang khat ma ka mu hi. Ama in tuuno kii bangin kii nii nei a, ama in ngulpui pau bangin pau hi.

¹²Ama in nganhing masa sia ii thuneina lian tengma ama mai ah zangh hi. Ama in leitung le a tungah a om theampo in a liam ma a dam sa nganhing masa sia biasak hi.

¹³Hi nganhing niina sia in, a nasia nalamdang laknate vawt hi; ngual theampo mutang in vantung panin leitung ah meikuang taaksak hi.

¹⁴Nganhing masa sia ii mai ah a vawt thei nalamdang laknate taw leitung mihing theampo theam hi. Tua nganhing in namsau taw kiliamsua napi a nungta lai nganhing sia upat natu in milim khat a vawt natu amate sawl hi.

¹⁵Nganhing niina sia in nganhing masa sia ii lim sia a pau thei natu le ama a bia ngawl theampo a thalup thei natu in a sungah nuntakna hu khum hi.

¹⁶Nganhing in a no a lian, a hau a zawng, sila le sila ngawl mihing theampo te ii ziatsang khutte tungah le a talki te tungah tepteena a vawt natu in zawthawk thu taw sawl hi.



¹⁷Tua nganhing min ahibuale, a min luang a kizangh nambat tepteena a nei ngawl peuma vanh lei vanh zuak thei ngawl tu hi.

¹⁸Hi thu sungah ciimna zak thei tu kisamh hi. Khua ngaisut theina a nei peuma in nganhing nambat sia ii khiakna sia tuat thei tu hi, banghangziam cile, tua nambat sia mihing khat ii min ahi hi. Tua nambat sia 666 ahi hi.

Thu Pualaakna 14

Tuuno le A mihingte

¹Tuaciang ka et le Tuuno sia Zion Mual tungah a ding ka mu hi; ama taw mihing 144,000 dingkhawm uh a, ama min le a Pa min a talki tungah ki at hi.

²Tuiteautuak nging bang le vanto nging bang ahi, vantung panin awnging khat ka za hi. Music thiamte ii tengtong tum aw bang zongh ahi hi.

³Mihing 144,000 teng sia kumpi tokhum mai ah, nganhing li teng le upa kul le li teng taw ding uh hi; amate in lathak khat sa uh a, tua la sia amate bek ii heak thei ahi hi. Mihing nam theampo sung pan amate teng bekma a kitansa ahi uh hi.

⁴Amate in numeite taw omkhopna a nei ngei ngawl tangval thiangthote ahi uh hi. Amate in Tuuno paina theampo zui uh hi. Amate sia a taang lai mihing nam sung panin a kitan sate hi a, Pathian le Tuuno tungah a kipia masa phitte ahi uh hi.

⁵Amate sia leilot thuson hi ci in kihe ngei ngawl hi; amate sitbanna nei ngawl hi.

Vantung Lalang Thum

⁶Tuaciangin leitung mihingte, minam sim, be le phung sim, paunam sim le ngamsimte ii tungah a kip tawntung Lungdamna Thupha son tu a nei vantung lalang dang khat a saangna vui sungah a leang ka mu hi.

⁷Ama in awnging tak taw, “Pathian upat vun a, ama vaangletna pok vun! Banghangziam cile ama ii thukhen tu hun hong theng zo hi. Vantung, leitung, tuipi le ciktuite a vawtpa bia vun!” ci hi.



⁸Vantung lalang a niina sia in a masa sia zui a, “Numeinu lal zo hi. A lian mama Babylon lal zo hi. Ama in a paktatna sapittui sia mihing theampo in nesak zo hi,” ci hi.

⁹Vantung lalang a thumna sia in a masate nii zomin, awnging tak taw, “A kuama po nganhing lim bia a, ama tepteena sia a talki tung ahibuale a khutte tungah a saangte in,

¹⁰Pathian thangsiatna sapittui ne tu uh hi. A thin uukna hai sungah a thahatna a dim in a sunsuk sapittui dawn tu uh hi. Hi bang a ahite theampo in, vantung lalang thiangthote le Tuuno mai a meikuang le kaan sa sungah vawtsiat zazanna a thuak tu uh hi.

¹¹Amate ngim a pia meikuang khu sia, a tawntung a tawntungin zaam to hi. Nganhing le milim bia in, a min tepteena a nei theampo sia sun zong zan zong nop tuamna a nga bua uh hi,” ci in au uh hi.

¹²Pathian thu ni a Jesus tungah a thumaan Pathian mihingte atu in thuak zawkna kisamh hi.

¹³Tua zawkciang, vantung panin awnging khat ka za a, “Hi sia at in. Tu pan kipan Topa nasepna sungah a thite sia mihing thupha ngate ahi uh hi,” ci hi. “Hi tatak hi! Amate in nasep haksatnate panin, tawlngakna nga tu hi, banghangziam cile amate nasep phatna in amate zui tu hi,” ci in Thaa in zo hi.

Leitung Anlaakna

¹⁴Tuaciang khua ka et ciang, meeikaang khat ka mu a, tua meei tungah mihing bang khat to hi; a lu tungah kham kumpi lukhu khat khu a, a khut sungah phiau hiam khat toai hi.

¹⁵Tuaciang vantung lalang a dang khat in, biakinn sung pan hong pusua a, meei tungah a to pa ii munah, hi bangin nging tak oksan hi. “Na phiau zangh in, an la in, banghangziam cile a hun hong theng zo hi; leitung ante laak tu in min zo hi!” ci hi.



¹⁶Tuaciang meei tung a to sia in, a phiau lei ah hong vik a, leitung an hong kila hi.

¹⁷Tua zawkciang vantung lalang dangkhat sia vantung biakinn sung pan hong pusuak a, phiau hiam khat ma nei hi.

¹⁸Tua zawkciang meikuang a ukpa ahi vantung lalang dangkhat biaknatau panin hong pai hi. Ama in phiau hiam a nei vantung lalang tungah awnging tak taw au hi. “Na phiau zangh in a, leitung sapit huante panin sapit ngate at in, banghangziam cile, sapitte min zo hi!” ci hi.

¹⁹Tua ahikom vantung lalang in, a phiau sia leitung ah hong vik a, sapit huan panin sapit ngate a at zawkciang, Pathian thin uukna ahi sapittui sukna set sungah, tua sapit ngate hong lawnsuk hi.

²⁰Sapit ngate sia khuapi pua a om, sapittui sukna set sungah kisuuk in, tuaciang tua sapittui sukna set pan chi hong luang a, tua chi sia metre 2 detak thukin, kilometre 300 dong bang tuipawm bangin hong luang hi.

Thu Pualaakna 15

A khakbel Tuasiat ngimna liante taw Vantung Lalangte

¹Tuaciangin van ah a lian a lamdang lim khat ka mu hi. Tuasiat ngimna lian nam sali a toai vantung lalang sali om a, Pathian thin uukna a lak a tawpkhakna ahikom, tuate sia a khakbel tuasiat ngimna liante ahi uh hi.

²Tuaciangin meikuang taw kihel limlangh tuipi bang khat ka mu hi. Nganhing, ama lim le a min nambat taw a kipia sate tungah zawna a ngate zongh ka mu hi. Amate sia Pathian piak sa tengtongte toai in limlangh tuipi hui ah dingin

³Pathian naseampa Moses la le Tuuno la sa uh a: “Topa Pathian vaanglianbelpa, Na sep, na vawtnate bangza in lianin lamdang ziam! Minamte ii Kumpipa awng, na lampi sia bangza in tang a, maan ziam?”

⁴Topa awng nang lamdang hong sa ngawlin akua ding tu ziam? Akua in na letna a thansak tu nial ngam tu ziam? Nangma bek na thiangtho hi. Minam



theampo hong pai in nang hong bia tu hi, banghangziam cile, thumaan na ngamtatnate mihing theampo in hong mu siat uh hi,” ci hi.

⁵Tuasia zawkciang a sungah Pathian ii a Thiangtho Buk a om, vantung biakinn a kihong sia ka mu hi.

⁶Tuasiat ngimna lian nam sali a nei vantung lalang salite, biakinn pan hong pusuak uh a, a thiangtho puanpaak Neal, a tee ziazuate silh in, a awm uh ah kham kawngkhaute kisawm hi.

⁷Tua zawkciang a nungta nganhing lite sung pan khat in vantung lalang salite tungah a tawntung a tawntungin a nungta Pathian thin uukna taw a kidim khamkhaw salite pia hi.

⁸Biakinn sia Pathian minthanna le vaangletna meikhu taw kidim hi, tuaciangin vantung lalang salite ii hong paipui uh tuasiat ngimna lian nam salite a ven dongin kuama in biakinn sungah a tum thei bua uh hi.

Thu Pualaakna 16

Pathian Thin uukna Khawte

¹Vantung lalang salite tungah biakinn panin awnging tatak khat in: “Pai tavun a, Pathian thin uukna khaw salite leitung ah sungasuk tavun!” a ci ka za hi.

²Vantung lalang a masa bel sia pai in leitung ah a khaw a sungasuk hi. A kiitak huai le a bot mama meimate sia a nganhing ii kiteptena a neite le tua ii lim a bia teng tungah hong piang hi.

³Tua zawkciang vantung lalang a niina sia in a khaw sia tuipi tungah sungasuk hi. Tui sia mithi khat ii chisan bang suak a tuipi sungah nuntakna a neite theampo thi siat hi.

⁴Tua zawkciang vantung lalang a thumna sia in a khaw sia ngunte le ciktuite tungah hong sungasuk a, tuate chisan suak siat hi.

⁵Tuite a uk vantung lalang in, “Tuhun le a bo sa hunin a om a Thiangtho Pa awng, na thukhennate tang hi!



- ⁶Amate in Pathian mihingte le, kamsangte chisan keesak ahikom amate dawn tu in chisan a pia zo hi. Amate in a kiphu a kilawm in thuak hi,” a ci ka za hi.
- ⁷Tuaciang biaknatau pan aw khat ka za a, “Topa Pathian Vaanglianbelpa awng! Na thukhennate maanin tang takpi hi,” ci hi.
- ⁸Vantung lalang a lina sia in, ni tungah a khaw hong sung a, tuasia ciang, nisatna meisa bang hi in, mihingte kaangsak hi.
- ⁹Amate sia a sa mama nisa in hal uh a, tuaciang amate in, hi tuasiatte tungah a thunei Pathian ii min haamsiat uh hi. Ahihang amate in a mawnate pan kisiik ngawlin ama ii letna zongh a pok bua tu uh hi.
- ¹⁰Tua zawkciang vantung lalang a ngana sia in, nganhing sia ii kumpi tokhum tungah a khaw hong sung suk hi. Nganhing ii ukna ngam sungah khuazing hong theng a, mihingte in na a sak hu in a leei pet uh hi,
- ¹¹tuaciang vantung Pathian tungah a meima botte hu in, haamsiat uh hi. Ahihang amate ngitlona pan a kisiik tuan bua uh hi.
- ¹²Vantung lalang a lukna in, Euphrates ngun tungah a khaw hong sung suk hi. Nguntui hong kang a niswana sang panin hong pai tu kumpipate atu in lampi piangsak hi.
- ¹³Tua zawkciang ulol taw a kibang thaa nin thum ka mu hi. Tuatte in ngulpui kamsung, nganhing kamsung le leilot kamsangpa kamsung panin hong pusuak uh hi.
- ¹⁴Amate sia nalamdang laknate a vawt doaite thaa ahi uh hi. Vaanglianbelpa Pathian ii ni thupi Ni in, ngal kidona sungah a khawmtua tu in leitung kumpipate theampo kungah hi thaa thumte pai uh hi.
- ¹⁵“Ngai vun! Nguta khat taw kibangin kong pai tu hi! Ngual mai ah pumnguak in om a, maizum a nga ngawl natu in, mu ngawlin a puansilhte a keamcing pa sia mihing lungdam ahi hi.”
- ¹⁶Tua zawkciang tua thaate in kumpite sia Hebrew kam a Armageddon a kicina munah hong paipui uh hi.



¹⁷Tuasia ciang vantung lalang a salina sia in, a khaw sia vui sungah hong sunguk hi. Biakinn sung kumpi tokhum tung pan, awnging tatak khat hong nging a, “Kiman zo hi!” ci hi.

¹⁸Khua hong leng vazal a, luum vangam in van hong to a, a lauhuai mama in zinliing hi. Hisia in zinliing theampo sung pan a nasia bel hi; mihingte a kubitphua pan kipan tuabang zinliing a om ngei bua hi!

¹⁹Khuapi lian sia khen thum in hong kiphaltham uh a, tuaciangin ngam theampo a khuapite sia kilalsak siat hi. Pathian in Babylon khuapi sia phawkin a thin uuk thangsiatna sapittui sia— ama hai panin dawnsak hi.

²⁰Tuikulh theampo bo in, mual theampo mangthang siat hi.

²¹Khat ciang kilogramme sawm nga bang a pha tu ngialtang lian mama te van panin mihingte tungah kia hi, tua tuasiat ngimna lian sia nasia lei lawlawm ahikom, tua ngial kiate hangin mihingte in Pathian haamsiat uh hi.

Thu Pualaakna 17

A minthang Pumpi zuak Numei

¹Khaw sali a nei vantung lalangte sali sung pan khat kei kungah hong pai in, “Hong pai tan, a minthang pumpi zuak nu, ngun tam mama hui ah a kisaat khuapi sia bangbangin daan kipia tu ziam, ci in kong lak tu hi.

²Leitung kumpipate in ama taw paktat khialna vawt uh a, leitung mihingte in ama paktatna sapittui ne in kham uh hi,” ci hi.

³Thaa in kei hong uk a, tua zawkciang vantung lalang khat in, senneal ngam khat sungah hong paipui hi. Tua munah numei khat sia, a pumpi tung theampo a dim in, Pathian selnona minte a ki at nganhing san khat ii tungah a to ka mu hi; tua nganhing in lutang sali le kii sawm nei hi.

⁴Numei in puan sannum le puansan silh in, kham kizepna tuatuamte, suang manphate le keptangte taw kizeam hi. Ama khut sungah a paktatna pan, a piang a kiihuai le a nin nate taw a kidim khamhai khat toai hi.

⁵A talki tungah, min khat ki at a, a kiphualseal khiakna sia: “Leitung ah numei pumpi kizuak theampo le zummawk ngamtatna neite ii nu, A lian Babylon,” ahi hi.

⁶Tuaciangin numei nu sia Pathian mihingte chisan le Jesus tungah a thumaan uh hu in a kithatte chisan sia zukham bangin a kham ka mu hi. Ama ka mu ciangin lamdang ka sa mama hi.

⁷“Banghangin lamdang sa ni ziam?” ci in vantung lalang in hong dong hi. “Numei le ama a pua lutang sali le kii sawm a nei nganhing ii a kiphualseal khiakna sia kong son tu hi.

⁸Nganhing sia khatvei lai nungta ngei ahihang tu in nungta nawn ngawl hi; ama sia a hawng thukpui sung panin, hong pusuak to dektak zo a, a kisia tu in pai tu hi. Leitung bitphua ma in, nuntakna laibu sungah a min uh a kikhum ngawl, Leitung ah a nungta mihing theampo in, nganhing sia a et uh ciangin, lamdang sa tu uh hi. Ama sia khatvei lai in nungta ngei hi; tu in nungta nawn ngawl hi, ahihang khat vei hong kilangh kik tu hi.

⁹“Hi sia taw kisai in, ciimna le teltheina nei tu kismh hi. Lutang salite in, tua numei tona mual sali ahi hi. Amate in kumpi sali te zongh ahi hi:

¹⁰amate sung pan nga sia taak zo a, khat sia maang lai hi; tuaciang a dang khat sia hong pai ngawl lai hi; hong pai ciang zong tawmvei bek uk tu hi.

¹¹Tuaciangin khatvei a nungta ngei ahihang tu in a nungta nawn ngawl nganhing sia ma in, kumpi a liatna hi, ama sia salite sungah kihel a, a kisia tu in pai tu hi.

¹²“Kii sawm na mu teng sia, ngam uk tu a kipan ngawl lai, kumpi sawmte hi a, ahihang nai khat sung tua nganhing taw kumpi a suak tu in, thuneina kipia tu hi.

¹³Hi sawm teng in tupna kibang nei uh a, a vaangneina le a thuneina uh sia nganhing tungah pia tu uh hi.

¹⁴Amate in Tuuno sia do tu uh hi; ahihang Tuuno in ama sapsa, tealsa le a thumaan nungzuite taw kopin zothal tu uh hi, banghangziam cile ama sia Topate ii Topa, kumpite ii Kumpipa ahi hi,” ci hi.

¹⁵Vantung lalang in hi bangin hong ci sii hi, “Pumpi zuak nu ii a tung a to laitak na mu tuite sia ngamte, mihingte, minamte le kampaute ahi hi.

¹⁶Kii sawm na mute le nganhing in pumpi zuaknu sia ensan tu hi; ama neisa theampo sia amate in laaksak tu a, a pumnguak in nusia tu hi; ama sa ne tu a, mei taw ama sia haltum tu hi.

¹⁷Banghangziam cile Pathian in, amate ii thin sungah ama tupnate a sep khop nop natu, Pathian kammalte a tun mateng a uk natu in, nganhing tungah amate vaangneina pia uh hi.

¹⁸“Numei na mu sia in leitung kumpite a uk khuapi lian sia ahi hi,” ci hi.

Thu Pualaakna 18

Babylon Khuapi Lalna

¹Hi sia zawkciang vantung panin, vantung lalang a dangkhat hong tuaksuk ka mu hi. Ama in thu neina lianpi nei a, ama vaang in leitung bup taangsak hi.

²Ama in nging takin au a, “A lian Babylon khuapi cim zo hi! cim zo hi! Ama sia tu in doate le thaa ninte in teenna in nei hi; a kiihuai le a ngaimawk huai vacimte zongh a sungah teang hi.

³Banghangziam cile, minam theampote in ama ii paktat sikvilna sapittui ciik ne uh hi. Leitung kumpipate in ama taw paktat khialna vawt uh a, leitung sumvawtte in ama ii ciangtan om ngawl sikvilna hangin hau law uh hi,” ci hi.

⁴Tua zawkciang vantung panin aw dang khat hi bangin ka za hi; “Hong pusuak tavun, ka minamte awng! Ama kung pan hong pusuak tavun; Ama ii mawnate sungah kihel heak vun! ama ii daan thuakpui heak vun.

⁵Banghangziam cile ama mawnate in van ban a, Pathian in ama ngitlonate ciamtee hi.



⁶Ama ii note tungah hong ngamtat bangma in note zongh amate tungah ngamta vun. Ama septe a zanii in lo kik vun. Note atu hong vawt sa sia sangin a zanii in a ciik zaw sapittui ama neak tu in a hai sungah sung in.

⁷A minthanna le a nopsaknate ama le ama a kipiakna taw kizui in, ngimna le heena na thuaksak in. Banghangziam cile ama in: ‘Hi sungah kei sia kumpinu in to khi hi! Kei sia meingong hi ngawl khi hi. Khuangai ngei ngawl tu khi hi!’ a kici hi.

⁸Hisia hu in ni khat ni ciang ama in tuasiat ngimna liante ahi — natna, heena, kial tunna, thuk tu hi. Ama thu a khen Topa Pathian sia thahat ahikom, ama sia mei taw kihal tu hi.”

⁹Ama taw paktatna sungah a kihel leitung kumpite in tua khuapi kak tumna meikuangte pan meikhu a mu ciangin au in kap tu uh hi.

¹⁰Amate in ama thuakna sia a thuakpui ngam bua uh a, a khualana ah ding uh hi. Amate in, “Bangza in kiitak huai ziam! Bangza in lau huai ziam! Hi a lian le a hat Babylon khuapi! Nai khat sung tengin daan hiza na tawk hi,” ci uh hi.

¹¹Kuama in amate vanhte a lei nawn bua uh a, leitung sumvawtte in, ama hu in kapin khuangai uh hi,

¹²kuama in a kham, a ngun, a suangmanpha, a keptangte; puan le puan sannumte, naaipuan, puansan; a muham thing manpha namcin, saiha taw a kivawt thil tuatumte, thing manham taw kivawt nate, taungo, thik le marble suang taw a kivawtte, a lei nawn bua uh hi;

¹³thing namtuite, sathau namtui, thil namtui myrrh le frankincense thinghaw namtuite; sapittui le sathau, anvui le zungtaang, khui, tuu, siphute le leangte, sila le mihing nuntaknate dong, a khawng nawn bua uh hi.

¹⁴Sumvawtte in ama tungah, “Na thangai vanh pha theampo sia bomang siat zo a, na hauna le na khiaklaakhuaina theampo bo siat zo hi, tuaciang in tuate bangma hunin na nga kik ngei nawn buatu hi!” ci uh hi.



¹⁵Tua khuapi sungah sum vawt a haute in, hi ama thuaknate kiita in a thuakpui ngam bua uh a, a khualana ah a ding tu uh hi. Amate kapin a tau tu uh a,

¹⁶tuaciangin, “Bangza in kiitak huai ziam! Tua khua atu in bangza in lauhuai ziam! Ama le ama sia naipuan taw, puan sannum taw, puansan taw kizeam in, kham kizepna, suangmanpha le keptangte taw kizeam ngei hi!

¹⁷Nai khat sungah a hauna theampo taan siat zo hi,” ci uh hi. Teambaw ukpa le a to mihingte, teambaw naseamte, tuipi tungah naseam in nuntak natu a thalawte le a dang theampo, a khuala na ah dingin,

¹⁸ama a kaangtum meikuangte pan meikhu sia a mu uh ciang, “Hi khuapi lian taw a kibang khuapi dang om ngei ngawl hi!” ci in au uh hi.

¹⁹Amate in a lutung uh ah leivui kithe in, au in tau in, hi bangin ci uh hi. “Bangza in kiitak huai ziam? Tua khuapi atu in bangza in lauhuai ziam! Ama sia tuipi tungah a pai teambawte a nei te theampo ama hauna taw a hausak khuapi ahi hi! Nai khat sung teng in taan siat zo hi!”

²⁰Vantung awng, ama lalna hu in, lungdam in! Pathian mihingte, sawltakte le kamsangte awng, lungdam tavun! Banghangziam ci le ama ii note hong vawtna hu in, Pathian in ama daan pia zo hi!

²¹Tua zawkciangin vantung lalang a thahat khat in, an ngoaina suang cia a lian suang khat la in tuipi sungah deangsuk in, hi bangin ci hi. “Khuapi lian mama Babylon sia hi bangin kilawn suk tu a, a kimu kik nawn buatu hi.

²²Tengtong tumna awte le mihing lasaknate, tamngai le lemle tumnate sia nang sungah a kiza ngei nawn buatu hi! Nuntak zonna naseamte nang sungah kuama a kimu nawn buatu hi; an ngoaina suang nging zongh nang sungah a kiza nawn buatu hi!

²³Meiinn taang zongh nang sungah a kimu nawn buatu hi; mo le zi neipa awte zongh nang sungah kiza nawn ngawl tu hi. Na sum vawtte sia leitung theampo ah a hatbelte hi a, na ngual theamna ai taw leitung mihingte theampo na theam siat hi!”



²⁴Kamsangte le Pathian mihingte chisan, leitung ah a kithatlumte theampote ii chisan sia, tua khuapi sungah kimu ahikom Babylon khuapi sia daan kipia hi.

Thu Pualaakna 19

¹Hisia zawkciangin, vantung a mihonte awnging bang khat ka za hi. “Hallelujah, Pathian pok vun! Ngupna, minthanna, vaangletna Pathian neisa ahi hi!

²Ama ii thukhennate sia maanin tang hi! Ama in a paktatna taw leitung a lalsak pumpi zuaknu sia nilkeak zo hi. Pathian in ama daan pia hi, banghangziam cile ama in Pathian naseamte thatlum hi,” ci uh hi.

³Tuaciangin amate au kik a, “Hallelujah, Pathian pok vun! Khuapi a kaangtumsak meikuang pan meikhu in a tawtung a tawtungin kaato hi!” ci hi.

⁴Upa kul le li le nganhing nungta li teng sia bokin kumpi tokhum tungah a to Pathian bia uh hi. Amate in, “Amen! Pathian Pokvun!” ci uh hi.

Tuuno Mopoi

⁵Tua zawkciang kumpi tokhum panin aw khat hong nging a, “Pathian pok vun, a naseam theampo le ama a thasia mihing a lian a no theampote in pok vun!” ci hi.

⁶Tuaciangin tuiteau nging bang le vanto nging bang mihonpi auna aw bang khat ka za hi. Tua awte in, “Topa pok vun! Banghangziam cile Topa, eite ii Vaanglianbel Pathian sia Kumpi ahi hi!

⁷Eite lawpin lungdam tawng; ama letna pok tawng! Banghangziam cile Tuuno mopoi hun hong theng zo a, ama mo tu sia in ama le ama kipua sa in om zo hi.

⁸Ama silh tu in a thiang, a tee vazia puante kipia zo hi,” ci uh hi. (A puanneal in Pathian mihingte ii na pha a septe ahi hi.)



⁹Tuaciangin vantung lalang in kei tungah, “Hi thu at in: Tuuno mopoai sungah a kisamte sia mihing lungdamte ahi hi,” hong ci hi. Tuaciang vantung lalang in, “Hite sia Pathian son tatak kammalte ahi hi,” hong ci thua lai hi.

¹⁰A peang ah ama bia tu in ka bok hi, ahihang, ama in, “Hong bia heak in! Keima in, Jesus ii hong pualaak thumaan thutak a kholet nangma le na suapuite theampo taw naseam khawm khat ka hi hi. Pathian bia in!” hong ci hi. Banghangziam cile Jesus ii hong pualaak thumaan thutak in kamsangte thinsung a hil sia ahi hi.

Siphu Kaang tungah A to pa

¹¹Tuaciang vantung kihong in ka mu a, tua sungah siphu kaang khat om hi. A tung to pa sia Thumaan Thutang kici hi; ama in khaikim takin thukhen a, a ngalte do hi.

¹²Ama mittangte sia meikuang bang hi a, a lu tungah kumpi lukhu tam mama khu hi. Ama sim ngawl kuama dang ii a heak ngawl min khat ama tungah ki at hi.

¹³Ama silh puantual sia in chisan taw kidim hi. Ama min sia “Pathian Kammal” ahi hi.

¹⁴Vantung ngalkap honte in puankaang neal silh a, siphu kaang tungah to in ama zui uh hi.

¹⁵Ama kamsung panin a hiam namsau khat pusuak a tua taw ngam theampo a zothal tu hi. Amate tungah ama in thik ciangkhut taw uk tu a, vaanglianbelpa Pathian thin uukna ahi sapittui sukna sungah sapittuite siikcil tu hi.

¹⁶A puantual tung le a pheizang tungah, “kumpite ii Kumpipa, Topate ii Topa,” ci in a min ki at hi.

¹⁷Tua zawkciang vantung lalang khat sia ni tungah a ding ka mu hi. Ama in vui sungah a leang vacimte munah awnging tatak taw, “Pathian poaipi sungah pai tu in hong kikhawmtua tavun!



¹⁸Kumpipate, ngalkap maangte, ngalkapte ii sa, siphute le a tung a tote ii sa, mihing theampo, sila le sila ngawlte, a lian a note ii sa ne tu in, hong pai tavun!” ci hi.

¹⁹Tua zawkciang nganhing le leitung kumpipate le a ngalkap honte in siphu tung a to pa le a ngalkap honte sim tu in hong kingawmtua uh hi.

²⁰Nganhing le tua nganhing omna ah, nalamdang lakna a vawt leilot kamsangpa kiman khawm hi. (Nganhing tepteena a neite le, nganhing milim a biate sia, nalamdang laknate taw ama in theam zo hi) Nganhing le leilot kamsangpa sia, kaan meikuang meili sungah a hingtang in kivawk khawm hi.

²¹A ngalkap honpite sia siphu tung a to pa kamsung pan hong pusuak namsau taw kithatlum uh hi; tuaciang vacim theampo in a sa a du zaza in ne uh hi.

Thu Pualaakna 20

Kum Tulkhat

¹Tua zawkciang vantung panin vantung lalang khat hong tuaksuk ka mu a, a khut sungah a hawng thukpui kikhana tawtang le thikkhau ngit khat toai hi.

²Ama in taangh ngulpui — Doaimangpa kici Satan — sia man a, kum tulkhat sung thikkhau taw khit hi.

³Vantung lalang in ama sia a hawng thukpui sungah lawnsuk a, taw kalh in, kum tulkhat a cin mateng, minam tuatuamte a theam thei ngawl natu in a kongkha ah tepteena tuum hi. Tua zawkciang ama sia tawmvei sung kitha kik tu hi.

⁴Tua zawkciang kumpi tokhumte ka mu a, a tungah a to te in thu a khen thei natu in vaangneina kipia hi. Pathian kammalte le Jesus ii pualaak thumaan thutak te a thansak uh hu a, a kithatte ii thaate zongh ka mu hi. Amate in nganhing le a lim a bia bua uh hi, tua bek dom ngawlin, a talki tungah ahibuale a khutte tung zongh ah nganhing tepteena a nei bua uh hi. Amate in hong nungta kikin Christ taw kum tulkhat kumpipate bangin a uk uh hi.

⁵(Kum tulkhat a cin mateng in, a thisa a taanglai te kuama a nungta kik a om bua uh hi.) Hi a thite thawsak kikna sia a masa bel ahi hi.



⁶Hi a thite thawsakna masa sungah a kihelte sia nasia takin thupha saangte hi uh a, a lungdamte ahi hi. Nii vei thina in amate tungah vaangneina a nei nawn bua hi; amate sia Pathian le Christ ii thiampite a hi tu uh a, ama taw kum tulkhat maangkawm tu hi.

Satan Zawthalna

⁷Kum tulkhat a bo zawkciang, Satan sia a thong pan ki tha kik tu a,

⁸leitung mun theampo ah a ki thethaang Gog le Magog minamte theam tu in pai tu hi. Satan in tuate theampo sia ngalsim tu in hong kaikhawm tu a, tuipi vaal ah senvuite za in tam tu uh hi.

⁹Amate in leitung bup ah kizel in, Pathian mihingte ii phual le a it khuapi a kiim uum uh hi. Ahihang vantung panin, meikuang hong taaksuk a, amate lalsak hi.

¹⁰Tua zawkciang amate a theam Doaimangpa sia nganhing le leilot kamsangpa kivawkna kaan meili sungah kivawt hi; tuaciangin amate sia sun taw zan taw a tawntung a tawntung ngim kipia tu hi.

A khakbel Thukhenna

¹¹Tuaciangin a lian kumpi tokhum kaang khat le a tungah a to pa ka mu hi. Leitung le vantung sia ama omna panin tai uh a, mu mun om nawn ngawl hi.

¹²Tuaciangin a thite a lian le a no a kibangin kumpi tokhum mai ah a ding ka mu hi. Laibute kihong a, tua zawkciang a nungtate tepteena laibu dang khat zongh kihong hi. A thite sia tua laibu sungah amate ngamatatna a kitepteena bangin thu kikhen hi.

¹³Tua zawkciang tuipi in ama sungah a thite aap hi. Thina le mithi khua in amate kep a thite aap uh hi. Tuaciang, a vekpi in a sepna uh bangin thu kikhen hi.

¹⁴Tua zawkciang thina le mithi khua sia zongh meili sungah kisp hi. (Hi meili in nii vei thina ahi hi.)

¹⁵A nungtate min khumna laibu sungah a min a om ngawl peuma meili sungah kilawn hi.



Thu Pualaakna 21

Vanthak le Leithak

¹Tuaciangin vanthak le leithak khat ka mu hi. Vantung masa sia le leitung masa sia bo mang zo a, tuipi zongh bo hi.

²Mothak khat a pasal tu taw kimu tu in a kipua bangin vantung Pathian kung panin Khuapi Thiangtho ahi Jerusalem khua thak hong tuaksuk sia ka mu hi.

³Kumpi tokhum panin a nging in a pau khat ka za hi: “Tu in Pathian omna inn sia mihingte taw om khawm zo hi! Ama in amate taw teang khawm tu a, ama mihingte a hi tu hi. Pathian mama in amate taw omkhawm tu a, ama in amate Pathian ahi tu hi.

⁴Amate mittang sung pan, thitui theampo nawlsak tu hi. Thina, heena, kaana le natnate a om nawn buatu hi. A lui sa na theampo bo mang zo hi,” ci hi.

⁵Tuaciangin kumpi tokhum tungah a to sia in, “Tu in na theampo a thak in ka vawt hi!” a ci zawkciang kei tungah, “Hi kammalte sia maan a muan thamman ahikom, lai taw at in” hong ci si hi.

⁶Tuaciang ama in, “Kiman zo hi! Kei sia a kipatna le a tawpna ahi a masa bel le a khakbel ka hi hi. A dangko theampo tungah manh piak ngawlin nuntakna ciktui a neak thei natu thu ka pia tu hi.

⁷Zawna a nga pawpo kei tung pan a saan tu thu in: Kei sia ama Pathian ka hi tu a, ama sia Keima tapa ahi tu hi.

⁸Ahihang a lauthauh, ngual leeheakte, zummawk seamte le ngual thatte, a paktatte, bum le ai toaite, milim biate, le a leilot thei theampote — a om natu sia nii vei thina ahi kaan meili sia ahi hi,” hong ci hi.

Jerusalem Thak

⁹Tuasiat ngimna lian khaw sali a nei vantung lalang salite sung pan, khat in kei kungah hong pai in, “Hong pai tan, mo ahi Tuuno zi kong lak tu hi,” hong ci hi.



¹⁰Thaa in kei hong uk a, vantung lalang in, mualsaang mama khat ii dawn ah hong paipui hi. Ama in Vantung Pathian kung pan a hong paisuk Khuapi Thiangtho ahi Jerusalem khua hong lak a,

¹¹tua khuapi sia Pathian minthanna taw tee ziikzeak a, jasper suangmanpha bangin taangin, crystal suang bangin thiang sitset hi.

¹²Tua khuapi luphung sia saa in saang mama a, kongpi sawm le nii om in vantung lalangte sawm le nii in cing hi. Kongpite tungah Israel minam sawm le niite min ki at hi.

¹³A pangh khat sim in kongpi thum veu om hi: thum sia nisuana sangah, thum sia thang sangah, thum sia sak sangah, thum sia nitumna sangah om hi.

¹⁴Khuapi luphungte sia phungkawng tawdap sawm le nii tungah ki ciangto a, tuate ii tungah Tuuno sawltak sawm le niite min ki at hi.

¹⁵Kei hong paupui vantung lalang sia in, Khuapi kongpite le a luphungte a tee natu in kham piciang khat nei hi.

¹⁶Khuapi sia kingh li nei a, a dung le a vai kikim hi. Vantung lalang in khuapi sia a teena piciang taw tee a: kilometre 2,400 pha in, a dung, a vai le a saanna kikim linlian hi.

¹⁷Vantung lalang in ama zak piciang taw a luphung zongh tee a, metre 60 saang hi.

¹⁸Khuapi luphung sia jasper suangmanpha taw kiciangin, a khuapi mama sia kham ciitak taw a kivawt hi a, limlangh bangin a thiang sitset hi.

¹⁹Khuapi luphung tawdapte sia suangmanpha namcin taw kivawt hi. A tawdap masa phit sia jasper hi a, a niina sia sapphire hi, a thumna sia agate a cite hi a, a lina sia emerald hi,

²⁰a ngana sia onyx hi a, a lukna sia carnelian hi, a salina sia yellow quartz hi a, a liatna sia beryl hi, a kuana sia Topaz hi a, a sawmna sia chalcedony hi, a sawm le khatna sia turquoise hi a, a sawm le niina sia amethyst ahi hi.



²¹A kongpi sawm le niite sia keptang sawm le nii hi a; kongpi khat sim in keptangpui khat taw kivawt hi. Khuapi lampite sia kham ciitak hi a, limlangh bangin kimu let thei hi.

²²Topa Vaanglianbelpa Pathian le a Tuuno sia khuapi ii biakinn hi zo ahikom, khuapi sungah biakinn ka mu bua hi.

²³Tuuno sia khuapi ii meiinn hi zo a, Pathian minthanna vaang sia, ama tungah taang zo ahikom, tua khuapi in nitaang le thataang a kismh bua hi.

²⁴Tua khuavak taang sungah leitung mihingte lampai tu uh a, leitung kumpite in khuapi sungah a nei a lamhte hong paipui tu uh hi.

²⁵Zan om ngawl tu ahikom, kongpite ki khakcip ngei ngawl tu a, ni bupin kihong suak tu hi.

²⁶Minamte letna le hauna sia tua khuapi sungah hong kipaipui tu hi.

²⁷Ahihang a thiangtho ngawl, a maizum huai a, a ngamtate le leilot theite kuama tua khuapi sungah a tum thei buatu uh hi. Tuuno nuntakna laibu sungah a min a kikhumte bek tua khuapi sungah tum thei tu uh hi.

Thu Pualaakna 22

¹Vantung lalang in, Pathian le Tuuno kumpi tokhum kung pan hong luang suk, crystal suang bangin a tee wakil nuntakna nguntui sia hong lak a,

²khuapi sung lampi laizang ah luangsuk hi. Ngun ii a lang le lang ah nuntakna thingkung khat veve po a, tua thingkung sia, thasim in khat vei veu kum khat in sawm le nii vei nga hi. Tuaciangin a thingtee te sia minamte cidamsak natu ahi hi.

³Pathian haamsiatna nuai ah a om peuma, khuapi sungah kuama a kimu buatu hi. Pathian le Tuuno ii kumpi tokhum sia khuapi sungah om tu a, a naseamte in ama bia tu uh hi.

⁴Amate in a maitang mu tu a, amate talki tungah a min ki at tu hi.



⁵Zan a om nawn buatu a, amate in meiinn le nitaang kismah nawn ngawl tu hi, banghangziam cile Topa Pathian sia amate khuavak hi tu a, amate in a tawntung a tawntungin ukna nei kumpite bangin a maang tu uh hi.

Jesus Hong paina

⁶Tua zawkciang vantung lalangin, kei tungah, “Hi kammalte sia maan a, muan taak hi. Kamsangte tungah a Thaa a pia Topa Pathian in hai ngawlin hong piang tu thute, a naseamte tungah lak tu in vantung lalang hong sawl hi.”

⁷“Ngai vun! Kei sia hong pai pal tu khi hi. Hi laibu sungah son kholnate a zuite in mihing hamphate ahi uh hi,” Jesus in ci hi.

⁸Keima John in hite theampo ka za zo a, ka mu zo hi. Tuaciang ka zaak zawkciang le ka mu zawkciangin, vantung lalang peangah ka bok a, hi nate hong lak vantung lalang sia bia tu in ka kipan hi.

⁹Ahihang ama in kei tungah, “Kei hong bia heak in! Keima in nangma le na suapuite ahi kamsangte le hi laibu sungah a om thute a zuite theampo taw naseam khawm khat ka hi hi. Pathian bia in!” hong ci hi.

¹⁰Tuaciangin vantung lalangin kei kungah, “Hi laibu sungah a ki at thute hong tun tu hong nai zo ahikom, incip heak in” hong ci hi.

¹¹A ngilo sia in a ngitlo bangin paisuak taken a, a kiihuai sia in a kiihuai bangin zomsuak taken; a kuama po mihing phate in phatna vawtsuak taken a, a thiangthote in a thiangtho in om suak taken,” hong ci hi.

¹²Jesus in, “Ngai in! Kong pai pal tu hi. Mihing sim tungah ama ii sepna bangin, ka piak tu thamante kong keng tu hi.

¹³Kei sia a masabel le a khakbel, a kipatna le a tawpna ka hi hi,” ci hi.

¹⁴Nuntakna thingnga neak thei natu le khuapi sungah kongkha kantan in pai thei natu in a puantual a sawp thiangte in mihing hamphate ahi uh hi.

¹⁵Ahihang lampialte, bum le ai toaite, a paktatte, mihing thatte, milim biate, leilot kampauna le ngamtatna taw ngual theam theite khuapi puasias ah om uh hi.



¹⁶“Keima Jesus in, hi thute pawlpi sung note tungah a thangsak tu in ka vantung lalang kong paisak zo hi. Kei sia David ii zung le a suan khi hi; keima in nikonghong aksi taang sia ka hi hi,” ci hi.

¹⁷Thaa le a Mo thak in, “Hong pai tan!” hong ci hi. A zate theampo zongh in, “Hong pai tan!” ci si hen. A dangko theampo hong pai tavun; nuntakna tui a dei peuma in, tua nuntakna tui letsong in saang tavun.

Thukhupna

¹⁸Keima John in, hi kamsaanna laibu sungah a kikhumte a sim peuma tungah kidop natu thu ka pia hi: Khat pawpo in a belap le, Pathian in hi laibu sungah a kison ama daante le tuasiatte belap tu hi.

¹⁹Tuaciangin khat pawpo in hi laibu sungah kamsaanna kammalte a dok le, Pathian in ama sia hi laibu sungah a kison nuntakna thingkung nga le Khuapi Thiangtho pan a nga tu tel teng taansak tu hi.

²⁰Hi thute theampo tetti a pang pa in, “Hi hi, maan hi! Kong pai pal tu hi!” ci hi. Na ci bangma hi taken. Topa Jesus awng, hong pai tan!

²¹Topa Jesus thuthiamna sia a kuama po tungah hong om taken



Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2022, Vitória/ES - Brasil